

# Holy Bible

*Aionian* Edition®

Библия церковно-славянском  
Church Slavonic Elizabeth Bible

[AionianBible.org](http://AionianBible.org)

The world's first Holy Bible untranslation

100% free to copy and print

also known as "The Purple Bible"

*Holy Bible Aionian Edition* ®  
Библия церковно-славянском  
Church Slavonic Elizabeth Bible

Creative Commons Attribution 4.0 International, 2018-2024

Source text: Crosswire.org

Source version: 8/10/2022

Source copyright: Public Domain

RusBible.ru with modern spelling, 1757

Formatted by Speedata Publisher 4.19.20 (Pro) on 9/2/2024

100% Free to Copy and Print

TOR Anonymously

<https://AionianBible.org>

Published by Nainoia Inc

<https://Nainoia-Inc.signedon.net>

We pray for a modern Creative Commons translation in every language  
Translator resources at <https://AionianBible.org/Third-Party-Publisher-Resources>

Report content and format concerns to Nainoia Inc

Volunteer help is welcome and appreciated!

*Celebrate Jesus Christ's victory of grace!*





# Preface

церковно-славянском at [AionianBible.org/Preface](http://AionianBible.org/Preface)

The *Holy Bible Aionian Edition* ® is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aīdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aīdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Take the time to understand these eleven words. The original translation is unaltered and a note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at [eBible.org](http://eBible.org), [Crosswire.org](http://Crosswire.org), [unbound.Biola.edu](http://unbound.Biola.edu), [Bible4u.net](http://Bible4u.net), and [NHEB.net](http://NHEB.net). The Aionian Bible is copyrighted with [creativecommons.org/licenses/by/4.0](http://creativecommons.org/licenses/by/4.0), allowing 100% freedom to copy and print, if respecting source copyrights. Check the Reader's Guide and read online at [AionianBible.org](http://AionianBible.org), with Android, and TOR network. Why purple? King Jesus' Word is royal... and purple is the color of royalty!

# History

церковно-славянском at [AionianBible.org/History](https://AionianBible.org/History)

- 04/15/85 - Aionian Bible conceived as B. and J. pray.
- 12/18/13 - Aionian Bible announced as J. and J. pray.
- 06/21/15 - Aionian Bible birthed as G. and J. pray.
- 01/11/16 - AionianBible.org domain registered.
- 06/21/16 - 30 translations available in 12 languages.
- 12/07/16 - Nainoia Inc established as non-profit corporation.
- 01/01/17 - Creative Commons Attribution No Derivatives 4.0 license added.
- 01/16/17 - Aionian Bible Google Play Store App published.
- 07/01/17 - 'The Purple Bible' nickname begins.
- 07/30/17 - 42 translations now available in 22 languages.
- 02/01/18 - Holy Bible Aionian Edition® trademark registered.
- 03/06/18 - Aionian Bibles available in print at Amazon.com.
- 10/20/18 - 70 translations now available in 33 languages.
- 11/17/18 - 104 translations now available in 57 languages.
- 03/24/19 - 135 translations now available in 67 languages.
- 10/28/19 - Aionian Bible nursed as J. and J. pray.
- 10/31/19 - 174 translations now available in 74 languages.
- 02/22/20 - Aionian Bibles available in print at Lulu.com.
- 05/25/20 - Illustrations by Gustave Doré, La Grande Bible de Tours, Felix Just.
- 08/29/20 - Aionian Bibles now available in ePub format.
- 12/01/20 - Right to left and Hindic languages now available in PDF format.
- 03/31/21 - 214 translations now available in 99 languages.
- 11/17/21 - Aionian Bible Branded Leather Bible Covers now available.
- 12/20/21 - Social media presence on Facebook, Twitter, LinkedIn, YouTube, etc.
- 01/01/22 - 216 translations now available in 99 languages.
- 01/09/22 - StudyPack resources for Bible translation study.
- 02/14/22 - Strong's Concordance from Open Scriptures and STEP Bible.
- 02/14/23 - Aionian Bible published on the TOR Network.
- 12/04/23 - Eleēsē added to the Aionian Glossary.
- 02/04/24 - 352 translations now available in 142 languages.
- 05/01/24 - 370 translations now available in 164 languages.
- 08/05/24 - 377 translations now available in 166 languages.
- 08/18/24 - Creative Commons Attribution 4.0 International, if source allows.

# Table of Contents

## OLD TESTAMENT

|                                  |      |
|----------------------------------|------|
| Бытие .....                      | 11   |
| Исход .....                      | 112  |
| Левит .....                      | 193  |
| Числа .....                      | 254  |
| Второзаконие .....               | 338  |
| Книга Иисуса Навина .....        | 412  |
| Книга Судей израилевых .....     | 463  |
| Книга Руфи .....                 | 513  |
| Первая книга Царств .....        | 520  |
| Вторая книга Царств .....        | 588  |
| Третья книга Царств .....        | 644  |
| Четвертая книга Царств .....     | 710  |
| Первая книга Паралипоменон ..... | 771  |
| Вторая книга Паралипоменон ..... | 828  |
| Книга Ездры .....                | 897  |
| Книга Неемии .....               | 917  |
| Книга Есфири .....               | 945  |
| Книга Иова .....                 | 959  |
| Псалтирь .....                   | 1008 |
| Притчи Соломона .....            | 1124 |
| Книга Екклезиаста .....          | 1170 |
| Песнь песней Соломона .....      | 1185 |
| Книга пророка Исаии .....        | 1193 |
| Книга пророка Иеремии .....      | 1286 |
| Плач Иеремии .....               | 1394 |
| Книга пророка Иезекииля .....    | 1404 |
| Книга пророка Даниила .....      | 1504 |
| Книга пророка Осии .....         | 1534 |
| Книга пророка Иоила .....        | 1548 |
| Книга пророка Амоса .....        | 1554 |
| Книга пророка Авдия .....        | 1565 |
| Книга пророка Ионы .....         | 1567 |
| Книга пророка Михея .....        | 1571 |
| Книга пророка Наума .....        | 1579 |
| Книга пророка Аввакума .....     | 1583 |
| Книга пророка Софонии .....      | 1587 |
| Книга пророка Аггея .....        | 1592 |
| Книга пророка Захарии .....      | 1596 |
| Книга пророка Малахии .....      | 1613 |

## NEW TESTAMENT


|  |      |
|--|------|
| От Матфея святое благовествование .... | 1621 |
| От Марка святое благовествование ..... | 1683 |
| От Луки святое благовествование .....  | 1722 |
| От Иоанна святое благовествование .... | 1788 |
| Деяния святых апостолов .....          | 1838 |
| Послание к Римлянам .....              | 1903 |
| Первое послание к Коринфянам .....     | 1928 |
| Второе послание к Коринфянам .....     | 1952 |
| Послание к Галатам .....               | 1969 |
| Послание к Ефессянам .....             | 1978 |
| Послание к Филиппийцам .....           | 1987 |
| Послание к Колоссянам .....            | 1993 |
| Первое послание к Фессалоникийцам ...  | 1999 |
| Второе послание к Фессалоникийцам ...  | 2005 |
| Первое послание к Тимофею .....        | 2008 |
| Второе послание к Тимофею .....        | 2015 |
| Послание к Титу .....                  | 2020 |
| Послание к Филимону .....              | 2023 |
| Послание к Евреям .....                | 2025 |
| Послание Иакова .....                  | 2044 |
| Первое послание Петра .....            | 2051 |
| Второе послание Петра .....            | 2058 |
| Первое послание Иоанна .....           | 2063 |
| Второе послание Иоанна .....           | 2070 |
| Третье послание Иоанна .....           | 2071 |
| Послание Иуды .....                    | 2072 |
| Откровение ап. Иоанна Богослова .....  | 2074 |

**APPENDIX**  
Reader's Guide  
Glossary  
Maps  
Destiny  
Illustrations, Doré





# OLD TESTAMENT



*И изрину Адама, и всели его прямо рая Сладости: и пристави Херувима,  
и пламенное оружие обращаемое, хранити путь древа жизни.*

Бытие 3:24

# Бытие

**1** В начале сотвори Бог небо и землю. **2** Земля же бе невидима и неустроена, и тма верху бездны, и Дух Божий ношашеся верху воды. **3** И рече Бог: да будет свет. И бысть свет. **4** И виде Бог свет, яко добро, и разлучи Бог между светом и между тмою. **5** И нарече Бог свет день, а тму нарече ночь. И бысть вечер, и бысть утро, день един. **6** И рече Бог: да будет твердь посреде воды, и да будет разлучающи посреде воды и воды. И бысть тако. **7** И сотвори Бог твердь, и разлучи Бог между водою, яже бе под твердию, и между водою, яже бе над твердию. **8** И нарече Бог твердь небо. И виде Бог, яко добро. И бысть вечер, и бысть утро, день второй. **9** И рече Бог: да соберется вода, яже под небесем, в собрание едино, и да явится суша. И бысть тако. И собрася вода, яже под небесем, в собрания своя, и явися суша. **10** И нарече Бог сушу землю, и собрания вод нарече моря. И виде Бог, яко добро. **11** И рече Бог: да прорастит земля былие травное, сеющее семя по роду и по подобию, и древо плодовитое творящее плод, емуже семя его в нем, по роду на земли. И бысть тако. **12** И изнесе земля былие травное, сеющее семя по роду и по подобию, и древо плодовитое творящее плод, емуже семя его в нем, по роду на земли. И виде Бог, яко добро. **13** И бысть вечер, и бысть утро, день третий. **14** И рече Бог: да будут светила на тверди небесней, освещати землю и разлучати между днем и между ночью: и да будут в знамения и во времена, и во дни и в лета, **15** и да будут в просвещение на тверди небесней, яко светити по земли. И бысть тако. **16** И сотвори Бог два светила великая: светило великое в начала дне, и светило

меншее в начала ночи, и звезды: 17 и положи я Бог на тверди небесней, яко светити на землю, 18 и владети днем и ночью, и разлучати между светом и между тмою. И виде Бог, яко добро. 19 И бысть вечер, и бысть утро, день четвертый. 20 И рече Бог: да изведут воды гады душ живых, и птицы летающыя по земли, по тверди небесней. И бысть тако. 21 И сотвори Бог киты великия, и всяку душу животных гадов, яже изведоша воды по родом их, и всяку птицу пернату по роду. И виде Бог, яко добра. 22 И благослови я Бог, глаголя: раститесь и множитесь, и наполните воды, яже в морях, и птицы да умножатся на земли. 23 И бысть вечер, и бысть утро, день пятый. 24 И рече Бог: да изведет земля душу живу по роду, четвероногая и гады, и звери земли по роду. И бысть тако. 25 И сотвори Бог звери земли по роду, и скоты по роду их, и вся гады земли по роду их. И виде Бог, яко добра. 26 И рече Бог: сотворим человека по образу Нашему и по подобию, и да обладает рыбами морскими, и птицами небесными, (и зверми) и скотами, и всею землею, и всеми гады пресмыкающимися по земли. 27 И сотвори Бог человека, по образу Божию сотвори его: мужа и жену сотвори их. 28 И благослови их Бог, глаголя: раститесь и множитесь, и наполните землю, и господствуйте ею, и обладайте рыбами морскими, (и зверми) и птицами небесными, и всеми скотами, и всею землею, и всеми гадами пресмыкающимися по земли. 29 И рече Бог: се, дах вам всякую траву семенную сеющую семя, еже есть верху земли всея: и всякое древо, еже имать в себе плод семене семенного, вам будет в снесь: 30 и всем зверем земным, и всем птицам небесным, и всякому гаду пресмыкающемуся по земли, иже имать в себе душу живота,



и всяку траву зелену в снєдь. И бысть тако. 31 И виде Бог вся, елика сотвори: и се добра зело. И бысть вечер, и бысть утро, день шестый.

**2** И совершишася небо и земля, и все украшение их. 2 И соверши Бог в день шестый дела Своя, яже сотвори: и почи в день седмый от всех дел Своих, яже сотвори. 3 И благослови Бог день седмый, и освяти его: яко в той почи от всех дел Своих, яже начат Бог творити. 4 Сия книга бытия небесе и земли, егда бысть, в оньже день сотвори Господь Бог небо и землю, 5 и всякий злак селный, прежде даже быти на земли, и всякую траву селную, прежде даже прозябнути: не бо одожди Господь Бог на землю, и человек не бяше делати ю: 6 источник же исхождаше из земли и напаяше все лице земли. 7 И созда Бог человека, персть (взем) от земли, и вдуну в лице его дыхание жизни: и бысть человек в душу живу. 8 И насади Господь Бог рай во Едеме на востоцех, и введе тамо человека, егоже созда. 9 И прозябе Бог еще от земли всякое древо красное в видение и доброе в снєдь: и древо жизни посреде рая, и древо еже ведети разуметелное добраго и лукаваго. 10 Река же исходит из Едема напаяти рай: оттуду разлучается в четыре начала. 11 Имя единой Фисон: сия окружающая всю землю Евилатскую: тамо убо есть злато. 12 Злато же онья земли доброе: и тамо есть анфракс и камень зеленый. 13 И имя реце вторей Геон: сия окружающая всю землю Ефиопскую. 14 И река третья Тигр: сия проходящая прямо Ассириом. Река же четвертая Евфрат. 15 И взя Господь Бог человека, егоже созда, и введе его в рай Сладости, делати его и хранити. 16 И заповеда Господь Бог Адаму, глаголя: от всякаго древа, еже в раи, снєдию снеси:

17 от древа же, еже разумети доброе и лукавое, не снете от него: а в оньже аще день снете от него, смертью умрете. 18 И рече Господь Бог: не добро быти человеку единому: сотворим ему помощника по нему. 19 И созда Бог еще от земли вся звери селныя и вся птицы небесныя, и приведе я ко Адаму видети, что наречет я: и всяко еже аще нарече Адам душу живу, сие имя ему. 20 И нарече Адам имена всем скотом, и всем птицам небесным, и всем зверем земным. Адаму же не обретеса помощник подобный ему. 21 И наложи Бог изступление на Адама, и успе: и взя едино от ребр его, и исполни плотию вместо его. 22 И созда Господь Бог ребро, еже взя от Адама, в жену, и приведе ю ко Адаму. 23 И рече Адам: се, ныне кость от костей моих и плоть от плоти моя: сия наречется жена, яко от мужа своего взята бысть сия. 24 Сего ради оставит человек отца своего и мать и прилепится к жене своей, и будета два в плоть едину. 25 И беста оба нага, Адам же и жена его, и не стыдятся.

**3** Змий же бе мудрейший всех зверей сущих на земли, ихже сотвори Господь Бог. И рече змий жене: что яко рече Бог: да не ясте от всякаго древа райскаго? 2 И рече жена змию: от всякаго древа райскаго ясти будем: 3 от плода же древа, еже есть посреде рая, рече Бог, да не ясте от него, ниже прикоснетеса ему, да не умрете. 4 И рече змий жене: не смертью умрете: 5 ведяше бо Бог, яко в оньже аще день снете от него, отверзутся очи ваши, и будете яко бози, ведяще доброе и лукавое. 6 И виде жена, яко добро древо в снеть и яко угодно очима видети и красно есть, еже разумети: и взявши от плода его яде, и даде мужу своему с собою, и ядоста. 7 И отверзошася очи обема, и разумеша,

яко нази беша: и сшиста листвие смоковное, и сотвори ста себе препоясания. 8 И услышаста глас Господа Бога ходяща в раи по полудни: и скрыстася Адам же и жена его от лица Господа Бога посреде древа райскаго. 9 И призва Господь Бог Адама и рече ему: Адаме, где еси? 10 И рече Ему: глас слышах Тебе ходяща в раи, и убояхся, яко наг есмь, и скрыхся. 11 И рече ему Бог: кто возвести тебе, яко наг еси, аще не бы от древа, егоже заповедах тебе сего единого не ясти, от него ял еси? 12 И рече Адам: жена, юже дал еси со мною, та ми даде от древа, и ядох. 13 И рече Господь Бог жене: что сие сотворила еси? И рече жена: змий прельсти мя, и ядох. 14 И рече Господь Бог змию: яко сотворил еси сие, проклят ты от всех скотов и от всех зверей земных: на персех твоих и чреве ходити будеши, и землю снеси вся дни живота твоего: 15 и вражду положу между тобою и между женою, и между семенем твоим и между семенем той: той твою блюсти будет главу, и ты блюсти будеши его пяту. 16 И жене рече: умножая умножу печали твоя и воздыхания твоя: в болезнех родиши чада, и к мужу твоему обращение твое, и той тобою обладати будет. 17 И Адаму рече: яко послушал еси гласа жены твоея и ял еси от древа, егоже заповедах тебе сего единого не ясти, от него ял еси: проклята земля в делех твоих, в печалех снеси тую вся дни живота твоего: 18 терния и волчцы возрастит тебе, и снеси траву селную: 19 в поте лица твоего снеси хлеб твой, дондеже возвратишия в землю, от неяже взят еси: яко земля еси, и в землю отидеши. 20 И нарече Адам имя жене своей Жизнь, яко та мати всех живущих. 21 И сотвори Господь Бог Адаму и жене его ризы кожаны, и облече их. 22 И рече Бог: се, Адам бысть яко един

от Нас, еже разумети доброе и лукавое: и ныне да не когда прострет руку свою и возмет от древа жизни и снесет, и жив будет во век. 23 И изгна его Господь Бог из рая Сладости делати землю, от неяже взят бысть. 24 И изрину Адама, и всели его прямо рая Сладости: и пристави Херувима, и пламенное оружие обращаемое, хранити путь древа жизни.

**4** Адам же позна Еву жену свою, и заченши роди Каина и рече: стяжах человека Богом. 2 И приложи родити брата его, Авеля. И бысть Авель пастырь овец, Каин же бе делаяй землю. 3 И бысть по днех, принесе Каин от плодов земли жертву Богу: 4 и Авель принесе и той от первородных овец своих и от туков их. И призре Бог на Авеля и на дары его: 5 на Каина же и на жертвы его не внят. И опечалися Каин зело, и испаде лице его. 6 И рече Господь Бог Каину: вскую прискорбен был еси? И вскую испаде лице твое? 7 Еда аще право принесл еси, право же не разделил еси, не согрешил ли еси? Умолкни: к тебе обращение его, и ты тем обладаеши. 8 И рече Каин ко Авелю брату своему: пойдем на поле. И бысть внегда быти им на поли, воста Каин на Авеля брата своего и уби его. 9 И рече Господь Бог ко Каину: где есть Авель брат твой? И рече: не вем: еда страж брату моему есмь аз? 10 И рече Господь: что сотворил еси сие? Глас крове брата твоего вопиет ко Мне от земли: 11 и ныне проклят ты на земли, яже разверзе уста своя прияти кровь брата твоего от руки твоея: 12 егда делаеши землю, и не приложит силы своя дати тебе: стена и трясьйся будеши на земли. 13 И рече Каин ко Господу Богу: вящшая вина моя, еже оставитися ми: 14 аще изгониши мя днесь от лица земли, и от лица Твоего скрююся, и буду



стения и трясыйся на земли, и будет, всяк обретаяй мя убьет мя. 15 И рече ему Господь Бог: не тако: всяк убивый Каина седмижды отмстится. И положи Господь Бог знамение на Каине, еже не убити его всякому обретающему его. 16 И изыде Каин от лица Божия и вселися в землю Наид, прямо Едему. 17 И позна Каин жену свою, и заченши роди Еноха. И бе зиждяй град, и именована град во имя сына своего Енох. 18 Родися же Еноху Гаидад: и Гаидад роди Малелеила: и Малелеил роди Мафусала: Мафусал же роди Ламеха. 19 И взя себе Ламех две жены: имя единей Ада и имя второй Селла. 20 И роди Ада Иовила: сей бяше отец живущих в селениих скотопитателей. 21 И имя брату его Иувал: сей бяше показавый певницу и гусли. 22 Селла же и тая роди Фовела: сей бяше млатобиец, ковачь меди и железа: сестра же Фовелова Ноема. 23 Рече же Ламех своим женам: Ада и Селла, услышите глас мой, жены Ламеховы, внушите моя словеса: яко мужа убих в язву мне и юношу в струп мне: 24 яко седмицею отмстися от Каина, от Ламеха же седмьдесят седмицею. 25 Позна же Адам Еву жену свою: и заченши роди сына, и именована имя ему Сиф, глаголющи: воскреси бо ми Бог семя другое, вместо Авеля, егоже уби Каин. 26 И Сифу бысть сын: именована же имя ему Енос: сей упова призывати имя Господа Бога.

**5** Сия книга бытия человека, в оньже день сотвори Бог Адама, по образу Божию сотвори его, 2 мужа и жену сотвори их и благослови их: и нарече имя ему Адам, в оньже день сотвори их. 3 Поживе же Адам лет двесте тридесать и роди сына по виду своему и по образу своему, и нарече имя ему Сиф. 4 Быша же дние Адамовы, яже поживе, по еже родити

ему Сифа, лет семь сот, и роди сыны и дщери. 5 И быша  
все дние Адамовы, яже поживе, лет девять сот и тридесять:  
и умре. 6 Поживе же Сиф лет двесте пять и роди Еноса. 7  
И поживе Сиф, по еже родити ему Еноса, лет семь сот и  
семь, и роди сыны и дщери. 8 И быша все дние Сифовы  
лет девять сот и дванадесять: и умре. 9 И поживе Енос лет  
сто девятердесят и роди Каинана. 10 И поживе Енос, по еже  
родити ему Каинана, лет семь сот и пятнадцат, и роди  
сыны и дщери. 11 И быша все дние Еносовы лет девять сот  
и пять: и умре. 12 И поживе Каинан лет сто семьдесят и  
роди Малелеила. 13 И поживе Каинан, по еже родити ему  
Малелеила, лет семь сот и четыредесят, и роди сыны и  
дщери. 14 И быша все дние Каинановы лет девять сот и  
десят: и умре. 15 И поживе Малелеил лет сто шестьдесят  
пять и роди Иареда. 16 И поживе Малелеил, по еже родити  
ему Иареда, лет семь сот и тридесят, и роди сыны и  
дщери. 17 И быша все дние Малелеиловы лет осмь сот  
и девятдесят пять: и умре. 18 И поживе Иаред лет сто  
шестьдесят два и роди Еноха. 19 И поживе Иаред, по еже  
родити ему Еноха, лет осмь сот, и роди сыны и дщери. 20 И  
быша все дние Иаредовы лет девять сот и шестьдесят два:  
и умре. 21 И поживе Енох лет сто шестьдесят пять и роди  
Мафусала. 22 Угоди же Енох Богу, и поживе Енох, по еже  
родити ему Мафусала, лет двесте, и роди сыны и дщери. 23  
И быша все дние Еноховы лет триста шестьдесят пять. 24 И  
угоди Енох Богу, и не обреташеся, зане преложи его Бог. 25  
И поживе Мафусал лет сто осмьдесят семь и роди Ламеха.  
26 И поживе Мафусал, по еже родити ему Ламеха, лет семь  
сот осмьдесят два, и роди сыны и дщери. 27 И быша все

дни Мафусаловы, яже поживе, лет девять сот и шестьдесят девять: и умре. 28 И поживе Ламех лет сто осмьдесят осмь и роди сына, 29 и нарече имя ему Ное, глаголя: сей упокоит нас от дел наших и от печали рук наших, и от земли, юже прокля Господь Бог. 30 И поживе Ламех, по еже родити ему Ноа, лет пять сот и шестьдесят пять, и роди сыны и дщери. 31 И быша вси дние Ламеховы лет седмь сот и пятьдесят три: и умре. 32 И бе Ное лет пяти сот, и роди сыны три, Сима, Хама, Иафефа.

**6** И бысть егда начаша человецы мнози бивати на земли, и дщери родишася им: 2 видевше же сынове Божии дщери человеци, яко добры суть, пояша себе жены от всех, яже избраша. 3 И рече Господь Бог: не имать Дух Мой пребывати в человецех сих во век, зане суть плоть: будут же дние их лет сто двадесять. 4 Исполни же бяху на земли во дни оны: и потом, егда вхождаху сынове Божии к дщерем человеческим, и раждаху себе: тии бяху исполни, иже от века, человецы именитии. 5 Видев же Господь Бог, яко умножишася злобы человеков на земли: и всяк помышляет в сердцы своем прилежно на злая во вся дни: 6 и помысли Бог, яко сотвори человека на земли, и размысли. 7 И рече Бог: потреблю человека, егоже сотворих, от лица земли, от человека даже до скота, и от гад даже до птиц небесных: зане размыслих, яко сотворих я. 8 Ное же обрете благодать пред Господем Богом. 9 Сия же бытия Ноева: Ное человек праведен совершен сый в роде своем, Богу угоди Ное. 10 Роди же Ное три сыны, Сима, Хама, Иафефа. 11 Растлеса же земля пред Богом, и наполнися земля неправды. 12 И виде Господь Бог землю, и бе растленна: яко растли всяка

плоть путь свой на земли. **13** И рече Господь Бог Ною: время всякаго человека прииде пред Мя, яко исполнися земля неправды от них: и се, Аз погублю их и землю. **14** Сотвори убо себе ковчег от древ (негниющих) четвероугольных: гнезда сотвориши в ковчезе, и посмолиши его внутрьуду и внеуду смолою. **15** И тако сотвориши ковчег: трех сот лактей долготы ковчега, и пятидесяти лактей широта, и тридесяти лактей высота его. **16** Собирая сводом сотвориши ковчег, и в локоть свершиши его свыше: дверь же ковчега сотвориши от страны: обиталища двокровна и трекровна сотвориши в нем. **17** Аз же, се, наведу потоп, воду на землю, погубити всяку плоть, в нейже есть дух жизни под небесем: и елика суть на земли, скончаются. **18** И поставлю завет Мой с тобою: внидеши же в ковчег ты и сынове твои, и жена твоя и жены сынов твоих с тобою. **19** И от всех скотов и от всех гад, и от всех зверей, и от всякия плоти, два два от всех введеша в ковчег, да питаеша с собою: мужеский пол и женский будут. **20** От всех птиц пернатых по роду, и от всех скотов по роду, и от всех гадов ползающих по земли по роду их, два два от всех внидут к тебе, питатися с тобою, мужеский пол и женский. **21** Ты же возми себе от всех брашен, яже имате ясти, и собереша к себе, и будут тебе и оным брашно. **22** И сотвори Ное вся елика заповеда ему Господь Бог, тако сотвори.

**7** И рече Господь Бог к Ною: вниди ты и весь дом твой в ковчег, яко ты видех праведна предо Мною в роде сем: **2** от скотов же чистых введи к себе седьмь седьмь, мужеский пол и женский: от скотов же нечистых два два, мужеский пол и женский: **3** и от птиц небесных чистых седьмь седьмь, мужеский пол и женский: и от всех птиц нечистых две две,



мужеский пол и женский, препитати семя по всей земли: 4  
еще бо дний седмь, Аз наведу дождь на землю четыредесять  
дний и четыредесять нощей: и потреблю всякое востание,  
еже сотворих, от лица всея земли. 5 И сотвори Ное вся,  
елика заповеда ему Господь Бог. 6 Ное же бе лет шести сот,  
и потоп водный бысть на земли. 7 Вниде же Ное и сынове  
его, и жена его и жены сынов его с ним в ковчег, воды ради  
потопа. 8 И от птиц чистых и от птиц нечистых, и от скот  
чистых и от скот нечистых, (и от зверей, ) и от всех гадов  
пресмыкающихся по земли, 9 два два внидоша к Ною в  
ковчег, мужеский пол и женский, якоже заповеда (Господь)  
Бог Ною. 10 И бысть по седми днех, и вода потопная  
бысть на земли. 11 В шестьсотное лето в житии Ноеве,  
второго месяца, в двадесять седмый день месяца, в день  
той разверзошася вси источницы бездны, и хляби небесныя  
отверзошася: 12 и бысть дождь на землю четыредесять дний  
и четыредесять нощей. 13 В день той вниде Ное, Сим, Хам,  
Иаффеф, сынове Ноевы, и жена Ноева, и три жены сынов его  
с ним в ковчег. 14 И вси зверие земнии по роду, и вси скоти  
по роду, и всякий гад движущийся на земли по роду, и всякая  
птица пернатая по роду своему, 15 внидоша к Ною в ковчег  
два два, мужеский пол и женский, от всякия плоти, в нейже  
есть дух животный: 16 и входящая мужеский пол и женский  
от всякия плоти, внидоша к Ною в ковчег, якоже заповеда  
Господь Бог Ною: и затвори Господь Бог ковчег отвне его. 17  
И бысть потоп четыредесять дний и четыредесять нощей  
на земли, и умножися вода и взя ковчег, и возвысися от  
земли: 18 и возмогаше вода, и умножашеся зело на земли, и  
ношашеся ковчег верху воды. 19 Вода же возмогаше зело

зело на земли: и покры вся горы високия, яже бяху под небесем: 20 пятнадцать лактей горе возвысися вода, и покры вся горы високия. 21 И умре всякая плоть движущаяся по земли птиц и скотов и зверей, и всякий гад движущийся на земли, и всякий человек, 22 и вся елика имут дыхание жизни, и все еже бе на суши умре. 23 И потребися всякое востание, еже бяше на лица всея земли, от человека даже до скота и гадов и птиц небесных, и потребишася от земли: и оста Ное един, и иже с ним в ковчезе. 24 И возвысися вода над землею дний сто пятьдесят.

**8** И помяну Бог Ноа, и вся звери, и вся скоты, и вся птицы, и вся гады пресмыкающыяся, елика беху с ним в ковчезе: и наведе Бог дух на землю, и преста вода. 2 И заключишася источницы бездны и хляби небесныя: и удержася дождь от небесе. 3 И вспять поиде вода идущая от земли: и умаляшеся вода по сте пятидесятих днех. 4 И седе ковчег в месяц седмый, в двадесать седмый день месяца, на горах Араратских. 5 Вода же уходящи умаляшеся даже до десятаго месяца: и в десятый месяц, в первый день месяца явишася верси гор. 6 И бысть до четыредесятих днех отверзе Ное оконце ковчега, еже сотвори, 7 и посла врана (видети, аще уступила вода от лица земли): и изшед не возвратися, дондеже изсяче вода от земли. 8 И посла голубицу по нем видети, аще уступила вода от лица земли: 9 и не обретши голубица покоя ногама своима, возвратися к нему в ковчег, яко вода бяше по всему лицу всея земли: и простер руку свою, прият ю и внесе ю к себе в ковчег. 10 И премедлив еще седмь дний, паки посла голубицу из ковчега. 11 И возвратися к нему голубица к вечеру, и имеяше сучец

масличен с листвием во устех своих: и позна Ное, яко уступи вода от лица земли. 12 И премедлив еще семь дней других, паки посла голубицу, и не приложи возвратится к нему потом. 13 И бысть в первое и шестьсотное лето жития Ноева, в первый день первого месяца, изсяче вода от лица земли: и откры Ное покров ковчега, егоже сотвори, и виде, яко изсяче вода от лица земли. 14 В месяц же второй, в двадесять седмый день месяца изсье земля. 15 И рече Господь Бог Ноеви, глаголя: 16 изыди из ковчега ты и жена твоя, и сынове твои и жены сынов твоих с тобою: 17 и вся звери, елицы суть с тобою, и всяку плоть от птиц даже до скотов, и всяк гад движущийся по земли изведи с собою: и раститесь и множитесь на земли. 18 И изыде Ное и жена его, и сынове его и жены сынов его с ним, 19 и вси зверие, и вси скоти, и вся птицы и вси гади движущиися по роду своему на земли изыдоша из ковчега. 20 И созда Ное жертвенник Господеви: и взя от всех скотов чистых и от всех птиц чистых и вознесе во всесожжение на жертвенник. 21 И обоня Господь воню благоухания. И рече Господь Бог размыслив: не приложу ктому прокляти землю за дела человеческая, зане прилежит помышление человеку прилежно на злая от юности его: не приложу убо ктому поразити всякую плоть живущую, якоже сотворих: 22 во вся дни земли сеятва и жатва, зима и зной, лето и весна, день и ночь не престанут.

**9** И благослови Бог Ноа и сыны его и рече им: раститесь и множитесь, и наполните землю и обладайте ею: 2 и страх и трепет ваш будет на всех зверех земных (и на всех скотех земных, ) на всех птицах небесных и на всех движущихся по земли и на всех рыбах морских: в руке ваши вдах (я). 3 И

всякое движущееся, еже есть живо, вам будет в снедь: яко зелие травное дах вам все. 4 Точию мяса в крови души да не снесите. 5 Крови бо вашей, душ ваших, от руки всякаго зверя изыщу (ея): и от руки человека брата изыщу ея. 6 Проливаяй кровь человеку, в ея место его пролиется: яко во образ Божий сотвори х человека. 7 Вы же раститесь и множитесь, и наполните землю, и множитесь на ней. 8 И рече Бог Ноеви и сыном его с ним, глаголя: 9 се, Аз поставляю завет Мой вам и семени вашему по вас, 10 и всякой души живушей с вами от птиц и от скот и всем зверем земным, елика с вами (суть) от всех изшедших из ковчега: 11 и поставлю завет Мой с вами: и не умрет всяка плоть ктому от воды потопныя, и ктому не будет потоп водный, еже истлити всю землю. 12 И рече Господь Бог Ноеви: сие знамение завета, еже Аз даю между Мною и вами, и между всякою душею живою, яже есть с вами, в роды вечныя: 13 дугу Мою полагаю во облаце, и будет в знамение завета (вечнаго) между Мною и землею. 14 И будет егда наведу облаки на землю, явится дуга Моя во облаце: 15 и помяну завет Мой, иже есть между Мною и вами, и между всякою душею живушею во всякой плоти, и не будет ктому вода в потоп, яко потребити всяку плоть. 16 И будет дуга Моя во облаце: и узрю ю, еже помянути завет вечный между Мною и землею, и между всякою душею живушею во всякой плоти, яже есть на земли. 17 И рече Бог Ноеви: сие знамение завета, егоже положих между Мною и между всякою плотию, яже есть на земли. 18 Быша же сынове Ноевы изшедшии из ковчега, Сим, Хам, Иафет: Хам же быше отец Ханаань. 19 Трие сии суть сынове Ноевы: от сих разсеяшася по всей земли. 20 И начат Ное человек

делатель (быти) земли, и насади виноград: 21 и испи от вина, и уписа, и обнажися в дому своем. 22 И виде Хам отец Ханаань наготу отца своего, и изшед вон поведа обема братома своима. 23 И взявше сим и Иафеф ризу, возложиша (ю) на обе раме свои, и идоша вспять зряще, и покрыша наготу отца своего: и лице их вспять зря, и наготы отца своего не видеша. 24 Истрезвися же Ное от вина, и разуме елика сотвори ему сын его юнейший, 25 и рече: проклят (буди) Ханаан отрок: раб будет братиям своим. 26 И рече: благословен Господь Бог Симов: и будет Ханаан отрок раб ему: 27 да распространит Бог Иафефа, и да вселится в селениих Симовых, и да будет Ханаан раб ему. 28 Поживе же Ное по потопе лет триста пятьдесят. 29 И быша вси дние Ноевы лет девять сот пятьдесят: и умре.

**10** Сия же (суть) бытия сынов Ноевых, Сима, Хама, Иафефа. И родишася им сынове по потопе. 2 Сынове Иафефовы: Гамер и Магог, и Мадай и Иован, и Елиса и Фовел, и Мосох и Фирас. 3 Сынове же Гамеровы: Асханас и Рифаф и Форгама. 4 Сынове же Иовани: Елиса и Фарсис, Китийстии и Родийстии. 5 От сих разделишася острови языков (всех) в земли их: кийждо по языку в племенех своих и в народех своих. 6 Сынове же Хамовы: Хус и Месраин, Фуд и Ханаан. 7 Сынове Хусовы: Сава и Евила, и Савафа и Регма, и Савафака. Сынове же Регмановы: Сава и Дадан. 8 Хус же роди Неврода: сей начат быти исполин на земли: 9 сей бе исполин ловец пред Господем Богом: сего ради рекут: яко Неврод исполин ловец пред Господем. 10 И бысть начало царства его Вавилон и Орех, и Архад и Халанни на земли Сеннаар. 11 От земли тоя изыде Ассур: и созда Ниневию,

и Роовоф град, и Халах. 12 И Дасем между Ниневиєю и между Халахом: сей есть град великий. 13 Месраин же роди Лудиима и Неффалима, и Енеметиима и Лавиима, 14 и Патросониима и Хасмониима, отнюдуже изыде Филистиим, и Гаффориима. 15 Ханаан же роди Сидона первенца (своего) и Хеттеа, 16 и Иевусеа и Аморреа, и Гергесеа 17 и Евеа, и Арукеа и Асенеа, 18 и Арадиа и Самарееа, и Амафию. И посем разсеяшася племена Хананейская: 19 и быша пределы Хананейстии от Сидона даже приити до Герара и Газы, идуще даже до Содомы и Гоморры, до Адамы и Севоима, даже до Даса. 20 Сии сынове Хамовы в племенех своих, по языком своим, в странах своих и в народех своих. 21 И Симу родися и тому, отцу всех сынов Еверовых, брату Иафефа старейшаго. 22 Сынове Симовы: Елам и Ассур, и Арфаксад и Луд, и Арам и Каинан. 23 И сынове Арамли: Ос и Ул, и Гатер и Мосох. 24 И Арфаксад роди Каинана, Каинан же роди Салу, Сала же роди Евера. 25 И родистася Еверу два сына: имя единому Фалек: во дни бо его разделися земля: и имя брату его Иектан. 26 Иектан же роди Елмодада и Салефа, и Сармофа и Иараха, 27 и Одорра и Евила и Декла, 28 и Евала и Авимаила и Совева, 29 и Уфира и Евила и Иовава: вси сии сынове Иектановы. 30 И бысть селение их от Маси даже приити до Сафира, горы восточныя. 31 Сии сынове Симовы, в племенех своих, по языком их, в странах их и в народех их. 32 Сия племена сынов Ноевых по родом их, по языком их: от сих разсеяшася острови языков на земли по потопе.

**11** И бе вся земля устне едины, и глас един всем. 2 И бысть внегда поити им от восток, обретоша поле в земли

Сеннаарстей и вселишася тамо. 3 И рече человек ближнему своему: приидите, сотворим плинфы и испечем их огнем. И бысть им плинфа в камень, и брение вместо мела. 4 И рекоша: приидите, созиждем себе град и столп, егоже верх будет даже до небесе: и сотворим себе имя, прежде неже разсеятися нам по лицу всея земли. 5 И сниде Господь видети град и столп, егоже созидаша сынове человечести. 6 И рече Господь: се, род един, и устне единые всех, и сие начаша творити: и ныне не оскудеют от них вся, елика аще восхотят творити. 7 Приидите, и сошедше смесим тамо язык их, да не услышат кийждо гласа ближняго (своего). 8 И разсея их оттуду Господь по лицу всея земли: и престаша зиждущи град и столп. 9 Сего ради наречеша имя его Смешение, яко тамо смеси Господь устна всея земли, и оттуду разсея их Господь по лицу всея земли. 10 И сия бытия Симова: и бяше Сим сын ста лет, егда роди Арфаксада, во второе лето по потопе: 11 и поживе Сим, повнегда родити ему Арфаксада, лет пять сот и роди сыны и дщери: и умре. 12 И поживе Арфаксад лет сто тридесять пять и роди Каинана: 13 и поживе Арфаксад, повнегда родити ему Каинана, лет триста тридесять и роди сыны и дщери: и умре. И поживе Каинан лет сто тридесять и роди Салу: и поживе Каинан, повнегда родити ему Салу, лет триста тридесять и роди сыны и дщери: и умре. 14 И поживе Сала лет сто тридесять и роди Евера: 15 и поживе Сала, повнегда родити ему Евера, лет триста тридесять и роди сыны и дщери: и умре. 16 И поживе Евер лет сто тридесять четыре и роди Фалека: 17 и поживе Евер, повнегда родити ему Фалека, лет триста седмьдесят и роди сыны и дщери: и умре. 18 И поживе Фалек лет сто тридесять

и роди Рагава: 19 и поживе Фалек, повнегда родити ему Рагава, лет двесте девять и роди сыны и дщери: и умре. 20 И поживе Рагав лет сто тридесять два и роди Серуха: 21 и поживе Рагав, повнегда родити ему Серуха, лет двесте седьмь и роди сыны и дщери: и умре. 22 И поживе Серух лет сто тридесять и роди Нахора: 23 и поживе Серух, повнегда родити ему Нахора, лет двесте и роди сыны и дщери: и умре. 24 И поживе Нахор лет седьмьдесят девять и роди Фарру: 25 и поживе Нахор, повнегда родити ему Фарру, лет сто двадесять девять и роди сыны и дщери: и умре. 26 И поживе Фарра лет седьмьдесят и роди Аврама и Нахора и Аррана. 27 Сия же бытия Фарры: Фарра роди Аврама и Нахора и Аррана. Арран же роди Лота: 28 и умре Арран пред Фаррою отцем своим в земли, в нейже родися, в стране Халдейстей. 29 И пояста Аврам и Нахор себе жены: и имя жене Аврамли Сара, и имя жене Нахорове Мельха, дщи Арраня: сей есть отец Мельхин и отец Есхин. 30 Бяше же Сара неплоды и не раждаше детей. 31 И поят Фарра Аврама сына своего и Лота сына Арраня, сына сына своего, и Сару сноху свою, жену Аврама сына своего: и изведе я из земли Халдейския ити на землю Ханаанску: и приидоша даже до Харрана и вселишася тамо. 32 Быша же вси дние Фаррины в земли Харрани лет двесте пять: и умре Фарра в Харране.

**12** И рече Господь Авраму: изыди от земли твоя, и от рода твоего, и от дому отца твоего, и иди в землю, юже ти покажу: 2 и сотворю тя в язык велий, и благословлю тя, и возвеличу имя твое, и будеши благословен: 3 и благословлю благословящыя тя, и кленушыя тя проклену: и благословятся о тебе вся племена земная. 4 И иде Аврам, якоже глагола ему



Господь, и идяше с ним Лот: Аврам же бе лет седмидесяти пяти, егда изыде от (земли) Харран. 5 И поят Аврам Сару жену свою, и Лота сына брата своего, и вся имения своя, елика стяжаша, и всякую душу, юже стяжаша в Харране: и изыдоша поити в землю Ханааню. 6 И пройде Аврам землю в долготу ея даже до места Сихем, до дуба Высокаго: Хананеи же тогда живяху на земли (той). 7 И явися Господь Авраму и рече ему: семени твоему дам землю сию. И созда тамо Аврам жертвенник Господу явльшемуся ему. 8 И отступи оттуду в гору на восток (лицем) прямо Вефилю, и постави тамо куцу свою в Вефили при мори, и Агге к востоком: и созда тамо жертвенник Господу, и призва во имя Господа (явльшася ему). 9 И воздвижеся Аврам, и шед ополчися в пустыни. 10 И бысть глад на земли: и сниде Аврам во Египет вселитися тамо, яко одоле глад на земли. 11 Бысть же егда приближися Аврам внити во Египет, рече Аврам Саре жене своей: вем аз, яко жена добролична еси: 12 будет убо егда увидят тя Египтяне, рекут, яко жена его есть сия: и убьют мя, тебе же снабдят: 13 рцы убо, яко сестра ему есмь, да добро мне будет тебе ради, и будет жива душа моя тебе ради. 14 Бысть же егда вниде Аврам во Египет, видевше Египтяне жену его, яко добра бяше зело, 15 и видеша ю князи фараони и похвалиша ю пред фараоном, и введоша ю в дом фараонов. 16 И Авраму добре бяше ея ради: и быша ему овцы и телцы и ослы, и рабы и рабыни, и мски и велблуды. 17 И мучи Господь казньми великими и лютыми фараона и дом его Сары ради жены Аврамли. 18 Призвав же фараон Аврама, рече ему: что сие сотворил еси мне, яко не поведал ми еси, яко жена твоя есть? 19 Вскую рекл еси,

яко сестра ми есть? И поях ю себе в жену. И ныне се, жена твоя пред тобою: поемь ю отиди. 20 И заповеда фараон мужем о Авраме, проводити его и жену его, и вся, елика быша его, и Лота с ним.

**13** Изыде же Аврам от Египта сам и жена его, и вся, елика его, и Лот с ним в пустыню. 2 Аврам же бяше богат зело скоты и серебром и златом. 3 И иде отнюдуже прииде, в пустыню до Вефила, до места, идеже бе ему куща первее, между Вефилем и между Агге, 4 на место жертвенника, идеже сотвори его первее: и призва тамо Аврам имя Господне. 5 И Лоту ходящу со Аврамом бяху овцы, и волы, и кущы. 6 И не вмещаше их земля жити вкупе, яко имения их бяху многа: и не можаху жити вкупе. 7 И бысть распря между пастухи скота Аврамля и между пастухи скота Лотова: Хананеи же и Фerezее тогда живяху на земли (той). 8 Рече же Аврам Лоту: да не будет распря между мною и тобою, и между пастухи твоими и между пастухи моими, яко человецы братия мы есмы: 9 не се ли вся земля пред тобою есть? Отлучися ты от мене: аще ты на лево, аз на десно: аще же ты на десно, аз на лево. 10 И возвед Лот очи свои, виде всю окрестную страну Иорданскую, яко вся напаяема бяше водою, прежде неже низвратити Богу Содом и Гоморр, яко рай Божий, и яко земля Египетска, даже приити до Зогора: 11 и избра себе Лот всю окрестную страну Иорданскую, и отиде Лот от востока: и разлучистася кийждо от брата своего. 12 Аврам же вселися в земли Ханаанстей, Лот же вселися во граде окрестных стран и вселися в Содоме. 13 Человецы же сущии в Содоме зли и грешни пред Богом зело. 14 Бог же рече Авраму, повнегда разлучитися Лоту от него: воззри очима

твоима и виждь от места, идеже ты ныне еси, к северу, и ливе, и к востоку, и морю: **15** яко всю землю, юже ты видиши, тебе дам ю и семени твоему во веки, **16** и сотворю семя твое, яко песок земный: аще кто может исчести песок земный, то и семя твое изочтет: **17** востав проиди землю в долготу ея и в широту: яко тебе дам ю и семени твоему во век. **18** И отселится Аврам, пришед вселися у дуба Мамврийскаго, иже бяше в Хевроне: и созда ту жертвенник Господу.

**14** Бысть же в царство Амарфала царя Сеннаарска, и Ариох царь Елласарск, и Ходоллогомор царь Еламск, и Фаргал царь языческий **2** сотвориша рать с Валлою царем Содомским и с Варсою царем Гоморрским, и с Сеннааром царем Адамы и с симовором царем Севоимским, и с царем Валаки: сия есть Сигор. **3** Все сии совещахася на юдоль Сланую: сие есть море Сланое. **4** Дванадцать лет тии работаша Ходоллогомору: третияго же надесять лета отступиша. **5** И в четвертое надесять лето, прииде Ходоллогомор, и цари иже с ним, и изсекоша Исполинов сущих во Астарофе и в Карнаине, и языки крепки вкупе с ними, и омеов, иже в Сави граде, **6** и Хорреов, иже в горах Сиирских, даже до Теревинфа Фарана, иже есть в пустыни. **7** И возвратившеся приидоша ко источнику Судному, иже есть Кадис: и ссекоша вся князи Амаликовы, и Аморреов живущих во Асасанфамаре. **8** Изыде же царь Содомский и царь Гоморрский, и царь Адаманский и царь Севоимский, и царь Валаки, сия есть Сигор: и ополчишася противу их на брань во юдоли Сланой, **9** на Ходоллогомора царя Еламска и Фаргала царя языческа, и Амарфала царя Сеннаарска и Ариоха царя Елласарска: четыре цари на пять. **10** Юдоль же Сланая имяше кладязи

смоляныя. И побеже царь Содомский и царь Гоморрский, и падоша тамо: оставшиися же бежаша в горня (и одержаша я). 11 Взяха же вся конныя Содомския и Гоморския и вся брашна их, и отидоша. 12 Взяха же и Лота сына брата Аврамова и имение его, и отидоша: бе бо в Содомех живый. 13 Пришед же един от уцелевших, возвести Авраму пришелцу, иже живяше у дуба Мамврийскаго, Аморреа брата Есхоля и брата Авнаня, иже беша союзницы Аврамовы. 14 Слышав же Аврам, яко пленен бысть Лот братаничь его, сочте домочадцы своя триста и осмьнадесять, и погна вслед их даже до Дана. 15 И нападе на ня нощию сам и отроцы его (с ним): и порази их и гони их даже до Ховала, иже есть ошуюю Дамаска: 16 и возврати вся конныя Содомския, и Лота сына брата своего возврати, и вся имения его, и жены, и люди. 17 Изыде же царь Содомский в сретение ему, повнегда возвратитися ему от сеча Ходоллогоморскаго, и царей сущих с ним, в юдоль Савину: сие же бяше поле царево: 18 и Мелхиседек царь Салимский изнесе хлебы и вино: бяше же священник Бога Вышняго. 19 И благослови Аврама, и рече: благословен Аврам Богом Вышним, иже созда небо и землю: 20 и благословен Бог Вышний, Иже предаде враги твоя под руки тебе. И даде ему десятину Аврам от всего. 21 Рече же царь Содомский ко Авраму: даждь ми мужы, а кони возми себе. 22 Рече же Аврам к царю Содомску: воздвигну руку мою ко Господу Богу Вышнему, иже сотвори небо и землю: 23 аще от нити до ремня сапожнаго возму от всего твоего, да не речеши, яко аз обогатих Аврама: 24 кроме сих, яже снедоша отроцы, и части мужей, иже ходиша со мною, Есхол, Авнан, Мамврий: сии да возмут части (своя).

**15** По глаголах же сих, бысть слово Господне ко Авраму в видении нощию, глаголя: не бойся, Авраме: Аз защищаю тя, мзда твоя многа будет зело. **2** Глагола же Аврам: Владыко Господи, что ми даси? Аз же отпускаюся безчаден: сын же масек домочадицы моея, сей Дамаск Елиезер. **3** И рече Аврам: понеже мне не дал еси семене, домочадец же мой наследник мой будет. **4** И абие глас Господень бысть к нему, глаголющий: не будет сей наследник твой, но иже изыдет из тебе, той будет наследник тебе. **5** Изведе же его вон и рече ему: воззри на небо и изочти звезды, аще возможеши исчести я. И рече: тако будет семя твое. **6** И верова Аврам Богу, и вменися ему в правду. **7** Рече же к нему: Аз (есмы) Бог изведый тя от страны Халдейския, яко дати тебе землю сию наследствовати. **8** И рече: Владыко Господи, по чесому уразумею, яко наследити ю имам? **9** Рече же к нему: возми Мне юницу трилетну и козу трилетну и овна трилетна, и горлицу и голубя. **10** Взя же он вся сия и раздели я на полы, и положи я противолічна едина ко другому: птиц же не раздели. **11** Слетеша же птицы на телеса растесаная их: и седе близу их Аврам. **12** Заходящу же солнцу, ужас нападе на Аврама, и се, страх темен велий нападе на нь. **13** И речено бысть ко Авраму: ведый увеси, яко преселно будет семя твое в земли не своей, и поработят я, и озлобят я, и смирят я лет четыриста. **14** языку же, емуже поработают, сужду Аз: по сих же изыдут семо со имением многим: **15** ты же отидеши ко отцем твоим в мире, препитан в старости добрей: **16** в четвертем же роде возвратятся семо: не бо исполнишася греси Аморреов до ныне. **17** Егда же бысть солнце на западе, пламень бысть: и се, пещь дымящися, и

свещы огненны, яже проидоша между растесании сими. **18** В день той завета Господь Авраму завет, глаголя: семени твоему дам землю сию от реки Египетския даже до реки великия Евфрата: **19** Кенеов и Кенезеов и Кедмонеов, **20** и Хеттеов и Ферезеов и Рафаинов, **21** и Амореов и Хананеов, и Евеов и Гергесеов и Иевусеов.

**16** Сара же жена Аврамля не раждаше ему: бяше же ей раба Египтяныня, ейже имя Агарь. **2** Рече же Сара ко Авраму: се, заключи мя Господь, еже не раждати: вниди убо к рабе моей, да чада сотворю от нея. Послуша же Аврам гласа Сарина. **3** И поимши Сара жена Аврамля Агарь Египтяныню рабу свою, по десяти летех вселения Аврамля в земли Ханаани, даде ю в жену Авраму мужу своему. **4** И вниде ко Агари, и зачат: и виде, яко во чреве имать, и укорена бысть госпожа (ея) пред нею. **5** И рече Сара ко Авраму: обида ми от тебе: аз дах рабу мою в недра твое: она же видевши, яко во чреве имать, укорена бых пред нею: суди Бог между мною и тобою. **6** Рече же Аврам к Саре: се, раба твоя в руку твою: твори ей, якоже ти есть угодно. И озлоби ю Сара: и отбеже от лица ея. **7** И обрете ю Ангел Господень у источника воды в пустыни, у источника на пути Сур. **8** И рече ей Ангел Господень: Агарь, раба Сарина, откуда идещи и камо грядещи? И рече: от лица Сары госпожи моея аз бегу. **9** Рече же ей Ангел Господень: возвратися к госпоже своей и покорися под руку ея. **10** И рече ей Ангел Господень: умножая умножу семя твое, и не сочтется от множества. **11** И рече ей Ангел Господень: се, ты во чреве имаши и родиши сына, и наречеши имя ему Исмаил: яко услыша Господь смирение твое: **12** сей будет селный человек: руце его на

всех, и руки всех на него, и пред лицом всея братии своя вселится. 13 И призва Агарь имя Господа глаголющаго к ней: Ты Бог призревый на мя: яко рече: ибо предо мною видех явльшагося мне. 14 Сего ради прозва кладязь той: Кладязь, идеже предо мною видех: се между Кадисом и между Варадом. 15 И роди Агарь Авраму сына, и нарече Аврам имя сыну своему, егоже роди ему Агарь, Исмаил. 16 Аврам же бе лет осмидесяти шести, егда роди Агарь Авраму Исмаила.

**17** Бысть же Авраму лет девяност девять: и явися Господь Авраму и рече ему: Аз есмь Бог твой, благоугождай предо Мною и буди непорочен: 2 и положу завет Мой между Мною и между тобою: и умножу тя зело. 3 И паде Аврам на лица своем, и рече ему Бог, глаголя: 4 и Аз се, завет Мой с тобою, и будеши отец множества языков: 5 и не наречется ктому имя твое Аврам, но будет имя твое Авраам: яко отца многих языков положих тя: 6 и возращу тя зело зело, и положу тя в народы, и царие из тебе изыдут: 7 и поставлю завет Мой между Мною и между тобою, и между семенем твоим по тебе в роды их, в завет вечен, да буду тебе Бог и семени твоему по тебе: 8 и дам тебе и семени твоему по тебе землю, в нейже обитаеши, всю землю Ханааню во одержание вечное, и буду им Бог. 9 И рече Бог ко Аврааму: ты же завет Мой соблюдеши, ты и семя твое по тебе в роды их. 10 И сей завет, егоже соблюдеши между Мною и вами, и между семенем твоим по тебе в роды их: обрежется от вас всяк мужеск пол, 11 и обрежете плоть крайнюю вашу, и будет в знамение завета между Мною и вами. 12 И младенец осмидний обрежется вам, всяк мужеский пол в родех ваших: и

домочадец, и купленный от всякаго сына чуждаго, иже несть от семени твоего: обрезанием обрежется домочадец дому твоего и купленный. 13 И будет завет Мой на плоти вашей в завет вечен. 14 Необрезанный же мужеский пол, иже не обрежет плоти крайняя своя в день осмый, погубится душа та от рода своего: яко завет Мой разори. 15 И рече Бог Аврааму: Сара жена твоя не наречется имя ея Сара, но Сарра будет имя ей: 16 благословлю же ю и дам тебе от нея чадо: и благословлю е, и будет в языки, и царие языков из него будут. 17 И паде Авраам на лице свое, и посмеяся, и рече в мысли своей, глаголя: еда столетному (мужу) родится сын? Еда и Сарра девяностидесяти лет (сущи) родит? 18 Рече же Авраам к Богу: Исмаил сей да живет пред Тобою. 19 Рече же Бог ко Аврааму: воистинну, се, Сарра жена твоя родит тебе сына, и наречеши имя ему Исаак: и поставлю завет Мой с ним в завет вечен, да буду ему в Бога и семени его по нем. 20 О Исмаиле же се послушах тебе: и се благослових его, и возращу его, и умножу его зело: дванадесять языки родит: и дам его в язык велий. 21 Завет же Мой поставлю со Исааком, егоже родит тебе Сарра, во время сие, в лето второе. 22 Сконча же (Бог) глаголя к нему, и взыде Бог от Авраама. 23 И поя Авраам Исмаила сына своего, и вся домочадцы своя и вся купленыя, и весь мужеск пол мужей, иже в дому Авраамли, и обреза плоть крайнюю их во время дне того, якоже глагола ему Бог. 24 Авраам же девяностидесяти девяти лет бяше, егда обреза плоть крайнюю свою. 25 Исмаил же сын его бяше лет тринадцати, егда обреза плоть крайнюю свою. 26 Во время (же) дне онаго обрезася Авраам и Исмаил



сын его, 27 и вси мужие дому его, и домочадцы (его) и куплении от инородных языков, и обреза я.

**18** Явился же ему Бог у дуба Мамврийска, сидящу ему пред дверми сени своя в полудни. 2 Воззрев же очима своима, виде, и се, трие мужие стояху над ним: и виде в притече в сретение им от дверей сени своя: и поклонися до земли 3 и рече: Господи, аще убо обретох благодать пред Тобою, не мини раба Твоего: 4 да принесется вода и омыются ноги ваши, и прохладитесь под древом: 5 и принесу хлеб, да ясте, и посем пойдете в путь свой, егоже ради уклонистесь к рабу вашему. И рекоша: тако сотвори, якоже глагола еси. 6 И потщася Авраам в сень к Сарре и рече ей: ускори и смеси три меры муки чисты, и сотвори потребники. 7 И тече Авраам ко кравам, и взя телца млада и добра, и даде рабу, и ускори приготовить е. 8 И взя масло, и млеко, и телца, егоже приготова: и предложи им, и ядоша: сам же стояше пред ними под древом. 9 Рече же к нему: где Сарра жена твоя? Он же отвещав, рече: се, в сени. 10 Рече же: (се) возвращая прииду к тебе во время сие в часы, и родит сына Сарра жена твоя. Сарра же услыша пред дверми сени сущи за ним. 11 Авраам же и Сарра стара (беста, ) заматеревшая во днех: и престаша Сарре бывати женская. 12 Разсмеяся же Сарра в себе, глаголющи: не у было ми убо доселе, господин же мой стар. 13 И рече Господь ко Аврааму: что яко разсмеяся Сарра в себе, глаголющи: еда истинно рожду? Аз же состарехся. 14 Еда изнеможет у Бога слово? В сие время возвращуся к тебе в часы, и будет Сарре сын. 15 Отречеся же Сарра, глаголющи: не разсмеяхся: убося бо. И рече ей: ни, но разсмеялася еси. 16 Воставше же оттуду мужие,

воззреша на лице Содома и Гоморра: Авраам же идяше с ними, провождая их. 17 Господь же рече: еда утаю Аз от Авраама раба Моего, яже Аз творю? 18 Авраам же бывая будет в язык велик и мног, и благословятся о нем вси языцы земнии: 19 вем бо, яко заповесть сыном своим и дому своему по себе, и сохранят пути Господни творити правду и суд, яко да наведет Господь на Авраама вся, елика глагола к нему. 20 Рече же Господь: вопль Содомский и Гоморрский умножися ко Мне, и греси их велицы зело: 21 сошед убо узрю, аще по воплю их грядущему ко Мне совершаются: аще же ни, да разумею. 22 И обратившеся оттуду мужие, приидоша в Содом: Авраам же еще бяше стояй пред Господем. 23 И приближився Авраам, рече: погубиши ли праведнаго с нечестивым, и будет праведник яко нечестивый? 24 Аще будут пятьдесят праведницы во граде, погубиши ли я? Не пощадиши ли всего места пятидесяти ради праведных, аще будут в нем? 25 Никакоже Ты сотвориши по глаголу сему, еже убити праведника с нечестивым, и будет праведник яко нечестивый: никакоже, Судяй всей земли, не сотвориши ли суда? 26 Рече же Господь: аще будут в Содомех пятьдесят праведницы во граде, оставлю весь град и все место их ради. 27 И отвещав Авраам, рече: ныне начах глаголати ко Господу моему, аз же есмь земля и пепел: 28 аще же умалятся пятьдесят праведницы в четыредесять пять, погубиши ли четыредесяти пятих ради весь град? И рече: не погублю, аще обрящу тамо четыредесять пять. 29 И приложи еще глаголати к Нему, и рече: аще же обрящутся тамо четыредесять? И рече: не погублю ради четыредесяти. 30 И рече: что, Господи, аще возглаголю? Аще же обрящется

тамо тридесять? И рече: не погублю тридесятих ради. 31 И рече: понеже имам глаголати ко Господу: аще же обрящутся тамо двадесять? И рече: не погублю, аще обрящутся тамо двадесять. 32 И рече: что, Господи, аще возглаголю еще единою? Аще же обрящутся тамо десять? И рече: не погублю десятих ради. 33 Отиде же Господь, яко преста глаголя ко Аврааму: и Авраам возвратися на место свое.

**19** Приидоста же два Ангела в Содом в вечер: Лот же седяше пред враты Содомскими. Видев же Лот, воста в сретение им и поклонися лицом на землю 2 и рече: се, господие, уклонитесь в дом раба вашего и почийте, и омойте ноги ваша, и обутренаваше отидете в путь свой. Реша же: ни, но на стогне почием. 3 И принуди я, и уклонишася к нему, и внидоша в дом его: и сотвори им учреждение, и опресноки испече им, и ядоша. 4 Пред спанием же мужие града Содомляне оыдоша дом, от юноши даже до старца, весь народ вкупе: 5 и изываху Лота, и глаголаху к нему: где суть мужие вшедшии к тебе ноцию? Изведи я к нам, да будем с ними. 6 Изыде же Лот к ним в преддверие, двери же затвори за собою. 7 Рече же к ним: никакоже, братие, не дейте зла: 8 суть же ми две дщери, яже не познаша мужа: изведу их к вам, и творите им, якоже угодно есть вам: точию мужем сим не сотворите обиды, того бо ради внидоша под кров дому моего. 9 Реша же ему: отиди отсюда: пришел еси (семо) обитати, еда ли и суд судити? Ныне убо ты озлобим паче, нежели оных. И насилствоваша мужа Лота зело, и приближишася разбити двери. 10 Простерше же мужие руки, вовлекоша Лота к себе в храмину, и двери храмины заключиша: 11 мужы же, сущыя пред дверми дому, поразиша

слепотою от мала даже до велика: и разслабишася ищуще дверей. 12 Реша же мужие к Лоту: суть ли тебе zde зятие или сынове или дщери? Или аще кто тебе ин есть во граде, изведи (я) от места сего: 13 яко мы погубляем место сие, понеже возвысися вопль их пред Господем, и посла нас Господь истребити его. 14 Изыде же Лот и глагола к зятем своим, поимшым дщери его, и рече: встаните и изыдите от места сего, яко погубляет Господь град. Возмнеся же играти пред зятьми своими. 15 Егда же утро бысть, понуждаху Ангели Лота, глаголюще: востав, поими жену твою и две дщери твоя, яже имаши, и изыди, да не и ты погибнеша со беззаконми града. 16 И смутишася, и взяша Ангели за руку его, и за руку жену его, и за руки двух дщерей его, понеже пощаде и Господь. 17 И бысть егда изведоша я вон, и реша: спасая спасай твою душу: не озирайся вспять, ниже постой во всем пределе (сем): в горе спасайся, да не когда купно ят будеши. 18 Рече же Лот к ним: молюся, Господи, 19 понеже обрете раб Твой милость пред Тобою, и возвеличил еси правду Твою, юже твориши на мне, еже жити души моей: аз же не возмогу спастися в горе, да не когда постигнут мя злая, и умру: 20 се, град сей близ еже убежати ми тамо, иже есть мал, и тамо спасуся: не мал ли есть? И жива будет душа моя Тебе ради. 21 И рече ему: се, удивихся лицу твоему, и о словеси сем, еже не погубити града, о немже глагола еси: 22 потщися убо спастися тамо: не возмогу бо сотворити дела, дондеже внидеши тамо: сего ради прозва имя граду тому Сигор. 23 Солнце възыде над землю, Лот же вниде в Сигор. 24 И Господь одожди на Содом и Гоморр жупел, и огонь от Господа с небесе. 25 И преврати грады сия, и всю окрестную

страну, и вся живущия во градех, и вся прозябающая от земли. 26 И озресе жена его вспять, и бысть столп слан. 27 Востав же Авраам завтра (иде) на место, идеже стояше пред Господем, 28 и воззре на лице Содома и Гоморра, и на лице окрестныя страны, и виде: и се, восхождаше пламень от земли, аки дым пещный. 29 И бысть егда преврати Бог вся грады страны тоя, помяну Бог Авраама и изсла Лота от среды превращения, егда преврати Господь грады, в нихже живяше Лот. 30 Изыде же Лот от Сигора, и седе в горе сам, и две дщери его с ним: убося бо жити в Сигоре: и вселися в пещеру сам и дщери его с ним. 31 Рече же старейшая к юнейшей: отец наш стар, и никтоже есть на земли, иже внидет к нам, якоже обычно всей земли: 32 гряди убо, упоим отца нашего вином и преспим с ним, и возставим от отца нашего семя. 33 Упоиша же отца своего вином в нощи оней: и вшедши старейшая, преспа со отцем своим тоя нощи: и не поразуме он, егда преспа и егда воста. 34 Бысть же наутрие, и рече старейшая к юнейшей: се, (аз) преспях вчера со отцем нашим: упоим его вином и в сию ночь, и вшедши преспи с ним, и возставим от отца нашего семя. 35 Упоиша же и в ту ночь отца своего вином: и вшедши юнейшая преспа со отцем своим: и не поразуме он, егда преспа и егда воста. 36 И зачаша обе дщери Лотовы от отца своего: 37 и роди старейшая сына и нарече имя ему Моав, глаголющи: от отца моего. Сей отец Моавитом даже до нынешняго дне. 38 Роди же юнейшая сына и нарече имя ему Амман, глаголющи: сын рода моего. Сей отец Амманитом до нынешняго дне.

**20** И поиде оттуду Авраам на землю полуденную и вселися между Кадисом и между Суром: и обита в Герарех. 2 Рече

же Авраам о Сарре жене своей, яко сестра ми есть: убося бо рещи, яко жена ми есть, да не когда убьют его мужие градстии ея ради. Посла же Авимелех царь Герарский и взя Сарру. 3 И прииде Бог ко Авимелеху нощию во сне и рече ему: се, ты умираеши жены ради сея, юже поял еси: сия же есть сожителствующая мужу. 4 Авимелех же не прикоснуса ей и рече: Господи, язык неведущий и праведен погубиши ли? 5 Не сам ли ми рече: сестра ми есть? И сия ми рече: брат ми есть? Чистым сердцем и в правде рук сотворих сие. 6 Рече же ему Бог во сне: и Аз познах, яко чистым сердцем сотворил еси сие, и пощадох тя, да не согрешиши ко Мне: сего ради не попустих ти коснутися ея. 7 ныне же отдаждь жену мужу, яко пророк есть, и помолится о тебе, и жив будеши: аще же не отдаси, веждь, яко умреши ты и вся твоя. 8 И воста рано Авимелех, и призва вся отроки своя, и глагола словеса сия вся во уши их: убошася же вси человецы зело. 9 И призва Авимелех Авраама и рече ему: что сие сотворил еси нам? Еда что согрешихом тебе, яко навел еси на мя и на царство мое грех велик? Дело, еже никтоже сотвори, сотворил еси мне. 10 И рече Авимелех Аврааму: что умыслив, сотворил еси сие? 11 Рече же Авраам: рекох бо: негли несть благочестия на месте сем: и убьют мя жены ради моея: 12 ибо истинно сестра ми есть по отцу, а не по матери: бысть же ми в жену: 13 и бысть егда изведе мя Бог от дому отца моего, и рех ей: правду сию сотвориши ми: во всяко место, идеже аще приидем, тамо рцы о мне, яко брат ми есть. 14 Взят же Авимелех тысящу дидрахм (серебра), и овцы, и телцы, и рабы, и рабыни, и даде Аврааму: и отдаде ему Сарру жену его. 15 И рече Авимелех Аврааму: се, земля

моя пред тобою: идеже аще тебе угодно есть, вселися. **16** Сарре же рече: се, дах тысящу дидрахм брату твоему: сия будут тебе в честь лица твоего, и всем, яже суть с тобою, и во всем истинствуй. **17** Помолися же Авраам Богу, и исцели Бог Авимелеха и жену его и рабыни его, и начаша раждати: **18** яко заключая заключи Господь от внеуду всяка ложесна в дому Авимелеха, Сарры ради жены Авраамли.

**21** И Господь посети Сарру, якоже рече: и сотвори Господь Сарре, якоже глагола. **2** И заченши Сарра роди Аврааму сына в старости, во время, якоже глагола ему Господь: **3** и нарече Авраам имя сыну своему рождшемуся ему, егоже роди ему Сарра, Исаак: **4** обреза же Авраам Исаака во осмый день, якоже заповеда ему Бог. **5** Авраам же бе ста лет, егда бысть ему Исаак сын его. **6** Рече же Сарра: смех мне сотвори Господь: иже бо аще услышит, обрадуется со Мною. **7** И рече: кто возвестит Аврааму, яко млеко питает отроча Сарра, яко родих сына в старости моей? **8** И возрасте отроча, и отдоено бысть: и сотвори Авраам учреждение велие, в оньже день отдоися Исаак сын его. **9** Видевши же Сарра сына Агари Египтяныни, иже бысть Аврааму, играюща со Исааком сыном своим, **10** и рече Аврааму: изжени рабу сию и сына ея: не наследит бо сын рабы сея с сыном моим Исааком. **11** Жесток же явися глагол сей зело пред Авраамом о сыне его Исмаиле. **12** И рече Бог Аврааму: да не будет жестоко пред тобою о отроче и о рабыни: вся елика аще речет тебе Сарра, слушай гласа ея: яко во Исааце наречется тебе семья: **13** сына же рабыни сея в язык велик сотворю его, яко семя твое есть. **14** Воста же Авраам заутра и взя хлебы и мех воды, и даде Агари: и возложи на плещы ея

отроча и отпусти ю. Отшедши же заблуждаше в пустыни, у кладязя Клятвеннаго: 15 оскуде же вода из меха: и поверже отроча под елию единую. 16 Отшедши же седяше прямо ему издалече, якоже дострелити из лука: рече бо: да не вижду смерти детища моего. И седе прямо ему издалече. Воскрячав же отроча, восплакася: 17 услыша же Бог глас отрочате от места, идеже бяше: и воззва Ангел Божий Агарь с небесе и рече ей: что есть, Агарь? Не бойся: услыша бо Бог глас отрочища от места, идеже есть: 18 востани и поими отроча, и ими рукою твоею его: в язык бо велик сотворю его. 19 И отверзе Бог очи ея, и узре кладязь воды живы: и иде, и налия мех воды, и напои отроча. 20 И бяше Бог со отрочатем, и возрасте, и вселися в пустыни, и бысть стрелец. 21 И поселися в пустыни Фаран: и поят ему мати его жену от земли Египетския. 22 Бысть же в то время, и рече Авимелех, и Охозаф невестоводитель его, и Фихол воевода силы его, ко Аврааму, глаголя: Бог с тобою во всех, яже твориши: 23 ныне убо кленися ми Богом, не обидети мене, ниже семене моего, ниже имене моего: но по правде, юже сотворих с тобою, сотвориши со мною и земли, идеже ты вселился еси на ней. 24 И рече Авраам: аз кленуся. 25 И обличи Авраам Авимелеха о кладязех водных, яже отяша отроцы Авимелеховы. 26 И рече ему Авимелех: не ведех, кто сотвори тебе вещь сию: ниже ты ми поведал еси, ниже аз слышах, токмо днесь. 27 И взя Авраам овцы и юнцы и даде Авимелеху: и завета оба завет. 28 И постави Авраам семь агниц овчих единых. 29 И рече Авимелех Аврааму: что суть семь агницы овец сих, яже поставил еси едины? 30 И рече Авраам: яко семь сих агниц возмеш у мене, да будут



ми во свидетелство, яко аз ископах кладязь сей. 31 Сего ради наименова имя месту тому кладязь Клятвенный: яко тамо клястася оба 32 и завещаста завет у кладязя Клятвенного. Воста же Авимелех, и Охозаф невестоводитель его, и Фихол воевода силы его, и возвратишася в землю Филистимску. 33 И насади Авраам ниву у кладязя Клятвенного, и призва ту имя Господа, Бога вечного. 34 Обита же Авраам в земли Филистимстей дни многи.

**22** И бысть по глаголах сих, Бог искушаше Авраама и рече ему: Аврааме, Аврааме. И рече: се аз. 2 И рече: поими сына твоего возлюбленного, егоже возлюбил еси, Исаака, и иди на землю Высоку и вознеси его тамо во всесожжение, на едину от гор, ихже ти реку. 3 Востав же Авраам утро, оседла осля свое: поят же с собою два отрочища и Исаака сына своего: и растнив дрова во всесожжение, востав иде, и прииде на место, еже рече ему Бог, в третий день. 4 И воззрев Авраам очима своими, виде место издалече. 5 И рече Авраам отроком своим: сядите zde со ослятем: аз же и детищъ пойдем до онде, и поклонившеся возвратимся к вам. 6 Взя же Авраам дрова всесожжения и возложи на Исаака сына своего: взя же в руки и огонь, и ножь, и идоста оба вкупе. 7 Рече же Исаак ко Аврааму отцу своему: отче. Он же рече: что есть, чадо? Рече же: се, огонь и дрова, где есть овча еже во всесожжение? 8 Рече же Авраам: Бог узрит Себе овча во всесожжение, чадо. Шедша же оба вкупе, 9 приидоста на место, еже рече ему Бог: и созда тамо Авраам жертвенник и возложи дрова: и связав Исаака сына своего, возложи его на жертвенник верху дров. 10 И простре Авраам руку свою, взяти ножь, заклати сына своего. 11 И воззва и Ангел

Господень с небесе, и рече: Аврааме, Аврааме. Он же рече: се, аз. 12 И рече: да не возложиши руки твоя на отрочища, ниже да сотвориши ему что: ныне бо познах, яко боишися ты Бога, и не пощадел еси сына твоего возлюбленного Мене ради. 13 И воззрев Авраам очима своими виде, и се, овен един держимый рогама в саде савек: и иде Авраам, и взя овна, и вознесе его во всеожжение вместо Исаака сына своего. 14 И нарече Авраам имя месту тому: Господь виде: да рекут днесь: на горе Господь явися. 15 И воззва Ангел Господень Авраама вторицею с небесе, 16 глаголя: Мною Самем кляхся, глаголет Господь, егоже ради сотворил еси глагол сей и не пощадел еси сына твоего возлюбленного Мене ради: 17 воистинну благословя благословлю тя, и умножая умножу семя твое, яко звезды небесныя, и яко песок вскрай моря: и наследит семя твое грады супостатов, 18 и благословятся о семени твоём вси языцы земнии, занеже послушал еси гласа Моего. 19 Возвратися же Авраам ко отроком своим, и воставше идоша купно ко кладязю Клятвенному: и вселися Авраам у кладязя Клятвенного. 20 Бысть же по глаголах сих, и поведаша Аврааму, глаголюще: се, роди Мелха и та сыны брату твоему Нахору, 21 Окса первенца, и Вавкса брата его, и Камуила отца Сирска, 22 и Хазада, и Азава, и Фалдеса, и Елдафа, и Вафуила: 23 Вафуил же роди Ревекку: осмь сии сынове, ихже роди Мелха Нахору брату Авраамлю: 24 и наложница его, ейже имя Ревма, роди и сия Тавека, и Таама, и Тохоса, и Моха.

**23** Бысть же житие Саррино лет сто двадесать семь. 2 И умре Сарра во граде Арвоце, иже есть в раздолии: сей есть Хеврон в земли Ханаанстей. Прииде же Авраам

рыдати по Сарре и плакати. 3 И воста Авраам от мертвеца своего и рече сыном Хеттеовым, глаголя: 4 преселник и пришлец аз есмь у вас, дадите ми убо стяжание гроба между вами, да погребу мертвеца моего от мене. 5 Отвещаша же сынове Хеттеовы ко Аврааму, глаголюще: ни, господине: 6 послушай же нас: царь от Бога ты еси в нас: во избранных гробех наших погреби мертвеца твоего: никтоже бо от нас возбранит гроба своего от тебе, еже погребсти мертвеца твоего тамо. 7 Востав же Авраам поклонися народу земли, сыном Хеттеовым, 8 и рече к ним Авраам, глаголя: аще имате в души вашей, яко погребсти мертвеца моего от лица моего, послушайте мене и рцыте о мне Ефрону Саарову: 9 и да даст ми пещеру Сугубую, яже есть его, сущую на части села его: серебром достойным да даст ми ю у вас в стяжание гроба. 10 Ефрон же седяше посреде сынов Хеттеовых. Отвещав же Ефрон Хеттейский ко Аврааму, рече слышащим сыном Хеттеовым и всем приходящим во град, глаголя: 11 у мене буди, господине, и послушай мене: село и пещеру яже в нем, тебе даю: пред всеми гражданы моими дах тебе, погреби мертвеца твоего. 12 И поклонися Авраам пред народом земли 13 и рече Ефрону во ушеса пред всем народом земли: понеже по мне еси, послушай мене: серебро села возми у мене, и погребу мертвеца моего тамо. 14 Отвеща же Ефрон Аврааму, глаголя: 15 ни, господине: слышах бо, яко земля четырех сот дидрахм серебра: но что было бы сие между мною и тобою? Ты же мертвеца твоего погреби. 16 И послуша Авраам Ефрона, и даде Авраам Ефрону серебро, еже глагола во ушеса сынов Хеттеовых, четыре ста дидрахм серебра искушена купцами. 17 И бысть

село Ефрово, еже бе в Сугубей пещере, еже есть лицом к Мамври, село и пещера яже бе в нем, и всякое древо, иже бе на селе, и все еже есть в пределех его окрест, **18** Аврааму (бысть) в стяжание пред сыны Хеттеовыми и пред всеми приходящими во град. **19** По сих погребе Авраам Сарру жену свою в пещере селней Сугубей, яже есть противу Мамври: сия есть Хеврон в земли Ханаанстей. **20** И утверждено есть село и пещера, яже бе на нем, Аврааму в стяжание гроба от сынов Хеттеовых.

**24** Авраам же бяше стар, заматеревший во днех: и Господь благослови Авраама во всех. **2** И рече Авраам рабу своему старейшему дому своего, обладающему всеми его: положи руку твою под стегно мое, **3** и заклену тя Господем Богом небесе и Богом земли, да не поймешу сыну моему Исааку жены от дочерей Хананейских, с нимиже аз живу в них: **4** но токмо на землю мою, идеже родихся, пойдешу, и ко племени моему, и поймешу жену сыну моему Исааку оттуду. **5** Рече же к нему раб: еда убо не восхоцет ити жена вслед со мною на землю сию, возвращу ли сына твоего в землю, от неяже изшел еси? **6** Рече же к нему Авраам: внемли себе, да не возвратиши сына моего онамо. **7** Господь Бог небесе и Бог земли, Иже помя мя из дому отца моего и от земли, в нейже родихся, Иже глагола мне и Иже кляся мне, глаголя: тебе дам землю сию и семени твоему, Той послет Ангела Своего пред тобою, и поймешу жену сыну моему Исааку оттуду: **8** аще же не восхоцет жена поити с тобою в землю сию, чист будешу от заклания моего: точию сына моего не возврати тамо. **9** И положи раб руку свою под стегно Авраама господина своего, и кляся ему о словеси сем. **10** И взя раб десять велблюд от

велблюд господина своего, и от всех благ господина своего с собою, и востав иде в Месопотамию во град Нахоров: **11** и постави велблюды вне града у кладязя воднаго под вечер, егда исходят (жены) почерпати воды, **12** и рече: Господи, Боже господина моего Авраама, благоустрой предо мною днесь, и сотвори милость с господином моим Авраамом: **13** се, аз стах у кладязя воднаго, дщери же живущих во граде исходят почерпати воды: **14** и будет девица, ейже аз реку: преклони водонос твой, да пию, и речет ми: пий ты, и велблюды твоя напою, дондеже напиются: сию уготовал еси рабу Твоему Исааку: и по сему увем, яко сотворил еси милость с господином моим Авраамом. **15** И бысть прежде неже скончати ему глаголющу во уме своем, и се, Ревекка исхождаше, яже родися Вафуилу, сыну Мелхи жены Нахора, брата же Авраамля, держащи водонос на рамах своих: **16** девица же бяше доброзрачна зело: дева бе, муж не позна ея. Сошедши же на кладязь, наполни водонос свой и взыде. **17** Тече же раб во сретение ей и рече: напой мя мало водою от водоноса твоего. **18** Сия же рече: пий, господине. И потщася, и сня водонос на мышца своя, и напои его, дондеже напися. **19** И рече: и велблюдом твоим налию, дондеже вси напиются. **20** И потщася, и испраздни водонос в поило: и тече паки на кладязь почерпнути воды, и вляя велблюдом всем. **21** Человек же выразумеваше ю и помолчеваше, да уразумеет, аще благоустрои Бог путь ему, или ни. **22** Бысть же егда престаша вси велблюды пиюще, взя человек усерязи златы весом по драхме и два запястия на руки ея: десять златниц вес их. **23** И вопроси ю и рече: чия еси дщерь? Повеждь ми, аще есть у отца твоего место нам витати? **24** Она же рече

ему: дочь Вафуилева есмь (сына) Мелхина, егоже роди Нахору. 25 И рече ему: и плевы и сена много у нас, и место витати. 26 И благословив человек, поклонися Господу 27 и рече: благословен Господь Бог господина моего Авраама, Иже не остави правды Своя и истины от господина моего: и мене благоустрои Господь в дом брата господина моего. 28 И текши девица в дом матери своей, поведи по глаголом сим. 29 Ревекце же бяше брат, емуже имя Лаван: и тече Лаван к человеку вон на кладязь. 30 И бысть егда виде усерязи, и запрястия на руку сестры своей, и егда слыша словеса Ревекки сестры своей, глаголющая: сице глагола мне человек: и прииде к человеку, стоящу ему у вельблюд у кладязя, 31 и рече ему: гряди, вниди благословенный от Господа, почто стоиши вне? Аз же уготовах хранину и место вельблюдом. 32 И вниде человек в дом, и разседла вельблюд, и даде плевы и сено вельблюдом, и воду умыти нозе его, и ноги мужем, иже бяху с ним: 33 и предложи им хлебы ясти, и рече: не ям, дондеже возглаголю словеса моя. И рече: глаголи. 34 И рече: раб Авраамль есмь аз: 35 Господь же благослови господина моего зело, и возвысися: и даде ему овцы и телцы, серебро и злато, рабы и рабыни, и вельблюд и ослы: 36 и роди Сарра, жена господина моего, сына единого господину моему, состаревшемуся ему, и даде ему елика имяше: 37 и закля мя господин мой, глаголя: не поймеш ли жены сыну моему от дочерей Хананейских, в нихже аз обитаю в земли их: 38 но в дом отца моего пойдеш, и в племя мое, и поймеш жену сыну моему оттуду: 39 рех же (аз) господину моему: а егда не восхощет жена со мною ити? 40 И рече ми: Господь Бог, Емуже благоугодих пред ним, он послет

Ангела Своего с тобою и благоустроит путь твой, и поймешь жену сыну моему от племени моего и от дому отца моего: 41 тогда будешь чист от заклинания моего: егда бо дойдешь в племя мое, и не дадут ти, и будешь чист от заклинания моего: 42 и пришед днешь на кладязь, рекох: Господи, Боже господина моего Авраама, аще Ты благоустроиши путь мой, в оньже ныне аз иду: 43 се, аз стах у кладязя воднаго, и дщери граждан исходят почерпати воды: и будет девица, ейже аще аз реку: напои мя от водоноса твоего мало водою: 44 и речет ми: и ты пей, и вельблюдом твоим влию: сия (будет) жена, юже уготова Господь рабу Своему Исааку: и по сему уразумею, яко сотворил еси милость господину моему Аврааму. 45 И бысть прежде неже скончати мне глаголющу во уме своем, абие Ревекка исхождаше держащи водонос на раму, и сниде на кладязь, и почерпе воды: и рекох ей: напои мя. 46 И потщавшись сня водонос с себе на мышцу свою и рече: пей ты, и вельблюды твоя напою. И напихся, и вельблюды моя напои. 47 И вопросих ю и рекох: чия еси дщерь? Повеждь ми. Она же рече: дщерь Вафуилева есмь сына Нахорова, егоже роди ему Мелха. И дах ей усерязи, и запястия на руке ея, 48 и благоволив поклонихся Господу: и благослових Господа Бога господина моего Авраама, Иже благоустрои мя на пути истины пояти дщерь брата господина моего сыну его: 49 аще убо сотворите вы милость и правду к господину моему: аще же ни, поведите ми: да обращуся или на десно, или на лево. 50 Отвещавша же Лаван и Вафуил, рекоста: от Господа прииде дело сие: не возможем ти противу рещи зло или благо: 51 се, Ревекка пред тобою: поемь ю, иди: и да будет жена сыну господина твоего, якоже

глагола Господь. 52 Бысть же егда услыша раб Авраамль словеса сия, поклонися до земли Господу. 53 И изнес раб сосуды златы и сребряны и ризы, даде Ревекце: и дары даде брату ея и матери ея. 54 И ядоша и пиша и той и мужие, иже бяху с ним, и почиша. И востав заутра, рече: отпустите мя, да отиду к господину моему. 55 Реша же братия ея и матери: да пребудет девица с нами яко десять дний, и посем пойдет. 56 Он же рече к ним: не держите мя, Господь бо благоустрои путь мой во мне: отпустите мя, да иду к господину моему. 57 Они же реша: призовем девицу и вопросим ея изоуст. 58 И призваша Ревекку и реша ей: пойдеш ли с человеком сим? Она же рече: пойду. 59 И отпустиша Ревекку сестру свою, и имения ея, и раба Авраамля, и иже с ним быша. 60 И благословиша Ревекку и реша ей: сестра наша еси, буди в тысящы тем, и да наследит семя твое грады супостат. 61 Воставши же Ревекка и рабыни ея, вседоша на велблуды и поидоша с человеком. И поим раб Ревекку, отиде. 62 Исаак же прехождаше сквозе пустыню у кладязя Видения: сам же живяше на земли на полудне. 63 И изыде Исаак поглумитися на поле к вечеру, и воззрев очима своима, виде велблуды идущыя. 64 И воззревши Ревекка очима своима, виде Исаака: и изсочи с велблюда. 65 И рече рабу: кто есть человек оный, иже идет по полю во сретение нам? Рече же раб: сей есть господин мой. Она же взявши ризу летнюю, облечеса. 66 И поведа раб Исааку вся словеса, яже сотвори. 67 Вниде же Исаак в дом матери своея, и поя Ревекку, и бысть ему жена: и возлюби ю, и утешися Исаак по Сарре матери своей.



**25** Приложив же Авраам, поя жену, ейже имя Хеттура: 2  
роди же ему Зомврана и Иезана, и Мадала и Мадиама,  
и Иесвока и Соиена. 3 Иезан же роди Савана и Фамана  
и Дедана. Сынове же Дедани быша: Рагуил и Навдеил, и  
Асуриим и Латусиим и Лаомим. 4 Сынове же Мадиамли:  
Ефар и афир, и Енох и Авида и Елдага. Все сии быша  
сынове Хеттурины. 5 Даде же Авраам вся своя имения  
Исааку сыну своему: 6 сыном же наложниц своих даде  
Авраам дары и отпусти я от Исаака сына своего, еще жив  
сый, к востоку на землю восточную. 7 Сия же лета дний  
жития Авраамля, елика поживе, лет сто семьдесят пять: 8 и  
ослабев умре Авраам в старости добрей, старец исполнен  
дний, и приложися к людем своим. 9 И погребоша его Исаак и  
Исмаил два сынове его в пещере Сугубей, на селе Ефронове  
сына Саарова Хеттеанина, еже есть прямо Мамври, 10 на  
селе и в пещере, юже притяжа Авраам от сынов Хеттеовых:  
тамо погребоша Авраама и Сарру жену его. 11 Бысть же  
по умертвии Авраамли, благослови Бог Исаака сына его:  
и вселися Исаак у кладязя Видения. 12 Сия же бытия  
Исмаила сына Авраамля, егоже роди Агарь Египтяныня,  
раба Саррина, Аврааму: 13 и сия имена сынов Исмаилих, по  
именом родов его: первенец Исмаилов Наваиоф, и Кидар  
и Навдеил, и Массам 14 и Масма, и Дума и Масси, 15 и  
Ходдан и Феман, и Иетур и Нафес и Кедма. 16 Сии суть  
сынове Исмаили: и сия имена их в скиниях их и в селех  
их: дванадесять князи в языцех их. 17 И сия лета жития  
Исмаилова, сто тридесять семь лет: и ослабев умре, и  
приложися к роду своему. 18 Вселися же от Евилата даже  
до Сура, иже есть в лице Египту, даже дойти ко Ассириом:

пред лицом всех братьев своих вселися. 19 И сия бытия Исаака сына Авраамля: Авраам роди Исаака. 20 Бяше же Исаак лет чотыредесяти, егда поя Ревекку дщерь Вафуила Сирина от Месопотамии Сирския, сестру Лавана Сирина, себе в жену. 21 Моляшеса же Исаак Господеви о Ревекце жене своей, яко неплоды бяше: послуша же его Бог, и зачат во утробе Ревекка жена его. 22 Игроста же младенца в ней, и рече: аще тако ми хоцет быти, почто ми сие? И иде вопрошати Господа. 23 И рече ей Господь: два языка во утробе твоей суть, и двои людие от утробы твоея разлучатся: и людие людий превзыдут, и болший поработает меншему. 24 И исполнишася дние родити ей, и бяху сей близнята во утробе ея: 25 изыде же сын первенец чермен, весь, яко кожа, космат: и нарече имя ему Исав: 26 и посем изыде брат его, рука же его придержася пяте Исавове: и нарече имя ему Иаков. Исааку же бе шестьдесят лет, егда роди их Ревекка. 27 Возрастоша же юноши: и бысть Исав человек ведый ловити, селный: Иаков же бысть человек нелукав, живый в дому. 28 И возлюби Исаак Исава, яко ловитва его бяше брашно ему: Ревекка же любляше Иакова. 29 Свари же Иаков варение: и прииде Исав с поля изнемог, 30 и рече Исав Иакову: напитай мя варением сочива сего, яко изнемогаю. Сего ради прозвася имя ему Едом. 31 И рече Иаков Исаву: отдаждь ми днесь первенство свое. 32 Рече же Исав: се, аз иду умрети, и вскую ми первенство сие? 33 И рече Иаков ему: кленися ми днесь. И кляся ему, и отдаде Исав Иакову первенство свое. 34 Иаков же даде Исаву хлеб и варение сочевно: яде же и пи, и востав отиде: и нивчтоже вмени себе Исав первенство.

**26** Бысть же глад на земли, кроме глада бывшего прежде во время Авраамле. Отиде же Исаак ко Авимелеху царю Филистимску в Герар: **2** явися же ему Господь и рече: не ходи во Египет, вселися же в земли, в нейже ти реку, **3** и обитай в земли той, и буду с тобою, и благословлю тя: тебе бо и семени твоему дам всю землю сию и поставлю клятву Мою, еуже кляхся Аврааму отцу твоему: **4** и умножу семя твое, яко звезды небесныя, и дам семени твоему всю землю сию: и благословятся о семени твоём вси языцы земнии: **5** понеже послуша отец твой Авраам Моего гласа и соблюде заповеди Моя и повеления Моя, и оправдания Моя и законы Моя. **6** Вселися же Исаак в Герарех. **7** Вопросыша же мужие места того о Ревекце жене его, и рече: сестра ми есть. Убося бо рещи, яко жена ми есть, да не когда убьют его мужие места того Ревекки ради, понеже бе доброзрачна. **8** Бысть же много время тамо: и прикинув Авимелех царь Герарский окном, виде Исаака играюща с Ревеккою женою своею. **9** Призва же Авимелех Исаака и рече ему: убо жена твоя есть? Почто рекл еси, яко сестра ми есть? Рече же ему Исаак: рех бо, да не умру ея ради. **10** Рече же ему Авимелех: что сие сотворил еси нам? Вмале не бысть некто от рода моего с женою твоею, и навел бы еси на ны неведение. **11** Заповеда же Авимелех всем людем своим, глаголя: всяк, иже прикоснется мужу сему, или жене его, смерти повинен будет. **12** Сея же Исаак в земли той, и приобрете в то лето стократный плод ячменя: благослови же его Господь. **13** И возвысися человек, и преуспевая болший бываше, дондеже велик бысть зело. **14** Быша же ему скоти овец и скоти волов и земледелия многа. Позавидеша же ему Филистимляне: **15**

и вся кладязи, яже ископаша раби отца его, во время отца его, заградиша я Филистимляне и наполниша тыя землю.

16 Рече же Авимелех ко Исааку: отиди от нас, яко сильнейший сотворился еси от нас зело. 17 И отиде оттуду Исаак и обита в дебри Герарстей, и вселися тамо. 18 И паки Исаак ископа кладязи водныя, яже ископаша раби Авраама отца его, и заградиша тыя Филистимляне, по умертвии Авраама отца его: и прозва им имена, по именам, имиже прозва Авраам отец его. 19 И ископаша раби Исааковы в дебри Герарстей, и обретоша тамо кладязь воды живы. 20 И пряхуся пастырие Герарстии с пастырами Исааковыми, глаголюще: наша есть вода. И прозва имя кладязю тому Обида: обидяху бо его. 21 Отшед же оттуду Исаак, ископа кладязь другой. Пряхуся же и о том: и прозва имя ему Вражда. 22 Отшед же оттуду, ископа кладязь другой. И не пряхуся о том, и прозва имя ему Пространство, глаголя: яко ныне распространи Господь нам и возрасти нас на земли. 23 Взыде же оттуду ко кладязю Клятвенному: 24 и явился ему Господь в ту ночь и рече: Аз есмь Бог Авраама отца твоего, не бойся, с тобою бо есмь: и благословлю тя, и умножу семя твое Авраама ради отца твоего. 25 И созда тамо жертвенник, и призва имя Господне: и постави тамо скинию свою: ископаша же тамо раби Исааковы кладязь в дебри Герарстей. 26 И Авимелех прииде к нему от Герар, и Охозаф невестоводитель его, и Фихол воевода сил его. 27 И рече им Исаак: вскую приидосте ко мне? Вы же возненавидесте мене и отсласте мя от себе. 28 Они же реша: видевши узрехом, яко бе Господь с тобою, и рехом: буди клятва между нами и между тобою, и завещаем с тобою завет, 29 да не сотвориши с нами зла, якоже не

возгнушахомся тобою мы, и якоже сотворихом тебе добро, и отпустихом тя с миром: и ныне благословен ты от Господа. 30 И сотвори им пир, и ядоша и пиша. 31 И воставше завтра, клятятся кийждо ближнему: и отпусти я Исаак, и отидоша от него здравы. 32 Бысть же в той день, и пришедше раби Исааковы поведаша ему о кладязе, егоже ископаша, и рекоша: не обретохом воды. 33 И прозва его Клятва. Сего ради прозва имя граду оному кладязь Клятвенный, даже до днешняго дне. 34 Бяше же Исав лет сорок: и поя жену Иудифу, дочь Веоха Хеттеина, и Васемафу, дочь Елона Хеттеина. 35 И быша противящися Исаакови и Ревекце.

**27** Бысть же, повнегда состаретися Исаакови, и притупишася очи его еже видети: и призва Исава сына своего старейшаго, и рече ему: сыне мой. И рече: се, аз. 2 И рече Исаак: се, состарехся, и не вею дне скончания моего: 3 ныне убо возьми орудие твое, тул же и лук, и изыди на поле, и улови ми лов: 4 и сотвори ми снеди, якоже люблю аз: и принеси ми, да ям, яко да благословит тя душа моя, прежде даже не умру. 5 Ревекка же слыша глаголюща Исаака ко Исаву сыну своему. Изыде же Исав на поле уловити лов отцу своему. 6 Ревекка же рече ко Иакову сыну своему меньшему: се, аз слышах отца твоего беседующа ко Исаву брату твоему, глаголюща: 7 принеси ми лов, и сотвори ми снеди, да ядый благословлю тя пред Господем, прежде неже умрети ми: 8 ныне убо, сыне мой, послушай мене, якоже аз заповедаю ти: 9 и шед во овцы, поими мне оттуду два козлища мягка и добра, и сотворю я снеди отцу твоему, якоже любит: 10 и внесеши отцу твоему, и будет ясти, яко да

благословит тя отец твой, прежде даже не умрет. 11 Рече же Иаков к Ревекце матери своей: Исав брат мой есть муж космат, аз же муж гладкий: 12 да не како осяжет мя отец мой, и буду пред ним яко презираяй, и наведу на себе клятву, а не благословение. 13 Рече же ему мати: на мне клятва твоя, чадо: точию послушай гласа моего, и шед принеси ми. 14 Шед же взя и принесе матери, и сотвори мати его снеди, якоже любляше отец его. 15 И взявши Ревекка одежду Исав сына своего старейшаго добрую, яже бысть у нея в дому, облече оную Иакова сына своего меньшаго, 16 и кожицами козлячими обложи мышцы его, и нагое выи его: 17 и даде снеди и хлебы, яже сотвори, в руце Иакову сыну своему. 18 И внесе отцу своему и рече: отче. Он же рече: се, аз: кто еси ты, чадо? 19 И рече Иаков отцу: аз Исав первенец твой, сотворих, якоже рекл ми еси: востав сяди и яждь от лова моего, яко да благословит мя душа твоя. 20 Рече же Исаак сыну своему: что сие, еже скоро обрел еси, о чадо? Он же рече: еже даде Господь Бог твой предо мною. 21 Рече же Исаак Иакову: приближися ко мне, и осяжу тя, чадо, аще ты еси сын мой Исав, или ни. 22 Приблизися же Иаков ко Исааку отцу своему, и осяза его и рече: глас убо глас Иаковль, руце же руце Исавове. 23 И не позна его: бесте бо руце его, яко руце Исав брата его космате. И благослови его 24 и рече: ты ли еси сын мой Исав? Он же рече: аз. 25 И рече: принеси ми, и ям от лова твоего, чадо, да благословит тя душа моя. И принесе ему, и яде, и принесе ему вино, и пи. 26 И рече ему Исаак отец его: приближися ко мне и облобызай мя, чадо. 27 И приблизився лобыза его: и обоня воню риз его, и благослови его и рече: се, воня сына

моего, яко воня нивы исполнены, юже благослови Господь: 28 и да даст тебе Бог от росы небесных и от тука земли, и множество пшеницы и вина: 29 и да пороботают тебе языцы, и да поклонятся тебе князи, и буди господин брату твоему, и поклонятся тебе сынове отца твоего: проклинаяй ты проклят, благословляяй же ты благословен. 30 И бысть по еже престати Исааку благословляющу Иакова сына своего: и бысть егда изыде Иаков от лица Исаака отца своего, и Исав брат его прииде с ловитвы. 31 Сотвори же и той снеди и принесе отцу своему, и рече отцу: да востанет отец мой, и да яст от лова сына своего, яко да благословит мя душа твоя. 32 И рече ему Исаак отец его: кто еси ты? Он же рече: аз есмь сын твой первенец Исав. 33 Ужасеся же Исаак ужасом велиим зело и рече: кто убо уловивый мне лов и принесый ми? И ядох от всех, прежде неже приити тебе, и благослових его, и благословен будет. 34 Бысть же егда услыша Исав глаголы отца своего Исаака, возопи гласом велиим и горьким зело, и рече: благослови убо и мене, отче. 35 Рече же ему: пришед брат твой с лестию, взя благословение твое. 36 И рече (Исав): праведно наречеса имя ему Иаков: запя бо мя се уже вторицею, и первенство мое взя, и ныне взя благословение мое. И рече Исав отцу своему: не оставил ли еси (и) мне благословения, отче? 37 Отвещав же Исаак, рече Исаву: аще господина его сотворих тебе, и всю братию его сотворих рабы ему, пшеницею и вином утвердих его: тебе же что сотворю, чадо? 38 Рече же Исав ко отцу своему: еда едино есть благословение у тебе, отче? Благослови убо и мене, отче. Умилившуся же Исааку, возопи гласом велиим Исав и восплакася. 39 Отвещав же Исаак отец его, рече ему:

се, от тука земли будет вселение твое, и от росы небесныя свыше: **40** и мечем твоим жити будеши, и брату твоему поработаеши: будет же (время) егда низложиши и отресиши ярем его от выи твоея. **41** И враждоваше Исав на Иакова о благословении, имже благослови его отец его. Рече же Исав во уме своем: да приблизятся дние плача отца моего, да бых убил Иакова брата моего. **42** Возвещена же быша Ревекце словеса Исава сына ея старейшаго: и пославши призва Иакова сына своего юнейшаго и рече ему: се, Исав брат твой грозит тебе убити тя: **43** ныне убо, чадо, послушай моего гласа, и востав бежи в Месопотамию к Лавану брату моему в Харран, **44** и поживи с ним дни некия, дондеже отвратится ярость и гнев брата твоего от тебе, **45** и забудет яже ему сотворил еси, и пославши приведу тя оттуду, да не когда безчадна буду от обоих вас в день един. **46** Рече же Ревекка ко Исааку: стужих си жизнь мою дщерей ради сынов Хеттейских: аще поймет Иаков жену от дщерей земли сея, то вскую ми жити?

**28** Призвав же Исаак Иакова, благослови его и заповеда ему, глаголя: да не поймеш жены от дщерей Хананейских: **2** востав отбежи в Месопотамию в дом Вафуила отца матери твоея, и поими себе оттуду жену от дщерей Лавана брата матери твоея: **3** Бог же мой да благословит тя и возрастит тя и умножит тя, и будеши в собрания языков: **4** и да даст тебе благословение Авраама отца моего, тебе и семени твоему по тебе наследити землю обитания твоего, юже даде Бог Аврааму. **5** Посла же Исаак Иакова: и отиде в Месопотамию к Лавану сыну Вафуила Сирина, к брату же Ревекки матери Иаковли и Исавли. **6** Виде же Исав, яко благослови Исаак



Иакова и посла в Месопотамию сирскую пояти оттуду себе жену, егда благослови его и заповеда ему, глаголя: да не поймеш жены от дочерей Хананейских. 7 И послуша Иаков отца и матери своея, и отиде в Месопотамию сирскую. 8 Видев же Исав, яко злы суть дочери Хананейския пред Исааком отцем его, 9 отиде Исав ко Исмаилу и взя Маелефу дочь Исмаила сына Авраамля, сестру Навеофову, жену к женам своим. 10 И отиде Иаков от кладязя Клятвеннаго и иде в Харран, 11 и обрете место и успе тамо, зайде бо солнце: и взя от камня места (того) и положи в возгавие себе, и спа на месте онем. 12 И сон виде: и се, лествица утверждена на земли, еяже глава досязаше до небесе, и Ангели Божии восхождаху и низхождаху по ней: 13 Господь же утверждашеса на ней и рече: Аз есмь Бог Авраама отца твоего и Бог Исаака, не бойся: земля, идеже ты спиши на ней, тебе дам ю и семени твоему: 14 и будет семя твое яко песок земный, и распространится на море, и ливу, и север, и на востоки: и благословятся о тебе вся колена земная и о семени твоём: 15 и се, Аз есмь с тобою, сохраняяй тя на всяком пути, а може аще пойдеш, и возвращу тя в землю сию: яко не имам тебе оставити, дондеже сотворити ми вся, елика глаголах тебе. 16 И воста Иаков от сна своего и рече: яко есть Господь на месте сем, аз же не ведех. 17 И убося и рече: яко страшно место сие: несть сие, но дом Божий, и сия врата небесная. 18 И воста Иаков заутра, и взя камень, егоже положи тамо в возгавие себе: и постави его в столп, и возлия елей верху его. 19 И прозва Иаков имя месту тому Дом Божий: Уламлуз же бе имя граду первее. 20 И положи Иаков обет, глаголя: аще будет Господь Бог со мною

и сохранит мя на пути сем, в онъже аз иду, и даст ми хлеб ясти, и ризы облещися, 21 и возвратит мя здрава в дом отца моего, и будет Господь мне в Бога: 22 и камень сей, егоже поставих в столп, будет ми дом Божий, и от всех, яже ми даси, десятину одесятствую та Тебе.

**29** И востав Иаков на нозе, иде в землю восточную к Лавану сыну Вафуила Сирина, брату же Ревекки матери Иаковли и Исавли. 2 Узре же, и се, кладязь на поли: и бяху тамо три стада овец, почивающе при нем: от того бо кладязя напаяхуся стада. Камень же велий бяше над устием кладязя. 3 И собирахуся тамо вся стада: и отвалаху камень от устия кладязя и напаяху овцы: и паки полагаху камень на устии кладязя на месте своем. 4 Рече же им Иаков: братия, откуда есте вы? Они же реша: от Харрана есмы. 5 Рече же им: знаете ли Лавана сына Нахорова? Они же реша: знаем. 6 Рече же им: здравствует ли? Они же реша: здравствует. И се, Рахиль дщи его идяше со овцами. 7 И рече Иаков: еще есть дне много, не у час собирати скота: напоивше овцы, шедше пасите. 8 Они же реша: не можем, дондеже соберутся вси пастуси и отвалят камень от устия кладязя, и напоим овцы. 9 Еще ему глаголющу к ним, и се, Рахиль дщи Лавана грядяше со овцами отца своего: она бо пасяше овцы отца своего. 10 Бысть же яко узре Иаков Рахиль дщерь Лавана брата матери своея и овцы Лавана брата матери своея, и приступив Иаков отвали камень от устия кладязя: 11 и напои овцы Лавана брата матери своея, и целова Иаков Рахиль, и возопив гласом своим, восплакася: 12 и поведя Рахили, яко брат отца ея есть и яко сын Ревеккин есть. И текши поведя отцу своему по словесем сим. 13 Бысть же

яко услыша Лаван имя Иакова сына сестры своея, тече во сретение ему и объемь его лобза, и введе его в дом свой. И поведя Лавану вся словеса сия. 14 И рече ему Лаван: от костей моих и от плоти моея еси ты. И бе с ним месяц дний. 15 Рече же Лаван Иакову: понеже брат мой еси ты, да не поработаеши мне туне: повеждь ми, что мзда твоя есть? 16 У Лавана же бесте две дщери: имя старейшей Лиа, имя же юнейшей Рахиль. 17 Очи же Лиины болезненны: Рахиль же бе добра видом и красна взором зело. 18 Возлюби же Иаков Рахиль. И рече: поработаю тебе седмь лет за Рахиль дщерь твою меньшую. 19 Рече же ему Лаван: лучше ми тебе дати ю, нежели иному отдати мужеви: со мною живи. 20 И работа Иаков за Рахиль седмь лет: и быша пред ним яко малы дни, занеже любяше ю. 21 Рече же Иаков Лавану: даждь ми жену мою, понеже совершишася дние, да вниду к ней. 22 Собра же Лаван вся мужы места того, и сотвори брак. 23 И бысть вечер, и поемь Лаван Лию дщерь свою, введе ко Иакову: и вниде к ней Иаков. 24 Даде же Лаван Лии дщери своей Зелфу рабыню свою, ей в рабу. 25 Бысть же заутра, и се, бяше Лиа, и рече Иаков Лавану: что сие сотворил ми еси? Не Рахили ли ради работах у тебе? Вскую же обидел мя еси? 26 Отвеща же Лаван: несть тако в нашем месте вдати меньшую прежде старейшия. 27 Скончай убо седмины сея, и дам ти и сию за дело, еже делаеши у мене еще седмь лет другия. 28 Сотвори же Иаков тако: и исполни седмины сея: и даде ему Лаван Рахиль дщерь свою ему в жену. 29 Даде же Лаван Рахили дщери своей Валлу рабу свою, ей в рабу. 30 И вниде (Иаков) к Рахили: возлюби же Рахиль паче, неже Лию: и работа ему седмь лет другия. 31 Видев же Господь

Бог, яко ненавидима бяше Лиа, отверзе ложесна ея: Рахиль же бяше неплоды. 32 И зачат Лиа и роди сына Иакову: нарече же имя ему Рувим, глаголя: яко призре Господь на мое смирение и даде ми сына: ныне убо возлюбит мя муж мой. 33 И зачат паки Лиа и роди сына втораго Иакову и рече: зане услыша Господь, яко ненавидима есмь, и придаде ми и сего. И нарече имя ему Симеон. 34 И зачат еще и роди сына и рече: в нынешнее время у мене будет муж мой, родих бо ему три сыны. Сего ради нарече имя ему Левий. 35 И заченши еще роди сына и рече: ныне еще сие исповем Господу. Сего ради нарече имя ему Иуда, и преста раждати.

**30** Видевши же Рахиль, яко не роди Иакову, и поревнова Рахиль сестре своей и рече Иакову: даждь ми чада: аще же ни, умру аз. 2 Разгневался же Иаков на Рахиль, рече ей: еда вместо Бога аз есмь, Иже лиши тя плода утробнаго? 3 Рече же Рахиль Иакову: се, раба моя Валла: вниди к ней, и да родит на коленях моих, и чадо сотворю и аз от нея. 4 И даде ему Валлу рабу свою ему в жену: и вниде к ней Иаков. 5 И зача Валла раба Рахилина и роди Иакову сына. 6 И рече Рахиль: суди ми Бог и послуша гласа моего, и даде ми сына. Сего ради прозва имя ему Дан. 7 И зачат еще Валла раба Рахилина и роди сына втораго Иакову. 8 И рече Рахиль: подя мя Бог, и сравнихся с сестрою моею, и возмогох. И прозва имя его Неффалим. 9 Виде же Лиа, яко преста раждати, и взя Зелфу рабу свою и даде ю Иакову в жену: и вниде к ней. 10 И зачат Зелфа раба Лиина и роди Иакову сына. 11 И рече Лиа: благо мне случися. И нарече имя ему Гад. 12 И зачат еще Зелфа раба Лиина и роди Иакову сына втораго. 13 И рече Лиа: блажена аз, яко ублажат мя жены. И прозва

имя ему Асир. 14 Иде же Рувим в день жатвы пшеницы и обрете яблока мандрагорова на поли, и принесе я к Лии матери своей. Рече же Рахиль к Лии сестре своей: даждь ми от мандрагоров сына твоего. 15 Рече же Лиа: не доволно ли тебе, яко взяла еси мужа моего? Еда и мандрагоры сына моего возмеши? Рече же Рахиль: не тако: да будет сея нощи с тобою за мандрагоры сына твоего. 16 Прииде же Иаков с поля в вечер, и изыде Лиа во сретение ему и рече: ко мне внидеши днесь: наяла бо тя есмь за мандрагоры сына моего. И бысть с нею тоя нощи. 17 И послуша Бог Лию, и заченши роди Иакову сына пятого. 18 И рече Лиа: даде ми Бог мзду мою, зане дах рабу мою мужу моему. И прозва имя ему Иссахар, еже есть мзда. 19 И зачат еще Лиа и роди сына шестаго Иакову. 20 И рече Лиа: дарова ми Бог дар добр в нынешнее время: возлюбит мя муж мой: родих бо ему шесть сынов. И прозва имя ему Завулон. 21 И посем роди дочь, и прозва имя ей Дина. 22 Помяну же Бог Рахиль, и услыша ю Бог, и отверзе утробу ея: 23 и заченши, роди Иакову сына. И рече Рахиль: отя Бог укоризну мою. 24 И нарече имя ему Иосиф, глаголющи: да придаст ми Бог сына другаго. 25 Бысть же яко роди Рахиль Иосифа, рече Иаков Лавану: отпусти мя, да иду на место мое и в землю мою: 26 отдаждь ми жены моя и дети моя, ихже ради работах тебе, да отиду: ты бо веси работу, юже работах ти. 27 Рече же ему Лаван: аще обретох благодать пред тобою: усмотрих бо, яко благослови мя Бог пришествием твоим: 28 раздели мзду свою у мене, и дам ти. 29 Рече же Иаков: ты веси, яже работах тебе, и колико бе скота твоего у мене: 30 мало бо бе елико твоего у мене и возрасте во множество: и

благослови тя Господь пришествием моим: ныне убо когда сотворю и аз себе дом? 31 И рече к нему Лаван: что ти дам? Рече же ему Иаков: не даси ми ничтоже: аще сотвориши ми глагол сей, паки пасти имам овцы твоя, и сохраню: 32 оуди вся овцы твоя ныне и разлучи оттуду всякую овцу пелесую во овцах, и всяку беловатую и пеструю в козах, будет ми мзда (и будет мое): 33 и послушает мене правда моя во утрешний день, яко есть мзда моя пред тобою: все еже аще не будет пестро и беловатое в козах, и пелесо во овцах, за украденое будет мною. 34 Рече же ему Лаван: буди по словеси твоему. 35 И разлучи в той день козлы пестрыя и беловатыя, и вся козы пестрыя и беловатыя, и все еже бе пелесо во овцах, и все еже бяше белое в них: и даде в руке сыном своим: 36 и разстави путем трех дний, и между ими и между Иаковом: Иаков же пасяше овцы Лавановы оставшыяся. 37 Взя же Иаков себе жезл стиракинов зеленый, и орехов, и яворовый: и острога я Иаков пестрением белым, сострогая кору: являшеся же на жезлах белое, еже острога, пестро. 38 И положи жезлы, яже острога, в поилных корытех воды: да егда приидут овцы пити, пред жезлы пришедшым им пити, зачнут овцы по жезлом: 39 и зачинаху овцы по жезлом, и раждаху овцы беловатыя и пестрыя и пепеловидныя пестрыя. 40 Агницы же разлучи Иаков и постави прямо овцам овна беловатаго и всякое пестрое во агнцах: и разлучи себе стада по себе, и не смеси сих со овцами Лавановыми. 41 Бысть же во время, в неже зачинаху овцы во чреве приемлющя, положи Иаков жезлы пред овцами в корытех, еже зачинати им по жезлом: 42 егда же раждаху овцы, не полагаше: быша же неназнаменаныя

Лавановы, а знаменанья Иаковли. 43 И разбогате человек зело зело: и быша ему скоти мнози, и волове, и раби, и рабыни, и велблюды, и ослы.

**31** Слыша же Иаков словеса сынов Лавановых, глаголющих: взя Иаков вся яже отца нашего, и от сущих отца нашего сотвори всю славу сию. 2 И виде Иаков лице Лаване, и се не быше к нему, яко вчера и третияго дне. 3 Рече же Господь ко Иакову: возвратися в землю отца твоего и в род твой, и буду с тобою. 4 Послав же Иаков, призва Лию и Рахиль на поле, идеже бяху стада, 5 и рече им: вижду аз лице отца вашего, яко несть ко мне, якоже вчера и третияго дне: Бог же отца моего бе со мною: 6 и вы сами весте, яко всею силою моею работах отцу вашему: 7 отец же ваш обиде мя и измени мзду мою десяти агнцев, но не даде ему Бог зла сотворити мне. 8 Аще сице речет: пестрыя, будет твоя мзда: и родятся вся овцы пестрыя. Аще же речет: белыя, будет твоя мзда: и родятся вся овцы белыя. 9 И отя Бог вся скоты отца вашего и даде я мне. 10 И бысть егда зачинаху овцы во чреве приемлющя, и видех очима моима во сне: и се, козлы и овны восходяще бяху на овцы и козы, беловатыя и пестрыя и пепеловидныя пестрыя. 11 И рече ми Ангел Божий во сне: Иакове. Аз же рех: что есть? 12 И рече: воззри очима твоима и виждь козлы и овны восходящыя на овцы и козы, белыя и пестрыя и пепеловидныя пестрыя: видех бо, елика тебе Лаван творит: 13 Аз есмь Бог явивыйся тебе на Месте Божии, идеже помазал Ми еси тамо столп, и обетовал Ми еси тамо обет: ныне убо востани и изыди от земли сея, и иди в землю рождения твоего, и буду с тобою. 14 И отвещавши Рахиль и Лиа, рекосте ему: еда есть нам еще

часть или наследие в дому отца нашего? 15 Не яко ли чужья вменихомся ему? Продаде бо нас и снеде снедию сребро наше: 16 все богатство и слава, юже отя Бог от отца нашего, нам будет и чадом нашим: ныне убо, елика тебе рече Бог, твори. 17 Востав же Иаков, взя жены своя и дети своя на велблуды, 18 и забра вся имена своя и вся стяжания, яже притяжа в Месопотамии, и вся своя, еже отити ко Исааку отцу своему в землю Ханаанскую. 19 Лаван же отиде острищи овцы своя: украде же Рахиль идолы отца своего. 20 Утаи же Иаков от Лавана Сирина, не поведати ему, яко уходит, 21 и отбеже сам, и вся яже его, и прейде реку, и взыде на гору Галаад. 22 Поведася же Лавану Сирина в третий день, яко бежа Иаков: 23 и поим сыны и братию свою с собою, гна вслед его путем седьмь дний: и достиже его на горе Галаад. 24 Прииде же Бог к Лавану Сирина нощию во сне и рече ему: блюди себе, да не когда возглаголеши ко Иакову зла. 25 И постиже Лаван Иакова: Иаков же постави кущу свою на горе: Лаван же разстави братию свою на горе Галаад. 26 Рече же Лаван Иакову: что сотворил еси? Вскую тайно ушел еси и окрал еси мя, и отвел дщери моя, яко пленницы оружием? 27 И аще бы ми поведал еси, отпустил бых тя с веселием и с мусикиею, и тимпаны и гусльми: 28 и не сподобихся целовати детей моих и дщерей моих: ныне же несмысленно сотворил еси: 29 и ныне рука моя может озлобити тя. Но Бог отца твоего вчера рече ко мне, глаголя: блюди себе, да не когда возглаголеши ко Иакову зла. 30 Ныне убо отшел еси: желанием бо возжелал еси отити в дом отца твоего: вскую украл еси боги моя? 31 Отвещав же Иаков рече к Лавану: понеже убояхся: рех бо, да не како отимеши дщери твоя от



мене, и вся моя. 32 И рече Иаков: у негоже аще обрящещи боги твоя, да не будет жив пред братиею нашею: узнавай, что есть твоего у мене, и возми. И не позна у него ничтоже: не ведяше же Иаков, яко Рахиль жена его украде я. 33 Вшед же Лаван, оыска в кущи Лиине, и не обрете. И изыде из кущи Лиины, и оыска кущу Иаковлю и в кущи двоих рабынь, и не обрете. Вниде же и в кущу Рахилину. 34 Рахиль же взя идолы и положи оныя под седло велблюже и седе на них, 35 и рече отцу своему: не имей себе тяжко, господине: не могу востати пред тобою, яко обычная женская ми суть. Иска же Лаван по всей кущи, и не обрете идолов. 36 Разгневался же Иаков и пряхся с Лаваном. Отвещав же Иаков рече Лавану: кая неправда моя? И кий грех мой, яко погнал еси вслед мене, 37 и яко оыскал еси вся сосуды дому моего? Что обрел еси от всех сосудов дому твоего? Положи zde пред братиею твоею и братиею моею, и да разсудят между обема нама: 38 се, двадесять лет аз есмь с тобою: овцы твоя и козы твоя не быша без плода: овнов овец твоих не поядох: 39 звероядины не принесох к тебе: аз воздаях тебе от мене самага татбины денняя и татбины ноцняя: 40 бых во дни жегомь зноем, и студению в нощи, и отхождаше сон от очию моею: 41 се, мне двадесять лет аз есмь в дому твоём, работах тебе четыренадесять лет двух ради дщерей твоих и шесть лет за овцы твоя, и преобидел еси мзду мою десятию агницами: 42 аще не бы Бог отца моего Авраама, и страх Исаака был мне, ныне тща отпустил бы мя еси: смирение мое и труд руку моею увиде Бог, и обличи тя вчера. 43 Отвещав же Лаван, рече ко Иакову: дщери дщери моя и сынове сынове мои, и скоти скоти мои, и вся елика ты

видиши моя суть и дочерей моих: что сотворю им днесь, или чадом их, яже родиста? 44 Ныне убо гряди, завещаем завет аз и ты: и будет во свидетелство между мною и тобою. Рече же ему Иаков: се, никтоже с нами есть: виждь, Бог свидетель между мною и тобою. 45 И взем Иаков камень, постави его в столп. 46 Рече же Иаков братии своей: соберите камене. И собраша камене и сотвориша холм: и ядоша, и пиша тамо на холме. Рече же ему Лаван: холм сей свидетелствует между мною и тобою днесь. 47 И прозва его Лаван холм Свидетелства: Иаков же прозва холм Свидетель. 48 Рече же Лаван ко Иакову: се, холм сей и столп, егоже поставих между мною и тобою, свидетелствует холм сей и свидетелствует столп сей: сего ради прозвася имя холм Свидетелствует, 49 и Видение, еже рече: да видит Бог между мною и тобою, яко отидем друг от друга: 50 аще смириши дочери моя, аще поймеша жены над дочери моя виждь, никтоже с нами есть видяй: Бог свидетель между мною и между тобою. 51 И рече Лаван Иакову: се, холм сей свидетель и столп сей: 52 аще бо аз не преиду к тебе, ниже ты да преидеши ко мне холма сего и столпа сего со злобою: 53 Бог Авраамль и Бог Нахоров да судит между нама. И кляся Иаков страхом отца своего Исаака, 54 и пожре Иаков жертву на горе и воззва братию свою: ядоша же и пиша и спаша на горе. 55 Востав же Лаван заутра, лобыза сыны и дочери своя и благослови я: и возвратився Лаван, отиде на место свое.

**32** И Иаков иде в путь свой. И воззрев виде полк Божий воополчившийся: и сretoша его Ангели Божи. 2 Рече же Иаков, егда виде их: полк Божий сей. И прозва имя месту тому Полки. 3 Посла же Иаков послы пред собою ко Исаву

брату своему в землю Сиир, в страну Едом, 4 и заповеда им глаголя: тако рцѣте господину моему Исаву: тако глаголет раб твой Иаков: у Лавана обитах и умедлих даже до ныне: 5 и быша ми волове и ослы и овцы, и раби и рабыни: и послах поведати господину моему Исаву, дабы обрел раб твой благодать пред тобою. 6 И возвратишася послы ко Иакову, глаголюще: ходихом ко брату твоему Исаву, и се, сам идет во сретение тебе, и четыриста мужей с ним. 7 Убоися же Иаков зело и в недоумении бе: и раздели люди сущья с собою, и волы и велблюды и овцы на два полка, 8 и рече Иаков: аще приидет Исав на един полк и изсечет и, будет второй полк во спасении. 9 Рече же Иаков: Бог отца моего Авраама и Бог отца моего Исаака, Господи Боже, Ты рекий ми: иди в землю рождения твоего, и благо тебе сотворю: 10 довлеет ми от всея правды и от всея истины, юже сотворил еси рабу Твоему: с жезлом бо сим преидох Иордан сей, ныне же бех в два полка: 11 изми мя от руки брата моего, от руки Исава: яко боюся аз его, да не когда пришед убьет мя и мать с чады: 12 ты же рекл еси: благо тебе сотворю и положу семя твое яко песок морской, иже не изочтется от множества. 13 И спа тамо ноци тоя, и взя, яже имяше дары, и посла Исаву брату своему: 14 коз двести, козлов двадесять, овец двести, овнов двадесять, 15 велблюдов дойных, и жребят их тридесять, волов четыредесять, юнцов десять, ослов двадесять и жребят десять: 16 и даде их рабом своим, (коеждо) стадо особо, и рече рабом своим: идите предо мною, и разстояние творите между стадом и стадом. 17 И заповеда первому глаголя: аще тя срящет Исав брат мой и вопросит тя глаголя: чий еси, и камо идещи,

и чия сия, яже пред тобою идут? 18 Речеши: раба твоего  
Иакова: дары посла господину моему Исаву: и се, сам за  
нами (идет). 19 И заповеда первому, и второму, и третьему,  
и всем предидущим вслед стад сих глаголя: по словеси  
сему глаголите Исаву, егда обрящете его вы, 20 и рцыте:  
се, раб твой Иаков идет за нами: рече бо: укрощу лице его  
дарами предидущими его, и посем узрю лице его: негли  
бо примет лице мое? 21 И предидяху дары пред лицом  
его, сам же преспа тоя нощи в полце. 22 Востав же тоя  
нощи, поя обе жены (своя) и обе рабыни и единонадесять  
сынов своих, и преjde брод Иавок: 23 и взя их, и преjde  
поток, и преведе вся своя. 24 Остася же Иаков един. И  
боряшеса с ним Человек даже до утра. 25 Виде же, яко не  
может противу ему: и прикоснуса широте стегна его: и отерпе  
широта стегна Иаковля, егда боряшеса с Ним. 26 И рече ему:  
пусти Мя: възиде бо заря. Он же рече: не пуцу Тебе, аще не  
благословиши мене. 27 Рече же ему: что ти имя есть? Он же  
рече: Иаков. 28 И рече ему: не прозовется ктому имя твое  
Иаков, но Израиль будет имя твое: понеже укрепился еси с  
Богом и с человеки силен будеши. 29 Вопросы же Иаков и  
рече: повеждь ми имя Твое. И рече: вскую сие вопрошаеши  
ты имене Моего? Еже чудно есть. И благослови его тамо. 30  
И прозва Иаков имя месту тому Вид Божий: видех бо Бога  
лицем к лицу, и спасеся душа моя. 31 Возсия же ему солнце,  
егда преjde Вид Божий: он же хромаше стегном своим. 32  
Сего ради не ядят сынове Израилевы жилы, яже отерпе, яже  
есть в широте стегна, даже до дне сего: понеже прикоснуса  
широте стегна Иаковли жилы, яже отерпе.

**33** Воззрев же Иаков очима своима, виде: и се, Исав брат его идый, и четыриста мужей с ним. И раздели Иаков дети Лии и Рахили и двум рабыням, 2 и постави обе рабыни и сыны их в первых, Лию же и дети ея позади, а Рахиль и Иосифа в последних: 3 сам же изыде первее пред ними и поклонися до земли седмижды, дондеже приближися к брату своему. 4 И притече Исав во сретение ему: и объемь его, припаде на выю его и облобыза его: и плакастася оба. 5 И воззрев Исав, виде жены и дети и рече: что сии тебе суть? Он же рече: дети, имиже помилова Бог раба твоего. 6 И приступиша рабыни и дети их и поклонишася: 7 и приступи Лиа и дети ея и поклонишася: посем же приступи Рахиль и Иосиф и поклонистася. 8 И рече: что сия тебе суть, полцы сии вси, яже сретох? Он же рече: да обрящет раб твой благодать пред тобою, господине. 9 Рече же Исав: суть мне многа, брате: да будут тебе твоя. 10 И рече Иаков: аще обретох благодать пред тобою, приими дары от руку моею: сего ради видех лице твое, яко бы аще кто видел лице Божие: и возблаговолиши о мне: 11 приими благословение мое, еже принесох тебе, яко помилова мя Бог, и суть ми вся. И принуди его, и взя. 12 И рече: воставше пойдем прямо. 13 Рече же ему: господин мой весть, яко дети мои юны, овцы же и говяда бременны у мене: аще убо пожену я един день, измрет весь скот: 14 да предидет господин мой пред рабом своим: аз же укреплюся на пути умедлением шествия моего, еже предо мною, и якоже возмогут ити дети, дондеже прииду к господину моему в Сиир. 15 И рече Исав: оставлю с тобою от людий сущих со мною. Он же рече: вскую сие? Довлеет, яко обретох благодать пред тобою, господине. 16 Возвратися

же Исав в том дни путем своим в Сиир: **17** и Иаков поиде в Кушцы, и постави себе тамо храмины, и скоту своему сотвори кушцы: сего ради нарече имя месту тому Кушцы. **18** И прииде Иаков в салим град Сикимск, иже есть в земли Ханаанстей, егда прииде от Месопотамии Сирския, и ста пред лицом града: **19** и купи часть села, идеже постави кушцу свою тамо, у Еммора отца Сихемля, стома агнцы: **20** и постави тамо жертвенник, и призва Бога Израилева.

**34** Изыде же Дина дщи Лиина, юже роди Иакову, познати дщери обитателей. **2** И виде ю Сихем сын Емморов Хорреанин, князь тоя земли: и поим ю, бысть с нею и смири ю: **3** и внят душею Дине дщери Иаковли, и возлюбил девицу, и глагола к ней по мысли девицы. **4** Рече же Сихем ко Еммору отцу своему, глаголя: поими мне отроковицу сию в жену. **5** Иаков же слыша, яко оскверни сын Емморов Дину дщерь его: сынове же его бяху со скоты его на поли: премолча же Иаков, дондеже приити им. **6** Изыде же Еммор отец Сихемль ко Иакову глаголати к нему. **7** Сынове же Иаковли приидоша с поля: егда же услышаша, смутишася мужие, и жалостно им бысть зело, яко не лепо сотвори во Израили, быв со дщерию Иаковлею: и не будет сице. **8** И рече им Еммор, глаголя: Сихем сын мой избра душею дщерь вашу: дадите убо ю в жену ему: **9** и сосватайтеся с нами: дщери ваша дадите нам, и дщери наша поимите сыновом своим, **10** и у нас населитеся: и се, земля пространна пред вами: населитеся и куплю дейте на ней, и притяжите на ней. **11** Рече же Сихем ко отцу ея и ко братьям ея: да обрящу благодать пред вами, и еже аще речете, дадим: **12** умножите вено зело, и дам, якоже речете ми: и дасте ми отроковицу сию в жену. **13**

Отвещаша же сынове Иаковли Сихему и Еммору отцу его с лестию, и глаголаша к ним, яко оскверниша Дину сестру их. **14** И рекоста им Симеон и Левий, братия Динины (сынове Лии): не возможем сотворити глагола сего, дати сестру нашу человеку, иже имать крайнюю плоть необрезанну: есть бо укоризна нам: **15** токмо в сем уподобимся вам и вселимся у вас, аще будете якоже мы и вы, егда обрежете весь мужеск пол: **16** и дадим дщери наша вам, и от дщереи ваших пойдем себе жены и вселимся у вас, и будем яко един род: **17** аще же не послушаете нас, еже обрезатися, поимше дщерь нашу отидем. **18** И угодна быша словеса пред Еммором и пред Сихемом сыном Емморовым: **19** и не премедли юноша сотворити глагол сей: любяше бо дщерь Иаковлю. Сей же бяше славнейший всех, иже в дому отца его. **20** Прииде же Еммор и Сихем сын его пред врата града своего и глаголаста к мужем града своего, рекуще: **21** человецы сии мирни суть, с нами да населятся на земли и да куплю деют на ней: земля же се пространна пред ними: дщери их да пойдем себе в жены, и дщери наша дадим им: **22** в сем точию уподобятся нам человецы, еже жити с нами, яко быти людем едином: внегда обрезати нам весь мужеск пол, якоже и тии обрезани суть: **23** и скоти их и четвероногая, и имения их не наша ли будут? Точию в сем уподобимся им, и вселятся с нами. **24** И послушаша Еммора и Сихема сына его вси исходящии из врат града своего и обрезаша плоть крайнюю свою, всяк мужеск пол. **25** Бысть же в третий день, егда бяху в болезни, взяша два сына Иаковля Симеон и Левий, братия Динины, кийждо свой меч, и внидоша во град безопасно и изсекоша весь мужеск пол: **26** Еммора же и Сихема сына его усекнуша

острием меча, и взяша Дину от дому Сихема и изыдоша. 27 Сынове же Иаковли внидоша к побиенным и разграбиша град, в немже оскверниша Дину сестру их: 28 и овцы их и говяда их и ослы их, и елика бяху во граде, и елика бяху на поли, взяша: 29 и вся чада их и вся сосуды их и жены их плениша: и разграбиша, елика бяху во граде, и елика бяху в домех. 30 Рече же Иаков к Симеону и Леви: ненавистна мя сотвористе, яко злу мне быти всем живущым на земли, в Хананеах и Ферезеах, аз же мал есмь числом: и собравшеся на мя изсекут мя, и истреблен буду аз и дом мой. 31 Они же рекоша: аки блудницу ли возимеют сестру нашу?

**35** Рече же Бог ко Иакову: востав възди на место Вефиль, и живи тамо, и сотвори тамо жертвенник Богу явльшемуся тебе, егда бежал еси от лица Исава брата твоего. 2 Рече же Иаков дому своему и всем иже с ним: поверзите боги чуждыя, иже с вами, от среды вас и очиститесь, и измените ризы своя: 3 и воставше въздем в Вефиль и сотворим тамо жертвенник Богу послушавшему мене в день скорбения, Иже бе со мною и спасе мя на пути, в оньже ходих. 4 И вдаша Иакову боги чуждыя, иже бяху в руках их, и усерязи яже во ушесех их: и скры я Иаков под теревинфом иже в Сикимех: И погуби я до днешняго дне. 5 И воздвижесе Израиль от Сикимов, и бысть страх Божий на градех, иже окрест их: и не гнаша вслед сынов Израилевых. 6 Прииде же Иаков в Лузу, яже есть в земли Ханаанстей, яже есть Вефиль, сам и вси людие, иже бяху с ним, 7 и созда тамо жертвенник, и прозва имя месту тому Вефиль: тамо бо явился ему Бог, егда бежаше он от лица Исава брата своего. 8 Умре же Девора, доилица Ревеккина, и погребоша ю ниже Вефиля под дубом, и прозва



имя ему дуб плача. 9 Явился же Бог Иакову еще в Лузе, егда прииде от Месопотамии Сирския, и благослови его Бог 10 и рече ему Бог: имя твое не прозовется ктому Иаков, но Израиль будет имя тебе. И нарече имя ему Израиль. 11 Рече же ему Бог: Аз Бог твой: расти и множися: языцы и собрания языков будут от тебе, и царие из чресл твоих изыдут: 12 и землю, юже дах Аврааму и Исааку, тебе дах ю, тебе будет, и семени твоему по тебе дам землю сию. 13 Взыде же Бог от него от места, идеже глагола с ним: 14 и постави Иаков столп на месте, идеже глагола с ним Бог, столп каменный, и пожре на нем жертву и возлия на него елей: 15 и прозва Иаков имя месту тому, идеже глагола с ним Бог, Вефиль. 16 (Востав же (Иаков) от Вефиля, и постави кущу свою далее столпа Гадер.) бысть же егда приближися к хаврафе приити до земли Ефрафа, роди Рахиль и возбедствова в рождении: 17 бысть же внегда жестоко ей родити, рече ей баба: дерзай, ибо сей тебе есть сын. 18 Бысть же егда оставляше ю душа, умираше бо, прозва имя ему Сын Болезни моя: отец же прозва имя ему Вениамин. 19 Умре же Рахиль, и погребоша ю на пути ипподрома Ефрафы: сия есть Вифлеем: 20 и постави Иаков столп на гробе ея: сей есть столп над гробом Рахилиным даже до дне сего. 21 Изыде же оттуду Израиль и постави кущу свою за столпом Гадер. 22 Бысть же егда вселися Израиль в земли той, иде Рувим и спа с Валлою, наложницею отца своего Иакова. И слыша Израиль, и зло явился пред ним. Беша же сынове Иаковли дванадесять. 23 Сынове Лиины: Рувим, первенец Иаковль, Симеон, Левий, Иуда, Иссахар, Завулон. 24 Сынове же Рахилины: Иосиф и Вениамин. 25 Сынове же Валлы, рабы Рахилины: Дан и

Неффалим. 26 Сынове же Зелфы, рабы Лиины: Гад и Асир. Сии сынове Иаковли, иже родишася ему в Месопотамии Сирстей. 27 Прииде же Иаков ко Исааку отцу своему (еще живу суцу ему) в Мамврию, во Град Польный: сей есть Хеврон в земли Ханаанстей, идеже обита Авраам и Исаак. 28 Быша же дние Исааковы, яже поживе, сто осмьдесят лет: 29 и ослабев Исаак умре, и приложися к роду своему стар исполнь дний: и погребоста его Исав и Иаков, сынове его.

**36** Сии же родове Исавли, сей есть Едом. 2 Исав же поя себе жены от дочерей Хананейских: Аду, дочь Елома Хеттеина, и Оливему, дочь Ананю сына Севегона Евеина, 3 и Васемафу, дочь Исмаилю, сестру Навеофову. 4 Родил же Ада Исаву Елифаса, и Васемаф родил Рагуила, 5 и Оливема родил Иеуса и Иеглома и Кореа: сии сынове Исавли, иже быша ему в земли Ханаанстей. 6 Поя же Исав жены своя и сыны своя и дочери своя, и вся телеса дому своего и вся имения своя и вся скоты, и вся, елика притяжа, и вся, елика приобрете в земли Ханаанстей, и отиде Исав из земли Ханаанския от лица Иакова брата своего: 7 бяху бо имения их многа, еже жити вкупе: и не можаше земля обитания их вместити их, от множества имений их. 8 Вселися же Исав на горе Сиир: Исав той есть Едом. 9 Сии же родове Исава, отца Едомля, на горе Сиир: 10 и сия имена сынов Исавлих: Елифас, сын Ады, жены Исавли, и Рагуил, сын Васемафы, жены Исавли. 11 Быша же Елифасу сынове: Феман, Омар, Софар, Гофом и Кенез. 12 Фамна же бяше наложница Елифаса, сына Исавля, и родил Елифасу Амалика: сии сынове Ады, жены Исавли. 13 Сии же сынове Рагуиловы: Нахоф, Заре, Соме и Мозе: сии быша сынове

Васемафы, жены Исавли. 14 Сии же сынове Оливемы  
дщере Анани сына Севегоня, жены Исавли: роди же Исаву  
Иеуса и Иеглома и Кореа. 15 Сии старейшины сына Исавля,  
сынове Елифаса, первенца Исавля: старейшина Феман,  
старейшина Омар, старейшина Софар, старейшина Кенез,  
16 старейшина Корей, старейшина Гофом, старейшина  
Амалик: сии старейшины Елифаса в земли Идумейстей,  
сии сынове Адины. 17 И сии сынове Рагуила, сына Исавля:  
старейшина Нахоф, старейшина Заре, старейшина Соме,  
старейшина Мозе: сии старейшины Рагуиловы в земли  
Едомстей, сии сынове Васемафы, жены Исавли. 18 Сии  
же сынове Оливемы, жены Исавли: старейшина Иеус,  
старейшина Иеглом, старейшина Корей: сии старейшины  
Оливемы, дщере Анани, жены Исавли, 19 сии сынове Исавли  
и сии старейшины их, сии суть сынове Едомли. 20 Сии же  
сынове Сиира Хорреова жившаго на земли: Лотан, Совал,  
Севегон, Ана 21 и Дисон, и Асар и Рисон: сии старейшины  
Хорреова сына Сиира в земли Едомстей. 22 Быша же сынове  
Лотани: Хорри и Еман, сестра же Лотаня Фамна. 23 Сии же  
сынове Соваловы: Голам и Манахаф, и Гевил и Софар и  
Омар. 24 И сии сынове Севегони: Аие и Ана: сей есть Ана,  
иже обрете иаминь в пустыни, егда пасяше подяремники  
Севегона, отца своего. 25 Сии же сынове Анани: Дисон и  
Оливема, дщи Ананя. 26 Сии же сынове Дисоновы: Амада  
и Асван, и Ифран и Харран. 27 Сии же сынове Асаровы:  
Валаам и Зукам, и Укам и Укан. 28 Сии же сынове Рисоновы:  
Ос и Аран. 29 Сии же старейшины Хорриовы: старейшина  
Лотан, старейшина Совал, старейшина Севегон, старейшина  
Ана, 30 старейшина Дисон, старейшина Асар, старейшина

Рисон: сии старейшины Хорриовы во областех их в земли Едомли. 31 И сии царие царствовавши во Едоме, прежде царствования царей во Израили: 32 и царствова во Едоме Валак, сын Веоров: имя же граду его Деннава. 33 Умре же Валак, и царь бысть по нем Иовав, сын Зарин от Восорры. 34 Умре же Иовав, и царь бысть по нем Асом от земли Феманони. 35 Умре же Асом, и бысть царь по нем Адад сын Варатов, иже изсече Мадиама на поли Моавли: имя же граду его Гетфем. 36 Умре же Адад, и царь бысть по нем Самада от Массеккаса. 37 Умре же Самада, и царь бысть по нем Саул из Роовофа, иже есть близ реки. 38 Умре же Саул, и царь бысть по нем Вааленнон, сын Аховорь. 39 Умре же Вааленнон сын Аховорь, и царь бысть по нем Арад, сын Варатов: и имя граду его Фогор, имя же жене его Метевеиль, дщерь Матраифа, сына Мезоовля. 40 Сия имена старейшин Исавлих в племенех их, по месту их, во странах их и в языцех их: старейшина Фамна, старейшина Гола, старейшина Иефер, 41 старейшина Оливема, старейшина Ила, старейшина Финон, 42 старейшина Кенез, старейшина Феман, старейшина Мазар, 43 старейшина Магедиил, старейшина Зафой: сии старейшины Едомли, живуции в земли притяжания их: сей Исав отец Едомль.

**37** Вселися же Иаков в земли, идеже обита Исаак, отец его, в земли Ханаани. 2 Сии же роди Иаковли. Иосиф же бяше седминадесяти лет, пасый овцы отца своего с братиею своею, юн сый, с сынми Валлы и с сынми Зелфы, жен отца своего: нанесоша же на Иосифа злу клевету ко Израилю отцу своему. 3 Иаков же любляше Иосифа паче всех сынов своих, яко сын в старости ему бысть: и сотвори ему ризу

пестру. 4 Видевше же братия его, яко любит его отец паче всех сынов своих, возненавидеша его и не можаху глаголати к нему ничтоже мирно. 5 Видев же Иосиф сон, поведи и братии своей 6 и рече им: послушайте сна сего, егоже видех: 7 мнх вас вяжущих снопы среде поля: и воста мой сноп и ста прямо, ваши же снопы обратившися поклонишася моему снопу. 8 Реша же ему братия его: еда царствуя царствовати будеши над нами, или господствуя господствовати будеши над нами? И приложиша еще ненавидети его снов ради его и ради словес его. 9 Виде же сон другой и поведи его отцу своему и братии своей, и рече: се, видех другой сон: аки бы солнце и луна и единонадесять звезд поклоняхуся мне. 10 И запрети ему отец его и рече ему: что сон сей, егоже еси видел? Еда пришедше приидем аз и мати твоя и братия твоя поклонитися тебе до земли? 11 Позавидеша же ему братия его: отец же его соблюде слово сие. 12 Отидоша же братия его пасти овцы отца своего в Сихем. 13 И рече Израиль ко Иосифу: еда братия твоя не пасут в Сихеме? Гряди да послю тя к ним. Рече же ему: се, аз. 14 Рече же ему Израиль: шед, виждь, аще здравствуют братия твоя и овцы, и повеждь ми. И посла его от юдоли Хеврони. И прииде в Сихем: 15 и обрете его человек заблуждающа на поли: вопроси же его человек глаголя: чесого ищещи? 16 Он же рече: братии моя ищю: повеждь ми, где пасут. 17 Рече же ему человек: отидоша отсюда: слышах бо их глаголющих: пойдем в Дофаим. И иде Иосиф вслед братии своея и обрете я в Дофаиме. 18 Предузреша же его издалече, прежде приближения его к ним, и зле умыслиша убити его: 19 рече же кийждо к брату своему: се, сновидец оный идет: 20 ныне убо приидите,

убиём его и ввержим его во един от ровов, и речем: зверь лют снеде его: и узрим, что будут соня его. 21 Слышав же Рувим, отя его из рук их и рече: не убиём его на души. 22 Рече же им Рувим: не пролийте крове, вверзите его во един от ровов сих, иже в пустыни, руки же не возложите на него: (тцашесе бо) яко да изымет его от рук их и отдаст его отцу своему. 23 Бысть же егда прииде Иосиф к братии своей, совлекоша со Иосифа ризу пеструю, яже на нем, 24 и поемше его ввергоша в ров: ров же тощъ, воды не имяше. 25 И седоша ясти хлеб, и воззревше очима видеша, и се, путницы Исмаилтяне идяху от Галаада, и велблюды их полны фимиама и ритины и стакти: идяху же везуще во Египет. 26 Рече же Иуда ко братии своей: кая польза, аще убиём брата нашего и скроем кровь его? 27 Грядите продадим его Исмаилтяном сим: руце же наши да не будут на нем, яко брат наш и плоть наша есть. Послушаша же братия его. 28 И мимоидоша человецы Мадиямстии купцы: и извлекоша и возведоша Иосифа из рова, и продаша Иосифа Исмаилтяном на двадесять златниц. И поведоша Иосифа во Египет. 29 Возвратися же Рувим к рову и не узре Иосифа в рову: и растерза ризы своя, 30 и прииде ко братии своей и рече: отрочища несть, аз же камо иду ктому? 31 Вземше же ризу Иосифову, заклаша козлище от коз и помазаша ризу кровию: 32 и послаша ризу пеструю, и принесоша ко отцу своему и рекоша: сию обретохом: познавай, аще риза сына твоего есть, или ни? 33 И позна ю и рече: риза сына моего есть: зверь лют снеде его: зверь восхити Иосифа. 34 И растерза Иаков ризы своя, и возложи вретище на чресла своя, и плакашесе сына своего дни многи. 35 Собрашася

же вси сынове его и дщери и приидоша утешити его: и не хотяше утешитися, глаголя: яко сниду к сыну моему сетуя во ад. И плакася о нем отец его. (Sheol h7585) 36 Мадiane же продаша Иосифа во Египет Пентефрию евнуху фараонову, архимагиру.

**38** Бысть же в то время, отиде Иуда от братии своея и прииде к человеку некоему Одолламитину, емуже имя Ирас: 2 и виде тамо Иуда дщерь человека Хананейска, ейже имя Сава: и поят ю, и вниде к ней: 3 и заченши роди сына, и нарече имя ему Ир: 4 и заченши еще роди сына и нарече имя ему Авнан: 5 и приложивши роди сына (третьяго) и нарече имя Силом: сия же бе в Хасве, егда роди сих. 6 И поя Иуда жену Иру первенцу своему, ейже имя Фамарь. 7 Бысть же Ир первенец Иудин зол пред Господем: и уби его Бог. 8 Рече же Иуда Авнану: вниди к жене брата твоего и совокупися с нею, и возстави семя брату твоему. 9 Познав же Авнан, яко не ему будет семя, бысть егда вхождаше к жене брата своего, проливаше (семя) на землю, еже не дати семене брату своему: 10 зло же явися пред Богом, яко сотвори сие: и умертви и сего. 11 Рече же Иуда Фамари, невестце своей (по смерти дву сынов своих): седи вдовою в дому отца твоего, дондеже велик будет Силом, сын мой. Рече бо (во уме си): да не когда умрет и сей, якоже и братия его. Отшедши же Фамарь, седяше в дому отца своего. 12 Умножишася же дние, и умре Сава жена Иудина. И утешився Иуда, взыде к стригуцым овцы его сам, и Ирас пастырь его Одолламитин, во Фамну. 13 И возвестиша Фамари невестце его, глаголюще: се, свекор твой восходит во Фамну стрищи овцы своя. 14 Она же свергши ризы вдовства с себе, облечеса в ризу

летнюю и украсися, и седе пред враты Енани, яже суть на пути Фамны: ведяше бо, яко велик бысть Силом: сей же не даде ея ему в жену. 15 И видев ю Иуда, возмне ю блудницу быти: покры бо лице свое, и не позна ея. 16 Уклонися же к ней путем и рече ей: попусти ми внити к себе. Не позна бо, яко невестка ему есть. Она же рече: что ми даси, аще увидеши ко мне? 17 Он же рече: аз тебе послю козлище коз от овец моих. Она же рече: аще даси ми залог, дондеже пришлещи. 18 Он же рече: кий залог тебе дам? Она же рече: перстень твой и гривну, и жезл иже в руке твоей. И даде ей, и вниде к ней, и зача во утробе от него. 19 И воставши отиде, и сверже ризу летнюю с себе и облечеса в ризы вдовства своего. 20 Посла же Иуда козлище от коз рукою пастыря своего Одолламитина взяти залог от жены, и не обрете ея. 21 Вопросы же мужей места того и рече им: где есть блудница бывшая во Енани на распутии? И реша: не бе zde блудница. 22 И возвратися ко Иуде и рече: не обретох: и человецы места того глаголют: несть zde блудницы. 23 Рече же Иуда: да имать та: но да не когда посмеются нам: аз убо послах козлище сие, ты же не обрел еси. 24 Бысть же по трех месяцев, поведаша Иуде, глаголюще: соблуди Фамарь невестка твоя, и се, во утробе имать от блуда. Рече же Иуда: изведите ю, и да сожгут ю. 25 Она же ведома посла к свекру своему, глаголющи: от человека, егоже сия суть, аз во утробе имам. И рече: познай, чий перстень и гривна и жезл сей. 26 Позна же Иуда и рече: оправдася Фамарь паче мене, яко не дах ея Силому сыну моему. И не приложи ктому познати ю. 27 Бысть же егда раждаше, и беста близнята во утробе ея. 28 Бысть же в рождении ея, един произнесе руку: взявши же



баба навяза на руку его червлень, глаголющи: сей изыдет первый. 29 Егда же вовлече руку, и абие изыде брат его. Она же рече: что пресечесе тебе ради преграждение? И прозва имя ему Фарес. 30 И посем изыде брат его, емуже бе на руце его червлень: и прозва имя ему Зара.

**39** Иосиф же приведен бысть во Египет. И купи его Пентефрий евнух фараонов архимагир, муж Египтянин, от рук Исмаилтян, иже приведоша его тамо. 2 И бяше Господь со Иосифом: и бяше муж благополучен, и бысть в дому господина своего Египтянина. 3 Ведяше же господин его, яко Господь бе с ним, и елика творит, Господь благоустраивает в руку его. 4 И обрете Иосиф благодать пред господином своим и благоугоди ему: и постави его над домом своим, и вся, елика быша ему, даде в руки Иосифовы. 5 Бысть же егда постави его над домом своим и над всеми, елика имеяше, и благослови Господь дом Египтянина Иосифа ради: и бысть благословение Господне на всем имении его в дому и в селех его. 6 И предаде вся, елика быша ему, в руки Иосифовы: и не ведяше от сущих у себе ничтоже, кроме хлеба, егоже ядыше сам: и бяше Иосиф добр образом и красен взором зело. 7 И бысть по словесех сих, и возложи жена господина его очи своя на Иосифа и рече: пребуди со мною. 8 Он же не хотяше и рече жене господина своего: аще господин мой не весть мене ради ничтоже в дому своем, и вся, елика суть ему, вдаде в руце мои, 9 и ничто есть выше мене в дому сем, ниже изято бысть от мене чтолибо, кроме тебе, понеже ты жена ему еси: и како сотворю глагол злый сей и согрешу пред Богом? 10 Егда же Иосифу глаголаше день от дне, и не послушаше ея еже спати и быти с нею. 11

Бысть же сицевый некий день, и вниде Иосиф в дом делати дела своя, и никтоже бяше от сущих в дому внутрь: 12 и ухвати его за ризы, глаголющи: лязи со мною. И оставив ризы своя в руках ея, убеже и изыде вон. 13 И бысть егда вниде, яко оставль ризы своя в руках ея, бежа и изыде вон: 14 и воззва сущих в дому и рече им глаголющи: видите, введе нам отрока Евреина наругаться нам: вниде ко мне, глаголя: пресли со мною: и возопих гласом великим: 15 и егда услыша он, яко возвысих глас мой и возопих, оставль ризы своя у мене, отбеже и изыде вон. 16 И удержав ризы у себе, дондеже прииде господин в дом свой. 17 И поведи его по словесех сих, глаголющи: вниде ко мне отрок Евреин, егоже ввел еси к нам, поругаться мне, и рече ми: да буду с тобою: 18 егда же услыша, яко воздвигох глас мой и возопих, оставль ризы своя у мене, отбеже и изыде вон. 19 И бысть егда услыша господин его глаголы жены своея, елика рече к нему, глаголющи: сице сотвори ми отрок твой: и разгневался яростию, 20 и взял господин Иосифа, вверже его в темницу, в место, идеже узники царицы держатся тамо в твердыни. 21 И бяше Господь со Иосифом, и возлия на него милость, и даде ему благодать пред начальным стражем темничным: 22 и вваде старейшина стражей темницу в руке Иосифу и всех вверженных в темницу: и вся, елика творяху тамо, той бе творяй. 23 Старейшина же стражей темничных ничтоже бе ведый его ради: вся бо быша в руках Иосифовых, занеже Господь бяше с ним: и елика той творяше, Господь благопоспешаше в руку его.

**40** Бысть же по словесех сих, согреша старейшина винарск царя Египетска и старейшина житарск господину своему

царю Египетскому. 2 И разгневался фараон на оба евнухи своя, на старейшину винарска и на старейшину житарска, 3 и вверже их в темницу во узилище, в место, идеже Иосиф ввержен бяше. 4 И вручи их старейшина темницы Иосифу, и предста им: и беста дни (некия) в темнице, 5 и видеста оба сон во едину ноць: видение же сонное старейшины винарска и старейшины житарска, иже беста царя Египетска, суще в темнице, бяше сие. 6 Вниде же к ним Иосиф заутра и виде их, и бяху смущени: 7 и вопрошаше евнухов фараоних, иже быша с ним в темнице, у господина своего, глаголя: что, яко лица ваша уныла днесь? 8 Они же реша ему: сон видехом, и разсуждаяй его несть. Рече же им Иосиф: еда не Богом изявление их есть? Поведите убо мне. 9 И поведи старейшина винарска сон свой Иосифу и рече: во сне моем бяше виноград предо мною: 10 в винограде же три леторасли, и той цветущь произнесе отрасли, зрелы грозды лозныя: 11 и чаша фараонова в руке моей: и взях грезн, и изжах оный в чашу, и дах чашу в руку фараоню. 12 И рече ему Иосиф: сие разсуждение сему: три леторасли три дни суть: 13 еще три дни, и помянет фараон сан твой, и паки поставит тя в старейшинство твое винарско, и подаси чашу фараону в руку его по сану твоему первому, якоже был еси виночерпчий: 14 но помяни мя тобою, егда благо ти будет, и сотвориши надо мною милость, и да помянеши о мне фараону, и изведеши мя от твердыни сея: 15 яко татьбою украден бых из земли Еврейския, и zde ничто зло сотворих, но ввергоша мя в ров сей. 16 И виде старейшина житарск, яко прямо разсуди, и рече Иосифу: и аз видех сон, и мняхся три кошницы хлебов держати на главе моей: 17 в кошнице

же верхней от всех родов, яже фараон яст, дело хлебное, и птицы небесныя ядыху тая от кошницы, яже на главе моей. 18 Отвещав же Иосиф, рече ему: сие разсуждение его: три кошницы три дние суть: 19 еще три дние, и отимет фараон главу твою от тебе и повесит тя на древе, и изядят птицы небесныя плоть твою от тебе. 20 Бысть же в день третий, день рождения бяше фараоня, и творяше пир всем отроком своим: и помяну старейшинство старейшины винарска и старейшинство старейшины житарска, посреде отрок своих: 21 и постави старейшину винарска в старейшинство его: и подаде чашу в руку фараону: 22 старейшину же житарска повеси (на древе), якоже сказа има Иосиф. 23 И не помяну старейшина винарска Иосифа, но забы его.

**41** Бысть же по двою лету дний, фараон виде сон: мняшеся стояти при реце: 2 и се, аки из реки исхождаху седмь крав добры видом и избранны телесы, и пасяхуся по берегу: 3 другия же седмь крав изыдоша по сих из реки, злы видом и телесы худы, и пасяхуся с кравами по берегу речному: 4 и поядоша седмь кравы злыя и худыя телесы седмь крав добрых видом и избранных телесы: (и сия невидимы быша, яко внидоша в чресла их). Воста же фараон. 5 И виде сон второй: и се, седмь класи исхождаху из стеблия единого избранны и добры: 6 друзии же седмь класи тонцыи, истончени ветром, израстаху по них: 7 и пожроша седмь класи тонцыи и истончени ветром седмь класов избранных и полных. Воста же фараон, и бяше сон. 8 Бысть же заутра, и возмутися душа его: и послав, созва вся сказатели Египетския и вся мудрыя его: и поведа им фараон сон свой: и не бяше сказуяй того фараону. 9 И рече старейшина

винарск к фараону, глаголя: грех мой воспоминаю днесь: 10 фараон разгневался на рабы своя и вверже нас в темницу в дому архимагира, мене и старейшину житарска: 11 и видехом сон оба единыя нощи аз и он, кийждо свой сон видехом: 12 бяше же тамо с нами юноша, отрок Евреин архимагиров, и поведяхом ему, и разсуди нам: 13 бысть же, якоже сказа нам, тако и случися, мне паки быти во своем старейшинстве, а оному повешену. 14 Послав же фараон, призва Иосифа: и изведоша его из твердыни, и остригоша его, и измениша ризы ему, и прииде к фараону. 15 Рече же фараон Иосифу: сон видех, и сказуяй его несть: аз же слышах о тебе глаголющих, яко слышав сны разсуждаеши тыя. 16 Отвещав же Иосиф фараону, рече: без Бога не отвещается спасение фараону. 17 Рече же фараон Иосифу, глаголя: во сне моем мняхся стояти на брезе речнем: 18 и аки из реки исхождаху седмь кравы добры видом и избранны телесы, и пасяхуся по брегу: 19 и се, другия седмь крав исхождаху вслед их из реки, злы и недобры видом и худы телесы, яковых не виде таковых во всей земли Египетстей худдших: 20 и изядоша седмь кравы злыя и худыя седмь крав первых добрых и избранных: 21 и внидоша во утробы их, и не явишася, яко внидоша во утробы их: и обличия их зла быша, яко и исперва. Востав же, (паки) уснух, 22 и видех паки во сне моем, и аки седмь класи исхождаху из единого стебля полны и добры: 23 друзии же седмь класи тонцыи и ветром истончени изницаху вслед их: 24 и пожроша седмь класи тонцыи и ветром истончени седмь класов добрых и полных. Рех убо сказателем, и не бысть поведаяй мне того. 25 И рече Иосиф фараону: сон фараонов един есть:

елика Бог творит, показа фараону: 26 семь кравы добрыя  
семь лет суть: и семь класи добрии семь лет суть: сон  
фараонов един есть: 27 и семь кравы худыя, яже изыдоша  
по сих, семь лет суть, и семь класи тонцыи и истончени  
ветром семь лет суть: будут семь лет глада: 28 слово  
же еже рех фараону, елика Бог творит, показа фараону:  
29 се, семь лет приходит, обилность многа во всей земли  
Египетстей: 30 приидут же семь лет глада по сих, и забудут  
сытости будущия во всем Египте, и погубит глад землю,  
31 и не познается обилие на земли от глада будущего по  
сих: силен бо будет зело: 32 повторися же сон фараону  
дважды, яко истинно будет слово еже от Бога, и ускорит  
Бог сотворити оно: 33 ныне убо усмотри человека мудра и  
смыслена и постави его над землею Египетскою: 34 и да  
сотворит фараон и поставит местоначалники по земли, и  
да собирают пятую часть от всех плодов земли Египетския  
седми лет обилных, 35 и да соберут всякую пищу седми  
лет грядущих добрых сих: и да соберется пшеница под руку  
фараону, пища во градех да хранится: 36 и будет пища  
соблюдена земли на семь лет гладных, яже имут быти в  
земли Египетстей, да не потребится земля в гладе. 37 Угодно  
же бысть слово пред фараоном и пред всеми рабы его. 38  
И рече фараон всем рабом своим: еда обрящем человека  
сицеваго, иже имать Духа Божия в себе? 39 Рече же фараон  
Иосифу: понеже показа Бог тебе вся сия, несть человека  
мудрейша и смысленнейша паче тебе: 40 ты будеши в дому  
моем, и уст твоих да послушают вси людие мои, разве  
престолом аз более тебе буду. 41 Рече же фараон Иосифу  
се, поставляю тя днесь над всею землею Египетскою. 42

И снем фараон перстень с руки своя, возложи его на руку Иосифову, и облече его в ризу червлену, и возложи гривну злату на выю его, 43 и всади его на колесницу свою вторую, и проповеда пред ним проповедник: и постави его над всюю землею Египетскою. 44 Рече же фараон Иосифу: аз фараон: без тебе не воздвигнет руки своя никтоже во всей земли Египетстей. 45 И нарече фараон имя Иосифу Псонфомфаних: и даде ему Асенефу, дочь Петефриа жреца Илиопольскаго, ему в жену. 46 Иосиф же бяше лет тридесяти, егда предста фараону царю Египетскому. Изыде же Иосиф от лица фараоня и пройде всю землю Египетскую. 47 И сотвори земля в седми летех обилну жатву. 48 И собра всякую пищу седми лет, в нихже бяше обилность в земли Египетстей: и положи пищу во градех: пищи поль града, сущих окрест его, положи в нем. 49 И собра Иосиф пшеницу яко песок морской многу зело, дондеже не можаху исчести: без числа бо бяше. 50 Иосифу же беста два сына, прежде пришествия седми лет гладных, ихже роди ему Асенефа, дочь Петефриа жреца Илиопольска: 51 нарече же Иосиф имя первенцу Манассиа, (глаголя: ) яко забыти мне сотвори Бог вся болезни моя, и вся, яже отца моего. 52 Имя же второму нарече Ефраим, (глаголя: ) яко возрасти мя Бог в земли смирения моего. 53 Минуша же семь лет обилных, яже быша в земли Египетстей, 54 и начаша семь лет гладных приходити, якоже рече Иосиф. И бысть глад по всей земли: во всей же земли Египетстей быша хлебы. 55 И взалка вся земля Египетская: возопи же народ к фараону о хлебах. Рече же фараон всем Египтяном: идите ко Иосифу, и еже речет вам, сотворите. 56 И глад бяше на лица всея

земли. Отверзе же Иосиф вся житницы, и продаваше всем Египтяном: 57 и вся страны прихождаху во Египет, куповати ко Иосифу: обдержаше бо глад всю землю.

**42** Видев же Иаков, яко купля есть (пшеницы) во Египте, рече сыном своим: почто не радите? 2 Се, слышах, яко есть пшеница во Египте: идите тамо и купите нам мало пищи, да живи будем и не умрем. 3 Идоша же братия Иосифовы десять купити пшеницы во Египет. 4 Вениамина же, брата Иосифова, не отпусти с братиею его, рече бо: да не когда случится (на пути) ему зло. 5 Приидоша же сынове Израилевы купити с приходящими: бяше бо глад в земли Ханаанстей. 6 Иосиф же бяше князь земли: сей продаваше всем людем земли (тоя). Пришедше же братия Иосифовы, поклонишася ему лицом до земли. 7 Видев же Иосиф братию свою, позна: и отчуждашеся их, и глаголаше им жестоко, и рече им: откуда приидосте? Они же реша: от земли Ханаанския купити пищи. 8 Позна же Иосиф братию свою: они же не познаша его. 9 И помяну Иосиф сны своя, яже виде он: и рече им: соглядатаи есте, соглядати путей страны (сея) приидосте. 10 Они же реша: ни, господине, раби твои приидохом купити пищи: 11 вси есмы сынове единого человека: мирницы есмы, не суть раби твои соглядатаи. 12 Рече же им: ни, но пути земли (сея) приидосте соглядати. 13 Они же реша: дванадесять есмы братия раби твои в земли Ханаани: и се, менший (от нас) со отцем нашим днесь, а другого несть. 14 Рече же им Иосиф: сие есть, еже рекох вам, глаголя, яко соглядатаи есте: 15 в сем явитесь: тако ми здравия фараоня, не изыдете отсюда, аще брат ваш менший не приидет семо: 16 послите от себе единого, и возьмите



брата вашего: вы же держими будите, дондеже яве будут словеса ваша, аще истинствуете, или ни: аще же ни, тако ми здравия фараоня, воистинну соглядатаи есте. 17 И даде я под стражу на три дни. 18 Рече же им в день третий: сие сотворите, и живи будете: Бога бо аз боюся: 19 аще мирницы есте, брат ваш да удержится един под стражею: сами же идите и отвезите купленную пшеницу вашу, 20 и брата вашего меньшаго приведите ко мне, и верна будут словеса ваша: аще же ни, умрете. И сотвориша тако. 21 И рече кийждо к брату своему: ей, во гресех бо есмы брата ради нашего, яко презрехом скорбение души его, егда моляшеся нам, и не послушахом его: и сего ради прииде на ны скорбение сие. 22 Отвещав же Рувим, рече им: не рех ли вам, глаголя: не преобидите детища? И не послушасте мене: и се, кровь его взыскуется. 23 Тии же не ведеша, яко разумеет Иосиф: толмачь бо между ими бяше. 24 Отвратився же от них, проплакася Иосиф: и паки прииде к ним и рече им. И поя Симеона от них, и связа его пред ними. 25 Повеле же Иосиф наполнити сосуды их пшеницы и возвратити сребро их комуждо во вретнице свое и дати им брашно на путь. И бысть им тако. 26 И возложивше пшеницу на ослы своя, отидоша оттуду. 27 Отрешив же един вретнице свое дати пищу ослом своим, идеже сташа, и виде узол сребра своего, и бе верху устия вретичнаго. 28 И рече братии своей: возвращено ми есть сребро, и се, сие во вретници моем. И ужасеся сердце их: и возмятошася, друг ко другу глаголюще: что сие сотвори Бог нам? 29 Приидоша же ко Иакову, отцу своему, в землю Ханааню и поведаша ему вся случившаяся им, глаголюще: 30 глагола муж господин земли (оныя) к нам жестоко и

вверже нас в темницу, аки соглядающих землю: 31 рехом же ему: мирницы есмы, несмы соглядатаи: 32 дванадесять братия есмы, сынове отца нашего: единаго несть, а менший со отцем нашим днесь в земли Ханаани: 33 рече же нам муж господин земли (тоя): по сему увем, яко мирницы есте: брата единаго оставите zde у мене, а купленную пшеницу дому вашему возьмете отидите 34 и приведите ко мне брата вашего меншаго: и увем, яко не соглядатаи есте, но яко мирницы есте: и брата вашего отдам вам, и куплю творите в земли. 35 Бысть же егда испраздняху вретница своя, и бяше узол сребра во вретници коегождо их: и видеша узлы сребра своего сами и отец их, и убояшася. 36 Рече же им Иаков отец их: мене безчадна сотвористе: Иосифа несть, Симеона несть, и Вениамина ли поймете? На мя быша сия вся. 37 Рече же Рувим отцу своему, глаголя: двоих сынов моих убий, аще не приведу его к тебе: даждь его в руце мои, и аз приведу его к тебе. 38 Он же рече: не пойдет сын мой с вами, яко брат его умре, и той един оста: и случится ему зло на пути, в оньже аще пойдете, и сведете старость мою с печалию во ад. (Sheol h7585)

**43** Глад же одоле на земли. 2 Бысть же егда скончаша пшеницу ядуще, юже принесоша из Египта: и рече им отец их: паки шедше купите нам мало пищи. 3 Рече же ему Иуда, глаголя: клятвою засвидетелствова нам муж господин земли (тоя) глаголя: не узрите лица моего, аще брат ваш менший не придет с вами: 4 аще убо послеша брата нашего с нами, пойдём и купим тебе пищи: 5 аще же не послеша брата нашего с нами, не пойдём: муж бо рече нам, глаголя: не узрите лица моего, аще брат ваш менший не придет с вами.

6 Рече же Израиль: почто зло сотвористе ми, поведавше мужу, яко есть вам брат? 7 Они же реша: вопрошая вопросы нас муж и рода нашего, глаголя: аще еще отец ваш жив есть, и аще есть вам брат? И поведахом ему по вопросу сему: еда ведехом, яко речет нам: приведите брата вашего? 8 Рече же Иуда ко Израилью, отцу своему: отпусти отрочища со мною: и воставше пойдем, да живи будем и не умрем, и мы и ты и имение наше: 9 аз же возму его: от руку мою взыщи его: аще не приведу его к тебе, и поставлю его пред тобою, грешен буду к тебе вся дни: 10 аще бо быхом не умедлили, уже возвратилися бы дважды. 11 Рече же им Израиль отец их: аще тако есть, сие сотворите: возьмите от плодов земных в сосуды своя и донесите человеку дары, ритину, мед, фимиама же и стаки, и теревинф и орехи: 12 и серебро сугубо возьмите в руке свои, и серебро обретенное во вретищах ваших возвратите с собою, да не како неведение есть: 13 и брата своего поимите, и воставше идите к мужу: 14 Бог же мой да даст вам благодать пред мужем и отпустит брата вашего единого, и Вениамина: аз бо якоже обезчадох, обезчадох. 15 Возмше же мужие дары сия, и серебро сугубое взяша в руке свои, и Вениамина: и воставше приидоша во Египет, и сташа пред Иосифом. 16 Виде же их Иосиф, и Вениамина брата своего единоматерня, и рече строителю дому своего: введи мужы (сия) в дом, и заколи от скота, и уготовай: со мною бо ясти имут мужие (сии) хлеб в полудне. 17 Сотвори же человек, якоже рече Иосиф, и введе мужы в дом Иосифов. 18 Видевше же мужие, яко введоша их в дом Иосифов, реша: сребра ради возвращеннаго во вретищах наших первее, вводят ны, еже бы оклеветати нас и нанести

на ны, да поймут нас в рабы, и ослы наша. 19 Приступивше же к человеку существу над домом Иосифовым, рекоша ему при вратех дому, 20 глаголюще: молим тя, господине: приидохом первее купити пищи: 21 бысть же егда приидохом на стан и отрешихом вретища своя, и се, серебро коегождо во вретищи его: тое серебро наше весом возвратихом ныне руками нашими: 22 и серебро другое принесохом с собою купити пищи: не вемы, кто вложи серебро во вретища наша. 23 Рече же им: мир вам, не бойтесь: Бог ваш и Бог отец ваших даде вам сокровища во вретищах ваших: а серебро ваше за приятое имею. И изведе к ним Симеона: 24 и принесе воду омыти нозе им, и даде пажити ослом их. 25 Уготоваша же дары, дондеже приидет Иосиф в полудне: слышаша бо, яко тамо имать обедати. 26 Прииде же Иосиф в дом: и принесоша ему дары, яже имяху в руках своих, в дом: и поклонишася ему лицом до земли. 27 И вопроси их: здрави ли есте? И рече им: здрав ли есть отец ваш, старец, егоже рекосте, еще ли жив есть? 28 Они же рекоша: здрав есть раб твой, отец наш, еще жив есть. И рече: благословен человек оный Богу. И приникше поклонишася ему. 29 Возрев же очима своима Иосиф, виде Вениамина брата своего единоматерня и рече: сей ли есть брат ваш юнейший, егоже рекосте ко мне привести? И рече: Бог да помилует тя, чадо. 30 Возмутися же Иосиф: подвижеся бо утроба его о брате своем, и искаше плакати: вшед же в ложницу, плакася тамо. 31 И умыв лице, изшед удержася и рече: предложите хлебы. 32 И предложиша ему единому, и оным особно, и Египтяном, иже с ним ядяху, особно: не можаху бо Египтяне ясти хлеба со Евреи: мерзость бо есть Египтяном (всяк пастух овчий).

33 Седоша же прямо ему первенец по старейшинству своему и менший по меншеству своему, и дивляхуся мужие кийждо ко брату своему: 34 и взяша части от него к себе: вящшая же бысть часть Вениаминова паче всех частей пятерицею, неже оных: пиша же и упишася с ним.

**44** И заповеда Иосиф домостроителю своему, глаголя: наполните вретища мужем пищи, елико могут понести: и вложите комуждо сребро верху устия вретища: 2 и чашу мою серебряную вложите во вретище меншаго, и цену пшеницы его. Бысть же по словеси Иосифову, якоже рече. 3 Утро возсия, и мужие отпустишася сами, и ослята их. 4 Изшедше же они из града, не отидоша далече: и рече Иосиф домостроителю своему: востав гони вслед мужей и постигни их, и рцы им: что яко воздасте (ми) злая за благая? 5 Вскую украдете чашу мою серебряну? Не сия ли есть, из неяже пиет господин мой? Он же и волхвованием волхвует в ней: злая совершите, яже сотвористе. 6 Обрет же их, рече им по словесем сим. 7 Они же реша ему: вскую глаголет господин словеса сия? Не буди рабом твоим сотворити по словеси сему: 8 аще сребро, еже обретохом во вретищах наших, возвратихом к тебе от земли Ханаани, како быхом украли из дому господина твоего сребро или злато? 9 У негоже аще обрящещи чашу от раб твоих, да умрет: и мы будем раби господину нашему. 10 Он же рече: и ныне, якоже глаголете, тако будет: у негоже аще обрящется чаша, будет мой раб, вы же будете чисти. 11 И потщася, и сверже кийждо вретище свое на землю, и отверзоша кийждо вретище свое. 12 Изыска же от старейшаго зачен, дондеже прииде до меншаго, и обрете чашу во вретищи Вениамини. 13 И растерзаша ризы

своя, и возложиша кийждо вретище свое на осля свое, и  
возвратишася во град. 14 Вниде же Иуда и братия его ко  
Иосифу, еще ему сущу ту, и падоша пред ним на землю. 15  
Рече же им Иосиф: что дело сие сотвористе? Не ведасте  
ли, яко несть волхвователь человек, якоже аз? 16 Рече же  
Иуда: что отвещаем господину, или что возглаголем, или чим  
оправдимся? Бог же обрете неправду рабов твоих: се, мы  
есмы раби господину нашему, и мы, и у негоже обретесе  
чаша. 17 Рече же Иосиф: не буди ми сотворити глагол сей:  
муж, у негоже обретесе чаша, той будет ми раб: вы же  
пойдите в целости ко отцу своему. 18 Приступив же к нему  
Иуда, рече: молю тя, господине, да речет раб твой слово  
пред тобою, и не прогневайся на раба твоего, яко ты еси  
по фараоне: 19 господине, ты вопрошал еси рабов твоих,  
глаголя: аще имате отца, или брата? 20 И рехом господину:  
есть нам отец стар, и отрочищ на старость менший ему, а  
брат его умре, он же един остася у матери своея, отец же  
возлюби его. 21 Ты же рекл еси рабом твоим: приведите его  
ко мне, да вижду его. 22 И рехом господину: не возможет  
отрочищ оставити отца своего: аще же оставит отца, умрет.  
23 Ты же рекл еси рабом твоим: аще не приидет брат ваш  
менший с вами, не приложите ктому видети лица моего.  
24 Бысть же егда приидохом к рабу твоему отцу нашему,  
поведахом ему словеса господина нашего, 25 рече же нам  
отец наш: идите паки и купите нам мало пищи. 26 Мы же  
рекохом: не возможем ити: но аще брат наш менший идет с  
нами, пойдем: ибо не возможем видети лице мужа, брату  
нашему меньшему не сущу с нами. 27 Рече же раб твой, отец  
наш к нам: вы весте, яко двоих роди мне жена: 28 и отиде

един от мене, и рекосте, яко зверем сненден бысть, и не видех его даже до ныне: **29** аще убо поймете и сего от лица моего, и случится ему зло на пути, и сведете старость мою с печалию во ад. (Sheol h7585) **30** Ныне убо аще пойду к рабу твоему, отцу же нашему, и отрочища не будет с нами: (душа же его связана есть с душою сего, ) **31** и будет егда увидит он не суща отрочища с нами, умрет: и сведут раби твои старость раба твоего, отца же нашего, с печалию во ад: (Sheol h7585) **32** раб бо твой от отца взя отрочища, глаголя: аще не приведу его к тебе и поставлю его пред тобою, грешен буду ко отцу вся дни. **33** Ныне убо пребуду тебе раб вместо отрочища, раб господину: отрочищь же да идет с братиею своею: **34** како бо пойду ко отцу, отрочищу не сущу с нами? Да не вижду злых, яже обрящут отца моего.

**45** И не можаше Иосиф удержатися всем предстоящим ему, но рече: отошлите всех от мене. И не предстояше ни един Иосифу, егда познавашеся братии своей. **2** И испусти глас с плачем: слышаша же вси Египтяне, и слышано бысть в дому фараонове. **3** Рече же Иосиф братии своей: аз есмь Иосиф: еще ли отец мой жив есть? И не могоша братия отвещати ему: смутишася бо. **4** Рече же Иосиф братии своей: приближитесь ко мне. И приближишася. И рече: аз есмь Иосиф, брат ваш, егоже продасте во Египет: **5** ныне убо не скорбите, ниже жестоко вам да явится, яко продасте мя семо: на жизнь бо посла мя Бог пред вами: **6** сие бо второе лето глад на земли, и еще пять лет оста, в нихже не будет оранья, ни жатвы: **7** посла бо мя Бог пред вами оставити вам останок на земли и препитати ваш останок велий: **8** ныне убо не вы посласте мя семо, но Бог: и сотвори

мя яко отца фараону и господина всему дому его и князя всей земли Египетстей: 9 потщавшися убо, възидите ко отцу моему и рцйте ему: сия глаголет сын твой Иосиф: сотвори мя Бог господина всей земли Египетстей: сниди убо ко мне и не умедли: 10 и вселишися в земли Гесемли аравийстей, и будеши близ мене ты и сынове твои, и сынове сынов твоих, овцы твоя и волове твои, и елика суть твоя: 11 и препитаю тя тамо, еще бо пять лет будет глад на земли, да не погибнеши ты и сынове твои, и вся имения твоя. 12 Се, очи ваши видят, и очи Вениамина брата моего, яко уста моя глаголющая к вам: 13 возвестите убо отцу моему всю славу мою сущую во Египте, и елика видите: и ускоривше, приведите отца моего семо. 14 И напад на выю Вениамина, брата своего, плакася над ним, и Вениамин плакася на выи его. 15 И облобызав всю братию свою, плакася над ними: и по сих глаголаша к нему братия его. 16 И пронесеса глас в дому фараонове, глаголюще: приидоша братия Иосифова. Возрадовася же фараон и раби его. 17 Рече же фараон ко Иосифу: рцы братии своей: сие сотворите: наполните сосуды ваша (пшеницы) и идите в землю Ханааню, 18 и взявше отца вашего и имения ваша, приидите ко мне: и дам вам от всех благ Египетских, и снесите тук земли: 19 ты же заповеждь сия: взяти им колесницы от земли Египетския, детям их и женам их: и поимше отца своего, приидите: 20 и не пощадите очима сосудов ваших: вся бо благая Египетская вам будут. 21 Сотвориша же тако сынове Израилевы: даде же им Иосиф колесницы по повелению фараона царя (Египетска), и даде им брашно на путь: 22 и всем даде сугубы ризы, Вениамину же даде триста златниц и пятеры ризы пременныя: 23 и



отцу своему посла такожде, и десять ослов везущих от всех благ Египетских, и десять мсков везущих хлебы на путь отцу его. 24 И отпусти братию свою. И отидоша. И рече им: не гневайтесь на пути. 25 Изыдоша же из Египта и приидоша в землю Ханааню ко Иакову отцу своему 26 и поведаша ему глаголюще: яко сын твой Иосиф жив есть, и он владеет над всюю землею Египетскою. И ужасеся в мысли Иаков: не вероваше бо им. 27 Глаголаша же ему вся реченная от Иосифа, елика рече им. Узрев же колесницы, яже посла Иосиф, еже взяти его, оживе дух Иакова, отца их, 28 и рече Израиль: велико ми есть (сие), аще еще Иосиф сын мой жив есть: шед узрю его, прежде неже умрети ми.

**46** Востав же Израиль сам и вся суцая его, прииде ко кладязю Клятвенному и пожре жертву Богу отца своего Исаака. 2 Рече же Бог ко Израилю в видении нощию, глаголя: Иакове, Иакове. Он же рече: что есть? 3 Он же рече ему: Аз есмь Бог отцев твоих, не убойся изыти во Египет: в язык бо велий сотворю тя тамо: 4 и Аз сниду с тобою во Египет, и Аз возведу тя до конца: и Иосиф возложит руки своя на очи твои. 5 Воста же Иаков от кладязя Клятвеннаго, и взяша сынове Израиля отца своего, и стяжание, и жены своя на колесницы, яже посла Иосиф, взяти его: 6 и взявше имения своя и все стяжание, еже стяжаша в земли Ханаанстей, внидоша во Египет Иаков и все семя его с ним: 7 сынове и сынове сынов его с ним, дщери и дщери дщерей его, и все семя свое введе во Египет. 8 Сия же имена сынов Израилевых вшедших во Египет купно со Иаковом отцем своим: Иаков и сынове его: первенец Иаковль Рувим. 9 Сынове же Рувимли: Енох и Фаллос, Асрон и Харми. 10

Сынове же Симеони: Иемуил и Иамин, и Аод и Ахин, и Саар и Саул, сын Хананитидин. 11 Сынове же Левиини: Гирсон, Кааф и Мерарий. 12 Сынове же Иудины: Ир и Авнан, и Силом и Фарес и Зара: умроша же Ир и Авнан в земли Ханаани. Быша же сынове Фаресу: Есром и Иемуил. 13 Сынове же Иссахаровы: Фола и Фуа, и Асум и Самвран. 14 Сынове же Завулони: Серед и Аллон и Ахоил. 15 Сии сынове Лиини, ихже роди Иакову в Месопотамии Сирстей, и Дину дочь его: всех душ сынов и дочерей тридесять три. 16 Сынове же Гадовы: Сафон и Ангис, и Саннис и Фасован, и Аидис и Ароидис и Ареилис. 17 Сынове же Асировы: Иемна и Ессау, и Иеул и Вариа, и Сара сестра их. Сынове же Вариины: Ховор и Мелхиил. 18 Сии сынове Зелфины, юже даде Лаван Лии, дщери своей, яже роди сих Иакову, шестнадцать душ. 19 Сынове же Рахили, жены Иаковли: Иосиф и Вениамин. 20 Быша же сынове Иосифу в земли Египетстей, ихже роди ему Асенефа, дщи Петефриа жреца Илиопольска, Манассию и Ефрема. Быша же сынове Манассиины, ихже роди ему наложница Сира, Махира. Махир же роди Галаада. Сынове же Ефраима, брата Манассиина: Суталаам и Таам. Сынове же Суталаамли, Едом. 21 Сынове же Вениамини: Вала и Ховор и Асфил. Быша же сынове Валовы: Гира и Ноеман, и Анхис и Рос, и Мамфим и Офимим. Гира же роди Арада. 22 Сии сынове Рахилины, ихже роди Иакову, всех душ осмьнадесять. 23 Сынове же Дановы: Асом. 24 Сынове же Неффалимли: Асиил и Гони, и Иссаар и Селлим. 25 Сии сынове Валлины, юже даде Лаван Рахили дщери своей, яже роди сих Иакову: всех душ седмь. 26 Всех же душ вшедших со Иаковом во Египет, яже изыдоша из чресл его, кроме жен

сынов Иаковлих, всех душ шестьдесят шесть. 27 Сынове же Иосифовы, иже быша ему в земли Египетстей, душ девять: всех душ дому Иаковля, яже приидоша со Иаковом во Египет, душ семьдесят пять. 28 Иуду же посла пред собою ко Иосифу срести его у Иройска града в земли Рамессийстей. 29 Впряг же Иосиф колесницы своя, изыде во сретение Израилю, отцу своему, ко Ироону граду: и явился ему, нападе на выю его и плакася плачем великим. 30 И рече Израиль ко Иосифу: да умру отныне, понеже видех лице твое: еще бо ты еси жив. 31 Рече же Иосиф ко братии своей: шед повем фараону и реку ему: братия моя и дом отца моего, иже быша в земли Ханаани, приидоша ко мне: 32 они же суть мужие пастуси, мужие бо скотопитателие быша: и скоты, и волы, и вся своя приведоша: 33 аще убо призовет вас фараон и речет вам: что дело ваше есть? 34 Рците: мужие скотопитателие есмы, раби твои, издетска даже до ныне, и мы и отцы наши: да вселитесь в земли Гесем аравийстей: мерзость бо есть Египтяном всяк пастух овчий.

**47** Пришед же Иосиф, поведа фараону глаголя: отец мой и братия моя, и скоти и волове их, и вся сущая их приидоша из земли Ханаани: и се, суть в земли Гесем. 2 От братий же своих поя пять мужей и постави их пред фараоном. 3 И рече фараон к братиям Иосифовым: что дело ваше? Они же реша фараону: пастуси овчии, раби твои, и мы и отцы наши оддетска и доселе. 4 Рекоша же фараону: обитати в земли приидохом, несть бо пажити скотом раб твоих: одоле бо глад на земли Ханаани: ныне убо да вселимся раби твои в земли Гесем. 5 И рече фараон Иосифу, глаголя: отец твой и братия твоя приидоша к тебе: 6 се, земля Египетская пред тобою

есть: на лучшей земли посели отца твоего и братию твою, да вселятся в земли Гесем: аще же веси, яко суть в них мужие сильнии, постави их старейшины скотом моим. (приидоша же во Египет ко Иосифу Иаков и сынове его: и услыша фараон царь Египетский). 7 Введе же Иосиф Иакова отца своего и постави его пред фараоном, и благослови Иаков фараона. 8 Рече же фараон ко Иакову: колико лет дний жития твоего? 9 И рече Иаков фараону: дние лет жития моего, яже обитаю, сто тридесять лет: малы и злы быша дние лет жития моего: не достигоша во дни лет жития отец моих, яже дни обиташа. 10 И благословив Иаков фараона, отиде от него. 11 И всели Иосиф отца своего и братию свою, и даде им обдержание в земли Египетстей, на лучшей земли, в земли Рамессийстей, якоже повеле фараон. 12 И деляше Иосиф пшеницу отцу своему и братии своей и всему дому отца своего по числу лиц. 13 Пшеницы же не бяше во всей земли, одоле бо глад зело: скончавашеся же земля Египетская и земля Ханааня от глада. 14 Собра же Иосиф все серебро обретшееся в земли Египетстей и в земли Ханаани, за пшеницу, юже куповаху, и размеряше им пшеницу, и внесе Иосиф все серебро в дом фараонов. 15 И оскуде все серебро от земли Египетския и от земли Ханаанския: приидоша же вси Египтяне ко Иосифу, глаголюще: даждь нам хлебы, и вскую умираем пред тобою? Скончася бо серебро наше. 16 Рече же им Иосиф: пригоните скоты ваша, и дам вам хлебы за скоты ваша, аще скончася серебро ваше. 17 Пригнаша же скоты своя ко Иосифу, и даде им Иосиф хлебы за кони и за овцы, и за волы и за ослы, и прекорми их хлебами за вся скоты их в том лете. 18 Прейде же то лето, и приидоша к нему во второе лето и рекоша ему:

да не како погибнем от господина нашего? Аще бо скончася сребро наше, и имение и скоты пред тобою, господине, и не оставя нам пред господином нашим, точию едино тело и земля наша: **19** да не умрем убо пред тобою, и земля опустеет, купи нас и землю нашу хлебами: и будем мы и земля наша раби фараону: даждь семя, да посеем и живи будем, и не умрем, и земля не опустеет. **20** И купи Иосиф всю землю Египетскую фараону: продаша бо Египтяне землю свою фараону, ибо одоле им глад: и бысть земля фараону. **21** И люди поработи ему в рабы, от края предел Египетских даже до краев, **22** кроме земли жреческия токмо, тоя бо не купи Иосиф: даянием бо даде в дар жерцем фараон, и ядыху даяние, еже даде им фараон: сего ради не продаша земли своея. **23** Рече же Иосиф всем Египтяном: се, купих вас и землю вашу днесь фараону: возьмите себе семена и сейте на земли: **24** и будут плоды ея, и да дасте пятую часть фараону, четыри же части будут вам самем в семена земли и на препитание вам и всем сущым в домех ваших. **25** И рекоша: оживил ны еси, обретохом благодать пред господином нашим, и будем раби фараону. **26** И устави им Иосиф заповедь даже до сего дне на земли Египетстей пятую часть даяти фараону, кроме земли жреческия: та точию не быаше фараоня. **27** Вселися же Израиль в земли Египетстей, на земли Гесем, и наследствоваше ю: и возрастоша, и умножишася зело. **28** Поживе же Иаков в земли Египетстей седьмнадцать лет: и быша дние Иаковли лет жизни его, сто четыредесять семь лет. **29** Приближишася же дние Израилю еже умрети, и призва сына своего Иосифа и рече ему: аще обретох благодать пред тобою, подложи руку твою

под стегно мое и сотвориши надо мною милость и истину, еже не погребсти мене во Египте, **30** но да почию со отцы моими: и изнесеши мя из Египта, и погребеши мя во гробе их. Он же рече: аз сотворю по словеси твоему. **31** Рече же: кленися мне. И клятсся ему. И поклонися Израиль на конец жезла его.

**48** Бысть же по глаголах сих, и поведано бысть Иосифу, яко отец твой изнемогает: и поим два сына своя, Манассию и Ефрема, прииде ко Иакову. **2** Поведаша же Иакову, глаголюще: се, сын твой Иосиф грядет к тебе. И укрепився Израиль седе на одре, **3** и рече Иаков ко Иосифу: Бог мой явися мне в Лузе, в земли Ханаани, и благослови мя **4** и рече ми: се, Аз возвращу тя и умножу тя, и сотворю тя в собрания языков: и дам ти землю сию и семени твоему по тебе во одержание вечное. **5** Ныне убо два сына твоя, иже быша тебе в земли Египетстей прежде пришествия моего к тебе во Египет, мои суть: Ефрем и Манассиа, аки Рувим и Симеон будут мне: **6** сыны же, яже аще родиши по сих, будут тебе: во имя братии своея призовутся ко жребиям оных: **7** аз же егда идях от Месопотамии Сирския, умре Рахиль матери твоя в земли Ханаани, приближающуся ми ко ипподрому Хаврафы земли, еже приити во Ефрафу: и погребох ю на пути ипподрома: сей есть Вифлеем. **8** Видев же Израиль сыны Иосифовы, рече: что тебе сии? **9** Рече же Иосиф отцу своему: сынове мои суть, яже даде ми Бог zde. И рече Иаков: приведи ми я, да благословлю их. **10** Очи же Израилью тяжко видеста от старости, и не можаше видети: и приближи их к нему, и лобза их, и объят я. **11** И рече Израиль ко Иосифу: се, лица твоего не лишихся, и се, показа ми Бог и семья

твое. **12** И отведе их Иосиф от колен его, и поклонишася ему лицом до земли. **13** Поим же Иосиф два сына своя, Ефрема в десницу, прямо левицы Израиля, Манассию же в левую, прямо десницы Израилевы, приближи их к нему. **14** Простер же Израиль руку десную, возложи на главу Ефремлю, сей же быше меньший, а левую на главу Манассиину, пременив руке, **15** и благослови я и рече: Бог, Емуже благоугодиша отцы мои пред ним, Авраам и Исаак, Бог, Иже питает мя измлада даже до дне сего, **16** Ангел, иже мя избавляет от всех зол, да благословит детища сия, и прозовется в них имя мое, и имя отец моих, Авраама и Исаака, и да умножатся во множество многое на земли. **17** Видев же Иосиф, яко возложи отец его руку десную свою на главу Ефремлю, тяжело ему явися: и прия Иосиф руку отца своего отяти ю от главы Ефремли на главу Манассиину, **18** и рече Иосиф отцу своему: не тако, отче: сей бо (есть) первенец, возложи руку десную твою на главу его. **19** И не хотяше, но рече: вем, чадо, вем: и сей будет в люди, и сей вознесется: но брат его меньший болий его будет, и семя его будет во множество языков. **20** И благослови я в том дни, глаголя: в вас благословится Израиль, глаголюще: да сотворит тя Бог якоже Ефрема и яко Манассию. И постави Ефрема вышше Манассии. **21** Рече же Израиль Иосифу: се, аз умираю, и будет Бог с вами, и возвратит вас от земли сея на землю отец ваших: **22** аз же даю ти Сикиму избранную свыше братии твоея, юже взях из руки Аморрейски мечем моим и луком.

**49** Призва же Иаков сыны своя и рече им: соберитесь, да возвещу вам, что срящет вас в последния дни: **2** соберитесь и послушайте мене, сынове Иаковли, послушайте Израиля,

послушайте отца вашего. 3 Рувим, первенец мой, ты крепость моя и начало чад моих: жесток терпели и жесток упорник: 4 досадил еси яко вода, да не воскипиши: возшел бо еси на ложе отца твоего, тогда осквернил еси постелю, идеже возшел еси. 5 Симеон и Левий братия совершиша обиду от воли своя: 6 в совет их да не приидет душа моя, и к собранию их да не прилепятся внутренняя моя: яко во гневе своем избиста человеки, и в похоти своей пререзаста жилы юнца: 7 проклята ярость их, яко упорна, и гнев их, яко ожесточися: разделю их во Иакове и разсею их во Израили. 8 Иудо, тебе похвалят братия твоя, руце твои на плещу враг твоих: поклонятся тебе сынове отца твоего: 9 скимен львов Иуда: от леторасли, сыне мой, возшел еси: возлег уснул еси яко лев и яко скимен: кто возбудит его? 10 Не оскудеет князь от Иуды и вождь от чресл его, дондеже приидут отложеная Ему, и Той чаяние языков: 11 привязуй к лозе жребя свое и к винничю жребца осляте своего, исперет вином одежду свою и кровию гроздия одеяние свое: 12 радостотворны очи его паче вина, и белы зубы его паче млека. 13 Завулон при мори вселится, и той на пристаници кораблей, и прострется даже до Сидона. 14 Иссахар доброе возжела, почивая посреде пределов, 15 и видево покой, яко добр, и землю, яко тучна, подложи рамы свои на труд, и бысть муж земледелец. 16 Дан судити имать люди своя, яко и едино племя во Израили, 17 и да будет Дан змий на пути, седяй на распутии, угрызая пяту конску: 18 и падет конник вспясть, спасения ждый Господня. 19 Гад, искушение искусит его: он же искусит того при ногах. 20 Асир, тучен его хлеб, и той даст пищу князем. 21 Неффалим стебель распушающаяся, издай во отрасли доброту. 22 Сын



возращен Иосиф, сын возращен мой ревностный, сын мой юнейший, ко мне обратися: **23** на негоже советующе укоряху и наляцаху нань господие стреляний, **24** и сотрошася с крепостию луки их, и разслабеша жилы мышцей рук их, рукою сильного Иакова: оттуду укрепися Израиль от Бога отца твоего, **25** и поможе тебе Бог мой, и благослови тя благословением небесным свыше и благословением земли и имущия вся: благословения ради сосцев и ложесн, **26** благословения отца твоего и матере твоея: преодоле паче благословения гор пребывающих и благословения холмов вечных: будут на главе Иосифове и на версе (главы) братий, имиже обладаше. **27** Вениамин волк хищник, рано яст еще и на вечер дает пищу. **28** Все сии сынове Иаковли дванадесять: и сия глагола им отец их, и благослови их: коегождо по благословению его благослови их, **29** и рече им: аз прилагаюся к людем моим: погребите мя со отцы моими в пещере, яже есть в селе Ефрона Хеттеанина, **30** в пещере Сугубей, яже прямо Мамврии в земли Ханаани, юже стяжа Авраам пещеру у Ефрона Хеттеанина в стяжание гроба. **31** Тамо погребоша Авраама и Сарру жену его, тамо погребоша Исаака и Ревекку жену его, тамо погребоша Лию, **32** в стяжании села и пещеры, яже есть в нем у сынов Хеттеовых. **33** И преста Иаков завещая сыном своим, и возложив Иаков нозе свои на одр умре, и приложися к людем своим.

**50** И припад Иосиф на лице отца своего, плакася (горько) о нем и облобыза его: **2** и повеле Иосиф рабом своим погребателем погребсти отца своего. И погребоша погребателие Израиля. **3** И исполнишася ему четьредесять дний: тако бо исчисляются дние погребения: и плакася его

Египет семьдесят дней. 4 Егда же преидоша дние плача, глагола Иосиф ко вельможам фараоновым, глаголя: аще обретох благодать пред вами, рцыте о мне во уши фараону, глаголюще: 5 отец мой заля мя прежде скончания (своего), глаголя: во гробе, егоже ископах себе в земли Ханаани, тамо мя погребите: ныне убо возшед погребу отца моего и возвращуся. И рекоша фараону по словеси Иосифову. 6 И рече фараон ко Иосифу: възиди, погребите отца твоего, якоже заля ты. 7 И възиде Иосиф погребсти отца своего. И совзыдоша с ним вси раби фараони и старейшины дому его, и вси старейшины земли Египетския, 8 и весь дом Иосифов и братия его, и весь дом отца его и сродницы его: овцы же и волы оставиша в земли Гесем. 9 И совзыдоша с ним и колесницы и конницы, и бысть полк велик зело. 10 И приидоша на Гумно Атадово, еже есть об он пол Иордана, и рыдаша его рыданием велиим и крепким зело: и сотвори плачь отцу своему семь дней. 11 И видеша жителие земли Ханаанския плачь на Гумне Атадове и реша: плачь велик сей есть Египтяном. Сего ради наречешя имя месту тому плачь Египетск, еже есть об он пол Иордана. 12 И сотвориша ему тако сынове его, якоже заповеда им. 13 И взяша его сынове его в землю Ханааню и погребоша его в пещере Сугубей, юже стяжа Авраам пещеру в стяжание гроба от Ефрона Хеттеанина, прямо Мамврии. 14 И возвратися Иосиф во Египет, сам и братия его и вси совозшедшии погребсти отца его. 15 Видевше же братия Иосифовы, яко умре отец их, реша: да не когда воспомянет злобу нашу Иосиф и воздаянием воздаст нам за вся злая, яже показахом ему. 16 И пришедше ко Иосифу рекоша: отец твой заля прежде

кончины своя, глаголя: 17 тако рцыте Иосифу: остави им неправду и грех их, яко лукавая тебе показаша: и ныне приими неправду рабов Бога отца твоего. И плакася Иосиф, глаголющим им к нему. 18 И пришедше к нему рекоша: се, мы тебе раби. 19 И рече к ним Иосиф: не бойтеся, Божий бо есмь аз: 20 вы совещасте на мя злая, Бог же совеща о мне благая, дабы было якоже днесь, и препиталися бы людие мнози. 21 И рече им: не бойтеся, аз препитаю вас и дома ваша. И утеши их, и глагола им по сердцу их. 22 И вселися Иосиф во Египте сам и братия его и весь дом отца его: и поживе Иосиф лет сто десять. 23 И виде Иосиф Ефремели дети до третияго рода: и сынове Махира сына Манассиина родишася при бедрах Иосифовых. 24 И рече Иосиф братии своей, глаголя: аз умираю, посещением же посетит вас Бог и изведет вас от земли сея в землю, о нейже клятеся Бог отцем нашим Аврааму, Исааку и Иакову. 25 И закла Иосиф сыны Израилевы, глаголя: в посещении, имже посетит вас Бог, совознесите и кости моя отсюда с вами. 26 И скончася Иосиф сый лет ста десяти: и погребоша его, и положиша в раце во Египте.

# Исход

**1** Сия имена сынов Израилевых, входящих во Египет вкупе со Иаковом отцем их, кийждо со всем домом своим внидоша: **2** Рувим, Симеон, Левий, Иуда, **3** Иссахар, Завулон и Вениамин, **4** Дан и Неффалим, Гад и Асир: Иосиф же бяше во Египте. **5** Бяше же всех душ изшедших из Иакова седьмьдесят пять. **6** Умре же Иосиф, и вся братия его, и весь род оный: **7** сынове же Израилевы возрастоша и умножишася, и мнози быша и укрепилася зело зело: умножи же их земля. **8** Воста же царь ин во Египте, иже не знаше Иосифа, **9** рече же языку своему: се, род сынов Израилевых великое множество и укрепляется паче нас: **10** приидите убо, прехитрим их, да не когда умножатся: и егда аще приключится нам брань, приложатся и сии к супостатом, и одолевше нам изыдут из земли (нашея). **11** И пристави над ними приставники дел, да озлобят их в делех. И создаша грады тверды фараону: Пифо, и Рамесси, и он, иже есть Илиополь. **12** По елику же их смиряху, толико множайшии бываху и укрепляхуся зело зело. И гнушахуся Египтяне сынми Израилевыми, **13** и насилие творяху Египтяне сыном Израилевым нуждею, **14** и болезненну тем жизнь творяху в делех жестоких брением и плинфоделанием, и всеми делы, яже в полях, во всех делех, имиже порабощаху их с нуждею. **15** И рече царь Египетский бабам Еврейским: единой их имя Сепфора и имя вторей Фуа, **16** и рече (им): егда бабите Евреаныням, и суть к рождению, аще убо мужеский пол будет, убивайте его: аще же женский, снабдевайте его. **17** Убояшася же бабы Бога, и не сотвориша, якоже повеле им царь Египетский, и живляху мужеский пол. **18** Призва же царь Египетский бабы и рече

им: что яко сотвористе вещь сию, и оживляете мужеский пол? 19 Рекоша же бабы фараону: не яко жены Египтяныни, тако и жены Евреаныни: раждают бо прежде неже внити к ним бабам, и раждаху. 20 Благо же творяше Бог бабам, и множахуся людие и укрепляхуся зело. 21 И понеже бояхуся бабы Бога, сотвориша себе жилища. 22 Заповеда же фараон всем людем своим, глаголя: всяк мужеский пол, иже родится Евреом, в реку ввергайте, и всяк женский пол снабдевайте и жив.

**2** Бяше же некто от племени Левиина, иже поя от дочерей Левииных, и имяше ю: 2 и зача во чреве и роди мужеский пол. Видевше же его лепа, крыша его три месяцы: 3 и понеже не можаху его ктому крыти, взя ему мати его ковчежец ситовый и помаза и клеєм и смолою, и вложи отроча в него, и положи его в лучице при реце: 4 и наблюдаше сестра его издалеча, да уведает, что будет ему. 5 Сниде же дочь фараонова измытиса на реку, и рабыни ея прохождаху при реце. И видевши ковчежец в лучице, пославши рабыню, взя и. 6 Отверзши же, видит отроча плачущееся в ковчежце, и пощаде е дочь фараоня, и рече: от детей Еврейских сие. 7 И рече сестра его дщери фараонове: хочещи ли, призову ти жену кормилицу от Еврей, и воздоит ти отроча? 8 И рече ей дочь фараонова: иди. Шедши же отроковица, призва мать отрочате. 9 Рече же к ней дочь фараонова: соблюди ми отроча сие и воздой ми е: аз же дам ти мзду. Взя же отроча жена и дояше е. 10 Возмужавшу же отрочати, введе е ко дщери фараонове, и бысть ей в сына, и нарече имя ему Моисей, глаголющи: от воды взях его. 11 Бысть же во дни многия оны, велик быв Моисей, изыде к братиям своим,

сыном Израилевым. Разумев же болезнь их, виде человека Египтянина биюща некоего Евреанина от братии его сынов Израилевых. 12 Обозревся же семо и овамо, ни когоже виде: и поразив Египтянина, скры его в песце. 13 Изшед же во второй день, виде два мужа Евреанина биющася и глагола обидящему: чесо ради ты биеши искренняго? 14 Он же рече: кто тя постави князя и судию над нами? Еда убить ты хоцещи, имже образом убил еси вчера Египтянина? Убояся же Моисей и рече: аще сице явлен бысть глагол сей? 15 Услыша же фараон глагол сей и искаше убить Моисеа. Отиде же Моисей от лица фараонова и вселися в земли Мадиамстей: пришед же в землю Мадиамскую седе при кладязе. 16 Священнику же Мадиамскому беша семь дщерей, пасущих овцы отца своего Иофора: пришедша же черпаху, дондеже наполниша корыта, напоити овцы отца своего Иофора. 17 Пришедше же пастырие изгнаша я. Востав же Моисей избави их, и налия им и напои овцы их. 18 Приидоша же к Рагуилу отцу своему. Он же рече им: что яко ускористе приити днесь? 19 Оныя же рекоша: человек Египтянин избави нас от пастырей, и начерпа нам и напои овцы наша. 20 Он же рече дщерем своим: и где есть? И вскую сице остависте человека? Призовите убо его, да яст хлеб. 21 Вселися же Моисей у человека: и даде Сепфору дщерь свою Моисею в жену. 22 Во чреве же заченши жена роди сына, и нарече Моисей имя ему Гирсам, глаголя: яко пришлец есмь в земли чуждей. Еще же заченши роди сына второго, и нарече имя ему Елиезер, глаголя: Бог бо отца моего помощник мой и избави мя из руки фараоновы. 23 По днех же многих тех, умре царь Египетский, и возстенаша

сынове Израилевы от дел и возопиша, и възыде вопль их к Богу от дел. 24 И услыша Бог стенание их: и помяну Бог завет Свой иже ко Аврааму и Исааку и Иакову, 25 и призре Бог на сыны Израилевы, и познан бысть ими.

**3** Моисей же бяше пасый овцы Иофора тестя своего, священника Мадиямска: и гнаше овцы в пустыню, и прииде в гору Божию Хорив. 2 Явился же ему Ангел Господнь в пламени огненне из купины: и видит, яко купина горит огнем, купина же не сгараше. 3 Рече же Моисей: мимошед увижду видение великое сие, яко не сгарает купина. 4 Егда же виде Господь, яко приступает видети, воззва его Господь из купины, глаголя: Моисее, Моисее. Он же рече: что есть, Господи? 5 Он же рече: не приближайся семо: изуй сапоги от ног твоих: место бо, на немже ты стоиши, земля свята есть. 6 И рече ему: Аз есмь Бог отца твоего, Бог Авраамов и Бог Исааков и Бог Иаковль. Отврати же Моисей лице свое: благоговейше бо воззрети пред Бога. 7 Рече же Господь к Моисею: видя видех озлобление людий Моих, иже во Египте, и вопль их услышах от дел приставников: уведех болезнь их, 8 и снидох изяти их от руку Египетску, и извести я из земли тоя, и ввести их в землю благу и многу, в землю кипящую млеко и медом, в место Хананейско и Хеттейско, и Amorрейско и Ферезейско, и Гергесейско и Евейско и Иевусейско: 9 и се, ныне вопль сынов Израилевых прииде ко Мне, и Аз видех тугу, еюже Египтяне стужают им: 10 и ныне гряди, да послю тя к фараону царю Египетскому, и изведеши люди Моя, сыны Израилевы из земли Египетския. 11 И рече Моисей к Богу: кто есмь аз, яко да пойду к фараону царю Египетскому, и яко да изведу сыны Израилевы от земли Египетския? 12

Рече же Бог к Моисею, глаголя: яко буду с тобою: и сие тебе знамение, яко Аз тя посылаю: внегда извести тебе люди Моя из Египта, и помолитесь Богу в горе сей. 13 И рече Моисей к Богу: се, аз пойду к сыном Израилевым и реку к ним: Бог отец наших посла мя к вам: и аще вопросят мя, что имя Ему, что реку к ним? 14 И рече Бог к Моисею, глаголя: Аз есмь Сый. И рече: тако речеши сыном Израилевым: Сый посла мя к вам. 15 И рече Бог паки к Моисею: тако речеши сыном Израилевым: Господь Бог отец наших, Бог Авраамов и Бог Исааков и Бог Иаковль, посла мя к вам: сие Мое есть имя вечное и память родов родом: 16 пришед убо собери старцы сынов Израилевых и рцы к ним: Господь Бог отец наших явися мне, Бог Авраамов и Бог Исааков и Бог Иаковль, глаголя: присещением присетих вас, и елика случишася вам во Египте: 17 и рече: изведу вас от озлобления Египетскаго в землю Хананейску и Хеттейску, и Аморрейску и Фerezейску, и Гергесейску и Евейску и Иевусейску, в землю кипящую млеко и медом: 18 и послушают гласа твоего, и внидеши ты и старейшины Израилевы к фараону царю Египетскому, и речеши к нему: Господь Бог Еврейский воззва нас: да пойдём убо путем трех дний в пустыню, да пожрем Господу Богу нашему: 19 Аз же вем, яко не отпустит вас фараон царь Египетский пойти, аще не рукою крепкою: 20 и простер руку Мою, поражу Египтяны всеми чудесы Моими, яже сотворю в них: и по сих отпустит вы, 21 и дам благодать людем сим пред Египтяны: егда же пойдете, не отидете тщы: 22 но да испросит жена от соседы и подруги своя сосуды серебряны и златы, и ризы: и украсите сыны ваша и дщери ваша, и оберите Египтян.



**4** Отвеща же Моисей и рече: аще не уверуют ми, ниже послушают гласа моего, рекут бо, яко не явися тебе Бог, что реку к ним? **2** И рече к нему Господь: что сие есть в руце твоей? Он же рече: жезл. **3** И рече: поверзи его на землю. И верже и на землю, и бысть змий: и отбеже Моисей от него. **4** И рече Господь к Моисею: простри руку и ими за хвост. Простер убо руку, взя за хвост, и бысть жезл в руце его. **5** Да уверуют ти, яко явися тебе Господь Бог отец твоих, Бог Авраамов и Бог Исааков и Бог Иаковль. **6** Рече же ему Господь паки: вложи руку твою в недро твое. И вложи руку в недро свое, и изят ю от недра своего, и бысть рука его прокажена яко снег. **7** И рече паки ему Господь: вложи руку твою в недро твое. И вложи руку свою в недро свое, и изят ю от недра своего, и бысть паки в румянстве плоти своя. **8** Аще же не уверуют тебе, ниже послушают гласа знамения перваго, уверуют тебе ради гласа знамения втораго: **9** и будет аще не уверуют тебе двема знаменами сими, ниже послушают гласа твоего, да возмеш от воды речныя, и пролиеш на сухо: и будет вода, юже возмеш от реки, кровию на сусе. **10** Рече же Моисей ко Господу: молюся ти, Господи: недоброречив есмь прежде вчерашняго и третияго дне, ниже отнележе начал еси глаголати рабу Твоему: худогласен и косноязычен аз есмь. **11** И рече Господь к Моисею: кто даде уста человеку? И кто сотвори нема и глуха, и видяща и слепа? Не Аз ли Господь Бог? **12** И ныне иди, и Аз отверзу уста твоя и устрою тебе, еже имаш глаголати. **13** Рече же Моисей: молюся ти, Господи, избери могуща иного, егоже послеш. **14** И разгневався яростию Господь на Моисеа, рече: не се ли брат твой Аарон

Левитин? Вем, яко глаголя возглаголет он вместо тебе: и се, той изыдет во сретение тебе, и узрев тя, возрадуется в себе: **15** и речеши к нему, и вдаси словеса Моя во уста его: Аз же отверзу уста твоя и уста его, и устрою вам яже имате творити: **16** и той возглаголет от тебе к людем, и той будет уста твоя: ты же будеши ему в тех, яже к Богу: **17** и жезл сей обращенный в змию, возми в руку твою, сим сотвориши знамения. **18** Пойде же Моисей, и возвратися ко Иофору тестю своему и рече: пойду и возвращуся ко братии моей, иже во Египте, и увижду, аще еще живи суть. И рече Иофор к Моисею: иди здрав. По днех же оных многих, умре царь Египетский. **19** И рече Господь к Моисею в земли Мадямстей: иди, отиди во Египет: измроша бо вси ищущии души твоя. **20** Поим же Моисей жену свою и отрочата, всади я на ослята, и возвратися во Египет. И взя Моисей жезл, иже от Бога, в руку свою. **21** Рече же Господь к Моисею: идущу тебе и возвращающуся во Египет, зри вся чудеса, яже дах в руке твои, да сотвориши Я пред фараоном: Аз же ожесточу сердце его, и не отпустит людей: **22** ты же возглаголеши фараону: сия глаголет Господь Бог Еврейский: сын Мой первенец Израиль: **23** рех же тебе: отпусти люди Моя, да Ми послужат: аще убо не хочеши отпустити их, блюди убо, Аз убью сына твоего первенца. **24** Бысть же на пути на стану, срете его Ангел Господнь и искаше его убити. **25** И взявши Сепфора камень, обреза конечную плоть сына своего, и припаде к ногам его и рече: ста кровь обрезания сына моего. **26** И отиде от него Ангел, занеже рече: ста кровь обрезания сына моего. **27** Рече же Господь ко Аарону: изыди во сретение Моисею в пустыню. И иде, и срете его в горе

Божии: и целовастася оба. 28 И поведи Моисей Аарону вся словеса Господня, яже посла, и вся знамения, яже заповеда ему. 29 Иде же Моисей и Аарон, и собраша вся старцы сынов Израилевых: 30 и глагола им Аарон вся словеса сия, яже глагола Бог к Моисею: и сотвори знамения пред людьми. 31 И вероваша людие, и возрадовашася, яко посети Бог сыны Израилевы и яко призре на их скорбение: и преклоншеся людие поклонися.

**5** И по сих видне Моисей и Аарон к фараону и реша ему: сия глаголет Господь Бог Израилев: отпусти люди Моя, да праздник сотворят Мне в пустыни. 2 Рече же фараон: кто есть, Егоже послушаю гласа, яко отпустити имам сыны Израилевы? Не вем Господа, и Израиля не отпущу. 3 И глаголют ему: Бог Еврейский призва нас: пойдём убо путем трех дний в пустыню, да пожрем Господу Богу нашему, да не когда случится нам смерть или убийство. 4 И рече им царь Египетский: вскую, Моисей и Аарон, развращаете люди моя от дел их? Идите кийждо вас на дела своя. 5 И рече фараон: се, ныне умножишася людие сии на земли: убо не дадим почити им от дел. 6 Заповеда же фараон приставником дел людских и книгочиям, глаголя: 7 не ктому приложите даяти плев людем к плинфоделанию, якоже вчера и третяго дне: но сами да идут и собирают плевы себе: 8 и урок плинфоделания, еже они творят, на кийждо день наложите им: не уемлите ничтоже: праздни бо суть: сего ради возопиша, глаголюще: да пойдём, и пожрем Богу нашему: 9 да отягчатся дела людий сих, и да пекутся о них, и не помыслят о словесех суетных. 10 Понуждаху же их приставницы и книгочия и глаголаху людем, рекуще: сия

глаголет фараон: не ктому даю вам плев: **11** сами вы шедше собирайте себе плены, идеже аще обряцете: ибо не будет уято от урока вашего ничтоже. **12** И разыдошася людие по всей земли Египетстей собирати тростие на плены. **13** Приставницы же понуждаху их, глаголюще: совершайте дела ваша урочная на всяк день, якоже и егда плены даяхом вам. **14** И биени быша книгочия рода сынов Израилевых, иже быша приставлени над ними от приставников фараоновых, глаголюще: почто не совершите урока вашего плинфенного, якоже вчера и третяго дне, такожде и днесь? **15** Вшедше же книгочия сынов Израилевых, возопиша к фараону, глаголюще: почто ты тако твориши рабом твоим? **16** Плев не дают рабом твоим, и плинфы нам глаголют творити: и се, раби твои мучими суть: обидиши убо людий твоих. **17** И рече им: праздни, праздни есте: сего ради глаголете: да идем, пожрем Богу нашему: **18** ныне убо шедше делайте плев бо не дам вам, урок же делания плинфенного да отдаете. **19** Видяху же книгочии сынов Израилевых себе во злых, глаголюще: не оставите плинфodelания урочного дню. **20** Сретоша же Моисеа и Аарона, идущих во сретение им, исходящим им от фараона, **21** и реша им: да видит Бог и судит вам, яко огнусисте дух ваш пред фараоном и пред рабы его, дати мечь в руки его убити нас. **22** Возвратися же Моисей ко Господу и рече: молются, Господи, почто озлобил еси люди сия? И вскую послал еси мя? **23** И отнележе внидох к фараону, глаголати Твоим именем, (он) озлоби люди сия, и не избавил еси людий Твоих.

**6** И рече Господь к Моисею: се, узриши, что сотворю фараону: рукою бо крепкою отпустит их и мышцею высокою

изженет их от земли своея. 2 Глагола же Бог к Моисею и рече ему: Аз Господь, 3 и явихся Аврааму, и Исааку, и Иакову, Бог Сый их, и имене Моего Господь не явих им: 4 и поставих завет Мой с ними, яко дати им землю Ханаанску, землю пришелствия их, на нейже и обитаху: 5 Аз же услышах стенание сынов Израилевых, имже Египтяне поработиша их, и помянух завет Мой: 6 иди, рцы сыном Израилевым глаголя: Аз Господь, и изведу вас от насилия Египетска, и избавлю вас от работы (их), и отиму вас мышцею высокою и судом великим, 7 и прииму вы Себе в люди, и буду вам Бог: и уразумеете, яко Аз Господь Бог ваш, изведый вас от земли Египетския и от насилия Египетска: 8 и введу вас в землю, на нюже прострох руку Мою, дати ю Аврааму и Исааку и Иакову: и дам ю вам в наследие, Аз Господь. 9 Глагола же Моисей тако сыном Израилевым, и не послушаша Моисея от малодушия и от дел жестоких. 10 Рече же Господь к Моисею, глаголя: 11 вниди, глаголи фараону царю Египетскому, да отпустит сыны Израилевы из земли своея. 12 Рече же Моисей пред Господем глаголя: се, сынове Израилевы не послушаша мене, и како послушает мене фараон? Аз же несловесен есмь. 13 Рече же Господь к Моисею и Аарону и завеща им внити к фараону царю Египетскому, да отпустит сыны Израилевы от земли Египетския. 14 И сии старейшины домов отечеств их: сынове Рувима, первенца Израилева, Енох и Фаллос, Асрон и Харми: сие племя Рувимово. 15 Сынове же Симеоновы: Иемуил и Иамин, и Аод и Ахин, и Саар и Саул, иже от Финиссины: сия рождения сынов Симеоновых. 16 И сия имена сынов Левиных по сродством их: Гирсон, Кааф и Мерари: лет же жития Левиина сто тридесять седмь. 17 Сии

же сынове Гирсони: Ловени и Семей: домове рождения их. 18 Сынове же Каафовы: Амврам и Иссаар, Хеврон и Озиил: лет же жития Каафова сто тридесять три. 19 Сынове же Мерарины: Мооли и Омуси: сии домове рождения Левиина по сродством их. 20 И поя Амврам Иохаведу, дщерь брата отца своего, себе в жену, и роди ему Аарона и Моисея и Мариамь сестру их: лет же жития Амврамова сто тридесять седмь. 21 Сынове же Иссааровы: Коре и Нафек и Зехри. 22 Сынове же Озиилковы: Мисаил и Елисафан и Сегри. 23 Поя же Аарон Елисавету, дщерь Аминадавову, сестру Наассонову, себе в жену, и роди ему Надава и Авиуда, и Елеазара и Ифамара. 24 Сынове же Кореовы: Асир и Елкана и Авиасар: сия рождения Кореова. 25 И Елеазар, сын Ааронов, поя от дщерей Футииловых себе в жену, и роди ему Финееса: сия старейшинства отечества левитска по сродством их. 26 Сей Аарон и Моисей, имже рече Бог извести сыны Израилевы из земли Египетския с силою их. 27 Сии суть, иже глаголаста к фараону царю Египетскому, еже извести сыны Израилевы от земли Египетския: сей Аарон и Моисей, 28 в оньже день глагола Господь к Моисею в земли Египетстей. 29 И рече Господь к Моисею глаголя: аз Господь: глаголи к фараону царю Египетскому, елика аз глаголю к тебе. 30 И рече Моисей пред Господем: се, аз худогласен есмь, и како послушает мене фараон?

**7** И рече Господь к Моисею, глаголя: се, дах ты Бога фараону, и Аарон брат твой будет твой пророк: 2 ты же возглаголеши ему вся, елика тебе заповедаю: Аарон же брат твой возглаголет к фараону, да отпустит сыны Израилевы от земли своея: 3 аз же ожесточу сердце фараоново и

умножу знамения Моя и чудеса в земли Египетстей: 4 и не послушает вас фараон, и возложу руку Мою на Египет и изведу с силою Моею люди Моя сыны Израилевы от земли Египетския, со отмщением великим: 5 и уведят вси Египтяне, яко Аз есмь Господь, простирая руку Мою на Египет, и изведу сыны Израилевы от среды их. 6 Сотвори же Моисей и Аарон, якоже заповеда им Господь, тако сотвориша. 7 Моисей же бе осмидесяти лет, Аарон же брат его осмидесяти трех лет, егда глаголаста к фараону. 8 И рече Господь к Моисею и Аарону глаголя: 9 и аще речет к вам фараон, глаголя: дадите нам знамение или чудо: и речеши Аарону брату твоему: возми жезл и повержи на землю пред фараоном и пред рабы его, и будет змий. 10 Вниде же Моисей и Аарон пред фараона и пред рабы его, и сотвориша тако, якоже заповеда им Господь: и поверже Аарон жезл пред фараоном и пред рабы его, и бысть змий. 11 Созва же фараон мудрецы Египетския и волхвы: и сотвориша и волсви египетския чарованиями своими такожде: 12 и повергоша кийждо жезл свой, и быша змиеве: и пожре жезл Ааронов оных жезлы. 13 И укрепися сердце фараоне, и не послуша их, якоже глагола им Господь. 14 И рече Господь к Моисею: отягчися сердце фараоне, еже не отпустити людей: 15 иди к фараону завтра: се, той исходит на воды, и буди сретая его на брезе речнем: и жезл обращайся в змия возми в руку твою, 16 и речеши к нему: Господь Бог Еврейский посла мя к тебе, глаголя: отпусти люди Моя, да Ми послужат в пустыни: и се, не послушал еси доселе: 17 сия глаголет Господь: по сему увеси, яко Аз Господь: се, аз ударю жезлом, иже в руке моей, по воде речней, и преложится в кровь: 18 и рыбы, яже в реце

изомрут, и возмердится река, и не возмогут Египтяне пити воды от реки. 19 Рече же Господь к Моисею: рцы Аарону брату твоему: возми жезл твой в руку твою, и простри руку твою на воды Египетския и на реки их и на кладязи их и на езера их и на всякое собрание вод их, и будет кровь, и бысть кровь по всей земли Египетстей, в древесех же и в камениих. 20 И сотвориша тако Моисей и Аарон, якоже заповеда им Господь: и взем Аарон жезл свой, удари воду речную пред фараоном и пред рабы его, и преложи всю воду речную в кровь: 21 и рыбы яже в реце изомроша, и возмердеся река, и не можаху Египтяне пити воды от реки, и бяше кровь по всей земли Египетстей. 22 Сотвориша же и волсви Египетстии волхвованиями своими такожде: и ожесточися сердце фараоново, и не послуша их, якоже рече Господь. 23 Возвратився же фараон вниде в дом свой, и не положи себе и сего во уме. 24 Ископаша же вси Египтяне окрест реки, да пьют воду: и не можаху пити воды от реки. 25 И исполнишася семь дней, по ударении Господни в реку.

**8** И рече Господь к Моисею: вниди к фараону и речеши к нему: сия глаголет Господь: отпусти люди Моя, да Ми послужат: 2 аще же не хочещи ты отпустить, се, Аз побиваю вся пределы твоя жабами: 3 и изрыгнет река жабы, и излезша внидут в дома твоя и в клети ложниц твоих, и на постели твоя и в дома рабов твоих и людей твоих, и в теста твоя и в печи твоя, 4 и на тя и на рабы твоя и на люди твоя возлезут жабы. 5 Рече же Господь к Моисею: рцы Аарону брату твоему: простри рукою твоею жезл твой на реки и на кладязи и на езера, и изведи жабы на землю Египетскую. 6 И простре Аарон руку на воды Египетския и изведе жабы: и



излезоша жабы и покрыша землю Египетскую. 7 Сотвориша же и волсви Египетстии волхвованиями своими такожде и изведоша жабы на землю Египетскую. 8 Призва же фараон Моисеа и Аарона и рече: помолитесь о мне ко Господу, да отженет от мене жабы и от людей моих: и отпущу люди, и пожрут Господви. 9 Рече же Моисей к фараону: определи мне, когда помолюся о тебе и о рабех твоих и о людех твоих, да погибнут жабы от тебе и от людей твоих и от домов ваших, точию в реце да останутся. 10 Он же рече: завтра. Рече убо: якоже рекл еси, да увеси, яко несть иного разве Господа: 11 и отженутся жабы от тебе и от домов ваших и от сел, и от рабов твоих и от людей твоих, точию в реце останутся. 12 Изыде же Моисей и Аарон от фараона, и возопи Моисей ко Господу о определении жаб, якоже совеща с фараоном. 13 Сотвори же Господь, якоже рече Моисей: и изомроша жабы от домов и от сел и от нив их: 14 и собраша я в стоги стоги, и возсмердеся земля. 15 Видев же фараон, яко бысть отрада, отяготися сердце его, и не послуша их, якоже рече Господь. 16 И рече Господь к Моисею: рцы Аарону: прости рукою жезл твой и удари в персть земную, и будут скнипы в человецех и в скотех, и на фараоне и на доме его и рабех его, и весь песок земный станет скнипами во всей земли Египетстей. 17 Простре убо Аарон рукою жезл и удари в персть земную: и быша скнипы в человецех и в скотех, и во всякой персти земной быша скнипы во всей земли Египетстей. 18 Твориша же и волсви волхвованми своими такожде извести скнипы, и не возмогоша: и быша скнипы в человецех и скотех. 19 Реша убо волсви фараону: перст Божий есть сие. И ожесточися сердце фараоново,

и не послуша их, якоже рече Господь. 20 Рече же Господь к Моисею: востани завтра и стани пред фараоном, и се, он изыдет на воду, и речеши ему: сия глаголет Господь: отпусти люди Моя, да Ми послужат в пустыни: 21 аще же не хочещи отпустить людей Моих, се, Аз посылаю на тя и на рабы твоя, и на люди твоя и на дома ваша песия мухи: и наполнятся домовы Египетстии песиих мух и в земли, на нейже суть: 22 и прославлю в той день землю Гесемску, на нейже людие Мои сташа, на нейже не будет тамо песиих мух, да увеси, яко Аз есмь Господь, Бог всея земли: 23 и положу разлучение между людьми Моими и людьми твоими: во утрии же будет знамение сие на земли. 24 Сотвори же Господь тако: и прииде песиих мух множество в дома фараоновы и в дома рабов его и во всю землю Египетску, и погибе земля от песиих мух. 25 Воззва же фараон Моисеа и Аарона, глаголя: шедше пожрите жертву Господу Богу вашему в земли сей. 26 И рече Моисей: не может се тако быти, хулно бо се Египтяном: не положим требу Господу Богу нашему: аще бо положим требу по хулению Египетску пред ними, камением побьют ны: 27 путем триех дний пойдём в пустыню и пожрем Господу Богу нашему, якоже рече Господь нам. 28 И рече фараон: аз отпущаю вы, и пожрите Господу Богу вашему в пустыни: но не далече простирайтесь ити: помолитесь убо и о мне ко Господу. 29 Рече же Моисей: се, аз изыду от тебе и помолюся ко Господу Богу, и отидут песия мухи от тебе и от рабов твоих и от людей твоих завтра: да не приложиши еще, фараоне, прельстити, еже не отпустить людей пожрети Господу. 30 Изыде же Моисей от фараона и помолися Богу. 31 Сотвори же Господь, якоже рече Моисей,

и отя песия мухи от фараона и от рабов его и от людий его, и не остана ни едина. 32 И отяготи фараон сердце свое и во время сие, и не восхоте отпустить людий.

**9** Рече же Господь к Моисею: вниди к фараону и речеши ему: сия глаголет Господь Бог Еврейский: отпусти люди Моя, да послужат Мне: 2 аще убо не восхощеши отпустить людий Моих, но и еще их удержиши: 3 се, рука Господня будет на скоты твоя в полях и на кони, и на ослы и на вельблуды, и на говьяда и на овцы, смерть велика зело: 4 и дивна сотворю Аз во время оно между скоты Египетскими и между скоты сынов Израилевых: и не умрет от всех скотов сынов Израилевых ни едино. 5 И даде Бог предел глаголя: во утрие сотворит Господь глаголгол сей на земли. 6 И сотвори Господь глаголгол сей на утрии, и измре весь скот Египетский: от скота же сынов Израилевых не умре ни едино. 7 Видев же фараон, яко не умре от всех скотов сынов Израилевых ни едино, отягчися сердце фараону, и не отпусти людий. 8 Рече же Господь к Моисею и Аарону, глаголя: возьмите вы полны руце пепела пещнаго, и да разсыплет Моисей к небеси пред фараоном и пред рабы его: 9 и да будет прах по всей земли Египетстей, и будут на человецех и на скотех гнойнии струпи, горящии на человецех и на скотех по всей земли Египетстей. 10 И взя пепел пещный пред фараоном, и разсыпа его Моисей к небеси: и быша гнойнии струпи, горящии на человецех и на скотех, 11 и не можаху волсви стояти пред Моисеом струпов ради: быша бо струпи на волсвех и на всей земли Египетстей. 12 Ожесточи же Господь сердце фараоново, и не послуша их, якоже повеле Господь Моисею. 13 И рече Господь к Моисею: востани заутра и

стани пред фараоном, и рцы к нему: сице глаголет Господь Бог Еврейский: отпусти люди Моя, да послужат Мне: **14** в сей бо час Аз испущу вся казни Моя в сердце твое и рабов твоих и людей твоих: да увеси, яко несть ин, якоже Аз, во всей земли: **15** ныне бо пустив руку Мою, поражу тя и люди твоя умерщвлю, и потребишися от земли: **16** и сего ради пощаден еси доселе, да покажу на тебе крепость Мою, и яко да проповестся имя Мое по всей земли: **17** еще ли убо ты встаеши на людей Моих, еже не отпустити их? **18** Се, Аз одождю в сей же час заутра град мног зело, яков не бяше во Египте, от негоже дне создася, даже до дне сего: **19** ныне убо потщися собрати скот твой, и елика ти суть на поли: вси бо человецы и скоти, елицы аще обрящутся на полях и не внидут в дом, падет же на ня град, измрут. **20** Иже убося слова Господня от рабов фараоновых, собра скоты своя в дома: **21** а иже не вня мыслию слову Господню, остави скоты на полях. **22** Рече же Господь к Моисею: простри руку твою на небо, и будет град по всей земли Египетстей, на человеки и на скоты и на всю траву земную. **23** Простре же Моисей руку на небо, и Господь даде громы и град, и течаше огонь по земли, и одожди Господь град по всей земли Египетстей: **24** бяше же град и огонь горящъ со градом, град же мног зело зело, яков не бысть во Египте, отнележе быша люди в нем. **25** Порази же град во всей земли Египетстей от человека до скота, и всяку траву яже на поли порази град, и вся древа яже на полях сотре град: **26** токмо в земли Гесемстей, идеже бяху сынове Израилевы, не бысть град. **27** Послав же фараон, призва Моисеа и Аарона и рече им: согреших ныне: Господь праведен аз же и людие мои нечестиви: **28**

помолитесь убо о мне ко Господу, и да престанут быти громи Божии и град и огонь на земли, и отпущу вы, и ктому не приложите медлти. **29** Рече же ему Моисей: егда изыду из града, простру руце мои на небо ко Господу, и громи престанут, и град и дождь не будет ктому, да увеси, яко Господня есть земля: **30** ты же и раби твои, вем, яко еще не убоястеса Господа. **31** Лен же и ячмень побит есть, ячмень бо испущаше класы, а лен семя: **32** пшеница же и жито не побиты, поздны бо бяху. **33** Изыде же Моисей от фараона из града и простре руце свои ко Господу, и громове престаша, и град и дождь не уканы на землю ктому. **34** Видев же фараон, яко преста дождь и град и громи, приложи согрешати еще, и отягчи сердце свое и рабов своих: **35** и ожесточися сердце фараоново и рабов его, и не отпусти сынов Израилевых, якоже глагола Господь к Моисею.

**10** Рече же Господь к Моисею глаголя: вниди к фараону: Аз бо ожесточих сердце его и рабов его, да и еще приидут знамения сия на них: **2** яко да повесте во ушеса чад ваших и чадом чад ваших, елико наругахся Египтяном, и знамения Моя, яже сотворих в них, и увесте, яко Аз Господь. **3** Вниде же Моисей и Аарон пред фараона и реста ему: сия глаголет Господь Бог Еврейский: доколе не хочещи усрамитися Мене? Отпусти люди Моя, да послужат Ми: **4** аще же не хочещи ты отпустити люди Моя, се, Аз наведу в сей час завтра пруги многи на вся пределы твоя, **5** и покрывают лице земли, и не возможещи видети земли, и поядят весь останок земли оставшийся, егоже остави вам град, и изядят всяко древо растущее вам на земли: **6** и наполнятся домове твои и домове рабов твоих, и вси домове по всей земли Египетстей:

ихже никогдаже видеша отцы твои, ни прадеды их, от негоже дне быша на земли, даже до дне сего. И уклонився Моисей, изыде от фараона. 7 Рекоша же раби фараоновы к нему: доколе нам сия будет мука? Отпусти люди, да послужат Господу Богу своему: или видети хочещи, яко погибнет Египет? 8 И возвратиша Моисеа и Аарона пред фараона, и рече им фараон: идите и послужите Господу Богу вашему: кто же и кто суть идущии? 9 И рече Моисей: с юнотами нашими и с старцы пойдем, с сынми и дщерьми, и со овцами и волами нашими: будет бо праздник Господа Бога нашего. 10 И рече им фараон: да будет тако, Господь с вами: якоже отпускаю вас, еда и стяжание ваше? Видите, яко лукавство обретається в вас: 11 не тако: но да идут мужие и да послужат Богу: сего бо сами просите. И изгнаша их от лица фараонова. 12 Рече же Господь Моисею: простри руку твою на землю Египетскую, и да въздут пружи на землю Египетскую, и снедят всю траву земную и весь плод древесный, егоже остави град. 13 И воздвиже Моисей жезл на небо, Господь же наведе ветр южный на землю во весь той день и во всю ночь: утро бысть, и ветр южный взя пруги, 14 и наведе я на всю землю Египетскую: и нападоша на вся пределы Египетския мнози зело: прежде сих не быша сицевии пружи, и по сих не будут тако, 15 и покрыша лице земное, и истле земля: и снедоша всю траву земную и весь плод древесный, иже остася от града: не остася зелено ничтоже на древех и во всей траве польней, по всей земли Египетстей. 16 Потщася же фараон призвати Моисеа и Аарона, глаголя: согреших пред Господем Богом вашим и к вам: 17 простите убо мой грех еще ныне и помолитесь Господу Богу вашему,

да отимет от мене смерть сию. 18 Изыде же Моисей от фараона и помолися ко Господу: 19 и премени Господь от моря ветр велик и взя пруги, и вверже их в море Чермное: и не остана ни един пруг на всей земли Египетстей. 20 И ожесточи Господь сердце фараоново, и не отпусти сынов Израилевых. 21 Рече же Господь Моисею: прости руку твою на небо, и да будет тма по земли Египетстей, осязаемая тма. 22 Простре же Моисей руку свою на небо, и бысть тма, мрак, буря по всей земли Египетстей три дни: 23 и не виде никтоже брата своего три дни, и не воста никтоже от одра своего три дни, всем же сыном Израилевым бяше свет во всех (жилищах), в нихже пребываху. 24 И призва фараон Моисея и Аарона, глаголя: идите, послужите Господу Богу вашему: токмо овцы и волы оставите: стяжание же ваше да идет с вами. 25 И рече Моисей: ни: но и ты нам даси всесожжения и жертвы, яже сотворим Господу Богу нашему: 26 и скот наш пойдет с нами, не оставим и копыта: от них бо возмем на службу Господу Богу нашему: мы же не вемы, чим послужим Господу Богу нашему, дондеже дойдем тамо. 27 Ожесточи же Господь сердце фараоново, и не восхоте отпустити их: 28 и рече ему фараон: отиди от мене, внемли себе ктому, да не приложиши видети лица моего: в оньже бо день аще явишия мне, умреш. 29 Рече же Моисей: якоже рекл еси, ктому не явлюся пред лицом твоим.

**11** Рече же Господь к Моисею: еще едину язву Аз наведу на фараона и на Египет, и по сих отпустит вы отсюда: егда же отпустит вы со всем, изженет вас изгнанием: 2 глаголи убо отай во уши людем, и да испросит кийждо у соседа, и жена у соседы своя сосуды сребряны и златы,

и ризы. 3 Господь же даде благодать людем Своим пред Египтяны, и даша им. Человек же Моисей велик бысть зело пред Египтяны и пред фараоном, и пред рабы его и пред очима всех людей. 4 И рече Моисей: сия глаголет Господь: в полунощи Аз вниду посреде Египта. 5 И измрет всяк первенец в земли Египетстей, от первенца фараонова, иже седит на престоле, и даже до первенца рабыни, яже у жернов, и до первенца всякаго скота: 6 и будет вопль велик по всей земли Египетстей, яков не бе, и таков ктому не будет. 7 Во всех же сынех Израилевых не поскомлет пес языком своим, от человека до скота: да узриши елико прославится Господь между Египтяны и сынми Израилевыми: 8 и приидут вси отроцы твои сии ко мне и поклонятся мне, глаголюще: отиди ты, и вси людие твои, ихже ты отводиши: и по сих отиду. Изыде же Моисей от фараона со гневом. 9 И рече Господь к Моисею: не послушает вас фараон, да умножая умножу знамения Моя и чудеса в земли Египетстей. 10 Моисей же и Аарон сотвориша вся знамения и чудеса сия пред фараоном: и ожесточи Господь сердце фараоново, и не восхоте отпустити сынов Израилевых от земли Египетския.

**12** Рече же Господь к Моисею и Аарону в земли Египетстей, глаголя: 2 месяц сей вам начало месяцев, первый будет вам в месяцах лета: 3 рцы ко всему сонму сынов Израилевых, глаголя: в десятый месяца сего да возмет кийждо овча по домом отечеств, кийждо овча по дому: 4 аще же мало их есть в дому, яко не доволным быти на овча, да возмет с собою соседа ближняго своего по числу душ: кийждо доволное себе сочтет на овча: 5 овча совершенно, мужеск пол, непорочно и единолетно будет вам, от агнец и от козлиц приимете: 6



и будет вам соблюдено даже до четвертагонадесять дне  
месяца сего: и заколют то все множество собора сынов  
Израилевых к вечеру, 7 и примут от крове и помажут на  
обою подвою и на прагах в домех, в нихже снедят тое, 8 и  
снедят мяса в нощи той печена огнем и опресноки с горьким  
зелием снедят: 9 не снесите от них сурово, ниже варено в  
воде, но печеное огнем, главу с ногами и со утробю: 10  
не оставите от него до утрия и кости не сокрушите от него,  
останки же от него до утра огнем сожжете: 11 сице же снесите  
е: чресла ваша препоясана, и сапозы ваши на ногах ваших, и  
жезлы ваши в руках ваших, и снесите е со тщанием: Пасха  
есть Господня: 12 и пройду землю Египетскую сея нощи, и  
убию всякаго первенца в земли Египетстей, от человека до  
скота, и во всех бозех Египетских сотворю отмщение: Аз  
Господь: 13 и будет кровь вам в знамение на домех, в нихже  
вы будете тамо, и узрю кровь и покрюю вы, и не будет в вас  
язвы, еже погибнути, егда поражу землю Египетскую: 14 и  
будет вам день сей в память, и празднуйте той праздник  
Господу во вся роды ваша: законно вечно празднуйте его: 15  
седьм дний опресноки ядите, от перваго же дне измите квас  
из домов ваших: всяк, иже снесть кисло, погибнет душа та от  
Израиля, от дне перваго даже до дне седмаго: 16 и первый  
день наречется свят, и седмый день нарочит свят да будет  
вам: всякаго дела работна да не сотворите в них, разве елика  
(снести) сотворятся всякой души, сия точию да сотворятся  
вам: 17 и сохраните заповедь сию: в сей бо день изведу  
силу вашу от земли Египетския: и сотворите день сей в роды  
ваша, законно вечно: 18 начинающе в четвертынадесять  
день перваго месяца, с вечера да снесите опресноки, до

двадцать первого дне месяца, до вечера: 19 семь дней квас да не явится в домех ваших: всяк, иже аще снестъ квасно, погубится душа та от сонма сынов Израилевых и в пришелицех и в жителех тоя земли: 20 всякого квасного да не ясте, во всех же домех ваших да ясте опресноки. 21 Созва же Моисей вся старцы сынов Израилевых и рече им: шедше поимите себе овца по сродством вашим и пожрите пасху: 22 возьмите же кисть иссопа, и омочивше в кровь, яже близ дверей, помажите праги, и на обою подвою, от крове, яже есть близ дверей: вы же да не изыдете кийждо из дверей дому своего до заутрия: 23 и мимо пройдет Господь избити Египтяны, и узрит кровь на празе и на обою подвою, и минет Господь двери, и не попустит погубляющему внити в дома ваша убивати: 24 и сохраните слово сие законно себе и сыном вашим до века: 25 аще же внидете в землю, юже даст Господь вам, якоже глагола, сохраните служение сие, 26 и будет егда возглаголют вам сынове ваши: что есть служение сие? 27 И рцыте им: жертва пасха сия Господу, Иже покры дома сынов Израилевых во Египте, егда поби Египтяны, дома же наша избави. И преклоншеса людие поклоншася. 28 И отшедше сотвориша сынове Израилевы, якоже заповеда Господь Моисею и Аарону, тако сотвориша. 29 Бысть же в полунощи, и Господь порази всякого первенца в земли Египетстей, от первенца фараонова сидящаго на престоле, до первенца пленницы, яже в рове, и до первенца всякого скотска. 30 Воста же фараон нощью, и вси раби его, и вси Египтяне, и бысть вопль велик по всей земли Египетстей, ибо не бысть дом, в немже не бе мертвеца. 31 И призва фараон Моисея и Аарона в нощи и рече им: встаните и

отидите от людей моих, и вы, и сынове Израилевы: идите и послужите Господу Богу вашему, якоже глаголете: **32** и овцы и говяда ваша поимше идите, благословите же и мене. **33** И нуждаху Египтяне людей со тщанием изринуты их от земли: рекоша бо, яко вси мы измрем. **34** Взяша же людие муку свою прежде вскисения теста своего, и ввязавше в ризы, (возложиша) на рамы своя. **35** Сынове же Израилевы сотвориша, якоже заповеда им Моисей: и испросиша от Египтян сосуды сребряны и златы, и ризы: **36** и даде Господь благодать людем Своим пред Египтяны: и даша им, и обраша Египтян. **37** Воздвигошася же сынове Израилевы от Рамессы в Сокхоф до шести сот тысящ пеших мужей, кроме домочадства: **38** и пришелцы мнози изыдоша с ними, и овцы, и волы, и скоти мнози зело. **39** И испекоша тесто, еже изнесоша из Египта, опресноки не кислы, не вскисоша бо: ибо изгнаша их Египтяне, и не возмогоша помедлити, ниже брашна сотвориша себе на путь. **40** Обитания же сынов Израилевых, иже обиташа в земли Египетстей и в земли Ханаани сии и отцы их, лет четыреста тридесать. **41** И бысть по четырех стех и тридесяти летех, изыде вся сила Господня от земли Египетския в нощи. **42** Стражба есть Господу, еже извести их от земли Египетския: оная нощь самая стражба Господу, яко всем сыном Израилевым быти в роды их. **43** И рече Господь к Моисею и Аарону: сей закон Пасхи: всяк иноплеменник да не яст от нея, **44** и всякаго раба или купленаго обрежеша его, и тогда да яст от нея: **45** пришлец или наемник да не яст от нея: **46** в дому едином да снесется: не оставите от мяс на утрие, и не изнесите мяс вон из дому, и кости не сокрушите от него: **47** весь сонм

сынов Израилевых сотворит сие: **48** аще же кто приидет пришлец к вам сотворити Пасху Господню, обрежеша его всяк мужеский пол, и тогда приступит сотворити ю, и будет аки житель земли тоя: всяк же необрезанный да не яст от нея: **49** закон един да будет тоя земли жителю и пришелцу пришедшему в вас. **50** И сотвориша сынове Израилевы, якоже заповеда Господь Моисею и Аарону, тако сотвориша. **51** И бысть в день он, изведе Господь сыны Израилевы от земли Египетския с силою их.

**13** И рече Господь к Моисею глаголя: **2** освяти Ми всякаго первенца перворожденного, разверзающаго всякая ложесна в сынех Израилевых от человека до скота, яко Мне есть. **3** Рече же Моисей к людем: помните день сей, в онже изыдoste от земли Египетския, из дому работы: рукою бо крепкою изведе вас Господь отсюда: и не ядите квасна, **4** понеже в днешний день исходите в месяце плодов новых: **5** и будет, егда введет тя Господь Бог твой в землю Хананейску и Хеттейску, и Аморрейску и Евейску, и Иевусейску и Гергесейску и Ферезейску, еюже клятся ко отцем твоим, дати тебе землю точашую млеко и мед, и сотвориши службу сию сего месяца: **6** шесть дний ядите опресноки, в седмый же день праздник Господу, **7** опресноки ядите семь дний: да не явится тебе квасное, ниже будет тебе квас во всех пределех твоих, **8** и возвестиши сыну твоему в день он, глаголя: сего ради сотворил Господь Бог мне, егда исхождах из Египта: **9** и будет тебе знамение на руце твоей, и воспоминание пред очима твоима, яко да будет закон Господнь во устех твоих, рукою бо крепкою изведе тя Господь Бог из Египта: **10** и сохраните закон сей по временом уставленным, от дний до

дний, **11** и будет егда введет тя Господь Бог твой в землю Хананейску, якоже кляся отцем твоим, и даст ю тебе: **12** и отлучиши всякое разверзающее ложесна, мужеск пол Господу: всякое разверзающее ложесна от стад или от скот твоих, елика будут тебе, мужеск пол освятиши Господу: **13** всякое разверзающее утробу ослию премениши овцею: аще же не премениши, искупиши е: и всякаго первенца человека сынов твоих да искупиши: **14** аще же вопросит тя сын твой по сих, глаголя: что сие? И речеши ему: яко рукою крепкою изведе нас Господь из земли Египетския, из дому работы, **15** егда бо ожесточися фараон отпустить нас, изби Господь всякаго первенца в земли Египетстей, от первенца человека до первенца скотия: сего ради аз в жертву приношу всякое разверзающее ложесна, мужеск пол Господу, и всякаго первенца сынов моих искуплю, **16** и будет в знамение на руже твоей, и непоколебимо пред очесы твоими: рукою бо крепкою изведе тя Господь из Египта. **17** Егда же отпусти фараон люди, не поведе их Бог путем земли Филистимския, яко близ бяше, ибо рече Бог: да не когда раскаются людие, видевшие рать, и возвратятся во Египет. **18** И обведе Бог люди путем, иже в пустыню к Чермному морю. Пятаго же рода изыдоша сынове Израилевы от земли Египетския. **19** И взя Моисей кости Иосифовы с собою: клятвою бо закла Иосиф сыны Израилевы, глаголя: присещением присетит вас Господь, и изнесете отсюда кости моя с собою. **20** Воздвигшеся же сынове Израилевы от Сокхофа, ополчишася во Офоме при пустыни. **21** Бог же вождаше их, в день убо столпом облачным, показати им путь, нощию же столпом

огненным, светити им: 22 и не оскуде столп облачный во дни и столп огненный ноцию пред всеми людьми.

**14** И рече Господь к Моисею глаголя: 2 рцы сыном Израилевым, и обратившеся да ополчатся прямо придворию, между Магдолом и между Морем, прямо Веельсепфону: пред ними ополчишия при мори: 3 и речет фараон людем своим о сынех Израилевых: заблуждают сии по земли, затвори бо их пустыня: 4 Аз же ожесточу сердце фараоново, и поженет создаи их, и прославлюся в фараоне и во всем воинстве его: и уразумеют вси Египтяне, яко Аз есмь Господь. И сотвориша тако. 5 И возвещено бысть царю Египетскому, яко бежаша людие, и превратися сердце фараоново и рабов его на люди, и рекоша: что сие сотворихом, отпустивше сыны Израилевы, да не работают нам? 6 Впряже убо фараон колесницы своя, и вся люди своя собра с собою: 7 и поят шесть сот колесниц избранных, и вся кони Египетския, и тристаты над всеми. 8 И ожесточи Господь сердце фараона царя Египетскаго и рабов его, и погна создаи сынов Израилевых. Сынове же Израилевы исхождаху рукою высокою. 9 И погнаша Египтяне вслед их, и обретоша их ополчившихся при мори: и вся кони и колесницы фараоновы, и конницы, и воинство его прямо придворию, противу Веельсепфона. 10 И фараон приближашеся. Возревше же сынове Израилевы очима, видеша: и се, Египтяне ополчишася вслед их: и убояшася зело, и возопиша сынове Израилевы ко Господу 11 и рекоша к Моисею: за еже не быти гробом во Египте, извел еси нас умертвити в пустыни: что сие сотворил еси нам, извед нас из Египта? 12 Не сей ли бяше глагол, егоже рекохом к тебе во Египте, глаголюще: остави нас, да работаем Египтяном:

лучше бо бяше нам работати Египтяном, нежели умрети в пустыни сей. 13 Рече же Моисей к людям: дерзайте, стойте и зрите спасение еже от Господа, еже сотворит нам днесь: имже бо образом видесте Египтян днесь, не приложите ктому видети их в вечное время: 14 Господь поборет по вас, вы же умолкните. 15 И рече Господь к Моисею: что вопиеши ко Мне? Рцы сыном Израилевым, и да путешествуют, 16 ты же возми жезл твой и простири руку твою на море, и расторгни е: и да внидут сынове Израилевы посреде моря по суху: 17 и се, Аз ожесточу сердце фараоново и всех Египтян, и внидут вслед их: и прославлюся в фараоне и во всем воинстве его, и в колесницах и в конех его, 18 и уведят вси Египтяне, яко Аз есмь Господь, егда прославляюся в фараоне и в колесницах и в конех его. 19 Взятся же Ангел Божий ходяй пред полком сынов Израилевых и поиде созади их, взятся же и столп облачный от лица их и ста созади их. 20 И вниде посреде полка Египетска и посреде полка сынов Израилевых и ста: и бысть тма и мрак, и прииде ночь, и не смесишася друг с другом во всю ночь. 21 Простре же Моисей руку на море, и возгна Господь море ветром южным сильным всю ночь, и сотвори море сушу, и разступися вода. 22 И внидоша сынове Израилевы посреде моря по суху, и вода им стена бысть одесную и стена ошуюю. 23 Погнаша же Египтяне и внидоша вслед их, и всяк конь фараонов, и колесницы, и всадники посреде моря. 24 Бысть же в стражу утреннюю, и воззре Господь на полк Египетский в столпе огненном и облачном, и смяте полк Египетский, 25 и связа оси колесниц их, и ведяше их с нуждею. И рекоша Египтяне: бежим от лица Израилева, Господь бо побораеет по ним на Египтяны. 26 И рече Господь

к Моисею: прости руку твою на море, и да совокупится вода и да покрывает Египтяны, колесницы же и всадники. 27 Простре же Моисей руку на море, и устроится вода ко дню на место: Египтяне же бежаша под водою, и истрясе Господь Египтяны посреде моря: 28 и обратившись вода покрывает колесницы и всадники и всю силу фараонову, вшедши вслед их в море: и не оста от них ни один. 29 Сынове же Израилевы проидоша по суку посреде моря: вода же им стена (бысть) одесную и стена ошуюю, 30 и избави Господь Израиля в день он из руки Египетския: и видеша сынове Израилевы Египтян измерших при краи моря. 31 Виде же Израиль руку великую, яже сотвори Господь Египтяном, и убояшася людие Господа и вероваша Богу и Моисею угоднику Его. Тогда воспе Моисей и сынове Израилевы песнь сию Господви, и рекоша глаголюще:

**15** Поим Господви, славно бо прославися: коня и всадника вверже в море: 2 Помощник и Покровитель бысть мне во спасение: Сей мой Бог и прославлю Его, Бог отца моего и вознесу Его: 3 Господь сокрушай брани, Господь имя Ему, 4 колесницы фараоновы и силу его вверже в море, избранныя всадники тристаты потопа в Чермнем мори, 5 пучиною покрывает их, погрязоша во глубине яко камень: 6 десница Твоя, Господи, прославися в крепости, десная Твоя рука, Господи, сокруши враги: 7 и множеством славы Твоя стерла еси сопротивных, послал еси гнев Твой, пояде я яко стеблие, 8 и духом ярости Твоя разступися вода: огустеша яко стена воды, огустеша и волны посреде моря: 9 рече враг: гнав постигну, разделю корысть, исполню душу мою, убию мечем моим, господствовать будет рука моя: 10 послал



еси духа Твоего, покры я море, погрязоша яко олово в воде зелней: 11 кто подобен Тебе в бозех, Господи, кто подобен Тебе? Прославлен во святых, дивен в славе, Творяй чудеса: 12 простерл еси десницу Свою, пожре я земля, 13 наставил еси правдою Твоею люди Твоя сия, яже избавил еси, утешил еси крепостию Твоею во обитель святую Твою: 14 слышаша языцы и прогневашася, болезни прияша живущии в Филистиме: 15 тогда потщашася владыцы Едомстии и князи Моавитстии, прият я трепет: растаяша вси живущии в Ханаане: 16 да нападет на ня страх и трепет: величием мышцы Твоея да окаменятся, дондеже пройдут людие Твои, Господи, дондеже пройдут людие Твои сии, яже стяжал еси: 17 введ насади я в гору достояния Твоего, в готовое жилище Твое, еже соделал еси, Господи, святыню, Господи, юже уготовасте руце Твои: 18 Господь царствуй веки, и на век, и еще: 19 егда вниде конница фараонова с колесницами и всадники в море, и наведе на них Господь воду морскую: сынове же Израилевы проидоша сушею посреде моря. 20 Взя же Мариам пророчица, сестра Ааронова, тимпан в руце свои, и изыдоша вся жены вслед ея со тимпаны и лики: 21 предначя же им Мариам, глаголющи: поим Господви, славно бо прославися: коня и всадника вверже в море. 22 Поят же Моисей сыны Израилевы от моря Чермнаго и веде их в пустыню Сур: и идяху три дни в пустыни, и не обретаху воды пити. 23 Приидоша же в Мерру, и не можаху пити воды от Мерры, горька бо бе: сего ради наречеса имя месту тому Горесть. 24 И роптаху людие на Моисея, глаголюще: что пием? 25 Возопи же Моисей ко Господу, и показа ему Господь древо, и вложи е в воду, и усладися вода: тамо положи ему

оправдания и судьбы, и тамо его искуси, **26** и рече: аще слухом услышиши глас Господа Бога твоего, и угодная пред ним сотвориши, и внушиши заповедем Его, и сохраниши вся оправдания Его: всяку болезнь, юже наведох Египтяном, не наведу на тя: Аз бо есмь Господь Бог твой исцеляяй тя. **27** И приидоша во Елим, и бяху тамо дванадесять источников вод, и седьмдесят стеблей финиковых: и ополчишася тамо при водах.

**16** Воздвигошася же от Елима, и прииде весь сонм сынов Израилевых в пустыню Син, яже есть между Елимом и между Синою. В пятый же надесять день втораго месяца изшедшым им от земли Египетския, **2** возропта весь сонм сынов Израилевых на Моисея и Аарона, **3** и рекоша к ним сынове Израилевы: о дабы быхом измерли мы уязвени от Господа в земли Египетстей, егда седяхом над котлы мясными и ядохом хлебы до сытости: яко изведосте ны в пустыню сию уморити весь сонм сей голодом. **4** Рече же Господь к Моисею: се, Аз одождю вам хлебы с небесе: и изыдут людие, и соберут доволное дню, на (всяк) день, яко да искушу их, аще пойдут в законе Моем, или ни. **5** И будет в день шестый, и уготовят, еже внесут, и да будет сугубо, еже собираша на всяк день. **6** Рече же Моисей и Аарон ко всему сонму сынов Израилевых: в вечер (сей) увесте, яко Господь изведе вы от земли Египетския, **7** и завтра узрите славу Господню, внегда услышати Господу роптание ваше на Бога: мы же что есмы, яко ропщете на ны? **8** И рече Моисей: егда даст Господь вам в вечер мяса ясти и хлебы завтра до сытости, понеже услыша Господь роптание ваше, имже ропщете на ны: мы же что есмы? Не

на нас бо роптание ваше, но точию на Бога. 9 И рече Моисей ко Аарону: глаголи ко всему сонму сынов Израилевых: приидите пред Бога, услыша бо роптание ваше. 10 Егда же глаголаше Аарон всему сонму сынов Израилевых, и обратишася в пустыню, и слава Господня явися во облаце, 11 и рече Господь к Моисею глаголя: 12 слышах роптание сынов Израилевых: рцы к ним глаголя: к вечеру да снесите мяса и завтра насытитесь хлебов, и увесте, яко Аз есмь Господь Бог ваш. 13 Бысть же вечер, и приидоша крастели и покрыша полк. Завтра же бысть спадшей росе около полка, 14 и се, на лица пустыни мелко яко кориандр, бело аки лед на земли. 15 Узревше же то сынове Израилевы, реша друг ко другу: что есть сие? Не ведяху бо, что бяше. Рече же Моисей к ним: сей хлеб, егоже даде Господь вам ясти: 16 сей глаголго, егоже завета Господь: соберите от него кийждо на домашния, гомор поглавно по числу душ ваших, кийждо вас с домашними своими соберите. 17 И сотвориша тако сынове Израилевы, и собраша ов много, ов же мало: 18 и измеривше гомором, не преизбыточествова иже много, и иже мало, не менее прият: кийждо на домашних своих собраша. 19 И рече Моисей к ним: никтоже да оставит на утрие от него. 20 И не послушаша Моисеа, но оставиша нецыи от него на утрие, и воскипе червми и возсмердеся. И оскорбися на них Моисей. 21 И собираша оное рано рано, кийждо надлежащее себе: егда же огреваше солнце, растаяваше. 22 Бысть же в день шестый, собраша потребное сугубо, два гомора комуждо. Приидоша же вси князи сонма и поведаша Моисею. 23 Рече же Моисей к ним: сие слово есть, еже глагола Господь: суббота покой свят Господу завтра: елика

аще печете, пецйте, и елика аще варите, варите, все же избыточное оставите в скрове на утрие. 24 И оставиша от того до утрия, якоже заповеда им Моисей: и не возсмердеса, ниже червь бысть в нем. 25 Рече же Моисей: ядите днесь, есть бо суббота покой Господу: днесь не обрящете на поли: 26 шесть дний собирайте, в седмый же день суббота: яко не будет в нем. 27 Бысть же в седмый день, изыдоша неции от людий собирати, и не обретоша. 28 Рече же Господь Моисеови: доколе не хочете послушати заповедий Моих и закона Моего? 29 Зрите: Господь бо даде вам субботу день сей: сего ради Той даде вам в день шестый хлеба на два дни: седите кийждо вас в дому своем у себе, никтоже да исходит от места своего в день седмый. 30 И субботствоваша людие в день седмый. 31 И прозваша сынове Израилевы имя тому манна: бяше же яко семя кориандрово бело, вкус же его аки мука с медом. 32 Рече же им Моисей: сей глаголгол, егоже завета Господь: наполните гомор от манны в скров в роды ваша: да видят хлеб, егоже ядoste вы в пустыни, егда изведе вас Господь от земли Египетския. 33 И рече Моисей ко Аарону: возми стамну златую едину и вложи в ню гомор полный от манны, и положиши тую пред Богом в соблюдение в роды ваша. 34 Якоже заповеда Господь Моисею, положи ю Аарон пред свидением в соблюдение. 35 Сынове же Израилевы ядоша манну лет четыредесять, дондеже приидоша в землю обитаемую, и ядоша манну, дондеже приидоша во страну Финикийскую: 36 гомор же десятая часть трех мер бяше.

**17** И воздвижеса весь сонм сынов Израилевых от пустыни Син по полком своим словом Господним и ополчисяся

в Рафидине. Не быше же воды людем пити, 2 и хуляху людие Моисеа, глаголюще: даждь нам воду, да пием. И рече им Моисей: что хулите мя? И что искушаете Господа? 3 Возжаждаша же тамо людие воды и роптаху на Моисеа, глаголюще: вскую сие? Извел еси нас из Египта уморити нас и чада наша и скоты жаждю? 4 Возопи же Моисей ко Господу глаголя: что сотворю людем сим? Еще мало, и побьют мя камением. 5 И рече Господь к Моисею: пойдь пред людьми сими, и поими с собою от старец людских, и жезл, имже пресекл еси море, возми в руку твою, и пойдь: 6 Аз же стану тамо прежде пришествия твоего у камене в Хориве: и удариши в камень, и изыдет из него вода, и да пьют людие. Сотвори же Моисей тако пред сыны Израилевыми, 7 и прозва имя месту тому Искушение и Похуление, хулы ради сынов Израилевых, и занеже искусиша Господа, глаголюще: аще есть в нас Господь, или ни? 8 Прииде же Амалик и воева на Израиля в Рафидине. 9 Рече же Моисей ко Иисусу: избери себе мужы сильны и изшед ополчися на Амалика заутра: и се, аз стану на верху горы, и жезл Божий в руке моей. 10 И сотвори Иисус, якоже рече ему Моисей, и изшед ополчися на Амалика: Моисей же и Аарон и Ор възыдоша на верх горы. 11 И бысть егда воздвизаше Моисей руке, одолеваше Израиль: егда же опускаше руке, одолеваше Амалик: 12 руке же Моисеовы тяжки беша: и вземше камень, подложиша ему, и седяше на нем: Аарон же и Ор поддержаста руке ему, един отсюда, а другой оттуду: и быша Моисеови руке укреплены до захождения солнца: 13 и преодоле Иисус Амалика и вся люди его убийством меча. 14 Рече же Господь к Моисею: впиши сие на память в книги и вдай во уши Иисусу, яко

пагубою погублю память Амаликову от поднебесных. 15 И созда Моисей олтарь Господу и прозва имя ему Господь Прибежище мое: 16 яко рукою тайною ратует Господь на Амалика от рода в род.

**18** Услыша же Иофор, иерей Мадиамский, тесть Моисеов, вся, елика сотвори Господь Израилю Своим людем, яко изведе Господь Израиля из Египта: 2 и поя Иофор, тесть Моисеов, Сепфору, жену Моисеову, по отпущении ея, 3 и два сына ея: имя единому от них Гирсам, глаголя: пришлец бых в земли чуждей, 4 и имя второму Елиезер, глаголя: Бог бо отца моего помощник мой и избави мя из руки фараони. 5 И прииде Иофор, тесть Моисеов, и сынове и жена к Моисею в пустыню, идеже ополчися при горе Божией. 6 Возвестиша же Моисею, глаголюще: се, Иофор, тесть твой, идет к тебе, и жена твоя, и оба сына твоя с ним. 7 Изыде же Моисей во сретение тестю своему и поклонися ему и целова его, и приветствоваша друг друга: и введе их Моисей в кущу. 8 И поведа Моисей тестю своему вся, елика сотвори Господь фараону и всем Египтяном Израиля ради, и весь труд бывший им на пути, и яко избави их Господь от руки фараони и от руки Египетския. 9 Ужасеся же Иофор о всех благих, яже сотвори им Господь, яко избави их Господь от руки Египетския и от руки фараони, 10 и рече Иофор: благословен Господь, яко избави люди Своя из руки Египетския и из руки фараони: 11 ныне уведех, яко велик Господь паче всех богов, сего ради, яко налегоса на них. 12 И взя Иофор тесть Моисеов всесожжения и жертвы Богу: прииде же Аарон и вси старцы Израилевы ясти хлеба с тестем Моисеовым пред Богом. 13 И бысть на утрие, седе Моисей судити люди:

стояху же пред Моисеом вси людие от утра до вечера. 14 Видев же Иофор вся, елика творяше людем, рече: что сие, еже ты твориши людем? Почто ты един седиши, вси же людие предстоят тебе от утра до вечера? 15 Рече же Моисей тестю: понеже приходят людие ко мне просити суда от Бога: 16 егда бо бывает им распря, и приходят ко мне, разсуждаю коемуждо и сказую им повеления Божия и закон Его. 17 Рече же тесть Моисеов к нему: не право ты твориши глагол сей: 18 трудом утрудилшия несносным и ты, и вси людие сии, иже суть с тобою: тяжек тебе глагол сей, не возможеши творити ты един: 19 ныне убо послушай мене и присоветую тебе, и будет Бог с тобою: буди ты людем в тех яже к Богу, и донесеши словеса их к Богу, 20 и засвидетелствуй им повеления Божия и закон Его, и повеждь им пути Его, имиже пойдут, и дела, яже сотворят: 21 ты же усмотри себе от всех людий мужы сильны, Бога боящияся, мужы праведны, ненавидящия гордости, и поставиши их над ними тысященачальники и стоначальники, и пятьдесятоначальники и десятоначальники и писмовводители, 22 и судят людий по вся часы: слово же неудоборешительное донесут к тебе: малыя же суды да судят они, и облегчат тя и спомогут тебе: 23 аще слово сие сотвориши, укрепит тя Бог, и возможеши настоятелствовати, и вси людие сии приидут во свое место с миром. 24 Послуша же Моисей гласа тестя своего и сотвори вся, елика рече ему: 25 и избра Моисей мужы сильны от всего Израиля, и сотвори я над ними тысященачальники и стоначальники, и пятьдесятоначальники и десятоначальники и писмовводители: 26 и суждаху людем по вся часы: всякое же слово неудоборешительное доносиша к Моисею, всякое же

слово легкое суждахи сами. 27 Отпусти же Моисей тестя своего, и отиде в землю свою.

**19** Месяца же третияго изшествия сынов Израилевых от земли Египетския, в сий день приидоша в пустыню Синайскую: 2 и воздвигошася от Рафидина и приидоша в пустыню Синайскую, и ополчися тамо Израиль прямо горы. 3 Моисей же възыде на гору Божию, и възва его Бог от горы глаголя: сия возглаголеши дому Иаковлю и повеси сыном Израилевым: 4 сами видесте, елика сотворих Египтяном, и подях вас яко на крилех орлих и приведох вас к Себе: 5 и ныне аще слухом послушаете гласа Моего и сохраните завет Мой, будете Ми людие избранни от всех язык: Моя бо есть вся земля: 6 вы же будете Ми царское священство и язык свят: сия словеса да речеши сыном Израилевым. 7 Прииде же Моисей и призва старцы людския и предложи им вся словеса сия, яже завета им Бог. 8 Отвещаша же вси людие единодушно и рекоша: вся, елика рече Бог, сотворим и послушаем. Донесе же Моисей словеса сия к Богу, 9 и рече Господь к Моисею: се, Аз прииду к тебе в столпе облачне, да услышат людие глаголюща мя к тебе и да тебе веруют во веки. Поведа же Моисей словеса людий ко Господу. 10 Рече же Господь Моисею: сошед засвидетелствуй людем и очисти я днешь и утре, и да исперут ризы, 11 и да будут готовы в день третий: в третий бо день снидет Господь на гору Синайскую пред всеми людьми: 12 и устроиши люди окрест глаголя: внимлите себе не восходити на гору и ни чимже коснутися ея: всяк прикоснувшийся горе смертию умрет: 13 не коснется ей рука, камением бо побиется или стрелою устрелится, аще скот, аще человек, не будет жив: егда же



гласи и трубы и облак отидет от горы, сии въздут на гору. 14  
Сниде же Моисей с горы к людем, и освяти я, и испраша  
ризы своя: 15 и рече людем: будите готови, три дни не  
входите к женам. 16 Бысть же в третий день бывшу ко утру,  
и быша гласи и молния и облак мрачен на горе Синайстей,  
глас трубный глашаше зело: и убояшася вси людие, иже  
в полце: 17 изведе же Моисей люди во сретение Богу из  
полка, и сташа под горою. 18 Гора же Синайская дымяшеся  
вся, схождения ради Божия на ню во огни, и восхождаше  
дым, яко дым пещный: и ужасошася вси людие зело. 19  
Быша же гласи трубнии происходяще крепцы зело: Моисей  
глаголаше, Бог же отвещаваше ему гласом. 20 Сниде же  
Господь на гору Синайскую на верх горы, и воззва Господь  
Моисеа на верх горы, и възде Моисей: 21 и рече Бог к  
нему глаголя: сошед засвидетелствуй людем, да не когда  
приступят к Богу уразумети, и падут от них мнози: 22 жерцы  
же приступающии ко Господу Богу да освятятся, да не когда  
погубит от них Господь. 23 И рече Моисей к Богу: не возмогут  
людие възйти на гору Синайскую: Ты бо заведчал еси нам  
глаголя: определи гору и освяти ю. 24 И рече ему Господь:  
иди, сниди и възди ты и Аарон с тобою: жерцы же и людие  
да не нудятся възйти к Богу, да не когда погубит от них  
Господь. 25 Сниде же Моисей к людем и поведа им.

**20** И глагола Господь вся словеса сия к Моисею глаголя: 2  
Аз есмь Господь Бог твой, изведый тя от земли Египетския,  
от дому работы: 3 да не будут тебе бози инии разве Мене. 4  
Не сотвори себе кумира и всякаго подобия, елика на небеси  
горе и елика на земли низу, и елика в водах под землею: 5 да  
не поклонишися им, ни послужиши им: Аз бо есмь Господь

Бог твой, Бог ревнитель, отдавая грехи отец на чада до третьего и четвертого рода ненавидящим Мене, 6 и творяй милость в тысящах любящим Мя и хранящим повеления Моя. 7 Не возмешь имене Господа Бога твоего всуе: не очистит бо Господь приемлющего имя Его всуе. 8 Помни день субботный, еже святити его: 9 шесть дний делай и сотвориши (в них) вся дела твоя: 10 в день же седмый, суббота Господу Богу твоему: да не сотвориши всякаго дела в онь ты и сын твой и дщерь твоя, и раб твой и раба твоя, и вол твой и осля твое и всякий скот твой, и пришлец обитай у тебе: 11 зане в шести днех сотвори Господь небо и землю, море и вся яже в них, и почи в день седмый: сего ради благослови Господь день седмый и освяти его. 12 Чти отца твоего и мать твою, да благо ти будет и да долголетен будешь на земли блазе, юже Господь Бог твой дает тебе. 13 Не убий. 14 Не прелюбы сотвори. 15 Не укради. 16 Не послушествуй на друга своего свидетелства ложна. 17 Не пожелай жены искренняго твоего, не пожелай дому ближняго твоего, ни села его, ни раба его, ни рабыни его, ни вола его, ни осла его, ни всякаго скота его, ни всего, елика суть ближняго твоего. 18 И вси людие зряху глас и свещы, и глас трубный и гору дымящуюся: и убоявшеся вси людие стаха издалече, 19 и рекоша Моисею: глаголи ты с нами, и да не глаголет к нам Бог, да не когда умрем. 20 Рече же им Моисей: дерзайте: искушения бо ради прииде Бог к вам, яко да будет страх Его в вас, да не согрешаете. 21 Стояху же вси людие издалече: Моисей же вниде во мрак, идеже бяше Бог. 22 Рече же Господь к Моисею: сия речеши дому Иаковлю и возвестиши сыном Израилевым: вы видесте, яко с небесе

глаголах к вам: **23** не сотворите себе сами богов серебряных и богов золотых не сотворите самым себе: **24** олтарь из земли сотворите Ми и пожрете на нем всесожжения ваша и спасительная ваша, и овцы и телцы ваша, на всяком месте, идеже нареку имя Мое тамо, и прииду к тебе и благословлю тя: **25** аще же олтарь от камней сотвориши Ми, да не устроиши их тесаных: сечиво бо твое аще возложиши на них, то осквернятся: **26** да не въздеши по степенем ко олтарю Моему, яко да не откриеши срамоты твоя на нем.

**21** И сия оправдания, яже да положиши пред ними: **2** аще стяжеш раба Евреина, шесть лет да поработает тебе, в седмое же лето отпустиши его свобода туне: **3** аще сам един внидет, то един и изыдет: аще же жена внидет с ним, то и жена отидет с ним: **4** аще же господин даст ему жену, и родит ему сыны или дщери, жена и дети да будут господину его, сам же един да отидет. **5** Аще же отвечава раб речет: возлюбих господина моего и жену мою и дети моя, не отхожду свободен: **6** да приведет его господин его пред судище Божие, и тогда приведет его пред двери на праг, и да провертит ему ухо господин его шилом, и да поработает ему во веки. **7** Аще же кто продаст свою дщерь в рабыню, да не отидет, якоже отходят рабыни: **8** аще не угодит пред очима господина своего, юже он взяти в жену обеща, да отпустит ю: языку же чуждему господин да не продаст ея, понеже отверже ю: **9** аще же сыну своему обещал ю, по обыкновению дщерей да сотворит ей: **10** аще же другую поймет себе, потребных и одежд и союбщения ея да не лишит: **11** аще же сих трех не сотворит ей, да отидет без сребра туне. **12** И аще кого кто ударит, и умрет, смертью да

умрет (и той): 13 аще же не хотя, но Бог предаде в руке его, дам тебе место, в неже убежит тамо убивый: 14 аще же кто приложит убити ближняго своего лестию и прибегнет ко олтарю, от олтаря Моего да возмеша того умертвити. 15 Иже биет отца своего или мать свою, смертью да умрет. 16 Иже злословит отца своего или мать свою, смертью да умрет. 17 Аще кто кого украдет от сынов Израилевых, и соодолев сему продаст его, и обрящется у него, смертью да скончается. 18 Аще же сварятся два мужа, и ударит един другаго камнем или пястиею, и не умрет, но сляжет на одре: 19 аще востав человек походит вне о жезле, неповинен будет ударивый его: точию за неделание его да даст цену и на цельбу. 20 Аще же кто ударит раба своего или рабу свою жезлом, и умрет от руки его, судом да отмститися: 21 аще же преживет день един или два, да не мститися: серебро бо его есть. 22 Аще же бьются два мужа, и поразят жену непраздну, и изыдет младенец ея неизображен, тщетою да отщетитися: якоже наложит муж жены тоя, подобающее да отдаст: 23 аще же изображен будет, да даст душу за душу, 24 око за око, зуб за зуб, руку за руку, ногу за ногу, 25 жжение за жжение, язву за язву, вред за вред. 26 Аще же кто исткнет око рабу своему или око рабыни своей и ослепит, свободны да отпустит я за око их: 27 аще же зуб рабу своему или зуб рабе своей избьет, свободны да отпустит я за зуб их. 28 Аще же вол убодет мужа или жену, и умрет, камением да побьется вол той, и да не снесят мяса его, господин же вола неповинен будет: 29 аще же вол бодлив будет прежде вчерашняго и третияго дне, и возвестят господину его, и не заключит его, и убьет мужа или жену: вол камением да

побиется, и господин его купно да умрет: **30** аще же окуп наложится ему, да даст окуп за душу свою, елико наложат ему: **31** аще же сына или дочь убодет, по сему же суду да сотворят ему: **32** аще же раба или рабу убодет вол, сребра тридесять дидрахм да даст господину их, и вол камением да побиется. **33** Аще же кто отверзет яму или ископает яму и не покрывает ея, и впадется в ню телец или осля, **34** господин ямы отдаст (цену), сребро даст господину их: умершее же ему да будет. **35** Аще же чий вол убодет вола ближняго, и умрет, да продадут вола живаго, и да разделят цену его, и вола умершаго да разделят: **36** аще же знаемь есть вол, яко бодлив есть прежде вчерашняго и третияго дне, и глаголаша господину его, и той не заключит его: да отдаст вола за вола, мертвый же ему да будет.

**22** Аще же кто украдет телца или овцу, и заколет или продаст, пять телцев да воздаст за телца и четыре овцы за овцу. **2** Аще же в подкопании обрящется тать, и язвен умрет, несть ему убийство: **3** аще же въздет солнце над ним, повинен есть, умрет за него: аще же не имать имения, да продастся за татьбу: **4** аще же ят будет, и обрящется в руце его украденое от осляте до овцы живо, сугубо да отдаст я. **5** Аще же кто потравит ниву или виноград, и пустит скот свой пастися на чужей ниве, да даст от нивы своя по плоду его: аще же всю ниву потравит, лучшая нивы своя и лучшая винограда своего да отдаст. **6** Аще же изшед огонь обрящется терние и запалит гумно, или класы, или ниву, да отдаст, иже возже огонь. **7** Аще же кто даст другу сребро или сосуд сохранити, и украдется из дому мужа того, аще обрящется украдый, да воздаст сугубо: **8** аще же не обрящется украдый,

да приидет господин дому пред бога и да кленется, яко поистинне не слукавствова он о всем положении дружном. 9 По всей реченной неправде, о теляти и о осяти и о овце, и о ризе и о всей гибели нанесенной, что убо ни было бы, пред богом да приидет суд обоих, и обвиненный богом да отдаст сугубо ближнему. 10 Аще же кто даст другу ося или телца, или овцу, или всяк скот хранити, и умрет или погибнет, или пленено будет, и никтоже увести, 11 клятва да будет Божия между обоими, яко поистинне не слукавствова он о всем ближняго положении, и тако приимет господин его, и да не отдаст: 12 аще же украдено будет от него, да отдаст господину: 13 аще же зверь снеде, да ведет его на звероядину, и не отдаст: 14 аще же кто испросит у друга, и погибнет, или умрет, или пленится, господин же его не будет с ним, отдаст: 15 аще же господин его будет с ним, да не отдаст: аще же наемник есть, да будет ему вместо мзды его. 16 Аще же прельстит кто не обручену девицу, и будет с нею, веном да отвенит ю, (и поймет ю) себе в жену: 17 аще же возбраняя возбранит и не восхоцет отец ея дати ю ему в жену, серебро да воздаст отцу, елико есть вено девическо. 18 Волхвом живым быти не попустите. 19 Всякаго со скотом бывающа смертию убиете его. 20 Иже жертву приносит богом, смертью да потребится, но точию Господу единому. 21 И пришелца не озлобите, ниже оскорбите его: пришелцы бо бесте в земли Египетстей. 22 Всякия вдовы и сироты не озлобите: 23 аще же злобою озлобите Я, и возстенавше возопиют ко мне, слухом услышу глас их 24 и разгневаюся яростию, и побию вы мечем, и будут жены ваша вдовы, и чада ваша сироты. 25 Аще же даси серебро взаем брату

нищему иже у тебе, не буди его понуждаяй, ниже наложиши ему лихвы. 26 И аще заложит в залог ризу друг твой, до захождения солнца одаси ему: 27 есть бо сия покровение ему, сия едина риза стыдения его, в чем спати будет: аще убо возопиет ко Мне, услышу его: милостив бо есмь. 28 Богов да не злословиши и князю людей твоих да не речеши зла. 29 Начатки от гумна и от точила твоего да не косниши принести (Мне): первенцы сынов твоих да даси Мне: 30 тако сотвориши телцу твоему, и овце твоей, и ослу твоему: седьм дний да будет у матери, в осмый же день да одаси оное Мне. 31 Люди святы будете Ми, и мяса звероядиннаго да не снете, псом повержете е.

**23** Да не примеша слуха суетна, да не приложиши с неправедным быти свидетель неправеден: 2 да не будеша со многими на злобу, да не приложиши ко множеству уклонитися со множайшими, яко превратити суд, 3 и нищаго да не помилуеши на суде. 4 Аще же срящеши говядо врага твоего или осля его заблуждающее, обратив да одаси ему: 5 аще же узриши осля врага твоего падшее под бременем его, да не мимоидеши е, но да воздвигнеши е с ним. 6 Да не превратиши суда нищему в суде его. 7 От всякаго слова неправеднаго да отступиши: неповинна и праведна да не убиеша, и не оправдиши нечестиваго даров ради, 8 и да не возмеша даров: дары бо ослепляют очи видящим и погубляют словеса праведна. 9 И пришелца не оскорбляйте, ни стужите (ему): вы бо весте душу пришелчу, понеже сами бесте пришелцы в земли Египетстей. 10 Шесть лет да сееша землю твою и да собереша плоды ея: 11 в седмое же оставление да сотвориши и опустиши ю, и да ясти будут

убозии языка твоего, останки же да снесут зверие дивии: тако да сотвориши винограду твоему и масличию твоему. 12 В шесть дний да сотвориши дела твоя, в седмый же день покой: да почиет вол твой и осел твой, и да почиет сын рабы твоя и пришлец. 13 Вся, елика глаголах вам, сохраните, имен же богов инех не поминайте, ниже да слышатся изо уст ваших. 14 Три краты в лете сотворите Ми праздник: 15 праздник опресноков сохраните творити, седмь дний ядите опресноки, якоже заповедах тебе, во время месяца новых плодов, в той бо изшел еси из Египта, да не явишия предо Мною тощъ: 16 и праздник жатвы первородных жит сотвориши от дел твоих, яже посееси на ниве твоей: и праздник скончания при исходе лета в собрании дел твоих, яже от нив твоих. 17 Три краты в лете да явится всяк мужеск пол твой пред Господем Богом твоим. 18 Егда бо изжену языки от лица твоего и разширю пределы твоя, да не пожреши на квасе крове жертвы Моея, ниже да долежит тук праздника Моего до утрия. 19 Начатки первых жит земли твоя да внесеши в дом Господа Бога твоего. Да не свариши ягняте во млеце матери его. 20 И се, Аз послю Ангела Моего пред лицом твоим, да сохранит тя на пути, яко да введет тя в землю, юже уготовах тебе: 21 вонми себе и послушай Его, и не ослушайся Его: не обинется бо тебе, имя бо Мое есть на Нем: 22 аще слухом слушаеши гласа Моего и сотвориши вся, елика Аз заповедаю тебе, и сохраниши завет Мой, будете Ми люди избранни от всех язык: Моя бо есть вся земля, вы же будете Ми царское священство и язык свят. Сия словеса да речеши сыном Израилевым. Аще слухом слушаеши гласа Моего и сотвориши вся,



елика реку тебе, враг буду врагом твоим и сопротивлюся сопротивником твоим. **23** Пойдет бо Ангел Мой наставляяй тя и введет тя ко Аморрею и Хеттею, и Ферезею и Хананею, и Гергесею и Евею и Иевусею, и потреблю их (от лица вашего): **24** да не поклонишися богом их, ниже послужиши им: да не сотвориши по делом их, но разорением разориши и сокрушением сокрушиши капища их, **25** и да послужиши Господу Богу твоему: и благословлю хлеб твой и вино твое и воду твою, и отвращу болезнь от вас. **26** Не будет безчаден, ниже неплоды на земли твоей: число дний твоих исполняя исполню. **27** И страх послю ведущий тя, и устрашу вся языки, в няже ты входиши к ним, и дам вся сопротивники твоя в бегуны: **28** и послю шершни пред тобою, и изжену Аморреи и Евеи, и Иевусеи и Хананеи и Хеттеи от тебе: **29** не изжену их в лете едином, да не будет земля пуста, и мнози будут на тя звери земнии: **30** помалу помалу изжену их от тебе, дондеже возрастеш и наследиши землю. **31** И положу пределы твоя от Чермнаго моря до моря Филистимля, и от пустыни до реки великия Евфрата, и предам в руке ваши сидящих на земли и изжену их от тебе: **32** да не смесишися с ними, и с боги их да не завещаеши завета, **33** и да не останутся на земли твоей, да не сотворят тя согрешити ко Мне: аще бо поработаеши богом их, сии будут тебе в соблазн.

**24** И Моисею рече: възди ко Господу ты и Аарон, и Надав и Авиуд и седьдесят старец Израилевых, и да поклонятся издалече Господу: **2** и да приступит Моисей един к Богу, они же да не приступят: и людие с ними да не въздут. **3** Прииде же Моисей и поведа людем вся словеса Божия и оправдания. Отвещаша же вси людие гласом единым, глаголюще: вся

словеса, яже глагола Господь, сотворим и послушаем. 4 И написа Моисей вся словеса Господня: обутрев же Моисей завтра, созда олтарь под горою, и дванадесять камений в дванадесять племен Израилевых: 5 и посла юношы сынов Израилевых, и принесоша всесожжения, и пожроша жертву спасения Господу Богу телцы. 6 Взем же Моисей половину крове, вляя в чаши, половину же крове возля на олтарь, 7 и взем книгу завета, прочте людем во уши. И рекоша: вся, елика глагола Господь, сотворим и послушаем. 8 Взем же Моисей кровь, окропи люди и рече: се, кровь завета, егоже завеща Господь к вам о всех словесех сих. 9 И взыде Моисей и Аарон, и Надав и Авиуд и седмьдесят от старец Израилевых, 10 и видеша место, идеже стояше Бог Израилев: и под ногама Его яко дело камене сапфира, и яко видение тверди небесныя чистотою. 11 И от избранных Израилевых не повредися ни един: и явишася на месте Божии, и ядоша, и пиша. 12 И рече Господь к Моисею: взыди ко Мне на гору и стани тамо, и дам ти скрижали каменные, закон и заповеди, яже написах законоположити им. 13 И востав Моисей и Иисус предстоявый ему, взыдоша на гору Божию 14 и старцем реша: пождите в молчании zde, дондеже возвратимся к вам: и се, Аарон и Ор с вами: аще кому случится суд, да идут к ним. 15 И взыде Моисей на гору, и покры облак гору, 16 и сниде слава Божия на гору Синайскую, и покры ю облак шесть дний. И воззва Господь Моисеа в день седмый из среды облака: 17 обличие же славы Господни, яко огонь пламенюя на версе горы, пред сыны Израилевы. 18 И вниде Моисей в среду облака и взыде на гору, и бе тамо на горе четыредесять дний и четыредесять нощей.

**25** И рече Господь к Моисею, глаголя: 2 рцы сыном Израилевым, и да возмут Ми начатки от всех, яже угодна будут сердцу их, да возмете начатки Моя. 3 Сей же есть начаток, егоже возмете от них: золото и серебро и медь, 4 и синету и багряницу, и червленицу сугубу (пряденую), и виссон сканый, и власы козия, 5 и кожи овни очервленены, и кожи сини, и древа негниющая, 6 и елей в свещение, фимиам во елей помазания и в сложение фимиама, 7 и камни Сардийския, и камни в ваяние на епомиду и подир. 8 И да сотвориши Ми освящение, и явлюся в вас: 9 и сотвориши ми по всему, елика Аз покажу тебе на горе, образ скинии и образ всех сосудов ея: сице да сотвориши. 10 И сотвориши кивот свидения от древ негниющих, двою лактей и пол в долготу, и лактя и пол в широту, и лактя и пол в высоту: 11 и позлатиши его золотом чистым, внутрьуду и внеуду позлатиши его, и сотвориши верху его венец злат витый окрест: 12 и слиеши ему четыре колца злата, и возложиши на четыре страны его, два колца на едину страну, и два на другую страну. 13 Сотвориши же носила от древа негниюща и позлатиши я золотом чистым: 14 и вложиши носила в колца, яже на странах кивота, носити ими кивот: 15 в колцах кивота да будут носила не зыблющися: 16 и вложиши в кивот свидения, яже дам тебе. 17 И да сотвориши очистилище покров от злата чиста, двою лактей и пол в долготу, лактя же и пол в широту: 18 и сотвориши два херувима злата изваянна, и возложиши я от обоих стран очистилища: 19 да сотворятся херувими, един от страны сея и другой от страны другия очистилища, и сотвориши два херувима на обоих странах: 20 да будут херувими

распростирающе крила верху, соосеняюще крилами своими над очистилищем, и лица их ко другъдругу, на очистилище будут лица херувимска: 21 и да возложиши очистилище на кивот верху, и в кивот да вложиши свидения, яже дам тебе. 22 И познан буду тебе оттуду, и возглаголю тебе с верху очистилища между двема херувимы, иже суть над кивотом свидения, и по всем, елика аще заповем тебе к сыном Израилевым. 23 И сотвориши трапезу от древ негниющих, двою лактей в долготу, и лактя в широту, и лактя и пол в высоту: 24 и позлатиши ю златом чистым, и сотвориши ей витое обложение златое окрест, и сотвориши ей венец длани окрест, 25 и сотвориши витое обложение венцу окрест. 26 И сотвориши четыре колца злата, и возложиши четыре колца на четыре страны ног ея под венец: 27 и да будут колца на влагалища носилам, яко воздвизати ими трапезу. 28 И сотвориши носила ея от древ негниющих, и позлатиши я златом чистым, и воздвизатися будет на них трапеза. 29 И сотвориши блюда ея и фимиамники, и возливалники и чаши, имиже возливати будеши: от злата чиста да сотвориши я. 30 И возлагати будеши на трапезу хлебы предложения предо Мною присно. 31 И да сотвориши светильник от злата чиста, изваян да сотвориши светильник: стебель его и ветви, и чаши и крузи и крины от него да будут: 32 шесть же ветвий исходящих от стран, три ветви светильника от страны его единыя и три ветви светильника от страны вторыя: 33 и три чаши во образ ореха, на единой ветви круг и крин: тако шести ветвам исходящим от светильника: 34 и на светильнике четыре чаши во образ ореха, на единой ветви крузи и крины его: 35 круг под двема ветвми от него, и круг под четырьми

ветвми от него: тако шести ветвам исходящым от светилника: и на светилнике четыри чашы во образ ореха: 36 крузи и ветви от него да будут: весь изваян от одинаго злата чиста. 37 И да сотвориши светил его седмь, и поставиши светила его, и светити будут от одинаго лица его: 38 и щипцы его, и подставы его от злата чиста сотвориши: 39 талантом злата чиста да сотвориши вся сосуды сия. 40 Виждь, да сотвориши по образу показанному тебе на горе.

**26** Скинию же да сотвориши от десяти опон от виссона сканаго и синеты, и багряницы и червленицы сканья: херувимы делом тканым да сотвориши я. 2 Долгота опоны единыя двадесять и осмь лактий, и широта четырёх лактий, опона едина да будет: мера таяжде да будет всем опонам. 3 Пять же опон да будут взаим придерживающяся едина от другия, и пять опон да будут содержащяся друга о друзей. 4 И да сотвориши им петли из синеты у края опоны единыя, от единыя страны в сложение: и сице сотвориши на краю опоны внешния к сложению второму. 5 Пятьдесят же петель сотвориши единой опоне, и пятьдесят петель да сотвориши от края опоны по сложению вторья, лицом к лицу сходящяся между собою каяждо. 6 И сотвориши пятьдесят крючков златых и совокупиши опоны едину ко друзей крючками: и будет скиния едина. 7 И да сотвориши опоны власяныя в покров над скиниею, единонадесять опон сотвориши их. 8 Долгота опоны единыя да будет тридесяти лактий, и четырёх лактий широта опоны единыя: таяжде мера да будет единонадесяти опонам. 9 И совокупиши пять опон вкупе, и шесть опон вкупе: и усугубиши опону шестую ко входу скинии. 10 И да сотвориши петель пятьдесят на

краи опоны единыя, яже среде по сложению, и пятьдесят петлей да сотвориши на краи опоны совокупляющияся вторыя. 11 И сотвориши крючков медяных пятьдесят: и совокупиши крючки с петлями, и да совокупиши опоны, и будет едино. 12 И да подложиши излишнее от опон скинии: полуопоною оставшеюся да покрыеши излишнее опон скинии: да прикроеши созади скинии. 13 Лакоть (един) от сего, и лакоть (един) от другаго, от излишняго опон, в долготу опон скинии: да будет покрывающее на стране скинии, сюду и сюду да покрывает. 14 И да сотвориши покров скинии от кож овних червленых, и прикрывала от кож синих сверху. 15 И да сотвориши столпы скинии от древ негниющих: 16 десяти лактей (в высоту) да сотвориши столп един, лактя же одинаго и пол широта столпа одинаго: 17 два закройца (на краях) столпу единому, противу стояща другъдругу: тако сотвориши всем столпом скинии. 18 И да сотвориши столпы скинии, двадесять столпов от страны яже к северу: 19 и четыредесять стоялов серебряных да сотвориши двадесятим столпом: два стояла единому столпу на обоих краех его и два стояла другому столпу на обоих краех его: 20 и в стране вторей южней двадесять столпов: 21 и четыредесять стоялов им серебряных: два стояла столпу единому на обоих краех его и два стояла столпу другому на обоих краех его. 22 И созади скинии по стране яже к морю да сотвориши шесть столпов, 23 и два столпа сотвориши во углах скинии созади. 24 И будут равни от долу: по томужде да будут равни от глав в состав един: тако да сотвориши обоим двум углам: равни да будут. 25 И да будут осмь столпы и стояла их серебряна шестнадесять: два стояла единому столпу

и два стояла другому столпу, на обоих краях его. 26 И да сотвориши верей от древ негниющих: пять верей столпу единому от единыя страны скинии, 27 и пять верей столпу единому второй стране скинии, и пять верей столпу заднему стране скинии, яже к морю: 28 и верей средняя посреде столпов да проходит от единыя страны в другую страну. 29 И столпы да позлатиши златом: и колца сотвориши злата, в няже вложиши верей: и позлатиши верей златом. 30 И возставиши скинию по образу показанному тебе на горе. 31 И да сотвориши завесу от синеты и багряницы, и червленицы сканья и виссона прядеаго: делом тканым да сотвориши ю херувимы. 32 И возложиши ю на четыре столпы негниющыя позлащены златом: и верхи их златы, и стояла их четыре сребряна. 33 И повесиши завесу на столпех, и внесеши тамо внутрь завесы кивот свидения: и разделяти будет завеса вам посреде святилица и посреде Святая святых, 34 и закрыеши завесою кивот свидения во Святая святых. 35 И поставиши трапезу вне завесы, и светилник прямо трапезы на стране скинии, яже к югу: и трапезу поставиши на стране скинии, яже к северу. 36 И да сотвориши закров в дверех скинии от синеты и багряницы, и червленицы сканья и виссона сканаго, делом пестрящаго. 37 И да сотвориши завесе пять столпов от древ негниющих, и позлатиши их златом, и верхи их златы: и да слиеши им пять стоял медяных.

**27** И да сотвориши олтарь от древ негниющих, пяти локот в долготу и пяти локот в широту: четвероуголен да будет олтарь, и трех лактий высота его. 2 И да сотвориши роги на четырех углех: из него да будут роги, и покрыеши я медию. 3 И да сотвориши венец олтарю: и покров его, и

фиалы его, и вилицы его, и кадилник его, и вся сосуды его да сотвориши медяны. 4 И да сотвориши ему огнище на подобие мрежи медяно: и сотвориши огнищу четыре колца медяна на четыре страны, 5 и подложиши я под огнище олтаря снизу, и будет огнище до среды олтаря. 6 И да сотвориши олтарю носила от древес негниющих, и окуеши я медию, 7 и вложиши носила в колца: и да будут носила олтарю по бокам, еже подимати его. 8 Тоць, дощатый сотвориши его: по показанному тебе на горе, тако сотвориши его. 9 И да сотвориши двор скинии: на стране, яже к югу, завесы двора из виссона сканаго: долгота сто лакот стране единой: 10 и столпы их двадесять, и стояла их двадесять медяна, и крючки их, и верхи их сребряны. 11 Такожде на стране, яже к северу, завесы сто лакот в долготу, и столпы их двадесять, и стояла их двадесять медяна, и крючки их, и верхи столпов, и стояла их посребрена серебром. 12 Широта же двора, яже к морю, опоны пятьдесят лакот: столпы их десять, и стояла их десять. 13 И широта двора, яже к востоку, завесы пятьдесят лактий: столпы их десять, и стояла их десять. 14 И пятнадцать лакот высота опон стране единой: столпы их три, и стояла их три: 15 и стране вторей опон пятнадцать лакот высота: столпы их три, и стояла их три. 16 И вратам двора завеса двадесять лакот в высоту, от синеты и багряницы, и червленицы сканья и виссона сканаго пестрением швенным: столпы их четыре, и стояла их четыре. 17 Вси столпы двора окрест окованы серебром, и верхи их сребряны, и стояла их медяна. 18 Долгота же двора сто на сто, и широта пятьдесят на пятьдесят, и высота пяти лактий от виссона сканаго: и стояла их медяна. 19 И



все устроение, и вся орудия, и гвозди двора медяны. 20 И ты заповеждь сыном Израилевым, и да возмут тебе елей от масличия без дрождей чист изжат в светение, да горит светильник всегда. 21 В скинии свидения вне завесы, яже над заветом, возжигати будет его Аарон и сынове его, от вечера даже до утра, пред Господем, законно вечно в роды ваша от сынов Израилевых.

**28** И ты приведи к себе Аарона, брата твоего, и сыны его от сынов Израилевых, да священнодействуют Мне Аарон и Надав, и Авиуд и Елеазар и Ифамар, сынове Аарони. 2 И да сотвориши ризу святу Аарону брату твоему в честь и славу. 3 И ты возглаголи ко всем премудрым умом, ихже наполних духа мудрости и смышления: и да сотворят ризу святу Аарону, в нейже имать священнодействовати Мне во святилици. 4 И сия суть ризы, ихже сотворят: наперсник и ризу верхнюю, и долгую ризу и ризу тресновиту, и наглавие и пояс: и да сотворят ризы святы Аарону и сыном его, во еже священнодействовати Мне. 5 И сии да возмут золото и синету, и багряницу и червленицу и виссон, 6 и да сотворят ризу верхнюю от виссона сканаго, дело тканно пестряцаго. 7 Две ризы верхния да будут ему придержащаяся едина друзей, на обе стране связаня. 8 И тkanie риз верхних, еже есть на них, по сотворению их да будет от золота чиста и синеты, и багряницы и червленицы пряденыя и виссона сканаго. 9 И возмеша два камня, камне смарагда, и изваяеша на них имена сынов Израилевых: 10 шесть имен на камени едином и шесть имен прочиих на камени друзем по родом их, 11 дело каменная хитрости: ваянием печати изваяеша оба камня имени сынов Израилевых. 12 И положиши оба камня

на раменах верхняя ризы: камни в память суть сыном Израилевым: и воздвигнет Аарон имена сынов Израилевых пред Господом на оба рамена своя в память о них. 13 И да сотвориши щитцы от золота чиста, 14 и да сотвориши две тресновицы от золота чиста, смешены цветами, дело плетения: и возложиши тресновицы сплетенныя на щитцы по нарамником их сопреди. 15 И да сотвориши слово судное, дело пестряцаго: по составу ризы верхняя да сотвориши сие от золота и синеты, и багрянницы и червленицы пряденныя и виссона сканаго: 16 сотвориши е четвероуголно: да будет сугубо, пяди долгота его и пяди широта, 17 и нашиеши на нем швение каменное в четыре ряда. Ряд камней да будет: сардий, топазий и смарагд, ряд един: 18 и ряд второй, анфракс и сапфир и иаспис: 19 и ряд третий, лигирий и ахат и амефист: 20 и ряд четвертый, хресолиф и вириллий и онихий: объаты златом, исплетены в злате да будут по ряду своему. 21 И камень да будут от имен дванадесяти сынов Израилевых пред Господом: на дву раменах его дванадесять по именам их и по родом их, изваяни печатми, коегождо по имени да будут в дванадесять племен. 22 И да сотвориши на слове тресны сплетены, делом верижным, от золота чиста. 23 И да сотвориши на словеси два колца золота: и возложиши два колца золота на оба края словесе. 24 И возложиши тресны и чепи златы на два колца от обоих краев словесе. 25 И два края двух тресн наложиши на две чепочки, и возложиши на рамена верхних риз лицом ко другъдругу. 26 И сотвориши два колца золота, и возложиши на обе страны словесе на край от края задняго верхних риз, отвнутрь. 27 И сотвориши два колца золота, и возложиши на оба рамена

верхняя ризы снизу его, лицом по согбению свыше соткания верхних риз. 28 И стягнеши слово колцами, яже на нем, с колцами верхних риз сложенными, из синеты плетеными во ткание верхних риз, да не низпускается слово с верхних риз. 29 И да возмет Аарон имена сынов Израилевых на слове суднем на персех, входящъ во святое на память пред Богом. И да положиши на словеси суднем тресны: плетения на оба края словесе возложиши, и оба щита возложиши на обе раме нарамника на лице. 30 И да возложиши на слово судное явление и истину: и да будет на персех Аарону, егда внидет в святое пред Господа: и да носит Аарон суды сынов Израилевых на персех пред Господем всегда. 31 И да сотвориши ризу внутреннюю подир всю синю. 32 И да будет устие посреде его, ожерелие имущо кругом устия делом тканым, сгиб сошвен от него, да не раздерется. 33 И да сотвориши на омете ризнем снизу, аки шипка цветущаго, пугвицы из синеты и багряницы, и червленицы пряденья и виссона сканаго, на омете ризы кругом: в тойже образ пугвицы златы, и звонцы между сими окрест. 34 При пугвице злат звонец, и цвет на омете ризнем, кругом. 35 И да будет Аарону, егда служит, слышан глас его, входящу во святое пред Господа, и исходящу, да не умрет. 36 И да сотвориши дщицу злату чисту: и изобразиши на ней образ печати, Святыня Господня, 37 и да возложиши ю на синету сканую, и да будет на увясле, спреди увясла да будет, 38 и да будет на челе Аарони: и отимет Аарон согрешения святых, елика освятят сынове Израилевы от всякаго даяния святых своих, и да будет на челе Аарони всегда приятно ими пред Господем. 39 И тресны риз от виссона: и сотвориши клубок виссонный, и

пояс да сотвориши дело пестряцаго. 40 И сыном Аароновым да сотвориши ризы и поясы, и клобуки да сотвориши им в честь и славу: 41 и облечеши в ня Аарона брата твоего и сыны его с ним, и да помажеш их, и исполниши руце их и освятиши их, да Ми священнодействуют. 42 И да сотвориши им надраги льняны покрывати стыдения плоти их, от бедр даже до стегн будут, 43 и да иматъ Аарон и сынове его, егда входят в скинию свидения, или егда приходят служити к жертвеннику святыни: и да не наведут на ся греха, да не умрут: законное вечное (да будет) ему и семени его по нем.

**29** И сия суть, яже сотвориши им: освятиши я, яко священнодействовати им Мне: да возмеш же телца единого от говяд и овна два непорочна: 2 и хлебы пресны смешены с елеем, и опресноки помазаны елеем: из муки пшеничны сотвориши я: 3 и да вложиши я в кош един, и принесеш я в коши, и телца и два овна. 4 И Аарона и сыны его приведеш пред двери скинии свидения, и измыеши я водою: 5 и возмеш ризы святыя, облечеши Аарона брата твоего, и в хитон подир, и в ризу верхнюю, и в слово: и совокупиши ему слово к нарамнику: 6 и возложиши на главу его клобук: и возложиши дщицу освящение на увясло: 7 и да возмеш от елеа помазания, и да возлиеш и на главу его и помажеш его. 8 И сыны его приведеш и облечеши я в ризы: 9 и опояшеш я поясы, и возложиши на них клобуки, и будет ими священство мне во веки: и совершиши руце Аарони и руце сынов его. 10 И да приведеш телца пред двери скинии свидения, и возложат Аарон и сынове его руце свои на главу телца пред Господем у дверей скинии свидения. 11 И да заколеш телца пред Господем у дверей скинии

свидения: **12** и да возмешь от крове телчи и помажешь на рогах олтаревых перстом твоим: останок же весь крове пролиешь у стояла олтарнаго: **13** и да возмешь весь тук, иже на утробе, и препонку печени, и обе почки, и тук иже на них, и возложиши на олтарь: **14** мяса же телча, и кожу, и мотыла да сожжешь на огни вне полка: за грех бо есть. **15** И овна да поймешь одинаго, и да возложат Аарон и сынове его руки своя на главу овню: **16** и заколешь его, и возмешь кровь пролиешь у олтаря окрест: **17** и овна да разсечеши на уды и измыеши внутренняя и ноги в воде, и возложиши на разсеченная части со главою: **18** и вознесеши всего овна на олтарь, всесожжение Господу в воню благоухания: жертва Господу есть. **19** И да поймешь овна втораго, и возложит Аарон и сынове его руки своя на главу овню: **20** и заколешь его, и возмешь от крове его, и возложиши на край ушесе Аарона деснаго и на край руки десныя и на край ноги десныя, и на край ушес сынов его десных и на край рук их десных и на край ног их десных: **21** и да возмешь от крове, яже на олтари, и от елеа помазания, и да воскропиши на Аарона и на ризу его, и на сыны его и на ризы сынов его с ним: и освятится сам и ризы его, и сыны его и ризы сынов его с ним: кровь же овню да пролиешь у олтаря окрест. **22** И да возмешь от овна тук его, и тук покрывающий утробу его, и препонку печени, и обе почки, и тук иже на них, и рамо десное: есть бо совершение сие: **23** и хлеб един с елеем, и опреснок един от коша опресноков, предложенных пред Господем: **24** и возложиши вся на руки Аарона и на руки сынов его, и отделиши я отделение пред Господем: **25** и да возмешь я от рук их, и вознесеши на олтарь всесожжения в

воню благоухания пред Господем: приношение есть Господу.

26 И да возмешь грудь от овна совершения, яже есть Аарону, и отделиши ю отделение пред Господем, и будет тебе в часть: 27 и освятиши грудь отделение, и рамо отлучения, еже отделися, и яже отяся от овна совершения от Аарона и от сынов его, 28 и будет Аарону и сыном его законно вечно от сынов Израилевых: есть бо отделение сие, и отятие будет от сынов Израилевых от жертв спасительных сынов Израилевых, отделение Господу. 29 И ризы святы, яже суть Аарону, да будут сыном его по нем, помазатися им в них и совершити руки своя. 30 Седьм дний да облачится в ня иерей великий, иже вместо его от сынов его, иже внидет в скинию свидения служити во святилищи. 31 И овна совершения да возмешь и испечеши мяса на месте святе, 32 и да ядят Аарон и сынове его мяса овня, и хлебы, яже в коши у дверей скинии свидения: 33 да ядят сия, имиже освятишася в них, совершити руки своя, освятити я: и иноплеменник да не снесет от них, суть бо свята. 34 Аще же останется от мяс жертвы совершения и от хлебов до утрия, да сожжеша останки огнем: да не снесутся, освящение бо есть. 35 И сотвориши Аарону и сыном его тако по всем, елика заповедах тебе: седьм дний совершиши руце их. 36 И телца греха ради да сотвориши в день очищения: и да очистиши олтарь, егда освящаеши на нем: и помажеша его, яко освятити его. 37 Седьм дний очистиши олтарь и освятиши его, и будет олтарь святая святых: всяк прикасаясь олтарю освятится. 38 И сия суть, яже сотвориши на олтари: агнца единоголетна непорочна два на всяк день на олтари присно жертву непрестанную: 39 агнца единого да сотвориши рано,

и втораго агнца да сотвориши в вечер: **40** и десятую часть муки пшеничны с елеем смешены, в четвертую часть ина, и возлияние четвертую часть меры ина вина единому овну. **41** И агнца втораго да сотвориши в вечер, якоже утреннюю жертву, и возлияние его: сотвориши в воню благоухания приношение Господу. **42** Жертву всегдашнюю в слухи и в роды ваша пред дверми скинии свидения пред Господем, в нихже познан буду тебе тамо, якоже глаголати к тебе. **43** И завещаю тамо сыном Израилевым, и освящуся во славе Моей, **44** и освящу скинию свидения и олтарь, и Аарона и сыны его освящу, священнодействовати Мне, **45** и нарекуся в сынех Израилевых, и буду им Бог: **46** и уведят, яко Аз есмь Господь Бог их, изведый их из земли Египетския, нарещися им и быти им Бог.

**30** И да сотвориши олтарь кадилный от древ негниющих: **2** и сотвориши и лактя в долготу и лактя в широту, четвероуголен да будет, и двою лактий в высоту: от него да будут роги его. **3** И позлатиши златом чистым огнище его, и стены его около, и роги его: и да сотвориши ему витый венец злат около. **4** И два колца злата чиста да сотвориши под витым венцем его на обою углу, да сотвориши на обоих странах: и будут колца носилам, якоже подимати оный ими. **5** И да сотвориши носила от древес негниющих, и позлатиши я златом: **6** и да положиши его прямо завесы, сущия у кивота свидения, в нихже познан буду тебе оттуду. **7** И да кадит над ним Аарон фимиамом сложеным благовонным рано рано: егда устрояет светила, да кадит над ним: **8** и егда вжигает Аарон светила с вечера, да кадит над ним: фимиам всегдашний присно пред Господем в роды их: **9** и да не принесеши над него

фимиама инаго: приношения, жертвы и возлияния да не пролиеши на него. 10 И да очистит над ним Аарон у рогов его единою в лето: от крове очищения грехов умилостивления единою в лето да очистит его в роды их: святое святых есть Господу. 11 И рече Господь к Моисею, глаголя: 12 аще возмешь исчисление сынов Израилевых в пресмотрении их, и дадут кийждо искупление за душу свою Господу, и не будет в них падения в пресмотрении их. 13 И сие есть, еже дадут, елицы аще приступят в пресмотрение, полдидрахмы, еже есть по дидрахме святей: двадесять цат дидрахма: пол же дидрахмы, дань Господу. 14 Всяк входяй в пресмотрение от двадесяти лет и вышше, да дадут дань Господу: 15 богатый да не приложит, и нищий да не умалит от полудидрахмы, егда дают дань Господу (от сынов Израилевых), еже умоляти о душах ваших. 16 И да возмешь серебро дани от сынов Израилевых, и даси е на соделание скинии свидения: и да будет сыном Израилевым память пред Господем, еже умоляти о душах ваших. 17 И рече Господь Моисею, глаголя: 18 сотвори умывалницу медяну и стояло ей медяно, еже умыватися, и да поставиши ю между скиниею свидения и между олтарем, и да влиеши в ню воду: 19 и да умывает Аарон и сынове его из нея руки своя и ноги водою: 20 егда входят в скинию свидения, да омыются водою, и не умрут: или егда приходят ко олтарю служить и приносить всесожжения Господу, 21 умывают руце и нозе водою, егда входят в скинию свидения, да не умрут, и да будет им законно вечно, ему и родом его по нем. 22 И рече Господь к Моисею, глаголя: 23 и ты возми ароматы, цвет смирны избранныя пять сот сиклев, и киннамома благовонна пол сего, двести



пятьдесят, и трости благовонныя двести пятьдесят, 24 и касии пять сот сиклев святого, и елеа от маслин (меру) ин, 25 и сотвориши сей елей помазание святое, миро помазательное художеством мироварца: елей помазание святое будет, 26 и да помажеш от него скинию свидения, и кивот скинии свидения, 27 и вся сосуды ея, и светильник и вся сосуды его, и олтарь кадилный, 28 и олтарь всесожжения и вся его сосуды, и трапезу и вся ея сосуды, и умывалницу и стояло ея, 29 и освятиши я, и будут святая святых: всяк прикасаясь им освятится: 30 и Аарона и сыны его помажеш, и освятиши я священнодействовати Мне: 31 и сыном Израилевым да речеши, глаголя: елей масть помазания свят да будет сей вам в роды ваша: 32 плоть человека да не помажется (им), и по сложению сему да не сотворите сами себе иного сице: свят есть и освящение будет вам: 33 иже аще сотворит сице, и иже аще даст от него иноплеменнику, потребится от людей своих. 34 И рече Господь к Моисею: возми себе ароматы, стакти, ониха и халвана благовонна и ливана чистаго: все то в равну меру да будет: 35 и да сотворят в нем фимиам мироварный, дело мироварца смешеное, чисто, дело сто: 36 и раздробиши от сих по тонку, и положиши прямо свидению в скинии свидения, отнюдуже познан буду тебе тамо: святое святых будет вам фимиам: 37 по сложению сему да не сотворите себе сами, освящение будет вам от Господа: 38 иже аще сотворит сице, еже обоняти от него, погибнет душа того от людей своих.

**31** И рече Господь к Моисею, глаголя: 2 се, нарекох именем Веселеила сына Урии, сына Орова, от племени Иудина, 3 и наполних его Духом Божиим премудрости и смышления и

ведения, во всяком деле разумети 4 и архитектовствовати, делати злато и серебро и медь, и синету и багряницу, и червленицу прядену и виссон сканый, 5 и каменное дело, и различная древоделства делати во всех делех: 6 и Аздах его и Елиава сына Ахисамахова от племени Данова, и всякому смысленному сердцем дах смысл, и потрудятся, и сотворят вся, елика заповедах тебе: 7 скинию свидения и кивот завета, и очистилище еже верху его, и утварь скинии, 8 и жертвенники, и трапезу и вся сосуды ея, и светилник чистый и вся сосуды его, 9 и умывалницу и стояло ея, 10 и ризы служебныя Аароновы и ризы сынов его, еже священнодействовати Мне, 11 и елей помазания, и фимиам сложения святого: по всем, елика заповедах тебе, сотворят. 12 И рече Господь к Моисею, глаголя: 13 и ты заповеждь сыном Израилевым, глаголя: смотрите и субботы Моя сохраните: есть бо знамение между Мною и вами в роды ваша, да увесте, яко Аз Господь освящай вас: 14 и сохраните субботу, яко свята сия есть Господу и вам: осквернивый ю смертью умрет: всяк, иже сотворит в ню дело, потребится душа та от среды людей своих: 15 шесть дний да сотвориши дела, в день же седмый суббота, покой свят Господу: всяк, иже сотворит дело в седмый день, смертью умрет: 16 и да сохраняют сынове Израилевы субботы держати я в роды их: 17 завет вечен во Мне и в сынех Израилевых, знамение есть во мне вечное: яко в шести днех сотвори Господь небо и землю, в седмый же день преста, и почи. 18 И даде (Бог) Моисею, егда преста глаголя ему на горе Синайстей, две скрижали свидения, скрижали каменны написаны перстом Божиим.

**32** И видевше людие, яко умедли Моисей снити с горы, восташа людие на Аарона и глаголаша ему: востани и сотвори нам боги, иже пойдут пред нами: Моисей бо сей человек, иже изведе нас от земли Египетския, не вемы, что бысть ему. 2 И рече им Аарон: измите усерязи златыя, яже во ушесех жен ваших и дщерей, и принесите ко мне. 3 И изыаша вси людие усерязи златы, яже во ушесех жен их, и принесоша ко Аарону. 4 И взя от рук их и слия их делом литым, и сотвори им телца литаго. И рекоша: сии бози твои, Израилю, иже изведоша тя из земли Египетския. 5 И видев Аарон, созда олтарь прямо ему, и проповеда Аарон, глаголя: праздник Господнь утре. 6 И обутреневав наутрие, вознесе всесожжения и принесе жертву спасения. И седоша людие ясти и пити и восташа играти. 7 И рече Господь к Моисею глаголя: иди скоро, сними отсюда, беззаконноваша бо людие твои, ихже извел еси из земли Египетския: 8 преступиша с пути скоро, егоже заповедал еси им: сотвориша себе телца, и поклонишася ему, и пожроша ему, и реша: 9 сии бози твои, Израилю, иже изведоша тя из земли Египетския: 10 и ныне остави Мя, и возярился гневом на ня, потреблю их, и сотворю тя в язык велик. 11 И помолися Моисей пред Господем Богом и рече: вскую, Господи, яришися гневом на люди Твоя, ихже извел еси из земли Египетския крепостию великою и мышцею Твоею высокою? 12 Да не когда рекут Египтяне, глаголюще: с лукавством изведе их погубити в горах и потребити их от земли: утоли гнев ярости Твоя и милостив буди о злобе людий Твоих, 13 помянув Авраама и Исаака и Иакова, Твоя рабы, имже клялся еси Собою, и рекл еси к ним, глаголя: зело умножу семя ваше, яко звезды небесныя множеством,

и всю сию землю, юже рекл еси дати семени их, и обладают ею во веки. 14 И умилостивися Господь о зле, еже рече сотворити людем Своим. 15 И возвратився Моисей, сниде с горы: и две скрижали свидения в руку его, скрижали каменны написаны от обою страну их, сюду и сюду быша написаны: 16 и скрижали дело Божие быша, и написание, написание Божие изваяно на скрижалех. 17 И услышав Иисус глас людий кричащих, рече к Моисею: глас ратный в полце. 18 И рече Моисей: несть глас начинающих одолевати, ниже глас начинающих бежати, но глас начинающих напиватися вином аз слышу. 19 И егда приближашеся к полку, узре телца и лики: и возярився гневом Моисей, поверже из руку своею обе скрижали, и сокруши я под горою: 20 и взял телца, егоже сотвориша, сожже его во огни и сотре его подробну, и разсыпа его по воде, и напои ею сыны Израилевы. 21 И рече Моисей Аарону: что сотвориша тебе людие сии, яко навел еси на них грех велик? 22 И рече Аарон к Моисею: не гневайся, господине: ты бо веси людий сих устремление. 23 Глаголаша бо ми: сотвори нам боги, иже пойдут пред нами: Моисей бо сей человек, иже изведе ны от Египта, не вемы, что бысть ему: 24 и рекох им: иже имать злато, измените: и изыша, и даша мне, и ввергох е во огонь, и излися телец сей. 25 Видев же Моисей люди, яко разделишася, раздели бо их Аарон в порадование супостатом их: 26 ста же Моисей во вратех полка и рече: аще кто есть Господнь, да идет ко мне. Снидошася убо к нему вси сынове Левиины. 27 И рече им: сия глаголет Господь Бог Израилев: препояшите кийждо свой мечь при бедре и пройдите, и возвратитесь от врат до врат сквозе полк, и убийте кийждо брата своего и кийждо

ближняго своего и кийждо соседа своего. 28 И сотвориша сынове Левиины, якоже глагола им Моисей: и паде от людей в той день до трех тысящ мужей. 29 И рече им Моисей: наполните руки ваша днесь Господу, кийждо в сыне своем и в брате своем, да дастся на вас благословение. 30 И бысть на утрие, рече Моисей к людям: вы согрешисте грех велик: и ныне възыду к Богу, да умолю о гресе вашем. 31 И возвратися Моисей ко Господу и рече: молюся ти, Господи: согрешиша людие сии грех велик и сотвориша себе боги златы: 32 и ныне, аще убо оставиши им грех их, остави: аще же ни, изглади мя из книги Твоя, в нюже вписал еси. 33 И рече Господь к Моисею: аще кто согрешит предо Мною, изглажу его из книги Моея: 34 ныне же иди, сниди и возведи людия на место, еже рех тебе: се, Ангел Мой предидет пред лицем твоим: в оньже день присещу, наведу на них грех их. 35 И порази Господь люди за сотворение телца, егоже сотвори Аарон.

**33** И рече Господь к Моисею: предиди, възыди отсюду ты и людие твои, ихже извел еси от земли Египетския на землю, еюже кляхся Аврааму и Исааку и Иакову, глаголя: семени вашему дам ю: 2 и послю купно Ангела Моего пред лицем твоим, и изженет Хананея, Аморрея и Хеттея, и Ферезея и Гергесея, и Евея и Иевусея: 3 и введу тя в землю текущую млеко и медом: Сам бо не пойду с тобою, яко людие жестоковыйнии суть, да не убию тебе на пути. 4 И услышавше людие слово сие страшное, восплакашася в плачевных (ризах). 5 И рече Господь к Моисею: глаголи сыном Израилевым: вы людие жестоковыйнии, блюдитесь, да не язвю другую наведу на вы и потреблю вы: ныне убо

сымите ризы славы вашей и утварь, и покажу, яже сотворю вам. 6 И отяша сынове Израилевы утварь свою и ризы от горы Хорива. 7 И взял Моисей кущу свою, потче ю вне полка, далече от полка, и прозвася скиния свидения: и бысть, всяк взыскупай Господа исхождаше в скинию, яже вне полка. 8 Егда же вхождаше Моисей в скинию вне полка, стояху вси людие смотряще кийждо пред дверми кущи своея, и зряху отходящу Моисею даже внити ему в скинию. 9 Егда же вниде Моисей в скинию, сниде столп облачный и ста пред дверми скинии, и глагола (Господь) Моисею. 10 И видяху вси людие столп облачный стоящъ пред дверми скинии: и ставше вси людие, поклонишася кийждо из дверей кущи своея: 11 и глагола Господь к Моисею лицом к лицу, якоже аще бы кто возглаголал к своему другу, и отпущашеся в полк: слуга же Иисус, сын Навин, юноша не исхождаше из скинии. 12 И рече Моисей ко Господу: се, Ты мне глаголеши: изведи люди сия: Ты же не явил ми еси, кого послещи со мною: Ты же мне рекл еси: вем тя паче всех и благодать имаши у Мене: 13 аще убо обретох благодать пред Тобою, яви ми Тебе самаго, да разумно вижду тя, яко да обрет буду благодать пред Тобою, и да познаю, яко людие Твои язык велик сей. 14 И глагола (ему Господь): Аз Сам предиду пред тобою и упокою тя. 15 И рече к Нему Моисей: аще Сам Ты не идеши с нами, да не изведеш мя отсюда: 16 и како ведомо будет воистинну, яко обретох благодать у Тебе аз же и людие Твои, точию идущу Ти с нами? И прославлен буду аз же и людие Твои паче всех язык, елицы суть на земли. 17 Рече же Господь к Моисею: и сие тебе слово, еже рекл еси, сотворю: обрел бо еси благодать предо Мною, и вем тя паче

всех. 18 И глагола Моисей: покажи ми славу Твою. 19 И рече (Господь к Моисею): Аз предиду пред тобою славою Моею и воззову о имени Моем, Господь пред тобою: и помилую, егоже аще милую, и ущедрю, егоже аще щедрю. 20 И рече: не возможеши видети лица Моего: не бо узрит человек лице Мое, и жив будет. 21 И рече Господь: се, место у Мене, и станеша на камени: 22 егда же преидет слава Моя, и положу тя в раселине камене, и покрью рукою Моею над тобою, дондеже мимоиду: 23 и отиму руку Мою, и тогда узриши задняя Моя: лице же Мое не явится тебе.

**34** И рече Господь к Моисею: истеши себе две скрижали каменные, якоже и первыя, и възыди ко Мне на гору: и напишу на скрижалех словеса, яже бяху на скрижалех первых, яже сокрушил еси: 2 и буди готов завтра, и възыдеши на гору Синайскую и предстанеша Мне тамо на версе горы: 3 и да никтоже въздет с тобою, ниже да явится на всей горе: и овцы и говядя да не пасутся близ горы тоя. 4 И истеса две скрижали каменные, якоже и первыя: и утреневав Моисей завтра, възыде на гору Синайскую, якоже завеща ему Господь: и взя Моисей с собою две скрижали каменные. 5 И сниде Господь во облаце, и предста ему тамо Моисей, и призва именем Господним. 6 И мимоиде Господь пред лицом его и воззва: Господь, Господь Бог щедр и милостив, долготерпелив и многомилостив и истинен, 7 и правду храняй, и творяй милость в тысящы, отемляй беззакония и неправды и грехи, и повиннаго не очистит, наводяй грехи отцев на чада, и на чада чад, до третияго и четвертаго рода. 8 И потщався Моисей, приник на землю, поклонися Богу 9 и рече: аще обретох благодать пред Тобою, да идет Господь мой с нами:

людие бо жестоковыйнии суть: и отимеши ты грехи наша и беззакония наша, и будем Твои. 10 И рече Господь к Моисею: се, Аз полагаю тебе завет пред всеми людьми твоими, и сотворю славная, яже не быша по всей земли и во всех языцех: и узрят вси людие, в нихже еси ты, дела Господня, яко чудна суть, яже Аз сотворю тебе: 11 внемли ты вся, елика Аз заповедаю тебе: се, Аз изжену пред лицом вашим Аморрея и Хананея, и Хеттея и Ферезея, и Евея и Гергесея и Иевусея: 12 внемли себе, да не когда завещаеши завет сидящим на земли, в нюже внидеши, да не будет соблазн в вас: 13 капища их разорите и кумиры их сокрушите, и дубравы их посеците, и изваяная богов их сожжете огнем, 14 не бо поклонитесь богом иным: ибо Господь Бог ревниво имя, Бог ревнив есть: 15 да не когда завещаеши завет сидящим на земли, и соблюдают вслед богов их, и пожрут богом их, и призовут тя, и снеси от жертв их: 16 и поймешь от дочерей их сыном твоим, и от дочерей твоих даси сыном их, и соблюдают дочери твоя вслед богов их, и сынове твои соблюдают вслед богов их: 17 и богов слияных да не сотвориши себе: 18 и праздник опресночный да сохраниши: семь дней да яси опресноки, якоже заповедах тебе, во время в месяце новых плодов: в месяце бо новых плодов изшел еси от земли Египетския: 19 всяко разверзающее ложесна мужеск Мне пол (да будет), всяко первородное телца и первородное овцы: 20 и первородное осляте искупиши овцею: аще же не искупиши е, цену да даси его: всякаго первенца от сынов твоих да искупиши, да не явишия предо Мною тощъ: 21 в шесть дней да делаеши, в седмый же день да почиши, от сеятвы и жатвы да почиши, 22 и праздник седмиц да сотвориши ми,



начало жатвы пшеницы, и праздник собрания посреде лета: 23 в три времена лета да явится всяк мужеск пол твой пред Господем Богом Израилевым: 24 егда бо изжену языки от лица твоего и расширю пределы твоя, никтоже возжелает земли твоя, егда приидеши явитися пред Господем Богом твоим в три времена лета: 25 да не заколеши с квасом крове жертв Моих, и да не прележит до утрия жертва праздника Пасхи: 26 первородная жит земли твоя да внесеши в дом Господа Бога твоего: да не свариши агнца во млеце матере его. 27 И рече Господь к Моисею: напиши себе словеса сия, в словесех бо сих положих тебе завет и Израилю. 28 И бе тамо Моисей пред Господем сорок дний и сорок ночей: хлеба не яде и воды не пи: и написа (Моисей) на скрижалех словеса сия завета, десять словес. 29 Сходящу же Моисею с горы Синайския, и обе скрижали в руку Моисеову: сходящу же ему с горы, и Моисей не ведяше, яко прославися зрак плоти лица его, егда глаголаше с ним. 30 И виде Аарон и вси сынове Израилевы Моисеа, и бяше прославлен зрак плоти лица его: и убояшася приступити к нему. 31 И воззва их Моисей, и обратишася к нему Аарон и вси князи сонма: и глагола Моисей к ним. 32 И по сих приидоша к нему вси сынове Израилевы: и заповеда им вся, елика глагола к нему Господь на горе Синайстей. 33 И егда преста глаголя к ним, возложи на лице свое покров. 34 Егда же вхождаше Моисей пред Господа глаголати к Нему, снимаше покров, дондеже исхождаше: и изшед глаголаше ко всем сыном Израилевым, елика заповеда ему Господь. 35 И видеша сынове Израилевы лице Моисеово, яко прославися:

и возлагаше Моисей покров на лице свое, дондеже внидет глаголати с Ним.

**35** И собра Моисей весь сонм сынов Израилевых и рече к ним: сия словеса, яже глагола Господь творити я: **2** шесть дний сотвориши дела, в день же седмый почиши, свята суббота, покой Господу: всяк творяй дело в ню, да умрет: **3** да не возгнетите огня во всех домех ваших в день субботный: Аз Господь. **4** И рече Моисей ко всему сонму сынов Израилевых, глаголя: сие слово, еже завеща Господь глаголя: **5** возьмите от себе самих участие Господу: всяк по воли сердца своего да принесет начатки Господу, злато, серебро, медь, **6** синету, багряницу, червленицу сугубу спрядену, и виссон сканый и волну козию, **7** и кожи овни очервлены, и кожи сини, и древесна негниюща, **8** и елей во свещение, и фимиам в елей помазания, и в сложение фимиама: **9** и камни сардийски, и камни в ваяние на ризу верхнюю и на подир: **10** и всяк премудрый сердцем в вас шед да делает вся, елика заповеда Господь: **11** скинию и завесы, и покровы и разворы, и колки и верей, и столпы и стояла: **12** и кивот свидения и носила его, и очистилище его и завесу, (и опоны двора, и столпы его, и камни смарагдовы, и фимиам и елей помазания, ) **13** и трапезу и носила ея, и вся сосуды ея, и хлебы предложения, (и олтарь и вся сосуды его, ) **14** и светилник света и вся сосуды его, и светила его и елей светилный, **15** и олтарь кадилный и носила его, и елей помазания, и фимиам сложения, и завесу дверей скинии, **16** и олтарь всесожжения, и огнище его медяно и носила его, и вся сосуды его, и умывалницу, и стояло ея, **17** и опоны двора, и столпы его и стояла его, и завесу дверей двора, **18**

и колки скинии, и колки двора, и ужы их: 19 и ризы святыя Аарона жерца, и ризы, в нихже служити имут во святем, и ризы сыном Аароновым священства (и елей помазания, и фимиам сложения). 20 И изыде весь сонм сынов Израилевых от Моисеа. 21 И принесоша кийждо, яже возлюбил сердце их, и якоже возмнеся души их, принесоша участие Господу на вся дела скинии свидения, и на вся сосуды ея, и на вся ризы святилища: 22 и принесоша мужие от жен своих, кийждо, якоже помысли умом, принесоша печати и усерязи, и перстни и пленицы, и мониста и всяк сосуд злат: и вси елицы принесоша участие злата Господу, 23 и всяк у негоже обретеса синета и багряница, и червленица и виссон, и кожи сини и кожи сини очервлены, (и кожи козия) принесоша: 24 всяк отделяяй участие, серебро и медь, принесоша участия Господу: и у нихже обретошася дровеса негниющая, на вся соделования сосудов принесоша: 25 и всяка жена мудрая умом рукама пряди, принесе пряденая, синету и багряницу и червленицу и виссон: 26 и вся жены, имже возлюбися во уме их, хитростию спрядоша волну козию: 27 и князи принесоша камени смарагдовы и камени на совершение ризе верхней, и на слово, 28 и на сложение, и на елей помазания, и на сложение фимиама: 29 и всяк муж, или жена, имже наносяше ум их, вшедшим творити вся дела, елика заповеда Господь творити я Моисеом, принесоша сынове Израилевы участие Господу. 30 И рече Моисей сыном Израилевым: се, нарече Бог именем Веселеила сына Уриина, сына Орова, от племени Иудина, 31 и наполни его Духа Божия, премудрости и разума, и умений всех, 32 архитектовствовати во всех делесех древоделания, творити

злато и сребро и медь, 33 и ваяти камени, и делати древо, и творити по всему делу премудрости: 34 и преуспевати даде во уме ему и Елиаву Ахисамахову, от племене Данова: 35 и наполни их премудрости, ума, еже разумети творити вся дела святыни, ткания и пестрения ткати червленицею и багряницею и виссоном, творити всякое дело художества различна.

**36** И сотвори Веселеил и Елиав, и всяк мудрый умом, емуже дана есть премудрость и хитрость в них, разумети творити вся дела, яже ко святыни надлежащая, по всем, елика заповеда Господь. 2 И призва Моисей Веселеила и Елиава и вся имущыя премудрость, имже даде Бог разум в сердцы, и вся волею хотящыя приходити к делам, еже совершати я: 3 и взяша от Моисеа вся участия, яже принесоша сынове Израилевы на вся дела святыни творити я: и тии приимаху еще приносимая от приносящих заутра заутра. 4 И прихождаху вси мудрии, иже творяху дела святыни, кийждо по своему делу, еже сами делаху: 5 и рекоша Моисею, яко много приносят людие свыше дел, елика заповеда Господь сотворити. 6 И повеле Моисей, и проповеда в полце, глаголя: муж и жена ктому да не делают на начатки святыни. И возбранени быша людие ктому приносити. 7 И дела быша им доволна на строение творити, и преизбыша. 8 И сотвори всяк премудрый в делающих ризы святыни, яже суть Аарону иерею, якоже заповеда Господь Моисею. 9 И сотвориша ризу верхнюю от злата и синеты, и багряницы и червленицы прядены и виссона сканаго: 10 и изрезаша дщицы златы аки власы, еже соткати с синетою и с багряницею, и с червленицею пряденою и

с виссоном сканым: дело тканое сотвориша е. 11 Ризы верхняя придержащаяся от обеих стран, 12 дело тканно, между собою сплетено: от него сотвориша е по его творению, от злата и синеты, и багряницы и червленицы спрядены и виссона сканаго, якоже заповеда Господь Моисею. 13 И сотвориша оба камени смарагдовы состеганы вервию и обложены златом, изваяны и вырезаны ваянием печати, от имен сынов Израилевых: 14 и возложиша я на рамена ризы верхняя камение в память сынов израилевых, якоже заповеда Господь Моисею. 15 И сотвориша слово, дело тканно пестротою, по делу ризы верхняя, от злата и синеты, и багряницы и червленицы спрядены и виссона сканаго, 16 четвероуголно сугубо сотвориша логион пяди в долготу, и пяди в широту, сугубо: 17 и сшиста на нем швением по три камени четырьмя рядами: ряд камней: сардий и топазий и смарагд, ряд один: 18 и ряд второй, анфракс и сапфир и иаспис: 19 и ряд третий, лигирий и ахат и амефист: 20 и ряд четвертый, хрисолиф и вириллий и онихий, окованы около златом и всаждени в злате: 21 и камение бяху от имен сынов Израилевых дванадесять, по именам их изваяно в печати, кийждо своим именем в дванадесять племен. 22 И сотвориша над логионом тресны сплетены, дело плетеное от злата чиста: 23 и сотвориша два щитца злата и два колца злата, и возложиша два колца злата на оба конца логиона: 24 и вложиша плетеницы златы в колца, со обеих стран логиона, 25 и в два сложения две плетеницы, и возложиша на два щитца: и возложиша на рамена ризы верхняя, противу лицом к лицу. 26 И сотвориша два колца злата, и возложиша на два крила на край логиона, и на край

созади верхняя ризы, внутрьуду: 27 и сотвориша два колца злата, и положиша на оба рамена ризы верхняя с низу его на лице по согбению свыше состава ризы верхняя: 28 и стягнуша логион колцами, яже на нем, с колцами верхняя ризы сложенными, из синеты сплетенными, во тканье ризы верхняя, да не низпускается логион от ризы верхняя, якоже заповеда Господь Моисею. 29 И сотвориша исподнюю ризу, яже под верхнюю, дело тканно, все синее: 30 ожерелие же во внутренней ризе, на среде швенно, сплетено, ометы имущо около ожерелие неразлучено. 31 И сотвориша на омете ризы внутренняя долу яко процветающаго шипка пугвицы от синеты и багряницы, и червленицы прядены и виссона сканаго. 32 И сотвориша звонцы златы, и возложиша звонцы на ометы ризы внутренняя окрест между пугвицами: 33 звонец злат и пугвица на омете внутренняя ризы окрест, к служению, якоже повеле Господь Моисею. 34 И сотвориша ризы виссонныя дело тканно, Аарону и сыном его, 35 и клобуки из виссона, и увясло из виссона, и надраги из виссона сканаго, 36 и поясы их из виссона и синеты, и багряницы и червленицы прядены, дело пестрящаго, якоже заповеда Господь Моисею. 37 И сотвориша дщицу злату, отделение святыни от злата чиста, и написаша на ней писмена изваяна печатию: освящение Господу: 38 и возложиша ю на омет синь, еже бы лежати на увясле свыше, якоже заповеда Господь Моисею.

**37** И сотвориша скинии десять опон: 2 двадесять и осмь лакот долготы единыя опоны, таяжде быше всем, и четырех лакот широта опоны единыя. 3 И сотвориша завесу от синеты и багряницы, и червленицы спрядены и виссона сканаго,

дело швенно херувимы: 4 и возложиша ю на четыре столпы негниющыя позлащены златом, и верхи их златы, и стояла их четыре сребряна. 5 И сотвориша завесу дверем скинии свидения от синеты и багряницы, и червленицы спрядены и виссона сканаго, дело швенно херувимы, 6 и столпы их пять и крючки их: и главицы их и верхи их позлатиша златом, и стояла их пять медяна. 7 И сотвориша двор к югу, опоны двора из виссона сканаго, сто на сто: 8 и столпы их двадесять, и стояла их двадесять медяна: 9 и страна к северу, сто на сто: и страна к югу, сто на сто, и столпы их двадесять, и стояла их двадесять медяна: 10 и страна к морю, опоны пятидесят лактей, столпы их десять, и стояла их десять: 11 и страна к востоку пятидесят лактей, 12 опоны пятнадцати лактей, яже созади, и столпы их три, и стояла их три. 13 И на вторей задней стране сюду и сюду у дверей двора, опоны пятнадцати лактей: столпы их три, и стояла их три. 14 Вся опоны скинии из виссона сканаго, 15 и стояла столпов их медяна, и петли их сребряны, и главицы их посребрены серебром, и столпы их посребрены серебром, вси столпи двора. 16 И завеса дверей двора дело пестрящаго, из синеты и багряницы, и червленицы прядены и виссона сканаго: двадесяти лактей долгота, и высота и широта пяти лактей, равны опонам двора: 17 и столпы их четыре, и стояла их четыре медяна, и петли их сребряны, и главицы их посребрены серебром: 18 и вси колки двора около медяны, и тии посребрены серебром. 19 И сие сочинение скинии свидения, якоже заповедано бысть Моисею, служению быти левитов чрез Ифамара сына Аарона иереа: 20 и Веселеил, сын Уриев, от племени Иудина, сотвори, якоже заоведа

Господь Моисею, **21** и Елиав, сын Ахисамахов, от племени Данова, иже созидаше тканья вещи и швенья и пестрыя, еже ткати из червленицы и виссона.

**38** И сотвори Веселеил кивот **2** и позлати его златом чистым внутрьуду и внеуду, **3** и сотвори ему злат обвод обоюду: и слия ему четыре колца злата на четыре страны его: два на стране единой, и два на стране друзей, **4** широки носилам, яко носити его ими. **5** И сотвори очистилище над кивотом от злата чиста, **6** и два херувима златы: **7** херувима единого на стране очистилища, и херувима второго на стране второй очистилища, **8** осеняющыя крилами своими над очистилищем. **9** И сотвори трапезу предложения от злата чиста, **10** и слия ей четыре колца злата: два колца на стране единой, и два колца на стране второй, широки яко носити носилами в них. **11** И носила кивоту и трапезе сотвори, и позлати их златом. **12** И сотвори сосуды трапезе, блюда и фимиатники, и чашы златы и возливалники, имиже возливати будет, от злата. **13** И сотвори светилник, еже светити, златый, крепок стеблом, **14** и ветви от обоих стран его: **15** и от ветвий его отрасли исходящыя, три от единыя и три от вторыя страны, равны друг другу: **16** и светила их, яже на верху их, во образ ореха, от них: и цветцы от них, (и крузи их, ) да будут светила на них: и цветец седмый, иже на краю светила, на верху свыше, крепкий весь злат: **17** и седьмь светил на нем златых, и щипцы его златыя, и подставы их златы. **18** Сей посребри столпы и слия столпом колца злата, и позлати верей златом, и позлати столпы завесе златом, и сотвори петли златы: **19** сей сотвори и крючки скинии златы, и крючки двора, и крючки на распространение завесы сверху



медяны: 20 сей слия главицы сребряны скинии, и главицы медяны дверей скинии, и двери двора, и петли сотвори сребряны на столпах: сей посребри их: 21 сей сотвори колки скинии и колки двора медяны. 22 сей сотвори олтарь медян из кадилниц медяных, яже быша мужем вскрамолившимся с Кореовым сонмищем: 23 сей сотвори вся сосуды олтаря и кадилник его, и стояло его и чаши, и вилицы его медяны: 24 сей сотвори олтарю окрест обложение делом мрежным, снизу огнища под ним даже до среды его, и положи на нем четыре колца от четырех стран обложения олтаря медяны, широки носилам, еже носити олтарь на них: 25 сей сотвори елей помазания святой, и сложение фимиама, дело чистое мироварца: 26 сей сотвори умывалницу медяну и стояло ея медяно из зеркал постниц, яже постишася у дверей скинии свидения, в онже день постави ю: 27 и сотвори умывалницу, да омывают из нея Моисей и Аарон и сынове его руце свои и нозе, входящим им в скинию свидения: или егда приходят ко олтарю служить, омывахуся из нея, якоже заповеда Господь Моисею.

**39** Все злато, еже соделано бысть в деле по всякому деланию святых, быше злата начатков двадесать девять талантов и семь сот тридесать сиклев, по сиклю святому: 2 и сребра участие от исчисленных мужей сонма, сто талантов и тысяща семь сот семьдесят пять сиклев: 3 драхма едина с главы пол сикля, по сиклю святому: всяк приходяй к пресмотрению от двадесяти лет и вышше, на шестьдесят тем и на три тысящы пять сот и пятьдесят. 4 И быша сто талант сребра на слияние ста главиц скинии и на главицы завесныя, сто главиц на сто талант, талант на главицу: 5 и

тысящу семь сот семьдесят пять сиклев сотвори на петли столпам, и позлати главицы их, и украси я. 6 И медь участия, семьдесят талант и две тысячи и четыреста сиклев. 7 И сотвориша из нея стояла дверная скинии свидения, 8 и стояла двора окрест, и стояла дверей двора, и колки скинии, и колки двора окрест, 9 и обложение медяно окрест олтаря, и вся сосуды олтаря, и вся орудия скинии свидения. 10 И сотвориша сынове Израилевы, якоже заповеда Господь Моисею, тако сотвориша. 11 От избывшаго же злата участия сотвориша сосуды, еже служити в них пред Господем: 12 и от оставшия синеты и багряницы, и червленицы и виссона, сотвориша ризы служебныя Аарону, еже служити в них во святилищи. 13 И принесоша ризы к Моисею, и скинию и сосуды ея, и вереи ея и столпы и стояла ея, 14 и кивот завета и носила его, 15 и олтарь и вся сосуды его, и елей помазания и фимиам сложения, 16 и светилник чистый и светила его, светила вжигания и елей светения: 17 и трапезу предложения и вся сосуды ея, и хлебы предложенныя: 18 и ризы святых, яже суть Аарони, и ризы сынов его на жречество: 19 и опоны двора, и столпы, и стояла его, и завесу дверей скинии и дверей двора: и вся сосуды скинии и вся орудия ея: 20 и покровцы кожи овни очервлены, и покровы кожи синия, и прочих опоны: 21 и колки, и вся орудия на дела скинии свидения: 22 елика заповеда Господь Моисею, тако сотвориша сынове Израилевы все устройство. 23 И виде Моисей вся дела, и бяху сотворена та, якоже заповеда Господь Моисею, тако сотвориша я, и благослови их Моисей.

**40** И рече Господь к Моисею, глаголя: **2** в день первый месяца первого, в новомесячие поставиши скинию свидения: **3** и да положиши кивот свидения, и покрыеши кивот завесою: **4** и внесеши трапезу, и предложиши предложение ея: и внесеши светильник, и поставиши светила его: **5** и положиши олтарь златый, в каждение пред кивотом свидения, и возложиши покров завесы над дверию скинии свидения: **6** и олтарь приношений поставиши у дверей скинии свидения, **7** и поставиши умывалницу между скиниею свидения и между олтарем, и влиеши в ню воду: **8** и поставиши двор окрест и даси завесу дверей двора: **9** и возмеш елей помазания и помажеш скинию и вся яже в ней, и освятиши ю и вся сосуды ея, и будут свята: **10** и да помажеш олтарь приношений и вся сосуды его, и освятиши олтарь, и будет олтарь святой святых: **11** и помажеш умывалницу и стояло ея и освятиши ю: **12** и да приведеш Аарона и сынов его пред двери скинии свидения и измыеши их водою: **13** и да облечеши Аарона в ризы святых и помажеш его, и освятиши его, и да жрет Мне: **14** и сыны его да приведеш и облечеши я в ризы, **15** и да помажеш я, якоже помазал еси отца их, да жрут Мне: и будет, еже быти им помазанию жречества во век, в роды их. **16** И сотвори Моисей вся, елика заповеда ему Господь, сице сотвори. **17** И бысть в первый месяц во второе лето исходящим им от Египта, в новомесячии ста скиния. **18** И постави Моисей скинию, и подложи стояла ея, и возложи главицы, и вложи разворы, и постави столпы, **19** и простре опоны на скинию, и возложи покрывало скинии на ню с верху, якоже заповеда Господь Моисею: **20** и взем свидения, вложи в кивот, и подстави ноги под кивотом, и

возложи очистилище над кивотом: 21 и внесе кивот в скинию, и возложи покров завесы, и закры кивот свидения, якоже заповеда Господь Моисею: 22 и постави трапезу в скинии свидения, на страну скинии свидения, яже к северу, внеуду завесы скинии: 23 и возложи на ню хлебы предложения пред Господем, якоже заповеда Господь Моисею: 24 и постави светилник в скинии свидения прямо трапезы, на страну скинии, яже к югу: 25 и постави свещники его пред Господем, якоже заповеда Господь Моисею: 26 и постави олтарь златый в скинии свидения противу завесы, 27 и покади над ним фимиамом сложения, якоже заповеда Господь Моисею: 28 и положи завесу дверей скинии, 29 и олтарь приношений постави у дверей скинии покрову свидения, и вознесе на нем всесожжение и жертву, якоже заповеда Господь Моисею: 30 и сотвори умывалницу между скиниею свидения и между жертвенником, 31 и влия в ню воду, да умывают от нея Моисей и Аарон и сынове его руки своя и ноги, входящим им в скинию свидения: 32 или приходяще к жертвеннику служити, умывахуся от нея, якоже заповеда Господь Моисею: 33 и постави двор окрест скинии и олтаря и положи завесу двора. И сконча Моисей вся дела. 34 И покры облак скинию свидения, и славы Господни исполнися скиния, 35 и не можаше Моисей внити в скинию свидения, яко осеняше над нею облак, и славы Господни исполнися скиния: 36 егда же восхождаше облак от скинии, воздвизахуся сынове Израилевы со имением своим: 37 аще же не възде облак, не воздвизахуся даже до дне, в оньже въздет облак: 38 облак бо Господнь бяше над скиниею в день, и огонь бяше над нею в ночь пред всем Израилем во всех путешествиих их.

# Левит

**1** И воззва Господь Моисея, и рече ему из скинии свидения, глаголя: **2** глаголи сыном Израилевым, и речеши к ним: человек от вас аще принесет дары Господу, от скотов и от говяд и от овец да принесете дары ваша: **3** аще всесожжение дар его, от говяд мужеск пол непорочен принесет, пред двери скинии свидения да принесет е приятно пред Господем, **4** и да возложит руку на главу приношения, приятно ему, умиловити о нем: **5** и да заколют телца пред Господем: и да принесут сынове Аароновы жерцы кровь, и да пролиют кровь на олтарь окрест, иже у дверей скинии свидения, **6** и одравше всесожжение, да раздробят е на уды, **7** и да возложат сынове Аарони жерцы огонь на олтарь, и да вскладут дрова на огонь: **8** и да вскладут сынове Аарони жерцы раздробленая, и главу, и тук на дрова суцая на огни яже на олтари, **9** утробу же и ноги да измыют водою: и да возложит жрец вся на олтарь: приношение есть жертва, воня благоухания Господу. **10** Аще же от овец дар свой Господви (принесет) от агнец и от козлиц во всесожжение, мужеск пол непорочен да принесет и, **11** и да возложит руку на главу его, и да заколют е в стране олтаря к северу пред Господем: и да пролиют сынове Аарони жерцы кровь его на олтарь окрест: **12** и да раздробят его на уды, и главу, и тук его, и да вскладут я жерцы на дрова суцая на огни яже на олтари, **13** и утробу и ноги измыют водою: и принесет жрец вся, и да возложит на олтарь: приношение есть жертва, воня благоухания Господу. **14** Аще же от птиц приношение принесет дар свой Господу, и принесет от горлиц или от голубов дар свой, **15** и да принесет и жрец ко олтарю, и да отторгнет главу его, и да

возложит жрец на олтарь и исцедит кровь у стояла олтаря: 16 и да отлучит гортань с перием, и извергнет ю от олтаря на восток на место пепела: 17 и да изломит его от крил, и да не разделит: и да возложит е жрец на олтарь на дрова, яже на огни: приношение есть жертва, воня благоухания Господу:

**2** Аще же душа принесет дар жертву Господу, мука пшенична да будет дар его, и да возлиет на ню елей, и возложит на ню ливан: жертва есть: 2 и да принесет ю к сыном Аароним жерцем, и возмет от нея полну горсть муки пшеничны с елеем и весь ливан ея, и да возложит жрец память ея на олтарь: жертва воня благоухания Господу: 3 и останок от жертвы Аарону и сыном его: святое святых от жертв Господних. 4 Аще же принесет дар жертву печени в печи от муки пшеничны, хлебы пресны сопряжены с елеем и опресноки помазаны елеем. 5 Аще же жертва от сковрады дар твой, мука пшенична смешена со елеем, пресна да будут: 6 и да разломиши я на укрухи, и возлиеши на на елей: жертва есть Господу. 7 Аще же жертву от огнища дар твой, мука пшенична с елеем да сотворена будет: 8 и принесет жертву, юже аще сотворит от сих Господу, и да принесет к жерцу: 9 и приступив ко олтарю, да отимет жрец от жертвы память ея, и да возложит жрец на олтарь: приношение воня благоухания Господу: 10 останок же от жертвы Аарону и сыном его: святая святых от приношений Господу. 11 Всяку жертву, юже аще приносите Господу, не сотворите квасну: всяк бо квас и всяк мед да не принесете от него, еже приносить Господу дар. 12 От начатков да принесете я Господу: на олтарь же да не вознесутся в воню благоухания Господу. 13 И всяк дар жертвы вашей солию да

осолится: да не оставите соли завета Господня от жертв ваших, во всяком даре вашем да принесете Господу Богу вашему соль. 14 Аще же принесеши жертву от начатков жит Господу, новы сопряжены зелены класы истлачены Господу, и принесеши жертву от начатков жит: 15 и да возлиеши на ню елей, и да возложиши на ню ливан: жертва есть: 16 и да вознесет жрец память ея от сопряженных с елеем, и весь ливан ея: принос есть Господу.

**3** Аще же жертва спасения дар его Господу, аще убо от говяд е принесет, аще мужеск пол или женск, непорочен да принесет и пред Господа: 2 и возложит руце свои на главу дара, и да заколет и пред Господем у дверей скинии свидения: и да возлиют сынове Аарони жерцы кровь на олтарь всесожжений окрест, 3 и да принесут от жертвы спасения принос Господу, тук покрывающий утробу, и весь тук иже на утробе, 4 и обе почки, и тук иже на них и иже на стегнах, и препонку, яже на печени, с почками отимет: 5 и да вознесут я сынове Аарони жерцы, на олтарь во всесожжения на дрова сущая на огни, яже на олтари: принос воня благовония Господу. 6 Аще же от овец дар его жертва спасения Господу, мужеск пол или женск, непорочен да принесет, 7 аше агнца принесет дар свой, да приведет его пред Господа, 8 и да возложит руку на главу дара своего, и да заколет его у дверей скинии свидения: и да пролиют сынове Аарони жерцы кровь на олтарь окрест, 9 и да принесет от жертвы спасения принос Господу, тук и чресла чиста с лядвиями да отлучит и: и весь тук покрывающий утробу, и весь тук иже на утробе, 10 и обе почки, и тук иже на них, иже на стегнах: и препонку, яже на печени, с почками

отемь, **11** да вознесет жрец на олтарь: воня благоухания, принос Господви. **12** Аще же от козлов дар его Господу, да принесет пред Господа: **13** и возложит руце на главу его, и да заколют е пред Господем у дверей скинии свидения: и да пролиют сынове Аарони жерцы кровь на олтарь около: **14** и да вознесет от него принос Господу тук покрывающий утробу, и весь тук иже на утробе, **15** и обе почки, и весь тук, иже на них, иже на стегнах, и препонку, яже на печени, с почками отлучит: **16** и да вознесет жрец на олтарь, принос воня благовония Господу: весь тук Господу. **17** Законное в веки в роды ваша, во всяком обитании вашем: всякаго тука и всякия крове да не ясте.

**4** И рече Господь к Моисею, глаголя. **2** Рцы к сыном Израилевым, глаголя: душа аще согрешит пред Господем не хотящи от всех повелений Господних, иже не леть есть творити, и сотворит едино что от них: **3** аще убо архиерей помазанный согрешит, во еже людем согрешити, и да приведет о гресе своем, имже согрешил, телца от говяд непорочна Господви от гресе: **4** и да приведет телца к дверем скинии свидения пред Господа, и да возложит руку свою на главу телца пред Господем, и да заколет телца пред Господем: **5** и взем жрец помазанный совершен руками от крове телца, и да внесет ю в скинию свидения, **6** и да омочит жрец перст в крови, и да покропит от крове седмижды перстом пред Господем, у завесы святыни: **7** и да возложит жрец от крове телчи на роги олтаря фимиама сложения иже пред Господем, иже есть в скинии свидения, и всю кровь телчу да излиет у стояла олтаря всесожжений, иже есть у дверей скинии свидения, **8** и весь тук телца, иже от гресе,



да отимет от него, тук покрывающий утробу, и весь тук иже на утробе, 9 и обе почки, и тук иже на них, иже есть на стегнах, и препонку, яже на печени, с почками отимет е, 10 якоже отемлется оное от телца жертвы спасения, и да вознесет жрец на олтарь приношения: 11 и кожу телчу, и всю его плоть со главою, и с крайними частми, и со утробою, и с мотылы: 12 и да изнесут всего телца вне полка на место чисто, идеже изсыпают пепел, и да сожгут его на дровах огнем: на месте изсыпания пепела да сожжен будет. 13 Аще же весь сонм сынов Израилевых согрешит не хотяць, и утаится глагол от лица сонма, и сотворят едину от всех заповедий Господних, еяже не леть есть творити, и согрешат, 14 и увестся им грех, имже согреша в нем: и да приведет сонм телца от волов непорочна от гресе, и приведет и пред двери скинии свидения: 15 и да возложат старцы сонма руки своя на главу телца пред Господем, и да заколют телца пред Господем, 16 и да внесет жрец помазанный от крове телчи в скинию свидения, 17 и да омочит жрец перст свой в крови телчи, и да покропит седмижды пред Господем, пред завесою святыни: 18 и от крове да возложит жрец на роги олтаря фимиамов сложения, иже есть пред Господем, иже есть в скинии свидения: и всю кровь да излиет у стояла олтаря приношений, иже есть у дверей скинии свидения, 19 и весь тук его да возмет от него, и вознесет на олтарь: 20 и сотворит телцу сему, якоже сотвори телцу, иже о гресе, тако сотворится: и да помолится от них жрец, и оставится им грех: 21 и да изнесут телца всего вне полка, и да сожгут телца, якоже сожгоша телца перваго: грех (бо) сонма есть. 22 Аще же князь согрешит, и сотворит едину от всех заповедий

Господа Бога своего, не хотя, иже не леть есть творити, и согрешит, и преступит, **23** и увестся ему грех, имже согрешит в нем: да принесет дар свой козла от коз мужеск пол непорочен греха ради, **24** и возложит руку свою на главу козла: и да заколют его на месте, идеже закаляют всесожжения пред Господем: о гресе (бо) есть: **25** и да возложит жрец от крове, яже от гресе, перстом на роги олтаря всесожжений, и всю кровь его да излиет у стояла олтаря всесожжений, **26** и весь тук его вознесет на олтарь, якоже тук жертвы спасения: и да помолится о нем жрец греха ради его, и оставится ему. **27** Аще же душа едина согрешит не хотящи от людей земли, внегда сотворити едину от всех заповедий Господних, еже не леть есть творити, и согрешит, **28** и увестся ему грех, имже согрешит в нем, и да принесется дар свой козу от коз женск пол непорочну, да принесет греха ради, имже согрешит: **29** и да возложит руку свою на главу греха своего: и заколют козу, яже греха ради, на месте, идеже закаляют всесожжения: **30** и да возмет жрец от крове ея перстом, и да возложит на роги олтаря всесожжений, и всю кровь ея излиет у стояла олтаря: **31** и весь тук да отимет, якоже отемлется тука от жертвы спасения, и да вознесет жрец на олтарь в воню благовония Господу: и да помолится жрец о нем, и оставится ему. **32** Аще же овцу принесет дар свой греха ради, женск пол непорочен да принесет ю: **33** и да возложит руку свою на главу яже о гресе, и да заколют ю греха ради на месте, на немже закаляют всесожжения (на месте святе): **34** и возмет жрец от крове, яже о гресе, перстом своим, да возложит на роги олтаря всесожжения: и всю кровь ея да излиет у стояла олтаря всесожжения, **35** и весь тук ея да отимет, якоже

отемлется тук овцы от жертвы спасения: и да возложит его жрец на олтарь на всесожжение Господне: и да помолится за него жрец о гресе, имже согреши, и оставится ему.

**5** Аще же душа согрешит, и услышит глас клятвы, и сей свидетель или виде или сведа, аще не возвестит, примет грех. **2** Душа она, яже аще прикоснется ко всякой вещи нечистой, или мертвечине, или звероядине нечистой, или мертвечинам гнусностей нечистых, или мертвечинам скотов нечистых, и мертвечине гад нечистых, и забыв их осквернится: **3** или прикоснется нечистоте человек, от всякия нечистоты его, ейже прикоснувся осквернится, и забудет, посем же увестъ, повинен будет греху. **4** Душа беззаконная, аще обещает устнама своима зле или добре сотворити, по всем, елика изречет человек с клятвою, и утаится его пред очесы, и сей увестъ, и согрешит едино что от сих, **5** и исповестъ грех, имже согреши противу себе: **6** и да принесет Господу о гресе, имже согреши, женск пол, от овец агницу, или козу от коз греха ради: и да помолится о нем жрец греха ради его, имже согреши, и оставится ему грех. **7** Аще же не может рука его доволства имети на овцу, да принесет греха ради своего, имже согреши, две горлицы, или два птенца голубина Господу, един греха ради и един во всесожжение: **8** и принесет я к жерцу, и приведет жрец еже за грех прежде, и да отторгнет жрец главу его созади, но да не отлучит: **9** и да покропит от крове, яже за грех, на стену олтаря, останок же крове да исцедит на стояло олтаря: о гресе бо есть: **10** и вторым да сотворит всесожжение, якоже подобает, и да помолится от нем жрец греха ради его, имже согреши, и оставится ему. **11** Аще

же не обрящет рука его супруга горлиц, или двух птенцев голубиных, и принесет дар свой за грех, десятую часть меры ефимуки пшеничны за грех: да не возлиет на ню елеа, ниже да возложит на ню ливана, понеже о гресе есть: **12** и да принесет ю к жерцу, и взем жрец о нея полную горсть в память его, возложит на жертвенник всесожжения Господня: о гресе (бо) есть: **13** и да помолится о нем жрец греха ради его, имже согреши отединого сих, и оставится ему: останок же будет жерцу, якоже жертва муки пшеничны. **14** И рече Господь к Моисею, глаголя: **15** душа яже аще забудет забвением, и согрешит не хотящи от святынь Господних, и да принесет о преступлении своем Господу овна непорочна от овец, емуже цена серебра сиклев, по сиклю святых, о немже согреши: **16** и еже согреши от святых, да отдаст е, и пятую часть приложит нань, и даст е жерцу: и жрец да помолится о нем о нов преступлении его, и оставится ему. **17** И душа яже аще согрешит, и сотворит едину от всех заповедий Господних, ихже не леть есть творити, и не уведе, и согрешит, и примет грех свой, **18** и да принесет овна непорочна от овец, ценою серебра греха ради, к жерцу и да помолится о нем жрец, о неведении его, егоже не веде, и сам не ведяще, и оставится ему: **19** согреши бо согрешением пред Господем.

**6** И рече Господь к Моисею, глаголя: **2** душа яже аще согрешит, и презрев презрит заповеди Господня, и солжет к другу о вдании, или о общине, или о хищении, или преобиде чим ближняго, **3** или обрете погубленное, и солжет о нем, и кленется в неправду о едином от всех, яже аще сотворит человек яко согрешити в них: **4** и будет егда согрешит и преступит, и отдаст похищенное, еже похити, или обиду, еюже

преобиде, или вдание, еже вдано бысть ему, или погибшее, еже обрете: 5 от всякия вещи, еяже ради кляся в неправду, и да отдаст самое то истое, и пятую часть свою приложит ктому: егоже есть, тому да отдаст, в онъже день обличится: 6 и о преступлении своем да принесет Господу овна от овец непорочна, ценою в немже прегреша: 7 и да помолится жрец о нем пред Господем, и оставится ему за едино от всех, яже сотвори и преступи в нем. 8 И рече Господь к Моисею, глаголя: 9 заповеждь Аарону и сыном его, глаголя: сей закон всесожжения: сие всесожжение на горении его на олтари всю ночь до заутра, и огонь олтаря да горит на нем, и не угасает: 10 и да облечется жрец в срачицу льняну, и надраги льняны да возвлечет на тело свое, и да изнесет принос, егоже аще изжжет огонь всесожжения от олтаря, и да поставит близ олтаря: 11 и да совлечет ризы своя, и да облечется в ризы ины, и да изнесет принос вне полка на место чисто: 12 и огонь на олтари да горит на нем и не угасает: и да возжжет на нем жрец дрова по вся утра, и да возкладет на нь всесожжение, и да возложит на нь тук спасения: 13 и огонь всегда да горит на олтари, не угасает: 14 сей закон жертвы, юже принесут сынове Аарони жерцы пред Господем, прямо олтаря: 15 и да возмет от него (жрец) горсть муки пшеничны жертвенныя с елеем ея и со всем ливаном ея, сущими на жертве: и да вознесет на олтарь принос в воню благовония, в память ея Господу: 16 оставшееся же от нея снесет Аарон и сынове его: пресна да снедятся в месте святе, в притворе скинии свидения да снедят я: 17 да не испечется квасна: часть сию дах им от приносов Господних: святая святых суть, якоже еже о гресе, и якоже еже о преступлении: 18 всяк мужеск

пол жреческ да снедят ю: законно вечно в роды ваша от принос Господних: всяк, иже аще прикоснется им, освятится.

**19** И рече Господь к Моисею, глаголя: **20** сей дар Аарону и сыном его, егоже принесут Господу в день, в оньже аще помажеша его: десятую часть меры ефи муки пшеничны в жертву всегда, пол ея заутра и пол ея в вечер: **21** на сковраде в елеи да сотворится, сопряжену да принесет ю витую жертву от укрупов, жертву в воню благовония Господу: **22** жрец помазанный, иже вместо его от сынов его, да сотворит ю: законно вечно, все да совершится: **23** и всяка жертва жреческа всесожженна да будет и да не снесется. **24** И рече Господь Бог Моисею, глаголя: **25** рцы Аарону и сыном его, глаголя: сей закон согрешения: на месте, на немже закаляют всесожжения, да закаляют яже греха ради пред Господем: святая (бо) святых суть: **26** жрец приносяй ю да снесет ю: в месте святе да снесется, в притворе скинии свидения: **27** всяк прикасайся мяс ея освятится: и емуже аще воскропится от крове ея на ризу, яже аще воскропится на ню, да исперется на месте святе: **28** и сосуд глинян, в немже варится, да разбьется: аще же в медян сосуде сварится, да изтрет его, и измьет водою: **29** всяк мужеск пол в жерцех да снесет ю: святая (бо) святых суть Господу: **30** и вся, яже от гресе аще принесутся от крове их в скинию свидения, ко очищению во святыни, да не снедятся, огнем да сожгутся.

**7** И сей закон овна иже о преступлении: святая святых суть: **2** на месте, на немже закаляют всесожжение, да заколют овна иже о преступлении пред Господем, и кровь да пролиют на стояла олтаря окрест: **3** и весь тук его да принесет от него, и чресла, и весь тук покрывающий утробу, и весь тук

иже на утробе, 4 и обе почки, и тук иже на них, иже на стегнах, и препонку, яже на печени, с почками да отимет я: 5 и вознесет я жрец на олтарь, принос в воню благовония Господу: о преступлении (бо) есть: 6 всяк мужеск пол от жрец да снесет я, на месте святе да снесет я: святая святых суть: 7 якоже греха ради, тако и преступления ради, закон един их: жрец иже помолится о нем, ему да будет: 8 и жрец приносяй всесожжение челоуечо, кожа всесожжения, еже приносит он, ему да будет: 9 и всяка жертва, яже сотворится в печи, и всяка, яже сотворится на огнищи, или на сковраде, жерцу, иже приносит ю, тому да будет: 10 и всяка жертва сопряжена с елеем, и яже не сопряжена, всем сыном Аароним комуждо равно да будет. 11 Сей закон жертвы спасения, юже принесут Господу: 12 аще убо похваления ради принесет ю, и принесет на жертву хваления хлеба от муки пшеничны пряжены в елеи, и опресноки помазаны елеем, и муку пшеничну смешену с елеем: 13 с хлеба квасными да принесет дар свой на жертву хваления спасителнаго: 14 и да принесет един от всех даров своих участие Господу: жерцу возливающему кровь жертвы спасения, тому да будет: 15 и мяса жертвы хваления спасителнаго тому да будут, и в оньже день принесутся, да снесутся: да не оставят от него на утрие: 16 и аще обет будет, или вольный пожрет дар свой, в оньже аще день жертву свою принесет, да снесется, и на утрие: 17 и оставшееся от мяс жертвы до дне третияго на огни да сожжется: 18 аще же ядый снесет от мяс в день третий, не приемется приносящему ю, ниже вменится ему: осквернение есть: душа же, яже аще снесет от них, грех примет: 19 и мяса, яже аще прикоснутся всякому

нечисту, да не снутятся, на огни да сожгутся: всяк чистый да снет мяса: 20 душа же, яже аще снет от мяс жертвы спасения, яже есть Господу, и нечистота его на нем, погибнет душа она от людей своих: 21 всякой вещи нечистой, или от нечистоты человеки или от четвероногих нечистых, или всякой мерзости нечистой, и снет от мяс жертвы спасения, яже есть Господня, погибнет душа та от людей своих. 22 И рече Господь к Моисею, глаголя: 23 рцы сыном Израилевым, глаголя: всякаго тука говяжа и овча и козия да не снете: 24 и тук мертвечинен и звероядный да сотворится на всяко дело, в ядении же да не снется: 25 всяк ядый тук от скотов, от нихже принесет дар Господу, погибнет душа та от людей своих: 26 всякия крове да не снете во всех селениих ваших и от скотов и от птиц: 27 всяка душа, яже аще снет кровь, погибнет душа та от людей своих. 28 И рече Господь к Моисею, глаголя: 29 и сыном Израилевым речеши, глаголя: приносяй жертву спасения Господу да принесет дар свой Господу, и от жертвы спасения: 30 руце его да принесут принос Господу: тук иже на грудех, и препонку печени да принесет я, якоже возложить дар пред Господа: 31 и да вознесет жрец тук иже на грудех, на олтарь, и груди да будут Аарону и сыном его, 32 и рамо десное да дастся участие жерцу от жертв спасения вашего: 33 приносящему кровь спасения и тук от сынов Аароновых, тому да будет рамо десное во участие: 34 грудь бо возложения и рамо участия взях от сынов Израилевых от жертв спасения вашего, и дах я Аарону жерцу и сыном его, законно вечно от сынов Израилевых. 35 Сие помазание Аароне и помазание сынов его от приносов Господних, в оньже день приведе я жрети



Господу: 36 якоже заповеда Господь дати им, в оньже день помаза я от сынов Израилевых: законно вечно в роды их. 37 Сей закон всесожжений и жертвы, и о гресе и о преступлении, и совершении и жертве спасения: 38 якоже заповеда Господь Моисею на горе Синайстей, в оньже день заповеда сыном Израилевым приносить дары своя пред Господа, в пустыни Синайстей.

**8** И рече Господь к Моисею, глаголя: 2 поими Аарона и сыны его, и ризы его, и елей помазания, и телца иже за грех, и два овна, и кошницу опресноков, 3 и весь сонм собери пред двери скинии свидения. 4 И сотвори Моисей, якоже повеле ему Господь: и собра сонм пред двери скинии свидения. 5 И рече Моисей к сонму: сие есть слово, еже завеща Господь сотворити. 6 И приведе Моисей Аарона и сыны его и измы я водою: 7 и облече его в срачицу, и опояса его поясом, и облече его в исподнюю ризу, и возвлече нань верхнюю ризу: 8 и опояса его по устройению ефуда, и стисне его им: и возложи нань слово, и возложи на слово явление и истину: 9 и возложи увясло на главу его, и возложи на увясло против лица его дщицу златую освященную святую, якоже повеле Господь Моисею. 10 И взя Моисей от елеа помазания, 11 и воскропи от него на олтарь седмижды, и помаза олтарь и освяти его и вся сосуды его, и умывалницу и стояло ея, и освяти я, и помаза скинию и вся сосуды ея, и освяти ю, 12 и возлия Моисей от елеа помазания на главу Аарону, и помаза его, и освяти его. 13 И приведе Моисей сыны Аарони, и облече я в срачицы, и опояса я поясы, и возложи на ня клобуки, якоже повеле Господь Моисею. 14 И приведе Моисей телца иже за грех, и возложи Аарон и

сынове его руки на главу телца иже за грех, 15 и закла его ю взя Моисей от крове, и возложи на роги олтаря окрест перстом, и очисти олтарь: и кровь пролия на стояло олтаря, и освяти его, еже молитися у него. 16 И взя Моисей весь тук иже на утробе, и препонку яже на печени, и обе почки, и тук иже на них, и вознесе Моисей на олтарь: 17 телца же и кожу его, и мяса его и мотылы его, сожже я огнем вне полка, якоже повеле Господь Моисею. 18 И приведе Моисей овна иже во всесожжение, и возложи Аарон и сынове его руки своя на главу овню. 19 И закла Моисей овна, и пролия Моисей кровь на олтарь окрест: 20 овна же раздробил на уды его, и вознесе Моисей главу и уды и тук, и утробу и ноги измы водою: 21 и вознесе Моисей всего овна на олтарь: всесожжение есть в воню благовония: принос есть Господу, якоже заповеда Господь Моисею. 22 И приведе Моисей овна второго, овна совершения: и возложи Аарон и сынове его руки своя на главу овню, 23 и закла его: и взя Моисей от крове его, и возложи на край уха Аароня деснаго, и на край руки его десныя, и на край ноги его десныя. 24 И приведе Моисей сыны Аарони, и возложи Моисей от крове на край ушес их десных, и на край рук их десных, и на край ног их десных: и пролия Моисей кровь на олтарь окрест: 25 и взя Моисей тук и чресла, и тук иже на утробе, и препонку печени, и обе почки, и тук иже на них, и рамо десное, 26 и от кошницы совершения, яже есть пред Господем, и взя хлеб един пресный, и хлеб елеен един, и опреснок един, и возложи на тук, и рамо десное: 27 и возложи вся на руке Аарони и на руке сынов его, и вознесе я участие пред Господа. 28 И взя Моисей от рук их и вознесе на олтарь

на всесожжение совершения, еже есть воня благоухания: принос есть Господу. 29 И возьмет Моисей грудь, отлучит ю возложение пред Господом от овна совершения: и бысть Моисею в масть, якоже заповеда Господь Моисею. 30 И взял Моисей от елея помазания и от крове яже на олтари, и воскропит на Аарона и на ризы его, и на сыны его и на ризы сынов его с ним: и освятит Аарона и ризы его, и сыны его и ризы сынов его с ним. 31 И рече Моисей Аарону и сыном его: сварите мяса во дворе скинии свидения на месте святе, и тамо да съесте я, и хлебы иже в кошнице совершения, якоже заповедано бысть мне глаголя: Аарон и сынове его да съедят я. 32 и остаток мяса и хлебов на огни да сожжете: 33 и из дверей скинии свидения да не изыдете седмь дний, дондеже день скончается, день совершения вашего: в седмь бо дний совершит руки ваша: 34 якоже сотвори в день сей, в оньже заповеда Господь сотворити, яко молитися о вас: 35 и у дверей скинии свидения сидите седмь дний, день и ночь, и сохраните повеления Господня, да не умрете: тако бо заповеда мне Господь Бог. 36 И сотвори Аарон и сынове его вся словеса, яже завета Господь Моисею.

**9** И бысть в день осмый, призвал Моисей Аарона и сыны его и старцы Израилевы, 2 и рече Моисей ко Аарону: возьми себе телца от говяд греха ради и овна на всесожжение, непорочны, и принеси я пред Господа: 3 и старцем Израилевым речеши, глаголя: возьмите козла от коз единого от гресе, и овна, и телца и агнца единоголетна, в приношение, непорочны: 4 и телца от говяд, и овна на жертву спасения пред Господа, и муку пшеничну спряжену с елеем: зане днесь Господь явится в вас. 5 И взяша, якоже заповеда Моисей пред скинию

свидения: и прииде весь сонм, и сташа пред Господем. 6 И рече Моисей: сие слово, еже рече Господь, сотворите, и явится в вас слава Господня. 7 И рече Моисей Аарону: приступи ко олтарю и сотвори еже греха ради твоего, и всесожжение твое, и помолися о себе и о доме твоём: и сотвори дары людския, и помолися о них, якоже заповеда Господь Моисею. 8 И приступи Аарон ко олтарю, и закла телца, иже греха ради его. 9 И принесоша сынове Аарони кровь к нему: и омочи перст свой в кровь, и возложи на роги олтаря, и кровь излия у стояла олтаря: 10 и тук, и обе почки, и препонку печени, яже греха ради, возложи на олтарь, якоже заповеда Господь Моисею: 11 мяса же и кожу сожже на огни вне полка, 12 и закла всесожжение. И принесоша сынове Аарони кровь к нему: и пролия на олтарь окрест. 13 И всесожжение принесоша к нему по удам: сия и главу возложи на олтарь, 14 и измы утробу и ноги водою, и возложи во всесожжение на олтарь. 15 И принесе дар людский: и взя козла, иже греха ради людска, и закла его, и очисти его, якоже и перваго, 16 и принесе всесожжение, и сотвори е, якоже достоит. 17 И принесе жертву, и наполни руце от нея, и возложи на олтарь кроме всесожжения утренняго, 18 и закла телца и овна жертвы спасения людска. И принесоша сынове Аарони кровь к нему: и пролия на олтарь окрест. 19 И тук телчий, и овня чресла, и тук покрывающий утробу, и обе почки, и тук иже на них, и препонку печени: 20 и возложи туки на груди, и вознесе туки на олтарь: 21 и груди и рамо десное отя Аарон участие пред Господем, якоже повеле Господь Моисею. 22 И воздвиг Аарон руце к людем, благослови я: и сниде сотворив приношение греха ради, и

всесожжение, и яже о спасении. 23 И вниде Моисей и Аарон в скинию свидения, и изшедше благословиша вся люди. И явися слава Господня всем людем: 24 и изыде огонь от Господа, и пояде яже на олтари, и всесожжения и туки. И видеша вси людие, и ужасошася, и падоша на лице.

**10** И взявше два сына Аарона, Надав и Авиуд, кийждо свою кадилницу, вложиста в ня огонь и возложиста нань фиммиам, и принесоста пред Господа огонь чуждь, егоже не повеле има Господь. 2 И изыде огонь от Господа, и пояде я, и умроста пред Господем. 3 И рече Моисей ко Аарону: сие есть, еже рече Господь, глаголя: в приближающихся Мне освящуся и во всем сонме прославлюся. И умилися Аарон. 4 И призва Моисей Мисаила и Елисафана, сыны Озиилевы, сыны брата отца Аарона, и рече им: приступите и возьмите братий своих от лица святых вне полка. 5 И приступиша, и взяша их в ризах их, (и изнесоша) вне полка, якоже рече Моисей. 6 И рече Моисей ко Аарону и Елеазару и Ифамару, сыном его оставшымся: глав ваших не открывайте и риз ваших не раздирайте, да не умрете, и на весь сонм будет гнев: кратия же ваша весь дом Израилев да плачутся запаления, имже запалишася от Господа: 7 и из дверей скинии свидения не исходите, да не умрете: елей бо помазания, иже от Господа, на вас есть. И сотвориша по словеси Моисеову. 8 И рече Господь ко Аарону, глаголя: 9 вина и сикера не пейте, ты и сынове твои с тобою, егда входите в скинию свидения, или приступающим вам ко олтарю, да не умрете: (и будет сие) законно вечно в роды ваша: 10 отлучити между вещми святыми и между сквернавыми, и между нечистыми и между чистыми, 11 и устроити сыном Израилевым вся законная, яже

глагола Господь к ним рукою Моисевою. **12** И рече Моисей ко Аарону, и Елеазару и Фамару, сыном, его оставшимся: возьмите жертву оставшуюся от приносов Господних и ядите опресноки у олтаря: яко святая святых суть: **13** и ядите я на месте святе: законно бо тебе есть, и законно сыном твоим, сие от приносов Господних: сице бо ми заповеда Господь: **14** и груди участия и рамо участия ядите на месте святе ты и сынове твои, и дом твой с тобою: законно бо тебе, и законно сыном твоим дадеся от жертв спасении сынов Израилевых: **15** рамо участия и груди участия в приносех тучных да принесут, участие еже приносить пред Господа: и да будет тебе и сыном твоим и дочерем твоим с тобою законно вечно, якоже повеле Господь Моисею. **16** И козла, иже греха ради, взыска взыска Моисей: и сей сожжен бяше. И разгневался Моисей на Елеазара и Ифамара, сыны Аарони оставльшыяся, глаголя: **17** почто не снадосте на месте святе, еже греха ради, яко святая святых суть, сие даде вам ясти, да отимете грех сонма и помолитесь о них пред Господем: **18** не внесеса бо от крове его в святое: пред лицом внутрь да ясте е на месте святе, якоже повеле мне Господь. **19** И рече Аарон к Моисею, глаголя: аще днесь принесоша яже греха ради своего и всесожжения своего пред Господа, и случишася мне сицевая, и снем, яже греха ради, днесь, еда угодно будет Господу? **20** И слыша Моисей, и угодно ему бысть.

**11** И рече Господь к Моисею и Аарону, глаголя: **2** рцыте сыном Израилевым, глаголюще: сии скоти, ихже имате ясти от всех скотов, иже на земли: **3** всяк скот раздвояющь копыто и пазнокти имеющь на двое, и отрыгаяй жвание в скотех,

сия да ясте: 4 токмо от сих да не снете от отрыгающих жвание и от раздвояющих копыта и делящих пазнокти: велблюда, яко сей износит жвание, но пазноктей не делит на двое, нечист сей вам: 5 и хирогриля, яко износит жвание, а пазноктей не делит, нечист сей вам: 6 и заяца, иже отрыгает жвание, но пазноктей не делит на двое, нечист сей вам: 7 и свинии, яко делит пазнокти на двое и копыто раздвояет, но не отрыгает жвания, нечиста сия вам: 8 от мяс их да не ясте и мертвечине их да не прикасаетесь, нечиста сия вам. 9 И сия да ясте от всех, яже в водах: вся, имже суть перия и чешуя в водах, и в морях и в езерах, сия да ясте: 10 и всем, Имже несть перие ни чешуи в водах, и в морях и в езерах, от всех, яже износят воды, и всяка душа живущая в воде, скверна есть, и скверна да будут вам: 11 от мяс их да не ядите и мертвечины их гнушайтесь: 12 и вся, имже несть перия и чешуи, иже в водах, скверна сия суть вам. 13 И сих гнушайтесь от птиц, и да не ясте их, гнусни суть: орла и грифа и морского орла, 14 и неясыти и иктина и подобных сим: 15 и струфа и совы, и сухолапля и подобных им: 16 и всякого врана и подобных ему: и ястреба и подобных ему: 17 и врана ночнаго и лилика и ивина, 18 и порфириона и пелекана и лебеда, 19 и еродиа и харадриона и подобных ему: и вдода и ночнаго нетопыря. 20 И вся гады птичия, иже ходят на четырех, мерзость есть вам: 21 но сия да ясте от всех гад птичных, иже ходят четвероножны, иже имут голени выше плесну своею, скакати ими по земли: 22 и сия да ясте от сих: вруха и подобная ему, и аттака и подобная ему, офиомаха и еже подобно к нему, и акриду и подобная ей: 23 и всяк гад от птиц, имже суть четыре ноги, мерзость

есть вам, и в сих да не осквернитесь: 24 всяк прикасаясь мертвечине их нечист будет до вечера: 25 и всяк взявляй мертвечину их да измыет ризы своя и нечист будет до вечера. 26 Во всех скотех, иже раздвояет копыто и пазнокти имеет, а жвания не отрыгает, нечиста да будут вам: всяк прикасаясь мертвечине их нечист будет даже до вечера: 27 и всяк иже ходит на лапах, во всех зверех, иже ходят на четырех, нечиста будут вам: всяк прикасаясь мертвечине их нечист будет до вечера: 28 и взявляй мертвечину их да исперет ризы своя и нечист будет до вечера: нечиста сия будут вам. 29 И сия вам нечиста от гад плещущих по земли: ласица и мыш и крокодил земный, 30 мигали и хамелеон, и халавотис и ящер и кротория: 31 сии нечисти вам от всех гад плещущих по земли: всяк прикасаясь мертвечине их нечист будет до вечера. 32 И всяко, в неже аше впадет от них нечто от мертвечины их, нечист будет всяк сосуд деревян, или риза, или кожа, или вретище: всякий сосуд, в немже творится дело, в воде погрузится и нечист будет до вечера, и по сих чист будет: 33 и всяк сосуд глинян, в оньже аще впадет от сих внутрь, елика суть в нем, нечиста будут, и сосуд да разбьется. 34 И всяка снедь юже ясте, на нюже аще возлиется вода, нечиста будет вам: и всякое питие, еже пиете во всяком сосуде, нечисто будет (вам): 35 и все, еже аще впадет в не от мертвечины их, нечисто будет: печи и огнища да сокрушатся, нечиста сия суть и нечиста будут вам. 36 Кроме источник водных и поток, и собраний водных, будут чисти: а иже прикасается мертвечинам их, нечист будет. 37 Аще же впадет от мертвечины их на всяко семя семянное, еже сеется, чисто будет: 38 аще же возлиется



вода на всяко семя, и впадет от мертвечины их на не, нечисто будет вам. 39 Аще же умрет от скота, егоже вам ясти, прикасаясь мертвечине его, нечист будет до вечера: 40 и ядый от мертвечин сих да исперет ризы своя и нечист будет до вечера: и возьмляй мертвечину их да измыет ризы своя и измыется водою, и нечист будет до вечера. 41 И всяк гад плещущий по земли мерзость вам есть сие, да не снесется. 42 И всяко ходящее на чреве, и всяко ходящее на четырех всегда, и (всяко) многоножное во всех гадах, иже плещут по земли, да не снесите е, яко мерзость вам есть: 43 и да не омерзите душ ваших во всех гадах плещущих по земли, и да не осквернитесь ими, и да не будете нечисти в них, 44 яко Аз есмь Господь Бог ваш: и да освятитесь и будете святы, яко свят есмь Аз Господь Бог ваш: и да не оскверните душ ваших во всех гадах движущихся по земли, 45 яко Аз есмь Господь, изведый вас из земли Египетския, да буду вам Бог, и будете святы, яко свят есмь Аз Господь. 46 Сей закон о скотех и о птицах, и всякой души движущейся в водах и всякой души пресмыкающей по земли, 47 разлучити между нечистыми и между чистыми, и научити сыны Израилевы между оживляющими ядомая и между оживляющими не ядомая.

**12** И рече Господь к Моисею, глаголя: 2 глаголи сыном Израилевым и речеши к ним, глаголя: жена, яже аще зачнет и родит мужеск пол, нечиста будет семь дней: по днем (естественнаго) разлучения скверны ея, нечиста будет: 3 и в день осмый да обрежет плоть конечную его: 4 и сидети будет тридесять и три дни в крови нечистой своей: всякой вещи святей да не прикоснется и в святилище да

не внидет, дондеже скончаются дние очищения ея. 5 Аще же женск пол родит, и нечиста будет четырнадцать дний по (естественней) скверне ея, и шестьдесят и шесть дний сидети будет в крови нечистоты своея. 6 И егда исполнятся дние очищения ея о сыне ея или дщери, да принесет агнца непорочна единоголетна во всесожжение, и птенца голубина или горлицу греха ради, пред двери скинии свидения к жерцу, 7 и да принесет е пред Господа: и помолится о ней жрец и очистит ю от тока крове ея: сей закон раждающия мужеск пол или женск. 8 Аще же не обрящет рука ея доволнаго на агнца, и да возмет две горлицы или два птенца голубина, единого на всесожжение и другаго греха ради: и помолится о ней жрец, и очистится.

**13** И рече Господь к Моисею и Аарону, глаголя: 2 человеку емуже аще будет на кожи плоти его струп знамения или блеск, и будет на кожи плоти его язва прокажения, да приведется ко Аарону жерцу или ко единому от сынов его жерцов: 3 и узрит жрец язву на кожи плоти его, и влас в язве изменится в бело, и взор язвы умален от кожи плоти его, язва проказы есть: и узрит жрец, и осквернит его. 4 Аще же и блеск бел будет на кожи плотней его, и не меньший будет взор его от кожи, и влас его не изменися во влас бел, и той есть темен, и отлучит жрец язву на седьм дний: 5 и узрит жрец язву в день седмый, и се, язва пребывает пред ним, и не изменися язва на кожи, и отлучит его жрец на другия седьм дний: 6 и узрит его жрец в седмый день вторицею, и се, язва потемне, и не изменися язва на кожи, и очистит его жрец: знамение бо есть: и измыв ризы своя, чист будет. 7 Аще же изменяющееся изменится знамение на

кожи, повнегда видети его жерцу еже очистити его, и явится второе жерцу: и узрит его жрец, и се, изменися знамение в кожи, 8 и да осквернит его жрец: проказа бо есть. 9 И язва прокажения аще будет на человеце, и приидет к жерцу: 10 и узрит жрец, и се, струп бел на кожи, и сей изменил влас бел, и от здравыя плоти живыя в струпе: 11 проказа ветха есть на кожи плоти его, и осквернит его жрец и отлучит его, яко нечист есть. 12 Аще же процветая процветет проказа на кожи, и покрывает прокажение всю кожу язвою, от главы да ногу его, по всему взору жерцову: 13 и узрит жрец, и се, покрыло прокажение всю кожу плоти его, да очистит жрец язву: яко вся изменися в бело, чист есть. 14 И в оньже день аще явится на нем плоть жива, осквернится: 15 и узрит жрец плоть здраву, и осквернит его плоть здрава, яко нечиста есть, прокажение есть. 16 Аще же составится плоть здрава, и изменится в бело, и приидет к жерцу: 17 и узрит жрец, и се, изменися язва в бело, и очистит жрец язву, чист есть. 18 И тело аще будет на кожи его болячка гнойна, и исцелее, 19 и будет на месте болячки струп бел, или блеск белеющься или рдящься, и явится жерцу: 20 и узрит жрец, и се, взор нижеа кожи, и влас его изменися в бело, и осквернит его жрец, яко блеск прокажения есть, на болячке процвете. 21 Аще же увидит жрец, и се, несть в нем влас бел, и не нижеа есть от кожи плотския, и сей есть темен, и отлучит его жрец на седмь дний. 22 Аще ли разсыпанием разсыплется по кожи, и осквернит его жрец, блеск прокажения есть, на болячке процвете. 23 Аще ли на месте своем пребывает блеск и не рассыпается, струп болячки есть, и очистит его жрец. 24 И плоть аще будет на кожи его жжение огнено, и будет

на кожи его исцелевшее от жжения блестящее бело или червлено или пробелующееся: 25 и узрит его жрец, и се, пременися влас бел в блестящийся, и взор ему ниже от кожи, прокажение есть, во жжении процвете, и осквернит его жрец, язва прокажения есть. 26 Аще же увидит его жрец, и се, несть на блестящемся влас бел, и не ниже есть от кожи, само же темно, и отлучит его жрец на семь дней: 27 и узрит его жрец в день седмый, и аще разсыпанием разсыплется по кожи, и осквернит его жрец: язва прокажения есть, бо гной процвете. 28 Аще же на месте пребудет блещание и не разсыплется по кожи, сие же темно есть, струп сожжения есть, да очистит его жрец: образ бо сожжения есть. 29 Мужу же или жене, аще будет на них язва прокажения на главе или на браде, 30 и узрит жрец язву, и се, обличие ея глубочае кожи, в нейже влас желтуяся тонок, и осквернит его жрец: вред есть, прокажение главы или прокажение брады есть. 31 И аще увидит жрец язву вреда, и се, не будет обличие ниже кожи, и влас желтуяся не будет в нем, да отлучит жрец язву вреда на семь дней: 32 и узрит жрец язву в день седмый, и се, не рассыпая вред, и влас желтуяся несть в нем, и обличие вреда несть ниже кожи: 33 и острижет кожу, вред же да не острижется, и отлучит жрец вред на семь дней второе: 34 и узрит жрец вред в день седмый, и се, не рассыпая вред по кожи по острижении его, и обличие вреда несть ниже кожи, и очистит его жрец, и измыв ризы, чист будет. 35 Аще же разсыпанием разсыплется вред по кожи по очищении его: 36 и узрит его жрец, и се, не рассыпая вред по кожи, да не присетит жрец о власе желтеющемся, яко нечист есть. 37 Аще же пред ним будет на месте вред, и

влас черн явится в нем, исцеле вред, чист есть, и очистит его жрец. 38 Мужу же или жене, аще будут на кожи плоти его блещания блещащая белеющая: 39 и увидит жрец, и се, на кожи плоти его блещания и блещащая белеющая, лишай есть, процвете на кожи плоти его, чист есть. 40 Аще же кому облезе глава, плешив есть, чист есть: 41 аще же спреди облезе глава, взлыс есть, чист есть: 42 аще же будет на плешу его или на взлысине его блеск бел или червленуяся, прокажение процветающее на плешу его или на взлысине его: 43 и увидит его жрец, и се, обличие блеска бело или червлено на плешу его или на взлысине его, яко обличие прокажения на кожи плоти его: 44 человек прокажен есть, осквернением осквернит его жрец, на главе его блеск его. 45 И прокажен, на немже есть язва, ризы его да будут раздраны, и глава его не покровена, и около уст своих да обвиется, и нечист прозовется: 46 вся дни, в няже будет на нем язва, нечист сый, нечист будет: отлучен да сedit, вне полка да будет ему пребывание. 47 И риза аще будет на ней язва прокажения, на ризе сукняне, или на изгребийней, 48 или на прядене, или на кроках, или на льнех, или на волне, или на кожи, или на всякой кожи деланей, 49 и явится язва зелена или червленуяся на кожи, или на ризе, или на пряденех, или на кроках, или на всяком деле кожанем, язва прокажения есть, и покажет жерцу: 50 и увидит жрец язву, и отлучит жрец язву на семь дней. 51 И да увидит жрец язву в день седмый: аще же разсыпая язва по ризе, или по прядене, или по кроках, или по кожи, по всему елика творятся кожи в делании, прокажение исто есть язва, нечист есть: 52 да сожжет ризу, или прядения, или кроки, или на

волне, или на льне, или на всяком сосуде кожане, на немже  
аще будет язва: понеже прокажение исто есть, на огни да  
сожжется. 53 Аще ли узрит жрец, и не разсыплется язва по  
ризе, или по прядене, или по кроках, или по всякому сосуду  
кожану: 54 и повелит жрец, и измыет, на немже будет язва, и  
да отлучит жрец язву на другия семь дней: 55 и увидит жрец  
по измытии его язву, и аще не изменила язва лица своего,  
и язва не разсыпая, нечисто есть, на огни да сожжется:  
утвердися бо на ризе, или на прядене, или на кроках. 56  
И аще увидит жрец, и будет темна язва по испрании ея,  
да отторгнет е от ризы, или от прядена, или от крок, или  
от кожи. 57 И аще явится еще на ризе или на прядене,  
или на кроках, или на всяком сосуде кожане, прокажение  
процветающее есть, на огни да сожжется, на немже есть  
язва. 58 И риза, или прядено, или кроки, или всяк сосуд  
кожан, еже исперется, и отступит от него язва, и измыется  
второе, и чисто будет. 59 Сей закон язве прокажения ризы  
сукняны, или изгребийны, или прядены, или куделныя, или  
всякаго сосуда кожана, во еже очистити е, или осквернити е.

**14** И рече Господь к Моисею, глаголя: 2 сей закон  
прокаженному, в оньже день аще очистится, и приведется  
к жерцу: 3 и да изыдет жрец вне полка, и узрит жрец, и  
се, исцеле язва прокажения от прокаженного: 4 и повелит  
жрец, да возмуться очищенному два птичища жива чиста и  
древо кедрово, и соскана червленица и иссоп: 5 и повелит  
жрец, да заколют птичище едино в сосуд глинян, над водою  
живою, 6 и живое птичище да возмет, и древо кедрово и  
соскану червленицу и иссоп, и да омочит их и птичище  
живое в крови закланого птичища над водою живою: 7 и да

воскропит на очистившагося от прокажения седмижды, и чист будет: и да отпустит птичище живое на поле: 8 и да исперет очистивыйся ризы своя и да острижет вся власы своя и да измыется водою, и чист будет: и по сих да внидет в полк и да пребудет вне дому своего семь дней. 9 И будет в день седмый, обриются вси власы его, глава его и брада и брови, и всяк влас его да обриется: и да измыет ризы своя, и да омыется тело его водою, и чист будет. 10 И в день осмый да возмет два агнца единоголетна непорочна и овцу едину единоголетну непорочну, и три десятины муки пшеничны на жертву смешанья с елеем и меру елеа едину: 11 и да поставит жрец очищаяй человека очищаемаго и сия пред Господем, у дверей скинии свидения: 12 и возмет жрец агнца единого и приведет его преступления ради, и чашу елеа, и отлучит я жрец во отлучение пред Господем: 13 и заколют агнца на месте идеже закаляют всесожжения и яже греха ради, на месте святе: есть бо еже греха ради, якоже и преступления ради есть жерцу: святая святых суть: 14 и возмет жрец от крове яже преступления ради, и возложит жрец на обушие уха очищаемаго деснаго, и на край руки его десныя, и на край ноги его десныя: 15 и возьмет жрец от чаши елеа, возлиет на руку левую свою: 16 и да омочит жрец перст свой десный в елей, иже есть в руце его левой, и да воскропит от елеа перстом седмижды пред Господем: 17 оставшийся же елей, иже в руце его, да возложит жрец на обушие уха очищаемаго деснаго, и на край руки его десныя, и на край ноги его десныя, на место крове яже преступления ради: 18 оставшийся же елей, иже в руце жерца, да возложит жрец на главу очищенному: и помолится о нем жрец пред

Господем: 19 и сотворит жрец еже греха ради, и помолится жрец от очищающемся от греха своего: и по сем заколет жрец всесожжение: 20 и вознесет жрец всесожжение и жертву на олтарь пред Господем, и помолится о нем жрец, и очистится. 21 Аще же убог есть, и рука его не достигнет, да возмет агнца единоголетнего единого, в онъже преступил на отлучение, яко помолится о нем, и десятину муки пшеничны смешаны с елеем в жертву, и чашу елеа едину, 22 и два горличичца, или два птенца голубина, елика обрете рука его, и да будет един греха ради, и другой во всесожжение: 23 и да принесет я в день осмый, во еже очистити его, к жерцу, пред двери скинии свидения пред Господа: 24 и возмет жрец агнца иже преступления ради, и чашу елеа, возложит я возложение пред Господем, 25 и заколет агнца иже преступления ради, и возмет жрец от крове яже преступления ради, и возложит на обушие уха очищаемаго деснаго, и на край руки его десныя, и на край ноги его десныя: 26 и от елеа возлиет жрец на руку свою левую, 27 и воскропит жрец перстом своим десным от елеа, иже в руце его левой, седмижды пред Господем: 28 и возложит жрец от елеа суцаго в руце его на обушие уха очищаемаго деснаго, и на край руки его десныя, и на край ноги его десныя, на месте крове яже преступления ради: 29 оставшееся же от елеа, еже есть в руце жерца, да возложит на главу очистившемуся: и помолится о нем жрец пред Господем, 30 и сотворит едину от горлиц, или от птенцев голубиных, якоже обрете рука его, 31 едину греха ради, и другую во всесожжение с жертвою: и помолится жрец о очищаемом пред Господем. 32 Сей закон в немже есть язва прокажения, и не обретающему рукою во очищение



свое. 33 И рече Господь к Моисею и Аарону, глаголя: 34 егда внидете в землю Ханаанску, юже Аз даю вам в притяжание, и дам язву прокажения в домех земли притяжанныя вам: 35 и приидет, егоже дом, и повесть жерцу глаголя: аки язва является в дому моем. 36 И повелит жрец испразднити сосуды дому, прежде неже внити жерцу видети язву, и да не будут нечиста вся яже в дому. По сих же внидет жрец соглядати дом: 37 и узрит жрец язву, и се, язва на стенах дому удолия зеленеющая или червleneющая, и обличие их худее стен: 38 изшед жрец из дому к дверем дому, и отлучит жрец дом на семь дней. 39 И возвратится жрец в седмый день, и узрит дом, и се, рассыпая язва по стенам дому: 40 и повелит жрец, да изымут камень, на нихже есть язва, и да изнесут е вон из града на место нечисто: 41 и да постружут извнутри дом окрест, и изсыплют персть состроганую вне града на место нечисто: 42 и да возмут камень ино острогано, и вложат я вместо камня: и персть ину да возмут, и помажут дом. 43 Аще же паки найдет язва, и явится в дому но изнесении камня и по острогании дому и по помазании, 44 и внидет жрец, и узрит аще рассыпая язва в дому, прокажение пребывающее есть в дому, нечист есть: 45 и разорят дом, и древа его и камень его и всю персть дому изнесут вне града, на место нечисто. 46 И входяй в дом вся дни, в няже есть отлучен, нечист будет до вечера: 47 и спяй в дому да исперет ризы своя и нечист будет до вечера: и ядый в дому да исперет ризы своя и нечист будет до вечера. 48 Аще же пришедый внидет жрец, и увидит: и се, рассыпанием не рассыпая язва в дому но помазании дому, да очистит жрец дом, яко исцеле язва: 49 и возмет

очистити дом, два птичища жива чиста и древо кедрово, и соскану червленицу и иссоп: 50 и да заколет птичище едино в сосуд глинян над водою живою: 51 и возмет древо кедрово и соскание червленое, и иссоп и птичище живое, и да омочит е в кровь птичища закланого над водою живою, и да окропит ими в дому седмижды: 52 и очистит дом кровию птичищною и водою живою, и птичищем живым и дровом кедровым, и иссопом и сосканою червленицею: 53 и да отпустит птичище живое вне града на поле и помолится о доме, и чист будет. 54 Сей закон о всякой язве прокажения и вреда, 55 и прокажения ризы и дому, 56 и струпа, и знамения, и блещашагося, 57 и поведати в оньже день нечисто, и в оньже день очистится: сей закон прокажения.

**15** И рече Господь к Моисею и Аарону, глаголя: 2 глаголи сыном Израилевым и речеши к ним: мужу, мужу, емуже аще будет излияние от тела его, излияние его нечисто есть. 3 И сей закон нечистоты его: изливаяй семя из тела своего, от излияния, имже составлено есть тело его излиянием, сия нечистота его в нем: вся дни излияния тела его, имже составлено тело его излиянием его, нечистота его есть: 4 всяко ложе, на немже аще ляжет изливаяй семя, нечисто есть: и всяк сосуд, на немже аще сядет верху его изливаяй семя, нечист будет: 5 и человек, иже аще прикоснется ложа его, да исперет ризы своя и да омыет тело свое водою, и нечист будет до вечера: 6 и седяй на сосуде, на немже аще сядет верху его изливаяй семя, да исперет ризы своя и да омыется водою, и нечист будет до вечера: 7 и прикоснувшийся к плоти изливающего семя да исперет ризы своя и да омыется водою, и нечист будет до вечера. 8 Аще

же плюнет изливаяй семя на чистаго, да исперет ризы своя и да измыется водою, и нечист будет до вечера: 9 и всяко седло ослее, на неже аще всядет верху его изливаяй семя, нечисто будет до вечера: 10 и всяк прикоснувшийся всем, яже суть под ним, нечист будет до вечера: и взявляй я да исперет ризы своя и омыется водою, и нечист будет до вечера: 11 и еликим аще коснется изливаяй семя и рук своих не омыет водою, да исперет ризы своя и омыет тело водою, и нечист будет до вечера: 12 и сосуд глинян, емуже аще прикоснется изливаяй семя, да разбьется: а сосуд деревянный да измыется водою, и чист будет. 13 Аще же очистится изливаяй семя от излияния своего, и изчислит себе семь дний на очищение свое, и исперет ризы своя и омыет тело свое водою живою, и чист будет: 14 и в день осмый да возмет себе два горличища или два птенца голубина, и да принесет я пред Господа к дверем скинии свидения, и даст я жерцу: 15 и сотворит я жрец един греха ради, и другой во всесожжение: и да помолится о нем жрец пред Господем о излиянии его. 16 И человек, емуже аще изыдет от ложа его семя, и да омыет водою все тело свое, и нечист будет до вечера: 17 и всяка риза и всяка кожа, на нейже аще будет ложе семенное, да измыется водою, и нечиста будет до вечера. 18 И аще ляжет муж с женою своею на ложи семене, да измыются водою, и нечисты будут до вечера. 19 И жена яже аще будет кровь точащи, и будет течение ея в телеси ея, семь дний да будет в скверне своей: и всяк прикасаяйся ей нечист будет до вечера: 20 и все, на немже аще сидит в течении своем, нечисто будет, и всяко, на неже аще присядет (она), нечисто будет: 21 и всяк, иже аще прикоснется ложа ея, да исперет

ризы своя и да измыет водою тело свое, и нечист будет до вечера: 22 и всяк прикасаясь всякому сосуду, на немже аще сядет, да исперет ризы своя и да измыется водою, и нечист будет до вечера: 23 аще же на ложи ей сущей, или на сосуде, на немже аще сядет (она), егда прикоснется кто ей, нечист будет до вечера. 24 Аще же кто будет на ложи с нею, и будет нечистота ея на нем, нечист будет семь дней: и всяко ложе, на немже аще ляжет, нечисто будет. 25 И жена аще точит течение крове дни многи, не во время скверны ея, аще и течет по осквернении ея, вся дни течения нечистоты ея, якоже дни скверны ея, нечиста будет: 26 и всяко ложе, на немже аще ляжет вся дни течения ея, по ложи скверны ея будет ей: и всяк сосуд, на немже аще сядет, нечист будет по нечистоте скверны ея: 27 и всяк прикасаясь ей нечист будет, да исперет ризы своя и омыет водою тело свое, и нечист будет до вечера. 28 Аще же очистится от течения своего, да сочтет себе семь дней, и по сих чиста будет: 29 и во осмый день да возмет себе два горличица или два птенца голубина, и принесет я к жерцу к дверем скинии свидения, 30 и да сотворит жрец, един греха ради и другой во всесожжение, и да помолится о ней жрец пред Господем о течении нечистоты ея. 31 И благоговейны сотворите сыны Израилевы от нечистот их: и да не умрут нечистоты ради своя, внегда осквернити им скинию Мою яже в них. 32 Сей закон изливающему семя, и аще кому изыдет из него ложе семенное, якоже осквернитися в нем, 33 и точащей кровь в скверне своей, и изливающему семя во излиании своем мужеску полу или женску, и мужу, иже аще поспит со сквернавою.

**16** И глагола Господь к Моисею, по умертвии двух сынов Аароних, егда принесоша огонь чуждий пред Господа и скончашася. **2** И рече Господь к Моисею: глаголи Аарону, брату твоему, да не входит по вся часы в святое внутрь завесы, пред лице очистилища, еже есть над кивотом свидения, и да не умрет: во облаце бо явлюся над очистилищем: **3** сице внидет Аарон в святое: с телцем от говяд греха ради, и со овном на всесожжение, **4** и в ризу льняну освящену да облечется, и надраги льняны да будут на теле его, и поясом льняным да опояшется, и клобук льнян да возложит, ризы святы суть: и да омыет водою все тело свое, и да облечется в ня: **5** и от сонма сынов Израилевых да возмет два козла от коз греха ради, и овна единого во всесожжение, **6** и да приведет Аарон телца, иже греха ради своего, и да помолится о себе и о доме своем, **7** и да возмет два козла, и поставит я пред Господем у дверей скинии свидения: **8** и да возложит Аарон на оба козла жребия: жребий един Господу и жребий другой отпущению. **9** И да приведет Аарон козла, на немже паде жребий Господу, и да принесет греха ради: **10** и козла, на немже паде жребий отпущения, да поставит его жива пред Господем, яко помолится над ним и яко отпустить его во отпущение, и да отпустит его в пустыню: и возмет козел на ся беззакония их в землю непроходиму. **11** И да приведет Аарон телца, иже греха ради своего, и да помолится о себе и о доме своем: и да заколет телца, иже греха ради своего. **12** И да возмет кадилник полн угля огненна от олтаря, иже пред Господем, и да наполнит руце фимиама сложения чиста, и да принесет внутрь завесы: **13** и да возложит фимиам на

огнь пред Господем, и покрывает дым фимиамный очистилище еже на свидениях, и не умрет. 14 И да возмет от крове телца, и да воскропит перстом на очистилище на востоки: пред лицем очистилище да воскропит седмижды от крове перстом своим. 15 И да заколет козла иже греха ради, иже за люди, пред Господем: и да внесет от крове его внутрь завесы, и да сотворит крови его, якоже сотвори крови телчи, и да воскропит кровию его на очистилище прямо очистилищу, 16 и очистит святое от нечистот сынов Израилевых и от неправд их, о всех гресех их: и тако сотворит скинии свидения сотворенней в них посреде нечистоты их. 17 И всяк человек да не будет в скинии свидения, егда входит молитися во святое, дондеже изыдет: и да помолится о себе и о доме своем и о всем сонме сынов Израилевых. 18 И изыдет ко олтарю, иже есть пред Господем, и помолится на нем, и да возмет от крове телца и от крове козла, и возложит на роги олтаря окрест: 19 и да воскропит перстом своим нань седмижды от крове, и очистит его и освятит его от нечистот сынов Израилевых. 20 И совершит очищая святое и скинию свидения и олтарь, и от жерцех очистит, и приведет козла живаго: 21 и да возложит Аарон обе руке свои на главу козла живаго, и да исповест на нем вся беззакония сынов Израилевых и вся неправды их и вся грехи их: и возложит я на главу козла живаго, и отпустит рукою человека уготованнаго в пустыню: 22 и возмет козел на ся неправды их в землю непроходиму: и да отпустит козла в пустыню. 23 И да внидет Аарон в скинию свидения, и да совлечет ризы льняны, в наже оболчен баше, входящу ему во святое, и положит я тамо: 24 и омыет тело свое водою на месте

святе и да облечется в ризы своя, и изшед да сотворит всесожжение свое и всеплодие людское, и да помолится о себе и о доме своем, и о людех якоже и о жерцех: 25 и тук иже грехов ради да вознесет на олтарь. 26 И отпустивый козла отпущенаго во отпущение да исперет ризы своя и да омыет плоть свою водою, и по сих да внидет в полк. 27 И телца иже греха ради, и козла иже греха ради, иже кровь внесеса на очищение во святое, да изнесут я вне полка и да сожгут я на огни, и кожи их и мяса их и мотыла их: 28 сожигаяй же я да исперет ризы своя и да омыет тело свое водою, и по сем да внидет в полк. 29 И будет сие вам законное вечное: в месяц седмый, в десятый день месяца, покорите души ваша, и всякаго дела да не сотворите, ни туземец, ни пришлец прилежай в вас: 30 в той бо день помолится о вас, еже очистити вас от всех грехов ваших пред Господем, и чисти будете: 31 суббота суббот покой да будет сия вам, и покорите души ваша, законно вечно. 32 Помолится жрец, егоже аще помажут и егоже аще совершат руце его, еже жрети ему по отце своем, и да облечется в ризу льняну свою, ризу святу, 33 и да очистит Святое святого и скинию свидения, и олтарь да очистит, и о жерцех и о всем сонме да помолится. 34 И будет сие вам законное вечное, еже молитися о сынех Израилевых о всех гресех их, единою в лето да сотворится, якоже заповеда Господь Моисею.

**17** И рече Господь к Моисею, глаголя: 2 глаголи Аарону и сыном его и ко всем сыном Израилевым, и речеши к ним: сие слово еже заповеда Господь, глаголя: 3 человек человек от сынов Израилевых или от пришелец, иже прилежат в вас, иже аще заколет телца или овцу или козу в полце, и иже

аще заколет вне полка 4 и пред двери скинии свидения не принесет, якоже сотворити е во всесожжение или спасение Господу приятно, в воню благовония: и иже аще заколет вне и пред двери скинии свидения не принесет его, яко принести дар Господу пред скинию Господню: и вменится человеку тому кровь: кровь пролиял, да потребится душа она от людей своих: 5 яко да принесут сынове Израилевы жертвы своя, елики аще сии заколют на поли, и да принесут я ко Господу к дверем скинии свидения к жерцу, и пожрут я в жертву спасения Господу. 6 И да возлиет жрец кровь на олтарь окрест пред Господем у дверей скинии свидения: и да вознесет тук в воню благоухания Господу: 7 и да не пожрут ктому жертв своих суетным, имже сами блудодействуют вслед их: законное вечное будет вам в роды ваша. 8 И речеши к ним: человек человек от сынов Израилевых или от сынов пришелцов прилежащих в вас, иже аще сотворит всесожжение или жертву, 9 и к дверем скинии свидения не принесет сотворити е Господви, потребится душа та от людей своих. 10 И человек человек от сынов Израилевых или от пришелец прилежащих в вас, иже аще яст всякую кровь, и утвержу лице Мое на душу ядущую кровь, и погублю ю от людей своих: 11 зане душа всякия плоти кровь его есть, и Аз дах ю вам у олтаря умоляти от душах ваших: кровь бо его вместо души умолит. 12 Сего ради рекох сыном Израилевым: всяка душа от вас да не снес крове, и пришлец прилежащий в вас да не снес крове. 13 И человек человек от сынов Израилевых или от пришлец прилежащих в вас, иже аще уловит ловитву зверя или птицу, еже ястся: пролиет кровь ея, и покрывает ю землю: 14 душа бо всякия плоти кровь



его есть. И рекох сыном Израилевым: крове всякия плоти да не снете, яко душа всякия плоти кровь его есть: всяк ядый ю потребится: **15** и всяка душа яже яст мертвечину или звероядину, от туземец или от пришелец, да исперет ризы своя и да оmyет тело водою, и нечист будет до вечера, по сем же чист будет: **16** аше же не исперет риз своих, ни оmyет тела водою, то примет беззаконие свое.

**18** И рече Господь к Моисею, глаголя: **2** глаголи сыном Израилевым и речеши к ним: Аз Господь Бог ваш: **3** по делом земли Египетския, в нейже обитасте, да не сотворите, и по начинанием земли Ханаанския, в нюже Аз веду вы тамо, не сотворите, и по законом их не ходите: **4** судьбы Моя сотворите, и повеления Моя сохраните и ходите в них: Аз Господь Бог ваш: **5** и сохраните вся повеления Моя и вся судьбы Моя, и сотворите я: Сотворивый та человек жив будет в них: Аз Господь Бог ваш. **6** Человек человек ко всякому ближнему плоти своя да не приступит открыти срамоты: Аз Господь. **7** Срамоты отца твоего и срамоты матере твоя да не открыеши: мати бо твоя есть, да не открыеши срамоты ея. **8** Срамоты жены отца твоего да не открыеши: срамота отца твоего есть. **9** Срамоты сестры твоя яже от отца твоего или от матере твоя, в дому рожденная или вне рожденная, да не открыеши срамоты их. **10** Срамоты дщере сына твоего или дщере дщере твоя, да не открыеши срамоты их, яко твоя срамота есть. **11** Срамоты дщере жены отца твоего да не открыеши, единоотча сестра ти есть, да не открыеши срамоты ея. **12** Срамоты сестры отца твоего да не открыеши, своя бо отцу твоему есть. **13** Срамоты сестры матере твоя да не открыеши, своя бо матери твоей

есть. 14 Срамоты брата отца твоего да не открыеши и к жене его да не внидеси, сродник бо ти есть. 15 Срамоты невестки твоя да не открыеши, жена бо сына твоего есть, да не открыеши срамоты ея. 16 Срамоты жены брата твоего да не открыеши, срамота брата твоего есть. 17 Срамоты жены и дщере ея, да не открыеши, дщере сына ея, и дщери дщере ея да не поймеша открыти срамоты их, ближнии бо ти суть, нечестие есть. 18 Сестру жены твоя да не поймеша в наложницу, открыти срамоту ея пред нею, еще живе сущей ей. 19 И к жене во отлучении нечистоты ея да не внидеси открыти срамоты ея. 20 И к жене ближняго твоего да не даси ложа семене твоего, осквернитися с нею. 21 И от семене твоего да не даси служити Молоху, да не оскверниши имене Святаго: 22 и с мужеским полом да не ляжеша женским ложем, мерзость бо есть. 23 И всякому четвероногому да не даси ложа своего в семенение, осквернитися с ним: и жена да не станет ко всякому четвероногому снитися, гнусно бо есть. 24 Не оскверняйтесь во всех сих: во всех бо сих осквернишася языцы, ихже Аз отжену пред лицом вашим: 25 и оскверниша земля, и воздах неправду им ея ради: и возненавиде земля сидящих на ней. 26 И сохраните вся законы Моя и вся повеления Моя, и не сотворите от всех гнусностей сих, туземец и прибывший пришлец в вас: 27 вся бо сия гнусности сотвориша человецы земнии, бывшии прежде вас, и оскверниша земля. 28 И да не вознегодует на вас земля, внегода осквернити вам ю, имже образом вознегодова на языки иже прежде вас: 29 яко всяк, иже аще сотворит от всех гнусностей сих, потребятся души творящия сие от людей своих. 30 И сохраните повеления Моя, яко да

не сотворите от всех закон гнусных, иже беша прежде вас: и да не осквернитея в них, яко Аз Господь Бог ваш.

**19** И рече Господь к Моисею, глаголя: 2 глаголи всему сонму сынов Израилевых, и речеши к ним: святы будите, якоже Аз свят (есмы) Господь Бог ваш. 3 Вийждо отца своего и матере своя да боится, и субботы Моя сохраните: Аз Господь Бог ваш. 4 Не последуйте идолом, и богов слияных не сотворите себе: Аз Господь Бог ваш. 5 И аще пожрете жертву спасения Господу, приятну вам пожрите: 6 в оньже день аще пожрете, (в той день) да снесся, и на утрие: и аще останется до третияго дне, на огни да сожжется: 7 аще же ли ядением сястся в день третий, не жертвенно есть, не приемется: 8 и иже яст е, грех приемет, яко святая Господня оскверни: и потребятся души ядущыя от людей своих. 9 И пожинающим вам жатву земли ваша, да не скончае жатвы ваша, нивы твоя пожинания: и падающих клас от жатвы твоя да не собереши: 10 и винограда твоего вторицею да не обереш, ниже грезн винограда твоего да собереши: нищему и пришелцу да оставиши я: Аз есмь Господь Бог ваш. 11 Не украдите, ни солжите, ниже да оклеветает кийждо ближняго. 12 И не кленитея именем Моим в неправде, и да не оскверните имене святого Бога вашего: Аз Господь Бог ваш. 13 Да не обидиши ближняго: и да не отимеши, и да не прележит мзда наемника твоего у тебе до утрия. 14 Зла да не речеши глухому, и пред слепым да не положиши претыкания: и да убоишия Господа Бога твоего: Аз Господь Бог ваш. 15 Не сотворите неправды в суде: да не примеши лица нищаго, ниже почудишия лицу могущаго: по правде да судиши ближнему твоему. 16 Да не ходиши лестию во

своим языком, и не встанешь на кровь ближнего твоего: Аз Господь Бог ваш. 17 Да не возненавидиши брата твоего во уме твоём, обличением да обличиши ближнего твоего: и не примешь ради его греха. 18 И да не отмщает рука твоя, и да не враждуешь на сынов людей своих, и возлюбиши ближнего своего яко сам себе: Аз Господь Бог ваш. 19 Закон Мой сохраните: и скота твоего да не смесиши со скотом иного рода, и винограда твоего да не насадиши различна: и ризы из двух (вещей) сотканные гнусные да не возложиши на ся. 20 И аще кто будет с женою ложем семени, и сия быше раба хранима мужу, и ценою не искуплена или свобода не дана ей, наказаны да будут: не умрут, яко не свободися: 21 и да приведет за преступление свое Господу к дверем скинии свидения овна преступления, 22 и да помолится о нем жрец овном преступления пред Господом о гресе имже согреши, и оставится ему грех, егоже сотвори. 23 Егда же внидете в землю, юже Господь Бог ваш дает вам, и насадите всяко древо съедное, и очистите нечистоту его, плод его три лета нечист да будет вам, да не съестся: 24 в лето же четвертое будет всяк плод его свят, похвален Господу: 25 в лето же пятое да съесте плод его, прибыток вам плоды его: Аз Господь Бог ваш. 26 Не ядите на горах, и не вражите, и ни сряща смотрите от птиц. 27 Не сотворите обстрижения кругом от влас глав ваших, ниже бриете брад ваших. 28 И кроения не сотворите на теле вашем о души: и язв настреканных да не сотворите в вас: Аз Господь Бог ваш. 29 Да не оскверниши дщере твоя еже блудити ей: и да не прелюбы деет земля, и наполнится земля беззаконий. 30 Субботы Моя сохраните, и от святых Моих убойтесь: Аз

Господь. 31 Не последуйте утробным баснем, и к волхвом не прилепитесь, осквернитесь в них: Аз Господь Бог ваш. 32 Пред лицом седаго востани и почти лице старчо, и да убоишися Господа Бога твоего: Аз Господь Бог ваш. 33 Аще же кто приидет к вам пришлец в землю вашу, не стужите ему: 34 якоже туземец будет в вас пришлец, иже приидет к вам, и возлюбиши его яко сам себе: яко (и вы) пришелцы бесте в земли Египетстей: Аз Господь Бог ваш. 35 Не сотворите неправды в суде, в мерах и в весах и в мерилех: 36 мерила праведна и весы праведны и мера праведна да будет в вас: Аз есмь Господь Бог ваш, изведый вас от земли Египетския. 37 И сохраните весь закон Мой и вся повеления Моя, и сотворите я: Аз Господь Бог ваш.

**20** И рече Господь к Моисею, глаголя: 2 рцы сыном Израилевым, глаголя: аще кто от сынов Израилевых, или от прибывших пришелцев во Израили, иже аще даст от семене своего Молоху, смертию да умрет: людие земли да побьют его камением: 3 и Аз утвержу лице Мое на человека того и погублю его от людей его, яко от семене своего даде Молоху, да осквернит святыню Мою и осквернит имя освященных Мне. 4 Аще же презрением презрят туземцы земли очима своима от человека того, внегда дати ему от семене своего Молоху, еже не убити его: 5 и утвержу лице Мое на человека того и на сродники его, и погублю его и всех единомыслящих с ним, еже соблуждати ему со идолы от людей своих. 6 И душа яже аще последует утробным баснем или волхвом, яко соблудити вслед их, утвержу лице Мое на душу ту и погублю ю от людей ея. 7 И будете святы, яко Аз свят Господь Бог ваш. 8 И сохраните повеления

Моя и сотворите я: Аз Господь освящаяй вас. 9 Человек человек, иже аще зло речет отцу своему или матери своей, смертию да умрет: отцу своему или матери своей зле рече, повинен будет. 10 Человек человек, иже аще прелюбы содеет с мужнею женою, или кто прелюбы содеет с женою ближняго своего, смертию да умрут прелюбодей и прелюбодейца. 11 И иже аще пребудет с женою отца своего, срамоту отца своего открыл есть, смертию да умрут оба, повинни суть. 12 И аще кто будет с невесткою своею, смертию да умрут оба, нечествоваша бо, повинни суть. 13 И аще кто будет с мужским полом ложем женским, гнусность сотвориша оба, смертию да умрут, повинни суть: 14 иже аще поймет жену и мать ея, беззаконие есть, огнем да сожгут его и оныя, и не будет беззаконие в вас. 15 И иже аще даст ложе свое четвероножному, смертию да умрет, четвероножное же убиете. 16 И жена яже аще приступит ко всякому скоту, еже быти с ним, да убиете жену и скот, смертию да умрут, повинни суть. 17 Иже аще поймет сестру свою от отца своего или от матери своей, и увидит срамоту ея, и она увидит срамоту его, укоризна есть, да потребятся пред сыны рода их: срамоту сестры своя откры, грех примут. 18 И муж иже будет с женою скверною и открыет срамоту ея, течение ея откры, и она откры течение крове своя, да потребятся оба от рода их. 19 И срамоту сестры отца твоего и сестры матери твоея да не откроеши: ужичество бо откры, грех понесут. 20 Иже аще будет со сродницею своею, срамоту сродства своего откры, безчадни измрут. 21 И человек иже аще поймет жену брата своего, нечистота есть: срамоту брата своего открыл есть, безчадни измрут. 22 И сохраните вся повеления

Моя и вся судьбы Моя и сотворите я, и не вознегодует на вас земля, в нюже Аз введу вы тамо вселитися на ней. 23 И не ходите в законы языческа, ихже Аз изгоню от вас: яко сия вся сотвориша, и возгнушахся ими. 24 И рех к вам: вы наследите землю их, и Аз дам вам ю в притяжание, землю текущую медом и млеко, Аз Господь Бог ваш, отлучивый вас от всех язык. 25 И отлучите себе между скоты чистыми и между скоты нечистыми, и между птицами чистыми и нечистыми: и не оскверните душ ваших в скотех и в птицах и во всех гадах земных, яже Аз отлучих вам в нечистоте, 26 и будете Ми святы, яко Аз свят есмь Господь Бог ваш, отлучивый вас от всех язык быти Моими. 27 И муж или жена иже аще будет от них чревобасник или волшебник, смертию да умрут оба: камением да побиете их, повинни суть.

**21** И рече Господь к Моисею, глаголя: рцы жерцем сыном Аароним, и речеши им: над душами да не осквернятся в языке своем, 2 но разве в дому ближняго своего, над отцем и матерью, и сынами и дщерьми, над братом 3 и над сестрою своею девою, яже есть ближняя ему, не дана мужу, над сими да осквернятся: 4 да не осквернится внезапно в людех своих, во осквернение свое. 5 И да не обриете главы по мертвем, и обличия брады да не обриют, и на плотех своих да не сотворят язв: 6 святы да будут Богу своему и не осквернят имене Бога своего: жертвы бо Господни дары Бога своего сами приносят, и будут святы. 7 Жены блудницы и осквернены да не поймут, и жены изгнаныя от мужа ея да не поймут: яко святы суть Господу Богу своему: 8 и да освятиши его: дары Господа Бога вашего сей приносит, свят будет: яко свят Аз есмь Господь Бог ваш освящая их. 9 И

дщерь человека жерца аще осквернится, еже соблудити, имя отца своего сия оскверняет: огнем да сожжется. **10** И жрец великий от братий своих, емуже возлиян на главу елей помазания, и совершенный, еже облачитися в ризы, главы да не откроет, и риз своих да не раздерет, **11** и ко всякой души умершей да не приидет: над отцем своим и над материю своею да не осквернится, **12** и от святых да не изыдет, и да не осквернит имене святаго Бога своего, яко святой елей помазания Бога его на нем: Аз Господь. **13** Сей в жену деву от рода своего да поймет: **14** вдовицы же и изгнаныя, и оскверненыя и блудницы, сих да не поймет: но девицу от племени своего да поймет в жену: **15** и да не осквернит семене своего в людех своих: Аз Господь Бог освящай его. **16** И рече Господь к Моисею, глаголя: **17** рцы ко Аарону, глаголя: человек от рода твоего в родех ваших, аще коему будет на нем порок, да не приступит приносить дары Бога своего: **18** всяк человек, емуже аще будет на нем порок, да не приступит: человек слеп, или хром, или корносый, или ухорезан, **19** или человек, емуже есть сокрушение руки или сокрушение ноги, **20** или горбат, или гноеточив очима, или бельмоочен, или человек, на немже суть красты дивия, или лишаи, или единойтрный: **21** всяк, емуже аще будет на нем порок от семени Аарона жерца, да не приступит принести жертв Богу твоему, зане порок на нем: даров Божиих да не приступит приносить: **22** дары Бога своего святая святых, и от святых да снесет: **23** обаче к завесе да не приступит, и ко олтарю да не приблизится, яко порок имать: и да не осквернит святилища Бога своего, яко Аз Господь освящай



их. 24 И глагола Моисей ко Аарону и сыном его, и ко всем сыном Израилевым.

**22** И рече Господь к Моисеовы, глаголя: 2 рцы Аарону и сыном его, да внимают от святынь сынов Израилевых, и да не осквернят имене святого Моего, елика они освящают Ми: Аз Господь. 3 Рцы им: в роды ваша всяк человек, иже аще приступит от всякаго семене вашего ко святым, елика аще освятят сынове Израилевы Господу, и нечистота его на нем будет, потребится душа оная от Мене: Аз Господь Бог ваш. 4 И человек от семене Аарона жерца, и сей прокажен, или семя изливает, от святых да не снесет, дондеже очистится: и прикасайся всякой нечистоте души, или человек, емуже аще изыдет от его ложа семя, 5 или иже аще прикоснется всякому гаду нечисту, иже осквернит его, или человеку, иже осквернит его, по всякой нечистоте его: 6 душа, яже аще прикоснется их, нечиста будет до вечера: да не снесет от святых, аще не омыет тела своего водою, 7 и зайдет солнце, и чист будет: и тогда да снесет от святых, яко хлеб его есть. 8 Мертвечины и звероядины да не снесет, еже осквернитися ему в них: Аз Господь. 9 И да сохраняют повеления Моя, да не примут сих ради греха, и измрут за них, аще осквернят их: Аз Господь Бог освящай их. 10 И всяк иноплеменник да не снесет святынь: приселник иереев или наемник да не снесет святынь. 11 Аще же жрец пристяжет душу пристяжаную серебром, сия да снесет хлебы его: и домочадцы его, и сии да снесут хлебы его. 12 И дочь человека жерца, аще посягнет за мужа иноплеменника, сия от начатков святых да не снесет. 13 И дочь жерца аще будет вдова или отпущена, плода же не будет ей, возвратится в дом отца своего, по юности

своей, от хлебов отца своего да снесет: всяк же иноплеменник да не снесет от них. 14 И человек, иже аще яст святая по неведению, и да приложит пятую свою часть ко истому, и да даст сие жерцу святое. 15 И да не осквернят святынь сынов Израилевых, иже они отделяют Господу: 16 и да не наведут на себе беззаконие преступления, внегда ясти им святыню их, яко Аз Господь освящаяй их. 17 И рече Господь к Моисею, глаголя: 18 глаголи Аарону и сыном его и всему сонму Израилеву и речеши к ним: человек человек от сынов Израилевых, или от пришлец прилежащих к ним во Израили, иже аще принесет дары своя по всякому исповеданию своему, или по всякому изволению своему, елика аще принесут Господу на всесожжение, 19 приятны вам непорочны мужеск пол от стад волов, или от овен и от коз: 20 всех, елика аще имут порок на себе, да не принесут Господу, понеже неприятно будет вам. 21 И человек иже аще принесет жертву спасения Господу, отлучив обет или по изволению, или в праздники ваша, от стад волов или от овец, непорочно да будет в приятие, всяк порок да не будет на нем: 22 слепо, или сокрушено, или язык урезан имущо, или червиво, или крастово, или лишаво, да не принесут тех Господу, и в жертву не дадите от них на олтарь Господви: 23 и телца или овцу ухорезну, или безхвостну, в заколение сотвориши я себе (по изволению), в обет же твой да не примется: 24 емуже суть ятра сокрушена, и емуже раздавлена, и изрезана, и исторжена, да не принесете сих Господу, и в земли вашей да не сотворите. 25 И от руки иноплеменника да не принесете даров Богу вашему от всех сих, яко вреждения суть на них, порок на них, не примутся

сия от вас. 26 И рече Господь к Моисею, глаголя: 27 телец, или овца, или козля, егда родится, да будет седмь дний под материю свою, в день же осмый и далее принесется в дар, принос Господу: 28 и телца и овчате вкупе с материю да не заколете в един день, 29 аше же пожреши жертву обет радования Господви, приятно вам пожрите е: 30 сия в тойже день да снесся, да не оставите от мяс на утрие: Аз есмь Господь. 31 И сохраните заповеди Моя и сотворите я: Аз Господь: 32 и не оскверните имене Святаго, и освящуся посреде сынов Израилевых: Аз Господь освящай вас, 33 изведый вы из земли Египетския, яко быти вам в Бога: Аз Господь.

**23** И рече Господь к Моисею, глаголя: 2 глаголи сыном Израилевым и речеши к ним: праздницы Господни, яже наречете нарочитыя святыя, сии суть праздницы Мои: 3 в шесть дний да сотвориши дела, и в день седмый суббота, покой нареченный свят Господви, всякаго дела да не сотворите: суббота есть Господви во всем обитании вашем. 4 Сии праздницы Господу наречены святы, яже наречете сия во времена их: 5 в первом месяце в четвертыйнадесять день месяца, между вечерними, Пасха Господу: 6 и в пятыйнадесять день месяца перваго праздник опресноков Господу: седмь дний опресноки да ясте. 7 И день первый наречен свят будет вам: всякаго дела работня не сотворите: 8 и да принесете всесожжения Господу седмь дний, и день седмый наречен свят будет вам: всякаго дела работня не сотворите. 9 И рече Господь к Моисею, глаголя: 10 глаголи сыном Израилевым и речеши к ним: егда внидете в землю, юже Аз даю вам, и пожнете жатву ея, и принесете снопы

начаток жатвы вашей к жерцу, **11** и вознесет сноп пред Господа приятен вам: на утро первого дне субботы да вознесет его жрец. **12** И сотворите в день, в оньже аще принесете сноп, овча непорочно единолетно во всеожжение Господу: **13** и жертву его две десятины муки пшеничны сопряжены в елеи: жертва Господу, в воню благовония Господу: и возлияние его вина четвертую часть ина. **14** И хлеба, и пряженных класов новых да не снесите, даже до того дне самага, дондеже принесете вы дары Богу вашему: законно вечно в роды ваша во всем населении вашем. **15** И сочтите себе от наутрия суббот, от дне, в оньже аще принесете снопы возложения, семь седмиц целых **16** даже до наутрия последния седмицы да сочтете пятьдесят дний, и да принесете жертву нову Господу. **17** От вселения вашего да принесете хлеба возложения, два хлеба: от двух десятин муки пшеничны да будут, квашены да испекутся от первых плодов Господу: **18** и да принесете со хлебами семь агнцев непорочных единолетних, и телца единого от стад, и овна два непорочна: и будут во всеожжение Господу, и жертвы их, и возлияния их, жертва воня благовония Господу. **19** И сотворите козла от коз единого о гресе, и два агнца единолетна в жертву спасения с хлебами первых жит. **20** И да возложит я жрец с хлебами первых жит, возложение пред Господем со обема агнцы: свята будут Господу, жерцу иже приносит я, тому да будут. **21** И прозовете сей день, нарочит свят будет вам: всякаго дела работня не сотворите в онь: законно вечно в роды ваша во всем населении вашем. **22** И егда жнете жатву земли вашей, не потребите останка жатвы нивы своей, егда жнете, и от падающих от жатвы

вашея да не собереши: нищему и пришелцу оставиши я: Аз  
Господь Бог ваш. 23 И рече Господь к Моисею, глаголя: 24  
рцы сыном Израилевым, глаголя: месяца седмаго, в первый  
день месяца, да будет вам покой, память труб: наречен  
свят будет вам: 25 всякого дела работня не сотворите,  
и принесете всесожжение Господу. 26 И рече Господь к  
Моисею, глаголя: 27 и в десятый день седмаго месяца сего  
день очищения, наречен свят да будет вам: и смирите души  
ваша, и принесите всесожжение Господу: 28 всякого дела  
не сотворите в самый день сей: есть бо день очищения  
сей вам, їмолити о вас пред Господем Богом вашим: 29  
всяка бо душа, яже не покорится в день той, потребится от  
людий своих: 30 и всяка душа, яже сотворит дело в самый  
день сей, погибнет душа та от людий своих: 31 всякого  
дела не сотворите, законно вечно в роды ваша, во всех  
селениих ваших. 32 Субботы суббот будут вам: и смирите  
души ваша, от девятого дне месяца от вечера, даже до  
десятаго дне месяца, до вечера, субботствуйте субботы  
ваша. 33 И рече Господь к Моисею, глаголя: 34 рцы сыном  
Израилевым, глаголя: в пятыйнадесять день месяца седмаго  
сего, праздник кущей семь дний Господу: 35 и день первый  
наречен свят будет: всякого дела работня не сотворите:  
36 семь дний да принесете всесожжения Господу: и день  
осмый наречен свят будет вам, и принесете всесожжения  
Господу: исходное есть, всякого дела работня не сотворите.  
37 Сии праздницы Господни, яже наречете нарочиты святы,  
еже приносить приносы Господу: всесожжения и жертвы их,  
и возлияния их от дне до дне, 38 кроме суббот Господних  
и кроме даров ваших, и кроме всех обетов ваших и кроме

благовольных ваших, яже аще дадите Господу. 39 И в пятыйнадесять день месяца седмаго сего, егда скончаετε жита земли, празднуйте Господу семь дний: в день первый покой, и в день осмый покой: 40 и да возмете себе в день первый плод древа красен, и ветвь финическую, и ветви древа частыя, и вербы, и агновы ветви от потока, и возвеселитесь пред Господем Богом вашим семь дний в лето: 41 законно вечно в роды ваша, в месяц седмый празднуйте его: 42 в куцах да пребудете семь дний: всяк туземец во Израили да пребудет в куцах: 43 яко да уведят роды ваша, яко в куцах вселих сыны Израилевы, внегда извести мне их из земли Египетския: Аз Господь Бог ваш. 44 И поведи Моисей праздники Господни сыном Израилевым.

**24** И рече Господь к Моисею, глаголя: 2 заповеждь сыном Израилевым, да возмут ти елей от масличия чист исцежен в светение, да горит светило всегда, 3 вне завесы в скинии свидения, и возжигати будут его Аарон и сынове его от вечера до заутра пред Господем непрестанно, законно вечно в роды ваша: 4 на светилнице чистем возжигати будете светила пред Господем даже до утра. 5 И возмете муки пшеничны, и сотворите от нея дванадесять хлебов: дву десятин да будет хлеб един: 6 и возложите их на два положения, по шести хлебов едино положение на трапезе чисте пред Господем: 7 и возложите на едино положение ливан чист и соль, и да будут хлебы в память предлежащия пред Господем: 8 в день субботы да предлагаются пред Господем всегда от сынов Израилевых, завет вечный: 9 и да будут Аарону и сыном его, и да снут я на месте святе, суть бо святая святых: сие им от жертв Господу в закон вечный. 10

И изыде сын жены Израилтяныни, и сей бе сын Египтянина в сынех Израилевых: и пряхуся в полце иже от Израилтяныни и муж Израилтянин: **11** и нарек сын жены Израилтяныни имя (Господне) прокля. И приведоша его к Моисею. Имя же матери его Саломиф, дщерь Давриина, от племени Данова. **12** И ввергоша его в темницу, разсудити о нем повелением Господним. **13** И рече Господь к Моисею, глаголя: **14** изведи клявшаго вне полка, и да возложат вси слышавшии руце свои на главу его, и да побьют его камением весь сонм: **15** и сыном Израилевым глаголи и речеши к ним: человек человек, иже аще прокленет Бога своего, грех приимет: **16** нарицай же имя Господне смертью да умрет: камением да побьют его весь сонм израильский: аще туземец, или пришлец, егда наречет имя Господне, да умрет: **17** и человек, иже аще поразит всяку душу человеку, и умрет, смертью да умрет: **18** и иже аще ударит скота, и умрет, да воздаст душу вместо души: **19** и аще кто сотворит порок ближнему, якоже сотвори ему, такожде и ему да сотворят: **20** изломление за изломление, око за око, зуб за зуб: якоже сотворил порок человеку, такожде да сотворят и ему: **21** иже аще ударит человека, и умрет смертью да умрет: **22** оправдание едино будет пришелцу и туземцу, яко Аз есмь Господь Бог ваш. **23** И глагола Моисей к сыном Израилевым, и изведоша клявшаго вне полка, и побиша его камением весь сонм: и сынове Израилевы сотвориша, якоже заповеда Господь Моисею.

**25** И рече Господь к Моисею на горе Синайстей, глаголя: **2** глаголи сыном Израилевым и речеши к ним: егда внидете в землю, юже Аз даю вам, и почиет земля, юже Аз даю вам, субботы Господу. **3** Шесть лет да сееши ниву твою,

и шесть лет да режеш виноград твой и собереш плод его: 4 в седмое же лето суббота, покой да будет земли, суббота Господня: нивы твоя сеяти и винограда твоего резати не будеш, 5 и сама собою произрастающая нивы твоя да не пожнеш, и винограда отлучения твоего да не собереш: лето покоя будет земли. 6 И будут субботы земли яди тебе, и рабу твоему и рабыни твоей, и наемнику твоему и обиталнику прилежащему к тебе, 7 и скотом твоим и зверем суцым на земли твоей да будет всяк плод его в снеть. 8 И исчислиши себе седьм лет покоя, седьм лет седмижды: и будут тебе седьм седмин лет, четыредсять девять лет. 9 И возвестите трубным гласом во всей земли вашей месяца седмаго в десятый день месяца: в день очищения возвестите трубою во всей земли вашей. 10 И освятите лето, пятьдесятое лето, и разгласите оставление на земли всем живущым на ней: лето оставления знамение сие будет вам: и да отидет кийждо вас в притяжание свое, и кийждо во отечество свое отидете. 11 Оставления знамение сие будет вам, лето пятьдесятое, лето будет вам: ни сеяти, ниже жати будете, еже само произникнет на ней, и да не объемлеш освященных (Богу) ея: 12 яко оставления знамение есть, свято да будет вам: от нив ядите плоды ея: 13 и в лето оставления знамения сего да возвратитс кийждо в притяжание свое. 14 Аще же оддаси куплею ближнему твоему, или аще притяжеш от ближняго твоего, да не оскорбляет человек ближняго: 15 по числу лет по знамении, да притяжеш от ближняго, по числу лет плодов да продастс тебе. 16 Якоже аще более лет, умножит притяжание его, и якоже аще менее лет, уменьшит притяжание его: яко число



плодов его, тако да продаст тебе. 17 Да не оскорбит человек ближняго, и да убоишия Господа Бога твоего: Аз Господь Бог ваш. 18 И сотворите вся оправдания Моя и вся суды Моя, сохраните же и сотворите я, и вселитесь на земли уповающе. 19 И даст земля плоды своя, и снесите в сытость, и вселитесь на ней уповающе. 20 Аще же речете: что ясти будем в седмое лето сие, аще не сеем, ни собираем плодов своих, 21 и послю благословение Мое вам в лето шестое, и сотворит плоды своя на три лета: 22 и посеете в лето осмое, и снесите от плодов ветхих даже до лета девятого: дондеже приспеют плоды ея, снесите ветхая ветхих. 23 И земля да не продастся во утверждение: Моя бо есть земля, яко пришелцы и приселницы вы есте предо Мною: 24 и по всей земли одержания вашего, искуп дадите земли. 25 Аще же нищетствует брат твой, иже с тобою, и продаст от одержания своего, да приидет ужик ближний ему и искупит продание брата своего. 26 Аще же не будет кому ужика, и возможет рука его обрести доволен искуп его, 27 и исчислит лета продания его, и воздаст еже излише имать, человеку емуже продано бе оное, и возвратится во одержание свое. 28 Аще же не обрящет рука его довольное, еже отдати ему, да будет проданое купившему е даже до шестаго лета оставления, и изыдет во оставление, и возвратится во одержание свое. 29 Аще же кто продаст дом обитаемый во граде огражденнем, и будет искупление его, дондеже исполнится: лето дний будет искупление его. 30 Аще же не искупит, дондеже скончается лето все, да укрепится дом сущий во граде имущем ограждение в твердость купившему его, в роды его, и не возвратится во оставление. 31 Дома же иже на

селех, имже несть окрест их ограждения, к селу земли да приложатся: искупемы всегда да будут, и во оставление да возвратятся. 32 И гради левитстии, дома градов одержания их, искупемы да будут всегда левитом. 33 И иже аще искупит от левит: и изыдет продание домов града одержания их во оставление, яко дома градов левитских одержание их, посреде сынов Израилевых. 34 И села отделеная градом их да не продадутся, яко одержание вечное сие их есть. 35 Аще же нищетствует брат твой, иже с тобою, и изнеможет руками у тебе, заступи его яко пришелца и приселника, да поживет брат твой с тобою: 36 да не возмеш от него лихвы, ниже более (даного), и убоишися Бога твоего: Аз Господь: и поживет брат твой с тобою. 37 Сребра твоего да не даси ему в лихву, и ради прибытка не даси ему пищей твоих. 38 Аз Господь Бог ваш, изведый вы из земли Египетския, еже дати вам землю Ханаанску, яко быти Мне Богу вашему. 39 Аще же оубождает брат твой у тебе, и продастся тебе, да не поработает тебе работы рабския: 40 аки наемник или пришлец да будет тебе, даже до лета оставления делати будет у тебе, 41 и да изыдет от тебе, и дети его с ним в лето оставления, и да отидет в род свой, и во одержание отчее свое возвратится, 42 понеже раби Мои суть сии, ихже изведох из земли Египетския, да не продастся проданием рабиим: 43 да не отяготиши его трудом, и убоишися Господа Бога твоего. 44 И раб и рабыня, иже ще будут у тебе от язык, иже окрест тебе суть, от тех да притяжете раба и рабыню. 45 И от сынов приселничих, иже суть в вас, от сих притяжете, и от сродников их, елицы аще будут в земли вашей, да будут вам во одержание, 46 и да разделите я детем вашим по

вас, и да будут вам во одержание во век: братии же вашей, сынов Израилевых, кийждо брата своего да не отяготит его в трудех. 47 Аще же обрящет рука пришелца или приселника иже у тебе, и обнищав брат твой продастся к пришелцу или приселнику иже у тебе, или родившемуся от рода пришелча, 48 по продании ему, искуп да будет ему, един от братий его да искупит его: 49 брат отца его, или сын брата отца его, да искупит его, или от свойственных плоти племени его искупит его: аще же возможет рука его, искупит себе, 50 да сочтется с притяжавшим его, от лета в неже продася ему даже до лета оставления, и будет серебро продания его аки день наемника: от лета до лета да будет с ним. 51 Аще же кому множае лет будет, против тех отдаст искуп свой, от серебра продания своего. 52 Аще же мало останется от лет до лета оставления, и да сочтет ему по летом его, и отдаст искуп его аки наемник: 53 от года до года да будет с ним: да не отяготиши его трудом пред тобою. 54 Аще же не искупится по сим, да изыдет в лето оставления сам и дети его с ним: 55 яко Мои сынове Израилевы раби суть, отроцы Мои сии суть, ихже изведох из земли Египетския: Аз Господь Бог ваш.

**26** Не сотворите себе (образов) рукотворенных, ниже изваяных, ниже столпа поставите себе, ниже камене поставите в земли вашей во знамение, ко еже поклонятися ему: Аз есмь Господь Бог ваш. 2 Субботы Моя сохраните, и от святых Моих убойтесь: Аз есмь Господь. 3 Аще в повелениях Моих ходите, и заповеди Моя сохранитеи сотворите я: 4 и дам дождь вам во время свое, и земля даст плоды своя, и древеса селная отдадут плод свой: 5 и постигнет вам млечение (жит) обрание вина, и обрание вина

постигнет сеятву, и снесите хлеб ваш в сытость, и вселитесь с твердостью на земли вашей, и рать не пройдет сквозе землю вашу: 6 и дам мир в земли вашей, и уснете, и не будет устрашаяй вас: и погублю звери лютыя от земли ваша: 7 и рать сквозе землю вашу не пройдет, и поженете враги ваша, и падут пред вами убиением: 8 и поженут от вас пять сто, и сто вас поженет тмы, и падут врази ваши пред вами мечем: 9 и призрю на вас и благословлю вас, и возращу вас и умножу вас, и поставлю завет Мой с вами: 10 и снесите ветхая и ветхая ветхих, и ветхая от лица новых изнесете: 11 и поставлю завет Мой в вас, и не возгнушается душа Моя вами: 12 и пожду в вас, и буду вам Бог, и вы будете Ми людие: 13 Аз есмь Господь Бог ваш, изведый вас из земли Египетския, сущым вам рабом: и сокруших узы ярма вашего, и изведох вас со дерзновением. 14 Аше же не послушаете Мене, ниже сотворите повелений Моих сих, 15 но ни покоритесь им, и о судьбах Моих вознегодует душа ваша, яко не творити вам всех заповедий Моих, яко разорити завет Мой, 16 и Аз сотворю сице вам, и наведу на вас скудость и красту, и желтяницу вреждающую очи ваша и души ваша истаевающую: и посеете вотще семена ваша, и поядят я супостаты ваша: 17 и утвержу лице Мое на вас, и падете пред враги вашими, и поженут вы ненавидящии вас, и побегнете ни комуже гонящу вас. 18 И аще до сего не послушаете Мене, и приложу наказати вы язвами седмижды за грехи ваша: 19 и сокрушу досаждение гордыни ваша, и положу небо вам аки железно, и землю вашу аки медяну: 20 и будет вотще крепость ваша, и не даст земля ваша семене своего, и древа села вашего не дадут плода своего. 21 И аще

по сих пойдете страну и не восхощете послушати Мене, приложу вам язв седмь по грехом вашим, 22 и послю на вы звери лютыя земныя, и изядят вы и потребят скоты ваша, и умалены сотворю вы, и пусты будут путие ваши. 23 И аще сими не накажетесь, но пойдете ко Мне страну, 24 пойду и Аз с вами в ярости страну, и поражу вы и аз седмижды грех ради ваших, 25 и наведу на вы мечь мстяй мечь завета, и вбегнете в грады ваша: и послю на вы смерть, и предани будете в руце враг ваших: 26 вегда скорбети вам скудистию хлебов, и испекут десять жен хлебы ваша в печи единой, и отдадят хлебы ваша весом, и ясти будете, и не насытитесь. 27 Аще же в сих не послушаете Мене и пойдете ко Мне страну, 28 и Аз пойду с вами в ярости страну, и накажу вы аз седмижды по грехом вашим: 29 и ясти будете плоти сынов ваших, и плоти дщерей ваших ясти имате, 30 и сотворю пустая капища ваша и потреблю деревяная рукотворения ваша, и положу трупы ваша на трупех кумир ваших, и возненавидит вас душа Моя: 31 и сотворю грады ваша пусты, и опустошу святая ваша, и не обоняю вони жертв ваших: 32 и сотворю пугу аз землю вашу, и удивятся о ней врази ваши, живуции на ней: 33 и разсыплю вы в языки, и потребит вы находяй мечь, и будет земля ваша пуга, и грады ваши будут пусты. 34 Тогда возблаговолит земля субботы своя, во вся дни запустения своего, и вы будете в земли враг ваших: тогда воспразднует земля и возблаговолит субботы своя: 35 во вся дни опустения своего воспразднует, яже не празднова в субботах ваших, егда живясте на ней. 36 И оставльшымся от вас вложу страх в сердца их в земли враг их, и поженет их глас листа летяща,

и побегнут яко бежащи от рати, и падут ни кимже гоними. 37 И презрит брат брата аки на рати, ни кому нападающе, и не возможете противустати врагом вашим: 38 и погибнете в языцех, и потребит вас земля враг ваших. 39 И оставльшиися от вас истлеют за грехи своя и за грехи отец своих, в земли враг своих истают, 40 и исповедят грехи своя и грехи отец своих, яко преступиша и презреша Мя, и яко ходиша предо Мною страну: 41 и Аз пойду с ними в ярости страну и погублю их в земли врагов их: тогда усрамится сердце их необрезаное и тогда познают грехи своя: 42 и помяну завет Иаковль и завет Исааков, и завет Авраамль помяну, 43 и землю помяну, и земля останется от них. Тогда примет земля субботы своя, внегда опустети ей их ради: и они примут своя беззакония, ихже ради презреша судьбы Моя, и о повелениих Моих вознегодова душа их: 44 обаче сущым им в земли врагов своих, не презрех их, ниже вознегодовах о них, яко потребити я и разорити завет Мой иже к ним: Аз бо есмь Господь Бог их. 45 И помяну завет их первый, егда изведох их из земли Египетския, из дому работы пред языки, еже быти Мне Богу их: Аз есмь Господь. 46 Сия судьбы Моя и повеления Моя, и закон, егоже даде Господь между Собою и между сыны Израилевы, на горе Синайстей, рукою Моисеовою.

**27** И рече Господь к Моисею, глаголя: 2 глаголи сыном Израилевым и речеши к ним, глаголя: человек, иже аще обещает обет, яко цену души своя Господу, 3 да будет цена мужеска полу от двадесяти лет до шестидесяти лет, да будет цена его пятьдесят дидрахм сребра весом святым, 4 женска же полу да будет цена тридесять дидрахм: 5 аще же

от пяти лет до двадцати лет, да будет цена мужеску полу двадцать дидрахм, женску же полу десять дидрахм: 6 от месяца же единого до пяти лет, да будет цена мужеска полу пять дидрахм серебра, женска же полу три дидрахмы серебра: 7 аще же от шестидесяти лет и вышше, аще убо мужеск пол будет, да будет цена его пятнадцать дидрахм серебра, аще же женск пол, десять дидрахм. 8 Аще же убог будет ценою своею, да станет пред жерцем, и да оценит его жрец: якоже может рука обещавшагося, тако оценит его жрец. 9 Аще же от скотов приносимых от них дар Господу, иже аще даст от сих Господу, будет свято. 10 Да не пременит добра злым, ниже зла добрым: аще же изменя изменит оный скот скотом, да будет и той и пременение свята. 11 Аще же всяк скот нечист, от нихже не приносится дар Господу, да поставит скота пред жерцем, 12 и оценит его жрец между добрым и между злым: и якоже оценит его жрец, тако да будет. 13 Аще же искупя искупит его, да приложит пятую часть к цене его. 14 И человек, иже аще освятит дом свой свят Господу, и оценит его жрец между добрым и между злым: якоже оценит его жрец, тако да станет. 15 Аще же освятивый его искупит дом свой, да приложит к сему пятую часть серебра цены его, и будет ему. 16 Аще же от нив одержания своего освятит человек Господу, и да будет цена его по сеянию его, за спуд ячменя пятьдесят дидрахм серебра. 17 Аще же от лета оставления освятит ниву свою, по цене ея да станет. 18 Аще же напоследок по оставлении освятит ниву свою, да причтет ему серебро жрец к летом оставшымся даже до лета оставления, и отимется от цены его 19 аще же искупит ниву освятивый ю, да приложит пятую часть серебра к цене

ея, и да будет ему. 20 Аще же не искупит нивы, и отдаст ниву человеку иному, не ктому да искупит ю: 21 но да будет нива минувшу лету оставления, свята хвална Господу, якоже земля отлученая: жерцу да будет во одержание его. 22 Аще же от нивы, юже стяжа, яже несть от села одержания его, освятит Господу, 23 да сочтет ему жрец останок цены от лета оставления, и да отдаст цену в той день святу Господу: 24 и в лето оставления да отдастся нива человеку, от негоже притяжа ю, егоже бе одержание земли. 25 И всяка цена да будет весами святыми, двадесять пенязей будет дидрахма. 26 И всяк первенец, иже аще родится в скоте твоём, да будет Господу, и да не освятит его никтоже: аще телец, аще овча, Господу есть. 27 Аще же от четвероножных нечистых, да пременит по цене его, и да приложит пятую часть его к сему, и да будет ему: аще же не искупится, да продастся по цене его. 28 Всяк же обет, егоже аще обещает человек Господу от всех, елика ему суть, от человека даже до скота, и от нив одержания его, не продастся, ниже искупится всякий обет свят святых будет Господу. 29 И всяк обет, иже аще обещан будет от человек, не искупится, но смертью да умертвится. 30 Всяка десятина земли, от семени земнаго и от плода древянаго Господу есть, свято Господу. 31 Аще же искупя искупит человек десятину свою, пятую часть его да приложит к нему, и да будет ему. 32 И всяка десятина волов и овец, и всяко, еже аще приидет в число под жезл десятое, будет свято Господу. 33 Не премениши добраго злым, ниже добрым злаго: аще же пременяя премениши е, то и пременение его будет свято, да не искупится, 34



сия суть заповеди, яже заповеда Господь Моисею к сыном  
Израиловым на горе Синайстей.

# Числа

**1** И глагола Господь к Моисею в пустыни Синайстей, в скинии свидения, в первый день месяца втораго, втораго лета изшедшым им от земли Египетския, глаголя: **2** возьмите сочтение всего сонма сынов Израилевых по сродством их, по домом отечества их, по числу имен их, по главам их: **3** всяк мужеск пол от двадесяти лет и вышше, всяк исходяй с силою Израилевою, соглядайте их с силою их, ты и Аарон созируйте их: **4** и с вами да будут с силою своею кийждо, кийждо по племени коегождо от князей, по домом отечеств да будут. **5** И сия имена мужей, иже станут с вами: от Рувима Елисур сын Седиуров, **6** от Симеона Саламиил сын Сурисадаев, **7** от Иуды Наассон сын Аминадавль, **8** от Иссахара Нафанаил сын Согаров, **9** от Завулону Елиав сын Хелонь, **10** от сынов Иосифовых, иже от Ефрема, Елисам сын Семиудов, от Манассии Гамалиил сын Фадассуров, **11** от Вениаминя Авидан сын Гадеониев, **12** от Дана Ахиезер сын Амисадаев, **13** от Асира Фагаиил сын Ехранов, **14** от Гада Елисаф сын Рагуилов, **15** от Неффалима Ахирей сын Енань. **16** Сии нареченнии сонма князи от племен, по отечествам их, тысященачальницы Израилевы суть. **17** И поя Моисей и Аарон мужы сия нареченныя именем. **18** И весь сонм собраша в первый день месяца втораго лета, и соглядаша я по родом их, по отечествам их, по числу имен их, от двадесяти лет и вышше, всяк мужеск пол по главам их, **19** якоже повеле Господь Моисею: и соглядашася сии в пустыни Синайстей. **20** И быша сынове Рувима, первенца Израилева, по сродством их, по сонмом их, по домом отечеств их, по числу имен их, по главам их, всяк мужеск пол от двадесяти

лет и вышше, всяк исходяй с силою, 21 соглядание их от племене Рувимля четыредесять шесть тысяц и пять сот. 22 Сынов Симеоновых по сродством их, по сонмом их, по домом отечеств их, по числу имен их, по главам их, всяк мужеск пол от двадесяти лет и вышше, всяк исходяй с силою, 23 соглядание их от племене Симеоня пятьдесят девять тысяц и триста. 24 Сынов Иудиных по сродством их, по сонмом их, по домом отечеств их, по числу имен их, по главам их, всяк мужеск пол от двадесяти лет и вышше, всяк исходяй с силою, 25 соглядание их от племене Иудина семьдесят четыре тысяцы и шесть сот. 26 От сынов Иссахаровых по сродством их, по сонмом их, по домом отечеств их, по числу имен их, по главам их, всяк мужеск пол от двадесяти лет и вышше, всяк исходяй с силою, 27 соглядание их от племене Иссахарова пятьдесят и четыре тысяцы и четыре ста. 28 От сынов Завулоних по сродством их, по сонмом их, по домом отечеств их, по числу имен их, по главам их, всяк мужеск пол от двадесяти лет и вышше, всяк исходяй с силою, 29 соглядание их от племене Завулоня пятьдесят семь тысяц и четыре ста. 30 От сынов Иосифовых, сынов Ефремлих по сродством их, по сонмом их, по домом отечеств их, по числу имен их, по главам их, всяк мужеск пол от двадесяти лет и вышше, всяк исходяй с силою, 31 соглядание их от племене Ефремля четыредесять тысяц и пять сот. 32 От сынов Манасииных по сродством их, по сонмом их, по домом отечеств их, по числу имен их, по главам их, всяк мужеск пол их от двадесяти лет и вышше, всяк исходяй с силою, 33 соглядание их от племене Манасиина тридесять и две тысяцы и двести. 34 От сынов Вениаминовых по

сродством их, по сонмом их, по домом отечеств их, по числу имен их, по главам их, всяк мужеск пол их от двадесяти лет и вышше, всяк исходяй с силою, 35 соглядание их от племене Вениамина тридесять и пять тысящ и четыре ста. 36 От сынов Гадовых, по сродством их, по сонмом их, по домом отечеств их, по числу имен их, по главам их, всяк мужеский пол их от двадесяти лет и вышше, всяк исходяй с силою, 37 соглядание их от племене Гадова четыредесять пять тысящ и шесть сот пятьдесят. 38 От сынов Дановых по сродством их, по сонмом их, по домом отечеств их, по числу имен их, по главам их, всяк мужеск пол их от двадесяти лет и вышше, всяк исходяй с силою, 39 соглядание их от племене Данова шестьдесят и две тысящы и седьм сот. 40 От сынов Асировых по сродством их, по сонмом их, по домом отечеств их, по числу имен их, по главам их, всяк мужеск пол их от двадесяти лет и вышше, всяк исходяй с силою, 41 соглядание их от племене Асирова четыредесять едина тысяща и пять сот. 42 От сынов Неффалимлих по сродством их, по сонмом их, по домом отечеств их, по числу имен их, по главам их, всяк мужеск пол их от двадесяти лет и вышше, всяк исходяй с силою, 43 соглядание их от племене Неффалимля пятьдесят и три тысящы и четыре ста. 44 Сие сочисление, еже соглядаша Моисей и Аарон и князи Израилевы, дванадесять мужей, муж един от племене единаго, по племени домов отечества их быша. 45 И бысть всего соглядания сынов Израилевых с силою их, от двадесяти лет и вышше, всяк исходяй ополчатися во Израили, 46 шесть сот тысящ и три тысящы и пять сот и пятьдесят. 47 Левити же от племене отечества их не сочислишася в сынех Израилевых. 48 И рече

Господь к Моисею, глаголя: **49** виждь, плеюмене Левиина да на сочислиши, и числа их да не приимеши среди сынов Израилевых: **50** и ты пристави левиты к скинии свидения и ко всем сосудом ея, и ко всем, елика суть в ней: да носят сии скинию и вся сосуды ея, и тии да служат в ней, и окрест скинии да ополчаются: **51** и внегда воздвизати скинию, да снимают ю левиты, и внегда поставити скинию, да возставят: и иноплеменник приступаяй да умрет. **52** И да ополчаются сынове Израилевы, всяк в своем чине и всяк по своему старейшинству, с силою своею: **53** левиты же да ополчаются сопровит, окрест скинии свидения, и не будет согрешения в сынех Израилевых, и да стрегут левиты сами стражу скинии свидения. **54** И сотвориша сынове Израилевы по всем, елика заповеда Господь Моисею и Аарону, тако сотвориша.

**2** И рече Господь к Моисею и Аарону, глаголя: **2** человек держайся по чину своему, по знамениям, по домом отечеств своих, да ополчаются сынове Израилевы пред Господем, окрест скинии свидения да ополчаются сынове Израилевы. **3** И ополчающися первии на восток чин полка Иудина с силою их, и князь от сынов Иудиных Наассон сын Аминадавль: **4** сила его согляданая седмьдесят и четыре тысящы и шесть сот. **5** И ополчающися близ от племени Иссахарова, и князь сынов Иссахаровых Нафанаил сын Согаров: **6** сила его согляданая пятьдесят и четыре тысящы и четыре ста. **7** И ополчающися близ от племени Завулоня, и князь сынов Завулоних Елиав сын Хелонь: **8** сила его согляданая пятьдесят седмь тысящ и четыре ста. **9** Всех сочтеных от полка Иудина сто осмьдесят шесть тысящ и четыре ста, с силою их первии да воздвизаются. **10**

Чины полка Рувимля к югу с силою его, и князь сынов Рувимлих Елисур сын Седиуров: 11 сила его согляданая четыредесять и шесть тысяч и пять сот. 12 И ополчающися близ его от племени Симеоня, и князь сынов Симеоних Саламииль сын Сурисадаин: 13 сила его сочтеная пятьдесят и девять тысяч и три ста. 14 И ополчающися близ его от племени Гадова, и князь сынов Гадовых Елисаф сын Рагуиль: 15 сила его согляданая четыредесять и пять тысяч и шесть сот и пятьдесят. 16 Всех же сочтеных полка Рувимля сто пятьдесят едина тысяща и четыре ста и пятьдесят, с силою их втории да воздвизаются. 17 И да воздвигнется скиния свидения и полк левитский посреде полков: якоже ополчатся, тако и да воздвигнутся, кийждо держася по чину своему. 18 Чин полка Ефремля к морю с силою их, и князь сынов Ефремлих Елисама сын Емиудов: 19 сила его сочтеная четыредесять тысяч и пять сот. 20 И ополчающися близ племя Манасиино, и князь сынов Манасииных Гамалиил сын Фадассуров: 21 сила его согляданая тридесять две тысящы и двести. 22 И ополчающися близ от племени Вениамина, и князь сынов Вениаминах Авидан сын Гадеониев: 23 сила его сочтеная тридесять пять тысяч и четыре ста. 24 Всех сочтеных полка Ефремля сто осмь тысяч и сто, с силою их гретии да воздвизаются. 25 Чин полка Данова к северу с силою их, и князь сынов Дановых Ахиезер сын Амисадаин: 26 сила его согляданая шестьдесят две тысящы и седмь сот. 27 И ополчающися близ его племя Асирово, и князь сынов Асировых Фагаиил сын Ехранов: 28 сила его согляданая четыредесять едина тысяща и пять сот. 29 И ополчающися

близ племя Неффалимле, и князь сынов Неффалимлих Ахирей сын Енань: 30 сила его согляданая пятьдесят три тысящы и четыре ста. 31 Всех сочтеных полка Данова сто пятьдесят семь тысящ и шесть сот, с силою их последнии да воздвизаются по чину своему. 32 Сие сочтение сынов Израилевых по домом отечеств их: вся соглядания полков с силами их шесть сот три тысящы и пять сот пятьдесят. 33 Левити же не соглядашася среди сынов Израилевых, якоже заповеда Господь Моисею. 34 И сотвориша сынове Израилевы вся, елика заповеда Господь Моисею: тако ополчахуся по чином своим, и тако воздвизахуся кийждо близ по сонмом своим, по домом отечеств своих.

**3** И сия рождения Аарона и Моисея, в день в оньже глагола Господь Моисею на горе Синайстей: 2 и сия имена сынов Аароних: первенец Надав и Авиуд, и Елеазар и Ифамар: 3 сия имена сынов Аароних, жерцы помазанья, имже совершишася руце их жрети: 4 и скончашася Надав и Авиуд пред Господем, приносящым им огонь чуждь пред Господем в пустыни Синайстей, и чад не бе им: и жречествоваху Елеазар и Ифамар со Аароном, отцем своим. 5 И рече Господь к Моисею, глаголя: 6 поими племя Левиино, и поставиши я пред Аароном жерцем, и да служат ему: 7 и да стрегут стражбы его и стражбы сынов Израилевых пред скиниею свидения, делати дела скинии: 8 и да хранят вся сосуды скинии свидения и стражбы сынов Израилевых по всем делом скинии: 9 и да даси левиты Аарону брату твоему и сыном его жерцем: в дар даны сии Мне суть от сынов Израилевых: 10 и Аарона и сыны его поставиши над скиниею свидения, и да хранят жречество свое, и вся яже

у олтаря и внутрь завесы: иноплеменник же прикасаясь умрет. 11 И рече Господь к Моисею, глаголя: 12 и се, Аз взях левиты от среды сынов Израилевых, вместо всякого первенца, отверзающего ложесна от сынов Израилевых: искупления их будут, и да будут Мне левити: 13 Мне бо всяк первенец: в оньже день побих всякого первенца в земли Египетстей, освятих Себе всякого первенца во Израили, от человека до скота Мне да будут: Аз Господь. 14 И рече Господь к Моисею в пустыни Синайстей, глаголя: 15 соглядай сынов Левиных по домом отечеств их по сонмом их, по рождению их: всяк мужеск пол от месяца единого и вышше да соглядаете их. 16 И сочте их Моисей и Аарон повелением Господним, якоже повеле им Господь. 17 И бяху сии сынове Левины от имен их: Гирсон, Кааф и Мерари. 18 И сия имена сынов Гирсоних по сонмом их: Ловени и Семей. 19 И сынове Каафовы по сонмом их: Амрам и Иссаар, Хеврон и Озиил. 20 И сынове Мерарины по сонмом их: Мооли и Муси: сии суть сонми Левитстии по домом отечеств их. 21 От Гирсона сонм Ловениин и сонм Семейн: сии суть сонми Гирсоновы. 22 Соглядание их по числу всего мужеска полу, от месяца единого и вышше, соглядание их семь тысяч и пять сот. 23 И сынове Гирсоновы за скиниею да ополчаются к морю. 24 И князь дому отечества сонма Гирсона Елисаф сын Даиль. 25 И стражба сынов Гирсоновых в скинии свидения, скиния и покров ея, и покров дверей скинии свидения, 26 и опоны двора, и завеса дверей двора, иже есть у скинии, и прочая всех дел его. 27 От Каафа сонм Амрамль един и сонм Иссааров един, и сонм Хевронь един и сонм Озиил един: сии суть сонми Каафовы: 28 по числу всяк мужеск



пол от месяца единаго и вышше осмь тысяцц и шесть сот, стрегуции стражбы Святых. 29 Сонми сынов Каафовых да ополчаются от страны скинии к югу, 30 и князь дому отечеств сонмов Каафовых Елисафан сын Озиил: 31 и стражба их кивот и трапеза, и светилник и олтари, и сосуды святаго, в нихже служат, и покров, и вся дела их. 32 И князь над князи левитскими Елеазар сын Аарона жерца, поставлен стрещи стражбы свярых. 33 От Мерара же сонм Мооли и сонм Муси: сии суть сонми Мерарины, 34 соглядание их по числу, всяк мужеск пол от месяца единаго и вышше, шесть тысяцц и двести. 35 И князь дому отечеств сонма Мерарина Суриил сын Авихеов: от страны скинии да ополчаются к северу, 36 соглядание стражбы сынов Мерариных главицы скинии и верей ея, и столпы ея и стояла ея, и вся сосуды их и вся дела их, 37 и столпы двора окрест и стояла их, и колки их и верви их. 38 Ополчающися сопреди скинии свидения на востоки Моисей и Аарон и сынове его, стрегуще стражбы святаго, в стражбах сынов Израилевых: и иноплеменник прикасайся да умрет. 39 Все соглядание левитов, ихже согляда Моисей и Аарон повелением Господним по сонмом их, всяк мужеск пол от месяца единаго и вышше, двадесять и две тысяццы. 40 И рече Господь к Моисею, глагола: соглядай всякаго первенца мужеска полу сынов Израилевых от месяца единаго и вышше, и возми число их по имени, 41 и да поймеш Мнелевиты за вся первенцы сынов Израилевых: Аз Господь: и скоты левитски вместо всех первенцев в скотех сынов Израилевых. 42 И согляда Моисей, якоже заповеда ему Господь, всякаго первенца в сынех Израилевых. 43 И быша вси первенцы мужескаго полу, по числу имен от месяца

единого и вышше, от соглядания их двадесять две тысящы двести и седмьдесят три. 44 И рече Господь к Моисею, глаголя: 45 поими левиты вместо всех первенцев сынов Израилевых, и скоты левитски вместо скотов их, и будут Мне левиты: Аз Господь: 46 и искуп дву сот седмидесяти трех, иже преизбывают сверх левитов от первенцов сынов Израилевых: 47 и да возмеш по пяти сикль на главу, по сиклю святому возмеш двадесать пенязей сикль, 48 и даси серебро Аарону и сыном его искуп от преизбывающих в них. 49 И взя Моисей серебро искупное от преизбывающих в них на искуп левитом: 50 от первенец сынов Израилевых взя серебра тысящу три ста шестьдесят пять сиклев, по сиклю святому. 51 И даде Моисей окуп от преизбывших Аарону и сыном его, повелением Господним, якоже заповеда Господь Моисею.

**4** И рече Господь к Моисею и Аарону, глаголя: 2 возми сочисление сынов Каафовых от среды сынов Левиных, по сонмом их, по домом отечеств их, 3 от двадесяти и пяти лет и вышше, даже до пятидесяти лет, всяк входяй служити, творити вся дела в скинии свидения. 4 И сия дела сынов Каафовых от среды сынов Левиных, по сонмом их, по домом отечеств их, в скинии свидения Святое Святых. 5 И да внидут Аарон и сынове его, егда воздвигнется полк, и да снимут завесу осеняющую, и да обвинют в ню кивот свидения, 6 и да покрывают его покровом кожаным синим, и да возложат нань одежду всю синетную сверху, и да вложат носила: 7 и на трапезе предложения да положат на ней одежду всю багряную и блюда, и кадилницы и чашы, и возливалницы, имиже возливают, и хлебы на ней всегда да

будут: 8 и да возложат на ню одежду червлену, и да покрывают покровом кожаным синим, и да вложат носила ея: 9 и да возмут одежду синю, и покрывают светильник светящий и свещы его, и щипцы его и очищала его, и вся сосуды елеа его, имиже служат в них: 10 и да вложат его и вся сосуды его в покров кожан синий, и да возложат его на носила: 11 и на олтарь златый да положат одежду синю, и да покрывают его покровом кожаным синим, и да вложат носила его: 12 и да возмут вся сосуды служебныя, еликими служат в них во святых, и вложат во одежду синю, и да покрывают их покровом кожаным синим, и да возложат на носила: 13 и покров да возложат на олтарь, и покрывают его одеждою всею багряною: 14 и да возложат на него вся сосуды его, еликими служат на нем в них, и кадилники, и вилицы и чашы, и покров и вся сосуды олтаря, и да возложат на него покров кожан синий и да вложат носила его: и да возмут одежду багряню, и да покрывают умывалницу и стояла ея: и да вложат ю в покров кожаный синий, и да возложат на носила. 15 И совершат Аарон и сынове его, покрывающе святая и вся сосуды святыя, внегда воздвизатися полку: и по сих да внидут сынове Каафовы воздвизати, и да не прикоснутся святых, да не умрут. Сия да воздвизают сынове Каафовы в скинии свидения. 16 Надсмотритель Елеазар, сын Аарона жерца, елей светилный, и фимиам сложения, и жертва яже по вся дни, и елей помазания, надсмотрение всея скинии и елика суть в ней во святем, во всех делех. 17 И рече Господь к Моисею и Аарону, глаголя: 18 не потребите сонм племени Каафова от среды левитов: 19 сие сотворите им, и живи будут и не умрут: приходящим им ко Святым Святым,

Аарон и сынове его да внидут и да устроят их коегождо по ношению его, 20 и да не внидут внезапно видети святая, и умрут. 21 И рече Господь к Моисею, глаголя: 22 возми сочисление сынов Гирсоних, и иже по домом отечеств их, по сонмом их и по племенем их, 23 от двадесяти и пяти лет и вышше, даже до пятидесяти лет, соглядайте я, всяк входяй служити и творити дела в скинии свидения. 24 Сия служба сонма Гирсонова, служити и воздвизати. 25 И да воздвигнет опоны скинии и скинию свидения, и покров ея и покров синий суций сверх ея, и опону дверей скинии свидения, 26 и опоны двора, и завесу дверей двора, елика над скиниєю свидения, и яже окрест олтаря, и прочая их, и вся сосуды служебныя, еликими служат в них, да сотворят. 27 По слову Аарона и сынов его да будет вся служба сынов Гирсоновых по всем службам их и по всем делам их: и да соглядаеши их по именам, вся носимая ими. 28 Сия служба сонма сынов Гирсоновых в скинии свидения, и стражба их рукою Ифамара, сына Аароня жерца. 29 Сынове Мерарины по сонмом их, по домом отечеств их, соглядайте их, 30 от двадесяти и пяти лет и вышше, даже до пятидесяти лет, соглядайте их, всяк входяй служити дела скинии свидения. 31 И сия хранения воздвигаемых ими, по всем делом их в скинии свидения: главицы скинии и вереи ея, и столпы ея и стояла ея, и покров и стояла их, и столпы их, и покров дверей скинии, 32 и столпы двора окрест и стояла их, и столпы завесы дверей двора и стояла их, и колки их и верви их, и вся сосуды их и вся служения их: по именам соглядайте их и вся сосуды стражбы воздвигаемых ими. 33 Сия служба сонма сынов Мерариных во всех делех их, в скинии свидения

рукою Ифамара, сына Аарона жерца. 34 И согляда Моисей и Аарон и князи Израилевы сыны Каафовы по сонмом их, по домом отечеств их, 35 от двадесяти и пяти лет и вышше, даже до пятидесяти лет, всяк входяй служити и творити дела в скинии свидения. 36 И бысть соглядание их по сонмом их, две тысяцы семь сот пятьдесят. 37 Сие сочтение сонма Каафова, всех служащих в скинии свидения, якоже согляда Моисей и Аарон повелением Господним, рукою Моисевою. 38 И соглядани быша сынове Гирсони по сонмом своим, по домом отечеств своих, 39 от двадесяти и пяти лет и вышше, даже до пятидесяти лет, всяк входяй служити и творити дела в скинии свидения. 40 И бысть соглядание их по сонмом их, по домом отечеств их, две тысяцы шесть сот тридесять. 41 Сие соглядание сонма сынов Гирсоновых, всех служащих в скинии свидения, ихже соглядаша Моисей и Аарон по глаголу Господню, рукою Моисевою. 42 Соглядани же быша сынове Мерарины по сонмом своим, по домом отечеств своих, 43 от двадесяти и пяти лет и вышше, даже до пятидесяти лет, всяк входяй служити на дела скинии свидения. 44 И бысть сочтение их по племеном их, по сонмом их, по домом отечеств их, три тысяцы и двести. 45 Сие сочисление сонма сынов Мерариных, ихже согляда Моисей и Аарон по глаголу Господню, рукою Моисевою. 46 Все согляданнии левиты, ихже согляда Моисей и Аарон и князи сынов Израилевых, по сонмом их и по домом отечеств их, 47 от двадесяти и пяти лет и вышше, даже до пятидесяти лет, всяк входяй на дело дел, и к делам воздвигаемым в скинии свидения. 48 И быша согляданнии осмь тысящ пять сот осмьдесят. 49 Повелением Господним соглядаше их Моисей, мужа по мужу над делы

их, и яже воздвизаху сии, и соглядани суть, якоже повеле Господь Моисею.

**5** И рече Господь к Моисею, глаголя: **2** повели сыном Израилевым, и да изгонят из полка всякаго прокаженного, и всякаго проливающего семя, и всякаго нечистаго душею: **3** от мужеска полу до женска, изгоните вне полка, и да не осквернят полков своих, в нихже Аз пребываю. **4** И сотвориша сынове Израилевы тако, и изгнаша их вне полка: якоже глагола Господь Моисею, тако сотвориша сынове Израилевы. **5** И рече Господь к Моисею, глаголя: **6** рцы сыном Израилевым, глаголя: муж или жена, иже аще сотворит от всех грехов человеческих и презирая презрит Господа, и преступит душа она: **7** да исповесть грех, егоже сотвори, и да отдаст преступление истое, пятую часть его да приложит к тому, и да отдаст, емуже согреша. **8** Аще же несть человеку ужика, яко отдати ему преступление, преступление отдаемое Господу, жерцу да будет, кроме овна очищения, имже помолится о нем. **9** И всяк начаток, и вся освящаемая в сынех Израилевых, елика аще приносят Господу, жерцу самому да будут: **10** и коегождо освященная, тому да будут и муж аще даст жерцу, тому да будет. **11** И рече Господь к Моисею, глаголя: **12** глаголи сыном Израилевым и речеши к ним: мужа, мужа аще преступит жена его, и презирающи презрит его, **13** и будет кто с нею ложем семене, и утаится от очию мужа ея, и укрывается, она же будет осквернена, и свидетеля не будет на ню и сия несть ята, **14** и приидет на него дух ревнования, и возревнует к жене своей, она же осквернена есть, или приидет ему дух ревнования, и возревнует к жене своей, она же не будет осквернена, **15** и

да приведет муж жену свою к жерцу, и да принесет дар за ню, десятую часть меры ефи муки ячн्या: да не возлиет на ню елеа, ниже да возложит на ню ливана: жертва бо ревнования есть, жертва памяти воспоминающая грех. 16 И приведет ю жрец и поставит ю пред Господем: 17 и да возмет жрец воду живу чисту в сосуде глиняне, и от персти на земли сущия у скинии свидения, и возьмет жрец да всыплет в воду: 18 и да поставит жрец жену пред Господем, и да откроет главу жене, и да даст в руке ея жертву памяти, жертву ревнования: в руке же жерца да будет вода обличения клятвенная сия. 19 И да закленет ю жрец и речет жене: аще никтоже бысть с тобою, и неси преступила осквернитися под мужем твоим, невинна буди от воды обличения клятвенныя сея: 20 аще же преступила еси, мужата сущи, или осквернена еси, и даде кто тебе ложе свое, кроме мужа твоего. 21 И закленет жрец жену клятвами клятвы сея, и речет жрец жене: да даст тя Господь в клятву и проклятие среди людей твоих, внегда дати Господу стегну твоему отпасти и чреву твоему разсестися: 22 и внидет вода клятвенная сия во чрево твое, еже расторгнути утробу твою, и отпасти стегну твоему. И отвещает жена: 23 и да напишет жрец клятвы сия в книзе, и изгладит в воде обличения клятвеннаго: 24 и напоит жену водою обличения клятвенною, и внидет в ню вода клятвенная обличения. 25 И да возмет жрец от руки женски жертву ревнования, и да возложит жертву пред Господем, и да принесет ю ко олтарю: 26 и да возмет жрец горстию от жертвы память ея, и да принесет ю на олтарь, и по сем напоит водою жену. 27 И будет аще есть осквернена, и аще утаением утаися от мужа своего, и внидет в ню вода клятвенная обличения, и надмет

чрево ея, и отпадет стегно ея, и будет жена в проклятие в людех своих: 28 аще же не будет осквернена жена, и чиста есть, и невинна будет, и плодствовать будет семья. 29 Сей закон ревнования, комулибо аще преступит жена, мужата сущи, и осквернится: 30 или человек, емуже аще найдет нань дух ревнования, и возревнует к жене своей, и поставит жену свою пред Господем, и да сотворит ей жрец весь закон сей: 31 и чист будет человек от греха, и жена та возмет грех свой.

**6** И рече Господь к Моисею, глаголя: 2 глаголи сыном Израилевым и речеши к ним: муж или жена, иже аще обещается зело обетом, еже очиститися чистотою Господу, 3 да воздержится от вина и сикера, и оцта винна и оцта от сикера да не пьет: и, елика делаются от грозд винных, да не пьет, и гроздия свежаго и сухаго да не снест. 4 Во вся дни обета своего от всех, елика бывают от винничины вина, от кости и до скорлупы да не пиете, ниже ясте от всего. 5 Во вся дни обета очищения своего бритва да не взыдет на главу его, дондеже скончаются дние, елики обещал есть Господу: свят будет растяй власы главы своея. 6 Во вся дни обета своего Господу, ко всякой душе скончавшейся да не внидет. 7 Над отцем и над матерью, и над братом и над сестрою, да не осквернится над ними, умершым им, яко обет Бога его на главе его. 8 Вся дни обета его свят будет Господу. 9 Аще же кто смертию внезапно умрет у него, абие осквернится глава обета его, и обриет главу свою, в оньже день очистится, в день седмый да обриется, 10 и в день осмый да принесет два горличища или два птенца голубина к жерцу пред двери скинии свидения: 11 и да сотворит жрец едину греха ради, и другую во всесожжение, и да помолится о нем жрец, о нихже



согреши, о души, и освятит главу свою в той день, в онъже освятися Господу, во дни обета своего. 12 И да приведет агнца единоголетна в преступление, и дние прежнии да не будут ему в число, понеже осквернися глава обета его. 13 И сей закон обещавагося, в онъже день скончает дни обета своего, да принесет сам к дверем скинии свидения: 14 и да приведет дар свой Господу агнца единоголетна непорочна единого во всесожжение, и агницу единоголетну едину непорочну греха ради, и овна единого непорочна во спасение, 15 и кош опресноков от муки пшеничны, хлебы смешаны с елеем, и опресноки помазаны елеем, и жертву их и возлияние их. 16 И да принесет жрец пред Господа, и да сотворит еже греха ради его, и всесожжение его, 17 и овна сотворит жертву спасения Господу на кошнице опресноков, и да сотворит жрец жертву его и возлияние его. 18 И да обриет обещавый пред дверми скинии свидения главу обета своего, и да возложит власы на огонь, иже есть под жертвою спасения: 19 и да возмет жрец рамо варено от овна, и хлеб един опресночный от кошницы, и опреснок един, и да возложит на руки обещававшемуся, по обриту главы его, 20 и да принесет я жрец возложение пред Господа: свято да будет жерцу на грудех возложения и на раме участия: и по сих обещавайся да пиет вино. 21 Сей закон обещавагося, иже аще обещает дар Господу о обете, кроме сих яже обрящет рука его: по силе обета его, егоже аще обещает, по закону очищения. 22 И рече Господь к Моисею, глаголя. 23 Рцы Аарону и сыном его, глаголя: сице благословите сыны Израилевы, глаголюще им: 24 да благословит тя Господь и сохранит тя: 25 да просветит Господь лице Свое на тя и помилует тя: 26 да воздвигнет

Господь лице Свое на тя и даст ти мир: 27 и да возложат имя Мое на сыны Израилевы, и Аз Господь благословлю я.

**7** И бысть в день в оньже сконча Моисей, якоже поставити скинию, и помаза ю, и освяти ю и вся сосуды ея, и олтарь и вся сосуды его, и помаза я. 2 И приведоша князи Израилтестии дванадесять, князи домов отечеств своих, сии князи коегождо племени, сии предстоящи над согляданием: 3 и приведоша дары своя пред Господа шесть колесниц покрытых и дванадесять волов: колесницу едину от двоих князей, и телца от коегождо и приведоша пред скинию. 4 И рече Господь к Моисею, глаголя: 5 возми от них, и да будут на дела служебная скинии свидения: и даси я левитом, коемуждо по его служению. 6 И взем Моисей колесницы и волы, даде я левитом: 7 две колесницы и четыре волы даде сыном Гирсоним по службам ихже, 8 и четыре колесницы и осмь волов даде сыном Мерариным по службам их, чрез Ифамара, сына Аарона жерца: 9 и сыном Каафовым не даде, яко службы святого имеют: на раменах да воздвизают я. 10 И принесоша князи на обновление олтаря в день, в оньже помаза его, и принесоша князи дары своя пред олтарь. 11 И рече Господь к Моисею: князь един на день, князь на день да принесут дары своя на обновление олтаря. 12 И бяше приносяй дар свой в первый день Наассон сын Аминадавль, князь племени Иудина: 13 и принесе дар свой, блюдо сребряно едино, вес его сто и тридесять сикль: чашу едину сребряну седмьдесят сикль, по сиклю святому: обоя полны муки пшеничны сопряжены с елеем на жертву: 14 фимиамник един десяти златник, полн фимиама: 15 телца одинаго от волов, овна одинаго,

агнца единого единоголетна во всесожжение: 16 и козла от коз единого греха ради: 17 и на жертву спасения юницы две, овнов пять, козлов пять, агниц единоголетних пять: сей дар Наассона сына Аминадавля. 18 Во второй день принесе Нафанаил сын Согаров, князь племени Иссахаря: 19 и принесе дар свой, блюдо серебряно едино, вес его сто и тридесять сикль: чашу едину серебряну седьдесят сикль, по сиклю святому: обоя полны муки пшеничны сопряжены с елеем на жертву: 20 фимиамник един десяти златник, полн фимиама: 21 телца единого от волов, овна единого, агнца единого единоголетна во всесожжение: 22 и козла от коз единого греха ради: 23 и на жертву спасения юницы две, овнов пять, козлов пять, агниц единоголетних пять: сей дар Нафанаила сына Согарова. 24 В третий день князь сынов Завулони, Елиав сын Хелонов: 25 дар его блюдо серебряно едино, вес его сто и тридесять сикль: чашу едину серебряну седьдесят сикль, по сиклю святому: обоя полны муки пшеничны сопряжены с елеем на жертву: 26 фимиамник един десяти златник, полн фимиама: 27 телца единого от волов, овна единого, агнца единого единоголетна во всесожжение: 28 и козла от коз единого греха ради: 29 и на жертву спасения юницы две, овнов пять, козлов пять, агниц единоголетних пять: сей дар Елиава сына Хелонова. 30 В четвертый день князь сынов Рувимлих, Елисур сын Седиуров: 31 дар его блюдо серебряно едино, вес его сто и тридесять сикль: чашу едину серебряну седьдесят сикль, по сиклю святому: обоя полны муки пшеничны сопряжены с елеем на жертву: 32 фимиамник един десяти златник, полн фимиама: 33 телца единого от волов, овна единого, агнца единого единоголетна

во всесожжение: 34 и козла от коз единого греха ради: 35 и на жертву спасения юницы две, овнов пять, козлов пять, агниц единоголетних пять: сей дар Елисура сына Седиурова. 36 В пятый день князь сынов Симеоних, Саламиил сын Сурисадаиль: 37 дар его блюдо серебряно едино, вес его сто и тридесять сикль: чашу едину серебряну семьдесят сикль, по сиклю святому: обоя полны муки пшеничны сопряжены с елеем на жертву: 38 фимиамник един десяти златник, полн фимиама: 39 телца единого от волов, овна единого, агнца единого единоголетна во всесожжение: 40 и козла от коз единого греха ради: 41 и на жертву спасения юницы две, овнов пять, козлов пять, агниц единоголетних пять: сей дар Саламиила сына Сурисадаиля. 42 В шестой день князь сынов Гадовых, Елисаф сын Рагуилев: 43 дар его блюдо серебряно едино, вес его сто и тридесять сикль: чашу едину серебряну семьдесят сикль, по сиклю святому: обоя полны муки пшеничны сопряжены с елеем на жертву: 44 фимиамник един десяти златник, полн фимиама: 45 телца единого от волов, овна единого, агнца единого единоголетна во всесожжение: 46 и козла от коз единого греха ради: 47 и на жертву спасения юницы две, овнов пять, козлов пять, агниц единоголетних пять: сей дар Елисафа сына Рагуилева. 48 В седьмой день князь сынов Ефремлих, Елисама сын Емиудов: 49 дар его блюдо серебряно едино, вес его сто и тридесять сикль: чашу едину серебряну семьдесят сикль, по сиклю святому: обоя полны муки пшеничны сопряжены с елеем на жертву: 50 фимиамник един десяти златник, полн фимиама: 51 телца единого от волов, овна единого, агнца единого единоголетна во всесожжение: 52 и козла от коз единого греха

ради: 53 и на жертву спасения юницы две, овнов пять, козлов пять, агниц единоплетных пять: сей дар Елисамы сына Емиудова. 54 В осмый день князь сынов Манассиных, Гамалиил сын Фадассуров: 55 дар его блюдо серебряно едино, вес его сто и тридесять сикль: чашу едину серебряну седьдесят сикль, по сиклю святому: обоя полны муки пшеничны сопряжены с елеем на жертву: 56 фимиамник един десяти златник, полн фимиама: 57 телца единого от волов, овна единого, агнца единого единоплетна во всесожжение: 58 и козла от коз единого греха ради: 59 и на жертву спасения юницы две, овнов пять, козлов пять, агниц единоплетных пять: сей дар Гамалиила сына Фадассурова. 60 В девятый день князь сынов Вениаминих, Авидан сын Гадеонин: 61 дар его блюдо серебряно едино, вес его сто и тридесять сикль: чашу едину серебряну седьдесят сикль, по сиклю святому: обоя полны муки пшеничны сопряжены с елеем на жертву: 62 фимиамник един десяти златник, полн фимиама: 63 телца единого от волов, овна единого, агнца единого единоплетна во всесожжение: 64 и козла от коз единого греха ради: 65 и на жертву спасения юницы две, овнов пять, козлов пять, агниц единоплетных пять: сей дар Авидана, сына Гадеонина. 66 В десятый день князь сынов Дановых, Ахизер сын Амисадаин: 67 дар его блюдо серебряно едино, вес его сто и тридесять сикль: чашу едину серебряну седьдесят сикль, по сиклю святому: обоя полны муки пшеничны сопряжены с елеем на жертву: 68 фимиамник един десяти златник, полн фимиама: 69 телца единого от волов, овна единого, агнца единого единоплетна во всесожжение: 70 и козла от коз единого греха ради: 71 и на жертву спасения юницы

две, овнов пять, козлов пять, агниц единоплетных пять: сей дар Ахиезера сына Амисадаина. 72 В первыйнадесять день князь сынов Асировых, Фагаиил сын Ехрань: 73 дар его блюдо серебряно едино, вес его сто и тридесять сикль: чашу едину серебряну седмьдесят сикль, по сиклю святому: обоя полны муки пшеничны сопряжены с елеем на жертву: 74 фимиамник един десяти златник, полн фимиама: 75 телца одинаго от волов, овна одинаго, агнца одинаго единоплетна во всесожжение: 76 и козла от коз одинаго греха ради: 77 и на жертву спасения юницы две, овнов пять, козлов пять, агниц единоплетных пять: сей дар Фагаиила сына Ехраня. 78 Во второйнадесять день князь сынов Неффалимних, Ахирей сын Енань: 79 дар его блюдо серебряно едино, вес его сто и тридесять сикль: чашу едину серебряну седмьдесят сикль, по сиклю святому: обоя полны муки пшеничны сопряжены с елеем на жертву: 80 фимиамник един десяти златник, полн фимиама: 81 телца одинаго от волов, овна одинаго, агнца одинаго единоплетна во всесожжение: 82 и козла от коз одинаго греха ради: 83 и на жертву спасения юницы две, овнов пять, козлов пять, агниц единоплетных пять: сей дар Ахиреа сына Енаня. 84 Сие обновление олтаря, в оньже день помаза его, от князей сынов Израилевых, блюд серебряных дванадесять, чаш серебряных дванадесять, фимиамников златых дванадесять: 85 по святу и тридесяти сикль в коемждо блюде, и по седмидесяти сикль чаша едина: всего серебра в сосудех две тысящы четьреста сиклев, по сиклю святому: 86 фимиамников златых дванадесять полных фимиама, по десяти златник в коемждо фимиамнике, по сиклю святому: всего злата в фимиамницех сто и двадесять

златник. 87 Всех говяд во всесожжение, телцов дванадесять, овнов дванадесять, агнцев единоплетных дванадесять, и жертвы их и возлияния их: и козлов от коз дванадесять, греха ради: 88 всех говяд на жертву спасения, юниц двадесять четыре, овнов шестьдесят, козлов единоплетных шестьдесят, агниц единоплетных непорочных шестьдесят. Сие обновление олтаря, по исполнении рук его и по помазании его. 89 Егда вхождаше Моисей в скинию свидения глаголати ему, и услыша глас Господа, глаголюща к нему свыше очистилища, еже есть над ковчегом свидения между двема херувимы: и глаголаше к нему.

**8** И рече Господь к Моисею, глаголя: 2 глаголи Аарону и речеши к нему: егда поставиши светила, от страны спреди светилника да светят седьм светила. 3 И сотвори тако Аарон: от единых страны спреди светилника возже светила его, якоже повеле Господь Моисею. 4 И сие устройство светилника: слияно злато стебель его и крины его, слияно все: по образу, егоже показа Господь Моисею, тако сотвори светилник. 5 И рече Господь к Моисею, глаголя: 6 поими левиты от среды сынов Израилевых, и да очистиши я: 7 и сице да сотвориши им очищение их: покропиши на них воду очищения, и да въздет бритва на все тело их, и исперут ризы своя, и чисти будут: 8 и да возмут телца единого от волов, и сего жертву муки пшеничны, сопряжены с елеем, и телца единоплетна от волов да возмеш греха ради: 9 и да приведеш левиты пред скинию свидения, и собереш весь сонм сынов Израилевых: 10 и приведеш левиты пред Господа, и да возложат сынове Израилстии руки своя на левиты: 11 и да отлучит Аарон левиты одание

пред Господа от сынов Израилевых, и да служат службы Господви: 12 левити же да возложат руки на главы телцев: и да сотвориши единого от гресе и единого во всесожжение Господу, умилостивити о них: 13 и поставиши левиты пред Господем и пред Аароном и пред сынми его, и отдаси я отдание Господу: 14 и да отлучиши левиты от среды сынов Израилевых, и будут Мне: 15 и по сих да внидут левиты делати дела скинии свидения: и да очистиши их, и отдаси я пред Господем: яко отдание отданы сии Мне суть от среды сынов Израилевых: 16 вместо отверзающих всяка ложесна первенцев всех от сынов Израилевых, приях я Себе: 17 яко Мне есть всяк первенец от сынов Израилевых, от человека до скота: в день в оньже поразих всякаго первенца в земли Египетстей, освятих я Себе, 18 и взях левиты вместо всякаго первенца сынов Израилевых, 19 и отдах левиты отданием Аарону и сыном его от среды сынов Израилевых делати дела сынов Израилевых в скинии свидения и умилостивляти о сынех Израилевых: да не будет язва на сынех Израилевых, внегда приступати им к святым. 20 И сотвори Моисей и Аарон и весь сонм сынов Израилевых левитом, якоже заповеда Господь Моисею о левитех, тако сотвориша им сынове Израилевы. 21 И очистишася левити и испраша ризы своя: и отдаде я Аарон отдание пред Господем, и помолися о них Аарон, очищения ради их. 22 И но сих внидоша левити служити службы своя в скинии свидения пред Аароном и пред сыны его: якоже повеле Господь Моисею о левитех, тако сотвориша им. 23 И рече Господь к Моисею глаголя: 24 сие есть еже о левитех: от двадесяти пяти лет и вышше, да внидут служити служение в скинии свидения: 25 и от



пятидесяти лет да отстанут от служения и не служат ктому.  
26 И да служат братия его в скинии свидения еже стрещи стражи, дел же да не делают. Тако сотвориши левитом в стражах их.

**9** И глагола Господь к Моисею в пустыни Синайстей, во второе лето изшедшим им из земли Египетския, в первый месяц, глаголя: 2 рцы да сотворят сынове Израилстии Пасху во время ея, 3 в четвертыйнадесять день месяца перваго к вечеру, и сотвориши ю во время ея: по закону ея и по уставу ея сотвориши ю. 4 И рече Моисей сыном Израилтеским сотворити Пасху. 5 И сотвориша Пасху, начинающуся первому месяцу в четвертыйнадесять день в пустыни Синайстей: якоже повеле Господь Моисею, тако сотвориша сынове Израилевы. 6 И придоша мужие, иже бяху нечисти о души человеки, и не можаху сотворити Пасхи в той день: и придоша пред Моисеа и Аарона в той день. 7 И рекоша мужие Онии к нему: мы нечисти есмы о души человеки: еда убо лишимся принести дар Господу во время свое посреде сынов Израилевых? 8 И рече Моисей к ним: станите ту, да яслышу, что повелит Господь о вас. 9 И рече Господь к Моисею, глаголя: 10 рцы сыном Израилевым, глаголя: человек человек, иже аще будет нечист о души человеки, или на пути далече, или в вас, или в родех ваших, и да сотворит Пасху Господу, 11 в месяц вторый, в четвертыйнадесять день (месяца) к вечеру да сотворят ю, со опресноки и с горьким зелием да снесят ю: 12 да не оставят от нея на утрие, и кости да не сокрушат от нея, по всему закону Пасхи да сотворят ю. 13 И человек, иже аще чист будет, и на пути далече несть, и оставит сотворити Пасху,

потребуется душа та от людей своих: яко дара Господви не принесе во время свое, грех свой примет человек той. 14 Аще же придет к вам пришлец в землю вашу и сотворит Пасху Господу, по закону Пасхи и по чину ея, тако сотворит ю: закон един да будет вам и пришелцу и туземцу. 15 И в день, в оньже поставися скиния, покры облак скинию и дом свидения: от вечера же бяше над скиниею аки вид огнен до заутрия: 16 тако бываше всегда: облак покрываше ю в день, и вид огнен нощию: , 17 и егда восхождаше облак от скинии, и по сих воздвизахуся сынове Израилтестии: и на месте, на немже стояше облак, тамо ополчахуся сынове Израилевы. 18 По повелению Господню да ополчаются сынове Израилевы и повелением Господним да воздвизаются: во вся дни, в няже осеняет облак над скиниею, да ополчаются сынове Израилевы: 19 и егда премедлит облак над скиниею дни многи, да стрегут сынове Израилтестии стражу Господню и да не воздвижутся: 20 и будет егда покрывает облак дни числа над скиниею, глаголголом Господним да ополчаются и повелением Господним да воздвижутся: 21 и будет егда пребудет облак от вечера до заутрия, и аще воздвигнется облак заутра, да воздвигнутся днем или нощию, 22 и аще воздвигнется облак, да пойдут: или день или месяц дней умножит облак осеняющь над нею, да ополчатся сынове Израилевы, и да не воздвизаются: во отступлении его, воздвизахуся: 23 яко повелением Господним да ополчаются и повелением Господним да воздвизаются: стражу Господню стрежаху по повелению Господню рукою Моисеовою.

**10** И рече Господь к Моисею, глаголя: 2 сотвори себе две трубы сребряны: кованы сотвориши я, и будут тебе на

созвание сонма и возставляти полки: **3** и да вострубиши ими, и да соберется к тебе весь сонм пред двери скинии свидения **4** аще же единою трубою вострубят, да приидут к тебе вси князи и тысященачалники Израилтестии: **5** и вострубите в знамение, и воздвигнутся полцы ополчающися на востоки: **6** и вострубите в знамение второе, и воздвигнутся полцы ополчающися от юга: и вострубите в знамение третье, и да воздвигнутся полцы ополчающися от моря: и вострубите в знамение четвертое, и воздвигнутся полцы ополчающися от севера: знаменем да вострубят в воздвижение их. **7** И егда соберете сонм, вострубите, не в знамение. **8** И сынове Аарони жерцы да вострубят трубами: и да будет вам законно вечно в роды ваша. **9** Аще же изыдете на брань в земли вашей к супостатом супротивящымся вам, и вострубите и назнаменуйте трубами, и воспомянетесь пред Господем и избавитесь от враг ваших. **10** И во днех веселия вашего и в праздницех ваших и в новомесячиих ваших вострубите трубами на всесожжения и на жертвы спасений ваших, и будет вам воспоминание пред Богом вашим: Аз Господь Бог ваш. **11** И бысть во второе лето, во второй месяц, в двадесятый месяца, вознесся облак от скинии свидения, **12** и воздвигошася сынове Израилевы со именами своими от пустыни Синайския, и ста облак в пустыни Фарани. **13** И воздвигошася первии по гласу Господню рукою Моисевою: **14** и воздвигоша знамя полка сынов Иудиных первии с силою своею: и над силою их Наассон сын Аминадавль: **15** и над силою племени сынов Иссахаровых Нафанаил сын Согаров: **16** и над силою племени сынов Завулоних Елиав сын Хелонь. **17** И сложиша скинию, и воздвигоша сынове Гирсони и

сынове Мерарины, носящие скинию. 18 И воздвигоша знамя полка Рувимля с силою своею: и над силою их Елисур сын Седиуров: 19 и над силою племени сынов Симеоних Саламиил сын Сурисадаев: 20 и над силою племени сынов Гадовых Елисаф сын Рагуилев: 21 и воздвигошася сынове Каафовы, воздвизающие святая: и поставиша скинию, дондеже приидоша. 22 И воздвигоша знамя полка Ефремля с силою своею: и над силою их Елисама сын Емиудов: 23 и над силою племени сынов Манассииных Гамалиил сын Фадассуров: 24 и над силою племени сынов Вениаминих Авидан сын Гадеонин. 25 И воздвигоша знамя полка сынов Дановых, последний всех полков с силою своею: и над силою их Ахизер сын Амисадаев: 26 и над силою племени сынов Асировых Фагаиил сын Ехрань: 27 и над силою племени сынов Неффалимлях Ахирей сын Енань. 28 Сии полцы сынов Израилевых, и воздвигошася с силою своею. 29 И рече Моисей Иоваву сыну Рагуилеву Маданитину, тестю Моисеову: воздвизаемся мы на место, о немже Господь рече: сие дам вам: пойдь с нами, и сотворим тебе добро, яко Господь добрая глагола о Израили. 30 И отвеща к нему: не пойду, но в землю мою и в род мой иду. 31 И рече: не остави нас, понеже был еси с нами в пустыни, и будещи в нас старейшина: 32 и будет аще пойдещи с нами, и будут благая она, елика благосотворит Господь нам, благосотворим и тебе. 33 И отидоша от горы Господни в путь трех дний: и кивот завета Господня предидяше пред ними в путь трех дний, соглядати им стана. 34 И бысть егда воздвизаху кивот, и рече Моисей: востани, Господи, и да разсыплются врази Твои, и да бежат вси ненавидящие Тебе. 35 И в поставлении

(кивота) рече: возвращай, Господи, тысящи тем во Израили.

36 И облак Господнь бысть осеняющь над ними в день, егда воздвизахуся из полка.

**11** И быша людие ропщуще злая пред Господем: и слыша Господь и разгневался гневом, и разгореся в них огонь от Господа и потреби часть некую от полка. 2 И возопиша людие к Моисею: и помолися Моисей к Господу, и преста огонь. 3 И прозвася имя месту тому Запаление: яко разгореся в них огонь от Господа. 4 И общий народ иже в них похотеша похотением: и седше плакахуся сынове Израилевы и рекоша: кто ны напитает мясы? 5 Помянухом рыбы, яже ядохом в земли Египетстей туне, и огурцы и дыни, лук и червленьй лук и чеснок: 6 ныне же душа наша изсохла, ничтоже точию манна пред очима нашима. 7 Манна же бяше аки семя кориандрово, и вид ея яко вид кристалла: 8 и исхождаху людие и собираху, и меляху в жерновах и толцаху в ступах, и варяху в горшках и творяху из нея потребники: и бяше вкус ея, яко вкус муки пряжены с елеем: 9 и егда сходяше роса на полк нощию, сходяше манна нань. 10 И услыша Моисей плачущихся их в сонмех своих, коегождо их пред своими дверми: и разгневался Господь гневом зело, и пред Моисеом бяше зло. 11 И рече Моисей ко Господу: вскую озлобил еси раба Твоего? И почто не обретох благодати пред Тобою, еже возложить устремление людий сих на мя? 12 Еда аз во утробе зачах вся люди сия? Или аз родих я? Яко глаголеши ми: возми их в недра твоя, якоже доилица носит доимья, в землю, еуже клялся еси отцем их: 13 откуда мне мяса дати всем людем сим? Яко плачут на мя, глаголюще: даждь нам мяса, да ядим: 14 не возмогу аз един водити людий сих, яко

тяжко мне есть слово сие: 15 аще же тако Ты твориши мне, то убий мя убиением, аще обретох благодать пред Тобою, да не вижу озлобления моего. 16 И рече Господь к Моисею: собери Ми семьдесят мужей от старец Израилевых, ихже ты сам веси, яко тии суть старцы людстии и книгочия их: и да приведеш я ко скинии свидения, и да станут тамо с тобою: 17 и сниду и возглаголю тамо с тобою, и уйму от Духа, иже в тебе, и возложу на ня: да подимут с тобою устремление людий, и не будеш водити их ты един: 18 и людем речеши: очиститесь наутрие, и снесите мяса, яко плакастеся пред Господем, глаголюще: кто ны напитает мясы? Яко добро нам бысть во Египте: и даст Господь вам мяса ясти, и снесите мяса: 19 не един день ясти будете, ни два, ни пять дний, ни десять дний, ниже двадесять дний: 20 до месяца дний ясти будете, дондеже изыдет из ноздрий ваших: и будет вам в мерзость, яко не покористеся Господу, Иже есть в вас, и плакастеся пред Ним, глаголюще: вскую бе нам изыти из Египта? 21 И рече Моисей: шесть сот тысяч пеших людий, в нихже аз есмь, и Ты рекл еси: мяса им дам ясти, и будут ясти месяц дний: 22 еда овцы и волы заколются им, и довольно будет им? Или вся рыбы морския соберутся им, и довольно будет им? 23 И рече Господь к Моисею: еда рука Господня не довольно будет? Ныне уразумееш, аще постигнет тя слово Мое, или ни. 24 И изыде Моисей и глагола людем словеса Господня: и собра семьдесят мужей от старец людских, и постави я окрест скинии. 25 И сниде Господь во облаце и глагола к нему: и уя от Духа, иже на нем, и возложи на семьдесят мужей старец: егда же препочи Дух на них, и пророчествоваша, и ктому не приложиша.

26 И осташася два мужа в полце: имя единому Елдад, и имя второму Модад: и препочи на них Дух. И сии беша от вписанных, и не приидоша ко скинии, и пророчествоваша в полце. 27 И притек юноша возвести Моисею, и рече, глаголя: Елдад и Модад пророчествуют в полцех. 28 И отвещав Иисус Навин, предстояй Моисею избранный ему, рече господи мой Моисею, запрети им. 29 И рече ему Моисей: еда ревнуеши ты мне? И кто даст всем людем Господним (быти) пророки, егда даст Господь Духа Своего на них? 30 И иде Моисей в полк сам и старцы Израилтестии. 31 И дух изыде от Господа, и изведе крастели из моря и наведе на полк день ходу отсюда и день ходу отнюду, окрест полка яко на два лактя от земли. 32 И воставше людие весь день и всю ночь, и весь день наутрие, и собраша крастели: иже мало, собра десять спуд: и иссушиша себе сушаницы окрест полка. 33 И мяса бяху им еще в зубех их, прежде оскудения, и Господь разгневался зело на люди, и порази Господь люди язвою великою зело: 34 и прозвася имя месту тому Гробы Похотения: яко тамо погребоша людий похотевших. 35 (И) воздвигошася людие от Гробов Похотения во Асироф, и быша людие во Асирофе.

**12** И возглаголаста Мариам и Аарон на Моисея жены ради Ефиопляныни, юже поя Моисей, ибо жену поя Ефиопляныню, 2 и рекоста: еда Моисею единому глагола Господь? Еда и нам не глаголаше? И услыша Господь. 3 И человек Моисей кроток зело паче всех человек сущих на земли. 4 И рече Господь внезапно к Моисею и Аарону и Мариаме: изыдите вы трие в скинию свидения. 5 И изыдоша трие в скинию свидения. И сниде Господь в столпе облачне ста над дверми скинии свидения: и призва Аарона и Мариам. И изыдоста

оба. 6 И рече к ним: послушайте словес Моих: аще будет в вас пророк Господнь, в видении ему познаюся, и во сне возглаголю ему: 7 не тако якоже раб Мой Моисей, во всем дому Моем верен есть: 8 усты ко устом возглаголю ему яве, и не гаданием, и славу Господню виде: и почто не убоястесь глаголати на раба Моего Моисеа? 9 И гнев ярости Господни (бысть) на них. И отиде. 10 И облак отступи от скинии, и се, Мариам прокажена бысть яко снег: и воззре Аарон на Мариам, и се, прокажена. 11 И рече Аарон к Моисею: молю тя, господи, не возлагай на ны греха, понеже не ведяхом, яко согрешихом: 12 да не будет сия яко мертва, яко изверг извержен из ложесн матерних, и (се, уже) пояде пол плоти ея. 13 И возопи Моисей ко Господу, глаголя: Боже, молютися, исцели ю. 14 И рече Господь к Моисею: аще бы отец ея плюя заплевал в лице ея, не посрамится ли седьм дний? Да отлучится седьм дний вне полка, и по сих да внидет. 15 И отлучися Мариам вне полка на седьм дний: и людие не воздвигошася, дондеже очистися Мариам. 16 И по сих воздвигошася людие от Асирофа и ополчишася в пустыни Фарани.

**13** И рече Господь к Моисею, глаголя: 2 послы от себе мужы, и да соглядают землю Ханаанску, юже Аз даю сыном Израилевым во одержание: мужа единаго от племени, по сонмом отечеств их, да послещи их всякаго старейшину от них. 3 И посла я Моисей от пустыни Фарани глаголголом Господним: вси мужи старейшины сынов Израилевых сии, и сия имена их: 4 от племени Рувимля Самуил сын Захуров: 5 от племени Симеоня Сафат сын Сурин: 6 от племени Иудина Халев сын Иефоннин: 7 от племени Иссахаря Игал



сын Иосифль: 8 от племени Ефремля Авсис сын Навин: 9 от племени Вениамина Фалтий сын Рафуов: 10 от племени Завулоня Гудиил сын Судин: 11 от племени Иосифля сынов Манасииных Гадди сын Сусин: 12 от племени Данова Амиил сын Гамалин: 13 от племени Асирова Сафур сын Михаиль: 14 от племени Неффалимля Навий сын Савинь: 15 от племени Гадова Гудиил сын Махииль. 16 Сия имена мужей, ихже посла Моисей соглядати землю: и прозва Моисей Авсия сына Навина Иисус. 17 И посла я Моисей от пустыни Фарани соглядати земли Ханаанския, и рече к ним: взыдите пустынею сею, и взыдете на гору. 18 И узрите землю, какова есть, и люди сидящыя на ней, аще сильни суть, или немощни, мало ли их есть, или много? 19 И какова земля, на нейже сии седят, добра ли есть, или зла? И какови гради, в нихже живут сии, ограждени ли суть, или не ограждени? 20 И какова земля, изюбилна ли, или не изюбилна? Суть ли на ней дрeвеса, или ни? И укрепившеся, возьмите от плодов земли. Дние же бяху весенни, предваряющии ягоды. 21 И шедше соглядаша землю от пустыни Син даже до Роова, до входов Емаф. 22 И идоша по пустыни, и приидоша до Хеврона: и тамо (живяше) Ахиман и Сессий и Феламин, роды Енаковы: и Хеврон создася седмью леты прежде Танина (града) Египетскаго. 23 И приидоша до дебри Гроздныя, и соглядаша ю: и урезаша оттуду ветвь, и грозд винограда един на ней, и воздвигоша ю на жердь, и от шипков, и от смоквей. 24 И место оно назваша дебрь Гроздная, грозда ради, егоже урезаша оттуду сынове Израилтестии. 25 И возвратишася оттуду, соглядавшe землю по чeтырeдeсяти днeх. 26 И ходивше приидоша к Моисею и Аарону и ко всему

сонму сынов Израилевых в пустыню Фараню в Кадис: и поведаша им слово и всему сонму, и показаша им плод земный., 27 и поведаша ему, и рекоша: ходихом на землю, на нюже посылал еси нас, на землю кипящую млеко и медом, и сий плод ея: 28 кроме яко людие сильни зело, иже на ней живут, и гради утверждени ограждением велицы зело, и род Енаков видехом тамо: 29 и Амалик живет в земли к югу: и Хеттей и Евей, и Иевусей и Аморрей живут в горах: и Хананей живет при мори и при Иордане реце. 30 И утиши Халев люди пред Моисеом, и рече ему: никакоже, на восходя взыдем и приимем ю в наследие, яко сильни есмы преодолети им. 31 И человецы ходившии с ним рекоша: не идем, яко не можем изыти противу языку (сему), яко крепльший есть паче нас. 32 И изнесоша ужас земли, юже соглядаша, к сыном Израилевым, глаголюще: землю юже проидохом соглядающе, земля есть поядающи живуцья на ней, и вси люди, ихже видехом на ней, мужи превысоцыи: 33 и тамо видехом исполины, сыны Енаковы, и бехом пред ними яко пружи, и тако бехом пред ними.

**14** И взем весь сонм, даде глас: и плакахуся людие всю ночь ту: 2 и роптаху на Моисеа и Аарона вси сынове Израилтестии, и рекоша к ним весь сонм: 3 о дабы умерли быхом в земли Египетстей, или в пустыни сей да быхом умерли: и вскую вводит нас Господь в землю сию, еже пасти на брани? Жены наша и дети наша будут в разграбление: ныне убо лучше есть нам возвратитися во Египет. 4 И рече друг ко другу: поставим себе старейшину, и возвратимся бо Египет. 5 И падоста Моисей и Аарон ниц пред всем сонмом сынов Израилевых. 6 Иисус же сын Навин и Халев сын

Иефонниин от соглядавших землю, растерзаста ризы своя.  
7 И рекоста ко всему сонму сынов Израилевых, глаголюще:  
земля, юже соглядахом, добра есть зело зело: 8 аще любит  
нас Господь, введет нас в землю ту и даст ю нам: земля же  
есть кипящая медом и млеко: 9 но от Господа не будите  
отступницы: вы же не убойтесе людей земли тоя, понеже  
в снесь нам есть: отступило бо время от них, Господь же  
с нами: не убойтесе их. 10 И рече весь сонм побити их  
камением: и слава Господня явися во облаце над скиниею  
свидения всем сыном Израилевым. 11 И рече Господь к  
Моисею: доколе преогорчевают Мя людие сии? И доколе  
не веруют Мне во всех знамениих, яже сотворих в них?  
12 Поражу их смертию и погублю их: и сотворю тя и дом  
отца твоего в язык велик и мног паче нежели сей. 13 И  
рече Моисей ко Господу: иуслышат Египтяне, яко возвел  
еси крепостию Твоею люди Твоя сия от них: 14 но и вси  
живущии на земли сей слышаша, яко Ты еси Господь в  
людех сих, иже очима ко очесем являешися, Господи, и облак  
Твой ста над ними, и столпом облачным идеши Ты пред  
ними в день, и столпом огненным в нощи: 15 и потребиши  
люди сия аки единого человека: и рекут вси языцы, елицы  
слышаша имя Твое, глаголюще: 16 занеже не возможе  
Господь людей Своих ввести в землю, о нейже клятся им,  
погуби их в пустыни: 17 и ныне да вознесется рука Твоя,  
Господи, якоже рекл еси, глаголя: 18 Господь долготерпелив  
и многомилостив и истинен, отемляй беззакония и неправды  
и грехи, и очищением не очистит повинного, отдавая грехи  
отцев на чада, до третьего и четвертаго рода: 19 остави грех  
людем сим по велицей милости Твоей, якоже милостив был

еси им от Египта даже до ныне. 20 И рече Господь к Моисею: милостив им есмь по словеси твоему: 21 но живу Аз, и присно живет имя Мое, и наполнит слава Господня всю землю: 22 яко вси мужие видяции славу Мою и знамения, яже сотворих во Египте и в пустыни сей, и искусиша Мя, се, десятое, и не послушаша гласа Моего, 23 истинно не узрят земли, еюже кляхся отцем их: разве чадом их, яже суть со Мною zde, иже не ведят добра и зла, всяк юноша не ведый, сим дам землю: вси же разгневавши Мя не узрят ю: 24 раб же Мой Халев, яко бысть дух ин в нем, и возследова Мне, введу его в землю, в нюже ходил тамо, и семя его наследит ю: 25 Амалик же и Хананей живут во юдоли: утре возвратитесь и подвигнитесь вы в пустыню путем моря Чермнаго. 26 И рече Господь к Моисею и Аарону, глаголя: 27 доколе сонм сей злый? Яже они ропщут противу Мне, роптание сынов Израилевых, имже возропташа о вас, слышах: 28 рцы им: живу Аз, глаголет Господь: истинно, якоже глаголасте во уши Мои, тако сотворю вам: 29 в пустыни сей падут телеса ваша, и все соглядание ваше, и сочтения ваша, от двадесяти лет и вышше, елицы ропташа на Мя: 30 аще вы внидете в землю, на нюже прострох руку Мою, вселити вас на ней, разве Халев сын Иефонниин и Иисус сын Навин: 31 и чада ваша, ихже ресте в разграблении быти, введу Я в землю, и наследят землю, от неяже вы отвергостесь: 32 и телеса ваша падут в пустыни сей: 33 сынове же ваши пасоми будут в пустыни четыредесять лет, и носити имут блужение ваше, дондеже потребятся телеса ваша в пустыни: 34 по числу дний, в нихже соглядаете землю, четыредесять дний, за день лето целое, понесете грехи ваша четыредесять лет, и увесте

ярость гнева Моего: **35** Аз Господь глаголах вам: истинно тако сотворю сонму сему злому, воставшему на Мя: в пустыни сей потребятся, и тамо измрут. **36** И мужие, ихже посылал Моисей соглядати землю, и пришедше возропташа на ню к сонму, еже бы изнести словеса зла о земли, **37** и изомроша мужи, глаголавшии о земли зло, язвою пред Господем: **38** и Иисус сын Навин и Халев сын Иефонниин живы останахот от мужей тех ходивших соглядати землю. **39** И глагола Моисей словеса сия ко всем сыном Израилевым: и восплакашася людие зело, **40** и воставше заутра, възыдоша на верх горы, глаголюще: се, мы възыдем на место, еже рече Господь, яко согрешихом. **41** И рече Моисей: вскую вы преступаете слово Господне? Не благопоспешно будет вам: **42** не восходите: несть бо Господь с вами: и падете пред лицем враг ваших: **43** зане Амалик и Хананей тамо пред вами, и падете мечем, понеже отвратистеся, не покаяющеся Господу, и не будет Господь с вами. **44** И понудившеся възыдоша на верх горы: кивот же завета Господня и Моисей не двигнушася из среды полка. **45** И сниде Амалик и Хананей седяи в горе той, и сотроша их, и изсекоша их даже до Ермана: и возвратишася в полк.

**15** И рече Господь к Моисею, глаголя: **2** глаголи сыном Израилевым и речеши к ним: егда внидете в землю вселения вашего, юже Аз даю вам, **3** и сотворите принос Господу во всеожжение или жертву, еже возвеличити мольбу, или благовольну, или в праздники ваша в воню благовония Господу, аще убо от волов, или от овец: **4** и да принесет приносяи дар свой Господу жертву, муки пшеничны десятую часть ефи (меры), вмешены в елей четвертыя части ина

(меры): 5 и вина на возлияние четвертую часть ина сотворите во всесожжение или в жертву: агнцу единому да сотвориши толико, принос воню благовония Господу. 6 И овну, егда творите его во всесожжение или в жертву, да сотвориши жертву муки пшеничны две десятины вмешаны в елеи, третью часть ина (меры): 7 и вина на возлияние третью часть ина принесете в воню благовония Господу. 8 Аще же творите от волов во всесожжение или в жертву, еже возвеличити мольбу, или во спасительное Господу, 9 и принесет с телцем принос муки пшеничны три десятины вмешаны в елей, пол ина (меры): 10 и вина на возлияние пол ина (меры), принос в воню благовония Господу. 11 Тако да сотвориши телцу единому, или овну единому, или агнцу единому от овец или от коз: 12 по числу их, яже аще сотворите, тако сотворите единому по числу их. 13 Всяк туземец да сотворит тако сицевая принести приношения в воню благовония Господу: 14 аще же пришлец в вас прибудет в земли вашей, или иже аще будет в вас в родех ваших, и сотворит принос в воню благовония Господу, якоже творите вы, тако да сотворит. 15 Сонме Господнь, закон един да будет вам и пришелцем прилежащым в вас, закон вечный в роды ваша: якоже вы, (тако) и пришлец да будет пред Господем: 16 закон един да будет и оправдание едино да будет вам и пришелцу прилежащему в вас. 17 И рече Господь к Моисею, глаголя: 18 глаголи сыном Израилевым и речеши к ним: егда внидете в землю, в нуже Аз ввожду вас тамо, 19 и будет егда ясте от хлебов земли (тоя), отложите участие во отделение Господу: начаток теста вашего, 20 хлеб отлучите участие оное: якоже участие от гумна, 21 тако отделите той хлеб, начаток теста

вашего, и дадите Господу участие в роды ваша. 22 Егда же согрешите и не сотворите всех заповедий сих, иже глагола Господь Моисею, 23 якоже повеле Господь Бог к вам рукою Моисеовою, от дне в оньже повеле Господь к вам, и потом в роды ваша, 24 и будет аще от очес сонма сотворится неволею, и да сотворит весь сонм телца единого непорочна от волов во всесождение, в воню благовония Господу, и жертву сего, и возлияние его по уставлению, и козла единого от коз греха ради: 25 и да помолится жрец от всем сонме сынов Израилевых, и оставится им, яко нехотение есть: и сии принесоша дар свой, принесение Господу греха ради своего пред Господем, нехотений ради своих, 26 и оставится всему сонму сынов Израилевых и пришелцу прилежащему в вас, яко всем людям нехотенное. 27 Аще же душа едина не хотящи согрешит, да приведет козу едину единоголетну греха ради: 28 и да помолится жрец о души нехотевшей и согрешшей нехотением пред Господем, и да помолится о ней, и оставится ей. 29 Населнику (земли) сынов Израилевых и пришелцу прилежащему в них, закон един да будет им, иже аще сотворит не хотящъ. 30 И душа яже сотворит рукою гордости от туземец или от пришелцев, Бога сия разгневает, и потребится душа та от людей своих: 31 яко слово Господне презре и заповеди Его разсыпа, сотрением да сотрется душа та: и грех ея на ней. 32 И бяху сынове Израилевы в пустыни, и обретоша мужа собирающа дрова в день субботный, 33 и приведоша его обретшии собирающа дрова в день субботный к Моисею и Аарону и ко всему сонму сынов Израилевых, 34 и ввергоша его в темницу: не совещаща бо, что сотворят ему. 35 И рече Господь к Моисею,

глаголя: смертию да умрет человек сей, да побиете его камением весь сонм вне полка. 36 И изведоша его весь сонм вне полка, и побиа его камением весь сонм вне полка, якоже глагола Господь Моисею. 37 И рече Господь к Моисею, глаголя: 38 глаголи сыном Израилевым и речеши им: и да сотворят себе рясны на воскрилиих риз своих в роды своя: и возложите на рясны воскрилий прядение синее, 39 и будет вам на ряснах: и узрите их, и вспомянете вся заповеди Господни и сотворите я, и не развратитесь вслед мыслей своих и вслед очес ваших, имиже вы соблудисте вслед их: 40 яко да помянете и сотворите вся заповеди Моя, и будете святы Богу вашему: 41 Аз Господь Бог ваш, изведый вас из земли Египетския, быти вам Бог: Аз Господь Бог ваш.

**16** И глагола Корей, сын Иссаара сына Каафа сына Левиина, и Дафан и Авирон, сынове Елиавли, и Авнан сын Фалефа сына Рувимля: 2 и востаха на Моисея, и мужи сынов Израилевых двести и пятьдесят начальницы сонма, сигклитики совета и мужи именити. 3 Совосташа на Моисея и Аарона и реша к ним: довлеет вам, яко весь сонм вси святы, и в них Господь: и чесо ради востаете на сонм Господнь? 4 И слышав Моисей, паде ниц. 5 И глагола к Корейю и ко всему сонму его, глаголя: согляда и позна Господь сущих Его и святых, и приведе к Себе: и ихже не избра Себе, не приведе к себе: 6 сие сотворите: возьмите себе сами кадилники, Корей и весь сонм его, 7 и вложите огонь в ня, и вложите в ня фимиам пред Господем утре: и будет муж, егоже аще изберет Господь, сей свят: да довлеют вам сынове Левиины. 8 И рече Моисей Корейю: послушайте мене, сынове Левиини: 9 еда мало есть сие вам, яко отлучи



вас Бог от сонма Израилева и приведе вас к Себе служити службы в скинии Господни и стояти пред сонмом Господним, еже служити им? **10** И приведе тя и всю братию твою, сыны Левиины с тобою, и просите священствовати? **11** Тако ты и весь сонм твой собравшийся на Бога: и Аарон кто есть, яко ропщете нашь? **12** И посла Моисей призвати Дафана и Авирона, сыны Елиавли. И реша: не идем: **13** еда мало се, яко извел еси ны из земли кипящия млеко и медом, еже погубити нас в пустыни, яко владееши нами? Князь еси: **14** и ты ли в землю кипящую медом и млеко ввел еси нас и дал еси нам часть села и винограда? Очи человек тех изткнул еси: не идем. **15** И отягча Моисей гневом зело и рече к Господу: не внемли на жертву их: ни единого похотения от них приях, ниже озлобих кого от них. **16** И рече Моисей к Корею: освяти сонм твой, и будите готови пред Господа ты и Аарон и они заутра: **17** и возьмите кийждо кадилник свой, и возложите на ня фимиам, и принесите пред Господа кийждо кадилник свой, двести и пятьдесят кадилников, и ты и Аарон кийждо кадилник свой. **18** И взяша кийждо свой кадилник, и возложиша на ня огонь, и вложиша в ня фимиам, и сташа пред дверми скинии свидения Моисей и Аарон. **19** И собра на ня Кореи весь сонм свой пред дверми скинии свидения: и явися слава Господня всему сонму. **20** И рече Господь к Моисею и Аарону, глаголя: **21** отступите кийждо от среды сонма сего, и потреблю Я абие. **22** И падоста на лица своя и рекоста: Боже, Боже духов и всякия плоти: аще человек един согрешит, на весь ли сонм гнев Господень? **23** И рече Господь к Моисею, глаголя: **24** рцы сонму, глаголя: отступите окрест от сонма Кореева и Дафаня и Авироня. **25** И воста

Моисей, и иде к Дафану и Авирону: и идоша с ним вси старцы Израилтестии. 26 И рече к сонму, глаголя: отступите от кущ человек жестокосердых сих, и не прикоснитесь ко всем, елика суть им, да не погибнете купно во всем гресе их. 27 И отступиша от кущ Кореа и Дафана и Авирона окрест: Дафан же и Авирон изыдоста и стапта пред дверми кущ своих, и жены их, и дети их и имение их. 28 И рече Моисей: в сем познаете, яко Господь посла мя сотворити вся дела сия, яко не от себе (аз творю сия): 29 аще смертью всех людей умрут сии, и аще по присещению всех человек посещение будет их, то не Господь посла мене: 30 но явно покажет Господь, и отверзши земля уста своя пожрет я и дома их, и кущы их и вся, елика суть их, и снидут живи во ад, и уведите, яко разгневаша человецы сии Господа. (Sheol h7585) 31 Егда же преста глаголя вся словеса сия, разседеса земля под ногами их: 32 и разверзеса земля, и пожре я и дома их, и вся люди сущыя с Кореом, и скоты их: 33 и снидоша тии, и вся, елика суть их, живи во ад, и покры их земля, и погибоша от среды сонма: (Sheol h7585) 34 и весь Израиль, и иже окрест их, отбегоша от вопля их, зане рекоша, глаголюще: да не пожрет нас земля. 35 И огонь изыде от Господа и пояде двести и пятьдесят мужей принесших фимиам. 36 И рече Господь к Моисею. 37 И ко Елеазару сыну Ааронову жерцу: соберите кадилники медяныя от среды изгоревших, и огонь чуждий сей разсыплите тамо, яко освятишася кадилницы грешных сих в душах их: 38 и сотворите я дщицы кованы, обложение у олтаря, яко принесошася пред Господа и освятишася, и быша в знамение сыном Израилевым. 39 И взя Елеазар сын Аарона жерца кадилники медяныя,

елики принесоша изгоревшии, и обложиша я во обложение  
олтаря, **40** в память сыном Израилевым яко да никтоже  
приидет иноплеменник, иже несть от семени Аарона, еже  
возложить фимиам пред Господем, и да не будет, якоже  
Корей и советницы его, якоже глагола ему Господь рукою  
Моисевою. **41** И возропташа сынове Израилтестии на  
утрие на Моисеа и Аарона, глаголюще: вы избисте люди  
Господни. **42** И бысть егда нападе сонм на Моисеа и Аарона,  
и устремишася к скинии свидения: **43** и покры оную облак, и  
явися слава Господня: и вниде Моисей и Аарон пред скинию  
свидения. **44** И рече Господь к Моисею и Аарону, глаголя: **45**  
уступите от среды сонма сего и потреблю я единицею. И  
падоста на лица своя. **46** И рече Моисей ко Аарону: возми  
кадилник, и вложи в него огонь от олтаря, и возложи нань  
фимиам, и понеси скоро в полк, и помолися о них: изыде бо  
гнев от лица Господня, и нача губити люди. **47** И взя Аарон,  
якоже глагола ему Моисей, и тече в сонм, уже бо начася  
пагуба в людех: и возложи фимиам, и помолися о людех:  
**48** и ста между мертвыми и живыми, и преста пагуба. **49** И  
бысть умерших в пагубе четырнадцать тысящ и седмь  
сот кроме умерших Кореа ради. **50** И возвратися Аарон к  
Моисею, к дверем скинии свидения, и преста пагуба.

**17** И рече Господь к Моисею, глаголя: **2** глаголи сыном  
Израилевым, и возми от них но единому жезлу, жезл от всех  
князей их, по домом отечества их, дванадесять жезлов, имя  
же коегождо напиши на жезле его, **3** и имя Аароне напиши на  
жезле Левиине: есть бо жезл един: по племени дому отечеств  
своих да дадят: **4** и да положиши их в скинии свидения,  
прямо свидению, в нихже явлюся тебе ту: **5** и будет человек,

егоже аще изберу, жезл его прозябнет: и отиму от мене роптание сынов Израилевых, елика сии ропщут на вы. 6 И глагола Моисей сыном Израилевым: и даша ему вси князи их по жезлу, князя единаго жезл, по княжению, по домом отечеств их, дванадесять жезлов: и жезл Ааронь посреде жезлов их. 7 И положи Моисей жезлы пред Господем в скинии свидения. 8 И бысть на утрие, и вниде Моисей и Аарон в скинию свидения: и се, прозябе жезл Ааронь в дому Левиине, и израсти ветвь, и процветоша цвети, и израсти орехи: 9 и изнесе Моисей вся жезлы от лица Господня ко всем сыном Израилевым: и видеша, и взя кийждо жезл свой. 10 И рече Господь к Моисею: отложи жезл Ааронь пред свидением в сохранение, в знамение сынов ослушливых: и да престанет роптание их от Мене, и не измрут. 11 И сотвори Моисей и Аарон, якоже повеле Господь Моисею, тако сотвориша. 12 И рекоша сынове Израилевы к Моисею, глаголюще: се, потребихомся, погибохом, исчезохом: 13 всяк прикасаясь ко скинии свидения Господня умирает: даже до конца ли умирающе погубнем?

**18** И рече Господь ко Аарону, глаголя: ты и сынове твои, и дом отца твоего с тобою, возьмите грехи святых, ты же и сынове твои возьмите грехи жречества вашего: 2 и братию твою, племя Левиино, сонм отца твоего приведи к себе, и да приложатся к тебе, и да служат тебе, и ты и сынове твои с тобою пред скиниею свидения, 3 и да блюдут стражбы твоя и стражбы скинии: токмо к сосудом святым и ко олтарю да не приступают, да не измрут и сии, и вы: 4 и приложатся к тебе и да блюдут стражбы скинии свидения по всем службам скинии, и иноплеменник да не приступит к тебе, 5 и

соблюдете стражбы святых и стражбы олтаря, и не будет ктому гнева на сынех Израилевых: 6 и Аз взял братию вашу левиты от среды сынов Израилевых в дар данный Господу служити службы скинии свидения. 7 И ты и сынове твои с тобою сохраните жречество ваше по всему образу олтаря, и еже внутрь завесы, и да служите службы в дар жречества вашего: и иноплеменник приступая умрет. 8 И рече Господь ко Аарону: и се, Аз дах вам снабдение начатков моих от всех освященных Мне от сынов Израилевых: тебе дах я в честь, и сыном твоим по тебе законно вечно: 9 и сие да будет вам от освященных святых приношений, от всех даров их и от всех жертв их, и от всякаго преступления их и от всех грех их, елика отдают Мне, от всех святынь, тебе да будут и сыном твоим. 10 Во святем святых ядите я: всяк мужеский пол да яст я, ты и сынове твои: свята будут тебе. 11 И сие да будет вам от начатков даяний их, от всех возложений сынов Израилевых: тебе дах я, и сыном твоим и дщерем твоим с тобою, законно вечно: всяк чистый в дому твоём да яст я. 12 Всяк начаток елеа, и всяк начаток вина и пшеницы, начаток их, елика аще отдадут Господу, тебе дах я: первородная вся елика в земли их, елика аще принесут Господу, тебе да будут: 13 всяк чистый в дому твоём да яст я. 14 Всяко освященное в сынех Израилевых тебе да будет, 15 и всякое разверзающее всяка ложесна от всякия плоти, елика приносят Господу, от человека до скота, тебе да будут: но токмо искуплением искупятся первенцы человечести, и первенцы скотов нечистых да искупятся: 16 и искуп его от единого месяца, сценение пять сикль, по сиклю святому: двадцать медниц есть: 17 обаче первородная телцев и

первородная овец и первородная коз да не искупятся: свята суть: и кровь их пролиеши у олтаря, и тук принесеши принос в воню благовония Господу. 18 И мяса тебе да будут, якоже и груди возложения: и по раму десному тебе да будут. 19 Всяко участие святых, елика аще отлучат сынове Израилтестии Господу, тебе дах и сыном твоим и дщерем твоим с тобою, законно вечно: завет соли вечныя есть пред Господем, тебе и семени твоему по тебе. 20 И рече Господь ко Аарону: в земли их да не наследиши наследия, и части да не будет тебе в них: яко Аз часть твоя и наследие твое посреде сынов Израилевых. 21 И сыном Левиным, се, дах всю десятину во Израили в жребий за службы их, елико служат тии служение в скинии свидения: 22 и да не приступают по сем сынове Израилтестии к скинии свидения прияти грех смертоносный: 23 и да служат левити сами службу скинии свидения, и тии возмут грехи их: законно вечно в роды их: и посреде сынов Израилевых да не наследят наследия: 24 яко десятины сынов Израилевых, елики аще отлучат Господу, участие дах левитом в жребий: сего ради рекох им: среди сынов Израилевых да не наследят жребия. 25 И рече Господь к Моисею, глаголя: 26 и левитом да глаголеши и речеши к ним: аще возьмете десятину от сынов Израилевых, юже дах вам от них во жребий, и отделите вы от нея участие Господу, десятину от десятины ея, 27 и вменятся вам участия ваша яко пшеница от гумна и яко участие от точила: 28 тако отделите их и вы от всех частей Господних, от всех десятин ваших, елики аще возьмете от сынов Израилевых, и дадите от них участие Господу, Аарону жерцу: 29 от всех даяний ваших отделите участие Господу, или от всех начатков освященное

от него, **30** и речеши к ним: егда отделите начаток от него, и вменится левитом аки жито от гумна и яко участие от точила: **31** и ядите то во всяком месте вы и сынове ваши и домовые ваши, яко мзда сия вам есть за службы ваша, яже в скинии свидения: **32** и не примете за сие греха, яко аще отлучите начаток от него: и святынь сынов Израилевых не оскверните, да не умрете.

**19** И рече Господь к Моисею и Аарону, глаголя: **2** се, расположение закона, елика заповеда Господь, глаголя: глаголи сыном Израилевым, и да приведут к тебе юницу рыжу непорочну, яже не имать на себе порока, и на нюже не бе возложено иго: **3** и даси ю ко Елеазару жерцу: и да изведут ю вне полка на место чисто, и да заколют ю пред ним: **4** и да возмет Елеазар от крове ея и да покропит спреди скинии свидения от крове ея седмижды: **5** и да сожгут ю пред ним, и кожу ея и мяса ея и кровь ея с мотылы ея да сожгут: **6** и да возмет жрец древо кедрово, и иссоп, и соскание червленое, и да вложат в средину сожжения юницы: **7** и да измыет ризы своя жрец и да омыет тело свое водою, и потом да внидет в полк, и нечист будет жрец до вечера: **8** и иже сожигает ю, да исперет ризы своя и да омыет тело свое водою, и нечист будет до вечера: **9** и да соберет чистый человек пепел юницы и да изнесет вне полка на место чисто, и да будет сонму сынов Израилевых в сохранение: вода окропления очищение есть: **10** и собираяй пепел юницы да исперет ризы своя, и нечист будет до вечера: и да будет сыном Израилевым и пришелцем прилежащим посреде вас законно вечно. **11** Прикасаяся мертвому всякия души человеки нечист будет семь дней: **12** сей да очистится (сею

водою) в день третий и в день седмый, и чист будет: аще же не очистится ею в день третий и в день седмый, нечист будет.

13 Всяк прикасяйся мертвому от всякия души человеки, аще умрет, и не очистится, скинию Господню оскверни: потребится душа та от Израиля, яко вода окропления не воскропится нань, нечист есть, еще нечистота его на нем есть. 14 И сей закон: человек аще умрет в дому, всяк входяй в дом, и елика суть в дому, нечиста будут седьм дний. 15 И всяк сосуд непокровен, и елики обвязанием не обвязаны, нечисти суть. 16 И всяк иже аще прикоснется на поли язвенному, или мертвому, или кости человеки, или гробу, седьм дний нечист будет: 17 и да возмут нечистому от пепела сожженного очищения, и да возлиют нань воду живу в сосуд: 18 и да возмет иссоп и омочит в воду муж чист, и да воскропит на дом и на сосуды и на души, елики суть тамо, и на коснувшася кости человекей, или язвенному, или мертвечине, или гробу: 19 и да воскропит чистый на нечистаго в день третий и в день седмый, и очистится седмаго дне: и да исперет ризы своя и да омыет тело свое водою, и нечист будет до вечера. 20 И человек, иже аще осквернится, и не очистит себе, потребится душа та от среды сонма, яко святая Господня осквернави, яко вода окропления не воскропится Нань, нечист есть. 21 И да будет вам законно вечно, и окропляяй водою окропления да исперет ризы своя, и прикасяся воде окропления нечист будет до вечера. 22 И всякое, емуже прикоснется нечистый, нечисто будет: и душа прикасающаяся нечиста будет до вечера.

**20** И приидоша сынове Израилтестии, весь сонм, в пустыню Син, в месяц первый, и пребываху людие в Кадисе: и



скончася ту Мариам, и погребеся тамо. 2 И не бяше воды сонму: и собращася на Моисея и Аарона, 3 и ропташа людие на Моисея, глаголюще: о, дабы умерли быхом в погибели братии нашея пред Господем: 4 и вскую введосте сонм Господнь в пустыню сию, погубити ны и скоты наши? 5 И вскую сие? Изведосте ны из Египта, еже приити (нам) на место злое сие, место, в немже не сеетсяя, ни смокви, ни винограды, ниже яблоки, ниже вода есть пити. 6 И прииде Моисей и Аарон от лица сонма пред двери скинии свидения, и падоста ниц: и явися слава Господня над ними. 7 И рече Господь к Моисею, глаголя: 8 возми жезл твой и созови сонм ты и Аарон, брат твой, и рцыте ко каменю пред ними, и даст воды своя: и изведете им воды из камене, и напойте сонм и скоты их. 9 И взя Моисей жезл иже пред Господем, якоже повеле Господь. 10 И созва Моисей и Аарон сонм пред камень, и рече к ним: послушайте мене, непокоривии: еда из камене сего изведем вам воду? 11 И воздвиг Моисей руку свою, удари в камень жезлом дважды: и изыде вода многа, и написа сонм (весь) и скоты их. 12 И рече Господь к Моисею и Аарону: понеже не веровасте освятити Мя пред сынми Израилтескими, сего ради не введете вы сонма сего в землю, юже дах им: 13 сия вода Пререкания, яко возропташа сынове Израилтестии пред Господем, и освятися в них. 14 И посла Моисей послы от Кадиса к Царю Едомскому, глаголя: тако глаголет брат твой Израиль: ты веси весь труд обретший нас: 15 и снидоша отцы наши в Египет, и жихом во Египте дни многи, и озлобиша нас Египтяне и отцев наших: 16 и возопихом ко Господу, и услыша Господь глас наш, и послав Ангела, изведе ны из Египта: и ныне есмы в Кадисе граде,

на конце предел твоих: 17 да перейдем сквозе землю твою: не пройдем сквозе села, ни сквозе винограды, ни пием воды в потоцех твоих: путем царским пойдем, не совратимся ни на десно, ни на лево, дондеже перейдем пределы твоя. 18 И рече к ним Едом: не пройдеши сквозе мене: аще же ни, ратию изыду противу тебе. 19 И рекоша к нему сынове Израилевы: под горою пройдем: аще же от воды твоя испием аз и скоты моя, дам цену тебе: но вещь сия ничтоже есть, под горою да пройдем. 20 Он же рече: не пройдеши сквозе мене. И изыде противу им Едом с народом тяжким и рукою крепкою. 21 И не восхоте Едом дати Израилю проити сквозе пределы своя, и уклонися Израиль от него. 22 И воздвигошася от Кадиса, и приидоша сынове Израилтестии, весь сонм, в гору Ор. 23 И рече Господь к Моисею и Аарону в горе Ор у предел земли Едомли, глаголя: 24 да приложится Аарон к людям своим, яко не внидете в землю, юже дах сыном Израилевым в наследие, понеже преогорчисте Мя у воды Пререкания: 25 возми Аарона брата твоего и Елеазара сына его, и возведи я на Ор гору пред всем сонмом: 26 и совлецы Аарону ризы его и облещы Елеазара сына его, и Аарон приложився да умрет тамо. 27 И сотвори Моисей, якоже повеле ему Господь: и возведе я на Ор гору пред всем сонмом, 28 и совлече Аарона с риз его, и облече в ня Елеазара сына его: 29 и умре Аарон тамо на версе горы: и сниде Моисей и Елеазар с горы. И виде весь сонм, яко умре Аарон: и плакашася по Аароне тридесять дний весь дом Израилев.

**21** И услыша Хананей царь Арадский живый при пустыни, яко прииде Израиль путем Афаримским, и ратова противу Израиля, и взя от них плен. 2 И обещахся Израиль обетом

Господу и рече: аще мне предади люди сия подручны, погублю их и грады их. 3 И услыша Господь глас Израилев и предаде Хананеа подручна ему: и опустоши его и грады его, и прозва има месту тому Запустение. 4 И воздвигшеся от Ора горы путем иже к морю Чермному, обыдоша землю Едомлю: и малодушествоваша людие на пути, 5 и роптаху людие на Бога и на Моисеа, глаголюще: вскую извел еси ны из Египта убити нас в пустыни, яко несть хлеба, ни воды? И душа наша негодует о хлебе сем тщем. 6 И посла Господь на люди змиев умерщвляющих, и угрызаху людей: и умроша люди мнози от сынов Израилевых. 7 И пришедше людие к Моисеови глаголаша: согрешихом, яко роптахом на Господа и на тя: помолися убо ко Господу, да отженет от нас змии. И помолися Моисей ко Господу о людех. 8 И рече Господь к Моисею: сотвори себе змию (медяну) и положи ю на знамя: и будет аще угрызет змия человека, всяк угрызенный видево жив будет. 9 И сотвори Моисей змию медяну и постави ю на знамени: и бысть егда угрызаше змия человека, и взираше на змию медяну, и оживаше. 10 И воздвигошася сынове Израилевы, и ополчишася во Овофе: 11 и воздвигшеся от Овофа, ополчишася во Ахалгеи об ону страну пустыни, яже есть пред лицем Моавитским, на восток солнца: 12 и оттуду воздвигошася, и ополчишася в дебри Заред: 13 и оттуду воздвигшеся, ополчишася об ону страну Арнона в пустыни, яже исходит от предел Аморрейских: есть бо Арнон предел Моавль между Моавом и между Аморреом. 14 Сего ради глаголется в книзе брань Господня: Зоову попали, и потоки Арнони, 15 и потоки устрои в селение Ир, и прилежит пределом Моавлим. 16 И оттуду (воздвигошася) ко Кладязю:

сей есть кладязь, о немже рече Господь к Моисею: собери люди, и дам им воду пити. 17 Тогда воспе Израиль песнь сию у кладязя: начинайте ему: 18 кладязь, ископаша его князи, изсекоша его царие язычестии во царствии их, внегда обладати ими. И от кладязя (воздвигошася) в Манфанаил: 19 и от Манфанаила в Наадиил, и от Наадиила в Вамоф: 20 и от Вамофа в Напин, иже есть на поли Моавли, от верха Изсеченаго, зрящаго пред лице пустыни. 21 И посла Моисей послы к Сиону царю Аморрейску, словесы мирными глаголя: 22 да пройдем сквозе землю твою, путем пойдем: не уклонимся ни на села, ни на винограды, не испием воды от кладязь твоих: путем царским пойдем, дондеже пройдем пределы твоя. 23 И не даде Сион Израилю проити сквозе пределы своя: и собра Сион вся люди своя, и изыде ополчитися на Израиля в пустыню: и прииде во Иассан, и ополчися на Израиля. 24 И порази его Израиль убийством меча, и обладаше землю его от Арнона до Иавока, даже до сынов Амманих: яко Иазир пределы сынов Амманих суть. 25 И взя Израиль вся грады сия: и вселися Израиль во всех градах Аморрейских, во Есевоне и во всех подлежащих ему: 26 есть бо Есевон град Сиона царя Аморрейска: и сей повоева царя Моавля прежде и взя всю землю его от Ароира даже до Арнона. 27 Сего ради рекут приточницы: приидите во Есевон, да соградится и созиждется град Сион: 28 яко огонь изыде от Есевона и пламень от града Сиона, и пояде даже до Моава, и пожре столпы Арнонския: 29 горе тебе, Моаве, погибосте, людие Хамосовы: продани быша сынове их в заключение и дщери их пленницы царю Аморрейскому Сиону: 30 и семя их погибнет, Есевон даже

до Девона: и жены их еще разожгоша огонь на Моава. **31** Вселися же Израиль во вся грады Аморрейски: **32** и посла Моисей соглядати Иазира: и взяша его и села его, и изгнаша Аморреа живуцаго тамо: **33** и возвратившися, приидоша путем в Васан. И изыде Ог, царь Васанский, противу им и вси людие его на брань во Едраин. **34** И рече Господь к Моисею: не убойся его, яко в руце твои предах его и вся люди его и всю землю его: и сотвориши ему, якоже сотворил еси Сиону царю Аморрейску, иже живяше во Есевоне. **35** И порази его и сыны его и вся люди его, даже не оста в них живый: и наследиша землю его.

**22** И воздвигшися сынове Израилтестии, ополчишася на запады Моава у Иордана ко Иерихону. **2** И видеВ Валак сын Сепфоров вся, елика сотвори Израиль Аморрею, **3** и убося Моав людий зело, яко мнози бяху, и оскорбе Моав от лица сынов Израилевых, **4** и рече Моав старейшинам Мадиямлим: ныне потребит сонм сей всех, иже окрест нас, якоже потребляет телец злак на поли. И Валак, сын Сепфоров, бяхе царь Моавль в то время, **5** и посла послы к Валааму, сыну Веорову, во Фафуру яже есть у реки земли сынов людий его, призвати его, глаголя: се, людие изыдоша из Египта, и се, покрыша лице земли, и сии седят при одержании моем: **6** и ныне прииди, проклени мне люди сия, понеже крепльшии суть паче нас, аше возможем сих избити, и изжену их из земли: яко вем, иже аще благословиши ты, благословени суть, и иже аще прокленеши ты, прокляти. **7** И идоша старейшины Моавли и старейшины Мадиямли, и волхвования в руках их: и приидоша к Валааму и глаголаша ему словеса Валакова. **8** И рече к ним: препочийте zde ночь

(сию), и отвещаю вам деяния, яже аще возглаголет Господь ко мне. И пребыша князи Моавли у Валаама. 9 И прииде Бог к Валааму и рече ему: что человецы сии у тебе? 10 И рече Валаам к Богу: Валак сын Сепфоров, царь Моавль, посла их ко мне, глаголя: 11 се, людие изыдоша из Египта и покрыша лице земли, и сии седят при одержании моем: и ныне прииди, проклени ми их, негли возмогу избити их и изгнати я от земли. 12 И рече Бог к Валааму: да не идеши с ними, ниже да кленеши людий: суть бо благословени. 13 И востав Валаам завтра, рече князем Валаковым: возвратитесь к господину своему: не попускает ми Бог ити с вами. 14 И воставше князи Моавли приидоша к Валаку и рекоша ему: не хочет Валаам приити с нами. 15 И приложи Валак еще послати князи множайшии и честнейшии сих. 16 И приидоша к Валааму и глаголаша ему: сия глаголет Валак, сын Сепфоров: молю тя, не обленися приити ко мне: 17 честне бо тя почту, и вся, елика аще речеши ми, сотворю тебе: и прииди, и проклени ми люди сия. 18 И отвеща Валаам и рече князем Валаковым: аще ми даст Валак полну храмину свою злата и сребра, не могу преступити слова Господа Бога, еже сотворити то мало или велико в разуме моем: 19 и ныне потерпите zde и вы ночь сию, и увем, что приложит Господь глаголати ко мне. 20 И прииде Бог к Валааму нощию и рече ему: аще звати тя приидоша человецы сии, востав иди вслед их, но слово, еже аше реку тебе, то да сотвориши. 21 И востав Валаам завтра, оседла осля свое и иде со князи Моавли. 22 И разгневался яростию Бог, яко иде сей: и воста Ангел Божий препяти ему на пути. Сей же седяше на осляти своем и два раба его с ним. 23 И узрев осел Ангела Божия супротив стояща на

пути, и мечь извлечен в руке его, и совратися осел с пути и идяше на поле: и бияше (Валаам) осля жезлом своим, еже направити е на путь: 24 и ста Ангел Божий на броздах виноградных: ограждение отсюда, и ограждение отсюда: 25 и узрев осел Ангела Божия, приложися ко ограде и прижме ногу Валааму ко ограде, и приложи еще бити его: 26 и приложи Ангел Божии, и шед свята в месте узком, в немже не бяше уклонитися ни на десно, ни на лево: 27 и видя осля Ангела Божия, паде под Валааомом: и разгневался Валаам, и бияше осля жезлом. 28 И отверзе Бог уста осляти, и рече Валааму: что сотворих тебе, яко се, в третие биеша мя? 29 И рече Валаам осляти: яко поругалоя ми еси: и аще бых мечь имел в руку моею, пробол бых тя. 30 И рече осля Валааму: не аз ли ослица твоя, на нейже ты ездиси от юности своея до днешняго дне? Еда презорством презревши сотворих тебе сие? Он же рече: ни. 31 Отверзе же Бог очи Валааму, и узре Ангела Божия противостояща на пути, и мечь извлечен в руке его: и приклонився поклонися ему лицом своим. 32 И рече ему Ангел Божий: почто биеша осля твое сие в третие? И се, аз приидох на препятие твое, яко неприятен путь твой предо Мною: и видя мя ослица, совратися от Мене се третие: 33 и аще бы не уклонила от Мене, ныне ты убо убил бых, сию же сохранил бых. 34 И рече Валаам ко Ангелу Господню: согреших, не ведех бо, яко Ты мне противостоял еси на пути: и ныне аще Тебе не угодно, возвращуся. 35 И рече Ангел Божий к Валааму: иди ты с человеки: обаче слово, еже аще реку тебе, сие сохрани глаголати. И иде Валаам со князи Валаковы. 36 И услышав Валак, яко приходит Валаам, изыде во сретение ему во град Моавль, иже есть в пределех

Арноних, иже есть на краи пределов. 37 И рече Валак к Валааму: не послах ли к тебе звати тя? Почто не пришел еси ко мне? Или не возмогу почтити тебе? 38 И рече Валаам к Валаку: се, прихожду к тебе ныне: мощен ли буду глаголати что? Слово, еже аще вложить Бог во уста моя, сие реку. 39 И иде Валаам с Валаком, и внидоша во Грады Селныя. 40 И закла Валак телцы и овцы, и посла Валааму и князем иже с ним. 41 И бысть заутра, и взяв Валак Валаама, возведе его на столп Ваалов, и показа ему оттуду часть некую людей.

**23** И рече Валаам к Валаку: созижди мне zde седьмь требищ, и уготовай мне zde седьмь телцев и седьмь овнов. 2 И сотвори Валак, якоже рече ему Валаам: и вознесе телца и овна на требище. 3 И рече Валаам к Валаку: стани у требы своя, и пойду, аще явится мне Бог в сретение, и слово, еже мне укажет, повем тебе. И ста Валак у требы своя. 4 И Валаам иде вопрошити Бога, и иде прямо: и явися Бог Валааму. И рече к нему Валаам: седьмь требищ изготових и возложих телца и овна на требище. 5 И вложи Бог слово во уста Валааму и рече: возвратився к Валаку тако глаголи. 6 И возвратися к нему: он же стояше у всесожжений своих, и вси князи Моавли с ним: и бысть Дух Божий на нем. 7 И восприим притчу свою рече: от Месопотамии приведе мя Валак царь Моавль, от гор восточных, глаголя: гряди, проклени ми Иакова, и гряди, проклени ми Израиля: 8 что проклену, егоже не кленет Господь? Или что зло реку, егоже не злословит Бог? 9 Яко от верха гор узрю его и от холм проуразумею его: се, людие едины населятся и со языки не вменятся: 10 кто изследит семя Иаковле? И кто изочтет сонмы Израиля? Да умрет душа моя в душах



праведных, и буди семя мое, якоже семя их. 11 И рече Валак к Валааму: что сотворил еси ми? На проклятие враг моих призвах тя, и се, благословил еси (я) благословением. 12 И рече Валаам к Валаку: не елика ли вложит Бог во уста моя, сие сохранию глаголати? 13 И рече к нему Валак: пойдиди еще со мною на место ино, с негоже не узриши их оттуду, но разве часть некую их узриши, всех же не узриши, и проклени ми их оттуду. 14 И поя его на стражу села, на верх Истесанаго, и созда тамо седмь требищ, и возложи телца и овна на требище. 15 И рече Валаам к Валаку: стани у требы своя, аз же пойду вопросити Бога. 16 И срете Бог Валаама, и вложи слово во уста ему и рече: возвратися к Валаку, и речеши сия. 17 И возвратися к нему: он же стояше у всесожжений своих, и вси князи Моавли с ним. И рече ему Валак: что глагола Господь? 18 И восприим притчу свою, рече: востани, Валак, и послушай, внуши свидетель, сыне Сепфоров: 19 не яко человек Бог колеблется, ниже яко сын человеческий изменяется: Той глаголаше, не сотворит ли? Речет, и не пребудет ли? 20 Се, благословляти приведен есмь: благословлю, и не отвращу: 21 не будет труда во Иакове, ниже узрится болезнь во Израили: Господь Бог его с ним, слава царская на нем: 22 Бог изведый его из Египта, якоже слава единорога в нем: 23 несть бо вражды во Иакове, ниже волхвования во Израили: во время наречется Иакову и Израилю, что совершит Бог: 24 се, людие яко львищица востанут, и яко лев вознесется: не уснет, дондеже снесет лов и кровь посеченых испиет. 25 И рече Валак к Валааму: ни клятвами мне клени их, ниже благословением благослови их. 26 И отвещав Валаам, рече к Валаку: не рех ли ти,

глаголя: слово, еже аще возглаголет Бог, сие сотворю? 27 И рече Валак к Валааму: гряди, пойму тя на место ино, аще угодно будет Богу, и проклени ми их оттуду. 28 И поя Валак Валаама на верх Фогора, простирающаяся в пустыню. 29 И рече Валаам к Валаку: созижди мне zde семь требищ, и уготовай мне zde семь телцев и семь овнов. 30 И сотвори Валак, якоже рече ему Валаам: и вознесе телца и овна на требище.

**24** И видеВ Валаам, яко добро есть пред Господем благословляти Израиля, не иде по обычаю своему в сретение волхвованием, и возврати лице свое в пустыню. 2 И возвед Валаам очи свои, узре Израиля ополчившася по племеном: и бысть Дух Божий на нем. 3 И восприим притчу свою рече: глаголет Валаам, сын Веоров, глаголет человек истинно зряй, 4 глаголет слушаай словеса Крепкаго, иже видение Божие виде во сне: отверсты очи его: 5 коль добри доми твои, Иакове, и кущы твоя, Израилю: 6 яко дубравы осеняющыя и яко садие при реках, и яко кущы, яже водрузи Господь, и яко кедри при водах: 7 изыдет человек от семене его, и обладает языки многими: и возвысится паче Гога царство его, и возрастет царство его: 8 Бог изведе его из Египта, якоже слава единорога ему: пояст языки враг своих и толщы их измождит, и стрелами своими устрелит врага: 9 возлег почи яко лев и яко скимен: кто возбудит его? Благословящии тя благословени, и проклинаящии тя прокляти. 10 И разгневася Валак на Валаама, и плесну руками своими, и рече Валак к Валааму: кляти тя врага моего призвах, и се, благословил еси их в третие: 11 ныне убо бежи на место свое: рекох, почту тя: и ныне лиши тя Господь славы. 12 И рече Валаам

к Валаку: и послом твоим, ихже послал еси ко мне, не рекох ли, глаголя: **13** аще ми даст Валак храмину свою полну сребра и злата, не могу преступити слова Божия, еже сотворити е зло или добро от мене самаго: елика аще речет ми Бог, сия возглаголю? **14** И ныне, се, иду до места своего: гряди, присоветую тебе, что сотворят людие сии людем твоим, в последняя дни. **15** И восприим притчу свою рече: глаголет Валаам сын Веоров, глаголет человек истинно зряй, **16** слышай словеса Божия, умея умение Вышняго и видение Божие видевый во сне: отверсты очи его: **17** покажу ему, и не ныне: ублажаю, и не приближается: возсияет звезда от Иакова, и встанет человек от Израиля и погубит князи Моавитския, и пленит вся сыны Сифовы: **18** и будет Едом наследие, и будет наследие Исав враг его, и Израиль сотвори крепость: **19** и встанет от Иакова, и погубит спасаемаго от града. **20** И видев Амалика и восприим притчу свою, рече: начало языков Амалик, и семя их погибнет. **21** И видев Кенеона и восприим притчу свою, рече: сильно селение твое: и аще положиши на камени гнездо твое, **22** и аще будет Веору гнездо коварства, Ассириане пленят тя. **23** И видев Ога и восприим притчу свою, рече: горе, горе, кто жив будет, егда положит Бог сия? **24** И изыдут из рук Китийских, и озлобят Ассура, и озлобят Евреов, и сами вкупе погибнут. **25** И востав Валаам отиде, возвратився на место свое: и Валак отиде к себе.

**25** И живяше Израиль в Саттима, и осквернишася людие блужением со дщерми Моавли: **2** и призваша я в требы кумир своих, и ядоша людие требы их и поклонишася кумиром их: **3** и причастися Израиль Веельфегору, и разгнеवासя

яростию Господь на Израиля. 4 И рече Господь к Моисею: поими вся князи людския, и обличи я Господу прямо солнцу, и отвратится гнев ярости Господни от Израиля. 5 И рече Моисей к племенем Израилским: избийте кийждо ужика своего служившаго Веельфегору. 6 И се, человек от сынов Израилевых пришед приведе брата своего к Мадянитыне пред Моисеем и пред всем сонмом Израилевым: сии же плакахуся пред дверми скинии свидения. 7 И виде Финеес, сын Елеазара сына Аарона жерца, воста из среды сонма, и взем сулицу в руку, 8 вниде вслед человека Израилтянина в блудилище, и прободе обоих, и человека Израилтянина, и жену сквозе ложесна ея: и преста вред от сынов Израилевых. 9 И быша умершии язвою двадесять четыре тысящы. 10 И рече Господь к Моисею, глаголя: 11 Финеес сын Елеазара сына Аарона жерца утоли гнев Мой от сынов Израилевых, егда возревнова ревность Моя в них, и не потребих сынов Израилевых в ревности Моей: 12 тако рцы: се, Аз даю ему заветзавет Мой мирный, 13 и будет ему и семени его по нем завет жречества вечный, понеже возревнова по Бозе своем и умилостиви о сынех Израилевых. 14 Имя же человеку Израилтянину, егоже уби с Мадянитынею, Замврий сын Салмонь, князь дому отечества сынов Симеоних: 15 и имя жене Мадянитыне прободеной Хазви, дщи Сура, князя рода Соммофова, дому отечества есть Мадямля. 16 И рече Господь к Моисею, глаголя: рцы сыном Израилевым, глаголя: 17 враждуйте Мадянитом и бийте я: 18 зане враждуют вам сии лестию, елико прельщают вас Фогором и Хазвиною дщерию князя Мадямля, сестрою своею прободеною, в день язвы Фогора ради.

**26** И бысть но язве, и рече Господь к Моисею и Елеазару жерцу, глаголя: **2** возми начало всего сонма сынов Израилевых от двадесяти лет и вышше, но домом отечеств их, всяк исходяй вооружитися во Израили. **3** И глаголя Моисей и Елеазар жрец к ним во Аравофе Моавли при Иордане у Иерихона, глаголя: **4** от двадесяти лет и вышше, якоже заповеда Господь Моисею: и сынове Израилтестии изшедшии из Египта: **5** Рувим первенец Израилев. Сынове же Рувимли: Енох и сонм Енохов, Фаллу сонм Фаллов, **6** Асрону сонм Асронов, Харму сонм Хармиин. **7** Сии сонми Рувимли: и бысть соглядание их четьредесять три тысящы и шесть сот и тридесять. **8** И сынове Фалловы Елиав. **9** И сынове Елиавли Намуил и Дафан и Авирон: сии нарочитии сонму: сии суть воставше на Моисеа и Аарона в сонме Кореове в крамоле на Господа: **10** и отверзши земля уста своя пожре их и Кореа в смерти сонма его, егда пояде огонь двести и пятьдесят, и быша в знамение. **11** Сынове же Кореовы не измроша. **12** И сынове Симеони, сонм сынов Симеоних: Намуилу сонм Намуилов, Иамину сонм Иаминов, Иахину сонм Иахинов, **13** Заре сонм Зарин, Саулу сонм Саулов. **14** Сии сонми Симеони от соглядания их двадесять две тысящы и двести. **15** Сынове же Иудины Ир и Авнан и Силом, и Фарес и Зара: и умре Ир и Авнан в земли Ханаани. **16** И быша сынове Иудины по сонмом своим: Силому сонм Силомль, Фаресу сонм Фаресов, Заре сонм Зарин. **17** И быша сынове Фаресовы: Асрону сонм Асронов, Иамуилу сонм Иамуилов. **18** Сии сонми Иудины по согляданию их седьмьдесят шесть тысящ и пять сот. **19** И сынове Иссахаровы по сонмом своим: Фоле сонм Фолин Фуеви сонм Фуин, **20** Иасуву сонм Иасувин,

Амвраму сонм Амврамль. 21 Сии сонми Иссахаровы но согляданию их шестьдесят и четыри тысящы и четыреста. 22 Сынове Завулони по сонмом своим: Сареду сонм Саредин, Аллону сонм Аллонин, Аллилу сонм Аллилин. 23 Сии сонми Завулони по согляданию их шестьдесят тысящ и пять сот. 24 Сынове Гадовы по сонмом их: Сафону сонм Сафонин, Аггину сонм Аггинов, Сунину сонм Сунинов, 25 Азenu сонм Азенин, Адду сонм Аддин, 26 Ароаду сонм Ароадин, Ариилу сонм Арииль. 27 Сии сонми сынов Гадовых но согляданию их четыредесять и четыри тысящы и пять сот. 28 Сынове Асировы по сонмом их: Иамину сонм Иаминов, Иесую сонм Иесуинь, 29 Вариаю сонм Вариаинь, Ховеру сонм Ховерин, Мелхиилу сонм Мелхиилин, 30 имя же дщери Асирове Сара, 31 сии сонми Асировы но согляданию их четыредесять три тысящы и четыреста. 32 Сынове Иосифли по сонмом их: Манассиа и Ефрем. 33 Сынове Манассиины: Махиру сонм Махирин: и Махир роди Галаада, Галааду сонм Галаадин. 34 И сии сынове Галаадины: Ахиезеру сонм Ахиезеров, Хелеку сонм Хелеков, 35 Есриилу сонм Есриилов, Сихему сонм Сихемль, 36 Симаеру сонм Симаерин, и Оферу сонм Оферов. 37 И Салпааду сыну Оферову не быша ему сынове, но токмо дщери. И сия имена дщерем Салпаадовым: Маала и Нуа, и Егла и Мелха и Ферса. 38 Сии сонми Манассиины по согляданию их пятьдесят и две тысящы и седьмь сот. 39 И сии сынове Ефремли: Суфалу сонм Суфалин, Танаху сонм Танахин. 40 Сии сынове Суфаловы: Едену сонм Еденин. 41 Сии сонми Ефремли по согляданию их тридесять две тысящы и пять сот. Сии сонми сынов Иосифовых по сонмом их. 42 Сынове Вениамини по сонмом их: Валу сонм

Валин, Асивиру сонм Асивиров, Иахирану сонм Иахиранин, Софану сонм Софанин. 43 И быша сынове Валу Адерь и Ноеман: 44 Адеру сонм Адерин, и Ноеману сонм Ноеманин. 45 Сии сынове Вениамини по сонмом их по согляданию их четыредесять и пять тысящ и шесть сот. 46 И сынове Дановы по сонмом их: Самею сонм Самеин: сии сонми Дановы но сонмом их. 47 Все сонми Самеини по согляданию их шестьдесят четыри тысящы и четыреста. 48 Сынове Неффалимли по сонмом их: Асиилу сонм Асиилев, Гоину сонм Гоинин, 49 Иесрию сонм Иесриев, Селлиму сонм Селлимов. 50 Сии сонми Неффалимли по согляданию их четыредесять пять тысящ и четыреста. 51 Сие соглядание сынов Израилевых шесть сот едина тысяща и седмь сот тридесять. 52 И рече Господь к Моисею, глаголя: 53 сим разделится земля в наследие по числу имен: 54 множайшым да умножиши наследие, и малейшым да умалиши наследие их: коемуждо, якоже суть соглядани, да дастся наследие их: 55 по жребием да разделится земля именам, по племенем отечеств своих да наследят: 56 от жребия да разделиши наследие их между многими и малыми. 57 И сынове Левиини но сонмом их: Гирсону сонм Гирсонов, Каафу сонм Каафов, Мераре сонм Мерарин. 58 Сии сонми сынов Левииных: сонм Ловенин, сонм Хевронин, и сонм Мусин, и сонм Кореов. И Кааф роди Амрама. 59 Имя же жене Амрамли Иохавеф, дщи Левиина, яже роди сих Левиин во Египте, и роди Амраму Аарона и Моисея и Мариам сестру их. 60 И родишася Аарону Надав и Авиуд, и Елеазар и Ифамар. 61 И умре Надав и Авиуд, егда принесоста огонь чуждий пред Господем в пустыни Синайстей. 62 И быша от соглядания их двадесять

три тысящы, всяк мужеск пол от единого месяца и вышше: не быша бо соглядани посреде сынов Израилевых, яко не дадеся им жребий посреде сынов Израилевых. **63** И сие соглядание Моисеа и Елеазара жерца, иже соглядаша сынов Израилевых во Аравофе Моавли, у Иордана при Иерихоне. **64** И в сих не бяше человек от согляданых Моисеом и Аароном, иже соглядаша сынов Израилевых в пустыни Синайстей. **65** Понеже рече Господь им: смертию измрут в пустыни. И не остана от них ни един, кроме Халева сына Иефонниина и Иисуса сына Навина.

**27** И пришедша дщери Салпаада сына Оферова, сына Галаадова, сына Махирова, сонма Манасиина, сынов Иосифовых, и сия имена их: Маала и Нуа, и Егла и Мелха и Ферса, **2** и ставша пред Моисеом и пред Елеазаром жерцем, и пред князи и пред всем сонмом у дверей скинии свидения, глаголаша: **3** отец наш умре в пустыни, и сей не бе среде сонма воставшаго на Господа в сонме Кореове, яко греха ради своего умре, и сынове не быша ему: **4** да не погибнет имя отца нашего от среды сонма своего, яко несть сына ему: дадите нам наследие посреде братии отца нашего. **5** И принесе Моисей суд их пред Господа. **6** И рече Господь к Моисею, глаголя: **7** право глаголаша дщери Салпаадовы: даяние да даси им одержание наследия посреде братий отца их, и да приложиши им жребий отца их: **8** и сыном Израилевым да речеши, глаголя: человек аще умрет, и не будет сына ему, дадите наследие его дщери его: **9** аще же дщери не будет ему, дадите наследие его брату его: **10** аще же не будут ему братия, дадите наследие брату отца его: **11** аще же не будут братия отца его, дадите наследие



ужу ближнему его от племени его наследити яже его: и да будет сие сыном Израилевым оправдание суда, якоже заповеда Господь Моисею. 12 И рече Господь к Моисею: взыди на гору, яже об ону страну Иордана, сия гора Навав, и виждь землю Ханааню, юже Аз даю сыном Израилевым во одержание: 13 и узриши ю, и приложиши к людем своим и ты, якоже приложися Аарон брат твой на горе Ор: 14 понеже преступисте слово Мое в пустыни Син, внегда супротивитися сонму освятити Мя, не освятисте Мене у воды пред ними: сия есть вода Пререкания в Кадисе в пустыни Син. 15 И рече Моисей ко Господу: 16 да изберет Господь Бог духов и всякия плоти человека над сонмом сим, 17 иже изыдет пред лицем их, иже внидет пред лицем их, и иже изведет их и иже введет их, и да не будет сонм Господень, яко овцы не имуща пастыря. 18 И рече Господь к Моисею, глаголя: поими к себе Иисуса сына Навина, человека, иже имать Духа в себе: и да возложиши руце твои на него: 19 и поставиши его пред Елеазаром жерцем, и заповеждь ему пред всем сонмом, и заповеждь о нем пред ними: 20 и даси на него от славы твоя, яко да послушают его вси сынове Израилевы: 21 и пред Елеазаром жерцем да станет, и да вопросят от него суда явленных пред Господем: по словеси его да исходят, и по словеси его да входят сам и сынове Израилевы вкупе, и весь сонм. 22 И сотвори Моисей, якоже повеле ему Господь Бог: и взял Иисуса постави его пред Елеазаром жерцем и пред всем сонмом: 23 и возложи руце свои на него, и устрои его, якоже повеле Господь Моисею.

**28** И рече Господь к Моисею, глаголя: 2 заповеждь сыном Израилевым, и речеши к ним, глаголя: дары Моя, даяния Моя,

приносы Моя, в воню благовония соблюдайте приносить Мне на праздники Моя. 3 И да речеши к ним: сия приношения, яже принесете Господу, агнцев единоголетних непорочных два на день во всесожжение выну: 4 агнца единого сотворите рано, и агнца второго сотворите в вечер: 5 и да сотвориши десятую часть ефи (меры) муки пшеничны на жертву, вмешану в елеи четвертую часть (меры) ина: 6 всесожжение непрестанное, якоже бысть в горе Синайстей, в воню благовония Господу. 7 И возлияние его четвертую часть (меры) ина агнцу единому: во святем да возлиеши возлияние сикеру Господу: 8 и агнца второго сотвориши к вечеру: по жертве его и по возлиянию его да сотвориши, в воню благовония Господу. 9 И в день суббот приведете два агнца единоголетна непорочна и две десятины муки пшеничны вмешаны в елеи на жертву и возлияние, 10 всесожжения субботы в субботах, на всесожжение всегдашнее и возлияние его. 11 И в новомесячиих да принесете во всесожжение Господу телца два от говяд и овна единого, агнцев единоголетних семь непорочных: 12 три десятины муки пшеничны вмешаны в елеи телцу единому, и две десятины муки пшеничны вмешаны в елеи овну единому, 13 по десятине муки пшеничны вмешаны в елеи агнцу единому: жертву в воню благовония принос Господу. 14 Возлияние их от вина пол (меры) ина да будет телцу единому: и третья часть (меры) ина да будет овну единому: и четвертая часть (меры) ина да будет агнцу единому: сие всесожжение от месяца до месяца в месяцы лета. 15 И козла единого от коз греха ради Господу на всесожжение присное сотворите и возлияние его. 16 И в месяце первом в четвертыйнадесять день месяца Пасха Господу: 17 и в

пятыйнадесять день месяца сего праздник: семь дней  
опресноки да ясте. 18 И день первый нарочит свят да  
будет вам: всякого дела служебна да не сотворите. 19 И  
принесете всесожжения принос Господу, телца от волов  
два, овна единого, агнцев единоголетних семь: непорочни  
будут вам. 20 И жертва их мука пшенична вмешана в елеи:  
три десятины телцу единому и две десятины овну единому  
да сотворите: 21 по десятине сотвориши агнцу единому,  
седми агнцем: 22 и козла единого от коз греха ради, во  
еже умолити о вас. 23 Кроме всесожжения всегдашняго  
утренняго, еже есть всесожжение всегдашнее, сотворите  
сия. 24 По сему сотворите на (всяк) день, в семь дней,  
дар, принос в вою благовония Господу: на всесожжение  
всегдашнее сотвориши возлияние его. 25 И день седмый  
нарочит свят да будет вам: всякого дела служебнаго да не  
сотворите в онь. 26 И день новых (плодов), егда принесете  
Господеви жертву нову седмиц, нарочит свят будет вам:  
всякого дела служебна да не сотворите. 27 И да принесете  
всесожжения в вою благовония Господу, телца от волов  
два, овна единого, агнцев единоголетних семь непорочных.  
28 Жертва их мука пшенична вмешана в елеи: три десятины  
телцу единому и две десятины овну единому: 29 по десятине  
агнцу единому, седми агнцем: 30 и козла единого от коз  
греха ради, во еже умолити о вас. 31 Кроме всесожжения  
всегдашняго, и жертву их сотворите Мне, непорочни да будут  
вам, и возлияния их.

**29** И в месяц седмый, первый (день) месяца нарочит свят  
да будет вам: всякого дела служебна да не сотворите: день  
знамения будет вам. 2 И сотворите всесожжения в вою

благовония Господу, телца от волов единого, овна единого, агнцев единоголетних семь непорочных: 3 жертва их мука пшенична вмешана в елеи: три десятины телцу единому и две десятины овну единому: 4 по десятине агнцу единому, семи агнцем: 5 и козла от коз единого греха ради, во еже умолити о вас: 6 кроме всесожжений новомесячия и жертвы их, и возлияния их, и всесожжение всегдашнее: и жертвы их и возлияния их, по уставу их, в воню благовония Господу. 7 И десятый день месяца сего нарочит свят да будет вам: и озлобите души ваша, и всякаго дела служебна да не сотворите, 8 и принесете всесожжение в воню благовония Господу, приносы Господу: телца единого от говяд, овна единого, агнцев единоголетних семь: непорочны да будут вам: 9 жертва их мука пшенична вмешана в елеи: три десятины телцу единому и две десятины овну единому: 10 по десятине агнцу единому, на семь агнцев: 11 и козла единого от коз греха ради, во еже умолити о вас: кроме еже греха ради очищения, и всесожжение всегдашнее: жертва его и возлияние его, по уставу его в воню благовония принос Господу. 12 И пятнадцатый день седмаго месяца сего нарочит свят да будет вам: всякаго дела служебна да не сотворите, и празднуйте той праздник Господеви семь дней, 13 и принесите всесожжения принос в воню благовония Господу: в первый день телцев от говяд тринадцать, овна два, агнцев единоголетних четырнадцать: непорочны да будут вам: 14 жертвы их мука пшенична вмешана в елеи: три десятины телцу единому, тринадцати телцем, и две десятины овну единому, на два овна: 15 по десятине агнцу единому, на четырнадцать агнцев: 16 и козла единого от

коз греха ради: кроме всесожжения всегдашняго, жертвы их и возлияния их. 17 И в день второй телцев дванадесять, овна два, агнцев единоплетных четыренадесять непорочных: 18 жертва их и возлияния их телцем и овном и агнцем по числу их, по уставу их: 19 и козла единого от коз греха ради: кроме всесожжения всегдашняго, жертвы их и возлияния их. 20 В день третий телцев единоплетных, овна два, агнцев единоплетных четыренадесять непорочных: 21 жертва их и возлияния их телцем и овном и агнцем по числу их, по уставу их: 22 и козла от коз единого греха ради: кроме всесожжения всегдашняго, жертвы их и возлияния их. 23 В день четвертый телцев десять, овна два, агнцев единоплетных четыренадесять непорочных: 24 жертвы их и возлияния их телцем и овном и агнцем по числу их, по уставу их: 25 и козла от коз единого греха ради: кроме всесожжения всегдашняго, жертвы их и возлияния их. 26 В день пятый телцев девять, овна два, агнцев единоплетных четыренадесять непорочных: 27 жертвы их и возлияния их телцем и овном и агнцем по числу их, по уставу их: 28 и козла от коз единого греха ради: кроме всесожжения всегдашняго, жертвы их и возлияния их. 29 В день шестой телцев осмь, овна два, агнцев единоплетных четыренадесять непорочных: 30 жертвы их и возлияния их телцем и овном и агнцем по числу их, по уставу их: 31 и козла от коз единого греха ради: кроме всесожжения всегдашняго, жертвы их и возлияния их. 32 В день седмый телцев седмь, овна два, агнцев единоплетных четыренадесять непорочных: 33 жертвы их и возлияния их телцем и овном и агнцем по числу их, по уставу их: 34 и козла от коз единого греха ради: кроме всесожжения всегдашняго, жертвы их и возлияния их.

35 И в день осмый исход будет вам: всякаго дела служебна да не сотворите в онь, 36 и да принесете всесожжения в воню благовония Господу, телца единого, овна единого, агнцев единоголетних семь непорочных: 37 жертвы их и возлияния их телцу и овну и агнцем по числу их, по уставу их: 38 и козла от коз единого греха ради: кроме всесожжения всегдашняго, жертвы их и возлияния их. 39 Сия сотворите Господу в праздники ваша, кроме обетов ваших, и вольная ваша, и всесожжения ваша, и жертвы ваша, и возлияния ваша, и спасительная ваша. 40 И глагола Моисей сыном Израилевым по всем, елика заповеда Господь Моисею:

**30** и глагола Моисей князем племен сынов Израилевых, глаголя: сие слово, еже повеле Господь. 2 Человек человек, иже аще обещает обет Господу, или закленется клятвою, или определит пределом о души своей, не оскверnavит словесе своего: вся, елика изыдут из уст его, да сотворит. 3 Аще же обещает жена обет Господу, или определит определение в дому отца своего в юности своей, 4 и услышит отец ея обеты ея и определения ея, яже определи на душу свою, и премолчит отец ея, и да состоятся вся обеты ея, и вся определения, яже определи на душу свою, да пребудут ей. 5 Аще же возбранением возбранит отец ея, в оньже день услышит вся обеты ея и определения, яже определи на душу свою, не состоятся: и Господь очистит ю, яко возбрани отец ея. 6 Аще же посягла за мужа, и обеты ея на ней, по определении уст ея, елика определи на душу свою, 7 и услышит муж ея, и премолчит ей, в оньже день услышит, и тако состоятся вся обеты ея, и определения ея, яже определи на душу свою, да состоятся. 8 Аще же

возбранением возбранит муж ея, в оньже день услышит вся обеты ея и определения ея, яже определи на душу свою, да не пребудут, яко муж возбрани ей: и Господь очистит ю. **9** И обет вдовицы и пущеницы, елика аще обещают на душу свою, да пребудут им. **10** Аще же в дому мужа ея обет ея или определение, еже на душу ея с клятвою, **11** и услышит муж ея, и премолчит ей, и не возбранит ей, и состоятся вся обеты ея, и вся определения ея, яже определи на душу свою да состоятся на ню. **12** Аще же отлучая отлучит муж ея, в оньже день услышит, вся елика изыдоша из уст ея по обетом ея и по определением ея яже на душу ея, не пребудут ей: муж бо ея отлучил есть, и Господь очистит ю. **13** Всяк обет и всяка клятва союза во еже озлобити душу, муж ея поставит ей, и муж ея отимет. **14** Аще же молча премолчит ей день от дне, и поставит ей вся обеты ея, и определения яже на ней, поставит ей, яко умолча ей в день, в оньже услыша. **15** Аще же отлучая отлучит муж ея по дни, в оньже услыша, и примет грех свой. **16** Сия оправдания, елика заповеда Господь Моисею, между мужем и между женою его, и между отцем и дщерию в юности ея, в дому отчи.

**31** И рече Господь к Моисею, глаголя: **2** отмсти месть сынов Израилевых от Мадянитов, и последи приложишися к людем своим. **3** И рече Моисей к людем, глаголя: вооружите от вас мужы и ополчитесь пред Господем на Мадиама, отдати отмщение от Господа Мадиаму: **4** тысящу от племени и тысящу от племени, от всех племен сынов Израилевых, послите ополчитися. **5** И сочтоша от тысящ Израилевых, по тысящи от племени, дванадесять тысящ вооруженых на брань. **6** И посла я Моисей тысящу от племени и тысящу

от племени с силою их, и Финееса сына Елеазарова сына Аарона жерца: и сосуды святых, и трубы знаменныя в руках их. 7 И ополчишася на Мадиама, якоже повеле Господь Моисею, и избиша весь мужеск пол: 8 и царей Мадиамских убиша вкупе с язвеными их, и Евина и Рокома, и Сура и Ура и ровока, пять царей Мадиамлих: и Валаама сына Веорова убиша мечем с язвеными их: 9 и плениша жен Мадиамлих и имения их, и скоты их и вся притяжания их, и силу их плениша: 10 и вся грады их, яже во обитаниих их, и веси их пожгоша огнем, 11 и взяша весь плен их и вся корысти их, от человека до скота: 12 и приведоша к Моисею и ко Елеазару жерцу и ко всем сыном Израилевым плен и корысти и имение в полк, во аравоф Моавль, иже есть у Иордана при Иерихоне. 13 И изыде Моисей и Елеазар жрец и вси князи сонма в сретение им вне полка. 14 И разгневался Моисей на надзирателей силы, тысященачалников и стоначалников идущих от ополчения брани. 15 И рече им Моисей: вскую жив остависте весь женск пол? 16 Тыя бо быша сыном Израилевым, по словеси Валаамлю, еже отступити и презрети слово Господне Фогора ради, и бысть язва в сонме Господни: 17 и ныне избийте всяк мужеск пол во всяком возрасте, и всяку жену, яже позна ложе мужеско, избийте: 18 и всяк возраст женск, яже не познаша ложа мужеска, живых оставите я: 19 и вы станите вне полка семь дний: всяк убивый душу и прикоснувыйся убиенному да очистится в третий день и в день седмый, вы и плен ваш: 20 и всяку одежду, и всяк сосуд кожан, и всяко соделаное от козличины, и всяк сосуд деревян очистите. 21 И рече Елеазар жрец к мужем силы приходящим от ополчения ратнаго: сие



оправдание закона, еже заповеда Господь Моисею: 22 кроме серебра и злата, и меди и железа, и касситера и олова, 23 всяка вещь, яже пройдет сквозе огонь, и (огнем) очистится, но и водою очищения очистится: и вся, елика аще не пройдут сквозе огонь, да пройдут сквозе воду: 24 и исперите ризы ваша в день седмый, и очиститесь: и по сих внидете в полк. 25 И рече Господь к Моисею, глаголя: 26 возьмите сочисление корыстей плена от человека до скота, ты и Елеазар жрец и князи отечеств сонма, 27 и разделите корысти между воины ходившими на брань и между всем сонмом, 28 и отлучите дань Господу от людей военных ходивших на брань, едину душу от пяти сот, от человек и от скотов, и от волов и от овец и от ослят, 29 и от половины их да возьмете, и даси Елеазару жерцу начатки Господни: 30 и от половины сынов Израилевых да возьмеша едино от пятидесяти человек, и от волов и от овец, и от ослят и от всех скотов, и даси я левитом, иже стрегут стражбы в скинии Господни. 31 И сотвори Моисей и Елеазар жрец, якоже повеле Господь Моисею. 32 И бысть множество плена, егоже плениша мужи воинстии, от овец шесть сот седмьдесят пять тысящ, 33 и волов седмьдесят две тысящы, 34 и ослов шестьдесят едина тысяща, 35 и душ человеческих от женска полу, яже не познаша ложа мужеска, всех душ тридесять две тысящы: 36 и бысть половина часть ходивших на брань, от числа овец триста тридесять седмь тысящ и пять сот: 37 и бысть дань Господу от овец шесть сот седмьдесят пять: 38 и волов тридесять шесть тысящ, и дань Господу седмьдесят и два: 39 и ослов тридесять тысящ пять сот, и дань Господу шестьдесят един: 40 и душ человеческих шестнадесять

тысящ, и дань от сих Господу тридесять две души. 41 И даде Моисей дань Господу, участие Божие Елеазару жерцу, якоже повеле Господь Моисею. 42 От половины сынов Израилевых, ихже раздели Моисей от мужей военных: 43 и бысть половина от сонма, от овец триста и тридесять семь тысящ и пять сот: 44 и волов тридесять шесть тысящ: 45 ослов тридесять тысящ и пять сот: 46 и человеких душ шестнадцать тысящ: 47 и взя Моисей от половины сынов Израилевых, едино от пятидесяти, от человек и от скотов, и даде я левитом стрегущым стражбы скинии Господни, якоже повеле Господь Моисею. 48 И приидоша к Моисею вси поставленнии над тысящами силы, тысященачальники и стоначальники, 49 и рекоша к Моисею: отроцы твои взяша сочтение от мужей воинских, иже суть у нас, и никтоже погиге от них: 50 и принесохом дар Господу, муж еже обрете, сосуд злат и обручие, и гривну и перстень, и усерязи и чепь златую, умолиши о нас пред Господем. 51 И взя Моисей и Елеазар жрец злато от них, всяк сосуд соделан. 52 И бысть всего злата участие, еже отлучися Господу, шестнадцать тысящ и семь сот и пятьдесят сикль от тысященачальников и от стоначальников. 53 И мужи воинстии плениша кийждо себе. 54 И взяша Моисей и Елеазар жрец злато от тысященачальников и от стоначальников и внесоша е в скинию свидения, в память сынов Израилевых пред Господем.

**32** И скота множество бяше сыном Рувимлим и сыном Гадовым, много зело. И видеша страну Иазирову и страну Галаадову, и бяше место, место скотно. 2 И пришедше сынове Рувимли и сынове Гадовы рекоша к Моисею и ко Елеазару жерцу и ко князем сонма, глаголюще: 3 Атароф и

Девон, и Иазир и Намра, и Есевон и Елеали, и Севама и Навав и Веан, 4 земля, юже предаде Господь пред сыны Израилевыми, земля скотопитателна есть, рабом же твоим скот есть. 5 И реша: аще обретохом благодать пред тобою, да дастся нам земля сия рабом твоим во одержание, и не преводи нас чрез Иордан. 6 И рече Моисей сыном Гадовым и сыном Рувимлим: братия ваша пойдут на брань, и вы ли сядете ту? 7 И вскую развращаете сердце сынов Израилевых, не прейти на землю, юже дает Господь им? 8 Не тако ли сотвориша отцы ваши, егда послах я от Кадис-Варни соглядати землю? 9 И взыдоша до дебри Грезновныя, и соглядаша землю, и отвратиша сердце сынов Израилевых, яко да не внидут в землю, юже даде им Господь? 10 И разгневался яростию Господь в день Он и клятся, глаголя: 11 аще узрят человецы сии изшедшии из Египта, от двадесяти лет и вышше, ведущии добро и зло, землю, еюже кляхся Аврааму и Исааку и Иакову: не последоваша бо вслед Мене, 12 точию Халев сын Иефоннин Отлученный и Иисус сын Навин, яко последоваша вслед Господа. 13 И разгневался яростию Господь на Израиля, и томи я в пустыни четыредесять лет, дондеже потребися весь род творящий злая пред Господем. 14 Се, востасте вместо отец ваших, сокрушение человек грешников, приложити еще к ярости гнева Господня на Израиля: 15 яко отвратитесь от Него, приложити еще оставити его в пустыни, и возбеззаконуете на весь сонм сей. 16 И приидоша к нему и глаголаша: ограды овцам да соградим zde скотом своим, и грады именем нашим: 17 и мы вооружени пойдём на стражбу первии сыном Израилевым, дондеже введем я в место их: и да вселятся

имения наша во градех утвержденных ради живущих на земли: **18** не возвратимся в дома наша, дондеже разделятся сынове Израилестии, кийждо в наследие свое: **19** и ктому не наследим в них об ону страну Иордана и далее, яко прияхом жребия наша сию страну Иордана на востоки. **20** И рече к ним Моисей: аще сотворите по словеси сему, аще вооружитесь пред Господем на брань, **21** и прейдет всяк оружник ваш Иордан пред Господем на брань, дондеже потребится враг Его от лица Его, **22** и обладана будет земля пред Господем, и посем возвратитесь, и будете безвинни пред Господем и от Израиля: и будет земля сия вам во одержание пред Господем: **23** аще же не сотворите тако, согрешите пред Господем, и увесте грех ваш, егда вас постигнут злая: **24** и соградите вы себе грады имению вашему и ограды скотом вашим: и исходящее из уст ваших сотворите. **25** И рекоша сынове Рувимли и сынове Гадовы к Моисею, глаголюще: раби твои сотворят, якоже Господь наш повелел есть: **26** имение наше, и жены наши, и весь скот наш да будут во градех Галаадовых: **27** раби же твои прейдут вси вооружени и уготовани пред Господем на брань, якоже глаголет Господь. **28** И пристави им Моисей Елеазара жерца и Иисуса сына Навина, и князи отечеств племен сынов Израилевых. **29** И рече к ним Моисей: аще прейдут сынове Рувимли и сынове Гадовы с вами чрез Иордан, всяк вооружен на брань пред Господем, и обладаете землю пред собою, и дадите им землю Галаадову во одержание. **30** Аще ли не прейдут вооружени с вами на брань пред Господем, то предпослите имение их и жены их и скоты их прежде вас на землю Ханааню, и да наследят купно с вами в земли Ханаани. **31** И

отвещаша сынове Рувимли и сынове Гадовы, глаголюще:  
елика глаголет Господь рабом Своим, тако сотворим мы:  
**32** преидем вооружени пред Господем в землю Ханааню,  
и дадите нам во одержание страну сию Иордана. **33** И  
даде им Моисей сыном Гадовым и сыном Рувимлим и  
полуплемени Манассиину сынов Иосифовых царство Сиона  
царя Аморрейска и царство Ога царя Васанска, землю и  
грады с пределы ея, грады окрестныя земли. **34** И соградиша  
сынове Гадовы Девон и Атароф и Ароир, **35** и Софан и  
Иазир, и вознесоша их, **36** и Намрам и Вефаран грады  
тверды, и ограды овцам. **37** И сынове Рувимли соградиша  
Есевон и Елеали и Кариафаим, **38** и Навон и Веельмеон  
ограждены, и Севама: и прозваша по именом своим имена  
градом, яже соградиша. **39** И иде ур сын Махиров, внук  
Манассиев, в Галаад, и взя его, и погуби Аморреа живущаго  
в нем: **40** и даде Моисей Галаад Махиру сыну Манассиину, и  
вселися ту. **41** И Иаир сын Манассиев иде и взя села их, и  
прозваша я села Иаирова. **42** И Навав иде и взя Каафа и  
села его, и именована я Наваф от имене своего.

**33** И сии станове сынов Израилевых, егда изыдоша из  
земли Египетския с силою своею рукою Моисеовою и  
Ааронею. **2** И написа Моисей воздвижения их и станы их, по  
словеси Господню. И сии станове шествия их: **3** воздвигошася  
от Рамессы в месяц первый, в пятыйнадесять день первого  
месяца: наутрие Пасхи изыдоша сынове Израилтестии рукою  
высокою пред всеми Египтяны: **4** и Египтяне погребаху  
умершья от них вся, яже изби Господь всякаго первенца в  
земли Египетстей: и в бозех их сотвори отмщение Господь. **5**  
И воздвигшеся сынове Израилевы от Рамессы, ополчишася в

Сокхофе: 6 и воздвигшеся от Сокхофа, ополчишася в Вуфане, иже есть часть некая пустыни: 7 и воздвигошася от Вуфана, и ополчишася во устии Ирофа, иже есть прямо Веельсепфону, и ополчишася прямо Магдолу: 8 и воздвигошася прямо Ирофу, и проидоша среди моря в пустыню: и идоша путем три дни в пустыни тии, и ополчишася в Горькостех. 9 И воздвигошася от Горькостей и приидоша в Елим: и в Елиме (быша) дванадесать источники вод, и семьдесят стеблей фиников, и ополчишася у воды тамо. 10 И воздвигошася от Елима и ополчишася у моря Чермнаго: 11 и воздвигошася от моря Чермнаго и ополчишася в пустыни Син: 12 и воздвигошася от пустыни Син и ополчишася в Рафаке: 13 и воздвигошася от Рафака и ополчишася в Елусе: 14 и воздвигошася от Елуса и ополчишася в Рафидине: и не бысть тамо воды людем пити. 15 И воздвигошася от Рафидина и ополчишася в пустыни Сина: 16 и воздвигошася от пустыни Сина и ополчишася во гробех Похотения: 17 и воздвигошася от Гробов Похотения и ополчишася во Асирофе: 18 и воздвигошася от Асирофа и ополчишася в Рафаме: 19 и воздвигошася от Рафама и ополчишася в Ремнон-Фаресе: 20 и воздвигошася от Ремнон-Фареса и ополчишася в Лемвоне: 21 и воздвигошася от Лемвона и ополчишася в Рессане: 22 и воздвигошася от Рессана и ополчишася в Макеллафе: 23 и воздвигошася от Макеллафа и ополчишася во Арсафафе: 24 и воздвигошася от Арсафафа горы и ополчишася в Харадафе: 25 и воздвигошася от Харадафа и ополчишася в Макидофе: 26 и воздвигошася от Макидофа и ополчишася в Катаафе: 27 и воздвигошася от Катаафа и ополчишася во Фарафе: 28 и воздвигошася от

Фарафа и ополчишася в Мафекке: 29 и воздвигошася от Мафекка и ополчишася во Аселмоне: 30 и воздвигошася от Аселмона и ополчишася в Масуруфе: 31 и воздвигошася от Масуруфа и ополчишася в Ванаккане: 32 и воздвигошася от Ванаккана и ополчишася в горе Гаддад: 33 и воздвигошася от горы Гаддад и ополчишася во Етевафе: 34 и воздвигошася от Етевафа и ополчишася во Евроне: 35 и воздвигошася от Еврона и ополчишася в Гесион-Гавере: 36 и воздвигошася от Гесион-Гавера и ополчишася в пустыни Син: и воздвигошася от пустыни Син и ополчишася в пустыни Фарани, яже есть Кадис: 37 и воздвигошася от Кадиса и ополчишася в горе Ор близ земли Едомли. 38 И взыде Аарон жрец на гору Ор повелением Господним, и умре тамо в четыредешатое лето изшествия сынов Израилевых из земли Египетския, месяца пятого в первый день месяца. 39 И Аарон бяше ста двадесяти трех лет, егда умре в горе Ор. 40 И услыша Хананей царь Арадский, и сей живяше в земли Ханаани, егда вхождаху сынове Израилевы. 41 И воздвигошася от горы Ор и ополчишася в Селмоне: 42 и воздвигошася от Селмона и ополчишася в Финоне: 43 и воздвигошася от Финона и ополчишася во Овофе: 44 и воздвигошася от Овофа и ополчишася в Гаи, об ону страну предел Моавлих: 45 и воздвигошася от Гаи и ополчишася в Девон-Гаде: 46 и воздвигошася от Девон-Гада и ополчишася в Гелмон-Девлафаиме: 47 и воздвигошася от Гелмон-Девлафаима и ополчишася в горах Аваримлих прямо Нававу: 48 и воздвигошася от гор Аваримлих и ополчишася на западе Моавли, у Иордана при Иерихоне: 49 и воздвигошася от запада Моавля и ополчишася у Иордана, между Есимофом,

до Велсаттима на запады Моава. 50 И рече Господь к Моисею в западе Моава у Иордана при Иерихоне, глаголя: 51 глаголи сыном Израилевым и речеши к ним: вы преходите Иордан в землю Ханааню, 52 и погубите вся живущия на земли от лица вашего, и разрушите стражбы их, и вся идолы излианныя их сокрушите я, и вся капища их разрушите, 53 и погубите вся живущия на земли, и вселитесь в ню: вам бо дах землю их по жребию: 54 и наследите землю их жребием по племенам вашим: многим умножите одержание их, и малым умалите одержание их: в неже изыдет имя его, тамо да будет жребий его: по племенам отечествий ваших наследите: 55 аще же не погубите живущих на земли от лица вашего, будут, ихже оставите от них, остны во очесех ваших и стрелы в ребрах ваших, и совраждуют вам на земли, на нейже вы вселитесь: 56 и будет якоже умыслих сотворити онем, то сотворю вам.

**34** И рече Господь к Моисею, глаголя: 2 заповеждь сыном Израилевым, и речеши к ним: вы входите в землю Ханааню, сия будет вам в наследие, земля Ханааня с пределы ея: 3 и будет вам страна, яже к ливе от пустыни Син даже до Едома: и будут вам пределе к ливе, от края моря Сланаго от востоков, 4 и обыдут вас пределы от ливы до возшествия Акравиня, и пройдут Еннак, и будет исход его к ливе Кадис-Варни, и изыдет на село Арад, и пройдет Аселмона: 5 и обыдут пределы от Аселмона водотечу Египетскую, и будет исход море (великое): 6 и пределы морстии будут вам, море великое определит, сие будет вам пределы морстии: 7 и сие будет вам предел к северу: от моря великаго измерите сами себе при горе Гору: 8 и от горы Гору измерите сами себе,



входяще во Емаф, и будут преход его пределы Садада: **9**  
и изыдут пределы Зефрона, и будет исход его Арсенаин:  
сие будет вам пределы от севера: **10** и измерите сами  
себе пределы восточныя от Арсенаина до Сепфамара: **11** и  
снидут пределы от Сепфамар-Вила от восток на источники,  
и снидут пределы Вилы, и пройдут на хребет моря Хенерев,  
от восток: **12** и снидут пределы на Иордан, и будет преход его  
море Сланое: сия будет земля вам, и пределы ея окрест. **13**  
И заповеда Моисей сыном Израилевым, глаголя: сия земля,  
юже примете в наследие по жребию, якоже повеле Господь,  
дати ю девяти племеном и полуплеменю Манассиину: **14**  
яко взя племя сынов Рувимлих и племя сынов Гадовых, по  
домом отечеств их, и пол племене Манассиина восприяша  
жребия своя: **15** два племена и пол племене прияша жребия  
своя за Иорданом при Иерихоне от полудня на востоки. **16**  
И рече Господь к Моисею, глаголя: **17** сия имена мужей,  
иже разделят вам землю: Елеазар жрец и Иисус Навин:  
**18** и по князю единому от племене возмете разделитьи вам  
землю. **19** И сия имена мужем: племене Иудина Халев сын  
Иефонниин, **20** племене Симеоня Саламиил сын Семиудов,  
**21** племене Вениамина Елдад сын Хаслонь, **22** племене  
Данова князь Воккор сын Иеклинин, **23** сынов Иосифовых  
племене сынов Манассииных князь Аниил сын Суфидов,  
**24** племене сынов Ефремлих князь Камуил сын Сафтанов,  
**25** племене Завулоня князь Елисафан сын Харнахов, **26**  
племене сынов Иссахаровых князь Фалтиил сын Озаин, **27**  
племене сынов Асировых князь Ахиор сын Селемиин, **28**  
племене Неффалимля князь Фадаил сын Амиудов. **29** Сим

заповеда Господь разделить сыном Израилевым в земли Ханаани.

**35** И рече Господь к Моисею на западе Моавли у Иордана при Иерихоне, глаголя: **2** заповеждь сыном Израилевым, да дадут левитом от жребий одержания своего грады вселитися, и предградия градская окрест их да дадут левитом: **3** и будут им грады вселятися, и участия их да будут скотом их и всем четвероножным их: **4** и прилежащая градом, ихже дадите левитом, от стены града и вне, две тысящы лакот окрест: **5** и да измериши страну вне града, яже на восток, две тысящы лакот, и страну, яже к ливе, две тысящы лакот, и страну, яже к морю, две тысящы лакот, и страну, яже к северу, две тысящы лакот, и град посреде сего будет вам, и пределы градов: **6** и грады яже дадите левитом, шесть градов (да будут) убежных, ихже дадите убегати в ня убившему, и к сим четыредесять и два града: **7** всех градов дадите левитом четыредесять и осмь градов, сия и предградия их: **8** и грады, ихже дадите от одержания сынов Израилевых, от многих многа, а от малых мала: кийждо по наследию своему, еже наследят, да дадут от градов левитом. **9** И рече Господь к Моисею, глаголя: **10** глаголи сыном Израилевым и речеши к ним: вы преходите Иордан в землю Ханааню: **11** и разделите сами себе грады убежища да будут вам убегати в ня убийце, всяк убивый душу нехотяй: **12** и будут гради вам убежища от ужика крове, и да не умрет убивый, дондеже станет пред сонмом на суде: **13** и грады, яже дадите, шесть градов, убежища да будут вам. **14** Три грады дадите об ону страну Иордана, и три грады дадите в земли Ханаани: **15** убежище да будет сыном Израилевым, и пришелцу, и обиталнику

иже в вас, да будут гради сии во убежище убежати тамо  
всякому убившему душу нехотением. 16 Аще же орудием  
железным убьет его, и умрет, убийца есть: смертью да умрет  
убийца. 17 Аще же камением из руки убьет его, и умрет  
от него, убийца есть: смертью да умрет убийца. 18 Аще  
же орудием деревянным из руки, от негоже умрет, убьет его,  
и умрет, убийца есть: смертью да умрет убийца. 19 Ужик  
крове, сей да убьет убившаго: егда усрящет его, сей да убьет  
его. 20 Аще же вражды ради ринет его и вержет на него  
всяк сосуд по навету, и умрет, 21 или от ненависти поразил  
его рукою, и умрет, смертью да умрет убивый, убийца есть:  
смертью да умрет убиваяй: ужик крове да убьет убийцу, егда  
сретится с ним. 22 Аще же внезапно не вражды ради ринет  
его, или вержет на него всяк сосуд не по навету, 23 или  
всяким камением, имже вержет не ведый, и падет на него, и  
умрет, он же враг его не бе, ниже ищяй зла ему творити, 24 и  
да судит сонм между убившим и между ужиком крове, по  
судбам сим, 25 и избавит сонм убившаго от ужика крове, и  
да возвратит его сонм во град убежища его, в оньже убежа,  
и да поживет тамо, дондеже умрет жрец великий, егоже  
помазаша елеем святым. 26 Аще же исходом изыдет убивый  
вне предел града, в оньже убежа тамо, 27 и обрящет его ужик  
крове вне предел града убежища его, и убьет ужик крове  
убившаго, несть повинен: 28 во граде бо убежания да живет,  
дондеже умрет жрец великий, и по умертвии жерца великаго  
да возвратится убивый в землю одержания своего. 29 И  
да будут сия вам во оправдание суда в роды ваша во всех  
селениях ваших. 30 Всякаго убившаго душу, пред свидетелми  
да убиеша убившаго: и свидетель един да не свидетельствует

на смерть души. **31** И да не возьмете искупа за душу от убившаго, повинна суца убиению: смертью бо умрет: **32** ниже да возьмете искупа убежания во град убежища, да паки живет на земли, дондеже умрет жрец великий. **33** И да не убьете земли, на нейже вы обитаете: кровь бо сия убивает землю, и не очистится земля от крове пролиянных на ней, но токмо кровию проливающего: **34** и да не оскверните земли, на нейже живете, на нейже Аз вселяюся посреде вас: Аз бо есмь Господь вселяяйся посреде сынов Израилевых.

**36** И приидоша князи племени сынов Галаадовых, сына Махирова сына Манассиина от племени сынов Иосифовых, и глаголаша пред Моисеом и пред Елеазаром жрецем и пред князи домов отечеств сынов Израилевых, **2** и рекоша: господину нашему повеле Господь отдати землю наследия по жребию сыном Израилевым: и господину нашему заповеда Господь дати наследие Салпаада брата нашего дочерем его: **3** и будут единому от племен сынов Израилевых в жены, и отлучится жребий их от одержания отец наших, и приложится к наследию племени, имже будут в жены, и от жребия наследия нашего отлучится: **4** аще же будет оставление сынов Израилевых, и приложится наследие их к наследию племени, имже аще будут в жены, и от наследия племени отечества нашего отимется наследие их. **5** И заповеда Моисей сыном Израилевым по повелению Господню, глаголя: сице племя сынов Иосифовых глаголют: **6** сие слово, еже заповеда Господь дочерем Салпаадовым, глаголя: идеже угодно им, да будут в жены, токмо от сонма отечества своего да будут в жены, **7** и не превратится наследие сынов Израилевых от племени в племя ино: яко

кийждо в наследии племени отечества своего жениться  
имут сынове Израилевы: 8 и всяка дщи, ужичествующая  
наследие от племен сынов Израилевых, единому сущих  
от сонма отца ея да будет жена: да ужичествуют сынове  
Израилевы кийждо наследие отца своего: 9 и не превратится  
жребий от племени в племя ино, но кийждо в наследии  
своём да женятся сынове Израилевы. 10 Якоже повеле  
Господь Моисею, тако сотвориша дщери Салпаадовы. 11  
И быша Маала и Ферса, и Егла и Мелха и Нуа, дщери  
Салпаадовы, сыном братии своея, от сонма Манассиина  
сынов Иосифовых, быша в жены: 12 и бысть наследие их в  
племени сонма отца их. 13 Сия заповеди и оправдания и  
суды, яже заповеда Господь рукою Моисеовою на западе  
Моавли при Иордане прямо Иерихону.

## Второзаконие

**1** Сия словеса, яже глагола Моисей всему Израилю об ону страну Иордана, в пустыни на запады, близ Чермного моря, между Фараном и Тофолом, и Ловоном и Авлоном и златыми рудами: **2** едионадесяти дний от Хорива путь чрез гору Сиир даже до Кадис-Варни. **3** И бысть в четыредешатое лето, в первыйнадесять месяц, в первый день месяца глагола Моисей ко всем сыном Израилевым, по всему елико заповеда ему Господь к ним, **4** по убиении Сиона царя Аморрейска, жившаго во Есевоне, и Ога царя Васанска, жившаго во Астарофе и во Едраине, **5** об ону страну Иордана в земли Моавли, нача Моисей изяснити закон сей, глаголя: **6** Господь Бог наш глагола нам в Хориве, глаголя: да довлеет вам жити в горе сей: **7** обратитесь и воздвигнитесь вы, и внидите в гору Аморрейску, и ко всем населником Аравы, в гору и поле, и к югу и в приморскую землю Ханааню, и во Антиливан, даже до реки великия, реки Евфрата: **8** видите, предах пред вами землю, вшедше наследите землю, еюже клятятся Господь отцем вашим, Аврааму и Исааку и Иакову, дати ю им и семени их по них. **9** И рекох к вам во время оно глаголя: не возмогу един водити вас: **10** Господь Бог ваш умножил вы есть, и се, есте днесь яко звезды небесныя множеством: **11** Господь Бог отец ваших да приложит вам, яко да будете тысящами сугубо, и да благословит вас, яко же глагола вам: **12** како возмогу един носити труды ваша и тяжести ваша и пререкания ваша? **13** Изберите себе мужы мудры и уметелны и смысленны в племенех ваших, и поставлю их над вами старейшины вам. **14** И отвещасте ми и рекосте: добро слово, еже глаголал еси сотворити. **15** И взях

от вас мужы мудры и уметелны и смысленны, и поставих их владети над вами тысященачалники и стоначалники, и пятьдесятначалники и десятначалники, и писмовводители судиям вашим. 16 И заповедах судиям вашим во время оно, глаголя: разслушайте посреде братий ваших, и судите праведно посреде мужа и посреде брата его и посреде пришелца его: 17 да не познаете лица в суде, малому и великому судиши, и не устыдишися лица человека, яко суд Божий есть: и речь, яже аще жестока будет у вас, донесете ю ко мне, и услышу ю. 18 И заповедах вам во время оно вся словеса, яже сотворите. 19 И воздвигшеся от Хорива, проидохом всю пустыню великую и страшную ону, юже видесте, путь горы Аморрейски, якоже заповеда нам Господь Бог наш: и приидохом до Кадис-Варни. 20 И рекох вам: приидосте до горы Аморрейски, юже Господь Бог наш дает вам: 21 видите, предаде Господь Бог ваш пред лицом вашим землю: вшедше наследите, якоже глагола Господь Бог отец ваших вам: не бойтесь, ни ужасайтесь. 22 И приидосте ко мне вси и рекосте: да послем мужы пред нами, и да соглядают нам землю, и да поведают нам ответ, путь, имже дойдем ея, и грады, в няже внидем. 23 И угодно бысть слово предо мною, и поях от вас дванадесать мужей, мужа единого от коегождо племени. 24 И обратившеся взыдоша на гору, и приидоша до дебри Грезновныя, и соглядаша ю: 25 и взяша в руке свои от плода земли и принесоша к нам, и глаголаху: блага земля, юже Господь Бог наш дает нам. 26 И не восхотесте зыти, но преслушасте глаголгол Господа Бога вашего: 27 и возроптасте в кущах своих и рекосте: ненависти ради изведе ны Господь из земли Египетския предати нас в руки

Аморрейския, потребити нас: 28 камо мы въздем? Братия же ваша отвратиша сердца ваша, глаголюще: язык велик и мног и крепчае нас, и грады велицы и ограждени даже до небесе, но и сыны Исполинов видехом тамо. 29 И глаголах к вам: не ужасайтесь, ниже убойтесь от них: 30 Господь Бог ваш предходяй пред лицом вашим, Той повоюет их с вами, по всему елико сотвори вам в земли Египетстей пред очима вашима, 31 и в пустыни сей, юже видесте: яко воспита тебе Господь Бог твой, якоже некий человек питает сына своего, по всему пути в онже ходисте, дондеже приидосте на место сие. 32 И в словеси сем не веровасте Господеви Богу вашему, 33 иже предходит пред вами в путь избрати вам место, путеводя вас огнем нощию, показуя вам путь, имже ити по нем, и облаком во дни. 34 И услыша Господь (Бог) глас словес ваших, и разгневався клястся, глаголя: 35 аще узрит кто от мужей сих землю благую сию, еюже Аз кляхся отцем их, 36 разве Халев сын Иефоннин, сей узрит ю, и сему дам землю, на нюже възде, и сыном его, понеже прилежит Господеви. 37 И на мя разгневася Господь вас ради, глаголя: ниже ты видиши тамо: 38 Иисус сын Навин, иже стоит пред тобою, сей увидет тамо: сего укрепи, яко сей даст ю в наследие Израилю: 39 и отрочата ваша, о нихже глаголасте, яко в пленении имут быти, и всяко отроча младо, еже не весть днесь добра или зла, сии видут тамо, и сим дам ю, и сии наследят ю: 40 и вы обратившися ополчитесь в пустыню, путем к Чермному морю. 41 И отвещасте и рекосте мне: согрешихом пред Господем Богом нашим: мы шедше повоюем, по всему елико заповеда Господь Бог наш нам. И вземше кийждо орудия ратная своя и собравшися въздосте



на гору. 42 И рече Господь ко мне: рцы им: не восходите, ниже ратуйте, несмы бо с вами, и да не будете сотрени пред враги вашими. 43 И глаголах к вам, и не послушасте мене: и преступисте слово Господне, и понудившеся въздосте на гору. 44 И изыде Аморрей живущий на горе той противу вам, и прогна вас, аки бы пчелы творили, и уязвляху вас от Сиира даже до Ермы. 45 (И возвратитесь, ) и седше плакасте пред Господем, и не послуша Господь гласа вашего, ниже внят вам: 46 и седесте в Кадисе дни многи, елики дни тогда седесте.

**2** И возвратившеся въздвигохомся в пустыню, путем моря Чермнаго, якоже глагола Господь ко мне: и обходихом гору Сиир дни многи. 2 И рече Господь ко мне: 3 довлеет вам обходжати гору сию: возвратитесь убо к северу: 4 и людем заповеждь, глаголя: вы пройдите сквозе пределы братии вашея, сынов Исавовых, живущих в Сиире, и убоятся вас и ужаснутся зело: 5 не сотворите с ними рати: не дах бо вам от земли их ниже стопы ноги, яко во жребий дах сыном Исавовым гору Сиир: 6 серебром пищу купите себе у них и ядите, и воду в меру возьмите от них на цене и пейте: 7 ибо Господь Бог твой благослови тебе во всяком деле руку твою: разумей, како прошел еси пустыню великую и страшную сию: се, четьредесять лет Господь Бог твой с тобою, и не востребовал еси словесе. 8 И минухом братию свою сыны Исавли, живущыя в Сиире, у пути Аравскаго от Елона и от Гесион-Гавера, и возвратившеся преидохом путь в пустыню Моавлю. 9 И рече Господь ко мне: не совраждуйтесь Моавитом и не сотворите с ними рати: не дах бо вам от земли их во жребий, сыном бо Лотовым дах Ароир

наследити. 10 Оммины прежде седяху на ней, народ велик и мног и крепок якоже Енакими: 11 Рафаины глаголются и сии, якоже и Енакими: и Моавити прозывают я Оммины. 12 И в Сиире седяше Хорреи прежде, но сынове Исавовы потребиша я и искорениша я от лица своего: и вселишася вместо их, имже образом сотвори Израиль земли наследия своего, юже даде Господь им. 13 Ныне убо вы встаните и воздвигнитеся, и пройдите дебрь Заретову. 14 И дни, в няже отидохом от Кадис-Варни дондеже преидохом дебрь Заретову, тридесять и осмь лет, дондеже паде весь род мужей воинских от полка, якоже клятсся им Господь Бог. 15 И рука Божия бяше на них, погубити я от полка, дондеже падоша. 16 И бысть внегда падоша вси мужи воинстии умирающе от среды людей, 17 и рече Господь ко мне, глаголя: 18 ты преjdeши днесь пределы Моавлими Ароир: 19 и пришедше близ сынов Амманых, не совраждуйтеся им и не сотворите с ними рати: не дам бо тебе от земли сынов Амманых во жребий, яко сыном Лотовым дах ю во жребий. 20 Земля Рафаинска возименуются: Рафаини бо на ней прежде живяху: Амманитяне же прозывают их Зоммин: 21 язык велик и мног и крепок, якоже и Енакими: и погуби я Господь от лица их, и прияша наследие и вселишася вместо их даже до сего дне: 22 якоже сотвориша сыном Исавовым живуцым в Сиире, имже образом потребиша Хорреа от лица своего и наследиха их, и вселишася вместо их даже до сего дне: 23 и Евее живуции во Асирофе даже до Газы, и Каппадоки изшедшии из Каппадокии потребиша я, и вселишася вместо их. 24 Ныне убо встаните и воздвигнитеся, и прейдите вы дебрь Арноню: се, предах в руце твои Сиона царя Есевоня

Аморрейска и землю его: начни наследовати, сотвори с ним рать днешний день: 25 начинай даяти трепет твой и страх твой пред лицом всех языков сущих под небесем, иже слышавше имя твое возмьются, и болезнь примут от лица твоего. 26 И послах послы от пустыни Кедамоф к Сиону царю Есевоню словесы мирными, глаголя: 27 да пройду сквозе землю твою: по пути пройду, не совращуся ни на десно, ни на лево: 28 пищу на цене даси ми, и ям: и воду на цене даси ми, и пию: точию ногама моима да прейдю: 29 якоже сотвориша ми сынове Исавли живуции в Сиире и Моавити живуции во Ароире, дондеже прейдю Иордан на землю, юже Господь Бог наш дает нам. 30 И не восхоте Сион цар Есевонь, да пройдем сквозе его, яко ожесточи Господь Бог наш дух его и укрепи сердце его, да предастся в руце твои якоже во днешний день. 31 И рече Господь ко мне: се, начях предаяти пред лицом твоим Сиона царя Есевоня Аморрейска и землю его, и начинай наследити землю его. 32 И изыде Сион царь Есевонь противу нам сам и вси людие его на брань во Иассу: 33 и предаде его Господь Бог наш пред лицом нашим в руце наши: и убихом его, и сыны его и вся люди его: 34 и одержихом вся грады его во оно время, и разорихом всяк град, ктому и жены их и дети их не оставихом живы: 35 токмо скот пленихом себе, и корысти градов взяхом. 36 Из Ароира, иже есть при устии водотечи Ариони, и град иже есть в дебри, и даже до горы Галаадовы, не бысть град уцелевый от нас: вся предаде Господь Бог наш в руце наши: 37 токмо в земли сынов Амманих не приступахом ко всем прилежащым к водотечи Иавокове и ко градом иже в горах, якоже повеле нам Господь Бог наш.

**3** И обратившися вздыхом путем иже к Васану: и изыде Ог царь Васанский противу нам, сам и вси людие его с ним на брань во Едраим. **2** И рече Господь ко мне: не убойся его, яко в руце твои предах его, и вся люди его, и всю землю его: и сотвориши ему, якоже сотворил еси Сиону царю Аморрейску, иже живяше во Есевоне. **3** И предаде его Господь Бог наш в руце наши, и Ога царя Васанска, и вся люди его: и избихом его, дондеже не остана от него семя: **4** и одержахом вся грады его во время оно, не бысть града, егоже не взяхом от них: шестьдесят градов, вся пределы Аргова царя Ога в Васане, **5** вся грады тверды, стены высоки, врата и верей, кроме градов фerezейских многих зело: **6** потребихом их, якоже сотворихом Сиону царю Есевоню, и потребихом вся грады, вкупе и жены их и чада: **7** и вся скоты, и корысти градныя пленихом себе, **8** и взяхом в то время землю от рук двух царей Аморрейских, иже быша об оны пол Иордана, от водотечи Арнони, даже и до горы Аермона. **9** Финикиане прозывают Аермон Саниором, Аморрей же прозва его Саниром. **10** Вси грады мисоровы, и весь Галаад, и весь Васан даже до Елхи и Едраима, грады царствия Огова в Васане: **11** яко точию Ог царь Васанский остана от Рафаинов: се, одр его одр железен, се, той есть в Краеградии сынов Аммановых: девять лакот долготы его и четыре лакты широта его лактем мужеским. **12** И землю ту наследихом во оно время от Ароира, иже есть у устия водотечи Ариони, и пол горы Галаадовы: и грады его дах Рувиму и Гаду: **13** и оставшее Галаадово, и все Васанское царство Огово дах полуплемени Манасиину, и весь предел Аргова, весь Васан оный, земля Рафаиня вменится. **14** И Иаир сын Манасиин

взя вся пределы Аргова, даже до предел Гаргасинских и Махафинских: прозва я по имени своему Васан Авоф Иаир, даже до сего дне: 15 и Махиру дах Галаад, 16 и Рувиму и Гадови дах от Галаада даже до водотечи Арнони, среди водотечи предел, и даже до Иавока: водотеча предел сынов Амманых: 17 и арава и Иордан предел от Махенерефа и даже до моря Аравскаго, моря Сланаго, под асидофом Фазги от востока. 18 И повелех вам во время оно, глаголя: Господь Бог ваш даде вам землю сию во жребий: вооружени поидите пред лицом братии вашей сынов Израилевых, всяк сильный: 19 точию жены ваша и дети ваша и скоти ваша, вем, яко скот мног есть вам, да пребудут во градех ваших, яже дах вам: 20 дондеже упокоит Господь Бог наш братию вашу, якоже и вас, и наследят и сии землю, юже Господь Бог ваш дает им об ону страну Иордана: и возвратитесь кийждо в наследие свое иже дах вам. 21 И Иисусу заповедах во время оно, глаголя: очи ваши видеша вся, елика сотвори Господь Бог наш обоим царем сим, тако сотворит Господь Бог наш всем царством, иже сквозе ты пройдеши тамо: 22 не убойтесе от них, яко Господь Бог наш Сам поборет по вас. 23 И молихся Господви во оно время, глаголя: 24 Господи Боже, Ты начал еси показовати Твоему рабу крепость Твою и силу Твою, и руку крепкую и мышцу высокую: кто бо есть бог на небеси или на земли, иже сотворит, якоже сотворил еси Ты, и по крепости Твоей? 25 Прешед убо увижду землю благую сию, яже об ону страну Иордана, гору сию благу и Антиливан. 26 И презре мя Господь вас ради, и не послуша мене, и рече Господь ко Мне: довлеет ти, не приложи к сему глаголати словесе сего: 27 възиди на верх горы Изсечения и

воззри очима твоима к морю и северу, и югу и на востоки, и виждь очима твоима, яко не преjdeши Иордана сего: 28 и заповеждь Иисусу, и укрепи его, и утеши его: яко сей преjдет пред лицем людий сих, и сей разделит им в наследие всю землю, юже еси видел. 29 И преbыхом во юдоли близ дому Фогорова.

**4** И ныне, Израилю, послушай оправданий и судов, елика аз учу вас днесь делати, да поживете и умножитесь, и вшедше наследите землю, юже Господь Бог отец ваших дает вам в наследие: 2 да не приложите к словеси, еже аз заповедаю вам, ниже да отимете от него: сохраните заповеди Господа Бога нашего, елика аз заповедаю вам днесь. 3 Очи ваши видеша вся, елика сотвори Господь Бог наш Веельфегору: яко всяк человек иже иде вслед Веельфегора, потреби его Господь Бог наш от вас: 4 вы же, прилежащии Господеви Богу вашему, живете вси до днесь: 5 видите, показах вам оправдания и суды, якоже заповеда мне Господь Бог мой сотворити сице на земли, в нюже вы идете тамо, наследити ю: 6 и сохраните, и сотворите, яко сия премудрость ваша и смышление пред всеми языки, елицы аще услышат вся оправдания сия и рекут: се, людие премудрии и уметелны: язык великий сей. 7 Кий бо язык тако велий, емуже есть бог, приближаяйся ему, яко Господь Бог наш во всех, в нихже аще призовем Его? 8 И кий язык велик, емуже суть оправдания и суды правы по всему закону сему, егоже аз даю пред вами днесь? 9 Вонми себе и снабди душу твою зело, и не забуди всех словес, яже видеста очи твои, и да не отступят от сердца твоего вся дни живота твоего: и да наставиши сыны твоя и сыны сынов твоих, 10 в день в оньже стоясте

пред Господем Богом вашим в Хориве в день собрания, егда рече Господь ко мне: собери ко Мне люди, и да слышат словеса Моя, да научатся бояться Мене вся дни, в няже сии живут на земли, и сыны своя да научат. 11 И приидосте, и стасте под горою: и гора горяше огнем даже до небесе, тма, мрак, и вихр. 12 И глагола Господь к вам на горе из среды огня: глас словес Его вы слышасте, и образа не видесте, токмо глас: 13 и возвести вам завет Свой, егоже заповеда вам творити, десять словес, и написа я на двоих скрижалех каменных: 14 и мне заповеда Господь во время оно, научити вас оправданием и судам, творити вам я на земли, в нюже вы входите тамо наследити ю. 15 И снабдите души своя зело, яко не видесте всякаго подобия в день, в оньже глагола Господь к вам в горе Хориве из среды огня: 16 не беззаконнуйте, и не сотворите себе самим подобия ваянна, всякаго образа подобия мужеска пола или женска: 17 и подобия всякаго скота, иже есть на земли, подобия всякия птицы пернатая, под небесем парящая: 18 подобия всякаго гада, иже плещет по земли: подобия всякия рыбы, елики суть в водах под землею: 19 да не когда воззрев на небо и видев солнце и луну и звезды, и всю красоту небесную, прельстився поклонишися им и послужиши им, яже раздели Господь Бог твой всем языком, иже под небесем. 20 Вас же взя Господь Бог и изведе вас от пещи железны из Египта, да будете Ему людие в жребий, якоже в днешний день. 21 И Господь Бог разгневался на мя о словесех ваших, и клятся, да не преиду Иордана сего и да не вниду в землю, юже Господь Бог твой дает тебе в наследие: 22 аз бо умру в сей земли, и не преиду Иордана сего, вы же преидете и

наследите землю благую сию. 23 Вонмите вы, да не когда забудете завета Господа Бога вашего, егоже завеща к вам, и да не сотворите сами себе изваянна подобия всех, яже заповеда тебе Господь Бог твой, 24 яко Господь Бог твой огонь потребляяй есть, Бог ревнитель. 25 Аще же родиши сыны и сыны сынов твоих, и умедлите на земли, и возбеззаконнуете, и сотворите изваянно подобие всякаго, и сотворите злое пред Господем Богом, вашим, еже раздражити Его, 26 засвидетелствую вам днесь небесем и землю, яко пагубою погибнете от земли, на нюже вы преходите чрез Иордан тамо наследити ю: не пребудете много дний на ней, но потреблением потребитесь: 27 и разсыплет вы Господь во всех языцех, и останетеся мали числом во языцех, в няже введет вы Господь тамо, 28 и послужите тамо богом иным, делом рук человеческих, древу и камению, иже не узрят и не услышат, ни ядят, ни обоняют: 29 и взыщете тамо Господа Бога вашего, и обрящете Его, егда взыщете Его от всего вашего сердца и от всея души вашея в скорби вашей. 30 И постигнут тя вся сия словеса в последняя дни, и обратишися к Господеви Богу твоему, и услышиши глас Его, 31 яко Бог щедр и милосерд Господь Бог твой, не оставит тебе, ниже потребит тебе, не забудет завета отец твоих, имже клятся им. 32 Вопросите дний первых, бывших прежде вас, от дне в оньже сотвори Бог человека на земли, и от края небесе даже до края небесе, аще бысть по словеси великому сему, аще слышано бысть сицево: 33 аще (кий) язык слыша глас Бога живаго глаголюща от среды огня, имже образом слышал еси ты, и жив был еси: 34 аще искуси бог вшед взяти себе язык от среды языка искушением, и знамении и чудесы, и



бранию и рукою сильною, и мышцею высокою и видении великими, по всему елико сотвори Господь Бог наш во Египте пред тобою зрящим, 35 яко да разумееш ты, яко Господь Бог твой сей Бог есть, и несть разве Его. 36 От небесе слышан сотвори тебе глас Свой, еже научити тя, и на земли показа тебе огонь Свой великий, и глаголголы Его слышал еси из среды огня: 37 занеже возлюби отцы твоя, избра семья их по них вас, и изведе тя Сам силою Своею великою из Египта 38 потребити языки великия и крепчайшыя тебе пред лицом твоим, ввести тя, дати тебе землю их в наследие, якоже имаши днесь. 39 И увеси днесь, и обратишия умом, яко Господь Бог твой Сей Бог на небеси горе и на земли долу, и несть разве Его, 40 и да сохраниши заповеди Его и оправдания Его, елика аз заповедаю тебе днесь, да благо тебе будет и сыном твоим по тебе, яко да будете долголетни на земли, юже Господь Бог твой дает тебе вся дни. 41 Тогда отдели Моисей три грады об ону страну Иордана на восток солнца, 42 еже убегати тамо убийце, иже аще убьет ближняго не ведый, и сей не ненавидя его прежде вчера и третияго дне, и да вбегнет во един град от сих и жив будет: 43 Восор в пустыни в земли селней Рувиму, и Раммоф в Галааде Гадду, и Гавлон в Васане Манассии. 44 Сей закон, егоже предложи Моисей пред сыны Израилтескими: 45 сия свидения и оправдания и суды, елика глагола Моисей сыном Израилевым в пустыни, изшедшым им из земли Египетския, 46 об он пол Иордана, в дебри, близ дому Фогорова, в земли Сиона царя Аморрейска, иже живяше во Есевоне, егоже изби Моисей и сынове Израилевы, изшедшым им из земли Египетския. 47 И наследиша землю его и землю

Ога царя Васанска, дву царей Аморрейских, иже бяху об он пол Иордана на восток солнца, 48 от Ароира, иже есть во устии водотечи Арнони и у горы Сиона, яже есть Аермон, 49 всю араву об ону страну Иордана, на восток солнца под асидофом Тесаным.

**5** И призва Моисей всего Израиля и рече к ним: слыши, Израилю, оправдания и суды, елика аз глаголю во уши ваши во днешний день, и научитесь их, и сохраните творити я. 2 Господь Бог ваш завеща вам завет в Хориве: 3 не отцем вашим завеща Господь завет сей, но токмо вам: вы же zde вси живи днесь. 4 Лицем к лицу глагола Господь к вам на горе из среды огня, 5 и аз стоях между Господем и вами во время оно возвестити вам глаголголы Господня, яко убоястесь от лица огня и не въздосте на гору, глаголя: 6 Аз есмь Господь Бог твой, изведый тя из земли Египетския, от дому работы: 7 да не будут тебе бози инии пред лицом Моим. 8 Да не сотвориши себе кумира, ни всякаго подобия, елика на небеси горе, и елика на земли низу, и елика в водах под землею, 9 да не поклонишися им, ниже послужиши им: яко Аз есмь Господь Бог твой, Бог ревнив, отдай грехи отцев на чада до третияго и четвертаго рода ненавидящим Мене, 10 и творяй милость в тысящах любящим Мене и хранящим повеления Моя. 11 Да не приимеши имене Господа Бога твоего всуе: не очистит бо Господь Бог твой приемлющаго имя Его всуе. 12 Снабди день субботный святити его, якоже заповеда тебе Господь Бог твой: 13 шесть дний делай, и да сотвориши вся дела твоя, 14 в день же седмый суббота Господу Богу твоему: да не сотвориши в онь всякаго дела, ты и сын твой и дщерь твоя, раб твой и

раба твоя, вол твой и осел твой и всяк скот твой, и пришлец обитаяй у тебе, да почует раб твой и раба твоя, и осел твой, якоже и ты: **15** и да помянеши, яко (и ты) раб был еси в земли Египетстей и изведе тя Господь Бог твой оттуду рукою крепкою и мышцею высокою: сего ради повеле тебе Господь Бог твой, еже хранити день субботный и святити его. **16** Чти отца твоего и мать твою, якоже заповеда тебе Господь Бог твой, да благо ти будет и да долголетен будеши на земли, юже Господь Бог твой дает тебе. **17** Не убий. **18** Не прелюбодействуй. **19** Не укради. **20** Не послушествуй на ближняго твоего свидетелства ложна. **21** Не пожелай жены ближняго твоего, не пожелай дому ближняго твоего, ни села его, ни раба его, ни рабыни его, ни вола его, ни осляте его, ни всякаго скота его, ниже всех, елика ближняго твоего суть. **22** Сия словеса глагола Господь ко всему сонму вашему на горе из среды огня: тма, мрак, буря, глас велик, и не приложи: и написа я на двоих скрижалех каменных, и даде мне. **23** И бысть яко услышасте глас из среды огня, и гора горяше огнем, и приидосте ко мне вси начальницы племен ваших и старейшины ваши, **24** и ресте: се, показа нам Господь Бог наш славу Свою, и глас Его слышахом из среды огня: во днешний день видехом, яко возглаголет Бог человеку, и жив будет: **25** и ныне да не измрем, яко потребит нас огонь великий сей, аще приложим мы слышати глас Господа Бога нашего ктому, и умрем: **26** кая бо плоть, яже слыша глас Бога жива, глаголюща из среды огня, якоже мы, и жива будет? **27** Приступи ты, и послушай вся, елика к тебе речет Господь Бог наш, и ты речеши к нам вся, елика речет Господь Бог наш к тебе, и услышим, и сотворим. **28** И

услыша Господь глас словес ваших, глаголющим вам ко мне, и рече Господь ко мне: слышах глас словес людей сих, елика глаголаша к тебе: право вся, елика глаголаша: **29** кто даст еже быти тако сердцу их в них, яко бояться Мене и хранити заповеди Моя во вся дни, да благо будет им и сыном их во веки? **30** Гряди, рцы им: возвратитесь в в дома своя: **31** ты же zde стани со Мною, и возглаголю к тебе вся заповеди и оправдания и суды, еликим научиши их: и да сотворят сице в земли, юже Аз даю им в жребий: **32** и сохраните творити, якоже заповеда тебе Господь Бог твой: не совратитесь ни на десно, ни на лево, **33** по всему пути, егоже заповеда тебе Господь Бог твой ходити в нем, да ты упокоит, и благо тебе будет: и многи дни будете на земли, юже наследите.

**6** И сия заповеди и оправдания и суды, елика заповеда Господь Бог ваш научити вас творити тако на земли, в нюже вы входите тамо, наследити ю: **2** да боитесь Господа Бога вашего, хранити вся оправдания Его и заповеди Его, яже аз заповедаю тебе днесь, ты и сынове твои, и сыны сынов твоих, во вся дни живота твоего, да многи дни пребудете. **3** И послушай, Израилью, и снабди творити, да благо ти будет, и да умножитесь зело, якоже глагола Господь Бог отец ваших, дати тебе землю кипящую млеком и медом. И сия оправдания и суды, елика заповеда Господь (Бог) сыном Израилевым в пустыни, изшедшим им из земли Египетския. **4** Слыши, Израилью: Господь Бог наш Господь един есть. **5** И возлюбиши Господа Бога твоего от всего сердца твоего и от всея души твоея и от всея силы твоея. **6** И да будут словеса сия, яже Аз заповедаю тебе днесь, в сердцы твоём и в души твоей, **7** и да накажеш ими

сыны твоя, и да возглаголеши о них седяй в дому и идый  
путем, и лежа и востая: 8 и навяжеш я в знамение на руку  
твою, и да будут непоколеблема пред очима твоима: 9 и  
да напишете я на празех храмине ваших и врат ваших. 10  
И будет егда введет тя Господь Бог твой в землю, еюже  
клятятся отцем твоим, Аврааму и Исааку и Иакову, дати тебе  
грады велики и добры, ихже не создал еси, 11 дома полны  
всяких благ, ихже не наполнил еси, потоки ископаны, ихже  
не ископал еси, винограды и маслины, ихже не насадил  
еси: и ядый и насытився, 12 вонми себе, да не расширится  
сердце твое, да не забудеши Господа Бога твоего, изведшаго  
тебе из земли Египетския, от дому работы. 13 Господа Бога  
твоего да убоишися, и тому единому послужиши, и к Нему  
прилепишися, и именем Его кленешися. 14 Да не ходите  
вслед богов иных, богов языческих, иже окрест вас: 15 яко  
Бог ревнив Господь Бог твой посреде тебе: да не разгневался  
яростию Господь Бог твой на тя, потребит тя от лица земли.  
16 Да не искусиши Господа Бога твоего, якоже искушасте во  
Искушении. 17 Храня да сохраниши заповеди Господа Бога  
твоего, свидения Его и оправдания Его, елика заповеда тебе:  
18 и да сотвориши угодное и благое пред Господем Богом  
твоим, да благо будет тебе, и внидеши и наследеши землю  
благую, еюже клятятся Господь отцем вашим, 19 отгнати вся  
враги твоя от лица твоего, якоже глагола Господь. 20 И будет  
егда вопросит тя сын твой утре, глаголя: что суть свидения и  
оправдания и суды, елика заповеда Господь Бог наш нам?  
21 И речеши сыну твоему: раби бехом фараону в земли  
Египетстей, и изведе нас Господь Бог оттуду рукою крепкою  
и мышцею высокою: 22 и даде Господь (Бог) знамения и

чудеса велика и зла во Египте на фараона и на дом его и на силу его пред нами, 23 и нас изведе Господь Бог наш оттуду, да введет нас дати нам землю сию, еуже клятся Господь Бог наш отцем нашим, дати ю нам: 24 и заповеда нам Господь творити вся оправдания сия, боятися Господа Бога нашего, да благо будет нам во вся дни, да живем, якоже и днесь, 25 и милосердие будет нам, аще сохраним творити вся заповеди закона сего пред Господем Богом нашим, якоже заповеда нам.

**7** И будет егда введет тя Господь Бог твой в землю, в нюже входиши тамо наследити ю, и изженет языки великия и многия от лица твоего, Хеттеа и Гергесеа, и Аморреа и Хананеа, и Ферезеа и Евеа и Иевусеа, седмь языков великих и многих, и крепчае вас: 2 и предаст их Господь Бог твой в руке твои, и избиеша я, пагубою погубиши я, да не завещаеши к ним завета, ниже да помилуеши их, 3 ниже сватовства сотвориши с ними: дщери своя не даси сыну его, и дщере его да не поймеша сыну твоему: 4 отвратит бо сына твоего от Мене, и послужит богом инем: и разгневается Господь гневом на вы, и потребит тя вскоре. 5 Но сице да сотворите им: требища их разсыплете, и столпы их да сокрушите, и дубравы их да посечете, и ваяния богов их да сожжете огнем: 6 яко люди святи есте Господеви Богу вашему: и вас избра Господь Бог ваш, да будете Ему люди избранни паче всех языков, елицы на лица земли. 7 Не яко мнози есте паче всех язык, предприя вас Господь и избра вас Господь, вы бо есте меншии от всех языков: 8 но яко возлюбил Господь вас, и храня клятву, еуже клятся отцем вашим, изведе Господь вас рукою крепкою и мышцею высокою, и

избави тя от дому работы, от руки фараона царя Египетска, **9** и да увеси, яко Господь Бог твой Сей Бог: Бог верный, храняй завет Свой и милость любящим Его и хранящим заповеди Его в тысяцы родов: **10** и воздаяй ненавидящим Его в лице потребити я, и не умедлит ненавидящим, в лице воздаст им. **11** И да сохраниши заповеди и оправдания и суды сия, елика аз заповедаю тебе творити днесь. **12** И будет егда послушаете вся оправдания сия, и сохраните и сотворите я, сохранит и Господь Бог твой тебе завет и милость, якоже клятсся отцем вашим, **13** и возлюбит тя, и благословит тя и умножит тя, и благословит плод чрева твоего и плод земли твоя, пшеницу твою и вино твое и елей твой, и стада волов твоих и паствы овец твоих на земли, юже клятсся Господь отцем твоим дати тебе: **14** и благословен будеши паче всех язык и не будет в вас безчадный, ниже неплоды, и в скотех твоих: **15** и отимет Господь Бог твой от тебе всяко расслабление и всяку язю Египетскую злую, яже видел еси и елика веси: не возложит на тя, но возложит я на вся ненавидящия тебе: **16** и ясти будеши вся корысти языков, яже Господь Бог твой дает тебе: да не пощадит их око твое, и да не послужиши богом их, яко претыкание тебе есть сие. **17** Аще же речеши во уме твоём: яко язык сей множае паче мене, како возмогу аз потребити я? **18** Не убоишися их: памятью да помянеши, елика сотвори Господь Бог твой фараону и всем Египтяном, **19** искушения великая, яже видеста очи твои, знамения она и чудеса великая, руку крепкую и мышцу высокую, якоже изведе тя Господь Бог твой: тако сотворит Господь Бог ваш всем языком, ихже ты боишися от лица их: **20** и шершни послет Господь Бог твой на

них, дондеже потребятся оставшиися и сокрывшиися от тебе: 21 не повредишия от лица их: яко Господь Бог твой в тебе, Бог великий и крепкий: 22 и погубит Господь Бог твой языки сия от лица твоего, помалу малу: не возможеши погубити их вскоре, да не будет земля пуста, и умножатся зверие дивии на тя: 23 и предаст их Господь Бог твой в руце твои, и погубиши их погублением великим, дондеже искорените их: 24 и предаст цари их в руце твои, и погубите имя их от места онаго: ниже един постоит пред лицом твоим, дондеже погубиши их. 25 Ваяния богов их да сожжете огнем, да не похощеши злата и сребра взяти себе от них, да не когда согресиши того ради, яко мерзость есть Господеви Богу твоему: 26 и да не внесеши мерзости в свой дом, и проклят будеши якоже сия: ненавидением да возненавидиши, и омерзением да омерзиши, яко проклятие есть.

**8** Вся заповеди, яже аз заповедаю вам днесь, снабдите творити, да живете, и умножитесь, и внидете, и наследите землю благую, еюже клятся Господь Бог отцем вашим. 2 И да помянеши весь путь, имже проведе тебе Господь Бог твой, сие четыредешатое лето в пустыни, да искусит тя и озлобит тя, и уразумеются яже в сердцы твоем, аще сохраниши заповеди Его или ни. 3 И озлоби тя, и голодом замори тя, и напита тя манною, еяже ты не уведел еси, ни отцы твои: да возвестит тебе, яко не от хлебе едином жив будет человек, но о всяком словеси исходящем из уст Божиих жив будет человек. 4 Ризы твоя не обетшаша на тебе: нозе твои не язвися, се, четыредешать лет. 5 И уразумеши сердцем твоим, яко имже образом аще кий человек накажет сына своего, тако Господь Бог твой накажет



тя. 6 И сохраниши заповеди Господа Бога твоего ходити в путех Его и бояться Его. 7 Господь бо Бог твой введет тя в землю благу и многу, идеже водотечи водныя и источники бездны исходящыя по полям и горам, 8 в землю пшеницы и ячменя, (идеже) виногради, смокви и щипцы, в землю масличия елеа и меда: 9 в землю на нейже не с нищетою снеси хлеб твой, и ничесого востребуеши на ней: в землю в нейже камене железно, и от гор ея ископаеши медь: 10 и ясти будеши, и насытишися, и благословиши Господа Бога твоего на земли блазей, юже даде тебе. 11 Вонми себе, не забуди Господа Бога твоего, еже не сохранити заповеди Его и судьбы и оправдания Его, елика аз заповедаю тебе днесь: 12 да не когда ядый и насытився, и дома добры соградив и вселився в ня, 13 и волом твоим и овцам твоим умножившымся тебе, серебру и злату умножившымся тебе, и всем, елика тебе будут, умножившымся тебе, 14 вознесешися сердцем твоим, и забудеши Господа Бога твоего, изведшаго тя из земли Египетския, из дому работы: 15 проведшаго тя сквозе пустыню великую и страшную ону, в нейже змии угрызающыя, и скорпии, и жажда, в нейже не бяше воды: изведшаго тебе из камене несекома источник водный: 16 питавшаго тя манною в пустыни, еяже не ведел еси ты, ниже ведяху отцы твои, да озлобит тя и да искусит тя, и благо тебе сотворит на последок твой: 17 да не речеши в сердцы твоём: крепость моя и сила руки моя сотвори мне силу великую сию, 18 и помянеши Господа Бога твоего, яко Той даде тебе крепость, еже сотворити силу, и да оставит завет Свой, имже клятятся отцем твоим, якоже днесь. 19 И будет аще забвением забудеши Господа Бога твоего, и пойдеши вслед богов иных,

и послужиши им, и поклонишися им, засвидетелствую вам днесь небесем и землю, яко пагубою погибнете: 20 якоже и прочии языцы, яже Господь Бог погубляет от лица вашего, тако погибнете, занеже не послушасте гласа Господа Бога вашего.

**9** Слыши, Израилю, ты преходиши Иордан днесь, внити еже наследити языки великия и крепчайшы паче вас, грады велики и ограждены до небесе, 2 люди велики и многи и предолги, сыны Енаковы, яже ты веси, и ты слышал еси: кто противу станет сыном Енаковым? 3 И увеси днесь, яко Господь Бог твой Сей предидет пред лицом твоим: огонь поपालяй есть: Сей потребит я, и Сей отвратит я от лица твоего, и потребит я вскоре, якоже рече тебе Господь. 4 Не рцы в сердцы твоём, егда потребит Господь Бог твой языки сия пред лицом твоим, глаголя: правд ради моих введе мя Господь наследити землю благую сию: 5 не ради правды твоя, ниже преподобия ради сердца твоего ты входиши наследити землю их, но нечестия ради и беззакония языков сих Господь от лица твоего потребит я, и да оставит завет, имже клятятся Господь отцем вашим, Аврааму и Исааку и Иакову: 6 и да увеси днесь, яко не ради правды твоя Господь Бог твой дает тебе землю благую сию наследити: яко людие жестоковыйнии есте. 7 Помни, не забуди, колико разгневавсте Господа Бога своего в пустыни: от негоже дне изыдoste из земли Египетския, даже внидoste в место сие, не покаяющася совершасте яже противу Господа: 8 и в Хориве разгневавсте Господа, и разгнеवासя Господь на вы, потребити вас, 9 восходящу мне на гору, взяти скрижали каменные, скрижали завета, яже завещаста Господь к вам: и пребых в

горе сорок дний и сорок ночей: хлеба не ядох и воды не пих. 10 И даде ми Господь две скрижали каменны, написаны перстом Божиим, и на них бяху написана вся словеса, яже глагола Господь к вам в горе из среды огня в день собрания: 11 и бысть но сорок днех и по сорок ночех, даде ми Господь две скрижали каменны, скрижали завета, 12 и рече Господь ко мне: востани и сниди скоро отсюду, яко беззаконноваша людие твои, яже извел еси из земли Египетски: соступиша скоро с пути, егоже заповедал еси им, и сотвориша себе слияние. 13 И рече Господь ко мне: глаголах тебе единою и дважды, глаголя: видех люди сия, и се, людие жестоковыйнии суть: 14 остави Мя, да потреблю Я, и погублю имя их под небесем, и сотворю тя в язык велик и крепок и мног паче сих. 15 И возвратився снидох с горы, и гора горяше огнем: и две скрижали свидений во обою руку мою: 16 и виде, яко согрешисте пред Господем Богом вашим, и сотвористе себе телца слияна, и соступисте с пути скоро, егоже заповеда Господь вам творити, 17 и взем обе скрижали, повергох я из руку мою и сокруших их пред вами. 18 И молихся пред Господем второе, якоже и первое, сорок дний и сорок ночей, хлеба не ядох и воды не пих, всех ради грехов ваших, имиже согрешисте, творяще злое пред Господем Богом вашим, еже разгневати Его: 19 и боязнен бех гнева ради и ярости, яко разгневался Господь на вы, да потребит вас: и послуша мене Господь и в то время. 20 И на Аарона разгневался Господь зело, еже погубити его: и молихся и за Аарона во время оно. 21 И грех ваш, егоже сотвористе, телца, взях его и сожгох его на огни, и избих его и сотрох его зело, даже бысть дробен,

и бысть яко прах, и изсыпах прах в водотечу сходящую с горы. 22 И в Запалении, и во Искушении, и во гробех Похотения разгневате Господа Бога вашего. 23 И егда посла вас Господь от Кадис-Варни, глаголя: взыдите и наследите землю, юже Аз даю вам: и сопротивитися глаголголу Господа Бога вашего, и не веровасте Ему, и не послушасте гласа Его: 24 и не покаяющеся бысте Господу от дне, в оньже познася вам. 25 И молихся пред Господем четыредесять дний и четыредесять ночей, в няже молихся: рече бо Господь погубити вас. 26 И молихся Богу и рекох: Господи, Господи Царю богов, не погуби людей Твоих и наследия Твоего, еже избавил еси крепостию Твоею великою, яже извел еси из земли Египетския крепостию Твоею великою и рукою сильною и мышцею Твоею высокою: 27 помяни Авраама и Исаака и Иакова, рабы Твоя, имже клялся еси Собою: не призирай на жестокость людей сих, и на нечестие их и на грехи их: 28 да не когда рекут живущии на земли, отнюдуже извел еси нас, глаголюще: не могый Господь ввести их в землю, юже им обеща, и ненавидя их Господь, изведе погубити их в пустыни: 29 и сии людие Твои и жребий Твой, ихже извел еси из земли Египетския крепостию Твоею великою и мышцею Твоею высокою.

**10** Во оно время рече Господь ко мне: истеши себе две скрижали каменны якоже первыя, и взыди ко Мне на гору, и да сотвориши себе ковчег деревян: 2 и напишу на скрижалех словеса, яже бяху на скрижалех первых, ихже сокрушил еси, и да вложиши я в ковчег. 3 И сотворих ковчег от древ негниющих, и истесах две скрижали каменны якоже и первыя, и взыдох на гору: и обе скрижали во юбою руку

моею: 4 и написа на скрижалех по писанию первому десять словес, яже глагола Господь к вам на горе от среды огня, и даде я Господь мне. 5 И обратився снидох с горы, и вложих скрижали в ковчег, егоже сотворих: и беста ту, якоже повеле ми Господь. 6 И сынове Израилевы воздвигошася от Вирофа сынов Иакимлих в Мисадай: тамо умре Аарон, и погребен бысть ту, и бысть жрец Елеазар сын его вместо его. 7 Оттуду же воздвигошася в Гадгад, и от Гадгада до Етавафа, земли водотечи вод. 8 Во оно время отдели Господь племя Левиино носити ковчег завета Господня, предстояти пред Господем, служити и молитися и благословляти о имени Его до днешняго дне: 9 сего ради несть левитом части и жребия в братии их: Господь Сам жребий их, якоже рече им. 10 И аз стоях на горе чотыредесять дний и чотыредесять нощей, и послуша Господь мене и во время сие, и не восхоте Господь погубити вас. 11 И рече Господь ко мне: гряди, воздвигнися пред людьми сими, и да внидут и наследят землю, еюже кляхся отцем их, дати ю им. 12 И ныне, Израилю, что просит Господь Бог твой у тебе, точию еже боятися Господа Бога твоего и ходити во всех путех Его, и любити Его и служити Господу Богу твоему от всего сердца твоего и от всея души твоея, 13 хранити заповеди Господа Бога твоего и оправдания Его, елика аз заповедаю тебе днесь, да благо тебе будет? 14 Се, Господа Бога твоего небо и небо небесе, земля и вся елика суть на ней: 15 обаче отцы ваши произволи Господь любити их, и избра семя их по ним, вас, паче всех язык, в день сей. 16 И обрежите жестокосердие ваше, и выи ваша не ожесточите ктому: 17 ибо Господь Бог ваш сей Бог богов и Господь господей, Бог великий и

крепкий и страшный, иже не дивится лицу, ниже возьмет дара: **18** творяй суд пришелцу и сире и вдовице, и любит пришелца дати ему хлеб и ризу. **19** И возлюбите пришелца: пришелцы бо бесте в земли Египетстей. **20** Господа Бога твоего да убоишися, и Тому (единому) послужиши, и к Нему прилепишися, и именем Его кленешися: **21** Той хвала твоя и Той Бог твой, иже сотвори тебе великая и славная сия, яже видесте очи твои: **22** в семидесятих и пяти душах снидоша отцы твои во Египт: ныне же сотвори тя Господь Бог твой яко звезды небесныя множеством.

**11** И да возлюбиши Господа Бога твоего, и сохраниши стражбы Его и оправдания Его и заповеди Его и суды Его во вся дни. **2** И увесте днесь, яко не чада ваша, елицы не сведеша, ниже видеша наказания Господа Бога твоего и величества Его, и руки сильныя и мышцы высокия, **3** и знамений Его и чудес Его, елика сотвори посреде Египта фараону царю Египетску и всей земли его, **4** и елика сотвори силе Египетстей: колесницы их и кони их како потопа вода моря Чермнаго, пред лицом их, гонящим им вслед вас, и погуби их Господь Бог до днешняго дне: **5** и елика сотвори вам в пустыни, дондеже приидосте на место сие: **6** и елика сотвори Дафану и Авирону сыном Елиава сына Рувимля, яже отверзши земля уста своя пожре их, и дома их, и кущы их, и все их имение с ними, среди всего Израиля: **7** яко очи ваши видеста вся дела Господня великая, елика сотвори в вас днесь. **8** И сохраните вся заповеди Его, елики аз заповедаю вам днесь, да живете и умножитесь, и внидете и наследите землю, на нюже вы преходите чрез Иордан тамо наследити ю: **9** да многи дни будете на земли, еюже

клянутся Господь отцем вашим дати им и семени их по них землю кипящую млеко и медом. 10 Есть бо земля, на нюже вы идете тамо наследити ю, не яко земля Египетска есть, отнюдуже изыдoste, егда сеют семя и напаяют ю ногами своими, аки вертоград зелейный: 11 земля же, в нюже ты входиши тамо наследити ю, земля нагорная и равная, от дождя небеснаго напаяется водою: 12 земля, на нюже Господь Бог твой присещает всегда, очи Господа Бога твоего на ней от начала лета и до конца лета. 13 Аще же слухом послушаете всех заповедий Его, яже аз заповедаю тебе днесь, любити Господа Бога твоего и служити Ему от всего сердца твоего и от всея души твоея, 14 и даст дождь земли твоей во время ранний и поздний, и собереши жита твоя и вино твое и елей твой: 15 и даст пищу на селех скотом твоим. 16 И ядый и насытився, внемли себе, да не разширится сердце твое, и преступите, и послужите богам иным, и поклонитесь им: 17 и яростию разгневается Господь на вы и затворит небо, и не будет дождя, и земля не даст плода своего, и погибнете вскоре от земли благия, юже Господь даде вам. 18 И вложите словеса сия в сердца ваша и в душу вашу, и наважите я в знамение на руку вашу, и будут непоколебима между очима вашима, 19 и научите сим чада своя глаголати сия, сидящу тебе в дому и идущу тебе в пути, и возлежащу ти и востающу ти: 20 и напишите я на празех домов ваших и врат ваших, 21 да умножатся дние ваши и дни сынов ваших на земли, еюже клянутся Господь отцем вашим дати им, якоже дние неба на земли. 22 И будет аще слухом послушаете всех заповедий сих, яже аз заповедаю вам днесь творити, любити Господа Бога вашего

и ходити во всех путех Его и прилепятся к Нему, **23** тогда изженет Господь вся языки сия от лица вашего, и одержите языки великия и крепкия паче вас. **24** Всякое место, на немже станет стопа ног ваших, вам будет: от пустыни и Антиливана, и от реки великия Евфрата, и даже до моря, еже на западе, будут пределы ваши: **25** никтоже противостанет пред лицом вашим: и трепет ваш и страх ваш возложит Господь Бог ваш на лице всея земли, на нюже аще възыдете, якоже глагола Господь к вам. **26** Се, Аз даю пред вами днесь благословение и клятву: **27** благословение, аще послушаете заповедий Господа Бога вашего, елики аз заповедаю вам днесь: **28** и клятву, аще не послушаете заповедий Господа Бога вашего, елики аз заповедаю вам днесь, и совратитесь с пути, егоже заповедах вам, идуще послужити богом иным, ихже не весте. **29** И будет егда введет тебе Господь Бог твой в землю, в нюже преходиши тамо наследити ю, да даси благословение на горе Гаризин и клятву на горе Гевал: **30** не се ли сия суть об ону страну Иордана, за путем иже на западе солнца, в земли Ханаана обитающаго на западе солнца близ Галгала у дуба Высокаго? **31** Вы бо преходите Иордан, вшедше наследити землю, юже Господь Бог ваш дает вам в жребий вся дни, и примете ю, и вселитесь в ню: **32** и да сохраните творити вся заповеди Его и суды Его, яже аз даю пред вами днесь.

**12** И сия заповеди и суды, яже снабдите творити на земли, юже Господь Бог отец ваших дает вам в жребий во вся дни, в няже вы жити будете на земли: **2** пагубою погубите вся места, в нихже служиша тамо языцы богом своим, яже вы примете, на горах высоких и холмах и под древом сеновным: **3** и да



раскопаете требища их и сокрушите столпы их, и дубравы их ссечете, и ваяние богов их сожжете огнем, и погубите имя их от места того. **4** Да не сотворите тако Господу Богу вашему, **5** токмо на месте, идеже изберет Господь Бог ваш, во едином от племен ваших, нареци имя Его тамо и призвати, и взыщете, и внидете тамо: **6** и принесете тамо всесожжения ваша, и жертвы ваша, и начатки ваши, и обеты ваши, и вольная ваша, и исповедания ваша, первенцы волов ваших и овец ваших, **7** и ясти будете тамо пред Господем Богом вашим и возвеселитесь о всех, на няже возложите руки ваша вы и домове ваши, якоже тя благословил есть Господь Бог твой. **8** Да не сотворите тамо всех, елика вы творите zde днесь, кийждо угодное пред собою: **9** не приидосте бо до ныне в покой и в наследие, еже Господь Бог ваш дает вам. **10** И егда прейдете Иордан и вселитесь на земли, юже Господь Бог ваш даст в наследие вам, и упокоит вас от всех враг ваших, иже окрест вас, и вселитесь со утверждением: **11** и будет место, иже изберет Господь Бог ваш призвати има Его тамо, ту принесете вся, елика аз заповедаю вам днесь: всесожжения ваша и жертвы ваша, и десятины ваша и начатки рук ваших, и всяк избран дар ваш, елика обещаете Господеву Богу вашему: **12** и возвеселитесь пред Господем Богом вашим вы и сынове ваши и дщери ваши, и рабы ваши и рабыни ваши, и левити, иже у врат ваших: яко несть им части ни жребия с вами. **13** Внемли себе, да не принесеши всесожжений твоих на всяком месте, еже аще узриши, **14** токмо на месте, еже изберет Господь Бог твой, в едином от племен твоих, тамо да принесеши всесожжения твоя и тамо сотвориши вся, елика аз заповедаю тебе днесь. **15**

Но токмо всем желанием души твоя да пожреш, и снеси мяса по благословению Господа Бога твоего, еже даде тебе во всяком граде: нечистый при тебе и чистый вкупе да яст я, яко серну, или еленя. 16 Токмо крове да не снесите: на землю пролиете ю, аки воду. 17 Не возможеши ясти в градех твоих десятины пшеницы твоя и вина твоего и елеа твоего, первенцов волов твоих и овец твоих, и всех обетове, елики обещаете, и исповеданий ваших, и начатков рук ваших: 18 токмо пред Господем Богом твоим да снеси я на месте, еже избрет Господь Бог твой Себе, ты и сын твой и дщерь твоя, и раб твой и раба твоя, и левит, и пришлец иже во градех твоих, и возвеселишия пред Господем Богом твоим во всех, на няже возложиши руку твою. 19 Внемли себе, да не оставиши левитина во все время, дондеже еси жив на земли. 20 Аще же разширит Господь Бог твой пределы твоя, якоже глагола тебе, и речеши: снем мяса, аще вожделеет душа твоя, яко ясти мяса, во всем желании души твоя да снеси мяса. 21 Аще же далече отстоит место от тебе, иже избрет Господь Бог твой призывать имя Его тамо, и заколеш от волов твоих и от овец твоих, яже даст тебе Бог твой, якоже заповедах тебе, и снеси во градех твоих по желанию души твоя. 22 Якоже ястся серна и елень, тако да снеси е: нечистый при тебе, и чистый такожде да снесет. 23 Вонми крепце, еже не ясти крове: кровь бо есть душа его: да на снесся душа с мясы: 24 да не снесите ея, на землю пролиете ю аки воду: 25 да не снеси ю, да благо тебе будет и сыном твоим по тебе во веки, аще сотвориши се, еже добро и угодно есть пред Господем Богом твоим. 26 Разве святая твоя, яже аще будут тебе, и обеты твоя взем да приидеши

на место, еже изберет Господь Бог твой оное себе призвати имя Его тамо: 27 и сотвориши всесожжения твоя: мяса да вознесеши на олтарь Господа Бога твоего, кровь же жертв твоих да пролиеши пред степени олтаря Господа Бога твоего, мяса же да снеси. 28 Снабди и послушай, и да сотвориши вся словеса, яже Аз заповедаю тебе, да благо тебе будет и сыном твоим во веки, аще сотвориши добро и угодно пред Господем Богом твоим. 29 Аще же потребит Господь Бог твой языки, в няже входиши ты тамо, наследити землю их, от лица твоего, и приимеши ю в наследие, и вселишия в земли их: 30 внемли себе, да не взыщеша последовати им, по потреблении их от лица твоего, не взыщи богов их, глаголя: якоже творят языцы сии богом своим, сотворю и аз: 31 да не сотвориши Господу Богу твоему тако: мерзостна бо Господеви, яже возненавиде, сотвориша богом своим, яко сыны своя и дщери своя жгут огнем богом своим. 32 Всяко слово, еже аз заповедаю тебе днесь, сие снабди творити: да не приложиши к сему, ни отимеши от него.

**13** Аще же встанет в тебе пророк, или видяй соние, и даст тебе знамение или чудо, 2 и приидет знамение или чудо, еже рече к тебе, глаголя: идем да послужим богом иным, ихже не весте: 3 да не послушаете глагол пророка того, или видящаго сон той: яко искушает Господь Бог твой вас, иже уведети, аще любите Господа Бога вашего всем сердцем вашим и всею душею вашею: 4 вслед Господа Бога вашего ходите, и Того бойтеся, и заповеди Его сохраните, и гласа Его послушайте, и Тому служите, и к Нему прилепитесь: 5 и пророк той или видяй сон да умрет: глагола бо, иже прельстити тя от Господа Бога твоего изведшаго тя из земли

Египетския, избавльшаго тя из работы, еже совратити тя с пути, егоже заповеда тебе Господь Бог твой ходити по нему: и погубите сами злое от вас самих. **6** Аще же помолит тя брат твой от отца твоего или от матери твоея, или сын твой, или дочь твоя, или жена твоя яже на лоне твоём, или друг твой, равен души твоей, отай глаголя: идем и послужим богом иным, ихже не видел еси ты и отцы твои, **7** от богов языков, ихже окрест вас, близ сущих тебе, или дальних от тебе, от конца земли до конца земли, **8** да не соизволиши ему и не послушаеши его, и да не пощадит его око твое, и не возлюбиши его, ниже прикроеши его: **9** возвещая да возвестиши о нем, и рука твоя да будет на нем в первых убить его, и руки всех людей последже: **10** и побьют его камением, и умрет, яко взыскал есть отвратити тебе от Господа Бога твоего, изведшаго тя из земли Египетския, от дому работы: **11** и весь Израиль услышав убоится, и не приложит ктому сотворити по словеси сему злomu еже в вас. **12** Аще же услышиши в едином от градов твоих, яже Господь Бог дает тебе, вселитися тамо, глаголющих: **13** изыдоша мужи беззаконнии от вас и отвратиша вся живущыя во граде их, глаголюще: идем, да послужим богом иным, ихже не весте, **14** и да взыщеш и вопрошиши и обещеш зело, и се, истинно слово яве, сотворися мерзость сия в вас: **15** убивая да убиеш вся живущыя во граде онем убийством меча, проклятием проклените его, и вся яже в нем, **16** и вся корысти его собереш на распутия его, и зажжеш град огнем, и вся корысти его всенародно пред Господем Богом твоим, и будет пуст во веки, не возградится по сем: **17** и да ничтоже прилепится от проклятия руце твоей, да отвратится

Бог от ярости гнева Своего: и даст тебе милость и помилует  
тя, и умножит тя, якоже глагола тебе, якоже клятся Господь  
отцем твоим, **18** аще послушаеши гласа Господа Бога твоего,  
еже хранити вся заповеди Его, яже аз заповедаю тебе днесь,  
творити доброе и угодное пред Господем Богом твоим.

**14** Сынове есте Господа Бога вашего: да не нарежетея и  
не возложите плещи между очима вашима над мертвым: **2**  
яко людие святы есте Господеви Богу вашему, и вас избра  
Господь Бог ваш быти вам людем избранным Ему от всех  
языков иже на лица земли. **3** Да не снесите всякия мерзости.  
**4** Сия скоты ядите: телца от говяд и агнца от овец и козла от  
коз: **5** еленя и серну, и буйвола и ланя, и зубря и онагра  
и сайгака. **6** Всяк скот на двое деля пазнокти, и копыто  
на двое копыта, и отрыгая жвание в скотех, да ясте. **7**  
И сих да не снесите от отрыгающих жвание и от делящих  
пазнокти на двое, но копыт не раздвояющих: велблюда и  
заяца и хирогрилля: яко отрыгают жвание сии, но копыт  
не раздвояют, нечиста сия вам суть. **8** И свинии, яко на  
двое делит пазнокти и копыта раздвояет, и сия жвания не  
отрыгает, нечиста сия вам есть: от мяс их да не ясте, и  
мертвечинам их да не прикоснетесь. **9** И сия да ясте от  
всех яже в воде: вся, имже суть перие и чешуя, ядите. **10**  
И всех, имже несть перия, на чешуи, да не ясте: нечиста  
суть вам. **11** Всяку птицу чисту да ясте. **12** И сих да не ясте  
от них: **13** орла и грифа и орла морскаго, **14** и неясыти и  
иктина и подобных сим: **15** и врана и врабия, и выпелицы и  
сухолапля, и ястреба и подобных сим: **16** и врана ночнаго  
и лилика и подобных сим: **17** и еродиа и лебедея, и ивина  
и катаракта, и вдода **18** и ночнаго нетопыря, и сыча и

теслоноса, и харадриона и подобных сим, и порфириона. 19  
Вся гады птичия нечиста суть вам: да не ясте от них. 20  
Всяку птицу чисту да ясте. 21 Всякия мертвечины да не ясте:  
приселнику, иже во градех твоих, да дасте, и да яст, или да  
продасте страннику: яко людие святы есте Господеви Богу  
вашему. Да не свариши ягняте во млеце матери его. 22  
Десятины да даси от всего плода семени своего, плод нив  
твоих от года до года, 23 и да снеси я пред Господем Богом  
твоим на месте, идеже избрет Господь Бог твой призывать  
имя Его тамо: да принесеши десятину пшеницы твоя и вина  
твоего и елея твоего, и первенцы волов твоих и овец твоих,  
да научишися бояться Господа Бога твоего вся дни. 24 Аще  
же далече будет путь от тебе и не возможеши донести их,  
яко далече место от тебе, еже избрет Господь Бог твой  
призывать имя Его тамо, яко да благословит тя Господь Бог  
твой: 25 и продаси сие на цене, и возмешь серебро в руку  
твою, и пойдешь на место, идеже избрет Господь Бог твой, 26  
и даси серебро за все, на неже пожелает душа твоя, на волы  
и овцы, или на вино, или на сикеру, или на все, еже желает  
душа твоя, и да снеси тамо пред Господем Богом твоим, и  
возвеселишися ты и дом твой. 27 И левит иже во градех  
твоих, не оставивши его, яко несть ему части ни жребия с  
тобою: 28 по трех летех да изнесеши всю десятину жит твоих  
в лето оно, да положиши ю во градех твоих: 29 и приидет  
левит, яко несть ему части ни жребия с тобою, и пришлец, и  
сирота и вдова, яже во градех твоих, да ядят и насытятся:  
да благословит тя Господь Бог твой во всех делех твоих, яже  
аще сотвориши.

**15** В седмое лето да сотвориши отпущение. 2 И сице заповедь отпущения: да оставивши весь долг твой, имже должен ближний тебе, и от брата своего не истяжеш, яко наречется отпущение Господу Богу твоему. 3 От чуждаго да истяжеш, елика суть твоя у него: брату же твоему отпущение да сотвориши долга твоего. 4 Яко не будет у тебе недостаточен: сего ради словесе благословением благословит тя Господь Бог твои в земли, юже тебе Господь Бог дает во жребий прияти ю. 5 Аще же слухом послушаете гласа Господа Бога вашего хранити и творити вся заповеди сия, яже аз заповедаю тебе днесь, яко Господь Бог твой благословил тя есть, якоже глагола тебе, 6 и взаим даси языком многим, ты же не займеш, и обладати будеш ты языки многими, тобою же не возобладают. 7 Аще же брат от братии твоя будет тебе недостаточен во едином от градов твоих в земли, юже Господь Бог твои дает тебе, да не отвратиши сердца твоего, ниже сожмеш руки твоя пред братом твоим требующим: 8 отверзая да отверзеши руку твою ему, и взаим да даси ему, елико просит, и елико ему не достанет. 9 Внемли себе: да не будет слово тайно в сердца твоем беззакония, глаголя: близ есть седмое лето, лето отпущения, и возлукавнует око твое брату твоему требующему, и не даси ему, и возопиет на тя ко Господу, и будет тебе грех велик: 10 даянием да даси ему, и взаим да даси ему, елико воспросит, якоже требует: и не опечалися в сердца своем, дающу ти ему, яко сего ради слова благословит тя Господь Бог твой во всех делех твоих, и во всем, на неже возложиши руку твою: 11 ибо не оскудеет недостаточный от земли твоя, сего ради аз заповедаю тебе

творити слово сие, глаголя: отверзая отверзи руце твои брату твоему нищему и просящему на земли твоей. 12 Аще же продастся тебе брат твой Евреанин, или Евреанья, да поработает тебе шесть лет, и в седмое да отпустиши его свободна от себе: 13 егда же пустиши его свободна от себе, да не отпустиши его тща: 14 напутное ему да уготовиши от овец твоих и от пшеницы твоя и от вина твоего: якоже благослови тя Господь Бог твой, да даси ему, 15 и помяни, яко раб и ты был еси в земли Египетстей, и свободи тя Господь Бог твой оттуду: сего ради аз заповедаю тебе творити слово сие. 16 Аще же речет к тебе: не отиду от тебе, яко возлюбих тя и дом твой, яко добро есть у тебе: 17 да возмешь шило, и провертиши ему ухо пред дверми у степени, и будет ти раб во веки: и рабе твоей сотвориши такожде. 18 Да не будет жестоко пред тобою, отпускаемым им от тебе свободным, понеже годовую мзду наемнику работа тебе шесть лет: и благословит тя Господь Бог твой во всем, еже твориши. 19 Всяко первородное, еже родится от волов твоих и от овец твоих, мужеск пол да освятиши Господеву Богу твоему: да не делаеши первородным телцем твоим и да не стрижеши первенца во овцах твоих. 20 Пред Господем Богом твоим да яси я от лета до лета, на месте, идеже избрет Господь Бог твои, ты и дом твой. 21 Аще же будет на нем порок, хромота, или слепота, и всякий порок зол, да не пожреш его Господу Богу твоему. 22 Во градех твоих да снеси я: нечистый и чистый у тебе такожде да яст, яко серну или еленя. 23 Токмо крове да не снесете: на землю проливай ю аки воду.



**16** Храни месяц новых (плодов), и да сотвориши Пасху Господеви Богу твоему, яко в месяце новых изшел еси из Египта нощию. **2** И да пожреши Пасху Господеви Богу твоему, овцы и говяда на месте, еже изберет Господь Бог твой призывать имя Его тамо. **3** Да не снеси в ню кваснаго: седмь дний да яси в ню опресноки, хлеб озлобления, яко со тщанием изыдoste из Египта, да поминаете день исхода вашего от земли Египетския вся дни жития вашего: **4** да не явится тебе квасно во всех пределах твоих седмь дний, и да не пренощствует от мяс, яже пожреши в вечер в первый день, до утрия. **5** Не возможеши жрети Пасхи ни в едином от градов твоих, яже Господь Бог твой дает тебе: **6** но токмо на месте, еже изберет Господь Бог твой призывать имя Его ту, тамо пожреши Пасху в вечер при захождении солнца, во время в неже изшел еси из земли Египетския: **7** и свариши, и испечеши, и снеси на месте, идеже изберет Господь Бог твой: и возвратишися заутра, и пойдеши в дом твой. **8** Шесть дний да яси опресноки, в седмый же день исходный праздник Господеви Богу твоему: да не сотвориши в нем всякаго дела, кроме яже суть души. **9** Седмь седмиц всецелых да сочтеши себе: в начало же твоего серпа на жатву начни исчисляти седмь седмиц, **10** и да сотвориши праздник седмиц Господеви Богу твоему, якоже рука твоя может, елика даст тебе, якоже благослови тя Господь Бог твой. **11** И возвеселишися пред Господем Богом твоим ты и сын твой и дщерь твоя, и раб твой и раба твоя, и левит иже во градех твоих, и пришлец, и сирота и вдова, яже в вас, на месте, идеже изберет Господь Бог твой призывать имя Его тамо: **12** и помянеши, яко раб был еси (ты) в земли Египетстей, и сохраниши и сотвориши

заповеди сия. **13** Праздник кущей да сотвориши себе семь дней, егда собереш от нивы твоея и от точила твоего: **14** и да возвеселишия в празднице твоем ты и сын твой и дщи твоя, раб твой и раба твоя, и левит и пришлец, и сирота и вдова, яже во градех твоих: **15** семь дней да празднуеши Господеви Богу твоему на месте, еже избрет Господь Бог твой призывати имя Его тамо: аще же благословит тя Господь Бог твой во всех плодех твоих и во всяком деле рук твоих, и будеши веселяся. **16** В три времена лета да явится всяк мужеск пол пред Господем Богом твоим, на месте, еже избрет Господь Бог твой: в праздник опресноков, и в праздник седмиц, и в праздник кущей: да не явишия пред Господем Богом твоим тощъ: **17** кийждо по силе рук своих, по благословению Господа Бога твоего, еже даде тебе. **18** Судии и книгочии поставиши себе во всех градех твоих, яже Господь Бог твой дает тебе по племенам, и да судят людем суд праведный: **19** да не уклонят суда, ниже познают лице, ниже да возмут даров: дары бо ослепляют очи мудрых и отめшут словеса праведных. **20** Праведне праведное гоните, да поживете, и вшедше наследите землю, юже Господь Бог твой дает вам. **21** Да не насадиши себе дубравы: всякаго древа близ олтаря Господа Бога твоего да не сотвориши себе, **22** да не поставиши себе капища, еже возненавиде Господь Бог твой.

**17** Да не пожреш Господеви Богу твоему телца или овчате, на немже есть порок, всяк глагол зол: яко мерзость Господеви Богу твоему есть. **2** Аще же обрящется у тебе во едином от градов твоих, яже Господь Бог твои дает тебе, муж или жена, иже сотворит лукавое пред Господем Богом твоим,

преступити завет Его: **3** и шедше послужат богом иным и поклонятся им, солнцу, или луне, или всякому яже от красоты небесныя, ихже не повелех тебе: **4** и возвестится тебе, и взыщеша зело, и се, истинно бысть слово, мерзость сотворися сия во Израили: **5** да изведеша человека того, или жену ту, иже сотвориша дело злое сие, пред двери, и побиете их камением, и да умрут. **6** При двою свидетелех или при трех да умрет: умираяй да не умрет при едином свидетели: **7** и рука свидетелей да будет на нем в первых, умертвити его, и рука всех людей послепе: и измените злое от вас самех. **8** Аще же неудоборешимо слово у тебе в суде между кровию и кровию, и между судом и судом, и между язвою и язвою, и между прением и прением, словеса судная в градах твоих, и востав взыдеша на место, еже избрет Господь Бог твой призвати имя Его тамо: **9** и приидеши к жерцем левитом, и к судии, иже будет в тыя дни, и взыскавше возвестят тебе суд: **10** и сотвориши по словеси, еже возвестят тебе от места, еже избрет Господь Бог твой призывать имя Его тамо, и да сохраниши зело творити вся, елика законоположатся тебе: **11** по закону и по суду, егоже рекут тебе, сотвориши, да не уклонишия от словесе, еже известят тебе, ни на десно, ни на лево. **12** И человек, иже сотворит в гордости, еже не послушати жерца предстоящаго служити во имя Господа Бога твоего, или судии, иже в тыя дни будет, да умрет человек той, и да измени злое от Израиля: **13** и вси людие услышавше убоятся, и не будут нечествовати кому. **14** Аще же внидеша в землю, юже Господь Бог твой дает тебе в жребий, и приимеши ю, и вселишия на ней, и речеши: поставлю князя над собою, якоже и прочии языцы,

иже окрест мене: **15** поставляя да поставиши над собою князя, егоже избрет Господь Бог твой, от братии твоя да поставиши над собою князя, не возможеши поставити над собою князя человека чуждаго, яко не брат твой есть. **16** Обаче да не умножит себе коней, ниже да возвратит людей во Египет, яко да не умножит себе коней: Господь же рече вам: не приложите возвратитися путем сим ктому: **17** и да не умножит себе жен, да не превратится сердце его: и сребра и злата да не умножит себе зело. **18** И будет егда сядет на престоле власти своея, да напишет себе второзаконие сие в книзе от жерцев левитов, **19** и будет с ним, и да чет ю во вся дни жития своего, да научится бояться Господа Бога своего и хранити вся заповеди сия и оправдания сия, творити я: **20** да не возвысится сердце его от братии его, да не преступит от заповедий ни на десно, ни на лево яко да будет многа лета во власти своей, той и сыны его с ним, в сынех Израилевых.

**18** Да не будет жерцем левитом всему племени Левиину части ниже жребия со Израилем: приношения Господу жребий их, да ядят я: **2** жребий же да не будет ему в братии его: Господь Сам жребий его, якоже рече ему. **3** И сей суд жерцев, яже от людей, от приносящих жертвы, аще телца, аще овцу: и даси жерцу рамо, и челюсти, и утробу: **4** и начатки пшеницы твоя и вина твоего и елеа твоего, и начаток стрижения овец твоих да даси ему: **5** яко того избра Господь Бог твой от всех племен твоих предстояти пред Господем Богом твоим, служити и благословити во имя Господне, той и сынове его во вся дни. **6** Аще же приидет левит от единого градов ваших, от всех сынов Израилевых, идеже той обитает, якоже желает душа его, на

место, еже изберет Господь, 7 да служит имени Господа Бога вашего, якоже и вся братия Его левити предстоящи тамо пред Господем: 8 часть отделеную да яст, кроме продажи яже по отечеству. 9 Аще же внидеши в землю, юже Господь Бог твой дает тебе, да не навькнеши творити по мерзостем языков тех: 10 да не обрящется в тебе очищая сына своего и дщерь свою огнем, волхвуя волхвованием и чаруяй и птицеволшебствуяй, 11 чародей обавая обаванием, утробоволхвуяй и знаменосмотритель, и вопрошаяй мертвых: 12 есть бо мерзость Господеви Богу твоему всяк творяй сия: сих бо ради мерзостей потребит я Господь Бог твой от лица твоего. 13 Совершен да будеши пред Господем Богом твоим. 14 Языцы бо сии, ихже ты наследисти, сии чарований и волхвований послушают: тебе же не тако даде Господь Бог твой. 15 Пророка от братии твоея, якоже мене, возставит тебе Господь Бог твой, Того послушайте: 16 по всему, елико просил еси от Господа Бога твоего в Хориве в день собрания, глаголюще: да не приложим слышати гласа Господа Бога нашего, и огня великаго сего не увидим по сем, да не измрем. 17 И рече Господь ко мне: право вся, елика глаголаху к тебе: 18 Пророка возставлю им от среды братии их, якоже тебе: и вдам слово Мое во уста Его, и возглаголет им, якоже заповедаю Ему: 19 и человек той, иже не послушает словес Его, елика возглаголет Пророк оный во имя Мое, Аз отмщу от него: 20 обаче пророк, иже вознечествует глаголати во имя Мое слово, егоже не повелех ему глаголати, и иже аще возглаголет во имя богов инех, да умрет пророк той. 21 Аще же речеши в сердцы своем: како познаем слово, егоже не глагола Господь? 22 Елика

аще возглаголет пророк во имя Господне, и не сбудется, и не случится слово сие, егоже не рече Господь: в нечестии глагола Пророк той, не убойтеся его.

**19** Егда же погубит Господь Бог твой языки, ихже Господь Бог твой дает тебе землю, и наследии их и вселишия во градах их и в домех их, 2 три грады да отлучиши себе среди земли твоя, юже Господь Бог твой дает тебе в наследие. 3 Уготови себе путь, и на трое раздели пределы земли твоя, юже разделяет тебе Господь Бог твой: и да будет убежище тамо всякому убийце. 4 Сие же да будет заповедание убийце, иже аще убежит тамо, и жив будет: иже аще убьет ближняго своего не ведя, и сей не ненавидя его прежде вчерашняго дне и третьяго, 5 и иже аще пойдет с подругом своим в лес собирати дрова, и поползнется рука его с секирою секущаго дрова, и спадши секира с топорница улучит подруга его, и умрет, сей да убежит во един от градов сих, и жив да будет: 6 да не погнав ужик крове вслед убившаго, яко разгорится сердце ему, и постигнет его, аще должайший будет путь, и убьет душу его, и умрет: и сему несть суд смертный, понеже не бе ненавидя его прежде вчерашняго и третьяго дне: 7 сего ради заповедаю аз тебе слово сие, глаголя: три грады да отлучиши себе. 8 Аще же разширит Господь Бог твой пределы твоя, якоже клятся отцем твоим, и даст тебе Господь всю землю, юже рече дати отцем твоим, 9 аще послушаеши творити вся заповеди сия, яже аз заповедаю тебе днесь, любити Господа Бога твоего, ходити во всех путех Его вся дни: и да приложиши себе еще три грады к сим трием градом, 10 и да не пролиется кровь безвинна в земли твоей, юже Господь Бог твой дает тебе

в жребий, и да не будет в тебе крови повинен. **11** Аще же будет у тебе человек ненавидяй ближняго своего, и навет сотворит нань, и встанет нань, и поразит душу его, и умрет, и вбегнет во един от градов сих, **12** да послют старейшины града того, и возмут его оттуду, и да предадут его в руке ужиков крове, и да умрет: **13** да не пощадит его око твое, и да очистиши кровь неповинную от Израиля, и благо будет тебе. **14** Да не предвижеша пределов ближняго своего, яже поставиша отцы твои в наследии твоём, еже наследовал еси в земли, юже Господь Бог твой дает тебе во жребий. **15** Да не пребудет свидетель един во свидетелство на человека по всякой обиде и по всякому преступлению и по всякому греху, имже аще согрешит: при устех двою свидетелей и при устех триех свидетелей да станет всяк глагол. **16** Аще же встанет свидетель неправеден на человека, глаголя на него нечестие, **17** да станут оба человека, имже есть прясло, пред Господом и пред жерцы и пред судиями, иже будут в тыя дни, **18** и да испытают их судии прилежно, и се, свидетель неправеден свидетелствова неправду, воста на брата своего: **19** да сотворите ему, якоже и он умысли сотворити супротив брата своего, и измите злое от вас самех: **20** да и прочии услышавше убоятся, и не приложат ктому творити словесе злаго сего в вас: **21** да не пощадит его око твое: душу за душу, око за око, зуб за зуб, руку за руку, ногу за ногу, якоже аще кто даст порок на ближняго своего, сице воздастся ему.

**20** Аще же изыдеши на брань на враги твоя, и узриши кони и всадники и люди множайшыя тебе, да не убоишися их: яко Господь Бог твой с тобою, изведый тя из земли Египетския. **2** И будет егда приближишися к рати, и приступив

жрец да возглаголет к людем и речет к ним: **3** послушай, Израилю, вы исходите днесь на рать ко врагом вашим: да не ослабеет сердце ваше, ни убойтеса, ниже устрашитеса и не уклонитеса от лица их: **4** яко Господь Бог ваш идый пред вами споборствует вам на враги ваша и спасет вас. **5** И да рекут книгочия к людем, глаголюще: кий человек создавый храмину нову, и не обнови ея? Да идет, и да возвратится в дом свой, да не умрет на рати, и человек ин обновит ю: **6** и кии человек, иже насади виноград, и не веселися от него? Да идет, и возвратится в дом свой, да не умрет на рати, и человек ин возвеселится от него: **7** и кий человек, иже обручи себе жену, и не понял ю? Да идет, и возвратится в дом свой, да не умрет на рати, и ин человек поймет ю. **8** И да приложат книгочия глаголати к людем, и да рекут: кий человек страшлив и слаб сердцем? Да идет, и возвратится в дом свой, да не устрашит сердца брата своего, аки сердце свое. **9** И будет егда умолкнут книгочия глаголюще к людем, и поставят воеводы воинства вожды людий. **10** Аще же приидеши ко граду воевати нань, и воззовеши я с миром: **11** аще убо мирное отвещают ти, и отверзут тебе (град), вси людие обретшиися во граде да будут тебе дань дающе и послушающии тебе: **12** аще же не покорятся тебе, и сотворят с тобою рать, да обсядеши его, **13** дондеже предаст я Господь Бог твой в руце твои: да избиеши всяк мужеск пол в нем убийством меча, **14** кроме жен и имения, и вся скоты, и вся елика суть во граде, и все стяжание да плениши себе, и да снеси весь плен врагов твоих, яже Господь Бог твой дает тебе. **15** Тако да сотвориши всем градом, иже суть далече от тебе зело, иже не суть от градов языков сих, ихже Господь



Бог дает тебе наследити землю их: 16 от них да не оставите жива всякаго дыхания: 17 но и проклятием проклените их, Хеттеа и Аморреа, и Хананеа и Ферезеа, и Евеа и Иевусеа и Гегесеа, якоже заповеда тебе Господь Бог твой: 18 да не научат вас творити всякия мерзости своя, елики твориша богом своим, и согрешите пред Господем Богом вашим. 19 Аще же обсядеши град един дни многы воевати его в приятие себе, да не истребиши садовия его, возложив железо нань, но токмо да яси плод от них, самого же да не посечеши: еда древо, еже в дубраве, человек есть, иже внити от лица твоего в забрала? 20 Но древо, еже веси, яко не ятся плод его, сие потребиши и посечеши, и сотвориши лествицы на град, иже творит на тя рать, дондеже предастся.

**21** Аще же обрящется убиеный на земли, юже Господь Бог дает тебе наследити, лежащъ на поли, и не ведят убившаго и: 2 да изыдут старцы и судии твои и да измерят до градов, иже окрест убиенаго: 3 и будет град приближаясь убиенному, и да возмут старейшины града того юницу от говяд, еюже не делано, и яже ярма не понесе: 4 и да изведут старейшины града того юницу в дебрь суху, яже не оранна, ниже насеяна, и да пресекут жилы юницы в дебри: 5 и да приступят жерцы Левити: яко сих избра Господь Бог твой предстояти Ему и благословляти во имя Его: и во устех их да будет всякое прекословие и всякая язва: 6 и вси старейшины града того, приближающиися убиенному, да омыют руце над главою юницы, ейже пресечены суть жилы в дебри, 7 и отвещавше да рекут: руце наши не пролияша крове сея, и очи наши не видеша: 8 милостив буди людям Твоим Израилю, ихже извел еси, Господи, из земли Египетския, да не будет кровь

неповинна на людех Твоих Израили: и очистится им кровь:  
9 ты же отимеши кровь неповинну от среды себе, аще сотвориши доброе и угодное пред Господем Богом твоим. 10 Аще же изыдеши на брань противу врагом твоим, и предаст я Господь Бог твой в руце твои, и плениши плен от них, 11 и узриши в плене добру облицием, и возлюбиши ю, и поймеша ю себе в жену, 12 и введеша ю внутрь в дом твой, и да обриеша главу ея, и да обрежеша ногти ея, 13 и да совлечеша ризы пленныя ея с нея: и да сядет в дому твоём, и да плачется отца своего и матери своей месяц дний: и не сем увидеши к ней, и совокупишися с нею, и будет тебе жена. 14 И будет аще не восхощеши ея, да отпустиши ю свободну, продажею же да не продаси ея на цене: да не отринеша ея, понеже смирил еси ю. 15 Аще же будут мужу две жены, едина от них любя, и другая не любя, и породят ему любя и нелюбая, и будет сын перворожденный от нелюбимыя: 16 и будет в онъже день разделит сыном своим имение свое, не возможет первенцем быти сын любимыя, презрев сына нелюбимыя первенца: 17 но сына нелюбимыя за первенца да признает, и даст ему сугубо от всего, еже обряцется ему, яко сей есть начало чад его, и сему достоит первенство. 18 Аще же кому будет сын непокорив и грубитель, не послушай гласа отца своего и гласа матери своей, и накажут его, и не послушает их, 19 да возмут его отец его и мати его, и да изведут его пред старейшины града своего и пред врата места своего, 20 и да рекут к мужем града своего: сын наш сей непокорив есть и грубитель и не слушает речи нашей, сластолюбствуя пьянствует: 21 и да побьют его мужие града того камением, и да умрет: и измите злое от себе самих, да

и прочие слышавше убоятся. 22 Аще же будет на ком грех, суд смертный, и да умрет, и повесите его на древе, 23 да не пренощует тело его на древе, но во гробе погребите его в тойже день: яко проклят есть от Бога всяк висий на древе: и да не оскверните земли, юже Господь Бог твой дает тебе во жребий.

**22** Видев телца брата твоего или овцу его заблуждающыя на пути, да не презриши я: но возвращением возвратиши я к брату твоему, и да отдаси ему. 2 Аще же несть близ тебе брат твой, ниже увеси его, собери я внутрь дому твоего, и да будут у тебе, дондеже взыщет их брат твой, и отдаси их ему. 3 Також сотвориши осляти его, и тако да сотвориши ризе его, и тако да сотвориши всему погубленому брата твоего: елика аще погибнут от него, и обрящещи я, да не возможеши пренебрещи я. 4 Аще увидиши осля брата твоего или телца его падшыя на пути, да не презриши я: возставляя да возставиши я с собою. 5 Да не будет утварь мужеска на жене, ни да облачится муж в ризу женску: яко мерзость есть Господеви Богу твоему всяк творяй сия. 6 Аще же уллучиши гнездо птичье пред лицом твоим на пути, или на древе некоем, или на земли, и в нем птенцы или яйца, и мати сидит на птенцех или яйцех, да не возмеши матере со птенцы: 7 отпущением да отпустиши мать, птенцы же возмеши себе, да благо тебе будет и долгоденствен будеши. 8 Аще же созиждеши дом нов, и сотвориши ограждение дому твоему, и да не сотвориши убийства в дому твоём, аще падет падый от него. 9 Да не насееш виноград твоего различна, да не освятится плод, и семя, еже насееш с плодом винограда твоего. 10 Да не ореш юнцем и ослятем

вкупе. 11 Ниже да облечешися в ризу разноличну от льна и волны вкупе ткану. 12 Тресны да сотвориши себе на четырех краях одежды своея, в нюже облечешися. 13 Аще же кто поймет жену и будет с нею, и возненавидит ю, 14 и наложит на ню обвинительная словеса, и нанесет на ню имя злое, и возглаголет: жену сию поях, и пришед к ней, не обретох ю девицею: 15 и возьмет отец девицы и мать, да изнесут девическая отроковицы пред старейшины ко вратом, 16 и речет отец отроковицы ко старейшинам: дочь мою сию дах мужу сему в жену, и ныне возненавидев ю сей, 17 возлагает ей обвинительная словеса, глаголя: не обретох дочери твоея девою: и се, девическая дочери моея: и да разгнут ризы пред старейшины града онаго, 18 и да возмут старейшины града онаго мужа того и накажут его, 19 и да обвинят его стом сиклей, и дадут отцу отроковицы, яко изнесе имя зло на девицу Израилтеску, и (паки) да будет ему жена: не возможет отпустить ю во вся лета. 20 Аще же будет воистинну слово сие, и не обрящутся девическая отроковице, 21 и да изведут девицу пред врата дому отца ея, и побьют ю камением мужие градстии, и да умрет, яко сотвори безумие в сынех Израилевых, оскверни дом отца своего: и измите злое от себе самих. 22 Аще же обрящется человек лежай с женою мужатою, убийте обоих, человека лежащаго с женою и жену: и измите злое от Израиля. 23 Аще же будет дева обрученная мужу, и обрет ю человек (другий) во граде, будет с нею, 24 изведите обоих пред врата града их, и побийте (обоих) камением, и да умрут: отроковицу, понеже не вопила во граде, и мужа, понеже обиде жену ближняго своего: и измите злое от себе самих. 25 Аще же на поли обрящется человек

деву обрученную, и насilовав будет с нею, убийте человека единого бывшего с нею: 26 а отроковице ничтоже сотворите: несть бо деве греха смертного: якоже аще кто бы встал на ближнего своего, и убил бы душу его, тако сие дело: 27 понеже на селе обрете ю, возопи отроковица обрученная, и не бе помогая ей. 28 Аще же кто обрящет отроковицу деву, яже несть обручена, и насilовав будет с нею, и обличится: 29 да даст человек бывший с нею отцу отроковицы пятьдесят дидрахм сребра, и тому да будет жена, понеже обиде ю: не возможет отпустить ю во все время. 30 Да не поймет человек жены отца своего, и да не откроет покровения отца своего.

**23** Да не входит каженик и скопец в сонм Господень. 2 Ниже да внидет блудородный во храм Господень до десятого рода. 3 Да не внидет Амманитин и Моавитин в храм Господень: и даже до десятого рода да не входит в храм Господень, и даже до века, 4 понеже не сретоша они вас с хлебы и водою на пути, исходящим вам из земли Египетския, и яко наяша на тя Валаама сына Веорова от Месопотамии, да тя прокленет: 5 и не восхоте Господь Бог твой послушати Валаама, и обрати Господь Бог твой клятвы в благословение, зане возлюби тя Господь Бог твой: 6 да не совещаеши мирная им и полезная им во вся дни твоя во веки. 7 Да не возгнушаешия Идумеанином, яко брат твой есть: да не возгнушаешия Египтянином, яко пришлец был еси в земли его: 8 сынове аще родятся им, в роде третьем да внидут в храм Господень. 9 Аще же изыдеши ополчитися на враги твоя, и да сохранишия от всякаго слова зла. 10 Аще будет у тебе человек, иже не будет чист от излияния его нощию, и да изыдет вне полка, и да не внидет в полк: 11 и егда

будет к вечеру, да омыет тело свое водою, и зашедшу солнцу да внидет в полк. 12 И место тебе да будет вне полка, и изыдеши тамо вон: 13 и рылец да будет тебе за поясом твоим, и будет егда сядеши вне, и да ископаеши им (яму), и навратив покрыеши стыдение твое в ней: 14 яко Господь Бог твой ходит в полце твоем избавляти тя и предати враги твоя в руце твои пред лицом твоим: и да будет полк твой свят, и да не явится у тебе стыдение вещи, и отвратится от тебе. 15 Да не предаши раба господину его, иже прииде к тебе от господина своего: 16 с тобою да обитает, с вами да живет во всяком месте, идеже угодно будет ему: да не оскорбиши его. 17 Да не будет блудница от дочерей Израилевых, и да не будет блудник от сынов Израилевым. 18 Да не принесеши мзды блудничи, ниже цене песни в дом Господа Бога твоего на всяк обет, яко мерзость суть Господеви Богу твоему и обоя. 19 Да не даси брату твоему в лихву сребра и в лихву пищей и в лихву всякия вещи, емуже аще взаим даси: 20 чуждему да даси в лихву, брату же твоему да не даси в лихву, да благословит тя Господь Бог твой во всех делах твоих на земли, в нюже входиши тамо наследити ю. 21 Аще же обещаеши обет Господеви Богу твоему, да не умедлиши воздати его, яко взыская взыщет Господь Бог твой от тебе, и будет на тебе грех: 22 аще же не восхощеши обещати, несть ти греха. 23 Исходящая на уст твоих сохрани и сотвори, имже образом обещал еси Господеви Богу твоему дар, егоже глаголал еси устами твоими. 24 Аще же внидеши на ниву ближняго своего, и собереши в руце свои класы, а серпа да не возложиши на ниву ближняго. 25 Аще же внидеши в

виноград ближнего своего, да яси гроздие, елико души твоей насытитися, в сосуд же да не вложиши.

**24** Аще же кто поймет жену и поживет с нею, и будет аще не обрящет благодати пред ним, яко обрете в ней срамное дело, да напишет ей книгу отпущения и вдаст в руке ея, и да отпустит ю из дому своего, **2** и отшедши будет (жена) мужу иному: **3** и аще возненавидит ю муж второй, и напишет ей книгу отпущения и даст ей в руке ея, и отпустит ю из дому своего, или умрет муж ея второй, иже бе ю поял себе в жену: **4** не возможет муж первый, отпустивый ю, возвратив пояти ю себе в жену, по осквернении ея, яко гнусно есть пред Господем Богом твоим: и да не осквернавите земли, юже Господь Бог ваш дает вам в наследие. **5** Аще же кто поймет жену внове, да не идет на брань, и да не наложится ему ни каяже вещь: неповинен будет в дому своем лето едино, да веселит жену свою, юже поял есть. **6** Да не возмеш в залог жерновных камней, яко душу сей дает в залог. **7** Аще же ят будет человек крадый душу от братии своея сынов Израилевых, и насилием продает ю, да умрет тать той, и измите злое от вас самих. **8** Внемли себе в язве проказы, и храни зело творити по всему закон, егоже возвестят вам жерцы левити: якоже заповедах вам, да храните творити: **9** помяни, елика сотвори Господь Бог твой Мариаме на пути, исходящим вам из Египта. **10** Аще же долг есть на ближнем твоём, долг каковый либо, да не внидеши в дом его взяти залог его: **11** вне станеш, и человек той, на немже есть долг твой, изнесет залог вон. **12** Аще же человек убог есть, да не преноществует залог его у тебе: **13** отданием да отдаси ризу его до захождения солнца, и да почиет в ризе своей, и

благословит тя, и будет тебе милость пред Господем Богом твоим. **14** Да не лишиши мзды убогаго и требующаго от братии твояе, или от пришлец иже во градах твоих: **15** в той же день да отдаси мзду ему, да не зайдет солнце ему, яко убог есть, и в том имать надежду, и да не возопиет на тя к Господеви, и будет тебе грех. **16** Да не умрут отцы за сыны, и сынове да не умрут за отцы: кийждо за свой грех да умрет. **17** Не уклониши суда пришелцу и сиру и вдове, и да не вземлеси в залог ризы вдовичи, **18** и помянеши, яко раб (и ты) был еси в земли Египетстей, и свободи тя Господь Бог твой оттуду: сего ради аз тебе заповедаю творити сие слово. **19** Аще же пожнеши ниву твою на селе твоем, и забудеши сноп на ниве твоей, да не возвратишися взяти его: пришелцу и убогу, и сиру и вдове да будет, да благословит тя Господь Бог твой во всех делех руку твою. **20** Аще же масличие собираеши, да не возвратишися останков собрати яже за тобою: пришелцу и сиру и вдове да будут: и воспомянеши, яко раб был еси в земли Египетстей: сего ради аз тебе заповедаю творити слово сие. **21** Аще же обираеши виноград твой, да не собираеши останков яже за тобою: пришелцу и сиру и вдове да будут: **22** и помянеши, яко раб был еси в земли Египетстей: сего ради аз тебе заповедаю творити сие слово.

**25** Аще же будет пря между человеки, и приидут на суд, и да судят, и оправдят праваго, и осудят нечестиваго: **2** и будет, аще достоин есть ран нечестивый, да поставиши его пред судиями, и да бьют его пред ними по нечестию его: **3** и числом чотыредесять ран да наложат ему, и да не приложат к сему: аще же приложат паче ран сих бити его множае,



срам будет брату твоему пред тобою. 4 Да не обратиши вола молотяща. 5 Аше же живут братия вкупе, и умрет один от них, семене же не будет ему, да не будет жена умершаго иному мужу несродну: брат мужа ея да внидет к ней и поймет ю себе в жену, и да поживет с нею: 6 и будет очроча, еже аще родится, да поставится во имя умершаго, и не погибнет имя его от Израиля. 7 Аще же не восхоцет человек пояти жены брата своего, да приидет жена ко вратом пред старейшины и речет: не хоцет брат мужа моего возставити имя брата своего во Израили, не восхоте брат мужа моего: 8 и да призовут его старейшины града того и рекут ему, и став речет: не хощу пояти ю: 9 и приступивши жена брата его к нему пред старейшины, и изует сапог его един от ноги его, и да плюнет на лице его, и отвецавши речет: сице да сотворят человеку, иже не созиждет дому брата своего во Израили: 10 и прозовется имя его во Израили дом изутаго из сапога. 11 Аще же биятся человека два вкупе, человек с братом своим, и приступит жена одинаго от них отяти мужа своего от руки биящаго и, и простерши руку свою, имет за ятра его, 12 да отсечеши руку ея: да не пощадит око твое ея. 13 Да не будет во влагалищи твоем мерило и мерило, великое и малое, 14 да не будет в дому твоем мера и мера, велика и мала: 15 мерило истинно и праведно да будет тебе, и мера истинна и праведна да будет тебе, да многи дни будеши на земли, юже Господь Бог твой дает тебе в жребий, 16 яко мерзость Господеви Богу твоему всяк творяй сия, всяк творяй неправду. 17 Помяни, елика тебе сотвори Амалик на пути, исходящу тебе из Египта: 18 како сопротивоста тебе на пути и посече задний полк твой утружден за тобою: ты же

алчен был еси и утружден: и не убойся Бога: **19** и будет егда упокоит тя Господь Бог твой от всех враг твоих, иже окрест тебе на земли, юже Господь Бог твой дает тебе в жребий, еже наследити ю, да погубиши имя Амаликово от земли, яже под небесем, и да не забудеши.

**26** И будет аще внидеши в землю, юже Господь Бог твой дает тебе в жребий еже наследити ю, и вселишися на ней, **2** и да возмешь от начатка плодов земли твоя, юже Господь Бог твой дает тебе в жребий, и вложиши в кошницу, и пойдеши на место, еже изберет Господь Бог твой призывати имя Его тамо: **3** и приидеши к жерцу, иже будет в тыя дни, и речеши к нему: возвещаю днесь Господеви Богу твоему, яко внидох в землю, еуже клятса Господь отцем нашим дати нам: **4** и да возмет жрец от руку твою кошницу и да положит ю пред олтарем Господа Бога твоего: **5** и отвещав речеши пред Господем Богом твоим: Сирию остави отец мой и сниде во Египте и обита тамо в числе малем, и бысть тамо в язык велик и во множество много и велико: **6** и озлобиша нас Египтяне, и смириша ны, и возложиша на ны дела жестокая: **7** и возопихом ко Господу Богу отец наших, и услыша Господь вопль наш и виде смирение наше и труд наш и скорбь нашу, **8** и изведе ны Господь из Египта Сам крепостию Своею великою и рукою сильною и мышцею высокою, и в видениях великих и в знамениях и в чудесех, **9** и введе ны в место сие, и даде нам землю сию, землю кипящую медом и млеко: **10** и ныне се, принесох начатки от плодов земли, юже дал ми еси, Господи, землю кипящую медом и млеко. И оставиши е пред Господем Богом твоим, и поклонишися тамо пред Господем Богом твоим, **11** и возвеселишися о всех

благих, яже даде тебе Господь Бог твой, и дом твой, и левит, и пришлец иже у тебе. 12 Егда же совершиши одесятити всю десятину плодов земли твоя в лето третье, вторую десятину да даси левиту и пришелцу и сироте и вдове, и ядят во градах твоих и насытятся: 13 и речеши пред Господем Богом твоим: очистих святая из дому моего, и дах я левиту и пришелцу и сироте и вдове, по всем заповедем Твоим, яже заповедал еси мне: не преступих заповеди Твоя и не забых, 14 и не ядох в болезни моей от них, не принесох от них в нечистое, ниже дах от них умершему: послушах гласа Господа Бога моего, сотворих, якоже заповедал еси мне: 15 призри с небесе от храма святого Твоего, и благослови люди Твоя Израиля и землю, юже дал еси им якоже клялся еси отцем нашим, дати нам землю кипящую медом и млеко. 16 В сей день заповеда тебе Господь Бог твой сотворити вся оправдания сия и судьбы: и сохраните и сотворите я от всего сердца вашего и от всея души вашей. 17 Господа избрал еси днесь быти тебе в Бога, и ходити во всех путех Его и хранити оправдания и заповеди и судьбы Его, и послушати гласа Его. 18 И Господь избра вас днесь, да будете Ему люди избранныи, якоже рече тебе, хранити вся заповеди Его, 19 и быти тебе вышше всех язык, иже сотвори тя именита и хвальна и славна, быти вам людем святым Господу Богу вашему, якоже глагола.

**27** И заповеда Моисей и старейшины сынов Израилевых, глаголя: сохраните вся заповеди сия, елики аз заповедаю вам днесь. 2 И будет в оньже день прейдете Иордан на землю, юже Господь Бог твой дает тебе во жребий, и поставиши себе камень велико и обелиши я мелом, 3 и напишеша

на каменех тех вся словеса закона сего, егда прейдете Иордан, егда внидете в землю, юже Господь Бог твой дает тебе, землю кипящую медом и млеко, якоже рече Господь Бог отец твоих тебе. 4 И будет егда прейдете Иордан, да поставите камене сие, яже аз повелеваю вам днесь, в горе Гевал, и побелиши их мелом: 5 и да созиждеши тамо олтарь Господеви Богу твоему, олтарь от камня: да не возложиши на них железа: 6 камением всецелым да созиждеши олтарь Господеви Богу твоему и вознесеши на нем всесожжения Господеви Богу твоему, 7 и пожреши жертву спасения: и яси, и насытишися тамо, и возвеселишися пред Господем Богом твоим, 8 и напишеша на камених сих весь закон сей яве зело. 9 И глагола Моисей и жерцы левити всему Израилю, глаголюще: молчи и слыши, Израилю, в день сей стася еси в люди Господеви Богу твоему: 10 и да послушаеши гласа Господа Бога твоего, и да сотвориши вся заповеди Его и оправдания Его, яже аз заповедаю тебе днесь. 11 И заповеда Моисей людям в той день, глаголя: 12 сии да станут благословляти люди на горе Гаризин, прешедше Иордан: Симеон, Левий, Иуда, Иссахар, Иосиф и Вениамин: 13 и сии да станут на клятву на горе Гевал: Рувим, Гад и Асир, Завулон, Дан и Неффалим. 14 И отвещавше рекут левити всему Израилю гласом великим: 15 проклят человек, иже сотворит изваяние и слияние, мерзость Господеви, дело рук художника, и положит е в сокровении. И отвещавше вси людие рекут: буди. 16 Проклят безчестяй отца своего или мать свою. И рекут вси людие: буди. 17 Проклят прелагай пределы ближняго своего. И рекут вси людие буди. 18 Проклят прельщай слепаго в пути. И рекут вси

людие: буди. 19 Проклят, иже уклонит суд пришелцу и сироте и вдове. И рекут вси людие: буди. 20 Проклят лежай с женою отца своего, яко открыл есть покровение отца своего. И рекут вси людие: буди. 21 Проклят лежай со всяким скотом. И рекут вси людие: буди. 22 Проклят лежай с сестрою своею, дщерию отца своего или дщерию матери своея и рекут вси людие: буди. 23 Проклят лежай с тещею своею. И рекут вси людие: буди. Проклят лежай с сестрою жены своея. И рекут вси людие: буди. 24 Проклят бияй ближняго с лестью. И рекут вси людие: буди. 25 Проклят, иже возмет дары поразити душу крове неповинныя. И рекут вси людие: буди. 26 Проклят всяк человек, иже не пребудет во всех словесех закона сего, еже творити я. И рекут вси людие: буди.

**28** И будет егда преидете Иордан в землю, юже Господь Бог ваш дает вам, аще слухом послушаете гласа Господа Бога вашего хранити и творити вся заповеди Его, яже аз заповедаю тебе днесь, и даст тя Господь Бог твой вышше всех язык земли: 2 и приидут на тя вся благословения сия и обрящете тя. Аще слухом слушаеши гласа Господа Бога твоего, 3 благословен ты во граде и благословен ты на селе, 4 благословена исчадия чрева твоего и плоды земли твоя, и стада волов твоих и паствы овец твоих, 5 благословены житницы твои и останцы твои, 6 благословен ты внегда входити тебе и благословен ты внегда исходити тебе. 7 Да предаст тебе Господь Бог враги твоя, сопротивляющыя тебе, сокрушены пред лицом твоим: путем единым изыдут на тя и седмью путыи побегат от лица твоего. 8 Да послет Господь на тя благословение в хранилищах твоих и на вся, на няже возложиши руку твою на земли, юже Господь Бог

твой дает тебе. **9** Да возставит тя Господь Бог твой Себе люд свят, якоже клятся отцем твоим. Аще послушаеши гласа Господа Бога твоего и ходити будеши в путех Его, **10** и узрят тя вси языцы земнии яко имя Господа (Бога твоего) призвася на тя, и убоятся тебе, **11** и умножит тя Господь Бог твой во благая во исчадиех утробы твоея и во исчадиех скотов твоих, и в плодех земли твоея, на земли твоей, юже клятся Господь отцем твоим дати тебе. **12** Да отверзет тебе Господь сокровище Свое благое, небо, иже дати дождь земли твоей во время свое, да благословит вся дела рук твоих: и даси взаим языком многим, ты же не одолжишия: и обладаеши ты многими языки, тобою же не возобладают. **13** Да поставит тя Господь Бог твой во главу, а не в хвост: и будеши тогда выше, и не будеши ниже, аще послушаеши заповедий Господа Бога твоего, елика аз заповедаю тебе днесь хранити и творити: **14** да не преступиши от всех словес, яже аз заповедаю тебе днесь, на десно ниже на лево, ходити вслед богов иных служити им. **15** И будет аще не послушаеши гласа Господа Бога твоего хранити и творити вся заповеди Его, елики аз заповедаю тебе днесь, и приидут на тя вся клятвы сия и постигнут тя: **16** проклят ты во граде и проклят ты на селе, **17** прокляты житницы твои и останки твои, **18** проклята исчадия утробы твоея и плоды земли твоея, стада волов твоих и паствы овец твоих, **19** проклят ты внегда входити тебе и проклят ты внегда исходити тебе. **20** Да послет тебе Господь скудость и глад и истребление на вся, на няже возложиши руку твою, елика аще сотвориши, дондеже потребит тя и дондеже погубит тя вскоре, злых ради начинаний твоих, зане оставил еси Мя.

21 Да прилепит Господь к тебе смерть, дондеже потребит  
тя от земли, в нюже ты входиши тамо наследити ю. 22 Да  
поразит тя Господь неимением и огневицею, и стужею и  
жжением, и убийством и ветром тлетворным и бледостию,  
и поженут тя, дондеже погубят тя. 23 И будет небо над  
главою твоею медяно и земля под тобою железна. 24 Да  
даст Господь дождь земли твоей прах, и персть с небесе  
сидет на тя, дондеже сокрушит тя и дондеже погубит тя. 25  
Да даст тя Господь на исечение пред враги твоими: путем  
единым изыдеши к ним и седмию пути побежиши от лица их,  
и будеши в разсеяние во всех царствах земных, 26 и будут  
мертвецы ваши снедь птицам небесным и зверем земным,  
и не будет отгоняй. 27 Да поразит тя Господь вредом  
Египетским в седалищах и крastoю дивиею и свербом, яко не  
мощи тебе исцелитися. 28 Поразит тя Господь неистовством  
и слепотою и изступлением ума, 29 и будеши осязая в  
полудни, якоже осязает слепый во тме, и не исправит путей  
твоих: и будеши тогда обидим и расхищаемь во вся дни,  
и не будет помогай тебе. 30 Жену поймеш, и ин муж  
возимеет ю: дом созиждеши, и не поживеши в нем: виноград  
насадиши, и не обереши его: 31 телец твой заклан пред  
тобою, и не снеси от него: осля твое отято от тебе, и не  
отдастся тебе: овцы твоя отданы (будут) врагом твоим,  
и не будет тебе помогай: 32 сынове твои и дщери твоя  
отданы (будут) языку иному, и очи твои узрят истаевающе на  
сия, и не возможет рука твоя: 33 плоды земли твоя и вся  
труды твоя пояст язык, егоже не веси, и будеши обидимь и  
сокрушаем во вся дни, 34 и будеши изумлен, видений ради  
очес твоих, яже узриши. 35 Да поразит тя Господь вредом

злым на коленах и на голенех, яко не мощи исцелитися тебе от стоп ног твоих даже до верха (главы) твоея. 36 Да ответитя Господь и князи твоя, яже поставиши себе, в язык, егоже не веси ты и отцы твои, и послужиши тамо богом иным, древу и камению, 37 и будеши тамо в гадание и в притчу и повесть во всех языцех, в няже введет тя Господь (Бог) тамо. 38 Семя много изнесеши на поле, и мало внесеши, яко поядят я пружи: 39 виноград насадиши и возделаеши, и вина не испиеш, ниже возвеселишися от него, яко пояст я червь: 40 маслины будут тебе во всех пределех твоих, и елеем не помажешися, яко истечет маслина твоя: 41 сыны и дщери родиши, и не будут тебе, отидут бо в плен: 42 вся древесная твоя и вся жита земли твоея потребит ржа: 43 пришлец, иже есть у тебе, взыдет над тя выше выше, ты же низидеши низу низу: 44 сей взаим даст тебе, ты же ему взаим не даси: сей будет глава, ты же будеши хвост. 45 И приидут на тя вся клятвы сия, и поженут тя и постигнут тя, дондеже потребят тя и дондеже погубят тя: яко не послушал еси гласа Господа Бога твоего, еже хранити заповеди Его и оправдания Его, елика заповеда тебе. 46 И будут на тебе знамения и чудеса, и в семени твоём до века, 47 понеже не послужил еси Господеву Богу твоему с веселием и благим сердцем, множества ради всех (благих), 48 и послужиши врагом твоим, яже послет Господь Бог твой на тя с гладом и жаждою, и наготою и оскудеением всех: и возложит ярем железен на выю твою, дондеже сокрушит тя. 49 И наведет Господь на тя язык издалеча от края земли аки устремление орле, язык, егоже не уразумеши глагола, 50 язык безстуден лицом, иже не удивится лицу старчу и юна не помилует: 51



и пояст плоды скотов твоих и плоды земли твоя, яко не оставит тебе пшеницы, ни вина, ни елеа, стад волов твоих и паств овец твоих, дондеже погубит тя: **52** и сокрушит тя во всех градех твоих, дондеже разорятся стены твоя высокия и крепкия, на нихже ты уповаеши, во всей земли твоей: и озлобит тя во всех градех твоих, яже даде тебе Господь Бог твой. **53** И снеси чада утробы твоя, плоть сынов и дочерей твоих, ихже даде тебе Господь Бог твой, в тесноте твоей и в скорби твоей, еюже оскорбит тя враг твой. **54** Юный в вас и младый зело позавидит оком своим брату своему и жене яже на лоне его, и оставшымся чадом, яже аще останутся ему: **55** яко дати единому их от плотей чад своих, ихже ял еси, понеже ничто остана ему в тесноте и скорби твоей, еюже оскорбят тя враги твои во всех градех твоих. **56** И юная в вас (жена) и младая зело, еяже не обыче нога ея ходити по земли юности ради и младости, позавидит оком своим мужу своему иже на лоне ея, и сыну и дочери своей, **57** и блоня своей изшедшей из чресл ея, и чаду своему еже аще родит: снесет бо я тайно, скудости ради всех в тесноте и скорби своей, еюже оскорбит тя враг твой во всех градех твоих. **58** Аще не послушаете творити вся словеса закона сего, написанная в книзе сей, еже боятися имени чуднаго и чуднаго сего, Господа Бога твоего, **59** и удивит Господь язвы твоя и язвы семени твоего, язвы великия и дивныя, и болезни злыя и известныя, **60** и обратит на тя всю болезнь Египетскую злую, еяже ты боялся еси от лица их, и прилепятся к тебе: **61** и все расслабление, и всю язву ненаписанную и всю писаную в книзе закона сего наведет Господь на тя, дондеже потребит тя: **62** и останетея в числе малем, вместо того егда бысте

яко звезды небесныя множеством, яко не послушасте гласа Господа Бога вашего. 63 И будет, якоже возвеселися Господь о вас благотворити вам и умножити вас, тако возвеселится Господь о вас потребити вас: и возметесь от земли, в нюже вы входите тамо наследити ю, 64 и развеет тя Господь Бог твой во вся языки, от края земли даже до края ея, и послужиши тамо богом иным, древу и камению, ихже не знал еси ты и отцы твои: 65 но и во языцех оных не упокоит тя, ниже будет стояния стопе ноги твоя: и даст тебе Господь тамо сердце печальное и оскудевающая очеса и истаявающую душу: 66 и будет живот твой висящъ пред очима твоима, и убоишися во дни и в нощи, и не будеши веры яти житию твоему: 67 завтра речеши: како будет вечер? И в вечер речеши: како будет утро? От страха сердца твоего, имже убоишися, и от видении очес твоих, имиже узриши: 68 и возвратит тя Господь Бог во Египет в кораблех, и на пути егоже рекох, не приложите ксему видети его: и продани будете тамо врагом вашим в рабы и в рабыни, и не будет купующаго.

**29** Сия словеса завета, яже завеща Господь Моисею уставити сыном Израилевым в земли Моавли, кроме завета, егоже завеща им в Хориве. 2 И призва Моисей вся сыны Израилевы и рече к ним: вы видесте вся, елика сотвори Господь в земли Египетстей пред вами фараону и всем слугам его и всей земли его, 3 искушения великая, яже видеста очи твои, знамения и чудеса великая оная, руку крепкую и мышцу высокую: 4 и не даде Господь Бог вам сердца разумети и очес видети и ушес слышати, даже до дне сего: 5 и водил вас сорок лет по пустыни:

не обетшаша ризы ваша, и сапозы ваши не сотрошася на  
ногах ваших: 6 хлеба не ядoste, вина и сикера не писте, да  
познаете, яко Сей Господь Бог ваш: 7 и приидосте до сего  
места: и изыде Сион царь Есевонский и Ог царь Васанский  
во сретение нам на брань, 8 и поразихом их на брани,  
и прияхом землю их: и дах ю во жребий Рувиму и Гаду  
и полуплемена Манассиину. 9 И сохраните творити вся  
словеса завета сего творити я, да разумеете вся, елика  
сотворите. 10 Вы стасте вси днесь пред Господем Богом  
вашим, племеноначалницы ваши и старейшины ваши, и  
судии ваши и писмовводители ваши, всяк муж Израилтеск,  
11 и жены ваша и чада ваша, пришлец иже посреде полка  
вашего, от древесечца вашего даже до водоносца вашего,  
12 еже прейти в завет Господа Бога вашего и в клятвы  
Его, елика завещает Господь Бог твой к тебе днесь: 13  
да поставит тя Себе в люди, и Той будет тебе Бог, якоже  
тебе рече и якоже клятятся отцем твоим, Аврааму и Исааку  
и Иакову. 14 И не вам едином аз завет сей и клятву сию  
завещаваю, 15 но и zde суцым с вами днесь, пред Господем  
Богом вашим, и не суцым с вами zde днесь. 16 Яко вы  
весте, како жихом в земли Египетстей и како проидохом  
посреде языков, ихже преидосте, 17 и видесте мерзости их  
и кумиры их, древо и камение, сребро и злато, яже суть  
у них. 18 Еда кто есть в вас муж или жена, или отечество  
или племя, егоже сердце уклонися от Господа Бога вашего,  
ити еже служити богом языков оных? Еда кий есть в вас  
корень горе прорастающь в желчи и горести? 19 И будет  
аще услышит словеса клятвы сея и похвалится в сердцы  
своём, глаголя: преподобно мне да будет, яко в прельщении

сердца моего пойду, да не погубит грешник безгрешного (с собою): 20 не восхощет Бог милостив быти ему, но тогда разгорится гнев Господень и ревность Его на человека того: и прилепятся ему вся клятвы завета сего, писанныя в книзе закона сего: и потребит Господь имя его от поднебесных, 21 и отлучит его Господь на злая от всех сынов Израилевых, по всем клятвам завета написанного в книзе закона сего. 22 И речет род ин, сынове ваши, иже востанут по вас, и чуждый иже приидет от земли далекия, и узрят язвы земли оныя и недуги ея, яже посла Господь на ню, 23 жупел и соль сожженную: вся земля ея не засеется, ни прозябнет, ниже возникнет на ней всяк злак: якоже опровержесе Содом и Гоморр, Адама и Севоим, яже опроверже Господь в ярости и гневне Своем. 24 И рекут вси языцы: почто сотвори Господь сице земли сей? Кая ярость гнева великая сия? 25 И рекут: яко оставиша завет Господа Бога отец своих, егоже завеща отцем их, егда изведе их от земли Египетския, 26 и шедше послужиша богом иным, и поклонишася им, ихже не ведяху, и не даде им ничтоже ни един: 27 и разгневался яростию Господь на землю ту, еже навести на ню по всем клятвам завета, писанным в книгах закона сего: 28 и изят их Господь от земли их яростию и гневом, и прогневанием великим зело, и изверже их в землю ину якоже ныне. 29 Тайная Господеви Богу нашему, нам же явленная и чадом нашим во веки, творити вся словеса закона сего.

**30** И будет егда приидут на тя вся словеса сия, благословение и клятва, юже дах пред лицом твоим, и приимеши в сердце твое во всех языцех, в няже расточит тя Господь Бог твой тамо, 2 и обратишися ко Господу Богу

твоему, и послушаеши гласа Его по всем, елика аз заповедаю тебе днесь, ты и сын твой, от всего сердца твоего и от всея души твоея, **3** и исцелит Господь грехи твоя и помилует тя, и паки соберет тя от всех языков, в няже разсыпа тя Господь Бог тамо. **4** Аще будет разсеяние твое от края небесе даже до края небесе, оттуду соберет тя Господь Бог твой и оттуду возмет тя, **5** и введет тя Господь Бог твой оттуду в землю, юже наследил отцы твои, и наследил ю: и благо тебе сотворит, и умножит тя паче отец твоих **6** и очистит Господь сердце твое и сердце семени твоего, любити Господа Бога твоего от всего сердца твоего и от всея души твоея, да живеша ты: **7** и даст Господь Бог твой клятвы сия на враги твоя и на ненавидящия тя, иже изгнаша тя: **8** и ты обратишися и послушаеши гласа Господа Бога твоего и сотвориши заповеди Его, елики аз заповедаю тебе днесь. **9** И благословит тя Господь Бог твой во всяком деле руку твою, в плодах утробы твоея и в плодах скотов твоих и в житех земли твоея, яко обратится Господь Бог твой возвеселится о тебе во благих, якоже возвеселился от отцев твоих: **10** аще послушаеши гласа Господа Бога твоего хранити и творити вся заповеди Его и оправдания Его и суды Его, написанныя в книзе закона сего: аще обратишися ко Господу Богу твоему от всего сердца твоего и от всея души твоея. **11** Яко заповедь сия, юже аз заповедаю тебе днесь, не тяжка есть, ниже далече есть от тебе: **12** не на небеси есть, глаголя: кто въздет от нас на небо и возмет ю нам, и услышавше ю сотворим? **13** Ниже об ону страну моря есть, глаголя: кто преидет нам на юну страну моря и возмет ю нам, и услышавше ю сотворим? **14** Близ тебе есть

глагол зело, во устех твоих и в сердцы твоим и в руку твою, творити его. 15 Се, дах пред лицом твоим днесь жизнь и смерть, благо и зло. 16 Аще послушаеши заповедий Господа Бога твоего, яже аз заповедаю тебе днесь, любити Господа Бога твоего, ходити во всех путех Его и хранити оправдания Его и заповеди Его и суды Его, и поживеши, и умножишия, и благословит тя Господь Бог твой на всей земли, в нюже входиши наследити ю тамо. 17 И аще превратится сердце твое, и не послушаеши, и заблудив поклонишия богом иным и послужиши им, 18 возвещаю вам днесь, яко погибелию погибнете, и не многодневни будете на земли, юже Господь Бог дает тебе, в нюже вы преходите Иордан тамо наследити ю. 19 Засвидетелствую вам днесь небом и землею: живот и смерть дах пред лицом вашим, благословение и клятву: и избери живот, да живеши ты и семя твое, 20 любити Господа Бога твоего, послушати гласа Его и прилепитися к Нему: яко сие живот твой, и долгота дний твоих, жити на земли, еюже клятятся Господь Бог отцем твоим, Аврааму и Исааку и Иакову, дати им.

**31** И сконча Моисей глаголя вся словеса сия ко всем сыном Израилевым 2 и рече к ним: ста и двадесяти лет аз есмь днесь: не возмогу ксему входитьи и исходити: Господь же рече ко мне: не преjdeши Иордана сего: 3 Господь Бог твой предидый пред лицом твоим, Той потребит языки сия от лица твоего, и наследити их: и Иисус предидый пред лицом твоим, якоже глагола Господь: 4 и сотворит им Господь, якоже сотвори Сиону и Огу, двум царем Аморрейским, иже быша об он пол Иордана, и земли их, якоже потреби их 5 и предаде их Господь в руце ваши: и сотворите им, якоже заповедах вам:

6 мужайся и крепися, не бойся, ни ужасайся, ни устрашайся от лица их: яко Господь Бог твой, Сей предидый с вами, и не отступит от тебе, ниже оставит тя. 7 И призва Моисей Иисуса и рече ему пред всем Израилем: мужайся и крепися: ты бо внидеши пред лицом людей сих в землю, юже клятся Господь отцем вашим дати им, и ты в наследие разделиши ю им: 8 и Господь, идый с тобою, не отступит от тебе, ниже оставит тя: не бойся, ни ужасайся. 9 И вписа Моисей вся словеса закона сего в книгу и даде жрецем сыном Левиным, воздвижущым ковчег завета Господня, и старцем сынов Израилевых. 10 И заповеда им Моисей в той день, глаголя: по седми летех во время лета оставления, в праздник кущей? 11 Егда сходится весь Израиль явится пред Господем Богом твоим на месте, еже изберет Господь, читайте закон сей пред всем Израилем во уши их: 12 соберите люди, мужы и жены и дети, и пришелца, иже во градех ваших, да услышат и научатся бояться Господа Бога вашего, и послушают творити вся словеса закона сего: 13 и сынове их, иже не ведят, услышат и научатся бояться Господа Бога вашего во вся дни, елики поживут на земли, на нюже вы преходите Иордан тамо наследити ю. 14 И рече Господь к Моисею: се, приближишася дние смерти твоя: призови Иисуса, и станите пред дверми скинии свидения, и заповем ему и иде Моисей и Иисус ко скинии свидения, и счаста пред дверми скинии свидения. 15 И сниде Господь в столпе облачне, и ста у дверей скинии свидения: и ста столп облачный у дверей скинии свидения. 16 И рече Господь к Моисею: се, ты почиши со отцы твоими, и воставше людие сии соблюдают вслед богов чуждых земли, в нюже входят сии тамо, и оставят Мя, и разорят завет Мой,

егоже завещах им: 17 и разгневаюся яростию на ня в той день, и оставлю я, и отвращу лице Мое от них, и будут в снесь: и обрящут я зла многа и скорби, и рекут в день той: понеже несть Господа Бога в нас, постигнуша ны злая сия: 18 Аз же отвращением отвращу лице Мое от них в той день, злб ради всех яже сотвориша, яко обратишася к богом чуждим: 19 и ныне напишите словеса песни сея, и научите ей сыны Израилевы, и вложите ю во уста их, да будет Мне песнь сия во свидетелство в сынех Израилевых: 20 введу бо их в землю благу, еюже кляхся отцем их, дати им землю кипящую медом и млеко, и ядят, и насытившеся утолстеют, и обратятся к богом чуждим, и послужат им, и разгневают Мя, и разорят завет Мой, егоже завещах им: 21 и будет егда постигнут их многа зла и скорби, и противостанет песнь сия пред лице их свидетельствующи, яко не забвена будет от яст их и от уст семени их: Аз бо вем злобу их, елика творят днесь zde, прежде введения их в землю благу, еюже кляхся отцем их. 22 И написа Моисей песнь сию в той день и научи ей сыны Израилевы и заповеда Моисей Иисусу сыну Навину и рече ему: 23 мужайся и крепися: ты бо введеша сыны Израилевы в землю, еюже кляхся им Господь, и Той будет с тобою. 24 Егда же сконча Моисей пиша вся словеса закона сего в книгу даже до конца, 25 и заповеда левитом воздвижуцым ковчег завета Господня, глаголя: 26 возьмше книгу закона сего, положите ю от страны ковчега завета Господа Бога вашего, и будет тамо вам во свидетелство: 27 яко аз вем рвение твое и выю твою жестокою: еще бо мне живу сущу с вами днесь, преогорчающе бысте Господа, кольми паче по смерти моей? 28 Соберите ко мне племеноначалники вашя



и старцы ваша, и судии ваша и книговводители ваша, да возглаголю во уши их вся словеса сия и засвидетелствую им небом и землю: **29** вем бо, яко по скончании моем беззаконием собеззаконнуете и уклонитесь от пути, егоже (аз) заповедах вам, и срящут вас злая в последния дни, яко сотворите злое пред Господем Богом, прогневати Его в делех рук ваших. **30** И глагола Моисей во ушеса всего сонма Израилева словеса песни сея даже до конца:

**32** Вонми, небо, и возглаголю, и да слышит земля глаголы уст моих, **2** да чается яко дождь вещание мое, и да снидут яко роса глаголы мои, яко туча на трескот и яко иней на сено: **3** яко имя Господне призвах, дадите величие Богу нашему. **4** Бог, истинна дела Его, и вси путие Его суд: Бог верен, и несть неправды в Нем: праведен и преподобен Господь. **5** Согрешиша, не Того чада порочная: роде строптивый и развращенный, **6** сия ли Господеви воздаете, сии людие буии и не мудри? Не Сам ли сей Отец твой стяжа тя, и сотвори тя, и созда тя? **7** Помяните дни вечныя, разумеите лета рода родов: вопроси отца твоего, и возвестит тебе, старцы твоя, и рекут тебе. **8** Егда разделяюще Вышний языки, яко разсея сыны Адамовы, постави пределы языков по числу ангел Божиих, **9** и бысть часть Господня, людие Его Иаков, уже наследия Его Израиль: **10** удовли его в пустыни, в жажди зноя в безводне: обыде его и наказа его, и сохрани его яко зеницу ока: **11** яко орел покры гнездо свое, и на птенцы своя возжеле: простер криле свои и прият их, и подят их на раму своюю. **12** Господь един вождаше их, и не бе с ними бог чуждь: **13** возведе я на силу земли, насыти их жит селных: ссаша мед из камене и елей от

тверда камене, 14 масло кравие и млеко овчее с туком агнчим и овним сынов юнчих и козлих, с туком пшеничным, и кровь гроздову пияху вино. 15 И яде Иаков и насытится, и отвержеса возлюбленный: уты, утолсте, разшире: и остави Бога сотворшаго его, и отступи от Бога спаса своего. 16 Прогневаша Мя о чуждих, и в мерзостех своих преогорчиша Мя. 17 Пожроша бесовом, а не Богу, богом, ихже не ведеша: нови и секрати приидоша, ихже не ведеша отцы их. 18 Бога рождшаго тя оставил еси и забыл еси Бога питающаго тя. 19 И виде Господь, и возревнова, и раздражися за гнев сынов их и дочерей, 20 и рече: отвращу лице Мое от них и покажу, что будет им напоследок, яко род развращен есть, сынове, имже несть веры в них: 21 тии раздражиша Мя не от бозе, прогневаша Мя во идолех своих: и Аз раздражу их не о языке, от языке же неразумливе прогневаю их: 22 яко огонь возгорится от ярости Моея, разжжется до ада преисподняго, снесет землю и жита ея, попалит основания гор: (Sheol h7585) 23 соберу на них злая, и стрелы Моя скончаю в них: 24 тающе гладом и снедию птиц, и горб неисцелен: зубы зверий послю в на, с яростию пресмыкающихся по земли: 25 отвне обезчадит их мечь, и от храмов их страх: юноша с девою, ссущее с совершенным старцем. 26 Рех: разсею их, уставлю же от человек память их: 27 токмо за гнев врагов, да не долголетствуют, и да не налягут супостати, да не рекут: рука наша высока, и не Господь сотвори сия вся: 28 яко язык погубивый совет есть, и несть в них художества, не смыслиша разумети: 29 сия вся да примут во грядущее лето. 30 Како поженет един тысящы, и два двигнета тмы, аще не Бог отдаде их, и Господь предаде их? 31 Не суть

бо бози их, яко Бог наш: врази же наши неразумливи. 32  
От виноградов бо Содомских виноград их, и розга их от  
Гоморры: грозд их грозд желчи, грозд горести их: 33 ярость  
змиев вино их, и ярость аспидов неисцельна. 34 Не сия ли  
вся собрашася у Мене и запечатлешася в сокровищах Моих?  
35 В день отмщения воздам, во время егда соблазнится нога  
их: яко близ день погибели их, и предстоят готовая вам: 36  
яко судити имать Господь людем Своим, и о рабех Своих  
умолен будет: виде бо их разслабленны и истаявша во время  
и изнемогша. 37 И рече Господь: где суть бози их, на нихже  
уповаша, 38 иже тук жертв их ядысте, и пиясте вино треб  
их? Да воскреснут и помогут вам, и будут вам покровители.  
39 Видите, видите, яко Аз есмь, и несть Бог разве Мене: Аз  
убию и жити сотворю: поражу и Аз исцелю, и несть иже измет  
от руку Моею: 40 яко воздвигну на небо руку Мою, и кленуся  
десницею Моею, и реку: живу Аз во веки: 41 яко поострю  
якоже молнию мечь Мой, и приимет суд рука Моя, и воздам  
мечь врагом и ненавидящим Мя воздам: 42 упою стрелы  
Моя от крове, и мечь Мой снесет мяса от крове язвеных  
и пленения, от глав князей языческих. 43 Возвеселитесь,  
небеса, купно с Ним, и да поклонятся Ему вси Ангели Божи:  
возвеселитесь, языцы, с людьми Его, и да укрепятся ему вси  
сынове Божи: яко кровь сынов Своих отмщает и отмстит, и  
воздаст мечь врагом и ненавидящим Его воздаст: и очестит  
Господь землю людий Своих. 44 И написа Моисей песнь сию  
в той день, и научи ей сыны Израилевы: и вниде Моисей к  
людем и глагола вся словеса закона сего во уши людем, сам  
и Иисус Навин. 45 И сконча Моисей глаголя словеса сия вся  
всему Израилю, 46 и рече к ним: внемлите сердцем вашим

вся словеса сия, яже аз засвидетелствую вам днесь, яже да заповесте сыном вашим, хранити и творити вся словеса закона сего, 47 яко не тщетно слово сие вам, зане сия жизнь ваша, и ради слова сего долги дни будете на земли, на нюже вы преходите Иордан тамо наследити ю. 48 И рече Господь к Моисею в день сей, глаголя: 49 възди на гору Аварим, сия гора Навав, яже есть в земли Моавли прямо Иерихону, и виждь землю Ханааню, юже аз даю сыном Израилевым во обдержание: 50 и скончайся тамо на горе, на нюже восходиши, и приложися к людем твоим, якоже умре Аарон брат твой на горе Ор и приложися к людем своим: 51 понеже не покористеся словеси Моему в сынех Израилевых у воды Пререкания Кадис в пустыни Син, понеже не освятите Мене в сынех Израилевых: 52 яко прямо узриши землю, и тамо не внидеши, юже даю сыном Израилевым.

**33** И сие благословение, имже благослови Моисей человек Божий сыны Израилевы прежде скончания своего, 2 и рече: Господь от Синаи прииде, и явился от Сиира нам, и приспе от горы Фарани, и прииде со тмами святых, одесную Его ангели с ним, 3 и пощаде люди Своя: и вси освященнии под руками Твоими, и сии под Тобою суть. 4 И прия от словес Его закон, егоже заповеда нам Моисей, наследие сонму Иаковлю: 5 и будет в Возлюбленном князь, собравшымся князем людским купно с племены Израилевыми. 6 Да живет Рувим, и да не умрет, и Симеон да будет мног числом. 7 И сие Иуде: услыши, Господи, глас Иудин и в люди его вниди: руке его поборют по нем, и помощник на враги его да будеши. 8 И Левию рече: дадите Левию явленная Его, и истину Его мужу преподобну, егоже искусиша Искушением, укориша

его у воды Пререкания: **9** глаголяй отцу своему и матери своей: не видех тебе: и братии своя не позна, и сынов своих не уведи: сохрани словеса Твоя и завет Твой соблюде: **10** явят оправдания Твоя Иакову и закон Твой Израилю: возложат фимиам во гневе Твоем всегда на олтарь Твой: **11** благослови, Господи, крепость его и дела руку его приими: порази чресла вставших на него врагов его, и ненавидящих его да не востанут. **12** И Вениамину рече: возлюбленный Господем уповаяй вселится (в Нем), и Бог осеняет его во вся дни, и посреде рамен Его почи. **13** И Иосифови рече: от благословения Господня земля его, от красот небесных и росы, и от бездн источников низу, **14** и во время плодов солнечных обращений, и от схождения месячных, **15** и от верха гор начала, и от верха холмов вечных, **16** и по времени земли исполнения: и приятная Явившемуся в купине, да приидут на главу Иосифу, и на версе прославивыйся в братии. **17** Первородный юнца доброта его, рози единорога рози его: ими языки изободет вкупе даже до края земли: сия тмы Ефремовы, и сия тысящи Манассиины. **18** И Завулону рече: возвеселися, Завулоне, во исходе твоём, и Иссахаре в селениях твоих: **19** языки потребят: и призовете тамо, и пожрете тамо жертву правды: яко богатство морское воздоит тя, и купли от язык при мори живущих. **20** И Гаду рече: благословен расширяяй Гада: яко лев почи, сокрушивый мышцу и князя: **21** и виде начатки своя, яко тамо разделися земля, князей собранных вкупе с начальники людскими: правду Господь сотвори и суд Свой со Израилем. **22** И Дану рече: Дан, скимен львов, и изскочит от Васана. **23** И Неффалиму рече: Неффалиму насыщение приятных, и да

насытится благословением от Господа: море и юг наследит.  
24 И Асиру рече: благословен от чад Асир, и будет приятен  
братии своей: омочит в елей ногу свою: 25 железо и медь  
сапог его будет, и аки дни твоя крепость твоя. 26 Несть якоже  
Бог Возлюбленного: восходяй на небо помощник твой, и  
великолепый в тверди: 27 и покрывает тя Божие начало, и  
под крепостию мышцей вечных: и отженет от лица твоего  
врага, глаголя: да погибнеши: 28 и вселится Израиль уповая  
един на земли Иаковли в вине и пшенице: и небо ему  
облачно росую. 29 Блажен еси, Израилью: кто подобен тебе,  
людие спасаемии от Господа? Защитит помощник твой, и  
мечь хвала твоя: и солжут тебе врази твои, и ты на выю их  
наступиши.

**34** И взыде Моисей от аравофа Моавля на гору Навав,  
на верх Фазга, яже есть прямо Иерихону: и показа ему  
Господь всю землю Галаадску даже до Дана, 2 и всю землю  
Неффалимлю, и всю землю Ефремову и Манассиину, и всю  
землю Иудину даже до моря последняго, 3 и пустыню и  
окрестная (села) Иерихона, град Фиников даже до Сигора, 4  
и рече Господь к Моисею: сия земля, еюже кляхся Аврааму и  
Исааку и Иакову, глаголя: семени вашему дам ю: и показав  
ю очесем твоим, и тамо не внидеши. 5 И скончася тамо  
Моисей раб Господень в земли Моавли словом Господним.  
6 И погребоша его в земли Моавли близ дому Фогорова.  
И не уведа никтоже погребения его даже до дне сего.  
7 Моисею же бе сто и двадесять лет, егда скончася: не  
отемнесте очи его, ни истлеста устне его. 8 И плакашася  
сынове Израилевы Моисеа во Аравофе Моавли у Иордана  
близ Иерихона тридесять дний. И скончашася дние плача

сетования о Моисей. **9** И Иисус сын Навин наполнился духа  
разума: возложи бо Моисей руке свои на него. И послушаша  
его сынове Израилевы, и сотвориша якоже заповеда Господь  
Моисею. **10** И не воста ктому пророк во Израили якоже  
Моисей, егоже позна Господь лицом к лицу, **11** во всех  
знамениих и чудесех, егоже посла Господь сотворити я в  
земли Египетстей фараону и рабом его и всей земли его, **12**  
дивная великая, и руку крепкую (и мышцу высокую), яже  
сотвори Моисей пред всем Израилем.

# Книга Иисуса Навина

**1** И бысть по скончании Моисеа раба Господня, и рече Господь Иисусу сыну Навину, служителю Моисеову, глаголя: **2** Моисей раб Мой скончася: ныне убо востав преиди Иордан ты и вси людие сии в землю, юже Аз даю им: **3** всякое место, по немуже прейдете стопою ног ваших, вам дам е, якоже глаголах Моисею: **4** пустыню и Антиливан сей даже до реки великия реки Евфрата, всю землю Ефеоню, и даже до моря последнего: от запада солнца будут пределы ваши: **5** не супротивится человек пред вами во вся дни живота твоего, и якоже бех с Моисеом, тако буду и с тобою: и не оставлю тебе, ниже презрю тя: **6** крепися и мужайся: ты бо разделиши людем сим землю, еюже кляхся отцем вашим дати им: **7** крепися убо, и мужайся зело, хранити и творити, якоже тебе заповеда Моисей раб Мой, и не уклонися от них ни на десно, ни на лево, да смыслиши во всех, яже твориши: **8** и да не отступит книга закона сего от уст твоих, и да поучаешися в ней день и ночь, да уразумееш творити вся писанная: тогда благоуспееши и исправиши пути твоя, и тогда уразумееш: **9** се, заповедаю тебе: крепися и мужайся, ни ужасайся, ниже убойся: яко с тобою Господь Бог твой во всех, аможе аще пойдеш. **10** И заповеда Иисус книгочиям людским, глаголя: **11** внидите посреде полка людей и заповедайте людем, глаголюще: уготовайте брашно, яко еще три дни, и вы прейдете Иордан сей, вшедше прияти землю, юже Господь Бог отец ваших дает вам в причастие. **12** И Рувиму и Гаду и полуплемени Манассиину рече Иисус: **13** помяните слово, еже заповеда вам Моисей раб Господень, глаголя: Господь Бог ваш упокои вас и даде вам землю сию: **14** жены



ваши и дети ваши и скоти ваши да живут на земли, юже даде вам Моисей у Иордана: вы же прейдете вооружени пред братиею вашею, всяк крепок, и споборствуете им, **15** дондеже упокоит Господь Бог ваш братию вашу, якоже и вас, и наследят и сии землю, юже Господь Бог ваш дает им: и отидете кийждо в наследие свое, и наследите е, еже даде вам Моисей об Ону страну Иордана от востоков солнца. **16** И отвещавше Иисусу, реша: вся, елика заповеси нам, сотворим, и во всякое место, аможе послеси нас, пойдём: **17** по всем, елика слушахом Моисеа, тебе послушаем: токмо да будет Господь Бог наш с тобою, якоже бе с Моисеем: **18** человек же, иже аще не покорится тебе и иже не послушает словес твоих, якоже заповеси ему, да умрет: точию крепися и мужайся.

**2** И посла Иисус сын Навин из Саттина два юношы соглядати втай, глаголя: взыдите и видите землю и Иерихон. И шедша два юношы внидоста во Иерихон и внидоста в дом жены блудницы, ейже имя Раав: и витаста тамо. **2** И поведаша царю Иерихонскому, глаголюще: се, мужие внидоша семо (в сию ночь) от сынов Израилевых соглядати землю. **3** И посла царь Иерихонский и рече к Рааве, глаголя: изведи мужы вшедшыя в дом твой нощию: соглядати бо землю приидоша. **4** И поемши жена два мужа, сокры их: и рече им, глаголющи: приидоша ко мне мужие, но не вем откуда быша: **5** егда же врата затворяху в сумраки, и мужие изыдоша: не вем камо поидоша: пожените скоро вслед их, аще постигнете их. **6** Она же возведе я на храмину и сокры я в паздере льняне собранем у нея на храмине. **7** И мужие гнаша вслед их путем ко Иордану к преходом, и врата затворены быша.

8 И бысть егда изыдоша женуции вслед их, и сии прежде неже уснути им, и она възыде к ним на храмину и рече к ним: 9 вем, яко предаде Господь землю (сию) вам: нападе бо страх ваш на ны, и ужасошася вси обитающии на земли от лица вашего: 10 слышахом бо, яко изсуши Господь Бог море Чермное пред лицом вашим, егда исхождасте из Египта, и елика сотвористе двоим царем Аморрейским, иже быша об ону страну Иордана, Сиону и Огу, иже потребисте: 11 и слышавше мы ужасохомся в сердцы нашем, и не ста ктому дух ни во единем от нас от лица вашего: яко Господь Бог ваш, Бог на небеси горе и на земли доле: 12 и ныне кленитесь мне Господем Богом (вашим), яко аз творю милость вам, да сотворите и вы милость в дому отца моего, и дадите ми знамение истинно: 13 и оживите дом отца моего, и мать мою, и братию мою, и сестры моя, и вся, елика суть им, и измите души наша от смерти. 14 И рекоша ей мужие: душа наша вместо вас на смерть, аще ныне не объявиши нас. Она же рече: и будет егда предаст Господь вам град (сей), сотворите мне милость и истину. 15 И свеси их на верве окном: яко дом ея при стене, и при стене сия живяше: 16 и рече им: отидите в гору, да не срящут вас гонящии, и скрыйтеся тамо три дни, дондеже возвратятся гонящии вслед вас: и по сих отидете в путь ваш. 17 И реша к ней мужие: неповинни есмы клятве сей твоей, еюже заклала еси нас: 18 се, мы входим в часть града, и поставиши знамение, вервь червлени, сию да обяжеш у окна, иже спустила еси нас: отца же твоего и мать твою, и братию твою и весь дом отца твоего да собереш к себе в дом твой: 19 и будет всяк, иже аще изыдет из дверей дому твоего вон, сам себе повинен

будет, мы же неповинни (будем) клятве твоей сей: и елицы  
аще с тобою будут в дому твоём, мы будем повинни, аще  
рука прикоснется их: **20** аще же кто нас обидит, или открыет  
словеса наша сия, будем неповинни клятве твоей сей, еюже  
закляла еси нас. **21** И рече им: по словеси вашему тако да  
будет. И отпусти их, и отидоша: и привяза вервь червлену у  
окна. **22** И отидоша, и проидоша в гору, и пребыша тамо три  
дни, дондеже возвратишася гнавшии. И искаша гонящии по  
всем путем, и не обретоша. **23** И возвратистася два юношы  
и снисоста с горы: и преидоста (Иордан) ко Иисусу сыну  
Навину, и поведаста ему вся случившаяся има: **24** и реста  
ко Иисусу: яко предаде Господь Бог наш в руце наши всю  
землю, и убояшася вси живущии на земли той от нас.

**3** И воста заутра Иисус, и воздвигошася из Саттина, и  
приидоша до Иордана той и вси сынове Израилевы, и  
сташа тамо прежде неже прейти. **2** И бысть по триех днех,  
проидоша книгочия чрез полк, **3** и заповедаша людем,  
глаголюще: егда узрите кивот завета Господа Бога нашего, и  
жерцы наша, и левиты воздвизающыя его, да воздвигнетесь  
и вы от мест ваших и пойдете вслед его: **4** но подалее  
да будет между вами и оным, елико две тысящы лакот  
станете: не приближитесь к нему, да увесте путь, по немуже  
пойдете: не ходисте бо путем тем ни вчера, ни третяго  
дне. **5** И рече Иисус к людем: очиститесь наутрие, яко  
заутра сотворит в вас Господь чудная. **6** И рече Иисус к  
жерцем: воздвигните кивот завета Господня и предидите  
пред людьми. И взяша жерцы кивот завета Господня и  
идоша пред людьми. **7** И рече Господь ко Иисусу: в сей день  
начинаю возвышати тя пред всеми сынами Израилевыми, да

уведят, якоже бех с Моисеом, тако буду и с тобою: **8** и ныне заповеждь жерцем воздвигающим кивот завета, глаголя: егда внидете на часть воды Иордана, и во Иордане станете. **9** И рече Иисус сыном Израилевым: приступите семо, и слышите слово Господа Бога вашего: **10** в сих увесте, яко Господь живяй в вас и потребляяй потребит от лица вашего Хананеа и Хеттеа, и Ферезеа и Евеа, и Гергесеа и Аморреа и Иевусеа: **11** се, кивот завета Господа всея земли преходит Иордан: **12** изберите себе дванадесять мужей от сынов Израилевых, одинаго от коегождо племени, **13** и будет егда починут нози жерцев воздвигающих кивот завета Господа всея земли в воде Иордана, вода Иорданова оскудеет, вода же низтекущая станет. **14** И бысть егда воздвигнушася людие от куц своих прейти Иордан, жерцы же воздвигоша кивот завета Господня пред людьми: **15** егда же внидоша жерцы воздвигуще кивот завета Господня во Иордан, и нози жерцев воздвигающих кивот завета Господня омочишася в части воды Иордана, Иордан же наполняшеся во вся краи своя, якоже во дни жатвы пшеницы: **16** и сташа воды текущия свыше, ста огустение едино отлучившееся далече зело зело от Адами града даже до страны Кариафиарима: низтекущая же низтече в море Аравско, в море Сланое, дондеже до конца оскуде. **17** И людие стояху прямо Иерихону. И сташа жерцы воздвигающии кивот завета Господня на сусе посреде Иордана: и вси сынове Израилевы прехождяху по суху, дондеже скончаша вси людие преходяще Иордан.

**4** И егда скончаша вси людие преходяще Иордан, и рече Господь к Иисусу, глаголя: **2** поими дванадесять мужей от людий, мужа одинаго от коегождо племени, **3** повели им,

глаголя: возьмите от среды Иордана, идеже стояша нози жречестии, готовых дванадесять каменей, и изнесше я с собою, положите в полце вашем, идеже станете тамо в ноци.

4 И призвав Иисус дванадесять мужей славных от сынов Израилевых, единого от коегождо племени, рече им: 5 идите предо мною пред лицом Господним в средину Иордана: и взем оттуду кийждо камень един да возложит на рамена своя, по числу племен (сынов) Израилевых: 6 да будут вам сии в знамение посреде вас лежаще всегда, да егда вопросит тебе утро сын твой, глаголя: что суть камене сие вам? 7 И ты возвестиши сыну твоему, глаголя: яко оскуде Иордан река от лица кивота завета Господа всея земли, егда прехождаше его, и изсяче вода Иорданова: и будут вам камене сие в память сынов Израилевых даже до века. 8 И сотвориша тако сынове Израилевы, якоже заповеда Господь Иисусу: и взявше дванадесять каменей от среды Иордана, якоже заповеда Господь Иисусу в скончании прехождения сынов Израилевых, и принесоша их с собою в полк, и положиша их тамо. 9 Постави же Иисус и другия дванадесять каменей в самом Иордане на месте, идеже стояху нози жерцев воздвигающих кивот завета Господня, и суть тамо даже до сего дне. 10 Стояху же жерцы воздвигающии кивот завета Господня во Иордане, дондеже сконча Иисус вся, елика заповеда Господь Иисусу поведати людем, по всем, елика заповеда Моисей Иисусу: и потщашася людие, и преидоша. 11 И бысть егда скончаша вси людие преходити (Иордан), преиде и кивот завета Господня, и камене пред ними. 12 И преидоша сынове Рувимли и сынове Гадовы и пол племени Манассиина устроены пред сынми

Израилевы, якоже заоведа им Моисей: **13** четыредесять тысяч вооружени на рать преидоша пред Господем на брань ко граду Иерихону. **14** В той день возвеличи Господь Иисуса пред всем родом Израилевым: и бояхуся его, якоже бояхуся Моисеа, елико время поживе. **15** И рече Господь ко Иисусу, глаголя: **16** заовеждь жерцем, воздвигающим кивот завета свидения, изступити из Иордана. **17** И заоведа Иисус жерцем, глаголя: изыдите из Иордана. **18** И бысть егда изыдоша жерцы воздвигающии кивот завета Господня от среды Иордана, и поставиша ноги на сусе, и устремися вода Иорданова на место и поиде якоже вчера и третияго дне по всему краю. **19** И людие взыдоша от Иордана в десятый день перваго месяца: и ополчишася сынове Израилевы в Галгалех на стране, яже на восток солнца от Иерихона. **20** И дванадесять камня сия, яже взя от Иордана, постави Иисус в Галгалех, и рече к сыном Израилевым, глаголя: **21** егда вопросят вас сынове ваши, глаголюще: что суть камень сие? **22** Возвестите сыном вашим: яко по суху преиде Израиль Иордан сей, **23** изсушившу Господу Богу вашему воду Иорданю пред ними, дондеже преидоша, якоже сотвори Господь Бог ваш Чермному морю, еже изсуши Господь Бог ваш пред вами, дондеже преидохом: **24** да уведят вси языцы земнии, яко рука Господня крепка есть, и вы да чтете Господа Бога вашего во всякое время.

**5** И бысть егда услышаша царие Аморрейстии, иже бяху об ону страну Иордана, и царие Финический, иже бяху близ моря, яко изсуши Господь Бог Иордан реку пред сыны Израилевыми, вегда преходити им, и истаяша мысли их, и ужасошася, и не бяше в них смышления ни единого от

лица сынов Израилевых. 2 В сие же время рече Господь Иисусу: сотвори себе ножи каменны от камене остраго, и сед обрежи сыны Израилевы второе. 3 И сотвори Иисус себе ножи каменны остры и обреза сыны Израилевы на месте нареченном Холм обрезания. 4 И тако обреза Иисус сыны Израилевы: елицы тогда родишася на пути, и елицы тогда не обрезани быша от изшедших из Египта, всех сих обреза Иисус: вси людие изшедшии из Египта мужеска полу, вси мужие ратнии измоша в пустыни на пути, внегда изыдоша из Египта: 5 яко обрезани быша вси людие изшедшии, вси же людие, иже родишася в пустыни на пути, егда изыдоша из Египта, не обрезани быша: 6 четыредесять бо и два лета хождаше Израиль в пустыни Мавдаритиде: сего ради не обрезани быша мнози от тех воинов изшедших из земли Египетския, не послушавшии заповедий Господних, имже и определи Господь не видети земли, еюже клятся Господь отцем их дати нам землю кипящую медом и млеко: 7 вместо же сих постави сыны их, ихже обреза Иисус, яко скончаныя плоти бяху им, яко родишася на пути не обрезани: 8 обрезавшеся же покой имяху тамо сидяще в полце, дондеже исцелишася. 9 И рече Господь Иисусу: в днешний день отях поношение Египетско от вас. И нарече имя месту тому Галгала, даже до сего дне. 10 И ополчишася сынове Израилевы в Галгалех и сотвориша Пасху в четвертыйнадесять день месяца от вечера на западе на поли Иерихонстем, 11 и ядоша от пшеницы земли онаю опресноки и новая: 12 в той день преста манна, повнегда ядоша от пшеницы земли, и ктому не бысть сыном Израилевым манны: но ядоша от плодов

земли Финическия в лето оное. 13 И бысть егда бяше Иисус у Иерихона, и воззрев очима своима, виде человека стояща пред ним, и мечь его обнажен в руце его. И приступив Иисус, рече ему: наш ли еси, или от сопостат наших? 14 Он же рече ему: аз архистратиг силы Господни, ныне приидох (семо). И Иисус паде лицом своим на землю и поклонися ему, и рече: господи, что повелеваеши рабу твоему? 15 И рече архистратиг Господень ко Иисусу: иззуй сапог с ногу твою: место бо, на немже ты стоиши, свято есть. И сотвори Иисус тако.

**6** Иерихон же заключен и огражден бысть от лица сынов Израилевых: и никтоже из него исхождаше, ниже вхождаше. 2 И рече Господь ко Иисусу: се, Аз предаю тебе в руце Иерихон и царя его, и сущыя в нем, сильны крепостию: 3 и обходите град окрест вси мужие крепцыи единою (на день), тако сотворите шесть дний: 4 и седмь жерцы да возмут седмь труб рожаных пред кивотом: и в седмый день ойдите град седмижды, и жерцы да вострубят в трубы рожаны: 5 и будет егда вострубите трубою рожаною, внегда услышати вам глас трубы, да воскликнут вси людие: и воскликнувшим им, падут сами стены града во основании своем, и внидут вси людие устремившися кийждо прямо себе во град. 6 И вниде Иисус сын Навин к жерцем сынов Израилевых и рече им глаголя: возьмите кивот завета Господня, и седмь жерцы да возмут седмь труб рожаных пред лицом кивота Господня. 7 И рече им глаголя: повелите людем ойти и окружити град, и воини да предидут вооружени пред кивотом Господним. 8 И бысть егда рече Иисус к людем, и седмь жерцы имуще седмь труб священных да предидут такожде пред Господем,



и да вострубят доброгласно: и кивот завета Господня вслед по них да идет: 9 воины же да предидут наперед, и жерцы трубяще в трубы, и последующии создади кивота завета Господня бяху идуще и трубяще трубами. 10 Людем же заповеда Иисус, глаголя: не вопите, ниже да слышит кто гласа вашего, ниже да изыдет из уст ваших слово до дне, в оные повелю вам сам воскликнути, и тогда воскликните. 11 И обшед кивот завета Божия окрест града (единою), абие иде в полк, и ста тамо. 12 Во второй же день воста Иисус заутра, и воздвигоша жерцы кивот завета Господня. 13 И жерцы семь носящии семь труб предидяху пред кивотом Господним и трубиша трубами, и воины вооружени идяху, и прочии людие вслед кивота завета Господня идуще, и жерцы вострубиша трубами рожаными. 14 И обыдоша град в день второй единою, и поидоша паки в полк: сиче творяху шесть дней. 15 И бысть в седмый день, воста в востание утреннее, и обыдоша град в той день седмижды. 16 И бысть во обхождении седмем вострубиша жерцы трубами, и рече Иисус к сыном Израилевым: воскликните, предаде бо Господь вам град: 17 и будет град сей проклят, и вся, елика суть в нем, Господу сил: токмо Раав блудницу снабдите ю, и вся, елика суть в дому ея, яко сокры прелагатаи, ихже посылахом: 18 но вы соблюдайтеся от клятвы, да не когда помысливше вы возмете от клятвы, и сотворите полк сынов Израилевых клятву, и потребите ны: 19 злато же все и серебро, и медь и железо свято да будет Господу: в сокровище Господне да внесется. 20 И вострубиша жерцы трубами: егда же услышаша людие глас трубный, воскликнуша вси купно людие гласом великим и сильным: и падоша вся стены

града окрест, и внидоша вси людие во град, кийждо противу себе, и прияша град. 21 И прокля и Иисус, и елика быша во граде, от мужеска полу и до женска, от юноши и до старца, и от телца до овцы и до осляте, все под мечь. 22 И двоим юношам соглядавшим землю рече Иисус: внидите в дом жены блудницы, и изведите ю оттуду, и вся, елика суть ея, якоже клястесе ей. 23 И внидоста два юношы соглядавшии град в дом жены, и изведосте Раав блудницу, и отца ея и мать ея, и братию ея и все сродство ея, и вся елика быша ей, изведоста и постависта я вне полка Израилева. 24 И град сожгоша огнем со всем, еже бе в нем, кроме злата и сребра, меди и железа, яже отдаша в дом Господень внести Господеву. 25 И Раав блудницу и весь дом ея отеческий остави живы Иисус, и обитати сотвори во Израили даже до дне сего, понеже сокры прелагатаи, ихже посла Иисус соглядати Иерихона. 26 И прокля Иисус в той день, глаголя: проклят человек пред Господем, иже поставит и созиждет град сей Иерихон: на первенце своем оснует его, и на меньшем своем поставит врата его. И сице сотвори Азан, иже от Вефиля: на Авироне первенце своем основа и, и на меньшем спасенем постави врата его. 27 И бяше Господь со Иисусом, и бе имя его по всей земли.

**7** И прегреша сынове Израилевы прегрешением великим, и взяша от клятвы: взя бо Ахар сын Хармии, сына Замври, сына Зары, от племени Иудина, от клятвы. И разгневася Господь яростию на сыны Израилевы. 2 И посла Иисус мужы от Иерихона в Гай, иже есть противу Вифавн на восток Вефиля, и рече им, глаголя: шедше соглядайте землю. И идоша мужие и соглядаша Гай. 3 И возвратишася ко

Иисусу и рекоша ему: да не идути вси людие, но яко две тысящы или три тысящы мужей да идути и да воюют Гай: да не ведеша тамо всех людий, мало бо есть их (тамо). 4 И идоша от людий тамо, аки три тысящы мужей, и побегоша от лица мужей Гайских: 5 и убиша от них мужие Гайстии яко тридесять и шесть мужей, и отгнаша их от врат, дондеже сокрушиша их на стремнине: и ужасеся сердце людий, и бысть яко вода. 6 И растерза Иисус ризы своя, и паде на земли на лице свое пред Господем даже до вечера, сам и старцы Израилевы: и посыпаша персть на главы своя. 7 И рече Иисус: молюся, Господи Господи, вскую преведе раб Твой люди сия чрез Иордан предати их Аморреом на погубление? От, да быхом пребыли и вселилися у Иордана: 8 Господи, что реку? Понеже отврати Израиль выю свою пред враги своими: 9 и услышав Хананей и вси живущии на земли обыдут нас и потребят нас от земли: и что сотвориши имени Твоему великому? 10 И рече Господь ко Иисусу: востани, вскую ты пал еси на лице твое? 11 Согрешиша людие и преступиша завет Мой, егоже заветах к ним, и украдше от клятвы, скрыша в сосудех своих: 12 сего ради не могут сынове Израилевы стати пред лицом врагов своих, но хребет обратят пред враги своими, яко клятвою сташася: не приложу ксему быти с вами, аще не измене клятвы от себе самих: 13 востав очисти люди и рцы: очиститесь на утро: яко сия глаголет Господь Бог Израилев: клятва есть в вас, не возможете стати пред враги вашими, дондеже измене от себе самих клятву: 14 и соберитесь вси заутра по племеном (вашым), и будет племя, еже покажет Господь, да приведете по сонмом: и сонм, егоже покажет Господь,

да приведете по домо: и дом, егоже покажет Господь, да приведете по мужем: 15 и иже обличится, да сожжется огнем, сам и вся елика суть его, яко преступи завет Господень и сотвори беззаконие во Израили. 16 И воста Иисус заутра, и приведе людий по племеном: и обличися племя Иудино. 17 И приведесе по сонмом, и обличися сонм Зараин: и приведесе сонм Зараин по мужем, и обличися дом Замвриин. 18 И приведесе дом его по мужем, и обличися Ахар сын Хармиин сына Замвриина, сына Зараня, от племени Иудина. 19 И рече Иисус Ахару: сыне мой, даждь славу днесь Господу Богу Израилеву, и даждь Ему исповедание, и исповеждь ми, что сотворил еси, и не утай от мене. 20 И отвеща Ахар Иисусу и рече: поистинне аз согреших пред Господем Богом Израилевым: сице и сице сотворих: 21 видех в плене ризу красну и добру и двести дидрахм сребра, и сосуд един злат, пятьдесят дидрахм вес его: и помыслив на ня взях: и се, сия сокровенна суть в земли в кущи моей, и сребро сокровенно под ними. 22 И посла Иисус послы, и идоша в кущу в полк: и сия бяху сокровенна в кущи его, и сребро под ними, 23 и изнесоша я из кущи, и принесоша ко Иисусу и к старцем Израилевым, и положиша я пред Господем. 24 И взя Иисус Ахара сына Зараня, и сребро и ризу и сосуд златый, и возведе его в дебрь Ахор, и сыны его и дщери его, и телцы его и ослята его и вся овцы его, и кущу его и вся имения его, и весь Израиль по нем: и возведе я (со всем) во емек Ахор. 25 И рече Иисус Ахару: почто потребил еси нас? Да потребит тя Господь, якоже и днесь. И побиша его камением весь Израиль, и сожгоша вся огнем, и наметаша их камением, 26 и наметаша на нем громаду камня велику. И преста

Господь от ярости гнева Своего. Сего ради прозвася имя месту тому емек Ахор даже до дне сего.

**8** И рече Господь ко Иисусу: не бойся, ниже ужасайся: поими с собою вся мужы воинския, и востав възди в Гай: се, предах в руце твои царя Гайска и землю его, и люди его и град его: **2** и да сотвориши Гаю и царю его, якоже сотворил еси Иерихону и царю его: и плен его и скоты его да плениши себе: устрой же себе подсаду граду за собою. **3** И воста Иисус и вси мужие воинстии, да внидут в Гай: и избра Иисус тридесять тысящ мужей воинских сильных крепостию и посла их нощию, **4** и заповеда им, глаголя: вы скрыйтесе за градом: не далече будите от града зело, и будите вси готови: **5** аз же и вси людие иже со мною приступим ко граду: и будет егда изыдут живуции в Гаи в сретение нам, якоже и прежде, и побегнем от лица их: **6** и егда изыдут вслед нас, отторгнем их от града: и рекут: бежат сии от лица нашего, якоже и прежде: **7** вы же востанете от подсады, и пойдете во град, и предаст его Господь Бог наш в руце ваши: **8** и будет егда возьмете град, запалите его огнем, по словеси сему сотворите: се, заповедаю вам. **9** И посла их Иисус, и идоша в подсаду: и седоша между Вефилем и между Гаием, от моря Гаиа. **10** И востав Иисус заутра, согляда люди: и възде сам и старцы Израилтестии пред людьми в Гай. **11** И вси людие воинстии с ним въздоша, и идуще приидоша сопотив града от востоков: и подсады града от моря. **12** И ополчишася от севера Гаиа, и (бысть) дебрь между ими и между Гаием. И взя яко пять тысящ мужей, и положи их на подсаду между Вефилем и Гаием от запада Гаиа. **13** И поставиша людие весь полк от севера града, а прочая его от

моря града. И поиде Иисус в ночь ону посреде дебри. 14 И бысть егда увиде царь Гайский, потщася, и воста рано и изыде в сретение им прямо на брань, сам и вси людие его с ним во время, пред лицом подсады: он же не ведяше, яко подсада ему есть за градом (его). 15 И увиде, и отиде Иисус и весь люд от лица их, и побеже путем пустыни, 16 и укрепися весь люд гнати вслед их, и погнаша вслед сынов Израилевых, и отступиша от града. 17 (И) не остася никтоже в Гаи и Вефили, иже не погна вслед Израиля: и оставиша град отверст, и гнаша вслед Израиля. 18 И рече Господь ко Иисусу: простри руку твою с копием, еже в руце твоей, на град, зане в руку твою предах его: и подсады востанут вскоре от места своего. И простре Иисус руку свою и с копием на град. 19 И подсады восташа скоро от места своего: и изыдоша, егда простре руку, и внидоша во град, и взяша его: и потщавшеся запалиша град огнем. 20 И озревшеся обитатели Гайстии вспять себе, узреша дым восходящъ от града до небесе, и ктому не имеша камо побегнути, семо или овамо: людие же бегущии в пустыню обратишася на гонящих. 21 Иисус же и весь Израиль увидеша, яко взяша подсады град, и яко восходит дым градный до небесе: и обратившеся избиша мужей Гайских. 22 И сии изыдоша из града противу им, и быша посреде полка Израилева, сии отсюду и сии отнюду: и избиша их, дондеже не остася ни един от них цел, ни убежа. 23 И царя Гайска яша жива, и приведоша его ко Иисусу. 24 И бысть егда престаша сынове Израилевы секуще всех сущих в Гаи и сущих на полях и на горе исхода, идеже гониша их, и падоша вси острием меча на ней до конца: и обратися Иисус в Гай и посече их мечем. 25 И быша вси

падшии в той день от мужеска полу и до женска дванадесять тысящ, вси живуции в Гаи. 26 Иисус же не обрати руки своея, юже простре с копием, дондеже прокля всех обитающих в Гаи. 27 Кроме скотов (их) и имения, яже во граде онем, вся плениша себе сынове Израилевы по повелению Господню, якоже повеле Господь Иисусу. 28 И запали град Иисус огнем: землю необитаему во век положи его даже до сего дне. 29 И царя Гайска повеси на древе сугубем: и бяше на древе до вечера: и заходящу солнцу повеле Иисус, и сняша тело его с древа, и повергоша и в ров пред враты града: и насыпа над ним громаду велику камня даже до сего дне. 30 Тогда созда Иисус олтарь Господу Богу Израилеву на горе Гевал, 31 якоже заповеда Моисей раб Господень сыном Израилевым, и якоже написася в законе Моисеове, олтарь от камней всецелых, на нихже не возложися железо: и вознесе тамо всесожжения Господу и жертву спасения. 32 И написа Иисус на камениих второй закон, закон Моисеов, егоже написа пред сыны Израилевыми. 33 И весь Израиль, и старцы их и судии их и книгочия их предходяху сюду и сюду пред кивотом, и жерцы и левити воздвизаша кивот завета Господня, пришелец же и туземец: иже быша половина их близ горы Гаризин, и половина их близ горы Гевал, якоже заповеда Моисей раб Господень благословити людей Израилевых в первых. 34 И по сих тако прочте Иисус вся словеса закона сего, благословения и клятвы, по всему написанному в законе Моисеове. 35 Не бяше словесе от всех, яже заповеда Моисей Иисусу, егоже не прочте Иисус во уши всего сонма сынов Израилевых, мужем и женам, и детем и пришелцем приходящим ко Израилю.

**9** Егда же услышаша вси царие Аморрейстии, иже об ону страну Иордана, иже в горней и иже в равней, и иже во всем примории моря великаго и иже при Антиливане, и Хеттеи и Аморреи, и Гергесеи и Хананеи, и Ферезеи и Евеи и Иевусеи, **2** снидошася вкупе сещися со Иисусом и со Израилем единомысленно. **3** И живуцции в холме в Гаваоне слышаша вся, елика сотвори Господь Иерихону и Гаю, **4** и сотвориша и сии с лукавством, и шедше уготоваша брашна и уготовашася: и взявше вретища ветха на ослы своя, и мехи вина ветхи и разседшыися завязаны: **5** и сапоги ветхи и заплачены на ногу их, и ризы обветшаны на них, и хлебы брашна их беша пресохли и сплеснели и сдроблени. **6** И приидоша ко Иисусу в полк Израилев в Галгалы, и рекоша ко Иисусу и всему Израилю: от земли дальния приидохом, и ныне завещайте нам завет. **7** И рекоша сынове Израилевы к Хоррею: виждь, не посреде ли нас живеша, и како тебе завещаю завет? **8** И рекоша ко Иисусу: раби есмы твои. И рече к ним Иисус: откуда есте? И откуда приидосте? **9** И рекоша к нему: от дальния земли зело приидохом раби твои во имя Господа Бога твоего: слышахом бо имя Его и вся, елика сотвори во Египте, **10** и вся, елика сотвори двоим царем Аморрейским, иже быша об ону страну Иордана, Сиону царю Есевонску и Огу царю Васанску, иже живяше во Астарофе и во Едраине. **11** И слышавше рекоша к нам старцы наши и вси живуцции на земли нашей, глаголюще: возьмите себе брашно на путь и идите противу им, и рцйте к ним: раби есмы ваши, и ныне завещайте нам завет: **12** сии хлебы наши, теплыя на путь взяхом их от домов наших, в оньже день изыдохом приити к вам: ныне же пресоша



и быша содроблени: **13** и сии меси вина, ихже налияхом новы, и сии разседошася: и ризы наша сия и обувища наша обетшаша от долгаго пути зело. **14** И взяша князи брашно их, а Господа не вопрошиша. **15** И сотвори Иисус с ними мир, и устави к ним завет, еже снабдети их: и кляшася им князи сонма. **16** И бысть по триех днех по завещании к ним завета, услышаша, яко близ их суть и яко посреде их живут. **17** И восташа сынове Израилевы и внидоша во грады их в третий день: гради же их (бяху) Гаваон и Кефира, и Вирот и град Иарим. **18** И не сотвориша с ними рати (Иисус и) сынове Израилевы, яко кляшася им вси князи сонма Господем Богом Израилевым. И ропташа весь сонм Израилев на князей. **19** И рекоша вси князи всему сонму: мы кляхомся им Господем Богом Израилевым, и ныне не возможем коснуться их: **20** сие сотворим им, еже живити их, и снабдим их, и не будет на нас гнева клятвы ради, еюже кляхомся им. **21** И рекоша им князи: да живут сии, и будут древесечцы и водоносцы всему сонму. И сотвори весь сонм, якоже рекоша им князи. **22** И созва их Иисус и рече им, глаголя: почто прельстисте мя, глаголюще: далече есмы от тебе зело? Вы же населницы есте от живущих в нас: **23** и ныне прокляти есте: и не оскудеет от вас раб, ниже древесечец, ниже водоносец мне и Богу моему. **24** И отвещаша Иисусу, глаголюще: понеже возвестися нам (рабом твоим), елика заповеда Господь Бог твой Моисею рабу Своему, дати вам землю сию и потребити нас и вся живущыя на ней от лица вашего, сего ради убояхомся зело от душ наших от лица вашего, и сотворихом дело сие: **25** и ныне, се, мы подручни вам, якоже угодно есть вам, и

якоже вам мнится, творите нам. 26 И сотвориша им сице: и избави я Иисус в той день от руку сынов Израилевых, и не убиша их. 27 И постави я Иисус в той день дрeвосечцы и водоносцы всему сонму и олтарю Божию. Сего ради быша живущии в Гаваоне дрeвосечцы и водоносцы олтарю Божию, даже до днешняго дне, и на месте еже аще изберет Господь.

**10** Егда же услыша Адонивезек царь Иерусалимский, яко взя Иисус Гаю и потреби его, якоже сотвори Иерихону и царю его, тако сотвори и Гаю и царю его, и яко сами вдашася живущии в Гаваоне ко Иисусу и ко Израилю, и быша в них, 2 и убояшася сами в себе зело: ведяху бо, яко град бяше велик Гаваон, яко един от великих градов, и вси мужие иже в нем крепцы. 3 И посла Адонивезек царь Иерусалимский к Еламу царю Хевронску и Фераану царю Иеримуфску, и ко Афию царю Лахисску, и к Давиру царю Одолламску, глаголя: 4 приидите, въздите ко мне и помозите ми, да повоюем Гаваона: вдашася бо сами ко Иисусу и к сыном Израилевым. 5 И собращася и въздоша пять царей Иевусейских: царь Иерусалимский и царь Хевронский, и царь Иеримуфский и царь Лахисский и царь Одолламский, сами и вси людие их, и обседоша Гаваона и воеваша на него. 6 И послаша живущии в Гаваоне ко Иисусу в полк Израилев в Галгалы, глаголюще: не отрешай руки твоя от раб твоих: възди к нам скоро и помози нам, и изми нас: яко собрани суть на ны вси царие Аморрейстии, живущии в горней. 7 И възде Иисус от Галгал, сам и вси людие воинстии с ним, всяк сильный крепостию. 8 И рече Господь ко Иисусу: не убойся их, яко в руке твои предах я: не останет от них ни един пред вами. 9 И прииде на них Иисус внезапно: всю бо ночь иде от Галгал. 10 И ужаси

я Господь от лица сынов Израилевых: и сокруши я Господь сокрушением великим в Гаваоне: и погнаша я путем восхода Вифоронска, и сечаху их даже до Азика и до Макида. 11 Внегда же бежати им от лица сынов Израилевых до восхода Вифоронска, и Господь верже на ня камене великое града с небесе даже до Азика, и бысть множае умерших от града каменна, неже убиенных от сынов Израилевых мечем на брани. 12 Тогда глагола Иисус ко Господу, в оньже день предаде Господь Бог Аморреа под руку Израилеву, егда сокруши их в Гаваоне, и сокрушишася от лица Израилева: и рече Иисус: да станет солнце прямо Гаваону, и луна прямо дебри Елон. 13 И ста солнце и луна в стоянии, дондеже отмсти Бог врагом их. Не сие ли есть писано в книгах Праведнаго: и ста солнце посреде небесе и не идяше на запад в совершение дне одинаго? 14 И не бысть день таковой ниже прежде, ниже последи, еже послушати Богу тако гласа человека, яко Господь споборствова Израилю. 15 И возвратися Иисус и весь Израиль с ним в полк в Галгалы. 16 И убегоша пять царие сии и скрышася в пещере яже в Макиде. 17 И поведаша Иисусу, глаголюще: обретошася пять царие скрывшиися в пещере яже в Макиде. 18 И рече Иисус: привалите камене велие ко устью пещеры и приставите над ними мужы стрещи их: 19 вы же не стойте zde, гоняще вслед врагов ваших, и постигните останок их, и не дадите внити им во грады их, предаде бо я Господь Бог наш в руке наши. 20 И бысть егда преста Иисус и вси сынове Израилевы секуще их сечением великим зело даже до конца, и уцелевшии от них внидоша во грады тверды. 21 И возвратишася вси людие в полк ко Иисусу в Макиду здрави, и не возскомле

никтоже от сынов Израилевых языком своим. 22 И рече Иисус: отверзите устие пещеры и изведите ко мне пять царей сих из пещеры. 23 И сотвориша тако, и изведоша к нему пять царей из пещеры: царя Иерусалимска и царя Хевронска, и царя Иеримуфска и царя Лахисска и царя Одолламска. 24 И егда изведоша их ко Иисусу, и созва Иисус всего Израиля и начальники воинския ходящия с ним, глаголя к ним: приступите и наступите ногами вашими на выи царей сих. И приступивше наступиша ногами своими на выи их. 25 И рече к ним Иисус: не бойтесь их, ни ужасайтесь: мужайтесь и крепитесь, яко сице сотворит Господь всем врагом вашим, ихже вы повоюете. 26 И уби я Иисус, и повеси я на пяти древесех: и быша висяще на древах даже до вечера. 27 И бысть при захождении солнца, повеле Иисус, и сняша я с древес, и ввергоша я в пещеру, в нюже вбегоша тамо: и завалиша камением великим пещеру до днешняго дне. 28 Взяха же и Макиду в той день, и избиша ю острием меча и царя ея, и потребиша их и все дышущее еже бяше в ней: и не остана никтоже в ней цел и избегший. И сотвориша царю Макидску, якоже сотвориша царю Иерихонску. 29 И отиде Иисус и весь Израиль с ним от Макиды в Левну, и облеже Левну. 30 И предаде ю Господь в руце Израилю: и взяша ю и царя ея, и избиша ю острием меча, и все дышущее в ней: и не остана в ней ни един цел и избегший. И сотвориша царю ея, якоже сотвориша царю Иерихонску. 31 И отиде Иисус и весь Израиль с ним от Левны в Лахис, и облеже его, и воеваше нань. 32 И предаде Господь Лахис в руце Израилевы: и взя его в день второй, и избиша его острием меча (и все дышущее в нем), и потребиша его,

якоже сотвориша Левне. 33 Тогда взыде Орам царь Газерск, помогаяй Лахису: и порази его Иисус острием меча, и люди его, дондеже не остана от них ни един цел и избегший. 34 И отиде Иисус и весь Израиль с ним от Лахиса во Аглон, и облеже и, и воева на него. 35 И предаде и Господь в руке Израилю: и взя и в той день, и изби и острием меча, и все дышущее в нем уби, и сотвори ему якоже и Лахису. 36 И отиде Иисус и весь Израиль с ним в Хеврон, и обсяде и: 37 и взя его, и порази его острием меча, и царя его, и вся веси его, и вся дышущая елика бяху в нем: не бе уцелевый: якоже сотвориша Аглону, потребиша и и все дышущее, елика в нем бяху. 38 И обратися Иисус и весь Израиль с ним в Давир: и обседше и, 39 взяша его и царя его и вся веси его, и поразиша и мечем, и потребиша и и все дышущее в нем, и не оставиша в нем ни единого уцелевша: якоже сотвориша Хеврону и царю его, тако сотвориша Давиру и царю его, и якоже сотвориша Левне и царю ея. 40 И порази Иисус всю землю горную и Нагев, и равную и Асидоф, и вся цари его: не оставиша в нем ни единого уцелевша: и все дышущее потребиша, якоже заповеда Господь Бог Израилю. 41 И изби их Иисус от Кадис-Варни даже до Газы, и всю землю Госом даже до Гаваона: 42 и вся цари сия и землю их взя Иисус единою: яко Господь Бог Израилев помогаше Израилю. 43 И возвратися Иисус и весь Израиль с ним в полк в Галгалы.

**11** Егда же услыша Иавин царь Асорск, посла ко Иоваву царю Мадонску, и к царю Семеронску и к царю Ахиавску, 2 и к царем иже в Сидоне велицем и в горней, и в Араву прямо Хенерифу, и на поляну, и в Нафеддор, 3 и к приморским Хананеам от восток, и к приморским Аморреом и Хеттеом,

и Ферезеом и Иевусеом, иже на горе, и Евеом, и иже под Аермоном, в землю Массифа. 4 И изыдоша сии и царие их с ними, людие мнози, яко песок иже при краи моря множеством, и кони и колесницы многи зело. 5 И снидошася вси царие сии, и приидоша вкупе, и ополчишася при воде Маррон воевати на Израиля. 6 И рече Господь ко Иисусу: не убойся от лица их, яко заутра в сей час аз предам их язвенных пред сыны Израилевы: конем их жилы пресечеши и колесницы их да сожжеша огнем. 7 И прииде Иисус и вси людие воинстии с ним на них к воде Марронстей внезапно, и нападоша на ня в горней. 8 И предаде их Господь под руце Израилевы: и секуще их, прогнаша даже до Сидона великаго и до Масрефоф-Маима и до поль Массифских к востоком: и изсекоша их, дондеже не остана в них ни един цел и избегший. 9 И сотвори им Иисус, якоже заповеда ему Господь: конем их жилы пресече и колесницы их сожже огнем. 10 И обратися Иисус в то время, и взя Асор, и царя его уби мечем: Асор бо бе прежде обладающий всеми царствы сими: 11 и изби все дышущее, еже в нем бысть, острием меча, и потребиша вся, и не остана в нем все дышущее: и Асор запалиша огнем. 12 И вся грады царств сих и вся цари их взя Иисус и изби я мечем, и потреби их, якоже повеле им Моисей раб Господень. 13 Но вся грады крепки не запали Израиль, точию Асор един запали Иисус. 14 И вся корысти их и вся скоты их плениша себе сынове Израилевы: людий же всех потребиша мечем, дондеже погубиша их, и не оставиша от них ни единого дышущаго. 15 Якоже повеле Господь Моисею рабу Своему, тако Моисей заповеда Иисусу: и тако сотвори Иисус, не преступи ни единого же от

всех, яже заповеда Господь Моисею. **16** И взя Иисус всю землю горную и всю землю нагев, и всю землю Госомску, и равную, и яже на запад, и гору Израилеву, и поля яже при горе, **17** от горы Хелха, и яже восходит к Сеиру, и даже до Валгада, и поле Ливана под горою Аермон: и вся цари их взя и изби. **18** И многи дни сотвори Иисус с цари сими брань: **19** и не бе ни единого града, егоже не предаде Господь сыном Израилевым, кроме Евеа обитающаго в Гаваоне: всех взяша бранию: **20** яко Господем бысть укрепитися их сердцу, сопротивитися на брани противу Израиля, да потребят их, яко да не дастся им милость, но да потребятся, якоже глагола Господь к Моисею. **21** И прииде Иисус в то время, и потреби (вся) Енакимы от горняя, от Хеврона и от Давира и от Анова, и от всея горы Израилевы и от всея горы Иудины, с грады их, и потреби я Иисус: **22** не остана ни един Енаким от сынов Израилевых, но точию в Газе и в Гефе и во Асидофе останася. **23** И взя Иисус всю землю, якоже заповеда Господь Моисею: и даде ю Иисус в наследие Израилю, разделением по племеном их. И преста земля воюема быти.

**12** И сии царие земли, ихже избиша сынове Израилевы и наследиша землю их об ону страну Иордана, от восток солнца, от дебри Арнонския даже до горы Аермон, и всю землю араву от восток: **2** Сиона царя Аморрейска, иже живяше во Есевоне, обладай от Ароира, иже есть в дебри Арнонстей от страны дебри, и пол (земли) Галаада даже до Иавока, (идеже) пределы сынов Аммоних: **3** и арава даже до моря Хенереф на востоки, и даже до моря арава, моря Солицнаго от восток, путем иже ко Вифсимофу, и от Фемана

иже под Асидоф-Фасгою: 4 и Ог царь Васанский остася от Исполинов, иже обита во Астарофе и во Едраине, 5 обладай от горы Аермон, и от Селхи, и всю землю Васан даже до предел Гесури, и Махафи, и пол Галаада до предел Сиона царя Есевонска. 6 Моисей раб Господень и сынове Израилевы поразиша я: и даде ю Моисей раб Господень в наследие Рувиму и Гаду и полплемени Манассиину. 7 И сии царие Аморрейстии, яже изби Иисус и сынове Израилевы об ону страну Иордана, при мори Валгад на поли Ливана, и даже до горы Алок, восходящих в Сиир: и даде ю Иисус племеном Израилевым в наследие по жребию их, 8 на горе и на поли, и во Араве и во Асидофе, и в пустыни и во нагеве, Хеттеа и Аморреа, и Хананеа и Ферезеа, и Евеа и Иевусеа: 9 царя Иерихонска и царя Гайска, иже есть близ Вефиля, 10 царя Иерусалимска, царя Хевронска, 11 царя Иеримуфска, царя Лахисска, 12 царя Еглонска, царя Газерска, 13 царя Давирска, царя Гадерска, 14 царя Ермафска, царя Адерска, 15 царя Левнска, царя Одолламска, 16 царя Макидска, царя Вефилска, 17 царя Апфуска, царя Оферска, 18 царя Афекска, царя Хесаромска, 19 царя Самвронска, царя Фувска, 20 царя Маронска, царя Ахсафска, 21 царя Фанахска, царя Магдедонска, 22 царя Кедесска, царя Иеконама Хермела, 23 царя Адорска Нафеддора, 24 царя Гоимска Гелгеля, царя Ферска. Все сии царие тридесять един.

**13** Иисус же состаресе прошед дни. И рече Господь ко Иисусу: ты состарелся еси денми, и земля остася многа в наследие: 2 и сия земля оставшаяся: пределы Филистимли, Гесури и Хананей, 3 от Необитаемья, яже от лица Египта даже до предел Аккаронских ошуюю Хананеов, причисляется



пятым областем Филистимским: Газеу и Азотию, и Аскалониту и Гетфею, и Аккарониту и Евею: 4 от Феман и всей земли Ханаанстей прямо Газе, и Сидонии даже до Афека, даже до предел Аморрейских: 5 и всю землю Гавли Филистимлю, и весь Ливан от восток солнца, от Галгал под горою Аермон даже до входа Емаф: 6 всяк обитающий в горней от Ливана даже до Масрефофмаима, всех Сидонян аз потреблю от лица Израилева: но раздай ю во жребий Израилю, якоже заповедах тебе: 7 и ныне раздели землю сию в наследие девяти племеном и полплеменем Манассиину от Иордана даже до моря великаго, к западу солнца даси ю: море великое предел будет. 8 Дву же племеном и полуплеменем Манассиину, Рувиму и Гаду, даде Моисей об ону страну Иордана: к востоком солнца даде им Моисей раб Господень, 9 от Ароира, иже есть на устии водотечи Арнони, и град иже посреде дебри, и весь Мисор от Медавана: 10 вся грады Сиона царя Аморрейска, иже царствова во Есевоне, даже до предел сынов Аммоних: 11 и Галаад, и пределы Гесури, и Махафи, всю гору Аермон, и всю Васанитску до Елхи: 12 все царство Огово в Васанитиде, иже царствова во Астарофе и во Едраине: сей останеся (един) от Исполинов, и уби его Моисей, и потреби. 13 И не потребиша сынове Израилевы Гесура и Махафа и Хананеа: и живяше царь Гесури и Махафи в сынех Израилевых даже до сего дне. 14 Токмо племени Левиину не дадеся наследие: Господь Бог Израилев, сам наследие их, якоже рече им Господь. И сие разделение, еже раздели Моисей сыном Израилевым (по племеном их) во Аравофе Моавли об ону страну Иордана противу Иерихона. 15 И даде Моисей племени сынов Рувимлих

по сонмом их: 16 и быша им пределы от Ароира, иже  
есть прямо дебри Арнонския, и град, иже есть в дебри  
Арнонстей, 17 и всю землю Мисорску даже до Есевона, и  
вся грады иже суть в мисоре, и Девор, и Вамоф-Ваал, и  
домы Веелмони, 18 и Иасса и Кедимофа и Мифааф, 19 и  
Кариафем и Севама, и Сарф и Сиор на горе Енак, 20 и  
Веффогор и Асидоф-Фасга и Вифсимуф, 21 и вся грады  
Мисорски, и все царство Сиона царя Аморрейска, егоже  
уби Моисей самаго, и старейшины Мадиамли, и Евиа и  
Рокома, и Сура и Ура и ровека, князи Сиорския, и живущих  
на земли (той): 22 и Валаама сына Веорова волхва убиша  
мечем сынове Израилевы в сражении. 23 Быша же пределы  
Рувимли, Иордан предел. Сие наследие сынов Рувимлих по  
сонмом их, грады их и села их. 24 Даде же Моисей сыном  
Гадовым по сонмом их, 25 и быша им пределы Иазир: вси  
гради Галаади и полземли сынов Аммоних до Ароира, иже  
есть пред лицом Раввафа: 26 и от Есевона до Рамофа к  
Масфе, и Вотаниму, и Манаиму до предел Давириных, 27 и  
во емеке Вифарам и Вифнамра, и Сохоф и Сафон, и прочее  
царство Сиона царя Есевонска: и Иордан определяет даже  
до страны моря Хенериф, об ону страну Иордана от восток.  
28 Сие наследие сынов Гадовых по сонмом их и по градом  
их и селам их. 29 И даде Моисей полуплемени Манассиину  
по сонмом их, 30 и быша пределы их от Манаима, и все  
царство Васанско, и все царство Ога царя Васанска, и вся  
веси Иаира, яже суть в Васанитиде, шестьдесят градов: 31 и  
пол Галаада, и во Астарофе, и во Едраине, грады царства  
Огова в Васанитиде: и дашася сыном Махировым, сыном  
Манассииным, и половине сынов Махировых по сонмом

их. **32** Сии суть, имже даде наследие Моисей об ону страну Иордана во Аравофе Моавли, прямо Иерихона на востоки. **33** Племени же Левиину не даде Моисей наследия: понеже Сам Господь Бог Израилев наследие Его есть, якоже глагола им.

**14** И сии наследовавши от сынов Израилевых в земли Ханаанстей, имже разделиша ю в наследие Елеазар жрец и Иисус сын Навин и князи отечеств племен сынов Израилевых: **2** по жребием наследиша, якоже заповеда Господь Моисеом дати девяти племеном и полплемен (Манассиину), **3** даде бо Моисей наследие дву племеном и полплемен Манассиину об ону страну Иордана: левитом же не даде жребия в них: **4** занеже быша сынове Иосифовы два племена, Манассиино и Ефремле: и не дадеса части в земли левитом, но токмо грады обитати, и предградия скотом их, и скоты их. **5** Якоже заповеда Господь Моисею, тако сотвориша сынове Израилевы и разделиша землю. **6** И приидоша сынове Иудины ко Иисусу в Галгалы. И рече к нему Халев Иефоннин Кенезей: ты веси слово, еже глагола Господь к Моисею человеку Божию о мне и о тебе в Кадис-Варни: **7** čtyрeдeсяти бо лет бех, егда посла мя Моисей раб Господень от Кадис-Варни соглядати землю: и отвещах ему слово по сердцу его: **8** братия моя ходивши со мною превратиша сердце людей, аз же приложихся последовати Господеви Богу моему: **9** и клятса Моисей в той день, глаголя: земля, на нюже возшел еси, тебе будет в жребий и чадом твоим во век, яко приложился еси последовати Господу Богу моему: **10** и ныне препита мя Господь, якоже рече, сие čtyрeдeсять и пятое лето, отнележе глагола Господь слово

сие к Моисею, и хождаше Израиль в пустыни: и ныне се, ми днесь осмьдесят и пять лет: **11** еще есмь днесь могий, якоже егда посла мя Моисей: тако и ныне могу входитьи и исходити на брань: **12** и ныне прошу у тебе горы сея, якоже рече Господь в день он, яко ты слышал еси слово сие в день оный: ныне же Енакими тамо суть, грады тверды и велицы: аще убо будет Господь со мною, потреблю их, якоже рече ми Господь. **13** И благослови его Иисус, и даде Хеврон Халеву сыну Иефонниину, сыну Кенезеину в жребий. **14** Сего ради бысть Хеврон Халеву Иефонниину Кенезеину в жребий даже до дне сего: понеже возследова повелению Господа Бога Израилева. **15** Имя же Хеврону прежде бяше Град Аргов: Митрополь Енакимлян сей. И почи земля от брани.

**15** И быша пределы сынов Иудиных по сонмом их, от предел Идумейских, от пустыни Син к ливу даже до Кадис к югу: **2** и быша пределы их от полудне до части моря Сланого, от верха клонящагося к югу, **3** и проходят прямо восхождению Акраввим, и обходят Сена, и восходят от юга до Кадис-Варни: и исходят из Есрона, и восходят во Аддару, и исходят на запады Кадис, обходят Аккарки, **4** и исходят во Асемону, и преходят даже до дебри Египетския: и будет исход пределов его к морю. Сии суть пределы их от юга. **5** И пределы от восток, все море Сланое даже до части Иордана, и пределы их к северу, и от верха моря, и от части Иордански: **6** восходят пределы (тии) в Вифаглу и преходят от севера к Вефару, и восходят пределы к камени Веора сына Рувимля, **7** и восходят пределы к Девиру дебри Ахоровы, и нисходят до Галгалы, яже есть прямо схождению Адоммин, иже есть к югу дебри, и восходит предел к воде

источника Солнечно, и будет исход его источник Рогиль:  
8 и восходят пределы в дебрь Енном, создади Иевуса от полудне, сей есть Иерусалим: и исходят пределы на верх горы, яже есть пред лицом дебри Енном к морю, яже есть от части земли Рафаин к северу: 9 и преходит предел от верха горы ко источнику воды Наффо и преходит к горе Ефрони, и изведет предел в Ваал, сей есть Град Иарим: 10 и обыдет предел от Ваала к морю и прейдет в гору Сиир, и прейдет создади града Иарима от севера, сей есть Хасалон: и снидет ко граду Солнечно и прейдет к югу: 11 и преходит предел создади Аккарона до севера, и преходят пределы в Сакхарон, и прейдут гору земли Валаани, и преходят ко Иавнилу, и будет исход пределов к морю, и пределы их от моря, море великое определит. 12 Сии пределы сынов Иудиных окрест по сонмом их. 13 И даде (Иисус) Халеву сыну Иефонниину часть посреде сынов Иудиных повелением Божиим, и даде ему Иисус Град Арвок, отца Енакова: сей есть Хеврон. 14 И потреби оттуду Халев сын Иефонниин три сыны Енаковы, Сусиа и Фолмаи и Ахима: 15 и взыде оттуду Халев на живущих в Давире: имя же прежде быше Давиру Град Писмен. 16 И рече Халев: иже аще возмет кто Град Писмен и возобладает им, дам ему Асхань дщерь мою в жену. 17 И взя его Гофониил сын Кенеза, брата Халевова, юнейший: и даде ему Асхань дщерь свою в жену. 18 И бысть внегда отходити ей, и совеща с ним, глаголющи: попрошу у отца моего села. И воззва со осляти. И рече ей Халев: что ти есть? 19 И рече ему: даждь ми благословение, яко в землю полуденную отдал еси мя: даждь ми Голаф-Маим. И даде ей Халев Голаф-Маим вышний и Голаф нижний. 20

Сие наследие племени сынов Иудиных по сонмом их: 21 быша же гради их гради племени сынов Иудиных к пределом едомлим в пустыни, Кавсеил и Едраим и Иагур, 22 и Кина и Димона и Адада, 23 и Кедес и Асор и Ифнаксиф, 24 и Телем и Валоф, 25 и Асор Новый и Град Асером (сей есть Асор): 26 Амам и Самаа и Моада, 27 и Асергадда и Веффалеф, 28 и Асарсула и Вирсавее (и села их и предградия их): 29 и Ваала и Авим и Асем, 30 и Елфолод и Хесил и Ерма, 31 и Сикелег и Ведевина и Сансанна, 32 и Лавоф и Селеим, и Аин и Реммон: всех градов двадесять и девять, и села их. 33 В напольней, Есфаол и Сараа, и Асна (и Рамен), 34 и Зано и Ингоним, и Фаффуа и Инаим, 35 и Иеримуф и Одоллам, (и Немра) и Сохо и Азика, 36 и Сагарим и Адиафаим, и Гадира и села ея: гради четырнадцать и веси их. 37 Сеннам и Адаса и Магдалгад, 38 и Далаан и Масфа и Иекфаил, 39 и Лахис и Васхаф и Еглом, 40 и Хаввон и Ламас и Хафлос, 41 и Гадироф и Виф-Дагон, и Нома и Макида: гради шестнадцать и веси их. 42 Левна и Афер и Асан, 43 и Иеффа и Асенна и Несив, 44 и Кеила и Ахзев, и Мариса (и Едом): гради девять и веси их. 45 Аккарон и села его и предградия его. 46 (И) от Аккарона, иемне и вси елики суть близ Асдофа, и веси их: 47 Асдоф и веси его и предградия его: Газа и веси ея и предградия ея, даже до водотечи Египетския, и море великое определяет. 48 И в горней, Сафир и Иефер и Сохо, 49 и Ренна, Град Писмен (сей есть Давир), 50 и Анов и Есфемо и Аним, 51 и Госом и Хилуон и Гилон: градов единнадцать и веси их. 52 Ерев и Есан и Рума, 53 и Ианум и Веф-Фапфуе и Афака, 54 и Хаммата и Град Арво (сей есть Хеврон) и Сиор: градов

девять и села их. 55 Маон и Хермел, и Зиф и Иетта, 56 и Иездраель и Иекдаам и Зано, 57 Аким и Гаваа и Фамна: гради десять и веси их. 58 Алул и Вефсур и Гедор, 59 и Мароф и Вефанон и Елфекен: гради шесть и веси их: Феко и Ефрафа (сей есть Вифлеем): и Фагор и Етам, и Кулон и Татами, и Сорис и Карем, и Галлим и Вефир и Манохо: градов единонадесять и веси их. 60 Кариаф-Ваал (сей Град Иарим) и Аревва: гради два, и села их и предградия их. 61 Ваддаргис и Вифарава, (и) Мадон и Сохоха, 62 и Невсан и град Соли и Ингадди: гради шесть и веси их. 63 И Иевусей обиташе во Иерусалиме, и не возмогоша сынове Иудины погубити их: и обиташа Иевусее с сынми Иудиными во Иерусалиме даже до дне онаго.

**16** И быша пределы сынов Иосифовых от Иордана иже ко Иерихону от восток, и восходят от Иерихона в горную пустыню в Вефиль, 2 и исходят от Вефиля в Лузу, и преходят к пределом Ахиатарофа: 3 и прейдут к морю к пределом Иефалтимским, даже до предел Вефорона нижняго и даже до Газера, и будет исход их к морю. 4 И наследствоваша сынове Иосифовы Ефрем и Манассий, 5 и быша пределы сынов Ефремлих по сонмом их: и быша пределы наследия их от восток Атароф и Адар, даже до Вефорона вышняго и Газары, 6 и преходят пределы к морю в Махфоф от севера, и идут на восток во Финаф-Силом, и прейдут от восток во Ианоха, 7 и от Ианоха снидут во Атароф и в Наарафа и веси их: и приходят ко Иерихону и исходят ко Иордану, 8 и от Тапфу пойдут пределы к морю к водотечи Кана, и будет исход его к морю. Сие наследие племene сынов Ефремлих по сонмом их. 9 И грады отлученныя сыном Ефремлим

посреде наследия сынов Манасииных, вси гради и веси их. 10 И не погуби Ефрем Хананеа живущаго в Газере: и обиташа Хананеи посреде Ефрема, дающе ему дани до днешняго дне, дондеже взыде фараон царь Египетский, и взя град, и запали его огнем: и Хананеи и Ферезеев и живущих в Газере избодоша: и даде его фараон в вено дщери своей.

**17** И быша пределы племени сынов Манасииных, яко сей первенец Иосифу, Махирови первенцу Манасиину, отцу Галаадову, (сей бо бысть муж храбр) в Галаадитиде и Васанитиде. 2 И быша сыном Манасииным прочым по сонмом их: сыном Ахизеровым и сыном Елековым и сыном Есриилевым, и сыном Сехемовым и сыном Семираеловым и сыном Оферовым: сии суть сынове Манасиины, сына Иосифова, мужеск пол по племеном своим. 3 И Салпааду сыну Оферову, сына Галаадова, сына Махирова, сына Манасиина, не быша сыны, но токмо дщери: и сия имена дщерем Салпаадовым: Маала и Нуа, и Егла и Мелха и Ферса. 4 И сташа пред Елеазаром жерцем и пред Иисусом сыном Навиным и пред князи, глаголюща: Бог заповеда рукою Моисевою дати нам наследие посреде братии нашея. И дадеся им наследие повелением Господним, жребий в братии отца их. 5 И паде жребий Манасию поле лавеково кроме земли Галаадовы и Васани, яже есть об ону страну Иордана, 6 понеже дщери сынов Манасииных наследиша жребий посреде братий своих: земля же Галаадова бысть сыном Манасииным прочым. 7 И быша пределы сынов Манасииных от Асир-Махфофа, и данаф, яже есть пред лицем Сихема, и идут пределы на Иамин и на Иасиф ко источнику Фаффоф. 8 Манасию будет земля Фаффоф: и



Фаффоф над пределы Манасииныи сыном Ефремлим:  
9 и снидут пределы к дебри Кана на юг по дебри Иарим:  
Теревинф Ефрему посреде града Манасиина. И пределы  
Манасиины к северу на водотечь, и будет исход его море:  
10 от юга Ефрему, и к северу Манасии, и будет море предел  
им: и ко Асиру совокупятся к северу, и Иссахару от восток.  
11 И будет Манасию (предел) между Иссахаром и между  
Асиром Вефсан и веси их, и Иевлаам и веси его, и живушья  
в Доре и веси его, и живушья в ендоре и веси его, и живушья  
в Магедде и веси его, и живушья в Танахе и веси его, и  
третья часть Нафефа и веси его. 12 И не возмогоша сынове  
Манасиины потребити градов сих: и нача Хананей жити в  
земли сей. 13 И бысть егда укрепишася сынове Израилевы,  
и сотвориша Хананеов послушных, потреблением же не  
потребиша их. 14 Противореша же сынове Иосифовы Иисусу,  
глаголюще: почто наследствовал еси нас жребием единым  
и ужем единым? Аз же люд мног есмь, и благослови мя  
Бог (даже доселе). 15 И рече им Иисус: аще люд мног еси,  
взыди в дубраву и отреби себе тамо место в земли Ферезеа  
и Рафаима, аще утесняет тя гора Ефремля. 16 И реша  
сынове Иосифовы: не доволно нам горы Ефремли: и конь  
преизбранный и железо всему Хананею живущему в земли  
емек, в Вефсане и в весех ея, и во юдоле Иезраель. 17  
И рече Иисус к сыном Иосифовым, Ефрему и Манасию,  
глаголя: аще люд мног еси и силу велику имаши, не будет ти  
жребий един: 18 зане дубрава будет тебе, понеже дубрава  
есть, и отребиши ю, и будет тебе, и концы ея, егда потребиши  
Хананеа, аще конь преизбранный ему есть: (и сам силен, )  
ты бо пресилиши его.

**18** И собрася весь сонм сынов Израилевых в Силом, и водрузиша тамо скинию свидения: и земля одержася от них. 2 И осташася сынове Израилевы, иже не наследиша наследия своего седмь племен. 3 И рече Иисус сыном Израилевым: доколе вы разслабляетея внити наследити землю, юже даде вам Господь Бог отец ваших? 4 Дайте от вас по три мужы от племени, и послю их, и воставше да пройдут землю и да опишут ю предо мною, якоже есть лепо разделить ю. И придоша к нему. 5 И раздели им на седмь частей: Иуда да поставит предел своим от лива, и сынове Иосифли да поставят предел своим от севера: 6 вы же разделите землю на седмь частей, и принесите ко мне семо, и изнесу вам жребий пред Господем Богом вашим: 7 несть бо части у вас сыном Левиным, зане жречество Господне часть их: Гад же и Рувим и полплемене Манассиина взяша наследие свое об ону страну Иордана на востоки, еже даде им Моисей раб Господень. 8 И воставше мужие поидоша. И заповеда Иисус мужем идущым описати землю, глаголя: идите и обыдите землю, и опишите ю, и приидите ко мне, и изнесу вам зде жребий пред Господем в Силоме. 9 И идоша мужие, и обыдоша землю и соглядаша ю, и описаша ю по градом ея на седмь частей в книгу, и принесоша ко Иисусу в полк в Силом. 10 И верже им Иисус жребий пред Господем в Силоме: и раздели тамо землю Иисус сыном Израилевым по разделению их. 11 И изыде жребий племени сынов Вениаминовых первый по сонмом их: и изыдоша пределы жребия их посреде сынов Иудиных и посреде сынов Иосифовых. 12 И быша пределы их от севера: от Иордана взыдут пределы созади Иерихона к северу и взыдут к горе к

морю, и будет исход его Мавдарит Вефавн: 13 и пройдут отсюда пределы Лузы сзади Лузы от юга: сия есть Вефиль: и снидут пределы сии от Атароф-Аддар на горную, яже есть к ливу Вефорон нижний, 14 и прейдут пределы, и обыдут к стране зрящи к морю от ливы, от горы к лицу Вефорон Лива, и будет исход его в Кариаф-Ваал: сей есть Кариафиарим, Град сынов Иудиных. Сия есть часть яже к морю. 15 И часть яже к ливу от части Кариаф-Ваал: и пройдут пределы морския в Гаин, на источник воды Наффоновы, 16 и снидут пределы на страну горы, яже есть пред лицом дубравы, сына Енома, яже есть от части емек Рафаин от севера, и снидут к Геенному сзади Иевуса от юга, и снидут на источник Рогиль, 17 и пройдут сквозе от севера, и пройдут на источник Самеса, и пройдут на Галилоф, иже есть прямо к восходу Едомим: и снидут на камень Ваан сынов Рувимлих, 18 и пройдут сзади вефаравы от севера, и снидут ко араве, 19 и снидут с Аравы (на) пределы сзади Вефагла от севера, и будет исход пределов на холм моря Сланаго от севера в страну Иорданову от ливы. Сии пределы суть от юга: и Иордан определит ю от страны востока. 20 Сие наследие сынов Вениаминовых, пределы его окрест по сонмом их. 21 И быша грады племени сынов Вениаминовых по сонмом их, Иерихо и Вифагла и Амеккасис, 22 и Вефарава и Семрим и Вифил, 23 и Авим и Афара, и Аффа (и Екарен), 24 и Кафираммин и Афни и Гаваа: грады дванадесять и веси их: 25 Гаваон и Рама и Вироф, 26 и Масфа и Хефира и Амоса, 27 и Рекем и Иерфаил и Фарала, 28 и Силалеф и Иевус (сей есть Иерусалим), и Гавааф и Град Иарим: грады

тринадцать и веси их. Сие наследие сынов Вениаминовых по сонмом их.

**19** И изыде второй жребий Симеону, племени сынов Симеоновых по сонмом их, и бысть наследие их посреде жребия сынов Иудиных. **2** И бысть жребий их Вирсавее и Савее и Молада, **3** и Асерсуал и Вафул, и Велвола и Асом, **4** и Елфулад и Ерма, **5** и Секелаг и Вефаммаргасвоф, и Асерсусим **6** и Вефалваф, и села их: грады тринадцать и веси их. **7** Аин и Реммоф, и Еефер и Асам, грады четыре и веси их: **8** и вся предградия, яже окрест градов сих даже до Ваалферирраммоф, идущих во Иамеф к ливу. Сие наследие племен сынов Симеоновых по сонмом их. **9** От жребия Иудина наследие племени сынов Симеоновых, яко бысть часть сынов Иудиных болшая нежели их: и наследиша сынове Симеоновы посреде жребия их. **10** И изыде жребий третий Завулону по сонмом их: и будут пределы наследия их до Сарида: **11** и восходят пределы их к морю и Мариле, и дойдут к Давасефу, и снидутся в дебрь, яже есть к лицу Иекнама, **12** и обратятся от Сарида противу от востоков Самес на пределы Хасалоф-Фавор, и пройдут к Даврафу, и взыдут к Иафаги: **13** и оттуду обыдут супротив на востоки в Гефаефер, во град Касим, и пройдут на Реммонам Мафарим Аннуа, **14** и обыдут пределы к северу на Еннафоф, и будет исход их к Гаю Иеффаил, **15** и Каттаф и Наалол, и Семрон и Иадила и Вифлеем: грады дванадесять и веси их. **16** Сие наследие племени сынов Завулоновых по сонмом их, грады их и веси их. **17** И Иссахару изыде жребий четвертый, сыном Иссахаровым по сродством их, **18** и быша пределы их Иезраель и Ахаселоф и Сунам, **19** и Аферарим и Сиан, (и

Ренаф) и Анахареф, 20 и Раввоф и Кесион и Аеме, 21 и Рамаф и Инганним, и Инадда и Веффасис: 22 и снидутся пределы к Фавору и к Сасимафу к морю, и вефсмас, и будет его исход предел Иордан: грады шестнадцать и веси их. 23 Сие наследие племени сынов Иссахаровых по сонмом их, грады и предградия их. 24 И изыде жребий пятый племени сынов Асировых по сонмом их, 25 и быша пределы их Хелкаф и Ооли, и Ватне и Ахсаф, 26 и Елимелех и Амад и Масал: и приблизятся к Кармилу к морю, и Сиору и Лаванафу, 27 и обратятся от восток солнца в Виф-Дагон, и приблизятся к Завулону, и в Гай Иеффаил к северу, (и внидут пределы Асафа) в Виф-Аемек, и да идут по долине Аниила, и пройдут в Хавол ошуюю, 28 и Ахран и Роов, и Аммон и Кана, даже до Сидона великаго: 29 и возвратятся пределы в Раму, и даже до града тверда Тириан, и возвратятся пределы до Сусы, и будет исход его море, и от ужа в Ахзиф, 30 и Амма и Афек и Раов: грады двадесать два и веси их. 31 Сие наследие племени сынов Асировых по сонмом их, грады их и веси их. 32 И Неффалиму изыде жребий шестой, сыном Неффалимлим по сонмом их, 33 и быша пределы их Меелеф и Милон, и Весенаним и Арме, и Накев и Иавнил, даже до Лаккун: и быша исходи их Иордан: 34 и возвратятся пределы к морю в Азаноф-Фавор, и пройдут оттуду во Икок, и приткнутся к Завулону от юга, и Асиру приблизятся к морю, и ко Иуде Иордан от восток солнца. 35 И грады ограждени Тириан, Тир и Амаф, и Реккаф и Хенероф, 36 и Адами и Рама и Асор, 37 и Кедес и Едраи и источник Асор, 38 и Иарион и Магдалиил, Оран и Вефанаф и Фасмус: грады девятнадцать и веси их. 39 Сие наследие племени сынов

Неффалимлих по сродству их, грады и предградия их. 40 И Дану и племени сынов Дановых по сонмом их изыде жребий седмый, 41 и быша пределы их Сараа и Есфаол и грады Самес, 42 и Саламинь и Еалон и Иефла, 43 и Елон и Фамна и Аккарон, 44 и Елфеко и Гавафон и Ваафоф, 45 и Иуф и Ваниварак и Гефреммон, 46 и от моря Иераконска, и Ираккон, предел близ Иоппы, и изыде предел сынов Дановых от них. 47 И изыдоша сынове Дановы и воеваша Ласем, и взяша его и поразиша его острием меча: и обиташа в нем, и нарекоша имя его Ласендан, по имени Дана отца своего. И Аморрей остася жити во Еломе и в Саламине: и отяготе рука Ефремля на них, и быша им данницы. 48 Сие наследие племени сынов Дановых по сонмом их, грады их и веси их. И не истребиша сынове Дановы Аморреа озлобляющаго их на горе, и не даяху им Аморрее исходити на юдоль, и утесниша от них предел части их. 49 И совершиша разделяти землю в пределех ея: и даша сынове Израилевы жребий Иисусу сыну Навину повелением Господним среде себе, 50 и даша ему град, егоже проси, Фамнаф-Сараи, иже есть в горе Ефраим: и созда град, и вселися в нем. 51 Сия разделения, яже разделиша Елеазар жрец и Иисус Навин и князи отечеств в племенех Израилевых по жребиям в Силоме пред Господем, у дверей скинии свидения. И скончаша делити землю.

**20** И рече Господь ко Иисусу, глаголя: 2 рцы сыном Израилевым, глаголя: дадите грады убежений, яже рекох к вам Моисеом: 3 убежище убийце поразившему душу неволею: и будут вам грады убежище, и не умрет убийца от ужика крове, дондеже предстанет пред сонмом на суд. 4 И (аще кто) убегнет во един от градов сих, и станет во

вратех града, и исповесть во уши старцем града того словеса своя: и примут его сонм к себе, и дадут ему место жити с ними: 5 и егда поженет ужик крове вслед его, и не дадут убившаго в руке его: яко не ведый уби ближняго своего и не ненавидя той его от вчера и третяго дне: 6 и да вселится в той град, дондеже станет пред лицом сонма на суд, и дондеже умрет жрец великий, иже будет в тыя дни: тогда да обратится убийца, и внидет во град свой и в дом свой, и во град, отнюдуже избеже. 7 И отделиша Кедес в Галилеи, в горе Неффалимли, и Сихем в горе Ефремли, и Град Арво (сей есть Хеврон) в горе Иуде: 8 и об ону страну Иордана ко Иерихону на восток, даша Восор в пустыни в поли от племени Рувимля, и Рамоф в Галааде от племени Гадова, и Голан в Васанитиде от племени Манассиина: 9 сии грады избраны быша всем сыном Израилевым и пришелцу прилежащему в них, еже убежати тамо всякому убивающему душу неволею, да не умрет от руку ужика крове, дондеже станет пред сонмом на суд.

**21** И приидоша старейшины отечеств сынов Левиных к Елеазару жерцу и ко Иисусу сыну Навину и к старейшинам отечеств от племен сынов Израилевых, 2 и реша к ним в Силоме в земли Ханаани, глаголюще: заповеда Господь рукою Моисевою дати нам грады еже обитати, и окрестная их предградия скотом нашим. 3 И даша сынове Израилевы левитом от участков своих по повелению Господню грады сия и окрестная предградия их. 4 И изыде жребий сонму Каафову, и бысть сыном Аароним жерцем левитом от племени Иудина и от племени Симеоня и от племени Вениамина по жребием грады тринадцать: 5 и сыном Каафовым оставшимся

от (сродства) племени Ефремова и от племени Данова и от полуплемене Манасиина по жребию грады десять: 6 и сыном Гирсоним от племени Иссахарова и от племени Асирова, и от племени Неффалимля и от полуплемене Манасиина (еже) в Васане, по жребию грады тринадцать: 7 и сыном Мерариным по сонмом их, от племени Рувимля и от племени Гадова и от племени Завулоня, по жребию грады дванадцать. 8 И даша сынове Израилевы левитом грады сия и окрестная их, якоже заповеда Господь Моисею, по жребию. 9 И даде племя сынов Иудиных и племя сынов Симеоновых и племя сынов Вениаминовых грады сия: и нарекоша по имени. 10 И быша сыном Аароновым от сонма Каафова сынов Левиных, яко сим бысть жребий первый. 11 И даде им Кариафарвок, Митрополь сынов Енаковых (сей есть Хеврон в горе Иудине), и окрестная их. 12 И села града (сего) и веси его даде Иисус Халеву сыну Иефонниину во обдержание его. 13 И сыном Аарона жерца даде град убежище убившему Хеврон и отлученная яже к нему: 14 и Левну и отлученная яже к ней: и Иефер и отлученная яже к нему: и Есфемо и отлученная яже к нему: 15 и Олон и отлученная яже к нему: и Давир и отлученная яже к нему: 16 и Аин и отлученная ему: и Иетта и отлученная ему: и Вефсамис и отлученная ему: грады девять от дву племен сих. 17 И от племени Вениамина Гаваон и отлученная ему: и Гавее и окрестная его: 18 и Анафоф и окрестная его: и Алмон и окрестная его: грады четыре. 19 Все грады сынов Аароновых жерцев, грады тринадцать и окрестная их. 20 И сонмом сынов Каафовых левитом, оставшымся от сынов Каафовых, и бысть град



пределов их от племени Ефремова. 21 И даша им град убежище убившему Сихем и окрестная его в горе Ефремли: и Газер и окрестная его: 22 и Кавсаим и окрестная его: и Вефорон и окрестная его: грады четыре. 23 И от племени Данова Елфеко и окрестная его: и Гавефон и окрестная его: 24 и Елон и окрестная его: и Гефреммон и окрестная его: грады четыре. 25 И от полуплемене Манассиина Фаанак и окрестная его: и Вефсам и окрестная его: града два. 26 Все грады десять и окрестная их сонмом сынов Каафовых оставшимся. 27 И сыном Гирсоним сродником левитским, от полуплемене Манассиина, грады отлученныя убившим, Голан в Васанитиде и окрестная его: и Веесфера и окрестная его: града два. 28 И от племени Иссахарова Кисион и окрестная его: и Девраф и окрестная его: 29 и Иермоф и окрестная его: и Источник Писмен и окрестная его: грады четыре. 30 И от племени Асирова Масаал и окрестная его: и Авдон и окрестная его: 31 и Фелкаф и окрестная его: и Роов и окрестная его: грады четыре. 32 И от племени Неффалимова град определенный убившему Кедес в Галилеи и окрестная его: и Емафдор и окрестная его: и Ноеммон и отлученная его: грады три. 33 Все грады Гирсоновы по сонмом их, грады тринадцать и отлученная их. 34 И сонму сынов Мерариных левитом прочим, от племени сынов Завулони, Иекнаам и окрестная его: и Карфа и окрестная его: 35 и Дамна и окрестная его: и Наалол и окрестная его: грады четыре. 36 И об ону страну Иордана ко Иерихону от племени Рувимова даде град убежище убившему Восор в пустыни Мисор и окрестная его: и Иазир и окрестная его: 37 и Гедсон и окрестная его: и Масфа и окрестная его: грады

четыре. 38 И от племени Гадова град убежища убившему Рамоф в Галааде и окрестная его: и Манаим и окрестная его: 39 и Есевон и окрестная его: и Иазир и окрестная его: грады четыре. 40 Все грады сыном Мерариным по сонмом их, оставшихся от племени Левиина, и быша пределы их грады дванадесять. 41 Все грады левитстии посреде обдержания сынов Израилевых четыредесять и осмь градов и окрестная их, окрест градов сих: 42 град и окрестная окрест града: тако всем градом сим. И соверши Иисус разделивый землю в пределах ея: и даша сынове Израилевы часть Иисусу повелением Господним: даша ему град, егоже проси: Фамнасахар даша ему на горе Ефремове. И созда Иисус град, егоже проси, и вселися в нем. И взя Иисус ножи каменные, имиже обрезава сыны Израилевы, родившыся на пути в пустыни, яко не обрезахася в пустыни, и положи я во Фамнасахаре. 43 И даде Господь Израилю всю землю, юже клятся дати отцем их: и наследиша ю и вселихася в ней. 44 И упокои Господь их окрест, якоже клятся отцем их: не воста никтоже противу им от всех врагов их: и вся враги их предаде им Господь в руки их. 45 Не оскуде слово (ни единое) от всех глаголющих благих, яже рече Господь сыном Израилевым: вся сбыхася.

**22** Тогда созва Иисус сыны Рувимли и сыны Гадовы и полплемене Манассиина, и рече им: 2 вы слышасте вся, елика заповеда вам Моисей раб Господень, и послушасте гласа моего, по всему елика заповедах вам: 3 не остависте братии вашей в сия дни и множайшыя, даже до дне сего: сохраните заповедь Господа Бога вашего: 4 ныне же упокои Господь Бог вашу братию вашу, якоже рече им: ныне убо

возвратившися отидите в дома ваша и в землю обдержания  
вашего, юже даде вам Моисей раб Господень об ону страну  
Иордана: 5 но сохраните зело творити заповеди и закон,  
егоже заоведа вам Моисей раб Господень, любити Господа  
Бога вашего и ходити во всех путех Его, хранити заповеди  
Его и прилежати Ему и служити Ему от всего сердца вашего  
и от всея души вашей. 6 И благословив их Иисус отпусти их:  
и отидоша в дома своя. 7 И полу (племене) Манассиину  
даде Моисей (обдержание) в Васане, и половине даде Иисус  
с братиею их у Иордана к морю. И егда отпусти их Иисус в  
дома их, и благослови их: 8 и со именем многим отидоша в  
дома своя: и скоты многи зело, и серебро и злато, и медь  
и железо, и ризы многи зело, и разделиша плен врагов  
своих с братиею своею. 9 И возвратившися отидоша сынове  
Рувимли и сынове Гадовы и полплемене Манассиина от  
сынов Израилевых, от Силома земли Ханаани, отити в землю  
Галаадску, в землю обдержания своего, юже наследиша по  
повелению Господню рукою Моисеовою. 10 И приидоша в  
Галилоф Иорданск, иже есть в земли Ханаани: и создаша  
сынове Рувимли и сынове Гадовы и полплемене Манассиина  
тамо олтарь у Иордана, олтарь велик еже видети. 11 И  
услышаша сынове Израилевы глаголющих: се, создаша  
сынове Рувимли и сынове Гадовы и полплемене Манассиина  
олтарь у пределов земли Ханаани, в галилофе у Иордана  
об ону страну сынов Израилевых. 12 И услышаша сынове  
Израилевы, и собращася вси сынове Израилевы в Силон,  
еже возшедше воевати их. 13 И послаша сынове Израилевы  
к сыном Рувимлим и к сыном Гадовым и к полуплемени  
Манассиину в землю Галаадску Финееса сына Елеазара,

сына Аарона жерца, 14 и десять князей с ним: князь един от дому отечества, от всех племен сынов Израилевых: мужие князи домов отечеств их, иже суть тысященачалницы Израилевы. 15 И приидоша к сыном Рувимлим и к сыном Гадовым и к полуплеменю Манассиину в землю Галаадову, и реша к ним, глаголюще: 16 сия глаголет весь сонм Господень: кое прегрешение сие, имже согрешисте пред Господем Богом Израилевым, отвратитися днесь от Господа Бога Израилева, создавше себе требище, еже отступником вам быти днесь от Господа? 17 Еда мал вам грех Фогоров, яко не очистихомся от него даже до сего дне? И бысть язва в сонме Господни: 18 и вы отвратитесь днесь от Господа: и будет егда отступите днесь от Господа, и завтра на всем Израили будет гнев Господень: 19 и ныне аще мала вам земля обдержания вашего, прейдите вы в землю обдержания Господня, идеже пребывает скиния Господня, и наследите среде нас, и не будите отступницы от Господа, и от нас не отступите, за еже создати вам требище кроме олтаря Господа Бога нашего: 20 не се ли Ахар сын Заранов прегрешением прегреша от проклятия, и бысть на весь сонм Израилев гнев? Аще и един бяше, но не един умре грехом своим. 21 И отвещаша сынове Рувимли и сынове Гадовы и полплемене Манассиина, и реша тысященачалником Израилевым, глаголюще: 22 Бог бог, Господь есть, и Бог бог Господь Сам весть, и Израиль сам познает, аще во отступлении прегрешихом пред Господем, да не избавит нас во днешний день: 23 и аще создахом себе требище, еже отступити нам от Господа Бога нашего, или вознести нам нань жертву всесожжений, или еже сотворити на нем жертву

спасения, Сам Господь взыщет: **24** но ради благоговения глагола сотворихом сие, глаголюще: да не рекут заутра чада ваша чадом нашим, глаголюще: что вам и Господеви Богу Израилеву? **25** И пределы постави Господь между вами и нами, сынове Рувимли и сынове Гадовы, Иордан, и несть вам части Господни: и отчуждят сынове ваши сынов наших, яко да не служат Господу: **26** и рекохом сотворити сице, еже создати требище сие, не приношений ради, ниже жертв ради, **27** но да будет свидетельство сие между вами и нами и между роды нашими по нас, еже служити службу Господеви пред ним в приношениях наших и в жертвах наших и в жертвах спасений наших: и да не рекут чада ваша заутра чадом нашим: несть вам части Господни. **28** И рекохом: аще будет когда, и возглаголют к нам или к родом нашим заутра и рекут: зрите подобие жертвенника Господня, егоже сотвориша отцы наши, не приношения ради, ниже жертв ради, но свидетельство есть между нами и между вами и между сыны нашими: **29** да не будет убо нам отступити от Господа, еже отвратитися во днешний день от Господа, еже сотворити нам жертвенник приношением и жертвам саламин и жертве спасения, кроме олтаря Господа Бога нашего, иже есть пред скиниею Его. **30** И услышавше Финеес жрец и вси князи сонма, и тысященачальницы Израилевы, иже быша с ним, словеса сия, яже глаголаша сынове Рувимли и сынове Гадовы и полплемене Манассиина, и угодно им бысть сие. **31** И рече Финеес жрец сыном Рувимлим и сыном Гадовым и полуплеменю Манассиину: днесь познахом, яко с нами есть Господь, иже не погрешисте пред Господем прегрешения, но днесь избависте сыны Израилевы от руки

Господни. 32 И возвратися Финеес жрец и князи отечеств от сынов Рувимлих и от сынов Гадовых и от полуплемене Манасиина от земли Галаадовы в землю Ханааню к сыном Израилевым: и отвещаша им словеса сия. 33 И угодно бысть слово сие сыном Израилевым, и благословиша Бога сынове Израилевы и рекоша: ктому да не изыдем к ним на брань потребити землю сынов Рувимлих и сынов Гадовых и полуплемене Манасиина. И вселишася на ней. 34 И нарече Иисус требище сынов Рувимлих и сынов Гадовых и полуплемене Манасиина и рече: яко свидение есть между ими, яко Господь бог Бог их есть.

**23** И бысть по днех мнозех, егда упокои Господь Бог Израиля от всех врагов его иже окрест, и Иисус состаресе прошед дни. 2 И созва Иисус вся сыны Израилевы и старейшины их, и князи их и судии их и книгочия их, и рече к ним: аз состарехся и проидох дни: 3 вы же видесте вся, елика сотвори Господь Бог ваш всем языком сим от лица вашего, зане Господь Бог наш споборствовавый нам: 4 видите, яко низвергох вам языки оставшыяся вам сия во жребиих племеном вашим, от Иордана вся языки потребих, и от моря великаго, еже определит на запад солнца: 5 Господь же Бог ваш Сам потребит их от лица вашего, дондеже погибнут, и послет на ня звери дивия, дондеже потребит их и цари их от лица вашего, и наследите землю их, якоже глагола вам Господь Бог ваш: 6 укрепитеся убо зело хранити и творити вся написанная в книгах закона Моисеова, да не уклонитесь от него на десно или на лево: 7 яко да не внидете во языки оставшыяся сия, и имена богов их да не возименуются в вас, ниже да кленетесь ими, ниже да

послужите им, ниже поклонитесь им: **8** но токмо Господу Богу вашему прилепитесь, якоже твористе до сего дне: **9** и потреби Господь от лица вашего языки велики и сильны, и никто противоста вам до сего дне: **10** един от вас прогна тысящы, яко Господь Бог ваш споборствоваше вам: **11** и сохраните зело любити Господа Бога вашего: **12** аще бо отвратитесь и приложитесь ко оставшымся языком сим, иже с вами, и браки сотворите с ними, и смеситесь с ними, и они с вами, **13** ведением уведите, яко не приложит Господь потребити языки сия от лица вашего: и будут вам в сети и в соблазны, и в гвоздия в пятах ваших и в стрелы во очесех ваших, дондеже погибнете от земли благия сея, юже даде вам Господь Бог ваш: **14** аз же днесь отхожду в путь, якоже и вси иже на земли: и познаете всем сердцем вашим и душею вашею, яко ни единое слово отпаде от всех словес благих, яже рече Господь Бог ваш к вам: вся приходят вам, и не разнствова от них ни единое слово: **15** и будет, имже образом приходят на вас вся словеса добрая, яже глагола Господь Бог к вам, тако наведет Господь на вы вся словеса злая, дондеже потребит вы от земли благия сея, юже даде вам Господь Бог ваш: **16** внегда преступите завет Господа Бога вашего, егоже заповеда вам, и шедше послужите богом иным и поклонитесь им: и разгневаются яростию Господь на вы, и погибнете скоро от земли благия, юже даде Господь вам.

**24** И собра Иисус вся племена Израилева в Сихем, и созва старейшины Израилевы и князи их, и судии их и книгочия их, и стаха пред Господем Богом. **2** И рече Иисус ко всем людем, глаголя: сия глаголет Господь Бог Израилев: об ону страну реки жиша отцы ваши исперва, Фара отец Авраамов

и отец Нахоров, и служиша богом иным: **3** и поях отца  
вашего Авраама от об ону страну реки, и водих его во всей  
земли Ханаанстей: и умножих семя его, и дах ему Исаака:  
**4** Исааку же дах Иакова и Исава и дах Исаву гору Сиир  
наследие ему: Иаков же и сынове его снидоша во Египет, и  
быша тамо в язык велик и крепок и мног, и озлобиша их  
Египтяне: **5** и послах Моисеа и Аарона, и поразих Египта во  
знамениих, яже сотворих в них, и по сем изведох вас, **6** и  
изведох отцы ваша из Египта, и внидоште в море Чермное: и  
погнаша Египтяне вслед отец ваших на колесницах и на  
конех в море Чермное: **7** и возопихом ко Господу, и даде  
облак и мглу между нами и между Египтяны, и наведе на  
них море, и покры их: и видеша очеса ваша, елика сотвори  
Господь в земли Египетстей: и бысте в пустыни дни многи: **8**  
и приведе вас в землю Аморреов живущих об ону страну  
Иордана, и ополчишася на вы: и предаде я Господь в руки  
вашя, и наследисте землю их, и потребисте их от лица  
вашего: **9** и воста Валак сын Сепфоров, царь Моавль, и  
ополчися противу Израиля, и послав призва Валаама сына  
Веорова кляти вас: **10** и не восхоте Господь Бог погубити тя,  
но благословением благослови вас и избави вас от рук их: **11**  
и преидоште Иордан и приидоште во Иерихон, и бишася с  
вами живущии во Иерихоне, Аморрей и Ферезей, и Хананей  
и Хеттей, и Гегесей и Евей и Иевусей, и предаде их Господь  
в руки ваша: **12** и посла пред вами шершни, и изгна от лица  
вашего два царя Аморрейска, не оружием твоим, ниже луком  
твоим, **13** и даде вам землю, о нейже не трудистесь на ней,  
и грады, ихже не создасте, и пожисте в них, и винограды и  
масличие, ихже не насадисте вы, ядоште: **14** и ныне убойтеся



Господа, и послужите Ему в правде и правоте: и отвержите боги чуждые, имже служиша отцы ваши об ону страну реки и во Египте, и служите Господеву: 15 аще же не угодно вам послужити Господеву, изберите сами себе днесь, кому послужите, или богом отец ваших, иже быша об ону страну реки, или богом Аморрейским, в нихже вы живете на земли их: аз же и дом мой послужити будем Господеву, яко свят есть. 16 И отвещавше людие, реша: не буди нам оставити Господа, еже послужити богом иным: 17 Господь бо Бог наш Той Бог есть, Той изведе нас и отцы нашы от земли Египетския, от дому работы, иже сотвори пред очима нашими знамения велия, и сохрани нас во всем пути, по немуже идохом, и во всех языцех, иже сквозе проидохом: 18 и изгна Господь вся языки и Аморреа живущаго на земли от лица нашего: но и мы послужим Господеву, Сей бо есть Бог наш. 19 И рече Иисус к людем: не возможете послужити Господеву Богу, яко Бог свят есть и ревнитель сей: не оставит грех ваших и беззаконий ваших: 20 егда оставите Господа и послужите богом чуждим, и пришед озлобит вас и потребит вас, вместо еже благо сотвори вам. 21 И рекоша людие ко Иисусу: ни, но Господеву послужим. 22 И рече Иисус к людем: свидетели вы сами на ся, яко вы избрасте послужити Господеву Самому. И рекоша: свидетели мы. 23 И ныне отвержите боги чуждые, иже суть в вас, и исправите сердца ваша ко Господу Богу Израилеву. 24 И рекоша людие ко Иисусу: Господеву Богу нашему послужим, и гласа Его послушаем. 25 И завета Иисус завет к людем в день он, и даде им закон и суд в Сихеме, пред скинию Господа Бога Израилева. 26 И вписа Иисус словеса сия в книгу закона Божия: и взя камень велий,

и постави его под тервинфом, иже есть пред Господем. 27 И рече Иисус к людем: се, камень сей будет вам во свидение: яко сей слыша вся глаголголанная от Господа, елика глагола к вам днесь, и сей будет вам во свидение в последния дни, и егда солжете Господеви Богу вашему. 28 И отпусти Иисус люди, коегождо в места своя. 29 И послужи Израиль Господеви во вся дни Иисусовы и во вся дни старцев, иже препроводиша время со Иисусом и иже видеша вся дела Господня, елика сотвори Израилю. 30 И бысть по сих, и умре Иисус сын Навин раб Господень, (пожив) сто и десять лет. 31 И погребоша его в пределех жребия его во Фамнасахаре, в горе Ефремли, от севера горы Гаасовы, и положиша тамо с ним во гробе, в немже погребоша его, ножы каменные, имиже обреза сыны Израилевы в Галгалех (Иисус), егда изведе их из Египта, якоже повеле Господь: и тамо суть даже до дне сего. 32 И кости Иосифовы изнесоша сынове Израилевы из Египта и закопаша их в Сихемех, в части села, еже притяжа Иаков от Аморрей живущих в Сихемех стом агниц, и даде ю Иосифу в часть. 33 И бысть по сих, и Елеазар сын Ааронов архиерей скончася: и погребен бысть в Гаваафе Финееса сына своего, егоже даде ему в горе Ефремове.

# Книга Судей израилевых

**1** И бысть по скончании Иисусове, и вопрошаху сынове Израилевы Господа, глаголюще: кто въздет нам к Хананею воевода, ратовати на них? **2** И рече Господь: Иуда въздет: се, дах землю в руку его. **3** И рече Иуда к Симеону брату своему: възди со мною в жребий мой, и ополчимся на Хананея: и пойду и аз с тобою в жребий твой. И поиде с ним Симеон. **4** И възде Иуда, и предаде Господь Хананея и Ферезея в руке их: и избиша их в Везеце до десяти тысящ мужей. **5** И обретоша Адонивезека в Везеце, и секошася с ним: и избиша Хананея и Ферезея. **6** И побеже Адонивезек: и гнаша вслед его, и яша его, и отсекоша краи рук его и краи ног его. **7** И рече Адонивезек: седмидесяти царем обсекох краи рук их и краи ног их, и быша собирающе (от крупиц) под трапезою моею: якоже убо сотворих, тако воздаде ми Бог. И приведоша его во Иерусалим, и умре тамо. **8** И воеваша сынове Иудины на Иерусалим, и възша его, и поразиша его острием меча, и град сожгоша огнем. **9** И по сих снидоша сынове Иудины воевати на Хананея живущаго в горней к югу и в равней. **10** И поиде Иуда на Хананея живущаго в Хевроне. И изыде Хеврон со страны: имя же бе Хеврону прежде Кариафарвок-Сефер: и убиша Сесина и Ахимана и Фолмиа, роды Енаковы. **11** И въздоша оттуду к живуцым в Давире: имя же Давиру бе прежде Кариафсефер, Град Писмен. **12** И рече Халев: иже аще поразит Град Писмен и возмет его, дам ему Асхань дщерь мою в жену. **13** И възя его Гофониил сын Кенеза брата Халевова юнейший, и даде ему Халев Асхань дщерь свою в жену. **14** И бысть внегда отходити ей, и подвиже ю Гофониил просити у отца своего села, и ропташе

(сидящи) на осляти, и вопияше со осляти: на землю южную отдал мя еси. И рече ей Халев: что ти есть? 15 И рече ему Асхань: даждь ми благословение: яко на землю южную отдал еси мя, да даси мне и исходища водная. И даде ей Халев по сердцу ея исходища вышних и исходища нижних. 16 И сынове Иофора Кинеева, ужика Моисеова, взыдоша от града Финическа к сыном Иудиным в пустыню сущую на юг Иуды ко исходу Аредову, и поидоша, и вселишася с людьми. 17 И поиде Иуда с Симеоном братом своим, и изби Хананеа живущаго в Сефефе, и потребиша его: и прозваша имя граду Потребление. 18 И взя Иуда Газу и предел ея, и Аскалона и предел его, и Аккарон и предел его, и Азот и окрестная его. 19 И бяше Господь со Иудою. И взя гору, яко не возмогоша потребити живущих во юдоли, зане Рихав противоста им, и колесницы железныя бяху там. 20 И даша Халеву Хеврон, якоже глагола Моисей: и наследствова тамо три грады сынов Енаковых, и изгна оттуду три сыны Енаковы. 21 И Иевусеа живущаго во Иерусалиме не изгнаша сынове Вениаминовы, и живяше Иевусей с сынами Вениамини во Иерусалиме даже до сего дне. 22 И взыдоша сынове Иосифли и сии в Вефиль: и Господь бяше с ними. 23 И ополчишася, и соглядаша (сынове Иосифовы) Вефиль: имя же бе прежде граду Луза. 24 И видеша стрегущии мужа исходящаго из града, и яша его и рекоша ему: покажи нам вход во град, и сотворим с тобою милость. 25 И показа им вход градный: и поразиша град острием меча, мужа же и сродство его отпустиша. 26 И отиде муж в землю Хеттиим, и созда тамо град, и прозва имя ему Луза: сие имя ему даже до дне сего. 27 И не разори Манассий Вефсана, иже есть Скифский град, ниже

дщерей его, ниже окрестных (предел) его, ниже Фанаха, ниже дщерей его, ниже живущих в Доре, ниже дщерей его, ниже живущих во Иевламе, ниже окрестных его, ниже дщерей его, и живущих в Магеддоне, ниже окрестных его и дщерей его. И нача Хананей жити на земли сей. 28 И бысть егда укрепися Израиль, и сотвори Хананеа данника: изгнанием же не изгна его. 29 И Ефрем не изгна Хананеа живущаго в Газере: и живяше Хананей среде его в Газере, и бысть ему в данника. 30 И Завулон не изгна живущих в Хевроне и живущих во Аммане: и вселися Хананей посреде их и бысть ему данник. 31 И Асир не изгна живущих во Акхоре, (и бысть ему данник, ) ни живущих в Доре, ни живущих в Сидоне, ни живущих в Далафе и во Ахазиве, и во Елве и во Афеке и в Роове. 32 И вселися Асир посреде Хананеа живущаго на земли (той), зане не возможе изгнати его. 33 И Неффалим не изгна живущих в Вефсамисе, ниже живущих в Вефанахе: и вселися Неффалим среде Хананеа живущаго на земли (сей): живущии же в Вефсамисе и в Вефанахе быша ему данницы. 34 И утесни Amorрей сыны Дановы в горе, яко не попусти им низходити во юдоль. 35 И нача Amorрей жити в горе Чрепней, идеже медведи и лисицы, в Мирсиноне и в Салавине: и отяготе рука дому Иосифля на Amorрея, и бысть ему данник. 36 И предел Amorрейский идумей от восхода Акравиня, от Камене и выше.

**2** И възыде Ангел Господень от Галгал к месту Плача и к Вефилю и к дому Израилеву, и рече к ним: сия глаголет Господь: изведох вас из Египта, и введох вас в землю, еюже кляхся отцем вашим дати вам: и рекох: не разорю завета Моего, иже с вами, во веки: 2 и вы не завещайте завета

с сидящими на земли сей, ниже богом их да поклонитесь, но изваянная их сокрушите, и олтари их раскопайте: и не послушасте гласа Моего, яко сия сотвористе: 3 и Аз рех: не приложу преселити людей, ихже рех изгнати, ниже отиму их от лица вашего, и будут вам в терние, и бози их будут вам в соблазн. 4 И бысть егда глагола Ангел Господень словеса сия ко всем сыном Израилевым, и воздвигоша людие глас свой, и восплакашася. 5 И сего ради прозвася имя месту тому Плачь: и пожроша тамо Господеви. 6 И отпусти Иисус люди, и отидоша сынове Израилевы кийждо в дома своя и кийждо в наследие свое наследити землю. 7 И работаша людие Господеви во вся дни Иисусовы и во вся дни старейшин, елицы пожиша многи дни со Иисусом, елицы разумеша все дело Господне великое, еже сотвори Израилю. 8 И скончася Иисус сын Навин раб Господень, сын ста и десяти лет. 9 И погребоша его в пределех наследия его в Фамнафаресе, в горе Ефремли, от севера горы Гаас: 10 и весь род он приложишася ко отцем своим. И воста род другой по сих, иже не познаша Господа и дела, еже сотвори во Израили. 11 И сотвориша сынове Израилевы злое пред Господем и послужиша Ваалу, 12 и оставиша Господа Бога отец своих, изведшаго их из земли Египетски, и поидоша вслед богов иных, от богов языческих, Иже окрест их, и поклонишася им: и разгневаша Господа, 13 и оставиша Его, и послужиша Ваалу и Астартом. 14 И разгневался яростию Господь на Израиля и предаде его в руки пленяющих, и плениша их: и отдаде их в руки врагов их, иже окрест их, и не возмогоша ктому противостати пред лицом врагов своих, во всех в нихже прохождаху. 15 И рука Господня бяхе на

них во злая, якоже глагола Господь и якоже клятся Господь им, и озлоби их зело. 16 И возстави (им) Господь судии, и избави их Господь от руки пленяющих я. 17 Но и судий не послушаша, яко соблюдиша вслед богов иных и поклонишася им, и разгневаша Господа: и уклонишася с пути скоро, по немуже ходиша отцы их послушати заповедий Господних: не сотвориша тако. 18 И яко возстави им Господь судий, и бяше Господь с судиею, и спасе я от руки врагов их во вся дни судии: яко умилися Господь от въздыхания их, от лица воющих на ня и озлобляющих я. 19 И бысть егда умираше судия, и отвращахуся, и паки растлевахуся паче отец своих, идуще вслед богов иных служити им и поклонятися им: не отвергоша начинаний своих и не отступиша от путей своих жестоких. 20 И разгневался яростию Господь на Израиля и рече: понеже остави род сей завет Мой, егоже заповедах отцем их, и не послушаша гласа Моего, 21 и Аз не приложу изгнати мужа от лица их от сих языков, ихже остави Иисус сын Навин на земли и умре, 22 еже искушати в них Израиля, аще сохранят путь Господень ходити в нем, якоже сохраниша отцы их, или ни. 23 И остави Господь языки сия не истребити их вскоре, и не предаде их в руку Иисусову.

**3** И сия языки, яже остави Господь, да искусит ими Израиля, вся неведущыя браней Ханаанских, 2 токмо ради родов сынов Израилевых, еже научити я брани, обаче иже прежде их не уведаша их: 3 пять воеводств иноплеменных, и всего Хананея и Сидония, и Евеа живущаго в Ливане от горы Ваал-Ермон до Лавоемафа. 4 И бысть да искусит ими Израиля, да увестъ, аще послушают заповедий Господних, яже заповеда отцем их рукою Моисеовою. 5 И сынове

Израилевы обиташа посреде Хананеа и Хеттеа, и Аморреа и Ферезеа, и Евеа и Гергесеа и Иевусеа, 6 и пояша дщери их себе в жены, и дщери своя даша сыном их, и послужиша богом их. 7 И сотвориша сынове Израилевы злое пред Господем и забыша Господа Бога своего, и послужиша Ваалу и Дубравам. 8 И разгневался яростию Господь на Израиля и предаде их в руки Хусарсафема царя Месопотамии Сирския: и работаша сынове Израилевы Хусарсафему лет осмь. 9 И возопиша сынове Израилевы ко Господу. И возстави Господь спасителя Израилю, и спасе их, Гофониила, сына Кенеза брата Халеева юнейшаго его. 10 И бысть на нем Дух Господень, и суди Израиля. И изыде на рать к Хусарсафему: и предаде Господь в руке его Хусарсафема царя Сирска, и укрепися рука его над Хусарсафемом. 11 И бысть в покои земля четьредесять лет. И умре Гофониил сын Кенезов. 12 И приложиша сынове Израилевы сотворити злое пред Господем: и укрепи Господь Еглома царя Моавля на Израиля, занеже сотвориша злое пред Господем. 13 И собра к себе вся сыны Аммони и Амаликовы: и иде, и порази Израиля, и взя град Финическ. 14 И работаша сынове Израилевы Еглому царю Моавлю лет осмьнадесять. 15 И возопиша сынове Израилевы ко Господу: и возстави им Господь спасителя, Аода сына Гираня, сына Иемениина, мужа ободесноручна: и послаша сынове Израилевы дары рукою его Еглому царю Моавлю. 16 И сотвори себе Аод нож обоюдоостр, на пядь едину долгота его, и припяса его под ризу по бедре десней своей. 17 И иде, и принесе дары Еглому царю Моавлю: Еглом же муж добротелесен бе зело. 18 И бысть егда сконча Аод принося дары, и отсла носящих дары: 19 и Еглом



обратися от идол иже в Галгалех. И рече Аод: слово мне есть к тебе тайно, царю. И рече Еглом к нему: молчи. И отсла от себе всех предстоящих пред ним. 20 И Аод вниде к нему. Сей же седяше в горнице летней своей един. И рече Аод: слово Божие мне к тебе, царю. И воста Еглом со престола близ его. 21 И бысть егда воста, и простре Аод руку левую свою, и извлече нож, иже над стегном его десным, и вонзе во чрево егломово: 22 и втисне и рукоять за острием, и заключи тук за острием, яко не извлече ножа из чрева его, (и изыде лайно). 23 И изыде Аод в притвор, и пройде стрегущих, и затвори двери горницы за собою и заключи, 24 и сам изыде. И раби его приидоша и узреша, и се, двери горницы заключены, и реша: еда у потребности седит во отлучении ложа? 25 И преждаша дондеже посрамишася: и се, не бысть отверзаяй двери горницы. И взяша ключь, и отверзоша: и се, господин их лежит на земли мертв. 26 И Аод спасеся внегда смущахуся, и не бе помышляющаго о нем: а он прейде идолы, и спасеся в Сетирофе. 27 И бысть егда прииде Аод в землю Израилеву, и воструби рогом в горе Ефремли: и снидоша с ним с горы сынове Израилевы, и той пред ними. 28 И рече к ним: идите вслед мене, яко предаде Господь Бог враги наша Моавляны в руки наша. И идоша вслед его, и предвзяша преходы Иордана Моавля, и ни единому мужу попустиша преити. 29 И избиша Моава в то время яко десять тысяч мужей, вся воины, иже в них, и всякаго мужа сильна: и ни един муж спасеся. 30 И пременися Моав в той день под руку Израилеву, и бысть в покои земля осмьдесят лет: и суди их Аод дондеже умре. 31 И по нем

воста Самегар сын Анафов: и изби иноплеменников шесть сот мужей ралом воловым: и спасе и сей Израиля.

**4** И приложиша сынове Израилевы сотворити злое пред Господем: и Аод умре. **2** И отдаде их Господь в руку Иавина царя Ханаанска, иже царствова во Асоре. И воевода силы его Сисара, и той живяше во Арисофе языков. **3** И возопиша сынове Израилевы ко Господу, яко девять сот колесниц железных бяше ему: и той озлоби Израиля зело лет двадесять. **4** И Деввора, жена пророчица, жена Лафидофова, сия судяше Израилю в то время: **5** и сия живяше под Фиником Деввора между Рамою и между Вефилем, в горе Ефремли: и восхождаху сынове Израилевы к ней тамо на суд. **6** И посла Деввора, и призва Варака сына Авинеемля из Кедеса Неффалимова, и рече к нему: не заповеда ли тебе Господь Бог Израилев? И пойдеси в гору Фавор, и поймеси с собою десять тысящ мужей от сынов Неффалимних и от сынов Завулоних: **7** и приведу к тебе в водотечь Кисонь Сисару воеводу силы Иавини, и колесницы его, и множество (вой) его, и предам его в руки твоя. **8** И рече к ней Варак: аще пойдеси со мною, пойду, и аще не пойдеси со мною, не пойду: яко не вем дне, в оньже благоустроит Господь Ангела со мною. **9** И рече Деввора к нему: идущи пойду с тобою: обаче веждь, яко не будет тебе слава на пути, в оньже ты идеши: понеже в руку женску предаст Господь Сисару. И воста Деввора и поиде с Вараком до Кадиса. **10** И воззва Варак Завулону и Неффалима до Кадиса, и поидоша вслед его десять тысящ мужей, и иде с ним Деввора. **11** И Хавер Киней отлучися от Кены и от сынов Иовава, ужика Моисеова: и потче кущу свою под дубом Почивающих, иже есть при

Кедесе. 12 И возвестиша Сисаре, яко взыде Варак сын Авинеемль на гору Фавор. 13 И созва Сисара вся колесницы своя, девять сот колесниц железных, и вся люди иже с ним, от Арисофа языков в водотечь Кисонь. 14 И рече Деввора к Вараку: востани, яко сей день, в оньже предаде Господь Сисару в руку твою, зане Господь изыдет пред тобою. И сниде Варак с горы Фавор, и десять тысяч мужей вслед его. 15 И сотре Господь Сисару и вся колесницы его и весь полк его острием меча пред Вараком. И сниде Сисара с колесницы своя и побеже ногами своими. 16 И Варак гоняй вслед колесниц его и вслед полка, даже до Дубравы языков. И паде весь полк Сисарин острием меча: не остана ни един. 17 И Сисара убеже ногами своими в кущу Иаили, жены Хавера Кинеева: яко мир бяше между Иавином царем Асорским и между домом Хавера Кинеева. 18 И изыде Иаиль во сретение Сисаре и рече к нему: уклонися, господине мой, уклонися ко мне, не бойся. И уклонися к ней в кущу: и покры его одеждою своею. 19 И рече Сисара к ней: напой мя мало воды, яко возжаждах. И отреша мех млечный, и напои его, и покры его. 20 И рече к ней Сисара: стани во дверех кущи, и будет аще кто приидет к тебе, и спросит тя, и речет: есть ли zde муж? И речеши: несть. 21 И взя Иаиль, жена Хаверова, кол кущный, и взя млат в руку свою, и вниде к нему тихо, и водрузи кол во скрании его, и пронзе до земли: и сей утрудся спаше, и издше. 22 И се, Варак гоняй Сисару. И изыде Иаиль во сретение ему и рече ему: прииди, и покажу тебе мужа, егже ты ищещи. И вниде к ней, и се, Сисара лежаше мертв, и кол во скрании его. 23 И покори Господь Бог в той день Иавина царя Ханааня пред сыны Израилевыми:

24 и хождаше рука сынов Израилевых ходящи, и ожесточися на Иавина царя Ханаанска, дондеже истребиша его.

**5** И воспе Деввора и Варак сын Авинеемов в той день, и рече: 2 внегда начати вождом во Израили, и в произволении людий, благословите Господа. 3 Услышите, царие, и внушите, князи: аз Господеви воспою и пою Богу Израилеву. 4 Господи, во исходе Твоем от Сиира, внегда воздвизатися Тебе от села Едомова, земля потрясется, и небо возмутися, и облацы искапаша воду: 5 горы подвигошася от лица Господа Елои, тая Сина от лица Господа Бога Израилева. 6 Во дни Самегара сына Анафова, во дни Иаили, оскудеша путие, и идоша в пути кривы, и идоша в пути развращенны: 7 оскудеша жнвущии во Израили, оскудеша дондеже воста Деввора, дондеже воста мати во Израили: 8 избраша боги новы, яко хлеб ячен, тогда воеваша грады князей: щит не явися, ниже копие в четыредесяти тысящах во Израили. 9 Сердце мое на учиненная во Израили: сильнии людий, благословите Господа. 10 Ездящи на ослятех белых в полудне, и сидящи на судищи, и ходящи на пути сонмов, провещайте. 11 Глас плещущих посреде веселящихся: тамо дадят правду. Господи, правды укрепи во Израили: тогда разыдошася во грады своя людие Господни. 12 Востани, востани, Деввора: востани, востани, глаголи с песнию: востани, Вараче, и плени плен твой, сыне Авинеемль. 13 Тогда возвеличися сила Его: Господь смири мне крепльшыя мене. 14 Людие Ефремли утомиша их в долине: брат твой Вениамин в людех твоих: от мене Махир снидоша взыскующии, и от Завулونا укрепляющиися в скиптре повествования писменника. 15 И начальницы во Иссахаре с Девворою и Вараком: тако Варак

отпусти пеших своих в долину, в разделения Рувимова, велика испытания сердца. 16 Вскую ми седиши посреде мосфафемов, слышати звиздание воставающих проити в разделения Рувимля? Велия испытания сердца. 17 Галаад, об ону страну Иордана вселися: и Дан, вскую обитаеши в кораблех? Асир обита при брезех морских, и в разделениях своих вселися. 18 Завулон, людие укориша душу свою на смерть: и Неффалим на высотах села. 19 И приидоша к нему царие, и ополчишася, тогда воеваша царие Ханаанстии во Фанаахе, у воды Магеддо: множества сребра не взяша. 20 От небесе ополчишася звезды, от чина своего ополчишася с Сисарою. 21 Водотечь Кисонов изверже их, водотечь Кадимин, водотечь Кисонов: поперет его душа моя сильная. 22 Тогда отсекошася копыта конская от топтания сильных его. 23 Проклинайте Мазора, рече Ангел Господень, проклятием проклените живущих в нем, яко не приидоша в помощь Господню, в помощь (Господню) в сильных. 24 Да благословится в женах Иаиль, жена Хавера Кинеева, от жен в кущи да благословится: 25 воды проси у нея, и даде ему млеко в чаши: преимущих принесе масло кравие: 26 руку свою левую к колу простре, и десницу свою ко млату работающих, и уби Сисару: разби главу его, и порази, прободе скрания его: 27 между ногама ея повалися: паде утружден, и умре посреде ног ея, и тамо паде бедне. 28 Оконцем взираше мати Сисарина, окном сквозе решетку, что замедли колесница его приити? Вскую умедлиша стопы колесниц его? 29 Мудрии начелствующие ея отвещаша ей, и сама отвещаваше словеса своя себе: 30 не обрящут ли его разделяюща корысти, удружающа другом

на главу мужа сильна? Кориыти шаров Сисаре, кориыти шаров различия, шары испещренных, сия выи его кориыти. 31 Тако да погибнут вси врази Твои, Господи: и любящии Его, якоже восток солнца в силе своей. И бысть в покои земля четыредесять лет.

**6** И сотвориша сынове Израилевы злое пред Господем, и предаде их Господь в руку Мадиамлю седмь лет. 2 И укрепися рука Мадиамля на Израиля: и сотвориша себе сынове Израилевы от лица Мадиамля ограды в горах и в пещерах и в твердынех. 3 И бысть егда сеяше муж Израилев, и восходдаше Мадиам и Амалик и сынове восточнии, и восходдаху на него, 4 и ополчахуся на них, и разоряху плоды земныя, дондеже внити в Газу: и не оставляху бытия жизненнаго во Израили, и стад и телца и осла: 5 яко сами и скоти их восходдаху, и кущы их преношаху, и прихождаху яко пружи множеством, и самем и велблюдом их не бяше числа: и прихождаху на землю Израилеву разорити ю. 6 И обнища Израиль зело от лица Мадиамля. 7 И возопиша сынове Израилевы ко Господу: и бысть егда возопиша сынове Израилевы ко Господу Мадиама ради, 8 и посла Господь мужа пророка к сыном Израилевым, и рече им: сия глаголет Господь Бог Израилев: Аз есмь изведый вас из Египта, и изведох вас из дому работы: 9 и избавих вас от руки Египетския и от руки всех стужающих вам: и изгнах я от лица вашего, и дах вам землю их, 10 и рекох вам: Аз есмь Господь Бог ваш, не убойтесе богов Аморрейских, в нихже вы живете в земли их: и не послушасте гласа Моего. 11 И прииде Ангел Господень, и седе под дубом, иже есть во Ефрафе, иже бысть Иоаса отца Езри. И Гедеон сын его

млачаше пшеницу на гумне его, бежати от лица Мадиамя.

12 И явися ему Ангел Господень и рече к нему: Господь с тобою, сильный крепостию. 13 И рече к нему Гедеон: во мне, Господи мой: и аще есть Господь с нами, и вскую обретошаны вся злая сия? И где суть вся чудеса Его, елика поведаша нам отцы наши, глаголюще: не из Египта ли изведе нас Господь? И ныне отверже нас Господь и предаде нас в руку Мадиамя. 14 И воззре на него Ангел Господень и рече ему: иди в крепости твоей сей, и спасеши Израиля от руки Мадиами: и се, послах тя. 15 И рече к нему Гедеон: во мне, Господи, в чесом спасу Израиля? Се, тысяща моя хуждша в Манассии, и аз есмь мний в дому отца моего. 16 И рече к нему Господь: понеже аз буду с тобою, и избиеши Мадиама яко мужа единаго. 17 И рече к Нему Гедеон: и аще обретох благодать пред очима Твоима, и да сотвориши мне днесь знамение, яко Ты глаголеши со мною: 18 не отиди отсюда, дондеже приити мне к Тебе, и принесу жертву мою, и пожру пред Тобою. И рече: аз есмь, премедлю, дондеже обратишися ты. 19 И Гедеон вниде, и сотвори козлице от коз, и четверть ифи муки опресноков, и мяса вложи в кошницу, и юху вляя в горнец: и изнесе к Нему под дуб, и поклонися. 20 И рече к нему Ангел Господень: возми мяса и хлебы пресныя, и положи у камене онаго, и юху близ излий. И сотвори тако. 21 И простре Ангел Господень конец жезла, иже в руке его, и прикоснуса мясом и хлебом пресным: и возгореса огонь из камене, и пояде мяса и опресноки: и Ангел Господень отиде от очей его. 22 И виде Гедеон, яко Ангел есть Господень, и рече Гедеон: увы мне, Господи, Господи, яко видех Ангела Господня лицом к лицу. 23 И

рече ему Господь: мир тебе, и не бойся, не умрешь. 24 И созда тамо Гедеон жертвенник Господу, и назва его Мир Господень, даже до дне сего, еще суцу ему во Ефрафе отца Езри. 25 И бысть в ту ночь, и рече ему Господь: возми телца упитанного (от скотов) отца твоего, и телца второго седми лет, и разориши олтарь Ваалов, иже есть отца твоего, и дубраву, яже у него, да посечеши: 26 и да соградиши олтарь Господеви Богу твоему явившемуся тебе на верху (горы) маози во предчинии: и да поймеша телца второго и вознесеши всеожжения на древех дубравы, юже посечеши. 27 И поя Гедеон десять мужей от рабов своих, и сотвори, якоже заповеда ему Господь. И бысть яко убоися дому отца своего и мужей града, еже сотворити во дни, и сотвори нощию. 28 И обутрениваша мужие градстии заутра: и се, раскопан олтарь Ваалов, и дубрава яже у него посечена, и видеша телца второго вознесена на всеожжение на олтарь новосгражденный. 29 И рече муж к ближнему своему: кто сотвори вещь сию? И вопрошаху и искаху, и познаша, яко Гедеон сын Иоасов сотвори вещь сию. 30 И рекоша мужие градстии ко Иоасу: изведи сына твоего, и да умрет, яко раскопа олтарь Ваалов и яко посече дубраву яже над ним. 31 И рече Иоас к мужем воставшим на него: еда вы ныне суд глаголете о Ваале? Или вы его спасете? Иже аще кто сотвори обиду, да умрет до заутрия: аще Бог есть, да мстит себе, яко раскопа олтарь его. 32 И прозва его в той день Иероваалом, глаголя: да отмстит на нем Ваал, яко раскопа олтарь его. 33 И весь Мадиям и Амалик и сынове востоков снидошася вкупе, и преидоша (реку), и ополчисася в долине Иезраель. 34 И Дух Божий укрепил Гедеона, и воструби рогом,



и возопи Авиезер вслед его. 35 И посла послы ко всему Манассию, и созвася и сей вслед его. Посем посла послы во Асир и в Завулон и в Неффалим, и взыдоша во сретение им. 36 И рече Гедеон к Богу: аще Ты спасаеши рукою моею Израиля, якоже глаголал еси, 37 се, аз положу руно овчье на гумне: и аще будет роса на руне точию, и по всей земли суша, уразумею, яко спасеши рукою моею Израиля, якоже глаголал еси. 38 И бысть тако: и урани Гедеон наутрие, и исцеди руно, и истече роса из руна, исполнен окрин воды. 39 И рече Гедеон к Богу: да не разгневается ярость Твоя на мя, и возглаголю еще единою, и искушу еще единою руном: да будет суша на руне токмо, и по всей земли да будет роса. 40 И сотвори Бог тако в нощи той: и бысть суша на руне токмо, и по всей земли бысть роса.

**7** И обутренева Иероваал, сей есть Гедеон, и вси людие иже с ним, и ополчишася у источника Арад: и полк Мадямль и Амаликов бяше ему с севера на холме Мосе Гавааф-Аморе в долине. 2 И рече Господь к Гедеону: мнози людие иже с тобою, сего ради не предам Мадиама в руку их, да не когда похвалится Израиль на Мя, глаголя: рука моя спасе мя: 3 и ныне рцы во уши людем, глаголя: кто боязлив и ужастив, да возвратится и да отидет от горы Галаадовы. И возвратишася от людий двадесять две тысящы, и десять тысящ ошашася. 4 И рече Господь к Гедеону: еще людие мнози суть: сведи я на воду, и искушу тебе их тамо: и будет егоже аще реку тебе, сей да идет с тобою, той да пойдет с тобою: и всяк егоже аще реку тебе, сей да не пойдет с тобою, той да не пойдет с тобою. 5 И сведи люди на воду, и рече Господь к Гедеону: всяк иже полочет языком своим от воды, якоже

лочет пес, да поставиши его особь: и всяк иже на колену падет пити, отлучи его особь. 6 И бысть число в горстех локавших языком триста мужей: и вси оставшии людие преклонишася на колена своя пити воду. 7 И рече Господь к Гедеону: трети сты мужей локавшими воду спасу вас, и предам Мадиама в руку твою: и вси людие да пойдут, кийждо на место свое. 8 И взяша себе брашно от людей в руку свою и роги своя: и всякаго мужа Израилтеска отпусти коегождо в кущу свою, а триста мужей удержа: полк же Мадиамль бяше ниже его в долине. 9 И бысть в ту ночь, и рече к нему Господь: востав сними отсюда скоро в полк, яко предах их в руку твою: 10 и аще боишися ты снити, сними ты и Фара раб твой в полк, 11 и услышиши, что возглаголют: и по сем укрепятся руце твои, и снидеши в полк. И сниде сам и Фара раб его в часть пятьдесятников, иже быша в полце. 12 И Мадиам и Амалик и вси сынове востоков стояху в долине яко пружи множеством, и велблюдом их не бяше числа, но бяху яко песок на краи морстем множеством. 13 И вниде Гедеон, и се, муж поведаше сон подругу своему, и рече: сей сон егоже видех, и се, тесто хлеба ячна валяющееся в полце Мадиамли, и привалися к кущи Мадиамли, и поби ю, и преврати ю, и паде куща. 14 И отвеца подруг его и рече: несть (сие тесто), но мечь Гедеона сына Иоасова мужа Израилева: предаде Бог в руку его Мадиама и весь полк. 15 И бысть яко услыша Гедеон поведание сна и разсуждение его, и поклонися Господеву, и возвратися в полк Израилев и рече: востаните, яко предаде Господь в руки наша полк Мадиамль. 16 И раздели триста мужей на три началства, и вдаде роги в руце всем, и водоносы тщы, и свещы среде

водоносов, 17 и рече им: мене смотрите, и такожде творите: и се, аз вниду в часть полка, и будет якоже сотворю, такожде сотворите: 18 и аз вострублю рогом, и вси иже со мною, да вострубите и вы в роги окрест всего полка, и да речете: (мечь) Богу и Гедеону. 19 И вниде Гедеон и сто мужей иже с ним в часть полка в начале стражи средняя: и убужением возбудиша стрегущих, и вострубиша в роги, и сразиша водоносы иже в руках их. 20 И вострубиша три началства в роги и сокрушиша водоносы, и удержаша в левых руках своих свещы, и в десных руках их роги, в няже трубити: и возопиша: мечь Господеви и Гедеону. 21 И сташа кийждо о себе окрест полка: и смятеса весь полк, и возопиша, и побегоша. 22 И вострубиша в триста рогов: и положи Господь мечь мужа на подруга его во всем полце, и пробеге полк до Вифасетта, и собрася до страны Авелмаула и к Тавафу. 23 И возопиша мужие Израилтестии от Неффалима и от Асира и от всего Манассии, и погнаша вслед Мадиама. 24 И посла послы Гедеон во всю гору Ефремлю, глаголя: снитите во сретение Мадиаму и удержите им воду до Вефира и Иордана. И воззва всяк муж Ефремль, и предотяша воду до Вефира и Иордана, 25 и яша два князя Мадиамя, Орива и Зива: и убиша Орива в Суре, и Зива убиша во Иакефзиве: и погнаша Мадиама, и главу Орива и Зива принесоша к Гедеону от оная страны Иордана.

**8** И рекоша к Гедеону мужие Ефремли: что сие сотворил еси нам, яко не позвал еси нас, егда ходил воевати на Мадиама? И пряхуся с ним сильно. 2 И рече к ним (Гедеон): что сотворих ныне якоже вы? Не лучше ли гроздец Ефремль, нежели обрание винограда Авиезерова? 3 В руку вашу

предаде Господь князи Мадиамли, Орива и Зива: и что  
возмогах сотворити якоже вы? Тогда утолися дух их от него,  
егда глагола им слово сие. 4 И прииде Гедеон ко Иордану, и  
прейде сам и иже с ним триста мужей, алчни и утруждени  
гоняще. 5 И рече мужем Сокхофским: дадите хлебы на пищу  
мужем сим иже со мною, яко алчни суть: аз же гоню вслед  
Зевеа и Салмана, царей Мадиамских. 6 И рекоша князи  
Сокхофстии: еда рука Зевеа и Салмана ныне в руце твоей,  
яко дадим воем твоим хлебы? 7 И рече Гедеон: не тако: но  
егда предаст Господь Зевеа и Салмана в руку мою, аз сотру  
плоти ваша тернием пустынным и волчцами. 8 И взыде  
оттуда во Фануил и глагола к ним такожде. И отвещаша ему  
мужие Фануили, якоже отвещаша ему мужие Сокхофстии. 9  
И рече Гедеон мужем Фануилским, глаголя: егда возвращуся  
с миром, раскопаю столп сей. 10 И Зевей и Салман быша в  
Каркаре, и полк их с ними до пятнадцать тысяч (мужей)  
оставшихся от всего полка сынов восточных: и умерших  
бяхе сто и двадесять тысяч мужей держащих оружие. 11 И  
взыде Гедеон путем живущих в куцах от востоков прямо  
Навы и Иегевала: и избил полк, полк же бяхе надежен. 12  
И побегоста Зевей и Салман: и гна вслед их, и поима оба  
царя Мадиамля, Зевеа и Салмана, и весь полк их смяте. 13  
И возвратися Гедеон сын Иоасов от рати прежде восхода  
солнца, 14 и ят отрочища от мужей Сокхофских и вопросы  
его: и вписа от него имена князей Сокхофских и старейшин  
их, седмидесяти и семи мужей. 15 И прииде Гедеон ко  
князем Сокхофским и рече им: се, Зевей и Салман, ихже  
ради укористе мя, глаголюще: еда рука Зевеа и Салмана  
ныне в руце твоей, яко дадим мужем твоим утруждшымся

хлебы? 16 И поя князи и старейшины града, и терние от пустыни и волчцы, и сотре ими мужы Сокхофски: 17 и столп Фануилев раскопа, и изби мужы градския. 18 И рече к Зевею и Салману: каковы мужие, ихже избисте в Фаворе? И реша: якоже ты, тако они, подобен ты еси им, яко подобие сынов царевых. 19 И рече Гедеон: братия моя и сынове матере моя суть: жив Господь, аще бысте живили их, не убил бых вас. 20 И рече Иеферу первенцу своему: востав убий их. И не извлече отрочищ меча своего: зане убояся, яко млад бяше. 21 И рече Зевей и Салман: востани убо ты, и сопротивися нам: зане яко муж сила его. И воста Гедеон, и уби Зевеа и Салмана: и взя украшения, яже на выях велблюдов их. 22 И рекоша мужие Израилстии ко Гедеону: владей нами и ты, и сынове твои, и сынове сынов твоих, яко ты спасл еси нас от руки Мадиамли. 23 И рече к ним Гедеон: не возобладаю аз вами, и не возобладает сын мой вами: Господь да владеет вами. 24 И рече к ним Гедеон: попрошу у вас прошения, и да даст мне всяк муж усерязь от плена своего: яко усерязи златы (мнози) и бяху им, зане Исмаилтяне бяху. 25 И рекоша: дающе дадим. И простре ризу, и ввергоша ту мужие по и усерязю от плена своего. 26 И бысть вес усерязь златых, ихже испроси, тысяща и седьмь сот сикль злата, кроме плениц и монист (енфофовых), и риз багряных, яже на царех Мадиамлих, и кроме чепей златых, яже на выях велблюдов их. 27 И сотвори от них Гедеон ефуд, и постави его во граде своем во Ефрафе. И соблуди весь Израиль по нем тамо: и бысть Гедеону и всему его дому в соблазн. 28 И смирися Мадиам пред сыны Израилевыми, и не приложиша воздвигнути главы

своея. И бысть в покои земля четыредесять лет, во дни Гедеоновы. 29 И иде Иероваал сын Иоасов, и седе в дому своем. 30 И Гедеону быша седьдесят сынов, изшедшии от чресл его, яко жены бяху многи ему. 31 И подложница его яже в Сикиме и сия роди ему сына, и нарече имя ему Авимелех. 32 И умре Гедеон сын Иоасов в старости блазе, и погребесе во гробе Иоаса отца своего, во Ефрафе, отца Езриева. 33 И бысть егда умре Гедеон, и совратишася сынове Израилевы и соблудиша вслед Ваалима, и сотвориша себе со Ваалверифом завет, да им будет бог: 34 и не воспомянуша сынове Израилевы Господа Бога своего, избавльшаго их из руки всех враг их окрестных: 35 и не сотвориша милости с домом Иеровааловым, сей есть Гедеон, по всей благостыни его, юже сотвори со Израилем.

**9** И поиде Авимелех сын Иероваалов в Сихем ко братии матери своея и глагола к ним и ко всему сродству дому отца матери своея, глаголя: 2 глаголите во уши всех мужей Сихемских: что лучше вам, еже владети вами седмидесяти мужем всем сыном Иеровааловым, или владети вами мужу единому? И помяните, яко кость ваша и плоть ваша есмь аз. 3 И глаголаша братия матери его о нем во уши всех мужей Сихемских вся словеса сия. И уклонися сердце их вслед Авимелеха, рекоша бо: брат наш есть. 4 И даша ему седьдесят сребреник от дому Ваалверифа: и ная ими Авимелех мужей праздных и скитающихся, и поидоша вслед его. 5 И вниде в дом отца своего во Ефрафу, и избратию свою, сыны Иеровааловы, седьдесят мужей, на камени едином, и остана Иоафам сын Иероваал юнейший, зане скрыся. 6 И собращася вси мужие Сихемстии и весь

дом Маалов, и поидоша, и поставиша Авимелеха царем у дуба стана, иже в Сихемех. 7 И поведаша Иоафаму, и пойде, и ста на версе горы Гаризин: и воздвиже глас свой, и воззва, и рече им: послушайте мене, мужие Сихемстии, и да услышит вас Бог. 8 Идуще идоша древа помазати себе царя и реша масличине: буди нам царь. 9 И рече им масличина: еда оставивши тучность мою, юже во мне прослави бог и человецы, пойду владети древами? 10 И рекоша древа смоковнице: прииди, царствуй над нами. 11 И рече им смоковница: еда оставивши мою сладость и плод мой благий, пойду владети древами? 12 И рекоша древа к лозе виноградней: прииди, буди нам царь. 13 И рече им лоза виноградная: еда оставивши вино мое, веселящее бога и человеки, пойду владети древами? 14 И рекоша вся древа тернию: прииди, буди нам царь. 15 И рече терние ко древам: аще по истине помазуете себе царя мене над вами, приидите и внидите под сень мою: аще ли же ни, да изыдет огонь из терния и пояст кедры Ливанския. 16 И ныне аще по истине и по совершенству сотвористе, и постависте Авимелеха царем, и аще благо сотвористе со Иероваалом и с домом его, и аще по воздаянию руки его сотвористе ему, 17 якоже воева отец мой по вас, и поверже душу свою в страну, и избави вас от руки Мадиамли: 18 и вы востасте на дом отца моего днесь и избисте сыны его, семьдесят мужей, на едином камени, и постависте царем Авимелеха сына рабыни его над мужи Сикимскими, яко брат ваш есть: 19 и аще по истине и по совершенству сотвористе со Иероваалом и домом его днесь, благословени вы будите, и возвеселитесь о Авимелесе, и той о вас да возвеселится: 20 аще же ни, да изыдет огонь от

Авимелеха и пояст мужы Сикимски и дом Мааллонь: и да изыдет огонь от мужей Сикимских и от дому Мааллоня и да пояст Авимелеха. 21 И избеже Иоафам, и побеже, и пойде в Виру, и вселися тамо от лица Авимелеха брата своего. 22 И облада Авимелех во Израили три лета. 23 И посла Бог дух зол между Авимелехом и между мужи Сикимскими: и возгнушашася мужие Сикимстии домом Авимелеховым, 24 еже навести неправду седмидесяти сынов Иероваалих и крови их возложить на Авимелеха брата их, иже уби их, и на мужы Сикимски, яко укрепиша руце его избити братию свою: 25 и поставиша нань мужие Сикимстии подсады на версех гор, и разграбляху всех идущих к ним на пути. И возвестися сие Авимелеху. 26 И прииде Гаал сын Аведов и братия его, и преидоша в Сикиму, и уповаша на него мужие Сикимстии: 27 и изыдоша на село, и обраша винограды своя, и изгнетоша, и сотвориша лики: и ходиша во храм богов своих, и ядоша и пиша, кленуща Авимелеха. 28 И рече Гаал сын Аведов: кто есть Авимелех, и кто есть сын Сихемль, яко да поработаем ему? Не сын ли Иеровааль, и Зевул страж его раб его с мужи Еммора отца Сихемля? И почто имама работати ему? 29 И кто даст люди сия в руку мою? И преставлю Авимелеха, и реку ко Авимелеху: умножи силу твою, и изыди. 30 И услыша Зевул князь града словеса Гаала сына Аведова, и разгневался яростию: 31 и посла послы ко Авимелеху отай, глаголя: се, Гаал сын Аведов и братия его приидоша в Сихему, и се, сии обседят на тя град: 32 и ныне востани нощию ты и людие иже с тобою, и засяди до заутрия на селе: 33 и будет рано, егда възыдет солнце, обутрееши и протягнешися ко граду: и се, той и людие иже с ним изыдут к тебе, и сотвориши ему,



елико возможет рука твоя. 34 И воста Авимелех и вси людие, иже с ним, нощию, и заседоша на Сихем на четьри части. 35 И бысть завтра, и изыде Гаал сын Аведов и ста пред дверию врат градских. И воста Авимелех и людие, иже с ним, от засады. 36 И виде Гаал сын Аведов люди и рече к Зевулу: се, народ людей исходит с верхов гор. И рече к нему Зевул: стень гор ты видиши яко мужы. 37 И приложи еще Гаал глаголати и рече: се, людие исходят при мори от высоты земли, и полк един идет путем дубравы Маоненим. 38 И рече к нему Зевул: и где суть ныне уста твоя глаголющая: кто есть Авимелех, яко поработаем ему? Не сии ли суть людие, яже ты уничтожил еси? Изыди убо ныне, и ополчися противу их. 39 И изыде Гаал пред мужы Сихемски, и ополчися противу Авимелеху: 40 и погна его Авимелех, и побеже от лица его: и падоша язвеннии мнози даже до врат градских. 41 И вниде Авимелех во Ариму: и Зевул изгна Гаала и братию его, да не живут в Сихеме. 42 И бысть наутрие, и изыдоша и людие на поле, и поведаша Авимелеху: 43 и взя людей, и раздели их на три части, и засяде на селе: и виде, и се, людие изыдоша из града, и воста на ня, и изби их. 44 И Авимелех и начальницы, иже с ним, протягошася и сташа у дверей врат градских: и две части пролияшася на вся, яже на селе, и избиша я. 45 Авимелех же добываше града весь день той, и взя град, и люди иже в нем изби, и разори град, и посея в нем соль. 46 И услышаша сие вси мужие столпа Сихемля и внидоша в твердь дому (бога) Вефилвериф. 47 И возвестися Авимелеху, яко собращася вси мужие столпа Сихемска. 48 И възыде Авимелех на гору Селмон сам и вси людие, иже с ним: и взя Авимелех секиру в руку свою, и усече ветвь от древа, и

воздвиги ю, и возложи на раму свою: и рече людем иже с ним: еже видесте мя творяща, сотворите скоро якоже и аз.

**49** И усекоша вси людие ветвия и взяша, и поидоша вслед Авимелеха, и возложиша на твердыню, и запалиша на них твердыню огнем: и изомроша вси людие столпа Сихемска до тысящи мужей и жен. **50** И иде Авимелех в Фивис и обсяде его, и взя его: **51** и столп бе тверд среде града, и вбегоша ту вси мужие и жены и вси старейшины града, и заключишася и взыдоша на кров столпа: **52** и прииде Авимелех до столпа, и супротивишася ему: и приступи Авимелех ко вратом столпа, еже запалити его огнем: **53** и сверже жена едина уломок жерновный на главу Авимелеха, и сокруши ему темя: **54** и возопи скоро Авимелех ко отроку носящему сосуды его и рече ему: извлецы мечь твой и убий мя, да не рекут, яко жена уби его. И прободе его отрок его, и умре. **55** И видеша мужие Израилстии, яко умре Авимелех: и отидоша кийждо на свое место. **56** И воздаде Бог зло Авимелеху, еже сотвори отцу своему, убив семьдесят братий своих: **57** и всяку злобу мужей Сихемлих обрати Бог на главы их: и взыде на ня клятва Иоафама сына Иероваала.

**10** И воста по Авимелесе спасти Израиля Фола сын Фуи, сын брата отца его, муж от Иссахара: и сей живяше в Самире в горе Ефремове, **2** и суди Израиля лет двадесять три, и умре, и погребен быти в Самире. **3** И воста по нем Иаир Галаадитин, и суди Израиля лет двадесять два: **4** и быша ему сынове тридесять два ездящии на тридесяти двух ослах: и грады им тридесять два: и прозываху их грады Иаиравы, даже до днесь, иже суть в земли Галаадове: **5** и умре Иаир, и погребен бысть в Камоне. **6** И приложиша сынове Израилевы

творити злое пред Господем и послужиша Ваалимам и Астарофам и богом Сирским и богом Сидонским и богом Моавлским и богом сынов Аммоних и богом иноплеменников: и оставиша Господа и не работаша Ему. 7 И разгневался Господь яростию на Израиля и предаде их в руку Филистимску и в руку сынов Аммоних. 8 И озлобиша, и сокрушиша сынов Израилевых в то время осмьнадесять лет, всех сынов Израилевых, иже об ону страну Иордана в земли Аморреа иже в Галааде. 9 И преидоша сынове Аммони Иордан воевати на Иуду и Вениамина и на дом Ефремов: и оскорблени быша сынове Израилевы зело. 10 И возопиша сынове Израилевы ко Господу, глаголюще: согрешихом Тебе, яко оставихом Бога нашего и работахом Ваалиму. 11 И рече Господь к сыном Израилевым: не от Египта ли и от Аморреа и от сынов Аммоних и от Филистима 12 и от Сидонян и от Амалика и от Мадиама, иже стужиша вам, и возописте ко Мне, и спасох вы от руки их? 13 Вы же остависте Мене и работасте богом иным: сего ради не приложу спасти вас: 14 идите и возопийте к богом, ихже избрасте себе, и тии да спасут вы во время скорби вашей. 15 И реша сынове Израилевы ко Господу: согрешихом, сотвори ты нам по всему, елико угодно пред очима Твоима: точию избави нас в сей день. 16 И извергоша боги чуждые от среды себе и послужиша Господеви единому: и сжался душа Его о утруждении Израилеве. 17 И взыдоша сынове Аммони, и ополчишася в Галааде: и собращася и сынове Израилевы, и ополчишася в Массифе. 18 И реша людие князи Галаадстии кийждо ко ближнему своему: муж, иже начнет битися с сынми Аммоновыми, той будет князь всем живущим в Галааде.

**11** И быше Иеффай Галаадитянин силен крепостию: и той бысть сын жены блудницы, яже роди Галааду Иеффая. **2** И роди жена Галаадова сынов ему: и возмужаша сынове жены и изгнаша Иеффая, и рекоша ему: не наследиси в дому отца нашего, яко сын жены блудныя еси ты. **3** И отбеже Иеффай от лица братии своя и вселися в земли Тов: и собирахуся ко Иеффаю мужие праздни, и хождуху с ним. **4** И бысть по днех сих, и воеваша сынове Аммони на Израиля. **5** И егда воеваша сынове Аммони на Израиля, и поидоша старейшины Галаадовы пояти Иеффая от земли Тов, **6** и рекоша ко Иеффаю: прииди и буди нам начальник, и ополчимся на сыны Аммони. **7** И рече Иеффай старейшинам Галаадским: не вы ли возненавидесте мя, и изгнасте мя из дому отца моего, и отпустисте мя от себе? И почто приидосте ко мне ныне, егда нужду возиместе? **8** И рекоша старейшины Галаадстии ко Иеффаю: сего ради ныне приидохом к тебе, да пойдеши с нами, и ополчимся на сыны Аммони: и будеши нам князь всем живущым в Галааде. **9** И рече Иеффай ко старейшинам Галаадовым: аще возвращаете мя ополчитися на сыны Аммони, и предаст их Господь предо мною, и аз вам буду ли князь? **10** И рекоша старейшины Галаадстии ко Иеффаю: Господь да будет послух между нами, аще по слову твоему тако не сотворим. **11** И поиде Иеффай со старейшинами Галаадскими, и поставиша его людие над собою главу и князя: и глагола Иеффай вся словеса своя пред Господем в Массифе. **12** И посла Иеффай послы к царю сынов Аммоних, глаголя: что мне и тебе, яко пришел еси ко мне воевати на земли моей? **13** И рече царь сынов Аммоних к послом Иеффаевым: яко взя Израиль землю мою, егда

изыде из Египта, от Арнона даже до Иавока и до Иордана: и ныне возврати ю с миром, и отиду. 14 И возвратишася послы ко Иеффаяу. И приложи еще Иеффай, и посла послы к царю сынов Аммоних, и рекоша ему: 15 тако глаголет Иеффай: не взя Израиль земли Моавли и земли сынов Аммоних, 16 понеже егда исхождаше из Египта, пойде Израиль по пустыни до моря Чермнаго, и прииде до Кадиса: 17 и посла Израиль послы к царю Едомску, глаголя: да прейдю сквозе землю твою: и не послуша царь Едомск: такожде посила и к царю Моавску, и не восхоте: и седе Израиль в Кадисе: 18 и иде пустынею, и обыде землю Едомлю и землю Моавлю, и прииде на востоки солнца земли Моавли, и ополчися об ону страну Арнона, и не вниде в пределы Моавли, яко Арнон бяше предел Моавль: 19 и посла Израиль послы к Сиону царю Amorрейску, царю Есевонску, и рече к нему Израиль: да преидем по земли твоей до места нашего: 20 и не восхоте Сион Израилю преити по пределом своим, и собра Сион вся люди своя, и ополчися во Иасе, и воева на Израиля: 21 и предаде Господь Бог Израилев Сиона и вся люди его в руки Израиля, и избил их: 22 и наследова Израиль всю землю Amorрея живущаго на земли той: и взя весь предел Amorрейск от Арнона даже до Иавока, и от пустыни до Иордана: 23 и ныне Господь Бог Израилев изгна Amorрея от лица людей Своих Израиля, и ты ли хочещи наследити его? 24 Ни, но елико даде в наследие тебе Хамос бог твой, сия да наследити: а всех, ихже изгна Господь Бог наш от лица нашего, сия мы наследим: 25 и ныне еда лучший еси ты Валака сына Сепфорова, царя Моавля? Не бранию ли борящеся со Израилем, или воюя воева его? 26

Егда вселися Израиль во Есевоне и в пределех его, и во Ароире и в пределех его, и во всех градах, иже у Иордана, триста лет, и почто не избавил еси их во время оно? 27 Аз же не согреших тебе, и ты твориши со мною зло, воюя на мя: да судит Господь судяй днесь между сыны Израилевыми и между сыны Аммони. 28 И не послуша царь сынов Аммоних словес Иеффавых, яже посылаше к нему. 29 И бысть на Иеффаи Дух Господень, и прейде Галаада и Манассию, и прейде Стражбу Галаадову, и от Стражбы Галаадовы иде на ону страну сынов Аммоних. 30 И обеща Иеффай обет Господеви и рече: аще преданием предаси сыны Аммони в руку мою, 31 и будет исходяй, иже аще изыдет из врат дому моего во сретение мне, егда возвращуся с миром от сынов Аммоних, и будет Господеви, и вознесу его во всесожжение. 32 И прииде Иеффай к сыном Аммоним воевати на ня: и предаде я Господь в руце его 33 и изби их от Ароира, дондеже приити в Мениф, двадесять градов, и даже до Авеля Виноградов, язвою великою зело. И покорени быша сынове Аммони пред лицом сынов Израилевых. 34 И прииде Иеффай в Массифу в дом свой: и се, дщерь его исхождаше во сретение его с тимпаны и лики: и сия бяше едиnorodна ему возлюбленна: и не бе ему сына, ни другия дщере, кроме ея. 35 И бысть егда увиде ю сам, растерза ризы своя и рече: о, дщи моя, смущающи смутила мя еси: и ты ныне в претыкание была еси пред очима моима: аз бо отверзох уста моя на тя ко Господу и не возмогу вспясть возвратити. 36 И рече к нему: отче, аще отверзл еси уста твоя ко Господу, сотвори мне, якоже изыде изо уст твоих, занеже сотвори тебе Господь месть врагом твоим от сынов Аммоних. 37 И

рече ко отцу своему: сотвори, отче мой, сие слово: остави мя два месяца, да пойду и взыду на горы и плачуся девства моего аз и другини мои. 38 И рече: иди. И отпусти ю на два месяца: и иде сама и другини ея, и плакася девства своего на горах. 39 И бысть в конце двою месяцу, и возвратися ко отцу своему: и сотвори на ней обет свой, имже обещася: и сия не позна мужа. И бысть в повеление во Израили: 40 от дний до дний исхождаху дщери Израилевы плакати о дщери Иеффая Галаадитина четыре дни в лете.

**12** И собрашася мужие Ефремели и приидоша в Сефину, и реша Иеффая: почто ходил еси ополчитися на сыны Аммони, и нас не позвал еси ити с тобою? Дом твой с тобою сождем огнем. 2 И рече к ним Иеффай: имех прю аз и людие мои, и сынове Аммони оскорбиша мене зело: и воззвах вас, и не избависте мене от руки их: 3 и видех, яко не бяхе спасающаго, и положих душу мою в руку мою, и приидох к сыном Аммоним, и предаде я Господь в руку мою: и вскую приидосте ко мне днесь, ополчити ли ся на мя? 4 И собра Иеффай вся мужы Галаадски и ополчися на Ефрема: и избиша мужие Галаадстии Ефрема, понеже глаголаху: уцелевшии от Ефрема, вы Галаад среде Ефрема и среде Манассии. 5 И засяде Галаад проходы у Иордана Ефремовы. И бысть егда реша уцелевшии от Ефрема: преидем: и рекоша им мужие Галаадстии: еда ли от Ефрема вы? И реша: несмы. 6 И реша им: рцыте, клас. И не управиша рещи тако: и имаху их, и закалаху у преходов Иорданих: и падоша в то время от Ефрема четыредесять и две тысящы. 7 И суди Иеффай Израилеви лет шесть: и умре Иеффай Галаадитин, и погребен бысть во граде своем в Галааде. 8

И суди по нем Израилеви Есевон от Вифлеема: 9 и быша ему тридесять сыны и тридесять дщери, яже отдаде вон (мужем), и тридесять жен приведе сыном своим отвне: и суди Израилеви семь лет: 10 и умре Есевон, и погребен бысть в Вифлееме. 11 И суди по нем Израилеви Елон Завулонянин десять лет: 12 и умре Елон Завулонянин, и погребен бысть во Елиме в земли Завулони. 13 И суди по нем Израилеви Авдон сын Еллихов Фарафонитин: 14 и быша ему четыредесять сынове и тридесять внуцы, ездящии на седмидесяти ослех: и суди Израилеви осмь лет: 15 и умре Авдон сын Еллихов Фарафонитин, и погребен бысть в Фарафоне, в земли Ефремли, в горе Амаликове.

**13** И приложиша еще сынове Израилевы творити зло пред Господем: и предаде я Господь в руку Филистимску четыредесять лет. 2 И бяше муж един от Сарай, от племене Данова, имя же ему Маное: и жена ему бяше неплоды и не раждаше. 3 И явися Ангел Господень к жене и рече к ней: се, ты неплоды и не раждала еси, и зачнеши и родиши сына: 4 и ныне блюдися, и не пий вина и сикера, и не яждь всякаго нечистаго: 5 яко се, ты во утробе приимеши и родиши сына: и железо на главу его не въздет, яко назорей Богови будет сие отроча от чрева: и сей начнет спасати Израиля из руки Филистимли. 6 И вниде жена и рече мужу своему, глаголющи: человек Божий прииде ко мне, и образ его яко образ Ангела Божия, страшен зело: и вопрошах его, откуда еси? И имене своего не поведа ми, 7 и рече мне: се, ты во утробе зачнеши и родиши сына: и ныне не пий вина, ни сикера, и не яждь всякаго нечистаго, яко назорей Богу будет отрочищь от утробы даже до дне смерти своея. 8 И



помолился Маное ко Господу и рече: во мне, Господи, человек Божий, егоже послал еси, да приидет еще к нам и наставит ны, что сотворим отрочати раждающемуся. 9 И послуша Бог молитвы Маноевы: и прииде паки Ангел Божий к жене, сия же седяше на селе, и Маное муж ея не бяше с нею. 10 И потщася жена, и текши скоро поведи мужу своему, и рече к нему: се, явися мне муж, иже приходил в день он ко мне. 11 И востав иде Маное вслед жены своея, и прииде к мужу и рече ему: ты ли еси муж глаголавый к жене (моей)? И рече Ангел: аз. 12 И рече Маное: ныне убо да приидет слово твое, кий будет суд отрочате, и что дела его? 13 И рече Ангел Господень к Манюю: от всех, яже глаголах к жене, да сохранится: 14 от всего, еже исходит из винограда, да не яст, и вина и сикера да не пьет, и всякаго нечистаго да не яст: и вся, елика заповедах ей, да хранит. 15 И рече Маное ко Ангелу Господню: да удержим тя zde, и сотворим пред тобою козлище от коз. 16 И рече Ангел Господень к Манюю: аще мя понудиши, не буду ясти хлеба твоего: но аще сотвориши всесожжение Господеви, то вознеси е. Не ведяше бо Маное, яко Ангел Господень той. 17 И рече Маное ко Ангелу Господню: что имя твое? Да егда сбудется слово твое, прославим тя. 18 И рече ему Ангел Господень: почто сие вопрошаеши имене моего? И то есть чудно. 19 И взя Маное козлища от коз и жертву, и вознесе на камень Господеви чудная творящему: Маное же и жена его зряста. 20 И бысть егда пламень възде выше олтаря даже до небесе, и възде Ангел Господень в пламени олтаря: Маное же и жена его смотряста, и падоста лицом своим на землю. 21 И не приложи ктому Ангел Господень явится Манюю и жене

его. Тогда уведи Маное, яко Ангел Господень есть. 22 И рече Маное к жене своей: смертию умрем, яко Бога видехом. 23 И рече ему жена его: аще бы хотел Господь умертвити нас, не бы взял от рук наших всесожжения и жертвы, и не бы показал нам сих всех, и не бы слышана сия сотворил нам якоже ныне. 24 И роди жена сына, и нарече имя ему Сампсон. И возмужа отроча, и благослови е Господь: 25 и нача Дух Господень ходити с ним в полце Данове, посреде Сараи и посреде Есфаола.

**14** И сниде Сампсон во Фамнафу и виде жену во Фамнафе от дщерей Филистимских, и угодна бысть пред ним. 2 И взыде и поведи отцу своему и матери своей, и рече: жену видех во Фамнафе от дщерей Филистимских, и ныне поимите ю мне в жену. 3 И рече ему отец его и мати его: еда несть дщерей от братии твоея и от всех людей моих жены, яко ты идеши пояти жену от дщерей иноплеменников необрезанных? И рече Сампсон ко отцу своему: сию поими мне, яко та угодна есть пред очима моима. 4 Отец же его и мати его не разумеша, яко сие от Господа есть, яко отмщения он ищет от Филистимлян: в то бо время владыку Филистимляне сыны Израилевыми. 5 И сниде Сампсон и отец его и мати его во Фамнафу, и приидоша до винограда Фамнафа: и се, львичиць рыкаюць во сретение ему. 6 И сниде на него Дух Господень, и растерза его яко козлища от коз, и ничтоже бяше в руку его: и не поведи отцу своему и матери своей, еже сотвори. 7 И поидоша и рекоша жене, и угодна бысть пред очима Сампсона. 8 И возвратися по днех пояти ю, и обратися видети труп львов, и се, рой пчел во устех львовых и мед: 9 и изья его от уст его в руце свои, и

идяше идый и ядый: и поиде ко отцу своему и матери своей, и даде им, и ядоша: и не поведа им, яко от уст львовых изя сей мед. 10 И сниде отец его к жене, и сотвори Сампсон тамо пир седмь дний, яко тако творят юношы: 11 и бысть внегда бояться им его, приставиша к нему тридесять друзей, и быша с ним: 12 и рече им Сампсон: предлагаю ныне вам гадание, и аще отгадающе поведите мне сие в седмь дний пира и обряцете, дам вам тридесять поняв и тридесять риз одежд: 13 аще же не возможете сие поведати мне, дадите вы мне тридесять поняв и тридесять риз изменных. И рекоша ему: предложи гадание твое, и услышим е. 14 И глагола им: от ядуцаго ядомое изыде, и от крепкаго изыде сладкое. И не могоша поведати гадания до трех дний. 15 И бысть в день четвертый, и рекоша жене Сампсонове: прельсти мужа своего, и да повесть тебе гадание, да не сождем тя и дом отца твоего огнем: или оубожити призвасте ны? 16 И плакася жена Сампсонова пред ним и рече: разве возненавидел еси мене и не возлюбил еси мене, яко гадания, еже еси предложил сыном людий моих, не поведал еси его мне. И рече ей Сампсон: се, отцу моему и матери моей не поведах сего, и тебе ли повем? 17 И плакася пред ним седмь дний, в няже бе им пир. И бысть в день седмый, и поведа ей, яко стужи ему: и та поведа сыном людий своих. 18 И рекоша ему мужие градстии в день седмый прежде зашествия солнца: что слаждше меда? И что креплее льва? И рече им Сампсон: аще не бысте орали юницею моею, не бысте уведали гадания моего. 19 И нападе на него Дух Господень, и сниде во Аскалон, и изби тамо тридесять мужей, и взя ризы их, и даде ризы поведавшым гадание. И разгневался

яростию Сампсон, и взыде в дом отца своего. 20 Жена же Сампсонова иде за инаго мужа, иже бысть един от друзей его.

**15** И бысть по днех во дни жатвы пшеницы, и посети Сампсон жену свою, несый козлище от коз, и рече: да вниду к жене моей в ложницу. И не даде ему отец ея внити. 2 И рече отец ея, глаголя: рех, яко ненавидя возненавидел еси ю, и отдах ю единому от друзей твоих: не се ли сестра ея меньшая добрейши ея есть? Да будет тебе ныне вместо ея. 3 И рече ему Сампсон: чист есмь ныне от Филистимлян, яко сотворю аз с ними зло. 4 И поиде Сампсон, и ят триста лисиц, и взя свещы, и связа ошиб ко ошибу, и устрои едину свещу между двема ошибома: 5 и разжже огонь в свещах, и пусти я в нивы Филистимски: и запали нивы от гумен и даже до класов простых и до винограда и масличия. 6 И рекоша иноплеменницы: кто сотвори сия? И рекоша: Сампсон зять Фамнафеев, яко взя жену его и даде ю единому от друзей его. И взыдоша иноплеменницы и сожгоша ю и дом отца ея огнем. 7 И рече им Сампсон: аще и сотвористе вы тако ей, аз не благоизволю, но отмщение мое единому комуждо вас сотворю, и посем почю. 8 И порази их голени до бедр язвою велию: и сниде, и вселися у водотечи в пещере камене Итама. 9 И изыдоша Филистимляне, и ополчисяся во Иуде, и разсеяшася в Лехи. 10 И рече им всяк муж Иудин: почто приидосте на ны? И рекоша иноплеменницы: связати Сампсона приидохом и сотворити ему, якоже сотвори нам. 11 И снидоша три тысящы мужей от Иуды к пещере камене Итама и рекоша к Сампсону: не веси ли, яко владеют нами Филистимляне? И вскую сия сотворил еси нам? И рече

им Сампсон: якоже ми сотвориша, тако сотворих им. 12 И рекоша ему: связати тебе приидохом и предати тя в руке иноплеменником. И рече им Сампсон: кленитесь мне, да не убиете мене вы. 13 И рекоша ему, глаголюще: ни, но токмо союзом свяжем тя и предадим тя в руки их, смертью же не умертвим тебе. И связаша его двема ужы новыми и изведоша его от камене того. 14 И той прииде до Челюсти: иноплеменницы же воскликнуша и текоша противу ему. И сниде на него Дух Господень, и быша узя на мышцах его яко изгребие, егда зажжется огнем: и разрешишася узы его от руку его: 15 и обрете челюсть ослею повержену, и простре руку свою, и взя ю: и изби ею тысящу мужей. 16 И рече Сампсон: челюстию ослею потребляя потребих их, яко челюстию ослею избих тысящу мужей. 17 И бысть егда преста глаголя, и поверже челюсть от руки своея: и нарече место тое Избиение Челюстное. 18 И возжажда зело, и возопи ко Господу, и рече: Ты благоволил еси в руке раба Твоего спасение великое сие, и ныне умираю жажду, и впаду в руки необрезанных. 19 И разверзе Бог язву на Челюсти, и изыде из нея вода, и пи: и возвратися дух его, и оживе: сего ради прозвася имя ей Источник призывающаго, иже есть в Челюсти, даже до дне сего. 20 И суди Израиллю во дни Филистимлян двадесять лет.

**16** И иде Сампсон в Газу, и виде тамо жену блудницу и вниде к ней. 2 И поведаша Газяном, глаголюще: прииде Сампсон семо. И обыдоша и подседоша ему всю ночь у врат градных, и утаишася всю ночь, глаголюще: дондеже освещает утро, и убием его. 3 И спа Сампсон до полунощи: и воста в полунощи, и восхити двери у врат града со обеими

верями, и подя оныя с заворю, и возложи я на рамена своя, и вознесе я на верх горы, яже пред лицом Хеврона, и положи их тамо. 4 И бысть по сем, и возлюби жену от водотечи Сориховы: имя же ей Далида. 5 И взыдоша к ней князи иноплеменничи и рекоша ей: прельсти его, и виждь, в чем есть крепость его великая, и чим преожем его, и свяжем его, яко смирити его: и мы тебе дадим кийждо тысящу и сто сребреников. 6 И рече Далида к Сампсону: повеждь ми ныне, в чем крепость твоя (так) великая, и чим свяжешися и смиришися? 7 И рече ей Сампсон: аще свяжут мя седмию тятивами сырыми неистлевшими, и изнемогу, и буду яко един от человек. 8 И принесоша ей князи от иноплеменник седмь тятив мокрых неистлевших, и связа его ими: 9 и подсада ему седяше в храмине. И рече ему: иноплеменницы на тя, Сампсоне. И расторже тятивы, аки бы кто расторгнул соскание изгребий, егда коснется ему огонь: и не уведася крепость его. 10 И рече Далида к Сампсону: се, прельстил еси мя, глаголя ко мне лжу: ныне убо повеждь ми, чим свяжешися? 11 И рече к ней: аще вяжуще свяжут мя ужы новыми, имиже не делано, и изнемогу, и буду яко един от человек. 12 И взя Далида ужы новы и связа его ими, и рече ему: иноплеменницы на тя, Сампсоне. Подсада же седяше в храмине. И расторже я от руку своею аки нить. 13 И рече Далида к Сампсону: даже до ныне прельщал мя еси и глаголал ко мне лжу: повеждь ми убо, чим свяжешися? И рече ей: аще сплетеш седмь плениц влас главы моея спрядением и вбиеш коллом в стену, и буду немощен яко един от человек. 14 И успи Далида его на коленех своих, и бысть внегда уснути ему, взя Далида седмь плениц влас

главы его и сплете спрядением и вонзе колом в стену, и рече: иноплеменницы на тя, Сампсоне. И возбну от сна своего и исторже кол сплетением из стены, и не уведася крепость его. 15 И рече к нему Далида: како глаголеши, возлюбих тя, и сердце твое несть со мною? Се, третье прельстил еси мя, и не поведал еси мне, в чем крепость твоя великая. 16 И бысть егда стужи ему словесы своими по вся дни, и убеди его, и изнеможе даже до умертвия. 17 И поведи ей все сердце свое, и рече к ней: железо не възиде на главу мою, яко назорей есмь аз Господу от утробы матери моея: аще убо обриюся, отступит от мене крепость моя, и изнемогу, и буду якоже вси человецы. 18 И виде Далида, яко поведи ей все сердце свое, посла и призва князи иноплеменничи, глаголющи: възидите еще единою, яко поведи ми все сердце свое. И възидоша к ней вси князи иноплеменничи, и принесоша сребро в руках своих. 19 И успи Далида Сампсона на коленех своих: и призва стригача, и остриже семь плениц влас главы его: и нача смиратися, и отступи крепость его от него. 20 И рече Далида: иноплеменницы на тя, Сампсоне. И возбудися от сна своего и рече: изыду якоже и прежде, и отрясуся. И не разуме, яко Господь отступи от него. 21 И яша его иноплеменницы, и избодоша ему очи, и введоша его в Газу, и оковаша его путы медяны: и бяше меля в храмине темничней. 22 И начаша власы главы его расти по острижении. 23 И князи иноплеменничи собращася пожрети жертву велику Дагону богу своему и возвеселитися, и рекоша: предаде бог наш в руки наша Сампсона врага нашего. 24 И видеша его людие, и похвалиша бога своего, яко реша: предаде бог наш в

руки наша врага нашего, опустошившаго землю нашу, и иже умножи язвенных наших. 25 И бысть егда возблажа сердце их, и рекоша: призовите Сампсона из дому темничнаго, и да играет пред нами. И призваша Сампсона из дому темничнаго, и играша пред ними: и заушаху его, и поставиша его между столпы. 26 И рече Сампсон ко юноши держащему его за руку: остави мене, да осяжу столпы, на нихже дом сей утвержден есть, и опруся на них. Юноша же сотвори тако. 27 Дом же бяше полн мужей и жен, и тамо вси князи иноплеменничи: на крове же том до трех тысяч мужей и жен, зряще ругаемаго Сампсона. 28 И воззва Сампсон ко Господу и рече: Адонаи Господи, Господи Сил, помяни мя ныне, и укрепи мя еще единою, Боже, да воздам мщение едино за два ока моя Филистимом. 29 И объя Сампсон оба столпа средния, на нихже храмина бяше утверждена, и опреся на них, держа един рукою десною, а другой левою. 30 И рече Сампсон: да умрет душа моя со иноплеменники. И преклонися крепостию, и паде храмина на князи и на вся люди иже в ней: и бысть мертвых, ихже умертви Сампсон при смерти своей, множае неже ихже умертви в животе своем. 31 И снидоша братия его и весь дом отца его, и взяша его: и въздоша, и погребоша его между Сарай и между Есфаолом во гробе Маноя отца его. И сей суди Израилю лет двадесять. (и воста по Сампсоне Емегар сын Енань, и уби от иноплеменников шесть сот мужей кроме скота, и спасе и он Израиля.)

**17** И бысть муж от горы Ефремли, и имя ему Миха: 2 и рече матери своей: тысяща и сто сребреников иже украдены у тебе, и заклнала мя еси и глаголала еси во уши мои:



се, серебро у мене, аз взял е. И рече мати его: благословен сын мой Господеви. 3 И отдаде тысящу и сто сребреников матери своей. И рече мати его: освящающи освятих серебро Господеви от руки моея, тебе сынови моему сотворити (кумир) изваян и слиян, и ныне отдам е тебе. 4 И отдаде серебро матери своей. И взя мати его двести сребреников и даде их среброделю, и сотвори тое (кумир) изваян и слиян: и бысть в дому Михи. 5 И дом Михин ему дом Божий. И сотвори ефуд и ферафин: и наполни руку единому от сынов своих, и бысть ему жрец. 6 В тыя же дни не бяше царя во Израили: кийждо муж, еже право видяшеся пред очима его, творяше. 7 И бысть юноша от Вифлеема Иудина и от рода племени Иудина, и сей левитин, и обиташе тамо: 8 и поиде сей муж от града Вифлеема Иудина обитати, идеже обрящет место: и прииде до горы Ефремли и даже до дому Михина, еже сотворити путь свой. 9 И рече ему Миха: откуда идеши? И рече ему левитин: аз есмь от Вифлеема Иудина, и иду обитати, идеже обрящу место. 10 И рече ему Миха: седи со мною и буди ми отец и жрец, и аз дам тебе сребреников десять в год и двои ризы, и яже на житие тебе. 11 И поиде левит, и нача обитати у мужа. И бысть юноша ему яко един от сынов его. 12 И наполни Миха руку левитину, и бысть ему юноша жрец, и бяше в дому Михи. 13 И рече Миха: ныне уведех, яко благосотворит мне Господь, яко бысть мне левитин жрец.

**18** В тыя дни не бяше царя во Израили: и в тыя дни племя Даново искаше себе наследия вселитися, яко не паде ему наследие до дний оных среде племен сынов Израилевых. 2 И послаша сынове Дановы от сонмов своих пять мужей от

части своя, мужы сильны от Сараи и Есфаола, соглядати землю и изследити ю, и рекоша к ним: идите и изследите землю. И приидоша до горы Ефремли, до дому Михина, и сташа тамо в дому Михи. 3 И тии познаша глас юноши левитина, и уклонишася тамо, и рекоша ему: кто тя приведе семо? И что твориши в месте сем? И что тебе zde? 4 И рече им: сице и сице сотвори мне Миха, и ная мя, и бых ему жрец. 5 И рекоша ему: вопроси убо Бога, и увемы, аще благопоспешится путь наш, в онъже мы идем. 6 И рече им жрец: идите с миром: пред Господем путь ваш, в онъже идете. 7 И идоша пять мужие и приидоша в Лаис: и видеша людей живущих в нем, сидящих со упованием по обычаю Сидонян, в тишине и надежде, и не бе устрашаяй, или посрамляй словесе на земли, наследник истязуяй сокровища: зане далече бяху от Сидонян, и не имяху словесе с киим либо человеком. 8 И приидоша пять мужей ко братии своей в Сараю и Есфаол и рекоша братии своей: что вы седите? 9 И реша: встаните, и въздем на ня, зане видехом землю, и се, блага зело, и вы молчите: не обленитесь ити и внити еже наследити землю: 10 и егда приидете, внидете в люди живуцья со упованием, а земля пространна: яко предаде ю Бог в руки ваша, место на немже несть скудости во всем еже на земли. 11 И воздвигошася оттуду от племени Данова, от Сараи и Есфаола, шесть сот мужей препоясани во оружие ополчения, 12 и въздоша и ополчишася в Кариафиариме во Иуде: сего ради наречеса место то полк Данов и до сего дне: се создади Кариафиарима. 13 И преидоша оттуду в гору Ефремлю и приидоша до дому Михина. 14 И отвецаша пять мужей ходившии соглядати землю Лаис и рекоша ко братии

своей: разумеете ли, яко есть в дому сем ефуд и ферафин, и изваяно и слияно? И ныне уведите, что сотворите. 15 И уклонишася тамо и внидоша в дом юноши левитина, в дом Михин, и вопросиша его в мире. 16 И шесть сот мужей препоясани во оружие ополчения своего, стояще у дверей вратных, иже от сынов Дановых. 17 И взыдоша пять мужей ходивших соглядати землю: и вшедше тамо взяша изваяно, и ефуд и ферафин, и слияное: жрец же стояше у дверей вратных, и шесть сот мужей препоясани во оружие воинско: 18 и сии внидоша в дом Михин и взяша ефуд и ферафин, и слияно и изваяно. И рече к ним жрец: что вы творите? 19 И реша ему: умолчи, положи руку твою на уста твоя и пойдй с нами, и буди нам отец и жрец: еда уне есть тебе быти жерцу единого мужа дому, нежели быти жерцу племени и дому и сонма Израилева? 20 И возблажа сердце жреческо, и взя ефуд и ферафин, и изваяное и слияное, и вниде посреде людий. 21 И возвратишася и отидоша, и пустиша пред собою чада и притяжание свое честное. 22 Удалившымся же им от дому Михина, и се, Миха и мужие иже в жилищах, яже с домом Михиным быша, воззваша и постигоша сыны Дановы, 23 и возопиша к сыном Дановым: и обратиша сынове Дановы лица своя и реша к Михе: что есть тебе, яко воззвал еси? 24 И рече Миха: яко изваяное мое, еже сотворих, взясте, и жерца, и пойдосте: и что мне еще? И что сие глаголете мне: что вопиеша? 25 И рекоша ему сынове Дановы: да не услышится ныне глас твой вслед нас, да не востанут на вы мужие лютою душею, и положиши душу твою и душу дому твоего. 26 И идоша сынове Дановы в путь свой. И виде Миха, яко сильнейшии суть паче его, и возвратися в

дом свой. 27 И сынове Дановы взяша, елика сотвори Миха, и жерца, иже бяше у него, и приидоша в Лаис, к людем молчащым и уповаущым надежду, и избиша их острием меча, и град сожгоша огнем: 28 и не бяше избавляяй, яко далече бяху от Сидонян, и словесе не бяше им с человеком: и сей (град бысть) во удолии Дому Роовля: и соградиша град и вселишася в нем, 29 и нарекоша граду имя Дан, во имя Дана отца своего, иже родися Израилю: и бяше прежде имя граду Лаис. 30 И поставиша себе сынове Дановы изваяное: Ионафан же сын Гирсонь сын Манассиин, той и сынове его бяху жерцы племени Данову до дне преселения земли: 31 и поставиша себе изваяное, еже сотвори Миха, во вся дни, в няже бяше дом Божий в Силоме.

**19** И бысть в тыя дни не бяше царя во Израили: и бысть муж левитин живый во стране горы Ефремовы, и поя себе жену подложницу от Вифлеема Иудина: 2 и разгневался нань подложница его, и отиде от него в дом отца своего в Вифлеем Иудин, и бе тамо четыре месяцы: 3 и воста муж ея и иде вслед ея глаголати в сердце ея, обратити ю к себе и привести паки к себе: и отрок его с ним, и двое ослят: она же введе его в дом отца своего: 4 и виде его отец отроковицы и изыде с веселием во сретение его, и удержал его тесть его отец отроковицы, и пребысть с ним три дни, и ядоша и пиша, и спаша тамо. 5 И бысть в день четвертый, и обутреша заутра, и воста поити. И рече отец отроковицы к зятю своему: укрепи сердце твое укрухом хлеба, и по сем пойдете. 6 И седоша, и ядоша оба вкупе и пиша. И рече отец отроковицы к мужу: иди ныне и преспи, и возблажает сердце твое. 7 И воста муж поити: и понуди его тесть его, и

седе, и пребысть тамо. 8 И воста рано в пятый день да идет. И рече отец отроковицы: укрепи убо сердце твое хлебом, и пребуди дондеже преклонится день. И ядоша и пища оба. 9 И воста муж да идет сам и подложница его и отрок его. И рече ему тесть его отец отроковицы: се, уже преклонися день к вечеру, пребуди zde, и возблажает сердце твое, и обутреете утро в путь ваш, и отидеши в селение свое. 10 И не изволи муж пребыти, и воста и отиде: и прииде даже прямо Иевусу, сей есть Иерусалим, и с ним двое ослят с бремены, и подложница его с ним. 11 И приидоша до Иевуса, и день преклонися к вечеру зело: и рече отрок ко господину своему: гряди убо, да уклонимся во град сей Иевус и пребудем в нем. 12 И рече к нему господин его: не уклонимся во град чуждь, в немже несть от сынов Израилевых, но преждем до Гаваона. 13 И рече ко отроку своему: гряди, да приступим ко единому от мест Гаваонских и пребудем в Гаваоне или в Раме. 14 И минуша, и идоша, и зайде им солнце близ Гаваона, иже есть Вениаминь: 15 и уклонишася тамо внити превитати в Гаваоне, и внидоша и седоша на стогнах града: и не бе муж вводяй их в дом превитати. 16 И се, муж стар идяше с дела своего из поля в вечер, и сей муж от горы Ефремли, и той обиташе в Гаваоне: и мужие места сынове Вениамини. 17 И возвед очи свои, виде мужа путника на стогнах градных, и рече муж старец: камо идеши и откуда грядеши? 18 И рече к нему: грядем мы от Вифлеема Иудина даже до стран горы Ефремли, отнюдуже аз есмь: и ходих до Вифлеема Иудина, и иду аз в дом мой: и несть мужа вводящаго мя в дом: 19 а плевы и пища ослятом нашим есть, и мне хлеб и вино есть, и отроковице и отроку: рабом

твоим несть скудно ни коея вещи. 20 И рече муж стар: мир тебе: и весь недостаток твой на мне, обаче на стогнах не лязи. 21 И введе его в дом свой, и даде место ослятом его: и омыша ноги своя, и ядоша и пиша. 22 Егда же возвеселися сердце их, и се, мужие градстии сынове беззаконников обыдоша дом биюще в двери, и реша мужу господину дому старцу, глаголюще: изведи мужа иже вниде в дом твой, да познаем его. 23 И изыде к ним муж господин дому и рече: ни, братия, не сотворите зла мужу сему повнегда внити ему в дом мой, и не сотворите безумия сего: 24 се, дочь моя дева, и подложница его: изведу их, и смирите их, и сотворите им еже благо пред очима вашима: а мужу сему не сотворите словесе безумия сего. 25 И не изволиша мужие послушати его. И взя муж подложницу его и изведе ю к ним вон: и познаша ю и ругашася над нею всю ночь даже до утра, и отпустиша ю, егда възыде денница. 26 И прииде жена к заутрию, и паде у дверей дому, идеже бяше муж ея, до разсветания. 27 И воста муж ея заутра, и отверзе двери дому и изыде поити в путь свой: и се, жена его подложница лежаше при дверех дому, и руце ея на преддверии. 28 И рече к ней: востани, да идем. И не отвеща ему, бяше бо мертва. И возложи ю на осля, и воста муж и пойде на место свое. 29 И прииде в дом свой, и взя нож, и взя подложницу свою, и раздроби ю по удесем ея на дванадесять частей, и посла я во вся племена Израилева. 30 И бысть всяк видящий глаголаше: не бысть, ни видено бе сице от дне изшествия сынов Израилевых от земли Египетския даже до дне сего. И заповеда мужем, ихже посла, глаголя: сице глаголите ко

всему Израилю: аще бысть по словеси сему? Уставите сами себе о ней совет и глаголите.

**20** И изыдоша вси сынове Израилевы, и собращася весь сонм яко един муж, от Дана и до Вирсавии, и земля Галаадска к Господеву в Массифу, **2** и сташа пред лицем Господним вся племена Израилева в сонме людей Божиих, четыреста тысяч мужей пеших воздвигающих оружия. **3** И услышаша сынове Вениамини, яко въздоша сынове Израилевы в Массифу, и рекоша сынове Израилевы: глаголите, где бысть злоба сия? **4** И отвеща муж левитин, муж жены уморенья, глаголя: в Гаваон Вениаминь приидох аз и подложница моя витати: **5** и восташа на мя мужие Гаваонстии и обыдоша мя во дворе нощию, и хотеша мя убити, и подложницу мою обидеша и обругаша, и умре: **6** и взях подложницу мою и раздробих ю, и послах ю во вся пределы наследия Израилева, яко сотвориша безумие во Израили: **7** се, вси вы сынове Израилевы, дадите себе слово и совет zde. **8** И восташа вси людие яко един муж, глаголюще: не отидет муж в селение свое, и не возвратится муж в дом свой: **9** и ныне слово сие, еже сотворим Гаваону: въздем на него по жребию, **10** токмо возмем по десяти мужей от ста во всех племенех Израилевых, и сто от тысящи, и тысяща от тмы, взяти брашно людем исходящим в Гаваю Вениаминю, сотворити ему по всему согрешению, еже сотвори во Израили. **11** И собращася вси мужие Израилевы ко граду, яко един муж из градов исходяще, **12** и послаша племена Израилева мужей во все племя Вениамине, глаголюще: кая злоба сия бывшая в вас? **13** И ныне дадите мужей беззаконных, иже в Гаваи, сынов велиаловых, и умертвим их,

и очистим зло от Израиля. И не изволиша сынове Вениамини послушати гласа братии своєю сынов Израилевых. 14 И собращася сынове Вениамини от градов своих в Гаваю, изыти на брань к сыном Израилевым. 15 И сочтошася сынове Вениамини от градов в той день двадесять и пять тысяч мужей воздвигающих оружия, кроме живущих в Гаваи: 16 ихже сочтеса семь сот мужей избранных от всех людей ободесноручных: сии вси пращницы мещуще камень ко власу и не погрешающе. 17 И всех мужей Израилевых сочтеса, кроме сынов Вениаминовых, четыреста тысяч мужей воздвигающих оружие: вси сии мужие воины. 18 И восташа, и взыдоша в Вефиль, и вопросиша Бога, и рекоша сынове Израилевы: кто от нас взыдет в начале воевати на сыны Вениамини? И рече Господь: Иуда в начале да взыдет вождь. 19 И восташа сынове Израилевы заутра и ополчишася на Гаваю. 20 И изыде всяк муж Израилев на брань с Вениамином, и сразишася с ними мужие Израилевы на брани у Гаваи. 21 И изыдоша сынове Вениаминовы из Гаваи, и избиша во Израили в той день двадесять две тысячи мужей на земли. 22 И укрепися всяк муж Израилев, и приложиша снитися на брань на место, идеже снидошася в день первый. 23 И взыдоша сынове Израилевы и плакашася пред Господем до вечера, и вопросиша Господа, глаголюще: аще приложим еще приступити на брань к сыном Вениаминим братьям нашим? И рече Господь: взыдите к ним. 24 И приидоша сынове Израилевы к сыном Вениаминим в день второй. 25 И изыдоша сынове Вениамини противу им от Гаваи в день второй, и избиша еще от сынов Израилевых осмнадцать тысяч мужей на земли: сии вси воздвигающии



оружие. 26 И взыдоша вси сынове Израилевы и вси людие, и приидоша в Вефиль, и плакашася, и седоша тамо пред Господем, и постишася в той день даже до вечера: 27 и вознесоша всесожжение спасения пред Господем, яко тамо кивот завета Господа Бога во дни оны, 28 и Финеес сын Елеазара сына Аароня предстоя пред ним в тыя дни. И вопросиша сынове Израилевы Господа, глаголюще: аще приложим взыти еще на брань к сыном Вениаминим братиям нашим, или оставим? И рече Господь: взыдите, завтра предам их в руки ваша. 29 И поставиша сынове Израилевы подсаду окрест Гаваи. 30 И взыдоша сынове Израилевы к сыном Вениаминим в день третий: и ополчишася на Гаваю яко единою и единою. 31 И изыдоша сынове Вениамини противу людем и протягошася из града, и начаша убивати людий уязвленных, якоже первое и второе на путех, от нихже есть един сходяй в Вефиль, а другой в Гаваю на селе, яко тридесять мужей во Израили. 32 И рекоша сынове Вениамини: падают пред нами якоже и прежде. И сынове Израилевы рекоша: побежим и отторгнем их от града на пути. И сотвориша тако. 33 И вси мужие Израилевы востаха от места своего и снидошася в Ваал-Фамаре: подсада же Израилева находаше от места своего от запада Гаваи. 34 И приидоша противу Гаваи десять тысящ мужей избранных от всего Израиля, и брань бяше тяжка: и тии не разумеша, яко постизает их зло. 35 И порази Господь Вениамина пред сыны Израилевыми: и избиша сынове Израилевы от Вениамина в той день двадесять пять тысящ и сто мужей: сии вси воздвизаху оружие. 36 И видеша сынове Вениамини, яко поражени суть. И даша место сынове Израилевы Вениамину,

понеже уповаша на подсаду, юже подсадиша у Гаваи: **37** и подвижеся подсада, и устремися на Гаваю, и избиша весь град острием меча. **38** И Израилтяне имяху знамение с подсадою брани, явити знамение дыма из града. **39** И возвратися Израиль на брань, и Вениамин нача убивати язвёных во Израили до тридесяти мужей, яко рекоша: паки падением падают пред нами, якоже и первая брань. **40** И знамение възиде наипаче над градом, аки столп дыма: и озресе Вениамин вспять, и се, възиде скончание града до небеси. **41** И муж Израилев возвратися: и потщася мужие Вениамини, видеша бо, яко постиже их зло, **42** и побегоша пред сыны Израилевыми на путь пустыни, брань же постиже их, и иже из градов избиваша их среде себе: **43** и побиваху Вениамина, и гнаша его от Нуа вслед его до Гаваи без опочивания, и поразиша его даже противу Гаваи на восток солнца. **44** И падоша от Вениамина осмьнадесять тысящ мужей, сии вси мужие сильнии. **45** И озрешася оставшии, и побегоша в пустыню к каменю Реммоню: и пожаша от них сынове Израилевы по стезям яко стеблие пять тысящ мужей, и гнаша вслед их до Гадаама и избиша от них две тысящы мужей. **46** И быти всех падших от Вениамина в той день двадесять пять тысящ мужей воздвигающих оружие, вси сии мужие сильнии. **47** И озрешася оставшии, и вбегоша в пустыню к каменю Реммоню шесть сот мужей, и седеша в камени Реммони четыри месяцы. **48** Сынове же Израилевы возвратишася к сыном Вениаминим, и избиша я оружием от града вне, даже и до скота, и все еже обретеся во всех градех, и грады вся обретшыся пожгоша огнем.

**21** И сынове Израилевы кляшася в Массифе, глаголюще: муж от нас да не даст Вениамину дочери своя в жену. **2** И приидоша людие в Вефиль и седеша тамо до вечера пред Богом: и воздвигоша глас свой, и плакашася плачем велиим, и рекоша: **3** вскую, Господи Боже Израилев, бысть сице днешь во Израили, еже оскудети от Израиля племени единому? **4** И бысть на утрия, и обутреша людие, и соградиша тамо олтарь, и вознесоша всеожжение спасения, и рекоша сынове Израилевы: **5** кто не взыде в сонм от всех племен Израилевых ко Господу? Яко велика клятва бяше не вшедшым ко Господу в Массифу, глаголюще: смертью да умрет. **6** И умилишася сынове Израилевы о Вениамине брате своем, и рекоша: изсечено днешь едино племя от Израиля: **7** что сотворим оставшымся о женах? И мы кляхомся Господем не дати им от дочерей наших в жены. **8** И рекоша: кто един от племен Израилевых, иже не взыде ко Господу в Массифу? И се, ни един прииде в полк от Иависа Галаадова в сонм. **9** И соглядаша людий, и се, не бяше тамо мужа от живущих во Иависе Галаадове. **10** И послаша тамо сонм дванадесять тысяч мужей от сынов силы и заповедаша им, глаголюще: идите и избийте живущыя во Иависе Галаадове оружием жены и народы: **11** и сие сотворите: всяк мужеский пол и всяку жену, познавшую ложе мужеско, побиете: девицы же снабдите. И сотвориша тако. **12** И обретоша от живущих во Иависе Галаадове четыре ста отроковиц дев, яже не познаша ложа мужеска: и приведоша я в полк в Силом, иже есть в земли Ханаани. **13** И послаша весь сонм и глаголаша к сыном Вениаминовым, иже в камени Реммони, и призваша их с миром. **14** И возвратися Вениамин к сыном

Израилевым в то время, и даша им сынове Израилевы жены, яже живо сохраниша от дочерей Иависа Галаадова: и угодно бысть им тако. 15 И людие умилишася о Вениамине, яко сотвори Господь истребление в племенех Израилевых. 16 И рекоша старейшины сонма: что сотворим оставшим о женах? Яко погибе от Вениамина жена: 17 и како будет наследие уцелевших от Вениамина, да не погибнет племя от Израиля? 18 И мы не возможем дати им жен от дочерей наших, яко кляшася сынове Израилевы, глаголюще: проклят даяй жену Вениамину. 19 И рекоша: се, праздник Господень в Силоме от дний во дни, иже есть от севера Вефиля, на восток солнца на пути восходящем от Вефиля в Сихем, и от юга Левоны. 20 И заповедаша сыном Вениаминим, глаголюще: идите и засядите в виноградех, 21 и узрите, и се, егда изыдут дочери живущих в Силоме плясати в лики, да изыдете из виноградов и восхитите муж жену себе от дочерей Силомлих, и идите на землю Вениаминю: 22 и будет егда приидут отцы их или братия их судитися к нам, и речем им: помилуйте нас ими, яко не взя муж жены своя в полце: понеже вы не дали есте им яко жребий, согрешисте. 23 И сотвориша тако сынове Вениамини, и пояша жены по числу своему от пляшущих, яже восхитиша: и отидоша и возвратишася в наследие свое, и создаша грады и вселишася в них. 24 И отидоша оттуду сынове Израилевы в то время, муж во племя свое и в род свой: и изыде оттуду муж в наследие свое. 25 И в тыя дни не бяше царя во Израили: муж еже угодно пред очима его, творяше.

# Книга Руфи

**1** И бысть внегда судяху судии, бысть глад на земли. И иде муж от Вифлеема Иудина обитати в селе Моавли, сам и жена его, и два сыны его: **2** имя же мужеви Елимелех, имя же жене его Ноемминь и имя двема сынома его Маалон и Хелеон, Ефрафейстии от Вифлеема Иудина. И приидоша в село Моавле, и беша тамо. **3** И умре Елимелех муж Ноемминин, и остася она и оба сыны ея: **4** и пояста себе жены Моавитския: имя единой Орфа и имя второй Руфь: и жиша тамо до десяти лет. **5** И умроста оба сыны ея, Маалон и Хелеон, и остася жена от мужа своего и от обоих сынов ея. **6** И воста она и обе снохи ея, и возвратишася с села Моавля: зане услыша на селе Моавли, яко присети Господь людей Своих дати им хлебы. **7** И отиде от места, идеже бе, она и обе снохи ея с нею, и идяху в путь возвратитися в землю Иудину. **8** И рече Ноемминь обема снохама своим: идите убо, возвратитесь каяждо в дом отца своего: да сотворит Господь с вами милость, якоже сотвористе со умершими и со мною: **9** да даст Господь Бог вам обрести покой коейждо в дому мужа своего. И целова я: они же воздвигоша гласы своя и плакашася, **10** и рекоша ей: ни, но идем с тобою в люди твоя. **11** И рече Ноемминь: обратитесь убо, дочери мои, вскую идете со мною? Или еще мне сынове во утробе моей, и будут вам мужи? **12** Возвратитесь убо, дочери мои и отидите, яко состарехся, и не буду мужу: аще же бых и рекла, яко у мене есть надежда, да буду мужу и рожду сыны, **13** вы ли пождете их, дондеже возрастут? И вы ли удержитесь, да не будете иному мужу? Ни, дочери мои, яко горько бысть мне паче вас, яко изыде на мя рука Господня. **14** И воздвигоша

гласы своя, и плакаша паки. И целова Орфа свекровь свою, и возвратися в люди своя, Руфь же последова ей. 15 И рече Ноемминь к Руфь: се, возвратися ятровь твоя к людям своим и к богом своим, возвратися убо и ты вслед ятрове своея. 16 И рече Руфь: не срящи мене то, еже оставити тебе или обратитися мне от тебе, но идеже идеши ты, и аз пойду, и идеже водворишися ты, водворюся и аз: людие твои людие мои, и Бог твой Бог мой: 17 и идеже аще умреш, умру и тамо погребуся: тако да сотворит мне Господь, и сия да приложит, яко смерть разлучит между мною и тобою. 18 Видевши же Ноемминь, яко укрепися она ити с нею, умолче глаголати к ней ктому. 19 Идосте же обе, дондеже приидосте в Вифлеем. И бысть егда приидосте они в Вифлеем, и возгласи весь град о них, и рекоша: еда сия есть Ноемминь? 20 И рече к ним: не зовите убо мене Ноемминь, но зовите мене Горька: яко исполни мя горести Вседержитель зело: 21 аз исполнь отидох, и ныне тщу мя возврати Господь: и вскую мя нарицаете Ноемминь, Господь смири мя и Вседержитель озлоби мя? 22 И возвратися Ноемминь и Руфь Моавитиня сноха ея с нею, обращающыяся с села Моавля: и приидосте в Вифлеем в начале жатвы ячменя.

**2** И бе муж знаемый мужу Ноемминю: муж же силен от рода Елимелехова, имя же ему Вооз. 2 И рече Руфь Моавитиня к Ноеммини: да иду убо на ниву и соберу класы вследствующи, идеже аще обрящу благодать пред очима его. Рече же ей: иди, дщи (моя). 3 И иде, и пришедши собираще на ниве вследствующи жателем: и прииде по случаю в часть нивы Воозовы, иже от сродства Елимелехова. 4 И се, Вооз прииде от Вифлеема и рече жнуцым: Господь с вами. И реша ему:

да благословит тя Господь. 5 И рече Вооз отроку своему стоящему над жатели: чия отроковица сия? 6 И отвеща отрок стояй над жнущими, и рече: отроковица Моавитиня есть, пришедшая с Ноемминою от села Моавля: 7 и рече: да соберу ныне и сложу в снопах по следу жнущих: и прииде, и ста от утра даже и до вечера, и ни мало почи на ниве. 8 И рече Вооз к Руфе: слыши, дщи, не ходи собирати на ниву ину, и ты да не отидеши отсюда: но zde прилепися ко отроковицам моим, 9 и очи твои да будут на ниве, идеже жнут, и да ходиши вслед их: се, заповедах отроком не коснуться тебе: и егда возжаждеши, и да идеши к сосудом, и пиеши отнюдуже черплют отроцы. 10 И паде (отроковица) ниц и поклонися до земли, и рече ему: что яко обретох благодать пред очима твоима, еже познати мя, аз же есмь странна? 11 И отвеща Вооз и рече к ней: возвещением возвестися мне, елика сотворила еси со свекровию твоею по умертвии мужа твоего, и како оставила еси отца твоего и мать твою и землю рождения твоего, и пришла еси в люди, ихже не ведала от вчера и третияго дне: 12 да воздаст Господь дело твое, и да будет мзда твоя исполнь от Господа Бога Израилева, к Немуже пришла еси уповати под крилома Его. 13 Она же рече: обретох благодать пред очима твоима, господине мой, яко утешил мя еси, и яко глаголал еси в сердце рабы твоея, и се, аз буду яко едина от рабынь твоих. 14 И рече ей Вооз: уже час ясти, приближися убо семо, да яси хлеб мой, и омочи укрух твой во оцет. И сяде Руфь от страны жателей: и подаде ей Вооз пряжмо, и яде и насытися, и оста: 15 и воста собирати. И заповеда Вооз отроком своим, глаголя: среде снопов да собирает,

и не посрамите ю: 16 и носяще носите ей, и отлагающе отлагайте ей от снопов, и оставите ю собирать и ясти, и не возбраните ей. 17 И собира до вечера на ниве, и измлати еже собра, и бысть яко ифи мера ячменя: 18 и взя, и прииде во град. И виде свекровь ея еже собра: и иземши Руфь от недр своих, даде свекрови своей, еже оставила, от нихже насытятся. 19 И рече к ней свекровь ея: где еси собирала днесь, и где работала? Да будет благословен познавый тя. И поведи Руфь свекрови своей, где работала, и рече: имя мужу Вооз, у негоже работах днесь. 20 Рече же Ноемминь снохе своей: благословен есть Господем, яко не остави милости своя с живыми и со умершими. И рече ей Ноемминь: ужик есть нам муж той, и есть от ужик наших. 21 И рече Руфь ко свекрови своей: и мне убо рече: ко отроковицам моим пристани, дондеже скончают всю жатву, яже есть мне. 22 И рече Ноемминь к Руфе снохе своей: благо, дщи, яко ходила еси со отроковицами его, и не сопротивятся тебе на иней ниве. 23 И приста Руфь ко отроковицам Воозовым собирать (класы), дондеже скончася жатва ячменя и пшеницы: и седе со свекровию своею.

**3** Рече же ей Ноемминь свекровь ея: дщи (моя), не поищу ли тебе покоя, да благо ти будет? 2 И ныне Вооз не ужик ли нам, идеже со отроковицами его была еси? Се, той веет на гумне ячмень сея нощи: 3 ты же измыйся, и помасти лице твое, и облещься в ризы твоя (светлыя), и изыди на гумно: не явися мужу, дондеже скончает ясти и пити: 4 и будет внегда уснути ему, и познаеши место, где ляжет, тамо да внидеши, и открыеши у ног его, и ляжеш: и той повесть тебе, яже имаши творити. 5 И рече Руфь к ней: вся елика речеши



мне, сотворю. 6 И иде на гумно, и сотвори по всему, елика заповеда ей свекровь ея. 7 И яде Вооз и пи, и возблажа сердце его, и иде спати со страны стога: она же прииде втай, и откры яже у ног его, и ляже. 8 И бысть в полунощи, ужасеся муж и возьмется, и се, жена лежит у ног его: 9 и рече (ей Вооз): кто еси ты? Она же рече: аз есмь Руфь раба твоя, да возложиши крило твое на рабу твою, яко ужик ты еси. 10 И рече Вооз: благословена ты Господем Богом, дщи, яко разблажила еси милость твою последнюю паче первыя, еже не ити тебе вслед юнот, аще убог, аще богат: 11 и ныне, дщи, не бойся: вся елика речеши, сотворю тебе: весть бо все племя людей моих, яко жена силы ты еси: 12 и ныне поистинне ужик есмь аз: но еще есть ужик ближший мене: 13 прележи сию ночь, и будет заутра аще примет тя, то благо: да поймет: аще ли не восхоцет пояти тебе, то пойму тя аз, жив Господь: прележи до заутрия. 14 И лежа у ног его до заутрия: она же воста, прежде неже познати мужу подруга своего. И рече Вооз: да не увестся, яко приходила жена на гумно. 15 И рече ей: принеси покрывало еже на тебе, и держи е. Она же держа е, и намери ей шесть мер ячменя, и заде ей: и иде во град. 16 И прииде Руфь ко свекрови своей. Она же рече ей: что есть, дщи? И поведа ей вся, елика сотвори ей муж. 17 И рече ей: шесть мер сих ячменя даде ми, глагола бо ко мне: да не идеши тща ко свекрови своей. 18 Она же рече: седи, дщи, дондеже увеси, како падет слово: не умолчит бо муж, дондеже совершится слово днесь.

**4** И Вооз прииде ко вратом и седе тамо: и се, ужик мимоидяше, о немже глагола Вооз. И рече ему Вооз: уклонився сяди zde. Он же уклонися и седе. 2 И поя Вооз

десять мужей от старейшин града, и рече: сядите zde. И седоша. 3 И рече Вооз ужику: часть села, яже есть брата нашего Елимелеха, яже дадеся Ноеммине возвратившейся от села Моавля: 4 аз же рекох: явлю тебе сие во ухо твое, глаголя, пристяжи пред сидящими и пред старейшины людей моих: и аще ужичествуеши, ужичествуй: аще же не ужичествуеши, повеждь ми, да ведаю: яко несть разве тебе еже ужичествовати ближший, и аз есмь по тебе. Он же рече: аз есмь, ужичествую. 5 И рече Вооз: в день в оньже пристяжеши село от руки Ноеммини, и от Руфы Моавитяныни жены умершаго, и сию достоит ти пояти, да возставиши имя умершаго в наследие его. 6 И рече ужик: не возмогу ужичествовати себе, да не разсыплю наследия моего: ужичествуй себе ты ужичество мое, аз бо не возмогу ужичествовати. 7 И сие управление бысть прежде во Израили о ужичествовании и о пременении, еже укрепити всякое слово: и иззуваше муж сапог свой, и даяше подругу своему ужичествующу ужичество его: и сие бяше свидетелство во Израили. 8 И рече ужик Воозу: пристяжи себе ужичество мое. И иззув сапог свой, даде ему. 9 И рече Вооз старейшинам и всем людем: свидетеле вы днесь, яко пристяжах днесь вся, яже Елимелехова, и вся елика суть Хелеонова и Маалонова, от руки Ноеммини: 10 ксему же Руфь Моавитяныню жену Маалоню поемлю себе в жену возставити имя умершаго в наследие его, да не погибнет имя умершаго от братии его и от племени людей его: свидетеле вы днесь. 11 И отвещаша вси людие иже у врат: свидетеле есмы. И старейшины реша: да даст Господь жене твоей, входящей в дом твой, якоже Рахили и яко Лии, яже создаша

обе дом Израилев, и сотвориша силу во Ефрафе, и будет имя в Вифлееме: 12 и буди дом твой якоже дом Фаресов, егоже роди Фамарь Иуде, от семени твоего даст тебе Господь от рабы сея чада. 13 И поя Вооз Руфь, и бысть ему жена, и вниде к ней: и даде ей Господь зачати, и роди сына. 14 И рекоша жены к Ноеммине: благословен Господь, Иже не разсыпа ужика твоего днесь, и прозовется имя твое во Израили, 15 и будет тебе во обращающаго душу и в прекормление старости твоя, яко сноха твоя, возлюбившая тебе, роди сына, яже есть блага тебе паче седми сынов. 16 И взя Ноемминь отроча, и положи е на лоне своем, и бысть ему кормилица. 17 И прозваша соседи имя его, глаголюще: родися сын Ноеммине. И нарекоша имя ему Овид: сей есть отец Иессеа, отца Давидова. 18 И сия родства Фаресова: Фарес роди Есрома: 19 Есром же роди Арама: Арам же роди Аминадава: 20 Аминадав же роди Наассона: Наассон же роди Салмона: 21 Салмон же роди Вооза: Вооз же роди Овида: 22 Овид же роди Иессеа: Иессей же роди Давида.

## Первая книга Царств

**1** И бысть человек от Армафем Сифы, от горы Ефремли, и имя ему Елкана сын Иеремииль, сына Илиина, сына Фокеля в Насиве от Армафема от горы Ефремли: **2** и сему две жены (быша): имя единой Анна и имя второй Феннана: и бяху Феннанае дети, Анне же не бяху отрочата. **3** И восхождаше человек от дне до дне из града своего Армафема поклоняться и жрети Господу Богу Саваофу в Силом. И тамо бе Илий и два сына его Офни и Финеес, жерцы Господни. **4** И бысть день, и пожре Елкана и даде Феннанае жене своей и сыном ея и дщерем ея части: **5** Анне же даде часть едину, яко не бе ей чада, обаче Анну любляше Елкана паче Феннаны. И Господь затвори ложесна ея: **6** занеже не даде ей Господь чада по скорби ея и по сетованию оскорбления ея, и сетоваше сего ради, яко затвори Господь утробу ея не дати ей чада. **7** Тако творяше от года до года, внегда приходити ей в дом Господень: (укоряше ея тако, ) и сетоваше, и плакаше, и не ядваше. **8** И рече ей Елкана муж ея: Анна. И рече ему: се, аз, господи. И рече ей: что ти есть, яко плачешися? И почто не яси? И почто биеша сердце твое? Несмь ли аз тебе добрее паче десяти чад? **9** И воставши Анна по ядении их в Силоме, и ста пред Господем. Илий же жрец седяше на престоле, при празе двери храма Господня. **10** И та умилена душею, и помолися Господу и плачущи проплака, **11** и обеща обет Господу, глаголющи: Адонай Господи Елои Саваоф, аще призирая призриши на смирение рабы Твоея и помянеша мя, и даси рабе Твоей семя мужеско, то дам е пред Тобою в дар до дне смерти его: и вина и пьянственного не испиет, и железо

не взыдет на главу его. 12 И бысть егда умножи молящихся пред Господем, Илий же жрец смотряше на уста ея. 13 И та глаголаше в сердцы своем, токмо устне ея двизастеся, а глас ея не слышашеся: и мняше ю Илий пьяну сущу. 14 И рече ей Илий: доколе пьяна будеши? Отими вино твое и иди от места Господня. 15 И отвеща Анна и рече: ни, господи: жена в жесток день аз есмь, вина и пьянства не пих, но изливаю пред Господем душу мою: 16 не даждь рабы твоя во дщерь погибели, яко от множества глумления моего и от множества сетования моего истаях даже доселе. 17 И отвеща Илий и рече к ней: иди с миром, Бог Израилев да даст ти все прошение твое, еже просила еси от Него. 18 И рече Анна: обрете раба твоя благодать пред очима твоима. И иде жена в путь свой, и вниде во обитель свою, и яде с мужем своим и пи, и лице ея не испадет ктому. 19 И утрениваша заутра, и поклонишася Господу, и идоша путем своим. И вниде Елкана в дом свой во Армафем и позна Елкана жену свою Анну: и помяне ю Господь, и зачат. 20 И бысть во время дний, и роди Анна сына и нарече имя ему Самуил: и рече: яко от Господа Бога Саваофа испросих его. 21 И взыде человек Елкана и весь дом его в Силом пожрети жертву дний и обеты своя и вся десятины земли своя. 22 Анна же не взыде с ним, яко рече мужеву своему: дондеже взыдет отроча, и аще отдою е, тогда явится лицу Господню и пребудет тамо до века. 23 И рече ей Елкана муж ея: твори благое пред очима твоима, седи дондеже отдоиши е: но да утвердит Господь (слово твое), изшедшее из уст твоих. И седе жена, и млеко питаше сына своего, дондеже отдои его. 24 И взыде с ним в Силом, егда отдои его, с телцем

трилетным и с хлебы и со ефи муки пшеничны и мехом вина: и внидоша в дом Господень в Силом, и отроча с ними. 25 И приведоша е пред Господа: и закла отец его жертву, юже творяше от дний на дни Господеви: и приведоша отроча, и закла телца. И приведе Анна мати отроча ко Илию 26 и рече: во мне, господи, да живет душа твоя, господине мой, аз жена стоявшая пред тобою, о сем помолитися Господу: 27 о отрочати сем молихся, и даде ми Господь прошение мое, еже просих у Него: 28 и аз отдаю е Господеви во вся дни живота его на служение Господеви. И поклонися тамо Господеви.

**2** И помолися Анна и рече: утвердися сердце мое в Господе, вознесеса рог мой в Бозе моем, разширишася уста моя на враги моя, возвеселихся о спасении Твоем: 2 яко несть свят яко Господь, и несть праведен яко Бог наш, и несть свят паче Тебе: 3 не хвалитесь и не глаголите высокая в гордыни, ниже да изыдет велеречие из уст ваших: яко Бог разумов Господь, и Бог уготовляяй начинания Своя: 4 лук сильных изнеможе, и немощствующии препоясашася силою: 5 исполнении хлеба лишишася, и алчущии пришелствоваша землю: яко неплоды роди седмь, и многая в чадех изнеможе: 6 Господь мертвит и живит, низводит во ад и возводит, (Sheol h7585) 7 Господь убожит и богатит, смиряет и высит, 8 возставляет от земли убога и от гноища воздвизает нища посадити его с могущими людей, и престол славы дая в наследие им: 9 даяй молитву молящемуся и благослови лета праведнаго, яко не в крепости силен муж: 10 Господь немощна сотвори сопостата Его, Господь свят: да не хвалится премудрый премудростию своею, и да не хвалится сильный силою своею, и да не хвалится богатый богатством своим: но о

сем да хвалится хваляйся, еже разумети и знати Господа, и творити суд и правду посреде земли: Господь възыде на небеса и възгреме: той судит концем земли, праведен сый, и даст крепость царем нашим и вознесет рог христа Своего. 11 И оставиша его тамо пред Господем и отидоша во Армафем в дом свой: отроча же бе служба лицу Господню пред лицом Илии жерца. 12 Сынове же Илии жерца (быша) сынове погибелнии, не ведуще Господа, 13 ни оправдания жреческа пред людьми всеми жрущими. И приходяше отрок жреческ, егда варятся мяса, и удица трезубна в руку его, 14 и влагаше ю в коноб великий, или в медяный сосуд, или горнец, и все еже вонзеса на удицу, взимаше е себе жрец: и тако творяху всему Израилеви приходящему пожрети Господеви в Силоме. 15 И прежде каждения тука, приходяше отрок жреческ и глаголаше мужеви жрущему: даждь мяса испещи жерцу, и не возму от тебе мяса варенаго от коноба. 16 И глаголаше муж жряй: да покадится первее тук, якоже подобает, и тогда возмеша себе от всех, еже хочет душа твоя. И рече: ни, ныне даждь: аще же не даси, возму силою. 17 И бе пред Господем грех отроков велий зело, яко отметаху жертву Господню. 18 И Самуил бе служба пред Господем, отрочиць сый опоясан во ефуд льнян. 19 И хламиду малу сотвори ему мати его, и приношаше ему от дний во дни, егда восхождаше с мужем своим пожрети жертву дний. 20 И благослови Илий Елкану и жену его, глаголя: да воздаст ти Господь семя от жены сея за дар, егоже даровал еси Господеви. И отиде человек в место свое. 21 И посети Господь Бог Анну, и зача, и роди еще три сыны и дщери две. И возвеличися отрок Самуил пред Господем. 22 Илий же

состарется зело: и услыша, яже творяху сынове его всем сыном Израилевым, и яко бываху с женами предстоящими у дверей скинии свидения, **23** и рече им: почто творите по глаголу сему, егоже аз слышу из уст всех людей Господних (о вас)? **24** Ни, чада, ни: яко не благ слух, егоже аз слышу о вас: не творите тако, яко не добры слухи, яже аз слышу, еже не работати людем Богу: **25** аще согрешая согрешит муж мужеве, помолятся о нем ко Господу: аще же Господеви согрешит, кто помолится о нем? И не послушаста гласа отца своего, яко хотяй восхоте Господь погубити я. **26** Отрок же Самуил хождаше предуспевая, и бе благ пред Господем и человеки. **27** И прииде человек Божий ко Илию и рече: сия глаголет Господь: открываяся открыхся в дому отца твоего, сущым им в земли Египетстей рабом в дому фараони, **28** и избрах дом отца твоего от всех домов Израилевых Мне служити, еже восходити ко олтарю Моему и кадити кадилом и носити ефуд, и дах дому отца твоего вся, яже огня жертвенная сынов Израилевых, в снесь: **29** и почто ты воззрел еси на фимиам Мой и на жертву Мою безстудным оком, и прославил сыны твоя паче Мене, еже благословляти начаток всякия жертвы Израилевы предо Мною? **30** Сего ради сия глаголет Господь Бог Израилев, глаголя: рекох, дом твой и дом отца твоего прейдет предо Мною до века: а ныне глаголет Господь: никакоже Мне, зане токмо прославляющыя Мя прославлю, и уничижаяй Мя безчестен будет: **31** се, дние идут, и потреблю семя твое и семя дому отца твоего, и не будет старца в дому твоем во вся дни, **32** и узриши державу Мою во всех, имиже разблажает Израиля, и не будет старца в дому твоем во вся дни: **33** и мужа не истреблю тебе от



олтаря Моего, во еже оскудети очесем его и истаяти души его: и вси прочии дому твоего падут оружием мужеским: **34** и сие тебе знамение, еже приидет на оба сына твоя сия Офни и Финееса: в день един умрут оба: **35** и возставлю Себе жерца верна, иже вся яже в сердцы Моем и яже в души Моей сотворит, и созижду ему дом верен, и предидет пред христом Моим во вся дни: **36** и будет всяк оставшийся в дому твоём приидет поклониться ему с цатою сребра и хлебом единым, глаголя: приими мя к единому от священнослужений твоих, еже ясти хлеб.

**3** И отрочищ Самуил бе служа Господеви пред Илием иереем, и глаголгол Господень бе честен в тыя дни, не бе видение посылаемо. **2** И бысть в день он, и Илий спаше на месте своем, и очи его начаста тяжце быти, и не можаше зрети: **3** и прежде неже угасе светилник Божий, и Самуил спаше в церкви Господни, идеже кивот Божий, **4** и воззва Господь: Самуиле, Самуиле. И рече: се, аз. **5** И тече ко Илию и рече: се, аз, яко звал мя еси. И рече (Илий): не звах тебе, возвратися и спи. И возвратися и спа. **6** И приложи Господь и воззва еще: Самуиле, Самуиле. И воста Самуил и иде ко Илию вторицею, и рече: се, аз, яко звал мя еси. И рече: не звах тебе, чадо мое, возвратися, спи. **7** Самуил же в то время еще не познаваше Бога, прежде откровения ему гласа Господня. **8** И приложи Господь призвати Самуила третицею: и востав, и иде ко Илию и рече: се, аз, яко звал мя еси. И разуме Илий, яко Господь призывает отрочища, и рече: возвратися и спи, чадо: **9** и будет аще воззовет тя Зовый, и речеши: глаголи, Господи, яко слышит раб Твой. И иде Самуил, и спа на месте своем. **10** И прииде Господь и ста и

воззва его якоже первое и второе: Самуиле, Самуиле. И рече Самуил: глаголи (Господи), яко слышит раб Твой. 11 И рече Господь к Самуилу: се, аз творю глаголголы Моя во Израили, яко всякому слышащему сия пошумит во обоих ушесех его: 12 в день той воздвигну на Илиа вся, елика глаголах на дом его: начну и скончаю: 13 и возвестих ему, яко отмщу аз на доме его до века в неправдах сынов его, о нихже ведяше, яко злословиста Бога сынове его, и не наказа их: 14 и сего ради кляхся дому Илиину, яко не очистится неправда дому Илиина в кадилах и жертвах его до века. 15 И спа Самуил до утра, и утренева заутра, и отверзе двери храма Господня. Самуил же убося поведати видения Илию. 16 И рече Илий к Самуилу: Самуиле чадо. И рече: се, аз. 17 И рече (Илий): что глаголгол глаголголаный к тебе? Не скрый убо от мене: сия да сотворит тебе Бог и сия да приложит, аще утаиши от мене слово от всех словес глаголголаных к тебе во ушеса твоя. 18 И поведи Самуил Илию вся словеса, и не утай от него (ни единого глаголгола). И рече Илий: Господь Сам, еже благо пред Ним, да сотворит. 19 И возвеличен бысть Самуил, и Господь бе с ним, и не паде от всех словес его на земли (ни един глагол). 20 И разумеша вси Израилтяне от Дана даже и до Вирсавии, яко верен Самуил Господу во пророцех. 21 И приложи Господь явитися в Силоме, яви бо Ся Господь Самуилу: и уверися Самуил пророк быти Господеву во всем Израили, от конца до конца земли. Илий же состаресе зело, и сынове его ходяще хождаху, и лукав путь их пред Господем.

**4** И бысть во дни оны, и собращася иноплеменницы противу Израиля на брань: и изыде Израиль во сретение им на

брань, и ополчишася во Авенезере, и иноплеменницы ополчишася во Афеце: 2 и сразишася иноплеменницы на брани со Израилтяны, и преклонися брань, и падоша мужие Израилевы пред иноплеменники, и убиени быша в брани на селе четыри тысящы мужей. 3 И приидоша людие в полк, и реша старейшины Израилевы: почто порази нас Господь днесь пред иноплеменники? Возмем кивот Бога нашего от Силома, и изыдет посреде нас и спасет ны от руки враг наших. 4 И послаша людие в Силом, и взяша оттуду кивот Господа сидящаго на херувимех: и (быша) тамо оба сына Илиина с кивотом Божиим, Офни и Финеес. 5 И бысть егда прииде кивот Господень в полк, и возопи весь Израиль гласом великим, и возшуме земля. 6 И услышаша иноплеменницы глас вопля и реша: что сей вопль великий в полце Еврейсте? И уразумеша, яко кивот Господень прииде в полк. 7 И убояшася иноплеменницы и реша: сии бози приидоша к ним в полк: горе нам, изми ны, Господи, днесь: яко не бысть тако вчера и третяго дне: 8 горе нам, кто ны измет от руки богов крепких сих? Сии суть бози, побившии Египта всякими язвами и в пустыни: 9 укрепитесь и будите в мужы, иноплеменницы, яко да не поработаете Евреом, якоже поработаша нам, будите убо в мужы и бийтеся с ними. 10 И бишася с ними: и падоша мужие Израилевы пред иноплеменники, и побеже кийждо в селение свое, и бысть язва велика зело: и паде от Израиля тридесять тысящ чинов: 11 и кивот Божий взят бысть, и оба сыны Илиины умроша, Офни и Финеес. 12 И тече муж от брани Иеминей, и прииде в Силом в день он, и ризы своя растерзав, и персть бе на главе его. 13 И прииде, и се, Илий седяше на престоле

своём у дверей, смотря на путь, яко бе сердце его во ужасе (велице) о кивоте Божии. И человек вниде во град возвещая: и возопи весь град гласом великим: **14** и слыша Илий глас вопля и рече: что есть глас вопля сего? И человек потщався вниде и поведи Илию. **15** И бе Илий девяносто осми лет, и очи его изнемогоста, и не видяше. **16** И рече Илий мужем предстоящим себе: что глас вопля сего? И муж потщався вниде ко Илию и рече ему: аз есмь пришедый из полка, и аз прибежах от брани днесь. И рече Илий: что бывший глагол, чадо? **17** И отвеща отрочищь и рече: побегаша мужие Израилевы от лица иноплеменников, и язва велия бысть в людех, и оба сыны твоя умроша, и кивот Божий взят есть. **18** И бысть егда помяну о кивоте Божии, и паде (Илий) с престола взак близ дверей, и сокрушися хребет его, и умре, яко стар бе человек и тяжек: и той суди Израилеви сорок лет. **19** И сноха его жена Финеесова заченшая родити, и слыша весть, яко взят бысть кивот Божий и яко умре свекор ея и муж ея, и восплакася (горько), и роди, яко обратишася на ню болезни ея. **20** И во время, внегда умираше, реша ей жены предстоящия ей: не бойся, яко сына родила еси. И не отвеща, и не разуме сердце ея. **21** И нарече отрочища Ухавоф: и реша о кивоте Божии и о свекре ея и о мужи ея: преселися слава от Израиля, яко взятся кивот Господень, и яко умре свекор ея и муж ея. **22** И рече: преселися слава Израилева, яко взят бысть кивот Божий.

**5** И взяша иноплеменницы кивот Божий и изнесоша его от Авенезера во Азот: **2** и взяша иноплеменницы кивот Господень и внесоша его в храм Дагонов, и поставиша его близ Дагона. **3** И обутренаваша Азотяне наутрие и внидоша

в храм Дагонов: и увидеша, и се, Дагон паде на землю на лице свое пред кивотом Божиим. И воздвигоша Дагона, и поставиша его на месте своем. 4 И бысть егда восташа заутра, и се, Дагон лежаше лицом на земли пред кивотом завета Господня: глава же Дагонова и обе плесне ног его отяты на празе особо каяждо, и обе длани рук его лежаще при дверех, точию труп Дагонов остася. 5 Того ради не вступают жерцы Дагоновы и вси входящие в храм Дагонов на праг дому Дагонова во Азоте даже до дне сего: яко престапующе престапают. 6 И отяготе рука Господня на Азоте, и наведе на них, и воскипе им на седалищах их, во Азоте и в пределех Его, и посреде страны его умножишася мышы: и бысть смущение смерти велико во граде. 7 И видеша мужие Азотстии, яко тако (бысть), и глаголаша: яко не пребудет кивот Бога Израилева с нами, яко жестока рука Его на ны и на Дагона бога нашего. 8 И пославше собраша воевод иноплеменничих к себе и глаголаша: что сотворим кивоту Бога Израилева? И реша Гефее: да прейдет кивот Бога Израилева к нам в Геф. И преиде кивот Бога Израилева в Геф. 9 И бысть по прешествии его, и бысть рука Господня на граде, мятеж велий зело: и порази мужы града от мала до велика, и порази их на седалищах их. И сотвориша Гефее себе седалища (злата), 10 и отпустиша кивот Божий во Аскалон. И бысть егда вниде кивот Бога Израилева во Аскалон, и возопиша Аскалонитяне глаголюще: почто возвратисте кивот Бога Израилева к нам, уморити ны и люди наша? 11 И послаша и собраша вся воеводы иноплеменничии и реша: отпустите кивот Бога Израилева, и да поставится на месте своем, и да не уморит нас и людей наших. Яко

бысть мятеж смерти во всем граде тяжек зело, егда вниде кивот Бога Израилева тамо. 12 И живуции и не умершии уязвишася на седалищах, и взыде вопль града до небесе.

**6** И бе кивот Господень на селе иноплеменников седмь месяца: и воскипе земля их мышами. 2 И призваша иноплеменницы жерцев и волхвов и обаянников своих, глаголюще: что сотворим кивоту Господню? Скажите нам, како послем его на место его? 3 И реша: аще отпускаете вы кивот завета Господа Бога Израилева, да не послете его тща, но отдающе отдадите Ему за муки (дары), и тогда исцелитесь, и умилостивится вам: еда ли не отступит рука Его от вас? 4 И глаголаша: что Ему за муки отдадим? И реша: по числу воевод и иноплеменничих пять седалищ златых и пять мышей златых, яко прегрешения в вас и в князех ваших и в людех: 5 и сотворите подобие седалищ ваших и подобие мышей ваших, растлевающих землю, и воздадите славу Богу (Израилеву), яко да облегчит руку Свою от вас и от богов ваших и от земли вашей: 6 и почто отягощаете сердца ваша, якоже отягчи Египет и фараон сердце свое? Не егда ли поругася им, отпусти их, и отидоша? 7 И ныне возьмите и сотворите колесницу нову едину и две кравы первородившыя без телят, на нихже не бяше ярмо: и впряжите кравы в колесницу, а телята их возвратите вспять в дом: 8 и возьмите кивот Господень, и возложите и на колесницу, и сосуды златыя отдадите Ему за муки, и положите в ковчезце от страны его: и отпустите его, да идет: 9 и узрите, аще путем пределов своих пойдет в Вефсамис, той сотвори нам зло великое сие: аще же ни, то уразумеем, яко не рука его прикоснуса нас, но приключение сие бысть

нам. 10 И сотвориша иноплеменницы тако, и взяша две кравы первородившыя, и впрягоша я в колесницу, телята же их затвориша в доме: 11 и возложиша кивот Господень на колесницу, и ковчежец, и мыши златыя, и подобия седалищ своих: 12 и управишася кравы на пути в путь Вефсамский, на пути имже идяху, и труждахуся, и не совращахуся на десно, ниже на шуе: и воеводы иноплеменничии идяху вслед его даже до предел Вефсамских. 13 И иже в Вефсамисе жняху жатву пшеницы во юдоли: и возведоша очи свои, и видеша кивот Господень, и возвеселишася во сретение ему. 14 И колесница вниде в село Осиево сущее в Вефсамисе, (и ста тамо, ) и поставиша тамо при нем камень велий: и иссекоша древеса колесничная, и кравы вознесоша на всесожжение Господу. 15 Левити же вознесоша кивот Господень, и ковчежец иже с ним, и яже в нем сосуды златы, и положиша на камени велицем: мужие же Вефсамстии вознесоша всесожжения и пожроша жертву в той день Господу. 16 И пять воевод иноплеменничии зряху, и возвратишася во Аккарон в день той. 17 И сия седалища златая, яже воздаша иноплеменницы за муку Господу: Азотско едино, Газско едино, Аскалонско едино, Гефско едино, Аккаронско едино. 18 И златыя мыши по числу всех градов иноплеменничих пяти воевод, от града утвержена и даже до веси ферезеовы и до камене великаго, на немже положиша кивот завета Господня, иже есть даже до сего дне, на селе Осии Вефсамиситянина. 19 И не порадовашася сынове Иехониины в мужех Вефсамских, яко видеша кивот Господень: и уби в них пятьдесят тысяч и седмьдесят мужей. И плакашася людие, яко порази Господь людей язвою великою зело. 20 И реша мужие иже от

Вефсамиса: кто возможет пойти пред Господем Богом святым сим? И к кому взыдет кивот завета Господня от нас? 21 И послаша послы к живущим в Кариафиариме, глаголюще: возвратиша иноплеменницы кивот Господень, снидите и вознесите его к себе.

**7** И приидоша мужие Кариафиаримстии и взяша кивот завета Господня, и внесоша его в дом Аминадавлъ иже на холме: и Елеазара сына его освятиша сохраняти кивот завета Господня. 2 И бысть от негоже дне бе кивот в Кариафиариме, умножишася дние, и быти двадесать лет: и возре весь дом Израилев вслед Господа. 3 И рече Самуил ко всему дому Израилеву, глаголя: аще всем сердцем вашим вы обращаетея ко Господу, отимите боги чуждыя от среды вас, и Дубравы, и уготовайте сердца ваша ко Господу, и поработайте Ему единому, и избавит вас от руки иноплеменничи. 4 И отвергоша сынове Израилевы Ваалима и дубравы Астарофа, и поработаша Господу единому. 5 И рече Самуил: соберите ко мне всего Израиля в Массифаф, и помолюся о вас ко Господу. 6 И собращася людие в Массифаф, и почерпаху воду и проливаху пред Господем на землю: и постишася в той день, и реша: согрешихом пред Господем. И судяше Самуил сыны Израилевы в Массифафе. 7 И услышаша иноплеменницы, яко собращася вси сынове Израилевы в Массифаф, и взыдоша воеводы иноплеменничи на Израиля. И слышаша сынове Израилевы и убояшася от лица иноплеменник: 8 и реша сынове Израилевы к Самуилу: не премолчи о нас вопия ко Господу Богу нашему, да избавит ны от руки иноплеменничи. И рече Самуил: не буди мне еже отступити от Господа Бога моего и не вопити о вас с



молением. 9 И взял Самуил ягня едино сущее, и принес его на всеожжение со всеми людьми Господеви: и возопи Самуил ко Господу о Израили, и послуша его Господь. 10 И быше Самуил возносяй всеожжение, и иноплеменницы приближишася на брань на Израиля: и возгреме Господь гласом велиим в день он на иноплеменники, и смятошася и падоша пред Израилем: 11 и изыдоша мужие Израилевы от Массифафа, и погнаша иноплеменников, и биша их даже до подолия Вефхор. 12 И взял Самуил камень един и постави его между Массифафом и между Ветхим: и нарече имя ему Авенезер, сиречь камень помощи, и рече: до zde поможе нам Господь. 13 И смири Господь иноплеменники, и не приложиша ктому ити в пределы Израилевы: и бысть рука Господня на иноплеменников во вся дни Самуиловы. 14 И отдашася грады, ихже взяша иноплеменницы от сынов Израилевых, и отдаша их Израилю, от Аккарона даже до Гефа, и пределы Израиля свободишася от руки иноплеменничи: и бе мир между Израилем и между Аморреем. 15 И судяше Самуил Израилю во вся дни живота своего. 16 И хоуждаше от года до года, и окрест Вефиля и Галгалы и Массифафа, и суждаше Израиля во всех священных сих. 17 Быше же ему возвращение во Армафем, яко тамо быше дом его: и судяше тамо Израиля, и созда тамо олтарь Господеви.

**8** И бысть егда состаресе Самуил, и постави сыны своя судити Израилеви. 2 И сия имена сыном его: первенец Иоиль, и имя второму Авиа, судии в Вирсаеви. 3 И не поидоша сынове его путем его: и уклонишася вслед лихоимания, и приимаху дары, и развращаху суды. 4 И собращася мужие Израилевы, и приидоша к Самуилу во Армафем 5 и реша

ему: се, ты состарелся еси, сынове же твои не ходят по пути твоему: и ныне постави над нами царя, да судит ны, якоже и прочии языки. 6 И бысть лукав глагол пред очима Самуиловыма, яко реша: даждь нам царя, да судит ны. И помолися Самуил ко Господу. 7 И рече Господь Самуилу: послушай гласа людей, якоже глаголют к тебе, яко не тебе уничижиша, но Мене уничижиша, еже не царствовати Ми над ними: 8 по всем делом, яже сотвориша Ми, от негоже дне изведох их из земли Египетски до днешняго дне, и оставиша Мя, и послужиша богом иным, тако тии творят и тебе: 9 и ныне послушай гласа их: обаче засвидетелствуя засвидетелствуеши им и возвестиши им правду царево, иже царствовати будет над ними. 10 И рече Самуил вся словеса Господня к людем просящым от него царя, 11 и глагола (им): сие будет оправдание царево, иже царствовати имать над вами: сыны ваша возмет и поставит я колесничники своя, и на кони всадит их, и предтекущих пред колесницами его: 12 и поставит я себе сотники и тысяцники и жателми жатвы своя, и оымут оыманием гроздия его, и творити орудия воинская его и орудия колесниц его: 13 и дщери ваша возмет в мироварницы и в поварницы и в хлебницы: 14 и села ваша и винограды ваша и масличины ваша благия возмет и даст рабом своим: 15 и семена ваша и винограды ваша одесятствует и даст скопцем своим и рабом своим: 16 и рабы ваша и рабыни ваша и стада ваша благая и ослы ваша отимет и одесятствует на дела своя: 17 и пажити ваша одесятствует, и вы будете ему раби: 18 и возопиете в день он от лица царя вашего, егоже избрасте себе, и не услышит вас Господь в день он, яко вы сами избрасте себе царя. 19 И

не восхотеша людие послушати Самуила и реша ему: ни, но царь да будет над нами, 20 и будем и мы якоже вси языцы: и судити имать нас царь наш, и изыдет пред нами, и поборет поборением о нас. 21 И слыша Самуил вся глаголы людий и глагола я во уши Господеви. 22 И рече Господь к Самуилу: послушай гласа их, и постави им царя. И рече Самуил к мужем Израилевым: да идет кийждо вас во свой град.

**9** И бе муж от сынов Вениаминовых, емуже имя Кис, сын Авиилов, сына Иаредова, сына Вахирова, сына Афекова, сына мужа Иеминеова, муж силен крепостию. 2 И сему бе сын, имя ему Саул, добровеличен, муж благ: и не бе в сынех Израилевых благ паче его, от рамен и выше высок паче всех людий. 3 И заблудиша ослята Киса отца Саулова. И рече Кис к Саулу сыну своему: возми с собою единого от отрок, и воставше идите и поищите ослят. 4 И проидоша гору Ефремлю, и проидоша землю Селха, и не обретоша: и проидоша землю Сегалимлю, и не бе: и проидоша землю Иаминю, и не обретоша. 5 И пришедшым им в землю Сифову, и рече Саул ко отроку своему иже с ним: гряди и возвратимся, да не како отец мой оставя ослята, печется о нас. 6 И рече ему отрок: се, zde человек Божий во граде сем, и человек славен: все еже аще речет приходящим к нему, будет им: и ныне пойдём тамо, да возвестит нам путь наш, имже пойдём. 7 И рече Саул отроку своему иже с ним: се, пойдём, и что принесем к человеку Божию? Яко хлебы оскудеша от вретищ наших, и ктому несть у нас, еже внести к человеку Божию от имени нашего. 8 И приложи отрок отвещати Саулу и рече: се, обретается в руце моей четвертая часть сикля сребра, и даси человеку

Божию, и возвестит нам путь наш. 9 Прежде бо во Израили сице глаголаше кийждо, егда кто идяше вопрошати Бога: гряди, да идем к прозорливцу: яко пророка нарицаху людие прежде прозорливцем. 10 И рече Саул отроку своему: добр глагол твой: гряди, да идем. И идоша во град, идеже бе человек Божий. 11 Восходящим же им на восход града, и се, обретоша девиц изшедших почерпсти воды, и реша им: есть ли zde прозорливец? 12 И отвещаша им девицы, глаголющя: есть, се пред лицом вашим: ныне же потщитесь, яко дне ради грядет во град, яко жертва днесь людем в вама: 13 и егда внидете во град, тако обряцете его во граде, прежде неже взыти ему в вама ясти: яко не имут ясти людие, дондеже внидет сей, яко той благословит жертву, и по сих ядят страннии: и ныне въздите, яко дне ради обряцете его. 14 И въздоша во град. Имже входящим среди града, и се, Самуил изыде во сретение им, еже взыти в вама. 15 И Господь откры во ухо Самуилу днем единым прежде пришествия к нему Сауля, глаголя: 16 якоже время сие, утро послю к тебе мужа от племени Вениаминова, и да помажеша его царя над людьми Моими Израилем, и спасет люди Моя от руки иноплеменничи: яко призрех на смирение людий Моих, яко възде вопль их ко Мне. 17 И виде Самуил Саула, и Господь рече к нему: се, человек, о немже рекох ти: сей будет в людех Моих царствовати. 18 И приближися Саул к Самуилу посреде града и рече: возвести ми, который дом прозорливца. 19 И отвеща Самуил Саулу и рече: аз сам есмь: възди предо мною в вама, и яждь со мною днесь, и отпущу тя завтра, и вся яже в сердцы твоём возвещу ти: 20 и о ослятех твоих заблудивших днесь третий день, не

помышляй в сердцы своем о них, ибо обретошася: и кому красная Израилева? Не тебе ли и дому отца твоего? 21 И отвеща Саул и рече: не сын ли есмь аз мужа иеминеа, меньшаго скиптра племени Израилева? И племени малейшаго от всего скиптра Вениаминова? И отечество мое меньшее паче всех отечеств Вениаминовых? И вскую глагола еси ко мне по глаголу сему? 22 И поят Самуил Саула и отрока его, и введе я во обиталище, и даде им тамо место в первых званых, яко в седмидесяти мужех. 23 И рече Самуил повару: даждь ми часть, юже дах ти, и о нейже рех ти положити ю у себе. 24 И взя повар плече, и предложи е Саулови. И рече Самуил Саулу: се, избыток, предложи пред ся и яждь, яко во свидетелство предложи тебе паче иных, прикоснися. И яде Саул с Самуилом в той день. 25 И сниде от мамы во град, и постлаша Саулови на горнице, и спа. 26 И бысть егда приближашеся утро, и воззва Самуил Саула на горнице, и рече: востани, и отпущу тя. И воста Саул, и изыде сам и Самуил вон. 27 Имже исходящим в часть града, и рече Самуил к Саулу: рцы юноши, да предидет пред нами: а ты стани якоже днешь, и слышан сотворю тебе глаголгол Божий.

**10** И взя Самуил сосуд с елеем, и возлия на главу его, и лобыза его, и рече ему: не помаза ли тебе Господь на царство людем Своим иже во Израили? И ты царствовати будеши в людех Господних, и ты спасеши я от руки враг их окрест: и сие тебе знамение, яко помаза тя Господь над наследием Своим в князя: 2 егда отидеши днешь от мене, обрящеши два мужа при гробех Рахилиных в пределех Вениаминих в Силоме, в Вакалафе скачущих зелно, и рекут тебе: обретошася ослята, ихже ходисте искати: и се, отец

твой отверже глагол о ослятех и зело печется вас ради, глаголя: что сотворю о сыне моем? 3 И отидеши оттуду, и далее приидеши до дубравы Фавора, и обрящеши тамо три мужы восходящья к Богу в Вефиль, единого ведуща трое козлят, а другаго несуща три вретища хлебов, а третияго несуща мех вина: 4 и вопросят тя яже о мире, и дадут ти два начатка хлебов, и возмеш от рук их: 5 и по сих да възидеши на холм Божий, идеже есть собрание иноплеменник, тамо начальницы иноплеменници: и будет егда внидеши тамо во град, срящеши лик пророков исходящих от мамы, и пред ними свирели и тимпаны, и сопели и гусли, и тии прорицающии: 6 и снидет на тя Дух Господень, и воспророчествуеши с ними, и обратишия в мужа иного: 7 и будет егда приидут знамения сия на тя, твори вся, елика обрящет рука твоя, яко Бог с тобою: 8 и снидеши прежде мене в Галгалы, и се, аз сниду к тебе вознести всесожжение и пожрети жертвы мирны: седмь дний пождеши, дондеже прииду к тебе, и покажу ти, что сотвориши. 9 И бысть внегда отвратити ему плещы своя отити от Самуила, преложи ему Бог сердце на ино. И приидоша вся знамения сия в день он. 10 И възиде оттуду на холм, и се, лик пророческий противу ему: и възиде нань Дух Божий, и прорицаше среде их. 11 И быша вси видевши его вчера и третияго дне, и видеша, и се, той посреде пророк прорицай. И реша людие кийждо ко искреннему своему: что сие бывшее сыну Кисову? Еда и Саул во пророцех? 12 И отвеща некто от них и рече: и кто отец ему? Не Кис ли? И сего ради бысть в притчу: еда и Саул во пророцех? 13 И сконча пророчествуя, и прииде оттуду на холм. 14 И рече ужик его к нему и ко отрочищу его: камо ходисте? И реша:

ослят искати, и видехом, яко несть их, и внидохом к Самуилу.

15 И рече ужок к Саулу: возвести ми ныне, что ти рече Самуил? 16 И рече Саул ужику своему: вестию возвести ми, яко обретошася ослята. Словесе же о царстве не возвести ему, еже рече Самуил. 17 И заповеда Самуил всем людем приити ко Господу в Массифаф. 18 И рече Самуил к сыном Израилевым: сия рече Господь Бог Израилев, глаголя: Аз изведох отцы ваша сыны Израилевы из Египта, и изях вы от руки фараона царя Египетскаго и от всех царств оскорбляющих вы: 19 и вы днесь уничижите Бога вашего, Иже Сам есть спасаяй вы от всех зол ваших и скорбей ваших, и ресте: ни, но царя да поставиши над нами: и ныне станите пред Господем по хоругвам вашим и по племенем вашим и по тысячам вашим. 20 И приведе Самуил вся колена Израилева, и паде жребий на хоругвь Вениамину. 21 И приведе хоругвь Вениамину по племенам, и паде жребий на племя Маттариино: и приведоша племя Маттариино по мужем, и паде жребий на Саула сына Кисова: и искаху его, и не обреташеся. 22 И вопроси Самуил еще Господа, глаголя: аще приидет семо муж еще? И рече Господь: се, той сокрыся в сосудех. 23 И тече Самуил, и взя его оттуду, и постави его посреде людий: и бысть вышше всех людий, от рамен и вышше. 24 И рече Самуил ко всем людем: видесте ли, егоже избра себе Господь, яко несть подобен ему во всех вас? И познаша вси людие и реша: да живет царь. 25 И рече Самуил к людем оправдания царствия, и написа в книзе, и положи пред Господем. 26 И отпусти Самуил вся люди, и идоша кийждо во своя си, и Саул иде в дом свой в Гаваю: и идоша с ним сынове сил, ихже коснеся Господь сердец их, с

Саулом. 27 Сынове же погибелнии реша: кто спасет нас, сей ли? И безчествоваша его, и не принесоша ему даров.

**11** И бысть аки по месяце, и възыде Наас Аманитянин, и ополчися на Иавис Галаадский. И реша вси мужие Иависстии к Наасу аманитянину: положи нам завет, и поработаем ти. 2 И рече к ним Наас Аманитянин: сей завет положу вам, изверчу комуждо вас око десное, и положу поношение на Израиля. 3 И реша ему мужие Иависа Галаадскаго: остави нам седмь дний, да послем вестники во вся пределы Израилевы: и аще не будет спасающаго нас, изыдем к вам. 4 И приидоша вестницы в Гаваю к Саулу и поведаша словеса сия во уши людий: и воздвигоша вси людие глас свой и плакашася. 5 И се, Саул прииде по заутрии от села, и рече Саул: что яко плачут людие? И поведаша ему глаголы мужей Иависских. 6 И сниде Дух Господень на Саула, егда услыша словеса сия, и разгневался на них зело: 7 и взя две кравы, и раздроби я на уды, и посла во вся пределы Израилевы руками вестников, глаголя: иже не будет идый вслед Саула и вслед Самуила, по сему сотворят говядом его. И сниде ужас Господень на Израилтян, и изыдоша яко един муж. 8 И сочте их в Везеце, в ваге, и бысть всех мужей Израилтеских шесть сот тысящ, и мужей Иудиных седмьдесят тысящ. 9 И рече вестником пришедшым: сия поведите мужем Иависа Галаадскаго: завтра будет вам спасение восходящу солнцу. И приидоша вестницы во град и возвестиша мужем Иависским: и возрадовашася, 10 и реша мужие Иависстии к Наасу аманитянину: утро изыдем к вам, и сотворите нам, еже благо пред очима вашима. 11 И бысть по заутрии, и Саул раздели люди на три начала: и внидоша посреде полка в стражу



утреннюю, и бияху сынов Аммонитских, дондеже разогресея день: и бысть, и оставшиися разбегошася, и не осташася ни два от них вкупе. 12 И реша людие к Самуилу: кто есть рекий, яко да Саул не воцарится над нами? Предаждь мужей, и избием их. 13 И рече Саул: да не умрет ни един в днешний день, яко днесь сотвори Господь спасение во Израили. 14 И рече Самуил к людем, глаголя: приидите да идем в Галгалы и обновим тамо царство. 15 И идоша вси людие в Галгалы, и помаза тамо Самуил Саула на царство пред Господем в Галгалех. И пожроша тамо жертвы и мирная пред Господем, и возвеселися тамо Саул и вси мужие Израилевы зело.

**12** И рече Самуил ко всем мужем Израилевым: се, послушах гласа вашего о всех, елика ми ресте, и поставих над вами царя: 2 и се, ныне царь предходит пред вами, аз же состарехся и седети буду, и сынове мои се с вами: и аз се, ходих пред вами от юности моя и даже до днешняго дне: 3 се, аз, отвещайте на мя пред Господем и пред христом Его, еда у кого телца взях, или ося, или кого от вас насилствовах, или кого утесних, или от руку некоего приях мзду, или обущу? Извещайте на мя, и возвращу вам. 4 И реша к Самуилу: не обидел еси нас, ниже насилствовал еси нам, ниже утеснил еси нас, ниже взял еси от руки чиея что. 5 И рече Самуил к людем: свидетель есть Господь в вас, и свидетель христос Его днесь в сей день, яко ничтоже обретосте в руку мою. И реша людие: свидетель. 6 И рече Самуил к людем, глаголя: свидетель Господь сотворивый Моисеа и Аарона и изведый от земли Египетския отцы наша: 7 и ныне предстаните, и разсуждуся с вами пред Господем и возвещу вам вся оправдания Господня, яже

сотвори вам и отцем вашим: 8 егда вниде Иаков и сынове его во Египет, и смириша их Египтяне: и возопиша отцы наши ко Господу, и посла Господь Моисеа и Аарона, и изведе отцы наша из Египта и всели их на месте сем: 9 и забыша Господа Бога своего, и вдаде я в руке Сисаре архистратигу Иавина царя Асорска, и в руки иноплеменничи, и в руки царя Моавска, и воеваша их: 10 и возопиша ко Господу и реша: согрешихом, яко оставихом Господа и поработаем Ваалиму и Дубравам, и ныне изми ны от рук враг наших, и поработаем Тебе: 11 и посла Господь Иероваала и Варака и Иеффая и Самуила, и изят вы из рук враг ваших окрестных, и обитасте уповающе: 12 и весте, яко Наас царь сынов Аммоних прииде на вы, и ресте: ни, но царь да царствует над нами: егда Господь Бог царствова над вами: 13 и се, ныне царь, егоже избрасте и егоже просисте: и се, даде Господь над вами царя: 14 аще убоитесь Господа и поработаете Ему, и послушаете гласа Его и не воспротивитесь устом Господним, и будете и вы и царь царствуяй над вами вслед Господа ходяще: то рука Господня не будет на вас: 15 аще же не послушаете гласа Господня и воспротивитесь устом Господним, будет рука Господня на вас и на царя вашего: 16 и ныне станите и видите глаголгол сей великий, егоже сотворит Господь пред очима вашима: 17 несть ли жатва пшеницы днесь? Призову Господа, и даст громы и дождь, и уразумеете и увидите, яко злоба ваша велика, юже сотвористе пред Господем, испросивше себе царя. 18 И призва Самуил Господа, и даде Господь гром и дождь в той день: и убояшася вси людие зело Господа и Самуила, 19 и реша вси людие к Самуилу: помолися о рабех твоих ко

Господу Богу твоему, да не умрем: яко приложихом ко всем грехом нашим злобу, просяще себе царя. 20 И рече Самуил к людям: не бойтесь: вы сотвористе всю злобу сию: токмо не уклонитесь от последования Господня и поработайте Господу всем сердцем вашим, 21 и не преступите вслед ничтоже сущих, иже не пособствуют и не изымут, яко ничтоже суть: 22 понеже не отринет Господь людей Своих имене ради Своего великаго, яко кротце Господь прият вас Себе в люди: 23 и да никакоже ми согрешити Господу, оставити еже молитися о вас ко Господу, и поработаю Господеви и покажу вам путь благ и прав, 24 токмо бойтесь Господа и работайте Ему во истине и всем сердцем вашим, яко видите яже великая сотвори Господь с вами: 25 и аще злобою зло сотворите, то вы и царь ваш погибнете.

**13** Сын единого лета Саул, егда нача царствовати, и два лета царствова над Израилем. 2 И избра себе Саул три тысящы мужей от мужей Израилевых, и быша с Саулом две тысящы в Махмасае и в горе Вефили, и тысяща беша со Ионафаном в Гаваи Вениаминове: и останок людей отпусти коегождо во своя селения. 3 И порази Ионафан насива иноплеменника иже в холме. И услышаша иноплеменницы, и Саул воструби трубою во всю землю, глаголя: отвергошася раби. 4 И слыша весь Израиль глаголющих, яко порази Саул насива иноплеменника, и омерзе Израиль во иноплеменницех. И собращася людие вслед Саула в Галгалех. 5 И иноплеменницы собращася на брань на Израиля: и приидоша на Израиля тридесять тысящ колесниц и шесть тысящ конник и множество людей, яко песок иже при мори: и шедше ополчишася в Махмасае

противу Вефорону на юг. 6 И видеша мужие Израилевы, яко не могоша противу стати, и скрышася людие в вертепех и в оградех и в камениих и в пропастьех и во рвах: 7 и преходяще преидоша Иордан в землю Гадову и Галаадску. И Саул бяше еще в Галгалех, и вси людие ужасошася, иже бяху с ним. 8 И ждаше седмь дний по свидетелству, якоже рече Самуил, и не прииде Самуил в Галгалы: и разсеяшася людие его от него. 9 И рече Саул: приведите, яко да сотворю всеожжение и мирная. И вознесе всеожжение. 10 И бысть егда соверши вознося всеожжение, и се, Самуил прииде: и Саул изыде на сретение ему благословитися им. 11 И рече Самуил: что сотворил еси? И рече Саул: видех, яко отидоша людие от мене, и ты не пришел еси, якоже определил еси свидетелством дний, иноплеменницы же собращася в Махмас, 12 и рех: ныне приидут иноплеменницы ко мне в Галгалы, и лица Господня не умолих: и не удержажся, и вознесох всеожжение. 13 И рече Самуил к Саулу: безумие бысть тебе, понеже не сохранил еси заповеди моея, юже заповеда ти Господь: яко ныне уготовал бы Господь царство твое во Израили до века: 14 и ныне царство твое не станет тебе, и изыщет Господь Себе человека по сердцу Своему, и повелит ему Господь властелину быти над людьми Своими, яко не сохранил еси, елика заповеда тебе Господь. 15 И воста Самуил и иде от Галгал в путь свой: и останок людей идоша вслед Саула на сретение людем ратным. Имже приходящым от Галгал в Гаваю Вениаминову, и сочте Саул люди обретшыяся с ним яко шесть сот мужей. 16 Саул же и Ионафан сын его и людие обретшиися с ними седоша в Гавай Вениаминове и плакашася: иноплеменницы

же ополчишася в Махмаса. 17 И изыдоша губящие от села иноплеменников тремя начала: начало едино зрящее путь Гофера на землю Совалю: 18 и начало едино зрящее путь Вефоронь: и начало едино зрящее путь Гаваи, клонящийся к Гаисавим пустыни. 19 И ковачь железа не обреташеся во всей земли Израилеве, яко реша иноплеменницы, да не сотворят Еврее меча и копия. 20 И хождуху вси сынове Израилевы в землю иноплеменничу ковати кийждо своя косы и орудия своя, и кийждо секиры своя и серпы своя. 21 И притупишася вся орудия приспевшей жатве, секиры и серпы, поправления же има не бысть. 22 И бысть во дни брани Махмасския, и не обретешя меча и копия в руках всех людей, иже с Саулом и со Ионафаном: точию у Саула и Ионафана сына его. 23 И изыдоша от стана иноплеменнича об ону страну Махмаса.

**14** И бысть во един день, и рече Ионафан сын Саулов отрочищу носящему оружие его: гряди, и преидем в мессаву иноплеменников иже на оней стране. И отцу своему не возвести сего. 2 И Саул сядяше на верху холма под древом яблонным еже в Магдоне, и бяше с ним яко шесть сот мужей. 3 И Ахиа сын Ахитов, брата Иохаведова, сына Финеесова, сына Илии, иерей Божий в Силоме нося ефуд: и людие не ведяху, яко отиде Ионафан. 4 Посреде же прехода, идеже хотяше Ионафан прейти в стан иноплеменничь, бысть камень острый отсюду и камень острый отюнду: имя единому Васес и другому Сенна: 5 камень един стояше от севера противу Махмаса, и камень второй от юга противу Гаваи. 6 И рече Ионафан ко отрочищу носящему оружие его: гряди, преидем в мессаву необрезанных сих, негли что

сотворит нам Господь, яко несть Господу не удобно спасти во многих или в малых. 7 И рече ему носяй оружие его: твори все, на неже сердце твое склоняется: се, аз с тобою есмь, якоже сердце твое сердце мое. 8 И рече Ионафан: се, мы преидем к мужем и явимся к ним: 9 аще сия рекут к нам: помедлите тамо, дондеже возвестим вам: то постоим сами на месте своем и не поидем к ним: 10 аще же к нам сице рекут: възидите к нам: то възидем, яко предаде их Господь в руки наша: сие нам знамение (да будет). 11 И внидоста оба в мессаву иноплеменников. И глаголаша иноплеменницы: се, Еврее исходят из расселин своих, идеже скрышася. 12 И отвещаша мужие мессавли ко Ионафану и к носящему оружие его, и реша: възидите к нам, и явим вам глагол. И рече Ионафан к носящему оружие его: гряди по мне, яко предаде их Господь в руки Израилевы. 13 И възиде Ионафан (ползуць) на руках и на ногах своих, и носяй оружие его за ним. И узреша иноплеменницы лице Ионафана, и порази их: и носяй оружие его идяше вслед его. 14 И бысть язва первая, еюже порази Ионафан и носяй оружие его, яко двадесять мужей копийцами и каменовержением и кремением полевым. 15 И бысть ужас в полце и на селе: и вси людие иже в мессаве и губящии ужаснушася, и тии не хотяху братися: и вострепета земля, и бысть ужас от Господа. 16 И видеша соглядатае Сауловы в Гаваи Вениамини, и се, полк смятеся семо и онамо. 17 И рече Саул людем сущым с ним: рассмотрите ныне и видите, кто отиде от вас. И рассмотриша, и се, не обретеша Ионафан и носяй оружие его. 18 И рече Саул ко Ахии: принеси ефуд, яко бе кивот Божий в той день с сынми Израилевыми. 19 И бысть егда глаголаше Саул ко иерею, и

шум в полце иноплеменничи ходя идяше и множашеся. И рече Саул ко иерею: пригни руки твоя. 20 И изыде Саул и вси людие иже с ним, и изыдоша до сечи. И се, бысть оружие коегождо на ближняго своего, (и бысть) мятеж велик зело. 21 Но и раби, иже быша со иноплеменники вчера и третияго дне, вшедшии в полк, обратишася и тии еже быти им со Израилтяны сущими с Саулом и со Ионафаном. 22 И вси Израилтяне скрывшиися в горе Ефремли услышаша, яко отбегоша иноплеменницы: приложишася и тии вслед их на брань. 23 И спасе Господь в той день Израиля: брань же пройде даже до Вамофа: и вси людие бяху с Саулом, яко десять тысящ мужей, и бе брань разсыпана во весь град на горе Ефремли. 24 И Саул сотвори безумие велие в день той, и закла люди, глаголя: проклят человек, иже ясти будет хлеб даже до вечера, дондеже отмщу врагом моим. И не вкусиша людие вси хлеба: 25 и вся земля обедаше: и се, бяхше дубрава пчелная пред лицем села: 26 и внидоша людие во пчелник, и се, исхождаху глаголюще: (яко истече мед,) и не бе возвращающаго руки своя ко устом своим, яко убояшася людие клятвы Господни. 27 Ионафан же не слышаше, егда заклинаше отец его люди: и простре конец жезла своего, иже в руку ему, и омочи его в соте медвене, и обрати руку свою во уста своя, и прозреша очи его. 28 И рече един от людей, глаголя: кленый прокля отец твой люди, глаголя: проклят человек, иже ясти будет хлеб в день сей: и изнемогоша людие. 29 И уразуме Ионафан и рече: смути отец мой землю: виждь, яко прозреша очи мои, егда вкусих мало от меда сего: 30 о, дабы яли ядуще днесь людие от корыстей врагов своих, ихже обретоша, множайшая бы днесь

язва была во иноплеменницех. 31 И поразиша в день той от иноплеменников множае нежели в Махмасе: и утрудися людие зело. 32 И устремишася людие на корысти, и пояша людие стада и буйволы и говяда: и закалаху на земли, и ядоша людие с кровию. 33 И возвестиша Саулу, глаголюще: согреша людие ко Господу, ядуще с кровию. И рече Саул: от гефема привалите мне семо камень велий. 34 И рече Саул: шедше к людем рцыте им: да принесет кийждо семо телца своего и кийждо овцу свою, и да заколют на камени сем, и ядите я, и не согрешайте Господу ядуще с кровию. И приведоша нощию вси людие свое кийждо, еже имяше в руке своей, и закалаху тамо. 35 И созда Саул тамо олтарь Господу: сей нача Саул созидати олтарь Господу. 36 И рече Саул: снидем вслед иноплеменник нощию, и расхитим их, дондеже заря будет, и не оставим от них мужа. И реша: все еже благо пред очима твоима, твори. И рече иерей: приступим семо к Богу. 37 И вопроси Саул Бога: сниду ли вслед иноплеменников? Предаси ли их в руки Израилтяном? И не отвеща ему Господь в день той. 38 И рече Саул: приведите семо вся колена Израилева, и уразумеите и увеждьте, на ком бысть грех сей днесь, 39 яко жив Господь спасыи Израиля, яко аще ответ будет на Ионафана сына моего, смертию да умрет. И не бе отвещающаго от всех людий. 40 И рече Саул всему Израилю: вы станите на едину страну, аз же и Ионафан сын мой станем на другую страну. И реша людие к Саулу: еже благо пред тобою, твори. 41 И рече Саул: Господи Боже Израилев, что яко не отвещал еси рабу Твоему днесь? Или моя есть, или сына моего Ионафана неправда? Господи Боже Израилев, даждь знамение: и аще



речеши сия, даждь ныне людем Твоим Израилю, даждь ныне преподобие. И паде жребий на Ионафана и Саула, и людие изыдоша. 42 И рече Саул: верзите жребий на мя и на Ионафана сына моего: егоже объявит Господь, смертию да умрет. И реша людие к Саулу: несть сей глагол. И преможе Саул люди, и вергоша о нем и Ионафане сыне его, и паде на Ионафана жребий. 43 И рече Саул ко Ионафану: возвести ми, что сотворил еси? И возвести ему Ионафан и рече: вкушая вкусих мало меду омочив конец жезла, иже в руку мою, и се, аз умираю. 44 И рече ему Саул: сия да сотворит ми Бог, и сия да приложит ми, яко смертию умреш днесь. 45 И реша людие к Саулу: еда днесь умрет сотворивый спасение сие велие во Израили? Не буди то, жив Господь, аще падет влас главы его на землю, яко милость Божию сотвори в день сей. И помолишася людие о Ионафане в день той, и не умре. 46 И не иде Саул вслед иноплеменников: иноплеменницы же отидоша в место свое. 47 И Саул укрепися царствовати во Израили, и побеждаше окрест вся враги своя в Моаве и в сынех Аммоних и в сынех Едомлих и в Вефоре и в царствии Сувани и во иноплеменницах: и аможе аще обращашеся, спасашеся. 48 И сотвори силу, и победи Амалика, и избави Израиля из руки попирающих его. 49 И беша сынове Сауловы Ионафан и Исуй и Мелхисуе: имена же двою дщерию его, имя первородней Мерова и имя вторей Мелхола: 50 имя же жене его Ахиноома, дщерь Ахимаасова: и имя старейшине вой его Авенир сын Нира сына ужика Саулова: 51 Кис же отец Саулов, и Нир отец Авениров сын иамина сына Авиилева. 52 И бе брань крепка

на иноплеменники во вся дни Сауловы: и видев Саул всяка мужа сильна и всяка мужа сына силы, собираше их к себе.

**15** И рече Самуил к Саулу: посла мя Господь помазати тя на царство в людех Его во Израили: и ныне послушай гласа словес Господних: **2** сия рече Господь Саваоф: ныне отмщу, яже сотвори Амалик Израилю, егда сrete его на пути, восходящу ему от Египта: **3** и ныне ты иди, и поразиши Амалика и Иерима, и вся яже суть его, и не снабдиши от них (ничтоже), и искорениши его: и прокленеши его и вся суцая его, и не пощадиши его: и да убиеш от мужеска полу и до женска и от юнош и до ссущих млеко, и от говяд до овец и от велблюд до ослят. **4** И собра люди Саул и сочте я в Галгалех двесте тысящ пеших и десять тысящ от Иуды в полцех: **5** и прииде Саул до градов Амаликовых и засяде в потоце. **6** И рече Саул ко Кинеови: иди и уклонися от среды Амалика, да не погублю тя с ним, ты бо сотворил еси милость с сынами Израилевыми, егда исхождаху из Египта. И уклонися Киней от среды Амалика. **7** И порази Саул Амалика от Евилы даже до Сура, иже пред лицем Египта: **8** и ят Агага царя Амаликова жива, и вся люди изби, и Иерима уби мечем. **9** И сохрани Саул и вси людие Агага царя жива и благая от стад и буйволов, и снедей (и одежд), и виноградов и от всех благих: и не хотяху искоренити я, точию худшее и уничиженое истребиша. **10** И бысть глаголгол Господень к Самуилу, глаголя: **11** раскаяхся, яко помазах Саула на царство, понеже отвратися от Мене и словес Моих не соблюде. И опечалися Самуил и вопияше ко Господу всю ночь. **12** И воста рано Самуил, и идяше на сретение Израилтяном рано. И возвестиша Самуилу,

глаголюще: идет Саул в Кармил, и се, воздвиже руку себе, и возврати колесницу, и сниде в Галгалы. И прииде Самуил к Саулу, и се, той возношаше всесожжение Господу, первая от корыстей, ихже взя от Амаликов. 13 И прииде Самуил к Саулу, и рече ему Саул: благословен ты Господу, сотворих бо вся, елика (ми) глагола Господь. 14 И рече Самуил: и кий глас стад сих во ушью моею, и глас говяд, егоже аз слышу? 15 И рече Саул: от Амалика пригнах я, ихже сохраниша людие лучшая от стад и от волов, еже пожрети я Господу Богу твоему, прочая же избих. 16 И рече Самуил к Саулу: потерпи, и возвещу ти, яже глагола Господь ко мне ноцию. 17 И рече ему (Саул): глаголи. И рече Самуил к Саулу: еда не мал был еси ты пред Ним, и не властелина ли ты постави хоругви колена Израилева? И помаза тя Господь на царство Израилево: 18 и посла тя Господь путем и рече тебе: иди и искорени Амалика, и погуби согрешших предо Мною, и воуй их, дондеже скончаеши их: 19 и почто не послушал еси гласа Господня по всему, елико глагола тебе, но устремился еси на корысти и сотворил еси лукавое пред Господем? 20 И рече Саул к Самуилу: послушах гласа людий и идох путем, имже посла мя Господь, и приведох Агага царя Амаликова, и Амалики искорених: 21 и взяша людие корысти от стад и буйволы, первая от истребляемых на пожрение Господу Богу нашему в Галгалех. 22 И рече Самуил: еда угодны Господу всесожжения и жертвы, якоже послушати гласа Господня? Се, послушание паче жертвы благи, и покорение паче тука овня: 23 якоже грех есть чарование, тако (грех есть) противление, и якоже грех есть идолопоклонение, тако непокорение: понеже уничижил еси

глаголгол Господень, и уничижит тя Господь не быти тебе царем во Израили. 24 И рече Саул к Самуилу: согреших, яко преступих слово Господне и глагол твой, убояхся бо людей и послушах гласа их: 25 и ныне возми грех мой и возвратися со мною, да поклонюся Господу Богу твоему. 26 И рече Самуил к Саулу: не возвращуся с тобою, яко уничижил еси глаголгол Господень, и уничижит тя Господь не быти тебе царем во Израили. 27 И отврати Самуил лице свое еже отити: и ят Саул за воскрилие ризы его и раздра е. 28 И рече ему Самуил: раздра Господь царство Израилево от руку твою днесь, и даст е ближнему твоему, лучшему паче тебе, 29 и разделится Израиль на двое: и не обратится, ниже раскается Святый Израилев, занеже не яко человек есть, еже раскаятися Ему, запретит, и не пребудет. 30 И рече Саул: согреших, но прослави мя ныне пред старейшины Израилевы и пред людьми моими, и возвратися со мною, и поклонюся Господу Богу твоему. 31 И возвратися Самуил вслед Саула, и поклонися Саул Господу. 32 И рече Самуил: приведите ми Агага царя Амаликова. И прииде к нему Агаг трепеща, и рече Агаг: тако ли горька смерть? 33 И рече Самуил ко агагу: якоже обезчадствова жен оружие твое, тако обезчадится в женах мати твоя. И закла Самуил Агага пред Господем в Галгалех. 34 И отиде Самуил во Армафем: и Саул отиде в дом свой в Гаваю. 35 И не приложи Самуил ктому видети Саула даже до дне смерти своея, понеже плакаше Самуил о Сауле, занеже раскаяся Господь, яко постави Саула царя во Израили.

**16** И рече Господь к Самуилу: доколе ты плачеш о Сауле, аз же уничижих его, не царствовати во Израили? Наполни

рог твой елеа и прииди, послю тя ко Иессею до Вифлеема, яко узрех в сынех его Себе царя. 2 И рече Самуил: како пойду? И услышит Саул, и убьет мя. И рече Господь: юницу от волов возми в руце твои и речеши: пожрети Господеви иду: 3 и призовеши Иессеа и сыны его к жертве: и Аз ти покажу, яже сотвориши, и помажеш Ми, егоже ти реку. 4 И сотвори Самуил вся, елика рече ему Господь: и прииде в Вифлеем, и ужасошася старейшины града о пришествии его и реша: мир ли вход твой, о, прозорливче? 5 И рече: мир: пожрети Господу приидох: освятитесь и возвеселитесь днесь со мною. И освяти Иессеа и сыны его, и призва я к жертве. 6 И бысть внегда внити им, и виде Елиава и рече: сей ли пред Господем помазанник Его? 7 И рече Господь Самуилу: не зри на лице его, ниже на возраст величества его, яко уничижих его: понеже не тако зрит человек, яко зрит Бог: яко человек зрит на лице, Бог же зрит на сердце. 8 И призва Иессей Аминадава и представи его пред лице Самуила. И рече (Самуил): ниже сего избра Господь. 9 И приведе Иессей Саммаа. И рече: и сего не избра Господь. 10 И приведе Иессей седмь сынов своих пред Самуила. И рече Самуил ко Иессею: не избра Господь от сих. 11 И рече Самуил ко Иессею: не достало ли уже детей? И рече Иессей: еще есть един мал, и сей пасет на пажити. И рече Самуил ко Иессею: посли и приведи его, яко не возляжем, дондеже приидет той семо. 12 И посла, и введе его: и той чермен, добрыма очима, и благ взором Господеви. И рече Господь к Самуилу: востани и помажи Давида, яко сей благ есть. 13 И прия Самуил рог со елеем и помаза его посреде братии его. И ношашеся Дух Господень над Давидом от того дне и потом. И воста

Самуил и отиде во Армафем. 14 И Дух Господень отступи от Саула, и давяше его дух лукавый от Господа. 15 И реша отроцы Сауловы к нему: се, ныне дух лукавый от Господа давит тя. 16 да рекут раби твои ныне пред тобою, и възыщут господину нашему мужа знающа пети в гусли: и внегда будет дух лукавый на тебе, и тогда да поет в гусли своя, и благодати будет, и упокоит тя. 17 И рече Саул ко отроком своим: посмотрите ми мужа добре поюща и введите его ко мне. 18 И отвеща един от отрок его и рече: се, видех сына Иессеова из Вифлеема, и той вестъ пение, и муж разумен, и борец, и мудр в словеси, и муж благ видом, и Господь с ним. 19 И посла Саул вестники ко Иессею, глаголя: отпусти ко мне Давида сына твоего, иже у стада твоего. 20 И взя Иессей бремя хлебов и мех вина и козля от коз единого, и посла к Саулу рукою Давида сына своего. 21 И видев Давид к Саулу, и предстояше пред ним, и возлюбил его зело Саул, и бысть ему носяй оружие его. 22 И посла Саул ко Иессею, глаголя: да предстоит Давид предо мною, яко обрете благодать пред очима моима. 23 И бысть внегда быти духу лукаву на Сауле, и взимаше Давид гусли и играше рукою своею, и отдыхаше Саул, и благо ему бяше, и отступаше от него дух лукавый.

**17** И собираша иноплеменницы полки своя на брань, и собрашася в Сокхофе Иудейстем, и ополчишася среде Сокхофа и среди Азика во Афесдоммине. 2 Саул же и мужие Израилевы собрашася и ополчишася во удоли Теревинфа и устрояхуся на брань противу иноплеменником. 3 И иноплеменницы стояху на горе отсюду особь, Израиль же стояше на горе отюнду, и удоль между ими бяше. 4 И изыде муж силен из полка иноплеменника, имя ему Голиаф

от Гефа, высота его шесть локот и пядь: 5 и шлем медян на главе его, и в броню кольчату той оболчен баше: и вес брони его пять тысяч сикль меди и железа: 6 и поножи медяны верху голений его, и щит медян на плечах его: 7 и ратовище копья его аки орудие ткущих, и копие его шесть сот сикль железа: и носяй оружие его идяше пред ним. 8 И ста и возопи пред полки Израилевыми и рече им: почто изыдоште, ополчитися ли на брань противу нам? Несмь ли аз иноплеменник, вы же Еврее Сауловы? Изберите себе мужа, и да снидет ко мне: 9 и аще возможет со мною братися и одолеет ми, будем вам раби: аще же аз возмогу одолети ему, будете вы нам раби и поработаете нам. 10 И рече иноплеменник: се, аз днесь уничижих полк Израилев в сей день: дадите ми мужа, иже поборется со мною един. 11 И слыша Саул и весь Израиль глаголы иноплеменници сия и ужасошася и убояшася зело. 12 Давид же Еффрафеев, сей бе от Вифлеема Иудина, имя же отцу его Иессей, емуже бе осмь сынов. Во дни же Сауловы бе муж той состареся в мужех. 13 И идоша три сыны Иессеевы старейшии на брань с Саулом: имена же сынов его пошедших на брань, Елиав первородный его, и вторый Аминадав, и третий Самма. 14 Давид же бе юнейший, и три болшии его идоша вслед Саула. 15 Давид же возвратився от Саула, отиде пасти овцы отца своего в Вифлеем. 16 И прихождаше иноплеменник утро и в вечер, являся пред Израилем чотыредесять дний. 17 И рече Иессей Давиду сыну своему: возми убо братиям твоим меру ефи муки и десять хлеб сих, и иди в полк, и даждь братиям твоим: 18 и десять сыров от млека сего, и даждь тысящнику: и братию свою посети в мире, и еликих

аще требуют, увеси, субботствовати же будеши со мною.

19 Саул же и вси людие бяху во удоли дуба ратующеся со иноплеменники. 20 И воста Давид рано, овцы же остави со стражею, и взя, и отиде, якоже заповеда ему отец его Иессей: и прииде на место, идеже исхождаху сильнии на брань и вопияху в полцех. 21 Занеже вооружашеся Израиль противу иноплеменником, и иноплеменницы вооружахуся противу Израиля. 22 И положи Давид бремя свое в руках стража, и тече в полк, и пришед вопроси братию свою в мире. 23 Глаголющу же ему с ними, и се, муж месейский, емуже имя Голиаф, Филистимлянин от Гефы, изыде от полков иноплеменничих и глагола по словесем сим, и услыша Давид. 24 И вси мужие Израилевы егда увидеша мужа, и бежаша от лица его и убояшася зело. 25 И реша мужие Израилтестии: видесте ли мужа сего восходяща, яко поносити Израиля прииде? И аще будет муж, иже убьет его, обогатит его царь богатством велиим, и дщерь свою даст ему, и дом отца его сотворит свободен во Израили. 26 И рече Давид к мужем стоящим с ним, глаголя: что сотворите мужу, иже убьет иноплеменника онаго и отимет поношение от Израиля? Яко кто есть иноплеменник необрезанный сей, иже поносит полку Бога живаго? 27 И рекоша ему людие по словеси сему, глаголюще: тако сотворится мужу, иже убьет его. 28 И услыша Елиав брат его болший, внегда глаголати ему к мужем: и разгневался яростию Елиав на Давида и рече: почто семо пришел еси? И кому оставил еси малыя овцы оны в пустыни? Вем аз гордость твою и злобу сердца твоего, яко видения ради брани пришел еси. 29 И рече Давид: что сотворих ныне? Несть ли речь? 30 И отвратися от него



ко иному и рече по словеси сему. И отвещаша ему людие по словеси прежнему. 31 И слышаны быша глаголы, ихже глагола Давид, и возвестиша пред Саулом: и пояша его людие и приведоша его пред Саула. 32 И рече Давид к Саулу: да не ужасается сердце господину моему о сем, раб твой пойдет и поборется со иноплеменником сим. 33 И рече Саул к Давиду: не можеш ли пойти ко иноплеменнику сему братися с ним, яко ты детище еси, сей же муж борец есть от юности своя. 34 И рече Давид к Саулу: егда пасяше раб твой отца своего стадо, и егда приходяше лев или медведица и восхищаше от стада овцу едину: 35 и аз вслед его исхождах и поражах его, и исторгах из уст его (взятое): и аще воспротивляшеся ми, то взем за гортань его, поражах и умерщвлях его: 36 и льва и медведицу бияше раб твой, и будет иноплеменник необрезанный сей яко един от сих: не поиду ли, и поражу его, и отиму днесь поношение от Израиля? Понеже кто необрезанный сей, иже уничижи полк Бога жива? 37 И рече Давид: Господь иже изят мя от руки львовы и от руки медведицы, той измет мя от руки иноплеменника сего необрезаннаго. И рече Саул к Давиду: иди, и да будет Господь с тобою. 38 И облече Саул Давида одеждею, и шлем медян возложи на главу его, 39 и препояса Давида оружием своим верху одежды его. Давид же походя (во оружии) семо и овамо, утрудися, яко не обыче. И рече Давид Саулу: не могу ити в сих, яко не обыкох. И взяша от него сия. 40 И взя палицу свою в руку свою, и избра себе пять камней гладких от потока, и вложи я в тоболец пастырский егоже носаше, и пращу свою имый в руке своей, и иде к мужу иноплеменнику. 41 И идяше иноплеменник

приближаясь к Давиду, и носяй оружие его пред ним (идяше).

42 И виде Голиаф иноплеменник Давида и обезчестова его, зане той детищъ бе, и чермен и леп очима. 43 И рече иноплеменник к Давиду: еда пес аз есмь, яко ты идещи противу мене с палицею и камением? И рече Давид: ни, но и худший пса. И прокля иноплеменник Давида боги своими.

44 И рече иноплеменник к Давиду: гряди ко мне, и дам плоть твою птицам небесным и зверем земным. 45 И рече Давид иноплеменнику: ты идещи на мя с мечем и с копием и щитом, аз же иду на тя во имя Господа Бога Саваофа, Бога ополчения Израилева, егоже ты уничижил еси днесь: 46 и предаст тя Господь днесь в руце мои, и убью тя, и отиму главу твою от тебе, и дам тело твое и телеса полка иноплеменника в день сей птицам небесным и зверем земным: и уразумеет вся земля, яко есть Господь Бог во Израили, 47 и уразумеет весь сонм сей, яко не мечем ни копием спасает Господь, яко Господня брань, и предаст Господь вас в руки наша. 48 И воста иноплеменник и иде во сретение Давиду. И ускори Давид и тече на сражение во сретение иноплеменнику.

49 И простре Давид руку свою в тоболец, и изья из него камень един, (и вложи в пращу, ) и верже пращею, и порази иноплеменника в чело его, и унзе камень под шлемом его в чело его, и паде (Голиаф) на лица своем на землю. 50 И укрепися Давид над иноплеменником пращею и камением, и порази иноплеменника, и умертви его: оружия же не бе в руце Давидове. 51 И тече скоро Давид, и ста над ним, и взя мечь его, и извлече его от недр его, и умертви его, и отсеке им главу его. И видеша иноплеменницы, яко умре сильный их, и бежаша. 52 И восташа мужие Израилевы

и Иудины и воскликнуша, и погнаша созади их даже до входа Гефова и до врат Аскалонских: и падоша уязвленни (мнози) иноплеменницы по пути врат и даже до Гефа и Аккарона. 53 И возвратишася мужие Израилевы гнавшии вслед иноплеменник, и потопташа полки их. 54 И взя Давид главу иноплеменника и внесе ю во Иерусалим, и оружие его положи во храмине своей. 55 И егда виде Саул Давида исходяща во сретение иноплеменника, рече ко Авениру князю силы: чий есть сын юноша сей, Авенире? И рече Авенир: да живет душа твоя, царю, яко не вем. 56 И рече царь: вопроси убо ты, чий есть сын юноша сей? 57 Егда же возвратися Давид по убиении иноплеменника, взя его Авенир и приведе его пред Саула: глава же иноплеменника бе в руке его. 58 И рече к нему Саул: чий еси сын, юноше? И рече Давид: сын раба твоего Иессеа от Вифлеема.

**18** И бысть егда преста глаголати к Саулу, и душа Ионафана с душею Давидовою спряжеся, и возлюби его Ионафан от души своя. 2 И поят его Саул во дни оны и не даде ему возвратитися в дом отца его. 3 И завета Ионафан и Давид завет, понеже возлюби его от души своя: 4 и совлече Ионафан ризу свою верхнюю и даде ю Давиду, и ины одежды своя даже до меча своего и до лука своего и до пояса своего. 5 И хождаше Давид разумно во всех, аможе аще посылаше его Саул: постави же его Саул над мужи воинскими, и угоден бе пред очима всех людей и пред слугами Сауловыми. 6 И бысть, внегда входити им, егда возвратися Давид от победы над иноплеменником: и изыдоша (девы) ликовствующие во сретение Саула царя от всех градов Израилевых поюща и скачуща в тимпанех с радостию и с гусльми. 7 И исхождаху

жены ликующая и глаголющая: победи Саул с тысящами своими, а Давид со тмами своими. 8 И разгневался Саул зело, и лукавы явишася глаголы пред очима сауловыма о словеси сем. И рече Саул: Давиду даша тмы, мне же даша тысящы: и чего ему (несть), точию царства? 9 И бе Саул подзирая Давида от дне онаго и потом. 10 И бысть от утрешняго дне, и нападаше дух лукавый от Бога на Саула, и прорицаше посреде дому своего: и Давид пояше рукою своею (в гусли), якоже и по вся дни: копие же в руце Саули: 11 и взя Саул копие и рече: поражу Давида к стене. И уклонися Давид от лица его дважды. 12 И убояся Саул от лица Давидова, яко Господь бе с ним, а от Саула отступи: 13 и отстави его Саул от себе, и постави его себе тысященачалника: и исхождаше и вхождаше пред людьми. 14 И бе Давид во всех путех своих смысля, и Господь бе с ним. 15 И виде Саул, яко той смыслит зело, и бояшеся от лица его. 16 Весь же Израиль и Иуда любляху Давида, яко той вхождаше и исхождаше пред лицом людей. 17 И рече Саул к Давиду: се, дщи моя болшая Меров, сию тебе дам в жену, токмо буди ми в сына силы и поборай брани Господни. И Саул рече: да не будет рука моя на нем, но да будет рука иноплеменнича. 18 И рече Давид к Саулу: кто аз есмь? И кое житие сродства отца моего во Израили, яко да буду зять царский? 19 И бысть во время, егда даней быти подобаше Мерове дщери Саулове Давиду, сия дадеся Адриилу Молафитскому в жену. 20 И возлюби Мелхола дщерь Саулова Давида: и возвестися Саулу, и угодно бысть пред очима его слово. 21 И рече Саул: дам ему ю, и будет ему в соблазн. И бе на Саула рука иноплеменнича. И рече Саул к Давиду: в силах будеши ми

зять днесь. 22 И заповеда Саул отроком своим, глаголя: рцыте вы тайно Давиду, глаголюще: се, благоволит о тебе царь, и вси отроцы его любят тя, и ты буди зять царю. 23 И глаголаша отроцы Сауловы во уши Давиду глаголы сия. И рече Давид: еда легко пред очима вашима, еже быти (ми) зятем царю? Аз бо есмь муж смирен и не славен. 24 И возвестиша отроцы Саулу сия словеса, яже глагола Давид. 25 И рече Саул: тако рцыте Давиду: не хошет царь с богатством (зятя), но токмо во сте краенеобрезаний иноплеменнических отмстити врагом царевым. Саул бо мысляше вдати Давида в руце иноплеменником. 26 И возвестиша отроцы Сауловы глаголы сия Давиду, и угодна быша словеса сия пред очима Давидовыма, еже быти в зятя царю. 27 И не по мнзех днех, воста Давид и иде сам и мужие его с ним, и уби от иноплеменник двести мужей: и принесе краенеобрезания их царю и вдаде я ему, и бысть зять царю, и вдаде ему царь Мелхолу дщерь свою в жену. 28 И виде Саул, яко Господь есть с Давидом, и весь Израиль любит его: 29 и приложи Саул оттоле паче бояться Давида. И бысть Саул враждуя на Давида во вся дни. 30 И исхождаху князи иноплеменничи, и бысть от начала исхождения их, Давид разумен бе паче всех слуг Сауловых, и почтесе имя его зело.

**19** И глагола Саул к Ионафану сыну своему и ко всем отроком своим, да умертвят Давида. Ионафан же сын Саулов любяше Давида зело. 2 И возвести Ионафан Давиду, глаголя: отец мой Саул ищет тя убити: сохранися убо заутра рано, и скрыйся, и сяди втайне: 3 и аз изыду, и стану при отце моем на селе, идеже еси ты: и аз возглаголю отцу моему о тебе, и узрю, что будет, и возвещу тебе. 4 И глагола

Ионафан о Давиде благая к Саулу отцу своему, и рече к нему: да не согрешает царь на раба своего Давида, яко не согреши пред тобою, и дела его блага суть зело: 5 и положи душу свою в руце своей и победи иноплеменника, и сотвори Господь спасение велико всему Израилю, и вси видеша и возрадовашася: и почто согрешаеши в кровь неповинну, еже убити Давида туне? 6 И послуша Саул гласа Ионафана: и клялся Саул, глаголя: жив Господь, яко не умрет (Давид). 7 И призва Ионафан Давида и возвести ему вся глаголы сия, и введе Ионафан Давида к Саулу, и бе пред ним яко вчера и третияго дне. 8 И приложися брань быти на Саула, и укрепися Давид, и победи иноплеменники, и избиязвою великою зело, и бежаша от лица его. 9 И бысть от Бога дух лукавый на Сауле, и той в дому своем седяше, и копие в руце его, Давид же играше руками своими: 10 и искаше Саул копием поразити Давида, и отступи Давид от лица Сауля, и удари Саул копием в стену: Давид же отшед спасеся в ночь ту. 11 И посла Саул вестники в дом Давидов стрещи его, еже убити его рано. И возвести Давиду Мелхола жена его, глаголющи: аще ты не спасеши души твоея в ночь сию, заутра умреша. 12 И свеси Мелхола Давида оконцем, и отиде, и убежа, и спасеся: 13 и прият Мелхола тщепогребалная, и положи на одре, и печень козию положи на возглавии его, и покры я ризами. 14 И посла Саул вестники, да имут Давида, и рекоша, яко болен есть. 15 И посла Саул, да оглядают Давида, глаголя: принесите его на одре ко мне, еже умертвити его. 16 И приидоша слуги, и се, тщепогребалная на одре и козия печень при возглавии его. 17 И рече Саул к Мелхоло: почто тако обманула мя еси, и

отпустила еси врага моего, и гонзе мене? И рече Мелхола Саулу: сам ми рече: отпусти мя: аще же ни, погублю тя. 18 И Давид убежа и спасеся, и иде к Самуилу во Армафем и поведи ему вся, елика сотвори ему Саул. И идоста Давид и Самуил и седоста в Навафе в Рае. 19 И возвестиша Саулу, глаголюще: се, Давид в Навафе в Рае. 20 И посла слуги Саул яти Давида, и видеша собор пророков, и Самуил стояше настоятель над ними: и бысть Дух Божий на слугах Саулих, и начаша прорицати. 21 И возвестиша Саулу, и посла другия слуги, и прорицати начаша и тии. И приложи Саул послати слуги третия, и начаша и тии прорицати. 22 И разгневался гневом Саул, и иде и сам во Армафем, и прииде даже до кладязя гумна, еже есть в Сефе, и вопросы и рече: где есть Самуил и Давид? И реша: се, в Навафе в Рае. 23 И иде оттуду в Наваф (иже) в Рае: и бысть и на нем Дух Божий, и идяше идый и прорицая, дондеже приити ему в Наваф иже в Рае. 24 И совлече ризы своя и прорицаше пред ними: и паде наг весь день той и всю ночь. Того ради глаголаху: еда и Саул во пророцех?

**20** И отбеже Давид от Навафа (иже) в Рае и прииде ко Ионафану и рече: что сотворих? И что неправда моя? И что согреших пред отцем твоим, яко ищет души моя? 2 И рече ему Ионафан: никакоже, ты не умреш: се, не имать сотворити отец мой глагола велика, или мала, и не открыет уха моего: и что яко скрывает отец мой глагол сей от мене? Не буди сие. 3 И отвеща Давид Ионафану и рече: ведая ведает отец твой, яко обретох благодать пред очима твоима, и глаголет: да не познает сего Ионафан, негли не восхощет: но жив Господь и жива душа твоя, зане якоже рекох, исполнися

между мною и между отцем твоим даже до смерти. 4 И рече паки Ионафан к Давиду: чесого желает душа твоя, и что сотворю тебе? 5 И рече Давид ко Ионафану: се, новомесячие заутра, и аз седя не сяду с царем ясти, и послеши мя, и скрыюся на поли до вечера дне третияго: 6 и аще смотря усмотрит мя отец твой, и речеши: прося уприся от мене Давид отити до Вифлеема града своего, яко жертва дний тамо всему племени: 7 аще тако речет: благо: мир рабу твоему: аще же жестоко отвещает тебе, разумей, яко совершился злоба от него: 8 и да сотвориши милость с рабом твоим, яко ввел еси в завет Господень раба твоего с собою: и аще есть неправда в рабе твоём, умертви мя ты, а ко отцу твоему почто тако имаши мя вводити? 9 И рече Ионафан: никакоже (буди) тебе: егда аще разумеваю уразумею, яко совершился злоба отца моего, еже приити на тебе, аще и не будеши во градех твоих, аз возвещу тебе. 10 И рече Давид ко Ионафану: кто возвестит ми, аще отвещает отец твой жестоко? 11 И рече Ионафан к Давиду: иди, и пребуди на поли. И идоста оба на поле. 12 И рече Ионафан к Давиду: Господь Бог Израилев весть, яко искушу отца моего во время (сие) заутра, или третияго дне, и сие, аще благо будет о Давиде, и не имам послати к тебе на поле и возвестити сия во уши твои: 13 сия да сотворит Бог Ионафану и сия да приложит, аще не возвещу злая на тя, и откряю ухо твое, и отпущу тя, и отидеши в мире: и будет Господь с тобою, якоже бе со отцем моим: 14 и аще убо еще жив буду аз, да сотвориши милость со мною: 15 и аще смертию умру, да не отимеши милости твоя от дому моего до века: 16 аще же ни, егда искоренит Господь враги Давидовы, коегождо от



лица земли, да обрящется имя Ионафане в дому Давидове, и изыщет Господь враги Давидовы. 17 И приложи Ионафан еще клятися Давиду, яко возлюби душу любящаго его. 18 И рече Ионафан к нему: заутра новомесячие, и присмотрен будеши, яко праздно усмотрено будет место твое: 19 ты же премедлиши три дни и пребудеши на месте твоём, идеже скроешися в день делания, и сядеши при Ергаве онем: 20 и аз утрою стрелами стреляя, и стрелю вергая до амагариа: 21 и се, послю отрока, глаголя: иди и обрящи ми стрелу: и аще реку отроку: где стрела от тебе, и где, возми ю: и ты гряди ко мне, яко мир тебе, и несть о тебе слова, жив Господь: 22 аще же тако реку юноши: тамо стрела от тебе и далее: иди, яко отсла тя Господь: 23 и глагол егоже аз и ты глаголахом, се, Господь свидетель между тобою и мною до века. 24 И скрися Давид на поли, и прииде новомесячие, и прииде царь на трапезу ясти, 25 и седе царь на месте своём якоже и всегда на престоле при стене, и предвари Ионафана, и седе Авенир от страны Сауловы, и усмотрено бысть (праздно) место Давидово. 26 И не глагола Саул ничтоже в той день, помысли бо, случай видится, нечисту быти, яко не очистися. 27 И бысть наутрие месяца в день второй, и усмотрено бысть праздно место Давидово, и рече Саул ко Ионафану сыну своему: что яко не прииде сын Иессеев ни вчера, ни днесь на трапезу? 28 И отвеща Ионафан к Саулу и рече ему: упросися от мене Давид до Вифлеема града своего ити, 29 и рече: отпусти мя ныне (в Вифлеем), яко жертва колена нашего во граде, и заповедаша мне братия моя: и ныне аще обретох благодать пред очима твоима, да пойду ныне и узрю братию мою: сего ради не прииде на трапезу цареву. 30

И разгневался гневом Саул на Ионафана зело и рече ему: сыне девок блудниц, не вем ли, яко сообщник еси ты сыну Иессееву в срамоту твою и в срамоту откровения матере твоея? 31 Яко во вся дни, в няже сын Иессеев жити имать на земли, не уготовится царство твое: ныне убо послав, поими юношу, яко сын смерти есть сей. 32 И отвеца Ионафан Саулу отцу своему и рече: за что умирает? Что сотвори? 33 И верже Саул копием на Ионафана, еже умертвити его. И позна Ионафан, яко совершися злоба сия от отца его, да умертвит Давида: 34 и вскочи Ионафан от трапезы во гнев ярости, и не яде хлеба в день второй месяца, яко сокрушися о Давиде, зане соверши (злобу) на него отец его. 35 И бысть заутра, и изыде Ионафан на село, якоже совещася о свидении с Давидом, и отрок мал с ним. 36 И рече отроку: тецы, и обрящи ми стрелы, имиже аз стреляю. И отрок тече, и он стрели стрелою за него. 37 И прииде отрок до места стрелы, идеже стрелил Ионафан. И возопи Ионафан вслед отрока и рече: тамо стрела от тебе и далее. 38 И паки возопи Ионафан вслед отрока своего, глаголя: потщися скоро, и не стой. И собра отрок Ионафану стрелы и принесе их к господину своему. 39 Отрок же не уведеничесоже, токмо Ионафан и Давид ведеста вещь. 40 И отда Ионафан оружие свое отроку своему и рече отроку своему: поиди и отнеси во град. 41 И егда отиде отрок, и Давид воста от Ергава, и паде на лице свое, и поклонися ему трижды, и облобыза кийждо друг друга, и плакася кийждо о друг друзе до скончания велика. 42 И рече Ионафан Давиду: иди с миром, и якоже кляхомся мы оба именем Господним, глаголюще: Господь да будет свидетель между мною и тобою

и между семенем моим и между семенем твоим до века. И воста Давид и отиде. Ионафан же вниде во град.

**21** И прииде Давид в Номву ко Авимелеху иерею: и ужасеся Авимелех о пришествии его и рече ему: что яко ты един, и никтоже с тобою? **2** И рече Давид иерею: царь заповеда ми глагол днесь и рече ко мне: никтоже да уразумеет глагола, егоже ради аз посылаю тя и о немже аз заповедаю ти: и отроки оставих на месте глаголемем еммоним: **3** и ныне аще суть у тебе пять хлебы, даждь ми елико имаши. **4** И отвеща иерей Давиду и рече: не суть хлебы прости у мене, но точию хлебы у мене священнии: аще сохранени отроцы суть токмо от жены, снедят. **5** И отвеща Давид иерею и рече ему: и (мы) от жен воздержажомся вчера и третияго дне: отнележе изыдох аз на путь, быша вси отроцы очищени, и сей путь нечист, но освятится днесь сосуд ради моих. **6** И даде ему Авимелех иерей хлебы предложения, яко тамо не бе хлеба, но токмо хлебы лица, иже взяты от лица Господня, еже предложитися хлебу теплomu, в оньже день взя их. **7** И бе тамо един от отрок Сауловых в день он удержан пред Господем, и имя ему Доик Сирин, (старейшина от пастырь Сауловых, ) пасый мски Сауловы. **8** И рече Давид ко Авимелеху: виждь, аще есть zde у тебе копие или мечь, яко меча моего и оружия моего не взях с собою, яко царево повеление внезапно ми бысть. **9** И рече иерей: се, мечь Голиафа иноплеменника, егоже ты убил еси во юдоли Ила, и той обвит бяше в ризу за ефудом: аще той хочещи взяти, возми себе, несть бо инаго zde кроме сего. И рече Давид: се, несть якоже той: даждь ми его. И даде его ему. **10** И воста Давид, и убеже в той день от лица Саулова, и прииде Давид

ко Анхусу царю Гефску. 11 И реша отроцы Анхусовы к нему: не сей ли Давид царь земли? Не сему ли изыдоша (жены) ликующыя, глаголющя: победи Саул с тысящами своими, и Давид со тмами своими? 12 И положи Давид глаголы сия в сердцы своем, и убося зело от лица Анхуса царя Гефска. 13 И измени лице свое пред ним, и притворися в день той, и бияше во врата града, яко в тимпан, и падаше на руки своя, и паде у врат града, и слины своя точаше по браде своей. 14 И рече Анхус ко отроком своим: се, видесте мужа неистова, почто его введосте ко мне? 15 Еда не имею аз неистовых, яко введосте его, да беснуется предо мною? Сей да не внидет в дом мой.

**22** И отиде Давид оттуду, и спасеся, и прииде в пещеру Одолламску: и слышавше братия его и дом отца его, приидоша к нему тамо. 2 И собращася к нему всяк иже в нужде, и всяк должник, и всяк печальный душею, и бе ими обладая, и бяше с ним яко четьреста мужей. 3 И отиде Давид оттуду в Массифаф Моавитский и рече к царю Моавитску: да будут ныне отец мой и мати моя у тебе, дондеже познаю, что сотворит мне Бог. 4 И умоли лице царя Моавитска, и пребываху у него по вся дни, сущу Давиду во области той. 5 И рече Гад пророк к Давиду: не седи во области сей: иди, и да внидеш в землю Иудину. И иде Давид и пришед седе в граде Сарих. 6 И слыша Саул, яко познан бысть Давид, и мужие иже с ним: и Саул седяше на холме под дубравою яже в Раме, и копие в руку его, и вси отроцы его предстояху ему. 7 И рече Саул ко отроком своим предстоящим ему: слышите ныне, сынове Вениаминовы, аще воистинну всем вам даст сын Иессеев села и винограды

и поставит вас всех в сотники и тысящники: 8 яко вси согласистесь на мя, и несть открываяй во ухо мое, егда положи завет сын мой с сыном Иессеовым, и несть от вас ни един боляй о мне и возвещаяй во ушы мои, яко воздвиже сын мой раба моего на мя врага, якоже день сей? 9 И отвеща Доик Сирин приставленный над мсками Сауловыми и рече: видех сына Иессеева пришедша в Номву ко Авимелеху сыну Ахитову иерею: 10 и вопрошаше о нем Бога, и брашно вдаде ему, и мечь Голиафа иноплеменника вдаде ему. 11 И посла царь призвати Авимелеха сына Ахитова, и вся сыны отца его иереи от Номвы. И приидоша вси к царю. 12 И рече Саул: слыши ныне, сыне Ахитов. И рече: се, аз, глаголи, господине. 13 И рече ему Саул: почто совещался еси на мя ты и сын Иессеев, яко вдал еси ему хлеб и мечь, и вопрошал еси о нем Бога положити его на мя во врага, якоже день сей? 14 И отвеща Авимелех царю и рече: и кто во всех рабех твоих верен якоже Давид, и зять царев, и князь всем заповедем твоим, и славен в дому твоём? 15 Еда днешь начах вопрошати о нем Бога? Никако: да не возложиши, царю, на раба твоего словесе сего, и на весь дом отца моего, яко не ведяше раб твой во всех сих словесе мала, или велика. 16 И рече царь Саул: смертью умреши, Авимелех, ты и весь дом отца твоего. 17 И рече царь скороходцем предстоящим пред ним: приведите и избийте иереи Господни, яко рука их с Давидом, и понеже познаша, яко бежит той, и не возвестиша во ушию мою. И не хотяху отроцы царевы возложить рук своих на иереи Господни. 18 И рече царь Доику: обратися ты, и устремися на иереи. И обратися Доик Сирин, и уби иереев Господних

в той день, триста пять мужей, всех носящих ефуд: 19 и Номву град иерейский погуби острием оружия от мужеска полу и до женска, от отрока и до ссушаго, и телца и осла и овчате. 20 И угонзе един сын Авимелеха сына Ахитова, имя ему Авиафар, и бежа вслед Давида. 21 И возвести Авиафар Давиду, яко изби Саул вся иереи Господни. 22 И рече Давид ко Авиафару: ведях в день той, яко тамо бе Доик Сирин, яко возвещая возвестит Саулу: аз есмь виновен о душах дому отца твоего: 23 седи со мною, не бойся, яко идеже аще взыщу души моей место, взыщу и души твоей, яко сохранен будеши ты у мене.

**23** И возвестиша Давиду, глаголюще: се, иноплеменницы облегоша Кеиль, и расхищают и попирают плоды. 2 И вопроси Давид Господа, глаголя: аще пойду и избию иноплеменники сия? И рече Господь: иди, и победиши иноплеменники сия, и спасеши Кеиль. 3 И реша мужие Давидовы к нему: се, мы зде во Иудеи боимся, и како будет, аще идем в Кеиль, в плен иноплеменников внидем? 4 И приложи еще Давид вопросити Господа. И отвеща ему Господь и рече ему: востани и сниди в Кеиль, яко Аз предаю иноплеменники в руце твои. 5 И иде Давид и мужие его с ним в Кеиль, и брашася со иноплеменники: и бежаша (иноплеменницы) от лица его, и взя скоты их, и порази их язвою великою, и спасе Давид живуцья в Кеиле. 6 И бысть егда бежа Авиафар сын Авимелехов к Давиду, и той с Давидом в Кеиль сниде, имый ефуд в руце своей. 7 И возвестися Саулу, яко прииде Давид в Кеиль. И рече Саул: предаде его Бог в руце мои, яко заключися вшед в град (имуць) врата и вереи. 8 И заповеда Саул всем людем на брань снити в Кеиль, яти Давида и мужы

его. 9 И уведе Давид, яко не премолкает злобы о нем Саул, и рече Давид ко Авиафару жерцу: принеси ефуд Господень. 10 И рече Давид: Господи Боже Израилев, слышав услыша раб Твой, яко ищет Саул приити на Кеиль растлити град мене ради: 11 аще заключится? И ныне аще снидет Саул, якоже слыша раб Твой? Господи Боже Израилев, возвести рабу Твоему. И рече Господь: заключится. 12 И рече Давид: аще предадут мя иже в Кеиле, и мужы моя в руки Саули? И рече Господь: предадут. 13 И воста Давид и мужие его с ним, яко четыреста, и изыдоша из Кеилы, и идоша, аможе хотяху. И возвестиша Саулу, яко угонзе Давид из Кеилы: и остави ити. 14 И седе Давид в Масереме в пустыни во узинах, и седяше в пустыни на горе Зиф, в земли знойне: и искаше его Саул во вся дни, и не предаде его Бог в руце его. 15 И виде Давид, яко исходит Саул искати его: и Давид бяше на горе знойне, в дубраве Зиф. 16 И воста Ионафан сын Саулов и иде к Давиду в дубраву, и утверди руце его во Господе, 17 и рече к нему: не бойся, яко не имать обрести тебе рука отца моего Саула, и ты имаши царствовати во Израили, и аз буду по тебе другий, и Саул отец мой уведа тако. 18 И положиста оба завет пред Господем: и седяше Давид в дубраве, а Ионафан отиде в дом свой. 19 И изыдоша Зифее от знойных земли к Саулу на холм, глаголюще: не се ли Давид скрыся у нас в Мессаре во узинах в дубраве на холме Ехелатсте, иже одесную Иесемона? 20 И ныне все еже по души цареви ко исхождению, да снидет (убо) к нам: заключиша бо его в руки цареви. 21 И рече им Саул: благословени вы Господеви, яко поболесте о мне: 22 идите ныне, и уготовите еще, и познайте место его, идеже будет нога его вскоре, тамо идеже

ресте, да не како прехитрит: **23** и видите и уразумеите о всех местех, идеже той крыется, и возвратитесь ко мне на готово, и иду с вами: и будет, аще есть на земли, изыскати имаю его во всех тысящах Иудиных. **24** И восташа Зифее, и идоша пред Саулом: Давид же и мужие его бяху в пустыни Маон к западу одесную Иесемона. **25** И иде Саул и мужие его искати Давида. И возвестиша Давиду, и сниде ко каменю иже в пустыни Маон. И услыша Саул, и погна вслед Давида в пустыню Маон. **26** И идяше Саул и мужие его от страны горы отсюда, Давид же бе и мужие его от страны горы отнюду: и бе Давид укрываяся ити от лица Сауля, а Саул и мужие его ополчишася на Давида и на мужы его яти их. **27** И прииде вестник к Саулу глаголя: потщися и иди, яко нападоша иноплеменницы на землю твою. **28** И возвратися Саул не гнати вслед Давида, и иде противу иноплеменником: сего ради наречеса место оно Камень Разделенный. **29** И воста Давид оттуду и седе во узинах Енгадди.

**24** И бысть егда возвратися Саул вспять от иноплеменник, и возвестиша ему, глаголюще: се, Давид в пустыни Енгадстей. **2** И взя Саул с собою три тысящы мужей избранных от всего Израиля и иде искати Давида и мужей его прямо лицу саддеем: **3** и прииде до стад пасомых на пути, и бе тамо вертеп: и Саул вниде испразднитися, Давид же и мужие его во внутренних вертепа седяху. **4** И реша мужие Давидовы к нему: се, день сей, о немже рече Господь тебе предати врага твоего в руце твои, и сотвориши ему якоже угодно пред очима твоима. И воста Давид, и отреза воскрилие одежды Саули отай. **5** И бысть по сих, и вострепета Давиду сердце его, яко отреза воскрилие одежды Саули: **6** и рече



Давид к мужем своим: никакоже ми от Господа, аще сотворю глагол сей господину моему христу Господню, еже нанести руку мою нань, яко христос Господень есть сей. 7 И увеща Давид мужы своя словесы и не даде им воставшым убити Саула. И воста Саул, и сниде на путь. 8 И изыде Давид вслед его из вертепа: и возопи Давид вслед Саула, глаголя: господине царю. И озресе Саул вслед себе, и преклонися Давид лицом своим до земли, и поклонися ему. 9 И рече Давид к Саулу: почто слушаеши словес людей глаголющих: се, Давид ищет души твоя? 10 Се, днесь видеста очи твои, яко предаде тя Господь днесь в руке мои в вертепе, и не восхотех убити тебе, и пощадох тя, и рех: не нанесу руки моея на господа моего, яко помазанник Господень сей есть: 11 и се, воскрилие одежды твоя в руке моей, аз отях воскрилие одежды твоя, и не убих тебе: и уразумей, и виждь днесь, яко несть злобы в руке моей, ниже нечестия и презорства, ниже согреших к тебе, а ты ищещи души моея изяти ю: 12 да судит Господь между мною и тобою, и да защитит мя Господь от тебе: рука же моя не будет на тя, 13 якоже глаголется притча древняя: от беззаконник изыдет преступление: рука же моя не будет на тя: 14 и ныне ты, царю Израилев, вслед кого исходиши? Кого ты гониши? Вслед ли пса умерша и вслед блохи единыя? 15 Да будет Господь судия и отмститель между мною и тобою, да видит Господь и судит суд мой, и осудит мя от руки твоя. 16 И бысть, егда сконча Давид глаголы сия, глаголя к Саулу, и рече Саул: твой ли глас сей, чадо Давиде? И воздвиже Саул глас свой и восплакася. 17 И рече Саул к Давиду: праведен еси ты паче мене, яко ты воздал ми еси благая, аз же тебе

воздах злая: **18** и ты возвестил ми еси днесь, яже сотворил ми благая, яко заключи мя Господь в руки твоя днесь, и не убил мя еси: **19** и якоже аще кто обрел бы врага своего в печали, и отпустил бы его в путь благ, и Господь воздаст ему благая, якоже ты сотворил еси днесь: **20** и ныне се, аз вем, яко царюя царствовати имаши, и стати имать в руке твоей царство Израилево: **21** и ныне кленися ми Господем, яко не искорениши семене моего по мне и не погубиши имени моего от дому отца моего. **22** И клятсся Давид Саулу. И отиде Саул на место свое, Давид же и мужие его въздоша в мессеру тесную.

**25** И умре Самуил, и собращася весь Израиль, и плакашася его, и погребоша его в дому его во Армафеме. И воста Давид, и сниде в пустыню Маоню. **2** И бе человек в Маоне и стада его на Кармиле, и человек велик зело: и сему овец три тысящы и коз тысяща: и бысть егда стрижаше стада своя на Кармиле: **3** имя же человеку Навал и имя жене его Авигеа: и жена его блага смыслом и добра взором зело, муж же ея человек жесток и лукав в начинаниих и человек зверонравен. **4** И услыша Давид в пустыни, яко стрижет Навал на Кармиле стада своя. **5** И посла Давид десять отроков и рече отроком: възыдите на Кармил и идите к Навалу и вопросите его именем моим с миром, **6** и рцыте сия: здрав ли еси ты и дом твой, и вся твоя здрава ли суть? **7** И ныне се, услышах, яко стригут тебе ныне пастуси твои, иже беша с нами в пустыни, и не возбранихом им, и не повелехом им ничесоже во вся дни, егда беша на Кармиле: **8** вопроси отроков твоих и возвестят ти: и да обрящут отроцы твои благодать пред очима твоима, яко в день благ приидохом: даждь убо ныне

еже обрящет рука твоя отроком твоим и сыну твоему Давиду.  
9 И приидоша отроцы Давидовы и глаголаша словеса сия к Навалу, по всем глаголом сим именем Давидовым. 10 И возсочи Навал и отвеца отроком Давидовым и рече: кто Давид? И кто сын Иессеов? Днесь умножени суть раби отходяще кийждо от лица господина своего: 11 и возму ли хлебы моя и вино мое и закланая моя, яже заклах стригущым моя овцы, и дам ли оная мужем, ихже не вем откуда суть? 12 И возвратишася отроцы Давидовы путем своим, и возвращешся приидоша и возвестиша Давиду по глаголом сим. 13 И рече Давид мужем своим: препояшитесь кийждо оружием своим. И препоясашася оружием своим, и сам Давид препоясася мечем своим, и идоша вслед Давида, яко четыреста мужей, а двести их осташася у сосудов. 14 И Авигеи жене Навалове поведи един отрок, глаголя: се, присыла Давид послы от пустыни благословити господина нашего, он же отвратися от них: 15 мужие же блази (беша) нам зело, не возбраняху нам, ниже повелеваху нам что во вся дни, в няже бехом с ними: 16 и сущым нам на селе, аки стена беша окрест нас, и в нощи и во дни, по вся дни в няже бехом с ними пасуще стада: 17 и ныне разумей и виждь ты, что сотвориши, яко совершися злоба на господина нашего и на дом его, и сей сын губитель, и не возможно глаголати к нему. 18 И потщася Авигеа, и взя двести хлебов и два сосуда вина и пять овец устроены и пять мер муки чистыя и кошницу гроздия и двести вязаниц смоквей, и возложи на ослята, 19 и рече ко отроком своим: поидите предо мною, и се, аз вслед вас иду. Мужу же своему не возвести. 20 И бысть, вседшей ей на ослицу и сходящей в подгорие, и се,

Давид и мужие его идяху сопротиву ея, и срете их. 21 И рече Давид: воистинну всуе вся навалова сохраних в пустыни, и ничесоже повелех взяти от всех яже его, и воздаде ми злая за благая: 22 сия да сотворит Бог Давиду и сия да приложит, аще до утра оставлю от всех Наваловых даже до мочащагося к стене. 23 И увиде Авигеа Давида, и потщася и скочи со осляте, и паде пред Давидом на лице свое, и поклонися ему до земли, 24 и паде на ноги его и рече: во мне, господине мой, неправда моя: да глаголет ныне раба твоя во уши твои, и послушай словес рабы твоея: 25 да не возложит ныне господин мой сердца своего на человека гибелнаго сего, яко по имени своему той есть: Навал имя ему, и безумие с ним: аз же раба твоя не видех отроков господина моего, ихже послал еси: 26 и ныне, господине мой, жив Господь и жива душа твоя, якоже возбрани тебе Господь еже не приити на кровь неповинну и спасти тебе руку твою: и ныне да будут якоже Навал врази твои и ищущии господину моему зла: 27 и ныне возми благословение сие, еже принесе раба твоя господину моему, и даждь отроком предстоящим господину моему: 28 отими ныне неправду рабы твоея, яко творя сотворит Господь дом верен господину моему, яко на брани господина моего Господь споборет, и злоба не обряцется в тебе никогдаже: 29 и аще востанет человек гоняй тя и ищай души твоея, и будет душа господина моего привязана соузом жизни у Господа Бога, и душу врагов твоих поразиши пращею посреде пращи: 30 и будет егда сотворит Господь господину моему вся, елика глаголаше благая о тебе, и повелит тебе Господь (быти) вождем во Израили, 31 и не будет тебе сие мерзость и соблазн сердцу господина моего, еже излияти

кровь неповинную туне и спасти руку свою себе: и да благо сотворит Господь господину моему, и вспомянеши рабу твою, еже благосотворити ей. 32 И рече Давид ко Авигеи: благословен Господь Бог Израилев, иже посла тя днесь на сретение ми, 33 и благословен совет твой, и благословена ты удержавшая мя в день сей ити на пролитие крове, и спасти ми руку мою: 34 обаче жив Господь Бог Израилев, иже возбрани ми днесь зло сотворити тебе: зане аще бы не потщалася и не пришла еси на сретение мне, тогда рех: аще останется Навалу до утренняго света мочащийся к стене. 35 И прия Давид от руку ея вся, яже принесе ему, и рече ей: иди с миром в дом свой: виждь, послушах гласа твоего и приях лице твое. 36 И прииде Авигеа к Навалу: и се, у него пир в дому его, яко пир царев: и сердце навалово весело в нем, и той пьян до зела. И не возвести Авигеа Навалу глагола ни велика ни мала до света утренняго. 37 И бысть заутра, егда истрезвися Навал от вина, поведи ему жена его вся глаголы сия, и умре сердце его в нем, и той бысть яко камень. 38 И бысть яко десять дний, и порази Господь Навала, и умре. 39 И услыша Давид и рече: благословен Господь, иже суди суд поношения моего от руки Навали, и раба Своего удержит от руки злых, и злобу Навалю обрати Господь на главу его. И посла Давид и глагола ко Авигеи пояти ю себе в жену. 40 И приидоша отроцы Давидовы ко Авигеи в Кармил, и реша ей, глаголюще: Давид посла нас к тебе, да ты поймет себе в жену. 41 И воста и поклонися до земли лицом и рече: се, раба твоя в рабыню умывати ноги отроком твоим. 42 И воста Авигеа, и вседе на осли, и пять девиц идяху вслед ея, и поиде вслед отроков Давидовых, и

бысть ему в жену. 43 И Ахинааму поят Давид от Иезраеля, и бесте ему обе жены. 44 Саул же даде Мелхолу дщерь свою жену Давидову Фалтию сыну Амисову иже от Роммы.

**26** И приидоша Зифее от знойныя к Саулу на холм, глаголюще: се, Давид скрыся у нас на холме Ехелаф, прямо Иессемону. 2 И воста Саул, и сниде в пустыню Зиф, и с ним три тысящы мужей избранных от Израиля, искати Давида в пустыни Зиф. 3 И ополчися Саул на холме Ехелаф иже прямо Иессемону при пути, Давид же седяше в пустыни. И виде Давид, яко идет Саул вслед его в пустыню, 4 и посла Давид соглядатаи, и разуме, яко идет Саул готов из Кеиля: 5 и воста Давид отай, и вниде в место, идеже почиваше Саул, и тамо бяше Авенир сын Ниров, первый воевода его, и Саул спаше в колеснице царстей, и людие ополчившесе окрест его. 6 И отвеща Давид и рече ко Авимелеху Хеттеину и ко Авессе сыну Саруину брату Иоавлю, глаголя: кто внидет со мною к Саулу в полк? И рече Авесса: аз вниду с тобою. 7 И внидоста Давид и Авесса в люди нощию: и се, Саул спяй сном в колеснице царстей, и копие его водружено в землю при главе его, Авенир же и воины его спаху окрест его. 8 И рече Авесса к Давиду: заключи Господь днесь врага твоего в руке твои, и ныне поражу его копием в землю единожды, и не повторю ему. 9 И рече Давид ко Авессе: не убивай его, яко кто прострет руку свою на христа Господня, и неповинен будет? 10 И рече Давид: жив Господь, аще не Господь поразит его, или день его приидет, и умрет, или на брань снидет и погибнет: 11 да не будет ми от Господа нанести руку мою на христа Господня: и ныне возми копие от возглавия его и сосуд водный, и отидем мы о себе. 12 И взя

Давид копие и сосуд водный от возглавия его, и отидоста о себе: и не бе иже бы видел или разумел, и не бяше встающего, вси бо спяху, яко сон крепок от Господа нападе на ня. 13 И преиде Давид на он пол и ста на версе горы издалеча, и мног бе путь между ими. 14 И воззва Давид к людем, и Авениру рече глаголя: не отвещаеши ли, Авенире? И отвеща Авенир и рече: кто ты еси зовый мя? 15 И рече Давид ко Авениру: не муж ли еси ты? И кто, якоже ты, во Израили? И почто не храниши господина твоего царя? Яко вниде един от людей убити господина твоего царя: 16 и не благо сие (зело), еже сотворил еси: жив Господь, яко сынове смерти вы, не хранящи господа своего царя христа Господня: и ныне виждь, где есть копие царево и сосуд водный, яже беша при главе его? 17 И позна Саул глас Давидов и рече: твой ли глас сей, чадо Давиде? И рече Давид: аз раб твой, господи царю. 18 И рече Давид: почто гониши раба твоего, господи царю? Яко что (ти) согреших? И кая обретесе во мне неправда? 19 И ныне да послушает господь мой царь глаголов раба своего: аще Бог поощряет тя на мя, да будет благовонна жертва твоя: аще же сынове человечести, прокляти сии пред Господем, яко изгнаша мя днесь не утвердятся в жребии Господни, глаголюще: пойди, работай богом чуждим: 20 и ныне да не падет кровь моя на землю пред лицом Господним, яко изыде царь Израилев искати души моя, и гонит якоже нощный вран по горам. 21 И рече Саул: согреших: возвратися, чадо Давиде, яко ктому не сотворю ти зла, зане честна душа моя пред очима твоима в день сей: безумно сотворих, и погреших много зело. 22 И отвеща Давид и рече: се, копие царево, да приидет отрок

един и возмет е: **23** и Господь да возвратит коемуждо по правде его и по вере его: якоже предаде тя Господь днесь в руце мои, и не восхотех нанести руки моя на христа Господня: **24** и се, якоже возвеличися душа твоя днесь во очию моею, тако да возвеличится душа моя пред Господем, и да покрывает мя и измет мя от всякия печали. **25** И рече Саул к Давиду: благословен ты, чадо, и творяй сотвориши и могий можешши. И отиде Давид в путь свой, а Саул возвратися на место свое.

**27** И рече Давид в сердцы своем, глаголя: ныне впаду в день един в руки Саули, и не будет ми благо, аще не спасуся в земли иноплеменничи, и престанет Саул искати мене во всяком пределе Израилеве, и спасуся из руки его. **2** И воста Давид и шесть сот мужей иже с ним, и иде ко Агхусу сыну Аммахову царю Гефску. **3** И пребысть Давид у Агхуса в Гефе, сам и мужие его вси и дом его, и Давид и обе жены его, Ахинаам Иезраилитыня и Авигея жена Навала Кармилскаго. **4** И возвестиша Саулу, яко отбеже Давид в Геф, и не приложи ктому (Саул) искати его. **5** И рече Давид ко Агхусу: аще обрете раб твой благодать пред очима твоима, да даси ми место во единем от градов иже на селе, и сяду тамо: и вскую седит раб твой во граде царственном с тобою? **6** И даде ему Агхус в день той Секелаг: сего ради бысть царю Иудейску Секелаг до днешняго дне. **7** И бысть число дний, в няже седяше Давид на селе иноплеменничи, четыре месяцы. **8** И восходяше Давид и мужие его и нападаху на всякаго Гессера и на Амаликита, и се, земля населяшесе от Ламсура и до земли Египетския: **9** и поражаше Давид землю, и не оставляше в живых мужеска полу и женска: и



взимаху стада, и буйволицы и ослята, и велблюды и ризы, и возвращающесе прихождаху ко Агхусу. 10 И рече Агхус к Давиду: на кого нападосте ныне? И рече Давид ко Агхусу: к югу Иудеи и к югу Иесмеги и к югу Кенезиа: 11 и мужеска полу и женска не оставлях в живых еже вводити в Геф, глаголя: да не возвестят в Гефе на нас, глаголюще: сия творит Давид. И сие оправдание его во вся дни, в няже седяше Давид на селе иноплеменничи. 12 И уверися Давид Агхусу зело, глаголя: омерзением омерзе в людех своих во Израили, и будет ми раб во веки.

**28** И бысть во дни оны, и собращася иноплеменницы в полки своя изыти братися со Израилтяны. И рече Агхус к Давиду: разумея разумей, яко со мною изыдеши на брань ты и мужие твои. 2 И рече Давид ко Агхусу: тако ныне уразумееш, яже сотворит раб твой. И рече Агхус к Давиду: темже начальника хранителей телу (моему) поставлю тя во вся дни. 3 И Самуил умре, и рыдаше по нем весь Израиль, и погребоша его во Армафеме во граде его: и Саул изби чревобасники и волхвы земли своея. 4 И собращася иноплеменницы и приидоша и ополчишася в Сонаме: и собра Саул вся мужы Израилевы, и ополчишася в Гелвуге. 5 И виде Саул полки иноплеменничи, и убояся, и ужасеся сердце его зело. 6 И вопроси Саул Господа, и не отвеща ему Господь ни во сне, ни во явлениих, ни во пророцех. 7 И рече Саул отроком своим: поищите ми жены волшебницы, и пойду к ней, и вопрошу ея. И рече отроцы его к нему: се, жена волшебница во Аендоре. 8 И прикрыся Саул и облечеся в ризы ины, и иде сам и два мужа с ним, и прииде нощию к жене и рече ей: поволхвуй ми чревоволшебством, и возведи

ми, егоже реку ти. 9 И рече ему жена: се, ныне ты сам веси, елика сотвори Саул, како истреби чревобасники и волхвы от земли, и вскую ты ловиши душу мою, еже умертвити ю? 10 И клятвса ей Саул, глаголя: жив Господь, аще срящет тя неправда о словеси сем. 11 И рече жена Саулу: кого возведу ти? И рече Саул: Самуила возведи ми. 12 И виде жена Самуила, и возгласи гласом велиим, и рече жена к Саулу: почто мя прельстил еси? И ты еси Саул. 13 И рече ей царь: не бойся, рцы кого видела еси? И рече ему жена: боги видех восходящя от земли. 14 И рече ей: что познала еси? И рече ему (жена): (видех) мужа стара восходяща от земли, и сей оболчен одеянием долгим. И уразуме Саул, яко сей Самуил (есть), и преклони лице свое на землю и поклонися ему. 15 И рече ему Самуил: почто понудил еси мя взыти ми? И рече Саул: скорблю зело, яко иноплеменницы воуют на мя, и Бог отступи от мене, и не услыша мене ктому ни в руках пророческих, ни во снех, ни во явлениих: и ныне призвах тя, да скажеш ми, что сотворю. 16 И рече Самуил: почто вопрошаеши мя, а Господь отступи от тебе и бысть со ближним твоим? 17 И сотвори Господь тебе, якоже глагола Господь рукою моею, и исторгнет Господь царство твое из руку твою и вдаст е ближнему твоему Давиду, 18 понеже не послушал еси гласа Господня и не исполнил еси гнева ярости Его на Амалике, глагола ради того сотвори тебе Господь в день сей: 19 и предаст Господь Израиля с тобою в руки иноплеменничи, и завтра ты и сынове твои падут с тобою, и полк Израилев предаст Господь в руки иноплеменничи. 20 И потщася Саул, и паде стоящ на землю, и убояся зело от словес Самуиловых, и не бысть

ктому крепости в нем: яко не яде хлеба во весь день той и во всю ночь ту. **21** И вниде жена к Саулу, и виде его, яко смятеся зело, и рече к нему: се, ныне послуша раба твоя гласа твоего, и положих душу мою в руце мои, и послушах словес, яже ми глаголал еси: **22** и ныне послушай гласа рабы твоея, и положу пред тобою укрух хлеба, и яждь, и будет в тебе крепость, яко идеши в путь. **23** И не хотяше ясти: и понудиша его отроцы его и жена, и послуша гласа их, и воста от земли, и седе на седалищи. **24** Жене же бяше юница питомая в дому: и потщася, и закла ю: и взя муку и смеси, и испече опресноки, **25** и принесе пред Саула и пред отроки его: и ядоша, и восташа и отидоша в ночь ону.

**29** И собраша иноплеменницы вся полки своя во Афек, Израилтяне же ополчишася во Аендоре иже во Иезраели. **2** И воеводы иноплеменничии предидяху со стами и тысящами, Давид же и мужие его идяху в последних со Агхусом. **3** И реша воеводы иноплеменничии кто суть идущии сии? И рече Агхус к воеводам иноплеменничим: не сей ли Давид раб Саула царя Израилева, иже бысть с нами дний сие второе лето? И не обретох в нем ничтоже, от дне в оньже прииде ко мне даже до сего дне. **4** И прискорбни быша о нем воеводы иноплеменничии и глаголаша ему: возврати мужа, и да возвратится на место свое, идеже поставил еси его тамо, и да не идет с нами на брань, и да не будет наветник в полцех: и чим примирится сей господину своему? Не главами ли мужей сих? **5** Не сей ли есть Давид, емуже изыдоша с лики, глаголюще: победи Саул с тысящами своими, и Давид со тмами своими? **6** И призва Агхус Давида и рече ему: жив Господь, яко прав ты и благ пред очима моима, и вход твой и

исход твой со мною в полце, и яко не обретох в тебе злобы, отнележе еси пришел ко мне до днешняго дне, но пред очима воевод не благ еси ты: 7 и ныне возвратися и иди с миром, и да не сотвориши зла пред очима воевод иноплеменничих. 8 И рече Давид ко Агхусу: что сотворих ти? И что обрел еси в рабе твоём, от негоже дне бех пред тобою, и даже до сего дне, да не иду воевати врагов господина моего царя? 9 И отвеща Агхус Давиду: вем, яко благ ты пред очима моима яко Ангел Божий, но воеводы иноплеменничии глаголют: да не идет с нами на брань: 10 и ныне востани рано ты и отроцы господина твоего ходящии с тобою и идите на место, идеже поставих вас, и словесе пагубна да не положиши на сердцы твоём, яко благ еси ты предо мною: и встаните рано в путь, егда разсвещает вам, и идите. 11 И урани Давид сам и мужие его отити и стрещи земли иноплеменничии, и иноплеменницы възыдоша на брань во Иезраель.

**30** И бысть приходящу Давиду и мужем его к Секелагу в день третий, и Амалик нападе на южную страну и на Секелаг, и порази Секелаг и сожже его огнем: 2 жен же и всех сущих в нем от мала до велика не умертвиша мужа ни жены, но плениша, и отидоша в путь свой. 3 И прииде Давид и мужие его во град, и се, сожжен бяше огнем, жены же их и сынове их и дщери их пленени быша. 4 И воздвиже Давид и мужие его глас свой и плакашася дондеже не бе в них силы ктому плакаться. 5 И жены обе Давидовы пленени быша, Ахинаам Иезраилитыня, и Авигеа бывшая жена Навала Кармилскаго. 6 И оскорбе Давид зело, яко совещаашася людие камением побити его, яко скорбна бяше душа всех людий коегождо о сынех своих и о дщерех своих. И укрепися

Давид о Господе Бозе своем, 7 и рече Давид ко Авиафару иерею сыну Авимелехову: принеси ефуд. И принесе Авиафар ефуд к Давиду. 8 И вопроси Давид Господа, глаголя: пожену ли вслед полчища сего? И постигну ли их? И рече Господь: гони, яко постизая постигнеши их и избавляя избавиши. 9 И иде Давид сам и шесть сот мужей с ним, и приидоша даже до потока Восорска, прочии же осташася: 10 и гна с четырьми сты мужей, двести же мужей осташася, иже седоша об он пол потока Восорска. 11 И обретоша мужа Египтянина на селе, и яша его, и приведоша его к Давиду, и даша ему хлеба, и яде, и напоиша его водою: 12 и даша ему часть смоквей, и яде, и укрепися дух его в нем, яко не яде хлеба и не пи воды три дни и три ноцы. 13 И рече ему Давид: откуда еси, и чий еси ты? И рече отрок Египтянин: аз есмь раб мужа Амаликитянина, и остави мя господин мой, яко изнемогох днесь уже третий день: 14 и мы ходихом на юг до Хелефи и на Иудейския страны и на Гелвуй, и Секелагу пожгохом огнем. 15 И рече ему Давид: доведеши ли мя до полчища сего? И рече: кленися ми Богом, яко не убиеши мя и не предаши мя в руце господину моему, и доведу тя до полчища сего. 16 (И клятся ему Давид: ) и приведе его онамо, и се, тии разсеяни быша по лицу всея земли, ядуще и пьюще и празднующе о всех корыстех великих, яже взяша от земли иноплеменничи и от земли Иудины. 17 И прииде на них Давид, и изби их от утра даже до вечера и наутрие: и не спасеся от них муж, разве четыреста отрок, иже вседоша на велблюды и убежаша. 18 И отя Давид вся елика взяша Амаликиты, и обе жены своя отя, 19 и не погибе им от мала даже до велика, и от корыстей, и даже до сынов и

дщерей и даже до всех, яже взяша, и вся возврати Давид: 20 и взя Давид вся стада и паствины, и погна пред пленом: и плен оный нарицашеся сей плен Давидов. 21 И прииде Давид к двема стом мужем оставшымся ити вслед Давида, ихже посади на потоце Восорсте, и изыдоша на сретение Давиду и на сретение людем иже с ним: и прииде Давид до людий, и вопросиша его о мирных. 22 И отвещаша вси мужие пагубнии и лукавнии от мужей ратных ходивших с Давидом и реша: яко не гониша с нами, не дадим им от плена, егоже взяхом, но токмо кийждо жену свою и чада своя да возмут и возвратятся. 23 И рече Давид: не сотворите, братия моя, тако, повнегда предаде Господь нам и сохрани нас, и предаде Господь полчище сие нашедшее на ны в руки наша: 24 и кто послушает ваших словес сих? Яко не менши нас суть: понеже по части исходящаго на брань, тако будет часть сидящаго при сосудех, по томужде разделятся. 25 И бысть от дне того и выше, и бысть в повеление и на оправдание Израилю даже до дне сего. 26 И прииде Давид в Секелаг, и посла старейшинам от корыстей Иудиных и искренним своим, глаголя: се, вам благословение от корыстей врагов Господних, 27 суцым в Вефсуре и в Раме южней и в Гефоре, 28 и во Ароире и во Аммаде, и во Сафе и во Есфифе и в Гефе, 29 и в Кинане и в Сафеце, и в Фимафе и в Кармиле, и суцым во градех Иеремиила и во градех Кенезия, 30 и суцым во Иеримуфе и во Вирсавеи и в Номве, 31 и суцым в Хевроне, и во вся места, яже пройде Давид тамо сам и мужие его.

**31** И иноплеменницы воеваху на Израиля, и бежаша мужие Израилевы от лица иноплеменнича, и падаху язвеннии

на горе Гелвуге. 2 И снисдошася иноплеменницы с Саулом и с сынами его, и убиша иноплеменницы Ионафана и Аминадава и Мелхисуа, сыны Сауловы. 3 И отяготе брань на Саула, и обретоша его копейницы мужие стрелцы, и уязвен бысть (Саул) во утробу. 4 И рече Саул к носящему оружие его: изсуни мечь твой и прободи мя им, да не приидут необрезаннии сии и избудут мя, и поругаются мне. И не хотяше носяй оружие его, яко убося зело. И взя Саул мечь свой и паде на него. 5 И виде носяй оружие его, яко умре Саул, и паде и той на мечь свой и умре с ним. 6 И умре Саул и трие сынове его, и носяй оружие его, и вси мужие его в день той купно. 7 И видеша мужие Израилстии, иже об он пол юдоли и иже об он пол Иордана, яко бежаша мужие Израилстии, и яко умре Саул и сынове его, и оставиша грады своя и бежаша: и приидоша иноплеменницы и вселишася в них. 8 И бысть на утрие, и приидоша иноплеменницы обнажити мертвых, и обретоша Саула и три сыны его падшыя на горе Гелвуге, 9 и обратиша его, и сняша оружие его, и отсекоша главу его, и послаша в землю иноплеменничу окрест возвещающе идолом их и людем их: 10 и положиша оружие его у Астарты, тело же его воткнуша на стене Вефсамли. 11 И услышаша живущии во Иависе Галаадитийстем, яже сотвориша иноплеменницы Саулу, 12 и восташа вси мужие сильнии, и идоша всю ночь, и взяша тело Саулово и тело Ионафана сына его с стены Вефсамски, и принесоша я во Иавис, и сожгоша я тамо: 13 и взяша кости их, и погребоша я в дубраве яже во Иависе, и постишася седмь дний.

## Вторая книга Царств

**1** И бысть егда умре Саул, и Давид возвратися победив Амалика, и пребысть Давид в Секелазе дни два. **2** И бысть в третий день, и се, муж прииде от полка людей Сауловых, ризы же его (бяху) раздраны, и персть на главе его: и бысть егда вниде к Давиду (отрок), и пад на земли поклонися ему. **3** И рече ему Давид: откуда ты пришел еси? И рече ему: от полка Израилева аз избегах. **4** И рече ему Давид: что слово сие? Возвести ми. И рече: яко побегоша людие от брани, и падоша мнози от людей, и измроша, и Саул и Ионафан сын его умре. **5** И рече Давид отроку возвестившему ему: како знаеши, яко умре Саул и Ионафан сын его? **6** И рече отрок возвещаяй ему: по случаю приидох в гору Гелвуйскую, и се, Саул нападаше на копие свое, и се, колесницы и вельможи собрашася нань: **7** и обозрися вспять (Саул) и виде мя, и призва мя, и рех: се, аз: **8** и рече ми: кто ты еси? И рех: Амаликитин есмь аз: **9** и рече ми: прииди убо на мя и убий мя, яко объят мя тма лютая, яко еще душа моя во мне: **10** и стах над ним, и убих его: ведех бо, яко не будет жив по падении своем: и взяв венец царский, иже бе на главе его, и нарамницу, яже бе на плещу его, и принесох сия к господину моему семо. **11** И емься Давид за ризы своя, и раздра я, и вси мужие иже с ним раздраша ризы своя, **12** и рыдаша и плакашася, и постишася до вечера о Сауле, и о Ионафане сыне его, и о людех Иудиных и о доме Израилеве, яко избиени быша мечем. **13** И рече Давид отроку возвестившему ему: откуда ты еси? И рече: сын мужа пришелца Амаликитина есмь аз. **14** И рече ему Давид: како не убоялся еси воздвигнути



руку твою погубити христа Господня? 15 И призва Давид единого от отрок своих и рече: иди, убий его. И уби его, и умре. 16 И рече ему Давид: кровь твоя на главе твоей, яко уста твоя на тя возвещаша, глаголюще: яко аз убих христа Господня. 17 И плакася Давид плачем сим о Сауле и о Ионафане сыне его, 18 и рече еже научити сыны Иудины стрелянию. Се написано в книзе Праведнаго. 19 И рече: воздвигни столп, Израилю, над умершими на высоких твоих язвеными: како падоша сильнии? 20 Не возвещайте в Гефе, ниже поведайте на исходищих Аскалоних, да не возвеселятся дщери иноплеменничи, ни да возрадуются дщери необрезанных. 21 Горы Гелвуйския, да не снидет роса ниже дождь на вас: и села начатков (житных), яко тамо повержен бысть щит сильных: щит Саулов не быти помазан елеем: 22 от крове язвены и от тука сильных лук Ионафанов не возвратися тощъ вспять, и мечь Саулов не возвратися тощъ: 23 Саул и Ионафан возлюбленнии и прекраснии неразлучни, благолепни в животе своем, и в смерти своей не разлучишася: паче орлов легцы и паче львов крепцы: 24 плачите по Сауле, дщери Израилевы, иже вас облачаше в червленицы со украшением вашим, и возлагаше украшение злато на ризы ваша: 25 како падоша сильнии посреде брани? Ионафане, до смерти на высоких твоих язвен еси: 26 болезную о тебе, брате мой Ионафане, красный ми зело, удивися любовь твоя от мене паче любве женския: 27 како падоша сильнии, и погибоша оружия бранная?

**2** И бысть по сих, и вопроси Давид Господа, глаголя: вниду ли в един от градов Иудиных? И рече Господь к нему: и вниди. И рече Давид: камо вниду? И рече: в Хеврон. 2 И иде тамо

Давид в Хеврон, и обе жены его, Ахинаам Иезраилитыня и Авигеа (бывшая) жена Навала Кармилскаго, 3 и мужие иже с ним кийждо, и домове их, и начаша жити во градах Хевронских. 4 И приидоша мужие от Иудеи и помазаша тамо Давида, да царствует над домом Иудиным. И возвестиша Давиду, глаголюще: яко мужие Иависа Галаадититскаго погребоша Саула. 5 И посла Давид послы к старейшинам Иависа Галаадититскаго и рече к ним Давид: благословени вы Господу, яко сотвористе милость сию над господином вашим Саулом, христом Господним, и погребосте его и Ионафана сына его: 6 и ныне да сотворит Господь с вами милость и истину: и аз сотворю с вами сие благое, понеже сотвористе глагол сей: 7 и ныне да укрепятся руки ваша, и да будете сынове сильнии, яко умре господин ваш Саул, мене же помаза дом Иудин, да царствую над ними. 8 И Авенир сын Ниров, начальный воевода Саулов, взя Иевосфеа сына Сауля, и изведе его из полка в Манаем, 9 и воцари его над Галаадитиєю и над Фасириєю и над Иезраилем и над Ефремом и над Вениамином и над всем Израилем. 10 Четырнадцать лет Иевосфею бе сыну Саулову, егда нача царствовати над Израилем, и два лета царствова, кроме дому Иудина, иже бысть за Давидом. 11 И быша дние, в няже Давид царствова в Хевроне над домом Иудиным, семь лет и шесть месяц. 12 И изыде Авенир сын Ниров и отроцы Иевосфеа сына Сауля из Манаема в Гаваон. 13 И Иоав сын Саруиев и отроцы Давидовы изыдоша от Хеврона и сретошася с ними у потока Гаваоня купно, и седоша сии над потоком отсюда, и тии оттуду. 14 И рече Авенир ко Иоаву: да востанут ныне отроцы и да поиграют пред нами. И

рече Иоав: да востанут. 15 И восташа и преидоша от отрок Вениаминовых, числом дванадесять Иевосфеа сына Сауля, и от отрок Давидовых дванадесять: 16 и взя кийждо рукою за главу искренняго своего, и мечь его в ребра искренняго его, и падоша вкупе: и наречеса имя месту тому Часть Наветников, яже есть в Гаваоне. 17 И бысть брань жестока зело в той день: и паде Авенир и мужие Израилстии пред отроки Давидовы. 18 И быша тамо три сынове Саруиевы, Иоав и Авесса и Асаил: Асаил же бе легок ногама своима, яко едина серна от сущих на селе. 19 И погна Асаил вслед Авенира, и не уклонися ни на десно ни на лево, но вслед Авенира: 20 и озресе Авенир назад себе и рече: ты ли еси сам, Асаиле? И рече: аз есмь. 21 И рече ему Авенир: уклонися ты на десно или на шее, и возми себе единого от отрок, и возми себе все оружие его. И не восхоте Асаил уклонитися от него. 22 И приложи еще Авенир глаголати ко Асаилу: отступи от мене, да не поражу тя о землю: и како явлю лице мое ко Иоаву? 23 И где суть сия? Возвратися ко Иоаву брату твоему. И не хотяше отступить. И удари его Авенир копием созади в лядвия: и пройде копие сквозе его, и паде тамо и умре пред ним: и бысть всяк приходяй до места, идеже паде Асаил и умре, и останавлиашеся. 24 И погнаша Иоав и Авесса вслед Авенира, и солнце заходяше: и тии приидоша даже до холма Амма, иже есть пред лицом Гаи, путь пустыни Гаваони. 25 И собращася сынове Вениаминовы за Авениром и быша в снитии едином, и сташа на версе холма единого. 26 И воззва Авенир ко Иоаву и рече: еда в победу пояст мечь? Или не веси, яко горька будут последняя? И доколе не речеши людем возвратитися созади братий наших? 27 И рече Иоав:

жив Господь, яко, аще бы не рекл еси, тогда от утра бы людие мои престали гоняще кийждо вслед брата своего. 28 И воструби Иоав трубою, и сташа вси людие, и не погнаша вслед Израилтян, и не приложиша ктому ратовати. 29 Авенир же и мужие его идоша на запад всю ночь ону, и преидоша Иордан, и проидоша всю страну ту, и приидоша в Полк. 30 И Иоав возвратися вспять от Авенира, и собра вся люди, и исчислиша отрок Давидовых (падших) девятнадцать мужей, и Асаила. 31 Отроцы же Давидовы убиша сынов Вениаминих мужей Авенировых триста и шестьдесят мужей. 32 И взяша Асаила, и погребоша его во гробе отца его в Вифлееме. И иде Иоав и мужие его с ним всю ночь, и осветоша в Хевроне.

**3** И бысть брань на много между домом Саулим и между домом Давидовым, и дом Давидов возвышашеся и укрепляшеся, дом же Сауль идяше и изнемогаше. 2 И родишася Давиду в Хевроне сынов шесть: и бе первородный ему Амнон от Ахинаамы Иезраилитыни, 3 и второй ему сын Далуиа от Авигеи Кармилския, и третий Авессалом сын Маахи дочери Фолми царя Гессирска, 4 четвертый Адониа сын Аггифы, и пятый Сафатиа от Авиталы, 5 и шестый Иефераам от Еглы жены Давидовы: сии родишася Давиду в Хевроне. 6 И бысть внегда быти брани между домом Саулим и между домом Давидовым, и бяше Авенир держа дом Саулов. 7 И Саулова подложница бе, ейже бе имя Ресфа, дочь Иоля. И вниде к ней Авенир, и рече Иевосфей сын Сауль ко Авениру: что яко вшел еси к подложнице отца моего? 8 И разгневался зело Авенир о словеси сем на Иевосфеа и рече ему Авенир: еда песия глава есмь

аз? Сотворих днесь милость дому Саула отца твоего и  
братии и знаемым, и не отступих в дом Давидов, и ищещи  
на мне ты о неправде жены днесь? 9 Сия да сотворит  
Бог Авениру и сия да приложит ему, зане якоже клятся  
Господь Давиду, тако сотворю ему в сей день, 10 еже отяти  
царство от дому Сауля и воздвигнути престол Давидов во  
Израили и во Иуде от Дана даже до Вирсавии. 11 И не  
возможе кому Иевосфей отвещати Авениру словесе от  
боязни, яже к нему. 12 И посла Авенир к Давиду послы в  
Фелам, идеже бе, абие, глаголя: положи завет твой со мною,  
и се, рука моя с тобою, еже возвратити ми к тебе весь дом  
Израилев. 13 И рече Давид: добре, аз положу с тобою завет,  
токмо словесе единого прошу у тебе, глаголя: не имаша  
видети лица моего, аще не приведеша Мелхолы дочери  
Саули, приходящу ти видети лице мое. 14 И посла Давид ко  
Иевосфею сыну Саулю вестники, глаголя: отдаждь мне жену  
мою Мелхолу, юже взях за сто необрезаний иноплеменничих.  
15 И посла Иевосфей, и взят ю от мужа ея от Фалтиила  
сына Селлимова. 16 И идяше муж ея с нею плачяся даже  
до Варакима. И рече к нему Авенир: иди, возвратися. И  
возвратися. 17 И рече Авенир к старейшинам Израилевым,  
глаголя: вчера и третияго дне искасте Давида, да царствует  
над вами: 18 и ныне сотворите, якоже Господь глагола о  
Давиде, глаголя: рукою раба Моего Давида спасу люди Моя  
Израиля от руки иноплеменничих и от руки всех врагов их. 19  
И глагола Авенир во уши Вениамину: и иде Авенир глаголати  
во уши Давидовы в Хеврон вся, елика угодна беша пред  
очима Израилевыма и пред очима всего дому Вениаминя.  
20 И прииде Авенир к Давиду в Хеврон, и с ним двадесять

мужей. И сотвори Давид пир Авениру и мужем его иже с ним.

21 И рече Авенир к Давиду: востану ныне и пойду и соберу к господину моему царю всего Израиля, и положу с ним завет, и царствовати имаши всеми, ихже желает душа твоя. И посла Давид Авенира, и иде с миром. 22 И се, отроцы Давидовы и Иоав идяху от исхода и корысть многу несяху с собою, и Авенир уже не бе с Давидом в Хевроне, яко отслан бяше, и отиде с миром. 23 Иоав же и все воинство его прииде: и возвестиша Иоаву, глаголюще: приходяше Авенир сын Ниров к Давиду, и отсла его, и отиде с миром.

24 И видне Иоав к царю и рече: что сие сотворил еси? Се, приходяше Авенир к тебе, и почто отпустил еси его, и отиде с миром? 25 Или не веси злобы Авенира сына Нирова, яко лукавствовати к тебе прииде, и уразумети исход твой и вход твой, и уведати вся елика твориши ты? 26 И возвратися Иоав от Давида, и посла послы вслед Авенира, и возвратиша его от кладязя Сеирамска: Давид же не ведяше. 27 И возврати Авенира в Хеврон, и соврати его Иоав на страну от врат глаголати к нему лукавно: и удари его в лядвия, и умре в крови Асаила брата Иоавля. 28 И услыша Давид по сих и рече: чист есмь аз и царство мое от Господа и отныне и до века от крове Авенира сына Нирова: 29 да снидет на главу Иоавлю и на весь дом отца его, и да не оскудеет от дому Иоавля изливаяй семя, и прокаженный, и держайся жезла, и падаяй оружием, и умаленный хлебами. 30 Иоав же и Авесса брат его наблюдаху Авенира, понеже уби Асаила брата их в Гаваоне на брани. 31 И рече Давид ко Иоаву и ко всем людем его: раздерите ризы ваша и препояшитесь вретисцы, и рыдайте о Авенире. Сам же царь Давид идяше

вслед одра. 32 И погребоша Авенира в Хевроне. И воздвиже царь глас свой и плакася над гробом его, и вси людие плакаша о Авенире. 33 И плакася царь над Авениром и рече: еда смертию Навала умре Авенир? 34 Руце твои не связаны, нозе твои не во оковах: не приступил еси якоже Навал, пред сынми неправды пал еси. И собрашася вси людие плакаться его, 35 и приидоша вси людие предложити Давиду ясти хлебы еще сущу дни. И клятсся Давид, глаголя: сия да сотворит ми Бог и сия да приложит, яко аще не зайдет солнце, не имам вкусити хлеба ни иного чего. 36 И познаша вси людие, и угодна быша пред ними вся, елика сотвори царь пред людьми. 37 И разумеша вси людие и весь Израиль в той день, яко не бысть от царя убийства Авениру сыну Нирову. 38 И рече царь отроком своим: не весте ли, яко властелин велик паде в сей день во Израили? 39 И яко аз есмь ближний днесь и возставлен в царя? Мужие же сии сынове Саруины жесточайшии мене суть: да воздаст Господь творящему лукавная по злобе его.

**4** И слыша Иевосфей сын Сауль, яко умре Авенир сын Ниров в Хевроне, и ослабеша руце его, и вси мужие Израилевы изнемогоша. 2 И два мужа старейшины полков Иевосфеа сына Сауля: имя единому Ваана и имя другому Рихав, сынове Реммона Вирофейскаго от сынов Вениаминих: яко Вироф вменяшеся в сынех Вениаминих. 3 И отбегоша Вирофее в Гефем, и беша тамо живуще до днешняго дне. 4 И Ионафану сыну Саулю сын бе хром ногама, сын пяти лет: и той, егда прииде возвешение о Сауле и Ионафане сыне его от Иезраеля, и взят его пестунница его, и бежа: и бысть тщащеся ей на отшествие, и паде, и охроне,

имя же ему Мемфивосфей. 5 И поидоста сынове Реммона Вирофейскаго, Рихав и Ваана, и внидоста во время зноя дневнаго в дом Иевосфеов, и той почиваше на одре в полудне: 6 и се, вратник дому очищаше пшеницу и воздрема и спаше, Рихав же и Ваана братия утаившася внидоста в дом: 7 Иевосфей же почиваше на одре своем в ложнице своей: и биста его, и умертвиста его, и отяста главу его, и взяста главу его, и отидоста путем иже на запад всю ночь: 8 и принесоста главу Иевосфеову к Давиду в Хеврон и реста к царю: се, глава Иевосфеа сына Саулова врага твоего, иже искаше души твоея, и даде Господь господину нашему царю отмщение врагов его, якоже день сей, от Саула врага твоего и от семене его. 9 И отвеща Давид Рихаву и Ваане брату его, сыном Реммона Вирофейскаго, и рече има: жив Господь, иже избави душу мою от всякия скорби: 10 ибо возвестивый мне, яко умре Саул и Ионафан, и той бяше аки благовестуяй предо мною, и ях его и убих его в Секелазе, емуже должен бех дати дар: 11 и ныне мужие лукавии убиша мужа праведна в дому его на одре его, и ныне взыщу крове его от руки вашей и искореню вас от земли. 12 И заповеда Давид отроком своим, и убиша их, и отсекоша руце их и нозе их, и повесиша их над источником в Хевроне, и главу Иевосфеову погребоша во гробе Авенира сына Нирова (в Хевроне).

**5** И приидоша вся племена Израилева к Давиду в Хеврон и глаголаша ему: се, кости твоя и плоть твоя мы есмы: 2 и вчера и третияго дне Саулу суцу царю над нами, ты был еси вводяй и изводяй Израиля, и рече Господь к тебе: ты упасеши люди Моя Израиля и ты будеши вождь людем



Моим Израилю. 3 И приидоша вси старейшины Израилевы к царю в Хеврон, и положи им царь Давид завет в Хевроне пред Господем: и помазаша Давида на царство над всем Израилем. 4 Сын тридесяти лет Давид внегда воцаритися ему, и царствова чотыредесять лет: 5 семь лет и месяцей шесть царствова в Хевроне над Иудою, и тридесять три лета царствова над всем Израилем и Иудою во Иерусалиме. 6 И поиде Давид и вси мужие его во Иерусалим ко Иевусею, живущему на земли той. И реша Давиду: не внидеши семо, яко восташа хромии и слепии глаголюще: яко не внидет Давид семо. 7 И взя Давид крепость Сиону: сия есть град Давидов. 8 И рече Давид в день той: всяк поражаай Иевусеа да касается мечем и хромым и слепых и ненавидящих души Давидовы. Сего ради рекут: слепии и хромии не внидут в дом Господень. 9 И седе Давид в крепости, и наречесе сия град Давидов: и созда той град около от Краеградия, и дом свой. 10 И идяше Давид идый и величаемь, и Господь Вседержитель с ним. 11 И посла Хирам царь Тирский послы к Давиду, и древа кедрова, и древоделей, и каменоделателей, и создаша дом Давиду. 12 И уразуме Давид, яко уготова его Господь в царя над Израилем, и яко вознесесе царство его людей Его ради Израиля. 13 И поят Давид еще жены и подложницы от Иерусалима по пришествии своем от Хеврона: и быша Давиду еще сынове и дщери. 14 И сия имена родившымся ему во Иерусалиме: Самус и Совав, и Нафан и Соломон, 15 и Евеар и Елисуе, и Нафек и Иефие, 16 и Елисама и Елидае и Елифалаф, Самае, Иесиваф, Нафан, Галамаан, Иеваар, Феисус, Елифалаф, Нагеф, Нафек, Ианафан и Леасамис, Ваалимаф, Елифааф. 17 И услышаша

иноплеменницы, яко помазася Давид царь над Израилем, и въздоша вси иноплеменницы искати Давида. И услыша Давид, и сниде в крепость. 18 Иноплеменницы же приидоша и соединишася во юдоли Титанстей. 19 И вопроши Давид Господа, глаголя: възду ли ко иноплеменником? И предаси ли я в руке мои? И рече Господь к Давиду: възди, яко предаю предаю иноплеменники в руке твои. 20 И прииде Давид с Вышних Сечей и посече иноплеменники тамо. И рече Давид: изсече Господь враги моя иноплеменники предо мною, якоже пресекаются воды. Сего ради наречеся имя места того Свыше Сечей. 21 И оставиша тамо (иноплеменницы) боги своя, и взя их Давид и мужие иже с ним (и рече Давид сожещи их во огни). 22 И приложиша паки приити иноплеменницы и собращася на юдоли Титанстей. 23 И вопроши Давид Господа: възду ли ко иноплеменником? И предаси ли их в руке мои? И рече ему Господь: не исходи на сретение им, но уклонися от них, и приступиши к ним близ дубравы плача: 24 и будет, егда услышиши глас шума от дубравы плача, тогда снидеша к ним, яко тогда изыдет Господь пред тобою сещи на брани иноплеменники. 25 И сотвори Давид, якоже заповеда ему Господь, и изби иноплеменники от Гаваона даже до земли Газира.

**6** И собра Давид еще всякаго юношу от Израиля, яко седмьдесят тысящ. 2 И воста и иде Давид и вси людие, иже с ним, и от князей Иудиных, на восход, еже вознести оттуду кивот Божий, над нимже призвася имя Господа Сил, седящаго на херувимех над ним: 3 и возложиша кивот Господень на колесницу нову, и отвезоша его из дому и Аминадавля иже на холме: Оза же и братия его сынове

Аминадавли везяху колесницу с кивотом (Господним): 4 и братия его идяху пред кивотом (Божиим), 5 Давид же и сынове Израилевы (идяху) пред Господем, играюще во органы устроенныя в крепости, и в пениих и в гуслах, и в свирелех и в тимпанех, и в кимвалех и в цевницах, 6 и приидоша до гумна Нахорова. И простре Оза руку свою на кивот Божий придержать его, и ятсся за него, понеже превращаше его телец. 7 И разгневался гневом Господь на Озу и порази его тамо Бог, и умре тамо у кивота Господня пред Богом. 8 И опечалися Давид, понеже порази Господь поражением Озу: и наречеся место то поражение Озино и до сего дне. 9 И убояся Господа Давид в день той, глаголя: како внидет ко мне кивот Господень? 10 И не хотяше Давид, да приидет к нему кивот завета Господня во град Давидов: и уклони его Давид в дом Аведдара Гефеанина. 11 И стояше кивот Господень в дому Аведдара Гефеанина месяцы три, и благослови Господь весь дом Аведдаров и вся, яже его. 12 И возвестиша царю Давиду, глаголюще: благослови Господь дом Аведдаров и вся, яже его, кивота ради Божия. И иде Давид, и взя кивот Божий из дому Аведдарова во град Давидов в веселии: 13 и беша с ним несущи кивот Господень семь ликов, и жертва телец и агнцы: 14 и Давид бряцаше во органы устроены пред Господем, и оболчен бысть Давид во одежду изящну: 15 и Давид и весь дом Израилев несяху кивот Господень с воплем и со гласом трубным. 16 И бысть кивоту приносиму ко граду Давидову, и Мелхола дщи Саулова приницаше оконцем и виде царя Давида скачуща и играюща пред Господем, и уничижи его в сердцы своем. 17 И внесоша кивот Господень, и поставиша его на месте

его посреде скинии, юже постави ему Давид: и вознесе Давид всесожигаемая пред Господа и мирная, 18 и соверши Давид возносяй всесожжения и мирная, и благослови люди о имени Господа Сил, 19 и раздели всем людем на всю силу Израилеву от Дана даже до Вирсавии, и от мужа даже до жены, коемуждо по укруху хлеба, и по части печенаго мяса, и по сковрадному млину. И отидоша вси людие, кийждо в дом свой. 20 И возвратися Давид благословити дом свой, и изыде Мелхола дщи Саулова на сретение Давиду, и благослови его и рече: коль прославися днешь царь Израилев, иже открыся днешь пред очима рабынь рабов своих, якоже открывається открывшийся един от пляшущих? 21 И рече Давид к Мелхоло: пред Господем плясати буду: и благословен Господь, иже избра мя паче отца твоего и паче всего дому его, поставити мя властелина над людьми Своими над Израилем, и буду играти и плясати пред Господем: 22 и открыюся еще такожде и буду непотребен пред очима твоима, и с рабынями, о нихже рекла еси, непрославлену быти ми. 23 И у Мелхолы дщере Саули не бысть детища до дне смерти ея.

**7** И бысть егда сяде царь в дому своем, и Господь унаследи его окрест от всех врагов его окрестных, 2 и рече царь к Нафану пророку: се, ныне аз живу в дому кедровем, кивот же Божий стоит посреде скинии. 3 И рече Нафан к царю: вся елика суть в сердцы твоем, иди и твори, яко Господь с тобою. 4 И бысть в нощи той, и бысть слово Господне к Нафану, глаголя: 5 иди и рцы рабу Моему Давиду: сия глаголет Господь: не ты созиждеши Мне дом, еже обитати Мне: 6 яко не обитах в дому, от негоже дне изведох сыны Израилевы из земли Египетския до дне сего, но бех ходя

во обиталищи и в кущи, 7 во всех идеже хождах во всем Израили: аще глаголя глаголах ко единому колену Израилеву, емуже заповедах пасти люди Моя Израиля, глаголя: почто не создасте Ми дому кедрова? 8 И ныне сия речеши рабу Моему Давиду: сице глаголет Господь Вседержитель: поях тя от пажити овчия на властелинство людем Моим Израилю, 9 и бех с тобою во всех, аможе ходил еси, и искорених вся враги твоя от лица твоего, и сотворих тя именита по имени великих иже на земли, 10 и положу место людем Моим Израилю, и насажду их, и вселятся о себе сами, и не попекутся ктому: и не приложит сын неправды обидети их, якоже исперва, 11 и от дний в няже поставих судии в людех Моих во Израили: и упокою тя от всех враг твоих: и возвестит ти Господь, яко созиждеши дом Ему: 12 и будет егда исполнятся дние твои, и уснеши со отцы твоими, и возставлю семя твое по тебе, иже будет от чрева твоего, и уготовлю царство его: 13 той созиждет дом имени Моему, и управлю престол его до века: 14 Аз буду ему во отца, и той будет Ми в сына: и аще приидет неправда его, и обличу его жезлом мужей и язвами сынов человеческих: 15 милости же Моея не оставлю от него, якоже оставих от тех, ихже оставих от лица Моего: 16 и верен будет дом его и царство его до века предо Мною: и престол его будет исправлен во век. 17 По всем словесем сим и по всему видению сему, тако глагола Нафан ко Давиду. 18 И вниде царь Давид и седе пред Господем и рече: кто есмь аз, Господи мой, Господи? И что дом мой, яко возлюбил мя еси даже до сих? 19 И мала сия пред Тобою суть, Господи мой, Господи, и глаголал еси о доме раба Твоего вдалеко: сей же закон человека, Господи

мой, Господи: **20** и что приложит Давид еще глаголати к Тебе? И ныне Ты веси раба Твоего, Господи мой, Господи, **21** и раба Твоего ради сотворил еси и по сердцу Твоему сотворил еси все величество сие, сказати рабу Твоему, **22** величия ради Твоего, Господи мой, Господи: несть бо ин якоже Ты, и несть Бога разве Тебе во всех, яже слышахом ушима нашими: **23** и кто якоже людие Твои Израиль язык ин на земли? Яко настави их Бог, еже избавити Себе людий, еже положити Тебе имя, еже сотворити величие и просвещение, еже изринути тебе от лица людий Твоих, ихже избавил еси Себе от Египта, языки и селения, **24** и уготовал еси Себе люди Твоя Израиля в люди до века, и Ты, Господи, был еси им в Бога: **25** и ныне, Господи мой, Господи, слово, еже глаголал еси о рабе Твоем и о доме его, увери до века, якоже глаголал еси, сотвори: **26** и ныне да возвеличится имя Твое до века, глаголя: Господь Вседержитель Бог над Израилем, и дом раба Твоего Давида да будет исправлен пред Тобою: **27** яко Ты Господь Вседержитель Бог Израилев, отверзл еси ухо рабу Твоему, глаголя: дом созижду тебе: сего ради обрете раб Твой сердце свое еже помолитися к Тебе молитвою сею: **28** и ныне, Господи мой, Господи, Ты еси Бог, и словеса Твоя будут истинна, и глаголал еси о рабе Твоем благая сия, **29** и ныне начни и благослови дом раба Твоего, еже быти ему во век пред Тобою, яко Ты, Господи мой, Господи, глаголал еси, и от благословения Твоего да благословится дом раба Твоего, еже быти во век пред Тобою.

**8** И бысть по сих, и порази Давид иноплеменники и победи их, и взя Давид отлученное от руки иноплеменничи. **2** И порази Давид Моава, и размеры их ужами, положив их на

земли: и быша два ужа на умерщвление, и два ужа на оживление: и бысть Моав Давиду в раба дающа дань. 3 И порази Давид Адраазара сына Раава царя Сувска, идушу ему поставити руку свою на реце Евфрате: 4 и предвзя Давид от него тысящу колесниц и седмь тысящ конник и двадесять тысящ мужей пешцев, и разруши Давид вся колесницы, и остави себе от них сто колесниц. 5 И прииде Сириа Дамаскова помощи Адраазару царю Сувску, и порази Давид от Сирии двадесять две тысящ мужей, 6 и постави Давид стражу в Сирии, яже под Дамаском, и бысть Сириа Давиду в рабы дающыя дань: и спасе Господь Давида во всех, аможе хождаше. 7 И взя Давид гривны златыя, яже быша на отроцех Адраазара царя Сувска, и принесе я во Иерусалим: и взя их Сукаким царь Египетск, егда взыде во Иерусалим во дни Ровоама сына Соломона. 8 И от Метевака и от избранных градов Адраазаровых взя Давид медь многу зело, из неяже сотвори Соломон море медяно и столпы, и умывалницы и вся сосуды. 9 И услыша Фoa царь Имафский, яко порази Давид всю силу Адраазарову, 10 и посла Фoa Иеддурама сына своего к царю Давиду вопросити его яже о мире, и благословити его, понеже победи Адраазара и уби его, зане сопротивлялся бе Адраазару: и в руку его быша сосуды сребряны и сосуды златы и сосуды медяны: 11 и сия освяти царь Давид Господу со сребром и златом, еже освяти от всех градов, имиже возоблада, 12 от Идумеи и от Моава, и от сынов Аммоних и от иноплеменник, и от Амалика и от корыстей Адраазара сына Раава, царя Сувска. 13 И сотвори Давид (себе) имя: и егда возвращашеся, порази Идумею в Гевелеме, до осминадесять тысящ: 14 и постави во

Идумеи Давид стражу, во всей Идумеи, и быша вси Идумеане раби царю Давиду: и спасе Господь Давида во всех, аможе хождаше. **15** И царствова Давид над всем Израилем, и бе Давид творяй суд и правду над всеми людьми своими. **16** И Иоав сын Саруин над воинствы (его), и Иосафат сын Ахилудов над памятописанми, **17** и Садок сын Ахитов и Ахимелех сын Авиафарь жерцы, и Саса книжник, **18** и Ванеа сын Иодаев советник, и Хелефий и Фелетий, и сынове Давидовы начальницы двора быша.

**9** И рече Давид: есть ли еще оставшийся в дому Саули, и сотворю с ним милость Ионафана ради? **2** И от дому Сауля бе отрок, и имя ему Сива: и призваша его к Давиду, и рече к нему царь: ты ли еси Сива? И рече: аз раб твой. **3** И рече царь: остана ли от дому Сауля еще муж, и сотворю с ним милость Божию? И рече Сива к царю: еще есть сын Ионафанов, хром ногама. **4** И рече царь: где есть? И рече Сива к царю: се, в дому Махира сына Амииля от Лодавара. **5** И посла царь Давид, и взя его из дому Махира сына Амииля от Лодавара. **6** И прииде Мемфивосфей сын Ионафана сына Саулова к царю Давиду, и паде на лица своем и поклонися ему. И рече ему Давид: Мемфивосфее. И рече: се, раб твой. **7** И рече ему Давид: не бойся, яко творя сотворю с тобою милость Ионафана ради отца твоего, и возвращу тебе вся села Саула деда твоего, и ты яждь хлеб на трапезе моей всегда. **8** И поклонися ему Мемфивосфей и рече: кто есмь аз раб твой, яко призрел еси на пса умершаго подобнаго мне? **9** И призва царь Сиву отрочища Сауля, и рече ему: вся елика суть Сауля и весь дом его дах сыну господина твоего: **10** и делай ему землю ты и сынове твои и раби твои,



и да приносиши сыну господина твоего хлебы, да яст: и Мемфивосфей сын господина твоего да яст хлеб всегда на трапезе моей. У Сивы же бяху пятнадцать сынов и двадцать рабов. 11 И рече Сива к царю: по всем, елика заповеда господин мой царь рабу своему, тако сотворит раб твой. И Мемфивосфей ядыше на трапезе Давидове, якоже един от сынов царевых. 12 И Мемфивосфею сын бе мал, и имя ему Миха, и все обитание дому Сивина раби бяху Мемфивосфеовы. 13 И Мемфивосфей живяше во Иерусалиме, яко на трапезе царева ядыше всегда: и той бяше хром обема ногама своима.

**10** И бысть по сих, и умре царь сынов Аммоних, и царствова сын его Аннон вместо его. 2 И рече Давид: сотворю милость со Анноном сыном Наасовым, имже образом сотвори отец его милость со мною. И посла Давид утешити его рукою рабов своих о отце его. И приидоша отроцы Давидовы в землю сынов Аммоних. 3 И реша старейшины сынов Аммоних ко Аннону господину своему: еда прославления ради отца твоего пред тобою посла к тебе Давид утешители? Не да испытают ли град, и соглядают его, еже разрушити его, посла Давид рабы своя к тебе? 4 И взя Аннон отроки Давидовы, и остриже половину брад их, и обреза одеяния их половину даже до чресл их, и отпусти их. 5 И возвестиша Давиду о мужех, и посла в сретение им, яко беша мужие тии обезчещени зело. И рече царь: сидите во Иерихоне, дондеже возрастут брады ваша, и возвратитесь. 6 И видеша сынове Аммони, яко посрамлени быша людие Давидовы: и послаша сынове Аммони, и наяша Сирию Вефраамлю, и Сирию Сувску и Роовлю двадцать тысящ пешцев, и

царя Амалика Мааха тысящу мужей, и Истова дванадесять тысящ мужей. 7 И слыша Давид, и посла Иоава и всю силу сильных. 8 И изыдоша сынове Аммони, и устроиша брань пред враты града: Сириа же Сувска и Роов, и Истов и Амалик, едины (сташа) на селе. 9 И виде Иоав, яко бысть на него противное лице брани сопреди и созади, и избра от всех юнош Израилевых, и устрои их противу Сириан, 10 останок же людей даде в руце брату своему Авессе и устрои я противу сынов Аммоних, 11 и рече (Иоав ко Авессе): аще укрепится Сириа паче мене, и будете мне на спасение: аще же укрепятся сынове Аммони паче тебе, и будем спасати тя: 12 мужаимся и укрепимся о людех наших и о градех Бога нашего, и Господь сотворит благое пред очима Своима. 13 И прииде Иоав и людие его с ним на брань на Сирию, и побегоша от лица его. 14 И видеша сынове Аммони, яко бежаша Сириане, и бежаша от лица Авессы и внидоша во град. И возвратися Иоав от сынов Аммоних, и прииде во Иерусалим. 15 И видеша Сириане, яко падоша пред Израилем, и собращася вкупе. 16 И посла Адраазар, и собра Сирианы, иже об он пол реки Халамака, и приидоша во Елам: и Совак старейшина силы Адраазаровы пред ними. 17 И возвестиша Давиду, и собра всего Израиля, и преиде Иордан, и прииде во Елам. И устроишася Сириане на Давида, и брашася с ним, 18 и бежаша Сириане от лица Израилтян. И отя Давид от Сирии седьм сот колесниц и четыредесять тысящ конник, и Совака старейшину силы его уби, и умре тамо. 19 И видеша вси царие раби Адраазаровы, яко падоша пред Израилем, и пребегоша ко Израилю и

работаша им: и убояшася Сириане спасати ктому сынов Аммоних.

**11** И бысть по возвращении лета, во время исхождения царей (на брань), и посла Давид Иоава и отроки своя с ним, и всего Израиля: и расточиша сыны Аммони и обседоша окрест Раввафа, и Давид седе во Иерусалиме. 2 И бысть при вечере, и воста Давид от ложа своего, и хождаше на крове дому царского, и увиде жену с крова мьющуюся: жена же взором добра велми: 3 и посла Давид, и взыска жену, и рече: не сия ли Вирсавиа дщерь Елиавля, жена Урии Хеттеанина? 4 И посла Давид слуги, и взя ю, и вниде к ней, и преспа с нею: и та бе очистилася от нечистоты своея, и возвратися в дом свой. 5 И зачат жена во чреве: и пославши возвести Давиду и рече: се, аз есмь во чреве имущая. 6 И посла Давид ко Иоаву, глаголя: посли ко мне Урию Хеттеанина. И посла Иоав Урию к Давиду. 7 И прииде Уриа и вниде к нему, и вопроши его Давид о мире Иоава и о мире людей и о мире брани. 8 И рече Давид ко Урии: иди в дом твой, и умый нозе твои. И изыде Уриа из дому царева, и иде вслед его снедь царева. 9 И спа Уриа пред враты дому царева с рабы господина своего, а не иде в дом свой. 10 И возвестиша Давиду, глаголюще: яко не ходи Уриа в дом свой. И рече Давид ко Урии: не с пути ли пришел еси? Почто не вшел еси в дом твой? 11 И рече Уриа к Давиду: кивот Божий и Израиль и Иуда пребывают в куцах, и господин мой Иоав и раби господина моего на лица сел пребывают, аз же вниду ли в дом мой ясти и пити и спати с женою моею? Како? Жива душа твоя, аще сотворю глагол сей. 12 И рече Давид ко Урии: поседи zde и днесь, и завтра отпущу тя. И пребысть Уриа

во Иерусалиме в той день и во утрешний. 13 И призва его Давид, и яде пред ним и пияше, и упои его, и отиде в вечер спати на ложе свое с рабы господина своего, в дом же свой не иде. 14 И бысть утро, и написа Давид писание ко Иоаву, и посла рукою Урииною. 15 И написа в писании, глаголя: введи Урию противу брани крепкия и возвратитесь вспять от него, да язвен будет и умрет. 16 И бысть егда стрежаше Иоав у града, и постави Урию на месте, идеже ведяше, яко мужие сильни тамо. 17 И изыдоша мужие из града и бияхуся со Иоавом: и падоша от людей от рабов Давидовых, умре же и Уриа Хеттеанин. 18 И посла Иоав, и возвести Давиду вся словеса, яже о брани, глаголати к царю. 19 И заповеда (Иоав) послу, глаголя: егда скончаеши вся речи, яже от брани, к царю глаголати, 20 и будет аще разгневаеся царь и речет ти: почто приблизитесь ко граду на брань? Не ведасте ли, яко стреляти будут с стены? 21 Кто уби Авимелеха сына Иероваала сына Нирова? Не жена ли верже нань уломком жернова с стены, (и урази его, ) и умре в Фамасе? Почто приступасте к стене? И речеши: и раб твой Уриа Хеттеанин (убиен бысть, и) умре. 22 И иде посол Иоавль к царю во Иерусалим, и прииде, и возвести Давиду вся, елика глагола ему Иоав, вся глаголы брани. И разгневася Давид на Иоава и рече к послу: почто приблизитесь ко граду битися? Не ведасте ли, яко язвени будете со стены? Кто уби Авимелеха сына Иероваала? Не жена ли верже нань уломок жернова со стены, и умре в Фамасе? Почто приблизитесь к стене? 23 И рече посол к Давиду: яко укрепилася на ны мужие и изыдоша на ны на село, и гонихом я до врат града: 24 и стреляша стрелцы со стены на рабы твоя, и умроша от отрок

царских, и раб твой Уриа Хеттеанин умре. 25 И рече Давид к послу: сице да речеши ко Иоаву: да не будет зло пред очима твоима слово сие, яко овогда убо сице, овогда же инако поядает мечь: укрепи брань твою на град, и раскопай и: и укрепи его. 26 И услыша жена Уриина, яко умре Уриа муж ея, и рыдаше по мужи своем. 27 И преjde плачь, и посла Давид, и введе ю в дом свой, и бысть ему жена, и роди ему сына. И зол явился глагол, егоже сотвори Давид, пред очима Господними.

**12** И посла Господь Нафана пророка к Давиду. И вниде к нему (и рече ему: отвецай ми, царю, ныне суд сей: ) и рече ему: два мужа беста во едином граде, един богат, а другий убог: 2 и у богатаго стада бяху и буйволи мнози зело, 3 у убогаго же ничтоже бе, но токмо агница едина мала, юже стяжа и снабде, и вскорми ю, и возрасте с ним и с сынами его вкупе: от хлеба его ядыше и от чаши его пияше, и на лоне его почиваше, и бе ему яко дщерь: 4 и прииде некто с пути к мужу богатому, и не восхоте взяти от стад своих и от буйволиц своих на сотворение обеда путнику пришедшу к нему: но взя агницу убогаго, и уготова ю на обед мужу пришедшу к нему. 5 И разгневался гневом зело Давид на мужа (того), и рече Давид к Нафану: жив Господь, яко сын смерти есть муж сотворивый сие: 6 и агницу возвратит седмерицею за сие, яко сотворил глагол сей, и за сие, яко не пощаде. 7 И рече Нафан к Давиду: ты еси муж сотворивый сие: сия глаголет Господь Бог Израилев: Аз есмь помазавый тя в царя над Израилем, и Аз есмь избавивый тя от руки Сауловы: 8 и дах ти дом господина твоего и жены господина твоего на лоно твое, и дах ти дом Израилев и Иудин: и

аще мало ти есть, приложу тебе к сим: **9** и что яко презрел еси слово Господне, еже сотворити лукавое пред очима Его? Урию Хеттеанина убил еси мечем, и жену его поял еси себе в жену, и того убил еси мечем сынов Аммоних: **10** и ныне не отступит мечь от дому твоего до века: зане уничижил Мя еси и поял еси жену Урии Хеттеанина в жену себе: **11** сия глаголет Господь: се, Аз воздвигну на тя злая от дому твоего, и возму жены твоя пред очима твоима и дам ближнему твоему, и будет спати со женами твоими пред солнцем сим: **12** яко ты сотворил еси втайне, Аз же сотворю глаголом сей пред всем Израилем и пред солнцем сим. **13** И рече Давид к Нафану: согреших ко Господу. И рече Нафан к Давиду: и Господь отя согрешение твое, не умреш: **14** обаче яко поощряя изострил еси врагов Господних глаголом сим, и сын твой родивыйся тебе смертию умрет. **15** И отиде Нафан в дом свой. И сокруши Господь детище, еже роди жена Уриина Давиду, и разболеся. **16** И взыска Давид Бога о детищи, и постися Давид постом, и вниде и водворися, и лежаше на земли: **17** и внидоша к нему старейшины дому его воздвигнути его от земли, и не восхоте, и не яде с ними хлеба. **18** И бысть в день седмый, и умре отроча. И убояшася раби Давидовы поведати ему, яко умре отроча, реша бо: се, егда отроча еще живо бяше, глаголахом к нему, и не послуша гласа нашего: и како речем к нему, яко умре отроча, и сотворит злая? **19** И разуме Давид, яко отроцы его шепчут, и позна Давид, яко умре отроча. И рече Давид отроком своим: умре ли отроча? И реша: умре. **20** И воста Давид от земли, и умыся и помазася, и измени ризы своя, и вниде в дом Божий, и поклонися ему, и вниде в дом свой,

и проси ясти хлеба, и предложиша ему хлеб, и яде. 21 И реша отроцы его к нему: что глагол сей, егоже сотворил еси отроцате ради, яко еще сущу отроцати живу, постился еси и плакал и бдел еси: егда же умре отроча, востал, и ял еси хлеб, и пил еси? 22 И рече Давид: егда бе отроча еще живо, постихся и плаках, яко рех: кто вестъ, помилует ли мя Господь и живо будет отроча? 23 Ныне же умре, почто мне поститися? Еда возмогу возвратити е ктому? Аз имам ити к нему, тое же не возвратится ко мне. 24 И утеша Давид Вирсавию жену свою, и вниде к ней и спа с нею, и зача и роди сына, и нарече имя ему Соломон: и Господь возлюби его. 25 И посла рукою Нафана пророка, и нарече имя ему Иеддеди словом Господним. 26 Иоав же воева в Раввафе сынов Аммоних и взя град царства. 27 И посла Иоав вестники к Давиду и рече: воевах на Равваф и взях град вод: 28 и ныне собери останок людий и ополчися на град, и приими его, да не аз возму град, и наречется имя мое на нем. 29 И собра Давид вся люди, и поиде в Равваф, и ополчися нань, и взя его: 30 и взя венец Молхома царя их с главы его, талант злата вес его, и от камня драга, и бе на главе Давидове, и корысть изнесе из града многу зело: 31 и люди сущыя в нем изведе, и положи на пилы и на трезубы железны и секиры железны, и превождаше их сквозе пещь плинфяну. И тако сотвори всем градом сынов Аммоних. И возвратися Давид и весь Израиль во Иерусалим.

**13** И бысть по сих, и у Авессалома сына Давидова бе сестра добра взором зело, имя же ей Фамарь, и возлюби ю Амнон сын Давидов: 2 и скорбляше Амнон, яко и разболетися (ему) сестры своея ради Фамары, зане дева бяше сия, и

не удобно бе пред очима Амнонима что сотворити ей. 3 И бе Амнону друг, имя же ему Ионадав, сын Самаа брата Давидова, и Ионадав муж мудр зело. 4 И рече ему (Ионадав): что ти, яко ты тако болиши, сыне царев, утро утро? И не возвещаеши ми? И рече ему Амнон: Фамару сестру Авессалома брата моего аз люблю. 5 И рече ему Ионадав: лязи на постели твоей и разболися, и внидет отец твой видети тя, и речеши к нему: да приидет ныне Фамарь сестра моя, и да ми даст ясти, и да сотворит пред очима моима снедь, да увижду и вкушу от рук ея. 6 И ляже Амнон и разболеся: и вниде царь видети его. И рече Амнон к царю: да приидет ныне Фамарь сестра моя ко мне и да испечет два пряжма пред очима моима, и имам ясти от руку ея. 7 И посла Давид к Фамаре в дом, глаголя: иди ныне в дом Амнона брата твоего и сотвори ему снедь. 8 И иде Фамарь в дом Амнона брата своего, и той лежаше. И взя тесто, и смеси, и устрои пред очима его, и испече пряжма: 9 и взя сковраду и изложи пред него, и не восхоте ясти. И рече Амнон: изжените вся мужы от мене. И изгнаша вся мужы от него. 10 И рече Амнон к Фамаре: внеси ми снедь во внутреннюю храмину, и ям от руку твою. И взя Фамарь пряжма, яже испече, и внесе Амнону брату своему во внутреннюю храмину, 11 и представи ему да яст. И ят ю, и рече ей: гряди, лязи со мною, сестро моя. 12 И рече ему: ни, брате мой, не обругай мене, понеже не сотворится тако во Израили, не сотвори безумия сего: 13 и аз камо скрюю безчестие мое? И ты будеши яко един от безумных во Израили: и ныне глаголи к царю, да не отлучит мене от тебе. 14 И не восхоте Амнон послушати гласа ея, и преодоле ей, и смири ю, и преспа с



нею. 15 И возненавиде ю Амнон ненавистию великою зело, яко велиим ненавидением возненавиде ю паче любви, еюже любляше ю, и рече ей Амнон: востани и отиди. 16 И рече ему Фамарь: (ни, брате, ) яко злоба болши есть последняя паче первая, юже сотворил еси со мною, еже отслати мене. И не восхоте Амнон слышати гласа ея. 17 И призва отрока своего, приставника дому своего, и рече ему: отсли ныне сию от мене вон, и заключи двери вслед ея. 18 И бе риза на ней испещрена, понеже тако облачахуся дщери царевы, сущия девицы, во одежды своя. И изведе ю вон слуга его и затвори двери вслед ея. 19 И взя Фамарь пепел, и насыпа на главу свою, и одежду испещренную растерза на себе, и возложи руце свои на главу свою, и идуци идяше и вопияше. 20 И рече к ней Авессалом брат ея: еда Амнон брат твой бысть с тобою? И ныне, сестро моя, умолчи, яко брат твой есть: не полагай на сердцы твоём еже глаголати слово сие. И седе Фамарь вдовствующи в дому Авессалома брата своего. 21 И слыша царь Давид вся словеса сия, и разгневался зело, и не опечали духа Амнона сына своего, понеже любляше его, яко первенец бе ему. 22 И не глагола Авессалом со Амном ни о добре, ни о зле, понеже возненавиде Авессалом Амнона того ради, понеже Фамару сестру его обругал. 23 И бысть по двух летех дний, и беша стригуще (овцы) Авессаломовы (раби) в Веласоре близ Ефрема: и призва Авессалом вся сыны царевы. 24 И прииде Авессалом ко царю и рече: се, ныне стригут рабу твоему, да идет убо царь и отроцы его с рабом твоим. 25 И рече царь ко Авессалому: ни, сыне мой, да не пойдём вси мы, и да не отяготим тя. И нуждаше его: и не восхоте (царь) ити, и благослови его. 26 И рече

Авессалом к нему: аще же ни, поне да идет с нами Амнон брат мой. И рече ему царь: почто идет с тобою Амнон? 27 И принуди его Авессалом, и отпусти с ним Амнона и вся сыны царева. И сотвори Авессалом пир, якоже творит пир царь. 28 И заповеда Авессалом отроком своим, глаголя: видите егда възблажает сердце Амноне от вина, и реку вам: поразите Амнона, и умертвите его: не убойтея, яко не аз ли есмь повелеваяй вам? Мужайтея и будите в сыны силы. 29 И сотвориша отроцы Авессаломли Амнону, якоже заповеда им Авессалом. И восташа вси сынове царева, и вседе кийждо на мска своего, и бежаша. 30 И бысть, сущым им на пути, и слух дойде до Давида, глаголя: изби Авессалом вся сыны царева, и не избысть от них ни един. 31 И воста царь, и растерза ризы своя, и ляже на земли, и вси отроцы его предстоящи ему растерзаша ризы своя. 32 И рече Ионадав, сын Самаа брата Давидова, и рече: да не речет господин мой царь, яко вся отроки сыны царева уби, но Амнон есть един убиен, яко той из уст Авессалому не исхождаше, отнележе обруга сестру его Фамару: 33 и ныне да не полагает господин мой царь словесе на сердцы своем, глаголя: вси сынове царева умроша: яко Амнон един умре. 34 И побеже Авессалом. И воздвиже отрок страж очеса своя и виде: и се, людие мнози идуще путем вслед его со страны гор в низхождение. И прииде страж и возвести царю и рече: мужы видех от пути Оронска со страны горы. 35 И рече Ионадав ко царю: се, сынове царева приходят: по словеси раба твоего, тако бысть. 36 И бысть егда сконча глаголя, и се, сынове царева приидоша и воздвигоша глас свой и плакаша: и сам царь и вси отроцы его плакаша плачем великим зело.

37 И Авессалом убеже, и прииде ко Фолму сыну Емиуда, царю Гедсурску, в землю Хамаахадску. И плакаше Давид царь о сыне своем вся дни. 38 И Авессалом убеже, и иде в Гедсур, и бе тамо три лета. 39 И остави царь Давид изыти вслед Авессалома, яко утешися о Амноне, яко умре.

**14** И разуме Иоав сын Саруин, яко сердце царево преклонися ко Авессалому. 2 И посла Иоав в Фекою, и взя оттуду жену мудру и рече к ней: сетуй ныне, и облещися в ризы сетования, и не помажися елеем, и будеши яко жена сетующая о умершем дни многи: 3 и внидеши ко царю и речеши к нему по глаголу сему. И положи Иоав словеса своя во уста ея. 4 И вниде жена Фекоитяныня ко царю и паде на лица своем на землю, и поклонися ему, и рече: спаси, царю, спаси мя. 5 И рече ей царь: что ти есть? Она же рече: издавна вдова жена аз есмь, и умре муж мой: 6 и рабе твоей два сына, и бистася оба на селе, и не бысть кто бы их разлучил, и нападе един на брата своего, и умертви его: 7 и се, воста все отечество на рабу твою и реша: дай убившаго брата своего, и умертвим его вместо души брата, егоже уби, и погубим и наследника вашего: и угасят искру мою оставшуюся, яко не оставити мужу моему останка и имене на лица земли. 8 И рече царь к жене: иди здрава в дом свой, и аз заповедаю о тебе. 9 И рече жена Фекоитяныня ко царю: на мне беззаконие, господи мой царю, и на дому отца моего, царь же и престол его неповинен. 10 И рече царь: кто глаголяй к тебе, и приведеши его ко мне, и не приложит ктому коснуться ему? 11 И рече жена: да воспомянет ныне царь Господа Бога своего, внегда умножити ужика крове, еже растлити, и не имут погубити сына моего. И рече (царь):

жив Господь, аще и влас падет сыну твоему с главы на землю. 12 И рече жена: да глаголет ныне раба твоя ко господину моему царю слово. Он же рече: глаголи. 13 И рече жена: почто помыслил еси тако о людех Божиих? Еда от уст царевых слово сие аки преступление, еже не возвратити царю отриновеннаго своего? 14 Яко смертию умрем, и яко вода низходящая на землю, яже не соберется, и примет Бог душу, и помышляяй спасти от Него отриновеннаго: 15 и ныне яко приидох глаголати ко царю господину моему глагол сей, яко увидят мя людие, и речет раба твоя: да глаголет убо ко господину моему царю, негли сотворит царь слово рабы своя, 16 яко услышит царь: да измет рабу свою из рук мужей ищущих погубити мя и сына моего от участия Божия: 17 и речет раба твоя: да будет ныне слово господа моего царя на жертву: якоже бо Ангел Божий, тако господь мой царь, еже слышати благое и злое: и Господь Бог твой будет с тобою. 18 И отвеща царь и рече к жене: никакоже да утаиши от мене глагола, о немже аз вопрошу тя. И рече жена: да глаголет убо господь мой царь. 19 И рече царь: еда рука Иоавля о всем сем с тобою? И рече жена к царю: да живет душа твоя, господи мой царю, аще есть одесную или ошуюю от всех, яже глагола господин мой царь, яко раб твой Иоав той заповеда мне, и той вложи во уста рабе твоей вся словеса сия: 20 за еже приити лицу глагола сего, еже сотвори раб твой Иоав слово сие: господин же мой царь мудр, якоже мудрость Ангела Божия, еже разумети вся, яже на земли. 21 И рече царь ко Иоаву: се, ныне сотворих ти по словеси твоему сему: иди, возврати отрока Авессалома. 22 И паде на лица своем Иоав на землю, и поклонися, и

благослови царя. И рече Иоав: днесь позна раб твой, яко обретох благодать пред очима твоима, господи мой царю, яко сотвори господин мой царь слово раба своего. 23 И воста Иоав и иде в Гедсур, и приведе Авессалом во Иерусалим. 24 И рече царь: да возвратится в дом свой, лица же моего да не видит. И возвратися Авессалом в дом свой, лица же царева не виде. 25 И якоже Авессалом не бе муж во всем Израили хвален зело: от пяты ноги его и до верха его не бе в нем порока: 26 и внегда стрищи ему главу свою, и бысть от начала дний до дний в няже стрижаешся, яко тяжело бяше ему от них, и стригущься весяше власы главы своея двести сиклей по сиклю царскому. 27 И родишася Авессалому три сыны и дщерь едина, и имя ей Фамарь: сия бе жена добра зело взором, и бысть жена Ровоаму сыну Соломоню, и роди ему Авию. 28 И седяше Авессалом во Иерусалиме два лета дний, и лица царева не виде. 29 И посла Авессалом ко Иоаву, дабы послати его ко царю, и не восхоте приити к нему: и посла второе к нему, и не восхоте приити. 30 И рече Авессалом ко отроком своим: видите, часть на селе Иоавли близ мене, его тамо ячмень, идите и запалите его огнем. И запалиша раби Авессаломли часть (Иоавлю) огнем. И приидоша раби Иоавли к нему раздравше ризы своя, и реша: пожгоша раби Авессаломли часть твою огнем. 31 И воста Иоав и прииде ко Авессалому в дом, и рече к нему: почто сожгоша раби твои часть мою огнем? 32 И рече Авессалом ко Иоаву: се, посылах к тебе, глаголя: иди семо, и пошлю тя ко царю, глаголя: почто приидох из Гедсура? Лучше ми бе быти еще тамо: и ныне се, лица царева не видех: аще же есть во мне неправда, то умертви мя. 33 И вниде Иоав ко

царю и возвести ему. И призва Авессалома, и прииде ко царю, и поклонися ему, и паде лицом своим на землю пред лицом царевым, и облобыза царь Авессалома.

**15** И бысть по сих, и сотвори себе Авессалом колесницы и кони и пятьдесят муж текущих пред ним: **2** и воставаше рано Авессалом, и стояше при самом пути врат: и бысть всяк муж, емуже бяше прях, прииде пред царя на суд, и возопи к нему Авессалом, и глаголаше ему: от коего града ты еси? И рече ему муж: от единого колен Израилевых раб твой. **3** И рече к нему Авессалом: се, словеса твоя блага и удобна, но слушающего несть ти от царя. **4** И рече Авессалом: кто мя поставит судию на земли, и ко мне приидет всяк муж имеяй прю и суд, и оправдаю его? **5** И бысть егда приближашеся муж поклонитися ему, и простираше руку свою, и принимаше его, и целоваше его. **6** И сотвори Авессалом по глаголу сему всему Израилю приходящим на суд к царю и приусвои Авессалом сердца сынов Израилевых. **7** И бысть от конца четыредесяти лет, и рече Авессалом ко отцу своему: пойду ныне и воздам обеты моя, яже обещах Господу в Хевроне: **8** зане обет обеща раб твой, егда жих в Гедсуре Сирийстем, глаголя: аще возвращая возвратит мя Господь во Иерусалим, и послужу Господу. **9** И рече ему царь: иди с миром. И востав иде в Хеврон. **10** И посла Авессалом соглядатаи во вся колена Израилева, глаголя: егда услышите вы глас трубы рожаны, и рцйте: воцарися царь Авессалом в Хевроне. **11** И идоша со Авессаломом двести мужей от Иерусалима позвани: и идяху в простоте своей, и не разумеша всякого глагола. **12** И посла Авессалом, и призва Ахитофела Галамонийскаго, советника Давидова,

от града его Голамы, егда жряше жертвы. И бысть смятение крепко: и людей множество идущих со Авессаломом. 13 И прииде вестник к Давиду, глаголя: бысть сердце мужей Израилевых со Авессаломом. 14 И рече Давид всем отроком своим сущим с ним во Иерусалиме: встаните, и бежим, яко несть нам спасения от лица Авессаломля: ускорите ити, да не ускорит и возмет нас, и наведет на нас злобу, и избьет град острием меча. 15 И реша отроцы царевы к царю: вся елика заповесь господь наш царь, се, мы отроцы твои. 16 И изыде царь и весь дом его ногами своими, и остави царь десять жен подложниц своих хранити дом. 17 И изыде царь и вси отроцы его пеши и сташа в Дому Сущем Далече: 18 и вси отроцы его от обою страну его идяху, и вси Хелефее и вси Фелефее и вси Гефее, шесть сот мужей шедше пеши от Гефа предидяху пред лицом царевым. 19 И рече царь ко Еффею Геффеину: почто и ты идеши с нами? Возвратися и живи с царем, яко чуждь еси ты, и яко преселился еси ты от места твоего: 20 аще вчера пришел еси, и днесь ли подвигну тя ити с нами? И аз иду, аможе пойду: иди и возвратися, и возврати братию твою с тобою, и Господь да сотворит с тобою милость и истину. 21 И отвеща Еффей к царю и рече: жив Господь, и жив господин мой царь, яко на месте, идеже будет господин мой царь, или в смерти, или в животе, тамо будет раб твой. 22 И рече царь ко Еффею: гряди, и прейди со мною. И прейде Еффей Геффеин и царь и вси отроцы его и весь народ иже с ним. 23 И вся земля плакашеса гласом великим. И вси людие прехождяху по потоку Кедрску, и царь прейде чрез поток Кедрский, и вси людие и царь идяху к лицу пути пустынного. 24 И се,

и Садок иерей и вси левити с ним, носяще кивот завета Господня от Вефары: и поставиша кивот Божий: и Авиафар взыде, дондеже престаша вси людие исходити из града. 25 И рече царь к Садоку: возврати кивот Божий во град, и да станет на месте своем: аще обрящу благодать пред очима Господними, и возвратит мя, и покажет ми его и лепоту его: 26 и аще тако речет: не благоволих в тебе: се, аз есмь, да сотворит ми по благому пред очима Своима. 27 И рече царь Садоку иерею: видите, ты возвращаешься во град с миром и Ахимаас сын твой и Ионафан сын Авиафаров, два сыны ваши с вами: 28 видите, аз вселяюся во аравов пустынный, дондеже приидет ми слово от вас, еже возвестити ми. 29 И возврати Садок и Авиафар кивот Божий во Иерусалим, и седе тамо. 30 И Давид восхождаше восходом на гору Елеонскую восходя и плачяся, и покрыв главу свою, и сам идяше босыма ногама: и вси людие иже с ним покрывша кийждо главу свою, и восхождаху восходяще и плачущесе. 31 И возвестиша Давиду глаголюще: и Ахитофел в мятежницах со Авессаломом. И рече Давид: разруши совет Ахитофелев, Господи, Боже мой. 32 И бе Давид грядый даже до роса, идеже поклонися Богу. И се, на сретение ему (изыде) Хусий первый друг Давидов, растерзав ризы своя, и персть на главе его. 33 И рече ему Давид: аще пойдеши со мною, и будеши ми в тягость: 34 аще же возвратишися во град и речеши Авессалому: минуша братия твоя, и царь за мною мину отец твой, и ныне раб твой есмь, царю, пощади мя жива быти: раб бех отца твоего тогда и доселе, ныне же аз твой раб: и разруши ми совет Ахитофелев: 35 и се, с тобою тамо Садок и Авиафар иереи: и будет всяк глагол, егоже услышиши из



уст царских, и скажеша Садоку и Авиафару иереям: **36** се, тамо с ними два сына их, Ахимаас сын Садоков и Ионафан сын Авиафаров: и послите рукою их ко мне всяк глагол, егоже аще услышите. **37** И вниде Хусий друг Давидов во град, и Авессалом тогда вхождаше во Иерусалим.

**16** И Давид преиде мало что от роса, и се, Сива отрок Мемфивосфеов в сретение ему: и супруг ослят оседланных, и на них двести хлебов, и сто гроздий, и сто фиников, и мех вина. **2** И рече царь к Сиве: что сия тебе? И рече Сива: ослыта на яждение дому цареву, а хлебы и финики на снедение отроком, и вино пити ослабевшим в пустыни. **3** И рече царь: и где сын господина твоего? И рече Сива ко царю: се, седит во Иерусалиме, яко рече: днесь возвратят ми весь дом Израилев царство отца моего. **4** И рече царь к Сиве: се, тебе вся елика суть Мемфивосфеова. И рече Сива поклонився: да обрящу благодать пред очима твоима, господи мой царю. **5** И прииде Давид царь до Вафирима, и се, оттуду муж исхождаше от рода дому Сауля, имя же ему Семей сын Гирань: изыде же исходя и проклиная **6** и камением метая на Давида и на вся отроки царя Давида: и вси людие и вси сильнии одесную и ошуюю царя бяху. **7** И тако рече Семей проклиная его: изыди, изыди, мужу кровей и мужу беззаконный: **8** возврати на тя Господь вся крови дому Сауля, понеже воцарился еси вместо его: и даде Господь царство в руце Авессалома сына твоего: и се, ты в злобе твоей, яко муж кровей ты. **9** И рече Авесса сын Саруин ко царю: почто проклинаят пес умерший сей господина моего царя? Ныне пойду, и отиму главу его. **10** И рече царь ко Авессе: что мне и вам, сынове Саруины?

Оставьте его, и тако да проклиняет, яко Господь рече ему проклинати Давида: и кто речет: почто сотворил еси тако? **11** И рече Давид ко Авессе и ко всем отроком своим: се, сын мой изшедый из чрева моего ищет души моя, а кольми паче сын Иеминиев: оставите его проклинати мя, яко рече ему Господь: **12** негли призрит Господь на смирение мое, и возвратит ми благая вместо клятвы Его во днешний день. **13** И идяше Давид и вси мужие его путем: а Семей идяше со страны горы близ его идый и проклиная, и камением меща со страны его, и перстию сыпая. **14** И прииде царь и вси людие иже с ним утруждени, и препочиша ту. **15** Авессалом же и вси мужие Израилевы внидоша во Иерусалим, и Ахитофел с ним. **16** И бысть егда прииде Хусий первый друг Давидов ко Авессалому: и рече Хусий ко Авессалому: да живет царь. **17** И рече Авессалом к Хусию: сия ли милость твоя со другом твоим? Почто не отшел еси со другом твоим? **18** И рече Хусий ко Авессалому: ни, но вслед (иду), егоже избра Господь и людие сии и вси мужие Израилевы, того есмь, и с тем буду: **19** и второе, кому аз поработаю? Не пред сыном ли его? Якоже работах пред отцем твоим, тако буду и пред тобою. **20** И рече Авессалом ко Ахитофелу: дадите себе совет, что сотворим? **21** И рече Ахитофел ко Авессалому: вниди к подложницам отца твоего, яже остави стрещи дом свой, и услышат вси Израилтяне, яко посрамил еси отца твоего, и возмогут руки всех сущих с тобою. **22** И поставиша Авессалому шатер на палате, и вниде Авессалом к подложницам отца своего пред очима всех Израилтян. **23** И совет Ахитофелев, егоже совещаваше во дни первыя, имже

образом спросил бы кто Бога о словеси, так всяк совет Ахитофелев, и иже Давиду, и иже Авессалому.

**17** И рече Ахитофел ко Авессалому: избери ныне себе дванадесять тысяч мужей и встану, и пожену вслед Давида нощию, 2 и найду на него, и той утружден и ослаблен руками, и устрашу его, и побежат вси людие иже с ним, и убью царя единого: 3 и возвращу вся люди к тебе, имже образом обращается невеста к мужеву своему: ты бо токмо души единого мужа ищещи, всем же людем будет мир. 4 И угодно слово бысть пред очима Авессаломлима и пред очима всех старейшин Израилевых. 5 И рече Авессалом: призовите же и Хусиа Арахиина, и услышим что из уст его. 6 И вниде Хусий ко Авессалому, и рече Авессалом к нему, глаголя: по глаголу сему глагола Ахитофел: сотворим ли по словеси его? Аще же ни, ты глаголи. 7 И рече Хусий ко Авессалому: не благ совет сей, егоже совещает Ахитофел единою сие. 8 И рече Хусий: ты веси отца твоего и мужей его, яко сильни суть зело, и гневливи душами своими, яко медведица чада лишена на селе, и аки вепрь свирепый на поли: и отец твой муж борец, и не даст почести людем: 9 се бо, той ныне скрыся на некотором холме или на некотором месте: и будет внегда напасти на них в начале, и услышит слушающий, и речет: бысть сокрушение в людех иже за Авессаломом: 10 и той сын силы, емуже сердце якоже сердце льву таящо истает: понеже весь весь Израиль, яко силен отец твой, и сынове силы вси иже с ним: 11 тако советуя аз усюветовах, и собираяся соберется к тебе весь Израиль от Дана и до Вирсавии, аки песок иже при мори во множестве, и лице твое идущее посреде их: 12 и приидем к нему на едино

место, идеже обрящем его тамо, и ополчимся на него, якоже спадает роса на землю, и не оставим в нем и в мужех его иже с ним ни одинаго: 13 и аще во град соберутся, и возмет весь Израиль ко граду тому ужы, и совлечем его в поток, дондеже не останется тамо ниже камень. 14 И рече Авессалом и вси мужие Израилтестии: благ совет Хусиа Арахиина паче совета Ахитофелева. И Господь заповеда разорити совет Ахитофелев благий, яко да наведет Господь на Авессалома злая вся. 15 И рече Хусий арахиин ко Садоку и Авиафару иереем: тако и тако советова Ахитофел Авессалому и старейшинам Израилевым: и аз тако и тако советовах: 16 и ныне послите скоро и возвестите Давиду, глаголюще: не пребуди ночь сию во Аравофе пустыни, но пойти потщися, да не како пожерт будет царь и вси людие иже с ним. 17 И Ионафан и Ахимаас стояста на студенце Рогили, и иде рабыня и поведа има: и тии идоста и возвестиста Давиду царю, яко не могоста явитися еже внити во град. 18 И виде их отрочищъ и поведа Авессалому. И идоста оба скоро и приидоста в дом мужа в Ваурим: и тому ров на дворе, и снидоста тамо. 19 И взя жена, и положи покров на устии рова, и суши на нем арафоф, и не познася глагол. 20 И приидоша отроцы Авессаломли к жене в дом и реша: где Ахимаас и Ионафан? И рече им жена: преидоста вмале воду. И искаша, и не обретоша, и возвратишася во Иерусалим. 21 Бысть же по отшествии их, и излезоста из рова, и идоста, и возвестиста Давиду царю и глаголаста ему: встаните, и прейдите скоро воду, яко сице совеща на вы Ахитофел. 22 И воста Давид и вси людие иже с ним и преидоша Иордан до света заутра, и ни един не оста, иже бы не прешел Иордана.

23 И Ахитофел виде, яко не сбытсся совет его, и оседла осля свое, и воста, и отиде в дом свой, во град свой: и заповеда дому своему, и удавися, и умре, и погребен бысть во гробе отца своего. 24 И Давид преjde в Манаим, Авессалом же преjde Иордан сам и вси мужие Израилтестии с ним. 25 И Амессая постави Авессалом вместо Иоава над силою: Амессай же сын мужа, емуже имя Иефер Иезраилитин, сей вниде ко Авигеи дщери Иессеине, сестре Саруии матери Иоавли. 26 И ополчися Авессалом и весь Израиль в земли Галаадстей. 27 И бысть егда вниде Давид в Манаим, и Уесвий сын Наасов от Раввафа сынов Аммоних, и Махир сын Амииль иже из Лодавара, и Верзеллий Галаадитин из Рогеллима, 28 принесоша десять постель устроеных и конобов десять и сосуды скуделны и пшеницу и ячмень и муку и пшено и боб и сочевицу 29 и мед и масло и овцы и сыры кравия, и принесоша Давиду и людем иже с ним ясти: быша бо людие гладни и утруждени и жаждни в пустыни.

**18** И согляда Давид всех людий сущих с ним, и постави над ними тысященачалники и сотники. 2 И посла Давид третью часть людий под рукою Иоавлею и третью часть под рукою Авессы сына Саруина брата Иоавля, и третью часть под рукою Еффеа Геффеина, и рече Давид к людем: шед изыду и аз с вами. 3 И реша: не изыди, яко аще бегством побегнем, не положат на нас сердца: и аще умрем пол нас, не положат на нас сердца, понеже ты аки мы десять тысяч: и ныне лучше, яко останеши во граде на помощь нам. 4 И рече им царь: еже угодно пред очима вашима, сотворю. И ста царь при вратех: и вси людие исхождаху стами и тысящами. 5 И заповеда царь Иоаву и Авессе и Еффееви, глаголя:

пощадите ми отрока Авессалома. И вси людие слышаша заповедающа царя всем князем о Авессаломе. 6 И изыдоша вси людие в дубраву сопотив Израилю: и бысть брань в дубраве Ефремли. 7 И падоша тамо людие Израилевы пред отроки Давидовыми, и бысть сокрушение велико в той день, яко двадесять тысяч мужей. 8 И бысть тамо брань разсыпана по лицу всея земли: и умножи дубрава поядати людий, паче неже их пояде мечь в той день. 9 И набежа Авессалом на отроки Давидовы: Авессалом же бе седяй на мске своем, и вбежа (с ним) мск в чашу дуба великаго, и обвишася власы главы его на дубе, и повисе между небом и землею, мск же под ним пройде. 10 И виде муж един и возвести Иоаву, и рече: се, видех висяща Авессалома на дубе. 11 И рече Иоав мужу возвестившему ему: аще видел еси, почто не убил еси его тамо на землю? И аз дал бых тебе пятьдесят сикль сребра и пояс един. 12 И рече муж Иоаву: аще ты вложиши в руце мои и тысящу сикль сребра, то не возложу руки моея на сына царева, яко при ушесах наших заповеда царь тебе и Авессе и Еффееви, глаголя: соблюдайте ми отроча Авессалома, 13 не сотворити души его неправды: и всяко слово не утаится пред царем, ты же стоиши сопотивно. 14 И рече Иоав: сие аз начну, не тако пребуду пред тобою. И взя Иоав три стрелы в руце свои, и вонзе я в сердце Авессалому. И еще ему живу суцу на дубе, 15 и обступиша десять отрок носящии оружие Иоавле, и поразиша Авессалома, и умертвиша его. 16 И воструби Иоав трубою рожаною, и возвратишася людие не гнати вслед Израиля, яко щадяше Иоав людий. 17 И взя Иоав Авессалома, и вверже его в пропасть велику в дубраве, и

складе над ним купу каменя велику зело. И вси Израилтяне бежаша кийждо в селения своя. 18 Авессалом же еще жив сый, взя и постави себе столп во юдоли царстей, рече бо, яко несть ми сына на память имене моего: и нарече столп именем своим и нарече его рука Авессаломля, даже до днешняго дне. 19 И Ахимаас сын Садоков рече ко Иоаву: потеку ныне и возвещу царю, яко суди ему Господь от руки врагов его. 20 И рече ему Иоав: неси муж ты возвещай благо днесь, но возвестиши в день другой: в днешний же день не добро возвещение, понеже сын царев умре. 21 И рече Иоав Хусию: шед повеждь царю елика видел еси. И поклонися Хусий Иоаву и отиде. 22 И приложи еще Ахимаас сын Садоков и рече ко Иоаву: что будет, аще и аз теку вслед Хусиа? И рече Иоав: почто ты хочещи тещи, сыне мой? Гряди, несть тебе возвещение в пользу идущему. 23 И рече Ахимаас: что бо аще потеку? И рече ему Иоав: тещы. И бежаше Ахимаас путем равным и предвари Хусиа. 24 Давид же седяще посреде двою врат. И изыде страж на кров врат ко стене, и воздвиже очи свои, и виде, и се, муж текий един пред ним. 25 И возопи страж и сказа цареви. И рече царь: аще един есть, благо возвещение во устех его. И идяше идый и приближаяся. 26 И виде страж мужа другаго текуща, и возопи к дверем и рече: се, муж и другой текущъ един. И рече царь: и той есть благо возвещай. 27 И рече страж: аз вижду течение перваго, яко течение Ахимааса сына Садокова. И рече царь: муж благ сей, и возвестие благое приидет. 28 И возопи Ахимаас и рече ко царю: мир. И поклонися царю лицом своим на землю и рече: благословен Господь Бог твой, иже затвори мужей воздвигших руки своя

на господина моего царя. 29 И рече царь: мир ли отрочищу Авессалому? И рече Ахимаас: видех множество велико веселящееся, егда отпущаше раб царев Иоав раба твоего, и не разумех что тамо. 30 И рече царь: возвратися, и стани zde. И шед ста созади. 31 И се, Хусий вслед его прииде и рече царю: возвещается благо господину моему царю, яко суди тебе Господь днесь от руки всех востающих на тя. 32 И рече царь к Хусию: мир ли отрочищу Авессалому? И рече Хусий: да будут, якоже отрочишь, врази господина моего царя, и вси елицы восташа нань злобою. 33 И смятесе царь, и възиде на горницу яже на вратех, и плакася: и тако глаголаше, егда плакаше: сыне мой, Авессаломе, сыне мой, сыне мой, Авессаломе: кто даст смерть мне вместо тебе? Аз вместо тебе, Авессаломе, сыне мой, сыне мой, сыне мой Авессаломе.

**19** И поведаша Иоаву, глаголюще: се, царь плачет и рыдает о Авессаломе. 2 И бысть спасение в той день в рыдание всем людем, услышаша бо людие в той день, глаголюще: яко печален есть царь о сыне своем. 3 И украдахуся людие в той день еже входити во град, якоже украдаются людие посрамленнии, внегда бегати им на брани. 4 И царь покры лице свое: и возопи царь гласом великим, глаголя: сыне мой, Авессаломе, Авессаломе, сыне мой. 5 И вниде Иоав к царю в дом и рече: посрамил еси днесь лица раб твоих всех иземших тя днесь и душу сынов твоих и дщерей твоих и душу жен твоих и подложниц твоих, 6 еже любити ненавидящыя тебе и ненавидети любящыя тя: и явил еси днесь, яко не суть тебе князи, ниже отроцы: но разумех днесь, яко аще бы Авессалом жив был, мы вси днесь мертвы быхом были, яко



тогда право было бы пред очима твоима: 7 и ныне востав изыди и глаголи в сердца рабов твоих, яко о Господе кляхся, яко аще не изыдеши днесь, не останет ни един муж с тобою в ночь сию: и разумей в себе, яко зло ти есть сие паче всех зол, яже приидоша на тя от юности твоя до ныне. 8 И воста царь и седе при дверех. И возвестиша всем людем глаголюще: се, царь седит в дверех. И внидоша вси людие пред лице царево пред двери: мужие же Израилевы бежаша во селения своя. 9 И пряхуся вси людие во всех коленах Израилевых, глаголюще: царь Давид избави ны от всех враг наших, и се, изы нас от руки иноплеменничи, и ныне бежа от земли и от царства своего и от Авессалом: 10 Авессалом же, егоже помазахом над нами, умре на брани: и ныне что вы молчите, еже возвратити царя? И глагол всего Израиля прииде ко царю. 11 И царь Давид посла ко Садоку и ко Авиафару иереом, глаголя: рцыте старейшинам Иудиным, глаголюще: почто бысте последнии, еже возвратити царя в дом его? Слово же всего Израиля прииде к царю в дом его: 12 братия моя вы, кости моя и плоть моя вы есте, то почто бысте последнии, еже возвратити царя в дом его? 13 И Амессаю рцыте: неси ли кость моя и плоть моя ты? И ныне сия ми да сотворит Бог и сия да приложит, аще не будеши князь силы предо мною во вся дни вместо Иоава. 14 И преклони сердца всех мужей Иудиных яко мужа единого. И послаша к царю, глаголюще: возвратися ты и вси раби твои. 15 И возвратися царь и прииде до Иордана, и мужие Иудины приидоша в Галгалы еже изыти на сретение царю, превести царя чрез Иордан. 16 И ускори Семей сын Гирань сына Иеминиева, иже от Ваурима, и сниде с мужми Иудиными

во сретение царю Давиду, 17 и тысяща мужей с ним от Вениамина, и Сива отрок дому Сауля, и пятнадцать сынов его с ним, и двадесять рабов его с ним: и управиша на Иордан путь пред царем, 18 и послужиша служением о преведении царева. И преиде преход еже превести дом царев и сотворити правое пред очима его. И Семей сын Гирань паде на лица своем пред царем, егда прехождаше Иордан, 19 и рече ко царю: да не вменит господин мой беззакония, и не помяни елика неправдова раб твой в день он, в оньже господин мой царь исхождаше из Иерусалима, еже содержати царю в сердцы своем: 20 понеже разуме раб твой, яко аз согреших, и се, аз приидох днесь первее всего Израиля и дому Иосифля, еже снити ми на сретение господину моему царю. 21 И отвеща Авесса сын Саруин и рече: сего ли ради не умертвится Семей, яко прокля христа Господня? 22 И рече Давид: что мне и вам, сынове Саруины, яко бысте мне днесь в навет? Днесь не умертвится муж от Израиля, понеже не вем ли, яко днесь царствую аз над Израилем? 23 И рече царь и Семейю: не умреша. И клятся ему царь. 24 И се, Мемфивосфей сын Ионафана сына Сауля сниде на сретение царю, и не омы ног своих, и не обреза ногтей, ниже управи брады своя, и риз своих не измы от дне того, в оньже изыде царь, до дне в оньже той возвратися с миром. 25 И бысть егда вниде во Иерусалим на сретение царю, и рече ему царь: что яко не пошел еси со мною, Мемфивосфее? 26 И рече к нему Мемфивосфей: господи мой царю, пренебреже мене раб мой, яко рече раб твой ему: оседлай ми осля, и всяду на не, и пойду с царем, яко хром раб твой: 27 и оболга раба твоего ко господину моему царю:

и господин мой царь яко Ангел Божий, и сотвори благое пред очима твоима: **28** яко не бе весь дом отца моего, разве мужие (повиннии) смерти господину моему царю, и посадил еси раба твоего с ядущими на трапезе твоей: и кое есть мне еще оправдание, и возопити мне еще к царю? **29** И рече ему царь: почто глаголеши еще словеса твоя? Рех тебе и Сиве: разделите себе села. **30** И рече Мемфивосфей к царю: и вся да возмет, повнегда приити господину моему царю в мире в дом свой. **31** И Верзеллий Галаадитин сниде из Рогеллима, и преиде с царем Иордан, еже превести его чрез Иордан. **32** И Верзеллий муж стар зело, сын осмидесяти лет, и той препита царя, егда живяше в Манаиме, яко муж бе велий зело. **33** И рече царь к Верзеллию: ты преjdeши со мною, и препитаю старость твою со мною во Иерусалиме. **34** И рече Верзеллий к царю: колицы дни лет живота моего, яко да възду с царем во Иерусалим? **35** Сын осмидесяти лет аз днесь есмь: еда уразумею посреде блага и посреде лукава? Или уразумеет еще раб твой, еже ям, или еже пию? Или услышу глас еще поющих и воспевающих? И вскую будет еще раб твой в тяжесть господину моему царю? **36** Мало преjдет раб твой Иордан с царем: и почто воздает ми царь воздаяние сие? **37** Да возвратится ныне раб твой, и умру во граде моем, у гроба отца моего и матере моея: и се, раб твой сын мой Хамаам преjдет с господем моим царем, и сотвори ему благое пред очима твоима. **38** И рече царь: со мною да преjдет Хамаам, и аз сотворю ему благое пред очима моима, и вся елика избрет себе у мене, сотворю тебе. **39** И преидоша вси людие Иордан, и царь преjде, и целова царь Верзеллия и благослови его, и отпусти его в дом его. **40** И

прейде царь в Галгалы, и Хамаам прейде с ним, и вси людие Иудины провождаху царя и пол людий Израилевых. 41 И се, вси мужие Израилевы приидоша к царю и реша к царю: что яко украдоша тебе братия наша мужие Иудины, и преведоша царя и дом его чрез Иордан, и вси мужие Давидовы с ним? 42 И отвещаша вси мужие Иудины к мужем Израилевым и реша: зане ближний нам царь: и почто тако разгневастеся от словеси сем? Еда яди ядохом от царя? Или дары даде нам, Или дани отя от нас? 43 И отвещаша мужие Израилстии к мужем Иудиным и реша: десять рук мы у царя, и в Давиде есмы паче тебе, и первенец аз, нежели ты: и почто сице укоряеши мя? И не вменися слово мое прежде мене Иуде возвратити царя мне? И отягча слово мужей Иудиных паче словес мужей Израилевых.

**20** И тамо бяше сын беззаконный, имя же ему Савей, сын Вохоров, муж Иеминиов, и воструби трубою рожаною и рече: несть нам части в Давиде, ниже наследия нам в сыне Иессееве: (возвратитесь, ) мужие Израилтестии, в селения ваша. 2 И отступиша вси мужие Израилевы от Давида вслед Савеа сына Вохорова: мужие же Иудины прилепишася к царю своему от Иордана даже и до Иерусалима. 3 И вниде Давид в дом свой во Иерусалим, и взя царь десять жен подложниц своих, яже остави стрещи дом, и даде их в дом стражбы: и препита их, и (оттоле) не вниде к ним: и беша храними до дне смерти своея, вдовски живуцья. 4 И рече царь ко Амессаю: созови ми мужы Иудины в три дни, ты же zde стани. 5 И пойде Амессай созвати мужей Иудиных, и умедли от времени, в неже повеле ему Давид. 6 И рече Давид ко Авессе: ныне зло сотворит нам Савей сын Вохорь

паче Авессалома: и ныне ты поими с собою отроки господина своего, и пожени вслед его, да не како обрящет себе грады тверды и застенится от очес наших. 7 И изыдоша вслед его Авесса и мужие Иоавли, и Хереффи и Фелеффи и вси сильнии, и изыдоша из Иерусалима гнати вслед Савеа сына Вохорова. 8 И тии (бяху) у камене великаго, иже в Гаваоне, и Амессай вниде пред ними: Иоав же препоясан ризами одеяния своего, и верху того препоясан мечем припряженным при чреслах его в ножнах его, и егда отиде, и мечь изсунуся и паде. 9 И рече Иоав Амессаю: здрав ли еси, брате? И взя Иоав рукою десною за браду Амессаеву лобзати его: 10 Амессай же не побрежеса меча, иже в руце Иоавли: и удари его Иоав мечем в чресла его, и излися чрево его на землю, и не повтори ему, и умре (Амессай). Иоав же и Авесса брат его гнаста вслед Савеа сына Вохоря. 11 И муж ста над ним от отрок Иоавлих и рече: кто хочет (быти) Иоавль, и кто Давидов, вслед Иоава (да идет). 12 Амессай же мертв валяшеса в крови посреде пути. И виде муж, яко останавлияхуся над ним вси людие, и соврати Амессая с пути на село, и возложи на него ризу, понеже видяше всякаго приходяща над ним стоявша: 13 и бысть егда принесе от пути, преидоша вси мужие Израилевы вслед Иоава, еже гнати вслед Савеа сына Вохоря. 14 И сей пройде вся колена Израилева во Авель и во Вефмаху: и вси в Харре, и вси грады собращася, и идоша вслед его, 15 и приидоша и ополчисася на него окрест во Авели и во Вефмахе: и насыпаша землю ко граду, и ста на предстении: и вси людие иже со Иоавом помышляху низложити стену (градскую). 16 И возопи жена мудрая со стены и рече: слышите, слышите, рцыте ныне

Иоаву, да приблизится до зде, и возглаголю к нему. 17 И приблизися к ней (Иоав), и рече жена: ты ли еси Иоав? Он же рече: аз. И рече ему: послушай словес рабы твоея. И рече Иоав: послушаю, аз есмь. 18 И рече глаголющи: слово глаголаша в первых, глаголюще: вопрошаемь вопрошен бысть во Авели и в Дане, аще оскудеша, яже положиша вернии Израилевы: вопрошающе да вопросят во Авели, и тако рече, аще оскудеша: 19 аз есмь мирная утверждений Израилевых, ты же ищещи умертвити град и мать градов Израилевых: и почто потопляеши достояние Господне? 20 И отвеща Иоав и рече: милостив мне, милостив мне, аще потоплю и аще разрушу: 21 не тако слово, яко муж с горы Ефремли, Савей сын Вохорь имя ему, и воздвиже руку свою на царя Давида: дадите ми того единого, и отиду от града. И рече жена ко Иоаву: се, глава его свержется к тебе со стены. 22 И вниде жена ко всем людем и глагола ко всему граду мудростию своею, отяти главу Савеа сына Вохоря. И отсекоша главу Савеа сына Вохоря, и свергоша ю ко Иоаву. И Иоав воструби в трубу, и разыдохася мужие от града вси в селения своя. Иоав же возвратися во Иерусалим ко царю. 23 И (бе) Иоав над всею силою Израилевою, и Ванеа сын Иодаев над Хереффи и над Фелеффи, 24 Адонирам же над данми, и Иосафат сын Ахилуфов воспоминай, 25 и Суса книгочий, Садок же и Авиафар иерее, 26 Ирас же Иаринь бысть жрец Давидов.

**21** И бысть глад на земли во дни Давидовы три лета, лето по лету. И вопросы Давид лица Господня и рече Господь: над Саулом и над домом его обида в смерти кровей его, понеже умертви Гаваониты. 2 И призва царь Давид Гаваониты и рече

к ним: и Гаваонитяне не суть сынове Израилевы, но токмо от остатков Аморрейских, и сынове Израилевы кляшася им: Саул же взыска поразити я, внегда поревновати ему по сынех Израилевых и Иудиных. 3 И рече Давид ко Гаваонитяном: что сотворю вам? И чим умолю, да благословите достояние Господне? 4 И реша ему Гаваонитяне: несть нам серебра или злата со Саулом и с домом его, и несть нам мужа умертвити от всего Израиля. И рече: что вы глаголете, и сотворю вам? 5 И реша ко царю: мужа, иже соверши над нами и погна ны, иже умысли потребити ны, потребим его, да не будет во всех пределех Израилевых: 6 дадите нам седмь мужей от сынов его, и повесим их на солнце Господеви в Гаваоне Саули избранных Господних. И рече царь: аз дам. 7 И пощаде царь Мемфивосфеа, сына Ионафая сына Сауля, клятвы ради Господни, яже посреде их и посреде Давида и посреде Ионафана сына Сауля. 8 И взя царь два сына Ресфы дщере Аиа, подложницы Саули, ихже роди Саулу, Ермония и Мемфивосфеа, и пять сынов Мелхолы дщере Саули ихже роди Есдриилу сыну Верзеллиа Моулафиева, 9 и даде их в руки Гаваонитом. И повесиша я на солнце на горе пред Господем, и падоша тамо сии седмь вкупе: тии же умроша во днех жатвы первых, в начале жатвы ячменя. 10 И взя Ресфа дщи Аиина вретиче, и потче е себе при камени, в начале жатвы ячменя дондеже снидоша на них воды Божия с небесе, и не даде птицам небесным днем почити на них, ниже зверем земным нощию. 11 И поведаша Давиду вся елика сотвори Ресфа дщерь Аиа, подложница Сауля. И истлеша, и взя я Дан сын Иой, иже от исчадий исполиновых. 12 И иде Давид, и взя кости

Саули и кости Ионафана сына его от мужей сынов Иависа Галаадскаго, иже украдоша их от стогны Вефсани, зане повесиша их тамо иноплеменницы в день, в оньже поразиша иноплеменницы Саула в Гелвуи. 13 И вознесе Давид кости Саули оттуду и кости Ионафана сына его, и собра кости повешеных на солнце: 14 и погребоша кости Саули и кости Ионафана сына его, и кости повешеных на солнце, в земли Вениаминове, при Краи во гробе Киса отца его, и сотвориша вся елика заповеда царь. И послуша Бог земли по сих. 15 И бысть паки брань иноплеменником со Израилтяны. И сниде Давид и отроцы его с ним, и бишася со иноплеменники: и утрудися Давид. 16 И Иесвий, иже бе от внук Рафаних, (у негоже) бе вес копия его триста сикль веса медяна, и той бе препоясан оружием, и хотяше поразити Давида. 17 И поможе ему Авесса сын Саруин, и избави Давида Авесса, и порази иноплеменника, и умертви его. Тогда кляшася мужие Давидовы, глаголюще: не изыдеши ктому с нами на брань, да не угасиши светилника Израилева. 18 И бысть по сих еще брань в Гефе со иноплеменники: тогда порази Совохей иже от Асофы собранныя внуки Гигантовы. 19 И бысть паки брань в Роме со иноплеменники: и порази Елеанан сын Ариоргима Вифлеемлянин Голиафа иже от Гефффеа, и древо копия его бысть аки навой ткущих. 20 И бысть паки брань в Гефе: и бе муж от мадона, и персты рук его и персты ног его по шести, числом двадесять четьри: и той родися от Рафы, 21 и уничижи Израиля: и уби его Ионафан сын Сафая брата Давидова. 22 Четьри сии родишася внуцы Гигантовы рафе в Гефе, и падоша от руку Давидову и от руку рабов его.



**22** И глагола Давид ко Господу словеса песни сея в день, в оньже избави и Господь из руки всех враг его и из руки Сауловы, **2** и рече песнь: Господи, камению мой и утверждение мое, и избавляй мя мне: **3** Бог мой, хранитель мой будет мне, уповая буду на Него: защитник мой и рог спасения моего, Заступник мой и прибежище мое спасения моего, от неправедного спасеши мя. **4** Хвальнаго призову Господа, и от враг моих спасуся: **5** яко одержаша мя болезни смертныя и потоцы беззакония смятоша мя, **6** болезни смертныя обыдоша мя, предвариша мя жестокости смертныя. (Sheol h7585) **7** Внегда скорбети ми призову Господа, и к Богу моему воззову, и услышит от храма святого Своего глас мой, и вопль мой внидет во уши Его. **8** И смятятся и трепетна бысть земля, и основания небесе смятошася и подвигошася, яко прогневался на ня Господь: **9** взыде дым гневом Его, и огонь из уст Его пояст: углие возгорешася от Него, **10** и преклони небеса и сниде, и мрак под ногама Его, **11** и вседе на Херувимы и лете, и явися на крилу ветреню, **12** и положи тму закров Свой: окрест Его селение Его, темноту вод огусти во облацех воздушных: **13** от сияния пред Ним разгорешася углие огненнии. **14** И возгреме с небесе Господь, и Вышний даде глас Свой, **15** и посла стрелы, и расточи их: и блесну молнию, и устраши я: **16** и явишася источницы морстии, и открышася основания вселенныя от запрещенія Господня, от дохновения духа гнева Его: **17** посла с высоты и прият мя, извлече мя от вод многих: **18** избави мя от враг моих сильных и от ненавидящих мя, яко укрепилася паче мене: **19** предвариша мя в день печали моея. И бысть Господь утверждение мое, **20** и изведе мя на широту, и избави мя,

яко благоволи во мне. 21 И воздаде ми Господь по правде моей, и по чистоте руку моею воздаде ми, 22 яко сохраних пути Господни и не нечествовах от Бога моего, 23 яко вся судьбы Его предо мною, и оправдания Его не отступиша от мене, 24 и буду непорочен Ему, и сохранюся от беззакония моего. 25 И воздаст ми Господь по правде моей и по чистоте руку моею пред очима Его. 26 С преподобным преподобен будеши, и с мужем неповинным неповинен будеши: 27 и со избранным избран будеши, и со строптивым развратишия: 28 люди же смиренныя спасеши, и очи гордых смириши. 29 Яко Ты просвещаеши светилник мой, Господи, и Господь просветит ми тму мою: 30 яко Тобою потеку препоясан, и о Бозе моем прелезу стену. 31 Крепок, непорочен путь Его: глаголгол Господень державен, разжжен: защитник есть всем уповающим на Него. 32 Яко кто крепок разве Господа? И кто творец разве Бога нашего? 33 Крепок укрепляй мя силою, и положи непорочен путь мой: 34 положивый нозе мои яко елени, и на высоких поставляй мя: 35 научаяй руце мои на брань, и положивый лук медян мышца моя. 36 И дал ми еси защищение спасения моего, и кротость Твоя умножи мя. 37 Разширил еси стопы моя подо мною, и не позыбнустеся голени мои. 38 Пожену враги моя и потреблю я, и не возвращуся дондеже скончаю их: 39 и сокрушу их, и не востанут, и падут под ногама моима. 40 И укрепил мя силою на брань, подклониши востающыя на мя под мя. 41 И враги моя дал ми еси хребет, ненавидящыя мя, и умертвил еси их: 42 возопиют, и несть помощника, ко Господу, и не услыша их: 43 и истних я яко прах земный, яко брение путей истончих я. 44 И избавиши мя от пререкания

людей моих, сохраниши мя в главу языков. И людие, ихже не ведях, работаша ми. 45 Сынове чуждии солгаша ми, в слух уха услыша мя: 46 сынове чуждии отвержени будут, и вострепещут во градех своих. 47 Жив Господь, и благословен хранитель мой, и вознесетя Бог мой, хранитель спасения моего. 48 Крепкий Господь даяй отмщения мне и наказуяй люди под мя, 49 и изводяй мя от враг моих, и от востающих на мя вознесеши мя, от мужа неправедна избавиши мя. 50 Сего ради исповемся Тебе, Господи, во языцех, и имени Твоему воспою: 51 величайя спасения царя Своего, и творяй милость христу Своему Давиду и семени его до века.

**23** И сия словеса Давидова последняя. Верен Давид сын Иессеов, и верен муж, егоже возстави Господь в христа Бога Иаковля, и благолепны псалмы Израилевы. 2 И Дух Господень глагола во мне, и слово Его на языке моем. 3 Глаголет Бог Израилев: мне глагола хранитель Израилев притчу: рех в человецех: како удержите страх Божий? 4 И во свете Божии утреннем, и возсия солнце заутра, не преjde от сияния, и яко от дождя злачна от земли. 5 Не тако бо дом мой с Крепким: завет бо вечен положи ми, готов во всяком времени сохранен: яко все спасение мое и все хотение во Госпoде, яко не имать прозябнути беззаконный. 6 Якоже терние извержено вси сии, яко не возмутся рукою, 7 и муж не потрудится в них: и множество железа, и древо копийное, и огнем сожжет, и попалятся в срамоту свою. 8 Сия имена сильных Давидовых: Иевосфей Хананеанин князь третияго есть: адинон асоней, сей обнажи мечь свой на осмь сот воинов (и победы) единою. 9 И по нем Елеазар, сын отца брата его, в триех сильных братиях, сей бе со Давидом

(во сирране) внегда поносити ему во иноплеменницех: и иноплеменницы собращася тамо на брань, 10 и изыдоша мужие Израилевы противу лица их, и той воста и убиваше иноплеменники, дондеже утрудися рука его и прильпе рука его к мечу: и сотвори Господь спасение велико в той день: и людие обратишася вслед его токмо совлачати. 11 И по нем Самаиа сын Асы, Арухейский: и собращася иноплеменницы во Фирию: и бе тамо часть села исполнь лящи: и людие бежаша от лица иноплеменнича: 12 и ста аки столп посреде части, и исхити ю, и порази иноплеменники: и сотвори Господь спасение велико. 13 И снидоша три князи от тридесятих, и приидоша в касон к Давиду в вертеп Одоллам: и чинове иноплеменник ополчишася во юдоли Рафаинстей. 14 И Давид тогда бе во обдержании, и стан иноплеменническ бе тогда в Вифлееме. 15 И возжада Давид и рече: кто напоит мя водою из рова, иже в Вифлееме при вратех? Стан же бе тогда иноплеменничь в Вифлееме. 16 И расторгоша трие сильнии ополчение иноплеменничо, и почерпоша воды из рова Вифлеемского, иже при вратех: и взяша, и приидоша ко Давиду, и не восхоте пити ея: и возлия ю Господу 17 и рече: милостив мне, Господи, еже сотворити сие, кровь ли мужей пошедших в душах своих пити имам? И не восхоте пити ея. Сия сотвориша трие сильнии. 18 И Авесса брат Иоавль сын Саруин, сей бе князь в триех, и сей воздвиже копие свое на триста язвеных, и тому имя есть в триех. 19 От триех оных славный, и бысть им князь, и даже до триех не прииде. 20 И Ванеа сын Иодаев, муж сей премног в делех, от Кавасаила, и сей уби два сына Ариила Моавского: и той сниде, и уби льва посреде рова в день снежен: 21 и той порази мужа

Египтянина, мужа красна, в руце же Египтянина копие яко древо лествицы корабленья: и сниде к нему со палицею, и исторже копие из руку Египтянина, и уби его копием его: **22** сия сотвори Ванеа сын Иодаев, и тому имя в триех сильных, **23** от триех славный, и ко трием не прииде: и постави его Давид над таинники своими. **24** И сия имена сильных Давида царя: Асаил брат Иоавль, сей в тридесятих: Елеанан сын отца брата его от Вифлеема: **25** Семоф Ародиин: **26** Хеллис Келофийский: Ира сын Еккиса Фекоитскаго: **27** Авиезер Анафифитский: Савухей иже от Асофиты: **28** Еллон Алонитский: моей Нетофафитянин: **29** Ели сын Ваань, иже от Нетофафит: Еффи сын Ривань от Гаваона сынов Вениаминих: **30** Ванеас Фарафонитский: Урий от Наалгеа: **31** Ариил сын Аравофитянина: Заор Варсамитский: **32** Елеаса сын Салавонитский: Васей гонитский: **33** Ионафан сын Самана Ароритскаго: Ахиан сын Арати Арафурскаго: **34** Елифалаф сын Маахиабль: Елиав сын Ахитофела Гелонитскаго: **35** Асараи Кармилский: Урем сын Асви: **36** и Гала сын Нафанов: и Ваан сын Агарин: **37** Елли Амманитский: Гелорей Вирофийский, носяй оружие Иоава сына Саруина: **38** Ирас Еффирский: Гарев Иерфейский: и Уриа Гефейский. **39** Всех тридесять и семь.

**24** И приложи Господь гневу разгоретися во Израили, и подвиже в них Давида, глаголя: иди и изочи Израиля и Иуду. **2** И рече царь ко Иоаву князю силы иже с ним: пройди ныне вся колена Израилева и Иудина, от Дана даже и до Вирсавии, и сочти люди, и да увем число людем. **3** И рече Иоав ко царю: да приложит Господь Бог твой к людем твоим, якоже быти им сторицею, и очи господина моего

царя да увидят: и господин мой царь почто помышляет о словеси сем? 4 И превозможе слово царево ко Иоаву и ко князем силы. И изыде Иоав и князи крепости пред царем сочести люди Израилевы. 5 И преидоша Иордан, и ополчишася во Ароире одесную града иже посреде дебри Гад и Елиезер. 6 И приидоша в Галаад и в землю Фавасон и Истон и в Дасу, и внидоша в Данидан и обыдоша Сидон, 7 и приидоша во Мапсар Тирский и во вся грады Евеины и в Хананеины, и идоша на юг Иуды в Вирсавию, 8 и обыдоша всю землю, и приидоша во Иерусалим, скончавше девять месяц и двадесять дней. 9 И даде Иоав число сочтеных людей царю: и бе Израиля числом осмь сот тысящ сильных держащих оружие, и мужей Иудиных пять сот тысящ мужей борцев. 10 И убояся сердце Давидово по счислению людей, и рече Давид ко Господу: согреших зело, яко сотворих глагол сей: и ныне, Господи, отими беззаконие раба Твоего, яко обуюх зело. 11 И воста Давид заутра: и слово Господне бысть ко Гаду пророку прозорливцу, глаголя: 12 иди и рцы Давиду, глаголя: тако глаголет Господь: трое аз наведу на тя, и избери себе единое от сих, и сотворю ти. 13 И вниде Гад к Давиду, и поведа, и рече ему: избери себе быти: или приидут тебе три лета глада на землю твою: или три месяцы бегати имаша пред враги твоими, и будут гоняще тя: или три дни быти смерти в земли твоей: ныне убо разумей и виждь, что отвещаю Пославшему мя. 14 И рече Давид ко Гаду: тесна ми суть отвсюду зело три сия: да впаду убо в руце Господни, яко многи суть щедроты Его зело: в руце же человеки да не впаду. И избра себе Давид смерть и дни жатвенныя пшеницы. 15 И даде Господь смерть во

Израили от утра до часа обедняго, и начася язва быти в людех, и умроша от людей Господних от Дана и до Вирсавии седмьдесят тысящ мужей. 16 И простре Ангел Божий руку свою на Иерусалим погубити его, и раскаяся Господь о зле, и рече Ангелу погубляющему люди: довольно ныне, отими руку твою. И Ангел Господнь бе стоя пред гумном Орны Иевусеанина. 17 И рече Давид ко Господу, егда виде Ангела биюща люди, и рече: се, аз есмь согрешивый, аз есмь пастырь зло сотворивый, а сии овцы что сотвориша? Да будет ныне рука Твоя на мне и на дому отца моего. 18 И прииде Гад к Давиду в день той и рече ему: взыди, и постави Господеви олтарь на гумне Орны Иевусеанина. 19 И взыде Давид по глаголу Гада пророка, имже образом заповеда ему Господь. 20 И преклонися Орна, и виде царя и отроки его восходящия выше его, и изыде Орна, и поклонися царю на лица своем на земли, 21 и рече Орна: что яко прииде господин мой царь к рабу своему? И рече Давид: купити у тебе гумно (приидох), на создание олтаря Господня, и престанет язва от людей. 22 И рече Орна к Давиду: да приимет и вознесет господин мой царь Господу (Богу) еже благо пред очима его: се, волове во всеожжение, и колеса и сосуди волов на дрова. 23 Вся даде Орна царю. И рече Орна к царю: Господь Бог твой да благословит тя. 24 И рече царь ко Орне: ни, но токмо купю куплю от тебе ценою, и не вознесу Господу Богу моему всеожжения туне. И купи Давид гумно и волы на пятидесяти сиклех сребра. 25 И созда тамо Давид олтарь Господеву: и вознесе всеожжения и мирная. И приложи Соломон ко олтарю последи, зане мал бе прежде. И послуша Господь земли, и отят язву от Израиля.

## Третья книга Царств

**1** И царь Давид бысть стар прешед дни, и одеваху его ризами (многими), и не согревашся. **2** И реша отроцы его ему: да поищут господину нашему царю девицы юныя, и предстоит цареви, и будет греючи его, и да лежит с ним, и согреется господин наш царь. **3** И искаша отроковицы добрыя от всего предела Израилева, и обретоша Ависагу Сумантяныню, и приведоша ю ко царю. **4** И бе отроковица добра видением зело: и бысть греючи царя и служаше ему: царь же не позна ея. **5** И Адониа сын Аггифин вознесся, глаголя: аз имам царствовати. И сотвори себе колесницы и конники, и пятьдесят мужей еже ходити пред ним. **6** И не возбрани ему отец его никогда, глаголя: почто сие ты сотворил еси? И бе той красен зраком зело, и того роди по Авессаломе. **7** И беша совети его со Иоавом сыном Саруиным и со Авиафаром иереом, и помогаху вслед Адонии. **8** Садок же иерей и Ванеа сын Иодаев, и Нафан пророк и Семей, и Рисий и сынове сильнии Давидовы не быша по Адонии. **9** И пожре Адониа овцы и телцы и агнцы при камени Зоелефе, иже бе близ источника Рогиля: и призва всю братию свою, сыны царевы, и вся мужы Иудовы, отроки царевы: **10** Нафана же пророка и Ванеа и сильных и Соломона брата своего не зва. **11** И рече Нафан ко Вирсавии матери Соломони, глаголя: не слышала ли еси, яко воцарися Адониа сын Аггифин, господин же наш Давид не весть: **12** ныне убо совещаю ти совет, и избавиши душу свою и душу сына твоего Соломона: **13** гряди, вниди к царю Давиду и речеши к нему, глаголющи: не ты ли, господи мой царю, клялся еси рабе твоей, глаголя: яко Соломон сын твой



имать царствовать по мне, и той сядет на престоле моем? И что яко воцарися Адониа? 14 И се, еще глаголющей тебе тамо со царем, и аз вниду вслед тебе и дополню словеса твоя. 15 И вниде Вирсавиа ко царю в ложницу. И царь стар зело, и Ависаг Сумантяныня бяше служащи царю. 16 И приклонися Вирсавиа и поклонися цареви. И рече царь: что ти есть? 17 Она же рече: господи мой царю, ты клялся еси пред Господем Богом твоим рабе твоей, глаголя: яко сын твой Соломон имать царствовать по мне, и той сядет на престоле моем: 18 и се, ныне Адониа царствует, ты же, господи мой царю, не веси: 19 и пожре телцы и агнцы и овцы во множестве, и созва вся сыны царевы, и Авиафара жерца и Иоава князя силы, Соломона же раба твоего не призва: 20 ты же, господи мой царю, очи всего Израиля к тебе: да возвестиши им, кто сядет на престоле господина моего царя по нем: 21 и будет егда уснет господин мой царь со отцы своими, и буду аз и сын мой Соломон грешни. 22 И се, еще ей глаголющей с царем, и Нафан пророк прииде. 23 И возвестиша царю, глаголюще се, Нафан пророк. И вниде пред лице царево, и поклонися царю пред лицом его до земли, 24 и рече Нафан: господи мой царю, ты ли рекл еси: Адониа да царствует по мне, и той да сядет на престоле моем? 25 Яко сниде днесь и закла телцы и агнцы и овцы во множестве, и созва вся сыны царевы и князи сильных, и Авиафара иереа: и се, суть ядуще и пиюще пред ним, и реша: да живет царь Адониа: 26 и мене самага раба твоего, и Садока иереа, и Ванеа сына Иодаева, и Соломона раба твоего не зва: 27 от господина ли царя моего бысть глагол сей? И не сказал еси рабу твоему, кто сядет на престоле

господина моего царя по нем? 28 И отвеща царь Давид и рече: призовите ми Вирсавию. И вниде (Вирсавиа) пред царя и ста пред лицом его. 29 И клялся царь и рече: жив Господь, иже избави душу мою от всея печали: 30 якоже бо кляхтися пред Господем Богом Израилевым, глаголя: яко Соломон сын твой воцарится по мне, и той сядет на престоле моем вместо мене, яко тако сотворю ему в днешний день. 31 И преклонися Вирсавиа лицом на землю, и поклонися царю и рече: да живет господин мой царь Давид во веки. 32 И рече царь Давид: призовите мне Садока жерца и Нафана пророка, и Ванеа сына Иодаева. И внидоша пред царя. 33 И рече им царь: поимите с собою рабы господина вашего, и всадите сына моего Соломона на мска моего, и ведите его к Гиону, 34 и да помажет его тамо Садок иерей и Нафан пророк в царя над Израилем, и вострубите трубою рожаною и речете: да живет царь Соломон: 35 и изыдите вслед его, и внидет, и сядет на престоле моем, и той воцарится вместо мене: и аз заповедах, да будет властелин над Израилем и Иудею. 36 И отвеща Ванеа сын Иодаев царю и рече: буди тако: да утвердит Господь Бог глагол сей господина моего царя: 37 якоже бе Господь со господином моим царем, тако да будет и с Соломоном, и да возвеличит престол его паче престола господина моего царя Давида. 38 И сниде Садок иерей и Нафан пророк, и Ванеа сын Иодаев, и Херэффи и Фелеффи, и всадиша Соломона на мска царя Давида, и возведоша его к Гиону: 39 и взя Садок иерей рог с елеем от скинии, и помаза Соломона, и воструби трубою рожаною, и реша вси людие: да живет царь Соломон. 40 И възыдоша вси людие вслед его и ликоваша в лицах, и веселяхуся

веселием великим, и разседся земля от гласа их. 41 И слыша Адониа и вси званнии его, и тии скончаша уже ядуще. И слыша Иоав глас трубы рожаны и рече: кий глас есть града шумяща? 42 И еще Ему глаголющу, и се, Ионафан сын Авиафара иереа прииде. И рече Адониа: вниди, яко муж силы ты еси, и благая возвести. 43 И отвеща Ионафан и рече: известно, господин наш царь Давид постави Соломона царем: 44 и посла с ним царь Садока иереа и Нафана пророка, и Ванеа сына Иодаева, и Хереффи и Фелеффи, и всадиша его на мска царева: 45 и помазаша его Садок иерей и Нафан пророк на царство в Гионе, и възыдоша оттуду веселящися, и възшуме град: сей глас, егоже слышасте: 46 и седе Соломон на престоле царstem: 47 и внидоша раби царевы благословити господина нашего царя Давида, глаголюще: да ублажит Бог имя Соломона сына твоего паче имене твоего, и да възвеличит престол его паче престола твоего: и поклонися царь на одре своем, 48 и сице рече царь: благословен Господь Бог Израилев, Иже даде днесь от семене моего седяща на престоле моем, и очи мои видят. 49 И ужасошася ужасом, и восташа вси званнии Адониевы, и отиде кийждо путем своим. 50 И Адониа убояся от лица Соломоня, и воста и отиде, и ятсся за рог олтаря. 51 И возвестиша Соломону, глаголюще: се, Адониа убояся царя Соломона, и держитсся за рог олтаря, глаголя: да кленетмися днесь царь Соломон, яко не убиет раба своего оружием. 52 И рече Соломон: аще будет сын силы, ни влас главы его упадет на землю: аще же злоба обрящется в нем, умрет. 53 И посла царь Соломон, и сведоша его со олтаря. И вниде, и

поклонися царю Соломону. И рече ему Соломон: иди в дом свой.

**2** И приближишася Давиду дние умрети ему, и заповеда Соломону сыну своему, глаголя: **2** аз отхожду в путь вся земля: ты же крепися, и буди муж совершен, **3** и сохрани завет Господа Бога твоего, еже ходити во всех путех Его, хранити заповеди Его и оправдания Его, и судьбы Его и свидения Его, писанная в законе Моисеове: да разумеши яже сотвориши по всем, елика заповедах тебе: **4** да утвердит Господь слово Свое, еже рече о мне, глаголя: аще сохранят сынове твои пути своя, еже ходити предо Мною во истине всем сердцем своим и всею душою своею, глаголя: не искоренится тебе муж с престола Израилева: **5** и ты веси, елика сотвори мне Иоав сын Саруин, елика сотвори двама воеводама сил Израилевых, Авениру сыну Нирову и Амессаю сыну Иеферову, и уби их, и излия крови брани в мире, и даде кровь неповинных на поясе своем, иже на чреслах его, и на сапозе своем сущем на нозе его: **6** и сотвориши по мудрости твоей, и не сведеши старости его с миром во ад: **(Sheol h7585)** **7** сыном же Верзеллии Галаадитина сотвориши милость, и да будут с ядущими трапезу твою: яко тако приближишася мне, внегда бежати мне от лица Авессалома брата твоего: **8** и се, с тобою Семей сын Гирань сын Иемениин от Ваурима, и той прокля мя проклятием горьким, в день в оньже исхождах в Полки: и той сниде на сретение ми на Иордан, и кляхся ему о Господе, глаголя: не убью тя оружием: **9** и да не обезвиниши его, яко муж мудр еси ты, и увеси что сотвориши ему, и сведеши старость его с кровию во ад. **(Sheol h7585)** **10** И успе Давид со отцы

своими, и погребен бысть во граде Давидове. 11 И бысть дний, в няже царствова Давид во Израили, четыредесять лет: в Хевроне царствова семь лет, во Иерусалиме же тридесять три лета. 12 И Соломон седе на престоле Давида отца своего сын дванадесяти лет, и уготовася царствие его зело. 13 И вниде Адониа сын Аггифин к Вирсавии матери Соломона, и поклонися ей. Она же рече: мир ли вход твой? И рече: мир. 14 И рече: слово мне к тебе. И рече ему: глаголи. 15 И рече ей: ты веси, яко мне бе царство, и на мя весь Израиль положи лице свое, еже царствовати, и обратися царство, и бысть брату моему, яко от Господа бысть ему: 16 и ныне прошения единого аз прошу от тебе, не отврати лица своего. И рече ему Вирсавиа: глаголи. 17 И рече к ней: рцы к Соломону царю, яко не имать отвратити лица своего от тебе, и дабы ми дал Ависагу Сумантяныню в жену. 18 И рече Вирсавиа: добре, аз имам глаголати о тебе к царю. 19 И вниде Вирсавиа пред царя Соломона глаголати ему о Адонии. И воста царь на сретение ей, и поклонися ей, и седе на престоле своем: и поставиша престол другой матери цареви, и седе одесную его, 20 и рече ему: прошения мала единого аз прошу у тебе, не отврати лица моего. И рече к ней царь: проси, мати моя, яко не отвращуся от тебе. 21 И рече: даждь Ависагу Сумантяныню Адонии брату твоему в жену. 22 И отвеща царь Соломон и рече матери своей: вскую ты просиши Ависаги Сумантяныни Адонии? Еще проси ему и царства, яко той брат мой болший мене, и ему Авиафар иерей, и ему Иоав сын Саруин воевода друг. 23 И клятся царь Соломон Господем, глаголя: сия да сотворит мне Бог и сия да приложит, яко на душу свою глагола Адониа слово

сие: 24 и ныне жив Господь, Иже уготова мя, и посади мя на престоле отца моего Давида, и Той сотвори ми дом, якоже глагола Господь, яко днесь умрет Адониа. 25 И посла царь Соломон рукою Ванеа сына Иодаева, и уби его, и умре Адониа в той день. 26 И Авиафару иерею рече царь: тецы ты во Анафоф на село твое, яко муж смерти еси ты в днешний день, но не умерщвлю тебе, яко носил еси кивот завета Господня пред отцем моим (Давидом), и яко озлоблен был еси во всех, имиже озлоблен бе отец мой. 27 И изгна Соломон Авиафара, еже не быти ему иереем Господним, якоже сбьитися словеси Господню, еже глагола на дом Илиев в Силоме. 28 И слух дойде до Иоава сына Саруина, яко Иоав последова Адонии, и в след Соломонь не уклонися. И бежа Иоав в скинию Господню, и ятсся рогов олтаревых. 29 И возвестиша Соломону, глаголюще: яко бежа Иоав в скинию Господню, и се, держится рогов олтаревых. И посла царь Соломон ко Иоаву, глаголя: что ти бысть, яко убежал еси во олтарь? И рече Иоав: яко убояхся от лица твоего, и бежах ко Господу. И посла Соломон Ванеа сына Иодаева, глаголя: иди, и убий его, и погребви его. 30 И прииде Ванеа сын Иодаев ко Иоаву в скинию Господню, и рече ему: сия глаголет царь: изыди. И рече Иоав: не изыду, но да zde умру. И возвратиса Ванеа сын Иодаев и рече царю, глаголя: сия глагола Иоав и сия отвеща мне. 31 И рече ему царь: иди и сотвори ему, якоже рече, и убий его, и погребви его, и отими днесь кровь, юже туне пролия Иоав, от мене и от дому отца моего: 32 и возврати Господь кровь неправды его на главу его, якоже нападе на два мужа праведна и блага паче его, и уби их оружием: и отец мой Давид не разуме крове

их, Авенира сына Нирова, воеводу Израилева, и Амессая сына Иеферова, воеводу Иудина: 33 и возвратися кровь их на главу его и на главу семени его во веки: Давиду же и семени его, и дому его, и престолу его мир да будет до века от Господа. 34 И взыде Ванеа сын Иодаев и нападе на него, и уби его, и погребе его в дому его в пустыни. 35 И постави царь Соломон Ванеа сына Иодаева вместо его над воинством: царство же управляшеся во Иерусалиме. И Садока иереа даде Соломон царь во иереа перваго вместо Авиафара. 36 И послав царь Соломон, призва Семеа и рече ему: созижди себе дом во Иерусалиме и седи тамо, и не исходи оттуду никаможе: 37 и будет в день исхода твоего, и преjdeши поток Кедрский, разумея разумей, яко смертию умреши: кровь твоя будет на главе твоей. И заклят его царь в день той. 38 И рече Семей к царю: благ глагол, егоже глагола еси, господи мой царю: тако сотворит раб твой. И седе Семей во Иерусалиме три лета. 39 И бысть по триех летех, и бежаста два раба Семейна ко Агхусу сыну Маахаину, царю Гефску. И возвестиша Семейю, глаголюще: се, раби твои во Гефе. 40 И воста Семей, и оседла осля свое, и иде во Геф ко Агхусу взыскати рабы своя: и поиде Семей, и приведе рабы своя от Гефа. 41 И возвестиша Соломону, глаголюще: яко Семей ходи из Иерусалима в Геф и возврати рабы своя. 42 И посла царь и призва Семеа и рече к нему: не заклых ли тя Господем, и засвидетелствовах тебе, глаголя: в оньже аще день изыдеши из Иерусалима и пойдеш на десно или на шуюе, разумея разумей, яко смертию умреши? И рекл ми еси: благ глагол, егоже слышах: 43 и что яко не сохранил еси клятвы Господни и заповеди, юже заповедах

на тя? **44** И рече царь к Семене: ты веси всю злобу твою, юже весть сердце твое, яже сотворил еси Давиду отцу моему: и возврати Господь злобу твою на главу твою: **45** и царь Соломон благословен, и престол Давидов будет готов пред Господем во веки. **46** И заповеда царь Соломон Ванею сыну Иодаеву: и изыде, и уби его, и умре (Семей).

**3** Егда же царство утвердися в руце Соломона, сватовство сотвори Соломон с фараоном царем Египетским: и поят дщерь фараону и введе ю во град Давидов, дондеже скончаша здати дом свой и дом Господень и стену Иерусалима окрест. **2** Обаче людие тогда бяху жруще на высоких, яко не бе создан дом Господеви даже до дне онаго. **3** И возлюбил Соломон Господа, ходити в заповеданиих Давида отца своего, токмо на холмах жряше и кадыше. **4** И воста Соломон, и иде в Гаваон пожрети тамо, яко тамо бе высота велия: тысящу всесожжения вознесе на жертвеннице в Гаваоне. **5** И явился Господь Соломону во сне нощию и рече ему: проси что хочещи себе. **6** И рече Соломон: Ты сотворил еси с рабом Твоим Давидом отцем моим милость велию, якоже ходи пред Тобою истиною и правдою и правым сердцем с Тобою, и сохранил еси ему милость великую сию, еже дати сыну его седети на престоле его, якоже днешь: **7** и ныне, Господи Боже мой, Ты дал еси раба Твоего вместо Давида отца моего: и аз есмь отрочищь мал, и не вею исхода моего и входа моего: **8** раб же Твой посреде людий Твоих, ихже избрал еси людий многих, иже не изочтутся от множества: **9** и даси рабу Твоему сердце смыслено слышати и судити люди Твоя в правде, еже разумевати посреде добра и зла: яко кто может судити людем Твоим тяжким сим? **10** И угодно



бысть слово сие пред Господем, яко испроси Соломон глагол сей. 11 И рече Господь к нему: занеже просил еси от мене глагола сего, и не просил еси от мене дний многих, и не просил еси богатства, ниже просил еси душ враг твоих, но испросил еси себе разума, еже слышати суд: 12 се, сотворих по глаголу твоему, се, дах ти сердце смыслено и мудро: якоже ты, не бысть муж прежде тебе и по тебе не встанет подобен тебе: 13 и яже не просил еси, дах тебе, и богатство и славу, якоже ты, не бысть муж подобен тебе в царех во вся дни твоя: 14 и аще пойдеша путем Моим сохранити заповеди Моя и повеления Моя, якоже хождаша Давид отец твой, и умножу дни твоя. 15 И возбудися Соломон, и се, сновидение. И воста, и иде во Иерусалим, и ста пред лицом жертвенника, пред лицом кивота завета Господня в Сионе, и вознесе всесожжения и сотвори мирная, и сотвори пир велий себе и всем отроком своим. 16 Тогда явилисьеся две жене блуднице пред царем и стасте пред ним. 17 И рече жена едина: во мне, господи мой: аз и жена сия жихоме в дому едином и родихоме в дому: 18 и бысть по третьем дни рождения моего, и роди и жена сия: и бехом купно, и не бе никтоже с нами, кроме обоих нас в дому: 19 и умре сын жены сея в нощи, яко лежа на нем: 20 и воста в полунощи, и взя отроча мое от объятий моих, и успи е на лоне своем, а отроча свое умершее положи на лоне моем: 21 и востах заутра накормити отроча мое, и обретох и мертво: и се, рассмотрих его рано, и се, не бе сын мой, егоже родих: 22 и рече другая жена: ни, но се есть сын мой живой, се же есть сын твой умерый. И прястесе пред царем. 23 И рече има царь: ты глаголеши, яко сей сын мой живой, сын же

сея мертвый: и ты глаголеши: ни, но живый есть сын мой, твой же сын умерший. 24 И рече царь: принесите ми мечь. И принесоша мечь пред царя. 25 И рече царь: разсецйте отроча ссущее живое на двое, и дадите половину его сей, и другую половину оней. 26 И отвеща жена, еяже бе сын живый, и рече ко царю, понеже смятятся утроба ея о сыне ея, и рече: во мне, господи мой, дадите ей отроча живое, смертию же не умертвите его. И та рече: да не будет ни мне, ни тебе, но пресецйте е. 27 И отвеща царь и рече: дадите детище живо жене рекшей: дадите сей е, смертию же не умертвите его: сия мати его. 28 И слыша весь Израиль суд сей, имже суди царь, и убояшася от лица царева, разумеша бо, яко разум Божий в нем еже творити оправдания.

**4** И бе царь Соломон царствуяй над Израилем. 2 И сии старейшины иже беша с ним: 3 Азариа сын Садоков, жрец: Елиаф и Ахиа сынове Сивины, книгочии: и Иосафат сын Ахилудов, напоминатель: 4 и Ванеа сын Иодаев над силою: и Садок и Авиафар, иерее: 5 и Азариа сын Нафань над настоятелми: и Завуф сын Нафань друг царев: 6 и Ахисар бе строитель, и Елиав сын Сафатов над отечеством: и Адонирам сын Авдонов над даньми. 7 И у Соломона бяху дванадесять приставник над всем Израилем, еже подаяти царю и дому его: по месяцу в лете бываше един, еже подаяти, 8 и сия имена их: Вен сын Оров на горе Ефремли, един: 9 сын Дакарь во Махемате и во Висаламине и Вефсамисе и Елоне, даже до Вефанана, един: 10 сын Седов во Аравофе, сего Сохо и вся земля Оферова: 11 сына Аминадавля вся Неффадор: Тефаф дщи Соломоня бе ему в жену, един: 12 Вана сын Ахилуфов во Ифаанахе и Магеддо и весь Дом

Саныи, иже при Сесафане под Езраелем, и от Вифсана даже до Савелмаула, даже до Маевер Лукам, един: **13** сын Наверов в Равофе Галаадстем: сему область Ергав в Васане, шестьдесят градов великих огражденных стенами, и верей медяны, един: **14** Ахинадав сын Саддов во Маанаиме: **15** Ахимаас в Неффалиме: и сей поят Васемафу дочь Соломону в жену, един: **16** Ваана сын Хусиин во Асире и во Ваалофе, един: **17** Иосафат сын Фаруев во Иссахаре, **18** Семей сын Илы во Вениамине, **19** Гавер сын Адаев в земли Галааде, в земли Сиона царя Есевонска и Ога царя Васанска, и Насиф един в земли Иудове. **20** Иуда и Израиль мнози аки песок иже при мори во множестве, ядуще и пиюще и веселящися. **21** И Соломон бе началствуяй во всех царствах, от реки земли Филистимския и даже до предел Египетских, (и бяху) приносяще дары и работающе Соломону во вся дни живота его. **22** И сия потребная Соломону в день един: тридесять мер муки семидалныя и шестьдесят мер муки смешаныя, **23** десять телцев избранных и двадесять волов тучных и сто овец, кроме еленей и серн и птиц, избранныя от избранных тучна. **24** Понеже бе началствуяй во всех об он пол реки от Фапсы и даже до Газы, над всеми царми об он пол реки, и мир бе ему от всех стран окрест. **25** И живяху Иуда и Израиль безпечально, кийждо под виноградом своим и под смоковницею своею, ядуще и пиюще, от Дана и даже до Вирсавии, во вся дни Соломона. **26** И бяхе у Соломона чтыредесять тысящ кобылиц в колесницы и двадесять тысящ конник. **27** И тако подаяху приставники царю Соломону, и вся повеленная на трапезу цареву, кийждо в месяц свой, не пременяюще словесе: **28** и ячмень и

плены конем, и колесницами привожаю на место, идеже бе царь, кийждо по чину своему. 29 И даде Господь смысл и мудрость Соломону многу зело, и широту сердца, яко песок иже при мори: 30 и умножися мудрость Соломонова зело, паче смысла всех древних человек и паче всех смысленных Египетских: 31 и умудрися паче всех человек, и умудрися паче Гефана Езраилитна и Емана, и Халкада и Дарды, сына Самадова, и прославися имя его во всех странах окрест. 32 И изглагола Соломон три тысящы притчей, и быша песни его пять тысящ: 33 и глагола о древех, от кедра иже в Ливане и даже до иссопа исходящего из стены: и глагола о скотех и о птицах и о гадах и о рыбах. 34 И прихождаху вси людие слышати премудрость Соломону: и приимаше дары от всех царей земных, елицы слышаху премудрость его.

**5** И посла Хирам царь Тирский отроки своя к Соломону: услыша бо, яко помазаша его на царство вместо Давида отца его, яко любяше Хирам Давида во вся дни. 2 И посла Соломон к Хираму, глаголя: 3 ты веси отца моего Давида, яко не возможе создати дому имени Господа Бога моего, от лица противных, окруживших его, дондеже даде я Господь под стопы ног его: 4 и ныне упокои Господь Бог мой мене окрест, несть наветника, ниже сопротивника лукаваго: 5 и се, аз глаголю создати дом имени Господа Бога моего, якоже глагола Господь Бог к Давиду отцу моему, глаголя: сын твой, егоже дам вместо тебе на престол твой, той созиждет дом имени Моему: 6 и ныне заповеждь, да насекут ми древ от Ливана, и се, раби мои с рабы твоими, и мзду трудов твоих дам ти по всему елика речеши, понеже ты веси, яко несть нам ведущаго древа сещи, якоже Сидоняне. 7 И бысть егда

услыша Хирам словеса Соломоня, возрадовася зело и рече: благословен Бог днесь, Иже даде Давиду сына разумна над людьми сими многими. 8 И посла Хирам к Соломону, глаголя: слышах о всех, ихже ради послал еси ко мне: аз сотворю все хотение твое о древах кедровых и певговых: 9 слуги мои изнесут я от Ливана к морю, и аз положу я в складения на место, идеже возвестиши мне, и доведу я тамо: и ты возмешь, и сотвориши хотение мое, еже дати хлебы дому моему. 10 И бе Хирам дая Соломону кедры и певги и всю волю его. 11 И даде Соломон Хираму двадесять тысяч мер пшеницы, и пищу дому его, и двадесять тысяч мер елеа чистаго: по сему даваше Соломон Хираму на всяко лето. 12 И Господь даде Соломону премудрость, якоже глагола ему. И бе мир между Хирамом и между Соломоном, и положиша завет между собою. 13 И взя царь дань от всего Израиля, и бе дань тридесять тысяч мужей. 14 И посла я в Ливан, десять тысяч на месяц в премену: месяц быша в Ливане и два месяца в дому своем: и бяше Адонирам над данию. 15 И бяше Соломону семьдесят тысяч носящих бремена и осмьдесят тысяч секущих камене в горе, 16 кроме старейшин приставленных над делами Соломоними, три тысячи и шесть сот приставник делающих дела. 17 И заповеда царь, и взяша камене великое, камене честное на основание храма, и камене нетесаное. 18 И истесаша сынове Соломони и сынове Хирамли и каменосечцы Гевалстии: и изготовиша каменя и древа в три лета.

**6** И бысть в четыредешатное и в четверсотное лето исхода сынов Израилевых из Египта, в лето четвертое, в месяц

вторый, царствующу царю Соломону над Израилем, и созда храм Господеви. 2 И храм, егоже созда Соломон царь Господеви, (бъше) шестьдесят лакот долготы его, и двадцати лакот широты его, и тридцати лакот высоты его: 3 и притвор, иже пред лицом храма, двадцати лакот долготы его в широту дому, и десяти лакот широты его пред лицом дому: и созда храм, и соверши его. 4 И сотвори храму окна преклонены сокровены. 5 И созда на стене дому притворы около храма и давира. 6 И сотвори бока около, бок иже с низу, пяти лакот широты его, и средний шести лакот широты, и третий седми лакот широты его: понеже разстояние дому сотвори окрест внеуду храма, яко да не досязает стен храма. 7 И храму зиждему суцу, камением краесекомым нетесаным создася: млат же, и теслица, и всякое орудие железно не слышася в храме, егда созидатися ему. 8 И двери бока нижняго под стеною храма десною, и извиенный восход до середины, а от середины до трекровных. 9 И созда храм, и соверши его: и обстави храм дсками кедровыми. 10 И сотвори вязания окрест всего храма, пять лакот в высоту его, и связя вязание древом кедровым. 11 И бысть слово Господне к Соломону, глаголющее: 12 храм сей егоже ты созидаеши, аще пойдеш по заповедем Моим, и судьбы Моя сотвориши, и сохраниши вся повеления Моя, еже пребывати в них, утвержу слово Мое с тобою, еже глаголах Давиду отцу твоему, 13 и вселюся посреде сынов Израилевых, и не оставлю людей Моих Израиля. 14 И созда Соломон храм, и сконча его. 15 И созда стены храму внутрь древом кедровым, от земли храма и даже до стен и даже до верха: около обстави содержащая древами внутрьуду и укрепи внутрь

храма боками певговыми. 16 И созда двадесяти лакот от края стены бок един от земли даже до верха: и сотвори ему внутрь от давира стену до Святая святых. 17 И четыредесяти лакот бяше храм: сей (есть) храм внутреннейший. 18 И от кедра во храме внутрь постави плетение и дщицы и ваяния вся кедрова: камень не являшеся. 19 Пред лицом давира, посреде храма внутрь уготова поставити тамо кивот завета Господня. 20 И пред лицом давира двадесяти лакот долгота, и двадесяти лакот широта, и двадесяти лакот высота его, и обьят его златом чистым: и сотвори олтарь кедровый: и повлече Соломон храм внутрь златом чистым, и пригвозди гвоздми златыми пред лицом давира, и обьят и златом. 21 И весь храм обьят златом до скончания всего храма. 22 И все внутрь давира покры златом. 23 И сотвори в давире два херувима от древ кипарисных, десять лакот мерою величество: 24 и пяти лакот крило херувима одинаго, и пяти лакот крило его второе, десяти лакот от края крила его до края крила его: 25 и десяти лакот такожде (мера) херувиму второму, мера едина совершение едино обоим херувимом: 26 и высота херувима одинаго десять лакот, такожде и второму херувиму. 27 И постави оба херувима посреде храма внутренняго: и простираху крила своя, и досязаше крило едино до стены храма, и крило другаго херувима досязаше до стены вторья: и крила их яже бяху посреде храма, касашеся крило с крилом: 28 и обьяты быша херувимы златом. 29 И на всех стенах храма около ваяния написа подобием херувимов, и финики, и изваянна произницающая внутрьуду и внеуду. 30 И помост храма из внутрьуду и внеуду обьят златом. 31 И входу давира сотвори

двери от древ смерчиих, и праги пятеричны, 32 и двои двери от древ певговых, и изваяния на них изваяна, херувимы, и финики, и дщицы простертыя, и объят я златом, и бяше златом устроено до херувимов и до фиников. 33 И тако сотвори вратом храма: и праги от древ смерчиих, притворы четверогубо. 34 И на обоих дверях древа певгова: два затвора дверь едина и вереи их, и два затвора дверь вторая вращающаяся в себе, 35 (на нихже сотвори) изваянныя херувимы и финики, и дщицы простертыя, и объятыя златом свешеным на изображение. 36 И созда двор внутренних: в три ряда нетесаных, и ряд тесанаго кедра около. 37 В лето четвертое основа храм Господень в месяце зии, во второй месяц. 38 Во едионадесятое лето в месяце Вул, сей месяц осмый, совершися храм по всему словеси своему и по всему устроению своему: и созда его в семь лет.

**7** И дом свой созда Соломон треминадесять леты, и соверши Соломон весь дом свой. 2 И созда дом древом Ливанским, сто лакот долготы его, и тридесять лакот высота его, и пятьдесят лакот широта его, и три ряды столпов кедровых, и рамена кедрова столпом. 3 И покры дсками кедровыми дом свыше над странами столпов: и число столпов чetyредесять и пять, 4 по пятнадцати ряд: и окон три ряда, и камара над камарою трегубо. 5 И вся двери и камары четвероугольны притворени: от дверей над дверми трегубо. 6 И елам столпов, пятьдесят лакот в долготу, и тридесять лакот в широту привязани ко Еламу пред лицом их: и столпи и толстота пред лицом того елама. 7 И елам престолов идеже судити, елам судилища, и покры и от земли даже до верха дщицами кедровыми. 8 И дом в немже живяше,



двор един распростерт сим по делу сему: и дом созда дочери фараони, юже взя Соломон, по еламу сему. 9 Вся сия бяху от каменей драгоценных изваяна от разстояния внутрьуду, и от основания до крова. 10 И внеуду ко двору великому основаному камением драгим великим, камением десяти локот и осми локот, 11 и с верху честным камением, по тойже мере несеченых, и кедрами. 12 Окрест двора великаго три ряда нетесаных, и ряд тесанаго кедра: и созда двор храма внутреннейший притвора дому Суцаго пред лицом храма. 13 И посла царь Соломон в Тир, и взя Хирама от Тира, 14 сына жены вдовицы, и той бе от колена Неффалимля: и отец его бе муж Тирин, делатель меди, и исполнен художества и разума и ведения, еже делати всяко дело медяное. И приведоша его ко царю Соломону: и сотвори вся дела: 15 и слиа два столпа еламу храма, осминадесяти локот высота столпа, и окрест мера его четыренадесятих локот окружаше его толстота столпа: четырех перстов вглубления: такожде бе и второй столп: 16 и два возложения сотвори, лежати на главах столпов излиянная от меди: пяти локот высота возложения единого, и пяти локот высота возложения втораго: 17 и сотвори две мрежи еже покрыти возложения столпов: и мрежу возложению единому, и мрежу возложению второму: 18 и дело висимо, два ряда яблок медяных сомрежены, дело висимо, ряд над рядом: такожде сотвори возложению второму: 19 и возложения на главах столпов, подобна крину, якоже во еламе, четырех локот: 20 и строение над обоими столпами, и свыше стран возложение строения, и яблоков двести рядов около на второй главе. 21 И постави столпы во еламе храма: и постави столп един и нарече имя ему Иахун,

и постави столп второй и нарече имя ему Воос. 22 И на главах столпов дело криново, и сконча дело столпов. 23 И сотвори море лияно десять лакот от края до края его, кругло окрест его: пять лакот высота его, и объятие его тридесять лактей окружаше е окрест: 24 и подкрепления под краем его окрест, окружаху е десять лакот около: два ряда подкреплений слиты во слиянии его стояща. 25 И дванадесять волов под морем, три зрящии на север, и три зрящии на юг, и три на запад, и три на восток, и вся задняя их внутрьуду, и море верху их. 26 И устие его бяше яко устие потиря прозябающаго крина, и толстота его на длань. 27 И сотвори десять мехонофов медяных, пять лакот долгота мехонофа единаго, и четыре лакти широта его, и шесть лакот высота его: 28 и сие дело мехонофов, споеное о себе и споеное посреде произничающих: 29 и на споениях их посреде произничающих львы и волы и херувимы, и над произничающими, такожде и свыше и снизу львов и волов места, дело низхождения: 30 и четыре колеса медна и мехонофу коемуждо, и придержания медяна, и четыре части их, и рамена их под умывалницами, и рамена слияная об ону страну коегождо прилежаще. 31 И уста его внутрь главы, и выше единаго лактя, и уста его кругла: дело такожде лактя единаго и пол лактя: и на устах его изваяния, и междустолпия их четвероуголна, а не кругла. 32 И четыре колеса под междустолпиями, и руце в колесех в мехонофе: и высота единаго колеса лакоть и пол. 33 И дело колес, яко дело колес колесницы: руце их и выи их, и хребты их и делания их вся лияна. 34 Четыри рамена на четырех углех мехонофа единаго, и от мехонофа рамена его. 35 И на

главе мехонофа пол локтя величество его, кругло окрест над главою мехонофовою: и начало рук его и спаяния его от него: и отверзашеся в началех рук своих. 36 И спаяния его подобия херувимов и львов и фиников стоящая, держащееся коеждо противу лица его внутрь и окрест. 37 По томужде сотвори вся десять мехонофы, по чину единому и по мере единой, мера едина всем. 38 И сотвори десять конобов медяных вмещающих по чотыредесяти мер во един коноб, мерою чотырех лактей: коноб един на коеждо мехонофе, от десяти мехонофов. 39 И постави пять мехонофов по десней стране храма на восток, и пять по левой стране храма: и море от страны храма одесную на востоки в угле полуденнем. 40 И сотвори Хирам конобы и теплицы и фиалы: и сконча Хирам вся дела творя, яже творяше цареви Соломону во храме Господни: 41 столпа два, и обвития столпов над главами столпов два: и мрежи две, еже покрывати оба обвития изваяных, яже на столпех суть: 42 яблоков медяных чотыреста обема мрежема, два ряда яблоков мрежи единой, покрывати оба обвития мехонофа, яже на обоих столпех: 43 и мехонофов десять и конобов десять на мехонофе: 44 и море едино, и волов дванадесять под морем: 45 и конобы и теплицы и фиалы, и вся сосуды, яже сотвори Хирам царю Соломону во храме Господни: и столпов чотыредесять и осмь дому царева и дому Господня: вся дела царева, яже сотвори Хирам, быша медяна вся. 46 Близ Иордана слия их царь в толстоте земли, между Сокхофом и между Сирамом. 47 Не бе веса меди, от неяже творяше вся дела сия, от множества зело, не бе предела весу меди. 48 И даде царь Соломон вся сосуды, яже сотвори во храм Господень: олтарь

златый и трапезу, на нейже хлебы приношения, златую, 49 и свещники пять одесную и пять ошуюю пред лицом давира (Святая святых) златыя спаяны, и лампы, и светилники, и щипцы златыя, 50 и преддверие, и гвоздие, и фиалы и блюда и кадилницы златы спаяны: и верей врат дому внутренняго Святаго Святых, и двери храма златыя. 51 И совершился дело, еже сотвори Соломон во храме Господни: и внесе Соломон святая Давида отца своего и вся святая Соломонова, серебро и злато, и сосуды даде в сокровище храма Господня.

**8** И собра царь Соломон вся старейшины Израилевы, вся начала колен, старейшины отечеств сынов Израилевых к себе во Сион, еже пренести кивот завета Господня от града Давидова: той есть Сион. 2 И собращася ко царю Соломону вси людие Израилевы в месяц Афаним в праздник: сей есть месяц седмый. 3 И приидоша вси старейшины Израилевы, и взяша иерее кивот, 4 и вознесоша кивот Господень, и скинию свидения, и вся сосуды святыя яже во скинии свидения: и вознесоша я иерее и левити. 5 Царь же Соломон и весь собор Израилский, собравшеся к нему, с ним пред кивотом жряху воли и овцы несочтенны, безчисленны от множества. 6 И внесоша иерее кивот завета Господня на место его во давир храма, во Свята Святых, под крила херувимов. 7 Херувими бо беша распростерше криле над местом кивота: и окриваху херувими над кивотом и над святыми его сверху. 8 И обдержаста освященная: и зряхуся главы освященных от святых к лицу давира, и не являхуся вне. 9 Не бе в кивоте токмо две скрижали каменны, скрижали завета, ихже положи Моисей в Хориве, яже завета Господь со сынами

Израиелевыми, внигда исходити им от земли Египетския. 10 И бысть егда изыдоша иерее из святилища, и облак исполни храм Господень, 11 и не можаху иерее стати служити от лица облака, яко исполни слава Господня храм. 12 Тогда рече Соломон: Господь рече еже обитати во мгле, 13 аз же создах дом имени Твоему свят Тебе и готов, и престолу твоему, еже обитати Тебе в нем во веки. 14 И обрати царь лице свое и благослови царь всего Израиля: весь же собор Израилев стояше. 15 И рече (царь): благословен Господь Бог Израилев днесь, Иже глагола усты Своими о Давиде отце моем и рукама Своима исполни, глаголя: 16 от дне в оньже изведох люди Моя Израиля из Египта, не избрах града от всех племен Израилевых на создание храму, еже быти имени Моему тамо: но избрах во Иерусалиме быти имени Моему тамо: и избрах Давида быти ему властелину над людьми Моими Израилем: 17 и бысть на сердцы отцу моему Давиду, еже создати храм имени Господа Бога Израилева, 18 и рече Господь к Давиду отцу моему: понеже взыде на сердце твое еже создати храм имени Моему, добре сотворил еси, яко бысть на сердцы твоем: 19 обаче ты не созиждеша храма, но разве сын твой, иже изыде из чресл твоих, той созиждет храм имени Моему: 20 и возстави Господь глаголгол Свой егоже глагола: и востах вместо Давида отца моего, и седох на престоле Израилеве, якоже глагола Господь, и создах храм имени Господа Бога Израилева, 21 и поставих тамо место кивоту, в немже есть тамо завет Господень, егоже завеща Господь со отцы нашими во извождении их из земли Египетския. 22 И ста Соломон пред лицом олтаря Господня пред всем собором Израилевым и воздвиже руце свои на

небо, 23 и рече: Господи Боже Израилев, несть якоже Ты Бог на небеси горе и на земли низу, храняй завет и милость рабу Твоему ходящему пред Тобою всем сердцем своим, 24 яже сохранил еси рабу Твоему Давиду отцу моему: ибо глагола еси усты Твоими и руками Твоима совершил еси, якоже день сей: 25 и ныне, Господи Боже Израилев, сохрани рабу Твоему Давиду отцу моему, яже рекл еси ему, глаголя: не оскудеет муж от лица Моего седяй на престоле Израилеве, токмо аще сохранят чада твоя пути своя, еже ходити предо Мною, якоже ходил еси предо Мною: 26 и ныне, Господи Боже Израилев, да уверится глаголгол Твой, егоже рекл еси Давиду отцу моему: 27 яко аще истинно вселится Бог с человеки на земли? Аще небо и небо небесе не довлеют Ти, кольми паче храм сей, егоже создах имени Твоему? 28 И да призриши на молитву мою, Господи Боже Израилев, послушати молитвы, еюже молится раб Твой пред тобою к Тебе днесь, 29 да будут очи Твои отверсты на храм сей день и ночь, на место о немже рекл еси: будет имя Мое тамо на услышание молитвы, еюже молится раб Твой на месте сем день и ночь: 30 и услышиши молитву раба Твоего и людей Твоих Израиля, о нихже помолятся на месте сем: и ты услышиши на месте обиталища Твоего на небеси, и сотвориши и помилуеши: 31 елика аще согрешит кийждо ко искреннему своему, и аще примет на него клятву еже кляти его, и приидет, и исповесть пред лицом олтаря Твоего в храме сем: 32 и Ты услышиши от небесе, и сотвориши суд людем Твоим Израилю: осудити беззаконного, дати путь его на главу его, и оправдити праведнаго, дати ему по правде его: 33 егда падут людие Твои Израиль пред враги,

яко согрешат Ти, и обратятся к Тебе, и исповедятся имени Твоему, и помолятся и возглаголют молитву к Тебе в храме сем: **34** и Ты услышиши с небесе, и милостив будеши о согрешениих людей Своих Израиля, и возвратиши я в землю, юже дал еси отцем их: **35** внегда заключитися небеси и не быти дождю, яко согрешат Ти, и помолятся на месте сем, и исповедятся имени Твоему, и от грех своих обратятся, егда смириши их: **36** и услышиши с небесе, и милостив будеши о гресех раба Твоего и людей Твоих Израиля: яко явиши им путь благий ходити по нему, и даси дождь на землю, юже дал еси людям Твоим в достояние: **37** глад аще будет, смерть аще будет, егда будет возжжение, гусеницы, ржа аще будет, и аще оскорбят я врази их в едином от градов их: все противное, всяка болезнь, **38** всяка молитва, всяко моление аще будет всякому человеку от людей Израилевых, егда познает кийждо болезнь сердца своего, и воздвигнет руке свои в храме сем: **39** и Ты услышиши от небесе, от готоваго жилища Твоего, и милостив будеши, и сотвориши, и даси коемуждо по путем его, якоже увеси сердце его, яко Ты един токмо веси всех сердца сынов человеческих: **40** да боятся Тебе вся дни, в няже поживут на земли, юже дал еси отцем нашим: **41** и чуждему, иже несть от людей Твоих Израиля, той аще приидет от земли издалеча ради имени Твоего, зане услышат имя Твое велико, и руку Твою крепкую, и мышцу Твою высокую, **42** и приидет, и помолится на месте сем: **43** и ты услышиши с небесе от готоваго жилища Твоего, и сотвориши по всем, в еликих аще призовет Тя чуждий, яко да уразумеют вси людие земнии имя Твое и убоятся Тебе, якоже людие Твои Израиль, и разумеют, яко имя Твое

наречеса на храме сем, егоже создах: 44 егда изыдут людие Твои на брань на враги своя, путем имже возвратиши я, и помолятся именем Господним путем града, егоже избрал еси Себе, и ко храму, егоже аз создах имени Твоему: 45 и ты услышиши с небесе молитву их и моления их, и сотвориши оправдание им: 46 яко согрешат Ти, яко несть человек, иже не согрешит, и разгневаешися на ня, и предаси я пред враги, и попленают их пленящи в землю далече, или близ, 47 и обратят сердца своя в земли, аможе преселишася, и обратятся, и помолятся Тебе в земли преселения своего, глаголюще: согрешихом, беззаконновахом, неправдовахом: 48 и обратятся ко Тебе всем сердцем своим и всею душею своею в земли враг своих, аможе превел еси их, и помолятся к Тебе по пути земли своя, юже дал еси отцем их, и ко граду, егоже избрал еси, и ко храму, егоже создах имени Твоему: 49 и услышиши от небесе, от готоваго жилища Твоего молитву их и моление их, и сотвориши оправдание им, 50 и милостив будеши неправдам их, имиже согрешаши Ти, и по всем отметанием их, имиже отвергошася Тебе, да даси их в щедроты пред пленившими их, и ущедрят я: 51 яко людие Твои и наследие Твое суть, ихже извел еси из земли Египетския от среды пещи железныя: 52 и да будут уши Твои и очи Твои отверсты на молитву раба Твоего и к молению людей Твоих Израиля, послушати их о всех, о нихже призовут Тя, 53 яко Ты избрал еси я Себе в наследие от всех людей земли, якоже глагола еси рукою раба Твоего Моисеа, внегда извести Тебе отцы наша из земли Египетския, Господи Господи. Тогда глагола Соломон о храме, егда соверши созидати его: солнце познано сотвори



на небеси: Господь рече пребывати во мгле: созижди храм Мой, храм благолепный себе, еже пребывати в новости: не сие ли писано в книгах песни? 54 И бысть егда сконча Соломон моляся ко Господу всею молитвою и молением сим, и воста от лица олтаря Господня припад на колена своя, и руже свои возде на небо, 55 и ста, и благослови весь собор Израилев, гласом велиим глаголя: 56 благословен Господь (Бог) днесь, Иже даде покой людем Своим Израилю, по всем елика глагола: не пременися слово ни едино во всех словесех Его благих, имиже глагола рукою Моисеа раба Своего: 57 да будет Господь Бог наш с нами, якоже бе со отцы нашими: да не оставит нас, ниже да отвратит нас, 58 преклонити сердца наша к Нему, еже ходити во всех путех Его и хранити вся заповеди Его и повеления Его и оправдания Его, яже заповеда отцем нашим: 59 и да будут словеса сия, имиже молихся пред Господем Богом нашим днесь, приближающесе Господу Богу нашему день и ночь, еже творити оправдания рабу Твоему и оправдания людем Твоим Израилю во вся дни: 60 яко да разумеют вси людие земли, яко Господь Бог Той Сам Бог, и несть инаго, 61 и да будут сердца наша совершенна ко Господу Богу нашему преподобно ходити в повелениих Его и хранити заповеди Его, якоже день сей. 62 И царь и вси сынове Израилевы пожроша жертву пред Господем. 63 И пожре царь Соломон жертвы мирныя, яже пожре Господу, волов двадесять две тысяцы и овец сто и двадесять тысящ. И обнови царь храм Господень и вси сынове Израилевы. 64 В той день освяти царь (Соломон) средину двора, яже пред лицем храма Господня: яко сотвори тамо всесожжение и дары, и

жертвы и тучная мирных, яко олтарь медяный, иже пред Господем, мал бе, еже не возмощи вместити всесожжения даров и жертвы мирных. **65** И сотвори Соломон праздник в той день, и весь Израиль с ним, собор велий, от входа Емафа даже до реки Египта, пред Господем Богом нашим, у храма, егоже созда, ядый и пия и веселяся пред Господем Богом нашим семь дний, **66** и во осмый день распусти люди. И благословиша царя, и идоша кийждо в дома своя, радующеся веселым сердцем о благих, яже сотвори Господь Давиду рабу Своему и Израилю людем Своим.

**9** И бысть егда сконча Соломон зиждяй храм Господень и дом царев и всякое дело свое Соломон, елика восхоте сотворити, **2** и явися Господь Соломону вторицею, якоже явися ему в Гаваоне, **3** и рече к нему Господь: услышах глас молитвы твоея и моления твоего, имже молился еси предо Мною: сотворих ти по всей молитве твоей, и освятих храм сей, егоже создал еси, еже положити имя Мое тамо во веки, и будут очи Мои ту и сердце Мое во вся дни: **4** и ты аще пойдеш предо Мною, якоже ходи Давид отец твой в преподобии сердца и в правоте, и еже творити по всем, яже заповедах ему, и повеления Моя и заповеди Моя сохраниши: **5** и возставлю престол царствия твоего во Израили во веки, якоже глаголах к Давиду отцу твоему, глаголя: не оскудеет ти муж властелин во Израили: **6** аще же отвращающесе отвратитесе вы и чада ваша от Мене и не сохраните заповедий Моих и повелений Моих, яже даде Моисей пред вами, и пойдете и поработаете богом иным и поклонитесе им: **7** и изрину Израиля из земли, юже дах им, и храм сей, егоже освятих имени Моему, отвергу от лица

Моего: и будет Израиль в погубление и во глаголение всем  
людem: 8 и дом сей будет высокий, всяк переходяй сквозе его  
ужаснется, и возсвищет и речет: чесо ради сотвори Господь  
тако земли сей и храму сему? 9 И рекут: понеже оставиша  
Господа Бога своего, иже изведе отцы их из Египта, из  
дому работы, и прияша боги чуждыя, и поклонишася им, и  
поработаша им, сего ради наведе на ня Господь зло сие.  
10 И бысть по двадесяти летех, в няже созда Соломон два  
домы, храм Господень и дом царев, 11 Хирам царь Тирский  
помогаше Соломону древы кедрскими и древы певговыми и  
златом и всем хотением его: тогда даде Соломон Хираму  
двадесять градов в земли Галилейстей. 12 И изыде Хирам  
из Тира и поиде в Галилею видети грады, яже даде ему  
Соломон: и не быша ему угодни, 13 и рече: что гради  
сии, яже дал ми еси, брате? И нарече я предел (Хавуль),  
до днешняго дне. 14 И принесе Хирам Соломону сто и  
двадесять талант злата. 15 Сие же есть число даяния еже  
принесе царь Соломон, да созиждет храм Господень и дом  
царев, и Мелон и стену Иерусалимску и Краеградие еже  
оградити стену града Давидова, и Асур и Магедо и Газер.  
16 Фараон царь Египетский взыде и взя Газер и сожже и  
огнем, и Ханаана живущаго во граде том погуби: и даде  
его в дар дщери своей, жене Соломони. 17 И согради  
Соломон Газер и Вефорон нижний, 18 и Валааф и Фамор  
в пустыни. 19 И вся грады крепкия, иже быша Соломону,  
и вся грады, идеже бяху колесницы, и вся грады, идеже  
бяху конницы его, и все еже бысть угодно царю Соломону,  
сзда во Иерусалиме, и в Ливане и во всей земли царства  
своего. 20 Всех людий оставшихся от Аморреа и Хеттеа, и

Ферезеа и Хананеа, и Евеа и Иевусеа и Гергесеа, не сущих от сынов Израилевых, 21 сынов их оставшихся по ним на земли, ихже не возмогоша сынове Израилевы потребити их, царь Соломон поработи их даяти дань даже до дне сего: 22 от сынов же Израилевых не даде в работу Соломон, яко тии бяху мужие храбрии, и отроцы его, и князи его, и тристаты его, и воеводы колесниц его, и конницы его. 23 И бяху старейшины приставленным над делы царя Соломона, пять сот пятьдесят повелевающи людем делающим дело. 24 Дщерь же фараона преиде из града Давидова в дом свой, егоже созда ей Соломон, тогда созда Мелон. 25 И приношаше Соломон трижды в год всесожжения и мирныя жертвы на олтарь, егоже созижде Господу, и кадыше фиммиам пред Господем: и соверши храм. 26 И сотвори царь Соломон корабль в Гасионе Гаверстем, иже при Елафе, при устии моря Последняго, в земли Едомстей. 27 И посла Хирам на корабли от отрок своих мужы корабелники управляти ведущих море со отроки Соломони: 28 и приидоша в Софир, и взяша оттуду злата четыре ста и двадесять талант и принесоша царю Соломону.

**10** И царица Савска услыша имя Соломоне и имя Господне, и прииде искусити его притчами: 2 и прииде во Иерусалим с силою тяжкою зело: и на вельблюдех привезоша ароматы и злата много зело, и камение драгое: и вниде к Соломону и глагола ему вся, елика име на сердцы своем. 3 И возвести ей Соломон вся глаголы ея: и не бе слово презрено от царя, егоже не возвести ей. 4 И виде царица Савска весь смысл Соломонь и дом егоже созда, 5 и снеди Соломони, и жилища отроков его, и предстояние служащих ему, и облачение его,

и виночерпцы его, и всеожжения его, яже приношаше во храме Господни, и вне себе бысть, 6 и рече к Соломону царю: истинна суть словеса, яже слышах в земли моей, 7 о словесех твоих и о смысле твоём: и не ях веры глаголющим ми, дондеже приидох семо, и видеста очи мои: и се, несть ни пол того, якоже ми поведаша: приложил еси премудрость и благая к сим паче всякаго слуха, егоже слышах в земли моей: 8 блаженны жены твоя, блажени отроцы твои сии, иже предстоят пред тобою всегда, слышаще всякий смысл твой: 9 буди Господь Бог твой благословен, иже восхоте тя дати на престол Израилев, понеже возлюби Господь Израиля утвердити во веки и постави тя царя над ними творити суд в правде и в судбах их. 10 И даде Соломону сто и двадесять талант злата, и ароматы многи зело, и камень драгое: не приидоша еще таковыя ароматы во множестве, яже даде царица Савска царю Соломону. 11 И корабль Хирамль приносящ злато из Софира, (и) принесе древа нетесана многа зело, и камень драгое. 12 И сотвори царь древом нетесаным подпоры храму Господню и дому цареву, и сопели и гусли певцем: не приидоша по сем таковая древеса нетесаная на земли, ниже видена быша где даже до дне сего. 13 И царь Соломон даде царице Савстей вся, елика восхоте и елики проси у него, кроме всех, яже даде ей рукама своиима Соломон царь, и возвратися, и отиде в землю свою, сама и вси отроцы ея. 14 И бе вес принесеннаго злата Соломону во едино лето шесть сот и шестьдесят и шесть талант злата, 15 кроме даней от подданных и от купцов и от всех царей странных и от воевод земных. 16 И сотвори царь Соломон триста копий златых кованых, по триста златых во

едино копие вдела: 17 и триста щитов кованных золотых, по три литры золота бяхе на коемждо щите: и даде я царь во храм дубравы Ливанския. 18 И сотвори царь престол от костей слоновых велий и позлати его золотом искушеным: 19 шесть степеней престолу, и образы телцов престолу созади, и верх престола кругл бе созади его, и руце сюду и сюду на престоле седалища, и два льва стояща при руках, 20 и дванадесять лвы стояще ту на шести степенех сюду и сюду: не бяхе тако во всяком царстве. 21 И вси сосуди, иже бяху при царе Соломоне, злати беша, и умывалницы златы и вси сосуди в храме дубравы Ливанския золотокованны: не бяхе сребра, понеже за ничто бе сребро во дни Соломони: 22 корабль бо Фарсийский царю Соломону на мори с корабли Хирамлими, единою во триех летех приходяше цареви корабль из Фарсиса и приношаше золото и сребро, и зубы слоновы, и пифики и павы, и камене точеное и тесаное. 23 И возвеличися Соломон паче всех царей земных и богатством и смыслом. 24 И вси царие земстии искаху видети лице Соломона, еже бы услышати смысла его, егоже даде ему Господь в сердцы его: 25 и тии приношаху кийждо дары своя, и сосуды златы и серебряны, и ризы, стакти и сладкости, и кони и мски на всякое лето. 26 И собра Соломон колесницы и кони, и бяху Соломону четыредесять тысящ кобылиц в колесницы, и дванадесять тысящ конных: и постави я во градех колесниц, а (друзии бяху) у царя во Иерусалиме: и бе властелин всем царем от реки и до земли иноплеменник и до предел Египта. 27 И сложи царь золото и сребро во Иерусалиме якоже камене, и кедры сложи якоже черничие, еже на поли во множестве. 28 И привождяху Соломону кони

от Египта и от Фекуя купцы царстии и куповаху от Фекуя променою. 29 И приходяху колесницы из Египта за шесть сот сребреник, и конь за сто пятьдесят сребреник: такожде и ко всем царем Хеттимским и Сирийским по морю исхождаху.

**11** И царь Соломон бе женолюбив, и поя жены чуждия, и дщерь фараону, Моавитяныни, Амманитяныни, и Аморреаныни, 2 от язык, ихже отрече Господь сыном Израилевым: не входите в ня, и тии да не входят в вас, да не отвратят душ ваших вслед идол своих: к тем прилепися Соломон любити, 3 и быша ему жен начальных седмь сот, и подложниц триста. 4 И бысть в время старости Соломони, и совратиша жены чуждия сердце его вслед богов иных, и не бе сердце его совершенно с Господем Богом его, якоже сердце Давида отца его, 5 и хождаше Соломон вслед Астарта мерзости Сидонския и вслед царя их, идола сынов Аммоних. 6 И сотвори Соломон лукавое пред Господем: и не хождаше вслед Господа, якоже Давид отец его. 7 Тогда созда Соломон высоко (капище) Хамосу, идолу Моавлю, и царю их, идолу сынов Аммоних, и Астарте, мерзости Сидонстей, на горе яже пред Иерусалимом: 8 и тако сотвори всем женам своим чуждим, яже кадыху и жряху идолом своим. 9 И разгневался Господь на Соломона, яко уклони сердце свое от Господа Бога Израилева, и явльшагося ему дважды 10 и заповедавшего ему дважды о словеси сем, весма не ходити ему вслед богов инех, но хранити и творити яже заповеда ему Господь Бог, 11 и рече Господь к Соломону: понеже быша сия с тобою, и не сохранил еси заповедий Моих и повелений Моих, яже заповедах тебе, раздирая раздери царство твое из руку твоею и дам е рабу твоему: 12 обаче во

дни твоя не сотворю сих Давида ради отца твоего: от руки же сына твоего отиму е: 13 токмо всего царства не возму, скипетр един дам сыну твоему Давида ради раба Моего и Иерусалима ради града, егоже избрах. 14 И воздвиже Господь противника на Соломона Адера Идумеанина от семени царска во Идумеи. 15 И бысть егда искорени Давид Едома, егда иде Иоав воевода вой погребати побиенныя, изсече всяк мужеск пол во Идумеи: 16 яко шесть месяц седяше тамо Иоав и весь Израиль во Идумеи, дондеже изби всяк мужеск пол в Идумеи: 17 и избеже Адер сам и вси мужие Идумейстии от отроков отца его с ним, и внидоша во Египет: Адер же бяше отрочищ мал. 18 И восташа мужие из града Мадиамска, и приидоша в Фаран, и взяша мужей с собою и приидоша к фараону царю Египетскому. И вниде Адер к фараону, и даде ему (царь) дом, и пищу определи ему, и землю даде ему. 19 И обрете Адер благодать пред очима фараонима зело, и даде ему в жену сестру жены своя, сестру Фекемины болшую. 20 И роди ему сестра Фекемины Адеру Ганивафа сына своего, и воскорми его Фекемина посреде сынов фараоних, и бе Ганиваф посреде сынов фараоних. 21 И Адер услыша бо Египте, яко успе Давид со отцы своими, и яко умре Иоав воевода воинству, и рече Адер к фараону: отпусти мя, да возвращуся в землю мою. 22 И рече фараон Адеру: чим ты не доволен еси у мене? И се, ты просишися отити в землю свою? И рече ему Адер: яко отпуцая да отпустиши мя. И возвратися Адер в землю свою. 23 И воздвиже Господь противника Соломону Разона, сына Елиадаева, иже убеже от Ададезера царя Сувска, господина своего. 24 И собращася к нему



мужие, и бе воевода полка мятежнаго, егда убиваше я Давид: и идоша в Дамаск, и седоша в нем, и воцаришася в Дамасце. 25 И бе стужая Израилеви во вся дни Соломони: сия злоба Адера: и отягчи Израиля и воцарися в земли Едомстей. 26 И Иеровоам сын Наватов, Ефрафянин от Сариры, сын жены вдовицы, раб Соломонов, и воздвиже руце на царя Соломона. 27 И сия вина, яко воздвиже руце на царя Соломона: царь Соломон созидаше Краеградие и ограждаше стеною град Давида отца своего: 28 Иеровоам же человек крепок силою. И виде Соломон отрока, яко муж дел есть, и постави его над бременими дому Иосифова. 29 И бысть во время оно, и Иеровоам изыде из Иерусалима, и обрете его Ахиа Силонитянин пророк на пути, и соврати его с пути: и бе Ахиа облечен в ризу нову: и (беста) оба едины на поли. 30 И взя Ахиа за ризу свою новую, яже бе на нем, и раздра ю на дванадесять жребий, 31 и рече Иеровоаму: приими себе десять жребий, яко тако глаголет Господь Бог Израилев: се, аз отторгаю царство из руки Соломони, и дам ти хоругвий десять: 32 и две хоругви будут ему, раба ради Моего Давида и Иерусалима ради града, егоже избрах Себе от всех колен Израилевых, 33 занеже остави Мя и поклонися Астарте мерзости Сидонстей и Хамосу и кумиром Моавлим и царю их претыканию сынов Аммоних, и не поиде по путем Моим, еже творити угодная предо Мною, якоже Давид отец его: 34 и не отиму царства всего от руку его, понеже защищая защищу его во вся дни живота его, Давида ради раба Моего, егоже избрах, иже сохрани заповеди Моя и оправдания: 35 и отиму царство от руки сына его, и дам ти десять хоругвий, 36 сыну же его дам две хоругви, яко да

будет престол рабу Моему Давиду во вся дни предо Мною во Иерусалиме граде, егоже избрах Себе на положение имени Моему тамо: **37** и приму тя, и воцаришися, в нихже желает душа твоя, и ты будеши царь над Израилем: **38** и будет аще сохраниши вся, елика заповедаю ти, и пойдеши по путем Моим, и сотвориши угодная предо Мною, хранити заповеди Моя и повеления Моя, якоже сотвори Давид раб Мой, и буду с тобою, и созижду ти дом верен, якоже создах Давиду, и дам ти Израиля: **39** и озлоблю род Давидов за сия, но не во вся дни. **40** И искаше Соломон убити Иеровоама. И воста Иеровоам, и убежа во Египет к Сусакиму царю Египетску, и бе во Египте, дондеже Соломон умре. **41** И прочая словес Соломоних, и вся елика сотвори, и весь смысл его, не се ли, сия писана быша в книзе словес Соломоних? **42** И дние, в няже царствова Соломон во Иерусалиме над всем Израилем, четьредесять лет. **43** И успе Соломон со отцы своими: и погребоша его во граде Давида отца его, и воцарися Ровоам сын его вместо его.

**12** И иде царь Ровоам в Сикиму, яко в Сикиму прииде весь Израиль воцарити его. **2** И бысть егда услыша Иеровоам сын Наватов, сущу ему еще во Египте, яко убегл бе от лица Соломона, и возвратися Иеровоам из Египта: **3** и послаша, и призваша его. И прииде Иеровоам и весь сонм Израилев, и рекоша людие к царю Ровоаму глаголюще: **4** отец твой отягчи ярем наш, ты же ныне облегчи от работы отца твоего жестокия и от ярма его тяжкаго, егоже возложи на ны, и поработаем ти. **5** И рече к ним: отидите (и пребудите) до третияго дне, и возвратитесь ко мне. И идоша. **6** И возвести Ровоам царь старейшинам, иже быша предстояще пред

Соломоном отцем его, еще живу ему суцу, глаголя: како вы мыслите, да отвещаю людем сим слово? 7 И реша ему, глаголюще: аще в днешний день будеши раб людем сим и поработаеши им, и речеши им словеса блага, и будут ти раби во вся дни. 8 И пренебреже совет старейшин, яже совещаша ему, и советова со отроки воспитанными с ним предстоявшими пред лицом его, 9 и рече им: что вы совещаете? И что отвещаю людем сим, иже реша ко мне, глаголюще: облегчи наш ярем, егоже возложи отец твой на ны? 10 И глаголаша к нему отроцы воспитанныи с ним и реша ему: сице да глаголеши людем сим, иже реша к тебе, глаголюще: отец твой отягчи ярем наш: ты же ныне облегчи от нас: сия речеши к ним: юность моя толстее чресл отца моего: 11 и ныне отец мой наложи на вы ярем тяжек, аз же приложу к ярму вашему: отец мой наказа вы ранами, аз же накажу вы скорпионами. 12 И прииде весь Израиль к царю Ровоаму в день третий, якоже рече им царь, глаголя: возвратитесь ко мне в день третий. 13 И отвеща царь к людем жестоко: и остави царь Ровоам совет старейшин, яже совещаша ему, 14 и рече к ним по совету отроков, глаголя: отец мой отягчи ярем ваш, аз же приложу к ярму вашему: отец мой наказа вы ранами, аз же накажу вы скорпионами. 15 И не послуша царь людий, яко бе превращение от Господа, яко да утвердит глаголгол Свой, егоже глагола рукою Ахии Силонитянина о Иеровоаме сыне Наватове. 16 И виде весь Израиль, яко не послуша царь гласа их, и отвещаша людие царю, глаголюще: кая нам часть в Давиде? И несть нам наследия в сыне Иессеове: бежи, Израилю, в кровы своя: ныне паси дом твой, Давиде. И отиде Израиль в кровы

своя. 17 Над сынами же Израилевыми, иже живяху во градех Иудиных, воцарися Ровоам над ними. 18 И посла царь Ровоам Адонирама, иже над данию, и поби его камением весь Израиль, и умре. Царь же Ровоам потщася взыти на колесницу убежати во Иерусалим. 19 И отложися Израиль от дому Давидова даже до днесь. 20 И бысть егда услыша весь Израиль, яко возвратися Иеровоам от Египта, и послаша, и призваша его на собор, и воцариша его над Израилем: и не бе вслед дому Давидова, токмо хоругвь Иудина и Вениаминова. 21 И Ровоам вниде во Иерусалим и собра весь сонм Иудин и хоругвь Вениамину, сто и двадесять тысяч юношей, творящих брань, ратовати на дом Израилев, еже возвратити царство Ровоаму сыну Соломоню. 22 И бысть слово Господне ко Самею человеку Божию, глаголя: 23 рцы к Ровоаму сыну Соломоню царю Иудину и ко всему дому Иудину и Вениаминову и ко оставшымся людем, глаголя: 24 тако глаголет Господь: не восходите, ниже ратуйте на братию вашу, на сыны Израилевы: но возвратитесь кийждо в дома своя, яко от Мене бысть глаголгол сей. И послушаша словесе Господня, и престаша ити по глаголголу Господню. 25 И созда Иеровоам Сикиму в горе Ефремли, и вселися в ней, и изыде оттуду, и созда Фануила. 26 И рече Иеровоам в сердцы своем: се, ныне возвратится царство в дом Давидов, 27 аще въздут людие сии вознести жертву в храме Господни во Иерусалим, и обратится сердце людей ко Господу и господину своему, к Ровоаму царю Иудину, и убьют мя, и возвратятся к Ровоаму царю Иудину. 28 И усуетова царь, и сотвори две юницы златы, и рече к людем: довлеет вам восходити во Иерусалим: се, бози твои, Израилю, изведшии

тя из земли Египетския. 29 И постави едину в Вефили, а другую в Дане. 30 И бысть слово сие на согрешение, и идяху людие пред лицом юницы единыя даже до Дана, и оставиша храм Господень. 31 И сотвори капища на высоких, и сотвори жерцов часть от людей, иже не беша от сынов Левиных. 32 И сотвори Иеровоам праздник в осмый месяц в пятыйнадесять день месяца, по празднику, иже в земле бе Иудине, и взыде на олтарь, егоже сотвори в Вефили, жрети юницам, яже сотвори, и постави в Вефили жерцы на высоких, яже сотвори. 33 И взыде на олтарь, егоже сотвори в Вефили, в осмый месяц, в пятыйнадесять день в праздник, егоже состави по сердцу своему: и сотвори праздник сыном Израилевым, и взыде на олтарь еже пожрети.

**13** И се, человек Божий прииде от Иуды по словеси Господню в Вефиль, и Иеровоам стояше на олтари своем жрети хотя: 2 и воззва ко олтарю словом Господним и рече: олтарю, олтарю, сице глаголет Господь: се, сын раждается дому Давидову, Иосиа имя ему, и пожрет на тебе жерцы, иже на высоких жрущыя на тебе, и кости человеческия сожжет на тебе. 3 И даст в день той чудо, глаголя: сей глаголгол, егоже рече Господь, глаголя: се, олтарь разсядется, и излиется тук иже на нем. 4 И бысть егда услыша царь Иеровоам словеса человека Божия воззавшаго ко олтарю иже в Вефили, и простре царь руку свою от олтаря, глаголя: имите его. И се, усше рука его, юже простре нань, и не можаше возвратити ю к себе: 5 и олтарь разседся, и излися тук от олтаря, по чудеси, еже даде человек Божий словом Господним. 6 И рече царь Иеровоам человеку Божию: помолися ныне пред лицом Господа Бога твоего, дабы возвратилася рука моя ко

мне. И помолися человек Божий пред лицом Господним, и возвратися рука царя к нему, и бысть якоже прежде. 7 И глагола царь к человеку Божию: вниди со мною в дом, и обедай, и дам ти дар. 8 И рече человек Божий к цареви: аще даси ми пол дому твоего, не вниду с тобою, ниже ям хлеба, ниже пию воды на месте сем, 9 яко тако заповеда ми Господь словом, глаголя: ни яждь хлеба, ни пий воды, ниже возвратися путем, имже шел еси. 10 И отиде путем иным, и не возвратися путем, имже прииде во Вефиль. 11 И пророк един стар живяше в Вефили, и приидоша сынове его и поведаша ему вся дела, яже сотвори человек Божий в день той в Вефили, и словеса, яже глагола цареви, поведаша отцу своему. 12 И рече к ним отец их, глаголя: киим путем иде? И показаша ему сынове его путь, имже иде человек Божий изшедый от Иуды. 13 И рече сыном своим: оседлайте ми осля. И оседлаша ему осля, и вседе на не, 14 и иде вслед человека Божия, и обрете его под дубом сидяща, и рече ему: ты ли еси человек Божий пришедый от Иуды? И рече ему: аз. 15 И рече ему: гряди со мною, и яждь хлеб. 16 И рече ему: не могу возвратитися с тобою, ниже ям хлеба, ни пию воды на месте сем, 17 яко тако заповеда ми Господь словом, глаголя: не яждь хлеба тамо, ниже пий воды тамо, и да не возвратишися путем тем, имже шел еси. 18 И рече к нему: и аз пророк есмь якоже ты, и Ангел глагола ко мне словом Господним, глаголя: возврати его к себе в дом твой, да снес хлеба и пиет воду. И солга ему, 19 и возврати его: и яде хлеб, и пи воду в дому его. 20 И бысть им сидящим на трапезе, и бысть слово Господне ко пророку возвращшему его. 21 И рече к человеку Божию пришедшему от Иуды, глаголя:

сице глаголет Господь: понеже преогорчил еси глаголгол Господень и не сохранил еси заповеди, юже заоведа тебе Господь Бог твой, 22 и возвратився ял еси хлеб и пил еси воду на месте сем, о немже рече к тебе, глаголя: да не яси хлеба и не пиеш воды: сего ради не внидет во гроб тело твое со отцы твоими. 23 И бысть по ядении хлеба и по питии воды, и оседла ося тому пророку, и возвратися, и отиде: 24 и обрете его лев на пути, и умертви его: и бе тело его повержено на пути, и осел стояше над ним, и лев стояше близ телесе (его): 25 и се, мужие мимоидуше, и видеша мертва повержена на пути и льва стояща близ мертваго: и приидоша, и поведаша во граде, в немже живяше пророк старый. 26 И услыша (сие пророк) возвративый его с пути и рече: человек Божии сей есть, иже преступи глаголгол Божий, и предаде его Господь льву, и сокруши его, и умертви его по глаголголу Господню, егоже рече ему. 27 И повеле сыном своим, глаголя: оседлайте ми ося. И оседлаша. 28 И поиде, и обрете тело его повержено на пути, и осел и лев стояста над телом, и не снеде лев телесе человека Божия и не сокруши осла. 29 И взя пророк тело человека Божия, и возложи е на ося, и возврати е пророк, и вниде во град погребсти его, 30 и положи тело его во гробе своем, и рыдаше по нем: увы, брате. 31 И бысть по рыдании о нем, и рече к сыном своим, глаголя: аще умру, погребите мя во гробе сем, идеже человек Божий погребен есть, при костех его положите мя, да спасутся кости моя с костями его, 32 яко сбудется глагол, егоже глагола словом Господним о олтари, иже во Вефили, и о домех высоких, иже в Самарии. 33 И по глаголе сем не обратися Иеровоам от злобы своя,

и возвратися, и сотвори от части единых людей жерцы  
высоких: иже хотяше, исполняше руку свою, и бываше жрец  
на высоких. 34 И бысть глагол сей в прегрешение дому  
Иеровоамлю, и на испровержение, и на исчезновение от  
лица земли.

**14** Во время оно разболеся Авиа сын Иеровоамль. 2 И  
рече Иеровоам к жене своей: востани и измени ризы своя,  
да не познают, яко ты жена Иеровоамова, и иди в Силом:  
се бо, тамо Ахиа пророк: той глагола мне еже царствовати  
над людьми сими: 3 и возми в руке твои человеку Божию  
десять хлебов, и опресноки чадом его, и гроздие и сосуд  
меда, и иди к нему: той возвестит ти, что будет отрочати. 4 И  
сотвори тако жена Иеровоамля: и воста и иде в Силом, и  
вниде в дом Ахиин: человек же стар бяше еже видети, и  
притупистася очи его от старости его. 5 И рече Господь ко  
Ахии: се, жена Иеровоамова входит вопрошати тя о сыне  
своем, яко болезнует: по сему и по сему да глаголеши к  
ней. И бысть внегда внити ей, и она страннаявляшеся. 6  
И бысть егда услыша Ахиа шум ног ея, входящей ей во  
врата, и рече: вниди, жено Иеровоамова, почто ты тако  
страннаявляешися? Аз бо есмь посланник к тебе жесток: 7  
шедши рцы Иеровоаму: сия глаголет Господь Бог Израилев:  
понеже толико вознесох тя от среды людей, и дах тя вожда  
над людьми Моими Израилем, 8 и раздрах царство от дому  
Давидова, и дах е тебе, ты же не был еси якоже раб Мой  
Давид, иже сохрани заповеди Моя, и иже хождаше вслед  
Мене всем сердцем своим, еже творити всякую правоту  
пред очима Моима, 9 и излукавствовал еси, еже творити  
паче всех елицы быша пред лицом твоим, и пошел еси и



сотворил еси себе боги чужды и слияны, еже раздражити Мя, и отвергл Мя еси назад себе: **10** сего ради се, Аз навожду злая на дом Иеровоамов, и потреблю Иеровоамля мочащаго к стене, держащагося и оставленаго во Израили, и истреблю дом Иеровоамов, якоже истребляется гной, дондеже скончатися ему: **11** умерших Иеровоамлих во граде снесят пси, и умершаго на селе снесят птицы небесныя, яко Господь глагола: **12** ты же воставши иди в дом твой: внегда входити ногама твоима во град, умрет детищь, **13** и восплачется по нем весь Израиль, и погребут его, яко той един внидет Иеровоаму во гроб, яко обретесе в нем глагол благ о Господе Бозе Израилеве в дому Иеровоамли: **14** и возставит Господь Себе царя над Израилем, иже поразит дом Иеровоамов в сей день: а что, и ныне? **15** И поразит Господь Бог Израиля, якоже колеблется трость на воде: и истребит Израиля свыше земли благия сея, юже даде отцем их, и завеет их за ону страну реки, понеже сотвориша дубравы своя, прогневнояще Господа, **16** и предаст Господь Израиля за грехи Иеровоамли, иже согреси и иже во грех введе Израиля. **17** И воста жена Иеровоамля и прииде во Сариру. И бысть егда вниде в преддверие дому, и детищь умре. **18** И погребоша его, и плакашася его весь Израиль по словеси Господню, еже глагола рукою раба Своего Ахии пророка. **19** И останок словес Иеровоамовых, елика ратоваше и елика царствоваше, се, сия написана в книзе словес дний царей Израилевых. **20** И дние, в нихже царствова Иеровоам, двадесять два лета: и успе со отцы своими, и воцарися Нават сын его вместо его. **21** Ровоам же сын Соломонов царствова над Иудю: бе четыредесяти и единого лета,

егда нача царствовати, и семнадцать лет царствова во Иерусалиме граде, егоже избра Господь положити имя Свое тамо от всех племен Израилевых. И имя матери его Наама Амманитяныня. 22 И сотвори Ровоам лукавое пред Господем: и раздражи Его о всех, яже сотвориша отцы их, о гресех их, имиже согрешиша: 23 и создаша сии себе высокая, и столпы, и капища на всяцем холме высокоем и под всяцем древом сеновным: 24 и смешение бе в земли их, и сотвориша от всех мерзостей языческих, яже отя Господь от лица сынов Израилевых. 25 И бысть в лето пятое царствующаго Ровоама, взыде Сукаким царь Египетский на Иерусалим 26 и взя вся сокровища дому Господня и сокровища дому царева, и копия золотая, яже взя Давид из руки отроков Адраазара царя Сувскаго и внесе я во Иерусалим: вся сия взя, и щиты золотыя, яже сотвори Соломон, и внесе я во Египет. 27 И сотвори царь Ровоам щиты медяныя вместо тех, и постави над ними власти от предходящих пред ним, иже храняху врата дому царева: 28 и бысть егда вхождаше царь в дом Господень, и ношаху оныя предходящии, и паки возвращаху тыя во оружехранилище предходящих. 29 Прочая же словес Ровоамлих, и вся яже сотвори, не се ли, сия писана суть в книзе словес дний царства Иудина? 30 И брань бе между Ровоамом и между Иеровоамом во вся дни. 31 И успе Ровоам со отцы своими, и погребен бысть со отцы своими во граде Давидове. И воцарися Авиа сын его вместо его.

**15** И во осмоенадесять лето царства Иеровоама сына Наватова, воцарися Авиа сын Ровоамль над Иудою, 2 и три лета царствова во Иерусалиме. Имя же матери его Мааха, дщи Авессаломля. 3 И хождаше во всех гресех

отца своего, яже сотвори пред ним, и не бе сердце его совершенно с Господем Богом его, якоже сердце Давида отца его: 4 яко Давида ради остави ему Господь Бог его останок во Иерусалиме, да возставит по нем чада его и утвердит Иерусалим, 5 понеже сотвори Давид правое пред Господем и не уклонися от всех, яже заповеда ему вся дни живота его, кроме слова Урии Хеттеанина. 6 И брань бе между Ровоамом и между Иеровоамом во вся дни живота их. 7 И прочая словес Авииных, и вся яже сотвори, не се ли, сия написана в книзе слов дний царей Иудиных? И брань бе между Авиєю и между Иеровоамом. 8 И успе Авиа со отцы своими в двадесятое лето Иеровоама, и погребоша его со отцы его во граде Давидове. И воцарися Аса сын его вместо его. 9 И в лето двадесятое Иеровоама царя Израилева, царствоваше Аса над Иудю, 10 и четыредесять и едино лето царствова во Иерусалиме. Имя же матере его Ана, дщи Авессаломля. 11 И сотвори Аса правое пред Господем, якоже Давид отец его, 12 и отя скверная от земли, и искорени вся изваянная, яже сотвориша отцы его, 13 и Ану мать свою отстави еже не владети ей, понеже сотвори сонмище в Дубраве своей: и изсече Аса Гай ея и сожже огнем в потоце Кедрстем: 14 высоких же не искорени, обаче сердце Асы бе совершенно пред Господем во вся дни его: 15 и внесе столпы отца своего, и столпы своя внесе во храм Господень серебряны и златы, и сосуды. 16 И брань бе между Асою и между Ваасом царем Израилевым во вся дни их. 17 И възыде Вааса царь Израилев на Иуду и созда Раму, яко не быти на исхождение и вхождение Асе царю Иудину. 18 И взя Аса все серебро и злато обретшееся в сокровищах дому Господня и в сокровищах

дому царева и даде я в руке отрок своих: и посла их царь Аса ко сыну Адерову сыну Таверема во Рамман, ко сыну Азаила, царя Сирскаго, живущаго в Дамасце, глаголя: **19** положи завет между мною и тобою, и между отцем моим и отцем твоим: се, послах ти дары, серебро и золото: прииди, разруши завет твой, иже со Ваасою царем Израилевым, да отидет от мене. **20** И послуша сын Адеров царя Асы, и посла воеводы сил своих на грады Израилевы, и поразиша Аина и Дана, и Авеля, Дому Маахиина, и весь Хеннереф, даже до всея земли Неффалимли. **21** И бысть яко услыша Вааса, и остави созидати Раму, и возвратися во Ферсу. **22** Царь же Аса заповеда всему Иуде во енакиме, и взяша камень из Рамы и древа ея, имиже основа Вааса, и созда в них царь Аса всяк Холм Вениаминь и Стражица. **23** Прочая же словес Асиных, и вся сила его, и вся яже сотвори, и грады яже созда, не се ли, сия писана суть в книзе словес дний царей Иудиных? Обаче во время старости своя начат болети ногама своимма: **24** и успе Аса со отцы своими, и погребен бысть во граде Давида отца своего. И воцарися Иосафат сын его вместо его. **25** Нават же сын Иеровоамль нача царствовати над Израилем во второе лето Асы царя Иудина, и царствова над Израилем два лета, **26** и сотвори лукавое пред Господем, и хождаше путем отца своего и во гресех его, имиже согрешити сотвори Израилью. **27** И обседе его Вааса сын Ахиин в дому Велаана сына Ахиина, и уби его во Гавафоне иноплеменничи: Нават же и весь Израиль обседоша Гавафон. **28** И умертви его Вааса в лето третье Асы царя Иудина, и воцарися вместо его. **29** И бысть егда воцарися, изби весь дом Иеровоамль и не остави ничтоже

от всего дыхания Иеровоамля, дондеже искорени их по глаголу Господню, егоже глагола рукою раба Своего Ахии Силонитскаго, **30** грех ради Иеровоамлих, иже согреши, иже введе во грех Израиля, и в прогневании его, имже прогнева Господа Бога Израилева. **31** И прочая словеса Навата, и вся яже сотвори, не се ли, сия писана суть в книзе словес дний царей Израилевых? **32** И бяше брань между Асою (царем Иудиным) и Ваасою царем Израилевым во вся дни их. **33** И в третие лето Асы царя Иудина царствова Вааса сын Ахиин над всем Израилем во Ферсе двадесять и четыре лета, **34** и сотвори лукавое пред Господем, и иде путем Иеровоама сына Наватова, и во гресех его, имиже в согрешение приведе Израиля.

**16** И бысть слово Господне рукою Иуа сына Ананиева ко Ваасе, глаголя: **2** понеже вознесох тя от земли и дах тя властеля над людьми Моими Израилем, и пошел еси путем Иеровоамлим и ввел еси в грех люди Моя Израиля, еже прогневати Мя суетными их: **3** се, Аз отвергу наследие Ваасы и наследие дому его, и сотворю дом твой яко дом Иеровоама сына Наватова: **4** умершаго Ваасова во граде снедят его пси, и умершаго на поли снедят его птицы небесныя. **5** И прочая словес Ваасовых, и вся яже сотвори, и сильная его, не се ли, суть писана в книзе словес дний царей Израилевых? **6** И успе Вааса со отцы своими, и погребен бысть во Ферсе, и воцарися Ила сын его вместо его. **7** И рукою Иуа сына Анании пророка глагола Господь на Ваасу и на дом его всю злобу, юже сотвори пред Господем, еже прогневати Его делами рук своих, быти ему якоже и дому Иеровоамлю, и о еже ему поражену быти. **8** В лето двадесять шестое Асы

царя Иудина, царствова Ила сын Ваасин над Израилем во Ферсе два лета. 9 И воздвиже (Господь) на него отроки его, и Замвриа воеводу половины конников: и Ила бе во Ферсе упиваяся, и пьян сый в дому Арсы домостроителя во Ферсе: 10 и вниде Замврий, и порази его, и умертви его, в лето двадесять седмое Асы царя Иудина, и воцарися вместо его. 11 И бысть царствующу ему, внегда сести ему на престоле его, и изби весь дом Ваасов: не остави ему мочащаго к стене, и ужиков его, и друга его. 12 И изби Замврий весь дом Ваасов по глаголу Господню, егоже глагола на дом Ваасов и ко Иую пророку, 13 о всех гресех Ваасовых и Илы сына его, яко сотвори согрешити Израилю, еже разгневати Господа Бога Израилева суетными их. 14 Прочая же словес Илы, яже сотвори, не се ли, сия писана в книзе словес дний царей Израилевых? 15 В лето двадесять седмое Асы царя Иудина царствова Замврий семь дний во Ферсе: и бе полк Израилев на Гавафон иноплеменнический. 16 И слышаша людие суции в полце, глаголющих: превратися Замврий и порази царя. И поставиша царем во Израили Амвриа воеводу, иже над воями во Израили в день он в полце. 17 И взыде Амврий и весь Израиль с ним от Гавафона и обседе Ферсу. 18 И бысть егда увиде Замврий, яко предвзят бысть град его, и вниде во внутренний дом царский, и зажже над собою дом царев огнем, и умре 19 за грехи своя, яже сотвори, сотворения ради лукаваго пред Господем, еже ходити путем Иеровоама сына Наватова, и во гресех его, яже сотвори, яко введе во грех Израиля. 20 И прочая словес Замврииных, и наветы его, яже совеща, не се ли, сия суть писана в книгах словес дний царей Израилевых? 21 Тогда разделишася

людие Израилстии, пол людий бысть за Фамнием сыном Гонафовым, яко да царствует он, и пол людий бысть со Амврием. 22 Людие же сущии по Амврии перевозмогша людий бывших со Фамнием сыном Гонафовым и умре Фамний и Иорам брат его во время оно, и воцарися Амврий по фамнии. 23 В лето тридесять первое Асы царя Иудина царствова Амврий во Израили дванадесять лет, во Ферсе же шесть лет царствова. 24 И купи Амврий гору Семерон у Семира господина горы двема таланты сребра, и созда гору, и нарече имя горе, юже созда, во имя Семира господина горы оныя, гора Семирон. 25 И сотвори Амврий лукавое пред Господем, и прелукавнова паче всех бывших пред ним: 26 и хождаше по всем путем Иеровоама сына Наватова и во гресех его, имиже введе во грех Израиля, еже разгневати Господа Бога Израилева в суетных их. 27 И прочая словес Амвриевых, и вся яже сотвори, и вся сила его, не се ли, сия писана в книзе словес дний царей Израилевых? 28 И успе Амврий со отцы своими, и погребен бысть в Самарии. И воцарися Ахаав сын его вместо его. 29 Ахаав же сын Амвриев воцарися над Израилем в лето тридесять осмое Асы царя Иудина: царствова же Ахаав сын Амвриев над Израилем в Самарии двадесять два лета: 30 и сотвори Ахаав лукавое пред Господем, и прелукавнова паче всех бывших прежде его: 31 и не бе ему довольно, еже ходити во гресех Иеровоама сына Наватова, и взя жену Иезавель дщерь Иефеваала царя Сидонскаго: и иде, и нача служити Ваалу, и поклонися ему, 32 и постави требище Ваалу в дому мерзостей его, егоже созда в Самарии: 33 и сотвори Ахаав дубраву: и приложи Ахаав творити прогневания, еже

разгневати Господа Бога Израилева и душу свою погубити: злодействова паче всех царей Израилевых бывших прежде его. **34** Во дни же его созда Ахиил Вефилянин Иерихон: на Авироне первороднем своем основа его, и на Сегуве юнейшем своем постави двери его, по глаголу Господню, егоже глагола рукою Иисуса сына Навина.

**17** И рече Илия пророк Фесвитянин, иже от фесвии Галаадския, ко Ахааву: жив Господь Бог сил, Бог Израилев, Емуже предстою пред Ним, аще будет в лета сия роса и дождь, точию от уст словесе моего. **2** И бысть глагол Господень ко Илии: **3** иди отсюда на восток и скрыйся в потоце Хорафа прямо лицу Иорданову: **4** и будеши пити от потока воду, и враном заповедах препитати тя тамо. **5** И сотвори Илия по глаголу Господню, и седе при потоце Хорафове прямо лицу Иорданову: **6** и вранове приношаху ему хлеба и мяса завтра, и хлеба и мяса к вечеру, и от потока пияше воду. **7** И бысть по днех, и изсше источник, яко не бе дождя на землю, **8** и бысть глагол Господень ко Илии глаголя: **9** востани и иди в Сарепту Сидонскую, и пребуди тамо: се бо, заповедах тамо жене вдовице препитати тя. **10** И воста и иде в Сарепту Сидонскую, и прииде ко вратом града: и се, тамо жена вдова собираше дрова. И возопи Илия вслед ея и рече ей: принеси ныне ми мало воды в сосуде, и испию. **11** И иде взяти. И возопи вслед ея Илия и рече ей: приими убо мне и укрух хлеба в руце своей, дам ям. **12** И рече жена: жив Господь Бог твой, аще есть у мене опреснок, но токмо горсть муки в водоносе и мало елеа в чванце: и се, аз соберу два поленца, и вниду, и сотворю е себе и детям моим, и снемы е, и умрем. **13** И рече к ней



Илиа: дерзай, вниди и сотвори но глаголу твоему: но сотвори ми оттуду опреснок мал прежде, и принеси ми, себе же и чадом своим да сотвориши послежде, **14** яко тако глаголет Господь Бог Израилев: водонос муки не оскудеет, и чванец елеа не умалится до дне, дондеже даст Господь дождь на землю. **15** И иде жена, и сотвори по глаголу Илиину, и даде ему, и яде той, и та, и чада ея. **16** И от того дне водонос муки не оскуде, и чванец елеа не умалися, по глаголу Господню, егоже глагола рукою Илииною. **17** И бысть по сих, и разболеся сын жены госпожи дому, и бе болезнь его крепка зело, дондеже не остана в нем дух его. **18** И рече ко Илии: что мне и тебе, человеце Божий? Вшел еси ко мне воспомянуги неправды моя и уморити сына моего. **19** И рече Илиа к жене: даждь ми сына твоего. И взят его от недра ея, и вознесе его в горницу, идеже сам почиваше, и положи его на одре своем. **20** И возопи Илиа ко Господу и рече: увы мне, Господи, свидетелю вдовы, у неяже аз ныне пребываю, Ты озлобил еси еже уморити сына ея. **21** И дуну на отрочища трижды, и призва Господа и рече: Господи Боже мой, да возвратится убо душа отрочища сего в онь. **22** И бысть тако: и возопи отрочишь, **23** и сведе его с горницы в дом, и даде его матери его. И рече Илиа: виждь, жив есть сын твой. **24** И рече жена ко Илии: се, уразумех, яко человек Божий еси ты, и глагол Господень во устех твоих истинен.

**18** И бысть по днех мнозех, и глагол Господень бысть ко Илии в лето третие глаголя: иди и явися Ахааву, и дам дождь на лице земли. **2** И иде Илиа ко Ахааву явится, и бе глад крепок в Самарии. **3** И призва Ахаав Авдиа строителя дому: и Авдий бе бояся Господа зело. **4** И бысть егда нача

избивати Иезавель пророки Господни, и взя Авдий сто мужей пророки и скры я по пятидесяти во двоих вертепех и кормяше их хлебом и водою. 5 И рече Ахаав ко Авдию: гряди, и преждем на землю, и на источники водныя, и на вся потоки, да негли како обрящем былие и прекормим кони и мски, да не изгибнут от скот. 6 И разделиша себе путь ити по нему: Ахаав иде путем единым един, и Авдий иде путем другим един. 7 И бе Авдий един на пути: и прииде Илия на сретение ему един. И Авдий потщася, и паде на лице свое и рече: ты ли еси сам, господи мой Илие? 8 И рече Илия ко Авдию: аз есмь: иди и повеждь господину твоему, глаголя: се, Илия. 9 И рече Авдий: что согреших аз, яко предаеши раба твоего в руце Ахаавли еже умертвити мя? 10 Жив Господь Бог твой, аще есть язык или царство, а може не посла господин мой искати тебе: и реша, несть: и закла царство и страны его, яко не обрете тебе: 11 и ныне ты глаголеши ми: иди, возвести господину твоему: се, Илия: 12 и будет егда аз отиду от тебе, и Дух Господень возмет тя в землю, еяже не вем, и вниду возвестити Ахааву, и не обрящет тебе, и убьет мя: раб же твой есть бояйся Господа от юности своя: 13 или не возвестися тебе господину моему, яже сотворих, егда убиваше Иезавель пророки Господни, и сокрых пророки Господни сто мужей, по пятидесяти в вертепе, и кормих их хлебом и водою? 14 И ныне ты глаголеши ми: иди, повеждь господину твоему: се, Илия: и убьет мя. 15 И рече Илия: жив Господь Сил, емуже предстою пред Ним, яко днесь покажуся ему. 16 И иде Авдий во сретение Ахааву и возвести ему. И ускори Ахаав и иде во сретение Илии. 17 И бысть егда узре Ахаав Илию, и рече Ахаав ко Илии: ты ли еси развращаяй

Израиля? 18 И рече Илия: не развращаю аз Израиля, но разве ты и дом отца твоего, егда остависте вы Господа Бога вашего и идосте вслед Ваала: 19 и ныне послы и собери ко мне всего Израиля на гору Кармилскую, и пророки студныя Вааловы четыреста и пятьдесят, и пророков дубравных четыреста, ядущих трапезу Иезавелину. 20 И посла Ахаав во весь Израиль, и приведе вся пророки на гору Кармилскую. 21 И приведе ко всем им Илию, и рече им Илия: доколе вы храмлете на обе плесне вашы? Аще есть Господь Бог, идите вслед Его: аще же Ваал есть, то идите за ним. И не отвещаша людие словесе. 22 И рече Илия к людем: аз остах пророк Господень един: и пророцы Вааловы четыреста и пятьдесят мужей, и пророков дубравных четыреста. 23 (И рече Илия: ) да дадят нам два вола, и да изберут себе единого, и да растешут и (на уды), и возложат на дрова, и да не возгнетят огня: и аз растешу вола другаго, и возложу на дрова, и огня не возгнешу: 24 и да призовете имена богов ваших, и аз призову имя Господа Бога моего: и будет Бог, Иже аще послушает огнем, Той есть Бог. И отвещаша вси людие и реша: добр глагол (Илиин), егоже глагола (да будет тако). 25 И рече Илия пророком студным: изберите себе юнца единого, и сотворите вы прежде, яко вас есть множество: и призовите имена богов ваших, и огня не возгнешайте. 26 И пояша юнца, и сотвориша (так), и призываху имя Ваалово от утра до полудне, и реша: послушай нас, Ваале, послушай нас. И не бе гласа, ни послушания. И ристаху около жертвенника, егоже сотвориша. 27 И бысть в полудне, и поругася им Илия Фесвитянин и рече: зовите гласом великим, яко бог есть, яко неспраждность ему есть, и негли

что ино строит, или спит сам, и востанет. 28 И зовяху гласом великим, и крояхуся по обычаю своему ножами, и мнози бишася бичми, до пролития крове своея, 29 и прорицаху, дондеже преїде вечер: и бысть егда прииде время взыти жертве, и не бе гласа, ниже послушания. И рече Илия Фесвитянин пророком студным, глаголя: отступите ныне, да и аз сотворю жертву мою. И отступиша тии, и умолкнуша. 30 И рече Илия к людем: приступите ко мне. И приступиша вси людие к нему. 31 И взя Илия дванадесять камней по числу колен Израилевых, якоже глагола к нему Господь, глаголя: Израиль будет имя твое. 32 И созда камень во имя Господне, и изцели олтарь раскопанный, и сотвори море вмещающее две меры семене окрест олтаря. 33 И воскладе дрова на олтарь, егоже сотвори, и растеса на уды всесожегаемая, и возложи на дрова, и воскладе на олтарь. 34 И рече Илия: принесите ми четыре водоносы воды, и возливайте на всесожжение и на полена. И сотвориша тако. И рече: удвойте. И удвоиша. И рече: утройте. И утроиша. 35 И прождаше вода окрест олтаря, и море исполнися воды. 36 И возопи Илия на небо и рече: Господи Боже Авраамов и Исааков и Иаковль, послушай мене, Господи, послушай мене днесь огнем, и да уразумеют вси людие сии, яко Ты еси Господь един Израилев, и аз раб Твой, и Тебе ради сотворих дела сия: 37 послушай мене, Господи, послушай мене огнем, и да разумеют вси людие сии, яко Ты еси (един) Господь Бог, и Ты обратил еси сердца людий сих вслед Тебе. 38 И спаде огонь от Господа с небесе, и пояде всесожегаемая, и дрова, и воду, яже в мори, и камень и персть полиза огонь. 39 И падоша вси людие на лице свое и реша: воистинну Господь

Бог Той есть Бог. **40** И рече Илия к людем: поймайте пророки Вааловы, да ни один скрывается от них. И яша их, и веде я Илия на поток Киссов, и закла их тамо. **41** И рече Илия ко Ахааву: възиди, и яждь и пей, яко глас есть дождевнаго хождения. **42** И възиде Ахаав ясти и пити. Илия же възиде на Кармил, и преклонися на землю, и положи лице свое между коленома своима, **43** и рече отрочищу своему: възиди и воззри на путь морской. И възиде, и воззре отрочищь, и рече: несть ничтоже. И рече Илия: и ты обратися седмижды. **44** И обратися отрочищь седмижды: и бысть в седмое, и се, облак мал, аки след ноги мужеския, возносящ воду из моря. И рече: възиди и рцы Ахааву: впрязи колесницу твою и сниди, да не постигнет тебе дождь. **45** И бысть до zde и до zde, и небо примрачися облаки и духом, и бысть дождь велий. И плакася, и иде Ахаав до Иезраеля. **46** И рука Господня бысть на Илии, и стягне чресла своя, и тече пред Ахаавом во Иезраель.

**19** И возвести Ахаав Иезавели жене своей вся, елика сотвори Илия, и яко изби пророки оружием. **2** И посла Иезавель ко Илии и рече: аще ты еси Илия, аз же Иезавель: сия да сотворят ми бози и сия да приложат ми, яко в сей же час утро положу душу твою, якоже душу единаго от них. **3** И убояся Илия, и воста, и отиде души ради своя, и прииде в Вирсавию землю Иудину, и остави отрочище свое тамо, **4** сам же иде в пустыню дне путь, и прииде, и седе под смерчем, и проси души своей смерти, и рече: довлеет ныне (ми), возми убо от мене душу мою, Господи, яко несмь аз лучший отец моих. **5** И ляже, и успе под садом: и се, Ангел Господень коснулся ему и рече ему: востани, яждь и пей. **6** И

воззре Илия: и се, у возглавия его опреснок ячменный и чванец воды. И воста, и яде и пи, и возвратився успе. 7 И обратися Ангел Господень вторицею, и коснулся ему, и рече ему: востани, яждь и пий, яко мног от тебе путь. 8 И воста, и яде и пи: и иде в крепости яди тоя четыредесять дний и четыредесять нощей до горы Божия Хорив. 9 И вниде тамо в пещеру, и вселися в ней. И се, глагол Господень к нему и рече: что ты zde, Илие? 10 И рече Илия: ревнуя поревновах по Господе (Бозе) Вседержители, яко оставиша Тя сынове Израилевы: олтари Твоя раскопаша, и пророки Твоя избиша оружием, и остах аз един, и ищут души моя изяти ю. 11 И рече: изыди утро и стани пред Господем в горе: и се, мимо поидет Господь, и дух велик и крепок разоряя горы и сокрушая камене в горе пред Господем, (но) не в душе Господь: и по душе трус, и не в трусе Господь: 12 и по трусе огонь, и не во огни Господь: и по огни глас хлада тонка, и тамо Господь. 13 И бысть яко услыша Илия, покры лице свое милотию своею, и изыде и ста пред вертепом. И се, к нему бысть глас и рече: что ты zde, Илие? 14 И рече Илия: ревнуя поревновах по Господе Бозе Вседержители, яко оставиша завет Твой сынове Израилевы, и олтари Твоя раскопаша, и пророки Твоя избиша оружием, и остах аз един, и ищут души моя изяти ю. 15 И рече Господь к нему: иди, возвратися путем своим, и изыдеши на путь пустыни Дамасковы, и помажеша Азаила на царство Сирийское, 16 и Ииуа сына Намессиина помажеша на царство над Израилем, и Елиссеа сына Сафатова от Авелмаула помажеша вместо себе пророка: 17 и будет спасаемаго от оружия Азаилева убиет Ииуй, и спасаемаго от оружия Ииуина убиет Елисей:

18 и оставиши во Израили седмь тысящ мужей, вся колена, яже не преклониша колена Ваалу, и всяка уста, яже не молишася ему. 19 И иде оттуду, и обрете Елиссеа сына Сафатова, и сей оряше двеманадесятьма супругома волов пред ним, и той сам по двоюнадесяти супруг. И прииде Илиа к нему, и поверже милоть свою на него. 20 И остави Елиссей волы, и тече вслед Илии, и рече: (молю тя, ) да обლობыжу отца моего и матерь мою, и иду вслед тебе. И рече ему Илиа: иди, возвратися, яко сотворих тебе. 21 И возвратися от него: и взя супруги волов, и закла, и испече я в сосудех воловных, и даде людем, и ядоша. И воста, и иде вслед Илии, и служаше ему.

**20** И сын Адеров царь Сирский собра всю силу свою, и возшед обседе Самарию, и с ним тридесять два царя и вси конницы и колесницы: и въздоша, и обседоша Самарию, и ратоваша на ню: 2 и посла ко Ахааву царю Израилеву во град и рече к нему: сице глаголет сын Адеров: 3 серебро твое и злато твое мое есть, и жены твоя и чада твоя добрая моя суть. 4 И отвеща царь Израилев и рече: якоже глаголал еси, господи мой царю, твой есмь аз и вся моя. 5 И возвратишася послы и реша: сице глаголет сын Адеров: аз посылах к тебе, глаголя: серебро и злато твое и жены твоя и чада твоя даждь мне: 6 яко в сей час утро послю рабы моя к тебе, и изыщут дом твой и дома отрок твоих, и будут вся желаемая очес их, на нихже аще возложат руки своя, и возмут. 7 И призва царь Израилев вся старейшины земли и рече: знайте ныне и видите, яко той зле просит, яко присла ко мне (глаголя) о женах моих и о сынех моих и о дщерех моих: сребра моего и злата моего не возбраних ему. 8 И реша ему старейшины

и вси людие: не послушай, ни восхощи (дати). 9 И рече послом сына Адерова: рцыте господину вашему: вся, ихже ради посылал еси к рабу твоему прежде, сотворю, сего же глагола не могу сотворити. И отидоша мужие (адеровы) и возвестиша ему слово. 10 И паки посла к нему сын Адеров, глаголя: сия да сотворят ми бози и сия да приложат, аще доволна будет персть Самарии горstem всех людий пещцев моих. 11 И отвеща царь Израилев и рече: довольно: да не хвалится слячен, якоже прямой. 12 И бысть егда отвеща ему слово сие, бе пиюць сам и вси царие, иже бяху с ним в куцах: и рече отроком своим: сотворите вал. И Сотвориша вал над градом. 13 И се, пророк един прииде к Ахааву царю Израилеву и рече: сия глаголет Господь: видиши ли весь народ сей великий? Се, Аз дам его днесь в руце твои, и уразумееш, яко Аз (есмы) Господь. 14 И рече Ахаав: в чем? И рече: сице глаголет Господь: во отроцех князей градских. И рече Ахаав: кто начнет брань? И рече: ты. 15 И сочте Ахаав отроки князей градских, и бысть их двести тридесять и два: и по сих сочте люди вся сыны силы, седмь тысящ. 16 И изыде в полудне: и сын Адеров пьян бе зело в Сокхофе сам и царие (иже с ним), тридесять два царя помощника ему. 17 И изыдоша отроцы воевод градских в первых. И посла сын Адеров, и возвестиша царю сирскому, глаголюще: мужие изыдоша из Самарии. 18 И рече им: аще на мир изыдоша, поимите их живых: и аще на брань изыдоша, живых поимите их, да не исходят из града. 19 И тии изыдоша из града отроцы воевод градских, и сила вслед их. 20 И порази кийждо противнаго себе, и удвои кийждо противнаго себе. И бежа Сириа: и погна их Израиль, и гонзе токмо сын Адеров царь



Сирский на кони конника. 21 И изыде царь Израилев, и взя вся кони и колесницы, и порази язвою великою в Сирии. 22 И прииде пророк к царю Израилеву и рече: укрепися и разумей, и виждь, что сотвориши, яко преходящу лету сему, сын Адеров, царь Сирийский, приидет на тя. 23 И отроцы царя Сирийска реша ему: Бог гор Бог Израилев, а не Бог юдолий, сего ради укрепися паче нас: аще же сразимся с ними на равнине, истинно укрепимся паче их: 24 по глаголу же сему сотвори: распусти цари коегождо на место свое, и постави вместо их воеводы, 25 и пременим тебе силу вместо силы падшия у тебе, и кони вместо коней, и колесницы вместо колесниц, и сразимся с ними на равнине, и укрепимся паче их. И послуша гласа их и сотвори тако. 26 И бысть минувшу лету тому, и сочте сын Адеров Сирию, и взыде во Афеку на брань на Израиля. 27 И сынове Израилевы сочислишася и изыдоша во сретение им. И ополчашася Израилтяне противу им, аки два стада коз: Сириане же наполниша землю. 28 И прииде человек Божий и рече к царю Израилеву: сице глаголет Господь: понеже рече Сириа: Бог гор Господь Бог Израилев, и не Бог юдолий той, и дам силу великую сию в руку твою, и уразумееш, яко Аз Господь. 29 И ополчишася тии противу им семь дний. И бысть в день седмый, и приближися брань, и порази Израиль Сириан, сто и двадесять тысяч пещцев во един день. 30 И бежаша оставшиися во Афеку град, и паде стена на двадесать семь тысяч мужей оставшихся: сын же Адеров бежа и вниде в дом ложа, в чертог. 31 И реша к нему отроцы его: се, ныне вемы, яко царие дому Израилева милостиви суть: да возложим ныне вретища на чресла наша и ужа на выи

нашя, и изыдем ко царю Израилеву, да негли оживит души нашя. 32 И препоясашася во вретища по чреслом своим, и возложиша узя на выи своя, и приидоша к царю Израилеву и реша: раб твой сын Адеров глаголет: да живет душа моя. И рече: аще есть еще жив, брат ми есть. 33 И мужие за знак и в залог прияша слово от уст его, и реша: брат твой сын Адеров. И рече: идите и приведите его. И изыде к нему сын Адеров. И возведоша его к нему на колесницу. 34 И рече к нему: грады, яже взя отец мой от отца твоего, отдам тебе: и на исход сотвориши я себе в Дамасце, якоже положи отец мой в Самарии, и аз в завете пушу тя. И положи ему завет и отпусти его. 35 И человек един от сынов пророчих рече ко ближнему своему по словеси Господню: бий мя ныне. И не восхоте человек бити его. 36 И рече к нему: понеже не послушал еси гласа Господня, се, ты отидеши от мене, и поразит тя лев. И отиде от него, и обрете его лев и порази его. 37 И обрете человека инаго и рече: бий мя ныне. И би его человек, и поразив сокруши его. 38 И иде пророк и предста царю Израилеву на пути и покры покрывалом очи свои. 39 И бысть егда мимоидяше царь, и сей возопи ко царю и рече: раб твой изыде на войну брани, и се, муж приведе ко мне мужа и рече ко мне: сохрани мужа сего: аще же отрешився отскочит, и будет душа твоя вместо души его, или талант отдаси сребра: 40 и бысть яко озресе раб твой семо и овамо, и сего не бысть. И рече к нему царь Израилев: се, суд твой при мне, сам себе убил еси. 41 И ускори и отя покрывало от очес своих. И позна его царь Израилев, яко от пророк сей есть. 42 И рече к нему: тако глаголет Господь: понеже испустил еси ты мужа пагубнаго из

руки твоя, и будет душа твоя вместо души его, и люди твои вместо людей его. 43 И отиде царь Израилев к дому своему смущен и расслаблен, и прииде в Самарю.

**21** И бысть по глаголю сих, и виноград един бе у Навуфеа Иезраилитянина при гумне Ахаава царя Самарийска. 2 И рече Ахаав к Навуфею, глаголя: даждь ми виноград твой, и будет ми во вертоград зелий, яко близ есть сей дому моего, и дам ти вместо сего виноград ин добр паче сего: аще же угодно пред тобою, дам ти сребро измену винограда сего, и будет ми во вертоград зелий. 3 И рече Навуфей ко Ахааву: да не будет мне от Господа Бога моего дати наследие отец моих тебе. 4 И прииде Ахаав в дом свой смущен и оскорблен о словеси, еже глагола к нему Навуфей Иезраилитянин, и рече: не дам тебе наследия отец моих. И бысть дух Ахаавль смущен, и успе на одре своем и покры лице свое и не яде хлеба. 5 И видде Иезавель жена его к нему и рече к нему: что дух твой есть смущен, и не яси ты хлеба? 6 И рече к ней (Ахаав): яко глаголах Навуфею Иезраилитянину глаголя: даждь ми виноград твой за сребро: и аще хочещи, дам ти виноград ин вместо его: и рече: не дам ти наследия отец моих. 7 И рече к нему Иезавель жена его: ты ли ныне твориши тако, царю Израилев? Востани и яждь хлеб и молча буди, аз же дам ти виноград Навуфеа Иезраилитянина. 8 И написа книгу на имя Ахаавле, и запечата ю печатью его, и посла книгу к старейшинам и свободным живуцым с Навуфеем. 9 И писано бяше в книзе тако: поститесь постом и посадите Навуфеа и в начале людей: 10 и посадите два мужа сыны законопреступных противу ему, и да засвидетелствуют о нем, глаголюще, яко (не) благослови Бога и царя: и да

изведут его и побьют камением, и да умрет. **11** И сотвориша тако мужие града его старейшии и свободнии живуции во граде его, якоже посла к ним Иезавель, и якоже писано быаше в книгах, яже посла к ним: **12** и нарекоша пост, и посадиша Навуфеа в начале людий, **13** и приидоста два мужа сынове законопреступных и седоста противу его, и засвидетельствоваша на него мужие отступницы Навуфеовы пред людьми, глаголюще: сей (не) благослови Бога и царя. И изведоша его вон из града и побиша его камением, и умре. **14** И послаша ко Иезавели, глаголюще: камением побиен бысть Навуфей и умре. **15** И бысть егда услыша Иезавель глаголющих, яко побиен Навуфей и умре, и рече Иезавель ко Ахааву: востани, наследуй виноград Навуфеа Израилитянина, иже не взя у тебе сребра, и уже несть Навуфей жив, но умре. **16** И бысть егда услыша Ахаав, яко убиен бысть Навуфей Израилитянин, и раздра ризы своя и облечеса во вретище. И бысть по сих, и воста и сниде Ахаав в виноград Навуфеа Израилитянина наследити его. **17** И рече Господь ко Илии Фесвитянину, глаголя: **18** востани и сниди на сретение Ахааву царю Израилеву, иже в Самарии, се бо, сей в винограде Навуфееве, яко сниде тамо наследити его: **19** и речеши ему, глаголя: сице глаголет Господь: понеже ты убил еси (Навуфеа) и приял еси в наследие (виноград его), сего ради тако глаголет Господь: на месте, идеже полизаша свинии и пси кровь его, тамо полижут и кровь твою, и блудницы измыются в крови твоей. **20** И рече Ахаав ко Илии: обрел ли еси мя, враже мой? И рече Илиа: обретох: понеже ты всуе продан еси сотвориши лукавое пред Господем, во еже разгневати Его: **21** сице глаголет

Господь: се, Аз наведу на тя злая и попалю задняя твоя, и искореню Ахаавля мочащагося к стене, и содержимыя и оставшихся во Израили: **22** и предам дом твой якоже дом Иеровоама сына Наватова, и якоже дом Ваасы сына Ахиина, о прогневаниих, имиже прогневал Мя еси, и грешити сотворил еси Израиля. **23** И ко Иезавели рече Господь, глаголя: пси снедят ю в предградии Иезраеля: **24** умершаго Ахаавля во граде снедят пси, и умершаго его на поли снедят птицы небесныя: **25** и в суете ты еси, Ахааве, иже продан бысть сотворити лукавое пред Господем, яко преврати его Иезавель жена его. **26** И омерзися зело, еже ходити вслед мерзостей, яже сотвори Аморрей, егоже истреби Господь от лица сынов Израилевых. **27** И бысть егда услыша Ахаав словеса сия, умилися от лица Господня, и идяше плачяся, и раздра ризы своя, и препоясая вретищем по телу своему и постися: и бе облечен во вретище от дне, в оньже уби Навуфеа Иезраилитянина, и хождаше скорбен. **28** И бысть глагол Господень рукою раба его Илии о Ахааве, **29** и рече Господь: видел ли еси, яко умилися Ахаав от лица Моего? Сего ради не наведу зла во днех его: но во днех сына его наведу зло на дом его.

**22** И седе три лета, и не бе брани между Сириею и между Израилем. **2** И бысть в лето третие, и сниде Иосафат царь Иудин к царю Израилеву. **3** И рече царь Израилев ко отроком своим: весте ли, яко моя есть Реммафа Галаадская, и мы молчим взяти ю от руки царя Сирийска? **4** И рече царь Израилев ко Иосафату: въздеши ли с нами в Реммафу Галаадскую на брань? И рече Иосафат: якоже аз, такожде и ты: якоже людие мои, людие твои: якоже кони мои, кони

твои. 5 И рече Иосафат царь Иудин к царю Израилеву: вопросите убо днесь Господа. 6 И собра царь Израилев вся пророки яко четыреста мужей, и рече царь им: възыду ли в Реммафу Галаадскую на брань, или оставлю? И реша: възыди, яко дая предаст Господь в руки царевы. 7 И рече Иосафат к царю Израилеву: несть ли зде пророка Господня, и вопросили быхом Господа им? 8 И рече царь Израилев ко Иосафату: еще есть един муж на вопрошение им Господа, и аз возненавидех его, яко не глаголет о мне добре, но злая, Михеа сын Иемвлаань. И рече царь Иосафат Иудин: не глаголи, царю, тако. 9 И призва царь Израилев скопца одинаго и рече: скоро иди по Михею сына Иемвлааня. 10 Царь же Израилев и Иосафат царь Иудин седяста кийждо на престоле своем вооружени во вратех Самарийских, и вси пророцы прорицаху пред ними. 11 И сотвори себе Седекиа сын Ханаань рога железна и рече: тако глаголет Господь: сими рогами избодеши Сирию, дондеже скончается. 12 И вси пророцы прорицаху тако, глаголюще: възыди в Реммафу Галаадскую, и наставит тя, и предаст Господь в руце твои царя Сирийскаго. 13 И посол шед призвати Михею, рече ему, глаголя: се, ныне вси пророцы усты едиными глаголют добрая о цари, буди убо и ты в словесех твоих по словесем одинаго от сих и глаголи добрая. 14 И рече Михеа: жив Господь, яко яже речет Господь ко мне, сия возглаголю. 15 И прииде ко царю. И рече ему царь: Михее, възыду ли в Реммафу Галаадскую на брань, или оставлю? И рече ему: възыди, и благопоспешит Господь в руки царевы. 16 И рече ему царь: еще аз дважды заклинаю тя, да речеши истину пред Господем. 17 И рече Михеа: не тако: видех

всего Израиля разсеяна по горам якоже стада, имже несть пастыря: и рече Господь: не Господь ли сим в Бога? Да возвратится кийждо в дом свой с миром. 18 И рече царь Израилев ко Иосафату царю Иудину: не рех ли тебе, яко не проричет сей ми добрая, но токмо злая? 19 И рече Михеа: не тако: не аз: слыши глагол Господень: не тако: видех Господа Бога Израилева сидящаго на престоле Своем, и все воинство небесное стояше окрест Его одесную Его и ошуюю Его: 20 и рече Господь: кто прельстит Ахаава царя Израилева, и взыдет и падет в Реммафе Галаадстей? И рече сей тако, и сей тако: 21 и изыде дух, и ста пред Господем, и рече: аз прельщу и: 22 и рече к нему Господь: в чем? И рече: изыду и буду дух лжив во устех всех пророк его: и рече: прельстиши и возможеши: изыди и сотвори тако: 23 и се, ныне даде Господь дух лжив во уста всех пророк твоих сих, и Господь глагола на тя злая. 24 И приступи Седекиа сын Ханаань, и порази Михею в лице и рече: каковый сей преиде Дух Господень от мене, еже глаголати в тебе? 25 И рече Михеа: се, ты узриши в день он, егда внидеш в ложницу сокровища твоего, еже скрытися ту. 26 И рече царь Израилев: поимите Михею, и возвратите его ко Аммону князю града и ко Иоасу сыну цареву, 27 и рцыте, да посадят его в темницу, и да кормят его хлебом печальным и водою печальною, дондеже возвращуся в мире. 28 И рече Михеа: аще возвращаяся возвратишия в мире, то не глагола Господь мною. И рече: слышите, людие вси. 29 И взыде царь Израилев и Иосафат царь Иудин с ним в Реммафу Галаадскую. 30 И рече царь Израилев ко Иосафату царю Иудину: прикрый мя, и вниду в сечь, и ты облещыся в ризу мою. И прикрыйся царь Израилев и

вниде в сечь. 31 Царь же Сирский заповеда князем колесниц своих тридесятим и двум, глаголя: не бийтесе ни с великим ни с малым, но токмо с царем Израилевым единым. 32 И бысть егда узреша воеводы колесниц Иосафата царя Иудина, и реша: видится царь Израилев сей. И обступиша его еже сразитися с ним: и возопи Иосафат. 33 И бысть егда узреша воеводы колесниц, яко несть царь Израилев той, и возвратишася от него: 34 и наляче лук един муж приметно, и порази царя Израилева между легким и щитом. И рече (царь) всаднику своему: обрати руки твоя, и изведи мя от брани, яко язвен есмь. 35 И умножися брань в той день, и царь бе стоя на колеснице противу Сириан от утра даже до вечера, и лияшесе кровь из язвы в недра колесницы, и умре в вечер, и изливашесе кровь от язвы даже до недр колесницы. 36 И ста проповедник о западе солнца, глаголя: кийждо вас да идет во свой град и во свою землю, яко умре царь. 37 И приидоша в Самарию, и погребоша в Самарии царя. 38 И омыша кровь с колесницы на источнице Самарийстем, и полизаша свинии и пси кровь его, и блудницы измышася в крови его, по глаголу Господню, егоже глагола. 39 Прочая же словес Ахаавлих, и вся яже сотвори, и храм слоновый, егоже созда, и вся грады, яже сотвори, не се ли, сия писана быша в книзе словес дний царей Израилевых? 40 И успе Ахаав со отцы своими, и воцарися Охозиа сын его вместо его. 41 И Иосафат сын Асы воцарися над Иудою в четвертое лето Ахаава царя Израилева. 42 Иосафат сын тридесяти пяти лет (бе), егда нача царствовати, и двадесять пять лет царствова во Иерусалиме. Имя же матери его Азува, дщи Салаила. 43 И хождаше по всем путем Асы отца своего, не уклонися от



него, творя правое пред очима Господними, токмо высоких не разори: еще людие жряху и кадяху на высоких. 44 И умирися Иосафат с царем Израилевым. 45 Прочая же словес Иосафатовых, и силы его, елика сотвори, не се ли, писана суть в книзе словес дний царей Иудиных? 46 И прочее мерзости, еже остася во дни Асы отца его, отя от земли. 47 И царя не бе во Едоме поставленнаго. 48 Царь же Иосафат сотвори корабли Фарсийския, еже ити во Офир по злато, но не поидоша, зане сокрушишася корабли во Асеон-Гавере. 49 Тогда рече Охозиа сын Ахаавль ко Иосафату: да идут раби мои с рабы твоими в кораблех. И не восхоте Иосафат. 50 И умре Иосафат со отцы своими, и погребен бысть у отец своих во граде Давида отца своего. И воцарися Иорам сын его вместо его. 51 И Охозиа сын Ахаавов воцарися над Израилем в Самарии, в лето седмоенадесять Иосафата царя Иудина, и царствова над Израилем в Самарии лета два, 52 и сотвори лукавое пред Господем, и нача ходити по путем отца своего Ахаава и по пути Иезавели матери своея, и во гресех дому Иеровоама сына Наватова, иже введе во грех Израиля: 53 и поработа Ваалу, и поклонися ему, и разгнева Господа Бога Израилева, по всем бывшим прежде его.

## Четвертая книга Царств

**1** И отступи Моав от Израиля, по умертвии Ахаавли. **2** Охозиа же паде из окна, еже в горнице его в Самарии, и разболеся, и посла послы и рече к ним: идите и вопросите у Ваала сквернаго бога Аккаронска, аще жив буду от болезни моя сея? И идоша вопрошати его ради. **3** И Ангел Господень рече ко Илии Фесвитянину, глаголя: востав, иди на сретение послом Охозии царя Самарийска и речеши к ним: или несть Бога во Израили, яко грядете вопрошати Ваала сквернаго бога во Аккароне? **4** И сего ради сице глаголет Господь одр, на негоже возшел еси ту, не имаши слезти с него, яко ту смертию умреши, и иде Илия и рече к ним. **5** И возвратишася послы к нему, и рече к ним: что яко возвратитесь? **6** И реща к нему: муж изыде в сретение нам и рече к нам: идите возвратитесь к царю пославшему вы и глаголите к нему: сице глаголет Господь: или нему Бога во Израили, яко вы грядете вопрошати Ваала сквернаго бога во Аккароне? Сего ради от одра, на негоже возшел еси, не имаши слезти с него, яко ту смертию умреши. **7** И рече к ним царь, глаголя: каков взором бяше муж той вшедый в сретение вам и глаголавый вам словеса сия? **8** И реща к нему: муж космат и поясом усненным препоясан о чреслах своих. И рече царь: Илия Фесвитянин сей есть. **9** И посла к нему старейшину пятьдесятника и пятьдесят мужей его. И възыде и прииде к нему: и се, Илия бе сидя верху горы. И глагола пятьдесятник к нему и рече: человеце Божии, царь зовет тя, сниди. **10** И отвеща Илия и рече к пятьдесятнику: аще есмь человек Божий аз, то да снидет огонь с небесе и снесет тя и пятьдесят твоих (с тобою). И сниде огонь с небесе и снеде

его и пятьдесят мужей его. 11 И приложи царь послати к нему другаго пятьдесятника и пятьдесят (мужей) с ним. И возшед, и глагола пятьдесятник к нему и рече: человек Божий, сице глаголет царь: потщався сниди. 12 И отвеща Илия и глагола к нему и рече: аще человек Божий аз есмь, то да снидет огонь с небесе, и да снесет тя и пятьдесят (мужей) с тобою. И сниде огонь с небесе и снесе его и пятьдесят мужей его. 13 И приложи царь еще послати стареишину, пятьдесятника третияго, и пятьдесят мужей с ним. И прииде к нему пятьдесятник третий, и поклонися на колена своя пред Илиею, и моли его, и глагола к нему и рече: человек Божий, пощади душу мою и душу раб твоих сих пятьдесят пред очима твоима: 14 се, сниде огонь с небесе и пояде два пятьдесятника первыя с пятиюдесятми их: и ныне да пощадится душа рабов твоих пред очима твоима. 15 И глагола Ангел Господень ко Илии и рече: сниди с ним, не убойся от лица их. И воста Илия и сниде с ним к царю, 16 и глагола к нему и рече: сице глаголет Господь: что яко послал еси послы вопрошати Ваала сквернаго бога во Аккароне, аки бы не был Бог во Израиле, еже вопрошити от Него словесе? Сего ради от одра, наньже возшел еси ту, не имаша слезти с него яко смертию умреша. 17 И умре по глаголу Господню, егоже глагогола Илия. И царствова Иорам брат Охозиин вместо его, понеже не име сына Охозиа, в лето второе Иорама сына Иосафата царя Иудина. 18 И прочая словес Охозииных, елика сотвори, не се ли, сия писана в книгах словес дний царей Израилевых?

**2** И бысть вегда взяти Господу Илию в вихре яко на небо и идяше Илия и Елиссей от Галгал. 2 И рече Илия ко Елиссею:

седи убо zde, яко Господь посла мя до Вефиля и рече Елиссей: жив Господь и жива душа твоя, аще оставлю тя и приидоста в Вефиль. 3 И приидоша сынове пророчестии, иже в Вефили, ко Елиссею и реша к нему: разумеши ли, яко взимает Господь днесь господина твоего верху главы твоя (от тебе)? И рече: и аз уразумех, молчите. 4 И рече Илия ко Елиссею: сяди убо zde, яко Господь посла мя во Иерихон. И рече Елиссей: жив Господь и жива душа твоя, аще оставлю тя. И приидоста во Иерихон. 5 И приближишася сынове пророков, иже во Иерихоне, ко Елиссею и реша ему: разумеши ли, яко днесь вземлет Господь господина твоего свыше главы твоя (от тебе)? И рече: ибо и аз уразумех, молчите. 6 И рече ему Илия: седи zde, яко Господь посла мя до Иордана. И рече Елиссей: жив Господь и жива душа твоя, аще оставлю тебе. И поидоста оба, 7 и пятьдесят мужей от сынов пророческих, и сташа противу издалеча: и сии оба стапта при Иордане. 8 И прият Илия милоть свою, и свит ю, и удари ею в воду, и разступися вода сюду и сюду: и проидоста оба по суху. 9 И бысть преходящема има, и рече Илия ко Елиссееви: проси, что сотворю ти прежде неже взят буду от тебе. И рече Елиссей: да будет убо дух, иже в тебе, сугуб во мне. 10 И рече Илия: ожесточил еси просити: аще узриши мя землема от тебе, будет ти тако: аще ли не (узриши), и будет. 11 И бысть идущема има, идяста и глаголаста: и се, колесница огненная и кони огненнии, и разделиша между обема. И взят бысть Илия вихром яко на небо. 12 И Елиссей зряше и вопияше: отче, отче, колесница Израилева и конница его. И не увиде его ктому: и ятся (Елиссей) за ризы своя, и растерза я в два растерзания, 13 и взя милоть Илину

Елиссеи падшую верху его, и возвратися Елиссеи, и ста на брезе Иорданове. 14 И прият (Елиссеи) милоть Илиину, яже паде верху его, и удари в воду, и не разступися вода. И рече: где Бог Илиин Аффо? И удари Елиссеи воды (вторицею), и разступишася сюду и сюду, и преиде Елиссеи по суху. 15 И видеша его сынове пророчестии, иже во Иерихоне сопротив, и реша: почи дух Илиин на Елиссеи. И приидоша на сретение ему и поклонишася ему до земли, 16 и реша к нему: се, ныне со отроки твоими пятьдесят мужей сынов сильных: шедше да взыщут господина твоего, еда како Дух Господень взя, и поверже его на Иордане, или на единей от гор, или на единем от холмов и рече Елиссеи: не посылайте. 17 И принудиша его, и дондеже устыдеса, и рече: послите. И послаша пятьдесят мужей, и искаша три дни, и не обретоша его, 18 и возвратишася к нему: и той седяше во Иерихоне. И рече Елиссеи к ним: не глаголах ли к вам, не идите? 19 И реша мужие града ко Елиссею: се, жилище града благо, якоже ты, господине, видиши, но воды злы и земля неплодна. 20 И рече Елиссеи: принесите ми водонос нов, и всыплите в онь соль. И взяша, и принесоша к нему. 21 И изыде Елиссеи на исходища водная, и всыпа ту соль, и рече: сице глаголет Господь: изцелих воды сия, не будет от них ктому смерти и неплодства. 22 И изцелеша воды до дне сего, по глаголу Елиссееву, егоже глагола. 23 И взыде оттуду во Вефиль. И восходящу ему путем, и дети малы изыдоша из града, и ругахуся ему, и реша ему: гряди, плешиве, гряди. 24 И озресе вслед их, и виде я, и проклят я именем Господним. И се, изыдоша две медведицы из дубравы и растерзаша

от них сорок два отрочища. 25 И иде оттуду в гору Кармилскую, и оттуду возвратися в Самарию.

**3** И Иорам сын Ахаавов воцарися над Израилем в Самарии, в лето осмоенадесять Иосафата царя Иудина, и царствова лет дванадесять, 2 и сотвори лукавое пред очима Господними: обаче не якоже отец его и не якоже мати его: и разруши капища Ваалова, яже сотвори отец его: 3 обаче ко греху Иеровоама сына Наватова, иже введе во грех Израиля, прилепися и не отступи от него. 4 И Моса царь Моавль бе нокид и даяше дань царю Израилеву, сто тысящ агнцев и сто тысящ овнов с рунами. 5 И бысть по умертвии Ахаавли и отвержеся царь Моавль царя Израилева. 6 И изыде царь Иорам во дни оны от Самарии и согляда Израиля, 7 и иде, и посла ко Иосафату царю Иудину, глаголя: царь Моавль отвержеся мене: идеши ли со мною на брань на Моава? И рече: възыду: сице мне, якоже и тебе: якоже людие мои, людие твои: якоже кони мои, кони твои. 8 И рече: киим путем възыдем? И рече: путем пустыни Едомския. 9 И иде царь Израилев и царь Иудин и царь Едомль, и идоша путем седмь дний: и не бе полку воды и скотом сущым с ними. 10 И рече отроком своим царь Израилев: о, яко созва Господь три сия цари идущыя предати их в руце Моавли. 11 И рече Иосафат к нему царь Иудин: есть ли zde пророк Господень, и воспросим Господа им? И отвеща един отрок царя Израилева и рече: zde есть Елиссей сын Сафатов, иже возливаше воду на руце Илиине. 12 И рече Иосафат: есть с ним глагол Господень. И сниде к нему царь Израилев и Иосафат царь Иудин и царь Едомль. 13 И рече Елиссей ко царю Израилеву: что мне и тебе? Иди ко пророком отца твоего и ко пророком матере

твоея. И рече ему царь Израилев: еда созва Господь три цари, еже предати я в руце Моавли? 14 И рече Елисей: жив Господь Сил емуже предстою пред Ним, яко аще бых не лице Иосафата царя Иудина аз приял, то воззрел ли бых на тя, и видел ли бых тя? 15 И ныне приведи ми певца. И бысть егда воспеваше певец, и бысть на нем рука Господня, 16 и рече: тако глаголет Господь: сотворите поток сей рвами рвами, 17 яко тако глаголет Господь: не узрите духа, и ниже увидите дождя: и поток сей наполнится воды, и пиете вы и стяжания ваша и скоти ваши: 18 и легко сие пред очима Господними, и предам Моава в руки ваша, 19 и поразите всяк град тверд, и всяко древо благо низложите, и всяк источник воды заградите, и всяку часть благу разбите камением. 20 И бысть заутра восходящей жертве, и се, воды идяху путем Едомским, и исполнися воды земля. 21 И вси Моавитяне услышаша, яко въздоша тридесяти царя братися с ними. И возопиша отвсюду препоясанныи оружием и реша: ох: и сташа у предела. 22 И ураниша заутра, и солнце возсия на воды: и виде Моав сопотив воды чермны яко кровь, 23 и рече: кровь сия есть от оружия: и бишася царие, и уби муж искреняго своего: и ныне (гряди) на корысти, Моаве. 24 И внидоша в полк Израилев, Израилтяне же восташа. И избиша Моавлян: и побегоша от лица их: и внидоша входяще и биюще Моава, 25 и грады разбиша, и всяку часть благу наверхоша мужие камением, и наполниша ю, и всяк источник заградиша, и всяко древо благо изсекоша, донележе оставиша камение стен разбиено: и обступиша пращницы и разбиша его. 26 И виде царь Моавль, яко укрепися над ним брань, и взя с собою семь сот мужей со

обнаженным оружием, еже просещися ко царю Едомску: и не возмогоша. 27 И поят сына своего первенца, егоже воцари вместо себе, и вознесе его во всесожжение на стене: и бысть раскаяние великое во Израили: и отступиша от него и возвратишася в землю свою.

**4** И жена едина от сынов пророчих возопи ко Елиссею, глаголющи: раб твой муж мой умре, ты же веси, яко раб твой бе бояся Господа: и заимодавец прииде взяти два сына моя себе в рабы. 2 И рече Елиссею: что сотворю ти? Повеждь ми, что имаши ныне в дому? Она же рече: несть у рабы твоя ничтоже в дому, токмо мало елеа, имже помажуся. 3 И рече к ней: иди, испроси себе сосуды отвне от всех сосед твоих, сосуды праздно, не умали: 4 и вниди, и затвори дверь за собою и за сынома твоима, и влиеши (от елеа твоего) во вся сосуды сия, и наполненное возмеш. 5 И отиде от него и сотвори тако, и затвори дверь за собою и за сынома своима: та приношаста к ней, она же вливаше: 6 и бысть егда наполнишася вси сосуды, и рече сынома своима: приближита ми еще сосуд. И реста ей: несть еще сосуда. И ста елей. 7 И прииде и возвести человеку Божию. И рече Елиссею: иди и продаждь сей елей, и заплати лихву твою, и ты и сына твоя жити будете от оставшаго елеа. 8 И бысть во един день, и преиде Елиссею в Соман, и ту жена велия и удержа его снести хлеба: и бысть ему входити и исходити множицею, и уклоняшеся тамо ясти хлеба. 9 И рече жена к мужу своему: се, ныне разумех, яко человек Божий свят сей мимо ходит нас присно: 10 сотворим убо ему горницу, место мало, и поставим ему тамо одр и трапезу, и престол и свещник: и будет внегда входити ему к нам, и



уклоняется тамо. 11 И бысть во един день, и вниде тамо, и уклонися в горницу, и спа тамо. 12 И рече ко Гиезию отрочищу своему: призови ми Соманитяныню сию. И призва ю, и ста пред ним. 13 И рече ему: рцы убо ей: се, удивила еси нас всем попечением сим: что подобает сотворити тебе? Аще есть тебе слово к царю или ко князю силы? Она же рече: (несть, ) посреде людей моих аз есмь живуци. 14 И рече ко Гиезию: что подобает сотворити ей? И рече Гиезий отрочищъ его: воистинну сына несть у нея и муж ея стар. 15 И рече призови ю. И призва ю, и ста при дверех. 16 И рече Елиссеи к ней: во время сие, якоже час сей живуци, ты зачнеши сына. Она же рече: ни, господине, не солжи рабе твоей. 17 И зачат во чреве жена, и роди сына во время сие, якоже час сей живуци, якоже глагола к ней Елиссеи. 18 И возмужа отрочищъ. И бысть, егда изыде ко отцу своему, к жнущым, 19 и рече ко отцу своему: глава моя, глава моя (болит). И рече ко отроку: неси его к матери его. 20 И несе его к матери его, и лежаше на колену ея до полудне, и умре. 21 И вознесе его, и положи его на одре человека Божия: и затвори его, и изыде, и призва мужа своего, и рече ему: 22 послѣ ми убо единого от отрок, и едино от ослят, и теку до человека Божия, и возвращуся. 23 И рече: что яко ты идеши к нему днесь? Не нов месяц, ниже суббота. Она же рече: мир. 24 И оседла осля, и рече ко отрочищу своему: веди, и иди, да не удержиши мене, еже всести, якоже реку тебе: гряди, и иди, и прииди к человеку Божию на гору Кармилскую. 25 И иде, и прииде до человека Божия в гору Кармилскую. И бысть яко виде ю Елиссеи грядущую, и рече ко Гиезию отрочищу своему: се, убо Соманитяныня оная:

26 ныне тецы во сретение ея и речеши ей: мир ли тебе? И  
тече во сретение ей и рече ей: мир ли тебе? Мир ли мужу  
твоему, мир ли отрочищу твоему? Она же рече: мир. 27 И  
прииде ко Елиссею на гору, и ятся за нозе его. И приблизнся  
Гиезий отринути ю. И рече Елиссею: остави ю, яко душа ея  
болезненна в ней, и Господь укры от мене и не возвести  
мне. 28 Она же рече: еда просих сына у господина моего,  
яко рекох: не прельсти мене? 29 И рече Елиссею ко Гиезию:  
препояви чресла твоя и возми жезл мой в руце твои, и иди,  
яко аще обрящеши мужа, да не благословиши его, и аще  
благословит тя муж, не отвещай ему: и возложи жезл мой на  
лице отрочища. 30 И рече мати отрочища: жив Господь и  
жива душа твоя, аще оставлю тебе. И воста Елиссею и иде  
вслед ея. 31 И Гиезий иде пред нею, и возложи жезл на лице  
отрочища, и не бе гласа, и не бе слышания. И возвратися во  
сретение его и поведи ему глаголя: не воста отрочищъ. 32 И  
вниде Елиссею в храмину, и се, отрочищъ умерый положен  
на одре его. 33 И вниде Елиссею в дом и затвори дверь за  
двою собою, и помолися Господу. 34 И възыде, и ляже на  
отрочищи, и положи уста своя на устех его, и очи свои на  
очи его, и руце свои на руце его, и плесне свои на плесну  
его: и слячеса над ним, и дуну на него, и согресея плоть  
отрочища. 35 И обратися, и походи в храмине сюду и сюду:  
и възыде, и слячеса над отрочищем седмижды, и отверзе  
отрочищъ очи свои. 36 И возопи Елиссею ко Гиезию и рече:  
призови ми Соманитяныню сию. И призва ю, и вниде к нему.  
И рече Елиссею: приими сына твоего. 37 И вниде жена, и  
паде на ногу его, и поклонися ему до земли: и прият сына  
своего, и изыде. 38 И Елиссею возвратися в Галгалы. И бе

глад в земли той, и сынове пророчи седяху пред ним. И рече Елиссеи отрочищу своему: настави коноб велий и свари варение сыном пророчим. **39** И изыде един на село собрати зелия дивия: и обрет виноград на селе, и набра в нем яблока дивияго полну ризу свою, и всыпа в котел на сварение, яко не разумеша, **40** и принесе мужем ясти. И бысть ядущим им от варения, и се, возопиша и реша: смерть в конобе, человеце Божий. И не могоша ясти. **41** И рече: возьмите муки и всыплите в коноб. И рече Елиссеи ко Гиезию отрочищу своему: изнеси людем, да ядят. И не бысть ктому злаго глагола в конобе. **42** И муж прииде от Вефариса и принесе к человеку Божию первородных двадесять хлебов ячменных и смоквы. И рече: дадите людем, да ядят. **43** И рече отрок его: что дам сие сту мужем? И рече: даждь людем я, да ядят, яко сице глаголет Господь: будут ясти, и останет. **44** И ядоша, и оста по глаголу Господню.

**5** И Нееман князь силы Сирийския бе муж велий пред господином своим и дивен лицом, яко им даде Господь спасение Сирии: и муж бе силен крепостию прокажен. **2** И из Сирии изыдоша воины и плениша юнотку малу от земли Израилевы: и бе пред женою Неемановою (служба) **3** и рече госпоже своей: о, дабы господин мой был у пророка Божия, иже в Самарии, той бы очистил его и проказы его. **4** И вниде и возвести господину своему и рече: тако и тако глагола юнотка, яже от земли Израилевы. **5** И рече царь Сирийский ко Нееману: иди, вниди, и послю писание ко царю Израилеву. И поиде, и взя в руке свои десять талант сребра и шесть тысящ златник и десять изменяемых риз. **6** И внесе писание к царю Израилеву глаголя: и ныне егда

приидет писание сие к тебе, се, послах к тебе Неемана раба моего, да очистиши его от проказы его. 7 И бысть егда прочте писание царь Израилев, раздра ризы своя и рече: еда аз Бог есмь, еже мертвити и животворити, яко сей посла и мне, да очищу мужа от проказы его? Прочее разумеите и видите, яко се ищет вины ко мне. 8 И бысть егда услыша Елиссеи, яко раздра ризы своя царь Израилев, и посла к царю Израилеву, глаголя: почто раздрал еси ризы твоя? Да приидет ко мне ныне Нееман, и да разумеет, яко есть пророк во Израили. 9 И прииде Нееман на конех и на колесницах и ста при дверех дому Елисеева. 10 И посла Елиссеи посланника к нему, глаголя: шед измыйся седмижды во Иордане, и возвратится плоть твоя к тебе, и очистишися. 11 И разгневался Нееман, и отиде, и рече: се, убо глаголах, яко изыдет ко мне, и станет, и призовет во имя Бога своего, и возложит руку свою на место, и очистит проказу: 12 не благи ли Авана и Фарфар реки Дамасковы паче Иордана и всех вод Израилевых? Не шед ли измыюся в них и очишуся? И уклонися и отиде во гнев. 13 И приближишася отроцы его и реша ему: аще бы велие слово глаголал пророк тебе, не бы ли сотворил еси? А яко рече к тебе: измыйся, и очистишися. 14 И сниде Нееман, и погрузися во Иордане седмижды, по глаголу Елисееву: и возвратися плоть его яко плоть отроцате млада, и очистися. 15 И возвратися ко Елиссею сам и все ополчение его, и прииде и ста пред ним и рече: се, ныне разумех, яко несть Бога во всей земли, но токмо во Израили: и ныне приими благословение от раба твоего. 16 И рече Елиссеи: жив Господь, Емуже предстах пред ним, аще прииму. И понуждаше его взяти, и не послуша. 17 И

рече Нееман: аще ли не (хощеши взяти), то даждь рабу твоему время, супруг мсков, от земли сея червленья: яко и сотворит отселе раб твой всесождения и жертвы богом иным, но Господу единому, **18** по глаголу сему и о словеси сем: и очистит Господь раба твоего, егда внидет господин мой в дом Ремманов на поклонение тамо: и той почует на руку мою, и поклонюся в дому Реммани, внегда кланяться ему в дому Реммани, и очистит Господь раба твоего по словеси сему. **19** И рече Елиссею ко Нееману: иди с миром. И отиде от него на Хаврафа земли. **20** И рече Гиезий отрочищь Елисеев: се, пощаде господин мой Неемана Сириянина сего, еже не взяти от руки его, яже принесе: жив Господь, яко имам тещи вслед его, и возму от него нечто. **21** И тече Гиезий во след Нееманов. И виде его Нееман текуща вслед себе, и возвратися с колесницы на сретение ему и рече: мир ли? **22** И рече Гиезий: мир: господин мой посла мя, глаголя: се, ныне приидоста ко мне два отрочища от горы Ефремели от сынов пророчих: даждь убо има талант сребра и две премены риз. **23** И рече Нееман: возми два таланта сребра. И взя два таланта во два мешца и две премены риз, и возложи на два отрочища своя, и несоста пред ним: **24** и приидоша в сумраки, и взя от рук их и сокры во храмине, и отпусти мужы. **25** И сам вниде и предста господину своему. И рече к нему Елиссею: откуда (пришел еси), Гиезие? И рече Гиезий: не исходил раб твой никаможе. **26** И рече к нему Елиссею: не ходило ли сердце мое с тобою, и видех, егда возвращашеся муж с колесницы своей во сретение тебе? И ныне взял еси сребро и ризы взял еси, да купиши за них вертограды и маслины и винограды, и овцы и волы, и отроки

и отроковицы: 27 и проказа Нееманова да прильпнет к тебе и к семени твоему во веки. И изыде от лица его прокажен яко снег.

**6** И реша сынове пророчи ко Елиссею: се, убо место, идеже мы живем противу тебе, тесно нам: 2 да идем ныне до Иордана, и да возмем оттуду кийждо муж по бервну единому и сотворим себе ту обиталища пребывати тамо. И рече: идите. 3 И рече един кротце: гряди и сам с рабы твоими. И рече: аз пойду. 4 И иде с ними: и приидоша ко Иордану, и секоша древа: 5 и егда един отсекаше бервно, и се, железо спаде с топорища и впаде в воду. И возопи: о, господине, и сие заемное. 6 И рече человек Божий: где паде? И показа ему место. И отсече древо и вверже и тамо: и всплыве железо. 7 И рече: возми себе. И простре руку свою и взят е. 8 И царь Сирский бе воюя на Израиля, и совеща со отроки своими, глаголя: на месте некоем сокровеннем ополчуся. 9 И посла Елиссея ко царю Израилеву, глаголя: блюдиися не преити на место сие, яко ту Сирияне залягоша. 10 И посла царь Израилев на место, о немже рече ему Елиссея, и соблюдеся оттуду не единою, ниже дважды. 11 И смутися душа царя Сирска о словеси сем: и призва отроки своя и рече и ним: не возвестите ли мне, кто предает мя царю Израилеву? 12 И рече един от отрок его: ни, господине мой царю: яко пророк Елиссея, иже во Израили, возвещает царю Израилеву вся словеса, яже аще глаголеши в сокровищи ложницы твоя. 13 И рече: идите, видите, где сей, и послав возму его. И возвестиша ему, глаголюще: се, есть в Дофаиме. 14 И посла тамо кони и колесницы и силу тяжку: и приидоша нощию и окружиша град. 15 И урани раб Елиссеев востати,

и изыде: и се, сила обступи град, и кони и колесницы. И рече отрок его к нему: о, господине, что сотворим? 16 И рече Елиссей: не бойся, яко множае иже с нами, нежели с ними. 17 И помолися Елиссей и рече: Господи, отверзи ныне очи отрока, да узрит. И отверзе Господь очи его, и виде: и се, гора исполнь коней, и колесница огненна окрест Елиссеа. 18 И снидоша к нему: и помолися Елиссей ко Господу и рече: порази убо язык сей невидением. И порази их невидением по глаголу Елиссееву. 19 И рече к ним Елиссей: не сей путь и не сей град: грядите по мне, и отведу вы к мужу, егоже ищете. И отведе их в Самарию. 20 И бысть егда внидоша в Самарию, и рече Елиссей: отверзи убо, Господи, очи их, и да видят. И отверзе Господь очи их, и видеша: и се, бяху посреде Самарии. 21 И рече царь Израилев ко Елиссею, егда увиде я: аще поражу я поражением, отче? 22 И рече Елиссеи: да не поразиши: еда ли пленил еси их мечем твоим и луком твоим, да избиеши? И предложи им хлебы и воду, да ядят и да пьют и да отидут ко господину своему. 23 И предложи им предложение велие, и ядоша и пиша, и отпусти я, и идоша ко господину своему: и не приложиша ктому воины приходити из Сирии в землю Израилеву. 24 И бысть по сих, и собра сын Адеров царь Сирийский все ополчение свое, и възыде и обседе Самарию. 25 И бысть глад велик в Самарии: и се, обседоша ю, дондеже бысть глава о слова за пятьдесят сикль сребра, и четвертая часть меры гноя голубинаго за пять сикль сребра. 26 И бысть царь Израилев обходяй по стенам: и жена (некая) возопи к нему, глаголющи: спаси мя, господине мой царю. 27 И рече ей: аще тебе не спасает Господь, како аз спасу тя? Еда от гумна или от точила? 28 И

рече ей царь: что ти есть? И рече: сия жена ко мне рече: даждь сына твоего, да съядим его днесь, а утро моего сына съядим: **29** и испекохом сына моего и снедохом его: и рех к ней в день второй: даждь сына твоего, и съядим его: и скры сына своего. **30** И бысть егда услыша царь Израилев словеса жены, раздра ризы своя и сам хождаше по стене, и видеша людие вретнице на плоти его внутрь. **31** И рече царь: сия да сотворит ми Бог и сия да приложит ми, аще будет глава Елисеева на нем днесь. **32** Елиссеи же седяше в дому своем, и старцы седяху с ним. И посла царь мужа пред лицом своим. И прежде даже приити посланному к нему, и той рече ко старцем: не весте ли, яко посла сын убийцы сей, да отсечет главу мою? Видите, егда приидет вестник, заключите двери и стисните его во дверех: не топот ли ног господина его вслед его? **33** И еще ему глаголющу с ними, и се, вестник сниде к нему и рече: се, сие зло от Господа: что потерплю Господеви ксему?

**7** И рече Елиссеи: слышите слово Господне, сице глаголет Господь: якоже час сей, утро мера муки пшеничны будет за сикль един, и две меры ячменя за сикль един во вратех Самарии. **2** И отвеща тристат, на егоже руку царь почиваше, и рече и Елисею: се, аще отверзет Господь и хляби небесныя, то не будет глагол сей. И Елиссеи рече: се, ты узриши очима твоима, и оттуду не имаши ясти. **3** И бяху четыре мужа прокажени при вратех града. И рече муж ко искреннему своему: что мы седим zde дондеже умрем? **4** Аще речем: внидем во град, то глад есть во граде, и умрем тамо: аще же седим zde, то и тако умрем: и ныне идем и внидем в полк Сирийский: аще живут ны, живи будем: аще ли умертвят



ны, то умрем. 5 И восташа в сумраце ити в полк Сирийский и внидоша среде полка Сирийска, и се, не бе мужа ту. 6 И Господь слышан сотвори полку Сирийску глас колесниц и глас коней и глас силы великия. И рече муж ко брату своему: се, ныне наял есть на нас царь Израилев цари Хеттейски и цари Египетския приити на ны. 7 И восташа, и бежаша в сумраце, и оставиша сени своя и кони своя и ослы своя, якоже быша во стану, и бежаша души ради своя. 8 И внидоша прокаженнии сии до среды полка, и внидоша в сень едину, и ядоша и пиша, и взяша оттуду сребро и злато и одежды, и отидоша, и скрыша: и возвратишася, и внидоша в другую сень, и взяша оттуду, и отидоша, и скрыша. 9 И рече муж ко искреннему своему: не тако мы творим: день сей день благоговещения есть, мы же молчим и медлим до света утренняго, и обрящем беззаконие: и ныне приидем и внидем, и возвестим в дому царева. 10 И внидоша, и возопиша ко вратом града и возвестиша им, глаголюще: внидохом в полк Сирийский, и се, не бысть ту мужа, ни гласа человека, но токмо кони привязани, и ослята, и сени их якоже суть. 11 И возопиша вратницы, и возвестиша в дому царева внутрь. 12 И воста ноцию царь и рече ко отроком своим: возвещу вам ныне, яже сотвориша нам Сириане: разумеша, яко гладни есмы, и изыдоша из стана, и сокрышася на селе, глаголюще: яко изыдут из града, и имем я живы и во град внидем. 13 И отвеща един от отрок его и рече: да возмут ныне пять коней оставших, иже осташася zde, се, суть у толикаго множества Израилева оставшиися, и послем тамо, и узрим. 14 И взяша два всадника коней: и посла царь Израилев вслед царя Сирска, глаголя: идите и видите. 15 И идоша

вслед их даже до Иордана, и се, весь путь исполнен одежд и оружия, яже повергоша Сириане, внегда устрашится им. И возвратишася посланнии, и возвестиша царю. 16 И изыдоша людие, и разграбиша весь стан Сирский. И бысть мера муки пшеничны за сикль един и две меры ячменя за сикль, по глаголу Господню. 17 И царь пристави тристата, на егоже руже царь почиваше, у врат: и попраша его людие во вратех, и умре, якоже глагола человек Божий, иже глагола, егда посланный прииде к нему. 18 И бысть якоже рече Елиссей к царю глаголя: две меры ячменя за сикль един, и мера муки пшеничны за сикль: и будет якоже сей час заутра во вратех Самарии. 19 И отвеща тристат Елиссею и рече: аще Господь отверзет хляби небесныя, не будет глагол сей. И рече Елиссей: се, узриши очима твоима, и оттуду и не имаши ясти. 20 И бысть тако, и попраша его людие во вратех, и умре.

**8** И глагола Елиссей к жене, еяже воскреси сына, глаголя: востани и иди ты и дом твой, и обитай идеже аще можеша обитати, яко призва Господь глад на землю, и приидет на землю семь лет. 2 И воста жена, и сотвори по глаголу Елиссееву, и поиде сама и дом ея, и обита на земли иноплеменничи семь лет. 3 И бысть по скончании седми лет, и возвратися жена от земли иноплеменничи во град, и прииде возопити к царю о доме своем и о селех своих. 4 И глагола царь ко Гиезию отроку Елиссеа человека Божия глаголя: повеждь ми ныне вся великая, яже сотвори Елиссей. 5 И бысть ему поведающе цареви, яко жива сотвори сына умершаго: и се, жена, еяже воскреси Елиссей сына ея, вопиюще ко цареви о доме своем и о селех своих, и рече

Гиезий: господине царю, сия жена и сей сын ея, егоже жива сотвори Елиссей. 6 И вопроши царь жену: и поведи ему. И даде ей царь скопца единого, глаголя возврати вся, яже ея суть, и вся плоды села ея, от да, в оньже остави землю, даже до ныне. 7 И прииде Елиссеи в Дамаск. И сын Адеров царь Сирский разболеся, и возвестиша ему, глаголюще: прииде человек Божий до zde. 8 И рече царь ко Азаилу: прими в руку свою дар, и иди во сретение человеку Божию, и вопроши Господа им, глаголя: аще ли жив буду от болезни сея? 9 И иде Азаил на сретение ему, и взя дар в руку свою, и вся благая Дамаскова, бремя сорок четыре вельблюд, и прииде, и ста пред ним, и рече ко Елиссею: сын твой, сын Адеров, царь Сирский, посла мя к тебе вопросити, глаголя: буду ли жив от болезни моя сея? 10 И рече к нему Елиссеи: иди и рцы ему: живя поживеши: но показа ми Господь, яко смертию умрет. 11 И предста лицу его, и возложи (руки) даже до постыдения, и плакася человек Божий. 12 И рече Азаил: что яко господин мой плачет? И рече: вем елика сотвориши сыном Израилевым зла: крепости их сожжеша огнем, и избранныя их избиеша мечем, и младенцы их разбиеша, и во чреве имеющыя их расторгнеша. 13 И рече Азаил: кто есть раб твой, пес мертвый, яко сотворит глагол сей? И рече Елиссеи: показа ми тя Господь царствующа над Сириею. 14 И отиде от Елиссеа и вниде ко господину своему. И рече ему (царь): что ти рече Елиссеи? Отвеща: рече ми Елиссеи, живя поживеши. 15 И бысть во утрии, и взя одеяло, и намочи в воде, и обложи на лице его, и умре: и воцарися Азаил вместо его. 16 В лето пятое Иорама сына Ахаава царя Израилева и Иосафата царя Иудина, воцарися Иорам сын

Иосафатов царь Иудин: 17 сын тридесяти и двою лету бе, внегда воцаритися ему, и осмь лет царствова во Иерусалиме, 18 и ходи в пути царей Израилевых, якоже сотвори дом Ахаавль, бе бо дщи Ахаавля жена ему, и сотвори лукавое пред Господем. 19 И не хотяше Господь потребити Иуды, Давида ради раба Своего, якоже рече дати ему светилник и сыном его во вся дни. 20 Во дни его отвержеся Едом из под руки Иудины и постави над собою царя. 21 И възиде Иорам в Сиор, и вся колесницы яже с ним. И бысть ему воставшу, и изби Едома обступившаго окрест его, и князи колесниц, и бежаша людие в селения своя. 22 И отступи Едом из под руки Иудины да дне сего: тогда отвержеся Ловна во время оно. 23 И прочая словес Иорамлих, и вся елика сотвори, не се ли, сия писана в книзе словес дний царей Иудиных? 24 И успе Иорам со отцы своими, и погребен бысть со отцы своими во граде Давида отца своего: и царствова Охозиа сын его вместо его. 25 В лето второенадесять Иорама сына Ахаавля царя Израилева, царствовати нача Охозиа сын Иорама царя Иудина: 26 сын двадесяти двух лет бысть Охозиа, егда нача царствовати, и лето едино царствова во Иерусалиме. Имя же матери его Гофолиа, дщерь Амвриа царя Израилева. 27 И хождаше по путем дому Ахаавля, и сотвори лукавое пред Господем, якоже дом Ахаавль: зять бо бе дому Ахаавля. 28 И иде со Иорамом сыном Ахаавлим на брань, на Азаила царя иноплеменнича в Рамоф Галаадский, и уязвиша Сиряне Иорама. 29 И возвратися царь Иорам целитися во Иезраель от язв, имиже уязвиша его в Рамофе, егда ратоваше той на Азаила царя Сирска, и Охозиа сын

Иорамль царь Иудин сниде видети Иорама, сына Ахаавля, во Иезраель, яко боляше той.

**9** Елисей пророк призва единого от сынов пророчих и рече ему: препояши чресла своя, и возми сосуд елеа сего в руку твою, и иди в Рамоф Галаадский: **2** и внидеши тамо, и узриши тамо Ииуа сына Иосафата сына Намессиева, и внидеши, и изведеши его от среды братии его, и введеши его во внутреннюю клеть: **3** и возмеша сосуд елеа, и возлиеша на главу его, и рцы: сице глаголет Господь: помазах тя в царя над Израилем: и отверзеша двери, и да бежиши, и да не пребудеша тамо. **4** И иде отрочищь пророк в Рамоф Галаадский: **5** и вниде, и се, князи силы седяху, и рече: слово ми есть к тебе, о, княже. И рече Ииуй: к кому от всех нас? И рече: к тебе, княже. **6** И воста и вниде в дом: и возлия елей на главу его и рече ему: сице глаголет Господь Бог Израилев: помазах тя в царя над людьми Господними, над Израилем. **7** И да потребиши дом Ахаава господина твоего от лица Моего, и отмстиши кровь рабов Моих пророков и кровь всех рабов Господних от руки Иезавелины. **8** И от руки всего дому Ахаавля, и потребиши от дому Ахаавля мочащагося к стене, и содержащагося, и оставльшагося во Израили: **9** и предам дом Ахаавль, якоже дом Иеровоама сына Наватова и якоже дом Ваасы сына Ахиина: **10** и Иезавель снедят пси в части Иезраеля, и не будет погребаящаго ю. И отверзе двери и убежа. **11** Ииуй же изыде ко отроком господина своего. И реша ему: мир ли? Что яко вниде неистовый сей к тебе? И рече им: вы весте мужа и суесловие его. **12** И реша: не правда, (аще не возвестиши?) возвести убо нам. И рече Ииуй к ним: тако и тако рече ко мне, глаголя:

сице глаголет Господь: помазах тя в царя над Израилем.

13 И слышавше текоша спешно, и взя кийждо ризы своя, и положиша под ним, понеже на едином от степеней сядяше, и вострубиша в рог и реша: воцарися Ииуй. 14 И возвратися Ииуй сын Иосафата сына Намессиева ко Иораму. Иорам же сам стрежаше в Рамофе Галаадстем и весь Израиль от лица Азаила царя Сирийска. 15 И возвратися Иорам царь целитися во Иезраели от язв, имиже уязвиша его Сиряне, егда брашеся со Азаилом царем Сирийским. И рече Ииуй: аще есть душа ваша со мною, да не изыдет из града беглец, ити и возвестити во Иезраели. 16 И вседе на коня, и поиде Ииуй, и сниде во Иезраель, яко Иорам царь Израилев целяшеся во Иезраели от стреляний, имиже устрелиша его Арамины в Рамофе на брани со Азаилом царем Сирским, яко той бе силен и муж силы, и лежаше тамо. И Охозиа царь Иудин прииде видети Иорама. 17 И страж възиде на столп во Иезраели, и виде прах Ииуев, егда ити ему и рече: прах аз вижу. И рече Иорам: всади мужа на конь и послы противу им, и да речет: мир ли? 18 И иде всадник конный на сретение ему и рече: тако глаголет царь: мир ли? И рече Ииуй: что тебе и миру? Обратися вслед мене. И возвести страж, глаголя: прииде посланный до них и не возвратися. 19 И посла всадника коннаго втораго, и прииде к нему и рече: тако рече царь: мир ли? И рече Ииуй: что тебе и миру? Возвратися вслед мене. 20 И возвести страж, глаголя: прииде до них и не возвратися: и вождь ведяше Ииуа сына Намессиина, яко в преме не бысть. 21 И рече Иорам: впрягите. И впрягоша колесницу: и изыде Иорам царь Израилев и Охозиа царь Иудин, кийждо на колеснице

своей, и изыдosta на сретение Ииуа, и обретоста его и части Навуфеа Иезраилитина. 22 И бысть яко увиде Иорам Ииуа, и рече мир ли, Ииуе? И рече Ииуй что тебе и миру? Еще блуды Иезавели матери твоея, и чарове ея многия. 23 И обрати Иорам руки своя и бежа, и рече ко Охозии: лесть, Охозие. 24 И наляче Ииуй рукою своею лук и устрели Иорама посреде плещу его, и изыде стрела сквозе сердце его: и преклонися на колена своя. 25 И рече Ииуй к Вадекару тристату своему: возми и верзи его на части села Навуфеа Иезраилитина, яко помню, аз и ты вседшии на колесницы идохом вслед Ахаава отца его, и Господь рече о нем пррочество сие, глаголя: 26 не видех ли крове Навуфеевы и крове сынов его вчера, рече Господь? И воздам ему на части сей, рече Господь: и ныне убо взем поверзи его на части сей по глаголу Господню. 27 И Охозиа царь Иудин виде, и побеже путем вефган и гна по нем Ииуй и рече: и сего (не имам оставити). И порази его на колеснице егда идяше в Гай, иже есть Иевлаам и убежа в Магеддон, и умре тамо. 28 И возложиша его отроцы его на колесницу и везоша его во Иерусалим, и погребоша его во гробе его во граде Давидове. 29 И в первоенадесять лето Иорама царя Израилева воцарися Охозиа над Иудою. 30 И прииде Ииуй во Иезраель (град). Иезавель же услыша, и намаза лице свое и украси главу свою, и приниче окном. 31 И Ииуй вхождаше во град и рече: мир ли Замврию, убийце господина своего? 32 И воззре лицом своим на окно и виде ю и рече: кто ты еси? Сниди ко мне. И преклонистася к нему два скопца. 33 И рече Ииуй: сверзита ю. И свергоста ю, и окропишася кровию ея стены и кони, и попраша ю. 34 И вниде Ииуй, и яде и пи, и рече: осмотрите ныне проклятую

сию, и погребите ю, яко дочь царева есть. 35 И идоша погребсти ю, и не обретоша от нея ничто ино, токмо лоб и ноги и длани рук. 36 И возвратишася и возвестиша ему. И рече: слово Господне, еже глагола рукою раба Своего Илии Фесвитянина, глаголя: в части Иезраеля снут пси плоть Иезавелину: 37 и будет труп Иезавелин аки гной на лица села в части Иезраеля, яко не рещи им: сия есть Иезавель.

**10** И Ахааву беша седьдесят сынове во Самарии. И написа писание Ииуй и посла в Самарию ко князем Самарийским и к старейшинам и ко кормителем сынов Ахаавлих, глаголя: 2 и ныне егда приидет писание сие к вам, и с вами сынове господина вашего, и с вами колесницы и кони, и грады тверды и оружия: 3 и узрите благаго и праваго в сынех господина вашего, и поставите его на престоле отца его, и да воюете о доме господина вашего. 4 И убояшася зело и реша: се, два царя не возмогоста стати противу лицу его, и како мы станем? 5 И послаша иже над домом и иже над градом, и старейшины, и кормителе ко Ииую, глаголголюще: отроцы мы твои, и елика аще речеши к нам, сотворим: не воцарим мужа, благое пред очима твоима сотворим. 6 И написа к ним Ииуй писание второе, глаголя: аще вы мои и гласа моего вы послушаете, возьмите главы мужей сынов господина вашего и принесите ко мне, якоже час утро, во Иезраель. И бе сынов царевых седьдесят мужей, сии началницы града вскормиша их. 7 И бысть егда прииде к ним писание, и взяша сыны царевы и заклаша их седьдесят мужей, и возложиша главы их в кошницы и послаша их к нему во Иезраель. 8 И прииде вестник, и возвести ему, глаголя: принесоша главы сынов царевых. И рече: положите я в два холма при вратех



града до заутра. 9 И бысть заутра, и изыде и ста во вратех града, и рече ко всем людем: праведни вы: се, аз есмь, обратихся на господина моего и убих его: и кто порази всех сих? 10 Видите убо, яко не падет от глагола Господня на землю, егоже глагола Господь на дом Ахаавль: и Господь сотвори, елика глагола рукою раба Своего Илии. 11 И изби Ииуй всех оставшихся в дому Ахаавли во Иезраели, и вся вельможы его, и знаемые его, и жерцы его, яко не останися его останку. 12 И воста и иде в Самарию сам, в Вефакад пастырский при пути. 13 И Ииуй обрете братию Охозии царя Иудина и рече: кто вы? И реша: братия Охозиины мы, и снидохом поздравити сыны царевы и сыны обладающия. 14 И рече: поимите я живы. И взяша их живых, и заклаша их в Вефакаде, четыредесять два мужа: и не остави мужа от них. 15 И иде оттуду, и обрете Ионадава сына Рихавля на пути во сретение себе, и благослови его. И рече к нему Ииуй: аще есть сердце твое с сердцем моим право, якоже сердце мое с сердцем твоим? И рече Ионадав: есть. И рече Ииуй: и аще есть, даждь руку твою. И даде руку свою. И возведе его к себе на колесницу 16 и рече к нему: гряди со мною и виждь, внегда ревновати мне по Господе саваофе. И посади его на колесницу свою. 17 И вниде в Самарию, и изби всех оставшихся Ахаавлих в Самарии, дондеже истребити ему по глаголу Господню, егоже глагола ко Илии. 18 И собра Ииуй вся люди и рече к ним: Ахаав поработа Ваалу мало, Ииуй же поработает ему много: 19 и ныне вся пророки Вааловы, вся рабы его и жерцы его призовите ко мне, муж да не потаится, яко жертва велика Ваалу: и всяк иже потаится, не будет жив. И Ииуй сотвори лестию, да погубит рабы Вааловы. 20 И рече

Ииуй: освятите жертву Ваалу и служение. И проповедаша.

21 И посла Ииуй во весь Израиль и рече, глаголя: и ныне вси раби Вааловы, и вси жерцы его, и вси пророцы его, да никтоже останется, яко жертву велику творю: иже останется, не будет жив и приидоша вси раби Вааловы, и вси жерцы его, и вси пророцы его: не оастся муж, иже не прииде: и внидоша во храм Ваалов, и наполнися храм Ваалов от края да края. 22 И рече Ииуй к сущым над домом одежд: изнесите одежды всем рабом Вааловым. И изнесе им ризохранитель.

23 И вниде Ииуй и Ионадав сын Рихавль в храмину Ваалову и рече рабом Вааловым: испытайте и видите, аще есть с вами от рабов Господних, и вышлите всех рабов Господних обретшихся тамо. И бысть якоже глагола Ииуй, яко не бе от рабов Господних, но токмо едини раби Вааловы. 24 И вниде сотворити жертвы и всесожжения и Ииуй постави себе вне осмьдесят мужей и рече: муж иже аще угонзет от мужей, иже аз извожду в руки ваша, душа его вместо души его. 25 И бысть егда сконча творяй всесожжения, и рече Ииуй предтекущым и тристатом: вшедше избийте их, да не изыдет от них муж. И избиша их острием меча и повергоша предтекуции и тристаты, и идоша даже до града храма Ваалова: 26 и изнесоша кумир Ваалов и сожгоша его: 27 и разбиша кумиры Вааловы, и низвергоша дом Ваалов, и определиша его на афедрон даже до дне сего. 28 И погуби Ииуй храм Ваалов от Израиля. 29 Обаче от грехов Иероваама сына Наватова, иже введе в грех Израиля, не отступи Ииуй от последования их: юницы златыя, яже в Вефили и в Дане. 30 И рече Господь ко Ииую: за сия, елика ублажил еси сотворити правое пред очима Моима, и вся

елика по сердцу Моему сотворил еси дому Ахаавлю, сынове твои до четвертаго рода сядут на престоле во Израили. 31 И Ииуй не сохрани ходити в законе Господни всем сердцем своим: не отступи от грехов Иеровоама сына Наватова, иже в грех введе Израиля. 32 Во дни оны нача Господь посещати во Израили: и порази их Азаил во всех пределех Израилевых, 33 от Иордана на восток солнца, всю землю Галаадску и Гаддииску, и Рувимову и Манассиину, от Ароира, иже есть при устии потока Арнонска, и Галаад и Васан. 34 И прочая словес Ииувых, и вся яже сотвори, и вся сила его, и совещания, яже совеща, не се ли, сия написана в книзе словес дний царей Израилевых? 35 И успе Ииуй со отцы своими, и погребоша его в Самарии. И воцарися Иоахаз сын его вместо его. 36 И дний бяше, в няже Ииуй царствова над Израилем в Самарии, двадесять осмь лет.

**11** И Гофолия мати Охозиина виде, яко умре сын ея, и воста и погуби все семя царево. 2 Иосавееф же дщи царя Иорама, сестра Охозиина, поя Иоаса сына брата своего, и украде его от среды сынов царевых избивеных, того и доилицу его в клетки постельней, и утаи его от лица Гофолии, и не умертвиша его: 3 и бе с нею крьемь в дому Господни шесть лет: и Гофолия бе царствующи в земли той. 4 И в седмое лето посла Иодай жрец, и поят стоначалники хорримски и расимски, и возведе я к себе в дом Господень, и завеща им завет Господень, и закла их пред Господем: и показа им Иодай сына царска, 5 и заповеда им, глаголя: сие слово, еже сотворите: третия часть от вас да снидет в субботу, и да стрежете стражбу дому царева во вратех, 6 и третия часть у дверей Пути, и третия часть у врат созади протекаюшнх,

и да устрезете стражбу дому: 7 и две части в вас, всяк исходяй в субботу, и да хранят стражбу дому Господня при цари: 8 и обступите царя около, кийждо оружие свое имый в руке своей, и входяй в садироф и да умрет: и будите с царем, егда входити ему и исходити. 9 И сотвориша стоначалницы вся, елика заповеда Иодай смысленый: и поя кийждо мужы своя, и входящя в субботу со исходящими в субботу, и внидоша ко Иодаю жерцу. 10 И даде жрец сотником копия и щиты царя Давида, яже быша в дому Господни: 11 и быша в руках воевод и предтекущих, и сотвориша сотницы и предходящи по всему, елико заповеда им жрец. И собра жрец Господень вся люди земли в дом Господень: и сташа предтекущи, кийждо их оружие имый в руке своей, от страны дому десныя, даже да страны дому шуия жертвенныя, и дому царева около: 12 и изведе сына царева, и возложи на него венец (царский) и свидение, и воцари его, и помаза его. И восплескаша руками и реша: да живет царь. 13 И услыша Гофолия глас предтекущих людей, и вниде к народу в дом Господень, 14 и виде, и се, царь стояше на столпе по обычаю: и бяху пред царем певцы и трубы, и вси людие земли радующесе и трубяще в трубы. И раздра Гофолия ризы своя и возопи: измена, измена. 15 И заповеда Иодай жрец стоначалником и властелем силы, и рече к ним: изведите ю вон из полков, и входяй вслед ея смертию да умрет от оружия: понеже рече жрец, да не умрет в дому Господни. 16 И возложиша на ню руке, и изведоша ю скопцы путем исхода коней дому царева, и умре ту. 17 И завеща Иодай завет между Господем и между царем и между людьми, яко быти им в люди Господни: и между

царем и между людьми. **18** И внидоша вси людие земли в дом Ваалов и разбиша его, и жертвенники его и образы его сокрушиша добре, и Мафана жерца Ваалова убиша пред лицом жертвенников. И постави жрец властели в дому Господни, **19** и взя стоначалники, и хоррима и расима, и вся люди земли, и изведе царя от дому Господня: и внидоша путем врат предтекущих дому царева, и посадиша его на престоле царева. **20** И возрадовашася вси людие земли, и град умолче: и Гофолию умертвиша мечем в дому царева. **21** Сын седми лет Иоас егда нача царствовати.

**12** В лето седмое Ииуа воцарися Иоас, и четыредесять лет царствова во Иерусалиме. Имя же матере его Савиа от Вирсавеи. **2** И сотвори Иоас правое пред Господем во вся дни, в няже просвети его Иодай иерей: **3** обаче высоких не преставиша, и тамо еще людие жряху и кадяху на высоких. **4** И рече Иоас к жрецем: все серебро святых вносимое в дом Господень, серебро оцененя, муж серебро взявый оцененя, все серебро, еже аще взыдет на сердце мужа внести в дом Господень, **5** да возмут себе жерцы, муж от продания своего, и тии да укрепят ведек дому во всех, идеже аще обрящется ведек. **6** И бысть в двадесять третье лето царя Иоаса, не укрепиша жерцы ведека храма: **7** и призва царь Иоас Иодая жерца и жерцы, и рече к ним: что яко не укреписте ведека храма? И ныне не принимайте серебра от продажей ваших, яко на ведек храма дасте е. **8** И совещашася жерцы не примати серебра от людий и не укрепляти ведека храма. **9** И взя Иодай жрец кивот един, и сотвори в нем скважню, и положи его при олтари одесную входящих мужей в дом Господень: и влагаху тамо жерцы

хранящий дверь все серебро приносимое в дом Господень. 10 И бысть егда увидеша, яко много серебра в ковчезе, и възыде писчий царев, и жрец великий, и сребросечцы и открыша, и сочтоша серебро обретшееся в дому Господни: 11 и даша серебро уготованное в руке творящих дела на сосуды дому Господня: и раздаша древоделем и делателем зиждущым в дому Господни, 12 и стеноделателем, и художником, и секущым каменья на купление древес, и каменья тесаного на строение ведека дому Господня, на вся елика иждивена быша на утверждение храма. 13 Обаче не творишася храму Господню двери серебряны, гвоздие, фиалы и трубы, ни вси сосуды златы, и сосуды серебряны от серебра принесенного в дом Господень: 14 понеже творящым дела дадеся сие, и утвердиша тем дом Господень. 15 И не считаху мужей, имже даяху серебро в руки, даяти творящым дела, зане верно творяху. 16 Серебро за грехи и серебро за преступление, елико внесено бысть в дом Господень, жерцем бысть. 17 Тогда възыде Азаил царь Сирский и воева на Геф, и взя его Азаил и разби его: и обрати Азаил лице свое възыти на Иерусалим. 18 И взя Иоас царь Иудин вся святая, елика освяти Иосафат и Иорам и Охозиа, отцы его и царие Иудины, и святая его, и все злато обретшееся в сокровищих дому Господня и дому царева, и посла Азаилу царю Сирску, и отиде от Иерусалима. 19 И прочая словес Иоасовых, и вся елика сотвори, не се ли, сия писана в книзе словес дний царей Иудиных? 20 И востаха отроцы его, и совещаша всяк совет, и убиша Иоаса в доме Маллони, иже в Саале. 21 И Иезехар сын Иемуафов, и Иезевуф сын Сомиров, раби его убиша его, и

умре, и погребоша его со отцы его во граде Давидове. И воцарися Амессиа сын его вместо его.

**13** В лето двадесять третье Иоаса сына Охозиина царя Иудина царствова Иоахаз сын Ииув над Израилем в Самарии семнадцать лет, **2** и сотвори лукавое пред очима Господними, и иде вслед грехов Иеровоама сына Наватова, иже в грех введе Израиля и не остана злобы той. **3** И разгневался Господь гневом на Израиля, и вдаде их в руке Азаилу царю Сирску и в руке сына Адера, сына Азаилева, во вся дни. **4** И помолися Иоахаз лицу Господню, и услыша его Господь, яко виде скорбь Израилеву, понеже оскорби их царь Сирский. **5** И даде Господь спасение Израилю, и избыша от руку Сирску: и вселишася и сынове Израилевы в селения своя якоже и вчера и третияго дне: **6** обаче не отступиша от грехов дому Иеровоама сына Наватова, иже и в грех введе Израиля, в нем ходяху: и дубрава стояше в Самарии. **7** Яко не останася Иоахазу людие, но токмо пятьдесят конник, и десять колесниц, и десять тысяч пешцев, яко изгубил их царь Сирский, и положи я яко прах на поприе. **8** И прочая словес Иоахазовых, и вся елика сотвори, и силы его, не сия ли писана в книзе словес дний царей Израилевых? **9** И успе Иоахаз со отцы своими, и погребоша его в Самарии: и воцарися Иоас сын его вместо его. **10** В лето тридесять седмое Иоаса царя Иудина царствова Иоас сын Иоахазов над Израилем в Самарии шестнадцать лет, **11** и сотвори лукавое пред очима Господними: и отступи от всех грехов Иеровоама сына Наватова, иже в грех введе Израиля, в том хоуждаше. **12** И прочая словес Иоасовых и вся елика сотвори, и силы его, яже сотвори со Амессием царем Иудиным, не сия

ли писана в книзе словес дний царей Израилевых? 13 И успе Иоас со отцы своими, Иеровоам же седе на престоле его: и погребен бысть Иоас в Самарии с царми Израилевыми. 14 И Елиссей разболеся болезнию своею, от неяже умре. И прииде к нему Иоас царь Израилев, и плакася над лицом его, и рече: отче, отче, колесница Израилева и кони его. 15 И рече ему Елиссей возми лук и стрелы. И взя к себе лук и стрелы. 16 И рече царю: возложи руку свою на лук. И возложи Иоас руку свою на лук, и Елиссей возложи руки своя на руки царевы, 17 и рече: отверзи окно еже на восток. И отверзе. И рече Елиссей: стрели. И стрели (царь). И рече Елиссей: стрела спасения Господня и стрела спасения на Сирию, и победиши Сирию во Афеке даже до скончания. 18 И рече ему Елиссей: возми лук. И взя. И рече царю Израилеву: удари на землю. И удари царь трижды, и ста. 19 И оскорбе человек Божий о нем и рече: аще бы ударил еси пятищи или шестищи, тогда бы еси поразил Сирию до скончания, ныне же победиши Сирию трижды. 20 И умре Елиссей, и погребоша его. Воины же Моавли приидоша в землю наставающую лету тому. 21 И бысть им погребавшим мужа, и се, видеша воинов, и повергоша мужа во гробе Елиссеове: (и впаде тело человека мертва, ) и прикоснуса костем Елиссеовым, и оживе и воста на ноги своя. 22 Азаил же оскорбляше Израиля во вся дни Иоахазовы. 23 И помилова и Господь, и ущедри я, и призре на ня завета ради Своего, иже со Авраамом и Исааком и Иаковом, и не восхоте Господь потребити их, ниже отверже их от лица Своего. 24 И умре Азаил царь Сирский, и воцарися Адер сын его вместо его. 25 И возвратися Иоас сын Иоахазов, и взя грады от



руки Адера сына Азаилева, ихже взя от руку Иоахаза отца его в брани: трижды победи его Иоас, и возврати грады Израилевы.

**14** В лето второе Иоаса сына Иоахаза царя Израилева, и воцарися Амессиа сын Иоасов, царь Иудин: 2 сын двадесяти пяти лет бе, внегда царствовати ему и двадесять пять лет царствова во Иерусалиме. Имя же матери его Иоадина от Иерусалима. 3 И сотвори правое пред очима Господними, обаче не якоже Давид отец его: по всем, елика сотвори отец его Иоас, сотвори, 4 токмо высоких не разруши: еще людие жряху и кадяху на высоких. 5 И бысть егда утвердися царство в руку его, и изби рабы своя убившыя отца его: 6 сынов же убийц тех не изби, якоже писано в книзе закона Моисеова, якоже заповеда Господь, глаголя: да не умирают отцы за сыны, и сынове да не умирают за отцы, но токмо кийждо за своя грехи да умрет. 7 Сей порази Едома в Гемеле десять тысяч и взя Камень и на брани, и нарече имя ему Иефоил до днешняго дне. 8 Тогда посла Амессиа послы ко Иоасу сыну Иоахаза сына Ииуа царя Израилева, глаголя: прииди, да видимся в лице. 9 И посла Иоас царь Израилев ко Амессии царю Иудину, глаголя: терн, иже в Ливане, посла к кедрови существу в Ливане, глаголя: даждь дочь твою сыну моему в жену: и придоша зверие лужнии, иже в Ливане, и попраша терние: 10 побивая поразил еси Идумею, и вознесе ты сердце твое, прославися седя в дому твоём, и почто любопришися в злобе твоей? И падеша ты, и Иуда с тобою. 11 И не послуша Амессиа. И възде Иоас царь Израилев, и видестася лицом той и Амессиа царь Иудин в Вефсамисе Иудине. 12 И паде Иуда пред

лицем Израилевым, и побеже кийждо в дома своя. 13 И Амессию сына Иоасова, сына Охозии, царя Иудина, ят Иоас сын Иоахазов царь Израилев в Вефсамисе: и прииде во Иерусалим, и разби стену Иерусалиму от врат Ефремлих до врат угловых, на чотыреста лакот: 14 и взя сребро и злато, и вся сосуды обретенныя в дому Господни и в сокровищах дому царева, и сыны смесившихся, и возвратися в Самарию. 15 И прочая словес Иоасовых, елика сотвори в силе своей, якоже брася со Амессиею царем Иудиных, не сия ли писана в книзе словес дний царей Израилевых? 16 И успе Иоас со отцы своими и погребен бысть в Самарии с цари и Израилевыми. И воцарися Иеровоам сын его вместо его. 17 И поживе Амессия сын Иоасов, царь Иудин, по умертвии Иоаса сына Иоахаза царя Израилева пятнадцать лет. 18 И прочая словес Амессиевых, и вся елика сотвори, не сия ли писана в книзе словес дний царей Иудиных? 19 И воста на него полки во Иерусалиме: и убеже в Лахисы, и послаша вслед его в Лахисы, и убиша его ту: 20 и взяша его на кони, и погребен бысть со отцы своими во Иерусалиме во граде Давидове. 21 И пояша вси людие Иудины Азарию, и той сын шестнадцати лет, и поставиша его царем вместо отца его Амессии: 22 той созда Елоф, и возврати его Иуде по умертвии царя со отцы его. 23 В лето пятоенадцать Амессии сына Иоаса царя Иудина, царствова Иеровоам сын Иоасов над Израилем в Самарии чотыредесять и едино лето, 24 и сотвори лукавое пред Господем: не отступи от всех грехов Иеровоама сына Наватова, иже в грех введе Израиля: 25 той приврати предел Израилев от входа Емафова даже и до моря аравитскаго, по глаголу Господа Бога Израилева,

егоже глагола и рукою раба Своего Ионы, сына Амафиина, пророка, иже от Гефаховера, 26 яко виде Господь смирение Израилево горько зело, и мало содержимых, и умаленных, и оставленных, и не бе помогающаго им. 27 И не глагола Господь искоренити семене Израилева под небесем: и спасе я рукою Иеровоама сына Иоасова. 28 И прочая словес Иеровоамовых, и вся елика сотвори, и силы его, елика повоева, и како возврати Дамаск и Емаф Иуде во Израили, не сия ли писана в книзе словес дний царей Израилевых? 29 И успе Иеровоам со отцы своими, со цари Израилевыми: и воцарися Захариа сын его вместо его.

**15** В лето двадесять седмое Иеровоама царя Израилева воцарися Азариа сын Амессии царя Иудина: 2 сын шестинадесяти лет бе, егда нача царствовати, и пятьдесят два лета царствова во Иерусалиме. Имя же матери его Иехелиа от Иерусалима. 3 И сотвори правое пред очима Господними по всему, елика сотвори отец его Амессиа, 4 обаче высоких не разори: еще людие жряху и кадяху на высоких. 5 И коснуса Господь царя, и бысть прокажен до дне смерти своея: и царствова в дому апфусоф. И Иоафам сын царев бе над домом судя людем земли той. 6 И прочая словес Азари, и вся елика сотвори, не сия ли написана в книзе словес дний царей Иудиных? 7 И успе Азариа со отцы своими, и погребоша его со отцы его во граде Давидове. И воцарися Иоафам сын его вместо его. 8 В лето тридесять осмое Азари, царя Иудина царствова Захариа сын Иеровоамль над Израилем в Самарии шесть месяц. 9 И сотвори лукавое пред очима Господними, якоже сотвориша отцы его, не отступи от всех грехов Иеровоама

сына Наватова, иже в грех введе Израиля. 10 И воста нань Селлум сын Иависов и Кевлаам, и поразиста его, и умертвиста его: и воцарися Селлум вместо его. 11 И прочая словес Захариевых, се, суть написана в книзе словес дний царей Израилевых. 12 Сие слово Господне, еже глагола ко Иию, рекий: сынове четвертии сядут тебе и на престоле Израилеве. И бысть тако. 13 И Селлум сын Иависов воцарися во Израили: и в лето тридесять девятое Азарии царя Иудина, царствова Селлум месяц дний в Самарии. 14 И взыде Манаим сын Гаддиин от Ферсилы, и прииде в Самарию, и уби Селлума сына Иависова в Самарии, и умертви его, и воцарися вместо его. 15 И прочая словес Селлумовых, и совещание его, имже совещася, се, суть писана в книзе словес дний царей Израилевых. 16 Тогда порази Манаим и Ферсу, и вся, яже в ней, и пределы ея от Ферсы, понеже не отверзоша ему, и разби ю и всех, иже в ней, и имущих во чреве разсече. 17 В лето тридесять девятое Азарии царя Иудина, царствова Манаим сын Гаддиин над Израилем десять лет в Самарии, 18 и сотвори лукавое пред очима Господними, (во вся дни своя) не отступи от всех грехов Иеровоама сына Наватова, иже в грех введе Израиля. 19 Во дни его взыде Фула царь Ассирийский на землю (Израилеву), и Манаим даде Фуле тысящу талант сребра, да будет рука его с ним, (еже укрепити царство в руку его). 20 И возложи Манаим дань на Израиля, на всех сильных, дати царю Ассирийску пятьдесят сикль сребра мужу коемуждо: и возвратися царь Ассирийск, и не ста тамо в земли. 21 И прочая словес Манаимовых, и вся елика сотвори, не се ли, сия написана в книзе словес дний царей

Израилевых? 22 И успе Манаим со отцы своими, и воцарися Факиа сын его вместо его. 23 В лето пятьдесятое Азарию царя Иудина, царствова Факиа сын Манаимль над Израилем в Самарии лета два, 24 и сотвори лукавое пред очима Господними, и отступи от грехов Иеровоама сына Наватова, иже в грех введе Израиля. 25 И воста на него Факей сын Ромелиин, тристат его, и уби его в Самарии близ дому царева, со Арговом и со Арием, и с ним (бяху) пятьдесят мужей от Галаадитов, и умертви его, и воцарися вместо его. 26 И прочая словес Факиевых, и вся елика сотвори се, суть, писана в книзе словес дний царей Израилевых. 27 В лето пятьдесят второе Азарию царя Иудина, царствова Факей сын Ромелиин над Израилем в Самарии двадесять лет, 28 и сотвори лукавое пред очима Господними, не отступи от всех грехов Иеровоама сына Наватова, иже в грех введе Израиля. 29 Во дни Факеа царя Израилева прииде Фелгаффелласар царь Ассирийский, и взя Аин и Авелвешмааха, и Аоха и Кенезу, и Асора и Галаад и Галилею, всю землю Неффалимлю, и приведе я ко Ассирианом. 30 И воста Осиа сын Илы на Факеа сына Ромелиина, и порази его, и умертви его, и воцарися вместо его в двадесятое лето Иоафама сына Азариина. 31 И прочая словес Факеевых, и вся елика сотвори, се, сия написана в книзе словес дний царей Израилевых. 32 В лето второе Факеа сына Ромелиина царя Израилева воцарися Иоафам, сын Азарию царя Иудина: 33 сын двадесяти пяти лет бе, егда нача царствовати, и шестнадцать лет царствова во Иерусалиме. Имя же матере его Иеруса дщи Садокова. 34 И сотвори правое пред очима Господними, по всему елика сотвори отец его Азария, 35

обаче высоких не разори: еще людие жряху и кадяху на высоких. Той созда двери храму Господню вышния. 36 И прочая словес Иоафамовых, и вся елика сотвори, не сия ли написана в книзе словес дний царей Иудиных? 37 Во дни оны начат Господь посылати на Иуду Раассона царя Сирска и Факеа сына Ромелиина. 38 И успе Иоафам со отцы своими, и погребен бысть со отцы своими во граде Давида отца своего. И воцарися Ахаз сын его вместо его.

**16** В лето седмоенадесять Факеа сына Ромелиина, воцарися Ахаз сын Иоафама царя Иудина: 2 сын двадесяти лет бе Ахаз, егда нача царствовати, и шестнадесять лет царствова во Иерусалиме, и не сотвори правое пред очима Господа Бога своего верно, якоже Давид отец его, 3 и ходи в пути Иеровоама сына Наватова царя Израилева, ксему и сына своего преведе сквозе огонь по мерзостем языков, ихже отят Господь от лица сынов Израилевых: 4 и жряше и кадяше на высоких и на холмех и под всяким древом частым. 5 Тогда взыде Раассон царь Сирск и Факей сын Ромелиин царь Израилев во Иерусалим на брань, и воеваста на Ахаза, и не можаста (ему) одолети. 6 Во время оно возврати Раассон царь Сирский Елаф Сирии и изгна Иудеев из Елафа, и Идумее приидоша во Елаф и вселишася тамо даже до дне сего. 7 И посла Ахаз послы к Фелгаффелласару царю Ассирийску, глаголя: раб твой и сын твой аз есмь, взыди и отими мя от руки царя Сирска и от руки царя Израилева, воставших на мя. 8 И взя Ахаз золото и серебро обретшееся в сокровищих дому Господня и в сокровищих дому царева, и посла царю Ассирийску дары. 9 И послуша его царь Ассирийский: и взыде царь Ассирийский в Дамаск, и взя

его, и пресели его, и Раассона царя уби. 10 И иде царь Ахаз на сретение Фелгаффелласару царю Ассирийску в Дамаск, и виде жертвенник в Дамасце: и посла царь Ахаз ко Урии иерею подобие жертвенника, и начертание, и все творение его. 11 И созда Уриа иерей жертвенник по всем, елика посла царь Ахаз от Дамаска. 12 И прииде царь Ахаз из Дамаска и виде жертвенник, и взыде на него, 13 и покади всесожжение свое и жертву свою и возлияние свое, и пролия кровь мирных на жертвенник, 14 олтарь же медяный, иже пред Господем, принесе от лица дому Господня, и от среды жертвенника и от среды дому Господня: и постави его о едину страну жертвенника к северу. 15 И заповеда царь Ахаз Урии иерею, глаголя: на жертвеннице велицем приношай всесожжения утренняя, и жертву вечернюю, и всесожжения царева, и жертву его, и всесожжения всех людей, и жертву их, и возлияния их, и всяку кровь всесожжения, и всяку кровь жертвенную излиеши на нем: олтарь не медян да будет мне на утро. 16 И сотвори Уриа иерей по всем, елика заповеда ему царь Ахаз. 17 И исече Ахаз царь споения подставов, и пренесе от них умывалницу, и море низложи от волов медяных, иже беша под ним, и положи е на подставе каменнем: 18 и основание седалища создано в дому Господни, и вход царев внешний обрати в дом Господень, от лица царя Ассирийска. 19 И прочая словес Ахазовых, елика сотвори, не сия ли написана в книзе словес дний царей Иудиных: 20 и успе Ахаз со отцы своими, и погребен бысть со отцы своими во граде Давидове. И воцарися Езекиа сын его вместо его.

**17** В лето второенадесять Ахаза царя Иудина, царствова Осиа сын Илы в Самарии над Израилем девять лет, **2** и сотвори лукавое пред очима Господнима, обаче не якоже царие Израилевы, иже беша прежде его. **3** И възиде нань Саламанассар царь Ассирийск. И бысть ему Осиа раб и даваше ему дань. **4** И обрете царь Ассирийск во Осии неправду, занеже посла послы к Сигору царю Египетску и не принесе дани царю Ассирийску лета того. И осади его царь Ассирийский и связа его в храмине темничней. **5** И прииде царь Ассирийск во всю землю (его), и възиде в Самарию, и воева ю три лета. **6** В лето девятое Осии взя царь Ассирийский Самарию, и заведе Израилтян во Ассирию, и посели их на Алаи и на Аворе, реках Гозанских, и в пределех Мидских. **7** И (сие) бысть, яко согреша сынове Израилевы Господу Богу своему изведшему их из земли Египетския, из под руки фараона царя Египетска, и убояшася богов инех, **8** и ходиша по преданием языков, ихже истреби Господь от лица сынов Израилевых, и царие Израилевы елицы сотвориша, **9** и елицы сокрыша сынове Израилевы словеса, не тако на Господа Бога своего: и создаша себе высокая во всех градех своих, от столпа стрегущих даже до града тверда, **10** и поставиша себе кумиры и Дубравы на всяцем холме висоце и под всяким древом чащным, **11** и кадыху тамо на всех высоких, якоже языцы, яже удали Господь от лица их, и сотвориша общники, и начаша яве прогневляти Господа, **12** и послужиша идолом, о нихже рече им Господь: не сотворите глагола сего Господеви. **13** И засвидетелствова Господь во Израили и во Иуде, и руками всех пророк Своих всякаго прозорливаго, глаголя: обратитесь от путей ваших лукавых,



и сохраните заповеди Моя и оправдания Моя, и весь закон, егоже заповедах отцем вашим, елика послах им руками раб Моих пророков. 14 И не послушаша, и ожесточиша выю свою паче выи отец своих, иже не вероваша Господу Богу своему: 15 и отвергоша завет Его и оправдания, яже завеща отцем их и свидений Его, елика засвидетельствова им, не сохраниша, и идоша вслед суетных и осуетишася, и вслед языков сущих окрест их, о нихже заповеда Господь их, еже не сотворити по сему: 16 и оставиша заповеди Господа Бога своего и сотвориша себе две юницы слиты, и сотвориша дубравы, и поклонишася всей силе небесней и послужиша Ваалу: 17 и превождаху сыны своя и дщери своя чрез огонь, и волхвоваху волхвованием и вражаху: и продашася, еже творити лукавое пред очима Господними, еже прогневати Его. 18 И разгневался Господь на Израиля зело и отрину их от лица Своего, и не остася, токмо едино колено Иудино. 19 И Иуда такожде не сохрани заповедий Господа Бога своего: и хождяху по оправданием Израилевым, яже сотвориша, и отвергошася Господа. 20 И разгневался Господь на все семя Израилево и поколеба я, и даде я в руки расхищающим я дондеже отверже я от лица Своего. 21 Яко отторжеся Израиль от дому Давидова, и поставиша себе царя Иеровоама сына Наватова: и отрину Иеровоам Израиля от Господа и введе их во грех великий. 22 И хождяху сынове Израилевы по всему греху Иеровоамлю, егоже сотвори: не отступиша от него, 23 дондеже отверже Господь Израиля от лица Своего, якоже глагола Господь рукою всех раб Своих пророков. И преселен бысть Израиль от земли своея во Ассирианы, даже до дне сего. 24 И приведе царь Ассирийский из Вавилона

иже от Хуфы и от Аиа, и от Емафа и Сепфаруима, и вселени быша во градех Самарийских вместо сынов Израилевых, и наследиша Самарию и вселишася во градех ея. 25 И бысть в начале седения их, не убояшася Господа, и пусти на ня Господь львы, и бяху убивающе я. 26 И реша царю Ассирийску, глаголюще: языки, ихже превел и пресади еси во градех Самарийских, не разумеша суда Бога земли, и посла Господь на них львы, и се, суть убивающе их, яко не разумеша суда Бога земли. 27 И заповеда царь Ассирийский глаголя: отведите тамо единого жерца от плененых, да идут и да вселятся тамо, и да просветит их судом Бога земли. 28 И отведоша единого от жерцев ихже взяша от Самарии, и седе в Вефили, и бе просвещая жрец их, яко да убоятся Господа. 29 И беша творяще кийждо язык боги своя: и поставиша я во храмех на высоких, ихже сотвориша Самаряне, кийждо язык во градех своих, в нихже живяху. 30 И мужие Вавилонстии сотвориша Сокхоф Вениф, и мужие Хуфовы сотвориша Гигель, и мужие Емафовы сотвориша Асимаф, 31 и Евее сотвориша Авлазер и Фарфак и Сепфаруим, егда сожигашу сыны своя огнем Андрамелеху и Анемелеху, богом Сепфаруимским. 32 И бяху боящеся Господа: и вселиша мерзости своя во храмех на высоких, ихже сотвориша в Самарии, кийждо язык во граде, в немже живяху. 33 И беша боящеся Господа и сотвориша себе жерцы в высоких, и сотвориша себе в храме высоких и Господа бояхуся, и идолом своим служашу по обычаю языков отнюдуже преселиша их. 34 Даже до дне сего тии творяху по обычаю их: не бояхуся Господа, и не творяху по оправданием их, и по суду их, и по закону, и по заповеди, юже заповеда

Господь сыном Иаковлим, идеже и нарече имя ему Израиль.  
35 И положи Господь с ними завет и заповеда им, глаголя: не убойтесе богов иных и не поклонитесе им, и не послужите им и не пожрите им: 36 но токмо Господеви, иже изведе вы из земли Египта крепостию великою и мышцею високою: Того убойтесе, и Тому поклонитесе, и Тому пожрите: 37 и оправдания Его, и суды Его, и закон Его, и заповеди, яже написа вам творити, храните во вся дни, и не убойтесе богов иных: 38 и завета, егоже завета с вами, не забываете: и не убойтесе богов иных, 39 но токмо Господа и вашего убойтесе, и Той измет вы от всех враг ваших. 40 И не послушаша сего, но по обычаем своим преждним твориша. 41 И бяху языцы сии боящесе Господа, и изваянным своим служаще: такожде и сынове их и сынове сынов их, якоже сотвориша отцы их, тако творят и до сего дне.

**18** И бысть в лето третие Осии сына Илы царя Израилева, воцарися Езекиа сын Ахаза царя Иудина: 2 сын двадесяти пяти лет бе егда нача царствовати, и двадесять девять леть царствова во Иерусалиме. Имя же матере его Авуфа дщи Захариина. 3 И сотвори правое пред очима Господними, по всем елика сотвори отец его Давид: 4 той разруши високая, и сокруши вся капища, и искорени дубравы и змию медяную, юже сотвори Моисей, яко и до дний тех сынове Израилевы беху кадяще ей: и назва имя ей Неестан. 5 На Господа Бога Израилева упова, и но нем не бысть подобен ему в царех Иудиных и в бывших прежде его: 6 и прилепися Господеви, не отступи от Него, и сохрани заповеди Его, елики заповеда Моисей: 7 и бе Господь с ним, и во всех, яже творяше, смысляше. И сопротивися царю Ассирийскому

и не поработа ему: 8 той победы иноплеменники даже до Газы и до предел ея, от столпа стрегущих и даже и града тверда. 9 И бысть в лето четвертое царя Езекии, сие же лето седмое Осии, сыну Илы, царю Израилеву, възыде Саламанассар царь Ассирийск на Самарию и обседе ю, 10 и взя ю при концы триех лет, в шестое лето Езекиево, сие лето девятое Осии царя Израилева, и пленена бысть Самариа. 11 И преведе царь Ассирийский Самаряны во Ассирию, и посади я на Алаи и на Аворе, реках Гозанских, и в пределех Мидских: 12 понеже не послушаша гласа Господа Бога своего и преступиша завет Его, вся елика заповеда Моисей раб Господень, и не послушаша, и не сотвориша. 13 И в четвертоенадесять лето царя Езекии, възыде Сеннахирим царь Ассирийский на грады Иудины твердыя и взят я. 14 И посла Езекиа царь Иудин послы к царю Ассирийску в Лахис, глаголя: согреших, возвратися от мене: еже аще возложиши на мя, то понесу. И возложи царь Ассирийский на Езекию царя Иудина триста талант сребра и тридесять талантов злата. 15 И даде Езекиа все сребро обрешееся в дому Господни и в сокровищих дому царева. 16 Во время оно ссече Езекиа царь Иудин двери храма Господня и утвержения, яже позлати Езекиа царь Иудин, и даде их царю Ассирийску. 17 И посла царь Ассирийск Фарфана и Равосаиа и Рапсака от Лахиса на Иерусалим к царю Езекии с силою тяжкою зело. И възыдоша, и приидоша ко Иерусалиму, и сташа у водотечи купели вышняя, яже есть на пути села белилнаго, 18 и возопиша ко Езекии. И изыде к ним Елиаким сын Хелкиев строитель, и Сомнас книгочий, и Иоас сын Сафатов воспоминатель. 19 И рече к ним Рапсак:

рцыте ныне ко Езекии: сице глаголет царь великий, царь Ассирийский: что упование сие, на неже уповаеши? 20 Рекл еси: токмо словеса устен, совет и сила на брань: ныне убо на кого надежду отвергл еси мене? 21 Ныне с, надеешься ты на жезл тростяный сломленный сей, на Египет ли? Наньже аще опрется муж, внидет в руку его и пронзет ю: тако фараон царь Египетский всем надеющимся нань: 22 и аще мне речете: на Господа Бога надеемся: не той ли сей, егоже и отстави Езекиа высокая его и жертвенники его, и рече Иуде и Иерусалиму: поклонитесь пред жертвенником сим во Иерусалиме? 23 И ныне соединитесь с господином моим царем Ассирийским, и дам тебе две тысящи коней, аще можеша имети всадники на ня: 24 и како отвратиши лице топарха единого от рабов господина моего малейших, и уповал еси сам на Египет, на колесницы и кони? 25 И ныне убо еда без Господа вздыхом на место сие, еже потребити и рече бо Господь ко мне: възыди на землю сию и потреби ю. 26 И рече Елиаким сын Хелкиин и Сомнас и Иоас ко Рапсаку: глаголи ныне ко отроком твоим сирски, яко слышим мы, а не глаголи к нам иудейски, и почто глаголеши во уши людей, иже на стене? 27 И рече к ним Рапсак: еда к господину твоему и к тебе посла мя господин мой глаголати словеса сия? Не к мужем ли сидящим на стене, еже ясти им гной свой и пити им сечь свою с вами вкупе? 28 И ста Рапсак, и возопи гласом великим иудейски, и глагола, и рече: слышите словеса великаго царя Ассирийска: 29 сице глаголет царь: да не возносит вас царь Езекиа словесы, понеже не возможет вас изяти из руки моя: 30 и да не обнадеживает вас Езекиа Господем, глаголя: изимая измет

вы Господь, и не имать предатися град сей в руце царя Ассирийска: **31** не послушайте Езекии, яко сице глаголет царь Ассирийский: сотворите со мною благословение и изыдите ко мне, и да пиет муж от винограда своего, и муж вкусит от смоквей своих, и да пиет воду от рова своего, **32** дондеже прииду и поиму вы в землю (такову) якоже земля ваша, земля пшеницы и вина, и хлебов и виноградов, земля масличин елеа и меда, и живи будете и не умрете: и не послушайте Езекии, яко прельщает вы, глаголя: Господь ны избавит: **33** еда избавляюще избавиша бози языков кийждо их свою страну из руки царя Ассирийска? **34** Где есть бог Емафа и Арфада? Где есть бог Сепфаруима, Ана и Ава? Еда избавиша Самарию из руку мою? **35** Кто во всех бозех земных, иже избавиша земли и от руки моея? И како измет Господь Иерусалима из руки моея? **36** И умолкоша людие и не отвещаша ему слова, яко заповеда им царь глаголя: не отвещайте ему. **37** И вниде Елиаким сын Хелкиин строитель, и Сомнас книгочий, и Иоас сын Сафатов воспоминатель ко Езекии, раздравше ризы своя, и возвестиша ему словеса Рапсакова.

**19** И бысть егда услыша царь Езекиа, и раздра ризы своя, и облечеса во вретище, и вниде в дом Господень. **2** И посла Елиакима строителя, и Сомнаса книгочия и старейшины жерцев облечены во вретище ко Исаии пророку сыну Амосову. **3** И реша ему: сице глаголет Езекиа: день скорби и обличения и прогневания день сей, яко приидоша сынове даже до болезнорождения, и крепости несть раждающей: **4** аще како послушает Господь Бог твой всех словес Рапсаковых, егоже и посла царь Ассирийский господин его поносити Богу живому

и хулити словесы, ихже слыша Господь Бог твой, и прими молитву о останце обретающемся. 5 И приидоша отроцы царя Езекии и ко Исаии. 6 И рече им Исаиа: сице рцыте господину вашему: тако глаголет Господь: не убойся от лица словес, ихже слышал еси, имиже похулиша Мя отроцы царя Ассирийска: 7 се, Аз даю ему духа, и услышит возвещение и возвратится в землю и свою: и низложу его оружием в земли и его. 8 И возвратися Рапсак и обрете и царя Ассирийска воююща на Ловну: услыша бо, яко отступи от Лахиса. 9 И слыша о Фараке цари Ефиопстем, глаголя: се, изыде ратоватися с тобою. И возвратися и посла послы ко Езекии, глаголя: тако рцыте Езекии царю Иудейску: 10 да не возносит тя Бог твой, на негоже ты надеешься глаголя: не имать предан быти Иерусалим в руце и царя Ассирийска: 11 се, ты слышал еси вся, елика и сотвориша царие Ассирийстии всем землем, еже прокляти их, и ты ли избудеши? 12 Еда избавляюще избавиша их и бози языков, ихже расточиша отцы и мои, Гозану и Харану, и Фаресу и сыны Едомли, иже во Фалассаре? 13 Где есть царь Емафов и царь и Арфадов? И где есть царь града Сепфаруима, Ана и Ава? 14 И прият царь Езекиа книги от руки послов и прочте я: и вниде в храм Господень, и разгну их Езекиа пред Господем, 15 и молися Езекиа пред Господем и рече: Господи Боже Израилев, седяй на Херувимех, Ты еси и Бог един бо всех царствиих земли, Ты сотворил еси небо и землю: 16 приклони, Господи, ухо Твое и услыши мя: отверзи, Господи, очи Твои и виждь, и услыши словеса Сеннахирима, яже посла поношая Тебе Богу живу: 17 яко поистинне, Господи, опустошиша царие Ассирийстии языки, 18 и даша боги их на огонь, яко не бози

беша, но дела руку человеку, древа и камня, и погубиша  
я: 19 и ныне, Господи Боже наш, спаси ны из руки его, и  
уразумеют вся царствия земли, яко Ты еси Господь Бог  
един. 20 И посла Исаиа сын Амосов ко Езекии, глаголя: тако  
глаголет Господь Бог Сил, Бог Израилев: слышах, о нихже  
молился еси ко Мне, о Сеннахириме царе Ассирийсте. 21 Сие  
слово, еже глагола Господь на него: уничижи тя и поругася  
тебе девица и дщи Сионя, над тобою главою своею покива  
дщи Иерусалимля: 22 кому поносил еси, и кого похулил еси?  
И на кого вознесл еси глас, и воздвигл еси на высоту очи  
твои? На Святаго Израилева. 23 Рукою послов твоих поносил  
еси Господу, и рекл еси: со множеством колесниц моих възыду  
аз на вышнюю часть горы Ливанския, и усеку величество  
от кедр ея и избранныя кипарисов ея, и прииду в средину  
чащи Кармилския: 24 аз изсуших, и пиях воды чуждыя, и  
опустоших стопами ног моих вся реки окрестныя: 25 еда не  
слышал еси? Издавна ю сотворих, от дний первых создах ю  
и принесох ю: и бысть в холмы преселников воюющих грады  
тверды: 26 и живущии в них изнемогоша рукою, сотрясошася  
и постыдешася, быша (яко) трава селная, или злачно былие,  
злак иже на зданиих, и попраия противу стоящаго: 27 и  
седение твое, и исход твой, и вход твой разумех, и гнев твой  
на Мя, 28 занеже разгневался еси на Мя и шум твой вниде  
во уши Мои, и вложу удицу Мою в ноздри твоя и бразду во  
устне твои, и возвращу тя по пути, имже пришел еси. 29 И  
сие тебе знамение, (Езекие): яждь в сие лето прозябающая  
самородная, и в лето второе прозябающая, и в лето третье  
сейте семена и жните, садите винограды, и да ясте плод их:  
30 и приложит спасшееся дому Иудова, оставшееся, корень



доле, и сотворит плод горе, **31** яко из Иерусалима изыдет останок, и спасаемый из горы Сиони: ревность Господа Сил сотворит сие. **32** Сего ради тако глаголет Господь (Сил) на царя Ассирийска: не имать внити во град сей, и не имать устрелити нам стрелы, и не достигнет к нему щит, и не имать осыпати его землю: **33** но путем, имже прииде темже возвратится, и во град сей не имать внити, глаголет Господь, **34** и защищу град сей, еже спасти его Мене ради и Давида ради раба Моего. **35** И бысть в ночь ону, и сниде Ангел Господнь и уби от полка Ассирийскаго сто осмьдесят и пять тысяч. И восташа завтра, и се, вся трупия мертва. **36** И воста, и отиде, и возвратися Сеннахирим царь Ассирийский, и вселися в Ниневию. **37** И бысть ему кланяющуся во храме Месераха бога своего, и Адрамелех и Сарасар сынове его убиста его мечем: сами же бежаста в землю Араратску. И воцарися Асордан сын его вместо его.

**20** Во днех оных разболеся Езекиа (царь) да смерти. И вниде к нему Исаиа пророк сын Амосов и рече к нему: тако глаголет Господь: заповеждь дому твоему, умреши бо ты и не будеши жив. **2** И обрати Езекиа лице свое ко стене и помолися ко Господу, глаголя: **3** Господи помяни ныне, яко истинною ходих пред Тобою и сердцем совершенным, и угодная пред очима Твоима сотворих. И плакася Езекиа плачем великим. **4** И бяше Исаиа еще посреде двора, и бысть слово Господне к нему, глаголя: **5** возвратися и рцы Езекии вожду людий Моих: тако глаголет Господь Бог Давида отца твоего: услышах молитву твою и видех слезы твоя: се, Аз изцелю тя, и в день третий възидеши в дом Господень: **6** и приложу к летом твоим лет пятнадцать, и

от руки царя Ассирийска избавлю тя и град сей, и защищу град сей Мене ради и Давида ради раба Моего. 7 И рече Исаиа: да возмут перевясло смоквей и да положат на вред, и изцелеет. 8 И рече Езекиа ко Исаии: кое знамение, яко изцелит мя Господь и взыду в дом Господень в день третий? 9 И рече Исаиа: сие знамение от Господа, яко сотворит Господь слово, еже глагола: (хощеши ли да) пойдет стена десять степеней, или возвратится стена десять степеней? 10 И рече Езекиа: удобно стены уклонятся десять степеней: ни, но да возвратится стена на десять степеней вспять. 11 И возопи Исаиа пророк ко Господу, и возвратится стена по числу назад десять степеней. 12 Во время оно посла Мародах Валадан, сын Валаданов, царь Вавилонский, книги и дары ко Езекии: слыша бо, яко разболеся (царь) Езекиа. 13 И порадовася Езекиа о них, и показа им весь дом свой сокровищный, серебро и золото, и ароматы и елей добрый, и дом сосудов и елика обретошася в сокровищях его: и не бе места, егоже не показа им Езекиа в дому своем и во всей области своей. 14 И вниде Исаиа пророк ко Езекии царю и рече к нему: что глаголаша мужие сии, и откуда приидоша к тебе? И рече Езекиа: от земли дальния приидоша ко мне, от Вавилона. 15 И рече: что видеша в дому твоём? И рече Езекиа: вся, елика в дому моем, видеша: несть в дому моем, егоже им не показаша, но и яже в сокровищях моих (видеша). 16 И рече Исаиа ко Езекии: слыши слово Господне: 17 се, дние грядут, рече Господь, взята будут вся, яже в дому твоём, и вся, яже собраша отцы твои до дне сего, внидут в Вавилон: и не останется слово, еже рече Господь. 18 И сынове твои, иже изыдут из тебе, ихже родиши, возмутся и

будут скопцы в дому царя Вавилонскаго. 19 И рече Езекиа ко Исаии: благо слово Господне еже глагола: да будут мир во дни моя. 20 И прочая словес Езекиевых, и вся сила его, и елика сотвори, источник и водотечь, и введе воду во град, не се ли, сия написана в книзе словес дний царей Иудиных? 21 И успе Езекиа со отцы своими, и погребен бысть во граде Давидове. И воцарися Манассиа сын его вместо его.

**21** Сын дванадесяти лет Манассиа, егда нача царствовати, и пятьдесят пять лет царствова во Иерусалиме. Имя матере его Офовиа. 2 И сотвори лукавое пред очима Господними, и хоуждаше вслед мерзостей языков, ихже отрину Господь от лица сынов Израилевых: 3 и обратися, и созда высокая, иже разори отец его Езекиа, и воздвиже жертвенник Ваалу, и сотвори дубравы, яже сотвори Ахаав царь Израилев, и поклонися всей силе небесней и поработа им: 4 и созда олтарь в дому Господни, якоже рече Господь: во Иерусалиме положу имя Мое. 5 И сотвори олтарь всей силе небесней на дву двору дому Господня: 6 и провождаше сыны своя чрез огонь, и вражаше, и волшвения творяше, и сотвори капища, и волшебницы умножи творити лукавое пред очима Господними, еже прогневати Его: 7 и постави изваяное Дубравы в храме, о немже рече Господь к Давиду и к Соломону сыну его: в храме сем и во Иерусалиме, егоже избрах от всех колен Израилевых, и положу ту имя Мое на веки, 8 и не приложу подвигнутися нозе Израилеве от земли, юже дах отцем их, аще тии соблюдут вся елика заповедах, по всей заповеди, юже заповеда им раб Мой Моисей. 9 И не послушаша, и прельсти их Манассиа, еже сотворити лукавое пред очима Господними паче язык, яже истреби Господь

от лица сынов Израилевых. **10** И глагола Господь рукою рабов Своих пророков, глаголя: **11** за сия, елика сотвори Манассиа царь Иудин мерзости сия лукавыя, паче всех яже сотвориша Аморрее, иже прежде сего быша, и введе во грех и Иуду, в кумирех своих: **12** не тако: сице глаголет Господь Бог Израилев: се, Аз наведу злая на Иерусалим и на Иуду, яко всякому слышащему пошумят обоя уха его, **13** и простру на Иерусалим меру Самарийскую и весы дому Ахаавля: и истреблю Иерусалима, якоже изглаждается алавастр изглаждаемый и превращается в лице свое: **14** и изрину останки достояния Моего и предам их в руки врагов их, и будут в расхищение и в плен всем врагом своим: **15** понеже сотвориша лукавое пред очима Моима и быша прогневающе Мя от дне, в оньже изведох отцы их от земли Египетския, и до дне сего. **16** Еще же кровь неповинную излия Манассиа многу зело, дондеже наполни Иерусалиму уста до уст, кроме грехов его, имиже во грех введе Иуду, сотворити лукавое пред очима Господними. **17** И прочая словес Манассииных, и вся елика сотвори, и грех его, имже согреси, не сия ли написана в книзе словес дний царей Иудиных? **18** И успе Манассиа со отцы своими, и погребен бысть в вертограде дому своего, в вертограде Озы. И воцарися Аммон сын его вместо его: **19** сын двадесяти дву лет бе Аммон, егда нача царствовати и два лета царствова во Иерусалиме. Имя же матери его Месоллам, дщи Арусова из Иетевы. **20** И сотвори лукавое пред очима Господними, якоже сотвори Манассиа отец его, **21** и хоужаше по всему пути, имже ходи отец его, и поработа кумиром, имже поработа отец его, и поклонися им: **22** и остави Господа Бога отец

своих, и не ходи путем Господним. 23 И восташа отроцы Аммоновы нань и умертвиша царя в дому его. 24 Людие же земли (тоя) избиша всех воставших на царя Аммона, и воцариша людие земли тоя Иосию сына его вместо его. 25 И прочая словес Аммоновых, елика сотвори, не се ли, сия написана и в книзе словес дний царей Иудиных? 26 И погребоша его во гробе его в вертограде Озине. И воцарися Иосиа сын его вместо его.

**22** Сын осми лет бе Иосиа, егда нача царствовати, и тридесять едино лето царствова во Иерусалиме. Имя же матери его Иеида, дщи Едеева, от Васурофа. 2 И сотвори правое пред очима Господнима, и хождаше во всех путех Давида отца своего, не совратися ни на десно, ни на шее. 3 И бысть во осмонадесять лето царства Иосиина, в седмый месяц, посла царь Сафана, сына Езелиина, сына Месолламля, книгочию дому Господня, глаголя: 4 взыди к Хелкии жерцу великому и запечатлей сребро внесеное в дом Господень, еже собраша стрегущии врат от людей, 5 и да дадут е в руки творящих дела приставником в храме Господни: да дадут е творящым дела в дому Господни, еже подкрепляти разселины храма, 6 древоделем и каменосечцем и покупающым древа и камене тесаное на утверждение разселин храма. 7 Обаче не сочисляху их о сребре даемем им, яко верно тии творяху. 8 И рече Хелкиа жрец великий ко Сафану книгочию: книгу закона (Божия) обретох в дому Господни. И даде Хелкиа книгу Сафану, и прочте ю. 9 И вниде в дом Господень и царю Иосии, и возвести царю слово и рече: сляша раби твои сребро обретшееся в дому Господни, и даша е приставницы в руки творящым дела в

храме Господни. 10 И рече Сафан книгочия к царю, глаголя книгу закона даде ми Хелкиа жрец. И прочте ю Сафан пред царем. 11 И бысть яко услыша царь словеса книги законныя, и раздра ризы своя, 12 и заповеда царь Хелкии жрецу и Ахикаму сыну Сафаню, и Аховору сыну Михеину и Сафану книгочию и Асаию рабу цареву, глаголя: 13 приидите, испросите Господа о мне и о всех людех и о всем Иуде, и о словесех книги обретшиися сея, яко велик гнев Господень разжженный на нас, понеже не послушаша отцы наши словес книги сея, еже творити по всем написанным на ны. 14 И иде Хелкиа жрец и Ахикам, и Аховор и Сафан и Асаиас ко Олдаме пророчице, жене Селима сына Фекуева, сына Араса ризохранителя: и сия живяше во Иерусалиме в масене: и глаголаша к ней по сему. 15 И рече им: сице глаголет Господь Бог Израилев: рцыте мужеви пославшему вы ко мне: 16 тако глаголет Господь: се, аз наведу злая на место сие и на живуцья в нем, вся словеса книжная, яже прочте царь Иудин: 17 понеже оставиша Мя и кадыху богом другим, яко да прогневают Мя делесы рук своих, и разжжется ярость Моя на место сие и не угаснет: 18 и ко царю Иудину пославшему вас вопросити Господа, сице рцыте ему: тако глаголет Господь Бог Израилев: словеса, яже слышал еси, 19 за сия, яко умягчися сердце твое и смирился еси пред лицом Господним, услышав елика глаголах на место сие и на живуцья в нем, еже быти в погубление и в проклятие, и раздрал еси ризы твоя, и плакался предо Мною, и аз убо услышах, глаголет Господь: 20 сего ради аз приложу тя ко отцем твоим, и соберешися во гроб твой в мире, и не узриши очима твоима

всех злых, яже Аз имам навести на место сие и на живущия в нем.

**23** И возвестиша сия глаголы цареви: и посла царь, и собра к себе вся старейшины Иудины и Иерусалимляны, 2 и вниде царь в дом Господень, и вси мужие Иудины и вси живущии во Иерусалиме с ним, и жерцы, и пророцы, и вси людие от мала и до велика, и прочте во ушеса их вся словеса книги завета обретшиися в дому Господни: 3 и ста царь у столпа и завеща завет пред Господем, еже ходити вслед Господа и хранити заповеди Его и свидения Его и оправдания Его всем сердцем и всею душею, еже возставити словеса завета сего, яже писана в книзе сей. И сташа вси людие в завете. 4 И заоведа царь Хелкии жерцу великому и жерцем вторым и стрегущым врат изнести от храма Господня вся сосуды сотворенныя Ваалу и Дубраве и всей силе небесней, и сожже и вне Иерусалима в Садимофе Кедрсте и изверже прах их в Вефиль: 5 и сожже хомаримы, ихже даша царие Иудины, и кадяху в высоких и во градех Иудиных и во окрестных Иерусалима, и кадящих Ваалу, и солнцу, и луне, и планетам и всей силе небесней: 6 и изнесе кумир из храма Господня вне Иерусалима на поток Кедрск, и сожже его в потоце Кедрсте, и истни в прах, и вверже прах их в гробы сынов людских: 7 и разруши храм кадисимов, иже бе в храме Господни, идеже жены прядяху ризы кумиру: 8 и возведе вся жерцы от градов Иудиных, и оскверни высокая, идеже кадяху жерцы, от Гаваи да Вирсаеи: и разруши храм врат, иже бе при дверех врат Иисуса князя граднаго, иже ошуюю входящим дверми града. 9 Обаче не вхождаху жерцы высоких ко олтарю Господню во Иерусалиме, но

только ядяху опресноки посреде братии своя. 10 И оскверни Тафефа, иже в дебри сынов Еномлих, еже не превести мужу сына своего и мужу дочери своя Молоху сквозе огонь: 11 и сожже кони, иже даша царие Иудины солнцу во входе храму Господня, при влагалищи Нафана, царева скопца во Фаруриме: и колесницу солнечную сожже огнем: 12 и олтари, яже на крове горницы Ахазовы, яже сотвориша царие Иудины и олтари, иже созда Манассиа во двою двору храма Господня, раскопа царь, и сверже оттуду, и всыпа прах их в поток Кедрск: 13 и храм, иже пред лицом Иерусалима, одесную горы Мосфаф, егоже созда Соломон царь Израилев Астарте мерзости Сидонстей и Хамосу мерзости Моавли и Молхолу мерзости сынов Аммоних, оскверни царь: 14 и сокруши столпы, и искорени дубравы, и наполни места их костми человеческими: 15 и оltарь иже во Вефили высокий, егоже сотвори Иеровоам сын Наватов, иже в грех введе Израиля, и оltарь той высокий раскопа, и сокруши камене его, и истни в прах, и сожже кумиры. 16 И восклонися Иосиа, и виде гробы сущия во граде тамо, и посла, и взя кости от гроб, и сожже на олтари, и оскверни его по глаголу Господню, егоже глагола человек Божий, егда стояше Иеровоам в праздник пред олтарем: и обращайся возведе очи свои на гроб человека Божия глаголавшаго словеса сия. 17 И рече: что могила сия, юже аз вижду? И реша ему мужие града: гроб сей человека Божия есть, иже прииде от Иуды и проглагола словеса сия, яже сотворил еси ныне над олтарем, иже в Вефили. 18 И рече: оставите его, да не подвижет ни един муж костей его. И оставиша кости его с костми пророка пришедшаго от Самарии. 19 Еще и вся храмы



высоких сущих во градех Самарийских, яже сотвориша царие Израилевы прогневающе Господа, отверже Иосиа, и сотвори им вся дела, яже сотвори в Вефили, 20 и закла вся жерцы высоких сущия тамо пред олтарми, и сожже на них кости человеци, и возвратися во Иерусалим. 21 И заповеда царь всем людем, глаголя: сотворите пасху Господеви Богу нашему, якоже писано в книзе завета сего: 22 яко не бысть пасха сия от дний судий, иже судиша Израилеви, и во всех днех царей Израилевых и царей Иудиных: 23 но токмо во осмоенадесять лето царя Иосии бысть пасха Господу во Иерусалиме. 24 Еще и волшебники, и вражбиты, и ферафимы, и кумиры, и вся мерзости бывшыя в земли Иудине и во Иерусалиме, искорени царь Иосиа, да утвердит словеса законная писанная в книзе, юже обрете Хелкиа жрец в храме Господни. 25 Подобен ему не бысть пред ним царь, иже обратися к Господеви всем сердцем своим и всею душею своею и всею силою своею по всему закону Моисеову, и по нем не воста подобен ему. 26 Обаче не отвратися Господь от ярости гнева Своего великаго, имже возярсися гневом на Иуду, на прогневания, имиже прогнева Его Манассиа, 27 и рече Господь: еще и Иуду отрину от лица Моего, якоже отринух Израиля, и град сей отвергу, егоже избрах, Иерусалима, и храм, о немже рех: будет имя Мое ту. 28 И прочая словес Иосиевых, и вся елика сотвори, не сия ли написана в книзе словес дний царей Иудиных? 29 Во днех же его възде фараон Нехао царь Египетск на царя Ассирийска на реку Евфрат: и изыде царь Иосиа на сретение ему, и уби его Нехао царь в Магеддоне, егда его узре. 30 И взяша его отроцы его мертва из Магеддона и принесоша

его во Иерусалим, и погребоша его во гробе его во граде Давидове. И пояша людие земли тоя Иоахаза сына Иосиина и помазаша его, и воцариша его вместо отца его. **31** Сын двадесяти и триех лет бе Иоахаз, внегда нача царствовати и три месяцы царствова во Иерусалиме. Имя же матери его Амитала, дщи Иеремии из Ловны. **32** И сотвори лукавое пред очима Господними, по всем елика сотвориша отцы его. **33** И пресели его фараон Нехао в Ревлаам в землю Емаф, да не царствует во Иерусалиме, и возложи дань на землю ту сто талант сребра и сто талант злата. **34** И постави царем фараон Нехао над ними Елиакима, сына Иосии царя Иудина, вместо Иосии отца его, и премени имя ему Иоаким: Иоахаза же взя и введе во Египет и умре тамо. **35** И сребро и злато даде Иоаким фараону, обаче написа землю даяти сребро по словеси фараону: муж по оценению своему даяше сребро и злато от людей земли тоя даяти фараону Нехао. **36** Сын бе двадесяти и пяти лет Иоаким, егда нача царствовати, и единонадесять лет царствова во Иерусалиме. Имя же матери его Иелдаф, дщи Фадаиля, от Румы. **37** И сотвори лукавое пред очима Господними, по всем елика сотвориша отцы его.

**24** Во днех его взыде Навуходоносор царь Вавилонский, и бысть ему Иоаким раб три лета, и отвратися, и отвержеся его. **2** И посла Господь ему единопоясники Халдейския и единопоясники Сирийския, поясники сынов Аммоних, и посла их в землю Иудову на побеждение по словеси Господню, еже глагола рукою рабов Своих пророков. **3** Обаче прииде по гневу Господню на Иуду, еже отставити его от лица Своего грех ради Манасииных, по всем елика сотвори, **4**

и кровь неповинную пролия, и наполни Иерусалим крове неповинныя, сего ради не восхоте Господь умиловитися. 5 И прочая словес Иоакимовых, и вся елика сотвори, не се ли, сия написана в книзе словес дний царей Иудиных? 6 И успе Иоаким со отцы своими, и воцарися Иехониа вместо его. 7 И не приложи ксему царь Египетский изыти из земли своя, яко взя царь Вавилонский от потока Египетска даже до реки Евфрата, вся елика быша царя Египетска. 8 Сын осминадесяти лет Иехониа, егда нача царствовати, и три месяцы царствова во Иерусалиме. Имя же матере его Несфа, дщи Еланасфана, от Иерусалима. 9 И сотвори лукавое пред очима Господними, по всему елико сотвори отец его. 10 И в время то взыде Навуходоносор царь Вавилонскими на Иерусалим, и бысть град во облежении. 11 И прииде Навуходоносор царь Вавилонский на град Иерусалим, и отроцы его около обседяху град. 12 И изыде Иехониа царь Иудин ко царю Вавилонскому, сам и отроцы его, и мати его, и князи его, и скопцы его, и взя его царь Вавилонский в осмое лето царства своего. 13 И изнесе вся сокровища оттуду суцая во храме Господни и сокровища дому царева, и сокруши вся сосуды златыя, яже сотвори Соломон царь Израилев во храме по глаголу Господню, 14 и пресели Иерусалимляны и вся князи, и сильныя крепостию, плена десять тысящ пленив, и всякаго древоделя, и художники: и никтоже остана, токмо убозии земли тоя: 15 и преведе Иехонию в Вавилон, и мать цареву, и жены царевы, и скопцы его, и крепкия земли тоя введе на преселение из Иерусалима в Вавилон: 16 и вся мужы силы, седмь тысящ, и древодель и художников тысящу, вси сильнии

творящи брань, и введе их царь Вавилонский в преселение в Вавилон. 17 И постави царем Вавилонский царь Ватфанию сына его и вместо его, и преложи имя ему Седекиа. 18 Сын двадесяти и одинаго лета Седекиа, внегда нача царствовати, и единонадесять лет царствова во Иерусалиме. Имя же матери его Амитала, дщи Иеремиина, от Ловны. 19 И сотвори лукавое пред очима Господними, по всему елика сотвори Иоаким, 20 яко ярость бе Господня на Иерусалиме и на Иуде, дондеже отверже я от лица Своего. И отвержеся Седекиа царя Вавилонска.

**25** И бысть в лето девятое царства его, в месяц десятый, прииде Навуходоносор царь Вавилонский и вся сила его на Иерусалим: и обступи его отвсюду, и создаша окрест его бойницы. 2 И бысть град во obleжении до первагонадесять лета царства Седекиина, девятого дне месяца: 3 и превозможе во граде глад, и не бысть хлеба людем земли тоя: 4 и разседся град, и вси мужие воинстии изыдоша нощию путем врат, яже посреде стен, яже суть у вертограда царева, и Халдее окрест града (беша). И побеже (царь Седекиа) путем пустынным: 5 и погна сила Халдейская вслед царя, и яша его во Аравофе Иерихонстем, и вся сила его разсыпая от него: 6 и пояша царя и поведоша его к царю Вавилонску в Ревлафу: и глагола с ним суд: 7 и сыны Седекиины закла пред очима его, и очи Седекиины избоде, и связа его узами, и отведе его во Вавилон. 8 В месяц же пятый, в седмый день месяца, сие лето девятонадесять Навуходоносора царя Вавилонска, прииде Навузардан архимагир, раб царя Вавилонскаго, во Иерусалим 9 и зажже храм Господень и дом царев, и вся

домы Иерусалимли и вся дома великия сожже архимагир:  
10 и стены Иерусалимли окрест раскопа сила Халдейская.  
11 И останок людей избывших во граде и впадших, иже отпадоша ко царю Вавилонску, и прочее и утверждение пренесе Навузардан воевода. 12 И от нищих земли тоя остави архимагир винограды блюсти и вертограды. 13 И столпы медяны в храме Господни, и подставы, и море медное сущее во храме Господни сокрушиша Халдее, и взяша медь их во Вавилон: 14 и конобы, и котлы и фиалы, и кадилницы, и вся сосуды медяныя, в нихже служаху, взяша: 15 и кадилницы, и фиалы златыя и сребряныя взя архимагир, 16 столпы два, и моря едино, и подставы, яже сотвори Соломон храму Господню: не бе веса меди всех сосудов. 17 Осминадесяти лакот бысть высота столпа единого, и глава медяна на нем: и высота главе три лакти, и на главе мрежи и шипки окрест, вся медяна: по сему же и столп второй со мрежею. 18 И поят архимагир Сареа жерца перваго и Софонию жерца втораго, и три стражы вратныя: 19 и от града взя скопца единого, иже бе приставник над мужи военными, и пять мужей предстоящих пред лицом царевым, обретшихся во граде, и книгочия князя силы, иже строяше люди земли тоя, и шестьдесят мужей людей земли тоя обретшихся во граде: 20 и поят я Навузардан архимагир, и приведе я к царю Вавилонскому в Ревлафу. 21 И порази их царь Вавилонский, и умори я в Ревлафе, в земли Емафове. И преселися Иуда свыше земли своея. 22 И людие оставшиися в земли Иудове, ихже остави Навуходносор царь Вавилонский, и постави над ними Годолию, сына Ахикамля, сына Сафаня. 23 И услышаша вси князи силы сами и мужие их, яко постави царь

Вавилонский Годолию, и приидоша к Годолии в Массифу, и Исмаил сын Нафаниин, и Иоанан сын Карифов, и Сараиа сын Фанамафов Нетофафитский, и Иезониа сын Махаффов, сами и мужие их (приидоша). 24 И клятса им Годолиа и мужем их и рече им: не бойтеса пришествия Халдеев: седите на земли и работайте царю Вавилонскому, и добро будет вам. 25 И бысть в месяц седмый, прииде Исмаил сын Нафаниин сына Елисамля от семене царска, и десять мужей с ним, и порази Годолию, и умре, и Иудеев и Халдеев, иже с ним бяху в Массифе. 26 И восташа вси людие, от мала и до велика, и князи сил, и внидоша во Египет, яко убояшася от лица Халдейска. 27 И бысть в лето тридесять седмое преселения Иоахина царя Иудина, в дванадесятыи месяц, в двадесять седмый день месяца, вознесе Евилмародах царь Вавилонский, в лето царства своего, главу Иоахина царя Иудина, и изведе его из дому темницы его, 28 и глагола с ним благая, и даде престол ему свыше престолов царей, иже бяху с ним в Вавилоне: 29 и измени ризы его темничныя, и ядыше хлеб с ним всегда, во вся дни живота своего. 30 И пища его от дому царска давана бяше, и все изобилие во дни его, во вся дни живота его.

## Первая книга Паралипоменон

**1** Адам, Сиф, Енос, **2** Каинан, Малелеил, Иаред, **3** Енох, Мафусал, Ламех, **4** Ное, Сим, Хам, Иафеф. **5** Сынове Иафефовы: Гамер и Магог и Мадай, Иован, Елиса и Фовел, и Мосох и Фирас. **6** Сынове же Гамеровы: Асханаз и Рифаф и Форгама. **7** Сынове же Иовани: Елиса и Фарсис, и Хеттим и Доданим. **8** Сынове же Хамовы: Хус и Месраим, Фуд и Ханаан. **9** Сынове же Хусовы: Сава и Евила, и Савафа и Регма и Севефаха. Сынове же Регмановы: Сава и Дадан. **10** Хус же роди Неврода: сей нача быти исполин ловец на земли. **11** Месраим же роди Лодиима и Анамиима, и Лавиима и Неффосеимы, **12** и Фафериимы и Патросониимы, и Хаслоимы, от нихже изыдоша Филистими, и Каффориимы. **13** Ханаан же роди Сидона первенца своего и Хеттеа, **14** и Иевусеа и Аморреа, и Гергесеа **15** и Евеа, и Арукеа и Асенеа, **16** и Арадиа и Самарееа и Амафия. **17** Сынове же Симовы: Елам и Ассур, и Арфаксад и Луд и Арам. Сынове же Арамли: Уз и Ул, и Гефер и Мосох. **18** Арфаксад же роди Каинана, Каинан же роди Салу, Сала же роди Евера. **19** Еверу же родистася два сына: имя единому Фалек, яко бо дни его разделена бысть земля, и имя брату его Иектан. **20** Иектан же роди Елмодада и Салефа, и Асермофа и Иадера, **21** и Адорама и Узала, и Деклу **22** и Гамаала, и Авимеила и Саву, **23** и Уфира и Евилата и Иоава: вси сии сынове Иектановы. **24** Сынове же Симовы: Арфаксад, Каинан, Сала, **25** Евер, Фалек, Рагав, **26** Серух, Нахор, Фара, **27** Аврам, той есть Авраам. **28** Сынове же Авраамли: Исаак и Исмаил. **29** Сии же роди их: первенец Исмаилов Наваиоф и Кидар, и Навдеил и Мавсан, **30** и Масма и Идума, и Массий и Ходдад,

и Феман 31 и Иетур, и Нафес и Кедма: сии суть сынове  
Исмаили. 32 Сынове же Хеттуры подложницы Авраамовы,  
и роди ему Зомврана и Иезана, и Мадала и Мадиама, и  
Иесвока и Суеа. Сынове же Иезани: Сава и Дедан. Сынове  
же Дедановы: Рагуил и Навдеил, и Ассириим и Латусиим и  
Асомин. 33 Сынове же Мадиамли: Гефар и Офер, и Енох и  
Авида и Елдад: вси тии сынове Хеттурини. Роди же Авраам  
Исаака. 34 Сынове же Исааковы Исав и Израиль. 35 Сынове  
же Исавовы: Елифаз и Рагуил, и Иевул и Иеглом и Корей. 36  
Сынове Елифазовы: Феман и Омар, и Софар и Гофам и  
Кенез. Фамна же подложница Елифазова роди ему Амалика.  
37 Сынове же Рагуилевы: Нахецф и Заре, и Сомме и Мозе. 38  
Сынове же Сиировы: Лотан и Совал, и Севегон и Ана, и  
Дисон и Асар и Рисон. 39 Сынове же Лотани: Хорри и Еман,  
и сестре Лотаня Фамна. 40 Сынове же Совали: Адуар и  
Манааф, и Увал и Саифи и онан. Сынове же Севегони: Аиа  
и Онам. 41 Сынове же Анани: Дисон и Еливама, дщи Ананя,  
двое. Сынове же Дисоновы: Амада и Есеван, и Ефран и  
Харран. 42 Сынове же Асаровы: Валаам и Занан и Илакан,  
и сынове Дисони: Ос и Арран. 43 И сии царие их, иже  
царствоваша в земли Едомли, прежде неже бысть царь над  
сыны Израилевыми: Валак сын Веоров, и имя граду его  
Деннава: 44 умре же Валак, и царствова вместо его Иовав,  
сын Зарин, от Восорры. 45 И умре Иовав, и царствова вместо  
его Асом от земли Феманони. 46 И умре Асом, и царствова  
вместо его Адад, сын Варадов, иже порази Мадиама на  
поли Моавли: и имя граду его Гетфем. 47 И умре Адад,  
и царствова вместо его Самаа от Мессеккаса. 48 И умре  
Самаа, и царствова вместо его Саул от Роовофа, иже близ



реки. 49 Умре же Саул, и царствова вместо его Валаеннон сын Аховоров. 50 И умре Валаеннон, и царствова вместо его Адад сын Варатов, егоже граду имя бе Фогор и имя жене его Метевеиль, дщерь Матраифа. 51 И умре Адад, и начаша быти князи Едомли: князь Феман, князь Алуа, князь Иефаф, 52 князь Еливама, князь Ила, князь Финон, 53 князь Кенез, князь Феман, князь Вамаил, 54 князь Гамесил, князь Арераман. Сии быша князи Едомстии.

**2** Сынове же Израилевы сии суть: Рувим, Симеон, Левий, Иуда, Иссахар, Завулон, 2 Дан, Иосиф, Вениамин, Неффалим, Гад и Асир. 3 Сынове Иудины: Ир, Авнан и Силом: сии трие родишася ему от дщере Савы Хананитяныни. Бысть же Ир первенец Иудин лукав пред Господем: и уби его. 4 Фамарь же невестка его роди ему Фареса и Зару. Всех сынов Иудиных пять. 5 Сынове же Фаресовы: Есром и Иемуил. 6 Сынове же Зарины: Замврий и Ифам, и Емуан и Калхад и Даралей: всех пять. 7 Сынове же Хармиины Ахар, иже смути Израиля, иже сложися на проклятие. 8 И сынове Ифамли Азариа. 9 Сынове же Есромовы, иже родишася ему: Иерамеил и Арам и Халови. 10 Арам же роди Аминадава, Аминадав же роди Наассона, князя дому Иудину, 11 Наассон же роди Салмона, и Салмон роди Вооза, 12 и Вооз роди Овида, и Овид роди Иессеа. 13 Иессей же роди первенца своего Елиава, и втораго Аминадава, и третяго Самеа, 14 и четвертаго Нафанаила, и пятаго Реила, 15 и шестаго Асака, и седмаго Давида. 16 И сестры их быша: Саруиа и Авигеа. Сынове же Саруины: Авесса и Иоав и Асаил, трие сии. 17 Авигеа же роди Амессу, егоже отец бысть Иофор Исмаилтянин. 18 И Халев сын Есромов поя жену Азуву и

Иериофу. И сии сынове ея: Иасар и Сував и Ардон. 19 И умре Азува, и взя себе Халев жену Ефрафу, яже роди ему Ора, 20 Ор же роди Урию, и Уриа роди Веселеила. 21 По сем же вниде Есром ко дщери Махира отца Галаадова, и сей поя ю, сый в летех шестидесяти пятих: и роди ему Сегува. 22 Сегув роди Иaira, и беша ему двадесять три грады в земли Галаадстей. 23 Взя же Гедсур и Арам веси Иаировы, Канаф и села его, шестьдесят градов. Вси тии сынове Махира отца Галаадова. 24 И по умертвии Есрома вниде Халев во Ефрафу, жена же Есромля Авиа, и роди ему Асдома отца Фекоева. 25 И беша сынове Иерамеила первенца Есромля: Рам первенец и Ваана, и Арам и Асом брат его. 26 И бе жена ина Иерамеилу, именем Атара, яже бысть мати Унамля. 27 И быша сынове Рама первенца Иерамеила: Маас и Иамин и Акор. 28 И быша сынове Унамли Саммаа и Еддай. Сынове же Саммаины Надав и Ависур. 29 И имя жене Ависурове Авигеа: и роди ему Озва и Моддиа. 30 Сынове же Надавли Салад и Апфаин: и умре Салад не имый чад. 31 И сынове Апфаини Иесий: и сын Иесиев Сосан: и сынове Сосани Дадай. 32 Сынове же Дадаини: Ахисама и Иефер и Ионафан: и умре Иефер не имый чад. 33 Сынове же Ионафани Фалеф и Заза. Тии быша сынове Иерамеили. 34 Сосан же не име сынов, но точию дщери, и имяше Сосан раба Египтянина, именем Иераа: 35 и даде Сосан дщерь свою Иераю рабу своему в жену, и роди ему Ефффеа, 36 Ефффей же роди Нафана, и Нафан роди Заведа, 37 Завед же роди Офлада, Офлад же роди Иовида, 38 Иовид же роди Ииуа, Ииуй роди Азарию, 39 Азариа же роди Хеллиса, и Хеллис роди Елеаса, 40 Елеас же роди Сосомаиа, и Сосомай

роди Саллума, 41 Саллум же роди Иекомию, и Иекомиа роди Елисама. 42 Сынове же Халева брата Иерамеиля, Мариса первенец его: той отец Зифов: и сынове Марисы отца Хевронова. 43 И сынове Хеврони: Корей и Фафуй, и Реком и Самаа. 44 Самаа же роди Раема, отца Иеркаанова, Иеркаан же роди Саммаа. 45 Сын же Саммаин Маон, и Маон отец Вефсуров. 46 Гефа же подложница Халевова роди Арана и Мосаа и Газера: Аран же роди Газиза. 47 Сынове же Аддаини: Регма и Иоафам, и Гирсом и Фалет, и Гефа и Сегав. 48 И подложница Халевова Моха роди Севера и Фархана. 49 Роди же Сагаф отца Мадминаева, и Саула отца Мадевина, и отца Аговдаева, и дщи Халевова Асха. 50 Сии бяху сынове Халевовы, сынове Ора первенца Ефрафова: Совал, отец Кариафиаримов, 51 и Соломон отец Вифлеемов, и Арим отец Вефгедоров. 52 Быша же сынове Совалу отцу Кариафиаримлю: Араа и Есий, и Амманиф 53 и Умасфае, и Кариафиарим и Мифифим, и Исамафим и Исамареим: от тех изыдоша Сарафее и Есфаголее. 54 Сынове же Соломони: Вифлеем и Нетофат и Атароф, дому Иоавля, и половина Манафиев Исараи, 55 отечества Писарей обитающих во Иависе, Фаргафиим и Самафиим и Сохафим: сии суть Кинее, иже приидоша от Емафа, отца дому Рихавля.

**3** Сии же быша сынове Давидовы, иже родишася ему в Хевроне: перворожденный Амнон от Ахинаамы Иезраилитиды: второй Далуиа от Авигеи Кармилския: 2 третий Авессалом сын Маахи, дщере Фоломиа царя Гесурска: четвертый Адониа сын Аггифин: 3 пятый Сафатиа от Авиталы: шестый Иефраам от Аглаи жены его: 4 шесть родишася ему в Хевроне, идеже царствова седмь лет и

шесть месяц: и тридесять три лета царствова во Иерусалиме.  
5 И сии родишася ему во Иерусалиме: Самаа и Совав, и Нафан и Соломон, четыри от Вирсавии дщере Амииловы: 6 и Евар и Елисама, и Елифалет 7 и Нагис, и Нафек и Иафие, 8 и Елисама и Елиадак и Елифалет, девять. 9 Все сынове Давидова кроме сынов подложничих и Фамары сестры их. 10 Сынове же Соломони: Ровоам, Авиа сын его, Аса сын его, Иосафат сын его, 11 Иорам сын его, Охозиа сын его, Иоас сын его, 12 Амасиа сын его, Озиа сын его, Иоафам сын его, 13 Ахаз сын его, Езекиа сын его, Манассиа сын его, 14 Амон сын его, Иосиа сын его. 15 Сынове же Иосиины: первенец Иоахаз, второй Иоаким, третий Седекиа, четвертый Селлум. 16 Сынове же Иоакимовы: Иехониа сын его, Седекиа сын его. 17 Сынове же Иехониины: Асир, Салафииль сын его, 18 Мелхирам, Фадаиа и Анесар, и Иезекиа и Осамон и Савадиа. 19 Сынове же Салафиилевы: Зоровавель и Семей. Сынове же Зоровавелевы: Мосоллам и Ананиа, и Салимин сестра их, 20 и Асувеа и Оел, и Варахиа и Асадиа и Асовед, пять. 21 Сынове же Ананиины: Фалтиас, и Иесиа сын его, Рафал сын его, Орна сын его, Авдиа сын его, Сехения сын его, 22 и сын Сехениин Самеа. И сынове Самеины: Хаттус и Иоил, и Верриа и Ноадиа и Саф, шесть. 23 И сынове Ноадиины: Елионей и Езекиа и Езрикам, трие. 24 Сынове Елионеевы: Уадиа и Елиасевон, и Фадаиа и Акаум, и Иоанан и Далеа и Анан, семь.

**4** Сынове же Иудины: Фарес, Есром и Хармий, и Ор и Сувал, 2 и Рада сын Суваль. Сувал же роди Иефа, Иеф же роди Ахимеа и Лаада: сии родове Арафиины. 3 И сии сынове Етановы: Иезраиль и Иесман и Иевдан: имя же сестре их

Есиадесфон. 4 И Фануил отец Гедоров, и Езер отец Осань: сии сынове Ора первенца Еффрафа, отца Вефлаемля. 5 Ассуру же отцу Фекоеву бысте две жене: Халла и Маара: 6 роди же ему Маара Ахаза и Афера, и Фемана и Аасфира: вси сии сынове Маарины. 7 И сынове Хеллани: Сереф и Саар и Есфанам. 8 Кое же роди Енова и Совива и рождение брата Рихава, сына Иаримля. 9 Бысть же Иавис честнейший братии своя: и мати его нарече имя его в болезни. 10 И призва Иавис Бога Израилева, глаголя: аще благословляя благословиши мене и распространиши пределы моя, и будет рука Твоя со мною, и сотвориши мя во уразумение, еже не смирити мя. И даде ему Бог вся, елика просих есть. 11 Халев же отец Асхань роди Махира: сый отец Ассафонов. 12 И Ассафон роди Сафрефу и Фессию, и Фана отца града Нааса, брата Селома Кенезиина и Ахазова: сии мужие Рихавли. 13 Сынове же Кенезиины: Гофониил и Сараиа. Сынове же Гофониилевы Афаф. 14 Манафай же роди Гофора, и Сараиа роди Иорама, отца Гисасариимля, зане художницы быша. 15 Сынове же Халева сына Иефонниина Ир, Ила и Наам. Сынове же Илы Кенез. 16 Сынове же Амелимли: Зиф и Зефа, и Фириа и Есерил. 17 Сынове же Еврины: Иефер, Морад, и Афер и Иамон: и роди Иефер Марона, и Семяю, и Иесву отца Гедорова и отца Есфамоня. 18 Жена же его сия Адиа роди ему Иареда отца Гедоря, и Авера отца Сохоня, и Ехфилия, отца Заноня. Сии же сынове Веффии дщере фараоновы, юже поят Морил. 19 И сынове жены Идумеаныни, сестры Ханема и Далиа отца Кеила, и Симеон отец Иомамов. И сынове Наимовы отца Кеилова: Гармий и Есфемоний иже из Махафы. 20 Сынове же Симеони:

Амнон и Рамнон сын Анань и Фимнон. И сынове Еси: Зохаф, и сынове Зохафовы. 21 Сынове Силома, сына Иудина: Ир отец Лихавль, и Лаада отец Марисань: и племя дому делателей виссона в дому Есовы, 22 и Иоаким, и мужие Хозива и Иоас и Сараф, иже вселишася в Моаве: и возврати их Аведир в Мафукиим. 23 Сии скудельницы обитающие во атаиме и гадире с царем, и в царстве его укрепилася и вселишася тамо. 24 Сынове Симеони: Намуил и Иамин и Иарив, Саре, Саул. 25 Салем сын его, масан сын его, Масма сын его, 26 Амуил сын его, Савуд сын его, Захкур сын его, Семей сын его. 27 Сынове же Семейны шестнадцать и дочерей шесть. Братиям же их не быша сынове мнози, и вся племена их не умножишася якоже сынове Иудины, 28 и обитаху в Вирсавеи и саваде, и Монаде и во Есерсуале, 29 и в Валааи и во Асеме, и во Фоладе 30 и в Вафуиле, и в Ерме и в Сикелаи, 31 и во Вефмаримофе и во Имисусеосине и в дому Варусеоримли: сии грады их даже до царя Давида, 32 и села их: Етам и Ин, Рамнон и Фоккан и Есар, градов пять. 33 И вся веси их окрест градов сих, даже до Ваала: сие обдержание их и разделение их. 34 Мосовав же и Иемолох, и Иосиа сын Амасиев, 35 и Иоиль и Ииуй сын Асавиев, сын Сараев, сын Асииль, 36 и Елионай и Иокава, и Иасуиа и Асеа, и Иедиил и Исмаил и Ванеа 37 и Зуза сын Сафеиев, сына Алоня, сына Иедиина, сына Семриня, сына Самеина. 38 Сии произшедшии во именовех князей, в родех своих и в домех отечеств своих умножишася во множество, 39 и поидоша да внидут в Герары даже до восток дебри взыскати пажити скотом своим: 40 и обретоша пажити премноги и благи: и земля пространна пред ними, и мир и покой, зане

прежде обитаху от сынов Хамовых тамо. 41 И приидоша сии написанныи имени во дни Езекии царя Иудина и побиша жителей их и обитание, ихже обретоша ту, и искорениша их даже до дне сего: и вселишася вместо их, яко пажить скотом их бяше тамо. 42 От сих же от сынов Симеоних идоша в гору Сиир мужей пять сот, и Фалтия и Ноадия, и Рафаиа и Озиил, сынове Иесы, князи их: 43 и побиша останки оставшыяся от Амалика, и вселишася тамо даже до дне сего.

**5** Сынове же Рувима первенца Израилева: яко той первенец: и внегда ему взыти на ложе отца своего, даде благословение его сыну своему Иосифу, сыну Израилеву, и не бысть (той) вменен в первенство, 2 яко Иуда силен крепостию и в братии своей, и в вожда из него, и благословение Иосифу. 3 Сынове Рувима первенца Израилева: Енох и Фаллус, Асрон и Хармий. 4 Сынове Иоилевы: Семей и Ванеа сын его. Сынове же Гога сына Семейна: 5 сын его Миха, сын его Риха, сын его Ваал, 6 Векра сын его, егоже пресели Фаглафалласар царь Ассирииский: сей бысть князь колена Рувимова. 7 И братия его во отечестве своем, в исчислениях своих, по родом их, князь Иоиль и Захариа, 8 и Валек сын Азузов, сын Саммы, сын Иоилев: той обита во Ароире и в Наване и Веелмаоне, 9 и противу востока обита даже до входа пустыни, от реки Евфрата, яко скот их мног в земли Галаадстей. 10 Во дни же Саула возведоша брань противу Агарян: и падоша в руках их обитающии в жилищах своих вси к востоку Галаадску. 11 Сынове Гадовы прямо их обиташа в земли Васани до Селха: 12 Иоиль первенец, и Сафам второй, и Ианин книжник Васанский. 13 И братия их, по домом отечеств их: Михаил и Мосоллам, и Савей

и Иора, и Иохан и Иовиа и Овид, семь. 14 Сии сынове Авихаила сына Рувиина, и Адди, сына Галаадова, сына Михаилова, сына Иессеина, сына Иедаина, сына Вузова, 15 брата сына Авдиилова, сына Гуниина, князь дому отечеств их. 16 Обиташа в Галааде, в Васане и в весех их и во всех окрестных Саронских, даже до исхода. 17 Вси сии сочтени быша во дни Иоафама царя Иудина и во дни Иеровоама царя Израилева. 18 Сынове Рувимовы и Гадовы и полплемене Манассиина (биша) сынове сильни, мужие носяще щиты и мечы и напрязающе луки и научени брани, четыредесять и четири тысящы и семь сот и шестьдесят, исходящии на ополчение. 19 И твориша брань со Агаряны и Итуреаны, и Нафисеаны и Надавеаны, 20 и укрепилася над ними: и предашася в руке их Агаряне и вся обитания их, зане к Богу воззваша во брани, и услыша их, зане уповаша на Него. 21 И плениша имения их, велблюдов пятьдесят тысящ, и овец двести пятьдесят тысящ, и ослов две тысящы, и душ человеческих сто тысящ: 22 ранении же мнози падоша, зане (бысть) от Бога брань: и вселишася вместо их даже до преселения. 23 И полплемене Манассиина вселишася в земли от Васана даже до Ваала Ермоня и Санира и горы Аермонски: и сии в Ливане умножилася. 24 И сии (быша) князи дому отечеств их: Гофер и Иеси, и Елиил и Иеремиа, и Иодуиа и Иедиил, мужие сильни в крепости, мужие именитии, князи по домом отечеств своих. 25 И оставиша Бога отец своих и соблудиша вслед богов людей земли, ихже потреби Бог от лица их: 26 и воздвиже Бог Израилев дух Фула царя Ассирийска и дух Фаглафалласара царя Ассирийска, и пресели Рувима и Гада и полплемене



Манасиина, и введе их во Аллан и Иовор, и во Аран и на реку Гозан, даже до дне сего.

**6** Сынове Леви: Герсон, Кааф и Мерари. **2** Сынове же Каафовы: Амрам и Иссаар, Хеврон и Озиил. **3** Сынове же Амрамли: Аарон и Моисей и Мариам. Сынове же Аароновы: Надав и Авиуд, Елеазар и Ифамар. **4** И Елеазар роди Финееса, и Финеес роди Авиуда, **5** и Авиуд роди Воккиа, и Воккий роди Озию, **6** Озия же роди Сареа, и Сарей роди Мариофа, **7** Мариоф же роди Амарию, Амариа же роди Ахитова, **8** Ахитов же роди Садока, и Садок роди Ахимааса, **9** Ахимаас же роди Азарию и Азариа роди Иоанана, **10** Иоанан же роди Азарию, той есть Азариа, иже священствова в дому, егоже созда Соломон во Иерусалиме. **11** Роди же Азариа Амарию, и Амариа роди Ахитова, **12** Ахитов же роди Садока, и Садок роди Селлума, **13** и Селлум роди Хелкию, и Хелкиа роди Азарию, **14** и Азариа роди Сареа, и Сарей роди Иоседека. **15** Иоседек же изыде, егда пресели Господь Иуду и Иерусалима рукою Навуходоносора в Вавилон. **16** Сынове же Левиини: Герсон, Кааф и Мерари. **17** И сия имена сынов Герсоних: Ловений и Семей. **18** Сынове же Каафовы: Амрам и Иссаар, Хеврон и Озиил. **19** Сынове же Мерарины: Мооли и Муси. И сии роди Левиини по отечеством их. **20** Герсонови: Ловений сын его, Иеф сын его, Семна сын его, **21** Иола сын его, Аддо сын его, Зара сын его, Иефри сын его. **22** Сынове Каафовы: Иссаар сын его, Аминадав сын его, Корей сын его, Асир сын его, **23** Елкана сын его, Ависаф сын его, Асир сын его, **24** Кааф сын его, Уриил сын его, Озия сын его, Саул сын его. **25** Сынове же Елкановы: Амаси сын его, Амиоф сын его, **26** Елкана сын его, Суфий

сын его, и Нааф сын его, 27 Елиав сын его, Иеремеил сын его, Елкана сын его, Самуил сын его. 28 Сынове же Самуили: первенец его Иоиль и второй Авиа. 29 Сынове же Мерарины: Мооли сын его, Ловений сим его, Семей сын его, Озиа сын его, 30 Саммаа сын его, Ананий сын его, Асаиа сын его. 31 Сии же суть, ихже постави Давид над певцы в дому Господни, егда постави кивот: 32 и бяху служаще пред скиниею дому свидения в пении, дондеже созда Соломон дом Господень во Иерусалиме, и стояху по чину своему в служении своем. 33 И сии предстоящи и сынове их от сынов Каафовых: Еман певец сын Иоиля, сына Самуилева, 34 сына Елканова, сына Еремеилева, сына Елиавля, сына Наафова, 35 сына Суфова, сына Елканаева, сына Амиофова, сына Амасова, 36 сына Елканова, сына Иоилева, сына Азариева, сына Сафаниева, 37 сына Маафова, сына ассерова, сына Авиасафова, сына Асирова, сына Кореова, 38 сына аминадавова, сына Исаарова, сына Каафова, сына Левиина, сына Израилева: 39 и брат его Асаф, иже стояша одесную его: Асаф сын Варахии, сына Самааева, 40 сына Михайлова, сына Масилова, сына Мелхиева, 41 сына Афаниева, сына Зараева, сына Адаиева, 42 сына Ифамова, сына Земмина, сына Семейева, 43 сына Иеефова, сына Герсонова, сына Левиина. 44 Сынове же Мерарины братия их ошуюю: Ефам сын Хусии, сына Авдиина, сына Малохова, 45 сына Савиева, сына Амасиева, сына Хелкиева, 46 сына Амасиева, сына Ваниина, сына Семирова, 47 сына Моолиина, сына Мусиева, сына Мерарина, сына Левиина. 48 Братия же их по домом отечеств их, левитяне даны во всякое дело служения скинии дому Божия: 49 и Аарон и сынове его кадяху над олтарем

всесожжений и над олтарем фимиама во всякое дело Святых Святых, и да молятся за Израиля по всему, елика повеле Моисей раб Божий. 50 Сии же сынове Аарони: Елеазар сын его, Финеес сын его, Авиуд сын его, 51 Вокхий сын его, Озий сын его, Сарей сын его, 52 Мариоф сын его, Амариа сын его, Ахитов сын его, 53 Садок сын его, Ахимаас сын его. 54 И сия обитания их, по селам их и в пределех их, сыном Аароним племени Каафову, тем бо бысть жребий: 55 и даша им Хеврон в земли Иудине и подградия его окрест его: 56 и села града и веси его даша Халеву сыну Иефонниину. 57 Сыном же Аароним даша грады убежищ: Хеврон и подградия его, и Ловну и подградия ея, и Алом и окрестная его, 58 и Келом и окрестная его, и Давир и окрестная его, 59 и Асан и подградия его, и Вефсамис и подградия его, и Вефсур и подградия его: 60 от колена же Вениаминова Гаваон и подградия его, и Еламоф и подградия его, и еламвей и подградия его, и Анафоф и подградия его: всех градов их тринадцать, градов по племенем их. 61 И сыном Каафовым оставшымся от племени рода, от полуплемени Манасиина, даша по жребию десять градов. 62 И сыном Герсоним по племенем их от колена Иссахарова и от колена Асирова, и от колена Неффалимова и от колена Манасиина в Васане, грады тринадцать. 63 И сыном Мерариным по племенем их от колена Рувимова и от колена Гадова и от колена Завулоня даша по жребию градов дванадцать. 64 Даша же сынове Израилевы левитом грады и подградия их. 65 Даша же по жребию от колена сынов Иудиных и от колена сынов Симеоних и от колена сынов Вениаминих грады сия, ихже назваша имени (своими). 66 И от племен сынов

Каафовых, и быша грады пределов их от колена Ефремова: 67 и даша им грады убежищ: Сихем с подградиями его в горе Ефремове и Газер с подградиями его, 68 и Екмаан с подградиями его, и Вефорон и подградие его, 69 и Елон с подградиями его, и Гефремон с подградиями его: 70 и от половины колена Манассиина Анеир и подградия его, и Иевлаам и подградная его, по племени сыном Каафовым оставшимся. 71 Сыном Гертсоним от отечеств полуплемене Манассиина Гавлон от Васана и подградная его, и Асироф с подградными его: 72 и от колена Иссахарова Кедес с подградными его, и Надар с подградными его, 73 и Рамоф и подградная его, и Енан с подградными его: 74 и от колена Асирова Масию с подградными его, и Рамоф и подградие его, 75 и Акак и подградие его, и Роов с подградными его: 76 и от колена Неффалимля Кадис в Галилеи и подградная его, и Хамоф с подградными его, и Кариафаим и подградная его. 77 И сыном Мерариным оставшимся от колена Завулоня Реммон и подградная его, и Фавор с подградными его, 78 и за Иорданом Иерихон противу востока Иорданова: от колена Рувимова Восор в пустыни с подградными его, и Есса с подградными его, 79 и Кадимоф и подградная его, и Моапсаф с подградными его: 80 и от колена Гадова Раммоф Галаадский и подградная его, и Наим с подградными его, 81 и Есевон с подградными его, и Иазир с подградными его.

**7** И сии сынове Иссахаровы: Фола и Фуа, и Ясув и Сомврам, четыре. 2 Сынове же Фолы: Озий и Рафеа, и Иериил и Амин, и Иаффам и Самуил, князи по домом отечеств их, иже от колена Фолина, крепцы силою по родом их, ихже число во дни Давидовы двадесять и две тысящы и шесть сот. 3

Сынове же Озиины Иезрий, и сынове Иезриины Михаил и Авдиа, и Иоиль и Иесиа, пять всех князей. 4 И с ними по родом их, по домом отечеств их, препоясани и сильни ко ополчению на брань, тридесять и шесть тысящ: много бо имеша жен и сынов. 5 Братия же их во всех племенех Иссахаровых крепцы силою, осмьдесят и седмь тысящ сочтение всех их. 6 Сынове же Вениаминовы: Валай и Ховор и Иедиил, три. 7 Сынове же Вллаевы: Есевон и Озиа, и Озиил и Иеримуф и Уриа, пять князей домов отечеств их, крепцы силою, и число их двадесять и две тысящы и тридесять четыре. 8 Сынове же Ховоровы: Замириа и Иоав, и Елиезер и Елиана, и Амариа и Иеримуф и Авиа и Анафоф и Елмефем: вси сии сынове Ховоровы. 9 Сочтение же их по родом их, князи домов отечеств их, крепцы силою, двадесять тысящ и двести. 10 Сынове же Иедиилевы Валаам, и сынове Валаамовы Иеос и Вениамин, и Аоф и Аханаан, и Зифан и Фарсис и Асаир: 11 вси сии сынове Иедиилевы, князи племен крепчайшии силою, седмьнадесять тысящ и двести ко ополчению с силою исходящии. 12 И Сафан и Ифан, сынове Иеримуфовы, Есуд сын его, 13 Неффалим сын его, и Есиил и Гоини, и Иесер и Селлим, сынове его, Валаам сын его. 14 Сынове Манассии: Езриил, егоже роди наложница его Сира, роди же ему и Махира отца Галаадова. 15 Махир же поят жену Офирова и Сафинови, и имя сестре его Мооха, имя же второму Салпаад. Родишажеся Салпааду дщери. 16 И роди Мооха жена Махирова сына и нарече имя его Фарес: и имя брату его Сороор: и сынове его Улам и Ракам. 17 Сынове же Уламовы Валаам: сии сынове Галаада сына Махирова сына Манассиева. 18 Сестра же его Малехеф роди

Иесуда и Авиезера и Маалу. 19 Беху же сынове Семира: Аим и Сихем, и Докиим и Ениам. 20 Сынове же Ефремли Фусалам, и Раам сын его, и Фаам сын его, и Елаад сын его, и Фаа сын его, 21 и Завад сын его, и Софела сын его, и Езер и Езлада. Убиша же их мужие Гефстии, иже родишася в земли той: зане изыдоша взяти скоты их. 22 И плакася Ефрем отец их многи дни: и приидоша братия его, да утешат его. 23 И вниде к жене своей: и зача во чреве, и роди сына, и нарече имя его Вариа, яко в злых дому его рожден есть. 24 Дщи же его Сараа, и бо оных оставшихся: и созда Вефорон нижний и вышний и Садру. 25 Рафай же сын его, и Расеф и Фалай сынове его, и Фаан сын его, 26 и Ладан сын его, и Амиуд сын его, Елисама сын его, 27 Рун сын его, Иосий сын его. 28 И одержание их и обитание их Вефиль и веси его противу востока Наараня, и к западней стране Газера и веси его, и Сихем и веси его даже до Газы и веси ея, 29 и даже до предел сынов Манассииных, Вефсан и веси его, Фанаах и веси его, и Магеддон и веси его, Дор и веси его: в тех вселишася сынове Иосифа сына Израилева. 30 Сынове Асировы: Иамна и Есуд, и Иесуе и Вариа, и Сарреа сестра их. 31 Сынове же Вариевы Ховер и Мелхиил: сей отец Завефов. 32 И Ховер роди Иафлета и Сомира, и Хофана и Сулу сестру их. 33 И сынове Иафлетовы: Фасех и Амамааф и Асоаф: сии сынове Иафлетовы. 34 Сынове же Сомировы: Ихиур, Равгоа и Иава и Арам. 35 Сынове же Асуда брата его: Софа и Иамна, и Елим и Алам. 36 Сынове Софовы: Суе, Ариафер и Суан, и Ворин и Имрам, 37 и Васар и Иуд, и Самма и Селимван, и Иефран и Веера. 38 Сынове же Иеферовы: Иефон и Фасфа и Арей. 39 Сынове же Олани:

Орех и Аниил и Расиа. 40 Все сии сынове Асировы, все князи домов отечества избраннии и крепцы силою, князи, воеводы: сочтение их во время брани на ополчение двадесять шесть тысяч мужей.

**8** Вениамин же роди Валу первенца своего, и Азвила втораго, и Диеру третияго, 2 и Науила четвертаго, и Рафу пятаго. 3 Быша же сынове Вале: Адир, Гира и Авиуд, 4 и Ависуи и Ноаман, и Ахиа 5 и Гира, и Сефуфам и Урам. 6 Сии сынове Аоди, сии суть князи племен обитающим в Гаваи, ихже преселиша в Мануаф: 7 и Нааман и Ахиа, и Гира, тойже иглаам, и (Гира) роди Азана и Нуа. 8 И Сеорим роди на поли Моавли, повнегда отпустити ему Осиму и Вааду жены своя: 9 роди же от Валы жены своя Иовава и Самию, и Мису и Мелхома, 10 и Иоаса и Сехию и Мармию: сии сынове его князи отечеств: 11 от Осимы же роди Амитова и Елифаада. 12 Сынове же Елифаадовы: Евер и Мисоам и Самиил: той созда Анон и Лодон и веси их, еод и веси его: 13 Вериа же и Сама. Сии князи племенем живущим во Еламе, и тии изгнаша живущих в Гефе. 14 И братия их Сосил и Иеримоф, 15 и Завадиа и Орид, и Авад 16 и Мосоллам, и Иесфа и Иезиа, сынове Вериины. 17 И Завадиа и Мосоллам, и Азаки и Авер, 18 и Иассий и Самари, и Иезелиа и Иовав, сынове Елфаали. 19 И Иахим и Хезрий, и Завдий 20 и Елиоинай, и Салафий и Елиил, 21 и Адаиа и Вариа и Самараф, сынове Семины. 22 И Иесфан и Авер, и Елеил (и Адриа), 23 и Авдон и Зехрий, и Анан 24 и Ананиа, и Илам и Анафадиа, 25 и Иефадиа и Фануил, сынове Сосиковы. 26 И Самоас и Сариа, и Ефниа 27 и Иарасиа, и Илия и Зехриа, сынове Иероимли. 28 Сии князи отечеств по племенем

их: начальницы сии обиташа во Иерусалиме. 29 В Гаваоне же вселися Иеиль отец Гаваона и имя жене его Мааха: 30 сын же его первенец Авдон, и Сур и Кис, и Ваел и Надав, и Нир 31 и Геддор и Аиуй и братия его, и Саур и Махелод. 32 Махелод же роди Самаа. Сии же обиташа прямо братии своей во Иерусалиме с братиею своею. 33 Нир же роди Киса, и Кис роди Саула, Саул же роди Ионафана и Мелхисуа, и Аминадава и Иесваала. 34 Сын же Ионафанов Мемфиваал (или Мемфивосфей): и Мемфиваал роди Миху. 35 Сынове же Михины: Фифоф и Малоф, и Фарес и Хааз. 36 Хааз же роди Иаду, Иада же роди Салемефа и Асмофа и Замвриа, Замврий же роди Месу, 37 Меса же роди Ваану: Рафеа сын его, Еласа сын его, Асаил сын его. 38 Асаилу же шесть сынов, и сия имена их: Езрикам первенец его, и Исмаил и Азариа, и Авдиа и Сараиа и Анан: вси тии сынови Асаилевы. 39 Сынове же Асена брата его: Улам первенец его, и Иесус второй, и Елифас третий. 40 Быша же сынове Уламли мужие крепцы силою, напрязающе лук и умножающе сыны и сыны сынов, сто пятьдесят. Вси сии от сынов Вениаминих.

**9** И весь Израиль сочтен есть: и се, суть писаны в книзе царей Израилевых и Иудиных со преселившимися в Вавилон за беззакония своя, имиже беззаконноваша. 2 И иже обиташа первее во одержаниих своих во градех Израилевых, священницы и левити и вданнии (на служение). 3 И во Иерусалиме обиташа от сынов Иудиных и от сынов Вениаминих и от сынов Ефремлих и Манасииных: 4 Уфий сын Амиуды сына Амвриина, сына Амвраимова, сына Ваниина, сына сынов Фареса сына Иудина: 5 и от Силона Асаиа первенец его и сынове его: 6 от сынов же Зары



Иеил и братия их шесть сот и девяност. 7 И от сынов Вениаминих: Сахом сын Васоллама, сына Одуиева, сына Сануина: 8 и Иевнаа сын Иеровоамов и Елав: и сии сынове Озии сына Махирова: и Мосоллам сын Сафатии, сына Рагуилева, сына Иеваня. 9 Братия же их по родом их девять сот пятьдесят шесть, вси мужие князи племенем по домом отечеств своих. 10 От священник же Иодаиа и Иоарим, и Иоаким 11 и Азариа сын Хелкии, сына Мосолламова, сына Садокова, сына Марариофова, сына Ахитова начальника дому Божия: 12 и Адиам сын Иероамль, сына Фасгора, сына Мелхиаева, и Маасий сын Адиила, сына Езирова, сына Мосолламля, сына Маселимофова, сына Еммарова. 13 Братия же их князи по домов отечеств своих, тысяща и седмь сот и шестьдесят, сильни крепостию к деланию служения в дому Божи. 14 От левит же Самеиа сын Асувов, сына Езрикамова, сына Савиева от сынов Мерариных, 15 Ваквакар же и Арис, и Гареа и Мафаниа сын Михаев, сына Зехри, сына Асафова: 16 и Авдиа сын Самеа, сына Галилова, сына Идифуня, и Варахиа сын Ассы, сына Елканова, иже обита во дворех Нетофафовых. 17 Дверницы же: Селлум и Акум, и Телмон и Емман, и братия их: Селлум князь. 18 И даже доселе во вратех царских к востоку: сия врата на ополчения сынов Левиных. 19 И Селлум сын Кореа, сына Авиасафова, сына Кореова: и братия его по дому отечеств их, Кореане над делами служения стрегуще стражбы скинии: а отцы их над полком Господним, стрегуще входа. 20 Финеес же сын Елеазаров бысть вождь их пред Господем, и сии с ним. 21 Захариа сын Мосолламов, дверник врат скинии свидения. 22 Вси избранныи дверницы над враты двести

дванадесять, сии в селех своих сочтени: сих постави Давид и Самуил провидец в вере их. 23 И сии и сынове их (быша) при вратех дому Господня и в дому скинии стрещи почередно. 24 По четырем ветром быша двери к востоку, к западу, к северу, к югу. 25 Братия же их, иже живяху в селех своих, прихождаху по седми днех от времени даже до времени (на премену тем): 26 понеже четырем дверником сильным вверени быша двери: и левити быша над хранилищи, и над сокровищи дому Божия ополчахуся, 27 и окрест дому Божия живяху: яко на них бе стражба их: и сии над ключами, еже утро утро отверзати двери святилища. 28 От тех же (бяху) над сосуды служения, по числу бо вношаху сосуды и по числу изношаху я. 29 От тех же поставлени над сосуды и над всеми сосуды святыми, и над мукою пшеничною и вином и елеем, и фимиамом и ароматы. 30 От сынов же священнических беша мироварцы, миро соделоваху из аромат. 31 И Маттафия от левит, сей первенец Селлуму Кореанину, емуже вверена дела жертвы сковрадняя великаго жерца: 32 и Ванеа Каафитянин от братий их над хлебы предложения, еже уготовляти в субботы и субботы. 33 И сии псалмопевцы князи отечеств левитских, определени почередно во храминах, повседневно, яко да день и ночь свое служение отслуживают. 34 Сии князи отечеств левитских по племенем своим, начальницы сии пребываху во Иерусалиме. 35 В Гаваоне же живяше отец Гаваонь Иеиль: и имя жене его Мааха: 36 и сын первенец его Авдон, и Сур и Кис, и Ваель и Нир, и Надав 37 и Гедор, и братия его Аиун и Зехриа и Макелоф. 38 Макелоф же роди Саму: и сии вселишася посреде братий своих во Иерусалиме с братиями своими. 39 Нир же роди Киса, и Кис роди Саула, и

Саул роди Ионафана и Мелхисуа, и Аминадава и Иесваала.  
40 Сын же Ионафанъ Мемфиваал: и Мемфиваал роди Миху.  
41 Сынове же Михи: Филоф и Мелхиил, и Фараа и Хааз.  
42 Хааз же роди Иаду, Иада же роди Алефа и Асмофа и  
Замвриа: Замврий же роди Месу, 43 Меса же роди Ваану:  
Рафеа сын его, Еласа сын его, Асаил сын его. 44 Асаилу же  
(быша) шесть сынов, и сия имена их: Езрикам первенец  
его, и Исмаил и Азариа, и Авдиа и Анан и Аса: сии сынове  
асаиловы.

**10** Филистими же воеваша противу Израиля, и бежаша  
мужие Израилевы от лица иноплеменническа и падоша  
ранени на горе Гелвуи. 2 И погнаша иноплеменницы вслед  
Саула и вслед сынов его: и убиша иноплеменницы Ионафана  
и Аминадава и Мелхисуа, сынов Сауловых. 3 И отягчися  
брань на Саула, и обретоша его стрелцы в луках и в трудех,  
и изнеможе от стрел. 4 И рече Саул к носящему оружие его:  
извлецы мечь твой и прободи мя им, да не когда приидут  
необрезаннии сии и поругаются мне. И не восхоте носяй  
оружие его, яко убоися зело. И взя Саул мечь и нападе  
нань. 5 И виде носяй оружие его, яко умре Саул, и нападе  
и он на мечь свой и умре. 6 И умре Саул и три сына его  
в день он: и весь дом его купно умре. 7 И видеша вси  
мужие Израилевы, иже во юдоли, яко побежа Израиль,  
и яко умре Саул и сынове его, и оставиша грады своя и  
побегоша: и приидоша иноплеменницы и вселишася в них.  
8 И бысть заутра, и приидоша иноплеменницы совлачати  
падших корысти, и обретоша Саула и сынов его падших на  
горе Гелвуи: 9 и обнажиша его, и взяша главу его и оружие  
его, и послаша в землю иноплеменничу, да обносится (и

покажется) идолом их и людем: **10** оружия же их положиша в капищи бога своего: и главу его поткнуша в капищи Дагонове. **11** И услышаша вси живущии во Иависе Галаадстем вся, яже Филистими сотвориша Саулу и сыном его и Израилю: **12** и восташа от Галаада вси мужие крепцыи, и приидоша и взяша труп Саулов и труп сынов его, и принесоша их во Иавис, и погребоша кости их под дубом во Иависе: и постишася семь дней. **13** И умре Саул за беззакония своя, имиже беззаконнова Господеви по словеси Господню, понеже не сохрани, яко вопроши Саул волшебницы еже вопросити, и отвеща ему Самуил пророк. **14** И не взыска Господа Саул: сего ради уби его и возврати царство его Давиду сыну Иессееву.

**11** И собрася весь Израиль к Давиду в Хеврон, глаголюще: се, кости твоя и плоть твоя мы: **2** вчера же и третьего дне, егда еще царствоваше Саул, ты был еси изводяй и вводяй Израиля, и тебе рече Господь Бог твой: ты упасеши люди Моя Израиля, и ты будеши князь над людьми Моими Израилем. **3** И приидоша вси старейшины Израилевы ко царю в Хеврон: и утверди Давид с ними завет в Хевроне пред Господем: и помазаша Давида в царя над Израилем по словеси Господню, (еже глагола) рукою Самуиловою. **4** И иде царь Давид и весь Израиль во Иерусалим, сей есть Иевус, идеже бяху Иевусее жителие земли. **5** Рекоша же Давиду, иже обиташа в Иевусе: не внидеши семо. И взя Давид крепость Сионю, яже есть град Давидов. **6** Рече же Давид: всяк иже убьет Иевусеа в первых, будет князь и воевода. И взыде нань прежде Иоав сын Саруиев и бысть князем. **7** И седе Давид во обдержании: сего ради именована

е град Давидов. 8 И созда град окрест от Маала даже да окружения: Иоав же прочее града соорити: и воева и взя град. 9 Преспеваше же Давид идый и растый, и Господь Вседержитель бе с ним. 10 Сии же князи сильных Давидовых, иже помогаху ему в царстве его со всем Израилем, да царь будет по словеси Господню, над Израилем, 11 и сие число крепких Давидовых: Иесваал сын Ахамань, первый между тридесятми: той извлече мечь свой единожды на триста язвеных во едино время. 12 И по нем Елеазар, сын Додеа Ахохии: сей бе между тремя сильными: 13 сей бе с Давидом в Фасодомине, идеже иноплеменницы собрани быша на брань, и бе часть нивы полна ячменя, и людие побегоша от лица иноплеменнича: 14 и ста посреде части и защити ю, и изби иноплеменники, и сотвори Господь спасение велие (людем Своим). 15 Снидоша же тии трие от тридесяти князей на камень ко Давиду в пещеру Одолламлю, а полк иноплеменничь стояше во юдоли Гигантов. 16 Давид же бе тогда в крепости, полк же иноплеменничь бе тогда в Вифлееме. 17 И возжада Давид и рече: кто напоит мя водою от кладязя Вифлеемска, иже есть во вратех? 18 И трие тии проторгошася сквозе полк иноплеменничь и почерпоша воду из кладязя, иже в Вифлееме, иже бе во вратех, и взяша и принесоша к Давиду, да пиет. И не восхоте Давид пити ея и возлия ю Господеви 19 и рече: милостив ми Бог, еже сотворити глагол сей: аще кровь мужей сих испию в душах их, понеже душами своими принесоша. И не восхоте пити ея. Сие сотвориша трие сильнии. 20 И Авесса брат Иоавль, той бе первый в триех: сей извлече мечь свой противу триех сот мужей во един час и уби их, и той бе посреде триех именит:

21 от триех между двема преславный, и бе им начальник, обаче ко трием первым не достиже. 22 И Ванеа сын Иодаев, сын мужа крепкого, многа дела его, от Каваслила: той уби двоих Ариилов Моавских, и той сниде и уби льва у кладязя во время снега: 23 и той уби мужа Египтянина, емуже возраст бе пять локот, и в руце Египтянина копие яко вратило ткущих: и сниде к нему Ванеа с жезлом, и восхити копие из руки Египтянина и уби его копием его: 24 сия сотвори Ванеа сын Иодаев, и бе именит посреде триех сильных: 25 над тридесятию бе славен сей, а ко трием не достиже: и постави его Давид над отечеством своим. 26 И сильнии сил: Асаил, брат Иоавль, Елеанан, сын Додоев от Вифлеема, 27 Саммоф Аддитянин, Хелкий Афелонин, 28 Орей сын от Киса Фекуйский, Авиезер Анафофский, 29 Совохай Асофийский, Илий Ахойский, 30 Воорай сын Нетофафиев, Еллаф сын Ваинака Нетофафийскаго, 31 Ифай сын Ривеин от холма Вениаминя, Ванеа сын Фарафониев, 32 Урий от Неали, Галсавиил Аравефийский, 33 Азмоф Варсамийский, Елиава Саламийский, 34 Ирас Гоинийский, Ионафан сын Саги Арарийский, 35 Ахиам сын Сахара Арарийскаго, Зифаал сын Орин, 36 Афер Мехурафинский, Ахиа Фелонийский, 37 Асарай Мармелинский, Ноорай сын Авдиев, 38 Иоиль брат Нафанов, Мавар сын Тараиев, 39 Селлик Аммониин, Наарей Вирофин, иже носил оружие Иоава сына Саруиева, 40 Ира Иефериин, Гарив Фериин, 41 Уриа Хетфейский, Вазаф сын Оолиев, 42 Адина сын Саха, Рувима князь, и у него тридесять, 43 Анан сын Маахин, и Иосафат Фафаин, 44 Озия Астарофин, Самма и Иеил сынове Хофана Арариина, 45 Иедиил сын Саамерин, и Иозае брат его Фосаин, 46

Иелиил Маоин, и Арива, и Осоиа сын его, Енаам, и Иефема Моавитский, 47 Елиил, и Овид, и Иесиил Месовиев.

**12** И сии приидоша ко Давиду в Сикелаг, егда еще обдержимь бяше от лица Саула сына Кисова: и сии от сильных помогающе во брани, 2 напязяюще лук десными и шуими руками, и пращницы каменем и стрелами, от братьий Сауловых от (колена) Вениамина: 3 князь Ахиезер, и Иоас сын Самаа Гавафита, и Иезиил, и Фалиф, сынове Замофовы, и Варахиа, и Ииуа Анафифитин, 4 и Самаиа Гаваонитин, сильный посреде тридесятих и над тридесятию, и Иеремиа, и Иезекииль, и Иоаннан, и Иозаваф Гадарафитин, 5 Елиозий, и Иеримуф, и Ваалиа, и Самариа, и Сафатиа Аруфин, 6 Елкана, и Иесиа, и Иелиил, и Иезаар, и Иесваам, Коритяне, 7 и Иоила, и Завадиа, сынове Иероамли, и иже от Гедора. 8 И от Гадди прибегоша к Давиду, (егда таяшеся) в пустыни, мужие крепцы и бойцы нарочити, держащи щиты и копия: лица же их яко лица львова, и легцы яко серны на горах скоростию: 9 Азер в первых, Авдиа второй, Алияд третий, 10 Масман четвертый, Иеремиа пятый, 11 Иеффиа шестый, Елиил седмый, 12 Иоанан осмый, Ельзавель девятый, 13 Иеремиа десятый, Махавенай первыйнадесять. 14 Сии от сынов Гадовых князи воинстии, един над стом малый, великий же над тысящею: 15 сии иже преидоша Иордан месяца перваго: и сей наполнен во всех брезех своих: и изгнаша всех, иже живяху в юдолах от восток даже до запад. 16 Приидоша же от сынов Вениаминих и Иудиных на помощь Давиду. 17 И изыде Давид во сретение им и рече им: аще мирно приидосте ко мне, да будет сердце мое такожде к вам: аще же предати мя супостатом моим не во истине руки, да

видит Бог отец наших и судит. 18 И облече дух Амасию князя над тридесатию, и рече: иди, Давида сыне Иессеев, и людие твои: мир, мир тебе, и мир помощником твоим, яко тебе помогает Бог твой. И восприял их Давид и постави их князей сил. 19 И от Манассии прибегоша к Давиду, егда идяху иноплеменницы на Саула на брань, и не поможе им Давид, яко совет быти у воевод иноплеменничих, глаголющих: с главами мужей сих обратится ко господину своему Саулу. 20 И егда идяше Давид в Сикелаг, прибегоша к нему от Манассии Еднай и Иозаваф, и Иавнил и Михаил и Иосафаф и Елиу и Салафий, князи над тысящами у Манассии: 21 сии даша помощь Давиду на полчище геддуров, вси бо крепцы силою: и беша крепцы начальницы в воинстве силою. 22 Зане на всяк день прихождаху к Давиду на помощь ему, в силу велику, аки сила Божия. 23 И сия имена князей воинства, иже приидоша ко Давиду в Хеврон, да возвратят царство Саулово к нему по словеси Господню: 24 сынове Иудины носящии щиты и копия шесть тысяч и осмь сот, крепцы ко ополчению: 25 от сынов Симеоних, крепцы силою на ополчение седмь тысяч и сто: 26 от сынов Левиных четыре тысящы и шесть сот: 27 и Иодда князь от колена Аароня, и с ним три тысящы и седмь сот: 28 и Садок, отрок крепкий силою, и дому отца его князи двадесать два: 29 от сынов же Вениаминих братий Сауловых три тысящы, и еще болшая часть их наблюдаше стражбу дому Сауля: 30 и от сынов Ефремлих двадесать тысяч и осмь сот крепцы силою, мужие именитии по домом отечеств их: 31 и от полуплемене Манассиина осмьнадесять тысяч, и иже нарекошася именем, да поставят царем Давида: 32 от сынов Иссахаровых мужие учени,



иже познаваху времена разсуждению, что сотворити имать Израиль, в начала их двести, и вся братия их с ними: **33** и от Завулону исходящие ко ополчению брани, со всякими оружии бранными, пятьдесят тысяч, в помощь Давиду не с праздными руками: **34** и от Неффалима князей тысяща, и с ними в щитах и с копиями тридесять и семь тысяч: **35** и от сынов Дановых ополчающиеся на брань двадесять осмь тысяч и шесть сот: **36** и от Асира исходящие помощи в брани чотыредесять тысяч: **37** и со оныя страны Иордана от сынов Рувимовых и от Гадовых и от полуплемене Манассиина во всем оружии браннем сто и двадесять тысяч. **38** Все сии мужие бранныи управлени ко ополчению сердцем мирным: и приидоша в Хеврон, да поставят царя Давида над всем Израилем: и прочии от Израиля едино сердце бяху, да царь будет Давид. **39** Быша же ту с Давидов три дни, ядуще и пиюще, уготоваша бо им братия их. **40** И иже близ их бяху даже до Иссахара и Завулону и Неффалима, приношаху им на ослех и вельблюдех, и мсках и волех пищу, муку, перевясла смоквей и гроздие сухое, вино и елей, и волы и овны во множестве, радость бо бысть во Израили.

**13** И сотвори совет Давид (со князи) и тысящники, и сотники и всеми начальники, **2** и рече Давид ко всему собранию Израилеву: аще угодно вам, и от Господа Бога нашего благопоспешится, да послем к братьям нашим оставшимся во всей земли Израилеве, и с ними священницы и левити, во градех обдержания их, да соберутся к нам, **3** и да принесем кивот Бога нашего к нам, не взыскахом бо его во дни Саули. **4** И отвеща все собрание, да тако будет, зане угодно бысть слово сие всем людем. **5** И собра Давид всего Израиля от

предел Египетских даже до входа Имафова, еже внести кивот Божий от Града Иарима. 6 И принесе его Давид: и весь Израиль взыде во град Давидов, иже бяше Иудин, еже вознести тамо кивот Господа Бога сидяща на Херувимех, идеже призвано есть имя Его: 7 и постави кивот Божий на колесницу нову из дому Аминадавля: Оза же и братия его ведяху колесницу: 8 Давид же и весь Израиль играху пред Богом всю силою и в песнях и в гуслех, и псалтири и тимпанех, и кимвалех и в трубах: 9 и приидоша ко гумну Хидоню: и простре Оза руку свою, да поддержит кивот, юнец бо уклони его: 10 и прогневался Господь гневом на Озу и порази его ту, того ради, яко простре руку свою (и прикоснуса) кивоту, и умре ту пред Богом. 11 И оскорбися Давид, яко пресече Господь пресечением Озу, и нарече место то пресечение Озане, даже до дне сего. 12 И убояся Давид Бога в той день, глаголя: како внесу ко мне кивот Божий? 13 И не возврати Давид кивота к себе во град Давидов, но возврати и в дом Аведдара Гефеина: 14 и пребываше кивот Божий в дому Аведдарове три месяцы, и благослови Бог Аведдара и вся, яже имяше.

**14** И посла Хирам царь Тирский послы к Давиду, и древа кедровл, и здателей стен, и древоделей, да созиждут ему дом. 2 И позна Давид, яко уготова его Господь царем над Израилем, яко воздвижесе в высоту царство его, ради людей его Израиля, 3 и поят Давид еще жены во Иерусалиме: и родишася ему еще сынове и дщери. 4 И сия имена их, иже родишася ему во Иерусалиме: Саммаа и Совав, Нафан и Соломон, 5 и Иеваар и Елисуй и Елифааф 6 и Нагеф, и Нафаг и Иафие, 7 и Елисама и Валиада и Елифалет. 8

И услышаша иноплеменницы, яко помазан бысть Давид в царя над всем Израилем, и изыдоша вси иноплеменницы взыскати Давида. И услыша Давид и изыде противу их. 9 Иноплеменницы же приидоша и разлишася во юдоли Исполинов. 10 И вопроси Давид Бога, глаголя: аще взыду на иноплеменники, и предади ли их в руки моя? И рече ему Бог: взыди, и предам их в руки твоя. 11 И изыде во Ваал-Фарасин, и порази их тамо Давид. И рече Давид: разсече Бог враги моя рукою моею, якоже разсечение воды. Сего ради нарече имя месту тому Фарасин, Разсечение. 12 И оставиша тамо боги своя иноплеменницы, ихже Давид повеле сожещи огнем. 13 И приложиша еще иноплеменницы, и разлишася еще во юдоли Исполинов. 14 И вопроси паки Давид Бога. И рече ему Бог: не исходи за ними: отвратися от них, и приидеши на них прямо грушей: 15 и будет егда услышиши глас шума верхов грушей, тогда изыдеши на брань, яко изыде Бог пред тобою, да поразит полки иноплеменнически. 16 И сотвори Давид, якоже повеле ему Бог: и порази полки филистимов от Гаваона даже до Газира. 17 И прославися имя Давидово во всех странах, и Господь даде страх его на вся языки.

**15** И сотвори себе дома во граде Давидове, и уготова место кивоту Божию, и сотвори ему скинию. 2 Тогда рече Давид: не леть есть, (да от всякаго) носится кивот Божий, но токмо от левит, понеже избра их Господь носити кивот Господень и служити Ему даже до века. 3 И собра Давид весь Израиль во Иерусалим, да внесется кивот Божий на место, еже уготова ему. 4 И собра Давид сынов Аароновых и левиты: 5 от сынов Каафовых Уриил начальник и братия его, сто двадесять: 6

от сынов Мерариных Асаиа начальник и братия его, двести пятьдесят: 7 от сынов Герсоних Иоиль начальник и братия его, сто тридцать: 8 от сынов Елисафаних Семеиа начальник и братия его, двести: 9 от сынов Хевроновых Елиил начальник и братия его, осмьдесят: 10 от сынов Озиилевых Аминадав начальник и братия его, сто дванадцать. 11 И призва Давид Садока и Авиафара священники, и левиты Уриила, Асаиа и Иоиля, и Семеиана и Елиила и Аминадава, 12 и рече к ним: вы, начальницы отечеств левитских, освятитесь вы и братия ваша, и принесите кивот Господа Бога Израилева (на место), идеже уготовах ему: 13 яко прежде вам не готовым сущым, раздели Господь Бог наш в нас, яко не взыскахом Его по разсуждению. 14 И освятишася священницы и левити, да внесут кивот Господа Бога Израилева. 15 И взяша сынове левитстии кивот Божий, якоже повеле Моисей словом Божиим по писанию, рамены своими на носилех. 16 И рече Давид начальником левитским: поставите братию свою певцев во органех, песнех мусикийских, псалтирех, в гуслех и кимвалех, да возгласят в высоту гласом веселия. 17 И поставиша левити Емана сына Иоилева: и от братий его Асафа сына Варахиина: и от сынов Мерариных, братий его, Ефана сына Кисеова: 18 и с ними братия их, вторици (чином), Захариа и Озиил, и Семирамоф и Иеиил, и Ананий и Елиав, и Ванеа и Маасиа, и Маттафия и Елифала, и Макения и Авдедом, и Иеиил и Озиа, дверницы. 19 И певцы Еман, Асаф и Ефам в кимвалы медяны (возглашающе) в слышание: 20 Захариа же и Озиил, и Семирамоф и Иеиил, и Ананий и Елиав, и Маасиа и Ванеа со гусльми тайны пояху: 21 и Маттафия и Елифала, и Макения и Авдедом, и Иеиил и Озиа в кимвалех

пояху, еже превзыти: 22 и Хонения начальник левитский, начальник пеней, зане разумен бе: 23 и Варахиа и Елкана дверницы кивота: 24 и Совения и Иосафат, и Нафанаил и Амасиа, и Захариа и Ванай и Елиезер священницы трубящии трубами пред кивотом Божиим: и Авдедом и Иеиа дверницы кивота Божия. 25 И бе Давид и старейшины Израилевы и тысящницы идущии, еже изнести кивот завета Господня из дому Авдедомля с веселием. 26 И бысть егда укрепляше Бог левиты носящыя кивот завета Господня, и пожроша седмь телцев и седмь овнов: 27 Давид же бяше одеян ризою виссонною, и вси левити, носящии кивот завета Господня, певцы же и Хонения начальник песней поющих, на Давиде же бе ефуд виссонный. 28 И весь Израиль провождаше кивот завета Господня с восклицанием и гласом трубным, и с трубами и кимвалы, глашающе в гусли и кифары. 29 И бысть егда прииде кивот завета Господня даже до града Давидова, и Мелхола дщи Сауля смотряше во окно, и виде царя Давида скачуща и играюща и уничижи его в сердцы своем.

**16** Принесоша убо кивот Божий и поставиша его посреде скинии, юже водрузи ему Давид, и принесоша всесожжения и спасителная пред Господем. 2 И соверши Давид вознося всесожжения и спасителная, и благослови люди во имя Господне, 3 и раздели всякому мужу Израилску, от мужа даже до жены, мужу хлеб един печеный, (и часть печена мяса, ) и пряженный со елеем семидал: 4 постави же пред лицем кивота завета Господня от левит, еже служити и возглашати (дела Его), и исповедати и хвалити Господа Бога Израилева: 5 Асаф начальник, и другой по нем Захариа, Иеиил и Семирамоф, и Иеиил и Маттафия, и Елиав и Ванеа

и Авдедом: Иеиил же во органех и псалтири и гуслех, Асаф же в кимвалех возглашая: 6 и Ванеа и Озиил священницы (трубиша) выну в трубы пред кивотом завета Божия. 7 В той день устрои Давид в начале хвалити Господа рукою Асафа и братии его. 8 Песнь. Исповедайтеся Господеви и призывайте Его во имени Его, знаема сотворите людем начинания Его: 9 пойте Ему и воспойте Ему, поведите вся чудеса Его, яже сотвори Господь: 10 хвалите имя святое Его, да возвеселится сердце ищущее благоволения Его: 11 взыщите Господа и укрепитесь, взыщите лица Его выну: 12 помяните чудеса Его, яже сотвори, знамения и судьбы уст Его, 13 семя Израилево, раби Его, сынове Иаковли, избранныи Его. 14 Той Господь Бог наш, во всей земли судьбы Его. 15 Помянем во век завет Его, слово Его, еже заповедал в тысящы родов, 16 еже завета Аврааму, и клятву Свою Исааку: 17 и постави е Иакову в повеление, Израилю в завет вечен, 18 глаголя: тебе дам землю Ханааню, уже достояния вашего. 19 Внегда быти им малым числом, яко умалишася и преселишася в ню, 20 и преидоша от языка в язык и от царствия к людем иным, 21 не остави мужа обидети их, и обличи о них цари: 22 не прикасайтесь помазанным Моим, и во пророцех Моих не лукавуйте. 23 Воспойте Господеви, вся земля, возвестите от дне на день спасение Его, 24 возвестите во языцех славу Его, во всех людах чудеса Его, 25 яко велий Господь и хвален зело, страшен есть над всеми боги. 26 Яко вси бози языков идоли: Господь же наш небеса сотвори. 27 Слава и величество пред лицом Его, крепость и похвала в месте Его святем. 28 Дадите Господеви, отечествия языков, дадите Господеви славу и

крепость, **29** дадите Господеви славу имени Его: возьмите дары и принесите пред лице Его, и поклонитесь Господеви во дворах святых Его. **30** Да убоится от лица Его вся земля, да исправится земля и да не подвижится: **31** да возвеселятся небеса и да возрадуется земля, и да рекут во языцех: Господь царствует. **32** Да возгласит море и исполнение его, и древа польская, и вся яже на них. **33** Тогда возвеселятся древа дубравная пред лицом Господним, яко прииде судити земли. **34** Исповедайтесь Господеви, яко благ, яко в век милость Его, **35** и глаголите: спаси ны, Боже, Спасителю наш, и собери нас, и изми нас от язык, да хвалим имя святое Твое, и хвалимся во хвалениих Твоих. **36** Благословен Господь Бог Израилев от века даже и до века. И рекут вси людие: аминь. И восхвалиша Господа. **37** И оставиша тамо пред кивотом завета Господня Асафа и братию его, да служат пред кивотом выну по вся дни: **38** и Авдедом и братия его, шестьдесят осмь: и Авдедом сын Идифунь и Осай (поставлени) во дверники: **39** Садока же священника и братию его священниками пред скиниею Господнею в вышних иже в Гаваоне, **40** да возносят всесожжения Господеви на олтари всесожжений выну утро и вечер, и по всем яже писана суть в законе Господни, елика повеле сыном Израилевым рукою Моисеа раба Божия: **41** и с ними Еман и Идифум и прочии избраннии кийждо званием своим еже хвалити Господа, яко в век милость Его: **42** и с ними трубы и кимвалы еже возглашати, и органы пений Божиих: сынове же Идифумли во вратех (стояху). **43** И идоша вси людие кийждо в дом свой, и Давид возвратися, да благословит дом свой.

**17** И бысть егда обиташе Давид в дому своем, и рече Давид к Нафану пророку: се, аз живу в дому кедрове, кивот же завета Господня под кожами. **2** И рече Нафан к Давиду: все еже в сердцы твоём твори, яко Бог с тобою есть. **3** И бысть нощи тоя, и бысть слово Господне к Нафану, глаголя: **4** иди и рцы Давиду рабу Моему: сия рече Господь: не созиждеш ты Мне дому, еже обитати Ми в нем: **5** яко не обитах в дому от дне, в оньже изведох Израиля (от земли Египетския), даже до дне сего, но бых в скинии и в шатре: **6** во всех аможе ходих со всем Израилем, аще глаголя глаголах коему колону Израилеву, имже повелех да пасут люди Моя, глаголя: чесо ради не создасте Мне дому кедрова? **7** И ныне тако рцы рабу Моему Давиду: сия рече Господь Вседержитель: Аз изях тя от паствы, егда последовал еси стаду, еже быти тебе вождем над людьми Моими Израилем, **8** и бых с тобою во всех, идеже ходил еси, и потребих вся враги твоя от лица твоего, и сотворих тебе имя якоже имя великих, иже на земли: **9** и дах место людем Моим Израилю, и насадих я, и обитают в нем, и не возкорбят ктому: ни сынове беззакония приложат смирити их якоже от начала **10** и от дний, в няже дах судии людем Моим Израилю, и смирих вся враги твоя, и возвращу тя, и дом созиждет ти Господь: **11** и будет егда исполнятся дние твои и почиши со отцы твоими, и воздвигну семя твое по тебе, еже будет от чрева твоего, и возставлю царство его: **12** той созиждет Мне дом, и укреплю престол его даже до века: **13** Аз буду ему во отца, и той будет Мне в сына: и милость Мою не отиму от него, якоже отях от бывших прежде тебе: **14** и уверю его в дому Моем и во царствии его даже до века, и престол его будет исправлен до века. **15** По



всем словесем сим и по всему видению сему тако глаголал  
есть Нафан к Давиду. 16 И прииде царь Давид, и седе пред  
Господем, и рече: кто есмь аз, Господи Боже мой? И что  
дом мой, яко возлюбил мя еси до века? 17 И сия мала суть  
пред Тобою, Боже, и глаголал еси на дом раба Твоего (еще)  
издалеча, и призрел еси на мя яко видение человека, и  
возвысил мя еси, Господи Боже: 18 что приложит еще Давид  
к Тебе еже прославити? И ты раба Твоего веси: 19 Господи,  
раба Твоего ради сотворил еси все величие сие и по сердцу  
Твоему, еже знаема сотворити вся величия Твоя: 20 Господи,  
несть подобен Тебе, и несть Бога разве Тебе, по всем елика  
слышахом ушима нашими, 21 и несть, якоже людие Твои  
Израиль, язык еще на земли, яко поиде Бог избавити люди  
Себе, еже положити имя Себе велие и славное, еже изгнати  
от лица людей Твоих, ихже избавил еси от Египта, языки: 22 и  
дал еси люди Твоя Израиля Тебе в люди даже до века, и Ты,  
Господи, был еси им в Бога: 23 и ныне, Господи, слово Твое,  
еже глаголал еси рабу Твоему и на дом его, да уверится  
до века: и сотвори якоже глаголал еси, 24 и да уверится и  
возвеличится имя Твое даже до века, глаголющих: Господи,  
Господи Вседержителю, Боже Израилев, и дом Давида раба  
Твоего да будет исправлен пред Тобою: 25 Ты бо, Господи  
Боже мой, отверзл еси ухо раба Твоего создати ему дом, сего  
ради обрете раб Твой (дерзновение) молитися пред лицом  
Твоим: 26 и ныне, Господи, Ты еси Сам Бог, и глаголал еси к  
рабу Твоему благая сия: 27 и ныне начни благословити дом  
раба Твоего, да будет во веки пред Тобою: яко Ты, Господи,  
благословил еси, и благослови во веки.

**18** И бысть по сих, и порази Давид иноплеменники, и прогна их: и взя Геф и веси его от руки иноплеменничи. 2 И порази Давид Моава, и бяху Моавити раби Давиду приносяще ему дань. 3 И порази Давид Адраазара царя Сувска во Емафе, идущу ему поставити руку свою над рекою Евфратом: 4 и взя от него Давид тысящу колесниц и седьмь тысящ конник и двадесять тысящ мужей пешцев, и разби Давид вся колесницы, и остави от них сто колесниц, (ихже удержа себе). 5 И прииде Сир от Дамаска, да помощь даст Адраазару царю Сувску, и порази Давид от Сировых двадесять две тысящы мужей: 6 и постави Давид стражу в Сирии, яже близ Дамаска, и бяху Давиду в рабы приносяще дани: и спасе Господь Давида во всех, в нихже хождаше. 7 И взя Давид гривны златыя, ихже имеша раби Адраазаровы, и принесе я во Иерусалим. 8 И из Метавефа и от избранных градов Адраазаровых взя Давид меди много зело, из неяже сотвори Соломон море медяно, и столпы, и сосуды медяныя. 9 И услыша Фоа царь Емафский, яко порази Давид всю силу Адраазара царя Сувска, 10 и посла Адурاما сына своего к царю Давиду, да вопросит его, яже о мире, и благословити его о сем, яко победи Адраазара и порази его, понеже муж противен бяше Фоа Адраазару. 11 И вся сосуды златыя и сребряныя и медяныя, и сия освяти царь Давид Господу со серебром и златом, яже взя от всех язык, от Идумеи и Моава, и от сынов Аммоних и от иноплеменник и от Амалика. 12 Авесса же сын Саруиев порази Идумею во юдоли Сланей, осмьнадесять тысящ: 13 и постави во юдоли стражу, и беша вси Идумеане раби Давиду. И спасаше Господь Давида во всех, в нихже хождаше. 14 И воцарися Давид над всем

Израилем, и бе творя суд и правду всем людем своим. 15  
Иоав же сын Саруиев (бысть) над воинством, и Иосафат сын  
Ахилудов памятописец, 16 и Садок сын Ахитов и Авимелех  
сын Авиафаров священницы, и Суса книгочий, 17 и Ванеа  
сын Иодаев над Херефием и над Фелефием: сынове же  
Давидовы первии преемницы цареви.

**19** И бысть по сих, умре Наас царь сынов Аммоних, и  
воцарися Амам сын его вместо его. 2 И рече Давид: сотворю  
милость со Ананом сыном Наасовым, якоже сотвори отец  
его милость со мною. И посла Давид послы на утешение ему  
о отце его. И приидоша отроцы Давидовы в землю сынов  
Аммоних ко Анану, да утешат его. 3 И рекоша начальницы  
сынов Аммоних ко Анану: еда прославляя Давид отца твоего  
пред тобою, посла к тебе утешители? Никако: но да испытают  
град и соглядают землю, приидоша к тебе отроцы его. 4  
И взя Анан рабов Давидовых, и обри их, и отреза от риз  
их половину даже до чресл, и отпусти их. 5 И приидоша  
возвестити Давиду о мужех: и посла во сретение им, яко  
быша обезчещени зело. И рече царь: седите во Иерихоне,  
дондеже возрастут брады ваша, и возвратитесь. 6 И видеша  
сынове Аммони, яко посрамлени быша людие Давидовы, и  
посла Анан и сынове Аммони тысящу талант сребра, да  
наймут себе от Сирии Месопотамски, и от Сирии Мааха, и от  
Сувы колесницы и конники: 7 и наяша себе тридесять две  
тысяцы колесниц и царя Мааха и людий его: и приидоша и  
ополчишася прямо Мидаве: и сынове Аммони собращася от  
градов своих и приидоша на брань. 8 И услыша Давид, и  
посла Иоава и все воинство сильных. 9 И изыдоша сынове  
Аммони и ополчишася на брань при вратех градских: царие

же пришедшии ополчишася особно на поли. **10** И виде Иоав, яко бысть на него противное лице брани сопреди и созади, и избра от всех юнош Израилевых и устрои их противу Сира, **11** и останок людий даде в руце брату своему Авессе, и ополчишася противу сынов Аммоних. **12** И рече: аще укрепится Сир паче мене, то будеши мне во спасение: аще же сынове Аммони укрепятся паче тебе, то аз спасу тя: **13** мужайся, и укрепимся о людех наших и о градех Бога нашего, и Господь, еже благо пред очима его, сотворит. **14** И ополчися Иоав и вси людие, иже с ним, противу Сириян на брань, и побегоша от них. **15** Сынове же Аммони видеша, яко побегоша Сирияне, и побегоша и они от лица Авессы и от лица Иоава брата его, и внидоша во град: Иоав же возвратися во Иерусалим. **16** И виде Сир, яко победи его Израиль, и посла послы: и изведоша Сира, иже бе за рекою, Софак же первоначалник тысящником силы Адраазаровы пред ними. **17** И возвещено бысть Давиду, и собра весь Израиль, и преиде Иордан, и прииде на них, и ополчися противу их: и ополчися Давид противу Сира на брань и воеванань. **18** И убеже Сир от лица Израилева, и уби Давид от Сира семь тысящ колесниц и чотыредесять тысящ пешцев, и Софака первоначалника силы уби. **19** И видеша раби Адраазаровы, яко падоша от лица Израилева, и прибегоша к Давиду, и служажу ему: и не восхоте Сир помогати сыном Аммоним ктому.

**20** И бысть в находящее лето во время исхождения царей (ко брани), и собра Иоав всю силу воинства, и опустоши землю сынов Аммоних: приидоша же и обседоша Равваф. Давид же пребываше во Иерусалиме: Иоав же порази

Равваф и разори его. 2 Взят же Давид венец Молхома царя их от главы его, и обретется вес в нем талант золота, и в нем камень драгий, и бе на главе Давидове: плены же градски взя мнози зело, 3 и людей сущих в нем изведе и претре пилами и орудии железными и разсецающими: тако сотвори Давид всем градом сынов Аммоних, и возвратися Давид и вси людие его во Иерусалим. 4 И бысть по сем, и начася еще брань в Газере со иноплеменники: тогда порази Совохай Усафитянин Сафута от сынов Исполиновых и смири его. 5 И бысть еще брань противу иноплеменник, и порази Елеанан сын Иаири Лаомиа, брата Голиафа Гефейскаго, емуже древо копия его яко навой ткущих. 6 И бысть еще брань в Гефе, и бе муж зело велик, по шести имеющ перстов, всех двадцать четыре, и сей бе от колена Исполинов, 7 и поноси Израиля: и порази его Ионафан сын Саммаа брата Давидова. 8 Сии родишася Рафаю в Гефе, всех их бе четыре исполины, и падоша рукою Давидовою и рукою рабов его.

**21** Воста же диавол на Израиля и подусти Давида, да сочислит Израиля. 2 И рече царь Давид ко Иоаву и к началником силы: идите и сочтите Израиля от Вирсавеи даже до Дана, и принесите ко мне, да познаю число их. 3 И рече Иоав: да приложит Господь к людем Своим, якоже сии сторицею, и очи господина моего царя да видят: не вси ли господину моему царю раби суть? И почто хочет сего господин мой? Дабы не вменилося в грех Израилю. 4 Но слово царево преможе Иоава: и поиде Иоав, и обыде всего Израиля, и прииде во Иерусалим. 5 И даде Иоав Давиду число сочтения людей: и обретется всего Израиля тысяща тысящ и сто тысящ мужей и носящих оружия: и от сынов

Иудиных четыре ста и семьдесят тысяч мужей носящих оружие: 6 Левии же и Вениамина не сочте среде их, понеже вознегодова о словеси царева Иоав. 7 И не угодно явился пред Богом повеление сие, и порази Израиля. 8 Рече же Давид ко Богу: согреших зело, яко сотворих вещь сию: и ныне молю, отими беззаконие раба Твоего, яко обезумихся зело. 9 И рече Господь ко Гаду пророку Давидову, глаголя: 10 иди и рцы к Давиду, глаголя: тако глаголет Господь: трие Аз наведу на тя, избери себе едино от них, и сотворю тебе. 11 И прииде Гад к Давиду и рече ему: 12 сице глаголет Господь: избери себе, (еже хоцещи, ) или три лета глада, или три месяцы бегати тебе от лица враг твоих, и оружие враг твоих постигнет тя, или три дни мечь Господень, и смерть на землю, и Ангел Господень убиваяй во всем наследии Израилеве: ныне убо разсмотри, что отвещаю Пославшему мя со словом. 13 И рече Давид ко Гаду: тесна ми суть три сия зело: но лучше ми есть впасти в руце Господни, зане многи щедроты Его зело, в руки же человеческия да не впаду. 14 И посла Господь смерть во Израиля, и падоша от Израиля семьдесят тысяч мужей. 15 И посла Бог Ангела во Иерусалим, да избьет его. И егда избиваше, виде Господь и раскаяся о зле, и рече Ангелу избивающему: довлеет ти, отими руку твою. Ангел же Господень стояше на гумне Орны Иевусеанина. 16 И возведе Давид очи своя, и виде Ангела Господня стояща между землею и небом, и мечь его извлечен в руку его, простерт на Иерусалим. И паде Давид и старейшины (Израилевы) облеченнии во вретисце на лице свое, 17 и рече Давид к Богу: не аз ли повелех сочислити люди? Аз есмь, иже согреших, и зло творя зло

сотворих, сия же овцы что сотвориша? Господи Боже мой, да будет рука Твоя на мне и на дому отца моего, а не на людех Твоих в погубление, Господи. 18 Ангел же Господень рече Гаду, еже глаголати к Давиду: да въздет и созиждет олтарь Господу Богу на гумне Орны Иевусеанина. 19 И възде Давид по словеси Гадову, еже глагола именем Господним. 20 И обратися Орна и виде царя, и четири сынове его с ним крыющиися. Орна же бе (в то время) млатя на гумне пшеницу. 21 И прииде Давид ко Орне, и обратися Орна, и узре Давида, и поиде от гумна, и поклонися Давиду лицом на землю. 22 Рече же Орне Давид: даждь мне место гумна твоего, да созижду на нем олтарь Господеви, на сребре достойне даждь ми е, и престанет язва от людий. 23 Рече же Орна к Давиду: возми себе, и да сотворит господин мой царь, еже угодно пред ним: се, даю телцы на всесожжение, и плуг на дрова, и пшеницу в жертву, вся (добровольно) даю. 24 И рече царь Давид Орне: ни, но куплею куплю, сребром достойным, понеже не возму Господеви, яже суть твоя, еже вознести всесожжение туне Господеви. 25 И даде Давид Орне за место то сикль златых весом шесть сот. 26 И созда ту Давид олтарь Господеви, и вознесе всесожжения и спасителная и воззва ко Господу, и услыша его во огни от небесе на олтарь всесожжения, и потреби всесожжение. 27 И рече Господь ко Ангелу: и вложи мечь во влагалище его. 28 Во время оно, егда виде Давид, яко услыша его Господь на гумне Орны Иевусеанина, и пожре ту жертвы. 29 И скиния Господня, юже сотвори Моисей в пустыни, и олтарь всесожжения во время оно бысть в вышнем, еже в Гаваоне.

30 И не возможе Давид ити пред него, еже вопросити Бога, понеже устрашен бысть от лица меча Ангела Господня.

**22** Рече же Давид: се есть дом Господа Бога, и сей олтарь на всесожжения Израилю. 2 И рече Давид собрати вся пришелцы, иже на земли Израилеве, и постави каменосечцев сеци каменя тесаная, да созиждется дом Божий. 3 Железо же много на гвозди дверем и вратом на спаяние уготова Давид, и меди множеству не бе числа: 4 и древам кедровым не бе числа: яко принесоша Сидоняне и Тиряне древ кедровых множество Давиду. 5 И рече Давид: Соломон сын мой детищь млад, дом же еже созидати Господеви в величество высоко, во имя и в славу во всю землю, уготовлю ему. И уготова Давид (всего) множество прежде скончания своего. 6 И призва Давид Соломона сына своего и заповеда ему, да созиждет дом Господу Богу Израилеву. 7 Рече же Давид к Соломону: чадо, мне бяше в сердцы, да созижду дом имени Господа Бога моего: 8 и бысть слово Господне ко мне, глаголющее: многи крови пролиял еси и многи брани сотворил еси, не созиждеши дому имени Моему, яко многи крови пролиял еси на землю предо Мною: 9 се, сын родится тебе, сей будет муж покоя, и упокою его от всех враг его окрест, зане Соломон имя ему, и мир и покой дам ему над Израилем во дни его: 10 той созиждет дом имени Моему, и той будет Мне в сына, и Аз буду ему во отца: и исправлю престол царства его во Израили до века: 11 ныне убо, сыне мой, будет Господь с тобою и благопоспешит, и созиждеши дом Господу Богу твоему, якоже глагола о тебе: 12 да даст же тебе премудрость и разум Господь и да укрепит тя над Израилем, еже хранити и творити закон Господа Бога твоего:



13 тогда благопоспешит, аще сохраниши творити заповеди и судьбы, яже повеле Господь Моисеови, (да учит) Израиля: мужайся и крепися, не бойся, ниже устрашися: 14 и се, аз по убожеству моему уготовах на дом Господень злата талантов сто тысящ, и сребра тысяща тысящ талантов, медь же и железо, емуже несть веса, понеже множество есть, и древа и каменья уготовах, и к сим да приложиши: 15 и с тобою Господь, и приложиши ко множеству творящих дела, художницы, и строителие камней, и древоделе, и всяк мудрец во всяцем деле, 16 в злате и серебре, в меди и железе несть числа: востани убо и твори, и Господь с тобою. 17 И повеле Давид всем начальником Израилевым, да помогают Соломону сыну его, глаголя: 18 не Господь ли с вами? И даде вам покой окрест, зане даде в руки ваша живущих на земли, и покорена земля пред Господем и пред людьми Его: 19 ныне убо дадите сердца ваша и души ваша еже взыскати Господа Бога вашего, и востаните и созидайте святыню Господу Богу вашему, да внесетя кивот завета Господня и сосуды святятыя Богови в дом созидаемый имени Господню.

**23** И Давид стар и исполнен дний, и воцари Соломона сына своего вместо себе над Израилем: 2 и собра всех князей Израилевых, и священников, и левитов: 3 сочтени же быша левити, от тридесяти лет и вышше, и бысть число их по главам их, мужей тридесять и осмь тысящ: 4 от сих избрани на дела дому Господня двадесять четьри тысящы, и книгочей и судий шесть тысящ, 5 и четьри тысящы дверников, и четьри тысящы поющих Господеву во органы, ихже сотвори ко хвалению Господню. 6 И раздели их Давид на чреды сыном Левиным, Гирсону, Каафу и Мераре: 7 и

Гирсону и Леадану и Семею. 8 Сынове Леадани: начальник Иеиил и Зефоф и Иоиль, трие. 9 Сынове же Семеовы: Саломиф и Азаил и Арам, трие: сии начальницы отечеств Леаданих. 10 И сыном Семеовым Иеф и Зизай, и Иоас и Вериа: тии сынове Семеовы четыре. 11 Бе же Иеф первый и Зизай второй: Иоас же и Вариа не иместа многих сынов и быста в дому отечества в причтение едино. 12 Сынове Каафовы: Амврам и Иссаар, Хеврон, Озиил, четыре. 13 Сынове Амврамли: Аарон и Моисей: отлучен же бысть Аарон еже освящати Святая Святых, той и сынове его во веки, и да кадит фимиамом пред Господем, служит Ему и молится во имя Его до века. 14 Моисей же человек Божий и сынове его причтени суть в колено Левиино. 15 Сынове Моисеовы: Гирсам и Елиезер. 16 Сынове Гирсамли, Суваил начальник. 17 Быша же сынове Елиезеру, Равиа начальник: и не беша Елиезеру сынове инии: сынове же Равиины умножени суть зело. 18 Сынове Иссааровы, Саллумоф начальник. 19 Сынове Хеврони: Иериав первый, Амариа второй, Иазиил третий, Иезекиа четвертый. 20 Сынове же Озиили: Миха первый, и Иессиа второй. 21 Сынове Мерарины: Мооли и Муси. 22 Сынове моолиевы: Елеазар и Кис. Умре же Елеазар, и не быша ему сынове, но токмо дщери: и пояша их сынове Кисовы братия их. 23 Сынове Мусиины: Мооли и Едер и Иаримоф, трие. 24 Сии сынове Левиини по домом отечеств их, начальницы отечеств их, по согляданию их, по числу имен их, по главам их, иже творяху дела служения дому Господня, от двадесяти лет и вышше. 25 Рече бо Давид: покой даде Господь Бог людем Своим Израилю, и вселися во Иерусалиме даже да века, 26 и левити не быша носяще

скинию и вся сосуды ея к служению ея. 27 По повелению бо Давидову последнему есть число сыновом Левиным от двадесяти лет и вышше: 28 зане постави их под руку сыном Аароним, еже служити в дому Господни во дворех и в притворех, и во очищении всех святынь, и в делех служения дому Божия, 29 и над хлебами предложения, и над мукою пшеничною жертвы, и над пряжмами опресночными, и над сковрадою, и над печеным, и над всяким весом и мерою, 30 и еже стояти, утро хвалити и исповедатися Господеви, такожде и к вечеру, 31 и над всеми возносимыми всесожжении Господеви в субботы, и в новомесячиих, и в праздницех, по числу, по чину их выну Господеви, 32 и да сохранят стражбы скинии свидения, и стражу святилища, и стражбы сынов Аароних братий своих, да служат в дому Господни.

**24** И сыном Аароним разделения: сынове Аарони: Надав и Авиуд, и Елеазар и Ифамар. 2 И умроста Надав и Авиуд прежде отца своего, и сынове не быша има: и священствова Елеазар и Ифамар, сынове Аарони. 3 И раздели их Давид, и Садок от сынов Елеазаровых, Ахимелех же от сынов Ифамаровых по сочислению их, по служению их и по домом отечеств их. 4 И обретошася сынове Елеазаровы множайшии в началники сил, нежели сынове Ифамаровы: и раздели их сыном Елеазаровым в началники в дома отечеств шестнадцать, и сыном Ифамаровым по домом отечеств их, осмь. 5 Раздели же их по жребием между ими, понеже бяху началницы святилища и началницы Божии в сынех Елеазаровых и в сынех Ифамаровых: 6 описа же их Самаиа сын Нафанаиль писарь от левит пред царем и князи и Садоком священником и Ахимелехом сыном Авиафара, и

началницы отечеств священников и левитов дому отечества, един ко Елеазару и един ко Ифамару. 7 И изыде жребий первый Иоариму, Иедию второй, 8 Хариву третий, Сеориму четвертый, 9 Мелхию пятый, Меиамину шестый, 10 Аккосу седмый, Авии осмый, 11 Исую девятой, Сехени десятой, 12 Елиасиву единонадесятой, Иакиму дванадесятой, 13 Оффаю тринадесятой, Иесваалу четыренадесятой, 14 Велгии пятойнадесять, Еммиру шестойнадесять, 15 Иефию седмойнадесять, Афессию осмойнадесять, 16 Феттию девятойнадесять, и Езекиилу двадесатый, 17 Ахину двадесать первый, Гамуилу двадесать второй, 18 Далейю двадесать третий, Иеилу двадесать четвертый. 19 Сие сочисление их по служению их входити в дом Господень по чину своему, рукою Аарона отца их, якоже повеле Господь Бог Израилев. 20 И сыном Левиным прочим: сыном Амврамлим Соваил, сыном Соваилим Иадаиа, 21 сыном Равиным начальник Иесиа, 22 сыном Иасариным Саломоф, сыном Саломофовым Иаф: 23 сынове Иедиуа: Иериав первый, Амадиа второй, Иазиил третий, Иекмоам четвертый. 24 Сыном Озиилим Миха, сынове Михины Самир: 25 брат Михин Исиа, сын Исиин Захариа. 26 Сынове Мерарины: Мооли и Муси, сын Озиин Вонний: 27 сынове Мерарины Озиа: сынове его Иесома и Закхур и Иовфи: 28 Моолию Елеазар (и Ифамар). Умре же Елеазар, не беша ему сынове. 29 Кису сын Кисов Иерамеил. 30 Сынове Мусины: Мооли и Едер и Еримоф. Сии сынове левитстии по домом отечеств своих. 31 Прияша же и тии жребия, якоже и братия их сынове Аарони, пред Давидом царем и Садоком и Ахимелехом и

начальники отечеств священнических и левитских: патриарси Аарони, якоже и братия его юнейшии.

**25** И постави Давид царь и князи силы над делы сыны Асафовы и Емани и Идифумовы, иже провещаваху в гуслех и псалтирех и кимвалех, и бысть число их по главам мужей творящих дела своя. **2** Сынове Асафовы: Закхур и Иосиф, и Нафаниа и Асиил: сынове Асафовы держащесе Асафа пророка близ царя. **3** Идифуму сынове Идифумли: Годолиа и Сури, и Исеа и Семей, и Асавиа и Маттафия, шесть по отце своем Идифуме в гусли бряцающе исповедание и хваление Господеви. **4** Еману сынове Емани: Вукиа и Мафаниа, и Озиил и Суваил, и Иеримуф и Ананиа, и Анан и Елиафа, и Годоллафий и Ромамфиезер, и Савах и Маллифий, а Офир и Мазиоф. **5** Все сии сынове Емана бряцающаго царю в словесех Божиих, да вознесется рог. Даде же Бог Еману сынов четырнадцать и три дщери: **6** все сии со отцем своим воспевающе в дому Божии в кимвалех и во псалтирех и гуслех, в служение дому Божия близ царя, и Асаф и Идифум, и Еман. **7** Бысть же число их со братиею их научени пению Господню и всех разумеющих (пения) двести осмьдесят и осмь. **8** Вергоша же и сии жребия чреды дневныя, по малу и по велику совершенных и учащихся. **9** И изыде жребий первый сынов его и братии его Асафу Иосифову, Годолиа: второй иния, сынове его и братия его дванадесять: **10** третий Закхур, сынове его и братия его дванадесять: **11** четвертый Иезрий, сынове его и братия его дванадесять: **12** пятый Нафан, сынове его и братия его дванадесять: **13** шестый Вукиа, сынове его и братия его дванадесять: **14** седмый Иериил, сынове его и братии

его дванадесять: **15** осмый Иосиа, сынове его и братия его дванадесять, **16** девятый Матфаниа, сынове его и братии его дванадесять: **17** десятый Семеиа, сынове его и братия его дванадесять: **18** первыйнадесять Езриил, сынове его и братия его дванадесять: **19** второйнадесять Асавиа, сынове его и братия его дванадесять: **20** третийнадесять Суваил, сынове его и братии его дванадесять: **21** четвертыйнадесять Матфафия, сынове его и братии его дванадесять: **22** пятыйнадесять Иеримуф, сынове его и братия его дванадесять: **23** шестыйнадесять Ананиа, сынове его и братия его дванадесять: **24** седмыйнадесять Иесвак, сынове его и братия его дванадесять: **25** осмыйнадесять Ананиа, сынове его и братия его дванадесять: **26** девятыйнадесять Меллифий, сынове его и братия его дванадесять: **27** двадесятый Елиафа, сынове его и братия его дванадесять: **28** двадесять первый Иефир, сынове его и братия его дванадесять: **29** двадесять вторый Годоллафий, сынове его и братия его дванадесять: **30** двадесять третий Меазоф, сынове его и братия его дванадесять: **31** двадесять четвертый Рометфиезер, сынове его и братия его дванадесять.

**26** Разделение же дверников: сынове Кореовы, Моселлемиа сын Кореов от сынов Асафовых. **2** Сынове же Моселлемии: Захариа первенец и Иадиил вторый, Завадиа третий и Иафанаил четвертый, **3** Олам пятый, Ионафан шестый, Елионай седмый, Авдедом осмый. **4** Авдедому же сынове: Самиа первенец, Иозаваф вторый, Иоаф третий, Сахар четвертый, Рофануил пятый, **5** Амиил шестый, Иссахар седмый, Фелафий осмый, яко благослови его Бог. **6** Семею же

сыну его рождени суть сынове первенца началницы в дому отечестем его, бяху бо сильни. 7 Сынове Семейевы: Офни и Рафаил, и Овид и Елзавад и Ахиа, сынове сильни, Елиу и Саваха и Исваком. 8 Все тии от сынов Авдедомлих, сии и сынове их и братия их труждающиеся крепко в делании, все шестьдесят два Авдедому. 9 Моселлемию же сынове и братия осмнадцать, сильнии. 10 Осе же от сынов Мерариных сынове Стрегуции начало, понеже не бысть ему первенец: и постави его отец его в началника разделения втораго: 11 Хелкиа второй, Тавелиа третий, Захариа четвертый: все сии сынове и братия Осины тринадцать. 12 Сии разделени суть в дверницы, да начальствуют над сильными чреды, якоже и братия их служити в дому Господни. 13 И метнуша жребия на коегождо мала и велика по домом отечеств своих на каяждо врата: 14 и паде жребий сущих на востоки Селемию и Захарию. Сынове соазовы мелхий метнуша жребия, и паде жребий к северу. 15 Авдедому к югу прямо дому Есефима. 16 Во второе Осе к западу по вратех притвора восхождения, стража противу стражи. 17 Ко востоку по шести на день: к северу четыре на день: к полудни на день четыре: и к дому совета по два пременяющиеся. 18 И Осе к западу по вратех притвора три, стража противу стражи восхождения к востоком, по шести на день, и на север по четыре, и к югу четыре, и к дому совета два пременяющиеся, и к западу четыре, и к стези два пременяющиеся. 19 Сия разделения дверником сыном Кореовым и сыном Мерариным. 20 Левити же братия их (беша) над сокровищи дому Господня и над сокровищи святынь. 21 Сынове Ладановы, сии сынове Герсони: Ладану началницы отечеств Ладаних, Герсону

Иеиил. 22 Сынове Иеиили Земеф и Иоиль братия над сокровищи дому Господня, 23 Амвраму и Иссаару, Хеврону и Озиилу. 24 Суваил же сын Гирсама сына Моисеова настоятель над сокровищи. 25 Брату же его Елиезеру Равиа сын его, и Иосиа и Иорам, и Зехрий и Саломоф. 26 Той Саломоф и братия его над всеми сокровищи святыми, ихже освяти Давид царь и начальницы отечеств, тысящницы и сотницы и вождеве силы, 27 яже взя из градов и от корыстей, и освяти я на пособление зданию дому Господня. 28 И над всеми, яже освяти Богу Самуил пророк и Саул сын Кисов, и Авенир сын Ниров и Иоав сын Саруиев, все еже освятиша рукою Саломофовою и братии его. 29 Иссаарию Хонения и сынове его делания внешнего над Израилем, к наказанию и суждению. 30 Хеврону Асавиа и братия его сынове сильнии, тысяща и семь сот над созираньем Израиля за Иорданом противу запада, на всякую службу Господню и на делание царево. 31 Хеврону Уриа начальник Хевронитов по родом их, по отечеством, в четыредешатое лето царства Давидова сочтени суть, и обретени мужие сильни в них во Иазире Галаадитстем. 32 И братия его сынове сильнии, две тысящы семь сот, начальницы отечеств, и постави их Давид царь над Рувимом и Гадам и над половиною колена Манасиина, во всякое повеление Господне и слово царево.

**27** Сынове же Израилевы но числу своему, начальницы отечеств, тысящницы и сотницы и книгочии служащии царю, и на всякое слово царево по разделением, и на всякое слово входящаго и исходящаго, месяц от месяца, во вся месяцы лета разделение едино, двадешать четыре тысящы. 2 И над первым разделением в первый месяц



бысть Извоаз сын Завдиилов, в разделении его двадесять четыре тысящи: 3 от сынов Фаресовых, началник всем князем воинства месяца перваго. 4 И над разделением месяца втораго Додай Екхотский и над разделением его, и Макеллоф вождь, и в разделении его двадесять четыре тысящи, князи силы. 5 Третий месяца третияго Ванеа сын Иодаев, иже священник началный, и в разделении его двадесять четыре тысящи: 6 сей Ванеа крепчайший между тридесятми, и над тридесятми: и над разделением его Завад сын его. 7 Четвертый месяца четвертаго Асаил брат Иоавль, и Завадиа сын его и братия, и в полце его двадесять четыре тысящи. 8 Пятый пятаго месяца началник Самаоф сын Иезраев, и в полце его двадесять и четыре тысящи. 9 Шестый месяца шестаго Одуиа сын Еккисов Фекуитянин, и в полце его двадесять и четыре тысящи. 10 Седмый месяца седмаго Хеллис иже от Фалуса, от сынов Ефремлих, и в полце его двадесять и четыре тысящи. 11 Осмый месяца осмаго Совахай Усафитянин, от колена Зараина, и в полце его двадесять и четыре тысящи. 12 Девятый месяца девятаго Авиезер, иже от Анафофа, от земли Вениамини, и в полце его двадесять и четыре тысящи. 13 Десятый месяца десятаго Меирай, иже от Нетофафита, от колена Зараина, и в полце его двадесять и четыре тысящи. 14 Первыйнадесять месяца первагонадесять Ванаиа, иже от Фарафона, от сынов Ефремлих и в полце его двадесять и четыре тысящи. 15 Вторыйнадесять месяца вторагонадесять Холдиа, иже от Нетофафита, от колена Гофониилева, и в полце его двадесять и четыре тысящи. 16 И над племены Израилевыми, Рувиму вождь Елиезер, сын Зехриев: Симеону

Сафатиа, сын Мааха: 17 Левию Асавиа, сын Камуилев:  
Аарону Садок: 18 Иуде Елиав от братий Давидовых: Иссахару  
Амри, сын Михаилов: 19 Завулону Самаиа, сын Авдиев:  
Неффалиму Иеримоф, сын Озииль: 20 Ефрему Осий, сын  
Озазиев: полуплемени Манассиину Иоиль, сын Фадеев:  
21 полуплемени Манассиину сущему в земли Галаадстей  
Иаддай сын Завадиин: сыном Вениаминим Иасиил, сын  
Авениров: 22 Дану Азариил, сын Иорамов. Сии быша  
началницы племеном Израилевым. 23 Не хоте же Давид  
счести их от двадесятилетнего и ниже: зане рече Господь  
умножити Израиля, яко звезды небесныя. 24 Иоав же сын  
Саруиев нача сочитати люди, и не соверши: сего ради бысть  
гнев Божий на Израиля: и не внесеся сочисление в книгу  
словес царя Давида. 25 Над сокровищи же царскими бысть  
Асмоф сын Одиилев: и над сокровищи, иже на нивах и в  
селех, и в весех и в столпех, Ионафан сын Озиев: 26 и над  
земледелатели землю делающими Езрай сын Хелувов:  
27 и над селы Семей Армафейский: и над сокровищами  
виноградными Замвдиа сын Сефамиев: 28 над маслинами же  
и над черничием, иже бяху на полях, Валанан Гедоритянин:  
над сокровищи елеа Иоас: 29 над скоты же, иже пасяхуся в  
Сароне, Сатрай Саронитянин: и над волы, иже во юдолах,  
Софат сын Адаин: 30 над велблюды же Увиа Исмаилтянин:  
над ослы же Иадиа, иже от Марафона: 31 и над овцами  
Иоас Агаритин. Все тии началницы имений Давида царя. 32  
Ионафан же дядя Давидов (бысть) советник, муж мудр и  
книжен сый: и Иеиль сын Ахаманиев бе с сынами царевыми.  
33 Ахитофел советник царев, и Хусиа первейший друг царев,

34 и по (нем) Ахитофеле бысть (близ) Иодай сын Ванеин и Авиафар: и Иоав начальный воевода царев.

**28** Собра же Давид вся начальники Израилевы, начальники судий и колен, и вся начальники полков, почредно стрегущих царя, и начальники тысящей и сотней, и стражы сокровищ, и сущыя над именами своими и над всем стяжанием царевым, и сынов своих со евнухами, и сильныя и храбрыя воинства во Иерусалим. 2 И воста Давид царь посреде собрания и рече: слышите мя, братия моя и людие мои: бысть мне на сердцы создати дом упокоения кивоту завета Господня и подножие ног Господа (Бога) нашего, и уготовах на созидание потребная: 3 Бог же рече: не созиждеши мне дому еже именовати имя Мое в нем, зане человек воин еси ты и крови пролиял еси: 4 и избра Господь Бог Израилев мене от всего дому отца моего, да буду царь над Израилем во веки, и во Иуде избра царство, и от дому Иудина дом отца моего: и от сынов отца моего во мне благоволи, еже быти ми царю над всем Израилем: 5 от сынов же моих всех, сыны бо мне многи даде Господь, избра Соломона сына моего, да седит на престоле царства Господня, над Израилем: 6 и рече мне Бог: Соломон сын твой созиждет дом Мой и двор Мой, зане того избрах Мне в сына быти, и Аз буду ему во Отца 7 и укреплю царство его даже до века, аще укрепится хранити заповеди Моя и судьбы Моя, якоже и днесь: 8 ныне убо пред лицом всего собрания Господня и во уши Бога нашего, храните и взыщити вся заповеди Господа Бога нашего, да наследите землю благу и оставите в наследие сыном вашим по вас даже до века: 9 и ныне, Соломоне, сыне мой, да знаеши Бога отец твоих и

служи Ему сердцем совершенным и душевною волею, вся бо сердца испытует Господь и всяко помышление разумеет: аще възыщеша Его, обрящется: аще же оставиши Его, оставит тя в конец: **10** ныне убо виждь, яко избра тя Господь, да созиждеша ему дом во освящение, крепися и соверши. **11** Даде же Давид Соломону сыну своему начертание храма и домов его, и камар его, и горниц, и полагалиц внутренних, и дому очищения, **12** и подобие, еже помысли духом своим, дворов дому Господня, и всех камар окрест в сокровищих дому Господня, и влагалищ святынь, **13** и виталищ, и дневных чред иерейских и левитских, во вся дела служения дому Господня, и влагалищ служебных сосудов службы дому Господня: **14** и меру веса их золотых и серебряных, **15** светильников вес даде ему и свещников. **16** Даде ему подобие вес трапезы предложения, кияждо трапезы золотыя, такожде и серебряных, **17** и удиц, и возлиялиц, и фиал золотых, и вес золотых и серебряных, и кадилниц золотых, коегождо веса: **18** и жертвенника фимиамов от золота чиста вес оказа ему, и подобие колесницы херувимов простирающих крила и осеняющих над кивотом завета Господня. **19** Вся писанная рукою Господнею даде Давид Соломону, по сущему в нем разуму дела изображения. **20** И рече Давид Соломону сыну своему: укрепляйся и мужайся и твори: не бойся, ниже страшися, зане Господь Бог мой с тобою, не отступит от тебе, ниже оставит тя, дондеже совершиши ты все дело служения дому Господня: и се, подобие храма и дому Его, и камар Его, и горниц, и полагалиц внутренних, и дому очищения, и подобие дому Господня: **21** и се, дневныя чреды иереев и левитов во всяко служение Дому Господня, и с тобою во

всяцем действе, и всяк усердный в мудрости во всяцем художестве, и князи, и вси людие во вся словеса твоя.

**29** И рече Давид царь ко всему собранию: Соломон сын мой, егоже избра себе Господь, юн и млад, а дело велико, занеже не человеку уготовится здание, но Господу Богу: **2** всею силою уготовах на дом Бога моего злато, серебро, медь, железо, древа, камение мраморное, и множество камней многоценных и различных, и всякое честное камение, и камней парийских много: **3** и еще внегда благоволити ми в дому Бога моего, есть у мене еже приготовах злато и серебро, и се, дах в дом Бога моего, в высоту, кроме оных, яже уготовах на дом святых: **4** три тысячи талант злата Суфирска и семь тысяч талант серебра искушена к позлащению стен святилища, **5** идеже дело златое златом, а идеже серебряное серебром, и на всякое дело рукою художников: и кто благоволяй исполнити руку свою днесь Господу? **6** И обещаша усердно начальницы отечеств и князи сынов Израилевых, и тысящницы и сотницы, и начальницы дел и икономы царевы, **7** и даша на дела дому Господня злата талант пять тысяч, и златник десять тысяч, и серебра талант десять тысяч, и меди талант осмнадцать тысяч, железа же сто тысяч талант: **8** и у нихже обретеса камение, даша во влагалище дому Господня, под руку Иеилия Герсонина. **9** И возвеселишася людие о усердном подаянии, понеже всем сердцем приношаху Господу, и Давид царь возвеселися зело: **10** и благослови царь Давид Господа пред всем множеством, глаголя: благословен еси, Господи Боже Израилев, Отец наш, от века и до века: **11** Тебе, Господи, величество, и сила, и слава, и одоление, и исповедание, и крепость, яко

Ты всеми, иже на небеси и на земли, владычествуеши: от лица Твоего трепещет всяк царь и язык: и Тебе, Господи, царство и великолепие во всех и во всяцем начале: **12** от Тебе богатство и слава, Ты над всеми началствуеши, Господи, начало всякаго начала, и в руку Твою крепость и власть, и в руку Твою милость, Вседержителю, возвеличити и укрепити вся: **13** и ныне, Господи, исповедаемся Тебе и хвалим имя хваления Твоего: **14** и кто аз есмь, и кто людие мои, яко возмогохом сия Тебе благовольне обещати? Твоя бо суть вся, и от твоих дахом Тебе: **15** пришелцы бо есмы пред Тобою и преселницы, якоже вси отцы наши: дние наши яко сень на земли, и несть постояния: **16** Господи Боже наш, ко всему множеству сему, еже уготовах, да созиждется дом имени святому Твоему, от руку Твоюю суть, и Тебе вся: **17** и вем, Господи мой, яко Ты еси испытуйай сердца, и правду любиши: в простоте сердца моего произволих сия вся, и ныне людей Твоих, иже zde обретошася, видех с радостию Тебе произволивших (принести дары): **18** Господи Боже Авраама и Исаака и Израиля отец наших, сохрани сия в воли сердца людей Твоих во веки, и исправи сердца их к Тебе: **19** Соломону же сыну моему даждь сердце благо, да хранит заповеди Твоя и свидения Твоя и повеления Твоя, и к совершению привести здание дому Твоего. **20** И рече Давид всему собранию (людей): благословите Господа Бога нашего. И благословиша все собрание Господа Бога отец своих: и преклонше колена поклонишася Господу и царю. **21** И пожре Давид жертвы Господу, и вознесе всесожжения Богу на утрие перваго дне, телец тысящу, овнов тысящу, агнец тысящу, и возлияния их, и жертвы множество от всего

Израиля. 22 И ядоша и пиша пред Господем в день той с великим веселием: и поставиша царем второе Соломона сына Давидова, и помазаша его Господу в царя, и Садока же во архиереа. 23 И седе Соломон на престоле Господни в царя, вместо Давида отца своего, и благоугоден бысть: и покорися ему весь Израиль. 24 Князи и сильнии и вси сынове царя Давида отца его повинушася ему. 25 И возвеличи Господь Соломона над всем Израилем и даде ему славу царства, еяже ни един царь име прежде его. 26 И Давид сын Иессеев царствова над всем Израилем четыредесять лет, 27 в Хевроне семь лет, а во Иерусалиме лет тридесять три, 28 и умре в старости блазе, исполнь дний, в богатстве и славе, и воцарися Соломон сын его вместо его. 29 Прочая же словеса царя Давида первая и последняя написана суть в словесех Самуила видящаго и в словесех Нафана пророка и в словесех Гада провидящаго, 30 о всем царстве его и крепости его, и времена яже быша при нем и во Израили и во всех царствах земных.

## Вторая книга Паралипоменон

**1** И укрепися Соломон сын Давидов на царстве своем, и Господь Бог его (бе) с ним и возвеличи его в высоту. **2** И рече Соломон ко всему Израилю, тысящником и сотником, и судиям и всем начальником пред Израилем. **3** И иде Соломон и все множество в вышний Гаваон, идеже бе скиния свидения Божия, юже сотвори Моисей раб Божий в пустыни. **4** Кивот же Господень принесе Давид от Града Кариафиарима на место, еже уготова ему Давид, яко водрузи ему скинию во Иерусалиме. **5** И олтарь медян, егоже содела Веселеил сын Урии сына Орова, ту бе пред скиниею Господнею и взыска его Соломон и вся церковь. **6** Вознесе же ту Соломон на олтари медянем пред Господем, иже в скинии свидения, и принесе на нем тысящу всесожжений. **7** В ту ночь явися Господь Соломону и рече ему: проси (что хочещи) да дам тебе. **8** Рече же Соломон к Богу: Ты сотворил еси с Давидом отцем моим милосердие велико и поставил мя еси царя вместо его: **9** и ныне, Господи Боже, да исполнится слово Твое к Давиду отцу моему, Ты бо мене сотворил царя над людьми многими, якоже прах земный: **10** ныне даждь мне премудрость и разум, да вниду и изыду пред людьми твоими сими, кто бо может судити сих людей Твоих многих? **11** И рече Бог к Соломону: понеже бысть сие в сердцах твоих, и не попросил еси богатства имений, ниже славы, ниже душ противящихся тебе, и дний многих не просил еси, но просил еси себе премудрости и разума, да судити можещи люди Моя, над нимиже поставих тя царя, **12** премудрость и разум даю тебе, богатство же и имения и славу дам тебе, яко не бысть в царех преждебывших тебе подобен тебе, и по



тебе такожде не будет. 13 Прииде же Соломон от вышняго Гаваона во Иерусалим пред скинию свидения и царствова над Израилем. 14 И собра Соломон колесницы и конники, и быша ему тысяща и четыреста колесниц и дванадесять тысящ конник: и остави их во градех колесничных, людие же с царем во Иерусалиме. 15 И положи царь серебро и злато во Иерусалиме яко камене, кедры же во Иудеи яко черничие, еже на поли во множестве. 16 Исхождение же коней Соломоновых из Египта ценою купцов царских, иже хождаху и куповаху. 17 И восхождаху и привождаху из Египта колесницу едину за шесть сот сребреник, и коня за сто и пятьдесят сребреник: такожде и от всех царств Хеттейских и от царей Сирийских рукама их приводима бываху.

**2** И повеле Соломон созидати дом имени Господню и дом царству своему. 2 И собра царь Соломон седмьдесят тысящ мужей носящих времена и осмьдесят тысящах каменосечцев в горах, приставленных же над ними три тысящы и шесть сот. 3 И посла Соломон к Хираму царю Тирску, глаголя: якоже сотворил еси с Давидом отцем моим и послал еси ему кедры, да созидет себе дом, в немже ему обитати, 4 и се, аз сын его созидаю дом имени Господа Бога моего, да освяшу его Ему, еже кадити пред Ним фимиам ароматов и предложение всегда, и возносити всеожжения выну, утро и к вечеру, и в субботы, и в новомесячиих, и в праздницех Господа Бога нашего: во век сие бо Израили: 5 и дом, егоже аз созидаю, велик, велик бо есть Господь Бог наш паче всех богов, 6 и кто возможет создати Ему дом? Аще бо небо и небо небесе не могут вместити славы Его: и кто аз, созидай Ему дом? Но токмо еже кадити фимиам пред Ним: 7 ныне

убо посли мне мужа мудра, иже вестъ дела творити в злате и серебре, и меди и железе, и порфире и в червлени и в синете, и иже знает ваяти ваяние, с мудрыми, иже у мене во Иудеи и во Иерусалиме, яже уготова Давид отец мой: 8 и посли ми древа кедрова и аркевфова и певгова от Ливана, вем бо аз, яко раби твои умеют сеци древа от Ливана: 9 и се, раби твои с рабы моими пойдут, да уготовают мне древа многа, дом бо, егоже аз созидаю, велик и преславлен: 10 и се, делателем, иже секут древа, дах в пищу рабом твоим пшеницы мер двадесять тысяч и ячменя мер двадесять тысяч, и вина мер двадесять тысяч и елеа мер двадесять тысяч. 11 Рече же Хирам царь Тирский чрез писание и посла к Соломону, глаголя: понеже возлюби Господь люди Своя, постави тя над ними царя. 12 И рече Хирам: благословен Господь Бог Израилев, иже сотвори небо и землю, иже даде Давиду царю сына премудра и учена, и умна и разумна, иже созиждет дом Господу и дом царству своему: 13 и ныне послах тебе мужа мудра и сведуща разум, Хирама раба моего: 14 мать его от дочерей Дановых, отец же его муж Тирянин, иже вестъ делати в злате и серебре, и в меди и в железе, и в камениих и в древах, и ткати в порфире и в синете и в виссоне и в червленице, и ваяти всякую резъ, и разумети всяко разумение, елика аще даси ему, с мудрыми твоими и с мудрыми господина моего Давида, отца твоего: 15 и ныне пшеницу и ячмень, и елей и вино, яже обещал еси, господине мой, посли рабом твоим, 16 мы же будем сеци древа от Ливана на всяку потребу твою и послам я плотами по морю Иоппийскому, ты же приведеша я во Иерусалим. 17 И собрав Соломон всех мужей пришелцев, иже бяху в

земли Израилеве, по сочтению, имже сочте их Давид отец его, и обретени суть сто пятьдесят три тысящы и шесть сот: 18 сотвори же от них семьдесят тысящ бременоносцев и осмьдесят тысящ каменосечцев, три тысящы и шесть сот приставники над делами людскими.

**3** И нача Соломон созидати дом Господень во Иерусалиме, на горе Амория, на месте, еже уготова Давид на гумне Орны Иевусеанина: 2 нача же созидати в месяц второй лета четвертаго царства своего. 3 И сице нача Соломон созидати дом Божий: в долготу лакот, размер первый, лакот шестьдесят, в широту же лакот двадесять: 4 и притвор пред лицем дому, долгота по лицу широты дому, лакот двадесять, высота же лакот сто двадесять и позлати его внутрь златом чистым. 5 Дом же великий окры дсками кедровыми и позлати златом чистым: извая же на нем подобия фиников и яко мрежицы промежь себе сплетающаяся, 6 и украси храм камением драгим славно, и позлати златом, еже от Фаруима. 7 И позлати дом и стены его, и врата и праги, и окна и двери златом, и извая херувимы на стенах. 8 Сотвори же дом Святая Святых, долгота его по лицу широты дому, лакот двадесять, широта такожде двадесять лакот, и позлати и златом чистым на херувимех, талант шесть сот. 9 И вес гвоздий, вес гвоздя единого пятьдесят сикль злата, и горницу позлати златом. 10 И сотвори в дому Святая Святых Херувима два, дело от древ негниюших и позлати их златом. 11 И криле херувимов, долгота двадесять лакот, и едино крило лакот пяти, прикасающееся стене дому, 12 и другое крило пяти лакот, прикасающееся крилу херувима другаго: 13 криле же херувимов сих распростерте на лакот двадесять,

тии же стояху на нозех своих, лица же их (зряще) к дому. 14 Сотвори же завесу от синеты и багряницы, и червленицы и виссона, и сотка на ней херувимы. 15 И сотвори пред храмом столпа два, локот тридесять пять в высоту, и главы их пять локот. 16 И сотвори чепи в давире и положи на главах столпов, и шипков сотвори сто, ихже положи на мрежи. 17 И постави столпы пред лицом храма, единого одесную, а другаго ошуюю: и нарече имя сущему одесную Исправление, имя же сущему ошуюю Крепость.

**4** Сотвори же и олтарь медян, двадесять локот в долготу и двадесять локот в широту и десять локот в высоту. 2 И сотвори море (медяно) слияно, десять локот от устия до устия его, кругло окрест, и пяти локот в высоту, и округлость его тридесяти лактей: 3 и подобие телцев под ним окрест окружающих е: десять локот обдержажу умывалницу окрест: два рода слияша телцев в слиянии их, 4 имже сотвориша их дванадесять телцев, иже трие сматряху к северу и трие к западу, и трие к полудню и трие к востоку, и море на них (наставлено), задняя же их бяху внутрь (под морем): 5 и толстота его дланная, и устие его яко устие потира, изваянна яко отрасли крина, вмещающее три тысящы мер: и соверши. 6 Сотвори же омывалниц десять и постави пять одесную и пять ошуюю, да омывают в них вся приносимая на всесождения и очищают в них, море же, да омываются священницы в нем. 7 Сотвори же и подсвещник златых десять по мере их и постави я в храм пять одесную и пять ошуюю. 8 И сотвори столов десять и постави в храм пять одесную и пять ошуюю, и фиал златых сотвори сто. 9 И сотвори двор священником и двор великий, и двери двора и

вереи их помедяны медию. 10 И море постави от угла дому одесную аки к востоку прямо. 11 Сотвори же Хирам удицы мясныя, и кадилницы, и сковраду жертвенную, и вся сосуды его: и соверши Хирам творити всякое дело, еже сотвори Соломону царю в дому Божии: 12 столпа два, и на них окружилия, и венцы на главах дву столпу, и мрежице две, еже покрывати главы венцев иже суть над главами столпов: 13 и звонцев златых четыреста в две мрежи, и два ряда шипков во мрежи единой, еже покрывати два окружилия венцев, иже суть верху столпов: 14 и подставов сотвори десять, и умывальницы сотвори на подставах, 15 и море едино и волов дванадесять под ним, 16 и котлы, и удицы мясныя и вся сосуды их, яже сотвори Хирам и принесе царю Соломону в дом Господень от меди чистыя. 17 Во стране Иордана слия их царь, в толщи земней, между Сокхофом и между Саридафом. 18 И сотвори Соломон вся сосуды сия многочисленны зело, понеже не оскуде тягость меди. 19 Сотвори же Соломон вся сосуды дому Божия, и олтарь злат, и трапезы, и на них хлебы предложения, 20 и подсвещники, и светилники света, да светят пред Святая святых по чину, от злата чиста, 21 и щипцы их, и светилники их, и фиалы, и чашицы, и кадилницы от злата чиста, 22 и двери храма внутренния яже во Святая Святых и двери дому храма златыя. И совершися все дело еже сотвори Соломон в дому Господни.

**5** И внесе Соломон святая Давида отца своего, серебро и злато и вся сосуды, и даде в сокровище дому Господня. 2 Тогда собра Соломон вся старейшины Израилевы и вся начальники колен, вожды отечеств сынов Израилевых во

Иерусалим, да вознесут кивот завета Господня от града Давидова, иже есть Сион. 3 И собращася ко царю вси мужие Израилевы в праздник, сей есть месяц седмый. 4 И приидоша вси старейшины Израилевы, и взяша вси левити кивот 5 и внесоша его и скинию свидения и вся сосуды святых, иже в скинии, и внесоша его священницы и левити. 6 Царь же Соломон и весь сонм сынов Израилевых, и боящиися и собрании пред кивотом, жряху телцы и овцы безчисленны и несочисляемы от множества. 7 И внесоша священницы кивот завета Господня на место его, еже есть молитвенник храма, во Святая Святых, под криле херувимов. 8 И бяху херувими распростерше крила своя над местом кивота, и покрываху херувими над кивотом и над носилами его свыше. 9 И длиннее бяху носила, и видяхуся главы носил от святых в лице молитвенника, и не видяхуся вне, и быша тамо даже до настоящего дне. 10 Ничтоже бе в кивоте, токмо две скрижали, иже положи Моисей в Хориве, егда закон даде Господь сыном Израилевым, исходящим им из земли Египетския. 11 И бысть исходящим священником от святых, вси бо священницы, иже ту обретошася, освящени быша и не бяху расположены в дневную чреду, 12 левити же и певцы вси с сынми Асафовыми, со Еманом, Идифумом, и с сынми их и с братьями их, облечени в ризы льняны, в кимвалех и псалтири и гуслех (возглашаху) стояще пред олтарем, и с ними жерцев сто двадесять трубяще трубами: 13 и бысть един глас в трублении и в псалмопении и в возглашении гласом единым еже хвалити и исповедатися Господеви. И егда воздвигоша глас в трубах и кимвалех и органех песней, и глаголаху: исповедайтеся Господеви, яко благ, яко в век

милость Его: и дом исполнися облака славы Господни, **14** и не могоша священницы стати служити от лица облака, наполни бо слава Господня дом Божий.

**6** Тогда рече Соломон: Господь рече обитати во мгле, **2** аз же создах дом имени Твоему Святыи Тебе, и уготован еже обитати Тебе во веки. **3** И обрати царь лице свое и благослови все собрание Израилево, и все собрание Израилево предстояше, и рече: **4** благословен Господь Бог Израилев, якоже глагола усты Своими ко Давиду отцу моему, и руками Своими соверши, глаголя: **5** от дне, в оньже изведох люди Моя от земли Египетския, не избрах града от всех колен Израилевых, да созиждется в нем дом имени Моему ту, ниже избрах мужа быти вождем над людьми Моими во Израили: **6** но избрах Иерусалима, да будет имя Мое в нем, и избрах Давида быти над людьми Моими Израилем: **7** и бысть на сердцы Давида отца моего создати дом имени Господа Бога Израилева: **8** и рече Господь ко Давиду отцу моему: понеже бысть на сердцы твоём создати дом имени Моему, добре сотворил еси, яко бысть на сердцы твоём, **9** обаче ты не созиждеши Мне дому, но сын твой, иже изыдет из чресл твоих, той созиждет дом имени Моему: **10** и соверши Господь слово сие, еже глагола, и бых вместо Давида отца моего, и седох на престоле Израилеве, якоже глагола Господь, и создах дом имени Господа Бога Израилева, **11** и поставих в нем кивот, в немже есть завет Господень, егоже завеща Израилю. **12** И ста пред олтарем Господним, пред всем множеством Израилевым, и простре руце свои: **13** сотвори бо Соломон стояло медяно и постави его посреде двора святилища, пять локот долготы его и пять локот широты его и

три локти высота его: и ста на нем, и паде на колена своя пред всем множеством Израилевым, и простре руки своя на небо и рече: **14** Господи Боже Израилев, несть подобен Тебе Бог на небеси и на земли, сохраняяй завет и милость с рабы Твоими, иже ходят пред Тобою всем сердцем своим, **15** яже сохранил еси рабу Твоему Давиду отцу моему, елика рекл еси ему глаголя, и глаголал еси усты Твоими и руками Твоими совершил еси, якоже день сей: **16** и ныне, Господи Боже Израилев, сохрани рабу Твоему Давиду отцу моему, яже рекл еси ему глаголя, и глаголал еси усты Твоими и исполнил еси якоже в день сей, глаголя: не оскудеет тебе муж от лица Моего седяй на престоле Израилеве, токмо аще сохранят сынове твои пути Моя ходити в законе Моем, якоже ходил еси предо Мною: **17** и ныне, Господи Боже Израилев, да укрепится слово Твое, еже глаголал еси рабу Твоему Давиду: **18** убо истинно ли Бог обитати будет с человеки на земли? Аще небо и небо небесе не довлеют Ти, и кольми паче дом сей, егоже создах? **19** И призри на моление раба Твоего и на молитву мою, Господи Боже мой, еже услышати молитвы моя и моление, имже раб Твой молится пред Тобою днесь, **20** еже быти очесем Твоим отверстым на дом сей день и ночь, на место сие, о немже глаголал еси, да призовется имя Твое тамо, еже услышати молитву, еюже раб Твой молится на месте сем: **21** и послушати мольбу раба Твоего и людей Твоих Израиля, елика аще помолятся на месте сем и ты услышиши на месте жилища Твоего с небесе, и услышиши, и милостив будеши: **22** аще согрешит муж ко искреннему своему и примет на него клятву еже клясти его, и придет и прокленет пред олтарем в дому сем,



23 и Ты услыши от небесе и суди рабом Твоим, еже воздати беззаконному, и воздати пути его на главу его, и оправдяти праведнаго, воздая ему по правде его: 24 и аще одолени будут людие Твои Израиль от враг, аще согрешат Тебе и обратятся, и исповедятся имени Твоему, и помолятся пред Тобою в храме сем, 25 и Ты услыши с небесе и милостив буди грехом людей Твоих Израиля и возврати их в землю, юже дал еси им и отцем их: 26 егда заключиши небо, и не будет дождя, яко согрешат Тебе, и помолятся на месте сем, и восхвалят имя Твое, и обратятся от грех своих, егда смириши их, 27 и Ты услыши с небесе и милостив буди грехом рабов и людей Твоих Израиля, яко явиши им путь благ, по немуже пойдут, и даждь дождь на землю Твою, юже дал еси людем Твоим в наследие: 28 глад аще будет на земли, губителство аще будет, воздуха растление и иктер, прузи и гусеницы аще будут, и аще оскорбит их враг пред градами их, всякою язвою и всякою болезнию, 29 и всяка молитва, и всяко моление, еже аще будет всякому человеку и всем людем Твоим Израилю, аще познает человек язву свою и грех свой и прострет руце свои в дому сем, 30 и Ты услыши с небесе от готоваго жилища Твоего, и очести, и даждь коемуждо по путем его, якоже веси по сердцу его, Ты бо един веси сердца сынов человеческих, 31 яко да боятся Тебе, еже ходити бо всех путех Твоих вся дни, в няже живут на лица земли юже дал еси отцем нашим: 32 и всяк чуждии, иже несть от людей Твоих Израиля, и приидет от земли дальния ради имени Твоего великаго и ради руки Твоея сильныя и мышцы Твоея высокия, и приидет и помолится на месте сем, 33 и Ты услыши с небесе от готоваго жилища

Твоего, и сотвориши по всему, елико призовет Тя чуждий, да уведят вси людие земли имя Твое и убоятся Тебе, якоже людие Твои Израиль, и познают, яко имя Твое призвано есть на дом сей, егоже создах: **34** аще же изыдут людие Твои на брань противу супостат своих по пути, имже послеши их, и помолятся Тебе по пути града сего, егоже избрал еси Себе, и дому, егоже создах имени Твоему, **35** да услышиши с небесе молитву их и моление их, и сотвориши оправдание их: **36** зане согрешат Тебе, яко несть человек, иже не согрешит, и поразиши их, и предаши их в руки врагов их, и пленят их пленяющие в землю врагов, в землю дальнюю или ближнюю, **37** и обратят сердце свое в земли их, в нюже пленени будут, и тамо обратятся, и помолятся Тебе в пленении своем, глаголюще: согрешихом, беззаконновахом, неправдовахом, **38** и обратятся к Тебе всем сердцем своим и всею душею своею в земли пленивших я, идеже плениша их, и помолятся путем земли своея, юже дал еси отцем их, и града, егоже избрал еси, и дому, егоже создах имени Твоему: **39** да услышиши с небесе от готоваго жилища Твоего молитву их и моление их, и сотвориши суд, и милостив буди людем Твоим согрешившим Ти: **40** и ныне, Господи, да будут отверсте очи Твои, и уши Твои внятне к молению места сего: **41** и ныне востани, Господи Боже, в покой Твой, Ты и кивот крепости Твоея: священницы Твои, Господи Боже, да облечутся во спасение, и преподобнии Твои возвеселятся во благих: **42** Господи Боже, да не отвратиши лица христа Твоего, помяни щедроты Давида раба Твоего.

**7** И егда соверши Соломон моляся, и огонь сниде с небесе и пояде всесожжения и жертвы и слава Господня исполни

дом: 2 и не можаху священницы внити в храм Господнь во время оно, яко исполни слава Господня дом Господень. 3 И вси сынове Израилевы видяху сходящъ огнь и славу Господню на дом, и падоша ниц на землю на помост послан каменiem, и поклонишася, и восхвалиша Господа, яко благ, яко во век милость Его. 4 Царь же и вси людие пожроша жертвы пред Господем. 5 И пожре царь Соломон жертву волов двадесять и две тысяцы, овец сто и двадесять тысяц, и освяти дом Божий царь и вси людие. 6 Священницы же стояху на стражах своих, и левити во органы пояху песни Господни, яже сотвори Давид царь к похвалению Господа: (яко благ, ) яко во век милость Его, песни Давидовы (поюще) руками своими: и священницы пояху трубами пред ними, и весь Израиль стояше. 7 Освяти же Соломон среднее двора, иже пред церковию Господнею, принесе бо ту всесожжения и туки мирных, яко олтарь медян, егоже сотвори Соломон, не можаше вместити всесожжений и жертв и туков. 8 И сотвори Соломон праздник во время оно седмь дний, и весь Израиль с ним, собрание велико зело от входа во Емаф даже до потока Египетска: 9 сотвори же в день осмый торжество, понеже освящению олтаря сотвори седмь дний праздник. 10 И в день двадесять третий месяца седмаго отпусти людий в жилище их веселящихся и радующихся о благих, яже сотвори Господь Давиду и Соломону и Израилю людем Своим. 11 И соверши Соломон дом Господень и дом царев: и вся, елика восхоте в сердцы своем Соломон творити в дому Господни и в дому своем, благопоспешися. 12 И явися Господь Соломону нощию и рече ему: услышах моление твое и избрах место сие мне в дом жертвы: 13

аще заключу небо, и дождь не излиется, и аще повелю пругом поясти древо, и аще послию губителство на люди Моя, **14** и аще посрамлени будут людие Мои, на нихже призвано есть имя Мое, и помолятся, и възыщут лица Моего, и отвратятся от путей своих злых: и Аз услышу с небесе и милостив буду грехом их, и изцелю землю их: **15** и ныне очи Мои будут отверсте, и уши Мои послушне к молению места сего: **16** и ныне избрах и освятих дом сей, да будет на Мое ту даже до века, и будут очи Мои и сердце Мое ту вся дни: **17** ты же аще ходити будеши предо Мною, якоже ходил Давид отец твой, и сотвориши по всем, яже повелех тебе, и повеления Моя и судьбы Моя сохраниши: **18** и воздвигну престол царства твоего, якоже завещах Давиду отцу твоему глаголя: не отимется от тебе муж вождь во Израили: **19** аще же отвратитесь вы и оставите повеления Моя и заповеди Моя, яже предах вам, и пойдете и послужите богом иным и поклонитесь им, **20** исторгну вас от земли, юже дах вам: и дом сей, егоже освятих имени Моему, отвергу от лица Моего и предам его в притчу и в повесть всем языком: **21** и дом сей высокий (в притчу), всяк мимоходяй его ужаснется и речет: почто сотвори Господь тако земли сей и дому сему? **22** И отвецают: яко оставиша Господа Бога отец своих, иже изведе их от земли Египетския, и прияша боги чуждыя, и поклонишася им, и поработаша им, и сего ради наведе на них вся сия злая.

**8** И бысть по двадесяти летех, в нихже созда Соломон дом Господень и дом свой, **2** и грады яже даде Хирам Соломону, созда оны Соломон и всели ту сыны Израилевы. **3** И прииде Соломон во Емаф-Сува и одержа его. **4** И созда Федмор

в пустыни и вся грады крепкия, яже созда во Емафе. 5  
Сострой же Вефорон вышний и Вефорон нижний, грады  
укреплены стенами, вратами и вереями: 6 и Валааф, и вся  
грады крепкия, иже быша Соломону, и вся грады колесниц и  
грады конник, и елика восхоте Соломон по желанию создати  
бо Иерусалиме и в Ливане и во всем царстве своем. 7  
Весь народ оставшийся от Хеттеа и Аморреа, и Ферезеа  
и Евеа и Иевусеа, иже не бяху от племени Израилева, 8  
но беша от сынов их оставшихся по ним на земли, ихже не  
избиша сынове Израилевы, подведе их Соломон в дань  
даже до дне сего. 9 От сынов же Израилевых не даде  
Соломон в рабы царству своему: тии бо бяху мужие ратницы  
и князи, и сильнии и начальницы колесниц и конник его.  
10 И сии начальницы предстоящих царю Соломону, двести  
пятьдесят приставницы над делы людскими. 11 Дщерь  
же Фараону преведе Соломон от града Давидова в дом,  
егоже созда ей, рече бо: да не обитает жена моя в дому  
Давида царя Израилева, понеже освящен есть, аможе вниде  
кивот Господень. 12 Тогда вознесе Соломон всесожжения  
Господеви на олтарь, егоже созда Господеви пред храмом, 13  
по словеси от дне до дне возносити, по повелению Моисееву,  
в субботы и в новомесячия и в праздники, трижды в год,  
в праздник опресноков и в праздник седмиц и в праздник  
кущей. 14 И постави по разсуждению Давида отца своего  
разделения священником и по служением их: и левиты над  
стражами их, да хвалят и служат пред священники по чину  
единого коегождо дний: и дверницы по разделением их,  
по вратом и вратом: тако бо повеле Давид человек Божий.  
15 Не преступиша заповедий царевых о священницех и

левитех по всякому словеси, и в сокровищих. 16 И уготовася всяко делание от дне, в онъже основа, до дне, в онъже соверши Соломон дом Господень. 17 Тогда иде Соломон в Гасионъгавер и во Елаф, иже при мори в земли Идумейстей. 18 И посла Хирам рукою слуг своих корабли и рабы знающыя морския проходы, и хождаху с рабы Соломоними в Софир, и взяша оттуду четьреста и пятьдесят талант злата и принесоша ко царю Соломону.

**9** Царица же Савска услыша имя Соломоново и прииде искусити его гаданьми во Иерусалиме с силою тяжкою зело: и вельбюды носящии ароматы и злата множество и камни драгаго: и прииде к Соломону и глагола ему вся, елика беша в сердцы ея. 2 И возвести ей Соломон вся словеса ея, и не преиде слово, егоже бы не возвестил ей. 3 И виде царица Савска премудрость Соломоню, и дом егоже созда, 4 и яди столов его, и седалища рабов его, и состояние служебников его и ризы их, и виначерпчия его и украшение их, и всеожжения, яже жряше в дому Господни, и вне себе бысть. 5 Рече же ко царю: истинно есть слово, еже слышах в земли моей о словесех твоих и о премудрости твоей: 6 и не веровах словесем их, дондеже приидох, и видеста очи мои, и се, не возвестиша мне половины множества премудрости твоея: приложил еси ко слышанию яже слышах: 7 блажени мужие твои и блажени раби твои сии, иже предстоят пред тобою на всяко время и слышат премудрость твою: 8 да будет Господь Бог твой благословен, иже благоволи в тебе, еже дати тя на престол Свой царя Господу Богу твоему: зане возлюби Господь Бог твой Израиля, еже утвердити его во век, и постави тя над ними царя, да сотвориши суд

и правду. **9** Даде же царю сто двадесять талант злата и ароматы многи зело и камение драгое, и не быша ароматы таковы яко сия, яже даде царица Савска царю Соломону. **10** Но и раби Хирамовы с рабы Соломоними приношаху злато Соломону драгое. **11** И сотвори Соломон царь от древ певговых степени в дом Господень и в дом царев, и гусли и псалтири песней, и никогдаже видена быша в земли Иудине прежде такоая. **12** Царь же Соломон даде царице Савстей вся по желанию ея, ихже просила, кроме всех яже принесе царю Соломону, и возвратися в землю свою. **13** Бе же вес злата приносимаго к Соломону на всяко лето шесть сот шестьдесят шесть талант злата, **14** кроме мужей подданных и купцов, иже приношаху, и всех царей Аравских и властелей земли, иже вси приношаху злато и сребро царю Соломону. **15** Сотвори убо царь Соломон двести щитов златых тягненных, шесть сот златник чистых бяху во едином щите: **16** и триста щитов златых тягненных, по триста златник бяше во едином коемждо щите, и положи я царь в дому древа Ливанова. **17** Сотвори же царь престол от слоновых зубов велик, и позлати его златом чистым, **18** и шесть степеней у престола позлащени златом, и мышчицы две туду и сюду над престолом седалища, и два льва стояща близ мышчцей, **19** и дванадесять львов стоящих тамо на шести степенех от обоих стран: и не бысть таков престол во всяцем царстве. **20** Вси же сосуди царя Соломона бяху златы, и вси сосуди дому дубравы Ливанския златом окружены, сребро бо во днеш Соломоних ни во что вменяшеся: **21** зане корабль царев хождаше в Фарсис с рабы Хирамовыми, единицею в лета три приходяше корабль от Фарсиса ко царю, полн

злата и сребра и зубов слоновых и обезьян. 22 И возвеличися Соломон паче всех царей земных богатством и мудростию. 23 Все же царие земстии желашу видети лице Соломоне и слышати премудрость его, юже даде Бог в сердце его: 24 и приношаху ему кийждо дары своя, сосуды серебряны и златы, и одеяния и стакту, и сладости, кони и мски, на всякое лето. 25 И бяху царю Соломону чотыредесять тысящ кобылиц к колесницы и дванадесять тысящ конник, и постави их во градах колесничных и со царем во Иерусалиме. 26 И бысть вождь всех царей от реки (Евфрата) даже до земли иноплеменник и даже до предел Египетских. 27 И даде царь злато и сребро во Иерусалиме яко камение, и кедры яко черничие, еже (раждается) в полях множество. 28 И приводяху кони Соломону от Египта и от всея земли. 29 И прочая словеса Соломона первая и последняя, се, сия писана суть в словесех Нафана пророка и в словесех Ахии Силониты и в видениях Иоила видящаго, противу Иеровоама сына Наватова. 30 И царствова Соломон во Иерусалиме над всем Израилем чотыредесять лет. 31 И успе Соломон со отцы своими, и погребоша его во граде Давида отца его. И воцарися Ровоам сын его вместо его.

**10** И прииде Ровоам в Сихем, зане в Сихем весь Израиль снидесе поставити его царем. 2 И бысть егда услыша Иеровоам сын Наватов, иже бе во Египте, яко убеже от лица Соломона царя, и обита Иеровоам во Египте, и возвратися Иеровоам от Египта. 3 И послаша и призваша его. И прииде Иеровоам и все собрание Израилево ко царю Ровоаму, глаголюще: 4 отец твой ожесточи иго наше, ты же ныне ослаби от работы отца твоего жестокия и от ига его тяжкаго,



еже возложи на нас, и послужим тебе. 5 И рече им: поидите даже до триех дний и приидите ко мне. И отидоша людие. 6 И собра царь Ровоам старейшины, иже стояху пред Соломон отцем его, егда еще живяше, глаголя: каков вы даете совет отвещати людем сим? 7 И реша ему: аще днесь будеши во благое людем сим, и благоугодиши, и речеши им словеса благая, то послужат тебе во вся дни. 8 И остави совет старейшин, егоже совещаша ему: и советоваше со юношами, иже с ним воспитани бяху и стояху пред ним, 9 и рече к ним: что вы советуете, да отвещаю людем сим, иже реша мне, глаголюще: облегчи иго, еже наложи на ны отец твой? 10 И отвещаша ему отроцы воспитаннии с ним, глаголюще: тако речеши людем, ихже рекоша тебе, глаголюще: отец твой отягчи иго наше, ты же облегчи нам: тако отвещай к ним: менший перст мой толстее есть чресл отца моего: 11 отец мой наложи вам тяжкое иго, аз же (тягости) приложу на иго ваше: отец мой бил вас бичми, аз же буду бити вас скорпионами. 12 И прииде Иеровоам и вси людие к Ровоаму в день третий, якоже повеле им царь, глаголя: возвратитесь ко мне в день третий. 13 И отвеща царь жестоко, и остави царь Ровоам совет старейшин, и рече к ним по совету юнош, глаголя: 14 отец мой отяготи иго ваше, аз же приложу к нему: отец мой бил вас бичми, аз же бити буду вы скорпионами. 15 И не послуша царь людий, яко бе превращение от Бога, глаголя: возстави Господь слово Свое, еже глагола рукою Ахии Силониты о Иеровоаме сыне Наватове 16 и о всем Израили, зане не послуша царь их. И отвещаша людие ко царю, глаголюще: кая нам часть в Давиде и наследие в сыне Иессееве? Возвратися в жилища твоя, Израилю,

ныне смотри дому твоего, Давиде. И иде весь Израиль в жилища своя. 17 Мужие же Израилевы, иже обитаху во градех Иудиных, воцариша над собою Ровоама. 18 И посла царь Ровоам к ним Адонирама бывша над даньми, и каменiem побиша его сынове Израилевы, и умре. И услыша царь Ровоам, и потщася взыти на колесницу, и побеже во Иерусалим. 19 И отвержеся Израиль от дому Давидова даже до дне сего.

**11** Прииде же Ровоам во Иерусалим, и созва (весь) дом Иудин и Вениамина, сто осмьдесят тысяч избранных юношей творящих брань, и воеваше противу Израиля и Иеровоама, да обратит к себе царство. 2 И бысть слово Господне к Самею человеку Божию, глаголя: 3 глаголи к Ровоаму сыну Соломону, царю Иудину, и ко всему Израилю, иже есть во Иуде и Вениамине: 4 сия рече Господь: не восходите, ниже ополчайтесь противу братии вашей: возвратитесь кийждо в дом свой, зане от Мене бысть глаголгол сей. И послушаша слова Господня, и возвратишася, и не поидоша противу Иеровоама. 5 Обита же Ровоам во Иерусалиме и созда грады стенаты во Иудеи: 6 сострои же Вифлеем и Етам, и Фекуе 7 и Вефсур, и Сокхоф и Одоллам, 8 и Геф и Марисан, и Зиф 9 и Адурем, и Лахис и Азику, 10 и Салаю и Елон и Хеврон, иже есть Иудин и Вениамина, грады крепкия: 11 и укрепи их стенами, и постави в них начальники, житохранилища, и елей и вино, 12 во всяцем граде щиты и копия, и укрепи их во множестве зело, и быста под ним Иуда и Вениамина. 13 Священницы же и левиты, иже бяху во всем Израили, собрашася к нему от всех предел: 14 яко оставиша левити селения одержания своего и поидоша ко Иуде во Иерусалим,

понеже изгна их Иеровоам и сынове его, еже не служити Господеви: **15** и постави себе жерцы на высоких, и идолом, и суетным, и телцем, ихже сотвори Иеровоам. **16** И изгна их от всех колен Израилевых, иже вдаша сердце свое, да взыщут Господа Бога Израилева: и приидоша во Иерусалим пожрети Господу Богу отец своих: **17** и укрепиша царство Иудино. И укрепися Ровоам сын Соломонь в три лета, хождаше бо по путем Давида и Соломона отца своего лета три. **18** И взя себе Ровоам жену Моолафу, дщерь Иеримофа сына Давидова, и Авигею дщерь Елиава сына Иессеова. **19** И роди ему сыны: Иеуса и Самориа и Заама. **20** По сих же поя себе Мааху дщерь Авессаломлю, и роди ему Авию и Иеффиа, и Зизу и Салимофа. **21** И возлюбил Ровоам Мааху дщерь Авессаломлю паче всех жен своих и подложниц своих, яко жен осьмнадцать име и подложниц шестьдесят: и роди двадесять осм сынов и шестьдесят дщерей. **22** И постави в начальника Ровоам Авию сына Маахина и князем над всею братиею его, того бо и царем сотворити помышляше. **23** И возрасте паче всех братий своих во всех пределех Иудиных и Вениаминих и во градах крепких, и даде им пищи множество много, и многих взыска жен.

**12** И бысть егда устроиша царство Ровоамово, и укрепися, остави заповеди Господни, и весь Израиль с ним. **2** И бысть в лето пятое царства Ровоамля взыде Сукаким царь Египетский на Иерусалим, зане согрешиша пред Господем, **3** с тысящию и двема сты колесниц и шестьдесят тысящ конник, и не бе числа народу пришедшему с ним от Египта, Ливиане, Троглодитяне и Ефиопляне: **4** и взяша грады крепкия, иже бяху во Иуде, и приидоша даже до Иерусалима.

5 Самеа же пророк вниде к Ровоаму и к начальником Иудиным, иже собрани бяху во Иерусалим от лица Сусакимова, и рече к ним: сия рече Господь: вы остависте Мя, и Аз оставлю вас в руку Сусакима. 6 И посрамишася начальницы Израилевы и царь и рекоша: праведен Господь. 7 Егда же виде Господь, яко смиришася, и бысть слово Господне к Самею, глаголя: смиришася, не разорю их, и дам им вмале спасение, и не уканет ярость Моя на Иерусалим, 8 обаче будут в рабы, да познают работу Мою и работу царства земли. 9 И възде Сусаким царь Египетский во Иерусалим, и взя сокровища, яже в дому Господни, и сокровища, яже в дому царева, вся взя: и взя щиты златыя, ихже сотвори Соломон. 10 И сотвори царь Ровоам щиты медяны вместо их. И постави на нем Сусаким царь Египетский начальников предходящих стрегущих врата царева: 11 и бысть внегда входити царю в дом Господень, вхождаху стрегущии и предходящии, и обращающиеся восхождаху предходящии ко оружехранителнице своей. 12 И егда смирися той, отвратися от него ярость Господня, а не в разорение в конец: ибо и во Иуде бяху словеса блага. 13 И укрепися царь Ровоам во Иерусалиме и царствова: четыредесяти же и единого лета бысть Ровоам, егда царствовати нача, и седьнадесять лет царствова во Иерусалиме, во граде, егоже избра Господь, да именуется имя Его ту от всех колен Израилевых. Имя же матери его Ноома Амманитыня. 14 И сотвори лукавое, яко не исправи сердца своего, да възыщет Господа. 15 Словеса же Ровоамова первая и последняя не се ли, суть писана в словесех Самеа пророка и Адда провидящаго, и деяния его? И воеваше Ровоам и Иеровоам во вся дни. 16 И умре Ровоам

и погребен бысть со отцы своими во граде Давидове. И воцарися Авиа сын его вместо его.

**13** В лето осмоенадесять царства Иеровоамля воцарися Авиа над Иудею: 2 три лета царствова во Иерусалиме. Имя же матери его Мааха дщерь Уриилева от Гаваона. И брань между Иеровоамом и между Авиєю. 3 И ополчися Авиа в силе воинския силы, в четырех стах тысящах мужей сильных: Иеровоам же устрои сопротиву его брань во осми стах тысящах мужей военных крепких силою. 4 Ста же Авиа на горе Сомори, яже есть на горе Ефремли, и рече: слышите Иеровоам и весь Израиль: 5 или не весте, яко Господь Бог Израилев даде царство Давиду над Израилем во веки и сыновом его в завет вечен? 6 И воста Иеровоам сын Наватов, раб Соломона сына Давидова, и отвержеса от господина своего: 7 и собращася к нему мужие пагубнии, сынове законопреступнии, и воста противу Ровоама сына Соломонова, Ровоам же бе юнейший и сердцем страшлив, и не возможе противостати лицу его: 8 и ныне вы глаголете противостати лицу царства Господня в руке сынов Давидовых: и вы мнози зело, и с вами телцы златии, ихже сотвори вам Иеровоам в боги: 9 не извергосте ли священников Господних сынов Аароних и левитов, и сотвористе себе жерцы от людий всея земли, приходяй наполнити руку свою телцем от волов и овнами седмию, и сотворися жерцем не сущему богу: 10 мы же Господа Бога нашего не оставихом, и священницы Его служат Господу, сынове Аарони и левити, 11 и по чредам своим жрут Господу всесожжения утро и пред вечером, и фимиам сложения, и предложения хлебов на трапезе чистей, и светилник златый,

и свещники возжжения возжизати к вечеру: мы бо храним стражбы Господа Бога отец наших, вы же Его остависте: 12 и се, с нами в начале Господь, и священницы Его, и трубы знаменования, еже знаменати противу вам: сынове Израилевы, не ратуйте противу Господа Бога отец ваших, понеже не благопоспешится вам. 13 Иеровоам же обрати подсаду приити ему созади, и бысть противу Иуды (сам), подсада же созади. 14 И обратися Иуда, и се, ему брань сопреди и созади, и возопиша ко Господу, и священницы вострубиша трубами: 15 и возопиша мужие Иудины. И бысть вопиющим мужем Иудиным, и Господь порази Иеровоама и Израиля пред Авию и Иудою: 16 и бежаша сынове Израилевы от лица Иуды, и предаде их Господь Бог в руки их: 17 и порази их Авиа и людие его язвою великою, и падоша ранени от Израиля пять сот тысяч мужей крепких. 18 И смиришася сынове Израилевы в день той, и укрепилася сынове Иудины, яко уповаша на Господа Бога отец своих. 19 Погна же Авиа вслед Иеровоама и взя от него грады: Вефиль и села его, и Иесину и села ея, и Ефрон и села его. 20 И не возможе ктому противитися Иеровоам во вся дни Авию, и порази его Господь: и умре. 21 Авиа же укрепися, и поят себе жен четырнадцать, и роди двадцать два сына и шестнадцать дочерей. 22 Прочая же словеса Авиева и деяния его и словеса его писана в книзе Адды пророка.

**14** И успе Авиа со отцы своими, и погребоша его во граде Давидове. И воцарися Аса сын его вместо его во дни же Асы почи земля Иудина лет десять. 2 И сотвори Аса благое и правое пред Господем Богом своим: 3 и отверже олтари чуждых и высокая, и сокруши идолы и посече дубравы: 4

и повеле Иуде, да взыщет Господа Бога отец своих и да сотворит закон Его и заповеди: 5 и изверже из всех градов Иудиных олтари и идолы, и царствова в мире. 6 И созда грады крепки в земли Иудине, зане в покои бысть земля, и не бе ему брани в лета сия, мир во Господь даде ему. 7 Рече же Иуде: созиждем грады сия, и сотворим стены и столпы, и врата и верей, дондеже землю господствуем: зане якоже взыскахом Господа Бога нашего, взыска и нас, и воздаде нам мир окрест, и благопоспешествова нам. 8 И бысть сила Асе оруженосцев носящих щиты и копия в земли Иудине триста тысящ, в земли же Вениамини щитников и стрелцев двести осьмьдесят тысящ: вси сии воины сильнии. 9 Изыде же противу их Зарай Ефиоплянин с силою в тысящы тысящей, и колесниц триста, и прииде даже до Мариса. 10 И изыде Аса противу ему и устрои брань в дебри на север Мариса. 11 И возопи Аса ко Господу Богу своему и рече: Господи, не изнеможет у Тебе спасати во многих и в малых, укрепи нас, Господи Боже наш, яко на Тя уповахом и о имени Твоем изыдохом на множество многое сие: Господи Боже наш, Ты еси Бог, да не превозможет противу Тебе человек. 12 И порази Господь Ефиопы пред Асою и Иудою и бежаша Ефиопи: 13 и погна их Аса и людие его даже до Гедора: и падоша Ефиопи, даже не быти в них останку, яко сотрени быша пред Господем и пред силою Его, и плениша корысти многи: 14 и изсекоша веси их окрест Гедора, велик бо страх Господень объят их, и плениша вся грады их, зане многи корысти быша в них: 15 и кущы скотския и амазонов изсекоша, и взяша скота множество и велблюды, и возвратишася во Иерусалим.

**15** Азариа же сын Ададов, бысть на нем Дух Божий: **2** и изыде во сретение Асе и всему Иуде и Вениамину и рече ему: услышите мя, Аса и весь Иуда и Вениамин: Господь с вами, яко бысте с Ним: и аще взыщете Его, обрящется вам, аще же оставите Его, оставит вас: **3** мнози дние (будут) во Израили без Бога истиннаго и без священника учащаго и без закона: **4** егда же обратятся в печали ко Господу Богу Израилеву и взыщут Его, и обрящется им: **5** и во время оно не будет мир исходящему и входящему, яко ужас Господень на всех обитающих на земли **6** и ополчится язык на язык и град противу града, яко Господь смутит их во всяцей печали: **7** и вы укрепитесь, и да не ослабеют руки ваша, есть бо мзда делу вашему. **8** И егда услыша Аса словеса сия и пророчество Азарии пророка, укрепися и отя вся идолы от всея земли Иудины и Вениамини и от градов, ихже содержаше Иеровоам в горе Ефремли, и освяти олтарь Господень, иже бе пред храмом Господним: **9** собра же (всего) Иуду и Вениамина и пришелцев обитающих с ним от Ефрема и от Манассии и от Симеона, мнози бо к нему прибегоша от Израиля, егда увидеша, яко Господь Бог его с ним. **10** И собращася во Иерусалим в месяц третий, в лето пятоенадесять царства Асы, **11** и пожроша Господу в день той от корыстей, ихже приведоша, волов семь сот и овец семь тысящ, **12** и поидоша в завете, еже искати Господа Бога отец своих всем сердцем и всею душею своею: **13** и (рече): всяк, иже аще не взыщет Господа Бога Израилева, да умрет от юнаго даже до старейшаго, от мужа даже до жены. **14** И кляшася Господу гласом великим в восклицании и в трубах и в рожаных. **15** И возрадовася весь Иуда о клятве,



яко от всея души кляшася, и всею волею взыскаша Его, и обретеса им, и даде им Господь покой окрест. **16** И Мааху мать свою отлучи, да не служит Астарту, и сокруши идола и сожже в потоце Кедрстем. **17** Токмо высоких не остави, еще бо бяху во Израили, но сердце Асы бе совершенно во всех днех его: **18** и внесе святая Давида отца своего и святая своя в дом Божий, серебро и золото и сосуды. **19** И брань не бысть ему даже до тридесять пятаго лета царства Асина.

**16** И в лето тридесять осмое царства Асина, възде Вааса царь Израилев на Иуду и стенами укрепи Раму, да не даст входа и исхода Асе царю Иудину. **2** И взя Аса серебро и золото от сокровищ дому Господня и дому царева, и посла ко (Венададу) сыну Адера царя Сирска, живущему в Дамасце, глаголя: **3** положи завет между мною и тобою и между отцем моим и отцем твоим: се послах тебе серебро и золото: прииди и отжени от мене Ваасу царя Израилева, и да отидет от мене. **4** И послуша сын Адеров царя Асы и посла начальники воев своих на грады Израилевы, и порази Аинона и Дана, и Авелмаина и вся окрестная Неффалимля. **5** И бысть егда услыша Вааса царь Израилев, остави ктому созидати Раму и остави дело свое. **6** Аса же царь взя всего Иуду и взя камень от Рамы и лес ея, яже на создание уготова Вааса, и созда из них Гаваю и Масфу. **7** И во время оно прииде Ананий пророк ко Асе царю Иудину и рече ему: понеже имел еси упование на царя Сирска, а не уповал еси на Господа Бога твоего, того ради спасесе сила царя Сирскаго от руку твою: **8** не Ефиопи ли и Ливиане бяху на тя в силе мнозе, в дерзости колесниц и конник во множество зело? И егда уповал еси на Господа, предаде их в руку твою: **9** очи бо

Господни назирают всю землю, еже укрепити сущих сердцем совершенным к Нему: буе сотворил еси сие, (сего ради) отныне будет на тя брань. **10** Разгневался же Аса на пророка и всади его в темницу, понеже прогневался о сем: и уби Аса от людей во время то (многих). **11** И се, словеса Асы, первая и последняя, писана суть в книзе царей Иудиных и Израиля. **12** И разболеся Аса в лето тридесять девятое царства своего ногама, болезнию зелнейшею: и ниже в немощи своей взыска Господа, но врачей. **13** Успе же Аса со отцы своими, и умре в лето четыредесять первое царства своего: **14** и погребоша его во гробе, егоже ископа себе во граде Давидове, и положиша его на одре, и наполниша ароматами и родами миров благоуханных, и сотвориша ему погребение велико зело.

**17** И воцарися Иосафат сын его вместо его, и укрепися Иосафат над Израилем: **2** расположи же силу во всех градех Иудиных крепких и постави воеводы во градех Иудиных и во градех Ефремовых ихже побра прежде Аса отец его. **3** И бысть Господь со Иосафатом, яко хождаше в путех Давида отца своего первых и не взыска идолов, **4** но Господа Бога отца своего взыска и поиде в повелениих отца своего, а не по делом Израилевым: **5** и укрепил Господь царство в руку его, и даша вся Иудея дары Иосафату, и бысть ему богатство и слава многа. **6** И вознесся сердце его в пути Господни, и ктому изья высокая и дубравы от земли Иудины. **7** В третье же лето царства своего посла начальники своя и сынов сильных Авдию и Захарию, и Нафанаила и Михеа, да учат во градех Иудиных: **8** и с ними левити Самеа и Нафаниа, и Завдиа и Асиил, и Семирамоф и Ионафан, и Адониа

и Товиа и Товадониа левити, и с ними Елисама и Иорам жерцы: 9 учаху же во Иудеи, имеюще книгу закона Господня, и прохождаху грады Иудины и учаху люди. 10 И бысть страх Господень на всех царствах земных окрест Иуды, и не воеваша противу Иосафата. 11 И от иноплеменник Иосафату дары приношаху сребро и дани: Арави же привождяху ему овнов овчих семь тысяч и семь сот, и козлов семь тысяч семь сот. 12 И бе Иосафат предуспевая велик в высоту и созда во Иудеи дома и грады крепки. 13 И многа дела быша ему во Иудеи: и мужие ратницы крепцы сильнии во Иерусалиме. 14 И сие число их по домом отечеств их: и во Иуде тысященачальницы Еднас вождь и с ним сынове сильнии силы триста тысяч: 15 и по нем Иоанан начальник и с ним двести осмьдесят тысяч: 16 по немже Амасиа, сын Захариин, усердсвуйяй Господу и с ним двести тысяч мужей сильных. 17 И от Вениаминя сильнии силы Елиад, и с ним держащих лук и щиты двести тысяч сильных: 18 и по нем Иозавад, и с ним сто осмьдесят тысяч, сильнии ко брани. 19 Сии служащие царю, кроме оных, ихже постави царь по градом крепким во всей Иудеи.

**18** И бысть Иосафату богатство и слава многа, и поят жену в дому Ахаавли. 2 И сниде при концы лет ко Ахааву в Самарию: и закла ему Ахаав овны и волы многи, и людем сущым с ним, и увещаваше его, да снидет с ним в Рамоф Галаадский. 3 И рече Ахаав царь Израилев ко Иосафату царю Иудину: пойдеш ли со мною в Рамоф Галаадский? И рече ему: якоже аз, тако и ты: и якоже людие твои, тако и людие мои с тобою на брань. 4 И рече Иосафат царю Израилеву: вопроси убо днесь Господа. 5 И собра царь

Израилев пророков четыреста мужей и рече к ним: пойду ли в Рамоф Галаадский на брань, или удержуся? И реша: възиди, и предаст Бог в руку цареви. 6 Рече же Иосафат: несть ли зде пророка Господня еще, да от него воспросим? 7 И рече царь Израилев ко Иосафату: есть еще муж един, имже воспросити Господа, но аз ненавижду его, понеже не прорицает мне во благая, зане вси дние его во злая: сей Михеа сын Иемвлин. Рече же Иосафат: не глаголи, царю тако. 8 И призва царь Израилев единого от евнух и рече ему: (призови) скоро Михею сына Иемвлина. 9 Царь же Израилев и Иосафат царь Иудин кийждо седяше на престоле своем, и облечена красотою царскою, седяста же на пространстве близ врат Самарийских, и вси пророцы пророчествоваху пред нима. 10 И сотвори себе Седекиа сын Ханаань роги железны и рече: сия глаголет Господь: сими избодеши Сирию, дондеже скончается. 11 И вси пророцы прорицаху тако, глаголюще: възиди в Рамоф Галаадский и предспееши, и предаст Господь в руку цареви. 12 Вестник же, шедый призвати Михею, рече ему: се, рекоша пророцы единеми усты благая о цари да будут убо и твоя словеса, якоже единого от них, и да речеши благая. 13 И отвеща Михеа: жив Господь, яко еже аще речет Бог ко мне, сие възглаголю. 14 И прииде ко царю, и рече ему царь: Михее, имам ли ити Рамоф Галаадский на брань, или удержуся? И отвеща: възиди и предспееши, и предадутся (врази) в руки ваша. 15 И рече ему царь: колико крат заклинаю тя, да не глаголеши мне, токмо истину во имя Господне. 16 И рече Михеа: видех всего Израиля расточена по горам яко овцы, имже несть пастыря: и рече Господь: не имут

сии вожда, да возвратятся кийждо в дом свой в мире. 17 И рече царь Израилев ко Иосафату: не рех ли тебе, яко не прорицает о мне благая, но токмо злая? 18 И рече Михеа: не тако: слышите слово Господне: видех Господа сидяща на престоле Своем, и вся сила небесная предстояше одесную Его и ошуюю Его: 19 и рече Господь: кто прельстит Ахаава царя Израилева, да взыдет и падет в Рамофе Галаадстем? И глаголаше един тако, и ин рече тако: 20 и изыде дух, и ста пред Господем, и рече: аз прельщу его: емуже Господь, в чем, рече, (прельстиши)? 21 И рече: изыду и буду дух лжив во устех всех пророков его: рече же (Господь): прельстиши и превозможеши, изыди и сотвори тако: 22 и ныне се, Господь даде духа лжива во уста всем пророком твоим сим, и Господь глагола о тебе злая. 23 И приступи Седекиа сын Ханаань, и удари Михею в ланиту и рече ему: коим путем пройде Дух Господень от мене, еже глаголати к тебе? 24 Рече же Михеа: се, узриши в день той, егда внидеши в ложницу из ложницы, да укроешися. 25 И рече царь Израилев: возьмите Михею, и отведите ко Еммиру начальнику града и ко Иоасу князю сыну цареву, 26 и рцыте: сия глаголет царь: вверзите сего в темницу, и да яст хлеб печали и воду печали, дондеже возвращуся в мире. 27 Рече же Михеа: аще возвращаяся возвратишися в мире, не глагола Господь мною. И рече: слышите, вси людие. 28 И възыде царь Израилев и Иосафат царь Иудин в Рамоф Галаадский. 29 Рече же царь Израилев ко Иосафату: прикрьюся и вниду во брань, ты же облещыся в ризы моя. И прикрывся царь Израилев и вниде во брань. 30 Царь же Сирский повеле вождем колесниц своих, глаголя: не устремляйтесь на мала и на велика, но токмо на самого царя

Израилева. 31 И бысть егда увидеша началницы колесниц Иосафата, глаголаша: царь Израилев есть сей. И обыдоша его воююще. Иосафат же возопи ко Господу, и Господь послуша его, и отврати их Бог от него. 32 И бысть егда увидеша воеводы колесниц, яко не бяше царь Израилев, оставиша его. 33 И муж наляче лук приметно и порази царя Израилева между легким и персями. И рече возатаю своему: обрати руку твою и изведи мя от брани яко изнемогах. 34 И скончана бысть брань в день той, и царь Израилев бе стоя на колеснице своей противу Сириом даже до вечера, и умре заходящу солнцу.

**19** И возвратися Иосафат царь Иудин в дом свой мирно во Иерусалим. 2 И изыде во сретение ему Ииуй сын Ананиин пророк и рече к нему: царю Иосафате, нечестиву ли даеши помощь, или ненавидимому от Господа дружиши? И рече ему Ииуй: сего ради бысть на тя гнев Господень: 3 но токмо дела благая обретошася в тебе, зане отял еси кумиры от земли Иудины и исправил еси сердце твое взыскати Господа. 4 И вселися Иосафат во Иерусалиме, и паки изыде к людем от Вирсавеи даже до горы Ефремли, и возврати их ко Господу Богу отец своих. 5 И постави судии во всех градех Иудиных крепких, во всяцем граде, 6 и рече судиям: видите, что вы творите, не человеческий бо вы суд творите, но Господень, и с вами словеса суда: 7 и ныне да будет страх Господень на вас, и храните и творите, яко несть у Господа Бога нашего неправды, ниже дивления лицу, ни приятия мзды. 8 Во Иерусалиме же постави Иосафат левитов и священников и отцначалников от Израиля в суд Господень, да судят живущих во Иерусалиме. 9 Повеле же им, глаголя:

тако творите во страхе Господни, во истине и сердцем совершенным: **10** всякую распрю, яже приидет к вам, братьий ваших обитающих во градех своих, между кровию крове, и между повелением и заповедию, и оправданьми и судбами, разсудите им, да не согрешают Господеви, и не приидет гнев на вас и на братию вашу: тако творите и не согрешите: **11** и се Амариа, священник вождь над вами во всяко слово Господне: и Завдиа сын Исмаиль вождь в дому Иудине во всякому слову цареву: и книжницы и левити пред вами: укрепитесь и творите, и будет Господь со благим.

**20** По сих же приидоша сынове Моавли и сынове Аммони и с ними от Амманитов ко Иосафату на брань. **2** Приидоша же и сказаша Иосафату, глаголюще: идет противу тебе велико множество от об он пол моря от Сирии, и се, стоят во Асасан-Фамаре, иже есть Енгадди. **3** И убося, и вдаде Иосафат лице свое взыскати Господа, и проповеда пост во всей Иудеи. **4** И собрася весь Иуда взыскати Господа: и от всех градов Иудиных приидоша ко умолению Господню. **5** И ста Иосафат в собрании Иуды во Иерусалиме, в дому Господни пред лицем двора новаго, **6** и рече: Господи Боже отец наших, не Ты ли еси Бог на небеси горе, и Ты владычествуеши всеми царствы язык, и в руку Твоею есть крепость силы, и кто противостанет Тебе? **7** Не Ты ли еси Бог наш искоренивый живущья на земли сей от лица людей Твоих Израиля, и дал еси ю семени Авраамлю возлюбленному Твоему во веки? **8** И вселишася на ней, и устроиша в ней святыню имени Твоему, глаголюще: **9** аще нападут на ны злая, мечь, суд, губителство, глад, станем пред домом сим и пред Тобою, яко призвано имя Твое в дому сем, и возопием к Тебе от

скорбей наших, и услышиши и спасеши: **10** и ныне се, сынове Аммони и Моавли и гора Сиир, сквозе яже не изволил еси Израилю проити, егда исхождаху от земли Египетския, но уклонишася от них и не избиша их: **11** и се, ныне сии нападают на ны исходяще изгонити нас от наследия нашего, еже предал еси нам. **12** Господи Боже наш, не судиши ли им? В нас бо несть толика крепость, да можем сему множеству сопротивитися, еже нападе на ны, и не вемы что соделати имамамы им: но токмо очи наши к Тебе. **13** И весь Иуда стояше пред Господем, и чада их, и жены их. **14** Бе же Иозиил сын Захариин, сынов Ванеа, сынов Елеила, сынов Мафания левитина, от сынов Асафовых, и бысть на нем Дух Господень посреде народа, **15** и рече: слышите, весь Иуда и обитающи во Иерусалиме, и ты, царю Иосафате: сия рече Господь вам: не бойтеся, ниже ужасайтеся от лица народа сего многого, несть бо ваше ополчение, но Божие: **16** заутра изыдите противу их: се, восходят по восходу Ассис, и обрящете их на краи реки противу пустыни Иериил: **17** не ваше есть воевати: сия разумеите и узрите сие спасение Господне с вами, Иудо и Иерусалиме: не убойтеся, ни ужасайтеся заутра изыти противу их, и Господь с вами. **18** И преклонься Иосафат на лице свое, и весь Иуда, и обитающи во Иерусалиме, падоша пред Господем поклонитися Господеви. **19** И восташа левити от сынов Каафовых и от сынов Кореовых, хвалити Господа Бога Израилева гласом великим в высоту. **20** И заутра восташа рано и изыдоша в пустыню Фекое. И внегда исходити им, ста Иосафат (посреде их), и возопи и рече: услышите мя, мужие Иудины и вси обитающи во Иерусалиме: веруйте в Господа Бога нашего и уверитеся:



веруйте пророку Его, и благопоспешится вам. 21 И советова с людьми, и постави псалмопевцы, и хвалящих исповедатися, и хвалити святая, внегда изыти пред силою, и глаголаху: исповедайтеся Господеви, яко благ, яко в век милость Его. 22 Егда же начаша хваления и исповедания, обрати Господь воевати сынов Аммоних на Моава и гору Сиир, изшедших на Иуду, и поражени быша. 23 И восташа сынове Аммони и Моавли на обитающих в горе Сири, да побьют их и сокрушат: и егда скончаша обитающих в Сиире, восташа друг на друга, да потребятся. 24 Иуда же прииде на созирание от пустыни, и воззре, и виде множество: и се, вси мертви падше на землю, и не бе спасыйся. 25 И изыде Иосафат и людие его взяти корысти их, и обретоша скота много, и одежды, и корысти, и сосуды дражайшыя и плениша их: и быша собирающе корысти их три дни, яко многи бяху. 26 Дне же четвертаго собрахуся во удолю благословения, ибо тако благословиша Господа: сего ради прозваша место то удолю благословения даже до сего дне. 27 И возвратишася вси мужие Иудины во Иерусалим и Иосафат вождь их с веселием великим: яко возвесели их Господь о вразех их. 28 И внидоша во Иерусалим со псалтирми и гусльми и трубами в дом Господень. 29 И бысть страх Господень на вся царства земная, внегда услышати им, яко порази Господь враги Израилевы. 30 И умирися царство Иосафатово, и даде ему Господь покой окрест. 31 И царствова Иосафат над Иудою, сый лет тридесяти пяти, егда царство прия и двадесять пять лет царствова во Иерусалиме. Имя же матери его Азува, дщи Салиина. 32 И хоуждаше в путех отца своего Асы, и не уклонися от них творити правое пред Господем: 33

обаче высокая еще бяху, и еще людие не управиша сердца своего ко Господу Богу отец своих. 34 Прочая же деяния Иосафатова первая и последняя, се, писана суть во словесех Ииуа сына Ананиина, иже написа книгу царей Израилевых. 35 И по сих сообщися Иосафат царь Иудин со Охозиею царем Израилевым, и сей беззаконнова, 36 занеже сотвори, и отиде к нему, да сотворят корабли, еже ити во Фарсис: и сотвори корабли в Гасион-Гавере. 37 И пророчествова Елиезер сын Додиа от Марисиса на Иосафата, глаголя: понеже возимел еси любовь со Охозиею, сокруши Господь дело твое, и сокрушишася корабли твоя и не возмогоша поити во Фарсис.

**21** И успе Иосафат со отцы своими, и погребен бысть с ними во граде Давидове. И воцарися Иорам сын его вместо его. 2 И братия его сынове Иосафатовы шесть: Азария и Иеил, и Захария и Азария, и Михаил и Сафатиа: вси сии сынове Иосафата царя Иудина. 3 И даде им отец их многи дары: серебро и золото, и оружие со грады крепкими во Иудеи, царство же даде Иораму, понеже сей бе первенец. 4 И воста Иорам на царство свое, и укрепися, и изби всю братию свою мечем и неких от началник Израилевых. 5 Тридесяти и дву лет бе Иорам, егда нача царствовати, и осмь лет царствова во Иерусалиме, 6 и хоужаше по путем царей Израилевых, якоже содела дом Ахаавль: дщи бо Ахаавля бысть жена его: и сотвори злое пред Господем. 7 И не хоте Господь искоренити дому Давидова ради завета, егоже завеща с Давидом, и якоже рече ему, дати ему светилник и сыном его во вся дни. 8 Во днех оных отступи Едом от Иуды и постави себе царя. 9 И поиде Иорам с начальники своими, и вся

конница с ним: и бысть, и воста нощю, и порази Едома, иже обыде окрест его, и начальники колесниц: и побегоша людие в селения своя. **10** И отступи от Иуды Едом даже до сего дне тогожде време и Ловна отступи из под руки его, зане остави Господа Бога отец своих: **11** ибо той сотвори высокая бо градех Иудиных, и блудити сотвори обитающих во Иерусалиме и прельсти Иуду. **12** И прииде к нему писание от Илии пророка, глаголя: сия рече Господь Бог Давида отца твоего: понеже не ходил еси по пути Иосафата отца твоего и в путех Асы царя Иудина, **13** и ходил еси в путех царей Израилевых, и блудити сотворил еси Иуду и обитающих во Иерусалиме, якоже соблуди дом Ахаавль, и братию твою, сыны отца твоего, лучшх тебе избил еси, **14** се, Господь поразит тя язвою великою с людьми твоими и с сынми твоими и с женами твоими и со всем именем твоим: **15** ты же будеши в язве лютей, в болезни чрева, дондеже изыдут внутренняя твоя с язвою от дний во дни. **16** И воздвиже Господь на Иорама иноплеменники и Аравов и сопредельныя Ефиопы: **17** и взыдоша на Иуду, и преодолеша, и плениша вся сокровища, яже обретоша в дому царева, и сынов его и дщери его и жены его, и не остана ему сын, токмо Охозиа менший сынов его. **18** И по сих всех порази его Господь чрева болезнию неизцельною. **19** И бысть от дний во дни, и егда прииде время дний два дни, и изыде чрево его с болезнию, и умре в расслаблении лютем. И не сотвориша ему людие по обычаю погребения, якоже погребение отцем его. **20** Тридесати двою лет бяше, егда царствовати нача, и осмь лет царствова во Иерусалиме: ходи же не хвальню,

и погребоша его во граде Давидове, обаче не во гробех царских.

**22** Поставиша же царем обитающии во Иерусалиме Охозию сына его меньшого вместо его: всех бо старших избиша нашедшии на них разбойницы Арави и Алимазоняне, и воцарися Охозиа сын Иорамов царь Иудин: 2 двадесяти дву лет сый Охозиа царствовати нача, и едино лето царствова во Иерусалиме. И имя матери его Гофолиа дщи Амвриина. 3 И сей ходил есть по пути дому Ахаавля, мати бо его бе советница, да грешит: 4 и сотвори лукавое пред Господем якоже дом Ахаавов, сии бо быша ему советницы по смерти отца его, в погубление ему, 5 и в советех их хождаше: и поиде со Иорамом сыном Ахаава царя Израилева на брань противу Азаила царя Сирска в Рамоф Галаадский. И поразиша стрелцы Иорама. 6 И возвратися Иорам изцелитися во Иезраель от ран, имиже раниша его Сирияне в Рамофе, внегда братися ему со Азаилем царем Сирским. Охозиа же сын Иорамль царь Иудин сниде посетити Иорама сына Ахаавля во Иезраель, разболеся бо. 7 И от Бога бысть превращение Охозии, да приидет ко Иораму: и внегда приити ему, изыде с ним Иорам противу Ииуа сына Намессиина, егоже помаза Господь на дом Ахаавль. 8 И бысть егда отмсти Ииуй дому Ахаавлю, и обрете начальники Иудины и братию Охозиину, служащих Охозии, и уби их: и уби Ииуй Иорама, и убежа Охозиа. 9 И рече Ииуй, еже взыскати Охозию: и яша его врачующася в Самарии и приведоша его ко Ииуеви, и уби его, и погребоша его: реша бо, яко сын Иосафатов есть, иже взыска Господа всем сердцем своим. И не бысть в дому Охозиине восприяти силу о царстве. 10 И

Гофолия мати Охозиина виде, яко умре сын ея, и воста и погуби все семя царское в дому Иудине. 11 И взя Иосавееф дщи царева Иоаса сына Охозиина, и украде его от среды сынов царевых, егда убиваху их, и даде его и кормилицу его в храмину постельною, и скры его Иосавееф дщерь царя Иорама, сестра Охозиина, жена Иодаа архиереа, и скры его от лица Гофолии, и не уби его. 12 И бысть с ними в дому Божии сокрыт шесть лет, и царствова Гофолия на земли.

**23** В лето же седмое укрепися Иодай, и взя сотники, Азарию сына Иорамля и Исмаила сына Иоананя, и Азарию сына Овидова и Амасию сына Адиева и Елисафана сына Захариина с собою в дом Господень. 2 И обыдоша Иудею, и собраша левиты от всех градов Иудиных и начальники отечеств Израилевых, и приидоша во Иерусалим. 3 И завеща все собрание Иудино завет в дому Божии со царем: и показа им сына царева и рече им (Иодай): се, сын царев да воцарится, якоже глагола Господь о доме Давидове: 4 и ныне слово сие, еже сотворите: третия часть от вас да изыдет в субботу, священников и левитов, и во врата входов, 5 и третия часть в дому цареве, и третия часть во вратех средних, и вси людие (да будут) во дворех дому Господня: 6 и никтоже да внидет в дом Господень, токмо священницы и левити и иже служат от левит: тии внидут, яко освящени суть, вси же людие да держат стражу Господню: 7 левити же да ходят окрест царя, кийждо имея оружие свое в руку свою, и входяй в церков да убиется, и да будут со царем, входящу ему и исходящу. 8 И сотвориша левити и весь Иуда по всему, елика повеле им Иодай жрец: и взяша кийждо мужы своя от начала субботы даже до исхода субботы: занеже

не остави Иодай жрец службы дневныя. **9** И даде Иодай священник сотником по чину поставленным мечы и щиты и броня, яже бяху царя Давида в дому Божию, **10** и постави вся люди, коегождо во оружии его, от десныя страны церкви даже до левыя страны олтаря и церкви, над царем окрест: **11** и изведе сына царева, и возложиша на него диадиму и свидения, и поставиша его царем, и помаза его Иодай жрец и сынове его и рекоша да живет царь. **12** И услыша Гофолия глас людий текущих и исповедающих и хвалящих царя, и вниде ко царю в церковь Господню, **13** и виде, и се, царь стояше на степени своем, на входе же князи и трубы, и начальницы окрест царя: и вси людие земли возрадовашася и вострубиша трубами, и поюще во органы певцы, и хваляще хвалою. И растерза Гофолия ризы своя, и возопи и рече: нападающе нападаете. **14** Изыде же Иодай архиерей, и повеле сотником и начальником силы и рече им: изрините ю вон из церкви, и изыдите вслед ея, и да убиется мечем. Рече бо священник да не умрет в дому Господни. **15** И даша ей ослабу на мало, дондеже пройде врата конник дому царева и убиша ю тамо. **16** И завеща Иодай завет между собою и всеми людьми и царем, да быша были людие Господни. **17** И внидоша вси людие земли в дом Ваалов и разориша его, и олтари его и идолы его сокрушиша, и Матфана жерца Ваалова убиша пред олтарем его. **18** И вручи Иодай жрец дела дому Господня в руку священников и левитов, и возстави дневныя чреды жерцев и левитов, яже раздели Давиде в дому Господни, и вознесе всежжения Господеви, якоже писано есть в законе Моисеове, в радости и пениих по расположению Давидову: **19** и постави придверники во

вратех дому Господня, и да не внидет нечист во всяцей вещи: 20 и взя отечеств начальники, и сильныя, и начальники людей, и вся люди земли, и возведоша царя от дому Господня, и вниде вратами внутренними в дом царев, и посадиша царя на престоле царstem. 21 И возвеселишася вси людие земстии и град упокоися, и Гофолиа убиена есть мечем.

**24** Седми лет бе Иоас, егда царствовати нача, и четыредесять лет царствова во Иерусалиме. Имя же матери его Савиа от Вирсаеви. 2 Сотвори же Иоас угодное пред Господем во вся дни Иодаа священника. 3 И поят ему Иодай жены две, и родиша сыны и дщери. 4 И бысть по сих, и възде на сердце Иоасу, да возновит дом Господень. 5 И собра священники и левиты и рече им: идите во грады Иудины, и соберите от всего Израиля сребро ко обновлению храма Господня от лета до лета, и поспешно сотворите. Левити же не потщашася. 6 И призва царь Иоас Иодаа начальника и рече ему: почто не надсматрял еси левитов, еже принести от Иуды и от Иерусалима, еже уставлено есть от Моисеа человека Божия, егда собра Израиля в скинию свидения? 7 Гофолиа бо бе нечестива, и сынове ея разориша дом Божий, яко святая дому Господня сотвориша Ваалиму. 8 И повеле царь, да сотворят ковчежец и поставят при вратех Господних извне, 9 и да проповедят во Иудеи и во Иерусалиме, приносить Господу, якоже устави Моисей раб Божий над Израилем в пустыни. 10 И даша вси начальницы и вси людие, и вношаху и влагаху в ковчежец, дондеже наполнися. 11 И бысть егда приношаху ковчежец к настоятелем царевым руками левитскими, и егда увидеша, яко умножися сребро, и приходяше писарь царев и настоятель великаго жерца, и

выбираху из ковчежца, и (паки) поставляху на место его: тако творяху от дне до дне, и собраша сребра много. 12 И вдаде е царь и Иодай жрец творящим дела на дело дому Господня: и наимаху каменосечцы и древодели, да устроят дом Господень, и ковачы железу и меди, да укрепят дом Господень. 13 И творяху творящим дела, и взыде долгота дел руками их, и возставиша дом Господень в состояние (прежнее) его, и укрепиша. 14 Егда же совершиша, принесоша ко царю и ко Иодаю останок сребра, из негоже сотвориша сосуды в дом Господень, сосуды в служение всесожжений, и кадилницы златыя и серебряныя, и приношаху всесожжения в дому Господни непрестанно, во вся дни Иодаевы. 15 И состаресе Иодай исполнен дний, и умре сый ста тридесяти лет внегода скончатися ему: 16 и погребоша его во граде Давидове со царми, понеже сотвори благое со Израилем и с Богом и с домом Его. 17 И бысть по скончании Иодаеве, внидоша начальницы Иудины и поклонишася царю: тогда послуша их царь. 18 И оставиша церковь Господа Бога отец своих и служаху Астарте и истуканным: и бысть гнев (Господень) на Иуду и Иерусалим в день той. 19 И посла к ним пророки, да обратятся ко Господу, и не послушаша: и засвидетелствова им, и не покоришася. 20 И Дух Божий облече Азарию священника сына Иодаева, и ста пред людьми и рече им: сия глаголет Господь: почто преступаете повеления Господня? Не поспешится вам, яко остависте Господа, и оставит вас. 21 И нападоша на него и побиша и камением по повелению Иоаса царя, во дворе дому Господня. 22 И не воспомяну Иоас царь милосердия, еже сотвори Иодай отец его с ним, но уби сына его: иже,



егда умираше, рече: да видит и судит Господь. 23 И бысть по скончании лета, воста на него сила Сирская, и прииде на Иуду и на Иерусалим, и убиша вся начальники в людех в церкви, и весь плен их послаша ко царю в Дамаск: 24 зане в малых мужех прииде сила Сирская, и Бог предаде в руце их силу многу зело, зане оставиша Господа Бога отец своих: и на Иоаса сотвори суд. 25 И по отшествии их от него, оставлену ему сущу в болезнех великих, и нападоша на него раби его за кровь священника сына Иодаева, и убиша его на постели его, и умре: и погребоша его во граде Давидове, но не погребоша его во гробех царских. 26 Нападшии же на него, Завед сын Семаафов Амманитянин и Иозавед сын Самарифов Моавитянин, 27 и сынове его вси, и приступиша к нему пять. И прочая словес его, се, написана в летописце царstem. И воцарися Амасиа сын его вместо его.

**25** Двадесяти пяти лет бысть Амасиа, егда царствовати нача, и двадесять девять лет царствова во Иерусалиме. Имя же матери его Иоадаень от Иерусалима. 2 И сотвори правое пред Господем, обаче не сердцем совершенным. 3 И бысть егда утвердися царство в руце его, и умертви рабы своя иже убиша царя отца его. 4 Сынов же их не избии по заповедем закона Господня, якоже писано есть в книзе закона Моисеова, якоже повеле Господь, глаголя: не умрут отцы за сыны, и сынове не умрут за отцы, но кийждо во гресе своем умрет. 5 И собра Амасиа дом Иудин, и постави их по домом отечеств их в тысящники и сотники, во всей Иудеи и Вениамине: и сочте их от двадесяти лет и вышше, и обрете их триста тысящ сильных исходити на брань, держащих копия и щиты. 6 Еще же ная от Израиля

сто тысящ храбрых в силе, за сто талант сребра. 7 И прииде человек Божий к нему, глаголя: о, царю да не изыдет с тобою сила Израилева, несть бо Господь со Израилем, со всеми сыны Ефремли: 8 яко аще мниши укрепитися с ними, в бегство обратит тя Господь пред враги, зане от Господа есть укрепитися и в бегство обратитися. 9 Рече же Амасиа к человеку Божию: и что сотворю о сте талантах, яже дах силе Израилеве? И рече человек Божий: имать Господь дати тебе множае сих. 10 И отлучи Амасиа силу пришедшую к нему от Ефрема, отити на место свое. И разгневашася зело на Иуду, и возвратишася во страну свою во гневе ярости. 11 И Амасиа укрепися, и взя люди своя и иде во удоль Сланую, и порази тамо сынов Сиир десять тысящ. 12 И десять тысящ живых яша сынове Иудины, и приведоша их на верх некоторыя стремнины, и свергоша их стремглав с высоты стремнины, и вси разседошася. 13 Сынове же силы, ихже отсла Амасиа, да не идут с ним на брань, нападаша на грады Иудины от Самарии даже до Вефорона: и убиша от них три тысящы, и плениша плен мног. 14 И бысть егда возвратися Амасиа поразив Идумею, и принесе себе богов сынов Сиир, и постави в боги себе, и поклоняшеся им и сам кадыше им. 15 И бысть гнев Господень на Амасию, и посла к нему пророка, и рече ему: почто взыскал еси богов людских, иже не избавиша людей своих от руку твою? 16 И бысть егда той глаголаше к нему, и отвеща ему: еда советника царева поставих тя? Внемли, да не биен будеши. И умолча пророк и рече: вем, яко восхоте Господь потребити тя, занеже сотворил еси сие зло) и не послушал еси совета моего. 17 И совещаша Амасиа царь Иудин, и посла ко Иоасу

сыну Иоахаза сына Ииуева, ко царю Израилеву, глаголя: прииди, да увидимся между собою в лице. 18 И посла Иоас царь Израилев ко Амасии царю Иудину, глаголя: терн, иже в Ливане, посла ко кедру ливанску, глаголя: даждь дочь твою сыну моему в жену, и се, приидут зверие, иже в дубраве Ливанстей: и приидоша зверие и потопташа терн: 19 рекл еси: се, поразих Идумею, и воздвизается сердце твое в гордыню: ныне седи в дому твоём, и почто совещаваеши себе лукавое? Падеш ты и Иуда с тобою. 20 И не послуша Амасиа, зане от Господа бысть, да предастся в руки Иоасу, яко взыска богов Идумейских. 21 И взыде Иоас царь Израилев, и явистася друг другу, той и Амасиа царь Иудин, в Вефсамисе, иже есть Иудин. 22 И паде Иуда пред лицом Израилевым, и бежа кийждо в жилище свое. 23 И Амасию царя Иудина сына Иоасова, сына Охозиина, ят Иоас царь Израилев в Вефсамисе, и введе его во Иерусалим, и разори стены Иерусалимля от врат Ефремлях даже до врат угла на четырёхста лакот: 24 и все злато и серебро, и вся сосуды обретшыяся в дому Господни и у Авведома, и сокровища дому царева, и сынов залога, и возврати в Самарию. 25 И поживе Амасиа сын Иоасов, царь Иудин, по умертвии Иоаса сына Иоахазова царя Израилева пятнадцать лет. 26 Прочая же словеса Амасиина первая и последняя, не се ли, писана суть в книзе царей Иудиных и Израилевых? 27 И во время егда Амасиа отступи от Господа, и нападоша на него нападением, и побеже из Иерусалима в Лахис. И послаша вслед его в Лахис, и убиша его ту. 28 И взяша его на конех и погребоша его со отцы его во граде Давидове.

**26** И взяша вси людие Иудины (сына его) Озию, он же бе лет шестинадесяти, и поставиша его царем вместо Амасии отца его. **2** Той созда Елаф, той возврати его Иуде по успении царя со отцы его. **3** Шестинадесяти лет бысть Озия, егда царствовати нача, и пятьдесят два лета царствова во Иерусалиме. Имя же матери его Иехелиа от Иерусалима. **4** И сотвори правое пред Господем по всем, елика сотвори Амасиа отец его, **5** и бе взыская Господа во дни Захарии разумеющаго во страсе Господни, и во дни его взыска Господа, и благопоспеша ему Господь. **6** И изыде, и ополчился противу иноплеменников, и разори стены Гефски и стены Иавнира и стены Азота и созда грады Азотски и во иноплеменницех. **7** И укрепи его Господь противу иноплеменников и противу Аравов, иже обитаху в камениих, и противу Минеев. **8** И даша Минее дары Озии, и прослы имя его даже до входа Египетскаго, понеже укрепися до высоты. **9** Созда же Озия столпы во Иерусалиме и над враты угла и над враты юдольными и над углами, и укрепи их: **10** и устрои столпы в пустыни, и ископа кладязи многи, понеже имяше многи скоты на поли и в пустыни, и делатели виноградов на горах и на Кармиле, бе бо муж любоземледелен. **11** Бысть же Озии сила творящая брань, и исходящая к ополчению на брань, и входящая на ополчение в число: и бе число их под рукою Иеиля писаря и Маасии судии и под рукою Анании наместника царска. **12** Все число отечеств начальников сильных на брань две тысяцы шесть сот, **13** и с ними силы военныя триста семь тысящ и пять сот: сии творяху брань в силе крепце, помогающе царю противу супостат. **14** Уготова же им Озия всей силе щиты и копия, и шлемы и броня,

луки же и пращы на метание камня. 15 И сотвори во Иерусалиме хитрости ухищренныя вымыслом, еже быти им на столпех и на углех, да мещут стрелы и камни велия: и слышано бысть устроение его до далеча, понеже удивлен бысть ища помощи (от Господа), дондеже укрепися. 16 И егда укрепися, вознесся сердце его на пагубу (свою): и обиде Господа Бога своего, и вниде в церковь Господню покадити над олтарем фимиамов. 17 И вниде по нем Азария священник и с ним священницы Господни осмьдесят, сынове сильнии. 18 И сташа противно Озии царю и рекоша ему: несть твое, Озие, да кадиши фимиамом Господеви, но токмо священником сыном Аароним освященным кадити: изыди из святилища, яко отступил еси от Господа: и не вменится тебе сие во славу от Господа Бога. 19 И прогневался Озия, и в руку его кадилница еже кадити во храме: и внегда разярися он на жерцы Господни, и проказа възде на чело егоже пред священники в дому Господни, на олтари фимиамнем. 20 И обратися к нему Азария архиерей и священницы, и се, той прокажен на челе своем, и изгнаша его оттуду, ибо и сам тщашеся изыти, яко обличи его Господь. 21 Бысть же Озия царь прокажен даже до дне смерти своя и седяше в дому отлучене прокажен, понеже отторжен бысть от дому Господню: Иоафам же сын его бе над царством его судя людем земли. 22 Прочая же словеса Озии первая и последняя написана у Исаии сына Амосова пророка. 23 И успе Озия со отцы своими, и погребоша его со отцы его в поли царских гробов, зане реша, яко прокажен бысть. И воцарися Иоафам сын его вместо его.

**27** Сын двадцати и пяти лет бяхе Иоафам, егда царствовати нача, и шестнадцать лет царствова во Иерусалиме. Имя же матери его Иеруса, дщи Садокова. **2** И сотвори правое пред Господем по всем, яже сотвори Озия отец его, обаче не вниде в церковь Господню, и еще людие согрешаху. **3** Той созда врата дому Господня высокая, и на стене Офли созда многа: **4** и грады созда на горах Иудиных, и в дубравех дворы и столпы. **5** И той ополчися противу царя сынов Аммоних и одоле его: и даяху ему сынове Аммони на всякое лето по сту талант сребра и десять тысящ кор (мер) пшеницы и десять тысящ ячменя: сия ему приношаше царь сынов Аммоних на лето, в первое лето и второе и третье. **6** И укрепися Иоафам, яко уготова пути своя пред Господем Богом своим. **7** Прочая же словеса Иоафамля, и брань, и деяния его, се, писана в книзе царей Иудиных и Израилевых. **8** Сын двадцати и пяти лет бяхе, егда царствовати нача, и шестнадцать лет царствова во Иерусалиме. **9** Успе же Иоафам со отцы своими и погребен бысть во граде Давидове. И воцарися Ахаз сын его вместо его.

**28** Сын двадцати и пяти лет бе Ахаз, егда царствовати нача, и шестнадцать лет царствова во Иерусалиме: и не сотвори правое пред Господем, якоже Давид отец его. **2** И поиде по путем царей Израилевых: ибо и изваянная сотвори, **3** и идолом их пожре в земли Веенномли и проведе сынов своих сквозе огонь по мерзостем языков, ихже потреби Господь от лица сынов Израилевых: **4** и кадяше на высоких и на холмех и под всяким древом дубравным. **5** И предаде его Господь Бог его в руке царя Сирска и порази его, и плени от них плен мног, и приведе в Дамаск, и в руки царя Израилева

предаде его, и порази его язвою великою. 6 И уби Факей сын Ромелиев царь Израилев от Иуды во един день сто двадесять тысяч мужей крепких силою, егда оставиша Господа Бога отец своих. 7 И уби Зехрий муж силен от Ефрема Маасию сына царева и Езрикама начальника дому его и Елкана наместника царева. 8 Плениша же сынове Израилевы от братии своих триста тысяч жен, сынов и дочерей: и плен мног плениша от них, и принесоша корысти в Самарию. 9 И бе тамо пророк Господень, именем Овид, иже изыде во сретение воем грядущым в Самарию и рече им: се, гнев Господа Бога отец ваших противу Иуды, и предаде их в руки ваша, и убисте их во гневе, и даже до небесе достиже (ваше немилосердие): 10 и ныне сынов Иудиных и Иерусалимских вы глаголете покорити в рабы и рабыни: не се ли, аз есмь с вами, свидетелствовати Господу Богу вашему? 11 И ныне послушайте мене и возвратите плен, егоже пленисте от братий ваших, яко гнев ярости Господни на вас. 12 И восташа начальницы от сынов Ефремских, Азария сын Иоанан и Варахия сын Васаллимофов, и Езекия сын Селлумов и Амасия сын Елдаев на грядущих от брани, 13 и рекоша им: не введите плена сего к нам, зане согрешим Господу, вы хотите приложить ко грехом нашим и к безумию нашему, велик бо грех наш, и гнев ярости Господни на Израили. 14 И оставиша воины плен и корысти пред начальники и пред всем множеством. 15 И восташа мужие реченнии по имени и взяша плененых, и всех нагих облекоша от корыстей, и одеяша их и обуша их, и даша ясти и пити им и помазатися, и всадиша на подъяремника всякаго немощнаго, и отвезоша их во Иерихон град финический ко братии их, и возвратишася в

Самарию. 16 Во время оно посла царь Ахаз ко царю Ассурску, прося помощи себе и в том, 17 понеже Идумеане нападоша и поразиша Иуду и плениша плен: 18 и иноплеменницы нападоша на грады напольныя и от полуденныя Иудеи и взяша Вефсамис, и яже в дому Господни, и яже в дому царstem, и князей, и даша царю Аилон и Гадироф, и Сохоф и веси его, и Гамзон и веси его, и Фамну и веси ея, и вселишася тамо. 19 Яко смири Господь Иудею ради Ахаза царя Иудина, понеже отступи отступлением от Господа. 20 И прииде на него Фелгафелласар царь Ассурский, и озлоби его, и пресели, иже бяху в Дамасце, в Мидию, из Сирии же пресели в Дамаск пребывати. 21 И взя Ахаз суцая в дому Господни и яже в дому царstem и у начальников, и даде царю Ассурску: и не бысть на помощь ему, но токмо к печали его. 22 И приложи отступити от Господа и рече царь Ахаз: 23 взышу богов Дамасковых биющих мя. И рече: бози царя Сирска, тии укрепляют их, сим убо пожру, и будут ми в помощь. Тии же быша к падению его и всего Израиля. 24 И остави Ахаз сосуды дому Господня и сокруши их, и заключи врата дому Божия, и сотвори себе требища во всех углех Иерусалима, 25 и во всех градех Иудиных сотвори высокая, еже кадити богом чуждим, и разгнева Господа Бога отец своих. 26 Прочая же словеса его и деяния его первая и последняя, се, писана суть в книзе царей Иудиных и Израилевых. 27 И успе Ахаз со отцы своими, и погребоша его во граде Давидове, ибо не внесоша его во гробы царей Израилевых. И воцарися Езекиа сын его вместо его.

**29** И Езекиа нача царствовати сый двадесяти и пяти лет, и двадесять девять лет царствова во Иерусалиме. Имя же



матери его Авиа, дочь Захариина. 2 Сотвори же правое пред Господем по всем, яже сотвори Давид отец его. 3 И бысть егда ста на царстве своем в месяц первый, отверзе двери дому Господня и обнови их, 4 и введе священники и левиты, и постави их на стране яже к востоку, 5 и рече им: послушайте мя, левити, ныне очиститесь и очистите дом Господа Бога отец наших, и изрините нечистоту из святилища: 6 яко отступиша отцы наши и сотвориша лукавое пред Господем Богом нашим, и оставиша Его, и отвратиша лице свое от скинии Господни, и даша хребет, 7 и заключиша врата храма, и погасиша светильники, и фимиамом не кадиша, и всесожжений не принесоша во святилищи Богу Израилеву: 8 и разгневался яростию Господь на Иуду и на Иерусалим, и предаде их во ужас и погубление и на звиздание, якоже вы видите очима вашима: 9 и се, поражени быша отцы наши мечем, и сынове наши и дщери наша и жены наша в пленении в земли не своей, якоже и ныне суть: 10 ныне убо положите на сердца ваша, еже заветати завет с Господем Богом Израилевым, и отвратит гнев ярости Своя от нас: 11 и ныне не пренебрегайте, яко вас избра Господь стояти пред Ним, служити Ему, и да будете Ему служаще и кадяще. 12 И восташа левити, Маал сын Амасиев и Иоиль сын Захариев от сынов Каафовых, и от сынов Мерариных Кис сын Авдиев и Азариа сын Илаелилов, и от сынов Гедсоних Иоадад сын Земмань и Иоадам, сии сынове Иоахаини: 13 от сынов Елисафаних Самарий и Иеиил, и от сынов Асафовых Захариа и Матфаниа, 14 и от сынов Еманих Иеиил и Семей, от сынов же Идифумлих Самафия и Озиил: 15 собраша же братию свою и освятишася по заповеди цареве повелением

Господним, да очистят дом Божий: 16 и внидоша священницы  
внутрь церкви Господни, да очистят ю, и извергоша всю  
нечистоту обретенную в дому Господни и во дворе дому  
Господня: и взявше левиты, изнесоша к потоку Кедрску вон.  
17 И начаша в первый день новомесячия первого месяца  
очищати, и в день осмый того месяца внидоша во храм  
Господень, и очистиша церковь Господню во осми днех, и  
в день шестыйнадесять месяца первого совершиша. 18 И  
внидоша внутрь ко Езекии царю и рекоша: очистихом вся,  
яже в дому Господни, олтарь всесожжения и сосуды его, и  
трапезу предложения со всеми сосуды ея, 19 и вся сосуды,  
яже оскверни царь Ахаз в царство свое во отступлении  
своем, уготовахом и очистихом, и се, суть пред олтарем  
Господним. 20 И воста рано Езекиа царь, и собра начальники  
града, и възиде в дом Господень, 21 и вознесе телцев седмь  
и овнов седмь, агнцев седмь и козлов от коз седмь за грех,  
за царство и за святилище и за Израиля, и рече сыном  
Аароним священником, да възидут на олтарь Господень жрети  
телцев. 22 И заклаша телцев, и взяша кровь священницы  
и излиаша на олтарь: и заклаша овнов и кровь на олтарь  
возлиаша: и заклаша агнцев и облиаша кровию олтарь: 23  
и приведоша козлов, иже за грех, пред царя и церковь, и  
возложиша руки своя на них, 24 и пожроша их священницы,  
и покропиша кровию их пред олтарем, и помолишася о всем  
Израили: зане рече царь, о всем Израили всесожжение  
и яже о гресе. 25 Постави же левиты в дому Господни  
с кимвалы и псалтирми и гусльми, по заповеди Давида  
царя и Гада провидца царю и Нафана пророка, яко по  
заповеди Господней повеление (бысть) рукою пророков Его.

26 Сташа же левити со органы Давидовы и священницы с трубами. 27 И повеле Езекиа, да вознесут всесожжение на олтарь: и егда начаша возносити всесожжение, начаша хвалы пети Господеви и трубити при органех Давида царя Израилева. 28 И вся церковь покланяшеся, и певцы пояху, и трубы трубяху, дондеже совершися всесожжение. 29 Егда же скончаша приношение, преклонися царь и вси иже бяху с ним и поклонишася Господеви. 30 Повеле же Езекиа царь и князи левитом, да восхвалят Господа словесы Давидовыми и Асафа пророка: иже восхвалиша в веселии, и падоша, и поклонишася Господеви. 31 И отвеща Езекиа и рече: ныне исполните руки ваша Господу, приведите и принесите жертвы хваления в дом Господень. И принесе (все) собрание жертвы и хвалы в дом Господень, и всяк усердный сердцем всесожжения. 32 И бысть число всесожжения, еже принесе собрание, телцев седьдесят, овнов сто, агнцев двести, вся сия во всесожжение Господеви: 33 освященных же телцев шестьсот, овец три тысящы. 34 Но священницы не мнози бяху и не можаху одирати кож всесожжения, и помогоша им братия их левити, дондеже исполнися дело и дондеже освятишася жерцы, левити бо усерднее освятишася, нежели священницы: 35 всесожжения же много в туках совершения спасения, и возлияний всесожжения: и исправися дело в дому Господни. 36 Возвеселися же Езекиа и вси людие, яко уготова Бог людем, понеже внезапно бысть слово.

**30** Посла же Езекиа ко всему Израилю и Иуде, и написа послания ко Ефрему и Манассии, да приидут к дому Господню во Иерусалим сотворити пасху Господу Богу Израилеву. 2 И усоветова царь и князи и все множество во Иерусалиме

сотворити пасху во второй месяц: 3 не возмогша бо сотворити во время свое, яко священницы не очистишася доволни, и людие не у собращася во Иерусалим. 4 И угодно бысть слово цареви и всему множеству. 5 И поставиша слово, да пройдет проповедь во весь Израиль от Вирсавети даже до Дана, да приидут сотворити пасху Господу Богу Израилеву во Иерусалиме, мнози бо не сотвориша по писанию. 6 И поидоша гонцы с посланьми от царя и от начальников во весь Израиль и Иудею по повелению цареви, глаголюще: сынове Израилевы, обратитесь ко Господу Богу Авраамлю и Исаакову и Иаковлю, и обратите спасшихся, иже избыша от руки царя Ассурска, 7 и не будите якоже отцы ваши и братия ваша, иже отступиша от Господа Бога отец своих, и предаде их в погубление, якоже вы видите: 8 и ныне не ожесточите сердец ваших, якоже отцы ваши: дадите славу Господу Богу и внидите во святилище Его, еже освяти во век, и служите Господу Богу вашему, и отвратит от вас гнев ярости Своея: 9 понеже егда обратитесь вы ко Господу, братия ваша и чада ваша будут в щедротах пред всеми пленившими их, и возвратит в землю сию, зане милостив и щедр Господь Бог наш, и не отвратит лица Своего от нас, аще обратимся к Нему. 10 И бяху гонцы проходяще от града во град, на горе Ефремли и Манассиине, даже и до Завулоне: и быша яко посмеяваеми и поругаеми. 11 Но мужие от Асира и от Манассии и от Завулоне устыдишася и приидоша в Иерусалим и во Иудею. 12 И бысть рука Господня дати им сердце едино приити, еже сотворити по повелению цареви и князей слово Господне. 13 И собращася во Иерусалим людие мнози, да сотворят

праздник опресноков в месяц второй, сонм мног зело. 14 И восташа, и разориша олтари, иже во Иерусалиме, и вся, в нихже кадыху идолом, испровергоша и ввергоша их в поток Кедрский, 15 и пожроша пасху в четвертынадесять день месяца втораго: священницы же и левити умилишася и освятишася, и принесоша всесожжения в дом Господень: 16 и сташа в чине своем по обычаю своему, по заповеди Моисеа человека Божия, и священницы приемляху кровь от руку левитску. 17 Понеже мног народ освящен не бысть, левити же бяху жруще пасху всякому, иже не можаше освятитися Господу: 18 понеже большая часть людей от Ефрема и Манассии, и Иссахара и Завулونا освященна не бысть, но ядоша пасху не по писанию. 19 И помолися Езекиа о них глаголя Господь Бог благ да умилоствитися о всяцем сердцы направившемся еже взыскати Господа Бога отец своих, а не по очищению святынь. 20 И услыша Господь Езекию и изцели люди. 21 И сотвориша сынове Израилевы обретшиися во Иерусалиме праздник опресноков семь дний в веселии велице хваляще Господа на всяк день, левити же и священницы во органы Господу. 22 И глагола Езекиа ко всякому сердцу левитов, иже имех разум благ ко Господу: и скончаша праздник опресноков семь дний жруще жертву спасения и исповедающеся Господу Богу отец своих. 23 И усоветова весь собор купно сотворити ины семь дний (праздника): и сотвориша семь дний иных в веселии. 24 Понеже Езекиа царь Иудин даде начатки всему народу тысящу телцев и семь тысяч овец: начальницы же даша людем телцев тысящу и овец десять тысяч, и освятишася священников множество. 25 И возрадовася вся

церковь, священницы и левити, и все множество Иудино и обретшиися из Иерусалима, и пришелцы пришедшии от земли Израилевы и обитающи во Иудеи. 26 И бысть веселие велие во Иерусалиме: яко от дний Соломона, сына Давидова царя Израилева, не бысть таковой праздник во Иерусалиме. 27 И восташа священницы и левити и благословиша людей, и услышан бысть глас их, и прииде моление их в жилище святое Его на небо.

**31** Егда же сия вся совершишася, изыде весь Израиль обретшийся во градех Иудиных, и сокрушиша идолы и посекоша дубравы, и разориша высокая и требища от всея Иудеи и Вениамина, и от Ефрема и от Манассии в конец: и возвратися весь Израиль, кийждо во одержание свое и во грады своя. 2 И устави Езекиа чреды священников и левитов, и чреды коегождо по служению его, священников и левитом, во всесожжение и в жертву спасения, и дабы хвалили и исповедалися и служили во вратех во дворех дому Господня. 3 Часть же царева бысть от имения его во всесожжение утреннее и вечернее, и всесожжения в субботы и в новомесячия и в праздники писанныя в законе Господни. 4 И заповеда людем живуцым во Иерусалиме дати часть священником и левитом, да укрепятся во служении дому Господня. 5 И егда устави слово, даша много сынове Израилевы начаток пшеницы и вина и елеа и меда, и вся яже родит земля, и десятины вся принесоша зело много сынове Израилевы и Иудины. 6 И иже обитаху во градех Иудиных, и тии принесоша десятины от телцев и овец, и десятины от коз, и посветиша Господу Богу своему, и внесоша и положиша купы многи. 7 Месяца третияго начаша

купам полагати основания, и месяца седмаго и совершиша их. 8 И вниде Езекиа и началницы, и видеша купы, и благословиша Господа и люди Его Израиля. 9 Вопросы же Езекиа священников и левитов о купах. 10 И отвеща к нему Азариа священник начальный в дому Садоков и рече отнележе начаша приносить начатки в дом Господень, ядохом и пихом, и оставихом даже до множества, яко благослови Господь люди Своя, и оставихом еще множество сие. 11 И повеле Езекиа еще уготовити житницы в дому Господни: и уготоваша. 12 И внесоша тамо начатки и десятины верно: над ними же бе настоятель Хонения левит, и Семей брат его второй, 13 и Иеиил и Озиа, и Наеф и Асаил, и Иеримоф и Иозавад, и Елиил и Самахиа, и Мааф и Ванаиа, и сынове его приставлени рукою Хонении и Семеа брата его, якоже повеле Езекиа царь и Азариа начальник дому Господня. 14 И Корей сын Иемнаин левит, дверник к востоку над даяньми, еже даяти начатки Господни и Святая святых, 15 рукою Одома и Вениамина, и Иисуса и Семеа, и Амариа и Сехониа, рукою священников верно, даяти братии своей по чредам, малу и велику, 16 кроме рожденных мужеска полу от лет триех и вышше, всем, иже вхождаху в церковь Господню по числу дний на день, в службу чред расположения их. 17 Сие разделение священников по домом отечеств: и левити в чредах своих, от двадесяти лет и вышше, по чином, в разделениих. 18 Всякому рожденному жен их и сынов их и дщерей их во все множество, понеже верно освятиша святое. 19 И сыновом Аароним священствующим в селех, и иже от градов их во всяцем граде и граде, мужие иже именовани суть по имени, даяти часть всякому мужеску

полу во священницех и всякому сочисляемому в левитех.  
20 И сотвори тако Езекиа во всей Иудеи, и сотвори благое и правое и истинное пред Господем Богом своим, 21 и во всяцем деле, еже нача делати в дому Господни, и в законе и в повелениих взыска Бога своего всем сердцем своим и сотвори, и благопоспешися ему.

**32** И по словесех сих и по истине сей, прииде Сеннахирим царь Ассирийский, и прииде на Иудею, и ополчился на грады крепкия хотя взяти их. 2 И виде Езекиа, яко прииде Сеннахирим, и лице его воевати на Иерусалим: 3 и советова со старейшины своими и с сильными, да заключат воды источников, иже беша вне града: и соизволиша ему. 4 И собра много людей, и заключи воды источников и поток текущъ посреде града, глаголя: да не приидет царь Ассирийский, и обрящет вод много, и укрепится. 5 И укрепися Езекиа, и созда вся стены, яже быша разсыпаны, и столпы, и отвне предстение ино, и укрепил разрушенную града Давидова, и уготова оружия многа: 6 и постави начальники бранем над людьми, и собращася к нему на площадь врат дебри, и глагола в сердца их глаголя: 7 укрепитесь и мужайтесь и не устрашайтесь, ниже ужасайтесь от лица царя Ассирийска и от лица всего множества, еже с ним: яко множайшии с нами суть неже с ним: 8 с ним мышца плотская, с нами же Господь Бог наш, еже спасати и поборати на брани нашей. И укрепившася людие словесы Езекии царя Иудина. 9 И по сих посла Сеннахирим царь Ассирийский рабы своя во Иерусалим, сам же со всеми вои своими обстояше Лахис, и посла ко Езекии царю Иудину и ко всему Иуде, иже во Иерусалиме, глаголя: 10 сия глаголет Сеннахирим царь



Ассирийский: на что вы уповаете и сидите во обстоянии во Иерусалиме? 11 Ни ли Езекиа прельщает вас, да предаст вы в смерть и в глад и жажду, глаголя: Господь Бог наш спасет нас от руки царя Ассирийска? 12 Не сей ли есть Езекиа, иже разори олтари Его и вышняя Его, и повеле Иуде и живущым во Иерусалиме, глаголя: олтарем пред олтарем сим поклоняйтесь и в нем кадите фимиам? 13 Или не весте сего, что аз сотворих и отцы мои всем людям земли? Еда могуще возмогоша бози языков всея земли избавити люди своя от руки моея? 14 Кто во всех бозех языков сих, ихже искорениша отцы мои? Еда возмогоша избавити люди своя от руки моея, и како может Бог ваш избавити вас от руки моея? 15 Ныне убо да не прельщает вас Езекиа и да не творит вас уповати по сему, и не веруйте ему: аще бо ни един бог всякаго языка и царства возможе избавити люди своя от руки моея и от руку отец моих, то ниже Бог ваш возможет избавити вас от руки моея. 16 И ина (многа) глаголаша раби его противу Господа Бога и противу Езекии раба Его. 17 И послания написа поношая Господа Бога Израилева, и рече Нань, глаголя: якоже бози язык земли не могоша избавити людей своих от руки моея, тако ниже Бог Езекиин избавит люди Своя от руки моея. 18 И возопи воплем великим языком Иудейским к людем, иже седяху на стенах Иерусалимлих, да устрашит их и ужасит, и возмет град: 19 и глагола на Бога Иерусалимля, якоже и на богов людей земли, дела рук человеческих. 20 И помолися Езекиа царь и Исаиа сын Амосов пророк о сих, и возопиша на небо. 21 И посла Господь Ангела, и порази всех мужей храбрых и бранников, и начальников и воевод в полцех царя Ассирийска:

и возврати лице его со стыдом на землю его, и прииде в дом бога своего, и сынове его изшедшии из чрева его погубиша его мечем. 22 И спасе Господь Езекию и обитающих во Иерусалиме от руки Сеннахирима царя Ассирийска и от руку всех, и подаде им покой окрест. 23 И мнози приношаху дары Господу во Иерусалим и даяния Езекии царю Иудину, и возвышен бысть пред очесы всех языков по сих. 24 Во днех оных разболеся Езекиа даже до смерти и помолися ко Господу: и услыша его и даде ему знамение. 25 И не по воздаянию, еже даде ему, воздаде Езекиа, но вознесеса сердце его, и бысть на него гнев и на Иуду и на Иерусалим. 26 И смирися Езекиа от высоты сердца своего сам и живущии во Иерусалиме, и не прииде на них гнев Господень во дни Езекиины. 27 И бысть Езекиеви богатство и слава многа зело: и сокровища себе собра сребра и злата и камня честнаго, и ароматы, и оружия хранилницы, и сосуды драгоценны, 28 и житницы жит, пшеницы и вина и елеа, и села, и ясли всякому скоту, и ограды стадом, 29 и грады, яже созда себе, и строения овцам и волом множество: зане даде ему Господь собрания многа зело. 30 Той Езекиа загради исход воды Геона вышняго и проведе ю в низ к полудню града Давидова. И преуспе Езекиа во всех делех своих. 31 И тако послом князей от Вавилона, иже послани бяху к нему, да вопросят его о чудеси, еже случися на земли, остави его Господь, да искусит его уведати, яже в сердцах его. 32 Прочая же словес Езекииных, и щедроты его, се, писана суть в пророчестве Исаии пророка сына Амосова и в книзе царей Иудиных и Израилевых. 33 И успе Езекиа со отцы своими, и погребоша его на восходех гробов сынов Давидовых: и славу и честь

даша ему в смерти его весь Иуда и живущии во Иерусалиме.  
И воцарися Манассиа сын его вместо его.

**33** Дванадцати лет бе Манассиа, егда царствовати нача, и пятьдесят пять лет царствова во Иерусалиме: 2 сотвори же лукавое пред Господем по всем мерзостем языческим, ихже истреби Господь от лица сынов Израилевых: 3 и возврати и созда высокая, яже раскопа Езекиа отец его, и соорои кумиры Ваалиму, и сотвори дубравы, и поклонися всему воинству небесному, и послужи им, 4 и созда олтари в дому Господни, о немже глагола Господь: во Иерусалиме будет имя Мое во веки: 5 созда же жертвенники всему воинству небесному во двою дворех дому Господня. 6 Той же проведе чада своя чрез огонь во удоли Веенномли и вражаше (со жребии), и последоваше гаданием, и волхвованием служаше, и имеваше чрево волшебники и обаянники, и многа лукавая сотвори пред Господем, да прогневает Его: 7 истуканы же и слиянны образы сотвори и постави в дому Божии, о немже глагола Бог к Давиду и к Соломону сыну его: в дому сем и во Иерусалиме, егоже избрах от всех колен Израилевых, положу имя Мое во век, 8 и не приложу подвигнути ногу Израилеву от земли, юже предах отцем их, токмо аще сохранят сотворити вся, яже повелех им, по всему закону и повелением и судьбам, рукою Моисеовою. 9 И прельсти Манассиа Иуду и живущих во Иерусалиме, да сотворят лукавое паче всех язык, ихже испроверже Господь от лица сынов Израилевых. 10 И глагола Господь к Манассии и к людем его, и не послушаша. 11 И наведе Господь на них начальники воев царя Ассирийска, и яша Манассию во узах, и связаша его оковы ножными, и отвелоша в Вавилон. 12 И

егда озлоблен бысть, взыска лице Господа Бога своего, и смирился зело пред лицом Бога отец своих, 13 и помолился к Нему и послуша его, и услыша вопль его, и возврати его во Иерусалим на царство его: и позна Манассиа, яко Господь Той есть Бог. 14 И по сих созда стену вне града Давидова от Ливы к югу в потоце и ко входу врат Рыбных, исходящим вратами сущими окрест в высоту, и возвыси зело: и постави начальники воем во всех градех Иудиных стенатых, 15 и отят боги чуждые и идолы от дому Господня, и вся олтари, яже созда в горе дому Господня и во Иерусалиме, и изверже вся вон из града. 16 И паки воздвиже олтарь Господень, и пожре на том жертву спасения и хваления, и заповеда Иуде, да служат Господу Богу Израилеву. 17 Но еще людие жряху на высоких, обаче Господу Богу своему. 18 Прочая же словес Манассииных, и молитва его, яже к Богу, и словеса провидящих, иже глаголаху к нему во имя Господа Бога Израилева, 19 се, во словесех молитвы его, и яко услыша его, и вси греси его и отступления его, и места, на нихже созида высокая, и сотвори тамо Дубравы и изваянная, прежде неже обратитися ему, се, писана суть во словесех провидящих. 20 Успе же Манассиа со отцы своими, и погребоша его в саду дому его. И воцарися вместо его сын его Амон. 21 Двадцати дву лет бе Амон, егда царствовати нача, и два лета царствова во Иерусалиме, 22 и сотвори лукавое пред Господем, якоже творяше Манассиа отец его, и всем идолом, ихже сотвори Манассиа отец его, пожре Амон и послужи им: 23 и не смирился пред Господем, якоже смирился Манассиа отец его, зане сын его Амон умножи грехи. 24 И нападоша нань раби его и убиша его в дому

его. 25 И убиша людие земли нападших на царя Амона, и поставиша людие земли царя Иосию сына его вместо его.

**34** Осми лет бысть Иосиа, егда царствовати нача, и тридесять едино лето царствова во Иерусалиме, 2 и сотвори правое пред Господем, и ходи в путех Давида отца своего, и не уклонися ни на десно, ни на лево. 3 И во осмое лето царства своего, и той еще сый отрок, нача взыскати Господа Бога отца своего Давида: и во второенадесять лето царства своего нача очищати Иудею и Иерусалим от высоких и лесов, и от капищ и от истуканных. 4 И разориша пред лицом его олтари Ваалимли, и высокая, яже на них: и посече дубравы и истуканныя, и слиянная сокруши и истни, и растопи и поверже пред лицом гробов жрущих им: 5 и кости жерцев сожже на олтарех их, и очисти Иуду и Иерусалим, 6 и во градех Манассииных и Ефремлих и Симеоних даже до Неффалима, и в местех их окрест: 7 и олтари размета и лесы, и идолы разсече в частицы, и вся высокая иссече от всея земли Израилевы, и возвратися во Иерусалим. 8 И во осмоенадесять лето царства своего, егда очищена бысть земля и церковь Господня, посла Сафана сына Еселиева и Амесию начальника града и Иоаса сына Иоахазова памятописца своего, да утвердят дом Господа Бога своего. 9 И приидоша ко Хелкии священнику великому, и даша серебро принесенное в дом Господень, еже собраша левити хранящии дверь от руки Манассиины и Ефремли, и от начальников и от всех прочих во Израили, и от сынов Иудиных и Вениаминих и обитающих во Иерусалиме, 10 и даша оное в руце творящих дела, приставницы в дому Господни, и даша е творящим дела, иже творяху в дому

Господни да, обновят и укрепят храм: **11** и даша тектоном и домоздателем, да купят камень четверугольный и древа на бервна на покрытие домов, ихже разориша царие Иудины.

**12** И мужие верно творяху в делех, и над ними надзирателе Иеф и Авдиа левити от сынов Мерариных, и Захария и Мосоллам от сынов Каафовых надзирати, и всяк левитин, и всяк знай во органы пети: **13** и над носящими бремена и над всеми творящими дела, всяким деланием: и от левит беша писареви и судии и дверницы. **14** И внегда изнести им сребро принесенное в церковь Господню, обрете Хелкия священник книгу закона Господня, (яже дана бысть) рукою Моисеовою. **15** И отвеща Хелкия и рече к Сафану писарю: книгу закона обретох в дому Господни. И даде Хелкия книгу Сафану. **16** И принесе Сафан книгу ко царю, и возвести еще ко царю слово, глаголя: все сребро дано в руки рабов твоих творящих дела: **17** и слияша сребро обретенное в дому Господни, и даша в руки надзирателей и в руки творящих дело. **18** И возвести Сафан писарь слово царю, глаголя: книгу даде ми Хелкия священник. И прочте ю Сафан пред царем. **19** И бысть егда услыша царь словеса закона, и растерза ризы своя. **20** И повеле царь Хелкиеву и Ахикаму сыну Сафанову и Авдону сыну Михееву, и Сафану писарю и Асаию рабу цареву, глаголя: **21** идите и молитесь Господу за мя и за всякаго оставшагося во Израили и Иуде, о словесех книги, яже обретена есть, велик бо гнев Господень разгорется на нас, понеже не послушаша отцы наши словес Господних, еже творити по всем написанным в книзе сей. **22** И иде Хелкия, и имже повеле царь, ко Олдане пророчице, жене Селлима сына Фекуева, сына Есерии ризохранителя,

хранящей заповеди, яже обиташе во Иерусалиме в масане, и глаголаша ей по сим. 23 И та отвеща им: сия рече Господь Бог Израилев: глаголите мужу, иже посла вас ко мне: сия рече Господь: 24 се, Аз наведу злая на место сие и на обитающих в нем вся словеса, яже писана суть в книзе прочтенной пред царем Иудиным, 25 зане оставиша Мя и кадяху богом чуждим, да прогневают Мя во всех делех рук своих: и разгорется ярость Моя на место сие и не угасится: 26 и ко царю Иудину, иже посла вас ко Господу помолитися, тако глаголите ему: сия рече Господь Бог Израилев: словеса, яже слышал еси, 27 и сокрушися сердце твое, и смирился еси пред лицом Моим, егда услышал еси словеса Моя на место сие и на обитающих в нем, и смирился еси предо Мною, и растерзал еси ризы твоя, и плакал еси предо Мною, и Аз услышах, рече Господь: 28 се, приложу тя ко отцем твоим, и приложишия ко гробом твоим в мире, и не узрят очи твои всякого зла, яже Аз наведу на место сие и на обитающих в нем. И возвестиша царю слово. 29 И посла царь, и собра старейшины Иудины и Иерусалимли. 30 И възыде царь в дом Господень и вси мужие Иудины и живущии во Иерусалиме, и священницы и левити, и вси людие от мала даже до велика: и читаше во ушеса их вся словеса книги завета обретенная в дому Господни. 31 И ста царь на столпе, и завета завет пред Господем ходити пред Господем, хранити заповеди Его и свидения Его и повеления Его всем сердцем и всею душею, еже творити словеса завета написанная в книзе сей. 32 И постави всех, иже обретени бяху во Иерусалиме и Вениамине, и сотвориша обитающии во Иерусалиме завет в дому Господа Бога отец своих. 33 И отя Иосиа вся мерзости

от всея земли, яже бе сынов Израилевых, и сотвори всех обретшихся во Иерусалиме и во Израили служити Господу Богу своему во вся дни своя, и не уклонися от Господа Бога отец своих.

**35** И сотвори Иосиа во Иерусалиме пасху Господу Богу своему, и пожре пасху в четвертыйнадесять день месяца перваго: **2** и постави священники на стражах их, и укрепи их на дела дому Господня, **3** и рече левитом сильным во всем Израили, да освятятся Господу и поставят кивот святой в дому Господни. И поставиши кивот святой во храме, егоже созда Соломон сын Давида царя Израилева. И рече царь: несть вам на раменах носити ничтоже: ныне убо служите Господу Богу вашему и людем Его Израилю, **4** и уготовайтесь по домом отечеств ваших и по чредам вашим, по писанию Давида царя Израилева и рукою Соломона сына его, **5** и стойте во храме по разделением домов отечеств ваших во братии вашей сынех людских, и по части дому отечества в левитех: **6** и пожрите пасху и святая уготовайте братии вашей, еже сотворити по словеси Господню, (еже глагола) рукою Моисевою. **7** И даде начатки Иосиа сыном людским овцы и агнцы и козлы от коз, вся на пасху, и всех обретеных в число тридесять тысящ, и волов три тысящы, сия от царева имения. **8** И началницы его даша начатки людем и священником и левитом: даде же и Хелкиа и Захариа и Иеиил началницы священником дому Господня, и даша на пасху овец и агнцев и козлиц две тысящы шесть сот и волов триста. **9** Хонения же и Ванеа, и Самеа и Нафанаил брат его, и Асавиа и Иеиил и Иозавад, началницы левитов, даша левитом на пасху пять тысящ овец и волов пять сот.



10 И уготовано бысть служение, и сташа священницы в чине своем и левити по разделением своим по повелению цареву, 11 и пожроша пасху, и пролияша священницы руками своима кровь, и левити одираху кожи: 12 и уготоваша всесожжения предати им по разделению, по домом отечеств сыном людским, принести Господеву всесожжения, якоже писано есть в книзе закона Моисеова: тако и завтра: 13 и испекоша пасху на огни по чину, и святая свариша в медницах и в котлах, и предупсе им, и поделиша всем сыном людским: 14 себе же и священником потом уготоваша, яко в возношении всесожегаемых и туков даже до нощи священницы (быша не праздни), и левити уготоваша им и братии их сыном Аароним. 15 И певцы сынове Асафовы (стояху) в чине своем по повелению Давида, и Асафа и Емана и Идифума пророков царевых: и начальницы и дверницы всех врат, имже не бе возможно отлучитися от службы святых, понеже братия их левити уготоваша им (брашна). 16 И управися и уготовася вся служба Господня в день той, да сотворят пасху и принесут всесожжения на олтарь Господень по повелению царя Иосии. 17 И сотвориша сынове Израилевы, иже обретени бяху, пасху во время то и праздник опресноков седмь дний. 18 И не бысть пасхи подобныя той во Израили от дний Самуила пророка, и вси царие Израилева не сотвориша пасхи, юже сотвори Иосиа и священницы и левити, и весь Иуда и Израиль, иже обретен бысть, и обитающии во Иерусалиме, Господу. 19 Во осмонадесять лето царства Иосиина сия пасха празднована бысть. 20 И изыде фараон Нехао царь Египетский на царя Ассирийскаго на реку Евфрат, еже ратовати его в Хархамисе.

И изыде во сретение ему Иосиа царь. 21 И посла к нему послы, глаголя: что мне и тебе, царю Иудин? Не противу тебе днешь иду воевати, но на место брани моя: и Бог рече потщатися мне: внемли ты о Бозе иже со мною, да не убьет тя. 22 И не возврати Иосиа лица своего от него, но ратовати его укрепися, ниже послуша словес Нехаовых, яже от уст Божиих, но иде, да воюет на поли Магеддо. 23 И устрелиша стрелцы в царя Иосию. И рече царь отроком своим: изведите мене (от брани), яко изнемогах зело. 24 И сведоша его отроцы его с колесницы, и в другую колесницу посадиша его, яже бяше ему, и привезоша его во Иерусалим, и умре и погребен бысть со отцы своими: и весь Иуда и Иерусалим плакаша о Иосии. 25 И Иеремиа възрыда по Иосии, и глаголаша вси князи и княгини плачь по Иосии даже до днешь: и даша его в повеление Израилю, и се, писано есть в рыданиях. 26 Прочая же словеса Иосиина и упование его бяху писана в законе Господни: 27 дела же его, первая и последняя, се, писана суть в книзе царей Израилевых и Иудиных.

**36** И взяша людие земли Иоахаза сына Иосиина, и помазаша его, и поставиша его царем вместо отца его во Иерусалиме. 2 Двадцати триех лет бысть Иоахаз, егда царствовати нача, и три месяцы царствова во Иерусалиме. Имя же матери его Амитал, дщерь Иеремиина от Ловны. И сотвори лукавое пред Господем по всем, яже сотвориша отцы его. (и плени Иоахаза, ) и окова его фараон Нехао в Девлафе в земли Ефамли, еже не царствовати ему во Иерусалиме, 3 и преведе его царь во Египет, и возложи дань на землю (Израилеву) сто талант сребра и талант

злата. 4 И постави фараон Нехао Елиакима сына Иосиина царем над Иудею и Иерусалимом вместо Иосии отца его, и премени имя его Иоаким. Иоахаза же брата его взял фараон Нехао и введе его во Египет. 5 Двадцати пяти лет бе Иоаким, егда царствовати нача, и единонадесять лет царствова во Иерусалиме. Сотвори же лукавое пред Господем по всем. 6 И взыде на него Навуходоносор царь Вавилонский, и окова его оковами медянными, и приведе его в Вавилон: 7 и часть сосудов дому Господня пренесе в Вавилон и постави я во храме своем в Вавилоне. 8 Прочая же словес Иоакимовых, и вся, яже содела, не се ли, сия писана в книзе словес дний царей Иудиных? И успе Иоаким со отцы своими и погребен бысть в Ганозане со отцы своими. И воцарися Иехониа сын его вместо его. 9 Осминадесяти лет бе Иехониа, егда царствовати нача, и три месяцы и десять дний царствова во Иерусалиме, и сотвори лукавое пред Господем. 10 Егда же лету круг вращашеся, посла Навуходоносор царь, иже и введе его в Вавилон с предрагими сосуды дому Господня, а царем постави Седекию брата отцу его над Иудею и Иерусалимом. 11 Двадцать едино лето бысть Седекии, егда царствовати нача, единнадесять лет царствова во Иерусалиме: 12 и сотвори лукавое пред Господем Богом своим, и не усрамися лица Иеремии пророка от уст Господних, 13 егда от царя Навуходоносора отвержесе, иже заклея его пред Богом: и ожесточи выю свою и сердце свое укрепи, да не обратится ко Господу Богу Израилеву. 14 И вси славнии Иудины и священницы и людие земли умножиша еже преступити преступления мерзостей языческих, и оскверниша дом

Господень, иже во Иерусалиме. 15 И посылаше Господь Бог отец их к ним рукою пророков Своих утренюя и посылая вестники Своя, понеже щадяше людей Своих и святилища Своего: и тии поношаху послом Божиим, 16 и уничижаху словеса Его, и ругахуся пророком Его, дондеже сниде гнев Господень на люди Его, дондеже не бысть изцеления. 17 И наведе на них царя Халдейска, и поби младенцы их мечем в дому святыни его: и не пощаде Седекии и дев их не помилова, и старцы их изведе, и всех предаде в руки их, 18 и вся сосуды дому Божия великия и малыя, и сокровища церкви Господни, и вся сокровища царева и вельмож, вся внесе в Вавилон: 19 и зажже дом Господень и разори стену Иерусалимлю, и столпы его сожже огнем и всяк сосуд драгий исти: 20 и пресели оставшихся в Вавилон, и быша ему и сыном его в рабы даже до царства Мидскаго, 21 да исполнится слово Господне устами Иеремии, донележе прия земля субботы своя субботствовати во вся дни запустения своего: субботствова до совершения седмидесяти лет. 22 В лето первое Кира царя Персскаго, повнегда исполнитися словесем Господним усты Иеремии, воздвиже Господь дух Кира царя Персскаго, и повеле проповедати во всем царствии своем писанием, глаголя: 23 сия глаголет Кир царь Персский: вся царства земли даде ми Господь Бог небесный, и Той заповеда мне создати Себе дом во Иерусалиме, иже есть во Иудеи: кто в вас от всех людей Его? Да будет Бог его с ним, и да възыдет.

# Книга Ездры

**1** В лето первое Кира царя Персского, да исполнится слово Господне от уст Иеремииных, воздвиже Господь дух Кира царя Персского, и повеле проповедати во всем царствии своем, и писаньми, глаголя: **2** сия глаголет Кир царь Персский: вся царства земная даде мне Господь Бог небесный, и Той повеле ми, да созижду Ему дом во Иерусалиме, иже во Иудеи: **3** кто в вас от всех людей Его? И будет Бог его с ним, и да възыдет во Иерусалим, иже во Иудеи, и да созиждет дом Богу Израилеву, Той есть Бог, Иже во Иерусалиме: **4** и всяк оставшийся от всех мест, идеже той обитает, и да помогут ему мужие от места его серебром и златом, и сосуды и скоты, с добровольными обещании (принесут) в церковь Божию, яже во Иерусалиме. **5** И восташа князи отечеств Иудиных и Вениаминих и священницы и левити, и вси, имже воздвиже Бог дух их, да възыдут созиданию церкви Господни, яже во Иерусалиме: **6** и вси, иже бяху окрест, помогоша рукам их сосуды сребрбяными, златом, потребными, и скотами, и драгими вещми, кроме добровольных. **7** И царь Кир изнесе сосуды церкви Господни, ихже взя Навуходоносор из Иерусалима и положи тыя в церкви бога своего: **8** изнесе же тыя Кир царь Персский рукою Мифридата Гасваринова, и сочте тыя Сасавассару князю Иудейску. **9** И сие число их: умывалниц златых тридесять, умывалниц же серебряных тысяща, ножей двадесять девять, **10** и чаш златых тридесять, и серебряных двойных четыреста десять, и сосудов иных тысяща: **11** всех сосудов златых и серебряных пять тысящ и четыреста, вся взя с собою Сасавассар от преселения Вавилонскаго во Иерусалим.

**2** Сии же суть сынове страны, иже взыдоша от плена преселения, иже пресели Навуходоносор царь Вавилонский в Вавилон: и возвратишася во Иерусалим и Иудею кийждо муж во град свой. **2** Иже приидоша с Зоровавелем: Иисус, Неемиа, Сараиа, Реелиа, Мардохей, Валасан, Масфар, Вагуй, Реум, Ваана. Сие число мужем людей Израилевых: **3** сынове Фаресовы две тысящы сто семьдесят и два, **4** сынове Сафатиевы триста семьдесят два, **5** сынове Аресовы семь сот семьдесят пять, **6** сынове Фааф-Моавли от сынов Иисувух и Иоавлих две тысящы осмь сот дванадесять, **7** сынове Еламли тысяща двести пятьдесят четьри, **8** сынове Зафуевы девять сот четьредесять пять, **9** сынове Закхани семь сот шестьдесят, **10** сынове Вануевы шесть сот четьредесять два, **11** сынове Ваваевы шесть сот двадесять три, **12** сынове Авгадовы тысяща двести двадесять два, **13** сынове Адоникамовы шесть сот шестьдесят шесть, **14** сынове Вагуевы две тысящы пятьдесят шесть, **15** сынове Адины четьриста пятьдесят четьри, **16** сынове Атировы, иже бяху от Езекии, девятьдесят осмь, **17** сынове Вассуевы триста двадесять три, **18** сынове Иоравовы сто дванадесять, **19** сынове Асумли двести двадесять три, **20** сынове Гаверовы девятьдесят пять, **21** сынове Вефлаемли сто двадесять три, **22** сынове Нетофаевы пятьдесят шесть, **23** сынове Анафофовы сто двадесять осмь, **24** сынове Азмофовы четьредесять три, **25** сынове Кариафиаримли, Хафира и Вироф, семь сот четьредесять три, **26** сынове от Рамы и Гаваи шесть сот двадесять един, **27** мужей Махмаских сто двадесять два, **28** мужей Вефилских и Гайских четьреста двадесять три, **29** сынове от Навы пятьдесят два, **30** сынове

Магевисовы сто пятьдесят шесть, 31 сынове Иламаровы тысяща двести пятьдесят чetyри, 32 сынове Ирамли триста двадeсять, 33 сынове Лиддоновы, Лодадидовы и Оновы седьмь сот двадeсять пять, 34 сынове Иерихони триста чetyрeдeсять пять, 35 сынове Сeннаaeвы три тысящы шесть сот тридeсять. 36 Священницы же: сынове Иeдyевы в дому Иисyевe девять сот седьмьдeсять три, 37 сынове Еммировы тысяща пятьдeсять два, 38 сынове Фассуровы тысяща двести чetyрeдeсять седьмь, 39 сынове Ирeмли тысяща седьмьнадeсять. 40 Левити же сынове Иисyевы и Кадмиили от сынов Одуeвых седьмьдeсять чetyри. 41 Певцы же сынове Асафовы сто двадeсять осмь. 42 Сынове дeрнников: сынове Сeллумли, сынове Атироы, сынове Тeлмоновы, сынове Акувовы, сынове Атитовы, сынове Сoвaиeвы, всех сто тридeсять девять. 43 Нафинeе: сынове Суавли, сынове Суфатовы, сынове Тавваoфли, 44 сынове Кирасовы, сынове Сирсавли, сынове Фадонины, 45 сынове Лавановы, сынове Агавовы, сынове Акувовы, 46 сынове Агавовы, сынове Сeлaмиины, сынове Анановы, 47 сынове Гeддилины, сынове Гааровы, сынове Раиaeвы, 48 сынове Рaсоновы, сынове Нeкoдoвы, сынове Гaзeмли, 49 сынове Азoкoвы, сынове Фaсиeвы, сынове Рaсиины, 50 сынове Асeнaeвы, сынове Мунниновы, сынове Нeфусимли, 51 сынове Вaквoкoвы, сынове Акуфaeвы, сынове Ануровы, 52 сынове Вaсaлoфoвы, сынове Мидановы, сынове Арсановы, 53 сынове Вapкoсoвы, сынове Сисарины, сынове Фeмaвли, 54 сынове Нaфиeвы, сынове Атифовы. 55 Сынове слуг Сoлoмoнoвых: сынове Сoтaeвы, сынове Сeфирины, сынове Фaдyрoвы, 56 сынове Иeлaaeвы, сынове Дeркoнoвы, сынове Гeддилины, 57 сынове

Сафатиевы, сынове Аттилевы, сынове Фахерафовы, сынове Асевоимли, сынове Имеевы: 58 вси нафанимовы и сынове слуг Соломоновых триста девяност два. 59 И сии, иже восхождаху от Фелмелеха, Фелариса, Херув, Идан, Еммир, и не могоша сказати дому отечества своего и семени своего, от Израиля ли быша: 60 сынове Далаиевы, сынове Товиевы, сынове Некодаевы, шесть сот пятьдесят два: 61 и от сынов священнических сынове Оваиевы, сынове Аккусовы, сынове Верзеллаевы, иже поя от дочерей Верзеллаа Галаадитина жену и наречеса именем их: 62 тии искаша писания роду своему и не обретоша, и изгнани суть от священства. 63 И рече Аферсафа им, да не ядят от святаго святых, дондеже востанет священник со изявлением и истиною. 64 Все же множество купно яко четыре тмы две тысящы триста шестьдесят, 65 кроме рабов их и рабынь их, сих семь тысящ триста тридцать семь: и сии певцы и певницы двести. 66 Коней их семь сот тридцать шесть, мсков их двести четыредцать пять, 67 велблюдов их четыреста тридцать пять, ослов их шесть тысящ семь сот двадцать. 68 И от князей отечеств, егда вхождаху тии в церковь Господню, яже во Иерусалиме, добровольно принесоша в дом Божий, поставити его на основании его: 69 по силе своей даша в расход дела, злата драхм шестьдесят тысящ и тысящу, и сребра мнас пять тысящ, и одеяний священнических сто. 70 И седоша священницы и левити, и иже от людей, и певцы и дверницы и нафинимляне во градех своих, и весь Израиль во градех своих.

**3** Пришедшу же месяцу седмому, и бяху сынове Израилевы во градех своих, и собращася людие аки человек един



во Иерусалим. 2 И воста Иисус сын Иоседеков и братия его священницы, и Зоровавель сын Салафиилев и братия его, и создаша олтарь Богу Израилеву, да принесут на нем всесожжения, якоже писано есть в законе Моисеа человека Божия. 3 И уготоваша олтарь на основании его, понеже страх бе на них от людей земных, и вознесоша на том всесожжение Господеви утро и в вечер: 4 и сотвориша праздник кущей, якоже писано, и всесожжения на всяк день числом по повелению, дело дне в день свой: 5 и посем всесожжения непрестанная и в новомесячия и во вся праздники Господеви освященные, и о всяцем добровольно приносящем со усердием Господеви. 6 От перваго дне месяца седмаго начаша возносити всесожжения Господеви, дом же Господень не бе еще основан. 7 И вдаша пенязи каменосечцем и древоделем, пищу же и питье и елей Сидоняном и Тиряном, да принесут древа кедрова от Ливана к морю Иоппийскому, якоже соизволи Кир царь Персский о них. 8 И в лето второе, внегда приити им к дому Божию во Иерусалим, месяца втораго нача Зоровавель сын Салафиилев и Иисус сын Иоседеков, и прочии от братии их священницы и левити, и вси, иже приидоша от пленения во Иерусалим, и поставиша левитов от двадесяти лет и вышше над творящими дела во храме Господни. 9 И ста Иисус и сынове его и братия его, Кадоил и сынове его, сынове Иудины, якоже муж един да единомушно настоят над творящими дела в дому Божии, сынове Инададовы, сынове их и братия их левити. 10 И основаша созидающе дом Господень: и сташа священницы во украшении своем со трубами, и левити сынове Асафовы, в кимвалех да хвалят

Господа, по уставу Давида царя Израилева: **11** и вопияху в песнях и исповедании Господеви, яко благ, яко в век милость Его над Израилем: и вси людие возглашаху гласом великим хваление Господу при основании дому Господня. **12** И мнози от священников и левит, и князи отечеств и старейшины, иже видеша дом преждний на основании своем, и сей дом пред очесы своими, плакаху гласом велиим: и народ возглашающь, в веселии возвышаху: **13** и не можаху людие познати гласа восклицания веселящихся от гласов плача народного, понеже людие восклицаху гласом великим, и глас велик слышашеся издалеца.

**4** И услышаша врази Иудины и Вениамини, яко сынове преселения созидают церковь Господу Богу Израилеву, **2** и приступиша к Зоровавелю и ко князем отечеств и рекоша им: созиждем с вами, понеже, якоже и вы, ищем Бога вашего и Ему мы жрем жертву от дний Асарадана царя Ассурска приведшаго ны семо. **3** И рече им Зоровавель и Иисус и прочии князи отечеств Израилевых: несть нам и вам создати дом Богу нашему, понеже мы сами особно созиждем Господу Богу нашему, якоже повеле нам Кир царь Персский. **4** И быша людие земли (тоя) ослабляюще руки людий Иудейских, и препинаху им в созидании, **5** и наимаху на них советников, да разорят совет их, во вся дни Кира царя Персского и даже до царства Дария царя Персского. **6** В царство же Ассира, (иже есть Артаксеркс, ) в начале царства его, написаша свиток на живущих во Иудеи и во Иерусалиме. **7** И во дни Арфасафана написа в мире Мифридат и Тавеил со прочими сослужители ко Артаксерксу царю Персскому: написа писмоносец писание Сирским языком и претолковано.

8 Реум Валтаам и Сампса книгочий написаста послание едино на Иерусалим ко Артаксерксу царю: 9 тако судил Реум Валтаам и Сампса книгочий и прочии сослужителие наши, Динее, Афарсафакее, Тарфалее, Арфасее, Архиейе, Вавилоняне, Сусанакее, Савее, Еламите 10 и прочии от язык, ихже преведе Ассенафар великий и преславный и всели их во градах Самарийских и прочих об он пол реки. 11 Сие есть сказание послания, еже послаша к нему, ко Артаксерксу царю: раби твои, мужие, иже за рекою: 12 ведомо да будет царю, яко Иудее, иже въздоша от тебе к нам, приидоша во Иерусалим град отступный и лукавый, егоже созидают: и стены его состроены суть, и основание его возвысиша: 13 ныне убо ведомо да будет царю, яко, аще град сей создан будет, и стены его совершатся, дани не будут тебе, ниже (летняго воздаяния) дадут: и сие царем зло творит, 14 и посрамощения царева не леть нам видети: сего ради послахом и возвестихом царю, 15 да рассмотрено будет в книзе памятописней отцев твоих, и обрящеши в книзе памятописней и познаеши, яко град он отступный есть и обидяць царей и страны, и убежища слуг бывають посреде его от дний древних, сего ради и град той опустошен есть: 16 ведомо убо творим царю, яко, аще град той создан будет и стены его совершатся, то не будет ти мира. 17 И посла царь ко Реуму Валтааму и Сампсаю книгочию и ко прочым сослужителем их обитающим в Самарии и прочым за рекою Мир 18 и рече: писмоносец, егоже посласте к нам, призван пред мене, 19 и от мене повелено есть, и соглядахом и обретохом, яко град той от дний древних на царей возносится, отступления и убежища бывають в нем:

20 и царие крепцы быша во Иерусалиме и обладаху всею страну, яже за рекою, дани же многи и часть давашеся им: 21 и ныне повелите мужем оным престати от дела, и град оный да не созидается ктому: 22 яко да от повеления сего опасни будете нерадение творити о сем, да не когда умножится погибель на зло царем. 23 Тогда писмоносец Артаксеркса царя прочте свиток пред Реумом Валтаамом и Сампсаем книгочием и сослужителми их: и идоша тщательно во Иерусалим и во Иудею, и удержаша их мышцею сильною. 24 Тогда преста дело дому Божия, еже во Иерусалиме, и не творяшеся даже до лета втораго царства Дариа царя Персского.

**5** Пророчествова же Аггей пророк и Захариа сын Аддов прорицание ко Иудеом, иже бяху во Иудеи и Иерусалиме, во имя Бога Израилева на них. 2 Тогда воста Зоровавель сын Салафиилев и Иисус сын Иоседеков и начаста здати дом Божий, иже во Иерусалиме: и с нима пророцы Божии помогающе има. 3 В то время прииде к ним Фафанай князь сущий за рекою и Сафарвузанай и сослужителие их, и сия рекоша им: кто даде вам власть созидати дом сей и стены сия возставляти? 4 Тогда сия рекоша им: кая суть имена мужей созидающих град сей? 5 И очи Божии на пленение Иудино, и не возбраниша им, дондеже послание к Дарию отнесено, и тогда послася с писмоносцем о сем. 6 Изявление послания, еже посла Фафанай князь об он пол реки и Сафарвузанай и сослужителие их Афарсахее, иже бяху за рекою, Дарию царю: 7 словесы послаша к нему, и сия писана в нем: Дарию царю мир всяк: 8 ведомо да будет царю, яко ходихом во Иудейскую страну к дому

Бога великаго, и той созидается каменiem избранным, и древа ставятся в стенах, дело же то со тщанием строится и благопоспешается в руках их: **9** тогда вопросихом старейшин тех и тако рекохом им: кто даде вам власть дом сей созидати и стены сия возставляти? **10** И о именех их вопросихом их, да возвестим тебе, яко да напишем тебе имена мужей, иже суть начальницы их: **11** и сицева словеса отвещаша нам глаголюще: мы есмы раби Бога небесе и земли, и созидаем дом, иже бысть устроен прежде сего за лета многа, и царь Израилев великий созда его и соверши его им: **12** егда же прогневаша отцы наши Бога небеснаго, предаде их в руки Навуходносора царя Вавилонскаго Халдеанина, и дом сей разори и люди преведе в Вавилон: **13** но в лето первое Кира царя, Кир царь Вавилонский постави повеление, да дом Божий сей созиждется, **14** и сосуды дому Божия златыя и серебряныя, яже Навуходносор взя из дому, иже во Иерусалиме, и отнесе я в храм Вавилонский, изнесе тыя Кир царь от храма Вавилонскаго и даде их Саванасару хранителю, иже над сокровищем, **15** и рече ему: вся сосуды сия возми и иди, и постави их в дому, иже есть во Иерусалиме, на место их: **16** тогда Саванасар той прииде и постави основание дому Божия во Иерусалиме, и от того времени даже доныне созидается, и еще не совершен есть: **17** и ныне аще (видится) царю благо, да посмотрит в дому сокровища царя Вавилонскаго, да увеси, яко от царя Кира бысть повеление созидати дом Божий сей, иже во Иерусалиме, и уведав о сем царь да послет к нам.

**6** Тогда Дарий царь повеле, и искаша во книгохранительницах, идеже сокровище лежит в Вавилоне. **2** И обретесе во Амафе

граде Мидийстем в палате главизна едина, и сие писано  
бе в ней на память: 3 в лето первое Кира царя, Кир царь  
царь повеле о доме Божии, иже во Иерусалиме: дом да  
созидается, и место, идеже жрут жертвы: и положи меру  
высоты лакот шестьдесят, широта его лакот шестьдесят: 4  
и стены каменные твердые три, и стена деревянная едина,  
иждивение же от дому царева да дастся: 5 и сосуди дому  
Божия златии и сребряннии, иже Навуходоносор взя от  
дому, иже во Иерусалиме, и пренесе их в Вавилон, да  
отдадутся и внесутся в дом, иже во Иерусалиме, на место,  
идеже и поставлены бяху в дому Божии: 6 ныне убо дадите,  
князие сущии за рекою, Сафарвузанай и сослужителие их  
Афарсахее, иже за рекою, далече отидите оттуду: 7 ныне  
оставите дело дому Божия: князие Иудейстии и старейшины  
их дом Божий той да созидают на месте своем: 8 и от  
мене повелено бысть, да не когда что сотворите противно  
старейшинам Жидовским в созидании дому Божия онаго:  
и от имений царских даней сущих за рекою прилежно на  
иждивение да дается мужем тем, еже бы не престало дело  
то: 9 и еже аще оскудеет, и телцы и овны и агнцы, во  
всесожжения Богу небесному, пшеница, соль, вино, елей, по  
словеси священников, иже во Иерусалиме, да дается им  
по вся дни, еже аще воспросят, 10 да будут приносящии  
благоухания Богу небесному и да молятся о жизни царя  
и сынов его: 11 и от мене уставлено повеление, да всяк  
человек, иже преступит повеление сие, возмется древо от  
дому его, и воздвижен обесится на нем, и дом его мне  
будет взят: 12 и Бог, Егоже обитает имя тамо, да низвратит  
всякаго царя и люди, иже прострут руку свою пременити

или разорити дом Божий, иже есть во Иерусалиме: аз Дарий поставих повеление, с прилежанием да будет. **13** Тогда Фафанай князь страны заречная, Сафарвузанай и сослужебницы его, якоже посла Дарий царь, тако сотвориша тщательно. **14** Старейшины же Иудейстии созидаху и левити по пророчеству Аггеа пророка и Захарии сына Аддова. И создаша и совершиша по повелению Бога Израилева и по повелению Кира и Дариа и Артаксеркса царей Персских, **15** и совершиша дом той даже до дне третияго, месяца Адара, иже есть в лето шестое царства Дариа царя. **16** Сотвориша же сынове Израилевы, священницы и левити, и прочии сынов преселения обновление дому Божия в радости, **17** и принесоша на обновление дому Божия телцев сто, овнов двести, агнцев четыреста, козлов от коз за грехи всего Израиля дванадесять, по числу колен Израилевых: **18** и поставиша священников в чинех своих и левиты в частех своих на служение дому Божия во Иерусалиме, якоже писано есть в книзе Моисеове. **19** И сотвориша сынове преселения пасху в четвертыйнадесять день месяца перваго: **20** очищени бо бяху священницы и левити даже до единаго вси чисти, и пожроша пасху всем сыном преселения и братии их священником и себе самым. **21** И ядоша сынове Израилевы пасху, иже от преселения, и всяк отлучивыйся от осквернения языков земли к ним, еже взыскати Господа Бога Израилева. **22** И сотвориша праздник опресночный седмь дний в веселии, яко возвесели их Господь и обрати сердце царя Ассурска к ним, укрепити руки их в делех дому Бога Израилева.

**7** По сих же словесех, в царство Артаксеркса царя Персского, взыде Ездра сын Сареа, сына Азариева, сына Хелкиева,

2 сына Селлумля, сына Саддукова, сына Ахитовля, 3 сына Самариева, сына Есриева, сына Мареофова, 4 сына Зараиева, сына Езеиева, сына Воккиева, 5 сына Ависуева, сына Финеесова, сына Елеазарова, сына Аарона священника первого: 6 сей Ездра взыде от Вавилона и сей писец скор в законе Моисеове, егоже даде Господь Бог Израилю. И даде ему царь, яко рука Господа Бога его на нем бе во всех, яже искаше он. 7 И взыдоша от сынов Израилевых и от священников и от левитов, и певцы и придверницы и нафиними во Иерусалим, в лето седмое Артаксеркса царя, 8 и приидоша во Иерусалим месяца пятого: сие есть лето седмое цареве: 9 зане в первый день месяца первого той нача восходити от Вавилона, и в первый день месяца пятого приидоша во Иерусалим, яко рука Бога его блага на нем бе: 10 Ездра бо уготова сердце свое, да възыщет закона (Господня) и да творит и учит во Израили повелением и судбам. 11 И сие есть сказание послания еже даде царь Артаксеркс Ездре священнику, писцу книги словес заповедий Господних и повелений Его во Израили: 12 Артаксеркс царь царей Ездре священнику, писцу закона Господа Бога небеснаго: да совершится слово и ответ: 13 от мене повелено есть, да кийждо, иже имать усердие благо во царстве моем от людей Израилевых и от священников и от левитов поити во Иерусалим, с тобою да идет: 14 от лица царева и седми советников его послан еси, да посетиши Иудею и Иерусалим в законе Бога их, сущем в руку твою, 15 и да отнесеши в дом Господень серебро и злато, еже царь и советницы его со усердием даша Богу Израилеву, Иже во Иерусалиме обитает, 16 и все злато и серебро, еже аще



обрящещи во всей области Вавилонстей, с добровольным даянием людским и священников, волею приносящих в дом Божий, иже во Иерусалиме: 17 и всякий доход той усердно впиши в книгу сию: телцы, овны, агнцы, и жертвы их и возлияния их: и принеси та на олтарь дому Бога вашего, иже есть во Иерусалиме: 18 и аще что тебе и братии твоей благо возмнится от оставшагося серебра и злата сотворити, якоже угодно Богу вашему, сотворите: 19 и сосуды, иже даны тебе в службу дому Божия, вдаждь пред Богом во Иерусалиме: 20 и прочыя потребы дому Бога твоего, еже аще возмнится тебе дати, да даси из домов сокровища царева 21 и от мене аз Артаксеркс царь уставих повеление всем хранителем сокровищ, иже суть за рекою, да все, еже аще воспросит от вас Ездра священник и писец закона Бога небеснаго, готово да будет: 22 серебра даже до ста талант, и пшеницы даже до ста мер, и вина даже до ста бочек, и елеа даже до ста чванов, а соли без записания: 23 все, еже есть по воли Бога небеснаго, да будет в дому Бога небеснаго: вонмите, да не кто прострет руку на дом Бога небеснаго, да не когда будет гнев на царство царево и сынов его: 24 и вам знаемо творим сие, от всех священников и левитов, певцев, дверников, нафинимов и слуг дому Божия дань да не будет тебе, ниже имейте власти поработати их: 25 ты же, Ездра, по премудрости Бога твоего, яже в руце твоей, постави книжники и судии, да судят вся люди, иже суть за рекою, всем знающим закон Бога твоего, и не ведающему ведати сотворите: 26 и всяк, иже не сотворит закона Бога твоего и закона царева усердно, суд да будет сотворен на него, аще в смерть, или в наказание, или во отщечение живота, или в

темницу. 27 Благословен Господь Бог отец наших, иже даде сице в сердце цареву, да прославит дом Господень, иже во Иерусалиме, 28 и на мя уклони милосердие пред очима царя и советников его и всех князей царевых сильных: и аз укреплен бых, яко рука Божия благая на мне, и собрах от Израиля князей взыти со мною.

**8** И сии князие отечеств их вождеве, иже въздоша со мною в царство Артаксеркса царя Вавилонска: 2 от сынов Финеесовых Гирсон, от сынов Ифамарих Даниил, от сынов Давидовых Аттус, 3 от сынов Саханиинных, от сынов Форосовых Захариа, и с ним мужей сто пятьдесят, 4 от сынов Фааф-Моава Елиана сын Сараиев, и с ним двести мужей, 5 и от сынов Зафоисовых Ехения сын Азиилев, и с ним триста мужей, 6 и от сынов Адиных Овин сын Ионафанов, и с ним пятьдесят мужей, 7 и от сынов Едамлих Исаиа сын Афелиин, и с ним седмьдесят мужей, 8 и от сынов Сафатиевых Завдиа сын Михаилов, и с ним осмьдесят мужей, 9 и от сынов Иоавлих Авдиа сын Иеиилев и с ним двести осмьнадесять мужей, 10 и от сынов Вааниевых Селимуф сын Иосефиев, и с ним сто шестьдесят мужей, 11 и от сынов Вавиевых Захариа сын Вавиев, и с ним двадесять осмь мужей, 12 и от сынов Азгадовых Ионан сын Икатанов, и с ним сто десять мужей, 13 и от сынов Адоникамлих последнии, и сия имена их: Едифалаф, Иеиил и Самаиа, и с ним шестьдесят мужей, 14 и от сынов Вагуаевых Уфай и Завуд, и с ними седмьдесят мужей. 15 Собрах же их к реце текущей ко Евии, и пребыхом ту три дни: исках же в людех и во священницех, и от сынов Левиинных не обретох тамо. 16 И послах ко Елеазару, Ариилу, Семейю и к Маонану, и Иериву и Елнафаму, и Нафану и

Захарии и Месолламу, и ко Иоариму и Елнафану, премудрых, 17 и изведох их ко Адаю начальнику на месте Касфия и вложих во уста их словеса глаголати ко Адаю и братии его афинимом на месте Касфии, привести нам поющих в дом Бога нашего. 18 И приидоша к нам, понеже рука Бога нашего бе блага на нас, муж сахон от сынов Моолиевых сына Левиина, сына Израилева, и Саравиа, и сынове его и братия его осмьнадесять: 19 и Асевиа, и Исаиа от сынов Мерариных и братия его и сынове его двадесять: 20 и от нафинимов, ихже даде Давид и князие ко службе левитом, нафинимов двести двадесять, вси собращася по именом. 21 И проповедах тамо пост близ реки Ауди, еже смиритися пред Господем Богом нашим, просити от Него пути праваго нам и чадом нашим и всему стяжанию нашему: 22 устыдехся бо испросити от царя силы и конник защитити нас от врага на пути, понеже рехом царю глаголюще: рука Бога нашего есть на всех ищущих Его во благое и крепость Его, ярость же Его на всех оставляющих Его. 23 Постихомся же и молихомся Богу нашему о сем, и услыша нас. 24 И отлучих от князей священнических дванадесять, Сараию, Асавию и с ними от братии их десять: 25 возвеснх же им серебро и злато и сосуды начатков дому Бога нашего, яже вознесе царь и советницы его и князие его, и весь Израиль обретаяйся, 26 и дах весом в руки их серебра талантов шесть сот пятьдесят, и сосудов серебряных сто, и злата сто талант, 27 и чаш златых двадесять, драхм тысящу, и сосуды меди светлыя добрыя различныя, драгоценныя яко злато, 28 и рекох им: вы святи Господу Богу, и сосуди святи и серебро и злато, еже волею вдано есть Господу Богу отец наших: 29 бдите и стрегите, дондеже весом отдадите

пред князи священников и левитов и пред князи отечеств Израилевых во Иерусалиме, во скинних дому Господня. **30** И прияша священницы и левити вес сребра и злата и сосудов, да вознесут во Иерусалим в дом Бога нашего. **31** И воздвигохомся от реки Ауи во вторыйнадесять день месяца перваго, да идем во Иерусалим: и рука Бога нашего бе на нас и избави нас от рук вражиих и ратников на пути, **32** и приидохом во Иерусалим и пребыхом ту три дни. **33** И бысть в день четвертый, отдахом весом сребро и злато и сосуды в дому Бога нашего под руку Маримофа сына Урии священника, и с ним Елеазар сын Финеесов, и с ними Иозавад сын Иисусов и Ноадия сын Ванаиев левити, **34** по числу и весу вся: и написан бысть весь вес. **35** Во время то, иже приидоша от пленения сынове преселения, принесоша всесожжения Богу Израилеву, телцев дванадесять за всего Израиля, овнов девяност шесть, агнцев седмьдесят седмь, козлов за грехи дванадесять, вся во всесожжение Господу. **36** И даша повеление царево правителем царским и князем, иже за рекою: и прославиша людей и дом Божий.

**9** И егда совершена быша сия, приступиша ко мне князие, глаголюще: не отлучишася людие Израилевы и священницы и левити от людей земных, (но) в мерзостех их (суть), иже суть Хананее, Еффее, Ферезее, Иевусее, Аммонитяне, Моавитяне и Мосеритяне и Аморреане, **2** понеже пояша от дщерей их себе и сыном своим, и смесися семя святое с людьми земными, и рука князей и воевод в преступлении сем в начале. **3** И егда услышах словеса сия, раздрах ризы моя, и вострепетах, и терзах власы главы моея и брады моея, и седох тужа. **4** И собращася ко мне вси боящиися слова

Бога Израилева за преступление пришедших от пленения, и аз седях прискорбен даже до жертвы вечерняя. 5 И в жертву вечернюю востях от сетования моего, и внегда раздрах ризы моя, и трепетах, и преклоних колена моя, и прострох руже мои ко Господу Богу моему 6 и рекох: Господи Боже мой, стыждуся и срамляюся воздвигнути лице мое к Тебе, яко беззакония наша умножишася паче глав наших, и прегрешения наша возрасташа даже до небесе: 7 от дний отец наших в преступлении велицем есмы даже до дне сего, и в беззакониих наших предани есмы мы и царие наши и священницы наши и сынове наши в руку царей языческих, в мечь и в пленение, и в расхищение и в стыдение лица нашего, якоже в день сей: 8 и ныне умилиствися над нами Бог наш, еже оставити ны во спасение и дати нам твердость на месте святыни Его, еже просветити очеса наша и дати оживление малое в работе нашей: 9 яко раби есмы, и в работе нашей не остави нас Господь Бог наш: и преклони на нас милосердие пред цари Персскими, дати нам живот, еже воздвигнути им дом Богу нашему и возставити запустевшая его, и дати нам ограждение во Иудеи и Иерусалиме: 10 и ныне что речем, Боже наш, по сем? Яко оставихом повеления Твоя, 11 яже дал еси нам рукою раб Твоих пророков, глаголя: земля, на нюже вы входите наследити ю, земля нечиста есть, по нечистоте людей языческих, в мерзостех их, имиже наполниша ю от уст даже до уст во сквернениих своих, 12 и ныне дочерей ваших не дадите сыном их и дочерей их не приемлите сыновом вашим, и не ищите мира их и блага их даже до века, яко да укрепитеся и снесите благая земли, и наследие дадите сыновом вашим даже до века: 13 и по всех,

яже приидоша на нас в делех наших злых и гресе нашем велицем, понеже несть якоже Бог наш, иже избавил еси нас от беззаконий наших и дал еси нам спасение: **14** зане обратихомся разорити заповеди Твоя и смеситися с людьми земными: не прогневайся на нас даже до скончания, еже не быти останку и спасаемому: **15** Господи Боже Израилев, праведен еси Ты, яко остахомся спасени, якоже день сей: се, мы пред Тобою есмы вси в беззакониих наших, понеже не возможно стати пред Тобою сего ради.

**10** И егда моляшеся Ездра и егда исповедашеся плачушь и моляся пред домом Божиим, собращая к нему от Израиля собрание велие зело, мужие и жены и отроцы яко плакахуся людие и вознесоша плачь. **2** И отвеща Сехения сын Иеилев от сынов Иламлих и рече Ездре: мы преступихом пред Богом нашим и пояхом жены чуждия от людей земли, и ныне есть упование Израилю о сем: **3** и ныне завещаем завет Богу нашему, да отвержем вся жены и рожденных от них, якоже хочет: востани и устраши их заповедьми Бога нашего, и по закону да будет: **4** востани, понеже на тебе есть глагол, и мы с тобою: укрепися и сотвори. **5** И воста Ездра, и закле князи, священники и левиты и всего Израиля, да сотворят по словеси сему. И кляшася. **6** И воста Ездра от лица дому Божия и иде в сокровищный дом Ионана сына Елисувова и седе тамо: хлеба не яде и воды не пи, плакаше бо о преступлении пришедших от пленения. **7** И послано бысть слово во Иудею и во Иерусалим всем сыновом преселения, да соберутся во Иерусалим: **8** всяк, иже аще не приидет в три дни, по совету князей и старейшин, возмется все имение его, и той отлучен будет от сонмища

преселения. 9 И собрашася вси мужие Иудины и Вениамины во Иерусалим тремя денми: сей есть месяц девятый: в двадесятый день месяца седоша вси людие пред домом Божиим трепещуще о словеси и от зимы. 10 И воста Ездра священник и рече к ним: вы преступисте и взясте жены иноплеменнически, еже приложити ко греху Израилеву: 11 и ныне дадите хвалу Господу Богу отец наших, и сотворите угодное пред Ним, и отлучитесь от людей земли и от жен иноплеменнических. 12 И отвещаша все множество гласом великим и рече: по словеси твоему к нам сотворим: 13 обаче людие мнози суть, и время зимнее, и несть мощно стояти вне: и дело несть дне единого или двух, зело бо много согрешихом во словеси сем: 14 да поставятся князие наши во всем множестве и во всех градах наших, иже пояша жены иноплеменничи, да приидут во времена повеленная, и с ними старейшины от всякаго града и судии, еже отвратити гнев ярости Бога нашего от нас словесе ради сего. 15 Обаче Ионафан сын Асаилев и Иасса сын Фекуев со мною о сем, и Месоллам и Савафай левитин помагай им. 16 И сотвориша тако сынове преселения: и разыдошася Ездра священник и мужие князие отечеств в дома, и вси по именем, яко обратишася в день первый месяца десятого, да възыщут глагола: 17 и совершиша во всех мужех, иже пояша жены иноплеменничи, даже до дне перваго месяца перваго. 18 И обретени суть от сынов священнических иже введоша жены иноплеменничи, от сынов Иисуса сына Иоседекова и братия его Маасиа и Елиезер, и Иарим и Гадалиа: 19 и даша руки своя изгонити жены своя, и согрешившии принесоша от овец о преступлении своем овна: 20 и от сынов Еммировых

Ананий и Завдиа: 21 и от сынов Ирамлих Маасиа и Еллия, и Самиа и Иеиил и Озиа: 22 и от сынов Фассуровых Елиоинай, Маасиа и Исмаил, и Нафанаель и Иозавад и Иласа: 23 и от левитов Иозавад и Фамуй и Колия, тойже и Колит, и Фефеиа, и Иуда и Елиезер: 24 и от певцев Елисав: и от дверник Солмин и Телмин и Одуа: 25 и от Израиля, от сынов Форосовых Рамиа и Азиа, и Мелхиа и Мелмин, и Елиазар и Асавиа и Ванеа: 26 и от сынов Иламовых Матфаниа и Захариа, и Иаиил и Авдий, и Иеримоф и Илиа: 27 и от сынов Зафуевых Елионай, Елисув, Мафанай и Армоф, и Завад и Озиза: 28 и от сынов Вавеиных Ионан, Ананиа и Завуй и Фали: 29 и от сынов Вануевых Мосоллам, Маллух, Адаиа, Иасув и Саал и Римоф: 30 и от сынов Фааф-Моавлих Еднеа и Халил и Ванаиа, Маасиа, Матфаниа, Веселеил и Вануй и Манассии: 31 и от сынов Ирамовых Елиезер, Иесиа, Мелхиа, Самаиа, Семеон, 32 Вениамин, Малух, Самариа: 33 и от сынов Асимовых Метфанаиа, Мафафа, Завад, Елифалет, Иерами Манассий, Семей: 34 и от сынов Ванииных Моодиа, Амрам и Уил, 35 Ванаиа, Вадаиа, Хелиа, 36 Уаниа, Маримоф и Елиасив, 37 Матфаниа Мафанай. 38 И сотвориша сынове Вануиевы и сынове Семеины, 39 и Салемиа и Нафан и Адаиа, 40 Махнада, Авусесей, 41 Аруесриил и Самариа, 42 Селлум, Амариа, Иосиф: 43 от сынов Навуиных Иеиил, Мафафиа, Завад, Зевенай, Иадай и Иоиль и Ванеа. 44 Все тии пояша жены иноплеменнически, и родиша от них сыны.



# Книга Неемии

**1** Словеса Неемии сына Ахалиина. И бысть в месяце Хаселев, двадесятого лета, и аз бех в Сусан-Авире. **2** И прииде (ко мне) Анания един от братий моих с мужи Иудовы, и вопросих их о спасшихся, иже ошастася от пленения, и о Иерусалиме. **3** И рекоша ми: оставшиися от пленения тамо во стране, во озлоблении велице и в поношении, и стены Иерусалимския разорены, и врата его сожжена огнем. **4** И бысть егда услышах словеса сия, седох и плаках и рыдах дни (много), и бех постяся и моляся пред лицом Бога небеснаго, **5** и рекох: молю Тя, Господи Боже небесный, крепкий, великий и страшный, храняй завет и милосердие любящим Тя и хранящим заповеди Твоя: **6** да будут уши Твои внимлюще и очи Твои отверсте, еже слышати молитву раба Твоего, еуже аз молюся пред Тобою днесь, день и ночь, о сынех Израилевых рабех Твоих: и исповедаюся о гресех сынов Израилевых, имиже согрешихом пред Тобою, и аз и дом отца моего согрешихом: **7** преступлением преступихом Тебе и не сохранихом заповедий (твоих) и повелений и судеб, яже повелел еси Моисею рабу Твоему: **8** помяни убо слово, еже заповедал еси Моисею рабу Твоему глаголя: аще преступите вы, Аз расточу вы в люди, **9** и аще обратитесь ко Мне и сохраните заповеди Моя и сотворите я, аще будет разсеяние ваше до конца небесе, оттуду соберу вы и введу вы в место, еже избрах вселитися имени Моему тамо: **10** и тии раби Твои и людие Твои, ихже искупил еси силою Твоей великою и рукою Твоею крепкою: **11** молю, Господи, да будет ухо Твое внимлющее на молитву раба Твоего и на молитву рабов Твоих хотящих боятися имене Твоего: и благопоспешу убо

рабу Твоему днесь, и даждь его в щедроты пред мужем сим.  
И аз бых виночерпчий царев.

**2** И бысть в месяце Нисане лета двадесятаго Артаксеркса царя, и вино бе предо мною: и взях вино и дах царю, и не бе ин пред ним. **2** И рече ми царь: чесо ради лице твое прискорбно есть, а неси болезную? И несть сие, разве скорбь сердца. И убояхся зело **3** и рекох царю: царю, во веки живи: како не быти прискорбну лицу моему, понеже град, дом гробов отец моих опусте, и врата его сожжена суть огнем. **4** И рече ми царь: почто о сем ты вопрошаеши? И помолихся Господу Богу небесному **5** и рекох ко царю: аще царю видится благо, и аще угоден будет раб твой пред тобою, да послеши мене во Иудею, во град гробов отец моих, и возсозижду его. **6** Рече же ми царь, и наложница седяше близ его: до коего времени будет путь твой, и когда возвратишия? И угодно бысть пред лицом царевым, и посла мя, и положих ему время. **7** И рекох царю: аще царю видится благо, даждь мне послание ко воеводам стран за рекою, да преведут мене, дондеже прииду во Иудею, **8** и послание ко Асафу стражу дубравы царевы, да даст ми древа покрыти врата столпа дому, и на стены градныхя, и на дом, в оньже вниду. И даде ми царь, якоже рука Божия благая (бе) со мною. **9** И приидох ко воеводам стран за рекою и дах им послание царевое: посла же царь со мною начальники силы и конницы. **10** И услыша Санаваллат Аронитин и Товиа раб Аммонитин, и зло има бысть, яко прииде человек взыскати блага сыновом Израилевым. **11** И приидох во Иерусалим и бых ту три дни. **12** И востах нощию аз и мужие не мнози со мною, и ни комуже возвестих, что Бог дает в сердце мое

сотворити со Израилем, и скота не бе со мною, токмо скот, на немже аз седях. 13 И внидох во врата Юдоли нощию, ко устью источника Смоковничнаго и ко вратом Гнойным, и бых размышляя о стене Иерусалимстей разореней и о вратах его пояденых огнем. 14 И приидох ко вратом Источника и ко купели царева, и не бысть места скоту, на немже седях, да пройдет. 15 И взыдох на стену потока нощию, и размышлях о стене, и бех во вратех Юдоли, и возвратихся. 16 СтрегуЩИи же не ведяху, камо ходих и что аз творю, и Иудеом и священником, и честным и воеводам и прочым творящым дела даже до тогда не сказах. 17 И рекох им: вы видите озлобление сие, в немже есмы, како Иерусалим опустошен, и врата его предана огню: приидите, и созиждем стены Иерусалима, и не будем ктому в поношение. 18 И сказах им руку Божию, яже есть блага со мною, и словеса царева, яже глагола мне, и рекох: востанем и созиждем. И укрепишася руцы их во благое. 19 И услыша Санаваллат Аронитин и Товиа раб Аммонитин и Гисам Аравитин, и посмеяшася нам, и придоша к нам, и уничижиша, и рекоша: что дело сие, еже вы творите? Еда вы противу царя отметаеся? 20 И воздах им слово и рекох к ним: Бог Небесе, Той благопоспешит нам, и мы раби Его чистии, (востанем) и созиждем: вам же несть части и правды и памяти во Иерусалиме.

**3** И воста Елиасув священник великий и братия его священницы, и создаша врата Овчая: сии освятиша их и поставиша двери их и даже до столпа Ста Лакот освятиша их, даже до столпа Анамеиля. 2 И близ его созидаша мужие Иерихонстии, и близ их созида Закхур сын Аманиин. 3 Врата же Рыбная созидаша сынове Асанаевы: сии покрыша их и

поставиша двери их и заворы их и вереи их. 4 И близ их созидаше из Рамофы сын Уриин, сына Аккосова: и близ его созидаше Мосоллам сын Варахиин, сына Мазевиля: и близ их созидаше Садок сын Ваанаев: 5 и близ их созидаша Фекоими, сильнии же их не положиша выи своя в дело Господа Бога своего. 6 И врата старая созидаше Иоида сын Фасеков и Месуллам сын Васодиев: тии покрыста их и поставиша двери их и заворы и вереи их. 7 И близ их созидаша Малтия Гаваонитин и Еварон Миронофит, мужие от Гаваона и Масфы, даже до престола князя (иже бысть) об он пол реки. 8 И близ его созида Озиил сын Арахиев златарь: и близ его созида Анания сын Рокеима, и возставиша Иерусалим даже до стены широкия. 9 И близ их созидаше Рафаиа сын Сурин, начальник половины окрестных страны Иерусалимли. 10 И близ их созидаше Иедеа сын Еромафов, и противу дому его: и близ его созида Аттуф сын Асаваниин. 11 И вторую часть созидаше Мелхиа сын Ирамов и Асуб сын Фааф-Моавль, и даже до столпа Пещнаго. 12 И близ его созидаше Саллум сын Аллоисов, начальник половины страны окрестных Иерусалимли, той и дщери его. 13 Врата Юдоли созидаша Анун и обитающии в Заноне: тии создаша их и поставиша двери их и заворы их и вереи их, и тысяща лакот в стене даже до врат Гнойных. 14 И врата Гнойная созидаше Мелхиа сын Рихавль, начальник окрестных страны Вифакрамския, той и сынове его, и покрыша их и поставиша двери их и заворы их и вереи их. 15 И врата Источника созидаше Соломон сын Халезеев, начальник страны Масфы: той созда их и покры их, и постави двери их и заворы их и вереи их, и стену купели Силоамли ко вертограду цареву и

даже до степеней низходящих от града Давидова. 16 По немже созидаше Неемиа сын Завухов, начальник половины страны Вифсуровы, даже до вертограда гроба Давидова и даже до купели устроеныя и даже до дому сильных. 17 По нем созидаша левити, Раум сын Ванаимль: по нем созидаше Асавиа, начальник половины страны Кеилы на стране своей, 18 и по нем созидаша братия их, Веней сын Инададов, начальник половины окрестныя страны Кеилы. 19 И созидаше близ его Азур сын Иисусов, начальник Масфы, меру вторую столпа восхода касающагося углу. 20 И по нем созидаше Варух, сын Завуев, меру вторую от угла даже до врат дому Елиасува священника великаго. 21 По нем созидаше Мерамоф сын Урии, сына Аккосова, меру вторую от врат дому Елиасувова даже до конца дому Елиасувова. 22 И по нем созидаша священницы, мужие от поля (иорданска). 23 И по нем созидаста Вениамин и Асув противу домов своих: и по нем созидаше Азариа сын Маасиев, сына Ананиина, близ дому своего. 24 По нем созидаше Ваней сын Ададов меру вторую от дому Азарии даже до угла и даже до уклонения. 25 Фалах сын Узаин противу угла и столпа возвышеннаго из дому царева высоко, иже во дворе темничнем: и по нем Фадаиа сын Форосов. 26 И нафиними обиташа во Офале, даже до вертограда врат Водных ко востоком и даже до столпа, иже бе возвышен. 27 И по них созидаша Фекоими меру вторую от страны столпа великаго и высокаго даже до стены Офлы. 28 Вышше врат Конских созидаша священницы, един кийждо противу дому своего. 29 И по нем созидаше Саддук сын Еммирь противу дому своего: и по нем созидаше Самаиа сын Сехениев, страж врат восточных. 30 По нем созидаше

Ананиа сын Селемиев и Аном сын Селефов шестый меру вторую: по нем созидаше Месуллам сын Варахийев противу сокровищницы своея. 31 По нем созидаше Мелхиа сын Сарефиев даже до дому нафинимля и щиты продающих, противу врат Судных, и даже до горницы угла. 32 И посреде врат Овчих созидаша ковачи и щитопродавцы.

**4** И бысть егда услыша Санаваллат, яко мы созидаем стены, и зло ему вменися, и разгневался зело, и посмеяшеса Иудеом, 2 и рече пред братиею своею, иже бяху сила Соморов, и рече: что Иудее сии созидают свой град? Еда жрети будут? Или возмогут? Или днесь изцелят камене, повнегда быти им в прах земли сожженным? 3 И Товиа Амманитянин близ его прииде и рече им: еда пожрут, или ясти имут на месте своем? Не взыдет ли лисица и разорит стену каменей их? 4 И рече Неемиа: услыши, Боже наш, яко сотворени есмы в посмеяние, 5 и обрати поношение их на главу их, и даждь их в посмеяние в землю пленения, 6 и не покрый беззакония их. 7 Бысть же егда услыша Санаваллат и Товиа, и Аравляне и Амманите, яко възыде отрасль стен Иерусалимских, зане начаша расселины заграждати, и зло им явися зело. 8 И собращася вси вкупе, да приидут и ополчатся на Иерусалим и разорят его. 9 И молихомся ко Богу нашему и поставихом стражи на стене противу их день и ночь от лица их. 10 Рече же Иуда: истомлена есть сила (от) враг, и земля многа есть, и мы не можем созидати стены. 11 И рекоша оскорбляющи нас: не познают и не увидят, дондеже приидем посреде их и убием их, и престати сотворим делу. 12 И бысть егда приидоша Иудее, иже обитаху близ их, и реша нам: восходят от всех язык на ны. 13 И поставих в нижайших местех созади

стен в закровении, и поставих люди по племеном с мечи их и с сулицами их и с луками. 14 И видех, и востах, и рекох ко честным и к воеводам и ко прочым людям: не убойтея от лица их, помяните Господа Бога нашего великаго и страшнаго, и ополчитесь за братию вашу, за сыны ваша и дщери ваша, жены ваша и дома ваша. 15 Бысть же егда услышаша врази наши, яко ведомо бысть нам, и разори Бог совет их: и возвратихомся вси мы на стены, кийждо ко делу своему. 16 И бысть от дне того, пол вчиненых делаху дело, и половина их уготована бысть ко брани с сулицами и щитами, и луки и бронями, и началницы созади всего дому Иудина. 17 Созидающии стену и носящии бремена со оружием: единою рукою своею творяху дело, а другою держяху мечь. 18 Созидающим же единому коемуждо мечь бысть опоясан при бедре его, и созидаху, и трубяху трубами близ их. 19 И рекох ко честным и ко старейшинам и ко прочым людям: дело велико есть и пространно, и мы разлучени есмы на стене далече кийждо от брата своего: 20 на месте идеже услышите глас трубный, тамо тецьте к нам, и Бог наш ополчится о нас. 21 И мы быхом творяще дело, и пол нас держяху сулицы от восхода зари утренния даже до восхода звезд. 22 Во время же то рекох людям: кийждо со отроком своим да пребывает в среде Иерусалима: и будет вам ночь на стражу, а день на делание. 23 Аз же и братия мои и отроцы и мужие стражи, иже бяху созади мене, не снимахом одеяний наших тамо ни един от нас.

**5** И бысть вопль людей и жен их велик на братию свою Иудеи. 2 И быша нецыи глаголюще: сынове наши и дщери наша мнози суть нам, и да возмем (за цену) пшеницу и

ядим и живи будем. 3 И быша нецыи глаголюще: села наша и винограды наша и дома наша мы да дадим в залог, и возмем пшеницу, и ясти будем. 4 И быша нецыи глаголюще: взаим взяхом сребро на дани царевы, дадим села наша и винограды наша и дома наша: 5 и ныне якоже плоть братий наших, плоть наша, якоже сынове их, сынове наши: и се, мы порабощаем сыны наша и дщери наша в рабы, и суть от дщерей наших порабощены, и несть силы в руках наших (откупити) и села наша и винограды наша у вельмож. 6 И оскорбех зело, егда услышах вопль их и словеса сия. 7 И усоветова сердце мое во мне, и воспретих державным и начальным и рекох им: лихвы ли кийждо от брата своего истяжет, юже вы истязуете? И собрах противу им собрание велико 8 и рекох им: мы искупихом братию нашу Иудеов, проданных языком, по силе нашей: вы же продасте братию вашу, и отдадутся нам? И умолчаша, и не обретоша что отвещати. 9 И рекох: не добро дело, еже вы творите: тако не во страхе Бога нашего (ходяще) убежите ли от поношения языков врагов наших? 10 И аз и братия моя и знаемии мои взаим дахом им пенязи и пшеницу: оставим убо лихоимство сие: 11 возвратите же им днесь села их и винограды их и маслины их и дома их, и от сребра пшеницу и вино и елей отдадите им. 12 И рекоша: отдадим и от них не взыщем, тако сотворим, якоже ты глаголеши. И призвах священников и заклых их сотворити по словеси сему. 13 И отрясох одежду мою и рекох: тако да истрясет Бог всякаго мужа, иже не исполнит слова сего, от дому его и от трудов его, и да будет тако отрясен и тощъ. И рече все множество: аминь. И восхвалиша Бога. И сотвориша людие по глаголу сему. 14



От дне того, в онъже повеле (царь) мне быти вождем их в земли Иудине, от лета двадесятаго и даже до лета тридесять втораго Артаксеркса царя, лет дванадесять, аз и братия моя оброку их не ядохом. 15 И оброков первых, имиже прежде мене отягчиша их, и прияша от них в хлебе и в вине, по сих сребра (на всяк день) дидрахм четыредесять: и служебницы их обладаша людьми. Аз же не сотворих тако ради страха Божия. 16 И в деле стены сия созидах: и села не стяжах, и вси отроцы мои собрани бяху тамо на дело. 17 Иудей же и начальников сто пятьдесят мужей, и приходящие к нам от язык, иже окрест нас, при трапезе Моей. 18 И бе уготовано мне на всяк день: телец един и овец шесть избранных и козел быша мне (и птицы), и между десяти дний всем вина много: и с сими хлеба господству моему не взысках, зане тяжка работа на людех сих. 19 Помяни мя, Боже мой, во благо по всем, елика сотворих людем сим.

**6** Бысть же егда услыша Санаваллат и Товиа и Гисам Аравийский и прочии врази наши, яко создах стену, и не оставя в них скважня: и аз даже до времени онаго дверей не поставих во вратех: 2 и посла Санаваллат и Гисам ко мне, глаголюща: прииди, и соберемся вкупе в весех на поли Оно (глаголемем). Тии же помышляста мне сотворити злое. 3 И послах к нима послов, глаголя: дело велико аз творю и не могу снити, да не престанет дело: егда же совершу е, взыду к вама. 4 И посласта ко мне, якоже глагол сей, четырижды, и послах к нима по сим. 5 И присла ко мне Санаваллат пятое отрока своего, и послание отверсто в руку его, и бе написано в нем: 6 во языцех услышано есть, и Гисам рече, яко ты и Иудее мыслите отступити, сего ради

ты созидаеши стену, и ты да будеши им в царя: 7 и к сим пророки поставил еси себе, да будеши во Иерусалиме царем над Иудею: и ныне возвестятся царю словеса сия: и сего ради ныне прииди, да сотворима совет вкупе. 8 И послах к нему, глаголя: не сотворися по словесем сим, якоже ты глаголеши, зане от сердца твоего ты лжеши в сих: 9 яко вси страшат нас, глаголюще: ослабют руцы их от дела сего, и не сотворится: и ныне укрепих руки моя. 10 И аз внидох в дом Семеа сына Далаиева, сына Метавеилева, и той заключен, и рече: да соберемся в дом Божий посреде его и заключим двери его, яко приходят нощию, да убьют тя. 11 И рекох: кто есть муж, яков аз, и убежит? Или кто яко аз, иже внидет в дом, и жив будет? Не вниду. 12 И уразумех, и се, Бог не посла его: яко пророчествова слово на мя. 13 И Товиа и Санаваллат наядо на мя народ, да устрашуся, и сотворю тако, и согрешу, и да буду им во имя зло, яко да поносят ми. 14 Помяни, Боже, Товию и Санаваллата по делом их сим, и Ноадия пророка и прочих пророк, иже устрашаху мя. 15 И совершися стена в двадцать пятый месяца Елула в пятьдесят и два дни. 16 И бысть егда услышаша вси врази наши, и убояшася вси языцы, иже окрест нас, и нападе страх велик пред очи их, и познаша, яко от Господа Бога нашего совершенно бысть дело сие. 17 И во дни оны от многих державных Иудиных послания прихождаху к Товии, и Товиина (послания) прихождаху к ним. 18 Мнози бо во Иудеи кляшася ему, яко зять бе Сехении сына Ираева: и Ионафан сын его поя дщерь Месулама сына Варахиина в жену. 19 И словеса его быша глаголющии ко мне, и словеса моя быша износящии ему. И послание посла Товиа, да устрашит мене.

**7** И бысть егда создася стена, и поставих двери, и сочтох придверники и певцы и левиты: **2** и повелех Анании брату моему и Анании начальнику дому, иже во Иерусалиме: той бо бе яко муж истинен и бояйся Бога паче прочих: **3** и рекох има: да не отверзутся врата Иерусалимская, дондеже взыдет солнце: и еще им бдящым, да заключатся врата и засунута да будут засовами: и постави стражи от обитающих во Иерусалиме, кийждо во стражи своей и кийждо противу дому своего. **4** Град же бысть широк и велик, и людей мало в нем, и не бяху дома создани. **5** И даде Бог в сердце мое, и собрах честных и князей и народ в собрание: и обретох книгу сочисления тех, иже въздоша первее, и обретох написано в ней: **6** и тии сынове страны възшедшии от пленения преселения, ихже пресели Навуходоносор царь Вавилонский, и возвратишася во Иерусалим и Иудею, кийждо муж во град свой, **7** с Зоровавелем и Иисусом и Неемиею, Азариа и Веелма, Наеман, Мардохей, Ваасан, Маасфараф, Ездра, Вогуиа, Инаум, Ваана, Масфар, мужие людей Израилевых: **8** сынове Форосовы две тысящы сто семьдесят два, **9** сынове Сафатиевы триста семьдесят два, **10** сынове Ираевы шесть сот пятьдесят два, **11** сынове Фааф-Моавли сынов Иисусовых и Иоавлих две тысящы шесть сот и осмьнадесять, **12** сынове Еламовы тысяща двести пятьдесят четыри, **13** сынове Соффуевы осмь сот четыредесять пять, **14** сынове Заханевы семь сот шестьдесят, **15** сынове Вануиевы шесть сот четыредесять осмь, **16** сынове Вереиевы шесть сот двадесять осмь, **17** сынове Гетадовы две тысящы триста двадесять два, **18** сынове Адоникамли шесть сот шестьдесят семь, **19** сынове Вагуиевы две

тысящи шестьдесят семь, 20 сынове Идини шесть сот пятьдесят четыре, 21 сынове Атировы и сынове Езекиевы девяносто восемь, 22 сынове Исамиевы триста двадцать восемь, 23 сынове Васеиевы триста двадцать четыре, 24 сынове Арифовы сто дванадцать, сынове Асеновы двести двадцать три, 25 сынове Гаваони девяносто пять, 26 сынове Вефалеимли сто двадцать три, сынове Атофовы пятьдесят шесть, 27 сынове Анаффовы сто двадцать восемь, 28 сынове Азамофовы, мужие Вифовы, сорок два, 29 мужие Кариафиаримли, Кафировы и Вирофовы семь сот сорок три, 30 мужие Арама и Гаваа шесть сот двадцать один, 31 мужие Махимасовы сто двадцать два, 32 мужие Вефили и Аиевы сто двадцать три, мужие анавиа другаго сто пятьдесят два, 33 сынове Мегевосовы сто пятьдесят шесть, 34 мужие Иламаевы тысяща двести пятьдесят два, 35 сынове Ирамли триста двадцать, 36 сынове Иериховы триста сорок пять, 37 сынове Лодовы, Адидовы и Оновы семь сот двадцать один, 38 сынове Ананины три тысящи девять сот тридцать: 39 священницы, сынове Иодаевы в дому Исусове девять сот семьдесят три, 40 сынове Еммировы тысяща пятьдесят два, 41 сынове Фассеуровы тысяща двести сорок семь, 42 сынове Ирамовы тысяща семнадцать: 43 левиты, сынове Исуса Кадмиильскаго от сынов Удуилих сорок четыре: 44 певцы, сынове Асафовы сто двадцать восемь: 45 дверницы сынове Селлумли, 46 сынове Атировы, сынове Телмони, сынове Аккувовы, сынове Атитовы, сынове Савиины сто тридцать восемь: 47 нафиними, сынове Илаевы, сынове Асефовы, сынове

Заваофовы, 48 сынове Кирасовы, сынове Сисаины, сынове Фадони, сынове Лавани, сынове Агавовы, сынове Акувовы, 49 сынове Утаевы, сынове Китаровы, сынове Гавовы, сынове Селмеины, сынове Анановы, 50 сынове Садеины, сынове Гааровы, сынове Рааины, 51 сынове Раасони, сынове Некодовы, 52 сынове Гизамли, сынове Озины, сынове Фессовы, 53 сынове Висиины, сынове Меиноновы, сынове Нефосаины, 54 сынове Ваквуковы, сынове Ахифовы, сынове Арурины, 55 сынове Васалофовы, сынове Мидаевы, сынове Адасани, 56 сынове Варкуевы, сынове Сисарафовы, сынове Фимаевы, 57 сынове Нисиины, сынове Атифовы: сынове рабов Соломоновых, 58 сынове Сутеины, сынове Сафаратовы, сынове Феридины, 59 сынове Лелилины, сынове Доркони, сынове Гадали, сынове Фарахасовы, 60 сынове Саваини, сынове Иммини: 61 вси Нафиними и сынове слуг Соломоновых триста девяност два. 62 И сии въздоша от Фелмефа, Феласар, Харув, Ирон, Иемир, и не могоша сказати домов отечеств своих и семене своего, от Израиля ли быша: 63 сынове Далеаевы, сынове Вуаевы, сынове Товиины, сынове Некодаевы, шесть сот четыредесять два: 64 и от священник сынове Авиевы, сынове Аккосовы, сынове Верзеллаины, яко пояша от дщерей Верзеллаа Галаадитина жены и прозвашася по имени их. 65 Сии искаша писания своего родословия, и не обретоша, и извержени суть от священства. 66 Рече же Аферсафа им, да не ядят от святая святых, дондеже востанет священник изьявляй. 67 И бысть весь собор единодушно аки четыредесять две тысящы триста шестьдесят, 68 кроме рабов их и рабынь их, ихже бяху седмь тысящ триста тридесять седмь: и певцы и певницы

двести тридесять шесть. 69 Кони (их) семь сот тридесять шесть, мски их двести четыредесять пять, велблюды их четыре ста тридесять пять, ослы их шесть тысящ семь сот двадесять. 70 И от части начальников отечеств даша в дело Аферсафе, даша в сокровище златых тысящу, фиал пятьдесят и риз жреческих тридесять. 71 И от начальников отечеств даша в сокровище дела злата драхм двадесять тысящ и сребра мнас две тысящы и триста. 72 И даша прочии людие злата драхм двадесять тысящ и сребра мнас две тысящы и двести, и риз священнических шестьдесят семь. 73 И седоша священницы и левити и дверницы и певцы и прочий народ и нафиними и весь Израиль во градех своих.

**8** И прииде месяц седмый, сынове же Израилевы бяху во градех своих: и собращася вси людие яко муж един на пространство, еже пред враты Водными, и рекоша Ездру писарю, да принесет книгу закона Моисеова, егоже заповеда Господь Израилю. 2 И принесе Езра священник закон пред множество от мужей даже до жен, и всем, иже можаху разумети слышаще, в день первый месяца седмаго, 3 и чте в нем (явно на пространстве, еже пред враты Водными), от утра даже до полудне, пред мужи и женами, и сии бяху разумеюще, и уши всех людий ко книзе закона. 4 И ста Езра писец на степени древянем, егоже сотвориша к народовещанию, и сташа близ его Матфафия и Самеа, и Анания и Уриа, и Хелкиа и Маасиа одесную его, ошуюю же Фадаиа и Мисаил, и Мелхиа и Осам, и Асавадма и Захариа и Месоллам. 5 И разгну Езра книгу пред всеми людьми, яко той бе над людьми, и бысть егда разгибаше ю, сташа

все люди. 6 И благослови Ездра Господа Бога великого, и отвещаша все люди и рече аминь, воздвигше руки свои, и преклонишася и поклонишася Господеви лицом на землю.

7 Иисус же и Ванаия и Саравиа, Акан, Саватей, Камптас, Азариа, Иозавадан, Анифанес и левити бяху вразумляюще людей в законе: люди же стояху на стоянии своем. 8 И чтоша в книге закона Божия, и поучаше Ездра и изясняше ко разумению Господню, и разумеша люди чтение. 9 Рече же Неемиа и Ездра священник и писец, и левити и толкующии людям, и рече всем людям: день свят есть Господу Богу нашему, не рыдайте и не плачете. Понеже плакаша все люди, егда услышаша словеса закона. 10 И рече им: идите и ядите тучная и пейте сладкая, и послите части не имущим, яко свят есть день Господеви нашему, и не печалитесь, ибо радость Господня сия есть сила наша. 11 Левити же молчание творяху во всех людех, глаголюще: молчите, яко день свят есть, и не тужите. 12 И отидоша все люди ясти и пити, и послати части, и сотворити веселие велико, яко разумеша словеса, имже научиша их. 13 И в день второй собращася князие отечеств со всеми людьми, священницы и левити ко Ездру писцу, да протолкует всем словеса законная. 14 И обретоша писано в законе, егоже заповеда Господь рукою Моисеовою, да обитают сынове Израилевы в кущах в праздник месяца седмаго, 15 и да проповедят трубами во всех градах их и во Иерусалиме. И рече Ездра: изыдите на гору, и принесите ветви масличны, и ветви древес кипарисных, и ветви мирсинныя, и ветви финиковы, и ветви древес дубравных, сотворити кущы по писаному. 16 И изыдоша люди, и принесоша, и сотвориша

себе куцы кийждо на крове своем и во дворех своих, и во дворех дому Божия и на пространстве врат Водных и на пространстве врат Ефремлих. 17 И сотвориша весь сонм возвративыйся от пленения куцы, и седоша в куцах, яко не сотвориша от дний Иисуса сына Навина тако сынове Израилевы даже до дне того. И бысть веселие велико. 18 И читаху в книзе закона Божия на всяк день, от дне перваго даже до дне последняго. И сотвориша праздник семь дний, и в день осмый собрание по обычаю.

**9** В день же двадесять четвертый месяца сего собращася сынове Израилевы в посте и во вретических, и персть на главах их. 2 И отлучишася сынове Израилевы от всякаго сына чужда, и исповедаху грехи своя и беззакония отец своих. 3 И стаха на стоянии своем и чтоша в книзе закона Господа Бога своего четверицею в день, и бяху исповедающиеся Господеву и поклоняющиеся Господу Богу своему. 4 И стаха на степени левитов Иисус и сынове Кадмиили, Сахания сын Саравиин, сынове Ханани, и возопиша гласом великим ко Господу Богу своему, 5 и рекоша левити, Иисус и Кадмиил: встаните, благословите Господа Бога нашего от века даже до века: и благословят имя славы Твоея, и вознесут во всяцем благословении и хвале. 6 И рече Ездра: Ты еси Сам Господь един, Ты сотворил еси небо и небо небесе и вся вои их, землю и вся, елика на ней суть, моря и вся, яже в них, и Ты оживляеши вся, и вои небеснии поклоняются Тебе: 7 Ты еси Господь Бог, ты избрал еси Аврама и извел еси его от страны Халдейския, и положил еси имя ему Авраам, 8 и обрел еси сердце его верно пред Тобою, и завещал еси с ним завет дати ему землю Хананейску и Хеттейску, и



Аморрейску и Ферезейску, и Иевусейску и Гегесейску, и семени его: и утвердил еси словеса Твоя, яко праведен еси: **9** и видел еси озлобление отец наших во Египте, и вопль их услышал еси на мори Чермнем, **10** и дал еси знамения и чудеса во Египте на фараона и на вся рабы его и на вся люди земли его: познал бо еси, яко возгордешася на них, и сотворил еси Себе имя, якоже день сей: **11** и море расторгл еси пред ними, и проидоша посреде моря по суху, и гонители их ввергл еси в глубину, яко камень в воде зелней: **12** и в столпе облачне водил еси их во дни и в столпе огненне в нощи, еже осветити им путь, по немуже идоша: **13** и на гору Синайскую сшел еси, и глагола еси к ним с небесе, и дал еси им судьбы правы и закон истинный, повеления и заповеди благи: **14** и субботу святую Твою явил еси им, заповеди, повеления и закон повелел еси им рукою Моисеа раба Твоего: **15** хлеб же с небесе дал еси им во алчбе их в пищу им, и воду из камене извел еси им в жажди их, и рекл еси им, да внидут и наследят землю, на нюже простерл еси руку Твою дати им: **16** тии же и отцы наши возгордешася и ожесточиша выя своя и не послушаша заповедий Твоих, **17** и не восхотеша слышати, и не вспомянуша чудес Твоих, яже сотворил еси им: и ожесточиша выю свою, и даша начало возвратитися на работу свою во Египет: Ты же, Боже, милостив и щедр, долготерпелив и многомилостив, и не оставил еси их: **18** еще же сотвориша себе и телца слияна и рекоша: сии бози изведоша нас из Египта: и сотвориша раздражения велия: **19** Ты же в щедротах Твоих многих не оставил еси их в пустыни, столп облачный не уклонил еси от них во дни, еже наставити их на путь, и столп огненный в

нощи, еже осветити им путь по немуже идоша, 20 и Дух Твой благ дал еси, еже научити их, и манны Твоея не лишил еси от уст их, и воду дал еси им в жажди их, 21 и четыредесять лет препитал еси их в пустыни, ничтоже им оскуде: одеяния их не состарешася, и сапозы их не раздрашася: 22 и дал еси им царства, и люди разделил еси им, и наследиша землю Сиона царя Есевонска и землю Ога царя Васанска: 23 и умножил еси сыны их яко звезды небесныя, и ввел еси их в землю, о нейже глагола еси отцем их внити и наследити ю: 24 (и внидоша сынове их) и наследиша землю: и сокрушил еси пред ними обитающих в земли Хананейстей, и дал еси их в руку их, и цари их и люди земли, да сотворят им якоже угодно пред ними: 25 и взяша грады высокия, и одержаша дома полны всех благих, кладязи ограждены камением, винограды и маслины и всяко древо снадное во множество, и ядоша и насытишася, и утолстеша и расширишася во благодати Твоей велицей: 26 и изменишася и отступиша от Тебе, и повергоша закон Твой создади плоти своея, и пророки Твоя избиша, иже засвидетельствоваху им, да обратятся к Тебе, и сотвориша хулы велики: 27 и дал еси их в руку оскорбляющих я, и озлобиша их: и во бремя печали своея возопиша к Тебе, и Ты с небесе Твоего услышал еси, и по щедротам Твоим многим дал еси им спасителей, и спасл еси их от рук враг их: 28 и егда упокоишася, возвратишася сотворити лукавое пред Тобою: и оставил еси их в руках враг их, и обладаша ими: и паки возопиша к Тебе, Ты же от небесе услышал еси, и избавил еси их в щедротах Твоих мнозех, 29 и засвидетельствовал еси им, да обратятся к закону Твоему: они же возгордешася и не послушаша, но в

заповедех Твоих и в судбах Твоих согреша, яже сотворив человек жив будет в них: и даша плещы непокоривыя, и выю свою ожесточиша, и не послушаша: **30** и продолжил еси на них лета многа, и засвидетельствовал еси им Духом Твоим и рукою пророк Твоих, и не вняша, и предал еси их в руку людей земных: **31** в милосердиих же Твоих многих не сотворил еси их в скончание, ниже оставил еси их, яко Бог силен еси и милостив и щедр: **32** и ныне, Боже наш крепкий, великий, державный и страшный, храняй завет Твой и милость Твою, да не явится мал пред Тобою всяк труд, иже обрете нас и цари наша, и начальники наша и священники наша, и пророки наша и отцы наша и вся люди Твоя, от дний царей Ассурских и даже до дне сего: **33** и Ты праведен во всех, яже приидоша на нас, яко истину сотворил еси, мы же согрешихом: **34** и царие наши и начальницы наши, и священницы наши и отцы наши не сотвориша закона Твоего и не внимаша повелением Твоим и свидением Твоим, имиже засвидетельствовал еси им, **35** и тии во царствии Твоем и во благостыни Твоей мнозе, юже дал еси им, и в земли широцей и тучней, юже дал еси пред ними, не послужиша Тебе и не отвратишася от начинаний своих лукавых: **36** се, мы днесь есмы раби, и земля, юже дал еси отцем нашим ясти плод ея и благая ея, се, есмы раби на ней: **37** и плоды ея мнози царем, имиже предал еси нас за грехи наша, и телесы нашими владычествуют и скоты нашими, якоже угодно им, и в печали велицей есмы: **38** и во всех сих мы полагаем завет верен и пишем, и печатают вси начальницы наши, левити наши и священницы наши.

**10** И в печатлеющих быша сии: Неemia Артасаста сын Ахалиев и Седекиа 2 сын Араиев, и Азариа и Иеремиа, 3 Фасур, Амариа, Мелхиа, 4 Аттус, Севаниа, Маллух, 5 Ирам, Мерамоф, Авдиа, 6 Даниил, Ганафон, Варух, 7 Месуллам, Авиа, Миамин, 8 Маазиа, Велгаи, Самаиа: сии священницы. 9 Левити же: Иисус сын Азариин, Ваней от сынов Инададовых, Кадмиил 10 и братия его Саваниа, Одуиа, Калитан, Фелиа, Анан, 11 Миха, Роов, Асевиа, 12 Захор, Саравиа, Севаниа, 13 Одуа, сынове Вануини. 14 Началницы людей: Форос, Фааф-Моав, Илам, Зафуиа, 15 сынове Ванниины Азгад, Вивай, 16 Ананиа, Вагой, Идин, 17 Атир, Езекиа, Азур, 18 Одувиа, Исам, Висий, 19 Ариф, Анафоф, Новай, 20 Мегафис, Месуллам, Изир, 21 Месозевил, Садук, Иеддуа, 22 Фалтиа, Анан, Анаиа, 23 Осиа, Ананиа, Асув, 24 Адой, Фалаа, Совик, 25 Раум, Ессавана, Маасиа 26 и Аиа, Енан, Инам, 27 Малух, Ирам, Ваана. 28 И прочии от людей, священницы, левити, дверницы, певцы, нафиними и всяк приходяй от людей земских ко закону Божию, жены их, сынове их, дщери их, всяк ведяй и разумяй, 29 укрепляхуся над братиею своею, и заклинаша их, и внидоша в клятву и в роту, еже ходити в законе Божии, иже дан есть рукою Моисеа раба Божия, да сотворят и сохранят вся заповеди Господни и судьбы Его и повеления Его, 30 и еже не дати дщереи наших людем земским, и дщереи их не возмем сыновом нашим: 31 людие же земли носящии продаемая и вся купуемая во дни субботы продавати, не купим от них в субботы, ни в день святый: и оставим лето седмое, и даяние всех рук. 32 И поставим над нами заповедь даяти нам третью часть дидрахмы на лето, на дело дому Бога нашего, 33 на хлебы предложения и на

жертвы повседневныя, и во всесожжение присное суббот, новомесячий, в праздники и во святая, и яже о гресех, помолитися за Израиля, и на дела дому Бога нашего. **34** И жребий метнухом о ношении древес, священницы и левити и людие, носити в дом Бога нашего, по домом отечеств наших, от времени до времени, от лета до лета возжигати на олтари Господу Богу нашему, якоже писано есть в законе, **35** и приноситьи первородная земли нашея и первородная плода всякаго древа, от лета до лета, в дом Господень, **36** и первенцы сынов наших и скотов наших, якоже писано есть в законе, и первенцы волов наших и стад наших приноситьи в дом Бога нашего, священником служащым в дому Бога нашего: **37** и начатки жит наших и плод всякаго древа, вина и елеа, приноситьи будем священником в сокровище дому Божия, и десятину земли нашея левитом, и тии левити десятину приемлют во всех градех дел наших. **38** Будет же священник сын Ааронов с левиты в десятинах левитов, и левити имут приноситьи десятую часть десятины в дом Бога нашего в сокровище дому Божия, **39** яко в сокровища принесут сынове Израилевы и сынове левитстии начатки пшеницы и вина и елеа, и тамо (будут) сосуди святии, и священницы и служителие и дверницы и певцы, и не оставим дому Бога нашего.

**11** И вселишася началницы людей во Иерусалиме, и прочие людие метнуша жребия взяти одинаго от десяти, да пребывает во Иерусалиме граде святем, и девять частей во градех. **2** И благословиша людие всех мужей, иже сами произволиша обитати во Иерусалиме. **3** И сии началницы страны, иже обиташа во Иерусалиме: и во градех Иудиных

обиташе кийждо во одержании своем, во градех своих Израилевых, священницы и левити, и нафинее и сынове рабов Соломоновых. 4 И во Иерусалиме обиташа от сынов Иудиных и от сынов Вениаминих. От сынов Иудиных Афаиа сын Озиин, сын Захариин, сын Самариин, сын Сафатиев, сын Масеиль и от сынов Фаресовых, 5 и Маасиа, сын Варухов, сын Халазов, сын Озиев, сын Адаиев, сын Иоаривль, сын Захариев, сын Силониев: 6 вси сынове Фаресовы, иже обиташа во Иерусалиме, четыреста шестьдесят осмь мужие крепцы. 7 Сии же сынове Вениамини: Силон сын Месулаев, сын Иоадов, сын Фадаиев, сын Колиев, сын Маасиев, сын Ефииль, сын Иессиев, 8 и по нем Гевеил, Силиев, девять сот двадесять осмь. 9 И Иоиль сын Зехрин настоятель над ними, и Иуда сын Асанаев, от града, второй. 10 От священников: и Иадиа сын Иоаривль, Иахинь, 11 Сареа сын Елхиев, сын Месуламов, сын Саддуков, сын Мариофов, сын Етофов, начальник дому Божия, 12 и братия их делающе дело церкви осмь сот двадесять два: и Адаиа сын Иероамль, сына Фалалиина, сына Намасова, сына Захариина, сына Фасефурова, сына Мелхиина, 13 и братия его начальницы отечеств двести чetyредесять два: и Амесай сын Езрииль, сына Сакхиева, сына Масаримофова, сына Еммирова, 14 и братия его сильнии во бранех сто двадесять осмь: и настоятель их Сохриил, сын Великих. 15 И от левит: Самаиа сын Асува, сына Езрикама, сына Асавии, сына Вонни, 16 и Саввафей, и Иосавад над делами дому Божия внешнего и от начальников левитских, 17 и Матфаниа, сын Михаев, сын Зехриев, сына Асафова, начальник хваления, и Иуда молитвы, и Вокхиа второй от братий своих, и Авдиа сын

Самеа сына Галелова, сына Идифунова: **18** всех левитов во граде святем двести осмьдесят четыре. **19** И дверницы: Акув, Теламин и братия их, стрегущии врат, сто седмьдесят два. **20** Прочии же от Израиля иерее же и левити во всех градах Иудеи кийждо в наследии своем. **21** И нафинее, иже обиташа во Офле, Сиай и Гесф от нафинеев. **22** И начальник левитов во Иерусалиме Озий сын Ваниин сына Савиева, сына Матфаниева, сына Михаева, от сынов Асафовых поющих над делом дому Божия, **23** яко заповедь царева (бе) им: и пребываше верно над певцами оброк коегождо дне в день свой. **24** И Фафеа, сын Массизавилов от сынов Зариных, сына Иудина, при руце цареве всякия потребы ради людей. **25** И при дворех, иже на селех их: и от сынов Иудиных обиташа в Кариафарвоце и в селех его, и в Девоне и в селех его, и в Кафсеиле и в селех его, **26** и во Иисусе, и в Моладе, и в Веффалате, **27** и во Асерсоале, и в Вирсавеи и в селех ея, **28** и в Секелаге, и Мавне и в селех ея, **29** и в Ремаоне, и в Саре, и во Иеримуфе, **30** и в Заннои, и во Одолламе и в селех их, и в Лахисе и в селех его, и во Азике и в селех ея: и ополчишася в Вирсавеи даже до дебри Еннон. **31** И сынове Вениамини от Гаваи и Магмаса и Вефиля и от весей его, **32** и во Анафофе, в Нове, во Ании, **33** во Асоре, в Раме, в Гефаиме, **34** в Адоде, в Севоиме, в Навалате, **35** в Лидде и во Оногиарасим. **36** И от левитов части Иудины и Вениамини.

**12** И сии суть священницы и левити, возшедшии с Зоровавелем сыном Салафиилевым и Иисусом: Сараиа, Иеремиа, Ездра, **2** Амариа, Малух, Аттуй, **3** Сехения, Реум, Маримоф, **4** Адаиа, Генафон, Авиа, **5** Миамин, Маадиа,

Велга, 6 Семиа, Иоарив, Идиа, 7 Салуй, Амук Хелкиа, Одуиа: сии начальницы священников и братия их во дни Иисуса. 8 И левити: Иисус, Вануй, Кадмиил, Саравиа, Иодай и Матфаниа, при руках той, и братия их в чредныя служения: 9 и Ваквакиа и Анай, братия их, прямо их во чреды дневныя. 10 Иисус же роди Иоакима, Иоаким роди Елиасива, Елиасив роди Иодаа, 11 Иодай же роди Ионафана, и Ионафан роди Адуа. 12 Во дни же Иоакима беху братия его священницы и начальницы отечеств: Сараии Амариа, Иеремии Ананиа, 13 Ездре Месуллам, Амариин Иоанан, 14 Амалуху Ионафан, Сехенин Иосиф, 15 Аресу Еднас, Мариофу Елкей, 16 Аддаю Захариа, Ганафону Месуллам, 17 Авиин Зехрий, Миамину Маадай, Фелетию, 18 Валгасу Самуей, Семии Ионафан, 19 Иоариву Матфанай, Едию Озий, 20 Салаию Калаиа, Амеку Авед, 21 Елкин Асавиа, Иедии Нафанаил. 22 Левити во дни Елиасива, Иоада и Иоа, и Иоанан и Идуа, написани начальницы отечеств, и священницы в царство Дариа Персского. 23 И сынове Левии начальницы отечеств писани в книзе словес дний и даже до дний Иоанана сына Елисуева. 24 И начальницы левитом Асавиа и Саравиа и Иисус, и сынове Кадмииловы и братия их пред ними в песнях хвалити и исповедовати, по заповеди Давида человека Божия, по чредам от дне до дне. 25 Матфаниа и Ваквакиа, Авдиа, Месуллам, Телмон, Акув, стрегущии дверницы стражу, внегда собрати ми дверники. 26 Во дни Иоакима сына Иисусова, сына Иоседекова, и во дни Неемии и Ездры священника и книгочии, 27 и во обновлении стены Иерусалимския, взыскаша левитов в местех их да возведут их во Иерусалим сотворити обновление и веселие



во хвалении и песнях, в кимвалех и псалтирех и гуслех. 28 И собращася сынове поющих и от страны окрестныя во Иерусалим, и от сел Нетофатиевых, 29 и от Дому (Галгал) и от стран (Гева и Азмавет), яко села создаша себе певцы окрест Иерусалима: 30 и очистишася священницы и левити, и очистиша людей и врата и стену. 31 И возведох начальников Иудиных на стену, и поставих два клироса велика, хвалы ради, и проидоша от десныя страны на стену ко вратом Гнойным. 32 И идоша за ними Осаиа и половина начальников Иудиных, 33 и Азариа и Ездра и Месуллам, 34 Иуда и Вениамин, и Самаиа и Иеремиа: 35 и от сынов священничих с трубами Захариа сын Ионафанов, сын Самаии, сын Мафаниин, сын Михаин, сын Закхуров, сын Асафов, 36 и братия его Самаиа и Озиил, Гелол, Маиа, Нафанаил и Иуда и Ананий, еже хвалити в песнях Давида человека Божия: 37 и Ездра книгочий пред ними при вратех Источника, хвалити прямо их. И взыдоша на лествицы града Давидова, на восход стены выше дому Давидова и даже до врат Водных к востоку. 38 И клирос вторый хвалу воздающих идяше сопровит их, и аз по нем, и половина людей по стене, верху столпа Фануримля и даже до стены пространнейшия, 39 и на врата Ефраима, и на врата старая, и на врата Рыбная, и на столп Анамеиль, и на столп Емаф, и даже до врат Овчих. 40 И сташа на вратех Стражи, сташа же два клироса хваляща в дому Божии, и аз и половина воевод со мною, 41 и священницы Елиаким, Маасиа, Миамин, Михеа, Елиона, Захариа, Ананиа с трубами, 42 и Маасиа и Семейа, и Елеазар и Озиа, и Иоанан и Мелхиа, и Елеамий и Иезур. И слышани быша певцы и Иезриа, и соглядани,

и восхвалиша. 43 И пожроша в день той жертвы великия и возвеселишася, яко Бог возвесели их вельми: и жены их и чада их радовахуся, и слышано бысть веселие то во Иерусалиме издалеча. 44 И поставиша в день той мужей над сокровищными хранилищи, на начатки и десятины, и да собирают сими начальниками от градов части священником и левитом, яко веселие бе во Иудеи, во священницех и в левитех предстоящих, 45 и стрежаху стражу Бога своего, и хранение очищения, и певцев и дверников, по повелению Давида и Соломона сына его. 46 Яко во дни Давидовы Асаф от начала первый в певцех и в песнях и хвалении Богу, 47 и весь Израиль во дни Зоровавеля и во дни Неемии даяху оброк певцем и дверником от дне до дне и освящяху левитом, левити же освящяху сыновом Аароним.

**13** В день той чтено бысть в книзе Моисеове во слышание людем, и обретесе написано в ней: да не имут внити Амманитяне и Моавитяне в церковь Божию даже до века, 2 понеже не сретоша сынов Израилевых со хлебом и водою и наяша на них Валаама на проклятие их: и обрати Бог наш проклятво на благословение. 3 И бысть егда слышаху закон, и отлучиша всех чуждых от Израиля. 4 И прежде сего Елиасив священник живяше в сокровищнем дому Бога нашего, сродник Товиин, 5 и сотвори ему сокровищный дом велик: таможе бяху прежде приносяще жертву и ливан, и сосуды и десятину пшеницы и вина и елеа, уставленная левитом и певцем и дверником, и начатки священническия. 6 Во всех же сих не бых во Иерусалиме, понеже в лето тридесять второе Артаксеркса царя Вавилонскаго приидох ко царю: и по скончании дний испросих от царя 7 и приидох

во Иерусалим, и уразумех зло, еже сотвори Елиасив Товии, сотворити ему сокровищный дом во дворе дому Божия, 8 и зло явися ми зело: и извергох вся сосуды дому Товиева вон из дому сокровищнаго, 9 и рекох, и очистиша сокровищный дом: и возвратих онамо сосуды дому Божия, жертву и ливан. 10 И познах, яко части левитския не быша даны, и побегоша кийждо на село свое левити и певцы творящии дело. 11 И пряхся со стратигами и рекох: чесо ради оставлен бысть дом Божий? И собрах их и поставих оных во стояниих своих. 12 И весь Иуда принесоша десятину пшеницы и вина и елеа в сокровища под руку Селемии священника и Садока писца и фадаяи от левит, 13 и при них Анан сын Захуров, сын Матфаниев, яко верни искушени суть над ними разделяти братьям своим. 14 Помяни мя, Боже, того ради, и да не погибнет милость моя, юже сотворих в дому Господа Бога моего и в чинех его. 15 Во днех тех видех во Иуде топчущих точило в субботу, и носящих снопы, и возлагающих на ослы и вино, и гроздие, и смоквы, и всякое бремя, и носящих во Иерусалим во дни субботныя: и засвидетелствовах им в день продаяния их. 16 И Тиряне обиташа в нем приносяще рыбы, и вся продаемая продающе в субботы сыновом Иудиным и во Иерусалиме. 17 И обличих сынов Иудиных свободных и рекох им: что сия вещь злая, юже вы творите, и скверните день субботный? 18 Не сия ли сотвориша отцы ваши, и наведе на них Бог наш и на нас вся злая сия, и на град сей, и вы прилагаете гнев на Израиля, скверняяще субботу? 19 Бысть же егда поставишася врата во Иерусалиме прежде субботы, и рекох, и запроша двери и повелех, да не отверзают их даже по субботе: и от отрок моих поставих

над враты, да ни един вносит бремя в день субботный. 20 И стаха вси и творяху куплю вне Иерусалима единоци и дващи. 21 И засвидетелствовах о них и рекох им: что вы пребываете пред стеною? Аще вторицею сие сотворите, простру руку мою на вас. И от времени того не приидоша в субботу. 22 И рекох левитом, иже бяху очищени, дабы приходили хранити врат и святити день субботный. И сих ради помяни мя, Боже, и прости ми по множеству милости Твоя. 23 И во днех оных видех Иудеев поемших жены Азотския, Амманитяны, Моавитския, 24 и сынове их от полу глаголаху азотским языком и не умеяху глаголати иудейски: 25 и запретих им, и проклях их, и поразих от них мужей, и оплеших их, и заках их Богом, аще дадите дщери ваша сыновом их и аще поймете от дщерей их сыновом вашим и себе: 26 не тако ли согреси Соломон царь Израилев? И во языцех мнозех не бысть царь подобен ему, и возлюблен Богу бе, и постави его Бог царем над всем Израилем, и того прельстиша жены чуждия: 27 и мы послушаем ли вас творити всяко зло сие, согрешити Богу нашему, еже пояти жены иноплеменничи? 28 И от сынов Иоада сына Ельтува священника великаго, зятя Санаваллатова Уранитина, и изгнах его от мене. 29 Помяни им, Боже, за осквернение священства и завета священническа и левитска. 30 И очистих их от всякия чуждия нечистоты, и поставих чреды священником и левитом, комуждо по делу его, 31 и даяние древес во временех уставленных и первородных. Помяни мя, Боже наш, во благое.

# Книга Есфири

**1** И бысть по словесех сих во днех Артаксеркса: сей Артаксеркс от Индии обладаше сто двадесять седмию странами (даже до Ефиопии): **2** во дни же тыя, егда седе на престоле царь Артаксеркс в Сусех граде, **3** в третие лето царства своего, сотвори пир другом и прочым языком, и Персским и Мидским славным, и началным сатрапом, **4** и по сих, егда показа им богатство царства своего и славу веселия своего, во сто осмьдесят дний. **5** И егда исполнишася дние пира, сотвори царь пиршество языком обретшымся во граде (Сусех) на дний шесть во дворе дому царева, **6** украшенном виссонными и зелеиыми завесами, простертыми на ужах виссонных и червленичных, на колцах златых и серебряных, на столпех мраморных и каменных: **7** ложа злата и серебряна, на помосте камене смарагдова, и пиннинска и паринска мрамора, и плащаницы пестротами различными разцвечены, окрест шипцы разсеяни: **8** сосуди злати и серебряни, и чаша анфракса (камене) предложенная, ценою талант тридесять тысящ: вино много и сладко, еже сам царь пияше: питие же сие не по уставленному закону бысть, тако бо восхоте царь и заповеда икономом сотворити волю свою и мужей. **9** И Астинь царица сотвори пир женам в дому царева, идеже царь Артаксеркс. **10** В день же седмый развеселився царь, рече Аману и Вазану, и Фарре и Варазу, и Зафолфану и Аватазу и Фараву, седмим евнухом, иже служаху пред царем Артаксерксом, **11** привести (Астинь) царицу пред него, еже воцарити ю и возложить на ню венец царский и показати ю всем началствующым и языком красоту ея, зане прекрасна бе. **12** И не послуша его Астинь царица

прийти со евнухи. 13 И опечалися царь, и разгневался, и рече ближним своим: сице рече Астинь: сотворите убо о сем закон и суд. 14 И приступиша к нему Аркесей и Сарсофей и Малисеар, начальницы Персстии и Мидстии, иже близ царя, первии седящие при цари, 15 и возвестиша ему по законом, како подобает сотворити царице Астини, яко не сотвори повеленных от царя чрез евнухи. 16 И рече Мухей ко царю и к боляром: не царя единого обиде Астинь царица, но и вся князи и начальники царевы, 17 ибо поведа им словеса царицы, и како противорече царю: 18 якоже убо противно рече царю Артаксерксу, сице и днесь госпожи жены прочыя князей Персских и Мидских, услышавша царю реченная от нея, дерзнут такожде безчествовати мужей своих: 19 аще убо угодно царю, да повелит царским повелением, и да напишется по законом Мидским и Персским, и инако да не будет, ниже да внидет ктому царица к нему, и царство ея да предаст царь жене лучшей ея: 20 и да будет услышан закон, иже от царя, егоже сотворит во царствии своем, и сице вся жены возложат честь на мужы своя от богата даже до убога. 21 И угодно бысть слово пред царем и начальники, и сотвори царь, якоже рече ему Мухей, 22 и посла царь книги во все царство по странам по языку их, да будет страх им в жилищих их.

**2** И по словесех сих утолися царь от гнева, и не вспомяну ктому Астини, воспоминаая, елика глагола и како осуди ея. 2 И реша слуги царевы: да изыщутся царю девицы нерастленны, красны зраком, и да поставит царь взыскатели во всех странах царствия своего, 3 и да изберут отроковиц девственных доброзрачных в Сусы град, в чертог женский,

и да отдадутся евнухови цареву стражу жен, и да дадутся масти и прочыя потребы: 4 и жена, юже возлюбит царь, да будет царицею вместо Астини. И угодно бе царю слово, и сотвори тако. 5 И муж бе Иудеанин во граде Сусех, и имя ему Мардохей сын Иаиров, сына Семеина, сына Кисеова, от племени Вениамина, 6 иже бяше пленен от Иерусалима Навуходоносором царем Вавилонским: 7 и бяше ему отроковица воспитана, дочь Аминадава брата отцу его, и имя ей Есфирь. По преставлении же родителей ея, прия ю Мардохей во дочери место: и бяше девица красна и доброзрачна. 8 И егда услышано бысть повеление цареву, собраны быша девицы многи во град Сусы, под руку Гаиеву, и приведена бысть Есфирь ко Гаию хранителю жен: 9 и угодна бысть ему отроковица и окрете благодать пред ним: и потщася дати ей масти и участие, и семь девиц пристави к ней из дому царева, и снабдеваше ю и рабынь ея добре в дому женstem. 10 И не поведает Есфирь рода своего, ниже отечества, Мардохей бо заповедает ей не возвещати. 11 На всяк же день хождаше Мардохей по двору женскому, назирая, что Есфири случится. 12 Сие же бе время девиц входитьи ко царю, егда исполнятся дванадесять месяцев: тако бо наполняхуся дние украшения, шесть месяц во ароматех и в мастех женских, и шесть месяц намазующаяся смирновым елеем, 13 и тогда вхождаху ко цареви: и емуже аще речет привести ю, входит с ним купно из дому женскаго даже до дому царева: 14 на вечер вхождаше и заутра возвращашеся в дом женский вторый, идеже Гай евнух царев хранитель жен, и не вхождаше паки ко царю, аще не будет позвана именем. 15 Егда же исполнися время Есфири дочери Аминадава, брата

отца Мардохеова, (иже поял ю себе в дщере место, ) внити ко цареви, ничтоже преступи от сих, яже заоведа ей евнух хранитель жен: бе бо Есфирь обретающая благодать пред всеми зрящими ю. 16 И вниде Есфирь ко царю Артаксерксу во вторыйнадесять месяц, иже есть Адар, в лето седмое царства его. 17 И возлюби царь Есфирь, и обрете благодать паче всех девиц, и возложи венец женский на главу ея. 18 И сотвори царь пир всем другом своим и силам седмь дний, и вознесе брак Есфирин, и сотвори отраду суцым во царствии его. 19 Мардохей же служаше во дворе (цареве). 20 Есфирь же не поведа рода своего, (ни людей своих): сице бо заоведа ей Мардохей боятися Бога и творити заповеди Его, якоже бе с ним, Есфирь же не измени обычая своего. 21 И опечалистася два евнуха царева началнейшии стражы тела его, яко предпочтен бысть Мардохей, и искаста убити Артаксеркса царя. 22 И возвестися слово Мардохею, и сказа Есфири: она же поведа царю, яже наветуют. 23 Царь же испыта дву евнуху, (и исповедаста, ) и обеси их. И повеле царь вписати на память в царстей книгохранителнице о благодеянии Мардохеове в похвалу.

**3** И по сих прослави царь Артаксеркс Амана сына Амадафуина Вугеанина и вознесе его, и председаше вышше всех друзей его: 2 и вси, иже во дворе (цареве), поклоняхуся Аману: сице бо повеле царь творити. Мардохей же не кланяшеся ему. 3 И глаголаша сущии во дворе цареве Мардохею: мардохее, чесо ради не слушаеши глаголемых от царя? 4 По вся же дни глаголаху ему, и не послушаше их. И возвестиша Аману, яко Мардохей сопротивляется повелению цареву, и поведа им Мардохей, яко Иудеанин есть. 5 И



уведав Аман, яко не кланяется ему Мардохеи, разгневался зело 6 и умысли погубити вся Иудеи, иже в царстве Артаксерксове: 7 и сотвори совет в лето второенадесять царства Артаксерксова, и меташе жребия день от дне и месяц от месяца, яко погубити во един день род Мардохеев: и паде жребий на четвертьнадесять день месяца, иже есть Адар. 8 И рече (Аман) ко царю Артаксерксу, глаголя: есть язык разсеянный во языцех во всем царстве твоём: законы же их странни паче всех язык, и законов царских не слушают, и не пользует царю оставити их: 9 и аще годе есть цареви, да повелит погубити я: аз же запишу в сокровище царево десять тысяч талант сребра. 10 И снем царь перстень (с руки своея), даде в руце Аману, да запечатает писания написанная на Иудей. 11 И рече царь Аману: сребро убо имей ты себе, людем же твори, якоже хочеши. 12 И призвани быша писцы цареви в третийнадесять день месяца перваго, и написаша, якоже повеле Аман, к воеводам и начальником по всем странам, от Индийския области даже и до Ефиопии, сто двадесяти седми странам, началствующим над языки по их языку, именем Артаксеркса царя. 13 И посла с писмоносцы писания в царство Артаксерксово, да побьют род Жидовский в день един месяца вторагонадесять, иже есть Адар, и да расхитят имения их. 14 Списания же епистолии посылахуся по странам, и повелено бысть всем языком готовым быти в нареченный день. 15 Приспе же дело и в Сусы: и царь убо и Аман пирующа наслаждастася, град же (Сусы) мятяшеся.

**4** Мардохей же разумев замышляемое, раздра ризы своя и облечеся во вретище и посыпая пепелом: и скочив в пространную улицу града, возопи воплем великим и горьким:

взимается род ничтоже преступивый. 2 И прииде даже до врат царевых и ста: не леть бо бе ему внити во двор во вретиче облечену и пепелом осыпану суцу. 3 И во всяцей стране, идеже показовахуся писания (царева), вопль бе и плачь и рыдание превелие Иудеом, вретиче и пепел постилаху себе. 4 И внидоца рабыни и евнуси царицыны и возвестиша ей. И смятесе услышавши бывшее: и посла ризы облещи Мардохеа и сняти вретиче его. И не послуша. 5 Есфирь же призва Ахрафеа скопца своего, предстоящаго ей, 6 и посла его уведати от Мардохеа истину. 7 Мардохей же сказа ему бывшее, и обещание, еже обеша Аман царю в сокровищный дом (положити) десять тысящ талант сребра, да погубит Иудей: 8 и списание (повеления) изданнаго в Сусех (граде) на погубление их даде ему, да покажет Есфири: и рече ему, заповедати ей ити молити царя и просити его о людех, поминаюши дни смирения твоего, како воспитана еси в руке моей, зане Аман вторый по цари глагола противу нам на смерть: призиви Господа и глаголи царю о нас, да избавит нас от смерти. 9 Вшед же Ахрафей, поведи Есфири вся глаголы сия. 10 И рече Есфирь ко Ахрафею: иди к Мардохею и рцы: 11 понеже вси языцы царствия ведят, яко всяк муж или жена, иже аще внидет ко царвеи во внутренний дом не призван, несть ему спасения, точию к немуже аще прострет царь златый жезл, сей спасен будет: аз же несмь звана внити ко царю се уже тридесять дний. 12 И возвести Ахрафей Мардохею вся глаголы Есфирины. 13 И рече Мардохей ко Ахрафею: иди и рцы ей: Есфире, да не речеши в себе, яко ты едина спасешися во царствии паче всех Иудей: 14 зане аще преслушаеши в сие время, отинуду помощь и покров

будет Иудеом, ты же и дом отца твоего погибнете: и кто весть, аще на сие время воцарилася еси? 15 И посла Есфирь пришедшаго к ней ко Мардохею, глаголющи: 16 шед собери Иудеи иже в Сусех, и поститесь о мне, и не ядите ниже пейте три дни день и ночь: аз же и служебницы моя (такожде) не имамы ясти: и тогда вниду ко царю кроме закона, аще и погибнути ми приключится. 17 И шед Мардохей сотвори, елика заповеда ему Есфирь.

**5** И бысть по триех днех... и сия червленеюущися добротою красоты своя... И прошедши вся двери, ста пред царем. Он же седяше на престоле царства своего, оболчен во все одеяние славы своя. 2 И взем златый жезл (царь) возложи на выю ея и облобыза ю и рече: глаголи ми. И рече ему: видех тя, господине, яко Ангела Божия, и смятеса сердце мое от страха славы твоея, яко дивен еси, господине, и лице твое благодатей исполнено. Беседующи же она к нему, паде от ослабления. Царь же смятеса, и вси раби его утешаху ея. 3 И рече ей царь: что хочещи, Есфире? И что прошение твое? Будет ти даже и до полуцарства моего. 4 И рече Есфирь: день моего празднования днесь есть: аще убо угодно есть цареву, да приидет царь и Аман на пир, егоже сотворю днесь. 5 И рече царь: ускорите ити по Амана, да сотворим слово Есфирино. И приидоста оба на пир, егоже сотвори Есфирь. 6 На пиру же рече царь ко Есфири: что есть, Есфире царице? (и кая есть мысль прошения твоего? Дам ти и до полуцарства моего, ) и будет елика просиши. 7 И рече Есфирь: прошение мое и моление: 8 аще обретох благодать пред царем, да приидет царь и Аман еще заутра на пир, егоже сотворю има, и заутра сотворю сие прошение.

9 И изыде Аман от царя зело радостен и весел: видев же Мардохеа Иудеанина во дворе (цареве не подвигнувшася и не кланяющатя пред ним), возярися зело: 10 и вшед в дом свой, призва други своя и Зосару жену свою 11 и показа им богатство свое и славу, еуже возвеличи его царь, и яко сотвори его первого быти и правити царствие. 12 И рече Аман: не зва царица ни одинаго на пир со царем, но точию мене, и наутрие зваше мя: 13 но сия не суть ми угодна, егда вижду Мардохеа Иудеанина во дворе (цареве). 14 И рече ему Зосара жена его и друзие: приготови древо лакот пятьдесят, и заутра речеши цареве, и да повешен будет Мардохей на древе: ты же вниди со царем на пир и веселися. И угоден бысть Аману глагол сей, и уготова древо.

**6** Господь же отя сон от царя в нощи оней. И повеле рабу своему принести книги памятных дний прочитати ему: 2 и обрете писания написанная о Мардохеи, како поведя царю о двою евнуху царскую, внегда стрещи има, и умыслиста убити (царя) Артаксеркса. 3 И рече царь: кую славу или благодать сотворихом Мардохею? И рекоша отроцы царевы: ничтоже сотворил еси ему? 4 Вопрошающу же царю о благодеянии Мардохеове, се, Аман прииде во двор, и рече царь: кто есть во дворе? Аман же прииде рещи цареве, да повесит Мардохеа на древе, еже уготова. 5 И рекоша отроцы царевы: се, Аман стоит во дворе. И рече царь: призовите его. 6 И рече царь Аману: что сотворю мужу, егоже аз хощу прославити? Рече же в себе Аман: кого хощет царь прославити, разве мене? 7 Рече же царю: мужа, егоже хощет царь прославити, 8 да принесут отроцы царевы одежду виссонную, еуже царь облачается, и коня, на немже царь ездит, 9 и да дастся

единому от друзей царевых славных, и да облечет мужа, егоже царь любит, и да посадит его на коня и проповесть на улицах града, глаголя: тако будет всякому человеку, егоже царь прославит. 10 И рече царь Аману: добре рекл еси: тако сотвори Мардохею Иудеанину, угодно служащему во дворе (нашем), и да не изменится слово твое от сих, яже рекл еси. 11 И взя Аман одежду и коня, и облече Мардохеа, и возведе его на коня, и пройде по улицам града, и проповедаше (пред ним), глаголя: сице будет всякому человеку, егоже хоцет цар прославити. 12 И возвратися Мардохеи во двор (царев): Аман же иде в дом свой скорбя преклонив главу. 13 И сказа Аман случившаяся ему Зосаре жене своей и другом своим. И реша ему друзие его и жена: аще от племени Иудейскаго Мардохей, начал еси смиратися пред ним, падая падеши, и не возможеши ему отмстити, яко Бог живый есть с ним. 14 И еще глаголющым им, приидоша евнуси, спешно зовуще Амана на пир, егоже уготова Есфирь.

**7** Вниде же царь и Аман пировати со царицею. 2 И рече царь Есфири во вторый день на пиру: что есть, Есфире царице? И что прошение твое? И что моление твое? И будет тебе до полуцарствия моего. 3 И отвещавши (Есфирь царица) рече: аще обретох благодать пред очима твоима, царю, да дастся душа моя прошению моему и людие мои молению моему: 4 продани бо есмы, аз же и людие мои, на погибель и расхищение и в работу, мы же и чада наша в рабы и рабыни, и небрегох: несть бо достоин клеветник двора царева. 5 И рече царь: кто есть сей, иже дерзну сотворити вещь сию? 6 И рече Есфирь: человек враг, Аман лукавый сей. Аман же смятеса от царя и царицы. 7 Царь же

воста со гневом от пира (и иде) в вертоград: Аман же моляше царицу, видяше бо себе в бедах суца. 8 Возвратися же царь из вертограда, и Аман припаде к ложу, на немже бе Есфирь, моля царицу. И рече царь: егда и жену насилует в дому моем? Аман же слышав изменися лицом. 9 Рече же Вугафан един от скопцев, сей же ведяше о том древе, виде в в дому Аманове, егда призываше его на обед царский, и о сем испытав единого от отрок, уразумев замышляемое, и рече ко царю: се, и древо уготова Аман Мардохею глаголавшему благая о цари, и стоит в дому Аманове возвышено на лакот пятьдесят. И рече царь: да повесится (Аман) на нем. 10 И повешен бысть Аман на древе, еже уготова Мардохею. И тогда царь утолился от ярости.

**8** И в той день царь Артаксеркс дарова Есфири, елика бяху Амана клеветника (Иудейска): и Мардохеи призван бысть от царя, поведа бо Есфирь, яко сродник есть ей. 2 И сня царь перстень свой, егоже отя у Амана, и даде Мардохееви. И постави Есфирь Мардохеа над всем именем Амановым, 3 и приложи глаголати ко царю, и припаде пред ногама его (и восплака), и моляше его отвратити злобу Аманову и мысль его, еюже помысли на Иудеи. 4 И простре царь Есфири жезл злат: воста же Есфирь и ста пред царем. 5 И рече Есфирь: аще угодно ти есть, и обретох благодать пред тобою, послѣ возвратити писания посланная от Амана, писаная на погубление Иудеов, иже обитают во (всем) царствии твоём: 6 како бо возмогу видети озлобление людей моих и како возмогу спастися в погибели отечества моего? 7 И рече царь Есфири: аще вся имения Аманова дах и даровах тебе, и того повесих на древе, яко руце вознесе на Иудеи, что еще

просиши? **8** Напишите и вы именем моим, якоже угодно есть вам, и запечатайте перстнем моим: елика бо писана бывают царевым повелением и запечатаются перстнем моим, не возможно им противорещи. **9** И призвани быша писцы (царевы) в первый месяц, иже есть Нисан, в двадесять третий день тогожде месяца, и написаша о Иудеех, елика заповеда Мардохей, ко управителем и ко начальником воевод от Индийския страны даже до Ефиопии, сто двадесять седми воеводам, во всякую страну по своему их языку. **10** Написана же быша велением царевым и запечатлешася перстнем его: и послаша писания чрез писмоноscopy, **11** яко повеле им жити по законом их во всяцем граде, и да помогают им, и да сотворят соперником их и противником их, якоже хотят, **12** в день един по всему царству Артаксерксову, в третийнадесять день вторагонадесять месяца, иже есть Адар. **13** И списания сия да предложатся очевидно во всем царстве, еже готовым быти всем Иудеом на сей день ратовати своих противных. **14** Конницы убо изыдоша спешно повеленная от царя совершити. Предлагашеся же повеление и в Сусех. **15** И Мардохей изыде облечен в царскую одежду и венец имущь златый, диадиму виссонную, червленую. Видевше же сущии в Сусех возрадовашася, **16** яко Иудеом бысть свет и веселие: **17** во (всяцем) граде и стране, идеже аще предлагашеся повеление радость и веселие бе Иудеом, пирование и утешение. И мнози от язык обрезовахуся и закон Иудейский приимаху, страха ради Иудейскаго.

**9** Во вторыйнадесять месяц, иже есть Адар, в третийнадесять день месяца приидоша писания от царя. **2** В той же день погибоша супостаты Иудеев: ни един бо

сопротивися им бояся их. 3 Началствующии бо странам и властителие и царстии книгочия почитаху Иудей: 4 страх бо Мардохеев належаше на них. 5 Приложися бо повеление царево именоватися ему по всему царствию. 6 И в Сусех граде избиша Иудее пять сот мужей: 7 Фарсана, нестанна и Делфона, и Фасгана 8 и Фардафана, и Вареа и Сарвакана, 9 и Мармасима и Руфеа, и Арсеа и Завуфефама, 10 десять сынов Амана Амадафуева Вугеанина врага Иудеом, иже от Фармафеа, и разграбиша в той день (имения их): 11 и сказаша число избиенных царю в Сусех граде. 12 И рече царь ко Есфири: избиша Иудее в Сусе граде пять сот мужей, по окрестным же странам колико, мниши, погубиша? И чесого еще просиши, и будет ти? 13 И рече Есфирь ко царю: да дастся такожде Иудеом творити заутра, яко да повесят десять сынов Амановых. 14 И повеле царь тако быти, и попусти Иудеом вне града повесити телеса сынов Амановых. 15 И собращася Иудее, иже в Сусех, в четвертыйнадесять деень Адара, и избиша мужей триста, и ничтоже разграбиша. 16 Прочии же Иудее, иже во царствии, собращася и себе помогаху и почиша от браней: избиша бо от них пятнадцать тысяч в третийнадесять Адара, и ничтоже расхитиша. 17 И почиша в четвертыйнадесять день тогожде месяца и провождаху той день упокоения с радостью и веселием. 18 Иудее же в Сусех граде собращася и в четвертыйнадесять почиша: проводиша же и пятыйнадесять с радостью и веселием. 19 Сего ради Иудее разсеянии во всяцей стране внешней провождают четвертыйнадесять день Адара благ с веселием, посылающе части кийждо ближнему: живущий же в митрополиях и в пятыйнадесять день Адара веселия



благий провождает, посылающе части ближним. 20 Написа же Мардохей словеса сия в книгу и посла Иудеом, елицы беша в царствии Артаксерксове, близ и далече сущым, 21 уставити дни сия благи, еже провождати четвертыйнадесять и пятыйнадесять день Адара: 22 в сих бо днех почиша Иудеи от враг своих: и месяц Адар, иже обратися им от плача в радость и от болезни во благий день, провождати весь во благих днех радости и веселия, посылающе части ко другом и нищым. 23 И прияша Иудеи, якоже написа им Мардохей: 24 како Аман Амадафув Македонянин ратоваше Иудеев, и како изнесе суд и жребий, еже погубити их, 25 и яко вниде ко царю, глаголя, да повесит Мардохеа: елика нача наводити на Иудеи злая, на него быша, и повешен бысть сам и чада его. 26 Сего ради нарекошася дние сии Фурим ради жребий, зане диалектом их жребии нарицаются фурим, ради словес епистолии сея, и елика пострадаша сих ради, и елика им приключишася. 27 Устави убо, и тако прияша Иудеи на себе и на семя свое и на ириложившихся к ним, ниже иначе да употребляют: дние же сии памяти совершаеми по роду и роду, и граду и отечеству и стране. 28 Дние же сии Фурим да провождает во всякое лето, и память да не оскудеет от родов. 29 И написа Есфирь царица дщи Аминадавля и Мардохей Иудеанин, елика сотвориша во утверждение епистолии о днех Фурим. 30 И Мардохей и Есфирь царица устависта себе сами, и тогда устависта в посте своем совет свой. 31 И Есфирь слово постави во веки, и написано бысть в память.

**10** Написа же царь по всему царствию своему, еже на земли и на мори, 2 и силу свою, и мужественная исправления,

богатство же и славу царствия своего: се, писана суть в  
книзе царей Персских и Мидских, на память. 3 Мардохей бо  
вторый бе по цари Артаксерксе, и велик бе во царствии и  
прославлен от Иудей и любимь, поведаше содеянная всему  
языку своему.

# Книга Иова

**1** Человек некий бяхе во стране Авситидийстей, емуже имя Иов, и бе человек он истинен, непорочен, праведен богочестив, удаляясь от всякия лукавыя вещи. **2** Быша же ему сынове седьмь и дщери три. **3** И бяху скоти его, овец седьмь тысящ, велблюдов три тысящы, супруг волов пять сот, и ослиц пасомых пять сот, и слуг много зело, и дела велия бяху ему на земли: и бе человек оный благороднейший сущих от Восток солнца. **4** Сходящеся же сынове его друг ко другу, творяху пир на кийждо день, споемлюще вкупе и три сестры своя, ясти и пити с ними. **5** И егда скончавашесе дние пира, посылаше Иов и очищаше их, востая заутра, и приношаше о них жертвы по числу их, и телца единого о гресе о душах их. Глаголаше бо Иов: негли когда сынове мои согреша и в мысли своей злая помыслиша противу Бога? Тако убо творяше Иов вся дни. **6** И бысть яко день сей, и се, приидоша Ангели Божии предстати пред Господем, и диавол прииде с ними. **7** И рече Господь диаволу: откуда пришел еси? И отвещав диавол Господеву, рече: обшед землю и прошед поднебесную, се, есмь. **8** И рече ему Господь: внял ли еси мыслию твоею на раба Моего Иова? Зане несть яко он на земли: человек непорочен, истинен, богочестив, удаляясь от всякия лукавыя вещи. **9** Отвеща же диавол и рече пред Господем: **10** еда туне Иов чтит Господа? Не Ты ли оградил еси внешняя его и внутренняя дому его, и яже вне всех сущих его окрест? Дела же руку его благословил еси и скоты его многи сотворил еси на земли: **11** но послы руку Твою и коснися всех, яже имать, аще не в лице Тя благословит, **12** тогда рече Господь диаволу:

се, вся, елика суть ему, даю в руку твою, но самого да не коснешися. И изыде диавол от Господа. 13 И бысть яко день сей, сынове иовлевы и дщери его пияху вино в дому брата своего старейшаго. 14 И се, вестник прииде ко Иову и рече ему: супрузи волов оряху, и ослицы пасяхуся близ их: 15 и пришедше пленителие плениша их и отроки избиша мечем, и спасохся аз един и приидох возвестити тебе. 16 Еще сему глаголющу, прииде ин вестник и рече ко Иову: огонь спаде с небесе и пожже овцы и пастыри пояде подобне, спасохся же аз един и приидох возвестити тебе. 17 Еще сему глаголющу, прииде ин вестник и рече ко Иову: конницы сотвориша начальства три и окружиша велблюды и плениша их и отроки избиша мечьми, спасохся же аз един и приидох возвестити тебе. 18 Еще сему глаголющу, ин вестник прииде, глаголя Иову: сыном твоим и дщерем твоим ядущым и пиущым у брата своего старейшаго, 19 внезапно ветр велик найде от пустыни и коснуся четырем углом храмины, и паде храмина на дети твоя, и скончашася: спасохся же аз един и приидох возвестити тебе. 20 Тако (услышав) Иов, востав растерза ризы своя и остриже власы главы своя, (и посыпа перстию главу свою, ) и пад на землю, поклонися (Господеву) 21 и рече: сам наг изыдох от чрева матере моея, наг и отиду тамо: Господь даде, Господь отят: яко Господеву изволися, тако бысть: буди имя Господне благословено (во веки). 22 Во всех сих приключившихся ему ничтоже согреша Иов пред Господем, (ниже устнама своима, ) и не даде безумия Богу.

**2** Бысть же яко день сей, и приидоша Ангели Божии предстати пред Господем, и диавол прииде посреде их предстати пред Господем. 2 И рече Господь диаволу: откуда

ты грядеши? Тогда рече диавол пред Господем: прошед поднебесную и обшед всю землю, приидох. 3 И рече Господь ко диаволу: внял ли еси убо (мыслию твою) рабу Моему Иову? Яко несть такова от сущих на земли: человек незлобив, истинен, непорочен, богочестив, удаляясь от всякаго зла, еще же придержитя незлобия: ты же рекл еси имения его погубити вотще. 4 Отвещав же диавол Господеви, рече: кожу за кожу, и вся, елика имать человек, даст за душу свою: 5 обаче послы руку Твою и коснися костем его и плоти его, аще не в лице Тя благословит. 6 Рече же Господь диаволу: се, предаю ти его, токмо душу его соблюди. 7 Изыде же диавол от лица Господня и порази Иова гноем лютым от ногу даже до главы. 8 И взя (Иов) чреп, да острогает гной свой, и той седяше на гноищи вне града. 9 но рцы глагол некий ко Господу и умри. 10 Он же воззрев рече к ней: вскую яко едина от безумных жен возглагонала еси? Аще благая прияхом от руки Господни, злых ли не стерпим? Во всех сих приключившихся ему, ничимже согреша Иов устнама пред Богом (и не даде безумия Богу). 11 Услышавше же трие друзие его вся злая нашедшая нань, приидоша кийждо от своя страны к нему: Елифаз Феманский царь, Валдад Савхейский властитель, Софар Минейский царь: и приидоша к нему единомушно утешити и посетити его. 12 Увидевше же его издалеча, не познаша, и возопивше гласом велиим восплакашася, растерзавше кийждо одежду свою и посыпавше перстию главы своя: 13 седеша при нем седмь дний и седмь нощей, и никтоже от них возглагола к нему словесе: видяху бо язву люту сущу и велику зело.

**3** Посем отверзе Иов уста своя и прокля день свой, **2** глаголя: **3** да погибнет день, в оньже родихся, и ночь оная, в нуже реша: се, мужеск пол: **4** та ночь буди тма, и да не възыщет ея Господь свыше, ниже да приидет на ню свет, **5** и да приимет ю тма и сень смертная, да приидет на ню сумрак: проклят буди день той **6** и ночь оная: да постигнет ю тма, да не будет во днех лета, ниже да вчислится во днех месяцев: **7** но ночь оная да будет болезнь, и да не приидет на ню веселие и радость, **8** но да прокленет ю проклинаяй той день, иже имать одолети великаго кита: **9** да померкнут звезды тоя нощи, да ожидает и на свет да не приидет, и да не видит денницы возсиявающия, **10** яко не затвори врат чрева матере моея: отяла бо бы болезнь от очию моею: **11** почто бо во утробе не умрох? Из чрева же изшед, и абие не погибох? **12** Почто же мя прияша на колена? Почто же ссах сосца? **13** Ныне убо уснув умолчал бых, уснув же почил бых **14** со царьми и советники земли, иже хваляхуся оружию, **15** или со князи, имже много злата, иже наполниша дома своя сребра, **16** или якоже изверг излазай из ложесн матерних, или якоже младенцы, иже не видеша света: **17** тамо нечестивии утолиша ярость гнева, тамо почиша претружденнии телом, **18** вкупе же в веце сем бывшии не слышат гласа собирающаго дань: **19** мал и велик тамо есть, и раб не бояйся господина своего: **20** почто бо дан есть сущым в горести свет и сущым в болезнех душам живот, **21** иже желают смерти и не получают, ищуще якоже сокровища, **22** обрадовани же бывают, аще улучат (смерть)? **23** Смерть бо мужу покой, егоже путь сокровен есть, затвори бо Бог окрест его: **24** прежде бо брашен моих въздыхание

ми приходит, слезю же аз одержимь страхом, 25 страх бо, егоже ужахся, прииде ми, и егоже бояхся, сrete мя: 26 ни умирихся, ниже умолчах, ниже почих, и найде ми гнев.

**4** Отвеща же Елифаз Феманитин, глаголя: 2 еда множицею глаголаю ти бысть в труде? Тяжести же глагол твоих кто стерпит? 3 Аще бо ты научил еси многи и руце немощных утешил еси, 4 немощныя же воздвигл еси словесы, коленом же немощным силу обложил еси. 5 Ныне же прииде на тя болезнь и коснуса тебе, ты же возмутился еси. 6 Еда страх твой есть не в безумии, и надежда твоя и злоба пути твоего? 7 Помяни убо, кто чист сый погибе? Или когда истиннии вси из корене погибоша? 8 Якоже видех орющих неподобная, сеющи же я болезни пожнут себе, 9 от повеления Господня погибнут, от духа же гнева Его исчезнут. 10 Сила львова, глас же львицы, веселие же змиев угасе: 11 мраволев погибе, занеже не имеяше брашна, скимни же львовы оставиша друг другу. 12 Аще же глагол кий истинен бе во словесех твоих, ни коеже бы от сих тя сретило зло. Не примет ли ухо мое предивных от него? 13 Страхом же и гласом ношным, нападающь страх на человеки, 14 ужас же мя сrete и трепет, и зело кости моя стрясе: 15 и дух на лице ми найде: устрашишася же ми власи и плоти, 16 востах и не разумех, видех, и не бе обличия пред очима моима, но токмо дух тих и глас слышах: 17 что бо? Еда чист будет человек пред Богом? Или в делех своих без порока муж? 18 Аще рабом Своим не верует, и во Ангелех Своих стропотно что усмотре, 19 живущих же в бранных храминах, от нихже и мы сами от тогожде брения есмы, порази, якоже молие, 20 и от утра даже до вечера ктому не суть: занеже не могоша себе

помощи, погибоша: 21 дхну бо на ня, и изсоша, и понеже не  
имеяху премудрости, погибоша.

**5** Призови же, аще кто тя услышит, или аще кого от святых  
Ангел узриши. 2 Безумнаго бо убивает гнев, заблудшаго же  
умерщвляет рвение. 3 Аз же видех безумных укореняющихся,  
но абие поядено бысть их жилище. 4 Далече да будут  
сынове их от спасения, и да сотрутся при дверех хуждших,  
и не будет изимаяй. 5 Иже бо они собраша, праведницы  
поядят, сами же от зол не изяти будут: изможденна буди  
крепость их. 6 Не имать бо от земли изыти труд, ни от  
гор прозябнути болезнь: 7 но человек раждается на труд,  
птенцы же суповы высоко парят. 8 Обаче же аз помолюся  
Богви, Господа же всех Владыку призову, 9 Творящаго  
веля и неизследимая, славная же и изрядная, имже несть  
числа: 10 дающаго дождь на землю, посылающаго воду  
на поднебесную: 11 возносящаго смиренныя на высоту и  
погибшыя воздвизающаго во спасение: 12 расточающаго  
советы лукавых, да не сотворят руце их истины. 13 Уловляй  
премудрых в мудрости их, совет же коварных разори. 14 Во  
дни обымет их тма, в полудне же да осяжут якоже в ноци,  
15 и да погибнут на брани: немощный же да изыдет из руки  
сильнаго. 16 Буди же немощному надежда, неправеднаго же  
уста да заградятся. 17 Блажен же человек, егоже обличи  
Бог, наказания же Вседержителя не отвращайся: 18 Той  
бо болети творит и паки возставляет: порази, и руце Его  
изцелят: 19 шестижды от бед измет тя, в седмем же не  
коснеттися зло: 20 во гладе избавит тя от смерти, на брани  
же из руки железа изрешит тя: 21 от бича языка скрыет  
тя, и не убоишися от зол находящих: 22 неправедным и



беззаконным посмеешься, от дивных же зверей не убоишься,  
23 зане с камением дивным завет твой: зверие бо дивии  
примирятся тебе. 24 Потом уразумеешь, яко в мире будет  
дом твой, жилище же храмины твоя не имать согрешити: 25  
уразумеешь же, яко много семя твое, и чада твоя будут яко  
весь злак селный: 26 увидеши же во гроб якоже пшеница  
созрелая во время пожатая, или якоже стог гумна во время  
свезенный. 27 Се, сия сице изследихом: сия суть, яже  
слышахом: ты же разумей себе, аще что сотворил еси.

**6** Отвещав же Иов, рече: 2 аще бы кто веся извесил гнев  
мой, болезни же моя взял бы на мерилу вкупе, 3 то песка  
морского тяжчайшии были бы: но, якоже мнится, словеса  
моя зла суть. 4 Стрелы бо Господни в теле моем суть, ихже  
ярость испивает кровь мою: егда начну глаголати, бодут мя.  
5 Что бо? Еда вотще возревет дивий осел, разве брашна  
прося? Или возревет гласом вол, в яслех имеяй брашно? 6  
Снестся ли хлеб без соли? Или есть вкус во тщих словесех?  
7 Не может бо утишиться душа моя: смрад бо зрю брашна  
моя, якоже воню львову. 8 Аще бо дал бы, да приидет  
прошение мое, и надежду мою дал бы Господь. 9 Начен  
Господь да уязвляет мя, до конца же да не убьет мя. 10  
Буди же ми град гроб, на егоже стенах скаках в нем: не  
пощажу: не солгах бо во словесех святых Бога моего. 11 Кая  
бо крепость моя, яко терплю? Или кое ми время, яко терпит  
моя душа? 12 Еда крепость камня крепость моя? Или  
плоти моя суть медяны? 13 Или не уповах на него? Помощь  
же от мене отступи, 14 отречися от мене милость, посещение  
же Господне презре мя. 15 Не возреша на мя ближнии мои:  
якоже поток оскудевая, или якоже волны преидоша мя: 16

иже мене бояхуся, ныне нападоша на мя: 17 якоже снег или лед смерзлый, егда истает теплоте бывшей, не ктому познавается, что бе: 18 тако и аз оставлен есмь от всех, погибох же и бездомок бых: 19 видите пути Феманския, на стези Савонския смотрящи, 20 и студа исполнены будут на грады и на имения надеющихся. 21 Ныне же и вы наидосте на мя немилостивно: убо видевше мой струп убойтесе. 22 Что бо? Еда что у вас просих, или вашае крепости требую, 23 да спасете мя от врагов, или из руки сильных избавите мя? 24 Научите мя, аз же умолчу: аще что погреших, скажите ми. 25 Но, якоже мнится, зла (суть) мужа истиннаго словеса, не от вас бо крепости прошу: 26 ниже обличение ваше словесы мя утолит, ниже бо вещания вашего словес стерплю. 27 Обаче яко на сира нападаете, наскочите же на друга вашего. 28 Ныне же возрев на лица ваша, не солжу. 29 Сядите ныне, и да не будет неправедно, и паки ко праведному снидитесь. 30 Ибо несть в языке моем неправды, и гортань мой не разуму ли поучается?

**7** Не искушение ли житие человеку на земли, и якоже наемника повседневнога жизнь его? 2 Или якоже раб бояйся господа своего и улучив сень? Или якоже наемник ждый мзды свояе? 3 Такожде и аз ждах месяцы тщы, нощи же болезней даны ми суть. 4 Аще усну, глаголю: когда день? Егда же востану, паки: когда вечер? Исполнен же бываю болезней от вечера до утра. 5 Месится же мое тело в гнои червей, обливаю же грудие земли, гной стружа. 6 Житие же мое есть скоряе беседы, погибе же во тщей надежди. 7 Помяни убо, яко дух мой живот, и ктому не возвратится око мое видети благая. 8 Не узрит мене око видящаго мя:

очи Твои на мне, и ктому несъмь, **9** якоже облак очищен от небесе: аще бо человек снидет во ад, ктому не възыдет, **(Sheol h7585)** **10** ни возвратится во свой дом, ниже имать его познати ктому место его. **11** Убо ниже аз пощажу уст моих, възглаголю в нужди сый, отверзу уста моя горестию души моя сотеснен. **12** Еда море есмь, или змий, яко учинил еси на мя хранение? **13** Рекох, яко утешит мя одр мой, произнесу же ко мне на едине слово на ложки моем: **14** устрашаеши мя сонями и видениями ужасаеши мя: **15** свободиши от духа моего душу мою, от смерти же кости моя. **16** Не поживу бо во век, да долготерплю: отступи от мене, тще бо житие мое. **17** Что бо есть человек, яко възвеличил еси его? Или яко внимаеши умом к нему? **18** Или посещение твориши ему по всяко утро и в покои судити его имаши? **19** Доколе не оставиши мене, ниже отпускаеши мя, дондеже поглосшу слины моя в болезни? **20** Аще аз согреших, что Тебе возмогу соделати, сведый ум человек? Почто мя еси положил прекословна Тебе, и есмь Тебе бременем? **21** Почто неси сотворил беззаконию моему забвения, и очищения греха моего? Ныне же в землю отиду, утренюй же несъмь ктому.

**8** Отвещав же Валдад Савхейский, рече: доколе глаголати будеши сия? **2** Дух многоглаголив во устех твоих. **3** Еда Господь обидит судяй? Или вся сотворивый възмятет правду? **4** Аще сынове твои согреша пред Ним, посла руку на беззакония их: **5** ты же утренюй ко Господу Вседержителю моляся: **6** аще чист еси и истинен, молитву твою услышит, устроит же ти паки житие правды: **7** будут убо первая твоя мала, последняя же твоя без числа. **8** Вопросы бо рода перваго, изследи же по роду отцев: **9** вчерашни бо есмы

и не вемы, сень бо есть наше житие на земли: **10** не сии ли научат тя и возвестят ти и от сердца изнесут словеса? **11** Еда произничет рогоз без воды, или растет ситник без напаяния? **12** Еще сущу на корени, и не пожнется ли? Прежде напаяния всякое былие не изсыхает ли? **13** Тако убо будут последняя всех забывающих Господа: надежда бо нечестиваго погибнет: **14** не населен бо будет дом его, паучина же сбудется селение его. **15** Аще подпрет храмину свою, не станет: емшуся же ему за ню, не пребудет. **16** Влажный бо есть под солнцем, и от тления его леторасль его изыдет: **17** на собрании камня спит, посреде же кремения поживет: **18** аще поглотит место, солжет ему, не видел еси таковая, **19** яко превращение нечестиваго таково, из земли же инаго произрастит. **20** Господь бо не отринет незлобиваго: всякаго же дара от нечестиваго не примет. **21** Истинным же уста исполнит смеха, устне же их исповедания. **22** Врази же их облекутся в студ: жилище же нечестиваго не будет.

**9** Отвещав же Иов, рече: **2** воистинну вем, яко тако есть: како бо будет праведен человек у Господа? **3** Аще бо восхоцет судитися с Ним, не послушает Его, да не преречет ко единому словеси Его от тысящи. **4** Премудр бо есть мыслию, крепок же и велик: кто жесток быв противу Его, пребысть? **5** Обетшай горы, и не ведут, превращай я гневом: **6** трясыи поднебесную из оснований, столпи же ея колеблются: **7** глаголяй солнцу, и не восходит, звезды же печатствуют: **8** прострый един небо и ходяй но морю, яко по земли: **9** творяй Плиады и Еспера, и Арктура и сокровища южная: **10** творяй велия и неизследованная, славная же и изрядная, имже несть числа. **11** Аще приидет ко мне, не

имам видети: и аще мимоидет мене, никакo уразумех. 12  
Аще возмет, кто возвратит? Или кто речет Ему: что сотворил  
еси? 13 Сам бо отвращает гнев, слякошася под Ним кити  
поднебеснии. 14 Аще же мя услышит, или разсудит глаголы  
моя? 15 Аще бо и праведен буду, не услышит мене, суду  
Его помолюся: 16 аще же воззову, и услышит мя, не иму  
веры, яко услыша глас мой. 17 Да не мглою мя потребит,  
многа же ми сотрения сотвори всеу, 18 не оставляет бо  
мя отдохнуть, исполни же мя горести. 19 Понеже силен  
есть крепостию: кто убо суду Его воспротивится? 20 Аще бо  
буду праведен, уста моя нечестия сотворят: аще же буду  
непорочен, стропотен буду. 21 Аще бо нечестие сотворих, не  
вем душею моею: обаче отемлетя ми живот. 22 Темже рех:  
велика и сильна губит гнев. 23 Яко лукавии смертью лютою  
погибнут, обаче праведным посмеваются. 24 Предана есть  
земля в руке нечестиваго, лица судий ея покрывает: аще  
же не Сам есть, кто есть? 25 Житие же мое есть легчае  
скоротечца: отбегоша и не видеша. 26 Или есть кораблем  
след пути, или орла летяща, ищуща яди? 27 Аще бо реку:  
забуду глаголя, приникнув лицом воздохну, 28 трясуся всеми  
удесы: вем бо, яко не безвинна мя оставиши. 29 Аще же  
нечестив есмь, почто не умрох? 30 Аще бо измыюся снегом и  
очищуся руками чистыми, 31 довольно во скверне омочил мя  
еси, возгнушася же мною одежда моя. 32 Неси бо человек,  
якоже аз, Емуже противорюся, да приидем вкупе на суд. 33  
О, дабы ходатай нам был, и обличаяй и разслушай между  
обема. 34 Да отимет от мене жезл, страх же Его да не  
смущает мене: 35 и не убоюся, но возглаголю, ибо тако не  
вем сам себе.

**10** Трудяюся душею моею, стена испущу на мя глаголы моя, возглаголю горестию души моя одержимъ 2 и реку ко Господеви: не учи мя нечестовати, и почто ми сице судил еси? 3 Или добро Ти есть, аще вознеправдую, яко презрел еси дела руку Твоею, совету же нечестивых внял еси? 4 Или якоже человек видит, видиши? Или якоже зрит человек, узриши? 5 Или житие Твое человеческо есть? Или лета Твоя яко дние мужа? 6 Яко истязал еси беззаконие мое и грехи моя изследил еси. 7 Веси бо, яко не нечестовах: но кто есть изимаяй из руку Твоею? 8 Руце Твои сотвористе мя и создасте мя: потом же преложив, поразил мя еси. 9 Помяни, яко брение мя создал еси, в землю же паки возвращаеши мя. 10 Или не якоже млеко измелзил мя еси, усырил же мя еси равно сыру? 11 Кожею же и плотию мя облекл еси, костями же и жилами сшил мя еси: 12 живот же и милость положил еси у мене, посещение же Твое сохрани мой дух. 13 Сия имей в Тебе, вем, яко вся можеш, и невозможно Тебе ничтоже. 14 Аще бо согрешу, храниши мя, от беззакония же не безвинна мя сотворил еси. 15 Аще бо нечестив буду, люте мне, аще же буду праведен, не могу возникнуть: исполнен бо есмь безчестия, 16 ловимъ бо есмь аки лев на убиение: паки же преложив, люте убиваеши мя. 17 Обновляй на мя испытание мое, гнева бо великаго на мя употребил еси и навел еси на мя искушения. 18 Почто убо мя из чрева извел еси, и не умрох, око же мене не видело бы, 19 и бых бы аки не был? Почто убо из чрева во гроб не снидох? 20 Или не мало есть время жизни моя? Остави мене почти мало, 21 прежде даже отиду, отнюдуже не возвращуся, в землю темну

и мрачну, 22 в землю тмы вечныя, идеже несть света, ниже видети живота человеческого.

**11** Отвещав же Софар Минеийский, рече: 2 глаголяй много, и противослышит: или многоречив мнится быти праведен? Благословен рожденный от жены малолетен. 3 Не мног во словесех буди: несть бо противовещаяй ти. 4 Не глаголи бо, яко чист есмь делы и безпорочен пред Ним: 5 но како Господь возглаголет к тебе и отверзет устне Свои с тобою? 6 Потом возвестит ти силу премудрости, яко сугуб будет в сих, яже противу тебе: и тогда уразумеши, яко достойная тебе сбыхася от Господа, имже согрешил еси, 7 или след Господень обрящеши? Или в последняя достигл еси, яже сотвори Вседержитель? 8 Высоко небо, и что сотвориши? Глубочае же сущих во аде что веси? (Sheol h7585) 9 Не должае ли меры земныя, или широты морския? 10 Аще же превратит вся, кто речет Ему: что сотворил еси? 11 Той бо весть дела беззаконных: видев же нелепая, не презрит. 12 Человек же инако обилует словесы: земный же рожденный от жены равен ослу пустынному. 13 Аще бо ты чисто положил еси сердце твое, воздеваеши же руце твои к Нему, 14 аще беззаконно что есть в руку твою, далече сотвори е от тебе, неправда же в жилищи твоим да не вселится: 15 тако бо ти возсияет лице, якоже вода чиста: совлечешися же скверны, и не убоишися, 16 и труда забудеши, якоже волны мимошедшия, и не устрашишися. 17 Молитва же твоя, аки денница, и паче полудне возсияет ти жизнь: 18 уповая же будеши, яко будет ти надежда: от туги же и попечения явится ти мир: 19 упокоишися бо, и не будет боряй тя: пременяющияся же мнози имут просити тя, 20 спасение

же оставит их: надежда бо их пагуба, очи же нечестивых истают.

**12** Отвещав же Иов, рече: **2** убо вы ли едины есте человецы, или с вами скончается премудрость? **3** И у мене сердце есть якоже и у вас. **4** Праведен бо муж и непорочен бысть в поругание: **5** во время бо определенное уготован бысть пасти от иных, дома же его опустошены быти беззаконными. Обаче никтоже да уповаает, лукав сый, неповинен быти, **6** елицы разгневляют Господа, аки и истязания им не будет. **7** Но вопросы четвероногих, аще ти рекут, и птиц небесных, аще ти возвестят: **8** повеждь земли, аще ти скажет, и исповедят ти рыбы морския. **9** Кто убо не разуме во всех сих, яко рука Господня сотвори сия? **10** Не в руце ли Его душа всех живущих и дух всякаго человека? **11** Ухо бо словеса рассуждает, гортань же брашна вкушает. **12** Во мнозем времени премудрость, во мнозе же житии ведение. **13** У Него премудрость и сила, у Того совет и разум. **14** Аще низложит, кто созиждет? Аще затворит от человеков, кто отверзет? **15** Аще возбранит воду, изсушит землю: аще же пустит, погубит ю превратив. **16** У Него держава и крепость, у Того ведение и разум. **17** Проводяй советники пленены, судии же земли ужаси: **18** посаждаяй цари на престолех и обвязуяй поясом чресла их: **19** отпускаяй жерцы пленники, сильных же земли низврати: **20** изменяяй устне верных, разум же старцев уразуме: **21** изливаяй безчестие на князи, смиренныя же изцели: **22** открываяй глубокая от тмы, изведе же на свет сень смертную: **23** прельщаяй языки и погубляяй их, низлагай языки и наставляяй их: **24** изменяяй сердца



князей земных, прельсти же их на пути, егоже не ведяху, **25**  
да осяжут тму, а не свет, да заблудят же яко пьяный.

**13** Се, сия виде око мое, и слыша ухо мое, **2** и вем, елика и  
вы весте: и не неразумнее есмь вас. **3** Но обаче и аз ко  
Господу возглаголю, обличу же пред Ним, аще восхощет. **4**  
Вы бо есте врачеве неправеднии и целители злых вси, **5** буди  
же вам онемети, и сбудется вам в премудрость. **6** Слышите  
же обличение уст моих, суду же устен моих вонмите. **7** Не  
пред Богом ли глаголете и пред Ним вещаете лесь? **8** Или  
уклонитесь, вы же сами судии будите. **9** Добро бо, аще  
изследит вас: аще бо вси творящии приложитесь к нему,  
обаче обличит вы. **10** Аще же и тай лицам удивитесь, **11** не  
движение ли Его смятет вас, боязнь же от Него нападет на  
вы? **12** Отидет же величание ваше равно пепелу, тело же  
бренно. **13** Умолчите, да возглаголю и почию от гнева. **14**  
Вземля плоти моя зубами, душу же мою положу в руце моей.  
**15** Аще мя убьет Сильный, понеже и нача, обаче возглаголю  
и обличу пред Ним: **16** и сие ми сбудется во спасение: не  
внидет бо пред Ним лесь. **17** Послушайте, послушайте  
глагол моих: возвещу бо вам слышащым. **18** Се, аз близ  
есмь суда моего, вем аз, яко праведен явлюся. **19** Кто бо  
есть судяйся со мною, да ныне умолчу и исчезну? **20** Двое  
же ми сотвориши, тогда от лица Твоего не скрыюся: **21** руку  
от мене отими, страх же Твой да не ужасает мя: **22** посем  
призовеши, аз же Тя послушаю, или возглаголеши, аз же  
Ти дам ответ. **23** Колицы суть греси мои и беззакония моя?  
Научи мя, кая суть? **24** Почто крыешися от мене? Мниши же  
мя противна суца Тебе? **25** Или яко лист движимь ветром  
убоишися? Или яко сену носиму ветром противляешимся?

26 Яко написал еси на мя злая, обложил же ми еси юностныя грехи: 27 положил же еси ногу мою в возбранение: сохранил же еси дела моя вся: в корения же ног моих пришел еси: 28 иже обетшают якоже мех, или якоже риза молием изядена.

**14** Человек бо рожден от жены малолетен и исполнь гнева: 2 или якоже цвет процветый отпаде, отбеже же яко сень, и не постоит. 3 Не и о сем ли слово сотворил еси, и сему сотворил еси внити на суд пред Тя? 4 Кто бо чист будет от скверны? Никтоже, 5 аще и един день житие его на земли: изочтени же месяцы его от Тебе, на время положил еси, и не преступит. 6 Отступи от него, да умолкнет и изберет житие якоже наемник. 7 Есть бо древу надежда: аще бо посечено будет, паки процветет, и леторасль его не оскудеет: 8 аще бо состареется в земли корень его, на камени же скончается стебло его, 9 от вони воды процветет, сотворит же жатву, якоже новосажденное. 10 Муж же умерый отиде, пад же человек, ктому несть. 11 Временем бо оскудевает море, река же опустевши изсше: 12 человек же уснув не встанет, дондеже не будет небо сошвено, и не возбудятся от сна своего. 13 Убо, о, дабы во аде мя сохранил еси, скрыл же мя бы еси, дондеже престанет гнев Твой, и вчиниши ми время, в неже память сотвориши ми. (Sheol h7585) 14 Аще бо умрет человек, жив будет: скончав дни жития своего, потерплю, дондеже паки буду. 15 Посем воззовеши, аз же послушаю Тя: дел же руку Твоею не отвращайся: 16 изчислил же еси начинания моя, и ничтоже Тя мимоидет от грех моих: 17 запечатлел же ми еси беззакония в мешце, назнаменал же еси, аще что неволею преступих. 18 Обаче и гора падающи распадется, и камень обетшает от места своего: 19 камение

огладиша воды, и потопиша воды взнак холмы земныя, и ожидание человеческо погубил еси. 20 Отринул еси его до конца, и отиде: изменил еси ему лице и испустил еси. 21 Многим же бывшим сыном его, не весть: аще же и мало их будет, не знает: 22 но плоти его болеша, душа же его о себе сетова.

**15** Отвещав же Елифаз Феманитин, рече: 2 еда премудрый даст ответ разумен на ветер, и наполни болезнию чрево, 3 обличая глаголы, имиже не подобает, и словесы, ихже ни кая польза? 4 Не и ты ли отринул еси страх? Скончал же еси глаголы таковы пред Господем? 5 Повинен еси глаголом уст твоих, ниже рассудил еси глаголы сильных. 6 Да обличат тя уста твоя, а не аз, и устне твои на тя возсвидетелствуют. 7 Что бо? Еда первый от человек рожден еси? Или прежде холмов сгустился еси? 8 Или строение Господне слышал еси? Или в советника тя употреби Бог? И на тя (единого) ли прииде премудрость? 9 Что бо веси, егоже не вемы? Или что разумеши ты, егоже и мы (не разумеем)? 10 И стар и древен есть в нас, старший отца твоего деньми. 11 Мало, о нихже согрешил еси, уязвлен еси, вельми выше меры возглаголал еси. 12 Что дерзостно бысть сердце твое? Или что вознесостеса очи твои? 13 Яко ярость изрыгнул еси пред Господем, изнесл же еси изо уст такова словеса? 14 Кто бо сый человек яко будет непорочен? Или аки будущий праведник рожден от жены? 15 Аще во святых не верит, небо же нечисто пред Ним, 16 кольми паче мерзкий и нечистый муж, пияй неправды, якоже питие. 17 Возвещу же ти, послушай мене: яже ныне видех, возвещу ти, 18 яже премудрии рекут, и не утаиша отцы их, 19 имиже единым

дана бысть земля, и не найде иноплеменник на ня. 20 Все житие нечестиваго в попечении, лета же изочтена дана сильному, 21 страх же его во ушесех его: егда мнит уже в мире быти, тогда приидет нань низвращение: 22 да не верует отвратитися от тмы, осужден бо уже в руки железа, 23 учинен же есть в брашно неясытем: весть же в себе, яко ждет падения, день же темен превратит его, 24 беда же и скорбь оымет его, якоже военачалник напреди стояй падает, 25 яко вознесе руце на Господа, пред Господем же Вседержителем ожесточи выю, 26 тече же противу Ему укоризною в толщи хребта щита своего: 27 яко покры лице свое туком своим и сотвори омет на стегнах: (хвала же его укоризна). 28 Да вселится же во градех пустых, внидет же в дома ненаселенныя: а яже они уготоваша, инии отнесут. 29 Ниже обогатится, ниже останет имение его, не имать положити на землю сени, 30 ниже избежит тмы: прозябение его да усушит ветр, и да отпадет цвет его: 31 да не верит, яко стерпит, тщетная бо сбудутся ему. 32 Посечение его прежде часа растлеет, и леторасль его не облиственеет: 33 да оыман будет якоже незрелая ягода прежде часа, да отпадет же яко цвет масличия. 34 Послушество бо нечестиваго смерть, огонь же пожжет дома мздоимцев: 35 во чреве же примет болезни, сбудется же ему тщета, чрево же его понесет лесть.

**16** Отвещав же Иов, рече: 2 слышах сицевая многа, утешителие зол вси. 3 Что бо? Еда чин есть во словесех ветра? Или кую ти пакость сотворит, яко отвечаеши? 4 И аз якоже вы возглаголю: аще бы душа ваша подлежала вместо моя, тогда наскочил бых на вы словесы, покиваю же на вы главою моею. 5 Буди же крепость во устех моих,

движения же устен не пощажу. **6** Аще бо возглаголю, не возболю ли язвою? Аще же и умолчу, чим меньше уязвен буду? **7** Ныне же преутруждена мя сотвори, буя, согнивша, и ят мя. **8** В послушество бых, и воста во мне лжа моя, противно лицу моему отвеща. **9** Гневен быв низложи мя, возскрежета зубы на мя, стрелы разбойников Его нападаша на мя. **10** Остротою очес насака, мечем порази мя в колена: вкупе же потекоша на мя: **11** предаде бо мя Господь в руки неправедных, нечестивым же поверже мя. **12** Мирствующа разсыпа мя, взяв мя за власы оборва, постави мя аки примету. **13** Обыдоша мя копиями бодуще во истесы моя, не щадяще: излиша на землю желчь мою, **14** низложиша мя труп на труп, текоша ко мне могущии, **15** вретнице сошиша на кожу мою, и мощь моя на земли угасе. **16** Чрево мое сгоре от плача, на веждах же моих стень смертная, **17** неправедно же ни едино бе в руку мою: молитва же моя чиста. **18** Земле, да не покрыеши над кровию плоти моя, ниже да будет место воплю моему. **19** И ныне се, на небесех Послух мой, Свидетель же ми во вышних. **20** Да приидет моя мольба ко Господу, пред Нимже да каплет око мое. **21** Буди же обличение мужу пред Господем, и сыну человеческому ко ближнему его. **22** Лета же изочтеная приидоша, и путем, имже не возвращуся, пойду.

**17** Тлею духом носимь, прошу же гроба и не улучаю. **2** Молю болезнуя, и что сотворю? Украдоша же ми имение чуждии. **3** Кто есть сей? Рукою моею связан да будет. **4** Яко сердце их сокрыл еси от мудрости, сего ради да не вознесеши их. **5** Части возвестит злобы: очи же на сынех истаяста. **6** Положил же мя еси в притчу во языцех, смех же

бых им. 7 Ослепоста бо от гнева очи мои, повоен бых  
вельми от всех: 8 чудо объа истинных о сем, праведник же  
на беззаконника да встанет: 9 да содержит же верный  
путь свой, чистый же рукама да примет дерзость. 10 Но  
обаче вси належите и приидите, не бо обретаю в вас истины.  
11 Дние мои преидоша в течении, расторгошася же удове  
сердца моего. 12 Ночь в день преложих: свет близ от лица  
тмы. 13 Аще бо стерплю, ад ми есть дом, в сумраце же  
постлася ми постеля. (Sheol h7585) 14 Смерть назвах отца  
моего быти, мать же и сестру ми гной. 15 Где убо еще есть  
ми надежда, или благая моя узрю? 16 Или со мною во ад  
сидут, или вкупе в персть сидем. (Sheol h7585)

**18** Отвещав же Валдад Савхейский, рече: 2 доколе не  
престанеши? Пожди, да и мы возглаголем. 3 И почто аки  
четвероножная умолчахом пред тобою? 4 Пребысть ти  
гнев. Что бо? Аще ты умреш, не населенна ли будет  
поднебесная? Или превратятся горы из оснований? 5 И  
свет нечестивых угаснет, и не произыдет их пламень: 6  
свет его тма в жилищи, светильник же в нем угаснет: 7  
да уловят меншии имения его, погрешит же его совет: 8  
ввержена же бысть нога его в пругло, мрежею да повиеся:  
9 да приидут же нань пругла, укрепит нань жаждущих: 10  
скрыся в земли уже его, и ятие его на стези. 11 Окрест  
да погубят его болезни: мнози же окрест ног его обыдут  
во гладе теснем: 12 падение же ему уготовано велико. 13  
Поядены же да будут плесны ног его, красная же его да  
пояст смерть. 14 Отторжено же буди от жития его изцеление,  
да имет же его беда виною царскою. 15 Да вселится в  
храмине его в нощи его, посыпана да будут лепотная его

жупелом: 16 под ним корения его да изсохнут, свыше же нападет пожатие его. 17 Память его да погибнет от земли, и (не) будет имя его на лица внешнем: 18 да отринет его от света во тму: 19 не будет знаемь в людех его, ниже спасен в поднебесней дом его: 20 но в своих ему поживут инии, над ним воздохнуша последнии, первых же объа чудо. 21 Сии суть домове неправедных, сие же место неведущих Бога.

**19** Отвещав же Иов, рече: 2 доколе притрудну творите душу мою и низлагаете мя словесы? Уразумейте токмо, яко Господь сотвори мя сице. 3 Клевещете на мя, не стыдящися мене належите ми. 4 Буди, яко воистинну аз прельстихся, и у мене водворяется погрешение, глаголати словеса, яже не подобаше, словеса же моя погрешают, и не во время: 5 буди же, яко на мя величается, наскакаете же ми поношением: 6 разумейте убо, яко Господь есть иже смяте мя и ограду Свою на мя вознесе. 7 Се, смеюся поношению, не возглаголю: возопию, и нигдеже суд. 8 Окрест огражден есмь и не могу прейти: пред лицом моим тму положи, 9 славу же с мене совлече и отя венец от главы моея: 10 растерза мя окрест, и отидох: посече же яко древо надежду мою. 11 Люте же гнева употреби на мя и возмне мя яко врага. 12 Вкупе же приидоша искушения Его на мя, на путех же моих обыдоша мя наветницы. 13 Братия моя отступиша от мене, познаша чуждих паче мене, и друзие мои немилостиви быша: 14 не снабдеша мя ближнии мои, и ведящии имя мое забыша мя. 15 Соседи дому и рабыни моя, (яко) иноплеменник бых пред ними: 16 раба моего звах, и не послуша, уста же моя моляхуся: 17 и просих жену мою, призывах же лаская сыны подложниц моих: 18 они же мене в век отринуша, егда

возстану, на мя глаголют. 19 Гнушахуся мене видящии мя, и ихже любих, восташа на мя. 20 В кожи моей согниша плоти моя, кости же моя в зубех содержатся. 21 Помилуйте мя, помилуйте мя, о, друзиие! Рука бо Господня коснувшаяся ми есть. 22 Почто мя гоните якоже и Господь? От плотей же моих не насыщаетесь? 23 Кто бо дал бы, да напишутся словеса моя, и положатся оная в книзе во век? 24 И на дщице железне и олове, или на камениих изваяются? 25 Вем бо, яко присносущен есть, иже имать искупити мя, 26 (и) на земли воскресити кожу мою терпящую сия, от Господа бо ми сия совершишася, 27 яже аз в себе свем, яже очи мои видеста, а не ин: вся же ми совершишася в недре. 28 Аще же и речете: что речем противу ему? И корень словесе обрящем в нем. 29 Убойтеся же и вы от меча: ярость бо на беззаконныя найдет, и тогда увидят, где есть их вещество.

**20** Отвещав же Софар Минейский, рече: 2 не тако мнех сия тебе рещи противу, и не разумеете паче нежели и аз. 3 Наказание срамления моего услышу, и дух от разума отвещавает ми. 4 Еда сих не уразумел еси от века, отнележе положен человек бысть на земли? 5 Веселие бо нечестивых падение страшно, обрадование же беззаконных пагуба. 6 Аще въздут на небо дары его, жертва же его облаков коснется: 7 егда бо мнится уже утвержден быти, тогда в конец погибнет. Видевшии же его рекут: где есть? 8 Якоже сон отлетьевый не обрящется, отлете же аки мечтание ночное. 9 Око призре, и не приложит, и ктому не познает его место его. 10 Сынов его да погубят меншии, и руце его возжгут болезни. 11 Кости его наполнишася грехов юности его и с ним на персти уснут. 12 Аще усладится во устех его злоба, скрывает ю



под языком своим: **13** не пощадит ея, и не оставит ея, и соберет ю посреде гортани своего, **14** и не возможет помощи себе: желчь аспидов во чреве его. **15** Богатство несправедливо собираемо изблюется, из храмины его извлечет его Ангел. **16** Ярость же змиеву да ссет, да убьет же его язык змиин. **17** Да не узрит отдрояния скотов, ниже прибытка меда и масла кравия. **18** Вотще и всеу трудися, богатство, от негоже не вкусит, якоже клоки не сожваемы и не поглощаемы. **19** Многих бо немощных дома сокруши, жилище же разграби и не постави. **20** Несть спасения имению его, в вожделении своем не спасется. **21** Несть останка брашну его, сего ради не процветут ему благая. **22** Егда же мнит уже исполнь быти, оскорбится, всяка же беда нань приидет. **23** Аще како либо исполнит чрево свое, напустит нань ярость гнева, одождит на него болезни: **24** и не спасется от руки железа, да устрелит его лук медян, **25** и да пройдет сквозе тело его стрела: звезды же в жилищих его: да приидут нань страси, **26** и всяка тма на нем да пребудет: да пояст его огонь нераздеженный, да озлобит же пришлец дом его: **27** и да открыет небо беззакония его, и земля да востанет нань: **28** да извлечет дом его пагуба до конца, день гнева да приидет нань. **29** Сия часть человека нечестиваго от Господа и стяжание имений его от Надзирателя.

**21** Отвещав же Иов, рече: **2** послушайте, послушайте словес моих, да не будет ми от вас сие утешение: **3** потерпите ми, аз же возглаголю, таже не посмеетемися. **4** Что бо? Еда человеческо ми обличение? Или почто не возярюся? **5** Воззревшии на мя удивитесь, руку положше на ланите. **6** Аще бо воспомяну, ужаснуса: обдержат бо плоть

мою болезни. 7 Почто нечестивии живут, обетшаша же в богатстве? 8 Семя их по души, чада же их пред очима. 9 Домове их обилнии суть, страх же нигде, раны же от Господа несть на них. 10 Говядо их не изверже: спасена же бысть их имущая во чреве и не лишися. 11 Пребывают же яко овцы вечныя, дети же их предиграют, 12 взявше псалтирь и гусли, и веселятся гласом песни. 13 Скончаша во благих житие свое, в покои же адове успоша. (Sheol h7585) 14 Глаголют же Господеви: отступи от нас, путей Твоих ведети не хотим: 15 что достоин, яко да поработаем Ему? И кая польза, яко да взыщем Его? 16 В руках бо их бяху благая, дел же нечестивых не надзирает. 17 Обаче же и нечестивых светилник угаснет, найдет же им развращение, болезни же их оымут от гнева: 18 будут же аки плевые пред ветром, или якоже прах, егоже взя вихр. 19 Да оскудеют сыном имения его: воздаст противу ему, и уразумеет. 20 Да узрят очи его свое убиение, от Господа же да не спасется. 21 Яко воля его с ним в дому его, и числа месяцев его разделишася. 22 Не Господь ли есть научаяй разуму и хитрости? Тойже мудрых разсуждает. 23 Той умрет в силе простоты своея, всецел же благодушествуяй и благоуспеваяй, 24 утроба же его исполнена тука, мозг же его разливается. 25 Ов же умирает в горести души, не ядый ничтоже блага. 26 Вкупе же на земли спят, гнилость же их покры. 27 Темже вем вас, яко дерзостию належите ми, 28 яко речете: где есть дом князь? И где есть покров селений нечестивых? 29 Вопросите мимоходящих путем, и знамения их не чужда сотворите. 30 Яко на день пагубы соблюдается нечестивый, и в день гнева Его отведен будет. 31 Кто возвестит пред лицом его

путь его, и еже той сотвори, кто воздаст ему? 32 И той во гроб отнесен бысть, и на гробищих побде. 33 Усладися ему дробное камение потока, и вслед его всяк человек отидет, и пред ним безчисленнии. 34 Како же мя утешаете суетными? А еже бы мне почити от вас, ничтоже.

**22** Отвещав же Елифаз Феманитин, рече: 2 не Господь ли есть научаяй разуму и хитрости? 3 Ибо кое попечение Господу, аще ты был еси дела непорочен? Или (кая) польза, яко прост творити будеши путь твой? 4 Или опасение имея от тебе обличит тя и внидет с тобою в суд? 5 Еда злоба твоя есть не многа? Безчисленнии же твои суть греси? 6 В залог бо имал еси от братии твояе вотще, одежду же нагих отнимал еси, 7 ниже водою жаждущих напоил еси, но алчущих лишил еси хлеба: 8 удивлялся же еси неких лицу и повергал еси убогих на земли: 9 вдовицы же отпустил еси тщы и сироты озлобил еси. 10 Сего ради обыдоша тя сети, и поспеши на тя рать велика: 11 свет тебе тма бысть, уснувшего же вода тя покры. 12 Еда на высоких живый не призирает? Укоризною же возносящихся смири. 13 И рекл еси: что разуме Крепкий? Или во мраце разсудит? 14 Облак покров Его, и неувидимь будет, и круг небесе обходит. 15 Еда стезю древнюю сохраниши, в нюже ходиша мужие неправедни, 16 иже яти быша прежде времење? Река текущая основания их, 17 глаголющии: что сотворит нам Господь? Или что нанесет на ны Вседержитель? 18 Иже исполнил есть дома их благими: совет же нечестивых далече от Него. 19 Видевше праведницы возсмеяшася, непорочен же глумляшеся им: 20 не погибе ли имение их, и останки их пояст огонь? 21 Буди убо тверд, аще претерпиши, потом плод твой будет во благих. 22

Приими же из уст Его изречение и восприими словеса Его в сердце твое. **23** Аще же обратишия и смириши себе пред Господем, и далече сотвориши от жилища твоего неправду, **24** и положен будеши на персти в камени, и якоже камень потока Офирска. **25** Будет убо тебе Вседержитель помощник от враг, чиста же сотворит тя якоже серебро разжжено, **26** потом дерзновение возмееши пред Богом, воззрев весело на небо. **27** Помольшуся же тебе к Нему, услышит тя, даст же ти обеты твоя воздати, **28** устроит же ти жилище правды, на путех же твоих будет свет: **29** яко смирил еси себе, тогда речеши: вознесеса, и поникша очима спасет, **30** избавит неповиннаго, и спасешия чистыма рукама твоима.

**23** Отвещава же Иов, рече: **2** вем убо, яко из руки моея обличение мое есть, и рука Его тяжка бысть паче моего въздыхания. **3** Кто убо увестъ, яко обрящу Его и прииду ко кончине? **4** И реку мой суд, уста же моя исполню обличения, **5** уразумею же изцеления, яже ми речет, и ощуцу, что ми возвестит. **6** И аще со мною крепостию найдет на мя, посем же не воспретит ми. **7** Истина бо и обличение от Него: да изведет же в конец суд мой. **8** Аще бо во первых пойду, ктому несъмь: в последних же, како вем Его? **9** Ошую творящу Ему, и не разумех: обложит одесную, и не узрю. **10** Вестъ бо уже путь мой, искуси же мя яко злато. **11** Изыду же в заповедех Его, пути бо Его сохраних, и не уклонюся от заповедий Его **12** и не преступлю, в недрах же моих сокрых глаголголы Его. **13** Аще же и Сам судил тако, кто есть рекий противу Ему? Сам бо восхоте и сотвори. **14** Сего ради о Нем трепетен бых, наказуемъ же попекохся о Нем: **15** сего ради от лица Его потщуся, поучуся и убоюся от Него. **16** И Господь

умягчил сердце мое, и Вседержитель потщася о мне: 17  
не ведех бо, яко найдет на мя тма, пред лицом же моим  
покрыет мрак.

**24** Почто же Господа утаишася часы, 2 нечестивии же  
предел преидоша, стадо с пастырем разграбивше? 3  
Подяремника сырых отвелоша и вола вдовича в залог взяша:  
4 уклониша немощных от пути праведнаго, вкупе же скрышася  
кротцыи земли: 5 изыдоша же, яко осли на село, на мя,  
изступивше своего чина: сладок бысть хлеб им ради юных.  
6 Ниву прежде време не свою суцу пожаша, немощнии же  
виноград нечестивых без мзды и без брашна возделаша: 7  
нагих многих успиша без риз, одежду же души их отяша:  
8 каплями горскими мокнут, занеже не имеяху покрова, в  
камение облекошася: 9 восхитиша сироту от сосца, падшаго  
же смириша: 10 нагия же успиша неправедно, от алчущих же  
хлеб отяша: 11 в теснинах неправедно заседоша, пути же  
праведнаго не ведеша. 12 Уже из града и из домов своих  
изгоними бываху, душа же младенцев стеньше вельми: Бог  
же почто сих посещения не сотвори? 13 На земли суцым  
им, и не разумеша, пути же праведнаго не ведеша, ни по  
стезям его ходиша. 14 Разумев же их дела, предаде их во  
тму, и в нощи будет яко тать. 15 И око прелюбодея сохрани  
тму, глаголя: не узрит мя око: и покрывало лицу наложи. 16  
Прокопа в нощи храмины, во днех же запечатлеша себе, не  
познаша света: 17 яко абие заутра им сень смерти, понеже  
познает мятеж сени смертныя. 18 Легок есть на лица воды:  
проклята буди часть их на земли, да явятся же садовия их  
на земли суха: 19 рукоятие бо сырых разграбиша. (Sheol  
h7585) 20 Потом воспомянен бысть ему грех, и якоже мгла

росы изчезе: воздано же буди ему, еже содея, сокрушен же буди всяк неправдив яко древо неизцельно: **21** неплодней бо не добро сотвори и жены не помилова. **22** Яростию же низврати немощныя: востав убо не имать веры яти о своем житии. **23** Егда же разболится, да не надеется здрав быти, но падет недугом. **24** Многи бо озлоби высота его: увяде же яко злак в знои, или якоже клас от стебла сам отпад. **25** Аще же ни, кто есть глаголяй лжу ми глаголати, и положит ни во чтоже глаголы моя?

**25** Отвещав же Валдад Савхейский, рече: **2** что бо начало, аще не страх от Него, иже творит всяческая в вышних? **3** Да никтоже бо мнит, яко есть умедление воинством: и на кого не найдет навет от Него? **4** Како бо будет праведен человек пред Богом? Или кто очистит себе рожденный от жены? **5** Аще луне повелевает, и не сияет, звезды же нечисты суть пред Ним, **6** кольми паче человек гной, и сын человеческий червь.

**26** Отвещав же Иов, рече: **2** кому прилежиши, или кому хочещи помогати? Не сему ли, емуже многа крепость и емуже мышца крепка есть? **3** Кому совет дал еси? Не емуже ли вся премудрость? Кого поженеши? Не емуже ли превелия сила? **4** Кому возвестил еси глаголы? Дыхание же чие есть исходящее из тебе? **5** Еда исполни родятся под водою и соседми ея? **6** Наг ад пред Ним, и несть покрывала Пагубе. **(Sheol h7585)** **7** Простираяй север ни на чемже, повешаяй землю ни на чемже, **8** связуяй воду на облацех Своих, и не расторжесе облак под нею: **9** держай лице престола, простирая над ним облак Свой: **10** повеление окружи на лице воды даже до скончания света со тмою. **11** Столпи

небеснии прострошася и ужасошася от запрещения Его. **12** Крепостию укроти море, и хитростию его низложен бысть кит: **13** верей же небесныя убояшася Его: повелением же умертви змиа отступника. **14** Се, сия части пути Его: и о капли слова услышим в Нем: силу же грома Его кто уведа, когда сотворит?

**27** Еще же приложив Иов, рече в притчах: **2** жив Господь, иже ми сице суди, и Вседержитель, Иже огорчи ми душу: **3** дондеже еще дыхание мое есть и дух Божий сущий в ноздрех моих, **4** не возглаголют устне мои беззакония, ниже душа моя поучится неправде. **5** Не буди мне правдивыми нареци вас, дондеже умру: не изменю бо незлобия моего. **6** Правде же внимая, не оставлю ея, не свем бо себе злых соделавша. **7** Обаче же, дабы были врази мои, якоже низвращение нечестивых, и востающии на мя, якоже пагуба пребеззаконных. **8** И кая бо есть надежда нечестивому, яко ожидает? Надеясь на Господа спасется ли? **9** Или мольбу его услышит Бог? Или нашедшей ему беде, **10** еда имать кое дерзновение пред Ним? Или яко призвавшу ему, услышит ли Его? **11** Сего ради возвещу вам, что есть в руке Господни, и, еже есть у Вседержителя, не солжу. **12** Се, вси весте, яко тщетная ко тщетным прилагаете. **13** Сия часть человека нечестиваго от Господа: и жребий сильных приидет от Вседержителя на ня. **14** Аще мнози будут сынове их, на закление будут: аще же и возмужают, нищы будут: **15** оставшиися же ему смертию умрут, и вдовиц их никтоже помилует. **16** Аще соберет якоже землю сребро, и якоже брение уготовит злато, **17** сия вся праведнии одержат, имения же его истиннии возмут: **18** будет же дом его яко молие, и яко

паучина, яже снабде. 19 Богатый уснет и не приложит, очи свои отверзе, и несть. 20 Обыдоша его якоже вода болезни, нощию же ят его примрак. 21 Возмет же его вар, и отидет, и взвеет его от места его, 22 и вержет на него, и не пощадит, из руку его бежанием побежит: 23 восплещет нань рукама своима и с шумом возмет его от места своего.

**28** Есть бо сребру место, отнюдуже и бывает, и место злату, отнюдуже очищается. 2 Железо бо из земли раждается, медь же равно камению сечется. 3 Чин положи тме, и вся концы сам испытует, камык тмы и сень смерти. 4 Пресечение потока от праха: забывающийи же путь правый изнемогоша, от человек подвигошася. 5 Есть земля, из неяже изыдет хлеб: под нею обратися яко огонь. 6 Место сапфира камень ея, и персть злато ему. 7 Стезя, не позна ея птица, и не узрею око супово, 8 и не ходиша по ней сынове величавых, и не прейде по ней лев. 9 На несекоме камени простре руку свою, преврати же из корения горы: 10 бреги рек расторже, всякое же честное виде око мое: 11 глубины же рек откры и показа силу свою на свет. 12 Премудрость же откуда обретется? И кое место есть ведения? 13 Не весть человек пути ея, ниже обретется в человецех. 14 Бездна рече: несть во мне: и море рече: несть со мною. 15 Не дастся сокровище за ню, и не извесится сребро на изменение ея, 16 и не сравнится со златом Софирским, со ониксом честным и сапфиром: 17 не равно будет ей злато и кристаль, и изменение ея сосуди злати. 18 Превысокая и бисерие не помянутся, и притяжи премудрость паче внутреннейших: 19 не уравнился ей топазий Ефиопский, со златом чистым не сравнится. 20 Премудрость же откуда обретется? И кое место есть разуму?



21 Утаися от всякаго человека, и от птиц небесных скрыся.  
22 Пагуба и смерть рекосте: слышахом ея славу. 23 Бог благо позна ея путь: Сам бо весть место ея. 24 Ибо Сам поднебесную всю надзирает, ведый, яже на земли, вся, яже сотвори. 25 Ветров вес и воде меру егда сотворил, 26 тако видяй сочте, и путь в сотрясении гласов, 27 тогда виде ю и поведая ю, уготовав изследи 28 и рече человеку: се, благочестие есть премудрость, а еже удалятися от зла есть ведение.

**29** Еще же приложив Иов, рече в притчах: 2 кто мя устроит по месяцам преждних дний, в нихже мя Бог храняше, 3 якоже егда светяшеся светилник Его над главою моею, егда светом Его хождах во тме, 4 егда бех тяжек в путех, егда Бог посещение творяше дому моему, 5 егда бех богат зело, окрест же мене раби, 6 егда обливахуся путие мои маслом кравиим, горы же моя обливахуся млеко, 7 егда исхождах изутра во град, на стогнах же поставляшеся ми престол? 8 Видяще мя юноши скрывашася, старейшины же вси воставаша: 9 вельможи же преставаху глаголати, перст возложше на уста своя. 10 Слышавшии же блажиша мя, и язык их прильпе гортани их: 11 яко ухо слыша и ублажи мя, око же виде мя уклонися. 12 Спасох бо убогаго от руки сильного, и сироте, емуже не бе помощника, помогох. 13 Благословение погибающаго на мя да приидет, уста же вдовича благословиша мя. 14 В правду же облачахся, одевахся же в суд яко в ризу. 15 Око бех слепым, нога же хромым: 16 аз бых отец немощным, распрю же, еяже не ведях, изследих: 17 сотрох же членовныя неправедных, от среды же зубов их грабление изях. 18 Рех же: возраст мой

состареемся якоже стебло финиково, многа лета поживу. **19** Корень разверзется при воде, и роса пребудет на жатве моей. **20** Слава моя нова со мною, и лук мой в руке моей поидет. **21** (Старейшины) слышавшии мя внимаху, молчаху же о моем совете. **22** К моему глаголу не прилагаху, радовахуся же, егда к ним глаголах: **23** якоже земля жаждущая ожидает дождя, тако сии моего глаголения. **24** Аще возсмеюся к ним, не вериша: и свет лица моего не отпадеши. **25** Избрах путь их, и седех князь, и вселяхся якоже царь посреде храбрых, аки утешаяй печальных.

**30** Ныне же поругашамися малейшии: ныне учат мя от части, ихже отцев уничтожах, ихже не вменях достойными псов моих стад. **2** Крепость же рук их во что мне бысть? У них погибаше скончание. **3** В скудости и гладе бесплоден: иже бежаху в безводное вчера сотеснение и бедность: **4** иже обхождаху былие в дребех, имже былие бяше брашно, безчестнии же и похулении, скудни всякаго блага, иже и корение древес жваху от глада великаго. **5** Восташа на мя татие, **6** ихже домове беша пещеры каменны: **7** от среды доброгласных возопиют, иже под хврастием дивиим живяху: **8** безумных сынове и безчестных, имя и слава угашена на земли. **9** Ныне же гусли есмь аз им, и мене в притчу имут: **10** возгнушались же мною отступивше далече, ни лица моего пощадеша от плюновения. **11** Отверз бо тул Свой уязви мя, и узду устам моим наложи. **12** На десную отрасли восташа, нозе свои простроша и путесотвориша на мя стези пагубы своя. **13** Сотрошася стези моя, совлекоша бо ми одежду. **14** Стрелами своими устреми мя: сотвори ми, якоже восхоте: в болезнех скисохся, обращаются же ми скорби. **15** Отиде ми

надежда якоже ветр, и якоже облак спасение мое. 16 И ныне на мя излиется душа моя: и одержат мя дние печалей: 17 нощию же кости моя смятошася, жилы же моя разслабеша. 18 Многую крепостию ятсся за ризу мою: якоже ожерелие ризы моя объя мя. 19 Вменяеши же мя равна брению, в земли и пепеле часть моя. 20 Возопих же к Тебе, и не услышал мя еси: сташа же и смотриша на мя. 21 Наидоша же на мя без милости, рукою крепкою уязвил мя еси: 22 вчинил же мя еси в болезнях и отвергл еси мя от спасения. 23 Вем бо, яко смерть моя сотрет: дом бо всякому смертну земля. 24 Аще бы возможно было, сам бых себе убил, или молил бых иного, дабы ми то сотворил. 25 Аз же о всяцем немощнем восплакахся, воздохнух же видев мужа в бедах. 26 Аз же ждах благих, и се, сретоша мя паче дние зол. 27 Чрево мое воскипе и не умолчит: предвариша мя дние нищеты. 28 Стеня ходих без обуздания, стоях же в соборе вопия. 29 Брат бых сиринам, друг же птичий. 30 Кожа же моя помрачися вельми, и кости моя сгореша от зноя. 31 Обратишася же в плачь гусли моя, песнь же моя в рыдание мне.

**31** Завет положих очима моима, да не помышлю на девицу. 2 И что удели Бог свыше, и наследие Всесильного от вышних? 3 Увы, пагуба неправдивому и отчуждение творящим беззаконие. 4 Не Сам ли узрит путь мой и вся стопы моя изочтет? 5 Аще ходих с посмеятели, и аще потщася нога моя на лесть, 6 стах бо на мериле праведне, виде же Господь незлобие мое. 7 Аще уклонися нога моя от пути, аще и вслед ока моего иде сердце мое, и аще рукама моима прикоснухся даров, 8 да посею убо, а инии да поядят, без корене же да бых был на земли. 9 Аще вслед

иде сердце мое жены мужа инаго, и аще приседяй бых при дверех ея, 10 угодна убо буди и жена моя иному мужу, младенцы же мои смиренни да будут: 11 ярость бо гнева не удержана, еже осквернити мужа инаго жену: 12 огонь бо есть горяй на вся страны, идеже найдет, из корения погубит. 13 Аще же презрех суд раба моего или рабыни, прящымся им предо мною: 14 что бо сотворю, аще испытание сотворит ми Господь? Аще же и посещение, кий ответ сотворю? 15 Еда не якоже и аз бех во чреве, и тии быша? Бехом же в томже чреве. 16 Немоцнии же, аще когда чесого требоваху, не не получиша, вдовича же ока не презрех. 17 Аще же и хлеб мой ядох един и сирому не преподах от него: 18 понеже от юности моя кормих якоже отец, и от чрева матере моя наставлях: 19 аще же презрех нага погибающа и не облекох его: 20 немощнии же аще не благословиша мя, от стрижения же агнцев моих согрешася плещы их: 21 аще воздвигох на сироту руку, надеяся, яко многа помощь мне есть: 22 да отпадет убо рамо мое от состава, мышца же моя от лактя да сокрушится: 23 страх бо Господень объя мя, и от тягости Его не стерплю. 24 Аще вчиних злато в крепость мою и аще на камения многоценная надеяся, 25 аще же и возвеселихся, многу ми богатству сущу, аще же и на безчисленных положих руку мою: 26 или не видим солнца возсиявшаго оскудевающа, луны же умаляющияся? Не в них бо есть: 27 и аще прельстися отай сердце мое, аще и руку мою положив на устах моих лобзах: 28 и сие ми убо в беззаконие превелие да вменится, яко солгах пред Богом Вышним. 29 Аще же обрадовахся о падении враг моих, и рече сердце мое: благоже, благоже: 30 да услышит убо ухо

мое клятву мою, озлославлен же да буду от людей моих озлобляемь. 31 Аще же и многажды реша рабыни моя: кто убо дал бы нам от плотей его насытитися, зело мне благу сущу? 32 И вне не водворяшесе странник, дверь же моя всякому приходящему отверста бе. 33 Аще же и согрешая неволею, скрых грех мой: 34 не посрамихся бо народного множества, еже не поведати пред ними: аще же и оставих маломощнаго изыти из дверей моих тццим недром: (аще бы не убоялся). 35 Кто даст слушающаго мене? Руки же Господни аще бых не убоялся, писание же, еже имех на кого, 36 на плечах возложив аки венец, читах, 37 и аще не раздрав его отдах, ничтоже взем от должника: 38 аще на мя когда земля возстена, аще и бразды ея восплакашася вкупе: 39 аще и силу ея ядох един без цены, или аще и душу господина земли взем оскорбих: 40 вместо пшеницы да взыдет ми кропива, а вместо ячменя терние.

**32** И умолча Иов словесы. Умолчаша же и трие друзие его ктому пререковати Иову, бе бо Иов праведен пред ними. 2 Разгневался же Елиус сын Варахиилев Вузитянин, от ужичества Арамска Авситидийския страны, разгневался же на Иова зело, занеже нарече себе праведна пред Богом, 3 и на триех же друзей разгневался зело, яко не возмогша отвецати противу Иову и судиша его быти нечестива. 4 Елиус же терпяше дати ответ Иову, яко старейшии его суть деньми (друзие его). 5 И виде Елиус, яко несть ответа во устех триех мужей, и возярися гневом своим. 6 Отвещав же Елиус сын Варахиилев Вузитянин, рече: юнейший убо есмь леты, вы же есте старейшии: темже молчах, убоявся возвестити вам хитрость мою: 7 рех же: время есть глаголющее, и во мнозех

летех ведят премудрость, 8 но дух есть в человецех, дыхание же Вседержителево есть научающее: 9 не многолетнии суть премудри, ниже старии ведят суд: 10 темже рех: послушайте мене, и возвещу вам, яже вем, внушите глаголы моя: 11 реку бо вам послушающим, дондеже испытаете словеса, и даже вас уразумею, 12 и се, не бе Иова обличай, отвечаай противно глаголом его от вас: 13 да не речете: обретохом премудрость, Господеви приложившися: 14 человеку же попустисте глаголати таковая словеса: 15 ужаснушася, не отвечаща ктому, обетшаша от них словеса: 16 терпех, не глаголах бо, яко сташа, не отвечаща, яко да отвечаю и аз часть. 17 Отвеща же Елиус, глаголя: 18 паки возглаголю, исполнен бо есмь словес: убивает бо мя дух чрева: 19 чрево же мое яко мех мста вряца завязан, или якоже мех коваческий расторгнутый: 20 возглаголю, да почию, отверз уста: 21 человека бо не постыждуся, но ниже брэннаго посрамлюся: 22 не вем бо чудитися лицу: аще же ни, то и мене молие изядят.

**33** Но послушай, Иове, словес моих и беседу мою внуши: 2 се бо, отверзох уста моя, и возглагола язык мой: 3 чисто сердце мое во словесех, разум же устну моею чистая уразумет: 4 Дух Божий сотворивый мя, дыхание же Вседержителево поучающее мя: 5 аще можеш, даждь ми ответ к сим: потерпи, стани противу мене, и аз противу тебе. 6 От брения сотворен еси ты, якоже и аз: от тогожде сотворения есмы: 7 не страх мой тя смятет, ниже рука моя тяжка будет на тя. 8 Обаче рекл еси во уши мои, и глас глагол твоих услышах, занеже глаголеши: 9 чист есмь аз, не согрешая, непорочен же есмь, ибо не беззаконновах: 10 зазор

же на мя обрете и мнит мя, яко противника Себе: **11** вложи же ногу мою в древо и надсмотрял пути моя вся. **12** Како бо глаголеши, яко прав есмь, и не послуша мене? Вечен бо есть, иже над земными. **13** Глаголеши бо: чесо ради правды моея не услыша всяко слово? **14** Единою бо возглаголет Господь, второе же во сне, или в поучении нощнем, **15** или, яко егда нападает страх лют на человеки, во дреманиих на ложи: **16** тогда открывает ум человеческий, виденьми страха тацеми их устрашит, **17** да возвратит человека от неправды, тело же его от падения избави, **18** пощаде же душу его от смерти, еже не пасти ему на брани. **19** Паки же обличи его болезнию на ложи и множество костей его разслаби: **20** всякаго же брашна пшенична не возможет прияти, а душа его яди хочет, **21** дондеже согниют плоти его, и покажет кости его тощя: **22** приближися же на смерть душа его, и живот его во аде. (questioned) **23** Аще будет тысяща Ангел смертоносных, един от них не уязвит его: аще помыслит сердцем обратитися ко Господу, повесть же человеку свой зазор, и безумие свое покажет, **24** заступит е, еже не впасти ему в смерть, обновит же тело его якоже повапление на стене, кости же его исполнит мозга: **25** умягчит же его плоть якоже младенца, и устроит его возмужавша в человецех. **26** Помолится же ко Господу и прият им будет, внидет же лицом веселым со исповеданием, воздаст же человеком правду свою. **27** Посем тогда зазрит человек сам себе, глаголя: якова содевах? И не по достоинству истяза мя, о нихже согреших: **28** спаси душу мою, еже не внити во исление, и жизнь моя свет узрит. **29** Се, сия вся творит Крепкий (Бог) пути три с мужем: **30** но избави душу мою от смерти, да

живот мой во свете хвалит его. **31** Внимай, Иове, и послушай мене, премолчи, и аз возглаголю: **32** и аще тебе суть словеса, отвещай ми: глаголи, хощу бо оправдитися тебе: **33** аще же ни, ты послушай мене, умолчи, и научу тя премудрости.

**34** Отвещав же Елиус, рече: **2** послушайте мене, премудрии: сведущии, внушите (доброе), **3** яко ухо словеса искушает, гортань же вкушает брашна. **4** Суд изберем себе, уразумеем посреде себе, что лучшее. **5** Яко рече Иов: праведен есмь, Господь отят ми суд, **6** солга же суду моему: насильна стрела моя без неправды. **7** Кто муж, якоже Иов, пий поругание, якоже воду, **8** не согрешая, ниже нечествовав, ниже приобщився к творящим беззакония, еже ходити с нечестивыми? **9** Не рцы бо, яко несть посещения мужеву, и посещения ему от Господа. **10** Темже, разумивии сердцем, послушайте мене, не буди ми пред Господем нечествовати и пред Вседержителем возмутити правду: **11** но воздает человекуви, якоже творит кийждо их, и на стези мужестей обрящет и. **12** Мниши же Господа нелепая сотворити, или Вседержитель смятет суд, иже сотвори землю? **13** Кто же есть творяй поднебесную и яже в ней всяческая? **14** Аще бо восхощет запретити и дух у Себе удержати, **15** умрет всяка плоть вкупе, всяк же человек в землю пойдет, отнюдуже и создан бысть. **16** Аще же не увещаешия, послушай сих, внуши глас глагол. **17** Виждь ты ненавидящаго беззаконная и губящаго лукавыя, суца, вечна, праведна. **18** Нечестив есть глаголай цареву, закон престапеши, нечестивейше, князем: **19** иже не постыдеса лица честнаго, ниже весть честь возложити сильным, удивитися лицам их. **20** Тще же им сбудется, еже возопити и молити мужа: зане



употребиша беззаконно, безчестяще немощных. 21 Той бо зритель есть дел человеческих, утаися же от Него ничтоже от тех, яже творят: 22 ниже будет место укрытися творящим беззаконная: 23 яко не на мужа положит еще. 24 Господь бо всех видит, постизаяй неизследная, славная же и изрядная, имже несть числа, 25 сведый их дела, и обратит ночь, и смиряся. 26 Угаси же нечестивыя, видими же пред ним: 27 яко уклонишася от закона Божия, оправданий же Его не познаша, 28 еже вознести к Нему вопль нищих, и вопль убогих услышит. 29 И Той тишину подаст, и кто осудит? И сокрыет лице, и кто узрит Его? И на язык, и на человека вкупе, 30 иже поставляет царем человека лицемера за строптивость людей. 31 Яко к Крепкому глаголяй: взях, не отиму вместо залога: 32 без мене узрю, Ты покажи ми: аще неправду соделах, не имам приложити. 33 Еда от тебе истяжет ю, яко ты отринеши, яко ты избереши, а не аз ли? И что разумееши? Глаголи. 34 Темже смысленнии сердцем рекут сия, муж же премудр услыша глагол мой. 35 Иов же не в разуме глаголаше, словеса же его не в хитрости. 36 Обаче навькни, Иове, не даждь еще ответа, якоже немудрии: 37 да не приложим на грехи наша: беззаконие же на нас вменится, многая глаголющих словеса на Господа.

**35** Отвещав же еще Елиус, рече: 2 что сие мнил еси на суде? Ты кто еси, яко рекл еси: прав есмь пред Господем? 3 Или речеши: что сотворю согрешив? 4 Аз же ти дам ответ и трием другом твоим. 5 Воззри на небо и виждь: смотри же на облаки, коль высоки суть от тебе. 6 Аще согрешил еси, что сотвориши? Аще же и много беззаконновал еси, что можеши сотворити? 7 Понеже убо праведен еси, что даси

Ему? Или что из руки твоя возмет? 8 Мужеви подобному тебе нечестие твое, и сыну человеческого правда твоя. 9 От множества оклеветаемии воззовут, возопиют от мышцы многих: 10 и не рече: где есть Бог сотворивый мя, устрояй стражбы нощныя, 11 отделяяй мя от четвероногих земных и от небесных птиц? 12 Тамо воззовут, и не имаши услышати, и от досады злых. 13 Безместная бо видети не хочет Господь: Сам бо Вседержитель зритель есть творящих беззаконная, и спасет мя. 14 Судися же пред Ним, аще можеши похвалити Его, якоже есть и ныне. 15 Яко несть посещаяй гневом Своим, и не позна прегрешения коеголибо зело. 16 Иов же всуе отверзает уста своя, неведением словеса отягощает.

**36** Приложив же еще Елиус, рече: 2 пожди ми мало еще, да ты научу: еще бо у мене есть слово. 3 Приим хитрость мою отдалеча, дела же моими праведная реку воистинну: 4 и не неправедны глаголы без правды уразумееша. 5 Видь же, яко Господь не отринет незлобиваго: 6 силен крепостию сердца нечестивых не оживит и суд нищым даст, 7 не отимет от правдиваго очес Своих, и со цари на престоле посадит их на победу, и вознесутся. 8 Связаннии в ручных узах яти будут ужами нищеты, 9 и возвестит им дела их и прегрешение их, яко укрепятся: 10 но правдиваго услышит, и рече, яко обратятся от неправды. 11 Аще услышат и поработают, скончают дни своя во благих и лета своя в благолепоту: 12 нечестивых же не спасет, зане не хотеша познати Господа и занеже учими не послушливи беша. 13 И лицемери сердцем возмутят ярость: не возопиют, яко связа их: 14 да умрет убо в юности душа их, житие же их уязвляемо Ангелы, 15 занеже оскорбиша недужна и немощна, суд же

кротких изложит. 16 Еще же исторгну тя от уст вражих: бездна, пролитие под нею, и сниде трапеза твоя исполнена тука. 17 Не оскудеет же от праведных суд: 18 ярость же на нечестивыя будет, нечестия ради даров их, ихже приимаху на неправде. 19 Да не уклонит тя волею ум от мольбы в беде сущих немощных и всех содержащих крепость. 20 Не привлецы нощи, еже взыти людем вместо их: 21 не сохранися, да не содееши зла: сих бо ради изят еси от нищеты. 22 Се, Крепкий удержит крепостию Своею: кто бо есть, якоже Той, силен? 23 И кто есть испытуяй дел Его? Или кто рекий: содея неправду? 24 Помяни, яко велия дела Его суть, имиже владеша мужие. 25 Всяк человек видит в себе, елицы уязвляеми суть человецы. 26 Се, Крепкий великий, и не увемы: число лет Его безконечное: 27 изочтенны же ему суть капли дождевныя, и излиются дождем во облак: 28 потекут обетшания, осениша же облацы над премногими людьми: время постави скоту, вedyт же ложа чин. О всех сих не дивитлится ум, и не изменяетлися ти сердце от тела? 29 И аще уразумеет простертие облака, равенство скинии Его: 30 се, простирает на ню свет и корения морская покры: 31 теми бо судит людем, даст пищу могущему. 32 На руку покры свет и заповеда о нем сретающему: 33 возвестит о нем другу своему Господь, стяжание, и о неправде.

**37** И от сих возьмется сердце мое и отторжеся от места своего. 2 Послушай слуха во гневе ярости Господни, и поучение изо уст Его изыдет. 3 Под всем небом началство его, и свет его на крилу земли. 4 Вслед его возопиет гласом, возгремит гласом величия Своего, и не изменит их, яко услышит глас Его. 5 Возгремит Крепкий гласом Своим

дивная: сотвори бо велия, ихже не ведахом. 6 Повелеваяй снегу: буди на земли, и буря дождя, и буря дождей могущества Его. 7 В руце всякого человека знаменает, да познает всяк человек свою немощь. 8 Внидоша же зверие под кров и умолкоша на ложи. 9 Из хранилиц внутренних находят болезни, и от внешних стран студень. 10 И от дыхания Крепка даст лед: управляет же воду, якоже хочет, 11 и избранное устрояет облак: разженет облак свет Его, 12 и Сам окрестная превратит, якоже хочет, в дела их: вся, елика заповесть им, сия чиноположена суть от Него на земли, 13 аще в наказание, аще на землю свою, аще на милость обрящет и. 14 Внуши сия, Иове: стани учайся силе Господни. 15 Вемы, яко Господь положи дела Своя, свет сотворив из тмы. 16 Весть же различие облаков и велия падения злых. 17 Твоя же одежда тепла, почивает же на земли от юга. 18 Утверждения с Ним в древности, крепка якоже видение слития. 19 Чесо ради, научи мя, что речем Ему? И престанем многа глаголюще. 20 Еда книга, или книгочия ми предстоит? Да стояць сотворю человеку молчати. 21 Не всем же видимь свет: светлый есть в древностех, якоже еже от него на облацех. 22 От севера облацы златозарни: в сих велия слава и честь Вседержителя. 23 И не обретаем иного подобна крепости Его: иже судит праведно, мниши ли, яко не слышит Той? 24 Темже убоятся Его человецы: убоятся же Его и премудрии сердцем.

**38** Преставшу же Елиусу от беседы, рече Господь Иову сквозе бурю и облаки: 2 кто сей скрываяй от Мене совет, содержай же глаголы в сердца, Мене же ли мнится утаити? 3 Препояши яко муж чресла твоя: вопрошу же тя, ты же Ми

отвещай. 4 Где был еси, егда основах землю? Возвести ми, аще веси разум. 5 Кто положи меры ея, аще веси? Или кто наведый вервь на ню? 6 На чемже столпи ея утверждени суть? Ктоже есть положивый камень краеугольный на ней? 7 Егда (сотворены) быша звезды, восхвалиша Мя гласом велиим вси Ангели Мои. 8 Заградих же море врата, егда изливашеся из чрева матери своея исходящее: 9 положих же ему облак во одеяние, мглою же пових е: 10 и положих ему пределы, обложив затворы и врата: 11 рех же ему: до сего дойдеш и не прейдеш, но в тебе сокрушатся волны твоя. 12 Или при тебе составих свет утренний, денница же весть чин свой, 13 ятися крил земли, оттрясти нечестивыя от нея? 14 Или ты, брение взем, от земли создал еси животное, и глаголиваго сего посадил еси на земли? 15 Отял же ли еси от нечестивых свет, мышцу же гордых сокрушил ли еси? 16 Пришел же ли еси на источники моря, во следах же бездны ходил ли еси? 17 Отверзаются же ли тебе страхом врата смертная, вратницы же адовы видевше тя убояшася ли? 18 Навыкл же ли еси широты поднебесныя? Повеждь убо ми, колика есть? 19 В коей же земли вселяется свет, тме же кое есть место? 20 Аще убо введеш мя в пределы их, аще же ли и веси стези их? 21 Вем убо, яко тогда рожден еси, число же лет твоих много. 22 Пришел же ли еси в сокровища снежная, и сокровища градная видел ли еси? 23 Подлежат же ли тебе в час врагов, в день браней и рати? 24 Откуда же исходит слана, или разсыпается юг на поднебесную? 25 Кто же уготова дождю велию пролияние, и путь молнии и грома, 26 одождити на землю, на нейже несть мужа, пустыню, идеже человека несть в ней, 27 насытити непроходиму и

ненаселену, и прозябнути исход злака? 28 Кто есть дождю отец? Кто же есть родивый капли росныя? 29 Из чиего чрева исходит лед? Слану же на небеси кто родил, 30 яже нисходит яко вода текущая? Лице нечестива кто устраши? 31 Разумел же ли еси соуз Плиад, и ограждение Орионово отверзл ли еси? 32 Или отверзеши знамения небесная во время свое? И вечернюю звезду за власы ея привлечеши ли? 33 Веси же ли пременения небесная, или бывающая вкупе под небесем? 34 Призовеши же ли облак гласом? И трепетом воды великия послушает ли тя? 35 Послеши же ли молнии, и пойдут? Рекут же ли ти: что есть? 36 Кто же дал есть женам ткания мудрость, или испещрения хитрость? 37 Кто же изчисляй облаки премудростию, небо же на землю преклонил, 38 разлился же яко земля прах, спаях же е, аки каменем, на четыри углы? 39 Уловиши же ли лвам ядь, и души змиев насытиши ли? 40 Убояшася бо на ложах своих и седят в дребрах уловляюще. 41 Кто же врану угодова пицу? Птичиши бо его ко Господу воззваша, облетающе брашна ищуще.

**39** Аще уразумел еси время рождения коз живущих на горах каменных? Усмотрил же ли еси болезнь при рождении еленей? 2 Изчислил же ли еси месяцы их исполнены рождения их, болезни же их разрешил ли еси? 3 Вскормил же ли еси детицы их вне страха, болезни же их отследи ли? 4 Извергнут чада своя, умножатся в порождении, изыдут и не возвратятся к ним. 5 Кто же есть пустивый осла дивияго свободна, узы же его кто разрешил? 6 Положих же жилище его пустыню и селения его сланость: 7 смеяйся многу народу града, стужания же данническаго не слышай, 8 усмотрит на горах пажить себе и вслед всякаго злака ищет. 9 Похощет же

ли ти единорог работати, или поспати при яслех твоих? **10**  
Привяжеш ли ремением иго его, и провлечет ли бразды  
на поли? **11** Надеешилися на него, яко многа крепость его?  
Попустиши ли ему дела твоя? **12** Повериши ли, яко  
воздаст ли тебе семя? Внесет ли тебе в гумно? **13** Крыло  
веселящихся нееласса, аще зачнет асида и несса? **14** Яко  
оставит ли на земли яйца своя, и на персти согреет, **15** и забывает,  
яко нога разбьет, и зверие селнии поперут: **16** ожесточится на  
чада своя, аки бы не ея, вотще трудися без страха, **17** яко  
сокры Бог ей премудрость и не уделит ей в разуме: **18** во  
время же на высоту вознесет, посмеется коню и сидящему  
на нем. **19** Или ты обложил еси коня силою, и облекл  
же ли еси выю его в страх? **20** Обложил же ли еси его  
всеоружием, славу же персей его дерзостию? **21** Копытом  
копая на поли играет и исходит на поле с крепостию: **22**  
срета стрелы посмеивается и не отвратится от железа: **23**  
над ним играет лук и мечь, **24** и гневом потребит землю  
и не имать веры яти, дондеже вострубит труба: **25** трубе  
же вострубившей глаголет, благоже: издалеча же обоняет  
рать, со скаканием и ржанием. **26** И твоею ли хитростию  
стоит ястреб, распростер криле недвижимъ, зря на юг?  
**27** Твоим же ли повелением возносится орел, неясать же  
на гнезде своем сидя вселяется, **28** на версе камене и в  
сокровене? **29** Тамо же съидет ищет брашна, издалеча очи его  
наблюдают, **30** птичищи же его валяются в крови: идеже аще  
будут мертвечины, абие обретаются.

**40** И отвеща Господь Бог ко Иову и рече: **2** еда суд со  
Всесильным укланяется? Обличая же Бога отвещати имать  
Ему. **3** Отвещав же Иов, рече Господеви: **4** почто еще аз

прюся, наказуемь и обличаемь от Господа, слышай таковая ничтоже сый? Аз же кий ответ дам к сим? Руку положу на устех моих: **5** единою глаголах, вторицею же не приложу. **6** Паки же отвещав Господь, рече ко Иову из облака: **7** ни, но препояши яко муж чресла твоя: вопрошу же тя, ты же Ми отвещай. **8** Не отвергай суда Моего: мниши ли Мя инако тебе сотворша, разве да явишися правдив? **9** Еда мышца ти есть на Господа, или гласом на Него гремиши? **10** Приими же высоту и силу, в славу же и в честь облещься: **11** пусти же Ангелы гневом и всякаго укорителя смири, **12** величава же угаси и согной нечестивыя абие: **13** скрый же в землю вне вкупе и лица их безчестия исполни. **14** Исповем, яко может десница твоя спасти. **15** Но убо се, зверие у тебе, траву аки волове ядят: **16** се убо, крепость его на чреслах, сила же его на пупе чрева: **17** постави ошиб яко кипарис, жилы же его (яко уже) сплетены суть, **18** ребра его ребра медяна, хребет же его железо слияно. **19** Сиесть начало создания Господня: сотворен поруган быти Ангелы Его: **20** возшед же на гору стреминную, сотвори радость четвероногим в тартаре: **21** под всяким древом спит, при рогозе и тростии и ситовии: **22** осеняют же над ним древеса велика с леторасльми и ветви напольныя: **23** аще будет наводнение, не ощутит: уповаает, яко внидет Иордан во уста его: **24** во око свое возмет его, ожесточився продиравит ноздри.

**41** Извлечеши ли змиа удицею, или обложиши узду о ноздрех его? **2** Или вдежеши колце в ноздри его? Шилом же провертиши ли устне его? **3** Возглаголет же ли ти с молением, (или) с прошением кротко? **4** Сотворит же ли завет с тобою? Поймеш ли его раба вечна? **5** Поиграеши



же ли с ним, якоже со птицею, или свяжеша его яко врабья  
детищу? 6 Питаются ли же им языцы, и разделяют ли его  
Финикийстии народи? 7 Вся же плавающая собравшаяся  
не подымут кожи единыя ошибка его, и корабли рыбаей  
главы его. 8 Возложиши же ли на нъ руку, вспомянув брань  
бывающую на теле его? И ктому да не будет. 9 Не видел  
ли еси его, и глаголемым не удивился ли еси? Не убоился  
ли еси, яко уготовася Ми? 10 Кто бо есть противляйся  
Мне, или кто противостанет Ми и стерпит, 11 аще вся  
поднебесная Моя есть? 12 Не умолчу его ради и словом  
силы помилую равнаго ему. 13 Кто открывает лице облечения  
его, в согбение же персей его кто внидет? 14 Двери лица  
его кто отверзет? Окрест зубов его страх, 15 утроба его  
щиты медяны, союз же его якоже смирит камень, 16 един  
ко другому прилипают, дух же не пройдет его: 17 яко муж  
брату своему прилепится, содержатся и не отторгнутся. 18 В  
чхании его возблистает свет: очи же его видение денницы.  
19 Из уст его исходят аки свещы горящыя, и размещутся  
аки искры огненные: 20 из ноздрей его исходит дым печи  
горящия огнем угля: 21 душа же его яко углие, и яко пламы  
из яст его исходит. 22 На выи же его водворяется сила, пред  
ним течет пагуба. 23 Плоти же телесе его сольпнушася: лиет  
на нъ, и не подвижится. 24 Сердце его ожесте аки камень,  
стоит же аки наковальня неподвижна. 25 Обращшуся же ему,  
страх зверем четвероногим по земли скачущым. 26 Аще  
срящут его копия, ничтоже сотворят ему, копие вонзено и  
броня: 27 вменяет бо железо аки плевы, медь же аки древо  
гнило: 28 не уязвит его лук медян, мнит бо каменометную  
пращу аки сено: 29 аки стеблие вменишася ему млатове,

ругаетжеся трусу огненосному. **30** Ложе его остни острии, всяко же золото морское под ним, якоже брение безчисленно. **31** Возжизает бездну, якоже пещь медяну: мнит же море яко мироварницу **32** и тартар бездны якоже пленника: вменил бездну в прохождение. **33** Ничтоже есть на земли подобно ему сотворено, поругано быти Ангелы Моими: **34** все высокое зрит: сам же царь всем сущым в водах.

**42** Отвещав же Иов, рече ко Господу: **2** вем, яко вся можеш, невозможно же Тебе ничтоже. **3** Кто есть таяй от Тебе совет, щадяй же словеса и от Тебе мнится утаити? Кто же возвестит ми, ихже не ведех, велия и дивная, ихже не знах? **4** Послушай же мене, Господи, да и аз возглаголю: вопрошу же Тя, ты же мя научи: **5** слухом убо уха слышах Тя первее, ныне же око мое виде Тя: **6** темже укорих себе сам, и истаях, и мною себе землю и пепел. **7** Бысть же егда изглагола Господь вся глаголголы сия Иову, рече Господь ко Елифазу Феманитину: согрешил еси ты и оба друзие твои: не глаголасте бо предо Мною ничтоже истинно, якоже раб Мои Иов: **8** ныне же возьмите седмь телцев и седмь овнов и идите ко рабу Моему Иову, и сотворит жертву о вас: Иов же раб Мой помолится о вас, понеже точию лице его прииму: аще бо не его ради, погубил бых убо вас: не глаголасте бо истины на раба Моего Иова. **9** Отиде же Елифаз Феманитин и Валдад Савхейский и Софар Минейский и сотвориша, якоже повеле им Господь. И отпусти грехи им Иова ради. **10** Господь же возрасти Иова: молящуся же ему и о друзех своих, отпусти им грехи их, и даде Господь сугубая, елика бяху прежде Иову во усугубление. **11** Услышаша же вси братия его и сестры его вся случившаяся ему, и приидоша

к нему, и вси елицы знаху его первее: ядше же и пивше у него, утеша его и дивишася о всех, яже наведе на нь Бог: даде же ему кийждо агницу едину и четыре драхмы злата назнаменована. 12 Господь же благослови последняя Иовля, неже прежняя: бяху же скоти его, овец четырнадцать тысящ, велблюдов шесть тысящ, супруг волов тысяща, ослиц стадных тысяща. 13 Родишажеся ему сынове семь и дщери три: 14 и нарече первую убо День, вторую же Кассию, третью же Амалфеев Рог: 15 и не обретошася подобны в лепоте дочерем Иовлевым в поднебесней: даде же им отец наследие в братии их. 16 Поживе же Иов по язве лет сто семьдесят, всех же лет поживе двести четыредесять осмь. И виде Иов сыны своя и сыны сынов своих, даже до четвертаго рода. 17 И скончася Иов стар и исполнь дний.

# Псалтирь

**1** Блажен муж, иже не иде на совет нечестивых, и на пути грешных не ста, и на седалищи губителей не седе: **2** но в законе Господни воля его, и в законе Его поучится день и ночь. **3** И будет яко древо насажденое при исходящих вод, еже плод свой даст во время свое, и лист его не отпадет: и вся, елика аще творит, успеет. **4** Не тако нечестивии, не тако: но яко прах, егоже возметает ветр от лица земли. **5** Сего ради не воскреснут нечестивии на суд, ниже грешницы в совет праведных. **6** Яко весть Господь путь праведных, и путь нечестивых погибнет.

**2** Вскую шаташася языцы, и людие поучишася тщетным?  
**2** Предсташа царие земстии, и князи собрашася вкупе на Господа и на Христа Его. **3** Расторгнем узы их и отвержем от нас иго их. **4** Живый на небесех посмеется им, и Господь поругается им. **5** Тогда возглаголет к ним гневом Своим и яростию Своею смятет я: **6** Аз же поставлен есмь Царь от Него над Сионом, горою святою Его, **7** возвещая повеление Господне. Господь рече ко Мне: Сын Мой еси Ты, Аз днесь родих Тя: **8** проси от Мене, и дам ти языки достояние Твое, и одержание Твое концы земли: **9** упасеши я жезлом железным, яко сосуды скудельничи сокрушиши я. **10** И ныне, царие, разумеите, накажитесь вси судящии земли. **11** Работайте Господеви со страхом, и радуйтесь Ему со трепетом. **12** Примите наказание, да не когда прогневается Господь, и погибнете от пути праведнаго, егда возгорится вскоре ярость Его: блажени вси надеющиися Нань.

**3** Псалом Давиду, внегда отбегаше от лица Авессалома сына своего. Господи, что ся умножиша стужающии ми?

Мнози встают на мя, 2 мнози глаголют души моей: несть спасения ему в Бозе его. 3 Ты же, Господи, заступник мой еси, слава моя, и возносяй главу мою. 4 Гласом моим ко Господу воззвах, и услыша мя от горы святых Своих. 5 Аз уснух, и спях, востях, яко Господь заступит мя. 6 Не убоюся от тем людей, окрест нападающих на мя. 7 Воскресени, Господи, спаси мя, Боже мой: яко Ты поразил еси вся враждующия ми всуе, зубы грешников сокрушил еси. 8 Господне есть спасение, и на людех Твоих благословение Твое.

**4** В конец, в песнях, Псалом Давиду. Внегда призвати ми, услыша мя Бог правды моея: в скорби распространил мя еси: ущедри мя и услыши молитву мою. 2 Сынове человечести, доколе тяжкосердии? Вскую любите суету и ищите лжи? 3 И уведите, яко удиви Господь преподобнаго Своего. Господь услышит мя, внегда воззвати ми к Нему. 4 Гневайтесь, и не согрешайте, яже глаголете в сердцах ваших, на ложах ваших умилитесь: 5 пожрите жертву правды и уповайте на Господа. 6 Мнози глаголют: кто явит нам благая? Знаменася на нас свет лица Твоего, Господи. 7 Дал еси веселие в сердцах моих: от плода пшеницы, вина и елея своего умножишася: 8 в мире вкупе усну и почию, яко Ты, Господи, единого на уповании вселил мя еси.

**5** О наследствующем, Псалом Давиду. Глаголы моя внуши, Господи, разумей звание мое. 2 Вонми гласу моления моего, Царю мой и Боже мой: яко к Тебе помолюся, Господи. 3 Заутра услыши глас мой: заутра предстану Ти, и узриши мя: 4 яко Бог не хотяй беззакония Ты еси: не приселится к Тебе лукавнуяй, 5 ниже пребудут беззаконницы пред очима

Твоима: возненавидел еси вся делающыя беззаконие, **6** погубиши вся глаголющыя лжу: мужа кровей и льстива гнушается Господь. **7** Аз же множеством милости Твоея вниду в дом Твой, поклонюся ко храму святому Твоему, в страсе Твоем. **8** Господи, настави мя правдою Твоею, враг моих ради исправи пред Тобою путь мой. **9** Яко несть во устех их истины, сердце их суетно, гроб отверст гортань их, языки своими льщаху. **10** Суди им, Боже, да отпадут от мыслей своих: по множеству нечестия их изрини я, яко преогорчиша Тя, Господи. **11** И да возвеселятся вси уповающи на Тя, во век возрадуются, и вселишися в них: и похвалятся о Тебе любящии имя Твое. **12** Яко Ты благословиши праведника, Господи, яко оружием благоволения венчал еси нас.

**6** В конец, в песнях о осем, псалом Давиду. Господи, да не яростию Твоею обличиши мене, ниже гневом Твоим накажешу мене. **2** Помилуй мя, Господи, яко немощен есмь: изцели мя, Господи, яко смятошася кости моя, **3** и душа моя смятася зело: и Ты, Господи, доколе? **4** Обратися, Господи, избави душу мою, спаси мя ради милости Твоея: **5** яко несть в смерти поминаяй Тебе, во аде же кто исповестся Тебе? (Sheol h7585) **6** Утрудихся воздыханием моим, измыю на всяку ночь ложе мое, слезами моими постелю мою омочу. **7** Смятася от ярости око мое, обетшах во всех вразех моих. **8** Отступите от мене, вси делающии беззаконие, яко услыша Господь глас плача моего, **9** услыша Господь моление мое, Господь молитву мою прият. **10** Да постыдятся и смятутся вси врази мои, да возвратятся и устыдятся зело вскоре.

**7** Псалом Давиду, егоже воспет Господеви о словесех Хусиевых, сына Иемениина. Господи Боже мой, на Тя уповах,

спаси мя от всех гонящих мя и избави мя: 2 да не когда похитит яко лев душу мою, не сущу избавляющую, ниже спасающую. 3 Господи Боже мой, аще сотворих сие, аще есть неправда в руку мою, 4 аще воздах воздающим ми зла, да отпаду убо от враг моих тощъ: 5 да поженет убо враг душу мою, и да постигнет, и поперет в землю живот мой, и славу мою в персть вселит. 6 Воскресени, Господи, гневом Твоим, вознесися в концах враг Твоих, и востани, Господи Боже мой, повелением, имже заповедал еси, 7 и сонм людей обыдет Тя: и о том на высоту обратися. 8 Господь судит людем: суди ми, Господи, по правде моей и по незлобе моей на мя. 9 Да скончается злоба грешных, и исправиши праведнаго, испытаяй сердца и утробы, Боже, праведно. 10 Помощь моя от Бога, спасающаго правыя сердцем. 11 Бог судитель праведен и крепок, и долготерпелив, и не гнев наводяй на всяк день. 12 Аще не обратитесь, оружие Свое очистит, лук Свой напряже, и уготова и, 13 и в нем уготова сосуды смертныя, стрелы Своя сгараемым содела. 14 Се, боле неправдою, зачат болезнь и роди беззаконие: 15 ров изры и ископа и, и падет в яму, юже содела. 16 Обратится болезнь его на главу его, и на верх его неправда его снидет. 17 Исповемся Господеви по правде Его и пою имени Господа Вышняго.

**8** В конец, о точилех, Псалом Давиду. Господи Господь наш, яко чудно имя Твое по всей земли, яко взятся великолепие Твое превыше небес. 2 Из уст младенец и ссущих совершил еси хвалу, враг Твоих ради, еже разрушити врага и местника. 3 Яко узрю небеса, дела перст Твоих, луну и звезды, яже Ты основал еси: 4 что есть человек, яко помниши его? Или сын

человекъ, яко посещаеши его? 5 Умалил еси его малым чим от Ангел, славою и честию венчал еси его: 6 и поставил еси его над делы руку Твоею, вся покорил еси под нозе его: 7 овцы и волы вся, еще же и скоты польския, 8 птицы небесныя и рыбы морския, преходящяя стези морския. 9 Господи Господь наш, яко чудно имя Твое по всей земли.

**9** В конец, о тайных сына, псалом Давиду. Исповемя Тебе, Господи, всем сердцем моим, повем вся чудеса Твоя. 2 Возвеселюся и возрадуюся о Тебе, пою имени Твоему, Вышний. 3 Внегда возвратится врагу моему вспять, изнемогут и погибнут от лица Твоего. 4 Яко сотворил еси суд мой и прю мою: сел еси на престоле, судяй правду. 5 Запретил еси языком, и погибе нечестивый: имя его потребил еси в век и в век века. 6 Врагу оскудеша оружия в конец, и грады разрушил еси: погибе память его с шумом. 7 И Господь во век пребывает, уготова на суд престол Свой: 8 и Той судити имать вселенней в правду, судити имать людем в правоте. 9 И бысть Господь прибежище убогому, помощник во благовремениих, в скорбех. 10 И да уповают на Тя знающии имя Твое, яко не оставил еси взыскающих Тя, Господи. 11 Пойте Господеви, живущему в Сионе, возвестите во языцех начинания Его: 12 яко взыскай крови их помяну, не забы звания убогих. 13 Помилуй мя, Господи, виждь смирение мое от враг моих, возносяй мя от врат смертных: 14 яко да возвещу вся хвалы Твоя во вратех дщере Сиони: возрадуемся о спасении Твоем. 15 Углебоша языцы в пагубе, юже сотвориша: в сети сей, юже скрыша, увязе нога их. 16 Знаемь есть Господь судьбы творяй: в делех руку своюю увязе грешник. 17 Да возвратятся грешницы во ад, вси языцы



забывающих Бога. (Sheol h7585) 18 Яко не до конца забвен будет нищий, терпение убогих не погибнет до конца. 19 Воскресени, Господи, да не крепится человек, да судятся языцы пред Тобою. 20 Постави, Господи, законоположителя над ними, да разумеют языцы, яко человецы суть.

**10** Вскую, Господи, отстоя далече, презираеши во благовременних, в скорбех? 2 Внегда гордится нечестивому, возгарается нищий: увязают в советех, яже помышляют. 3 Яко хвалимь есть грешный в похотех души своея, и обидяй благословимь есть. 4 Раздражи Господа грешный: по множеству гнева своего не взыщет: несть Бога пред ним. 5 Оскверняются путие его на всяко время: отемлются судьбы Твоя от лица его: всеми враги своими обладает. 6 Рече бо в сердцы своем: не подвижуся от рода в род без зла: 7 егоже клятвы уста его полна суть, и горести и льсти: под языком его труд и болезнь. 8 Приседит в ловителстве с богатыми в тайных, еже убити неповиннаго: очи его на нищаго призираете. 9 Ловит в тайне яко лев во ограде своей, ловит еже восхитити нищаго, восхитити нищаго, внегда привлещи и в сети своей. 10 Смирит его: преклонится и падет, внегда ему обладати убогими. 11 Рече бо в сердцы своем: забы Бог, отврати лице Свое, да не видит до конца. 12 Воскресени, Господи Боже мой, да вознесется рука Твоя, не забуди убогих Твоих до конца. 13 Чесо ради прогнева нечестивый Бога? Рече бо в сердцы своем: не взыщет. 14 Видиши, яко Ты болезнь и ярость смотряеши, да предан будет в руке Твои: тебе оставлен есть нищий, сиру Ты буди помощник. 15 Сокруши мышцу грешному и лукавому: взыщется грех его и не обрящется. 16 Господь царь во век и

в век века: погибнете, языцы, от земли Его. 17 Желание убогих услышал еси, Господи, уготованию сердца их внят ухо Твое. 18 Суди сиру и смирену, да не приложит ктому величаться человек на земли.

**11** В конец, псалом Давиду. На Господа уповах, како речете души моей: превитай по горам, яко птица? 2 Яко се, грешницы налякоша лук, уготоваша стрелы в туле, состреляти во мраще правыя сердцем. 3 Зане яже ты совершил еси, они разрушиша: праведник же что сотвори? 4 Господь во храме святем Своем. Господь, на небеси престол Его: очи Его на ницаго призираете, вежди Его испытаете сыны человеческия. 5 Господь испытает праведнаго и нечестиваго: любяй же неправду ненавидит свою душу. 6 Ождит на грешники сети: огонь и жупел, и дух бурен часть чаши их. 7 Яко праведен Господь и правды возлюби: правоты виде лице Его.

**12** В конец, о осмей, псалом Давиду. Спси мя, Господи, яко оскуде преподобный: яко умалишася истины от сынов человеческих. 2 Суетная глагола кийждо ко искреннему своему: устне льстивыя в сердцы, и в сердцы глаголаша злая. 3 Потребит Господь вся устны льстивыя, язык велеречивый, 4 рекшыя: язык наш возвеличим, устны наша при нас суть: кто нам господь есть? 5 Страсти ради нищих и въздыхания убогих ныне воскресну, глаголет Господь: положуся во спасение, не обвинюся о нем. 6 Слова Господня слова чиста, сребро разжжено, искушено земли, очищено седмерицею. 7 Ты, Господи, сохраниши ны и соблюдеши ны от рода сего и во век. 8 Окрест нечестивии ходят: по высоте твоей умножил еси сыны человеческия.

**13** В конец, псалом Давиду. 2 Доколе, Господи, забудеши мя до конца? Доколе отвращаеши лице Твое от мене? 3 Доколе положу советы в души моей, болезни в сердцы моем день и ночь? Доколе вознесется враг мой на мя? 4 Призри, услыши мя, Господи Боже мой: просвети очи мои, да не когда усну в смерть: 5 да не когда речет враг мой: укрепился на него. 6 Стужающие ми возрадуются, аще подвижуся. Аз же на милость Твою уповах: возрадуется сердце мое о спасении Твоем: воспою Господеви благодеявшему мне и пою имени Господа Вышняго.

**14** Рече безумен в сердцы своем: несть Бог. Растлеша и омерзишася в начинаниих: несть творяй благостыню. 2 Господь с небесе приниче на сыны человеческия, видети, аще есть разумеваая, или взыскаая Бога. 3 Все уклонишася, вкупе неключими быша: несть творяй благостыню, несть до единого. 4 Ни ли уразумеют все делающие беззаконие, снедающие люди моя в снедь хлеба? Господа не призваша. 5 Тамо убояшася страха, идеже не бе страх: яко Господь в роде праведных. 6 Совет нищаго посрамисте: Господь же упование его есть. 7 Кто даст от Сиона спасение Израилево? Внегда возвратит Господь пленение людей Своих, возрадуется Иаков, и возвеселится Израиль.

**15** Господи, кто обитает в жилищи Твоем? Или кто вселится во святую гору Твою? 2 Ходяй непорочен и делаяй правду, глаголяй истину в сердцы своем: 3 иже не ульсти языком своим и не сотвори искреннему своему зла, и поношения не прият на ближния своя: 4 уничижен есть пред ним лукавнуяй, боящьяяжеся Господа славит: кленыйся искреннему своему

и не отменяя: 5 сребра своего не даде в лихву и мзды на неповинных не прият. Творяй сия не подвижится во век.

**16** Сохрани мя, Господи, яко на Тя уповах. 2 Рех Господеви: Господь мой еси Ты, яко благих моих не требуеши. 3 Святым, иже суть на земли его, удиви Господь вся хотения Своя в них. 4 Умножишася немощи их, по сих ускориша: не соберу соборы их от кровей, ни помяну же имен их устнама моима. 5 Господь часть достояния моего и чаши моя: Ты еси устрояяй достояние мое мне. 6 Ужя нападоша ми в державных моих: ибо достояние мое державно есть мне. 7 Благословлю Господа вразумившаго мя: еще же и до нощи наказаша мя утробы моя. 8 Предзрех Господа предо мною выну, яко одесную мене есть, да не подвижуся. 9 Сего ради возвеселися сердце мое, и возрадовася язык мой: еще же и плоть моя вселится на уповании. 10 Яко не оставиши душу мою во аде, ниже даси преподобному Твоему видети истления. (Sheol h7585) 11 Сказал ми еси пути живота: исполниши мя веселия с лицом Твоим: красота в деснице Твоей в конец.

**17** Молитва Давиду. Услыши, Господи, правду мою, вонми молению моему, внуши молитву мою не во устнах льстивых. 2 От лица Твоего судьба моя изыдет: очи мои да видита правоты. 3 Искусил еси сердце мое, посетил еси нощию: искусил мя еси, и не обретеса во мне неправда. 4 Яко да не возглаголют уста моя дел человеческих, за словеса устен Твоих аз сохраних пути жестоки. 5 Соверши стопы моя во стезях Твоих, да не подвижутся стопы моя. 6 Аз воззвах, яко услышал мя еси, Боже: приклони ухо Твое мне и услыши глаголы моя. 7 Удиви милости Твоя, спасаяй уповающыя на

Тя от противящихся деснице Твоей: **8** сохрани мя, Господи, яко зеницу ока: в крове крилу Твоею покрыеши мя **9** от лица нечестивых острастших мя: врази мои душу мою одержаша **10** тук свой затвориша, уста их глаголаша гордыню. **11** Изгонящи мя ныне обыдоша мя, очи свои возложиша уклонити на землю. **12** Объяша мя яко лев готов на лов и яко скимен обитаяй в тайных. **13** Воскресени, Господи, предвари я и запни им: избави душу мою от нечестиваго, оружие Твое **14** от враг руки Твоея, Господи, от малых от земли: раздели я в животе их, и сокровенных Твоих исполнися чрево их: насытишася сынов, и оставиша останки младенцем своим. **15** Аз же правдою явлюся лицу Твоему, насыщуся, внегда явитимися славе Твоей.

**18** В конец, отроку Господню Давиду, яже глагола Господеви словеса песни сея, в день, в оньже избави его Господь от руки всех враг его и из руки Саули: и рече: возлюблю Тя, Господи, крепосте моя: **2** Господь утверждение мое, и прибежище мое, и Избавитель мой, Бог мой, Помощник мой, и уповаю на Него: Защититель мой, и рог спасения моего, и Заступник мой. **3** Хваля призову Господа и от враг моих спасуся. **4** Одержаша мя болезни смертныя, и потоцы беззакония смятоша мя: **5** болезни адовы обыдоша мя, предвариша мя сети смертныя. (Sheol h7585) **6** И внегда скорбети ми, призвах Господа и к Богу моему воззвах: услыша от храма святого Своего глас мой, и вопль мой пред Ним внидет во уши Его. **7** И подвижеся и трепетна бысть земля, и основания гор смятошася и подвигошася, яко прогнеvasя на ня Бог. **8** Взыде дым гневом Его, и огонь от лица Его воспламенится: углие возгореся от Него. **9** И приклони небеса и сниде, и

мрак под ногама Его. 10 И взыде на Херувимы и лете, лете на крилу ветреню. 11 И положи тму закров Свой: окрест Его селение Его: темна вода во облацех воздушных. 12 От облистания пред Ним облацы проидоша, град и углие огненное. 13 И возгреме с небесе Господь, и Вышний даде глас Свой. 14 Низпосла стрелы и разгна я, и молнии умножи и смяте я. 15 И явишася источницы воднии, и открышася основания вселенныя от запрещенія Твоего, Господи, от дохновения духа гнева Твоего. 16 Низпосла с высоты и прият мя, восприят мя от вод многих. 17 Избавит мя от врагов моих сильных и от ненавидящих мя: яко утвердишася паче мене. 18 Предвариша мя в день озлобления моего: и бысть Господь утверждение мое. 19 И изведе мя на широту: избавит мя, яко восхоте мя. 20 И воздаст ми Господь по правде моей, и по чистоте руку мою воздаст ми, 21 яко сохраних пути Господни и не нечествовах от Бога моего. 22 Яко вся судьбы Его предо мною, и оправдания Его не отступиша от мене. 23 И буду непорочен с Ним и сохранюся от беззакония моего. 24 И воздаст ми Господь по правде моей и по чистоте руку мою пред очима Его. 25 С преподобным преподобн будеши, и с мужем неповинным неповинен будеши, 26 и со избранным избран будеши, и со строптивым развратишия. 27 Яко Ты люди смиренныя спасеши и очи гордых смириши. 28 Яко Ты просветиши светилник мой, Господи: Боже мой, просветиши тму мою. 29 Яко Тобою избавлюся от искушения, и Богом моим преиду стену. 30 Бог мой, непорочен путь Его: словеса Господня разжжена. Защититель есть всех уповающих на Него. 31 Яко кто Бог, разве Господа? Или кто Бог, разве Бога нашего? 32 Бог препоясуяй мя силою, и положи непорочен

путь мой: **33** совершая нозе мои яко елени, и на высоких поставляяй мя: **34** научаяй руце мои на брань, и положил еси лук медян мышца моя: **35** и дал ми еси защищение спасения, и десница Твоя восприят мя: и наказание Твое исправит мя в конец, и наказание Твое то мя научит. **36** Уширил еси стопы моя подо мною, и не изнемогосте плесне мои. **37** Пожену враги моя, и постигну я, и не возвращуся, дондеже скончаются: **38** оскорблю их, и не возмогут стати, падут под ногама моима. **39** И препоясал мя еси силою на брань, спял еси вся востающыя на мя под мя. **40** И врагов моих дал ми еси хребет и ненавидящыя мя потребил еси. **41** Возваша, и не бе спасаяй: ко Господу, и не услыша их. **42** И истню я яко прах пред лицом ветра, яко брение путей поглажду я. **43** Избавиши мя от пререкания людей: поставиши мя во главу языков: людие, ихже не ведех, работаша ми, **44** в слух уха послушаша мя. Сынове чуждии солгаша ми, **45** сынове чуждии обетшаша и охромоша от стезь своих. **46** Жив Господь, и благословен Бог, и да вознесетя Бог спасения моего, **47** Бог даяй отмщение мне и покоривый люди под мя, **48** избавитель мой от враг моих гневливых: от востающих на мя вознесеша мя, от мужа неправедна избавиши мя. **49** Сего ради исповемся Тебе во языцех, Господи, и имени Твоему пою: **50** величаяй спасения царева и творяй милость христу Своему Давиду и семени его до века.

**19** В конец, псалом Давиду. Небеса поведают славу Божию, творение же руку Его возвещает твердь. **2** День дни отрыгает глагол, и ночь ночи возвещает разум. **3** Не суть речи, ниже словеса, ихже не слышатся гласи их. **4** Во всю землю изыде вещание их, и в концы вселенныя глаголы их: в солнце

положи селение свое: **5** и той яко жених исходяй от чертога своего, возрадуется яко исполин тещи путь. **6** От края небесе исход его, и сретение его до края небесе: и несть, иже укроется теплоты его. **7** Закон Господень непорочен, обращаая души: свидетельство Господне верно, умудряющее младенцы. **8** Оправдания Господня права, веселящая сердце: заповедь Господня светла, просвещающая очи. **9** Страх Господень чист, пребывая в век века: судьбы Господни истинны, оправданны вкупе, **10** вожделенны паче злата и камене честна многа, и слаждша паче меда и сота. **11** Ибо раб Твой хранит я: вегда сохранити я, воздаяние много. **12** Грехопадения кто разумеет? От тайных моих очисти мя, **13** и от чуждих пощади раба Твоего: аще не обладают мною, тогда непорочен буду, и очищуся от греха велика. **14** И будут во благоволение словеса уст моих, и поучение сердца моего пред Тобою выну, Господи, помощниче мой и Избавителю мой.

**20** В конец, псалом Давиду. Услышит тя Господь в день печали, защитит тя имя Бога Иаковля. **2** Послет ти помощь от Святаго, и от Сиона заступит тя. **3** Помянет всяку жертву твою, и всеожжение твое тучно буди. **4** Даст ти Господь по сердцу твоему, и весь совет твой исполнит. **5** Возрадуемся о спасении твоём, и во имя Господа Бога нашего возвеличимся: исполнит Господь вся прошения твоя. **6** Ныне познах, яко спасе Господь Христа Своего: услышит его с небесе святаго Своего: в силах спасение десницы его. **7** Сии на колесницах, и сии на конех: мы же во имя Господа Бога нашего призовем. **8** Тии спяти быша и падоша: мы же востахом и исправихомся.



9 Господи, спаси царя, и услыши ны, в оньже аще день призовем Тя.

**21** Псалом Давиду. Господи, силою Твоею возвеселится царь, и о спасении Твоем возрадуется зело. 2 Желание сердца его дал еси ему, и хотения устну его неси лишил его. 3 Яко предварил еси его благословением благостынным, положил еси на главе его венец от камене честна. 4 Живота просил есть у Тебе, и дал еси ему долготу дний во век века. 5 Велия слава его спасением Твоим: славу и велелепие возложиши на него. 6 Яко даси ему благословение во век века: возвеселиши его радостию с лицом Твоим. 7 Яко царь уповает на Господа, и милостию Вышняго не подвижится. 8 Да обрящется рука Твоя всем врагом Твоим, десница Твоя да обрящет вся ненавидящия Тебе. 9 Яко положиши их яко пещь огненную во время лица Твоего: Господь гневом Своим смятет я, и снесть их огонь. 10 Плод их от земли погубиши, и семя их от сынов человеческих. 11 Яко уклониша на Тя злая, помыслиша советы, ихже не возмогут составить. 12 Яко положиши я хребет: во избытцех Твоих уготовиши лице их. 13 Вознесися, Господи, силою Твоею: воспоем и поем силы Твоя.

**22** В конец, о заступлении утреннем, псалом Давиду. Боже, Боже мой, вонми ми, вскую оставил мя еси? Далече от спасения моего словеса грехопадений моих. 2 Боже мой, воззову во дни, и не услышиши, и в нощи, и не в безумие мне. 3 Ты же во Святем живеши, хвало Израилева. 4 На Тя уповаша отцы наши: уповаша, и избавил еси я: 5 к Тебе воззваша, и спасошася: на Тя уповаша, и не постыдешася. 6 Аз же есмь червь, а не человек, поношение человеков

и уничижение людей. 7 Все видящие мя поругашамися, глаголаша устнами, покиваша главою: 8 упова на Господа, да избавит его, да спасет его, яко хошет его. 9 Яко Ты еси исторгий мя из чрева, упование мое от сосцу матере моея. 10 К Тебе привержен есмь от ложесн, от чрева матере моея Бог мой еси Ты. 11 Да не отступиши от мене, яко скорбь близ, яко несть помогай ми. 12 Обыдоша мя телцы мнози, юнцы тучнии одержаша мя: 13 отверзоша на мя уста своя, яко лев восхищай и рыкай. 14 Яко вода излихся, и разсыпашася вся кости моя: бысть сердце мое яко воск таяй посреде чрева моего. 15 Изсше яко скудель крепость моя, и язык мой прильпе гортани моему, и в персть смерти свел мя еси. 16 Яко обыдоша мя пси мнози, сонм лукавых одержаша мя: ископаша руце мои и нозе мои. 17 Изчетоша вся кости моя: тии же смотриша и презреша мя. 18 Разделиша ризы моя себе, и о одежди моей меташа жребий. 19 Ты же, Господи, не удали помощь твою от мене: на заступление мое вонми. 20 Избави от оружия душу мою, и из руки песни однородную мою. 21 Спаси мя от уст львовых, и от рог единорожь смирение мое. 22 Повем имя Твое братии моей, посреде церкви воспою Тя. 23 Боящиися Господа, восхвалите Его, все семя Иаковле, прославите Его, да убоится же от Него все семя Израилево: 24 яко не уничижи, ниже негодова молитвы нищаго, ниже отврати лице Свое от мене, и егда воззвах к Нему, услыша мя. 25 От Тебе похвала моя, в церкви велицей исповемся Тебе: молитвы моя воздам пред боящимися Его. 26 Ядят убозии, и насытятся, и восхвалят Господа взыскающии Его: жива будут сердца их в век века. 27 Помянутся и обратятся ко Господу вси концы

земли, и поклонятся пред Ним вся отечествия язык: 28 яко Господне есть царствие, и Той обладает языки. 29 Ядоша и поклонишася вси тучнии земли: пред Ним припадут вси низходящии в землю: и душа моя тому живет. 30 И семя мое поработает Ему: возвестит Господеви род грядущий: 31 и возвестят правду Его людем рождшымся, яже сотвори Господь.

**23** Господь пасет мя, и ничтоже мя лишит. 2 На месте злачне, тамо всели мя, на воде покойне воспита мя. 3 Душу мою обрати, настави мя на стези правды, имене ради Своего. 4 Аще бо и пойду посреде сени смертныя, не убоюся зла, яко Ты со мною еси: жезл Твой и палица Твоя, та мя утешиста. 5 Уготовал еси предо мною трапезу сопротив стужающим мне: умастил еси елеом главу мою, и чаша твоя упоявающи мя, яко державна. 6 И милость Твоя поженет мя вся дни живота моего, и еже вселитимися в дом Господень в долготу дний.

**24** Господня земля, и исполнение ея, вселенная и вси живуущии на ней. 2 Той на морях основал ю есть и на реках уготовал ю есть. 3 Кто взыдет на гору Господню? Или кто станет на месте святем Его? 4 Неповинен рукама и чист сердцем, иже не прият всуе душу свою и не клятсся лестию искреннему своему: 5 сей примет благословение от Господа и милостыню от Бога Спаса своего. 6 Сей род ищущих Господа, ищущих лице Бога Иаковля. 7 Возмите врата князи ваша, и возмיתесь врата вечная: и внидет Царь славы. 8 Кто есть сей Царь славы? Господь крепок и силен, Господь силен в брани. 9 Возмите врата князи ваша, и возмיתесь

врата вечная: и увидет Царь славы. 10 Кто есть сей Царь славы? Господь сил, Той есть царь славы.

**25** К Тебе, Господи, воздвигох душу мою, Боже мой, на Тя уповах, да не постыжуся во век, ниже да посмеютмися врази мои: 2 ибо вси терпящии Тя не постыдятся. 3 Да постыдятся беззаконующии вотще. 4 Пути Твоя, Господи, скажи ми и стезям Твоим научи мя. 5 Настави мя на истину Твою и научи мя: яко Ты еси Бог спас мой, и Тебе терпех весь день. 6 Помяни щедроты Твоя, Господи, и милости Твоя, яко от века суть. 7 Грех юности моя и неведения моего не помяни: по милости Твоей помяни мя Ты, ради благодати Твоея, Господи. 8 Благ и прав Господь, сего ради законоположит согрешающим на пути. 9 Наставит кроткия на суд, научит кроткия путем Своим. 10 Все путие Господни милость и истина, взыскающим завета Его и свидения Его. 11 Ради имени Твоего, Господи, и очисти грех мой, мног бо есть. 12 Кто есть человек бояйся Господа? Законоположит ему на пути, егоже изволи. 13 Душа его во благих водворится, и семя его наследит землю. 14 Держава Господь боящихся Его, и завет Его явит им. 15 Очи мои выну ко Господу, яко Той исторгнет от сети нозе мои. 16 Призри на мя и помилуй мя, яко единород и нищ есмь аз. 17 Скорби сердца моего умножишася, от нужд моих изведи мя. 18 Видь смирение мое и труд мой, и остави вся грехи моя. 19 Видь враги моя, яко умножишася, и ненавидением неправедным возненавидеша мя. 20 Сохрани душу мою и избави мя, да не постыжуся, яко уповах на Тя. 21 Незлобивии и правии прилеплюхуся мне, яко потерпех Тя, Господи. 22 Избави, Боже, Израиля от всех скорбей его.

**26** Суди ми, Господи, яко аз незлобою моею ходих: и на Господа уповая не изнемогу. 2 Искуси мя, Господи, и испытай мя, разжжи утробы моя и сердце мое. 3 Яко милость Твоя пред очима моима есть, и благоугодих во истине Твоей. 4 Не седох с сонмом суетным, и со законопреступными не вниду. 5 Возненавидех церковь лукавнующих, и с нечестивыми не сяду. 6 Умыю в неповинных руце мои, и обыду жертвенник Твой, Господи, 7 еже услышати ми глас хвалы Твоея и поведати вся чудеса Твоя. 8 Господи, возлюбих благолепие дому Твоего и место селения славы Твоея. 9 Да не погубиши с нечестивыми душу мою и с мужи кровей живот мой, 10 ихже в руку беззакония, десница их исполнися мзды. 11 Аз же незлобою моею ходих: избави мя, Господи, и помилуй мя. 12 Нога моя ста на правоте: в церквах благословлю Тя, Господи.

**27** Господь просвещение мое и спаситель мой, кого убоюся? Господь защититель живота моего, от кого утрашуся? 2 Внегда приблизится на мя злобующим, еже снести плоти моя, оскорбляющим мя и врази мои, тии изнемогоша и падоша. 3 Аще ополчится на мя полк, не убоится сердце мое: аще востанет на мя брань, на него аз уповаю. 4 Едино просих от Господа, то взыщу: еже жити ми в дому Господни вся дни живота моего, зрети ми красоту Господню и посещати храм Святый Его. 5 Яко скры мя в селении Своем в день зол моих, покры мя в тайне селения Своего, на камень вознесе мя. 6 И ныне се, вознесе главу мою на враги моя: обыдох и пожрох в селении Его жертву хваления и воскликновения: пою и воспую Господеви. 7 Услыши, Господи, глас мой, имже воззвах, помилуй мя и услыши мя. 8 Тебе рече сердце

мое: Господа възыщу, възыска Тебе лице мое, лица Твоего, Господи, възыщу. 9 Не отврати лица Твоего от мене и не уклонися гневом от раба Твоего: помощник мой буди, не отрини мене и не остави мене, Боже, Спасителю мой. 10 Яко отец мой и мати моя остависта мя, Господь же восприят мя. 11 Законоположи ми, Господи, в пути Твоем, и настави мя на стезю правую враг моих ради. 12 Не предаждь мене в души стужающих ми: яко восташа на мя свидетеле неправеднии, и солга неправда себе. 13 Верую видети благая Господня на земли живых. 14 Потерпи Господа, мужайся, и да крепится сердце твое, и потерпи Господа.

**28** К Тебе, Господи, воззову, Боже мой: да не премолчиши от мене: да не когда премолчиши от мене, и уподоблюся низходящым в ров. 2 Услыши, Господи, глас моления моего, внегда молитимися к Тебе, внегда воздети ми руце мои ко храму святому Твоему. 3 Не привлецы мене со грешники, и с делающими неправду не погуби мене, глаголющими мир с ближними своими, злая же в сердцах своих. 4 Дажь им, Господи, по делом их и по лукавству начинаний их, по делом руку их даждь им, воздаждь воздаяние их им. 5 Яко не разумеша в дела Господня и в дела руку Его: разориши я и не созиждеша я. 6 Благословен Господь, яко услыша глас моления моего. 7 Господь помощник мой и защититель мой: на Него упова сердце мое, и поможе ми, и процвете плоть моя: и волею моею исповемся Ему. 8 Господь утверждение людий Своих и защититель спасений Христа Своего есть. 9 Спаси люди Твоя, и благослови достояние Твое, и упаси я, и возми я до века.

**29** Принесите Господеви, сынове Божии, принесите Господеви сыны овни, принесите Господеви славу и честь: **2** принесите Господеви славу имени Его: поклонитесь Господеви во дворе святем Его. **3** Глас Господень на водах, Бог славы возгреме, Господь на водах многих. **4** Глас Господень в крепости, глас Господень в великолепии. **5** Глас Господа, сокрушающего кедры: и стрыет Господь кедры Ливанския, **6** и истнит я яко телца Ливанска: и возлюбленный яко сын единорожь. **7** Глас Господа, пресецающего пламень огня. **8** Глас Господа, стрясающего пустыню: и стрясет Господь пустыню Каддийскую. **9** Глас Господень, свершающий елени, и откроет дубравы: и в храме Его всякий глаголет славу. **10** Господь потоп населяет, и сядет Господь царь в век. **11** Господь крепость людем Своим даст, Господь благословит люди Своя миром.

**30** Псалом песни обновления дому Давидова. Вознесу Тя, Господи, яко подял мя еси, и не возвеселил еси врагов моих о мне. **2** Господи Боже мой, возвах к Тебе, и изцелил мя еси. **3** Господи, возвел еси от ада душу мою, спасл мя еси от низходящих в ров. (Sheol h7585) **4** Пойте Господеви, преподобнии Его, и исповедайте память святыни Его: **5** яко гнев в ярости Его, и живот в воли Его: вечер водворится плачь, и завтра радость. **6** Аз же рех во обилии моем: не подвижуся во век. **7** Господи, волею Твоею подаждь доброте моей силу: отвратил же еси лице Твое, и бых смущен. **8** К Тебе, Господи, воззову, и к Богу моему помолюся. **9** Кая польза в крови моей, внегда сходити ми во истление? Еда исповестся Тебе персть? Или возвестит истину Твою? **10** Слыша Господь и помилова мя: Господь бысть помощник

мой. **11** Обратил еси плачь мой в радость мне, растерзал еси вретище мое и препоясал мя еси веселием, **12** яко да воспоеет Тебе слава моя, и не умилюся. Господи Боже мой, во век исповемся Тебе.

**31** В конец, псалом Давиду, изступления. На Тя, Господи, уповах, да не постыжуся во век: правдою Твоею избави мя и изми мя. **2** Приклони ко мне ухо Твое, ускори изяти мя: буди ми в Бога защитителя и в дом прибежища, еже спасти мя. **3** Яко держава моя и прибежище мое еси Ты: и имене Твоего ради наставиши мя и препитаеши мя. **4** Изведеши мя от сети сея, юже скрыша ми: яко Ты еси защититель мой, Господи. **5** В руце Твои предложу дух мой: избавил мя еси, Господи Боже истины. **6** Возненавидел еси хранящия суеты вотще: аз же на Господа уповах. **7** Возрадуюся и возвеселюся о милости Твоей, яко призрел еси на смирение мое, спасл еси от нужд душу мою **8** и неси мене затворил в руках вражиих, поставил еси на пространне нозе мои. **9** Помилуй мя, Господи, яко скорблю: смятеся яростию око мое, душа моя и утроба моя. **10** Яко исчезе в болезни живот мой, и лета моя в въздыханиих: изнеможе ницетою крепость моя, и кости моя смятошася. **11** От всех враг моих бых поношение, и соседом моим зело, и страх знаемым моим: видящии мя вон бежаша от мене. **12** Забвен бых яко мертв от сердца: бых яко сосуд погублен. **13** Яко слышах гаждение многих живущих окрест: внегда собратися им вкупе на мя, прияти душу мою совещаша. **14** Аз же на Тя, Господи, уповах, рех: Ты еси Бог мой. **15** В руку Твою жребии мои: избави мя из руки враг моих и от гонящих мя. **16** Просвети лице Твое на раба Твоего: спаси мя милостию Твоею. **17** Господи, да не постыжуся,



яко призвах Тя: да постыдятся нечестивии, и снидут во ад.  
(Sheol h7585) 18 Немы да будут устны льстивыя, глаголющия  
на праведнаго беззаконие, гордынею и уничижением. 19  
Коль многое множество благодати Твоя, Господи, юже скрыл  
еси боящимся Тебе, соделал еси уповающим на Тя, пред  
сыны человеческими: 20 скроеши их в тайне лица Твоего от  
мятежа человека, покроеши их в крове от пререкания  
язык. 21 Благословен Господь, яко удиви милость Свою  
во граде ограждения. 22 Аз же рех во изступлении моем:  
отвержен есмь от лица очию Твоею: сего ради услышал еси  
глас молитвы моея, внегда воззвах к Тебе. 23 Возлюбите  
Господа, вси преподобнии Его: яко истины взыскает Господь  
и воздаст излише творящим гордыню. 24 Мужайтесь, и да  
крепится сердце ваше, вси уповающи на Господа.

**32** Блажени, ихже оставишася беззакония, и ихже  
прикрышася греси. 2 Блажен муж, емуже не вменит Господь  
греха, ниже есть во устех его лесть. 3 Яко умолчах, обетшаша  
кости моя, от еже звати ми весь день, 4 яко день и ночь  
отяготе на мне рука Твоя: возвратихся на страсть, егда  
унзе ми терн. 5 Беззаконие мое познах и греха моего не  
покрых, рех: исповею на мя беззаконие мое Господеви: и Ты  
оставил еси нечестие сердца моего. 6 За то помолится к Тебе  
всяк преподобный во время благопотребно: обаче в потопе  
вод многих к нему не приближатся. 7 Ты еси прибежище  
мое от скорби обдержаша мя: радости моя, избави мя от  
обышедших мя. 8 Вразумлю тя, и наставлю тя на путь сей, в  
оньже пойдеш: утвержу на тя очи Мои. 9 Не будите яко  
конь и мек, имже несть разума: броздами и уздою челюсти  
их востягнеши, не приближающихся к тебе. 10 Многи раны

грешному: уповающего же на Господа милость обыдет. **11** Веселитесь о Господе и радуйтесь праведнии, и хвалитесь, вси правии сердцем.

**33** Радуйтесь, праведнии, о Господе: правым подобает похвала. **2** Исповедайтесь Господеви в гуслах, во псалтири десятиструннем пойте Ему: **3** воспойте Ему песнь нову, добре пойте Ему со восклицанием: **4** яко право слово Господне, и вся дела Его в вере. **5** Любит милостыню и суд Господь, милости Господни исполнь земля. **6** Словом Господним небеса утвердишася, и духом уст Его вся сила их: **7** собирай яко мех воды морския, полагаяй в сокровищих бездны. **8** Да убоится Господа вся земля, от Негоже да подвижутся вси живущии по вселенней: **9** яко Той рече, и быша: Той повеле, и создашася. **10** Господь разоряет советы языков, отмечает же мысли людей и отмечает советы князей. **11** Совет же Господень во век пребывает, помышления сердца Его в род и род. **12** Блажен язык, емуже есть Господь Бог Его, людие, яже избра в наследие Себе. **13** С небесе призре Господь, виде вся сыны человеческия: **14** от готоваго жилища Своего призре на вся живущыя на земли: **15** создавый на едине сердца их, разумеваяй на вся дела их. **16** Не спасается царь мною силою, и исполин не спасется множеством крепости своя. **17** Ложь конь во спасение, во множестве же силы своя не спасется. **18** Се, очи Господни на боящыяся Его, уповающыя на милость Его: **19** избавити от смерти души их, и препитати я в глад. **20** Душа же наша чает Господа, яко помощник и защититель наш есть: **21** яко о Нем возвеселится сердце наше, и во имя святое Его уповахом. **22** Буди, Господи, милость Твоя на нас, якоже уповахом на Тя.

**34** Псалом Давиду, внегда измени лице свое пред Авимелехом: и отпусти его, и отиде. Благословлю Господа на всякое время, выну хвала Его во устех моих. 2 О Господе похвалится душа моя: да услышат кротцыи и возвеселятся. 3 Возвеличите Господа со мною, и вознесем имя Его вкупе. 4 Взысках Господа, и услыша мя и от всех скорбей моих избави мя. 5 Приступите к Нему и просветитесь, и лица ваша не постыдятся. 6 Сей нищий воззва, и Господь услыша и, и от всех скорбей его спасе и. 7 Ополчится Ангел Господень окрест боящихся Его и избавит их. 8 Вкусите и видите, яко благ Господь: блажен муж, иже уповае на Нань. 9 Бойтесь Господа, вси святии Его, яко несть лишения боящимся Его. 10 Богатии обнищаша и възалкаша: възскающии же Господа не лишатся всякаго блага. 11 Приидите, чада, послушайте мене, страху Господню научу вас. 12 Кто есть человек хотяй живот, любяй дни видети блага? 13 Удержи язык твой от зла и устне твои, еже не глаголати лъсти. 14 Уклонися от зла и сотвори благо: възси мира и пожени и. 15 Очи Господни на праведныя, и уши Его в молитву их. 16 Лице же Господне на творящыя злая, еже потребити от земли память их. 17 Воззваша праведнии, и Господь услыша их и от всех скорбей их избави их. 18 Близ Господь сокрушенных сердцем, и смиренныя духом спасет. 19 Многи скорби праведным, и от всех их избавит я Господь. 20 Хранит Господь вся кости их, ни едина от них сокрушится. 21 Смерть грешников люта, и ненавидящии праведнаго прегрешат. 22 Избавит Господь души раб Своих, и не прегрешат вси уповающии на Него.

**35** Суди, Господи, обидящыя мя, побори борющыя мя. 2 Приими оружие и щит и востани в помощь мою: 3 изсуни

мечь и заключи сопротив гонящих мя: рцы души моей: спасение твое есмь аз. 4 Да постыдятся и посрамятся ищущии душу мою, да возвратятся вспять и постыдятся мыслящии ми злая. 5 Да будут яко прах пред лицом ветра, и Ангел Господень оскорбляя их: 6 да будет путь их тма и ползок, и Ангел Господень погоняяй их: 7 яко туне скрыша ми пагубу сети своя, всуе поносиша души моей. 8 Да приидет ему сеть, юже не весть, и ловитва, юже скры, да обымет и, и в сеть да впадет в ню. 9 Душа же моя возрадуется о Господе, возвеселится о спасении Его. 10 Вся кости моя рекут: Господи, Господи, кто подобен Тебе? Избавляяй нища из руки крепльших его, и нища, и убога от расхищающих его. 11 Воставше на мя свидетеле неправеднии, яже не ведях, вопрошаху мя. 12 Воздаша ми лукавая воз благая, и безчадие души моей. 13 аз же, внегда они стужаху ми, облачаяхся во вретисце и смирах постом душу мою, и молитва моя в недро мое возвратится. 14 Яко ближнему, яко брату нашему, тако угождах: яко плача и сетуя, тако смирахся. 15 И на мя возвеселишася и собращася: собращася на мя раны, и не познах: поделишася, и не умилишася. 16 Искусиша мя, подражниша мя подражанием, поскрежеташа на мя зубы своими. 17 Господи, когда узриши? Устрой душу мою от злодейства их, от лев едиnorodную мою. 18 Исповемя Тебе в церкви мнозе, в людех тяжцех восхваляю Тя. 19 Да не возрадуются о мне враждующии ми неправедно, ненавидящии мя туне и помизающии очима: 20 яко мне убо мирная глаголаху, и на гнев лести помышляху. 21 Разшириша на мя уста своя, реша: благоже, благоже, видеша очи наши. 22 Видел еси, Господи, да не премолчиши: Господи, не

отступи от мене. **23** Востани, Господи, и вонми суду моему, Боже мой и Господи мой, на прю мою. **24** Суди ми, Господи, по правде Твоей, Господи Боже мой, и да не возрадуются о мне. **25** Да не рекут в сердцах своих: благоже, благоже души нашей: ниже да рекут: пожрохом его. **26** Да постыдятся и посрамятся вкупе радующися злом моим: да облечутся в студ и срам велеречующии на мя. **27** Да возрадуются и возвеселятся хотящии правды моея: и да рекут выну, да возвеличится Господь, хотящии мира рабу Его. **28** И язык мой поучится правде Твоей, весь день хвале Твоей.

**36** В конец, отроку Господню Давиду. Глаголет пребеззаконный согрешати в себе: несть страха Божия пред очима его: **2** яко ульсти пред ним обрести беззаконие свое, и возненавидети. **3** Глаголы уст его беззаконие и лесь: не восхоте разумети еже ублажити. **4** Беззаконие помысли на ложи своем: предста всякому пути неблагоу, о злобе же не негодова. **5** Господи, на небеси милость Твоя, и истина Твоя до облак: **6** правда Твоя яко горы Божия, судьбы Твоя бездна многа: человеки и скоты спасеши, Господи. **7** Яко умножил еси милость Твою, Боже: сынове же человечестии в крове крилу Твоею надеяться имут. **8** Упиются от тука дому Твоего, и потоком сладости Твоя напоиши я. **9** Яко у Тебе источник живота, во свете Твоем узрим свет. **10** Пробави милость Твою ведущим Тя и правду Твою правым сердцем. **11** Да не придет мне нога гордыни, и рука грешника да не подвижит мене. **12** Тамо падоша вси делающии беззаконие: изриновени быша, и не возмогут стати.

**37** Не ревнуй лукавнующым, ниже завиди творящим беззаконие. **2** Зане яко трава скоро изсхнут, и яко зелие злака

скоро отпадут. 3 Уповай на Господа и твори благостыню: и  
насели землю, и упасешия в богатстве ея. 4 Насладися  
Господеви, и даст ти прошения сердца твоего. 5 Открой ко  
Господу путь твой и уповай на Него, и Той сотворит. 6 И  
изведет яко свет правду твою и судьбу твою яко полудне. 7  
Повинися Господеви и умоли Его. Не ревнуй спешущему в пути  
своём, человеку творящему законопреступление. 8 Престани  
от гнева и остави ярость: не ревнуй, еже лукавновати, 9  
зане лукавнующии потребятся, терпящии же Господа, тии  
наследят землю. 10 И еще мало, и не будет грешника: и  
взыщеша место его и не обрящеша. 11 Кротцыи же наследят  
землю и насладятся о множестве мира. 12 Назирает грешный  
праведнаго и поскрежет нань зубы своими: 13 Господь же  
посмеется ему, зане прозирает, яко приидет день его. 14  
Мечь извлекоша грешницы, напрягоша лук свой, низложити  
убога и нища, заклати правыя сердцем. 15 Мечь их да  
внидет в сердца их, и луцы их да сокрушатся. 16 Лучше  
малое праведнику, паче богатства грешных многа. 17 Зане  
мышцы грешных сокрушатся, утверждает же праведныя  
Господь. 18 Весть Господь пути непорочных, и достояние  
их в век будет. 19 Не постыдятся во время лютое и во  
днех глада насытятся, яко грешницы погибнут. 20 Врази же  
Господни, купно прославятся им и вознесятся, исчезающе  
яко дым изчезоша. 21 Заемлет грешный и не возвратит:  
праведный же щедрит и дает. 22 Яко благословящии Его  
наследят землю, кленущии же Его потребятся. 23 От Господа  
стопы человеку исправляются, и пути Его восхошет зело. 24  
Егда падет, не разбьется, яко Господь подкрепляет руку его.  
25 Юнейший бых, ибо состарехся, и не видех праведника

оставлена, ниже семене его просяща хлебы. 26 Весь день милует и взаим дает праведный, и семя его во благословение будет. 27 Уклонися от зла и сотвори благо, и вселися в век века. 28 Яко Господь любит суд и не оставит преподобных Своих: во век сохраняются: беззаконницы же изженутся, и семя нечестивых потребится. 29 Праведницы же наследят землю и вселятся в век века на ней. 30 Уста праведного поучатся премудрости, и язык его возглаголет суд. 31 Закон Бога его сердцы его, и не запнутся стопы его. 32 Смотряет грешный праведного и ищет еже умертвити его: 33 Господь же не оставит его в руку его, ниже осудит его, егда судит ему. 34 Потерпи Господа и сохрани путь Его, и вознесет тя еже наследити землю: внегда потреблятися грешником, узриши. 35 Видех нечестиваго превозносящася и высящася яко кедры Ливанския: 36 и мимо идох, и се, не бе, и взысках его, и не обретеса место его. 37 Храни незлобие и виждь правоту, яко есть останок человеку мирну. 38 Беззаконницы же потребятся вкупе: останцы же нечестивых потребятся. 39 Спасение же праведных от Господа, и защититель их есть во время скорби: 40 и поможет им Господь и избавит их, и измет их от грешник и спасет их, яко уповаша на Него.

**38** Псалом Давиду, в воспоминание о субботе. Господи, да не яростию Твоею обличиши мене, ниже гневом Твоим накажеша мене: 2 яко стрелы Твоя унзоша во мне, и утвердил еси на мне руку Твою. 3 Несть изцеления в плоти моей от лица гнева Твоего, несть мира в костех моих от лица грех моих. 4 Яко беззакония моя превзыдоша главу мою, яко бремя тяжкое отяготеша на мне. 5 Возмердеша и согниша раны моя, от лица безумия моего. 6 Пострадах и

слякохся до конца, весь день сетуя хождах: 7 яко лядвия моя наполнишася поруганий, и несть изцеления в плоти моей. 8 Озлоблен бых и смирихся до зела, рыках от въздыхания сердца моего. 9 Господи, пред Тобою все желание мое, и въздыхание мое от Тебе не утаися. 10 Сердце мое смятесе, остави мя сила моя, и свет очию моею, и той несть со мною. 11 Друзи мои и искреннии мои прямо мне приближишася и сташа. 12 И ближнии мои отдалече мене сташа, и нуждахуся ищущии душу мою: и ищущии злая мне глаголаху суетная, и льстивным весь день поучахуся. 13 Аз же яко глух не слышах, и яко нем не отверзаяй уст своих: 14 и бых яко человек не слышай и не имый во устех своих обличения. 15 Яко на Тя, Господи, уповах, Ты услышиши, Господи Боже мой. 16 Яко рех: да не когда порадуютмися врази мои: и внегда подвижатися ногам моим, на мя велеречеваша. 17 Яко аз на раны готов, и болезнь моя предо мною есть выну. 18 Яко беззаконие мое аз возвещу и попекуся о гресе моем. 19 Врази же мои живут и укрепишася паче мене, и умножишася ненавидящии мя без правды: 20 воздающии ми злая воз благая оболгаху мя, зане гонях благостыню. 21 Не остави мене, Господи Боже мой, не отступи от мене: 22 вонми в помощь мою, Господи спасения моего.

**39** В конец, Идифуму, песнь Давиду. Рех: сохраню пути моя, еже не согрешати ми языком моим: положих устом моим хранило, внегда востати грешному предо мною. 2 Онемех и смирихся, и умолчах от благ, и болезнь моя обновися. 3 Согреяся сердце мое во мне, и в поучении моем разгорится огонь: глаголах языком моим: 4 скажи ми, Господи, кончину мою и число дний моих, кое есть, да разумею, что лишаюся



аз. 5 Се, пяди положил еси дни моя, и состав мой яко ничтоже пред Тобою: обаче всяческая суета всяк человек живый. 6 Убо образом ходит человек, обаче все мятется: сокровиществует, и не весть, кому соберет я. 7 И ныне кто терпение мое? Не Господь ли? И состав мой от Тебе есть. 8 От всех беззаконий моих избави мя: поношение безумному дал мя еси. 9 Онемех и не отверзох уст моих, яко Ты сотворил еси. 10 Отстави от мене раны Твоя: от крепости бо руки Твоя аз исчезох. 11 Во обличениях о беззаконии наказал еси человека, и истаял еси яко паучину душу его: обаче все всяк человек. 12 Услыши молитву мою, Господи, и моление мое внуши, слез моих не премолчи: яко преселник аз есмь у Тебе и пришлец, якоже вси отцы мои. 13 Ослаби ми, да почию, прежде даже не отиду, и ктому не буду.

**40** В конец, псалом Давиду. Терпя потерпех Господа, и внят ми и услыша молитву мою: 2 и возведе мя от рова страстей и от брения тины, и постави на камени нозе мои и исправи стопы моя: 3 и вложи во уста моя песнь нову, пение Богу нашему. Узрят мнози и убоятся, и уповают на Господа. 4 Блажен муж, емуже есть имя Господне упование его, и не призре в суеты и неистовления ложная. 5 Многа сотворил еси Ты, Господи Боже мой, чудеса Твоя, и помышлением Твоим несть кто уподобится Тебе: возвестих и глаголах: умножишася паче числа. 6 Жертвы и приношения не восхотел еси, тело же свершил ми еси: всесожжений и о гресе не взыскал еси. 7 Тогда рех: се, прииду: в главизне книжне писано есть о мне: 8 еже сотворити волю Твою, Боже мой, восхотех, и закон Твой посреде чрева моего. 9 Благовестих правду в церкви велицей, се, устнам моим не возбраню:

Господи, Ты разумел еси. 10 Правду Твою не скрых в сердца моем, истину Твою и спасение Твое рех, не скрых милость Твою и истину Твою от сонма многа. 11 Ты же, Господи, не удали щедрот Твоих от мене: милость Твоя и истина Твоя выну да заступите мя. 12 Яко одержаша мя злая, имже несть числа: постигоша мя беззакония моя, и не возмогах зрети: умножишася паче влас главы моя, и сердце мое остави мя. 13 Благоволи, Господи, избавити мя: Господи, во еже помощи ми, вонми. 14 Да постыдятся и посрамятся вкупе ищущии душу мою, изяти ю: да возвратятся вспять и постыдятся хотящии ми злая. 15 Да примут абие студ свой глаголющии ми: благоже, благоже. 16 Да возрадуются и возвеселятся о Тебе вси ищущии Тебе, Господи, и да рекут выну, да возвеличится Господь, любящии спасение Твое. 17 Аз же нищь есмь и убог, Господь попечется о мне: помощник мой и защититель мой еси ты, Боже мой, не закосни.

**41** В конец, псалом Давиду. Блажен разумеваый на нища и убога, в день лют избавит его Господь. 2 Господь да сохранит его и живит его, и да ублажит его на земли и да не предаст его в руки врагов его. 3 Господь да поможет ему на одре болезни его: все ложе его обратил еси в болезни его. 4 Аз рех: Господи, помилуй мя, изцели душу мою, яко согреших Ти. 5 Врази мои реша мне злая: когда умрет, и погибнет имя его? 6 И вхождаше видети, всуе глаголаше сердце его: собра беззаконие себе, исхождаше вон и глаголаше вкупе. 7 На мя шептаху вси врази мои, на мя помышляху злая мне. 8 Слово законопреступное возложиша на мя: еда спяй не приложит воскреснути? 9 Ибо человек мира моего, на негоже уповах, ядый хлебы моя, возвеличи на мя запинание. 10 Ты же,

Господи, помилуй мя и возстави мя, и воздам им. **11** В сем познах, яко восхотел мя еси, яко не возрадуется враг мой о мне. **12** Мене же за незлобие приял, и утвердил мя еси пред Тобою в век. **13** Благословен Господь Бог Израилев от века и до века: буди, буди.

**42** В конец, в разум сынов Кореовых, псалом Давиду. Имже образом желает елень на источники водныя, сице желает душа моя к Тебе, Боже. **2** Возжада душа моя к Богу крепкому, живому: когда прииду и явлюся лицу Божию? **3** Быша слезы моя мне хлеб день и ночь, внегда глаголатися мне на всяк день: где есть Бог твой? **4** Сия помянух, и излиях на мя душу мою: яко пройду в место селения дивна, даже до дому Божия, во гласе радования и исповедания, шума празднующаго. **5** Вскую прискорбна еси, душе моя? И вскую смущаеши мя? Уповай на Бога, яко исповемся Ему, спасение лица моего и Бог мой. **6** Ко мне самому душа моя смятеся: сего ради помянух Тя от земли Иордански и Ермониимски, от горы Малыя. **7** Бездна бездну призывает во гласе хлябий Твоих: вся высоты Твоя и волны Твоя на мне преидоша. **8** В день заповесть Господь милость Свою, и нощию песнь Его от мене, молитва Богу живота моего. **9** Реку Богу: заступник мой еси, почто мя забыл еси? И вскую сетуя хожду, внегда оскорбляет враг? **10** Внегда сокрушатися костем моим, поношаху ми врази мои, внегда глаголати им мне на всяк день: где есть Бог твой? **11** Вскую прискорбна еси, душе моя? И вскую смущаеши мя? Уповай на Бога, яко исповемся Ему, спасение лица моего и Бог мой.

**43** Суди ми, Боже, и разсуди прю мою: от языка не преподобна, от человека неправедна и льстива избави мя. **2**

Зане Ты еси, Боже, крепость моя, вскую отринул мя еси? И вскую сетуя хожду, внегда оскорбляет враг? 3 Посли свет Твой и истину Твою: та мя настависта, и введоста мя в гору святую Твою и в селения Твоя. 4 И вниду к жертвеннику Божию, к Богу веселящему юность мою: исповемся Тебе в гуслах, Боже, Боже мой. 5 Вскую прискорбна еси, душе моя? И вскую смущаеши мя? Уповай на Бога, яко исповемся Ему, спасение лица моего и Бог мой.

**44** В конец, сынов Кореовых, в разум, псалом. Боже, ушима нашими услышахом, и отцы наши возвестиша нам дело, еже соделал еси во днех их, во днех древних. 2 Рука Твоя языки потреби, и насадил я еси: озлобил еси люди и изгнал еси я. 3 Не бо мечем своим наследилша землю, и мышца их не спасе их, но десница Твоя и мышца Твоя и просвещение лица Твоего, яко благоволил еси в них. 4 Ты еси сам Царь мой и Бог мой, заповедай спасения Иаковля. 5 О Тебе враги наша избодем роги, и о имени Твоем уничим востающыя на ны. 6 Не на лук бо мой уповаю, и мечь мой не спасет мене: 7 спасл бо еси нас от стужающих нам, и ненавидящих нас посрамил еси. 8 О Бозе похвалимся весь день, и о имени Твоем исповемся во век. 9 Ныне же отринул еси и посрамил еси нас, и не изыдеши, Боже, в силах наших. 10 Возвратил еси нас вспять при врезех наших, и ненавидящии нас расхищаху себе. 11 Дал еси нас яко овцы снеди, и во языцех разсеял ны еси. 12 Отдал еси люди Твоя без цены, и не бе множество в восклицаниих наших. 13 Положил еси нас поношение соседом нашим, подражание и поругание сущым окрест нас. 14 Положил еси нас в притчу во языцех, покиванию главы в людех. 15 Весь день срам

мой предо мною есть, и студ лица моего покры мя, 16 от гласа поношающего и оклеветающего, от лица вражия и изгонящаго. 17 Сия вся приидоша на ны, и не забудом Тебе, и не неправдовахом в завете Твоем, 18 и не отступи вспять сердце наше: и уклонил еси стези наша от пути Твоего, 19 яко смирил еси нас на месте озлобления, и прикры ны сень смертная. 20 Аще забудом имя Бога нашего, и аще воздыхом руки наша к богу чуждему, 21 не Бог ли взыщет сих? Той бо весть тайная сердца. 22 Зане Тебе ради умерщвляемся весь день, вменихомся яко овцы заколения. 23 Востани, вскую спиши, Господи? Воскресени, и не отрини до конца. 24 Вскую лице Твое отвращаеши? Забываеши нищету нашу и скорбь нашу? 25 Яко смирися в персть душа наша, прильпе земли утроба наша. 26 Воскресени, Господи, помози нам, и избави нас имене ради Твоего.

**45** В конец, о изменяемых сыном Кореовым в разум, песнь о возлюбленном. Отрыгну сердце мое слово благо, глаголю аз дела моя Цареви: язык мой трость книжника скорописца. 2 Красен добротою паче сынов человеческих, излися благодать во устнах Твоих: сего ради благослови Тя Бог во век. 3 Препояши мечь Твой по бедре Твоей, Сильне, 4 красотою Твоею и добротою Твоею: и наляцы, и успевай, и царствуй истины ради и кротости и правды: и наставит Тя дивно десница Твоя. 5 Стрелы Твоя изощрены, Сильне: людие под Тобою падут в сердца враг Царевых. 6 Престол Твой, Боже, в век века: жезл правости жезл царствия Твоего. 7 Возлюбил еси правду и возненавидел еси беззаконие: сего ради помаза Тя, Боже, Бог Твой елеем радости паче причастика Твоих. 8 Смирна и стакти и касиа от риз Твоих,

от тяжестей слоновых, из нихже возвеселиша Тя. **9** Дщери царей в чести Твоей: предста царица одесную Тебе, в ризах позлащенных одеяна преиспещрена. **10** Слыши, дщи, и виждь, и приклони ухо твое, и забуди люди твоя и дом отца твоего: **11** и возжелает Царь доброты твоя, зане Той есть Господь твой, и поклонишися Ему, **12** и дщи Тирова с дары: лицу Твоему помолятся богатии людстии. **13** Вся слава дщере Царевы внутрь: рясны златыми одеяна и преиспещрена. **14** Приведутся Царю девы вслед ея, искренния ея приведутся Тебе: **15** приведутся в веселии и радовании, введутся в храм Царев. **16** Вместо отец Твоих быша сынове Твои: поставиши я князи по всей земли. **17** Помяну имя Твое во всяком роде и роде: сего ради людие исповедятся Тебе в век и во век века.

**46** В конец, о сынех Кореовых, о тайных, псалом. Бог нам прибежище и сила, помощник в скорбех обретших ны зело. **2** Сего ради не убоимся, внегда смущается земля, и прелагаются горы в сердца морская. **3** Возшумеша и смятошася воды их, смятошася горы крепостию его. **4** Речная устремления веселят град Божий: освятил есть селение свое Вышний. **5** Бог посреде его, и не подвижится: поможет ему Бог утро заутра. **6** Смятошася языцы, уклонишася царствия: даде глас Свой Вышний, подвижеся земля. **7** Господь сил с нами, заступник наш Бог Иаковль. **8** Приидите и видите дела Божия, яже положи чудеса на земли: **9** отемля брани до конец земли, лук сокрушит и сломит оружие, и щиты сожжет огнем. **10** Упразднитесь и разумеите, яко Аз есмь Бог: вознесуся во языцех, вознесуся на земли. **11** Господь сил с нами, заступник наш Бог Иаковль.

**47** В конец, о сынех Кореовых, псалом. Все языцы, восплещете руками, воскликните Богу гласом радования: 2 яко Господь Вышний страшен, Царь велий по всей земли: 3 покори люди нам и языки под ноги наша: 4 избра нам достояния свое, доброту Иаковлю, юже возлюби. 5 Взыде Бог в воскликновении, Господь во гласе трубне. 6 Пойте Богу нашему, пойте: пойте Цареву нашему, пойте. 7 Яко Царь всея земли Бог, пойте разумно. 8 Воцарися Бог над языки: Бог седит на престоле святем Своем. 9 Князи людстии собращася с Богом Авраамлим: яко Божию державнии земли зело вознесошася.

**48** Псалом песни сынов Кореовых, вторья субботы. Велий Господь и хвален зело во граде Бога нашего, в горе святей Его, 2 благокоренным радованием всея земли: горы Сионския, ребра северова, град Царя великаго. 3 Бог в тяжестех его знаемь есть, егда заступает и. 4 Яко се, царие земстии собращася, снидошася вкупе: 5 тии видевше тако, удивишася, смятошася, подвигошася: 6 трепет прият я тамо, болезни яко раждающия. 7 Духом бурным сокрушиши корабли Фарсийския. 8 Якоже слышахом, тако и видехом во граде Господа сил, во граде Бога нашего: Бог основа и в век. 9 Прияхом, Боже, милость Твою посреде людий Твоих. 10 По имени Твоему, Боже, тако и хвала Твоя на концах земли: правды исполнь десница Твоя. 11 Да возвеселится гора Сионская, и да возрадуются дщери Иудейския, судеб ради Твоих, Господи. 12 Обыдите Сион и обымите его, поведите в столпех его: 13 положите сердца ваша в силу его, и разделите дома его, яко да повесте в роде инем. 14 Яко Той есть Бог наш во век и в век века: Той упасет нас во веки.

**49** В конец, сыном Кореовым, псалом. Услышите сия, вси языцы, внушите, вси живущии по вселенней, 2 земнороднии же и сынове человечестии, вкупе богат и убог. 3 Уста моя возглаголют премудрость, и поучение сердца моего разум. 4 Приклоню в притчу ухо мое, отверзу во псалтири ганание мое. 5 Вскую боюся в день лют? Беззаконие пяты моея обыдет мя. 6 Надеющиися на силу свою и о множестве богатства своего хвалящиися: 7 брат не избавит, избавит ли человек? Не даст Богу измены за ся, 8 и цену избавления души своя: и утрудися в век, 9 и жив будет до конца, не узрит пагубы. 10 Егда увидит премудрыя умирающыя, вкупе безумен и несмыслен погибнут, и оставят чуждим богатство свое. 11 И гроби их жилища их во век, селения их в род и род, нарекоша имена своя на землях. 12 И человек в чести сый не разуме, приложися скотом несмысленным и уподобися им. 13 Сей путь их соблазн им, и по сих во устех своих благоволят. 14 Яко овцы во аде положени суть, смерть упасет я: и обладают ими правии заутра, и помощь их обетшает во аде: от славы своя изриновени быша. (Sheol h7585) 15 Обаче Бог избавит душу мою из руки адовы, егда приемлет мя. (Sheol h7585) 16 Не убойся, егда разбогатеет человек, или егда умножится слава дому его: 17 яко внегда умрети ему, не возмет вся, ниже снидет с ним слава его. 18 Яко душа его в животе его благословится, исповестся тебе, егда благосотвориши ему. 19 Внидет даже до рода отец своих, даже до века не узрит света. 20 И человек в чести сый не разуме, приложися скотом несмысленным и уподобися им.



**50** Бог Богов Господь глагола, и призва землю от восток солнца до запад. **2** От Сиона благолепие красоты Его: **3** Бог яве придет, Бог наш, и не премолчит: огонь пред Ним возгорится, и окрест Его буря зелна. **4** Призовет небо свыше, и землю, разсудити люди Своя. **5** Соберите Ему преподобныя Его, завещающыя завет Его о жертвах. **6** И возвестят небеса правду Его: яко Бог судия есть. **7** Услышите, людие Мои, и возглаголю вам, Израилю, и засвидетелствую тебе: Бог, Бог твой есмь Аз. **8** Не о жертвах твоих обличу тя, всесожжения же твоя предо Мною суть выну: **9** не прииму от дому твоего телцев, ниже от стад твоих козлов. **10** Яко Мои суть вси зверие дубравнии, скоти в горах и волове: **11** познах вся птицы небесныя, и красота селная со Мною есть. **12** Аще взалчу, не реку тебе: Моя бо есть вселенная и исполнение ея. **13** Еда ям мяса юнча? Или кровь козлов пию? **14** Пожри Богови жертву хвалы и воздаждь Вышнему молитвы твоя: **15** и призови Мя в день скорби твоя, и изму тя, и прославиши Мя. **16** Грешнику же рече Бог: вскую ты поведаеши оправдания Моя и восприемлеши завет Мой усты твоими? **17** Ты же возненавидел еси наказание и отвергл еси словеса Моя вспясть. **18** Аще видел еси татя, текл еси с ним, и с прелюбодеем участие твое полагал еси: **19** уста твоя умножиша злобу, и язык твой сплеташе льщения: **20** сидя на брата твоего клеветал еси и на сына матери твоя полагал еси соблазн. **21** Сия сотворил еси, и умолчах, вознепщевал еси беззаконие, яко буду тебе подобен: обличу тя и представлю пред лицом твоим грехи твоя. **22** Разумейте убо сия, забывающии Бога, да не когда похитит, и не будет

избавляя. 23 Жертва хвалы прославит Мя, и тамо путь, имже явлю ему спасение Мое.

**51** В конец, псалом Давиду, внегда внити к нему Нафану пророку, егда вниде к Вирсавии жене Уриеве. Помилуй мя, Боже, по велицей милости Твоей, и по множеству щедрот Твоих очисти беззаконие мое. 2 Наипаче омый мя от беззакония моего и от греха моего очисти мя: 3 яко беззаконие мое аз знаю, и грех мой предо мною есть выну. 4 Тебе единому согреших и лукавое пред Тобою сотворих: яко да оправдишися во словесех Твоих и победиши, внегда судити Ти. 5 Се бо, в беззакониих зачат есмь, и во гресех роди мя мати моя. 6 Се бо, истину возлюбил еси, безвестная и тайная премудрости Твоя явил ми еси. 7 Окропиши мя иссопом, и очищуся: омыеши мя, и паче снега убелюся. 8 Слуху моему даси радость и веселие: возрадуются кости смиренныя. 9 Отврати лице Твое от грех моих и вся беззакония моя очисти. 10 Сердце чисто созижди во мне, Боже, и дух прав обнови во утробе моей. 11 Не отвержи мене от лица Твоего и Духа Твоего Святаго не отими от мене. 12 Воздаждь ми радость спасения Твоего и Духом владычним утверди мя. 13 Научу беззаконныя путем Твоим, и нечестивии к Тебе обратятся. 14 Избави мя от кровей, Боже, Боже спасения моего: возрадуется язык мой правде Твоей. 15 Господи, устне мои отверзеши, и уста моя возвестят хвалу Твою. 16 Яко аще бы восхотел еси жертвы, дал бых убо: всесожжения не благоволиши. 17 Жертва Богу дух сокрушен: сердце сокрушенно и смиренно Бог не уничижит. 18 Ублажи, Господи, благоволением Твоим Сиона, и да созиждутся стены Иерусалимския: 19 тогда благоволиши жертву правды,

возношение и всесожегаемая: тогда возложат на олтарь Твой телцы.

**52** В конец, разума Давиду, внегда приити Доику Идумейску, и возвестити Саулу, и рещи ему: прииде Давид в дом Авимелехов. Что хвалишиися во злобе, сильне? Беззаконие весь день. **2** Неправду умысли язык твой: яко бритву изощрену сотворил еси лесть. **3** Возлюбил еси злобу паче благостыни, неправду неже глаголати правду: **4** возлюбил еси вся глаголы потопныя, язык льстив. **5** Сего ради Бог разрушит тя до конца: восторгнет тя, и преселит тя от селения твоего и корень твой от земли живых. **6** Узрят праведнии и убоятся, и о нем возсмеются и рекут: **7** се, человек, иже не положи Бога помощника себе, но упова на множество богатства своего, и возможе суетою своею. **8** Аз же яко маслина плодовита в дому Божию: уповах на милость Божию во век и в век века. **9** Исповемся Тебе в век, яко сотворил еси: и терплю имя Твое, яко благо пред преподобными Твоими.

**53** В конец, о Маелефе, разума Давиду. Рече безумен в сердцы своем: несть Бог. Растлеша и омерзишася в беззакониих, несть творяй благое. **2** Бог с небесе приниче на сыны человеческия, видети, аще есть разумеваая или взыскаая Бога. **3** Все уклонишася, вкупе непотребни быша: несть творяй благое, несть до единого. **4** Ни ли уразумеют все делающии беззаконие, снедающии люди моя в снесь хлеба? Господа не призваша. **5** Тамо устрашишася страха, идеже не бе страх: яко Бог разсыпа кости човекоугодников: постыдешася, яко Бог уничижи их. **6** Кто даст от Сиона

спасение Израилево? Внегда возвратит Бог пленение людей Своих, возрадуется Иаков и возвеселится Израиль.

**54** В конец, в песнях разума Давиду, внегда приити Зифеем и рещи Саулови: не се ли, Давид скрыся в нас? Боже, во имя Твое спаси мя и в силе Твоей суди ми. 2 Боже, услыши молитву мою, внуши глаголы уст моих: 3 яко чуждии восташа на мя, и крепцыи взыскаша душу мою, и не предложиша Бога пред собою. 4 Се бо, Бог помогает ми, и Господь заступник души моей: 5 отвратит злая врагом моим: истиною Твоею потреби их. 6 Волею пожру Тебе, исповемся имени Твоему, Господи, яко благо: 7 яко от всякия печали избавил мя еси, и на враги моя воззре око мое.

**55** В конец, в песнях разума, Асафу, псалом. Внуши, Боже, молитву мою и не презри моления моего: 2 вонми ми и услыши мя: возскорбех печалию моею, и смятохся 3 от гласа вражия и от стужения грешнича: яко уклониша на мя беззаконие и во гневе враждоваху ми. 4 Сердце мое смятется во мне, и боязнь смерти нападе на мя: 5 страх и трепет прииде на мя, и покры мя тма. 6 И рех: кто даст ми криле яко голубине? И полещу, и почию. 7 Се, удалихся бегая и водворихся в пустыни. 8 Чаях Бога спасающаго мя от малодушия и от бури. 9 Потопи, Господи, и раздели языки их: яко видех беззаконие и пререкание во граде. 10 Днем и ночью обыдет и по стенам его: беззаконие и труд посреде его, и неправда: 11 и не оскуде от стогн его лихва и лесть. 12 Яко аще бы враг поносил ми, претерпел бых убо: и аще бы ненавидяй мя на мя велеречевал, укрыл быхся от него. 13 Ты же, человеце равнодушне, владыко мой и знаемый мой, 14 иже купно наслаждался еси со мною брашен: в дому Божи

ходихом единомышлением. **15** Да приидет же смерть на ня, и да снидут во ад живи: яко лукавство в жилищих их, посреде их. (Sheol h7585) **16** Аз к Богу воззвах, и Господь услыша мя. **17** Вечер и заутра и полудне повем и возвещу, и услышит глас мой. **18** Избавит миром душу мою от приближающихся мне: яко во мнозе бяху со мною. **19** Услышит Бог, и смирит я сый прежде век: несть бо им изменения, яко не убояшася Бога. **20** Простре руку свою на воздаяние: оскверниша завет Его. **21** Разделишася от гнева лица Его, и приближишася сердца их: умякнуша словеса их паче елеа, и та суть стрелы. **22** Возверзи на Господа печаль твою, и Той тя препитает: не даст в век молвы праведнику. **23** Ты же, Боже, низведеши их в студенец истления: мужие кровей и льсти не преполовят дний своих. Аз же, Господи, уповаю на Тя.

**56** В конец, о людех от святых удаленых, Давиду в столпописание, внегда удержаша и иноплеменницы в Гефе, псалом. Помилуй мя, Боже, яко попра мя человек: весь день боря стужи ми. **2** Попраша мя врази мои весь день: яко мнози борющии мя с высоты. **3** В день не убоюся, аз же уповаю на Тя. **4** О Бозе похваляю словеса Моя: на Бога уповах, не убоюся: что сотворит мне плоть? **5** Весь день словес моих гнушахуся: на мя вся помышления их на зло. **6** Вселятся и скрывают, тии пята мою сохраняют, якоже потерпеша душу мою. **7** Ни о чесомже отринеша я, гневом люди низведеши. **8** Боже, живот мой возвестих Тебе: положил еси слезы моя пред Тобою, яко и во обетовании Твоем. **9** Да возвратятся врази мои вспять, в оньже аще день призову Тя: се, познах, яко Бог мой еси Ты. **10** О Бозе похваляю глаголгол, о Господе похваляю слово. **11** На Бога уповах, не убоюся: что сотворит

мне человек? **12** Во мне, Боже, молитвы, яже воздам хвалы Твоя: **13** яко избавил еси душу мою от смерти, очи мои от слез и нозе мои от поползновения: благоугожду пред Господем во свете живых.

**57** В конец, да не растлиши, Давиду в столпописание, вегда ему отбегати от лица Саулова в пещеру. Помилуй мя, Боже, помилуй мя: яко на Тя упова душа моя, и на сень крилу Твоею надеюся, дондеже прейдет беззаконие. **2** Воззову к Богу Вышнему, Богу благодаявшему мне. **3** Посла с небесе и спасе мя, даде в поношение попирающыя мя: посла Бог милость Свою и истину Свою, **4** и избави душу мою от среды скимнов. Поспах смущен: сынове человечести, зубы их оружия и стрелы, и язык их мечь остр. **5** Вознесися на небеса, Боже, и по всей земли слава Твоя. **6** Сеть уготоваша ногам моим, и слякоша душу мою: ископаша пред лицом моим яму, и впадоша в ню. **7** Готово сердце мое, Боже, готово сердце мое: воспою и пою во славе моей. **8** Востани, слава моя, востани, псалтирю и гусли: востану рано. **9** Исповемся Тебе в людех, Господи, воспою Тебе во языцех: **10** яко возвеличися до небес милость Твоя и даже до облак истина Твоя. **11** Вознесися на небеса, Боже, и по всей земли слава Твоя.

**58** В конец, да не растлиши, Давиду в столпописание. Аще воистинну убо правду глаголете, правая судите, сынове человечести. **2** Ибо в сердцы беззаконие делаете на земли, неправду руки ваша сплетают. **3** Очуждишася грешницы от ложесн, заблудиша от чрева, глаголаша лжу. **4** Ярость их по подобию змиину, яко аспида глуха и затыкающаго уши свои, **5** иже не услышит гласа обавающих, обаваемь

обавається от премудра. 6 Бог сокрушит зубы их во устех их: членовныя львов сокрушил есть Господь. 7 Уничжатся яко вода мимотекущая: напряжет лук свой, дондеже изнемогут. 8 Яко воск растаяв отимутся: паде огонь на них, и не видеша солнца. 9 Прежде еже разумети терния вашего рамна, яко живы, яко во гневе пожрет я. 10 Возвеселится праведник, егда увидит отмщение: руце свои умыет в крови грешника. 11 И речет человек: аще убо есть плод праведнику, убо есть Бог судя им на земли.

**59** В конец, да не растлиши, Давиду в столпописание, внегда посла Саул и стреже дом его, еже умертвити его. Изми мя от враг моих, Боже, и от востающих на мя избави мя: 2 избави мя от делающих беззаконие, и от муж кровей спаси мя. 3 Яко се, уловиша душу мою, нападоша на мя крепцыи: ниже беззаконие мое, ниже грех мой, Господи: 4 без беззакония текох и исправих: востани в сретение мое и виждь. 5 И Ты, Господи Боже сил, Боже Израилев, вонми посетити вся языки: да не ущедриши вся делающыя беззаконие. 6 Возвратятся на вечер, и взалчут яко пес, и обыдут град. 7 Се, тии отвещают усты своими, и мечь во устнах их: яко кто слыша? 8 И Ты, Господи, посмеешися им, уничижиши вся языки. 9 Державу мою к Тебе сохраняю: яко Ты, Боже, заступник мой еси. 10 Бог мой, милость Его предварит мя: Бог мой, явит мне на вразех моих. 11 Не убий их, да не когда забудут закон Твой: расточи я силою Твоею и низведи я, защитниче мой, Господи, 12 грех уст их, слово устен их: и яти да будут в гордыни своей, и от клятвы и лжи возвестятся в кончине, 13 во гневе кончины, и не будут: и уведят, яко Бог владычествует Иаковом и концы

земли. 14 Возвратятся на вечер, и взалчут яко пес, и обыдут град: 15 тии разыдутся ясти: аще ли же не насытятся, и поропщут. 16 Аз же воспою силу Твою и возрадуюся завтра о милости Твоей: яко был еси заступник мой и прибежище мое в день скорби моея. 17 Помощник мой еси, Тебе пою: яко Бог заступник мой еси, Боже мой, милость моя.

**60** В конец, о изменитися хотящих, в столпописание Давиду, в научение: внегда сожже Средоречие Сирийское и Сирию Совалскую, и возвратися Иоав и порази Едома в дебри Солей дванадесять тысящ. Боже, отринул ны еси и низложил еси нас, разгневался еси и ущедрил еси нас. 2 Стрясл еси землю и смутил еси ю: изцели сокрушение ея, яко подвижеся. 3 Показал еси людем Твоим жестокая: напоил еси нас вином умиления. 4 Дал еси боящимся Тебе знамение, еже убежати от лица лука. 5 Яко да избавятся возлюбленнии Твои, спаси десницею Твоею и услыши мя. 6 Бог возглагола во святем Своем: возрадуюся, и разделю Сикиму, и юдоль Жилищ размерю. 7 Мой есть Галаад, и Мой есть Манассий, Ефрем крепость главы Моея, Иуда царь Мой. 8 Моав коноб упования Моего: на Идумею простру сапог Мой: Мне иноплеменницы покоришася. 9 Кто введет мя во град ограждения? Или кто наставит мя до Идумеи? 10 Не Ты ли, Боже, отринувый нас? И не изыдеши, Боже, в силах наших? 11 Дажь нам помощь от скорби: и суетно спасение человеческо. 12 О Бозе сотворим силу: и Той уничижит стужающыя нам.

**61** В конец, в песнях, Давиду Псалом. Услыши, Боже, моление мое, вонми молитве моей: 2 от конец земли к Тебе воззвах, внегда уны сердце мое: на камень вознесл мя еси, наставил мя еси, 3 яко был еси упование мое,



столп крепости от лица вражия. 4 Вселюся в селении Твоем во веки, покрюся в крове крил Твоих. 5 Яко Ты, Боже, услышал еси молитвы моя, дал еси достояние боящимся имене Твоего. 6 Дни на дни царевы приложиши, лета его до дне рода и рода. 7 Пребудет в век пред Богом: милость и истину его кто взыщет? 8 Тако воспою имени Твоему во веки, воздати ми молитвы моя день от дне.

**62** В конец, о Идифуме, псалом Давиду. Не Богу ли повинется душа моя? От Того бо спасение мое. 2 Ибо Той Бог мой и спас мой, заступник мой: не подвижуся наипаче. 3 Доколе належите на человека? Убиваете вси вы, яко стене преклонене и оплоту возриновену. 4 Обаче цену мою совещаща отринуты, текоша в жажди: усты своими благословляху, и сердцем своим кленяху. 5 Обаче Богови повинися, душе моя: яко от Того терпение мое. 6 Ибо Той Бог мой и спас мой, заступник мой: не преселюся. 7 О Бозе спасение мое и слава моя: Бог помощи моея, и упование мое на Бога. 8 Уповайте на Него, весь сонм людий: излийте пред Ним сердца ваша, яко Бог помощник наш. 9 Обаче суетни сынове человечести, лживи сынове человечести в мерилех еже неправдовати: тии от суеты вкупе. 10 Не уповайте на неправду, и на восхищение не желайте: богатство аще течет, не прилагайте сердца. 11 Единою глагола Бог, двоя сия слышах, зане держава Божия, 12 и Твоя, Господи, милость: яко Ты воздаси комуждо по делом его.

**63** Псалом Давиду, внегда быти ему в пустыни Иудейстей. Боже, Боже мой, к Тебе утренюю: возжада Тебе душа моя, коль множицею Тебе плоть моя, в земли пусте и непроходне и безводне. 2 Тако во святем явихся Тебе, видети силу Твою

и славу Твою. 3 Яко лучши милость Твоя паче живот: устне мои похвалите Тя. 4 Тако благословлю Тя в животе моем и о имени Твоем воздежу руце мои. 5 Яко от тука и масти да исполнится душа моя, и устнама радости восхвалят Тя уста моя. 6 Аще поминах Тя на постели моей, на утренних поучахся в Тя: 7 яко был еси помощник мой, и в крове крилу Твоею возрадуюся. 8 Прильпе душа моя по Тебе: мене же прият десница Твоя. 9 Тии же всуе искаша душу мою: внидут в преисподняя земли: (questioned) 10 предадутся в руки оружия, части лисовом будут. 11 Царь же возвеселится о Бозе: похвалится всяк кленийся Им, яко заградишася уста глаголющих неправедная.

**64** В конец, псалом Давиду. Услыши, Боже, глас мой, внегда молитимися к тебе: от страха вражия изми душу мою. 2 Покрый мя от сонма лукавнующих, от множества делающих неправду: 3 иже изостриша яко меч языки своя, напрягоша лук свой, вещь горьку, 4 состреляти в тайных непорочна: внезапно состреляют его, и не убоятся. 5 Утвердиша себе слово лукавое: поведаша скрыти сеть, реша: кто узрит их? 6 Испыташа беззаконие: исчезоша испытующии испытания: приступит человек, и сердце глубоко. 7 И вознесетя Бог: стрелы младенец быша язвы их, 8 и изнемогоша на ня языцы их: смутишася вси видяции их. 9 И убояся всяк человек: и возвестиша дела Божия, и творения Его разумеша. 10 Возвеселится праведник о Господе и уповает на Него: и похвалятся вси правии сердцем.

**65** В конец, псалом песни Давиду, песнь Иеремиева и иезекиилева, людей преселения, егда хотяху исходити. Тебе подобает песнь, Боже, в Сионе, и Тебе воздастся

молитва во Иерусалиме. 2 Услыши молитву мою: к Тебе всяка плоть придет. 3 Словеса беззаконник премогаша нас: и нечестия наша Ты очистиши. 4 Блажен, егоже избрал еси и приял, вселится во дворех Твоих. Исполнимся во благих дому Твоего: свят храм Твой. 5 Дивен в правде, услыши ны, Боже, Спасителю наш, упование всех концев земли и сущих в мори далече: 6 уготовляяй горы крепостию Своею, препоясан силою: 7 смущаяй глубину морскую, шуму волн его кто постоит? Смятутся языцы, 8 и убоятся живущии в концах от знамений Твоих: исходы утра и вечера украсиши. 9 Посетил еси землю и упоил еси ю, умножил еси обогатити ю: река Божия наполнися вод: уготовал еси пищу им, яко тако (есть) уготовление. 10 Бразды ея упой, умножи жита ея: в каплях ея возвеселится возсияющи. 11 Благословиши венец лета благости Твоя, и поля Твоя исполнятся тука: 12 разботеют красная пустыни, и радостию холми препояшутся. 13 Одеядшася овни овчии, и удолия умножат пшеницу: воззовут, ибо воспоют.

**66** В конец, песнь псалма воскресения. 2 Воскликните Господеви вся земля, пойте же имени Его, дадите славу хвале Его. 3 Рцыте Богу: коль страшна дела Твоя? Во множестве силы Твоя солжут Тебе врази Твои. 4 Вся земля да поклонится Тебе и поет Тебе, да поет же имени Твоему, Вышний. 5 Приидите и видите дела Божия, коль страшен в советех паче сынов человеческих. 6 Обращаяй море в сушу, в реце пройдут ногами: тамо возвеселимся о Нем, 7 владычествующем силою Своею веком: очи Его на языки призираете: преогорчевающи да не возносятся в себе. 8 Благословите, языцы, Бога нашего, и услышан

сотворите глас хвалы Его, 9 положшаго душу мою в живот, и не давашаго во смятение ног моих. 10 Яко искусил ны еси, Боже, разжегл ны еси, якоже разжизается сребро. 11 Ввел ны еси в сеть, положил еси скорби на хребте нашем. 12 Возвел еси человеки на главы наша: проидохом сквозе огонь и воду, и извел еси ны в покой. 13 Вниду в дом Твой со всесожжением, воздам Тебе молитвы моя, 14 яже изрекосте устне мои, и глаголаша уста моя в скорби моей. 15 Всесожжения тучна вознесу Тебе с кадилом, и овны, вознесу Тебе волы с козлы. 16 Приидите, услышите, и повем вам, вси боящиися Бога, елика сотвори души моей. 17 К Нему усты моими воззвах, и вознесох под языком моим. 18 Неправду аще узрех в сердцы моем, да не услышит мене Господь. 19 Сего ради услыша мя Бог, внят гласу моления моего. 20 Благословен Бог, Иже не отстави молитву мою и милость Свою от мене.

**67** В конец, в песнях, псалом песни Давиду. Боже, ущедри ны и благослови ны, просвети лице Твое на ны и помилуй ны: 2 познати на земли путь Твой, во всех языцех спасение Твое. 3 Да исповедятся Тебе людие, Боже, да исповедятся Тебе людие вси. 4 Да возвеселятся и да возрадуются языцы: яко судиши людем правотою, и языки на земли наставиши. 5 Да исповедятся Тебе людие, Боже, да исповедятся Тебе людие вси. 6 Земля даде плод свой: благослови ны, Боже, Боже наш, 7 благослови ны, Боже: и да убоятся Его вси концы земли.

**68** В конец, псалом песни Давиду. Да воскреснет Бог, и расточатся врази Его, и да бежат от лица Его ненавидящии Его. 2 Яко исчезает дым, да исчезнут: яко тает воск от лица огня, тако да погибнут грешницы от лица Божия: 3 а

праведницы да возвеселятся, да возрадуются пред Богом, да наслаждаются в веселии. 4 Воспойте Богу, пойте имени Его: путесотворите Возшедшему на запады, Господь имя Ему: и радуйтесь пред Ним. 5 Да смятутся от лица Его, Отца сирых и судии вдовиц: Бог в месте святем Своем. 6 Бог вселяет единомысленныя в дом, изводя окованныя мужеством, такожде преогорчевающыя живущыя во гробех. 7 Боже, внегда исходити Тебе пред людьми Твоими, внегда мимоходити Тебе в пустыни, 8 земля потрясется, ибо небеса кануша от лица Бога Синаина, от лица Бога Израилева. 9 Дождь волен отлучиши, Боже, достоянию Твоему, и изнеможе, Ты же совершил еси е. 10 Животная Твоя живут на ней: уготовал еси благостию Твоею нищему, Боже. 11 Господь даст глагол благовествующим силою многою: 12 царь сил возлюбленного, красотою дому разделить корысти. 13 Аще поспите посреде предел, криле голубине посребрене, и междорамия ея в блещании злата: 14 внегда разнствит Небесный цари на ней, оснежатся в Селмоне. 15 Гора Божия, гора тучная, гора усыренная, гора тучная. 16 Вскую непщуете, горы усыренные? Гора, юже благоволи Бог жити в ней: ибо Господь вселится до конца. 17 Колесница Божия тмами тем, тысяща гобзующих: Господь в них в Синаи во святем. 18 Возшел еси на высоту, пленил еси плен: приял еси даяния в человецех, ибо непокаряющыяся, еже вселитися. 19 Господь Бог благословен, благословен Господь день дне: поспешит нам Бог спасений наших. 20 Бог наш Бог еже спасати: и Господня, Господня исходища смертная. 21 Обаче Бог сокрушит главы врагов Своих, верх влас преходящих в прегрешениих своих. 22 Рече Господь: от Васана обращу,

обращу во глубинах морских: 23 яко да омочится нога твоя в крови, язык пес твоих от враг от него. 24 Видена быша шествия Твоя, Боже, шествия Бога моего Царя, иже во святем. 25 Предвариша князи близ поющих, посреде дев тимпанниц. 26 В церквах благословите Бога, Господа от источник Израилевых. 27 Тамо Вениамин юнейший во ужасе, князи Иудовы владыки их, князи Завулони, князи Неффалимли. 28 Заповеждь, Боже, силою Твоею: укрепи, Боже, сие, еже соделал еси в нас. 29 От храма Твоего во Иерусалим Тебе принесут царие дары. 30 Запрети зверем тростным: сонм юнец в юницах людских, еже затворити искушенные серебром: расточи языки хотящия бранем. 31 Приидут молитвенницы от Египта: Ефиопиа предварит руку свою к Богу. 32 Царства земная, пойте Богу, воспойте Господеви, 33 возшедшему на небо небесе на востоки: се, даст гласу Своему глас силы. 34 Дадите славу Богови: на Израили велелепота Его, и сила Его на облацех. 35 Дивен Бог во святых Своих: Бог Израилев, Той даст силу и державу людем Своим. Благословен Бог.

**69** В конец, о изменшихся, псалом Давиду. Спаси мя, Боже, яко внидоша воды до души моя. 2 Углебох в тимении глубины, и несть постояния: приидох во глубины морския, и буря потопа мя. 3 Утрудихся зовый, измолче гортань мой: исчезосте очи мои, от еже уповати ми на Бога моего. 4 Умножишася паче влас главы моя ненавидящии мя туне: укрепишася врази мои, изгонящии мя неправедно: яже не восхищах, тогда воздаях. 5 Боже, Ты уведел еси безумие мое, и прегрешения моя от Тебе не утаишася. 6 Да не постыдятся о мне терпящии Тебе, Господи, Господи сил: ниже

да посрамятся о мне ищущии Тебе, Боже Израилев. 7 Яко Тебе ради претерпех поношение, покры срамота лице мое. 8 Чуждь бых братии моей и странен сыновом матери моея: 9 яко ревность дому Твоего снеде мя, и поношения поносящих Ти нападоша на мя. 10 И покрых постом душу мою, и бысть в поношение мне: 11 и положих одеяние мое в ретище, и бых им в притчу. 12 О мне глумляхуся сидящи во вратах, и о мне пояху пиющи вино. 13 Аз же молитвою моею к Тебе, Боже: время благоволения, Боже: во множестве милости Твоя услыши мя, во истине спасения Твоего. 14 Спаси мя от брения, да не углубну: да избавлюся от ненавидящих мя и от глубоких вод. 15 Да не потопит мене буря водная, ниже да пожрет мене глубина, ниже сведет о мне ровенник уст своих. 16 Услыши мя, Господи, яко блага милость Твоя: по множеству щедрот Твоих призири на мя. 17 Не отврати лица Твоего от отрока Твоего, яко скорблю: скоро услыши мя. 18 Вонми души моей и избави ю: враг моих ради избави мя. 19 Ты бо веси поношение мое, и студ мой, и срамоту мою: пред Тобою вси оскорбляющи мя. 20 Поношение чаяше душа моя и страсть: и ждах соскорбящаго, и не бе, и утешающих, и не обретох. 21 И даша в снедь мою желчь, и в жажду мою напоиша мя оцта. 22 Да будет трапеза их пред ними в сеть и в воздаяние и в соблазн. 23 Да помрачатся очи их, еже не видети, и хребет их выну сляцы. 24 Пролий на ня гнев Твой, и ярость гнева Твоего да постигнет их. 25 Да будет двор их пуст, и в жилищих их да не будет живый. 26 Зане егоже Ты поразил еси, тии погнаша, и к болезни язв моих приложиша. 27 Приложи беззаконие к беззаконию их, и да не внидут в правду Твою. 28 Да потребятся от книги живых, и

с праведными да не напишутся. 29 Нищъ и боляй есмь аз: спасение Твое, Боже, да примет мя. 30 Восхваляю имя Бога моего с песнию, возвеличу Его во хвалении: 31 и угодно будет Богу паче телца юна, роги износяща и пазнокти. 32 Да узрят нищии и возвеселятся: възыщите Бога, и жива будет душа ваша. 33 Яко услыша убогия Господь, и окованныя Своя не уничижи. 34 Да восхвалят Его небеса и земля, море и вся живущая в нем. 35 Яко Бог спасет Сиона, и созиждутся гради Иудейстии, и вселятся тамо и наследят и: 36 и семя рабов Твоих удержит и, и любящии имя Твое вселятся в нем.

**70** В конец Давиду, в воспоминание, во еже спасти мя Господу. Боже, в помощь мою вонми: Господи, помощи ми потщися. 2 Да постыдятся и посрамятся ищущии душу мою. Да возвратятся вспять и постыдятся хотящии ми злая: 3 да возвратятся абие стыдящися глаголющии ми: благоже, благоже. 4 Да возрадуются и возвеселятся о Тебе вси ищущии Тебе, Боже: и да глаголют выну, да возвеличится Господь, любящии спасение Твое. 5 Аз же нищъ есмь и убог, Боже, помози ми: помощник мой и Избавитель мой еси Ты, Господи, не закосни.

**71** На Тя, Господи, уповах, да не постыжуся в век. 2 Правдою Твоею избави мя и изми мя: приклони ко мне ухо Твое и спаси мя. 3 Буди ми в Бога защитителя и в место крепко спасти мя: яко утверждение мое и прибежище мое еси Ты. 4 Боже мой, избави мя из руки грешнаго, из руки законопреступнаго и обидящаго: 5 яко Ты еси терпение мое, Господи, Господи, упование мое от юности моя. 6 В Тебе утвердихся от утробы, от чрева матере моя Ты еси мой покровитель: о Тебе пение мое выну. 7 Яко чудо



бых многим: и Ты помощник мой крепок. 8 Да исполнятся уста моя хваления, яко да воспую славу Твою, весь день великолепие Твое. 9 Не отвержи мене во время старости: внемди оскудевати крепости моей, не остави мене. 10 Яко реша врази мои мне, и стрегущии душу мою совещаши вкупе, 11 глаголюще: Бог оставил есть его, пожените и имите его, яко несть избавляяй. 12 Боже мой, не удалися от мене: Боже мой, в помощь мою вонми. 13 Да постыдятся и исчезнут оклеветающии душу мою, да облекутся в стыд и срам ищущии злая мне. 14 Аз же всегда возуповаю на Тя, и приложу на всяку похвалу Твою. 15 Уста моя возвестят правду Твою, весь день спасение Твое, яко не познах книжная. 16 Вниду в силе Господни: Господи, помяну правду Тебе единого. 17 Боже мой, имже научил мя еси от юности моя, и доньне возвещу чудеса Твоя. 18 И даже до старости и престарения, Боже мой, не остави мене, дондеже возвещу мышцу Твою роду всему грядущему, 19 силу Твою и правду Твою, Боже, даже до вышних, яже сотворил ми еси величия: Боже, кто подобен Тебе? 20 Елики явил ми еси скорби многи и злы? И обращься оживотворил мя еси и от бездн земли возвел мя еси. 21 Умножил еси на мне величие твое, и обращься утешил мя еси, и от бездн земли паки возвел мя еси. 22 Ибо аз исповемся Тебе в людех, Господи, в сосудех псаломских истину Твою, Боже: воспую Тебе в гуслах, Святыи Израилев. 23 Возрадуется устне мои, егда воспую Тебе, и душа моя, юже еси избавил: 24 еще же и язык мой весь день поучится правде Твоей, егда постыдятся и посрамятся ищущии злая мне.

**72** Боже, суд Твой царице даждь, и правду Твою сыну царице: **2** судити людем Твоим в правде и нищым Твоим в суде. **3** Да восприимут горы мир людем и холми правду. **4** Судит нищым людским, и спасет сыны убогих, и смирит клеветника. **5** И пребудет с солнцем, и прежде луны рода родов. **6** Сидет яко дождь на руно, и яко капля каплющая на землю. **7** Возсияет во днех его правда и множество мира, дондеже отимется луна. **8** И обладает от моря до моря, и от рек до конец вселенныя. **9** Пред ним припадут Ефиопляне, и врази его персть полижут. **10** Царие Фарсийстии и острови дары принесут, царие Аравстии и Сава дары приведут: **11** и поклонятся ему вси царие земстии, вси языцы поработают ему. **12** Яко избави нища от сильна, и убога, емуже не бе помощника. **13** Поощадит нища и убога, и души убогих спасет: **14** от лихвы и от неправды избавит души их, и честно имя его пред ними. **15** И жив будет, и дастся ему от злата Аравийска: и помолются о нем выну, весь день благословят его. **16** Будет утверждение на земли на версех гор: превознесется паче Ливана плод его, и процветут от града яко трава земная. **17** Будет имя его благословено во веки, прежде солнца пребывает имя его: и благословятся в нем вся колена земная, вси языцы ублажат его. **18** Благословен Господь Бог Израилев, творяй чудеса един, **19** и благословено имя славы Его во век и в век века: и исполнится славы Его вся земля: буди, буди.

**73** Коль благ Бог Израилев правым сердцем. **2** Мои же в мале не подвижастеся нозе: в мале не пролияшася стопы моя: **3** яко возревновах на беззаконныя, мир грешников зря: **4** яко несть восклонения в смерти их и утверждения в

ране их: 5 в трудех человеческих не суть, и с человеки не приимут ран. 6 Сего ради удержа я гордыня их до конца: одеяшася неправдою и нечестием своим. 7 Изыдет яко из тука неправда их: преидоша в любовь сердца. 8 Помыслиша и глаголаша в лукавстве, неправду в высоту глаголаша: 9 положиша на небеси уста своя, и язык их прейде по земли. 10 Сего ради обратятся людие Мои семо, и дние исполнени обрящутся в них. 11 И реша: како уведе Бог? И аще есть разум в Вышнем? 12 Се, сии грешницы и гобзующии в век удержаша богатство. 13 И рех: еда всуе оправдих сердце мое и умых в неповинных руце мои, 14 и бых язвен весь день, и обличение мое на утрених? 15 Аще глаголах, повем тако: се, роду сынов Твоих, емуже обещахся: 16 и непщевах разумети: сие труд есть предо мною, 17 дондеже вниду во свяtilo Божие и разумею в последняя их. 18 Обаче за льщения их положил еси им злая, низложил еси я, внегда разгордешася. 19 Какo быша в запустение? Внезапу исчезоша, погибоша за беззаконие свое. 20 Яко соние востающаго, Господи, во граде Твоем образ их уничижиши. 21 Яко разжжеся сердце мое, и утробы моя изменишася: 22 и аз уничижен, и не разумех, скотен бых у Тебе. 23 И аз выну с Тобою: удержал еси руку десную мою, 24 и советом Твоим наставил мя еси, и со славою приял мя еси. 25 Что бо ми есть на небеси? И от Тебе что восхотех на земли? 26 Изчезе сердце мое и плоть моя, Боже сердца моего, и часть моя, Боже, во век. 27 Яко се, удаляющи себе от Тебе погибнут: потребил еси всякаго любодующаго от Тебе. 28 Мне же прилеплятися Богови благо есть, полагаги на Господа упование мое, возвестити ми вся хвалы Твоя, во вратех дщере Сиони.

**74** Вскую, Боже, отринул еси до конца? Разгневался ярость Твоя на овцы пажити Твоя? **2** Помяни сонм Твой, егоже стяжал еси исперва, избавил еси жезлом достояния Твоего, гора Сион сия, в нейже вселился еси. **3** Воздвигни руке Твои на гордыни их в конец, елика лукавнова враг во святем Твоем. **4** И восхвалишася ненавидящии Тя посреде праздника Твоего: положиша знамения своя знамения, и не познаша. **5** Яко во исходе превыше: яко в дубраве древяне секирами разсекоша **6** двери его вкупе, сечивом и оскордом разрушиша и. **7** Возжоша огнем святило Твое: на земли оскверниша жилище имене Твоего. **8** Реша в сердцы своем южики их вкупе: приидите, и отставим вся праздники Божия от земли. **9** Знамения их не видехом: несть ктому пророка, и нас не познает ктому. **10** Доколе, Боже, поносит враг? Раздражит противный имя Твое до конца? **11** Вскую отвращаеши руку Твою и десницу Твою от среды недра Твоего в конец? **12** Бог же, Царь наш, прежде века содела спасение посреде земли. **13** Ты утвердил еси силою Твоею море: Ты стерл еси главы змиев в воде: **14** Ты сокрушил еси главу змиеву, дал еси того брашно людем Ефиопским. **15** Ты расторгл еси источники и потоки: Ты изсушил еси реки ифамския. **16** Твой есть день, и Твоя есть ночь: Ты совершил еси зарю и солнце. **17** Ты сотворил еси вся пределы земли: жатву и весну Ты создал еси я. **18** Помяни сия: враг поноси Господеви, и людие безумнии раздражиша имя Твое. **19** Не предаждь зверем душу исповедающуюся Тебе: душ убогих Твоих не забуди до конца. **20** Призри на завет Твой: яко исполнишася помраченнии земли домов беззаконий. **21** Да не возвратится смиренный посрамлен: нищ и убог восхвалита имя Твое. **22**

Востани, Боже, суди прю Твою: помяни поношение Твое, еже от безумнаго весь день. 23 Не забуди гласа молитвенник Твоих: гордыня ненавидящих Тя взыде выну.

**75** В конец, да не растлиши, псалом песни Асафу. Исповемыся Тебе, Боже, исповемыся Тебе и призовем имя Твое: повем вся чудеса Твоя. 2 Егда прииму время, Аз правоты возсужду. 3 Растаяся земля и вси живуции на ней, Аз утвердих столпы ея. 4 Рех беззаконнующым, не беззаконнуйте: и согрешающим, не возносите рога. 5 Не воздвизайте на высоту рога вашего и не глаголите на Бога неправду: 6 яко ниже от исход, ниже и запад, ниже от пустых гор. 7 Яко Бог судия есть: сего смиряет, и сего возносит. 8 Яко чаша в руце Господни, вина неразтворена исполнь растворения, и уклони от сея в сию: обаче дрождие его не истощися, испиют вси грешнии земли. 9 Аз же возрадуюся в век, воспою Богу Иаковлю: 10 и вся роги грешных сломлю, и вознесется рог праведнаго.

**76** В конец, в песнях, псалом Асафу, песнь ко Ассирианину. Ведом во Иудеи Бог: во Израили велие имя Его. 2 И бысть в Мире место Его, и жилище Его в Сионе. 3 Тамо сокруши крепости луков, оружие и мечь и брань. 4 Просвещаеши ты дивно от гор вечных. 5 Смятошася вси неразумнии сердцем: уснуша сном своим, и ничтоже обретоша вси мужие богатства в руках своих. 6 От запрещения Твоего, Боже Иаковль, воздремаша вседшии на кони. 7 Ты страшен еси, и кто противостанет Тебе? Оттоле гнев Твой. 8 С небесе слышан сотворил еси суд: земля убояся и умолча, 9 внегда востати на суд Богу, спасти вся кроткия земли. 10 Яко помышление человеческое исповестся Тебе, и останок

помышления празднует Ти. 11 Помолитесь и воздадите Господеви Богу нашему: вси, иже окрест Его, принесут дары 12 Страшному и отемлющему духи князей, страшному паче царей земных.

**77** В конец, о Идифуме, псалом Асафу. Гласом моим ко Господу воззвах, гласом моим к Богу, и внят ми. 2 В день скорби моя Бога взысках рукама моима, нощию пред ним, и не прельщен бых: отвержеся утешитися душа моя. 3 Помянух Бога и возвеселихся, поглумляхся, и малодушествоваше дух мой. 4 Предваристе стражбы очи мои: смятохся и не глаголах. 5 Помыслих дни первыя, и лета вечная помянух, и поучахся: 6 нощию сердцем моим глумляхся, и тужаше дух мой: 7 еда во веки отринет Господь и не приложит благоволити паки? 8 Или до конца милость Свою отсечет, сконча глаголгол от рода в род? 9 Еда забудет ущедрити Бог? Или удержит во гневе Своем щедроты Своя? 10 И рех: ныне начах, сия измена десницы Вышняго. 11 Помянух дела Господня: яко помяну от начала чудеса Твоя, 12 и поучуся во всех делех Твоих, и в начинаниих Твоих поглумлюся. 13 Боже, во святем путь Твой: кто Бог велий, яко Бог наш? 14 Ты еси Бог творяй чудеса: сказал еси в людех силу Твою, 15 избавил еси мышцею Твоею люди Твоя, сыны Иаковли и Иосифовы. 16 Видеша Тя воды, Боже, видеша Тя воды и убояшася: смятошася бездны. 17 Множество шума вод: глас даша облацы, ибо стрелы Твоя преходят. 18 Глас грома Твоего в колеси, осветиша молния твоя вселенную: подвижеся и трепетна бысть земля. 19 В мори путие Твои, и стези Твоя в водах многих, и следы Твои не познаются.

20 Наставил еси яко овцы люди Твоя рукою Моисеовою и Ааронею.

**78** Внемлите, людие мои, закону моему, приклоните ухо ваше во глаголы уст моих. 2 Отверзу в притчах уста моя, провещаю ганания исперва. 3 Елика слышахом и познахом я, и отцы наши поведаша нам: 4 не утаишася от чад их в род ин, возвещающе хвалы Господни, и силы Его и чудеса Его, яже сотвори. 5 И воздвиже свидение во Иакове, и закон положи во Израили, елика заповеда отцем нашим сказати я сыновом своим, 6 яко да познает род ин, сынове родящиися, и востанут и поведят я сыновом своим: 7 да положат на Бога упование свое, и не забудут дел Божиих, и заповеди Его взыщут: 8 да не будут якоже отцы их, род строптив и преогорчеваяй, род иже не исправи сердца своего и не увери с Богом духа своего. 9 Сынове Ефремли наляцающе и стреляюще луки возвратишася в день брани: 10 не сохраниша завета Божия, и в законе Его не восхотеша ходити. 11 И забыша благодеяния Его и чудеса Его, яже показа им 12 пред отцы их, яже сотвори чудеса в земли Египетстей, на поли Танеосе: 13 разверзе море и проведе их: представи воды яко мех, 14 и настави я облаком во дни и всю ночь просвещением огня. 15 Разверзе камень в пустыни и напои я яко в бездне мнозе: 16 и изведе воду из камене и низведе яко реки воды. 17 И приложиша еще согрешати Ему, преогорчиша Вышняго в безводней: 18 и искусиша Бога в сердцах своих, воспросити брашна душам своим. 19 И клеветаша на Бога и реша: еда возможет Бог уготовати трапезу в пустыни? 20 Понеже порази камень, и потекоша воды, и потоцы наводнишася: еда и хлеб может

дати? Или уготовати трапезу людем Своим? 21 Сего ради слыша Господь и презре, и огонь возгорется во Иакове, и гнев взыде на Израиля: 22 яко не вероваша Богови, ниже уповаша на спасение Его. 23 И заоведа облаком свыше, и двери небесе отверзе: 24 и одожди им манну ясти, и хлеб небесный даде им. 25 Хлеб ангельский яде человек: брашно посла им до сытости. 26 Воздвиже юг с небесе, и наведе силою Своею лива: 27 и одожди на ня яко прах плоти, и яко песок морской птицы пернаты. 28 И нападоша посреде стана их, окрест жилищ их. 29 И ядоша и насытишася зело, и желание их принесе им. 30 Не лишишася от желания своего: еще брашну суцу во устех их, 31 и гнев Божий взыде на ня, и уби множайшая их, и избранным Израилевым запят. 32 Во всех сих согреша еще и не вероваша чудесем Его: 33 и исчезоша в суете дние их, и лета их со тщанием. 34 Егда убиваше я, тогда взыскаху Его и обращахуся и утреневаху к Богу: 35 и помянуша, яко Бог помощник им есть, и Бог Вышний Избавитель им есть: 36 и возлюбиша Его усты своими, и языком своим солгаша Ему: 37 сердце же их не бе право с Ним, ниже уверишася в завете Его. 38 Той же есть щедр, и очистит грехи их, и не растлит: и умножит отвратити ярость Свою, и не разжжет всего гнева Своего. 39 И помяну, яко плоть суть, дух ходяй и не обращайся: 40 колькраты преогорчиша Его в пустыни, прогневаша Его в земли безводней? 41 И обратишася, и искусиша Бога, и Святаго Израилева раздражиша: 42 и не помянуша руки Его в день, в онже избави я из руки оскорбляющаго: 43 якоже положи во Египте знамения Своя, и чудеса Своя на поли Танеосе: 44 и преложи в кровь реки их и источники их, яко да



не пьют. 45 Посла на ня песия мухи, и поядоша я, и жабы, и растли я: 46 и даде рже плоды их, и труды их пругом. 47 Уби градом винограды их и черничие их сланою: 48 и предаде граду скоты их, и имение их огню. 49 Посла на ня гнев ярости Своя, ярость и гнев и скорбь, послание аггелы лютыми. 50 Путесотвори стезю гневу Своему, и не пощаде от смерти душ их, и скоты их в смерти заключи: 51 и порази всякое первородное в земли Египетстей, начаток всякаго труда их в селениих Хамовых. 52 И воздвиже яко овцы люди Своя, и возведе я яко стадо в пустыни: 53 и настави я на упование, и не убояшася: и враги их покры море. 54 И введе я в гору святыни Своя, гору сию, юже стяжа десница Его. 55 И изгна от лица их языки, и по жребию даде им (землю) ужем жребодаяния, и всели в селениих их колена Израилева. 56 И искусиша и преогорчиша Бога Вышняго, и свидений Его не сохраниша: 57 и отвратишася и отвергошася, якоже и отцы их: превратишася в лук разврощен: 58 и прогневаша Его в холмех своих, и во истуканных своих раздражиша Его. 59 Слыша Бог и презре, и уничижи зело Израиля: 60 и отрину скинию Силомскую, селение еже вселися в человецех: 61 и предаде в плен крепость их, и доброту их в руки врагов: 62 и затвори во оружии люди Своя и достояние Свое презре. 63 Юношы их пояде огонь, и девы их не осетованы быша: 64 священницы их мечем падоша, и вдовицы их не оплаканы будут. 65 И воста яко спя Господь, яко силен и шумен от вина: 66 и порази враги своя вспять, поношение вечное даде им: 67 и отрину селение Иосифово, и колена Ефремово не избра: 68 и избра колена Иудово, гору Сионю, юже возлюби: 69 и созда яко единорога святилище Свое: на земли основа и

в век. **70** И избра Давида раба Своего, и восприят его от стад овчих: **71** от доилиц поят его, пасти Иакова раба Своего, и Израиля достояние Свое. **72** И упасе я в незлобии сердца своего, и в разумех руку свою наставил я есть.

**79** Боже, приидоша языцы в достояние Твое, оскверниша храм святыи Твой, **2** положиша Иерусалим яко овощное хранилище: положиша трупия раб Твоих брашно птицам небесным, плоти преподобных Твоих зверем земным: **3** пролияша кровь их яко воду окрест Иерусалима, и не бе погребаяй. **4** Быхом поношение соседом нашим, подражнение и поругание сущым окрест нас. **5** Доколе, Господи, прогневаешися до конца? Разжжется яко огонь рвение Твое? **6** Пролий гнев Твой на языки незнающия Тебе, и на царствия, яже имене Твоего не призваша: **7** яко поядоша Иакова, и место его опустошиша. **8** Не помяни наших беззаконий первых: скоро да предварят ны щедроты Твоя, Господи, яко обнищавом зело. **9** Помози нам, Боже, Спасителю наш, славы ради имене Твоего: Господи, избави ны и очисти грехи наша имене ради Твоего. **10** Да не когда рекут языцы: где есть Бог их? И да увестся во языцех пред очима нашими отмщение крове раб Твоих пролитыя. **11** Да внидет пред Тя воздыхание окованных: по величию мышцы Твоя снабди сыны умерщвленных. **12** Воздаждь соседом нашим седмерицею в недро их поношение их, имже поносиша Тя, Господи. **13** Мы же людие Твои и овцы пажити Твоя исповемься Тебе, Боже, во век, в род и род возвестим хвалу Твою.

**80** В конец, о изменшихся, свидение Асафу, псалом. Пасый Израиля вонми: наставляяй яко овча Иосифа, седяй на

Херувимех, явился: 2 пред Ефремом и Вениамином и Манассием воздвигни силу Твою, и прииди во еже спасти нас. 3 Боже, обрати ны, и просвети лице Твое, и спасемся. 4 Господи Боже сил, доколе гневаешися на молитву раб Твоих? 5 Напитаеши нас хлебом слезным, и напоиши нас слезами в меру. 6 Положил еси нас в пререкание соседом нашим, и врази наши подражниша ны. 7 Господи Боже сил, обрати ны, и просвети лице Твое, и спасемся. 8 Виноград из Египта пренесл еси: изгнал еси языки, и насадил еси и: 9 путесотворил еси пред ним, и насадил еси корения его, и исполни землю. 10 Покры горы сень его, и ветвия его кедры Божия: 11 простре розги его до моря, и даже до рек отрасли его. 12 Вскую низложил еси оплот его, и оымают и вси мимоходящии путем? 13 Озоба и вебрь от дубравы, и уединенный дивий пояде и. 14 Боже сил, обратися убо, и призри с небесе и виждь, и посети виноград сей: 15 и соверши и, егоже насади десница Твоя, и на сына человеческого, егоже укрепил еси Себе. 16 Пожжен огнем и раскопан: от запрещения лица Твоего погибнут. 17 Да будет рука Твоя на мужа десницы Твоея и на сына человеческого, егоже укрепил еси Себе, 18 и не отступим от Тебе: оживиши ны, и имя Твое призовем. 19 Господи Боже сил, обрати ны, и просвети лице Твое, и спасемся.

**81** В конец, о точилех, псалом Асафу. Радуйтесь Богу помощнику нашему, воскликните Богу Иаковлю: 2 примите псалом и дадите тимпан, псалтирь красен с гусльми: 3 вострубите в новомесячии трубою, во благознаменительный день праздника вашего: 4 яко повеление Израилеви есть, и судьба Богу Иаковлю. 5 Свидение во Иосифе положи е, внегда

изыти ему от земли Египетския: языка, егоже не ведяше, услыша. 6 Отят от бремене хребет его: руце его в коши поработасте. 7 В скорби призвал Мя еси, и избавих тя: услышах тя в тайне бурне: искусих тя на воде Пререкания. 8 Слышите, людие Мои, и засвидетелствую вам, Израилю, аще послушаеши Мене: 9 не будет тебе бог нов, ниже поклонишия богу чуждему. 10 Аз бо есмь Господь Бог твой, изведый тя от земли Египетския: разшири уста твоя, и исполню я. 11 И не послушаша людие Мои гласа Моего, и Израиль не внят Ми: 12 и отпустих я по начинанием сердец их, пойдут в начинаниих своих. 13 Аще быша людие Мои послушали Мене, Израиль аще бы в пути Моя ходил: 14 ни о чесомже убо враги его смирил бых, и на оскорбляющыя их возложил бых руку Мою. 15 Врази Господни солгаша ему, и будет время их в век: 16 и напита их от тука пшенична, и от камене меда насыти их.

**82** Бог ста в сонме богов, посреде же боги разсудит. 2 Доколе судите неправду, и лица грешников приемлете? 3 Судите сиру и убогу, смирена и нища оправдайте: 4 измите нища и убога, из руки грешничи избавите его. 5 Не познаша, ниже уразумеша, во тме ходят: да подвижатся вся основания земли. 6 Аз рех: бози есте, и сынове Вышняго вси: 7 вы же яко человецы умираете, и яко един от князей падаете. 8 Воскресени, Боже, суди земли: яко Ты наследиши во всех языцех.

**83** Песнь псалма Асафу. Боже, кто уподобится Тебе? Не премолчи, ниже укроти, Боже: 2 яко се, врази Твои возшумеша, и ненавидящии Тя воздвигоша главу. 3 На люди Твоя лукавноваша волею, и совещаша на святыя Твоя. 4

Реша: приидите и потребим я от язык, и не помянется имя Израилево ктому. 5 Яко совещаща единомышлением вкупе, на Тя завет заещаща: 6 селения Идумейска и Исмаилите, Моав и Агаряне, 7 Гевал и Аммон и Амалик, иноплеменницы с живущими в Тире: 8 ибо и Ассур прииде с ними, быша в заступление сыновом Лотовым: 9 сотвори им яко Мадиаму и Сисаре, яко Иавиму в потоце Киссове: 10 потребишася во Аендоре, быша яко гной земный. 11 Положи князи их яко Орива и Зива, и Зевета и Салмана, вся князи их, 12 иже реша: да наследим себе святилище Божие. 13 Боже мой, положи я яко коло, яко трость пред лицом ветра. 14 Яко огонь попяляй дубравы, яко пламень пожигаяй горы: 15 тако поженеши я бурю Твоею, и гневом Твоим смятеши я. 16 Исполни лица их безчестия, и възыщут имене Твоего, Господи. 17 Да постыдятся и смятутся в век века, и посрамятся и погибнут. 18 И да познают, яко имя Тебе Господь, Ты един Вышний по всей земли.

**84** В конец, о точилех, сыном Кореовым, псалом. Коль возлюбленна селения Твоя, Господи сил. 2 Желает и скончавається душа моя во дворы Господни: сердце мое и плоть моя возрадовастася о Бозе живе. 3 Ибо птица обрете себе храмину, и горлица гнездо себе, идеже положит птенцы своя, олтари Твоя, Господи сил, Царю мой и Боже мой. 4 Блажени живущии в дому Твоем: в веки веков восхвалят Тя. 5 Блажен муж, емуже есть заступление его у Тебе: восхождения в сердца своем положи, 6 во юдоль плачевную, в место еже положи: ибо благословение даст законополагаяй. 7 Пойдут от силы в силу: явится Бог богов в Сионе. 8 Господи Боже сил, услыши молитву мою, внуши,

Боже Иаковль. 9 Защитниче наш, виждь, боже, и призри на лице христа Твоего. 10 Яко лучше день един во дворех Твоих паче тысящ: изволих приметатися в дому Бога моего паче, неже жити ми в селениих грешничих. 11 Яко милость и истину любит Господь, Бог благодать и славу даст: Господь не лишит благих ходящих незлобием. 12 Господи Боже сил, блажен человек уповаяй на Тя.

**85** В конец, сыном Кореовым, псалом. Благоволил еси, Господи, землю Твою, возвратил еси плен Иаковль. 2 Оставил еси беззакония людей Твоих, покрыл еси вся грехи их. 3 Укротил еси весь гнев Твой, возвратился еси от гнева ярости Твоея. 4 Возврати нас, Боже спасений наших, и отврати ярость Твою от нас. 5 Еда во веки прогневаешия на ны? Или простреши гнев Твой от рода в род? 6 Боже, Ты обращаеши оживиши ны, и людие Твои возвеселятся о Тебе. 7 Яви нам, Господи, милость Твою, и спасение Твое даждь нам. 8 Услышу, что речет о мне Господь Бог: яко речет мир на люди Своя, и на преподобныя Своя, и на обращающыя сердца к нему. 9 Обаче близ боящихся Его спасение Его, вселити славу в землю нашу. 10 Милость и истина сретостеся, правда и мир облобызастеся: 11 истина от земли возсия, и правда с небесе приниче: 12 ибо Господь даст благость, и земля наша даст плод свой. 13 Правда пред Ним предидет, и положит в путь стопы своя.

**86** Приклони, Господи, ухо Твое, и услыши мя: яко нищ и убог есмь аз. 2 Сохрани душу мою, яко преподобен есмь: спаси раба Твоего, Боже мой, уповающаго на Тя. 3 Помилуй мя, Господи, яко к Тебе воззову весь день. 4 Возвесели душу раба Твоего: яко к Тебе взях душу мою. 5 Яко Ты,

Господи, благ и кроток и многомилостив всем призывающим  
Тя. 6 Внуши, Господи, молитву мою и вонми гласу моления  
моего. 7 В день скорби моя воззвах к Тебе, яко услышал  
мя еси. 8 Несть подобен Тебе в бозех, Господи, и несть по  
делом Твоим. 9 Все языцы, елики сотворил еси, приидут  
и поклонятся пред Тобою, Господи, и прославят имя Твое:  
10 яко велий еси Ты и творяй чудеса, Ты еси Бог един.  
11 Настави мя, Господи, на путь Твой, и пойду во истине  
Твоей: да возвеселится сердце мое бояться имене Твоего.  
12 Исповемся Тебе, Господи Боже мой, всем сердцем моим и  
прославлю имя Твое в век: 13 яко милость Твоя велия на  
мне, и избавил еси душу мою от ада преисподнейшаго. (Sheol  
h7585) 14 Боже, законопреступницы восташа на мя, и сонм  
державных взыскаша душу мою, и не предложиша Тебе пред  
собою. 15 И Ты, Господи Боже мой, щедрый и милостивый,  
долготерпеливый и многомилостивый и истинный, 16 призри  
на мя и помилуй мя: даждь державу Твою отроку Твоему и  
спаси сына рабы Твоея. 17 Сотвори со мною знамение во  
благо: и да видят ненавидящие мя, и постыдятся, яко Ты,  
Господи, помог ми и утешил мя еси.

**87** Сыном Кореовым, псалом песни. 2 Основания его на  
горах святых: любит Господь врата Сиона паче всех селений  
Иаковлих. 3 Преславная глаголашася о тебе, граде Божий. 4  
Помяну Раав и Вавилона ведущим мя: и се, иноплеменницы  
и Тир и людие Ефиопстии, сии быша тамо. 5 Мати Сион  
речет: человек и человек родися в нем, и Той основа и  
Вышний. 6 Господь повесть в писании людей и князей, сих  
бывших в нем. 7 Яко веселящихся всех жилище в тебе.

**88** Песнь псалма Сыном Кореовым, в конец, о Маелефе  
еже отвещати, разума Еману Израилтянину. Господи Боже  
спасения моего, во дни воззвах и в нощи пред Тобою: **2** да  
внидет пред Тя молитва моя, приклони ухо Твое к молению  
моему. **3** Яко исполнися зол душа моя, и живот мой аду  
приблизися. (Sheol h7585) **4** Привменен бых с низходящими в  
ров: бых яко человек без помощи, **5** в мертвых свободь: яко  
язвеннии спящии во гробе, ихже не помянул еси ктому, и тии  
от руки Твоя отринувени быша. **6** Положиша мя в рове  
преисподнем, в темных и сени смертной. **7** На мне утвердися  
ярость Твоя, и вся волны Твоя навел еси на мя. **8** Удалил еси  
знаемых моих от мене: положиша мя мерзость себе: предан  
бых и не исхождах. **9** Очи мои изнемогосте от нищеты:  
воззвах к Тебе, Господи, весь день, вздох к Тебе руце мои.  
**10** Еда мертвыми твориши чудеса? Или врачеве воскресят, и  
исповедятся Тебе? **11** Еда повесть кто во гробе милость  
Твою, и истину Твою в погибели? **12** Еда познана будут во  
тме чудеса Твоя, и правда Твоя в земли забвенней? **13** И аз  
к Тебе, Господи, воззвах, и утро молитва моя предварит Тя.  
**14** Вскую, Господи, отрееши душу мою? Отвращаеши лице  
Твое от мене? **15** Нищ есмь аз, и в трудех от юности моя:  
вознесжеся смирихся и изнемогах. **16** На мне преидоша  
гневи Твои, устрашения Твоя возмутиша мя: **17** обыдоша мя  
яко вода весь день, одержаша мя вкупе. **18** Удалил еси от  
мене друга и искреняго, и знаемых моих от страстей.

**89** Разума Ефама Израилтянина. Милости Твоя, Господи,  
во век воспою, в род и род возведу истину Твою усты моими.  
**2** Зане рекл еси: в век милость созиждется: на небесех  
уготовится истина Твоя. **3** Завещах завет избранным Моим,



кляхся Давиду рабу Моему: 4 до века уготоваю семя твое, и  
созижду в род и род престол твой. 5 Исповедят небеса чудеса  
Твоя, Господи, ибо истину Твою в церкви святых. 6 Яко кто  
во облацех уравнился Господеви? Уподобится Господеви в  
сынех Божиих? 7 Бог прославляемь в совете святых, велий  
и страшен есть над всеми окрестными Его. 8 Господи Боже  
сил, кто подобен Тебе? Силен еси, Господи, и истина Твоя  
окрест Тебе. 9 Ты владычествуеши державою морскою:  
возмущение же волн его Ты укрочаеши. 10 Ты смирил, еси,  
яко язвена, гордаго: мышцею силы Твоя расточил еси враги  
Твоя. 11 Твоя суть небеса, и Твоя есть земля: вселенную  
и исполнение ея Ты основал еси. 12 Север и море Ты  
создал еси: Фавор и Ермон о имени Твоем возрадуется. 13  
Твоя мышца с силою: да укрепится рука Твоя, и вознесется  
десница Твоя. 14 Правда и судьба уготовление престола  
Твоего: милость и истина предидете пред лицом Твоим. 15  
Блажени людие ведуции воскликновение: Господи, во свете  
лица Твоего пойдут, 16 и о имени Твоем возрадуются весь  
день, и правдою Твоею вознесутся. 17 Яко похвала силы  
их Ты еси, и во благоволении Твоем вознесется рог наш:  
18 яко Господне есть заступление, и Святаго Израилева  
царя нашего. 19 Тогда глаголал еси в видении сыновом  
Твоим, и рекл еси: положих помощь на сильного, вознесох  
избраннаго от людей Моих: 20 обретох Давида раба Моего,  
елеем святым Моим помазах его. 21 Ибо рука Моя заступит  
его, и мышца Моя укрепит его. 22 Ничтоже успеет враг на  
него, и сын беззакония не приложит озлобити его. 23 И  
ссеку от лица его враги его, и ненавидящыя его побегу:  
24 и истина Моя и милость Моя с ним, и о имени Моем

вознесется рог его: 25 и положу на мори руку его, и на реках десницу его. 26 Той призовет Мя: отец мой еси Ты, Бог мой и заступник спасения моего. 27 И Аз первенца положу его, высока паче царей земных: 28 в век сохраню ему милость Мою, и завет Мой верен ему: 29 и положу в век века семя его, и престол его яко дние неба. 30 Аще оставят сынове его закон Мой, и в судбах Моих не пойдут: 31 аще оправдания Моя осквернят, и заповедий Моих не сохранят: 32 посету жезлом беззакония их, и ранами неправды их, 33 милость же Мою не разорю от них, ни преврежду во истине Моей: 34 ниже оскверню завета Моего, и исходящих от уст Моих не отвергуся. 35 Единою клякса о святем Моем: аще Давиду солжу? 36 Семя его во век пребудет, и престол его яко солнце предо Мною, 37 и яко луна совершена в век, и свидетель на небеси верен. 38 Ты же отринул еси и уничижил, негодовал еси помазаннаго Твоего: 39 разорил еси завет раба Твоего, осквернил еси на земли святыню его: 40 разорил еси вся оплоты его, положил еси твердая его страх. 41 Расхищашу его вси мимоходящии путем, бысть поношение соседом своим. 42 Возвысил еси десницу стужающих ему, возвеселил еси вся враги его: 43 отвратил еси помощь меча его и не заступил еси его во брани: 44 разорил еси от очищения его, престол его на землю повергл еси: 45 умалил еси дни време его, облиал еси его студом. 46 Доколе, Господи, отвращаешия в конец, разжжется яко огонь гнев Твой? 47 Помяни, кий мой состав: еда бо всуе создал еси вся сыны человеческия? 48 Кто есть человек, иже поживет и не узрит смерти, избавит душу свою из руки адовы? (Sheol h7585) 49 Где суть милости Твоя древняя, Господи, имиже клялся еси

Давиду во истине Твоей? 50 Помяни, Господи, поношение раб Твоих, еже удержал в недрах моих многих язык: 51 имже поносиши врази Твои, Господи, имже поносиши изменению Христа Твоего. 52 Благословен Господь во век: буди, буди.

**90** Молитва Моисея человека Божия. 2 Господи, прибежище был еси нам в род и род. 3 Прежде даже горам не быти и создатися земли и вселенней, и от века и до века Ты еси. 4 Не отврати человека во смирение, и рекл еси: обратитесь, сынове человечести. 5 Яко тысяща лет пред очима Твоима, Господи, яко день вчерашний, иже мимо иде, и стража ночная. 6 Уничужения их лета будут: утро яко трава мимо идет, утро процветет и преидет: на вечер отпадет, ожестеет и исххнет: 7 яко исчезохом гневом Твоим, и яростию Твоею смутихомся. 8 Положил еси беззакония наша пред Тобою, век наш в просвещение лица Твоего. 9 Яко вси дние наши оскудеша, и гневом Твоим исчезохом: 10 лета наша яко паучина поучахуся: дние лет наших в нихже седмьдесят лет, аще же в силах, осмьдесят лет, и множае их труд и болезнь: яко прииде кротость на ны, и накажемся. 11 Кто вест державу гнева Твоего, и от страха Твоего ярость Твою изчести? 12 Десницу Твою тако скажи ми, и окованная сердцем в мудрости. 13 Обратися, Господи, доколе? И умолен буди на рабы Твоя. 14 Исполнихомся заутра милости Твоя, Господи, и возрадовахомся и возвеселихомся: 15 во вся дние наша возвеселихомся, за дние, в няже смирил ны еси, лета, в няже видехом злая. 16 И призри на рабы Твоя и на дела Твоя, и настави сыны их. 17 И буди светлость Господа Бога нашего на нас, и дела рук наших исправи на нас, и дело рук наших исправи.

**91** Живый в помощи Вышняго, в крове Бога небесного водворится, **2** речет Господеву: заступник мой еси и прибежище мое, Бог мой, и уповаю на Него. **3** Яко Той избавит тя от сети ловчи и от словесе мятежна: **4** плещма Своима осенит тя, и под криле Его надеешься: оружием обыдет тя истина Его. **5** Не убоишия от страха ночного, от стрелы летящая во дни, **6** от вещи во тме преходящая, от сряща и беса полуденного. **7** Падет от страны твоея тысяща, и тма одесную тебе, к тебе же не приблизится: **8** обаче очима твоима смотриши и воздаяние грешников узриши. **9** Яко ты, Господи, упование мое: Вышняго положил еси прибежище твое. **10** Не приидет к тебе зло, и рана не приблизится телеси твоему: **11** яко Ангелом Своим заповесть о тебе, сохранити тя во всех путех твоих. **12** На руках возмут тя, да не когда преткнеши о камень ногу твою: **13** на аспида и василиска наступиши, и попереши льва и змия. **14** Яко на Мя упова, и избавлю и: покрыю и, яко позна имя Мое. **15** Воззовет ко Мне, и услышу его: с ним есмь в скорби, изму его и прославлю его: **16** долготою дний исполню его и явлю ему спасение Мое.

**92** Псалом песни, в день субботный. Благо есть исповедатися Господеву и пети имени Твоему, Вышний: **2** возвещати заутра милость Твою и истину Твою на всяку ночь, **3** в десятиструнном псалтири с песнию в гуслех. **4** Яко возвеселил мя еси, Господи, в творении Твоем, и в делех руку Твоею возрадуюся. **5** Яко возвеличишася дела Твоя, Господи: зело углубишася помышления Твоя. **6** Муж безумен не познает, и неразумив не разумет сих. **7** Внегда прозябоша грешницы яко трава, и проникоша вси делающии

беззаконие, яко да потребятся в век века: **8** Ты же вышний во век, Господи. **9** Яко се, врази Твои, Господи, яко се, врази Твои погибнут, и разыдутся вси делающии беззаконие. **10** И вознесется яко единорога рог мой, и старость моя в елеи мастите: **11** и воззре око мое на враги моя, и востающыя на мя лукавнующыя услышит ухо мое. **12** Праведник яко финикс процветет: яко кедр, иже в Ливане, умножится. **13** Насаждени в дому Господни во дворех Бога нашего процветут: **14** еще умножатся в старости мастите, и благоприемлюще будут. **15** Да возвестят, яко прав Господь Бог наш, и несть неправды в Нем.

**93** Господь воцарися, в лепоту облечеса: облечеса Господь в силу и препоясая: ибо утверди вселенную, яже не подвижится. **2** Готов престол Твой оттоле: от века Ты еси. **3** Воздвигоша реки, Господи, воздвигоша реки гласы своя: **4** возмут реки сотрения своя, от гласов вод многих. **5** Дивны высоты морския: дивен в высоких Господь. Свидения Твоя уверишася зело. Дому Твоему подобает святыня, Господи, в долготу дний.

**94** Бог отмщений Господь, Бог отмщений не обинулся есть. **2** Вознесися, Судяй земли, воздаждь воздаяние гордым. **3** Доколе грешницы, Господи, доколе грешницы восхвалятся? **4** Провещают и возглаголют неправду, возглаголют вси делающии беззаконие? **5** Люди Твоя, Господи, смириша, и достояние Твое озлобиша: **6** вдовицу и сира умориша, и пришелца убиша, **7** и реша: не узрит Господь, ниже уразумеет Бог Иаковль. **8** Разумейте же, безумнии в людех, и буии некогда, умудритесь: **9** насаждей ухо, не слышит ли? Или создавый око, не сматряет ли? **10** Наказуяй языки,

не обличит ли, учай человека разуму? **11** Господь вещь помышления человеческая, яко суть суетна. **12** Блажен человек, егоже аще накажеш, Господи, и от закона Твоего научиши его: **13** укротити его от дний лютых, дондеже изрыется грешному яма. **14** Яко не отринет Господь людей Своих, и достояния Своего не оставит: **15** дондеже правда обратится на суд, и держащиеся ея вси правии сердцем. **16** Кто встанет ми на лукавнующыя? Или кто спредстанет ми на делающыя беззаконие? **17** Аще не Господь помог бы ми, в мале вселилася бы во ад душа моя. **18** Аще глаголах: подвижеса нога моя, милость Твоя, Господи, помогаше ми: **19** по множеству болезней моих в сердца моем, утешения Твоя возвеселиша душу мою. **20** Да не пребудет Тебе престол беззакония, созидаей труд на повеление. **21** Уловят на душу праведничу, и кровь неповинную осудят. **22** И бысть мне Господь в прибежище, и Бог мой в помощь упования моего: **23** и воздаст им Господь беззаконие их, и по лукавствию их погубит я Господь Бог.

**95** Приидите, возрадуемся Господеви, воскликнем Богу спасителю нашему: **2** предварим лице Его во исповедании, и во псалмех воскликнем Ему: **3** яко Бог велий Господь, и Царь велий по всей земли: **4** яко в руце Его вси концы земли, и высоты гор Того суть. **5** Яко Того есть море, и Той сотвори е, и сушу руце Его создасте. **6** Приидите, поклонимся и припадем ему, и восплачемся пред Господем сотворшим нас: **7** яко Той есть Бог наш, и мы людие пажити Его и овцы руки Его. Днесь аще глас Его услышите, **8** не ожесточите сердец ваших, яко в прогневании, по дни искушения в пустыни: **9** в оньже искусиша Мя отцы ваши, искусиша Мя, и видеша

дела Моя. 10 Четырехдесять лет негодовах рода того, и рех: присно заблуждают сердцем, тии же не познаша путей Моих: 11 яко кляхся во гневе Моем, аще внидут в покой Мой.

**96** Воспойте Господеви песнь нову, воспойте Господеви вся земля: 2 воспойте Господеви, благословите имя Его: благовестите день от дне спасение Его. 3 Возвестите во языцех славу Его, во всех людех чудеса Его. 4 Яко велий Господь и хвален зело, страшен есть над всеми боги. 5 Яко вси бози язык бесове: Господь же небеса сотвори. 6 Исповедание и красота пред Ним, святыня и великолепие во святиле Его. 7 Принесите Господеви, отечествия язык, принесите Господеви славу и честь. 8 Принесите Господеви славу имени Его: возьмите жертвы и входите во дворы Его. 9 Поклонитесь Господеви во дворе святем Его: да подвижится от лица Его вся земля. 10 Рцыте во языцех, яко Господь воцарися: ибо исправи вселенную, яже не подвижится: судит людем правостию. 11 Да возвеселятся небеса, и радуется земля: да подвижится море и исполнение его: 12 возрадуются поля, и вся яже на них: тогда возрадуются вся древа дубравная 13 от лица Господня, яко грядет, яко грядет судити земли: судити вселенней в правду, и людем истинною Своею.

**97** Господь воцарися, да радуется земля, да веселятся острови мнози. 2 Облак и мрак окрест Его: правда и судба исправление престола Его. 3 Огонь пред Ним предидет и поपालит окрест враги Его. 4 Осветиша молния Его вселенную: виде и подвижеса земля. 5 Горы яко воск растаяша от лица Господня, от лица Господа всея земли. 6 Возвестиша небеса правду Его, и видеша вси людие славу Его. 7 Да постыдятся

все кланяющиеся истуканам, хвалящиеся о идолах своих: поклонитесь Ему, все ангелы Его. **8** Слыша и возвеселился Сион, и возрадовалась дщерь Иудейская, судеб ради Твоих, Господи: **9** яко Ты Господь вышний над всею землею, зело превознеслся еси над всеми боги. **10** Любящие Господа, ненавидите злая: хранит Господь души преподобных Своих, из руки грешницы избавит я. **11** Свет возсия праведнику, и правым сердцем веселие. **12** Веселитесь, праведнии, о Господе, и исповедайте память святых Его.

**98** Воспойте Господу песнь нову, яко дивна сотвори Господь: спасе Его десница Его и мышца святая Его. **2** Сказа Господь спасение Свое, пред языки откры правду Свою. **3** Помяну милость Свою Иакову и истину Свою дому Израилеву: видеша все концы земли спасение Бога нашего. **4** Воскликните Богови, вся земля, воспойте и радуйтесь и пойте. **5** Пойте Господу в гуслех, в гуслех и гласе псаломсте, **6** в трубах кованых и гласом трубы рожаны: вострубите пред Царем Господем. **7** Да подвижится море и исполнение его, вселенная и все живущии на ней. **8** Реки воспещут рукою вкупе, горы возрадуются **9** от лица Господня, яко грядет, яко идет судити земли: судити вселенней в правду, и людем правостию.

**99** Господь воцарися, да гневаются людие: седяй на Херувимех, да подвижится земля. **2** Господь в Сионе велик, и высок есть над всеми людьми. **3** Да исповедятся имени Твоему великому, яко страшно и свято есть. **4** И честь царева суд любит: Ты уготовал еси правоты, суд и правду во Иакове Ты сотворил еси. **5** Возносите Господа Бога нашего и поклоняйтесь подножию ногу Его, яко свято есть. **6** Моисей и



Аарон во иереех Его, и Самуил в призывающих имя Его: призываху Господа, и Той послушаше их. 7 В столпе облачне глаголаше к ним: яко храняху свидения Его и повеления Его, яже даде им. 8 Господи Боже наш, Ты послушал еси их: Боже, Ты милостив бывал еси им, и мщя на вся начинания их. 9 Возносите Господа Бога нашего и поклоняйтесь в горе святей Его: яко свят Господь Бог наш.

**100** Воскликните Богови вся земля: 2 работайте Господеви в веселии, внидите пред Ним в радости. 3 Уведите, яко Господь Той есть Бог наш: Той сотвори нас, а не мы: мы же людие Его и овцы пажити Его. 4 Внидите во врата Его во исповедании, во дворы Его в пениих: исповедайтесь Ему, хвалите имя Его. 5 Яко благ Господь, в век милость Его, и даже до рода и рода истина Его.

**101** Милость и суд воспою Тебе, Господи: 2 пою и разумею в пути непорочне: когда приидеши ко мне? Прехождах в незлобии сердца моего посреде дому моего. 3 Не предлагах пред очима моима вещь законопреступную: творящья преступление возненавидех. 4 Не прильпе мне сердце строптиво: уклоняющагося от мене лукаваго не познах. 5 Оклеветающаго тай искренняго своего, сего изгонях: гордым оком и несытым сердцем, с сим не ядях. 6 Очи мои на верныя земли, посаждати я со мною: ходяй по пути непорочну, сей ми служаше. 7 Не живяше посреде дому моего творяй гордыню: глаголай неправедная не исправляше пред очима моима. 8 Воутрия избивах вся грешныя земли, еже потребити от града Господня вся делающья беззаконие.

**102** Молитва ницаго, егда уныет и пред Господем пролиет моление свое. Господи, услыши молитву мою, и вопль мой к

Тебе да придет. 2 Не отврати лица Твоего от мене: в онъже  
аще день скорблю, приклони ко мне ухо Твое: в онъже аще  
день призову Тя, скоро услыши мя. 3 Яко исчезоша яко дым  
дни мои, и кости моя яко сушило сосхошася. 4 Уязвлен  
бых яко трава, и исше сердце мое, яко забых снести хлеб  
мой. 5 От гласа воздыхания моего прильпе кость моя плоти  
моей. 6 Уподобихся неясити пустынной, бых яко ночный  
вран на нырищи. 7 Бдех и бых яко птица особящаяся на зде.  
8 Весь день поношаху ми врази мои, и хвалящии мя мною  
кленяхуся. 9 Зане пепел яко хлеб ядах и питие мое с плачем  
растворях, 10 от лица гнева Твоего и ярости Твоя: яко  
вознес низвергл мя еси. 11 Дни мои яко сень уклонишася, и  
аз яко сено иссох. 12 Ты же, Господи, во век пребываеши, и  
память Твоя в род и род. 13 Ты воскрес ущедриши Сиона: яко  
время ущедрити его, яко прииде время. 14 Яко благоволиша  
раби Твои камене его, и персть его ущедрят. 15 И убоятся  
языцы имене Господня, и вси царие земстии славы Твоя:  
16 яко созиждет Господь Сиона и явится во славе Своей.  
17 Призре на молитву смиренных и не уничижи моления  
их. 18 Да напишется сие в род ин, и людие зиждемии  
восхвалят Господа: 19 яко причне с высоты святя Своя,  
Господь с небесе на землю призре, 20 услышати воздыхание  
окованных, разрешити сыны умерщвленных: 21 возвестити в  
Сионе имя Господне и хвалу Его во Иерусалиме, 22 внегда  
собратися людем вкупе и царем, еже работати Господеви.  
23 Отвеща Ему на пути крепости Его: умаление дний моих  
возвести ми: 24 не возведи мене во преполовение дний  
моих: в роде родов лета Твоя. 25 В началех Ты, Господи,  
землю основал еси, и дела руку Твоею суть небеса. 26 Та

погибнут, Ты же пребываеши: и вся яко риза обетшают, и яко одежду свиеси я, и изменятся. 27 Ты же тойжде еси, и лета Твоя не оскудеют. 28 Сынове раб Твоих вселятся, и семя их во век исправится.

**103** Благослови, душе моя, Господа, и вся внутренняя моя, имя святое Его: 2 благослови, душе моя, Господа, и не забывай всех воздаяний Его: 3 очищающего вся беззакония твоя, изцеляющего вся недуги твоя, 4 избавляющего от истления живот твой, венчающего тя милостию и щедротами, 5 исполняющего во благих желание твое: обновится яко орля юность твоя. 6 Творяй милостыни Господь и судьбу всем обидимым. 7 Сказа пути Своя Моисеови, сыновом Израилевым хотения Своя. 8 Щедр и милостив Господь, долготерпелив и многомилостив. 9 Не до конца прогневается, ниже во век враждует: 10 не по беззаконием нашим сотворил есть нам, ниже по грехом нашим воздал есть нам. 11 Яко по высоте небесней от земли, утвердил есть Господь милость Свою на боящихся Его: 12 елико отстоят востоцы от запад, удалил есть от нас беззакония наша. 13 Якоже щедрит отец сыны, ущедри Господь боящихся Его. 14 Яко Той позна создание наше, помяну, яко персть есмы. 15 Человек, яко трава дние его, яко цвет селный, тако оцветет: 16 яко дух пройде в нем, и не будет, и не познает ктому места своего. 17 Милость же Господня от века и до века на боящихся Его, 18 и правда Его на сынех сынов, хранящих завет Его и помнящих заповеди Его творити я. 19 Господь на небеси уготова престол Свой, и царство Его всеми обладает. 20 Благословите Господа, вси Ангели Его, сильнии крепостию, творящии слово Его, услышати глас словес Его.

21 Благословите Господа, вся силы Его, слуги Его, творящие волю Его. 22 Благословите Господа, вся дела Его на всяком месте владычества Его: благослови, душе моя, Господа.

**104** Благослови, душе моя, Господа. Господи Боже мой, возвеличился еси зело: во исповедание и в велелепоту облеклся еси: 2 одеяйся светом яко ризою, простираяй небо яко кожу: 3 покрываяй водами превыспренняя Своя, полагаяй облаки на восхождение Свое, ходяй на крилу ветреню: 4 творяй ангелы Своя духи, и слуги Своя пламень огненный: 5 основаяй землю на тверди ея: не преклонится в век века. 6 Бездна яко риза одеяние ея, на горах станут воды: 7 от запрещения Твоего побегнут, от гласа грома Твоего убоятся. 8 Восходят горы, и низходят поля, в место еже основал еси им. 9 Предел положил еси, егоже не прейдут, ниже обратятся покрыти землю. 10 Посылаяй источники в дебрех, посреде гор пройдут воды. 11 Напаяют вся звери селныя, ждут онагри в жажду свою. 12 На тых птицы небесныя привитают: от среды камня дадят глас. 13 Напаяй горы от превыспренних Своих: от плода дел Твоих насытится земля. 14 Прозябаяй траву скотом, и злак на службу человеком, извести хлеб от земли: 15 и вино веселит сердце человека, умастити лице елеем: и хлеб сердце человека укрепит. 16 Насытятся древа польская, кедри Ливанстии, ихже еси насадил: 17 тамо птицы вогнездытся, еродиево жилище предводителствует ими. 18 Горы высокия еленем, камень прибежище заяцем. 19 Сотворил есть луну во времена: солнце позна запад свой. 20 Положил еси тму, и бысть ночь, в нейже пройдут вси зверие дубравнии, 21 скимни рыкающи восхитити и взыскати от Бога пищу

себе. 22 Возсия солнце, и собрашася, и в ложах своих лягут. 23 Изыдет человек на дело свое и на делание свое до вечера. 24 Яко возвеличишася дела Твоя, Господи: вся премудростию сотворил еси: исполнися земля твари Твоея. 25 Сие море великое и пространное: тамо гади, ихже несть числа, животная малая с великими: 26 тамо корабли преплавают, змий сей, егоже создал еси ругатися ему. 27 Вся к Тебе чают, дати пищу им во благо время. 28 Давшу Тебе им, соберут: отверзшу Тебе руку, всяческая исполнятся благности: 29 отвращу же Тебе лице, возмьются: отимеши дух их, и исчезнут и в персть свою возвратятся: 30 послеши духа Твоего, и созиждутся, и обновиши лице земли. 31 Буди слава Господня во веки: возвеселится Господь о делех Своих: 32 призирай на землю и творяй ю трястися: прикасайся горам, и дыматся. 33 Воспою Господеви в животе моем, пою Богу моему, дондеже есмь: 34 да усладится Ему беседа моя, аз же возвеселюся о Господе. 35 Да исчезнут грешницы от земли, и беззаконницы, якоже не быти им. Благослови, душе моя, Господа.

**105** Исповедайтесь Господеви и призывайте имя Его, возвестите во языцех дела Его: 2 воспойте Ему и пойте Ему, поведите вся чудеса Его. 3 Хвалитесь о имени святем Его: да возвеселится сердце ищущих Господа: 4 взыщите Господа и утвердитесь, взыщите лица Его выну. 5 Помяните чудеса Его, яже сотвори, чудеса Его и судьбы уст Его, 6 семя Авраамле раби Его, сынове Иаковли избраннии Его. 7 Той Господь Бог наш: по всей земли судьбы Его. 8 Помяну в век завет Свой, слово, еже заповеда в тысяцы родов, 9 еже завета Аврааму, и клятву Свою Исааку: 10 и постави ю

Иакову в повеление и Израилю в завет вечен, **11** глаголя: тебе дам землю Ханааню, уже достояния вашего. **12** Внегда быти им малым числом, малейшим и пришелцем в ней, **13** и преидоша от языка в язык и от царствия в люди ины: **14** не остави человека обидети их и обличи о них цари: **15** не прикасайтесь помазанным Моим, и во пророцех Моих не лукавуйте. **16** И призва глад на землю: всяко утверждение хлебное сотры. **17** Посла пред ними человека: в раба продан бысть Иосиф. **18** Смириша во оковах нозе его, железо пройде душа его, **19** дондеже прииде слово Его: слово Господне разжже его. **20** Посла царь и разреши его: князь людей, и остави его. **21** Постави его господина дому своему и князя всему стяжанию своему, **22** наказати князи его яко себе и старцы его умудрити. **23** И вниде Израиль во Египет, и Иаков пришелствова в землю Хамову. **24** И возрасти люди Своя зело и укрепил я паче врагов их. **25** Преврати сердце их возненавидети люди Его, лесь сотворити в рабех Его. **26** Посла Моисеа раба Своего, Аарона, егоже избра себе: **27** положи в них словеса знамений Своих и чудес Своих в земли Хамове. **28** Посла тму и помрачи, яко преогорчиша словеса Его. **29** Преложил воды их в кровь и измори рыбы их. **30** Воскипе земля их жабами в сокровищницах царей их. **31** Рече, и приидоша песия мухи и скнипы во вся пределы их. **32** Положил дожди их грады, огонь пополяющь в земли их: **33** и порази винограды их и смоквы их, и сотры всякое древо предел их. **34** Рече, и приидоша пружи и гусеницы, имже не бе числа, **35** и снесоша всяку траву в земли их, и поядоша всяк плод земли их. **36** И порази всякаго первенца в земли их, начаток всякаго труда их: **37** и изведе я с серебром и

златом: и не бе в коленех их боляй. 38 Возвеселися Египет во исхождении их: яко нападе страх их на ня. 39 Распростре облак в покров им, и огонь, еже просветити им нощию. 40 Просиша, и приидоша крастели, и хлеба небеснаго насыти я: 41 разверзе камень, и потекоша воды, потекоша в безводных реки: 42 яко помяну слово святое Свое, еже ко Аврааму рабу Своему. 43 И изведе люди Своя в радости и избранныя Своя в веселии. 44 И даде им страны язык, и труды людей наследоваша: 45 яко да сохранят оправдания Его и закона Его взыщут.

**106** Исповедайтеся Господеви, яко благ, яко в век милость Его. 2 Кто возглаголет силы Господни, слышаны сотворит вся хвалы Его? 3 Блажени хранящии суд и творящии правду во всякое время. 4 Помяни нас, Господи, во благоволении людей Твоих, посети нас спасением Твоим, 5 видети во благодати избранныя Твоя, возвеселитися в веселии языка Твоего, хвалитися с достоянием Твоим. 6 Согрешихом со отцы нашими, беззаконновахом, неправдовахом: 7 отцы наши во Египте не разумеша чудес Твоих, ни помянуша множества милости Твоея: и преогорчиша восходяще в Чермное море. 8 И спасе их имене Своего ради, сказати силу Свою: 9 и запрети Чермному морю, и изсяче: и настави я в бездне яко в пустыни. 10 И спасе я из руки ненавидящих и избави я из руки врагов. 11 Покры вода стужающыя им: ни един от них избысть. 12 И вероваша словеси Его и воспеша хвалу Его. 13 Ускориша, забыша дела Его, не стерпеша совета Его: 14 и похотеша желанию в пустыни и искусиша Бога в безводней. 15 И даде им прошение их, посла сытость в души их. 16 И прогневаша Моисеа в стану,

Аарона святого Господня. 17 Отверзется земля и пожре Дафана и покры на сонмищи Авирона: 18 и разжжеся огонь в сонме их, пламень попали грешники. 19 И сотвориша телца в Хориве и поклонишася истуканному: 20 и измениша славу Его в подобие телца ядущаго траву. 21 И забыша Бога спасающаго их, сотворшаго велия во Египте, 22 чудеса в земли Хамове, страшная в мори Чермнем. 23 И рече потреби их, аще не бы Моисей избранный Его стал в сокрушении пред Ним, возвратити ярость Его, да не погубит их. 24 И уничижиша землю желанную, не яша веры словеси Его: 25 и поропташа в селениих своих, не услышаша гласа Господня. 26 И воздвиже руку Свою на ня, низложити я в пустыни, 27 и низложити семя их во языцех, и расточити я в страны. 28 И причастишася Веельфегору и снетоша жертвы мертвых: 29 и раздражиша Его в начинаниих своих, и умножися в них падение. 30 И ста Финеес и умилостиви, и преста сечь: 31 и вменися ему в правду, в род и род до века. 32 И прогневаша Его на воде Пререкания, и озлоблен бысть Моисей их ради: 33 яко преогорчиша дух его и разнствова устнама своима. 34 Не потребиша языки, яже рече Господь им. 35 И смесишася во языцех и навикоша делом их: 36 и поработаша истуканным их, и бысть им в соблазн. 37 И пожроша сыны своя и дщери своя бесовом, 38 и пролияша кровь неповинную, кровь сынов своих и дщерей, яже пожроша истуканным Ханаанским: и убиена бысть земля их кровьми 39 и осквернися в делех их: и соблюдиша в начинаниих своих. 40 И разгневася яростию Господь на люди Своя и омерзи достояние Свое: 41 и предаде я в руки врагов, и обладаша ими ненавидящии их. 42 И стужиша им



врази их: и смиришася под руками их. **43** Множицею избави я: тии же преогорчиша Его советом своим, и смиришася в беззакониях своих. **44** И виде Господь, внемла скорбети им, внемла услышаша моление их: **45** и помяну завет Свой, и раскаяся по множеству милости Своея: **46** и даде я в щедроты пред всеми пленившими я. **47** Спаси ны, Господи, Боже наш, и собери ны от язык, исповедатися имени Твоему святому, хвалитися во хвале Твоей. **48** Благословен Господь Бог Израилев от века и до века. И рекут вси людие: буди, буди.

**107** Исповедаетесь Господеву, яко благ, яко в век милость Его. **2** Да рекут избавленнии Господем, ихже избави из руки врага, **3** и от стран собра их, от восток и запад, и севера и моря: **4** заблудиша в пустыни безводней, пути града обителнаго не обретоша: **5** алчуще и жаждуще, душа их в них изчезе. **6** И воззваша ко Господу, внемла скорбети им, и от нужд их избави я: **7** и настави я на путь прав, внити во град обителный. **8** Да исповедятся Господеву милости Его и чудеса Его сыновом человеческим: **9** яко насытил есть душу тщу, и душу алчущу исполни благ: **10** сидящия во тме и сени смертней, окованныя нищетою и железом, **11** яко преогорчиша словеса Божия, и совет Вышняго раздражиша. **12** И смирися в трудех сердце их, и изнемогоша, и не бе помагаяй. **13** И воззваша ко Господу, внемла скорбети им, и от нужд их спасе я: **14** и изведе я из тмы и сени смертныя, и узы их растерза. **15** Да исповедятся Господеву милости Его и чудеса Его сыновом человеческим: **16** яко сокруши врата медная, и верей железныя сломи. **17** Восприят я от пути беззакония их: беззаконий бо ради своих смиришася. **18**

Всякаго брашна возгнушася душа их, и приближишася до врат смертных. 19 И воззваша ко Господу, внегда скорбети им, и от нужд их спасе я: 20 посла слово Свое, и изцели я, и избави я от растлений их. 21 Да исповедятся Господеви милости Его и чудеса Его сыновом человеческим: 22 и да пожрут Ему жертву хвалы и да возвестят дела Его в радости. 23 Сходящие в море в кораблех, творящие делания в водах многих, 24 тии видеша дела Господня и чудеса Его во глубине. 25 Рече, и ста дух бурен, и вознесошася волны его: 26 восходят до небес и низходят до бездн: душа их в злых таяше: 27 смятошася, подвигошася яко пьяный, и вся мудрость их поглощена бысть. 28 И воззваша ко Господу, внегда скорбети им, и от нужд их изведе я: 29 и повеле бури, и ста в тишину, и умолкоша волны его. 30 И возвеселишася, яко умолкоша, и настави я в пристанище хотения Своего. 31 Да исповедятся Господеви милости Его и чудеса Его сыновом человеческим: 32 да вознесут Его в церкви людстей, и на седалищи старец восхвалят Его. 33 Положил есть реки в пустыню и исходища водная в жажду, 34 землю плодоносную в сланость, от злобы живущих на ней. 35 Положил есть пустыню во езера водная и землю безводную во исходища водная. 36 И насели тамо алчущыя, и составиша грады обителны: 37 и насеяша (села) и насадиша винограды, и сотвориша плод житен. 38 И благослови я, и умножишася зело: и скоты их не умали. 39 И умалишася и озлобишася от скорби зол и болезни: 40 излися уничижение на князи их, и облазни я по непроходней, а не по пути. 41 И поможе убогу от нищеты и положи яко овцы отечествия. 42 Узрят правии и

возвеселятся, и всякое беззаконие заградит уста своя. **43** Кто премудр и сохранит сия? И уразумеют милости Господни.

**108** Песнь, псалом Давиду. Готово сердце мое, Боже, готово сердце мое: воспою и пою во славе моей. **2** Востани, слава моя, востани, псалтирю и гусли: встану рано. **3** Исповемся Тебе в людех, Господи, пою Тебе во языцех: **4** яко велия верху небес милость Твоя и до облак истина Твоя. **5** Вознесися на небеса, Боже, и по всей земли слава Твоя, **6** яко да избавятся возлюбленнии Твои: спаси десницею Твоею и услыши мя. **7** Бог возглагола во святем Своем: вознесуся и разделю Сикиму, и удолю Селений размерю. **8** Мой есть Галаад, и Мой есть Манассий, и Ефрем заступление главы Моея: Иуда царь Мой, **9** Моав коноб упования Моего: на Идумею наложу сапог Мой: мне иноплеменницы покоришася. **10** Кто введет мя во град ограждения? Или кто наставит мя до Идумеи? **11** Не Ты ли, Боже, отринувый нас, и не изыдеши, Боже, в силах наших? **12** Дажь нам помощь от скорби: и суетно спасение человеческо. **13** О Бозе сотворим силу, и Той уничижит враги наша.

**109** Боже, хвалы моя не премолчи: **2** яко уста грешника и уста льстиваго на мя отверзошася, глаголаша на мя языком льстивым, **3** и словесы ненавистными обыдоша мя, и брашася со мною туне. **4** Вместо еже любити мя, оболгаху мя, аз же моляхся: **5** и положиша на мя злая за благая, и ненависть за возлюбление мое. **6** Постави на него грешника, и диавол да станет одесную его: **7** внегда судитися ему, да изыдет осужден, и молитва его да будет в грех. **8** Да будут дние его мали, и епископство его да примет ин: **9** да будут сынове его сири, и жена его вдова: **10** движущеся

да преселятся сынове его и воспросят, да изгнани будут из домов своих. 11 Да възыщет заимодавец вся, елика суть его: и да восхитят чуждии труды его. 12 Да не будет ему заступника, ниже да будет ущедряяй сироты его: 13 да будут чада его в погубление, в роде едином да потребится имя его. 14 Да воспомянется беззаконие отец его пред Господем, и грех матери его да не очистится: 15 да будут пред Господем выну, и да потребится от земли память их: 16 занеже не помяну сотворити милость, и погна человека нища и убога, и умилена сердцем умертвити. 17 И возлюби клятву, и приидет ему: и не восхоте благословения, и удалится от него. 18 И облечеса в клятву яко в ризу, и вниде яко вода во утробу его и яко елей в кости его: 19 да будет ему яко риза, в нюже облачится, и яко пояс, имже выну опоясуется. 20 Сие дело оболгающих мя у Господа и глаголющих лукавая на душу мою. 21 И Ты, Господи, Господи, сотвори со мною имене ради Твоего, яко блага милость Твоя: 22 избави мя, яко нищ и убог есмь аз, и сердце мое смятеса внутрь мене. 23 Яко сень, вегда уклонитися ей, отяхся: стрясохся яко прузи. 24 Колена моя изнемогоста от поста, и плоть моя изменися елеа ради. 25 И аз бых поношение им: видеша мя, покиваша главами своими. 26 Помози ми, Господи Боже мой, и спаси мя по милости Твоей: 27 и да разумеют, яко рука Твоя сия, и Ты, Господи, сотворил еси ю. 28 Прокленут тии, и Ты благословиши: востающии на мя да постыдятся, раб же Твой возвеселится. 29 Да облекутся оболгающии мя в срамоту и оденутся яко одеждою студом своим. 30 Исповемся Господеву зело усты моими и посреде многих

восхваляю Его: **31** яко преста одесную убогаго, еже спасти от гонящих душу мою.

**110** Рече Господь Господеви моему: седи одесную Мене, дондеже положу враги Твоя подножие ног Твоих. **2** Жезл силы послет Ти Господь от Сиона, и господствуй посреде врагов Твоих. **3** С Тобою начало в день силы Твоея, во светлостех святых твоих: из чрева прежде денницы родих Тя. **4** КлятсЯ Господь и не раскается: Ты иерей во век по чину Мелхиседекову. **5** Господь одесную Тебе сокрушил есть в день гнева Своего цари: **6** судит во языцех, исполнит падения, сокрушит главы на земли многих. **7** От потока на пути пиет: сего ради вознесет главу.

**111** Исповемся Тебе, Господи, всем сердцем моим в совете правых и сонме. **2** Велия дела Господня, изыскана во всех волях его: **3** исповедание и великолепие дело Его, и правда Его пребывает в век века. **4** Память сотворил есть чудес Своих: милостив и щедр Господь. **5** Пищу даде боящимся Его: помянет в век завет Свой. **6** Крепость дел Своих возвести людем Своим, дати им достояние язык. **7** Дела рук Его истина и суд, верны вся заповеди Его, **8** утвержены в век века, сотворены во истине и правоте. **9** Избавление посла людем Своим: заповеда в век завет Свой: свято и страшно имя Его. **10** Начало премудрости страх Господень, разум же благ всем творящим и: хвала Его пребывает в век века.

**112** Блажен муж бояйся Господа, в заповедех Его восхощет зело. **2** Сильно на земли будет семя его, род правых благословится: **3** слава и богатство в дому его, и правда его пребывает в век века. **4** Возсия во тме свет правым: милостив и щедр и праведен. **5** Благ муж щедря и дая:

устроит словеса своя на суде, яко в век не подвижится. **6** В память вечную будет праведник. **7** От слуха зла не убоится: **8** готово сердце его уповати на Господа: утвердися сердце его, не убоится, дондеже воззрит на враги своя. **9** Расточи, даде убогим: правда его пребывает во век века: рог его вознесется в славе. **10** Грешник узрит и прогневаются зубы своими поскрежет и растает: желание грешника погибнет.

**113** Хвалите, отроцы, Господа, хвалите имя Господне. **2** Буди имя Господне благословено отныне и до века. **3** От восток солнца до запад хвально имя Господне. **4** Высок над всеми языки Господь: над небесы слава Его. **5** Кто яко Господь Бог наш? На высоких живый, **6** и на смиренныя призираяй на небеси и на земли: **7** воздвизаяй от земли нища, и от гноища возвышаяй убога: **8** посадити его с князи, с князи людий своих: **9** вселяя неплодовь в дом, мать о чадах веселящуюся.

**114** Во исходе Израилеве от Египта, дому Иаковля из людий варвар, **2** бысть Иудеа святыня Его, Израиль область Его. **3** Море виде и побеже, Иордан возвратися вспять: **4** горы взыграшася яко овни, и холми яко агнцы овчии. **5** Что ти есть, море, яко побегло еси, и тебе, Иордане, яко возвратился еси вспять? **6** Горы, яко взыгрastesя яко овни, и холми яко агнцы овчии? **7** От лица Господня подвижеся земля, от лица Бога Иаковля: **8** обращшаго камень во езера водная и несекомый во источники водныя.

**115** Не нам, Господи, не нам, но имени Твоему даждь славу о милости Твоей и истине Твоей: **2** да не когда рекут языцы: где есть Бог их? **3** Бог же наш на небеси и на земли, вся елика восхоте, сотвори. **4** Идоли язык сребро и злато,

дела рук человеческих: 5 уста имут, и не возглаголют: очи имут, и не узрят: 6 уши имут, и не услышат: ноздри имут, и не обоняют: 7 руце имут, и не осяжут: нозе имут, и не пойдут: не возгласят гортанем своим. 8 Подобни им да будут творящи я и вси надеющиися на ня. 9 Дом Израилев упова на Господа: помощник и защититель им есть. 10 Дом Ааронь упова на Господа: помощник и защититель им есть. 11 Боящиися Господа уповаша на Господа: помощник и защититель им есть. 12 Господь помянув ны благословил есть нас: благословил есть дом Израилев, благословил есть дом Ааронь, 13 благословил есть боящияся Господа, малыя с великими. 14 Да приложит Господь на вы, на вы и на сыны ваша: 15 благословени вы Господеви, сотворшему небо и землю. 16 Небо небесе Господеви, землю же даде сыновом человеческим. 17 Не мертвии восхвалят Тя, Господи, ниже вси низходящи во ад: 18 но мы живии благословим Господа отныне и до века.

**116** Возлюбих, яко услышит Господь глас моления моего, 2 яко приклони ухо Свое мне: и во дни моя призову. 3 Объяша мя болезни смертныя, беды адовы обретоша мя: скорбь и болезнь обретох и имя Господне призвах: (Sheol h7585) 4 о, Господи, избави душу мою: милостив Господь и праведен и Бог наш милует. 5 Храняй младенцы Господь: смирихся, и спасе мя. 6 Обратися, душе моя, в покой твой, яко Господь благодествова тя: 7 яко изят душу мою от смерти, очи мои от слез и нозе мои от поползновения. 8 Благоугожду пред Господем во стране живых. 10 Веровах, темже возглаголах: аз же смирихся зело. 11 Аз же рех во изступлении моем: всяк человек ложь. 12 Что воздам Господеви о всех, яже

воздаде ми? **13** Чашу спасения прииму и имя Господне призову: **14** молитвы моя Господеви воздам пред всеми людьми Его. **15** Честна пред Господем смерть преподобных Его. **16** О, Господи, аз раб Твой, аз раб Твой и сын рабыни Твоея: растерзал еси узы моя. **17** Тебе пожру жертву хвалы, и во имя Господне призову. **18** Молитвы моя Господеви воздам пред всеми людьми Его, **19** во дворех дому Господня, посреде тебе, Иерусалиме.

**117** Хвалите Господа, вси языцы, похвалите Его, вси людие: **2** яко утвердися милость Его на нас, и истина Господня пребывает во век.

**118** Исповедайтеся Господеви, яко благ, яко в век милость Его. **2** Да речет убо дом Израилев: яко благ, яко в век милость Его. **3** Да речет убо дом Ааронь: яко благ, яко в век милость Его. **4** Да рекут убо вси боящиися Господа: яко благ, яко в век милость Его. **5** От скорби призвах Господа, и услыша мя в пространство. **6** Господь мне помощник, и не убоюся: что сотворит мне человек? **7** Господь мне помощник, и аз воззрю на враги моя. **8** Благо есть надеяться на Господа, нежели надеяться на человека: **9** благо есть уповати на Господа, нежели уповати на князи. **10** Вси языцы обыдоша мя, и именем Господним противляхся им: **11** обышедше обыдоша мя, и именем Господним противляхся им: **12** обыдоша мя яко пчелы сот, и разгорешася яко огонь в тернии: и именем Господним противляхся им. **13** Отриновен превратихся пасти, и Господь прият мя. **14** Крепость моя и пение мое Господь, и бысть ми во спасение. **15** Глас радости и спасения в селениих праведных: десница Господня сотвори силу. **16** Десница Господня вознесе мя, десница Господня сотвори силу. **17**



Не умру, но жив буду и повем дела Господня. 18 Наказуя наказа мя Господь, смерти же не предаде мя. 19 Отверзите мне врата правды: вшед в ня, исповемся Господеви. 20 Сия врата Господня: праведнии внидут в ня. 21 Исповемся Тебе, яко услышал мя еси и был еси мне во спасение. 22 Камень, егоже небрегоша зиждущии, сей бысть во главу угла: 23 от Господа бысть сей, и есть дивен во очесех наших. 24 Сей день, егоже сотвори Господь, возрадуемся и возвеселимся в онь. 25 О, Господи, спаси же: о, Господи, поспеши же. 26 Благословен грядый во имя Господне: благословихом вы из дому Господня. 27 Бог Господь, и явися нам: составите праздник во учащающих до рог олтаревых. 28 Бог мой еси Ты, и исповемся Тебе: Бог мой еси Ты, и вознесу Тя: исповемся Тебе, яко услышал мя еси и был еси мне во спасение. 29 Исповедайтесь Господеви, яко благ, яко в век милость Его.

**119** Блажени непорочнии в путь, ходящии в законе Господни. 2 Блажени испытующии свидения Его, всем сердцем взыщут Его. 3 Не делающии бо беззакония в путех Его ходиша. 4 Ты заповедал еси заповеди Твоя сохранить зело: 5 дабы исправился путие мои, сохранить оправдания Твоя. 6 Тогда не постыжуся, внегда призрети ми на вся заповеди Твоя. 7 Исповемся Тебе в правости сердца, внегда научитимися судьбам правды Твоея. 8 Оправдания Твоя сохраню: не остави мене до зела. 9 В чесом исправит юнейший путь свой? Внегда сохранить словеса Твоя. 10 Всем сердцем моим взысках Тебе: не отрини мене от заповедий Твоих. 11 В сердца моем скрых словеса Твоя, яко да не согрешу Тебе. 12 Благословен еси, Господи: научи

мя оправданием Твоим. 13 Устнама моима возвестих вся судьбы уст Твоих. 14 На пути свидений Твоих насладихся, яко о всяком богатстве. 15 В заповедех Твоих поглумлюся, и уразумею пути Твоя. 16 Во оправданиях Твоих поучуся: не забуду словес Твоих. 17 Воздаждь рабу Твоему: живи мя, и сохраню словеса Твоя. 18 Открый очи мои, и уразумею чудеса от закона Твоего. 19 Пришлец аз есмь на земли: не скрый от мене заповеди Твоя. 20 Возлюби душа моя возжелати судьбы Твоя на всякое время. 21 Запретил еси гордым: прокляти уклоняющиеся от заповедий Твоих. 22 Отими от мене понос и уничижение, яко свидений Твоих взысках. 23 Ибо седоша князи и на мя клеветаху, раб же Твой глумляшеся во оправданиях Твоих: 24 ибо свидения Твоя поучение мое есть, и совети мои оправдания Твоя. 25 Прильпе земли душа моя: живи мя по словеси Твоему. 26 Пути моя возвестих, и услышал мя еси: научи мя оправданием Твоим. 27 Путь оправданий Твоих вразуми ми, и поглумлюся в чудесех Твоих. 28 Воздрема душа моя от уныния: утверди мя в словесех Твоих. 29 Путь неправды отстави от мене и законом Твоим помилуй мя. 30 Путь истины изволих и судьбы Твоя не забых. 31 Прилепихся свидением Твоим, Господи, не посрами мене. 32 Путь заповедий Твоих текох, егда разширил еси сердце мое. 33 Законоположи мне, Господи, путь оправданий Твоих, и взыщу и выну: 34 вразуми мя, и испытаю закон Твой и сохраню и всем сердцем моим. 35 Настави мя на стезю заповедий Твоих, яко тую восхотех. 36 Приклони сердце мое во свидения Твоя, а не в лихоимство. 37 Отврати очи мои еже не видети суеты: в пути Твоем живи мя. 38 Постави рабу Твоему слово Твое в страх Твой. 39 Отими поношение

мое, еже непщевах: яко судьбы Твоя благи. 40 Се, возжелах заповеди Твоя: в правде Твоей живи мя. 41 И да приидет на мя милость Твоя, Господи, спасение Твое по словеси Твоему: 42 и отвечаю поношающим ми слово, яко уповах на словеса Твоя. 43 И не отими от уст моих словесе истинна до зела, яко на судьбы Твоя уповах: 44 и сохраню закон Твой выну, в век и в век века. 45 И хождах в широте, яко заповеди Твоя взысках: 46 и глаголах о свидениях Твоих пред цари и не стыдяся: 47 и поучахся в заповедех Твоих, яже возлюбих зело: 48 и воздвигох руце мои к заповедем Твоим, яже возлюбих, и глумляхся во оправданиях Твоих. 49 Помяни словеса Твоя рабу Твоему, ихже упование дал ми еси. 50 То мя утеша во смирении моем, яко слово Твое живи мя. 51 Гордии законопреступоваху до зела: от закона же Твоего не уклонихся. 52 Помянух судьбы Твоя от века, Господи, и утешихся. 53 Печаль прият мя от грешник, оставляющих закон Твой. 54 Пета бяху мне оправдания Твоя на месте пришествия моего. 55 Помянух в нощи имя Твое, Господи, и сохраних закон Твой. 56 Сей бысть мне, яко оправданий Твоих взысках. 57 Часть моя еси, Господи: рех сохранити закон Твой. 58 Помолихся лицу Твоему всем сердцем моим: помилуй мя по словеси Твоему. 59 Помыслих пути Твоя и возвратих нозе мои во свидения Твоя. 60 Уготовихся и не смутихся сохранити заповеди Твоя. 61 Ужя грешник обязашася мне, и закона Твоего не забых. 62 Полунощи востах исповедатися Тебе о судьбах правды Твоея. 63 Причастник аз есмь всем боящимся Тебе и хранящим заповеди Твоя. 64 Милости Твоея, Господи, исполнь земля: оправданием Твоим научи мя. 65 Благодать сотворил еси

с рабом Твоим, Господи, по словеси Твоему: 66 благости и наказанию и разуму научи мя, яко заповедем Твоим веровах. 67 Прежде даже не смиритимся, аз прегреших: сего ради слово Твое сохраних. 68 Благ еси Ты, Господи: и благостию Твоею научи мя оправданием Твоим. 69 Умножися на мя неправда гордых: аз же всем сердцем моим испытаю заповеди Твоя. 70 Усырися яко млеко сердце их: аз же закону Твоему поучихся. 71 Благо мне, яко смирил мя еси, яко да научуся оправданием Твоим. 72 Благ мне закон уст Твоих паче тысяч злата и серебра. 73 Руце Твои сотвористе мя и создасте мя: вразуми мя, и научуся заповедем Твоим. 74 Боящиися Тебе узрят мя и возвеселятся, яко на словеса Твоя уповах. 75 Разумех, Господи, яко правда судьбы Твоя, и воистинну смирил мя еси. 76 Буди же милость Твоя, да утешит мя, по словеси Твоему рабу Твоему: 77 да приидут мне щедроты Твоя, и жив буду, яко закон Твой поучение мое есть: 78 да постыдятся гордии, яко неправедно беззаконноваша на мя: аз же поглумлюся в заповедех Твоих. 79 Да обратят мя боящиися Тебе и ведящии свидения Твоя. 80 Буди сердце мое непорочно во оправданиях Твоих, яко да не постыжуся. 81 Изчезает во спасение Твое душа моя, на словеса Твоя уповах: 82 изчезоша очи мои в слово Твое, глаголюще: когда утетиши мя? 83 Зане бых яко мех на слане: оправданий Твоих не забых. 84 Колико есть дний раба Твоего? Когда сотвориши ми от гонящих мя суд? 85 Поведаша мне законопреступницы глумления, но не яко закон Твой, Господи. 86 Вся заповеди Твоя истина: неправедно погнаша мя, помози ми. 87 Вмале не скончаша мене на земли: аз же не оставих заповедий Твоих. 88 По милости Твоей живи мя, и

сохраню свидения уст Твоих. 89 Во век, Господи, слово Твое пребывает на небеси. 90 В род и род истина Твоя: основал еси землю, и пребывает. 91 Учинением Твоим пребывает день: яко всяческая работна Тебе. 92 Яко аще бы не закон Твой поучение мое был, тогда убо погибл бых во смирении моем: 93 во век не забуду оправданий Твоих, яко в них оживил мя еси. 94 Твой есмь аз, спаси мя: яко оправданий Твоих взысках. 95 Мене ждаша грешницы погубити мя: свидения Твоя разумех. 96 Всякия кончины видех конец: широка заповедь Твоя зело. 97 Коль возлюбих закон Твой, Господи: весь день поучение мое есть. 98 Паче враг моих умудрил мя еси заповедию Твоею, яко в век моя есть. 99 Паче всех учащих мя разумех, яко свидения Твоя поучение мое есть. 100 Паче старец разумех, яко заповеди Твоя взысках. 101 От всякаго пути лукава возбраних ногам моим, яко да сохраню словеса Твоя: 102 от судеб Твоих не уклонихся, яко Ты законоположил ми еси. 103 Коль сладка гортани моему словеса Твоя: паче меда устом моим. 104 От заповедий Твоих разумех: сего ради возненавидех всяк путь неправды. 105 Светилник ногама моима закон Твой, и свет стезям моим. 106 Кляхся и поставих сохранить судьбы правды Твоя. 107 Смирися до зела: Господи, живи мя по словеси Твоему. 108 Вольная уст моих благоволи же, Господи, и судбам Твоим научи мя. 109 Душа моя в руку Твоею выну, и закона Твоего не забых. 110 Положиша грешницы сеть мне: и от заповедий Твоих не заблудих. 111 Наследовах свидения Твоя во век, яко радование сердца моего суть: 112 приклоних сердце мое сотворити оправдания Твоя в век за воздаяние. 113 Законопреступныя возненавидех, закон же Твой возлюбих.

114 Помощник мой и заступник мой еси Ты: на словеса Твоя уповах. 115 Уклонитесь от мене, лукавнующии, и испытаю заповеди Бога моего. 116 Заступи мя по словеси Твоему, и жив буду: и не посрами мене от чаяния моего: 117 помози ми, и спасуся, и поучуся во оправданиях Твоих выну. 118 Уничжил еси вся отступающыя от оправданий Твоих: яко неправедно помышление их. 119 Преступающыя непщевах вся грешныя земли: сего ради возлюбих свидения Твоя. 120 Пригвозди страху Твоему плоти моя: от судеб бо Твоих убояхся. 121 Сотвори суд и правду: не предаждь мене обидящым мя. 122 Восприими раба Твоего во благо, да не оклеветают мене гордии. 123 Очи мои исчезосте во спасение Твое и в слово правды Твоея: 124 сотвори с рабом Твоим по милости Твоей, и оправданием Твоим научи мя. 125 Раб Твой есмь аз: вразуми мя, и увем свидения Твоя. 126 Время сотворити Господеви: разориша закон Твой. 127 Сего ради возлюбих заповеди Твоя паче злата и топазиа. 128 Сего ради ко всем заповедем Твоим направляхся, всяк путь неправды возненавидех. 129 Дивна свидения Твоя: сего ради испыта я душа моя. 130 Явление словес Твоих просвещает и вразумляет младенцы. 131 Уста моя отверзох и привлекох дух, яко заповедий Твоих желях. 132 Призри на мя и помилуй мя, по суду любящих имя Твое. 133 Стопы моя направи по словеси Твоему, и да не обладает мною всякое беззаконие: 134 избави мя от клеветы человеческия, и сохранию заповеди Твоя. 135 Лице Твое просвети на раба Твоего и научи мя оправданием Твоим. 136 Исходища водная изведосте очи мои, понеже не сохраних закона Твоего. 137 Праведен еси, Господи, и прави суди Твои: 138 заповедал еси правду

свидения Твоя, и истину зело. 139 Истаяла мя есть ревность Твоя: яко забыша словеса Твоя врази мои. 140 Разжжено слово Твое зело, и раб Твой возлюбил е. 141 Юнейший аз есмь и уничижен: оправданий Твоих не забых. 142 Правда Твоя правда во век, и закон Твой истина. 143 Скорби и нужди обретоша мя: заповеди Твоя поучение мое. 144 Правда свидения Твоя в век: вразуми мя, и жив буду. 145 Воззвах всем сердцем моим, услыши мя, Господи: оправдания Твоя възыщу. 146 Воззвах Ти, спаси мя, и сохраню свидения Твоя. 147 Предварих в безгодии и воззвах: на словеса Твоя уповах. 148 Предваристе очи мои ко утру, поучитися словесем Твоим. 149 Глас мой услыши, Господи, по милости Твоей: по судьбе Твоей живи мя. 150 Приближишася гонящии мя беззаконием: от закона же Твоего удалишася. 151 Близ еси Ты, Господи, и вси путие Твои истина. 152 Исперва познах от свидений Твоих, яко в век основал я еси. 153 Виждь смирение мое и измени мя: яко закона Твоего не забых. 154 Суди суд мой и избави мя: словесе ради Твоего живи мя. 155 Далече от грешник спасение, яко оправданий Твоих не възыскаша. 156 Щедроты Твоя многи, Господи: по судьбе Твоей живи мя. 157 Мнози изгонящии мя и стужающии ми: от свидений Твоих не уклонихся. 158 Видех неразумевающыя и истаях: яко словес Твоих не сохраниша. 159 Виждь, яко заповеди Твоя възлюбих: Господи, по милости Твоей живи мя. 160 Начало словес Твоих истина, и во век вся судьбы правды Твоя. 161 Князи погнаша мя туне: и от словес Твоих убояся сердце мое. 162 Возрадоуюся аз о словесех Твоих, яко обретаяй корысть многу. 163 Неправду возненавидех и омерзих: закон же Твой възлюбих. 164 Седмерицею днем хвалих Тя о

судбах правды Твоея. 165 Мир мног любящим закон Твой, и несть им соблазна. 166 Чаях спасения Твоего, Господи, и заповеди Твоя возлюбих. 167 Сохрани душа моя свидения Твоя и возлюби я зело. 168 Сохраних заповеди Твоя и свидения Твоя, яко вси путие мои пред Тобою, Господи. 169 Да приблизится моление мое пред Тя, Господи: по словеси Твоему вразуми мя. 170 Да внидет прошение мое пред Тя: Господи, по словеси Твоему избави мя. 171 Отрыгнут устне мои пение, егда научиши мя оправданием Твоим. 172 Провецает язык мой словеса Твоя, яко вся заповеди Твоя правда. 173 Да будет рука Твоя еже спасти мя, яко заповеди Твоя изволих. 174 Возжелах спасение Твое, Господи, и закон Твой поучение мое есть. 175 Жива будет душа моя и восхвалит Тя: и судьбы Твоя помогут мне. 176 Заблудих яко овча погибшее: взыщи раба Твоего, яко заповедий Твоих не забых.

**120** Ко Господу, внегода скорбети ми, воззвах, и услыша мя. 2 Господи, избави душу мою от устен неправедных и от языка льстива. 3 Что дастся тебе, или что приложится тебе к языку льстиву? 4 Стрелы сильного изощрены, со угльми пустынными. 5 Увы мне, яко пришествие мое продолжися, вселихся с селении Кидарскими: 6 много пришествия душа моя: с ненавидящими мира бех мирен: 7 егда глаголах им, боряху мя туне.

**121** Возведох очи мои в горы, отнюдуже приидет помощь моя. 2 Помощь моя от Господа, сотворшаго небо и землю. 3 Не даждь во смятение ноги твоя, ниже воздремлет храняй тя: 4 се, не воздремлет, ниже уснет храняй Израиля. 5 Господь сохранит тя, Господь покров твой на руку десную



твою. 6 Во дни солнце не ожжет тебе, ниже луна ночью. 7  
Господь сохранит тя от всякаго зла, сохранит душу твою  
Господь: 8 Господь сохранит вхождение твое и исхождение  
твое, отныне и до века.

**122** Возвеселихся о рекших мне: в дом Господень пойдем.  
2 Стояще бяху ноги наша во дворех твоих, Иерусалиме. 3  
Иерусалим зиждемый яко град, емуже причастие его вкупе.  
4 Тамо бо въздоша колена, колена Господня, свидение  
Израилево, исповедатися имени Господню: 5 яко тамо  
седоша престолы на суд, престолы в дому Давидове. 6  
Вопросите же яже о мире Иерусалима: и обилие любящим  
тя. 7 Буди же мир в силе твоей, и обилие в столпостенах  
твоих. 8 Ради братий моих и ближних моих глаголах убо мир  
о тебе. 9 Дому ради Господа Бога нашего взысках благая  
тебе.

**123** К Тебе возведох очи мои, Живущему на небеси. 2  
Се, яко очи раб в руку господий своих, яко очи рабыни в  
руку госпожи своея: тако очи наши ко Господу Богу нашему,  
дондеже ущедрит ны. 3 Помилуй нас, Господи, помилуй нас,  
яко помногу исполнихомся уничижения: 4 наипаче наполнися  
душа наша поношения гобзующих и уничижения гордых.

**124** Яко аще не Господь бы был в нас, да речет убо  
Израиль: 2 яко аще не Господь бы был в нас, внегда востати  
человеком на ны, убо живых пожерли быша нас: 3 внегда  
прогневатися ярости их на ны, убо вода потопила бы нас. 4  
Поток прейде душа наша: 5 убо прейде душа наша воду  
непостоянную. 6 Благословен Господь, иже не даде нас в  
ловитву зубом их. 7 Душа наша яко птица избавися от сети

ловящих: сеть сокрушится, и мы избавлены быхом. 8 Помощь наша во имя Господа, сотворшаго небо и землю.

**125** Надеющиеся на Господа, яко гора Сион: не подвижится в век живый во Иерусалиме. 2 Горы окрест его, и Господь окрест людей Своих, отныне и до века. 3 Яко не оставит Господь жезла грешных на жребий праведных, яко да не прострут праведнии в беззакония рук своих. 4 Ублажи, Господи, благия и правыя сердцем. 5 Уклоняющыяся же в развращения ответит Господь с делающими беззаконие: мир на Израиля.

**126** Внегда возвратити Господу плен Сионь, быхом яко утешени. 2 Тогда исполнишася радости уста наша, и язык наш веселия: тогда рекут во языцех: возвеличил есть Господь сотворити с ними. 3 Возвеличил есть Господь сотворити с нами: быхом веселящися. 4 Возврати, Господи, пленение наше, яко потоки югом. 5 Сеющи слезами, радостью пожнут. 6 Ходящи хождаху и плакахуся, метаяще семена своя: грядуще же приидут радостью, вземлюще рукояти своя.

**127** Аще не Господь созиждет дом, всуе трудишася зиждущии: аще не Господь сохранит град, всуе бде стрегий. 2 Всуе вам есть утревати: востанете по седении ядущии хлеб болезни, егда даст возлюбленным Своим сон. 3 Се, достояние Господне сынове, мзда плода чревняго. 4 Яко стрелы в руке сильного, тако сынове отрясенных. 5 Блажен, иже исполнит желание свое от них: не постыдятся, егда глаголют врагом своим во вратех.

**128** Блажени вси боящиися Господа, ходящи в путех Его: 2 труды плодов твоих снеси: блажен еси, и добро тебе

будет. 3 Жена твоя яко лоза плодovита в странах дому твоего: 4 сынове твои яко новосаждения масличная окрест трапезы твоя. 5 Се, тако благословится человек бояйся Господа. 6 Благословит тя Господь от Сиона, и узриши благая Иерусалима вся дни живота твоего, и узриши сыны сынов твоих: мир на Израиля.

**129** Множицею брашася со мною от юности моя, да речет убо Израиль: 2 множицею брашася со мною от юности моя, ибо не премогаша мя. 3 На хребте моем делаша грешницы, продолжиша беззаконие свое. 4 Господь праведен ссече выя грешников. 5 Да постыдятся и возвратятся вспять вси ненавидящии Сиона: 6 да будут яко трава на здех, яже прежде восторжения изсше: 7 еюже не исполни руки своя жняй, и недра своего рукояти собираяй: 8 и не реша мимоходящии: благословение Господне на вы, благословихом вы во имя Господне.

**130** Из глубины воззвах к Тебе, Господи: Господи, услыши глас мой. 2 Да будут уши Твои внимлюще гласу моления моего. 3 Аще беззакония назриши, Господи, Господи, кто постоит? 4 Яко у Тебе очищение есть, Имене ради Твоего потерпех Тя 5 Господи, потерпе душа моя в слово Твое: 6 упова душа моя на Господа от стражи утренния до нощи, от стражи утренния 7 да уповает Израиль на Господа: яко у Господа милость, и многое у Него избавление:

**131** Господи, не вознесеса сердце мое, ниже вознесостеса очи мои: ниже ходих в великих, ниже в дивных паче мене. 2 Аще не смиренумудрствовах, но вознесох душу мою, яко одоеное на мать свою, тако воздаси на душу мою. 3 Да уповает Израиль на Господа отныне и до века.

**132** Помяни, Господи, Давида и всю кротость его: 2 яко клятятся Господеви, обещася Богу Иаковлю: 3 аще вниду в селение дому моего, или възыду на одр постели моя: 4 аще дам сон очима моима, и веждома моима дремание, и покой скраниама моима: 5 дондеже обрящу место Господеви, селение Богу Иаковлю. 6 Се, слышахом я во Евфрафе, обретохом я в полях Дубравы: 7 внидем в селения Его, поклонимся на место, идеже стоясте нозе Его. 8 Воскресени, Господи, в покой Твой, Ты и кивот святыни Твоя. 9 Священницы Твои облекутся правдою, и преподобнии Твои возрадуются. 10 Давида ради раба Твоего, не отврати лице помазаннаго Твоего. 11 Клятятся Господь Давиду истинною, и не отвержется ея: от плода чрева твоего посажду на престоле твоем. 12 Аще сохранят сынове твои завет Мой и свидения Моя сия, имже научу я, и сынове их до века сядут на престоле твоем. 13 Яко избра Господь Сиона, изволи и в жилище Себе. 14 Сей покой Мой во век века, zde вселюся, яко изволих и. 15 Ловитву его благословляяй благословлю, нищыя его насыщу хлебы: 16 священники его облеку во спасение, и преподобнии его радостию возрадуются. 17 Тамо возращу рог Давидови, уготовах светилник помазанному Моему. 18 Враги его облеку студом, на немже процветет святыня моя.

**133** Се, что добро, или что красно, но еже жити братии вкупе? 2 Яко миро на главе, сходящее на браду, браду Аарону, сходящее на ометы одежды его: 3 яко роса Аермонская сходящая на горы Сионския: яко тамо заповеда Господь благословение и живот до века.

**134** Се, ныне благословите Господа, вси раби Господни, стоящие в храме Господни, во дворех дому Бога нашего. 2 В нощех воздежите руки ваша во святая и благословите Господа. 3 Благословит тя Господь от Сиона, сотворивый небо и землю.

**135** Хвалите имя Господне, хвалите, раби Господа, 2 стоящие во храме Господни, во дворех дому Бога нашего. 3 Хвалите Господа, яко благ Господь: пойте имени Его, яко добро: 4 яко Иакова избра Себе Господь, Израиля в достояние Себе: 5 яко аз познах, яко велий Господь, и Господь наш над всеми боги: 6 вся, елика восхоте Господь, сотвори на небеси и на земли, в морях и во всех безднах. 7 Возводя облаки от последних земли, молнии в дождь сотвори, изводяй ветры от сокровищ Своих. 8 Иже порази первенцы Египетския от человека до скота: 9 посла знамения и чудеса посреде тебе, Египте, на фараона и на вся рабы его. 10 Иже порази языки многи и изби цари крепки: 11 Сиона царя Аморрейска и Ога царя Васанска, и вся царствия Ханаанска: 12 и даде землю их достояние, достояние Израилю людем Своим. 13 Господи, имя Твое в век, и память Твоя в род и род: 14 яко судити имать Господь людем Своим, и о рабех Своих умолится. 15 Идоли язык сребро и злато, дела рук человеческих: 16 уста имут, и не возглаголют: очи имут, и не узрят: 17 уши имут, и не услышат: ниже бо есть дух во устех их. 18 Подобни им да будут творящии я и вси надеющиися на ня. 19 Доме Израилев, благословите Господа: доме Ааронь, благословите Господа: доме Левиин, благословите Господа: 20 боящиися Господа, благословите Господа. 21 Благословен Господь от Сиона, живый во Иерусалиме.

**136** Исповедайтесь Господеви, яко благ: яко в век милость Его. 2 Исповедайтесь Богу богов: яко в век милость Его. 3 Исповедайтесь Господеви господей: яко в век милость Его. 4 Сотворшему чудеса велия единому: яко в век милость Его. 5 Сотворшему небеса разумом: яко в век милость Его. 6 Утвердившему землю на водах: яко в век милость Его. 7 Сотворшему светила велия единому: яко в век милость Его: 8 солнце во область дне: яко в век милость Его: 9 луну и звезды во область ночи: яко в век милость Его. 10 Поразившему Египта с первенцы его: яко в век милость Его: 11 и изведшему Израиля от среды их: яко в век милость Его: 12 рукою крепкою и мышцею высокою: яко в век милость Его. 13 Раздельшему Чермное море в разделения: яко в век милость Его: 14 и проведшему Израиля посреде его: яко в век милость Его: 15 и истрясшему фараона и силу его в море Чермное: яко в век милость Его. 16 Проведшему люди Своя в пустыни: яко в век милость Его. 17 Поразившему цари велия: яко в век милость Его. 18 И убившему цари крепкия: яко в век милость Его: 19 Сиона царя Аморрейска: яко в век милость Его: 20 и Ога царя Васанска: яко в век милость Его. 21 И давшему землю их достояние: яко в век милость Его: 22 достояние Израилю рабу Своему: яко в век милость Его. 23 Яко во смирении нашем помяну ны Господь: яко в век милость Его. 24 И избавил ны есть от врагов наших: яко в век милость Его: 25 даяй пищу всякой плоти: яко в век милость Его. 26 Исповедайтесь Богу небесному: яко в век милость Его.

**137** На реках Вавилонских, тамо седохом и плакахом, вегда помянути нам Сиона: 2 на вербиих посреде его

обесихом органы наша. 3 Яко тамо вопросиша ны пленшии нас о словесех песней, и ведшии нас о пении: воспойте нам от песней Сионских. 4 Какое воспоем песнь Господню на земли чуждей? 5 Аще забуду тебе, Иерусалиме, забвена буди десница моя. 6 Прильпни язык мой гортани моему, аще не помяну тебе, аще не предложу Иерусалима, яко в начале веселия моего. 7 Помяни, Господи, сыны Едомския в день Иерусалимль глаголющья: истощайте, истощайте до оснований его. 8 Дщи Вавилоны окаянная, блажен, иже воздаст тебе воздаяние твое, еже воздала еси нам: 9 блажен, иже имет и разбьет младенцы твоя о камень.

**138** Исповемся Тебе, Господи, всем сердцем моим, и пред ангелы воспую Тебе, яко услышал еси вся глаголы уст моих: 2 поклонюся ко храму святому Твоему и исповемся имени Твоему о милости Твоей и истине Твоей, яко возвеличил еси над всем имя Твое святое. 3 В оньже аще день призову Тя, скоро услыши мя: умножиши мя в души моей силою Твоею. 4 Да исповедятся Тебе, Господи, вси царие земстии, яко услышаша вся глаголголы уст Твоих: 5 и да воспоят в путех Господних, яко велия слава Господня: 6 яко высок Господь, и смиренныя призирает, и высокая издалеча весть. 7 Аще пойду посреде скорби, живиши мя: на гнев враг моих простерл еси руку Твою, и спасе мя десница Твоя. 8 Господь воздаст за мя: Господи, милость Твоя во век: дел руку Твоею не презри.

**139** Господи, искусил мя еси и познал мя еси: ты познал еси седание мое и востание мое. 2 Ты разумел еси помышления моя издалеча: 3 стезю мою и уже мое Ты еси изследовал и вся пути моя провидел еси. 4 Яко несть лъсти в языке моем:

се, Господи, Ты познал еси 5 вся последняя и древняя: Ты создал еси мя и положил еси на мне руку Твою. 6 Удивися разум Твой от мене, утвердися, не возмогу к нему. 7 Камо пойду от Духа Твоего? И от лица Твоего камо бежу? 8 Аще възыду на небо, Ты тамо еси: аще сниду во ад, тамо еси. (Sheol h7585) 9 Аще возму криле мои рано и вселюся в последних моря, 10 и тамо бо рука Твоя наставит мя, и удержит мя десница Твоя. 11 И рех: еда тма поперет мя? И ночь просвещение в сладости моей. 12 Яко тма не помрачится от Тебе, и ночь яко день просветится: яко тма ея, тако и свет ея. 13 Яко Ты создал еси утробы моя, восприял мя еси из чрева матере моя. 14 Исповемя Тебе, яко страшно удивился еси: чудна дела Твоя, и душа моя знает зело. 15 Не утаися кость моя от Тебе, юже сотворил еси в тайне, и состав мой в преисподних земли. 16 Несоделанное мое видесте очи Твои, и в книзе Твоей вси напишутся: во днех созиждутся, и никтоже в них. 17 Мне же зело честни быша друзи Твои, Боже, зело утвердишася владычества их: 18 изочту их, и паче песка умножатся: востах, и еще есмь с Тобою. 19 Аще избиеши грешники, Боже: мужие кровей, уклонитесь от мене. 20 Яко ревниви есте в помышлениях, примут в суету грады Твоя. 21 Не ненавидащыя ли Тя, Господи, возненавидех, и о вразех Твоих истаях? 22 Совершенною ненавистию возненавидех я: во враги быша ми. 23 Искуси мя, Боже, и увеждь сердце мое: истяжи мя и разумей стези моя: 24 и виждь, аще путь беззакония во мне, и настави мя на путь вечен.

**140** Изми мя, Господи, от человека лукава, от мужа неправедна избави мя: иже помыслиша неправду в сердцы,



весь день ополчаху брани: 2 изостриша язык свой яко змиин: яд аспидов под устнами их. 3 Сохрани мя, Господи, из руки грешничи, от человек неправедных изми мя, иже помыслиша запяты стопы моя. 4 Скрыша гордии сеть мне и ужы, препяша сеть ногама моима: 5 при стези соблазны положиша ми. 6 Рех Господеви: Бог мой еси Ты, внуши, Господи, глас моления моего. 7 Господи, Господи, сило спасения моего, осенил еси над главою моею в день брани. 8 Не предаждь мене, Господи, от желания моего грешнику: помыслиша на мя, не остави мене, да не когда вознесутся. 9 Глава окружения их, труд устен их покрывает я. 10 Падут на них угля огненная, низложиши я во страстех, и не постоят. 11 Муж язычен не исправится на земли: мужа неправедна злая уловят во истление. 12 Познах, яко сотворит Господь суд нищым и месть убогим. 13 Обаче праведнии исповедятся имени Твоему, и вселятся правии с лицом Твоим.

**141** Господи, воззвах к Тебе, услыши мя: вонми гласу моления моего, внегда воззвати ми к Тебе. 2 Да исправится молитва моя яко кадило пред Тобою: воздеяние руку моею, жертва вечерняя. 3 Положи, Господи, хранение устом моим и дверь ограждения о устнах моих. 4 Не уклони сердце мое в словеса лукавствия, непщевати вины о гресех с человеки делающими беззаконие: и не сочтуса со избранными их. 5 Накажет мя праведник милостию и обличит мя, елей же грешнаго да не намастит главы моея: яко еще и молитва моя во благоволениях их. 6 Пожертвы быша при камени судии их: услышатся глаголи мои, яко возмогоша. 7 Яко толща земли проседесе на земли, расточишася кости их при аде. (Sheol h7585) 8 Яко к Тебе, Господи, Господи, очи мои: на Тя уповах,

не отими душу мою: 9 сохрани мя от сети, юже составиша ми, и от соблазн делающих беззаконие. 10 Падут во мрежу свою грешницы: един есмь аз, дондеже прейдю.

**142** Разума Давиду, внегда быти ему в вертепе молящемуся. 2 Гласом моим ко Господу воззвах, гласом моим ко Господу помолихся. 3 Пролию пред Ним моление мое, печаль мою пред ним возвещу. 4 Внегда исчезати от мене духу моему, и ты познал еси стези моя: на пути сем, по немуже хождах, скрыша сеть мне. 5 Смахнух одесную и возгледах, и не бе знайя мене: погибе бегство от мене, и несть възыскайя душу мою. 6 Воззвах к Тебе, Господи, рех: Ты еси упование мое, часть моя еси на земли живых. 7 Вонми молению моему, яко смирихся зело: избави мя от гонящих мя, яко укрепишася паче мене. Изведи из темницы душу мою, исповедатися имени Твоему: мене ждут праведницы, дондеже въздаси мне.

**143** Господи, услыши молитву мою, внуши моление мое во истине Твоей, услыши мя в правде Твоей: 2 и не вниди в суд с рабом Твоим, яко не оправдится пред Тобою всяк живый. 3 Яко погна враг душу мою: смирил еси в землю живот мой: посадил мя еси в темных, яко мертвыя века. 4 И уны во мне дух мой, во мне смятесе сердце мое. 5 Помянух дни древния, поучихся во всех делех Твоих, в творениих руку Твоею поучахся. 6 Воздех к Тебе руке мои: душа моя яко земля безводная Тебе. 7 Скоро услыши мя, Господи, исчезе дух мой: не отврати лица Твоего от мене, и уподоблюся низходящым в ров. 8 Слышану сотвори мне заутра милость Твою, яко на Тя уповах: скажи мне, Господи, путь, в оньже пойду, яко к Тебе възях душу мою. 9 Изми мя от враг моих,

Господи, к Тебе прибегах. 10 Научи мя творити волю Твою, яко Ты еси Бог мой: Дух Твой благий наставит мя на землю праву. 11 Имене Твоего ради, Господи, живиши мя правдою Твоею: изведеши от печали душу мою: 12 и милостию Твоею потребиши враги моя и погубиши вся стужающыя души моей: яко аз раб Твой есмь.

**144** Благословен Господь Бог мой, научаяй руце мои на ополчение, персты моя на брань. 2 Милость моя и прибежище мое, заступник мой и Избавитель мой, защититель мой, и на Него уповах: повинуй люди моя под мя. 3 Господи, что есть человек, яко познался еси ему? Или сын человекь, яко вменяеши его? 4 Человек суете уподобися: дние его яко сень преходят. 5 Господи, преклони небеса, и сниди: коснися горам, и воздымятся: 6 блесни молнию, и разженеши я: послы стрелы Твоя, и смятеши я. 7 Посли руку Твою с высоты, изми мя и избави мя от вод многих, из руки сынов чуждих, 8 ихже уста глаголаша суету, и десница их десница неправды. 9 Боже, песнь нову воспою Тебе, во псалтири десятиструннем пою Тебе: 10 дающему спасение царем, избавляющему Давида раба Своего от меча люта. 11 Избави мя и изми мя из руки сынов чуждих, ихже уста глаголаша суету, и десница их десница неправды: 12 ихже сынове их яко новосаждения водружена в юности своей, дщери их удобрены, преукрашены яко подобие храма: 13 хранилища их исполнена, отрыгающая от сего в сие: овцы их многоплодны, множащыяся во исходищих своих: волове их толсти: 14 несть падения оплоту, ниже прохода, ниже вопля в стогнах их. 15 Ублажиша люди, имже сия суть: блажени людие, имже Господь Бог их.

**145** Вознесу Тя, Боже мой, Царю мой, и благословлю имя Твое в век и в век века. 2 На всяк день благословлю Тя, и восхваляю имя Твое в век и в век века. 3 Велий Господь и хвален зело, и величию Его несть конца. 4 Род и род восхвалят дела Твоя и силу Твою возвестят: 5 великолепие славы святыни Твоя возглаголют и чудеса Твоя поведят: 6 и силу страшных Твоих рекут и величие Твое поведят: 7 память множества благодати Твоя отрыгнут и правдою Твоею возрадуются. 8 Щедр и милостив Господь, долготерпелив и многомилостив. 9 Благ Господь всяческим, и щедроты Его на всех делах Его. 10 Да исповедятся Тебе, Господи, вся дела Твоя, и преподобнии Твои да благословят Тя: 11 славу царствия Твоего рекут и силу Твою возглаголют, 12 сказати сыновом человеческим силу Твою и славу великолепия царствия Твоего. 13 Царство Твое царство всех веков, и владычество Твое во всяком роде и роде: верен Господь во всех словесех Своих и преподобен во всех делах Своих. 14 Утверждает Господь вся низпадающыя и возставляет вся низверженныя. 15 Очи всех на Тя уповают, и Ты даеши им пищу во благовремени: 16 отверзаеши ты руку Твою и исполняеши всякое животно благоволения. 17 Праведен Господь во всех путех Своих и преподобен во всех делах Своих. 18 Близ Господь всем призывающим Его, всем призывающим Его во истине: 19 волю боящихся Его сотворит, и молитву их услышит, и спасет я. 20 Хранит Господь вся любящыя Его, и вся грешники потребит. 21 Хвалу Господню возглаголют уста моя: и да благословит всяка плоть имя святое Его в век и в век века.

**146** Хвали, душе моя, Господа: **2** восхваляю Господа в животе моем, пою Богу моему, дондеже есмь. **3** Не надейтесь на князи, на сыны человеческия, в нихже несть спасения. **4** Изыдет дух его, и возвратится в землю свою: в той день погибнут вся помышления его. **5** Блажен, емуже Бог Иаковль помощник его, упование его на Господа Бога своего, **6** сотворшаго небо и землю, море, и вся, яже в них: хранящаго истину в век, **7** творящаго суд обидимым, дающаго пищу алчущым. Господь решит окованныя: **8** Господь умудряет слепцы: Господь возводит низверженныя: Господь любит праведники. **9** Господь хранит пришелцы, сира и вдову примет, и путь грешных погубит. **10** Воцарится Господь во век, Бог твой, Сионе, в род и род.

**147** Хвалите Господа, яко благ псалом: Богови нашему да усладится хваление. **2** Зиждай Иерусалима Господь: разсеяния Израилева соберет: **3** изцеляй сокрушенныя сердцем и обязуяй сокрушения их: **4** изчитаяй множество звезд, и всем им имена нарицаая. **5** Велий Господь наш, и велия крепость Его, и разума Его несть числа. **6** Приемляй кроткия Господь, смиряяй же грешники до земли. **7** Начните Господеву во исповедании, пойте Богови нашему в гуслах: **8** одевающему небо облаки, уготовляющему земли дождь: прозябающему на горах траву и злак на службу человеком: **9** дающему скотом пищу их, и птенцем врановым призывающим Его. **10** Не в силе констей восхощет, ниже в лыстех мужеских благоволит: **11** благоволит Господь в боящихся Его и во уповающих на милость Его. **12** Похвали, Иерусалиме, Господа, хвали Бога твоего, Сионе: **13** яко укрепи верей врат твоих, благослови сыны твоя в тебе. **14**

Полагаяй пределы твоя мир, и тука пшенична насыщаяй  
тя: **15** посылаяй слово Свое земли, до скорости течет  
слово Его, **16** дающего снег свой яко волну, мглу яко пепел  
посыпающего, **17** метаящего голоть Свой яко хлебы: противу  
лица мразя Его кто постоит? **18** Послет слово Свое, и истает  
я: дхнет дух Его, и потекут воды. **19** Возвещаяй слово Свое  
Иакову, оправдания и судьбы Своя Израилеви: **20** не сотвори  
такo всякому языку, и судьбы Своя не яви им.

**148** Хвалите Господа с небес, хвалите Его в вышних. **2**  
Хвалите Его вси Ангели Его: хвалите Его, вся силы Его. **3**  
Хвалите Его, солнце и луна: хвалите Его вся звезды и свет. **4**  
Хвалите Его, небеса небес и вода, яже превыше небес. **5** Да  
восхвалят имя Господне: яко Той рече, и быша: Той повеле,  
и создашася. **6** Постави я в век и в век века: повеление  
положи, и не мимо идет. **7** Хвалите Господа от земли, змиеве  
и вся бездны: **8** огонь, град, снег, голоть, дух бурен, творящая  
слово Его: **9** горы и вси холми, древа плодоносна и вси  
кедри: **10** зверие и вси скоти, гади и птицы пернаты: **11**  
царие земстии и вси людие, князи и вси судии земстии: **12**  
юноши и девы, старцы с юнотами. **13** Да восхвалят имя  
Господне: яко вознесется имя Того единого, исповедание  
Его на земли и на небеси. **14** И вознесет рог людей Своих:  
песнь всем преподобным Его, сыновом Израилевым, людям  
приближающимся Ему.

**149** Воспойте Господеви песнь нову: хваление Его в церкви  
преподобных. **2** Да возвеселится Израиль о сотворшем  
его, и сынове Сиони возрадуются о Цари своем. **3** Да  
восхвалят имя Его в лице, в тимпане и псалтири да поют  
Ему. **4** Яко благоволит Господь в людех Своих, и вознесет

кроткия во спасение. 5 Восхвалятся преподобнии во славе и  
возрадуются на ложах своих. 6 Возношения Божия в гортани  
их, и мечи обоюду остры в руках их: 7 сотворити отмщение  
во языцех, обличения в людех: 8 связати цари их путы, и  
славныя их ручными оковы железными: 9 сотворити в них  
суд написан. Слава сия будет всем преподобным Его.

**150** Хвалите Бога во святых Его, хвалите Его во утверждении  
силы Его: 2 хвалите Его на силах Его, хвалите Его по  
множеству величества Его: 3 хвалите Его во гласе трубнем,  
хвалите Его во псалтири и гуслех: 4 хвалите Его в тимпане  
и лице, хвалите Его во струнах и органе: 5 хвалите  
Его в кимвалех доброгласных, хвалите Его в кимвалех  
восклицания. 6 Всякое дыхание да хвалит Господа.

# Притчи Соломона

**1** Притчи Соломона сына Давидова, иже царствова во Израили, **2** познати премудрость и наказание и уразумети словеса мудрости, **3** прияти же извития словес и разрешения гаданий, уразумети же правду истинную и суд исправляти: **4** да даст незлобивым коварство, отрочати же юну чувство же и смысл. **5** Сих бо послушав, мудрый премудрее будет, а разумный строителство стяжет: **6** уразумеет же притчу и темное слово, речения же премудрых и гадания. **7** Начало премудрости страх Господень, разум же благ всем творящим его: благочестие же в Бога начало чувства, премудрость же и наказание нечестивии уничтожат. **8** Слыши, сыне, наказание отца твоего и не отрини заветов матере твоея: **9** венец бо благодатей примемши на твоём версе и гривну злату о твоей выи. **10** Сыне, да не прельстят тебе мужие нечестивии, ниже да восхощеши, **11** аще помолят тя, глаголюще: иди с нами, приобщися крове, скроем же в землю мужа праведна неправедно: **12** пожрем же его якоже ад жива, и возмем память его от земли, (Sheol h7585) **13** стяжание его многоценное приимем, исполним же дома наша корыстей: **14** жребий же твой положи с нами: обще же влагалище стяжем вси, и мешец един да будет всем нам. **15** Не иди в путь с ними: уклони же ногу твою от стезь их: **16** нозе бо их на зло текут, и скоры суть излияти кровь. **17** Не без правды бо простираются мрежи пернатым: **18** тии бо убийству приобщающися, сокровищствуют себе злая: разрушение же мужей законопреступных зло. **19** Сии путие суть всех творящих беззаконная: нечестием бо свою душу отемлют. **20** Премудрость во исходех поется, в стогнах же дерзновение



водит, 21 на краях же стен проповедуется, у врат же сильных приседит, во вратех же града дерзаючи глаголет: 22 елико убо время незлобивии держатся правды, не постыдятся: безумнии же досады суще желателие, нечестивии бывше, возненавидеша чувство 23 и повинни быша обличением. Се, предложу вам моего дыхания речение, научу же вас моему словеси. 24 Понеже звах, и не послушасте, и простирах словеса, и не внимасте, 25 но отместе моя советы и моим обличением не внимасте: 26 убо и аз вашей погибели посмеюся, порадуясь же, егда приидет вам пагуба, 27 и егда приидет на вы внезапно мятеж, низвращение же подобно бури приидет, или егда приидет вам печаль и градоразорение, или егда найдет на вы пагуба. 28 Будет бо егда призовете мя, аз же не послушаю вас: взыщут мене злии и не обрящут. 29 Возненавидеша бо премудрость, словесе же Господня не прияша: 30 ниже хотеша внимати моим советом, ругахуся же моим обличением. 31 Темже снedyт своих путей плоды и своего нечестия насытятся: 32 ибо, зане обидеша младенцев, убиени будут, и истязание нечестивыя погубит. 33 Мене же слушаый вселится на уповании и почует без страха от всякаго зла.

**2** Сыне, аще приим глагол моя заповеди, скроеши в себе, 2 послушает премудрости твое ухо, и приложиши сердце твое к разуму: приложиши же е в наказание сыну твоему. 3 Аще бо премудрость призовеши и разуму даси глас твой, чувство же взыщеша великим гласом, 4 и аще взыщеша ея яко сребра, и якоже сокровища испытаеши ю: 5 тогда уразумееша страх Господень и познание Божие обрящеша: 6 яко Господь дает премудрость, и от лица

Его познание и разум: 7 и сокровиществует исправляющим спасение, защищает же шествие их, 8 еже сохранить пути оправданий, и путь благоговеинствующих Его сохранит. 9 Тогда уразумеешь правду и суд и исправиши вся стези благия. 10 Аще бо приидет премудрость в твою мысль, чувство же твоей души добро быти возмнится. 11 Совет добр сохранит тя, помышление же преподобное соблюдет тя, 12 да избавит тя от пути злаго и от мужа, глаголюща ничтоже верно. 13 О, оставившии пути правыя, еже ходити в путех тмы! 14 О, веселящихся о злых и радующихся о развращении злем! 15 Ихже стези стропотны, и крива течения их, еже далече тя сотворити от пути права, 16 и чужда от праведнаго разума. Сыне, да тя не постигнет совет злый, 17 оставляяй учение юности, и завета Божественнаго забывый: 18 постави бо при смерти дом свой и при аде с земными деяния своя. (questioned) 19 Все ходящие по нему не возвратятся, ниже постигнут стезь правых: ни бо достигнут лет жизни. 20 Аще бо быша ходили в стези благия, обрели убо быша стези правы гладки: блази будут жители на земли, незлобивии же останут на ней: 21 яко правии вселятся на земли, и преподобнии останут на ней. 22 Путие нечестивых от земли погибнут, пребеззаконнии же изринутся от нея.

**3** Сыне, моих законов не забывай, глаголы же моя да соблюдает твое сердце: 2 долготу бо жития и лета жизни и мир приложат тебе. 3 Милостыни и вера да не оскудевают тебе: обложи же я на твоей выи и напиши я на скрижали сердца твоего: и обрящещи благодать. 4 И промышляй добрая пред Господем (Богом) и человеки. 5 Буди уповая всем сердцем на Бога, о твоей же премудрости не возносия:

6 во всех путех твоих познавай ю, да исправляет пути твоя. 7 Не буди мудр о себе: бойся же Бога и уклоняйся от всякого зла: 8 тогда изцеление будет телу твоему и уврачевание костем твоим. 9 Чти Господа от праведных твоих трудов и начатки давай ему от твоих плодов правды: 10 да исполнятся житницы твоя множеством пшеницы, вино же точила твоя да источают. 11 Сыне, не пренебрегай наказания Господня, ниже ослабевай от Него обличаемь: 12 егоже бо любит Господь, наказует, биет же всякого сына, егоже приемлет. 13 Блажен человек, иже обрете премудрость, и смертен, иже уведет разум. 14 Лучше бо сию куповати, нежели злата и сребра сокровища: 15 честнейша же есть камней многоценных: не сопротивляется ей ничтоже лукаво, благознатна есть всем приближающимся ей: всяко же честное недостойно ея есть. 16 Долгота бо жития и лета жизни в деснице ея, в шуйце же ея богатство и слава: от уст ея исходит правда, закон же и милость на языке носит. 17 Путие ея путие добри, и вся стези ея мирны. 18 Древо живота есть всем держащимся ея, и воскланяющимся на ню, яко на Господа, тверда. 19 Бог премудростию основа землю, уготова же небеса разумом: 20 в чувстве Его бездны разверзошася, облацы же источиша росу. 21 Сыне, да не преминеш, соблюди же мой совет и мысль: 22 да жива будет душа твоя, и благодать будет на твоей выи: (будет же изцеление плотем твоим и уврачевание костем твоим: ) 23 да ходиши надеяся в мире во всех путех твоих, нога же твоя не поткнется. 24 Аще бо сядеши, безбязнен будеши, аще же поспиши, сладостно поспиши. 25 И не убоишися страха нашедшаго, ниже устремления нечестивых находящаго: 26 Господь бо будет на всех путех

твоих и утвердит ногу твою, да не поползнешися. 27 Не отрецись благотворити требующему, егда имать рука твоя помогати. 28 Не рцы: отшед возвратися, и завтра дам, сильну ти сущу благотворити: не веси бо, что породит день находяй. 29 Не соплетай на друга твоего зла, пришелца суща и уповающа на тя. 30 Не враждуй на человека туне, да не что на тя содеет злое. 31 Не стяжи злых мужей поношения, ни возревнуй путем их. 32 Нечист бо пред Господем всяк законопреступник и с праведными не сочетается. 33 Клятва Господня в домех нечестивых, дворы же праведных благословляются. 34 Господь гордым противится, смиренным же дает благодать. 35 Славу премудрии наследят, нечестивии же вознесоша безчестие.

**4** Послушайте, дети, наказания отча и внимлите разумети помышление, 2 дар бо благий дарю вам: моего закона не оставляйте. 3 Сын бо бых и аз отцу послушливый, и любимый пред лицом матере, 4 иже глаголаша и учиша мя: да утверждается наше слово в твоём сердце: храни заповеди, не забывай: 5 стяжи премудрость, стяжи разум: не забуди, ниже презри речения моих уст, ниже уклонися от глагол уст моих. 6 Не остави ея, и имется тебе: возжелей ея, и соблюдет тя. 7 Начало премудрости: стяжати премудрость, и во всем стяжании твоём стяжи разум. 8 Огради ю, и вознесет тя: почти ю, да тя оымет, 9 да даст главе твоей венец благодатей, венцем же сладости защитит тя. 10 Слыши, сыне, и приими моя словеса, и умножатся лета живота твоего, да ти будут мнози путие жития. 11 Путем бо премудрости учу тя, наставляю же тебе на течения правая: 12 аще бо ходиши, не запнутся стопы твоя: аще ли течеши,

не утрудишься. 13 Имися моего наказания, не остави, но сохрани е себе в жизнь твою. 14 На пути нечестивых не иди, ниже возревнуй путем законопреступных. 15 На немже аще месте воя соберут, не иди тамо: уклонися же от них и измени: 16 не уснут бо, аще зла не сотворят: отимется сон от них, и не спят: 17 тии бо питаются пищею нечестия, вином же законопреступным упиваются. 18 Путие же праведных подобне свету светятся: предходят и просвещают, дондеже исправится день. 19 Путие же нечестивых темни: не ведут, како претыкаются. 20 Сыне, моим глаголом внимай, к моим же словесем прилагай ухо твое: 21 да не оскудеют ти источники твои, храни я в сердцы твоим: 22 живот бо суть всем обретающим я и всей плоти их изцеление. 23 Всяцем хранением блюди твое сердце: от сих бо исходища живота. 24 Отими от себе строплива уста, и обидливы устне далече от тебе отрини. 25 Очи твои право да зрят, и вежди твои да помавают праведная. 26 Права течения твори твоима ногама и пути твоя исправляй. 27 Не уклонися ни на десно, ни на шуе: отврати же ногу твою от пути зла:

**5** Сыне, моей премудрости внимай, к моим же словесем прилагай ухо твое, 2 да сохраниши мысль благою: чувство же моих устен заповедает тебе. 3 Не внимай злей жене: мед бо каплет от устен жены блудницы, яже на время наслаждает твой гортань: 4 последи же горчае желчи обрящеши, и изоощренну паче меча обоюду остра: 5 безумия бо нозе низводят употребляющих ю со смертию во ад, стопы же ея не утверждаются: (Sheol h7585) 6 на пути бо животныя не находит, заблужденна же течения ея и неблагоразумна. 7 Ныне убо, сыне, послушай мене и не отриновенна сотвори моя

словеса: **8** далече от нея сотвори путь твой и не приближися ко дверем домов ея, **9** да не предаст иным живота твоего, и твоего жития немилостивым, **10** да не насытятся инии твоя крепости, твои же труды в дома чуждыя внидут, **11** и раскаешися на последок твой, егда иструтся плоти тела твоего, и речеши: **12** како возненавидех наказание, и от обличений уклонися сердце мое? **13** Не послушах гласа наказующаго мя, и ко учащему мя не прилагах уха моего: **14** в мале бех во всяцем зле посреде церкви и сонмища. **15** Сыне, пий воды от своих сосудов и от твоих кладенцев Источника: **16** да преизливаются тебе воды от твоего источника, во твоя же пути да происходят твоя воды. **17** Да будут тебе единому имения, и да никтоже чуждъ причастится тебе. **18** Источник твоя воды да будет тебе твой, и веселися с женою, яже от юности твоя: **19** елень любви и жребя твоих благодатей да беседует тебе, твоя же да предидет тебе и да будет с тобою во всяко время: в дружбе бо сея спребываяй умножен будеши. **20** Не мног буди к чуждей, ниже объят буди объятии не твоя: **21** пред очима бо суть Божиима путие мужа, вся же течения его назират. **22** Законопреступления мужа уловляют: пленицами же своих грехов кийждо затызается. **23** Сей скончается с ненаказанными: от множества же своего жития извержется и погибает за безумие.

**6** Сыне, аще поручишися за твоего друга, предаши твою руку врагу. **2** Сеть бо крепка мужу свои устне, и пленяется устнами своих уст. **3** Твори, сыне, яже аз заповедую ти, и спасайся: идеши бо в руке злых за твоего друга: буди не ослабевая, поощряй же и твоего друга, егоже испоручил еси. **4** Не даждь сна твоима очима, ниже да воздремлеши твоима

веждома, 5 да спасешися аки серна от тенет и яко птица от сети. 6 Иди ко мравию, о, лениве, и поревнуй видеви пути его, и буди онаго мудрейший: 7 он бо, не сущу ему земледелцу, ниже нудящаго его имей, ниже под владыкою сый, 8 готовит в жатву пищу и многое в лето творит уготовление. Или иди ко пчеле и увещь, коль делателница есть, делание же коль честное творит: еяже трудов царие и простию во здравие употребляют, любима же есть всеми и славна: аще силою и немощна сущи, (но) премудростию почтена произведется. 9 Доколе, о, лениве, лежиши? Когда же от сна востанеши? 10 Мало убо спиши, мало же седиши, мало же дремлеши, мало же объемиши перси рукама: 11 потом же найдет тебе аки зол путник убожество: скудость же аки благий течец. Аще же не ленив будеши, приидет яко источник жатва твоя, скудость же аки злый течец (от тебе) отбежит. 12 Муж безумен и законопреступный ходит в пути не благи: 13 той же намизает оком и знамение дает ногою, учит же помаванием перстов. 14 Развращенно же сердце кует злая: на всякое время таковой мятежи составляет граду. 15 Сего ради внезапно приходит ему погибель, разсечение и сокрушение неизцельное. 16 Яко радуется о всех, ихже ненавидит Бог, сокрушается же за нечистоту души: 17 око досадителя, язык неправедный, руже проливающая кровь праведнаго, 18 и сердце кующее мысли злы, и нозе тщащяся зло творити потребятся. 19 Разжизает лжи свидетель неправеден и насылает суды посреде братий. 20 Сыне, храни законы отца твоего и не отрини наказания матери твоея: 21 навяжи же я на твою душу присно и обяжи их о твоей выи. 22 Егда ходиши, води ю, и с тобою да будет: егда же спиши, да хранит тя, да востающу ти глаголет с

тобою. 23 Зане светилник заповедь закона и свет, и путь жизни, и обличение, и наказание, 24 еже сохранить тя от жены мужаты и от наваждения языка чуждаго. 25 Сыне, да не победит тя доброты похоть, ниже уловлен буди твоима очима, ниже да совосхитишися веждами ея. 26 Цена бо блудницы, елика единого хлеба: жена же мужей честных души уловляет. 27 Вяжет ли кто огонь в недра, риз же (своих) не сожжет ли? 28 Или ходити кто будет на углиех огненных, ног же не сожжет ли? 29 Тако вшедый к жене мужатей не без вины будет, ниже всяк прикасайся ей. 30 Не дивно, аще кто ят будет крадый: крадет бо, да насытит душу свою алчущую: 31 аще же ят будет, воздаст седмицею, и вся имения своя дав, избавит себе. 32 Прелюбодей же за скудость ума погибель души своей содевает, 33 болезни же и безчестие понесет: поношение же его не загладится во век: 34 исполнена бо ревности ярость мужа ея: не пощадит в день суда, 35 не изменит ни единою ценою вражды, ниже разрешится многими дарми.

**7** Сыне, храни моя словеса, моя же заповеди скрый у себе. Сыне, чти Господа, и укрепишися: кроме же Его не бойся иного. 2 Храни моя заповеди, и поживеши, словеса же моя яко зеницы очию: 3 обложи же ими твоя персты, напиши же я на скрижали сердца твоего. 4 Нарцы премудрость сестру тебе быти, разум же знаемь сотвори тебе, 5 да ты соблюдет от жены чуждия и лукавия, аще ты словесы льстивыми облагати начнет: 6 оконцем бо из дому своего на пути приничуши, 7 егоже аще узрит от безумных чад юношу скудоумна, 8 проходящаго мимо угла в распутиих дому ея 9 и глаголющаго в темный вечер, егда упокоение



будет noctное и мрачное: 10 жена же срящет его, зрак  
имущи прелюбодейничь, яже творит юных парити сердцам:  
воскрилена же есть и блудна, 11 в дому же не почивают нозе  
ея: 12 время бо некое вне глумится, время же на распутиих  
при всяцем угле приседит: 13 потом емши лобзает его,  
безстудным же лицом речет к нему: 14 жертва мирна ми есть,  
днесь въздаю обеты моя: 15 сего ради изыдох в сретение  
тебе, желающи лица твоего, обретох тя: 16 простиралами  
покрых одр мой, коврами же сугубыми постлах, иже от  
Египта, 17 шафраном посыпах ложе мое и дом мой корицею:  
18 прииди и насладимся любве даже до утра, гряди и  
повалеемся в похоти: 19 несть бо мужа моего в дому, отиде в  
путь далече, 20 доволно сребра взя с собою, по многих днех  
возвратится в дом свой. 21 И прельсти его многою беседою,  
тенетами же устен (в блуд) привлече его. 22 Он же абие  
последова ей объюродев, и якоже вол на заколение ведется,  
и яко пес на узы, 23 или яко елень уязвлен стрелою в ятра: и  
спешит яко птица в сеть, не ведый, яко на душу свою течет.  
24 Ныне убо, сыне, послушай мене и внимай глаголом уст  
моих, 25 да не уклонится в пути ея сердце твое, 26 и да не  
прельстишиися в стезях ея: многих бо уязвивши низверже, и  
безчисленни суть, ихже убила есть: 27 путие адовы дом ея,  
низводящии в сокровища смертная. (Sheol h7585)

**8** Темже ты премудрость проповеждь, да разум послушает  
тебе. 2 На высоких бо краех есть, посреде же стезь  
стоит: 3 при вратех бо сильных приседит, во входех  
же поется. 4 Вас, о, человецы, молю, и вдаю мой глас  
сыном человеческим. 5 Уразумейте, незлобивии, коварство,  
ненаказаннии же, приложите сердце. 6 Послушайте мене:

честная бо реку и изнесу от устен правая. 7 Яко истине поучится гортань мой, мерзки же предо мною устны лживыя.

8 С правдою вси глаголы уст моих, ничтоже в них стропотно, ниже развращенно. 9 Вся права разумевающим, и права обретающим разум. 10 Примите наказание, а не серебро, и разум паче злата искушена: избирайте же ведение паче злата чиста. 11 Лучши бо премудрость камней многоценных, всякое же честное недостойно ея есть. 12 Аз премудрость вселих совет, и разум и смысл аз призвах. 13 Страх Господень ненавидит неправды, досаждения же и гордыни, и пути лукавых: возненавидех же аз развращенныя пути злых. 14 Мой совет и утверждение, мой разум, моя же крепость.

15 Мною царие царствуют, и сильнии пишут правду: 16 мною вельможи величаются, и властители мною держат землю. 17 Аз любящия мя люблю, ищущии же мене обрящут благодать. 18 Богатство и слава моя есть, и стяжание многих и правда. 19 Лучше есть плодiti мене, паче злата и камня драга: мои же плоды лучше серебра избранна. 20 В путех правды хожду и посреде стезь оправдания живу, 21 да разделю любящим мя имение, и сокровища их исполню благих. Аще возведу вам бывающая на всяк день, помяну, яже от века, изчести. 22 Господь созда мя (евр.: стяжа мя) начало путей Своих в дела Своя, 23 прежде век основа мя, в начале, прежде неже землю сотворити, 24 и прежде неже бездны соделати, прежде неже произыти источником вод, 25 прежде неже горам водрузитися, прежде же всех холмов раждает мя. 26 Господь сотвори страны и ненаселенныя, и концы населенныя поднебесныя. 27 Егда готовяше небо, с Ним бех, и егда отлучаше престол Свой на ветрах, 28 и егда

крепки творяше вышния облаки, и егда тверды полагаше источники поднебесныя, 29 и егда полагаше морю предел его, да воды не мимо идут уст его, и крепка творяше основания земли, бех при нем устрояющи. 30 Аз бех, о нейже радовашеся, на всяк же день веселяхся пред лицом Его на всяко время, 31 егда веселяшеся вселенную совершив, и веселяшеся о сынех человеческих. 32 Ныне убо, сыне, послушай мене: и блажени, иже пути моя сохраняют. 33 Услышите премудрость, и умудритесь, и не отместите. 34 Блажен муж, иже послушает мене, и человек, иже пути моя сохранит, бдяй при моих дверех присно, соблюдаяй праги моих входов: 35 исходи бо мои исходи живота, и уготовляется хотение от Господа: 36 согрешающи же в мя нечествуют на своя души, и ненавидящии мя любят смерть.

**9** Премудрость созда себе дом и утверди столпов седмь: 2 закла своя жертвенная, и раствори в чаши своей вино, и уготова свою трапезу: 3 посла своя рабы, созывающи с высоким проповеданием на чашу, глаголющи: 4 иже есть безумен, да уклонится ко мне. 5 И требующым ума рече: приидите, ядите мой хлеб и пейте вино, еже растворих вам: 6 оставите безумие и живи будете, да во веки воцаритесь: и взыщите разума, да поживете и исправите разум в ведении. 7 Наказуяй злыя примет себе безчестие, обличаяй же нечестиваго порочна сотворит себе (обличения бо нечестивому раны ему). 8 Не обличай злых, да не возненавидят тебе: обличай премудра, и возлюбит тя. 9 Дажь премудрому вину, и премудрейший будет: сказуй праведному, и приложит приимати. 10 Начало премудрости страх Господень, и совет святых разум: разумети бо закон,

помысла есть благаго. **11** Сим бо образом многое поживеши время, и приложатся тебе лета живота твоего. **12** Сыне, аще премудр будеши, себе премудр будеши и искренним твоим: аще же зол будеши, един почерпнеши злая. Сын наказан премудр будет, безумный же слугою употребится. Иже утверждаетя на лжах, сей пасет ветры, той же поженет птицы парящия: остави бо пути своего винограда, в стезях же своего земледелания заблуди, проходит же сквозе пустыню безводную и землю определенную в жаждех, собирает же рукама неплодие. **13** Жена безумная и продержая скудна хлебом бывает, яже не весть стыдения, **14** седе при дверех дому своего, на столце яве на стогах, **15** призывающая мимоходящих и исправляющих пути своя: **16** иже есть от вас безумнейший, да уклонится ко мне: и лишенным разума повелеваю, глаголющи: **17** хлебом сокровенным в сладость прикоснитесь и воду татьбы сладкую пейте. **18** Он же не весть, яко земнороднии у нея погибают и во дне ада обретаются. (Sheol h7585)

**10** Сын премудр веселит отца, сын же безумен печаль матери. **2** Не пользуют сокровища беззаконных, правда же избавит от смерти. **3** Не убьет гладом Господь душу праведную, живот же нечестивых низвратит. **4** Нищета мужа смиряет: руце же мужественных обогащаются. **5** Сын наказан премудр будет, безумный же слугою употребится: спасется от зноя сын разумный, ветротленен же бывает на жатве сын беззаконный. **6** Благословение Господне на главе праведнаго: уста же нечестивых покрывает плачь безвременный. **7** Память праведных с похвалами: имя же нечестивых угасает. **8** Премудр сердцем примет заповеди:

непокровенный же устнама остроптевая запнется. 9 Иже ходит просто, ходит надеясь: развращая же пути своя, познан будет. 10 Намизай оком с лестию собирает мужем печали: обличаяй же со дерзновением миротворит. 11 Источник жизни в руце праведнаго: уста же нечестиваго покрывает пагуба. 12 Ненависть воздвизает распрю: всех же нелюбопрителных покрывает любовь. 13 Иже от устен произносит премудрость, жезлом бьет мужа безсердечна. 14 Премудрии скрывают чувство, уста же продерзаго приближаются сокращению. 15 Стяжание богатых град тверд, сокращение же нечестивых нищета. 16 Дела праведных живот творят, плодове же нечестивых грехи. 17 Пути жизни хранит наказание: наказанием же не обличеный заблуждает. 18 Покрывают вражду устне правыя: износяции же укоризну безумнейшии суть. 19 От многословия не избежиши греха: щадя же устне, разумен будеши. 20 Серебро разжженое язык праведнаго: сердце же нечестиваго исчезнет. 21 Устне праведных ведут высокая: безумнии же в скудости скончаваются. 22 Благословение Господне на главе праведнаго, сие обогащает, и не имать приложитися ему печаль в сердца. 23 Смехом безумный творит злая: премудрость же мужеви раждает разум. 24 В погибели нечестивый обносится: желание же праведнаго приятно. 25 Преходящей бури, нечестивый исчезает, праведный же уклонився спасается во веки. 26 Якоже гроздие зеленое вред зубом и дым очима, тако законопреступление творящим е. 27 Страх Господень прилагает дни: лета же нечестивых умалются. 28 Пребывает с праведными веселие, упование же нечестивых погибает. 29 Утверждение преподобному страх Господень, сокращение

же творящим злая. 30 Праведник во веки не поколеблется: нечестивии же не населят земли. 31 Уста праведнаго каплют премудрость, язык же неправеднаго погибнет: 32 устне мужей праведных каплют благодати, уста же нечестивых развращаются.

**11** Мерила лъстивая мерзость пред Господем, вес же праведный приятен Ему. 2 Идеже аще внидет досаждение, тамо и безчестие: уста же смиренных поучаются премудрости. 3 Умираяй праведник остави раскаяние, удобна же бывает и посмеятелна нечестивых погибель. 4 Совершенство правых наставит их, и поползновение отрицающихся пленит их. Не уполюзуют имения в день ярости: правда же избавит от смерти. 5 Правда непорочнаго исправляет пути, нечестие же впадает в неправду. 6 Правда мужей правых избавит их, безсоветием же уловляются беззаконнии. 7 Скончавшуся мужу праведну, не погибнет надежда: похвала же нечестивых погибнет. 8 Праведный от лова убежит, в негоже место предается нечестивый. 9 Во устех нечестивых сеть гражданином, чувство же праведных благопоспешно. 10 Во благих праведных исправится град, и в погибели нечестивых радование. 11 В благословении правых возвысится град, усты же нечестивых раскопается. 12 Ругается гражданином лишенный разума, муж же мудр безмолвие водит. 13 Муж двоязычен открывает советы в сонмищи, верный же духом таит вещи. 14 Умже и несть управления, падают аки листвие, спасение же есть во мнозе совете. 15 Лукавый злодействует, егда сочетается с праведным, ненавидит же гласа утверждения. 16 Жена благодатна возносит мужу славу: престол же безчестия жена ненавиждящая правды.

Богатства ленивии скудни бывают, крепцыи же утверждаются богатством. 17 Души своей благотворит муж милостивый, погубляет же тело свое немилостивый. 18 Нечестивый творит дела неправедная: семя же праведных мзда истины. 19 Сын праведный рождается в живот: гонение же нечестиваго в смерть. 20 Мерзость Господеви путие развращенни, приятни же Ему вси непорочнии в путех своих. 21 В руку руце вложив неправедно, не без муки будет злых: сеяй же правду приимет мзду верну. 22 Якоже усерязь златый в ноздрех свинии, тако жене злоумней лепота. 23 Желание праведных все благое, надежда же нечестивых погибнет. 24 Суть, иже своя сеюще, множайшая творят: суть же и собирающе чуждая, умаляются. 25 Душа благословенна всякая простая: муж ярый неблагообразен. 26 Удержаваяй пшеницу оставит ю языком: продай пшеницу скупю, от народа проклят, благословение же Господне на главе подавающаго. 27 Творяй благая ищет благодати добры: ищущаго же злая постигнут его. 28 Надеяться на богатство свое, сей падет: заступаяй же праведных, той возсияет. 29 Не сматряяй своего дому наследит ветры: пороботает же безумный разумному. 30 От плода правды древо жизни прозябает: отемлются же безвременно души беззаконных. 31 Аще праведный едва спасается, нечестивый же и грешный где явится?

**12** Любяй наказание любит чувство: ненавидяй же обличения безумен. 2 Лучше обреть благодать от Господа Бога: муж же законопреступен премолчан будет. 3 Не исправится человек от беззаконнаго: корения же праведных не отимутся. 4 Жена мужественная венец мужу своему: якоже в древе червь, тако мужа погубляет жена злотворная. 5

Мысли праведных судьбы: управляют же нечестивии лести. 6  
Словеса нечестивых льстива в кровь, уста же правых избавят  
их. 7 Аможе обратится нечестивый, исчезает: храмины же  
праведных пребывают. 8 Уста разумного хвалима бывают  
от мужа: слабосерд же поругаемь бывает. 9 Лучше муж  
в безчестии работаяй себе, нежели честь себе обложив и  
лишаяйся хлеба. 10 Праведник милует души скотов своих:  
утробы же нечестивых немилостивны. 11 Делаяй свою  
землю исполнится хлебов: гонящие же суетная лишени  
разума. Иже есть сладостен в виннем пребывании, во своих  
твердынех оставит безчестие. 12 Желания нечестивых зла:  
корение же благочестивых в твердостех. 13 За грех устен  
впадает в сети грешник: избегает же от них праведник.  
Сматрняяй кротко помилован будет, а сретаяй во вратех  
оскорбит души. 14 От плодов уст душа мужа наполнится  
благих, воздаяние же устен его воздастся ему. 15 Путие  
безумных прави пред ними: послушает советов мудрый. 16  
Безумный абие исповест гнев свой: крыет же свое безчестие  
хитрый. 17 Явленную веру возвещает праведный: свидетель  
же неправедных льстив. 18 Суть, иже глаголюще уязвляют  
аки мечи: языцы же премудрых изцеляют. 19 Устне истинны  
исправляют свидетелство: свидетель же скор язык имать  
неправеден. 20 Лесть в сердцы кующаго злая: хотящие же  
мира возвеселятся. 21 Ничтоже неправедное угодно есть  
праведному: нечестивии же исполнятся злых. 22 Мерзость  
Господеви устне лживы: творяй же верно приятен Ему. 23  
Муж разумивый престол чувства: сердце же безумных  
срящет клятвы. 24 Рука избранных одержит удобь: льстивии  
же будут во пленении. 25 Страшное слово сердце мужа



праведна смущает, весть же благая веселит его. 26 Разумив праведник себе друг будет: мысли же нечестивых некротки: согрешающих постигнут злая, путь же нечестивых прельстит я. 27 Не улучит лъстивый ловитвы: стяжание же честное муж чистый. 28 В путех правды живот, путие же злопомнящих в смерть.

**13** Сын благоразумный послушлив отцу, сын же непокорливый в погибель. 2 От плодов правды снестъ благий: души же беззаконных погибают безвременно. 3 Иже хранит своя уста, соблюдает свою душу: продерзивый же устнама устршит себе. 4 В похотех есть всяк праздный: руки же мужественных в прилежании. 5 Словесе неправедна ненавидит праведник: нечестивый же стыдится и не возмет дерзновения. 6 Правда хранит незлобивыя: нечестивыя же злы творит грех. 7 Суть богатяще себе, ничесоже имуще: и суть смиряющесе во мнозе богатстве. 8 Избавление мужа души свое ему богатство: нищий же не терпит прещения. 9 Свет праведным всегда, свет же нечестивых угасает: души лъстивыя заблуждают во гресех, праведнии же щедрят и милуют. 10 Злый с досаждением творит злая: себе же знающии премудри (суть). 11 Имение поспешаемо со беззаконием умалено бывает, собираяй же себе со благочестием изобилствовати будет: праведный щедрит и дает. 12 Лучше начинаяй помогати сердцем обещающаго и в надежду ведущаго: древо бо жизни желание доброе. 13 Иже презирает вещь, презрен будет от нея: а бояйся заповеди, сей здравствует. Сыну лукавому ничтоже есть благо: рабу же мудру благопоспешна будут дела, и исправится путь его. 14 Закон мудрому источник жизни: безумный же от сети умрет.

15 Разум благ дает благу: разумети же закон, мысли есть  
благия: путие же презирающих в погибели. 16 Всяк хитрый  
творит с разумом, безумный же прострет свою злобу. 17  
Царь дерзостен впадет во злая, вестник же мудр избавит  
его. 18 Нищету и безчестие отемлет наказание: храняй  
же обличения прославится. 19 Желания благочестивых  
наслаждают душу, дела же нечестивых далече от разума. 20  
Ходяй с премудрыми премудр будет, ходяй же с безумными  
познан будет. 21 Согрешающих постигнут злая, праведных  
же постигнут благая. 22 Благ муж наследит сыны сынов:  
сокровищствуется же праведным богатство нечестивых. 23  
Праведнии насладятся в богатстве лета многа: неправеднии  
же погибнут вскоре. 24 Иже щадит жезл (свой), ненавидит  
сына своего: любяй же наказует прилежно. 25 Праведный  
ядый насыщает душу свою: души же нечестивых скудны.

**14** Мудрыя жены создаша дома: безумная же раскопа  
рукама своима. 2 Ходяй право боится Господа: развращаяй  
же пути своя обезчестится. 3 Из уст безумных жезл  
досаждения: устне же мудрых хранят я. 4 Идеже несть  
волов, ясли чисты: а идеже жита многа, явна волу крепость.  
5 Свидетель верен не лжет: разжизает же ложная свидетель  
неправеден. 6 Взыщеша премудрости у злых, и не обрящеша:  
чувство же у мудрых удобно. 7 Вся противна (суть) мужеви  
безумну: оружие же чувства устне премудры. 8 Премудрость  
коварных уразумеет пути их: буйство же безумных в  
заблуждении. 9 Домове беззаконных требуют очищения,  
домове же праведных приятни. 10 Сердце мужа чувственно  
печаль души его: егда же веселится, не примешается  
досаждению. 11 Домове нечестивых исчезнут, селения

же право творящих пребудут. 12 Есть путь, иже мнится человеком прав быти, последняя же его приходят во дно ада. (questioned) 13 Ко веселием не примешавается печаль: последняя же радости в плачь приходят. 14 Путий своих насытится дерзосердый, от размышлений же своих муж благ. 15 Незлобивый веру емлет всякому словеси, коварный же приходит в раскаяние. 16 Премудр убоявся уклонится от зла, безумный же на себе надеявся смешавается со беззаконным. 17 Острояростный без совета творит, муж же мудрый многая терпит. 18 Разделяют безумнии злобу, коварнии же удержат чувство. 19 Поползнутся злии пред благими, и нечестивии послужат пред дверьми праведных. 20 Друзие возненавидят другов убогих: друзие же богатых мнози. 21 Безчестяй убогия согрешает, милуяй же нищия блажен. 22 Заблуждающи (неправедницы) делают злая, милость же и истину делают благии. Не ведят милости и веры делателие злых: милостыни же и веры у делателей благих. 23 Во всяцем пекущемся есть изюбиле: любосластный же и безпечальный в скудости будет. 24 Венец премудрых богатство их, житие же безумных зло. 25 Избавит от злых душу свидетель верен, разжизает же лживая лестный. 26 Во страхе Господни упование крепости, чадом же Своим оставит утверждение (мира). 27 Страх Господень источник жизни, творит же укланяться от сети смертныя. 28 Во мнозе языке слава царю: во оскудении же людсте сокрушение сильному. 29 Долготерпелив муж мног в разуме, малодушный же крепко безумен. 30 Кроткий муж сердцу врач: моль же костем сердце чувственно. 31 Оклеветаяй убогаго раздражает Сотворшаго и, почитаяй же Его милует нищаго. 32 Во злобе

своей отринется нечестивый: надейся же на Господа своим преподобием праведен. 33 В сердцах блазе мужа почит премудрость, в сердцах же безумных не познается. 34 Правда возвышает язык: умаляют же племена греси. 35 Приятен цареву слуга разумный, своим же благообращением отемлет безчестие.

**15** Гнев губит и разумных: ответ же смирен отвращает ярость, а слово жестоко возвизает гнев. 2 Язык мудрых добрая свесь: уста же безумных возвещают злая. 3 На всяком месте очи Господни сматряют злыя же и благия. 4 Изцеление языка древо жизни: храняй же его исполнится духа. 5 Безумный ругается наказанию отчу: храняй же заповеди хитрейший. Во мнозе правде крепость многа: нечестивии же от земли искоренятся. 6 В домех праведных крепость многа: плоды же нечестивых погибают. 7 Устне мудрых связуются чувством, сердца же безумных не тверда. 8 Жертвы нечестивых мерзость Господеви, обеты же правоходящих приятни Ему. 9 Мерзость Господеви путие нечестивых: гонящия же правду любит. 10 Наказание незлобиваго познается от мимоходящих: ненавидящии же обличения скончаваются срамно. 11 Ад и Пагуба явна пред Господем, како не и сердца человеков? (Sheol h7585) 12 Не возлюбит ненаказанный обличающих его, с мудрыми же не побеседует. 13 Сердцу веселящуся, лице цветет: в печалех же сущу, сетует. 14 Сердце правое ищет чувства: уста же ненаказанных уразумеют злая. 15 На всяко время очи злых приемлют злая: добрии же безмолвствуют присно. 16 Лучше частица малая со страхом Господним, нежели сокровища велия без боязни. 17 Лучше учреждение от зелий

с любовью и благодатию, нежели представление телцев со  
враждою. 18 Муж ярый устроит брани, долготерпеливый  
же и будущую укрощает. Терпеливый муж угасит суды,  
нечестивый же воздвизает паче. 19 Пути праздных постланы  
тернием, мужественных же углаждени. 20 Сын премудр  
веселит отца, сын же безумен раздражает мать свою. 21  
Несмысленнаго стези скудны ума: муж же разумен исправляя  
ходит. 22 Отлагают помышления не чтуции сонмищ: в  
сердцах же советных пребывает совет. 23 Не послушает  
злый его, ниже речет полезно что и добро общему. 24  
Пути живота помышления разумнаго, да уклонився от  
ада спасется. (Sheol h7585) 25 Дома досадителей разоряет  
Господь, утверди же предел вдовицы. 26 Мерзость Господеви  
помысл неправедный, чистых же глаголы честны. 27 Губит  
себе мздоимец, ненавидяй же даров приятия спасется:  
милостынями и верами очищаются греси, страхом же  
Господним уклоняется всяк от зла. 28 Сердца праведных  
поучаются вере, уста же нечестивых отвецают злая: приятни  
пред Господем пути мужей праведных, имиже и врази друзие  
бывают. 29 Далече отстоит Бог от нечестивых, молитвы же  
праведных послушает: лучше малое приятие со правдою,  
нежели многа жита с неправдою: сердце мужа да мыслит  
праведная, да от Бога исправятся стопы его. 30 Видящее око  
добрая веселит сердце, слава же благая утучняет кости. 31  
Слушая обличений живота посреде премудрых водворится.  
32 Иже отменяет наказание, ненавидт себе: соблюдаяй же  
обличения любит свою душу. 33 Страх Господень наказание  
и премудрость, и начало славы отвецает ей (, предидет же  
смирненным слава).

**16** Человеку предложение сердца: и от Господа ответ языка. 2 Вся дела смиренного явлена пред Богом, и укрепляяй духи Господь. 3 Приблужи ко Господу дела твоя, и утвердятся помышления твоя. 4 Вся содела Господь Себе ради: нечестивии же в день зол погибнут. 5 Нечист пред Богом всяк высокосердый: в руку же руце влагаяй неправедно не обезвинится. 6 Начало пути блага, еже творити праведная, приятна же пред Богом паче, нежели жрети жертвы. 7 Ищай Господа обрящет разум со правдою: 8 праве же ищущии его обрящут мир. 9 Вся дела Господня со правдою: хранится же нечестивый на день зол. 10 Пророчество во устнех царевых, в судищи же не погрешат уста его. 11 Превеса мерила правда у Господа: дела же Его мерила праведная. 12 Мерзость цареви творяй злая: со правдою бо уготовляется престол началства. 13 Приятны царю устне праведны, словеса же правая любит Господь. 14 Ярость царева вестник смерти: муж же премудр утолит его. 15 Во свете жизни сын царев: приятнии же ему яко облак позден. 16 Угнеждения премудрости избраннее злата: вселения же разума дражайши сребра. 17 Путие жизни укланяются от злых: долготы же жития путие праведни. Приемляй наказание во благих будет, храняй же обличения умудрится. Иже хранит своя путия, соблюдает свою душу: любяй же живот свой щадит своя уста. 18 Прежде сокрушения предваряет досаждение, прежде же падения злопомышление. 19 Лучше кроткодушен со смирением, нежели иже разделяет корысти с досадительми. 20 Разумный в вещех обретатель благих, надеяйся же на Господа блажен. 21 Премудрыя и разумныя злыми наричут, сладции же в словеси множае услышани

будут. 22 Источник животен разум стяжавшим, наказание же безумных зло. 23 Сердце премудраго уразумеет яже от своих ему уст, во устнах же носит разум. 24 Сотове медовнии словеса добрая, сладость же их изцеление души. 25 Суть путие мянщиися прави быти мужу, обаче последняя их зрят во дно адово. 26 Муж в трудех труждается себе и изнуждает погибель свою: строптивый во своих устах носит погибель. 27 Муж безумен копает себе злая и во устнах своих сокровищствует огонь. 28 Муж строптивый разсылает злая, и светилник льсти вжигает злым, и разлучает други. 29 Муж законопреступен прельщает други и отводит их в пути не благи. 30 Утверждаяй очи свои мыслит развращенная, грызый же устне свои определяет вся злая: сей пещь есть злобы. 31 Венец хвалы старость, на путех же правды обретается. 32 Лучше муж долотерпелив паче крепкаго, (и муж разум имей паче земледелца великаго: ) удержаваяй же гнев паче вземлющаго град. 33 В недра входят вся неправедным: от Господа же вся праведная.

**17** Лучше укрух хлеба со сластию в мире, нежели дом исполнен многих благих и неправедных жертв со бранию. 2 Раб смыслен обладает владыки безумными, в братиих же разделит (имение) на части. 3 Якоже искушается в пещи сребро и злато, тако избранная сердца у Господа. 4 Злый послушает языка законопреступных, праведный же не внимает устнам лживым. 5 Ругайся убогому раздражает Сотворшаго его, радуяйся же о погибающем не обезвинится: милуяй же помилован будет. 6 Венец старых чада чад: похвала же чадом отцы их. Верному весь мир богатство, неверному же ниже пенязь. 7 Неприличны суть безумному

устне верны, ниже праведному устне лживы. 8 Мзда благодатей наказание употребляющим: и аможє аще обратитєя, успеет. 9 Иже таит обиды, ищет любве: а иже ненавидит скривати, разлучает други и домашния. 10 Сокрушает прещение сердце мудраго: безумный же биемь не чувствует (ран). 11 Прекословия воздвижет всяк злый: Господь же ангела немилостива послет нань. 12 Впадет попечение мужу смысленну: безумнии же размышляют злая. 13 Иже воздаєт злая за благая, не подвижутся злая из дому его. 14 Власть даєт словесем начало правды: предводителствует же скудости прѧ и брань. 15 Иже судит праведнаго неправедным, неправеднаго же праведным, нечист и мерзок у Господа. 16 Вскую бяше имение безумному? Стяжати бо премудрости безсердый не может. Иже высок творит свой дом, ищет сокращения: остроптеваяя же учитися впадет во злая. 17 На всяко время друг да будет тебе, братия же в нуждах полезни да будут: сего бо ради раждаются. 18 Муж безумен плещет и радуєтєя себе, якоже поручайєся испоручит друга своего, на своих же устнах огонь сокровишствует. 19 Грехолюбец радуєтєя сваром, а жестокосердый не усрящєт благих. 20 Муж удобопреложный языком впадет во злая: сердце же безумнаго болезнь стяжавшему е. 21 Не веселитєя отец о сыне ненаказаннем: сын же мудр веселит мать свою. 22 Сердце веселящєся благоиметєся творит: мужу же печальну засышут кости. 23 Приемлющему дары неправедно в недра не предуспевают путиє: нечестивый же укланяєт пути правды. 24 Лице разумно мужа премудра, очи же безумнаго на концех земли. 25 Гнев отцу сын безумен, и болезнь рождшей его. 26 Тщєты творити мужу праведну не добро,



ниже преподобно наветовати властем праведным. 27 Иже щадит глагол произнести жесток, разумен: долготерпеливый же муж премудр, лучше ищущаго науки. 28 Несмысленному вопросившу о мудрости, мудрость вменится: нема же кто себе творит, возмнится разумен быти.

**18** Вины ищет муж хотя отлучитися от друзей, на всяко же время поносимь будет. 2 Не требует премудрости муж скудоумен, зане паче водится безумием. 3 Егда приидет нечестивый во глубину зол, нерадит: находит же ему безчестие и поношение. 4 Вода глубока слово в сердцы мужа, река же изскачуши и источник жизни. 5 Чудитися лицу нечестиваго не добро, ниже преподобно укланяти праведное на суде. 6 Устне безумнаго приводят его на зло, уста же его дерзостная призывают смерть. 7 Уста безумнаго сокрушение ему, устне же его сеть души его. 8 Ленивыя низлагает страх: души же мужей женам подобных взалчут. 9 Не изцеляяй себе во своих делех брат есть погубляющему себе самага. 10 Из величества крепости имя Господне, к немуже притекающе праведницы возносятся. 11 Имение богату мужу град тверд, слава же его вельми присеняет. 12 Прежде сокрушения возносится сердце мужу и прежде славы смиряется. 13 Иже отвещает слово прежде слышания, безумие ему есть и поношение. 14 Гнев мужа укрощает раб разумный: малодушна же человека кто стерпит? 15 Сердце разумнаго стяжет чувствие, ушеса же мудрых ищут смысла. 16 Даяние человека распространяет его и с сильными посаждает его. 17 Праведный себе самага оглаголник во первословии: егда же приложит супостат, обличается. 18 Прекословия утоляет молчаливый и во властех определяет. 19 Брат от брата

помогаемь, яко град тверд и высок, укрепляется же якоже основаное царство. 20 От плодов уст муж насыщает чрево свое, и от плодов устен своих насытится. 21 Смерть и живот в руце языка: удерживающии же его снут плоды его. 22 Иже обрете жену добру, обрете благодать, приял же есть от Господа тишину. 23 Иже изгоняет жену добрую, изгоняет благая: держай же прелюбодейцу безумен и нечестив. С молении глаголет убогий, богатый же отвещает жестоко. 24 Муж любовен к дружбе, и есть друг прилепивыйся паче брата.

**19** Лучше есть убог ходяй в простоте своей, неже богатый строптив устны своими и несмыслен. 2 Идеже несть учения души, несть добро, и иже скор есть ногама, поткнется. 3 Неразумие мужа погубляет пути его, и Бога виновна творит в сердцы своем. 4 Богатство прилагает други многи: нищий же и от сущаго друга оставляемь бывает. 5 Свидетель лжив без муки не будет: оклеветаяй же неправедно не убежит ея. 6 Мнози угождают лицам царским: всяк же зол бывает в поношение мужеву. 7 Всяк, иже убогаго брата ненавидит, и от содружества далече будет. Мысль благая ведящым ю приближается, муж же мудр обрящет ю. Много творяй зла совершает злобу, а иже раздражает словеса, не спасется. 8 Стяжавый мудрость любит себе, а иже сохраняет разум, обрящет благая. 9 Свидетель лживый не без муки будет, а иже разжизает злобу, погибнет от нея. 10 Не пользует безумному сладость, и аще раб начнет с досаждением обладати. 11 Милостив муж долготерпит, похвала же его превосходит законопреступных. 12 Царево прещение подобно рыканию львову, и якоже роса злаку,

тако тихость его. 13 Студ есть отцу сын безумен, и нечисты обеты от мзды блудницы. 14 Дом и имение разделяют отцы чадом: от Господа же сочетается жена мужеву. 15 Страх содержит мужа женонравна: душа же празднаго взалчет. 16 Иже хранит заповеди, соблюдает свою душу, а нерадяй о своих путех погибнет. 17 Милуяй нища взаим дает Богови, по даянию же его воздастся ему. 18 Наказуй сына твоего, тако бо будет благонадежен: в досаждение же не вземлися душою твоею. 19 Злоумен муж много отщетится: аще же губитель есть, и душу свою приложит. 20 Слушай, сыне, отца твоего наказания, да мудр будеши в последняя твоя. 21 Многи мысли в сердцы мужа: совет же Господень во век пребывает. 22 Плод мужеву милостыня: лучше же нищъ праведный, нежели богат лжив. 23 Страх Господень в живот мужеву: а безстрашный водворится на местех, идеже не наблюдается разум. 24 Скрываяй в недрах руце свои неправедно ниже ко устом своим принесет я. 25 Губителю раны приемлющу, безумный коварнее будет: аще же обличаеши мужа разумна, уразумеет чувство. 26 Безчествуй отца и отриваяй мать свою срамоту приимет и поношение. 27 Сын оставляй хранити наказание отчее поучится словесем злым. 28 Выручаяй отрока несмыслена досаждае оправданию: уста же нечестивых пожрут суд. 29 Уготовляются невоздержным раны, и мучения подобне неразумным.

**20** Невинно вино, укориженно же пьянство, и всяк пребываяй в нем не будет премудр. 2 Не разнствует прещение цареву от ярости львовы: раздражаяй же его и примешаяйся ему согрешает в свою душу. 3 Слава мужу отвращатися от досаждения: всяк же безумен сими

соплетается. 4 Поносимь ленивый не усрамляется, такожде и заемляй пшеницу в жатву. 5 Вода глубока совет в сердцы мужа: муж же премудр изчерплет ю. 6 Велика вещь человек, и драгая муж творяй милость: мужа же верна (велико) дело обрести. 7 Иже без порока живет в правде, блажены оставит дети своя. 8 Егда царь праведен на престоле сядет, не противится пред очима его ничтоже лукаво. 9 Кто похвалится чисто имети сердце? Или кто дерзнет рещи чиста себе быти от грехов? 10 Вес велик и мал, и мера сугуба, нечиста пред Господем обоя: 11 и творяй я в начинаниих своих запнется: юнота с преподобным, и правый путь его. 12 Ухо слышит, и око видит: Господня дела обоя. 13 Не люби клеветати, да не вознесешия: отверзи очи твои и насыщайся хлеба. 14 Зло, зло, речет стяжаваяй, и отшед тогда похвалится. 15 Есть злато и множество камней драгих, сосуд честен устне разумны. 16 Возми ризу его, яко испоручник бысть чуждыя, и за чуждую возми залог от него. 17 Сладок есть человеку хлеб лжи, но потом исполнятся уста его камня. 18 Помышление в совете уготовится, в правлении же творит брань. 19 Открываяй тайну ходит лестию: и прельщающему устнами своими не примешайся. 20 Злословящему отца или матерь угаснет светилник, зеницы же очес его узрят тму. 21 Часть поспешна в начале, в последних не благословится. 22 Не рцы: отмщу врагу: но потерпи Господа, да ти поможет. 23 Мерзость Господеви сугубый вес, и мерило лживо не добро пред ним. 24 От Господа исправляются стопы мужу: смертный же како уразумеет пути своя? 25 Сеть мужеви скоро нечто от своих освящати: по обете бо раскаяние бывает. 26 Веятель нечестивых есть царь мудр и наложит

на ня коло. 27 Свет Господень дыхание человеком, иже испытает тайная утробы. 28 Милостыня и истина сохранение царю, и обыдут престол его в правде. 29 Лепота (есть) юным премудрость: слава же старым седины. 30 Раны и сокрушения сретают злых, язвы же в сокровищих чрева.

**21** Якоже устремление воды, тако сердце цареве в руке Божией: а може аще восхоцет обратити, тамо уклонит е. 2 Всяк муж является себе праведен: управляет же сердца Господь. 3 Творити праведная и истинствовати угодна Богу паче, нежели жертв кровь. 4 Велемудрый во укоризне дерзосерд, светило же нечестивых греси. 5 Помышления тщаливаго во изюбилии, и всяк нерадивый в лишении. 6 Делаяй сокровища языком лживым суетная гонит в сети смертныя. 7 Всегубителство на нечестивыя устремляется: не хотят бо творити праведная. 8 К стропотным стропотныя пути посылает Бог: чиста бо и права дела Его. 9 Лучше жити во угле непокровеннем, нежели в повапленных с неправдою и в храмине общей. 10 Душа нечестиваго не помилуется ни от единого от человеков. 11 Тщету приемлющу невоздержному, коварнейший будет незлобивый, разумеваая же мудрый примет разум. 12 Разумеваает праведный сердца нечестивых и уничтожает нечестивыя в злых. 13 Иже затыкает ушеса своя, еже не послушати немощнаго, и той призовет, и не будет послушай его. 14 Даяние тайно отвращает гнев, щадяй же даров воздвизает ярость крепкую. 15 Веселие праведных творити суд: преподобный же нечист у злодеев. 16 Муж заблуждаы от пути правды в сонмищи исполинов почиет. 17 Муж скуден любит веселие, любяй же вино и елей не обогатится. 18 Отребие же праведнику беззаконник. 19

Лучше жити в земли пугте, неже жити с женоу сварливоу и язычноу и гневливоу. 20 Сокровище вожделенно почит во устех мудраго: безумнии же мужие пожирают е. 21 Путь правды и милостыни обрящет живот и славу. 22 Во грады крепки вниде премудрый и разруши утверждение, на неже надеяшася нечестивии. 23 Иже хранит своя уста и язык, соблюдает от печали душу свою. 24 Продерзый и величавый и горделивый губитель нарицается: а иже памятозлобствует, беззаконен. 25 Похоти лениваго убивают: не произволяют бо руке его творити что. 26 Нечестивый желает весь день похоти злыя, праведный же милует и щедрит нещадно. 27 Жертвы нечестивых мерзость Господеви: ибо беззаконно приносят я. 28 Свидетель ложный погибнет, муж же послушлив сохраняемь возглаголет. 29 Нечестив муж безстыдно стоит лицом: правый же сам разумевае пути своя. 30 Неть премудрости, несть мужества, несть совета у нечестиваго. 31 Конь уготовляется на день брани: от Господа же помощь.

**22** Лучше имя доброе, неже богатство много, паче же сребра и злата благодать благая. 2 Богат и нищ сретоста друг друга, обоих же Господь сотвори. 3 Худо, видев лукаваго мучима крепко, сам наказуется: безумнии же мимошедше отщетишася. 4 Род премудрости страх Господень, и богатство и слава и живот. 5 Волчцы и сети на путех стропотных, храняй же свою душу избежит их. 6 Богатии убогими имут обладати, 7 и раби своим господем взаим дадут. 8 Сеявый злая пожнет злая, язву же дел своих совершит. 9 Мужа тиха и даятеля любит Господь, суету же дел его скончае. 10 Милуай нищаго сам препитаеся: от своих бо хлебов даде убогому. Победу и честь устрояет даяй дары, обаче душу погубляет

стяжавших. 11 Изжени от сонмища губителя, и изыдет с ним прение: егда бо сядет в сонмищи, всех безчестит. 12 Любит Господь преподобная сердца, приятни же Ему вси непорочнии в путех своих: устнама пасет царь (люди своя). 13 Очи Господни соблюдают чувство: презирает словеса законопреступный. 14 Вины ищет и глаголет ленивый: лев на стезях, на путех же разбойницы. 15 Яма глубока уста законопреступных: возненавиденый же от Господа впадется в ню. Суть путие злии пред мужем, и не любит возвратитися от них: возвратитися же подобает от пути стропотна и злаго. 16 Безумие висит на сердцы юнаго: жезл же и наказание далече (отгонит) от него. 17 Обидяй убогаго многая себе зла творит, дает же богатому во оскудение (себе). 18 Ко словесем мудрых прилагай твое ухо, и услыши моя словеса: свое же сердце утверди (к ним), да разумеши, яко добра суть. 19 И аще вложиши я в сердце твое, возвеслят тебе купно во твоих устнех. 20 Да будет ти на Господа надежда, и покажет ти путь Свой. 21 Ты же напиши я себе трижды, на совет и смысл и разум, на широте сердца твоего: учу бо тя истинному словеси, и разума благаго слушати на ответы словесем истинным предлагаемым тебе. 22 Не насильствуй нищаго, зане убог есть, и не досаждай немощному во вратех: 23 Господь бо имать судити его суд, и избавиши твою безбедную душу. 24 Не бывай друг мужу гневливу и со другом жестокосердым не соводворяйся: 25 да не когда научишися путем его и приимеши тенета души твоей. 26 Не вдавайся в поручение, стыдяся лица: 27 егда бо не будеши имети чим искупитися, возмут постелю, яже под ребры твоими. 28 Не прелагай предел вечных, яже положиша отцы твои. 29

Прозрителну человеку и острому в делех своих пред царьми подобает стояти, и не стояти пред мужми простыми.

**23** Аще сядеши вечеряти на трапезе сильного, разумно разумевай предлагаемая тебе, **2** и налагай руку твою, ведый, яко сицевая тебе подобает уготовити: **3** аще же несытнейший еси, не желай брашен его: сия бо имут живот ложен. **4** Не распростирайся убог сый с богатым, твою же мыслию удаляйся. **5** Аще устремиши на него око твое, никогдаже явится: соделаны бо суть ему крила яко орлу, и обращается в дом настоятеля своего. **6** Не вечеряй с мужем завистливым, ниже похощеши пищей его: **7** имже бо образом аще кто поглотит власы, сице яст и пиет: ниже к себе да введеши его и снеси хлеб твой с ним: **8** изблюет бо его и осквернит словеса твоя добрая. **9** Во ушию безумнаго ничтоже глаголи, да не когда поругает разумная словеса твоя. **10** Не прелагай предел вечных и в стяжание сирот не вниди: **11** избавляяй бо их Господь крепок есть и разсудит суд их с тобою. **12** Дажь в наказание сердце твое, ушеса же твоя уготовай словесем чувственным. **13** Не преставай младенца наказовати: аще бо жезлом биеши его, не умрет (от него): **14** ты бо побиеши его жезлом, душу же его избавиши от смерти. (Sheol h7585) **15** Сыне, аще премудро будет сердце твое, возвеселиши и мое сердце, **16** и пребудут в словесех твои устне к моим устнам, аще права будут. **17** Да не ревнует сердце твое грешником, но в страсе Господни буди весь день: **18** аще бо соблюдеши я, будут ти внуцы, и упование твое не отступит. **19** Слушай, сыне, и премудр бывай и исправляй мысли твоего сердца: **20** не буди винопийца, ниже прилагайся к сложением и купованием мяс: **21** всяк бо



пияница и блудник обнищает, и облечется в раздранная и в рубища всяк сонливый. 22 Слушай, сыне, отца родившего ты, и не презирай, егда состарелся мати твоя. 23 Истину стяжи и не отрини мудрости и учения и разума. 24 Добре воспитывает отец праведен, о сыне же премудрем веселится душа его. 25 Да веселится отец и мати о тебе, и да радуется рождающая ты. 26 Дажь ми, сыне, твое сердце, очи же твои моя пути да соблюдают. 27 Сосуд бо сокрушен чуждий дом, и студенец тесен чуждий: 28 сей бо вскоре погибнет, и всякий законопреступник потребится. 29 Кому горе? Кому молва? Кому судове? Кому горести и свары? Кому сокрушения вотще? Кому сини очи? 30 Не пребывающим ли в вине? И не назирающим ли, где пирове бывают? 31 Не упивайтесь вином, но беседуйте ко человеком праведным, и беседуйте во проходех: аще бо на чашы и сткляницы вдаси очи твои, последи имаша ходити нажайший белилнаго древа: 32 последи же яко от змиа уязвен прострется, и якоже от кераста разливается ему яд. 33 Очи твои егда узрят (жену) чуждую, уста твоя тогда возглаголют стропотная: 34 и возляжеси яко в сердцы моря и якоже кормчий во мнозе волнении. 35 Речеши же: биша мя, и не поболех, и поругашася ми, аз же не разумех: когда утро будет, да шед взыщу, с нимиже снидуся?

**24** Сыне, не ревнуй мужем злым, ниже возжелей быти с ними: 2 лжам бо поучается сердце их, и болезни устне их глаголют. 3 С премудростию зиждется дом и с разумом исправляется. 4 С чувствием исполняются сокровища от всякаго богатства честнаго и добраго. 5 Лучше мудрый крепкаго, и муж разум имеяй земледелца

велика. 6 Со управлением бывает брань, помощь же с сердцем советным. 7 Премудрость и мысль блага во вратех премудрых: смысленнии не укланяются от закона Господня, 8 но советуют в сонмищих. Ненаказанных сретаает смерть, 9 умирает же безумный во гресех. Нечистота мужу губителю: 10 осквернится в день зол и в день печали, дондеже оскудеет. 11 Избави ведомыя на смерть и искупи убиваемых, не щади. 12 Аще же речеши: не вем сего: разумей, яко Господь всех сердца весть, и создавый дыхание всем, сей весть всяческая, Иже воздаст комуждо по делом его. 13 Яждь мед, сыне, благ бо есть сот, да насладится гортань твоя: 14 сице уразумеши премудрость душею твоею: аще бо обрящеши, будет добра кончина твоя, и упование не оставит тебе. 15 Не приводи нечестиваго на пажить праведных, ниже прельщайся насыщением чрева: 16 седмицею бо падет праведный и востанет, нечестивии же изнемогут в злых. 17 Аще падет враг твой, не обрадуйся ему, в преткновении же его не возноися: 18 яко узрит Господь, и не угодно Ему будет, и отвратит ярость Свою от него. 19 Не радуйся о злодеющих и не ревнуй грешным, 20 не пребудут бо внуцы лукавых, светило же нечестивых угаснет. 21 Бойся Бога, сыне, и царя, и ни единому же их противися: 22 внезапно бо истяжут нечестивых, мучения же обоих кто увесть? 23 Сия же вам смысленным глаголю разумети: срамлятся лица на суде не добро. 24 Глаголяй нечестиваго, яко праведен есть, проклят от людей будет и возненавиден во языцех: 25 обличающии же лучшии явятся, на няже приидет благословение благо: 26 и устне обლობызакот отвецающыя словеса блага. 27 Уготовляй на исход дела твоя, и уготовися на село, и ходи вслед мене,

и созиждеш дом твой. 28 Не буди свидетель лжив на твоего гражданина, ниже простражайся твоима устнама. 29 Не рцы: имже образом сотвори ми, сотворю ему и отмщу ему, имиже мя преобиде. 30 Якоже нива муж безумный, и яко виноград человек скудоумный: 31 аще оставиши его, опустеет и травую порастет весь, и будет оставлен, ограды же каменные его раскопаются. 32 Последи аз покаяхся, воззрех избрати наказание: 33 мало дремлю, мало же сплю и мало объемлю рукама перси: 34 аще же сие твориши, приидет предидущи нищета твоя и скудость твоя, яко благ течец.

**25** Сия притчи Соломони бывшыя нерасположенны, яже списаша друзие Езекии царя Иудейска. 2 Слава Божия крыет слово, слава же царева почитает повеления Его. 3 Небо высоко, земля же глубока: сердце же цареве необличительно. 4 Куй неискушенное серебро, и очистится чисто все. 5 Убивай нечестивыя от лица царева, и исправится в правде престол его. 6 Не гордися пред лицом царевым и на месте сильных не стани: 7 лучше бо ти есть, егда речет: взыди ко мне: нежели смиритися тебе пред лицом сильного. 8 Иже видеста очи твои, глаголи. Не впадай в тяжбу скоро, да не раскаешия послезди, егда тебе досадит друг твой. 9 Вступай вспяты, не неради, да не поносит убо тебе друг: 10 свара же твоя и вражда твоя не отступит, но будет ти равна со смертию. Благодать и любы свобождает, в нихже утверди себе, да не в поношении будеши, но сохрани пути твоя добре устроены. 11 (Якоже) яблоко злато во усерязи сардийскаго камене, сице рещи слово при приличных ему. 12 И (якоже) во усерязь златый сардийский камень многоценный вяжется, (сице)

слово премудро во ухо благопослушно. 13 Якоже исходище снега в жатву зноя пользует, тако вестник верен пославших его: души бо употребляющих его пользует. 14 Якоже ветри и облацы и дождеве являющиеся, тако и хвалящийся о даянии ложнем. 15 В долготерпении благополучие царем: язык же мякок сокрушает кости. 16 Мед обрет яждь умеренно, да не како пресыщен изблюеши. 17 Не учащай вносити ногу твою ко другу твоему, да не когда насыщся тебе, возненавидит тя. 18 Дреколь и мечь и стрела остра, тако и муж свидетелствуй на друга своего свидетелство ложное. 19 Путь злаго и нога законопреступнаго погибнут в день зол. 20 Якоже оцет неполезен вреду и дым очима, тако припадшая страсть в телеси сердце оскорбляет. 21 Якоже молие в ризе и червие в древе, тако печаль мужу вредит сердце. 22 Аще алчет враг твой, ухлеби его: аще ли жаждет, напой его: 23 сие бо творя, углие огненное собираеши на главу его, Господь же воздаст тебе благая. 24 Ветр северный воздвизает облаки, лице же безстыдно язык раздражает. 25 Лучше жити во угле непокрытем, неже во храмине общей со женою клеветливою. 26 Якоже вода студеная души жаждущей благоприятна, тако весть благая от земли издалеча. 27 Якоже аще кто источник заграждает и исходище воды губит, тако не лепо праведнику пасти пред нечестивым. 28 Ясти мед много не добро: почитати же подобает словеса славна. Якоже град стенами разорен и не огражден, тако муж творяй что без совета.

**26** Якоже роса в жатву и якоже дождь в лете, тако несть безумному чести. 2 Якоже птицы отлетают и врабиеве, тако клятва суетная не найдет ни на коже. 3 Якоже бичь

коню и остен ослу, тако жезл языку законопреступну. 4  
Не отвечаей безумному по безумию его, да не подобен  
ему будеш: 5 но отвечаей безумному по безумию его,  
да не явится мудр у себе. 6 От путей своих поношение  
творит, иже посла вестником безумным слово. 7 Отими  
шествие от глезн и законопреступление от уст безумных.  
8 Иже привязует камень в пращи, подобен есть дающему  
безумному славу. 9 Терния прозябают в руце пияницы, и  
порабощение в руце безумных. 10 Многими волнуется всяка  
плоть безумных, сокрушается бо изступление их. 11 Якоже  
пес, егда возвратится на своя блевотины, и мерзок бывает,  
тако безумный своею злобою возвращься на свой грех.  
Есть стыд наводяй грех, и есть стыд слава и благодать. 12  
Видех мужа непщевавша себе мудра быти, упование же  
имать безумный паче его. 13 Глаголет ленивый послан на  
путь: лев на путех, на стогнах же разбойницы. 14 Якоже  
дверь обращается на пяте, тако ленивый на ложи своем. 15  
Скрыв ленивый руку в недро свое не возможет принести  
ко устом. 16 Мудрейший себе ленивый является, паче во  
изюбилии износящаго весть. 17 Якоже держай за ошиб пса,  
тако председателствуяй чуждему суду. 18 Якоже врачуемии  
мещут словеса на человеки, сретаяй же словом первый  
запнется: 19 тако вси коварствующие над своими други: егда  
же увидени будут, глаголют, яко играя содеях. 20 Во мнозех  
древех растет огонь: а идеже несть разгневающая, умолкает  
свар. 21 Огнице углию, и дрова огневи: муж же клеветлив в  
мятеж свар. 22 Словеса ласкателей мягка: сия же ударяют в  
сокровица утроб. 23 Сребро даемо с лестию, якоже скудель  
вменяемо: устне гладки сердце покрывают прискорбно. 24

Устнама вся обещавае плачай враг, в сердцы же содевает леть. 25 Аще ты молит враг велиим гласом, не веруй ему, седьмь бо есть лукавствий в души его. 26 Таяй вражду составляет леть: открывает же своя грехи благоразумный на сонмищих. 27 Изрываяй яму искреннему впадется в ню: валяяй же камень на себе валит. 28 Язык лжив ненавидит истины, уста же непокровенна творят нестроение.

**27** Не хвалися о утрии, не веси бо, что родит (день) находяй. 2 Да хвалит ты искренний, а не твоя уста, чуждий, а не твои устне. 3 Тяжко камень и неудобносно песок, гнев же безумнаго тяжший обоего. 4 Безмилостивна ярость и остр гнев, но ничтоже постоит ревности. 5 Лучше обличения откровенна тайныя любве. 6 Достовернее суть язвы друга, нежели вольная лобзания врага. 7 Душа в сытости сущи сотам ругается: души же нищетней и горькая сладка являются. 8 Якоже егда птица отлетит от гнезда своего, тако человек порабощается, егда устранился от своих мест. 9 Миры и вином и фимиамы красуется сердце, растерзаваетжеся от бед душа. 10 Друга твоего или друга отча не оставляй: в дом же брата своего не вниди неблагополучно: лучше друг близ, неже брат далече живый. 11 Мудр буди, сыне, да веселится сердце твое, и отврати от себе понослива словеса. 12 Хитрый злым находящим укрывается: безумнии же нашедше тщету постраждут. 13 Отими ризу его, преjde бо досадитель, иже чуждая погубляет. 14 Иже аще благословит друга утро велиим гласом, от кленущаго ни чимже разнствовати возмнится. 15 Капли изгоняют человека в день зимен из дому его, тако и жена клеветливая из своего дому. 16 Север жесток ветр, именем же приятен нарицается. 17

Железо железа острит: муж же поощряет лице дружне. **18** Иже насаждает смоковницу, снесть плоды ея: а иже хранит господу своему, честен будет. **19** Якоже суть неподобна лица лицам, сице ниже сердца человек. **20** Ад и Погибель не насыщаются: такожде и очи человечестии несыти. (Sheol h7585) **21** Испытание сребру и злату разделение: муж же испытывается усты хвалящих его. **22** Аще биеша безумнаго посреде сонмища срамляя его, не отимеши безумия его. **23** Разумне разумевай души стада твоего, и да приставиши сердце твое ко твоим стадам. **24** Яко не во век мужев державы и крепость, ниже предает от рода в род. **25** Прилежи о злацах сущих на поли и пожнеша траву, и собирай сено нагорное, **26** да имаши овцы на одеяние: почитай поле, да будут ти агнцы. **27** Сыне, от мене имаши речения крепка в жизнь твою и в жизнь твоих служителей.

**28** Бегают нечестивый ни единому же гонящу, праведный же яко лев уповая. **2** За грехи нечестивых судове востают: муж же хитрый угасит я. **3** Продерзый в нечестиих оклеветает нищья, якоже дождь сильный не полезен: **4** тако оставивши закон хвалят нечестие, любящии же закон ограждают себе стену. **5** Мужие злии не уразумеют суда, ищущии же Господа уразумеют о всем. **6** Лучше нищ ходяй во истине, нежели богат ложь. **7** Хранит закон сын разумный: а иже пасет несытость, безчестит отца своего. **8** Умножая богатство свое с лихвами и прибыли милующему нищья собирает е. **9** Укланяй ухо свое не послушати закона и сам молитву свою омерзил. **10** Иже льстит правья на пути злем, во истление сам впадет: беззаконнии же минуют благая и не внидут в ня. **11** Премудр у себе муж богатый, убогий же

разумив презрит его. 12 Помощию праведных многа бывает слава, на местех же нечестивых погибают человецы. 13 Покрываяй нечестие свое не успеет во благая, поведая же обличения возлюблен будет. 14 Блажен муж, иже боится всех за благоговение, а жестосердый впадает во злая. 15 Лев алчен и волк жажден, иже тиранствует, нищъ сый, над языком убогим. 16 Царь скуден уроком велик клеветник (бывает), а ненавидяй неправды долго лет поживет. 17 Мужа, иже в вине смертне, выручаяй беглец будет, а не утвержден. Наказуй сына, и возлюбит тя и даст лепоту твоей души, не послушает языка законопреступна. 18 Ходяй праведно помощь приимет, ходяй же в стропотны пути увязнет. 19 Делаяй свою землю насытится хлебов, гоняй же праздность насытится нищеты. 20 Муж веры достойный много благословится, злый же не без мучения будет. 21 Иже не срамляется лица праведных, не благ: таковой за укрух хлеба продаст мужа. 22 Тщится обогатитися муж завидлив, и не вестъ, яко милостивый возобладает им. 23 Обличаяй человецы пути благодать имать паче языком ласкающаго. 24 Иже отвергает отца или мать и мнится не согрешати, сей сопричастник есть мужу нечестиву. 25 Неверный муж судит туне, а иже надеется на Господа, в прилежании будет. 26 Иже надеется на дерзо сердце, таковой безумен: а иже ходит в премудрости, спасется. 27 Иже дает убогим, не оскудеет: а иже отвращает око свое, в скудости будет мнозе. 28 На местех нечестивых стенят праведнии, в погибели же их умножатся праведнии.

**29** Лучше муж обличаяй, нежели муж жестоковыйный: внезапно бо палиму ему, несть изцеления. 2 Похваляемым



праведным, возвеселятся людие: началствующим же нечестивым, стенят мужие. 3 Мужу любящу премудрость, веселится отец его: а иже пасет любодейцы, погубит богатство. 4 Царь праведен возвышает землю, муж же законопреступник раскоповает. 5 Иже уготовляет на лице своему другу мрежу, облагает ю на своя ноги. 6 Согрешающему мужу велия сеть: праведный же в радости и в веселии будет. 7 Умеет праведный суд творити убогим, а нечестивый не разумеет разума, и убогому несть ума разумевающаго. 8 Мужие беззаконнии сожгоша град, мудрии же отвратиша гнев. 9 Муж мудр судит языки, муж же злый гневаяйся посмеваемь бывает, а не устрашает. 10 Мужие кровей причастни возненавидят преподобнаго, правии же възыщут душу его. 11 Весь гнев свой произносит безумный: премудрый же скрывает по части. 12 Царю послушающу словесе неправедна, вси, иже под ним, законопреступницы. 13 Заимодавцу и должнику, друг со другом сошедшымся, посещение творит обема Господь. 14 Царю во истине судящему нищым, престол его во свидетелство устроится. 15 Язвы и обличения дают мудрость: отрок же заблуждаяй срамляет родители своя. 16 Многим сущым нечестивым мнози греси бывают, праведнии же, оным падающим, устрашаеми бывают. 17 Наказуй сына твоего, и упокоит тя и даст лепоту души твоей. 18 Не будет сказатель языку законопреступну, храняй же закон блажен. 19 Не накажется словесы раб жесток: аще бо и уразумеет, но не послушает. 20 Аще увидиши мужа скоро в словесех, разумей, яко упование имать паче его безумный. 21 Иже ласкосерд будет от детства, поработится, на последок же

болезновати будет о сем. 22 Муж гневливый воздвизает свар, муж же ярый открывает грехи. 23 Досаждение мужа смиряет, а смиренные утверждает Господь в славе. 24 Иже сообщается татю, ненавидит своя души: аще же клятву предложенную слышавшии не возвестят, 25 убоявшеся и постыдевшеся чловеков, преткнутся: надеявыйся же на Господа возвеселится. Нечестие мужу дает соблажнение: уповаяй же на Владыку спасется. 26 Мнози угождают лицам начальников: от Господа же сбывается правда мужу. 27 Мерзость праведнику муж не праведен: мерзость же законопреступному путь правоведай.

**30** Сия глаголет муж верующым Богови, и почиваю: 2 безумнее бо есмь от всех человек, и разума человеческого несть во мне: 3 Бог же научи мя премудрости, и разум святых уразумею. 4 Кто взыде на небо и сниде? Кто собрал ветры в недра? Кто возврати воду в ризу? Кто обдержал вся концы земли? Кое имя его? Или кое имя сыну его, да разумеши? 5 Вся бо словеса Божия раздужена: защищает же Сам благоговееущих Ему. 6 Не приложи ко словесем Его, да не обличит тя, и ложь будеши. 7 Двое прошу у Тебе: не отими от мене благодати прежде умертвия моего: 8 суетно слово и ложно далече от мене сотвори, богатства же и нищеты не даждь ми: устрой же ми потребная и самодовольная, 9 да не насыщся ложь буду и реку: кто мя видит? Или обнищав украду и кленуся именем Божиим. 10 Не предаждь раба в руке господина, да не когда прокленет тя, и исчезнеши. 11 Чадю зло кленет отца и мать не благословит. 12 Чадю зло праведна себе судит, исхода же своего не измы. 13 Чадю зло высоки очи имать, веждама же своима возносится. 14

Чадо зло мечь зубы (своя) имать, и членовныя яко сечиво,  
еже губити и поядати смиренныя от земли и убогия их от  
человек. 15 Пиявица име три дщери, любовию возлюблены,  
и три сия не насытишася ея, и четвертая не удовлися реци:  
доволно (ми есть). 16 Ад и похоть жены, и земля ненапоеная  
водою и вода и огонь не рекут: довлеет. (Sheol h7585) 17 Око  
ругающееея отцу и досаждающее старости матерни, да  
исторгнут е вранове от дебрива и да снedyт е птенцы орли. 18  
Трие ми суть невозможная уразумети, и четвертаго не вем:  
19 следа орла паряща (по воздуху) и пути змиа (ползуца) по  
камени, и стези корабля пловуща по морю и путей мужа  
в юности (его). 20 Таков путь жены блудницы: яже егда  
сотворит, и измывшися, ничтоже, рече, содеях нелепо. 21  
Тремь трясется земля, четвертаго же не может понести: 22  
аще раб воцарится, и безумный исполнится пищею, и раба  
аще изженет свою госпожу, 23 и мерзкая жена аще ключится  
добру мужу. 24 Четыри же суть малейшая на земли, сия же  
суть мудрейша мудрых: 25 мравие, имже несть крепости и  
уготовляют в жатву пищу: 26 и хирогрилли, язык не крепок,  
иже сотвориша в камениих дома своя: 27 безцарни суть  
прузии, и воют от единого повеления благочинно: 28  
ящерица, руками опирающися и удобь уловляема сущи,  
живет во твердех царевых. 29 Трие суть, яже благопоспешно  
ходят, четвертое же, еже добре проходит: 30 скимен львов  
крепчае зверей, иже не отвращается, ни устрашается скота,  
31 и петель ходя в кокошех благодушен, и козел предводитель  
стаду, и царь глаголяй к народу во языке. 32 Аще вдаси  
себе в веселие и простреши руку твою со сваром, поруган  
будеши. 33 Мельзи млеко, и будет масло. Аще ли ноздри

чешеш, изыдет кровь: аще же извлечеши словеса, изыдут судове и тяжбы.

**31** Моя словеса рекошася от Бога, цареве пророчество, егоже наказа мати его: **2** что, чадо, (соблюдеш, ) что речение Божие? Первородне, тебе глаголю, сыне: что, чадо моего чрева? Что, чадо моих молитв? **3** Не даждь женам твоего богатства и твоего ума и жития в последний совет. **4** С советом все твори, с советом пей вино: сильнии гневливи суть, вина да не пият, **5** да напившеся не забудут мудрости и право судити немощным не возмогут. **6** Дадите сикера сущым в печалех и вино пити сущым в болезнях, **7** да забудут убожества и болезней не вспомянут ктому. **8** Сыне, отвержай уста твоя слову Божию и суди вся здраво: **9** отвержай уста твоя и суди праведно, разсуждай же убога и немощна. **10** Жену доблю кто обрящет, дражайши есть каменя многоценнаго таковая: **11** дерзает на ню сердце мужа ея: таковая добрых корыстей не лишится: **12** делает бо мужу своему благая во все житие: **13** обретши волну и лен, сотвори благопотребное рукама своима. **14** Бысть яко корабль куплю дея, издалеча собирает себе богатство: **15** и востает из нощи, и даде брашна дому и дела рабыням. **16** Узревши село купи, от плодов же рук своих насади стяжание. **17** Препоясавши крепко чресла своя, утвердит мышцы своя на дело, **18** и вкуси, яко добро есть делати, и не угасает светилник ея всю ночь. **19** Лакти своя простирает на полезная, руке же свои утверждает на вретено, **20** и руке свои отверзает убогому, длань же простре нищу. **21** Не печется о сущих в дому муж ея, егда где замедлит: вси бо у нея одеяни суть. **22** Сугуба одеяния сотвори мужу

своему, от виссона же и порфиры себе одеяния. 23 Славен бывает во вратех муж ея, вегда аще сядет в сонмищи со старейшины жителями земли. 24 Плащаницы сотвори и продаде Финикианом, опоясания же Хананеом. 25 Уста своя отверзе внимательно и законно и чин заповеда языку своему. 26 Крепостию и лепотою облечеса, и возвеселися во дни последния. 27 Тесны стези дому ея, брашна же леностнаго не яде. 28 Уста своя отверзе мудро и законно. 29 Милостыня же ея возстави чада ея, и обогатишася: и муж ея похвалию: 30 многи дщери стяжаша богатство, многи сотвориша силу: ты же предупела и превознеслася еси над всеми: 31 ложнаго угождения и суетныя доброты женския несть в тебе: жена бо разумная благословена есть: страх же Господень сия да хвалит. Дадите ей от плодов устен ея, и да хвалимь будет во вратех муж ея.

# Книга Екклесиаста

**1** Глаголы Екклесиаста, сына Давидова, царя Израилева во Иерусалиме. **2** Суета суетствий, рече Екклесиаст, суета суетствий, всяческая суета. **3** Кое изюбиле человеку во всем труде его, имже трудится под солнцем? **4** Род преходит и род приходит, а земля во век стоит. **5** И восходит солнце и заходит солнце и в место свое влечется, сие возсиявая тамо. **6** Идет к югу и обходит к северу, обходит окрест, идет дух и на круги своя обращается дух. **7** Все потоцы идут в море, и море несть насыщаемо: на место, а може потоцы идут, тамо тии возвращаются ити. **8** Вся словеса трудна, не возможет муж глаголати: и не насытитя око зрети, ни исполнитя ухо слышания. **9** Что было, тожде есть, еже будет: и что было сотвореное, тожде имать сотворитися. **10** и ничтоже ново под солнцем. Иже возглаголет и речет: се, сие ново есть: уже бысть в вещех бывших прежде нас. **11** Несть память первых, и последним бывшим не будет их память с будущими на последок. **12** Аз Екклесиаст бых царь над Израилем во Иерусалиме **13** и вдах сердце мое, еже взыскати и разсмотрити в мудрости о всех бывающих под небесем: яко попечение лукаво даде Бог сыном человеческим, еже упражднати в нем. **14** Видех всяческая сотворения сотворенная под солнцем: и се, вся суетство и произволение духа. **15** Разращенное не может исправитися, и лишение не может изчислитися. **16** Глаголах аз в сердцы моем, еже рещи: се, аз возвеличихся и умножих мудрость паче всех, иже быша прежде мене во Иерусалиме, **17** и сердце мое вдах, еже ведети премудрость и разум: и сердце мое виде многая, премудрость и разум, притчи и хитрость: уразумех

аз, яко и сие есть произволение духа: **18** яко во множестве мудрости множество разума, и приложивый разум приложит болезнь.

**2** Рекох аз в сердцы моем: прииди убо, да тя искушу в веселии, и виждь во блазе: и се, такожде сие суетство. **2** Смеху рекох: погрешение, и веселию: что сие твориши? **3** И разсмотрих, аще сердце мое повлечет аки вино плоть мою: и сердце мое настави мя в мудрости, и еже удержати веселие, дондеже увижду, кое благо сыном человеческим, еже творят под солнцем в число дний живота своего. **4** Возвеличих творение мое: создах ми дома, насадих ми винограды, **5** сотворих ми вертограды и сады и насадих в них древес всякаго плода, **6** сотворих ми купели водныя, еже напаяти от них прозябение древес: **7** притяжах рабы и рабыни, и домочадцы быша ми: и стяжание скота, и стад много ми бысть, паче всех бывших прежде мене во Иерусалиме: **8** собрах ми злато и серебро и имена царей и стран, сотворих ми поющих и поющыя, и услаждения сынов человеческих, виночерпцы и виночерпицы. **9** И возвеличихся, и приложихся мудрости паче всех бывших прежде мене во Иерусалиме: и мудрость моя пребысть со мною. **10** И все, егоже просиста очи мои, не отях от них и не возбраних сердцу моему от всякаго веселия моего, яко сердце мое возвеселися во всяцем труде моем. И сие бысть часть моя от всего труда моего. **11** И призрех аз на вся творения моя, яже сотвористе руце мои, и на труд, имже трудихся творити. И се, вся суета и произволение духа, и несть изюбилие под солнцем. **12** И призрех аз видети мудрость, лесть и безумие: яко кто человек, иже пойдет вслед совета, елика сотвори

в нем? 13 И видех аз, яко есть изюбилие мудрости паче безумия, якоже изюбилие света паче тмы: 14 мудраго очи его во главе его, а безумный во тме ходит: и уведех и аз, яко случай един случится всем им. 15 И рех аз в сердцы моем: якоже случай безумнаго, и мне случится: и вскую умудрихся? Аз тогда излишше глаголах в сердцы моем, яко и сие суета, понеже безумный от избытка глаголет: 16 яко несть памяти мудраго с безумным во век, зане уже во днех грядущих вся забвена быша: и како умрет мудрый с безумным? 17 И возненавидех живот, яко лукавно мне сотворение сотворенное под солнцем: понеже всяческая суета и произволение духа. 18 И возненавидех аз всяческая мира и труд мой, имже аз труждаюся под солнцем, яко оставляю его человеку будущему по мне. 19 И кто весть, мудр ли будет или безумен? И обладати ли имать всем трудом моим, имже трудихся и имже мудрствовах под солнцем? И сие же суета. 20 И обратихся аз отрещися сердцу моему о всем труде, имже трудихся под солнцем: 21 яко есть человек, егоже труд в мудрости и в разуме и в мужестве: и человек, иже не потрудися о нем, даст ему часть свою. И сие суета и лукавство велие. 22 Яко бывает человеку во всем труде его и в произволении сердца его, имже той труждается под солнцем, 23 яко вси дние его болезней и ярости попечение ему, ибо в нощи не спит сердце его. И сие же суета есть. 24 Несть благо человеку, но (разве) еже яст и пиет и еже покажет души своей благо в труде своем: и сие видех аз, яко от руки Божия есть: 25 яко кто яст и пиет кроме Его? 26 Яко человеку благу пред лицом Его даде мудрость и разум и веселие, согрешающему же даде попечение, еже прилагати



и собирати, во еже дати благому пред лицем Божиим: яко и сие суета и произволение духа.

**3** Всем время и время всяцей вещи под небесем: 2 время раждати и время умирати, время садити и время исторгати сажденое, 3 время убивати и время целити, время разрушати и время созидати, 4 время плакати и время смеяться, время рыдати и время ликовати, 5 время разметати камение и время собирати камение, время обымати и время удалятися от обымания, 6 время искати и время погубляти, время хранити и время отреяти, 7 время раздрати и время сшити, время молчати и время глаголати, 8 время любити и время ненавидети, время брани и время мира. 9 Кое изюбилие творящаго, в нихже сам трудится? 10 Видех попечение всяческое, еже даде Бог сыном человеческим, еже пещися в нем. 11 Всяческая, яже сотвори, добра (суть) во время свое, ибо всякий век дал есть в сердце их, яко да не обрящет человек сотворения, еже сотвори Бог от начала и даже до конца. 12 Уразумех, яко несть благо в них, но токмо еже веселитися и еже творити благо в животе своем: 13 ибо всяк человек, иже яст и пиет и видит благое во всем труде своем, сие даяние Божие есть. 14 Разумех, яко вся, елика сотвори Бог, сия будут во век: к тем несть приложити и от тех несть отяти, и Бог сотвори, да убоятся от лица Его: 15 бывшее уже есть, и елика имут быти, уже быша, и Бог възыщет гонимаго. 16 И еще видех под солнцем место суда, тамо нечестивый, и место праведнаго, тамо благочестивый. 17 И рех аз в сердцы моем: праведнаго и нечестиваго судит Бог: яко время всяцей вещи и на всяцем сотворении тамо. 18 Рех аз в сердцы моем о глаголании сынов человеческих, яко разсудит их

Бог: и еже показати, яко сии скоти суть: **19** ибо и тем якоже случай сынов человеческих и случай скотский, случай един им: якоже смерть того, тако и смерть сего, и дух един во всех: и что излишше имать человек паче скота? Ничтоже: яко всяческая суета. **20** Вся идут во едино место: вся быша от персти и вся в персть возвращаются. **21** И кто весть дух сынов человеческих, аще той восходит горе? И дух скотский, аще низходит той долу в землю? **22** И видех, яко несть благо, но токмо еже возвеселится человек в творениих своих, яко сия часть его: понеже кто приведет его видети то, еже будет по нем?

**4** И обратихся аз и видех вся оклеветания бывающая под солнцем: и се, слезы оклеветанных, и несть им утешающего, и от руки клеветующих на ня крепость, и несть им утешающего. **2** И похвалих аз всех умерших, иже умроша уже, паче живых, елицы живи суть доселе: **3** и благ паче обоих сих, иже еще не бысть, иже не виде всякаго сотворения лукаваго сотвореннаго под солнцем. **4** И видех аз весь труд и всяко мужество сотворения, яко сие ревность мужа от подруга своего. И сие суета и произволение духа. **5** Безумный объят руке свои и снеде плоти своя. **6** Благо есть исполнение горсти покоя, паче исполнения двою горстию труда и произволения духа. **7** И обратихся аз и видех суетство под солнцем: **8** есть един, и несть втораго, ни сына, ниже брата несть ему, и несть конца всему труду его, ниже око его насыщается богатства. И кому аз труждаюся и лишаю душу мою от благостыни? И сие суета и попечение лукавно есть. **9** Блази два паче одинаго, имже есть мзда блага в труде их: **10** яко аще падется един от них, воздвигнет другий причастника своего: и горе тому

единому, егда падет и не будет втораго воздвигнути его. 11 И аще уснета два, тепло има будет, а един како согреться? 12 И аще укрепится один, два станета противу ему: и вервь треплетена не скоро расторгнется. 13 Благ отрок нищ и мудр, паче стара царя и безумна, иже не разуме внимати еще: 14 яко из дому юзников изыдет царствовати, понеже и в царстве своем родися нищ. 15 Видех всех живущих, ходящих под солнцем, с юным вторым, иже встанет вместо его. 16 Неть конца всем людем, всем, иже пред ними быша, ибо последнии не возвеселятся о нем: яко и сие суета и произволение духа.

**5** Сохрани ногу твою, егда аще идеши в дом Божий, и близ (буди) еже слушати: паче даяния безумных жертва твоя, понеже не ведят, яко творят зло. 2 Не скор буди усты твоими, и сердце твое да не ускоряет износить слово пред лицем Божиим, яко Бог на небеси горе, ты же на земли долу: сего ради да будут словеса твоя мала: 3 яко приходит соние во множестве попечения, тако и глас безумнаго во множестве словес. 4 Аще обещаеши обет Богу, не умедли отдати его, яко неть хотения в безумных: ты убо, елика аще обещаеши, отдаждь. 5 Благо тебе еже не обещаватися, нежели обещавшуся тебе, не отдати. 6 Не даждь устнам твоим еже во грех ввести плоть твою, и да не речеши пред лицем Божиим, яко неведение есть: да не прогневается Бог о гласе твоём и растлит творения рук твоих: 7 яко во множестве соний и суетствия, (так) и словеса многа, темже Бога бойся. 8 Аще обиду нищаго и расхищение суда и правды увидиши во стране, не дивися о вещи: яко высокий над высоким надзиратель, и высокоцыи над ними,

9 и изобилие земли над всем есть царь села возделанна.  
10 Любяй серебро не насытится серебра: и кто насладится во множестве его плода? И сие суета. 11 Во множестве блага умножишася ядущии е: и кое мужество имущему е? Яко начало еже видети очима своима. 12 Сон сладок работающему, аще мало или много снесть: а насытившагося богатство не оставляет уснути. 13 Есть недуг, егоже видех под солнцем, богатство хранимо от стяжателя во зло ему: 14 и погибнет богатство оно в попечении лукавне: и роди сына, и несть в руце его ничтоже: 15 якоже изыде из чрева матере своя наг, возвратится ити, якоже и прииде, и ничтоже возмет от труда своего, да понесет в руце своей. 16 И сие зол недуг: якоже бо прииде, тако и отидет, и кая польза ему, яко трудится на ветер? 17 Ибо вси дние его во тме и плачи и в ярости мнозе, и в недуже и во гневе. 18 Се, видех аз благое, еже есть изрядно, еже ясти и пити и видети благостыню во всем труде своем, имже трудился бы под солнцем, в число дний живота своего, яже дал есть ему Бог, яко сие часть его: 19 ибо всякому человеку, емуже дал есть Бог богатство и имения, и власть даде ему ясти от того и прияти часть свою и возвеселитися о труде своем, сие дар Божий есть: 20 яко не много памятовати имать дни живота своего, понеже Бог облагает его попеченьми в веселии сердца его.

**6** Есть лукавствие, еже видех под солнцем, и много есть над человеком: 2 муж, емуже даст Бог богатство и имение и славу, и несть лишаяй души своей от всех, ихже вожделет, и не даст ему Бог власти от него ясти, яко чуждь муж ясти имать от него. И сие суета и недуг зол есть. 3 Аще родит муж сто (чад) и лета многа поживет, и мнози будут дние лет его, и

душа его не насытится от благостыни, и погребения не бысть ему, рех: благ паче его изверг, 4 яко в суете прииде и во тму идет, и во тме имя его покрывается: 5 и солнца не виде, ниже разуме, покой сему паче того: 6 и поживе тысящу лет сугубо, и благостыни не виде: еда не во едином месте вся идут? 7 Весь труд человек во уста его, и душа его не исполнится. 8 Яко кое излюбиле (человеку) мудрому паче безумнаго? Понеже нищ позна ходити противу живота. 9 Благо видение очию паче ходящаго душею. И се суетствие и произволение духа. 10 Аще что бысть, уже именовася имя его, и познася, еже есть человек и не возможет судитися с крепчайшим паче себе: 11 яко суть словеса многа умножающая суету. 12 Что излишше человеку, яко кто весть, что благо человеку в животе (его) число дний живота суетства его? И сотвори я в сени: яко кто возвестит человеку, что будет по нем под солнцем?

**7** Благо имя паче елеа блага, и день смертный паче дня рождения его. 2 Благо ходити в дом плача, нежели ходити в дом пира, понеже сие конец всякому человеку, и живый даст благо в сердцы его. 3 Блага ярость паче смеха, яко во злобе лица ублажится сердце. 4 Сердце мудрых в дому плача, а сердце безумных в дому веселия. 5 Благо еже слышати прещение премудра, паче мужа слышащаго песнь безумных: 6 якоже глас терния под котлом, тако смех безумных. И сие суета. 7 Яко клевета льстит мудраго и погубляет сердце благородствия его. 8 Блага последняя словес паче начала его: благ терпеливый паче высокога духом. 9 Не тщися в душе своем яриться, яко ярость в недре безумных почиет. 10 Да не речеши: что бысть, яко дние прежднии беша блази

паче сих? Яко не в мудрости вопросил еси о сем. 11 Блага мудрость с наследием, паче же видящим солнце: 12 яко в сени его мудрость, якоже сень сребра, и изюбилие разума премудрости оживляет, иже от нея. 13 Виждь творения Божия: яко кто может украсить, егоже аще Бог превратит? 14 В день благостыни (Его) живи во блазе и виждь в день зла: виждь, и с ним согласно сие сотвори Бог, о глаголании, да не обрящет человек за Ним ничтоже. 15 Всяческая видех во днех суетствия моего: есть праведный погибаяй во своей правде, и есть нечестивый пребываяй во своей злобе. 16 Не буди правдив вельми, ни мудрися излишше, да не когда изумишися. 17 Не нечестуй много и не буди жесток, да не умреша не во время свое. 18 Благо ти есть держатися сего, и от сего не оскверни руки твоя, яко боящимся Бога поспешатся вся. 19 Премудрость поможет мудрому паче десяти обладающих во граде: 20 яко несть человек праведен на земли, иже сотворит благое и не согрешит. 21 И во вся словеса, яже возглаголют нечестивии, не вложи сердца своего, да не услышиши раба своего кленуща тебе: 22 яко многожды возлукавнует на тя, и обхождении многими озлобит сердце твое, якоже и ты клял еси иныя (многия). 23 Вся сия искусих в мудрости: рех, умудрюся: и сия удалися от мене 24 далече паче неже бех, и бездны глубина, кто обрящет ю? 25 Обыдох аз, и сердце мое, еже разумети, еже рассмотреть, и еже взыскати мудрость и разум, и еже разумети нечестиваго безумие и ожесточение и лесть: 26 и обретох аз ю, и реку горчайшу паче смерти жену, яже есть ловитва, и сети сердце ея, узы в руку ея: благий пред лицом Божиим изимется от нея, а согрешаяй ят будет от нея. 27 Се,

сие обретох, рече Екклесиаст: едину единою еже обрести помысл, еже взыска душа моя, и не обретох: **28** и человека единого от тысяч обретох, а жены во всех сих не обретох: **29** обаче се, сие обретох, еже сотвори Бог человека правого, и сии взыскаша помыслов многих.

**8** Кто уведе мудрость? И кто весть разрешение глагола? Мудрость человека просветит лице его, а безстудный возненавиден будет лицом своим. **2** Уста царева сохрани, и о словеси клятвы Божия не скор буди. **3** От лица его пойдеши, не стани во словеси лукавне, яко все, еже (аще) восхощет, сотворит, **4** якоже царь обладаяй, и кто речет ему: что твориши? **5** Храняй заповедь не увесь глагола лукавна: и время суда весть сердце мудраго, **6** яко всяцей вещи есть время и суд: яко разум человека мног (есть) на нем, **7** яко несть ведящаго, что будущее: зане якоже будет, кто возвестит ему? **8** Несть человека владущаго духом, еже возбранити духу: и несть владущаго в день смерти, и несть посла в день брани: и не спасет нечестие сущаго в нем. **9** И все сие видех, и вдах сердце мое во все сотворение, еже сотворено есть под солнцем, вся, во еликих обладан есть человек над человеком, еже озлобити его. **10** И тогда видех нечестивыя во гробы внесены, и от святаго: и идоша и похвалени быша во граде, яко сице сотвориша. И сие суета. **11** Яко несть пререкания бывающаго творящим лукавое вскоре: сего ради уверися сердце сынов человеческих в них, еже сотворити лукавое. **12** Иже согрешит, сотворил есть лукавое, оттоле, и от долготы их: ибо и вем аз, яко есть благо боящимся Бога, да боятся от лица Его, **13** и не будет благо нечестивому, и не продолжит дний в сени, иже несть

бояйся от лица Божия. 14 Есть суета, яже сотворена есть на земли: яко суть праведнии, на нихже постизает яко творение нечестивых, и суть нечестивии, на нихже постизает яко творение праведных. Рех, яко и сие суета. 15 И похвалих аз веселие, яко несть благо человеку под солнцем, но токмо еже ясти и пити и еже веселитися: и то прибыток ему в труде его во днех живота его, ихже дал есть ему Бог под солнцем. 16 В нихже дах сердце мое, еже разумети мудрость и еже ведети попечение сотвореное на земли: яко и во дни и в ноци сна во очию своею несть видяй. 17 И видех вся творения Божия, яко не может человек изобрести творение сотвореное под солнцем: елика аще потрудится человек обрести, и не обрящет: и елика аще речет мудрый уразумети, не возможет обрести. Темже все сие вдах в сердце мое, и сердце мое все сие виде.

**9** Яко праведнии и мудрии и делания их в руце Божией, и любве же и ненависти несть ведяй человек: вся пред лицем их, суета во всех. 2 Случай един праведному и нечестивому, благому и злomu, и чистому и нечистому, и жрущему и не жрущему: якоже благий, тако согрешаяй, якоже кленыйся, тако бояйся клятвы. 3 Сие лукаво во всяцем сотворенем под солнцем, яко случай един всем: и сердце сынов человеческих исполнися лукавствия, и прелесть в сердцах их и в животе их, и по сих к мертвым. 4 Понеже кто есть, иже приобщается ко всем живым? Есть надежда, яко пес живый, той благ паче льва мертва. 5 Понеже живии разумеют, яко умрут, мертвии же не суть ведущии ничтоже: и ктому несть им мзды, яко забвена есть память их, 6 и любовь их и ненависть их и рвение их уже погибе, и части



несть им ктому во веки во всяцем творении под солнцем. 7 Прииди, яждь в веселии хлеб твой и пий во блазе сердцы вино твое, яко уже угодна Богу творения твоя. 8 Во всяко время да будут ризы твоя белы, и елей на главе твоей да не оскудеет. 9 И виждь житие с женою, юже возлюбил еси, во вся дни живота юности твоея, данныя ти под солнцем, вся дни суетствия твоего: яко сие часть твоя в животе твоём и в труде твоём, имже ты трудишися под солнцем. 10 Вся, елика аще обрящет рука твоя сотворити, якоже сила твоя, сотвори: зане несть сотворение и помышление и разум и мудрость во аде, аможе ты идеши тамо. (Sheol h7585) 11 Обратихся и видех под солнцем, яко ни легким течение, ниже сильным брань, ниже самому мудрому хлеб, ниже разумным богатство, ниже ведущым благодать: яко время и случай случится всем сим. 12 Яко убо не разуме человек време свое: якоже рыбы уловляемы во мрежи зле, и аки птицы уловляемы в сети: якоже сия, уловляются сынове человечести во время лукаво, егда нападёт на ня внезапу. 13 И сие видех, мудрость под солнцем, и велика есть во мне: 14 град мал, и мужей в нем мало, и приидет нань царь велик и окрест обляжет его, и соделает на него остроги велия, 15 и обрящет в нем мужа нищаго мудра, и сей спасет град мудростию своею, и человек не воспомяну мужа нищаго онаго. 16 И рех аз: блага мудрость паче силы, и мудрость нищаго уничижена, и словеса его не суть послушаема. 17 Словеса мудрых в покои слышатся, паче клича обладающих в безумии. 18 Блага мудрость паче орудий ратных: и согрешаяй един погубит благостыню многу.

**10** Мухи умершья згноют елеа сладость: честно малое мудрости паче славы велики безумия. **2** Сердце мудраго одесную его, сердце же безумнаго ошуюю его: **3** и в путь егда безумный идет, сердце его лишается, и яже помышляет, вся безумие суть. **4** Аще дух владеющаго въздет на тя, места твоего не остави: яко изцеление утолит грехи велики. **5** Есть лукавство, еже видех под солнцем, аки невольню изыде от лица владеющаго: **6** вдан безумный в высоты велики, а богатии во смиренных сядут: **7** видех рабов на конех, и князей идущих яко рабов на земли. **8** Копаяя яму впадет в ню, и разоряющаго ограду угрызнет его змий. **9** Иземляй камень поболит от них, разсекаяя дрова беду примет в них: **10** аще спадет сечиво, и сам лицом смятется: и силы укрепит, и изюбиле мужу мудрость. **11** Аще угрызнет змий не в шепте, и несть излишества обавающему. **12** Слова уст премудраго благодать, устне же безумнаго потопят его: **13** начало словес уст его безумие, и последняя уст его прелесть лукава. **14** Безумный умножает слова: не разуме человек, что бывшее и что будущее, что создаи его, (и) кто возвестит ему? **15** Труд безумных озлобит их, иже не разуме ити во град. **16** Горе тебе, граде, в немже царь твой юн, и князи твои рано ядят. **17** Блаженна ты, земле, еже царь твой сын свободных, и князи твои во время ядят в силе и не постыдятся. **18** В леностех смирится строп, и в празднестве рук прокаплет храмина. **19** Во смех творят хлеб и вино и елей, еже веселитися живушым: и сребра со смирением послушают всяческая. **20** И в совести убо твоей не клени царя, и в клети ложницы твоея не клени богатаго: яко птица

небесная донесет глас твой, и имеяй криле возвестит слово твое.

**11** Посли хлеб твой на лице воды, яко во множестве дний обрящещи его. **2** Дажь часть седмим и осмим, яко не веси, что будет лукаво на земли. **3** Аще исполнятся облацы дождя, на землю изливают: и аще падет древо на юг, и аще на север, на месте, идеже падет древо, тамо будет. **4** Блюдый ветра не сеет, и сматряяй во облацех не пожнет. **5** В нихже несть ведый, кии путь духа, якоже кости во чреве раждающия: тако не уразумеши дел Божиих, елика сотворит всяческая. **6** В заутрии сей семя твое, и в вечер да не оставляет рука твоя: яко не веси, кое произыдет сие или оно, и аще обоя вкупе благая. **7** И сладко свет, и благо очима зрети солнце: **8** яко аще и многа лета поживет человек, и о всех сих возвеселится, и помянет дни тмы, яко мнози будут: все грядущее суета. **9** Веселися, юноше, во юности твоей, и да ублажит тя сердце твое во днех юности твоея, и ходи в путех сердца твоего непорочен и не в видении очию твоею: и разумей, яко о всех сих приведет тя Бог на суд: **10** и отстави ярость от сердца твоего, и отрини лукавство от плоти твоея: яко юность и безумие суета.

**12** И помяни Сотворшаго тя во днех юности твоея, дондеже не приидут дние злобы твоея, и приспеют лета, в нихже речеши: несть ми в них хотения: **2** дондеже не померкнет солнце и свет, и луна и звезды, и обратятся облацы созади дождя: **3** в день, в оньже подвигнутся стражие дому, и развратятся мужие силы, и упразднятся мелющии, яко умалишася, и помрачатся зрящии во скважнех: **4** и затворят двери на торжищи, в немощи гласа мелющия, и востанет

на глас птицы, и смирятся вся дщери песни: 5 и на высоту узрят, и ужас на пути, и процветет амигдал, и отолстеют пружие, и разрушится каппарис: яко отиде человек в дом века своего, и обыдоша на торжищи плачущии: 6 дондеже не превратится уже серебряное, и не сокрушится повязка золотая, и сокрушится водонос у источника, и сломится колесо в колее. 7 И возвратится персть в землю, якоже бе, и дух возвратится к Богу, иже даде его. 8 Суета суетствий, рече Екклесиаст, всяческая суета. 9 И лишнее, яко бысть Екклесиаст мудр, и яко научи разуму человека: и ухо изследит красоту притчей. 10 Много взыска Екклесиаст, еже обрести словеса хотения, и написанное правости, словеса истины. 11 Словеса мудрых якоже остны воловии и якоже гвоздие вонзено, иже от сложений дани быша от пастыря единого. 12 И множае от них, сыне мой, хранися: творити книги многи несть конца, и учение многое труд плоти. 13 Конец слова, все слушай: Бога бойся и заповеди Его храни, яко сие всяк человек: 14 яко все творение приведет Бог на суд о всяцем погрешении, аще благо и аще лукаво.

## Песнь песней Соломона

**1** <sup>2</sup> Да лобжет мя от лобзаний уст своих: яко блага сосца твоя паче вина, <sup>3</sup> и воня мира твоего паче всех аромат. Мирозлияное имя твое: сего ради отроковицы возлюбиша тя. <sup>4</sup> Привлекоша тя: вслед тебе в воню мира твоего течем. Введе мя царь в ложницу свою: возрадуемся и возвеселимся о тебе, возлюбим сосца твоя паче вина: правость возлюбим тя. <sup>5</sup> Черна есмь аз и добра, дщери Иерусалимския, якоже селения Кидарска, якоже завесы Соломони. <sup>6</sup> Не зрите мене, яко аз есмь очернена, яко опали мя солнце: сынове матере моея сваряхуся о мне, положиша мя стража в виноградех: винограда моего не сохраних. <sup>7</sup> Возвести ми, егоже возлюбил душа моя, где пасеши? Где почиваеши в полудне? Да не когда буду яко облагающаяся над стады друзей твоих. <sup>8</sup> Аще не увеси самую тебе, добрая в женах, изыди ты в пятах паств и паси козлища твоя у кущей пастырских. <sup>9</sup> Конем моим в колесницах фараоновых уподобих тя, ближняя моя. <sup>10</sup> Что украшены ланиты твоя яко горлицы, выя твоя яко монисты? <sup>11</sup> Подобия злата сотворим ти с пестротами сребра. <sup>12</sup> Дондеже (будет) царь на восклонении своем, нард мой даде воню свою. <sup>13</sup> Вязание стакти брат мой мне, посреде сосцу моею водворится: <sup>14</sup> грезн кипров брат мой мне в виноградех Енгаддовых. <sup>15</sup> Се, еси добра, искренняя моя, се, еси добра: очи твои голубине. <sup>16</sup> Се, еси добр, брат мой, и еще красен: одр наш со осенением, <sup>17</sup> преклади дому нашего кедровии, дски наша кипарисныя.

**2** Аз цвет польный и крин удольный. <sup>2</sup> Якоже крин в тернии, тако искренняя моя посреде дщерей. <sup>3</sup> Яко яблонь посреде древес лесных, тако брат мой посреде сынов: под сень

его восхотех и седох, и плод его сладок в гортани моем. 4 Введите мя в дом вина, вчините ко мне любовь: 5 утвердите мя в мирех, положите мя во яблоцех: яко уязвлена (есмы) любовию аз. 6 Шуйца его под главою моею, и десница его оымет мя. 7 Заклях вас, дщери Иерусалимли, в силах и крепостех села: аще возставите и возбудите любовь, дондеже восхощет. 8 Глас брата моего: се, той идет, скача на горы и прескача на холмы. 9 Подобен есть брат мой серне или младу еленю на горах вефильских. Се, сей стоит за стеною нашу, проглядая оконцами, приницая сквозе мрежи. 10 Отвещает брат мой и глаголет мне: востани, прииди, ближняя моя, добрая моя, голубице моя. 11 Яко се, зима преjde, дождь отиде, отиде себе: 12 цветы явишася на земли, время обрезания приспе, глас горлицы слышан в земли нашей: 13 смоквь изнесе цвет свой, виногради зреюще даша воню. Востани, прииди, ближняя моя, добрая моя, голубице моя, и прииди. 14 Ты, голубице моя, в покрове каменне, близ предстения: яви ми зрак твой, и услышан сотвори ми глас твой: яко глас твой сладок, и образ твой красен. 15 Имите нам лисы малыя, губящия винограды: и виногради наши созревают. 16 Брат мой мне, и аз ему, пасый в кринах, 17 дондеже дхнет день, и двинутся сени. Обратися, уподобися ты, брате мой, серне или младу еленю на горах юдолий.

**3** На ложи моем в нощех исках, егоже возлюби душа моя, исках его, и не обретох его: воззвах его, и не послуша мене. 2 Востану убо и обыду во граде и на торжищих и на стогнах, и поищу, егоже возлюби душа моя. Поисках его, и не обретох его: звах его, и не послуша мене. 3 Обретоша мя стрегущи,

обходяще во граде: видесте ли, егоже возлюби душа моя?  
4 Яко мало егда преидох от них, дондеже обретох, егоже  
возлюби душа моя: удержал его, и не оставил его, дондеже  
введох его в дом матери моея и в чертог зачатия мя. 5  
Заклях вас, дочери Иерусалимския, в силах и в крепостех  
селных: аще подвижете и воздвижете любовь, дондеже аще  
восхощет. 6 Кто сия восходящая от пустыни, яко стебло дыма  
кадящее смирну и ливан, от всех благовоний мироварца?  
7 Се, одр Соломонь, шестьдесят сильных окрест его от  
сильных Израилевых, 8 вси имуще оружия, научени на  
брань: муж, оружие его на бедре его от ужаса в нощех.  
9 Одр сотвори себе царь Соломон от древес Ливанских.  
10 Столпы его сотвори серебряны и восклонение его злато:  
восход его багрян, внутрь его камень послан, любовь от  
дщерей Иерусалимских. 11 Дщери Сиони, изыдите и видите  
в цари Соломоне в венце, имже венча его мати его в день  
обручения его и в день веселия сердца его.

**4** Се, еси добра, ближняя моя, се, еси добра: очи твои  
голубине, кроме замолчания твоего: власи твои яко стада  
козиц, яже открышася от Галаада. 2 Зубы твои яко стада  
остриженных, яже изыдоша из купели, вся двоеплодны, и  
неродящая несть в них. 3 Яко вервь червлена устне твои,  
и беседа твоя красна: яко обращение шипка ланиты твоя,  
кроме замолчания твоего. 4 Яко столп Давидов выя твоя,  
создан в Фалпиофе: тысяща щитов висит на нем, вся стрелы  
сильных. 5 Два сосца твоя яко два млада близнца серны,  
пасомая во кринах, 6 дондеже дхнет день, и подвижутся  
сени. Пойду себе к горе смирей и к холму ливанску. 7 Вся  
добра еси, ближняя моя, и порока несть в тебе. 8 Гряди

от Ливана, невесто, гряди от Ливана: прииди и прейди из начала Веры, от главы Санира и Аермона, от оград львовых, от гор пардалеов. 9 Сердце наше привлекла еси, сестро моя невесто, сердце наше привлекла еси единым от очию твоєю, единым монистом выи твоея. 10 Что удобреста сосца твоя, сестро моя невесто? Что удобреста сосца твоя паче вина, и воня риз твоих паче всех аромат? 11 Сот искапают устне твои, невесто, мед и млеко под языком твоим, и благовоние риз твоих яко благоухание Ливана. 12 Вертоград заключен сестра моя невеста, вертоград заключен, источник запечатлен. 13 Леторасли твоя сад шипков с плодом яблочным, кипри с нардами, 14 нарды и шафран, трость и киннамон со всеми древами ливанскими, смирна, алой со всеми первыми мирами, 15 источник вертограда, и кладязь воды живы и истекающая от Ливана. 16 Востани, севере, и гряди, юже, и повеи во вертограде моем, и да потекут ароматы мои.

**5** Да снидет брат мой в вертоград свой и да яст плод овощей своих. Внидох в вертоград мой, сестро моя невесто: оымах смирну мою со ароматами моими, ядох хлеб мой с медом моим, пих вино мое с млеком моим. Ядите, ближнии, и пейте и упийтесе, братия. 2 Аз сплю, а сердце мое бдит: глас брата моего ударяет в двери: отверзи ми, сестро моя, ближняя моя, голубице моя, совершенная моя: яко глава моя наполнися росы, и власи мои капель нощных. 3 Совлекохся ризы моея, како облечуся в ню? Умых нозе мои, како оскверню их? 4 Брат мой посла руку свою сквозе скважню, и чрево мое вострепета от него. 5 Востах аз отверсти брату моему: руке мои искапаша смирну, персты мои смирны полны на руках заключения. 6 Отверзох аз брату моему: брат мой



прейде. Душа моя изыде в слово его: взысках его, и не обретох его: звах его, и не послуша мене. 7 Обретоша мя стражие обходящие во граде: биша мя, язвиша мя, взяша верхнюю ризу от мене стражие стеннии. 8 Заклях вы, дочери Иерусалимския, в силах и в крепостех селных: аще обрящете брата моего, возвестите ему, яко уязвлена любовьию аз есмь. 9 Что брат твой паче брата, добрая в женах? Что брат твой от брата, яко тако заклала еси нас? 10 Брат мой бел и чермен, избран от тем: 11 глава его злато избранно, власы его кудрявы, черны яко вран: 12 очи его яко голубицы на исполнениих вод, измовени во млеце, сидящая в наполнениих (вод): 13 ланиты его аки фиалы аромат, прозябающая благовоение: устне его крины, каплющие смирну полную: 14 руце его обточены златы, наполнены фарсиса: чрево его сосуд слоновый на камени сапфирове: 15 лыста его столпи мраморовы, основани на степенех златых: вид его яко Ливан, избран яко кедрове: 16 гортань его сладость, и весь желание: сей брат мой и сей ближний мой, дочери Иерусалимли.

**6** Камо отиде брат твой, добрая в женах? Камо уклонися брат твой? И взыщем его с тобою. 2 Брат мой сниде в вертоград свой, в места аромат, паствити в вертоградех и собирати крины. 3 Аз брату моему и брат мой мне, пасый в кринех. 4 Добра еси, ближняя моя, яко благоволение, красна яко Иерусалим, ужас яко вчиненны. 5 Отврати очи твои от мене, яко тии воскрилиша мя: власи твои, яко стада коз, яже взыдоша от Галаада: 6 зубы твои, яко стада остриженных, яже взыдоша от купели, вся близнята родящая, и безчадныя несть в них: яко вервь червлена устне твои, и беседа

твоя красна: 7 яко оброщение шипка ланиты твоя, кроме замолчания твоего. 8 Шестьдесят суть цариц и осмьдесят наложниц, и юнот, имже несть числа: 9 едина есть голубица моя, совершенная моя: едина есть матери своей, избранна есть родившей ю: видеша ю дщери и ублажиша ю, царицы и наложницы, и восхвалиша ю. 10 Кто сия проникающая аки утро, добра яко луна, избранна яко солнце, ужас яко вчиненны? 11 В вертоград орехов снидох видети в плодах потока, видети, аще процвете виноград и возрастоса шипки. 12 Тамо дам сосца моя тебе: не разуме душа моя, положи мя на колеснице Аминадавли. 13 Обратися, обратися, суламитино, обратися, обратися, и узрим в тебе. Что увидите у Суламитины? Приходящая яко лики полков,

**7** что украсишася стопы твоя во обутиих твоих, дщи Надавля? Чины бедру твоею подобни усеряземь, делу рук художника: 2 пуп твой чаша источена, не лишаемая мста: чрево твое яко стог пшеницы, огражден в кринах: 3 два сосца твоя, яко два млада близнецы серны: 4 выя твоя яко столп слоновый: очи твои яко езера во Есевоне, во вратах дщерей многих: нос твой яко столп Ливанский, сматряяй лице Дамаска: 5 глава твоя на тебе яко Кармил (гора), и заплетение главы твоея яко багряница, царь увязан в преристаниих. 6 Что украсилася еси, и что усладила еси, любы, во сладостех твоих? 7 Сие величество твое: уподобилася еси финику, и сосца твоя грезном. 8 Рекох: възыду на финик, удержу высоту его: и будут сосцы твои яко грезнове винограда, и воня ноздрей твоих яко яблока: 9 и гортань твой яко вино благо, ходящее брату моему в правость, довольно устнам моим и зубом. 10 Аз брату моему,

и ко мне обращение его. 11 Прииди, брате мой, и взыдем на село, водворимся в селех: 12 ураним в винограды, увидим аще процвете виноград, процветоша ли овощи, процветоша ли яблока? Тамо дам тебе сосца моя. 13 Мандрагоры даша воню, и при дверех наших вси плоды новии: до ветхих, брате мой, соблюдох ти.

**8** Кто даст тя, брате мой, ссуца сосцы матере моя? Обретши тя вне целую тя, и ктому не уничижат мене. 2 Пойму тя, введу тя в дом матере моя и в ложницу заченшия мя: тамо мя научиши: напою тя от вина с вонями строенаго, от воды яблук моих. 3 Шуйца его под главою моею, и десница его оымет мя. 4 Заклях вас, дщери Иерусалимския, в силах и в крепостех селных: аще подвижете и воздвижете любовь, дондеже аще восхощет. 5 Кто сия восходящая убелена и утвержаема о брате своем? Под яблонею возбудих тя: тамо роди тя мати твоя, тамо поболе тобою рождшая тя. 6 Положи мя яко печать на сердцы твоём, яко печать на мышце твоей: зане крепка яко смерть любы, жестока яко ад ревность: крила ея крила огня, (углие огненно) пламы ея. (Sheol h7585) 7 Вода многа не может угасити любве, и реки не потопят ея. Аще даст муж все имение свое за любовь, уничижением уничижат его. 8 Сестра наша мала и сосцу не имать: что сотворим сестре нашей в день, в оньже аще глаголатися будет ей? 9 Аще стена есть, соградим на ней забрала сребряна: и аще дверь есть, напишем на ней дску кедрову. 10 Аз стена, и сосцы мои яко столпи: аз бех во очию их аки обретающая мир. 11 Виноград бысть Соломону во Вееламоне: даде виноград свой стрегущим: муж принесет в плоде его тысящу сребреник. 12 Виноград мой предо мною:

тысяща Соломону и двести стрегущим плод его. 13 Седяй в  
вертоградех, и друзие внимлющи гласу твоему: глас твой  
внуши мне. 14 Бежи, брате мой, и уподобися серне или юнцу  
еленей, на горы ароматов.

# Книга пророка Исаии

**1** Видение, еже виде Исаиа сын Амосов, еже виде на Иудею и на Иерусалим, в царство Озии и Иоафама, и Ахаза и Езекии, иже царствоваша во Иудеи. **2** Слыши, небо, и внуши, земле, яко Господь возглагола: сыны родих и возвысих, тии же отвергошася Мене. **3** Позна вол стяжавшаго и, и осел ясли господина своего: Израиль же Мене не позна, и людие Мои не разумеша. **4** Увы, язык грешный, людие исполнены грехов, семя лукавое, сынове беззаконнии, остависте Господа и разгневавсте Святаго Израилева, отвратитесь вспять. **5** Что еще уязвляетея, прилагающе беззаконие? Всякая глава в болезнь, и всякое сердце в печаль. **6** От ног даже до главы несть в нем целости: ни струп, ни язва, ни рана палящаяся: несть пластыря приложити, ниже елеа, ниже обязания. **7** Земля ваша пуста, гради ваши огнем пожжени, страну вашу пред вами чуждии поядают, и опусте низвращена от людей чуждих. **8** Оставится дщерь Сионя яко куща в винограде и яко овощное хранилище в вертограде, яко град воюемый. **9** И аще не бы Господь Саваоф оставил нам семене, яко Содома убо были быхом, и яко Гоморру уподобилися быхом. **10** Услышите слово Господне, князи Содомстии: внемлите закону Божию, людие Гоморрстии. **11** Что Ми множество жертв ваших, глаголет Господь? Исполнен есмь всесожжений овних и тука агнцев, и и крове юнцев и козлов не хочу. **12** Ниже приходите явитися Ми: кто бо изыска сия из рук ваших? Ходити по двору Моему не приложите. **13** И аще принесете Ми семидал, всуе: кадило мерзость Ми есть. **14** Новомесячий ваших и суббот и дне великаго не потерплю: поста и праздности, и новомесячий ваших и праздников

ваших ненавидит душа Моя: бысте Ми в сытость, ктому не стерплю грехов ваших. 15 Егда прострете руки (вашя) ко Мне, отвращу очи Мои от вас: и аще умножите моление, не услышу вас: руки бо ваша исполнены крове. 16 Измыйтеся, (и) чисти будите, отимите лукавства от душ ваших пред очима Моима, престаните от лукавств ваших. 17 Научитесь добро творити, взыщите суда, избавите обидимаго, судите сиру и оправдате вдовицу, 18 и приидите, и истяжимся, глаголет Господь. И аще будут греси ваши яко багряное, яко снег убелю: аще же будут яко червленое, яко волну убелю. 19 И аще хотите и послушаете Мене, благая земли снесите: 20 аще же не хотите, ниже послушаете Мене, мечь вы пояст: уста бо Господня глаголаша сия. 21 Как бысть блудница град верный Сион полн суда? В немже правда почиваше, ныне же (в нем) убийцы. 22 Сребро ваше неискушено, корчемницы твои мешают вино с водою. 23 Князи твои не покажутся, общницы татем, любяще дары, гоняще воздаяние, сирым не судящим и суду вдовиц не внимающим. 24 Сего ради тако глаголет Владыка Господь Саваоф: горе крепким во Израили: не престанет бо ярость Моя на противных, и суд врагом Моим сотворю: 25 и наведу руку Мою на тя, и разжегу в чистоту, непокаряющихся же погублю, и отиму всех беззаконных от тебе, и всех гордых смирю. 26 И приставлю судии твоя якоже прежде, и советники твоя яко от начала: и по сих наречешися град правды, мати градовом, верный Сион. 27 С судом бо спасется пленение его и с милостынею. 28 И сокрушатся беззаконнии и грешницы вкупе, и оставивши Господа скончаются: 29 занеже постыдятся о идолах своих, ихже сами восхотеша, и посрамятся о садех своих, ихже

возжелеша. 30 Будут бо яко теревинф отметнувый листовия (своя), и яко вертоград не имый воды. 31 И будет крепость их яко стебель изгребия, и делания их яко искры огненные, и сожгутся беззаконницы и грешницы вкупе, и не будет угашаяй.

**2** Слово бывшее от Господа ко Исаии сыну Амосову о Иудеи и о Иерусалиме. 2 Яко будет в последния дни явлена гора Господня, и дом Божий на версе гор, и возвысится превыше холмов: и приидут к ней вси языцы. 3 И пойдут языцы мнози и рекут: приидите, и взыдем на гору Господню и в дом Бога Иаковля, и возвестит нам путь Свой, и пойдём по нему. От Сиона бо изыдет закон, и слово Господне из Иерусалима: 4 и судити будет посреде язык и избличит люди мнози: и раскуют мечы своя на орала и копия своя на серпы, и не возмет язык на язык меча, и не навькнут ктому ратоватися. 5 И ныне, доме Иаковль, приидите, пойдём светом Господним. 6 Остави бо люди Своя, дом Иаковль: зане якоже из начала наполнися страна их волхвований, якоже иноплеменников, и чада многа иноплеменнича родишася им. 7 Наполнися бо страна их сребра и злата, и не бяше числа сокровищ их: и наполнися земля их коней, и не бяше числа колесниц их: 8 и наполнися земля мерзостей дел рук их, и поклонишася тем, яже сотвориша персты их: 9 и преклонися человек и смирился муж, и не претерплю им. 10 И ныне видите в камение и скрыйтеся в землю от лица страха Господня и от славы крепости Его, егда встанет сокрушити землю. 11 Очи бо Господни висоцы, человек же смирен: и смирился высота человеческая, и возиесется Господь един в день оный. 12 День бо Господа Саваофа на всякаго досадителя и

горделиваго, и на всякаго високаго и величаваго, и смирятся:  
13 и на всяк кедр Ливанский высоких и превознесенных и на  
всяко древо желудя Васанска, 14 и на всякую гору высокую  
и на всякий холм высокий, 15 и на всякий столп высок и на  
всякую стену высокую, 16 и на всякий корабль морской и на  
всяко видение доброты кораблей. 17 И смирится всякий  
человек, и падется высота человека, и вознесется Господь  
един в день оный. 18 И рукотвореная вся скрывают, 19 внесше  
в пещеры и в раселины камней и в вертепы земныя, от  
лица страха Господня и от славы крепости Его, егда встанет  
сокрушити землю. 20 В день бо оный изринет человек  
мерзости своя златыя и серебряныя, яже сотвориша, да  
поклоняются суетным и нетопырем, 21 еже внити в вертепы  
твердаго камене и в раселины камней, от лица страха  
Господня и от славы крепости Его, егда встанет сокрушити  
землю. 22 Оставьте (убо) вам человека, емуже есть дыхание  
в ноздрех его: яко в чем вменися сей?

**3** Се, Владыка Господь Саваоф отимет от Иерусалима и  
от Иудеи крепкаго и крепкую, крепость хлеба и крепость  
воды, 2 исполина и крепкаго, и человека ратника и судию, и  
пророка и смотреливаго, и старца 3 и пятьдесятначалника,  
и дивнаго советника и премудраго архитектона и разумнаго  
послушателя. 4 И поставлю юношы князи их, и ругателие  
господствовати будут ими. 5 И нападати имут людие,  
и человек на человека, и человек на ближняго своего:  
приразится отроча к старцу, и безчестный к честному. 6 Яко  
имется человек брата своего, или домашняго отца своего,  
глаголя: ризу имаши, началовождь нам буди, и брашно мое  
под тобою да будет. 7 И отвещав в день оный речет: не



буду твой началовождь, несть бо в дому моем ни хлеба, ни ризы: не буду началовождь людем сим. 8 Яко оставлен бысть Иерусалим, и Иудеа паде, и язык их со беззаконием, не покаяющься Господеви. 9 Сего ради ныне смирися слава их, и студ лица их противу ста им: грех же свой яко Содомский возвестиша и явиша. Горе души их, зане умыслиша совет лукавый на себе самих, 10 рекше: свяжем праведнаго, яко непотребен нам есть. Убо плоды дел своих снедят. 11 Горе беззаконному: лукавая бо приключатся ему по делом руку его. 12 Людие Мои, приставницы ваши пожинают вас, и истязующии обладают вами: людие Мои, блажации вас льстят вы и стези ног ваших возмущают. 13 Но ныне устроится Господь на суд и поставит на суд люди Своя: 14 Сам Господь на суд приидет со старейшины людий и со князи их. Вы же почто запалисте виноград Мой, и разграбление убогаго в домех ваших? 15 Почто вы обидите людий Моих и лице убогих посрамляете? Глаголет Господь Саваоф. 16 Сия глаголет Господь: понеже вознесошася дщери Сиони и ходиша высокою выею и помизанием очес и ступанием ног, купно ризы влекущья (по долу) и ногама купно играющья: 17 и смирит Господь началныя дщери Сиони, и Господь откроет срамоту их. 18 В день он, и отимет Господь славу риз их и красоты их, и вплетения златая (на главе) и тресны ризныя, и луницы гривенныя 19 и срачицы тонкия, и красоту лица их и состроение красы славныя, 20 и обручи и перстни, и мониста и запястия и художныя усерязи, 21 и багряницы и пребагряная, и утварь храмную 22 и светлая лаконская, и виссоны и синеты, и червленицы 23 и виссон со златом и синетою претыканы, и тончицы

преиманы златом: 24 и будет вместо вони добрыя смрад, и вместо пояса ужем препояшешися, и вместо украшения златаго, еже на главе, плешь имети будеши дел твоих ради, и вместо ризы багрянныя препояшешися вретischem: 25 и сын твой добрейший, егоже любиши, мечем падет, и крепцыи ваши мечем падут и смирятся: 26 и восплачутся хранилища утварей ваших, и останешися едина и о землю ударена будеши.

**4** И имутся семь жен за мужа единого, глаголющя: хлебы наш ясти будем и в ризы наша одеватися, точию имя твое да наречется на нас, отими укоризну нашу. 2 В день оный возсияет Бог в совете со славою на земли, еже вознести и прославити останок Израиля. 3 И будет останок в Сионе и останок во Иерусалиме, святи нарекутся вси написанныи в жизнь во Иерусалиме: 4 яко отмыет Господь скверну сынов и дщерей Сионских и кровь Иерусалимску очистит от среды их духом суда и духом зноя. 5 И приидет Господь, и будет все место горы Сиони, и вся яже окрест ея осенит облак во дни, и яко дыма и света огненна горяща в нощи, всею славою покрывается: 6 и будет в сень от зноя и в покров и в сокровение от жестости и дождя.

**5** Воспою ныне Возлюбленному песнь Возлюбленного моего винограду моему: виноград бысть Возлюбленному в розе, на месте тучне: 2 и ограждением оградих и окопах, и насадих лозу избранну, и создах столп посреде его, и предпочиле ископах в нем, и ждах, да сотворит гроздие, и сотвори терние. 3 И ныне, живущии во Иерусалиме и человеце Иудин, судите между Мною и виноградом Моим. 4 Что сотворю еще винограду Моему, и не сотворих ему? Занеже

ждах, да сотворит гроздие, сотвори же терние. 5 Ныне убо возведу вам, что Аз сотворю винограду Моему: отиму ограждение его, и будет в разграбление: и разорю стену его, и будет в поспание. 6 И оставлю виноград Мой, и ктому не обрежется, ниже покопается, и взыдет на нем, якоже на лядине, терние: и облаком заповем, еже не одождити на него дождя. 7 Виноград бо Господа Саваофа, дом Израилев есть, и человек Иудин новый сад возлюбленный: ждах, да сотворит суд, сотвори же беззаконие, и не правду, но вопль. 8 Горе совокупляющим дом к дому и село к селу приближающим, да ближнему отимут что: еда вселитесь едины на земли? 9 Услышашася бо во ушесех Господа Саваофа сия: аще бо будут домове мнози, в запустение будут велиции и добрии, и не будут живущии в них: 10 идеже бо возорют десять супруг волов, сотворит корчаг един, и сеяй артавас шесть сотворит меры три. 11 Горе встающим заутра и сикер гонящим, ждущим вечера: вино бо сожжет я: 12 со гусльми бо и певницами, и тимпаны и свирельми вино пият, на дела же Господня не взирают и дел руку Его не помышляют. 13 Убо пленени быша людие мои, за еже не ведети им Господа, и множество бысть мертвых глада ради и жажди водных. 14 И разшири ад душу свою и разверзе уста своя, еже не престати: и снидут славнии и велиции и богатии и губителие их и веселяйся в нем: (Sheol h7585) 15 и смирится человек, и обезчестится муж, и очи высокоглядающии смирятся. 16 И вознесется Господь Саваоф в суде, и Бог Святой прославится в правде: 17 и упасутся расхищеннии яко юнцы, и пустыни плененных агнцы поядят. 18 Горе привлекающим грехи яко ужем долгим,

и яко ига юнична ременем беззакония своя, **19** глаголющим: скоро да приблизатся, яже сотворит, да видим, и да приидет совет Святаго Израилева, да разумеем. **20** Горе глаголющим лукавое доброе, и доброе лукавое, полагающим тму свет, и свет тму, полагающим горькое сладкое, и сладкое горькое. **21** Горе, иже мудри в себе самих и пред собою разумни. **22** Горе крепким вашим, вино пьющим, и вельможам растворяющим сикер, **23** оправдающим нечестива даров ради, и еже есть праведное праведнаго вземлющим от него. **24** Сего ради якоже сгорит трость от угля огненнаго и сожжется от пламене разгоревшагося, корень их яко персть будет, и цвет их яко прах взыдет: не восхотеша бо закона Господа Саваофа, но слово Святаго Израилева раздражиша. **25** И возярися гневом Господь Саваоф на люди Своя, и наложи руку Свою на них, и порази их: и раздражишася горы, и быша трупы их яко гной посреде пути. И во всех сих не отвратися ярость Его, но еще рука Его высока. **26** Воздвигнет убо знамение во языцех сущих далече и позвиждет им от конец земли, и се, скоро легче грядут: **27** не взалчут, ни утрудятся, ни воздремлют, ни поспят, ни распояшут поясов своих от чресл своих, ниже расторгнутся ремени сапогов их: **28** ихже стрелы остры суть, и луцы их напряжени: копыта коней их яко тверд камень вменишася, колеса колесниц их яко буря. **29** Ярятся яко львоу, и предсташа яко львичища: и имет, и возопиет яко зверь, и извержет, и не будет отемлющаго их. **30** И возопиет их ради в той день, яко шум моря волнующаяся: и воззрят на землю, и се, тма жестока в недоумении их.

**6** И бысть в лето, в неже умре Озия царь, видех Господа сидяща на престоле висоце и превознесенне, и исполнь дом

славы Его. 2 И Серафими стояху окрест Его, шесть крил единому и шесть крил другому: и двема убо покрываху лица своя, двема же покрываху ноги своя и двема летаху. 3 И взываху друг ко другу и глаголаху: Свят, Свят, Свят Господь Саваоф: исполнь вся земля славы Его. 4 И взяся наддверие от гласа, имже вопияху, и дом наполнися дыма. 5 И рекох: о, окаянный аз, яко умилихся, яко человек сый и нечисты устне имый, посреде людей нечистыя устне имущих аз живу: и Царя Господа Саваофа видех очима моима. 6 И послан бысть ко мне един от Серафимов, и в руке своей имяше угля горящъ, егоже клещами взят от олтаря, 7 и прикоснуса устнам моим и рече: се, прикоснуса сие устнам твоим, и отимет беззакония твоя и грехи твоя очистит. 8 И слышах глас Господа глаголюща: кого послю, и кто пойдет к людем сим? И рекох: се, аз есмь, посли мя. 9 И рече: иди и рцы людем сим: слухом услышите, и не уразумеете: и видяще узрите, и не увидите: 10 одебеле бо сердце людей сих, и ушима своима тяжко слышаша, и очи свои смежиша, да не когда узрят очима и ушима услышат, и сердцем уразумеют и обратятся, и изцелю я. 11 И рекох: доколе, Господи? И рече: дондеже опустеют гради, от еже ненаселеным быти, и дома, от еже ненаселеным быти, и дома от еже не быти человеком, и земля останется пуста. 12 И посем продолжит Бог человеки, и умножатся оставльшиися на земли. 13 И еще на ней есть десятина, и паки будет в расхищение якоже теревинф и яко желудь, егда испадет из плюски своея: семя свято стояние его.

**7** И бысть во дни Ахаза сына Иоафамля, сына Озии, царя Иудина, възде Расин царь Арамль, и Факей сын

Ромелиев, царь Израилев, на Иерусалим, воевати на него, и не возмогоша разорити его. 2 И возвестися в дому Давидове, глаголя: совещася Арам со Ефремом, и ужасеся душа его и душа людей его, якоже в дубраве древо ветром возколеблется. 3 И рече Господь ко Исаии: изыди во сретение Ахазу ты и оставыйся Иасув сын твой, к купели горняго пути села белилнича, 4 и речеши ему: блюди, еже молчати, и не бойся, ниже душа твоя да изнеможет от двою древу главень дымящихся сих: егда бо гнев ярости Моея будет, паки изцелю. 5 Сын же Арамль и сын Ромелиев яко совещаста совет лукавый на тя, глаголюще: 6 взыдем во Иудею, и собеседовавше с ними отвратим я к нам и воцарим в ней сына Тавеилева: 7 сия же глаголет Господь Саваоф: не пребудет совет сей, ниже сбудется, 8 но глава Араму Дамаск, и глава Дамаску Расин: но еще шестьдесят и пять летъ, оскудеет царство Ефремово от людей, 9 глава же Ефремови Соморон, и глава Соморону сын Ромелиев: и аще не уверите, ниже имате разумети. 10 И приложи Господь глаголати ко Ахазу, рекый: 11 проси себе знамения от Господа Бога твоего во глубину, или в высоту. (Sheol h7585) 12 И рече Ахаз: не имам просити, ниже искушу Господа. 13 И рече (Исаиа): слышите убо, доме Давидов: еда мало вам есть труд даяти человеком, и како даете Господеву труд? 14 Сего ради даст Господь Сам вам знамение: се, Дева во чреве зачнет и родит Сына, и наречеши имя Ему Еммануил: 15 масло и мед снести, прежде неже разумети ему изволити злая, или избрати благое: 16 зане прежде неже разумети отрочати благое или злое, отринет лукавое, еже избрати благое, и останется земля, еяже ты боишися, от лица двух царей.

17 Но наведет Господь на тя и на люди твоя и на дом отца твоего дни, иже еще не пришли, от дне в онъже отя Ефрема от Иуды, царя Ассирийска. 18 И будет в той день, позвиждет Господь мухам, яже владеют частию реки Египетския, и пчеле, яже есть во стране Ассирийстей: 19 и приидут вси и почуют в дебрех страны и в пещерах каменных, и во вертепех и во всяцей разселине и во всяцем древе. 20 В день оный обриет Господь бритвою наятою об ону страну реки царя Ассирийска, главу и власы ног, и браду отимет. 21 И будет в той день, кормити будет человек юницу от волов и две овце: 22 и будет от множества творения млечнаго, масло и мед снесть всяк оставыйся на земли. 23 И будет в той день, всяко место, идеже аще будет тысяща лоз винограда, по тысящи сикль, в лядину будет и в терние: 24 со стрелою и луком внидут тамо, яко лядиною и тернием будет вся земля: 25 и всяка гора оремая возорется, не найдет тамо страх: будет от лядины и от терния в паству овцам и в поправление волу.

**8** И рече Господь ко мне: приими себе свиток нов велик и напиши в нем писалом человечесим, еже скоро пленение сотворити корыстей, приспе бо: 2 и свидетели мне сотвори верны человеки, Урию иереа и Захарию сына Варахиина. 3 И приступих ко пророчице, и во чреве зачат и роди сына. И рече Господь мне: нарцы имя ему: скоро плени, нагло расхити, 4 зане прежде неже разумети отрочати назвати отца или мать, примет силу Дамаскову, и корысти Самарийския пред царем Ассирийским. 5 И приложи Господь глаголати ко мне еще, глаголя: 6 понеже не восхотеша людие сии воды Силоамли текущая тисе, но восхотеша имети Рассона и

сына Ромелиева царя над вами, 7 сего ради се, возводит Господь на вы воду реки сильну и многу, царя Ассирийска и славу его: и възыдет на всяку дебрь вашу, и обыдет всяку стену вашу, 8 и отимет от Иудеи человека, иже возможет главу воздвигнути, или могущаго что совершити: и будет полк его, во еже наполнити ширину страны Твоея, с нами Бог! 9 Разумейте, языцы, и покаряйтесь, услышите даже до последних земли: могущии, покаряйтесь: аще бо паки возможете, паки побеждени будете, 10 и иже аще совет совещаєте, разорит Господь, и слово, еже аще возглаголете, не пребудет в вас, яко с нами Бог. 11 Тако глаголет Господь: крепкою рукою не покарятся хождению пути людий сих, глаголюще: 12 да не когда рекут: жестоко: все бо, еже аще рекут людие сии, жестоко есть: страха же их не убойтесе, ниже възмьтесе. 13 Господа Сил, Того освятите, и Той будет тебе в страх. 14 И аще будеши уповая на Него, будет тебе во освящение, а не якоже о камень претыкания преткнешися, ниже яко о камень падения: домове же Иаковли в пругле, и в раздолии седящии во Иерусалиме. 15 Сего ради изнемогут в них мнози, и падут, и сокрушатся, и приближатся, и яти будут человецы в твердыни суще. 16 Тогда явлени будут печатлеущии закон, еже не учитися. 17 И речет: пожду Бога отвращаго лице Свое от дому Иаковля и уповая буду Нань. 18 Се, аз и дети, яже ми даде Бог: и будут знамения и чудеса в дому Израилеве от Господа Саваофа, иже обитает на горе Сион. 19 И аще рекут к вам: изыщите чревоволшебников и от земли възглашающих, тщесловующих, иже от чрева глашают, не язык ли к Богу своему възыщет? Что испытуют мертвыя о живых? 20 Закон бо в помощь даде, да рекут не



якоже слово сие, заньже не леть дары даяти. 21 И приидет на вы жесток глад, и будет, егда взалчете, скорбни будете и зло речете князю и отечеству: 22 и воззрят на небо горе, и на землю низу призрят, и се, скудость тесна и тма, скорбь и теснота и тма, якоже не видети: и не оскудеет в тесноте сый даже до времени.

**9** Сие прежде испий, скоро твори, страно Завулоня и земле Неффалимля, и прочии при мори живуции, и об ону страну Иордана, Галилеа языков. 2 Людие ходящии во тме видеша свет велий: живуции во стране и сени смертней, свет возсияет на вы. 3 Множайшии людие, яже извел еси, в веселии Твоем: и возвеселятся пред тобою, якоже веселящиися в жатву, и якоже веселятся делящии корысти. 4 Зане отятыя ярем лежай на них, и жезл, иже на выи их: жезл бо истязующих разсыпа Господь, якоже в день, иже на Мадиама. 5 Яко всякую одежду собранну лестию и ризу с примирением отдадут, и восхотят, да быша огнем сожжены были. 6 Яко отроча родися нам, Сын, и дадеся нам, егоже началство бысть на раме Его: и нарицается имя Его: велика совета Ангел, Чуден, Советник, Бог крепкий, Властелин, Князь мира, Отец будущаго века: приведу бо мир на князи, мир и здравие Ему. 7 И велие началство Его, и мира Его несть предела на престоле Давидове и на царстве его, исправити е и заступити его в суде и правде, отныне и до века: ревность Господа Саваофа сотворит сия. 8 Смерть посла Господь на Иакова, и прииде на Израиля: 9 и уразумеют вси людие Ефремовы и живуции в Самарии, в досаждении и висоцем сердцы глаголюще: 10 плинфы падоша, но приидите, изсечем камение и посечем черничие и

кедры, и созиждем себе столп. 11 И разрушит Бог востающыя на гору Сионю, и враги его разсыплет: 12 Сирию от восток солнца и Еллины от запада солнца, поядающыя Израиля всеми усты. Во всех сих не отвратися ярость Его, но еще рука Его высока. 13 И людие не обратишася, дондеже язвени быша, и Господа не взыскаша. 14 И отят Господь от Израиля главу и ошиб, велика и мала, во един день: 15 старца и чудящихся лицам, сие начало: и пророка учаща беззаконная, сей ошиб. 16 И будут блажасии людий сих льстяще, и льстят, яко да поглотят я. 17 Сего ради о юношах их не возвеселится Господь, и сирот их и вдовиц их не помилует: яко вси беззаконнии и лукавии, и всякая уста глаголют неправду. Во всех сих не отвратися ярость Его, но еще рука Его высока. 18 И разгорится яко огонь беззаконие, и яко трескот сухой пояден будет огнем, и разгорится в чащах дубравных и пояст, яже окрест холмов вся. 19 За ярость гнева Господня сгоре вся земля, и будут людие яко огнем пожжени: человек брата своего не помилует, 20 но уклонится на десно, яко взалчет, и снесть от шуиих, и не насытитися человек ядый плоти мышцы своея: снесть бо Манассий Ефремово, и Ефрем Манассиино, яко вкупе повоюют Иуду. 21 Во всех сих не отвратися ярость (Его), но еще рука Его высока.

**10** Горе пишуцым лукавство: пишуции бо лукавство пишут, 2 укланяюще суд убогих, восхищающе суд нищих людий Моих, яко быти им вдовице в расхищение и сироте в разграбление. 3 И что сотворят в день посещения? Скорбь бо вам отдалече приидет. И к кому прибегнете, да поможет вам? И где оставите славу вашу, 4 еже не впасти в пленение?

И под убиенными падут. И во всех сих не отвратися гнев Его, но еще рука Его высока. 5 Горе Ассирием, жезл ярости Моя и гнев есть в руку их. 6 Гнев Мой послю на язык беззаконен, и своих людей повелю сотворити корысти и пленение, и попрати грады и положити я в прах. 7 Сей же не тако помысли и душею не тако возмне: но отступит ум его, и еже потребити языки не малы. 8 И аще рекут ему: ты ли еси един князь? 9 И речет: не взях ли страны, яже выше Вавилона и Халани, идеже столп создан, и взях Аравию и Дамаск и Самарию? 10 Якоже сия взях, и вся княжения возму. Возрыдайте, изваянная во Иерусалиме и в Самарии: 11 якоже бо сотворих Самарии и рукотворенным ея, тако сотворю и Иерусалиму и кумиром его. 12 И будет, егда скончает Господь вся творя в горе Сиони и во Иерусалиме, наведет на ум великий на князя Ассирийска и на высоту славы очию его. 13 Рече бо: крепостию руки моя сотворю, и премудростию разума (моего) отиму пределы языков, и силу их пленю, 14 и сотрясу грады населенныя, и вселенную всю оыму рукою моею яко гнездо, и яко оставленная яйца возму: и несть, иже убежит мене, или противу мне речет, и отверзет уста и глумит. 15 Еда прославится секира без секущаго ею? Или вознесется пила без влекущаго ю? Такжеде аще кто возмет жезл, или древо: и не тако. 16 Но послет Господь Саваоф на твою честь безчестие, и на твою славу огонь горя возгорится. 17 И будет свет Израилев во огонь, и освятит его огнем горящим, и пояст яко сено вещество. 18 В той день угаснут горы и холми и дубравы, и пояст от души даже до плотей: и будет бежай, яко бежай от пламене горяща: 19 и оставльшиися от них будут в число, и отроча малое

напишет я. 20 И будет в той день, не приложится ктому останок Израилев, и спасеннии Иаковли не будут ктому уповающе на обидевшыя их, но будут уповающе на Бога Святаго Израилева истиною. 21 И обратится останок Иаковль к Богу крепкому. 22 И аще будут людие Израилевы яко песок морской, останок их спасется: 23 слово бо совершая и сокращая правдою, яко слово сокращено сотворит Господь во всей вселенней. 24 Сего ради сия глаголет Господь Саваоф: не бойтесь, людие Мои, от Ассириан, живущии в Сионе, яко жезлом поразит тя: язву бо наводит на тя, еже видети путь Египта. 25 Еще бо мало, и престанет гнев, ярость же Моя на совет их: 26 и воздвигнет Бог Сил на ня язву, яко язву Мадиамлю на месте Скорби, и ярость Его на путь иже к морю, на путь иже во Египет: 27 и будет в той день, отимется иго его от рамене твоего и страх его от тебе, и согниет иго от рамен ваших. 28 Приидет бо во град Аггай, и преидет в Магеддо, и в Махмасе положит сосуды своя. 29 И минет дебрь, и приидет во Аггай: страх приимет Раму град Саулов, 30 побегнет дочь Галимля, услышится в Лаисе, услышится во Анафофе. 31 И ужасеся Мадемина и живущии во Гивиме. 32 Утешайте днесь еже на пути пребыти: утешайте рукою гору дочь Сионю, и холми, иже во Иерусалиме: 33 се Владыка Господь Саваоф смятет славныя со крепостию, и высокоции укоризною сокрушатся, и высокоции смирятся, 34 и падут высокоции мечем, Ливан же с высокими падется.

**11** И изыдет жезл из корене Иессеова, и цвет от корене его взыдет: 2 и почиет на нем Дух Божий, дух премудрости и разума, дух совета и крепости, дух ведения и благочестия: 3

исполнит его дух страха Божия: не по славе судити имать, ниже по глаголанию обличит, 4 но судит правдою смиренному суд и обличит правостию смиренныя земли, и поразит землю словом уст Своих и духом устен убиет нечестиваго: 5 и будет препоясан правдою о чреслах Своих и истиною обвит по ребрам Своим: 6 и пастися будут вкупе волк с агнцем, и рысь почиет со козлищем, и телец и юнец и лев вкупе пастися будут, и отроча мало поведет я: 7 и вол и медведь вкупе пастися будут, и вкупе дети их будут, и лев аки вол ясти будет плеввы: 8 и отроча младо на пещеры аспидов и на ложе изчадий аспидских руку возложит: 9 и не сотворят зла, ни возмогут погубити ни когоже на горе святей Моей: яко наполнися вся земля ведения Господня, аки вода многа покры море. 10 И будет в день оный корень Иессеов, и востаяй владети языки, на того языцы уповати будут: и будет покой его честь. 11 И будет в день оный, приложит Господь показати руку Свою, еже возревновати по останку прочему людей, иже аще останет от Ассириов и от Египта, и Вавилона и от Ефиопии, и от Еламитов и от Востоков солнца, и от Аравии и от островов морских. 12 И воздвигнет знамение в языки, и соберет погибшыя Израилевы, и расточенныя Иудины соберет от четырех крил земли. 13 И отимется ревность Ефремова, и врази Иудины погибнут: Ефрем не возревнует Иуде, и Иуда не оскорбит Ефрема. 14 И полетят в кораблех иноплеменничих, море купно пленят, и сущих от Восток солнца, и Идумею: и на Моава первее руки возложат, сынове же Аммони первии покорятся. 15 И опустошит Господь море Египетское и возложит руку Свою на реку духом пресильным: и поразит на семь дебрый,

якоже преходити ю во обувении: **16** и будет прошествие людем Моим оставшим во Египте, и будет Израилю, якоже в день, егда изыде от земли Египетския.

**12** И речеши в день оный: благословлю и Тя, Господи, яко разгневался еси на мя, и отвратил еси ярость Твою (от мене), и помиловал мя еси. **2** Се, Бог мой спас мой, уповая буду на Него и не убоюся: зане слава моя и похвала моя Господь, и бысть ми во спасение. **3** И почерпите воду со веселием от источник спасения. **4** И речеши в день оный: хвалите Господа, воспойте имя Его, возвестите во языцех славная Его, поминайте, яко вознесется имя Его. **5** Хвалите имя Господне, яко высокая сотвори: возвестите сия по всей земли. **6** Веселитесь и радуйтесь, живущии в Сионе, яко вознесется Святой Израилев посреде тебе.

**13** Видение на Вавилоне, еже виде Исаиа сын Амосов. **2** На горе польней воздвигните знамение, вознесите глас им, не бойтесь, поущайте рукою, отверзите, князи. **3** Аз повелеваю, освященни суть: и Аз веду их, исполини идут исполнити ярость Мою радующеся, вкупе и укаряюще. **4** Глас языков многих на горах, подобен языков многих, глас царей и языков собравшихся: Господь Саваоф заповеда языку оружеборцу **5** приити от земли издалеча, от края основания небесе, Господь и оружеборцы Его, растлити всю вселенную. **6** Рыдайте: близ бо день Господень, и сокрушение от Бога приидет: **7** сего ради всяка рука разслабее, и всяка душа человека убоится, **8** и смятутся послы, и болезни примут я яко жены раждающия: и поскорбят друг ко другу, и ужаснутся, и лице свое яко пламень изменят. **9** Се бо, день Господень грядет неизцельный, ярости и гнева, положити вселенную (всю)

пусту и грешники погубити от нея. 10 Звезды бо небесныя и орион и все украшение небесное света своего не дадят, и помрачится солнце возсиявающее, и луна не даст света своего. 11 И заповем всей вселенней злая и нечестивым грехи их, и погублю укориэну беззаконных и укориэну гордых смирю: 12 и будут оставшии честнии паче, нежели злато нежженое, и человек честен будет паче, нежели камень, иже от Суфира. 13 Разярится бо небо, и земля потрясется от оснований своих, за ярость гнева Господа Саваофа в день, в оньже приидет ярость Его. 14 И будут оставшии яко серна бежащая и яко овца заблудившая, и не будет собираяй, яко человеку в люди своя возвратитися, и человек во страну свою побегнет. 15 Иже бо аще пленится, поразится, и иже собрани суть, мечем падут. 16 И чада их пред ними разбюют, и дома их пленят, и жены их поймут. 17 Се, аз возбуждаю на вы Мидов, иже сребра не вменяют, ниже злата требуют: 18 стреляния юношеская сокрушат, и чад ваших не помилуют, ниже пощадят чад твоих очи их. 19 И будет Вавилон, иже нарицается славный от царя Халдейска, якоже разсыпа Бог Содому и Гоморру, 20 не населится в вечное время, и не внидут в онь чрез многия роды, ниже пройдут его Аравляне, ниже пастуси почиют в нем. 21 И почиют тамо зверие, и наполнятся домове шума, и почиют ту сирины, и беси тамо воспляшут, 22 и онокентавры тамо вселятся, и вогнездятся ежеве в домех их.

**14** Скоро идет и не умедлит: и помилует Господь Иакова и изберет паки Израиля, и почиют на земли своей, и пришлец приложится к ним и приложится к дому Иаковлю, 2 и поймут их языцы и введут на место их, и наследят и умножатся на

земли Божии в рабы и рабыни: и будут пленены пленившии я, и обладани будут обладавшии ими. 3 И будет в той день, упокоит тя Господь от болезни и ярости твоя и от работы жестокия, еюже работал еси им. 4 И примемши плачь сей на царя Вавилонска и речеши в той день: како преста истязуй и преста понуждай? 5 Сокруши Бог ярем грешников, ярем князей, 6 поразив язык яростию, язвою неизцельною, поражаяй язык язвою ярости, еюже не пощаде, почи уповающи. 7 Вся земля вопиет со веселием, 8 и древа ливанова возвеселишася о тебе и кедр ливанский: отнележе ты уснул еси, не взыде посекаяй нас. 9 Ад доле огорчися, срет тя: восташа с тобою вси Исполини обладавшии землю, подвизавшии от престолов своих всех царей языческих. (Sheol h7585) 10 Все отвещают и рекут тебе: и ты пленен еси, якоже и мы: и в нас вменен еси. 11 Сниде слава твоя во ад, многое веселие твое: под тобою постелют гнилость, и покров твой червь. (Sheol h7585) 12 Како спаде с небесе денница восходящая заутра? Сокрушися на земли посылай ко всем языком. 13 Ты же рекл еси во уме твоём: на небо взыду, выше звезд небесных поставлю престол мой, сяду на горе висоце, на горах високих, яже к северу: 14 взыду выше облак, буду подобен Вышнему. 15 Ныне же во ад снидеши и во основания земли. (Sheol h7585) 16 Видевшии тя удивятся о тебе и рекут: сей человек раздражаяй землю, потрясаяй цари, 17 положивый вселенную всю пусту и грады ея разсыпа, плененых не разреши. 18 Все царие языков успоша в чести, кийждо в дому своем. 19 Ты же повержен будеши в горах, яко мертвец мерзкий со многими мертвецы изсечеными мечем, сходящими во ад. 20 Якоже риза в крови



намочена не будет чиста, такожде и ты не будеши чист, зане землю Мою погубил еси и люди Моя избил еси: не пребудеши в вечное время, семя злое. 21 Уготови чада твоя на убиение грехами отца твоего, да не востанут и наследят землю и наполнят землю ратьми. 22 И востану на ня, глаголет Господь Саваоф, и погублю имя их, и останок, и семя: сия глаголет Господь. 23 И положу Вавилона пуста, яко вогнездитися ежем, и будет ни во чтоже: и положу и брения пропасть в пагубу. 24 Сия глаголет Господь Саваоф: якоже глаголах, тако будет, и якоже совещах, тако пребудет, 25 еже погубити Ассириан на земли Моей и на горах Моих: и будут в попрание, и отимется от них ярем их, и слава их от рамен их отимется. 26 Сей совет, егоже совеща Господь на всю вселенную, и сия рука на вся языки вселенныя: 27 яже бо Бог Святый совеща, кто разорит? И руку Его высокую кто отвратит? 28 В лето, в неже умре Ахаз царь, бысть глагол сей: 29 не радуйтеся, вси иноплеменницы, сокрушися бо ярем биющаго вы: от семене бо змиина изыдут изчадия аспидов, и изчадия их изыдут змии парящии: 30 и упасутся убозии им, нищии же человецы в мире починут: и потребит голодом семя твое, и останок твой избьет. 31 Восплачיתесь, врата градов, да возопиют грады смятении, иноплеменницы вси, зане дым от севера идет, и несть, иже пребудет. 32 И что отвещают царие языков? Яко Господь основа Сиона, и тем спасутся смиреннии людий Его.

**15** Нощию погибнет Моавитска земля, нощию бо погибнет стена Моавитская. 2 Плачיתесь о себе, погибнет бо и Дивон, идеже требище ваше: тамо въздете плакатиися над Нававом Моавитским. Плачיתесь, на всяцей главе плешь, вся мышцы

обсечены, 3 на стогнах его препояшится во вретнища, и  
восплачется на храминах его и на улицах его и на стогнах  
его, вси возрыдайте с плачем. 4 Яко возопи Есевон и  
Елеала, даже до Иассы услышася глас их: сего ради чресла  
Моавитиды вопиют, душа ея увестъ. 5 Сердце Моавитиды  
вопиет в ней даже до Сигора: юница бо есть трилетна.  
В возшествии же Луифа к тебе плачущеся взыдут путем  
Арониимлим: вопиет сотрение и трус. 6 Вода Немримля  
пуста будет, и трава ея оскудеет: травы бо зелены не будет.  
7 Еда и сице спасется? Наведу бо на дебрь Аравлян, и  
возмут ю: 8 преjde бо вопль предел земли Моавитския до  
Агаллима, и плачь ея даже до Кладязя Елимля. 9 Вода бо  
Димоня наполнится крове: наведу бо на Димона Аравляны, и  
возму семя Моавле и Ариилево и останок Адаминь.

**16** Послю аки гады на землю: еда камень и пуст есть гора  
дщере Сиони? 2 Будеши бо аки птицы парящия птенец  
отятый, дщи Моавля, потом же Арнон множайше совещавай.  
3 Сотворите покров плача ея присно: в полуденней тме  
бегут, ужаснушася: да не отведешися, 4 обитати будут в  
тебе беглецы Моавли: будут в покровение вам от лица  
гонящаго, яко отяся помощь твоя, и князь погибе попирай  
от земли. 5 И исправится с милостию престол, и сядет на  
нем со истиною во скинии Давидове, судя и взыская суд и  
ускоряя правду. 6 Слышахом укоризну Моавлю, укоритель  
(бысть) зело, гордыню отях: не тако волхование твое, не  
такое. 7 Восплачется Моав, в Моавитиде бо вси восплачутся:  
живущим же в Сефе помышления, и не усрамишися. 8  
Поля Есевоня возрыдают, виноград Севамань: пожирающии  
языков, поперите винограды его, даже до Иазира: не

совокупитесь, обходите пустыню, посланнии ошашася, проидоша бо море. 9 Сего ради восплачуся яко плачем Иазировым о винограде Севамани: древа твоя посече Есевон и Елиала, яко на жатву твою и на оымание вина поперу, и вся падутся. 10 И отимется радость и веселие от виноградов, и в виноградех твоих не возрадуются, и не изгнетут вина в точилех, престало бо есть: 11 сего ради чрево мое на Моава аки гусли возгласит, и внутренняя моя аки стену обновил еси. 12 И будет в посрамление тебе, и яко утрудися Моав о требищих, и внидет в рукотворенная своя, да помолится, и не возмогут избавити его. 13 Сие слово еже глагола Господь на Моава, егда возглагола. 14 И ныне глаголю: в триех летех лет наемника обезчестится слава Моавля во всем богатстве мнозе, и оставится умален и нечестен.

**17** Се, Дамаск возмется от градов и будет в падение. 2 Оставлен в век, в ложе стадам и в покой, и не будет отгоняяй. 3 И ксему не будет укреплен, еже вбегнути тамо Ефрему: и ксему не будет царство в Дамасце, и останок Сирян погибнет: неси бо ты лучший от сынов Израилевых и славы их: сия глаголет Господь Саваоф. 4 Будет в той день помрачение славы Иаковли, и тучная славы его потрясутся. 5 И будет, якоже аще кто собирает жатву стоящую, и семя класов пожинает: и будет, якоже аще кто собирает класы в дебри Тверде. 6 И останется в ней стеблие, или аки зерна маслична две или три на версе висоце, или четыре или пять на ветвии ея останут: сия глаголет Господь Бог Израилев. 7 В той день уповая будет человек на Сотворшаго и, и очи его ко Святому Израилеву воззрят, 8 и не будут уповающе на требища, ниже на дела рук своих, яже сотвориша персты их, и не будут

смотри на Дубравы, ниже на мерзости их. **9** В той день будут гради твои оставлены, якоже оставиша Аморрее и Евее от лица сынов Израилевых: и будут пусты, **10** зане оставил еси Бога спаса твоего и Господа помощника твоего не помянул еси: сего ради насадиши сад неверен и семя неверно. **11** В оньже бо день аще насадиши, прельстишися: а еже аще завтра посееси, то процветет на жатву, во оньже день наследиши, и аки отец человек наследие даси сыном твоим. **12** О, люте множеству языков многих! Аки море волнующееся, тако смятется, и хребет языков многих яко вода возшумит: **13** аки вода многа языцы мнози, аки (шум) воды многия нуждею носимья: и отвержет его и далече поженет его, аки прах плевный веющих противу ветра, и яко прах колесный буря возносящая. **14** К вечеру, и будет плачь: прежде заутрия, и не будет: сия часть пленивших ны, и жребий наследивших нас.

**18** Горе корабельным крилам земли, яже об ону страну рек Ефиопских. **2** Посылай по морю послы в залог и послания книжная верху воды: пойдут бо вестницы легцы ко языку высокоу и к людем странным и строптивым. Кто далее их? Язык безнадежен и погран. **3** Ныне реки земныя вся аки страна населена населится, страна их аки знамение от горы воздвигнется, аки глас трубы услышан будет. **4** Яко тако ми рече Господь: утверждение будет в Моем граде, аки свет зноя полуденнаго и аки облак росный в день жатвы будет. **5** Прежде жатвы, егда совершится цвет, и грезн произыдет по цвете незрел: и отимет гроздие малое серпами и лозие отимет и посечет, **6** и оставит вкупе птицам небесным и зверем земным: и соберутся на ня птицы небесныя, и вси

зверие земли нань приидут. 7 В то время принесутся дары Господу Саваофу от людей оскорбленных и отторженных и от людей великих, отныне и в вечное время: язык надеющихся и попран, иже есть в части речней страны своея, на место, идеже имя Господа Саваофа, на гору Сионю.

**19** Се, Господь сedit на облаце легце и приидет во Египет, и потрясутся рукотворенная Египетская от лица Его, и сердца их разслабнут в них. 2 И востанут Египтяне на Египтяны, и вооружится человек на брата своего, и всяк на ближняго своего, востанет град на град и закон на закон. 3 И возматется дух Египтян в них, и совет их разсыплю, и вопросят богов своих и кумиров своих, и гласящих от земли и чрево волшебников. 4 И предам Египет в руке человеков властелей жестоких, и царие жестоцы обладати будут ими: сия глаголет Господь Саваоф. 5 И испиют Египтяне воду, яже при мори, а река оскудеет и исхнет. 6 И оскудеют реки и ровенницы речнии: и исхнет весь сонм водный, и во всяцем лузе тростнем и ситнем, 7 и злак зеленый весь иже окрест реки, и все сеемое при реце посхнет ветром растленно. 8 И возстенят рыбаerie, и возстенят вси мещущии удицу в реку, и мещущии неводы и мещущии сети возрыдают. 9 И студ примет делающих лен разчесаный и делающих виссон, и будут делающии я в болезни, 10 и вси творящии сикеру опечалются и поболят душами. 11 И юродиви будут князи Танесовы: мудрии царевы советницы, совет их объюродеет. Како речете царю: сынове смысленных мы, сынове царей древних? 12 Где суть ныне мудрии твои, и да возвестят тебе и рекут: что совеща Господь Саваоф на Египет? 13 Оскудеша князи Танесовы, и вознесошася князи

Мемфитстии, и прельстят Египта по племеном. 14 Господь бо раствори им дух прельщения, и прельстиша Египта всеми делесы своими, якоже прельщается пьяный и купно блюющь.

15 И не будет Египтяном дела, еже бы сотворило главу и ошиб, и начало и конец. 16 В той день будут Египтяне аки жены во страхе и трепете от лица руки Господа Саваофа, юже Той возложит на ня. 17 И будет страна Иудейска во страх Египтяном: всяк, иже аще вспомянет ю им, убоятся совета ради, егоже совецца Господь Саваоф нань. 18 В той день будет пять градов во Египте, глаголющих языком Ханаанитским и кленущихся именем Господа Саваофа: град Аседек прозовется един град. 19 В той день будет жертвенник Господеву в земли Египетстей и столп в пределех его Господеву. 20 И будет в знамение во век Господеву в земли Египетстей: яко возопиют ко Господу на оскорбляющыя их, и послет им Господь человека, иже спасет я, судяй спасет я. 21 И познан будет Господь Египтяном: и уведят Египтяне Господа в той день и сотворят жертвы и дары, и обещают обеты Господеву и воздадут. 22 И поразит Господь Египтян язвою великою и изцелит их цельбою, и обратятся ко Господеву, и услышит их и изцелит их цельбою. 23 В той день будет путь от Египта ко Ассирианом, и внидут Ассириане во Египет, и Египтяне пойдут ко Ассирианом, и поработают Египтяне Ассирианом. 24 В той день будет Израиль третий во Египтянех и во Ассирианех, благословен на земли, 25 юже благослови Господь Саваоф, глаголя: благословени людие Мои, иже во Египте и иже во Ассириах, и наследие Мое Израиль.

**20** В лето, в неже вниде Танафан во Азот, егда послан бысть от Арны, царя Ассирийскаго, и воева на Азот и взя его, **2** тогда рече Господь ко Исаии сыну Амосову, глаголя: иди и сверзи вретище со чресл своих, и сандалия твоя иззуй с ног твоих, и сотвори сице, ходя наг и бос. **3** И рече Господь: якоже ходил раб Мой Исаиа наг и бос три лета, три лета будут знамения и чудеса Египтяном и Ефиопляном: **4** яко такожде ответет царь Ассирийск плен Египетск и Ефиопск, юношы и старцы, наги и босы, откровены во стыдение Египту. **5** И постыдятся побеждени Египтяне о Ефиоплянех, на нихже уповаху Египтяне, бяху бо им слава. **6** И рекут живущии на острове сем в день оный: се, мы бехом уповающе бежати к ним на помощь, иже не могоша спастися от царя Ассирийска, и како мы спасемся?

**21** Якоже буря сквозе пустыню проходит, от пустыни исходящая из земли, **2** страшно видение и жестоко поведася мне: преступаяй преступает, и беззаконная беззаконствует: на мя Еламите, и послы Персстии на мя идут: ныне воздохну и утешу себе. **3** Сего ради наполнишася чресла моя расслабления, и болезни прияша мя аки раждающую: неправдовах еже не слышати, потщахся еже не видети. **4** Сердце мое заблуждает, и беззаконие погружает мя, душа моя стоит во страхе. **5** Уготовите трапезу, ядите, пейте: воставше, князи, уготовите щиты, **6** яко тако рече Господь ко мне: шед постави себе стража, и еже аще узриши, возвести. **7** И узрех всадники конныя два, всадника на осляти и всадника на вельблуде. Послушай слушанием многим **8** и призови Урию на стражбу Господню. И рече: стоях выну день, и у полчища аз стоях всю ночь, **9** и се, сам грядет (муж) всадник

двоконный, и отвечава рече: паде, паде Вавилон, и вси кумиры его и вся рукотворенная его сокрушишася на земли. **10** Послушайте, оставшиися, и болезнующии, услышите: еже слышах от Господа Саваофа, Бог Израилев возвести нам. **11** Ко мне зови от Сиира: стрегите забрала. **12** Стрегу заутра и нощию. Аще ищещи, ищи и у мене обитай. **13** В дубраве в вечер преспиши, или на пути Деданове. **14** Во сретение жаждущему воду принесите, живуции во стране Феманове, со хлебы сретайте бежащия множества ради убиенных **15** и множества ради заблуждающих, и множества ради мечей и множества ради луков напряженных, и множества ради падших на сечи. **16** Яко сице рече Господь ко мне: еще лето (едино), якоже лето наемника, оскудеет слава сынов Кидарских, **17** и останок луков сильных сынов Кидарских будет мал, яко Господь Бог Израилев глагола.

**22** Что бысть тебе, яко ныне возлезосте вси на храмины тщетныя? **2** Наполнися град вопиющих, уязвлении твои не мечьми уязвлены, ниже мертвецы твои умерщвлены ратию: **3** вси князи твои побегоша, и пленении жестоце суть связаны, и крепцыи в тебе далече отбежаша. **4** Сего ради рекох: оставите мене, да горце восплачуся: не належите утешати мя о сокрушении дщере рода моего: **5** яко день мятежа и пагубы и попрания, и смятение от Господа Саваофа: в дебри Сиони скитаются, от мала даже до велика скитаются по горам. **6** Еламите же взяша тулы, и всадницы чловецы на конех, и собор ополчения. **7** И будут избранны дебри твоя, наполнятся колесниц, конницы же заступят врата твоя **8** и открыют врата Иудина, и воззрят в той день во избранныя дома града, **9** и открыт сокровенная домов краеградия Давидова, и



узрят, яко множайшии суть, и яко отвратиша воду древняя купели во град, 10 и яко разориша дома Иерусалимли на утверждение стене градней. 11 И сотвористе себе воду между двема стенама, внутрьуду купели древняя, и не воззресте на Сотворившаго ю исперва, и Сограждшаго ю не видесте. 12 И призва Господь, Господь Саваоф в той день плачь и рыдание, и острижение и препоясание во вретница: 13 тии же сотвориша радость и веселие, закалающе телцы и жруще овцы, яко ясти мяса и пити вино, глаголюще: да ямы и прием, утре бо умрем. 14 И откровенна сия суть во ущию Господа Саваофа, яко не оставится вам той грех, дондеже умрете. 15 Сице глаголет Господь Саваоф: иди в кущу ко Сомнану строителю дому и рцы ему: 16 что ты zde, и что тебе zde, яко истесал еси себе zde гроб и сотворил еси себе на висоце гроб, и написал еси себе на камени кущу? 17 Се, ныне Господь Саваоф извержет и сотрет мужа, и отимет утварь твою и венец твой славный, 18 и повержет тя во страну велику и безмерну, и тамо умреши: и положит колесницу твою добрую в безчестие и дом князя твоего в поправление: 19 и извержешися от строительства твоего и от степене твоего. 20 И будет в той день, и призову раба Моего Елиакима сына Хелкиева 21 и облеку его во утварь твою, и венец твой дам ему и державу твою, и строительство твое дам в руке его, и будет яко отец живущим во Иерусалиме и живущим во Иудеи. 22 И дам ему славу Давидову, и овладеет, и не будет противоглаголющаго: и дам ему ключь дому Давидова на рамо его, и отверзет, и не будет затворяющаго, и затворит, и не будет отверзающаго. 23 И поставлю его князя на месте верне, и будет на престоле славы дому отца своего. 24 И

будет уповаяя на него всяк славный в дому отца его, от мала даже до велика: и будут зависяще на нем. 25 В той день, сия глаголет Господь Саваоф, подвигнется человек утвержден на месте верне, и отимется, и падет, и потребится слава, яже на нем, яко Господь глагола.

**23** Плачитесь, корабли Кархидонстии, яко погибе, и ктому не идут от земли Китиейския, отведся пленен. 2 Кому подобни быша живуции во острове, купцы Финичестии, преходящии море? 3 В воде мнозе семя купеческо, аки жатве вносимей купцы язычестии. 4 Усрамяся, Сидоне, рече море. Крепость же морская рече: не болех, ни породих, ни вскормих юнош, ниже вознесох девиц. 5 Егда же слышано будет во Египте, приимет я болезнь о Тире. 6 Идите в Кархидон, плачитесь, живуции во острове сем. 7 Не сие ли бе величание вам исперва, прежде неже предану быти ему? 8 Кто сия совеща на Тира? Еда хуждший есть, или не крепкий есть? Купцы его славнии князи земли. 9 Господь Саваоф совеща разсыпати всякую гордыню славных и обезчестити всякое славное на земли. 10 Делай землю твою, ибо корабли ктому не приидут от Кархидона. 11 И рука Твоя ктому не укрепит по морю, разгневляющая царей. Господь Саваоф заповеда о Ханаане, еже погубити крепость его. 12 И рекут: ктому не приложите укаряти и обидети дщерь Сидоню: и аще отидеши ко Китиом, ниже тамо будет тебе покой: 13 и в землю Халдейску, но и та опустела от Ассириан, яко стена ея падеся. 14 Плачитесь, корабли Кархидонстии, яко погибе твердыня ваша. 15 И будет в той день, оставлен будет Тир седьмдесят лет, якоже время (единого) царя, яко время человеческо: и по седмидесятих летех будет Тир яко

песнь блудницы. **16** Возми гусли, обыди град, блудница забвеная, добре погуди, много воспой, да память твоя будет. **17** И будет по седмидесятих летех, присещение сотворит Бог Тиру, и паки возставится на прежнее и будет торжище всем царствам вселенныя на лица земли. **18** И будет его купля и мзда свято Господеви, не им собрано будет, но живущим пред Господем, вся купля его, ясти и пити и наполнится, и в сытость, на память пред Господем.

**24** Се, Господь разсыплет вселенную и опустошит ю, и откроет лице ея и расточит живущыя на ней. **2** И будут людие аки жрец, и раб аки господин, и раба аки госпожа: будет купуяй яко продай, и взаим емляй аки заимодавец, и должный аки емуже есть должен. **3** Тлением истлеет земля, и расхищением расхищена будет земля: уста бо Господня глаголаша сия. **4** Восплакася земля, и растленна бысть вселенная, восплакашася висоцыи земли. **5** Земля бо беззаконие сотвори живущих ради на ней, понеже преступиша закон и измениша заповеди, разрушиша завет вечный. **6** Сего ради проклятие пояст землю, яко согреша живущии на ней: сего ради убози будут живущии на земли, и останется человек мало. **7** Восплачется вино, возрыдает виноград, возстенут вси радующиися душею. **8** Престало есть веселие тимпанов, преста высокодерзость и богатство нечестивых, престал есть глас гуслей: **9** усрамишася, не пиша вина, горька бысть сикера пиущим. **10** Опусте всяк град, заключит храм, еже не внити. **11** Плачители о вине всюду, престала есть радость вся земная, отиде вся радость земли. **12** И останут гради пусты, и домове оставлени погибнут. **13** Сия вся будут на земли среди языков: якоже

аще кто отрясает масличину, тако отрясут их: и (якоже) аще  
останет от оымания винограда, 14 сии гласом возопиют:  
оставшиися же на земли возрадуются со славою Господнею,  
возмьется вода морская. 15 Сего ради слава Господня во  
островех будет морских, имя Господне прославлено будет. 16  
Господи Боже Израилев, от крил земных чудеса слышахом,  
надежда благочестивому: и рекут: (горе хулящым, иже хулят  
закон, ) горе преступником, иже преступают закон. 17 Страх и  
пропасть и сеть на вас живущих на земли. 18 И будет, бежай  
страха впадет в пропасть, и излазй из пропасти имется в  
сеть: яко окна с небесе отверзошася, и потрясутся основания  
земная. 19 Мятежем возмьется земля, и скудостию оскудеет  
земля. 20 Преклонися и потрясеся земля аки овощное  
хранилище, и аки пьян и шумен падет и не возможет востати,  
преодоле бо на ней беззаконие. 21 И будет в той день,  
наведет Господь на утварь небесную руку и на цари земныя.  
22 И соберут собрание ея и затворят в тверди и в темницы:  
мноземи роды будет посещение их. 23 И истает плинфа  
и падет стена, и устыдится луна и посрамится солнце:  
яко воцарится Господь в Сионе и во Иерусалиме и пред  
старейшины славен будет.

**25** Господи Боже мой, прославлю Тя, воспою имя Твое,  
яко сотворил еси чудная дела, совет древний истинный: да  
будет, Господи. 2 Яко положил еси грады в персть, грады  
твердые, еже пасти основанием их, нечестивых град да не  
созиждется во век. 3 Сего ради благословят Тя людие нищии,  
и гради человек обидимых возблагословят Тя. 4 Был бо  
еси всякому граду смиренному помощник, и изнемогающим  
за оскудение покров, от человек злых избавиши их: покров

жаждущих, и дух человеков обидимых. 5 Аки человецы малодушни жаждущии в Сионе, яко избавиши их от человек нечестивых, имже нас предал еси. 6 И сотворит Господь Саваоф всем языком: на горе сей испиют радость, испиют вино, 7 помажутся миром на горе сей: предаждь сия вся языком: той бо совет на вся языки. 8 Пожре смерть возмогши, и паки отят Господь Бог всякую слезу от всякого лица: поношение людей отят от всея земли, уста бо Господня глаголаша (сия). 9 И рекут в день оный: се, Бог наш, Наньже уповахом, и спасет нас: Сей Господь, потерпехом Его, и возрадовахомся и возвеселихомся о спасении нашем. 10 Покой даст Бог на горе сей, и поперется Моавитида, якоже топчут ток колесницами. 11 И воздвигнет руце свои, якоже и той смири, еже погубити: и смирит гордыню его, на няже руце возложи. 12 И высоту убежища ограда твоя смирит, и обнизится даже до земли.

**26** В той день воспоют песнь сию в земли Иудейстей, глаголюще: се, град крепок, и спасение нам положит стену и ограждение. 2 Отверзите врата, да внидут людие хранящии правду и хранящии истину, 3 приемлющии истину и хранящии мир. 4 Яко на тя надеянием надеяшася, Господи, во век, Боже великий, вечный, 5 иже смилив низвел еси живуцья в высоких: грады крепкия разориши и обнизиши я даже до земли. 6 И поперут я ноги кротких и смиренных. 7 Путь благочестивых прав бысть, и приуготован путь благочестивых. 8 Путь бо Господень суд: уповахом на имя Твое и память, еяже желает душа наша. 9 От нощи утренюет дух мой к Тебе, Боже, зане свет повеления Твоя на земли: правде научитесь, живуцши на земли. 10 Преста бо нечестивый:

всяк, иже не научится правде на земли, истины не сотворит:  
да возмется нечестивый, да не видит славы Господни. 11  
Господи, высока Твоя мышца, и не ведеша, разумеюще же  
постыдятся: ревность приимет люди ненаказанныя, и ныне  
огнь супостаты пояст. 12 Господи Боже наш, мир даждь нам,  
вся бо воздал еси нам. 13 Господи Боже наш, стяжи ны:  
Господи, разве Тебе иного не вемы: имя Твое именуем. 14  
Мертвии же живота не имут видети, ниже врачеве воскресят:  
сего ради навел еси и погубил еси, и взял еси всяк мужеск  
пол их. 15 Приложи им зла, Господи, приложи зла славным  
земли. 16 Господи, в скорби помянухом Тя, в скорби мале  
наказание Твое нам. 17 И яко болящая приближается родити  
и в болезни своей воскрича, тако быхом возлюбленному  
Твоему. 18 Страха ради Твоего, Господи, во чреве прияхом и  
поболехом, и родихом дух спасения Твоего, егоже сотворихом  
на земли: не падемся, но падутся вси живуции на земли. 19  
Воскреснут мертвии и востанут иже во гробех, и возрадуются  
иже на земли: роса бо, яже от Тебе, изцеление им есть,  
земля же нечестивых падет. 20 Идите, людие мои, внидите  
во храмину вашу, затворите двери своя, укрыйтесь мало  
елико елико, дондеже мимоидет гнев Господень. 21 Се бо,  
Господь от святаго (места) наводит гнев на живуция на  
земли: и открыет земля кровь свою и не покрывает избиеных.

**27** В той день наведет Господь мечь святыи и великий  
и крепкий на драконта змиа бежаща, на драконта змиа  
лукаваго, и убьет драконта сущаго в мори. 2 В той день  
виноград добрый, желание пети над ним: 3 аз град крепкий,  
град воюемый, всуе напою его: пленен бо будет нощию, в  
день же падется стена его: несть того, иже не возмет его. 4

Кто мя приставит стрещи стеблие на ниве? Ради вражды сея отринух и. Убо сего ради сотвори Господь Бог вся, елика совеща. 5 И горех, возопиют живуции в нем: сотворим мир Ему, сотворим мир, 6 приходящая чада Иаковля: прозябнет и процветет Израиль, и наполнится вселенная плода его. 7 Еда якоже Той порази, и сам сице уязвится? И якоже сам уби, такожде убиен будет? 8 Сваряся и укоряя отпустит я: не Ты ли был еси помышляя духом жестоким, убити я духом ярости? 9 Сего ради отимется беззаконие Иаковле, и сие есть благословение его, егда отиму грех его, егда положат все камене требищ сокрушено аки прах дробный: и не пребудут древеся их, и кумиры их будут посечени, аки дубрава далече. 10 Обитающее стадо отпущенно будет, аки стадо оставленное: и будет много время в пажить, и тамо починут стада. 11 И по времени не будет в нем всякаго злака, занеже исхнет: жены грядущыя с позорища, приидите: не суть бо людие имуща смысла, сего ради не ущедрит Сотворивый я, ниже Создавый их помилует. 12 И будет в той день, заградит Господь от ровенника речнаго, даже до Ринокоруры (града): вы же соберите сыны Израилевы по единому. 13 И будет в той день, вострубят трубою великою, и приидут погубляеми во стране Ассирийстей и погубляеми во Египте, и поклонятся Господеви на горе святей во Иерусалиме.

**28** Горе венцу гордыни, наимницы Ефремовы, цвет отпадый от славы, на версе горы тучныя пиянии без вина. 2 Се, крепка и жестока ярость Господня, аки град низпускаемый не имый крова, насильно низпускаемый: якоже воды многое множество влекущее страну, земли сотворит покой рукама, 3 и ногама поперется венец гордыни, наимницы Ефремовы.

4 И будет цвет отпадный от надежды славы на версе горы  
высокия, аки ранний плод смоквин: видевый его, прежде  
взятия в руце свои, восхощет поглотити его. 5 В той день  
будет Господь Саваоф венец надежды, сплетеный славою  
оставшимся людем. 6 И оставятся духом судным на суд, и  
крепость возбраняющих погубляти. 7 Сии бо вином суть  
прельщены: прельстишася сикеры ради, жрец и пророк  
изступиша ума от сикеры, пожерты быша вином, потрясошася  
от пьянства сикеры, прельстишася: сие есть привидение. 8  
Проклятие пояст сей совет, сей бо совет ради лихоимства.  
9 Кому возвестихом злая и кому поведяхом весть? Иже  
отдрении (суть) от млека, отторжении от сосца. 10 Печали  
на печаль ожидай, надежды к надежды, еще мало, еще мало,  
11 яко худостию устен, языком иным возглаголют людем сим,  
рекуще им: 12 сей покой алчному и сие сокрушение, и не  
восхотеша слышати. 13 И будет им слово Господа Бога,  
печаль к печали, надежда к надежды, еще мало, еще мало,  
да идут и падутся вспять и в беду впадут, и сокрушатся и  
пленени будут. 14 Сего ради услышите слово Господне,  
мужие озлоблении и князи людий сущих во Иерусалиме.  
15 Яко рекосте: сотворихом завет со адом и со смертию  
сложение: буря носима аще мимоидет, не приидет на нас:  
положихом лжу надежду нашу и лжею покроемся. (Sheol  
h7585) 16 Сего ради тако глаголет Господь: се, Аз полагаю во  
основание Сиону камень многоценен, избран, краеуголен,  
честен, во основание ему, и веруяй в онь не постыдится:  
17 и положу суд в надежду, милость же моя на мерилех,  
и уповавшии вотще на лжу, яко не минет вас буря: 18 и  
не отимет от вас завета смертнаго, и надежда ваша, яже



ко аду, не пребудет. Буря идущая аще найдет, будете ей в поправление: (Sheol h7585) 19 егда мимоидет, возмет вас: яко по всяко утро преходити будет в день, и в нощи будет надежда зла. Научитесь слышати, утесняемии: 20 не можем ратовати, сами же изнемогаем, еже собратися нам. 21 Якоже гора на нечестивых востанет Господь, и будет (якоже) в дебри Гаваонстей, с яростию сотворит дела Своя, горести дело: ярость же Его чуждо употребится, и погубление Его странно. 22 И вы не радуитесь, ниже да возмогут ваши узы: зане скончаны и сокращены вещи слышах от Господа Саваофа, яже сотворит над всею землею. 23 Внушите и слышите глас мой, внимлите и слышите словеса моя. 24 Еда весь день будет оряй орати? Или семя уготовит прежде возделания земли? 25 Не егда ли умягчит лице ея, тогда всеет мало чернухи и кимины, потом же сеет пшеницу и ячмень и просо в пределех твоих? 26 И научишися суду Бога твоего и возрадуешися. 27 Ибо не с жестокостию очищается чернуха, ниже коло колесничное обыдет кимины, но жезлом истрясаются чернуха, кимин же со хлебом снесся. 28 Не во век бо Аз разгневаюся на вы, ниже глас гнева Моего поперет вас. 29 И сия от Господа Саваофа изыдоша чудеса: советуйте, вознесите тщетное утешение.

**29** Горе граду Ариилу, нанже Давид воева. Соберите жита от года до года, снесите бо вкупе с Моавом: 2 озлоблю бо Ариила, и будет крепость его и богатство Мне: 3 и обсядутя аки Давид, и поставлю окрест тебе острог, и согражду столпы. 4 И смирятся словеса твоя до земли, и в землю внидут словеса твоя: и будет глас твой аки гласящих от земли, и ко земли изнеможет глас твой. 5 И будет яко

персть от колесе богатство нечестивых, и аки прах летяй множество утесняющих тя, и будет аки черта внезапно от Господа Саваофа. 6 Присещение бо будет со громом и с трусом и гласом великим, буря несомая и пламень огненный поядай. 7 И будет аки соние видяй во сне ноцию, богатство всех языков, елицы воеваша на Ариила, и вси, иже воеваша на Иерусалима, и вси собраннии нань и озлобляющи его. 8 И будут аки во сне ядущи и пиющи, и воставшым, тощъ их сон: и якоже во сне жагдай аки пияй, воспрянув же еще жаждет, душа же его вотще надеяся: тако будет богатство всех языков, елицы воеваша на гору Сионю. 9 Разслабейте и ужаснитесь, и упийтесе не сикером, ни вином, 10 яко напои вас Господь духом умиления, и смежит очи их и пророков их и князей их, видящих сокровенная. 11 И будут вам вся сия словеса, аки словеса книги запечатленныя сея, юже аще дадут человеку ведущему писания, глаголюще: прочти сие. И речет: не могу прочести, запечатленна бо. 12 И дастся книга сия в руке человеку не ведущему писания, и речется ему: прочти сие. И речет: не вем писания. 13 И рече Господь: приближаются Мне людие сии усты своими и устнами своими почитают Мя, сердце же их далече отстоит от Мене: все же почитают Мя, учаще заповедем человеческим и учением. 14 Сего ради се, Аз приложу, еже преселити люди сия, и преставлю я, и погублю премудрость премудрых и разум разумных сокрыю. 15 Горе творящим глубоко совет, а не Господем: горе в тайне совет творящим, и будут во тме дела их, и рекут: кто ны виде, и кто ны уразумеет, яже мы творим? 16 Не якоже ли брение скудельника вменитесе? Еда речет здание создавшему е: не ты мя создал еси? Или

творение сотворшему: не разумно мя сотворил еси? 17 Не еще ли мало, и приложится Ливан, аки гора Хермель, и Хермель в дубраву вменится? 18 И услышат в день оный глушии словеса книги (сея), и иже во тме и иже во мгле очи слепых узрят. 19 И возрадуются нищии ради Господа в веселии, и отчаявшиися человецы исполнятся веселия. 20 Изчезе беззаконник, и погибе гордый, и потребишася вси беззаконующии во злобе 21 и творящии согрешати человеки во слове: всем же обличающим во вратех претыкание положат, понеже совратиша в неправдах праведнаго. 22 Сего ради тако глаголет Господь на дом Иаковль, егоже определи от Авраама: не ныне постыдится Иаков, ниже ныне лице свое изменит Израиль: 23 но егда увидят чада их дела Моя, Мене ради освятят имя Мое и освятят Святаго Иаковля, и Бога Израилева убоятся. 24 И уразумеют заблуждающии духом смысл, и ропщущии научатся послушати, и языцы немощствующии научатся глаголати мир.

**30** Горе чада отступившая, сия глаголет и Господь: сотвористе совет не Мною и заветы не духом Моим, приложити грехи ко грехом: 2 идущии снити во Египет, Мене же не вопрошиша, еже помощь имети от фараона и заступление от Египтян. 3 Будет бо вам покров фараонов в постыждение и уповающим на Египет укоризна: 4 яко суть в Тане старейшины его, и вестницы его зли. 5 Вотще потрудятся людей ради, иже не уполюзуют их, ниже на помощь, ниже на пользу, но на студ и на укоризну. 6 В печали и в тесноте лев и львичищ: оттуду аспиды и племя аспидов парящих, иже везяху на ослех и на велблюдех богатство свое ко языку, иже не поможет им в помощь, но на студ и

укоризну. 7 Египтяне вотще и всуе успеют вам: возвести им, яко тщетно утешение ваше сие. 8 Ныне убо сед напиши сия на дске и в книгу: яко будут сия во дни времен и даже до века. 9 Яко людие непокориви суть, сынове лживии, иже не похотеша слышати закона Божия, 10 глаголюще пророком: не поведайте нам: и видения видящим: не глаголите нам, но нам глаголите и возвещайте нам иное прельщение 11 и совратите нас с пути сего: отимите от нас путь сей и отимите от нас суд Израилев. 12 Того ради сице глаголет Господь Святыи Израилев: понеже не покористеся словесем сим и надеястесь на лжу, и яко пороптасте и уповающе бысте на слово сие, 13 сего ради будет вам грех сей, аки стена падающая внезапно града тверда пленена, егоже абие настоит падение: 14 и падение его будет яко сокрушение сосуда глиняна, от глины дробны, яко не можно обрести в них чрепа, имже огонь возмеш и в оньже влиеш воды мало. 15 Тако глаголет Господь, Господь Святыи Израилев: егда возвратився воздохнеш, тогда спасешися и уразумеши, где еси был: егда уповал еси на суетная, тщетна крепость ваша бысть, и не хотесте послушати, 16 но рекосте: на конех побегнем. Того ради побегнете. И рекосте: на легких всадницы будем. Того ради легцы будут гонящии вас. 17 От гласа единого побегнут тысяща, и от гласа пяти побегнут мнози, дондеже оставлени будете аки щогла на горе и яко знамяносяи на холме. 18 И паки пождет Бог, еже ущедрити вас, и сего ради вознесетс еже помиловати вас: зане судия Господь Бог ваш есть, и где оставите славу вашу? Блажени вси пребывающии в Нем. 19 Зане людие святии в Сионе вселятс, Иерусалим же плачем восплакася: помилуй мя.

Помилует тя, егда узре глас вопля твоего, послуша тебе.

20 И даст Господь вам хлеб печали и воду тесную, и ктому не приблизятся к тебе льстящие тя: яко очи твои узрят прельщающих тя, 21 и ушеса твоя услышат словеса созади тебе прельщающих, иже глаголют: сей путь, поидим по нему или на десно, или на лево. 22 И отвержеши кумиры посребренные, и позлащенные раздобиши, и развеши яко воду жены месячные, и аки мотыла отвержеши я. 23 Тогда будет дождь семени земли твоя, и хлеб жита земли твоя будет излюблен и тучен, и напасутся скоти твои в той день на месте тучне и пространне. 24 Юнцы ваши и волове делающие землю наядятся плев смешенных со ячменем извевным. 25 И будет на всяцей горе висоце и на всяцем холме вознесенне вода текущая в день оный, егда погибнут мнози, и егда падутся столпи: 26 и будет свет луны аки свет солнца, и свет солнечный будет седмицею в той день, егда изцелит Господь сокрушение людей Своих и болезнь язвы твоя изцелит. 27 Се, имя Господне идет временем многим, горящая ярость Его: со славою слово устен Его, слово гнева полно, и гнев ярости яко огонь пояст: 28 и дух Его аки вода в дебри влекущи приидет даже до выи и разделится, еже смутити языки о прельщении суетнем, и поженет я прелесть тща, и возмет я пред лицом их. 29 Еда присно подобает вам радоватися и входити во святая Моя всегда, аки празднующим и яко веселящимся внити со сопелию в гору Господню к Богу Израилеву? 30 И слышану сотворит Господь славу гласа Своего, и ярость мышцы Своея показати, с яростию и гневом, и со пламенем поядающим возгремит зелно, и яко вода и град низходящя нуждею. 31

Гласом бо Господним побеждени будут Ассириане язвою, еюже аще поразит я. 32 И будет ему окрест, отнюдуже бе их надежда помощи, на нюже той уповаше: тии со тимпаны и гусльми ратовати будут нань от пременения. 33 Ты бо прежде дний истязан будеши: еда и тебе уготовася царствовати? Дебрь глубокою, древеса лежаща, огонь и дрера многа, ярость Господня аки дебрь жупелом горящая.

**31** Горе сходящым во Египет помощи ради, уповающим на кони и на колесницы: суть бо многа, и конническое множество много зело: и не беша уповающе на Святаго Израилева, и Бога не взыскаша. 2 Тойже премудре наведе на них злая, и слово Его не отринется, и востанет на дома человеков злых и на надежду их тщетную, 3 Египтянина человека, а не Бога, конски плоти, и не будет помощи: Господь же наведет руку Свою на ня, и утрудятся помагающи, и вси вкупе погибнут. 4 Занеже тако рече мне Господь: якоже возревет лев, или львицищ о ловитве, юже имет, и возопиет над нею, дондеже наполнятся горы гласа его, и победишася и множества ярости убояшася: тако Господь Саваоф снидет на гору Сионю и на горы его воевати. 5 Якоже птицы парящия, сице защитит Господь Саваоф о Иерусалиме, защитит и избавит, и снабдит и спасет. 6 Обратитесь, совещавающи глубок совет и беззаконен, сынове Израилевы: 7 яко в той день отвергут человецы рукотворенная своя серебряная и рукотворенная золотая, яже сотвориша руки их. 8 И падет Ассур не мечем человеческим, ни мечь мужеский пояст его, и побегнет не от лица меча: юноты же будут в побеждение. 9 Камением бо оымутся яко острогом и побеждени будут, а

бежай пленен будет. Сия глаголет Господь: (блажен, ) иже имеет племя в Сионе и южики во Иерусалиме.

**32** Се бо, Царь праведный воцарится, и князи со судом владети начнут. **2** И будет человек сокрываяй словеса своя, и скрывается, аки от воды носимья: и явится в Сионе яко река текущая славная в земли жаждущей. **3** И ксему не будут уповающе на человеки, но уши вдадут на слышание, **4** и сердце изнемогших вонмет послушати, и языцы немотствующие скоро научатся глаголати мир: **5** и ксему не рекут юродивому владети, и ксему не рекут слуги твои: молчи. **6** Юрод бо юродивая изречет, и сердце его тщетная уразумеет, еже совершати беззаконная и глаголати на Господа прелесть, еже растлити души алчныя и души жаждущыя тщы сотворити. **7** Совет бо злых беззаконная совещавает, растлити смиренныя словесы неправедными и разсыпати словеса смиренных на суде. **8** Благочестивии же смысленне совещаша, и той совет пребудет. **9** Жены богатая, встаните и услышите глас мой: дщери, с надеждою слышите словеса моя: **10** дня летняго память сотворите в болезни с надеждою: потребися оымание винное, преста сеяние, и (собрание) ктому не приидет. **11** Ужаснитесь, сжалитесь, уповавшыя, совлецытесь, наги будите, препояшите чресла своя во вретища **12** и в перси бийтесь о селе желаемем и о винограднем рождении. **13** На земли людий моих терние и былие возникнет, и от всего дому радость восхитится: град богат, **14** домове оставлении, богатство града и дома вожделения оставят: и будут веси пещеры до века, радость ослом дивиим, паствы пастухов: **15** дондеже найдет на ны Дух от вышняго, и будет пустыня в Хермель, а Хермель в

дубраву вменится. **16** И почиет в пустыни суд, и правда в Кармиле вселится: **17** и будут дела правды мир, и одержит правда покой, и уповающе будут до века: **18** и вселятся людие его во граде мира и обитати будут уповающе, и почиют с богатством. **19** Град же, аще снидет, то не на вы приидет: и будут живущии в дубравах уповающе, якоже сущии на полях. **20** Блажени сеющии при всяцей воде, идеже вол и осел попирает.

**33** Горе обидящим вас! Вас никтоже и избидит, и отвергаяй вас не отвержет: пленени будут отметающии (вас) и предадутся, и яко молие в ризе, тако побеждени будут. **2** Господи, помилуй ны, на Тя бо уповахом: бысть племя непокаряющихся в пагубу, спасение же наше во время печали. **3** Гласом страха Твоего ужасошася людие от страха Твоего, и разсеяшася языцы. **4** Ныне же соберутся корысти ваша малаго и великаго: якоже аще кто соберет пруги, тако наругаются вам. **5** Свят Бог живой в вышних, наполнися Сион суда и правды. **6** В законе предадутся, в сокровищих спасение наше, тамо премудрость и хитрость и благочестие ко Господеви: сия суть сокровища правды. **7** Се, ныне во страхе вашем тии убоятся: ихже боястеся, возопиют от вас: вестницы бо послани будут горце плачущеся, просяще мира. **8** Опустеют бо сих путие: преста страх языков, и завет иже к ним вземлется, и не вмените их в человеки. **9** Восплакася земля, посрамлен Ливан, блато бысть Саронь: явлена будет Галилеа и Хермель. **10** Ныне воскресну, глаголет Господь, ныне прославолюся, ныне вознесуся. **11** Ныне узрите, ныне ощутите, тщетна будет крепость духа вашего: огонь вы пояст. **12** И будут языцы пожжени, аки



терние на ниве разметано и пожжено. 13 Услышат дальнии, яже сотвориш, ( глаголет Господь, ) уведят приближающиеся крепость Мою. 14 Отступиша, иже в Сионе, беззаконницы, примет трепет нечестивья: кто возвестит вам, яко огонь горит? Кто возвестит вам место вечное? 15 Ходяй в правде, глаголай правый путь, ненавидай беззакония и неправды и руке оттрясая от даров: отягчаяя уши, да не услышит суда крове: смежаяй очи, да не узрит неправды, 16 сей вселится во висоце пещере камене крепкаго: хлеб ему дастся и вода его верна. 17 Царя со славою узрите, и очи ваши узрят землю издавеча, 18 душа ваша поучится страху Господню: где суть книгоции? Где суть совещавающи? Где есть изчитаяй питаемая малы и велики люди? 19 Имже не совещаше, ниже ведяше глубокий глас имущаго, яко не слышати людем уничтоженным, и несть слышащему смысла. 20 Се, Сион град, спасение наше, очи твои узрят, Иерусалиме, граде богатый, куцы не поколеблются, ниже подвигнутся колые храмины его в вечное время, и узя его не преторгнутя. 21 Яко имя Господне велико вам есть, место вам будет, реки и ровенницы широцы и пространни: не пойдеш по сему пути, ниже пойдет корабль пловуць: 22 Бог бо мой велик есть: не минет мене Господь судия наш, Господь князь наш, Господь царь наш, Господь Той нас спасет. 23 Прервашася узя твоя, яко не укрепишася: щогла твоя преклонися, не распустит ветрил, не воздвигнет знамения, дондеже предастся на пленение: темже мнози хромии плен сотворят, 24 и не рекут: труждаемся, людие живуции в них, оставися бо им грех.

**34** Приступите, языцы, и услышите, князи: да слышит земля и живущии на ней, вселенная и людие, иже на ней. 2 Зане ярость Господня на вся языки и гнев на число их, еже погубити их и предати я на закляние. 3 И язвении их повергнутся и мертвецы, и взыдет их смрад, и намокнут горы кровию их: 4 и истают вся силы небесныя, и свиеется небо аки свиток, и вся звезды спадут яко листвие с лозы, и якоже спадает листвие смоковницы. 5 Упися мечь Мой на небеси: се, на Идумею снидет и на люди пагубныя с судом. 6 Мечь Господень наполнися крове, растолсте туком, от крове козлов и агнцев и от тука козлов и овнов: яко жертва Господеви в Восоре, и закляние велие во Идумеи. 7 И падут с ними сильнии, и овны и юнцы, и упиется земля от крове и от тука их насытитися: 8 день бо суда Господня, и лето воздаяния суда Сионя. 9 И обратятся дебри его в смолу, и земля его в жупел, 10 и будет земля его горящи яко смола днем и ночью, и не угаснет в вечное время, и взыдет дым ея висоце, в роды своя опустеет. 11 И во время много птицы и ежеве, совы и вранове возгнездятся в нем: и возложат нань уже землемерно пустыни, и онокентаври вселятся в нем. 12 Князи его не будут: царие бо и вельможи его будут в пагубу. 13 И возникнут во градах их терновая древеса и во твердынех его, и будут селения сирином и селища струфионом: 14 и срящутся беси со онокентавры и возопиют друг ко другу, ту почиют онокентаври, обретше себе покоища: 15 тамо возгнездится ежь, и сохранит земля дети его со утверждением: тамо елени сретошася и увидеша лица друг друга. 16 Числом преидоша, и един и них не погибе, друг друга не взыска, яко Господь заповеда им, и дух Его собра я.

17 И Той вержет им жребия, и рука Его разделит пастись: в вечное время наследите, в роды родов починут в нем.

**35** Радуйся, пустыня жаждущая, да веселится пустыня и да цветет яко крин. 2 И процветет и возвеселится пустыня Иорданова: и слава Ливанова дадеся ей, и честь Кармилова, и узрят людие мои славу Господню и высоту Божию. 3 Укрепитесь, руже ослабленыя и колена разслабленая: 4 утешитесь, малодушнии умом укрепитесь, не бойтесь: се, Бог наш суд воздает и воздаст, Той приидет и спасет нас. 5 Тогда отверзутся очи слепых, и уши глухих услышат. 6 Тогда скочит хромый яко елень, и ясен будет язык гугнивых: яко проторжесе вода в пустыни и дебрь в земли жаждущей. 7 И безводная будет во езера, и на жаждущей земли источник водный будет: тамо будет веселие птицам, и селитва трости, и лузи. 8 И тамо будет путь чист, и путь свят наречется: и не преидет тамо нечистый, ниже будет тамо путь нечист: разсеянии же пойдут по нему и не заблудят. 9 И не будет тамо льва, ни от зверей злых не взыдет нань, ниже обрящется тамо, но пойдут по нему избавлении: 10 и собраннии Господем обратятся и приидут в Сион с радостию, и радость вечная над главою их: над главою бо их хвала и веселие, и радость примет я, отбеже болезнь и печаль и въздыхание.

**36** И бысть во четвертоенадесять лето царствующу Езекии, възиде Сеннахирим царь Ассирийск на грады тверды Иудейски и взя оныя. 2 И посла царь Ассирийск Рапсака от Лохиса во Иерусалим ко царю Езекии с силою великою, и ста у водоважды купели вышняя на пути села Кнафеова. 3 И изыде к нему Елиаким сын Хелкиев домостроитель, и

Сомнас книгочий, и Иоах сын Асафов памятописец. 4 И рече им Рапсак: рцыте Езекии: сия глаголет царь великий, царь Ассирийск: на что уповаеши? 5 Еда советом и словесы устными битва бывает? И ныне на кого уповаеши, яко не покаряешися мне? 6 Се, уповаеши на жезл тростян сокрушенный сей, на Египет, на негоже аще опрется муж, внидет в руку его и прободет ю: тако есть фараон царь Египетский, и вси уповающии на него: 7 аще же глаголете, на Господа Бога нашего уповаем: не сей ли есть, егоже разори Езекиа высокая и требища его, и заповеда Иуде и Иерусалиму: пред олтарем сим поклонитесь? 8 Ныне соединитесь господину моему царю Ассирийску, и дам вам две тысящы коней, аще можете дати вседающыя на них: 9 и како можете отвратити лице воеводы единаго? Раби суть, иже уповают на Египтян, на коней и всадников: 10 и ныне еда без Господа приидохом на страну сию, воевати на ню? Господь рече ко мне: взыди на землю сию и погуби ю. 11 И рече к нему Елиаким и Сомнас книгочий и Иоах: глаголи к рабом твоим сирски, разумеем бо мы, а не глаголи к нам иудейски: и вскую глаголеши во уши человеком сидящим на стене? 12 И рече к ним Рапсак: еда ко господину вашему, или к вам посла мя господин мой глаголати словеса сия? Не к человеком ли сидящим на ограде, да ядят мотыла и пият мочь с вами вкупе? 13 И ста Рапсак, и возопи гласом велиим иудейски и рече: слышите словеса царя великаго, царя Ассирийска: 14 сия глаголет царь: да не прельщает вас Езекиа словесы, не может избавити вас: 15 и да не глаголет вам Езекиа, яко избавит вы Бог, и не предастся град сей в руце царя Ассирийска: 16 не слушайте Езекии: сия глаголет

царь Ассирийский: аще хотите благословени быти, изыдите ко мне и ядите кийждо виноград свой и смокви, и пейте от потока вашего, **17** дондеже прииду и поиму вы в землю, яже аки ваша земля, земля пшеницы и вина и хлебов и виноградов: **18** да не прельщает вас Езекиа, глаголя: Бог ваш избавит вы: еда избавиша бози язычестии, кийждо страну свою от руки царя Ассирийска? **19** Где есть бог Емафов и Арфафов? И где бог града Сепфарима? Еда возмогоша избавити Самарию от руки моея? **20** Кто от богов всех языков сих, иже избави землю свою от руки моея, яко избавит Бог Иерусалима от руки моея? **21** И умолкоша, и никтоже отвеща ему словесе, повеления ради царева, да никтоже отвещает. **22** И вниде Елиаким сын Хелкиев домостроитель, и Сомнас книгочий силы, и Иоах сын Асафов памятописец ко Езекии в растерзанных ризах и поведаша ему словеса Рапсакова.

**37** И бысть егда услыша царь Езекиа, растерза ризы и облечеса во вретисце и вниде во храм Господень: **2** и посла Елиакима домостроителя, и Сомну книгочия, и старейшины жречески оболчены во вретисца ко Исаии пророку сыну Амосову. **3** И рекоша ему: сия глаголет Езекиа: день печали и укоризны и обличения и гнева днешний день, понеже прииде болезнь раждающей, крепости же не имеет родити: **4** да услышит Господь Бог твой словеса Рапсакова, яже посла царь Ассирийский, господин его, укаряти Бога живаго и поносити словесы, яже слыша Господь Бог твой, и да помолишися ко Господеви Богу твоему о оставшихся сих. **5** И приидоша отроцы царя Езекии ко Исаии. **6** И рече им Исаиа: сиче рцыте ко господину вашему: сия глаголет Господь: не убойся от словес, яже еси слышал, имиже

укориша Мя послы царя Ассирийска: 7 се, Аз вложу в него дух, и услышав весть возвратится во страну свою и падет мечем на своей земли. 8 И возвратися Рапсак и обрете царя Ассирийскаго облежаща Ловну: и услыша царь Ассирийск, яко отиде от Лохиса, 9 и изыде Фарака царь Ефиопский воевати нань: и услышав возвратися и посла послы ко Езекии, глаголя: 10 сице рцыте Езекии царю Иудейску: да не прельщает Бог твой тебе, на Негоже уповая еси, глаголя, яко не предастся Иерусалим в руце царя Ассирийска: 11 или не слышал еси ты, что сотвориша царие Ассирийстии, како всю землю погубиша, и ты ли избавишися? 12 Еда избавиша сих бози язычестии, ихже погубиша отцы мои Гозан и Харран и Расем, иже суть во стране Феемафи? 13 Где суть царие Емафовы, и где Арфафовы, и где града Епфаруема, Анагугана? 14 И взя Езекиа книгу от послов и прочте ю, и вниде во храм Господень и отверзе ю пред Господем. 15 И помолися Езекиа ко Господеву, глаголя: 16 Господи Саваоф, Боже Израилев, седяй на Херувимех, Ты еси Бог един Царь всякаго царства вселенных, Ты сотворил еси небо и землю: 17 приклони, Господи, ухо Твое, услыши, Господи, отверзи, Господи, очи Твои, призри, Господи, и виждь и слыши вся словеса Сеннахиримля, яже посла укаряти Бога живаго: 18 поистинне бо, Господи, пусту сотвориша царие Ассирийстии всю землю и страны их, 19 и ввергоша кумиры их во огонь, не беша бо бози, но дела рук человеческих, древа и камение, и погубиша я: 20 ныне же, Господи Боже наш, спаси ны от руки их, да уведят вся царствия земная, яко Ты еси (Господь) Бог един. 21 И послан бысть Исаиа сын Амосов ко Езекии и рече ему: сия глаголет Господь Бог Израилев: слышах, о нихже

молился еси ко Мне о Сеннахириме цари Ассирийском. 22  
Сие слово, еже глагола о нем Бог: похули ты и поругая тебе  
девица дщи Сионя, на ты главою покива дщи Иерусалимля:  
23 кого укорил и разгневал еси? Или к кому возвысил еси  
глас твой, и не воздвигл еси на высоту очес твоих? Ко  
Святому Израилеву! 24 Яко послами укорил еси Господа,  
ты бо рекл еси: множеством колесниц аз взыдох на высоту  
гор и на последняя Ливана, и посекох высоту кедра его и  
доброту кипарисову, и внидох в высоту части дубравныя 25  
и положих мост, и опустоших воды и все собрание водное:  
26 не слышал ли еси издревле сих, яже Аз сотворих? От  
древних дний совещах, ныне же показах опустошити языки в  
твердынех и живущыя во твердых градех: 27 опустих руце, и  
изсхоша и быша аки сухо сено на кровех и аки трескот: 28  
ныне же покой твой и исход твой и вход твой Аз вем, 29  
ярость же твоя, еуже разгневался еси, и огорчение твое  
взыде ко Мне, и вложу брозду в ноздри твоя, и узду во уста  
твоя, и возвращу тя путем, имже еси пришел. 30 Сие же тебе  
знамение: яждь сего лета, еже еси всеял, а во второе лето,  
еже от себе растет: а в третье насеявше пожнете и насадите  
винограды и снете плоды их: 31 и будут оставшии во Иудеи,  
прорастят корение долу и сотворят в верх плод, 32 яко от  
Иерусалима будут оставшиися и спасшиися от горы Сиони:  
ревность Господа Саваофа сотворит сия. 33 Сего ради тако  
глаголет Господь на царя Ассирийска: не внидет в сей град,  
ниже пустит нань стрелу, ниже возложит нань щита, ниже  
оградит окрест его ограждения: 34 но путем, имже прииде,  
темже возвратится, и во град сей не внидет. Сия глаголет  
Господь: 35 защищу град сей, еже спасти его Мене ради

и ради Давида раба Моего. 36 И изыде Ангел Господень и изби от полка Ассирийска сто осмьдесят пять тысяч. И воставше заутра, обретоша вся телеса мертва. 37 И отиде возвращься Сеннахирим царь Ассирийский и вселися во Ниневии. 38 И внегда поклонятися ему и в дому Насараху отечественачалнику своему, Адрамелех и Сарасар сынове его убиста его мечьми, сами же убежаста во Армению. И воцарися Асордан сын его вместо его.

**38** Бысть же в то время, разболеся Езекиа до смерти. И прииде к нему Исаи пророк сын Амосов и рече к нему: сия глаголет Господь: устрой о доме твоём, умираеши бо ты и не будеши жив. 2 И обрати Езекиа лице свое ко стене и помолися ко Господеву глаголя: 3 помяни, Господи, како ходих пред Тобою со истиною и сердцем истинным, и угодная пред Тобою сотворих. И плакася Езекиа плачем великим. 4 И бысть слово Господне ко Исаии глаголя: 5 иди и рцы Езекии: тако глаголет Господь Бог Давида отца твоего: услышах молитву твою и видех слезы твоя, се, прилагаю к летам твоим лет пятнадцать, 6 и от руки царя Ассирийска избавлю тя и град сей, и защищу о граде сем: 7 сие же тебе знамение от Господа, яко Бог сотворит глаголю сей, якоже глагола: 8 се, аз возвращу сень степеней, имже сниде солнце десять степеней дому отца твоего, возвращу солнце десять степеней, имже сниде сень. И взыде солнце десять степеней, имже сниде сень. 9 Молитва Езекии царя Иудейска, егда боле и воста от недуга своего. 10 Аз рекох в высоте дний моих: пойду во врата адова, оставлю лета прочая. (Sheol h7585) 11 Рекох: кому не узрю спасения Божия на земли живых, кому не узрю спасения Израилева на



земли, ктому не узрю человека со живущими: **12** остах от сродства моего, оставих прочее живота моего, изыде и отиде от мене аки разрушай кущу поткнувый: аки платно дух мой во мне бысть, ткательнице приближающейся отрезати. **13** В той день предан бых до заутра аки льву, тако сокруши вся кости моя: от дне бо до нощи предан бых. **14** Яко ластовица, тако возопию, и яко голубь, тако поучуся: исчезосте бо очи мои, еже взирати на высоту небесную ко Господу, Иже избави мя и отя болезнь души моя: **15** и Той сотвори путеводство во вся лета моя. **16** Господи, о той бо возвестися Тебе, и воздвигл еси дыхание мое, и утешився ожих. **17** Избавил бо еси душу мою, да не погибнет, и завергл еси за мя вся грехи моя. **18** Не похвалят бо Тебе, иже во аде, ни умершии возблагодарят Тя, и не надеются, иже во аде, милости Твоея. (Sheol h7585) **19** Живии же возблагодарят Тя, якоже и аз: отднесь бо дети сотворю, яже возвестят правду Твою, **20** Господи спасения моего: и не престану благословя тя с песнию вся дни живота моего прямо дому Божию. **21** И рече Исаиа ко Езекии: возми от смоквий и сотри, и приложи пластырь на язву и здрав будеши. **22** И рече Езекиа: сие знамение, яко възыду в дом Божий.

**39** В то время посла Меродах Валадан сын Валаданов, царь Вавилонский, писания и послы и дары Езекии: слыша бо, яко болел есть до смерти и воста. **2** И обрадовася о них Езекиа радостию великою, и показа им дом ароматов и мира, и стакти и фимиама, и сребра и злата, и вся дома сосудов сокровищных, и вся елика бяху во сокровищих его: и не оста ничтоже, егоже не показа им Езекиа в дому своем и во всей области своей. **3** И прииде Исаиа пророк ко Езекии царю и

рече к нему: что глаголют сии мужие, и откуда приидоша к тебе? И рече Езекиа: от земли далекия приидоша ко мне, от Вавилона. 4 И рече Исаиа: что видеша в дому твоём? И рече Езекиа: вся, елика в дому моем, видеша, и несть в дому моем, егоже бы не видели, но и яже в сокровищих моих. 5 И рече ему Исаиа: послушай словесе Господа Саваофа: 6 се, дние грядут, глаголет Господь, и возмут вся, яже в дому твоём, и елика собраша отцы твои даже до дне сего, в Вавилон прейдут, и ничесоже оставят: 7 рече Господь, яко и от чад твоих, ихже родил еси, поймут и сотворят каженики в дому царя Вавилонска. 8 И рече Езекиа ко Исаии: благо слово Господне, еже глагола: да будет ныне мир и правда бо дни моя.

**40** Утешайте, утешайте люди Моя, глаголет Бог: 2 священницы, глаголите в сердце Иерусалиму, утешайте и, яко наполнися смирение его, разрешися грех его, яко прият от руки Господни сугубы грехи своя. 3 Глас вопиющаго в пустыни: уготовайте путь Господень, правы сотворите стези Бога нашего: 4 всяка дебрь наполнится, и всяка гора и холм смирится, и будут вся стропотная в право, и острая в пути гладки. 5 И явится слава Господня, и узрит всяка плоть спасение Божие, яко Господь глагола. 6 Глас вопиющаго: возопий. И рекох: что возопию? Всяка плоть сено, и всяка слава человека яко цвет травный: 7 изсше трава, и цвет отпаде, 8 глаголго же Бога нашего пребывает во веки. 9 На гору високу възди, благовествуяй Сиону, возвыси крепостию глас твой, благовествуяй Иерусалиму: возвысите, не бойтесе. Рцы градом Иудиным: 10 се, Бог ваш, се, Господь, Господь со крепостию идет, и мышца Его со властию: се, мзда Его с

Ним, и дело Его пред Ним: 11 аки пастырь упасет паству Свою, и мышцею Своею соберет агнцы, и имущья во утробе утешит. 12 Кто измери горстию воду и небо пядию и всю землю горстию? Кто постави горы в мериле и холмы в весе? 13 Кто уразуме ум Господень, и кто советник Ему бысть, иже научает Его? 14 Или с ким советова, и настави И? Или кто показа Ему суд? Или путь разумения кто показа Ему? Или кто прежде даде Ему, и воздастся Ему? 15 Аще вси языцы, аки капля от кади, и яко претяжение веса вменишася, и аки плюновение вменятся? 16 Дубрава же Ливанова не доволна на сожжение, и вся четвероногая не доволна на всесожжение. 17 И вси языцы яко ничтоже суть, и в ничтоже вменишася. 18 Кому уподобисте Господа, и коему подобию уподобисте Его? 19 Еда образ сотвори древоделатель, или златарь сливав золото позлати его, или подобием сотвори его? 20 Древо бо негниущее избирает древоделатель и мудре ищет, како поставит образ его, и да не поколеблется. 21 Не разумеете ли, не слышасте ли, не возвестися ли вам исперва? Не разумеете ли основания земли? 22 Содержай круг земли, и живущии на ней аки пружи: поставивый небо яко камару и простер е, яко скинию обитати: 23 даяй князи аки ничтоже владети, и землю аки ничтоже сотвори. 24 Не насадят бо, ниже насеют, и не вкоренится в земли корение их: дхну на них ветер, и изсоша, и буря аки стеблие возмет их. 25 Ныне убо кому Мя уподобисте, и вознесуся? Рече Святей. 26 Воззрите на высоту очима вашима и видите, кто сотвори сия вся: носяй по числу утварь Свою, и вся по имени прозовет от многия славы и в державе крепости Своя: ничтоже утаися и Тебе. 27 Еда бо речеши, Иакове, и

что глаголали еси, Израилю: утаися путь мой от Бога, и Бог мой суд отя, и отступи? **28** И ныне не уразумел ли еси ни ли слышал еси? Бог вечный, Бог устроивый концы земли, не взалчет, ниже утрудится, ниже есть изобретение премудрости Его, **29** давая алчущим крепость и неболезненным печаль. **30** Взалчут бо юнейшии, и утрудятся юноты, и избранныи не крепцы будут: **31** терпящие же Господа изменят крепость, окрылатеют аки орли, потекут и не утрудятся, пойдут и не взалчут.

**41** Обновляйтесь ко Мне, острови князи бо изменят крепость: да приблизятся и да глаголют вкупе, тогда суд да возвещают. **2** Кто возстави от восток правду, призваю к ногам своим, и пойдет? Даст пред языки, и цари ужасит: и повержет на землю мечы их, и аки стеблие отвержени луцы их, **3** и проженет я, и пройдет с миром путь ног его. **4** Кто содела и сотвори сия, призваю призываяю от начала родов. Аз Бог первый, и в грядущая Аз есмь. **5** Видеша языцы и убояшася, концы земнии приближишася и приидоша вкупе. **6** Судяй кийждо ближнему, и брату помощи, и речет: **7** превозможе муж древоделатель и ковачь бияй млатом, вкупе проковаяй: овогда убо речет: спаяние добро есть, утвердиша я гвоздьми, положат я, и не подвигнутся. **8** Ты же, Израилю, рабе Мой, Иакове, егоже избрах, семя Авраамле, егоже возлюбих, **9** егоже поях от конец земли, и от стражб ея призвах тя, и рекох ти: раб Мой еси, избрах тя, и не оставих тебе: **10** не бойся, с тобою бо есмь, не прельщаю: Аз бо есмь Бог твой, укрепивый тя, и помогах ти, и утвердих тя десницею Моею праведною: **11** се, постыдятся и посрамятся вси сопротивляющиися тебе, будут бо яко не сущии, и погибнут вси соперницы твои: **12**

взыщеша их, и не обрящеша человеков, иже поругаются тебе: будут бо аки не бывшии и не будут ратующии тебе. 13 Яко Аз Бог твой держай десницу твою, глаголяй тебе: 14 не бойся, Иакове, малый Израилю, Аз помогах ти, глаголет Бог твой, Избавляяй тя Святыи Израилев: 15 се, сотворих тя аки колеса колесничная новая, стирающая аки пила, и сотреша горы, и истончиши холмы, и аки прах положиши, 16 и извеши, и ветер возмет я, и буря развеет я: ты же возвеселишися во Святыи Израилевых. 17 И возрадуются убозии и неимуции: поищут бо воды, и не будет, язык их от жажды исше. Аз Господь Бог, Аз услышу их, Бог Израилев, и не оставлю их, 18 но отверзу на горах реки и среди поля источники, сотворю пустыню в луги водныя и жаждущую землю в водотечи, 19 положу в безводную землю кедр и смерчье, и мирсину и кипарис и тополю: 20 да узрят и уразумеют, и помыслят и уведят вкупе, яко рука Господня сотвори сия вся, и Святыи Израилев показа. 21 Приближается суд ваш, глаголет Господь Бог: приближишася совети ваши, глаголет Царь Иаковль. 22 Да приближатся и возвестят вам, яже сбдутся, или яже прежде быша, рцыте: и приставим ум и уразумеем, что последняя и будущая: рцыте нам, 23 возвестите нам грядущая на последок, и увемы, яко бози есте: благо сотворите и зло сотворите, и почудимся и узрим вкупе. 24 Яко откуда есте вы, и откуда дело ваше? От земли мерзость избраша вас. 25 Аз же возставих, иже от севера и иже от восток солнечных прозовутся именем Моим: да приидут князи, и яко брение скудельника и яко скудельник топчущь брение, тако попраши будете. 26 Кто бо возвестит, яже исперва, да увемы, яже напреди, и речем,

яко истинна суть? Несть предглаголющего, ни слышащего словес ваших. 27 Начало Сиону дам и Иерусалима утешу на пути. 28 От язык бо, се, ни един и от кумир их несть возвещай. И аще вопрошу их, откуда есте? Не отвещают ми. 29 Суть бо творящии вас и все прельщающии вас.

**42** Иаков Отрок Мой, восприиму и: Израиль избранный Мой, прият Его душа Моя, дах дух Мой Нань, суд языком возвестит: 2 не возопиет ниже ослабит, ниже услышится вне глас Его: 3 трости сокрушены не сотрет и льна курящаяся не угасит, но во истину изнесет суд: 4 возсияет и не потухнет, дондеже положит на земли суд, и на имя Его языцы уповати имут. 5 Тако глаголет Господь Бог, сотворивый небо и водрузивый е, утверждей землю и яже на ней, и даей дыхание людем, иже на ней, и дух ходящим на ней: 6 Аз Господь Бог призвах Тя в правде, и удержу за руку Твою и укреплю Тя: и дах Тя в завет рода Израилева, во свет языков, 7 отверсти очи слепых, извести от уз связанные и из дому темницы и сидящия во тме. 8 Аз Господь Бог, сие Мое есть имя, славы Моея иному не дам, ниже добродетелей Моих истуканным. 9 Иже из начала, се, приидоша, и новая, яже Аз возвещу, и прежде неже возвестити, явишася вам. 10 Воспойте Господеви песнь нову: началство Его, прославите имя Его от конец земли, сходящии в море и плавающии по нему, острови и живущии на них. 11 Возвеселися, пустыне, и веси ея, придвория, и живущии в Кидаре: возвеселятся живущии на камени, от края гор возопиют, 12 дадут Богу славу, добродетели Его во островех возвестят. 13 Господь Бог Сил изыдет и сокрушит рать, воздвигнет рвение и возопиет на враги Своя со крепостию. 14 Молчах, еда и всегда

умолчу и потерплю? Терпех яко раждающая, истреблю и  
изсушу вкупе, 15 опустошу горы и холмы, и всяку траву  
их изсушу, и положу реки во острова, и луги изсушу: 16 и  
наведу слепыя на путь, егоже не видеша, и по стезям, ихже  
не знаша, ходити сотворю им: сотворю им тму во свет и  
стропотная в правая: сия глаголголы сотворю, и не оставлю  
их. 17 Тии же возвратишася вспясть: посрамитеся стыдением,  
уповающии на изваянная, глаголющии слиянным: вы есте  
бози наши. 18 Глусии, услышите, и слепии, прозрите видети.  
19 И кто слеп, разве раби Мои? И глуси, разве владеющии  
ими? И ослепоша раби Божии. 20 Видесте многажды, и  
не сохранисте: отверсты уши (имуще), и не слышасте. 21  
Господь Бог восхоте, да оправдится и возвеличит хвалу. 22  
И видех, и быша людие расхищени и разграблени: пругло  
бо в ложах везде, и в домех вкупе, идеже скрыша я,  
быша в плен: и не бысть изимаяй разграбления и не бе  
глаголющаго: отдаждь. 23 Кто в вас, иже внушит сия? И  
услышит во грядущая. 24 Кто даде на разграбление Иакова,  
и Израиля пленяющым его? Не Бог ли, Емуже согреша и  
не восхотеша в путех Его ходити, ни слушати закона Его? 25  
И наведе на ня гнев ярости Своя, и укрепися на ня рать, и  
палящии их окрест, и не уведеша кийждо их, ниже положиша  
на уме.

**43** И ныне сице глаголет Господь Бог сотворивый тя,  
Иакове, и создавый тя, Израилю: не бойся, яко избавих тя,  
прозвах тя именем твоим: Мой еси ты. 2 И аще преходиши  
сквозе воду, с тобою есмь, и реки не покрывают тебе: и аще  
скозе огонь пройдеши, не сожжешися, и пламень не опалит  
тебе, 3 яко Аз Господь Бог твой, Святыи Израилев, Спасаяи

тя: сотворих премену твою Египет и Ефиопию, и Соину за  
тя. 4 Отнелиже честен был еси предо Мною, прославился  
еси, и Аз тя возлюбих, и дам человеки за тебе и князи  
за главу твою. 5 Не бойся, яко с тобою есмь: от восток  
приведу семя твое и от запад соберу тя: 6 реку северу:  
приведи: и ливу: не возбраняй, приведи сыны Моя от земли  
дальния и дщери Моя от краев земных, 7 всех, елицы  
нарицаются именем Моим: во славе бо Моей устроих его и  
создах его и сотворих и. 8 И изведох люди слепы, и очи  
суть такожде слепы, и глуши уши имущии. 9 Все языцы  
собрашася вкупе, и соберутся князи от них. Кто возвестит  
сия? Или яже исперва кто возвестит вам? Да приведут  
свидетели своя и оправдятся, и да услышат и да рекут  
истину. 10 Будите Ми свидетелие, и Аз свидетель, глаголет  
Господь Бог, и отрок Мой, егоже избрах, да увесте и веруете  
Ми и уразумеете, яко Аз есмь: прежде Мене не бысть ин Бог,  
и по Мне не будет. 11 Аз Бог, и несть разве Мене Спасаяй. 12  
Аз возвестих и спасох, укорих, и не бе в вас чуждий: вы Мне  
свидетелие, и Аз свидетель, глаголет Господь Бог, 13 еще  
от начала, и несть изимаяй от руку Моею: сотворю, и кто  
отвратит е? 14 Тако глаголет Господь Бог, Избавляяй вас,  
Святой Израилев: вас ради послю в Вавилон и воздвигну  
вся бежащия, и Халдее в кораблех свяжутся. 15 Аз Господь  
Бог Святой ваш, показавый Израиля Царя вашего. 16 Сице  
глаголет Господь, даяй путь по морю и по воде сильне стезю:  
17 изводяй колесницы и кони и народ силен: но успоша  
и не востанут, угасоша аки лен угашен. 18 Не поминайте  
первых, и ветхих не помышляйте, 19 се, Аз творю новая,  
яже ныне возсияют, и увесте я: и сотворю в пустыни путь и



в безводней реки. **20** Возблагодарят Мя зверие селнии, сирини и дочери струфовы: яко дах в пустыни воду и реки в безводней, напоити род Мой избранный, **21** люди Моя, яже снабдох, добродетели Моя поведати. **22** Не ныне призвах тебе, Иакове, ниже трудитися сотворих тя, Израилю. **23** Не принесл еси Мне овец твоих всесождения твоего, ни в жертвах твоих прославил Мя еси, не поработих тя в жертвах, ниже утруждена сотворих тя в Ливане: **24** не купил еси Мне на серебро фимиама, ниже тука треб твоих возжелах, но во гресех твоих стал еси предо Мною и в неправдах твоих. **25** Аз есмь, Аз есмь заглаждай беззакония твоя Мене ради и грехи твоя, и не помяну. **26** Ты же помяни, и да судимся: глаголи ты беззакония твоя прежде, да оправдишися. **27** Отцы ваши первии согреша, и князи ваши беззаконноваша на Мя. **28** И оскверниша князи святая Моя, и дах погубити Иакова и Израиля во укоризну.

**44** Ныне же слыши, рабе Мой Иакове, и Израилю, егоже избрах. **2** Сице глаголет Господь Бог сотворивый тя и создавый тя из утробы: еще поможет ти: не бойся, рабе Мой Иакове, и возлюбленный Израилю, егоже избрах. **3** Яко Аз дам воду в жажду ходящым в безводней, наложу дух Мой на семя твое и благословения Моя на чада твоя, **4** и прозябнут аки трава посреде воды и яко верба при воде текущей. **5** Сей речет: Божий есмь: и сей возопиет о имени Иаковли, и другий напишет рукою своею: Божий есмь: и о имени Израилеве возопиет. **6** Сице глаголет Бог Царь Израилев, и Избавлей его Бог Саваоф: Аз первый и Аз по сих, кроме Мене несть Бога: **7** кто якоже Аз? Да станет и да призовет, и да возвестит и да уготовит Ми, отнележе

сотворих человека во век, и грядущая прежде неже приити им, да возвестят вам. 8 Не укрывайтесь, ниже заблуждайте: не исперва ли внушите, и возвестих вам? Свидетелие вы есте, аще есть Бог разве Мене. 9 И не послушаша тогда созидающии, и ваяющии вси тщетни, творящии желания своя, яже не уполюзуют их: 10 но посрамятся вси созидающии бога и ваяющии вси бесполезная. 11 И вси, отнюдуже быша, изсхоша: и глушии от человек да соберутся вси и да станут вкупе, и да посрамятся и устыдятся вкупе. 12 Яко наостри древоделатель сечиво, теслою содела оное, и свердлом состави е, и длатом издолбе е, и содела е крепостию мышцы своя: и взалчет, и изнеможет, и не напьется воды. 13 И избрав древоделю древо, постави в меру, и клеєм соорочи е, и сотвори е аки образ мужеск и аки красоту человекю, поставити е в дому. 14 Посече древо в дубраве, еже насади Господь, сосну, и дождь возрасти, 15 да будет человеком на жжение: и взяв от него, согреша, и изжегше я, испекоша ими хлебы, из оставшаго же сотвориша боги и поклоняются им: сотвори е изваянное, и прекланяется им. 16 Пол его сожже огнем, и пол его сожже на углие, и испече в них хлебы, и на них испече мясо, и яде, и насытится, и согревша рече: сладко мне, яко согреша и видех огонь. 17 Из оставшаго же сотвори бога изваянна, прекланяется ему и поклоняется, и молится ему глаголя: избави мя, яко бог мой еси ты. 18 Не уведаша смыслити, яко отемнеша очи их еже видети и разумети сердцем своим. 19 И не помысли в души своей, ни уведеша смышлением, яко пол его сожже огнем, и испече на углиех его хлебы, и испек мяса снеде, и оставшее его в мерзость сотвори, и поклоняются ему. 20 Уведь, яко пепел

есть сердце их, и прельщаются, и ни один может души своея избавити: видите, не рцйте, яко лжа в деснице моей. 21 Помяни сия, Иакове и Израилю, яко раб Мой еси ты, сотворих тя раба Моего, и ты, Израилю, не забывай Мене. 22 Се бо, отях яко облак беззакония твоя и яко примрак грехи твоя: обратися ко Мне, и избавлю тя. 23 Возвеселитесь, небеса, яко помилова Бог Израиля: вострубите, основания земная, возопийте, горы, веселие, холми и вся дрeвеса, яже на них: яко избави Бог Иакова, и Израиль прославится. 24 Сице глаголет Господь избавляй тя и создавый тя от чрева: Аз Господь совершаяй вся, распрострох небо един и утвердих землю. 25 Кто ин разсыплет знамения чревоволшебников и волшбы от сердца, отвращаяй мудрыя вспясть и советы их обуяй, 26 и уставляя глагол раба Своего, и совет вестников Своих истинен творяй? Глаголяй Иерусалиму: населишися: и градом Иудейским: возградитесь, и пустыни его просияют, 27 глаголяй бездне: опустееши, и реки твоя изсушу, 28 глаголяй Киру смыслити, и вся воли Моя сотворит: глаголяй Иерусалиму: возградишися, и храм святыи мой осную.

**45** Сице глаголет Господь Бог помазанному Моему Киру, егоже удержаж за десницу, повинути пред ним языки, и крепость царей разрушу, отверзу пред ним врата, и гради не злтворятся: 2 Аз пред тобою пойду и горы уравню, врата медяная сокрушу и верей железных сломя, 3 и дам ти сокровища темная сокровенная: невидимая отверзу тебе, да увеси, яко Аз Господь Бог твой прозывая имя твое, Бог Израилев. 4 Ради раба Моего Иакова и Израиля избраннаго Моего, Аз прозову тя именем твоим и прииму тя: 5 ты же не познал еси Мене, яко Аз Господь Бог, и несть разве Мене еще

Бога: укрепих ты, и не познал еси Мене, 6 да быша уведели, иже от восток солнечных и иже от запад, яко несть Бог разве Мене: Аз Господь Бог, и несть еще. 7 Аз устройвый свет и сотворивый тму, творяй мир и зиждяй злая, Аз Господь Бог, творяй сия вся. 8 Да возрадуется небо свыше, и облацы да кропят правду: да прозябнет земля, и да прорастит милость, и правду да прозябнет вкупе: Аз есмь Господь создавый тя. 9 Что лучшее устройх яко глину скудельничу? Еда оряй орати будет землю весь день? Еда речет брение скудельнику: что твориши, яко не делаеши, ниже имаши рук? Еда отвеццает здание создавшему е? 10 Еда глаголет отцу: что родиши? И матери: что чревоболиши? 11 Яко тако глаголет Господь Бог, Святыи Израилев, Сотворивый грядущая: вопросите Мене о сынех Моих и о дщерех Моих, и о делех руку моею заповедите Мне. 12 Аз сотворих землю и человека на ней, Аз рукою Моею утвердих небо, Аз всем звездам заповедах. 13 Аз возставих его со правдою царя, и вси путие его правы: сей созиждет град Мой и пленение людий Моих возвратит, не по мзде, ни по даром, рече Господь Саваоф. 14 Тако глаголет Господь Саваоф: утрудися Египет и купли Ефиопския, и Саваимстии мужие висоцыи к тебе прейдут и тебе будут раби, и вслед тебе пойдут связаны узами ручными, и прейдут к тебе и поклонятся тебе, и в тебе помолятся, яко в тебе Бог есть, и рекут: несть Бога разве тебе: 15 Ты бо еси Бог, и не ведехом, Бог Израилев Спас. 16 Постыдятся и посрамятся вси противящиися ему и пойдут в студе: обновляйтеся ко мне, острови. 17 Израиль спасается от Господа спасением вечным: не постыдятся, ни посрамятся даже до века ктому. 18 Зане тако глаголет Господь сотворивый небо, Сей Бог

показавый землю и сотворивый ю, Той раздели ю, не вотще сотвори ю, но на вселение созда ю: Аз есмь Господь, и несть ктому. **19** Не отай глаголах, ни в темне месте земли: не рекох племени Иаковлю: суетнаго възыщите. Аз есмь, Аз есмь Господь глаголяй правду и возвещаяй истину. **20** Соберитесь и приидите, совещайтесь вкупе, спасаемии от язык. Не разумеша воздвижущии древо изваяние свое и молящеся богом, иже не спасают. **21** Аще возвестят, да приближатся, да уведят вкупе, кто слышана сотвори сия исперва? Тогда возвестися вам: Аз Бог, и несть иного разве Мене, праведен и Спаситель, несть кроме Мене. **22** Обратитесь ко Мне и спасетесь, иже от края земнаго: Аз есмь Бог, и несть иного. **23** Кленуся Мною Самим, аще не изыдет изо уст Моих правда, словеса Моя не возвратятся: яко Мне поклонится всяко колено, и исповестся всяк язык Богови, глаголя: **24** правда и слава к Нему приидет: и посрамятся вси отлучающиися. **25** От Господа оправдятся, и о Бозе прославится все семя сынов Израилевых.

**46** Паде Вил, сокрушися Дагон, быша ваяния их во звери и скоты: носите я связана яко бремя труждающемуся и разслабевшу, **2** и алчущу и не могущу вкупе, иже не возмогут спастися от рати, сами же пленени приведошася. **3** Послушайте Мене, доме Иаковль и весь останок Израилев, носимии от чрева и наказуемии от детска даже до старости: **4** Аз есмь, и дондеже состарееетесь, Аз есмь, Аз терплю вам, Аз сотворих и Аз понесу, Аз подиму и спасу вы. **5** Кому Мя уподобисте? Видите, ухитрите, заблуждающии, **6** слагающии злато из меха, и сребро весом поставляют в мериле, и наемше златаря сотвориша рукотворенная, и преклоншеся

поклоняются им: 7 воздвигут я на рамах и ходят: аще же  
положат я на месте своем, ту лежат, ниже подвижутся: и иже  
аще возопиет к ним, не услышат, от бед не спасут его. 8  
Помяните сия и возстените, покайтесь, прельстившиися,  
обратитесь сердцем 9 и помяните первая от века, яко Аз  
есмы Бог, и несть еще разве Мене: 10 возвещай первее  
последняя, прежде неже быти им, и абие сбывшася: и рекох:  
весь совет Мой станет, и вся, елика совещах, сотворю. 11  
Призываяй от восток птицу, и от земли издалеча, о нихже  
совещах: рекох и приведох, создах и сотворих, приведох и  
благопоспеших путь его. 12 Послушайте Мене, погубльшии  
сердце, сущии далече от правды: 13 приближих правду Мою,  
и не удалится, и спасение, еже от Мене, не умедлю: дах в  
Сионе спасение Израилю во прославление.

**47** Сниди, сяди на земли, дево, дщи Вавилоня, вниди во тму,  
дщи Халдейска, яко не приложиши ксему прозыватися мягка  
и юна. 2 Возми жерновы, мели муку, открьй покрывало твое,  
открьй седины, возсучи голени, прежди реки: 3 открыется  
студ твой, явятся укоризны твоя, праведное от тебе возму,  
ктому не предам человеком. 4 Рече Избавивый тя Господь  
Саваоф, имя Ему Святыи Израилев: 5 сяди умилена, вниди  
во тму, дщи Халдейска, ксему не прозовешиися крепость  
царства. 6 Разгневахся на люди Моя, осквернила еси  
наследие Мое: Аз вдах я в руку твою, ты же не дала им  
милости, старчий ярем отягчила еси зело 7 и рекла еси: в  
век буду владычица: не помыслила еси сих в сердцы твоём,  
ниже помянула еси последних: 8 ныне же слыши сие, юная,  
сидящая, уповающая, глаголющая в сердцы своем: аз есмь,  
и несть иныя, не сяду вдовою и не познаю сиротства. 9 Ныне

же придут на тя два сия внезапно во един день, безчадие и вдовство внезапно придет на тя, в волшебстве твоём и в крепости волхвов твоих зело, **10** в надеянии злобы твоея: ты бо рекла еси: аз есмь, и несть иныя: увеждь, якомышление сих и блужение твое будет тебе срам: и рекла еси сердцем своим: аз есмь, и несть иныя. **11** И придет на тя пагуба, и не увеси, пропасть, и впадеш в ню: и придет на тя печаль, и не возможеш чиста быти: и придет на тя внезапно пагуба, и не увеси. **12** Стани ныне с волхвы твоими и со многими чары твоими, имже научилася еси из юности твоея, аще возмогут ти помощи. **13** Утрудилася еси в советех твоих: да станут ныне и спасут тя звездочетцы небесе, смотряющии звезд, да возвестят ти, что имать на тя приити. **14** Се, вси яко хврастие огнем погорят и не изимут души своя из пламене, понеже имаши углие огненное, сяди на них. **15** Сии будут тебе помощь: трудилася еси в преложении от юности, человек сам в себе прельстися, тебе не не будет спасения.

**48** Услышите сия, доме Иаковль, прозваннии именем Израилевым и изшедшии из Иуды, кленущиися именем Господа Бога Израилева, поминающии не со истиною, ниже со правдою, **2** и придерживающии имени града святаго, и о Бозе Израилеве подтверждающиися: Господь Саваоф имя Ему. **3** Преждняя еще возвестих, и из уст Моих изыдоша, и слышано бысть: внезапно сотворих, и найде. **4** Вем, яко жесток еси, и жила железна выя твоя, и чело твое медяно. **5** И возвестих ти, яже древле, прежде неже приити на тя: слышана тебе сотворих, да не когда речеши, яко идоли мне сия сотвориша, и не рцы, яко изваянная и слиянная заповедаша мне. **6** Слышасте вся, и вы не разуместе: но и

слышана тебе сотворих новая отныне, яже имут быти: 7 и не рекл еси: ныне бывают, а не прежде, и не в преждния дни слышал еси сия: не рцы: ей, вем сия. 8 Не ведел еси, ниже разумел еси, ниже исперва отверзох ушеса твоя: ведех бо, яко отвергая отринеси и беззаконник еще от чрева прозовешися. 9 Имене Моего ради покажу ти ярость Мою, и славная Моя наведу на тя, да не потреблю тебе. 10 Се, продах тя не сребра ради: изях же тя из печи убожества. 11 Мене ради сотворю ти, яко Мое имя оскверняется, и славы Моея иному не дам. 12 Послушай Мене, Иакове и Израилю, егоже Аз призываю: Аз есмь первый и Аз есмь во век. 13 И рука Моя основа землю, и десница Моя утверди небо: призову я, и станут вкупе, 14 и соберутся вси и услышат: кто им возвести сия? Любя тя сотворих волю твою над Вавилоном, еже отяти племя Халдейско. 15 Аз глаголах, Аз призвах, приведох и, и благопоспешит путь его. 16 Приступите ко Мне и слышите сия, исперва не отай глаголах: егда бываху, тамо бех, и ныне Господь Господь посла Мя и Дух Его. 17 Тако глаголет Господь, Избавивый тя, Святый Израилев: Аз есмь Господь Бог твой, научих тя, еже обрести тебе путь, по немуже пойдеш. 18 И аще бы еси послушал заповедий Моих, то был бы убо аки река мир твой, и правда твоя яко волна морская, 19 и было бы яко песок семя твое, и изчадия чрева твоего яко персть земли: ниже ныне потребишися, ниже погибнет имя твое предо Мною. 20 Изыди от Вавилона, бежай от Халдеев: глас радости возвестите, и да слышано будет сие, возвестите даже до последних земли, глаголите: избави Господь раба Своего Иакова. 21 И аще вжаждут, пустынею проведет их и воду



из камене изведет им: разсядется камень, и потечет вода, и испиют людие Мои. 22 Несть радоватися нечестивым, глаголет Господь.

**49** Послушайте Мене, острови, и внимлите, языцы. Временем многим стояти будет, глаголет Господь: от чрева матери Моея нарече имя Мое, 2 и положи уста Моя яко мечь остр, и под кровом руки Своея скры Мя: положи Мя яко стрелу избранну, и в туле своем скры Мя, 3 и рече Ми: раб Мой еси Ты, Израилю, и в Тебе прославлюся. 4 Аз же рекох: вотще трудихся, всуе и ни во что дах крепость Мою: сего ради суд Мой пред Господем и труд Мой пред Богом Моим. 5 И ныне тако глаголет Господь, создавый Мя от чрева раба Себе, еже собрати Иакова к Нему и Израиля: соберуся и прославлюся пред Господем, и Бог Мой будет Мне крепость. 6 И рече Ми: велие Ти есть, еже назватися Тебе рабом Моим, еже возставити племена Иаковля и разсеяние Израилево обратити: се, дах Тя в завет рода, во свет языком, еже быти Тебе во спасение даже до последних земли. 7 Тако глаголет Господь, Избавивый Тя Бог Израилев: освятите уничижающаго душу Свою, гнушаемаго от язык рабов княжеских: царие узрят Его, и востанут князи и поклонятся Ему Господа ради, яко верен есть Святой Израилев, и избрах Тя. 8 Тако глаголет Господь: во время приятно послушах Тебе и в день спасения помогах Ти, и сотворих Тя и дах Тя в завет вечный языков, еже устроити землю и наследити наследия пустыни, 9 глаголюща сущым во узах: изыдите, и сущым во тме: открыйтеся. На всех путех пастися будут, и на всех стезях пажить их: 10 не взалчут, ниже вжаждут, ниже поразит их зной, ниже солнце, но Милуяй

их утешит их и сквозе источники водныя проведет их. 11 И положу всяку гору в путь и всяку стезю в паству им. 12 Се, сии издалеча приидут, сии от севера и от моря, инии же от земли Персския. 13 Радуйтесь, небеса, и веселися, земле, да отрыгнут горы веселие и холми правду, яко помилова Бог люди Своя и смиренныя людий Своих утешити. 14 Рече же Сион: остави мя Господь, и Бог забы мя. 15 Еда забудет жена отроча свое, еже не помиловати изчадия чрева своего? Аще же и забудет сих жена, но Аз не забуду тебе, глаголет Господь. 16 Се, на руках Моих написах стены твоя, и предо Мною еси присно, 17 и вскоре возградишися, от нихже разорился еси, и опустошившии тя изыдут из тебе. 18 Возведи окрест очи твои и виждь вся, се, собращася приидоша к тебе, живу Аз, глаголет Господь: яко всеми ими аки в красоту облечешися и обложиши себе ими яко утварию невеста. 19 Понеже пустая твоя и разсыпаная и падшая ныне утеснеют от обитающих, и удалятся от тебе поглощающии тя. 20 Рекут бо во уши твои сынове твои, ихже был погубил еси: тесно ми место, сотвори ми место, да вселюся. 21 И речеши в сердцах своем: кто мне породил сих? Аз же безчадна и вдова, сих же кто воспита мне? Аз же остахся едина, сии же мне где быша? 22 Тако глаголет Господь Господь: се, воздвизаю на языки руку Мою и на острова воздвигну знамение Мое, и приведут сыны твоя в лоне и дщери твоя на плечах возмут. 23 И будут царие кормителие твои, и княгини их кормилицы твоя: до лица земли поклонятся тебе и прах ног твоих оближут, и увеси, яко Аз Господь Бог, и не посрамятся терпящии Мя. 24 Еда возмет кто от исполина корысти? И аще кто пленит неправедне, спасетлися? 25 Зане тако глаголет Господь: аще кто пленит

исполина, возмет корысти: взявляя же от крепкаго спасется:  
Аз же прю твою разсужду и Аз сыны твоя избавлю: **26** и  
оскорбившии тебе снедят плоть свою и испиют яко вино  
ново кровь свою, и упиются: и увестъ всяка плоть, яко Аз  
Господь Избавивый тя и заступаяй крепость Иаковлю.

**50** Тако глаголет Господь: кая книга отпущения матере  
вашея, еуже отпустих ю? Или коему заимодавцу продах  
вы? Се, грехми вашими продастеса, и беззаконий ради  
ваших отпустих мать вашу. **2** Что яко приидох, и не бяше  
человека? Звах, и не бе послушающаго? Еда не может рука  
Моя избавити, или не могу изяти? Се, запрещением Моим  
опустошу море и положу реки пусты, и исхнут рыбы их не  
сущей воде и умрут жажду: **3** облеку небо во тму и положу  
аки вретнице одежду его. **4** Господь Господь дает Мне язык  
научения, еже разумети, егда подобает рещи слово: положи  
Мя утро утро, приложи Ми ухо, еже слышати, **5** и наказание  
Господне отверзает уши Мои: Аз же не противлюся, ни  
противолаголю. **6** Плещы Мои вдах на раны и ланите  
Мои на заушения, лица же Моего не отвратих от студа  
заплеваний, **7** и Господь Господь помощник Ми бысть: сего  
ради не усрамяхся, но положих лице Свое аки твердый  
камень и разумех, яко не постыждуся: **8** зане приближается  
оправдавый Мя. Кто пряйся со Мною? Да сопротивостанет  
Мне купно. И кто судяйся со Мною? Да приблизится ко Мне.  
**9** Се, Господь Господь поможет Ми: кто озлобит Мя? Се, вси  
вы яко риза обетшааете, и яко молие изяст вы. **10** Кто в вас  
бояйся Господа? Да послушает гласа Отрока Его. Ходящии  
во тме, и несть им света, надеются на имя Господне и  
утвердятся о Бозе. **11** Се, вси вы огонь раждизаете и

укрепляет пламень: ходите светом огня вашего и пламенем, егоже разжегосте. Мене ради быша сия вам, в печали усннете.

**51** Послушайте Мене, гонящие правду и взыскающие Господа, воззрите на твердый камень, егоже изсекосте, и в юдоль потока, юже ископасте. **2** Воззрите на Авраама отца вашего и на Сарру породившую вы: яко един бе, и призвах его, и благослових его, и возлюбих его, и умножих его. **3** И тебе ныне утешу, Сионе, и утеших вся пустыни его, и поставлю пустыню его яко рай, и яже ко западом его аки рай Господень: радость и веселие обрящут в нем, исповедание и глас хваления. **4** Послушайте Мене, людие Мои, послушайте, и царие, ко Мне внушите: яко закон от Мене изыдет, и суд Мой во свет языком. **5** Приближается скоро правда Моя, и изыдет яко свет спасение Мое, и на мышцу Мою языцы надеяться будут: Мене острови ожидати и на мышцу Мою уповати будут. **6** Воздвигните на небо очи ваши и воззрите на землю долу, понеже небо яко дым утвердися, и земля яко риза обетшает, живущии же на земли якоже сия изомрут, спасение же Мое во век будет, и правда Моя не оскудеет. **7** Послушайте Мене, ведящие суд, людие Мои, имже закон Мой в сердцах ваших, не бойтесь укорения человека и похулению их не покарайтесь. **8** Якоже бо риза снадена будет временем, и яко сукно изяется мольми, правда же Моя во веки будет и спасение Мое в роды родов. **9** Востани, востани, Иерусалиме, и облещися во крепость мышцы твоя, востани яко в начале дне, яко род века: не ты ли еси победил гордаго и расторгнул змиа? **10** Не ты ли еси опустошай море, воду бездны многу? Положивый

глубины морския путь прохода изытым и избавленным? **11** Господем бо возвратятся и приидут в Сион с радостью и со веселием вечным: на главе бо их веселие и хвала, и радость приимет я: отбеже болезнь и печаль и воздыхание. **12** Аз есмь, Аз есмь Утешаяй тя: разумей, кто сый убоялся еси человека смертна и сына человека, иже яко трава изсхоша, **13** и забыл еси Бога Создавшего тя, Сотворшаго небо и основавшего землю: и боялся еси присно во вся дни лица ярости стужающаго тебе: како бо восхоте взяти тя, и ныне где ярость стужающаго тебе? **14** Внегда бо спасися тебе, не станет, ниже умедлит: **15** яко Аз Бог твой, возмущаяй море и творяй шум волнам его: Господь Саваоф имя Мне. **16** Положу словеса Моя во уста твоя и под сению руки Моея покрюю тя, еуже поставих небо и основах землю: и речет Сиону: людие Мои есте вы. **17** Востани, востани, воскресени, Иерусалиме, испивый чашу ярости от руки Господни: чашу бо падения, фиал ярости испил и истощил еси, **18** и не бысть утешаяй тебе от всех чад твоих, яже родил еси, и не бысть подемяющаго руки твоя, ниже от всех сынов твоих, ихже вознесл еси. **19** Два сия противна тебе, кто сожалеет тебе? Падение и сокрушение, глад и мечь, кто утешит тя? **20** Сынове твои обнищавшии, сидяще на краи всякаго исхода, яко свекла недовареная, исполнени ярости Господни, расслаблени Господем Богом. **21** Сего ради слыши, смиренный и упивыйся не вином: **22** тако глаголет Господь Бог судяй людем Своим: се, взях от руки твоя чашу падения, фиал ярости Моея, и не приложиши ксему пити ея: **23** и вложу ю в руже преобидевших тя и смиривших тя, иже

рекоша души твоей: преклонися, да минем: и положил еси равно земли плещы твоя отвне мимоходящим.

**52** Востани, востани, Сионе, облещыся во крепость твою, Сионе, и ты облещыся во славу твою, Иерусалиме, граде святой, ктому не приложит проити сквозе тя необрезанный и нечистый. 2 Истряси прах и востани, сяди, Иерусалиме, совлещы узу выи твоя, плененая дщи Сиона. 3 Яко сия глаголет Господь: туне продани бысте, и не серебром избавитеся. 4 Тако глаголет Господь: во Египет снидоша людие Мои прежде, еже пришецем быти тамо, и во Ассирию нуждею отведошася. 5 И ныне что зде есте? Сия глаголет Господь: яко взяшася людие Мои туне, чудитеся и плачитеся. Тако глаголет Господь: вас ради присно имя Мое хулится во языцех. 6 Сего ради познают людие Мои имя Мое в той день, яко Аз есмь Сам глаголяй, ту есмь. 7 Коль красны на горах ноги благовествующих мир, благовествующих благая, яко слышано сотворю спасение твое, глаголя: Сионе, воцарится Бог твой. 8 Яко глас хранящих тя вознесется, и гласом вкупе возрадуются: яко очи ко очесем воззрят, егда помилует Господь Сиона. 9 Да отрыгнут веселие вкупе пустыни Иерусалимския, яко помилова Господь людий Своих и избави Иерусалима: 10 и открыет Господь мышцу Свою святую пред всеми языки, и узрят вси концы земли спасение, еже от Бога нашего. 11 Отступите, отступите, изыдите отсюда и нечистоте не прикасайтесь, изыдите от среды его, отлучитеся, носящии сосуды Господни: 12 яко не с мятежем изыдете, ниже убежанием пойдете: поидет бо пред вами Господь, и собираяй вы Господь Бог Израилев. 13 Се, уразумеет отрок Мой и вознесется и прославится зело. 14

Якоже ужаснутся о Тебе мнози, тако обезславится от человек вид Твой, и слава Твоя от сынов человеческих. 15 Тако удивятся языцы мнози о Нем, и заградят царие уста своя: яко, имже не возвестися о Нем, узрят, и иже не слышаша, уразумеют.

**53** Господи, кто верова слуху нашему, и мышца Господня кому открыся? 2 Возвестихом, яко отроча пред Ним яко корень в земли жаждущей, несть вида Ему, ниже славы: и видехом Его, и не имяше вида, ни доброты: 3 но вид Его безчестен, умален паче всех сынов человеческих: человек в язве сый и ведый терпети болезнь, яко отвратися лице Его, безчестно бысть, и не вменися. 4 Сей грехи наша носит и о нас болезнует, и мы вменихом Его быти в труде и в язве от Бога и во озлоблении. 5 Той же язвен бысть за грехи наша и мучен бысть за беззакония наша, наказание мира нашего на Нем, язвою Его мы изцелехом. 6 Все яко овцы заблудихом: человек от пути своего заблуди, и Господь предаде Его грех ради наших. 7 И Той, зане озлоблен бысть, не отверзает уст Своих: яко овча на заколение ведеса, и яко агнец предстригущим его безгласен, тако не отверзает уст Своих. 8 Во смирении Его суд Его взятся: род же Его кто исповесть? Яко вземлется от земли живот Его, ради беззаконий людей Моих ведеса на смерть. 9 И дам лукавья вместо погребения Его и богатя вместо смерти Его: яко беззакония не сотвори, ниже обретеса лесь во устех Его. 10 И Господь хочет очистити Его от язвы: аще дастся о гресе, душа ваша узрит семя долгоживотное. 11 И хочет Господь рукою Своею отяти болезнь от души Его, явити Ему свет и создати разумом, оправдати праведнаго благо служаща многим, и грехи их

Той понесет. **12** Сего ради Той наследит многих и крепких разделит корысти, зане предана бысть на смерть душа Его, и со беззаконными вменися, и Той грехи многих вознесе и за беззакония их предан бысть.

**54** Возвеселися, неплоды, нераждающая возгласи и возопий, нечревоболевшая, яко многа чада пустыя паче, нежели имущия мужа. **2** Рече бо Господь: разшири место, кущи твоя и покровов твоих, водрузи, не пощади, продолжи ужа твоя и колие твое укрепи, **3** еще на десно и на лево простри: и семя твое языки наследит, и грады опустевшыя населиши. **4** Не бойся, яко посрамлена еси, ниже устыдися, яко укорена еси: понеже срамоту вечную забудеши и укоризны вдовства твоего не помянеши ктому. **5** Яко Господь Творяй тя, Господь Саваоф имя Ему: и Избавивый тя Святыи Бог Израилев, всей земли прозовется. **6** Не яко жену оставлену и малодушну призва тя Господь, ниже яко жену из юности возненавидену, рече Бог твой. **7** На время мало оставих тя, а с милостию великою помилую тя: **8** во ярости мале отвратих лице Мое от тебе, но милостию вечною помилую тя, рече Избавивый тя Господь. **9** От воды, яже при Нои, сие Ми есть, якоже кляхся Ему во время оно на землю, не разгневатися о тебе ктому, ниже во прещении твоём **10** горы преставити, и холми твои не предвигнутся: тако ниже, яже от Мене к тебе, милость оскудеет, ниже завет мира твоего преставится: рече бо милостив к тебе Господь. **11** Смиренная и колеблемая не имела еси утешения: се, аз уготовляю тебе анфракс камень твой и на основание твое сапфир: **12** и положу забрала твоя иаспис, и врата твоя камене кристалла, и ограждение твое камене избранное,



13 и вся сыны твоя научены Богом, и во мнозе мире чада твоя. 14 И правдою возградишия: удалися от неправеднаго, и не убоишия, и трепет не приблизится тебе. 15 Се, пришелцы приидут к тебе Мною и вселятся у тебе и к тебе прибегнут. 16 Се, Аз создах тя, не якоже кузнец раздуваяй углие и износя сосуд на дело: Аз же создах тя не на пагубу, еже истлити. 17 Всяк сосуд соделан на тя не благопоспешу, и всяк глас, иже на тя востанет на прю, одолееши им всем: повиннии же твои будут в нем есть наследие служащим Господеви, и вы будете Мне праведни, глаголет Господь.

**55** Жажущии, идите на воду, и елицы не имате сребра, шедше купите, и ядите (и пейте) без сребра и цены вино и тук. 2 Вскую цените сребро не в хлебы, и труд ваш не в сытость? Послушайте Мене, и снесите благая, и насладится во благих душа ваша. 3 Внемлите ушима вашима и последуйте путем Моим: послушайте Мене, и жива будет во благих душа ваша, и завещаю вам завет вечен, преподобная Давидова верная. 4 Се, свидетелство во языцех дах Его, князя и повелителя языком. 5 Се, языцы, иже не ведяху тебе, призовут тя, и людие, иже не познаша тебе, ко тебе прибегнут ради Господа Бога твоего, Святаго Израилева, яко прослави тя. 6 Взыщите Господа, и внегда обрести вам Того, призовите: егда же приблизится к вам, 7 да оставит нечестивый пути своя, и муж беззаконен советы своя, и да обратится ко Господу, и помилован будет, яко попремногу оставит грехи ваша. 8 Не суть бо совети Мои якоже совети ваши, ниже якоже путие ваши путие Мои, глаголет Господь. 9 Но якоже отстоит небо от земли, тако отстоит путь Мой от путей ваших, и помышления ваша от мысли Моея. 10 Якоже бо аще снидет

дождь или снег с небесе, и не возвратится, дондеже напоит землю, и родит, и прозябнет, и даст семя сеющему и хлеб в снедь: **11** тако будет глагологол Мой, иже аще изыдет из уст Моих, не возвратится ко Мне тощ, дондеже совершит (вся), елика восхотех, и поспешу пути твоя и заповеди Моя. **12** Со веселием бо изыдете и с радостию научитесь: горы бо и холми возскачут ждуще вас с радостию, и вся древеса селная восплещут ветвymi: **13** и вместо драчия взыдет кипарис, и вместо кропивы взыдет мирсина: и будет Господь во имя и во знамение вечное, и не оскудеет.

**56** Сия глаголет Господь: сохраните суд и сотворите правду, приближися бо спасение Мое приити и милость Моя открытися. **2** Блажен муж творяй сия, и человек держайся их, и храняй субботы не оскверняти, и блюдый руце свои не творити неправды. **3** Да не глаголет иноплеменник приложивыйся ко Господеви: еда отлучит мя Господь от людей Своих? И да не глаголет каженик, яко аз есмь древо сухо. **4** Сия глаголет Господь кажеником: елицы сохранят субботы Моя и изберут яже Аз хочу и содержат завет Мой, **5** дам им в дому Моем и во ограде Моей место именито, лучшее от сынов и дочерей, имя вечно дам им, и не оскудеет: **6** и иноплеменником приложившымся Господеви работати Ему и любити имя Господне, еже быти Ему в рабы и рабыни, и вся снабдящыя субботы Моя не оскверняти и держащыя завет Мой, **7** введу я в гору святую Мою и возвеселю я в дому молитвы Моея: всесожжения их и жертвы их будут приятны на требнице Моем: дом бо Мой дом молитвы наречется всем языком, **8** глаголет Господь, собираяй разсеяныя Израилевы, яко соберу к нему собор. **9** Все зверие дивии,

приидите, ядите, вси зверие дубравнии. 10 Видите, яко вси ослепоша, не разумеша смыслити, вси пси немии не возмогут лаяти, видяще сны на ложи, любяще дремати, 11 и пси безстуднии душею, не ведяще сытости: и суть лукави, не ведяще смысла, вси путем своим последоваша, кийждо уклонишася в лихоимство свое, от первого и до последняго.

12 Приидите, да возьмем вино и наполнимся пиянства, и будет яко днесь, тако и заутра, и много множае.

**57** Видите, како праведный погиге, и никтоже не приемлет сердцем, и мужие праведнии вземлются, и никтоже разумет: от лица бо неправды взяся праведный. 2 Будет с миром погребение его, взяся от среды. 3 Вы же приидите семо, сынове беззаконнии, семя прелюбодеев и блудницы: 4 в чем усладжастесь и на кого отверзосте уста ваша? И на кого изсунуте язык ваш? Не вы ли есте чада пагубы, семя беззаконно, 5 молящиися кумиром под древием частым, закалающе чада своя в дебрех посреде камня? 6 То твоя часть, сей твой жребий, и тем пролиал еси возлияния, и тем принесл еси жертвы: о сих убо не разгневаюся ли? 7 На горе висоце и превознесенне, тамо твое ложе, и тамо вознесл еси требы твоя: 8 и за подвоями дверей твоих положил еси память твою: мыслил еси, яко аще от Мене отступиши, более нечто возимеши: возлюбил еси спящыя с тобою, 9 и умножил еси блужение твое с ними, и многи сотворил, иже далече от тебе, и послал еси послы за пределы твоя, и смирился еси даже до ада. (Sheol h7585) 10 Многими путыми твоими трудился еси, и не рекл еси: престану крепящся, яко сотворил еси сия, сего ради не помолился ми еси ты. 11 Кого благопочет убоялся еси, и солгал Ми, и не помянул еси

Мене, ниже приял Мя еси во ум, ниже в сердце твое? И Аз  
тя видя, презираю, и не убоялся еси Мене. 12 И аз возвещу  
правду твою и злобы твоя, яже не успеют тебе: 13 егда  
возопиеш, да избавят тя во печалех твоих: сия бо вся ветр  
возмет, и отнесет буря: а держащиеся Мене стяжут землю и  
наследят гору святую Мою. 14 И рекут: очистите пред лицом  
его пути и отимите претыкания от пути людей Моих. 15 Сия  
глаголет Господь Вышний, Иже живет во высоких во век,  
Святой во святых имя Ему, Вышний, во святых почиваяй, и  
малодушным даяй долготерпение и даяй живот сокрушенным  
сердцем: 16 не во век отмщу вам, ни всегда гневаться буду  
на вы: дух бо от Мене изыдет, и всякое дыхание Аз сотворих.  
17 За грех мало что опечалих его и поразих его и отвратих  
лице Мое от него: и опечалися и пойте дряхл во путех своих.  
18 Пути его видех и изцелих его, и утеших его и дах ему  
утешение истинно, 19 мир на мир далече и близ сущым: и  
рече Господь: изцелю я. 20 Неправеднии же возволнуются и  
почити не возмогут. 21 Несть радоватися нечестивым, рече  
Господь Бог.

**58** Возопий крепостию и не пощади: яко трубу возвыси  
глас твой и возвести людем Моим грехи их и дому Иаковлю  
беззакония их. 2 Мене день от дне ищут и разумети пути  
Моя желают, яко людие правду сотворившии и суда Бога  
своего не оставившии: просят ныне у Мене суда праведна  
и приблизитися ко Господу желают, глаголюще: 3 что яко  
постихомся, и не увидел еси? Смирихом души наша, и  
не уведел еси? Во дни бо пощений ваших обретаете воли  
вашя, и вся подручныя ваша томите: 4 аще в судех и сварех  
поститесь и биете пястями смиренного, вскую Мне поститесь

якоже днешь, еже услышану быти с воплем гласу вашему? 5 Не сицеваго поста Аз избрах и дне, еже смирити человеку душу свою: ниже аще слячеши яко серп выю твою, и вретище и пепел постелеши, ниже тако наречете пост приятен. 6 Не таковаго (бо) поста Аз избрах, глаголет Господь: но разрешай всяк союз неправды, разрушай обдолжения насильных писаний, отпусти сокрушенныя во свободу и всякое писание неправедное раздери: 7 раздробляй алчущым хлеб твой и нищыя безкровныя введи в дом твой: аще видиши нага, одей, и от свойственных племене твоего не презри. 8 Тогда разверзется рано свет твой, и изцеления твоя скоро возсияют, и предидет пред тобою правда твоя, и слава Божия оымет тя. 9 Тогда воззовеши, и Бог услышит тя, и еще глаголющу ти, речет: се, приидох. Аще отимеши от себе союз и рукобиение и глагол роптания 10 и даси алчущему хлеб от души твоея и душу смиренную насытиши, тогда возсияет во тме свет твой, и тма твоя будет яко полудне, 11 и будет Бог твой с тобою присно: и насытишися, якоже желает душа твоя, и кости твоя утучнеют, и будут яко вертоград напоен, и яко источник, емуже не оскуде вода: и кости твоя прозябнут яко трава, и разботеют, и наследят роды родов. 12 И созиждутся пустыни твоя вечныя, и будут основания твоя вечная родом родов: и прозовешися здатель оград, и стези твоя посреде упокоиши. 13 Аще отвориши ногу твою от суббот, еже не творити хотений твоих в день святой, и прозовеши субботы сладостны, святы Богови твоему: не воздвигнеши ноги своея на дело, ниже возглаголеши словесе во гневе из уст твоих, 14 и будеши уповая на Господа, и возведет тя на благоты

земныя, и ухлебит тя наследием Иакова отца твоего: уста бо Господня глаголаша сия.

**59** Еда не может рука Господня спасти? Или отягчил есть слух Свой, еже не услышати? **2** Но греси ваши разлучают между вами и между Богом, и грех ради ваших отврати лице Свое от вас еже не помиловати. **3** Руце бо ваши осквернене кровию, и персты ваши во гресех, устне же ваши возглаголаша беззаконие, и язык ваш неправде поучается. **4** Никтоже глаголет правды, ниже есть суд истинен: уповают на суетная и глаголют тщетная, яко зачинают труд и раждают беззаконие. **5** Яйца аспидска разбиша и постав паучинный ткут, и хотяй от яйц их ясти, разбив запорток (его), обрете и в нем василиска. **6** Постав их не будет на ризу, и не одеждутся от дел своих: дела бо их дела беззакония. **7** Нозе же их на зло текут, скоры пролияти кровь, и мысли их мысли о убийствах: сокрушение и бедность во путех их, **8** и пути мирнаго не познаша, и несть суда во путех их: стези во их развращены, по нихже ходят и не ведут мира. **9** Того ради отступи от них суд, и не постигнет их правда: ждущым им света, бысть им тма, ждуще зари во мраце ходиша. **10** Осяжут яко слепии стену, яко суще без очес осязати будут, и падутся в полудни яко в полунощи, яко умирающе возстенут **11** яко медведь, и яко голубь вкупе пойдут. Ждахом суда, и несть, спасение далече отступи от нас. **12** Много бо беззаконие наше пред Тобою, и греси наши противу сташа нам: беззакония бо наша в нас, и неправды наша уразумехом: **13** нечествовахом и солгахом и отступихом от последования Бога нашего: глаголахом неправду и не покорихомся, во утробе зачахом и поучихомся от сердца

нашего словесем неправедным: 14 и оставихом создаи суд, и правда далече отступи от нас: яко изнеможе во путех их истина, и правым (путем) не возмогоша прейти: 15 и истина взяся, и престашиша ум свой еже смыслити. И виде Господь и негодова, яко не бяше суда: 16 и виде, и не бяше мужа, и помысли, и не бяше избавляющаго: и мсти им мышцею Своею, и помилованием утверди. 17 И одеяся правдою яко щитом, и возложи шлем спасения на главу, и облечися в ризу отмщения, и одежду Своею: 18 яко воздавая воздаяние укоризну супостатом. 19 И убоятся, иже от запад, имене Господня, и иже от восток солнца, имене Его славнаго: приидет бо яко река насильная гнев от Господа, приидет со яростию. 20 И приидет Сиона ради Избавляяй, и отвратит нечестие от Иакова. 21 И сей им иже от Мене завет, рече Господь: Дух Мой, иже есть в тебе, и глаголголы, яже Аздах во уста твоя, не оскудеют от уст твоих и от уст семени твоего: рече бо Господь отныне и во век.

**60** Светися, светися Иерусалиме, прииде бо твой свет, и слава Господня на тебе возсия. 2 Се, тма покрывает землю, и мрак на языки, на тебе же явится Господь, и слава Его на тебе узрится. 3 И пойдут царие светом твоим, и языцы светлостию твоею. 4 Возведи окрест очи твои и виждь собраная чада твоя: се, приидоша вси сынове твои издалеча, и дщери твоя на рамах возмутся. 5 Тогда узриши и возрадуешься, и убоишися и ужаснешися сердцем, яко преложится к тебе богатство морское и языков и людей: 6 и приидут к тебе стада вельблюд, и покрывают тя вельблуди Мадиямстии и Гефарстии: вси от Савы приидут, носяще злато, и Ливан принесут и камень честен, и спасение Господне благовозвестят: 7 и

вся овцы Кидарския соберутся тебе, и овни Навеофстии приидут к тебе, и вознесутся приятная на жертвенник Мой, и дом молитвы Моея прославится. 8 Кии суть, иже яко облацы летят, и яко голубие со птенцы ко мне? 9 Мене острови ждаша, и корабли Фарсийстии во первых, привести чада твоя издалеча, и серебро и золото их с ними, имене ради Господня Святаго, и за еже Святому Израилеву славу быти. 10 И созиждут сынове инороднии стены твоя, и царие их предстояти будут тебе: за гнев бо Мой поразих тя и за милость Мою возлюбих тя. 11 И отверзутся врата твоя присно, день и ночь не затворятся, ввести к тебе силу язык и цари их ведомыя. 12 Языцы бо и царие, иже не поработают ти, погибнут, и языцы запустением запустеют. 13 И слава Ливанова к тебе приидет, кипарисом и певгом и кедром вкупе, прославити место святое Мое, и место ногу Моею прославлю. 14 И пойдут к тебе боящися сынове смиривших тя и раздраживших тя, и поклонятся следам ногу твою вси прогневавшии тя, и наречешися град Господень, Сион Святаго Израилева. 15 За сие, яко был еси оставлен и возненавиден и не бе помагающаго ти, положу тя в радость вечную, веселие родом родов. 16 И иссеши млеко языков и богатство царей снеси, и уразумеши, яко Аз Господь Спасаяй тя и Избавляяй тя Бог Израилев. 17 И вместо меди принесу ти золото, и вместо железа принесу ти серебро, и вместо древес принесу ти медь, и вместо камня железо: и вдам князи твоя в мир и надзиратели твоя в правду. 18 И не услышится посем неправда в земли твоей, ни сокрушение ни бедность во пределех твоих, но прозовется спасение забрала твоя и врата твоя хвала. 19 И не будет тебе ктому солнце во



свет дне, ниже восход луны просветит твою ночь, но будет тебе Господь свет вечный и Бог слава твоя. 20 Не зайдет бо солнце тебе, и луна не оскудеет тебе: будет бо Господь тебе свет вечный, и исполнятся дние рыдания твоего. 21 И людие твои вси праведнии в век наследят землю, храняще сад дела руку Его в славу. 22 Малый будет в тысящы, а малейший во язык велик: Аз Господь по времени соберу их.

**61** Дух Господень на Мне, Егоже ради помаза Мя, благовестити нищым посла Мя, изцелити сокрушенныя сердцем, проповедати пленником отпущение и слепым прозрение, 2 нареци лето Господне приятно и день воздаяния, утешити вся плачущыя, 3 дати плачущим Сиона славу вместо пепела, помазание веселия плачущим, украшение славы вместо, духа уныния: и нарекутся родове правды насаждение Господне во славу. 4 И созиждут пустыни вечныя, запустевшыя прежде воздвигнут: и обновят грады пустыя, опустошенныя в роды. 5 И приидут инороднии, пасущии овцы твоя, и иноплеменницы орателие и виноградарие ваши: 6 вы же священницы Господни наречетесь, служителие Бога вашего, речется вам: крепость язык снесите и в богатстве их чудни будете. 7 Сице землю свою вторицею наследят, и веселие вечное над главою их. 8 Аз бо есмь Господь любяй правду и ненавиждяй грабления от неправды: и дам труд их праведником и завет вечен завещаю им. 9 И познается во языцех семя их, и внуцы их посреде людий: всяк видяй я познает я, яко сии суть семя благословено от Бога, и радостию возрадуются о Господе. 10 Да возрадуется душа моя о Господе: облече бо мя в ризу спасения и одежду веселия (одея мя): яко на жениха

возложи на мя венец, и яко невесту украси мя красотою. **11**  
И яко земля растящая цвет свой, и яко вертоград семена  
своя прозябает: тако возрастит Господь Господь правду и  
веселие пред всеми языки.

**62** Сиона ради не умолчу и Иерусалима ради не попущу,  
дондеже изыдет яко свет правда моя, и спасение мое яко  
светило разжжется. **2** И узрят языцы правду твою, и царие  
славу твою, и прозовут тя именем новым, имже Господь  
наименует е. **3** И будеши венец доброты в руце Господни и  
диадима царствия в руце Бога твоего: **4** и не прозовешися  
ктому оставлен, и земля твоя ктому не наречется пуста:  
тебе бо прозовется воля Моя, и земля твоя вселенная, яко  
благоволи Господь в тебе, и земля твоя вкупе населится.  
**5** И якоже живяй юноша с девою, тако поживут сынове  
твои с тобою: и будет якоже радуется жених о невесте,  
тако возрадуется Господь о тебе. **6** И на стенах твоих,  
Иерусалиме, приставих стражи весь день и всю ночь, иже  
до конца не премолкнут поминающе Господа. **7** Несть бо  
вам подобен: аще исправиши и сотвориши, Иерусалиме,  
радование на земли. **8** Клятсся Господь десницею Своею и  
крепостию мышцы Своея: аще ктому отдам пшеницу твою и  
пищу твою врагом твоим, и аще ктому испиют вино твое  
сынове чуждии, о немже трудился еси: **9** но собирающие  
снедят я и похвалят Господа, и оымающие испиют я во дворех  
святых Моих. **10** Идите враты Моими и путь сотворите людем  
Моим, и камение, еже на пути, разместите: воздвигните  
знамение на языки. **11** Се бо, Господь слышано сотвори до  
последних земли: рцыте дщери Сионове: се, Спаситель твой  
грядет, имеяй с Собою мзду и дело Свое пред лицом Своим.

12 И прозовет я люди святы, избавлены Господем: ты же прозовешиися взыскан град и не оставлен.

**63** Кто Сей пришедый от Едома, червлены ризы Его от Восора, Сей красен во утвари, зело с крепостию? Аз глаголю правду и суд спасения. 2 Почто червлены ризы Твоя и одежды Твоя яко от истоптания точила? 3 Исполнен истоптания, и от язык несть мужа со Мною: и попрах я яростию Моею, и сотрох я яко персть, и сведох кровь их в землю и вся ризы Моя омочих: 4 день бо воздаяния прииде на них, и лето избавления приспе: 5 и воззрех, и не бе помощника: и помыслих, и никтоже заступи: и избави я мышца Моя, и ярость Моя наста: 6 и попрах я гневом Моим и сведох кровь их в землю. 7 Милость Господню помянух, добродетели Господни во всех, имиже нам воздает: Господь, судия благ дому Израилеву, наводит нам по милости Своей и по множеству правды Своея. 8 И рече: не людие ли Мои? Чада, и не отвергнутся. И бысть им во спасение и всякия скорби их. 9 Не ходатай, ниже Ангел, но Сам Господь спасе их, зане любит их и щадит их: Сам избави их и восприят их и вознесе их во вся дни века. 10 Тии же не покоришася и разгневаша Духа Святаго Его, и обратися им на вражду, и Той воева на ня. 11 И помяну дни вечныя: где возведый от земли пастыря овец Своих? Где есть вложивый в них Духа Святаго? 12 Возведшая десницею Моисея, мышца славы Его раздели воду пред лицом его сотворити Ему имя вечно, 13 проведе их сквозе бездну, якоже коня сквозе пустыню, и не утрудилася, 14 и яко скоты по полю, и сниде Дух от Господа и настави их: тако провел еси люди Твоя сотворити Тебе Самому имя славно. 15 Обратися, Господи, от небесе

и виждь от дому святаго Твоего и славы Твоея: где есть ревность Твоя и крепость Твоя? Где есть множество милости Твоея и щедрот Твоих, яко терпел еси нам? **16** Ты бо еси Отец наш, понеже Авраам не уведе нас, и Израиль не позна нас, но Ты, Господи, Отец наш, избави ны, исперва имя Твое на нас есть. **17** Что уклонил еси нас, Господи, от пути Твоего? И ожесточил еси сердца наша, еже не бояться Тебе? Обратися ради раб Твоих, ради племен достояния Твоего, **18** да (поне) мало наследим горы святыя Твоея. Противницы наши попраша святыню Твою: **19** быхом яко исперва, егда не владел еси нами, ниже бе наречено имя Твое на нас.

**64** Аще отверзеши небо, трепет примут от Тебе горы и растают, **2** яко тает воск от лица огня, и попалит огонь супостаты, и явлено будет имя Твое в сопротивных Твоих: от лица Твоего языцы возмятутся: **3** егда сотвориши славная, трепет примут от Тебе горы. **4** От века не слышахом, ниже очи наши видеша бога, разве Тебе, и дела Твоя, яже сотвориши ждущим милости. **5** Милость бо срящет творящих правду, и пути Твоя помянутся: се, Ты разгневался еси, и мы согрешихом. **6** Сего ради заблудихом и быхом яко нечисти вси мы, якоже порт нечистыя вся правда наша, и отпадохом яко листовие беззаконий ради наших: тако ветер восхитит нас. **7** И несть призываяй имя Твое и помянувый удержати Тя: яко отвратил еси лице Твое от нас и предал ны еси беззаконий ради наших. **8** И ныне, Господи, Отец наш еси Ты, мы же брение, дела руку Твоею вси: **9** не прогневайся на ны зело и не помяни во время беззаконий наших, и ныне призри, яко людие Твои вси мы. **10** Град святилища Твоего бысть пуст, Сион якоже пустыня бысть, Иерусалим на проклятие: **11** дом

святой наш и слава, уже благословиша отцы наши, бысть огнем пожжен, и вся славная наша купно падоша. 12 И о всех сих терпел еси, Господи, и молчал, и смирил еси ны зело.

**65** Явлен бых не ищущим Мене, обретохся не вопрошающим о Мне, рекох: се, есмь: языку, иже не призваша имене Моего. 2 Прострох руце Мои весь день к людем не покаяющимся и противу глаголющим, иже не ходиша путем истинным, но вслед грехов своих. 3 Людие сии разгневающии Мя пред лицом Моим присно: тии жертвы приносят в вертоградех и кадят во чрепех бесом, иже не суть, 4 и во гробех и во пещерах лежат соний ради, иже ядят мяса свиная и юху треб, осквернени сосуди их вси: 5 иже глаголют: отиди от мене, не прикоснися мне, яко чист есмь. Сей дым ярости Моея, огонь горит в нем вся дни. 6 Се, написася предо Мною: не умолчу, дондеже отдам в недра им грехи их и грехи отец их глаголет Господь: 7 иже кадяху на горах и на хомех укориша Мя, отдам дела их в недра им. 8 Тако глаголет Господь: имже образом обретається ягода на грезне, и рекут: не погуби его, яко благословение есть в нем: тако сотворю служащаго Ми ради, не имам всех погубити ради его: 9 и изведу из Иакова семя и из Иуды, и наследит гору святую Мою, и наследят избраннии Мои и раби Мои и вселятся тамо. 10 И будут во дубраве ограды стадом, и юдоль Ахорская в покоище говядов людем Моим, иже взыскаша Мене. 11 Вы же, оставивши Мя и забывающии гору святую Мою, и уготовлящии демону трапезу и исполняющии щастию растворение, 12 Аз предам вас под мечь, вси заклятием падете: яко звах вас и не послушасте, глаголах, и преслушасте и сотвористе лукавое

предо Мною и яже не хотех избрасте. **13** Сего ради тако глаголет Господь: се, работающи Ми ясти будут, вы же взалчете: се, работающи Ми пити будут, вы же возжаждете: **14** се, работающи Ми возрадуются, вы же посрамитесь: се, работающи Ми возвеселятся в веселии сердца, вы же возопиете в болезни сердца вашего и от сокрушения духа восплачетесь. **15** Оставьте бо имя ваше в насыщение избранным Моим, вас же избьет Господь: работающым же Мне наречется имя новое, **16** еже благословится на земли, благословят бо Бога истиннаго: и кленущиися на земли клятися будут Богом истинным, забудут бо печаль свою первую, и не въздет им на сердце. **17** Будет бо небо ново и земля нова, и не помянут прежних, ниже въздут на сердце их, **18** но радость и веселие обрящут на ней, яко се, Аз творю веселие Иерусалиму и людем Моим радость. **19** И возвеселюся о Иерусалиме и возрадуюся о людех Моих, и ксему не услышится в нем глас плача, ни глас вопля, **20** ниже будет тамо младенец, ни старец, иже не исполнит лет своих: будет бо юный ста лет, умираяй же грешник ста лет и проклят будет. **21** И созиждут дома и сами вселятся, и насадят винограды и сами снут плоды их. **22** Не созиждут, да инии вселятся, и не насадят, да инии снут: якоже бо дние древа жизни, будут дние людий Моих: дела бо трудов их обетшают. **23** Избраннии же мои не имут трудитися вотще, ниже породят чад на проклятие, яко семя благословено есть Богом, и внуцы их с ними будут. **24** И будет, прежде неже воззвати им, Аз услышу их, еще глаголющым им, реку: что есть? **25** Тогда волцы и агнцы имут пастися вкупе, и лев яко

вол снести плевые, и змия землю яко хлеб: не повредят, ниже погубят на горе святей Моей, глаголет Господь.

**66** Тако глаголет Господь: небо престол Мой, земля же подножие ногу Моею: кий дом созиждете Ми, и кое место покоища Моего? **2** Вся бо сия сотвори рука Моя, и сия суть вся Моя, глаголет Господь. И на кого воззрю, токмо на кроткаго и молчаливаго и трепещущаго словес Моих? **3** Беззаконник же жряй ми телца, яко убиваяй пса: и приносяй семидал, яко кровь свиную: даяй ливан в память, аки хулник. И тии избраша пути своя, и мерзости их, яже душа их изволи. **4** И Аз изберу поругания их и грехи их воздам им: яко звах их, и не послушаша Мене, глаголах, и преслушаша и сотвориша злое предо Мною, и яже не хотех избраша. **5** Услышите глаголгол Господень, трепещущии словесе Его: рцыте, братия, ненавидящим вас и гнушающимся, да имя Господне прославится и явится во веселии их, и они посрамятся. **6** Глас вопля от града, глас от храма, глас Господа воздающаго воздаяние сопротивляющимся. **7** Прежде неже чревоболети ей, роди, прежде неже приити труду чревоболения, избеже и породи мужеск пол. **8** Кто слыша сицевое, и кто виде сице? Аще родила земля с болезнию во един день? Или и родися язык весь купно, яко поболе и роди Сион дети своя? **9** Аз же дах чаяние сие, и не помянул еси Мене, рече Господь. Не се ли, Аз родящую и неплодную сотворих? Рече Бог твой. **10** Веселися, Иерусалиме, и торжествуйте в нем, вси любящии его и живуции в нем: радуйтесь вкупе с ним радостию, вси елицы плакасте о нем, **11** да ссете и насытитесь от сосца утешения его, да ссавше насладитесь от входа славы его. **12** Яко сия глаголет Господь: се, Аз

укланяю на ня аки реку мира, и аки поток наводняемый славу языков: дети их на рамена взяты будут и на колену утешатся.

**13** Якоже аще кого мати утешает, тако и Аз утешу вы, и во Иерусалиме утешитесь **14** и узрите, и возрадуется сердце ваше, и кости ваша яко трава прозябнут: и познается рука Господня боящимся Его, и запретит непокаряющимся. **15** Се бо, Господь яко огонь приидет, и яко буря колесницы Его, воздати яростию отмщение Свое и прещение во пламени огненне: **16** огнем бо Господним судитися будет вся земля, и мечем Его всяка плоть: мнози язвени будут от Господа.

**17** Очищающиися и освящающиися во вертоградех и в преддвериих ядуЩИИ мясо свиное и мерзости и мыши вкупе погибнут, рече Господь. **18** И Аз дела их и помышление их вем, и гряду собрати вся народы и языки, и приидут и узрят славу Мою: **19** и оставлю на них знамение, и пошлю от них спасеных во языки, во Фарсис и в Фуд, и в Луд и в Мосох, и в Фовель и во Елладу, и во острова дальния, иже не слышаша имене Моего, ниже видеша славу Мою: и возвестят славу Мою во языцех, **20** и приведут братию вашу от всех язык дар Господеви, с коньми и колесницами и с носилами мсков, под сеньми во святой град Иерусалим, рече Господь, аки бы принесли сынове Израилевы жертвы своя Мне со псалмы в дом Господень: **21** и от тех поиму себе жерцы и левиты, рече Господь. **22** Якоже бо небо ново и земля нова, яже Аз творю, пребывают предо Мною, глаголет Господь, тако станет семя ваше и имя ваше: **23** и будет месяц от месяца, и суббота от субботы, приидет всяка плоть поклонитися предо Мною во Иерусалим, рече Господь: **24** и изыдут и узрят трупы



человеков преступивших Мне: червь бо их не скончается, и  
огнь их не угаснет, и будут в позор всяцей плоти.

# Книга пророка Иеремии

**1** Слово Божие, еже бысть ко Иеремии сыну Хелкиеву от священник, иже обиташе во Анафофе, в земли Вениаминове, **2** якоже бысть слово Господне к нему, во дни Иосии сына Амоса царя Иудина, в третиенадесять лето царства его, **3** и бысть во дни Иоакима сына Иосии царя Иудина, даже до первагонадесять лета Седекии сына Иосии царя Иудина, даже до пленения Иерусалимскаго в месяц пятый. **4** И бысть слово Господне ко мне глаголя: **5** прежде неже мне создати тя во чреве, познах тя, и прежде неже изыти тебе из ложесн, освятих тя, пророка во языки поставих тя. **6** И рекох: о, Сый Владыко Господи, се, не вем глаголати, яко отрок аз есмь. **7** И рече Господь ко мне: не глаголи, яко отрок аз есмь, ибо ко всем, к нимже послю тя, пойдеши, и вся, елика повелю тебе, возглаголеши: **8** не убойся от лица их, яко с тобою Аз есмь, еже избавити тя, глаголет Господь. **9** И простре Господь руку Свою ко мне и прикоснуса устом моим, и рече Господь ко мне: се, дах словеса Моя во уста твоя: **10** се, поставих тя днесь над языки и над царствы, да искорениши и разориши, и расточиши и разрушиши, и паки созиждеши и насадиши. **11** И бысть слово Господне ко мне глаголя: что ты видиши Иеремие? И рекох: жезл ореховый (аз вижду). **12** И рече Господь ко мне: благо видел еси, понеже бдех Аз над словесы Моими, еже сотворити я. **13** И бысть слово Господне вторицею ко мне глаголя: что ты видиши? И рекох: коноб поджигаемый (аз вижду) и лице его от лица севера. **14** И рече Господь ко мне: от лица севера возгорятя злая на всех обитающих на земли, **15** зане се, Аз созову вся царства земная от севера, рече Господь и

приидут и поставят кийждо престол свой в преддвериих врат Иерусалимских и на всех стенах окрест его и на всех градех Иудиных: **16** и возглаголю к ним с судом о всяцей злобе их, како оставиша Мя и пожроша богом чуждим и поклонишася делом рук своих. **17** Ты же препояши чресла твоя, и востани и глаголи к ним вся, елика заповедаю тебе: не убойся от лица их, ниже устрашися пред ними, яко с тобою есмь, еже избавити тя, глаголет Господь: **18** се, положих тя днесь аки град тверд и в столп железный, и аки стену медяну, крепку всем царем Иудиным и князем его, и священником его и людем земли: **19** и ратовати будут на тя и не премогут тя, понеже с тобою Аз есмь, да избавлю тя, рече Господь.

**2** И бысть слово Господне ко мне глаголющее: иди и вопий во уши Иерусалиму, рекий: сия глаголет Господь: **2** помянух милость юности твоя и любовь совершенства твоего, егда последовал еси в пустыни ненасеянной Святому Израилеву, глаголет Господь. **3** Свят Израиль Господеви, начаток плодов Его: вси поядающии его согрешат, злая приидут на них, рече Господь. **4** Услышите слово Господне, доме Иаковль и вся племена дому Израилева. **5** Сия глаголет Господь: кое обретоша отцы ваши во Мне погрешение, яко удалишася от Мене и ходиша вслед суетных и осуетишася, **6** и не рекоша: где есть Господь, изведый нас от земли Египетския, преведый нас по пустыни, по земли необитанней и непроходней, по земли безводней и неплодней, по земли, по нейже не ходил муж никогдаже и не обитал человек тамо? **7** И введох вас в землю Кармил, да снете плоды его и благая того: и внидоште, и осквернили есте землю Мою, и достояние Мое поставили есте в мерзость. **8** Священницы не рекоша: где

есть Господь? И держащий закон не ведеша Мя, и пастырие нечествоваша на Мя, и пророцы пророчествоваша в Ваала и идолом последоваша. 9 Сего ради еще судом претися имам с вами, рече Господь, и с сыны вашими препрюся. 10 Того ради приидите во острова Хеттим и видите, и в Кидар послите и рассмотрите прилежно и видите, аще сотворена быша таковая? 11 Аще премениша языцы боги своя, и тии не суть бози? Людие же Мои премениша славу свою на то, от негоже не уполюзуются. 12 Ужасеся небо о сем и вострепета попремногу зело, глаголет Господь. 13 Два бо зла сотвориша людие Мои: Мене оставиша источника воды живы, и ископаша себе кладенцы сокрушенныя, иже не возмогут воды содержати. 14 Еда раб есть Израиль, или домочадец есть? Вскую бысть в пленение? 15 На него рыкаша львоуе и издаша глас свой, иже поставиша землю его в пустыню, и грады его сожжени суть, еже не обитати в них. 16 И сынове Мемфиса и Тафны познаша тя и поругашася тебе. 17 Не сия ли сотвори тебе то, яко оставил еси Мене? Глаголет Господь Бог твой. 18 И ныне что тебе и пути Египетскому, еже пити воду Геонскую? И что тебе и пути Ассирийскому, да пиешу воду речную? 19 Накажет тя отступление твое и злоба твоя обличит тя и увеждь и виждь, яко зло и горько ти есть, еже оставити мя, глаголет Господь Бог твой: и не благоволих от тебе, глаголет Господь Бог твой. 20 Понеже от века сокрушил еси иго твое и растерзал еси узы твоя и рекл еси: не имам тебе служити, но пойду на всякий холм высокий и под всяким дровом лиственным тамо разлиюся в блюде моем. 21 Аз же насадих тя виноград плодоносен, весь истинен: како превратился еси в горесть, виноград

чуждий? 22 Аще умыешися нитром и умножиши себе травы борифовы, порочен еси во беззакониих твоих предо Мною, рече Господь Бог. 23 Какое речеши: не осквернился и вслед Ваала не ходих? Виждь пути твоя на месте многогробищнем и увеждь, что сотворил еси. В вечер глас его рыдаше, 24 пути своя разшири на воды пустынные, в похотех души своея ветром ношашеся, предан бысть, кто обратит его? Все ищущии его не утрудятся, во смирении его обрящут его. 25 Отврати ногу твою от пути стропотна и гортань твоя от жажды. И рече: возмужаюся, яко возлюблю чуждых и вслед их хождаше. 26 Якоже стыд татю, егда ят будет, тако постыдятся сынове Израилевы, тии и царие их, и началницы их и священницы их и пророцы их. 27 Древу рекоша: яко отец мой еси ты: и камени: ты мя родил еси: и обратиша ко Мне хребты, а не лица своя: и во время озлобления своего рекут: востани и избави нас. 28 И где суть бози твои, яже сотворил еси тебе? Да востанут и избавят тя во время озлобления твоего: по числу бо градов твоих быша бози твои, Иудо, и по числу путей Иерусалимских жряху Ваалу. 29 Вскую глаголет ко Мне? Все вы нечествовасте и все вы беззаконновасте ко Мне, глаголет Господь. 30 Всеуе поразих чада ваша, наказания не приясте, мечь пояде пророки ваша, аки лев погубляй, и не убоястеся. 31 Слышите слово Господне, тако глаголет Господь: еда пустыня бых Израилю, или земля неплодна? Вскую реша людие Мои: обладаеми не будем и потом не приидем к Тебе? 32 Еда забудет невеста красоту свою, и дева мониста персий своих? Людие же Мои забыша Мене дни безчисленны. 33 Что еще добро ухитриши на путех твоих, еже взыскати любве? Не тако: но и ты лукавновала

еси, еже осквернити пути твоя, **34** и в руках твоих обретется кровь душ (убогих) неповинных: не в ровех обретох их, но во всяцей дубраве. **35** И рекла еси: неповинна есмь, но да отвратится ярость Твоя от мене. Се, Аз суждуся с тобою, внегда рещи тебе: не согреших: **36** понеже презрела еси зело, еже повторити пути твоя: и от Египта постыдишися, якоже постыдена еси от Ассура: **37** яко и оттуду изыдеши, и руце твои на главе твоей: яко отрину Господь надеяние твое, и не благопоспешится тебе в нем.

**3** Аще отпустит муж жену свою, и отидет от него и будет мужу иному, еда возвращающийся возвратится к нему паки? Еда непорочна будет и неосквернена жена та? Ты же соблудила еси с пастырьми многими, и возвращалася еси и ко Мне, глаголет Господь. **2** Воздвигни очи твои на правоту и виждь, где не смесилася еси? На путех сидела еси аки врана особающаяся и осквернила еси землю в любодеениях и в лукавствех твоих, **3** и имела еси пастырей многих в претыкание себе: лице жены блудницы бысть тебе, не хотела еси постыдетися ко всем. **4** Не аки ли домом Мене нарекла еси и Отцем и вождем девства твоего? **5** Еда пребудет во век, или сохранится в победу? Сия глаголала еси, и сотворила еси злая, и возмогла еси. **6** И рече Господь ко мне во дни Иосии царя: видел ли еси, яже сотвори ми дом Израилев? Поидоша на всяку гору високу и под всяко древо листовяно и соблудиша тамо. **7** И рекох по внегда прелюбодействовати ему во всех сих: ко Мне обратися. И виде преступление его преступница Иудеа сестра его. **8** И видех, яко о всех (изобличен есть), в нихже ят бысть, в нихже любодействова дом Израилев: сего ради отпустих и и дах ему

книгу распустную в руке его. Обаче не убоюся преступница Иудеа (сестра его), но иде и соблудила есть и та: 9 и бысть ни во что блуд ея, и оскверни землю, и соблудила есть с каменем и со древом. 10 И во всех сих не обратися ко Мне преступница сестра ея Иудеа от всего сердца своего, но во лжи, рече Господь. 11 И рече Господь ко мне: оправда душу свою отступница Израиль, паче преступницы Иудеи: 12 иди, и прочти словеса та к северу, и речеши: обратися ко мне, доме Израилев, рече Господь: и не утвержду лица Моего на вас, яко милостив Аз есмь, рече Господь, и не прогневаюся на вы во веки. 13 Обаче веждь беззаконие твое, яко в Господа Бога твоего преступила еси, и расточила еси пути твоя чуждим под всяким древом листовяным, гласа же Моего не послушала еси, рече Господь. 14 Обратитесь, сынове отступившии, глаголет Господь: яко Аз возобладаю вами и поиму вы единого от града и двух от племени, и введу вас в Сион 15 и дам вам пастыри по сердцу Моему, и упасут вас разумом и учением. 16 И будет, егда умножитесь и возрастете на земли, глаголет Господь, во дни оны не рекут ктому: кивот завета Святаго Израилева: не въздет на сердце, ни воспомянется, ниже посетится, ниже сотворится ктому. 17 Во дни оны нарекут Иерусалима престол Господень, и соберутся к нему вси языцы во имя Господне во Иерусалим, и не пойдут ктому вслед похотей сердца своего злейшаго. 18 Во днех тех приидет дом Иудин ко дому Израилеву, и пойдут вкупе от земли северныя и от всех стран к земли, юже дах в наследие отцем их. 19 Аз же рех: да будет, Господи, яко положу тя в чада и дам тебе землю избранную, достояние Бога Вседержителя языков: и рекох: отцем наречете Мя и

от Мене не отвратитесь. 20 Обаче якоже отвергается жена сожителя своего, тако отвержеся от Мене дом Израилев, рече Господь. 21 Глас из устен слышан бысть плача и моления сынов Израилевых, яко беззаконноваша в путех своих, забыша Господа Бога святого своего. 22 Возвратитесь, сынове возвращающиися, и изцелю сокрушения ваша. Се, рабы мы будем Тебе, Ты бо еси Господь Бог наш. 23 Истинно лживи быша холми и множество гор, токмо Господем Богом нашим спасение Израилево. 24 Студ же пояде труды отец наших, от юности нашея, овцы их и телцы их, и сыны их и дщери их. 25 Уснухом в постыдении нашем, и покры нас безчестие наше, яко Господу Богу нашему согрешихом, мы и отцы наши, от юности нашея даже до сего дне, и не послушахом гласа Господа Бога нашего.

**4** Аще обратишися, Израилю, глаголет Господь, ко Мне обратися: и аще отимеши мерзости твоя от уст твоих, и от лица Моего убоишися, 2 и кленешися, живет Господь, во истине и в суде и в правде, и благословят в Нем языцы и в Нем восхвалят Бога во Иерусалиме. 3 Сия бо глаголет Господь мужем Иудиным и обитателем Иерусалимлим: поновите себе поля и не сейте на тернии: 4 обрежитесь Богу вашему и обрежьте жестосердие ваше, мужие Иудины и обитающии во Иерусалиме, да не изыдет яко огонь ярость Моя, и возгорится, и не будет угашаяй, ради лукавства начинаний ваших. 5 Возвестите во Иудеи, и да услышится во Иерусалиме: глаголите, воспойте трубою на земли, возопийте зело и рцыте: соберитесь, и внидем во грады тверды. 6 Воздвигше (знамение) бежите в Сион, потщитесь, не стойте, яко злая Аз навожду от севера и сотрение велико. 7 Взыде



лев от ложа своего, и погубляяй языки воздвижеса и изыде от места своего, да положит землю твою в пустыню, и гради твои разорятся, оставшии без обитателей. 8 О сих препояшится во вретница и плачите и рыдайте, яко не отвратися гнев ярости Господни от вас. 9 И будет в день той, глаголет Господь, погибнет сердце царево и сердце начальников, и священницы ужаснутся, и пророцы удивятся. 10 И рекох: о, Владыко Господи, еда обольстил еси людися и Иерусалима, рекий: мир будет вам? И се, пройде мечь даже до души их. 11 Во время оно речется людем сим и Иерусалиму: дух заблуждения в пустыни, путь дщере людий Моих, не ко очищению, ниже во святое: 12 дух исполнения от сих приидет Мне, и ныне Аз возглаголю суды Моя к ним. 13 Се, яко облак взыдет, и яко вихрь колесницы его, быстрее орлов кони его: горе нам, яко бедствуем. 14 Омый от лукавства сердце твое, Иерусалиме, да спасешия: доколе будут в тебе помышления бед твоих? 15 Глас бо возвещающаго от Дана приидет, и слышана будет болезнь от горы Ефремли. 16 Рцыте языком: се, приидоша: возвестите во Иерусалиме: полцы идут от земли дальния и даша на грады Иудины глас свой, 17 аки стражы селнии быша над ним окрест: яко пренебрегл Мя еси, глаголет Господь. 18 Пути твоя и начинания твоя сотвориша тебе сия: сие лукавство твое, понеже горько, яко прикоснуса сердцу твоему. 19 Чрево мое, чрево мое болит мне, и чувства сердца моего, смущается душа моя, терзается сердце мое: не умолчу, яко глас трубы услышала душа моя, вопль рати и беды: 20 сотрение (на сотрение) призывается, понеже опустела вся земля, внезапно опусте жилище мое, расторгошася кожи моя.

21 Доколе зрети имам бежащих, слышащ гласы трубных?  
22 Понеже вождеве людей Моих Мене не познаша: сынове буии суть и безумни, мудри суть, еже творити злая, благо же творити не познаша. 23 Воззрех на землю, и се, ничтоже, и на небо, и не бе света его. 24 Видех горы, и трепетаху, и вси холми возмутишася. 25 Воззрех, и се, не бе человека, и вся птицы небесныя ужасохуся. 26 Видех, и се, Кармил пуст, и вси гради сожжени огнем от лица Господня, и от лица гнева ярости Его погибоша. 27 Сия глаголет Господь: пуста будет вся земля, скончания же не сотворю. 28 О сих да плачет земля, и да помрачится небо свыше: понеже глаголах, и не раскаюся: устремихся и не отвращуся от него. 29 От гласа яздящих и напряженна лука побеже всяка страна: внидоша в разселины и в дубравы сокрышася и на камене взыдоша: вси гради оставлени суть, не обитает в них человек. 30 Ты же, запустелая, что сотвориши? Аще облечешися во багряницу и украсишися монисты златыми, аще намажеш стивием очи твои, всуе украшение твое: отринуша тя любовницы твои, души твоя ищут. 31 Глас бо яко родящая слышах стенания твоего: аки первородящая глас дщере Сиони истает, и опустит руце свои: горе мне, яко исчезает душа моя над убиенными.

**5** Обыдите пути Иерусалимския и воззрите, и познайте и поищите на стогнах его, аще обрящете мужа творящаго суд и ищуща веры: и милосерд буду ему, глаголет Господь.  
2 Живет Господь, глаголют, сего ради не во лжах ли кленутся? 3 Господи, очи Твои (зрят) на веру: бил еси их, и не поболеша, сокрушил еси их, и не восхотеша прияти наказания: ожесточиша лица своя паче камене и не хотеша

обратится. 4 Аз же рех: негли убози суть (и буии), того ради не возмогоша, яко не уведаша пути Господня и суда Бога своего. 5 Пойду ко державным и возглаголю им, тии бо познаша путь Господень и суд Бога своего. И се, единодушно сии сокрушиша иго, расторгоша узы. 6 Сего ради порази их лев от дубравы, и волк даже до домов погуби их, и рысь бдяше над градами их: вси исходящие от них будут яти, яко умножиша нечестия своя, укрепилася во отвращениях своих. 7 О чем от сих милосерд буду тебе? Сынове твои оставиша Мя и кляшася теми, иже не суть бози: насытил их, и прелюбодействоваша и в домех блудниц обиташа, 8 кони женонеистовни сотворишася, кийждо ко жене искреняго своего ржаше. 9 Еда о сих не посету? Рече Господь: или языку сицевому не мстит душа Моя? 10 Взыдите на стены его и разорите, окончания же не сотворите: оставите подпоры его, яко Господни суть. 11 Преступлением бо преступил есть на Мя дом Израилев и дом Иудин глаголет Господь. 12 Солгаша Господу своему и рекоша: не суть сия, ниже приидут на нас злая и меча и глада не узрим: 13 пророцы наши быша на ветр, и слово Господне не бе в них, тако будет им. 14 Сего ради тако глаголет Господь Сил: занеже глаголали есте слово сие, се, Аз даю словеса Моя во уста твоя огонь, и люди сия древа, и пояст их. 15 Се, Аз наведу на вас язык издалеча, доме Израилев, рече Господь, язык сильный, язык старый, егоже языка не увеси, (ни уразумеши, что глаголет): 16 тул его яко гроб отверст, вси крепцыи и поядят жатву вашу 17 и хлебы ваша, и поядят сынов ваших и дщерей ваших, и снут овец ваших и телцов ваших, и поядят винограды ваша и смоквы ваша и масличия ваша,

и сокрушат грады ваша твердыя, на нихже вы уповасте, мечем. 18 Обаче во днех оных, глаголет Господь Бог твой, не сотворю вас во истребление. 19 И будет, егда речете: почто сотвори Господь Бог наш нам сия вся? И речеши к ним: яко остависте Мя и послужисте богом чуждим в земли вашей, тако послужите богом чуждим в земли не вашей. 20 Возвестите сия дому Иаковлю и слышано сотворите в дому Иудине (рекуще): 21 слышите сия, людие буии и не имущии сердца, иже, имеющие очи, не видите, и уши, и не слышите: 22 Мене ли не убоитесь? Рече Господь: или от лица Моего не устыдитесь? Иже положих песок предел морю, заповедь вечну, и не превзыдет его, и возмутится и не возможет: и возшумят волны его, и не прейдут того. 23 Людем же сим бысть сердце непослушно и непокориво, и уклонишася и поидоша, 24 и не рекоша в сердца своем: убоимся Господа Бога нашего, дающаго нам дождь ранний и поздний во время исполнения повеления жатвы и хранящаго нам. 25 Беззакония наша уклониша сия, и греси наши отринуша благая от нас. 26 Яко обретошася в людех Моих нечестивии, и сети поставиша, еже погубити мужы, и уловиша. 27 Аки клетка поставлена полна птиц, тако дома их полни лести: сего ради возвеличишася и обогатишася: 28 утыша и утолстеша и преступиша словеса Моя злейшии: прю вдовицы не судиша, суда сира не управиша и суда убогим не судиша. 29 Еда сих ради не посещу? Рече Господь: или языку сицевому не отмстит душа Моя? 30 Ужас и страшная содеяшася на земли: 31 пророцы пророчествоваша неправедная, и священницы восплескаша руками своими, и

людие Мои возлюбиха таковая. И что сотворите в последняя сих?

**6** Укрепитесь, сынове Вениаминовы, посреде Иерусалима, и в Фекуи вострубите трубою, и над Вефахармом воздвигните хоругвь: яко злая произникоша от севера, и сотрение велико бывает: **2** и отимется высота твоя, дщи Сиона. **3** К ней приидут пастырие и стада их, и поставят на ней кущы окрест, и упасут кийждо рукою своею. **4** Уготовитесь на ню на крань, встаните и взыдем на ню о полудни: горе нам, яко уклонися день, яко исчезают сени дневныя. **5** Встаните и взыдем на ню нощию и расточим основания ея. **6** Яко сия глаголет Господь Сил: посецы древа его, излий на Иерусалим силу: о, граде лживый, всякое насильство в нем! **7** Якоже студену творит кладязь воду свою, тако студену творит ю злоба ея: нечестие и пакости услышатся в нем над лицом его всегда. **8** Немоцию и язвою накажешься, Иерусалиме: да не отступит душа Моя от тебе, да не сотворю тя непроходну, землю необитанну. **9** Яко сия глаголет Господь Сил: обирайте, обирайте, аки виноград, останки Израилевы, обратитесь аки обиратель на кошницу свою. **10** Кому возглаголю и (кому) засвидетельствую, и услышит? Се, необрезана ушеса их, и слышати не возмогут: се, слово Господне бысть к ним в поношение, и не восприимут того. **11** И ярость Мою исполних, и терпех, и не скончах их: излию на младенцы отвне и на собрание юнош вкупе: муж бо и жена яти будут, старец со исполненным дний. **12** И прейдут дома их ко иным, поля и жены их такожде, яко простру руку Мою на обитающих на земли сей, глаголет Господь. **13** Понеже от меншаго и даже до болшаго вси совершиша беззаконная, от священника и

даже до лжепророка вси сотвориша ложная 14 и целяху сотрение людей Моих, уничижающе и глаголюще: мир, мир: и где есть мир? 15 Постыдешася, яко оскудеша: и ниже аки посрамляеми постыдешася и безчестия своего не познаша: сего ради падут падением своим и во время посещения своего погибнут, рече Господь. 16 Сия глаголет Господь: станите на путех и видите, и вопросите о стезях Господних вечных и видите, кий есть путь благ, и ходите по нему и обряцете очищение душам вашим. И рекоша: не пойдём. 17 И поставих над вами стражы: слышите глас трубы. И рекоша: не послушаем. 18 Сего ради услышаша языцы и пасущии стада своя. 19 Слыши, земле: се, Аз навожду на люди сия злая, плод отвращения их, яко словес Моих не послушаша и закон Мой отвергоша. 20 Вскую Мне кадило от Савы приносите и кинамон от земли дальняя, всесожжения ваша не суть приятна, и жертвы ваша не усладиша Мя. 21 Сего ради тако глаголет Господь: се, Аз дам на люди сия болезнь, и изнемогут отцы и сынове вкупе, сосед и искренний его погибнут. 22 Сия глаголет Господь: се, людие грядут от севера, и язык велик востанет от конец земли, 23 лук и щит возмут: мучителен есть и не умилосердится: глас его, яко море шумящее: на конех и колесницах ополчится аки огонь на брань на тя, дщи Сиона. 24 Слышахом слух его, ослабеша руже наши, скорбь объят нас, болезни яко родящия. 25 Не исходите на нивы и на пути не ходите, понеже мечь вражий обитает окрест. 26 Дщи людей моих, препояшися вретischem и посыплися пепелом, плачь возлюбленного сотвори тебе рыдание горько, понеже внезапно приидет запустение на вас. 27 Искусителя дах тя в людех искусных, и увеси Мя, внегда

искусити Ми путь их: 28 вси непослушни ходящии строптиво: медь и железо, вси растлени суть. 29 Оскуде мех от огня, истле олово: всуе ковачь сребро кует, лукавства бо их не истаяша. 30 Сребро отриновено нарцъте их, яко Господь отверже их.

**7** Слово, еже бысть ко Иеремии от Господа, глаголющее: 2 стани во вратех дому Господня и проповеждь тамо слово то и глаголи: слышите слово Господне, вся Иудеа, ходящии сквозе врата сия, да поклонитесь Господу: 3 сия глаголет Господь Сил, Бог Израилев: исправити пути ваша и начинания ваша, и вселю вы на месте сем. 4 Не надейтесь на себе во словесех лживых, понеже весьма не уполюзуют вас, глаголюще: храм Господень, храм Господень, храм Господень есть. 5 Яко аще исправляюще исправите пути ваша и умышления ваша, и творяще сотворите суд посреде мужа и посреде искренняго его, 6 и пришелцу и сиру и вдовице не сотворите насилия, и крове неповинныя не излиете на месте сем, и вслед богов чуждих не пойдете на зло вам, 7 вселю вас на месте сем, в земли, юже дах отцем вашим от века даже и до века. 8 Аще же вы надеетесь на словеса лживая, отнюдуже не будет вам пользы, 9 и крадете и убиваете, и блудствуете и кленетесь лживо, и жрете Ваалу и ходите вслед богов чуждих, ихже не весте, яко во зло вам суть, 10 и приидосте и стаете предо Мною в дому сем, в немже призвано есть имя Мое, и рекли есте: удалихомся, еже не творити вся мерзости сия: 11 еда вертеп разбойником есть дом Мой, в немже призвался имя Мое тамо во очию вашею? И се, Аз видех, глаголет Господь. 12 Сего ради идите к месту Моему, еже в Силоме, идеже вселих имя Мое от начала, и видите,

что сотворих ему лукавств ради людей Моих Израиля. **13** И ныне, понеже сотвористе вся дела сия, рече Господь, и глаголах к вам рано востающь и глаголющь, и не услышасте Мене, и звах вас, и не отвещасте: **14** убо и Аз сотворю дому сему, в немже призвано есть имя Мое, на негоже вы уповасте, и месту, еже дах вам и отцем вашим, якоже сотворих Силому. **15** И отвергу вас от лица Моего, якоже отвергох всю братию вашу, все семя Ефремово. **16** Ты же не молися о людех сих и не проси еже помилованым быти им, и не моли, ниже приступай ко Мне о них, яко не услышу тя. **17** Еда не видиши, что сии творят во градех Иудиных и на путех Иерусалимских? **18** Сынове их собирают дрова, и отцы их зажигают огонь, и жены их месят муку, да сотворят опресноки воинству небесному, и возлияша возлияния богом чуждим, да прогневают Мя. **19** Мене ли тии прогневляют? Глаголет Господь: еда не себе самих? Да постыдятся лица их. **20** Сего ради тако глаголет Господь: се, гнев и ярость Моя лиется на место сие и на люди, и на скоты и на всяко древо страны их и на плоды земныя, и возжжется и не угаснет. **21** Сия глаголет Господь Сил, Бог Израилев: всеожжения ваша соберите со жертвами вашими и изядите мяса: **22** яко не глаголах ко отцем вашим и не заповедах им в день, в оньже изведох их от земли Египетския, о всеожжениих и жертвах, **23** но (токмо) слово сие заповедах им, рекий: услышите глас Мой, и буду вам в Бога, и вы будете Мне в люди, и ходите во всех путех Моих, в нихже повелех вам, да благо будет вам. **24** И не услышаша Мене, и не внят ухо их: но поидоша в похотех и стропотстве сердца своего лукаваго, и сотворишася на задняя, а не на предняя, **25** от дне, в



оньже изыдоша отцы их от земли Египетския, и даже до дне сего: и послах к вам вся рабы Моя пророки, в день и рано востая и посылая: **26** и не услышаша Мя, ни приклониша ухо свое, но ожесточиша выю свою паче отец своих. **27** И речеши к ним вся словеса сия, и не услышат тя, и воззовеши их, и не отвещают тебе. **28** И речеши к ним: сей язык, иже не послуша гласа Господа Бога своего, ни восприят наказания: погибе вера и отята есть от уст их. **29** Остризи главу твою и отметни, и восприими во устне рыдание, яко отверже Господь и отрину род творяй сия. **30** Понеже сотвориша сынове Иудины лукавое во очию Моею, рече Господь: поставиша мерзости своя в дому, в немже призвано есть имя Мое, да осквернят его, **31** и создаша требище Тафефу, еже есть во юдоли сына Енномля, да сожигают сыны своя и дщери своя огнем, егоже не повелех им, ниже помыслих в сердцах Моем: **32** сего ради се, дние грядут, глаголет Господь, и не рекут кому: требище Тафефово и юдоль сына Енномля, но юдоль закланых: и погребутся во Тафефе, занеже несть места. **33** И будут трупие людей сих во снедь птицам небесным и зверем земным, и не будет отгоняющаго. **34** И упрядню от градов Иудиных и от путей Иерусалимлих глас радующихся и глас веселящихся, глас жениха и глас невесты, во опустении бо будет вся земля.

**8** Во время оно, глаголет Господь, извергут кости царей Иуды и кости князей его, и кости священников и кости пророков и кости обитающих во Иерусалиме из гробов их **2** и повергут их противу солнца и луны и противу всех звезд небесных и противу всего воинства небеснаго, ихже возлюбиша и имже служиша и вслед их ходиша, и ихже

держажуся и имже поклонишася: неоплакани и непогребени будут и в пример на лица земли будут: 3 яко избраша паче смерть, неже живот, и всем, иже осташа от племени сего строптиваго во всех местех, аможе изрину их рече Господь Сил. 4 И речеши к ним: понеже сия глаголет Господь: еда падаей не востает, или отвращаяйся не обратится? 5 Вскую отвратишася людие Мои сии во Иерусалиме отвращением безстыдным и укрепишася во произволении своем и не восхотеша обратится? 6 Внимайте и слушайте: не тако ли возглаголют: несть человек творяй покаяние о гресе своем, глаголя: что сотворих? Изнеможе бежай от течения своего, аки конь утружден во ржании своем. 7 Еродиа на небеси позна время свое, горлица и ластовица селная, врабие сохраниша времена входов своих: людие же Мои сии не познаша судеб Господних. 8 Како речете, яко мы мудри есмы и закон Господень с нами есть? Истинно всуе бысть трость лживая книжником. 9 Постыдешася премудрии, и устрашени и поимани быша, слово бо Господне отвергоша: кая мудрость есть в них? 10 Сего ради дам жены их иным и села их наследником, понеже от мала даже до велика вси златолюбию последуют и от пророка даже до священника вси творят лжу, 11 и изцеляху сотрения дщере людий Моих, ко безчестию глаголюще: мир, мир. И не бе мира. 12 Постыждени суть, яко гнусство сотвориша и постыдением не постыдешася и посрамитися не ведеша: сего ради падут между падающими, во время посещения своего падут рече Господь. 13 И соберут плоды их, глаголет Господь: несть грозда на лозе, и не суть смокви на смоковницах, и листвие отпадоша: и дах им, и мимоидоша их. 14 Почто мы седим?

Совокупитесь и внидем во грады тверды и повержемся тамо, яко Господь Бог наш отрину нас и напои нас водою желчи, согрешихом бо пред Ним. 15 Ждахом мира, и не бяху благая: време уврачевания, и се, боязнь. 16 От Дана слышано бысть ржание коней его, от гласа ржания яждения коней потрясется вся земля: и приидет и пожрет землю и исполнение ея, град и обитающих в нем: 17 яко се, аз пошлю на вас змии умерщвляющыя, имже несть обаяния, и угрызут вас, рече Господь, 18 неизцельно со болезнию сердца вашего исчезающаго. 19 Се, глас вопля и дочери людей Моих от земли издалеча: еда Господь несть в Сионе? Или Царя несть в нем? Понеже прогневаша Мя во изваянных своих и в суетных чуждих. 20 Пройде жатва, мимоиде лето, и мы несмы спасени. 21 Над сокрушением дочери людей моих сокрушен есмь и скорбен: во ужасе объяша мя болезни аки раждающия. 22 Или ритины несть в Галааде? Или врача несть тамо? Чесо ради несть изцелена рана дочери людей моих?

**9** Кто даст главе моей воду и очесем моим источник слез? И плачуся день и ночь о побиенных дочери людей моих. 2 Кто даст мне в пустыни виталище последнее? И оставлю люди моя и отиду от них: понеже вси любодествуют, соборище преступников. 3 И налякоша язык свой яко лук: лжа и неверство укрепишася на земли, ибо от злых во злая произыдоша и Мене не познаша, рече Господь. 4 Кийждо от искренняго своего да стрежется, и на братию свою не уповайте, ибо всяк брат запинанием запнет, и всяк друг льстивно наскочит. 5 Кийждо другу своему посмеется, истины не возглаголют: научиша язык свой глаголати лжу,

неправдоваша и не восхотеша обратитися. 6 Лихва на лихву и лесь на лесь: не восхотеша уведети Мене, рече Господь. 7 Сего ради тако глаголет Господь Сил: се, Аз разжегу их и искушу их: что бо ино сотворю от лица лукавства дщери людей Моих? 8 Стрела уязвляющая язык их, льстивии глаголы уст их: приятелю своему глаголет мирная, внутрь же себе имеет вражду. 9 Еда на сих не посещу? Рече Господь: или людем таковым не отмстит душа Моя? 10 На горах восприимите плачь и тужение и на стезях пустыни рыдание, яко оскудеша, за еже не быти человеком преходящим: не слышаша гласа обитания от птиц небесных и даже до скотов, ужасошася, отидоша. 11 И дам Иерусалим в преселение и в жилище змием и грады Иудины положу в разорение, яко не будет обитающаго. 12 Кто муж премудр, и уразумеет сие? И к немуже слово уст Господних, да возвестит вам, чесо ради погibe земля, сожжена есть яко пустыня, еяже никтоже проходит? 13 И рече Господь ко мне: понеже оставиша закон Мой, егоже дах пред лицом их, и не послушаша гласа Моего и не ходиша по нему, 14 но поидоша по изволению сердца своего лукаваго и вслед идолов, имже научиша их отцы их: 15 сего ради тако глаголет Господь Сил, Бог Израилев: се, Аз напитая люди сия теснотами и в питье дам им воду желчную, 16 и расточу их во языки, ихже не знаша тии и отцы их, и послю на них мечь, дондеже истлятсся. 17 Сия рече Господь Сил: призовите плачевниц, и да приидут, и ко женам премудрым послите, и да вещают 18 и да примут над вами плачь, и да изведут очи ваши слезы, и вежди ваши да излиют воду: 19 зане глас плача слышан бысть во Сионе: како бедни быхом, постыждени зело, яко оставихом

землю и отринухом жилища наша? **20** Темже слышите, жены, слово Господне, и примите ушима вашима словеса уст Его, и научите дщери ваша рыданию, и каяждо искреннюю свою плачу: **21** понеже взыде смерть сквозе окна ваша и вниде в землю вашу погубити отрочата отвне и юношы от стогн. **22** (Глаголи: ) сия рече Господь: и будут мертвии человецы в пример на лица поля земли вашей, яко сено созади жнущаго, и не будет собирающаго. **23** Тако глаголет Господь: да не хвалится мудрый мудростию своею, и да не хвалится крепкий крепостию своею, и да не хвалится богатый богатством своим: **24** но о сем да хвалится хваляйся, еже разумети и знати, яко Аз есмь Господь творяй милость и суд и правду на земли, яко в сих воля Моя, глаголет Господь. **25** Се, дние грядут, глаголет Господь, и посещу на всех, иже обрезаную имут плоть свою: **26** на Египет и на Идумею, и на Едом и на сыны Аммони, и на сыны Моавли и на всякаго остризающаго власы по лицу своему, обитающыя в пустыни, яко вси языцы необрезани плотию, весь же дом Израилев необрезани суть сердцы своими.

**10** Слышите слово Господне, еже глагола Господь на вас, доме Израилев. **2** Сия глаголет Господь: по путем языков не учитесь и от знамений небесных не страшитесь, яко их боятся языцы. **3** Понеже законы языков суетни суть: древо есть от леса изсеченое, дело тектонское и слияние: **4** серебром и златом украшена суть, и млатами и гвоздьми утвердиша я, да не движутся: **5** серебро изваяно есть, не глаголют, носими носятся, понеже ходити не возмогут: не убойтеся их, яко не сотворят зла, и блага несть в них. **6** Несть подобен Тебе, Господи: велик еси Ты и велико имя

Твое в крепости. 7 Кто не убоится Тебе, о, Царю языков!  
Твоя бо честь между всеми премудрыми языков, и во всех  
царствах их ни один есть подобен Тебе. 8 Купно буии и  
безумнии суть, учение суетных их древо есть: 9 серебро  
извито от Фарсиса приходит, золото от Офаза, и рука златарей,  
дела вся художников: в синету и багряницу одеют их, дела  
умоделников вся сия. 10 Господь же Бог истинен есть, Той  
Бог живой и Царь вечный, от гнева Его подвигнется земля, и  
не стерпят языцы прещения Его. 11 Тако рцыте им: бози,  
иже небесе и земли не сотвориша, да погибнут от земли и от  
сих, иже под небесем суть. 12 Господь сотворивый землю во  
крепости Своей, устроивый вселенную в премудрости Своей,  
и разумом Своим простре небо. 13 Ко гласу Своему дает  
множество вод на небеси: и возведе облаки от последних  
земли, блистания в дождь сотвори и изведе ветр от сокровищ  
Своих. 14 Буй сотворися всяк человек от ума (своего),  
постыдися всяк златоделник во изваяниих своих, яко ложная  
слия, несть духа в них: 15 суетна суть дела, смеху достойна,  
во время посещения своего погибнут. 16 Несть сицевая  
часть Иакову, яко Создавый вся Той есть, и Израиль жезл  
достояния Его, Господь Сил имя Ему. 17 Собра отвне имение,  
обитающее во избранных, 18 понеже тако глаголет Господь:  
се, Аз отвергу обитатели земли сея в скорби и смущу их,  
яко да обрящется язва твоя. 19 Горе во сокрушении твоём,  
болезненна язва твоя: аз же рех: воистинну сия болезнь моя  
(есть) и объят мя, жилище мое опусте, погибе: 20 скиния  
моя опусте, погибе, и вся кожи моя растерзашася: сынов  
моих и овец моих несть, несть ктому места скинии моей,  
места козам моим: 21 понеже обуяша пастырие и Господа

не взыскаша, сего ради не уразуме все стадо и расточено бысть. 22 Глас слышания, се, грядет и трус велий от земли северныя, да положит грады Иудины в запустение и во обитание змием. 23 Вем, Господи, яко несть человеку путь его, ниже муж пойдет и исправит шествие свое. 24 Накажи нас, Господи, обаче в суде, а не в ярости, да не умаленых нас сотвориши. 25 Излий гнев Твой на языки не знающыя Тя и на племена, яже имене Твоего не призваша, яко поядоша Иакова и потребиша его и пажить его опустошиша.

**11** Слово еже бысть от Господа ко Иеремии, глаголющее: 2 слышите словеса завета сего и глаголите ко мужем Иудиным и ко обитателем Иерусалимским, 3 и речеши к ним: сия глаголет Господь Бог Израилев: проклят муж, иже не послушает словес завета сего, 4 егоже заповедах отцем вашим в день, в оньже изведох их от земли Египетския, от печи железныя, глаголя: услышите глас Мой и сотворите вся, елика заповедаю вам, и будете Мне в люди, и Аз буду вам в Бога: 5 да утвержду клятву Мою, еюже кляхся отцем вашим, еже дати им землю точашую млеко и мед, якоже есть день сей. И отвещах и рекох: буди, Господи. 6 И рече Господь ко мне: прочти вся словеса сия во градах Иудиных и вне Иерусалима, рекий: слышите словеса завета сего и сотворите та: 7 яко свидетелствуя засвидетелствовах отцем вашим в день, в оньже изведох их от земли Египетския, даже до дне сего, заутра востая засвидетелствовах глаголя: слышите глас Мой. 8 И не слышаша, ни приклониша уха своего, но идоша кийждо в стропотстве сердца своего злаго: и наведох на них вся словеса завета сего, егоже заповедах да сотворят, и не сотвориша. 9 И рече Господь ко мне:

обретено есть совещание (на зло) в мужех Иудиных и во обитающих во Иерусалиме: 10 возвратишася ко беззаконием первым отец своих, иже не хотеша слышати словес Моих, и се, тии поидоша по бозех чуждих, да служат им: и разори дом Израилев и дом Иудин завет Мой, егоже завещах со отцы их. 11 Сего ради сия глаголет Господь: се, Аз наведу на них злая, от нихже изыти не возмогут, и возопиют ко Мне, и не услышу их: 12 и пойдут грады Иудины и обитателе Иерусалима и возопиют ко богом, имже тии кадят, иже не спасут их во время скорбей их. 13 По числу бо градов твоих беху бози твои, Иудо, и по числу путей Иерусалимских постависте олтари студныя, олтари на каждение Ваалу. 14 Ты же не молися о людех сих и не проси о них в мольбе и молитве: не услышу бо во время вопля их ко Мне и во время озлобления их. 15 Почто возлюбленная в дому Моем сотвори мерзости (многи)? Еда обеты и мяса святая отимут от тебе лукавства твоя, или сими избежиши? 16 Маслину благосенну, красну зраком нарече Господь имя твое, ко гласу обрезания ея: разгоресе огонь в ней, велика скорбь на тебе, непотребны быша ветви ея. 17 И Господь Сил, иже насади тебе, глаголал есть на тя зло за злая дому Израилева и дому Иудина, елика сотвориша себе ко прогневанию Мене кадяще Ваалу. 18 Господи, скажи ми, и уразумею: тогда видех начинания их. 19 Аз же, яко агня незлобиво ведомо на заколение, не разумех, яко на мя помыслиша помысл лукавый, глаголюще: приидите и вложим древо во хлеб его и истребим его от земли живущих, и имя его да не помянется ктому. 20 Господь Саваоф, судяй праведно, испытуяй сердца и утробы, да вижду мщение Твое на них, яко к Тебе открых оправдание



мое. 21 Сего ради сия глаголет Господь на мужы Анафоски ищущыя души моя, глаголющыя: да не пророчествуеши о имени Господни, аще ли же ни, умреши в руках наших. 22 Сего ради сия глаголет Господь Сил: се, Аз посещу на них: юноши их мечем умрут, и сынове их и дщери их скончаются гладом, 23 и останка не будет от них, наведу бо злая на живущыя во Анафофе в лето посещения их.

**12** Праведен еси, Господи, яко отвечаю к Тебе: обаче судьбы возглаголю к Тебе: что, яко путь нечестивых спееется, угобзишася вси творящии беззакония? 2 Насадил еси их, и укоренишася, чада сотвориша и сотвориша плод: близ еси Ты уст их, далече же от утроб их. 3 И Ты, Господи, разумееш мя, видел мя еси и искусил еси сердце мое пред Тобою: собери их яко овцы на заколение и очисти их в день заколения их. 4 Доколе плакати имать земля, и трава вся селная исхнет от злобы живущих на ней? Погибоша скоти и птицы, яко рекоша: не узрит Бог путей наших. 5 Нозе твои текут и расслабляют тя: како уготовишися с коньми? И в земли мира твоего уповал еси, како сотвориши в шуме Иорданстем? 6 Понеже и братия твоя и дом отца твоего, и сии отвергошася тебе и тии возопиша, созади тебе собращася: не веруй им, егда глаголати будут тебе благая. 7 Оставих дом Мой, оставих достояние Мое, дах возлюбленную душу Мою в руки врагов ея: 8 бысть Мне достояние Мое яко лев в дубраве, даде противу Мене глас свой: сего ради возненавидех е. 9 Не вертеп ли иенин достояние Мое Мне, или пещера окрест его? Идите, соберите вся звери селныя, и да приидут снести е. 10 Пастырие мнози растлиша виноград Мой, оскверниша часть Мою, даша часть желаемую Мою в

пустыню непроходную, **11** положиша в потребление пагубы: Мене ради разорением разорена есть вся земля, яко ни един есть, иже размышляет сердцем. **12** Во всякий путь пустыни приидоша опустошающии, яко мечь Господень пояст от края земли даже до края ея: несть мира всяцей плоти. **13** Посеясте пшеницу, а терние пожасте: достояния их не полезна будут им: постыдитесь стыдением от похваления вашего, от поношения пред Господем. **14** Яко сия глаголет Господь о всех соседех лукавых, прикасающихся наследию Моему, еже разделих людем Моим Израилю: се, Аз исторгну их от земли их и дом Иудин извергну от среды их: **15** и будет, егда исторгну их, обращуся и помилую их, и вселю их кождо в достояние свое и кождо в землю свою: **16** и будет, аще учащеся научатся путем людей Моих, еже клятися именем Моим, жив Господь, якоже научиша людей Моих клятися Ваалом, и созиждутся посреде людей Моих: **17** аще же не послушают, исторгну язык оный исторганием и погублением, рече Господь.

**13** Сия глаголет Господь ко мне: иди и стяжи себе чресленик льняный и препояши того на чреслах твоих, и в воду да не внесеши того. **2** И стяжах чресленик по словеси Господню и обложих окрест чресл моих. **3** И бысть слово Господне ко мне вторицею, рекущее: **4** возми чресленик, егоже стяжал еси, иже есть окрест чресл твоих, и востани и иди ко Евфрату, и скрый того тамо во раселине каменне. **5** И идох и скрых того во Евфрате, якоже заповеда мне Господь. **6** И бысть по днех мнозех, и рече Господь ко мне: востани и иди ко Евфрату, и возми оттуду чресленик, егоже заповедах тебе скрыти тамо. **7** И идох ко Евфрату и раскопах, и взях чресленик от

места, идеже скрых его, и се, изгнил бе (чресленик), яко ни на чтоже быти потребну ему. 8 И бысть слово Господне ко мне, рекущее: сия глаголет Господь: 9 тако согнити сотворю гордыню Иудину и гордыню Иерусалимлю, многую гордыню сию людей сих строптивых, 10 иже не хотят послушати словес Моих, ходящих во строптивстве сердца своего и шедших вслед богов чуждих, да служат им и да поклоняются им: и будут якоже чресленик той, иже ни к чему потребен. 11 Зане, якоже придержится чресленик ко чреслом мужа, тако прилепих Мне (весь) дом Израилев и весь дом Иудин, рече Господь: да будут Мне в люди имениты, и в хвалу и в славу, и не послушаша Мене. 12 И речеши к людем сим словеса сия: тако рече Господь Бог Израилев: всяк мех исполнится вина. И будет, аще рекут к тебе: еда ведяще не увемы, яко всяк мех исполнится вина? 13 И речеши к ним: сия глаголет Господь: се, Аз исполню всех обитателей земли сея, и царей их сидящих от колена Давидова на престоле их, и священники и пророки, и Иуду и всех обитающих во Иерусалиме пьянством, 14 и расточу их, мужа и брата его, и отцы их и сыны их вкупе: не пожелаю, рече Господь, не пощажу, и не умилосердюся, еже не погубити их. 15 Слышите и внимлите, и не возноситеся, яко Господь глаголал есть. 16 Дадите Господу Богу вашему славу прежде даже не смеркнется и прежде даже не преткнутся нозе ваши ко горам темным: и пождете света, и тамо сень смертная, и положени будут во мрак. 17 Аще же не послушаете, в тайне восплачется душа ваша от лица гордыни и плача восплачет, и изведут очи ваши слезы, яко сотрено есть стадо Господне. 18 Рцыте царю и владыкам: смиритесь,

сядите, яко взятся от главы вашей венец славы вашей. 19  
Грады южнии затворени суть, и несть отверзаяй: преведен  
есть весь Иуда, совершиша преселение совершенное. 20  
Воздвигни очи твои, Иерусалиме, и виждь приходящия от  
севера: где стадо данное тебе, овцы славы твоя? 21 Что  
речеши, егда посетят тя? И ты научил еси их на тя учением в  
началство: еда не оымут тя болезни яко жену родящую? 22  
Аще же речеши в сердцы твоём: почто приидоша ми сия? За  
множество беззакония твоего откровена суть задняя твоя, да  
обруганы будут стопы твоя. 23 Аще пременит Ефиоплянин  
кожу свою, и рысь пестроты своя, и вы можете благотворити  
научившеся злу. 24 И развею их, яко стеблие носимое ветром  
в пустыню. 25 Сей жребий твой и часть непокорства твоего  
на Мя, глаголет Господь, яко забыл еси Мя и надеялся на  
лжу: 26 темже и аз обнажу бедра твоя противу лица твоего,  
и явится срамота твоя 27 и прелюбодейство твое, и ржание  
твое и отчуждение блуда твоего: на горах и на селех видех  
мерзости твоя. Горе тебе, Иерусалиме, яко не очистился  
еси, последуя мне. Доколе еще?

**14** И бысть слово Господне ко Иеремии о бездождии. 2  
Рыдала Иудея, и врата ея разрушишася, и отемнишася  
на земли, и вопль Иерусалима взыде. 3 И вельможи его  
послаша меньших своих к воде: приидоша на кладязи и не  
обретоша воды, и отнесоша сосуды своя тщы: постыждени  
суть и посрамлени, и покрыша главы своя. 4 И дела земли  
оскудеша, яко не бяше дождя на землю: постыждени суть  
земледелцы, покрыша главы своя. 5 И еленицы на ниве  
родиша и оставиша, яко не бе травы. 6 Онагри сташа на  
камениих, браша в себе ветер яко змиеве, оскудеша очи

их, яко не бе травы. 7 Беззакония наша противушаста нам: Господи, сотвори нам ради имени Твоего, яко мнози греси наши пред Тобою, Тебе согрешихом. 8 Ожидание Израилево, Господи, Спасителю наш во время скорби! Вскую яко пришлец еси на земли и яко путник укланяющься во виталище? 9 Еда будеши якоже человек спяй, или аки муж не могий спасти? Ты же в нас еси, Господи, и имя Твое призвано бысть на нас, не забуди нас. 10 Сия глаголет Господь людем сим: возлюбиша подвизати нозе свои и не упокоишася, и Бог не благопоспешит в них, ныне воспомянет беззакония их и посетит грехи их. 11 И рече Господь ко мне: не молися о людех сих во благо: 12 егда поститися будут, не услышу прошения их, и аще принесут всесожжения и жертвы, не благоволю в них: яко мечем и гладом и мором Аз скончаю их. 13 И рекох: сый Господи Боже, се, пророцы их прорицают и глаголют: не узрите меча, и глад не будет вам, но истину и мир дам на земли и на месте сем. 14 И рече Господь ко мне: лживо пророцы прорицают во имя Мое, не послах их, ни заповедах им, ни глаголах есмь к ним: понеже видения лжива и гадания и волшебства и произволы сердца своего тии прорицают вам. 15 Сего ради сия глаголет Господь о пророцех, иже пророчествуют во имя Мое ложная, и Аз не послах их, иже глаголют: мечь и глад не будет на земли сей: смертию лютою умрут и гладом скончаются пророцы тии. 16 И людие, имже тии пророчествуют, будут извержени на путех Иерусалима от лица меча и глада, и не будет погребаяй их, и жены их и сынове их и дщери их, и излию на них злая их. 17 И речеши к ним слово сие: да изведут очи ваши слезы день и ночь, и да не престанут, яко сотрением великим

сотрена (дева) дочь людей моих и язвою злою зело. **18** Аще изыду на поле, и се, заклани мечем: и аще вниду во град, и се, истаяввшии голодом: яко пророк и священник отидоша в землю, еяже не ведяху. **19** Еда отмещуць отвергл еси Иуду, и от Сиона отступи душа Твоя? Вскую поразил еси нас, и несть нам изцеления? Ждахом мира, и не бяху благая: време уврачевания, и се, боязнь. **20** Познахом, Господи, грехи наша, беззакония отец наших, яко согрешихом пред Тобою. **21** Престани ради имени Твоего, не погуби престола славы Твоя: вспомяни, не разори завета Твоего иже с нами. **22** Еда есть во изваянных языческих, иже дождит? Или небеса могут дати влагу свою? Не Ты ли еси, Господи Боже наш? И пождем Тебе, Господи, Ты бо сотворил еси вся сия.

**15** И рече Господь ко мне: аще станут Моисей и Самуил пред лицом Моим, несть душа Моя к людем сим: изрини тех (от лица Моего), и да изыдут. **2** И будет, аще рекут к тебе: камо изыдем? И речеши к ним: сия глаголет Господь: иже ко смерти, ко смерти: и иже к мечу, к мечу: и иже ко гладу, ко гладу: и иже ко пленению, ко пленению. **3** И отмщу имъчетырьми образы, рече Господь: мечь на заклание, и пси на растерзание, и птицы небесе и зверие земли на пожрения и расхищение. **4** И предам их во утеснение всем царствам земным, ради Манассии сына Езекина царя Иудина за вся, яже сотвори во Иерусалиме. **5** Кто умилосердится к тебе, Иерусалиме? И кто поскорбит о тебе, или кто пойдет молити о мире тебе? **6** Ты оставил Мя еси, рече Господь, вспять пошел еси: и простру руку Мою на тя и убью тя, и ктому не пощажу их. **7** и расточу их расточением во вратех людей Моих: обезчадеша, погубиша людей Моих злобами своими,

и не обратишася. 8 Умножишася вдовицы их паче песка морского: наведох на мать юношы, бедность о полудни, наверхох на ню внезапу страх и трепет. 9 Праздна бысть родившая семь, оскуде душа ея, зайде ей солнце еще среде полудне, постыждена бысть и укорена: прочыя их в мечь дам пред враги их, рече Господь. 10 Горе мне, мати (моя), вскую мя родила еси мужа прителнаго и судимаго по всей земли? Не заях, ниже заят у мене кто: сила моя оскуде от кленущих мя, (рече Господь). 11 Буди, Владыко, исправляющим им: аще не притекох ко Тебе во время озлобления их и во время скорби их, во благая на врага. 12 Еда познается железо? И одеяние медяно крепость твоя. 13 И сокровища твоя в расхищение дам, измену за вся грехи твоя, и во всех пределех твоих: 14 и порабощу тя окрест врагом твоим, в земли, еяже не веси: яко огонь возжжеся от ярости Моея, на вас горети будет. 15 Ты веси, Господи, вспомяни мя и посети мя и защити мя от гонящих мя, не в долготерпение Твое восприими мя: веждь, яко приях Тебе ради поношение от отвергающих словеса Твоя: 16 скончай их, и будет слово Твое мне в радость и во веселие сердца моего, яко призвано есть имя Твое на мне, Господи Боже Сил. 17 Не седох в сонме их играющих, но бояхся от лица руки Твоея: на едине седях, яко горести исполнихся. 18 Вскую оскорбляющи мя возмогают на мя? Язва моя тверда, откуда изцелюся? Бысть мне яко вода лживая, не имущая верности. 19 Сего ради сия глаголет Господь: аще обратишися, возставлю тя, и пред лицом Моим станеш: и аще изведеш честное от недостойнаго, яко уста Моя будеш: и обратятся тии к тебе, и ты не обратишися к ним. 20 И дам тя людем сим аки стену

крепку, медяну: и поратуют на тя и не возмогут на тя, яко Аз с тобою есмь, да спасу тя и избавлю тя, рече Господь: **21** избавлю тя от рук злейших и искуплю тя от рук губителей.

**16** И бысть слово Господне ко мне, рекущее: и ты да не поймеша жены, **2** и не родится тебе сын, ниже дочь на месте сем. **3** Яко сия глаголет Господь от сынех и дщерех, иже родятся на месте сем, и о матерех их, яже родиша их, и о отцех их родивших я в земли сей: **4** смерть лютою изомрут, не оплачутся и не погребутся: во образ на лица земли будут и мечем падут и голодом скончаются, и будут трупи их во снедь птицам небесным и зверем земным. **5** Сия глаголет Господь: да не видиши в дом их пирный, ни да ходиши плакати, ниже да рыдаеши их, понеже отях мир Мой от людей сих, рече Господь, милость и щедроты. **6** И умрут велицыи и малии в земли сей: не погребутся, ни оплачутся, ниже терзание о них будет, ниже обриются ради их, **7** и не преломят хлеба во стенании их ко утешению над мертвым, и не дадут им пития чаши ко утешению над отцем и материю их. **8** И в дом пирный да не видиши седети с ними, еже ясти и пити. **9** Понеже сия глаголет Господь Сил, Бог Израилев: се, Аз отиму от места сего во очию вашею и во днех ваших глас радости и глас веселия, глас жениха и глас невесты. **10** И будет, егда возвестиши людем сим вся словеса сия, и рекут к тебе: вскую глагола ест Господь на нас вся злая сия? Кая неправда наша? И кий грех наш, имже согрешихом Господу Богу нашему? **11** И речеши к ним: понеже оставиша Мя отцы ваши, глаголет Господь, и идоша вслед богов чуждых, и послужиша им и поклонишася им, Мене же оставиша и закона Моего не сохраниша: **12** и вы



горше деласте, неже отцы ваши, и се, вы ходите кийждо  
вслед похотей сердца вашего лукаваго, еже не слушати  
Мене: **13** и изрину вас от земли сея в землю, еяже не весте  
вы и отцы ваши, и послужите тамо богом чуждим день и  
нощь, иже не дадут вам милости. **14** Сего ради, се, дние  
грядут, глаголет Господь, и не рекут ктому: жив Господь, иже  
изведе сынов Израилевых от земли Египетския: **15** но: живет  
Господь, иже изведе сынов Израилевых от земли северных  
и от всех стран, аможе извержени быша: и возвращу их  
в землю их, юже дах отцем их. **16** Се, Аз послю рыбари  
много, рече Господь, и уловят их: и посем послю много  
ловцы, и уловят их на всяцей горе и на всяцем холме и  
от пещер каменных. **17** Яко очи Мои на всех путех их, не  
сокровени суть от лица Моего, и не утаена суть беззакония  
их от очию Моею. **18** И воздам первее сугубая беззакония  
и грехи их, имиже оскверниша землю Мою в мертвечинах  
мерзостей своих и в беззакониих своих, имиже наполниша  
достояние Мое. **19** Господи, Ты крепость моя и помощь  
моя и прибежище мое во днех злых: к Тебе языцы приидут  
от последних земли и рекут: воистинну лживых стяжаша  
отцы наши идолов, и несть в них пользы. **20** Еда сотворит  
себе человек боги, и тии не суть бози? **21** Сего ради, се, Аз  
покажу им во время сие руку Мою и знаему сотворю им силу  
Мою, и познают, яко имя Мне Господь.

**17** Грех Иудин написан есть писалом железным на ногти  
адамантове, начертан на скрижали сердца их и на розех  
олтарей их. **2** Егда воспомянут сынове их олтари своя и  
дубравы своя при древе лиственне и на холмех высоких,  
**3** о, нагорный (жителю)! Крепость твою и сокровища твоя

в расхищение дам, и высокая твоя, грех ради твоих, яже во всех пределах твоих, 4 и останешься един от наследия твоего, еже дах тебе: и служити тя сотворю врагом твоим в земли, еяже не веси: яко огонь разжегл еси в ярости Моей, даже во век горети будет. Сия глаголет Господь: 5 проклят человек, иже надеется на человека и утвердит плоть мышцы своя на нем, и от Господа отступит сердце его: 6 и будет яко дивия мирика в пустыни и не узрит, егда приидут благая, и обитати будет в сухоте и в пустыни, в земли сланей и необитаемей. 7 И благословен человек, иже надеется на Господа, и будет Господь упование его: 8 и будет яко древо насажденное при водах, и во влаге пустит корение свое: не убоится, егда приидет зной, и будет на нем стеблие зелено, и во время бездождия не устрашится и не престанет творити плода. 9 Глубоко сердце (человеку) паче всех, и человек есть, и кто познает его? 10 Аз Господь испытуюй сердца и искушаяй утробы, еже воздати комуждо по пути его и по плодом изобретений его. 11 Возгласи ряб, собра, ихже не роди, творяй богатство свое не с судом: в преполовлении дний своих оставит е и на последок свой будет безумен. 12 Престол славы возвышен от начала, место святыни наша. 13 Чаяние Израилево, Господи! Все оставляющии Тя да постыдятся, отступающии (от Тебе) на земли да напишутся, яко оставиша источник живых вод, Господа. 14 Изцели мя, Господи, и изцелею: спаси мя, и спасен буду, яко хвала моя Ты еси. 15 Се, тии глаголют ко мне: где есть слово Господне? Да приидет. 16 Аз же не утрудихся, Тебе (пастырю) последуюй, и дне человека не пожелах: Ты веси исходящая от устен моих, пред лицом Твоим суть: 17 не буди ми во

отчуждение, упование мое Ты в день лют. 18 Да постыдятся гонящие мя, аз же да не постыжуся: да устрашатся тии, аз же да не устрашуся: наведи на них день озлобления, сугубым сокрушением сотри их. 19 Сия глаголет Господь ко мне: иди и стани во вратех сынов людей твоих, имиже входят царие Иудины и исходят, и во всех вратех Иерусалимских и речеши к ним: 20 слышите слово Господне, царие Иудины и вся Иудея и весь Иерусалим, входящие во врата сия. 21 Сия глаголет Господь: сохраните души ваша и не носите бремен в день суббот, и не исходите враты Иерусалима, 22 и не изнесите бремен из домов ваших в день субботный, и всякого дела не творите: освятите день субботный, якоже заповедах отцем вашим: 23 и не услышаша, ни приклониша уха своего, но ожесточиша выи своя паче отец своих, да не услышат мя и да не примут наказания. 24 И будет, аще послушаете Мене, глаголет Господь, еже не вносить бремен во врата града сего в день субботный, и святити день субботный, не творити в онь всякого дела, 25 и внидут во врата града сего царие и начальницы, сидящие на престоле Давидове и восходящие на колесницах и конех своих, тии и начальницы их, мужие Иудины и обитатели Иерусалима: и обитати будут во граде сем во веки: 26 и приидут от градов Иудиных и от окрестных Иерусалима, и от земли Вениамины и от польных, и от горних и от юга, носяще всесожжения и жертву, и фимиам и манау и ливан, носяще хвалу в дом Господень. 27 И будет, аще не послушаете Мене еже святити день субботный и не носить бремен, ниже входити вратами Иерусалима в день субботный, то зажгу огонь во вратех его, и пожрет дома Иерусалимли и не угаснет.

**18** Слово, еже бысть ко Иеремии от Господа, рекущее:  
2 востани и сниди в дом скудельничь, и тамо услышиши  
словеса Моя. 3 И снидох в дом скудельничь, и се, той  
творяше дело на каменех. 4 И разбися сосуд, егоже той  
творяше от глины рукама своима: и паки той сотвори из  
него иной сосуд, якоже угодно во очию его творити. 5  
И бысть слово Господне ко мне, рекущее: 6 еда, якоже  
скудельник сей, не возмогу сотворити вас, доме Израилев?  
Рече Господь: се, якоже брение в руку скудельника, тако вы  
есте, доме Израилев, в руку Мою: 7 наконец возглаголю на  
язык и на царство, да искореню их и разорю и расточу я: 8 и  
аще обратится язык той от всех лукавств своих, то раскаюся  
о озлоблениих, яже помыслих сотворити им: 9 и наконец  
реку на язык и царство, да возсозижду и насажду я, 10 и аще  
сотворят лукавая пред очима Моима, еже не послушати гласа  
Моего, то раскаюся о благих, яже глаголах сотворити им. 11  
И ныне рцы ко мужем Иудиным и обитателем Иерусалима,  
рекий: сия рече Господь: се, Аз творю на вас злая и мышлю  
на вас умышление: да обратится убо кийждо от пути своего  
лукаваго, и исправите пути ваша и умышления ваша. 12 И  
рекоша: укрепимся, ибо по развращением нашим пойдём, и  
кийждо удобное сердца своего лукаваго сотворим. 13 Сего  
ради сия глаголет Господь: вопросите ныне языков, кто  
слыша сицевая страшная, яже сотвори зело дева Израилева?  
14 Еда оскудеют от камене сосцы, или снег от Ливана? Еда  
уклонится вода зелно ветром носимая? 15 Понеже забыша  
Мене людие Мои всеу жруще, и изнемогут на путех своих и  
на стезях вечных, еже взыти на стези не имущья пути на  
хождение, 16 еже положити землю свою в запустение и во

звиздание вечное: всяк, иже преидет по ней, почудится и покивает главою своею: **17** якоже ветер палящ разсею их пред враги их, хребет, а не лице покажу им в день погибели их. **18** И рекоша: приидите и умыслим на Иеремию совет, ибо не погибнет закон от священника, ни совет от премудраго, ни слово от пророка: приидите и поразим его языком, и не вонмем всем словесем его. **19** Вонми, Господи, мне и услыши глас оправдания моего. **20** Еда воздаются злая за благая? Яко глаголаша словеса на душу мою и мучительство свое сокрыша ми. Помяни стоявшего мя пред Тобою, еже глаголати за них благая, да отвращу гнев Твой от них. **21** Сего ради даждь сыны их в глад и собери их в руце меча: да будут жены их безчадны и вдовы, и мужие их да будут убиени смертию, и юноши их да падут мечем на рати: **22** да будет вопль в домех их: наведи на них разбойники внезапно, понеже совещаша слово, да имут мя, и сети сокрыша на мя. **23** Ты же, Господи, веси весь совет их на мя в смерть: да не очистиши беззакония их и грехов их от лица Твоего да не изгладиши: да будет болезнь их пред Тобою, и во время ярости Твоя сотвори им.

**19** Сия рече Господь ко мне: иди и стяжи сосуд скудельничь жжен, и приведи от старец людских и от старец священнических: **2** и изыди в место многогробищное сынов Енноних, еже есть близ придверия врат Харсифских, и прочти тамо вся словеса, яже Аз возглаголю тебе, **3** и речеши им: слышите слово Господне, царие Иудины и мужие Иудины, и обитателие Иерусалима и входящиеи вратами сими: сия глаголет Господь Сил, Бог Израилев: се, Аз наведу злая на место сие, яко всякому слышащему сия зазвучит

во ушю его: 4 понеже оставиша Мя, и чужде сотвориша место сие, и пожроша на нем богом чуждим, ихже не ведеша тии и отцы их: и царие Иудины наполниша место сие крове неповинных 5 и создаша высокая Ваалу на сожжение сынов своих огнем, во всесожжение Ваалу, яже не заповедах ни глаголах, ниже въздоша на сердце Мое. 6 Сего ради, се, дние грядут, глаголет Господь, и не прозовется ктому место сие Падение и место многогобищное сынов Енноних, но место многогобищное заклания: 7 и расточу совет Иудин и совет Иерусалима в месте сем, и превращу их мечем пред враги их и в руку ищущих душ их: и дам трупие их в ядь птицам небесным и зверем земным: 8 и поставлю град сей в разорение и во звиздание: всяк, иже мимоидет, о нем почудится и позвиждет о всей язве его: 9 и снедят плоти сынов своих и плоти дщереи своих, и кийждо плоти подруга своего снестъ во обстоянии и в тесноте, в нейже запрут их врази их, ищущии души их. 10 И да сокрушиши сосуд пред очима мужей исходящих с тобою 11 и речеши к ним: сия глаголет Господь Сил: тако сокрушу люди сия и град сей, якоже сокрушается сосуд скудельный, иже не может ктому изцелитися: и в Тофефе погребутся того ради, яко не будет иного места на погребение. 12 Тако сотворю месту сему, глаголет Господь, и обитателем его, да поставлю град той яко Падающъ. 13 И будут дома Иерусалима и дома царей Иудиных, якоже место Падающее, от нечистот своих во всех домех, в нихже жряху на кровех своих всему воинству небесному и приношаху возлияния богом чуждим. 14 И прииде Иеремиа от (места) Падения, аможе посла его Господь пророчествовати, и ста во дворе дому Господня

и рече ко всем людем: **15** сия глаголет Господь Сил, Бог Израилев: се, Аз наведу на град сей и на вся грады его и на вся села его вся злая, яже глагола есмь нань: яко ожесточиша выи своя, еже не слышати заповедий Моих.

**20** И услыша Пасхор сын Еммеров священник, иже поставлен бе начальник в дому Господни, Иеремию пророчествующа словеса сия: **2** и удари Пасхор Иеремию пророка и вверже его в кладу, яже бе во вратех Вениаминих вышних в дому Господни. **3** Бывшу же утру, изведе Пасхор Иеремию от клады. И рече к нему Иеремиа: не Пасхор нарече (Господь) имя твое, но Преселника Отвсюду. **4** Понеже сия глаголет Господь: се, Аз дам тя в преселение и всех друзей твоих: и падут мечем враг своих, и очи твои узрят, и тебе и всего Иуду дам в руки царя Вавилонска, и преведут их в Вавилон и побьют их мечьми. **5** И дам всю силу града сего и вся труды его и вся сокровища царя Иудина дам в руки врагов его, и расхитят их и возмут и отведут в Вавилон. **6** Ты же, Пасхор, и вси обитателие дому твоего, отидете во пленение, и в Вавилон приидеши и тамо умреши, тамо же и погребешися ты и вси друзие твои, имже пророчествовал еси лжу. **7** Прельстил мя еси, Господи, и прельщен есмь, креплейший мене еси и превозмогл еси: бых в посмех весь день, вси ругаются мне. **8** Понеже горьким словом моим посмеюся, отвержение и бедность наведу, яко бысть в поношение мне слово Господне и в посмех весь день. **9** И рекох: не воспомяну имене Господня, ниже возглаголю кому во имя Его. И бысть в сердцы моем яко огонь горящъ, палящъ в костех моих, и разслабех отвсюду, и не могу носити: **10** слышах бо досадительства многих собравшихся окрест:

нападите, нападим нань, вси мужие друзие его: наблюдайте помышление его, аще (како) прельстится, и преждем нань и сотворим отмщение наше ему. **11** Господь же со мною есть яко борец крепкий: сего ради погнаша и уразумети не могоша: постыдешася зело, яко не разумеша безчестия своего, еже во век не забвено будет. **12** И Ты, Господи сил, искушаяй праведная, ведаяй утробы и сердца, (молятся, ) да вижду мщение Твое на них, Тебе бо открых прю мою. **13** Пойте Господу, хвалите Господа, яко избави душу убогаго от руки лукавых. **14** Проклят день, в оньже родихся: день, в оньже породил мя мати моя, да не будет благословен. **15** Проклят муж, иже возвести отцу моему, рекий: родися тебе отрок мужеск, и яко радостию возвесели его. **16** Да будет человек той якоже гради, яже преврати Господь яростию и не раскаяся: да слышит вопль заутра и рыдание во время полуденное: **17** яко не убил мене в ложеснах матере, и была бы мне мати моя гроб мой и ложесна зачатия вечнаго. **18** Вскую изыдох из ложесн, да вижду труды и болезни, и скончашася в постыждении дние мои?

**21** Слово, еже бысть от Господа ко Иеремию, егда посла к нему царь Седекия Пасхора сына Мелхиина и Софонию сына Васаиева, священника, глаголя: **2** вопросы о нас Господа, яко Навуходоносор царь Вавилонский воста на нас: сотворит ли Господь с нами по всем чудесем Своим, и отидет от нас? **3** И рече Иеремиа к ним: тако рцыте Седекии: сия глаголет Господь Бог Израилев: **4** се, аз обращаю оружия бранная, яже суть в руках ваших, имиже вы ополчаетесь на царя Вавилонска и Халдейска, иже обстоят вас окрест вне стен: и соберу та посреде града сего, **5** и поборю аз по вас



рукою простертою и мышцею крепкою с яростию и гневом великим, 6 и побию всех обитающих во граде сем, человеки и скоты, губителством великим, и измрут. 7 И по сих, тако глаголет Господь, дам Седекию царя Иудина и рабы его, и люди его и оставльшыяся во граде сем от губителства и глада и меча, в руку Навуходоносора царя Вавилонска и в руку врагов их и в руку ищущих душ их, и побиет их острием меча: и не пощажу их, ниже милостив буду им. 8 И к людем сим речеши: сия глаголет Господь: се, Аз даю пред вами путь живота и путь смерти: 9 иже обитает во граде сем, умрет мечем и голодом и губителством, а исходяй, иже прибежит ко Халдеом обстоящим вас, жив будет, и будет душа его в плен, и жив будет. 10 Утвердих бо лице Мое на град сей во злая, а не во благая, рече Господь: в руки царя Вавилонска предастся, и сожжет его огнем. 11 Доме царя Иудина, слышите слово Господне: 12 доме Давидов, сия глаголет Господь: судите завтра суд и исправите, и избавите силою угнетенаго от руки обидящаго и, да не зажжется яко огонь ярость Моя и возгорится, и не будет угашающаго, ради лукавых умыслений ваших. 13 Се, Аз к тебе обитающему во крепце и польне удолии, рече Господь, иже глаголете: кто побиет нас? Или кто внидет в дома наша? 14 И посету на вас по лукавым начинанием вашим, рече Господь, и возжгу огонь в лесе его, и пояст вся, яже окрест его.

**22** Сия рече Господь: иди и вниди в дом царя Иудина и рцы тамо слово сие, 2 и речеши: слыши слово Господне, царю Иудин, иже седиши на престоле Давидове, ты и дом твой, и раби твои и людие твои и входящии дверьми сими: 3 сия глаголет Господь: творите суд и правду, и избавите

силою угнетена от руку обидящаго и, и пришелца и сира и вдовицы не оскорбляйте, не угнетайте беззаконно, и крове неповинныя не изливайте на месте сем. 4 Аще бо творяще сотворите слово сие, то внидут вратами дому сего царие сидящи на престоле Давидове и вседающи на колесницы и на кони, тии и раби их и людие их. 5 Аще же не послушаете словес сих, Сам Собою заляхся, рече Господь, яко в пустыню будет дом сей. 6 Понеже тако глаголет Господь на дом царя Иудина: Галаад ты Мне, глава Ливанская, аще не поставлю тебе в пустыню, во грады необитанны, 7 и наведу на тя убивающа мужа и секиру его, и посекут избранныя кедры твоя и вергут на огонь. 8 И пройдут языцы мнози сквозе град сей, и речет кийждо искреннему своему: вскую сотвори Господь тако граду сему великому? 9 И отвецают: сего ради, яко оставиша завет Господа Бога своего и поклонишася богом чуждим и послужиша им. 10 Не плачите мертваго, ниже рыдайте о нем: плачите плачем о исходящем, яко не возвратится ктому, ниже увидит земли рождения своего. 11 Понеже сия рече Господь к Селлиму сыну Иосиину царю Иудину царствующему вместо Иосии отца своего, иже изшел есть от места сего: не возвратится ктому семо, 12 но на месте том, аможе преведох его, тамо умрет и земли сея не узрит ктому. 13 Горе созидающему дом свой с неправдою и горницы своя не в суде, у негоже ближний его делает туне, и мзды его не воздаст ему: 14 иже рече: созижду себе дом пространен, и горницы широки со отверстыми окнами и своды кедровыми, и расписаны червленцем. 15 Еда царствовати будеши, яко ты поощряешия о ахазе отце твоём? Не ядят, ниже пият: лучше тебе было творити суд и

правду благу. 16 Не познаша, не судиша суда смиренных, ниже суда нища: не сие ли тебе есть, еже не знати тебе Мене, рече Господь? 17 Се, не суть очи твои, ниже сердце твое благо, но к сребролюбию твоему и крове неповинныя пролиянию, и ко обидам и ко убийству, еже творити я. 18 Сего ради сия рече Господь ко Иоакиму сыну Иосиину царю Иудину: горе мужу сему, не оплачут его: горе, брате! Ниже възрыдают о нем: увы мне, господине! 19 Погребением ослим погребется, влачимь извержен будет вне врат Иерусалима. 20 Взыди на Ливан и возопий, и в Васан даждь глас твой, и возопий на он пол моря, яко сотрени суть вси любовнии твои. 21 Глаголах к тебе в падении твоём, и рекл еси: не услышу. Сей путь твой от юности твоея, яко не послушал еси гласа Моего. 22 Всех пастырей твоих упасет ветер, и любовнии твои во пленение пойдут, и тогда постыдишися и посрамишися от всех любящих тя: 23 иже седиши в Ливане и гнездишися в кедрех, возстенеши, егда приидут к тебе болезни, яко раждающия. 24 Живу Аз, рече Господь, аще будет Иехониа сын Иоакима царь Иудин, перстень на руке десней Моей, оттуду исторгну тя 25 и предам тя в руки ищущих души твоея и в руки, ихже ты боишися лица, и в руки Навуходоносора царя Вавилонска и в руки Халдеом, 26 и отвергу тя и мать твою, яже роди тя, в землю чужду, в нейже несте рождени, и тамо умрете: 27 а в землю, в нюже тии желают душами своими возвратитися, не возвратятся. 28 Обезчестися Иехониа, аки сосуд непотребен, яко отриновен бысть той и семя его, и извержен в землю, еяже не ведяше. 29 Земле, земле, земле, слыши слово Господне! 30 Сия рече Господь: напиши мужа сего отвержена, мужа, иже во днех

своих не предуспееет: ниже бо будет от семене его муж, иже сядет на престоле Давидове, и власть имейя ктому во Иуде.

**23** Горе пастырем, иже погубляют и расточают овцы паствы Моея, рече Господь. **2** Сего ради сия рече Господь Бог Израилев к пасущым людей Моих: вы расточили есте овцы Моя, и отвергосте я, и не посетисте их, се, Аз посещу на вас по лукавству умыслений ваших, рече Господь: **3** и Аз соберу останки стада Моего от всех земель, в няже извергох их тамо, и возвращу их к селением их, и возрастут и умножатся. **4** И возставлю над ними пастыри, и упасут их, и не убоятся ктому, ниже ужаснутся, и ни един погибнет от числа, рече Господь. **5** Се, дние грядут, глаголет Господь, и возставлю Давиду Восток праведный, и царствовать будет Царь и премудр будет и сотворит суд и правду на земли: **6** во днех Его спасется Иуда, и Израиль пребудет в надежди, и сие имя Ему, имже нарекут Его: Господь праведен наш. **7** Сего ради, се, дние грядут, рече Господь, и не рекут ктому: живет Господь, иже изведе сыны Израилевы от земли Египетския: **8** но: живет Господь, иже изведе и преведе семя дому Израилева от земли северски и от всех земель, в няже изверже их тамо, и обитати имут в земли своей. **9** О пророцех сотрено есть сердце мое во мне, вострепеташа вся кости моя, бых яко муж пьян и яко человек, егоже одоле вино, от лица Господня и от лица благолепия славы Его. **10** Яко прелюбодеяньми исполнена есть земля, яко от лица их плакася земля, исхоша пажити пустынные: и бысть течение их лукаво, и крепость их такожде. **11** Понеже пророк и священник осквернишася, и в дому Моем обретох лукавство их, рече Господь: **12** того ради путь их будет

им ползок во тме, и поткнутся и падут в нем: наведу бо на них злая в лето посещения их, рече Господь. 13 И во пророцех Самарийских видех беззакония: пророчествоваху чрез Ваала и прельщаху люди Моя Израиля. 14 И во пророцех Иерусалимских видех ужасная, прелюбодействующих и ходящих во лжи и скрепляющих руки строптивым, да не отвратится кийждо от пути своего лукаваго: быша Мне вси аки Содом, и обитающи в нем яко Гоморр. 15 Сего ради тако рече Господь Сил ко пророком: се, Аз напитаю их пельнем и напою их желчию, от пророков бо Иерусалимских изыде осквернение на всю землю. 16 Сия глаголет Господь Сил: не слушайте словес пророков, иже пророчествуют вам и прельщают вас: видение от сердца своего глаголют, а не от уст Господних. 17 Глаголют отвергающим Мя: глагола Господь, мир будет вам: и всем, иже ходят в похотех своих, и всякому, ходящему в строптивстве сердца своего, рекоша: не приидут на вас злая. 18 Кто бо бысть в совете Господни, и виде и слыша словеса Его? Кто внят слово Его и слыша? 19 Се, буря от Господа и ярость исходит в сотрясение, устремившись приидет на нечестивыя. 20 И ктому не возвратится ярость Господня, дондеже сотворит сие и дондеже совершит помышление сердца Своего. В последния дни уразумеете совет Его. 21 Не посылах пророки, а они течаху: не глаголах к ним, и тии пророчествоваху. 22 И аще бы стали в совете Моем, слышана сотворили бы словеса Моя и отвратили бы людей Моих от пути их лукаваго и от начинаний их лукавых. 23 Бог приближаяйся Аз есмь, глаголет Господь, а не Бог издалеча. 24 Аще утаится кто в сокровенных, и Аз не узрю ли его? Рече Господь. Еда

небо и землю не Аз наполняю? Рече Господь. 25 Слышах, яже глаголют пророцы, пророчествующе во имя Мое лжу и глаголюще: видех сон, (видех сон). 26 Доколе будет в сердцы пророков прорицающих лжу и пророчествующих льщения сердца своего, 27 мыслящих, да забвен будет закон Мой в соних их, яже вещают кийждо искреннему своему, якоже забыша отцы их имя Мое ради Ваала? 28 Пророк, иже имать сновидение, да вещает сновидение свое, а иже имать слово Мое, да глаголет слово Мое во истине. Что плевы ко пшенице? Тако слово Мое, рече Господь. 29 Еда словеса Моя не суть якоже огонь горящ, рече Господь, и яко млат сотрыюшь камень? 30 Сего ради, се, Аз ко пророком, рече Господь, иже крадут словеса Моя кийждо от искреняго своего. 31 Се, Аз на пророки, глаголет Господь, износящья пророчествия языком и дремлющья дремание свое. 32 Се, Аз на пророки, прорицающья соние лживо, рече Господь, и провещаша та, и прельстиша люди Моя во лжах своих и во прелестех своих, Аз же не послах их, ни заповедах им, и пользою не упользуют людей сих, (рече Господь). 33 И аще вопросят людие сии, или пророк, или священник, рекуще: кое (есть) бремя Господне? И речеши к ним: вы есте бремя, и повергу вас, рече Господь. 34 И пророк, и священник, и людие, иже рекут: бремя Господне, посещу местию на мужа того и на дом его. 35 Сиче рцыте кийждо ко искреннему и ко брату своему: что отвеща Господь? И что глагола Господь? 36 И бремя Господне не помянется ктому, ибо бремя будет комуждо слово его: и превратисте словеса Бога живаго, Господа Сил, Бога нашего. 37 Сия рцы ко пророку: что отвеща тебе Господь? И что глагола Господь? 38 Аще же

речете: бремя Господне: сего ради тако рече Господь: понеже рекли есте глагол сей бремя Господне, и послах к вам, рекий: не глаголите бремя Господне: **39** сего ради, се, Аз возму и повергу вас и град, егоже дах вам и отцем вашим, от лица Моего, **40** и дам вас в поношение вечное и в срамоту вечную, яже никогда забвением загладится.

**24** Показа мне Господь, и се, две кошницы полны смоквий поставлены пред храмом Господним, повнегда преведе Навуходоносор царь Вавилонский Иехонию сына Иоакимова, царя Иудина, и начальников его и художников, и узников и богатых от Иерусалима, и преведе их в Вавилон. **2** Кошница едина смоквий добрых зело, яко обычай смоквам быти первых времен, и кошница другая смоквий злых зело, ихже ясти не возможно за худость их. **3** И рече Господь ко мне: что ты видиши, Иеремие? И рекох: смокви, смокви добрыя, добры зело: и злыя, злы зело, ихже ясти не возможно за худость их. **4** И бысть слово Господне ко мне, рекущее: **5** сия глаголет Господь Бог Израилев: якоже смокви сия благи, тако познаю преселеных Иудеев, ихже послах от места сего в землю Халдейску во благая: **6** и утвержу очи Мои на них во благая и преведу их паки в землю сию во благая: и возсозижду их и не разорю, и насажду их и не исторгну: **7** и дам им сердце, да уведят Мя, яко Аз есмь Господь, и будут Мне в люди, и Аз буду им в Бога: понеже обратятся ко Мне всем сердцем своим. **8** И якоже смокви злыя, ихже ясти не возможно за худость их, сия рече Господь, тако предам Седекию царя Иудина и начальники его и останок от Иерусалима, иже осташа во граде сем и иже обитают во земли Египетстей, **9** и дам их в расточение и озлобление

всем царствам земным, и будут в поношение и в притчу, и в ненависть и в проклятие во всех местех, в няже извергох их: 10 и послю на них мечь и глад и пагубу, дондеже исчезнут от земли, юже дах им и отцем их.

**25** Слово, еже бысть ко Иеремии на вся люди Иудины, в лето четвертое Иоакима сына Иосиина, царя Иудина: то лето первое Навуходоносора царя Вавилонскаго: 2 еже глагола Иеремия пророк ко всем людем Иудиным и ко всем обитателем Иерусалима, рекий: 3 в третиенадесять лето Иосии сына Амосова, царя Иудина, и даже до дне сего, сие двадесять третье лето, бысть слово Господне ко мне, и глаголах к вам, заутра востая и глаголя: и не слышасте. 4 И посылаше Господь к вам всех раб Своих пророк, востая заутра и посылая: и не слышасте, ни приклонисте ушес ваших, да слышите, егда глаголаше: 5 отвратитесь кийждо от пути своего злаго и от злейших умышлений ваших, и обитати будете в земли, юже Господь даде вам и отцем вашим, от века даже и до века: 6 и не ходите вслед богов чуждых, еже служити им и поклонятися им, да не прогневаете Мя в делех рук ваших, еже озлобити вас. 7 И не послушасте Мя, рече Господь, еже не подвизати Мя ко гневу в делех руку вашею на зло вам. 8 Сего ради сия глаголет Господь Сил: понеже не послушасте словес Моих, 9 се, Аз послю и возму вся племена северска, (рече Господь, ) и Навуходоносора царя Вавилонска раба Моего: и приведу их на землю сию и на обитатели ея и на вся языки, иже окрест ея, и убью их и поставлю их во ужас и во звиздание и в поношение вечное: 10 и погублю от них глас радости и глас веселия, глас жениха и глас невесты, благоухание мира и свет светилника: 11 и



будет вся земля сия в запустение и во ужас, и поработают сии во языцех царю Вавилонску семьдесят лет. 12 Егда же исполнени будут семьдесят лет, посещу на царя Вавилонска и на язык оный, рече Господь, беззакония их, и на землю Халдейску, и положу тую в запустение вечное, 13 и наведу на землю ону вся словеса Моя, яже глаголах на ню, вся писанная в книзе сей, и елика пророчествова Иеремиа на вся языки: 14 яко работаша им, егда беша языцы мнози и царие велицы, и воздам им по делом их и по творению рук их, 15 елико прорече Иеремиа до всех стран: тако бо глаголет Господь Бог Израилев: возми чашу вина неразвореннаго от руки Моея, да напоиши вся языки, к нимже Аз пошлю тя. 16 И испиют и изблюют, и обуяют от лица меча, егоже Аз пошлю среде их. 17 И взях чашу от руки Господни и напоих вся языки, к нимже посла мя Господь: 18 Иерусалима и грады Иудины, и цари его и князи его, яко положити я во опустение и в непрохождение, и во звиздание и в проклятие, яко день сей, 19 и фараона царя Египетскаго и отроков его, и вельможы его и вся люди его 20 и вся примесники его, и вся цари земли Ус и вся цари иноплеменников, Аскалона и Газу, и Аккарона и останок Азота, 21 и Идумею и Моавитиду и сыны Аммони, 22 и вся цари Тирски и цари Сидонски и цари, иже об ону страну моря, 23 и Дедана и Фемана, и Роса и всякаго остриженаго по лицу его, 24 и вся цари Аравии и вся смесники обитающыя в пустыни, 25 и вся цари Замврийския и вся цари Еламския, и вся цари Персския 26 и вся цари от восточия, дальния и ближняя, коегождо ко брату его, и вся царства, яже на лица земли, и царь Сесах испиет последи их. 27 И речеши им: тако рече Господь Сил, Бог Израилев:

пийте и упийтесе, и изблюйте и падите, и не востаните от лица меча, егоже Аз послю среде вас. 28 И будет, егда не восхотят прияти чаши от руки твоея, еже пити, речеши к ним: тако рече Господь: пиюще пийте. 29 Яко во граде, в немже именовася имя Мое, Аз начну озлобляти, и вы очищением не очиститесе: понеже мечь Аз призываю на вся седящия на земли, рече Господь Сил. 30 Ты же проречеши на них вся словеса сия и речеши: Господь с высоты суд воздаст, от святого Своего даст глас Свой, слово проречет на место Свое, сии же яко объемлюще виноград отвецают: и на вся седящия на земли прииде пагуба, 31 на часть земли, яко суд во языцех Господу: судитися имать Той со всякою плотию, нечестивии же предани быша мечу, глаголет Господь. 32 Тако глаголет Господь: се, злая грядут от языка на язык, и вихорь велик исходит от конца земли. 33 И будут язвении от Господа в день Господень, от края земли и до края земли: не оплачутся, ниже соберутся и не погребутся, в гной на лица земли будут. 34 Воскликните, пастуси и возопийте, и восплачите, овни овчии, яко исполнишася дние ваши на заклание, и падете якоже овни избранныи, 35 и изгибнет бегство от пастухов и спасение от овнов овчих. 36 Глас вопля пастырска и кличь овец и овнов, яко потреби Господь пажити их: 37 и умолкнут останцы мира от лица ярости гнева Господня. 38 Остави якоже лев виталище Свое, яко бысть земля их в непрохождение от лица меча великаго.

**26** В начале царства Иоакима сына Иосиина бысть слово сие от Господа: 2 тако рече Господь: стани во дворе дому Господня и проповеждь всем Иудеом, входящим кланятися в дом Господень, вся словеса, яже завещах тебе проповедати

им, не уйми словесе: 3 негли послушают и отвратятся кийждо от пути своего злаго, и почию от зол, яже помышляю сотворити им злых ради начинаний их. 4 И речеши: тако рече Господь: аще не послушаете Мене, еже ходити в законех Моих, яже дах пред лицом вашим, 5 в послушание словес отрок Моих пророков, ихже Аз посылаю к вам из утра, и послах, и не послушасте Мене, 6 и дам дом сей якоже Силом, и град сей дам в клятву всем языком всея земли. 7 И слышаша жерцы и лжепророцы и вси людие Иеремию глаголюща словеса сия в дому Господни. 8 И бысть, егда Иеремиа преста глаголати вся, елика завета ему Господь глаголати всем людем, и яша Иеремию жерцы и лжепророцы и вси людие, глаголюще: смертию да умрет, 9 яко прорече имеием Господним, глаголя: якоже Силом будет сей дом, и град сей опустеет от живущих. И собращася вси людие на Иеремию в дому Господни. 10 И слышаша князи Иудины словеса сия, и въздоша от дому царева в дом Господень и седоша во преддверии врат дому Господня новых. 11 И реша жерцы и лжепророцы князем и всем людем, глаголюще: суд смертный человеку сему, яко прорече на сей град, якоже слышасте во уши ваши. 12 И рече Иеремиа ко всем князем и ко всем людем, глаголя: Господь посла мя прорещи на дом сей и на град сей вся словеса, яже слышасте: 13 и ныне лучшыя сотворите пути ваша и дела ваша и послушайте гласа Господа Бога вашего, и престанет Господь от зол, яже глагола на вы: 14 и се, аз в руках ваших, сотворите ми якоже угодно и якоже лучше вам является: 15 но разумеюще да уразумеете, яко аще убиете мя, кровь неповинну дадите сами на ся и на град сей и на живущыя в нем: яко поистинне посла

мя Господь к вам глаголати во уши ваши вся словеса сия. **16**  
И реша князи и вси людие ко жерцем и ко лжепророком:  
несть человеку сему суд смертный, яко во имя Господа  
нашего глагола к нам. **17** И восташа мужие от старейшин  
земских и реша всему собору людскому, глаголюще: **18**  
Михеа Морафитский бе пророчествуя во дни Езекии царя  
Иудина и рече всем людем Иудиным, глаголя: тако рече  
Господь: Сион яко нива изорется, и Иерусалим яко в путь  
непроходный будет, и гора храма будет в луг дубравный. **19**  
Еда убивая уби его Езекиа царь Иудин и вси людие Иудины?  
Не убояшались убо Господа? И понеже помолишася лицу  
Господню, и почи Господь от зол, яже глаголаше на ня:  
и мы сотворихом злобы велики на души наша. **20** И бе  
человек прорицая именем Господним, Уриа сын Самеов от  
Кариафиарима, и прорече на град сей и о земли сей по всем  
словесем Иеремииным. **21** И слыша царь Иоаким и вси  
князи вся словеса его и искаху убити его: и слыша Уриа и  
убояся, и бежа и прииде во Египет. **22** И посла царь Иоаким  
мужы во Египет, Елдафана сына Ахорова и мужы с ним во  
Египет, **23** и изведоша его оттуду и приведоша его ко царю, и  
порази его мечем и вверже его во гроб сынов людий своих.  
**24** Обаче рука Ахикама сына Сафаниина бе со Иеремию,  
еже не предати его в руце людий, да не убьют его.

**27** В начале царства Иоакима сына Иосиина, царя Иудина,  
бысть слово сие ко Иеремии от Господа глаголя: **2** тако рече  
Господь: сотвори себе узы и клады и возложи на выю свою,  
**3** и да послеши я ко царю Идумейску и ко царю Моавску и ко  
царю сынов Аммоних, и ко царю Тирску и ко царю Сидонску,  
в руку послов их идущих сретением своим во Иерусалим ко

Седекии царю Иудину, 4 и завещаи им ко господем их рещи: тако рече Господь Бог Израилев: тако рцйте ко господем своим: 5 Аз сотворих землю и человека и скоты, яже на лица земли, крепостию Моею великою и мышцею Моею высокою, и дам ю, емуже будет угодно пред очима Моима. 6 И ныне Аз дах всю землю сию в руке Навуходоносору царю Вавилонску, да ему работают, и звери селныя дах делати ему: 7 и послужат ему вси языцы и сыну его и сыну сына его, дондеже приидет время земли его и его самого, и послужат ему мнози народи и царие велицы: 8 страна же и царство, елицы аще не поработают царю Вавилонску и елицы не вдежут выи своея в ярем царя Вавилонска, мечем и гладом посещу их, рече Господь, дондеже скончаются в руке его. 9 Вы же не слушайте лжепророк ваших и волхвующих вам и видящих сония вам, ни чарований ваших, ни обаятелей ваших глаголющих: не послужите царю Вавилонскому: 10 яко лжу прорицают тии вам, еже бы удалитися вам от земли вашея, извергнути вас и еже погибнути вам. 11 Страна же, яже склонит выю свою под ярем царя Вавилонска и послужит ему, оставлю ю на земли своей, глаголет Господь: и орати будет ю и вселится на ней. 12 И ко Седекии царю Иудину глаголах по всем словесем сим, глаголя: склоните выи ваша под иго царя Вавилонска и служите ему и людем его, и живи будете: 13 почто умираете, ты и людие твои, мечем и гладом и мором, якоже рече Господь ко странам, не хотевшым служити царю Вавилонску? 14 Не послушайте слов пророков глаголющих вам: не послужите царю Вавилонску: 15 яко неправедно тии прорицают вам: яко не послах их, рече Господь, тии же прорицают именем Моим о неправде, еже бы

погубити вас, и погибнете вы и пророцы ваши, прорицающие вам о неправде ложная. 16 Вам и всем людям сим и жерцем глаголах, рекий: тако рече Господь: не слушайте словес пророческих, прорицающих вам лжу и глаголющих: се, сосуди дому Господня возвратятся от Вавилона ныне вскоре: яко лжу прорицают вам, 17 не послушайте их, но служите царю Вавилонскому, да живи будете. Вскую даете град сей в запустение? 18 Аще суть пророцы и есть слово Господне в них, да предстанут Господу Вседержителю, да не отидут сосуди, оставшиися в дому Господни и в дому царя Иудина и во Иерусалиме, в Вавилон. 19 Тако бо глаголет Господь Вседержитель о столпех и о умывалнице, и о подставах и о прочих сосудех оставшихся во граде сем, 20 ихже не взя Навуходоносор царь Вавилонский, егда пресели Иехонию сына Иоакимова, царя Иудина, из Иерусалима в Вавилон, и вся старейшины Иудины и Иерусалимли. 21 Тако бо глаголет Господь Вседержитель Бог Израилев о сосудех оставшихся в дому Господни и в дому царя Иудина и в Иерусалиме: 22 в Вавилон принесутся и тамо будут даже до дне посещения своего, глаголет Господь: и повелю принести я и возвратити на место сие.

**28** И бысть в четвертое лето, царствующу Седекии царю Иудину, в пятый месяц, рече ми Анания сын Азоров лживый пророк Гаваонитский в дому Господни, пред очима жерцев и всех людей, глаголя: 2 тако рече Господь Вседержитель Бог Израилев: сокруших ярем царя Вавилонска: 3 еще два лета дний, возвращу Аз на место сие вся сосуды дому Господня, яже взя Навуходоносор царь Вавилонский от места сего и пренесе я до Вавилона, 4 и Иехонию сына Иоакимова

царя Иудина, и все преселение Иудино вшедшее в Вавилон возвращу в место сие, глаголет Господь, яко сокрушу ярем царя Вавилонска. 5 И рече Иеремиа пророк ко Анании лжепророку пред очима жерцев и пред очима всех людей стоящих в дому Господни, 6 и рече Иеремиа: поистинне тако да сотворит Господь, да утвердит Господь слово твое, еже ты прорицаеши, еже возвратити сосуды дому Господня и вся преселенныя из Вавилона на место сие: 7 обаче слышите слово сие, еже аз глаголю во уши ваши и во уши всех людей: 8 пророцы, бывшии прежде мене и прежде вас от века, прорекоша на многи земли и на царства велика о рати и о погублении и о гладе: 9 пророк прорекий мир, пришедшу слову познают пророка, егоже посла им Господь в вере. 10 И взя Анания пред очима всех людей клады от выи Иеремиины и сокруши я. 11 И рече Анания пред очима всех людей глаголя: сице рече Господь: тако сокрушу ярем Навуходоносора царя Вавилонска еще два лета дний со выи всех языков. И отиде Иеремиа на путь свой. 12 И бысть слово Господне ко Иеремии, по сокрушении Ананиине клад со выи его, глаголя: 13 иди и рцы ко Анании глаголя: тако рече Господь: клады древяныя сокрушил еси и сотвориши вместо тех клады железны, 14 яко тако рече Господь: ярем железен возложих на выи всех языков, служити Навуходоносору царю Вавилонску, и послужат ему: ктому и звери земныя дах ему. 15 И рече Иеремиа пророк ко Анании: слыши, Анание: не посла тебе Господь, ты же сотворил еси людей сих уповати на неправду. 16 Того ради сице рече Господь: се, аз отпущу тя от лица земли, в сем лете умреши, яко на

Господа (Бога) глагола еси. 17 И умре Анания лжепророк в сем лете месяца седмаго.

**29** И сия словеса книги, юже посла Иеремиа из Иерусалима ко старейшинам преселеным и ко жерцем и лживым пророком и всем людем, ихже пресели Навуходоносор из Иерусалима до Вавилона, 2 последи изшедшу Иехонии царю и царице, и кажеником и всякому свободну, и художнику и юзнику из Иерусалима, 3 рукою Елеаса сына Сафая и Гамариа сына Хелкиина, егоже посла Седекиа царь Иудин ко царю Вавилонску в Вавилон, глаголя: 4 тако рече Господь Бог Израилев о преселеных, ихже пресели из Иерусалима в Вавилон: 5 соградите храмины и вселитесь, и насадите вертограды и ядите плоды их, 6 и поимите жены и чадотворите сыны и дщери, и приведите сыном вашим жены и дщери ваша дадите за мужы, и да раждают сыны и дщери, и умножайтесь, а не умаляйтесь: 7 и взыщите мира земли, на нуже преселих вас тамо, и молитесь Господа за ня, яко в мире их будет мир вам. 8 Яко тако рече Господь Сил, Бог Израилев: да не препирают вас лживии пророцы, иже в вас, и да не препирают вас волсви ваши, и не послушайте соний своих, яже вы видите во сне, 9 яко неправедне тии прорицают вам во имя Мое, а не послах их, рече Господь. 10 Яко тако рече Господь: егда исполнятся в Вавилоне седмьдесят лет, посету вас и уставлю словеса Моя на вас, еже возвратити люди Моя на место сие: 11 и помышлю на вы помышление мира, а не злая, еже дати вам сия: 12 и помолитесь ко Мне, и послушаю вас, 13 и взыщете Мене, и обряцете Мя: и егда взыщете Мене всем сердцем вашим, 14 и явлюся вам, глаголет Господь, и возвращу узники ваша и



соберу вас от всех стран и от всех градов, в няже изгнах вас, глаголет Господь: и возвратитися повелю вам на место откуда превести вас повелех. 15 Понеже рекосте: возстави нам Господь пророки в Вавилоне. 16 Тако бо рече Господь ко царю сидящу на престоле Давидове и ко всем людем живущым во граде том, и братиям вашим, не изшедшым с вами в плен, 17 тако глаголет Господь Вседержитель: се, Аз пошлю на ня мечь и глад и мор, и положу я яко смоквы худыя, ихже немощно ясти, понеже зело худы быша: 18 и сотру я мечем и гладом и мором, и дам я в погубление всем царствам земным и в проклятие, и во удивление и в посмех и в поругание всем языком, к нимже извергох я: 19 занеже не послушаша словес Моих, глаголет Господь, яже послах к ним рабы Моиими пророки, рано востая и посылая, и не послушасте, глаголет Господь. 20 Вы убо слышите слово Господне, все преселение, еже выслах из Иерусалима в Вавилон. 21 Тако глаголет Господь Вседержитель Бог Израилев на Ахиаву сына Колиева и на Седекию сына Маасиева, иже прорицают вам во имя Мое лживо: се, Аз предаю я в руке Навуходоносора царя Вавилонска, и побьет я пред очима вашима: 22 и возмется от них проклятие всему преселению Иудину, еже в Вавилоне, глаголюще: да сотворит ти Господь якоже Седекии сотвори и якоже Ахиаву, ихже сожже царь Вавилонский во огни, 23 беззакония ради, еже сотвориша во Иерусалиме, и любодeahу с женами граждан своих и слово глаголаша во имя Мое лживо, егоже не повелех им, Аз же есмь судия и послух, глаголет Господь. 24 И к Самеи Еламитину речеши: 25 тако глаголет Господь Вседержитель, Бог Израилев: понеже послал еси во имя твое

послания ко всем людем, иже во Иерусалиме, и ко Софонии сыну Маасеову жерцу и ко всем жерцем, глаголя: 26 Господь даде тя жерца вместо Иодаа жерца, быти приставнику в дому Господни, всякому человеку прорицающу и всякому человеку неистовующу, и вдаси его в затвор и в кладу. 27 И ныне почто не запретисте Иеремии, иже от Анафофа, прорицающему вам? 28 Яко того ради посла к нам в Вавилон, глаголя: долгое есть время, соградите храмины и вселитесь, и насадите вертограды и ядите плоды их. 29 И прочте книгу сию Софониа во уши Иеремии пророка. 30 И бысть слово Господне ко Иеремии глаголя: 31 посли ко преселником глаголя: тако рече Господь на Самею Еламитина: понеже прорече вам Самеа, Аз же не послах его, и сотвори вас уповати на неправду: 32 того ради сице рече Господь: се, Аз посещу на Самею и на род его, и не будет ему человека посреде вас, еже видети благая, яже Аз сотворю вам, глаголет Господь, зане отступление глагола на Господа.

**30** Слово бывшее ко Иеремии от Господа глаголя: 2 тако рече Господь Бог Израилев глаголя: впиши вся словеса в книги, яже глаголах к тебе. 3 Яко се, дние грядут, рече Господь, и возвращу преселение людей Моих Израиля и Иуды, рече Господь Вседержитель, и возвращу я на землю, юже дах отцем их, и овладеют ею. 4 И сия словеса, яже глагола Господь о Израили и о Иуде. 5 Тако рече Господь: глас страха услышите: страх, и несть мира. 6 Вопросите и видите, аще раждает мужеск пол? И о страсе, в немже имети будут чресла и спасение? Понеже видех всякаго человека, и руце его на чреслах его аки раждающия: обратишася лица в желтую болезнь. 7 О, люте! Яко бысть велик день той и несть

подобна ему: и время тесно есть Иакову, и от того спасется.  
8 В той день, рече Господь, сокрушу ярем со выи их и узы их  
расторгну: и не послужат тии ктому чуждим, 9 но послужат  
тии Господу Богу своему: и Давида царя их возставлю им. 10  
Сего ради ты не бойся, рабе Мой Иакове, глаголет Господь,  
ни устрашайся, Израилю: яко се, Аз спасу тя из земли  
дальняя и семя твое из земли пленения их: и возвратится  
паки Иаков и почиет и всякаго добра исполнен будет, и  
не будет устрашаяй тя. 11 Яко Аз с тобою есмь, глаголет  
Господь, спасаяй тя: яко сотворю скончание во всех языцех,  
в няже разсеях тя: тебе же не сотворю во скончание, но  
накажу тя в суде и очищая не очищу тя. 12 Тако бо глаголет  
Господь: возставих сокрушение твое, болезненна есть язва  
твоя, 13 несть судяй суда твоего, на болезнь врачевался  
еси, пользы несть тебе: 14 вси друзие твои забыша тя, ниже  
вопросят тя, яже о мире твоём: яко язвою вражиею поразих  
тя, наказанием твердым: множества ради неправды твоея  
превозмогоша греси твои. 15 Что вопиеш о сокрушении  
твоем? Неизцельна есть болезнь твоя множества ради  
неправды твоея, и твердых ради грехов твоих сотворих ти  
сия (вся). 16 Того ради вси ядущии тя изядени будут, и вси  
врази твои плоть их всю изядят: во множестве неправды  
твоея умножишася греси твои, сотвориша сия тебе: и будут  
разграбляющи тя в разграбление, и всех пленяющих тя  
дам во пленение. 17 Яко обяжу язву твою и от ран твоих  
уврачую тя, рече Господь: яко расточенным называху тя,  
Сионе ловитва наша есть, яко несть взыскающего его. 18  
Тако глаголет Господь: се, Аз возвращу преселение Иаковле  
и пленники его помилую, и возградится град в высоту свою,

и храм по чину своему утвердится: **19** и изыдут из него поюЩИи и глас играющих, и умножу я, и не умялятся. **20** И внидут сынове их якоже и прежде, и свидения их пред лицем Моим исправятся: и посещу на вся стужающыя им, **21** и будут крепльшии его на ня, и князь его из него изыдет: и соберу я, и обратятся ко Мне: кто бо есть той, иже приложит сердце свое обратитися ко Мне? Рече Господь. **22** И будете Ми в люди, и Аз вам буду в Бога. **23** Яко гнев Господень изыде яр, изыде гнев обращаемь, на нечестивыя придет. **24** Не отвратится гнев ярости Господни, дондеже сотворит и дондеже исполнит умышление сердца Своего: в последняя дни познаете я.

**31** Во время оно рече Господь, буду в Бога роду Израилеву, и тии будут Ми в люди. **2** Тако рече Господь: обретох теплоту в пустыни со изгибшими от меча: идите и не потребите Израиля, **3** Господь издалеча явится ему: любовию вечною возлюбих тя, того ради вовлекох тя в щедроты. **4** Яко возгражду тя, и возградишися, дево Израилева: возмеша тимпаны своя и изыдеши с собором играющих. **5** Еще насадите винограды в горе Самарийстей, насаждающе насадите и похвалите. **6** Яко есть день воззвания отвещавающих в горах Ефремовых: встаните и възидите в Сион ко Господеви Богу нашему: **7** яко тако рече Господь Иакову: возвеселитесь веселием и воскликните на главу языков: слышано сотворите и похвалите, рцыте: спасе Господь люди Своя, останок Израилев. **8** Се, Аз веду их от севера и соберу их от конец земли в праздник Пасхи: и чадородит народ мног, и возвратятся семо. **9** С плачем изыдоша, а со утешением возведу я, проводя чрез ровенники вод по пути праву, и не

заблудят по нему: яко Аз бех Израилеви во отца, и Ефрем первенец Ми есть. 10 Слышите, языцы, слово Господне, и возвестите во островех дальних и рцыте: Развевающий Израиля соберет его и снабдит его, яко пастырь стадо свое. 11 Яко избави Господь Иакова и изят его от руки сильнейших его. 12 И приидут и возвеселятся в горе Сион, и приидут ко благотам Господним, на землю пшеницы и вина и плодов, и скотов и овнов: и будет душа их якоже древо плодovито, и не взалчут ктому. 13 Тогда возрадуются девицы в собрании юношей, и старцы возрадуются: и обращу плачь их на радость, и утешу их, и сотворю их веселы. 14 Возвеличу и упою душу жерцев сынов Левииных, и людие Мои благот Моих насытятся. 15 Тако рече Господь: глас в Раме слышан бысть плача и рыдания и вопля: Рахиль плачущися чад своих, и не хотяше утешиться, яко не суть. 16 Тако рече Господь: да почиет глас твой от плача и очи твои от слез, яко есть мзда делом твоим, глаголет Господь, и возвратятся от земли вражия: 17 и есть надежда последним твоим, (глаголет Господь, ) и возвратятся сынове твои в пределы своя. 18 Слыша слышах Ефрема плачуща: наказал мя еси, (Господи, ) и наказахся: аз якоже телец не научихся: обрати мя, и обращуся, яко Ты еси Господь Бог мой: 19 понеже последи пленения моего покаяхся и последи разумения моего возстенах в день посрамления и показах тебе, яко приях укоризну от юности моя. 20 Сын любезен Мне, Ефрем, отроча питающееся, понеже словеса Моя в нем, памятью воспомяну и: того ради потщахся о нем, милуяй помилую его, рече Господь. 21 Постави себе самого, Сионе, стражу, сотвори мучение, направи сердце твое на путь прав,

имже ходил еси: возвратися, девице Израилева, обратися во грады твоя рыдаючи. 22 Доколе отвращаешися, дщи обезчестованая? Яко созда Господь спасение в насаждение ново, в немже спасении обыдут человецы. 23 Яко тако рече Господь: еще рекут слово сие в земли Иудейстей и во градех ея, егда возвращу преселение его: благословен Господь на праведней горе святей своей: 24 и живуции во градех Иудиных и во всей земли его, купно со земледельцем, и вознесется во стаде. 25 Яко упоих всяку душу жаждущу и всяку душу алчущу насытих. 26 Того ради востах от сна и видех, и сон ми сладок бысть. 27 Се, дние грядут, глаголет Господь, и всюю Израиля и Иуду семя человекочо и семя скотское. 28 И будет, якоже бдех на ня потребити и озлобити, тако бдети буду о них, еже созидати и насаждати, рече Господь. 29 В тыя днии не рекут ктому: отцы ядоша кислая, а зубы детем оскомнишася: 30 но кийждо своим грехом умрет, и ядшему кислая оскомятся зубы его. 31 Се, днии грядут, глаголет Господь, и завещаю дому Израилеву и дому Иудину завет нов, 32 не по завету, егоже завещах отцем их в день, в оньже емшу ми за руку их, извести я от земли Египетския, яко тии не пребыша в завете Моем, и аз небрегох их, глаголет Господь. 33 Яко сей завет, егоже завещаю дому Израилеву по днех оных, глаголет Господь: дая законы Моя в мысли их, и на сердцах их напишу я, и буду им в Бога, и тии будут Ми в люди: 34 и не научит кийждо ближняго своего и кийждо брата своего, глаголя: познай Господа: яко вси познают Мя от мала даже и до великаго их: яко милостив буду неправдам их и грехов их не помяну ктому. 35 Аще возиесется небо на высоту, рече Господь, и аще смирится испод земли низу,

и Аз не отвергу рода Израилева о всех, яже сотвориша, глаголет Господь. 36 Тако рече Господь, давший солнце во свет дне, луну и звезды на свет нощи, и вопль на мори, и возшумеша волны его, Господь Вседержитель имя Ему. 37 Аще премолкнут законы сии от лица Моего, рече Господь, то и род Израилев престанет быти язык пред лицом Моим во вся дни. 38 Се, дние грядут, рече Господь, и созиждется град Господеви от столпа Анамеиля до врат угловых: 39 и изыдет размерение его противу ему до могил Гарив, и оымется окрест избранным камением, 40 и всю юдоль мертвых и пепела, и весь Ассаримоф даже до водотечи Кедрския, даже до угла коний врат восточных, освящение Господеви, и ктому не исторгнется и не потребится даже до века.

**32** Слово бывшее от Господа ко Иеремии в десятое лето Седекии, царя Иудина, то лето осмоенадесять Навуходоносору царю Вавилонску. 2 И тогда сила царя Вавилонска острог обложи окрест Иерусалима, Иеремия же стегомь бяше во дворе темничнем, иже есть во дворе царя Иудина, 3 в нейже заключи его Седекиа царь, глаголя: почто ты прорицаеши, глаголя: тако рече Господь: се, Аз даю сей град в руце царя Вавилонска, и возмет его, 4 и Седекиа царь Иудин не спасется от руки Халдейски, яко преданием предастся в руце царя Вавилонска, и соглаголет усты своими ко устом его, и очи его очи его узрят, 5 и в Вавилон внидет Седекиа и ту будет, дондеже посету его, глаголет Господь: аще же воевати будете на Халдеи, ничесоже успеете? 6 И рече Иеремия: бысть слово Господне ко мне глаголя: 7 се, Аиамеил, сын Саломль, брата отца твоего, идет к тебе, глаголя: прикупи себе село мое, еже во Анафофе, яко

тебе суд ужичества прияти во притяжание. 8 И прииде ко мне Анамеил, сын Саломль, брата отца моего, по словеси Господню во двор темничный и рече ми: прикупи себе село мое, еже во Анафофе в земли Вениамини: яко тебе суд прикупити е, ты бо старей. И разумех, яко слово Господне есть, 9 и прикупих село Анамеиле, сына брата отца моего, от Анафофа, и поставих ему семнадцать сикль сребра, 10 и вписах в книгу и запечатах, и засвидетелствовах послухи и поставих сребро на весах. 11 И взях книгу купления прочтену и запечатану. 12 И дах книгу купления Варухови сыну Нириину, сына Маассеова, пред очима Анамеила сына брата отца моего, и пред очима стоящих послух и вписавших в книги купления, и пред очима всех Иудеов, сидящих во дворе темничнем. 13 И заветах Варуху пред очима их, глаголя: 14 тако рече Господь Вседержитель Бог Израилев: возми книгу сию купления запечатленну и книгу прочтеную и вложи ю в сосуд глинян, да пребудет дни множайшыя. 15 Яко тако рече Господь Вседержитель Бог Израилев: еще притяжуются храмины и села и винограды на сей земли. 16 И молихся ко Господеви по отдании книги прикупления Варуху сыну Нириину, глаголя: 17 о, сый Господи Боже! Ты сотворил еси небо и землю крепостию Твоею великою и мышцею Твоею высокою, не утаится от Тебе ничтоже, 18 творяй милость в тысящы и отдай грехи отчи в недра чад их по ним: Бог великий и крепкий, 19 Бог велика совета и силен делесы, Бог великий Вседержитель и великоименит Господь: очи Твои отверсты на вся пути сынов человеческих, дати комуждо по пути его и по плоду начинаний его: 20 иже сотворил еси знамения и чудеса во земли Египетстей, даже



до сего дне и во Израили и в людех, и сотворил еси имя Себе, якоже день сей, 21 и извел еси люди Твоя Израиля из земли Египетския знамении и чудесы, рукою крепкою и мышцею высокою и видении великими, 22 и дал еси им сию землю, еуже клялся еси отцем их, землю кипящую медом и млеко. 23 И внидоша и прияша ю, и не послушаша гласа Твоего и в заповедех Твоих не ходиша: вся, яже заповедал еси им (творити), не сотвориша, и сотвориша, да сбдутся им вся злая сия. 24 Се, народ идет на сей град взяти его, и град предан есть в руце Халдеев воющих нань от лица меча и глада и мора. Якоже глагола еси, тако и бысть: и се, Ты зриши. 25 А Ты ко мне глаголеши: притяжи себе село серебром: и вписах в книгу, и запечатах, и засвидетелствовах послухи, град же предастся в руце Халдейсте. 26 И бысть слово Господне ко мне глаголя: 27 Аз Господь Бог всея плоти, еда от Мене утаится что? 28 Сего ради тако рече Господь Бог Израилев: отдан предастся сей град в руце царя Вавилонска, и возмет его, 29 и приидут Халдее воюущии на сей град, и пожгут его огнем, и храмины сожгут, в нихже кадиша на кровех своих Ваалу и возливаша возлияния богом инем, ко еже разгневати Мя. 30 Понеже беша сынове Израилевы и сынове Иудины едины творяще зло пред очима Моима от юности своя, сынове Израилевы подвизают Мя на гнев в делех рук своих, рече Господь. 31 Яко на гнев Мой и на ярость Мою бе град сей, от негоже дне соградиша его и даже до сего дне, яко отставити его от лица Моего, 32 злобы ради всякия сынов Израилевых и Иудиных, яко сотвориша разгневати Мя тии и царие их, и князи их и вельможи их, и жерцы их и пророцы их, мужие Иудины и живущии во

Иерусалиме, **33** и обратиша хребет ко мне, а не лице: и наказах я из утра, и не послушаша прияти наказания, **34** и положиша осквернения своя в дому, идеже наречеса имя Мое, в нечистотах своих: **35** и соградиша требища Ваалу, яже в дебри сына Енномля, еже возносити сыны своя и дщери своя Молоху, ихже не заповедах им, и не възыде на сердце Мое, еже сотворити мерзость сию на согрешение Иуде. **36** И ныне тако рече Господь Бог Израилев ко граду, о немже ты глаголеши: предан будет в руце царя Вавилонска мечем и гладом и мором. **37** Се, Аз соберу я от всея земли, идеже разсеях я во гневе Моим и ярости Моей и в преогорчении велием, и обращу я на сие место, и посажду я во уповании, **38** и будут Ми в люди, и Аз буду им в Бога: **39** и дам им путь ин и сердце ино, боятися Мене вся дни, на благоту им и чадом их по них: **40** и завещаю им завет вечный, егоже не отвращу последи их, и страх Мой дам в сердце их, ко еже не отступити им от Мене: **41** и посещу еже ублажити я и насажду я в сей земли с верою и со всем сердцем Моим и со всею душою Моею. **42** Яко тако рече Господь: якоже наведох на люди сия вся злая сия великая, тако Аз наведу на них вся благоты, яже Аз глаголах к ним. **43** И возобладают паки селы на земли, о нейже ты глаголеши: непроходна будет от человек и скота, и предашася в руце Халдейсте. **44** И притяжут села сребром: и впишеша в книги, и запечатаеша, и опослушиши послухи в земли Вениамини и окрест Иерусалима, и во градех Иудиных и во градех горних, и во градех польных и во градех нагев и: яко возвращу преселения их, глаголет Господь.

**33** И бысть слово Господне ко Иеремии вторицею, тойже быше еще связан во дворе темничнем, глаголя: **2** тако рече Господь, творяй землю и устрояй ю, еже исправити ю, Господь имя Ему: **3** возопий ко Мне, и отвечаю ти и возвещу тебе великая и крепкая, ихже не разумел еси. **4** Яко тако рече Господь Бог Израилев о домех града сего и о храмех царя Иудина, растерзанных на остроги и на забрала, **5** еже противитися ко Халдеем, и наполню его мертвыми человеки, ихже поразих во гневе Моем и в ярости Моей, и отвратих лице Мое от них всех ради злоб их. **6** Се, Аз наведу на ня срастение язвы и изцеление, и изврачую я и явлю им, еже слушати, и изцелю я и сотворю им мир и веру: **7** и обращу преселение Иудино и преселение Израилево, и согражду я, якоже и прежде, **8** и очищу я от всех неправд их, имиже согрешиша Ми, и милостив буду всем неправдам их, имиже отступиша от Мене. **9** И будет в веселие и во хвалу и в величие всем людем земли, иже услышат вся благоты, яже Аз сотворю им, и убоятся, и огорчатся о всех благотах и о всем мире, егоже Аз сотворю им. **10** Тако рече Господь: еще услышится в сем месте, о немже вы глаголете: пусто есть от человек и от скот, во градех Иудиных и вне Иерусалима, опустевших, понеже несть человека, ни скота, **11** глас веселия и глас радости, глас жениха и глас невесты, глас глаголющих: исповедайтеся Господеви Вседержителю, яко благ Господь, яко в век милость Его: и принесут дары похваления в дом Господень, яко возвращу все преселение земли тоя по прежнему, рече Господь. **12** Тако глаголет Господь Сил: еще будут на сем месте пустем, за еже не быти человеку, ни скоту, во всех градех его обиталища

пастухов пасущих овцы, 13 во градех горних и во градех  
польных, и во градех нагев и в земли Вениамини, и во  
окрестных Иерусалима и во градех Иудиных, еще пойдут  
овцы к руце изчисляющего, глаголет Господь. 14 Се, дние  
грядут, рече Господь, и возставлю слово благо, еже глаголах  
к дому Израилеву и к дому Иудину. 15 Во днех оных и в то  
время произрастити сотворю Давиду Отрасль правды, и  
сотворит суд и правду на земли. 16 Во днех оных спасен  
будет Иуда, и Иерусалим пребудет в надежди: и сие есть  
имя, имже нарекут Его: Господь праведен наш. 17 Тако бо  
рече Господь: не оскудеет от Давида муж седяй на престоле  
дому Израилева: 18 и от жерцев и от левитов не погибнет  
муж от лица Моего, приносяй всесожжения и дар и творяй  
жертвы по вся дни. 19 И бысть слово Господне ко Иеремии  
глаголя: 20 тако глаголет Господь: может ли разоритися завет  
Мой со днем и завет Мой с ночью, еже не быти дню и нощи  
во время свое? 21 То и завет Мой разорится с Давидом  
рабом Моим, еже не быти от него сыну царствующу на  
престоле его, и с левиты и священники рабы Моими. 22  
Якоже сочтены быти не могут звезды небесныя, ни измерен  
быти песок морской, тако умножу семя раба Моего Давида  
и левиты служители Моя. 23 И бысть слово Господне ко  
Иеремии глаголя: 24 еда не видел еси, что рекоша людие  
сии, глаголюще: два народа, ихже избра Господь, и се,  
отверже я: и преогорчиша людей Моих, (сего ради) яко да  
не будет ктому народ пред ними? 25 Тако рече Господь:  
не положих ли убо завета Моего между днем и ночью и  
законов небеси и земли? 26 Тогда и семя Иаковле и Давида  
раба Моего отвергу, еже не прияти от семене его князей

семене Авраама и Исаака и Иакова: яко паки возвращу плен их и помилую их.

**34** Слово, еже бысть ко Иеремии от Господа, егда Навуходоносор царь Вавилонский и вси вои его, и вся земля власти его и вси людие воеваху на Иерусалим и на вся грады Иудины, глаголя: 2 тако рече Господь Бог Израилев: иди ко Седекии царю Иудину и речеши ему: тако рече Господь: преданием предастся сей град в руке царя Вавилонска, и возмет его и пожжет его огнем: 3 и ты не уцелееши от руку его, и ят будеши, и в руке его предасися: и очи твои очи его узрят, и уста его со усты твоими соглаголют, и в Вавилон внидеши. 4 Но обаче слыши слово Господне, Седекие, царю Иудин! Тако глаголет Господь к тебе: не умреши от меча, но в мире умреши: 5 и якоже плакаша отцев твоих царствовавших прежде тебе, восплачутся и тебе: увы, господи, и: увы, господи! Восплачутся и тебе, яко слово Аз соглаголах, рече Господь. 6 И глагола Иеремиа пророк ко Седекии царю Иудину вся словеса сия во Иерусалиме. 7 И сила царя Вавилонска воева на Иерусалим и на грады Иудины оставшыяся: на Лахис и на Азику, яко тии осташася во градех Иудиных грады тверды. 8 Слово бывшее ко Иеремии от Господа, повнегда скончати царю Седекии завет к людем, иже во Иерусалиме, еже нареци им отпущение, 9 еже отпустить комуждо раба своего и комуждо рабыню свою, Евреанина и Евреаныню, свободны, да не работает муж от Израиля. 10 И обратишася вси вельможи и вси людие вступившии в завет еже отпустить комуждо раба своего и комуждо рабу свою свободны и ктому не владети ими. Слышаша убо и отпустиша. 11 И обратишася по сих вспять и удержаша

паки рабы и рабыни своя, ихже отпустиша свободных, и взяша в рабы и рабыни. 12 И бысть слово Господне ко Иеремии от Господа глаголя: 13 тако рече Господь Бог Израилев: Аз завещах завет ко отцем вашим в день, в оньже избавих я от земли Египетския, из дому работы, глаголя: 14 егда скончаются шесть лет, да отпустиши брата своего Евреанина, иже продан есть тебе: и да делает ти шесть лет, и да отпустиши его свобода от себе. И не послушаша Мене отцы ваши, ни приклониша уха своего. 15 И обратитесь вы днесь сотворити правая пред очима Моима, еже нареци комуждо отпущение ближняго своего: и совершите завет пред лицом Моим в дому, идеже наречется имя Мое в нем: 16 и отвратитесь, и оскверните завет Мой, еже возвратити комуждо раба своего и комуждо рабу свою, ихже отпустите свободны душою их: и покорите их, якоже быти у вас в рабы и в рабыни. 17 Того ради сице рече Господь: вы не послушасте Мене, нареци отпущения кийждо брату своему и кийждо ближнему своему: се, Аз нарицаю отпущение вам на мечь и на смерть и на глад, и дам вы на разсыпание всем царствам земным: 18 и дам мужы преступившыя завет Мой и не хранящыя словес завета Моего, емуже соизволиша пред лицом Моим: телца егоже разсекоша на две части и ходиша между разделенными частями его: 19 князи Иудины и князи Иерусалимли, и вельможы и жерцы и вся люди земли ходящыя между разделеным телцем, 20 и дам я в руки врагом их и в руки ищущих души их, и будут трупы их в ядь птицам небесным и зверем земным: 21 и Седекию царя Иудейска и князи его дам в руке врагов их и в руку ищущих души их и в руку воинства царя Вавилонска, отбегающих от

них. 22 Се, Аз завещаю, рече Господь, и возвращу я в землю сию, и повоюют на ню, и возмут ю, и пожгут ю огнем и грады Иудины: и дам я в непроходны от живущих.

**35** Слово бывшее ко Иеремии от Господа, во дни Иоакима сына Иосиина, царя Иудина, глаголя: 2 иди в дом Рихавль и призови я и веди я в дом Господень, во един от дворов, и напоиши я вином. 3 И изведох Иезонию сына Иеремиина, сына Хавасиина, и братию его, и сыны его, и весь дом Рихавль, 4 и введох я в дом Господень, во хранилище имения сынов Анании, сына Годолиина, человека Божия, иже есть близ дому князей, выше дому Маасеова, сына Селомля, стрегущаго двор. 5 И поставих пред ними корчаг вина и чаши, и рекох: пейте вино. 6 И рекоша: не прием вина, яко Ионадав сын Рихавль, отец наш, заповеда нам, глаголя: не пейте вина вы и сынове ваши до века: 7 и храмин да не соградите, и семене не сейте, и виноград да не будет вам, но в кушах да живете вся дни живота вашего, да поживете дни многи на земли, на нейже обитаете вы. 8 И послушахом словесе Ионадава отца нашего, еже не пити вина вся дни живота нашего, мы и жены наша, и сынове наши и дщери наша, 9 и еже не соградати храмин жити тамо: и винограда и нивы и семене не бысть нам. 10 И жихом в куцах, и послушахом и сотворихом по всем, елика заповеда нам Ионадав отец наш. 11 И бысть, егда прииде Навуходоносор царь Вавилонский на землю нашу, и рекохом: вшедше да внидем во Иерусалим от лица Халдейска и от лица силы Ассирийския: и вселихомся ту. 12 И бысть слово Господне ко Иеремии глаголя: 13 тако глаголет Господь Сил, Бог Израилев: иди и рцы человеку Иудину и живущым

во Иерусалиме: еда не восприимете наказания послушати словес Моих? 14 Утвердиша слово сынове Ионадава, сына Рихавля, еже заповеда сыном своим, еже не пити вина, и не пиша даже до дне сего, яко послушаша заповеди отца своего: Аз же глаголах к вам завтра, и не послушасте Мене: 15 и посылах к вам рабы Моя пророки, утреню и глаголя: обратитесь кийждо от пути своего злаго, и лучше сотворите дела своя, и не ходите вслед богов инех, еже служити им, и вселитесь на земли, юже дах вам и отцем вашим: и не приклонисте ушес ваших и не послушасте. 16 И уставиша сынове Ионадавли, сына Рихавля, заповедь отца своего, юже заповеда им: а людие Мои не послушаша Мене. 17 Сего ради сице рече Господь Сил, Бог Израилев: се, Аз наведу на Иуду и на вся живуцья во Иерусалиме вся злая, яже соглаголах на ня: понеже глаголах к ним, и не послушаша, призывах я, и не отвещаша Ми. 18 Дому же Рихавлю рече Иеремиа: тако рече Господь Бог Вседержитель: понеже послушаша сынове Ионадава, сына Рихавля, заповеди отца своего, творити, елика заповеда им отец их: 19 сего ради сия глаголет Господь Сил, Бог Израилев: не оскудеет муж от сынов Ионадавлих, сына Рихавля, стояй пред лицом Моим, вся дни земли.

**36** И бысть в лето четвертое Иоакима, сына Иосиина, царя Иудина, бысть слово Господне ко Иеремии глаголя: 2 возми себе свиток книжный и напиши в нем вся словеса, яже соглаголах к тебе на Израиля и на Иуду и на вся языки, от негоже дне глаголах к тебе, от дне Иосии царя Иудина и до сего дне: 3 негли услышит дом Иудин вся злая, яже Аз помышляю сотворити им, да отвратятся от пути своего



злаго, и милостив буду неправдам их и грехом их. 4 И призва Иеремиа Варуха, сына Нириина: и вписа Варух от уст Иеремииных вся словеса Господня, яже соглагола к нему, во свиток книжный. 5 И заповеда Иеремиа Варуху глаголя: мене стрегут, и не могу внити в дом Господень, 6 ты убо вниди и прочти во свитце сем, в немже написал еси от уст моих словеса Господня, во уши людей в дому Господни в день поста и во уши всему дому Иудину, приходящим от градов своих, да прочтеши им: 7 негли падет молитва их пред лицом Господним, и отвратятся от пути своего злаго: яко велика ярость и гнев Господень, егоже соглагола на люди сия. 8 И сотвори Варух сын Нириин но всему, елика заповеда ему Иеремиа пророк прочести во книзе словеса Господня в дому Господни. 9 И бысть в пятое лето Иоакима царя Иудина, в девятый месяц, заповедаша пост пред лицом Господним всем людем во Иерусалиме и всему множеству, еже снидесе от градов Иудиных во Иерусалим. 10 И прочте Варух во книзе словеса Иеремиина в дому Господни, в дому Гамариеве, сына Сафаня книгочия, во дворе вышнем, во преддверии врат дому Господня новых, во уши всех людей. 11 И слыша Михей сын Гамариев, сына Сафаня, вся словеса Господня от книги. 12 И сниде в дом царев, в дом книжника, и се, тамо вси князи седяху, Елисам книгочий и Далеа сын Селемиев, и Нафан сын Аховоров и Гамариа сын Сафань, и Седекиа сын Ананиин и вси князи, 13 и возвести им Михей вся словеса, яже слыша чтуща Варуха во уши людем. 14 И послаша вси князи ко Варуху сыну Нириину, Иудину сыну Нафаниину, сына Селемиина, сына Хусиина, глаголюще: книгу, юже ты чтеши во уши людем, возми ю в руку свою

и прииди. И взя Варух сын Нириин книгу в руку свою и сниде к ним. 15 И рекоша ему: паки прочти во уши наши. И прочте Варух во уши их. 16 И бысть яко услышаша вся словеса, совещашася кийждо со ближним своим и реша Варуху: возвещающе возвестим царю вся словеса сия. 17 И вопросиша Варуха, глаголюще: откуда еси вписал вся словеса сия? 18 И рече Варух: от уст своих поведана ми Иеремиа вся словеса сия, аз же писав в книгу. 19 И рекоша князи Варуху: иди и скрыйся ты и Иеремиа, и человек да не увестъ, где вы. 20 И внидоша ко царю во двор, книгу же вдаша хранити в дому Елисама книгочия, и возвестиша царю вся словеса сия. 21 И посла царь Иудина взяти книгу. И взя ю от дому Елисамы книгочия, и прочте Иудин во уши царицы и во уши всех князей стоящих окрест царя. 22 Царь же седяше во храмине зимней, в девятый месяц, и поставлено бе пред ним огнище со огнем. 23 И бысть чтущу Иудину третий лист и четвертый, раздробил я бритвою книгочия и возметаше на огненное огнище, дондеже скончася весь свиток на огненнем огнищи. 24 И не ужасошася и не растерзаша риз своих царь и вси отроцы его, слышавшии вся словеса сия. 25 Елнафан же и Далеа, и Гамариа и Годолиа глаголаша царю, еже бы не сожещи свитка. И не послуша их. 26 И повеле царь Иеремиилу сыну царицы и Сараеви сыну Езриилеву и Селемию сыну Авдеилеву, да изымают Варуха книгочия и Иеремию пророка. Но сокрови я Господь. 27 И бысть слово Господне ко Иеремии, егда соже царь свиток, вся словеса, яже вписа Варух от уст Иеремииных, глаголя: 28 паки возми ты свиток другой и впиши вся словеса бывшая во свитце, яже соже царь Иоаким: 29 и ко Иоакиму царю Иудину речеши:

тако рече Господь: ты сожегл еси сию книгу, глаголя: почто вписал еси в ней, глаголя: входя внидет царь Вавилонский и потребит землю сию, и потребятся от нея человецы и скоти? 30 Того ради сице рече Господь на Иоакима царя Иудина: не будет ему сидящаго на престоле Давидове, и будет тело его мертвое повержено на знои дневнем и на мразе ночью: 31 и посету нань и на его род и на отроки его, и наведу нань и на живущыя во Иерусалиме и на землю Иудину вся злая, яже соглаголах на ня, и не послушаша. 32 И взя Варух свиток другой и вписа в нем от уст Иеремииных вся словеса книги, яже сожже Иоаким царь Иудин: и еще приложишася ему словеса множайша неже первая.

**37** И царствова Седекиа сын Иосиин вместо Иехонии сына Иоакимова, егоже постави Навуходоносор царь Вавилонский царствовать во Иудеи. 2 И не послуша той и отроцы его и людие земли словес Господних, яже глагола рукою Иеремииною. 3 И посла царь Седекиа Иоахала сына Селемиина и Софонию сына Массеа жерца ко Иеремии пророку, глаголя: молися за ны ко Господу Богу нашему. 4 Иеремиа же свободен приходаше и проходаше среде града, не введоша бо его во храмину темничную. 5 И сила фараоня изыде из Египта, и слышавше Халдее облегшии Иерусалим слух их, отступиша от Иерусалима. 6 И бысть слово Господне ко Иеремии глаголя: 7 тако рече Господь Бог Израилев: тако речеши царю Иудину, пославшему к тебе вопросити Мя: се, сила фараоня, изшедшая вам на помощь, возвратится паки до земли Египетския, 8 и возвратятся Халдее и повоюют град сей, и возмут его и пожгут его огнем. 9 Яко тако рече Господь: не прельщайте душ своих,

глаголюще: отходяше отидут от нас Халдее: яко не отидут.

10 И аще побиете всю силу Халдеев воющих на вы, и останут нецыи язвени, кийждо на месте своем, сии востанут и пожгут град сей огнем. 11 И бысть егда взыде сила Халдейска от Иерусалима, от лица силы фараони, 12 изыде Иеремиа из Иерусалима ити в землю Вениаминю, еже купити оттуду посреде людей. 13 Внегда же быти ему во вратех Вениаминих, и (бысть) тамо человек, у негоже обита Саруиа сын Селемиин, сына Ананиина, и взя Иеремию, глаголя: ко Халдеем ты бежиши. 14 И рече Иеремиа: лжа, не ко Халдеем аз бегу. И не послуша его. И взя Саруиа Иеремию и приведе его ко князем. 15 И разгневашася князи на Иеремию и биша его, и послаша его в дом Ионафана книгочия, яко той сотвориша храминою темничною. 16 И прииде Иеремиа в дом рва и в херет, и седе ту дни многи. 17 И посла Седекиа царь и призва его, и вопрошаше его царь отай, аще есть слово от Господа? И рече ему Иеремиа: есть. И рече: в руце царя и Вавилонска предан будеши. 18 И рече Иеремиа царю: чим преобидех ты и отроки твоя и люди сия, яко ты вдаеши мя в дом темничный? 19 И где суть пророцы ваши прорицавшии вам, глаголюще, яко не приидет царь Вавилонский на вас и на землю сию? 20 Ныне же послушай, молютися, господи мой, царю, да падет моление мое пред лицом твоим: и не посылай мя паки в дом Ионафана книгочия, да не умру тамо. 21 И повеле царь, и ввергоша его во храмину темничную, и даяху ему хлеб един на день извне, идеже пекут, дондеже скончашася хлебы из града. И седяше Иеремиа во дворе темничнем.

**38** И слыша Сафаниа сын Нафань и Годолиа сын Пасхоров, и Иоахал сын Селемиин и Фасхор сын Мелхийев словеса, яже Иеремиа глагола ко всем людем, глаголя: **2** тако рече Господь: седяй во граде сем умрет мечем и гладом и мором, исходяй же ко Халдеем жив будет, и будет душа его на обретение, и жив будет. **3** Яко тако рече Господь: преданием предастся град сей в руце силы царя Вавилонска, и возмет его. **4** И рекоша царю: да умрет человек той, яко сей разслабляет руце мужей воюющих оставшихся во граде и руки всех людей, глаголя к ним по словесем сим: яко человек сей не проповедает людем сим мира, но токмо злая. **5** И рече царь Седекиа: се, той в руках ваших. Понеже не можаше царь противу им. **6** И взяша Иеремию и ввергоша его в ров Мелхиин, сына царева, иже бяше во дворе темничнем: и свесиша его ужами в ров, в рове же не бяше воды, но тина, и бяше в тине Иеремиа. **7** И слыша Авдемелех Муриин, и той бяше во дворе царева, яко ввергоша Иеремию в ров: царь же (в той час) седяше во вратех Вениаминих. **8** И изыде Авдемелех от дому царева и рече ко царю глаголя: **9** злосотворил еси, яже сотворил еси, убивая человека сего от лица глады, яко несть хлеба во граде ктому. **10** И повеле царь Авдемелеху, глаголя: поими с собою отсюду тридесять мужей и извлецы Иеремию из рова, да не умрет. **11** И поят Авдемелех мужы, и прииде в дом царев подземный, и взя оттуду ветхи порты и ветхия ужы, и вверже я ко Иеремию в ров, и рече к нему: **12** положи сия под ужы. И сотвори Иеремиа сице. **13** И извлекоша его ужами и изыаша его из рова. И седе Иеремиа во дворе темничнем. **14** И посла царь, и призва к себе Иеремию в дом Аселисиль, иже в

дому Господни. И рече ему царь: вопрошаю тя словесе (единого), и не утай от мене словесе. 15 И рече Иеремиа царю: аще повем ти, то не смертью ли умориши мя? И аще совещаю ти, то не послушаеши мене. 16 И клятся ему царь, глаголя: жив Господь, иже сотвори нам душу сию, аще убью тя и аще предам тя в руце человек сих ищущих души твоея (на смерть). 17 И рече ему Иеремиа: тако рече Господь Сил, Бог Израилев: аще изыдый изыдеши к воеводам царя Вавилонска, жива будет душа твоя, и град сей не пожжется огнем, и жив будеши ты и дом твой: 18 аще же не изыдеши ко князем царя Вавилонска, предастся град сей в руце Халдейсте, и пожгут его огнем, и ты не спасешия от руки их. 19 И рече царь Иеремии: аз опасение имам от Иудеев избежавших ко Халдеем, да не предадут мя (Халдее) в руце их, и поругаются ми. 20 И рече Иеремиа: не предадут тебе: послушай убо словесе Господня, еже аз глаголю тебе, и лучше ти будет, и жива будет душа твоя: 21 и аще не восхощеши ты изыти, сие слово, еже сказа мне Господь: 22 и се, вся жены, оставшыяся в дому царя Иудина, изведутся ко князем царя Вавилонска: и тыя глаголаху: прельстиша тя и премогаша ты мужие мирницы твои, и ослабиша во поползновениях ногу твою и отвратишася от тебе: 23 и жены твоя и чада твоя изведут ко Халдеем, и ты не уцелееши, яко рукою царя Вавилонска ят будеши, и град сей пожжется. 24 И рече ему царь: человек да не увезь словес сих, и да не умреша ты. 25 И аще услышат князи, яко глаголах с тобою, и приидут к тебе и рекут ти: повеждь нам, что глагола к тебе царь? Не утай от нас, и не убием тебе: и что глагола к тебе царь? 26 И речеши им: повергох аз моление мое пред лицом

царевым, яко да не возвратит мене в дом Ионафань, умрети ми тамо. 27 И приидоша вси князи ко Иеремии и вопросиша его. И поведи им по всем словесем сим, яже заповеда ему царь. И умолкнуша, яко несть слышано слово господне. 28 И седяше Иеремия во дворе темничнем, дондеже взяша Иерусалим.

**39** И бысть в девятое лето Седекии царя Иудина, в месяц десятый, прииде Навуходоносор царь Вавилонский и вся сила его на Иерусалим, и воеваху на нь. 2 И в первоенадесять лето Седекии, в месяц четвертый, в девятый день месяца, разседися град. 3 И внидоша вси князи царя Вавилонска и седоша во вратах средних, Ниргелсарасар, Самагад, Навусахар, Навусарис, Нагаргас, Насерравамаг, и прочии воеводы царя Вавилонскаго. 4 И бысть егда узре я Седекиа царь Иудин и вси мужие ратнии, и избегоша, и изыдоша в нощи от града по пути вертограда царева и сквозе врата, яже беша между стеною и предстением: и изыдоша в путь пустыни. 5 И гнаша вслед их воинство Халдейско, и постигоша Седекию и поли пустыни Иерихонския, и емше приведоша к Навуходоносору царю Вавилонску во Ревлаф, иже в земли Емаф, и глагола к нему с судом. 6 И изби царь Вавилонский сыны Седекиины во Ревлафе пред очима его, и вся вельможи Иудины поби царь Вавилонский. 7 И очи Седекии изят, и окова его путы, и отведе его в Вавилон. 8 Дом же царев и дома всех людей пожгоша Халдее огнем и стену Иерусалимску превратиша: 9 и останок людей, и оставших во граде, и убегшыя, иже утекоша ко царю Вавилонску, и останок людей, и оставших пресели Навузардан воевода в Вавилон: 10 а от людей убогих,

ничтоже имущих, остави Навузардан воевода воинств в земли Иудине, и даде им винограды и нивы в той день. 11 И заповеда Навуходоносор царь Вавилонский о Иеремии пророце Навузарданови воеводе воинств и рече: 12 возми его и положи нань очи твои и ничтоже ему сотвори зла: но якоже восхощет, тако сотвори ему. 13 Посла убо Навузардан воевода воинства и Навузезван, и Рапсарис и Ниргел, и Сарасар и Фавман, и вси воеводы царя Вавилонска: 14 и послаша, и пояша Иеремию от двора темничнаго, и даша его Годолии сыну Ахикамову, сына Сафая, и изведоша его, и седе среде людей. 15 И ко Иеремии бысть слово Господне ко дворе темничнем глаголя: 16 иди и рцы ко Авдемелеху Мурину, глаголя: тако рече Господь Бог Израилев: се, Аз приношу словеса Моя на град сей во злая? А не во благая: и будут пред лицом твоим в той день: 17 и избавлю тя в той день, и не дам тебе в руке человек, ихже ты боишися от лица их: 18 яко избавляя спасу тя, и мечем не падеши: и будет душа твоя на обретение, яко уповал еси на Мя, рече Господь.

**40** Слово бывшее ко Иеремии от Господа, повнегда отпусти его Навузардан архимагир из Рамы, егда взя его связанаго путы от среды, от Иерусалима и от Иуды преселения, ведомых в Вавилон. 2 И взя его архимагир и рече ему: Господь Бог твой соглаголал есть злая сия на место сие: 3 и приведе, и сотвори Господь, якоже рече, зане согрешисте Ему и не послушасте гласа Его, и бысть вам глагол сей. 4 И се, ныне разреших тя от уз, яже на руку твою: аще ти есть добро ити со мною в Вавилон, поиди, и положу очи мои на тя: аще же ни, остани где: се, вся земля пред лицом твоим



есть: что изволиши, и аможе восхощеши ити, тамо иди: 5 и  
возвратися ко Годолии, сыну Ахикамову, сыну Сафаню, егоже  
постави царь Вавилонский в земли Иудине, и живи с ним  
среде людий, во всех благих пред очима твоима, еже ходити,  
и ходи. И даде ему архимагир пищу и дары и отпусти его. 6 И  
прииде Иеремиа ко Годолии сыну Ахикамову в Массифаф  
и седе среде людий своих оставшихся на земли. 7 И егда  
услышаша вси воеводы силы яже на селе, тии и силы их, яко  
поставил есть царь Вавилонский Годолию сына Ахикамова  
(властелина) над землею, и яко предаде ему мужы и жены и  
дети, и от убогих земли, иже не преведени быша в Вавилон:  
8 приидоша ко Годолии в Массифаф Исмаил сын Нафаниин  
и Иоанан, и Ионафан сын Кариев и Сареа сын Фанаемевов,  
и сынове Офи, иже беша из Нетофафы, и Иезониа сын  
Махафы, тии и мужие их. 9 И клятятся им Годолия и мужем их,  
глаголя: не убойтеса от лица отрок Халдейских: вселитеса  
на земли и служите царю Вавилонску, и лучше вам будет: 10  
и се, аз сежу в Массифафе, стати противу лицу Халдейску,  
иже аще приидут на вас: вы же соберите вино и овощь, и  
соберите масло, и влийте в сосуды своя, и вселитеса во  
грады, яже удержасте. 11 И вси Иудее, иже в земли Моавли  
и в сынех Аммоних, и иже во Идумеи и иже во всей земли,  
услышаша, яко дал есть царь Вавилонский останок во Иуде  
и яко поставил есть над ними Годолию сына Ахикамова,  
сына Сафанова. 12 И приидоша вси Иудее от всех мест, в  
няже бяху убегли, и приидоша ко Годолии в землю Иудину в  
Массифаф, и собраша вино и овощь и масло много зело. 13  
Иоанан же сын Кариев и вси воеводы силы, иже на селех,  
приидоша ко Годолии в Массифаф 14 и рекоша ему: веси ли,

яко Велиса царь сынов Аммоних посла к тебе Исмаила сына Нафаниева поразити душу твою? И не верова им Годолия сын Ахикамль. **15** Иоанан же сын Кариев рече ко Годолии отай в Массифафе, глаголя: да иду убо и побию Исмаила, сына Нафаниина: и никтоже да увести, да не како поразит душу твою, и разсыплется весь Иуда собранный к тебе, и погибнет останок Иудин. **16** И рече Годолия ко Иоанану сыну Кариеву: не сотвори дела сего, яко лжу ты глаголеши на Исмаила.

**41** И бысть в седмый месяц, прииде Исмаил сын Нафаниин сына Елисамова, от рода царева, и вельможи царевы десять мужей с ним ко Годолии в Массифаф, и ядоша ту вкупе хлеб. **2** И воста Исмаил и десять мужей иже с ним, и поразиша Годолию мечем, и убиша, егоже постави царь Вавилонский над землею, **3** и всех Иудеев, иже беша с ним в Массифафе, и всех Халдеев, иже обретошася тамо, и мужей военных изби Исмаил. **4** И бысть во вторый день по убиении Годолиеве, и человек не уведе. **5** И приидоша мужие от Сихема и от Салима и от Самарии осмьдесят мужей, обритыми брадами и растерзанными ризами, плачущеся, и дары и фимиам в руку их, еже внести в дом Господень. **6** И изыде противу им Исмаил сын Нафаниев от Массифы: тии же идяху и плакахуся: и егда сретеся с ними, рече к ним: внидите ко Годолии. **7** И бысть, вшедшым им среде града, изсече я Исмаил у кладязя, той и мужие, иже беша с ним. **8** И обретошася десять мужей ту и реша Исмаилу: не убий нас, яко суть нам имения на нивах, пшеница и ячмень, и мед и масло. И мину их и не уби их посреде братий их. **9** И кладязь, в оньже вверже Исмаил вся, яже изби, сей кладязь

велик есть, егоже сотвори царь Аса, от лица Ваасы царя Израилева, сей наполни Исмаил убиенными. **10** И обрати Исмаил вся люди оставшыя в Массифафе и дщери царевы, яже вручил архимагир Годолии сыну Ахикамову, и взя их Исмаил сын Нафань: и отиде на ону страну сынов Аммоних. **11** И слыша Иоанан сын Кариев и вси воеводы силы, иже с ним, вся злая, яже сотвори Исмаил сын Нафаниев, **12** и приведоша вся воя своя и идяху воевати нань, и обретоша его при воде мнозе во Гаваоне. **13** И бысть, егда увидеша вси людие, иже со Исмаилом, Иоанана сына Кариева и вся воеводы силы, иже быша с ним, возрадовашася: **14** и возвратишася вси людие, ихже плени Исмаил от Массифы, и возвратившеся отидоша ко Иоанану сыну Кариеву. **15** Исмаил же уцеле со осмию мужи от лица Иоананя и иде ко сыном Аммоним. **16** И взя Иоанан и вси воеводы силы, иже с ним, вся оставшыяся люди, ихже возврати от Исмаила сына Нафаня из Массифафа, повнегда уби Годолию, сына Ахикамля, мужы сильны на рати, и жены, и останки, и каженики, ихже обрати от Гаваона, **17** и идоша, и седоша на земли Вирофоамли, яже ко Вифлеему, еже ити и внити во Египет от лица Халдейска: понеже убояшася от лица их: **18** яко уби Исмаил Годолию, егоже постави царь Вавилонский на земли Иудине.

**42** И приидоша вси воеводы силы, и Иоанан сын Кариев и Азариа сын Маасеев, и вси людие от мала и до велика **2** ко Иеремии пророку и рекоша ему: да падет молитва наша пред лицом твоим, и помолися о нас ко Господеви Богу твоему о оставшихся сих: яко остася мало нас от многих, якоже очи твои видят: **3** и да возвестит нам Господь Бог

твой путь, по нему же пойдем, и слово, еже сотворим. 4  
И рече им Иеремиа пророк: слышах: се, аз помолюся о  
вас Господеви Богу нашему по словесем вашим: и будет,  
слово, еже отвещает Господь, повем вам и не потаю от вас  
словесе. 5 Тии же рекоша Иеремии: буди Господь в нас  
послух правдив и верен, яко по всему слову, еже аще послет  
Господь к нам, тако сотворим: 6 аще добро и аще зло, гласа  
Господа нашего, к Немуже мы посылаем тя, послушаем, да  
лучше нам будет, яко послушаем гласа Господа Бога нашего.  
7 И егда скончашася десять дний, бысть слово Господне  
ко Иеремии. 8 И призва Иоанана сына Кариева и воеводы  
силы, иже с ним быша, и вся люди от мала и до велика,  
9 и рече им: тако рече Господь Бог Израилев, к Немуже  
посыласте мя, да простру молитвы ваша пред Ним: 10 аще  
седяще сядете на земли сей, то созижду вас, а не разорю, и  
насажду вас, а не исторгну, яко престах от зол, яже сотворих  
вам. 11 Не убойтесь от лица царя Вавилонска, егоже вы  
боитесь: от лица его не убойтесь, рече Господь: яко аз с  
вами есмь, еже избавляти вас и спасати вас от руки его:  
12 и дам вам милость и помилую вас и возвращу вас на  
землю вашу. 13 Аще же речете вы: не сядем на земли сей,  
еже не слышати гласа Господа Бога нашего, 14 глаголюще:  
никако, но в землю Египетску внидем, и не узрим рати, и  
гласа трубнаго не услышим, и о хлебех не взалчем, и тамо  
вселимся: 15 того ради слышите слово Господне, оставшии  
Иудины, тако рече Господь Вседержитель, Бог Израилев:  
аще вы дадите лице ваше во Египет и внидете тамо жити, 16  
и будет, мечь, егоже вы боитесь от лица его, обрящет вы  
во Египте, и глад, от негоже вы опасение имате от лица

его, постигнет вы вслед вас во Египте, и тамо измрете вы. 17 И будут вси мужие и вси иноплеменницы положившии лице свое на землю Египетску жити тамо, оскудеют голодом и мечем, и будет от них ни един спасаемь от зол, яже Аз наведу на ны. 18 Яко тако рече Господь Сил, Бог Израилев: якоже вскапа ярость Моя на живушья во Иерусалиме, тако вскаплет ярость Моя на вас, вшедшым вам во Египет: и будете в непроходимая и подручни, и в клятву и во укоризну, и не узрите ктому места сего. 19 Сия глагола Господь на вас оставшихся от Иуды: не входите во Египет. И ныне ведяще уведаете, яко засвидетелствовах вам днесь: 20 яко слукавновасте в душах ваших, пославше мя ко Господу Богу вашему, глаголюще: помолися о нас Господеви: и по всему, елико возглаголет тебе Господь Бог наш, тако возвести нам, и сотворим. 21 И возвестих вам днесь, и не послушасте гласа Господа Бога вашего во всем, егоже посла к вам: 22 и ныне ведуще ведайте, яко мечем и голодом и мором исчезнете на месте, на неже хотите ити жити тамо.

**43** И бысть, егда преста Иеремиа глаголя к людем вся словеса Господня, яже посла Господь к ним, 2 и рече Азариа сын Маасеев и Иоанан сын Кариев и вси мужие презорливии ко Иеремии, глаголюще: лжеша, не посла тя к нам Господь Бог наш глаголати: не входите во Египет жити тамо: 3 но Варух сын Нириин подущает тя на нас, да нас вдаси в руке Халдейсте уморити нас и превести нас в Вавилон. 4 И не послуша Иоанан и вси воеводы силы и вси людие (не послушаша) гласа Господня, еже жити на земли Иудине. 5 И взя Иоанан и вси воеводы силы вся оставшья Иудины, возвращенья от всех языков, аможе разсеяни быша, еже

жити на земли Иудине, 6 мужы сильныя и жены, и младенцы и дщери царевы, и души, яже остави Навузардан воевода силы со Годолием сыном Ахикамовым сына Сафанова, и Иеремию пророка, и Варуха сына Нириина, 7 и внидоша во Египет, яко не послушаша гласа Господня, и внидоша во Тафнасе. 8 И бысть слово Господне ко Иеремию во Тафнасе глаголя: 9 возми себе камни велики и скрый я пред враты дому фараоня во Тафнасе пред очима мужей Иудиных, и речеши к ним: 10 тако глаголет Господь Сил, Бог Израилев: се, аз послю и приведу Навуходоносора царя Вавилонска раба Моего, и поставит престол свой на камениих сих, ихже скрыл еси, и воздвигнет оружие свое на ня, 11 и внидет и поразит землю Египетску: ихже на смерть, на смерть, и ихже на преселение, на преселение, а ихже под мечь, под мечь: 12 и пожжет огнем дома богов их, и пожжет я, и преселит я, и покрывает землю Египетскую, якоже покрывается пастух ризою своею: и изыдет оттуду с миром 13 и сокрушит столпы Илиуполя, иже во Египте, и дома богов Египетских пожжет огнем.

**44** Слово бывшее ко Иеремию (от Господа) и ко всем Иудеем сущим в земли Египетстей и сидящим во Магдале и во Тафнасе, и во Мемфисе и в земли Пафурсте, глаголя: 2 тако глаголет Господь Бог Израилев: вы видесте вся злая, яже наведох на Иерусалим и на грады Иудины: и се, пусти суть ныне от живущих, 3 от лица злобы их, юже сотвориша разгневати Мя, ходяще кадити богом чуждим, ихже не ведесте вы сами и отцы ваши. 4 И послах к вам отроки Моя пророки заутра, и посылах я, глаголя: не творите дела осквернения сего, егоже возненавидех. 5 И не послушаша

Мене, ни приклониша уха своего обратитися от злб своих, еже не кадити богом инем. 6 И вскапа ярость Моя и гнев Мои и разгореся во вратех Иудиных и вне Иерусалима: и быша во опустение и в непроходимую до сего дне. 7 И ныне сице рече Господь Вседержитель, Бог Израилев: вскую вы творите злобы велики на души своя, еже иссеци вам мужы и жены, младенца и ссуцаго от среды Иуды, да не останется ни един от вас, 8 разгневати Мя в делех рук ваших, кадити богом инем в земли Египетстей, в нюже приидосте жити тамо, да иссечени будете и в проклятие да будете и на укориэну во всех языцех земли? 9 Еда забысте злобы отец ваших и злобы царей Иудиных, и злобы князей ваших и злобы ваша, и злобы жен ваших, яже сотвориша в земли Иудине и вне Иерусалима? 10 И не престаша даже до сего дне и не убояшася и не держяхуся законов Моих и повелений Моих, яже дах пред лицом вашим и пред очима отец ваших. 11 Того ради тако глаголет Господь Сил, Бог Израилев: се, Аз приставлю лице Мое на вы во зло, еже погубити вся люди Иудины: 12 и возму останки Иудины, иже поставиша лица своя, еже внити в землю Египетску и жити тамо, и исчезнут вси в земли Египетстей, и падут мечем и голодом, и исчезнут от мала даже до велика: и будут на укориэну и в пагубу и в проклятие: 13 и посещу на сидящих в земли Египетстей, якоже посетих на Иерусалим, мечем и голодом и смертию, 14 и не будет уцелевша ни единого же от оставших Иудиных, обитающих в земли Египетстей, еже возвратитися на землю Иудину, к нейже тии надеются душами своими возвратитися тамо: не возвратятся, разве избегшии. 15 И отвещаша Иеремии вси мужие разумеющии, яко кадят жены их богом

иным, и вся жены собор велик, и вси людие сидящи в земли Египетстей, в земли Пафурсте, глаголюще: **16** слово, еже глагола еси к нам во имя Господне, не послушаем тебе, **17** яко творяще сотворим всякое слово, еже изыдет из уст наших, кадити царице небесней и возливати ей возлияния, якоже сотворихом мы и отцы наши, и царие наши и князи наши во градех Иудиных и вне Иерусалима: и насытихомся хлебов, и благо нам бысть, и зла не видехом. **18** И егда престахом кадити царице небесней и возливати возлияния, оскудехом хлебы вси мы, и мечем и голодом скончахомся. **19** И егда кадихом мы царице небесней и возливахом ей возлияния, еда без мужей наших творихом ей опресноки и возливахом ей возлияния? **20** И рече Иеремиа всем людем сильным и всем женам и всем людем отвещавшим ему словеса, глаголя: **21** не каждение ли, еже кадите во градех Иудиных и внеуду Иерусалима вы и отцы ваши, и царие ваши и князи ваши и людие земли, помяну Господь, и взыде на сердце Его? **22** И не можаше Господь терпети ктому от лица злобы деяний ваших и от гнусностей, яже сотвористе: и бысть земля ваша во опустение и в непрохождение и в клятву, еже не быти живущым, якоже есть день сей, **23** от лица сих, имже кадите (идолом) и имиже согрешисте Господеви: и не послушасте гласа Господня, и в повелениих Его и в законе и во свидениих Его не ходисте, и постигнуша вы злая сия, якоже день сей. **24** И рече Иеремиа людем и женам: слышите слово Господне, весь Иуда, иже есте в земли Египетстей: **25** тако рече Господь Вседержитель, Бог Израилев, глаголя: вы и жены ваша усты вашими соглаголасте и руками вашими исполните, глаголюще: творяще сотворим исповедания



наша, яже обещахом кадити царице небесней и возливати возлияния ей: пребывающе пребысте во обетех ваших и творяще сотвористе я. 26 Того ради слышите слово Господне, весь Иуда, сидящие в земли Египетстей: се, кляхся именем Моим великим, рече Господь, аще будет кому имя Мое во устех всего Иуды, еже рещи, жив Господь Бог, во всей земли Египетстей. 27 Яко се, Аз возбудихся на ня озлобити их, а не благосотворити, и исчезнут весь Иуда живущии в земли Египетстей мечем и голодом, дондеже скончаются. 28 И уцелевшии от меча возвратятся на землю Иудину малым числом: и уведят оставшии Иудины, преселившиися в землю Египетску обитати тамо, слово чие пребудет, Мое, или их? 29 И сие вам знамение, глаголет Господь, яко посету Аз на вы на месте сем, да уведите, яко воистинну исполнятся словеса Моя на вас во злая. 30 Тако рече Господь: се, Аз предаю фараона Вафриа царя Египетска в руке врага его и в руке ищущих души его, якоже дах Седекию царя Иудина в руке Навуходносора царя Вавилонска врага его и ищущаго души его.

**45** Слово, еже глагола Иеремиа пророк к Варуху сыну Нириеву, егда вписа словеса сия в книгу от уст Иереминых, в четвертое лето Иоакима, сына Иосиина, царя Иудина, глаголя: 2 тако глаголет Господь Вседержитель о тебе, Варуше: 3 яко рекл еси: о, люте мне! О, люте мне! Яко приложи Господь труд к болезни моей, усдох с стенанием, покоя не обретох. 4 Рцы ему, сие глаголет Господь: се, яже Аз соградих, Аз разорю: и яже насадих Аз, исторгну, и всю землю Мою. 5 И Ты ли взыщещи себе великих? Не ищи: яко

се, Аз наведу злая на всяку плоть, глаголет Господь, и дам душу твою в корысть во всяцем месте, а може аще пойдеши.

**46** Слово, еже бысть ко Иеремии пророку от Господа на языки, **2** ко Египту противу силы фараона Нехао царя Египетскаго, иже бысть над рекою Евфратом во Кархамисе, егоже порази Навуходоносор царь Вавилонский, в лете четвертем Иоакима сына Иосиина, царя Иудина. **3** Возмите оружие и щиты и идите на брань, **4** оседлайте кони и вседайте, всадницы, и станите во шлемех ваших, уставите копия и облецытеся в броня ваша. **5** Что убо видех их страшливых и хребты обращающих? Крепцыи их избити, побегоша скоро и не озрешася вспять, отвсюду страх, глаголет Господь. **6** Не утечет легкий, ниже возможет избавитися крепкий на полунощь: близ реки Евфрата побеждени суть и падоша. **7** Кто есть той, иже яко река восходит, и яко реки воздвижутся волны его? **8** Воды Египта аки река взыдут, и аки река восколеблются воды его. И рече: взыду и покрыю землю, и погублю град и живуцья в нем. **9** Возсядите на кони и устройте колесницы, изыдите, сильнии Муринстии, и Ливиане вооруженнии щитами, и Лидяне, взыдите наляцающе лук. **10** День сей Господа Бога Вседержителя, день отмщения, да отмстит врагом Своим, и пожрет я мечь Господень и насытится и упиется кровию их, яко жертва Господу Вседержителю в земли полунощней, близ реки Евфрата. **11** Взыди в Галаад и возми ритину, дево, дщи Египетска! Всуе умножила еси врачевания твоя, и цельбы несть тебе. **12** Услышаша языцы глас, и плачь твой наполни землю: яко сильный сретеса с сильным, и оба вкупе изнемогоста и падоста. **13** Слово, еже глагола Господь ко Иеремии пророку

о сем: яко име приити Навуходоносор царь Вавилонский и поразити землю Египетску. 14 Возвестите Египту и разгласите во Магдалу, и возопийте во Мемфисе и во Тафнасе поведите: стой и уготовися, яко пожрет мечь сия, яже окрест тебе суть. 15 Почто убежа от тебе апис? Телец избранный твой не пребысть, яко Господь разруши его. 16 И множество твое изнеможе и паде, и кийждо ко ближнему своему глаголаху: востаним и возвратимся к людем нашим и в землю рождения нашего от лица меча Еллинскаго. 17 Назовите имя фараона Нехао царя Египетска, смятение преведе время. 18 Живу Аз, глаголет Царь, Господь Вседержитель имя Его: ибо, якоже Фавор на горах и якоже Кармель в мори, приидет. 19 Сосуды пленения сотвори себе, живущая дщи Египетска, яко Мемфис в запустение будет, и наречется, увы! И не будут в нем жити. 20 Юница (избранна и) украшена Египет, разорение от полунощи прииде на ню, 21 и наемницы его, живущии посреде его, якоже телцы тучнии питаеми в нем: зане и тии обратишася и побегоша вкупе, и не могоша стати, яко день погибели их прииде на ня и время отмщения их. 22 Глас их, якоже змиа звиздающаго, понеже с силою пойдут, со секирами приидут на него. 23 Яко дровие секуще посекут лес его, глаголет Господь Бог: ибо не может сочтен быти, яко умножишася паче пругов, и несть им числа. 24 Посрамленна есть дщи Египетска и дана в руке людем полунощным. 25 Рече Господь Вседержитель, Бог Израилев: се, Аз посещу на Аммона сына ея, и на фараона и на Египет, и на боги его и на цари его, и на фараона и на уповающыя на нь, 26 и дам их в руке ищущих души их, и в руку Навуходоносора царя Вавилонска, и в руке слуг его: и посем поживут якоже и

первее, глаголет Господь. 27 Ты же не убойся, рабе мой Иакове, ни устрашайся, Израилю: се бо, Аз тебе спасена сотворю издапча и семья твое от земли пленения их: и возвратится Иаков и почиет и благоуспеет, и не будет устрашай его. 28 Не бойся, рабе Мой Иакове, глаголет Господь, яко с тобою есмь Аз: яко сотворю скончание во всех языцех, в няже извергох тя, тебе же не сотворю оскудети, но накажу тя судом и обезвиня не обезвиню тя.

**47** Слово Господне, еже бысть ко Иеремии пророку на иноплеменники, прежде нежели порази фараон Газу. 2 Тако глаголет Господь: се, воды восходят от севера и будут яко поток наводняй, и потопят землю и исполнение ея, град и живущыя в нем: и возопиют людие и восплачутся вси живущии на земли, 3 от шума устремления его, от оружия ног его и от гремения колесниц его и от звука колес его: не обратишася отцы ко сыном своим, опустивше руце свои, 4 в день находящъ, еже погубити вся иноплеменники: и разорю Тир и Сидон со всеми прочими помощники их, яко истребит Господь Филистины, останки островов Каппадокийских. 5 Прииде плешь на Газу, отвержен бысть Аскалон и останцы енакимли. 6 Доколе сещи будеши, о, мечу Божий! Доколе не упокоишися? Вниди в ножны твоя, почий и вознесися. 7 Како упокоится? Понеже Господь заповеда ему на Аскалона и на сущыя при мори, на прочыя востати.

**48** О Моаве тако рече Господь Вседержитель, Бог Израилев: о, люте Нававу, яко погибе, взяся Кариафаим, посрамися Масигаф и побежден есть. 2 Нестъ ктому целение в Моаве, веселие во Есевоне, помыслиша нань злая: приидите и потребим я от язык: (сего ради) молча умолкнеши, пойдет

за тобою мечь. 3 Глас вопля от Оронаима, погубление и сотрение велико. 4 Сотресе Моав, возвестите вопль малых его. 5 Яко исполнися Алаоф плача: взыдет рыдая путем Оронаима, врази, вопль сотрения слышасте. 6 Бежите и спасите души ваша, и будете яко осел дивий в пустыни. 7 Понеже имел еси надежду во оградах твоих и в сокровищих твоих, и ты ят будеши: и пойдет Хамос во преселение, и священницы его и князи его вкупе. 8 И приидет губитель на всяк град, и не избавится ни един град, и погибнут удолия, и погубятся поля, якоже рече Господь. 9 Дайте знамение Моаву, яко прикосновением прикосновен будет, и вси гради его будут пусти и без живущих. 10 Проклят (человек) творяй дело Господне с небрежением, и проклят возбраняяй мечу своему от крове. 11 Почиваше Моав от младости своя и бе уповая на славу свою: не прелияся от сосуда в сосуд и во преселение не отиде: сего ради пребысть вкус его в нем, и воня его несть пременена. 12 Сего ради, се, дние грядут, глаголет Господь, и послю ему преселители, и преселят его, и сосуды его истощат и роги его сокрушат: 13 и посрамится Моав от Хамоса, якоже посрамлен есть дом Израилев от Вефиля, в немже имяху надежду. 14 Какое глаголете: сильни есмы и мужие крепцы во бранех? 15 Погибе Моав, град его, и избраннии юноши его снидоша под мечь, глаголет Царь, Господь Вседержитель имя Его. 16 Близ день Моавль, еже приити, и зло его скоро зело. 17 Утешайте его вси, иже окрест его, и вси ведящии имя его: рцыте, како сокрушися жезл крепости, палица славна? 18 Сниди от славы и сяди, во влаге живущая, дщи Дивоня, яко губитель Моавский взыдет на тя разрушаяй ограды твоя. 19 На пути стани и воззри,

живущая во Ароире, и вопросы бежащего и избегшаго, и рцы: что се бысть? 20 Посрамися Моав, зане побежден есть: рыдайте и вопийте, возвестите во Арноне, яко погиге Моав, 21 и суд прииде на землю напольную, на Хелон и на Рефас и на Мофаф, 22 и на Девон и на Наво и на дом Девлафаим, 23 и на Кариафаим и на Вефгамул и на дом Маонов, 24 и на Кариоф и на Восора и на вся грады Моавли, иже далече и иже близ суть. 25 Отсечен есть рог Моавль, и мышца его сокрушился, глаголет Господь: 26 упойте его, яко на Господа возвеличися, и приразит Моав руку свою (о блевотину), и будет в посмех и сам. 27 И аще не в посмех бысть тебе Израиль, аще в татстве твоём обретесе, яко воевал еси его: преселишися инамо. 28 Оставьте грады и пребывайте на камени, живущии в Моаве, и будите якоже голуби гнездящиися в каменех, во устех скважни. 29 Слышахом гордость Моавлю, горд бе зело: презорство его и кичение его, возношение и воздвижение сердца его. 30 Аз же вем дела его, глаголет Господь: не доволство ли его тако сотвори? 31 Сего ради над Моавом възрыдайте всюду, възопийте над мужи Кирады смущения. 32 Яко плачем Иазировым восплачуся о тебе, винограде Асеримль! Леторасли твоя проидоша море, градов Иазировых коснушася, на жатву твою и на винное собрание твое хищник нападе. 33 Отята есть радость и веселие от Кармила и от земли Моавли, и вино от точил отях: никакоже изгнетаяй винну ягоду по обычаю песни восплет. 34 От вопля Есевонска даже до Елеала и Иаса грады их даша глас свой, от Сигора даже до Оронаима, и юница трилетная, понеже и воды Немрим во сожжение будут. 35 И отиму Моава, глаголет Господь,

жрущаго на горах и кадящаго богом своим. 36 Того ради сердце Моава, яко цевницы звяцати будут, и сердце мое к мужем Кирады яко цевница звяцати будет: сего ради, яже пристяжа, погибоша от человек. 37 Всяка бо глава на всяцем месте острижена будет, и всяка брада оброснется, и всяка рука посечена будет, и на всяцем чресле вретище, 38 и на всех храминах Моавских и на стогнах его всяк плачь, понеже сокруших Моава, якоже сосуд непотребен, глаголет Господь. 39 Как изменися? Возрыдаша, како обрати хребет Моав и посрамися? И бысть Моав в посмех и в ненависть всем окрест себе. 40 Яко тако глаголет Господь: се, якоже орел полетит и распрострет криле свои на Моава, 41 взят есть Кариоф, и ограды его обстоимы суть: и будет сердце сильных Моавских в той день, яко сердце жены родящая. 42 И погибнет Моав от людей, яко на Господа возвеличися. 43 Страх и пропасть и сеть на тя, о, живущий в Моаве, глаголет Господь. 44 Иже убежит от лица страха, впадет в пропасть: и излазяй из пропасти имется сетью: понеже наведу сия на Моава в лето посещения их, глаголет Господь. 45 Во стени Есевонстей сташа от силы избегше, огонь бо изыде от Есевона и пламень от среды Сеона, и пожже часть Моава и верх сынов смятения. 46 Горе тебе, Моаве! Погибоша людие Хамоса, яко отведошася сынове твои и дщери твоя в плен. 47 И возвращу плен Моавль в последния дни, глаголет Господь. До zde суд Моавль.

**49** К сыном Аммоним тако глаголет Господь: еда не суть сынове Израилевы, или наследника несть им? Почто убо прия наследие Мелхом Гада, и людие его во градех его живяху? 2 Сего ради, се, дние грядут, глаголет Господь, и

оглашу на Равваф сынов Аммоних ратный звук, и будет в непроходная и в пагубу, и требища его огнем сожжена будут, и восприимет Израиль власть свою, глаголет Господь.

3 Возопий, Есевоне, яко погибе Гай: возопийте, дщери Раввафски, препояшители вретницами, рыдайте и бегайте по забралом, яко Мелхом во плен отведется, священницы и князи его вкупе.

4 Что хвалишиися во удолиях? Стече удолие твое, дщи безстудная, уповающая на богатства своя, глаголющи: кто приидет на мя?

5 Се, Аз наведу на тя страх, глаголет Господь Вседержитель, от всех сущих окрест тебе: и рассеется вси от лица его, и не будет собирающего бежащих.

6 И посем возвращу пленники сынов Аммоних, глаголет Господь.

7 Ко Идумеи сия глаголет Господь Вседержитель: еда есть ктому мудрость во Фемане? Погибе совет от разумных, непотребна бысть мудрость их,

8 попрано бысть место их: снесите в пропасть к седению, живущии во Дедане: яко жестокая сотвори: (погибель Исавлю) наведох нань во время, в неже посетих его.

9 Яко оымателие вина приидоша на тя, не оставят тебе останков: аки татие в нощи возложат руки своя.

10 Яко (Аз) обнажих Исаву, открытых тайная его, не возможет утаитися, погибе рукою брата своего и соседа своего,

11 и несть остатися сироте твоей, да живет: Аз же сотворю жити, и вдовицы на Мя уповаша.

12 Тако бо глаголет Господь: се, имже не бе закона пити чашу, пьюще испиют: и ты ли аки неповинный останешися? Не будеши неповинен, но пия испиеша.

13 Собою бо кляхся, глаголет Господь, яко в пустыню и в поругание и в посмех и в проклятие будеши посреде его, и вси гради его будут в пустыню вечную.

14 Слух слышах от Господа, и послов во



языки посла: соберитесь и идите противу ему и встаните на ополчение. 15 Се, мала дах ты во языцех и поругаема в людех. 16 Игранице твое прельсти ты, безстудие сердца твоего обиташе в раселинах каменных, похити крепость холма високаго: егда вознесеша яко орел гнездо свое, оттоле свергу ты, глаголет Господь. 17 И будет Идумеа в запустение, всяк ходяй чрез ню подивится и позвиждет над всякою язвою ея. 18 Якоже превращена есть Содома и Гоморра и соседи ея, глаголет Господь, не поживет тамо муж, ниже пребудет тамо сын человек. 19 Се, якоже лев изыдет от среды Иордана на место сильного, яко скоро сотворю им бежати от него, и кто будет избран, егоже поставлю над ним? Кто бо подобен Мне? И кто противостанет Ми? И кто есть сей пастырь, иже сопротивится лицу Моему? 20 Сего ради слышите совет Господень, егоже совещаша на Едома, и умышление Его, еже умысли на живущих во Фемане, не свергнут ли их малая от стад, и не разметано ли будет на них жилище их? 21 От гласа бо падения их потрясется земля, и вопль на мори Чермнем слышася гласа их. 22 Се, яко орел взыдет и возлетит и прострет криле свои над твердыньми его: и будет сердце сильных Идумейских в той день, яко сердце жены родящая. 23 К Дамаску: посрамися Емаф и Арфаф, яко слух зол слышаша, ужасошася, возмутишася на мори, (за попечение) упокоитися не могут. 24 Расторжеся Дамаск, обратися на бегание, трепет объят и, скорбь и болезнь одержаша его яко раждающую. 25 Како не оставиша града славнаго, крепости любезныя? 26 Сего ради падут юноши на стогнах твоих, и вси мужие воинстии падут в той день, глаголет Господь Вседержитель. 27 И возжгу огонь

на стене Дамаска, и пожжет стены сына Адерова. 28 К Кидару, царице двора, егоже порази Навуходоносор царь Вавилонский, тако глаголет Господь: востаните и взыдите на Кидар и погубите сыны восточныя. 29 Селения их и стада их возмут: одежды их и вся сосуды их и вельблюды их возмут себе, и призовут на ня страх окрест. 30 Бежите и отидите вскоре, в пропастьех сядите, живущии во дворе, глаголет Господь: яко совеща на вы Навуходоносор царь Вавилонский совет и помысли на вас умышление. 31 Востаните и внидите к людем упокоеным, живущым в прохладе, глаголет Господь: иже ни дверей, ниже заворов имут, едины обитают. 32 И будут вельблюды их в расхищение и множество скота их в разграбление, и развею я всяким ветром остриженных окрест, и от всех окрестных их приведу на ня погибель, глаголет Господь. 33 И будет двор в жилище змием и пуст даже до века, не поживет тамо муж, ниже будет живяй в нем сын человек. 34 Слово Господне, еже бысть ко Иеремии пророку на Елам, в начале царства Седекии царя Иудина, глаголя: 35 тако глаголет Господь Вседержитель: се, аз сокрушу лук Еламль, начало силы их, 36 и наведу на Елам четыре ветры от четырех стран небесных и развею я во вся ветры тыя, и не будет языка, в оньже бы не пришли бежации Еламитяне. 37 И устрашу их пред враги их и пред лицом ищущих души их, и наведу на ня злая, по гневу ярости Моея, глаголет Господь: и пошлю вслед их мечь Мой, дондеже сотру их: 38 и поставлю престол Мой во Еламе, и иждену оттуду царя и князи, глаголет Господь: 39 и будет в последния дни, возвращу плен Еламль, глаголет Господь.

**50** Слово, еже рече Господь на Вавилон и на землю Халдейскую Иеремию пророком. **2** Возвестите во языцех и слышано сотворите, воздвигните знамение, возопийте и не скрывайте, рцыте: пленен бысть Вавилон, посрамися Вил, победися Меродах, посрамишася изваяния его, сокрушишася кумиры их. **3** Яко прииде нань язык от севера, той положит землю его в запустение, и не будет живяя в ней от человека даже и до скота: подвигнушася, отидоша. **4** В тыя дни и в то время, глаголет Господь, приидут сынове Израилевы, тии и сынове Иудины вкупе ходяще и плачуще пойдут и Господа Бога своего възыщут. **5** Во Сион испытают стези, тамо бо обративше лица своя приидут и приложатся ко Господу заветом вечным, иже забвению не предастся. **6** Овцы погибшыя быша людие Мои, пастырие их совратиша их и сотвориша я крытися по горам: с горы на холм ходиша. **7** Забыша ложа своего, вси обретающии их снедаху их, и врази их рекоша: не пощадим их, зане согреша Господу, пажить правды, собирающему отцев их Господу. **8** Отидите от среды Вавилона и от земли Халдейски изыдите, и будите яко козлища пред овцами. **9** Яко се, Аз воздвигну и приведу на Вавилон собрания языков великих от земли полунощныя, и ополчатся нань: оттуду пленен будет, якоже стрела мужа сильна искусна и возвратится праздна. **10** И будет земля Халдейска в разграбление, вси грабители ея наполнятся глаголет Господь: **11** зане веселистесе и велеречивасте, расхищающе наследие Мое, скакасте бо яко телцы на траве и бодосте якоже волы. **12** Поругана бысть мати ваша зело, и посрамися родившая вас: се, последняя во языцех пуста и непроходна и суха. **13** От гнева Господня не поживут во век:

но будет весь в запустение, и всяк ходяй сквозе Вавилон подивится и позвиждет над всякою язвою Его. 14 Ополчитесь на Вавилон, вси окрестнии наляцающи лук, стреляйте нань, не щадите стрел ваших, понеже пред Господем согреши, 15 возьмите его: ослабеша руце его, падоша основания его, сокрушишася забрала его, яко месть Господня есть: отмстите ему, якоже сотвори, сотворите ему: 16 потребите семя от Вавилоня, и держащаго серп во время жатвы от лица меча Еллинска, кийждо к людем своим обратится, и кийждо в землю свою убежит. 17 Овча заблуждающее Израиль, львоуе изнуриша е: первее яде его царь Ассур, сей же последний и кости оглода ему Навуходоносор царь Вавилонский. 18 Сего ради тако глаголет Господь Вседержитель, Бог Израилев: се, аз посещу на царя Вавилонска и на землю его, якоже посетих на царя Ассурска, 19 и возведу паки Израиля на пажить его, и упасется в Кармиле и Васане, и в горе Ефремли и в Галааде, и насытится душа его. 20 В тыя дни и в той час, глаголет Господь, поищут неправды Израилевы, и не будет, и грехов Иудиных, и не обрящутся: яко милостив буду им оставшымся. 21 На землю владеющих възиди и на живущих в ней посети, разори и убий сущыя по них, глаголет Господь, и сотвори вся, елика заповедаю тебе. 22 Глас брани и сотрение велико в земли Халдейстей. 23 Как сокрушился и сотресе млат всея земли? Как обратися в пустыню Вавилон во языцех? 24 Въздут на тя, и пленен будеши, и не познаеши, яко Вавилон еси: обретен и ят еси, понеже разгневал еси Господа. 25 Отверзе Господь сокровища Своя и изнесе сосуды гнева Своего, яко дело есть Господу Вседержителю в земли Халдейстей: 26 яко приидоша

времена его: отверзите хранилища его и испытайте и, аки вертеп, и погубите его, да не будет останка его. 27 Изсушите вся плоды его, и да снидут в закляние: горе им, яко прииде день их и час отмщения их. 28 Глас бежащих и избегших от земли Вавилонския, да возвестят в Сионе отмщение Господа Бога нашего, отмщение храма Его. 29 Возвестите на Вавилон многим, всем наляцающим лук, ополчитесь нань окрест: да не убежит ни один из него: воздайте ему по делом его, по всему, елика сотвори, сотворите ему, яко воста на Господа Бога Святаго Израилева. 30 Сего ради падут юноши его на стогнах его, и вси мужие воинстии его низвержени будут в той день, глаголет Господь. 31 Се, аз на тя, горде, глаголет Господь Бог Вседержитель, яко прииде день твой и час посещения твоего: 32 и падет гордыня твоя и разрушится, и не будет возставляяй ю: и возжгу огонь в дубраве его, и пояст вся окрестная его. 33 Тако глаголет Господь Вседержитель: порабощение терпят сынове Израилевы и сынове Иудины, вкупе вси пленившии их поработиша их, не хошут бо отпустить их. 34 Избавитель же их сильный, Господь Вседержитель имя Ему, судом судити имать супостаты своя, яко да избавит землю, и потрясет жителями Вавилонскими. 35 Мечь на Халдеев, глаголет Господь, и на жители Вавилонския, и на князи и на мудрыя его, 36 мечь на обаятели его, и буии будут, и мечь на сильныя его, и ослабеют: 37 мечь на кони его и на колесницы его, и на вся прочыя люди, иже суть посреде его, и будут яко жены: мечь на сокровища его, и расхитятся: 38 мечь на воды его, и постыдятся, яко земля изваянных есть, и во островех хваляхуся. 39 Сего ради поживут мечты во островех, и

поживут в нем дочери сиринов, и не будет живуща в нем ктому во веки, ниже соградится от рода в род. 40 Якоже преврати Господь Содома и Гоморра и окрестныя грады их, глаголет Господь, не пребудет тамо муж, ниже поживет в нем сын человек. 41 Се, людие идут от севера, и язык велик, и царие мнози востанут от конец земли, 42 луки и щиты имуще, грозни суть и немилостиви: глас их яко море возшумит, на кони возсядут, уготовани якоже огонь на брань противу тебе, дщи Вавилоня. 43 Услыша царь Вавилонский слух их, и ослабеша руце его, скорбь объят его и болезни, яко раждающую. 44 Се, яко лев изыдет от рыкания Иорданова на место Ефана, яко скоро отмщу их от него, и всякаго юношу над ним поставлю. Кто бо подобен Мне? И кто может стояти противу Мене? И кто есть пастырь сей, иже воспротивится лицу Моему? 45 Темже слышите совет Господень, егоже совеща на Вавилон, и умышления Его, яже умысли на землю Халдейску: аще не исторгнутся агнцы овец их, аще не будет разметана (вкупе с ними) пажить их. 46 От гласа бо пленения Вавилонскаго потрясется земля, и вопль во языцех слышан будет.

**51** Тако глаголет Господь: се, Аз воздвигну на Вавилон и на живущыя Халдеи ветер зноен губителный: 2 и пошлю на Вавилон ругатели, и студно поругаются ему и истлят землю его: понеже горе на Вавилон окрест в день озлобления его. 3 Да наляцает наляцаяй лук свой, и да облечется в броня своя, и не пощадите юнош его, и побийте все воинство его. 4 И падут избиеннии в земли Халдейстей и язвеннии во странах ея. 5 Понеже не овдове Израиль и Иуда от Бога Своего, от Господа Вседержителя, яко земля их

наполнися неправды от Святых Израилевых. 6 Бежите от среды Вавилона и спасите кийждо душу свою и не погибнете в неправде его, зане время отмщения его есть от Господа, воздаяние Той воздаст ему. 7 Чаша золотая Вавилон в руке Господни, напаяющи всю землю, от вина его пища (вси) языцы, сего ради потрясошася. 8 Внезапу паде Вавилон и сокрушися: плачите по нем, возьмите масти к болезни его, да изцелится. 9 Врачевахом Вавилона, и не изцеле: оставим его и отидем кийждо в землю свою, взыде бо к небеси суд его и воздвижеся даже до звезд. 10 Изнесе Господь суд Свой: приидите и возвестим в Сионе дела Господа Бога нашего. 11 Наострите стрелы, наполните тулы: воздвиже Господь дух царей Мидских, яко противу Вавилона гнев Его, да погубит и, понеже отмщение Господне есть, отмщение людей Его. 12 На стенах Вавилонских воздвигните знамя, поставите стражи, уготовите стражей, уготовите оружие: яко умысли Господь, и сотворит, яже рече на живущия в Вавилоне, 13 живой над водами многими и богат в сокровищих своих: прииде конец твой истинно во утробы твоя. 14 Клятсся бо Господь Сил мышцею Своею, яко наполню тебе людьми, якоже акридами, и возгласят над тобою низходящими. 15 Господь сотворивый землю в силе Своей и устроивый вселенную в мудрости Своей, и разумением Своим распростре небеса, 16 егда Он даст глас, умножатся воды на небеси, воздвизаяй облаки от конец земли, молнию в дождь сотвори, изводяй свет от сокровищ Своих. 17 Обуя всяк человек от разума, посрамися всяк слиятель от изваяний своих, яко ложная слияния его, и несть духа в них: 18 суетна суть дела и смеху достойна, в час посещения своего погибнут. 19 Не

такова часть Иаковля, яко Сотворивый всяческая Той есть, (а Израиль) жезл достояния Его, Господь Вседержитель имя Его. 20 Сокрушаеши ты Мне сосуды бранныя, и Аз сокрушу в тебе языки и погублю в тебе царствия: 21 и избью в тебе кони и всадники их, и избью в тебе колесницы и вседающих на них: 22 и избью в тебе мужа и жену, и избью в тебе стара и отрока, и избью в тебе юношу и деву: 23 и избью в тебе пастыря и стада его, и избью в тебе орюща и работна скота его, и избью в тебе воеводы и правители. 24 И воздам Вавилону и всем жителем Халдейским вся злобы их, яже сотвориша над Сионом пред очима вашима, глаголет Господь. 25 Се, Аз на тя, горо смертоносная, глаголет Господь, растлевающая всю землю, и простру руку Мою на тя и извергу тя из камней, и дам тя в гору сожженую: 26 и не возмут от тебе камене во угл и камене во основание, яко потребишися во веки, глаголет Господь. 27 Воздвигните знамя на земли, вострубите трубою во языцех, освятите нань языки, возвестите нань царствам Араратским от Мене и Асханазеом: утвердите над ним стрельницы, возведите нань кони, яко акридов множество. 28 Возведите нань языки, царя Мидска и всея земли, воевод его и всех воев его и всея земли области его. 29 И потрясеся земля и смутися, зане воста на Вавилон умышление Господне, еже положить землю Вавилонску пусту и ненаселену. 30 Оскудеша крепцыи Вавилонстии еже ратовати: сядут тамо во ограде, погибе храбрость их, и быша яко жены: пожжена суть селения, сотрены заворы его. 31 Гоняй во сретение текуща постигнет, и вестник сретит посла, да возвестит царю Вавилонску, яко взят бысть град его. 32 От края прехождений его яти быша, и



твердыни его зажжены огнем, и мужие его воинстии исходят.

**33** Тако бо глаголет Господь Вседержитель, Бог Израилев: домове царя Вавилонскаго яко гумно зрело измлачени будут: еще мало, и приидет жатва его. **34** Снеде мя, раздроби мя, прият мя тма тонка, Навуходоносор царь Вавилонский пожре мя, яко змий наполни чрево свое сладостию моею: и извергоша мя. **35** Труды мои и беды моя на Вавилон, речет живущая в Сионе, и кровь моя на живущыя в Халдеех, речет Иерусалим. **36** Сего ради тако глаголет Господь: се, аз судити буду соперника твоего и отмщу отмщение твое, и пусто сотворю море его и изсушу потоки его. **37** И будет Вавилон в запустение, жилище змием, в чудо и позвиздание, понеже не будет живущаго. **38** Вкупе аки львы востанут и аки скимни львов. **39** В горячести их дам питие им и упою я, да спят и уснут сном вечным и не востанут, глаголет Господь.

**40** И низведу я яко агнцы на заклание и яко овны с козлы.

**41** Како взяся Сесах, и ята слава всея земли? Како бысть во удивление Вавилон во языцех? **42** Взыде на Вавилон море в шуме волн своих, и покрыся. **43** Быша гради его в запустение, земля безводна и пуста, земля, в нейже никтоже поживет, и ниже будет витати в нем сын человек. **44** И посещу на Вила в Вавилоне, и извергу то, еже поглоти, от уст его, и не соберутся вящше к нему языцы, зане и стены Вавилонския падут. **45** Изыдите от среды его, людие Мои, да спасет кийждо душу свою от гнева ярости Господни.

**46** Да не когда умягчится сердце ваше, и убоитесь ради слуха, иже услышится на земли, и приидет в лето слышание, и по лете слышание, бедность и неправда на землю, и властелин на властелина. **47** Сего ради, се, дние грядут, и

посещу на изваяния Вавилона: и вся земля его посрамится, и вси язвении его падут посреде его. 48 И возвеселятся над Вавилоном небеса и земля и вся сущая в них: от полунощи бо приидут нань всегубителие, глаголет Господь: 49 и якоже сотвори Вавилон падати язвеным во Израили, тако в Вавилоне падут язвении всея земли. 50 Избегшии меча, идите, не стойте: иже издалече, помяните Господа, и Иерусалим да възидет на сердце ваше. 51 Посрамихомся, зане слышахом ругание наше, покры срамота лице наше, яко приидоша чуждии во святая наша в дом Господень. 52 Сего ради, се, дние грядут глаголет Господь, и посету на изваяния его, и по всей земли его падут язвении. 53 Яко аще възидет Вавилон на небо и аще утвердит на высоте крепость свою, от Мене приидут губителие его, глаголет Господь. 54 Глас вопля Вавилонска, и сотрение велико в земли Халдейстей: 55 яко погуби Господь Вавилона и сотре от него глас велий шумящъ яко воды многи, даде в пагубу глас его: 56 яко прииде на Вавилон хищник, яти быша сильнии его, увяде лук их, яко Бог воздает им, 57 Господь воздает ему воздаяние: и упоит князи его и мудрыя его, и воеводы его и вои его и сильныя его, и уснут сном вечным и не возбудятся, глаголет Царь, Господь Вседержитель имя Его. 58 Тако глаголет Господь Вседержитель: стена Вавилонска сия преширока, подкопанием подкопана будет, и врата его высока огнем сожжена будут, и будут трудитися людие вотще, и языцы в начале погибнут. 59 Слово, еже заповеда Господь Иеремии пророку, рещи Сарейю сыну Нириину, сына Маассеова, егда иде от Седекии царя Иудина в Вавилон, в четвертое лето царства его: Сарей же бе начальник даров. 60 И написа

Иеремиа вся злая, яже имяху приити на Вавилон, во едину книгу вся словеса сия, яже писана суть на Вавилон. И рече Иеремиа к Сарю: **61** егда внидеши в Вавилон, и узриши и прочтеши вся словеса сия, и речеши: **62** Господи, Ты рекл еси противу места сего погубити е, и да не будет живяй в нем от человека и до скота, и да будет в вечную пустыню: **63** и будет, егда прочтеши книгу сию, привяжи к ней камень и вверзи ю посреде Евфрата и рцы: **64** тако потопится Вавилон и не востанет от лица зол, яже Аз наведу на нь, и разорится. Даже до зде словеса Иеремиина.

**52** Сущу двадесяти и единому лету Седекии, внегда нача царствовати, и царствова во Иерусалиме едионадесять лет: и имя матери его Амиталь, дщи Иеремиина, от Ловны. **2** И сотвори лукавое пред очима Господними по всему, елико творяше Иоаким: **3** яко ярость Господня бысть на Иерусалим и на Иуду, дондеже отверже их от лица Своего: и отступи Седекиа от царя Вавилонска. **4** И бысть в девятое лето царства его, в десятый месяц, в десятый день месяца, прииде Навуходоносор царь Вавилонский и вся сила его на Иерусалим, и облегоша его и сотвориша окрест его острог от четвероугольных камней. **5** И бысть во облежении град даже до первагонадесяте лета царства Седекиина. **6** Месяца же четвертаго в девятый день, утвердися глад во граде, и не бяше хлеба людем земли. **7** И просекоша град, и вси мужие воинстии изыдоша нощию путем врат, иже есть между двема стенама, иже бяше прямо вертограду цареву, Халдее же добываху град окрест лежаще, и отидоша путем в пустыню. **8** И погна сила Халдейска вслед царя и постиже его об ону страну Иерихона, и вси отроцы его разсыпашася от

него. 9 И яша царя и приведоша и ко царю Вавилонскому в Девлаф, иже есть в земли Емаф, и глагола ему с судом. 10 И изсече царь Вавилонский сыны Седекиины пред очима его, и вся князи Иудины изсече в Девлафе. 11 Очи же Седекии изят, и связа его оковами, и приведе его царь Вавилонский в Вавилон и вдаде его в дом жерновный до дне, в онже умре. 12 В десятый же день пятого месяца (лето сие девятнадцать Навуходоносору царю Вавилонску) прииде Навузардан архимагир, стоящъ пред лицом царя Вавилонска, во Иерусалим, 13 и сожже храм Господень и дом царев, и вся дома градския и всяк дом велик сожже огнем, 14 и всяку стену Иерусалимлю окрест разори сила Халдейска, яже бяше со архимагиром. 15 И от убогих людей, и останок людей, и оставшихся во граде и избегших, иже убежаша ко царю Вавилонску, и прочий народ пресели Навузардан воевода: 16 прочиих же остави людей убогих в делатели винограда и земледелцев. 17 Столпы же медяныя, иже во храме Господни, и подставы, и море медяное, еже во храме Господни, сокрушиша Халдее, и взяша медь их, и отнесоша в Вавилон: 18 и венец и чашы, и вилицы и вся сосуды медяныя, в нихже служажу, 19 и фимиамники и чашы, и умывалницы и свещники, и кадилницы и чашицы, яже бяху златая и яже бяху серебряная, взя архимагир. 20 И столпа два и море едино, и телцев дванадесять медяных под морем, яже сотвори царь Соломон во храме Господни, не бе веса меди сосуд тех. 21 Столп же кийждо осминадесяти лактей бе в высоту, вервь же дванадесяти лактей окрест его обдержаше, и толстота его четырех перст окрест, 22 и глава на них медяна, пять лакот высота главы единыя, и мрежа, и

шипки на венце окрест, все бяше медяно: такожде бысть и второй столп. 23 И бяше шипков девятыдесят и шесть едина страна, и бяше всех шипков над мрежею окрест сто. 24 И взя архимагир Сареа жерца старейшаго и жерца Софонию втораго и триех стрегущих путь. 25 И от града взя каженика единаго, иже бе приставник людий воинских, и седмь мужей нарочитых, иже пред лицом царевым обретошася во граде, и книгочия сил учащаго людий земли, и шестьдесят мужей от людий земли, иже обретошася среде града: 26 и взя их Навузардан архимагир и приведе я ко царю Вавилонску в Девлаф. 27 И изби я царь Вавилонский в Девлафе в земли Емаф: и преселен бысть Иуда от земли своея. 28 Сии суть людие, ихже пресели Навуходоносор в седмое лето, Иудеев три тысяцы и двадесять и три: 29 во осмоенадесять лето Навуходоносор из Иерусалима душ осмь сот тридесять и две пресели. 30 В двадесять третие лето Навуходоносора пресели Навузардан архимагир Иудеев душ седмь сот и четыредесять пять, всех же душ четыре тысяцы и шесть сот. 31 И бысть в тридесять седмое лето преселения Иоакима царя Иудина, в двадесять пятый день месяца вторагонадесять, вознесе Евилмеродах царь Вавилонский в первое лето царства своего главу Иоакима царя Иудина, и изведе его из храма, в немже стрежашеся, и глагола ему благая: 32 и даде престол его выше царей, иже с ним, в Вавилоне, 33 и измени ризы его темничныя, и ядыше хлеб всегда пред лицом его во вся дни живота своего: 34 и урок ему даяшеся всегда от царя Вавилонска, даже до дне, в оньже умре, во вся дни живота его.

# Плач Иеремии

**1** Алеф. Како седе един град умноженный людьми: бысть яко вдовица, умноженный во языцех, владая странами бысть под данию. **2** Беф. Плача плакася в нощи, и слезы его на ланитех его, и несть утешаяй его от всех любящих его: вси дружащиися с ним отвергошася его, быша ему врази. **3** Гимель. Преселися Иуда ради смирения своего и ради множества работы своея: седе во языцех, не обрете покоя. Вси гонящи его постигнуша и среде стужающих ему. **4** Далеф. Путие Сиони рыдают, яко несть ходящих по них в праздник, вся врата его разорена, жерцы его въздыхают, девицы его ведомы, и сам огорчеваемь в себе. **5** Ге. Быша стужающи ему во главу, и врази его угобзишася, яко Господь смири его за множество нечестия его: младенцы его отидоша пленени пред лицом стужающаго. **6** Вав. И отяся от дщере Сиони вся лепота ея: быша князи ея яко овни не имущии пажити, и хождуху не с крепостию пред лицом гонящаго. **7** Заин. Помяну Иерусалим дни смирения своего и отринувений своих, вся вожеления своя, яже имейше от дний первых, егда падоша людие его в руке стужающаго, и не бе помагающаго ему: видевше врази его посмеяшася о преселении его. **8** Иф. Грехом согреши Иерусалим, того ради в мятеж бысть: вси славящи его смириша и, видеша бо срам его: сей же стеньць обратися вспячь. **9** Теф. Нечистота его пред ногама его, не помяну последних своих и низведеса пречудно: несть утешаяй его. Видь, Господи, смирение мое, яко возвеличися враг. **10** Иод. Руку свою простре стужаяй на вся вожеленная его, виде бо языки вшедшыя во святыню свою, имже повелел

еси не входити во церковь Твою. 11 Каф. Все людие его  
воздыхающе ищут хлеба: даша вожденная своя за пищу,  
еже бы обратити душу. Видь, Господи, и призри, яко бых  
безчестен. 12 Ламед. Все, иже к вам проходящии путем,  
обратитесь и видите, аще есть болезнь, яко болезнь моя,  
яже бысть: глаголавый о мне смири мя Господь в день гнева  
ярости Своея. 13 Мем. С высоты Своея посла огонь, в кости  
моя сведе его: простре сеть ногама моима, обрати мя вспять,  
даде мя Господь в погубление, весь день болезнующа. 14  
Нун. Бдѣше на нечестия моя, в руку мою сплетошася:  
взыдоша на выю мою, изнеможе крепость моя, яко даде  
Господь в руке мои болезни, не возмогу стати. 15 Самех. Отя  
вся крепкия моя Господь от среды мене, призва на мя время,  
еже сокрушити избранныя моя: точило истопта Господь  
девице, дщери Иудине: о сих аз плачу. 16 Аин. Очи мои  
излиясте воду, яко удалися от мене утешаяй мя, возвращаяй  
душу мою: погибоша сынове мои, яко возможе враг. 17  
Фи. Возде руке свои Сион, несть утешаяй его. Заповеда  
Господь на Иакова, окрест его врази его: бысть Иерусалим  
яко осквернена кровоточением в них. 18 Цади. Праведен  
есть Господь, яко уста Его огорчих. Слышите убо, все людие,  
и видите болезнь мою: девицы моя и юноты отидоша в  
плен. 19 Коф. Позвах любители моя, и тии прельстиша мя:  
жерцы мои и старцы мои во граде оскудеша, яко зыскаша  
пищи себе, да укрепят души своя, и не обретоша. 20 Реш.  
Видь, Господи, яко скорблю, утроба моя смятется во мне,  
и превратися сердце мое, яко горести исполнихся: отвне  
обезчеди мене мечь, аки смерть в дому. 21 Шин. Слышаша  
убо, яко воздыхаю аз, несть утешающаго мя. Все врази мои

слышаша злая моя и порадовашася, яко Ты сотворил еси:  
привел еси день, призвал еси время, и будут подобни мне.  
22 Фав. Да приидет вся злоба их пред лице Твое, и отреби  
их, якоже сотвориша отребление о всех гресех моих, яко  
многа суть стенания моя, и сердце мое скорбит.

**2** Алеф. Как оумрачи во гневе Своем Господь дочь Сиону:  
сверже с небесе на землю славу Израилеву, и не помяну  
подножия ногу Своею в день гнева и ярости Своея. 2 Беф.  
Погрузи Господь и не пощаде: вся красная Иаковля разори  
яростию Своею, твердыни дочери Иудины изверже на землю,  
оскверни царя ея и князи ея, 3 гимель. Сокруши во гневе  
ярости Своея весь рог Израилев, обрати вспять десницу  
его от лица врага, разжже во Иакове яко огонь пламы, и  
потреби вся окрест, 4 далеф. Напряже лук Свой яко ратник  
противный, утверди десницу Свою яко супостат и изби вся  
красная очию моею во селениих дочери Сиони, излия яко огонь  
ярость Свою. 5 Ге. Бысть Господь аки враг, погрузи Израиля,  
погрузи вся дома его, разсыпа вся стены его и умножи дщери  
Иудине смирена и смирену, 6 вав. И разверзе аки виноград  
селение Свое, разсыпа праздники Его: забы Господь, яже  
сотвори в Сионе праздники и субботы, и озлоби прещением  
гнева Своего царя и князя и жерца. 7 Заин. Отрину Господь  
жертвенник Свой, оттрясе святыню Свою, сокруши рукою  
вражиею стену забралов его: глас даша в дому Господни  
яко в день праздника. 8 Иф. Обратися Господь разсыпати  
стену дочери Сиони: протяже меру, не отврати руки Своея от  
попрания: и сетова предградие, и ограда вкупе изнеможе. 9  
Теф. Врastoша в землю врата ея, погуби и сокруши верей  
ея, царя ея и князи ея во языцех, несть закона, и пророцы



ея не видеша видения от Господа. 10 Иод. Седоша на земли, умолкоша старейшины дочери Сиони, посыпаша персть на главы своя, препоясашася во вретница, низведоша в землю старейшин дев Иерусалимских. 11 Каф. Оскудеша очи мои в слезах, смутися сердце мое, излился на землю слава моя о сокрушении дочери людей моих, внегда оскуде младенец и ссущий на стогах градских. 12 Ламед. Матерем своим рекоша: где пшеница и вино? Внегда разслабленным быти им, яко язвеным на стогах градских, егда изливахуся души их в лоно матерей их. 13 Мем. Что ти засвидетелствую? Или что уподоблю тебе, дщи Иерусалимля? Кто тя спасет и кто тя утешит, девице, дщи Сионя? Яко возвеличися чаша сокрушения твоего, кто тя изцелит? 14 Нун. Пророцы твои видеша тебе суетная и безумие и не открыша о неправде твоей, еже возвратити пленение твое, и видеша тебе словеса суетная и изриновения. 15 Самех. Восплескаша рукама о тебе вси минующии путем, позвиздаша и покиваша главою своею о дочери Иерусалимли, рекуще: сей ли град, венец славы, веселие всея земли? 16 Аин. Отверзоша на тя уста своя вси врази твои, позвиздаша и поскрежеташа зубы своими и реша: поглотим ю: обаче сей день, егоже чаяхом, обретохом его, видехом. 17 Фи. Сотвори Господь, яже помысли, сконча словеса Своя, яже заповеда от дний первых: разори и не пощаде, и возвесели о тебе врага, вознесе рог стужающаго ти. 18 Цади. Возопи сердце их ко Господу, стены дочери Сиони да излиют якоже водотеча слезы день и ночь: не даждь покоя себе, и да не умолкнет зеница очию твоею. 19 Коф. Востани, поучися в нощи в начале стражбы твоя, пролий яко воду сердце твое пред лицом

Господним, воздвигни к Нему руке твои о душах младенцев твоих, разслабленных голодом в начале всех исходов. **20** Реш. Виждь, Господи, и призри, кого еси отребил сице? Еда снесят жены плод утробы своея? Отребление сотвори повар, избият ли младенцев ссущих сосцы? Убиеш ли во святыни Господни жерца и пророка? **21** Шин. Успоша на исходищих отрок и старец: девицы моя и юноты мои отидоша в плен, мечем и голодом избил еси, в день гнева Твоего сварил еси, не пощадел. **22** Фав. Призвал еси яко день праздника пришествия моя окрест, и не бысть в день гнева Господня уцелевый и оставыйся, яко сотворих возмощи и умножих враги моя вся.

**3** Алеф. Аз муж видя нищету (мою) в жезле ярости Его на мя: **2** поят мя и отвеще мя во тму, а не во свет. **3** Обаче на мя обрати руку Свою весь день, **4** беф. Обетши плоть мою и кожу мою, кости моя сокруши: **5** согради на мя и объа главу мою и утрудил, **6** в темных посади мя, якоже мертвья века: **7** гимель. Согради на мя, и не изыду, отяготи оковы моя, **8** и егда воскричу и возопию, загради молитву мою: **9** возгради пути моя, загради стези моя, возьмите. **10** Далеф. Бысть яко медведь ловяй, (приседяй ми) яко лев в сокровенных, **11** гна отступившаго, и упокои мя, положи мя погибша: **12** напряже лук Свои, и постави мя яко знамение на стреляние, **13** ге. Пусти в лядвия моя стрелы тула Своего. **14** Бых в смех всем людям моим, песнь их весь день. **15** Насыти мя горести, напои мя желчи **16** вав. И изья каменем зубы моя, напита мя пепелом **17** и отрину от мира душу мою. Забых благоты **18** и рех: погиге победа моя и надежда моя от Господа. **19** Заин. Помяни нищету мою и гонение мое. **20**

Горесть и желчь мою помяну, и стужит во мне душа моя. 21  
Сия положу в сердца моем, сего ради потерплю. 22 Иф.  
Милость Господня, яко не остави мене, не скончашася бо  
щедроты Его: пребываяй во утриих, помилуй, Господи, яко  
не погибохом, не скончашася бо щедроты Твоя. 23 Новая  
во утриих, многа есть вера Твоя. 24 Часть моя Господь,  
рече душа моя: сего ради пожду Его. 25 Теф. Благ Господь  
надеющимся Нань: 26 души ищущей Его благо (есть), и  
надеющейся с молчанием спасения Божия. 27 Благо есть  
мужу, егда возмет ярем в юности своей: 28 иод. Сядет на  
едине и умолкнет, яко воздвигну на ся: 29 положит во прахе  
уста своя, негли како будет надежда: 30 подаст ланиту  
свою биющему, насытится укориизн. 31 Каф. Яко не во век  
отринет Господь, 32 яко смиренный помилует по множеству  
милости Своя, 33 не отрину от сердца Своего и смири сыны  
мужеския. 34 Ламед. Еже смирити под нозе его вся узники  
земныя, 35 еже уклонити суд мужа пред лицом Вышняго, 36  
осудити человека, внегда судитися ему, Господь не рече. 37  
Мем. Кто есть той, иже рече, и быти, Господу не повелевшу?  
38 Из уст Вышняго не изыдет зло и добро. 39 Что возропщет  
человек живуць, муж о гресе своем? 40 Нун. Изыскася путь  
наш и испытася, и обратимся ко Господу. 41 Воздвигнем  
сердца наша с руками к Богу высокому на небеси. 42 Мы  
согрешихом и нечествовахом, сего ради не помиловал еси:  
43 самех. Покрыл еси яростию и отгнал еси нас, убил и не  
пощадел еси: 44 покрылся еси облаком, да не дойдет к Тебе  
молитва, 45 сомжити очи мои и отринуты, положил еси нас  
посреде людий. 46 Аин. Отверзоша на ны уста своя вси врази  
наши. 47 Страх и ужас бысть нам, надмение и сокрушение:

48 исходища водная излиет око мое о сокрушении дочери  
людей моих. 49 Фи. Око мое погрязну: и не умолкну, еже не  
быти ослаблению, 50 дондеже приклонится и увидит Господь  
с небесе. 51 Око мое закрывается о души моей, паче всех  
дщерей града. 52 Цади. Ловяще уловиша мя яко врабья  
врази мои туне: 53 умориша в рове жизнь мою и возложиша  
на мя камень. 54 Возлияся вода выше главы моя: рех:  
отриновен есмь. 55 Коф. Призвах имя Твое, Господи, из рова  
преисподняго: 56 глас мой услышал еси: не покрый ушес  
Твоих на мольбу мою: 57 на помощь мою приблизился еси,  
в день, в онже призвах Тя, рекл ми еси: не бойся. 58 Реш.  
Судил еси, Господи, прю души моя, избавил еси жизнь мою:  
59 видел еси, Господи, смятения моя, рассудил еси суд мой:  
60 веси все отмщение их и вся помышления их на мя. 61  
Шин. Слышал еси укоризны их, вся советы их на мя, 62  
устне востающих на мя и поучение их на мя весь день, 63  
седение их и востание их: призри на очи их. 64 Фав. Воздаси  
им, Господи, воздаяние по делом руку их: 65 воздаси им  
заступление, сердца моего труд. 66 Ты их проженеши во  
гневе и потребиши их под небесем, Господи.

**4** Алеф. Како потемне злато, изменися сребро доброе:  
разсыпашася камыцы святыни в начале всех исходов. 2  
Беф. Сынове Сиони честнии, одеянии златом чистым, како  
вменишася в сосуды глиняны, дела рук скудельничих. 3  
Гимель. Еще же змиеве обнажиша сосцы, воздоиша скимни их  
дщерей людей моих в неизцеление, якоже птица во пустыни.  
4 Далеф. Прильпе язык ссущаго к гортани его в жажди,  
младенцы просиша хлеба, и несть им разломляющаго.  
5 Ге. Ядуще сладостная погибоша во исходех, питаемии

на багряницах одеяшася в гной. 6 Вав. И возвеличися беззаконие дщере людий моих паче беззакония Содомска, превращенныя во окомгновении, и не поболеша о ней руками.

7 Заин. Очистишася назорее ея паче снега и просветишася паче млека, чермни быша, паче камене сапфира усечение их.

8 Иф. Потемне паче сажи вид их, не познани быша во исходех: прильпе кожа их костем их, изскоша, быша яко древо.

9 Теф. Лучше быша язвении мечем, нежели погублени гладом: сии бо истлеша от неплодности земли.

10 Иод. Руце жен милосердых свариша дети своя, быша в ядь им, в сокрушении дщере людий моих.

11 Каф. Сконча Господь ярость Свою, излия ярость гнева Своего и возжже огонь в Сионе, и пояде основания его.

12 Ламед. Не вероваша царие земстии и вси живуции во вселенней, яко внидет враг и стужаяя сквозе врата Иерусалимская,

13 мем. Ради грех пророков его и неправд жерцев его, проливающих кровь праведну посреде его.

14 Нун. Поколебашася бодрии его на стогнах, осквернишася в крови, внегда немощи им, прикоснушася одежд своих.

15 Самех. Отступите от нечистых, призовите их: отступите, отступите, не прикасайтесь, яко возжгошася и восколебашася: рцыте во языцех: не приложат, еже обитати (с ними).

16 Аин. Лице Господне часть их, не приложит призрети на них: лица жреческа не устыдешася, старых не помиловаша.

17 Фи. Еще сущым нам оскудеша очи наши, на помощь нашу всеу смотрящым нам, внегда надеяхомся на язык не спасающь.

18 Цади. Уловиша малых наших еже не ходити на стогнах наших, приближися время наше, исполнишася дние наши, настоят конец наш.

19 Коф. Скорейшии быша гонящии ны паче орлов небесных, на

горах гоняю нас, в пустыни приседоша нам. 20 Реш. Дух лица нашего, помазанный Господь ят бысть в растлениих их, о немже рехом: в сени его поживем во языцех. 21 Шин. Радуйся и веселися, дщи Идумейска, живущая на земли, и на тебе приидет чаша Господня, и упиешися и излиеши. 22 Фав. Скончася беззаконие твое, дщи Сионя, не приложит ктому преселити тя: посетил есть беззакония твоя, дщи Едомля, откры нечестия твоя.

**5** Молитва Иеремии пророка. Помяни, Господи, что бысть нам: призри и виждь укоризну нашу: 2 достояние наше обратися к чуждим и домы наша ко иноплеменником: 3 сири быхом, несть отца, матери наша яко вдовы. 4 Воду нашу за серебро пихом, дрова наша за цену куповахом: 5 на выя наша гоними быхом, трудихомся, не почихом. 6 Египет даде руку, Ассур в насыщение их. 7 Отцы наши согреша, и несть их, мы же беззакония их подяхом. 8 Раби обладаша нами, избавляющаго несть от руку их. 9 В душах наших носихом хлеб наш, от лица меча в пустыни. 10 Кожа наша аки пещь обгоре, разседошася от лица бурей глада. 11 Жен в Сионе смириша, девиц во градех Иудиных. 12 Князи в руках их повешени быша, старейшины не прославишася. 13 Избраннии плачь подяша, и юноши в кладе изнемогоша. 14 И старцы от врат оскудеша, избраннии от песней своих умолкоша. 15 Разсыпая радость сердец наших, обратися в плачь лик наш, 16 спаде венец со главы нашея: горе нам, яко согрешихом. 17 О сем смутися сердце наше, о сем померкнуша очи наши. 18 На горе Сионе, яко погибе, лисицы ходиша. 19 Ты же, Господи, во веки вселишися, престол Твой в род и род. 20 Вскую во веки забываеши нас, оставиши ли

нас в продолжение дний? 21 Обрати ны, Господи, к Тебе,  
и обратимся, и вознови дни наша якоже прежде. 22 Яко  
отрвая отринул еси нас, разгневался еси на ны зело.

# Книга пророка Иезекииля

**1** И бысть в тридесятое лето, в четвертый месяц, в пятый день месяца, и аз бых посреде пленения при реце Ховар: и отверзошася небеса, и видех видения Божия. **2** В пятый день месяца, сие лето пятое пленения царя Иоакима, **3** и бысть слово Господне ко Иезекиилю сыну Вузиеву, священнику, в земли Халдейстей при реце Ховар. И бысть на мне рука Господня, **4** и видех, и се, дух воздвизаяйся грядяше от севера, и облак великий в нем, и свет окрест его, и огонь блистайся: **5** и посреде его яко видение илектра посреде огня, и свет в нем: и посреде яко подобие четырех животных. И сие видение их, яко подобие человека в них: **6** и четыре лица единому, и четыре крила единому, **7** и голени их правы, и пернаты ноги их, и искры яко блистающаяся медь, и легка крила их, **8** и рука человека под крилами их на четырех странах их: **9** и лица их, и крила их четырех держащаяся друг друга, лица же их четырех не обращася внегда ходити им: коеждо прямо лица своего хожду. **10** И подобие лиц их, лице человеческое и лице львово одесную четверем, и лице телчее ошуюю четверем, и лице орлее четверем: **11** (и лица их) и крила их простерта свыше четверем, коемуждо два сопряжена друг ко другу, и два покрываху верху телесе их, и коеждо прямо лицу своему идяше: **12** идеже аще быше дух шествуй, идяху и не обращася. **13** И посреде животных видение, яко угляя огня горящаго, яко видение свещ соображающихся посреде животных, и свет огня, и от огня исхождаше яко молния: **14** и животная течаху и обращася, яко видение везеково. **15** И видех, и се, коло едино на земли держащееся животных четырех: **16** и видение



колес и сотворение их, яко видение Фарсиса, и подобие едино четверем: и дело их бяше, якоже аще бы было коло в колеси: 17 на четыре страны их шествоваху: не обращахуся, внегда шествовати им, 18 ниже хребты их, и высота бяше им. И видех та, и плеща их исполнена очес окрест четверем: 19 и внегда шествовати животным, шествоваху и колеса держащиеся их: и внегда воздвизатися животным от земли, воздвизахуся и колеса. 20 Идеже аще бяше облак, тамо бяше и дух, еже шествовати: шествоваху и животная, и колеса воздвизахуся с ними, зане дух жизни бяше в колесех. 21 Внегда идяху сия, идяху (и колеса), и внегда стояти им, стояху (и колеса с ними), и егда воздвизахуся от земли, воздвизахуся с ними (и колеса), яко дух жизни бяше в колесех. 22 И подобие над главою животных яко твердь, яко видение кристалла, простертое над крилами их свыше: 23 и под твердию крила их простерта, паряще друг ко другу, комуждо два сопряжена, прикрывающе телеса их. 24 И слышах глас крил их, внегда паряху, яко глас вод многих, яко глас Бога Саддаи: и внегда ходити им, глас слова яко глас полка: и внегда стояти им, почиваху крила их. 25 И се, глас превыше тверди сущия над главою их: внегда стояти им, низпускахуся крила их. 26 И над твердию, яже над главою их, яко видение камене сапфира, подобие престола на нем, и на подобии престола подобие якоже вид человекь сверху. 27 И видех яко видение илектра, яко видение огня внутрь его окрест: от видения чресл и выше и от видения чресл даже до долу видех видение огня, и свет его окрест: 28 яко видение дуги, егда есть на облацех в день дождя, тако стояние света окрест.

**2** Сие видение подобие славы Господни. И видех, и падох ниц, и слышах глас Глаголющаго, и рече ко мне: сыне человекъ, стани на ноги твоя, и возглаголю тебе. **2** И прииде на мя дух, и взя мя, и воздвиже мя, и постави мя на ногах моих, и слышах Его глаголюща ко мне. **3** И рече (Господь) ко мне: сыне человекъ, послю тя Аз к дому Израилеву, огорчевающим Мя, иже огорчиша Мя: сами и отцы их отвергошася Мене до днешняго дне: **4** и сынове жестоколичнии и твердосердечнии. Аз послю тя к тем, и речеши к ним: тако глаголет Адонаи Господь: **5** аще убо услышат, или убоятся, зане дом огорчеваяй есть, и познают, яко пророк еси ты посреде их. **6** И ты, сыне человекъ, да не убоишися их, ни ужасайся от лица их: зане разсверепеют и обыдут тя окрест, посреде бо скорпиев ты живеши: словес их не убойся и от лица их не ужасайся, зане дом огорчеваяй есть: **7** и возглаголеши словеса Моя к ним, аще убо услышат, или убоятся, зане дом прогневаяй есть. **8** И ты, сыне человекъ, послушай Глаголющаго к тебе, не буди огорчеваяй, якоже дом преогорчеваяй: отверзи уста твоя и снеждь, яже Аз даю тебе. **9** И видех, и се, рука простерта ко мне, и в ней свиток книжный: **10** и разви его предо мною, и в том писана быша предняя и задняя: и вписано бяше в нем рыдание и жалость и горе.

**3** И рече ко мне: сыне человекъ, снеждь свиток сей, и иди и рцы сыном Израилевым. **2** И отверзох уста моя, и напита мя свитком сим **3** и рече ко мне: сыне человекъ, уста твоя снедят, и чрево твое насытится свитка сего даннаго тебе. И снедох его, и бысть во устех моих яко мед сладок. **4** И рече ко мне: сыне человекъ иди и вниди в дом Израилев, и глаголи

словеса Моя к ним: 5 яко не к людем глубокоречивым и  
косноязычным посылаемъ еси, к дому Израилеву, 6 ниже к  
людем многим иноязычным, иноречивым, ни тяжким языком  
сущым, ихже не разумел бы еси словес: аще же и к тацем  
послал бых тя, то и тии послушали быша тебе: 7 а дом  
Израилев не восхощет послушати тебе, понеже не хотят  
слушати Мене, яко весь дом Израилев непокориви суть и  
жестокосерди: 8 и се, дах лице твое сильно противу лица  
их, и прю твою укреплю противу при их: 9 и будет, всегда  
крепчае камене дах прю твою: не убойся их, ни ужасайся  
лица их, зане дом разгневаяй есть. 10 И рече ко мне: сыне  
человечь, вся словеса, яже глаголах с тобою, возми в сердце  
твое и ушима твоима послушай: 11 и шед вниди в плен к  
сыном людей твоих, и речеши к ним и возглаголеши к ним:  
тако глаголет Адонаи Господь: аще убо послушают и аще убо  
повинутся. 12 И взя мя дух, и слышах глас за собою труса  
велика, глаголющих: благословена слава Господня от места  
Его. 13 И видех глас крил животных скрисяющихся друг ко  
другу, и глас колес держащихся их, и глас труса велика. 14 И  
дух воздвиже мя и взя мя, и поидох вознесен во устремлении  
духа моего, и рука Господня бысть на мне крепкая. 15 И  
внидох в пленники вознесен, и обыдох живуцья на реце  
Ховар, и седох ту седьм дний, ходя посреде их. 16 И бысть  
по седмих днех слово Господне ко мне глаголя: 17 сыне  
человечь стража дах тя дому Израилеву, да слышиши слово  
от уст Моих и воспретиши им от Мене. 18 Внегда глаголати  
Ми беззаконнику: смертию умреши: и не возвестиши ему, ни  
соглаголеши, еже остатися беззаконнику и обратитися от пути  
своего, еже живу быти ему: беззаконник той в беззаконии

своим умрет, крове же его от руки твоя взыщу. 19 И ты  
еще возвестиши беззаконнику, и не обратится от беззакония  
своего и от пути своего (беззаконна): той беззаконник во  
беззаконии своим умрет, а ты душу твою избавиши. 20 И егда  
совертится праведник от правд своих и сотворит согрешение:  
и дам муку пред ним, той умрет, яко ты не воспретил еси  
ему, и во гресех своих умрет, зане не помянутся правды его,  
яже сотвори: крове же его от руки твоя взыщу. 21 Ты же  
еще возвестиши праведному, еже не согрешити, и той не  
согрешит: праведный жизнью поживет, яко воспретил еси  
ему, и ты твою душу избавиши. 22 И бысть на мне рука  
Господня, и рече ко мне: востани и изыди на поле, и тамо  
возглаголется к тебе. 23 И востах и изыдох на поле: и се,  
тамо слава Господня стояше, якоже видение и якоже слава  
Господня, юже видех на реце Ховар, и падох на лица моем.  
24 И прииде на мя дух и постави мя на ногу моею: и глагола  
ко мне и рече ми: вниди и затворися среде дому твоего. 25 И  
ты, сыне человек, се, дашася на тя узы, и свяжут тя ими, и  
не изыдеши от среды их: 26 и язык твой привяжу к гортани  
твоему, и онемееши и не будеши им в мужа обличения,  
понеже дом разгневаяй есть: 27 и внегда глаголати Ми  
к тебе, отверзу уста твоя, и речеши к ним: сия глаголет  
Адонаи Господь: слышай да слышит, и не покаяйся да не  
покаряется, зане дом преогорчевай есть.

**4** И ты, сыне человек, возьми себе плинфу и положи ю пред  
лицем твоим, и да напишеш на ней град Иерусалим, 2 и  
да даси окрест его ограждение, и да соградиши над ним  
забрала и обложиши его острогом, и да поставиши окрест  
его полки и да учиниши поставления стрельниц окрест: 3 ты

же возми себе сковраду железню, и да положиши ю в стену железню между тобою и между градом, и да уготовиши лице твое нань, и будет в затворе, и затвориши и: знамение сие есть сыном Израилевым. 4 Ты же да спиши на левем боку твоём, и да положиши неправды дому Израилева на нем, по числу дний пятьдесят и сто, в няже поспиши на нем, и возмеш неправды их. 5 И Аз дах тебе две неправды их в число дний, в девяност и сто дний, и возмеш неправды дому Израилева. 6 И совершиши сия, и поспиши на десных ребрех твоих второе, и возмеш неправды дому Иудина чотыредесять дний, день за едино лето положих тебе. 7 И на заключение Иерусалима да уготоваеши лице твое, и мышцу твою утврдиши, и пророчествовати будеш на него. 8 И се, Аз дах на тя узы, и не превратишия от ребр твоих на ребра твоя, дондеже скончуются дние заключения твоего. 9 Ты же (сыне человекь) возми себе пшеницу и ячмень, и боб и лящу, и просо и пыро, и вложиши я в сосуд един глинян: и сотвориши я себе в хлебы, и по числу дний, в няже спиши на ребрех твоих, девяност и сто дний ясти будеш оныя. 10 Ядь же твоя, юже ясти будеш, весом двадесять сикль на день, от време до време снеси сия. 11 И воду мерю пити будеш, и шестую часть ина от време до време испиеш. 12 И опреснок ячменный снеси я, в лайне мотыл человеких сокрыеш я пред очима их 13 и речеши: сия глаголет Господь Бог Израилев: тако снедят сынове Израилевы хлеб свой нечист во языцех, аможе разсыплю я. 14 И рех: никакоже, Господи Боже Израилев! Се, душа моя не осквернилася в нечистоте, и мертвечины и зверядины не ядох от рождения моего даже доныне, ниже вниде во

уста моя всякое мясо мерзко и сквернаво. 15 И рече ко мне: се, дах тебе мотыла говяжая вместо мотыл человечесих, и сотвориши хлебы себе в них. 16 И рече ко мне: сыне человекь, се, Аз сотру утверждение хлебное во Иерусалиме, и снесут хлеб весом и во оскудении, и воду мерою и в пагубе испиют, 17 яко да скудни будут хлебом и водою: и погибнет человек и брат его, и истают в неправдах своих.

**5** Ты же, сыне человекь, возми себе меч остр паче бритвы стригущаго, притяжи его себе и возложи его на главу твою и на брану твою: и возми превес весов, и размериши я. 2 Четвертую часть да сожжеш на огни среде града по исполнению дний затворения: 3 и да возмеш четвертую часть и сожжеш ю среде града, четвертую же часть содробиши мечем окрест его, и четвертую часть разсыплеш ветром: и меч извлеку вслед их. 4 И возмеш оттуду мало их числом и ввяжеш я во одежду твою: и от техже возмеш еще и ввержеш я среде огня и сожжеш я на огни: и от того изыдет огонь на весь дом Израилев. И речеши всему дому Израилеву: 5 сия глаголет Адонаи Господь: сей Иерусалим, посреде языков положих его, и страны, яже окрест его. 6 И речеши: измени оправдания Моя паче языков, и законы Моя паче стран, яже окрест его: понеже оправдания Моя отринуша и по законом Моим не ходиша в них. 7 Сего ради тако глаголет Адонаи Господь: понеже вина ваша паче язык, иже окрест вас, и не ходисте и законех Моих и оправданий Моих не сотвористе, но и по судом языческим, яже окрест вас, не сотвористе: 8 сего ради сия глаголет Адонаи Господь: се, Аз на тя, и сотворю среде тебе суд пред языки, 9 и сотворю среде тебе, иже не сотворих и иже не сотворю

подобных им ктому, по всем мерзостем твоим. **10** Сего ради отцы снедят чад среде тебе, и чада снедят отцев: и сотворю в тебе суды, и разсею вся оставшая от тебе по всему ветру. **11** Сего ради живу Аз, глаголет Адонаи Господь, воистинну понеже святая Моя осквернил еси всеми мерзостями твоими, и Аз отрину тя, и не пощадит око Мое, и Аз не помилую тя. **12** Четверть тебе смертию потребится, и четверть тебе голодом скончается среде тебе, четверть же тебе падет мечем окрест тебе, четверть же тебе разсыплю по всему ветру, и мечь извлеку вслед их. **13** И скончается ярость Моя и гнев Мой на них, и утешуся, и уведят, яко Аз Господь глаголах во рвении Моем, внегда скончати ми гнев Мой на них. **14** И положу тя в пустыню и во укориэну языком сущым окрест тебе и пред всяким проходящим. **15** И будеши во стенание и ужас, наказанием и пагубою во языцех, иже окрест тебе, егда сотворю в тебе суды во гнев и в ярость и во отмщение ярости Моея: Аз Господь глаголах: **16** и егда послю стрелы глады на ня, и будут во скончание, и послю растлити вы, и глады соберу на вы, и сотру утверждение хлеба твоего, **17** и испущу на тя глады и звери люты, и умучу тя, смерть же и кровь пройдут сквозе тя, и мечь наведу на тя окрест: Аз Господь глаголах.

**6** И бысть слово Господне ко мне глаголя: **2** сыне человек, утверди лице твое к горам Израилевым и прорцы к ним, **3** и речеши: горы Израилевы, слышите слово Господне, сия глаголет Адонаи Господь горам и холмом, и каменем и дебрем: се, Аз наведу на вы мечь, и потребятся высоты ваша: **4** и сокрушатся требища ваша и кумирницы ваша, и повергу язвеных ваших пред кумиры вашими: **5** и дам

трупы сынов Израилевых пред кумиры их и расточу кости ваша окрест требищ ваших. 6 И во всем селении вашем опустеют грады, и высокая ваша погибнут, яко да потребятся требницы ваши и сокрушатся, и престанут кумиры ваши, и отвергнутся кумирницы ваша, и потребятся дела ваша: 7 и падут язвении посреде вас, и познаете, яко Аз Господь. 8 И оставлю еже быти от вас избегшым от меча во языцех, и в разсыпании вашем во странах, 9 и помянут Мя уцелевшии от вас во языцех, аможе быша пленени: кляхся бо сердцу их блудившему и отставшему от Мене и очесем их блудившым вслед начинаний их: и бити имут лица своя о злобах, яже твориша во всех мерзостех своих, 10 и познают, яко Аз Господь не туне глаголах сотворити им вся злая сия. 11 Тако глаголет Адонаи Господь: восплеци рукою и вострепли ногою и рцы: благоже, благоже о всех мерзостех злобы дому Израилева: яко мечем и голодом и смертию падут. 12 Дальнии смертию скончаются, а ближнии мечем падут: оставшии же и обдержимии голодом скончаются: и скончаю гнев Мой на них, 13 и увесте, яко Аз Господь, егда будут язвении ваши среде кумир ваших окрест требищ ваших, на всяцем холме высокоем и на всех версах горних, и под дубом санным и под всяким древом чащным, идеже даяху воню благоухания всем кумиром своим. 14 И простру руку Мою на ня, и положу землю в пагубу и в потребление от пустыни Девлафа, от всего селения их: и познаете, яко Аз Господь.

**7** И бысть слово Господне ко мне глаголя: 2 и ты, сыне человек, рцы: сия глаголет Господь: земли Израилеве конец прииде, конец прииде на четыри краи земли. 3 Пришел есть конец, ныне конец тебе, и испущу ярость Мою на тя,



и отмщу тебе по путем твоим, и дам на тя вся мерзости твоя. 4 Не пощадит око Мое на тя, и не помилую, зане путь твой на тя дам, и мерзости твоя среде тебе будут, и увеси, яко Аз Господь. 5 Темже сия глаголет Адонаи Господь: зло едино зло, се, идет. 6 Конец пришел есть, прииде конец, воста на тя, се, прииде. 7 Прииде плетение на тя живущаго на земли: прииде время, приближися день, не с молвою, ниже с болезнями. 8 Ныне изблизу излию гнев Мой на тя и скончаю ярость Мою на тебе, и осужду тя по путем твоим и дам на тя вся мерзости твоя. 9 Не пощадит око Мое, и не помилую, зане пути твоя на тя дам, и мерзости твоя посреде тебе будут, и познаеши, яко Аз Господь бияй. 10 Се, день Господень приходит, се, конец пришел есть, изыде плетение, и процвете жезл, 11 прозябе укоризна, и сокрушит утверждение беззаконника: и не с плищем, ни с потщанием: и не от них суть, и несть красы в них. 12 Прииде время, приближися день: купуяй да не радуется, и продай да не плачется, яко гнев на все множество их. 13 Занеже притяжаваяй ко продающему ктому не возвратится, и еще в жизни живущему, яко видение на все множество их не возвратится, и человек во очесех жизни своя не укрепится. 14 Вострубите трубою и разсудите вся, и не будет грядущаго на рать, яко гнев Мой на все множество их. 15 Рать отвне с мечем, глад же и смерть извнутри: иже на поли мечем скончается, сущих же во граде глад и смерть скончает. 16 И уцелеют спасеннии от них и будут на горах яко голубицы скорбяще: и всех избию, коегождо в неправдах его. 17 Вся руки разслабют, и вся стегна окаляются мокростию. 18 И препояшутся во вретища, и

покроет я ужас: и на всяцем лицах срам на них, и на всяцей главе плешь. 19 Сребро их на стогах повержется, и злато их презрено будет: сребро их и злато не возможет избавити их в день гнева Господня, души их не насытятся, и чрева их не наполнятся, зане казнь неправостей их бысть. 20 Избранныя утвари в гордыню положиша я, и образы мерзостей своих и гнусности сотвориша от них: сего ради дах оная им в нечистоту. 21 И предам я в чуждия руце, еже разграбити я, и губителем земли в корысти, и осквернят я. 22 И отвращу лице Мое от них, и осквернят стражбу Мою, и внидут в ня неопасно, и осквернят я: 23 и сотворят мятеж, понеже земля полна суда крове, и град полн беззакония. 24 И приведу злыя языки, и наследят дома их: и отвращу величание крепости их, и осквернятся святая их. 25 И моление приидет, и възыщет мира, и не будет. 26 Горе на горе будет, и весть на весть будет, и не будет видение от пророка, и закон погибнет от жерца и совет от старец. 27 Царь восплачется, и князь облечется в пагубу, и руки людий земли расслабуют: по путем их сотворю им и по судом их отмщу им, и уразумеют, яко Аз Господь.

**8** И бысть в лето шестое в шестый месяц, в пятый день месяца, аз седех в дому моем, и старейшины Иудины седяху предо мною, и бысть на мне рука Адоная Господа. 2 И видех, и се, подобие мужа, от чресл его и даже до низу огонь, от чресл же его в верх его якоже видение зари и яко взор илектра. 3 И простре подобие руки и взя мя за верх главы моея, и взя мя дух среде земли и среде небесе и веде мя во Иерусалим в видении Божии на преддверие врат внутреннейших зрящих на север, идеже бе столп и образ

ревности притягающего. 4 И се, ту бяше слава Господа Бога Израилева по видению, еже видех на поли. 5 И рече ко мне: сыне человекь, воззри очима твоима на север. И воззрех очима моима на север, и се, от севера ко вратом зрящым на восток требника, идеже образ рвения сего во входе. 6 И рече ко мне: сыне человекь, видел ли еси, что сии творят? Беззакония велика дом Израилев творит zde, еже удалятися от святынь Моих: и еще обратився узриши болшая беззакония. 7 И введе мя ко предвратию двора, и видех, и се, скважня едина в стене. 8 И рече ко мне: сыне человекь, раскопай стену. И раскопах, и се, дверь едина. 9 И рече ко мне: вниди и виждь беззакония злая, яже творят сии zde. 10 И внидох и видех, и се, всякое подобие гада и скота, суетная гнушения и всяцыи кумиры дому Израилева написани быша на стене всюду около. 11 И семьдесят мужей от старейшин дому Израилева, и Иезониа сын Сафанов посреде их стояше пред лицом их, и кийждо кадилницу свою имейше в руке своей, и дым кадила восхождаше. 12 И рече ко мне: видел ли еси, сыне человекь, яже старцы дому Израилева творят zde, кийждо их на ложи тайнем своем, зане реша: не видит Господь, оставил Господь землю. 13 И рече ко мне: еще обратися, и узриши беззакония болшая, яже сии творят. 14 И введе мя в преддверие врат дому Господня зрящих на север: и се, тамо жены сидящья плачущья о Фаммузе. 15 И рече ко мне: сыне человекь, видел еси, и еще узриши мерзости их болшыя сих. 16 И введе мя во двор дому Господня внутренний, и в преддверие храма Господня, между Еламом и между жертвенником, яко двадесять и пять мужей, задняя своя давших ко храму Господню, и лица их прямо к

востоку: и сии покланяются на восток солнцу. 17 И рече ко мне: видел еси, сыне человекь, еда мало дому Иудину, еже творити беззакония, яже сотвориша zde? Понеже наполниша землю беззакония, и обратишася разгневати Мя: и се, сии простирают лозу аки ругающеся Мне: 18 и Аз сотворю им с яростию: не пощадит око Мое, и не помилую: и воззовут во ушы Мои гласом великим, и не услышу их.

**9** И возопи во ушы мои гласом великим, глаголя: приближися отмщение града: и кийждо имеяше сосуды истребления в руке своей. 2 И се, шесть мужей идоша от пути врат высоких зрящих на север, и коемуждо секира (погубления) в руке его: и муж един посреде их облечен в подир, и пояс от сапфира о чреслах его: и внидоша и сташа близ жертвенника медянаго. 3 И слава Бога Израилева възде от Херувимов суцая на них в непокровенное дому: и призва мужа оболчена в подир, иже имеяше на чреслах своих пояс. 4 И рече Господь к нему: пройди среде града Иерусалима и даждь знамения на лица мужей стнящих и болезнующих о всех беззакониих бывающих среде их. 5 И сим рече, слышащу мне: идите во град вслед его, изсецьте и не пощадите очима вашима и не помилуйте: 6 старца и юношу и деву, и младенцы и жены избийте в потребление: а ко всем, на нихже есть знамение, не прикасайтесь: от освященных Моих начните. И начаша от мужей старых, иже беша внутрь в дому. 7 И рече к ним: оскверните дом, и наполните пути мертвецев исходяще, и изсецьте (сущих во граде). 8 И бысть внегда сечаху их, остах аз и падох ниц, и возопих и рех: горе, (горе, ) о, люте мне, Адонаю Господи! Еда потребляеши Ты останки Израилевы, егда разливаеши ярость Твою на Иерусалим? 9 И рече ко

мне: неправда дому Израилева и Иудина возвеличися зело зело, яко наполнися земля людей многих, и град наполнися неправд и нечистот, яко реша: оставил есть Господь землю и не видит Господь. 10 И Аз есмь, и не пощадит око Мое, ни помилую, пути их на главы их дах. 11 И се, муж, оболченный в подир и препоясан поясом о чреслах своих, отвещаваше, глаголя: сотворих, якоже заповедал ми еси.

**10** И видех, и се, верху тверди сущия над главою Херувимов, яко камень сапфировый, подобие престола на них. 2 И рече к мужу облеченному во утварь: вниди среде колес, яже под Херувимами, и наполни горсти твоя угля огненнаго от среды Херувимов и разсыпли на град. И вниде предо мною: 3 Херувими же стояху одесную дому, внегда вхождаше муж, и облак наполни двор внутренний. 4 И воздвижесе слава Господня от Херувимов в непокровение дому, и наполни дом облак, и двор наполнися сияния славы Господни: 5 и глас крил Херувимских слышашесе даже до внешнего двора, якоже глас Бога Саддаи глаголющаго. 6 И бысть внегда заповедаше мужу облеченному во утварь святую, глаголя: возми огонь от среды колес, иже среде Херувимов. И вниде и ста близ колес. 7 И простре Херувим руку свою в средину огня сущаго среде Херувимов, и взя и вдаде в руке облеченному во утварь святую, и взя и изыде. 8 И видех Херувимы, и се, подобие рук человечесих под крилы их. 9 И видех, и се, четыре колеса стояху держащесе Херувимов: коло едино держашесе единого Херувима, и коло едино держашесе другаго Херувима: взор же колес якоже взор камня анфракса: 10 и взор их подобие едино четверем, акибы было коло в колеси: 11 внегда идяху, на четыре

части их идяху, и не обращахуся внегда идяху: яко, на неже место аще зряше начало едино, идяху (вслед его), и не обращахуся, внегда ити им. 12 Вся же телеса их и хребты их, и руце их и крила их и колеса полна очес окрест четырех колес. 13 Колесам же сим воззвася гелгель, слышащу мне. 14 Четыри же лица коемуждо их: единому лице херувимле, лице же другому лице человекочо, третье же лице львово и четвертое лице орлее. 15 И взяшася Херувими: сие есть животное, еже видех на реце Ховар. 16 И егда идяху Херувими, идяху и колеса их, и сии держяхуся их: и внегда воздвизаху Херувими крила своя, еже возвыситися от земли, не обращахуся колеса их, и та держяхуся их: 17 егда стояху тии, стояху и они, и внегда возвышахуся тии, возвышахуся и они с ними: зане дух жизни бе в них. 18 И изыде слава Господня от непокровения дому и взыде на Херувимы. 19 И воздвигоша Херувими крила своя и возвысишася от земли предо мною: егда изыдоша тии, и колеса держяхуся их: и сташа над преддверием врат Дому Господня, яже противу востоку, и слава Господа Бога Израилева бе над ними свыше. 20 Сие животное есть, еже видех под Богом Израилевым на реце Ховар, и познах, яко Херувими суть. 21 Четыри лица единому, и четыре крила единому, и подобие рук человекчих под крилы их. 22 И подобие лиц их: сия лица суть, яже видех под славою Бога Израилева при реце Ховар воззрение их: и сия кождо прямо лицу своему идяху.

**11** И воздвиже мя дух и возведе мя ко вратом дому Господня, яже прямо зрят на восток: и се, пред преддверием врат яко двадесять и пять мужей: и видех среде их Иехонию сына Иазерова и Фалтию Ванеова, старейшины людския. 2 И рече

Господь ко мне: сыне человек, сии мужие помышляющие  
суетная и совет творящая лукава во граде сем, 3 глаголющая:  
не в нове ли соградишася домова? Сей есть коноб, мы же  
мяса. 4 Сего ради прорцы на ня, прорцы, сыне человек. 5  
И нападе на мя Дух Господень и рече ко мне: глаголи, сия  
глаголет Господь: тако рекосте, доме Израилев, и умышления  
духа вашего аз вем: 6 умножисте мертвецы ваша во граде  
сем и наполнисте пути его язвенных. 7 Того ради тако  
глаголет Адонаи Господь: мертвецы ваши, яже избисте среде  
его, тии суть мяса, а сей коноб есть, и вас изведу от среды  
его. 8 Меча боитесь, и мечь наведу на вас, глаголет Адонаи  
Господь: 9 и изведу вас от среды его и предам вас в руке  
чуждых и сотворю в вас суд: 10 мечем падете, на горах  
Израилевых сужду вам, и увесте, яко аз Господь: 11 той не  
будет вам в коноб, и вы не будете посреде его в мяса: на  
горах Израилевых сужду вам, 12 и увесте, яко аз Господь, яко  
по заповедем Моим не ходисте и судов Моих не сотвористе,  
но по обычаем языков сущих окрест вас сотвористе. 13 И  
бысть внегда прорицати ми, и Фалтия сын Ванеов умре:  
и падох ниц и возопих гласом великим, глаголя: горе мне,  
люте мне, Адонаю Господи! На скончание ли твориши Ты  
останки Израилевы? 14 И бысть слово Господне ко мне  
глаголя: 15 сыне человек, братия твоя и мужие плена твоего  
и весь дом Израилев скончася, имже рекоша живуцции во  
Иерусалиме: далече удалитесь от Господа, нам дана есть  
земля в наследие. 16 Сего ради рекох: сия глаголет Адонаи  
Господь: яко отрину я во языки и разсею я по всей земли, и  
буду им во освящение мало во странах, а може внидут тамо.  
17 Сего ради рцы: сия глаголет Адонаи Господь: и прииму я

от язык и соберу я от стран, идеже разсеях я в них, и дам им землю Израилеву: **18** и внидут тамо и отвергут вся мерзости ея и вся беззакония ея от нея: **19** и дам им сердце ино и дух нов дам им, и исторгну каменное сердце от плоти их и дам им сердце плотяно, **20** яко да в заповедех Моих ходят и оправдания Моя сохранят и сотворят я: и будут Ми в люди, и Аз им буду в Бога. **21** А ихже сердце по гнусностем их и по беззаконием их ходит, пути тех на главы их положу, глаголет Адонаи Господь. **22** И воздвигоша Херувими крила своя, и колеса держащаяся их: слава же Бога Израилева бе на них свыше их. **23** И възыде слава Господня от среды града и ста на горе, яже бяше прямо града на восток. **24** И дух взя мя и принесе мя на землю Халдейску в пленники, в видении, Духом Божиим. **25** И въздох от видения, еже видех, и глаголах ко пленником вся словеса Господня, яже показа мне.

**12** И бысть слово Господне ко мне глаголя: **2** сыне человекь, посреде неправд их ты живеши, иже очи имут видети, и не видят, и уши имут, еже слышати, и не слышат, зане дом преогорчеваяй есть. **3** И ты, сыне человекь, сотвори себе сосуды пленнически, и пленен буди днем пред ними, и преселен буди от места твоего на место другое пред ними, яко да видят, зане дом прогневлиаяй есть. **4** И да изнесеши сосуды твоя, яко сосуд пленнический, днем пред очима их: ты же изыдеши в вечер пред ними, якоже исходит пленник. **5** Прокопай себе стену, и да изыдеши сквозе ю пред ними. **6** На раменех взят будеши и покровен изыдеши, лице твое покрыеши, и да не видиши земли, понеже чудо тя дах дому Израилеву. **7** И сотворих тако все, елико ми



заповеда Господь: и сосуды изнесох яко сосуды пленничы  
днем, и в вечер прокопах себе стену рукою, и отай изыдох, и  
на рамена взят бых пред ними. 8 И бысть слово Господне  
заутра ко мне глаголя: 9 сыне человекь, не реша ли к тебе  
дом Израилев, дом прогневлый: что ты твориши? 10 Рцы к  
ним: тако глаголет Господь Бог: ко князю и старейшинам  
Иерусалимим, и всему дому Израилеву, иже суть среде их,  
11 рцы, яко аз чудеса творю, якоже сотворих, сице им будет:  
во преселении и во пленении изыдут. 12 И князь среде их на  
рамена взят будет, и отай изыдет сквозе стену, и прокопает,  
еже ему изыти сквозе ю, лице свое покрывает, да не видимь  
будет очесы, и сам земли не узрит. 13 И простру мрежу Мою  
нань, и ят будет во одержании Моем, и введу его в Вавилон  
в землю Халдейску, и не узрит ея, и тамо скончается. 14  
И вся, иже окрест его, помощники его, и вся заступающыя  
его разсею по всем ветром, и мечь излию вслед их: 15 и  
уведят, яко Аз Господь, егда разсыплю я во языки и разсею  
я по странам: 16 и оставлю от них мужы в число от меча  
и от глада и от смерти, яко да поведят вся беззакония их  
во языцех, аможе внидут: и уведят, яко Аз Господь. 17 И  
бысть слово Господне ко мне глаголя: 18 сыне человекь,  
хлеб твой с болезнию снеси и воду твою со страданием  
и скорбию испиеш. 19 И речеши к людем земли: сия  
глаголет Адонаи Господь живущым в Иерусалиме на земли  
Израилеве: хлебы своя с недостатком снедят и воду свою  
с пагубою испиют: яко да погибнет земля со исполнением  
своим, в нечестии бо вси живущии в ней. 20 И гради их  
населении опустеют, и земля их в погибель будет, и увесте,  
яко Аз Господь. 21 И бысть слово Господне ко мне глаголя:

22 сыне человекъ, кая притча сия вам на земли Израилеве, глаголющым: долги дни, погибе всякое видение? 23 Сего ради рцы к ним: тако глаголет Адонаи Господь: отвращу притчу сию, и потом не рекут притчи тоя дом Израилев, яко речеши к ним: приближишася дние и слово всякаго видения. 24 Зане не будет ктому всякое видение ложное, и волхвуй угодная среде сынов Израилевых. 25 Яко аз Господь возглаголю словеса Моя, возглаголю и сотворю и не продолжу ктому: во дни ваша, доме прогневай, реку слово и сотворю, глаголет Адонаи Господь. 26 И бысть слово Господне ко мне глаголя: 27 сыне человекъ, се, дом Израилев преогорчеваяй глаголюще глаголют: видение, еже сей видит, на дни многи, и на времена долга сей прорицает. 28 Сего ради рцы к ним: сия глаголет Господь Бог: не продолжатся ктому вся словеса Моя, яже возглаголю: яко возглаголю слово и сотворю, глаголет Адонаи Господь.

**13** И бысть слово Господне ко мне глаголя: 2 сыне человекъ, прорцы на пророки Израилевы прорицающыя и речеши пророком прорицающим от сердца своего, и прорцы и речеши к ним: слышите слово Господне, 3 сия глаголет Адонаи Господь: люте прорицающим от сердца своего, ходящим вслед духа своего, а отнюд не видящим. 4 Якоже лисицы в пустыни, (так) пророцы твои (быша), Израилю! 5 Не сташа на тверди и собраша стада к дому Израилеву: не восташа глаголющии в день Господень, 6 видящии ложная и волхвующии суетная, глаголюще: тако глаголет Господь, Господь же не посла их, и начаша возставляти слово. 7 Не ложное ли убо видение видесте и волхвования суетная рекосте? И глаголете, рече Господь: аз же не глаголах. 8 Сего

ради рцы: сия глаголет Адонаи Господь: понеже словеса ваша лжива и волхвования ваша суетна, того ради, се, Аз на вы, глаголет Адонаи Господь, **9** и простру руку Мою на пророки видящья лжу и провещавающья суетная: в наказании людей Моих не будут, и в писании дому Израилева не впишутся, и в землю Израилеву не внидут, и уведят, яко Аз Адонаи Господь. **10** Понеже прельстиша людей Моих, глаголюще: мир, мир: и не бяше мира: и сей сограждает стену, а они помазуют ю, падется. **11** Глаголи к помазующым ю: падется, и будет туча потопляющая, и дам камене стрельное в свузы их, и падутся, и ветер воздвижущь размещет, и разсядется. **12** И се, падеся стена, и не рекут ли к вам: где есть помазание ваше, имже помазасте? **13** Того ради сия глаголет Адонаи Господь: и наверху бурю разоряющую со яростию, и туча потопляющи гневом Моим будет, и камене стрельное наведу яростию во скончание: **14** и раскопаю стену, юже помазасте, и падется, и положу ю на земли, и открыются основания ея, и падется, и скончается со обличением и познаете, яко Аз Господь: **15** и скончаю ярость Мою на стене и на помазующих ю, и падет. И рекох к вам: несть стены, ни помазующих ея, **16** пророцы Израилевы, прорицающии на Иерусалим и видящии ему мир, и несть мира, глаголет Адонаи Господь. **17** И ты, сыне человекь, утверди лице твое на дщери людей твоих, на прорицающья от сердца своего, и прорцы на них, **18** и речеши: сия глаголет Адонаи Господь: горе шшивающим возглавийцы под всякий лакоть руки и сотворяющим покрывала над всякую главу всякаго возраста, еже развратити души: души развратишася людей Моих, и душ снабдеваху: **19** и осквернавляху Мя у людей

Моих, горсти ради ячмене и ради укруза хлеба, еже избити души, имже не подобаше умрети, и оживити души, имже не подобаше жити, провещающе людем Моим, послушающим лживых провещаний. 20 Сего ради сия глаголет Господь: се, Аз на возглавия ваша, имиже вы развращаете души тамо: и отторгну я от мышцей ваших, и послю души, яже вы развращаете души их на разсыпание, 21 и растерзаю покрывала ваша, и отиму люди Моя от руки вашея, и ктому не будут в руках ваших на развращение, и познаете, яко Аз Господь: 22 понеже развращаете сердце праведнаго неправедно, Аз же не развращах его, и укрепляете руке беззаконнику, еже отнюд не обратитися ему от пути его злаго и живу быти ему, 23 сего ради не узрите лжи, и волхвования ктому не имате волхвовати: и избавлю люди Моя от рук ваших, и увесте, яко Аз Господь.

**14** И приидоша ко мне мужие от старец Израилевых и седоша предо мною. 2 И бысть слово Господне ко мне глаголя: 3 сыне человек, мужие сии положиша помышления своя на сердцах своих и мучение неправд своих поставиша пред лицом своим: аще отвещаяй отвещаю им? 4 Сего ради глаголи к ним и речеши им: сия глаголет Адонаи Господь: человек человек от дому Израилева, иже аще положит мысли своя в сердцах своем и мучение неправды своея учинит пред лицом своим и приидет ко пророку, Аз Господь отвещаю ему о сих, имиже держится мысль его: 5 яко да уклонят дом Израилев по сердцам их удаленым от Мене помышленьми их. 6 Сего ради рцы дому Израилеву: сия глаголет Господь Бог: обратитесь и отвратитесь от начинаний ваших и от всех нечестий ваших, и обратите лица ваша

ко мне: 7 зане человек человек от дому Израилева и от пришелцев пришедших ко Израилеви, иже аще удалится от Мене и положит мысли своя на сердцы своем и мучение неправды своя учинит пред лицом своим и приидет ко пророку еже вопросити ему Мене, Аз Господь отвечаю ему, в немже держится он, 8 и утвержу лице Мое на человека того и положу его в погибель и в потребление и извергу его от среды людей Моих, и увесте, яко Аз Господь. 9 И пророк аще прельстится и речет слово, Аз Господь прельстих пророка того, и простру руку Мою на ню и потреблю его от среды людей Израилевых. 10 И примут неправду свою по неправде вопрошающаго, и по неправде такожде пророку будет, 11 яко да не прельщается ктому дом Израилев от Мене, и да не оскверняются ктому во всех гресех своих, и будут Ми в люди, Аз же буду им в Бога, глаголет Адонаи Господь. 12 И бысть слово Господне ко мне глаголя: 13 сыне человекь, земля аще согрешит Ми, еже пастися грехом, и простру руку Мою на ню и сотру утверждение хлебное и пущу на ню глад и возму с нея человеки и скоты, 14 и аще будут сии трие мужие среде ея, Ное и Даниил и Иов, тии во правде своей спасутся, глаголет Адонаи Господь: 15 аще и звери злыя напущу на землю и умучу ю, и будет в пагубу, и не будет проходящаго сквозе ю от лица зверей, 16 и аще будут трие сии мужие среде ея, живу Аз, глаголет Адонаи Господь, ни сынове, ни дщери их спасутся, но токмо сии едины спасутся, а земля в потребление будет: 17 аще же наведу на ту землю мечь и реку: мечь да пройдет землю, и возму от нея человека и скота, 18 и трие мужие сии будут среде ея, живу Аз, глаголет Адонаи Господь, не избавят ни

сынов, ни дочерей своих, но тии едины спасутся: **19** аще же и смерть пуцу на землю ону и излию ярость Мою на ню в крови, еже потребити от нея человеки и скоты, **20** Ное же и Даниил и Иов будут посреде ея, живу Аз, глаголет Адонаи Господь, ни сынове, ни дщери не останут им, тии же во правде своей спасутся и избавят души своя. **21** Сия глаголет Адонаи Господь: аще же и четыре мести Моя лютыя пуцу на Иерусалима, мечь и глад, и звери люты и смерть, еже потребити от него человеки и скоты, **22** и се, оставлени в нем спасеннии от него, сии изведут сыны и дщери: се, тии изыдут к вам, и узрите пути их и помышления их, и раскаетесь о злых, яже наведох на Иерусалим, вся злая, яже наведох нань, **23** и утешат вас: понеже узрите пути их и помышления их, и уразумеете, яко не всуе сотворил есмь вся, елика сотворих в нем, глаголет Адонаи Господь.

**15** И бысть слово Господне ко мне глаголя: **2** сыне человекь, что было бы древо лозное от всех древес гроздных, сущих во древесех дубравных? **3** Аще возмут от него древо, еже сотворити дело? И аще возмут кол от него, еже обесити на нем кий либо сосуд? **4** Разве еже огневи предастся на потребление, летнее очищение его потребляет огонь, и исчезает до конца: еда потребно будет на дело? **5** И еще целу ему суцу не будет на дело, кольми паче аще огонь е попалит до конца, будет ли на дело потом? **6** Сего ради рцы: сице глаголет Господь Бог: якоже лоза виноградная во древех дубравных, юже дах на потребление огневи, тако дам живуцья во Иерусалиме: **7** и дам лице Мое на ня, от огня изыдут, и огонь пояст я: и уведят, яко Аз Господь, егда

утвержду лице Мое на них: **8** и дам землю в пагубу, зане впадоша в грех, глаголет Адонаи Господь.

**16** И бысть слово Господне ко мне глаголя: **2** сыне человекъ, засвидетелствуй Иерусалиму беззакония его **3** и речеши: сия глаголет Адонаи Господь дщери Иерусалимстей: корень твой и бытие твое от земли Хананейски: отец твой Аморреанин и мати твоя Хеттеаныня: **4** и рождение твое, в онъже день родилася еси, не обязаша сосец твоих, и водою не омыша тя на спасение, ни солию осолошиша, ниже пеленами повиша: **5** и не пощаде тебе око Мое, еже сотворити тебе едино от всех сих, пострадати что о тебе, и отвержена была еси на лице поля стропотством души твоея, в день в онъже родилася еси. **6** И проидох сквозе тя и видех тя смешену во крови твоей и рекох ти: от крове твоя жива буди: и рекох тебе: во крови твоей живот твой: **7** умножайся, якоже прозябение селное дах ты, и умножилася еси и возвеличилася и вошла еси во грады градов: сосцы твои возрастоша, и власи твои просветлеша, ты же была еси нага и без красы. **8** И проидох сквозе тя и видех тя: и се, время твое, яко время витающих: и прострох криле Мои на тя и прикрых студ твой, и кляхся тебе и внидох в завет с тобою, глаголет Адонаи Господь, и была еси Мне: **9** и омых ты водою и ополосках кровь твою от тебе и помазах ты елеем, **10** и облекох ты в пестроты и обух ты в червлены, и препоясах ты виссоном и возложих на тя трихаптон, **11** и украсих ты утварию и возложих запястие на руце твои и гривну на выю твою, **12** и дах усерязи на ноздри твоя и колца во уши твои и венец хвалы на главу твою: **13** и украшенна была еси златом и серебром, и одежды твоя виссонны и трихапты и испещрения, семидал и мед и

масло яла еси, и была еси добра зело зело, и управилася еси на царство: 14 и изыде имя твое во языки в доброте твоей, зане совершенно бе лепотою в красоте, юже учиних на тебе, глаголет Адонаи Господь. 15 Ты же уповала еси на доброту твою и соблудила еси во имени твоём и излила еси блужение твое на всякаго мимоходящаго, тому была еси, емуже не подобаше: 16 и взяла еси от риз твоих и сотворила себе кумиры сошвеня и соблудила еси с ними, и не внидеши, и не будет. 17 И взяла еси сосуды хвалы твоя от серебра Моего и злата Моего, от нихже дах тебе, и сотворила себе образы мужески, и соблудила еси в них. 18 И взяла еси ризы своя испещренныя и одеялася еси в ня, и масло Мое и фимиам Мой положила еси пред лицом их, 19 и хлебы Моя, яже дах тебе, семидалом и маслом и медом напитал тя, и положила еси та пред лицом их в воню благоухания. И бысть по сих, глаголет Адонаи Господь, 20 и взяла еси сыны твоя и дщери твоя, яже родила еси, и заклала еси им в потребление. Еда мало соблудила еси? 21 И заклала еси чада твоя и дала еси я, внегда принесла еси их на жертву им. 22 Сие паче всякаго блуда твоего и гнусностей твоих: и не помянула еси дний младенства твоего, егда была еси нага и безобразна, и смешена во крови твоей жила еси. 23 И бысть по всех злобах твоих, горе горе тебе, глаголет Адонаи Господь, 24 и создала еси себе храм блуднический и сотворила себе полагания на всех стогнах: 25 и в начале всякаго пути создала еси блудилища своя и растлила доброту твою, и разложила голени твоя всякому мимоходящему и умножила еси блуд твой: 26 и соблудила с сынами Египетскими соседы



твоими дебелими, и многожды блудила еси, еже разгневати Мя. 27 И се, простру руку Мою на тя и отвергу законы твоя и предам тя душам ненавидящим тебе, дочерем иноплеменников, совращающим тя с пути твоего, имже нечествовала еси. 28 И соблудила еси с сынами Ассировыми и ниже тако насытилася еси: и соблудила и не насытилася, 29 и умножила заветы твоя ко земли Хананейстей, Халдейстей, и ниже в сих насытилася еси. 30 Что сотворю сердцу твоему, глаголет Адонай Господь, внегда твориши вся сия дела жены блудницы протерзая? И соблудила еси трегубо во дочерех твоих. 31 Егда соградила еси блудилище твое в начале всякаго пути и высокая твоя сотворила еси на всех стогнах, и не была яко блудница собирающая наем. 32 Жена любодейница подобна тебе, от мужа своего вземлющи наем, 33 всем блудившим с нею даяше наем: и ты дала еси наем всем рачителем твоим и обременяла их, еже приходити им к тебе отвсюду в блужения твоя. 34 И бысть в тебе сопротивно обычаю женску во блужении твоем, и с тобою соблудившим, вместо еже бы дати тебе наем, и наем не дадеся тебе, и бысть в тебе сопротивно. 35 Сего ради слыши, блуднице, слово Господне. 36 Сия глаголет Адонай Господь: зане излила еси медь твою, и открытсся срам твой во блужении твоем ко рачителем твоим, и во вся помышления беззаконий твоих, и во крови чад твоих, яже дала еси им: 37 сего ради, се, Аз на тя соберу вся похотники твоя, с нимиже смесилася еси, и всех, ихже любила еси, со всеми, ихже ненавидела еси: и соберу я на тя отвсюду и открыю злобы твоя к ним, и узрят весь срам твой. 38 И отмщу ти отмщением любодейцы и проливающаяия кровь, и

положу ты во крови ярости и рвенія, 39 и предам ты в руке их, и раскопают блудилище твое и разорят высокая твоя, и совлекут с тебе ризы твоя и возмут сосуды хвалы твоя, и оставят ты нагу и безстудну: 40 и приведут на ты народы, и побьют тебе камением и изсекут ты мечьми своими, 41 и запалят дома твоя огнем и сотворят в тебе отмщение пред женами многими: и обращу ты от блужения, и найма ктому не даси. 42 И послию ярость Мою на ты, и отимется рвение Мое от тебе: и почию и ктому не попекуся. 43 Понеже не помянула еси дний младенства твоего и опечалила Мя во всех сих: и се, Аз пути твоя на главу твою дах, глаголет Адонаи Господь: и тако сотворила еси нечестие по всем беззаконием твоим. 44 Сия суть вся, елика рекоша на ты в притчи, глаголюще: якоже мати, тако и дщерь. 45 Дщерь матери твоя ты еси, отринувшая мужа своего и чада своя: и сестры сестр твоих, отринувшыя мужей своих и чад своих: мати ваша Хеттеаныня, а отец ваш Аморрей: 46 сестра ваша старейшая Самария, та и дщери ея живуцья ошуюю тебе: и сестра твоя меньшая, живущая одесную тебе, Содома и дщери ея. 47 Но ниже по путем их ходила еси, ниже сотворила по беззаконием их поне мало, и превозшла еси их во всех путех твоих. 48 Живу Аз, глаголет Адонаи Господь, не сотворила Содома сия сестра твоя и дщери ея, якоже ты сотворила и дщери твоя. 49 Обаче сие беззаконие Содомы сестры твоя, гордость в сытости хлеба и во изюбиии вина, и сластолюбствовала та и дщери ея: сие бяше ей и дщерем ея: и руки убогому и нищему не подаяху, 50 и величахуся, и сотвориша беззакония предо Мною: и отвергох я якоже видех. 51 Самария же пол грехов твоих не согреша:

и умножила еси беззакония твоя паче оных, и оправдала еси сестры твоя во всех беззакониях твоих, яже сотворила еси. 52 И ты прими мучение твое, в немже растлила еси сестры твоя во гресех твоих, имиже беззаконновала паче тех, и оправдала их паче тебе: и ты посрамяся и прими безчестие твое, внегда оправдати тебе сестры твоя. 53 И обращу обращения их, обращение Содомы и дочерей ея, и обращение Самарии и дочерей ея, и обращу обращение твое среде их, 54 яко да примешь мучение твое и безчестна будешь от всех, яже сотворила еси во разгневании моем. 55 И сестра твоя Содома и дочери ея возставятся, якоже беша исперва: и Самария и дочери ея возставятся, якоже беша исперва: и ты и дочери твоя возставитесь, якоже бесте прежде. 56 И не была Содома сестра твоя во слышание во устех твоих во днех гордыни твоея, 57 прежде откровения злб твоих, якоже ныне укоризна еси дочерей Сирских и всех сущих окрест ея дочерей иноплеменничих одержавших тя окрест: 58 нечестия твоя и беззакония твоя ты понесла еси я, глаголет Господь. 59 Сия глаголет Адонаи Господь: и сотворю в тебе, якоже сотворила еси, якоже презрела еси еже преступити завет Мой: 60 и вспомяну Аз завет Мой, иже с тобою во днех младенства твоего, и возставлю тебе завет вечный: 61 и помянешь пути твоя и безчестна будешь, внегда поймешь сестры твоя старейшыя со юнейшими твоими, и дам я тебе на созидание, но не от завета твоего: 62 и возставлю Аз завет Мой с тобою, и увеси, яко Аз Господь: 63 яко да помянешь и усрамишися, и не будет тебе ктому отверсти уст твоих от лица безчестия твоего, егда милостив

буду тебе по всем, елика сотворила еси, глаголет Адонаи Господь.

**17** И бысть слово Господне ко мне глаголя: **2** сыне человек, повеждь повесть и рцы притчу на дом Израилев, **3** и речеши: сия глаголет Адонаи Господь: орел великий, великокрылый, долгий протяжением, исполнь ногтей, иже имать повеление внити в Ливан, и взя избранныя кедра, **4** и верхи мягкости острога, и принесе я в землю Хананейску, во граде огражденнем положи я: **5** и взя от семене земнаго и даде е на поли плодне, (да утвердит корение) над водами многими, видно учини е: **6** и прозябе и бысть в виноград немощен и мал величеством, еже являтися лозию его на нем, и корение его под ним бяше: и бысть в виноград, и сотвори розги, и простре отрасли своя. **7** И бысть орел другой велик, великокрылый, мног ногтьми, и се, виноград сей оплетаяся об нем: и корение его к нему, и лозие свое испусти ему, еже напаяти себе со грудием сада своего. **8** На поли добре, на воде мнозе питается той, еже сотворити прозябения и приносить плод, еже быти в виноград велик. **9** Сего ради рцы: сия глаголет Адонаи Господь: еда исправится? Не корение ли мягкоты его и плод изгниет? И изсхнут вся леторасли его, и не мышцею ли великою, ни людьми многими еже исторгнути его из корения его? **10** И се, тыет: еда успеет? Не абие ли, егда коснется ему ветр знойный, посхнет сухотою? Со грудием прозябения своего изсхнет. **11** И бысть слово Господне ко мне глаголя: **12** сыне человек, рцы ко дому прогневающему мя: не весте ли, что суть сия? Рцы им: се, грядет царь Вавилонск на Иерусалим, и возмет царя его и князя его, и ответет я к себе в Вавилон: **13** и

поймет от племени царска, и завещает с ним завет, и введет его в клятве, и старейшины земли возмет, 14 еже быти в царство немощно, еже весьма не возноситься, (но) хранити завет его и стояти в нем: 15 и отвержется от него посылая послы своя во Египет дати ему кони и люди многи: еда исправит? Спасется ли творяй сопротивная? И преступаяй завет спасется ли? 16 Живу Аз, глаголет Адонаи Господь, аще не на месте, идеже царь воцаривый его, иже похули клятву Мою и иже преступи завет Мой, с ним среде Вавилона скончается. 17 И не в силе велицей, ниже в народе мнозе сотворит с ним фараон брань во остроже и в сограждении стрельниц, еже изяти души многи. 18 И похули клятву, еже преступити завет, и се, даде руку свою и вся сия сотвори ему: не спасется. 19 Сего ради рцы: сия глаголет Адонаи Господь: живу Аз, аще не клятву Мою, юже похули, и завет Мой, егоже преступи, дам на главу его: 20 и простру мрежу Мою нань, и ят будет во одержании ея: и приведу его в Вавилон и разсуждуся с ним тамо о неправде его, еюже неправдова ко Мне: 21 и вси избегшии его и вси избранныи со всеми ополчении его мечем падут, и вся оставшая их разсею по всему ветру, и увесте, яко Аз Господь глаголах. 22 Сего ради сия глаголет Адонаи Господь: и возму Аз от избранных кедра высокога от верха и дам от главы отраслей его, сердца их остружу и насажду аз на горе висоце: 23 и повешу и в горе висоце Израилеве и насажду и, и прорастит отрасль и сотворит плод и будет в кедр велик: и почиет под ним всяк зверь, и под сению его почиет всяка птица, и лозие его паки устроятся: 24 и увесть всяко древо полевое, яко Аз Господь смиряяй древо высокое и возносяй древо

смирненное, и изсушаяй древо зеленое и проращаяй древо сухое: Аз Господь глаголах и сотворю.

**18** И бысть слово Господне ко мне глаголя: 2 сыне человекь, что вам притча сия на земли Израилеве, глаголющим: отцы ядоша терпкое, а зубом чад их оскомины быша? 3 Живу Аз, глаголет Адонаи Господь, аще будет еще глаголема притча сия во Израили. 4 Яко вся души Моя суть, якоже душа отча, тако и душа сыновня, Моя суть: душа, яже согрешит, та умрет, и зобавшаго пародки зубы оскоминны будут. 5 Человек же, иже есть праведен творяй суд и правду, 6 на горах не снести и очес своих не воздвигнет на кумиры дому Израилева, и жены ближняго своего не оскверnavит и к жене в месячных сущей не приблизится, 7 и человеку не насильствует, залог должнику отдаст и хищением не восхитит, хлеб свой алчному даст и нагаго облечет в ризу, 8 и сребра своего в лихву не даст и прибытка не возмет, и от неправды отвратит руку свою и суд сотворит между мужем и ближним своим, 9 и в заповедех Моих ходил и оправдания Моя снабдел, еже творити та: праведен сей есть, жизнью жити имать, глаголет Адонаи Господь. 10 И аще родит сына губителя, проливающего кровь и творяща грехи, 11 в путь отца своего праведнаго не ходил, но и на горах пожре, и жену ближняго своего оскверnavил, 12 и убогаго и нищаго преобиде, и хищением восхитил и залога не отдал, и к кумиром положи очи свои, беззакония сотвори, 13 с лихвою даде и с примножением приял, сей жизнью не поживет: вся сия беззакония сотвори, смертью умрет, кровь его на нем будет. 14 Аще же родит сына, он же увидит вся грехи отца своего, яже сотворил есть, и убоится и не сотворит по ним,

15 на горах не снести и очес своих не положит к кумиром  
дому Израилева, и жены подруга своего не осквернит 16 и  
человека не насильствует, и залога не удержит и хищением  
не восхитит, хлеб свои алчному даст и нага одет ризою, 17  
и от неправды отвратит руку свою, лихвы и примножения не  
возмет, правду сотворит и в заповедех Моих ходити будет:  
не скончается в неправдах отца своего, (но) жизнь поживет.  
18 Отец же его аще скорбию оскорбит и хищением восхитит,  
сопротивная сотворит посреде людей Моих, и умрет в  
неправдах своих. 19 И речете: что яко не взя сын неправды  
отца своего? Понеже сын правду и милость сотвори, вся  
законы Моя соблюде и сотвори я, жизнь поживет. 20 Душа  
же согрешающая, та умрет: сын не возмет неправды отца  
своего, и отец не возмет неправды сына своего: правда  
праведнаго на нем будет, и беззаконие беззаконника на нем  
будет. 21 И беззаконник аще обратится от всех беззаконий  
своих, яже сотворил, и сохранит вся заповеди Моя и сотворит  
суд и правду и милость, жизнь поживет и не умрет: 22 вся  
согрешения его, елика сотворил, не помянутся ему: но в  
правде своей, юже сотворил, жив будет. 23 Еда хотением  
восхощу смерти грешника, глаголет Адонаи Господь, а не  
еже обратится ему от пути зла и живу быти ему? 24 И аще  
совратится праведник от правды своея и сотворит неправду  
по всем беззаконием, яже сотворил беззаконник, вся правды  
его, яже сотворил есть, не помянутся: в преступлении своем,  
имже преступи, и во гресех своих, имиже согреши, в них  
умрет. 25 И рекосте: не управится путь Господень. Слышите  
убо, весь дом Израилев, еда путь мой не управится? Ваш  
ли путь убо управится? 26 Егда совратится праведник от

правды своея и сотворит грех, и умрет в преступлении, еже сотворил, в том умрет. 27 И егда обратится беззаконник от беззакония своего, еже сотворил, и сотворит суд и правду, той душу свою снабдел есть: 28 и виде и обратися от всех беззаконии своих, яже сотвори, жизнью поживет и не умрет. 29 И глаголет дом Израилев: не управится путь Господень. Еда путь Мой не управляется? О, доме Израилев, убо ваш ли путь управляется? 30 (Сего ради) комуждо по пути его сужду вам, доме Израилев, глаголет Адонаи Господь: обратитесь и отвержитесь от всех нечестий ваших, и не будут вам неправды в мучение: 31 отвержите от себе вся нечестия ваша, имиже нечествовасте ко Мне, и сотворите себе сердце ново и дух нов, и сотворите вся заповеди Моя: и вскую умираете, доме Израилев? Глаголет Господь. 32 Понеже не хочу смерти грешника умирающаго, глаголет Адонаи Господь, но еже обратится ему от пути своего и жити души его, глаголет Адонаи Господь: обратитесь убо, и живи будете.

**19** Ты же, сыне человек, возми плачь на князи Израилевы, 2 и речеши: почто мати твоя львица среде львов почи, посреде львов умножи львичища своя? 3 И отскочи един от львичищ ея и бысть лев, и научися восхищати восхищения и человеки снеде. 4 И слышаша о нем языцы, и ят бысть в растлении их, и приведоша его во узде во Египет. 5 И виде, яко отведен бысть от нея, и погипе чаяние ея: и взя инаго от львичищ своих и львом учини его, 6 и живяше посреде львов, бысть лев и научися восхищати восхищения: человеки изяде, 7 и пасяшеся в лютоści своей, и грады их пусты постави, и погуби землю и исполнение ея гласом рыкания



своего. **8** И даша нань языцы окрест от стран и простроша нань мрежи своя, и в погублении их ят бысть. **9** И положиша его во узде и в клети, приведоша его ко царю Вавилонску и ввергоша его в темницу, яко да не слышится глас его ктому на горах Израилевых. **10** Мати твоя яко виноград и яко цвет шипчан на воде насажден, плод его и отрасль его бысть от воды многи. **11** И бысть ему жезл крепости над племенем старейшин, и вознесся в величии своем среде лозия: и виде величество свое во множестве лозия своего, **12** и обломися в ярости, и на землю повержен бысть, и ветр знойный изсуши плоды его: увядоша, и исше жезл крепости его: огонь потреби его. **13** И ныне насадиша его в пустыни, на земли безводне. **14** И изыде огонь от жезла избранных его и пояде и, и не бе в нем жезла крепости его: племя в притчу плача есть, и будет плачь.

**20** И бысть в лето седмое, в пятый месяц, в десятый день месяца, приидоша мужие от старейшин дому Израилева вопросити Господа и седоша пред лицом моим. **2** И бысть слово Господне ко мне глаголя: **3** сыне человекь, глаголи ко старейшинам дому Израилева и речеши к ним: тако глаголет Адонаи Господь: еда вопросити Мене вы приходите? Живу Аз, аще отвещаю вам, глаголет Адонаи Господь. **4** Аще отмщением отмщу им: сыне человекь, беззакония отец их засвидетелствуй им, **5** и речеши к ним: сия глаголет Адонаи Господь: от негоже дне избрах дом Израилев, и уведен бых племени дому Иаковля и познан бых им во земли Египетстей, и приях я рукою Моею глаголя: Аз Господь Бог ваш: **6** в той день подях я рукою Моею, еже извести я из земли Египетския в землю, юже уготовах им, землю кипящую млеко и медом,

сот есть паче всех земель, 7 и рекох к ним: кийждо мерзости от очес своих отвержите и во творениих Египетских не оскверняйтесь, Аз Господь Бог ваш. 8 И отвергошася Мене и не хотеша послушати Мя: кийждо мерзостей от очес своих не отвергоша и творений Египетских не оставиша. И рекох, еже изляти ярость Мою на ня и скончати гнев Мой на них среде земли Египетския. 9 И сотворих, яко да имя Мое весьма не осквернится пред языки, в нихже суть тии среде их, в нихже познан бых им пред лицом их, еже извести я из земли Египетския. 10 И изведох я из земли Египетския и введох я в пустыню, 11 и дах им заповеди Моя, и оправдания Моя явих им, яже аще сотворит человек, жив будет в них: 12 и субботы Моя дах им, еже быти в знамение между Мною и между ими, еже разумети им, яко Аз Господь освящаяй их. 13 И глаголах ко дому Израилеву в пустыни: в заповедех Моих ходите и оправдания Моя сохраните, еже творити я, яже сотворит человек и жив будет в них. И разгнева Мя дом Израилев в пустыни: в заповедех бо Моих не ходиша и оправдания Моя отвергоша, яже сотворит человек и жив будет в них: и субботы Моя оскверниша зело. И рекох, еже изляти ярость Мою на ня в пустыни, еже потребити их. 14 И сотворих, яко да весьма имя Мое не осквернится пред языки, из нихже изведох я пред очима их. 15 И Аз воздвигох руку Мою на ня в пустыни весьма, еже не ввести их в землю, юже дах им, в землю текущую млеко и медом, сот есть паче всея земли: 16 понеже судьбы Моя отвергоша и в заповедех Моих не ходиша, и субботы Моя оскверниша и вслед помышлений сердца своего хождаху. 17 И пощаде я око Мое, еже потребити их, и не сотворих им скончания в

пустыни. 18 И рекох ко чадом их в пустыни: в законех отец ваших не ходите и оправданий их не храните, и ко творением Египетским не примешайтесь и не оскверняйтесь: 19 Аз Господь Бог ваш: в заповедех Моих ходите, и оправдания Моя снабдите и творите я, 20 и субботы Моя освящайте и будет в знамение между Мною и между вами, еже ведети вам, яко Аз Господь Бог ваш. 21 И разгневаша Мя, и чада их в заповедех Моих не ходиша и оправданий Моих не снабдеша, еже творити я: сия бо сотворив человек жив будет в них: и субботы Моя оскверниша зело. И рекох: излию ярость Мою на ня, еже скончати гнев Мой на них в пустыни. 22 И сотворих, яко да имя Мое весьма не осквернавится пред языки, от нихже изведох я пред очима их. 23 И Аз воздвигох руку Мою на ня в пустыни, еже расточити я во языцех и разсеяти я во странах, 24 понеже оправданий Моих не сотвориша и заповеди Моя отринуша и субботы Моя оскверниша, и вслед кумиров отец их быша очеса их. 25 И дах им заповеди не добры и оправдания, в нихже не будут живи: 26 и оскверню я в даяниих их, внегда проводитьи (им) всякое разверзающее ложесна, да погублю их, да уразумеют, яко Аз Господь. 27 Сего ради глаголи к дому Израилеву, сыне человекь, и речеши к ним: сия глаголет Адонаи Господь: даже до сего разгневаша Мя отцы ваши во гресех своих, имиже согреша ко Мне: 28 и введох я в землю, в нюже воздвигох руку Мою, еже дати ю им: и видеша всяк холм высок и всяко древо присенное, и пожроша тамо богом своим и учиниша тамо ярость даров своих, и положиша тамо воню благовония своего и возлияша тамо возлияния своя. 29 И рекох к ним: что суть Аввама,

яко вы входите тамо? И прозваша имя ему Аввама даже до днешняго дне. 30 Сего ради рцы к дому Израилеву: сия глаголет Адонаи Господь: аще во беззакониих отец ваших вы оскверняетея и вслед мерзостей их вы соблуждаете, 31 и в приношении даров ваших и в нарочех ваших, егда проходят чада ваша сквозе огонь: вы оскверняетея во всех кумирех ваших даже до днешняго дне, и Аз отвечаю ли вам, доме Израилев? Живу Аз, глаголет Адонаи Господь, аще отвечаю вам и аще въздет на дух ваш сие. 32 И не будет, якоже вы глаголете: будем, якоже языцы и якоже племена земная, служити древу и камению. 33 Сего ради живу Аз, глаголет Адонаи Господь, аще не рукою крепкою и мышцею высокою и в ярости излиянней царствовать буду над вами: 34 и изведу вы от людей и прииму вы от стран, в нихже бесте рассеяни, рукою крепкою и мышцею высокою и яростию излиянною, 35 и приведу вас в пустыню людскую и разсуждуся с вами тамо лицом к лицу: 36 якоже судихся со отцы вашими в пустыни земли Египетския, тако сужду и вам, глаголет Адонаи Господь: 37 и проведу вы под жезлом моим и введу вы в числе завета, 38 и изберу от вас нечестивыя и отвергшыяся: из земли бо обитания их изведу я, и в землю Израилеву не внидут, и познаете, яко Аз Господь Бог. 39 Вы же, доме Израилев, сице глаголет Адонаи Господь: кийждо кумиры своя отимите, и потом аще послушаете Мене, и имене Моего святаго не осквернавите ксему в дарех ваших и рукотворениих ваших: 40 понеже на горе Моей святей, на горе висоце Израилеве, глаголет Адонаи Господь, тамо послужат Ми весь дом Израилев до конца на земли, и тамо прииму я и тамо присещу на приношения ваша и

начатки обетов ваших во всех освященных ваших. **41** В воню благовония прииму вы, егда изведу вы из людей и прииму вы от стран, в няже расточени бысте, и освящуся в вас пред очима людскимма: **42** и увесте, яко Аз Господь, егда введу вы в землю Израилеву, в землю, на нюже воздвигох руку Мою дати ю отцем вашим: **43** и помянете тамо пути ваша и вся мерзкия грехи ваша, в нихже осквернитесь, и посрамите лица ваша во всех злобах ваших, яже сотвористе: **44** и познаете, яко Аз Господь, егда сотворю вам тако, яко да имя Мое не осквернится по путем вашим злым и по рукотворением вашим растленным, доме Израилев, глаголет Адонаи Господь. **45** И бысть слово Господне ко мне глаголя: **46** сыне человекь, утверди лице твое на юг и воззри на дарома, и прорцы на дубраву старейшину нагева **47** и речеши дубраве нагевове: слыши слово Господне, сия глаголет Адонаи Господь: се, Аз возгнещу в тебе огонь, и пожжет в тебе всяко древо зеленое и всяко древо сухое, не угаснет пламень разжженный, и изгорит в нем всяко лице от полудне до севера, **48** и увесть всяка плоть, яко Аз Господь разжегох его, и не угаснет. **49** И рекох: никакоже, Господи, Господи! Сии глаголют ко мне: не притча ли есть сия глаголема?

**21** И бысть слово Господне ко мне глаголя: **2** сего ради прорцы, сыне человекь, и утверди лице твое на Иерусалим и воззри на святыни их, и прорцы на землю Израилеву, **3** и речеши ко земли Израилеве: сия глаголет Адонаи Господь: се, Аз на тя, и извлеку меч Мой из ножен его, и потреблю от тебе неправеднаго и беззаконнаго. **4** Понеже потреблю от тебе неправеднаго и беззаконника, тако изыдет меч Мой из ножен своих на всяку плоть от юга даже до севера, **5** и

увестъ всяка плоть, яко Аз Господь извлекох мечь Мой из  
ножен его, и ктому не возвратится. 6 И ты, сыне человекъ,  
воздохни в сокрушении чресл твоих и в болезнех возстени  
пред очима их. 7 И будет, аще рекут к тебе: чесо ради ты  
стенеши? И речеши: о возвещении, яко грядет: и сокрушится  
всяко сердце, и ослабеют вся руки, и издшет всяка плоть и  
всяк дух, и вся стегна оскверняются мокротою: се, грядет и  
будет, глаголет Адонаи Господь. 8 И быти слово Господне ко  
мне глаголя: 9 сыне человекъ, прорцы и речеши: сия глаголет  
Адонаи Господь: рцы: мечу, мечу! Изострися и разярися,  
10 яко да изсечеши сечения: изострися, яко да будеши в  
блещание и готов на разсыпание: сецы, изничтожай, отрини  
всякое древо. 11 И даде его уготованна, еже держати в  
руках его: наострился мечь, готов есть, еже дан быти в руке  
секущаго. 12 Возопий и восплачися, сыне человекъ, яко сей  
бысть в людех Моих, сей во всех старейшинах Израилевых:  
обитающии близ под мечь быша с людьми Моими: сего ради  
восплещи рукама твоима, 13 яко оправдася. И что, аще и  
племя отринется? Не будет, глаголет Адонаи Господь. 14 И  
ты, сыне человекъ, прорцы и восплещи рукама и усугуби  
мечь: третий мечь язвеным есть, мечь язвеным велик, и  
ужасиши я, 15 яко да сокрушится сердце их, и умножатся  
немощнии во всех вратех их, предаются на усечение мечное:  
благо остр бысть на сечение, благо бысть на блистание. 16  
Проходи яко молния, острися одесную и ошуюю, аможе аще  
лице твое востанет: 17 и Аз восплещу рукою Моею к руке  
Моей и напущу ярость Мою, Аз Господь глаголах. 18 И бысть  
слово Господне ко мне глаголя: 19 и ты, сыне человекъ,  
учини себе пути два, еже внити мечу царя Вавилонска,

от страны единыя изыдут начала два, и руку уготовают в начале пути града, от начала пути учиниши, **20** яко внити мечу на Равваф сынов Аммоних и на Иудею и на Иерусалим среде его. **21** Понеже станет царь Вавилонск на старем пути, на начале обоих путей, еже волхвовати волхвованием, якоже вскипети жезлу, и вопрошати ваяных и вражити во утробах. **22** И бысть одесную его волшебство на Иерусалим, еже обставити острог и еже отверсти уста с воплем и возвысити глас со глашением трубным, и яко поставити острог пред враты его и насыпати персти и поставити стрелницы. **23** И той аки волхвуха им волхвование пред ними, уседмеря седмерицы, и той воспоминай неправды его помянути. **24** Того ради сия глаголет Адонаи Господь: понеже воспомянусте неправды ваша, внегда открышася нечестия ваша, яко явится грехом вашим во всех беззакониих ваших и во всех начинаниих ваших, понеже воспомянусте, в тех яти будете. **25** И ты, сквернаве, беззаконниче, старейшино Израилев, егоже грядет день во время неправды, конец: **26** сия глаголет Господь: сними кидар и отложи венец, сей не таков будет, смирил еси высокое и вознесл смиренное: **27** неправду, неправду, неправду положу его, и той не таков будет, дондеже приидет, Емуже достоит, и предам Ему. **28** И ты, сыне человек, прорцы и речеши: се глаголет Адонаи Господь к сыном Аммоним и ко укоризне их, и речеши: мечу, мечу извлеченый на сечение, извлеченый на скончание, двигнися, яко да блистаеши: **29** в видении твоём суетнем, и внегда вражбити тебе ложная, егда предаешися ты на выи язвеных беззаконников, ихже день приспе во время неправды, конец: **30** возвратися в ножны твоя и не стани на

месте сем, в немже родился еси, на земли твоей имам тя судити: **31** и излию на тя гнев Мой, во огни гнева Моего дуну на тя и предам тя в руце мужей варвар, творящих пагубу: **32** огню будеши ядь, кровь твоя будет посреде земли твоея: не будет твоя памяти, занеже Аз Господь глаголах.

**22** И бысть слово Господне ко мне глаголя: **2** и ты, сыне человекь, аще судити будеши граду кровей, и яви ему вся беззакония его, **3** и речеши: сия глаголет Адонаи Господь: о, граде проливай кровь среде себе, еже приити времени его, и творяй кумиры на себе, еже осквернитися самому: **4** в крови их, юже излиал еси, согрешил еси, и в кумирех твоих, яже творил, осквернился еси, и сократил еси дни твоя, и привед время лет твоих: сего ради дах ты на укоризну языком и на поругание всем странам, **5** близ тебе и далече от тебе сущым, и поругаются тебе и возопиют на тя: о, нечистый, пресловутый и мног во беззакониих! **6** Се, старейшины дому Израилева, кийждо ко своим ужикам смесишася в тебе, яко да пролиют кровь: **7** отцу и матери злословяху в тебе и ко пришелцу обращахуся неправдами в тебе: сироту и вдовицу преобидяху в тебе: **8** и святая Моя уничижаху и субботы Моя оскверняху в тебе: **9** мужие разбойницы беша в тебе, яко да пролиют в тебе кровь, и на горах ядыху в тебе и скверны творяху в тебе: **10** стыд отчий открыша в тебе, и в нечистоте сидящую обругаша в тебе: **11** кийждо на жену подруга своего беззаконноваша, и кийждо невестку свою оскверняше в нечестии, и кийждо сестру свою, дочь отца своего, обругаваше в тебе: **12** мзды взимаху в тебе, яко да пролиют кровь, лихву и избыток взимаху в тебе: и скончал еси скончание злобы твоея яже в насилии, Мене



же забыл еси, глаголет Адонаи Господь. 13 Се убо, ударю рукою Моею о руку Мою на та, яже совершил еси и яже сотворил еси, и на крови твоя бывшая посреде тебе: 14 аще устоит сердце твое, и аще преодолеют рuce твои во днех, в няже Аз творю в тебе? Аз Господь глаголах, и сотворю. 15 И разсыплю тя во языцех и разсею тя в странах, и оскудеет нечистота твоя из тебе, 16 и владети буду тобою пред очима языков, и познаеши, яко Аз Господь. 17 И бысть слово Господне ко мне глаголя: 18 сыне человек, се, быша Мне дом Израилев смешани вси с медю и железом, и со оловом чистым и со свинцем, среде печи серебро смешено суть. 19 Сего ради рцы: сия глаголет Адонаи Господь: понеже бысте вси во смешение едино, сего ради, се, Аз приму вас во средину Иерусалима: 20 якоже приемлется серебро и медь, и железо и свинец и олово чистое во средину печи, еже дунути на ня огню, да слиются, тако приму вас во гнев Моем и в ярости Моей, и соберу и слию вас, 21 и дуну на вы во огни гнева Моего, и слиани будете среде его: 22 якоже сливается серебро среде печи, тако слитесь посреде его и познаете, яко Аз Господь излиях ярость Мою на вас. 23 И бысть слово Господне ко мне глаголя: 24 сыне человек, рцы ему: ты еси земля неодождимая, ниже дождь бысть на тя в день ярости. 25 Егоже старейшины среде его, яко львы рыкающе, восхищающе восхищения, души изыдающе насилием, богатство и честь приемлюще, и вдовицы твоя умножишася посреде тебе: 26 и жерцы его отвергошася закона Моего и оскверниша святая Моя: между святым и сквернавым не разлучаху, и между нечистым и чистым не разделяху, и от суббот Моих покрываху очи свои, и

оскверняху Мя посреде себе: 27 князи его среде его яко волцы  
восхищающе похищения, еже пролияти кровь и погубити  
душы, яко да лихоимством лихоимствуют: 28 и пророцы  
его помазующии их падут, видящии суетная, волхвующии  
ложная, глаголюще: сия глаголет Адонаи Господь: а Господь  
не глагола. 29 Людей земли утесняюще неправдою и  
восхищающе восхищения, нища и убога насильствующе и со  
пришелцем не живуце судом. 30 И исках от них мужа живуца  
право и стояща цело пред лицом Моим во время гнева  
Моего, еже бы не до конца погубити его, и не обретох. 31 И  
излиях нань ярость Мою во огни гнева Моего, еже скончати  
я: пути их на главы их дах, глаголет Адонаи Господь.

**23** И бысть слово Господне ко мне глаголя: 2 сыне человекь,  
две жене бесте дщери матере единыя 3 и соблудисте во  
Египте, в юности своей соблудисте: тамо спадоша сосцы их,  
и тамо растлисте девство. 4 Имена же има: Оола старейшая,  
Оолива же меньшая сестра ея: и бысте Мне и родисте  
сыны и дщери: имена же има: Самариа Оола, и Иерусалим  
Оолива. 5 И соблуди Оола от Мене и возложися на похотники  
своя, на Ассирианы приближающыяся ей, 6 облеченныя  
в червленицы, старейшины и воеводы: юноши избраннии,  
вси конницы яздящии на конех: 7 и даде блужение свое к  
ним: избранным сыном Ассирийским всем, и ко всем, на  
няже возлагашеся, во всех нечистотах их оскверняшеся: 8 и  
блужения своего, еже из Египта, не остави, яко с нею спяху в  
юности ея, и тии растлиша девство ея и излиша блужение  
свое на ню. 9 Того ради предах ю в руце похотником ея, в руце  
сыном Ассирийским, на нихже возлагашеся. 10 Тии открывша  
стыд ея, сыны и дщери ея пояша и самую мечем усекнуша:

и бысть поношение в женах, и отмщение сотвориша в ней во дщерех ея. 11 И виде сестра ея Оолива, и растли возложение свое паче ея, и блуд свой паче блуда сестры своея умножи: 12 на сынов Ассирийских возложися, на старейшины и воеводы, иже близ ея, облеченны во благоистканны, на конники яздящыя на конех, юноши избранни вси. 13 И видех, яко осквернися путь един обою. 14 И приложи ко блужению своему, и виде мужы написаны на стене, образы Халдейски написаны шарами, 15 препоясаны пестротами о чреслах своих, и превои крашеннии на главах их, вид троякий всех, подобие сынов Вавилонских, Халдейских, земли отечества их: 16 и возложися на ня зрением очей своих, и посла послы к ним в землю Халдейску. 17 И придоша к ней сынове Вавилонстии на ложе витающих и оскверниша ю в блужении ея, и осквернися в них, и отступи душа ея от них: 18 и откры блужение свое и откры срамоту свою. И отступи душа Моя от нея, якоже отступи душа Моя от сестры ея. 19 И умножила еси блужение твое, еже помянути дни юности твоея, в няже блудила еси во Египте, 20 и возлегла еси на Халдеи, ихже плоти быша аки плоти осли, и яко лона конская лона их, 21 и посетила еси беззаконие юности твоея, яже творила еси во Египте во виталищи твоём, идеже сосцы юности твоея спадоста. 22 Того ради, Ооливо, сия глаголет Адонаи Господь: се, Аз воздвигну похотники твоя на тя, от нихже отступи душа твоя, и наведу их на тя окрест, 23 сынов Вавилонских и всех Халдеев, Факуда и Суда и Куды, и вся сыны Ассирийски с ними, юношы избранны, старейшины и воеводы, вся тристаты и нарочитыя, конники на конех вси. 24 И приидут на тя вси от севера, колесницы и колеса

со многим народом, щиты и сулицы и шлемы, и поставят стражбу окрест тебе, и дам пред лицом их суд, и отмстят ти в судех своих: 25 и дам рвение Мое в тебе, и сотворят с тобою гнев ярости Моея, ноздри твоя и уши твои обрежут, и оставших твоих мечем изсекут: тии сынов твоих и дщерей твоих возмут, и оставших твоих потребит огонь: 26 и совлекут с тебе ризы твоя и возмут сосуды хвалы твоея. 27 И отвращу нечестия твоя от тебе и блуд твой от земли Египетския: и не воздвигнеша очес твоих на них и Египта не помянеша кому. 28 Понеже сия глаголет Адонаи Господь: се, Аз предаю тя в руке, ихже ненавидиши, от нихже отступи душа твоя: 29 и сотворят в тебе в ненависти, и возмут вся труды твоя и дела твоя, и будеши нага и посрамлена, и открытася студ блуда твоего и нечестие твое. 30 И блужение твое сотвори сия тебе, егда блудила еси вслед языков и осквернялася в кумирех их: 31 в пути сестры твоея ходила еси, и дам чашу ея в руке твои. 32 Сия глаголет Адонаи Господь: чашу сестры твоея испиеша глубокую и широкую, и будет на смех и подражание, излюбилую ко совершению пиянства, 33 и расслабления наполниши: чаша же потребления и погубления чаша сестры твоея Самарии: 34 и испиеша ю и истоциши, и чреп ея ядуци потребиши, и сосца твоя отторгнеша: и праздники и новомесячия твоя отвращу: понеже Аз глаголах, рече Адонаи Господь. 35 Сего ради сия глаголет Адонаи Господь: понеже забыла Мя еси и отвергла Мене назад тела твоего, и ты возми нечестие твое и блуд твой. 36 И рече Господь ко мне: сыне человек, не будеши ли судити Ооле и Ооливе, и возвестиши ли има беззакония ея? 37 Яко любодействовасте, и кровь в руках ея, и в

кумирех ею прелюбодействовасте, и чада своя, яже родисте Мне, провождасте им сквозе огонь. 38 Даже и сия сотвористе Ми, осквернясте святая Моя в той день, и субботы Моя осквернясте: 39 и внегда закаласте чада своя кумиром своим, и вхождасте во святая Моя в той день, еже сквернити я: и се, тако творясте среде дому Моего: 40 и посыласте ко мужем грядущим издалеча, к нимже послов посыласте. И егда приходити им, абие умывалася еси и утваряла еси очи твои и украшалася утварию, 41 и седела еси на одре постлане, и трапеза украшенна пред лицом ея, и фимиам Мой и елей Мой предлагала пред ними, и веселяхуся в них: 42 и гласом сличным возглашаху, и ко мужем от множества человека приходящим от пустыни, и даяху перстни на руки их и венец хвалы на главы их. 43 И рекох: не в сих ли прелюбодействуют? И дела блудницы, и сама соблуди. 44 И вхождаху к ней: якоже влазят к жене блуднице, тако влазяху ко Ооле и ко Ооливе, женам беззаконницам, еже сотворити беззаконие. 45 Мужие же праведнии, тии и отмстят има отмщением любодейниц и отмщением проливающих кровь, яко любодейцы суть, и кровь в руках их. 46 Сия глаголет Адонаи Господь: приведи на них народы и даждь на них мятеж и разграбление, 47 и вержи камень на них, камень народов, и да избодут их мечьми своими: сыны их и дщери их избьют и дома их огнем сожгут: 48 и отвращу нечестие от земли, и накажутся вся жены и не сотворят по нечестием их: 49 и дастся нечестие ваше на вы: и (вся) грехи кумир ваших примете и уразумеете, яко Аз Адонаи Господь.

**24** И бысть слово Господне ко мне, в девятое лето, в месяц десятый, в десятый день месяца, глаголя: 2 сыне

человекъ, напиши себе имя дне сего, от негоже укрепися  
царь Вавилонский на Иерусалим, от сего дне, иже днесъ, 3 и  
рцы притчу к дому прогневающему, и речеши к ним: сия  
глаголет Адонаи Господь: настави коноб, настави и влий  
в онь воду, 4 и верзи в онь на двое разсеченая, всякое  
разсечение доброе, голень и рамо, обрезана от костей, 5 от  
избранных скотовъ взятая, и подгнещай костью под ними:  
возвре и воскипе, и сваришася кости его посреде его. 6 Того  
ради сия глаголет Адонаи Господь: о, граде кровей! Конобе,  
в немже есть яд, и яд не изыде из него: по уdom его изнесе,  
не паде на нем жребий. 7 Яко кровь его среде его есть, на  
гладцем камени вчиних ю: не пролиях ея на землю, еже  
покрыти ю землю, 8 еже навести ярость Мою (на ню), во  
отмщение еже отмстити: дах кровь его на гладцем камени,  
еже не покрыти ея. 9 Того ради сия глаголет Адонаи Господь:  
о, люте, граде кровей! Аз же возвеличу главню 10 и умножу  
дрова и возгнещу огонь, яко да истают мяса, и оскудеет юха,  
и кости истают, 11 и станет на главнях его, (тощъ) разгореся,  
яко да изгорит, и распалится и сгорит медь его, и истают  
среде его нечистота его, и оскудеет яд его: 12 да смирится  
яд его, и не изыдет из него многий яд его, и посрамится яд  
его: 13 в нечистоте твоей укроп, понеже осквернялся еси  
ты и не очистился от нечистоты твоея: и что будет аще не  
очистишися по сем, дондеже исполню ярость Мою в тебе?  
14 Аз Господь глаголах, и приидет, и сотворю, и не укосню, и  
не пощажу, и не буду умолен: по путем твоим и по помыслом  
твоим сужду тебе, глаголет Адонаи Господь: сего ради, се,  
Аз сужду тебе по кровем твоим и по помыслом твоим сужду  
тебе, нечисте, пресловуте и великий на разгневание. 15 И

бысть слово Господне ко мне глаголя: **16** сыне человекь, се, Аз возьму от тебе желания очес твоих в поражении, не восплачи, ниже возрыдай, ниже да приидут тебе слезы, **17** возстени молча: стенание крове, чресл плачь есть: да будут власи твои сплетени на тебе, и сапозы твои на ногах твоих, и да не утешишися устнами их, и хлеба мужей да не снеси. **18** И глаголах к людем заутра, якоже заповеда ми, и умре жена моя в вечер, и сотворих заутра, якоже повелесе ми. **19** И рекоша ко мне людие: не возвестиши ли нам, что суть сия, яже ты твориши? **20** И рекох к ним: слово Господне бысть ко мне глаголя: **21** рцы к дому Израилеву, сия глаголет Адонаи Господь: се, Аз оскверню святая Моя, величания крепости вашея, желания очес ваших, и ихже щадят души ваша: и сынове ваши и дщери ваша, яже остависте, мечем падут: **22** и сотворите, якоже аз сотворих: от уст их не утешитесь и хлеба мужей не снете, **23** и власи ваши на главах ваших, и сапозы ваши на ногах ваших: не будете терзатися, ниже плакати, и истаете в неправдах ваших, и не утешите кийждо брата своего. **24** И будет вам Иезекииль в чудо: по всему елика сотворих, сотворите: егда приидут сия, и уразумеете, яко Аз Адонаи Господь. **25** И ты, сыне человекь, не в день ли той, егда возму от них крепость их, вознесение хвальбы их, желания очию их и возношение души их, сыны их и дщери их: **26** в той день приидет уцелевый к тебе возвестити тебе во уши, **27** в той день отверзутся уста твоя ко уцелевшему, и возглаголеши и не премолчиши ктому, и будеши им в чудо: и уведят, яко Аз Адонаи Господь.

**25** И бысть слово Господне ко мне глаголя: **2** сыне человекь, утверди лице твое на сыны Аммони и прорцы на ня, **3** и

речеши сыном Аммоним (глаголя): слышите слово Господа Адоная, сия глаголет Адонаи Господь: понеже порадовастесь о святых Моих, яко осквернена быша, и о земли Израилеве, яко погибе, и о дому Иудине, яко отиде в пленение: 4 того ради, се, Аз предаю вас сыном Кедемлим в наследие, и вселятся со именем своим в тебе и поставят в тебе селения своя: тии поядят плоды твоя, и тии испиют тук твой: 5 и дам град Аммонь паствы вельблюдов и сыны Аммони на паству овец, и уразумеете, яко Аз Адонаи Господь. 6 Сего ради тако глаголет Господь Бог: понеже восплескал еси рукою твою и потоптал ногою твою и порадовался еси душею твою о земли Израилеве, 7 того ради, се, Аз простру руку Мою на тя и дам тя в разграбление языком, и потреблю тя от людей и погублю тя от стран пагубою, и увеси, яко Аз Адонаи Господь. 8 Сия глаголет Адонаи Господь: понеже рече Моав и Сиир: се, якоже вси языцы, дом Израилев и Иуда, 9 сего ради, се, Аз разслаблю мышцу Моавлю от градов крайних его, избранную землю, Дом Иасимуфов над источником града приморского (Ваелмона и Кариафаима): 10 сыны Кедемли на сыны Аммони дах я в наследие, яко да не будет памяти сынов Аммоних во языцех: 11 и в Моаве сотворю отмщение, и уведят, яко Аз Господь. 12 Сия глаголет Адонаи Господь: понеже сотвори Идумеа, егда отмстиша тии отмщением (во гневе) дому Иудову, и памятозлбствоваша и отмстиша прю от них: 13 того ради сия глаголет Адонаи Господь: простру руку Мою на Идумею и потреблю от нея человеки и скот и поставлю ю пусту, и от Феман гоними мечем падут: 14 и дам отмщение Мое на Идумею рукою людей Моих Израиля, и сотворят во Идумеи по гневу Моему



и по ярости Моей, и уведят отмщение Мое, глаголет Адонаи Господь. 15 Сего ради сия глаголет Адонаи Господь: понеже сотвориша иноплеменницы во отмщении и возставиша месть радующеся всею душею еже потребити даже до века, 16 того ради сия глаголет Адонаи Господь: се, Аз простру руку Мою на иноплеменники, и потреблю Критян, и погублю оставшыя живущыя на примории, 17 и сотворю в них отмщение велико, во обличениих ярости Моея, и уразумеют, яко Аз Адонаи Господь, егда дам отмщение Мое на ня.

**26** И бысть во едионадешатое лето, в первый день месяца, бысть слово Господне ко мне глаголя: 2 сыне человекь, понеже рече Сор на Иерусалима: благоже, сокрушися, погибоша языцы, обратися ко мне, иже бе исполненный, опусте: 3 того ради сия глаголет Адонаи Господь: се, Аз на тя, Сор, и приведу на тя языки многи, якоже восходит море волнами своими. 4 И обвалят стены Сора и разорят столпы твоя, и развею прах его из него и дам его во гладок камень. 5 Сушение мрежей будет среде моря, яко Аз глаголах, глаголет Адонаи Господь: и будет на пленение языком, 6 и дщери его, яже на поли, мечем убиены будут, и уведят, яко Аз Господь. 7 Яко сия глаголет Адонаи Господь: се, Аз наведу на тя, Сор, Навуходносора царя Вавилонска от севера, царь царем есть, с коньми и колесницами и с конниками и собранием многих языков зело: 8 сей дщери твоя на поли мечем избьет, и приставит на тя стражбу и оградит тя, и окопает тя ровом и сотворит окрест тебе острог, и обставит оружием и копия своя прямо тебе поставит, 9 стены твоя и пирги твоя разорит оружием своим: 10 от множества коней его покрывает тя прах их, и от ржания коней его и от колес колесниц его потрясутся

стены твоя, входящу ему во врата твоя, аки входящу во град с поля: **11** копытами коней своих поперут вся стогны твоя: люди твоя мечем изсечет, и состав крепости твоя на земли повержет, **12** и пленит силу твою, и возмет имения твоя, и разсыплет стены твоя, и дома твоя вожделенныя разорит, и древа твоя и камене твое и персть твою среде моря ввержет, **13** и упразднит множество мусикий твоих, и глас певниц твоих не услышится в тебе ктому. **14** И дам тя во камень гладок, сушение мрежное будеши, не соградишися ктому, яко Аз глаголах, глаголет Адонаи Господь. **15** Яко сия глаголет Адонаи Господь Сору: не от гласа ли падения твоего, егда возстенут язвении твои, егда извлечется мечь посреде тебе, потрясутся острови? **16** И снидут со престол своих вси князи язык морских, и свергут венцы со глав своих, и ризы своя испещренныя совлекут с себе, ужасом ужаснутся: на земли сядут, и убоятся погибели своея, и возстенут о тебе, **17** и примут о тебе плачь, глаголюще: како погибл и разсыпался еси от моря, граде хвалимый, иже был еси крепок на мори, ты и живуции в тебе, иже даял еси страх твой всем живуцым в тебе? **18** И убоятся (вси) острови от дне падения твоего, и смятутся острови в мори от исхода твоего. **19** Яко сия глаголет Адонаи Господь: егда дам тя град опустевшь, якоже грады ненаселены никогдаже, внегда возведу на тя бездну, и покрывает тя вода многа: **20** и сведу тя к низходящым в пропасть к людем века, и вселю тя во глубинах земных, яко пустыню вечную с низходящими в пропасть, яко да не населишися, ниже востанеши на земли живота: **21** на пагубу тя отдам, и не будеши ктому,

и взыщешися и не обрящешися во век, глаголет Адонаи Господь.

**27** И бысть слово Господне ко мне глаголя: **2** и ты, сыне человекъ, возми на Сор плачь, **3** и речеши Сору населенному на морстем входе, торжищу людей от островов многих, сия глаголет Адонаи Господь Сору: ты рекл еси: аз сам возложих на мя мою доброту, **4** в сердцы морстем веелиму, и сынове твои возложиша на тя доброту. **5** Кедр от Санира истесася тебе, тонкия доски кипарисныя от Ливана взяты быша, еже сотворити тебе ядрила елова: **6** от Васанитиды сотвориша весла твоя: святилища твоя состроиша от слоновых (костей), дома древяны от островов Хеттиимских: **7** виссон со испещрением от Египта бысть тебе постеля, еже обложити тебе славу и облещи тя в синету и во багряницу от островов Елиссе, и бысть одежда твоя. **8** И князи твои живуции во Сидоне и Арадиане быша весленицы твои: премудрии твои, Сор, иже быша в тебе, сии кормчии твои. **9** Старейшины Вивлийстии и премудрии их, иже быша в тебе, тии укрепляху совет твой: и вси корабли морстии и весленицы их быша в тебе ко западом западов. **10** Персяне и Лидяне и Ливиане беша в силе твоей, мужие доблии твои щиты и шлемы повесиша в тебе, сии даша славу твою. **11** Сынове Арадийстии и сила твоя на забралех твоих окрест: но и Мидяне во пиргах твоих быша стражие, тулы своя обесиша на забралех твоих окрест: сии совершиша твою доброту. **12** Кархидоняне купцы твои, от множества силы твоея, серебро и злато, и медь и железо, и чистое олово и свинец даша куплю твою. **13** Еллада вся и ближнии твои продаяху в тебе души человекы, и сосуды медяны даша куплю твою. **14** От

дому Форгамова кони и конники и мщята даша куплю твою.

15 Сынове Родийстии купцы твои от островов умножиша куплю твою, зубы слоновы, и вводимым воздавал еси мзды твоя. 16 Человеки куплю твою от множества примешенца твоего, стаки и пестроты и синету от Фарсиса, и рамоф и хорхор даша куплю твою. 17 Иуда и сынове Израилевы, сии купцы твои: продаянием пшеницы и миров и касии, и первый мед и елей и ритину даша примешенцу твоему. 18 Дамаск купцы твои от множества всея силы твоея, вино от Хелвона, и волну блестящуся от Милита, и вино Деданово и Ионаново и Меозелево в куплю твою даша. 19 От ассиила железо деланое и колеса в примесницех твоих суть. 20 Дедан купцы твои со скоты избранными в колесницы. 21 Аравиа и вси князи Кидарстии, сии купцы рукою твоею, велблюды и овны и агнцы в тебе продадут, имиже куплю творят. 22 Купцы Савы и Раммы, тии купцы твои с первыми сладостями и со камением драгим, и злато даша куплю тебе. 23 Харран, Ханаа и Дедан, сии купцы твои: Сава, Ассур и Харман купцы твои, 24 приносяще куплю синету и червленицу, и испещренная и сокровица избранная связана ужами, и кипарисная. 25 Корабли, в тех купля твоя, (корабли) Кархидонстии купцы твои, во множестве смесник твоих, и насытился еси, и отягчал зело в сердцах морских. 26 В воде мнозе привождаху тя весленицы твои: ветер южный сокруши тя в сердца морстем. 27 Быша силы твоя и мзда твоя от смесник твоих, и весленицы твои и кормчии твои, и советницы твои и смесницы от смесников твоих, и вси мужие твои доблии в тебе и весь сонм твой падут среде тебе в сердца морстем, в день падения твоего. 28 От гласа

вопля твоего кормчи и твои страхом убоятся. 29 И снидут с кораблей своих все весленицы твои, и всадницы и ловцы морстии на земли станут: 30 и воскликнут на тя гласом своим, и воскричат горце, и возложат землю на главы своя, и прах постелют: 31 и оплешивеют над тобою плешьми, и облекутся во вретнице, и восплачутся о тебе в горести души, и плачем горьким ужаснутся: 32 и возмут о тебе сынове их плачь, возрыдают плаканием о тебе: кто якоже Тир умолкнувший среде моря? Колику обрел еси мзду от моря? 33 Наполнил еси страны от множества твоего и от смесник твоих обогатил еси вся цари земныя. 34 Ныне же сокрушился еси в мори, во глубинах водных смесницы твои, и весь сонм твой среде тебе падоша, и все весленицы твои. 35 Все же живущии во островех уныли по тебе, и царие их ужасом ужасошася, и прослезися лице их. 36 Купцы от язык позвиждут о тебе, в погибель был еси, и ктому не будещи в век, глаголет Господь Бог.

**28** И бысть слово Господне ко мне глаголя: 2 и ты, сыне человек, рцы князю Тирску: сия глаголет Адонаи Господь: понеже вознесся сердце твое, и рекл еси: аз есмь бог, в селение божие вселихся в сердца морстем: ты же человек еси, а не Бог, и положил еси сердце твое яко сердце Божие. 3 Еда премудрее ты еси Даниила? Премудрии не наказаша тебе хитростию своею. 4 Еда хитростию твоею или смыслом твоим сотворил еси себе силу и притяжал еси сребро и злато в сокровищих твоих? 5 Или во мнозей хитрости твоей и в купли твоей умножил еси силу твою? Вознесся сердце твое в силе твоей. 6 Того ради сия глаголет Адонаи Господь: понеже дал еси сердце свое яко сердце Божие,

7 вместо сего, се, Аз наведу на тя чуждые губители от язык, и извлекут мечы своя на тя и на доброту хитрости твоя, и постелят доброту твою в погубление, 8 и сведут тя, и умрешу смертью язвеных в сердцы морстем. 9 Еда речеши глаголя пред убивающими тя: бог есмь аз? Ты же человек еси, а не бог, в руце убивающих тя. 10 Смертьми необрезаных умрешу в руках чуждых: яко Аз рекох, глаголет Адонаи Господь. 11 И бысть слово Господне ко мне глаголя: 12 сыне человек, возми плачь на князя Тирска и рцы ему: сия глаголет Адонаи Господь: ты еси печать уподобления, исполнен премудрости и венец доброты, 13 в сладости рая Божия был еси, всяким камением драгим украсился еси, сардием и топазием, и смарагдом и иакином, и анфраксом и сапфиром, и иасписом и серебром и златом, и лигирием и ахатом, и амефистом и хрисолифом, и вириллием и онихом и златом наполнил еси сокровища твоя и житницы твоя, от негоже дне создан еси. 14 Ты, с херувимом вчиних тя в горе святей Божии, был еси среде камней огненных. 15 Был еси ты непорочен во днех твоих, от негоже дне создан еси, дондеже обретошася неправды в тебе. 16 От множества купли твоя наполнил еси сокровища твоя беззакония, и согрешил еси, и уязвлен еси от горы Божия: и сведе тя херувим осеняяй от среды камыков огненных. 17 Вознесися сердце твое в доброте твоей, истле хитрость твоя с добротою твоею: множества ради грехов твоих на землю повергох тя, пред цари дах тя во обличение. 18 Множества ради грехов твоих и неправд купли твоя, осквернил еси святая твоя, и изведу огонь от среды твоя, сей снести тя: и дам тя во прах на земли пред всеми видящими тя. 19 И вси ведящи тебе

во языцех возстенут по тебе: пагуба учинен еси, и не будеши ктому во век. 20 И бысть слово Господне ко мне глаголя: 21 сыне человек, утверди лице твое на Сидона и прорцы о нем и рцы: 22 сия глаголет Адонаи Господь: се, аз на тя, Сидоне, и прославлюся в тебе, и уразумеешь, яко аз есмь Господь, егда сотворю в тебе суд и освящуся в тебе: 23 и послю на тя смерть, и кровь в стогнах твоих будет, и падут язвении среде тебе мечем, в тебе и окрест тебе, и уведят, яко аз Господь: 24 и не будет ктому дому Израилеву остен горести и терн болезни от всех окрестных его обезчестивших их, и уразумеют, яко аз есмь Адонаи Господь. 25 Тако глаголет Адонаи Господь: и соберу дом Израилев от язык, идеже разсыпашася тамо, и освящуся в них пред людьми и языки: и вселятся на земли своей, юже дах рабу Моему Иакову, 26 и населятся на ней с надеждою, и созиждут дома, и насадят винограды, и вселятся на ней с надеждою, егда сотворю суд во всех, иже укориша я во окрестных их: и уразумеют, яко аз Господь Бог их и Бог отцев их.

**29** В десятое лето, в десятый месяц, (в первый день) месяца, бысть слово Господне ко мне глаголя: 2 сыне человек, утверди лице твое на фараона царя Египетска и прорцы нань и на Египет весь: 3 глаголи и рцы: сице глаголет Адонаи Господь: се, аз наведу на тя, фараоне, царю Египетский, змиа великаго, сидящаго среде рек своих, глаголющаго: моя суть реки, и аз сотворих я. 4 аз же дам узду в челюсти твоя, и прилеплю рыбы реки твоя ко крилома твоима, и возведу тя от среды реки твоя, и к чешуям твоим прильпнут: 5 и низвергу тя вскоре и вся рыбы реки твоя: на лица поля падеши, и не соберешися, и не оградишися,

зверем земным и птицам небесным дах ты во снедь. 6 И уведят вси живущии во Египте, яко Аз есмь Господь: зане был еси жезл тростян дому Израилеву: 7 егда яся тебе рукою своею, сокрушился еси, и егда восплеска на них всяка рука, и егда почиша на тебе, стерлся еси и сломил еси их вся чресла. 8 Сего ради тако глаголет Адонаи Господь: се, Аз наведу на ты мечь и погублю от тебе человеки и скоты, 9 и будет земля Египетска в погибель и во опустение, и уразумеют, яко Аз есмь Господь. Понеже глагола еси, яко реки моя суть, и аз сотворих я: 10 того ради, се, Аз на ты и на и вся реки твоя, и дам землю Египетску во опустение и в мечь и в погибель, от Маглола и Сиины и даже до предел Ефиопских: 11 не пройдет сквозе ея нога человека, ни нога скотия не поступит по ней, и не населится сорок лет: 12 и дам землю его в пагубу среди земли опустелыя, и гради его среди градов опустевших будут, в разорении будут сорок лет: и разсею Египта во языцех, и развею я по странам. 13 Сия глаголет Адонаи Господь: по сорока летех соберу Египтяны от язык, аможе разсыпашася, 14 и возвращу пленники Египетския и вселю я в землю Фафорскую, в землю, отнюдуже взяти быша, и будет власть смиренна: 15 паче всех властей будет смиренна, и не вознесется ктому над языки, и умалены сотворю я, еже не быти им многим во языцех. 16 И не будут ктому дому Израилеву в надежду воспоминающую беззаконие, внегда последовати им по ним: и уразумеют, яко Аз есмь Господь. 17 И бысть в двадцать седмое лето, во един день месяца перваго, бысть слово Господне ко мне глаголя: 18 сыне человек, Навуходоносор царь Вавилонск



поработи силу свою работою великою на Тира, всяка глава плешива и всяко рамо наго: и мзда не бысть ему ни силе его на Тира, за работу, еюже работаша нань. **19** Того ради сице глаголет Адонаи Господь: се, Аз даю Навуходоносору царю Вавилонску землю Египетску, и возмет множество ея, и пленит плен ея, и расхитит корысти ея, и будет мзда силе его: **20** за службу его, еюже послужил на Тира, дах ему землю Египетску, зане послужил Мне, сия глаголет Адонаи Господь. **21** В той день взыдет рог всему дому Израилеву, и тебе дам уста отверста среде их, и уведят, яко Аз есмь Господь.

**30** И бысть слово Господне ко мне глаголя: **2** сыне человек, прорцы и рцы: сия глаголет Адонаи Господь: **3** возрыдайте: оле, оле день! Яко близ день Господень, и приближается день облака, и конец языков будет: **4** и приидет мечь на Египтяны, и будет мятеж во Ефиопии, и падут язвении во Египте, и взято будет множество их, и падутся основания его: **5** Персяне и Критяне, и Лидяне и Ливиане, и Мурини (и вся Аравия) и вси примесницы, и сынове, иже от завета Моего, в нем мечем падут с ним. **6** Сия глаголет Господь: и падут подпоры Египта, и снидет укоризна крепости его от Маглола даже до Сиины, мечем падут в нем, глаголет Адонаи Господь. **7** И опустеют среде стран погибших, и гради их среде градов опустевших будут: **8** и уразумеют, яко Аз есмь Господь, егда дам огонь на Египет, и сокрушатся вси помагающии ему. **9** В той день приидут вестницы от лица Моего в сиеим тщася погубити надежду Муринския земли, и будет им мятеж в день Египетск, яко се, приспе. **10** Сия глаголет Адонаи Господь: и погублю множество Египтян рукою Навуходоносора царя Вавилонска, **11** самаго и людей его с ним, губителие от

язык послани погубити землю: и извлекут вси мечы своя на Египта, и наполнится земля язвеными. 12 И дам реки их во опустение и отдам землю в руке злых, и погублю землю и исполнение ея руками чуждых, Аз Господь глаголах. 13 Яко сия глаголет Адонаи Господь: погублю кумиры и испражню вельможи от Мемфиса и старейшины от земли Египетския, и не будут ктому: и дам страх во земли Египетстей. 14 И погублю землю Фафорскую, и дам огонь на Таниса, и сотворю отмщение в Диосполи, 15 и излию ярость Мою на Саин крепость Египетску, и погублю множество Мемфы. 16 И дам огонь на Египта, и мятежем возматется Саис, и в Диосполи будет расселина, и разлиются воды. 17 Юноши Илиуполя и Вуваста мечем падут, и жены в плен пойдут: 18 и в Тафнесе помрачится день, егда сокрушу тамо скипетры Египетски, и погибнет тамо укоризна крепости его, и того покрывает облак, и дщери его во пленение отведутся. 19 И сотворю суд во Египте, и уразумеют, яко Аз есмь Господь. 20 И бысть во единонадесятое лето, в первый месяц, в седмый день месяца, бысть слово Господне ко мне глаголя: 21 сыне человекъ, мышцы фараона царя Египетска сотрох, и се, не помолися, еже дати ему цельбу, приложити ему пластырь, (обязати, ) дати силу, да возмет мечь. 22 Того ради сия глаголет Адонаи Господь: се, Аз на фараона царя Египетска, и сокрушу мышцы его крепкия и протяженья и сотренья, и изрину мечь его из руки его: 23 и развею Египта во языки и развею их во страны: 24 и укреплю мышцы царя Вавилонска и дам мечь Мой в руку его, и наведет его на Египта, и пленит пленение его, и возмет корысти его: 25 и укреплю мышцы царя Вавилонска, мышцы же фараони

падут: и уведят, яко Аз есмь Господь, егда дам меч Мой в руке царя Вавилонска, и прострет его на землю Египетску, 26 и разсею Египта во языки и развею их во страны: и уведят вси, яко Аз есмь Господь.

**31** И бысть во едионадешатое лето, в третий месяц, во един день месяца, бысть слово Господне ко мне глаголя: 2 сыне человекъ, рцы фараону царю Египетску и множеству его: кому уподобил еси себе в высоте твоей? 3 Се, Ассур кипарис в Ливане, добр отрасльми и высок величеством и част покровом, и среде облак бысть власть его: 4 вода воспита его, бездна вознесе его, реки своя приведе окрест садов своих, и составы своя испусти во вся дрeвеса полевая. 5 Сего ради вознесся величество его паче всех дрeвес польных, разширишася ветвие его, и вознесошася отрасли его от воды многи, егда протяжеся. 6 Во отраслех его возгнездишася вся птицы небесныя, и под ветвьми его раждахуся вси зверие польнии, под сению его вселися все множество языков. 7 И бысть добр в высоте своей множества ради ветвий своих, яко беша корение его в воде мнозе. 8 И кипариси не таковы в раи Божии, и сосны неподобны отраслем его, и елие не бысть подобно ветвиям его: всякое древо, еже в раи Божии, не бысть подобно ему в доброте его, множества ради ветвий его. 9 Добра сотворих его во множестве ветвий его, и возревноваша ему дрeвеса райская Сладости Божия. 10 Того ради сия глаголет Адонаи Господь: понеже был еси велик величеством и дал еси власть свою во средину облак, и вознесся сердце его в высоте его, и видех, егда вознесся: 11 и предах его в руке князя языческа, и сотвори пагубу его, по нечестию его.

12 И изгнах его Аз, и потребиша его чуждии губителие от язык, и повергоша его на горах: и во всех дебрех падоша ветви его, и сотрошася отрасли его на всяцем поли земнем, и снидоша от покрова его вси людие языков и разориша его. 13 Во падении его почиша вся птицы небесныя, и на стеблиех его быша вси зверие селнии, 14 яко да не возносятся величеством своим вся дрeвеса, яже в воде, и не дадут власти своея среде облак, и не станут в высоте их к нему вси пиющии воду, вси отдани быша во смерть во глубину земли, среде сынов человеческих к низходящим в пропасть. 15 Сия глаголет Адонаи Господь: в оньже день сведеся во ад, плакася о нем бездна: и удержях реки ея и возбраних множеству вод, и померче о нем Ливан, и вся дрeвеса полевая о нем разслабишася: (Sheol h7585) 16 от гласа падения его потрясошася языцы, егда свождах его во ад со низходящими в ров, и утешаху его в земли долнейшей вся дрeвеса Сладости, и избранная и добрая Ливанова, вся пиющая воду: (Sheol h7585) 17 и та бо сведошася с ним во ад со язвеными от меча, и семя его, и живущии под покровом его среде жизни своея погибоша. (Sheol h7585) 18 Кому уподобился еси силою и славою и величеством во дрeвесех Сладости? Слези и сними со дрeвесами Сладости во глубину земную: среде необрезанных успнеши со язвеными мечем: тако фараон и все множество крепости его, глаголет Адонаи Господь.

**32** И бысть во второенадесять лето, во вторыйнадесять месяц, во един день месяца, 2 бысть слово Господне ко мне глаголя: сыне человек, возми плачь на фараона царя Египетска и речеши ему: лъву языков уподобился еси ты, и

яко змий великий, иже в мори, и бил еси рогами в реках твоих, и возмуцал еси воду ногама твоима, и попирал еси реки твоя. **3** Сия глаголет Адонаи Господь: и возложу на тя сети Моя в собрании людей многих, **4** и изведу тя удою моею, и простру тя на земли: поля наполнятся тебе, и посажду на тебе вся птицы небесныя, и насыщу тобою вся звери всея земли: **5** и повергу плоти твоя на горах, и наполню кровию твоею всю землю, **6** и напнется земля от гноя твоего, от множества твоего на горах: и дебри наполню от тебе, **7** и покрью небо, егда угаснеши, и помрачу звезды его, солнце во облаце сокрыю, и луна не явит света своего: **8** вся светила небесная помрачу на тя и дам тму на землю твою, глаголет Адонаи Господь. **9** И разгневаю сердца людей многих, егда изведу пленники твоя во языки, в землю, еяже не знал еси. **10** И уныют о тебе языцы мнози, и царие их ужасом ужаснутся о тебе, егда налетит мечь Мой на лица их, чающе падения своего от дне падения твоего. **11** Яко сия глаголет Адонаи Господь: мечь царя Вавилонска приидет тебе, мечьми исполинов, и поражу крепость твою: **12** губителие от язык вси, и погубят укоризну Египетску, и сокрушится вся крепость его. **13** И погублю вся скоты его от воды многи, и не возмутит ея нога человеческа ктому, и стопа скотия не ступит на ню. **14** Тако тогда умолкнут воды их, и реки их яко елей потекут, глаголет Адонаи Господь, **15** егда дам Египта в пагубу, и опустеет земля с полнотою своею, егда разсею вся живуцья на ней, и уведят, яко Аз есмь Господь. **16** Плачь есть, и восплачешися о нем, и дщери языческаия восплачутся о нем, над Египтом и над всею силою Его восплачутся, глаголет Адонаи Господь. **17** И бысть во

второнадесять лето, первого месяца в пятыйнадесять день, бысть слово Господне ко мне глаголя: **18** сыне человекь, восплачися о крепости Египетстей (прекланяя преведи его): и сведут дщерей его мертвых языцы во глубину земную ко низходящим в пропасть. **19** От вод благолепно сниди и поспи с необрезаными. **20** Среде язвеным мечем падут с ним, и уснет вся крепость его. **21** И рекут ти исполнии: во глубине пропасти буди, кого лучши еси ты? Сниди и лязи с необрезаными среде язвеным мечем. (Sheol h7585) **22** Тамо Ассур и весь сонм его, и вси язвении тамо дашася, и гроб их во глубине пропасти, и быти сонм его окрест гроба его, вси язвении падшии мечем, **23** иже даша гробы его во стегнех рва, и бысть сонм его окрест гроба его, вси тии язвении падающии мечем, иже даша страх свой на земли живых. **24** Тамо Елам и вся сила его окрест гроба его, вси язвении падшии мечем и низходящии необрезани во глубину земную, давшии страх свой на земли живых: **25** и прияша мучение свое с низходящими в пропасть, среде язвеным. **26** Тамо дашася Мосох, и Фовель, и вся сила его, окрест гроба его, вси необрезанныи язвении от меча, давшии страх свой на земли жизни. **27** И успоша со исполины падшими от века, иже снидоша во ад во оружии воинстем и положиша мечы своя под главы своя, и быша беззакония их на костех их, яко устрашиша всех во житии своем, и страх сильным быша на земли живущым. (Sheol h7585) **28** И ты посреде необрезанных сокрушишися и поспиши со язвеными мечем. **29** Тамо Едом и царие его и вси князи Ассуровы, давшии крепость свою на язву мечную: сии со язвеными успоша, с низходящими в ров. **30** Тамо князи северстии вси, тамо

все воеводы Ассуровы, иже сведени быша со язвеными со страхом своим и со крепостию своею стыдящися, успоша необрезанныи со язвеными мечем, и прияша мучение свое с низходящими в пропасть. 31 Тех узрит царь фараон и утешится от всей крепости их: фараон и язвении мечем и вся сила его, глаголет Адонаи Господь. 32 Яко дах страх Мой на земли жизни, и успнет среде необрезанных со язвеными мечем фараон, и все множество его с ним, глаголет Адонаи Господь.

**33** И быти слово Господне ко мне глаголя: 2 сыне человекь, глаголи ко сыном людий твоих и речеши к ним: земля, на нюже Аз аще наведу мечь, и поймут людие земли человека единого от себе и поставят его себе во стража, 3 и узрит мечь грядущь на землю, и вострубит трубою, и проповесть людем, 4 и услышит услышавый глас трубы, а не сохранится, и найдет мечь и постигнет его, кровь его на главе его будет: 5 яко слыша глас трубы и не сохранися, кровь его на нем будет: а сей, понеже сохранися, душу свою избавил. 6 И страж, аще увидит мечь грядущь, и не вострубит трубою, (и не проповесть людем, ) и людие не охранят себе, и нашед мечь возмет от них душу, та убо беззакония ради своего взяся, а крове ея от руки стража взыщу. 7 И ты, сыне человекь, во стража дах ты дому Израилеву, и услышиши от уст Моих слово, и проповеси им от Мене. 8 Егда реку грешнику: грешниче, смертью умреш: и не будеш глаголати (грешнику), еже сохранится нечестивому, (еже обратится ему) от пути своего (и живу быти ему), той беззаконник во беззаконии своем умрет, а крове его от руки твоя взыщу. 9 Аще же ты проповеси нечестивому путь его, еже обратится

от него, и не обратится с пути своего, той в нечестии своем умрет, а ты душу твою избавил еси. 10 И ты, сыне человек, рцы дому Израилеву: сице ресте глаголюще: прелести наша и беззакония наша в нас суть, и мы в них таем, и како нам живым быти? 11 Рцы им: живу Аз, глаголет Адонаи Господь, не хочу смерти грешника, но еже обратится нечестивому от пути своего и живу быти ему: обращением обратитесь от пути вашего злаго: и вскую умираете, доме Израилев? 12 И ты, сыне человек, рцы ко сыном людей твоих: правда праведника не избавит его, в оньже день прельстится: и беззаконие беззаконника не убьет, в оньже день обратится от беззакония своего: и праведник не может спастися в день греха своего. 13 Егда реку праведнику: жизньию жив будеши: сей же уповая на правду свою и сотворит беззаконие, вся правды его не вспомнятся, в неправде своей, юже сотвори, в той умрет. 14 И егда реку нечестивому: смертью умреши: и обратится от греха своего и сотворит суд и правду, 15 и залог отдаст и восхищенное возвратит, беззаконник в заповедех жизни ходити будет, еже не сотворити неправды, жизньию жив будет и не умрет: 16 вси греси его, яже согреши, не помянутся: понеже суд и правду сотвори, жив будет в них. 17 И рекут сынове людей твоих: неправ путь Господень. И се, путь их неправ. 18 Егда совратится праведник от правды своея и сотворит беззаконие, и умрет в нем. 19 И егда грешник возвратится от беззакония своего и сотворит суд и правду, той жив будет в них. 20 И се есть, еже рекосте: неправ путь Господень. Комуждо по путем его сужду вам, доме Израилев. 21 И бысть во второенадесять лето, месяца вторагонадесять, в пятый день месяца пленения нашего,



прииде ко мне от Иерусалима уцелевый глаголя: пленен бысть град. 22 И рука Господня бысть на мне в вечер, прежде пришествия его, и отверзе уста моя, дондеже прииде ко мне завтра: и отверзшаяся уста моя не затворишася ктому. 23 И бысть слово Господне ко мне глаголя: 24 сыне человекь, живуции на опустевших местех во земли Израилеве глаголют: един бяше Авраам и одержаше землю, а мы множайшии есмы, нам дана есть земля во одержание. 25 Того ради рцы им: сице глаголет Адонаи Господь: понеже с кровию ясте и очи ваши воздвигосте ко кумиром и кровь проливаете, и землю ли наследите? 26 Стасте с мечем вашим, сотвористе мерзости, и кийждо жену ближняго своего осквернисте, и тако ли землю имате наследити? 27 Того ради рцы им: сия глаголет Адонаи Господь: живу Аз, яко падут мечем сущии во опустевших, и иже на лица поля, зверем польным предадутся на изядение, и сущыя во градех и иже в пещерах смертию поражу, 28 и дам землю на опустение, и погибнет гордость крепости ея, и опустеют горы Израилевы, занеже не будет проходящаго: 29 и уведят, яко Аз Господь: и сотворю землю их пусту, и опустеет всех ради мерзостей их, яже сотвориша. 30 И ты, сыне человекь, сынове людей твоих глаголюции о тебе у забрал и во вратех дворов, и глаголют кийждо ко ближнему своему и кийждо ко брату своему, глаголюще: соберимся и услышим исходящая от уст Господних. 31 И приходят к тебе, якоже сходятся людие, и седят людие Мои пред тобою, и послушают глаголов твоих, и не сотворят их: понеже лжа во устех их, и вслед скверн их сердце их ходит. 32 И будеши им яко глас песнивца сладкогласнаго благосличнаго, и услышат глаголы твоя, и

не сотворят их. **33** И егда приидеши, рекут: се, прииде. И уведят, яко пророк бе среде их.

**34** И бысть слово Господне ко мне глаголя: 2 сыне человек, прорцы на пастыри Израилевы, прорцы и рцы пастырем: сия глаголет Адонаи Господь: 3 оле, пастырие Израилевы! Еда пасут пастырие самих себе? Не овец ли пасут пастырие? Се, млеко ядите и волною одеаетесь и тучное закалаете, а овец Моих не пасете: 4 изнемогшаго не подясте и болящаго не уврачевасте, и сокрушеннаго не обязасте и заблуждающаго не обратисте, и погибшаго не взыскасте и крепкое оскорбисте трудом и властью наказасте я и наруганием. 5 И разсыпашася овцы Моя, понеже не имеяху пастырей, и быша на изядение всем зверем селным. 6 И расточишася овцы Моя по всем горам и (заблудиша) по всем холмом высоким, и на лица всея земли разсыпашася овцы Моя, и не бе взыскающаго, ни обращающаго. 7 Того ради, о, пастырие, слышите слово Господне: 8 живу Аз, глаголет Адонаи Господь, понеже учинена суть стада Моя в расхищение, и овцы Моя быша во снадение всем зверем селным, занеже несть пастырей, и не поискаша пастырие овец Моих, но пасоша пастырие самих себе, а овец Моих не пасоша: 9 сего ради, пастырие, слышите слово Господне, 10 сия глаголет Адонаи Господь: се, Аз на пастыри, и взыщу овец Моих от рук их, и оставлю я от паствы овец Моих, и не будут пасти их пастырие: ниже самих себе имут пасти, и отиму овцы Моя из уст их, и ктому не будут им на изядение. 11 Сего ради сия глаголет Адонаи Господь: се, Аз взыщу овец Моих и присещу их: 12 якоже присещает пастух паству свою в день, егда есть облачен и мглян, среде овец своих разлученых, тако взыщу овец Моих

и избавлю я от всякого места, аможе суть разсыпаны в день облачен и примрачен. 13 И изведу я от язык и соберу и от стран, и введу я в землю их и упасу я на горах Израилевых и в дебрех и во всем селении земли, 14 на пажити блазе упасу я, на горе висоце Израилеве: и будут ограды их тамо, и уснут и починут тамо в пищи блазе, и на пажити тучне упасутся на горах Израилевых. 15 Аз упасу овцы Моя и Аз упокою я, и уразумеют, яко Аз есмь Господь. 16 Сия глаголет Адонаи Господь: погибшее взыщу и заблудившее обращу, и сокрушенное обяжу и немощное укреплю, и крепкое снабдю и упасу я с судом. 17 И вы, овцы Моя, сия глаголет Адонаи Господь: се, Аз разсужду между овцею и овцею, и овном и козлом. 18 Не довольно ли вам, яко на блазей пажити пасостесь, и останок пажити вашея ногами вашими попирасте, и устоявшуюся воду пивасте, и останок ногами вашими возмущасте, 19 и овцы Моя попраaniem ног ваших живяху, и возмущенную воду ногами вашими пияху? 20 Того ради сия глаголет Адонаи Господь: се, Аз разсужду между овчатем сильным и между овчатем немощным. 21 Ребрами и плечами вашими реясте и рогами вашими бодосте, и всякое немощное пхасте, дондеже изгнасте я вон: 22 и спасу овцы Моя, и ктому не будут на разграбление, и разсужду между овчатем и овчатем, и между овном и овном: 23 и возставлю им пастыря единого, и упасет я, раба Моего Давида, той упасет я, (и той упокоит я, ) и будет им пастырь, 24 Аз же Господь буду им в Бога, и раб Мой Давид князь среде их: Аз Господь глаголах. 25 И завещаю Давидови завет мирный, и потреблю звери злы от земли, и вселятся в пустыни, уповающе уснут в дубравах. 26 И дам им окрест горы

Моя благословение, и испущу дождь вам во время свое, дождь благословения. 27 И дерева на поли дадут плод свой, и земля даст силу свою, и вселятся на земли своей с надеждою мира, и уведят, яко Аз есмь Господь, егда сокрушу узы ига их: и избавлю я из руки поработивших я, 28 и не будут ктому во пленение языком, и зверие земнии не поядят их ктому: и вселятся с надеждою, и не будет устрашай их. 29 И возставлю им сад мирен, и не будут ктому малы числом на земли, и не будут погублены голодом на земли, и не примут ктому укорения от язык: 30 и уведят, яко Аз есмь Господь Бог их с ними, а тии людие Мои дом Израилев, глаголет Адонаи Господь: 31 вы же овцы Моя и овцы паствы Моя есте, и Аз Господь Бог ваш, глаголет Адонаи Господь.

**35** И бысть слово Господне ко мне глаголя: 2 сыне человекь, обрати лице твое к горе Сеир и прорцы на ню и рцы ей: 3 сия глаголет Адонаи Господь: се, Аз на тя, горо Сеир, и простру руку Мою на тя и поставлю тя пусту, и опустеши, 4 и во градах твоих пустыню сотворю, и ты в пустыню будеши, и уразумеши, яко Аз есмь Господь. 5 Понеже бысть в тебе вражда вечная, и приседела еси дому Израилеву лукавством, рукою врагов с мечем во время печали их и во время неправды, на последок: 6 сего ради живу Аз, глаголет Адонаи Господь, понеже в крови согрешила еси, и кровь поженет тя, кровь возненавидела еси, и кровь ижденет тя. 7 И поставлю гору Сеир пусту и опустевшу, и погублю от нея человеки и скоты, (и приходяща и отходяща: ) 8 и наполню язвеными твоими холмы твоя и дебри твоя, и на всех полех твоих язвении мечем падут в тебе: 9 и пусту во век поставлю тя, и гради твои не населятся ктому, и

уразумеешь, яко Аз есмь Господь. **10** Понеже рекла еси: оба языка и обе стране мои будут, и возму их в наследие, а Господь тамо есть: **11** сего ради живу Аз, глаголет Адонаи Господь, и сотворю тебе по вражде твоей и по ревности твоей, юже сотворила еси от ненавидения к ним, и познан буду тобою, егда имам тебе судити, и уразумеешь, яко Аз есмь Господь. **12** Слышах глас всех хулений твоих, яже глаголала еси: горы Израилевы пусты даны нам во снедь: **13** и велеречила еси на Мя усты твоими и умножила на Мя словеса, Аз же услышах. **14** Сего ради тако глаголет Адонаи Господь: во веселии всея земли пусту тя сотворю: **15** якоже порадовалася еси о наследии дому Израилева, яко погибе, тако сотворю тебе: пуста будеши, горо Сеир, и вся Идумеа потребится, и уведят, яко Аз есмь Господь Бог их.

**36** И ты, сыне человек, прорцы на горы Израилевы и рцы: **2** горы Израилевы, слышите слово Господне, сия глаголет Адонаи Господь: понеже рече враг на вы: благоже, пустыня вечная во одержание нам бысть: **3** того ради прорцы и рцы: тако глаголет Адонаи Господь: зане быти вам погубленным и безчестным и возненавиденным от язык окрестных вам, еже быти вам во одержание прочым языком, и възидосте и бысте в поношение устен и во укоризну странам: **4** сего ради, горы Израилевы, слышите слово Господне, сия глаголет Адонаи Господь горам и холмом, и потоком и дебрем, и полянам и опустошенным, и разоренным и градом оставленным, иже быша в пленение и в попрание оставшим языком окрестным. **5** Того ради сия глаголет Адонаи Господь: аще не во огни рвения Моего глаголах на прочыя языки и на Идумею всю, яко даша землю Мою себе во одержание со веселием (от всего

сердца), обезчестивше души, еже потребити повоеванием:  
6 того ради прорцы на землю Израилеву и рцы горам и холмом, и полянам и дебрем: сия глаголет Адонаи Господь: се, Аз во рвении Моем и в ярости Моей глаголах, за укорищу, юже приясте от язык. 7 Того ради сия глаголет Адонаи Господь: се, Аз воздвигну руку Мою на языки, иже окрест вас, тии безчестие свое примут. 8 Ваше же гроздие и плод ваш, горы Израилевы, поядят людие Мои, яко надеются приити. 9 Яко се, Аз к вам, и призрю на вы, и возделаете и насеете: 10 и умножу в вас человеки, весь дом Израилев до конца, и населятся гради, и пустыни оградятся: 11 и умножу вас людьми и скотом, и умножатся и возрастут, и вселю вас якоже прежде, и благо сотворю вам якоже бывшим прежде вас, и уразумеете, яко Аз есмь Господь: 12 и нарожду в вас человеки люди Моя Израиля, и наследят вас, и будете им во одержание, и не приложите ктому безчадни быти от них. 13 Сия глаголет Адонаи Господь: понеже глаголаша тебе: земля поядящая человеки ты еси, и безчадная от языка твоего была еси: 14 того ради человеков ктому не пояси и языка твоего не обезчудиши ктому, глаголет Адонаи Господь. 15 И не услышится в вас ктому безчестие языков, и укорищны людей не примете ктому, и язык твой не будет без чад ктому, глаголет Адонаи Господь. 16 И бысть слово Господне ко мне глаголя: 17 сыне человекь, дом Израилев вселися на земли своей, и оскверниша ю путем своим и кумирми своими и нечистотами своими, и по нечистоте месячная имущия бысть путь их пред лицом Моим: 18 и излиях ярость Мою на ня, крови ради, юже пролияша на землю, и кумирми своими оскверниша ю, 19 и разсыпах я во языки и развеях я

во страны: по пути их и по начинанию их судих им. 20 И внидоша во языки, в няже внидоша тамо, и оскверниша имя Мое святое, внегда глаголатися им: людие Господни сии и от земли своея изыдоша. 21 И пощадих я имене ради Моего святого еже оскверниша дом Израилев во языцех, аможе внидоша. 22 Того ради рцы дому Израилеву: сия глаголет Адонаи Господь: не вам Аз творю, доме Израилев, но имене Моего ради святого, еже осквернисте во языцех, тамо аможе внидoste. 23 И освящу имя Мое великое, оскверненное во языцех, еже осквернисте среде их, и уразумеют языцы, яко Аз есмь Господь, глаголет Адонаи Господь, внегда освящуся в вас пред очима их. 24 И возму вы от язык и соберу вы от всех земель, и введу вы в землю вашу, 25 и воскроплю на вы воду чисту, и очиститесь от всех нечистот ваших и от всех кумиров ваших, и очищу вас. 26 И дам вам сердце ново и дух нов дам вам, и отиму сердце каменное от плоти вашея и дам вам сердце плотяно, и дух Мой дам в вас: 27 и сотворю, да в заповедех Моих ходите, и суды Моя сохраните и сотворите я. 28 И вселитесь на земли, юже дах отцем вашим, и будете Ми в люди, Аз же буду вам в Бога. 29 И спасу вы от всех нечистот ваших (и очищу вы от грех ваших всех), и призову пшеницу и умножу ю, и не дам на вы глада: 30 и распложу плод древесный и плоды селныя, яко да не примете ктому гладныя укоризны во языцех. 31 И помянете пути своя злыя и начинания ваша не благая, и вознегодуете пред лицом их о беззакониих ваших и о мерзостех ваших. 32 Не вас ради Аз творю, доме Израилев, глаголет Адонаи Господь, вестно да будет вам, (доме Израилев: ) постыдитесь и усрамитесь от путей ваших, доме Израилев. 33 Сия глаголет

Адонаи Господь: во оньже день очищу вы от всех беззаконий ваших и населю грады, и соградятся пустыни, **34** и земля погибшая возделается вместо того, яко погублена бысть пред очима всякаго мимоходящаго: **35** и рекут: земля оная погибшая бысть яко вертоград Сладости, и гради опустевшии и разореннии и раскопаннии, забралы утверждени сташа: **36** и уразумеют языцы, елицы останутся окрест вас, яко Аз Господь возградих разоренныя и насадих погубленныя: Аз Господь глаголах и сотворю. **37** Сия глаголет Адонаи Господь: се, еще обрящуся дому Израилеву, еже сотворити им: умножу их яко овцы, человеки яко овцы святыя, **38** яко овцы Иерусалимли во праздниках его, тако будут гради опустевшии полни стад человеческих: и уразумеют, яко Аз Господь.

**37** И бысть на мне рука Господня, и изведе мя в дусе Господни и постави мя среде поля: се же бяше полно костей человеческих: **2** и обведе мя окрест их около, и се, многи зело на лица поля, и се, сухи зело. **3** И рече ко мне: сыне человекь, оживут ли кости сия? И рекох: Господи Боже, Ты веси сия. **4** И рече ко мне: сыне человекь, прорцы на кости сия и речеши им: кости сухия, слышите слово Господне: **5** се глаголет Адонаи Господь костем сим: се, Аз введу в вас дух животен **6** и дам на вас жилы, и возведу на вас плоть и простру по вам кожу, и дам дух Мой в вас, и оживете и увесте, яко Аз есмь Господь. **7** И прорекох, якоже заповеда ми Господь. И бысть глас внегда ми пророчествовати, и се, трус, и совокупляхуся кости, кость к кости, каяждо ко составу своему. **8** И видех, и се, быша им жилы, и плоть растяше, и восхождаше (и протяжеся) им кожа верху, духа



же не баше в них. 9 И рече ко мне: прорцы о душе, прорцы, сыне человекь, и рцы духови: сия глаголет Адонаи Господь: от четырех ветров прииди, душе, и вдуни на мертвыя сия, и да оживут. 10 И прорекох, якоже повеле ми, и вниде в ня дух жизни, и ожиша и сташа на ногах своих, собор мног зело. 11 И рече Господь ко мне глаголя: сыне человекь, сия кости весь дом Израилев есть, тии бо глаголют: сухи быша кости наша, погибе надежда наша, убиени быхом. 12 Того ради прорцы (сыне человекь) и рцы к ним: сия глаголет Адонаи Господь: се, Аз отверзу гробы ваша и изведу вас от гроб ваших, людие Мои, и введу вы в землю Израилеву: 13 и увесте, яко Аз есмь Господь, внегда отверсти Ми гробы ваша, еже возвести Ми вас от гробов ваших, людие Мои: и дам дух Мой в вас, и живи будете, 14 и поставлю вы на земли вашей, и увесте, яко Аз Господь: глаголах и сотворю, глаголет Адонаи Господь. 15 И бысть слово Господне ко мне глаголя: 16 сыне человекь, возми себе жезл един и напиши на нем Иуду и сыны Израилевы прилежащыя к нему: и жезл вторый возми себе и напиши на нем Иосифа, жезл Ефремов, и вся сыны Израилевы приложившыя к нему: 17 и совокупи я друг ко другу себе в жезл един, еже связати я, и будут (вкупе) в руке твоей: 18 и будет, егда рекут к тебе сынове людий твоих, вопрошающе: не возвестиши ли нам ты, что суть сия тебе? 19 И речеши к ним: сия глаголет Адонаи Господь: се, Аз поиму племя Иосифово, еже есть в руке Ефремове, и племена Израилева прилежащая к нему, и дам я в племя Иудино, и будут в жезл един в руке Иудине. 20 И будут жезли, на нихже писати будеши, в руке твоей пред очима их, 21 и речеши к ним: сия глаголет Адонаи Господь:

се, Аз поемлю весь дом Израилев от среды языков, аможе внидоша, и соберу я от всех сущих окрест их и введу их в землю Израилеву, **22** и дам я во язык на земли Моей и в горах Израилевых: и Князь един будет во всех сих царем, и не будут ктому в два языка, ни разделятся ктому на два царства, **23** да не оскверняются ктому в кумирех своих и в мерзостех своих и во всех нечестиих своих: и избавлю я от всех беззаконий их, имиже согрешиша, и очищу я, и будут Ми в люди, и Аз буду им в Бога. **24** И раб Мой Давид Князь среде их и Пастырь един будет всех, яко в заповедех Моих ходити будут и суды Моя сохранят и сотворят я, **25** и вселятся на земли своей, юже дах рабу Моему Иакову, на нейже жиша тамо отцы их, и вселятся на ней тии и сынове их и сынове сынов их даже до века: и Давид раб Мой князь их будет во век. **26** И утвержу им завет мирен, и завет вечен будет с ними, и укореню я и умножу, **27** и дам освящение Мое посреде их во век, и будет вселение Мое в них, и буду им Бог, а они будут Ми людие: **28** и уведят языцы, яко Аз есмь Господь освящайя я, внегда будут святая Моя среде их во век.

**38** И бысть слово Господне ко мне глаголя: **2** сыне человекь, утверди лице твое на Гога и на землю Магога князя Рос, Мосоха и Фовеля, и прорцы нань, **3** и рцы ему: сия глаголет Адонаи Господь: се, Аз на тя, Гог, и на князя Рос, Мосоха и Фовеля, **4** и обращаю тя окрест, и вложу узду в челюсти твоя, и соберу тя и всю силу твою, кони и конники оболчены во броня вся, собор мног, шлемы и мечы и щиты вси тии имуще: **5** Персяне и Мурияне, и Лидяне и Ливиане, вси сии щиты и шлемы имуще: **6** Гомер и вси иже окрест его, дом Форгамань

от конец севера и вси иже окрест его, и языцы мнози с тобою. 7 Уготовися, уготовися сам ты и весь сонм твой собранный с тобою, и будеши ми в преднюю стражду. 8 От дний множайших уготовишися, и в последняя лета приидеши, и приидеши на землю низвращенную от меча, собранных от язык многих на землю Израилеву, яже бысть пуста весьма: и тии от язык изыдоша, и вселятся с миром вси. 9 И възидеши аки дождь и приидеши аки облак, покрыти землю, и падеши ты и вси иже окрест тебе, и языцы мнози с тобою. 10 Сия глаголет Адонаи Господь: и будет в той день, възидут глаголы на сердце твое, 11 и помыслиши помышления злая и речеши: възиду на землю отверженую, прииду на молчащыя в тишине и живущыя мирно, на вся живущыя на земли, на нейже несть ограды, ни дверей, ни верей, 12 еже пленити плен и взяти корысти их, еже обратити руку мою на землю опустошеную, яже населися, и на язык собранный от языков многих, сотворивших притяжания имений и живущих на пупе земли. 13 Сава и Дедан и купцы Кархидонстии и вся веси их рекут тебе: еда на пленение, еже пленити, ты грядеши, и взяти корысти? И собрал еси люди твоя взяти сребро и злато, отвести притяжания и имения, еже пленити плен велик. 14 Того ради прорцы, сыне человекь, и рцы Гогу: сия глаголет Адонаи Господь: не в той ли день, егда жити будут людие Мои Израиль с миром, востанеши? 15 И приидеши от места своего от конца севера, и языцы мнози с тобою: конницы на конех вси, собор велик и сила многа, 16 и възидеши на люди Моя Израиля, яко облак покрыти землю: в последняя дни будет, и возведу тя на землю Мою, да Мя уведят вси языцы, егда освящуся в тебе пред ними, (о,

Гог!) 17 сия глаголет Адонаи Господь Гогу: ты еси, о немже глаголах во дни первыя рукою раб Моих пророк Израилевых, прорекших в оныя дни и лета, еже привести тя на ня. 18 И будет в той день, в оныже приидет Гог на землю Израилеву, глаголет Адонаи Господь, взыдет ярость Моя во гневе Моём 19 и рвенія Моя во огни гнева Моего: глаголах, аще не будет в той день трус велик на земли Израилеве: 20 и потрясутся от лица Господня рыбы морския и птицы небесныя, и зверие польнии и вси гади ползающии по земли, и вси человецы иже на лица земли, и расторгнутся горы и падут дебри, и всяка стена на землю падет. 21 И призову нань весь страх мечный, глаголет Адонаи Господь: мечь человека на брата его будет. 22 И отсужду ему смертью и кровию, и дождем потопляющим и каменіем градным, огонь и камень горящъ одождю нань и на вся сущыя с ним и на языки многія с ним: 23 и возвеличуся и освящуся, и прославлюся и уведан буду пред языки многими, и уведят, яко Аз есмь Господь.

**39** И ты, сыне человекъ, прорцы на Гога и рцы: сия глаголет Адонаи Господь: се, Аз на тя, Гог, князя Рос, Мосоха и Фовеля, 2 и соберу тя и наставлю тя, и возведу тя от конца севера и возведу тя на горы Израилевы: 3 и исторгну лук твой от руки твоя левыя и стрелы твоя от руки твоя десныя, 4 и поражу тя на горах Израилевых, и падеша ты и вси иже окрест тебе, и языцы иже с тобою отдадутся во множество птиц всякому парящему, и всем зверем польным дах ты на изядение: 5 на лица поля падеша, яко Аз глаголах, глаголет Адонаи Господь. 6 И пущу огонь на Магога, и населятся острови с миром, 7 и уведят, яко Аз есмь Господь, и имя Мое святое вестно будет среде людей Моих Израиля, и не осквернится имя

Мое святое ктому, и уведят вси языцы, яко Аз есмь Господь Святыи среде Израиля. 8 Се, приспе, и увеси, яко будет, глаголет Адонаи Господь: се есть день, о немже глаголах, 9 и изыдут живуции во градех Израилевых, и пожгут оружие, и щиты и копия, и луки и стрелы, и жезлы ручныя и сулицы, и раждегут ими огонь семь лет: 10 и не возмут древес с поля, ни изсекут от дубравы, но оружием раждегут огонь, и пленят пленившыя их и расхитят расхитивших я, глаголет Адонаи Господь. 11 И будет, в той день дам Гогу место нарочито, гроб во Израили, многопогребателно, пришедших на восток моря, и заградят устие дебри и погребут тамо Гога и все множество его, и прозовется та дебрь: многопогребателное Гога. 12 И закопают я дом Израилев, да очистится земля в семь месяц, 13 и погребут я вси людие земли, и будет им именито, в онже день прославлюся, глаголет Адонаи Господь. 14 И мужей всегда поставят обходитьи всю землю, еже погребсти оставшихся на лица земли и очистити ю по седми месяцах, и възыщут опасно. 15 Всяк проходяй землю и узревый кость человеку сотворит у нея знамение, дондеже погребут ю погребаяущии в дебри, многопогребателнем Гогове. 16 Ибо имя месту (прозовется) Падение многопогребателное: и очистится земля. 17 И ты, сыне человекь, рцы: сия глаголет Адонаи Господь: рцы всяцей птице парящей и ко всякому зверю селному: соберитесь и приидите от всех окрестных его на заколение Мое, еже заклах вам, закляние велие на горах Израилевых, ядите мяса и пейте кровь: 18 мяса исполинов изясте и кровь князей земных испиете, овны и телцы, и козлы и волы тучнии вси: 19 и да ясте тук до сытости и испиете кровь до пьянства от закляния Моего,

еже заклах вам: **20** и насытитесь от трапезы Моея, от коня и всадника, исполина и всякаго мужа воинскаго, глаголет Адонаи Господь. **21** И дам славу Мою в вас, и узрят вси языцы суд Мой, егоже сотворих, и руку Мою, юже наведох на ня, **22** и увезь дом Израилев, яко Аз есмь Господь Бог их от сего дне и в прочья. **23** И уведят вси языцы, яко грехов ради своих пленени быша дом Израилев, понеже отвергошася Мене, и отвратих лице Мое от них и предах я в руце врагов их, и падоша мечем вси: **24** по нечистотам их и по беззаконием их сотворих им и отвратих лице Мое от них. **25** Того ради сия глаголет Адонаи Господь: ныне возвращу пленение Иаковле и помилую дом Израилев, и возревную имене ради Моего святаго: **26** и возмут безчестие свое и всякую неправду свою, еуже неправдоваша, егда вселятся на земли своей с миром и не будет устрашающаго, **27** вегда возвращу я от язык и соберу я от стран языческих и освящуся в них пред языки: **28** и уведят, яко Аз есмь Господь Бог их, вегда явлюся им во языцех и соберу я на землю их и не оставлю от них тамо кому: **29** и не отвращу лица Моего кому от них, зане излиях ярость Мою на дом Израилев, глаголет Адонаи Господь.

**40** И бысть во двадесять пятое лето пленения нашего, перваго месяца, в десятый день месяца, в четвертоенадесять лето но пленении града, в той день бысть на мне рука Господня: и веде мя тамо, **2** в видении Божии веде мя на землю Израилеву и постави мя на горе висоце зело, на нейже яко сограждение града прямо (полудне), **3** и введе мя тамо: и се, муж, и зрак его бяше, яко видение меди блестящаяся, и в руце его бяше вервь зиждущих и трость

мерительная. Той же стояше у врат 4 и рече ко мне: видел ли еси, сыне человекъ? Видь очима твоима и ушима твоима слыши, и учини в сердцы твоём вся, елика аз показую тебе, зане того ради вшел еси семо, да покажу тебе, и покажеш ты вся, елика видиши, дому Израилеву. 5 И се, ограда внеуду окрест храма, и в руке мужа мера тростяна шести лакот в лакоть шестодланный, и измери предстение ширину равно трости, и высоту его равно трости. 6 И вниде во врата зрящая на восток седмию степенями, и измери фее, шесть о сию страну, шесть же об ону, и елам дверный равно трости. 7 И фее равно трости в долготу и равно трости в широту, и аилам среде феилаф шести лакот. И фее второе равно трости в широту и равно трости в долготу, елам же пяти лакот. 8 И фее третье равно трости в долготу и равно трости в широту, 9 елам же вратный, иже близ елама двернаго осми лакот, аилев же двою лактей: и елам дверный внутрьуду. 10 И фее дверныя прямо фее, три о сию страну и три об ону, мера же едина трием: и мера едина аилам сюду и сюду. 11 И размеры широту входа вратнаго десяти лактей, широту же вратную тринадесяти лактей, 12 и лакоть един сводимь прямо фееим лактя единаго и лактя единаго, предел сюду и сюду, и фее шести лактей о сию страну и шести лактей об ону страну. 13 И размеры врата от стены фее до стены фее, широта двадесяти и пяти лактей: сия врата ко вратом, 14 и непокровенное елама врат шестидесяти лактей, (двадесяти пяти) и фее двора окрест, 15 и непокровенное врат отвне в непокровенное (врат) елама врат внутрьуду пятьдесят лактей. 16 И оконца сокровена фееим и в аилам внутрь врат двора окрест: такожде и елам оконца внутрьуду окрест, и на

аилам финики сюду и сюду (изваяны). 17 И введе мя во двор внутренний, и се, преграждения и междустолпия окрест двора, преграждений же тридесять в междустолпиях, 18 и притворы противу задней стране врат, по долготе врат междустолпиие нижнее. 19 И размеры широту двора от непокровенаго врат внешних внутрь ко непокровенному врат зрящих вне, лактей сто зрящих на восток: и введе мя на север, 20 и се, врата зрящая на север двору внешнему, и размеры я, долготу их и широту. 21 И фее три о сию страну, три же об ону, и аилев, и еламы, и финики их: и бысть по мере врат зрящих на восток, пятидесяти лактей долгота их, а широта их двадцести и пяти лактей: 22 и оконца их, и еламы, и финики их, якоже врата зрящая на восток: и седмью восходами восхождаху на ня, и еламы внутрьуду. 23 И врата двору внутреннему зрящая ко вратом северным, якоже врата зрящая на восток: и размеры двор от врат до врат лактей сто. 24 И введе мя к югу, и се, врата зрящая на юг, и размеры я, и фее, и аилева, и еламы, по темжде мерам. 25 И оконца их и еламы окрест якоже и оконца елаг, пятидесяти лактей долгота их, а широта двадцести и пяти лактей, 26 и седмь восходов им, и еламы внутрьуду, и финики их, един о сию страну, а другой об ону над аилев. 27 И врата прямо вратом двора внутренняго на юг: и размеры двор от врат до врат на юг, сто лактей в широту. 28 И введе мя во двор внутренний врат, яже на юг, и размеры врата, яже на юг, по темжде мерам: 29 и фее, и аилев, и еламы по темжде мерам. 30 И оконца их и еламы окрест, пятидесяти лактей долгота их, а широта двадцести и пяти лактей. 31 Еламы же во двор внешний, и финики аилев, и



осмь восходов. 32 И введе мя во врата зрящая на восток, и размери я по темжде мерам, и фее и аилев и еламы по темжде мерам. 33 И оконца им, и еламы и окрест, пятидесяти лактей долгота их, а широта их двадцести и пяти лактей. 34 И еламы во двор внутренний, и финики на аилев сюду и сюду, и осмь восходов им. 35 И введе мя во врата яже на север, и размери по темжде мерам, 36 и фее и аилев и еламы, и оконца им окрест, пятидесяти лактей долгота их, а широта двадцести и пяти лактей, 37 и еламы во внешний двор, и финики аилеву сюду и сюду, и осмь восходов им. 38 И преграды их, и двери их, и еламы их пред враты их вторыми сток, тамо измывают всесождения. 39 Во еламе же врат, две трапезы о сию страну, две же об ону, еже закалати на них всесождения, яже за грехи и яже за неведение. 40 И создади стока всесождений дверей зрящих на север две трапезы на восток противу задней стране (дверий) вторых, и противу елама врат две трапезы на восток. 41 Четыри о сию страну, четыре же об ону противу задней стране врат, на тех закалают заколения: прямо осми трапез заколений: 42 четыре же трапезы всесождений каменны истесаны, в широту лактя одинаго и пол, в долготу двух лактей и пол, а в высоту лакоть един: на тыя возлагают орудия, имиже закалают тамо всесождения и заколения. 43 И имеют ограждение мало истесано на длань внутрьуду окрест, верху же трапезы покров, еже покрыватися им от дождя и зноя. 44 И введе мя во двор внутреннейший, и се, две преграды во внутреннейшем дворе, едина противу задней стране врат зрящих на север, вводящая на юг, а другая противу задней стране врат сущих на юг, зрящих же к северу. 45 И рече ко

мне: преграда сия, яже зрит на юг, жерцем есть, иже стрегут стражбу храма: 46 а преграда, яже зрит к северу, жерцем есть стрегущим стражу требника: тии суть сынове Садуковы, приступающие от Левиа ко Господеви, еже служити Ему. 47 И размеры двор ста лактей в долготу и в широту ста лактей, на четыре страны его, и требник прямо храму. 48 И введе мя во елам храма: и размеры аил елама пяти лактей широту о сию страну, пяти же лактей об ону, широта же дверная четырнадцать лактей, и бока дверная елама три лакти о сию страну, три же об ону. 49 Долгота же елама двадесять лактей, а широта дванадесять лактей: и десятию степенями восходяху к нему, и столпи бяху у аилама, един о сию страну, а другой об ону.

**41** И введе мя во храм, и размеры аилам, шести лактей широта о сию страну и шести лактей широта аилам об ону, 2 и широта врат десять лактей, и бока врат пяти лактей о сию страну и пяти об ону: и измери долготу их четыредесять лактей, а широту двадесять лактей. 3 И вниде во двор внутренний, и размеры аилам дверей двух лактей, и двери шести лактей, бока же дверная семи лактей о сию страну и семи об ону. 4 И размеры долготу дверей четыредесять лактей, а широту двадесять лактей пред лицом храма, и рече ко мне: сие Святое Святых. 5 И размеры стену храма шести лактей и широту страны четырех лактей окрест, 6 страны же страна до страны тридесять и три дващи: и расстояние в стене храма во странах окрест, еже на прозрак быти входящим, да отнюд не прикасаются ко стенам храма. 7 Широта же вышняя страны по приложению от стены к вышней окрест храма, яко да расширяется свыше, и да от

долгих восходят на горня, а от средних на трекровная. 8 И видех храма высоту окрест разстояние стран равно трости шести лактей разстояния, 9 широта же стены страны внеуду пяти лактей, и прочая между странами храма, 10 и между преградами широта двадесяти лактей, окружность окрест храма. 11 Двери же преград ко прочему дверей единых яже к северу: и дверь едина к югу, широта же света прочаго пяти лактей широта окрест. 12 Раздел же противу прочему аки к морю семьдесят лактей, широта стены разделяющия, широта окрест пять лактей, и долгота ея девяносто лактей. 13 И размеры противу храма долготу сто лактей, и прочая и разделяющая, и стены их в долготу сто лактей. 14 И широта противу храма, и прочая противу ста лактей. 15 И размеры долготу разделу противу лицу прочему создади храму тому, и прочая о сию страну и об ону ста лактей долготу: храм же и углы, и елам внешний, доски постланы. 16 И окна решетчатая свещения окрест трием (странам) еже приципати: храм же и яже близ его устлана древом окрест, и помост, и от помоста до окон: окна же отворяема трояко на приципание, 17 и даже до дому внутренняго и до внешняго, и на всей стене окрест внутренней и внешней меры, 18 и изваянии херувими и финики: финик посреде херувима и херувима: два лица херувиму: 19 лице человеческо к финику сюду и сюду, и лице львово к финику сюду и сюду, изваян весь храм окрест. 20 От помоста даже до свода херувими и финики изваяни. 21 Святое же и храм отверзаемь на четыре страны, пред лицом святых видение яко зрак требника древяна, 22 три лапти высота его, а долгота дву лактей, и широта такожде: имеяше же роги, и основание его и стены его древяны. И

рече ко мне: сия трапеза, яже пред лицом Господним: **23** двои же двери храму и двои двери святому, **24** двоим дверем вращающимся: две веревки единым, и две веревки вторым дверем. **25** И ваяния над ними и над дверьми храма херувим и финики, по ваянию святых, и дерева потребна пред лицом елама от внеуду, **26** и окна сокровена. И размеры сюду и сюду в покровех елама, и страны храма древами сопряжены.

**42** И введе мя во двор внешний на востоки, прямо врат яже к северу, и введе мя (внутри), и се, преград пять держащихся прочаго и держащихся предела к северу, **2** противу лица ста лактей долготы к северу, а широта пятьдесят лактей, **3** расписаны якоже врата двора внутреннего, и якоже междустолпия внешнего двора чинорасположены, прямоличны притворы три. **4** И прямо преградам проход десяти лактей в широту, во внутренняя пути единого локтя на сто лактей долготы, и двери их к северу. **5** И проходи горничнии такожде, яко изнищаше междустолпие из него, от долного междустолпия, и расстояние: сиче междустолпие и расстояние, **6** и сиче притворы: понеже трегубы бяху и столпов не имеша, якоже столпы преград: того ради изнищашу из нижних и средних от земли. **7** И свет внеуду, якоже преграды двора внешнего, зрящия противу преградам, яже к северу, долготы пятидесяти лактей. **8** Зане долготы преград зрящих во двор внешний бяху пятидесяти лактей, и тыя суть прямоличны тем: все же (бе) ста лактей. **9** Двери же преград тех входа, иже на востоки, еже входити ими от двора внешнего, **10** по свету сущаго в начале прохода: и к югу на лице юга, и прямо прочему, и прямо разделения, и преграды, **11** и проход противу лицу их, по мерам преград яже к северу

и по долготе их и по широте их, и по всем исходом их и по всем вращением их, и по светом их и по дверем их, **12** преград яже к югу, и по дверем от начала прохода аки к свету разстояния трости, и на восток еже входити ими. **13** И рече ко мне: преграды, яже к северу, и преграды, яже к югу, суцья противу лицу разстояний, сия суть преграды святаго, в нихже ядят жерцы сынове Садуковы, иже приступают ко Господеви, Святая святых, и тамо положат Святая святых и жертву, и яже за грехи и яже за неведение, понеже место свято есть. **14** Да не входят тамо, кроме жерцев, и да не изходят от святаго во двор внешний, яко да присно святы будут приносящии, и да не прикасаются ризам их, в нихже служат, понеже свята суть, но да облекутся в ризы ины, егда прикасаются людям. **15** И совершися размерение храма внутрьуду. И изведе мя по пути врат зрящих на восток, и размеры подобие храма окрест чинорасположением. **16** И ста созади врат зрящих на восток, и размеры пять сот тростию мерною. **17** И обратися на север, и размеры на лице севера лактей пять сот тростию мерною. **18** И обратися к морю, и размеры на лице моря пять сот лактей тростию мерною. **19** И обратися на юг, и размеры противу югу пять сот тростию мерною. **20** Четыри страны тоужде тростию: и расположи его, и ограду окрест ему, пять сот лактей (долготу) на восток, и пять сот лактей широту, еже разлучати между святыми и между предстением сущим в чинорасположении храма.

**43** И веде мя ко вратом зрящим на востоки и изведе мя: **2** и се, слава Бога Израилева грядяше по пути врат зрящих на востоки, и глас полка аки глас усугубляющих многих, и земля светяшесе аки свет от славы Его окрест. **3** И видение, еже

видех, по видению, еже видех, егда вхождах помазати град:  
и видение колесницы, юже видех, подобяшеся видению,  
еже видех на реце Ховар. И падох на лице мое. 4 Слава же  
Господня вниде во храм по пути врат зрящих на восток. 5 И  
взя мя дух и введе мя во двор внутренний: и се, полн славы  
дом Господень. 6 И стах, и се, глас от храма глаголющаго  
ко мне, и муж стояше близ мене 7 и рече ко мне: сыне  
человечь, видел ли еси место престола Моего и место стопы  
ног Моих, идеже вселится имя Мое среде дому Израилева  
во век? И не осквернят ктому имене Моего святаго дом  
Израилев, тии и старейшины их во блужении своем и во  
убийствах старейшин своих среде себе, 8 внегда полагаху  
преддверие Мое во преддвериих своих и праги Моя близ  
прагов своих: и даша стену Мою яко держащуюся Мене и  
онех, и оскверниша имя Мое святое в беззакониих своих,  
яже творяху: и скончах я в ярости Моей и во избиении: 9  
и ныне да отринут блужение свое и убийства старейшин  
своих от Мене, и вселюся среде их во век. 10 Ты же, сыне  
человечь, покажи дому Израилеву храм, и да престанут от  
грехов своих: и видение его, и чиноположение его, 11 и тии  
приимут казнь свою о всех, яже сотвориша: и распишеша  
храм и уготовление его, и исходы его и входы его, и бытие  
его и вся повеления его и вся законы его возвестиши им и  
да впишеша пред ними, и снабдят вся оправдания Моя и  
вся повеления Моя и сотворят я. 12 И расписание храма на  
верху горы: вси пределы его окрест Святая Святых суть. 13  
Сей закон храма, и сия мера требника, в локоть лактя и  
длани, недро глубины локоть на локоть и локоть в широту,  
и ограждение устия ему окрест, пяди. 14 И сия высота

ребника, и от глубины начала вдоления его ко очистилищу великому, еже внизу, двух лактей, широта же лакоть: а от очистилища малаго ко очистилищу великому лапти четыре, и широта лакоть. 15 И ариил четырех лактей, а от ариила и выше рогов лакоть: 16 ариил же дванадесять лактей в долготу и дванадесять лактей в широту, четвероуголен на четыре части своя. 17 И очистилище четыренадесять лактей в долготу и четыренадесять лактей в широту, четвероуголно на четыре части своя: и ограждение ему окрест окружающее его пол лактя, и обдержание его лакоть окрест, и степени его зрящыя на восток. 18 И рече ко мне: сыне человек, сия глаголет Господь Бог Израилев: сия заповеди ребника в день сотворения его, еже возносити на нем всесождения и возливати нань кровь. 19 И даси жерцем и левитом, иже суть от семени Садукова, приступающим ко Мне, глаголет Господь Бог, еже служити Мне, телца от говяд за грех: 20 и да возмут от крове его и да возложат на четыре роги ребника и на четыре части очистилища и на основание окрест, и окропиши е, и очистят е: 21 и да возмут телца, иже за грех, и да сожжеться во отлученнем храме вне святых. 22 А во второй день да возмут два козлища от коз непорочных за грех и да очистят ребник, якоже очистиша телцем. 23 И егда скончают очищение, да принесут телца от говяд непорочна и овна от овец непорочна, 24 и да принесете пред Господа: и да возвергут на ня жерцы соль и да вознесут я Господеви всесождения. 25 Седьм дний да сотвориши козлище за грех по вся дни, и телца от говяд и овна от овец непорочна, да сотворят седьм дний: 26 и да очистят ребник и освятят его, и наполнят руки своя. 27 И скончают седьм дний, и будет

от осмаго дне и потом, сотворят жерцы на жертвеннице всесожжения ваша и яже спасения вашего: и прииму вы, глаголет Господь.

**44** И обрати мя на путь врат святых внешних, зрящих на востоки: и сия бяху затворенна. **2** И рече Господь ко мне: сия врата заключенна будут и не отверзутся, и никтоже пройдет ими: яко Господь Бог Израилев внидет ими, и будут заключенна. **3** Зане старейшина сей сядет в них ясти хлеб пред Господем: по пути елама врат внидет и по пути его изыдет. **4** И введе мя по пути врат яже к северу, прямо храму: и видех, и се, полн славы дом Господень. И падох ниц на лица моем. **5** И рече Господь ко мне: сыне человекь, сложи в сердцы твоем, и виждь очима твоима и ушима твоима слыши вся, елика Аз глаголю с тобою, по всем повелением храма Господня и по всем узаконением его: и устроиши сердце твое на вход храма по всем исходам его во всех святых. **6** И речеши к дому прогневающему мя, к дому Израилеву: сия глаголет Господь Бог: да довлеет вам от всех беззаконий ваших, доме Израилев, **7** еже вводити вам сыны иноплеменничы необрезаны сердцем и необрезаны плотию, еже бывати им во святых Моих, и оскверняху я, егда приносите вы хлебы, тук и мяса и кровь: и преступасте завет Мой во всех беззакониях ваших, **8** и не снабдесте хранити стражбы во святых Моих, и постависте стражей стрещи стражбы святых Моих себе. **9** Того ради сице глаголет Адонаи Господь: всяк сын иноплеменничь необрезан сердцем и необрезан плотию да не внидет во святая Моя во всех сынех иноплеменничих, иже суть среде дому Израилева: **10** но и левити, иже отвергошася Мене, егда заблуждаше



Израиль, иже заблудиша от Мене вслед помыслов своих, и возмут неправду свою 11 и будут служаще во святых Моих, вратари у дверей храма и служащие храму: тии да закаляют жертвы и всеожжения людем и тии да станут пред людьми, еже служити им. 12 Понеже служиша им пред лицем кумиров своих, и бысть дому Израилеву в мучение неправды: того ради воздвигох на ня руку Мою, глаголет Господь Бог (Израилев), и возмут беззаконие свое, 13 и не приступят ко Мне служити Мне, ни приносить ко святым сынов Израилевых, ниже ко Святым Святынь Моих, и возмут безчестие свое в заблуждении, в немже прельстишася: 14 и учинят я стрещи стражбы храма на вся дела его 15 и на вся, елика сотворят жерцы и левити, сынове Садуковы, иже сохраниша стражбы святынь Моих (и пути Моя), егда заблуждаше дом Израилев от Мене: сии приступят ко Мне, еже служити Мне, и станут пред лицем Моим, еже приносить Мне жертву, тук и кровь, глаголет Адонаи Господь. 16 Сии внидут во святая Моя и сии приступят ко трапезе Моей, еже служити Мне, и сохранят стражбы Моя. 17 И будет внегда входить им во врата двора внутренняго, в ризы льняны да облукются, а да не облукются в волняны, внегда служити им от врат двора внутренняго. 18 И клобуки льняны да имут на главах своих, и опоясания льняна да имут о чреслах своих, и да не препоясуются крепко: 19 и егда исходят к людем во внешний двор, да совлукются риз своих, в нихже тии служат, и да положат я в преградах святых, и облукются в ризы ины, и да не освятят людей в ризах своих: 20 и глав своих да не обриют, и влас своих да не растят, покрывающе покрывают главы своя. 21 И вина да не пиет всяк жрец, егда

входит во внутренний двор. 22 И вдовицы и пущеницы да не поемлют себе в жену, но токмо девицу от племени дому Израилева: и аще будет вдова жерча, да оную поймут. 23 И люди Моя да научат разлучати между святым и скверnavым, и между чистым и нечистым возвестят им. 24 И на суде крове тии да стоят, еже рассуждати: оправдания Моя да оправдят и суды Моя да судят, и законы Моя и повеления Моя во всех праздницех Моих сохранят, и субботы Моя освятят. 25 И над душу человека не приидут оскверниться, но точию над отцем и матерью, и сыном и дщерью, и братом и сестрою своею, яже не посягла за мужа, осквернится. 26 И по очищении своем семь дний да сочтет себе. 27 И во оньже день входят во двор внутренний, еже служити во святилищи, да принесут очищение, глаголет Господь Бог. 28 И будет им в наследие: Аз им наследие, и одержание им не дастся в сынех Израилевых, яко Аз одержание их. 29 Жертвы же и яже за грехи и за неведение сии да ядят: и всякое отлученное во Израили тем да будет: 30 начатки всех и первенцы всех и участия вся, от всех начатков ваших жерцем да будут: и начатки жит ваших да дасте жерцу, еже положити благословения в домех ваших. 31 И всякия мертвечины и звероядины, от птиц и от скот да не ядят жерцы.

**45** И егда разделяти вам землю в наследие, отлучите начаток Господеву, свято от земли, в долготу двадесяти и пяти тысящ, а в широту десяти тысящ, свято да будет во всех пределах их окрест. 2 И да будут от того на святое пять сот, по пяти сот четвероуголно окрест, расстояние же их пятьдесят лактей окрест. 3 И от сего размерения да

размериши в долготу двадесять пять тысяч, а в широту десять тысяч: и в том да будет освящение, Святая Святых.

4 Свято от земли да будет жерцем служащим во святем и да будет приступающим служить Господеви, и будет им место на дома отлученны освящению их, 5 двадесать пять тысяч в долготу и двадесать тысяч в широту да будет, левитом служащим храму, тем во одержание грады ко обитанию.

6 И одержание града да даси в широту пять тысяч, а в долготу двадесать пять тысяч, якоже начаток святых всему дому Израилеву да будет 7 и старейшине от того: и от сего в начатки святых, во одержание града по лицу начатков святынь и по лицу одержания града, яже к морю, и от сущих к морю, яже на восток: долгота же яко едина часть от предел иже к морю, и долгота ко пределом иже на восток земли. 8 И будет ему во одержание во Израили, и да не насилуют ктому старейшины Израилевы людем Моим, и землю да наследят дом Израилев по племеном своим. 9 Сия глаголет Господь Бог: да довлеют вам, старейшины Израилевы, неправду и озлобление отвержите, суд же и правду сотворите: изымите насилие от людей Моих, глаголет Господь Бог. 10 Вес праведный и мера праведна и хиникс праведен да будут вам в меры: 11 и хиникс такожде един да будет вам, еже приимати, десятая часть гомора хиникс, и десятая часть гомора ефи, мера к гомору да будет равна. 12 И вес, двадесать оволи сикль, и двадесать пять сиклей, и двадесать сиклей, и пятнадцать сиклей мнас будет вам. 13 И сей начаток, егоже отлучите, шестую часть меры от гомора пшеницы и шестую часть ефи от кора ячменя. 14 Заповедь же о елеи, меру елеа от десяти мер, понеже десять мер

суть гомор. 15 И овча едино от десяти овец участие от всех отечеств Израилевых, на жертвы и на всесожжения и на спасение, еже умолиши о вас, глаголет Господь Бог. 16 Все же люди земли да дадут сей начаток старейшине Израилеву, 17 и старейшиною да бывают всесожжения: и жертвы и возлияния будут в праздники и в новомесячия, и в субботы и во вся праздники дому Израилева: той сотворит яже за грехи и жертву, и всесожжения и яже спасения, еже умоляти о доме Израилеве. 18 Тако глаголет Господь Бог: в первый месяц, во един день месяца, да возьмете телца от говяд непорочна, еже очистити святое: 19 и да возмет жрец от крове очищения и да возлиет на праги храма и на четыре углы святилища, и на жертвенник и на праги врат двора внутреннего. 20 И сице да сотвориши в седмый месяц: во един (день) месяца возмешь от коегождо неведущаго и от младенца, и очистите храм. 21 В первый месяц, четвертагонадесять дне месяца, да будет вам Пасха праздник: семь дний да ясте опресноки. 22 И сотворит старейшина в той день за ся и за дом и за вся люди земли, телца за грех: 23 в седьм же дний праздника да сотворит всесожжения Господеву седьм телцев и седьм овнов непорочных по всяк день седми дний: и за грех козлище от коз на всяк день, и жертву, 24 и опресноки телцу и опресноки овну да сотвориши, и ела ин опресноку. 25 В седмый же месяц, в пятыйнадесять день месяца, в празднице сотвориши по томужде, седьм дний, якоже и за грех, и якоже всесожжения, и якоже дар, и якоже масло деревяное.

**46** Сия глаголет Господь Бог: врата, яже во дворе внутреннем зрящая на восток, да будут затворена на шесть

дний делных: в день же субботный да отверзаются, и в день новомесячия да отверзутся. 2 И внидет старейшина по пути елама врат внешних и да станет у преддверия врат, и да сотворят жерцы всесожжения его и яже спасения его: 3 и да поклонится у преддверия врат и изыдет, врата же да не заключатся до вечера, и да поклоняются людие земли у преддверия врат тех в субботы и в новомесячия пред Господем. 4 И всесожжения да принесет старейшина в день субботный Господеви, шесть агнцев непорочных и овна непорочна, 5 и манау, опреснок овну, и агнцем жертву, дар руки своя, и елеа ин опресноку. 6 И в день новомесячия телец от стада непорочен и шесть агнцев и овен непорочен да будет, 7 и опреснок телцу и опреснок овну да будет манаа, и агнцем, якоже постигнет рука его, и масла ин опресноку. 8 И егда входит старейшина, по пути елама врат да внидет и по пути врат да изыдет. 9 И егда входят людие земли пред Господа в праздники, входящие по пути врат зрящих на север поклонитися, да исходят по пути врат яже на юг: и иже входят по пути врат яже на юг, да исходят по пути врат яже на север, да не возвращаются во врата, имиже внидоша, но прямо им да изыдут. 10 И старейшина посреде их, егда тии входят, да внидет с ними, и егда исходят, да изыдет. 11 И в праздники и в торжества да будет манаа опреснок телцу и опреснок овну, и агнцем, якоже постигнет рука его, и елеа ин опресноку. 12 Аще же сотворит старейшина исповедание, всесожжение спасения Господеви, и отворит себе врата зрящая на восток и сотворит всесожжение свое и яже спасения своего, якоже есть обычай творити в день субботный: и да изыдет и затворит двери по исхождении

своём: **13** агнца же единоголетнего непорочна да сотворит во всеожжение на всяк день Господеву, завтра да сотворит его. **14** И манаа да сотворит над ним завтра завтра, шестую часть меры, и елеа третью часть ина, еже смесити семидал манаа Господеву, заповедь вечная присно. **15** Да сотворите агнца, и манаа, и масло древяно да сотворите завтра всеожжение присно. **16** Сия глаголет Господь Бог: аще даст старейшина даяние единому от сынов своих от наследия своего, сие сыном его да будет: одержание их сие в наследие. **17** Аще же даст даяние единому от раб своих, да будет ему до лета отпущения, и да воздаст старейшине: обаче наследие сынов его им да будет. **18** И да не вземлет старейшина от наследия людей еже насилити им, от одержания своего даст наследие сыном своим: яко да не расточатся людие Мои кийждо от одержания своего. **19** И введе мя во вход врат, яже к югу, в преграду святых жерцев, зрящую на север: и се, тамо место отлучено. **20** И рече ко мне: сие место есть, идеже варят жерцы, яже за неведение и яже за грехи, и тамо да пекут манау весьма, еже не износити во двор внешний освящати люди. **21** И изведе мя во двор внешний и обведе мя на четыре части двора: и се, двор по углам двора. **22** По углу двор, на четырех углах двора, двор малый в долготу лактей четыредесять, а в широту лактей тридесять, мера едина четыререм. **23** И преграды окрест в них, окрест четыререм: и поварни устроеныя под преградами окрест. **24** И рече ко мне: сии домовые поваров, идеже варят служащии храму заколениа людская.

**47** И введе мя ко преддверию храма, и се, вода исхождаше из под непокровеннаго храма на восток, яко лице храма

зряше на восток, и исхождаше вода от страны десныя, от юга к жертвеннику. 2 И изведе мя по пути врат яже на север и обведе мя путем вратным внеуду ко вратом двора, зрящаго на восток, и се, вода исхождаше от страны десныя, 3 якоже исход мужа противу: и мера в руце его: и измери тысящу мерою, и преjde водою воду оставления. 4 И (паки) измери тысящу, и преведе мя чрез воду, и взыде вода до колен: и размери тысящу, и взыде вода даже до чресл. 5 И размери тысящу, поток, и не возможе прейти, яко кипяше вода, аки шум поточный, егоже не прейдут. 6 И рече ко мне: видел ли еси, сыне человекъ? И веде мя и обрати мя на брег речный, во обращении моем: 7 и се, на брезе речнем древеся многа зело сюду и сюду. 8 И рече ко мне: вода сия текущая в Галилею, яже на восток, и низхождаше ко Аравии, и грядяше до моря к воде исхода, и изцелит воды: 9 и будет всяка душа животных вреущих, на вся, на няже найдет тамо река, жива будут: и будут тамо рыбы многи зело, яко приидет тамо вода сия и изцелит, и живо будет всякое, на неже аще приидет река, тамо живо будет. 10 И станут тамо рыбарие от Ингадда до Ингалима: сушило мрежам будет, о себе будет: и рыбы ея яко рыбы моря великаго, множество много зело. 11 И во исходе ея и во обращении ея и в возвышении ея мелины ея не изцелятся, в соль вдадутся: 12 и над реку взыдет, и на брезе ея оба полы, всякое древо ядомое не обетшает у нея, ни оскудеет плод его, новости своя первый плод принесет, ибо воды их сия от святых исходят, и будет плод их в снeдь и прозябение их во здравие. 13 Сице глаголет Господь Бог: сия пределы наследите земли, двенадцати племеном сынов Израилевых приложение ужа. 14 И наследите ю кийждо,

якоже брат его, на нюже воздвигох руку Мою, еже дати ю отцем их, и падет земля сия вам в наследие. 15 И сии пределы земли на север, от моря великаго сходящаго и отделяющаго вход Имаселдам, 16 Маавфирас, Еврамилиам среде предел Дамасковых и среде предел Имафовых, двory Савнани, иже суть выше предел Авранитидских. 17 Сии пределы от моря: от двора Енанова, пределы Дамасковы, и яже к северу, и предел Емафов, и предел северск. 18 И яже на востоки: между Авранитидою и между Дамаском, и между Галаадитидою и между землею Израилевою, Иордан делит к морю, еже на востоки фиников: сия на востоки. 19 И яже к югу и ливу: от Фемана и фиников даже до воды Маримоф-Кадим, продолжающееся к морю великому. 20 Сия страна юга и лива, сия страна моря великаго разделяет даже прямо входу Имаф, даже до входа его: сия суть яже к морю Имаф. 21 И разделите землю вам, племеном Израилевым. 22 Расположите ю жребием вам и пришелцем обитающим среде вас, иже родиша сыны посреде вас, и будут вам яко туземцы в сынех Израилевых: с вами да ядят во участии среде племен Израилевых, 23 и будут в племени пришелцев, в пришелцах иже с ними: тамо дадите участие им, глаголет Господь.

**48** Сия же имена племен от начала еже к северу, по стране схождения разделяющаго ко входу Имафову двора Енаня, предел Дамасков к северу по стране Имафова двора: и будут им яже на востоки, даже до моря, Даново едино. 2 И от предел Дановых к востоком даже до моря, Асирово едино. 3 И от предел Асировых, от сущих к востоком, даже до моря, Неффалимле едино. 4 От предел же Неффалимлив



от страны восточная даже до страны моря, Манассиино едино. 5 От предел же Манассииных, сущих на востоки, даже до сущих к морю, Ефремле едино. 6 От предел же Ефремлих, иже на восток, даже до моря, Рувимле едино. 7 От предел же Рувимлих, иже на востоки, даже до моря, Иудино едино. 8 А от предел Иудиных, иже к востоком, даже до моря, будет начаток уделения двадесяти и пяти тысяч широта, и долгота якоже едина от частей сущих к востоком, и даже до тех яже к морю: и будет святое посреде их. 9 Начаток, егоже отделят Господеви, в долготу двадесять и пять тысяч и в широту двадесять и пять тысяч. 10 От сих будет начаток святых жерцем, к северу (в долготу) двадесять и пять тысяч, и к морю в широту десять тысяч, и к востоку десять тысяч, и на юг в долготу двадесять и пять тысяч: и гора святых будет посреде его 11 жерцем, освященным сыном Садуковым, стрегущим стражбы храма, иже не прельстишася во прельщение сынов Израилевых, якоже прельстишася левити. 12 И будет им начаток даемый от начатков земли, святое святых от предел левитских. 13 Левитом же ближняя пределов жреческих, двадесяти и пяти тысяч в долготу, а в широту десяти тысяч: вся долгота двадесяти и пяти тысяч, а широта десяти тысяч. 14 Да не продастся от него, ни заменится, ниже отимутся первая жита земли, яко свято есть Господеви. 15 Пять же тысяч избыточных в широте двадесяти и пяти тысящей, предградие да будет граду на вселение и в разстояние его: и да будет град среде его. 16 И сия меры его: от севера четыре тысящы и пять сот, и от юга четыре тысящы и пять сот, и от восток четыре тысящы и пять сот, и от моря четыре тысящы и

пять сот. 17 И да будет расстояние граду к северу двусту и пятидесяти, и к югу двусту и пятидесяти, и на восток двусту и пятидесяти, и к морю двусту и пятидесяти. 18 Избыток же долготы держащяся начатков святых десять тысяч к востоком и десять тысяч к морю: и будут начатки святого, и будут жита ея во хлебы делающым град. 19 Делающии же град да делают его от всех племен Израилевых. 20 Весь начаток двадесяти и пяти тысяч на двадесять и пять тысяч: четвероуголно отделите от него начаток святого, от одержания градского, 21 а избыток старейшине от сего: и от онаго, от начатков святого и во участие града, спреди на двадесять и пять тысяч долгота, до предел, иже к морю и к востоком, спреди на двадесять и пять тысяч, до предел, иже к морю, близ частей старейшины: и да будет начаток святых и освящение храма среде его. 22 От участия же левитска и от участия града, среде старейшин, будет среде предел Иудиных и среде предел Вениаминих, и старейшин да будет. 23 А избыточное племен от сущих к востоком даже до сущих к морю, Вениаминово едино. 24 От предел же Вениаминих к востоком даже до страны яже к морю, Симеоне едино. 25 От предел же Симеоних, от страны яже на восток даже до страны яже к морю, Иссахарово едино. 26 А от предел Иссахаровых, от востоков даже до моря, Завулоне едино. 27 От предел же Завулоних, от востока даже до страны моря, Гадово едино. 28 От предел же Гадовых, от востока даже до ливы: и будут пределы его от юга, и воды Варимоф-Кадиса, наследия даже до моря великаго. 29 Сия земля, юже расположите жребием племеном Израилевым: и сии разделы их, глаголет Господь Бог. 30 И сии исходы града, иже

к северу, четыре тысящы и пять сот мерою: **31** врата же града по именом племен Израилевых: врата троя на север: врата Рувимля едина, врата же Иудина едина и врата Левиина едина: **32** и на восток четыре тысящы и пять сот, и врата троя: врата едина Иосифова, врата же едина Вениаминя и врата Данова едина: **33** и яже к югу четыре тысящы и пять сот мерою, и врата троя: врата едина Симеону, врата же едина Иссахару и врата едина Завулону: **34** и яже к морю четыре тысящы и пять сот мерою: врата троя: врата едина Гадова, и врата Асирова едина и врата Неффалимова едина. **35** Округлость же осминадесяти тысящ: имя же граду, от негоже дне будет, Господь тамо будет имя ему.

# Книга пророка Даниила

**1** В лето третье царства Иоакима царя Иудина, прииде Навуходоносор царь Вавилонск на Иерусалим и воеваше нань. **2** И даде Господь в руце его Иоакима царя Иудина и от части сосудов храма Божия. И принесе я в землю Сennaар в дом бога своего и сосуды внесе в дом сокровищный бога своего. **3** И рече царь ко Асфанезу, старейшине евнухов своих, ввести от сынов плена Израилева и от племене царска и от князей **4** юношы, на нихже несть порока, и добры зраком и смыслены во всяцей премудрости, и ведущия умение и размышляющия разум, и имже есть крепость в них, еже предстояти в дому пред царем и научити я книгам и языку Халдейску. **5** И повеле им (даяти) царь по вся дни от трапезы царевы и от вина пития своего и кормити их лета три, и потом стати пред царем. **6** И бысть в них от сынов Иудиных Даниил и Ананиа, и Азариа и Мисаил. **7** И возложи им имена старейшина евнухов: Даниилу Валтасар, и Анании Седрах, и Мисаилу Мисах, Азарии же Авденаго. **8** И положи Даниил на сердцы своем, еже не осквернитися от трапезы царевы и от вина пития его, и моли старейшину евнухов, яко да не осквернитися. **9** И вдаде Бог Даниила в милость и в щедроты пред старейшиною евнухов. **10** И рече старейшина евнухов Даниилу: боюся аз господина моего царя, заповедавшего о пици вашей и питии вашем, да не когда увидит лица ваша уныла паче отроков сверстников ваших, и осудите главу мою царю. **11** И рече Даниил ко Амелсару, егоже пристави старейшина евнухов к Даниилу и Анании, и Азарии и Мисаилу: **12** искуси отроки твоя до десяти дний, и да дадят нам от семян земных, да ядим, и

воду да пием: **13** и да явятся пред тобою лица наша и лица отроков ядущих от трапезы царицы, и якоже узриши, сотвори со отроки твоими. **14** И послуша их и искуси я до десяти дний. **15** По скончании же десятих дний, явишася лица их блага и крепка плотию паче отроков ядущих от трапезы царицы. **16** И бысть Амелсар отемля яди их и вино пития их и даяше им семена. **17** И четырем отроком сим им даде им Бог смысл и мудрость во всяцей книжной премудрости: Даниил же разумен бысть во всяцем видении и сонних. **18** И по скончании тех дний, в няже рече царь привести я, введе я старейшина евнухов пред Навуходоносора. **19** И беседова с ними царь, и не обретошася от всех их подобни Даниилу и Анании, и Азарии и Мисаилу: и сташа пред царем. **20** И во всяцем глаголе премудрости и умения, о нихже вопрошаше от них царь, обрете я десятирицею паче всех обаятелей и волхвов сущих во всем царстве его. **21** И бысть Даниил даже до первого лета Кира царя.

**2** В лето второе царства Навуходоносорова, соние виде Навуходоносор, и ужасеся дух его, и сон его отступи от него: **2** и рече царь призвати обаятелей и волхвов, и чародеев и Халдеев, еже возвестити царю сон его. И приидоша и сташа пред царем. **3** И рече им царь: видех сон, и ужасеся дух мой, еже уразумети сон. **4** И глаголаше Халдее сирски царици: царю, во веки живи: ты повеждь сон рабом твоим, и сказание его возвестим ти. **5** Отвеща же царь Халдеом и рече: слово отступило есть от мене: аще убо не возвестите ми сна и сказания его, в пагубу будете, и домове ваши разграбятся: **6** аще же сон и сказание его возвестите мне, даяния и дары и честь многу примете от мене: точию сон и сказание его

возвестите мне. 7 И отвещаша второе и реша: царь да повесть сон рабом своим, и сказание его возвестим ему. 8 И отвеща царь и рече: поистинне вем аз, яко время вы (точию) искупуете, понеже видите, яко отступило есть слово от мене: 9 аще убо сна не возвестите мне, вем, яко слово ложно и растленно совещащесе рещи предо мною, дондеже время минет: сон мой поведите мне, и увем, яко и сказание его возвестите мне. 10 Отвещаша же паки Халдее пред царем и реша: несть человека на земли, иже слово цареве возможет возвестити, яко всяк царь великий и князь не вопрошает ссиеваго словесе обаятеля, волхва и Халдеа: 11 понеже слово, егоже вопрошает царь, тяжко, и несть другаго, иже возвестит е пред царем, но точию бози, ихже несть житие со всякою плотию. 12 Тогда царь в ярости и во гневе мнозе рече погубити вся мудрыя Вавилонския. 13 И изыде повеление, и мудрии убивахуся: и взыскаша Даниила и другов его убити я. 14 Тогда Даниил отвеща совет и разум Ариоху архимагиру царску, иже изыде убити мудрых Вавилонских, 15 и вопрошаше и глаголя: княже царев, о чесом изыде изречение безстудное от лица царева? Возвести же Ариох слово Даниилу. 16 Даниил же вниде и моли царя, яко да время даст ему, и сказание его возвестит царю. 17 И вниде Даниил в дом свой и возвести слово Анании и Азарии и Мисаилу, другом своим: 18 и щедрот прошаху у Бога небеснаго отайне сей, яко да не погибнут Даниил и друзие его со прочиими мудрыми Вавилонскими. 19 Тогда Даниилу во сне нощию тайна открыся: и благослови Даниил Бога небеснаго 20 и рече: буди имя Господа Бога благословено от века и до века, яко премудрость и смысл и крепость Его

есть, 21 и Той пременяет времена и лета, поставляет цари и преставляет, давая премудрость мудрым и разум ведущим мышление: 22 Той открывает глубокая и сокровенная, сведый суцая во тме и свет с Ним есть: 23 Тебе, Боже отцев моих, исповедаюся и хвалю, яко премудрость и силу дал ми еси и возвестил ми еси, яже просихом у Тебе, и видение цареву возвестил ми еси. 24 И прииде Даниил ко Ариоху егоже пристави царь погубити мудрыя Вавилонския, и рече ему: мудрых Вавилонских не погубляй, но введи мя пред царя, и сказание сна возвещу ему. 25 Тогда Ариох с потщанием введе Даниила пред царя и рече ему: обретох мужа от пленник жидовских, иже сказание царю возвестит. 26 И отвеща царь и рече Даниилу, емуже имя Валтасар: можеш ли ми возвестити сон, егоже видех, и сказание его? 27 И отвеща Даниил пред царем и рече: тайны, еяже царь вопрошает, несть мудрых, волхвов, ниже обаятелей газаринов (сила) возвестити царю: 28 но есть Бог на небеси открываяй тайны и возвести царю Навуходоносору, имже подобает быти в последния дни. Сон твой и видение главы твоея на ложи твоим сие есть, царю: 29 помышления твоя на ложи твоим въздоша, чесому подобает быти по сих, и Открываяй тайны яви тебе, имже подобает быти: 30 и мне не премудростию сущею во мне паче всех живущих тайна сия открыся, но ради того, яко да возвещу сказание царю, да уразумеши размышления сердца твоего. 31 Ты, царю видел еси: и се, тело едино, велие тело оно, и обличие его высоко, стоящо пред лицом твоим, и образ его страшен: 32 тело, егоже глава от злата чиста, руце и перси и мышцы его сребряны, чрево и стегна медяна, 33 голени железны, нозе,

часть убо некая железна и часть некая скудельна: **34** видел еси, дондеже отторжеса камень от горы без рук, и удари тело в нозе железны и скудельны, и истни их до конца: **35** тогда сотрошася вкупе скудель, железо, медь, серебро и золото, и бысть яко прах от гумна летня: и взят я премногий ветр, и место не обретеся им: камень же поразивый тело бысть гора велика и наполни всю землю. **36** Сей есть сон, а сказание его речем пред царем. **37** Ты, царю, царь царей, емуже Бог небесный царство даде крепко и державно и честно: **38** во всяцем месте, идеже живут сынове человек и зверие польстии, и птицы небесныя и рыбы морския дал есть в руку твою и поставил тя властелина всем: ты еси глава золотая. **39** И последи тебе востанет царство другое меньшее тебе, еже есть серебро, царство же третие, еже есть медь, еже соодолеет всей земли, **40** и царство четвертое, еже будет крепко аки железо: якоже железо стончевает и умягчает вся, такожде и то истончит и истнит вся. **41** А яко видел еси нозе и персты, часть убо некую железну, часть же некую глиняну, царство разделено будет, и от корене железна будет в нем, якоже видел еси железо смешено с глиною: **42** и персты ножнии, часть убо некая железна, часть же некая глиняна, часть некая царства будет крепка и от него будет сокрушена. **43** Яко видел еси железо смешено со глиною, смешены будут во племени человек, и не будут прилепляющеса сей к сему, якоже железо не смешается со глиною. **44** И во днех царей тех возставит Бог небесный царство, еже во веки не разсыплется, и царство Его людем инем не останется, истнит и развеет вся царства, тое же станет во веки, **45** якоже видел еси, яко отсечеса от горы камень без рук и истни глину,



железо, медь, серебро, золото. Бог великий возвести царю, имже подобает быти по сих: и истинен сон, и верно сказание его. 46 Тогда царь Навуходоносор паде на лице и поклонися Даниилу, и рече дары и благовония возлияти ему. 47 И отвещав царь рече Даниилу: поистинне Бог ваш Той есть Бог богов и Господь господей и Царь царей, открываяй тайны, понеже возмогл еси открыти тайну сию. 48 И возвеличи царь Даниила, и дары велики и многи даде ему, и постави его над всею страню Вавилонскою и князя воеводам, над всеми мудрыми Вавилонскими. 49 И Даниил проси у царя и пристави над делы страны Вавилонския Седраха, Мисаха и Авденаго. Даниил же бяше во дворе царева.

**3** В лето осмонадешатое Навуходоносор царь сотвори тело злато, высота его лактий шестидесяти и широта его лактий шести, и постави е на поли Деире во стране Вавилонстей. 2 И посла (Навуходоносор царь) собрати ипаты и воеводы и местоначалники, вожди же и мучители, и сущыя на властех и вся князи стран, приити на обновление кумира, егоже постави Навуходоносор царь. 3 И собращася местоначалницы, ипатове, воеводы, вождеве, мучителие велицыи, иже над властьюми, и вси началницы стран на обновление тела, еже постави Навуходоносор царь: и сташа пред телом, еже постави Навуходоносор царь. 4 И проповедник вопияше со крепостию: вам глаголется, народи, людие, племена, языцы: 5 в оньже час аще услышите глас трубы, свирели же и гусли, самвики же и псалтири и согласия, и всякаго рода мусикийска, падающе покланяйтеся телу златому, еже постави Навуходонсор царь: 6 и иже аще не пад поклонится, в той час ввержен будет в пещь огнем горящую.

7 И бысть егда услышаша людие глас трубы, свирели же и гусли, самвики же и псалтири и согласия, и всякаго рода мусикийска, падающе вси людие, племена, языцы, поклоняхуся телу златому, еже постави Навуходоносор царь.

8 Тогда приступиша мужие Халдейстии и оболгаша Иудеев, 9 отвещавше реша Навуходоносору цареви: царю, во веки живи: 10 ты, царю, положил еси повеление, да всяк человек, иже аще услышит глас трубы, свирели же и гусли, самвики же и псалтири и согласия, и всякаго рода мусикийска, 11 и не пад поклонится телу златому, ввержен будет в пещь огнем горящую. 12 Суть убо мужие Иудее, ихже поставил еси надделы страны Вавилионския, Седрах, Мисах и Авденаго, иже не послушаша заповеди твоя, царю, и богом твоим не служат и телу златому, еже поставил еси, не поклоняются.

13 Тогда Навуходоносор в ярости и гневe рече привести Седраха, Мисаха и Авденаго. И приведени быша пред царя.

14 И отвеща Навуходоносор и рече им: аще воистинну, Седрах, Мисах и Авденаго, богом моим не служите и телу златому, еже поставих, не поклоняетесь? 15 Ныне убо аще есте готови, да егда услышите глас трубы, свирели же и гусли, самвики же и псалтири и согласия, и всякаго рода мусикийска, падше поклонитесь телу златому, еже сотворих: аще же не поклонитесь, в той час ввержени будете в пещь огнем горящую: и кто есть Бог, иже измет вы из руки моя?

16 И отвещаша Седрах, Мисах и Авденаго, глаголюще царю Навуходоносору: не тебе нам о глаголе сем отвещати тебе: 17 есть бо Бог наш на небесех, Емуже мы служим, силен изяти нас от пещи огнем горящия и от руку твою избавити нас, царю: 18 аще ли ни, ведомо да будет тебе, царю,

яко богом твоим не служим и телу златому, еже поставил еси, не кланяемся. 19 Тогда Навуходоносор исполнися ярости, и зрак лица его изменися на Седраха, Мисаха и Авденаго, и рече: разжгите печь седмерицею, дондеже до конца разгорится. 20 И мужем сильным крепостию рече: оковавше Седраха, Мисаха и Авденаго, вверзите в печь огнем горящую. 21 Тогда мужие онии оковани быша с гащами своими и покрывалы, и сапогми и со одеждами своими, и ввержени быша посреде печи огнем горящая. 22 Понеже глагол царев превозможе, и печь разжжена бысть преизлишше: и мужей оных, иже ввергоша Седраха, Мисаха и Авденаго, уби пламень огненный. 23 И мужие тии трие, Седрах, Мисах и Авденаго, падоша посреде печи огнем горящая оковани, 24 Навуходоносор же слыша поющих их, и почудися, и воста со тщанием, и рече вельможам своим: не триех ли мужей ввергохом среде огня связанных? И реша цареви: воистинну, царю. 25 И рече царь: се, аз вижду мужы четыре разрешены и ходяща среде огня, и истления несть в них, и зрак четвертаго подобен сыну Божию. 26 Тогда прииде Навуходоносор ко устию печи огнем разжженныя и рече: Седрах, Мисах, Авденаго, раби Бога Вышняго, изыдите и приидите. И изыдоша Седрах, Мисах, Авденаго от среды огня. 27 И собращася князи и воеводы, и местоначалницы и вельможи царевы, и видяху мужей, яко не одоле огнь телесем их и власа главы их не опали, и ризы их не изменишася, и вони огненны не бяше в них. 28 И поклонися пред ними царь Богу, и отвеща Навуходоносор царь и рече: благословен Бог Седрахов, Мисахов и Авденаго, Иже посла Ангела Своего и изя отроки Своя, яко уповаша на Него: и

слово цареве премениша, и предаша телеса своя во огонь, яко да не послужат, ни поклонятся всякому богу иному, но точию Богу своему: 29 и аз заповедаю заповедь: вси людие, племя, язык, аще речет хулу на Бога Седрахова и Мисахова и Авденаго, в пагубу будут, и домове их в разграбление: понеже несть бога другаго, иже возможет избавити сице. 30 Тогда царь постави Седраха, Мисаха и Авденаго во стране Вавилонстей, и возвеличи их, и сподоби их старейшинства Иудеев всех сущих во царстве его.

**4** Навуходоносор царь всем людем, племеном и языком сущым во всей земли, мир вам да умножится. 2 Знамения и чудеса, яже сотвори со мною Бог Вышний, угодно бысть предо мною возвестити вам, 3 коль великая и крепкая: царство Его царство вечное, и власть Его в роды и роды. 4 Аз Навуходоносор обилуяй бех в дому моем и благоцветый на престоле моем: 5 сон видех, и устраши мя, и смятохся на ложи моем, и видения главы моя смятоша мя: 6 и мною положися повеление, привести пред мя вся мужы мудрыя Вавилонския, да сказание сна возвестят мне. 7 И вхождаху обаятелие, волсви, газарини, Халдее, и сон аз рех пред ними, и сказания его не возвестиша ми, 8 дондеже вниде (пред мя) Даниил, емуже имя Валтасар, по имениа бога моего, иже духа Божия свята имать в себе, и сон пред ним рех: 9 Валтасаре, княже обаятелей, егоже аз разумех, яко дух Божий святой имаши, и всякая тайна не изнемогает пред тобою, слыши видение сна моего, еже видех, и сказание его повеждь мне. 10 И видение главы моя на ложи моем зрех, и се, древо среде земли, и высота его велика: 11 и возвеличися древо то и укрепися, и высота

его досязаше до небесе, и величина его до конец земли  
всего, 12 листвие его прекрасное, и плод его много, и пища  
всех в нем, и под ним вселяхуся вси зверие дивии, и в  
ветвех его живяху (вся) птицы небесныя, и от него питашеся  
всяка плоть. 13 Видех во сне нощию на ложи моем, и се,  
Бодрый и Святой от небесе сниде 14 и возгласи крепце и  
такое рече: посетите древо и обийте ветви его, и оттрясите  
листвие его и разсыплите плод его, да позаблуются зверие  
под ним и птицы с ветвий его: 15 точию отрасль кореня  
его в земли оставите, и во узе железне и медне, и во  
злаце внешнем и в росе небесней вселится, и со зверьми  
(дивиими) часть его во траве земней: 16 сердце его от  
человек изменится, и сердце зверино дастся ему, и семь  
времен изменятся над ним: 17 изречением Бодраго слово, и  
глагол Святых прошение: да уведят живущии, яко владеет  
Вышний царством человеческим, и емуже восхощет, даст  
е, и уничтоженное человеков возставит над ним. 18 Сей  
сон, егоже видех аз Навуходоносор царь: ты же, Валтасаре,  
сказание его повеждь, яко вси мудрии царства моего не  
могут сказания его поведати мне, ты же, Данииле, можеша,  
яко дух Божий свят в тебе. 19 Тогда Даниил, емуже имя  
Валтасар, ужасеся аки на един час, и размышления его  
смущаху его. И отвеща царь и рече: Валтасаре, сон мой и  
сказание его да не смущает тебе. И отвеща Валтасар и рече:  
господине, да будет сон сей ненавидящим тя, и сказание его  
врагом твоим. 20 Древо, еже видел еси возвеличившееся и  
укрепившееся, егоже высота досязаше до небесе и величина  
его на всю землю, 21 и листвие его благоцветное и плод его  
много, и пища всем в нем, под ним живяху зверие дивии, и в

ветвех его угнездяхуся птицы небесныя: 22 ты еси, царю, яко возвеличился еси и укрепел, и величество твое возвеличился и досяже небесе, и власть твоя до конец земли. 23 И яко виде царь Бодраго и Святаго сходяща с небесе, и рече: посецыте древо и разсыплите е, точию проничение кореня его в земли оставите, и во узе железне и медяне и во злаце внешнем и в росе небесней водворится, и со зверьми дивиими часть его, дондеже семь времен пременятся над ним: 24 сие сказание его, царю, и изречение Вышняго есть, еже приспе на господина моего царя: 25 изженут тя от человек, и с дивиими зверьми будет житие твое, и травую аки вола напитают тя, и от росы небесныя тело твое оросится, и семь времен изменятся над тобою, дондеже увеси, яко владеет Вышний царством человеческим, и емуже восхощет, даст е. 26 А еже рече: оставите проничение кореня древа (в земли): царство твое тебе будет, отнележе увеси власть небесную. 27 Сего ради, царю совет мой да будет тебе угоден, и грехи твоя милостынями искупи и неправды твоя щедротами убогих: негли будет долготерпелив грехом твоим Бог. 28 Сия вся постигоша Навуходоносора царя. 29 По двюнадесяти месяцах в дому царства своего, в Вавилоне беходя, 30 отвеща царь и рече: несть ли сей Вавилон великий, егоже аз соградих в дом царства, в державе крепости моея, в честь славы моея? 31 Еще слову сущу во устех каря, глас с небесе бысть: тебе глаголется, Навуходоносоре царю: цартво твое преjde от тебе, 32 и от человек отженут тя, и со зверьми дивиими житие твое, и травую аки вола напитают тя и семь времен изменятся на тебе, дондеже увеси, яко владеет Вышний царством человеческим, и емуже восхощет,

даст е. 33 В той час слово скончася на цари Навуходоносоре, и от человек отгнася, и траву аки вол ядыше, и от росы небесныя тело его оросися, дондеже власи ему яко льву возрастоша и ногти ему аки птицам. 34 И по скончании тех дний, аз Навуходоносор очи свои на небо воздвиг, и ум мой ко мне возвратися, и Вышняго благослових, и Живущаго во веки похвалих и прославих, яко власть Его власть вечна, и царство Его в роды и роды, 35 и вси живущии на земли ни во чтоже вменишася, и по воли Своей творит в силе небесней и в селении земнем: и несть, иже воспротивится руце Его и речет Ему: что сотворил еси? 36 В то время ум мой возвратися ко мне, и в честь царства моего приидох, и зрак мой возвратися ко мне, и началницы мои и вельможи мои искаху мене: и в царстве моем утвердихся, и величество излюбилнее приложися мне. 37 Ныне убо аз Навуходоносор хвалю и превозношу и славлю Царя Небеснаго, яко вся дела Его истинна, и путие Его судьбы, и вся ходящия в гордости может смирити.

**5** Валтасар царь сотвори вечерю велию вельможам своим тысящи мужем, 2 пред тысящею же вино, и пия Валтасар рече при вкушении вина, еже принести сосуды златы и серебряны, яже изнесе Навуходоносор отец его из храма (Господа Бога), иже во Иерусалиме, и да пият в них царь и вельможи его, и наложницы его и возлежащия (окрест) его. 3 И принесоша сосуды златыя и серебряныя, яже изнесе (Навуходоносор царь) из храма Господа Бога, иже во Иерусалиме: и пияху ими царь и вельможи его, и наложницы его и возлежащия (окрест) его: 4 пияху вино и похвалиша боги златыя и серебряныя, и медяныя и железныя, и деревянные

и каменные, а Бога вечного не благословиша, имущаго власть духа их. 5 В той час изыдоша персты руки чловечи и писаху противу лампы на поваплении стены дому царева, и царь видяше персты руки пишуция. 6 Тогда царю зрак изменися, и размышления его смущаху его, и соузы чресл его разслабляхуся, и колена его сражастася: 7 и возопи царь силою, еже ввести волхвов, Халдеев, газаринов: и рече царь мудрым Вавилонским: иже прочтет писание сие и разум его возвестит мне, той в багряницу облечется, и гривна золотая на выю его, и третий во царстве моем обладати начнет. 8 И вхождаху вси мудрии ко царю и не можаху писания прочести, ни разума царю возвестити. 9 Царь же Валтасар возьмется, и зрак его изменися на нем, и вельможи его смущахуся. 10 И вниде царица в дом пирный, и рече царица: царю во веки живи: да не смущают тебе размышления твоя, и зрак твой да не изменяется: 11 есть муж во царстве твоём, в немже дух Божий: и во дни отца твоего бодрость и смысл обретется в нем, и царь Навуходоносор отец твой князя постави его волхвом, обаятелем, Халдеем, газарином, 12 яко дух преизлюбилный (баше) в нем, и премудрость и смысл (обретется) в нем, сказуя сны и возвещая сокровенная и разрешая соузы, Даниил, и царь нарече имя ему Валтасар: ныне убо да призовется, и сказание его возвестит тебе. 13 Тогда Даниил введен бысть пред царя. И рече царь Даниилу: ты лиеси Даниил, от сынов пленник Иудейских, ихже привеле Навуходоносор царь отец мой? 14 Слышах о тебе, яко дух Божий в тебе, и бодрость и смысл и премудрость излюбилна обретется в тебе: 15 и ныне внидоша пред мя мудрии, волсви, газарини, да писание сие прочтут и сказания его возвестят



ми, и не могоша возвестити мне: 16 аз же слышах о тебе, яко можеши суды сказати: ныне убо аще возможеши писание сие прочести и сказание его возвестити мне, в багряницу облечешися, и гривна золотая на выи твоей будет, и третий во царстве моем обладати будеши. 17 Тогда отвеща Даниил и рече пред царем: даяния: твоя с тобою да будут, и дар дому твоего иному даждь, аз же писание прочту царю и сказание его возвещу тебе. 18 Царю! Бог Вышний царство и величество, и честь и славу даде Навуходоносору отцу твоему, 19 и от величества, еже ему даде, вси людие, племена, языцы бяху трепещуще и боящися от лица его: ихже хотяше убиваше, и ихже хотяше бияше, и ихже хотяше возвышаше, и ихже хотяше, той смиряше: 20 и егда вознесеса сердце его и утвердися дух его еже презорствовать, сведеса от престола царства, и слава и честь отяся от него, 21 и от человек отгнася, и сердце его со зверьми отдася, и житие его со дивиими ослы, и травую аки вола питаху его, и от росы небесных оросися тело его, дондеже уразуме, яко владеет Бог Вышний царством человеческим, и емуже хочет, даст е. 22 И ты убо, сыне его Валтасаре, не смирил еси сердца твоего пред Господем: не вся ли сия ведал еси? 23 Но на Господа Бога небеснаго вознеслся еси, и сосуды храма Его принесоша пред тебе, ты же и вельможи твои, и наложницы твоя и возлежащия (окрест) тебе, вино пиясте ими: и боги золотыя и серебряныя, и медяныя и железныя, и каменныя и деревяныя, иже ни видят, ни слышат, ни разумеют, похвалил еси, а Бога, у Негоже дыхание твое в руце Его, и вси путие твои, Того не прославил еси. 24 Сего ради от лица Его послани быша персты ручнии и писание сие вчиниша. 25

Се же есть писание вчиненое: мани, фекел, фарес. 26 Се сказание глагола: мани, измери Бог царство твое и сконча е: 27 фекел, поставися в мерилех и обретесе лишаемо: 28 фарес, разделися царство твое и дадесе Мидом и Персом. 29 И рече Валтасар: (облецыте и). И облекоша Даниила в багряницу, и гривну златую возложиша на выю его, и проповеда о нем, еже быти ему князю третьему во царстве его. 30 Валтасара царя Халдейска убиша в ту ночь, 31 Дарий же Мидянин прия царство, сый шестидесяти и двою лет.

**6** И бысть угодно пред царем, и постави во царстве князей сто и двадесять, еже быти им во всем царстве его, 2 над ними же три чиновники, от нихже бе Даниил един, дабы отдавали им князи слово, яко да царю не стужают. 3 И бе Даниил над ними, яко дух бяше преизюбилен в нем, и царь постави его над всем царством своим. 4 Чиновницы же и князи искаху вины обрести на Даниила: и всякия вины и соблазна и греха не обретоша на него, яко верен бяше. 5 И реща чиновницы не обрящем на Даниила вины, аще не в законех Бога его. 6 Тогда чиновницы и князи предсташа царю и реша ему: Дарие царю, во веки живи: 7 совещаща вси иже во царстве твоём воеводы и князи, ипати и обладающии странами, еже уставити устав царский и укрепити предел, яко аще кто попросит прошения от всякаго бога и человека до дний тридесяти, разве точию от тебе, царю, да ввержен будет в ров левский: 8 ныне убо, царю, устави предел и положи писание, яко да не изменится заповедь Мидска и Персска, (да никтоже преступит ея). 9 Тогда царь Дарий повеле вписати заповедь. 10 Даниил же егда уведо, яко

заповедь вчинися, вниде в дом свой: дверцы же отверсты ему в горнице его противу Иерусалима, в три же времена дне бяше прекланяя колена своя, моляся и исповедаяся пред Богом своим, якоже бе творя прежде. 11 Тогда мужие онии наблюдаша и обретоша Даниила просяща и молящася Богу своему, 12 и пришедше реша пред царем: царю, не вчинил ли еси ты предела, яко да всяк человек, иже аще попросит у всякаго бога и человека прошения до тридесяти дний, но точию у тебе, царю, да ввержется в ров левск? И рече царь: истинно слово, и заповедь Мидска и Персска не мимоидет. 13 Тогда отвещаша пред царем и глаголаша: Даниил, иже от сынов плена Иудейска, не покорися заповеди твоей (и не раде) о пределе, егоже вчинил еси: в три бо времена дне просит у Бога своего прошений своих. 14 Тогда царь, яко слышав слово сие, зело опечалися о нем, и о Данииле прашеся еже избавити его, и бе даже до вечера праша еже избавити его. 15 Тогда мужие онии глаголаша царю: веждь, царю яко Мидом и Персом не леть есть пременити всякаго предела и устава, егоже царь уставит. 16 Тогда царь рече, и приведоша Даниила и ввергоша его в ров левск. И рече царь Даниилу: Бог твой, Емуже ты служиши присно, Той избавит тя. 17 И принесоша камень един и возложиша на устие рва, и запечата царь перстнем своим и перстнем вельмож своих, да не изменится деяние о Данииле. 18 И отиде царь в дом свой и ляже без вечери, и яди не внесоша к нему: и сон отступи от него. И заключи Бог уста львом, и не стужиша Даниилу. 19 Тогда царь воста заутра на свете и со тщанием прииде ко рву левску. 20 И егда приближися ко рву, возопи гласом крепким: Данииле, рабе Бога живаго! Бог

твой, Емуже ты служиши присно, возможе ли избавити тя из уст львовых? 21 И рече Даниил цареви: царю, во веки живи: 22 Бог мой посла Ангела Своего и затвори уста львов, и не вредиша мене, яко обретеса пред Ним правда моя, и пред тобою, царю, согрешения не сотворих. 23 Тогда царь вельми возвеселися о нем и рече Даниила извести из рва. И изведен бысть Даниил из рва, и всякого тления не обретеса на нем яко верова в Бога своего. 24 И рече царь, и приведоша мужы оклеветавшыя Даниила и в ров левск ввергоша я и сыны их и жены их: и не доидоша дна рва, даже соодолеша им львы и вся кости их истончиша. 25 Тогда Дарий царь написа всем людем, племеном, языком, живущым во всей земли: мир вам да умножится: 26 от лица моего заповедася заповедь сия во всей земли царства моего, да будут трепещуще и боящеся от лица Бога Даниилова, яко Той есть Бог живой и пребываяй во веки, и царство Его не разсыплется, и власть Его до конца: 27 подемллет и избавляет, и творит знамения и чудеса на небеси и на земли, иже избави Даниила от уст львовых. 28 Даниил же управляше во царстве Дариеве и во царстве Кира Персянина.

**7** В первое лето Валтасара царя Халдейска, Даниил сон виде и видения главы его на ложи его, и сон свой вписа: 2 аз Даниил видех в видении моем нощию: и се, четыре ветри небеснии налегаша на море великое, 3 и четыре зверие велицыи исхождаху из моря, различни между собою: 4 первый аки львица имый криле, криле же его аки орли, зрях, дондеже исторжена быша крила его, и воздвижеса от земли, и на ногу человекучу ста, и сердце человекучо дадеса ему: 5 и се, зверь вторый подобен медведице, и на стране

единой ста, и три ребра во устех его, среде зубов его, и сице глаголаху ему: востани, яждь плоти многи: 6 созади сего видех: и се, зверь ин аки рысь, тому же крила четыре птичия над ним и четыре главы зверю, и власть дадеся ему: 7 созади сего видех: и се, зверь четвертый страшен и ужасен и крепок излиха, зубы же его железни велии, ядый и истончевая, останки же ногама своима попираше, той же различаяся излиха паче всех зверей прежних, и рогов десять ему: 8 разсмотрях в розех его, и се, рог другой мал възде среде их, и трие рози преднии его исторгнушася от лица его, и се, очи аки очи человекчи в розе том, и уста глаголюща великая. 9 Зрях дондеже престолы поставшася, и Ветхий денми седе, и одежда Его бела аки снег, и власи главы Его аки волна чиста, престол Его пламень огнен, колеса Его огонь палящ: 10 река огненна течаше исходящи пред Ним: тысящя тысящ служаху Ему, и тмы тем предстояху Ему: судище седе, и книги отверзошася. 11 Видех тогда от гласа словес великих, яже рог оный глаголаше, дондеже убися зверь и погибе, и тело его дадеся во сожжение огненно: 12 и прочих зверей преставися власть, и продолжение жития дадеся им до времени и времени. 13 Видех во сне нощию, и се, на облацех небесных яко Сын человекч идый бяше и даже до Ветхаго денми дойде и пред Него приведеся: 14 и Тому дадеся власть и честь и царство, и вси людие, племена и языцы Тому поработают: власть Его власть вечная, яже не преидет, и царство Его не разсыплется. 15 Вострепета дух мой в состоянии моем, аз Даниил, и видения главы моя смущаху мя. 16 И приидох ко единому от стоящих и известия просих от него научитися о всех сих. И поведи

ми известие и сказание словес возвести ми: 17 сии зверие велиции четыре, четыре царства востанут на земли, 18 яже возмутся: и преимут царство святии Вышняго и содержати будут оное даже до века веков. 19 И вопрошах испытно о звери четвертем, яко бяхе различен паче всякаго зверя, страшен вельми, зубы его железни и ногти его медяни, ядый и истончевая, останки же ногама своима попираше: 20 и о десяти розех его иже на главе его, и о друзем возшедшем и истрясшем первыя три, рог же той емуже очи и уста глаголюща великая, и видение его более прочиих: 21 зрях, и рог той творяше рать со святыми и укрепися на них, 22 дондеже прииде Ветхий денми и суд даде святым Вышняго: и время приспе, и царство прияша святии. 23 И рече: зверь четвертый царство четвертое будет на земли, еже превзыдет вся царства и пояст всю зеемлю, и поперет ю и посечет: 24 и десять рогов его десять царей востанут, и по них востанет другой, иже превзыдет злобами всех прежних и три цари смирит, 25 и словеса на Вышняго возглаголет и святых Вышняго смирит, и помыслит пременити времена и закон, и дастся в руку его даже до времени и времен и полувремене: 26 и судище сядет, и власть его преставят еже потребити и погубити до конца: 27 царство же и власть и величество царей, иже под всем небесем, дастся святым Вышняго: и царство Его царство вечное, и вся власти Тому работати будут и слушати. 28 До zde скончание словесе. Аз Даниил, надолзе размышления моя смущаху мя, и зрак мой пременяся на мне, и глагол в сердцы моем соблюдох.

**8** В лето третие царства Валтасара царя видение явися мне, аз Даниил, по явльшемся мне прежде. 2 И бех в Сусех

граде, иже есть во стране Еламстей, и видех в видении, и бех на Увале, 3 и воздвигох очи мои и видех: и се, овен един стоя пред увалом емуже рози, рози же висоцы, един же вышше другаго, и вышший восхождаше последи. 4 И видех овна бодуща на запад и на север, и на юг и на восток: и вси зверие не станут пред ним, и не бе избавляюща из руки его, и сотвори по воли своей, и возвеличися. 5 Аз же бех размышляя, и се козел от коз идяше от лива на лице всея земли и не бе прикасаяся земли, и козлу тому рог видимь между очима его: 6 и прииде до овна имущаго рога егоже видех стояща пред увалом, и тече к нему в силе крепости своя. 7 И видех его доходяща до овна, и разсвирипе на него, и порази овна, и сокруши оба рога его: и не бе силы овну, еже стати противу ему: и поверже его на землю и попра его, и не бе избавляяй овна от руки его. 8 И козел козий возвеличися до зела: и внегда укрепися, сокрушися рог его великий, и възыдоша друзии четыри рози под ним, по четырем ветром небесным: 9 и от единого их възыде рог един крепок, и возвеличися вельми к югу и к востоку и к силе, 10 и возвеличися даже до силы небесных: и сотвори пасти на землю от силы небесных и от звезд, и попра я: 11 и дондеже Архистратиг избавит пленники, и Его ради жертва смятятся, и благопоспешися Ему, и святое опустеет: 12 и дадеса на жертву грех, и повержеса правда на землю: и сотвори, и благопоспешися. 13 И слышах единого святого глаголюща. И рече един святой другому некоему глаголющему: доколе видение станет, жертва отятая, и грех опустения данный, и святое и сила поперется? 14 И рече ему: даже до вечера и утра дний две тысящы и триста, и очистится святое. 15 И

бысть, егда видех аз Даниил видение и взысках ведения, и се, ста предо мною аки образ мужеск, 16 и слышах глас мужеск среде Увала, и призва и рече: Гаврииле, скажи видение оному. 17 И прииде и ста близ стояния моего: и егда прииде ужасохся и падох на лице мое. И рече ко мне: разумей, сыне человекь, еще бо до скончания времени видение. 18 И егда глаголаше со мною, падох ниц на земли, и прикоснуса мне, и постави мя на ноги моя, и рече: 19 се, аз возвещаю тебе будущая на последок гнева (сыном людей твоих): еще бо до конца времени видение. 20 Овен, егоже видел еси имуща рога, царь Мидский и Персский: 21 а козел козий царь Еллинский есть: рог же великий, иже между очима его, той есть царь первый: 22 сему же сокрушившуся восташа четыре рози под ним: четыре царие востанут от языка его, но не в крепости его, 23 и на последок царства их, исполняющимся грехом их, встанет царь безсрамен лицом и разумея гадания, 24 и державна крепость его, не в крепости же своей, и чудесно растлит и управит и сотворит, и разсыплет крепкия и люди святы, 25 и ярем вериг своих исправит: лествь в руце его, и в сердцы своем возвеличится, и лестию разсыплет многих, и на пагубу многим возстанет, и яко яйца рукою сокрушит. 26 И видение вечера и утра реченного истинно есть: ты же назнаменай видение, яко на дни многи. 27 Аз же Даниил успох и изнемогах на дни (многи), и востах и творях дела царева, и почудихся видению, и не бяше разумевающаго.

**9** В первое лето Дариа сына Ассиурова, от племени Мидска, иже царствова во царстве Халдейстем, 2 в лето первое царства его, аз Даниил разумех в книгах число лет, о немже



бысть слово Господне ко Иеремии пророку, на скончание опустения Иерусалимля семьдесят лет. 3 И дах лице мое к Господу Богу, еже взыскати молитвы и прошения в посте и во вретиси и пепеле, 4 и молихся ко Господу Богу моему и исповедахся и рех: Господи, Боже великий и чудный, храняй завет Твой и милость Твою любящим Тя и хранящим заповеди Твоя: 5 согрешихом, беззаконновахом, нечествовахом и отступихом и уклонихомся от заповедий Твоих и от судов Твоих 6 и не послушахом раб Твоих пророков, иже глаголаша во имя Твое ко царем нашим и князем нашим, и отцем нашим и всем людям земли. 7 Тебе, Господи, правда, нам же стыдение лица, якоже день сей, мужу Иудину, и живущим во Иерусалиме, и всему Израилю, и ближним и дальним во всей земли, идеже разсеял еси я тамо, во отвержении их, имже отвергошася Тебе, Господи. 8 Тебе, Господи, есть правда, нам же стыдение лица, и царем нашим и князем нашим и отцем нашим, иже согрешихом Тебе. 9 Господу же Богу нашему щедроты и очищения, яко отступихом от Господа 10 и не послушахом гласа Господа Бога нашего, ходити в законех Его, ихже даде пред лицом нашим рукою раб Своих пророков. 11 И весь Израиль преступи закон Твой, и уклонишася еже не послушати гласа Твоего: и прииде на ны клятва и заклятие вписаное в законе Моисеа раба Божия, яко согрешихом Ему. 12 И устави словеса Своя, яже глагола на ны и на судии наша, иже судиша нам, навести на ны злая великая, яковых не бысть под всем небесем, по (всем) бывшим во Иерусалиме, 13 якоже есть писано в законе Моисеове, вся злая сия приидоша на ны: и не помолихомся лицу Господа

Бога нашего, отвратится от неправд наших, и еже смыслити во всей истине Твоей (Господи). 14 И убудися Господь Бог на злобу нашу и наведе сия на ны, яко праведен Господь Бог наш во всем деянии Своем, еже сотвори, и не послушахом гласа Его. 15 И ныне, Господи, Боже наш, иже извел еси люди Твоя от земли Египетския рукою крепкою и сотворил еси Себе Самому имя, якоже день сей, согрешихом, беззаконновахом. 16 Господи, всем помилованием Твоим да отвратится ярость Твоя и гнев Твой от града Твоего Иерусалима, от горы святых Твоя: яко согрешихом неправдами нашими и беззаконием отец наших, Иерусалим и людие Твои во укоризну быша во всех окрестных нас. 17 И ныне, Господи, Боже наш, услыши молитву раба Твоего и прошение его, и яви лице Твое на святилище Твое опустевшее, Тебе ради, Господи. 18 Приклони, Господи, Боже мой, ухо Твое и услыши, отверзи очи Твои и виждь потребление наше и града Твоего, в немже призвася имя Твое, яко не на наша правды (уповающе) повергаем моление наше пред Тобою, но на щедроты Твоя многия, Господи. 19 Услыши, Господи, очисти, Господи, вонми, Господи, и сотвори, и не закосни Тебе ради, Боже мой, яко имя Твое призвася во граде Твоем и в людех Твоих. 20 Еще же ми глаголющу и молящуся и исповедающу грехи моя и грехи людей моих Израиля, и припадающу с молением моим пред Господем Богом моим о горе святых Его: 21 и еще глаголющу ми в молитве, и се, муж Гавриил, егоже видех в видении моем в начале, парящъ, и прикоснуся мне, аки в час жертвы вечерняя, 22 и вразуми мя, и глагола ко мне, и рече: Данииле, ныне изыдох устроити тебе разум: 23 в начале молитвы твоя изыде слово, и аз приидох

возвестити тебе, яко муж желаний еси ты, размысли о словеси и разумей во явлении. 24 Седьдесят седмин сократишася о людех твоих и о граде твоём святем, яко да обетшает согрешение, и скончается грех, и запечатаются греси, и загладятся неправды, и очистятся беззакония, и приведется правда вечная: и запечатается видение и пророк, и помажется Святой святых. 25 И увеси и уразумеши от исхода словесе, еже отвещати и еже соградити Иерусалим, даже до Христа Старейшины седмин седьмь и седмин шестьдесят две: и возвратится, и соградится стогна и забрала, и истощатся лета. 26 И по седминах шестидесяти двух потребится помазание, и суд не будет в нем: град же и святое разсыплется со старейшиною грядущим, и потребятся аки в потопе, и до конца рати сокращенныя чином, погибельми. 27 И утвердит завет мнозем седмина едина: в пол же седмины отимется жертва и возлияние, и во святилищи мерзость запустения будет, и даже до скончания времени скончание дастся на опустение.

**10** В лето третие Кира царя Персскаго, слово открыся Даниилу, емуже прозвася имя Валтасар: истинно же слово и сила велика и разум дадеся ему в видении. 2 В тыя дни аз Даниил бех рыдая три седмицы дний: 3 хлеба вожденнаго не ядох, и мясо и вино не вниде во уста моя, и мастию не помазахся до исполнения триех седмиц дний. 4 В день двадесять четвертый перваго месяца аз бех близ реки великия, яже есть Тигр Еддекель, 5 и воздвигох очи мои и видех, и се, муж един облечен в ризу льняну, и чресла его препоясана златом светлым: 6 тело же его аки фарсис, лице же его аки зрение молнии, очи же его аки свещы огнены,

и мышцы его и голени аки зрак меди блещущияся, глас же словес его аки глас народа. 7 И видех аз Даниил един явление, а мужие, иже со мною, не видеша явления, но ужас великий нападе на них, и отбегнуша во страсе. 8 Аз же остах един и видех явление великое сие, и не оста во мне крепость, и слава моя обратися в разсыпание, и не удержях крепости. 9 И слышах глас словес его. И внегда слышах, бех сокрушен, лице же мое на земли: 10 и се, рука прикасающися мне, и возстави мя на колена моя и на длани рук моих. 11 И рече ко мне: Данииле, мужу желаний, разумей во словесех сих, яже аз глаголю к тебе, и стани на стоянии своем, яко ныне послан есмь к тебе. И егда возглагола слово сие ко мне, востах трепетен. 12 И рече ко мне: не бойся, Данииле, яко от перваго дне, в оньже подал еси сердце твое, еже разумети и трудитися пред Господем Богом твоим, услышана быша словеса твоя, аз же приидох во словесех твоих: 13 князь же царства Персского стояше противу мне двадесять и один день: и се Михаил един от старейшин первых прииде помощи мне, и того оставих тамо со князем царства Персского, 14 и приидох сказати тебе, елика срящут людий твоих в последния дни, яко еще видение на дни. 15 И егда глагола со мною по словесем сим, дах лице мое на землю и умилихся. 16 И се, аки подобие сына человека прикоснуса устам моим, и отверзох уста моя и глаголах, и рех ко стоящему предо мною: господи, в видении твоём обратися утроба моя во мне, и не имех силы: 17 и како возможет раб твой господи, глаголати с господем сим моим? Аз бо изнемогах, и отныне не станет во мне крепость, (сила бо) и дыхание не оста во мне. 18 И приложи, и прикоснуса

мне яко зрак человекъ, и укрепи мя, 19 и рече ми: не бойся, мужу желаний, мир тебе: мужайся и крепися и егда глагола со мною, укрепихся и рех: да глаголет господь мой яко укрепил мя еси. 20 И рече: веси ли, почто приидох к тебе? И ныне возвращуся, еже ратися со князем Персским: аз же исхождах, князь же Еллинский грядяше: 21 но да возвещу ти вчиненое в писании истины, инестъ ни единого помогающаго со мною о сих, но точию Михаил князь ваш.

**11** Аз же в первое лето Кирово стах в державу и крепость. 2 И ныне истину возвещу тебе се, еще трие царие востанут в Персиде четвертый же разбогатеет богатством великим паче всех и по одержании богатства своего востанет на вся царства Еллинская: 3 и востанет царь силен, и обладает властью мноюю, и сотворит по воли своей. 4 И егда станет царство его сокрушится и разделится на четыре ветры небесныя, и не в последняя своя, ниже по власти своей, еюже совладе, понеже исторгнется царство его и другим кроме сих отдастся. 5 И укрепится царь южский, и от князей их един укепеет нань и обладает властью мноюю над властью его. 6 И по летех его смешатся, и дщи царя южска внидет к северску царю, еже сотворити завет с ним, и не удержит крепости мышцы, и не станет племя ея, и предастся та и приведшии ю, и дева и укрепляй ю во временех. 7 И востанет от цвета корене ея на уготование его и приидет в силу, и внидет во утверждения царя северскаго и сотворит в них и одержит: 8 и боги их со слиянными их, вся сосуды их вожделенны сребра и злата с пленники принесет во Египет, и той востанет паче царя северска: 9 и внидет в царство царя южскаго, и возвратится на свою землю. 10 И сынове

его соберут народ силен мног, и внидет грядый и потопляяй:  
и мимо преидет и сядет, и даже до крепости его снидется. 11  
И разсвирепееет царь южский, и изыдет и брань сотворит с  
царем северским, и поставит народ мног, и предастся народ  
в руце его. 12 И возмет народы, и возвысится сердце его,  
и соодолеет тмам, и не укрепеет. 13 И возвратится царь  
северский и приведет народ мног паче прежняго: и на конец  
времен лет приидет входом в силе велицей и со имением  
многим. 14 И в лета она мнози востанут на царя южска, и  
сынове губителей людий твоих воздвигнутся, еже поставити  
видение, и изнемогут. 15 И внидет царь северский и сотворит  
окоп и возмет грады тверды, мышцы же царя южскаго не  
станут и востанут избранныи его, и не будет крепости еже  
стати. 16 И сотворит входяй к нему по воли своей, и несть  
стоящаго противу лица его: и станет на земли савеи, и  
скончается в руце его. 17 И вчинит лице свое внити в силе  
всего царства своего, и праве вся сотворит с ним: и дщерь  
жен даст ему еже растлити ю, и не пребудет, и не будет ему.  
18 И обратит лице свое на острова, и возмет многи, и погубит  
князи укоризны своя, обаче укоризна его возвратится ему.  
19 И обратит лице свое в крепость земли своя, и изнеможет,  
и падетса, и не обряцетса. 20 И встанет от корене его  
сад царства на уготование его производяй творяй славу  
царства: и в тыя дни еще сокрушится, и не в лицах, ни в  
рати: 21 станет во уготовании его ункчижися, и не даша  
нань славы царства: и приидет со обилием и соодолеет  
царству лестьми, 22 и мышцы потопляющаго потопятся  
от лица его и сокрушатся и старейшина завета. 23 И от  
совокуплений к нему сотворит лесть, и възыдет, и преодолеет

их в мале языке: 24 и во обилие и в тучныя страны приидет, и сотворит, яже не сотвориша отцы его и отцы отцев его: пленение и корысти и имение им расточит, и на Египта помыслит мыслию даже до времени. 25 И встанет крепость его, и сердце его на царя южскаго в силе велице, царь же южский сотворит с ним сечь силою великою и крепкою зело, и не станут: яко помышляют нань помышления 26 и изядят потребная его и сокрушат его, и силы разсыплет, и падут язвении мнози. 27 И оба царя, сердца их на лукавство, и на трапезе единой возглаголют лжу, и не предуспеет, яко еще конец на время. 28 И возвратится на свою землю со имением многим, и сердце его на завет святей, и сотворит, и возвратится на свою землю. 29 На время возвратится и приидет на юг, и не будет якоже первая и последняя. 30 И внидут с ним исходящии Китяне, и смирится, и возвратится, и возярится на завет святей: и сотворит, и возвратится, и умыслит на оставльшыя завет святей. 31 И мышцы и племена от него востанут и осквернят святыню могущества и преставят жертву всегдашнюю и дадут мерзость запустения, 32 и беззаконующии завет наведут со прелестию: людие же ведуще Бога своего премогут и сотворят, 33 и смысленнии людие уразумеют много, и изнемогут в мечи и в пламени, и в пленении и в разграблении дний. 34 И егда изнемогут, поможется им помощию малою, и приложатся к ним мнози со прелестию. 35 И от смысливших изнемогут, еже разжещи я и избрати, и еже открыти даже до конца времени, яко еще на время. 36 И сотворит по воли своей, и царь возвысится и возвеличится над всяким богом, и на Бога богов возглаголет тяжкая, и управит, дондеже скончает гнев, в скончание

бо бывает. 37 И о всех бозех отцев своих не смыслит, и рачении жен, и о всяцем бозе не уразумеет, понеже паче всех возвеличится. 38 И бога маозима на месте своем прославит, и бога, егоже не ведеша отцы его, почитит серебром и золотом и камыком честным и похотьми, 39 и сотворит тверделем убежищ с богом чуждим, егоже познает, и умножит славу, и покорит им многи, и землю разделит в дары. 40 И на конец времени сразится ратию с царем южским: и соберется на него царь северский с колесницами и с конники и с корабли многими, и внидет в землю, и сокрушит, и мимоидет, 41 и внидет на землю саваимску, и мнози изнемогут: сии же спасутся от руки его, Едом и Моав и начало сынов Аммоних. 42 И прострет руку свою на землю, и земля Египетска не будет во спасение. 43 И владети начнет в сокровенных злата и серебра и во всех вожделенных Египта и Ливиев и Ефиопов, в тверделех их. 44 И слышания и поткщания возмутят его от восток и от севера: и приидет во ярости мнозе, еже погубити многи. 45 И поткнет кущу свою ефадано между морями, на горе святей савеи, приидет даже до части ея, и несть избавляяй его.

**12** И во время оно востанет Михаил князь великий стояй о сынех людей твоих: и будет время скорби, скорбь, якова не бысть, отнележе создася язык на земли, даже до времени онаго: и в то время спасутся людие твои вси, обретшиися вписани в книзе, 2 и мнози от спящих в земней персти востанут, сии в жизнь вечную, а онии во укоризну и в стыдение вечное. 3 И смыслящии просветятся аки светлость тверди, и от праведных многих аки звезды во веки и еще. 4 Ты же, Данииле, загради словеса и запечатай книги до



времени скончания, дондеже научатся мнози, и умножится ведение. 5 И видех аз Даниил, и се, два инии стояху, един о сию страну устия реки, а другий об ону страну устия реки. 6 И рече к мужу оболченному в ризу льняну, иже бяше верху воды речныя: доколе окончание чудес, яже рекл еси? 7 И слышах от мужа оболченнаго в ризу льняну, иже бяще верху воды речныя, и воздвиже десницу свою и шуйцу свою на небо и клялся Живущим во веки, яко во время и во времена и в пол времени, егда скончается разсыпание руки людей освященных, и уведят сия вся. 8 Аз же слышах, и не разумех, и рех: господи, что последняя сих? 9 И рече: гряди, Данииле, яко заграждена словеса и запечатана даже до конца времени: 10 избранни будут и убелятся, и аки огнем искусятся и освятятся мнози: и собеззаконнуют беззаконницы, и не уразумеют вси нечестивии, но умнии уразумеют: 11 от времени же пременения жертвы всегдашня, и дастся мерзость запустения на дни тысяща двести девятыдесят: 12 блажен терпый и достигувый до дний тысящи трех сот тридесяти пяти: 13 ты же иди и почивай: еще бодние суть и часы во исполнение скончания, и почиши, и востанеши в жребий твой, в скончание дний.

# Книга пророка Осии

**1** Слово Господне, еже бысть ко Осии сыну Веириину, во днех Осии и Иоафама, и Ахаза и Иезекии царей Иудиных, и во дни Иеровоама сына Иоасова царя Израилева. **2** Начало словесе Господня ко Осии. И рече Господь ко Осии: иди, поими себе жену блужения, (и роди) чада блужения: понеже блудящи соблудит земля от Господа. **3** И иде и поя Гомерь дочь Девилаимлю: и зачат и роди ему сына. **4** И рече Господь к нему: прозови имя ему Иезраель: зане еще мало, и отмщу кровь Иезраелеву на дому Иудове и упокою царство дому Израилева: **5** и будет в той день, сокрушу лук Израилев во удоле Иезраелеве. **6** И зачат еще и роди дочь. И рече ему (Господь): прозови имя ей Непомилована: зане не приложу ксему помиловати дому Израилева, но противляся воспротивлюся им: **7** сыны же Иудины помилую и спасу я о Где Бозе их: и не спасу их луком, ни мечем, ни бранию, ни коньми, ниже конниками. **8** И отдои Непомилованную: и зачат паки и роди сына. **9** И рече (Господь): прозови имя ему Не Людие Мои: зане вы не людие Мои, и Аз несмь Бог ваш: **10** и будет число сынов Израилевых аки песок морской, иже не измерится, ни изочтется: и будет, на месте, на немже речеса им: не людие Мои вы: сии тамо прозовутся сынове Бога живаго. **11** И соберутся сынове Иудины и сынове Израилевы вкупе, и поставят себе власть едину, и изыдут от земли, яко велик день Иезраелев.

**2** Рцыте брату своему: людие Мои: и сестре своей: Помилованная. **2** Судитесь с матерю своею, судитесь, яко та не жена Моя, и Аз не муж ея: и отвергу блужения ея от лица Моего и любодейство ея от среды сосцу ея: **3** яко да

совлеку ю нагу и поставлю ю якоже в день рождения ея, и положу ю яко пустыню, и учиню ю яко землю безводну, и убью оную жажду: 4 и чад ея не помилую, яко чада блужения суть, 5 яко соблуди матери их, посрамится родившая их, рече бо: пойду вслед похотников моих, дающих мне хлебы моя и воду мою, и ризы моя и плащаницы моя, и масло мое и вся, елика мне достоят. 6 Сего ради, се, Аз загражду путь ея тернием и возгражду распутия ея, и стези своя не обрящет: 7 и поженет похотники своя и не постигнет их, и взыщет их и не обрящет, и речет: пойду и возвращуся к мужу моему первому, яко добрее ми бе тогда, нежели ныне. 8 Но та не уразуме, яко Аз дах ей пшеницу и вино и масло, и серебро умножих ей: сия же серебряны и златы сотвори Ваалу. 9 Сего ради обращуся и возьму пшеницу Мою во время ея и вино Мое во время его, и отиму ризы Моя и плащаницы Моя, да не покрывает студа своего: 10 и ныне открою нечистоту ея пред похотниками ея, и никтоже отимет ея от руки Моея: 11 и отвращу вся веселия ея и праздники ея, и новомесячия ея и субботы ея и вся празднества ея, 12 и погублю виноград ея и смоквы ея, о нихже рече: мзды ми суть сия, яже даша мне похотницы мои: и положу я в свидение, и поядят я зверие селнии и птицы небесныя и гади земнии: 13 и отмщу на ней дни Ваалимовы, в няже требы кладяше им, и вдеваше усерязи своя и мониста своя, и хождаше вслед похотников своих, а Мене забы, глаголет Господь. 14 Сего ради, се, Аз соблажню ю, и учиню ю яко пустыню, и возглаголю в сердце ея, 15 и дам ей притяжание ея оттуду и поляну Ахорову, отверсти смысл ея: и смирится тамо по днем детства своего и по днем изведения своего от

земли Египетски. 16 И будет в той день, наречет Мя муж мой, глаголет Господь, а не прозовет Мене ктому Ваалим. 17 И отвергу имена Ваалимля от уст ея, и не вспомнятся ксему имена их. 18 И завещаю им завет в той день со зверьми селными и со птицами небесными и с гады земными, и лук и мечь и брань сокрушу от земли, и вселю я со упованием: 19 и обручу тя Себе во век и обручу тя Себе в правде и в суде и в милости и в щедротах: 20 и обручу тя Себе в вере, и увеси Господа. 21 И будет в той день, глаголет Господь, послушаю небесе, а оное послушает земли, 22 и земля послушает пшеницы и вина и масла, и сии послушают Иезраеля: 23 и всею оную Себе на земли и помилую Непомилованную: и реку не людем Моим: людие Мои есте вы: и тии рекут: Господь Бог наш Ты еси.

**3** И рече Господь ко мне: еще иди и возлюби жену любящую зло и злободейцу, якоже любит Бог сыны Израилевы: сии же взирают к богом чуждим и любят варения с коринками. 2 И наях себе оную пятиюнадесять сребрениками и гомором ячменя и невелем вина, 3 и рекох ей: дни многи да седиши у мене и аз у тебе, и не соблудиши, ни будеши мужу иному: 4 зане дни многи сядут сынове Израилевы, не сущу царю, ни сущу князю, ни сущей жертве, ни сущу жертвеннику, ни жречеству, ниже явлением: 5 и посем обратятся сынове Израилевы и възыщут Господа Бога своего и Давида царя своего, и почудятся о Господе и о благостех Его в последния дни.

**4** Слышите слово Господне, сынове Израилевы, яко суд Господеви к живущым на земли: зане несть истины, ни милости, ни ведения Божия на земли: 2 клятва и лжа,

и убийство и татьба и любоддеяние разлися по земли, и кровь с кровьми мешают. 3 Сего ради восплачетя земля и умалитя со всеми вселившимися на ней, со зверьми польскими и с гады земными и со птицами небесными, и рыбы морския оскудеют: 4 яко да никтоже не притя, ни обличаетя никтоже: людие же мои аки пререкаемый жрец, 5 и изнеможет во днех, и изнеможет пророк с тобою: нощи уподобих матерь твою. 6 Уподобишася людие Мои аки не имуща умения: яко ты умение отвергл еси, отвергу и Аз тебе, еже не жречествовати Мне, и забыл еси закон Бога своего, забуду и Аз чада твоя. 7 По множеству их тако согресиша Мне: славу их в безчестие положу. 8 Грехи людей Моих снedyт и в неправдах их возмут души их. 9 И будет якоже людие, тако и жрец: и отмщу на них пути их, и умышления их воздам им. 10 И будут ясти и не насытятся: соблудиша и не исправятся: понеже Господа оставиша еже снабдети. 11 Блуд и вино и пьянство прият сердце людей Моих. 12 В знамениих вопрошаху и в жезлах своих поведаху тем: духом блужения прельстишася и соблудиша от Бога своего: 13 на версех гор кадяху и на холмех жряху под дубом и под елию и под древом ветвенным, яко добр кров: сего ради соблудят дщери ваша, и невесты ваша возлюбодеют. 14 И не присещу на дщери ваша, егда соблудят, и на невесты ваша, егда возлюбодеют: яко и тии со блудницами смесишася и со блудниками требы жряху, и людие смыслящии со блудницею сплетахуся. 15 Ты же, Израилью, не не разумевай, и Иудо: не входите в Галгалу и не восходите в Дом Онов, и не кленитя Господем живым. 16 Зане якоже юница стрекалом стречема разсвирепе Израиль: ныне упасет я Господь, яко агнца

на пространстве. 17 Причастник кумиром Ефрем положи себе соблазны, 18 избра Хананеов: блудяще возблудиша, возлюбиша безчестие от хрепетания своего. 19 Вихр духа возсвищет в крилех своих, и посрамятся от требищ своих.

**5** Слышите сия, жерцы, и вонмите, доме Израилев, и доме царев, внушите, понеже к вам есть суд: яко пругло бысте стражбе, и якоже мрежа распростерта на Итавирии, 2 юже ловящии лов поткнуша, Аз же наказатель вам: 3 Аз познах Ефрема, и Израиль не отступи от Мене, зане ныне соблуди Ефрем, и осквернися Израиль: 4 не положиша помышлений своих, еже возвратится к Богу своему, яко дух блужения есть в них, и Господа не уведеша. 5 И смирится укоризна Израилева в лице ему, и Израиль и Ефрем изнемогут в неправдах своих, изнеможет же и Иуда с ними. 6 Со овцами и телцы пойдут взыскати Господа и не обрящут Его, уклонися бо от них. 7 Яко Господа оставиша, яко чада чужда породиша себе: ныне пояст я ржа, и причастия их. 8 Вострубите трубою на холмех, возгласите на высоких, проповедите в Дому Онове, ужасеся Вениамин, 9 Ефрем в пагубу бысть во дни наказания: в племенех Израилевых показах верная. 10 Быша князи Иудины яко прелагающе пределы: на ня излию яко воду гнев Мой. 11 Соодоле Ефрем соперника своего, попра суд, яко нача ходити вслед суетных. 12 Аз же яко мятеж Ефремови и яко остен дому Иудину. 13 И виде Ефрем немощь свою и Иуда болезнь свою: и иде Ефрем ко Ассирием и посла послы ко царю Иариму: и той не возможе изцелити вас, и не престанет от вас болезнь. 14 Зане Аз есмь яко панфирь Ефремови и яко лев дому Иудину: и Аз восхищу, и пойду, и возму, и не будет изимаяй: 15 пойду и

возвращуся на место Свое, дондеже погибнут, и възыщут лица Моего.

**6** В скорби своей утревати будут ко Мне, глаголюще: идем и обратимся ко Господу Богу нашему, 2 яко Той поби ны, и изцелит ны: уязвит, и уврачует ны: 3 изцелит ны по двюю дню, в день третий воскреснем и живи будем пред ним, и увемы: поженем, еже уведети Господа: яко утро готово обрящем Его, и приидет нам яко дождь ранний и поздний земли. 4 Что ти сотворю, Ефреме? Что ти сотворю, Иудо? Милость бо ваша яко облак утренний и яко роса рано падающая. 5 Сего ради пожах пророки ваша, убих я словесем уст Моих, и суд Мой яко свет изыдет. 6 Зане милости хочу а не жертвы, и уведения Божия, нежели всесожжения. 7 Сии же суть яко человек преступаяй завет: тамо презреша Мя. 8 Галаад град делаяй суетная, мутяй воду, 9 а крепость твоя яко мужа морскаго разбойника: скрыша жерцы путь Господень, убиша Сикиму, яко беззаконие сотвориша. 10 В дому Израилеве видех грозная: тамо блужение Ефремово: осквернися Израиль и Иуда. 11 Начни оымати виноград себе, егда возвращу пленение людей Моих.

**7** Егда изцелю Израиля, и открыется неправда Ефремова и злоба Самарийска, яко соделаша лжу: и тать к нему внидет, совлачаяй разбойник на пути его: 2 яко да воспюют вкупе, аки поюции сердцем своим. Вся злобы их помянух: ныне обыдоша их совети их, противу лицу Ми быша. 3 Злобами своими возвеселиша царя и лжами своими князей. 4 Всеи любоденущии, яко пещь жегома на печение сожжения от пламене, от примешения тука, дондеже вскиснет то все. 5 Во дни царей ваших начаша князи яритися от вина, простроша

руки своя с губителями: **6** зане разгорешася яко пещь сердца их, внегда устремлятися им: всю ночь сна Ефрем насытится, завтра бысть, и разгореся яко пламень огненный. **7** Все согреяшася, яко пещь жегома, и огонь пояде судий их: все царие их падоша, не бе в них моляйся ко Мне. **8** Ефрем в людех своих сам смешаешася, Ефрем бысть опреснок необращаемь. **9** И снедоша чуждии крепость его, сей же не разуме: и седины явишася на нем, он же не позна. **10** И смирится укоризна Израилева в лице ему: и не возвратишася ко Господу Богу своему и не взыскаша Его во всех сих. **11** И бяше Ефрем яко голубь безумный, не имый сердца: Египта моляше, и во Ассирианы отидоша. **12** Якоже идут, возложу на ня мрежу Мою, якоже птицы небесныя свергу я, накажу я в слух скорбения их. **13** Горе им, яко отскочиша от Мене: боязливи суть, яко нечествоваша ко Мне: Аз же избавих я, сии же возглаголаша на Мя лжу. **14** И не возопиша ко Мне сердца их, но плакахуся на ложах своих: о пшенице и вине сечахуся. **15** Накажутя Мною, Аз же укрепих мышцу их, и на Мя помыслиша злая. **16** Совратишася ни во чтоже, быша яко лук напряжен: падутся князи их мечем ради ненаказания языка своего. Сие ругание их в земли Египетстей.

**8** В недре их, яко земля непроходима, яко орел в дому Господни: понеже преступиша завет Мой и на закон Мой нечествоваша. **2** Ко Мне воззовут: Боже, познахом Тя, **3** яко Израиль отвратися благих, врага прогнаша. **4** Сами себе царя поставиша, а не Мною, началствоваша, и не явиша Ми: от серебра своего и от злата своего сотвориша себе кумиры, яко да потребятся. **5** Сокруши телца твоего, Самарие, разгнеvasя ярость Моя на ня: доколе не могут



очиститися, иже во Израили? **6** И то древодель сотвори, и несть бог: зане льястй бяше телец твой, Самарие. **7** Яко ветром истлено всеяша, и разрушение их примет я: рукоять не имущая силы еже сотворити муку, аще же и сотворит, то чуждии поядят ю. **8** Поглощен бысть Израиль, ныне бысть во языцех яко сосуд непотребен, **9** понеже тии възыдоша ко Ассирианом: процвете о себе Ефрем, дары возлюби. **10** Сего ради предадутся во языки: ныне восприиму их, и почуют мало еже помазати царя и князи. **11** Яко умножи Ефрем требища, во грехи быша ему требища возлюбленная. **12** Впишу ему множество, и законная его в чуждая вменишася требища возлюбленная. **13** Темже аще и пожрут жертву и снедят мяса, Господь не примет их: ныне помянет неправды их и отмстит грехи их: тии во Египет возвратишася и во Ассирии нечистая снедят. **14** И забы Израиль Сотворшаго и возгради требища, и Иуда умножи грады утверждены: но послю огонь на грады его, и потребит основания его.

**9** Не радуйся, Израилю, ни веселися якоже людие, понеже соблудил еси от Господа Бога твоего: возлюбил еси даяния на всяцем гумне пшеницы. **2** Гумно и точило не позна их, и вино солга им. **3** Не вселишася на земли Господни: вселися Ефрем во Египте, и во Ассириях снедят нечистая. **4** Не возлияша Господеви вина, и не усладишася Ему требы их, яко хлеб жалости им: вси ядуции тыя осквернятся: понеже хлебы их душ их, не внидут в дом Господень. **5** Что сотворите во днех торжества и в день праздника Господня? **6** Сего ради, се, пойдут от труда Египетска, и примет их Мемфис, и погребет я махмас: сребро их пагуба наследит, терние во дворех их. **7** Приспеша дние отмщения твоего, приидоша

дни воздаяния твоего, и озлобится Израиль, якоже пророк изумленный, человек духом носимый: от множества неправ твоих умножится изумление твое. 8 Страж Ефрем с Богом, пророк пруголо строптиво на всех путех его: изумление в дому Божии утвердиша. 9 Растлешася по дню холма: вспомянет неправды их, отмстит грехи их. 10 Якоже грезн в пустыни обретох Израиля и яко стража на смоковнице раняго увидех отцы их: тии внидоша ко Веельфегору и отчуждишася на стыдение, и быша мерзостнии якоже возлюбленнии. 11 Ефрем яко птица отлете, славы их от порождений и болезней и от зачатий. 12 Темже аще и воскормят чада своя, безчадны будут от человек: понеже и люте им есть, (зане оставих я, ) плоть моя от них. 13 Ефрем, якоже видех, в ловитву предпоставиша чада своя, и Ефрем еже извести на заклание чада своя. 14 Дажь им, Господи: что даси им? Дажь им утробу неплодящую и сосцы сухи. 15 Вся злобы их во Галгалех, яко тамо их возненавидех за злобы начинаний их: из дому Моего изжену я, (ксему) не приложу любити их: 16 вси князи их непокориви. Поболе Ефрем: корение его исхоша, плода ксему да не принесет: понеже аще и породят, побию вожделенная утроб их. 17 Отринет я Бог, яко не послушаша Его, и будут заблуждающи в языцех.

**10** Виноград благолозен Израиль, плод обилен его: по множеству плодов его умножи требища, по благотам земли его возгради капища. 2 Разделиша сердца своя, ныне погибнут: Сам раскопает требища их, сокрушатся кумиры их. 3 Темже ныне рекут: несть царя в нас, яко не бояхомся Господа: царь же что сотворит нам? 4 Глаголяй словеса извинения ложная завещает завет: прозябнет суд аки трескот

на лядине селней. 5 У телца Дому Онова возобитают живущии в Самарии, яко плакашася людие его о нем: и якоже разгневаша его, порадуются о славе его, яко преселися от них. 6 И связавше его, во Ассирию отведоша в дар царю Иариму: в дар Ефрем примется, и усрамится Израиль о совете своем. 7 Отверже Самариа царя своего, аки хврастие на лица воды. 8 Извергутся требища Онова согрешения Израилева, терние и волчец возникнут на требищих их: и рекут к горам: покрыйте ны: и холмом: падите на ны. 9 Отнележе холми, согреша Израиль: тамо сташа: не постигнет их на холме рать, на чада неправды. 10 Прииде наказати их по желанию Моему: и соберутся людие на ня, внегда наказатися им во двою неправдах своих. 11 Ефрем юница наученая, еже любити прение: Аз же найду на доброту выи ея, наступлю на Ефрема, умолчу о Иуде, укрепится себе Иаков. 12 Сейте себе в правду, соберите плод живота, просветите себе свет ведения, дондеже время, взыщите Господа, дондеже приидут вам жита правды. 13 Вскую премолчаша нечестие, и неправды его оымасте, изядосте плод лжив? Яко уповал еси на оружие твое, во множестве силы твоя. 14 И встанет пагуба в людех твоих, и вся ограды твоя погибнут, якоже (погибе) князь Саламан от дому Иеровоамля, во дни ратны матерь о чада разбиша: 15 тако сотворю вам, ДOME Израилев, от лица неправды злоб ваших.

**11** Заутра отвергошася, отвержеся царь Израилев, понеже младенец Израиль, и Аз возлюбих его и из Египта воззвах сына Моего. 2 Якоже призвах я, такожде отхождаху от лица Моего: тии Ваалиму требу жряху и изваяным кадыху. 3 Аз же

связях Ефрема, взял его на мышцу Мою, и не разумеша, яко  
изцелих я. 4 Во истлении человечесте привлекох я узами  
любления моего, и буду им яко ударяяй человек по челюстем  
его: и воззрю к нему и премогу ему. 5 Вселися Ефрем во  
Египте, Ассур же сам царь его, яко не восхоте возвратитися.  
6 И изнеможе оружие во градах его, и умолче в руку его:  
и снесят от умышлений своих. 7 И людие его висяще от  
обитания своего: и Бог на честная его разгневается, и не  
вознесет его. 8 Что ты устрою, Ефреме? Защищу ли ты,  
Израилю? Что ты положу? Якоже Адаму устрою ты, и якоже  
Севоим, превратися сердце Мое в Нем, смятесе раскаяние  
Мое. 9 Не сотворю по гневу ярости Моея, не оставлю еже  
потребитися Ефремови, зане Бог Аз есмь, а не человек:  
в тебе Свят, и не вниду во град. 10 Вслед Господа имам  
ходити: яко лев возревет, понеже Той возревет, и ужаснутся  
чада вод, 11 и приидут яко птица из Египта и яко голубь от  
земли Ассирски: и возставлю я в домех их, глаголет Господь.  
12 Обыде Мя лжею Ефрем, и нечестиями дом Израилев и  
Иуда: ныне позна я Бог, и людие святы прозвашася Богови.

**12** Ефрем же зол дух, гоняше зной весь день: тщетная и  
суетная умножи, и завет со Ассирианы завеща, и елей во  
Египет посылаше. 2 И суд Господеви ко Иуде, еже отмстити  
Иакова: по путем его и по начинанием его воздаст ему.  
3 Во утробе запя брата своего и труды своими укрепе к  
Богу: 4 и укрепе со Ангелом и перевозможе. Плакашася и  
молишася ми: в дому Онове обретоша мя, и ту глаголася  
к ним. 5 Господь же Бог Вседержитель будет память Его.  
6 И ты о Бозе своем обратишися, милость и суд снабди,  
и приближайся к Богу своему присно. 7 Ханаан, в руке

его мерило неправды, насильствовати возлюби. **8** И рече Ефрем: обаче обогатех, обретох прохлаждение себе: вси труды его не обрящутся ему ради неправд, имиже согреша. **9** Аз же Господь Бог твой, изведох тя из земли Египетски: еще вселю тя в кущах, якоже во дни праздника. **10** И глаголах ко пророком, и аз видения умножих, и в руках пророческих уподобихся. **11** Аще не Галаад есть, убо ложни быша во Галгалех князи требы кладуща, и требища их якоже желви на целизне польстей. **12** И отиде Иаков на поле Сирийско, и работа Израиль о жене и о жене снабде. **13** И пророком изведе Господь Израиля из земли Египетския, и пророком снабдеса. **14** Разгнева Мя Ефрем и возяри Мя: и кровь его на нем пролиется, и укоризну его воздаст ему Господь.

**13** По словеси Ефремову оправдания прия сей во Израили, и положи я Ваалови, и умре. **2** И ныне приложиша согрешати и сотвориша себе слияние от золота и серебра своего по образу идолов, дела художников совершена: им сии глаголют: пожрите человека, оскудеша бо телцы. **3** Сего ради будут яко облак утренний, якоже роса утренняя идущи, якоже плевы с тока (и прах с ветвия) развеваемый вихром, якоже дым из трубы. **4** Аз же Господь Бог твой утверждаяй небо и созидаядя землю, Егоже руце создасте все воинство небесное, и не показях ти их, еже ходити вслед их: и Аз изведох тя из земли Египетския, и бога разве Мене да не познаеши, и спасающаго несть разве Мене. **5** Аз пасох тя в пустыни на земли ненаселенней, **6** на пажитех их, и насытишася до исполнения, и вознесошася сердца их, сего ради забыша Мя. **7** И буду им яко панфирь, и яко рысь на пути Ассириев: **8** и срящу их аки медведица лишаема, и разрушу соключение

сердце их: и поядят я скимни дубравнии, и зверие польстии расторгнут я. 9 В погибели твоей, Израилю, кто поможет тебе? 10 Где царь твой сей? Той да спасет тя во всех градех твоих: и да судит ти, о немже глаголал еси: даждь ми царя и князя. 11 И дах тебе царя во гневе Моем, и утвержахся в ярости Моей. 12 Согромаждение неправды Ефрем, сокровен грех его: 13 болезни аки раждающия приидут ему: сей сын немудрый, зане ныне не устоит в сокрушении чад. 14 От руки адовы избавлю я и от смерти искуплю я: где пря твоя, смерти? Где остен твой, аде? Утешение скрыся от очию Моею: (Sheol h7585) 15 зане сей между братьями разлучит: наведет Господь ветер зноен из пустыни нань, и изсушит жилы его и опустошит источники его: сей изсушит землю его и вся сосуды его любимыя. 16 Погибнет Самариа, яко сопротивися и Богу своему: оружием падут сами, и младенцы их разбьются, и во утробе имущыя их разсядутся.

**14** Обратися, Израилю, ко Господу Богу твоему, зане изнемогл еси в неправдах твоих. 2 Возмите с собою словеса и обратитесь ко Господу Богу вашему, рцыте Ему: (можеша всяк отврещи грех: ) яко да не примете неправды, но да примете благая, и воздадим плод устен наших. 3 Ассур не спасет нас, на кони не възыдем, ксему не речем: 4 бози наши, делам рук наших: яко в Тебе помилуется сирота. Изцелю селения их, возлюблю я явленно, яко отвратися гнев Мой от них. 5 Буду якоже роса Израилю, процветет яко крин и прострет корение свое якоже Ливан. 6 Пойдут ветви его, и будет якоже маслина плодовита, и обоняние его аки Ливана: 7 обратятся и сядут под кровом его, поживут и утвердятся пшеницею, и процветет яко виноград память его,

якоже вино Ливаново. 8 Ефремови что ему еще и кумиром?  
Аз смирих его, Аз и укреплю его: аки смерчие учащенное,  
от Мене обретеса плод твой. 9 Кто премудр и уразумеет  
сия? И смыслен, и увесь сия? Яко правы путие Господни, и  
праведнии пойдут в них, а нечестивии изнемогут в них.

# Книга пророка Иоила

**1** Слово Господне, иже бысть ко Иоилу сыну Вафуилеву. **2** Слышите сия, старцы, и внушите, вси живуции на земли: аще быша сицевая во днех ваших или во днех отец ваших? **3** О сих чадом своим поведите, а чада ваша чадом своим, а чада их роду другому: **4** останок гусениц поядоша прузи, и останок пругов поядоша мшицы, и останок мшиц поядоша сиплеве. **5** Утрезвитесь, пиянии, от вина своего и плачитесь: рыдайте, вси пиющии вино до пиянства, яко отяся от уст ваших веселие и радость. **6** Понеже язык взыде на землю Мою крепок и безчислен: зубы его (якоже) зубы львовы, и членовныя его якоже львичища: **7** положи виноград Мой в погубление и смоквы Моя в сломление: взыскуя обыска и и сверже, обели лозие его. **8** Восплачися ко мне паче невесты препоясаныя во вретиче по мужи своем девственнем. **9** Извержеся жертва и возлияние из дому Господня: плачитесь, жерцы, служащии жертвеннику Господню, **10** яко опустеша поля. Плачися, земле, яко пострада пшеница, и изсше вино, умалися елей, **11** посрамишася земледелателе. Плачитесь, села, по пшенице и по ячмени, яко погибе обымание от нивы, **12** виноград изсше, и смоквы умалишася: шипки, и финикс, и яблонь, и вся древа польская изсхоша, яко посрамиша радость сынове чловечи. **13** Препояшитесь и бийтеся, жерцы, плачитесь, служащии жертвеннику: внидите, поспите во вретичих, служащии Богу, яко отяся от дому Бога вашего жертва и возлияние: **14** освятите пост, проповедите цельбу, соберите старейшины вся живуция на земли в дом Бога вашего и воззовите ко Господу усердно: **15** увы мне, увы мне, увы мне в день! Яко близ есть день Господень, и яко беда от



беды придет: 16 яко пред очима вашима пищи взяшася и от дому Бога вашего веселие и радость. 17 Вскочиша юницы у яслей своих, погибоша сокровища, раскопашася точила, яко посше пшеница. 18 Что положим себе? Восплакашася стада волов, яко не бе пажити им, и паствы овчия погибоша. 19 К Тебе, Господи, возопию, яко огонь потреби красная пустыни, и пламень пожже вся древа польская, 20 и скоти польстии воззреша к Тебе, яко посхоша источники воднии, и огнь пояде красная пустыни.

**2** Вострубите трубою в Сионе, проповедите в горе Моей святей, и да смятутся вси живуции на земли, яко предстоит день Господень, яко близ, 2 день тмы и бури, день облака и мглы: якоже утро разлиются по горам людие мнози и крепцы, подобни им не быша от века, и по них не приложится до лет в род и род: 3 яже пред ним огонь потребляяй, и яже за ним возгараяся пламень: якоже рай Сладости земля пред лицем его, и яже создади его поле пагубы, и спасающагося не будет им: 4 якоже вид конский вид их, и якоже конницы, тако проженут: 5 якоже глас колесниц на верхи гор востекут, и яко глас пламене огненна попадающа тростие, и яко людие мнози и крепцы воополчающися на брань. 6 От лица их сокрушатся людие: всякое лице аки опаление горнца. 7 Якоже борцы потекут, и якоже мужие храбри въздут на ограды: и кийждо в путь свой поидет, и не совратят путей своих, 8 и кийждо от брата своего не отступит: отягощени оружии своими пойдут и в стрелах своих падут, но не скончаются. 9 Града имутся, и на забрала востекут, и на храмины взлезут, и оконцами внидут, якоже татие. 10 Пред лицем его смятется земля и потрясется небо: солнце и луна

померкнут, и звезды угасят свет свой. 11 И Господь даст глас Свой пред лицом силы Своея, яко мног есть зело полк Его, яко крепка дела словес Его: зане велик день Господень, велик и светел зело, и кто будет доволен ему? 12 И ныне глаголет Господь Бог ваш: обратитесь ко Мне всем сердцем вашим в посте и в плачи и в рыдании, 13 и расторгните сердца ваша, а не ризы ваша, и обратитесь ко Господу Богу вашему, яко милостив и щедр есть, долготерпелив и многомилостив и раскаявайся о злобах. 14 Кто весть, обратится ли, и раскается, и оставит за собою благословение и жертву и возлияние Господу Богу вашему? 15 Вострубите трубою в Сионе, освятите пост, проповедите цельбу, 16 соберите люди, освятите церковь, изберите старейшины, совокупите младенцы сущия сосцы: да изыдет жених от ложа своего, и невеста от чертога своего. 17 Между степенями жертвенника восплачутся жерцы служащие Господу и рекут: пощади, Господи, люди Твоя и не даждь достояния Твоего на укоризну, да не обладают ими языцы, да не рекут во языцех: где есть Бог их? 18 И возревнова Господь о земли Своей и пощаде люди Своя. 19 И отвеща Господь людем Своим и рече: се, Аз вам пошлю пшеницу и вино и масло деревяное, и насытитесь их, и не дам вас ксему на поругание во языцех: 20 и сущаго от севера отжену от вас и отрину его на землю безводную, и погублю лице его в мори первом и задняя его в мори последнем, и взыдет гнилость его, и взыдет смрад его, яко возвеличи дела своя. 21 Дерзай, земле, радуйся и веселися, яко возвеличи Господь, еже сотворити. 22 Дерзайте, скоти польстии, яко прозябнуша поля пустыни, яко древо принесет плод свой, виноград и смокви даша силу свою. 23 И чада

Сионя, радуйтесь и веселитесь о Господе Боже вашем, яко даде вам пищу в правду и одождит вам дождь ранний и поздний, якоже и прежде: 24 и наполнятся гумна ваша пшеницы, и преизлиются точила вином и елеем. 25 И воздам вам вместо лет, в няже поядоша пружи и мшица, и сиплеве и гусеницы, сила Моя великая, юже послах на вы: 26 и снесите ядуще и насытитесь, и похвалите имя Господа Бога вашего, Яже сотвори с вами чудеса: и не посрамятся людие Мои во век. 27 И уведите, яко посреде Израиля Аз есмь, и Аз Господь Бог ваш, и несть иного разве Мене: и не посрамятся ктому людие Мои во век. 28 И будет по сих, и излию от Духа Моего на всяку плоть, и прорекут сынове ваши и дщери ваша, и старцы ваши сония узрят, и юноты ваши видения увидят: 29 ибо на рабы Моя и на рабыни Моя во дни оны излию от Духа Моего: 30 и дам чудеса на небеси и на земли, кровь и огонь и курение дыма: 31 солнце обратится во тму, и луна в кровь, прежде неже приити дню Господню великому и просвещенному: 32 и будет, всяк иже призовет имя Господне, спасется: яко в горе Сионе и во Иерусалиме будет спасаемый, якоже рече Господь, и благовестуемии, ихже Господь призва.

**3** Яко се, Аз во дни тья и во время оно, егда возвращу пленники Иудины и Иерусалимли, 2 и соберу вся языки, и сведу я на юдоль Иосафатову, и рассуждуся с ними ту о людех Моих и о наследии Моем Израили, иже разсеяшася во языцех, и землю Мою разделиша. 3 И на люди Моя вергоша жребия, и даша отрочища блудницам, и отроковицы продаяху на вине и пияху. 4 И что вы Мне, Тире и Сидоне и вся Галилеа иноплеменников? Еда воздаяние вы воздаете

Мне? Или памятозлобствуете вы на Мя? Остро и быстро  
воздам воздаяние ваше на главы ваша, **5** понеже серебро  
Мое и золото Мое возьмете, и избранная Моя и добрая внесосете  
в требища ваша, **6** и сыны Иудины и сыны Иерусалимли  
продасте сыном Еллинским, яко да ижденете я от предел их.  
**7** И се, Аз возставлю я от места, в неже продасте я тамо, и  
воздам воздаяние ваше на главы ваша: **8** и отдам сыны  
ваша и дщери ваша в руце сынов Иудиных, и продадут  
я в плен во страну далече суцу, яко Господь глагола. **9**  
Проповедите сия во языцех, освятите рать, возставите сечцы,  
приведите и восходите, вси мужие воинстии, **10** разсецете  
рала ваша на мечи и серпы ваша на копия: немощный да  
глаголет, яко могу аз: **11** совокупляйтесь и входите, вси  
языцы окрест, и соберитесь ту: кроткий да будет храбр. **12** Да  
возстанут и въздут вси языцы на юдоль Иосафатову, яко тамо  
сяду разсудити вся языки яже окрест. **13** Испустите серпы,  
яко предстоит обымание винограда: внидите, топчите, яко  
исполнь точило, изливаются подточилия, яко умножишася  
злобы их. **14** Гласи прогласишася на поли судебнем, яко  
близ день Господень на юдоли судебней. **15** Солнце и  
луна померкнут, и звезды скрывают свет свой. **16** Господь  
же от Сиона воззовет и от Иерусалима даст глас Свой, и  
потрясется небо и земля: Господь же пощадит люди Своя  
и укрепит (Господь) сыны Израилевы. **17** И увесте, яко Аз  
Господь Бог ваш, вселяясь в Сионе в горе Моей святей: и  
будет Иерусалим свят, и иноплеменницы не пройдут сквозе  
его ктому. **18** И будет в той день, искаплют горы сладость,  
и холми источат млеко, и вси источники Иудины источат  
воды, и источник от дому Господня изыдет и напоит водотечь

Сития. 19 Египет в погибель будет, и Идумеа в поле погибели  
будет за озлобление сынов Иудиных, понеже пролияша  
кровь праведную на земли своей: 20 Иудеа же во веки  
населится, и Иерусалим в роды родов. 21 И взыщу крови их  
и не обезвию: и Господь вселится в Сионе.

# Книга пророка Амоса

**1** Слова Амосова, яже быша в Кариафиариме от Фекуи, яже виде о Иерусалиме во дни Озии царя Иудина и во дни Иеровоама сына Иоасова царя Израилева, прежде двою лет труса. **2** И рече: Господь от Сиона возглагола и от Иерусалима даде глас Свой: и сетоваша пажити пастырей, и изсше верх Кармилъ. **3** И рече Господь: за три нечестия Дамаска и за четыри не отвращуся его, понеже растроша пилами железными имущыя во утробе сущих в Галааде: **4** и послю огонь в дом Азаиль, и пояст основание сына Адерова: **5** и сокрушу верей Дамасковы, и потреблю живуцья с поля Онова, и посеку племя от мужей Харраних, и пленятся людие Сирстии нарочитии, глаголет Господь. **6** Сия глаголет Господь: за три нечестия Газы и за четыри не отвращуся их, за еже пленити им пленение Соломоне, еже заключити во Идумею: **7** и послю огонь на забрала Газы, и пояст основание ея: **8** и потреблю живуцья из Азота, и извержется племя из Аскалона, и наведу руку Мою на Аккарона, и погибнут остаточнии иноплеменников, глаголет Господь. **9** Сия глаголет Господь: за три нечестия Тирова и за четыри не отвращуся его, понеже заключиша пленники Соломони во Идумею и не помянуша завета братня: **10** и послю огонь на забрала Тирова, и пояст основания его. **11** Сия глаголет Господь: за три нечестия Идумейска и за четыри не отвращуся их, понеже прогнаша брата своего мечем и растлиша мать на земли, и восхити во свидение грозу свою, и устремление свое снабде на победу: **12** и послю огонь в Феман, и пояст основания оград его. **13** Сия глаголет Господь: за три нечестия сынов Аммоних и за

четыри не отвращуся их, понеже распоряху имущия во утробе Галаадитов, яко да расширят пределы своя: 14 и разжегу огонь на забрала Раввафы, и пояст основания ея с воплем в день рати, и потрясется в день скончания своего: 15 и пойдут царие ея в плен, жерцы их и князи их вкупе, глаголет Господь.

**2** Сия глаголет Господь: за три нечестия Моавля и за четыре не отвращуся его, понеже сожгоша кости царя Идумейска в пепел: 2 и послю огонь на Моава, и пояст основания градов его, и умрет со безсилием Моав, с воплем и гласом трубным: 3 и потреблю судию из него и вся князи его избю с ним, глаголет Господь. 4 Сия глаголет Господь: за три нечестия сынов Иудиных и за четыре не отвращуся их, понеже отринуша закон Господень и повелений Его не сохраниша, и прельстиша их суетная их, яже сотвориша, имже последоваша отцы их вслед их: 5 и послю огонь на Иуду, и пояст основания Иерусалимля. 6 Сия глаголет Господь: за три нечестия Израиля и за четыре не отвращуся его, понеже продаша праведнаго на серебре и убогаго на сапозех, 7 ходящих на прасе земнем, и бияху пястю во главы убогих, и путь смиренных совращаху: и сын и отец его влазьяста ко единой рабыни, яко да осквернавят имя Бога своего: 8 и ризы своя связующе ужами, и завесы творяху держащьяся требища, и вино от обоганий пияху в дому бога своего. 9 Аз же отвергох Аморреа от лица их, егоже бе высота якоже высота кедрова, и крепок бяше якоже дуб, и изсуших плод его с верха и корение его из низу. 10 Аз же изведох вы из земли Египетския и обводих вы в пустыни четыредесять лет, еже прияти в наследие землю Аморрейску. 11 И поях от

сынов ваших во пророки и от юнот ваших во освящение: еда несть сих, сынове Израилевы? глаголет Господь. **12** И напаясте освященныя вином и пророком заповедасте глаголюще: не прорицайте. **13** Сего ради, се, Аз повращу под вами, якоже вратится колесница полна тростия: **14** и погибнет бегство от скоротекущаго, и крепкий не удержит крепости своя, и храбрый не спасет души своя, **15** и стреляяй из лука не постоит, и быстрый ногама своима не уцелеет, и конник не спасет души своя, **16** и крепкий не обрящет сердца своего в силах, наг побегнет в той день, глаголет Господь.

**3** Слышите слово сие, еже глагола Господь на вы, доме Израилев, и на все племя, еже изведох из земли Египетския, рекий: **2** вас точию познах от всех племен на земли, сего ради отмщу на вас вся грехи ваша. **3** Еда пойдут два вкупе всяко, аще не познают себе? **4** Или возревет лев из дубравы своя, ловитвы не имый? Или испустит глас свой львичиць из ложа своего всяко, аще не похитит чесого? **5** Или падет птица на землю без ловца? Или спадет пругло на землю, аще не имет ничесоже? **6** Или возгласит труба во граде, и не убоятся людие? Или будет зло во граде, еже Господь не сотвори? **7** Понеже не сотворит Господь Бог дела, аще не открыет наказания Своего к рабом Своим пророком. **8** Лев возревет, и кто не убоится? Господь Бог глагола, и кто не проречет? **9** Поведите странам во Ассирианех и во странах Египетских и рцьте: соберитесь на гору Самарийскую и видите чудесная многа среде ея и насильство еже в ней. **10** И не уразуме, яже будут противу ей, глаголет Господь, сокровиществуящи неправду и страсть в селех своих. **11** Сего ради сия глаголет



Господь Бог: Тире, окрест земля твоя опустеет, и отимет от тебе крепость твою, и разграбятся страны твоя. 12 Сия глаголет Господь: якоже пастух, егда исторгнет от уст львовых две голени, или обушие уха, тако исторгнутся сынове Израилевы живущии в Самарии прямо племени и в Дамасце. 13 Жерцы, послушайте и засвидетелствуйте дому Иаковлю, глаголет Господь Бог Вседержитель: 14 понеже в день, егда отмщу нечестия Израилева на нем, и отмщу на требищих Вефилих, и раскопаю роги требища, и падутся на землю: 15 сокрушу и поражу дом с проклеты с домом летним, и погибнут домовые кости слоновыя, и потребятся и друзии домовые мнози, глаголет Господь.

**4** Слышите слово сие, юницы Васанитидския, яже в горе Самарийстей, преобидящыя убогих и попирающыя нищих, глаголющыя господем своим: подадите нам, да пием. 2 Клятятся Господь святыми Своими, яко се, дние грядут на вы, и возмут вы во оружии, и сущих с вами ввергут в конобы подгнещаемыя огненнии губителие: 3 и извержены будете наги прямо друг друга и отвержетесь в гору Ремман, глаголет Господь. 4 Внидoste в Вефиль и беззаконновасте, и в Галгалех умножисте еже нечествовати, и принесoste заутра требы ваша, в треденство десятины ваша: 5 и прочтоша извне закон и призваша исповедание: возвестите, яко сия возлюбisha сынове Израилевы, глаголет Господь Бог. 6 Аз же дам вам оскомину зубом во всех градех ваших и недостаток хлеба во всех местех ваших: и не обратистесь ко Мне, глаголет Господь. 7 И аз удержаж дождь от вас прежде триех месяцев жатвы, и на дождю на един град, а на другий (един) не на дождю: часть едина на дождится, и часть, на нюже не

надожду, иссохнет: **8** и соберутся два и три града во град един пити воду и не насытятся: и не обратитесь ко Мне, глаголет Господь. **9** Побих вы раждежением и златеницею: умножисте вертограды ваша, винограды ваша и смоквы ваша и масличия ваша: сия поядоша гусеницы: и ниже тако обратитесь ко Мне, глаголет Господь. **10** Послах на вы смерть на пути Египетстем, и избих оружием юношы ваша, с пленом коней твоих, и изведох во огни Полки ваша во гневе Моем: и ниже тако обратитесь ко Мне, глаголет Господь. **11** Разорих вы, якоже разори Бог Содому и Гоморру, и бысте яко главня исторжена из огня: и ниже тако обратитесь ко Мне, глаголет Господь. **12** Сего ради сице сотворю ти, Израилю: обаче, яко сице сотворю ти, уготовися призывати Бога твоего, Израилю. **13** Се, Аз утвержаяй гром и созидаый ветр и возвещаый в человецех Христа Своего, творяый утро и мглу и восходяый на высокая земли: Господь Бог Вседержитель имя Ему.

**5** Слышите слово Господне, имже аз приемлю на вы плачь: дом Израилев падеся и ктому не приложит востати: **2** девица Израилева повержена на земли своей, несть возставляющаго ю. **3** Понеже сия глаголет Господь Бог: из града, из негоже исхождаше тысяща, останется в нем сто: и из негоже исхождаше сто, останет в нем десять дому Израилеву. **4** Понеже сия глаголет Господь к дому Израилеву: взыщите Мене и поживете: **5** а не взыскуйте Вефиля и в Галгалу не входите и ко кладязю клятвы не ходите, яко Галгала пленяема пленится, и Вефиль будет аки не быв. **6** Взыщите Господа и поживете, яко да не возжжется яко огонь дом Иосифов, и пояст его, и не будет угашающаго дому Израилева. **7** Господь

творяй в высоту суд и правду на земли положи: 8 творяй вся и претворяй, и обращаяй во утро сень смертную и день в ночь помрачаяй, призываяй воду морскую и разливаяй ю на лице земли: 9 Господь Бог Вседержитель имя Ему: разделяй сокрушение на крепость и бедство на твердыню наводяй. 10 Возненавидеша у врат наказующаго, и словом праведным возгнушашася. 11 Сего ради понеже пястями биете убогих и дары избранны приясте от них: дома украшены соградисте, и не вселитесь в них, винограды вожделенны насадисте, и не имате пити вина от них. 12 Яко уведех многа нечестия ваша, и крепцы греси ваши, попирающе праведнаго, приемлюще премены и убогия от врат отреяюще. 13 Сего ради смысляй в то время премолчит, яко время лукаво есть. 14 Взыщите добра, а не зла, яко да поживете, и будет тако с вами Господь Бог Вседержитель, якоже ресте: 15 возненавидехом злая и возлюбихом добрая: и возставите у врат суд, яко да помилует Господь Бог Вседержитель оставшая Иосифова. 16 Сего ради сия глаголет Господь Бог Вседержитель: на всех стогнах (будет) плачь, и на всех путех речется: увы люте, увы люте! Призовется земледелец на плачь и на рыдание, и на ведящих плачь, 17 и на всех путех плачь, понеже пройду среде тебе, рече Господь. 18 Увы люте желающим дне Господня! Вскую вам сей день Господень? Сей бо есть тма, а не свет: 19 якоже аще убежит человек от лица льва, и нападет нань медведица: и вскочит в дом и опрется рукама своима о стену, и усекнет его змия. 20 Несть ли день Господень тма, а не свет, и мгла не имущи света своего? 21 Возненавидех и отвергох праздники ваша и не обоняю жертв в сонмех ваших: 22 зане аще принесете Ми всесожжения и жертвы ваша, не

прииму, и на спасительная явления вашего не призрю. 23 Отстави от Мене глас песней твоих, и песни органов твоих не послушаю. 24 И повалится якоже вода суд, и правда якоже водотеча непроходна. 25 Еда заколения и требы принесосте Ми в пустыни лет čtyредесять, доме Израилев? 26 И восприясте скинию Молохову и звезду бога вашего Ремфана, образы, яже сотвористе себе. 27 И преселю вы далее Дамаска, глаголет Господь: Бог Вседержитель имя Ему.

**6** Люте уничижающим Сиона и уповающим на гору Самарийскую: оймаша начатки языков, и внидоша к ним дом Израилев. 2 Мимоидите Халану вси и видите, и прейдите оттуду во Емаф великий и снидите оттуду в Геф иноплеменников, крепчайшыя от всех царств сих, аще болши суть пределы их предел ваших? 3 Приходящии в день зол, приближающиися и прикасающиися субботам лживым, 4 спящии на одрех от костей слоновых и ласкосердствующии на постелех своих, ядущии козлища от паств и телцы млеком питаемы от среды стад: 5 плещущии ко гласу пищалей, аки стояща мнеша, а не яко бежаща: 6 пиющии процеженое вино и первыми вонями мажущиися, и не страдаху ничесоже в сокрушении Иосифове. 7 Сего ради ныне пленницы будут от начала сильных, и отимется ржание конско от Ефрема. 8 Яко клятятся Господь Собою, глаголет Господь Бог Сил: понеже гнушаюся аз всею укоризною Иакова и села его возненавидех, и отвергу град со всеми живущими в нем. 9 И будет, аще останутся десять мужей во едином дому, умрут, и останутся остаточнии: 10 и возмут свои их, и понудятя изнести кости их из дому. И речет настоятелем дому: еще

ли есть у тебе? И речет: несть еще. И речет: молчи, не именованя ради имене Господня. **11** Понеже, се, Господь заповедает и побиет дом великий толчением и дом малый разседением. **12** Аще поженут в камениях кони? И аще умолкнут в женстем полу? Яко обратисте на гнев суд, и плод правды на горесть, **13** веселящихся ни о едином слове блазе, глаголющих: не крепостию ли нашею имамаы роги? **14** Темже, се, Аз воздвигну на вы, доме Израилев, язык, глаголет Господь Бог Сил, и сокрушат вас еже не внити во Емаф и до водотечи западов.

**7** Сице показа ми Господь Бог, и се, приплод пружий идый утренний, и се, гусеница, един Гог царь. **2** И будет, аще скончает ядый траву земную, и рех: Господи, Господи, милостив буди, кто возставит Иакова? Яко мал есть. **3** Раскайся о сем, Господи: и сие не будет, глаголет Господь. **4** Сице показа ми Господь, и се, призва прю во огни Господь Бог, и пояде бездну многу, и пояде часть. **5** И рех: Господи, Господи, престани ныне, кто возставит Иакова? Яко мал есть. **6** Раскайся о сем, Господи: и сие не будет, глаголет Господь. **7** Сице показа ми Господь: и се, Муж стой на ограде адамантове, и в руце Его адамант. **8** И рече Господь ко мне: что ты видиши, Амосе? И рех: адамант. И рече Господь ко мне: се, Аз учиню адаманта среде людей Моих Израиля, ктому не приложу, еже мимоити его: **9** и потребятся требища смеха, и требы Израилевы опустеют, и востану на дом Иеровоамль со оружием. **10** И посла Амасиа жрец Вефильский ко Иеровоаму царю Израилеву глаголя: развраты творит на тя Амос среде дому Израилева, не возможет земля подяти всех словес его, **11** понеже сия

глаголет Амос: оружием скончается Иеровоам, Израиль же пленен отведется от земли своя. 12 И рече Амасиа ко Амосови: видяй гряди и отиди ты на землю Иудину, и тамо живи, и тамо да прорицаеши: 13 а в Вефили посем не приложи прорицати, яко освящение царя есть и дом есть царства. 14 И отвеща Амос и рече ко Амасии: не бех пророк аз, ниже сын пророчь, но пастырь бех и ягодичия обирая: 15 и поя мя Господь от овец и рече ко мне: иди и прорцы на люди Моя Израиля. 16 И ныне слыши слово Господне: ты глаголеши: не прорицай на Израиля и не возмущай народа на дом Иаковль: 17 сего ради сия глаголет Господь: жена твоя во граде соблудит, сынове же твои и дщери оружием падут, и земля твоя ужем измерится, и ты на земли нечистой скончаешися, и Израиль пленен отведется от земли своя.

**8** Сице показа ми Господь Бог: и се, сосуд птицеловца. 2 И рече (Господь): что ты видиши, Амосе? И рех: сосуд птицеловца. И рече Господь ко мне: приспе конец на люди Моя Израиля, не приложу ксему еже мимоити его. 3 И восплачутся стропове храма в той день, глаголет Господь Бог: мнози падшии во всем месте, наверху молчание. 4 Слышите убо сия, сокрушающии из утра убогаго и насильствующии нищих от земли, 5 глаголющии: когда прейдет месяц, и продамы, и (когда прейдут) субботы, и отверзем сокровища наша, еже сотворити меру малу, и увеличити мерило, и сотворити вес неправеден, 6 яко да притяжем убогия сребром и нищаго за сапоги, и от всякаго жита куплю сотворим? 7 Кленется Господь на презорство Иаковле, аще забудет в конец вся дела ваша: 8 и о сих не возмьется ли земля, и восплачется всяк живяй на ней? И възьдет яко река скончание

(ея), и снидет якоже река Египетская. 9 И будет в той день, глаголет Господь Бог, зайдет солнце в полудне, и померкнет на земли в день свет: 10 и превращу праздники ваша в жалость и вся песни ваша в плачь, и возложу на всяк хребет вретисце и на всяку главу плешь, и положу его яко жалость любимаго и сущья с ним яко день болезни. 11 Се, дние грядут, глаголет Господь, и послю глад на землю, не глад хлеба, ни жажду воды, но глад слышания слова Господня: 12 и поколеблются воды от моря до моря и от севера до восток, и обтекут ищуще словесе Господня, и не обрящут. 13 В той день оскудеют девы добрыя и юноши в жажди, 14 кленущиися очищением Самарийским и глаголющии: жив бог твой, Дане, и жив бог твой, Вирсавее. И падут и не востанут ктому.

**9** Видех Господа стояща на жертвеннице, и рече: порази очистилище, и поколеблются преддверия, и пресецы в главы всех: и оставшья их оружием избию, не убежит от них бежай, и не уцелеет от них уцелевая: 2 аще сокрыются во аде, то и оттуду рука Моя исторгнет я, и аще възьдут на небо, то и оттуду свергу я: (Sheol h7585) 3 и аще скрываются на версе Кармила, то и оттуду възьщу и возму я, и аще погрузятся от очию Моею во глубинах морских, то и тамо повелю змиеви, и угрызет я: 4 и аще пойдут в плен пред лицом враг своих, и тамо повелю оружию, и избьет их: и утвержу очи Мои на них во злая, а не во благая. 5 И Господь Бог Вседержитель прикасаясь земли и колебля ея, и възрыдают вси живуции на ней, и възьдет яко река скончание ея, и снидет яко река Египетская: 6 сотворяяй на небо восход Свой и обещание Свое на земли основаяй, призываяй

воду морскую и проливаяй ю на лице земли: Господь Бог Вседержитель имя Ему. 7 Не якоже ли сынове Ефиопстии вы есте Мне, сынове Израилевы? глаголет Господь. Не Израиля ли изведох из земли Египетския и иноплеменники из Каппадокии и Сирияны из Рова? 8 Се, очи Господа Бога на царство грешных, и отвергу е от лица земли: обаче не в конец отвергу дом Израилев, глаголет Господь. 9 Понеже, се, Аз заповедаю и развею дом Израилев во вся языки, якоже веется на веяле, и не падет сотрение на землю. 10 Оружием скончаются вси грешнии людий Моих, глаголющии: не приблизатся, ни приидут на нас злая. 11 В той день возставлю скинию Давидову падшую, и возгражду падшая ея, и раскопаная ея возставлю, и возгражду ю якоже дние века: 12 яко да възыщут мене оставшиися человецы и вси языцы, в нихже призвася имя Мое в них, глаголет Господь творяй сия вся. 13 Се, дние грядут, глаголет Господь, и постигнет жатва оымание винограда, и созреет гроздие в сеятву, и искапают горы сладость, и вси холми насаждени будут: 14 и возвращу плен людий Моих Израиля, и возградят грады разоренья, и населятся, и насадят винограды и испиют вино их, и сотворят вертограды и снедят плод их: 15 и насажду я на земли их, и не исторгнутся ктому от земли своея, юже дах им, глаголет Господь Бог Вседержитель.



# Книга пророка Авдия

**1** Видение Авдиино: сия глаголет Господь Бог Идумеи: слух слышах от Господа, известие во языки посла: встаните, и востанем на ню ратию. **2** Се, мала дах ты во языцех, безчестен ты еси зело. **3** Презорство сердца твоего воздвиже ты живущаго в пещерах каменных: возвышаяй храмину свою, глаголяй в сердцах своем: кто мя свержет на землю? **4** Аще вознесешися якоже орел и аще положиши гнездо твое среде звезд, и оттуду свергу тя, глаголет Господь. **5** Аще бы татие влезли к тебе, или разбойницы нощию, камо бы повержен был еси? Еда не украли бы доволных себе? Или аще бы объемлющии виноград влезли к тебе, еда бы не оставили гроздия? **6** Како обыскася Исав, и взята быша сокровенная его? **7** Даже до предел испустиша ты: вси мужие завета твоего сопротивишася ти, премогиша ты мужие мирницы твои: (ядущии с тобою) положиша лесть под тобою, несть смысла в них. **8** В той день, глаголет Господь, погублю премудрыя от Идумеи и смысл от горы Исавовы: **9** и убоятся воины твои, иже от Феман, да отимется человек от горы Исавовы. **10** Посечения ради и нечестия, еже на брата твоего Иакова, покрывает ты студ, и отвержен будеши во век. **11** От негоже дне сопротивился еси во дни пленяющих иноплеменников силу его, и чуждии внидоша во врата его и о Иерусалиме вергоша жребия, и ты был еси яко един от них. **12** И да не презриши дне брата твоего в день чуждых, и да не порадуешься о сынех Иудиных в день погибели их, и да не велеречиши в день скорби: **13** и не входи во врата людей Моих в день болезни их, и не презри и ты сонма их в день потребления их, и не совещайся на силу их в

день погибели их: **14** ниже настой на исходы их потребити избегающыя их, ниже заключай бежащыя их в день скорби.

**15** Понеже близ день Господень на вся языки: якоже сотворил еси, сице будет ти, воздаяние твое воздастся на главу твою.

**16** Понеже якоже еси пил на горе Моей святей, испиют вси языцы вино, испиют и снидут, и будут яко не бывшии. **17** В горе же Сиони будет спасение, и будет свята: и наследят дом Иаковль наследивших я. **18** И будет дом Иаковль огонь, дом же Иосифов пламень, а дом Исавов в тростие, и возгорятся на них и поядят я, и не будет избегаяй дому Исавову, яко Господь глагола. **19** И наследят иже во нагеве гору Исавову, и иже в раздолии иноплеменники: и возмут гору Ефремову и поле Самарийско, и Вениамина и Галаадитиду.

**20** И преселения начало сие сыном Израилевым, земля Хананейска до Сарепты: преселение же Иерусалимле до Ефрафа: и наследят грады Нагевовы. **21** И въздут спасаемии от горы Сиони, еже отмстити гору Исавлю, и будет царство Господеви.

# Книга пророка Ионы

**1** И бысть слово Господне ко Ионе сыну Амафиину, глаголя:  
**2** востани и иди в Ниневию град великий и проповеждь в нем, яко възыде вопль злобы его ко Мне. **3** И воста Иона, еже бежати в Фарсис от лица Господня и сниде во Июппию и обрете корабль идущь в Фарсис, и даде наем свой и вниде в онь плиты с ними в Фарсис от лица Господня.  
**4** И Господь воздвиже ветер велий на мори, и бысть буря великая в мори, и корабль бедствоваше еже сокрушится. **5** И убояшася корабельницы, и возопиша кийждо к богу своему, и изметание сотвориша сосудов иже в корабли в море, еже облегчитися от них: Иона же сниде во дно корабля и спаше ту и храпляше. **6** И прииде к нему кормчий и рече ему что ты храплеши? Востани и моли Бога твоего, яко да спасет ны Бог, да не погибнем. **7** И рече кийждо ко искреннему своему приидите, вержим жребия и уразумеем, кого ради есть зло сие на нас? И метнуша жребия, и паде жребий на Иону. **8** И реша к нему возвести нам, кого ради сие зло на нас, что твое делание есть, и откуда грядеши и камо идеши, и от коея страны и от киих людий еси ты? **9** И рече к ним раб Господень емь аз и Господа Бога небеснаго аз чту, иже сотвори море и сушу. **10** И убояшася мужие страхом великим и реша к нему что сие сотворил еси? Зане разумеша мужие, яко от лица Господня бежаше, яко возвести им. **11** И реша к нему: что тебе сотворим, и утолится море от нас? Зане море восхождаше и воздвизаше паче волнение. **12** И рече к ним Иона: возьмите мя и вверзите в море, и утолится море от вас понеже познах аз, яко мене ради волнение сие великое на вы есть. **13** И нуждахуся мужие, возвратитися к земли, и

не можаху, яко море восхождаше и воздвизашесе паче на них. 14 И возопиша ко Господеви и рече: никакоже, Господи, да не погибнем души ради человека сего, и не даждь на нас крове праведных: зане Ты, Господи, якоже восхотел, сотворил еси. 15 И взяша Иону и ввергоша его в море, и преста море от волнения своего. 16 И убояшася мужие страхом великим Господа и пожроша жертву Господеви и помолишася молитвами. 17 И повеле Господь киту великому пожрети Иону. И бе Иона во чреве китове три дни и три нощи.

**2** И помолися Иона ко Господу Богу своему от чрева китова и рече: возопих в скорби моей ко Господу Богу моему, и услыша мя из чрева адова вопль мой, услышал еси глас мой: (Sheol h7585) 3 отвергл мя еси во глубины сердца морского, и реки обыдоша мя вся высоты Твоя и волны Твоя мне преидоша. 4 И аз рех: отринуся от очию Твоею: еда приложу призрети ми ко храму святому Твоему? 5 Возлиася на мя вода до души моя, бездна обыде мя последняя, понре глава моя в раселины гор, 6 снидох в землю, еяже верей ея заклеи вечнии: и да въздет из истления живот мой к Тебе, Господи Боже мой. 7 Внегда скончаватися от мене души моей, Господа помянух, и да приидет к Тебе молитва моя ко храму святому Твоему. 8 Хранящии суетная и ложная милость свою оставиша: 9 аз же со гласом хваления и исповедания пожру Тебе, елика обещах, воздам Тебе во спасение мое Господеви. 10 И повеле Господь китови, и изверже Иону на сушу.

**3** И бысть слово Господне ко Ионе вторицею глаголя: 2 востани и иди в Ниневию град великий, и проповеждь в нем

по проповеди преждней, юже Аз глаголах тебе. 3 И воста Иона и иде в Ниневию, якоже глагола Господь. Ниневиа же бяше град велик Богу, яко шествия пути триех дний. 4 И начат Иона входити во град, яко шествие пути дне единого, и проповеда и рече: еще три дни, и Ниневиа превратится. 5 И вероваша мужие Ниневийстии Богови, и заповедаша пост, и облекошася во вретища от велика их даже до мала их. 6 И дойде слово ко царю Ниневийскому, и воста с престола своего и сверже ризы своя с себе, и облечеса во вретище и седе на пепеле. 7 И проповедася и речено бысть в Ниневию от царя и вельмож его глаголющих: человецы и скоти, и волове и овцы да не вкусят ничесоже, ни да пасутся, ниже воды да пият. 8 И облекошася во вретища человецы и скоти и возопиша прилежно к Богу, и возвратися кийждо от пути своего лукаваго и от неправды сущия в руках их, глаголюще: 9 кто весть, аще раскается и умолен будет Бог, и обратится от гнева ярости Своея, и не погибнем? 10 И виде Бог дела их, яко обратишася от путей своих лукавых, и раскаяся Бог о зле, еже глаголаше сотворити им, и не сотвори.

**4** И опечалися Иона печалию великою и смутися, 2 и помолися ко Господу и рече: о Господи, не сия ли убо словеса моя, яже глаголах, еще сущу ми на земли моей? Сего ради предварих бежати в Фарсис, зане разумех, яко милостив Ты еси и щедр, долготерпелив и многомилостив, и каяйся о злобах (человеческих): 3 и ныне, Владыко Господи, прими душу мою от мене, яко уне ми умрети, нежели жити. 4 И рече Господь ко Ионе: аще зело опечалился еси ты? 5 И изыде Иона из града и седе прямо града, и сотвори себе кущу и сидяще под нею в сени, дондеже увидит, что будет граду.

6 И повеле Господь Бог тыкве, и возрасте над главою его, еже осенити его от злых его. И возрадовася Иона о тыкве радостью великою. 7 И повеле Господь Бог червию раннему во утрие, и подяде тыкву, и изсше. 8 И бысть вкупе внегда возсияти солнцу, и повеле Бог ветру знойну жегущу, и порази солнце на главу Ионину, и малодушствоваше и отрицашеся души своя и рече: 9 уне ми умрети, нежели жити. И рече Господь Бог ко Ионе: зело ли опечалился еси ты о тыкве? И рече (Иона): зело опечалихся аз даже до смерти. 10 И рече Господь: ты оскорбился еси о тыкве, о нейже не трудился еси, ни воскормил еси ея, яже родися об ночь и об ночь погибе: 11 Аз же не пощажду ли Ниневии града великаго, в немже живут множайшии неже дванадесять тем человек, иже не познаша десницы своя, ниже шуйцы своя, и скоти их мнози?

# Книга пророка Михея

**1** Слово Господне, еже бысть ко Михею Морасфитину, во дни Иоафама и Ахаза и Езекии царей Иудиных, о нихже виде о Самарии и о Иерусалиме. **2** Слышите, людие вси, словеса, и внимли, земле и вси иже на ней, и будет Господь Бог в вас в послушествование, Господь от дому святого Своего. **3** Понеже, се, Господь исходит от места Своего, и снидет и наступит на высоты земныя, **4** и поколеблются горы под Ним, и юдоли растают яко воск от лица огня и яко вода сходящи со устремлением. **5** Нечестия ради Иаковля вся сия и греха ради дому Израилева. Кое нечестие дому Иаковлю? Не Самария ли? И кий грех дому Иудина? Не Иерусалим ли? **6** И положу Самарию во овощное хранилище селное и в сад винограда, и развергу в пропасть камение ея, и основания ея откряю: **7** и вся изваянная ея сокрушат, и вся мзды ея запалят огнем, и вся кумиры ея положу в пагубу: понеже от найма блуда собра и от найма блужения соврати. **8** Сего ради възрыдает и восплачется, пойдет боса и нага, сотворит плачь аки змиев и рыдание аки дочерей сиринских: **9** яко одержа язва ея, понеже прииде даже до Иуды и коснуса до врат людий моих даже до Иерусалима. **10** Уже в Гефе, не величайтесь, и Иенакимляне, не сограждайте из дому на посмеяние, перстию посыплите посмеяние ваше. **11** Обитающая добре во градех своих, не изыде живущая в Сеннааре, плачитесь дому (сущаго) близ ея, примет от вас язву болезней. **12** Кто нача во благая вселившейся в болезнях, яко снидоша злая от Господа на врата Иерусалимля, **13** шум колесниц и конников: живущая в Лахисе начальница греха та есть дщери Сиони, яко в тебе обретошася нечестия Израилева.

14 Сего ради даст посылаемая даже до наследия Гефова, дома суетны, вотще быша царем Израилевым, 15 дондеже наследники приведу тебе, живущая в Лакисе, наследие даже до Одоллама приидет, слава дочери Сиони. 16 Оброснися и остризися по чадех своих младых: разшири оброснение твое яко орел, понеже пленени быша от тебе.

**2** Быша помышляюще труды и делающе злая на ложах своих, и купно со днем совершаху тая, понеже не воздвигоша к Богу рук своих: 2 и желаху сел, и грабляху сирот, и дома отимаху, и расхищаху мужа и дом его, и мужа и наследие его. 3 Сего ради сия глаголет Господь: се, Аз помышляю на племя сие злая, от нихже не подвигнете вый ваших и не пойдете прости внезапно, яко время зло есть. 4 В той день приимется на вы притча, и восплачется плачь с песнию, глаголющъ: бедство пострадахом: часть людей моих измерися ужем, и не бе возбраняй его, еже отвратится: села ваша разделена быша. 5 Сего ради не будет тебе вмещуць ужа в жребии в сонме Господни. 6 Не плачитесь слезами, ниже да слезят о сих: не отвержет бо укоризны 7 глаголяй: дом Иаковль разгнева Дух Господень: не сия ли суть начинания Его? Не словеса ли Его суть добра с ним, и правии ходиша? 8 И прежде людие Мои во вражду сопротивишася, противу миру своему: кожу его одраша, еже отяти упование, сокрушение ратное: 9 сего ради старейшины людей Моих извергутся из домов сладости своя, злых ради начинаний своих отриновени быша. Приблизитесь горам вечным: 10 востани и пойдь, яко несть тебе сей покой: нечистоты ради, истлесте тлением, 11 прогнастеса ни кимже гоними: дух постави лжу, искапа тебе в вино и пьянство: и



будет, от капли людей сих, **12** собираемь соберется Иаков со всеми: приемая прииму оставших Израилевых, вкупе положу возвращение его, аки овцы в скорби, яко паству посреде ложа их: изскачат от человек. **13** Взыди просечением пред лицом их: просекоша, и проидоша врата, и изыдоша ими. И изыде царь их пред лицом их, Господь же Вождь их будет.

**3** И речет: слышите убо сия, власти дому Иаковля и оставшии дому Израилева: не вам ли есть еже разумети суд? **2** Ненавидящии добра, а ищущии зла, похищающии кожи их с них и плоти их от костей их: **3** якоже объядоша плоти людей Моих, и кожи их от костей их одраша, и кости их столкоша и содробиша яко плоти в коноб и яко мяса в горнец: **4** тако возопиют ко Господу, и не послушает их и отвратит лице Свое от них в то время, понеже слукавноваша в начинаниих своих на Ня. **5** Сия глаголет Господь на пророки льстящия людей Моих, угрызающия зубы своими и проповедающия мир на них, и не вдая во уста их, возставиша на них рать: **6** сего ради ночь будет вам от видения, и тма будет вам от волхвования, и зайдет солнце на пророки, и померкнет на ня день: **7** и усрамятся видящии сония, и посмеяни будут волсви, и возглаголют на них вси сии, зане не будет послушай их. **8** Аще аз не наполню силы Духом Господним и судом и силою, еже возвестити Иакову нечестия его и Израилеви грехи его. **9** Слышите сия, старейшины дому Иаковля и оставшии дому Израилева, гнушающиися судом и вся правая развращающии, **10** созидающии Сиона кровьюми и Иерусалима неправдами: **11** старейшины его на дарех суждаху, и жерцы его на мзде отвещаваху, и пророцы его на серебре волхвоваху, и на Господе почиваху, глаголюще:

не Господь ли в нас есть? Не приидут на ны злая. 12 Сего ради вас дела Сион якоже нива изорется, и Иерусалим яко овощное хранилище будет, и гора дому якоже луг дубравный.

**4** И будет в последния дни явлена гора Господня, уготована над верхи гор, и вознесется выше холмов, и потщатся к ней людие, 2 и приидут языцы мнози и рекут: приидите, взыдем на гору Господню и в дом Бога Иаковля: и покажут нам путь Его, и пойдем по стезям Его: яко от Сиона изыдет закон, и слово Господне из Иерусалима, 3 и разсудит среде людий многих и избличит языки крепки даже до земли дальния: и раскуют мечы своя на рала и сулицы своя на серпы, и не ктому возмет язык на язык меча, и не научатся ксему воевати. 4 И почиет кийждо под лозою своею и кийждо под смоковницею своею, и не будет устрашающаго, зане уста Господа Вседержителя глаголаша сия. 5 Яко вси людие пойдут кийждо в путь свой, а мы пойдем во имя Господа Бога нашего в век и далечае. 6 В той день, глаголет Господь, соберу сокрушенную, и отриновенную прииму, и ихже отринух: 7 и положу сокрушенную во останок и отриновенную в язык крепок, и воцарится Господь над ними в горе Сионе отныне и до века. 8 И ты, столпе паствы мгляный, дщи Сионя, к тебе приидет и внидет власть первая, царство из Вавилона дщери Иерусалимли. 9 И ныне вскую познала еси зло? Не бе ли тебе царя? Или совет твой погибе, яко обыдоша ты болезни, аки раждающия? 10 Болезнуй и мужайся и приближайся, дщи Сионя, яко раждающая: зане ныне изыдеши из града и вселишися на поли и дойдеши Вавилона: оттуду изимет тя и оттуду избавит тя Господь Бог твой от руки враг твоих. 11 И ныне собрашася на тя

языцы мнози глаголющи: порадуемся: и воззрят на Сион  
очи наши. 12 Сии же не разумеша помышления Господня  
и не домыслишася совета Его, яко собра их аки снопы  
гуменные. 13 Востани и измлати их, дщи Сионя, яко роги  
твоя положу железны и пазнокти твоя положу медяны, и  
истончиши люди многи, и возложиши Господеви множество  
их и крепость их Господеви вся земля.

**5** Ныне оградится дщи Ефремова ограждением, рать учини  
на вы, железом поразят о челюсть племен Израилевых. 2 И  
ты, Вифлееме, доме Ефрафов, еда мал еси, еже быти в  
тысящах Иудиных? Из тебе бо Мне изыдет Старейшина, Еже  
быти в Князя во Израили, исходи же Его из начала от дний  
века. 3 Сего ради даст я, до времени раждающия породит, и  
прочии от братии их обратятся к сыном Израилевым. 4 И  
станет, и узрит, и упасет паству Свою крепостию Господь, и  
в славе имене Господа Бога Своего пребудут: зане ныне  
возвеличится даже до конец земли. 5 И будет Сей мир, егда  
Ассур приидет на землю вашу, и егда взыдет на страну вашу,  
и востанут нань семь пастырей и осмь язв человеческих, 6  
и упасут Ассура оружием и землю Невродову копиями ея,  
и избавит от Ассура, егда приидет на землю вашу и егда  
вступит на пределы ваша. 7 И будет останок Иаковль в  
языцех среде людей многих, аки роса от Господа падающи  
и яко агнцы на злаце, яко да не соберется ни един, ниже  
постоит в сынех человеческих. 8 И будет останок Иаковль в  
языцех среде людей многих, аки лев в скотех в дубраве и  
яко львицищ в стадах овчих, якоже егда пройдет, и отлучив  
восхитит, и не будет изимающаго. 9 Вознесется рука твоя  
на оскорбляющыя тя, и вси врази твои потребятся. 10 И

будет в той день, глаголет Господь, потреблю кони твоя из среды твоя и погублю колесницы твоя, **11** и потреблю грады земли твоя и развергу вся твердыни твоя, **12** и отвергу волхвования твоя от руку твою, и волхвующии не будут в тебе: **13** и потреблю изваянная твоя и кумиры твоя из среды тебе, и посею да не поклонишия делом рук твоих: **14** и посеку дубравы от среды тебе и погублю грады твоя: **15** и сотворю со гневом и с яростию месть языком, понеже не послушаша Мене.

**6** Слышите, яже глагола Господь: востани, судися с горами, и да слышат холми глас твой. **2** Слышите, горы, суд Господень, и дебри основания земли, яко суд Господень к людем Его, и со Израилем претися имать. **3** Людие Мои, что сотворих вам, или чим оскорбих вас, или чим стужих вам? Отвещайте Ми. **4** Зане изведох вас из земли Египетския и из дому работы избавих вас, и послах пред вами Моисеа и Аарона и Мариам. **5** Людие Мои, помяните убо, что совещаша на вы Валак царь Моавитский, и что ему отвещаша Валаам сын Веоров, от Сития до Галгал? Яко да познается правда Господня. **6** В чем постигну Господа, срящу Бога моего Вышняго? Срящу ли Его со всесожжением, телцы единоплетными? **7** Еда примет Господь в тысящах оводов, или во тмах козлиц тучных? Дам ли первенцы моя о нечестии моем, плод утробы моея, за грехи души моея? **8** Возвестися бо тебе, человеце, что добро, или чесого Господь ищет от тебе, разве еже творити суд и любити милость и готову быти еже ходити с Господем Богом твоим? **9** Глас Господень граду призовется, и спасет боящияся имене Его: послушай, племя, и кто украсит град? **10** Еда огонь и дом беззаконнаго собирая имения беззаконнаго

и со укоризною неправды? **11** Еда оправдится в мериле беззаконник и во вретиси меры неправыя, **12** от нихже богатство свое нечестия наполниша? И живуции в ней глаголаху лжу, и язык их вознесся во устех их. **13** И Аз начну поражати тя и погублю тя во гресех твоих. **14** Ты ясти будеши и не насытишися, и померкнет в тебе, и совратишися, и не спасешия: и елицы аще избудут, оружию предадутся. **15** Ты посееши, но не пожнеши: ты изгнетеши масличие, но не помажешися маслом: и насадите вино, и не испиете: и погибнут законы людей Моих. **16** И хранил еси оправдания Замвриина и вся дела дому Ахаавля, и ходисте в советех их, яко да предам тя в пагубу, и живуцыя в ней во звиздание, и укоризны людей приимете.

**7** У, люте мне! Понеже бых аки собираяй сламу на жатве, и яко пародок во оымании винограда не сущу гроздию, еже ясти первоплодная, яже вождеде душа моя. **2** У, люте мне, душе! Яко погибе благочестивый от земли, и исправляющаго в человецех несть: вси во кровех прячя, кийждо ближняго своего озлобляет озлоблением, **3** на зло руки своя уготовляют: князь просит, и судия мирная словеса глаголет, желание души его есть: и отиму благая их, **4** яко моль поядаяй, и ходяй по правилам в день стражбы. У, люте! У, люте! Отмщения Твоя приспеша, ныне будут плачы их. **5** Не верите другом, ни надейтеся на старейшины, и от сожителницы твоя хранися, еже сказати ей что: **6** понеже сын безчестит отца, дщерь встанет на мать свою и невеста на свекровь свою, врази вси мужу домашнии его. **7** Аз же ко Господеви воззрю, потерплю Бога спаса моего, услышит мя Бог мой. **8** Не радуйся о мне, враждебница моя,

яко падох, и востану: зане аще сяду во тме, Господь осветит мя. 9 Гнев Господень стерплю, яко согреших Ему, дондеже оправдит прю мою и сотворит суд мой: и изведет мя на свет, и узрю правду Его. 10 И узрит враждебница моя, и облечется в студ глаголющая ко мне: где есть Господь Бог твой? Очи мои воззрят на ню, ныне будет в поправление аки кал на путех. 11 День глаждения плинфа: изглаждение твое день оный, и сотрет законы твоя день оный. 12 И гради твои приидут на поравнение и в разделение Ассирийско, и гради твои твердии в разделение от Тира даже до реки Сирския, и от моря даже до моря, и от горы даже до горы, дние воды и молвы. 13 И будет земля в пагубу со живущими на ней, от плодов начинаний их. 14 Паси люди Твоя жезлом Твоим, овцы наследия Твоего, вселяющыяся едины в дубраве среде Кармила, попасут Васанитиду и Галаадитиду, якоже дние века. 15 И по днем исхода твоего из Египта узрите чудесная. 16 Узрят языцы и усрамятся от всея крепости своея, руже возложат на уста своя, и уши их оглохнут, 17 полижут персть яко змиеве плещуе по земли, смятутся во облежении своем: о Господе Бозе нашем ужаснутся и убоятся от Тебе. 18 Кто Бог якоже Ты, отемляй беззакония и оставляяй нечестия останком наследия Своего? И не удержи гнева Своего во свидение, яко Волитель милости есть. 19 Той обратит и ущедрит ны, и погрузит неправды наша и ввержет в глубины морския вся грехи наша, 20 даст истину Иакову, (и) милость Аврааму, якоже клялся еси отцем нашим во дни первыя.

# Книга пророка Наума

**1** Пророчество о Ниневии: книга видения Наума сына Елкесеева. **2** Бог ревнив и мстят Господь, мстят Господь с яростию, Господь мстят сопостатом Своим и потребляя сам враги Своя. **3** Господь долготерпелив, и велика крепость Его, и очищаяй не очистит Господь: в скончании и трусе путь Его, и облацы прах ног Его: **4** запрещаая морю и изсушая е и вся реки опустошаяй. Умались Васанитида и Кармил, и процветающая Ливана оскудеша: **5** горы потрясошася от Него, и холми поколебашася, и ужасеся земля от лица Его, вселенная и вси живущии на ней. **6** От лица гнева Его кто постоит? И кто сопротивится во гневе ярости Его? Ярость Его растаеает власти, и камень сотрошася от Него. **7** Благ Господь терпящим Его в день скорбения, и знаяй боящяся Его: **8** и в потопе пути скончание сотворит: встающыя и враги Его поженет тма. **9** Что помышляете на Господа? Скончание Сам сотворит, не отмстит дважды купно в скорби: **10** понеже до основания своего оляденеет, и аки блющь и оплетающяся снен будет, и аки трость сухоты полна. **11** Из тебе изыдет помысл на Господа злый, совещаая сопротивная. **12** Сия глаголет Господь: обладаая водами многими, и сице разступятя, и слух твой не услышится ктому: **13** и ныне сокрушу жезл его от тебе и узы твоя расторгну. **14** И заповесь о тебе Господь, не развеется от имени твоего ктому: от дому бога твоего потреблю изваянная и слиянная положу гроб твой, яко скоры (есте). **15** Се, на горах ноги благовествующаго и возвещающаго мир: празднуй, Иудо, праздники твоя, воздаждь обеты твоя, зане

не приложат ктому еже проити сквозе тебе во обетшание:  
скончася и извержеся.

**2** Взыде вдыхаяй в лице твое, отемляй от оскорбления:  
усмотри путь, укрепи чресла, возмужай крепостию зело: **2**  
понеже отврати Господь укоризну Иаковлю, якоже укоризну  
Израилеву: зане отрясающи отрясоша я и лозы их растлиша.  
**3** Оружия силы их от человек, мужы сильныя играющыя  
во огни: брозды колесниц их в день уготования его, и  
конницы возмятутся на путех, **4** и смятутся колесницы и  
сплетутся на стогнах: вид их яко свещы огненны, и яко  
молния протекающая. **5** И помянутся старейшины их, и  
побегнут в день, и изнемогут в пути своем, и потщатся на  
забрала его, и уготовят предняя стражбы своя. **6** Врата  
градная отверзошася, и царства падоша, и имение открыся.  
**7** Сия же восхождаше, и рабыни ея ведяхуся, яко голубицы  
воркующа в сердцах своих: **8** и Ниневиа, аки купель водная  
воды ея, и тии бежаше не сташа, и не бе взирающаго.  
**9** Расхищашу сребро, расхищашу злато, и не бяше конца  
имения ея: отяготишася паче всех сосудов вожденная  
ея. **10** Истрясение и вострясение, и воскипение и сердца  
сокрушение, и разслабление колен и болезни по всем  
чреслом, и лице всех, аки опаление котла. **11** Где есть  
виталище львов и пажить суцая львичищем? Камо иде лев,  
еже влезти тамо львичищу, и не бяше устрашающаго. **12**  
Лев восхити доволная львичищем своим и удави львицам  
своим, и наполни ловитвы гнездо свое и виталище свое  
похищения. **13** Се, Аз на тя, глаголет Господь Вседержитель,  
и пожгу дымом множество твое, и львы твоя пояст оружие:



и потреблю от земли ловитву твою, и не услышатся ктому дела твоя.

**3** О, граде кровей, весь лживый, полн неправды! Не осяжется ловитва. **2** Глас бичей и глас труса колес, и коня текуща и колесницы шумящая, **3** и конника едуща, и блистающа меча и блистающих оружий, и множества язвенных и тяжаго падения, и не бяше конца языком ея: и изнемогут в телесех своих от множества блужения. **4** Блудница добра и приятна, начальница волхвований, продающая языки во блужении своем и племена в чародеяниях своих. **5** Се, Аз на тя, глаголет Господь Бог Вседержитель, и открою задняя твоя к лицу твоему, и покажу языком срамоту твою и царствам безчестие твое, **6** и возвергу на тя огнушение по нечистотам твоим, и положу тя в притчу. **7** И будет, всяк видяй тя снидет с тебе и речет: окаянная Ниневиа, кто постенет по ней? Откуда взыщу утешение ей? **8** Уготовити часть, устроить струну, уготовити часть Аммону, живущая в реках, вода окрест ея, ейже начало море, и вода забрала ея: **9** и Ефиопия крепость ея и Египет, и несть конца бегству твоему: и Фуд и Ливиане быша помощницы ея. **10** И сия в преселение пойдет пленница, и младенцы ея разбьют в началех всех путей ея, и о всех славных ея вергут жребия, и вси воеводы ея свяжутся путы. **11** И ты упиешися и будеши презрена, и ты сама себе взыщеши помощи от враг. **12** Вся твердели твоя яко смоквичие стражу имущее: аще поколеблются, впадут во уста ядущаго. **13** Се, людие твои, яко жены в тебе: врагом твоим отворяема отворятся врата земли твоя, и пояст огонь верей твоя. **14** Воду одержания восхити себе сама и утверди твердели твоя: влеси в брение и поперися

в плевах, утверди паче плинфа. 15 Тамо пояст тя огонь, потребит тя мечь, поядят тя аки пружи, и отягчаеши аки мшица. 16 Умножила еси купли твоя паче звезд небесных: мшицы устремишася и возлетеша. 17 Возскочи аки пруг смесник твой, аки акрида восходящая на ограду в день студений: солнце взыде, и отлете, и не познася место ея: люте им! 18 Воздремашася пастуси твои, царь Ассирийск успи сильныя твоя, воздвигошася людие твои на горы, и не быаше приемлющаго. 19 Несть цельбы сокрушению твоему, разгореся язва твоя: вси слышации весть твою восплещут руками о тебе: понеже на кого не найде злоба твоя всегда?

# Книга пророка Аввакума

**1** Видение, еже виде Аввакум пророк. **2** Доколе, Господи, воззову, и не услышиши? Возопию к Тебе обидимь, и не избавиши? **3** Вскую мне показал еси труды и болезни, смотриши страсть и нечестие? Противу мне бысть суд, и судия вземлет. **4** Сего ради разорися закон, и не производится в совершение суд: яко нечестивый преобидит праведнаго, сего ради изыдет суд развращен. **5** Видите, презорливии, и смотрите, и чудитесь чудесем и исчезните: понеже дело Аз делаю во днех ваших, емуже не имате веровати, аще кто исповесть вам. **6** Зане, се, Аз возставляю Халдеи, язык горький и борзый, ходящий по широтам земли, еже наследити селения не своя: **7** страшен и явлен есть, от него суд его будет, и взятие его от него изыдет: **8** и изскочат паче рысей кони его и быстрее волков аравийских, и поедут конницы его и устрелятся издалеча и полетят аки орел готов на ядь. **9** Скончание на нечестивыя приидет, сопротивляющыяся лицам их противу, и соберет яко песок пленники. **10** И той над царьми посмеется, и мучителие играние его, и той над всякою тверделию поругается, и обложит вал, и возобладает ею. **11** Тогда применит дух и прейдет и помолится: сия крепость богу моему. **12** Неси ли Ты искони, Господи Боже, Святыи мой? И не умрем. Господи, на суд учинил еси его, и созда мя обличати наказание его. **13** Чисто око еже не видети зла и взирати на труды болезненныя: вскую призираеши на презорливыя? Премолчаваеши, егда пожират нечестивый праведнаго? **14** И сотвориши человеки яко рыбы морския и яко гады не имущыя старейшины. **15** Скончание удою восхити и привлече его мрежею и собра его сетьми своими:

сего ради возвеселится и возрадуется сердце его: 16 сего ради пожрет мрежи своей и покадит сеть свою, яко теми разблажи часть свою и пищи своя избранныя: 17 сего ради прострет мрежу свою и присно избивати языков не пощадит.

**2** На стражи моей стану, и взыду на камень, и посмотрю еже видети, что возглаголет во мне и что отвещаю на обличение мое. 2 И отвеща Господь ко мне и рече: впиши видение, и яве на дске, яко да постигнет читаяй я. 3 Зане еще видение на время, и просияет в конец, а не вотще: аще умедлит, потерпи ему, яко идый приидет и не умедлит. 4 Аще усумнится, не благоволит душа моя в нем: праведник же (мой) от веры жив будет. 5 Презорливый же и обидливый муж и величавый ничесоже скончает: иже разшири аки ад душу свою, и сей яко смерть ненасыщен: и соберет к себе вся языки и примет к себе вся люди. (Sheol h7585) 6 Не сия ли вся на него притчу примут и гадание в повесть его? И рекут: горе умножающему себе не сущая его, доколе? И отягчающему узу свою тяжце. 7 Яко внезапно востанут угрызающии его, и ободрятся наветницы твои, и будеши в разграбление им. 8 Понеже ты пленил еси страны многи, пленят тя вси оставшии людие крове ради человек и нечестия земли и града и всех живущих на ней. 9 Горе лихоимствующым лихоимство злое дому своему, еже учинити на высоте гнездо свое, еже исторгнути от руки злых. 10 Умыслил еси стыдение дому своему, скончал еси люди многи, и согреси душа твоя. 11 Зане камень из стены возопиет, и хруць от древа возглаголет сия: 12 у, люте созидающему град кровьми и уговоряющему град неправдами. 13 Не сия ли суть от Господа Вседержителя? И оскудеша людие мнози огнем,

и языцы мнози изнемогоша: **14** яко наполнится вся земля ведения славы Господни, якоже вода многа в мори покрывает я. **15** Горе напаяющему подруга своего развращением мутным, и упоявающему, яко да взирает к пещерам их. **16** Сытость безчестия от славы испий и ты: сердце, поколеблися и сотряснися: обыде о тебе чаша десницы Господни, и собрася безчестие на главу твою. **17** Занеже нечестие Ливаново покрывает тя, и страсть зверей пристрашит тя, крове ради человеци и нечестия земли и града и всех живущих на ней. **18** Что пользует изваяное, яко изваяша е? Создаша слияние, мечтание ложное, яко упова создавый на создание свое, сотворити кумиры немья. **19** У, люте глаголющему ко древу: ободрися, востани: и камению: возвысися: и то есть мечтание, и сие есть скование злата и серебра, и всякаго духа несть в нем. **20** Господь же во храме святем Своем: да убоится от лица Его вся земля.

**3** Молитва Аввакума пророка с песнию. Господи, услышах слух Твой и убояхся: **2** Господи, разумех дела Твоя и ужасохся: посреде двою животну познан будеши: внегда приблизитися летом, познаешися: внегда приити времени, явишися: внегда смутитися души моей во гневе, милость (Твою) помянеши. **3** Бог от юга приидет, и Святыи из горы Приосененныя чащи: покры небеса добродетель Его, и хваления Его исполнь земля. **4** И сияние Его яко свет будет: рози в руках Его, и положи любовь державну крепости Своя. **5** Пред лицем Его предидет слово, и изыдет на поле при ногу Его. **6** Ста, и подвижесе земля: призре, и растаяша языцы: стрышася горы нуждею, и растаяша холми вечнии, шествия вечная Его, **7** за труд видеша селения Ефиопская, убоятся и

кровы земли Мадиамския. 8 Еда в реках прогневаешися, Господи? Еда в реках ярость Твоя? Или в мори устремление Твое? Яко всядеши на кони Твоя, и яждение Твое спасение.

9 Наляцая налячеши лук Твой на скиптры, глаголет Господь: реками разсядется земля. 10 Узрят тя и побоят людие, расточая воды шествия Его: даде бездна глас свой, высота привидения своя: 11 воздвижеса солнце, и луна ста в чине своем: во свете стрелы Твоя пойдут, в блистании молний оружий Твоих. 12 Прещением умалиши землю и яростию низложиши языки. 13 Изшел еси во спасение людей Твоих, спасти помазанныя Твоя, вложил еси во главы беззаконных смерть, воздвигл еси узы даже до выи в конец: 14 разсекл еси во изступлении главы сильных, сотрясутся в ней: разверзут узды своя яко снедаяй нищий тай. 15 И навел еси на море кони Твоя, смущающыя воды многи. 16 Сохранихся, и убояся сердце мое от гласа молитвы устен моих, и вниде трепет в кости моя, и во мне смятеса крепость моя: почию в день скорби моея, да възыду в люди пришелствия моего. 17 Зане смоковь не плодопринесет, и не будет рода в лозах: солжет дело маслинное, и поля не сотворят яди: оскудеша овцы от пищи, и не будет волов при яслех. 18 Аз же о Господе возрадуюся, возвеселюся о Бозе спасе моем. 19 Господь Бог мой сила моя, и учинит нозе мои на совершение, и на высокая возводит мя, еже победити ми в песни Его.

# Книга пророка Софонии

**1** Слово Господне, иже бысть к Софонии сыну Хусиину, сыну Годолиину, Амориину, Езекиину, во дни Иосии сына Амоня, царя Иудина. **2** Оскудением да оскудеют вся от лица земли, глаголет Господь: **3** да оскудеет человек и скоти, да оскудеют птицы небесныя и рыбы морския, и да изнемогут нечестивии, и изиму беззаконныя от лица земли, глаголет Господь. **4** И простру руку Мою на Иуду и на вся живущыя во Иерусалиме: и изиму от места сего имена Ваалова и имена жреческа со жерцами, **5** и поклоняющихся на покровех воинству небесному и кленущихся Господем и кленущихся царем своим, **6** и укланяющихся от Господа и не ищущих Господа и не придерживающихся Господа. **7** Убойтесь от лица Господа Бога, зане близ день Господень, яко уготова Господь жертву Свою и освяти званныя Своя. **8** И будет в день жертвы Господни: и отмщу на князи и на дом царский и на вся оболченныя во одеяния чуждая, **9** и отмщу яве на вся предвратныя в день той, исполняющыя храм Господа Бога своего нечестием и лестию. **10** И будет в день он, глаголет Господь, глас вопля от врат избодающих и плачь от вторых и сотрение велие от холмов. **11** Плачите, живуции в посеченней, яко уподобишася вси людие ханаану, и потребишася вси величающыися серебром. **12** И будет в той день, изыщу Иерусалима со светилником и отмщу на мужы нерадящыя о стражбах своих, глаголющыя в сердцах своих: не имать блага сотворити Господь, ниже имать озлобити. **13** И будет сила их в расхищение и дома их в разорение: и созиждут жилища и не имут пожити в них, и насадят винограды и не имут пити вина их: **14** яко близ

день Господень великий, близ и скор зело, глас дне Господня горек и жесток учинися. 15 Силен день гнева день той, день скорби и нужды, день безгодия и исчезновения, день тмы и мрака, день облака и мглы, 16 день трубы и вопля на грады твердыя и на углы высокоя. 17 И оскорблю человеки, и пойдут яко слепи, зане Господеви прегреша, и излиется кровь их яко персть, и плоти их яко лайна: 18 и сребро их и злато их не возможет изяти их в день гнева Господня, и огнем рвеня Его поядена будет вся земля: зане скончание и тщание сотворит на вся живушья на земли.

**2** Соберитесь и свяжитесь, язык ненаказанный, 2 прежде неже быти вам якоже цвети мимоходящу в день, прежде неже приити на вы гневу Господню, прежде неже приити на вы дню ярости Господни. 3 Взыщите Господа, вси смиреннии земли, суд содевайте и правды взыщите, (взыщите кротости) и отвещайте я, яко да покрываете в день гнева Господня. 4 Зане Газа расхищена будет, и Аскалон во исчезновение будет: и Азот в полудни отвержется, и Аккарон искоренится. 5 Горе живушым на ужи морстем, пришелцы Критстии: слово Господне на вас, Ханаане, земле иноплеменников, и погублю вы от жилища: 6 и будет Крит пажить стадам и ограда овцам, 7 и будет уже морское оставшым дому Иудина: на них пожируют в домех Аскалоних, к вечеру витати имут от лица сынов Иудиных, яко присети их Господь Бог их и возврати плен их. 8 Слышах поношения Моавля и укоризны сынов Аммоних, о нихже поношаху людем Моим и величахуся на пределы Моя. 9 Сего ради живу Аз, глаголет Господь Сил, Бог Израилев: зане Моав яко Содомы будет, и сынове Аммони яко Гоморра, и Дамаск оставлен яко стог гуменный и



разорен во век: и прочии людей Моих расхитят я, и оставшии языка Моего наследят их. 10 Сие им за досаждение их, зане поносиша и возвеличишася на люди Господа Вседержителя. 11 Явится Господь на них и потребит вся боги языков земных: и поклонятся Ему кийждо от места своего, вси острови язычестии. 12 И вы, Мурини, язвени оружием Моим будете. 13 И прострет руку Свою на север и погубит Ассирианина, и положит Ниневию во исчезновение безводно, яко пустыню: 14 и пожируют посреде ея стада и вси зверие земнии, и хамелеоны и ежеве во гнездах ея вогнездятся: и зверие возвыют в раселинах ея, и вранове во вратех ея, зане кедр возношение ея. 15 Сей град презорливый, живяй на уповании, глаголай в сердцы своем: аз есмь, и несть по мне еще: како бысть во исчезновение, пажить зверем? Всяк мимоходяй сквозе его позвиждет и воздвигнет руце свои.

**3** О, светлый и избавленный граде, голубице! 2 Не услыша гласа, не прият наказания, на Господа не упова и к Богу своему не приближися. 3 Князи его в нем, яко львы рыкающе, судии его яко волцы аравийстии, не оставляху на утро. 4 Пророцы его ветроносцы, мужие презорливи: священницы его сквернят святая и нечествуют в закон. 5 Господь же праведен посреде его и не имать сотворити неправды: утро утро даст суд Свой в свет: и не укрыся, и не весть неправды во истязании, ниже в распри обиды. 6 В растление низложих величавыя, исчезоша углы их: опустошу пути их весьма, еже не проходити: исчезоша гради их, занеже ни единому быти, ни жити. 7 Рех: обаче убойтеся Мене и примите наказание, и не имате потребитися от очию его, за вся елика отмстих на нем: готовися, утренюй, истле все листвие их. 8 Сего ради

потерпи Мене, глаголет Господь, в день воскресения моего  
во свидетелство: зане суд Мои в сонмища языков еже прияти  
царей, еже излияти на ня гнев Мой весь, гнев ярости Моея:  
зане огнем рвения Моего поядена будет вся земля. 9 Яко  
тогда обращаю к людем язык в род его, еже призывати: всем  
имя Господне, работати Ему под игом едином. 10 От конец  
рек Ефиопских прииму молящия Мя, в разсеянных Моих  
принесут жертвы Мне. 11 В день он не имаша постыдятся  
от всех начинаний твоих, имиже нечествовал еси в Мя: яко  
тогда отиму от тебе укоризны досаждения твоего, и ктому не  
имаша приложити величатися на горе святей Моей. 12 И  
оставлю в тебе люди кротки и смиренны, и будут благоговети  
о имени Господни 13 останцы Израилевы, и не сотворят  
неправды, и не возглаголют суетных, и не обряцется в устех  
их язык льстив: зане тии пожируют и угнездятся, и не будет  
устрашая их. 14 Радуйся, дщи Сионова, зело, проповедуй,  
дщи Иерусалимова, веселися и преукрашайся от всего  
сердца твоего, дщи Иерусалимля: 15 отят Господь неправды  
твоя, избавил тя есть из руки враг твоих: воцарится Господь  
посреде тебе, и не узриши зла ктому. 16 Во время оно речет  
Господь Иерусалиму: дерзай, Сионе, да не ослабеют руце  
твои. 17 Господь Бог твой в тебе, Сильный спасет тя, наведет  
на тя веселие и обновит тя в любви Своей, и возвеселится  
о тебе во украшении, яко в день праздника. 18 И соберу  
сотренья твоя: горе, кто приимет нань поношение? 19 Се, Аз  
сотворю в тебе тебе ради, глаголет Господь, во время оно:  
и спасу утисненную и отриновенную прииму, и положу я в  
похваление и имениты по всей земли. 20 И постыдятся во  
время оно, егда добро вам сотворю, и во время, егда прииму

вы: зане дам вы имениты и в похваление во всех людех  
земли, внегда возвращати ми пленение ваше пред вами,  
глаголет Господь.

# Книга пророка Аггея

**1** Во второе лето, при Дарии цари, в шестый месяц, в первый (день) месяца, бысть слово Господне рукою Аггеа пророка глаголя: рцы к Зоровавелю Салафиилеву от колена Иудова и ко Иисусу сыну Иоседекову, иерею великому, глаголя: **2** сице глаголет Господь Вседержитель глаголя: людие сии глаголют: не прииде время создати храм Господень. **3** И бысть слово Господне рукою Аггеа пророка глаголя: **4** аще время убо вам есть жити в домех ваших истесанных, храм же мой сей запусте? **5** И ныне сице глаголет Господь Вседержитель: устройте сердца ваша в пути ваша. **6** Сеясте много, и взяли мало: ядoste, и не в сытость: писте, и не в пиянство: облекостеся, и не согрестеся в них: и собирай мзды собра во влагалище дираво. **7** Сице глаголет Господь Вседержитель: положите сердца ваша в пути ваша, **8** възидите на гору и усецыте древа, и принесите и созиждите храм, и благоволю в нем и прославлюся, рече Господь. **9** Призресте на многа, и быша мала, и внесoste я в храм, и отдунух я: сего ради сице глаголет Господь Вседержитель: зане храм Мой есть пуст, вы же течете кийждо в дом свой, **10** сего ради удержится небо от росы, и земля оскудит изношения своя, **11** и наведу мечь на землю и на горы, и на пшеницу и на вино и на елей, и на вся, елика износит земля, и на человеки и на скоты и на вся труды рук их. **12** И слыша Зоровавель Салафиилев от колена Иудова, и Иисус Иоседеков, иерей великий, и вси прочии людие глас Господа Бога своего и словеса Аггеа пророка, якоже посла его Господь Бог их к ним, и убояшася людие от лица Господня. **13** И рече Аггей вестник Господень в вестницех Господних людем, глаголя: Аз

есмы с вами, глаголет Господь. 14 И воздвиже Господь дух Зоровавеля Салафиилева от колена Иудова и дух Иисуса Иоседекова, иереа великаго, и дух прочих всех людей: и внидоша и творяху дела во храме Господа Вседержителя Бога своего. 15 В двадесять четвертый день месяца шестаго, во второе лето, при Дарии цари,

**2** в седмый месяц, в двадесать первый месяца, глагола Господь рукою Аггеа пророка глаголя: 2 рцы ныне к Зоровавелю Салафиилеву от колена Иудова и ко Иисусу сыну Иоседекову, иерею великому, и ко всем прочиим людем, глаголя: 3 кто от вас, иже виде храм сей в славе его прежней? И како вы видите его ныне якоже не суща пред вами? 4 И ныне укрепляйся, Зоровавелю, глаголет Господь, и укрепляйся, Иисусе, сыне Иоседеков, иерею великий, и да укрепляются вси людие земли, глаголет Господь (Вседержитель), и творите: зане Аз с вами есмь, глаголет Господь Вседержитель: 5 слово, еже завещах с вами, егда исходисте из земли Египетския, и дух Мой настоит посреде вас: дерзайте, зане сице глаголет Господь Вседержитель: 6 еще единою Аз потрясу небом и землею, и морем и сушею, 7 и сотрясу вся языки, и приидут избранная всех языков: и исполню храм сей славы, глаголет Господь Вседержитель. 8 Мое серебро и Мое золото, глаголет Господь Вседержитель: 9 зане велия будет слава храма сего последняя паче первыя, глаголет Господь Вседержитель: и на месте сем дам мир, глаголет Господь Вседержитель, и мир души в снабдение всякому зиждущему, еже возставити церковь сию. 10 В двадесять четвертый девятаго месяца, во второе лето при Дарии цари, бысть слово Господне ко Аггею пророку глаголя:

11 сице глаголет Господь Вседержитель: вопроси иереев закона глаголя: 12 аще примет человек мясо свято вскрай ризы своея, и коснется край ризы его хлеба, или варива, или вина, или масла, или всякаго брашна, еда освятится? И отвещаша священницы и реша: ни. 13 И рече Аггей: аще прикоснется оскверненный или нечистый душею всякому сих, еда осквернится? И отвещаша иерее и реша: осквернится. 14 И отвеща Аггей и рече: сице людие сии, и сице язык сей предо Мною, глаголет Господь, и сице вся дела рук их: и иже аще приблизится тамо, осквернится за приятия их утренняя, побоят от лица лукавств своих, и ненавидесте во вратех обличающаго. 15 И ныне положите на сердцах ваших от дне сего и выше, прежде неже положити камень на камени в храме Господни. 16 Кто бысте, егда влагасте в мех ячмене двадесять сат, и быша ячмене десять сат? И входисте в подточилие черпати пятьдесят мер, и быша двадесять. 17 Поразих вы неплодием и ветротлением и градом вся дела рук ваших, и не обратистесь ко Мне, глаголет Господь. 18 Устройте же сердца ваша от сего дне и далее, от двадесять четвертаго дне девятаго месяца и от дне, в оньже основася церковь Господня: положите в сердцах ваших, 19 аще еще познается на гумне, и аще еще виноград, и смокви, и яблонь, и древа масличная не творящая плода? От дне сего благословлю. 20 И бысть слово Господне вторицею ко Аггею пророку в двадесять четвертый месяца глаголя: 21 рцы к Зоровавелю сыну Салафиилеву от колена Иудова глаголя: Аз потрясу небом и землею, и морем и сушею, 22 и превращу престолы царей, и потреблю силу царей языческих, и превращу колесницы и всадники, и снидут

кони и всадницы их, кийждо во оружи на брата своего.  
23 В той день, глаголет Господь Вседержитель, прииму тя,  
Зоровавелю Салафиилев, рабе Мой, глаголет Господь, и  
положу тя яко печать, понеже ты избрах, глаголет Господь  
Вседержитель.

# Книга пророка Захарии

**1** Во осмый месяц, втораго лета, при Дарии, бысть слово Господне ко Захарии Варахиину, сыну Аддову, пророку, глаголя: **2** прогневася Господь на отцы ваша гневом велиим, **3** и речеши к ним: сице глаголет Господь Вседержитель: обратитесь ко Мне, глаголет Господь Сил, и обращуся к вам, глаголет Господь Сил. **4** И не будите, якоже отцы ваши, ихже обличаху пророцы прежнии, глаголюще: сице глаголет Господь Вседержитель: отвратитесь от путей ваших лукавых и от начинаний ваших злых: и не послушаша и не вняша послушати Мене, глаголет Господь (Вседержитель). **5** Отцы ваши где суть и пророцы? Еда во век поживут? **6** Обаже словеса Моя и законы Моя приемлете, елика Аз заповедаю в Дусе Моем рабом Моим пророком, иже постигнуша отцев ваших. И отвещаша и реша: якоже устави Господь Вседержитель сотворити нам по путем нашим и по начинанием нашим, тако сотвори нам. **7** В двадесять четвертый первагонадесять месяца, сей есть месяц Сават, во второе лето, при Дарии, бысть слово Господне ко Захарии Варахиину, сыну Аддову, пророку, глаголя: **8** видех нощию, и се, муж всед на коня рыжа, и сей стояше между горами осеняющими, и за ним кони рыжы и сери, и пестри и бели, **9** и рех: что сии, господи? И рече ко мне Ангел глаголяй во мне: аз покажу ти, что суть сия. **10** И отвеща муж стояй между горами и рече ко мне: сии суть, ихже посла Господь оыти землю. **11** И отвещаша Ангелу Господню стоящему между горами и реша: обыдохом всю землю, и се, вся земля населена есть и молчит. **12** И отвеща Ангел Господень и рече: Господи Вседержителю, доколе



не имаша помиловати Иерусалима и грады Иудовы, яже презрел еси, сие седьдесятое лето? 13 И отвеща Господь Вседержитель Ангелу глаголющему во мне глаголюшы добры и словеса утешна. 14 И рече ко мне Ангел глаголяй во мне: возопий глаголя: сице глаголет Господь Вседержитель: ревновах по Иерусалиму и Сиону рвением великим, 15 и гневом велиим Аз гневаюся на языки нападающыя: зане Аз убо прогневахся мало, они же налегаша во злая. 16 Сего ради сице глаголет Господь: обращуся ко Иерусалиму щедротами, и храм Мой созиждется в нем, глаголет Господь Вседержитель, и мера протянется во Иерусалиме еще. 17 И рече ко мне Ангел глаголяй во мне: еще возопий глаголя: сице глаголет Господь Вседержитель: еще прелиятися имут грады благими, и помилует Господь еще Сиона и изберет еще Иерусалима. 18 И возведох очи мои и видех, и се, четыри рози, 19 и рех ко Ангелу глаголющему во мне: что суть сия, господи? И рече ко мне: сии рози расточившии Иуду и Израиля и Иерусалима. 20 И показа ми Господь четыри древодела. 21 И рех: что сии грядут сотворити, (господи)? И рече: сии рози расточившии Иуду, и Израиля сокрушиша, и никтоже от них воздвиже главы: и изыдоша сии поострити я в руках своих четыри рози, языцы возносящии рог на землю Господню, еже расточити ю.

**2** И возведох очи мои и видех, и се, муж, и в руке его уже землемерно. 2 И рех к нему: камо грядеши ты? И рече ко мне: размерити Иерусалима, еже видети, колика широта его есть и колика долгота. 3 И се, Ангел глаголяй во мне стояше, и ин Ангел исхождаше во сретение ему 4 и рече к нему глаголя: тецы и рцы к юноши оному глаголя: плодови

населится Иерусалим от множества человеков и скотов, иже посреде его: 5 и Аз буду ему, глаголет Господь, стена огнена окрест и в славу буду посреде его. 6 О, о, бежите от земли северныя, глаголет Господь, зане от четырех ветров небесных соберу вы, глаголет Господь: 7 в Сион спасайтесь, живущии во дщери Вавилонстей. 8 Зане сице глаголет Господь Вседержитель: вслед славы посла Мя на языки пленившыя вас, зане касаяся вас яко касаяся в зеницу ока Его: 9 зане, се, Аз наношу руку Мою на ня, и будут корысть работающим им, и уразумеете, яко Господь Вседержитель посла Мя. 10 Красуйся и веселися, дщи Сионя, зане, се, Аз гряду и вселюся посреде тебе, глаголет Господь. 11 И прибегнут языцы мнози ко Господу в той день и будут Ему в люди и вселятся посреде тебе, и уразумеши, яко Господь Вседержитель посла Мя к тебе. 12 И наследит Господь Иуду, участие Свое на земли святей, и изберет еще Иерусалима. 13 Да благоговеет всяка плоть от лица Господня, яко воста из облак святых Своих.

**3** И показа ми Господь Иисуса, иереа великаго, стояща пред лицом Ангела Господня, и диавол стояше одесную его, еже противитися ему. 2 И рече Господь ко диаволу: да запретит Господь тебе, диаволе, и да запретит Господь тебе, избравый Иерусалима: не се ли, сие яко главня исторжена из огня? 3 Иисус же бе оболчен в ризы гнусны и стояше пред лицом Ангела. 4 И отвеща и рече к стоящим пред лицом его глаголя: отимите ризы гнусныя от него. И рече к нему: се, отях от тебе беззакония твоя и грехи твоя очищу, и облещыте его в подир 5 и возложите кидар чист на главу его. И возложиша кидар чист на главу его и облекоша его в

ризы. И Ангел Господень стояше, **6** и засвидетельствоваше Ангел Господень ко Иисусу глаголя: **7** сице глаголет Господь Вседержитель: аще в путех Моих пойдеш и повеления Моя сохраниши, и ты разсудиши храм Мой: и аще сохраниши двор Мой, и дам ти соображающыя посреде стоящих сих. **8** Послушай убо, Иисусе, иерею великий, ты и искреннии твои сидящи пред лицом твоим, зане мужие дивозрителие суть: зане, се, Аз ввожду раба Моего Востока: **9** зане камень, егоже дах пред лицом Иисусовым, на камени едином седмь очес суть: се, Аз изрыю ров, глаголет Господь Вседержитель, и осяжу всю обиду земли оныя в день един. **10** В день оный, глаголет Господь Вседержитель, созовете кийждо искренняго своего под виноград и под смоковницу.

**4** И обратися Ангел глаголяй во мне и возведе мя, якоже егда встанет человек от сна своего, **2** и рече ко мне: что ты видиши? И рех: видех, и се, свещник злат весь, и светилце верху его, и седмь светилник верху его, и седмь чашиц светилником верхним его, **3** и две маслины верху его, едина одесную светилца его и едина ошуюю. **4** И вопросих и рех ко Ангелу глаголющему во мне глаголя: что суть сия, господи? **5** И отвеща Ангел глаголяй во мне и рече ко мне глаголя: не разумееш ли, что суть сия? И рех: ни, господи. **6** И отвеща и рече ко мне глаголя: сие слово Господне к Зоровавелю глаголя: не в силе велицей, ни в крепости, но в Дусе Моем, глаголет Господь Вседержитель. **7** Что ты еси, горо великая, пред лицом Зоровавеля, еже исправити? И изнесу камень наследия, равенство благодати, благодать его. **8** И бысть слово Господне ко мне глаголя: **9** руце Зоровавелевы основаша храм сей и руце его совершат его:

и уразумеешь, яко Господь Вседержитель посла Мя к вам:  
10 зане кто укорил тя есть во дни малы? И возрадуются, и увидят камень, иже от чистаго олова, в руку Зоровавеля: седьмь сия очеса Господня суть, призирающая на всю землю.  
11 И отвещах и рех к нему: что суть две маслины сия, яже одесную свещника и ошуюю? 12 И вопросих вторицею и рех к нему: что суть две ветви масличны, яже в руку двух усекалиц златых возливающих и возношающих чашицы златыя? 13 И рече ко мне глаголя: не веси ли, что суть сия? И рех: ни, господи. 14 И рече: сии два сынове тучности, яже предстоят Господеви всея земли.

**5** И обратихся и возведох очи мои и видех, и се, серп летящъ. 2 И рече ко мне: что ты видиши? И рех: аз вижду серп летящъ, в долготу лактей двадесять и в широту десяти лактей. 3 И рече ко мне: сия клятва исходящая на лице всея земли: зане всяк тать от сего даже до смерти отмщен будет, и всяк кленыйся во лжу от сего до смерти отмстится. 4 И изнесу его, глаголет Господь Вседержитель, и внидет в дом татя и в дом кленущагося именем Моим во лжу, и вселится посреде дому его, и скончает его и древа его и камение его.  
5 И изыде Ангел глаголяй во мне и рече ко мне: воззри очима твоима и виждь исходящее сие. И рех: 6 что есть? И рече: сия мера исходящая. И рече: сия неправда их по всей земли.  
7 И се, талант оловян вземляйся, и се, жена едина седяше посреде меры. 8 И рече: сия есть беззаконие. И верже ю в средину меры и вверже камень оловяный во уста ея. 9 И возведох очи мои и видех, и се, две жены исходящыя, и дух в крилех их, и те имяху крила, яко криле вдововы: и взяша меру между землею и между небом. 10 И рех ко

Ангелу глаголющему во мне: камо сия относят меру? **11** И рече ко мне: создати ей храмину в земли Вавилонстей и уготовати, и положат ю тамо на уготование свое.

**6** И обратихся и возведох очи мои и видех, и се, четыре колесницы исходящья из средины двоих гор, горы же те беша горы медяны: **2** в колеснице первой кони рыжы, и в колеснице второй кони врани, **3** и в колеснице третьей кони бели, и в колеснице четвертой кони пестри скоры. **4** И отвещах и рех ко Ангелу глаголющему во мне: что суть сия, господи? **5** И отвеща Ангел глаголяй во мне и рече: сия суть четыре ветри небеснии, иже исходят предстати Господу всея земли. **6** В нейже беху кони врани, исхождаху на землю северскую, и белии исхождаху вслед их, и пестрии исхождаху на землю южную, **7** и скории исхождаху и озираху еже ойти землю. И рече: идите, обыдите землю. И обыдоша землю. **8** И возопи и рече ко мне глаголя: се, исходящии на землю северскую упокоиша ярость Мою на земли северстей. **9** И бысть слово Господне ко мне глаголя: **10** приими, яже от плена от князей и от ключимых его и от разумевших его, и внидеси ты в день он в дом Иосии Софониина, грядущаго от Вавилона, **11** и приимеши сребро и золото, и сотвориши венцы, и возложиши на главу Иисусу Иоседекову, иерею великому, **12** и речеши к нему: сице глаголет Господь Вседержитель: се, Муж, Восток имя Ему, и под Ним возсияет, и созиждет храм Господень: **13** и той приимет добродетель, и сядет и возобладает на престоле Своем, и будет иерей одесную Его, и совет мирен будет между обема, **14** а венец будет терпящим и ключимым Ему и разумевшим Его, и в благодать сыну Софониину, и в псалом во храме Господни:

15 и издалеча от сих приидут и созиждут во храме Господни, и уразумеете, яко Господь Вседержитель посла мя к вам: и будет, аще слушающе послушаете гласа Господа Бога вашего.

**7** И бысть в четвертое лето, при Дарии цари, бысть слово Господне ко Захарии в четвертый месяца девятого, иже есть Хаселев. 2 И посла в Вефиль Сарасар и Арвесеер царь и мужие его молити Господа, 3 глаголя ко священником, иже во храме Господа (Бога) Вседержителя, и пророком, глаголя: аще вниде zde в пятый месяц святыня, (плачя или постяся,) якоже сотворих уже многа лета. 4 И бысть слово Господа Вседержителя ко мне глаголя: 5 рцы ко всем людем земли и ко священником глаголя: аще поститесь или плачевопльствисте в пятинах или седминах (месяца), и се, седмьдесят лет, постом ли поститесь Ми? 6 И аще ясте или пиете, не вы ли ясте и пиете? 7 Не сия ли суть словеса, яже глагола Господь руками пророков прежних, егда бе Иерусалим населен и гобзующ, и гради его окрест, и нагорная и подольная населена бяху? 8 И бысть слово Господне ко Захарии глаголя: 9 сице глаголет Господь Вседержитель: суд праведен судите и милость и щедроты творите кийждо ко брату своему, 10 а вдовицы и сира, и пришелца и убога не насильствуйте, и злобы кийждо брата своего да не помнит в сердцах своих. 11 И не покоришася, еже внимати, и даша плещы презирающыя, и ушеса своя отяготиша, еже не слышати, 12 и сердце свое учиниша непокориво, не послушати закона Моего и словес, яже посла Господь Вседержитель Духом Своим рукою пророков прежних: и бысть гнев великий от Господа Вседержителя. 13

И будет, якоже рече, и не услышаша Его: сице возопиют, и не имам услышати, глаголет Господь Вседержитель: 14 и отвергу я во вся языки, иже не разумеша, и земля запустеет последи их от проходящаго и от возвращающагося: и учиниша избранную землю в запустение.

**8** И бысть слово Господа Вседержителя (ко мне) глаголя: 2 сице глаголет Господь Вседержитель: ревновах по Иерусалиме и Сионе рвением великим и яростию велиею ревновах по нем. 3 Тако глаголет Господь: обращуся к Сиону и вселюся посреде Иерусалима, и наречется Иерусалим град истинный, и гора Господа Вседержителя гора святая. 4 Сице глаголет Господь Вседержитель: еще сядут старцы и старицы на путех Иерусалимских, кийждо жезл свой имый в руке своей от множества дний: 5 и путие града исполнятся отрочищ и отроковиц играющих на путех его. 6 Сице глаголет Господь Вседержитель: аще изнеможет пред останком людей сих во оных днех, еда и предо Мною изнеможет? Глаголет Господь Вседержитель. 7 Сице глаголет Господь Вседержитель: се, Аз спасу люди Моя от земли восточныя и от земли западныя 8 и введу их (в землю их), и вселюся посреде Иерусалима, и будут Ми в люди, и Аз буду им в Бога во истине и в правде. 9 Сице глаголет Господь Вседержитель: да укрепятся руке вас слышащих во днех сих словеса сия от уст пророческих, от негоже дне основася храм Господа Вседержителя, и церковь отнележе создася. 10 Зане прежде дний оных мзда человеком не бе во успех, и мзда скотом не бяше, и исходящему и входящему не бе мира от печали, и послю вся человеки коегождо на искренняго своего. 11 И ныне не по днем онем прежним Аз сотворю

останку людей сих, глаголет Господь Вседержитель, **12** но покажу мир: виноград даст плод свой, и земля даст жита своя, и небо даст росу свою, и наследити сотворю останком людей Моих сих вся сия. **13** И будет, яко бесте в клятве во языцех, доме Иудов и доме Израилев, тако спасу вы, и будете в благословении: дерзайте и укрепляйтесь руками вашими. **14** Зане сице глаголет Господь Вседержитель: якоже помыслих озлобити вы, внегда прогневаша Мя отцы ваши, глаголет Господь Вседержитель, и не раскаяхся: **15** тако уставих и умыслих во дни сия добро сотворити Иерусалиму и дому Иудову: дерзайте. **16** Сия словеса, яже сотворите: глаголите истину кийждо искреннему своему, истину и суд мирен судите во вратех ваших, **17** и кийждо злобы искреняго своего не помышляйте в сердцах ваших, и клятвы лживыя не любите, зане вся сия возненавидех, глаголет Господь Вседержитель. **18** И бысть слово Господа Вседержителя ко мне глаголя: **19** сице глаголет Господь Вседержитель: пост четвертый и пост пятый, и пост седмый и пост десятый будут дому Иудову в радость и в веселие и в праздники благи: и возвеселитесь и истину и мир возлюбите. **20** Сице глаголет Господь Вседержитель: еще людие мнози приидут и живуции во градех многих: **21** и снидутся живуции во пяти градех во един град, глаголюще: грядим помолитися лицу Господню и взыскати лице Господа Вседержителя: иду и аз. **22** И приидут людие мнози и языцы мнози взыскати лица Господа Вседержителя во Иерусалиме и умолити лице Господне. **23** Сице глаголет Господь Вседержитель: во оны дни имется десять мужей от всех племен языческих, и



имутся за ризу мужа Иудеанина, глаголюще: пойдем с тобою, зане слышахом, яко Бог с вами есть.

**9** Пророчество словесе Господня в земли Седраха и Дамаска жертвы его: зане Господь призирает на человеки и на вся колена Израилева, **2** и во Имафе в пределех его Тир и Сидон, яко умудреша зело. **3** И созда Тир твердыни себе и собра сребро яко персть и злато яко брение путей. **4** Сего ради Господь наследит я и поразит в море силу его, и той огнем поястся. **5** Увидит Аскалон и убоится, и Газа и поболит зело, и Аккарон, яко постыдеся о уповании своем: и погибнет царь от Газы, и Аскалон не имать населитися. **6** И вселятся иноплеменницы во Азоте, и разрушу досаждение иноплеменников, **7** и изму кровь их из уст их и мерзости их из средины зубов их, и оставятся и сии Богу нашему и будут яко тысящник во Иуде, и Аккарон якоже Иевусей. **8** И подставлю храму Моему воздвижение, еже не сквозе ходити, ниже возвращатися, и ктому не имать приити на ня изгоняяй: яко ныне видех очима Моима. **9** Радуйся зело, дщи Сионя, проповедуй, дщи Иерусалимля: се, Царь твой грядет тебе праведен и спасаая, той кроток и всед на подяремника и жребца юна. **10** И потребит колесницы от Ефрема и кони от Иерусалима, и потребит лук бранный, и множество, и мир от языков: и обладает водами от моря до моря и от рек до исходищ земли. **11** И ты в крови завета твоего испустил еси узники твоя от рова не имуща воды. **12** Сядите в тверделех, связани сонмища, и за един день пришелствия твоего сугубо воздам ти. **13** Занеже напрягох тя Себе, Иудо, яко лук, исполних Ефрема, и воздвигну чада твоя, Сионе, на чада Еллинска, и осяжу тя яко мечь ратника. **14** И Господь на

них явится, и изыдет яко молния стрела Его: и Господь Бог Вседержитель в трубу вострубит и пойдет в шуме прещения своего. 15 Господь Вседержитель защитит их, и поядят я, и посыплют их камением пращным, и испиют кровь их яко вино, и исполнят окрины яко жертвенник. 16 И спасет я Господь Бог их в день он, яко овцы люди Своя: зане камень свято валяется на земли Его. 17 Аще что благо его, и аще что добро его, пшеница юношам и вино благоуханно девам.

**10** Просите от Господа дождя во время раннего и позднего: Господь сотвори привидения, и дождь зимен даст им, комуждо злак на селе. 2 Зане провещающии глаголаша труды, и вражбителие видения ложна и сония лжива глаголаху, суетными утешаху: сего ради изсохша яко овцы, и озлоблени быша, понеже не бе изцеления. 3 На пастырей прогнеवासя ярость Моя, и на агнцы посещу: и посетит Господь Бог Вседержитель стадо Свое, дом Иудин, и учинит я аки коня благолепна Своего во брани. 4 И от него призре, и от него учини, и от него лук в душе ярости, и от него изыдет всяк изгоняяй в том. 5 И будут яко ратницы попирающе брение на путех во брани, и ополчатся, яко Господь с ними, и постыдятся всадницы коннии. 6 И укреплю дом Иудов и дом Иосифов спасу, и вселю я, понеже возлюбих я, и будут аки бы не отвратих их: зане Аз Господь Бог их и услышу я. 7 И будут яко ратницы Ефремовы, и возрадуется сердце их аки от вина: и чада их увидят и возвеселятся, и возрадуется сердце их о Господе. 8 Возвещу им и прииму я, зане искуплю их, и умножатся, якоже бяху мнози: 9 и всюю я в людех, и дальнии помянут Мя, и воспитают чада своя, и обратятся: 10 и возвращу я от земли Египетския и от Ассириан прииму я, и

в Галаадит и в Ливан введу я, и не имать остатки от них ни един. 11 И пройдут морем узким и поразят в мори волны, и изсякнут вся глубины речныя, и отимется всяко досаждение Ассирийско, и скиптр Египетск отимется. 12 И укреплю я о Где Боже их, и о имени Его восхвалятся, глаголет Господь.

**11** Разверзи, Ливане, двери твоя, и да пояст огонь кедры твоя: 2 да плачевопльствит питис, зане паде кедр, яко вельможи вельми обеднеша. Восплачевопльствите, дуби Васанитидстии, яко посечесе дубрава насажденная. 3 Глас плачущих пастырей, яко возбедствова величие их: глас рыкающих львов, яко озлоблено бысть шатание Иорданово. 4 Сице глаголет Господь Вседержитель: пасите овцы заколения, 5 яже стяжавши закалаху и не раскаявахуся, и продающии я глаголаху: благословен Господь, и обогатихомся: и пастырие их не печажуся ни чимже о них. 6 Сего ради не пощажду ктому на живущих на земли, глаголет Господь: и се, Аз предам человеки, коегождо в руце искреннему его и в руце царю своему: и изсекут землю, и не имам изяти от руки их. 7 И упасу овцы заколения в земли Ханаани: и прииму Себе два жезла, единого нарекох доброту, а другаго нарекох уже, и упасу овцы. 8 И погублю три пастыри в месяц един, и отягчает душа Моя на ня: ибо души их рыкаху на Мя. 9 И рех: не имам пасти вас: умирающее да умрет, и исчезающее да исчезнет, и прочая да пояст кийждо плоть ближняго своего. 10 И прииму жезл Мой добрый и отвергу его еже разорити завет Мой, егоже завещах ко всем людям: 11 и разорится в день оный, и уразумеют Хананеи овцы хранимыя Мне, зане слово Господне есть. 12 И реку к ним: аще добро пред вами есть, дадите мзду Мою, или отрецываете. И поставиша мзду

Мою тридесять сребреник. **13** И рече Господь ко мне: вложи я в горнило и смотри, аще искушено есть, имже образом искушен бых о них. И приях тридесять сребреник и вложих их в храм Господень в горнило. **14** И отвергох жезл вторый уже, еже разорити завет иже посреде Иуды и посреде Израиля. **15** И рече Господь ко мне: еще приими себе сосуды пастырски, пастыря неискусна: **16** зане, се, Аз воздвигну пастыря на землю: погибающаго не посетит и расточеннаго не имать взыскати, и сокрушеннаго не имать изцелити и здраваго не имать направити, и мяса избранных пояст и глезны их извиет. **17** О, пасущии суетная и оставльшии овец! Мечь на мышцу его и на око ему десное: мышца его изсыхающа изсхнет, и око ему десное ослепая ослепнет.

**12** Пророчество словесе Господня на Израиля, глаголет Господь, прострый небо и основаяй землю и созидаая дух человека в нем: **2** се, Аз полагаю Иерусалима яко преддверия движимая всем людем окрест, и во Иудеи будет обседение на Иерусалима: **3** и будет в день оный, положу Иерусалима камень попираемый всеми языки: всяк попираяй его ругаяся поругается, и соберутся нань вси языцы земли. **4** В день он, глаголет Господь Вседержитель, поражу всякаго коня во ужас и всадника его в безумие: и на дом Иудов отверзу очи Мои и вся кони людий поражу во ослепление. **5** И рекут тысящницы Иудины вси в сердцах своих: обрящем себе живуцья во Иерусалиме о Господе Вседержители Бозе их. **6** В день он положу тысящники Иудины яко главню огненну в дровах и яко свещу огненну в стеблии, и поядят одесную и ошуюю вся люди окрест: и населится Иерусалим еще по себе во Иерусалиме: **7** и спасет Господь селения

Иудова якоже исперва, яко да не величается похвала дому Давидова и величания живущих во Иерусалиме на Иуду. **8** И будет в день он, защитит Господь живущих во Иерусалиме: и будет немощный в них в той день яко Давид, а дом Давидов яко дом Божий, якоже Ангел Господень пред ними. **9** И будет в день он, взыщу изяти вся языки грядущыя на Иерусалим, **10** и излию на дом Давидов и на живущыя во Иерусалиме дух благодати и щедрот, и воззрят Нань, Егоже прободоша, и восплачутся о Нем плаканием яко о возлюбленном, и поболят о Нем болезнию яко о первенце. **11** В день он возвеличится плачевопльствие во Иерусалиме, яко плачевопльствие Ададримона на поли Магедоне. **12** И восплачется земля по племеном племеном: колено о себе, и жены их о себе: колено дому Давидова о себе и жены их о себе: **13** колено дому Нафанова о себе, и жены их о себе: колено дому Левиина о себе, и жены их и себе: колено Симеоне о себе, и жены их о себе: **14** вся прочая колена, колено и колено о себе, и жены их о себе.

**13** В день он будет всяко место отверзаемо дому Давидову и живущым во Иерусалиме в передвижение и разделение. **2** И будет в день он, глаголет Господь Саваоф, потреблю имена идолов от земли, и ктому не будет их памяти: и лживыя пророки и духа нечистаго изму от земли. **3** И будет, аще проречет человек еще, и речет к нему отец его и мати его, рождшии его, внегда пророчествовати ему: не жив будеши, яко лжу глаголал еси во имя Господне: и запнут ему отец его и мати его, родившии его, егда пророчествовати начнет. **4** И будет в день он, постыдятся пророцы, кийждо от видения своего, внегда пророчествовати

ему, и облекутся в кожу власяную, зане солгаша. 5 И речет: несъм пророк аз, яко человек делаяй землю аз есмь, зане человек роди мя от юности моя. 6 И реку к нему: что язвы сия посреде руку твою? И речет: имиже уязвлен бых в дому возлюбленного моего. 7 Мечу, востани на пастыря Моего и на мужа гражданина Моего, глаголет Господь Вседержитель: порази пастыря, и расточатся овцы стада: и наведу руку Мою на (малья) пастыри. 8 И будет в день он на всей земли, глаголет Господь, две части ея потребятся и исчезнут, а третья останется на ней: 9 и проведу третью часть сквозе огонь, и разгжу я, якоже разжизается сребро, и искушу я, якоже искушается злато: той призовет имя Мое, и Аз услышу его и реку: людие Мои сии суть. И тии рекут: Господь Бог мой.

**14** Се, дние Господни грядут, и разделятся корысти твоя в тебе: 2 и соберу вся языки на Иерусалим в брань, и пленится град, и расхитятся домовые, и жены осквернятся: и изыдет пол града в пленение, а останок людей Моих не потребятся от града. 3 И изыдет Господь и ополчится на языки оны, якоже день ополчения его в день брани. 4 И станут нозе Его в день он на горе Елеонстей, яже есть прямо Иерусалиму на восток: и разделится гора Елеонская, пол ея к востоком и пол ея к морю, пропасть велия зело: и уклонится пол горы на север и пол ея на юг: 5 и засыплется дебрь гор Моих, и прильпнет дебрь горняя даже до Асаила и наполнится, якоже наполнился от лица труса во днех Озии царя Иудова: и приидет Господь Бог мой, и вси святии с Ним. 6 И будет в день он, не будет свет, но зима и мраз: 7 и будет день един, и день той знаемь будет Господеви, и не день и не

ночь, и при вечере будет свет. 8 И в день он изыдет вода жива из Иерусалима, пол ея в море первое и пол ея в море последнее: и в жатву и в весну будет тако. 9 И будет Господь в Царя по всей земли: в день он будет Господь един, и имя Его едино, 10 обходя всю землю и пустыню, от Гаваи и до Реммона, на юг Иерусалиму: и вознесется на месте и пребудет от врат Вениаминых до места врат первых, даже до врат угловых и до столпа Анамеиля и до подточилия царева. 11 И вселятся в нем, и анафема не будет ктому, и вселится Иерусалим надеяйся. 12 И сие будет падение, имже иссечет Господь вся люди, елицы воеваша на Иерусалим: истают плоти их стоящих на ногах своих, и очеса им истекут из обочий их, и язык их истает во устех их. 13 И будет в день он ужас Господень велий на них: и имутся кийждо за руку ближняго своего, и соплетется рука его к руке ближняго своего. 14 И Иуда ополчится во Иерусалиме и соберет крепость всех людей окрест, злато и серебро и ризы во множество зело. 15 И сие будет падение конем и мском, и велблюдом и ослом, и всем скотом сущым в полцех оных, по падению сему. 16 И будет, елицы аще останутся от всех язык пришедших на Иерусалим, и взыдут на всякое лето поклоняться Царю Господу Вседержителю и праздновати праздник скинопигии. 17 И будет, елицы аще не взыдут от всех племен земли во Иерусалим поклонится Царю Господу Вседержителю, и сии онем приложатся, не будет на них дождя. 18 Аще же колено Египетское не взыдет, ни приидет, и на сих будет язва, еюже поразит Господь вся языки, елицы аще не взыдут, еже праздновати праздник скинопигии. 19 Сей будет грех Египту и грех всем языком, елицы аще не

взыдут, еже праздновати праздник скинопигии. 20 В день он будет еже во узде коня, свято Господу Вседержителю: и будут коноби в дому Господни яко чашы пред лицем олтаря, 21 и будет всяк коноб во Иерусалиме и во Иуде свят Господеви Вседержителю: и приидут вси жрущии и примут от них и сварят в них, и не будет Хананей ктому во храме Господа Вседержителя в день он.



# Книга пророка Малахии

**1** Пророчество словесе Господня на Израиля рукою ангела  
Его: положите убо на сердцах ваших. **2** Возлюбих вы, глаголет  
Господь. И ресте: о чем возлюбил еси ны? Не брат ли бе  
Исав Иакову? Глаголет Господь: и возлюбих Иакова, Исава  
же возненавидех, **3** и учиних пределы его во исчезновение  
и достояние его в нырища пустынна. **4** Зане аще речет:  
Идумеа разорися, и обратимся и возсозиждем опустевшая  
ея: сице глаголет Господь Вседержитель: тии созиждут, и Аз  
разорю, и нарекутся им пределе беззакония, и людие, на  
няже ополчися Господь до века. **5** И очеса ваша увидят, и вы  
речете: возвеличися Господь превыше предел Израилевых.  
**6** Сын славит отца, и раб господина своего убоится: и аще  
Отец есмь Аз, то где слава Моя? И аще Господь есмь Аз,  
то где есть страх Мой? Глаголет Господь Вседержитель.  
Вы священницы презирающии имя Мое. И ресте: о чесом  
презрехом имя Твое? **7** Приносяще ко олтареву Моему хлебы  
скверны. И ресте: о чесом осквернихом я? Внегда глаголати  
вам: трапеза Господня осквернена есть: и возложенная  
брашна уничижили есте. **8** Зане аще приведете слепо на  
жертву, не зло ли? И аще приведете хромо или недужно, то  
не зло ли? Приведи е князю твоему, еда приимет е? Еда  
приимет лице твое? Глаголет Господь Вседержитель. **9** И  
ныне умилостивите лице Бога вашего и помолитесь Ему, (да  
помилует вы). В руках ваших быша сия, аще прииму от вас  
лица ваша? Глаголет Господь Вседержитель. **10** Зане и в  
вас затворятся двери, и не возгнетите огня олтареву Моему  
туне: несть воля Моя в вас, глаголет Господь Вседержитель,  
и жертвы не прииму от рук ваших. **11** Зане от восток солнца и

до запад имя Мое прославися во языцех, и на всяцем месте  
фимиам приносится имени Моему и жертва чиста: зане велие  
имя Мое во языцех, глаголет Господь Вседержитель. 12 Вы  
же скверните е глаголюще: трапеза Господня осквернена  
есть, и возлагаемая брашна его уничтожена быша. 13 И  
ресте: сия от злострадания суть. И отдунух я, глаголет  
Господь Вседержитель. И внесосте хищения и хромая и  
недужная, и приведете я на жертву, еда прииму их от рук  
ваших? Глаголет Господь Вседержитель. 14 И проклят, иже  
бе силен, и бе ему в стаде его мужеск пол, и обет его на  
нем, и жрет растленное Господеви: зане Царь велий Аз  
есмы, глаголет Господь Вседержитель, и имя Мое светло во  
языцех.

**2** И ныне заповедь сия к вам, священницы: 2 аще не  
услышите и аще не положите на сердца ваших, еже дати  
славу имени Моему, глаголет Господь Вседержитель, то  
послю на вы клятву и проклену благословение ваше и оклену  
е: и разорю благословение ваше, и не будет в вас, зане вы  
не влагаете в сердца ваша. 3 Се, Аз отлучу вам рамо, и  
раскидаю требухи на лица ваша, требухи праздников ваших,  
и прииму вы вкупе: 4 и уразумеете, яко Аз Господь послах  
к вам заповедь сию, еже быти завету Моему к Левитом,  
глаголет Господь Вседержитель. 5 Завет Мой бе с ним жизни  
и мира, и дах ему боязнию бояться Мене и от лица имене  
Моего устрашится ему. 6 Закон истины бе во устех его,  
и неправда не обретется во устнах его: в мире исправляй  
иде со Мною и многи обрати от неправды. 7 Понеже устне  
иереовы сохраняют разум, и закона взыщут от уст его: яко  
ангел Господа Вседержителя есть. 8 Вы же уклонистесь от

пути и изнемошеством многих в законе, растлисте завет  
Левиин, глаголет Господь Вседержитель. 9 И Аз дах вы  
уничижены и отвержены во вся языки, зане вы не сохранисте  
путий Моих, но лиц обинустеся в законе. 10 Не Отец ли един  
всем вам? Не Бог ли един созда вас? Что яко остависте  
кийждо брата своего, осквернити завет отец ваших? 11  
Оставлен бысть Иуда, и мерзость бысть во Израили и во  
Иерусалиме: зане оскверни Иуда святая Господня, яже  
возлюби, и преиде к богом чуждим. 12 Потребит Господь  
человека творящаго сия, дондеже смирится от селений  
Иаковлих и от приносящих жертву Господу Вседержителю.  
13 И сия, яже ненавидех, твористе: покрывасте слезами  
олтарь Господень, и плачем и воздыханием от трудов:  
еще ли достойно призрети на жертву (вашу), или прияти  
приятно из рук ваших? 14 И ресте: чесо ради? Яко Господь  
засвидетелствова между тобою и между женою юности  
твоя, юже оставил еси, и та общница твоя и жена завета  
твоего: 15 и не добро ли сотвори, и останок духа его? И  
ресте: что ино кроме семени ищет Бог? И сохранисте духом  
вашим и жены юности твоя да не оставиши: 16 но аще  
возненавидев отпустиши ю, глаголет Господь Бог Израилев,  
и покрьет нечестие помышления твоя, глаголет Господь  
Вседержитель: и сохранисте духом вашим и не оставите. 17  
Прогневляющии Бога словесы вашими, и ресте: о чесом  
прогневахом Его? Зане ресте: всяк творяй зло добр пред  
Господем, и в них Сам благоволи: и где есть Бог правды?

**3** Се, Аз посылаю Ангела Моего, и призрит на путь пред  
лицем Моим: и внезапно приидет в церковь Свою Господь,  
Егоже вы ищите, и Ангел завета, Егоже вы хотите: се,


грядет, глаголет Господь Вседержитель. 2 И кто стерпит день пришествия Его? И кто постоит в видении Его? Зане Той входит яко огонь горнила и яко мыло перущих. 3 И сядет разваряя и очищая яко серебро и яко золото, и очистит сыны Левиины, и прелиет я яко золото и яко серебро: и будут Господеви приносяще жертву в правде. 4 И угодна будет Господеви жертва Иудова и Иерусалимля, якоже дние века и якоже лета преждняя. 5 И прииду к вам с судом, и буду свидетель скор на чародеи и на прелюбодейцы, и на кленущыя именем Моим во лжу и на лишающыя мзды наемника, и на насильствующыя вдовиц и пхающыя сирья, и на укланяющыя суд пришелца и на небоящыя Мене, глаголет Господь Вседержитель: 6 зане Аз Господь Бог ваш, и не изменяюся, и вы сынове Иаковли не удаляетеся от грех отец ваших. 7 Уклонистеся от законов Моих и не сохранисте: обратитесь ко Мне, и обращуся к вам, глаголет Господь Вседержитель. И ресте: в чесом обратимся? 8 Еда обольстит человек Бога? Зане вы обольщаете Мя. И ресте: в чесом обольстихом Тя? Яко десятины и начатцы с вами суть. 9 И взирающе вы взираете, и Мене вы обольщаете. 10 Лето скончася, и внесосте вся плоды в сокровища, и будет расхищение Его в дому Его: обратитесь убо о сем, глаголет Господь Вседержитель: аще не отверзу вам хлябий небесных и излию вам благословение Мое, дондеже удволитесь: 11 и разделю вам в брашно, и не имам истлити вам плодов земных, и не изнеможет ваш виноград на селе, глаголет Господь Вседержитель: 12 и ублажат вы вси языцы, зане будете вы земля пожеланная, глаголет Господь Вседержитель. 13 Отяготисте на Мя словеса ваша,

глаголет Господь (Вседержитель). И ресте: о чем клеветахом на Тя? 14 Ресте: суетен работаяй Богу, и что более, яко сохранихом храненияя Его и яко идохом молитвенницы пред лицем Господа Вседержителя? 15 И ныне мы блажим чуждих, и созидаются вси творящии беззаконная, сопротивишася Богови и спасошася. 16 Сия рекоша боящиися Господа, кийждо ко искреннему своему: и внят Господь, и услыша, и написа книгу памяти пред Собою боящимся Господа и благоговеющим имя Его. 17 И будут Ми, глаголет Господь Вседержитель, в день, егоже Аз творю в снабдение, и изберу я, имже образом избирает человек сына своего (добре) работающа ему. 18 И обратитесь и увидите между праведным и между беззаконным, и между служащим Богови и не служащим Ему.

**4** Яко се, день грядет горящъ яко пещь и попалит я, и будут вси иноплеменницы и вси творящии беззаконная яко стеблие: и возжжет я день Господень грядый, глаголет Господь Вседержитель, и не останется от них корень ниже ветвь. 2 И возсияет вам боящимся имене Моего Солнце правды и изцеление в крилех Его: и изыдете и възыграете, якоже телцы от уз разрешени: 3 и попереете беззаконники, и будут пепел под ногами вашими в день, в онъже Аз сотворю, глаголет Господь Вседержитель. 4 Помяните закон Моисеа раба Моего, якоже повелех ему в Хориве ко всему Израилю повеления и оправдания. 5 И се, Аз пошлю вам Илию Фесвитянина, прежде пришествия дне Господня великаго и просвещеннаго, 6 иже устроит сердце отца к сыну и сердце человека ко искреннему его, да не пришед поражу землю в конец.



# NEW TESTAMENT



*Иисус же глаголаше: Отче, отпусти им: не ведают бо что творят.  
Разделяюще же ризы Его, метяху жребия.  
От Луки святое благовествование 23:34*



## От Матфея святое благовествование

**1** Книга родства Иисуса Христа, Сына Давидова, Сына Авраамля. **2** Авраам роди Исаака. Исаак же роди Иакова. Иаков же роди Иуду и братию его. **3** Иуда же роди Фареса и Зару от Фамары. Фарес же роди Есрома. Есром же роди Арама. **4** Арам же роди Аминадава. Аминадав же роди Наассона. Наассон же роди Салмона. **5** Салмон же роди Вооза от Рахавы. Вооз же роди Овида от Руфы. Овид же роди Иессея. **6** Иессей же роди Давида царя. Давид же царь роди Соломона от Уриины. **7** Соломон же роди Ровоама. Ровоам же роди Авию. Авия же роди Асу. **8** Аса же роди Иосафата. Иосафат же роди Иорама. Иорам же роди Озию. **9** Озия же роди Иоафама. Иоафам же роди Ахаза. Ахаз же роди Езекию. **10** Езекиа же роди Манассию. Манассия же роди Амона. Амон же роди Иосию. **11** Иосия же роди Иехонию и братию его, в преселение Вавилонское (в неких греч.: Иосия же роди Иоакима и братию его. Иоаким же роди Иехонию в преселение Вавилонское.). **12** По преселении же Вавилонстем, Иехониа роди Салафииля. Салафииль же роди Зоровавеля. **13** Зоровавель же роди Авиуда. Авиуд же роди Елиакима. Елиаким же роди Азора. **14** Азор же роди Садока. Садок же роди Ахима. Ахим же роди Елиуда. **15** Елиуд же роди Елеазара. Елеазар же роди Матфана. Матфан же роди Иакова. **16** Иаков же роди Иосифа, мужа Мариина, из Неяже родися Иисус, глаголемый Христос. **17** Всех же родов от Авраама до Давида родове четырнадцать: и от Давида до преселения Вавилонскаго родове четырнадцать: и от преселения Вавилонскаго до Христа родове четырнадцать.

18 Иисус Христово Рождество сице бе: обрученной бо бывши Матери Его Марии Иосифови, прежде даже не снитися има, обретеса имущи во чреве от Духа Свята. 19 Иосиф же муж Ея, праведен сый и не хотя Ея обличити, восхоте тай пустити Ю. 20 Сия же ему помыслившу, се, Ангел Господень во сне явися ему, глаголя: Иосифе, сыне Давидов, не убойся прияти Мариам жены твоея: рождшеебося в Ней, от Духа есть Свята: 21 родит же Сына, и наречеши имя Ему Иисус: Той бо спасет люди Своя от грех их. 22 Сие же все бысть, да сбудется реченное от Господа пророком, глаголющим: 23 се, Дева во чреве примет и родит Сына, и нарекут имя Ему Еммануил, еже есть сказуемо: с нами Бог. 24 Востав же Иосиф от сна, сотвори якоже повеле ему Ангел Господень, и прият жену свою, 25 и не знаяше Ея, дондеже роди Сына Своего первенца, и нарече имя Ему Иисус.

**2** Иисусу же рождшуся в Вифлееме Иудейстем во дни Ирода царя, се, волсви от восток приидоша во Иерусалим, глаголюще: 2 где есть рождейся Царь Иудейский? Видехом бо звезду Его на востоце и приидохом поклонитися Ему. 3 Слышав же Ирод царь смутися, и весь Иерусалим с ним. 4 И собрав вся первосвященники и книжники людския, вопрошаше от них: где Христос раждается? 5 Они же рекоша ему: в Вифлееме Иудейстем, тако бо писано есть пророком: 6 и ты, Вифлееме, земле Иудова, ни чимже менши еси во владыках Иудовых: из тебе бо изыдет Вождь, Иже упасет люди Моя Израиля. 7 Тогда Ирод тай призва волхвы, и испытоваше от них время явльшиися звезды, 8 и послав их в Вифлеем, рече: шедше испытайте известно о Отрочати: егда же обряцете, возвестите ми, яко да и аз шед поклонюся Ему.

9 Они же послушавше царя, идоша. И се, звезда, юже видеша на востоце, идяше пред ними, дондеже пришедши ста верху, идеже бе Отроча. 10 Видевше же звезду, возрадовашася радостию велиею зело, 11 и пришедше в храмину, видеша Отроча с Мариєю Материю Его, и падше поклонишася Ему: и отверзше сокровища своя, принесоша Ему дары, злато и ливан и смирну. 12 И весть приемше во сне не возвратитися ко Ироду, иным путем отидоша во страну свою. 13 Отшедшым же им, се, Ангел Господень во сне явися Иосифу, глаголя: востав поими Отроча и Матерь Его, и бежи во Египет, и буди тамо, дондеже реку ти: хошет бо Ирод искати Отрочате, да погубит Е. 14 Он же востав, поят Отроча и Матерь Его нощию, и отиде во Египет, 15 и бе тамо до умертвия Иродова: да сбудется реченное от Господа пророком, глаголющим: от Египта возвах Сына Моего. 16 Тогда Ирод виде, яко поруган бысть от волхвов, разгневался зело и послав изби вся дети сущия в Вифлееме и во всех пределех его, от двою лету и нижайше, по времени, еже известно испытана от волхвов. 17 Тогда сбывся реченное Иеремием пророком, глаголющим: 18 глас в Рае слышан бысть, плачь и рыдание и вопль мног: Рахиль плачущися чад своих, и не хотяше утешитися, яко не суть. 19 Умершу же Ироду, се, Ангел Господень во сне явися Иосифу во Египте, 20 глаголя: востав поими Отроча и Матерь Его И иди в землю Израилеву, изомроша бо ищущии души Отрочате. 21 Он же востав, поят Отроча и Матерь Его и прииде в землю Израилеву. 22 Слышав же, яко Архелай царствует во Иудеи вместо Ирода отца своего, убоися тамо ити: весть же приемь во сне, отиде в пределы Галилейския 23 и пришед вселися

во граде нарицаемем Назарет: яко да сбудется реченное пророки, яко Назорей наречется.

**3** Во дни же оны прииде Иоанн Креститель, проповеда в пустыни Иудейстей **2** и глаголя: покайтесь, приближибось Царствие Небесное. **3** Сей бо есть реченный Исаием пророком, глаголющим: глас вопиющаго в пустыни: уготовайте путь Господень, правы творите стези Его. **4** Сам же Иоанн имяше ризу свою от влас велблуждь и пояс усмен о чреслах своих: снесь же его бе пружие и мед дивий. **5** Тогда исхождаше к нему Иерусалима, и вся Иудея, и вся страна Иорданская, **6** и крещася во Иордане от него, исповедающе грехи своя. **7** Видев же (Иоанн) многи фарисеи и саддукеи грядущия на крещение его, рече им: рождения ехиднова, кто сказа вам бежати от будущаго гнева? **8** Сотворите убо плод достоин покаяния, **9** и не начинайте глаголати в себе: отца имамы Авраама: глаголю бо вам, яко может Бог от камня сего воздвигнути чада Аврааму: **10** уже бо и секира при корени древа лежит: всяко убо древо, еже не творит плода добра, посекаемо бывает и во огонь вметаемо: **11** аз убо крещая вы водою в покаяние: Грядый же по мне креплий мене есть, Емуже несмь достоин сапоги понести: Той вы крестит Духом Святым и огнем: **12** емуже лопата в руце Его, и отребит гумно Свое, и соберет пшеницу Свою в житницу, плевы же сожжет огнем негасающим. **13** Тогда приходит Иисус от Галилеи на Иордан ко Иоанну креститися от него. **14** Иоанн же възбраняше Ему, глаголя: аз требую Тобою креститися, и Ты ли грядеши ко мне? **15** Отвещав же Иисус рече к нему: остави ныне: тако бо подобает нам исполнити всяку правду. Тогда остави Его. **16** И крестився Иисус възыде

абие от воды: и се, отверзошася Ему небеса, и виде Духа Божия сходяща яко голубя и грядуща на Него. 17 И се, глас с небесе глаголя: Сей есть Сын Мой возлюбленный, о Немже благоволих.

**4** Тогда Иисус возведен бысть Духом в пустыню искутитися от диавола, 2 и постився дний четьредесять и нощий четьредесять, последи взалка. 3 И приступль к Нему искучитель рече: аще Сын еси Божий, рцы, да камене сие хлебы будут. 4 Он же отвещав рече: писано есть: не о хлебе едином жив будет человек, но о всяцем глаголголе исходящем изо уст Божиих. 5 Тогда поят Его диавол во святыи град, и постави Его на криле церковнем, 6 и глагола Ему: аще Сын еси Божий, верзися низу: писано бо есть, яко Ангелом Своим заповесть о Тебе (сохранити Тя), и на руках возмут Тя, да не когда преткнеши о камень ногу Твою. 7 Рече (же) ему Иисус: паки писано есть: не искусиши Господа Бога твоего. 8 Паки поят Его диавол на гору високу зело, и показа Ему вся царствия мира и славу их, 9 и глагола Ему: сия вся Тебе дам, аще пад поклонимися. 10 Тогда глагола ему Иисус: иди за Мною, сатано: писано бо есть: Господу Богу твоему поклонися и Тому единому послужиши. 11 Тогда остави Его диавол, и се, Ангели приступиша и служаху Ему. 12 Слышав же Иисус, яко Иоанн предан бысть, отиде в Галилею, 13 и оставль Назарет, пришед вселися в Капернаум в поморие, в пределех Завулоних и Неффалимлих: 14 да сбудется реченное Исаием пророком, глаголющим: 15 земля Завулоня и земля Неффалимля, путь моря об он пол Иордана, Галилея язык, 16 людие седящии во тме видеша свет велий, и седящым в стране и сени смертней, свет

возсия им. 17 Оттоле начат Иисус проповедати и глаголати: покаятеся, приближися бо Царство Небесное. 18 Ходя же при мори Галилейстем, виде два брата, Симона глаголемаго Петра, и Андреа брата его, вметающа мрежи в море, беста бо рыбаля: 19 и глагола има: грядита по Мне, и сотворю вы ловца человеком. 20 Она же абие оставльша мрежи, по Нем идоста. 21 И прешед оттуду, виде ина два брата, Иакова Зеведеева, и Иоанна брата его, в корабли с Зеведеом отцем ею, завязующа мрежи своя, и воззва я. 22 Она же абие оставльша корабль и отца своего, по Нем идоста. 23 И проходилаше всю Галилею Иисус, учя на сонмищих их и проповедаю Евангелие Царствия, изцеляя всяк недуг и всяку язю в людех. 24 И изыде слух Его по всей Сирии: и приведоша к Нему вся болящия, различными недуги и страстьми одержимы, и бесны, и месячныя, и расслабленныя (жилами): и изцели их. 25 И по Нем идоша народи мнози от Галилеи и десяти град, и от Иерусалима и Иудеи, и со онаго полу Иордана.

**5** Узрев же народы, възиде на гору: и седшу Ему, приступиша к Нему ученицы Его. 2 И отверз уста Своя, учаше их, глаголя: 3 блажени нищии духом: яко тех есть Царствие Небесное. 4 Блажени плачущии: яко тии утешатся. 5 Блажени кротцыи: яко тии наследят землю. 6 Блажени алчущии и жаждущии правды: яко тии насытятся. 7 Блажени милостивии: яко тии помиловани будут. 8 Блажени честии сердцем: яко тии Бога узрят. 9 Блажени миротворцы: яко тии сынове Божии нарекутся. 10 Блажени изгнани правды ради: яко тех есть Царствие Небесное. 11 Блажени есте, егда поносят вам, и ижденут, и рекут всяк зол глагол на вы лжуще, Мене

ради: 12 радуйтесь и веселитесь, яко мзда ваша многа на небесех: тако бо изгнаша пророки, иже (беша) прежде вас. 13 Вы есте соль земли: аще же соль обуяет, чим осолится? Ни во чтоже будет ктому, точию да изсыпана будет вон и попираема человеки. 14 Вы есте свет мира: не может град укрытися верху горы стоя: 15 ниже вжигают светилника и поставляют его под спудом, но на свещнице, и светит всем, иже в храмине (суть). 16 Тако да просветится свет ваш пред человеки, яко да видят ваша добрая дела и прославят Отца вашего, Иже на небесех. 17 (Да) не мните, яко приидох разорити закон, или пророки: не приидох разорити, но исполнити. 18 Аминь бо глаголю вам: дондеже преидет небо и земля, иота едина, или едина черта не преидет от закона, дондеже вся будут. 19 Иже аще разорит едину заповедий сих малых и научит тако человеки, мний наречется в Царствии Небеснем: а иже сотворит и научит, сей велиий наречется в Царствии Небеснем. 20 Глаголю бо вам, яко аще не избудет правда ваша паче книжник и фарисей, не внидете в Царствие Небесное. 21 Слышасте, яко речено бысть древним: не убиеш: иже (бо) аще убьет, повинен есть суду. 22 Аз же глаголю вам, яко всяк гневаяйся на брата своего всуе повинен есть суду: иже бо аще речет брату своему: рака, повинен есть сонмищу: а иже речет: уроде, повинен есть геенне огненной. (Geenna g1067) 23 Аще убо принесеши дар твой ко олтарю и ту помянеш, яко брат твой имать нечто на тя: 24 остави ту дар твой пред олтарем и шед прежде смирися с братом твоим, и тогда пришед принеси дар твой. 25 Буди увещавався с соперником твоим скоро, дондеже еси на пути с ним, да не предаст

тебе соперник судии, и судия тя предаст слузе, и в темницу  
ввержен будеши: 26 аминь глаголю тебе: не изыдеши оттуду,  
дондеже воздаси последний кодрант. 27 Слышасте, яко  
речено бысть древним: не прелюбы сотвориши. 28 Аз же  
глаголю вам, яко всяк, иже воззрит на жену ко еже вожделети  
ея, уже любодействова с нею в сердцы своем: 29 аще же  
око твое десное соблажняет тя, изми е и верзи от себе: уне  
бо ти есть, да погибнет един от уд твоих, а не все тело твое  
ввержено будет в геенну (огненную): (Geenna g1067) 30 и аще  
десная твоя рука соблажняет тя, усецы ю и верзи от себе: уне  
бо ти есть, да погибнет един от уд твоих, а не все тело твое  
ввержено будет в геенну. (Geenna g1067) 31 Речено же бысть,  
яко иже аще пустит жену свою, да даст ей книгу распустную.  
32 Аз же глаголю вам, яко всяк отпущаяй жену свою, разве  
словесе любодейнаго, творит ю прелюбодействовати: и иже  
пущеницу поймет, прелюбодействует. 33 Паки слышасте, яко  
речено бысть древним: не во лжу кленешися, воздаси же  
Господеви клятвы твоя. 34 Аз же глаголю вам не клятися  
всяко: ни небом, яко престол есть Божий: 35 ни землею,  
яко подножие есть ногама Его: ни Иерусалимом, яко град  
есть великаго Царя: 36 ниже главою твоею кленися, яко не  
можеши власа единаго бела или черна сотворити: 37 буди  
же слово ваше: ей, ей: ни, ни: лишше же сею от неприязни  
есть. 38 Слышасте, яко речено бысть: око за око, и зуб за  
зуб. 39 Аз же глаголю вам не противитися злу: но аще тя  
кто ударит в десную твою ланиту, обрати ему и другую: 40  
и хотящему судитися с тобою и ризу твою взяти, отпусти  
ему и срачицу: 41 и аще кто тя поймет по силе поприще  
едино, иди с ним два. 42 Просящему у тебе дай, и хотящаго



от тебе зяяти не отврати. **43** Слышасте, яко речено есть: возлюбиши искренняго твоего и возненавидиши врага твоего. **44** Аз же глаголю вам: любите враги ваша, благословите кленущыя вы, добро творите ненавидящым вас, и молитесь за творящих вам напасть и изгонящыя вы, **45** яко да будете сынове Отца вашего, Иже есть на небесех: яко солнце Свое сияет на злыя и благия и дождит на праведныя и на неправедныя. **46** Аще бо любите любящих вас, кую мзду имате? Не и мытари ли тожде творят? **47** И аще целуете други ваша токмо, что лишше творите? Не и язычницы ли такожде творят? **48** Будите убо вы совершени, якоже Отец ваш Небесный совершен есть.

**6** Внемлите милостыни вашае не творити пред человеки, да видими будете ими: аще ли же ни, мзды не имате от Отца вашего, Иже есть на небесех. **2** Егда убо твориши милостыню, не воструби пред собою, якоже лицемери творят в сонмищих и в стогнах, яко да прославятся от человек. Аминь глаголю вам, восприемлют мзду свою. **3** Тебе же творящу милостыню, да не увесь шуйца твоя, что творит десница твоя, **4** яко да будет милостыня твоя в тайне: и Отец твой, видяй в тайне, той воздаст тебе яве. **5** И егда молишися, не буди якоже лицемери, яко любят в сонмищих и в стогнах путей стояще молитися, яко да явятся человеком. Аминь глаголю вам, яко восприемлют мзду свою. **6** Ты же, егда молишися, вниди в клеть твою, и затворив двери твоя, помолися Отцу твоему, Иже в тайне: и Отец твой, видяй в тайне, воздаст тебе яве. **7** Молящися же не лишше глаголите, якоже язычницы: мнят бо, яко во многоглаголании своем услышани будут: **8** не подобитеся убо им: весть бо Отец

ваш, ихже требуете, прежде прошения вашего. 9 Сице убо молитесь вы: Отче наш, иже еси на небесех, да святится имя Твое: 10 да приидет Царствие Твое: да будет воля Твоя, яко на небеси, и на земли: 11 хлеб наш насущный даждь нам днесь: 12 и остави нам долги наша, яко и мы оставляем должником нашим: 13 и не введи нас в напасть, но избави нас от лукаваго: яко Твое есть Царствие и сила и слава во веки. Аминь. 14 Аще бо отпускаете человеком согрешения их, отпустит и вам Отец ваш Небесный: 15 аще ли не отпускаете человеком согрешения их, ни Отец ваш отпустит вам согрешений ваших. 16 Егда же поститесь, не будите якоже лицемери сетующе: помрачат бо лица своя, яко да явятся человеком постящися. Аминь глаголю вам, яко восприемлют мзду свою. 17 Ты же постяся помажи главу твою, и лице твое умый, 18 яко да не явишия человеком постяся, но Отцу твоему, Иже в тайне: и Отец твой, видяй в тайне, воздаст тебе яве. 19 Не скрывайте себе сокровищ на земли, идеже червь и тля тлит, и идеже татие подкопывают и крадут: 20 скрывайте же себе сокровище на небеси, идеже ни червь, ни тля тлит, и идеже татие не подкопывают, ни крадут: 21 идеже бо есть сокровище ваше, ту будет и сердце ваше. 22 Светилник телу есть око. Аще убо будет око твое просто, все тело твое светло будет: 23 аще ли око твое лукаво будет, все тело твое темно будет. Аще убо свет, иже в тебе, тма есть, то тма кольми? 24 Никтоже может двема господинома работати: любо единого возлюбит, а другаго возненавидит: или единого держится, о другом же нерадити начнет. Не можете Богу работати и мамоне. 25 Сего ради глаголю вам: не печытесе душею вашею, что ясте, или что

пие: ни телом нашим, во что облечетесь. Не душа ли болши есть пищи, и тело одежды? 26 Воззрите на птицы небесныя, яко не сеют, ни жнут, ни собирают в житницы, и Отец ваш Небесный питает их. Не вы ли паче лучши их есте? 27 Кто же от вас пекийся может приложити возрасту своему лакоть един? 28 И о одежды что печетесь? Смотрите крин селных, како растут: не труждаются, ни прядут: 29 глаголю же вам, яко ни Соломон во всей славе своей облечеся, яко един от сих: 30 аще же сено селное, днесь суще и утре в печь вметаемо, Бог тако одевает, не много ли паче вас, маловери? 31 Не пецътесь убо, глаголюще: что ямы, или что прием, или чим одждемся? 32 Всех бо сих языцы ищут: весть бо Отец ваш Небесный, яко требуете сих всех. 33 Ищите же прежде Царствия Божия и правды Его, и сия вся приложатся вам. 34 Не пецътесь убо на утрей, утрений бо собою печется: довлеет дневи злоба его.

**7** Не судите, да не судими будете: 2 имже бо судом судите, судят вам: и в нуже меру мерите, возмерится вам. 3 Что же видиши сучец, иже во оце брата твоего, бервна же, еже есть во оце твоём, не чуеши? 4 Или како речеши брату твоему: остави, да изму сучец из очесе твоего: и се, бервно во оце твоём? 5 Лицемере, изми первее бервно из очесе твоего, и тогда узриши изяти сучец из очесе брата твоего. 6 Не дадите святая псом, ни пометайте бисер ваших пред свиниями, да не поперут их ногами своими и вращшеся расторгнут вы. 7 Просите, и дастся вам: ищите, и обряцете: толцъте, и отверзется вам: 8 всяк бо просяй приемлет, и ищяй обретае, и толкущему отверзется. 9 Или кто есть от вас человек, егоже аще воспросит сын его хлеба, еда камень

подаст ему? 10 Или еще рыбы просит, еда змию подаст ему?  
11 Аще убо вы, лукави суще, умеете даяния блага даяти чадом вашим, кольми паче Отец ваш Небесный даст блага просящим у Него. 12 Вся убо, елика аще хотите, да творят вам человецы, тако и вы творите им: се бо есть закон и пророцы. 13 Внидите узкими врата: яко пространная врата и широкий путь вводяй в пагубу, и мнози суть входящии им: 14 что узкая врата, и тесный путь вводяй в живот, и мало их есть, иже обретают его. 15 Внемлите же от лживых пророк, иже приходят к вам во одеждах овчих, внутрь же суть волцы хищницы: 16 от плод их познаете их. Еда объемлют от терния грозды, или от репия смоквы? 17 Тако всяко древо доброе плоды добры творит, а злое древо плоды злы творит: 18 не может древо добро плоды злы творити, ни древо зло плоды добры творити. 19 Всяко убо древо, еже не творит плода добра, посекают е и во огонь вметають. 20 Темже убо от плод их познаете их. 21 Не всяк глаголяй Ми: Господи, Господи, внидет в Царствие Небесное: но творяй волю Отца Моего, иже есть на небесех. 22 Мнози рекут Мне во он день: Господи, Господи, не в Твое ли имя пророчествовахом, и Твоим именем бесы изгонихом, и Твоим именем силы многи сотворихом? 23 И тогда исповею им, яко николиже знах вас: отидите от Мене, делающии беззаконие. 24 Всяк убо, иже слышит словеса Моя сия и творит я, уподоблю его мужу мудру, иже созда храмину свою на камени: 25 и сниде дождь, и приидоша реки, и возвеша ветри, и нападоша на храмину ту: и не падеся, основана бо бе на камени. 26 И всяк слышай словеса Моя сия, и не творя их, уподобится мужу уродиву, иже созда храмину свою на песце: 27 и сниде дождь, и

приидоша реки, и возвеша ветри, и опрошася храмине той, и падеся: и бе разрушение ея велие. 28 И бысть егда сконча Иисус словеса сия, дивляхуся народи о учении Его: 29 бе бо учя их яко власть имея, и не яко книжницы (и фарисее).

**8** Сшедшу же Ему с горы, вслед Его идяху народи мнози. 2 И се, прокажен пришед кланяшеся Ему, глаголя: Господи, аще хочещи, можещи мя очистити. 3 И простер руку Иисус, коснулся ему, глаголя: хочу, очистися. И абие очистися ему проказа. 4 И глагола ему Иисус: виждь, ни комуже повеждь: но шед покажися иереови и принеси дар, егоже повеле (в законе) Моисей, во свидетелство им. 5 Вшедшу же Ему в Капернаум, приступи к Нему сотник, моля Его 6 и глаголя: Господи, отрок мой лежит в дому разслаблен, люте стражда. 7 И глагола ему Иисус: Аз пришед изцелю его. 8 И отвещав сотник, рече (Ему): Господи, несъм достоин, да под кров мой внидеши: но токмо рцы слово, и изцелеет отрок мой: 9 ибо аз человек есмь под властию, имый под собою воины: и глаголю сему: иди, и идет: и другому: прииди, и приходит: и рабу моему: сотвори сие, и сотворит. 10 Слышав же Иисус, удивися, и рече грядущым по Нем: аминь глаголю вам: ни во Израили толики веры обретох. 11 Глаголю же вам, яко мнози от восток и запад приидут и возлягут со Авраамом и Исааком и Иаковом во Царствии Небеснем: 12 сынове же царствия изгнани будут во тму кромешнюю: ту будет плачь и скрежет зубом. 13 И рече Иисус сотнику: иди, и якоже веровал еси, буди тебе. И изцеле отрок его в той час. 14 И пришед Иисус в дом Петров, виде тещу его лежащу и огнем жегому, 15 и прикоснулся руце ея, и остави ю огонь: и воста и служаше ему. 16 Позде же бывшу, приведоша к Нему

бесны многи: и изгна духи словом и вся болящия изцели: 17 да сбудется реченное Исаием пророком, глаголющим: Той недуги наша прият и болезни понесе. 18 Видев же Иисус многи народы окрест Себе, повеле (учеником) ити на он пол. 19 И приступль един книжник, рече Ему: Учителю, иду по Тебе, аможе аще идеши. 20 Глагола ему Иисус: лиси язвины имут, и птицы небесныя гнезда: Сын же Человеческий не имать где главы подклонити. 21 Другий же от ученик Его рече Ему: Господи, повели ми прежде ити и погребсти отца моего. 22 Иисус же рече ему: гряди по Мне и остави мертвых погребсти своя мертвецы. 23 И влезшу Ему в корабль, по Нем идоша ученицы Его. 24 И се, трус велик бысть в мори, якоже кораблю покрыватися волнами: Той же спаше. 25 И пришедше ученицы Его возбудиша Его, глаголюще: Господи, спаси ны, погибаем. 26 И глагола им: что страшливи есте, маловери? Тогда востав запрети ветром и морю, и бысть тишина велия. 27 Чловецы же чудишася, глаголюще: кто есть Сей, яко и ветри и море послушают Его? 28 И пришедшу Ему на он пол, в страну Гергесинскую, сретоста Его два бесна от гроб исходяца, люта зело, яко не мощи ни кому минути путем тем. 29 И се, возописта глаголюща: что нама и Тебе, Иисусе Сыне Божий? Пришел еси семо прежде време мучити нас. 30 Бяше же далече от нею стадо свиний много пасомо. 31 Беси же моляху Его, глаголюще: аще изгониши ны, повели нам ити в стадо свиное. 32 И рече им: идите. Они же изшедше идоша в стадо свиное: и се, (абие) устремися стадо все по берегу в море, и утопоша в водах. 33 Пасущии же бежаша, и шедше во град, возвестиша вся, и о бесною.

34 И се, весь град изыде в сретение Иисусови: и видевше Его, молиша, яко дабы прешел от предел их.

**9** И влез в корабль, преиде и прииде во Свой град. 2 И се, принесоша Ему разслаблена (жилами), на одре лежаща: и видев Иисус веру их, рече разслабленному: дерзай, чадо, отпускаются ти греси твои. 3 И се, нецыи от книжник реша в себе: Сей хулит. 4 И видев Иисус помышления их, рече: вскую вы мыслите лукавая в сердцах своих? 5 Что бо есть удобее рещи: отпускаются ти греси: или рещи: востани и ходи? 6 Но да увесте, яко власть имать Сын Человеческий на земли отпущати грехи: тогда глагола разслабленному: востани, возми твой одр и иди в дом твой. 7 И востав, (взем одр свой, ) иде в дом свой. 8 Видевше же народи чудишася и прославиша Бога, давшего власть таковую человеком. 9 И преходя Иисус оттуду, виде человека сидяща на мытнице, Матфеа глаголема: и глагола ему: по Мне гряди. И востав по Нем иде. 10 И бысть Ему возлежащу в дому, и се, мнози мытари и грешницы пришедше возлежаху со Иисусом и со ученики Его. 11 И видевше фарисее, глаголаху учеником Его: почто с мытари и грешники Учитель ваш яст и пиет? 12 Иисус же слышав рече им: не требуют здравии врача, но болящии: 13 шедше же научитесь, что есть: милости хошу, а не жертвы? Не приидох бо призвати праведники, но грешники на покаяние. 14 Тогда приступиша к Нему ученицы Иоанновы, глаголюще: почто мы и фарисее постимся много, ученицы же Твои не постятся? 15 И рече им Иисус: еда могут сынове брачнии плакати, елико время с ними есть жених? Приидут же дние, егда отимется от них жених, и тогда постятся. 16 Никтоже бо приставляет приставления

плата небелена ризе ветсе: возмет бо кончину свою от ризы, и горша дира будет. 17 Ниже вливают вина нова в мехи ветхи: аще ли же ни, то просадятся меси, и вино пролиется, и меси погибнут: но вливают вино ново в мехи новы, и обое соблюдется. 18 Сия Ему глаголющу к ним, се, князь некий пришед кланяшеся Ему, глаголя, яко дщи моя ныне умре: но пришед возложи на ню руку Твою, и оживет. 19 И востав Иисус по нем иде, и ученицы Его. 20 И се, жена кровоточива дванадесяте лет, приступльши созади, прикоснуса воскрилию ризы Его, 21 глаголаше бо в себе: аще токмо прикоснуса ризе Его, спасена буду. 22 Иисус же обращься и виде ю, рече: дерзай, дщи, вера твоя спасе тя. И спасена бысть жена от часа того. 23 И пришед Иисус в дом княжь, и виде сопцы и народ молвяць, 24 глагола им: отидите, не умре бо девица, но спит. И ругахуса Ему. 25 Егда же изгнан бысть народ, вшед ят ю за руку: и воста девица. 26 И изыде весть сия по всей земли той. 27 И преходящу оттуду Иисусови, по Нем идоста два слепца, зовуща и глаголюща: помилуй ны, (Иисусе) сыне Давидов. 28 Пришедшу же Ему в дом, приступиста к Нему слепца, и глагола има Иисус: веруета ли, яко могу сие сотворити? Глаголаста Ему: ей, Господи. 29 Тогда прикоснуса очию их, глаголя: по вере ваю буди вама. 30 И отверзостася очи има: и запрети има Иисус, глаголя: блюдита, да никтоже увесть. 31 Она же изшедша прослависта Его по всей земли той. 32 Тема же исходящема, се, приведоша к Нему человека нема беснуема. 33 И изгнану бесу, проглагола немый. И дивишася народи, глаголюще, яко николиже явися тако во Израили. 34 Фарисее же глаголаху: о князи бесовстем изгонит бесы. 35 И



проходяше Иисус грады вся и веси, учя на сонмищих их, и проповедае Евангелие Царствия, и целя всяк недуг и всяку язю в людех. **36** Видев же народы, милосердова о них, яко бяху смятени и отвержени, яко овцы не имущыя пастыря. **37** Тогда глагола учеником Своим: жатва убо многа, делателей же мало: **38** молитесь убо Господину жатвы, яко да изведет делатели на жатву Свою.

**10** И призва обанадесять ученики Своя, даде им власть на дусех нечистых, яко да изгонят их, и целити всяк недуг и всяку болезнь. **2** Дванадесятих же Апостолов имена суть сия: первый Симон, иже нарицается Петр, и Андрей брат его: Иаков Зеведеев и Иоанн брат его: **3** Филипп и Варфоломей: Фома и Матфей мытарь: Иаков Алфеев и Леввей, нареченный Фаддей: **4** Симон Кананит и Иуда Искариотский, иже и предаде Его. **5** Сия обанадесять посла Иисус, заповеда им, глаголя: на путь язык не идите и во град Самарянский не внидите: **6** идите же паче ко овцам погибшым дому Израилева: **7** ходяще же проповедуйте, глаголюще, яко приближися Царствие Небесное: **8** болящыя изцеляйте, прокаженныя очищайте, мертвыя воскрешайте, бесы изгоняйте: туне приясте, туне дадите. **9** Не стяжите злата, ни сребра, ни меди при поясах ваших, **10** ни пиры в путь, ни двоя ризу, ни сапог, ни жезла: достоин бо есть делатель мзды своея. **11** В оньже аще (колиждо) град или весь внидете, испытайте, кто в нем достоин есть, и ту пребудите, дондеже изыдете: **12** входяще же в дом целуйте его, глаголюще: мир дому сему: **13** и аще убо будет дом достоин, приидет мир ваш нань: аще ли же не будет достоин, мир ваш к вам возвратится. **14** И иже аще не примет вас,

ниже послушает словес ваших, исходяще из дому или из града того, оттрясите прах ног ваших: **15** аминь глаголю вам: отраднее будет земли Содомстей и Гоморрстей в день судный, неже граду тому. **16** Се, Аз посылаю вас яко овцы посреде волков: будите убо мудри яко змия, и цели яко голубие. **17** Внемлите же от человек: предадут бо вы на сонмы, и на соборищих их бьют вас, **18** и пред владыки же и цари ведени будете Мене ради, во свидетелство им и языком. **19** Егда же предают вы, не пецытеся, како или что возглаголете: дастбоя вам в той час, что возглаголете: **20** не вы бо будете глаголющии, но Дух Отца вашего глаголай в вас. **21** Предаст же брат брата на смерть, и отец чадо: и востанут чада на родители и убьют их: **22** и будете ненавидими всеми имене Моего ради: претерпевый же до конца, той спасен будет. **23** Егда же гонят вы во граде сем, бегайте в другой. Аминь бо глаголю вам: не имате скончати грады Израилевы, дондеже приидет Сын Человеческий. **24** Несть ученик над учителя (своего), ниже раб над господина своего: **25** довлеет ученику, да будет яко учитель его, и раб яко господь его. Аще господина дому веельзевула нарекоша, кольми паче домашния его? **26** Не убойтеся убо их: ничтоже бо есть покровено, еже не открыется, и тайно, еже не уведено будет. **27** Еже глаголю вам во тме, рцыте во свете: и еже во уши слышите, проповедите на кровех. **28** И не убойтеся от убивающих тело, души же не могущих убити: убойтеся же паче могущаго и душу и тело погубити в геенне. (Geenna g1067) **29** Не две ли птице ценитеся единому ассарию? И ни едина от них падет на земли без Отца вашего: **30** вам же и власи главнии вси изочтени суть: **31** не убойтеся убо: мнозех птиц

лучши есте вы. 32 Всяк убо иже исповесть Мя пред человеки, исповем его и Аз пред Отцем Моим, иже на небесех: 33 а иже отвержется Мене пред человеки, отвергуся его и Аз пред Отцем Моим, иже на небесех. 34 Не мните, яко приидох воврещи мир на землю: не приидох воврещи мир, но мечь: 35 приидох бо разлучити человека на отца своего, и дочь на мать свою, и невесту на свекровь свою. 36 И врази человеку домашнии его. 37 Иже любит отца или мать паче Мене, несть Мене достоин: и иже любит сына или дочь паче Мене, несть Мене достоин: 38 и иже не приимет креста своего и вслед Мене грядет, несть Мене достоин. 39 Обретый душу свою погубит ю: а иже погубит душу свою Мене ради, обрящет ю. 40 Иже вас приемлет, Мене приемлет: и иже приемлет Мене, приемлет Пославшаго Мя: 41 приемляй пророка во имя пророчо, мзду пророчу приимет: и приемляй праведника во имя праведниче, мзду праведниче приимет: 42 и иже аще напоит единого от малых сих чашею студены воды токмо, во имя ученика, аминь глаголю вам, не погубит мзды своея.

**11** И бысть, егда соверши Иисус заповедая обеманадесяте ученикома Своима, преиде оттуду учити и проповедати во градех их. 2 Иоанн же слышав во узилици дела Христова, посла два от ученик своих, 3 рече Ему: Ты ли еси Грядый, или иного чаем? 4 И отвещав Иисус рече има: шедша возвестита Иоаннови, яже слышита и видита: 5 слепии прозирают и хромии ходят, прокаженнии очищаются и глушии слышат, мертвии встают и нищии благовествуют: 6 и блажен есть, иже аще не соблазнится о Мне. 7 Тема же исходящема, начат Иисус народом глаголати о Иоанне: чесо изыдoste в пустыню

видети? Трость ли ветром колеблему? 8 Но чесо изыдосте видети? Человека ли в мяжки ризы облеченна? Се, иже мягкая носящи, в домех царских суть. 9 Но чесо изыдосте видети? Пророка ли? Ей, глаголю вам, и лишше пророка. 10 Сей бо есть, о немже есть писано: се, Аз посылаю Ангела Моего пред лицом Твоим, иже уготовит путь Твой пред Тобою. 11 Аминь глаголю вам, не воста в рожденных женами болий Иоанна Крестителя: мний же во Царствии Небеснем болий его есть. 12 От дний же Иоанна Крестителя доселе Царствие Небесное нудится, и нуждницы восхищают е: 13 вси бо пророцы и закон до Иоанна прорекоша. 14 И аще хотите прияти, той есть Илия хотяй приити: 15 имейя уши слышати да слышит. 16 Кому же уподоблю род сей? Подобен есть детем сидящим на торжищих, и возглашающим другом своим 17 и глаголющим: пискахом вам, и не плясасте: плакахом вам, и не рыдасте. 18 Прииде бо Иоанн ни ядый, ни пияй: и глаголют: беса имать. 19 Прииде Сын Человеческий ядый и пияй: и глаголют: се, человек ядца и винопийца, мытарем друг и грешником. И оправдися премудрость от чад своих. 20 Тогда начат Иисус поношати градовом, в нихже быша множайшыя силы Его, зане не покаяшася: 21 горе тебе, Хоразине, горе тебе, Вифсаидо: яко аще в Тире и Сидоне быша силы были бывшыя в вас, древле убо во вретищи и пепеле покаялися быша: 22 обаче глаголю вам Тиру и Сидону отраднее будет в день судный, неже вам. 23 И ты, Капернауме, иже до небес вознесыйся, до ада снидеши: зане аще в Содомех быша силы были бывшыя в тебе, пребыли убо быша до днешняго дне: (Hadēs 986) 24 обаче глаголю вам, яко земли Содомстей отраднее будет

в день судный, неже тебе. 25 В то время отвечава Иисус рече: исповедаются, Отче, Господи небесе и земли, яко утаил еси сия от премудрых и разумных и открыл еси та младенцем: 26 ей, Отче, яко тако бысть благоволение пред Тобою. 27 Вся Мне предана суть Отцем Моим: и никтоже знает Сына, токмо Отец: ни Отца кто знает, токмо Сын, и емуже аще волит Сын открыти. 28 Приидите ко Мне вси труждающися и обремененнии, и Аз упокою вы: 29 возьмите иго Мое на себе и научитесь от Мене, яко кроток есмь и смирен сердцем: и обрящете покой душам вашим: 30 иго бо Мое благо, и бремя Мое легко есть.

**12** В то время иде Иисус в субботы сквозе сеяния: ученицы же Его взалкаша и начаша востерзати класы и ясти. 2 Фарисее же видевши реша Ему: се, ученицы Твои творят, егоже не достоит творити в субботу. 3 Он же рече им: несте ли чли, что сотвори Давид, егда взалка сам и сущии с ним? 4 Како вниде в храм Божий и хлебы предложения снеде, ихже не достойно бе ему ясти, ни сущым с ним, токмо иереем единым? 5 Или несте чли в законе, яко в субботы священницы в церкви субботы сквернят и неповинни суть? 6 Глаголю же вам, яко церкви боле есть zde: 7 аще ли бысте ведали, что есть: милости хочу, а не жертвы, николиже убо бысте осуждали неповинных: 8 господь бо есть и субботы Сын Человеческий. 9 И прешед оттуду, прииде на сонмище их. 10 И се, человек бе ту, руку имый суху. И вопросиша Его, глаголюще: аще достоит в субботы целити? Да на Него возглаголют. 11 Он же рече им: кто есть от вас человек, иже имать овча едино, и аще впадет сие в субботы в яму, не имет ли е и измет? 12 Кольми убо лучши есть человек овчате?

Темже достоит в субботы добро творити. **13** Тогда глагола человеку: прости руку твою. И простре: и утвердися цела яко другая. **14** Фарисее же шедше совет сотвориша на Него, како Его погубят. Иисус же разумев отиде оттуду. **15** И по Нем идоша народи мнози, и изцели их всех: **16** и запрети им, да не яве Его творят: **17** яко да сбудется реченное Исаием пророком, глаголющим: **18** се, Отрок Мой, Егоже изволих, Возлюбленный Мой, Наньже благоволи душа Моя: положу дух Мой на Нем, и суд языком возвестит: **19** не преречет, ни возопиет, ниже услышит кто на распутиих гласа Его: **20** трости сокрушенны не преломит и лена внемшася не угасит, дондеже изведет в победу суд: **21** и на имя Его языцы уповати имут. **22** Тогда приведоша к Нему беснующася слепая и нема: и изцели его, яко слепому и немому глаголати и глядати. **23** И дивляхуся вси народи глаголюще: еда Сей есть (Христос) сын Давидов? **24** Фарисее же слышавше реша: Сей не изгонит бесы, токмо о веельзевуле князи бесовстем. **25** Ведый же Иисус мысли их, рече им: всякое царство раздельшееся на ся запустеет, и всяк град или дом разделивыйся на ся не станет. **26** И аще сатана сатану изгонит, на ся разделился есть: како убо станет царство его? **27** И аще Аз о веельзевуле изгоню бесы, сынове ваши о ком изгонят? Сего ради тии вам будут судии. **28** Аще ли же Аз о Дусе Божии изгоню бесы, убо постиже на вас Царствие Божие. **29** Или како может кто внити в дом крепкаго и сосуды его расхитити, аще не первее свяжет крепкаго, и тогда дом его расхитит? **30** Иже несть со Мною, на Мя есть: и иже не собирает со Мною, расточает. **31** Сего ради глаголю вам: всяк грех и хула отпустится человеком: а яже на Духа хула

не отпустится человеком: **32** и иже аще речет слово на Сына Человеческого, отпустится ему: а иже речет на Духа Святаго, не отпустится ему ни в сей век, ни в будущий. (αἰὼν ἁῖων) **33** Или сотворите древо добро и плод его добр: или сотворите древо зло и плод его зол: от плода бо древо познано будет. **34** Порождения ехиднова, како можете добро глаголати, зли суще? От избытка бо сердца уста глаголют. **35** Благий человек от благаго сокровища износит благая: и лукавый человек от лукаваго сокровища износит лукавая. **36** Глаголю же вам, яко всяко слово праздное, еже аще рекут человецы, воздадут о нем слово в день судный: **37** от словес бо своих оправдишися и от словес своих осудишися. **38** Тогда отвещаша нецыи от книжник и фарисей, глаголюще: Учителю, хожем от Тебе знамение видети. **39** Он же отвещав рече им: род лукав и прелюбодей знамения ищет, и знамение не дастся ему, токмо знамение Ионы пророка: **40** якоже бо бе Иона во чреве китове три дни и три нощы, тако будет и Сын Человеческий в сердцы земли три дни и три нощы. **41** Мужие Ниневитстии востанут на суд с родом сим и осудят его, яко покаяшася проповедию Иониною: и се, боле Ионы zde. **42** Царица южская встанет на суд с родом сим и осудит и, яко прииде от конец земли слышати премудрость Соломонову: и се, боле Соломона zde. **43** Егда же нечистый дух изыдет от человека, переходит сквозе безводная места, ищя покоя, и не обретает: **44** тогда речет: возвращуся в дом мой, отнюдуже изыдох. И пришед обрящет празден, пометен и украшен: **45** тогда идет и поймет с собою семь иных духов лютейших себе, и вшедше живут ту: и будут последняя человеку тому горша первых. Тако будет и роду сему лукавому. **46** Еще

же Ему глаголющу к народом, се, Мати (Его) и братия Его  
стояху вне, ищуще глаголати Ему. 47 Рече же некий Ему: се,  
Мати Твоя и братия Твоя вне стоят, хотяще глаголати Тебе.  
48 Он же отвещав рече ко глаголющему Ему: кто есть Мати  
Моя, и кто суть братия Моя? 49 И простер руку Свою на  
ученики Своя, рече: се, мати Моя и братия Моя: 50 иже бо  
аще сотворит волю Отца Моего, Иже есть на небесех, той  
брат Мой, и сестра, и мати (Ми) есть.

**13** В день же той изшед Иисус из дому, сядяше при мори. 2  
И собращася к Нему народи мнози, якоже Ему в корабль  
влезти и сести: и весь народ на бреже стояше. 3 И глагола им  
притчами много, глаголя: се, изыде сеяй, да сеет: 4 и сеющу  
ему, ова падоша при пути, и приидоша птицы и позобаша я:  
5 другая же падоша на каменных, идеже не имеяху земли  
многи, и абие прозябоша, зане не имеяху глубины земли: 6  
солнцу же возсиявшу присвянуша, и зане не имеяху корения,  
изсхоша: 7 другая же падоша в тернии, и възыде терние и  
подави их: 8 другая же падоша на земли добрей и даяху  
плод, ово убо сто, ово же шестьдесят, ово же тридесять: 9  
имеяй уши слышати да слышит. 10 И приступивше ученицы  
(Его) рекоша Ему: почто притчами глаголеши им? 11 Он  
же отвещав рече им: яко вам дано есть разумети тайны  
Царствия Небеснаго, онем же не дано есть: 12 иже бо имать,  
дастся ему и преизбудет (ему): а иже не имать, и еже имать,  
возмется от него: 13 сего ради в притчах глаголю им, яко  
видяще не видят, и слышаще не слышат, ни разумеют: 14 и  
сбывается в них пророчество Исаиино, глаголющее: слухом  
услышите, и не имате разумети: и зряще узрите, и не имате  
видети: 15 отолсте бо сердце людей сих, и ушима тяжко



слышаша, и очи свои смежиша, да не когда узрят очима, и ушима услышат, и сердцем уразумеют, и обратятся, и изцелю их. 16 Ваша же блаженна очеса, яко видят, и уши ваши, яко слышат: 17 аминь бо глаголю вам, яко мнози пророцы и праведницы вожделеша видети, яже видите, и не видеша, и слышати, яже слышите, и не слышаша. 18 Вы же услышите притчу сеющаго: 19 всякому слышащему слово Царствия и не разумевающу, приходит лукавый и восхищает всеянное в сердцы его: сие есть, еже при пути сеянное. 20 А на камени сеянное, сие есть слышай слово и абие с радостию приемлет е: 21 не имать же корене в себе, но привременен есть: бывши же печали или гонению словесе ради, абие соблажняется. 22 А сеянное в тернии, се есть слышай слово, и печаль века сего и леть богатства подавляет слово, и без плода бывает. (aiōn g165) 23 А сеянное на добрей земли, се есть слышай слово и разумевая: иже убо плод приносит и творит ово сто, ово же шестьдесят, ово тридесять. 24 Ину притчу предложи им, глаголя: уподобися Царствие Небесное человеку, сеявшу доброе семя на селе своем: 25 спящым же человеком, прииде враг его и всея плевелы посреде пшеницы и отиде: 26 егда же прозябе трава и плод сотвори, тогда явишася и плевелие. 27 Пришедше же раби господина, реша ему: господи, не доброе ли семя сеял еси на селе твоём? Откуда убо имать плевелы? 28 Он же рече им: враг человек сие сотвори. Раби же реша ему: хоцещи ли убо, да шедше исплелем я? 29 Он же рече (им): ни: да не когда восторгающе плевелы, восторгнете купно с ними (и) пшеницу: 30 оставите расти обое купно до жатвы: и во время жатвы реку жателем: соберите первее

плевелы и свяжите их в снопы, яко сожеши я: а пшеницу соберите в житницу мою. 31 Ину притчу предложи им, глаголя: подобно есть Царствие Небесное зерну горушичну, еже взем человек всея на селе своем, 32 еже малейше убо есть от всех семен: егда же возрастет, более (всех) зелий есть и бывает древо, яко приити птицам небесным и витати на ветвех его. 33 Ину притчу глаголя им: подобно есть Царствие Небесное квасу, егоже вземши жена скры в сатех трех муки, дондеже вскисоша вся. 34 Сия вся глаголя Иисус в притчах народом, и без притчи ничесоже глаголаше к ним: 35 яко да сбудется реченное пророком, глаголющим: отверзу в притчах уста Моя: отрыгну сокровенная от сложения мира. 36 Тогда оставль народы, прииде в дом Иисус. И приступиша к Нему ученицы Его, глаголюще: скажи нам притчу плевел селных. 37 Он же отвещав рече им: сеявый доброе семя есть Сын Человеческий: 38 а село есть мир: доброе же семя, сии суть сынове Царствия, а плевелие суть сынове неприязненнии: 39 а враг всеявый их есть диавол: а жатва кончина века есть: а жатели Ангели суть. (aiōn g165) 40 Якоже убо собирают плевелы и огнем сожигают, тако будет в скончание века сего: (aiōn g165) 41 послет Сын Человеческий Ангелы Своя, и соберут от Царствия Его вся соблазны и творящих беззаконие 42 и ввергут их в печь огненну: ту будет плачь и скрежет зубом: 43 тогда праведницы просветятся яко солнце в Царствии Отца их. Имеяй уши слышати да слышит. 44 Паки подобно есть Царствие Небесное сокровищу сокровену на селе, еже обрет человек скры, и от радости его идет, и вся, елика имать, продает, и купует село то. 45 Паки подобно есть Царствие

Небесное человеку купцу, ищущу добрых бисерей, **46** иже обрет един многоценен бисер, шед продаде вся, елика имяше, и купи его. **47** Паки подобно есть Царствие Небесное неводу ввержену в море и от всякаго рода собравшу, **48** иже егда исполнися, извлекоша и на край, и седше избраша добрыя в сосуды, а злыя извергоша вон. **49** Тако будет в скончание века: изыдут Ангели, и отлучат злыя от среды праведных, (aіōn g165) **50** и ввергут их в пещь огненную: ту будет плачь и скрежет зубом. **51** Глагола им Иисус: разуместе ли сия вся? Глаголаша Ему: ей, Господи. **52** Он же рече им: сего ради всяк книжник, научився Царствию Небесному, подобен есть человеку домовиту, иже износит от сокровища своего новая и ветхая. **53** И бысть, егда сконча Иисус притчи сия, преиде оттуду. **54** И пришед во отечествие Свое, учаше их на сонмищи их, яко дивитися им и глаголати: откуда Сему премудрость сия и силы? **55** Не Сей ли есть тектонов сын? Не Мати ли Его нарицается Мариам, и братия Его Иаков и Иосий, и Симон и Иуда? **56** И сестры Его не вся ли в нас суть? Откуда убо Сему сия вся? **57** И блажняхуся о Нем. Иисус же рече им: несть пророк без чести, токмо во отечествии своем и в дому своем. **58** И не сотвори ту сил многих за неверство их.

**14** В то время услыша Ирод четвертовластник слух Иисусов **2** и рече отроком своим: сей есть Иоанн Креститель: той воскресе от мертвых, и сего ради силы деются о нем. **3** Ирод бо емь Иоанна, связа его и всади в темницу, Иродиады ради жены Филиппа брата своего: **4** глаголаше бо ему Иоанн: не достоин ти имети ея. **5** И хотящъ его убити, убояся народа, зане яко пророка его имеяху. **6** Дню же бывшу рождества

Иродова, пляса дщи Иродиадина посреде и угоди Иродови:  
7 темже и с клятвою изрече ей дати, егоже аще воспросит. 8  
Она же наваждена материю своею, даждь ми, рече, zde на  
блюде главу Иоанна Крестителя. 9 И печален бысть царь:  
клятвы же ради и за возлежащих с ним, повеле дати (ей) 10  
и послав усекну Иоанна в темнице. 11 И принесоша главу  
его на блюде и даша девице: и отнесе матери своей. 12 И  
приступльше ученицы его взяша тело (его) и погребоша е: и  
пришедше возвестиша Иисусови. 13 И слышав Иисус отиде  
оттуда в корабли в пусто место един: и слышавше народи по  
Нем идоша пеши от градов. 14 И изшед Иисус виде мног  
народ, и милосердова о них, и изцели недужныя их. 15 Позде  
же бывшу, приступиша к Нему ученицы Его, глаголюще:  
пусто есть место, и час уже мину: отпусти народы, да шедше  
в веси купят брашна себе. 16 Иисус же рече им: не требуют  
отити: дадите им вы ясти. 17 Они же глаголаша Ему: не  
имамамы zde токмо пять хлеб и две рыбе. 18 Он же рече:  
принесите Ми их семо. 19 И повелев народом возлещи на  
траве, и приемь пять хлеб и обе рыбе, воззрев на небо,  
благослови и преломив даде учеником хлебы, ученицы же  
народом. 20 И ядоша вси и насытишася: и взяша избытки  
укрух, дванадесять кошы исполнь: 21 ядущих же бе мужей  
яко пять тысящ, разве жен и детей. 22 И абие понуди  
Иисус ученики Своя влезти в корабль и варити Его на оном  
полу, дондеже отпустит народы. 23 И отпустив народы,  
взыде на гору един помолитися: позде же бывшу, един бе  
ту. 24 Корабль же бе посреде моря вляся волнами: бе  
бо противен ветр. 25 В четвертую же стражу ноци иде к  
ним Иисус, ходя по морю. 26 И видевшЕ Его ученицы по

морю ходяща, смутишася, глаголюще, яко призрак есть: и от страха возопиша. 27 Абие же рече им Иисус, глаголя: дерзайте: аз есмь, не бойтеся. 28 Отвещав же Петр рече: Господи, аще Ты еси, повели ми приити к Тебе по водам. Он же рече: прииди. 29 И излез из корабля Петр, хождаше по водам, приити ко Иисусови: 30 видя же ветр крепок, убояся, и начен утопати, возопи, глаголя: Господи, спаси мя. 31 И абие Иисус простер руку, ят его и глагола ему: маловере, почто усумнелся еси? 32 И влезшема има в корабль, преста ветр. 33 Сущии же в корабли пришедше поклонишася Ему, глаголюще: воистинну Божий Сын еси. 34 И прешедше приидоша в землю Геннисарефскую. 35 И познавше Его мужие места того, послаша во всю страну ту, и принесоша к Нему вся болящия: 36 и моляху Его, да токмо прикоснутся вскрилию ризы Его: и елицы прикоснушася, спасени быша.

**15** Тогда приступиша ко Иисусови иже от Иерусалима книжницы и фарисее, глаголюще: 2 почто ученицы Твои престапуют предание старец? Не умывают бо рук своих, егда хлеб ядят. 3 Он же отвечав рече им: почто и вы престапаете заповедь Божию за предание ваше? 4 Бог бо заповеда, глаголя: чти отца и мать: и: иже злословит отца или мать, смертию да умрет. 5 Вы же глаголете: иже аще речет отцу или матери: дар, имже бы от мене пользовался еси: 6 и да не почтит отца своего или матери: и разористе заповедь Божию за предание ваше. 7 Лицемери, добре пророчествова о вас Исаиа, глаголя: 8 приближаются Мне людие сии усты своими и устнами чтут Мя: сердце же их далече отстоит от Мене: 9 всуе же чтут Мя, учаще учением, заповедем человеческим. 10 И призвав народы, рече им:

слышите и разумейте: **11** не входящее во уста сквернит человека: но исходящее из уст, то сквернит человека. **12** Тогда приступльше ученицы Его реша Ему: веси ли, яко фарисее слышавше слово соблазнишася? **13** Он же отвещав рече: всяк сад, егоже не насади Отец Мой Небесный, искоренится: **14** оставите их: вожди суть слепи слепцем: слепец же слепца аще водит, оба в яму впадетася. **15** Отвещав же Петр рече Ему: скажи нам притчу сию. **16** Иисус же рече (им): единаче ли и вы без разума есте? **17** Не у ли разумеваете, яко всяко, еже входит во уста, во чрево вмещается и афедроном исходит? **18** Исходящая же из уст, от сердца исходят, и та сквернят человека: **19** от сердца бо исходят помышления злая, убийства, прелюбодеяния, любодеяния, татьбы, лжесвидетелства, хулы: **20** сия суть скверняющая человека: а еже неумовенными руками ясти, не сквернит человека. **21** И изшед оттуду Иисус, отиде во страны Тирския и Сидонския. **22** И се, жена Хананейска, от предел тех изшедши, возопи к Нему глаголющи: помилуй мя, Господи, сыне Давидов, дщи моя зле беснуется. **23** Он же не отвеща ей словесе. И приступльше ученицы Его, моляху Его, глаголюще: отпусти ю, яко вопиет вслед нас. **24** Он же отвещав рече: несть послан, токмо ко овцам погибшим дому Израилева. **25** Она же пришедши поклонися Ему, глаголющи: Господи, помози ми. **26** Он же отвещав рече: несть добро отяти хлеба чадом и поврещи псом. **27** Она же рече: ей, Господи: ибо и пси ядят от крупиц падающих от трапезы господей своих. **28** Тогда отвещав Иисус рече ей: о, жено, велия вера твоя: буди тебе якоже хочещи. И изцеле дщи ея от того часа. **29** И прешед оттуду Иисус, прииде на море

Галилейское, и возшед на гору, седе ту. 30 И приступиша к Нему народи мнози, имуще с собою хромья, слепья, немья, бедныя и ины многи, и привергоша их к ногама Иисусовыма: и изцели их: 31 якоже народом дивитися, видящым немья глаголюща, бедныя здравы, хромья ходяща и слепья видяща: и славляху Бога Израилева. 32 Иисус же призвав ученики Своя, рече (им): милосердную о народе (сем), яко уже дни три приседят Мне и не имут чесо ясти: и отпустити их не ядших не хошу, да не како ослабют на пути. 33 И глаголаша Ему ученицы Его: откуда нам в пустыни хлеби толицы, яко да насытится толик народ? 34 И глагола им Иисус: колико хлебы имате? Они же реша: седмь, и мало рыбиц. 35 И повеле народом возлещи на земли, 36 и приемь седмь хлебы и рыбы, хвалу воздав преломи и даде учеником Своим, ученицы же народом. 37 И ядоша вси и насытишася: и взяша избытки укрух, седмь кошниц исполнь: 38 ядших же бяше четыре тысящы мужей, разве жен и детей. 39 И отпустив народы, влезе в корабль и прииде в пределы Магдалински.

**16** И приступиша (к нему) фарисее и саддукее, искушающе просиша Его знамение с небесе показати им. 2 Он же отвещав рече им: вечеру бывшу, глаголете: ведро, чермнуетбоя небо: 3 и утру: днесь зима, чермнуетбоя дряселуя небо. Лицемери, лице убо небесе умеете разсуждати, знамений же временом не можете (искусити). 4 Род лукав и прелюбодейный знамения ищет: и знамение не дастся ему, токмо знамение Ионы пророка. И оставль их, отиде. 5 И прешедше ученицы Его на он пол, забыша хлебы взяти. 6 Иисус же рече им: внимлите и блюдитесь от кваса фарисейска и саддукейска. 7

Они же помышляху в себе, глаголюще: яко хлебы не возьмем.  
8 Разумев же Иисус рече им: что мыслите в себе, маловери,  
яко хлебы не возьмете? 9 Не у ли разумеете, ниже помните  
пять хлебы пятим тысящам, и колико кошъ возьмете? 10 Ни ли  
семь хлебы четырем тысящам, и колико кошницъ возьмете? 11  
Како не разумеете, яко не о хлебахъ рехъ вамъ внимати, (но) отъ  
кваса фарисейска и саддукейска? 12 Тогда разумеша, яко не  
рече хранитися отъ кваса хлебнаго, но отъ учения фарисейска  
и саддукейска. 13 Пришедъ же Иисусъ во страны Кесарии  
Филипповы, вопрошаша ученики Своя, глаголя: кого Мя  
глаголютъ человецы быти, Сына Человеческаго? 14 Они же  
реша: ови убо Иоанна Крестителя, инии же Илию, друзии же  
Иеремию или единаго отъ пророк. 15 Глагола имъ (Иисус): вы  
же кого Мя глаголете быти? 16 Отвещавъ же Симонъ Петръ  
рече: Ты еси Христос, Сынъ Бога Живаго. 17 И отвещавъ  
Иисусъ рече ему: блаженъ еси, Симоне, варъ Иона, яко плоть и  
кровь не яви тебе, но Отецъ Мой, иже на небесехъ: 18 и Азъ же  
тебе глаголю, яко ты еси Петр, и на семъ камени созижду  
Церковь Мою, и врата адова не одолеютъ ей: (Hades g86) 19 и  
дамъ ти ключи Царства Небеснаго: и еже аще свяжеша на  
земли, будетъ связано на небесехъ: и еже аще разрешиши на  
земли, будетъ разрешено на небесехъ. 20 Тогда запрети Иисусъ  
ученикомъ Своимъ, да ни комуже рекутъ, яко Сей есть Иисусъ  
Христос. 21 Оттоле начатъ Иисусъ сказовати ученикомъ Своимъ,  
яко подобаетъ Ему ити во Иерусалимъ и много пострадати отъ  
старецъ и архиерей и книжник, и убиену быти, и в третій день  
востати. 22 И поемъ Его Петр, начатъ пререцати Ему глаголя:  
милосердъ Ты, Господи: не имать быти Тебе сие. 23 Онъ же  
обращься рече Петрови: иди за Мною, сатано, соблазнъ Ми



еси: яко не мыслиши яже (суть) Божия, но человеческая. 24  
Тогда Иисус рече учеником Своим: аще кто хочет по Мне  
йти, да отвержется себе и возмет крест свой и по Мне грядет:  
25 иже бо аще хочет душу свою спасти, погубит ю: и иже  
аще погубит душу свою Мене ради, обрящет ю: 26 кая бо  
польза человеку, аще мир весь приобрящет, душу же свою  
отщтит? Или что даст человек измену за душу свою? 27  
Прийти бо имать Сын Человеческий во славе Отца Своего  
со Ангелы Своими, и тогда воздаст комуждо по деянием его:  
28 аминь глаголю вам, (яко) суть нецыи от zde стоящих, иже  
не имут вкусити смерти, дондеже видят Сына Человеческого  
грядуща во Царствии Своем.

**17** И по днех шестих поят Иисус Петра и Иакова и Иоанна  
брата его, и возведе их на гору високу едины, 2 и преобразися  
пред ними: и просветися лице Его яко солнце, ризы же Его  
быша белы яко свет. 3 И се, явистася им Моисей и Илиа, с  
Ним глаголюща. 4 Отвещав же Петр рече (ко) Иисусови:  
Господи, добро есть нам zde быти: аще хоцещи, сотворим  
zde три сени, Тебе единому, и Моисеови единому, и единому Илии. 5  
Еще (же) ему глаголющу, се, облак светел осени их: и се,  
глас из облака глаголя: Сей есть Сын Мой Возлюбленный,  
о Немже благоволих: Того послушайте. 6 И слышавше  
ученицы падоша ницы и убояшася зело. 7 И приступль Иисус  
прикоснулся их и рече: встаните и не бойтеся. 8 Возведше  
же очи свои, ни когоже видеша, токмо Иисуса единого. 9 И  
сходящим им с горы, заповеда им Иисус, глаголя: ни комуже  
поведите видения, дондеже Сын Человеческий из мертвых  
воскреснет. 10 И вопросиша Его ученицы Его, глаголюще: что  
убо книжницы глаголют, яко Илии подобает прийти прежде?

11 Иисус же отвечава рече им: Илиа убо приидет прежде и устроит вся: 12 глаголю же вам, яко Илиа уже прииде, и не познаша его, но сотвориша о нем, елика восхотеша: тако и Сын Человеческий имать пострадати от них. 13 Тогда разумеша ученицы, яко о Иоанне Крестители рече им. 14 И пришедшым им к народу, приступи к Нему человек, кланяяся Ему 15 и глаголя: Господи, помилуй сына моего, яко на новы месяцы беснуется и зле страждет: множицею бо падает во огонь и множицею в воду: 16 и приведох его ко учеником Твоим, и не возмогоша его изцелити. 17 Отвещава же Иисус рече: о, роде неверный и развращенный, доколе буду с вами? Доколе терплю вам? Приведите Ми его семо. 18 И запрети ему Иисус, и изыде из него бес: и изцеле отрок от часа того. 19 Тогда приступльше ученицы ко Иисусу на едине, реша: почто мы не возмогохом изгнати его? 20 Иисус же рече им: за неверствие ваше: аминь бо глаголю вам: аще имате веру яко зерно горушно, речете горе сей: прежди отсюду тамо, и прейдет: и ничтоже невозможно будет вам: 21 сей же род не исходит, токмо молитвою и постом. 22 Живущым же им в Галилеи, рече им Иисус: предан имать быти Сын Человеческий в руце человеком, 23 и убийют Его, и в третий день востанет. И скорбни быша зело. 24 Пришедшым же им в Капернаум, приступиша приемлющи дидрахмы к Петрови и реша: Учитель ваш не даст ли дидрахмы? 25 Глаголя: ей. И егда вниде в дом, предвари его Иисус, глаголя: что ти мнится, Симоне? Царие земстии от киих приемлют дани или кинсон? От своих ли сынов, или от чужих? 26 Глагола Ему Петр: от чужих. Рече ему Иисус: убо свободни суть сынове: 27 но да не соблазним их, шед на море, верзи удицу, и, юже

прежде имешу рыбу, возми: и отверз уста ей, обрящещи статир: той взем даждь им за Мя и за ся.

**18** В той час приступиша ученицы ко Иисусу, глаголюще: кто убо болий есть в Царствии Небеснем? **2** И призвав Иисус отроча, постави е посреде их **3** и рече: аминь глаголю вам, аще не обратитесь и будете яко дети, не внидете в Царство Небесное: **4** иже убо смирится яко отроча сие, той есть болий во Царствии Небеснем: **5** и иже аще приимет отроча таково во имя Мое, Мене приемлет: **6** а иже аще соблазнит единого малых сих верующих в Мя, уне есть ему, да обесится жернов оселский на выи его, и потонет в пучине морстей. **7** Горе миру от соблазн: нужда бо есть приити соблазном: обаче горе человеку тому, имже соблазн приходит. **8** Аще ли рука твоя или нога твоя соблажняет тя, отсецы ю и верзи от себе: добрейше ти есть внити в живот хрому или бедну, неже две руце и две нозе имущу ввержену быти во огнь вечный: (aĩōnios g166) **9** и аще око твое соблажняет тя, изми е и верзи от себе: добрейше ти есть со едином оком в живот внити, неже две оце имущу ввержену быти в геенну огненную. (Geenna g1067) **10** Блюдите, да не презрите единого (от) малых сих: глаголю бо вам, яко Ангели их на небесех выну видят лице Отца Моего Небеснаго. **11** Прииде бо Сын Человеческий (взыскати и) спасти погибшаго. **12** Что вам мнится? Аще будет некоему человеку сто овец, и заблудит едина от них: не оставит ли девяносто и девять в горах и шед ищет заблудшия? **13** И аще будет обрести ю, аминь глаголю вам, яко радуется о ней паче, неже о девяносто и девяти не заблудших. **14** Тако несть воля пред Отцем вашим Небесным, да погибнет един от малых сих. **15** Аще же

согрешит к тебе брат твой, иди и обличи его между тобою и тем едином: аще тебе послушает, приобрел еси брата твоего: **16** аще ли тебе не послушает, поими с собою еще единого или два, да при устех двою или триех свидетелей станет всяк глагол: **17** аще же не послушает их, повеждь церкви: аще же и церковь преслушает, буди тебе якоже язычник и мытарь. **18** Аминь (бо) глаголю вам: елика аще свяжете на земли, будут связана на небеси: и елика аще разрешите на земли, будут разрешена на небесех. **19** Паки аминь глаголю вам, яко аще два от вас совещае на земли о всяцей вещи, еяже аще просита, будет има от Отца Моего, Иже на небесех: **20** идеже бо еста два или трие собрани во имя Мое, ту есмь посреде их. **21** Тогда приступль к Нему Петр рече: Господи, колькраты аще согрешит в мя брат мой, и отпущу ли ему до седмь крат? **22** Глагола ему Иисус: не глаголю тебе: до седмь крат, но до седмьдесят крат седмерицею. **23** Сего ради уподобися Царствие Небесное человеку царю, иже восхоте стязатися о словеси с рабы своими. **24** Наченшу же ему стязатися, приведоша ему единого должника тмою талант: **25** не имущу же ему воздати, повеле и господь его продати, и жену его, и чада, и вся, елика имеяше, и отдати. **26** Пад убо раб той, кланяшеся ему, глаголя: господи, потерпи на мне, и вся ти воздам. **27** Милосердовав же господь раба того, прости его и долг отпусти ему. **28** Изшед же раб той, обрете единого (от) клевет своих, иже бе должен ему стом пенязь: и емь его давяше, глаголя: отдаждь ми, имже (ми) еси должен. **29** Пад убо клевет его на нозе его, моляше его, глаголя: потерпи на мне, и вся воздам ти. **30** Он же не хотяше, но вед всади его в темницу, дондеже воздаст

должное. **31** Видевше же клеветы его бывшая, сжалиша си зело и пришедше сказаша господину своему вся бывшая. **32** Тогда призвав его господин его, глагола ему: рабе лукавый, весь долг он отпустих тебе, понеже умолил мя еси: **33** не подобаше ли и тебе помиловати клеветы твоего, якоже и аз тя помиловах? **34** И прогневавсь господь его, предаде его мучителем, дондеже воздаст весь долг свой. **35** Тако и Отец Мой Небесный сотворит вам, аще не отпустите кийждо брату своему от сердец ваших прегрешения их.

**19** И бысть егда сконча Иисус словеса сия, преиде от Галилеи и прииде в пределы Иудейския об он пол Иордана. **2** И по Нем идоша народи мнози, и изцели их ту. **3** И приступиша к Нему фарисее искушающе Его и глаголаша Ему: аще достоин человеку пустити жену свою по всяцей вине? **4** Он же отвещав рече им: несте ли чли, яко Сотворивый искони, мужеский пол и женский сотворил я есть? **5** И рече: сего ради оставит человек отца (своего) и мать и прилепится к жене своей, и будета оба в плоть едину, **6** якоже ктому неста два, но плоть едина: еже убо Бог сочета, человек да не разлучает. **7** Глаголаша Ему: что убо Моисей заповеда дати книгу распустную и отпустити ю? **8** Глагола им: яко Моисей по жестосердию вашему повеле вам пустити жены ваша: изначала же не бысть тако: **9** глаголю же вам, яко иже аще пустит жену свою, разве словесе прелюбодейна, и оженится иною, прелюбы творит: и женяйся пущеницею прелюбы деет. **10** Глаголаша Ему ученицы Его: аще тако есть вина человеку с женою, лучше есть не женитися. **11** Он же рече им: не вси вмещают словесе сего, но имже дано есть: **12** суть бо скопцы, иже из чрева матерня родишася тако: и суть скопцы,

иже скопишася от человек: и суть скопцы, иже исказиша сами себе Царствия ради Небеснаго: могий вместити да вместит. 13 Тогда приведоша к Нему дети, да руце возложит на них и помолится: ученицы же запретиша им. 14 Иисус же рече (им): оставите детей и не возбраняйте им приити ко Мне: таковых бо есть Царство Небесное. 15 И возложь на них руце, отиде оттуду. 16 И се, един (некий) приступль рече Ему: Учителю благий, что благо сотворю, да имам живот вечный? (aiōnios g166) 17 Он же рече ему: что Мя глаголеши блага? Никтоже благ, токмо един Бог: аще ли хочещи внити в живот, соблюди заповеди. 18 Глагола Ему: кия? Иисус же рече: еже, не убиеши: не прелюбы сотвориши: не украдеши: не лжесвидетелствуеши: 19 чти отца и мать: и: возлюбиши искренняго твоего яко сам себе. 20 Глагола Ему юноша: вся сия сохраних от юности моя: что есмь еще не dokonчал? 21 Рече ему Иисус: аще хочещи совершен быти, иди, продаждь имение твое и даждь нищим: и имети имаша сокровище на небеси: и гряди вслед Мене. 22 Слышав же юноша слово, отиде скорбя: бе бо имея стяжания многа. 23 Иисус же рече учеником Своим: аминь глаголю вам, яко неудобь богатый внидет в Царствие Небесное: 24 паки же глаголю вам: удобее есть велбуду сквозе иглине уши проити, неже богату в Царствие Божие внити. 25 Слышавше же ученицы Его, дивляхуса зело, глаголюще: кто убо может спасен быти? 26 Воззрев же Иисус рече им: у человек сие невозможно есть, у Бога же вся возможна. 27 Тогда отвецав Петр рече Ему: се, мы оставихом вся и вслед Тебе идохом: что убо будет нам? 28 Иисус же рече им: аминь глаголю вам, яко вышедши по Мне, в пакибытие, егда сядет Сын Человеческий

на престоле славы Своя, сядете и вы на двюнадесяте престолю, судяще обеманадесяте коленом Израилевома: **29** и всяк, иже оставит дом, или братию, или сестры, или отца, или мать, или жену, или чада, или села, имене Моего ради, сторицею приимет и живот вечный наследит: **(aiōnios g166) 30** мнози же будут перви последнии, и последни первии.

**20** Подобно бо есть Царствие Небесное человеку домовиту, иже изыде купно утро наяти делатели в виноград свой, **2** и совещав с делатели по пенязю на день, посла их в виноград свой. **3** И изшед в третий час, виде ины стояща на торжици праздны, **4** и тем рече: идите и вы в виноград мой, и еже будет правда, дам вам. Они же идоша. **5** Паки же изшед в шестый и девятый час, сотвори такоже. **6** Во единыйнадесять час изшед, обрете другия стояща праздны и глагола им: что зде стоите весь день праздни? **7** Глаголаша ему: яко никтоже нас наят. Глагола им: идите и вы в виноград (мой), и еже будет праведно, приимете. **8** Вечеру же бывшу, глагола господин винограда к приставнику своему: призови делатели и даждь им мзду, начен от последних до первых. **9** И пришедше иже во единыйнадесять час, прияша по пенязю. **10** Пришедше же первии мняху, яко вящше приимут: и прияша и тии по пенязю: **11** приемше же роптаху на господина, **12** глаголюще, яко сии последнии един час сотвориша, и равных нам сотворил их еси, понесшым тяготу дне и вар. **13** Он же отвещав рече единому их: друже, не обижу тебе: не по пенязю ли совещал еси со мною? **14** Возми твое и иди: хочу же и сему последнему дати, якоже и тебе: **15** или несть ми леть сотворити, еже хочу, во своих ми? Аще око твое лукаво есть, яко аз благ есмь? **16** Тако будут

последнии перви, и первии последни: мнози бо суть звани, мало же избранных. 17 И восходя Иисус во Иерусалим, поят обанадесяте ученика едины на пути и рече им: 18 се, восходим во Иерусалим, и Сын Человеческий предан будет архиереем и книжником: и осудят Его на смерть, 19 и предадут Его языком на поругание и биение и пропятие: и в третий день воскреснет. 20 Тогда приступи к Нему матери сыну Зеведеову с сынома своима, кланяющихся и просящи нечто от Него. 21 Он же рече ей: чесо хочещи? Глагола Ему: рцы, да сядета сия оба сына моя, един одесную Тебе, и един ошуюю (Тебе), во Царствии Твоем. 22 Отвещав же Иисус рече: не веста, чесо просита: можета ли пити чашу, юже Аз имам пити, или крещением, имже Аз крещаяся, креститися? Глаголаста Ему: можева. 23 И глагола има: чашу убо Мою испиета, и крещением, имже Аз крещаяся, имате креститися: а еже сести одесную Мене и ошуюю Мене, несть Мое дати, но имже уготовася от Отца Моего. 24 И слышавше десять, негодоваша о обою брату. 25 Иисус же призвав их, рече: весте, яко князи язык господствуют ими, и велиции обладают ими: 26 не тако же будет в вас: но иже аще хочет в вас вящший быти, да будет вам слуга: 27 и иже аще хочет в вас быти первый, буди вам раб: 28 якоже Сын Человеческий не прииде, да послужат Ему, но послужити и дати душу Свою избавление за многих. 29 И исходящу Ему от Иерихона, по Нем иде народ мног. 30 И се, два слепца сидяща при пути, слышавша, яко Иисус мимоходит, возопиаста, глаголюща: помилуй ны, Господи, Сыне Давидов. 31 Народ же прещаше има, да умолчита: она же паче вопияста, глаголюща: помилуй ны, Господи,



Сыне Давидов. **32** И востав Иисус возгласи я и рече: что хочета, да сотворю вама? **33** Глаголаста Ему: Господи, да отверзетеса очи наю. **34** Милосердовав же Иисус прикоснулся очию има: и абие прозреста има очи, и по Нем идоста.

**21** И егда приближишася во Иерусалим и приидоша в Вифсфагию к горе Елеонстей, тогда Иисус посла два ученика, **2** глаголя има: идита в весь, яже прямо вама: и абие обряцета осля привязано, и жребя с ним: отрешивша приведита Ми: **3** и аще вама кто речет что, речета, яко Господь ею требует: абие же послет я. **4** Сие же все бысть, да сбудетса реченное пророком, глаголющим: **5** рцыте дщери Сионове: се, Царь твой грядет тебе кроток, и всед на осля и жребя, сына подяремнича. **6** Шедша же ученика и сотворша, якоже повеле има Иисус, **7** приведоста осля и жребя: и возложиша верху ею ризы своя, и вседе верху их. **8** Множайшии же народи постилаху ризы своя по пути: друзии же резаху ветви от древ и постилаху по пути. **9** Народи же предходящии (ему) и вследствующии зваху, глаголюще: осанна Сыну Давидову: благословен Грядый во имя Господне: осанна в вышних. **10** И вшедшу Ему во Иерусалим, потрясеса весь град, глаголя: кто есть Сей? **11** Народи же глаголаху: Сей есть Иисус Пророк, иже от Назарета Галилейска. **12** И вниде Иисус в церковь Божию и изгна вся продающыя и купующыя в церкви, и трапезы торжником испроверже и седалища продающих голуби, **13** и глагола им: писано есть: храм Мой храм молитвы наречетса: вы же сотвористе и вертеп разбойником. **14** И приступиша к Нему хромии и слепии в церкви: и изцели их. **15** Видевше же архиерее и книжницы чудеса, яже сотвори, и отроки зовущя в церкви и

глаголюща: осанна Сыну Давидову, негодоваша 16 и реша Ему: слышиши ли, что сии глаголют? Иисус же рече им: ей: несте ли чли николиже, яко из уст младенец и ссущих совершил еси хвалу? 17 И оставль их, изыде вон из града в Вифанию и водворися ту. 18 Утру же возвращься во град, взалка: 19 и узрев смоковницу едину при пути, прииде к ней, и ничтоже обрете на ней, токмо листвие едино, и глагола ей: да николиже от тебе плода будет во веки. И абие изсше смоковница. (aiōn g165) 20 И видевше ученицы дивишася, глаголюще: како абие изсше смоковница? 21 Отвещав же Иисус рече им: аминь глаголю вам: аще имате веру и не усумнитесь, не токмо смоковничное сотворите, но аще и горе сей речете: двигнися и верзися в море, будет: 22 и вся, елика аще воспросите в молитве верующе, приимете. 23 И пришедшу Ему в церковь, приступиша к Нему учашу архиерее и старцы людстии, глаголюще: кою властью сия твориши? И кто Ти даде власть сию? 24 Отвещав же Иисус рече им: вопрошу вы и Аз слово едино: еже аще речете Мне, и Аз вам реку, кою властью сия творю: 25 крещение Иоанново откуда бе? С небесе ли, или от человек? Они же помышляху в себе, глаголюще: аще речем, с небесе: речет нам: почто убо не веровасте ему? 26 Аще ли речем, от человек: боимся народа: вси бо имут Иоанна яко пророка. 27 И отвечавше Иисусови реша: не вемы. Рече им и Той: ни Аз вам глаголю, кою властью сия творю. 28 Что же ся вам мнит? Человек некий имяше два сына, и пришед к первому, рече: чадо, иди днесь, делай в винограде моем. 29 Он же отвечав рече: не хощу: последи же раскаявся, иде. 30 И приступль к другому, рече такоже. Он же отвечав рече: аз,

господи (иду): и не иде. 31 Кий от обою сотвори волю отчу? Глаголаша Ему: первый. Глагола им Иисус: аминь глаголю вам, яко мытари и любодейцы варяют вы в Царствии Божии: 32 прииде бо к вам Иоанн (Креститель) путем праведным, и не веровасте ему, мытари же и любодейцы вероваша ему: вы же видевше, не раскаястесь последи веровати ему. 33 Ину притчу слышите. Человек некий бе домовит, иже насади виноград, и оплотом огради его, и ископа в нем точило, и созда столп, и вдаде и делателем, и отиде. 34 Егда же приближися время плодов, посла рабы своя к делателем прияти плоды его: 35 и емше делателе рабов его, оваго убо биша, оваго же убиша, оваго же камением побиша. 36 Паки посла ины рабы множайша первых: и сотвориша им такоже. 37 Последи же посла к ним сына своего, глаголя: усрамятся сына моего. 38 Делателе же видевше сына, реша в себе: сей есть наследник: приидите, убием его и удержим достояние его. 39 И емше его изведоша вон из винограда и убиша. 40 Егда убо приидет господин винограда, что сотворит делателем тем? 41 Глаголаша Ему: злых зле погубит их, и виноград предаст иным делателем, иже воздадут ему плоды во времена своя. 42 Глагола им Иисус: несте ли чли николиже в Писаниих: камень, егоже не в ряду сотвориша зиждущии, сей бысть во главу угла? От Господа бысть сие, и есть дивно во очию вашу. 43 Сего ради глаголю вам, яко отимется от вас Царствие Божие и дастся языку творящему плоды его: 44 и падый на камени сем сокрушится: а на немже падет, сотрыет и. 45 И слышавше архиерее и фарисее притчи Его, разумеша, яко о них глаголет: 46 и ищуще Его яти, убояшася народа, понеже яко Пророка Его имяху.

**22** И отвещав Иисус, паки рече им в притчах, глаголя: 2 уподобися Царствие Небесное человеку царю, иже сотвори браки сыну своему 3 и посла рабы своя призвати званья на браки: и не хотяху приити. 4 Паки посла ины рабы, глаголя: рцыте званым: се, обед мой уготовах, юнцы мои и упитанная исколена, и вся готова: приидите на браки. 5 Они же небрегше отидоша, ов убо на село свое, ов же на купли своя: 6 прочии же емше рабов его, досадиша им и убиша их. 7 И слышав царь той разгневался, и послав воя своя, погуби убийцы оны и град их зажже. 8 Тогда глагола рабом своим: брак убо готов есть, званнии же не быша достойни: 9 идите убо на исходища путей, и елицех аще обряцете, призовите на браки. 10 И изшедше раби они на распутья, собраша всех, елицех обретоша, злых же и добрых: и исполнися брак возлежащих. 11 Вшед же царь видети возлежащих, виде ту человека не облечена во одеяние брачное, 12 и глагола ему: друже, како вшел еси семо не имый одеяния брачна? Он же умолча. 13 Тогда рече царь слугам: связавше ему руце и нозе, возьмите его и вверзите во тму кромешнюю: ту будет плачь и скрежет зубом: 14 мнози бо суть звани, мало же избранных. 15 Тогда шедше фарисее, совет восприяша, яко да обольстят Его словом. 16 И посылают к Нему ученики своя со иродианы, глаголюще: Учителю, вемы, яко истинен еси, и пути Божию воистинну учиши, и нерадиши ни о комже: не зриши бо на лице человеком: 17 рцы убо нам, что Ти ся мнит? Достойно ли есть дати кинсон кесареви, или ни? 18 Разумев же Иисус лукавство их, рече: что Мя искушаете, лицемери? 19 Покажите Ми златицу кинсонную. Они же принесоша Ему пенязь. 20 И глагола им: чий образ сей и

написание? 21 (И) глаголаша Ему: кесарев. Тогда глагола им: воздадите убо кесарева кесареви, и Божия Богови. 22 И слышавше дивишася: и оставльше Его отидоша. 23 В той день приступиша к Нему саддукее, иже глаголют не быти воскресению, и вопросиша Его, 24 глаголюще: Учителю, Моисей рече: аще кто умрет не имый чад, (да) поймет брат его жену его и воскресит семя брата своего: 25 беша же в нас седьм братия: и первый оженься умре, и не имый семене, остави жену свою брату своему: 26 такожде же и второй, и третий, даже до седмаго: 27 последи же всех умре и жена: 28 в воскресение убо, котораго от седмих будет жена? Все бо имеша ю. 29 Отвещав же Иисус рече им: прельщаетесь, не ведуще Писания, ни силы Божия: 30 в воскресение бо ни женятся, ни посягают, но яко Ангели Божии на небеси суть: 31 о воскресении же мертвых несте ли чли реченнаго вам Богом, глаголющим: 32 Аз есмь Бог Авраамов, и Бог Исааков, и Бог Иаковль? Несть Бог Бог мертвых, но (Бог) живых. 33 И слышавше народи дивляхуся о учении Его. 34 Фарисее же слышавше, яко посрами саддукеи, собрашася вкупе. 35 И вопроси един от них законоучитель, искушая Его и глаголя: 36 Учителю, кая заповедь болши (есть) в законе? 37 Иисус же рече ему: возлюбиши Господа Бога твоего всем сердцем твоим, и всею душею твоею, и всею мыслию твоею: 38 сия есть первая и болшая заповедь: 39 вторая же подобна ей: возлюбиши искренняго твоего яко сам себе: 40 в сию обою заповедию весь закон и пророцы висят. 41 Собравшымся же фарисеом, вопроси их Иисус, 42 глаголя: что вам мнится о Христе? Чий есть Сын? Глаголаша Ему: Давидов. 43 Глагола им: како убо Давид Духом Господа

Его нарицает, глаголя: **44** рече Господь Господеви моему: седи одесную Мене, дондеже положу враги Твоя подножие ногама Твоима? **45** Аще убо Давид нарицает Его Господа, како сын ему есть? **46** И никтоже можаше отвещати Ему словесе: ниже смеяше кто от того дне вопросити Его ктому.

**23** Тогда Иисус глагола к народом и учеником Своим, **2** глаголя: на Моисеове седалищи седоша книжницы и фарисее: **3** вся убо, елика аще рекут вам блюсти, соблюдайте и творите: по делом же их не творите: глаголют бо, и не творят: **4** связуют бо бремена тяжка и бедне носима, и возлагают на плеща человеческа, перстом же своим не хотят двинути их. **5** Вся же дела своя творят, да видими будут человеки: расширяют же хранилища своя и величают воскрилия риз своих: **6** любят же преждевозлегания на вечерях, и преждеседания на сонмищих, **7** и целования на торжищих, и зватися от человек: учителю, учителю. **8** Вы же не нарицайтесь учителяе: един бо есть ваш Учитель, Христос: вси же вы братия есте: **9** и отца не зовите себе на земли: един бо есть Отец ваш, Иже на небесех: **10** ниже нарицайтесь наставницы: един бо есть Наставник ваш, Христос. **11** Болий же в вас да будет вам слуга: **12** иже бо вознесется, смирится: и смиряяйся вознесется. **13** Горе вам, книжницы и фарисее, лицемери, яко затворяете Царствие Небесное пред человеки: вы бо не входите, ни входящих оставляете внити. **14** Горе вам, книжницы и фарисее, лицемери, яко снedaете дома вдовиц, и виною далече молитвы творяще: сего ради лишнее примете осуждение. **15** Горе вам, книжницы и фарисее, лицемери, яко преходите море и сушу, сотворити единого пришелца: и егда будет,

творите его сына геенны сугубейша вас. (Geenna g1067) 16 Горе вам, вожди слепии, глаголющии: иже аще кленется церковию, ничесоже есть: а иже кленется златом церковным, должен есть. 17 Буи и слепии, что бо более есть, злато ли, или церковь, святящая злато? 18 И: иже аще кленется олтарем, ничесоже есть: а иже кленется даром, иже верху его, должен есть. 19 Буи и слепии, что бо более, дар ли, или олтарь, святяй дар? 20 Иже убо кленется олтарем, кленется им и сущим верху его: 21 и иже кленется церковию, кленется ею и Живущим в ней: 22 и кленийся небесем кленется Престолом Божиим и Седящим на нем. 23 Горе вам, книжницы и фарисее, лицемери, яко одесятствуете мятву и копр и кимин, и остависте вящшая закона, суд и милость и веру: сия (же) подобаше творити, и оных не оставляти. 24 Вожди слепии, оеждающии комары, велблуды же пожирающе. 25 Горе вам, книжницы и фарисее лицемери, яко очищаете внешнее сткляницы и блюда, внутрьуду же суть полни хищения и неправды: 26 фарисее слепый, очисти прежде внутреннее сткляницы и блюда, да будет и внешнее има чисто. 27 Горе вам, книжницы и фарисее, лицемери, яко подобитесь гробом повапленным, иже внеуду убо являются красны, внутрьуду же полни суть костей мертвых и всякия нечистоты: 28 тако и вы, внеуду убо являетесь человеком праведни, внутрьуду же есте полни лицемерия и беззакония. 29 Горе вам, книжницы и фарисее, лицемери, яко зиждете гробы пророческия, и красите раки праведных, 30 и глаголете: аще быхом были во дни отец наших, не быхом убо общницы им были в крови пророк: 31 темже сами свидетелствуете себе, яко сынове есте избивших пророки: 32 и вы исполните меру отец ваших.

33 Змия, порождения ехиднова, како убежите от суда (огня) геенскаго? (Geenna g1067) 34 Сего ради, се, Аз пошлю к вам пророки и премудры и книжники: и от них убиеете и распнете, и от них биете на сонмищих ваших, и изженете от града во град: 35 яко да приидет на вы всяка кровь праведна, проливаемая на земли, от крове Авеля праведнаго до крове Захарии сына Варахиина, егоже убисте между церковию и олтарем. 36 Аминь глаголю вам: (яко) приидут вся сия на род сей. 37 Иерусалиме, Иерусалиме, избивый пророки и камением побиваяй посланныя к тебе, колькраты восхотех собрати чада твоя, якоже собирает кокош птенцы своя под криле, и не восхотесте? 38 Се, оставляется вам дом ваш пуст. 39 Глаголю бо вам: (яко) не имате Мене видети отселе, дондеже речете: благословен Грядый во имя Господне.

**24** И изшед Иисус идяше от церкви. И приступиша (к Нему) ученицы Его показати Ему здания церковная. 2 Иисус же рече им: не видите ли вся сия? Аминь глаголю вам, не имать остати zde камень на камени, иже не разорится. 3 Седящу же Ему на горе Елеонстей, приступиша к Нему ученицы на едине, глаголюще: рцы нам, когда сия будут? И что есть знамение Твоего пришествия и кончина века? (aiōn g165) 4 И отвещав Иисус рече им: блюдите, да никтоже вас прельстит: 5 мнози бо приидут во имя Мое, глаголюще: Аз есмь Христос: и многи прельстят. 6 Услышати же имате брани и слышания бранем. Зрите, не ужасайтесь, подобает бо всем (сим) быти: но не тогда есть кончина. 7 Восстанет бо язык на язык, и царство на царство: и будут глади и пагубы и труси по местом: 8 вся же сия начало болезнем. 9 Тогда предадут вы в скорби и убьют вы: и будете ненавидими



всеми языки имене Моего ради. 10 И тогда соблазнятся мнози, и друг друга предадут, и возненавидят друг друга: 11 и мнози лжепророцы востанут и прельстят многия: 12 и за умножение беззакония, изсякнет любы многих. 13 Претерпевый же до конца, той спасется. 14 И проповестся сие Евангелие Царствия по всей вселенней, во свидетельство всем языком: и тогда придет кончина. 15 Егда убо узрите мерзость запустения, реченную Даниилом пророком, стоящу на месте святе: иже четет, да разумеет: 16 тогда сущии во Иудеи да бежат на горы: 17 (и) иже на крове, да не сходит взяти яже в дому его: 18 и иже на селе, да не возвратится вспять взяти риз своих. 19 Горе же неспрадным и доящым в тья дни. 20 Молитесь же, да не будет бегство ваше в зиме, ни в субботу. 21 Будет бо тогда скорбь велия, якоже не была от начала мира доселе, ниже имать быти. 22 И аще не быша прекратилися дние оны, не бы убо спаслася всяка плоть: избранных же ради прекратятся дние оны. 23 Тогда аще кто речет вам: се, zde Христос, или онде: не имите веры: 24 востанут бо лжехристи и лжепророцы и дадут знамения велия и чудеса, якоже прельстити, аще возможно, и избранныя. 25 Се, прежде рех вам. 26 Аще убо рекут вам: се, в пустыни есть, не изыдите: се, в сокровищих, не имите веры: 27 якоже бо молния исходит от восток и является до запад, тако будет пришествие Сына Человеческого: 28 идеже бо аще будет труп, тамо соберутся орли. 29 Абие же, по скорби дний тех, солнце померкнет, и луна не даст света своего, и звезды спадут с небесе, и силы небесныя подвижутся: 30 и тогда явится знамение Сына Человеческого на небеси: и тогда восплачутся вся колена земная и узрят

Сына Человеческого грядуща на облацех небесных с силою и славою многою: 31 и послет Ангелы Своя с трубным гласом велиим, и соберут избранныя Его от четырех ветр, от конец небес до конец их. 32 От смоковницы же научитесь притчи: егда уже ваия ея будут млада, и листвие прозябнет, ведите, яко близ есть жатва: 33 тако и вы, егда видите сия вся, ведите, яко близ есть, при дверех. 34 Аминь глаголю вам, не мимоидет род сей, дондеже вся сия будут: 35 небо и земля мимоидет, словеса же Моя не мимоидут. 36 О дни же том и часе никтоже весть, ни Ангели небеснии, токмо Отец Мой един: 37 якоже (бо бысть во) дни Ноевы, тако будет и пришествие Сына Человеческого: 38 якоже бо беху во дни прежде потопа ядуще и пиюще, женящися и посягающе, до негоже дне вниде Ное в ковчег, 39 и не уведеша, дондеже прииде вода и взят вся: тако будет и пришествие Сына Человеческого: 40 тогда два будета на селе: един поемлется, а другой оставляется: 41 две мелюще в жерновех: едина поемлется, и едина оставляется. 42 Бдите убо, яко не весте, в кий час Господь ваш приидет. 43 Сие же ведите, яко аще бы ведал дому владыка, в кую стражу тать приидет, бдел убо бы и не бы дал подкопати храма своего. 44 Сего ради и вы будите готови: яко, в оньже час не мните, Сын Человеческий приидет. 45 Кто убо есть верный раб и мудрый, егоже поставит господин его над домом своим, еже даяти им пищу во время (их)? 46 Блажен раб той, егоже, пришед господин его, обрящет тако творяща: 47 аминь глаголю вам, яко над всем имением своим поставит его. 48 Аще ли же речет злый раб той в сердцы своем: коснит господин мой приити, 49 и начнет бити клеветы своя, ясти же и пити с пияницами: 50

приидет господин раба того в день, в онъже не чаает, и в час, в онъже не вестъ, 51 и растешет его полма, и часть его с неверными положит: ту будет плачь и скрежет зубом.

**25** Тогда уподобися Царствие Небесное десятиим девам, яже прияша светилники своя и изыдоша в сретение жениху: 2 пять же бе от них мудры и пять юродивы. 3 Юродивыя же, приемшя светилники своя, не взяша с собою елеа: 4 мудрыя же прияша елей в сосудех со светилники своими: 5 коснящу же жениху, воздремашася вся и спяху. 6 Полунощи же вопль бысть: се, жених грядет, исходите в сретение его. 7 Тогда восташа вся девы тыя и украсиша светилники своя. 8 Юродивыя же мудрым реша: дадите нам от елеа вашего, яко светилницы наши угасают. 9 Отвещаша же мудрыя, глаголющя: еда како не достанет нам и вам: идите же паче к продающым и купите себе. 10 Идущым же им купити, прииде жених: и готовыя внидоша с ним на браки, и затворены быша двери. 11 Последи же приидоша и прочыя девы, глаголющя: Господи, Господи, отверзи нам. 12 Он же отвещав рече им: аминь глаголю вам, не вем вас. 13 Бдите убо, яко не весте дне ни часа, в онъже Сын Человеческий приидет. 14 Якоже бо человек некий отходя призва своя рабы и предаде им имение свое: 15 и овому убо даде пять талант, овому же два, овому же един, комуждо противу силы его: и отиде абие. 16 Шед же приемый пять талант, дела в них и сотвори другия пять талант: 17 такожде и иже два, приобрете и той другая два: 18 приемый же един, шед вкопа (его) в землю и скры сребро господина своего. 19 По мнозе же времени прииде господин раб тех и стязася с ними о словеси. 20 И приступль пять талант приемый, принесе

другия пять талант, глаголя: господи, пять талант ми еси предал: се, другия пять талант приобретох ими. 21 Рече же ему господь его: добре, рабе благий и верный: о мале был еси верен, над многими тя поставлю: вниди в радость господя твоего. 22 Приступль же и иже два таланта приемый, рече: господи, два таланта ми еси предал: се, другая два таланта приобретох има. 23 Рече (же) ему господь его: добре, рабе благий и верный: о мале (ми) был еси верен, над многими тя поставлю: вниди в радость господя твоего. 24 Приступль же и приемый един талант, рече: господи, ведях тя, яко жесток еси человек, жнеши, идеже не сеял еси, и собираеши идеже не расточил еси: 25 и убоявся, шед скрых талант твой в земли: (и) се, имаши твое. 26 Отвещав же господь его рече ему: лукавый рабе и ленивый, ведел еси, яко жну идеже не сеях, и собираю идеже не расточих: 27 подобаше убо тебе вдати сребро мое торжником, и пришед аз взял бых свое с лихвою: 28 возьмите убо от него талант и дадите имущему десять талант: 29 имущему бо везде дано будет и преизбудет: от неимущаго же, и еже мнится имея, взято будет от него: 30 и неключимаго раба вверзите во тму кромешнюю: ту будет плачь и скрежет зубом. Сия глаголя возгласи: имейяй уши слышати да слышит. 31 Егда же приидет Сын Человеческий в славе Своей и вси святии Ангели с Ним, тогда сядет на престоле славы Своея, 32 и соберутся пред Ним вси языцы: и разлучит их друг от друга, якоже пастырь разлучает овцы от козлищ: 33 и поставит овцы одесную Себе, а козлища ошуюю. 34 Тогда речет Царь сущым одесную Его: приидите, благословеннии Отца Моего, наследуйте уготованное вам Царствие от сложения мира: 35

взалкался бо, и дасте Ми ясти: возжадахся, и напоисте Мя: странен бех, и введосте Мене: 36 наг, и одеясте Мя: болен, и посетисте Мене: в темнице бех, и приидосте ко Мне. 37 Тогда отвечают Ему праведницы, глаголюще: Господи, когда Тя видехом алчуща, и напитахом? Или жаждуща, и напоихом? 38 Когда же Тя видехом странна, и введохом? Или нага, и одеяхом? 39 Когда же Тя видехом боляща, или в темнице, и приидохом к Тебе? 40 И отвечав Царь речет им: аминь глаголю вам, понеже сотвористе единому сих братий Моих меньших, Мне сотвористе. 41 Тогда речет и сущым ошуюю (Его): идите от Мене, проклятии, во огонь вечный, уготованный диаволу и аггелом его: (aiōnios g166) 42 взалкался бо, и не дасте Ми ясти: возжадахся, и не напоисте Мене: 43 странен бех, и не введосте Мене: наг, и не одеясте Мене: болен и в темнице, и не посетисте Мене. 44 Тогда отвечают Ему и тии, глаголюще: Господи, когда Тя видехом алчуща, или жаждуща, или странна, или нага, или больна, или в темнице, и не послужихом Тебе? 45 Тогда отвечает им, глаголя: аминь глаголю вам, понеже не сотвористе единому сих меньших, ни Мне сотвористе. 46 И идут сии в муку вечную, праведницы же в живот вечный. (aiōnios g166)

**26** И бысть, егда сконча Иисус вся словеса сия, рече учеником Своим: 2 весте, яко по двою дню Пасха будет, и Сын Человеческий предан будет на пропятие. 3 Тогда собращася архиерее и книжницы и старцы людстии во двор архиереев, глаголемаго Каиафы, 4 и совещаща, да Иисуса лестию имут и убьют: 5 глаголаху же: но не в праздник, да не молва будет в людех. 6 Иисусу же бывшу в Вифании, в дому Симона прокаженного, 7 приступи к Нему жена,

сткляницу мира имущи многоценнаго, и возливаше на главу Его возлежаща. 8 Видевше же ученицы Его негодоваша, глаголюще: чесо ради гибель сия (бысть)? 9 Можаше бо сие миро продано быти на мнозе и датися нищым. 10 Разумев же Иисус рече им: что труждаете жену? Дело бо добро содела о Мне: 11 всегда бо нищыя имате с собою, Мене же не всегда имате: 12 возливши бо сия миро сие на тело Мое, на погребение Мя сотвори: 13 аминь глаголю вам: идеже аще проповедано будет Евангелие сие во всем мире, речется и еже сотвори сия, в память ея. 14 Тогда шед един от обоюнадесяте, глаголемый Иуда Искариотский, ко архиереом, 15 рече: что ми хочете дати, и аз вам предам Его? Они же поставиша ему тридесять сребреник: 16 и оттоле искаше удобна времени, да Его предаст. 17 В первый же день опресночный приступиша ученицы ко Иисусу, глаголюще Ему: где хочещи уготоваем Ти ясти пасху? 18 Он же рече: идите во град ко онсице, и рцыте ему: Учитель глаголет: время Мое близ есть: у тебе сотворю пасху со ученики Моими. 19 И сотвориша ученицы, якоже повеле им Иисус, и уготоваша пасху. 20 Вечеру же бывшу, возлежаше со обеманадесяте ученикома: 21 и ядущым им, рече: аминь глаголю вам, яко един от вас предаст Мя. 22 И скорбяще зело, начаша глаголати Ему един кийждо их: еда аз есмь, Господи? 23 Он же отвещав рече: омочивый со Мною в солило руку, той Мя предаст: 24 Сын убо Человеческий идет, якоже есть писано о Нем: горе же человеку тому, имже Сын Человеческий предастся: добро бы было ему, аще не бы родился человек той. 25 Отвещав же Иуда предавая Его, рече: еда аз есмь, Равви? Глагола ему: ты рекл еси. 26 Ядущым

же им, приемь Иисус хлеб и благословив преломи, и даяше учеником, и рече: примите, ядите: сие есть Тело Мое. 27 И приемь чашу и хвалу воздав, даде им, глаголя: пейте от нея вси: 28 сия бо есть Кровь Моя, Новаго Завета, яже за многия изливаема во оставление грехов. 29 Глаголю же вам, яко не имам пити отныне от сего плода лознаго, до дне того, егда е пию с вами ново во Царствии Отца Моего. 30 И воспевше изыдоша в гору Елеонску. 31 Тогда глагола им Иисус: вси вы соблазнитесь о Мне в ночь сию: писано бо есть: поражу пастыря, и разыдутся овцы стада: 32 по воскресении же Моем варяю вы в Галилеи. 33 Отвещав же Петр рече Ему: аще и вси соблазнятся о Тебе, аз никогдаже соблажнюся. 34 Рече ему Иисус: аминь глаголю тебе, яко в сию ночь, прежде даже алектор не возгласит, трикраты отвержешься Мене. 35 Глагола Ему Петр: аще ми есть и умрети с Тобою, не отвергуся Тебе. Такжеде и вси ученицы реша. 36 Тогда прииде с ними Иисус в весь, нарицаемую Гефсиманиа, и глагола учеником: седите ту, дондеже шед помолюся тамо. 37 И поемь Петра и оба сына Зеведеова, начат скорбети и тужити. 38 Тогда глагола им Иисус: прискорбна есть душа Моя до смерти: пождите зде и бдите со Мною. 39 И прешед мало, паде на лица Своем, моляся и глаголя: Отче Мой, аще возможно есть, да мимоидет от Мене чаша сия: обаче не якоже Аз хочу, но якоже Ты. 40 И пришед ко учеником, и обрете их спящих, и глагола Петрови: тако ли не возмогосте единого часа побдети со Мною? 41 Бдите и молитесь, да не внидете в напасть: дух убо бодр, плоть же немощна. 42 Паки вторицею шед помолися, глаголя: Отче Мой, аще не может сия чаша мимоити от Мене, аще

не пию ея, буди воля Твоя. 43 И пришед обрете их паки спящих: беста бо им очи отяготене. 44 И оставль их, шед паки, помолися третицею, тожде слово рек. 45 Тогда прииде ко учеником Своим и глагола им: спите прочее и почивайте: се, приближися час, и Сын Человеческий предается в руки грешников: 46 встаните, идем: се, приближися предай Мя. 47 И еще Ему глаголющу, се, Иуда, един от обоюнадесяте, прииде, и с ним народ мног со оружием и дрекольми, от архиерей и старец людских. 48 Предай же Его даде им знамение, глаголя: Егоже аще лобжу, Той есть: имите Его. 49 И абие приступль ко Иисусови, рече: радуйся, Равви. И облобыза Его. 50 Иисус же рече ему: друже, (твори, ) на неже еси пришел. Тогда приступльше возложиша руце на Иисуса и яша Его. 51 И се, един от сущих со Иисусом, простер руку, извлече нож свой, и удари раба архиереова, и уреза ему ухо. 52 Тогда глагола ему Иисус: возврати нож твой в место его: вси бо приемшии нож ножем погибнут: 53 или мнится ти, яко не могу ныне умолити Отца Моего, и представит Ми вящше неже дванадесяте легеона Ангел? 54 Како убо сбдутся Писания, яко тако подобает быти? 55 В той час рече Иисус народом: яко на разбойника ли изыдoste со оружием и дрекольми яти Мя? По вся дни при вас седех учя в церкви, и не ясте Мене. 56 Се же все бысть, да сбдутся писания пророческая. Тогда ученицы вси оставльше Его бежаша. 57 (Воини) же емше Иисуса ведоша к Каиафе архиереови, идеже книжницы и старцы собрашася. 58 Петр же идяше по Нем издалеца до двора архиереова: и вшед внутрь, седяше со слугами, видети кончину. 59 Архиерее же и старцы и сонм весь искаху лжесвидетелства на Иисуса, яко да убьют Его,



60 и не обретаху: и многим лжесвидетелем приступльшым, не обретоша. Послежде же приступивша два лжесвидетеля, 61 реста: Сей рече: могу разорити церковь Божию и трем денми создати ю. 62 И востав архиерей рече Ему: ничесоже ли отвечаваеши, что сии на Тя свидетелствуют? 63 Иисус же молчаше. И отвечав архиерей рече Ему: заклинаю Тя Богом живым, да речеши нам, аще Ты еси Христос, Сын Божий? 64 Глагола ему Иисус: ты рекл еси: обаче глаголю вам: отселе узрите Сына Человеческого седяща одесную силы и грядуща на облацех небесных. 65 Тогда архиерей растерза ризы своя, глаголя, яко хулу глагола: что еще требуем свидетелей? Се, ныне слышасте хулу Его: 66 что вам мнится? Они же отвечающе реша: повинен есть смерти. 67 Тогда заплеваша лице Его и пакости Ему деяху: овии же за ланиту удариша, 68 глаголюще: прорцы нам, Христе, кто есть ударей Тя? 69 Петр же вне седяше во дворе. И приступи к нему едина рабыня, глаголющи: и ты был еси со Иисусом Галилейским. 70 Он же отвержеся пред всеми, глаголя: не вем, что глаголеши. 71 Изшедшу же ему ко вратом, узре его другая, и глагола сущым тамо: и сей бе со Иисусом Назореом. 72 И паки отвержеся с клятвою, яко не знаю Человека. 73 Помале же приступивше стоящи, реша Петрови: воистинну и ты от них еси, ибо беседа твоя яве тя творит. 74 Тогда начат ротитися и клятися, яко не знаю Человека. И абие петель возгласи. 75 И помяну Петр глаголгол Иисусов, реченный ему, яко прежде даже петель не возгласит, трикраты отвержешися Мене. И изшед вон плакася горько.

**27** Утру же бывшу, совет сотвориша вси архиерее и старцы людстии на Иисуса, яко убити Его: **2** и связавше Его ведоша и предаша Его Понтийскому Пилату игемону. **3** Тогда виде Иуда предавый Его, яко осудиша Его, раскаявся возврати тридесять сребреники архиереем и старцем, **4** глаголя: согрших предав кровь неповинную. Они же реша: что есть нам? Ты узриши. **5** И поверг сребреники в церкви, отиде: и шед удавился. **6** Архиерее же приемше сребреники, реша: недостойно есть вложить их в корвану, понеже цена крове есть. **7** Совет же сотворше, купиша ими село скудельничо, в погребание странным: **8** темже наречесе село то село крове, до сего дне: **9** тогда сбытся реченное Иеремием пророком, глаголющим: и прияша тридесять сребреник, цену Цененнаго, Егоже цениша от сынов Израилев, **10** и даша я на село скудельничо, якоже сказа мне Господь. **11** Иисус же ста пред игемоном. И вопроси Его игемон, глаголя: Ты ли еси Царь Иудейский? Иисус же рече ему: ты глаголеши. **12** И егда Нань глаголаху архиерее и старцы, ничесоже отвещаваше. **13** Тогда глагола Ему Пилат: не слышиши ли, колика на Тя свидетелствуют? **14** И не отвеща ему ни к единому глаголу, яко дивитися игемону зело. **15** На (всяк) же праздник обычай бе игемону отпущати единого народу связня, егоже хотяху: **16** имяху же тогда связана нарочита, глаголемаго Варавву: **17** собравшымся же им, рече им Пилат: кого хотите (от обою) отпущу вам: Варавву ли, или Иисуса глаголемаго Христа? **18** Ведяше бо, яко зависти ради предаша Его. **19** Сядящу же ему на судищи, посла к нему жена его, глаголющи: ничтоже тебе и Праведнику Тому: много бо пострадах днесь во сне Его ради. **20** Архиерее же

и старцы наустиша народы, да испросят Варавву, Иисуса же погубят. 21 Отвещав же игемон рече им: кого хотите от обою отпущу вам? Они же реша: Варавву. 22 Глагола им Пилат: что убо сотворю Иисусу глаголемому Христу? Глаголаша ему вси: да распят будет. 23 Игемон же рече: кое убо зло сотвори? Они же излиха вопияху, глаголюще: да пропят будет. 24 Видев же Пилат, яко ничтоже успеваает, но паче молва бывает, приемь воду, умы руце пред народом, глаголя: неповинен есмь от крове Праведнаго Сего: вы узрите. 25 И отвечавше вси людие реша: кровь Его на нас и на чадех наших. 26 Тогда отпусти им Варавву: Иисуса же бив предаде (им), да Его пропнут. 27 Тогда воины игемоновы, приемше Иисуса на судище, собраша Нань все множество воин: 28 и совлекше Его, одеяша Его хламидою червленою: 29 и сплетше венец от терния, возложиша на главу Его, и трость в десницу Его: и поклоньшеся на колену пред Ним ругахуся Ему, глаголюще: радуйся, Царю Иудейский. 30 И плюнувшю Нань, прияша трость и бияху по главе Его. 31 И егда поругашася Ему, совлекоша с Него багряницу и облекоша Его в ризы Его: и ведоша Его на пропятие. 32 Исходяще же обретоша человека Киринейска, именем Симона: и сему задеша понести крест Его. 33 И пришедше на место нарицаемое Голгофа, еже есть глаголемо Краниево место, 34 даша Ему пити оцет с желчию смешен: и вкушь, не хотяше пити. 35 Распеншии же Его разделиша ризы Его, вергше жребия: 36 и сидяще стрежаху Его ту: 37 и возложиша верху главы Его вину Его написану: Сей есть Иисус, Царь Иудейский. 38 Тогда распяша с Ним два разбойника: единого о десную, и единого о шуюю. 39 Мимоходящии же хуляху

Его, покиваяще главами своими 40 и глаголюще: Разоряй церковь и трети денми Созидаяй, спасися Сам: аще Сын еси Божий, сниди со креста. 41 Такожде же и архиерее ругающесе с книжники и старцы (и фарисеи), глаголаху: 42 инья спасе, Себе ли не может спасти? Аще Царь Израилев есть, да снидет ныне со креста, и веруем в Него: 43 упова на Бога: да избавит ныне Его, аще хочет Ему. Рече бо, яко Божий есмь Сын. 44 Тожде же и разбойника распята с Ним поношаста Ему. 45 От шестаго же часа тма бысть по всей земли до часа девятаго: 46 о девятем же часе возопи Иисус гласом велиим, глаголя: Или, Или, лима савахфани? Еже есть, Боже Мой, Боже Мой, вскую Мя еси оставил? 47 Нецыи же от ту стоящих слышавше глаголаху, яко Илию глашает Сей. 48 И абие тек един от них, и приемь губу, исполнив же оцта, и вонзе на трость, напаяше Его. 49 Прочии же глаголаху: остави, да видим, аще придет Илия спасти Его. 50 Иисус же, паки возопив гласом велиим, испусти дух. 51 И се, завеса церковная раздрася на двое с вышняго края до нижняго: и земля потрясеся: и камень распадеся: 52 и гроби отверзошася: и многа тела усопших святых восташа: 53 и изшедше из гроб, по воскресении Его, внидоша во святей град и явишася мнозем. 54 Сотник же и иже с ним стрегущии Иисуса, видевше трус и бывшая, убояшася зело, глаголюще: воистинну Божий Сын бе Сей. 55 Бяху же ту и жены многи издалеча зрящя, яже идоша по Иисусе от Галилеи, служащя Ему: 56 в нихже бе Мариа Магдалина, и Мариа Иакова и Иосии мати, и мати сыну Зеведеову. 57 Позде же бывшу, прииде человек богат от Аримафеа, именем Иосиф, иже и сам учися у Иисуса: 58 сей приступль к Пилату, проси телесе

Иисусова. Тогда Пилат повеле дати тело. 59 И приемь тело Иосиф, обвит е плащаницею чистою 60 и положи е в новом своем гробе, егоже изсече в камени: и возвалив камень велий над двери гроба, отиде. 61 Бе же ту Мариа Магдалина и другая Мариа, сидяще прямо гроба. 62 Во утрий же день, иже есть по пятце, собращася архиерее и фарисее к Пилату, 63 глаголюще: господи, помянухом, яко льстец он рече, еще сый жив: по триех днех востану: 64 повели убо утвердити гроб до третияго дне, да не како пришедше ученицы Его нощию украдут Его и рекут людем: воста от мертвых: и будет последняя лесь горша первая. 65 Рече же им Пилат: имате кустодию: идите, утвердите, якоже весте. 66 Они же шедше утвердиша гроб, знаменавше камень с кустодию.

**28** В вечер же субботный, свитаючи во едину от суббот, прииде Мариа Магдалина и другая Мариа, видети гроб. 2 И се, трус бысть велий: Ангел бо Господень сшед с небесе, приступль отвали камень от дверей гроба и сидяше на нем: 3 бе же зрак его яко молния, и одеяние его бело яко снег. 4 От страха же его сотрясошася стрегущии и быша яко мертви. 5 Отвещав же Ангел рече женам: не бойтеся вы: вем бо, яко Иисуса распятаго ищите: 6 несть zde: воста бо, якоже рече: приидите, видите место, идеже лежа Господь, 7 и скоро шедше рцыте учеником Его, яко воста от мертвых и се, варяет вы в Галилеи: тамо Его узрите: се, рех вам. 8 И изшедше скоро от гроба со страхом и радостию велию, текосте возвестити учеником Его. 9 Егда же идясте возвестити учеником Его, и се, Иисус сrete я, глаголя: радуйтеся. Оне же приступльше ястеся за нозе Его и поклонистеся Ему. 10 Тогда глагола има Иисус: не

бойтеса: идите, возвестите братии Моей, да идут в Галилею, и ту Мя видят. 11 Идущема же има, се, нецыи от кустодии пришедше во град, возвестиша архиереем вся бывшая. 12 И собравшеса со старцы, совет сотвориша, сребреники доволны даша воином, 13 глаголюще: рцыте, яко ученицы Его нощию пришедше украдоша Его, нам спящим: 14 и аще сие услышано будет у игемона, мы утолим его и вас безпечальны сотворим. 15 Они же приемше сребреники, сотвориша, якоже научени быша. И промчеса слово сие во Иудеех даже до сего дне. 16 Единии же надесеате ученицы идоша в Галилею, в гору, аможе повеле им Иисус: 17 и видевшЕ Его, поклонишася Ему: ови же усумнешася. 18 И приступль Иисус, рече им, глаголя: дадеса Ми всяка власть на небеси и на земли: 19 шедше убо научите вся языки, крестяще их во имя Отца и Сына и Святаго Духа, 20 учаще их блюсти вся, елика заповедах вам: и се, Аз с вами есмь во вся дни до скончания века. Аминь. (аіѡн g165)

# От Марка святое благовествование

**1** Зачало Евангелиа Иисуса Христа, Сына Божия, **2** якоже есть писано во пророцех: се, Аз посылаю Ангела Моего пред лицем Твоим, иже уготовит путь Твой пред Тобою. **3** Глас вопиющего в пустыни: уготовайте путь Господень, правы творите стези Его. **4** Бысть Иоанн крестяй в пустыни и проповедая крещение покаяния во отпущение грехов. **5** И исхождаше к нему вся Иудейская страна и Иерусалимляне: и крещахуся вси во Иордане реце от него, исповедающе грехи своя. **6** Бе же Иоанн оболчен власы велблужди, и пояс усмен о чреслах его, и ядый акриды и мед дивий. **7** И проповедаше, глаголя: грядет Креплий мене вслед мене, Емуже несмь достоин преклонься разрешити ремень сапог Его: **8** аз убо крестих вы водою: Той же крестит вы Духом Святым. **9** И бысть во оных днех, прииде Иисус от Назарета Галилейскаго и крестися от Иоанна во Иордане. **10** И абие восходя от воды, виде разводящася небеса и Духа яко голубя, сходяща Нань. **11** И глас бысть с небесе: Ты еси Сын Мой возлюбленный, о Немже благоволих. **12** И абие Дух изведе Его в пустыню. **13** И бе ту в пустыни дний четьредесять, искушаемь сатаню, и бе со зверьми: и Ангели служаху Ему. **14** По предании же Иоаннове, прииде Иисус в Галилею, проповедая Евангелие Царствия Божия **15** и глаголя, яко исполнися время и приближися Царствие Божие: покайтесь и веруйте во Евангелие. **16** Ходя же при мори Галилейстем, виде Симона и Андреа брата (того) Симона, вметающа мрежи в море: беста бо рыбаля. **17** И рече има Иисус: приидита вслед Мене, и сотворю вас быти ловца

человеком. 18 И абие оставльша мрежи своя, по Нем идоста. 19 И прешед мало оттуду, узре Иакова Зеведеова и Иоанна брата его, и та в корабли строяща мрежа: 20 и абие воззва я. И оставльша отца своего Зеведеа в корабли с наемники, по Нем идоста. 21 И внидоша в Капернаум: и абие в субботы вшед в сонмище, учаше. 22 И дивляхуся о учении Его: бо учя их яко власть имый, и не яко книжницы. 23 И бе в сонмищи их человек в душе нечисте, и воззва, 24 глаголя: остави, что нам и Тебе, Иисусе Назарянине? Пришел еси погубити нас: вем Тя, кто еси, Святый Божий. 25 И запрети ему Иисус, глаголя: умолчи и изыди из него. 26 И стрясе его дух нечистый, и возопи гласом великим, и изыде из него. 27 И ужасошася вси, якоже стязатися им к себе, глаголющим: что есть сие? (и) что учение новое сие, яко по области и духовом нечистым велит, и послушают Его? 28 Изыде же слух Его абие во всю страну Галилейску. 29 И абие из сонмища изшедше, приидоша в дом Симонов и Андреев со Иаковом и Иоанном. 30 Теща же Симопова лежаше огнем жегома: и абие глаголаша Ему о ней. 31 И приступль воздвиже ю, емь за руку ея: и остави ю огонь абие, и служаше им. 32 Позде же бывшу, егда захождаше солнце, приношаху к Нему вся недужныя и бесныя. 33 И бе весь град собрался к дверем. 34 И изцели многи зле страждущыя различными недуги: и бесы многи изгна, и не оставляше глаголати бесы, яко ведяху Его Христа суща. 35 И утро, ноци сущей зело, востав изыде, и иде в пусто место, и ту молитву деяше. 36 И гнаша Его Симон и иже с ним: 37 и обретше Его, глаголаша Ему, яко вси Тебе ищут. 38 И глагола им: идем в ближния веси и грады, да и тамо проповем: на сие бо изыдох. 39 И бе



проповедавая на сонмищих их, во всей Галилеи, и бесы изгоня.  
40 И прииде к Нему прокажен, моля Его и на колену припадая пред Ним, и глаголя Ему, яко, аще хоцещи, можещи мя очистити. 41 Иисус же милосердовав, простер руку, коснулся его, и глагола ему: хощу, очистися. 42 И рекшу ему, абие отиде от него прокажение, и чист бысть. 43 И запрещь ему, абие изгна его: 44 и глагола ему: блюди, ни комуже ничесоже рцы: но шед покажися иерееви и принеси за очищение твое, яже повеле Моисей, во свидетелство им. 45 Он же изшед начат проповедати много и проносити слово, якоже ктому не мощи Ему яве во град внити: но вне в пустых местех бе. И приходяду к Нему отвсюду.

**2** И вниде паки в Капернаум по днех: и слышано бысть, яко в дому есть. 2 И абие собращася мнози, якоже ктому не вмещатися ни при дверех: и глаголаше им слово. 3 И приидоша к Нему носяще разслабленна (жилами), носима четырьми: 4 и не могущым приблизитися к Нему народа ради, открыша покров, идеже бе, и прокопавше свесиша одр, на немже разслабленный лежаше. 5 Видев же Иисус веру их, глагола разслабленному: чадо, отпускаются тебе греси твои. 6 Бяху же нецыи от книжник ту сидяще и помышляюще в сердцах своих: 7 что Сей тако глаголет хулы? Кто может оставляти грехи, токмо един Бог? 8 И абие разумев Иисус духом Своим, яко тако тии помышляют в себе, рече им: что сия помышляете в сердцах ваших? 9 Что есть удобее? Реци разслабленному: отпускаются тебе греси? Или реци: востани, и возми одр твой, и ходи? 10 Но да увесте, яко власть имать Сын Человеческий на земли отпущати грехи: глагола разслабленному: 11 тебе глаголю:

востани, и возми одр твой, и иди в дом твой. 12 И воста абие, и взем одр, изыде пред всеми: яко дивитися всем и славити Бога, глаголющым, яко николиже тако видехом. 13 И изыде паки к морю: и весь народ идяше к Нему, и учаше их. 14 И мимогрядый виде Левию Алфеова, сидяща на мытнице, и глагола ему: по Мне гряди. И востав вслед Его иде. 15 И бысть возлежащу Ему в дому его, и мнози мытари и грешницы возлежаху со Иисусом и со ученики Его: бяху бо мнози, и по Нем идоша. 16 И книжницы и фарисее, видевше Его ядуца с мытари и грешники, глаголаху учеником Его: что яко с мытари и грешники яст и пиет? 17 И слышав Иисус глагола им: не требуют здравии врача, но болящии: не приидох призвати праведники, но грешники на покаяние. 18 И бяху ученицы Иоанновы и фарисейстии постящися. И приидоша и глаголаша Ему: почто ученицы Иоанновы и фарисейстии постятся, а Твои ученицы не постятся? 19 И рече им Иисус: еда могут сынове брачнии, дондеже жених с ними есть, поститися? Елико время с собою имут жениха, не могут поститися: 20 приидут же дние, егда отимется от них жених, и тогда постятся в тыя дни: 21 и никтоже приложения плата небелена пришивает к ризе ветсе: аще ли же ни, возмет конец его новое от ветхаго, и горша дира будет: 22 и никтоже вливает вина нова в мехи ветхи: аще ли же ни, просадит вино новое мехи, и вино пролиется, и меси погибнут: но вино новое в мехи новы вляти. 23 И бысть мимоходити Ему в субботы сквозе сеяния, и начаша ученицы Его путь творити, востерзающе класы. 24 И фарисее глаголаху Ему: виждь, что творят в субботы, егоже не достоит? 25 И Той глаголаше им: несте ли николиже чли, что сотвори Давид, егда требование

име и взалка сам и иже с ним? 26 Како вниде в дом Божий при Авиафаре архиереи, и хлебы предложения снеде, ихже не достояше ясти токмо иереем, и даде и сущым с ним? 27 И глаголаше им: суббота человека ради бысть, а не человек субботы ради: 28 темже господь есть Сын Человеческий и субботе.

**3** И вниде паки в сонмище: и бе тамо человек, суху имый руку. 2 И назираху Его, аще в субботы изцелит его, да Нань возглаголют. 3 И глагола человеку суху имущему руку: стани посреде. 4 И глагола им: достоин ли в субботы добро творити, или зло творити? Душу спасти, или погубити? Они же молчаху. 5 И воззрев на них со гневом, скорбя о окаменении сердец их, глагола человеку: простри руку твою. И простре: и утвердися рука его цела яко другая. 6 И изшедше фарисее, абие со иродианы совет творяху Нань, како Его погубят. 7 Иисус же отиде со ученики Своими к морю: и мног народ от Галилеи по Нем иде, и от Иудеи, 8 и от Иерусалима, и от Идумеи, и со онаго полу Иордана. И от Тира и Сидона множество многое, слышавше, елика творяше, (и) приидоша к Нему. 9 И рече учеником Своим, да корабль будет у Него народа ради, да не стужают Ему. 10 Многи бо изцели, якоже нападати на Него, да Ему прикоснутся, елицы имеяху раны. 11 И дуси нечистии, егда видяху Его, припадаху к Нему и зваху, глаголюще, яко Ты еси Сын Божий. 12 И много прещаше им, да не явлена Его сотворят. 13 И възыде на гору и призва, ихже хотяше Сам: и приидоша к Нему. 14 И сотвори дванадесяте, да будут с Ним, и да посылает их проповедати, 15 и имети власть целити недуги и изгнити бесы: 16 и нарече Симону имя Петр: 17 и Иакова Зеведеова

и Иоанна брата Иаковля: и нарече има имена Воанергес, еже  
есть сына громова: 18 и Андреа, и Филиппа, и Варфоломеа,  
и Матфеа, и Фому, и Иакова Алфеова, и Фаддеа, и Симона  
Кананита, 19 и Иуду Искариотскаго, иже и предаде Его. 20 И  
приидоша в дом: и собрася паки народ, яко не мощи им ни  
хлеба ясти. 21 И слышавше иже бяху у Него, изыдоша, да  
имут Его: глаголаху бо, яко неистов есть. 22 И книжницы,  
иже от Иерусалима низшедшии, глаголаху, яко веельзевула  
имать и яко о князи бесовстем изгонит бесы. 23 И призвав их,  
в притчах глаголаше им: како может сатана сатану изгонити?  
24 И аще царство на ся разделится, не может стати царство  
то: 25 и аще дом на ся разделится, не может стати дом  
той: 26 и аще сатана воста на ся сам и разделися, не может  
стати, но конец имать. 27 Никтоже может сосуды крепкаго,  
вшед в дом его, расхитити, аще не первее крепкаго свяжет:  
и тогда дом его расхитит. 28 Аминь глаголю вам, яко вся  
отпустятся согрешения сыном человеческим, и хуления,  
елика аще восхулят: 29 а иже восхулит на Духа Святаго, не  
имать отпущения во веки, но повинен есть вечному суду. (aīōn  
g165, aīōnios g166) 30 Зане глаголаху: духа нечистаго имать. 31  
Приидоша убо Мати и братия Его, и вне стояще послаша  
к Нему, зовуще Его. 32 И седяше народ окрест Его. Реша  
же Ему: се, Мати Твоя и братия Твоя (и сестры Твоя) вне  
ищут Тебе. 33 И отвеща им, глаголя: кто есть мати Моя, или  
братия Моя? 34 И соглядав окрест Себе седящия, глагола:  
се, мати Моя и братия Моя: 35 иже бо аще сотворит волю  
Божию, сей брат Мой и сестра Моя и мати (Ми) есть.

**4** И паки начат учити при мори: и собрася к Нему народ  
мног, якоже Самому влезшу в корабль, седети в мори: и весь

народ при мори на земли бяше. 2 И учаше их притчами много и глаголаше им во учении Своем: 3 слышите: се, изыде сеяй сеяти: 4 и бысть егда сеяше, ово паде при пути, и приидоша птицы, и позобаша е: 5 другое же паде при камени, идеже не имяше земли многи, и абие прозябе, зане не имяше глубины земныя: 6 солнцу же возсиявшу присвяде, и зане не имяше корене, изсше: 7 и другое паде в тернии, и възде терние, и подави е: и плода не даде: 8 и другое паде на земли добрей, и даяше плод восходящ и растущ, и приплодоваше на тридесять, и на шестьдесят, и на сто. 9 И глаголаше: имеяй уши слышати да слышит. 10 Егда же бысть един, вопросиша Его, иже бяху с Ним, со обеманадесяте о притчи. 11 И глаголаше им: вам есть дано ведати тайны Царствия Божия: онем же внешним в притчах вся бывають, 12 да видяще видят, и не узрят: и слышаще слышат, и не разумють: да не когда обратятся, и оставятся им греси. 13 И глагола им: не весте ли притчи сея? И како вся притчи уразумеете? 14 Сеяй, слово сеет. 15 Сии же суть, иже при пути, идеже сеется слово, и егда услышат, абие приходит сатана и отемлет слово сеянное в сердцах их. 16 И сии суть такожде иже на каменных сеемии, иже егда услышат слово, абие с радостию приемлют е: 17 и не имут корения в себе, но привременни суть: таже бывшей печали или гонению словесе ради, абие соблажняются. 18 А сии суть, иже в тернии сеемии, слышашии слово: 19 и печали века сего, и леть богатства, и о прочих похоти входящия подавляють слово, и бесплодно бывает. (aiōn g165) 20 И сии суть, иже на земли добрей сеянии, иже слышат слово и приемлют, и плодствуют на тридесять, и на шестьдесят, и

на сто. 21 И глаголаше им: еда светилник приходит, да под спудом положат его или под одром? Не да ли на свещнице положен будет? 22 Несть бо тайно, еже не явится, ниже бысть потаено, но да приидет в явление: 23 аще кто имать уши слышати, да слышит. 24 И глаголаше им: блюдите что слышите: в нюже меру мерите, возмерится вам, и приложится вам слышащим: 25 иже бо аще имать, дастся ему: а иже не имать, и еже имать, отимется от него. 26 И глаголаше: тако есть (и) Царствие Божие, якоже человек вметает семя в землю, 27 и спит, и востает ноцию и дню: и семя прозябает и растет, якоже не весть он: 28 от себе бо земля плодит прежде траву, потом клас, таже исполняет пшеницу в класе: 29 егда же созреет плод, абие послет серп, яко наста жатва. 30 И глаголаше: чесому уподобим Царствие Божие? Или коей притчи приложим е? 31 Яко зерно горущично, еже егда всеяно будет в земли, мнее всех семен есть земных: 32 и егда всеяно будет, возрастает, и бывает более всех зелий, и творит ветви велия, яко мощи под сению его птицам небесным витати. 33 И таковыми притчами многими глаголаше им слово, якоже можаху слышати. 34 Без притчи же не глаголаше им словесе: особь же учеником Своим сказаше вся. 35 И глагола им в той день, вечеру бывшу: преидем на он пол. 36 И отпущше народы, пояша Его якоже бе в корабли: и инии же корабли бяху с Ним. 37 И бысть буря ветрена велика: волны же вливахуся в корабль, яко уже погружатися ему. 38 И бе Сам на корме на возглавнице сля. И возбудиша Его и глаголаша Ему: Учителю, не радиши ли, яко погибаем? 39 И востав запрети ветру и рече морю: молчи, престани. И улеже ветр, и бысть

тишина велия. 40 И рече им: что тако страшливи есте? Како не имате веры? 41 И убо яшася страхом велиим и глаголаху друг ко другу: кто убо Сей есть, яко и ветр и море послушают Его?

**5** И приидоша на он пол моря, во страну Гадаринскую. 2 И излезшу Ему из корабля, абие срете Его от гробов человек в душе нечисте, 3 иже жилище имяше во гробех, и ни веригами никтоже можаше его связати: 4 зане ему многажды путы и ужы (железны) связану сущу, и растерзатися от него ужем (железным) и путом сокрушатися: и никтоже можаше его умучити: 5 и выну ночь и день во гробех и в горах бе, вопия и толкийся камением. 6 Узрев же Иисуса издалеча, тече и поклонися Ему, 7 и возопив гласом велиим, рече: что мне и Тебе, Иисусе, Сыне Бога Вышняго? Заклинаю Тя Богом, не мучи мене. 8 Глаголаше бо ему: изыди, душе нечистый, от человека. 9 И вопрошаше его: что ти есть имя? И отвеща глаголя: легеон имя мне, яко мнози есмы. 10 И молиша Его много, да не послет их вне страны. 11 Бе же ту при горе стадо свиное велие пасомо. 12 И молиша Его вси беси, глаголюще: послы ны во свиния, да в ня внидем. 13 И повеле им абие Иисус. И изшедше дуси нечистии, внидоша во свиния: и устремися стадо по берегу в море, бяху же яко две тысящы, и утопаху в мори. 14 Пасущии же свиния бежаша и возвестиша во граде и в селех. И изыдоша видети, что есть бывшее. 15 И приидоша ко Иисусови, и видеша бесновавшагося сядяща и оболчена и смысляща, имевшаго легеон: и убо яшася. 16 Поведаша же им видевшии, како бысть бесному, и о свиниях. 17 И начаша молити Его отити от предел их. 18 И влезшу Ему в корабль, моляше Его

бесновавыйся, дабы был с Ним. 19 Иисус же не даде ему, но рече ему: иди в дом твой ко твоим и возвести им, елика ти Господь сотвори и помилова тя. 20 И иде и нача проповедати в десяти градех, елика сотвори ему Иисус. И вси дивляхуся. 21 И прешедшу Иисусу в корабли паки на он пол, собрася народ мног о Нем. И бе при мори. 22 И се, прииде един от архисинагог, именем Иаир, и видев Его, паде при ногу Его 23 и моляше Его много, глаголя, яко дщи моя на кончине есть: да пришед возложиши на ню руце, яко да спасется и жива будет. 24 И иде с ним: и по Нем идяху народи мнози и угнетаху Его. 25 И жена некая суци в точении крове лет дванадесяте, 26 и много пострадавши от мног врачей, и издавши своя вся, и ни единыя пользы обретши, но паче в горшее пришедши: 27 слышавши о Иисусе, пришедши в народе созади, прикоснуса ризе Его: 28 глаголаше бо, яко, аще прикоснуса ризам Его, спасена буду. 29 И абие изсякну источник крове ея: и разуме телом, яко изцеле от раны. 30 И абие Иисус разуме в Себе силу изшедшую от Него, (и) обращься в народе, глаголаше: кто прикоснуса ризам Моим? 31 И глаголаху Ему ученицы Его: видиши народ угнетающь Тя, и глаголеши: кто прикоснуса Мне? 32 И обглядаше видети сотворшую сие. 33 Жена же убоявшись и трепещуци, ведящи, еже бысть ей, прииде и припаде к Нему и рече Ему всю истину. 34 Он же рече ей: дщи, вера твоя спасе тя: иди в мире и буди цела от раны твоея. 35 Еще Ему глаголющу, (и) приидоша от архисинагога, глаголюще, яко дщи твоя умре: что еще движеши Учителя? 36 Иисус же абие слышав слово глаголемое, глагола архисинагогови: не бойся, токмо веруй. 37 И не остави по Себе ни единого



ити, токмо Петра и Иакова и Иоанна брата Иаковля. 38 И прииде в дом архисинагогов и виде молву, плачущыяся и кричащыя много. 39 И вшед глагола им: что молвите и плачетесь? Отроковица несть умерла, но спит. 40 И ругахуся Ему. Он же изгнав вся, поят отца отроковицы и мать, и иже (беху) с Ним, и вниде, идеже бе отроковица лежащи. 41 И емь за руку отроковицу, глагола ей: талифа куми: еже есть сказаемо: девице, тебе глаголю, востани. 42 И абие воста девица и хождаше: бе бо лет двюнадесяте. И ужасошася ужасом велиим. 43 И запрети им много, да никтоже увестъ сего, и рече: дадите ей ясти.

**6** И изыде оттуду и прииде во отечествие Свое: и по Нем идоша ученицы Его. 2 И бывшей субботе, начат на сонмищи учити. И мнози слышашии дивляхуся, глаголюще: откуда Сему сия? И что премудрость данная Ему, и силы таковы рукама Его бывают? 3 Не Сей ли есть тектон, сын Мариин, брат же Иакову и Иосии и Иуде и Симону? И не сестры ли Его zde (суть) в нас? И блажняхуся о Нем. 4 Глаголаше же им Иисус, яко несть пророк без чести, токмо во отечествии своем, и в сродстве и в дому своем. 5 И не можаше ту ни единыя силы сотворити, токмо мало недужных, возложь руце, изцели. 6 И дивляшеся за неверствие их: и обхождаше веси окрест учя. 7 И призва обанадесяте, и начат их посылати два два, и даяше им власть над духи нечистыми. 8 И заповеда им, да ничесоже возмут на путь, токмо жезл един: ни пиры, ни хлеба, ни при поясе меди: 9 но обувени в сандалия: и не облачитися в две ризе. 10 И глаголаше им: идеже аще внидете в дом, ту пребывайте, дондеже изыдете оттуду: 11 и елицы аще не примут вы,

ниже послушают вас, исходяще оттуду, оттрясите прах, иже под ногами вашими, во свидетелство им: аминь глаголю вам, отраднее будет Содомом и Гоморром в день судный, неже граду тому. 12 И изшедше проповедаху, да покаются: 13 и бесы многи изгоняху: и мазаху маслом многи недужныя, и изцелеваху. 14 И услыша царь Ирод: яве бо бысть имя Его: и глаголаше, яко Иоанн Креститель от мертвых воста, и сего ради силы деются о нем. 15 Инии глаголаху, яко Илия есть: инии же глаголаху, яко пророк есть, или яко един от пророк. 16 Слышав же Ирод рече, яко, егоже аз усекнух Иоанна, той есть: той воста от мертвых. 17 Той бо Ирод послав, ят Иоанна и связа его в темнице, Иродиады ради жены Филиппа брата своего, яко оженися ею. 18 Глаголаше бо Иоанн Иродови: не достоин тебе имети жену (Филиппа) брата твоего. 19 Иродиа же гневашеся на него и хотяше его убити: и не можаше. 20 Ирод бо бояшеся Иоанна, ведый его мужа праведна и свята, и соблюдаше его: и послушав его, многа творяше, и в сладость его послушаше. 21 И приключшуся дню потребну, егда Ирод рождеству своему вечерю творяше князем своим и тысящником и старейшинам Галилейским: 22 и вшедши дщерь тоя Иродиады, и плясавши, и угождши Иродови и возлежащым с ним, рече царь девице: проси у мене егоже аще хочещи, и дам ти. 23 И клявся ей: яко егоже аще попросиши у мене, дам ти, и до пол царствия моего. 24 Она же изшедши рече матери своей: чесо прошу? Она же рече: главы Иоанна Крестителя. 25 И вшедши абие со тщанием к царю, просяше, глаголющи: хочу, да ми даси от него на блюде главу Иоанна Крестителя. 26 И прискорбен быв царь, клятвы (же) ради и за возлежащих с ним не

восхоте отрещи ей. 27 И абие послав царь спекулятора, повеле принести главу его. 28 Он же шед усекну его в темнице, и принесе главу его на блюде, и даде ю девице: и девица даде ю матери своей. 29 И слышавше ученицы его, приидоша и взяша труп его, и положиша его во гробе. 30 И собращася Апостоли ко Иисусу и возвестиша Ему вся, и елика сотвориша, и елика научиша. 31 И рече им: приидите вы сами в пусто место едины и почийте мало. Бяху бо входящии и отходящии мнози, и ни ясти им бе когда. 32 И идоша в пусто место кораблем едины. 33 И видеша их идущих народи, и познаша их мнози: и пеши от всех градов стицахуся тамо, и предвариша их, и снидошася к Нему. 34 И изшед виде Иисус народ мног и милосердова о них, зане бяху яко овцы не имущыя пастыря: и начат их учити много. 35 И уже часу многу бывшу, приступльше к Нему ученицы Его, глаголаша, яко пусто есть место, и уже час мног: 36 отпусти их, да шедше во окрестных селех и весех купят себе хлебы: не имут бо чесо ясти. 37 Он же отвещав рече им: дадите им вы ясти. И глаголаша Ему: да шедше купим двема стома пенязь хлебы и дамы им ясти? 38 Он же рече им: колико хлебы имате? Идите и видите. И уведевше глаголаша: пять (хлеб), и две рыбе. 39 И повеле им посадити вся на споды на споды на траве зелене. 40 И возлегоша на лехи на лехи по сту и по пятидесят. 41 И приемь пять хлеб и две рыбе, воззрев на небо, благослови и преломи хлебы, и даяше учеником Своим, да предлагают пред ними: и обе рыбе раздели всем. 42 И ядоша вси и насытишася: 43 и взяша укрухи, дванадесяте кошы исполнь, и от рыбу. 44 Бяше же ядших хлебы яко пять тысящ мужей.

45 И абие понуди ученики Своя внити в корабль и варити Его на он пол к Вифсаиде, дондеже Сам отпустит народы. 46 И отречеся им, иде в гору помолитися. 47 И вечеру бывшу, бе корабль посреде моря, и Сам един на земли. 48 И виде их страждущих в плавании: бе бо ветер противен им: и о четвертей стражи нощней прииде к ним, по морю ходяй, и хотяше минути их. 49 Они же видевше Его ходяща по морю, мняху призрак быти и возопиша. 50 Все бо Его видеша и смутишася. И абие глагола с ними и рече им: дерзайте: аз есмь, не бойтеся. 51 И вниде к ним в корабль: и улеже ветер. И зело излиха в себе ужасохуся и дивляхуся. 52 Не разумеша бо о хлебах: бе бо сердце их окаменено. 53 И прешедше приидоша в землю Геннисаретску и присташа. 54 И изшедшым им из корабля, абие познаша Его, 55 обтекше всю страну ту, начаша на одрех приносити болящыя, идеже слышаху, яко ту есть. 56 И аможе аще вхождаше в веси, или во грады, или села, на распутиих полагаху недужныя и моляху Его, да поне воскрилию ризы Его прикоснутся: и елицы аще прикасахуся Ему, спасахуся.

**7** И собращася к Нему фарисее и нецыи от книжник, пришедшии от Иерусалима: 2 и видевше неких от ученик Его нечистыми руками, сиречь неумовеными, ядущих хлебы, ругахуся. 3 Фарисее бо и вси Иудее, аще не трыюще умыют рук, не ядят, держаще предания старец: 4 и от торжища, аще не покуплются, не ядят. И ина многа суть, яже прияша держати: погружения сткляницам и чваном и котлом и одром. 5 Потом же вопрошаху Его фарисее и книжницы: почто ученицы Твои не ходят по преданию старец, но неумовеными руками ядят хлеб? 6 Он же отвещав рече им, яко добре

пророчествова Исаиа о вас лицемерех, якоже есть писано:  
сии людие устнами Мя чтут, сердце же их далече отстоит  
от Мене, 7 всуе же чтут Мя, учаще учением, заповедем  
человеческим: 8 оставльше бо заповедь Божию, держите  
предания человеческая, крещения чваном и сткляницам, и  
ина подобна такова многа творите. 9 И глаголаше им: добре  
отметаєте заповедь Божию, да предание ваше соблюдете:  
10 Моисей бо рече: чти отца твоего и мать твою: и иже  
злословит отца или мать, смертию да умрет: 11 вы же  
глаголете: аще речет человек отцу или матери: корван,  
еже есть дар, иже аще пользовался еси от мене: 12 и не  
ктому оставляете его что сотворити отцу своему или матери  
своей, 13 преступающе слово Божие преданием вашим, еже  
предасте: и подобна такова многа творите. 14 И призвав весь  
народ, глаголаше им: послушайте Мене вси и разумеите: 15  
ничтоже есть внеуду человека входимо в онь, еже может  
осквернити его: но исходящая от него, та суть сквернящая  
человека: 16 аще кто имать уши слышати, да слышит. 17  
И егда вниде в дом от народа, вопрошаху Его ученицы  
Его о притчи. 18 И глагола им: тако ли и вы неразумливи  
есте? Не разумеете ли, яко все, еже извне входимое в  
человека, не может осквернити его? 19 Яко не входит ему в  
сердце, но во чрево: и афедронном исходит, истребляя вся  
брашна. 20 Глаголаше же, яко исходящее от человека, то  
сквернит человека: 21 извнутри бо от сердца человеческа  
помышления злая исходят, прелюбодеяния, любоддеяния,  
убийства, 22 татьбы, лихоимства, (обиды, ) лукавствия,  
лесть, студоддеяния, око лукаво, хула, гордыня, безумство: 23  
вся сия злая извнутри исходят и сквернят человека. 24 И

оттуду востав, иде в пределы Тирски и Сидонски: и вшед в дом, ни когоже хотяше, дабы его чул: и не може утаитися. 25 Слышавши бо жена о Нем, еяже дщи имяше духа нечиста, пришедши припаде к ногама Его: 26 жена же бе еллинска, сирофиникисса родом: и моляше Его, да беса изженет из дщере ея. 27 Иисус же рече ей: остави, да первее насытятся чада: несть бо добро отяти хлеб чадом и повреци псом. 28 Она же отвещавши глагола Ему: ей, Господи: ибо и пси под трапезою ядят от крупиц детей. 29 И рече ей: за сие слово, иди: изыде бес из дщере твоея. 30 И шедши в дом свой, обрете беса изшедша и дщерь лежащу на одре. 31 И паки изшед Иисус от предел Тирских и Сидонских, прииде на море Галилейско, между пределы Декапольски. 32 И приведоша к Нему глуха и гугнива, и моляху Его, да возложит нань руку. 33 И поемь его от народа одинаго, вложи персты Своя во уши его и плюнув коснулся языка его: 34 и воззрев на небо, воздохну и глагола ему: еффафа, еже есть разверзися. 35 И абие разверзостася слуха его, и разрешися уза языка его, и глаголаше право. 36 И запрети им, да ни комуже поведят: елико же им Той запрещаше, паче излиха проповедаху. 37 И преизлиха дивляхуся, глаголюще: добре все творит: и глухия творит слышати, и немья глаголати.

**8** В тыя дни, зело многу народу суцу, и не имущым чесо ясти, призвав Иисус ученики Своя, глагола им: 2 милосердную о народе, яко уже три дни приседят Мне и не имут чесо ясти: 3 и аще отпущу их не ядших в дома своя, ослабеют на пути: мнози бо от них издалеча пришли суть. 4 И отвещаша Ему ученицы Его: откуда сих возможет кто zde насытити хлебы в пустыни? 5 И вопроси их: колико имате хлебов? Они же

реша: седмь. 6 И повеле народу возлеци на земли: и приемь седмь хлебов, хвалу воздав, преломи и даяше учеником Своим, да предлагают: и предложиша пред народом. 7 И имяху рыбиц мало: и (сия) благословив, рече предложити и тыя. 8 Ядоша же и насытишася: и взяша избытки укрух, седмь кошниц. 9 Бяху же ядших яко четыре тысящы. И отпусти их. 10 И абие влез в корабль со ученики Своими, прииде во страны Далмануфански. 11 И изыдоша фарисее и начаша стязатися с Ним, ищуще от Него знамения с небесе, искушающе Его. 12 И воздохнув духом Своим, глагола: что род сей знамения ищет? Аминь глаголю вам, аще дастся роду сему знамение. 13 И оставль их, влез паки в корабль, (и) иде на он пол. 14 И забыша ученицы Его взяти хлебы и разве одинаго хлеба не имяху с собою в корабли. 15 И прещаше им, глаголя: зрите, блюдитесь от кваса фарисейска и от кваса Иродова. 16 И помышляху, друг ко другу глаголюще, яко хлебы не имамы. 17 И разумев Иисус, глагола им: что помышляете, яко хлебы не имате? Не у ли чувствуете, ниже разумеете? Еще ли окаменено сердце ваше имате? 18 Очи имуще не видите? И уши имуще не слышите? И не помните ли, 19 егда пять хлебы преломих в пять тысящ, колико кош исполнь укрух приясте? Глаголаша Ему: дванадесять. 20 Егда же седмь в четыре тысящы, колико кошниц исполнения укрух взяли? Они же реша: седмь. 21 И глагола им: како не разумеете? 22 И прииде в Вифсаиду: и приведоша к Нему слепая, и моляху Его, да его коснется. 23 И емь за руку слепаго, изведе его вон из веси: и плюнув на очи его, (и) возложь руце нань, вопрошаше его, аще что видит? 24 И воззрев глаголаше: вижу человеки яко дровие ходящя.

25 Потом (же) паки возложи руце на очи его и сотвори его прозрети: и утворися и узре светло все. 26 И посла его в дом его, глаголя: ни в весь вниди, ни повеждь кому в веси. 27 И изыде Иисус и ученицы Его в веси Кесарии Филипповы: и на пути вопрошаше ученики Своя, глаголя им: кого Мя глаголют человецы быти? 28 Они же отвещаша: Иоанна Крестителя: и инии Илию: друзии же одинаго от пророк. 29 И Той глагола им: вы же кого Мя глаголете быти? Отвещав же Петр глагола Ему: Ты еси Христос. 30 И запрети им, да ни комуже глаголют о Нем. 31 И начат учить их, яко подобает Сыну Человеческому много пострадати, и искушену быти от старец и архиерей и книжник, и убиену быти, и в третий день воскреснути. 32 И не обвиняся слово глаголаше. И приемь Его Петр, начат претити Ему. 33 Он же обращься и воззрев на ученики Своя, запрети Петрови, глаголя: иди за Мною, сатано: яко не мыслиши, яже (суть) Божия, но яже человеческа. 34 И призвав народы со ученики Своими, рече им: иже хочет по Мне ити, да отвержется себе, и возмет крест свой, и по Мне грядет: 35 иже бо аще хочет душу свою спасти, погубит ю: а иже погубит душу свою Мене ради и Евангелиа, той спасет ю: 36 кая бо польза человеку, аще приобрящет мир весь, и отщтит душу свою? 37 Или что даст человек измену на души своей? 38 Иже бо аще постыдится Мене и Моих словес в роде сем прелюбодейнем и грешнем, и Сын Человеческий постыдится его, егда приидет во славе Отца Своего со Ангелы святыми.

**9** И глаголаше им: аминь глаголю вам, яко суть нецыи от zde стоящих, иже не имут вкусити смерти, дондеже видят Царствие Божие пришедшее в силе. 2 И по шести днех поят



Иисус Петра и Иакова и Иоанна, и возведе их на гору високу особь едины: и преобразися пред ними. 3 И ризы Его быша блестящяся, белы зело яко снег, яцехже не может белильник убелити на земли. 4 И явися им Илиа с Моисеем: и беста со Иисусом глаголюща. 5 И отвещав Петр глагола Иисусови: Равви, добро есть нам zde быти: и сотворим кровы три, Тебе един, и Моисееви един, и Илии един. 6 Не ведяше бо, что рещи: бяху бо пристрашни. 7 И бысть облак осеняя их: и прииде глас из облака, глаголя: Сей есть Сын Мой возлюбленный, Того послушайте. 8 И внезапно воззревше, ктому ни коже видеша, токмо Иисуса единого с собою. 9 Сходящым же им с горы, запрети им, да ни комуже поведят, яже видеша, токмо егда Сын Человеческий из мертвых воскреснет. 10 И слово удержаша в себе, стязаящяся, что есть, еже из мертвых воскреснути. 11 И вопрошаху Его глаголюще: како глаголют книжницы, яко Илии подобает приити прежде? 12 Он же отвещав рече им: Илиа убо пришед прежде, устроит вся: и како есть писано о Сыне Человечестем, да много постраждет и уничижен будет: 13 но глаголю вам, яко и Илиа прииде, и сотвориша ему, елика хотеша, якоже есть писано о нем. 14 И пришед ко учеником, виде народ мног о них и книжники стязаящяся с ними. 15 И абие весь народ видев Его ужасеся, и пририщуце целоваху Его. 16 И вопросы книжники: что стязаетея к себе? 17 И отвещав един от народа рече: Учителю, приведох сына моего к Тебе, имуща духа нема: 18 и идеже колиждо имет его, разбивает его, и пены тещит, и скрежещет зубы своими, и оцепеневаает: и рех учеником Твоим, да изженут его, и не возмогоша. 19 Он же отвещав ему глагола: о,

роде неверен, доколе в вас буду? Доколе терплю вы? Приведите его ко Мне. 20 И приведоша его к Нему. И видев Его, абие дух стрясе его: и пад на земли, валяшися, пены теця. 21 И вопроси отца его: колико лет есть, отнележе сие бысть ему? Он же рече: издетска: 22 и многажды во огонь вверже его и в воды, да погубит его: но аще что можеши, помози нам, милосердовав о нас. 23 Иисус же рече ему: еже аще что можеши веровати, вся возможна верующему. 24 И абие возопив отец отрочате, со слезами глаголаше: верую, Господи: помози моему неверию. 25 Видев же Иисус, яко срищется народ, запрети духу нечистому, глаголя ему: душе немый и глухий, Аз ти повелеваю: изыди из него и ктому не вниди в него. 26 И возопив и много пружався, изыде: и бысть яко мертв, якоже мнозем глаголати, яко умре. 27 Иисус же емь его за руку, воздвиже его: и воста. 28 И вшедшу Ему в дом, ученицы Его вопрошаху Его единого: яко мы не возмогохом изгнати его? 29 И рече им: сей род ничимже может изыти, токмо молитвою и постом. 30 И оттуду изшедше, идяху сквозе Галилею: и не хотяше, да кто увестъ. 31 Учаше бо ученики Своя и глаголаше им, яко Сын Человеческий предан будет в руце человечесте, и убьют Его: и убиен быв, в третий день воскреснет. 32 Они же не разумеваху глаголгола и бояхуся Его вопросити. 33 И прииде в Капернаум: и в дому быв, вопрошаше их: что на пути в себе помышлясте? 34 Они же молчаху: друг ко другу бо стязашася на пути, кто (есть) болий. 35 И сед пригласи обанадесяте и глагола им: аще кто хочет старей быти, да будет всех менший и всем слуга. 36 И приимь отроча, постави е посреде их: и объеми е, рече им: 37 иже аще

едино таковых отрочат примет во имя Мое, Мене примет:  
и иже Мене примет, не Мене примет, но Пославшаго  
Мя. 38 Отвеща Ему Иоанн, глаголя: Учителю, видехом  
некоего именем Твоим изгоняща бесы, иже не ходит по нас:  
и возбранихом ему, яко не последует нам. 39 Иисус же рече:  
не браните ему: никтоже бо есть, иже сотворит силу о имени  
Моем, и возможет вскоре злословити Мя. 40 Иже бо несть  
на вы, по вас есть. 41 Иже бо аще напоит вы чашею воды во  
имя Мое, яко Христовы есте, аминь глаголю вам, не погубит  
мзды своя. 42 И иже аще соблазнит единого от малых сих  
верующих в Мя, добрее есть ему паче, аще облежит камень  
жерновный о выи его, и ввержен будет в море. 43 И аще  
соблажняет тя рука твоя, отсецы ю: добрее ти есть беднику  
в живот внити, неже обе руке имущу внити в геенну, во огонь  
неугасающий, (Geenna g1067) 44 идеже червь их не умирает, и  
огнь не угасает. 45 И аще нога твоя соблажняет тя, отсецы  
ю: добрее ти есть внити в живот хрому, неже две нозе имущу  
ввержену быти в геенну, во огонь неугасающий, (Geenna g1067)  
46 идеже червь их не умирает, и огнь не угасает. 47 И аще око  
твое соблажняет тя, исткни е: добрее ти есть со едином оком  
внити в Царствие Божие, неже две оце имущу ввержену  
быти в геенну огненную, (Geenna g1067) 48 идеже червь их не  
умирает, и огнь не угасает. 49 Всяк бо огнем осолится, и  
всяка жертва солию осолится. 50 Добро соль: аще же соль  
не слана будет, чим осолится? Имейте соль в себе, и мир  
имейте между собою.

**10** И оттуду востав преиде в пределы Иудейския, об он пол  
Иордана. И снидошася паки народи к Нему: и яко обычай  
име, паки учаше их. 2 И приступльше фарисее вопрошиша

Его: аще достоин мужу жену пустити? Искушающе Его. 3 Он же отвещав рече им: что вам заповеда Моисей? 4 Они же реша: Моисей повеле книгу распустную написати, и пустити. 5 И отвещав Иисус рече им: по жестосердию вашему написа вам заповедь сию: 6 от начала же создания, мужа и жену сотворил я естъ Бог: 7 сего ради оставит человек отца своего и мать 8 и прилепится к жене своей, и будета оба в плоть едину: темже уже неста два, но плоть едина: 9 еже убо Бог сочета, человек да не разлучает. 10 И в дому паки ученицы Его о сем вопрошиша Его. 11 И глагола им: иже аще пустит жену свою и оженится иною, прелюбы творит на ню: 12 и аще жена пустит мужа и посягнет за иного, прелюбы творит. 13 И приношаху к Нему дети, да коснется их: ученицы же прецаху приносящым. 14 Видев же Иисус негодова и рече им: оставите детей приходити ко Мне и не браните им, тацех бо естъ Царствие Божие: 15 аминь глаголю вам: иже аще не приимет Царствия Божия яко отроча, не имать внити в не. 16 И объемь их, возложь руце на них, благословляше их. 17 И исходящу Ему на путь, притек некий и поклонься на колену Ему, вопрошаше Его: Учителю благий, что сотворю, да живот вечный наследствую? (aiōnios g166) 18 Иисус же рече ему: что Мя глаголеши блага? Никтоже благ, токмо един Бог. 19 Заповеди веси: не прелюбы сотвориши: не убий: не укради: не лжесвидетелствуй: не обиди: чти отца твоего и мать. 20 Он же отвещав рече Ему: Учителю, сия вся сохраних от юности моя. 21 Иисус же возрев нань, возлюби его и рече ему: единого еси не докончал: иди, елика имаши, продаждь и даждь нищым, и имети имаши сокровище на небеси: и прииди (и) ходи вслед Мене, взем крест. 22 Он же дряхл

быв о словеси, отиде скорбя: бе бо имея стяжания многа.

23 И воззрев Иисус глагола учеником Своим: како неудобь имущии богатство в Царствие Божие внидут. 24 Ученицы же ужасавшася о словесех Его. Иисус же паки отвещав глагола им: чада, како неудобь уповающим на богатство в Царствие Божие внити: 25 удобнее бо есть вельбуду сквозе иглине ушы проити, неже богату в Царствие Божие внити. 26 Они же излиха дивляхуся, глаголюще к себе: то кто может спасен быти? 27 Воззрев же на них Иисус глагола: у человек невозможно, но не у Бога: вся бо возможна суть у Бога. 28 Начат же Петр глаголати Ему: се, мы оставихом вся и вслед Тебе идохом. 29 Отвещав же Иисус рече: аминь глаголю вам: никтоже есть, иже оставил есть дом, или братию, или сестры, или отца, или мать, или жену, или чада, или села, Мене ради и Евангелиа ради: 30 аще не примет сторицею ныне во время сие, домов, и братий, и сестр, и отца, и матери, и чад, и сел, во изгнании, и в век грядущий живот вечный: (αἰὼν ἡνῶκα, αἰὼνιος ἡνῶκα) 31 мнози же будут первии последни, и последнии первии. 32 Бяху же на пути, восходяще во Иерусалим: и бе варяя их Иисус, и ужасавшася, и вслед идуще, бояхуся. И поемь паки обанадесять, начат им глаголати, яже хотяху Ему быти: 33 яко, се, восходим во Иерусалим, и Сын Человеческий предан будет архиереом и книжником, и осудят Его на смерть, и предадут Его языком: 34 и поругаются Ему, и уязвят Его, и оплюют Его, и убьют Его: и в третий день воскреснет. 35 И пред Него приидоста Иаков и Иоанн, сына Зеведеева, глаголюща: Учителю, хоцева, да, еже аще просива, сотвориши нама. 36 Он же рече има: что хочета, да сотворю вама? 37 Она же реста Ему: даждь нам,

да един о десную Тебе и един о шуюю Тебе сядева во славе Твоей. 38 Иисус же рече има: не веста, чесо просита: можета ли пити чашу, юже Аз пию, и крещением, имже Аз крещаюся, креститися? 39 Она же реста Ему: можева. Иисус же рече има: чашу убо, юже Аз пию, испиета, и крещением, имже Аз крещаюся, креститася: 40 а еже сести о десную Мене и о шуюю, несть Мне дати, но имже уготовано есть. 41 И слышавше десять, начаша негодовати о Иакове и Иоанне. 42 Иисус же призвав их, глагола им: весте, яко мнящиися владети языки, соодолевают им, и велицыи их обладают ими: 43 не тако же будет в вас: но иже аще хоцет в вас вящший быти, да будет вам слуга: 44 и иже аще хоцет в вас быти старей, да будет всем раб: 45 ибо Сын Человечь не прииде, да послужат Ему, но да послужит и даст душу Свою избавление за многи. 46 И приидоша во Иерихон. И исходящу Ему от Иерихона, и учеником Его, и народу многу, сын Тимеов Вартимей слепый сядяше при пути, прося. 47 И слышав, яко Иисус Назорянин есть, начат звати и глаголати: Сыне Давидов Иисусе, помилуй мя. 48 И прещаху ему мнози, да умолчит: он же множае паче зваше: Сыне Давидов, помилуй мя. 49 И став Иисус, рече его возгласити. И возгласиша слепца, глаголюще ему: дерзай, востани, зовет тя. 50 Он же отверг ризы своя, востав прииде ко Иисусови. 51 И отвещав глагола ему Иисус: что хоцещи, да сотворю Тебе? Слепый же глагола Ему: Учителю, да прозрю. 52 Иисус же рече ему: иди: вера твоя спасе тя. И абие прозре и по Иисусе иде в путь.

**11** И егда приближися во Иерусалим, в Вифсфагию и Вифанию, к горе Елеонстей, посла два от ученик Своих 2

и глагола има: идита в весь, яже есть прямо вама: и абие входяща в ню, обряцета жребя привязано, на неже никтоже от человек вседе: отрешша е, приведита: **3** и аще кто вама речет: что творита сие? Рцыта, яко Господь требует е: и абие послет е семо. **4** Идоста же, и обретоста жребя привязано при дверех вне на распутии, и отрешиста е. **5** И нецыи от стоящих ту глаголаху има: что деета отрешающа жребя? **6** Она же реста им, якоже заповеда има Иисус: и оставиша я. **7** И приведоста жребя ко Иисусови: и возложиша на не ризы своя, и вседе на не. **8** Мнози же ризы своя постлаша по пути: друзии же ваиа резаху от древия и постилаху по пути. **9** И предходящии и вслед грядущии вопияху, глаголюще: осанна, благословен Грядый во имя Господне, **10** благословено грядущее царство во имя Господа отца нашего Давида: осанна в вышних. **11** И вниде во Иерусалим Иисус и в церковь: и соглядав вся, позде уже сущу часу, изыде в Вифанию со обеманадесяте. **12** И наутрие изшедшым им от Вифании, взалка: **13** и видев смоковницу издалеча, имущу листвие, прииде, аще убо что обряцет на ней: и пришед к ней, ничесоже обрете, токмо листвие: не у бо бе время смоквам. **14** И отвещав Иисус рече ей: да не ктому от тебе во веки никтоже плода снесть. И слышаху ученицы Его. **(aiōn g165)** **15** И приидоша (паки) во Иерусалим. И вшед Иисус в церковь, начат изгонити продающыя и купующыя в церкви: и трапезы торжником и седалища продающих голуби испроверже: **16** и не даяше, да кто мимонесет сосуд сквозе церковь. **17** И учаше, глаголя им: несть ли писано, яко храм Мой храм молитвы наречется всем языком? Вы же сотвористе его вертеп разбойником. **18** И слышаша

книжницы и архиерее, и искаху, како Его погубят: бояхубося Его, яко весь народ дивляшесе о учении Его. 19 И яко позде бысть, исхождаше вон из града. 20 И утро мимоходяще, видеша смоковницу изсохшу из корения. 21 И вспомянув Петр глагола Ему: Равви, виждь, смоковница, юже проклял еси, усше. 22 И отвещав Иисус глагола им: 23 имейте веру Божию: аминь бо глаголю вам, яко, иже аще речет горе сей: двигнися и верзися в море: и не размыслит в сердцы своем, но веру имет, яко еже глаголет, бывает: будет ему, еже аще речет: 24 сего ради глаголю вам: вся елика аще молящесе просите, веруйте, яко приемлете: и будет вам: 25 и егда стоите молящесе, отпускайте, аще что имате на кого, да и Отец ваш, Иже есть на небесех, отпустит вам согрешения ваша: 26 аще ли же вы не отпускаете, ни Отец ваш, Иже есть на небесех, отпустит вам согрешений ваших. 27 И приидоша паки во Иерусалим. И в церкви ходящу Ему, приидоша к Нему архиерее и книжницы и старцы 28 и глаголаша Ему: коею областию сия твориши? И кто Ти область сию даде, да сия твориши? 29 Иисус же отвещав рече им: вопрошу вы и Аз словесе единого, и отвещайте Ми: и реку вам, коею областию сия творю: 30 крещение Иоанново с небесе ли бе, или от человек? Отвещайте Ми. 31 И мысляху в себе, глаголюще: аще речем, с небесе, речет: почто убо не веровасте ему? 32 Но аще речем, от человек: бояхубося людей: вси бо имеяху Иоанна, яко воистинну пророк бе. 33 И отвещавше глаголаша Иисусови: не вемы. И отвещав Иисус глагола им: ни Аз глаголю вам, коею областию сия творю.

**12** И начат им в притчах глаголати: виноград насади человек, и огради оплотом, и ископа точило, и созда столп, и



предаде его тяжателем, и отиде. 2 И посла к тяжателем во время раба, да от тяжатель примет от плода винограда: 3 они же емше его биша и отослаша тща. 4 И паки посла к ним другаго раба: и того камением бивше, пробиша главу ему и послаша безчестна. 5 И паки иного посла: и того убиша: и многи ины, овы убо биюще, овы же убивающе. 6 Еще убо единого сына име возлюбленного своего, посла и того к ним последи, глаголя, яко усрамятся сына моего. 7 Они же тяжателе реша к себе, яко сей есть наследник: приидите, убием его, и наше будет наследство. 8 И емше его убиша и извергоша его вон из винограда. 9 Что убо сотворит господь винограда? Приидет и погубит тяжатели и даст виноград инем. 10 Ни Писания ли сего чли есте: камень, егоже не в ряду сотвориша зиждущии, сей бысть во главу угла: 11 от Господа бысть сие, и есть дивно во очию нашу? 12 И искаху Его яти, и убояшася народа: разумеша бо, яко к ним притчу рече: и оставльше Его отидоша. 13 И послаша к Нему некия от фарисей и иродиян, да Его обольстят словом. 14 Они же пришедше глаголаша Ему: Учителю, вемы, яко истинен еси и не радиши ни о комже: не зриши бо на лице человеков, но воистинну пути Божию учиши: достоин ли кинсон кесареви дати, или ни? Дамы ли, или не дамы? 15 Он же ведый их лицемерие, рече им: что Мя искушаете? Принесите Ми пенязь, да вижу. 16 Они же принесоша. И глагола им: чий образ сий и написание? Они же реша Ему: кесарев. 17 И отвещав Иисус рече им: воздадите кесарева кесареви и Божия Богови. И чудишася о Нем. 18 И приидоша саддукее к Нему, иже глаголют воскресению не быти: и вопросиша Его, глаголюще: 19 Учителю, Моисей написа

нам, яко аще кому брат умрет и оставит жену, а чад не оставит: да поймет брат его жену его и воскресит семя брату своему. 20 Седмь братий бе: и первый поят жену и умирая не остави семене: 21 и второй поят ю и умре, и ни той остави семене: и третий такожде: 22 и пояша ю седмь и не оставиша семене: последи же всех умре и жена. 23 В воскресение убо, егда воскреснут, которому их будет жена: седмь бо имеша ю жену. 24 И отвещав Иисус рече им: не сего ли ради прельщаетеся, не введуще Писания, ни силы Божия? 25 Егда бо из мертвых воскреснут, ни женятся, ни посягают, но суть яко Ангели на небесех: 26 о мертвых же, яко востают, несте ли чли в книгах Моисеовых, при купине яко рече ему Бог, глаголя: Аз Бог Авраамов и Бог Исааков и Бог Иаковль? 27 Несть Бог мертвых, но Бог живых: вы убо много прельщаетеся. 28 И приступль един от книжник, слышав их стязующихся и виде, яко добре отвеща им, вопроси Его: кая есть первая всех заповедий? 29 Иисус же отвеща ему: яко первойши всех заповедий: слыши, Израилю, Господь Бог ваш Господь един есть: 30 и возлюбиши Господа Бога твоего всем сердцем твоим, и всею душею твоею, и всем умом твоим, и всею крепостию твоею: сия есть первая заповедь. 31 И вторая подобна ей: возлюбиши ближняго своего яко сам себе. Большая сею ина заповедь несть. 32 И рече Ему книжник: добре, Учителю, воистинну рекл еси, яко един есть Бог, и несть ин разве Его: 33 и еже любити Его всем сердцем, и всем разумом, и всею душею, и всею крепостию: и еже любити ближняго яко себе, боле есть всех всесожжений и жертв. 34 Иисус же виде, яко смысленно отвеща, рече ему: не далече еси от

Царствия Божия. И никтоже смеяше ктому Его вопрошити. 35  
И отвещав Иисус глаголаше, учя в церкви: како глаголют  
книжницы, яко Христос Сын есть Давидов? 36 Той бо Давид  
рече Духом Святым: глагола Господь Господеви моему: седи  
о десную Мене, дондеже положу враги Твоя подножие ногама  
Твоима. 37 Сам убо Давид глаголет Его Господа: и откуда  
Сын ему есть? И мног народ послушаше Его в сладость. 38  
И глаголаше им во учении Своем: блюдитесь от книжник,  
хотящих во одеяниих ходити, и целования на торжищих,  
39 и преждеседания на сонмищих, и первовозлежания на  
вечерях: 40 поядающе дома вдовиц и непщеванием надолзе  
молящися, сии примут лишнее осуждение. 41 И сед Иисус  
прямо сокровищному хранилищу, зряше, како народ мещет  
медь в сокровищное хранилище. И мнози богатии вметаху  
многа. 42 И пришедши едина вдовица убога, вверже лепте  
две, еже есть кодрант. 43 И призвав ученики Своя, рече им:  
аминь глаголю вам, яко вдовица сия убогая множае всех  
вверже вметающих в сокровищное хранилище: 44 вси бо от  
избытка своего ввергоша: сия же от лишения своего вся,  
елика имеяше, вверже, все житие свое.

**13** И исходящу Ему от церкви, глагола Ему един от ученик  
Его: Учителю, виждь, каково камене и какова здания. 2 И  
отвещав Иисус рече ему: видиши ли сия великая здания? Не  
имать остати zde камень на камени, иже не разорится. 3 И  
сядящу Ему на горе Елеонстей прямо церкви, вопрошаху  
Его единаго Петр и Иаков, и Иоанн и Андрей: 4 рцы нам,  
когда сия будут? И кое (будет) знамение, егда имут вся  
сия скончатися? 5 Иисус же отвещав им, начат глаголати:  
блюдитесь, да не кто вас прельстит. 6 Мнози бо приидут во

имя Мое, глаголюще, яко Аз есмь: и многи прельстят. 7 Егда же услышите брани и слышания бранем, не ужасайтесь: подобает бо быти: но не у кончина. 8 Восстанет бо язык на язык, и царство на царство: и будут труси по местом, и будут глади и мятежи. Начало болезнем сия. 9 Блюдитесь же вы сами: предадут бо вы в сонмища, и на соборищих биени будете: и пред воеводы и цари ведени будете Мене ради, во свидетелство им. 10 И во всех языцех подобает прежде проповедатися Евангелию. 11 Егда же поведут вы предающе, не прежде пецытеся, что возглаголете, ни поучайтесь: но еже аще дастся вам в той час, се глаголите: не вы бо будете глаголющии, но Дух Святой. 12 Предаст же брат брата на смерть, и отец чадо: и восстанут чада на родители и убьют их. 13 И будете ненавидими всеми имене Моего ради: претерпевый же до конца, той спасен будет. 14 Егда же узрите мерзость запустения, реченную Даниилом пророком, стоящу, идеже не подобает: чтый да разумеет: тогда сущии во Иудеи да бежат на горы: 15 и иже на крове, да не слазит в дом, ни да внидет взяти чесо от дому своего: 16 и иже на селе сый, да не возвратится вспять взяти ризу свою. 17 Горе же непраздным и доящым в тыя дни. 18 Молитесь же, да не будет бегство ваше в зиме. 19 Будут бо дние тии скорбь, якова не бысть такова от начала создания, еже созда Бог, доныне, и не будет. 20 И аще не бы Господь прекратил дний, не бы убо спаслася всяка плоть: но избранных ради, ихже избра, прекратит дни. 21 Тогда аще кто речет вам: се, zde Христос, или: се, онде: не имите веры. 22 Восстанут бо лжехристи и лжепророцы и дадут знамения и чудеса, еже прельстити, аще возможно, и избранныя. 23 Вы же

блюдитесь: се, прежде рех вам вся. 24 Но в тья дни, по скорби той, солнце померкнет, и луна не даст света своего, 25 и звезды будут с небесе спадающа, и силы, яже на небесех, подвижутся. 26 И тогда узрят Сына Человеческого грядуща на облацех с силою и славою мноюю. 27 И тогда послет Ангелы Своя и соберет избранныя Своя от четырех ветр, от конца земли до конца неба. 28 От смоковницы же научитеся притчи: егда уже ветвие ея будет младо и изращает листвие, ведите, яко близ есть жатва: 29 тако и вы, егда сия видите бывающа, ведите, яко близ есть, при дверех. 30 Аминь глаголю вам, яко не имать прейти род сей, дондеже вся сия будут. 31 Небо и земля прейдут, словеса же Моя не прейдут. 32 О дни же том или о часе никтоже весть, ни Ангели, иже суть на небесех, ни Сын, токмо Отец. 33 Блюдите, бдите и молитесь: не весте бо, когда время будет. 34 Якоже человек отходя оставль дом свой, и дав рабом своим власть, и комуждо дело свое, и вратарю повеле, да бдит. 35 Бдите убо: не весте бо, когда господь дому приидет, вечер, или полунощи, или в петлоглашение, или утро: 36 да не пришед внезапно, обрящет вы спящя. 37 А яже вам глаголю, всем глаголю: бдите.

**14** Бе же Пасха и опресноцы по двою дню: и искаху архиерее и книжницы, како Его лестию емше убийт: 2 глаголаху же: (но) не в праздник, еда како молва будет людска. 3 И суцу Ему в Вифании, в дому Симона прокаженного, возлежащу Ему, прииде жена, имущи алавастр мира нарднаго пистикиа многоценна: и сокруши алавастр, возливаше Ему на главу. 4 Бяху же нецыи негодующе в себе и глаголюще: почто гибель сия мирная бысть? 5 Можаше бо сие продано

быти вяцше триех сот пенязь и датися нищым. И прещаху ей. 6 Иисус же рече: оставите ю: что ей труды даете? Добро дело содела о Мне. 7 Всегда бо нищья имате с собою, и егда хочете, можете им добро творити: Мене же не всегда имате. 8 Еже име сия, сотвори: предвари помазати Мое тело на погребение. 9 Аминь глаголю вам: идеже аще проповестся Евангелие сие во всем мире, и еже сотвори сия, глаголаано будет в память ея. 10 И Иуда Искариотский, един от обоюнадесяте, иде ко архиереем, да предаст Его им. 11 Они же слышавше возрадовашася и обещаша ему сребреники дати. И искаше, како Его в удобно время предаст. 12 И в первый день опреснок, егда пасху жряху, глаголаша Ему ученицы Его: где хоцшеши, шедше уготоваем, да яси пасху? 13 И посла два от ученик Своих и глагола има: идита во град: и срящет вас человек в скудельнице воду нося: по нем идита, 14 и идеже аще внидет, рцыта господину дому, яко Учитель глаголет: где есть виталница, идеже пасху со ученики Моими снем? 15 И той вама покажет горницу велию, послану, готову: ту уготовайта нам. 16 И изыдоста ученика Его, и приидоста во град, и обретоста, якоже рече има: и уготоваста пасху. 17 И вечеру бывшу прииде со обеманадесяте. 18 И возлежащым им и ядущым, рече Иисус: аминь глаголю вам, яко един от вас предаст Мя, ядый со Мною. 19 Они же начаша скорбети и глаголати Ему един по единому: еда аз? И другий: еда аз? 20 Он же отвещав рече им: един от обоюнадесяте, омочивый со Мною в солило. 21 Сын убо Человеческий идет, якоже есть писано о Нем: горе же человеку тому, имже Сын Человеческий предастся: добрее было бы ему, аще не бы родился человек той. 22 И

ядущим им, приемь Иисус хлеб, (и) благословив, преломи и даде им, и рече: приимите, ядите: сие есть Тело Мое. 23 И приим чашу, хвалу воздав, даде им: и пиша от нея вси. 24 И рече им: сия есть Кровь Моя Новаго Завета, за многи изливаема: 25 аминь глаголю вам, яко ктому не имам пити от плода лознаго до дне того, егда е пию ново во Царствии Божии. 26 И воспевше изыдоша в гору Елеонскую. 27 И глагола им Иисус, яко вси соблазнитесь о Мне в ночь сию: писано бо есть: поражу пастыря, и разыдутся овцы. 28 Но потом, егда воскресну, варяю вы в Галилеи. 29 Петр же рече Ему: аще и вси соблазняются, но не аз. 30 И глагола ему Иисус: аминь глаголю тебе, яко ты днешь в ночь сию, прежде даже вторицею петель не возгласит, трикраты отвержешия Мене. 31 Он же множае глаголаше паче: аще (же) ми есть с Тобою и умрети, не отвергуся Тебе. Такожде и вси глаголаху. 32 И приидоша в весь, ейже имя Гефсиманиа: и глагола учеником Своим: седите zde, дондеже шед помолюся. 33 И поят Петра и Иакова и Иоанна с Собою: и начат ужасатися и тужити. 34 И глагола им: прискорбна есть душа Моя до смерти: будите zde и бдите. 35 И прешед мало, паде на земли и моляшеся, да, аще возможно есть, мимо идет от Него час: 36 и глаголаше: Авва Отче, вся возможна Тебе: мимо носи от Мене чашу сию: но не еже Аз хочу, но еже Ты. 37 И прииде, и обрете их спящих, и глагола Петрови: Симоне, спиши ли? Не возмогл еси единого часа побдети? 38 Бдите и молитесь, да не внидете в напасть: дух убо бодр, плоть же немощна. 39 И паки шед помолися, тожде слово рек. 40 И возвращься обрете я паки спящя: бяху бо очеса им тяготна: и не ведяху, что быша Ему отвещали. 41 И прииде третицею и

глагола им: спите прочее и почивайте: приспе конец, прииде час: се, предается Сын Человеческий в руки грешником: 42 востаните, идем: се, предай Мя приближися. 43 И абие, еще Ему глаголющу, прииде Иуда, един сый от обоюнадесяте, и с ним народ мног со оружием и дрекольми, от архиерей и книжник и старец. 44 Даде же предай Его знамение им, глаголя: Егоже аще лобжу, Той есть: имите Его и ведите (Его) сохранно. 45 И пришед, абие приступль к Нему, глагола (Ему): Равви, Равви. И облобыза Его. 46 Они же возложиша руке Свои на него и яша Его. 47 Един же некто от стоящих извлек нож, удари раба архиереова и уреза ему ухо. 48 И отвещав Иисус рече им: яко на разбойника ли изыдoste со оружием и дрекольми яти Мя? 49 По вся дни бех при вас в церкви учя, и не ясте Мене: но да сбудется Писание. 50 И оставльше Его, вси бежаша. 51 И един некто юноша иде по Нем, одяен в плащаницу по нагу: и яша того юношу. 52 Он же оставль плащаницу, наг бежа от них. 53 И ведоша Иисуса ко архиерею: и снидошася к нему вси архиерее и книжницы и старцы. 54 И Петр издалеча вслед Его иде до внутрь во двор архиереев: и бе седя со слугами и греяся при свещи. 55 Архиерее же и весь сонм искаху на Иисуса свидетельства, да умертвят Его: и не обретаху. 56 Мнози бо лжесвидетелствоваху на Него, и равна свидетельства не бяху. 57 И нецыи воставше лжесвидетелствоваху на Него, глаголюще: 58 яко мы слышахом Его глаголюща, яко Аз разорю церковь сию рукотвореную и тремя денми ину нерукотворену созижду. 59 И ни тако равно бе свидетельство их. 60 И востав архиерей посреде, вопроси Иисуса, глаголя: не отвещаваеши ли ничесоже? Что сии на Тя свидетельствуют?



61 Он же молчаше и ничтоже отвещаваше. Паки архиерей  
вопроси Его и глагола Ему: Ты ли еси Христос, Сын  
Благословенного? 62 Иисус же рече: Аз есмь: и узрите  
Сына Человеческого о десную сядяща силы и грядуща со  
облаки небесными. 63 Архиерей же растерзав ризы своя,  
глагола: что еще требуем свидетелей? 64 Слышасте хулу:  
что вам мнится? Они же вси осудиша Его быти повинна  
смерти. 65 И начаша нецыи плювати Нань, и прикрывати  
лице Его, и мучити Его, и глаголати Ему: прорцы. И слуги  
по ланитома Его бияху. 66 И сущу Петрови во дворе низу,  
прииде едина от рабынь архиереовых, 67 и видевши Петра  
греющася, воззревши на него, глагола: и ты с Назарянином  
Иисусом был еси. 68 Он же отвержеся, глаголя: не вем,  
ниже знаю, что ты глаголеши. И изыде вон на преддворие:  
и алектор возгласи. 69 И рабыня видевши его паки, начат  
глаголати предстоящым, яко сей от них есть. 70 Он же паки  
отметашеся. И помале паки предстоящи глаголаху Петрови:  
воистинну от них еси: ибо Галилеанин еси, и беседа твоя  
подобится. 71 Он же нача ротитися и клятися, яко не вем  
Человека Сего, Егоже вы глаголете. 72 И второе алектор  
возгласи. И помяну Петр глаголгол, егоже рече ему Иисус, яко  
прежде даже петель не возгласит двакрыты, отвержешися  
Мене трикрыты. И начен плакашеся.

**15** И абие наутрие совет сотвориша архиерее со старцы и  
книжники, и весь сонм, связавше Иисуса ведоша и предаша  
(Его) Пилату. 2 И вопроси Его Пилат: Ты ли еси Царь  
Иудейский? Он же отвещав рече ему: ты глаголеши. 3 И  
глаголаху на Него архиерее много. 4 Пилат же паки вопроси  
Его, глаголя: не отвещаваше ли ничтоже? Виджь, колика

на Тя свидетелствуют. 5 Иисус же ктому ничтоже отвеща, яко дивитися Пилату. 6 На (всяк) же праздник отпущаше им единого связня, егоже прошаху. 7 Бе же нарицаемый Варавва со сковники своими связан, иже в кове убийство сотвориша. 8 И возопив народ нача просити, якоже всегда творяше им. 9 Пилат же отвеща им, глаголя: хочете ли, пуцу вам Царя Иудейска? 10 Ведяше бо, яко зависти ради предаша Его архиерее. 11 Архиерее же помануша народу, да паче Варавву пустит им. 12 Пилат же отвещав паки рече им: что убо хочете сотворю, Егоже глаголете Царя Иудейска? 13 Они же паки возопиша (глаголюще): пропни Его. 14 Пилат же глаголаше им: что бо зло сотвори? Они же излиха вопияху: пропни Его. 15 Пилат же хотя народу хотение сотворити, пусти им Варавву: и предаде Иисуса, бив, да пропнут Его. 16 Воини же ведоша Его внутрь двора, еже есть претор: и созваша всю спину, 17 и облекоша Его в препяду, и возложиша на Него сплетше тернов венец, 18 и начаша целовати Его (и глаголати): радуйся, Царю Иудейский. 19 И бияху Его по главе тростию, и плюваху на Него, и прегигающе колена поклоняхуся Ему. 20 И егда поругашася Ему, совлекоша с Него препяду и облекоша Его в ризы Своя: и изведоша Его, да пропнут Его. 21 И задеша мимоходящу некоему Симону Киринею, грядущу с села, отцу Александрову и Руфову, да возмет крест Его. 22 И приведоша Его на Голгофу место, еже есть казаемо Лобное место. 23 И даяху Ему пити есмирнисмено вино: Он же не прият. 24 И распеншии Его разделиша ризы Его, метающе жребий о них, кто что возмет. 25 Бе же час третий, и распяша Его. 26 И бе написание вины Его написано: Царь Иудейск.

27 И с Ним распяша два разбойника, единого о десную и единого о шую Его. 28 И сбытся Писание, еже глаголет: и со беззаконными вменися. 29 И мимоходящи хуляху Его, покивающе главами своими и глаголюще: уа, разоряй церковь и трети денми созидай, 30 спасися Сам и сниди со креста. 31 Такожде и архиерее ругающесе, друг ко другу с книжники глаголаху: ины спасе, Себе ли не может спасти? 32 Христос, Царь Израилев, да снидет ныне со креста, да видим и веру имем Ему. И распятая с Ним поношаста Ему. 33 Бывшу же часу шестому, тма бысть по всей земли до часа девятого. 34 И в час девятый возопи Иисус гласом велиим, глаголя: Елои, Елои, лама савахфани? Еже есть сказаемо: Боже Мой, Боже Мой, почто Мя оставил еси? 35 И нецыи от предстоящих слышавше, глаголаху: се, Илию гласит. 36 Тек же един, и наполнив губу оцта, и возложь на трость, напаяше Его, глаголя: оставите, да видим, аще приидет Илия сняти Его. 37 Иисус же пуць глас велий, издше. 38 И завеса церковная раздрася на двое, свыше до низу. 39 Видев же сотник стояй прямо Ему, яко тако возопив издше, рече: воистинну Человек Сей Сын бе Божий. 40 Бяху же и жены издалеча зряща, в нихже бе Мариа Магдалина, и Мариа Иакова малаго и Иосии мати, и Саломиа, 41 яже, и егда бе в Галилеи, хождаху по Нем и служажу Ему: и ины многия, яже въздоша с Ним во Иерусалим. 42 И уже позде бывшу, понеже бе пятюк, еже есть к субботе, 43 прииде Иосиф, иже от Аримафеа, благообразен советник, иже и той бе чая Царствия Божия, дерзнув вниде к Пилату, и проси телесе Иисусова. 44 Пилат же дивися, аще уже умре: и призвав сотника, вопроси его: аще уже умре? 45 И уведев от сотника,

даде тело Иосифови. 46 И купив плащаницу и снемь Его, обвит плащаницею: и положи Его во гроб, иже бе исечен от камене: и привали камень над двери гроба. 47 Мариа же Магдалина и Мариа Иосиева зрясте, где Его полагаху.

**16** И минувшей субботе, Мариа Магдалина и Мариа Иаковля и Саломиа купиша ароматы, да пришедши помажут Иисуса. 2 И зело заутра во едину от суббот приидоша на гроб, возсиявшу солнцу, 3 и глаголаху к себе: кто отвалит нам камень от дверей гроба? 4 И воззревша видеша, яко отвален бе камень: бе бо велий зело. 5 И вшедша во гроб, видеша юношу седяща в десных, одеяна во одежду белу: и ужасошася. 6 Он же глагола им: не ужасайтесь: Иисуса ищите Назарянина распятаго: воста, несть zde: се, место, идеже положиша Его: 7 но идите, рцйте учеником Его и Петрови, яко варяет вы в Галилеи: тамо Его видите, якоже рече вам. 8 И изшедша бежаша от гроба: имяше же их трепет и ужас: и ни комуже ничтоже реша: бояхубося. 9 (note: The most reliable and earliest manuscripts do not include Mark 16:9-20.) Воскрес же (Иисус) заутра в первую субботу, явися прежде Марии Магдалини, из неяже изгна седмь бесов. 10 Она (же) шедши возвести с Ним бывшым, плачущымся и рыдающим: 11 и они слышавше, яко жив есть и виден бысть от нея, не яша веры. 12 По сих же двема от них грядущема явися инем образом, идущема на село. 13 И та шедша возвестиста прочым: и ни тема веры яша. 14 Последи (же) возлежащым им единомунадесяте явися, и поноси неверствию их и жестосердию, яко видевающим Его воставша не яша веры. 15 И рече им: шедше в мир весь, проповедите Евангелие всей твари. 16 Иже веру имет и

крестится, спасен будет: а иже не имет веры, осужден будет.

17 Знамена же веровавшим сия последуют: именем Моим бесы ижденут: языки возглаголют новы: 18 змия возмут: аще и что смертно испиют, не вредит их: на недужныя руки возложат, и здрави будут. 19 Господь же убо, по глаголголании (Его) к ним, вознесся на небо и седе о десную Бога. 20 Они же изшедше проповедаша всюду, Господу поспешствующу и слово утверждающу последствующими знаменми. Аминь.

## От Луки святое благовествование

**1** Понеже убо мнози начаша чинити повесть о извествовавшихся в нас вещех, **2** якоже предаша нам, иже исперва самовидцы и слуги бывшии Словесе: **3** изволися и мне последовашу выше вся испытно, порядку писати тебе, державный Феофиле, **4** да разумееш, о нихже научился еси словесех утверждение. **5** Бысть во дни Ирода царя Иудейска, иерей некий, именем Захариа, от дневных чреды Авиани: и жена его от дочерей Аароновех, и имя ей Елисаветь. **6** Беста же праведна оба пред Богом, ходяща во всех заповедех и оправданиих Господних безпорочна. **7** И не бе има чада, понеже Елисаветь бе неплоды, и оба заматоревша во днех своих беста. **8** Бысть же служащу ему в чину чреды своя пред Богом, **9** по обычаю священничества ключися ему покадити вшедшу в церковь Господню: **10** и все множество людей бе молитву дея вне, в год фимиама: **11** явился же ему Ангел Господень, стоя о десную олтаря кадилнаго: **12** и смутися Захариа виде, и страх нападе на нь. **13** Рече же к нему Ангел: не бойся, Захарие: зане услышана бысть молитва твоя, и жена твоя Елисаветь родит сына тебе, и наречеши имя ему Иоанн: **14** и будет тебе радость и веселие, и мнози о рождестве его возрадуются: **15** будет бо велий пред Господем: и вина и сикера не имать пити, и Духа Святаго исполнится еще из чрева матери своя: **16** и многих от сынов Израилевых обратит ко Господу Богу их: **17** и той предидет пред Ним духом и силою Илииною, обратити сердца отцем на чада, и противных в мудрости праведных, уготовати Господеву люди совершены. **18** И рече Захариа ко

Ангелу: по чесому разумею сие? Аз бо есмь стар, и жена моя заматоревши во днех своих. 19 И отвещав Ангел рече ему: аз есмь Гавриил предстояй пред Богом, и послан есмь глаголати к тебе и благовестити тебе сия: 20 и се, будеши молча и не могый проглаголати, до негоже дне будут сия: зане не веровал еси словесем моим, яже сбудутся во время свое. 21 И беша людие ждуще Захарию: и чудяхуся коснящу ему в церкви. 22 Изшед же не можаше глаголати к ним: и разумеша, яко видение виде в церкви: и той бе помавая им, и пребываше нем. 23 И бысть яко исполнишася дние службы его, иде в дом свой. 24 По сих же днех зачат Елисаветь жена его, и таяшеся месяц пять, глаголющи: 25 яко тако мне сотвори Господь во дни, в няже призре отяти поношение мое в человецех. 26 В месяц же шестый послан бысть Ангел Гавриил от Бога во град Галилейский, емуже имя Назарет, 27 к Деве обрученной мужеву, емуже имя Иосиф, от дому Давидова: и имя Деве Мариамь. 28 И вшед к Ней Ангел рече: радуйся, Благодатная: Господь с Тобою: благословена Ты в женах. 29 Она же видевши смутися о словеси его и помышляше, какво будет целование сие. 30 И рече Ангел Ей: не бойся, Мариамь: обрела бо еси благодать у Бога. 31 И се зачнеши во чреве, и родиши Сына, и наречеши имя Ему Иисус: 32 Сей будет велий, и Сын Вышняго наречется: и даст Ему Господь Бог престол Давида отца Его: 33 и воцарится в дому Иаковли во веки, и Царствию Его не будет конца. (αἰῶν g165) 34 Рече же Мариамь ко Ангелу: како будет сие, идеже мужа не знаю? 35 И отвещав Ангел рече Ей: Дух Святыи найдет на Тя, и сила Вышняго осенит Тя: темже и раждаемое Свято наречется Сын Божий: 36 и се, Елисаветь южика Твоя,

и та зачат сына в старости своей: и сей месяц шестый есть ей нарицаемой неплоды: 37 яко не изнеможет у Бога всяк глаголгол. 38 Рече же Мариамь: се, Раба Господня: буди Мне по глаголу твоему. И отиде от Нея Ангел. 39 Воставши же Мариамь во дни тыя, иде в горняя со тщанием, во град Иудов: 40 и вниде в дом Захариин и целова Елисаветь. 41 И бысть яко услыша Елисаветь целование Мариино, възграся младенец во чреве ея: и исполнися Духа Свята Елисаветь, 42 и возопи гласом велиим, и рече: благословена Ты в женах, и благословен плод чрева Твоего: 43 и откуда мне сие, да приидет Мати Господа моего ко мне? 44 Се бо, яко бысть глас целования Твоего во ушию моею, възграся младенец радощами во чреве моем: 45 и блаженна Веровавшая, яко будет совершение глаголголаным Ей от Господа. 46 И рече Мариамь: величит душа Моя Господа, 47 и возрадовася дух Мой о Бозе Спасе Моем: 48 яко призре на смирение Рабы Своея: се бо, отныне ублажат Мя вси роди: 49 яко сотвори Мне величие Сильный, и свято имя Его: 50 и милость Его в роды родов боящимся Его: 51 сотвори державу мышцею Своею: расточи гордыя мыслию сердца их? 52 Низложи сильныя со престол, и вознесе смиренныя: 53 алчущыя исполни благ и богатящыяся отпусти тщы: 54 восприят Израиля отрока Своего, помянути милости, 55 якоже глагола ко отцем нашим, Аврааму и семени его до века. (aiōn g165) 56 Пребысть же Мариамь с нею яко три месяцы и возвратися в дом свой. 57 Елисавети же исполнися время родити ей, и роди сына. 58 И слышаша окрест живуции и ужики ея, яко возвеличил есть Господь милость Свою с нею: и радовахуся с нею. 59 И бысть во осмый день, приидоша обрезати отрока,



и нарицаху е именем отца его, Захарию. 60 И отвещавши матери его рече: ни, но да наречется Иоанн. 61 И реша к ней, яко никтоже есть в родстве твоём, иже нарицается именем тем. 62 И помаваху отцу его, еже како бы хотел нареши е. 63 И испрошь дщицу, написа, глаголя: Иоанн будет имя ему. И чудяхуся вси. 64 Отверзошася же уста его абие и язык его, и глаголаше благословя Бога. 65 И бысть на всех страх живущих окрест их: и во всей стране Иудейстей поведаеми бяху вси глаголи сии. 66 И положиша вси слышавшии в сердцы своем, глаголюще: что убо отроча сие будет? И рука Господня бе с ним. 67 И Захария отец его исполнися Духа Свята, и пророчествова, глаголя: 68 благословен Господь Бог Израилев, яко посети и сотвори избавление людем Своим: 69 и воздвиже рог спасения нам, в дому Давида отрока Своего: 70 якоже глагола усты святых сущих от века пророк Его, (аіѡн g165) 71 спасение от враг наших и из руки всех ненавидящих нас: 72 сотворити милость со отцы нашими и помянути завет святой Свой, 73 клятву, еюже клятса ко Аврааму отцу нашему, дати нам, 74 без страха, из руки враг наших избавльшымся, 75 служити Ему преподобием и правдою пред Ним вся дни живота нашего. 76 И ты, отроча, пророк Вышняго наречешися: предидеши бо пред лицом Господним, уготовати пути Его, 77 дати разум спасения людем Его, во оставление грех их, 78 милосердия ради милости Бога нашего, в нихже посетил есть нас Восток свыше, 79 просветити во тме и сени смертней сидящя, направити ноги наша на путь мирен. 80 Отроча же растяше и крепляшеся духом: и бе в пустынях до дне явления своего ко Израилю.

**2** Бысть же во дни тыя, изыде повеление от кесаря Августа написати всю вселенную. **2** Сие написание первое бысть владашу Сириею Кирию. **3** И идяху вси написатися, кождо во свой град. **4** Взыде же и Иосиф от Галилеи, из града Назарета, во Иудею, во град Давидов, иже нарицается Вифлеем, зане быти ему от дому и отечества Давидова, **5** написатися с Мариєю обрученою ему женою, сущею непраздною. **6** Бысть же, егда быста тамо, исполнишася дние родити Ей: **7** и роди Сына своего Первенца, и повит Его, и положи Его в яслех: зане не бе им места во обители. **8** И пастырие беху в тойже стране, бдяще и стрегуще стражу нощную о стаде своем. **9** И се, Ангел Господень ста в них, и слава Господня осия их: и убояшася страхом велиим. **10** И рече им Ангел: не бойтесе: се бо, благовествую вам радость велию, яже будет всем людем: **11** яко родися вам днесь Спас, Иже есть Христос Господь, во граде Давидове: **12** и се вам знамение: обрящете Младенца повита, лежаща в яслех. **13** И внезапно бысть со Ангелом множество вой небесных, хвалящих Бога и глаголющих: **14** слава в вышних Богу, и на земли мир, во человецех благоволение. **15** И бысть, яко отидоша от них на небо Ангели, и человецы пастырие реша друг ко другу: преидем до Вифлеема и видим глаголгол сей бывший, егоже Господь сказа нам. **16** И приидоша поспешесе, и обретоша Мариамь же и Иосифа, и Младенца лежаща во яслех. **17** Видевше же сказаша о глаголголе глаголголаннем им о Отрочати Сем. **18** И вси слышавши дивишася о глаголанных от пастырей к ним. **19** Мариамь же соблюдаше вся глаголы сия, слагаючи в сердцы Своем. **20** И возвратишася пастырие, славяще и хваляще

Бога о всех, яже слышаша и видеша, якоже глаголаше бысть к ним. 21 И егда исполнишася осмь дний, да обрежут Его, и нарекоша имя Ему Иисус, нареченное Ангелом прежде даже не зачатся во чреве. 22 И егда исполнишася дние очищения ея, по закону Моисеову, вознесоста Его во Иерусалим, поставити Его пред Господем, 23 якоже есть писано в законе Господни: яко всяк младенец мужеска полу, разверзая ложесна, свято Господеви наречется: 24 и еже дати жертву, по реченному в законе Господни, два горличища или два птенца голубина. 25 И се, бе человек во Иерусалиме, емуже имя Симеон. И человек сей праведен и благочестив, чая утехи Израилевы: и Дух бе Свят в нем. 26 И бе ему обещанно Духом Святым, не видети смерти, прежде даже не видит Христа Господня. 27 И прииде Духом в церковь. И егда введоста родителя Отроча Иисуса, сотворити има по обычаю законному о Нем, 28 и той приемь Его на руку свою, и благослови Бога, и рече: 29 ныне отпускаеши раба Твоего, Владыко, по глагололу Твоему, с миром: 30 яко видесте очи мои спасение Твое, 31 еже еси уготовал пред лицом всех людей: 32 свет во откровение языком, и славу людей Твоих Израиля. 33 И бе Иосиф и Мати Его чудящася о глаголемых о Нем. 34 И благослови я Симеон, и рече к Марии Матери Его: се, лежит Сей на падение и на востание многим во Израили, и в знамение пререкаемо: 35 и Тебе же Самой душу пройдет оружие: яко да открыются от многих сердец помышления. 36 И бе Анна пророчица, дщи Фануилева, от колена Асирова: сия заматоревши во днех мнозех, живши с мужем седмь лет от девства своего: 37 и та вдова яко лет осмьдесят и четыре, яже не отхождаше от церкви, постом

и молитвами служащи день и ночь. 38 И та в той час приставши исповедашеся Господеви и глаголаше о Нем всем чающим избавления во Иерусалиме. 39 И яко скончашася вся по закону Господню, возвратишася в Галилею, во град свой Назарет. 40 Отроча же растяше и крепляшеся духом, исполняяся премудрости: и благодать Божия бе на Нем. 41 И хождаста родителя Его на всяко лето во Иерусалим в праздник Пасхи. 42 И егда бысть двоюнадесяти лету, восходящим им во Иерусалим по обычаю праздника, 43 и скончавшим дни, и возвращающимся има, оста Отрок Иисус во Иерусалиме: и не разуме Иосиф и Мати Его: 44 мневша же Его в дружине суща, преидоста дне путь, и искаста Его во сродницех и в знаемых: 45 и не обретша Его, возвратистася во Иерусалим, взыскающа Его. 46 И бысть по триех днех, обретоста Его в церкви, сидящего посреде учителей, и слушающего их, и вопрошающего их: 47 ужасавшася же вси слушающии Его о разуме и о ответех Его. 48 И видевша Его, дивистася: и к Нему Мати Его рече: Чадо, что сотвори нама тако? Се, отец Твой и Аз боляща искахома Тебе. 49 И рече к нима: что яко искаста Мене? Не веста ли, яко в тех, яже Отца Моего, достоин быти Ми? 50 И та не разуместа глаголгола, егоже глагола Има. 51 И сниде с нима и прииде в Назарет: и бе повинуюся има. И Мати Его соблюдаше вся глаголголы сия в сердцы Своем. 52 И Иисус преспеваше премудростию и возрастом и благодатию у Бога и человек.

**3** В пятое же надешате лето владычества Тивериа кесаря, обладающу Понтийскому Пилату Иудеею, и четвертовластвующу Галилеею Ироду, Филиппу же брату его

четвертовластвующу Итуреею и Трахонитскою страну, и Лисанию Авилинию четвертовластвующу, 2 при архиереи Анне и Каиафе, бысть глаголгол Божий ко Иоанну Захариину сыну в пустыни. 3 И прииде во всю страну Иорданскую, проповеда я крещение покаяния во оставление грехов: 4 якоже есть писано в книзе словес Исаии пророка, глаголюща: глас вопиющаго в пустыни: уготовайте путь Господень: правы творите стези Его: 5 всяка дебрь исполнится, и всяка гора и холм смирится: и будут стропотная в правая, и острии в пути гладки: 6 и узрит всяка плоть спасение Божие. 7 Глаголаше же исходящым народом креститися от него: порождения ехиднова, кто сказа вам бежати от грядущаго гнева? 8 Сотворите убо плоды достойны покаяния: и не начинайте глаголати в себе: отца имама Авраама: глаголю бо вам, яко может Бог от камня сего воздвигнути чада Аврааму. 9 Уже бо и секира при корени древа лежит: всяко убо древо не творящее плода добра посекается и во огонь вметається. 10 И вопрошаху его народи, глаголюще: что убо сотворим? 11 Отвещав же глагола им: имеяй две ризе, да подаст неимущему: и имеяй брашна, такожде да творит. 12 Приидоша же и мытари креститися от него и реша к нему: учителю, что сотворим? 13 Он же рече к ним: ничтоже более от повеленнаго вам творите. 14 Вопрошаху же его и воины, глаголюще: и мы что сотворим? И рече к ним: ни когоже обидите, ни оклеветавайте: и доволни будите оброки вашими. 15 Чающым же людем, и помышляющым всем в сердцах своих о Иоанне, еда той есть Христос, 16 отвещаваше Иоанн всем, глаголя: аз убо водою крещая вы: грядет же Креплий мене, Емуже несмь

достоин отрешити ремень сапогу Его: Той вы крестит Духом Святым и огнем: 17 Емуже лопата в руку Его, и отребит гумно Свое, и соберет пшеницу в житницу Свою, плевые же сожжет огнем негасающим. 18 Многа же убо и ина утешая благовествоваша людем. 19 Ирод же четвертовластник, обличаемь от него о Иродиаде жене брата своего, и о всех, яже сотвори злая Ирод, 20 приложи и сие над всеми, и затвори Иоанна в темнице. 21 Бысть же егда кресташася вси людие, и Иисусу крещашуся и моляшуся, отверзесе небо, 22 и сниде Дух Святой телесным образом, яко голубь, Нань: и глас с небесе бысть, глаголя: Ты еси Сын Мой Возлюбленный, о Тебе благоволих. 23 И той бе Иисус яко лет тридесять начиная, сый, яко мнимь, Сын Иосифов, Илиев, 24 Матфатов, Левиин, Мелхиин, Ианнаев, Иосифов, 25 Маттафиев, Амосов, Наумов, Еслимов, Наггеов, 26 Маафов, Маттафиев, Семейев, Иосифов, Иудин, 27 Иоаннанов, Рисаев, Зоровавелев, Салафиилев, Нириев, 28 Мелхиев, Аддиев, Косамов, Елмодамов, Иров, 29 Иосиев, Елиезеров, Иоримов, Матфатов, Левиин, 30 Симеонов, Иудин, Иосифов, Ионанов, Елиакимов, 31 Мелеаев, Маинанов, Маттафаев, Нафанов, Давидов, 32 Иессеов, Овидов, Воозов, Салмонов, Наассонов, 33 Аминадавов, Арамов, Есромов, Фаресов, Иудин, 34 Иаковль, Исааков, Авраамов, Фарин, Нахоров, 35 Серухов, Рагавов, Фалеков, Еверов, Саланов, 36 Каинанов, Арфаксадов, Симов, Ноев, Ламехов, 37 Мафусалев, Енохов, Иаредов, Малелеилов, Каинанов, 38 Еносов, Сифов, Адамов, Божий.

**4** Иисус же исполнь Духа Свята возвратися от Иордана: и ведяшеся Духом в пустыню, 2 дний четыридесять искушаемь

от диавола: и не яст ничесоже во дни тыя: и скончавшимся им, последи взалка. 3 И рече Ему диавол: аще Сын еси Божий, рцы каменеви сему, да будет хлеб. 4 И отвеща Иисус к нему, глаголя: писано есть, яко не о хлебе едином жив будет человек, но о всяцем глаголголе Божию. 5 И возвед Его диавол на гору високу, показа Ему вся царствия вселенныя в часе временне, 6 и рече Ему диавол: Тебе дам власть сию всю и славу их: яко мне предана есть, и, емуже аще хоцу, дам ю: 7 Ты убо аще поклонишия предо мною, будут Тебе вся. 8 И отвещав рече ему Иисус: иди за Мною, сатано: писано есть: поклонишия Господу Богу твоему, и Тому единому послужиши. 9 И веде Его во Иерусалим, и постави Его на криле церковнем, и рече Ему: аще Сын еси Божий, верзися отсюда долу: 10 писано бо есть, яко Ангелом Своим заповесть о Тебе сохранить Тя: 11 и на руках возмут Тя, да не когда преткнеши о камень ногу Твою. 12 И отвещав рече ему Иисус, яко речено есть: не искусиши Господа Бога твоего. 13 И скончав все искушение диавол, отиде от Него до времене. 14 И возвратися Иисус в силе духовней в Галилею: и весть изыде по всей стране о Нем. 15 И той учаше на сонмищих их, славимь всеми. 16 И прииде в Назарет, идеже бе воспитан. И вниде, по обычаю Своему, в день субботный в сонмище, и воста чести. 17 И даша Ему книгу Исаии пророка: и разгнув книгу, обрете место, идеже бе написано: 18 Дух Господень на Мне: Егоже ради помаза Мя благовестити нищым, посла Мя изцелити сокрушенныя сердцем, проповедати плененным отпущение и слепым прозрение, отпустить сокрушенныя во отраду, 19 проповедати лето Господне приятно. 20 И согнув книгу, отдав

слузе, седе: и всем в сонмищи очи беху зряще Нань. 21 И начат глаголати к ним, яко днесь сбьется писание сие во ушию вашу. 22 И вси свидетелствоваху Ему, и дивляхуся о словесех благодати, исходящих из уст Его, и глаголаху: не Сей ли есть сын Иосифов? 23 И рече к ним: всяко речете Ми притчу сию: врачу, изцелися Сам: елика слышахом бывшая в Капернауме, сотвори и zde во отечестве Своем. 24 Рече же: аминь глаголю вам, яко ни который пророк приятен есть во отечестве своем: 25 поистинне же глаголю вам: многи вдовицы беша во дни Илиины во Израили, егда заключися небо три лета и месяц шесть, яко бысть глад велик по всей земли: 26 и ни ко единой их послан бысть Илия, токмо в Сарепту Сидонскую к жене вдовице: 27 и мнози прокажени беху при Елисеи пророце во Израили: и ни един же от них очистися, токмо Нееман Сирианин. 28 И исполнишася вси ярости в сонмищи, слышавшии сия: 29 и воставше изгнаша Его вон из града, и ведоша Его до верху горы, на нейже град их создан бьаше, да быша Его низринули: 30 Он же прошед посреде их, идяше. 31 И сниде в Капернаум град Галилейский: и бе учя их в субботы. 32 И ужасохуся о учении Его: яко со властью бе слово Его. 33 И в сонмищи бе человек имый духа беса нечиста, и возопи гласом велиим, 34 глаголя: остави, что нам и Тебе, Иисусе Назарянине? Пришел еси погубити нас: вем Тя, кто еси, Святыи Божий. 35 И запрети ему Иисус, глаголя: премолчи и изыди из него. И поверг его бес посреде, изыде из него, никакоже вредив его. 36 И бысть ужас на всех, и стязохуся друг ко другу, глаголюще: что слово сие, яко властью и силою велит нечистым духовом, и исходят? 37 И исхождаше глас о Нем во всяко место страны.



38 Востав же из сонмища, вниде в дом Симонов: теща же Симонова бе одержима огнем велиим: и молиша Его о ней. 39 И став над нею, запрети огню, и остави ю. Абие же воставши служаше им. 40 Заходящу же солнцу, вси, елицы имеяху болящыя недуги различными, привождяху их к Нему: Он же на единого коегождо их руце возложь, изцеляше их. 41 Исхождаху же и беси от многих, вопиюще и глаголюще, яко Ты еси Христос Сын Божий. И запрещая не даяше им глаголати, яко ведяху Христа Самого суща. 42 Бывшу же дню, изшед иде в пусто место: и народи искаху Его, и приидоша к Нему, и удержаваху Его, дабы не отшел от них. 43 Он же рече к ним, яко и другим градовом блавестити Ми подобает Царствие Божие: яко на се послан есмь. 44 И бе проповедая на сонмищих галилейских.

**5** Бысть же належашу Ему народу, да быша слышали слово Божие, и Той бе стоя при езере Геннисаретсте: 2 и виде два корабля стояща при езере: рыбарие же отшедше от нею, измываху мрежи. 3 Влез же в един от кораблю, иже бе Симонов, моли его от земли отступити мало: и сед учаше из корабля народы. 4 Якоже преста глаголя, рече к Симону: поступи во глубину, и вверзите мрежи ваша в ловитву. 5 И отвещав Симон рече Ему: Наставниче, об ночь всю труждшеся, ничесоже яхом: по глаголголу же Твоему ввергу мрежу. 6 И се сотворше, яша множество рыб много: протерзашеся же мрежа их. 7 И помануша причастником, иже беху во друзем корабли, да пришедше помогут им: и приидоша, и исполниша оба корабля, яко погружатися има. 8 Видев же Симон Петр, припаде к коленама Иисусовома, глаголя: изыди от мене, яко муж грешен есмь, Господи. 9

Ужас бо одержаше его и вся суцья с ним, о ловитве рыб, яже яша: 10 такожде же Иакова и Иоанна сына Зеведеова, яже беста обещника Симонови. И рече к Симону Иисус: не бойся: отселе будеши человеки лова. 11 И извлекше (оба) корабля на землю, оставльше вся, вслед Его идоша. 12 И бысть егда бе Иисус во единем от градов, и се, муж исполнь прокажения: и видев Иисуса, пад ниц, моляся Ему, глаголя: Господи, аще хочеши, можеши мя очистити. 13 И простер руку, коснулся его, рек: хочу, очистися. И абие проказа отиде от него. 14 И Той заповеда ему ни комуже поведати: но шед покажися иереови, и принеси о очищении твоём, якоже повеле Моисей, во свидетелство им. 15 Проходяше же паче слово о Нем: и сходяхуся народи мнози слышати и целитися от Него от недуг своих. 16 Той же бе отходя в пустыню и моляся. 17 И бысть во един от дний, и Той бе учя: и беху сидяще фарисее и законоучителие, иже беху пришли от всякия веси Галилейския и Иудейския и Иерусалимския: и сила Господня бе изцеляющи их: 18 и се, мужие носяще на одре человека, иже бе расслаблен, и искаху внести его и положить пред Ним: 19 и не обретше куде внести его народа ради, взлезше на храм, сквозе скуделы низвесиша его со одром на среду пред Иисуса. 20 И видев веру их, рече ему: человек, оставляютися греси твои. 21 И начаша помышляти книжницы и фарисее, глаголюще: кто есть сей, иже глаголет хулы? Кто может оставляти грехи, токмо един Бог? 22 Разумев же Иисус помышления их, отвещав рече к ним: что помышляете в сердцах ваших? 23 Что есть удобее рещи: оставляютися греси твои? Или рещи: востани и ходи? 24 Но да увесте, яко власть иматъ Сын Человеческий на

земли отпущати грехи, рече разслабленному: тебе глаголю: востани, и возми одр твой, и иди в дом твой. 25 И абие востав пред ними, взем, на немже лежаше, иде в дом свой, славя Бога. 26 И ужас прият всех, и славляху Бога: и исполнишася страха, глаголюще, яко видехом преславная днесь. 27 И посем изыде, и узре мытаря именем Левию, сидяща на мытнице, и рече ему: иди по Мне. 28 И оставль вся, востав вслед Его иде. 29 И сотвори учреждение велие Левий Ему в дому своем: и бе народ мытарей мног, и инех, иже бяху с ним возлежаще. 30 И роптаху книжницы на Него и фарисее, ко учеником Его глаголюще: почто с мытари и грешники ясте и пиете? 31 И отвещав Иисус рече к ним: не требуют здравии врача, но болящии: 32 не приидох призвати праведных, но грешных в покаяние. 33 Они же реша к Нему: почто ученицы Иоанновы постятся часто и молитвы творят, такожде и фарисейстии, а Твои ядят и пьют? 34 Он же рече к ним: еда можете сыны брачныя, дондеже жених с ними есть, сотворити поститися? 35 Приидут же дние, егда отят будет от них жених, и тогда постятся в тыя дни. 36 Глаголаше же и притчу к ним, яко никтоже приставления ризы новы приставляет на ризу ветху: аще ли же ни, и новую раздерет, и ветсей не согласует еже от новаго. 37 И никтоже вливает вина нова в мехи ветхи: аще ли же ни, расторгнет новое вино мехи, и само излиется, и меси погибнут: 38 но вино новое в мехи новы вливати: и обоя соблюдутся. 39 И никтоже пив ветхое, абие хочет новаго: глаголет бо: ветхое лучше есть.

**6** Бысть же в субботу второпервую ити Ему сквозе сеяния: и восторгаху ученицы Его класы, и ядыху, стирающе руками. 2 Нецыи же от фарисей реша им: что творите, егоже не

достоит творити в субботы? 3 И отвещав Иисус рече к ним: ни ли сего чли есте, еже сотвори Давид, егда взалкася сам и иже с ним бяху? 4 Како вниде в дом Божий, и хлебы предложения взем, и яде, и даде и сущым с ним, ихже не достояше ясти, токмо едином иереем? 5 И глаголаше им, яко господь есть Сын Человеческий и субботе. 6 Бысть же и в другую субботу внити Ему в сонмище и учити: и бе тамо человек, и рука ему десная бе суха. 7 Назираху же книжницы и фарисее, аще в субботу изцелит, да обрящут речь Нань. 8 Он же ведяше помышления их и рече человеку имущему суху руку: востани и стани посреде. Он же востав ста. 9 Рече же Иисус к ним: вопрошу вы: что достоин в субботы, добро творити, или зло творити? Душу спасти, или погубити? Они же умолчаша. 10 И воззрев на всех их, рече ему: прости руку твою. Он же сотвори тако: и утвердися рука его здрава яко другая. 11 Они же исполнишася безумия и глаголаху друг ко другу, что быша сотворили Иисусови. 12 Бысть же во дни тыя, изыде в гору помолитися: и бе об ночь в молитве Божии. 13 И егда бысть день, призва ученики Своя: и избра от них дванадесяте, ихже и Апостолы нарече: 14 Симона, егоже именована Петра, и Андреа брата его, Иакова и Иоанна, Филиппа и Варфоломея, 15 Матфея и Фому, Иакова Алфеева и Симона нарицаемаго Зилота, 16 Иуду Иаковля, и Иуду Искаротскаго, иже и бысть предатель. 17 Изшед с ними, ста на месте равне: и народ ученик Его, и множество много людей от всея Иудеи и Иерусалима, и помория Тирска и Сидонска, 18 иже приидоша послушати Его и изцелитися от недуг своих, и страждущии от дух нечистых: и изцеляхуса. 19 И весь народ искаше прикасатися

Ему: яко сила от Него исхождаше и изцеляше вся. 20 И Той возвед очи Свои на ученики Своя, глаголаше: блажени нищии духом: яко ваше есть Царствие Божие. 21 Блажени, алчущии ныне: яко насытитесь. Блажени, плачущии ныне: яко возсмеетесь. 22 Блажени будете, егда возненавидят вас человецы, и егда разлучат вы и поносят, и пронесут имя ваше яко зло, Сына Человеческого ради. 23 Возрадуйтесь в той день и възиграйте: се бо, мзда ваша многа на небеси. По сим бо творяху пророком отцы их. 24 Обаче горе вам богатым: яко отстоите утешения вашего. 25 Горе вам, насыщеннии ныне: яко взалчете. Горе вам смеющымся ныне: яко възрыдаете и восплачете. 26 Горе, егда добре рекут вам вси человецы. По сим бо творяху лжепророком отцы их. 27 Но вам глаголю слышащым: любите враги ваша, добро творите ненавидящым вас, 28 благословите кленущыя вы, и молитесь за творящих вам обиду. 29 Биющему тя в ланиту, подаждь и другую: и от взимающаго ти ризу, и срачицу не возбрани. 30 Всякому же просящему у тебе дай: и от взимающаго твоя не истязуй. 31 И якоже хотите да творят вам человецы, и вы творите им такожде. 32 И аще любите любящыя вы, кая вам благодать есть? Ибо и грешницы любящыя их любят. 33 И аще благотворите благотворящым вам, кая вам благодать есть? Ибо и грешницы тожде творят. 34 И аще взаим даете, от нихже чаєте восприяти, кая вам благодать есть, ибо и грешницы грешником взаим дают, да восприимут равная. 35 Обаче любите враги ваша, и благотворите, и взаим дайте, ничесоже чающе: и будет мзда ваша многа, и будете сынове Вышняго: яко Той благ есть на безблагодатныя и злыя. 36 Будите убо милосерди, якоже

и Отец ваш милосерд есть. 37 И не судите, и не судят вам: (и) не осуждайте, да не осуждени будете: отпускайте, и отпустят вам: 38 дайте, и дастся вам: меру добру, наткану и потрясну и преливающуюся дадут на лоно ваше: тою бо мерою, еюже мерите, возмерится вам. 39 Рече же притчу им: еда может слепец слепца водити? Не оба ли в яму впадетася? 40 Несть ученик над учителя своего: совершен же всяк будет, якоже и учитель его. 41 Что же видиши сучец, иже есть во очеси брата твоего, бервна же, еже есть во очеси твоём, не чуеши? 42 Или како можеша рещи брату твоему: брате, остави, да изму сучец, иже есть во очеси твоём, сам сущаго во очеси твоём бервна не видя? Лицемере, изми первее бервно из очесе твоего, и тогда прозриши изяти сучец из очесе брата твоего. 43 Несть бо древо добро, творя плода зла: ниже древо зло, творя плода добра. 44 Всяко бо древо от плода своего познается: не от терния бо чешут смоквы, ни от купины емлют гроздия. 45 Благий человек от благаго сокровища сердца своего износит благое: и злый человек от злаго сокровища сердца своего износит злое: от избытка бо сердца глаголют уста его. 46 Что же Мя зовете: Господи, Господи, и не творите, яже глаголю? 47 Всяк грядый ко Мне и слышай словеса Моя и творя я, скажу вам, кому есть подобен: 48 подобен есть человеку зиждущу храмину, иже ископа и углуби, и положи основание на камени: наводнению же бывшу, припаде река ко храмину той, и не може поколебати ея: основана бо бе на камени. 49 Слышавый же и не сотворивый подобен есть человеку создавшему храмину на земли без основания: к нейже

припаде река, и абие падесе, и бысть разрушение храмины  
тоя велие.

**7** Егда же сконча вся глаголголы Своя в слухи людем, вниде  
в Капернаум. **2** Сотнику же некоему раб боля зле, хотяше  
умрети, иже бе ему честен. **3** Слышав же о Иисусе, посла к  
Нему старцы Иудейския, моля Его, яко да пришед спасет  
раба его. **4** Они же пришедше ко Иисусови, моляху Его  
тощно, глаголюще, яко достоин есть, емуже даси сие: **5**  
любит бо язык наш, и сонмище той созда нам. **6** Иисус же  
идяше с ними. И уже Ему не далече сущу от храмины, посла  
к Нему сотник други, глаголя Ему: Господи, не движися:  
несь бо достоин, да под кров мой внидеши: **7** темже ни  
себе достойна сотворих приити к Тебе: но рцы слово, и  
изцелеет отрок мой: **8** ибо и аз человек есмь под владыкою  
учинен, имея под собою воины: и глаголю сему: иди, и  
идет: и другому: прииди, и приидет: и рабу моему: сотвори  
сие, и сотворит. **9** Слышав же сия Иисус, чудися ему, и  
обращься идущему по Нем народу рече: глаголю вам, ни во  
Израили толики веры обретох. **10** И возвращшеся посланнии  
обретоша болящаго раба изцелевша. **11** И бысть посем,  
идяше во град, нарицаемый Наин: и с Ним идяху ученицы  
Его мнози и народ мног. **12** Якоже приблизися ко вратом  
града, и се изношаху умерша, сына едиnorodна матери  
своей, и та бе вдова: и народ от града мног с нею. **13** И виде  
ю Господь, милосердова о ней, и рече ей: не плачи. **14** И  
приступль коснуся во одр: носящии же сташа: и рече: юноше,  
тебе глаголю, востани. **15** И седе мертвый, и начат глаголати:  
и даде его матери его. **16** Прият же страх всех, и славляху  
Бога, глаголюще: яко пророк велий воста в нас, и яко посети

Бог людей Своих. 17 И изыде слово сие по всей Иудеи о Нем, и по всей стране. 18 И возвестиша Иоанну ученицы его о всех сих. 19 И призвав два некая от ученик своих Иоанн, посла ко Иисусу, глаголя: Ты ли еси Грядый, или иного чаем? 20 Пришедша же к Нему мужа, реста: Иоанн Креститель посла нас к Тебе, глаголя: Ты ли еси Грядый, или иного чаем, 21 в Той же час изцели многи от недуг и ран и дух злых и многим слепым дарова прозрение. 22 И отвещав Иисус рече има: шедша возвестита Иоанну, яже видеста и слышаста: яко слепии прозирают, хромии ходят, прокаженнии очищаются, глушии слышат, мертвии встают, нищии благовествуют: 23 и блажен есть, иже аще не соблазнится о Мне. 24 Отшедшема же ученикома Иоанновома, начат глаголати к народом о Иоанне: чесо изыдoste в пустыню видети, трость ли ветром колеблему? 25 Но чесо изыдoste видети? Человека ли в мяжки ризы одеяна? Се, иже во одежди славней и пищи сущии, во царствии суть. 26 Но чесо изыдoste видети? Пророка ли? Ей, глаголю вам, и лишше пророка. 27 Сей (бо) есть, о немже писано есть: се, Аз пошлю Ангела Моего пред лицом Твоим, иже устроит путь Твой пред Тобою. 28 Глаголю бо вам: болий в рожденных женами пророка Иоанна Крестителя никтоже есть: мний же во Царствии Божии болий его есть. 29 И вси людие слышавше и мытарие оправдиша Бога, крещшеса крещением Иоанновым: 30 фарисее же и законницы совет Божий отвергоша о себе, не крещшеса от него. 31 Рече же Господь: кому убо уподоблю человеки рода сего, и кому суть подобни? 32 Подобни суть отрочищем сидящим на торжищих, и приглашающим друг друга, и глаголющим: пискахом вам, и не плясасте: рыдахом вам,



и не плакасте. 33 Прииде бо Иоанн Креститель ни хлеба ядый, ни вина пия, и глаголет: беса иматъ. 34 Прииде Сын Человеческий ядый и пия, и глаголет: сей человек ядца и винопийца, друг мытарем и грешником. 35 И оправдися премудрость от чад своих всех. 36 Моляше же Его некий от фарисей, дабы ял с ним: и вшед в дом фарисеов, возлеже. 37 И се, жена во граде, яже бе грешница, и уведевши, яко возлежит во храмине фарисеове, принесши алавастр мира, 38 и ставши при ногу Его созади, плачущися, начат умывати нозе Его слезами, и власы главы своея отираше, и облобызаше нозе Его, и мазаше миром. 39 Видев же фарисей воззавый Его, рече в себе, глаголя: Сей аще бы был пророк, ведел бы, кто и какова жена прикасается Ему: яко грешница есть. 40 И отвещав Иисус рече к нему: Симоне, имам ти нечто рещи. Он же рече: Учителю, рцы. 41 Иисус же рече: два должника беста заимодавцу некоему: един бе должен пятиюсот динарий, другой же пятиюдесят: 42 не имущема же има воздати, обема отда. Который убо ея, рцы, паче возлюбит его? 43 Отвещав же Симон рече: мною, яко емуже вяцше отда. Он же рече ему: право судил еси. 44 И обращься к жене, Симонову рече: видиши ли сию жену? Внидох в дом твой, воды на нозе Мои не дал еси: сия же слезами облия Ми нозе и власы главы своея отре. 45 Лобзания Ми не дал еси: сия же, отнелиже внидох, не преста облобызаючи Ми нозе. 46 Маслом главы Моея не помазал еси: сия же миром помаза Ми нозе. 47 Егоже ради, глаголю ти, отпускаются греси ея мнози, яко возлюби много: а емуже мало оставляется, менше любит. 48 Рече же ей: отпускаются тебе греси. 49 И начаша возлежащи с Нем

глаголати в себе: кто Сей есть, иже и грехи отпускает? 50  
Рече же к жене: вера твоя спасе тя: иди в мире.

**8** И бысть посем, и Той проходилаше сквозе грады и веси, проповедуя и благовествуя Царствие Божие: и обанадесяте с Ним, 2 и жены некия, яже бяху изцелены от духов злых и недуг: Мариа нарицаемая Магдалина, из неяже бесов седмь изыде, 3 и Иоанна жена Хузаня, приставника Иродова, и Сусанна, и ины многи, яже служаху Ему от имений своих. 4 Разумевающу же народу многу, и от всех градов грядущым к Нему, рече притчу: 5 изыде сеяй сеяти семене своего: и егда сеяше, ово паде при пути, и попрано бысть, и птицы небесныя позобаша е: 6 а другое паде на камени, и прозяб усше, зане не имеяше влаги: 7 и другое паде посреде терния, и в возрасте терние, и подави е: 8 другое же паде на земли блазе, и прозяб сотвори плод сторицею. Сия глаголя, возгласи: имеяй уши слышати, да слышит. 9 Вопрошаху же Его ученицы Его, глаголюще: что есть притча сия? 10 Он же рече: вам есть дано ведати тайны Царствия Божия, прочым же в притчах, да видяще не видят и слышаще не разумеют. 11 Есть же сия притча: семя есть слово Божие: 12 а иже при пути, суть слышашии, потом (же) приходит диавол и вземлет слово от сердца их, да не веровавше спасутся: 13 а иже на камени, иже егда услышат, с радостию приемлют слово: и сии корене не имут, иже во время веруют, и во время напасти отпадают: 14 а еже в тернии падшее, сии суть слышавшии, и от печали и богатства и сластьми житейскими ходяще подавляются, и не совершают плода: 15 а иже на добрей земли, сии суть, иже добрым сердцем и благим слышавше слово, держат и плод творят в терпении.

Сия глаголя, возгласи: имеяй уши слышати, да слышит. 16 Никтоже (убо) светилника вжег, покрывает его сосудом, или под одр подлагает: но на свещник возлагает, да входящии видят свет. 17 Несть бо тайно, еже не явлено будет: ниже утаено, еже не познается и в явление приидет. 18 Блюдитесь убо, како слышите: иже бо имать, дастся ему: и иже аще не имать, и еже мнится имея, возмется от него. 19 Приидоша же к Нему Мати и братия Его, и не можаху беседовати к Нему народа ради. 20 И возвестиша Ему, глаголюще: Мати Твоя и братия Твоя вне стоят, видети Тя хотяще. 21 Он же отвещав рече к ним: мати Моя и братия Моя сии суть, слышасии слово Божие, и творящии е. 22 И бысть во един от дний, Той влезе в корабль и ученицы Его: и рече к ним: преидем на он пол езера. И поидоша. 23 Идуцым же им, успе. И сниде буря ветреная в езеро, и скончавохуся и в беде беху. 24 И приступльше воздвигоша Его, глаголюще: Наставниче, Наставниче, погибаем. Он же востав запрети ветру и волнению водному: и улегоста, и бысть тишина. 25 Рече же им: где есть вера ваша? Убоявшися же чудишася, глаголюще друг ко другу: кто убо Сей есть, яко и ветром повелевает и воде, и послушают Его? 26 И преидоша во страну Гадаринску, яже есть об он пол Галилеи. 27 Изшедшу же Ему на землю, срете Его муж некий от града, иже имяше бесы от лет многих, и в ризу не облачашеся, и во храме не живяше, но во гробех. 28 Узрев же Иисуса и возопив, припаде к Нему, и гласом велиим рече: что мне и Тебе, Иисусе Сыне Бога Вышняго? Молюся Ти, не мучи мене. 29 Повеле бо духови нечистому изыти от человека: от многих бо лет восхищаше его: и вязаху его узы (железны) и путы,

стрегуща его: и растерзая узы, гонимъ бываше бесом сквозе пустыни. 30 Вопросы же его Иисус, глаголя: что ти есть имя? Он же рече: легеон: яко беси мнози внидоша в оны. 31 И моляху Его, да не повелит им в бездну ити. (Abyssos g12) 32 Бе же ту стадо свиний много пасомо в горе: и моляху Его, да повелит им в ты внити. И повеле им. 33 Изшедше же беси от человека, внидоша во свиния: и устремися стадо по берегу в озеро, и истопе. 34 Видевше же пасущии бывшее, бежаша, и возвестиша во граде и в селех. 35 Изыдоша же видети бывшее: и приидоша ко Иисусови и обретоша человека седяща, из негоже беси изыдоша, оболчена и смысляща, при ногу Иисусову: и убояшася. 36 Возвестиша же им видевшии, како спасесе бесновавыйся. 37 И моли Его весь народ страны Гадаринския отити от них, яко страхом велиим одержими беху. Он же влез в корабль, возвратися. 38 Моляшася же Ему муж, из негоже изыдоша беси, дабы с Ним был. Отпусти же его Иисус, глаголя: 39 возвратися в дом твой и поведай, елика ти сотвори Бог. И иде, по всему граду проповедая, елика сотвори ему Иисус. 40 Бысть же егда возвратися Иисус, прият Его народ: беху бо вси чающе Его. 41 И се, прииде муж, емуже имя Иаир, и той князь сонмищу бе: и пад при ногу Иисусову, моляше Его внити в дом свой: 42 яко дщи единокровна бе ему, яко лет двоюнадесяте, и та умираше. Егда же идяше, народи угнетаху Его. 43 И жена сущи в точении крове от двоюнадесяте лету, яже врачом издавши все имение, (и) не возможе ни от единого изцелети: 44 (и) приступльши созади, коснуся края риз Его: и абие ста ток крове ея. 45 И рече Иисус: кто есть коснувыйся Мне? Отметающымся же всем, рече Петр и иже с Ним:

Наставниче, народи одержат Тя и гнетут, и глаголеши: кто есть коснувшийся Мне? 46 Иисус же рече: прикоснуся Мне некто: аз бо чух силу изшедшую из Мене. 47 Видевши же жена, яко не утаися, трепещущи прииде, и падши пред Ним, еяже ради вины прикоснуся Ему, поведя Ему пред всеми людьми, и яко изцеле абие. 48 Он же рече ей: дерзай дщи, вера твоя спасе тя: иди в мире. 49 Еще Ему глаголющу, прииде некий от архисинагога, глаголя ему, яко умре дщи твоя: не движи Учителя. 50 Иисус же слышав отвеща ему, глаголя: не бойся, токмо веруй, и спасена будет. 51 Пришед же в дом, не остави ни единого внити, токмо Петра и Иоанна и Иакова, и отца отроковицы, и матери. 52 Плакахуся же вси и рыдаху ея. Он же рече: не плачитесь: не умре (бо), но спит. 53 И ругахуся Ему, ведяще, яко умре. 54 Он же изгнав вон всех, и емь за руку ея, возгласи, глаголя: отроковице, востани. 55 И возвратися дух ея, и воскресе абие: и повеле дати ей ясти. 56 И дивистася родителя ея. Он же повеле имати комуже поведати бывшего.

**9** Созвав же обанадесяте, даде им силу и власть на вся бесы, и недуги целити: 2 и посла их проповедати Царствие Божие и изцелити болящия. 3 И рече к ним: ничесоже возьмите на путь: ни жезла, ни пиры, ни хлеба, ни сребра, ни по двема ризама имети: 4 и в оньже дом внидете, ту пребывайте, и оттуду исходите: 5 и елицы аще не приемлют вас, исходяще от града того, и прах от ног ваших оттрясите, во свидетелство на ня. 6 Исходяще же прохождаху сквозе веси, благовествующе и изцеляюще всюду. 7 Слыша же Ирод четвертовластник бывающая от Него вся и недоумевашеся: зане глаголемо бе от неких, яко Иоанн воста от мертвых: 8

от инех же, яко Илия явися: от других же, яко пророк един от древних воскрес. 9 И рече Ирод: Иоанна аз усекнух: кто же есть Сей, о Немже аз слышу таковая? И искаше видети Его. 10 И возвращшеся Апостоли поведаша Ему, елика сотвориша: и поимь их, отиде един на место пусто града, нарицаемаго Вифсаида. 11 Народи же разумевше, по Нем идоша: и приемь их, глаголаше им о Царствии Божии и требующыя изцеления целяше. 12 День же начат прекланятися. Приступльше же обанадесяте рекоша Ему: отпусти народ, да шедше во окрестныя веси и села витают и обрящут брашно: яко zde в пусте месте есмы. 13 Рече же к ним: дадите им вы ясти. Они же реша: несть у нас вящше, токмо пять хлеб и рыбе две, аще убо не шедше мы купим во вся люди сия брашна. 14 Беху бо мужей яко пять тысяч. Рече же ко учеником Своим: посадите их на купы по пятидесят. 15 И сотвориша тако, и посадиша их вся. 16 Приим же пять хлеб и обе рыбе, воззрев на небо, благослови их, и преломи, и даяше учеником, предложити народу. 17 И ядоша, и насытишася вси: и взяша избывшыя им укрузи коша дванадесяте. 18 И бысть егда моляшеся един, с Ним беху ученицы: и вопроси их, глаголя: кого Мя глаголют народи быти? 19 Они же отвещавше реша: Иоанна Крестителя: нии же Илию: друзии же, яко пророк некий от древних воскрес. 20 Рече же им: вы же кого Мя глаголете быти? Отвещав же Петр рече: Христа Божия. 21 Он же запрещь им, повеле ни комуже глаголати сего, 22 рек, яко подобает Сыну Человеческому много пострадати, и искушену быти от старец и архиерей и книжник, и убиену быти, и в третий день востати. 23 Глаголаше же ко всем: аще кто

хочет по Мне ити, да отвержется себе, и возмет крест свой, и последует Ми. 24 Иже бо аще хочет душу свою спасти, погубит ю: а иже погубит душу свою Мене ради, сей спасет ю. 25 Что бо пользы иматъ человек, приобрет мир весь, себе же погубив или отщетив? 26 Иже бо аще постыдится Мене и Моих словес, сего Сын Человеческий постыдится, егда придет во славе Своей и Отчей и святых Ангел. 27 Глаголю же вам воистинну: суть нецыи от zde стоящих, иже не имут вкусити смерти, дондеже видят Царствие Божие. 28 Бысть же по словесех сих яко дний осмь, и поемь Петра и Иоанна и Иакова, взыде на гору помолитися. 29 И бысть егда моляшеся, видение лица Его ино, и одеяние Его бело блистаяся. 30 И се, мужа два с Ним глаголюща, яже беста Моисей и Илия, 31 явльшася во славе, глаголаста же исход Его, егоже хотяше скончати во Иерусалиме. 32 Петр же и сущии с ним бяху отягчени сном: убуждшеся же видеша славу Его, и оба мужа стояща с Ним. 33 И бысть егда разлучистася от Него, рече Петр ко Иисусу: Наставниче, добро есть нам zde быти: и сотворим сени три, едину Тебе, и едину Моисеови, и едину Илии: не ведый, еже глаголаше. 34 Се же ему глаголющу, бысть облак, и осени их: убояшася же, вшедше во облак. 35 И глас бысть из облака, глаголя: Сей есть Сын Мой Возлюбленный, Того послушайте. 36 И егда бысть глас, обретеся Иисус един. И тии умолчаша, и ни комуже возвестиша в тыя дни ничесоже от тех, яже видеша. 37 Бысть же в прочий день, сшедшым им с горы, сrete Его народ мног. 38 И се, муж из народа возопи, глаголя: Учителю, молются, призри на сына моего, яко единокроден ми есть: 39 и се дух емлет его, и внезапно вопиет, и пружается с пенами,

и едва отходит от него, сокрушая его: 40 и молихся учеником Твоим, да ижденут его: и не возмогоша. 41 Отвещав же Иисус рече: о, роде неверный и развращенный, доколе буду в вас и терплю вы? Приведи (Ми) сына твоего семо. 42 Еще же грядущу ему, поверже его бес и стрясе. Запрети же Иисус духови нечистому, и изцели отрока, и вдаде его отцу его. 43 Дивляхуся же вси о величии Божии. Всем же чюдящымся о всех, яже творяше Иисус, рече ко учеником Своим: 44 вложите вы во уши ваши словеса сия: Сын бо Человеческий имать предатися в руке человечесте. 45 Они же не разумеша глаголгола сего, бе бо прикровен от них, да не ощутят его: и бояхуся вопрошити Его о глаголголе сем. 46 Вниде же помышление в них, кто их вящший бы был. 47 Иисус же ведый помышление сердец их, приемь отроча, постави е у Себе 48 и рече им: иже аще приимет сие отроча во имя Мое, Мене приемлет: и иже аще Мене приемлет, приемлет Пославшаго Мя: иже бо меньший есть в вас, сей есть велик. 49 Отвещав же Иоанн рече: Наставниче, видехом некоего о имени Твоем изгоняща бесы: и возбранихом ему, яко вслед не ходит с нами. 50 И рече к нему Иисус: не браните: иже бо несть на вы, по вас есть. 51 Бысть же егда скончавахуся дние восхождению Его, и Той утверди лице Свое ити во Иерусалим: 52 и посла вестники пред лицем Своим: и изшедше внидоша в весь Самарянску, яко да уготовят Ему: 53 и не прияша Его, яко лице Его бе грядущее во Иерусалим. 54 Видевша же ученика Его Иаков и Иоанн, реста: Господи, хочеши ли, речема, да огонь снидет с небесе и потребит их, якоже и Илиа сотвори? 55 Обращься же запрети има, и рече: не веста, коего духа еста вы: 56 Сын



бо Человеческий не прииде душ человеческих погубити, но спасти. И идоша во ину весь. 57 Бысть же идущим им по пути, рече некий к Нему: иду по Тебе, аможе аще идеши, Господи. 58 И рече ему Иисус: лиси язвины имут, и птицы небесныя гнезда: Сын же Человеческий не имать где главу подклонити. 59 Рече же ко другому: ходи вслед Мене. Он же рече: Господи, повели ми, да шед прежде погребу отца моего. 60 Рече же ему Иисус: остави мертвыя погребсти своя мертвецы: ты же шед возвещай Царствие Божие. 61 Рече же и другой: иду по Тебе, Господи: прежде же повели ми отвещатися, иже суть в дому моем. 62 Рече же к нему Иисус: никтоже возложь руку свою на рало и зря вспять, управлен есть в Царствии Божии.

**10** По сих же яви Господь и инех седьмдесят, и посла их по двема пред лицем Своим во всяк град и место, аможе хотяше Сам ити: 2 глаголаше же к ним: жатва убо многа, делателей же мало: молитесь убо Господину жатве, да изведет делатели на жатву Свою. 3 Идите: се Аз посылаю вы яко агнцы посреде волков. 4 Не носите влагалища, ни пиры, ни сапог: и ни когоже на пути целуйте. 5 В оньже аще дом внидете, первее глаголите: мир дому сему: 6 и аще убо будет ту сын мира, почиет на нем мир ваш: аще ли же ни, к вам возвратится: 7 в том же дому пребывайте, ядуще и пиюще, яже суть у них: достоин бо есть делатель мзды своея. Не переходите из дому в дом. 8 И в оньже аще град входите, и приемлют вы, ядите предлагаемая вам: 9 и изцелите недужныя, иже суть в нем, и глаголите им: приближися на вы Царствие Божие. 10 И в оньже аще град входите, и не приемлют вас, изшедше на распутия его, рцыте: 11 и прах,

прилепшии нам от града вашего, оттрясаем вам. Обаче сие ведите, яко приближися на вы Царствие Божие: **12** глаголю вам, яко Содомляном в день той отраднее будет, неже граду тому. **13** Горе тебе, Хоразине, горе тебе, Вифсаидо: яко аще в Тире и Сидоне быша силы были бывшыя в ваю, древле убо во вретиси и пепеле сидяще покаялися быша: **14** обаче Тиру и Сидону отраднее будет на суде, неже вама. **15** И ты, Капернауме, иже до небес вознесыйся, до ада низведешися. **(Hadēs 986)** **16** Слушай вас, Мене слушает: и отменяйся вас, Мене отменяется: отменяйся же Мене, отменяется Пославшаго Мя. **17** Возвратишася же семьдесят с радостию, глаголюще: Господи, и беси повинуются нам о имени Твоем. **18** Рече же им: видех сатану яко молнию с небесе спадша. **19** Се, даю вам власть наступати на змию и на скорпию и на всю силу вражию: и ничесоже вас вредит: **20** обаче о сем не радуйтесь, яко души вам повинуются: радуйтесь же, яко имена ваша написана суть на небесех. **21** В той час возрадовася духом Иисус и рече: исповедаются, Отче, Господи небесе и земли, яко утаил еси сия от премудрых и разумных, и открыл еси та младенцем: ей, Отче, яко тако бысть благоволение пред Тобою. **22** И обращься ко учеником, рече: вся Мне предана быша от Отца Моего: и никтоже весть, кто есть Сын, токмо Отец: и кто есть Отец, токмо Сын, и емуже аще хочет Сын открыти. **23** И обращься ко учеником, един рече: блажени очи видящии, яже видите: **24** глаголю бо вам, яко мнози пророцы и царие восхотеша видети, яже вы видите, и не видеша: и слышати, яже слышите, и не слышаша. **25** И се, законник некий воста, искушая Его и глаголя: Учителю,

что сотворив, живот вечный наследую? (aiōnios g166) 26 Он же рече к нему: в законе что писано есть? Како чтеши? 27 Он же отвещав рече: возлюбиши Господа Бога твоего от всего сердца твоего, и от всея души твоя, и всею крепостию твоею, и всем помышлением твоим: и ближняго своего яко сам себе. 28 Рече же ему: право отвещал еси: сие сотвори, и жив будеши. 29 Он же хотя оправдится сам, рече ко Иисусу: и кто есть ближний мой? 30 Отвещав же Иисус рече: человек некий сходяше от Иерусалима во Иерихон, и в разбойники впаде, иже совлекше его, и язвы возложше отидоша, оставльше едва жива суца. 31 По случаю же священник некий сходяше путем тем, и видев его, мимоиде. 32 Также же и левит, быв на том месте, пришед и видев, мимоиде. 33 Самарянин же некто грядый, прииде над него, и видев его, милосердова: 34 и приступль обвяза струпы его, возливая масло и вино: всадив же его на свой скот, приведе его в гостинницу и прилежа ему: 35 и наутрия изшед, иземь два сребреника, даде гостиннику и рече ему: прилежи ему: и еже аще приидивеши, аз егда возвращуся, воздам ти. 36 Кто убо от тех триех ближний мниттися быти впадшему в разбойники? 37 Он же рече: сотворивый милость с ним. Рече же ему Иисус: иди, и ты твори также. 38 Бысть же ходящым им, и Сам вниде в весь некую: жена же некая именем Марфа прият Его в дом свой: 39 и сестра ей бе нарицаемая Мариа, яже и седши при ногу Иисусову, слышаше слово Его. 40 Марфа же молвяше о мнозе службе, ставши же рече: Господи, не брежеш ли, яко сестра моя едину мя остави послужити? Рцы убо ей, да ми поможет. 41 Отвещав же Иисус рече ей: Марфо, Марфо, печешися и

молвиши о мнозе, 42 едино же есть на потребу. Мариа же благою часть избра, яже не отимется от нея.

**11** И бысть внегда быти Ему на месте некоем молящуся, (и) яко преста, рече некий от ученик Его к Нему: Господи, научи ны молитися, якоже и Иоанн научи ученики своя. 2 Рече же им: егда молитесь, глаголите: Отче наш, иже на небесех, да святится имя Твое: да приидет Царствие Твое: да будет воля Твоя, яко на небеси, и на земли: 3 хлеб наш насущный подавай нам на всяк день: 4 и остави нам грехи наша, ибо и сами оставляем всякому должнику нашему: и не введи нас во искушение, но избави нас от лукаваго. 5 И рече к ним: кто от вас имать друга, и идет к нему в полунощи, и речет ему: друже, даждь ми взаим три хлебы: 6 понеже друг прииде с пути ко мне, и не имам чесо предложитьи ему. 7 И той извнурь отвещав речет: не твори ми труды: уже двери затворены суть, и дети моя со мною на ложи суть: (и) не могу востав дати тебе. 8 Глаголю же вам: аще и не даст ему востав, зане друг ему есть: но за безочьство его, востав даст ему, елика требует. 9 И Аз вам глаголю: просите, и дастся вам: ищите, и обрящете: толцйте, и отверзется вам: 10 всяк бо просяй приемлет, и ищяй обретает, и толкущему отверзется. 11 Котораго же вас отца воспросит сын хлеба, еда камень подаст ему? Или рыбы, еда в рыбы место змию подаст ему? 12 Или аще попросит яйца, еда подаст ему скорпию? 13 Аще убо вы зли суще, умеете даяния блага даяти чадом вашым, кольми паче Отец, иже с небесе, даст Духа Святаго просящим у Него? 14 И бе изгоня беса, и той бе нем: бысть же бесу изшедшу, проглагола немый: и дивишася народи. 15 Нецыи же от них реша: о веельзевуле князи бесовстем

изгонит бесы. 16 Друзии же искушающе, знамения от Него  
искаху с небесе. 17 Он же ведый помышления их, рече им:  
всяко царство само в себе разделяся, запустеет: и дом  
на дом, падает. 18 Аще же и сатана сам в себе разделися,  
како станет царство его, якоже глаголете, о веельзевуле  
изгоняща Мя бесы. 19 Аще же Аз о веельзевуле изгоню  
бесы, сынове ваши о ком изгонят? Сего ради тии будут  
вам судии. 20 Аще ли же о персте Божии изгоню бесы, убо  
постиже на вас Царствие Божие. 21 Егда крепкий вооружився  
хранит свой двор, во смирении суть имения его: 22 егда  
же креплей его нашед победит его, все оружие его возмет,  
на неже уповаше, и корысть его раздает. 23 Иже несть со  
Мною, на Мя есть: и иже не собирает со Мною, расточает.  
24 Егда (же) нечистый дух изыдет от человека, преходит  
сквозе безводная места, ища покоя: и не обретая, глаголет:  
возвращуся в дом мой, отнюдуже изыдох. 25 И пришед  
обрящет и пометен и украшен: 26 тогда идет и поймет семь  
других духов горших себе, и вшедше живут ту: и бывают  
последняя человеку тому горша первых. 27 Бысть же егда  
глаголаше сия, воздвигши некая жена глас от народа, рече  
Ему: блажено чрево носившее Тя, и сосца, яже еси ссал. 28  
Он же рече: темже убо блажени слышавшии слово Божие и  
хранящи е. 29 Народом же собирающимся начат глаголати:  
род сей лукав есть: знамения ищет, и знамение не дастся  
ему, токмо знамение Ионы пророка: 30 якоже бо бысть  
Иона знамение Ниневитом, тако будет и Сын Человеческий  
роду сему. 31 Царица южская встанет на суд с мужи рода  
сего, и осудит их: яко прииде от конец земли слышати  
премудрость Соломонову: и се множае Соломона zde. 32

Мужие Ниневитстии востанут на суд с родом сим и осудят и:  
яко покаяшася проповедию Иониною: и се, множае Ионы  
зде. **33** Никтоже (убо) светилника вжег, в скрове полагает, ни  
под спудом, но на свещнице, да входящий свет видят. **34**  
Светилник телу есть око: егда убо око твое просто будет, все  
тело твое светло будет: егда же лукаво будет, и тело твое  
темно: **35** блюди убо, еда свет, иже в тебе, тма есть. **36** Аще  
бо тело твое все светло, не имый некия части темны, будет  
светло все, якоже егда светилник блистанием прсвещает  
тя. **37** Егда же глаголаше, моляше Его фарисей некий, да  
обедует у него: вшед же возлеже. **38** Фарисей же виде  
дивися, яко не прежде крестися прежде обеда. **39** Рече же  
Господь к нему: ныне вы, фарисее, внешняя сткляницы и  
блюда очищаете, внутреннее же ваше полно грабления есть  
и лукавства. **40** Безумнии, не Иже ли сотвори внешнее,  
и внутреннее сотворил есть? **41** Обаче от сущих дадите  
милостыню: и се, вся чиста вам будут. **42** Но горе вам  
фарисеом, яко одесятствуете от мятвы и пигана и всякаго  
зелия, и мимоходите суд и любовь Божию: сия подобаше  
сотворити, и онех не оставляти. **43** Горе вам фарисеом, яко  
любите председания на сонмищих и целования на торжищих.  
**44** Горе вам, книжницы и фарисее, лицемери, яко есте яко  
гробы неведомы, и человецы ходящий верху не ведут. **45**  
Отвещав же некий от законник рече Ему: Учителю, сия  
глаголя и нам досаждаеши. **46** Он же рече: и вам законником  
горе, яко накладаете на человеки бремена не удобь носима,  
и сами едином перстом вашим не прикасаетея бременем.  
**47** Горе вам, яко зиждете гробы пророк, отцы же ваши избиша  
их: **48** убо свидетелствуете и соблаговолите делом отец

ваших: яко тии убо избиша их, вы же зиждете их гробы. **49**  
Сего ради и премудрость Божия рече: пошлю в них пророки и  
Апостолы, и от них убьют и изженут: **50** да взыщется кровь  
всех пророк, проливаемая от сложения мира, от рода сего,  
**51** от крове Авеля даже до крове Захарии, погибшаго между  
олтарем и храмом: ей, глаголю вам, взыщется от рода сего.  
**52** Горе вам законником, яко возьмете ключь разумения: сами  
не внидоште, и входящим возбраните. **53** Глаголющу же  
Ему сия к ним, начаша книжницы и фарисее бедне гневаться  
Нань и престати Его о мнозе, **54** лающе Его, ищуще уловити  
нечто от уст Его, да Нань возглаголют.

**12** О нихже собравшымся тмам народа, яко попирати друг  
друга, начат глаголати учеником Своим первее: внемлите  
себе от кваса фарисейска, еже есть лицемерие. **2** Ничтоже  
бо покровено есть, еже не открыется, и тайно, еже не  
уразумеется: **3** зане, елика во тме ресте, во свете услышатся:  
и еже ко уху глаголасте во храмах, проповестся на кровех. **4**  
Глаголю же вам другом Своим: не убойтесь от убивающих  
тело и потом не могущих лишше что сотворити: **5** сказую же  
вам, кого убойтесь: убойтесь имущаго власть по убиении  
воврещи в дебрь огненную: ей, глаголю вам, того убойтесь.  
(Geenna g1067) **6** Не пять ли птиц ценится пенязема двема? И  
ни едина от них несть забвена пред Богом. **7** Но и власи  
главы вашей вси изочтени суть. Не убойтесь убо: мнозех птиц  
унши есте вы. **8** Глаголю же вам: всяк, иже аще исповесть  
Мя пред человеки, и Сын Человеческий исповесть его  
пред Ангелы Божиими: **9** а отвергийся Мене пред человеки  
отвержен будет пред Ангелы Божиими. **10** И всяк иже речет  
слово на Сына Человеческаго, оставится ему: а на Святаго

Духа хулившему не оставится. 11 Егда же приведут вы на соборища и власти и владычества, не пецьтесе, како или что отвещаете, или что речете: 12 Святый бо Дух научит вы в той час, яже подобает рещи. 13 Рече же Ему некий от народа: Учителю, рцы брату моему разделить со мною достояние. 14 Он же рече ему: человек, кто Мя постави судию или делителя над вами? 15 Рече же к ним: блюдите и хранитесь от лихоимства: яко не от избытка кому живот его есть от имени его. 16 Рече же притчу к ним, глаголя: человеку некоему богату угобзися нива: 17 и мысляше в себе, глаголя: что сотворю, яко не имам где собрати плодов моих? 18 И рече: се сотворю: разорю житницы моя, и болшыя созижду, и соберу ту вся жита моя и благая моя: 19 и реку души моей: душе, имаши многа блага, лежаща на лета многа: почивай, яждь, пей, веселися. 20 Рече же ему Бог: безумне, в сию ночь душу твою истяжут от тебе: а яже уготовал еси, кому будут? 21 Тако собираяй себе, а не в Бога богатея. 22 Рече же ко учеником Своим: сего ради глаголю вам: не пецьтесе душею вашею, что ясте: ни телом, во что облечетесе: 23 душа болши есть пици, и тело одежды. 24 Смотрите вран, яко не сеют, ни жнут: имже несть сокровища, ни житницы, и Бог питает их: кольми паче вы есте лучши птиц? 25 Кто же от вас пекийся может приложити возрасту своему лакоть един? 26 Аще убо ни мала чесо можете, что о прочих печетесе? 27 Смотрите крины, како растут: не труждаются, ни прядут: глаголю же вам, яко ни Соломон во всей славе своей облечесе, яко един от сих. 28 Аще же траву, на селе днесь сушу и утре в пещь вмещему, Бог тако одевает: кольми паче вас, маловери? 29 И вы не ищите, что ясте, или что



пие: и не возноситеся: 30 всех бо сих языцы мира сего ищут: ваш же Отец вестъ, яко требуете сих: 31 обаче ищите Царствия Божия, и сия вся приложатся вам. 32 Не бойся, малое стадо: яко благоизволи Отец ваш дати вам Царство. 33 Продадите имения ваша и дадите милостыню. Сотворите себе влагалища неветшающа, сокровище неоскудеемо на небесех, идеже тать не приближается, ни моль растлеваает. 34 Идеже бо сокровище ваше, ту и сердце ваше будет. 35 Да будут чресла ваша препоясана, и светилницы горящи: 36 и вы подобни человеком чающим господа своего, когда возвратится от брака, да пришедшу и толкнувшу, абие отверзут ему. 37 Блажени раби тии, ихже пришед господь обрящет бдящих: аминь глаголю вам, яко препояшется и посадит их, и минув послужит им. 38 И аще приидет во вторую стражу, и в третью стражу приидет, и обрящет (их) тако, блажени суть раби тии. 39 Се же ведите, яко аще бы ведал господин храмины, в кий час тать приидет, бдел убо бы, и не бы дал подкопати дому своего: 40 и вы убо будите готови: яко, в онъже час не мните, Сын Человеческий приидет. 41 Рече же Ему Петр: Господи, к нам ли притчу сию глаголеши, или ко всем? 42 Рече же Господь: кто убо есть верный строитель и мудрый, егоже поставит господь над челядию своею, даяти во время житомерие? 43 Блажен раб той, егоже пришед господь его обрящет творяща тако: 44 воистинну глаголю вам, яко над всем имением своим поставит его. 45 Аще же речет раб той в сердцы своем: коснит господин мой приити: и начнет бити рабы и рабыни, ясти же и пити и упиватися: 46 приидет господин раба того в день, в онъже не чаает, и в час, в онъже не вестъ:

и растешет его, и часть его с неверными положит. 47 Той же раб ведевый волю господина своего, и не угодовав, ни сотворив по воли его, биен будет много: 48 неведевый же, сотворив же достойная ранами, биен будет мало. Всякому же, ему же дано будет много, много взыщется от него: и ему же предаша множайше, множайше просят от него. 49 Огня приидох воврещи на землю, и что хочу, аще уже возгореся? 50 Крещением же имам креститися, и како удержуся, дондеже скончאותся? 51 Мните ли, яко мир приидох дати на землю? Ни, глаголю вам, но разделение: 52 будут бо отселе пять во едином дому разделени, трие на два, и два на три: 53 разделится отец на сына, и сын на отца: матери на дщерь, и дщи на матерь: свекры на невесту свою, и невеста на свекровь свою. 54 Глаголаше же и народом: егда узрите облак восходящъ от запада, абие глаголете: туча грядет: и бывает тако: 55 и егда юг веющъ, глаголете: зной будет: и бывает. 56 Лицемери, лице небу и земли весте искушати: време же сего како не искушаете? 57 Что же и о себе не судите праведное? 58 Егда бо грядеши с соперником твоим ко князю, на пути даждь делание избыти от него: да не како привлечет тебе к судии, и судия тя предаст слуге, и слуга всадит тя в темницу: 59 глаголю тебе: не изыдеши оттуду, дондеже и последнюю медницу воздаси.

**13** Приидоша же нецыи в то время, поведающе Ему о Галилеех, ихже кровь Пилат смеси с жертвами их. 2 И отвещав Иисус рече им: мните ли, яко Галилеане сии грешнейши паче всех Галилеан бяху, яко тако пострадаша? 3 Ни, глаголю вам: но аще не покается, вси такожде погибнете. 4 Или они осмьнадесяте, на нихже паде столп

Силоамский и поби их, мните ли, яко тии должнейши бяху паче всех живущих во Иерусалиме? 5 Ни, глаголю вам: но аще не покается, вси такожде погибнете. 6 Глаголаше же сию притчу: смоковницу имяше некий в винограде своем всаждену: и прииде ища плода на ней, и не обрете: 7 рече же к винареви: се, третье лето, отнелиже прихожду ища плода на смоковнице сей, и не обретаю: посецы ю (убо), вскую и землю упражняет? 8 Он же отвещав рече ему: господи, остави ю и се лето, дондеже окопаю окрест ея и осыплю гноем: 9 и аще убо сотворит плод: аще ли же ни, во грядущее посечеши ю. 10 Бяше же учя на едином от сонмищ в субботу: 11 и се, жена бе имущи дух недужен лет осмьнадесять, и бе сляка и не могуши восклонитися отнюд. 12 Видев же ю Иисус, пригласи и рече ей: жено, отпущена еси от недуга твоего. 13 И возложи на ню руце: и абие простресея и славляше Бога. 14 Отвещав же старейшина собору, негодуя, зане в субботу изцели (ю) Иисус, глаголаше народу: шесть дний есть, в няже достоит делати: в тыя убо приходяще целитесь, а не в день субботный. 15 Отвеща (же) убо ему Господь и рече: лицемере, кождо вас в субботу не отрешает ли своего вола или осла от яслий, и вед напаяет? 16 Сию же дщерь Авраамлю сущу, юже связа сатана, се, осмоенадесяте лето, не достояше ли разрешитися ей от юзы сея в день субботный? 17 И сия Ему глаголющу, стыдяхуся вси противляющиися Ему: и вси людие радовахуся о всех славных бывающих от Него. 18 Глаголаше же: кому подобно есть Царствие Божие? И кому уподоблю е? 19 Подобно есть зерну горушну, еже приемь человек вверже в вертоград свой: и возрасте, и бысть древо велие, и птицы небесныя

вселишася в ветвие его. 20 Паки рече: кому уподоблю Царствие Божие? 21 Подобно есть квасу, егоже приемши жена, скры в сатех триех муки, дондеже вскисе все. 22 И проходилаше сквозе грады и веси, учя и шествие творя во Иерусалим. 23 Рече же некий Ему: Господи, аще мало есть спасающихся? Он же рече к ним: 24 подвизайтесь внити сквозе тесная врата: яко мнози, глаголю вам, възыщут внити, и не возмогут. 25 Отнележе востанет дому владыка и затворит двери, и начнете вне стояти и ударяти в двери, глаголюще: Господи, Господи, отверзи нам. И отвецав речет вам: не вем вас, откуда есте. 26 Тогда начнете глаголати: ядохом пред Тобою и пихом, и на распутиих наших учил еси. 27 И речет: глаголю вам, не вем вас, откуда есте: отступите от Мене, вси делателие неправды. 28 Ту будет плачь и скрежет зубом, егда узрите Авраама и Исаака и Иакова и вся пророки во Царствии Божии, вас же изгонимых вон. 29 И приидут от восток и запад и севера и юга, и возлягут в Царствии Божии. 30 И се, суть последнии, иже будут перви, и суть первии, иже будут последни. 31 В той день приступиша нецыи от фарисей, глаголюще Ему: изыди и иди отсюда, яко Ирод хоцет Тя убити. 32 И рече им: шедше рцыте лису тому: се, изгоню бесы и изцеления творю днесь и утре, и в третий скончаюся: 33 обаче подобает Ми днесь и утре и в ближний ити: яко невозможно есть пророку погибнути кроме Иерусалима. 34 Иерусалиме, Иерусалиме, избивый пророки и камением побивая посланная к тебе, колькраты восхотех собрати чада твоя, якоже кокош гнездо свое под криле, и не восхотесте? 35 Се оставляется вам дом ваш пуст. Глаголю

же вам, яко не имате Мене видети, дондеже приидет, егда речете: благословен Грядый во имя Господне.

**14** И бысть егда внити Ему в дом некоего князя фарисейска в субботу хлеб ясти, и тии бяху назирающе Его: **2** и се, человек некий, имый водный труд, бе пред Ним. **3** И отвещав Иисус рече к законником и фарисеом, глаголя: аще достоин в субботу целити? **4** Они же умолчаша. И приемь изцели его, и отпусти. **5** И отвещав к ним рече: котораго от вас осел или вол в студенец впадет, и не абие ли исторгнет его в день субботный? **6** И не возмогоша отвещати Ему к сим. **7** Глаголаше же к званым притчу, обдержя, како председания избираху, глаголя к ним: **8** егда зван будеши ким на брак, не сяди на преднем месте: еда кто честнее тебе будет званных, **9** и пришед иже тебе звавый и онаго, речет ти: даждь сему место: и тогда начнеши со студом последнее место держати. **10** Но егда зван будеши, шед сяди на последнем месте, да егда приидет звавый тя, речет ти: друже, посяди выше: тогда будет ти слава пред званными с тобою: **11** яко всяк возносяйся смирится, и смиряяйся вознесется. **12** Глаголаше же и ко звавшему Его: егда сотвориши обед или вечерю, не зови друзей твоих, ни братии твоя, ни сродник твоих, ни сосед богатых: еда когда и тии ты такожде воззовут, и будет ти воздаяние. **13** Но егда твориши пир, зови нищия, маломощныя, хромыя, слепыя: **14** и блажен будеши, яко не имут ти что воздати: воздаст же ти ся в воскрешение праведных. **15** Слышав же некий от возлежащих с Ним сия, рече Ему: блажен, иже снесть обед в Царствии Божии. **16** Он же рече ему: человек некий сотвори вечерю велию и зва многи: **17** и посла раба своего в год вечера рещи

званным: грядите, яко уже готова суть вся. 18 И начаша вкупе отрицатися вси. Первый рече ему: село купих и имам нужду изыти и видети е: молютися, имей мя отречена. 19 И другой рече: супруг волов купих пять и гряду искусити их: молю тя, имей мя отречена. 20 И другой рече: жену поях и сего ради не могу приити. 21 И пришед раб той поведа господину своему сия. Тогда разгневався дому владыка, рече рабу своему: изыди скоро на распутья и стогны града, и нищыя и бедныя и слепыя и хромыя введи семо. 22 И рече раб: господи, бысть якоже повелел еси, и еще место есть. 23 И рече господин к рабу: изыди на пути и халуги, и убеди внити, да наполнится дом мой: 24 глаголю бо вам, яко ни един мужей тех званных вкусит моя вечера: мнози бо суть звани, мало же избранных. 25 Идяху же с Ним народи мнози: и обращься рече к ним: 26 аще кто грядет ко Мне, и не возненавидит отца своего и мать, и жену и чад, и братию и сестр, еще же и душу свою, не может Мой быти ученик: 27 и иже не носит креста своего и вслед Мене грядет, не может Мой быти ученик. 28 Кто бо от вас, хотяй столп создати, не прежде ли сед разчтет имение, аще имать, еже есть на совершение? 29 Да не, когда положит основание и не возможет совершити, вси видящии начнут ругатися ему, 30 глаголюще, яко сей человек начат здати и не може совершити? 31 Или кий царь идый ко иному царю снитися с ним на брань, не сед ли прежде совещаает, аще силен есть срести с десятию тысящ грядущаго со двемадесятма тысящама нань? 32 Аще ли же ни, еще далече ему сущу, моление послав молится о смирении. 33 Тако убо всяк от вас, иже не отречется всего своего имени, не может быти

Мой ученик. 34 Добро есть соль: аще же соль обуяет, чим осолится? 35 Ни в землю, ни в гной потребна есть: вон изсыплют ю. Имеяй уши слышати, да слышит.

**15** Бяху же приближающа к Нему вси мытари и грешници, послушати Его. 2 И роптаху фарисее и книжницы, глаголюще, яко Сей грешники приемлет и с ними яст. 3 Рече же к ним притчу сию, глаголя: 4 кий человек от вас имый сто овец, и погубль едину от них, не оставит ли девяносто и девяти в пустыни и идет вслед погибшия, дондеже обрящет ю? 5 И обрет возлагает на раме свои радуяся: 6 и пришед в дом, созывает други и соседы, глаголя им: радуйтеся со мною, яко обретох овцу мою погибшую. 7 Глаголю вам, яко тако радость будет на небеси о едином грешнице кающемся, нежели о девяносто и девяти праведник, иже не требуют покаяния. 8 Или кая жена имущи десять драхм, аще погубит драхму едину, не вжигает ли свечилника, и пометет храмину, и ищет прилежно, дондеже обрящет? 9 И обретши созывает другини и соседы, глаголющи: радуйтеся со мною, яко обретох драхму погибшую. 10 Тако, глаголю вам, радость бывает пред Ангелы Божиими о едином грешнице кающемся. 11 Рече же: человек некий име два сына: 12 и рече юнейший ею отцу: отче, даждь ми достойную часть имения. И раздели има имение. 13 И не по мнозех днех собрав все мний сын, отиде на страну далече, и ту расточи имение свое, живый блудно. 14 Изжившу же ему все, бысть глад крепок на стране той, и той начат лишатися: 15 и шед прилепися единому от житель тоя страны: и посла его на села своя пасти свиния: 16 и желаше насытити чрево свое от рожец, яже ядяху свиния: и никтоже даяше ему. 17 В себе же пришед, рече: колико

наемником отца моего избывают хлебы, аз же гладом гиблю?  
18 Востав иду ко отцу моему, и реку ему: отче, согреших на небо и пред тобою, 19 и уже несъм достоин нарещися сын твой: сотвори мя яко единого от наемник твоих. 20 И востав иде ко отцу своему. Еще же ему далече сущу, узре его отец его, и мил ему бысть, и тек нападе на выю его, и облобыза его. 21 Рече же ему сын: отче, согреших на небо и пред тобою, и уже несъм достоин нарещися сын твой. 22 Рече же отец к рабом своим: изнесите одежду первую и облецыте его, и дадите перстень на руку его и сапоги на нозе: 23 и приведше телец упитанный заколите, и ядше веселимся: 24 яко сын мой сей мертв бе, и оживе: и изгибл бе, и обретесе. И начаша веселитися. 25 Бе же сын его старей на селе: и яко грядый приближися к дому, слыша пение и лики: 26 и призвав единого от отрок, вопрошаше: что (убо) сия суть? 27 Он же рече ему, яко брат твой прииде: и закла отец твой телца упитанна, яко здрава его прият. 28 Разгневался же, и не хотяше внити. Отец же его изшед моляше его. 29 Он же отвещав рече отцу: се, толико лет работаю тебе и николиже заповеди твоя преступих, и мне николиже дал еси козляте, да со други своими возвеселился бых: 30 егда же сын твой сей, изядый твое имение с любодейцами, прииде, заклал еси ему телца питомаго. 31 Он же рече ему: чадо, ты всегда со мною еси, и вся моя твоя суть: 32 возвеселитижеся и возрадовати подобаше, яко брат твой сей мертв бе, и оживе: и изгибл бе, и обретесе.

**16** Глаголаше же ко учеником Своим: человек некий бе богат, иже имяше приставника: и той оклеветан бысть к нему, яко расточает имения его: 2 и пригласив его рече ему: что се



слышу о тебе? Воздаждь ответ о приставлении домовнем: не возможеши бо ктому дому строити. 3 Рече же в себе приставник дому: что сотворю, яко господь мой отемлет строение дому от мене? Копати не могу, просити стыжуся: 4 разумех, что сотворю, да егда отставлен буду от строения дому, примут мя в дома своя. 5 И призвав единого кождо от должник господина своего, глаголаше первому: колицем должен еси господину моему? 6 Он же рече: сто мер масла. И рече ему: прими писание твое, и сед скоро напиши пятьдесят. 7 Потом же рече другому: ты же колицем должен еси? Он же рече: сто мер пшеницы. И глагола ему: прими писание твое, и напиши осмьдесят. 8 И похвали господь дому строителя неправеднаго, яко мудре сотвори: яко сынове века сего мудрейши паче сынов света в роде своем суть. (aiōn g165) 9 И Аз вам глаголю: сотворите себе други от мамоны неправды, да, егда оскудеете, примут вы в вечныя кровы. (aiōnios g166) 10 Верный в мале, и во мнозе верен есть: и неправедный в мале, и во мнозе неправеден есть. 11 Аще убо в неправеднем имени верни не бысте, во истиннем кто вам веру имет? 12 И аще в чужем верни не бысте, ваше кто вам даст? 13 Ни кий же раб может двема господинома работати: ибо или единого возненавидит, а другаго возлюбит: или единого держится, о друзем же нерадети начнет: не можете Богу работати и мамоне. 14 Слышаху же сия вся и фарисее, сребролюбцы суще, ругахуся Ему. 15 И рече им: вы есте оправдающе себе пред человеки, Бог же весть сердца ваша: яко, еже есть в человецех высоко, мерзость есть пред Богом. 16 Закон и пророцы до Иоанна: оттоле Царствие Божие благовествуется, и всяк в не нудится. 17 Удобее же есть небу

и земли прейти, неже от закона единой черте погибнути.

**18** Всяк пушайя жену свою и приводя ину прелюбы деет: и женяйся пушеною от мужа прелюбы творит. **19** Человек же некий бе богат, и облачашеся в порфиру и виссон, веселяся на вся дни светло. **20** Нищъ же бе некто, именем Лазарь, иже лежаше пред враты его гноен **21** и желаше насытитися от крупиц падающих от трапезы богатаго: но и пси приходяще облизаху гной его. **22** Бысть же умрети нищему и несену быти Ангелы на лоно Авраамле: умре же и богатый, и погребоша его: **23** и во аде возвед очи свои, сый в муках, узре Авраама издалеча, и Лазаря на лоне его: **(Hadēs g86)** **24** и той возглашь рече: отче Аврааме, помилуй мя и послы Лазаря, да омочит конец перста своего в воде и устудит язык мой, яко стражду во пламени сем. **25** Рече же Авраам: чадо, помяни, яко восприял еси благая твоя в животе твоём, и Лазарь такожде злая: ныне же zde утешается, ты же страждеши: **26** и над всеми сими между нами и вами пропасть велика утвердися, яко да хотящии прейти отсюду к вам не возмогут, ни иже оттуду, к нам преходят. **27** Рече же: молю тя убо, отче, да послыши его в дом отца моего: **28** имам бо пять братий: яко да засвидетелствует им, да не и тии приидут на место сие мучения. **29** Глагола ему Авраам: имут Моисеа и пророки: да послушают их. **30** Он же рече: ни, отче Аврааме: но аще кто от мертвых идет к ним, покаются. **31** Рече же ему: аще Моисеа и пророков не послушают, и аще кто от мертвых воскреснет, не имут веры.

**17** Рече же ко учеником Своим: не возможно есть не приити соблазном, горе же, егоже ради приходят: **2** унее ему было бы, аще жернов оселский облежал бы о выи его, и ввержен в

море, неже да соблазнит от малых сих единаго. 3 Внемлите себе. Аще согрешит к тебе брат твой, запрети ему: и аще покается, остави ему: 4 и аще седмици на день согрешит к тебе и седмици на день обратится, глаголя: каюся: остави ему. 5 И рекоша Апостоли Господеви: приложи нам веру. 6 Рече же Господь: аще бысте имели веру яко зерно горушно, глаголали бысте убо ягодичине сей: восторгнися и всадися в море: и послушала бы вас. 7 Который же от вас раба имея орюща или пасуща, иже пришедшу ему с села речет: абие минув возлязи? 8 Но не речет ли ему: уготовай, что вечеряю, и препоясався служи ми, дондеже ям и пию: и потом яси и пиешы ты? 9 Еда имат хвалу рабу тому, яко сотвори повеленная? Не мню. 10 Тако и вы, егда сотворите вся повеленная вам, глаголите, яко раби неключими есмы: яко, еже должны бехом сотворити, сотворихом. 11 И бысть идущу Ему во Иерусалим, и той проходилаше между Самариею и Галилеею. 12 Входящу же Ему в некую весь, сретоша Его десять прокаженных мужей, иже сташа издалеча: 13 и тии вознесоша глас, глаголюще: Иисусе Наставниче, помилуй ны. 14 И видев рече им: шедше покажитесь священником. И бысть идущым им, очистишася. 15 Един же от них, видев, яко изцеле, возвратися, со гласом велиим славя Бога, 16 и паде ниц при ногу Его, хвалу Ему воздая: и той бе Самарянин. 17 Отвещав же Иисус рече: не десять ли очистишася? Да девять где? 18 Како не обретошася возвращшеся дати славу Богу, токмо иноплеменник сей? 19 И рече ему: востав иди: вера твоя спасе тя. 20 Вопрошен же быв от фарисей, когда приидет Царствие Божие, отвечав им рече: не приидет Царствие Божие с соблюдением: 21 ниже рекут: се zde, или:

онде. Се бо, Царствие Божие внутрь вас есть. 22 Рече же ко учеником (Своим): приидут дние, егда вожделеете единого дне Сына Человеческаго видети, и не узрите: 23 и рекут вам: се zde, или: се, онде: не изыдите, ни пожените: 24 яко бо молния блистающися от поднебесныя на поднебесней светится: тако будет Сын Человеческий в день Свой. 25 Прежде же подобает Ему много пострадати и искушену быти от рода сего. 26 И якоже бысть во дни Ноевы, тако будет и во дни Сына Человеческа: 27 ядяху, пияху, женяхуся, посягаху, до негоже дне вниде Ное в ковчег: и прииде потоп и погуби вся. 28 Такожде и якоже бысть во дни Лотовы: ядяху, пияху, куповаху, продаяху, саждаху, здаху: 29 в оньже день изыде Лот от Содомлян, одожди камык горящъ и огнь с небесе и погуби вся: 30 по тому же будет и в день, в оньже Сын Человеческий явится. 31 В той день, иже будет на крове, и сосуди его в дому, да не слазит взяти их: и иже на селе, такожде да не возвратится вспять: 32 поминайте жену Лотову. 33 Иже аще взыщет душу свою спасти, погубит ю: и иже аще погубит ю, живит ю. 34 Глаголю вам: в ту ночь будета два на одре едином: един поемлется, а другой оставляется: 35 будете две вкупе мелюще: едина поемлется, а другая оставляется. 36 Два будета на селе: один поемлется, а другой оставляется. 37 И отвецавше глаголаша Ему: где, Господи? Он же рече им: идеже тело, тамо соберутся и орли.

**18** Глаголаше же и притчу к ним, како подобает всегда молитися и не стужати (си), 2 глаголя: судия бе некий в некоем граде, Бога не бояся и человек не срамляся. 3 Вдова же некая бе во граде том: и приходаше к нему, глаголющи: отмсти мене от соперника моего. 4 И не хотяше на долзе

времени. Последи же рече в себе: аще и Бога не боюся, и человек не срамляюся: 5 но зане творит ми труды вдовица сия, отмщу ея: да не до конца приходящи застоит мене. 6 Рече же Господь: слышите, что судия неправды глаголет? 7 Бог же не имать ли сотворити отмщение избранных Своих, вопиющих к Нему день и ночь, и долготерпя о них? 8 Глаголю вам, яко сотворит отмщение их вскоре: обаче Сын Человеческий пришед убо обрящет ли (си) веру на земли? 9 Рече же и ко другим уповающим собою, яко суть праведницы, и уничижающим прочих, притчу сию: 10 человека два внидosta в церковь помолитися: един фарисей, а другой мытарь. 11 Фарисей же став, сице в себе моляшеся: Боже, хвалу Тебе воздаю, яко несмы якоже прочии человецы, хищницы, неправедницы, прелюбодее, или якоже сей мытарь: 12 пощуся двакратно в субботу, десятину даю всего елико притяжу. 13 Мытарь же издалеча стоя, не хотяше ни очию возвести на небо: но бияше перси своя, глаголя: Боже, милостив буди мне грешнику. 14 Глаголю вам, яко сниде сей оправдан в дом свой паче онаго: яко всяк возносяйся смирится, смиряяй же себе вознесется. 15 Приношаху же к Нему и младенцы, да их коснется: видевшие же ученицы запретиша им. 16 Иисус же призвав их, глагола: оставите детей приходити ко Мне и не браните им: таковых бо есть Царствие Божие: 17 аминь бо глаголю вам: иже аще не примет Царствия Божия яко отроча, не имать внити в не. 18 И вопроси Его некий князь, глаголя: Учителю благий, что сотворив, живот вечный наследствую? (aiōnios g166) 19 Рече же ему Иисус: что Мя глаголеши блага? Никтоже благ, токмо един Бог: 20 заповеди веси: не прелюбы твори, не

убий, не укради, не лжесвидетельствуй, чти отца твоего и мать твою. 21 Он же рече: вся сия сохраних от юности моея. 22 Слышав же сия Иисус рече ему: еще единого не dokonчал еси: вся, елика имаши, продаждь и раздай нищым: и имети имаши сокровище на небеси: и гряди вслед Мене. 23 Он же слышав сие, прискорбен бысть: бе бо богат зело. 24 Видев же его Иисус прискорбна бывша, рече: како не удобь имущии богатство в Царствие Божие внидут: 25 удобее бо есть вельбуду сквозе иглине уши проити, неже богату в Царствие Божие внити. 26 Реша же слышавшии: то кто может спасен быти? 27 Он же рече: невозможная у человек возможна суть у Бога. 28 Рече же Петр: се, мы оставихом вся и по Тебе идохом. 29 Он же рече им: аминь глаголю вам, яко никтоже есть, иже оставит дом, или родители, или братию, или сестры, или жену, или чада, Царствия ради Божия, 30 иже не примет множицею во время сие, и в век грядущий живот вечный. (aiōn g165, aiōnios g166) 31 Поемь же обанадесяте ученики Своя, рече к ним: се, восходим во Иерусалим, и скончаются вся писанная пророки о Сыне Человечесте: 32 предадят бо Его языком и поругаются Ему, и укорят Его и оплюют Его, 33 и бивше убьют Его: и в третий день воскреснет. 34 И тии ничесоже от сих разумеша: и бе глаголгол сей сокровен от них, и не разумеваху глаголголемых. 35 Бысть же егда приближишася во Иерихон, слепец некий седяше при пути прося: 36 слышав же народ мимоходяць, вопрошаше: что убо есть се? 37 Поведаша же ему, яко Иисус Назарянин мимоходит. 38 И возопи, глаголя: Иисусе Сыне Давидов, помилуй мя. 39 И предидуции прещаху ему, да умолчит: он же паче множае

вопияше: Сыне Давидов, помилуй мя. 40 Став же Иисус повеле привести его к Себе. Приближшуся же ему к Нему, вопроси его, 41 глаголя: что хочеши, да ти сотворю? Он же рече: Господи, да прозрю. 42 Иисус же рече ему: прозри: вера твоя спасе тя. 43 И абие прозре, и вслед Его идяше, слава Бога. И вси людие видевше воздаша хвалу Богови.

**19** И вшед прохощаше Иерихон. 2 И се, муж нарицаемый Закхей, и сей бе старей мытарем, и той бе богат: 3 и искаше видети Иисуса, кто есть, и не можаше от народа, яко возрастом мал бе: 4 и предитек, возлезе на ягодичину, да видит, яко хотяше мимо ея проити. 5 И яко прииде на место, возрев Иисус виде его и рече к нему: Закхее, потщався слези: днесь бо в дому твоём подобает Ми быти. 6 И потщався слезе и прият Его радуясь. 7 И видевше вси роптаху, глаголюще, яко ко грешну мужу вниде витати. 8 Став же Закхей рече ко Господу: се, пол имения моего, Господи, дам нищим: и аще кого чим обидех, возвращу четверицею. 9 Рече же к нему Иисус, яко днесь спасение дому сему бысть, зане и сей сын Авраамль есть: 10 прииде бо Сын Человечь възискати и спасти погибшаго. 11 Слышашым же им сия, приложь рече притчу, зане близ Ему быти Иерусалима, и мняху, яко абие Царство Божие хочет явитися. 12 Рече убо: человек некий добра рода иде на страну далече прияти себе царство и возвратитися: 13 призвав же десять раб своих, даде им десять мнас и рече к ним: куплю дейте, дондеже прииду. 14 И граждане его ненавидяху его и послаша послы вслед его, глаголюще: не хоцем сему, да царствует над нами. 15 И бысть егда возвратися приим царство, рече пригласити рабы тыя, имже даде сребро, да увесть, какову

куплю суть сотворили. 16 Прииде же первый, глаголя: господи, мнас твоя придела десять мнас. 17 И рече ему: благо, рабе добрый: яко о мале верен был еси, буди область имея над десятию градов. 18 И прииде второй, глаголя: господи, мнас твоя сотвори пять мнас. 19 Рече же и тому: и ты буди над пятию градов. 20 И другой прииде, глаголя: господи, се, мнас твоя, юже имех положену во убрусе: 21 бояхся бо тебе, яко человек яр еси, взялещи, егоже не положил еси, и жнеши, егоже не сеял еси. 22 Глагола же ему: от уст твоих сужду ти, лукавый рабе: ведел еси, яко аз человек яр есмь, возьму, егоже не положих, и жну, егоже не сеях: 23 и почто не вдал еси моего сребра купцем, и аз пришед с лихвою истязал бых е? 24 И предстоящим рече: возьмите от него мнас и дадите имущему десять мнас. 25 И реша ему: господи, имать десять мнас. 26 Глаголю бо вам, яко всякому имущему дастся: а от неимущаго, и еже имать, отимется от него: 27 обаче враги моя оны, иже не восхотеша мене, да царь бых был над ними, приведите семо и изсецыте предо мною. 28 И сия рек, идяше преди, восходя во Иерусалим. 29 И бысть яко приближися в Вифсфагию и Вифанию, к горе нарицаемей Елеон, посла два ученик Своих, 30 глаголя: идита в прямную весь: (и) в нюже входяща обряцета жребя привязано, на неже никтоже николиже от человек вседе: отрешша е приведита: 31 и аще кто вы вопрошает: почто отрешаета? Сице рцыта ему, яко Господь его требует. 32 Шедша же посланная обретоста, якоже рече има. 33 Отрешающема же има жребя, рекоша господие его к нима: что отрешаета жребя? 34 Она же рекоста, яко Господь его требует. 35 И приведоста е ко Иисусови: и возвергше



ризы своя на жребя, всадиша Иисуса. 36 Идушу же Ему, постилаху ризы своя по пути. 37 Приближающужеса Ему уже (абие) к низхождению горе Елеонстей, начаша все множество ученик радующеса хвалити Бога гласом велиим о всех силах, яже видеша, 38 глаголюще: благословен грядый Царь во имя Господне: мир на небеси и слава в вышних. 39 И нецыи фарисее от народа реша к Нему: Учителю, запрети учеником Твоим. 40 И отвещав рече им: глаголю вам, яко, аще сии умолчат, камене возопиет. 41 И яко приближися, виде град, плакася о нем, 42 глаголя: яко аще бы разумел и ты, в день сей твой, еже к смирению твоему: ныне же скрыся от очию твоею: 43 яко приидут дние на тя, и обложат врази твои острог о тебе, и обыдут тя, и оымут тя отвсюду, 44 и разбьют тя и чада твоя в тебе, и не оставят камень на камени в тебе: понеже не разумел еси време посещения твоего. 45 И вшед в церковь, начат изгонити продающыя в ней и купующыя, 46 глаголя им: писано есть: дом Мой дом молитвы есть: вы же сотвористе его пещеру разбойником. 47 И бе учя по вся дни в церкви. Архиерее же и книжницы искаху Его погубити, и старейшины людем: 48 и не обретаху, что бы сотворили Ему: людие бо вси держахуся Его, послушающе Его.

**20** И бысть во един от дний оных, учашу Ему люди в церкви и благовествующу, приидоша священницы и книжницы со старцы 2 и реша к Нему, глаголюще: рцы нам, коею областию сия твориши, или кто есть давый Тебе власть сию? 3 Отвещав же рече к ним: вопрошу вы и Аз единого словесе, и рцыте Ми: 4 крещение Иоанново с небесе ли бе, или от человек? 5 Они же помышляху в себе, глаголюще, яко аще

речем: с небесе, речет: почто убо не веровасте ему? 6 Аще ли же речем: от человек, вси людие камением побьют ны: известно бо бе о Иоанне, яко пророк бе. 7 И отвещаша: не вемы откуда. 8 Иисус же рече им: ни аз глаголю вам, кою областию сия творю. 9 Начат же к людем глаголати притчю сию: человек некий насади виноград, и вдаде его делателем, и отиде на лета многа: 10 и во время посла к делателем раба, да от плода винограда дадут ему: делатели же бивше его, послаша тща. 11 И приложи послати другаго раба: они же и того бивше и досадивше (ему), послаша тща. 12 И приложи послати третяго: они же и того уязвльше изгнаша. 13 Рече же господин винограда: что сотворю? Послю сына моего возлюбленного, еда како, его видевшю, усрамятся. 14 Видевше же его делателе, мышляху в себе, глаголюще: сей есть наследник: приидите, убием его, да наше будет достояние. 15 И изведше его вон из винограда, убиша. Что убо сотворит им господин винограда? 16 Приидет и погубит делатели сия и вдаст виноград инем. Слышавше же рекоша: да не будет. 17 Он же воззрев на них, рече: что убо писаное сие: камень, егоже небрегоша зиждущии, сей бысть во главу угла? 18 Всяк падый на камени том, сокрушится: а на немже падет, стрыет его. 19 И взыскаша архиерее и книжницы возложить Нань руце в той час и убояшася народа: разумеша бо, яко к ним притчу сию рече. 20 И наблюдше послаша лаятели, притворяющих себе праведники быти: да имут Его в словеси, во еже предати Его началству и области игемонове. 21 И вопросиша Его, глаголюще: Учителю, вемы, яко право глаголеш и учиши, и не на лица зриши, но воистинну пути Божию учиши: 22 достоин ли нам кесареви

дань даяти, или ни? 23 Разумев же их лукавство, рече к ним: что Мя искушаете? 24 Покажите Ми цату: чий имать образ и надписание? Отвещавше же рекоша: кесарев. 25 Он же рече им: воздадите убо, яже кесарева, кесареви, и яже Божия, Богови. 26 И не могоша зазрети глаголгола Его пред людьми: и дивишася о ответе Его и умолчаша. 27 Приступиша же нецыи от саддукей, глаголющии воскресению не быти, вопрошаху Его, 28 глаголюще: Учителю, Моисей написа нам: аще кому брат умрет имый жену, и той безчаден умрет, да брат его поймет жену и возставит семя брату своему: 29 седмь убо братий бе: и первый поят жену, умре безчаден: 30 и поят вторый жену, и той умре безчаден: 31 и третий поят ю: такожде же и вси седмь: и не оставиша чад и умроша: 32 послезде же всех умре и жена: 33 в воскресение убо, котораго их будет жена? Седмь бо имеша ю жену. 34 И отвещав рече им Иисус: сынове века сего женятся и посягают: (aiōn g165) 35 а сподобльшиися век он улучити и воскресение, еже от мертвых, ни женятся, ни посягают: (aiōn g165) 36 ни умрети бо ктому могут: равни бо суть Ангелом и сынове суть Божии, воскресения сынове суще: 37 а яко встают мертвии, и Моисей сказа при купине, якоже глаголет Господа Бога Авраамля и Бога Исаакова и Бога Иаковля: 38 Бог же несть мертвых, но живых: вси бо Тому живи суть. 39 Отвещавше же нецыи от книжник рекоша: Учителю, добре рекл еси. 40 Ктому же не смеяху Его вопросити ничесоже. Рече же к ним: 41 како глаголют Христа Сына Давидова быти? 42 Сам бо Давид глаголет в книзе псаломстей: рече Господь Господеву моему: седи о десную Мене, 43 дондеже положу враги Твоя подножие ногама Твоима. 44 Давид убо

Господа Его нарицает, и како Сын ему есть? 45 Слышащим же всем людем, рече учеником Своим: 46 внемлите себе от книжник хотящих ходити во одеждах и любящих целования на торжищих и председания на сонмищих и преждевозлежания на вечерях: 47 иже снедают дома вдовиц и виною далече молятся: сии приимут лишше осуждение.

**21** Воззрев же виде вметающыя в храм набдящий имения дары своя богатыя: 2 виде же и некую вдовицу убогу вметающую ту две лепте, 3 и рече: воистинну глаголю вам, яко вдовица сия убогая множае всех вверже: 4 вси бо сии от избытка своего ввергоша в дары Богови: сия же от лишения своего все житие, еже име, вверже. 5 И неким глаголющим о церкви, яко камением добрым и сосуды украшена, рече: 6 сия яже видите, приидут дние, в няже не останет камень на камени, иже не разорится. 7 Вопросыша же Его, глаголюще: Учителю, когда убо сия будут? И что есть знамение, егда хотят сия быти? 8 Он же рече: блюдите, да не прельщени будете: мнози бо приидут во имя Мое, глаголюще, яко Аз есмь: и время приближися. Не изыдите убо вслед их. 9 Егда же услышите брани и нестроения, не убойтесь: подобает бо сим быти прежде: но не у абие кончина. 10 Тогда глаголаше им: востанет (бо) язык на язык, и царство на царство: 11 труси же велицы по местом и глади и пагубы будут, страхования же и знамения велия с небесе будут. 12 Прежде же сих всех возложат на вы руки своя и ижденут, предающе на сонмища и темницы, ведомы к царем и владыкам, имене Моего ради: 13 прилучится же вам во свидетелство. 14 Положите убо на сердцах ваших, не прежде поучатися отвещавати: 15 Аз бо дам вам уста и премудрость, ейже не возмогут противитися

или отвещати вси противляющиися вам. 16 Предани же будете и родители и братиею и родом и други, и умертвят от вас: 17 и будете ненавидими от всех имене Моего ради: 18 и влас главы вашея не погибнет: 19 в терпении вашем стяжите души ваша. 20 Егда же узрите обстоимь Иерусалим вои, тогда разумеите, яко приближися запустение ему: 21 тогда сущии во Иудеи да бегают в горы: и иже посреде его, да исходят: и иже во странах, да не входят в оны: 22 яко дние отмщению сии суть, яко исполнитися всему писанному. 23 Горе же имущым во утробе и доящым в тыя дни: будет бо беда велия на земли и гнев на людех сих, 24 и падут во острии меча, и пленени будут во вся языки: и Иерусалим будет попираемь языки, дондеже скончаются времена язык. 25 И будут знамения в солнце и луне и звездах: и на земли туга языком от нечаяния шума морскаго и возмущения, 26 издыхающым человеком от страха и чаяния грядущих на вселенную: силы бо небесныя подвижутся, 27 и тогда узрят Сына Человеческа грядуща на облацех с силою и славою многую. 28 Начинаящым же сим бывати, восклонитесь и воздвигните главы ваша: зане приближается избавление ваше. 29 И рече притчу им: видите смоковницу и вся древа: 30 егда прошибаются уже, видяще сами весте, яко близ жатва есть. 31 Тако и вы, егда узрите сия бывающа, ведите, яко близ есть Царствие Божие. 32 Аминь глаголю вам, яко не имать прейти род сей, дондеже вся сия будут: 33 небо и земля мимо идет, а словеса Моя не имут прейти. 34 Внемлите же себе, да не когда отягчают сердца ваша объядением и пьянством и печальми житейскими, и найдет на вы внезапу день той: 35 яко сеть бо приидет на вся

живущыя на лицах всея земли: **36** бдите убо на всяко время молящеся, да сподобитесь убежати всех сих хотящих быти, и стати пред Сыном Человеческим. **37** Бе же во дни во церкви учя: нощию же исходя водворяшеся в горе нарицаемей Елеон. **38** И вси людие из утра прихождаху к Нему во церковь послушати Его.

**22** Приближашеся же праздник опреснок, глаголемый Пасха: **2** и искаху архиереи и книжницы, како бы убили Его: бояхуся бо людий. **3** Вниде же сатана во Иуду нарицаемаго Искариот, суща от числа обоюнадесяте, **4** и шед глагола архиереом и воеводам, како Его предаст им. **5** И возрадовашася и совещаша ему сребреники дати: **6** и исповеда и искаше удобна времена, да предаст Его им без народа. **7** Прииде же день опресноков, в оньже подобаше жрети пасху: **8** и посла Петра и Иоанна, рек: шедша уготовайта нам пасху, да ямы. **9** Она же рекоста Ему: где хочещи уготоваем? **10** Он же рече има: се, восходящема вама во град, срящет вы человек в скудельнице воду нося: по нем идета в дом, в оньже входит, **11** и рцета дому владыце: глаголет тебе Учитель: где есть обитель, идеже пасху со ученики Моими съем? **12** И той вама покажет горницу велию послану: ту уготовайта. **13** Шедша же обретоста, якоже рече има: и уготоваста пасху. **14** И егда бысть час, возлеже, и обанадесяте Апостола с Ним, **15** и рече к ним: желанием возжелех сию пасху ясти с вами, прежде даже не прииму мук: **16** глаголю бо вам, яко отселе не имам ясти от нея, дондеже скончаются во Царствии Божии. **17** И приим чашу, хвалу воздав, рече: приимите сию, и разделите себе: **18** глаголю бо вам, яко не имам пити от плода лознаго, дондеже Царствие Божие

приидет. 19 И приим хлеб, хвалу воздав, преломи и даде им, глаголя: сие есть тело Мое, еже за вы даемо: сие творите в Мое воспоминание. 20 Такожде же и чашу по вечери, глаголя: сия чаша Новый Завет Моею кровию, яже за вы проливается: 21 обаче се, рука предающего Мя со Мною (есть) на трапезе, 22 и Сын убо Человеческий идет по реченному: обаче горе человеку тому, имже предается. 23 И тии начаша искати в себе, который убо от них хочет сие сотворити. 24 Бысть же и прях в них, кий мнится их быти болий. 25 Он же рече им: царие язык господствуют ими, и обладающи ими благодателе нарицаются: 26 вы же не тако: но болий в вас, да будет яко мний: и старей, яко служай. 27 Кто бо болий, возлежай ли, или служай? Не возлежай ли? Аз же посреде вас есмь яко служай. 28 Вы же есте пребывше со Мною в напастех Моих, 29 и Аз завещаваю вам, якоже завеща Мне Отец Мой, Царство, 30 да ясте и пиете на трапезе Моей во Царствии Моем: и сядете на престолах, судяще обеманадесяте коленом Израилевом. 31 Рече же Господь: Симоне, Симоне, се, сатана просит вас, дабы сеял, яко пшеницу: 32 Аз же молихся о тебе, да не оскудеет вера твоя: и ты некогда обратишься утверди братию твою. 33 Он же рече Ему: Господи, с Тобою готов есмь и в темницу и на смерть ити. 34 Он же рече: глаголю ти, Петре, не возгласит петель днесь, дондеже трикраты отвержешися Мене не ведети. 35 И рече им: егда послах вы без влагалища и без меха и без сапог, еда чесого лишени бысте? Они же реша: ничесоже. 36 Рече же им: но ныне иже имать влагалище, да возмет, такожде и мех: а иже не имать, да продаст ризу свою, и купит нож: 37 глаголю бо

вам, яко еще писаное се, подобает, да скончается о Мне, еже: и со беззаконными вменися. Ибо еже о Мне, кончину имать. 38 Они же реша: Господи, се, ножа zde два. Он же рече им: довольно есть. 39 И изшед иде по обычаю в гору Елеонскую: по Нем же идоша ученицы Его. 40 Быв же на месте, рече им: молитесь, да не внидете в напасть. 41 И Сам отступи от них яко вержением камене, и поклонь колена моляшеся, 42 глаголя: Отче, аще волиши мимонести чашу сию от Мене: обаче не Моя воля, но Твоя да будет. 43 Явися же Ему Ангел с небесе, укрепляя Его. 44 И быв в подвизе, прилежнее моляшеся: бысть же пот Его яко капли крове каплющья на землю. 45 И востав от молитвы (и) пришед ко учеником, обрете их спящих от печали 46 и рече им: что спите? Воставше молитесь, да не внидете в напасть. 47 Еще же Ему глаголющу, се, народ, и нарицаемый Иуда, един от обоюнадесяте, идяше пред ними, и приступи ко Иисусови целовати Его. Сие бо бе знамение дал им: Егоже аще лобжу, Той есть. 48 Иисус же рече ему: Иудо, лобзанием ли Сына Человеческаго предаеши? 49 Видевше же, иже беху с Нем, бываемое, реша Ему: Господи, аще ударим ножом? 50 И удари един некий от них архиереова раба и уреза ему ухо десное. 51 Отвещав же Иисус рече: оставите до сего. И коснувся уха его, изцели его. 52 Рече же Иисус ко пришедшым Нань архиереом и воеводам церковным и старцем: яко на разбойника ли изыдoste со оружием и дрекольми яти Мя? 53 По вся дни сущу Ми с вами в церкви, не простросте руки на Мя: но се есть ваша година и область темная. 54 Емше же Его ведоша и введоша Его во двор архиереев. Петр же вслед идяше издалеча. 55 Возгнецшым



же огонь посреде двора и вкупе сидящим им, седяше Петр посреде их. 56 Узревши же его рабыня некая сидяща при свете и воззревши нань, рече: и сей с Ним бе. 57 Он же отвержеся Его, глаголя: жено, не знаю Его. 58 И помале другий видево его, рече: и ты от них еси. Петр же рече: человекче, несмь. 59 И мимошедшу яко часу единому, ин некий крепляшеся глаголя: воистинну и сей с Ним бе: ибо Галилеанин есть. 60 Рече же Петр: человекче, не вем, еже глаголеши. И абие, еще глаголющу ему, возгласи петель. 61 И обращься Господь воззре на Петра: и помяну Петр слово Господне, якоже рече ему, яко прежде даже петель не возгласит, отвержешися Мене трикраты. 62 И изшед вон плакася горько. 63 И мужие держащи Иисуса ругахуся Ему, биюще: 64 и закрывше Его, бияху Его по лицу и вопрошаху Его, глаголюще: прорцы, кто есть ударей Тя? 65 И ина многа хуляще глаголаху Нань. 66 И яко бысть день, собрашася старцы людстии и архиерее и книжницы, и ведоша Его на сонм свой, 67 глаголюще: аще Ты еси Христос? Рцы нам. Рече же им: аще вам реку, не имете веры: 68 аще же и вопрошу (вы), не отвещаете Ми, ни отпустите: 69 отселе будет Сын Человеческий седяй о десную силы Божия. 70 Реша же вси: Ты ли убо еси Сын Божий? Он же к ним рече: вы глаголете, яко Аз есмь. 71 Они же реша: что еще требуем свидетельства? Сами бо слышахом от уст Его.

**23** И воставше все множество их, ведоша Его к Пилату, 2 начаша же Нань вадити, глаголюще: Сего обретохом развращающа язык наш и возбраняюща кесареви дань даяти, глаголюща Себе Христа Царя быти. 3 Пилат же вопроси Его, глаголя: Ты ли еси Царь Иудеом? Он же

отвещав рече ему: ты глаголеши. 4 Пилат же рече ко архиереом и народу: ни коеяже обретаю вины в человеце сем. 5 Они же крепляхуся глаголюще, яко развращает люди, учя по всей Иудеи, начен от Галилеи до zde. 6 Пилат же слышав Галилею, вопроси, аще человек Галилеанин есть? 7 И разумев, яко от области Иродовы есть, посла Его ко Ироду, суцу и тому во Иерусалиме в тыя дни. 8 Ирод же виде Иисуса рад бысть зело: бе бо желая от многа времени видети Его, зане слышаше многа о Нем: и надеяшеся знамение некое видети от Него бываемо: 9 вопрошаше же Его словесы многими: Он же ничесоже отвечаваше ему. 10 Стояху же архиереи и книжницы, прилежно вадяще Нань. 11 Укорив же Его Ирод с вои своими и поругався, оболк его в ризу светлу, возврати Его к Пилату. 12 Быста же друга Ирод же и Пилат в той день с собою: прежде бо беста вражду имуща между собою. 13 Пилат же созвав архиереи и князи и люди, 14 рече к ним: приведосте ми человека сего, яко развращающа люди: и се, аз пред вами истязав, ни единья же обретаю в человеце сем вины, яже Нань вадите: 15 но ни Ирод: послах бо Его к нему, и се, ничтоже достойно смерти сотворено есть о Нем: 16 наказав убо Его отпущу. 17 Нужду же имяше на вся праздники отпущати им единого. 18 Возопиша же вси народи, глаголюще: возми Сего, отпусти же нам Варавву. 19 Иже бе за некую крамолу бывшую во граде и убийство ввержен в темницу. 20 Паки же Пилат возгласи, хотя отпустити Иисуса. 21 Они же возгласаху, глаголюще: распни, распни Его. 22 Он же третицею рече к ним: что бо зло сотвори Сей? Ничесоже достойна смерти обретох в Нем: наказав убо Его отпущу. 23 Они же прилежаху гласы

великими, просяще Его на распятие: и устояху гласи их и архиерейстии. 24 Пилат же посуди быти прошению их: 25 отпусти же бывшего за крамолу и убийство всаждена в темницу, егоже прошаху: Иисуса же предаде воли их. 26 И яко поведоша Его, емше Симона некоего Киринаеа, грядуща с села, возложиша на нь крест нести по Иисусе. 27 Идяше же вслед Его народ мног людей, и жены, яже и плакахуся и рыдаху Его. 28 Обращься же к ним Иисус рече: дщери Иерусалимски, не плачитесь о Мне, обаче себе плачите и чад ваших: 29 яко се, дние грядут, в няже рекут: блажены неплоды, и утробы, яже не родиша, и сосцы, иже не доиша: 30 тогда начнут глаголати горам: падите на ны: и холмом: покрыйте ны: 31 зане, аще в сурове древе сия творят, в сусе что будет? 32 Ведяху же и ина два злодея с Ним убити. 33 И егда приидоша на место, нарицаемое Лобное, ту распяша Его и злодея, оваго убо о десную, а другаго о шуюю. 34 Иисус же глаголаше: Отче, отпусти им: не ведят бо что творят. Разделяюще же ризы Его, метаху жребия. 35 И стояху людие зряще. Ругахуся же и князи с ними, глаголюще: иныя спасе, да спасет и Себе, аще Той есть Христос Божий избранный. 36 Ругахуся же Ему и воини, приступающе и оцет придеюще Ему, 37 и глаголаху: аще Ты еси Царь Иудейск, спасися Сам. 38 Бе же и написание написано над Ним писмены еллинскими и римскими и еврейскими: Сей есть Царь Иудейск. 39 Един же от обешеною злодею хуляше Его, глаголя: аще Ты еси Христос, спаси Себе и наю. 40 Отвещав же другий прещаше ему, глаголя: ни ли ты боишия Бога, яко в томже осужден еси? 41 И мы убо в правду: достойная бо по делом наю восприемлева: Сей же ни единого зла сотвори. 42

И глаголаше Иисусови: помяни мя, Господи, егда приидеши во Царствии си. 43 И рече ему Иисус: аминь глаголю тебе, днесь со Мною будеши в раи. 44 Бе же час яко шестый, и тма бысть по всей земли до часа девятого: 45 и померче солнце, и завеса церковная раздрася посреде. 46 И возгласъ гласом велиим Иисус, рече: Отче, в руце Твои предаю дух Мой. И сия рек издше. 47 Видев же сотник бывшее, прослави Бога, глаголя: воистинну человек сей праведен бе. 48 И вси пришедшии народи на позор сей, видяще бывающая, биюще перси своя возвращахуся. 49 Стояху же вси знаемии Его издалеча, и жены споследовавшыя Ему от Галилеи, зрящя сия. 50 И се, муж именем Иосиф, советник сый, муж благ и праведен 51 сей не бе пристал совету и делу их, от Аримафеа града Иудейска, иже чаяше и сам Царствия Божия: 52 сей приступль к Пилату, проси телесе Иисусова: 53 и снем е обвит плащаницею, и положи е во гробе иссечене, в немже не бе никтоже никогдаже положен. 54 И день бе пяток, и суббота светаше. 55 Вслед же шедшыя жены, яже бяху пришли с Ним от Галилеи, видеша гроб, и яко положено бысть тело Его: 56 возвращыся же уготоваша ароматы и миро: и в субботу убо умолчаша по заповеди.

**24** Во едину же от суббот зело рано приидоша на гроб, носящя яже уготоваша ароматы: и другия с ними: 2 обретоша же камень отвален от гроба, 3 и вшедшыя не обретоша телесе Господа Иисуса. 4 И бысть не домышляющимся им о сем, и се, мужа два стаща пред ними в ризах блестящихся. 5 Пристрашным же бывшим им и поклоньшым лица на землю, рекоста к ним: что ищите живаго с мертвыми? 6 Несть zde, но воста: помяните, якоже глагола вам, еще сый в Галилеи,

7 глаголя, яко подобает Сыну Человеческому предану быти в руце человек грешник, и пропяту быти, и в третий день воскреснути. 8 И помянуша глаголголы Его, 9 и возвращаяся от гроба, возвестиша вся сия единомунадесяте и всем прочым. 10 Бяше же Магдалина Мариа и Иоанна и Мариа Иаковля, и прочыя с ними, яже глаголаху ко Апостолом сия. 11 И явишася пред ними яко лжа глаголы их, и не вероваху им. 12 Петр же востав тече ко гробу и приник виде ризы едины лежащя: и отиде, в себе дивяся бывшему. 13 И се, два от них беста идуща в тойже день в весь отстоящу стадий шестьдесят от Иерусалима, ейже имя Еммаус: 14 и та беседоваста к себе о всех сих приключшихся. 15 И бысть беседующема има и совопрошающемася, и Сам Иисус приближився идяше с нима: 16 очи же ею держастеся, да Его не познаета. 17 Рече же к нима: что суть словеса сия, о нихже стязаетася к себе идуща, и еста дряхла? 18 Отвещав же един, емуже имя Клеопа, рече к Нему: Ты ли един пришлец еси во Иерусалим, и не уведел еси бывших в нем во дни сия? 19 И рече има: киих? Она же реста Ему: яже о Иисусе Назарянине, Иже бысть муж пророк, силен делом и словом пред Богом и всеми людьми: 20 како предаша Его архиерее и князи наши на осуждение смерти и распяша Его: 21 мы же надеяхомся, яко Сей есть хотя избавити Израиля: но и над всеми сими, третий сей день есть днесь, отнелиже сия быша: 22 но и жены некия от нас ужасиша ны, бывшыя рано у гроба: 23 и не обретшя телесе Его, приидоша, глаголющя, яко и явление Ангел видеша, иже глаголют Его жива: 24 и идоша нецыи от нас ко гробу и обретоша тако, якоже и жены реша: Самого же не видеша. 25 И Той рече к нима:

о несмысленная и косная сердцем, еже веровати о всех, яже глаголаша пророцы: 26 не сия ли подобаше пострадати Христу и внити в славу Свою? 27 И начен от Моисеа и от всех пророк, сказаше има от всех Писаний яже о Нем. 28 И приближишася в весь, в нюже идяста: и Той творяшеся далечайше ити: 29 и нуждаста Его, глаголюща: облязи с нама, яко к вечеру есть, и приклонился есть день. И вниде с нима облеци. 30 И бысть яко возлеже с нима, (и) приим хлеб благослови, и преломив даяше има: 31 онема же отверзостеса очи, и познаста Его: и Той невидимь бысть има. 32 И рекоста к себе: не сердце ли наю горя бе в наю, егда глаголаше нама на пути и егда сказоваше нама Писания? 33 И воставша в той час, возвратистася во Иерусалим и обретоста сокупленных едионадесяте и иже бяху с ними, 34 глаголющих, яко воистинну воста Господь и явися Симону. 35 И та поведаста, яже быша на пути, и яко познася има в преломлении хлеба. 36 Сия же им глаголющым, (и) Сам Иисус ста посреде их и глагола им: мир вам. 37 Убоявшеся же и пристрашни бывше, мняху дух видети: 38 и рече им: что смущени есте? И почто помышления входят в сердца ваша? 39 Видите руце Мои и нозе Мои, яко сам Аз есмь: осяжите Мя и видите: яко дух плоти и кости не имать, якоже Мене видите имуща. 40 И сие рек, показа им руце и нозе. 41 Еще же неверующым им от радости и чудящимся, рече им: имате ли что снадно zde? 42 Они же даша Ему рыбы печены часть и от пчел сот. 43 И взем пред ними яде, 44 рече же им: сия суть словеса, яже глаголах к вам еще сый с вами, яко подобает скончатися всем написанным в законе Моисеове и пророцех и псалмех о Мне. 45 Тогда отверзе им

ум разумети Писания 46 и рече им, яко тако писано есть, и тако подобаше пострадати Христу и воскреснути от мертвых в третий день, 47 и проповедатися во имя Его покаянию и отпущению грехов во всех языцех, наченше от Иерусалима: 48 вы же есте свидетелие сим: 49 и се, Аз послю обетование Отца Моего на вы: вы же седите во граде Иерусалимсте, дондеже облечетесь силою свыше. 50 Извед же их вон до Вифании и воздвиг руце Свои, (и) благослови их. 51 И бысть егда благословляше их, отступи от них и возношашеся на небо. 52 И тии поклонишася Ему, и возвратишася во Иерусалим с радостью великою: 53 и бяху выну в церкви, хваляще и благословяще Бога. Аминь.

## От Иоанна святое благовествование

**1** В начале бе Слово, и Слово бе к Богу, и Бог бе Слово. **2** Сей бе искони к Богу: **3** вся Тем быша, и без Него ничтоже бысть, еже бысть. **4** В Том живот бе, и живот бе свет человеком: **5** и свет во тме светится, и тма его не объят. **6** Бысть человек послан от Бога, имя ему Иоанн: **7** Сей прииде во свидетелство, да свидетелствует о Свете, да вси веру имут ему. **8** Не бе той свет, но да свидетелствует о Свете: **9** бе Свет истинный, Иже просвещает всякаго человека грядущаго в мир: **10** в мире бе, и мир Тем бысть, и мир Его не позна: **11** во своя прииде, и свои Его не прияша. **12** Елицы же прияша Его, даде им область чадом Божиим быти, верующым во имя Его, **13** иже не от крове, ни от похоти плотския, ни от похоти мужеския, но от Бога родишася. **14** И Слово плоть бысть и вселися в ны, и видехом славу Его, славу яко Единороднаго от Отца, исполнь благодати и истины. **15** Иоанн свидетелствует о Нем и воззва глаголя: Сей бе, Егоже рех, Иже по мне Грядый, предо мною бысть, яко первее мене бе. **16** И от исполнения Его мы вси прияхом и благодать воз благодать: **17** яко закон Моисеом дан бысть, благодать (же) и истина Иисус Христом бысть. **18** Бога никтоже виде нигдеже: Единородный Сын, сый в лоне Отчи, Той исповеда. **19** И сие есть свидетелство Иоанново, егда послаша Жидове от Иерусалима иереев и левитов, да вопросят его: ты кто еси? **20** И исповеда и не отвержеся: и исповеда, яко несъм аз Христос. **21** И вопросиша его: что убо? Илиа ли еси ты? И глагола: несъм. Пророк ли еси? И отвеща: ни. **22** Реша же ему: кто еси? Да ответ дамы



пославшым ны: что глаголеши о тебе самем? 23 Рече: аз глас вопиющего в пустыни: исправите путь Господень, якоже рече Исаиа пророк. 24 И посланнии беху от фарисей: 25 и вопросиша его и реша ему: что убо крещаеши, аще ты носи Христос, ни Илия, ни пророк? 26 Отвеща им Иоанн, глагола: аз крещая водою: посреде же вас стоит, Егоже вы не весте: 27 Той есть Грядый по мне, Иже предо мною бысть, Емуже несмь аз достоин, да отрешу ремень сапогу Его. 28 Сия в Вифаваре быша об он пол Иордана, идеже бе Иоанн крестя. 29 Во утрий (же) виде Иоанн Иисуса грядуща к себе и глагола: се, Агнец Божий, вземляй грехи мира: 30 Сей есть, о Немже аз рех: по мне грядет Муж, Иже предо мною бысть, яко первее мене бе: 31 и аз не ведех Его: но да явится Израилеви, сего ради приидох аз водою крестя. 32 И свидетелствова Иоанн, глаголя, яко видех Духа сходяща яко голубя с небесе, и пребысть на Нем: 33 и аз не ведех Его: но Пославый мя крестити водою, Той мне рече: над Негоже узриши Духа сходяща и пребывающа на Нем, Той есть крестяй Духом Святым: 34 и аз видех и свидетелствовах, яко Сей есть Сын Божий. 35 Во утрий (же) паки стояше Иоанн, и от ученик его два. 36 И узрев Иисуса грядуща, глагола: се, Агнец Божий. 37 И слышаста его оба ученика глаголющаго, и по Иисусе идоста. 38 Обращься же Иисус и виде я по Себе идуща, глагола има: чесо ищета? Она же реста Ему: Равви, еже глаголется сказаемо учителю, где живеши? 39 (И) глагола има: приидита и видита. Приидоста и видеста, где живяше, и у Него пребыста день той. Бе же час яко десятый. 40 Бе (же) Андрей, брат Симона Петра, един от обою слышавшею от Иоанна и по Нем шедшею. 41 Обрете

сей прежде брата своего Симона и глагола ему: обретохом Мессию, еже есть сказаемо Христос. 42 И приведе его ко Иисусови. Возрев же нань Иисус рече: ты еси Симон сын Ионин: ты наречешися Кифа, еже скажется Петр. 43 Во утрий (же) восхоте изыти в Галилею: и обрете Филиппа и глагола ему: гряди по Мне. 44 Бе (же) Филипп от Вифсаиды, от града Андреова и Петрова. 45 Обрете Филипп Нафанаила и глагола ему: Егоже писа Моисей в законе и пророцы, обретохом Иисуса сына Иосифова, иже от Назарета. 46 И глагола ему Нафанаил: от Назарета может ли что добро быти? Глагола ему Филипп: прииди и виждь. 47 Виде (же) Иисус Нафанаила грядуща к Себе и глагола о нем: се, воистинну Израилтянин, в немже льсти несть. 48 Глагола Ему Нафанаил: како мя знаеши? Отвеща Иисус и рече ему: прежде даже не возгласи тебе Филипп, суца под смоковницею видех тя. 49 Отвеща Нафанаил и глагола Ему: Равви, Ты еси Сын Божий, Ты еси Царь Израилев. 50 Отвеща Иисус и рече ему: зане рех ти, яко видех тя под смоковницею, веруеши: болша сих узриши. 51 И глагола ему: аминь, аминь глаголю вам, отселе узрите небо отверсто и Ангелы Божия восходящыя и нисходящыя над Сына Человеческаго.

**2** И в третий день брак бысть в Кане Галилейстей: и бе Мати Иисусова ту. 2 Зван же бысть Иисус и ученицы Его на брак. 3 И недоставшу вино, глаголгола Мати Иисусова к Нему: вина не имут. 4 Глагола Ей Иисус: что (есть) Мне и Тебе, Жено? Не у прииде час Мой. 5 Глаголгола Мати Его слугам: еже аще глаголет вам, сотворите. 6 Беху же ту водоноси каменни шесть, лежаще по очищению Иудейску, вместящии по двема или трием мерам. 7 Глагола им Иисус:

наполните водоносы воды. И наполниша их до верха. 8 И глагола им: почерпите ныне и принесите архитриклинови. И принесоша. 9 Якоже вкуси архитриклин вина бывшего от воды, и не ведяше, откуда есть: слуги же ведяху почерпшии воду: пригласи жениха архитриклин 10 и глагола ему: всяк человек прежде доброе вино полагает, и егда упиются, тогда худшее: ты (же) соблюл еси доброе вино доселе. 11 Се сотвори начаток знамением Иисус в Кане Галилейстей и яви славу Свою: и вероваша в Него ученицы Его. 12 По сем сниде в Капернаум Сам и Мати Его, и братия Его и ученицы Его: и ту не многи дни пребыша. 13 И близ бе Пасха Иудейска, и взыде во Иерусалим Иисус 14 и обрете в церкви продающая овцы и волы и голуби, и пеняжники сидящия. 15 И сотворив бичь от вервий, вся изгна из церкви, овцы и волы: и торжником разсыпа пенязи и дски опроверже: 16 и продающим голуби рече: возьмите сия отсюда и не творите дому Отца Моего дому купленаго. 17 Помянуша же ученицы Его, яко писано есть: жалость дому Твоего снесь Мя. 18 Отвещаша же Иудее и реша Ему: кое знамение являеши нам, яко сия твориши? 19 Отвеща Иисус и рече им: разорите церковь сию, и тремя денми воздвигну ю. 20 Реша же Иудее: четыредесять и шестию лет создана бысть церковь сия, и Ты ли тремя денми воздвигнеши ю? 21 Он же глаголаше о церкви тела Своего. 22 Егда убо воста от мертвых, помянуша ученицы Его, яко се глаголаше, и вероваша Писанию и словеси, еже рече Иисус. 23 Егда же бе в Иерусалимех в праздник Пасхи, мнози вероваша во имя Его, видяще знамения Его, яже творяше. 24 Сам же Иисус не вдаеше Себе в веру их, зане сам ведяше вся, 25 и яко не требоваше,

да кто свидетельствует о человецех: Сам бо ведяше, что бе в человеце.

**3** Бе же человек от фарисей, Никодим имя ему, князь Жидовский: 2 сей прииде ко Иисусу нощию и рече Ему: Равви, вем, яко от Бога пришел еси учитель: никтоже бо может знамений сих творити, яже Ты твориши, аще не будет Бог с ним. 3 Отвеща Иисус и рече ему: аминь, аминь глаголю тебе: аще кто не родится свыше, не может видети Царствия Божия. 4 Глагола к Нему Никодим: како может человек родитися стар сый? Еда может второе внити во утробу матере своя и родитися? 5 Отвеща Иисус: аминь, аминь глаголю тебе: аще кто не родится водою и Духом, не может внити во Царствие Божие: 6 рожденное от плоти плоть есть, и рожденное от Духа дух есть. 7 Не дивися, яко рех ти: подобает вам родитися свыше. 8 Дух, идеже хочет, дышет, и глас его слышиши, но не веси, откуда приходит и камо идет: тако есть всяк (человек) рожденный от Духа. 9 Отвеща Никодим и рече Ему: како могут сия быти? 10 Отвеща Иисус и рече ему: ты еси учитель Израилев, и сих ли не веси? 11 Аминь, аминь глаголю тебе, яко, еже вемы, глаголем, и еже видехом, свидетельствуем, и свидетельства Нашего не приемлете: 12 аще земная рекох вам, и не веруете: како, аще реку вам небесная, уверуете? 13 И никтоже взыде на небо, токмо сшедый с небесе Сын Человеческий, сый на небеси: 14 и якоже Моисей вознесе змию в пустыни, тако подобает вознестися Сыну Человеческому, 15 да всяк веруяй в Онъ не погибнет, но имать живот вечный. (aiōnios g166) 16 Тако бо возлюби Бог мир, яко и Сына Своего Единороднаго дал есть, да всяк веруяй в Онъ не погибнет, но имать живот

вечный. (aiōnios g166) 17 Не посла бо Бог Сына Своего в мир, да судит мирови, но да спасется Им мир. 18 Веруяй в Онъ не будет осужден: а не веруяй уже осужден есть, яко не верова во имя Единороднаго Сына Божия. 19 Сей же есть суд, яко свет прииде в мир, и возлюбиша человецы паче тму, неже свет: беша бо их дела зла. 20 Всяк бо делаяй злая ненавидит света и не приходит к свету, да не обличатся дела его, яко лукава суть: 21 творяй же истину грядет к свету, да явятся дела его, яко о Бозе суть соделана. 22 По сих (же) прииде Иисус и ученицы Его в Жидовскую землю: и ту живяше с ними и крещаше. 23 Бе же Иоанн крестя во Еноне близ Салима, яко воды многи бяху ту: и прихождаху и крещахуся: 24 не у бо бе всажден в темницу Иоанн. 25 Бысть же стязание от ученик Иоанновых со Иудеи о очищении: 26 и приидоша ко Иоанну и рекоша ему: равви, Иже бе с тобою об он пол Иордана, Емуже ты свидетелствовал еси, се, Сей крещает, и вси грядут к Нему. 27 Отвеща Иоанн и рече: не может человек приимати ничесоже, аще не будет дано ему с небесе. 28 Вы сами мне свидетелствуете, яко рех: несмь аз Христос, но яко послан есмь пред Ним. 29 Имеяй невесту жених есть: а друг женихов, стоя и послушая его, радостию радуется за глас женихов: сия убо радость моя исполнися: 30 оному подобает расти, мне же малитися. 31 Грядый свыше над всеми есть: сый от земли от земли есть и от земли глаголет: Грядый с небесе над всеми есть, 32 и еже виде и слыша, сие свидетелствует: и свидетельства Его никтоже приемлет. 33 Приемый Его свидетелство верова, яко Бог истинен есть. 34 Егоже бо посла Бог, глаголголы Божия глаголет: не в меру бо Бог дает Духа. 35 Отец (бо)

любит Сына и вся даде в руце Его. **36** Веруй в Сына имать живот вечный: а иже не верует в Сына, не узрит живота, но гнев Божий пребывает на нем. (aiōnios g166)

**4** Егда убо разуме Иисус, яко услышаша фарисее, яко Иисус множайшыя ученики творит и крещает, неже Иоанн: **2** Иисус же Сам не крещаше, но ученицы Его: **3** остави Иудею и иде паки в Галилею. **4** Подобаше же Ему проити сквозе Самарию. **5** Прииде убо во град Самарийский, глаголемый Сихарь, близ веси, юже даде Иаков Иосифу сыну своему: **6** бе же ту источник Иаковль. Иисус же утруждся от пути, седяше тако на источнице: бе (же) яко час шестый. **7** Прииде жена от Самарии почерпати воду. Глагола ей Иисус: даждь Ми пити. **8** Ученицы бо Его отшли бяху во град, да брашно купят. **9** Глагола Ему жена Самаряныня: како ты Жидовин сый от мене пити просиши, жены Самаряныни сущей? Не прикасаютбоя Жидове Самаряном. **10** Отвеща Иисус и рече ей: аще бы ведала еси дар Божий, и Кто есть глаголяй ти: даждь Ми пити: ты бы просила у Него, и дал бы ти воду живу. **11** Глагола Ему жена: господи, ни почерпала имаши, и студенец есть глубок: откуда убо имаши воду живу? **12** Еда ты болий еси отца нашего Иакова, иже даде нам студенец сей, и той из него пит и сынове его и скоти его? **13** Отвеща Иисус и рече ей: всяк пийй от воды сея, вжаждется паки: **14** а иже пиет от воды, юже Аз дам ему, не вжаждется во веки: но вода, юже (Аз) дам ему, будет в нем источник воды текуция в живот вечный. (aiōn g165, aiōnios g166) **15** Глагола к Нему жена: господи, даждь ми сию воду, да ни жажду, ни прихожду семо почерпати. **16** Глагола ей Иисус: иди, пригласи мужа твоего и прииди семо. **17** Отвеща жена и

рече (Ему): не имам мужа. Глагола ей Иисус: добре рекла еси, яко мужа не имам: 18 пять бо мужей имела еси, и ныне, егоже имаши, несть ти муж: се воистинну рекла еси. 19 Глагола Ему жена: Господи, вижу, яко пророк еси Ты: 20 отцы наши в горе сей поклонишася: и вы глаголете, яко во Иерусалимех есть место, идеже кланяться подобает. 21 Глагола ей Иисус: жено, веру Ми ими, яко грядет час, егда ни в горе сей, ни во Иерусалимех поклонитесь Отцу: 22 вы кланяетесь, егоже не весте: мы кланяемся, егоже вемы, яко спасение от Иудей есть: 23 но грядет час, и ныне есть, егда истиннии поклонницы поклонятся Отцу духом и истиною: ибо Отец таковых ищет поклоняющихся Ему: 24 дух (есть) Бог: и иже кланяется Ему, духом и истиною достоин кланяться. 25 Глагола Ему жена: вем, яко Мессиа приидет, глаголемый Христос: егда Той приидет, возвестит нам вся. 26 Глагола ей Иисус: Аз есмь, глаголяй с тобою. 27 И тогда приидоша ученицы Его и чудяхуся, яко с женою глаголаше: обаче никтоже рече: чесо ищещи? Или: что глаголеши с нею? 28 Остави же водонос свой жена, и иде во град, и глагола человеком: 29 приидите (и) видите Человека, Иже рече ми вся, елика сотворих: еда Той есть Христос? 30 Изыдоша же из града и грядяху к Нему. 31 Между же сим моляху Его ученицы (Его), глаголюще: Равви, яждь. 32 Он же рече им: Аз брашно имам ясти, егоже вы не весте. 33 Глаголаху убо ученицы к себе: еда кто принесе Ему ясти? 34 Глагола им Иисус: Мое брашно есть, да сотворю волю Пославшаго Мя и совершу дело Его. 35 Не вы ли глаголете, яко еще четыре месяцы суть, и жатва приидет? Се, глаголю вам: возведите очи ваши и видите нивы, яко плавы суть

к жатве уже: **36** и жнй мзду приемлет и собирает плод в живот вечный, да и сеяй вкупе радуется и жнй: (aiōnios g166) **37** о сем бо слово есть истинное, яко ин есть сеяй, и ин (есть) жнй: **38** аз послах вы жати, идеже вы не трудистесь: инии трудишася, и вы в труд их внидосте. **39** От града же того мнози вероваша в Онъ от Самарян, за слово жены свидетелствующия, яко рече ми вся, елика сотворих. **40** Егда убо приидоша к Нему Самаряне, моляху Его, дабы пребыл у них: и пребысть ту два дни. **41** И много паче вероваша за слово Его: **42** жене же глаголаху, яко не ктому за твою беседу веруем: сами бо слышахом и вемы, яко Сей есть воистинну Спас миру, Христос. **43** По двою же дню изыде оттуду и иде в Галилею: **44** Сам бо Иисус свидетелствова, яко пророк во своем отечестве чести не имать. **45** Егда же прииде в Галилею, прияша Его Галилеане, вся видевшие, яже сотвори во Иерусалимех в праздник: и тии бо приидоша в праздник. **46** Прииде же паки Иисус в Кану Галилейскую, идеже претвори воду в вино. И бе некий царев муж, егоже сын боляше в Капернауме. **47** Сей слышав, яко Иисус прииде от Иудеи в Галилею, иде к Нему и моляше Его, да снидет и исцелит сына Его: имеяше бо умрети. **48** Рече убо Иисус к нему: аще знамени и чудес не видите, не имате веровати. **49** Глагола к Нему царев муж: Господи, сниди, прежде даже не умрет отроча мое. **50** Глагола ему Иисус: иди, сын твой жив есть. И верова человек словеси, еже рече ему Иисус, и идяше. **51** Абие же входящу ему, (се, ) раби его сretoша его и возвестиша (ему), глаголюще, яко сын твой жив есть. **52** Вопрошаше убо от них о часе, в который легчае ему бысть, и реша ему, яко вчера в час седмый остави его огонь. **53**



Разуме же отец, яко той бе час, в оньже рече ему Иисус, яко сын твой жив есть: и верова сам и весь дом его. 54 Сие паки второе знамение сотвори Иисус, пришед от Иудеи в Галилею.

**5** По сих (же) бе праздник Иудейский, и взыде Иисус во Иерусалим. 2 Есть же во Иерусалимех Овчая купель, яже глаголется еврейски Вифесда, пять притвор имущи: 3 в тех слежаше множество болящих, слепых, хромых, сухих, чающих движения воды: 4 Ангел бо Господень на (всяко) лето сходяше в купель и возмущаше воду: (и) иже первее влазаше по возмущении воды, здрав бываше, яцем же недугом одержимь бываше. 5 Бе же ту некий человек, тридесять и восемь лет имый в недузе (своем). 6 Сего виде Иисус лежаща и разумев, яко многа лета уже имяше (в недузе), глагола ему: хочещи ли цел быти? 7 Отвеща Ему недужный: ей, Господи, человека не имам, да, егда возмутится вода, ввержет мя в купель: егда же прихожду аз, ин прежде мене слазит. 8 Глагола ему Иисус: востани, возми одр твой и ходи. 9 И абие здрав бысть человек: и взем одр свой и хождаше. Бе же суббота в той день. 10 Глаголаху же Жидове исцелевшему: суббота есть, и не достоин ти взяти одра (твоего). 11 Он (же) отвеща им: Иже мя сотвори цела, Той мне рече: возми одр твой и ходи. 12 Вопросыша же его: кто есть Человек рекий ти: возми одр твой и ходи? 13 Изцелевый же не ведяше, Кто есть: Иисус бо уклонися, народу сущу на месте. 14 Потом (же) обрете его Иисус в церкви и рече ему: се, здрав еси: ктому не согрешай, да не горше ти что будет. 15 Иде (же) человек и поведи Иудеом, яко Иисус есть, иже мя сотвори цела.

16 И сего ради гоняху Иисуса Иудее и искаху Его убити, зане сия творяше в субботу. 17 Иисус же отвещаваше им: Отец Мой доселе делает, и Аз делаю. 18 И сего ради паче искаху Его Иудее убити, яко не токмо разоряше субботу, но и Отца Своего глаголаше Бога, равен Ся творя Богу. 19 Отвеща же Иисус и рече им: аминь, аминь глаголю вам, не может Сын творити о Себе ничесоже, аще не еже видит Отца творяща: яже бо Он творит, сия и Сын такожде творит. 20 Отец бо любит Сына и вся показывает Ему, яже Сам творит: и болша сих покажет Ему дела, да вы чудитесь. 21 Якоже бо Отец воскрешает мертвыя и живит, тако и Сын, ихже хошет, живит. 22 Отец бо не судит ни комуже, но суд весь даде Сынови, 23 да вси чтут Сына, якоже чтут Отца. (а) иже не чтит Сына, не чтит Отца пославшаго Его. 24 Аминь, аминь глаголю вам, яко слушаай словесе Моего и веруай Пославшему Мя имать живот вечный, и на суд не придет, но преидет от смерти в живот. (aiōnios g166) 25 Аминь, аминь глаголю вам, яко грядет час, и ныне есть, егда мертвии услышат глас Сына Божия и услышавше оживут. 26 Якоже бо Отец имать живот в Себе, тако даде и Сынови живот имети в Себе 27 и область даде Ему и суд творити, яко Сын Человечь есть. 28 Не дивитесь сему: яко грядет час, в оньже вси сущии во гробех услышат глас Сына Божия, 29 и изыдут сотворшии благая в воскрешение живота, а сотворшии злая в воскрешение суда. 30 Не могу Аз о Себе творити ничесоже. Якоже слышу, сужду, и суд Мой праведен есть, яко не ищу воли Моея, но воли пославшаго Мя Отца. 31 Аще Аз свидетелствую о Мне, свидетельство Мое несть истинно: 32 ин есть свидетелствуй о Мне, и

вем, яко истинно есть свидетелство, еже свидетелствует о Мне: **33** вы посласте ко Иоанну, и свидетелствова о истине. **34** Аз же не от человека свидетелства приемлю, но сия глаголю, да вы спасени будете. **35** Он бе светилник горя и светя: вы же восхотесте возрадоватися в час светения его. **36** Аз же имам свидетелство более Иоаннова: дела бо, яже даде Мне Отец, да совершу я, та дела, яже Аз творю, свидетелствуют о Мне, яко Отец Мя посла. **37** И пославый Мя Отец Сам свидетелствова о Мне. Ни гласа Его нигдеже слышасте, ни видения Его видесте, **38** и словесе Его не имате пребывающа в вас, зане, Егоже Той посла, Сему вы веры не емлете. **39** Испытайте Писаний, яко вы мните в них имети живот вечный: и та суть свидетелствующая о Мне. (aіōnios g166) **40** И не хочете приити ко Мне, да живот имате. **41** Славы от человек не приемлю, **42** но разумех вы, яко любви Божия не имате в себе. **43** Аз приидох во имя Отца Моего, и не приемлете Мене: аще ин приидет во имя свое, того приемлете. **44** Как вы можете веровати, славу друг от друга приемлюще, и славы, яже от Единого Бога, не ищете? **45** Не мните, яко Аз на вы реку ко Отцу: есть, иже на вы глаголет, Моисей, нанже вы уповаете. **46** Аще бо бысте веровали Моисеови, веровали бысте (убо и) Мне: о Мне бо той писа. **47** Аще ли того писанием не веруете, како Моим глаголголом веру имете?

**6** По сих иде Иисус на он пол моря Галилеи Тивериадска: **2** и по Нем идяше народ мног, яко видяху знамения Его, яже творяше над недужными. **3** Взыде же на гору Иисус и ту седяше со ученики Своими. **4** Бе же близ Пасха, праздник Жидовский. **5** Возвед убо Иисус очи и виде, яко мног

народ грядет к Нему, глагола к Филиппу: чим купим хлебы, да ядят сии? 6 Сие же глаголаше искушая его: Сам бо ведяше, что хочет сотворити. 7 Отвеща Ему Филипп: двема стома пенязей хлебы не довлеют им, да кийждо их мало что примет. 8 Глагола Ему един от ученик Его, Андрей, брат Симона Петра: 9 есть отрочищь zde един, иже имать пять хлеб ячменных и две рыбы: но сии что суть на толико? 10 Рече же Иисус: сотворите человеки возлещи. Бе же трава многа на месте. Возлеже убо мужей числом яко пять тысяц. 11 Прият же хлебы Иисус и, хвалу воздав, подаде учеником, ученицы же возлежащым: такожде и от рыбу, елико хотяху. 12 И яко насытишася, глагола учеником Своим: соберите избытки укрух, да не погибнет ничтоже. 13 Собраша же и исполниша дванадесяте коша укрух от пятих хлеб ячменных, иже избыша ядшым. 14 Человецы же видевшя знамение, еже сотвори Иисус, глаголаху, яко Сей есть воистинну Пророк Грядый в мир. 15 Иисус убо разумев, яко хотят приити, да восхитят Его и сотворят Его царя, отиде паки в гору един. 16 Яко позде бысть, снидоша ученицы Его на море, 17 и влезоша в корабль, и идяху на он пол моря в Капернаум. И тма абие бысть, и не (у) бе пришел к ним Иисус. 18 Море же, ветру велию дыхающу, воздвизашеся. 19 Гребше же яко стадий двадесять пять или тридесять, узреша Иисуса ходяща по морю и близ корабля бывша, и убошася. 20 Он же глагола им: Аз есмь, не бойтеся. 21 Хотяху убо прияти Его в корабль: и абие корабль бысть на земли, в нуже идяху. 22 Во утрий (же) народ, иже стояше об он пол моря, виде, яко корабля иного не бе ту, токмо един той, в онже внидоша ученицы Его, и яко не вниде со ученики Своими Иисус в

корабль, но едины ученицы Его идоша: 23 и ини приидоша корабли от Тивериады близ места, идеже ядоша хлебы, хвалу воздавше Господеви: 24 егда же видеша народи, яко Иисуса не бысть ту, ни ученик Его, влезоша сами в корабли и приидоша в Капернаум, ищуще Иисуса, 25 и обретше Его об он пол моря, реша Ему: Равви, когда zde бысть? 26 Отвеща им Иисус и рече: аминь, аминь глаголю вам, ищите Мене, не яко видесте знамение, но яко яли есте хлебы и насытитесь: 27 делайте не брашно гиблющее, но брашно пребывающее в живот вечный, еже Сын Человеческий вам даст: Сего бо Отец знамена Бог. (aiōnios g166) 28 Реша же к Нему: что сотворим, да делаем дела Божия? 29 Отвеща Иисус и рече им: се есть дело Божие, да веруете в Того, Егоже посла Он. 30 Реша же Ему: кое убо Ты твориши знамение, да видим и веру имем Тебе? Что делаеши? 31 Отцы наши ядоша манну в пустыни, якоже есть писано: хлеб с небесе даде им ясти. 32 Рече убо им Иисус: аминь, аминь глаголю вам, не Моисей даде вам хлеб с небесе, но Отец Мой дает вам хлеб истинный с небесе: 33 хлеб бо Божии есть сходяй с небесе и даяй живот миру. 34 Реша убо к Нему: Господи, всегда даждь нам хлеб сей. 35 Рече же им Иисус: Аз есмь хлеб животный: грядый ко Мне не имать взалкаться, и веруяй в Мя не имать вжаждаться никогдаже. 36 Но рех вам, яко и видесте Мя, и не веруете. 37 Все, еже дает Мне Отец, ко Мне приидет, и грядущаго ко Мне не изжену вон: 38 яко снидох с небесе, не да творю волю Мою, но волю пославшаго Мя Отца. 39 Се же есть воля пославшаго Мя Отца, да все, еже даде Ми, не погублю от Него, но воскрешу е в последний день. 40 Се же есть воля Пославшаго Мя, да всяк видяй Сына и веруяй в

Него имать живот вечный, и воскрешу его Аз в последний день. (aiōnios g166) 41 Роптаху убо Иудее о Нем, яко рече: Аз есмь хлеб сщедый с небесе. 42 И глаголаху: не Сей ли есть Иисус сын Иосифов, Егоже мы знаем отца и Матерь? Како убо глаголет Сей, яко с небесе снидох? 43 Отвеща убо Иисус и рече им: не ропщите между собою: 44 никтоже может прийти ко Мне, аще не Отец пославый Мя привлечет его, и Аз воскрешу его в последний день. 45 Есть писано во пророцех: и будут вси научени Богом. Всяк слышавый от Отца и навик, приидет ко Мне. 46 Не яко Отца видел есть Кто, токмо сый от Бога, Сей виде Отца. 47 Аминь, аминь глаголю вам: веруяй в Мя имать живот вечный. (aiōnios g166) 48 Аз есмь хлеб животный: 49 отцы ваши ядоша манну в пустыни и умроша: 50 сей есть хлеб сходяй с небесе, да, аще кто от него яст, не умрет: 51 Аз есмь хлеб животный, иже сщедый с небесе: аще кто снестъ от хлеба сего, жив будет во веки: и хлеб, егоже Аз дам, Плоть Моя есть, юже Аз дам за живот мира. (aiōn g165) 52 Пряхуся же между собою Жидове, глаголюще: како может Сей нам дати Плоть (Свою) ясти? 53 Рече же им Иисус: аминь, аминь глаголю вам: аще не снесте Плоти Сына Человеческаго, ни пиете Крове Его, живота не имате в себе. 54 Ядый Мою Плоть и пияй Мою Кровь имать живот вечный, и Аз воскрешу его в последний день. (aiōnios g166) 55 Плоть бо Моя истинно есть брашно, и Кровь Моя истинно есть пиво. 56 Ядый Мою Плоть и пияй Мою Кровь во Мне пребывает, и Аз в нем. 57 Якоже посла Мя живой Отец, и Аз живу Отца ради: и ядый Мя, и той жив будет Мене ради. 58 Сей есть хлеб сщедый с небесе: не якоже ядоша отцы ваши манну и умроша: ядый хлеб сей

жив будет во веки. (aἰὼν g165) 59 Сия рече на сонмищи, учя в Капернауме. 60 Мнози убо слышавше от ученик Его, реша: жестоко есть слово сие: (и) кто может Его послушати? 61 Ведый же Иисус в Себе, яко ропщут о сем ученицы Его, рече им: сие ли вы блазнит? 62 Аще убо узрите Сына Человеческаго восходяща, идеже бе прежде? 63 Дух есть, иже оживляет, плоть не пользует ничтоже: глаголголы, яже Аз глаголах вам, дух суть и живот суть: 64 но суть от вас нецыи, иже не веруют. Ведяше бо искони Иисус, кии суть неверующии, и кто есть предай Его. 65 И глаголаше: сего ради рех вам, яко никтоже может приити ко Мне, аще не будет ему дано от Отца Моего. 66 От сего мнози от ученик Его идоша вспясть и ктому не хождаху с Ним. 67 Рече же Иисус обеманадесяте: еда и вы хотите ити? 68 Отвеща убо Ему Симон Петр: Господи, к кому идем? Глаголголы живота вечнаго имаши, (aἰῶnios g166) 69 и мы веровахом и познахом, яко Ты еси Христос, Сын Бога живаго. 70 Отвеща им Иисус: не Аз ли вас дванадесяте избрах? И един от вас диавол есть. 71 Глаголаше же Иуду Симонова Искарюта: сей бо хотяше предати Его, един сый от обоюнадесяте.

**7** И хождаше Иисус по сих в Галилеи: не хотяше бо во Иудеи ходити, яко искаху Его Иудее убити. 2 Бе же близ праздник Иудейский, потчение сени. 3 Реша убо к Нему братия Его: прежди отсюда, и иди во Иудею, да и ученицы Твои видят дела Твоя, яже твориши: 4 никтоже бо в тайне творит что, и ищет сам яве быти: аще сия твориши, яви Себе мирови. 5 Ни братия бо Его вероваху в Него. 6 Глагола убо им Иисус: время Мое не у прииде: время же ваше всегда готово есть: 7 не может мир ненавидети вас, Мене же ненавидит, яко Аз

свидетелствую о нем, яко дела Его зла суть: 8 вы въздите в праздник сей, Аз не възду в праздник сей, яко время Мое не у исполнися. 9 Сия рек им, оста в Галилеи. 10 Егда же въздоша братия Его в праздник, тогда и Сам възде, не яве, но яко тай. 11 Жидове же искаху Его в праздник и глаголаху: где есть Он? 12 И ропот мног бе о Нем в народех: овии глаголаху, яко благ есть: инии же глаголаху: ни, но льстит народы. 13 Никтоже убо яве глаголаше о Нем, страха ради Иудейскаго. 14 Абие же в преполовение праздника възде Иисус во церковь и учаше. 15 И дивляхуся Иудее, глаголюще: како Сей книги весть не учився? 16 Отвеща (убо) им Иисус и рече: Мое учение несть Мое, но Пославшаго Мя: 17 аще кто хоцет волю Его творити, разумет о учении, кое от Бога есть, или Аз от Себе глаголю: 18 глаголяй от себе славы своя ищет: а Ищяй славы Пославшаго Его, Сей истинен есть, и несть неправды в Нем. 19 Не Моисей ли даде вам закон? И никтоже от вас творит закона. Что Мене ищите убити? 20 Отвеща народ и рече: беса ли имаши? Кто Тебе ищет убити? 21 Отвеща Иисус и рече им: едино дело сотворих, и вси дивитесь: 22 сего ради Моисей даде вам обрезание, не яко от Моисеа есть, но от отец: и в субботу обрезаете человека: 23 аще обрезание приемлет человек в субботу, да не разорится закон Моисеов, на Мя ли гневаетесь, яко всего человека здрава сотворих в субботу? 24 Не судите на лица, но праведный суд судите. 25 Глаголаху убо нецыи от Иерусалимлян: не Сей ли есть, Егоже ищут убити? 26 И се, не обвиняся глаголет, и ничесоже Ему не глаголют: еда како разумеша князи, яко Сей есть Христос? 27 Но Сего вемы, откуда есть: Христос же егда приидет, никтоже весть, откуда



будет. 28 Воззва убо в церкви учя Иисус и глаголя: и Мене весте, и весте, откуда есмь: и о Себе не приидох, но есть истинен Пославый Мя, Егоже вы не весте: 29 Аз вем Его, яко от Него есмь, и Той Мя посла. 30 Искаху убо, да имут Его: и никтоже возложи Нань руки, яко не у бе пришел час Его. 31 Мнози же от народа вероваша в Него и глаголаху, яко Христос, егда приидет, еда болша знамения сотворит, яже Сей творит? 32 Слышаша фарисее народ ропщущь о Нем сия, и послаша фарисее и архиерее слуги, да имут Его. 33 Рече убо Иисус: еще мало время с вами есмь, и иду к Пославшему Мя: 34 взыщете Мене и не обрящете: и идеже есмь Аз, вы не можете приити. 35 Реша же Иудее к себе: камо Сей хоцет ити, яко мы не обрящем Его? Еда в разсеяние Еллинское хоцет ити и учити Еллины? 36 Что есть сие слово, еже рече: взыщете Мене и не обрящете: и идеже есмь Аз, вы не можете приити? 37 В последний же день великий праздника стояше Иисус и зваше, глаголя: аще кто жаждет, да приидет ко Мне и пьет: 38 веруяй в Мя, якоже рече Писание, реки от чрева его истекут воды живы. 39 Сие же рече о Дусе, Егоже хотяху приимати верующии во имя Его: не у бо бе Дух Святыи, яко Иисус не у бе прославлен. 40 Мнози же от народа слышавше слово, глаголаху: Сей есть воистинну пророк. 41 Друзии глаголаху: Сей есть Христос. Овии же глаголаху: еда от Галилеи Христос приходит? 42 Не Писание ли рече, яко от семене Давидова и от Вифлеемския веси, идеже бе Давид, Христос приидет? 43 Распря убо бысть в народе Его ради. 44 Нецыи же от них хотяху яти Его: но никтоже возложи Нань руце. 45 Приидоша же слуги ко архиереом и фарисеом: и реша им тии: почто не приведосте

Его? 46 Отвещаша слуги: николиже тако есть глагола человек, яко Сей Человек. 47 Отвещаша убо им фарисее: еда и вы прельщени бысте? 48 Еда кто от князь верова в Онъ, или от фарисей? 49 Но народ сей, иже не весть закона, прокляти суть. 50 Глагола Никодим к ним, иже пришедый к Нему ноцию, един сый от них: 51 еда закон наш судит человеку, аще не слышит от него прежде и разумеет, что творит? 52 Отвещаша и рекоша ему: еда и ты от Галилеи еси? Испытай и виждь, яко пророк от Галилеи не приходит. 53 И иде кийждо в дом свой.

**8** Иисус же иде в гору Елеонску: 2 заутра же паки прииде в церковь, и вси людие идяху к Нему: и сед учаше их. 3 Приведоша же книжницы и фарисее к Нему жену в прелюбодеении яту, и поставивше ю посреде, 4 глаголаша Ему: Учителю, сия жена ята есть ныне в прелюбодеении: 5 в законе же нам Моисей повеле таковыя камением побивати: Ты же что глаголеши? 6 Сие же реша искушающе Его, да быша имели что глаголати Нань. Иисус же долу преклонься, перстом писаше на земли, не слагая (им). 7 Якоже прилежаху вопрошающе Его, восклонься рече к ним: иже есть без греха в вас, прежде верзи камень на ню. 8 И паки долу преклонься, писаше на земли. 9 Они же слышавше и совестию обличаеми, исхождаху един по единому, наченше от старец до последних: и оста един Иисус, и жена посреде суци. 10 Восклонься же Иисус и ни единаго виде, точию жену, рече ей: жено, где суть, иже вайдаху на тя? Ни кийже ли тебе осуди? 11 Она же рече: никтоже, Господи. Рече же ей Иисус: ни аз тебе осуждаю: иди и (отселе) ктому не согрешай. 12 Паки же им Иисус рече глаголя: аз есмь свет миру: ходяй

по Мне не имать ходити во тме, но имать свет животный. 13  
Реша убо Ему фарисее: Ты о Себе Сам свидетельствуеши:  
свидетелство Твое несть истинно. 14 Отвеща Иисус и рече  
им: аще Аз свидетельствую о Себе, истинно есть свидетелство  
Мое, яко вем, откуда приидох и камо иду: вы же не весте,  
откуда прихожду и камо гряду: 15 вы по плоти судите, Аз не  
сужду ни комуже: 16 и аще сужду Аз, суд Мой истинен есть,  
яко един несмь, но Аз и пославый Мя Отец: 17 и в законе  
же вашем писано есть, яко двою человеку свидетелство  
истинно есть: 18 Аз есмь свидетельствуй о Мне Самем, и  
свидетелствует о Мне пославый Мя Отец. 19 Глаголаху же  
Ему: где есть Отец Твой? Отвеща Иисус: ни Мене весте, ни  
Отца Моего: аще Мя бысте ведали, и Отца Моего ведали  
бысте. 20 Сия глаголголы глагола Иисус в газофилакии, учя  
в церкви: и никтоже ят Его, яко не у бе пришел час Его.  
21 Рече же им паки Иисус: Аз иду, и възыщете Мене, и во  
гресе вашем умрете: а може Аз иду, вы не можете приити.  
22 Глаголаху убо Иудее: еда Ся Сам убьет, яко глаголет:  
а може Аз иду, вы не можете приити? 23 И рече им: вы от  
нижних есте, Аз от вышних есмь: вы от мира сего есте, Аз  
несмь от мира сего: 24 рех убо вам, яко умрете во гресех  
ваших: аще бо не имете веры, яко Аз есмь, умрете во гресех  
ваших. 25 Глаголаху убо Ему: Ты кто еси? И рече им Иисус:  
Начаток, яко и глаголю вам: 26 многа имам о вас глаголати и  
судити: но Пославый Мя истинен есть, и Аз, яже слышах  
от Него, сия глаголю в мире. 27 Не разумеша (убо), яко  
Отца им глаголаше. 28 Рече же им Иисус: егда вознесете  
Сына Человеческаго, тогда уразумеете, яко Аз есмь, и о  
Себе ничесоже творю, но, якоже научи Мя Отец Мой, сия

глаголю: 29 и пославый Мя со Мною есть: не остави Мене единого Отец, яко Аз угодная Ему всегда творю. 30 Сия Ему глаголющу, мнози вероваша в Него. 31 Глаголаше убо Иисус к веровавшим Ему Иудеом: аще вы пребудете во словеси Моем, воистинну ученицы Мои будете 32 и уразумеете истину, и истина свободит вы. 33 Отвещаша (и реша) Ему: семя Авраамле есмы и ни комуже работахом николиже: како Ты глаголеши, яко свободни будете? 34 Отвеща им Иисус: аминь, аминь глаголю вам, яко всяк творяй грех раб есть греха: 35 раб же не пребывает в дому во век: сын пребывает во век: (aiōn g165) 36 аще убо Сын вы свободит, воистинну свободни будете: 37 вем, яко семя Авраамле есте: но ищите Мене убити, яко слово Мое не вмещается в вы: 38 Аз, еже видех у Отца Моего, глаголю: и вы убо, еже видесте у отца вашего, творите. 39 Отвещаша и реша Ему: отец наш Авраам есть. Глагола им Иисус: аще чада Авраамля бысте были, дела Авраамля бысте творили: 40 ныне же ищите Мене убити, Человека, иже истину вам глаголах, юже слышах от Бога: сего Авраам несть сотворил: 41 вы творите дела отца вашего. Реша же Ему: мы от любодения несмы рождени: единого Отца имамы, Бога. 42 Рече же им Иисус: аще Бог Отец ваш (бы) был, любили бысте (убо) Мене: Аз бо от Бога изыдох и приидох: не о Себе бо приидох, но Той Мя посла: 43 почто беседы Моея не разумеете? Яко не можете слышати словесе Моего: 44 вы отца (вашего) диавола есте, и похоти отца вашего хотите творити: он человекоубийца бе искони и во истине не стоит, яко несть истины в нем: егда глаголет лжу, от своих глаголет, яко ложь есть и отец лжи: 45 Аз же зане истину глаголю, не веруете

Мне: 46 кто от вас обличает Мя о гресе? Аще ли истину глаголю, почто вы не веруете Мне? 47 Иже есть от Бога, глаголголов Божиих послушает: сего ради вы не слушаете, яко от Бога несте. 48 Отвещаша убо Иудее и реша Ему: не добре ли мы глаголем, яко Самарянин еси Ты и беса имаши? 49 Отвеща Иисус: Аз беса не имам, но чту Отца Моего, и вы не чтете Мене: 50 Аз же не ищю славы Моея: есть Ищя и Судя: 51 аминь, аминь глаголю вам: аще кто слово Мое соблюдет, смерти не имать видети во веки. (aiōn g165) 52 Реша убо Ему Жидове: ныне разумехом, яко беса имаши: Авраам умре и пророцы, и Ты глаголеши: аще кто слово Мое соблюдет, смерти не имать вкусити во веки: (aiōn g165) 53 еда Ты болий еси отца нашего Авраама, иже умре? И пророцы умроша: кого Себе Сам Ты твориши? 54 Отвеща Иисус: аще Аз славлюся Сам, слава Моя ничесоже есть: есть Отец Мой славяй Мя, Егоже вы глаголете, яко Бог ваш есть: 55 и не познасте Его, Аз же вем Его: и аще реку, яко не вем Его, буду подобен вам ложь: но вем Его и слово Его соблюдаю: 56 Авраам отец ваш рад бы был, дабы видел день Мой: и виде и возрадовася. 57 Реша убо Иудее к Нему: пятидесят лет не у имаши, и Авраама ли еси видел? 58 Рече (же) им Иисус: аминь, аминь глаголю вам: прежде даже Авраам не бысть, Аз есмь. 59 Взяхша убо камень, да вергут Нань: Иисус же скрыся и изыде из церкви, прошед посреде их: и мимоходаше тако.

**9** И мимоидый виде человека слепа от рожества. 2 И вопросиша Его ученицы Его, глаголюще: Равви, кто согрешит, сей ли, или родителя его, яко слеп родися? 3 Отвеща Иисус: ни сей согрешит, ни родителя его, но да явятся дела Божия на

нем: 4 мне подобает делати дела Пославшаго Мя, дондеже  
день есть: придет ночь, егда никтоже может делати: 5 егда  
в мире есмь, свет есмь миру. 6 Сия рек, плюну на землю,  
и сотвори брение от плюновения, и помаза очи брением  
слепому, 7 и рече ему: иди, умыйся в купели Силоамсте,  
еже скажется послан. Иде убо и умыся, и прииде видя.  
8 Соседи же и иже бяху видели его прежде, яко слеп бе,  
глаголаху: не сей ли есть седяй и просяй? 9 Овии глаголаху,  
яко сей есть: инии же (глаголаху), яко подобен ему есть.  
Он (же) глаголаше, яко аз есмь. 10 Глаголаху же ему:  
како ти отверзостеса очи? 11 Отвеща он и рече: Человек  
нарицаемый Иисус брение сотвори и помаза очи мои и рече  
ми: иди в купель Силоамлю и умыйся. Шед же и умывся,  
прозрех. 12 Реша убо ему: кто Той есть? Глагола: не вем.  
13 Ведоша (же) его к фарисеом, иже бе иногда слеп. 14  
Бе же суббота, егда сотвори брение Иисус и отверзе ему  
очи. 15 Паки же вопрошаху его и фарисее, како прозре.  
Он же рече им: брение положи мне на очи, и умыхся, и  
вижу. 16 Глаголаху убо от фарисей нецыи: несть Сей от Бога  
Человек, яко субботу не хранит. Овии глаголаху: како может  
человек грешен сицева знамения творити? И распря бе в  
них. 17 Глаголаху (убо) слепцу паки: ты что глаголеши о Нем,  
яко отверзе очи твои? Он же рече, яко пророк есть. 18 Не  
яша убо веры Иудее о нем, яко слеп бе и прозре, дондеже  
возгласиша родителя того прозревшаго 19 и вопросиша я,  
глаголюще: сей ли есть сын ваю, егоже вы глаголете, яко  
слеп родися? Како убо ныне видит? 20 Отвещаста (же) им  
родителя его и реста: вемы, яко сей есть сын наю и яко слеп  
родися: 21 како же ныне видит, не вемы, или кто отверзе ему

очи, мы не вемы: сам возраст имать, самого вопросите, сам о себе да глаголет. 22 Сия рекоста родителя его, яко боястася Жидов: уже бо бяху сложилися Жидове, да, аще кто Его исповесть Христа, отлучен от сонмища будет: 23 сего ради родителя его рекоста, яко возраст имать, самого вопросите. 24 Возгласиша же вторицею человека, иже бе слеп, и реша ему: даждь славу Богу: мы вемы, яко Человек Сей грешен есть. 25 Отвеща убо он и рече: аще грешен есть, не вем: едино вем, яко слеп бех, ныне же вижу. 26 Реша же ему паки: что сотвори тебе? Како отверзе очи твои? 27 Отвеща им: рекох вам уже, и не слышасте: что паки хотите слышати? Еда и вы ученицы Его хотите быти? 28 Они же укориша его и реша (ему): ты ученик еси Того: мы же Моисеовы есмы ученицы: 29 мы вемы, яко Моисеови глагола Бог, Сего же не вемы, откуда есть. 30 Отвеща человек и рече им: о сем бо дивно есть, яко вы не весте, откуда есть, и отверзе очи мои: 31 вемы же, яко грешники Бог не послушает, но аще кто Богочтец есть и волю Его творит, того послушает: 32 от века несть слышано, яко кто отверзе очи слепу рождenu: (aiōn g165) 33 аще не бы был Сей от Бога, не мог бы творити ничесоже. 34 Отвещаша и реша ему: во гресех ты родился еси весь, и ты ли ны учиши? И изгнаша его вон. 35 Услыша Иисус, яко изгнаша его вон, и обрет его, рече ему: ты веруеши ли в Сына Божия? 36 Отвеща он и рече: и кто есть, Господи, да верую в Него? 37 Рече же ему Иисус: и видел еси Его, и Глаголяй с тобою Той есть. 38 Он же рече: верую, Господи. И поклонися Ему. 39 И рече Иисус: на суд Аз в мир сей приидох, да невидящии видят, и видящии слепи будут. 40 И слышаша от фарисей сия сущии с Ним и реша Ему: еда и

мы слепи есмы? 41 Рече им Иисус: аще бысте слепи были, не бысте имели греха: ныне же глаголете, яко видим, грех убо ваш пребывает.

**10** Аминь, аминь глаголю вам: не входяй дверьми во двор овчий, но прелазя инуде, той тать есть и разбойник: 2 а входяй дверьми пастырь есть овцам: 3 сему дверник отверзает, и овцы глас его слышат, и своя овцы глашает по имени, и изгонит их: 4 и егда своя овцы ижденет, пред ними ходит: и овцы по нем идут, яко ведут глас его: 5 по чуждем же не идут, но бежат от него, яко не знают чуждаго гласа. 6 Сию притчу рече им Иисус: они же не разумеша, что бяше, яже глаголаше им. 7 Рече же паки им Иисус: аминь, аминь глаголю вам, яко Аз есмь дверь овцам. 8 Все, елико (их) прииде прежде Мене, татие суть и разбойницы: но не послушаша их овцы. 9 Аз есмь дверь: Мною аще кто внидет, спасется, и внидет и изыдет, и пажить обрящет. 10 Тать не приходит, разве да украдет и убьет и погубит: аз приидох, да живот имут и лишше имут. 11 Аз есмь пастырь добрый: пастырь добрый душу свою полагает за овцы: 12 а наемник, иже несть пастырь, емуже не суть овцы своя, видит волка грядуща и оставляет овцы и бегае, и волк расхитит их и распудит овцы: 13 а наемник бежит, яко наемник есть и нерадит о овцах. 14 Аз есмь пастырь добрый: и знаю Моя, и знают Мя Моя: 15 якоже знает Мя Отец, и Аз знаю Отца: и душу Мою полагаю за овцы. 16 И ины овцы имам, яже не суть от двора сего, и тыя Ми подобает привести: и глас Мой услышат, и будет едино стадо (и) един Пастырь. 17 Сего ради Мя Отец любит, яко Аз душу Мою полагаю, да паки прииму ю: 18 никтоже возмет ю от Мене, но Аз полагаю



ю о Себе: область имам положити ю и область имам паки  
прияти ю: сию заповедь приях от Отца Моего. 19 Распря же  
паки бысть во Иудеех за словеса сия. 20 Глаголаху же мнози  
от них: беса имать и неистов есть: что Его послушаете?  
21 Инии глаголаху: сии глаголголи не суть беснующагося:  
еда может бес слепым очи отверсти? 22 Быша же (тогда)  
обновления во Иерусалимех, и зима бе. 23 И хождаше Иисус  
в церкви, в притворе Соломони. 24 Обыдоша же Его Иудее и  
глаголаху Ему: доколе души наша вземлеши? Аще Ты еси  
Христос, рцы нам не обинуяся. 25 Отвеща им Иисус: рех вам,  
и не веруете: дела, яже Аз творю о имени Отца Моего, та  
свидетельствуют о Мне: 26 но вы не веруете, несте бо от овец  
Моих, якоже рех вам: 27 овцы Моя гласа Моего слушают, и  
Аз знаю их, и по Мне грядут: 28 и Аз живот вечный дам им, и  
не погибнут во веки, и не восхитит их никтоже от руки Моея:  
(aĩōn g165, aĩōnios g166) 29 Отец Мой, Иже даде Мне, болий  
всех есть, и никтоже может восхитити их от руки Отца Моего:  
30 Аз и Отец едино есма. 31 Взяха же камение паки Иудее,  
да побьют Его. 32 Отвеща им Иисус: многа добра дела явих  
вам от Отца Моего: за кое их дело камение мещете на Мя?  
33 Отвещаша Ему Иудее, глаголюще: о добре деле камение  
не мещем на Тя, но о хуле, яко Ты, человек сый, твориши  
Себе Бога. 34 Отвеща им Иисус: несть ли писано в законе  
вашем: Аз рех: бози есте? 35 Аще оных рече богов, к нимже  
слово Божие бысть, и не может разоритися Писание: 36  
Егоже Отец святы и посла в мир, вы глаголете, яко хулу  
глаголеши, зане рех: Сын Божий есмь. 37 Аще не творю  
дела Отца Моего, не имите Ми веры: 38 аще ли творю, аще  
и Мне не веруете, делом (Моим) веруйте: да разумеете и

веруете, яко во Мне Отец, и Аз в Нем. **39** Исаху убо паки яти Его: и изыде от рук их, **40** и иде паки на он пол Иордана, на место, идеже бе Иоанн прежде крестя, и пребысть ту. **41** И мнози приидоша к Нему и глаголаху, яко Иоанн убо знамения не сотвори ни единого: вся же, елика рече Иоанн о Сем, истинна бяху. **42** И мнози вероваша в Него ту.

**11** Бе же некто боля Лазарь от Вифании, от веси Мариины и Марфы сестры ея. **2** Бе же Мариа помазавшая Господа миром и отершая нозе Его власы своими, еяже брат Лазарь боляше. **3** Посласте убо сестре к Нему, глаголюще: Господи, се, егоже любиши, болит. **4** Слышав же Иисус рече: сия болезнь несть к смерти, но о славе Божии, да прославится Сын Божий ея ради. **5** Любляше же Иисус Марфу и сестру ея и Лазаря. **6** Егда же услыша, яко болит, тогда пребысть на немже бе месте два дни. **7** Потом же глагола учеником: идем во Иудею паки. **8** Глаголаша Ему ученицы: Равви, ныне исаху Тебе камением побити Иудее, и паки ли идеши тамо? **9** Отвеща Иисус: не два ли надесеяте часа еста во дни? Аще кто ходит во дни, не поткнется, яко свет мира сего видит: **10** аще же кто ходит в нощи, поткнется, яко несть света в нем. **11** Сия рече и посем глагола им: Лазарь друг наш успе: но иду, да возбужу его. **12** Реша убо ученицы Его: Господи, аще успе, спасен будет. **13** Рече же Иисус о смерти его: они же мнеша, яко о успении сна глаголет. **14** Тогда рече им Иисус не обвиняся: Лазарь умре: **15** и радуюся вас ради, да веруете, яко не бех тамо: но идем к нему. **16** Рече же Фома, глаголемый Близнец, учеником: идем и мы, да умрем с ним. **17** Пришед же Иисус, обрете его четири дни уже имуща во гробе. **18** Бе же Вифания близ Иерусалима, яко стадий

пятнадцать, 19 и мнози от Иудей бяху пришли к Марфе и Марии, да утешат их о брате ею. 20 Марфа убо егда услыша, яко Иисус грядет, сретет Его: Мариа же дома седяше. 21 Рече же Марфа ко Иисусу: Господи, аще бы еси zde был, не бы брат мой умерл: 22 но и ныне вем, яко елика аще просиши от Бога, даст Тебе Бог. 23 Глагола ей Иисус: воскреснет брат твой. 24 Глагола Ему Марфа: вем, яко воскреснет в воскрешение, в последний день. 25 Рече (же) ей Иисус: Аз есмь воскрешение и живот: веруяй в Мя, аще и умрет, оживет: 26 и всяк живый и веруяй в Мя не умрет во веки. Емлеши ли веру сему? (aion g165) 27 Глагола Ему: ей, Господи: аз веровах, яко Ты еси Христос Сын Божий, иже в мир грядый. 28 И сия рекши, иде и пригласи Марию сестру свою тай, рекши: Учитель пришел есть и глашает тя. 29 Она (же) яко услыша, воста скоро и иде к Нему. 30 Не уже бо бе пришел Иисус в весь, но бе на месте, идеже сретет Его Марфа. 31 Иудее (же) убо сущии с нею в дому и утешающе ю, видевшу Марию, яко скоро воста и изыде, по ней идоша, глаголюще, яко идет на гроб, да плачет тамо. 32 Мариа же яко прииде, идеже бе Иисус, видевши Его, паде Ему на ногу, глаголющи Ему: Господи, аще бы еси был zde, не бы умерл мой брат. 33 Иисус убо, яко виде ю плачущую и пришедшую с нею Иудеи плачуща, запрети духу и возмутися Сам 34 и рече: где положисте его? Глаголаша Ему: Господи, прииди и виждь. 35 Прослезися Иисус. 36 Глаголаху убо Жидове: виждь, како любляше его. 37 Нецыи же от них реша: не можаше ли Сей, отверзый очи слепому, сотворити, да и сей не умрет? 38 Иисус же паки претя в себе, прииде ко гробу. Бе же пещера, и камень лежаше на ней. 39 Глагола Иисус: возьмите камень.

Глагола Ему сестра умершаго Марфа: Господи, уже смердит: четверодневен бо есть. 40 Глагола ей Иисус: не рех ли ти, яко аще веруеши, узриши славу Божию? 41 Взяхша убо камень, идеже бе умерый лежа. Иисус же возведе очи горе и рече: Отче, хвалу Тебе воздаю, яко услышал еси Мя: 42 аз же ведех, яко всегда Мя послушаеши: но народа ради стоящаго окрест рех, да веру имут, яко Ты Мя послал еси. 43 И сия рек, гласом великим воззва: Лазаре, гряди вон. 44 И изыде умерый, обязан рукама и ногама укроем, и лице его убрусом обязано. Глагола им Иисус: разрешите его и оставите ити. 45 Мнози убо от Иудей пришедши к Марии и видевше, яже сотвори Иисус, вероваша в Него: 46 нецыи же от них идоша к фарисеом и рекоша им, яже сотвори Иисус. 47 Собраша убо архиерее и фарисее сонм и глаголаху: что сотворим? Яко Человек Сей многа знамения творит: 48 аще оставим Его тако, вси уверуют в Него: и приидут Римляне и возмут место и язык наш. 49 Един же некто от них Каиафа, архиерей сый лету тому, рече им: вы не весте ничесоже, 50 ни помышляете, яко уне есть нам, да един человек умрет за люди, а не весь язык погибнет. 51 Сего же о себе не рече, но архиерей сый лету тому, прорече, яко хотяше Иисус умрети за люди, 52 и не токмо за люди, но да и чада Божия расточеная соберет во едино. 53 От того убо дне совещаща, да убьют Его. 54 Иисус же ктому не яве хождаше во Иудеех, но иде оттуду во страну близ пустыни, во Ефрем нарицаемый град, и ту хождаше со ученики Своими. 55 Бе же близ Пасха Иудейска, и възыдоша мнози во Иерусалим от стран прежде Пасхи, да очистятся. 56 Исаху убо Иисуса и глаголаху к себе, в церкви стояще:

что мнится вам, яко не имать ли приити в праздник? 57 Даша же архиерее и фарисее заповедь, да аще кто оцтит (Его), где будет, повесть, яко да имут Его.

**12** Иисус же прежде шести дний Пасхи прииде в Вифанию, идеже бе Лазарь умерый, егоже воскреси от мертвых. 2 Сотвориша же Ему вечерю ту, и Марфа служаше: Лазарь же един бе от возлежащих с Ним. 3 Мариа же приемши литру мира нарда пистика многоценна, помаза нозе Иисусове, и отре власы своими нозе Его: храмина же исполнися от вони масти (благовонная). 4 Глагола же един от ученик Его, Иуда Симонов Искаротский, иже хотяше Его предати: 5 чесо ради миро сие не продано бысть на триех стех пенязь и дано нищым? 6 Сие же рече, не яко о нищих печашеся, но яко тать бе, и ковчежец имеяше, и вметаемая ношаше. 7 Рече же Иисус: не дейте ея, да в день погребения Моего соблюдет е: 8 нищыя бо всегда имате с собою, Мене же не всегда имате. 9 Разуме же народ мног от Иудей, яко ту есть: и приидоша не Иисуса ради токмо, но да и Лазаря видят, егоже воскреси от мертвых. 10 Совецаша же архиерее, да и Лазаря убийют, 11 яко мнози его ради идяху от Иудей и вероваху во Иисуса. 12 Во утрий (же) день народ мног пришедый в праздник, слышавше, яко Иисус грядет во Иерусалим, 13 прияша ваиа от финик и изыдоша в сретение Ему, и зваху (глаголюще): осанна, благословен грядый во имя Господне, Царь Израилев. 14 Обрет же Иисус осля, вседе на не, якоже есть писано: 15 не бойся, дщи Сионя: се, Царь твой грядет, сидя на жребяти осли. 16 Сих же не разумеша ученицы Его прежде: но егда прославися Иисус, тогда помянуша, яко сия быша о Нем писана, и сия сотвориша Ему. 17

Свидетельствоваше убо народ, иже бе (прежде) с Ним, егда Лазаря возгласи от гроба и воскреси его от мертвых: 18 сего ради и сrete Его народ, яко слышаша Его сие сотворша знамение. 19 Фарисее убо реша к себе: видите, яко никакаяже польза есть? Се, мир по Нем идет. 20 Бяху же нецыи Еллини от пришедших, да поклонятся в праздник: 21 сии убо приступиша к Филиппу, иже бе от Вифсаиды Галилейския, и моляху его, глаголюще: господи, хоцем Иисуса видети. 22 Прииде Филипп и глагола Андреови: и паки Андрей и Филипп глаголаста Иисусови. 23 Иисус же отвеща има, глаголя: прииде час, да прославится Сын Человеческий: 24 аминь, аминь глаголю вам: аще зерно пшенично пад на земли не умрет, то едино пребывает: аще же умрет, мног плод сотворит: 25 любяй душу свою погубит ю, и ненавидай души своя в мире сем в живот вечный сохранит ю: (aiōnios g166) 26 аще кто Мне служит, Мне да последствует, и идеже есмь Аз, ту и слуга Мой будет: и аще кто Мне служит, почтит его Отец (Мой): 27 ныне душа Моя возмутися: и что реку? Отче, спаси Мя от часа сего: но сего ради приидох на час сей: 28 Отче, прослави имя Твое. Прииде же глас с небесе: и прославих, и паки прославлю. 29 Народ же стояй и слышав, глаголаху: гром бысть. Инии глаголаху: Ангел глагола Ему. 30 Отвеща Иисус и рече: не Мене ради глас сей бысть, но народа ради: 31 ныне суд есть миру сему: ныне князь мира сего изгнан будет вон: 32 и аще Аз вознесен буду от земли, вся привлеку к Себе. 33 Сие же глаголаше, назнаменуя, коею смертию хотяше умрети. 34 Отвеща Ему народ: мы слышахом от закона, яко Христос пребывает во веки: како Ты глаголеши: вознестися подобает Сыну Человеческому?

Кто есть Сей Сын Человеческий? (aiōn g165) 35 Рече же им Иисус: еще мало время свет в вас есть: ходите, дондеже свет имате, да тма вас не имет: и ходяй во тме не вестъ, камо идет: 36 дондеже свет имате, веруйте во свет, да сынове света будете. Сия глагола Иисус, и отшед скрыся от них. 37 Толика знамения сотворшу Ему пред ними, не вероваху в Него, 38 да сбудется слово Исаии пророка, еже рече: Господи, кто верова слуху нашему, и мышца Господня кому открыся? 39 Сего ради не можаху веровати, яко паки рече Исаиа: 40 ослепи очи их и окаменил есть сердца их, да не видят очима, ни разумеют сердцем, и обратятся, и исцелю их. 41 Сия рече Исаиа, егда виде славу Его и глагола о Нем. 42 Обаче убо и от князь мнози вероваша в Него, но фарисей ради не исповедоваху, да не из сонмищ изгнани будут: 43 возлюбиха бо паче славу человеческую, неже славу Божию. 44 Иисус же воззва и рече: веруяй в Мя не верует в Мя, но в Пославшаго Мя: 45 и видяй Мя видит Пославшаго Мя: 46 Аз свет в мир приидох, да всяк веруяй в Мя во тме не пребудет: 47 и аще кто услышит глаголголы Моя и не верует, Аз не сужду ему: не приидох бо, да сужду мирови, но да спасу мир: 48 отменяйся Мене и не приемляй глаголгол Моих имать судящаго ему: слово, еже глаголах, то судит ему в последний день: 49 яко Аз от Себе не глаголах, но пославый Мя Отец, Той Мне заповедь даде, что реку и что возглаголю: 50 и вем, яко заповедь Его живот вечный есть: яже убо Аз глаголю, якоже рече Мне Отец, тако глаголю. (aiōnios g166)

**13** Прежде же праздника Пасхи, ведый Иисус, яко прииде Ему час, да преидет от мира сего ко Отцу, возлюбь Своя сущыя в мире, до конца возлюби их. 2 И вечера

бывшей, диаволу уже вложившу в сердце Иуде Симонову Искаротскому, да Его предаст, 3 ведый Иисус, яко вся даде Ему Отец в руке, и яко от Бога изыде и к Богу грядет: 4 воста от вечери и положи ризы, и приемь лентион, препоясая: 5 потом вляя воду во умывалницу и начат умывати ноги учеником и отирати лентием, имже бе препоясан. 6 Прииде же к Симону Петру, и глагола Ему той: Господи, Ты ли мои умыеши нозе? 7 Отвеща Иисус и рече ему: еже Аз творю, ты не веси ныне, уразумеши же по сих. 8 Глагола Ему Петр: не умыеши ногу моею во веки. Отвеща ему Иисус: аще не умыю тебе, не имаша части со Мною. (aiōn g165) 9 Глагола Ему Симон Петр: Господи, не нозе мои токмо, но и руке и главу. 10 Глагола ему Иисус: измовенный не требует, токмо нозе умыти, есть бо весь чист: и вы чисти есте, но не вси. 11 Ведяше бо предающаго Его: сего ради рече, яко не вси чисти есте. 12 Егда же умы ноги их, прият ризы Своя, возлег паки, рече им: весте ли, что сотворих вам? 13 Вы глашаете Мя Учителя и Господа, и добре глаголете: есмь бо. 14 Аще убо Аз умых ваши нозе, Господь и Учитель, и вы должни есте друг другу умывати нозе: 15 образ бо дах вам, да, якоже Аз сотворих вам, и вы творите. 16 Аминь, аминь глаголю вам: несть раб болий господа своего, ни посланник болий пославшаго его. 17 Аще сия весте, блажени есте, аще творите я. 18 Не о всех вас глаголю: Аз (бо) вем, ихже избрах: но да Писание сбудется: ядый со Мною хлеб воздвиже на Мя пяту свою. 19 Отселе глаголю вам, прежде даже не будет, да, егда будет, веру имете, яко Аз есмь. 20 Аминь, аминь глаголю вам: приемляй, аще кого послю, Мене приемлет: а приемляй Мене приемлет Пославшаго Мя. 21 Сия рек Иисус



возмутися духом и свидетелствова и рече: аминь, аминь глаголю вам, яко един от вас предаст Мя. 22 Сзирахуся убо между собою ученицы, недоумеющися, о ком глаголет. 23 Бе же един от ученик Его возлежа на лоне Иисусове, егоже любляше Иисус: 24 поману же сему Симон Петр вопросити, кто бы был, о немже глаголет. 25 Напад же той на перси Иисусовы, глагола Ему: Господи, кто есть? 26 Отвеща Иисус: той есть, емуже Аз омочив хлеб подам. И омочь хлеб, даде Иуде Симонову Искаротскому. 27 И по хлебе тогда вниде в онь сатана. Глагола убо ему Иисус: еже твориши, сотвори скоро. 28 Сего же никтоже разуме от возлежащих, к чесому рече ему. 29 Нецыи же мняху, понеже ковчежец имяше Иуда, яко глаголет ему Иисус: купи, еже требуем на праздник: или нищым да нечто даст. 30 Приим же он хлеб, абие изыде: бе же ночь. Егда изыде, 31 глагола Иисус: ныне прославися Сын Человеческий, и Бог прославися о Нем: 32 аще Бог прославися о Нем, и Бог прославит Его в Себе, и абие прославит Его. 33 Чадца, еще с вами мало есмь: взыщете Мене, и якоже рех Иудеом, яко аможе Аз иду, вы не можете приити: и вам глаголю ныне. 34 Заповедь новую даю вам, да любите друг друга: якоже возлюбих вы, да и вы любите себе: 35 о сем разумеют вси, яко Мои ученицы есте, аще любовь имате между собою. 36 Глагола Ему Симон Петр: Господи, камо идеши? Отвеща ему Иисус: аможе (Аз) иду, не можеша ныне по Мне ити: последи же по Мне идеши. 37 Глагола Ему Петр: Господи, почто не могу ныне по Тебе ити? (ныне) душу мою за Тя положу. 38 Отвеща ему Иисус: душу ли твою за Мя положиши? Аминь, аминь глаголю тебе: не возгласит алектор, дондеже отвержешися Мене трици.

**14** Да не смущается сердце ваше: веруйте в Бога, и в Мя веруйте: **2** в дому Отца Моего обители многи суть: аще ли же ни, рекл бых вам: иду уготовати место вам: **3** и аще уготовлю место вам, паки прииду и поиму вы к Себе, да идеже есмь Аз, и вы будете: **4** и аможе Аз иду, весте, и путь весте. **5** Глагола Ему Фома: Господи, не вемы, камо идеши: и како можем путь водети? **6** Глагола ему Иисус: Аз есмь путь и истина и живот: никтоже приидет ко Отцу, токмо Мною: **7** аще Мя бысте знали, и Отца Моего знали бысте (убо): и отселе познасте Его, и видесте Его. **8** Глагола Ему Филипп: Господи, покажи нам Отца, и довлеет нам. **9** Глагола ему Иисус: толико время с вами есмь, и не познал еси Мене, Филиппе? Видевый Мене виде Отца: и како ты глаголеши: покажи нам Отца? **10** Не веруеши ли, яко Аз во Отце, и Отец во Мне есть? Глаголголы, яже Аз глаголю вам, о Себе не глаголю: Отец же во Мне пребываяй, Той творит дела: **11** веруйте Мне, яко Аз во Отце, и Отец во Мне: аще ли же ни, за та дела веру имите Ми. **12** Аминь, аминь глаголю вам: веруяй в Мя, дела, яже Аз творю, и той сотворит, и болша сих сотворит: яко Аз ко Отцу Моему гряду: **13** и еже аще что просите (от Отца) во имя Мое, то сотворю, да прославится Отец в Сыне: **14** (и) аще чесо просите во имя Мое, Аз сотворю. **15** Аще любите Мя, заповеди Моя соблюдайте, **16** и Аз умолю Отца, и иного Утешителя даст вам, да будет с вами в век, (aiōn g165) **17** Дух истины, Егоже мир не может прияти, яко не видит Его, ниже знает Его: вы же знаете Его, яко в вас пребывает и в вас будет. **18** Не оставлю вас сиры: прииду к вам: **19** еще мало, и мир ктому не увидит Мене: вы же увидите Мя, яко Аз живу, и вы живи будете: **20** в той

день уразумеете вы, яко Аз во Отце Моем, и вы во Мне, и Аз в вас. 21 Имеяй заповеди Моя и соблюдаяй их, той есть любяй Мя: а любяй Мя возлюблен будет Отцем Моим, и Аз возлюблю его и явлюся ему Сам. 22 Глагола Ему Иуда не Искаротский: Господи, и что бысть, яко нам хоцещи явитися, а не миру? 23 Отвеща Иисус и рече ему: аще кто любит Мя, слово Мое соблюдет: и Отец Мой возлюбит его, и к нему приидема и обитель у него сотворима: 24 не любяй Мя словес Моих не соблюдает: и слово, еже слышасте, несть Мое, но пославшаго Мя Отца. 25 Сия глаголах вам в вас съй: 26 Утешитель же, Дух Святыи, Егоже послет Отец во имя Мое, той вы научит всему и воспомянет вам вся, яже рех вам. 27 Мир оставляю вам, мир Мой даю вам: не якоже мир дает, Аз даю вам. Да не смущается сердце ваше, ни устрашает. 28 Слышасте, яко Аз рех вам: иду и прииду к вам. Аще бысте любили Мя, возрадовалися бысте (убо), яко рех: иду ко Отцу: яко Отец Мой болий Мене есть. 29 И ныне рех вам, прежде даже не будет, да, егда будет, веру имете. 30 Ктому не много глаголю с вами: грядет бо сего мира князь и во Мне не имать ничесоже. 31 Но да разумеет мир, яко люблю Отца, и якоже заповеда Мне Отец, тако творю: встаните, идем отсюду.

**15** Аз есмь лоза истинная, и Отец Мой делатель есть: 2 всяку розгу о Мне не творящую плода, измет ю: и всяку творящую плод, отребит ю, да множайший плод принесет. 3 Уже вы чисти есте за слово, еже глаголах вам. 4 Будите во Мне, и Аз в вас. Якоже розга не может плода сотворити о себе, аще не будет на лозе, тако и вы, аще во Мне не пребудете. 5 Аз есмь лоза, вы (же) рождие: (и) иже будет во

Мне, и Аз в нем, той сотворит плод мног, яко без Мене не можете творити ничесоже: 6 аще кто во Мне не пребудет, извержется вон, якоже розга, и изсышет: и собирают ю и во огонь влагают, и сгарает: 7 аще пребудете во Мне и глаголю Мои в вас пребудут, егоже аще хотите, просите, и будет вам: 8 о сем прославися Отец Мой, да плод мног сотворите и будете Мои ученицы. 9 Якоже возлюби Мя Отец, и Аз возлюбих вас: будите в любви Моей: 10 аще заповеди Моя соблюдете, пребудете в любви Моей, якоже Аз заповеди Отца Моего соблюдох и пребываю в Его любви. 11 Сия глаголах вам, да радость Моя в вас будет и радость ваша исполнится. 12 Сия есть заповедь Моя, да любите друг друга, якоже возлюбих вы: 13 болши сея любве никтоже имать, да кто душу свою положит за други своя. 14 Вы друзи Мои есте, аще творите, елика Аз заповедаю вам: 15 не ктому вас глаголю рабы, яко раб не вестъ, что творит господь его: вас же рекох друзи, яко вся, яже слышах от Отца Моего, сказах вам. 16 Не вы Мене избрасте, но Аз избрах вас и положих вас, да вы идете и плод принесете, и плод ваш пребудет, да, егоже аще просите от Отца во имя Мое, даст вам. 17 Сия заповедаю вам, да любите друг друга. 18 Аще мир вас ненавидит, ведите, яко Мене прежде вас возненавиде: 19 аще от мира бысте были, мир убо свое любил бы: якоже от мира несте, но Аз избрах вы от мира, сего ради ненавидит вас мир. 20 Поминайте слово, еже Аз рех вам: несть раб болий господа своего: аще Мене изгнаша, и вас изженут: аще слово Мое соблюдоша, и ваше соблюдут: 21 но сия вся творят вам за имя Мое, яко не ведят Пославшаго Мя. 22 Аще не бых пришел и глаголах им, греха не быша имели: ныне

же вины не имут о гресе своем: **23** ненавиждяй Мене, и Отца  
Моего ненавидит: **24** аще дел не бых сотворил в них, ихже ин  
никтоже сотвори, греха не быша имели: ныне же и видеша,  
и возненавидеша Мене и Отца Моего: **25** но да сбудется  
слово, писанное в законе их, яко возненавидеша Мя туне. **26**  
Егда же приидет Утешитель, Егоже Аз пошлю вам от Отца,  
Дух истины, Иже от Отца исходит, Той свидетелствует о Мне:  
**27** и вы же свидетелствуете, яко искони со Мною есте.

**16** Сия глаголах вам, да не соблазнитесь. **2** От сонмищ  
ижденут вы: но приидет час, да всяк, иже убьет вы, возмнится  
службу приносить Богу: **3** и сия сотворят, яко не познаша  
Отца, ни Мене. **4** Но сия глаголах вам, да, егда приидет час,  
вспомянете сия, яко Аз рех вам: сих же вам исперва не  
рех, яко с вами бех. **5** Ныне же иду к Пославшему Мя, и  
никтоже от вас вопрошает Мене: камо идеши? **6** Но яко  
сия глаголах вам, скорби исполних сердца ваша. **7** Но Аз  
истину вам глаголю: уне есть вам, да Аз иду: аще бо не иду  
Аз, Утешитель не приидет к вам: аще (ли) же иду, пошлю  
Его к вам, **8** и пришед Он обличит мир о гресе и о правде  
и о суде: **9** о гресе убо, яко не веруют в Мя: **10** о правде  
же, яко ко Отцу Моему иду, и ктому не видите Мене: **11** о  
суде же, яко князь мира сего осужден бысть. **12** Еще много  
имам глаголати вам, но не можете носити ныне: **13** егда же  
приидет Он, Дух истины, наставит вы на всяку истину: не от  
Себе бо глаголати имать, но елика аще услышит, глаголати  
имать, и грядущая возвестит вам: **14** Он Мя прославит, яко от  
Моего приимет и возвестит вам. **15** Вся, елика имать Отец,  
Моя суть: сего ради рех, яко от Моего приимет и возвестит  
вам. **16** Вмале, и (ктому) не видите Мене: и паки вмале,

и узрите Мя, яко иду ко Отцу. 17 Реша же от ученик Его к себе: что есть сие, еже глаголет нам: в мале, и не видите Мене: и паки в мале, и узрите Мя: и: яко Аз иду ко Отцу? 18 Глаголаху убо: что сие есть, еже глаголет: в мале? Не вемы, что глаголет. 19 Разуме же Иисус, яко хотяху Его вопрошати, и рече им: о сем ли стязаетеся между собою, яко рех: в мале, и не видите Мене: и паки в мале, и узрите Мя? 20 Аминь, аминь глаголю вам, яко восплачетесь и возрыдаете вы, а мир возрадуется: вы же печальни будете, но печаль ваша в радость будет: 21 жена егда раждает, скорбь имать, яко прииде год ея: егда же родит отроча, ктому не помнит скорби за радость, яко родися человек в мир: 22 и вы же печаль имате убо ныне: паки же узрю вы, и возрадуется сердце ваше, и радости вашей никтоже возмет от вас: 23 и в той день Мене не воспросите ничесоже. Аминь, аминь глаголю вам, яко елика аще (чесо) просите от Отца во имя Мое, даст вам: 24 доселе не просисте ничесоже во имя Мое: просите, и примете, да радость ваша исполнена будет. 25 Сия в притчах глаголах вам: но приидет час, егда ктому в притчах не глаголю вам, но яве о Отце возвещу вам. 26 В той день во имя Мое воспросите, и не глаголю вам, яко Аз умолю Отца о вас: 27 Сам бо Отец любит вы, яко вы Мене возлюбисте и веровасте, яко Аз от Бога изыдох. 28 Изыдох от Отца и приидох в мир: (и) паки оставляю мир и иду ко Отцу. 29 Глаголаша Ему ученицы Его: се, ныне не обинуяся глаголеши, а притчи ни коеяже не глаголеши: 30 ныне вемы, яко веси вся и не требуеши, да кто Тя вопрошает: о сем веруем, яко от Бога изшел еси. 31 Отвеща им Иисус: ныне ли веруете? 32 Се, грядет час, и ныне прииде, да разыдетесь

кийждо во своя и Мене единого оставите: и несъм един, яко Отец со Мною есть: 33 сия глаголах вам, да во Мне мир имате: в мире скорбни будете: но дерзайте, (яко) Аз победих мир.

**17** Сия глагола Иисус и возведе очи Свои на небо и рече: Отче, прииде час: прослави Сына Твоего, да и Сын Твой прославит Тя: 2 якоже дал еси Ему власть всякия плоти, да всяко, еже дал еси Ему, даст им живот вечный: (αιῶνιος g166) 3 се же есть живот вечный, да знают Тебе единого истинного Бога, и Егоже послал еси Иисус Христа. (αιῶνιος g166) 4 Аз прославих Тя на земли, дело соверших, еже дал еси Мне да сотворю: 5 и ныне прослави Мя Ты, Отче, у Тебе Самого славою, юже имех у Тебе прежде мир не бысть. 6 Явих имя Твое человеком, ихже дал еси Мне от мира: Твои беша, и Мне их дал еси, и слово Твое сохраниша: 7 ныне разумеша, яко вся, елика дал еси Мне, от Тебе суть: 8 яко глаголголы, ихже дал еси Мне, дах им, и тии прияша и разумеша воистинну, яко от Тебе изыдох, и вероваша, яко Ты Мя послал еси. 9 Аз о сих молю: не о (всем) мире молю, но о тех, ихже дал еси Мне, яко Твои суть: 10 и Моя вся Твоя суть, и Твоя Моя: и прославихся в них: 11 и ктому несъм в мире, и сии в мире суть, и Аз к Тебе гряду. Отче Святыи, соблюди их во имя Твое, ихже дал еси Мне, да будут едино, якоже (и) Мы. 12 Егда бех с ними в мире, Аз соблюдах их во имя Твое: ихже дал еси Мне, сохраних, и никтоже от них погибе, токмо сын погибельный, да сбудется Писание: 13 ныне же к Тебе гряду, и сия глаголю в мире, да имут радость Мою исполнену в себе. 14 Аз дах им слово Твое, и мир возненавиде их, яко не суть от мира, якоже (и) Аз от мира несъм: 15 не молю, да

возмеша их от мира, но да соблюдеши их от неприязни: 16 от мира не суть, якоже (и) Аз от мира несъмь: 17 святы их во истину Твою: слово Твое истина есть. 18 Якоже Мене послал еси в мир, и Аз послах их в мир, 19 и за них Аз свящу Себе, да и тии будут священи во истину. 20 Не о сих же молю токмо, но и о верующих словесе их ради в Мя, 21 да вси едино будут: якоже Ты, Отче, во Мне, и Аз в Тебе, да и тии в Нас едино будут: да (и) мир веру имет, яко Ты Мя послал еси: 22 и Аз славу, юже дал еси Мне, дах им: да будут едино, якоже Мы едино есма: 23 Аз в них, и Ты во Мне: да будут совершени во едино, и да разумеет мир, яко Ты Мя послал еси и возлюбил еси их, якоже Мене возлюбил еси. 24 Отче, ихже дал еси Мне, хощу, да идеже есмь Аз, и тии будут со Мною, да видят славу Мою, юже дал еси Мне, яко возлюбил Мя еси прежде сложения мира. 25 Отче праведный, и мир Тебе не позна, Аз же Тя познах, и сии познаша, яко Ты Мя послал еси: 26 и сказах им имя Твое, и скажу, да любы, еюже Мя еси возлюбил, в них будет, и Аз в них.

**18** (И) сия рек Иисус, изыде со ученики Своими на он пол потока Кедрска, идеже бе вертоград, в оньже вниде Сам и ученицы Его: 2 ведяше же Иуда предавая Его место, яко множицею собирашеся Иисус ту со ученики Своими. 3 Иуда убо приемь спину и от архиерей и фарисей слуги, прииде тамо со светилами и свещами и оружию. 4 Иисус же ведый вся грядущая Нань, изшед рече им: кого ищите? 5 Отвещаша Ему: Иисуса Назореа. Глагола им Иисус: Аз есмь. Стояше же и Иуда, иже предаваше Его, с ними. 6 Егда же рече им: Аз есмь, идоша вспять и падоша на земли. 7 Паки убо вопросы их (Иисус): кого ищите? Они же реша: Иисуса Назореа. 8



Отвеща Иисус: рех вам, яко Аз есмь: аще убо Мене ищите, оставите сих ити: 9 да сбудется слово, еже рече, яко ихже дал еси Мне, не погубих от них ни когоже. 10 Симон же Петр, имый нож, извлече его и удари архиереова раба и уреза ему ухо десное: бе же имя рабу Малх. 11 Рече убо Иисус Петрови: вонзи нож в ножницу: чашу, юже даде Мне Отец, не имам ли пити ея? 12 Спира же и тысящник и слуги Иудейстии яша Иисуса и связаша Его, 13 и ведоша Его ко Анне первее: бе бо тесть Каиафе, иже бе архиерей лету тому: 14 бе же Каиафа давый совет Иудеом, яко уне есть единому человеку умрети за люди. 15 По Иисусе же идяше Симон Петр и другой ученик: ученик же той бе знаемь архиереови и вниде со Иисусом во двор архиереев: 16 Петр же стояше при дверех вне. Изыде убо ученик той, иже бе знаемь архиереови, и рече двернице и введе Петра. 17 Глагола же раба дверница Петрови: еда и ты ученик еси Человека Сего? Глагола он: несмь. 18 Стояху же раби и слуги огонь сотворше, яко зима бе, и греяхуся: бе же с ними Петр стоя и греяся. 19 Архиерей же вопроси Иисуса о ученицех Его и о учении Его. 20 Отвеща ему Иисус: Аз не обинуяся глаголах миру: Аз всегда учах на сонмищих и в церкви, идеже всегда Иудее снемлются, и тай не глаголах ничесоже: 21 что Мя вопрошаеши? Вопроси слышавших, что глаголах им: се, сии ведят, яже рех Аз. 22 Сия же рекшу Ему, един от предстоящих слуг удари в ланиту Иисуса, рек: тако ли отвещаваеши архиереови? 23 Отвеща ему Иисус: аще зле глаголах, свидетелствуй о зле: аще ли добре, что Мя биеши? 24 Посла же Его Анна связана к Каиафе архиереови. 25 Бе же Симон Петр стоя и греяся. Реша же ему: еда и ты от ученик Его еси? Он (же) отвержеся

и рече: несъм. 26 Глагола един от раб архиереевых, южика сый, емуже Петр уреза ухо: не аз ли тя видех в вертограде с Ним? 27 Паки убо Петр отвержеся, и абие петель возгласи. 28 Ведоша же Иисуса от Каиафы в претор. Бе же утро: и тии не внидоша в претор, да не осквернятся, но да ядят пасху. 29 Изыде же Пилат к ним вон и рече: кую речь приносите на Человека Сего? 30 Отвещаша и реша ему: аще не бы (был) Сей злодей, не быхом предали Его тебе. 31 Рече же им Пилат: поимите Его вы и по закону вашему судите Ему. Реша же ему Иудее: нам не достоит убить ни когоже: 32 да слово Иисусово сбудется, еже рече, назнаменуя, кою смертью хотяше умерети. 33 Вниде убо паки Пилат в претор и пригласи Иисуса и рече Ему: Ты ли еси Царь Иудейск? 34 Отвеща ему Иисус: о себе ли ты сие глаголеши, или инии тебе рекоша о Мне? 35 Отвеща Пилат: еда аз Жидовин есмь? Род Твой и архиерее предаша Тя мне: что еси сотворил? 36 Отвеща Иисус: Царство Мое несть от мира сего: аще от мира сего было бы Царство Мое, слуги Мои (убо) подвизалися быша, да не предан бых был Иудеом: ныне же Царство Мое несть отсюда. 37 Рече же Ему Пилат: убо Царь ли еси Ты? Отвеща Иисус: ты глаголеши, яко Царь есмь Аз: Аз на сие родихся и на сие приидох в мир, да свидетелствую истину: (и) всяк, иже есть от истины, послушает гласа Моего. 38 Глагола Ему Пилат: что есть истина? И сие рек, паки изыде ко Иудеом и глагола им: аз ни единыя вины обретаю в Нем: 39 есть же обычай вам, да единого вам отпущу на Пасху: хотите ли убо, (да) отпущу вам Царя Иудейска? 40 Возопиша же паки вси, глаголюще: не Сего, но Варавву. Бе же Варавва разбойник.

**19** Тогда убо Пилат поят Иисуса и би (Его): 2 и воины сплетше венец от терния, возложиша Ему на главу, и в ризу багряну облекоша Его, 3 и глаголаху: радуйся, Царю Иудейский. И бияху Его по ланитома. 4 Изыде убо паки вон Пилат и глагола им: се, извожду Его вам вон, да разумеете, яко в Нем ни единыя вины обретаю. 5 Изыде же вон Иисус, нося терновен венец и багряну ризу. И глагола им: се, Человек. 6 Егда же видеша Его архиерее и слуги, возопиша глаголюще: распни, распни Его. Глагола им Пилат: поимите Его вы и распните, аз бо не обретаю в Нем вины. 7 Отвещаша ему Иудее: мы закон имама, и по закону нашему должен есть умрети, яко Себе Сына Божия сотвори. 8 Егда убо слыша Пилат сие слово, паче убося, 9 и вниде в претор паки и глагола Иисусови: откуда еси Ты? Иисус же ответа не даде ему. 10 Глагола же Ему Пилат: мне ли не глаголеши? Не веси ли, яко власть имам распяти Тя и власть имам пустити Тя? 11 Отвеща Иисус: не имаши власти ни единыя на Мне, аще не бы ти дано свыше: сего ради предавый Мя тебе болий грех имать. 12 От сего искаше Пилат пустити Его. Иудее же вопияху, глаголюще: аще Сегопустиши, неси друг кесарев: всяк, яже царя себе творит, противится кесарю. 13 Пилат убо слышав сие слово, изведе вон Иисуса и седе на судици, на месте глаголемем Лифостротон, еврейски же Гаввафа. 14 Бе же пяток Пасце, час же яко шестый. И глагола Иудеом: се, Царь ваш. 15 Они же вопияху: возми, возми, распни Его. Глагола им Пилат: Царя ли вашего распну? Отвещаша архиерее: не имама царя токмо кесаря. 16 Тогда убо предаде Его им, да распнется. Поемше же Иисуса и ведоша: 17 и нося крест Свой, изыде на глаголемое Лобное место, еже

глаголется еврейски Голгофа, 18 идеже пропяша Его и с Ним  
ина два сюду и сюду, посреде же Иисуса. 19 Написа же и  
титла Пилат и положи на кресте. Бе же написано: Иисус  
Назоряннин, Царь Иудейский. 20 Сего же титла мнози чтоша  
от Иудей, яко близ бе место града, идеже пропяша Иисуса: и  
бе написано еврейски, гречески, римски. 21 Глаголаху убо  
Пилату архиерее Иудейстии: не пиши: Царь Иудейский: но  
яко Сам рече: Царь есмь Иудейский. 22 Отвеща Пилат: еже  
писах, писах. 23 Воини же, егда пропяша Иисуса, прияша  
ризы Его и сотвориша четыри части, коемуждо воину часть,  
и хитон: бе же хитон нешвен, свыше исткан весь. 24 Реша  
же к себе: не предерем его, но метнем жребия о нем, кому  
будет: да сбудется Писание, глаголющее: разделиша ризы  
Моя себе и о иматисме Моей меташа жребия. Воини убо сия  
сотвориша. 25 Стояху же при кресте Иисусове Мати Его и  
сестра Матере Его Мариа Клеопова и Мариа Магдалина. 26  
Иисус же виде Матерь и ученика стояща, егоже любляше,  
глагола Матери Своей: Жено, се, сын Твой. 27 Потом глагола  
ученику: се, Мати твоя. И от того часа поят Ю ученик во своя  
си. 28 Посем ведый Иисус, яко вся уже совершишася, да  
сбудется Писание, глагола: жажду. 29 Сосуд же стояше полн  
оцта. Они же исполнивше губу оцта и на трость вонзше,  
придеша ко устом Его. 30 Егда же прият оцет Иисус, рече:  
совершишася. И преклонь главу, предаде дух. 31 Иудее же,  
понеже пяток бе, да не останут на кресте телеса в субботу,  
бе бо велик день тоя субботы, молиша Пилата, да пребиют  
голени их и возмут. 32 Приидоша же воини, и первому убо  
пребиша голени, и другому распятому с Ним: 33 на Иисуса  
же пришедше, яко видеша Его уже умерша, не пребиша Ему

голений, 34 но един от воин копием ребра Ему прободе, и абие изыде кровь и вода. 35 И видевый свидетелствова, и истинно есть свидетелство его, и той весть, яко истину глаголет, да вы веру имете: 36 быша бо сия, да сбудется Писание: кость не сокрушится от Него. 37 И паки другое Писание глаголет: воззрят Нань, Егоже прободоша. 38 По сих же моли Пилата Иосиф, иже от Аримафеа, сый ученик Иисусов, потаен же страха ради Иудейска, да возмет тело Иисусово: и повеле Пилат. Прииде же и взят тело Иисусово. 39 Прииде же и Никодим, пришедый ко Иисусови нощию прежде, нося смещение смиренно и алойно, яко литр сто. 40 Прияста же тело Иисусово и обвиста е ризами со ароматы, якоже обычай есть Иудеом погребати. 41 Бе же на месте, идеже распялся, верт, и в верте гроб нов, в немже николиже никтоже положен бе: 42 ту убо пятка ради Иудейска, яко близ бяше гроб, положиста Иисуса.

**20** Во едину же от суббот Мариа Магдалина прииде заутра, еще сущей тме, на гроб, и виде камень взят от гроба: 2 тече убо и прииде к Симону Петру и к другому ученику, егоже любляше Иисус, и глагола има: взяша Господа от гроба, и не вем, где положиша Его. 3 Изыде же Петр и другий ученик и идяста ко гробу: 4 течаства же оба вкупе: и другий ученик тече скорее Петра и прииде прежде ко гробу, 5 и приник виде ризы лежаща: обаче не вниде. 6 Прииде же Симон Петр вслед его, и вниде во гроб, и виде ризы (едины) лежаща 7 и сударь, иже бе на главе Его, не с ризами лежащъ, но особъ свит на едином месте. 8 Тогда убо вниде и другий ученик, пришедый прежде ко гробу, и виде и верова: 9 не убо ведяху Писания, яко подобает Ему из мертвых воскреснути.

10 И доста же паки к себе ученика. 11 Мариа же стояше у гроба вне плачуци: якоже плакашеся, причиче во гроб, 12 и виде два Ангела в белых (ризах) сидяща, единого у главы и единого у ногу, идеже бе лежало тело Иисусово. 13 И глаголаста ей она: жено, что плачешися? Глагола има: яко взяша Господа моего, и не вем, где положиша Его. 14 И сия рекши обратися вспять и виде Иисуса стояща, и не ведяше, яко Иисус есть. 15 Глагола ей Иисус: жено, что плачеши? Кого ищеши? Она (же) мнящи, яко вертоградарь есть, глагола Ему: господи, аще ты еси взял Его, повеждь ми, где еси положил Его, и аз возму Его. 16 Глагола ей Иисус: Марие. Она (же) обращшися глагола Ему: Раввунни, еже глаголется, Учителю. 17 Глагола ей Иисус: не прикасайся Мне, не у бо взыдох ко Отцу Моему: иди же ко братии Моей и рцы им: восхожду ко Отцу Моему и Отцу вашему, и Богу Моему и Богу вашему. 18 Прииде (же) Мариа Магдалина поведаючи учеником, яко виде Господа, и сия рече ей. 19 Сущу же позде в день той во едину от суббот, и дверем затворенным, идеже бяху ученицы (Его) собрани, страха ради Иудейска, прииде Иисус и ста посреде и глагола им: мир вам. 20 И сие рек, показа им руце (и нозе) и ребра Своя. Возрадовашася убо ученицы, видевшe Господа. 21 Рече же им Иисус паки: мир вам: якоже посла Мя Отец, и Аз посылаю вы. 22 И сие рек, дуну и глагола им: приимите Дух Свят: 23 имже отпустите грехи, отпустятся им: и имже держите, держатся. 24 Фома же, един от обоюнадесяте, глаголемый Близнец, не бе (ту) с ними, егда прииде Иисус. 25 Глаголаху же ему друзии ученицы: видехом Господа. Он же рече им: аще не вижу на руку Его язвы гвоздинныя, и вложу перста

моего в язвы гвоздинныя, и вложу руку мою в ребра Его, не иму веры. 26 И по днех осмих паки бяху внутрь ученицы Его, и Фома с ними. Прииде Иисус дверем затворенным, и ста посреде (их) и рече: мир вам. 27 Потом глагола Фоме: принеси перст твой семо и виждь руце Мои: и принеси руку твою и вложи в ребра Моя: и не буди неверен, но верен. 28 И отвеща Фома и рече Ему: Господь мой и Бог мой. 29 Глагола ему Иисус: яко видев Мя, веровал еси: блажени не видевшии и веровавше. 30 Многа же и ина знамения сотвори Иисус пред ученики Своими, яже не суть писана в книгах сих: 31 сия же писана быша, да веруете, яко Иисус есть Христос Сын Божий, и да верующе живот имате во имя Его.

**21** Посем явися паки Иисус учеником (Своим, востав от мертвых, ) на мори Тивериадстем. Явися же сице: 2 бяху вкупе Симон Петр, и Фома нарицаемый Близнец, и Нафанаил, иже (бе) от Каны Галилейския, и сына Зеведеова, и ина от ученик Его два. 3 Глагола им Симон Петр: иду рыбы ловити. Глаголаша ему: идем и мы с тобою. Изыдоша (же) и вседоша абие в корабль, и в ту ночь не яша ничесоже. 4 Утру же бывшу, ста Иисус при бреге: не познаша же ученицы, яко Иисус есть. 5 Глагола же им Иисус: дети, еда что сведно имате? Отвещаша Ему: ни. 6 Он же рече им: вверзите мрежу о десную страну корабля и обряцете. Ввергоша же и ктому не можаху привлещи ея от множества рыб. 7 Глагола же ученик той, егоже любляше Иисус, Петрови: Господь есть. Симон же Петр слышав, яко Господь есть, епендитом препоясая, бе бо наг, и ввержеса в море: 8 а друзии ученицы кораблем приидоша, не беша бо далече от земли, но яко две сте лактей, влекуще мрежу рыб. 9 Егда

убо излезоша на землю, видеша огнь лежащ и рыбу на нем лежащу и хлеб. 10 (И) глагола им Иисус: принесите от рыб, яже ясте ныне. 11 Влез (же) Симон Петр, извлече мрежу на землю, полну великих рыб сто (и) пятьдесят (и) три: и толико сущым, не проторжеса мрежа. 12 Глагола им Иисус: приидите, обедуйте. Ни един же смеяше от ученик истязати Его: Ты кто еси? Ведяще, яко Господь есть. 13 Прииде же Иисус, и прият хлеб и даде им, и рыбу такожде. 14 Се уже третье явися Иисус учеником Своим, востав от мертвых. 15 Егда же обедоваше, глагола Симону Петру Иисус: Симоне Ионин, любиши ли Мя паче сих? Глагола Ему: ей, Господи, Ты веси, яко люблю Тя. Глагола ему: паси агнцы Моя. 16 Глагола ему паки второе: Симоне Ионин, любиши ли Мя? Глагола Ему: ей, Господи, Ты веси, яко люблю Тя. Глагола ему: паси овцы Моя. 17 Глагола ему третье: Симоне Ионин, любиши ли Мя? Оскорбе (же) Петр, яко рече ему третье: любиши ли Мя? И глагола Ему: Господи, Ты вся веси: Ты веси, яко люблю Тя. Глагола ему Иисус: паси овцы Моя: 18 аминь, аминь глаголю тебе: егда был еси юн, поясался еси сам и ходил еси, аможе хотел еси: егда же состареешися, воздежеш руце твои, и ин тя пояшет и ведет, аможе не хочещи. 19 Сие же рече, назнаменуя, кою смертью прославит Бога. И сия рек, глагола ему: иди по Мне. 20 Обращься же Петр виде ученика, егоже любляше Иисус, вслед идуща, иже и возлеже на вечери на перси Его и рече: Господи, кто есть предай Тя? 21 Сего видев Петр, глагола Иисусови: Господи, сей же что? 22 Глагола ему Иисус: аще хочу, да той пребывает, дондеже прииду, что к тебе? Ты по Мне гряди. 23 Изыде же слово се в братию, яко ученик той



не умрет. И не рече ему Иисус, яко не умрет, но: аще хошу  
тому пребывати, дондеже прииду, что к тебе? 24 Сей есть  
ученик свидетельствующий о сих, иже и написа сия: и вем, яко  
истинно есть свидетельство его. 25 Суть же и ина многа, яже  
сотвори Иисус, яже аще бы по единому писана быша, ни  
самому мню (всему) миру вместити пишемых книг. Аминь.

## Деяния святых апостолов

**1** Первое убо слово сотвори о всех, о, Феофиле, яже начат Иисус творити же и учити **2** даже до дне, в оньже, заповедав Апостолом Духом Святым, ихже избра, вознесся: **3** пред нимиже и постави Себе жива по страдании Своем во мнозех истинных знамениих, деньми четыредесятьми являся им и глаголя яже о Царствии Божи: **4** с нимиже и ядый повеле им от Иерусалима не отлучатися, но ждати обетования Отча, еже слышасте от Мене: **5** яко Иоанн убо крестил есть водою, вы же имате креститися Духом Святым не по мнозех сих днех. **6** Они же убо сошедшеся вопрошаху Его, глаголюще: Господи, аще в лето сие устрояеши царствие Израилево? **7** Рече же к ним: несть ваше разумети времена и лета, яже Отец положи во Своей власти: **8** но примете силу, нашедшу Святому Духу на вы, и будете Ми свидетелие во Иерусалиме же и во всей Иудеи и Самарии и даже до последних земли. **9** И сия рек, зрящым им взятся, и облак подят Его от очию их. **10** И егда взирающе бяху на небо, идущу Ему, и се, мужа два стаа пред ними во одежди беле, **11** яже и рекоста: мужие Галилейстии, что стоите зряще на небо? Сей Иисус, вознесыйся от вас на небо, такожде приидет, имже образом видесте Его идуца на небо. **12** Тогда возвратишася во Иерусалим от горы нарицаемая Елеон, яже есть близ Иерусалима, субботы имущия путь. **13** И егда внидоша, възыдоша на горницу, идеже бяху пребывающе, Петр же и Иаков, и Иоанн и Андрей, Филипп и Фома, Варфоломей и Матфей, Иаков Алфеев и Симон Зилот и Иуда Иаковль: **14** сии вси бяху терпяще единомушно в молитве и молении, с женами и Марию Материю Иисусовою и с братиею Его.

15 И во дни тыя востав Петр посреде ученик, рече, 16 бе же имен народа вкупе яко сто и двадесять: мужие братие, подобаше скончатися Писанию сему, еже предрече Дух Святый усты Давидовыми о Иуде, бывшем вожди емшым Иисуса: 17 яко причтен бе с нами и приял бяше жребий службы сея: 18 сей убо стяжа село от мзды неправедных, и ниц быв проседеся посреде, и излися вся утроба его: 19 и разумно бысть всем живушым во Иерусалиме, яко нарецися селу тому своим их языком Акелдама, еже есть село крове: 20 пишется бо в книзе Псаломстей: да будет двор его пуст, и да не будет живуцаго в нем, и епископство его да примет ин: 21 подобает убо от сходявшихся с нами мужей во всяко лето, в неже вниде и изыде в нас Господь Иисус, 22 начен от крещения Иоаннова даже до дне, в оньже вознесся (на небо) от нас, свидетелю воскресения Его быти с нами единому от сих. 23 И поставиша два, Иосифа нарицаемаго Варсаву, иже наречен бысть Иуст, и Матфия, 24 и помолившеся реша: Ты, Господи, Сердцеведче всех, покажи, егоже избрал еси от сею двою единого, 25 прияти жребий служения сего и Апостолства, из негоже испаде Иуда, ити в место свое. 26 И даша жребия има, и паде жребий на Матфия, и причтен бысть ко единонадесяти Апостолом.

**2** И егда скончавашася дние Пятидесятницы, беша вси Апостоли единомушно вкупе. 2 И бысть внезапно с небесе шум, яко носиму дыханию бурну, и исполни весь дом, идеже бяху седяще: 3 и явишася им разделени языцы яко огненни, седе же на едином коемждо их. 4 И исполнишася вси Духа Свята и начаша глаголати иными языки, якоже Дух даяше им провещавати. 5 Бяху же во Иерусалиме живушии Иудее,

мужие благоговейнии, от всего языка, иже под небесем. **6** Бывшу же гласу сему, снидесея народ и смятесе, яко слышаху един кийждо их своим языком глаголющих их. **7** Дивляхуся же вси и чудяхуся, глаголюще друг ко другу: не се ли, вси сии суть глаголющии Галилеане? **8** И како мы слышим кийждо свой язык наш, в немже родихомся, **9** Парфяне и Мидяне и Еламита, и живущии в Месопотамии, во Иудеи же и Каппадокии, в Понте и во Асии, **10** во Фригии же и Памфилии, во Египте и странах Ливии, яже при Киринии, и приходящии Римляне, Иудее же и пришелцы, **11** критяне и аравляне, слышим глаголющих их нашими языки величия Божия? **12** Ужасохуся же вси и недоумевдохуся, друг ко другу глаголюще: что убо хоцет сие быти? **13** Инии же ругающеся глаголаху, яко вином исполнени суть. **14** Став же Петр со единонадесятьми, воздвиже глас свой и рече им: мужие Иудейстии и живущии во Иерусалиме вси, сие вам разумно да будет, и внушите глаголы моя: **15** не бо, якоже вы непщуете, сии пияни суть, есть бо час третий дне: **16** но сие есть реченное пророком Иоилем: **17** и будет в последния дни, глаголет Господь, излию от Духа Моего на всяку плоть, и прорекут сынове ваши и дщери ваша, и юноши ваши видения узрят, и старцы ваши сония видят: **18** ибо на рабы Моя и на рабыни Моя во дни оны излию от Духа Моего, и прорекут: **19** и дам чудеса на небеси горе и знамения на земли низу, кровь и огонь и курение дыма: **20** солнце преложится во тму, и луна в кровь, прежде даже не приити дню Господню великому и просвещенному: **21** и будет, всяк, иже аще призовет имя Господне, спасетсея. **22** Мужие Израилстии, послушайте словес сих: Иисуса Назореа, Мужа

от Бога известованна в вас силами и чудесы и знамении,  
яже сотвори Тем Бог посреде вас, якоже и сами весте,  
23 Сего нарекованным советом и проразумением Божиим  
предана приемше, руками беззаконных пригвождше убисте:  
24 Егоже Бог воскреси, разрешив болезни смертныя, якоже не  
бяхе мощно держиму быти Ему от нея. 25 Давид бо глаголет  
о Нем: предзрех Господа предо мною выну, яко о десную  
мене есть, да не подвижуся: 26 сего ради возвеселися сердце  
мое, и возрадовася язык мой: еще же и плоть моя вселится  
на уповании, 27 яко не оставиши души моя во аде, ниже  
даси преподобному Твоему видети истления: (Hadēs g86) 28  
сказал ми еси пути живота: исполниши мя веселия с лицом  
Твоим. 29 Мужие братие, достоин реци с дерзновением к  
вам о патриарсе Давиде, яко и умре и погребен бысть, и  
гроб его есть в нас даже до дне сего: 30 пророк убо сый и  
ведый, яко клятвою клятся ему Бог от плода чресл его по  
плоти воздвигнути Христа и посадити Его на престоле его, 31  
предвидев глагола о воскресении Христове, яко не оставися  
душа Его во аде, ни плоть Его виде истления. (Hadēs g86) 32  
Сего Иисуса воскреси Бог, емуже вси мы есмы свидетелие.  
33 Десницею убо Божиею вознесеса, и обетование Святаго  
Духа приемь от Отца, излия сие, еже вы ныне видите и  
слышите. 34 Не бо Давид взыде на небеса, глаголет бо сам:  
рече Господь Господеви моему: седи о десную Мене, 35  
дондеже положу враги Твоя подножие ног Твоих. 36 Твердо  
убо да разумеет весь дом Израилев, яко и Господа и Христа  
его Бог сотворил есть, Сего Иисуса, Егоже вы распясте.  
37 Слышавше же умилишася сердцем и реша к Петру и  
прочым Апостолом: что сотворим, мужие братие? 38 Петр

же рече к ним: покаятеся, и да крестится кийждо вас во имя Иисуса Христа во оставление грехов: и примете дар Святаго Духа: **39** вам бо есть обетование и чадом вашим и всем дальним, елики аще призовет Господь Бог наш. **40** И иными словесы множайшими засвидетелствоваше и моляше я, глаголя: спаситесь от рода строптиваго сего. **41** Уже убо любезно прияша слово его, крестишася: и приложишася в день той душ яко три тысячи: **42** бяху же терпяще во учении Апостол и во общении и в преломлении хлеба и в молитвах. **43** Бысть же на всякой души страх: многа бо чудеса и знамения Апостолы быша во Иерусалиме. **44** Страх же велий бяше на всех их. Все же веровавшии бяху вкупе и имяху вся обща: **45** и стяжания и имения продаяху, и раздаяху всем, егоже аще кто требоваше: **46** по вся же дни терпяще единомушно в церкви и ломяще по домом хлеб, приимаху пищу в радости и в простоте сердца, **47** хваляще Бога и имуще благодать у всех людей. Господь же прилагаше по вся дни Церкви спасающыяся.

**3** Вкупе же Петр и Иоанн восхождаста во святилище на молитву в час девятый. **2** И некий муж, хром от чрева матере своея сый, носимъ бываше, егоже полагаху по вся дни пред дверьми церковными, рекомыми Красными, просити милостыни от входящих в церковь: **3** иже видев Петра и Иоанна хотящыя внити в церковь, прошаше милостыни. **4** Воззрев же Петр нань со Иоанном, рече: воззри на ны. **5** Он же прилежаше има, мня нечто от нею прияти. **6** Рече же Петр: сребра и злата несть у мене, но еже имам, сие ти даю: во имя Иисуса Христа Назореа востани и ходи. **7** И емь его за десную руку воздвиже: абие же утвердистесь его плесне и глезне, **8**

и вскочив ста и хождаше, и вниде с нима в церковь, ходя и скача и хваля Бога. 9 И видеша его вси людие ходяща и хваляща Бога, 10 знаху же его, яко сей бяше, иже милостыни ради седяше при Красных дверех церковных: и исполнишася чуда и ужаса о приключившемся ему. 11 Держащужесе исцелевшему хрому Петра и Иоанна, притекоша к нима вси людие в притвор, нарицаемый Соломонов, ужасни. 12 Видев же Петр отвещаваше к людем: мужие Израилтяне, что чудитесь о сем, или на ны что взираете, яко своєю ли силою или благочестием сотворихом его ходити? 13 Бог Авраамов и Исааков и Иаковль, Бог отец наших, прослави Отрока Своего Иисуса, Егоже вы предасте, и отвергостесе Его пред лицом Пилатовым, суждъшу Оному пустити: 14 вы же Святаго и Праведнаго отвергостесе, и испросисте мужа убийцу дати вам, 15 Началника же жизни убисте: Егоже Бог воскреси от мертвых, емуже мы свидетелие есмы. 16 И о вере имене Его, сего, егоже видите и знаете, утверди имя Его: и вера, яже Его ради, даде ему всю целость сию пред всеми вами. 17 И ныне, братие, вем, яко по неведению сие сотвористе, якоже и князи ваши: 18 Бог же, яже предвозвести усты всех пророк Своих пострадати Христу, исполни тако. 19 Покайтесь убо и обратитесь, да очиститесь от грех ваших, 20 яко да приидут времена прохладна от лица Господня, и послет пронареченнаго вам Христа Иисуса, 21 Егоже подобает небеси убо прияти даже до лет устроения всех, яже глагола Бог усты всех святых Своих пророк от века. (aiōn g165) 22 Моисей убо ко отцем рече: яко Пророка вам воздвигнет Господь Бог ваш от братии вашей, яко мене: Того послушайте по всему, елика аще речет к вам: 23 будет

же, всяка душа, яже аще не послушает Пророка онаго, потребится от людей. 24 И вси же пророцы от Самуила и иже по сих, елицы глаголаша, такожде предвозвестиша дни сия. 25 Вы есте сынове пророк и завета, егоже завеща Бог ко отцем вашим, глаголя ко Аврааму: и о семени твоём возблагодарятся вся отечествия земная. 26 Вам первее Бог, воздвигий Отрока Своего Иисуса, посла Его благословяща вас, во еже отвратитися вам комуждо от злоб ваших.

**4** Глаголющим же им к людям, наидоша на них священницы и воевода церковный и саддукее, 2 жаляще си, за еже учити им люди и возвещати о Иисусе воскресение мертвых: 3 и возложиша на них руки и положиша их в соблюдение до утрия: бе бо вечер уже. 4 Мнози же от слышавших слово вероваша: и бысть число мужей яко тысящ пять. 5 Бысть же наутрие собратися князем их и старцем и книжником во Иерусалим, 6 и Анне архиерею и Каиафе и Иоанну и Александру, и елицы беша от рода архиерейска: 7 и поставльше их посреде, вопрошаху: кою силою или коим именем сотвористе сие вы? 8 Тогда Петр, исполнився Духа Свята, рече к ним: князи людстии и старцы Израилевы, 9 аще мы днесь истязуеми есмы о благодеянии человека немощна, о чесом сей спасеся, 10 разумно буди всем вам и всем людем Израилевым, яко во имя Иисуса Христа Назореа, Егоже вы распясте, Егоже Бог воскресил от мертвых, о сем сей стоит пред вами здрав: 11 Сей есть камень укореный от вас зиждущих, бывый во главу угла, и несть ни о едином же ином спасения: 12 несть бо иного имене под небесем, даннаго в человецех, о немже подобает спастися нам. 13 Видяще же Петрово дерзновение и Иоанново и разумевше,



яко человека некнижна еста и проста, дивляхуся, знаху же их, яко со Иисусом беста: **14** видяще же исцелешаго человека с нима стояща, ничтоже имяху противу рещи. **15** Повелевше же има вон из сонмища изыти, стязяхуся друг со другом, **16** глаголюще: что сотворим човекома сима? Яко убо нарочитое знамение бысть има, всем живуцым во Иерусалиме яве, и не можем отрещися: **17** но да не более прострется в людех, прещением да запретим има кому не глаголати о имени сем ни единому от человек. **18** И призвавше их, заповедаша има отнюд не провещавати ниже учити о имени Иисусове. **19** Петр же и Иоанн отвещавша к ним реста: аще праведно есть пред Богом вас послушати паче, нежели Бога, судите: **20** не можем бо мы, яже видехом и слышахом, не глаголати. **21** Они же призапрещше има, пустиша я, ничтоже обретше како мучити их, людей ради, яко вси прославляху Бога о бывшем: **22** лет бо бяше множае четыредесяти человек той, на немже бысть чудо сие исцеления. **23** Отпущена же бывша приидоста ко своим и возвестиста, елика к нима архиерее и старцы реша. **24** Они же слышавше единодушно воздвигоша глас к Богу и рекоша: Владыко, ты, Боже, сотворивый небо и землю и море и вся, яже в них, **25** иже Духом Святым усты отца нашего Давида отрока Твоего рекл еси: вскую шаташася языцы, и людие поучишася тщетным? **26** Предсташа царие земстии, и князи собрашася вкупе на Господа и на Христа Его. **27** Собрашася бо воистинну во граде сем на Святаго Отрока Твоего Иисуса, Егоже помазал еси, Ирод же и Понтийский Пилат с языки и людьми Израилевыми, **28** сотворити, елика рука Твоя и совет Твой преднарече быти: **29** и ныне, Господи,

призри на прещения их и даждь рабом Твоим со всяким дерзновением глаголати слово Твое, **30** внегда руку Твою прострети Ти во исцеления, и знаменем и чудесем бывати именем Святым Отрока Твоего Иисуса. **31** И помолившись им, подвижесе место, идеже бяху собрани, и исполнишася вси Духа Свята и глаголаху слово Божие со дерзновением. **32** Народу же веровавшему бе сердце и душа едина, и ни един же что от имений своих глаголаше свое быти, но бяху им вся обща. **33** И велиею силою воздаяху свидетелство Апостоли воскресению Господа Иисуса Христа, благодать же бе велия на всех их. **34** Не бяше бо нищъ ни един в них: елицы бо господие селом или домовом бяху, продающе приношаху цены продаемых **35** и полагаху при ногах Апостол: даяшесе же коемуждо, егоже аще кто требоваше. **36** Иосиа же, нареченный Варнава от Апостол, еже есть сказаемо сын утешения, левит, Кипрянин родом, **37** имея село, продав принесе цену и положи пред ногами Апостол.

**5** Муж же некий, Анания именем, с Сапфирию женою своею, продаде село **2** и утаи от цены, сведущей и жене его: и принес часть некую, пред ногами Апостол положи. **3** Рече же Петр: Анание, почто исполни сатана сердце твое солгати Духу Святому и утаити от цены села? **4** Сущее тебе не твое ли бе, и проданое не в твоей ли власти бяше? Что яко положил еси в сердцы твоем вещь сию? Не человеком солгал еси, но Богу. **5** Слышав же Анания словеса сия, пад издше: и бысть страх велик на всех слышавших сия. **6** Вставше же юноши взяша его и изнесше погребоша. **7** Бысть же яко трием часом минувшим, и жена его не ведущи бывшего вниде. **8** Отвеща же ей Петр: рцы ми, аще на

толице село отдаста? Она же рече: ей, на толице. 9 Петр же рече к ней: что яко согласистася искусити Духа Господня? Се, ноги погребших мужа твоего при дверех, и изнесут тя. 10 Паде же абие пред ногама его и издше: вшедше же юноши обретоша ю мертву и изнесше погребоша близ мужа ея. 11 И бысть страх велик на всей церкви и на всех слышавших сия. 12 Руками же Апостолскими быша знамения и чудеса в людех многа: и бяху единодушно вси в притворе Соломони: 13 от прочих же никтоже смеяше прилепятся им, но величаху их людие. 14 Паче же прилагахуся верующии Господви, множество мужей же и жен, 15 яко и на стогны износить недужныя и полагати на постелех и на одрех, да грядущу Петру поне сень его осенит некоего от них. 16 Схождашеся же и множество от окрестных градов во Иерусалим, приносяще недужныя и страждущыя от дух нечистых, иже исцелевахуся вси. 17 Востав же архиерей и вси иже с ним, сущая ересь саддукейская, исполнишася зависти, 18 и возложиша руки своя на Апостолы и послаша их в соблюдение общее. 19 Ангел же Господень нощию отверзе двери темницы, извед же их, рече: 20 идите и ставше глаголите в церкви людем вся глаголы жизни сея. 21 Слышавше же внидоша по утренице в церковь и учаху. Пришед же архиерей и иже с ним, созваша собор и вся старцы от сынов Израилевых и послаша во узилище, привести их. 22 Слуги же шедше не обретоша их в темнице, возвращежеся возвестиша, 23 глаголюще, яко темницу убо обретохом заключену со всяким утверждением и блюстителю стоящю пред дверьми: отверзше же, внутри ни единого обретохом. 24 Якоже слышаша словеса сия архиерей же и воевода церковный

и первосвященницы, недоумевахуся о них, что убо будет сие. 25 Пришед же некто возвести им, глаголя, яко се, мужие, ихже всадиште в темницу, суть в церкви стояще и учаще люди. 26 Тогда шед воевода со слугами, приведе их не с нуждею, бояхуся бо людий, да не камением побьют их: 27 приведше же их, поставиша на сонмищи, и вопроши их архиерей, глаголя: 28 не запрещением ли запретихом вам не учити о имени сем? И се, исполните Иерусалим учением вашим и хочете навести на ны кровь Человека Сего. 29 Отвещав же Петр и Апостоли реша: повиноватися подобает Богу паче, нежели человеком: 30 Бог отец наших воздвиже Иисуса, Егоже вы убисте, повесивше на древе: 31 Сего Бог Начальника и Спаса возвыси десницею Своею, дати покаяние Израилеви и оставление грехов: 32 и мы есмы Того свидетелие глагол сих, и Дух Святой, Егоже даде Бог повинующымся Ему. 33 Они же слышавше распыхахуся и совещаша убити их. 34 Востав же некий на сонмищи фарисей, именем Гамалиил, законоучитель честен всем людем, повеле вне мало что Апостолом уступити, 35 рече же к ним: мужие Израильтяне, внимайте себе о человецех сих, что хочете сотворити: 36 пред сими бо деньми воста Февда, глаголя быти велика некоего себе, емуже прилепишася числом мужей яко четьреста: иже убиен бысть, и вси, елицы повинушася ему, разыдошася и быша ни во чтоже: 37 по сем воста Иуда Галилеанин во дни написания и отвлече люди доволны вслед себе: и той погибе, и вси, елицы послушаша его, разсыпашася: 38 и ныне, глаголю вам, отступите от человек сих и оставите их: яко аще будет от человек совет сей или дело сие, разорится, 39 аще ли же от Бога есть, не

можете разорити то, да не како и богоборцы обрящетеся. 40 Послушаша же его, и призвавше Апостолы, бивше запретиша им не глаголати о имени Иисусове и отпустиша их. 41 Они же убо идяху радуящися от лица собора, яко за имя Господа Иисуса сподобишася безчестие прияти: 42 по вся же дни в церкви и в домех не престаяху учаще и благовествующе Иисуса Христа.

**6** Во днех же сих, умножившымся учеником, бысть роптание Еллинов ко Евреом, яко презираемы бываху во вседневнем служении вдовицы их. 2 Призвавше же дванадесять множество ученик, реша: не угодно есть нам, оставльшим слово Божие, служити трапезам: 3 усмотрите убо, братие, мужы от вас свидетелствованы семь, исполнены Духа Свята и премудрости, ихже поставим над службою сею: 4 мы же в молитве и служении слова пребудем. 5 И угодно бысть слово сие пред всем народом: и избраша Стефана, мужа исполнена веры и Духа Свята, и Филиппа, и Прохора и Никанора, и Тимона и Пармена, и Николаа пришелца Антиохийскаго, 6 ихже поставиша пред Апостолы: и помолившеся возложиша на ня руке. 7 И слово Божие растяше, и множашеся число ученик во Иерусалиме зело: мног же народ священников послушаху веры. 8 Стефан же исполнь веры и силы творяше знамения и чудеса велия в людех. 9 Восташа же нецыи от сонма глаголемаго Ливертинска и Киринейска и Александрска, и иже от Киликии и Асии, стязающеся со Стефаном: 10 и не можаху противустати премудрости и Духу, Имже глаголаше. 11 Тогда подустиша мужы глаголющия, яко слышахом его глаголюща глаголы хульныя на Моисеа и на Бога. 12 Сподвигоша же люди и старцы и книжники,

и нападше восхитиша его и приведоша на сонмище, **13** поставиша же свидетели ложны глаголющя, яко человек сей не престае глаголы хульня глаголя на место святое сие и закон: **14** слышахом бо его глаголюща, яко Иисус Назорей сей разорит место сие и изменит обычаи, яже предаде нам Моисей. **15** И воззревше нань вси седящии в сонмищи, видеша лице его яко лице Ангела.

**7** Рече же архиерей: аще убо сия тако суть? **2** Он же рече: мужие братие и отцы, послушайте. Бог славы явился отцу нашему Аврааму сущу в Месопотамии, прежде даже не вселитися ему в Харрань, **3** и рече к нему: изыди от земли твоя и от рода твоего и от дому отца твоего, и прииди в землю, юже аще ти покажу. **4** Тогда изшед от земли Халдейския, вселися в Харрань: и оттуду, по умертвии отца его, пресели его в землю сию, на нейже вы ныне живете, **5** и не даде ему наследия в ней, ниже стопы ногу: и обеща дати ему ю во одержание и семени его по нем, не сущу ему чаду. **6** Глагола же сице Бог, яко будет семя его пришелцы в земли чуждей, и поработят е и озлобят лет четыреста. **7** И языку, емуже поработают, сужду аз, рече Бог: и по сих изыдут и послужат Ми на месте сем. **8** И даде ему завет обрезания. И тако роди Исаака и обреза его в день осмый: и Исаак Иакова, и Иаков дванадесять патриарх. **9** И патриарси позавидевше Иосифу продаша его во Египет: и бе Бог с ним, **10** и изят его от всех скорбей его, и даде ему благодать и премудрость пред фараоном царем Египетским: и постави его начальника над Египтом и над всем домом своим. **11** Прииде же глад на всю землю Египетскую и Ханааню и скорьбь велия, и не обретаху сытости отцы

наши. 12 Слышав же Иаков сущую пшеницу во Египте, посла отцы наша первее, 13 и вегда второе (приидоша), познан бысть Иосиф братии своей, и яве бысть фараону род Иосифов. 14 Послав же Иосиф призва отца своего Иакова и все сродство свое, семьдесят и пять душ. 15 Сниде же Иаков во Египет, и скончася сам и отцы наши: 16 и принесени быша в Сихем и положени быша во гробе, егоже купи Авраам ценою сребра от сынов Еммора Сихемова. 17 И якоже приближашеся время обетования, имже клятся Бог Аврааму, возрастоша людие и умножишася во Египте, 18 дондеже наста царь ин (во Египте), иже не знаше Иосифа: 19 сей зле умыслив о роде нашем, озлоби отцы наша, уморити младенцы их и не оживити. 20 В неже время родися Моисей и бе угоден Богови, иже питан бысть месяцы три в дому отца своего: 21 извержена же его взят его дщи фараонова и воспита и себе в сына: 22 и наказан бысть Моисей всей премудрости Египетстей, бе же силен в словесех и делех. 23 Егда же исполняшеся ему лет четыредесятих время, възиде на сердце ему посетити братию свою сыны Израилевы: 24 и видев некоего обидима, пособствова и сотвори отмщение обидимому, убив Египтянина. 25 Мняше же разумети братиям своим, яко Бог рукою его даст им спасение: они же не разумеша. 26 Во утрий же день явися им тяжущымся и привлачаше их в примирение, рек: мужие, братия есте вы, вскую обидите друг друга? 27 Обидяй же ближняго отрину его, рек: кто тя постави князя и судию над нами? 28 Еда убити мя ты хочещи, имже образом убил еси вчера Египтянина? 29 Бежа же Моисей о словеси сем и бысть пришлец в земли Мадямстей, идеже роди

сына два. 30 И исполнишымся летом четыредесятим, явися ему в пустыни горы Синайския Ангел Господень в пламени огнене в купине: 31 Моисей же виде дивляшеся видению: приступающу же ему разумети, бысть глас Господень к нему: 32 Аз Бог отец твоих, Бог Авраамов и Бог Исааков и Бог Иаковль. Трепетен же быв Моисей не смеяше смотрити. 33 Рече же ему Господь: изуй сапоги ногу твою, место бо, на немже стоиши, земля свята есть: 34 видя видех озлобление людей Моих, иже во Египте, и стенание их услышах, и снидох изяти их: и ныне гряди, послю тя во Египет. 35 Сего Моисеа, егоже отринуша, рекше: кто ты постави начальника и судию? Сего Бог князя и избавителя посла рукою Ангела явльшагося ему в купине: 36 сей изведе их, сотвори чудеса и знамения в земли Египетстей и в Чермнем мори, и в пустыни лет четыредесять. 37 Сей есть Моисей рекий сыном Израилевым: Пророка вам воздвигнет Господь Бог ваш от братии вашей яко мене: Того послушайте. 38 Сей есть бывый в церкви в пустыни со Ангелом, глаголавшим ему на горе Синайстей, и со отцы нашими, иже прият словеса жива дати нам, 39 егоже не восхотеша послушати отцы наши, но отринуша и и обратишася сердцем своим во Египет, 40 рекше Аарону: сотвори нам боги, иже предидут пред нами, Моисею бо сему, иже изведе нас от земли Египетския, не вемы, что бысть ему. 41 И сотвориша телца во дни оны, и принесоша жертву идолу, и веселяхуся в делех руку своюю. 42 Отвратися же Бог и предаде их служити воем небесным, якоже писано есть в книзе пророк: еда заколения и жертвы принесосте Ми лет четыредесять в пустыни, доме Израилев? 43 И восприясте скинию Молохову и звезду бога



вашего Ремфана, образы, яже сотвористе поклонятся им: и преселю вы далее Вавилона. 44 Сень свидения бяше отцем нашим в пустыни, якоже повеле Глаголяй Моисеови сотворити ю по образу, егоже виде: 45 юже и внесоша приемше отцы наши со Иисусом во одержание языков, ихже изрину Бог от лица отец наших, даже до дний Давида: 46 иже обрете благодать пред Богом и испроси обрести селение Богу Иаковлю. 47 Соломон же созда Ему храм. 48 Но Вышний не в рукотворенных церквах живет, якоже пророк глаголет: 49 Небо Мне престол есть, земля же подножие ногама Моима: кий храм созиждете Ми, глаголет Господь, или кое место покоищу Моему? 50 Не рука ли Моя сотвори сия вся? 51 Жестоковыйнии и необрезаннии сердца и ушесы, вы присно Духу Святому противитесь, якоже отцы ваши, тако и вы: 52 кого от пророк не изгнаша отцы ваши? И убиша предвозвестившыя о пришествии Праведнаго, Егоже вы ныне предатели и убийцы бысте, 53 иже приясте закон устройением Ангелским и не сохранисте. 54 Слышаще же сия, распыхахуся сердца своими и скрежетаху зубы нань. 55 Стефан же сый исполнь Духа Свята, возрев на небо, виде славу Божию и Иисуса стояща о десную Бога, 56 и рече: се, вижу небеса отверста и Сына Человеча о десную стояща Бога. 57 Возопивше же гласом велиим, затыкаху уши свои и устремишася единодушно нань, 58 и изведше вне града, камением побиваху его: и свидетелие (снемше) ризы своя положиша при ногу юноши нарицаемаго Савла, 59 и камением побиваху Стефана, молящася и глаголюща: Господи Иисусе, приими дух мой. 60 Преклонь же колена,

возопи гласом велиим: Господи, не постави им греха сего. И сия рек успе.

**8** Савл же бе соизволяя убийству его. Бысть же в той день гонение велие на церковь Иерусалимскую: вси же разсеяшася по странам Иудейским и Самарийским, кроме Апостол: **2** погребоша же Стефана мужие благоговейнии и сотвориша плачь велий над ним. **3** Савл же озлобляше церковь, в дома входя, и влача мужы и жены, предаше в темницу. **4** Разсеявшиися же прохождаху, благовествующе слово. **5** Филипп же сошед во град Самарийский, проповедаше им Христа: **6** внимаху же народи глаголемым от Филиппа единодушно, слышаще и видяще знамения, яже творяше: **7** дуси бо нечистии от многих имущих я, вопиюще гласом велиим, исхождаху, мнози же расслабленнии и хромии исцелишася: **8** и бысть радость велия во граде том. **9** Муж же некий, именем Симон, прежде бе во граде волхвуйа и удивляя язык Самарийский, глаголя некоего быти себе велика, **10** емуже внимаху вси от мала даже до велика, глаголюще: сей есть сила Божия великая. **11** Внимаху же ему, зане довольно время волхвовании удивляше их. **12** Егда же вероваша Филиппу благовествующе яже о Царствии Божии и о имени Иисус Христове, крещахуся мужие же и жены. **13** Симон же и сам верова и крещься бе пребывая у Филиппа: видя же силы и знамения велия бываема, ужасен дивляшеся. **14** Слышавше же иже во Иерусалиме Апостоли, яко прият Самариа слово Божие, послаша к ним Петра и Иоанна, **15** иже сошедше помолишася о них, яко да примут Духа Святаго: **16** еще бо ни на единого их бе пришел, точию крещени бяху во имя Господа Иисуса: **17** тогда возложиша

руце на ня, и прияша Духа Святаго. 18 Видев же Симон, яко возложением рук Апостолских дается Дух Святый, принесе им сребро, 19 глаголя: дадите и мне власть сию, да, на негоже аще положу руке, приимет Духа Святаго. 20 Петр же рече к нему: сребро твое с тобою да будет в погибель, яко дар Божий непщевал еси сребром стяжати: 21 несть ти части ни жребия в словеси сем, ибо сердце твое несть право пред Богом: 22 покайся убо о злобе твоей сей и молися Богу, аще убо отпустится ти помышление сердца твоего: 23 в желчи бо горести и союзе неправды зрю тя суща. 24 Отвещав же Симон рече: помолитесь вы о мне ко Господу, яко да ничтоже сих найдет на мя, яже рекосте. 25 Они же убо, засвидетельствовавше и глаголавше слово Господне, возвратишася во Иерусалим и многим весем Самарийским благовестиша. 26 Ангел же Господень рече к Филиппу, глаголя: востани и иди на полудне, на путь сходящий от Иерусалима в Газу: и той есть пуст. 27 И востав пойде: и се, муж Мурин, евнух силен Кандакии царицы Муринския, иже бе над всеми сокровищи ея, иже прииде поклонитися во Иерусалим: 28 бе же возвращаяся, и сидя на колеснице своей, чтяше пророка Исаию. 29 Рече же Дух к Филиппу: приступи и прилепися колеснице сей. 30 Притек же Филипп услыша его чтуща пророка Исаию и рече: убо разумеши ли, яже чтеши? 31 Он же рече: како убо могу (разумети), аще не кто наставит мя? Умоли же Филиппа, да возшед сядет с ним. 32 Слово же Писания, еже чтяше, бе сие: яко овча на закление ведется, и яко агнец прямо стригущему его безгласен, тако не отверзает уст Своих: 33 во смирении Его суд Его взятся, род же Его кто исповесть?

Яко вземлется от земли живот Его. 34 Отвещав же каженик к Филиппу, рече: молю тя, о ком пророк глаголет сие? О себе ли, или о инем некоем? 35 Отверз же Филипп уста своя и начен от Писания сего, благовести ему Иисуса. 36 Якоже идяху путем, приидоша на некую воду, и рече каженик: се, вода: что возбраняет ми креститися? 37 Рече же ему Филипп: аще веруеши от всего сердца твоего, мощно ти есть. Отвещав же рече: верую Сына Божия быти Иисуса Христа. 38 И повеле стати колеснице: и снидоста оба на воду, Филипп же и каженик: и крести его. 39 Егда же изыдоста от воды, Дух Святый нападе на каженика: Ангел же Господень восхити Филиппа, и не виде его ктому каженик, идяше бо в путь свой радуясь. 40 Филипп же обретесе во Азоте и проходя благовествоваше градом всем, дондеже приити ему в Кесарию.

**9** Савл же, еще дыхая прещением и убийством на ученики Господни, приступль ко архиерею, 2 испроси от него послания в Дамаск к соборищем, яко да аще некия обрящет того пути сущья, мужы же и жены, связаны приведет во Иерусалим. 3 Внегда же ити, бысть ему приблизитися к Дамаску, и внезапно облиста его свет от небесе: 4 и пад на землю, слыша глас глаголющ ему: Савле, Савле, что Мя гониши? 5 Рече же: кто еси, Господи? Господь же рече: Аз есмь Иисус, Егоже ты гониши: жестоко ти есть противу рожну прати. 6 Трепещя же и ужасаяся глагола: Господи, что мя хочещи творити? И Господь рече к нему: востани и вниди во град, и речется ти, что ти подобает творити. 7 Мужие же идуции с ним стояху чудящися, глас убо слышаще, но ни когоже видяще. 8 Воста же Савл от земли и отверстыма очима своима ни единого

видяше: ведуще же его за руку, введоша в Дамаск: 9 и бе дни три не видя, и ни яде, ниже пияше. 10 Бе же некто ученик в Дамасце, именем Анания, и рече к нему Господь в видении: Анание. Он же рече: се, аз, Господи. 11 Господь же к нему: востав поиди на стогну нарицаемую Правую и взыщи в дому Иудове Савла именем, Тарсянина: се бо, молитву деет 12 и виде в видении мужа, именем Ананию, вшедша и возложша нань руку, яко да прозрит. 13 Отвеща же Анания: Господи, слышах от многих о мужи сем, колика зла сотвори святым Твоим во Иерусалиме: 14 и zde имать власть от архиерей связати вся нарицающыя имя Твое. 15 Рече же к нему Господь: иди, яко сосуд избран Ми есть сей, пронести имя Мое пред языки и царьми и сынми Израилевыми: 16 Аз бо скажу ему, елика подобает ему о имени Моем пострадати. 17 Пойде же Анания и вниде в храмину, и возложь нань руце, рече: Савле брате, Господь Иисус явлейтися на пути, имже шел еси, посла мя, яко да прозриши и исполнишися Духа Свята. 18 И абие отпадоша от очию его яко чешуя: прозре же абие, и востав крестися, 19 и приемь пищу, укрепися. Бысть же Савл с сущими в Дамасце учениками дни некия: 20 и абие на сонмищих проповедаше Иисуса, яко Сей есть Сын Божий. 21 Дивляхуся же вси слышавшии и глаголаху: не сей ли есть гонивый во Иерусалиме нарицающыя имя сие, и zde на сие прииде, да связаны тыя приведет ко архиереем? 22 Савл же паче крепляшеся и смущаше Иудей живущыя в Дамасце, препирая, яко Сей есть Христос. 23 Якоже исполнишася дние доволни, совещааша Иудее убити его, 24 уведан же бысть Савлу совет их: стражаху же врат день и ночь, яко да убьют его: 25 поемше же его ученицы

нощию, свесиша по стене в кошнице. 26 Пришед же Савл во Иерусалим, покушашеся прилепятся учеником: и вси бояхуся его, не верующе, яко есть ученик. 27 Варнава же приемь его, приведе ко Апостолом и поведи им, како на пути виде Господа, и яко глагола ему, и како в Дамасце дерзаше о имени Иисусове. 28 И бяше с ними входя и исходя во Иерусалиме и дерзая о имени Господа Иисуса. 29 Глаголаше же и стязашеся с Еллины: они же искаху убити его. 30 Разумевше же братия, сведоша его в Кесарию и отпустиша его в Тарс. 31 Церкви же по всей Иудеи и Галилеи и Самарии имеяху мир, созидающыяся и ходящя в страхе Господни, и утешением Святаго Духа умножахуся. 32 И бысть Петру, посещающу всех, снити и ко святым живущым в Лидде: 33 обрете же тамо человека некоего, именем Енея, от осми лет лежаща на одре, иже бе разслаблен. 34 И рече ему Петр: Енее, исцеляет тя Иисус Христос: востани с постели твоея. И абие воста: 35 и видеша его вси живуции в Лидде и во Ассароне, иже обратишася ко Господу. 36 Во Июппии же бе некая ученица, именем Тавифа, яже сказаема глаголется серна: сия бяше исполнена благих дел и милостынь, яже творяше. 37 Бысть же во дни тыя, болевшей ей умрети: омывше же ю, положиша в горнице. 38 Близ же сущей Лидде Июппии, ученицы слышавше, яко Петр есть в ней, послаша два мужа к нему, моляще его не обленитися приити до них. 39 Востав же Петр иде с нима: егоже пришедша возведоша в горницу, и предсташа ему вся вдовицы плачущя и показующя ризы и одежды, елика творяше, с ними сущи, Серна. 40 Изгнав же вон вся Петр, преклонь колена помолися, и обращься к телу, рече: Тавифо, востани. Она же отверзе очи

свои, и видевши Петра, седе. 41 Подав же ей руку, воздвиже ю, и призвав святых и вдовицы, постави ю живу. 42 Уведано же бысть се по всей Июппии, и мнози вероваша в Господа. 43 Бысть же дни доволны пребыти ему во Июппии у некоего Симона усмаря.

**10** Муж же некий бе в Кесарии, именем Корнилий, сотник от спиры нарицающийся Италийския, 2 благоговеин и бояйся Бога со всем домом своим, творяй милостыни многи людем и моляйся Богу всегда: 3 виде в видении яве, яко в час девятый дне, Ангела Божия сшедша к нему и рекша ему: Корнилие. 4 Он же воззрев на нь и пристрашен быв рече: что есть, Господи? Рече же ему: молитвы твоя и милостыни твоя въздоша на память пред Бога: 5 и ныне послы во Июппию мужей и призови Симона, нарицаемаго Петра: 6 сей странствует у некоего Симона усмаря, емуже есть дом при мори: той речет тебе глаголы, в нихже спасешия ты и весь дом твой. 7 И якоже отиде Ангел глаголяй Корнилию, пригласив два от рабов своих и воина благочестива от служащих ему 8 и сказав им вся, посла их во Июппию. 9 Воутрие же, путешествующым им и ко граду приближающимся, възиде Петр на горницу помолитися, о часе шестем. 10 Бысть же приалчен и хотяше вкусити: готовящим же онем, нападе на нь ужас, 11 и виде небо отверсто и сходящ на нь сосуд некий, яко плащаницу велию, по чetyрем краем привязан и низу спущаемъ на землю, 12 в немже бяху вся четвероногая земли и зверие и гади и птицы небесныя. 13 И бысть глас к нему: востав, Петре, заколи и яждь. 14 Петр же рече: никакоже, Господи, яко николиже ядох всяко скверно или нечисто. 15 И (се) глас паки к нему

вторицею: яже Бог очистил есть, ты не скверни. 16 Сие же бысть трищи: и паки взяся сосуд на небо. 17 Якоже в себе недоумевашеся Петр, что бы было видение, еже виде, и се, мужие посланнии от Корнилия, вопроше и уведевше дом Симонов, сташа пред враты 18 и возглашше вопрошаху, аще Симон, нарицаемый Петр, zde странствует. 19 Петру же размышляюще о видении, рече ему Дух: се, мужие трие ищут тебе: 20 но востав сниди и иди с ними, ничтоже разсуждая: зане Аз послах их. 21 Сошед же Петр к мужем посланным к нему от Корнилия, рече: се, аз есмь, егоже ищите: кая есть вина, еяже ради приидосте? 22 Они же рекоша: Корнилий сотник, муж праведен и бояйся Бога, свидетелствован от всего языка Иудейска, увещен есть от Ангела свята призвати тя в дом свой и слышати глаголы от тебе. 23 Призвав же их учреди: наутрие же Петр востав иде с ними, и неции от братьей, иже от Июппии, идоша с ним: 24 и наутрие внидоша в Кесарию. Корнилий же бе чая их, созвав сродники своя и любезныя други. 25 Якоже бысть внити Петру, срете его Корнилий, и пад на ногу его поклонися. 26 Петр же воздвиже его, глаголя: востани: и аз сам человек есмь. 27 И с ним беседуя, вниде и обрете собравшыяся многи: 28 рече же к ним: вы весте, яко не лепо есть мужу Иудеанину прилепятся или приходити ко иноплеменику: и мне Бог показа ни единого скверна или нечиста глаголати человека: 29 темже и без сумнения приидох призван: вопрошаю вы убо, коея ради вины посласте по мене? 30 И Корнилий рече: от четвертаго дне даже до сего часа бех постяся и в девятый час моляся в дому моем: и се, муж ста предо мною во одежди светле 31 и рече: Корнилие, услышана бысть



молитва твоя, и милостыни твоя помянушася пред Богом: 32 послѣ убо во Иѹппію и призови Симона, иже нарицается Петр: сей странствует в дому Симона усмаря близ моря: иже пришед возглаголет тебе. 33 Абие убо послах к тебе, ты же добре сотворил еси пришед: ныне убо вси мы пред Богом предстоим слышати вся повеленная тебе от Бога. 34 Отверз же Петр уста, рече: поистинне разумеваю, яко не на лица зрит Бог, 35 но во всяцем языке бойся Его и делаяй правду приятен Ему есть: 36 слово, еже посла сыном Израилевым, благовествуя мир Иисус Христом: Сей есть всем Господь: 37 вы весте глагол бывший по всей Иудеи, наченшийся от Галилеи, по крещении, еже проповеда Иоанн: 38 Иисуса, Иже от Назарета, яко помаза Его Бог Духом Святым и силою, Иже пройде благодатствуя и исцеляя вся насилуванныя от диавола, яко Бог бжше с Ним: 39 и мы есмы свидетеле всех, яже сотвори во стране Иудейстей и во Иерусалиме: Егоже и убиша, повешше на древе. 40 Сего Бог воскресил в третій день и даде Ему явлену быти, 41 не всем людем, но нам свидетелем преднаренными от Бога, иже с Ним ядохом и пихом, по воскресении Его от мертвых: 42 и повеле нам проповедати людем и засвидетелствовати, яко Той есть нареченный от Бога Судия живым и мертвым: 43 о Сем вси пророцы свидетельствуют, оставление грехов прияти именем Его всякому верующему в Онъ. 44 Еще же глаголющу Петру глаголы сия, нападе Дух Святыи на вся слышашыя слово. 45 И ужасошася иже от обрезания вернии, елицы приидоша с Петром, яко и на языки дар Святаго Духа излися: 46 слышаху бо их глаголющих языки и величающих Бога. Тогда отвеща Петр: 47 еда воду возбранити может кто, еже не

креститися сим, иже Дух Святыи прияша, якоже и мы? **48**  
Повеле же им креститися во имя Иисус Христово. Тогда  
молиша его пребыти у них дни некия.

**11** Слышаша же Апостоли и братия сущии во Иудеи,  
яко и языцы прияша слово Божие. **2** И егда възде Петр  
во Иерусалим, препирахуся с ним иже от обрезания, **3**  
глаголюще, яко к мужем обрезания не имущым вшел еси  
и ял еси с ними. **4** Начен же Петр, сказоваше им порядку,  
глаголя: **5** аз бех во граде Июппийстем моляся и видех во  
ужасе видение, сходящъ сосуд некий, яко плащаницу велию,  
от четырех краев низпускаему с небесе, и прииде даже до  
мене: **6** в нюже воззрев смотрях, и видех четвероногая  
земная и звери и гады и птицы небесныя. **7** Слышаша же  
глас глаголющъ мне: востав, Петре, заколи и яждь. **8** Рех же:  
никакоже, Господи, яко всяко скверно или нечисто николиже  
вниде во уста моя. **9** Отвеща же ми глас вторицею с небесе  
глаголющъ: яже Бог очистил есть, ты не скверни. **10** Сие же  
бысть трижды: и паки взяшася вся на небо. **11** И се, абие  
трие мужие сташа пред храминою, в нейже бех, послани от  
Кесарии ко мне. **12** Рече же ми Дух ити с ними, ничтоже  
разсуждая: приидоша же со мною и шесть братия сии, и  
внидохом в дом мужа. **13** И возвести нам, како виде Ангела  
(свята) в дому своем, ставша и рекша ему: посли во Июппию  
мужы и призови Симона, нарицаемаго Петра, **14** иже речет  
глаголы к тебе, в нихже спасешися ты и весь дом твой. **15**  
Внегда же начаша глаголати, нападе Дух Святыи на них, якоже  
и на ны в начале. **16** Помянух же глаголгол Господень, якоже  
глаголаше: Иоанн убо крестил есть водою, вы же имате  
креститися Духом Святым. **17** Аще убо равен дар даде им

Бог, якоже и нам веровавшим в Господа нашего Иисуса Христа, аз же кто бех могый возбранити Бога? 18 Слышавше же сия умолкоша и славляху Бога, глаголюще: убо и языком Бог покаяние даде в живот. 19 Разсеявшиися убо от скорби, бывшия при Стефане, проидоша даже до Финикии и Кипра и Антиохии, ни единому же глаголюще слово, токмо Иудеем. 20 Бяху же нецыи от них мужие Кипрстии и Киринейстии, иже, вшедше во Антиохию, глаголаху к Еллином, благовествующе Господа Иисуса. 21 И бе рука Господня с ними: многое же число веровавше обратишася ко Господу. 22 Слышано же бысть слово о них во ушию церкви сущия во Иерусалиме, и послаша Варнаву преити даже до Антиохии: 23 иже пришед и видев благодать Божию, возрадовася и моляше всех изволением сердца терпети о Господе: 24 яко бе муж благ и исполнь Духа Свята и веры. И приложися народ мног Господеву. 25 Изыде же Варнава в Тарс взыскати Савла, и обрет его, приведе его во Антиохию: 26 бысть же им лето цело собиратися в церкви и учити народ мног, нареци же прежде во Антиохии ученики Христианы. 27 В тыя же дни снидоша от Иерусалима пророцы во Антиохию: 28 востав же един от них, именем Агав, назнаменаше Духом глад велик хотящъ быти по всей вселенней, иже и бысть при Клавдии кесари: 29 от ученик же, по елику кто имевше что, изволиша кийждо их на службу послати живущым во Иудеи братиям, 30 еже и сотвориша, пославше к старцем рукою Варнавлею и Савлею.

**12** Во оно же время возложи Ирод царь руце озлобити некия иже от церкви, 2 уби же Иакова, брата Иоаннова, мечем: 3 и видев, яко годь ест Иудеем, приложи яти и

Петра: бяху же дние опресночнии: 4 егоже и емь всади в темницу, предав четьрем четверицам воинов стрещи его, хотя по Пасце извести его к людем. 5 И убо Петра стражаху в темнице: молитва же бе прилежна бываемая от церкви к Богу о нем. 6 Егда же хотяше его извести Ирод, в нощи той бе Петр спя между двема воинома, связан (железнома) ужема двема, стражие же пред дверьми стражаху темницы. 7 И се, Ангел Господень предста, и свет возсия в храмине: толкнув же в ребра Петра, воздвиже его, глаголя: востани вскоре. И спадоша ему узя (железная) с руку. 8 Рече же Ангел к нему: препояшися и вступи в плесницы твоя. Сотвори же тако. И глагола ему: облещься в ризу твою и последствуй ми. 9 И изшед вслед его идяше и не ведаше, яко истина есть бывшее от Ангела, мняше же видение зрети. 10 Прошедша же первую стражу и вторую, приидоста ко вратом железным, вводящим во град, яже о себе отверзошася има: и изшедша преидоста стогну едину, и абие отступи Ангел от него. 11 И Петр быв в себе, рече: ныне вем воистинну, яко посла Бог Ангела Своего и изят мя из руки Иродовы и от всего чаяния людий Иудейских. 12 Смотрив же прииде в дом Марии матери Иоанна, нарицаемаго Марка, идеже бяху мнози собрани и молящися. 13 Толкнувшу же Петру во врата двора, приступи слышати отроковица, именем Роди, 14 и познавши глас Петров, от радости не отверзе врат, притекши же сказа Петра стояща пред враты. 15 Они же к ней реша: беснуешися ли? Она же крепляшеся тако быти. Они же глаголаху: Ангел его есть. 16 Петр же пребываше толкий: отверзше же видеша его и ужасошася. 17 Помаав же им рукою молчати, сказа им, како Господь его изведе

из темницы: рече же: возвестите Иакову и братиям сия. И  
изшед иде во ино место. 18 Бывшу же дню, бе молва не мала  
в воинех, что убо Петру бысть: 19 Ирод же, поискав его и не  
обрет и истязав стражы, повеле отвести их: и изшед от Иудей  
в Кесарию, живяше. 20 Бе же Ирод гневаяся на Тиряны и  
Сидоняны: иже единодушно приидоша к нему, и умоливше  
Власта постельника царева, прошаху мира, понеже страны  
их от царства его питахуся. 21 В нареченный же день Ирод,  
оболкся во одежду царску и сед на судище пред народом,  
глаголаше к ним, 22 народ же возглашаше: глас Божий, а не  
человечь. 23 Внезапу же порази его Ангел Господень, зане  
не даде славы Богу: и быв червьми изяден, издше. 24 Слово  
же Божие растяше и множашеся. 25 Варнава же и Савл  
возвратистася из Иерусалима во Антиохию, исполнивша  
службу, поемша с собою и Иоанна, нарицаемого Марка.

**13** Бяху же нецыи во церкви сущей во Антиохии пророцы  
и учителяе: Варнава же и Симеон нарицаемый Нигер, и  
Лукий Киринеанин, и Манаил со Иродом четвертовластником  
воспитанный, и Савл. 2 Служащым же им Господеви и  
постящымся, рече Дух Святый: отделите Ми Варнаву и  
Савла на дело, на неже призвах их. 3 Тогда постившеся и  
помолившеся и возложше руки на ня, отпустиша их. 4 Сия  
убо, послана бывша от Духа Свята, снисоста в Селевкию,  
оттуда же отплыста в Кипр, 5 и бывша в Саламине,  
возвещаста слово Божие в сонмищих Иудейских: имеяста  
же и Иоанна слугу. 6 Прошедша же остров даже до Пафа,  
обретоста некоего мужа волхва лжепророка Иудеанина,  
емуже имя Вариисус, 7 иже бе со анфипатом Сергием  
Павлом, мужем разумным. Сей призвав Варнаву и Савла,

взыска услышати слово Божие: 8 сопротивляшесе же има Елима волхв, тако бо сказуется имя его, иский развратити анфипата от веры. 9 Савл же, иже и Павел, исполнися Духа Свята, и воззрев на нь, 10 рече: о, исполненне всякия лъсти и всякия злобы, сыне диаволь, враже всякия правды, не престанеши ли развращая пути Господни правыя? 11 И ныне, се, рука Господня на тя, и будеши слеп, не видя солнца до време. Внезапу же нападе на нь мрак и тма, и осязая искаше вожда. 12 Тогда виде анфипат бывшее, верова, дився о учении Господни. 13 Отвезшесе же от Пафа Павел и сущии с ним, приидоша в Пергию Памфилийскую: Иоанн же, отлучився от них, возвратися во Иерусалим. 14 Они же, прошедше от Пергии, приидоша во Антиохию Писидийскую, и вшедше в сонмище в день субботный, седоша. 15 По чтении же закона и пророк, послаша начальницы сонмища к ним, глаголюще: мужие братие, аще есть слово в вас утешения к людем, глаголите. 16 Востав же Павел и помаав рукою, рече: мужие Израильтяне и боящиися Бога, услышите: 17 Бог людий сих избра отцы наша и люди вознесе в пришелствии в земли Египетстей, и мышцею высокою изведе их из нея 18 и до четыредесяти лет препита их в пустыни: 19 и низложив язык седмь в земли Ханаанстей, даде им в наследие землю их, 20 и по сих, яко лет четыреста и пятьдесят, даде им судии до Самуила пророка: 21 и оттуду просиша царя, и даде им Бог Саула сына Кисова, мужа от колена Вениаминова, лет четыредесять: 22 и преставль его, воздвиже им Давида в царя, емуже и рече свидетелствовав: обретох Давида сына Иессеова, мужа по сердцу Моему, иже сотворит вся хотения Моя. 23 От сего семене Бог по обетованию воздвиже Израилю

Спасение Иисуса, 24 проповедавшу Иоанну пред лицом  
внития Его крещение покаяния всем людем Израилевым.  
25 И якоже скончаваше Иоанн течение, глаголаше: кого мя  
непщуете быти? Несмь аз, но се, грядет по мне, Емуже несмь  
достойн разрешити ремень сапогу Его. 26 Мужие братие,  
сынове рода Авраамля, и иже в вас боящися Бога, вам  
слово спасения сего послася. 27 Живущии бо во Иерусалиме  
и князи их, сего не разумевше, и гласы пророческия по вся  
субботы чтomyя, осудивше (Его), исполниша, 28 и ни единыя  
вины смертныя обретше, просиша у Пилата убити Его: 29  
якоже скончаша вся, яже о Нем писана, снемше с древа,  
положиша во гробе. 30 Бог же воскреси Его от мертвых: 31  
иже являшеся во дни многи совозшедшым с Ним от Галилеи  
во Иерусалим, иже ныне суть свидетелие Его к людем. 32 И  
мы вам благовествуем обетование бывшее ко отцем, яко  
сие Бог исполнил есть нам чадом их, воздвиг Иисуса, 33  
якоже и во псалме вторем писано есть: Сын Мой еси Ты, Аз  
днесь родих Тя. 34 А якоже воскреси Его от мертвых, не  
ктому хотяща возвратитися во истление, сице рече: яко дам  
вам преподобная Давидова верная. 35 Темже и в другом  
глаголет: не даси Преподобному Твоему видети истления. 36  
Давид бо, своему роду послужив Божиим советом, успе, и  
приложися ко отцем своим, и виде истление: 37 а Егоже  
Бог воздвиге, не виде истления. 38 Ведомо убо да будет  
вам, мужие братие, яко Его ради вам оставление грехов  
проповедается: 39 и от всех, от нихже не возмогосте в законе  
Моисеове оправдитися, о Сем всяк веруай оправдается. 40  
Блюдите убо, да не приидет на вас реченное во пророцех:  
41 видите, нерадивии, и чудитесь, и узрите и исчезнете: яко

дело Аз соделаю во дни ваша, емуже не имате веровати, аще кто повесть вам. 42 Исходящым же им от сонмища Иудейска, моляху языцы в другую субботу глаголатися им глаголом сим: 43 разшедшуся же собору, последоваша мнози от Иудей и честивых пришлец Павлу и Варнаве, иже, глаголюща им, увещаста их пребывати в благодати Божией. 44 Во грядущую же субботу мало не весь град собрася послушати слова Божия: 45 видевше же Иудее народы, исполнишася зависти и вопреки глаголаху глаголемым от Павла, сопротив глаголюще и хуляще. 46 Дерзнувша же Павел и Варнава рекоста: вам бе лепо первее глаголати слово Божие: а понеже отвергосте е и недостойны творите сами себе вечному животу, се, обращаемся во языки: (aiōnios g166) 47 тако бо заповеда нам Господь: положих Тя во свет языком, еже быти Тебе во спасение даже до последних земли. 48 Слышаше же языцы радовахуся и славляху слово Господне, и вероваша, елицы учинени бяху в жизнь вечную: (aiōnios g166) 49 проношашеся же слово Господне по всей стране. 50 Иудее же наустиша честивыя жены и благообразныя и старейшины града, и воздвигоша гонение на Павла и Варнаву, и изгнаша я от предел своих. 51 Она же, отрясша прах от ног своих на них, приидоста во Иконию. 52 Ученицы же исполняхуся радости и Духа Свята.

**14** Бысть же во Иконии, вкупе внити има в сонмище Иудейское и глаголати тако, яко веровати Иудеев и Еллинов множеству многу. 2 Неверующии же Иудее воздвигоша и озлобиша души языков на братию. 3 Доволно же убо время пребыста дерзающа о Господе, Свидетелствующем слову благодати Своя и дающем знамения и чудеса быти



рукама их. 4 Разделиша же ся множество града, и ови убо бяху со Иудеи, ови же со Апостолы. 5 И егда бысть стремление языком же и Иудеем с начальники их досадити и камением побити их, 6 уведевша же прибегоста во грады Ликаонския, в Листру и Дервию, и во окрестныя их, 7 и тамо беста благовествующа. 8 И некто муж в Листрех немощен ногама седяше, хром от чрева матере своея сый, иже николиже бе ходил. 9 Сей слышаше Павла глаголюща: иже воззрев нань и видев, яко веру имать здрав быти, 10 рече велиим гласом: тебе глаголю во имя Господа Иисуса Христа, встани на ногу твою прав. И абие возсочи и хождаше. 11 Народи же видевшы, еже сотвори Павел, воздвигоша глас свой, ликаонски глаголюще: бози уподобльшеся человеком снидоша к нам. 12 Наричаху же убо Варнаву Диа, Павла же Ермиа, понеже той бяше начальник слова. 13 Жрец же Диев, сущаго пред градом их, приведе юнцы и (принесе) венцы пред врата, с народы хотяше жрети. 14 Слышавша же Апостола Варнава и Павел, растерзавша ризы своя, вскочиста в народ, зовуща и глаголюща: 15 мужие, что сия творите? И мы подобострастна есма вам человека, благовествующа вам от сих суетных обращаться к Богу Живу, Иже сотвори небо и землю и море и вся, яже в них: 16 Иже в мимошедшыя роды оставил бе вся языки ходити в путех их: 17 и убо не несвидетелствована Себе остави, благотворя, с небесе нам дожди дая и времена плодоносна, исполняя пищу и веселием сердца наша. 18 И сия глаголюща, едва устависта народы не жрети има, но отити коемуждо во своя си. Пребывающема же има и учащема, 19 приидоша от Антиохии и Иконии нецыи Иудее,

и стязающемася има с дерзновением, наустиша народы отступити от нею, глаголюще, яко ничтоже истинно глаголет, но все лжета. И наустивше народы и камением побивше Павла, извлекоша вне града, мняще его умерша. 20 Окрест же ставшым его учеником, востав вниде во град и наутрие изыде с Варнавою в Дервию. 21 Благовествовавша же граду тому и научивша многи, возвратистася в Листру и Иконию и Антиохию, 22 утверждающа души учеников, моляща пребыти в вере, и яко многими скорбьми подобает нам внити в Царствие Божие. 23 Рукоположша же им пресвитеры на вся церкви и помолившася с постом, предаста их Господеву, в Негоже увероваша. 24 И прошедша Писидию, приидоста в Памфилию: 25 и глаголавша в Пергии слово Господне, снидоста во Атталию 26 и оттуду отплыста во Антиохию, отнюдуже беста предана благодати Божией в дело, еже скончаста. 27 Пришедша же и собравша церковь, сказаста, елика сотвори Бог с нима и яко отверзе языком дверь веры: 28 пребыста же тамо время не мало со ученики.

**15** И нецыи шедше от Иудеи, учяху братию, яко аще не обрежетесь по обычаю Моисеову, не можете спастися. 2 Бывшей же распри и стязанию не малу Павлу и Варнаве к ним, учиниша взыти Павлу и Варнаве и неким другим от них ко Апостолом и старцем во Иерусалим о вопрошении сем. 3 Они же убо, предпослани бывше от церкви, прохождаху Финикию и Самарию, поведаяще обращение языков, и творяху радость велию всей братии. 4 Пришедше же во Иерусалим, прияти быша от церкви и Апостол и старец, сказаша же, елика сотвори Бог с ними и яко отверзе языком дверь веры. 5 Восташа же нецыи от ереси фарисейския веровавши,

глаголюще, яко подобает обрезать их, завещавати же блюсти закон Моисеов. 6 Собрашася же Апостоли и старцы ведети о словеси сем. 7 Многу же взысканию бывшу, востав Петр рече к ним: мужие братие, вы весте, яко от дний первых Бог в нас избра усты моими услышати языком слово Благовестия и веровати: 8 и Сердцеведец Бог свидетелствова им, дав им Духа Святаго, якоже и нам, 9 и ничтоже разсуди между нами же и оными, верою очищъ сердца их: 10 ныне убо что искушаете Бога, (хотяще) возложить иго на выи учеником, егоже ни отцы наши, ни мы возмогохом понести? 11 Но благодатию Господа Иисуса Христа веруем спастися, якоже и они. 12 Умолча же все множество и послушаху Варнавы и Павла поведаящею, елика сотвори Бог знамения и чудеса во языцех има. 13 По умолчании же ею, отвеца Иаков глаголя: мужие братие, послушайте мене: 14 Симеон поведа, яко прежде Бог посети прияти от язык люди о имени Своем: 15 и сему согласуют словеса пророк, якоже пишет: 16 по сих обращуся и созижду кров Давидов падший, и раскопаная его созижду и исправлю его, 17 яко да взыщут прочии человецы Господа, и вси языцы, в нихже наречеса имя Мое, глаголет Господь, творяй сия вся. 18 Разумна от века суть Богови вся дела Его. (αἰὼν ἡ 165) 19 Сего ради аз сужду не стужати от язык обращающимся к Богу, 20 но заповедати им огребатися от треб идолских и от блуда и удавленины и от крове, и елика негодна себе суть, иным не творити. 21 Моисей бо от родов древних по всем градом проповедающья его имать, в сонмищих по вся субботы чтомый. 22 Тогда изволися Апостолом и старцем со всею церковию, избравше мужа от них, послати во Антиохию с Павлом и Варнавою, Иуду

нарицаемаго Варсаву, и Силу, мужа нарочита в братии, **23** написавше рукама их сия: Апостоли и старцы и братия, суцым во Антиохии и Сирии и Киликии братьям, иже от язык, (о Господе) радоватися. **24** Понеже слышахом, яко нецьи от нас изшедше возмутиша вас словесы, развращающе души ваша, глаголюще обрезатися и блюсти закон, имже мы не завещаем: **25** изволися нам собравшымся единодушно, избранныя мужы послати к вам, с возлюбленныма нашими Варнавою и Павлом, **26** човекома предавшема души своя о имени Господа нашего Иисуса Христа: **27** послахом убо Иуду и Силу, и тех словом сказующих таяжде: **28** изволися бо Святому Духу и нам, ничтоже множае возложить вам тяготы, разве нуждных сих: **29** огребатися от идоложертвенных и крове, и удавленины и блуда: и елика не хотите вам быти, другим не творите: от нихже соблюдающе себе, добре сотворите. Здравствуйте. **30** Они же убо послани бывше приидоша во Антиохию, и собравше народ, вдаша послание. **31** Прочетше же, возрадовашася о утешении. **32** Иуда же и Сила, и та пророка суца, словом мнозем утешиста братию и утвердиста. **33** Пребывша же тамо время, отпущена быста с миром от братий ко Апостолом. **34** Изволися же Силе пребыти тамо, Иуда же возвратися во Иерусалим. **35** Павел же и Варнава живяста во Антиохии, учаща и благовествующа слово Господне, и со инеми многими. **36** По неких же днех рече Павел к Варнаве: возвращшеся подобает посетити братию нашу во всех градех, в нихже проповедахом слово Господне, како пребывают. **37** Варнава же восхоте пояти с собою Иоанна нарицаемаго Марка: **38** Павел же глаголаше отступльшаго от наю от Памфилии и не шедшаго с нама

на дело, на неже послани быхом, не пояти сего с собою. 39 Бысть убо распря, яко отлучитися има от себе: Варнава убо поемь Марка отплы в Кипр: 40 Павел же избрав Силу изыде предан благодати Божией от братий, 41 проходил же Сирию и Киликию, утверждая церкви.

**16** Прииде же в Дервию и Листру. И се, ученик некий бе ту, именем Тимофей, сын жены некия Иудеяныни верны, отца же Еллина: 2 иже свидетелствован бе от сущих в Листрех и Иконии братии. 3 Сего восхоте Павел с собою изыти: и приемь обреза его, Иудей ради сущих на местех оных: ведяху бо вси отца его, яко Еллин баше. 4 И якоже проходаху грады, предаваше им хранити уставы сужденныя от Апостол и старец, иже во Иерусалиме. 5 Церкви же утверждахуся верою и прибываху в число по вся дни. 6 Прошедше же Фригию и Галатийскую страну, возбранени (быша) от Святаго Духа глаголати слово во Асии. 7 Пришедше же в Мисию, покушахуся в Вифинию поити: и не остави их Дух. 8 Прешедше же Мисию, снидоша в Троаду. 9 И видение в нощи явися Павлу: муж некий бе Македонянин стоя, моля его и глаголя: пришед в Македонию, помози нам. 10 И якоже видение виде, абие взыскахом изыти в Македонию, разумевше, яко призва ны Господь блавестити им. 11 Отвезшеся же от Троады, приидохом в Самофрак, воутрие же в Неаполь, 12 оттуду же в Филиппы, иже есть первый град части Македонии, колониа. Бехом же в том граде пребывающе дни некия. 13 В день же субботный изыдохом вон из града при реце, идеже мяшеся молитвенница быти, и седше глаголахом к собравшимся женам. 14 И некая жена, именем Лидиа, порфиропродалница от града Фиатирскаго,

чтущи Бога, послушаше: ейже Господь отверзе сердце внимати глаголемым от Павла. 15 Якоже крестися та и дом ея, моляше ны глаголющи: аще усмотристе мя верну Господеви быти, вшедше в дом мой, пребудите. И принуди нас. 16 Бысть же идущым нам на молитву, отроковица некая имущая дух пытлив срете нас, яже стяжание много даяше господем своим волхвующи. 17 Та последовавши Павлу и нам, вzywаше глаголющи: сии человецы раби Бога Вышняго суть, иже возвещают нам путь спасения. 18 Се же творяше на многи дни. Стужив же си Павел и обращься, духови рече: запрещаю ти именем Иисуса Христа, изыди из нея. И изыде в том часе. 19 Видевше же господие ея, яко изыде надежда стяжания их, поемше Павла и Силу, влекоша на торг ко князем, 20 и приведше их к воеводам, реша: сии человецы возмущают град наш, Иудее суще, 21 и завещавают обычаи, яже не достоит нам приимати ни творити, Римляном сущым. 22 И снидесе народ на них, и воеводы растерзавше има ризы, веляху палицами бити их: 23 многи же давше има раны, всадиша в темницу, завещавше темничному стражу твердо стрещи их: 24 иже таково завещание приемь, всади их во внутреннюю темницу и ноги их заби в кладе. 25 В полунощи же Павел и Сила молящася пояста Бога: послушаху же их юзники. 26 Внезапу же трус бысть велий, яко поколебатися основанию темничному: отверзошася же абие двери вся, и всем юзы ослабеша. 27 Возбуждъся же темничный страж и виде отвeрсты двери темницы, извлек нож, хотяше себе убити, мя избегшя юзники. 28 Возгласи же гласом велиим Павел глаголя: ничтоже сотвори себе зла, вси бо есмы zde. 29 Просив же свечи вскочи, и трепетен быв, припаде

к Павлу и Силе, **30** и извед их вон, рече: господие, что ми подобает творити, да спасуся? **31** Она же рекоста: веруй в Господа Иисуса Христа, и спасешися ты и весь дом твой. **32** И глаголаста ему слово Господне, и всем, иже в дому его. **33** И поемь я в тойже час нощи, измы от ран и крестися сам и свои ему вси абие: **34** введ же я в дом свой, постави трапезу и возрадовася со всем домом своим, веровав Богу. **35** Дню же бывшу, послаша воеводы паличники, глаголюще: отпусти человека она. **36** Сказа же темничный страж словеса сия Павлу, яко послаша воеводы, да отпущена будета: ныне убо изшедша, идита с миром. **37** Павел же рече к ним: бивше наю пред людьми, неосужденна человека Римлянина суца, всадиша в темницу, и ныне отай изводят наю? Ни бо: но да пришедше сами изведут наю. **38** Сказаша же паличники воеводам глаголы сия: и убояшася слышавше, яко Римлянина еста. **39** И пришедше умолиша их и изведше моляху изыти из града. **40** Изшедша же из темницы приидоста к Лидии, и видеvша братию, утешиста их и изыдоста.

**17** Прешедша же Амфиполь и Аполлонию, внидоста в Солунь, идеже бе сонмище Иудейское. **2** По обычаю же своему Павел вниде к ним и по субботы три стязашеся с ними от Писаний, **3** сказуя и предлагая им, яко Христу подобаше пострадати и воскреснути от мертвых, и яко Сей Иисус, Егоже аз проповедую вам, есть Христос. **4** И нецыи от них вероваша и приложишася к Павлу и Силе, от честивых Еллин множество много и от жен благородных не мало. **5** Возревновавше же непокоршиися Иудее и приемше крамолники некия мужы злыя, и собравше народ, молвяху

по граду: нашедше же на дом Иассонов, искаху их извести к народу. 6 Не обретше же их, влечаху Иассона и некия от братий ко градоначалником, вопиюще, яко, иже развратиша вселенную, сии и zde приидоша, 7 ихже прият Иассон: и сии вси противно велением кесаревым творят, царя глаголюще иного быти, Иисуса. 8 Смятоша же народ и градоначалники слышащыя сия: 9 возьмше же доволное от Иассона и от прочих, отпустиша их. 10 Братия же абие в нощи отслаша Павла и Силу в Берию: иже пришедша, идоста в собор Иудейский. 11 Сии же бяху благороднейши живущих в Солуни, иже прияша слово со всем усердием, по вся дни разсуждающе Писания, аще суть сия тако. 12 Мнози убо от них вероваша, и от Еллинских жен благообразных и мужей не мало. 13 И яко уведаша иже от Солуны Иудее, яко и в Берии проповедася от Павла слово Божие, приидоша и тамо движуще и смущающе народы. 14 Абие же тогда братия отпустиша Павла ити на поморие: остаста же Сила и Тимофей тамо. 15 Провождяущии же Павла ведоша его даже до Афин, и приемше заповедь к Силе и Тимофею, да яко скорее приидут к нему, изыдоша. 16 Во Афинех же ждущу их Павлу, раздражашеся дух его в нем зрящем идол полн сущь град. 17 Стязашеся же убо на сонмищи со Иудеи и с честивыми, и на торжищи по вся дни с приключаящимися. 18 Нецыи же от епикур и от стоик философ стязахуся с ним: и нецыи глаголаху: что убо хочет суесловивый сей глаголати? Инии же: чуждых богов мнится проповедник быти: яко Иисуса и воскресение благовествоваше им. 19 Поемше же его, ведоша на ареопаг, глаголюще: можем ли разумети, что новое сие глаголемое тобою учение? 20 Странна бо



некая влагаеши во ушеса наша: хоцем убо разумети, что хотят сия быти? 21 Афинее же вси и приходящии страннии ни во чтоже ино упражняхуся, разве глаголати что или слышати новое. 22 Став же Павел посреде ареопага, рече: мужие Афинеисти, по всему зрю вы аки благочестивыя: 23 проходя бо и соглядая чествования ваша, обретох и капище, на немже бе написано: неведомому Богу. Егоже убо не ведуще (благолепне) чтете, Сего аз проповедую вам. 24 Бог сотворивый мир и вся, яже в нем, Сей небесе и земли Господь сый, не в рукотворенных храмах живет, 25 ни от рук человеческих угождения приемлет, требуя что, Сам дая всем живот и дыхание и вся: 26 сотворил же есть от единых крове весь язык человек, жити по всему лицу земному, уставив предучиненая времена и пределы селения их, 27 взыскати Господа, да поне осяжут Его и обрящут, яко не далече от единого коегождо нас суца: 28 о Нем бо живем и движемся и есмы, якоже и нецыи от ваших книжник рекоша: Сего бо и род есмы. 29 Род убо суще Божий, не должны есмы непщевати подобно быти Божество злату, или серебру, или каменю художне начертану, и смышлению человеку: 30 лета убо неведения презирая Бог, ныне повелевает человеком всем всюду покаяться: 31 зане уставил есть день, в оньже хочет судити вселенней в правде, о Муже, Егоже предустави, веру подая всем, воскресив Его от мертвых. 32 Слышавше же воскресение мертвых, овии убо ругахуся, овии же реша: да слышим тя паки о сем. 33 И тако Павел изыде от среды их. 34 Нецыи же мужие прилепившеся ему, вероваша: в нихже бе и Дионисий Ареопагитский, и жена именем Дамарь, и друзии с ними.

**18** По сих же отлучився Павел от Афин, прииде в Коринф: 2 и обрет некоего Иудеанина именем Акилу, Понтянина родом, ново пришедша от Италии, и Прискиллу жену его: зане повелел бяше Клавдий отлучитися всем Иудеем от Рима: прииде к ним, 3 и зане единохудожником быти им, пребысть у них и делаше: бяху бо скинотворцы хитростию. 4 Стязашеся же на сонмищах по вся субботы и препираше Иудеи и Еллины. 5 И егда снидоста от Македонии Сила же и Тимофей, тужаше духом Павел, свидетелствуя Иудеом Иисуса быти Христа. 6 Противящымся же им и хулящым, отряс ризы своя, рече к ним: кровь ваша на главах ваших: чист аз, отныне во языки иду. 7 И прешед оттуду, прииде в дом некоего именем Иуста, чтуща Бога, емуже храма бе вскрай сонмища. 8 Крисп же начальник собора верова Господеви со всем домом своим, и мнози от Коринфян слышавше вероваху и крещася. 9 Рече же Господь в видении нощнем Павлу: не бойся, но глаголи и да не умолкнеша, 10 зане аз есмь с тобою, и никтоже приложит озлобити тя: зане людие суть Ми мнози во граде сем. 11 Пребысть же тамо лето и месяц шесть, учя в них слову Божию. 12 Галлиону же анфипату суцу во Ахаии, нападоша единомушно Иудее на Павла и приведоша его на судилище, 13 глаголюще, яко противу закону сей увещавает человеки чтити Бога. 14 Хотящу же Павлу отверсти уста, рече Галлион ко Иудеем: аще убо неправда была бы кая или дело злое, о, Иудее, по слову послушал бых вас: 15 аще ли же стязания суть о словеси и о именех и о законе вашем, ведите сами: судия бо аз сим не хочу быти. 16 И изгна их от судилища. 17 Емше же вси Еллини Сосфена начальника собора, бияху пред судилищем:

и ни едино о сих Галлиону радение бысть. **18** Павел же, еще пребыв дни доволны и целовав братию, отплы в Сирию, и с ним Акила и Прискилла, остриг главу в Кегхреих: обрекся бо бе. **19** Приста же во Ефесе и тех остави тамо, сам же вшед в сонмище, стязашеся со Иудеи. **20** Молящым же им его на много время пребыти у них, не изволи, **21** но отречеся им, глаголя, яко подобает ми всяко праздник грядущий сотворити во Иерусалиме: паки же возвращаюся к вам, Богу хотящу. И отвезеся от Ефеса: Акила же и Прискилла остава во Ефесе. **22** И сошед в Кесарию, возшед и целовав церковь, сниде во Антиохию, **23** и сотвори время некое, изыде, проходя порядку Галатийскую страну и Фригию, утверждая вся ученики. **24** Иудеанин же некто, Аполлос именем, Александриянин родом, муж словесен, прииде во Ефес, силен сый в книгах. **25** Сей бе оглашен пути Господню, и горя духом, глаголаше и учаще известно яже о Господе, ведый токмо крещение Иоанново. **26** Сей же начат дерзати на сонмищих. Слышавша же его Акила и Прискилла, прияста его и известнее тому сказаста путь Господень. **27** Хотящу же ему преити во Ахаию, предпославше братия написаша учеником прияти его: иже пришед тамо пособствова много веровавшим благодатию: **28** твердо бо Иудеи не престая обличаше пред людьми, сказуя Писаньми, Иисуса быти Христа.

**19** Бысть же внегда быти Аполлосу в Коринфе, Павел, прошед вышняя страны, прииде во Ефес, и обрет некия ученики, **2** рече к ним: аще убо Дух Свят прияли есте веровавше? Они же реша к нему: но ниже аще Дух Святой есть, слышахом. **3** Рече же к ним: во что убо крестистеся? Они же рекоша: во Иоанново крещение. **4** Рече же Павел:

Иоанн убо крести крещением покаяния, людем глаголя, да во Грядущаго по нем веруют, сиречь во Христа Иисуса. 5 Слышавше же крестишася во имя Господа Иисуса, 6 и возложшу Павлу на ня руке, прииде Дух Святый на ня, глаголаху же языки и пророчествоваху. 7 Бяше же всех мужей яко дванадесять. 8 Вшед же в сонмище, дерзаше, не обвиняя три месяцы беседуя и уверяя, яже о Царствии Божии. 9 И егда нецыи ожесточахуся и пряхуся, злословяще путь Господень пред народом, отступль от них отлучи ученики, по вся дни стязаяся во училищи мучителя некоего. 10 Сие же бысть два лета, яко всем живущым во Асии слышати слово Господа Иисуса, Жидом же и Еллином. 11 Силы же не просты творяше Бог рукама Павловыма, 12 яко и на недужныя наносити от (пота) тела его главоотяжы и убрूसцы, и исцелитися им от недуг, и духом лукавым исходити от них. 13 Начаша же нецыи от скитающихся Иудей заклинателей именовати над имущими духи лукавыя имя Господа Иисуса, глаголюще: заклинаем вы Иисусом, Егоже Павел проповедует. 14 Бяху же нецыи сынове Скевы Иудеанина архиереа седмь, иже сие творяху. 15 Отвещав же дух лукавый рече: Иисуса знаю и Павла свем, вы же кто есте? 16 И скачя на них человек, в немже бе дух лукавый, и одолев им, укрепися на них, якоже нагим и ураненым избежати от храма онаго. 17 Сие же бысть разумно всем живущым во Ефесе Иудеем же и Еллином, и нападе страх на всех их, и величашеся имя Господа Иисуса: 18 мнози же от веровавших прихождаху, исповедающе и сказующе дела своя: 19 доволни же от сотворших чародеяния, собравше книги своя, сожигаху пред всеми: и сложиша цены их и

обретоша сребра пять тем. 20 Сице крепко слово Господне  
растяше и крепляшеса. 21 И якоже скончашася сия, положи  
Павел в душе, прошед Македонию и Ахаию, ити во Иерусалим,  
рек, яко бывшу ми тамо, подобает ми и Рим видети. 22  
Послав же в Македонию два от служащих ему, Тимофеа и  
Ераста, сам же пребысть время во Асии. 23 Бысть же во  
время оно молва не мала о пути Господни: 24 Димитрий  
бо некто именем, среброковачь, творяй храмы сребряны  
Артемиде, подаяше хитрецем делание не мало, 25 ихже  
собрав и ины сицевых вещей делатели, рече: мужие, весте,  
яко от сего делания доволство житию нашему есть: 26 и  
видите и слышите, яко не токмо Ефес, но мало не всю Асию  
Павел сей препрев, обрати мног народ, глаголя, яко не суть  
бози, иже руками человеческими бывают: 27 не токмо же сия  
беду приемлет наша часть, еже бы во обличение не приити,  
но дабы и великия богини Артемиды храм ни во чтоже не  
вменился, имать же разоритися и величество ея, юже вся  
Асия и вселенная почитает. 28 Слышавше же и бывше  
исполнени ярости, вопияху глаголюще: велика Артемида  
Ефесская. 29 И исполнися град весь мятежа: устремишася  
же единодушно на позорище, восхищше Гаиа и Аристарха  
Македоняны, други Павловы. 30 Павлу же хотящу внити в  
народ, не оставляху его ученицы: 31 нецыи же от Асийских  
началник, суще ему друзи, пославше к нему, моляху не вдати  
себе в позор. 32 Друзии же убо ино нечто вопияху: бе бо  
собрание смущено, и множайшии от них не ведяху, чесо  
ради собращася. 33 От народа же избраша Александра,  
изведшым его Иудеем. Александр же, помаав рукою, хотяше  
отвещати народу. 34 Разумевше же, яко Иудеанин есть,

глас бысть един от всех, яко на два часа вопиющих: велика Артемида Ефесская. 35 Утишив же книжник народ, рече: мужие Ефесстии, кто бо есть человек, иже не весть, яко Ефесский град служителъ есть великия богини Артемиды и Диопета? 36 Без всякаго убо прекословия сим сице сущым, потребно есть вам безмолвным быти и ничтоже безчинно творити: 37 приведосте бо мужей сих, ни храм (Артемидин) окрадших, ниже богиню вашу хулящих: 38 аще убо Димитрий и иже с ним художницы имут к кому слово, суды суть и анфипати суть: да поемлют друг на друга: 39 аще ли же что о иных ищите, в законнем собрании разрешится: 40 ибо бедствуем порицаеми быти о крамоле днешней, ни единой вине сущей, о нейже возможем воздати слово стремления сего. 41 И сия рек распусти собравшийся народ.

**20** По утишении же молвы, призвав Павел ученики, утешив и целовав их, изыде ити в Македонию. 2 Прошед же страны оны и утешив их словом многим, прииде во Елладу: 3 пожив же месяцы три, бывшу нань навету от Иудей, хотящу отвезтися в Сирию, бысть хотение возвратитися сквозе Македонию. 4 Последова же ему даже до Асии Сосипатр Пирров Берянин, Солуняне же Аристарх и Секунд, и Гаий Дервянин и Тимофей, Асиане же Тихик и Трофим. 5 Сии предшедше ждаху нас в Трояде. 6 Мы же отвезохомся по днех опресночных от Филипп и приидохом к ним в Трояду во днех пяти, идеже пребыхом дний семь. 7 Во едину же от суббот, собравшымся учеником преломити хлеб, Павел беседоваше к ним, хотя изыти на утрии, простре же слово до полунощи. 8 Бяху же свещы многи в горнице, идеже бехом собрани. 9 Седя же некто юноша, именем Евтих, во

окне, отягчен сном глубоким, глаголющу Павлу о мнозе, преклонься от сна, паде от трекровника долу, и взяша его мертва. 10 Сошед же Павел нападе нань, и объемь его рече: не молвите, ибо душа его в нем есть. 11 Возшед же и преломль хлеб и вкушь, довольно же беседовав даже до зари, и тако изыде. 12 Приведоша же отрока жива и утешишася не мало. 13 Мы же, пришедше в корабль, отвезохомся во Ассон, оттуду хотяще пояти Павла: тако бо нам бе повелел, хотя сам пешь ити. 14 И якоже снидеса с нами во Ассоне, взявше его приидохом в Митилин. 15 И оттуду отвезшеся, во утрие пристахом противу Хию, в другий же отвезохомся в Самон, и пребывше в Трогиллии, в грядущий же день приидохом в Милит: 16 суди бо Павел мимо ити Ефес, яко да не будет ему закоснети во Асии, тцашебося, аще возможно будет, в день Пятьдесятный быти во Иерусалиме. 17 От Милита же послав во Ефес, призва пресвитеры церковныя, 18 и якоже приидоша к нему, рече к ним: вы весте, яко от перваго дне, отнелиже приидох во Асию, како с вами все время бых, 19 работая Господеви со всяким смиренумудрием и многими слезами и напастьми, прилучившимися мне от Иудейских навет: 20 яко ни в чесом от полезных обинухся, еже сказати вам и научити вас пред людьми и по домом, 21 засвидетелствуя Иудеем же и Еллином еже к Богу покаяние и веру яже в Господа нашего Иисуса Христа. 22 И ныне, се, аз связан Духом гряду во Иерусалим, яже в нем хотящая приключитися мне не ведый: 23 точию яко Дух Святый по вся грады свидетелствует, глаголя, яко узы мене и скорби ждут. 24 Но ни едино же попечение творю, ниже имам душу мою честну себе, разве еже скончати течение мое с радостию и

службу, юже приях от Господа Иисуса, засвидетелствовати Евангелие благодати Божия. 25 И ныне, се, аз вем, яко кому не узрите лица моего вы вси, в нихже проидох проповедуя Царствие Божие. 26 Темже свидетелствую вам во днешний день, яко чист аз от крове всех, 27 не обинухся бо сказати вам всю волю Божию. 28 Внимайте убо себе и всему стаду, в немже вас Дух Святый постави епископы, пасти Церковь Господа и Бога, юже стяжа Кровию Своею. 29 Аз бо вем сие, яко по отшествии моем внидут волцы тяжцы в вас, не щадящии стада: 30 и от вас самех востанут мужие глаголющии развращеная, еже отторгати ученики вслед себе. 31 Сего ради бдите, поминающе, яко три лета ночь и день не престаях учя со слезами единого кождо вас. 32 И ныне предаю вас, братие, Богови и слову благодати Его, могущему наздати и дати вам наследие во осенних всех. 33 Сребра или злата или риз ни единого возжелах: 34 сами весте, яко требованию моему и сущым со мною послужисте руце мои сии. 35 Вся сказах вам, яко тако труждающимся подобает заступати немощныя, поминати же слово Господа Иисуса, яко Сам рече: блаженнее есть паче даяти, нежели приимати. 36 И сия рек, преклонь колена своя, со всеми ими помолися. 37 Мног же бысть плачь всем: и нападше на выю Павлову, облобызаху его, 38 скорбяще наипаче о словеси, еже рече, яко кому не имут лица его узрети. Провождяху же его в корабль.

**21** И якоже бысть отвезтися нам, отторгшымся от них, прямо шедше приидохом в Кон, в другой же день в Родос и оттуду в Патару: 2 и обретше корабль преходящ в Финикию, возшедше отвезохомся. 3 Возникший же нам



Кипр оставльше ошуюю, пlying в Сирию и пристахом в Тире, тамо бо бяше кораблю изложити бремя: 4 и обретше ученики, пребыхом ту дний седмь: иже Павлови глаголаху Духом не восходити во Иерусалим. 5 Егда же бысть нам скончати дни, изшедше идохом, провождающим нас всем с женами и детьми даже до вне града: и преклоньше колена при брезе помолихомся. 6 И целовавше друг друга внидохом в корабль, они же возвратишася во своя си. 7 Мы же, плавание наченше от Тира, пристахом во Птолемаиде, и целовавше братию, пребыхом день един у них. 8 Во утрие же изшедше Павел и иже с ним, приидохом в Кесарию, и вшедше в дом Филиппа благовестника, суца от седми (диакон), пребыхом у него. 9 Сего же бяху дщери девицы четьри прорицающыя. 10 Пребывающим же нам тамо дни многи, сниде некто от Иудеи пророк, именем Агав, 11 и пришед к нам и взем пояс Павлов, связав же свои руце и нозе, рече: тако глаголет Дух Святой: мужа, егоже есть пояс сей, тако свяжут (его) во Иерусалиме Иудее и предадят в руце языков. 12 И якоже слышахом сия, моляхом мы же и наместнии, не восходити ему во Иерусалим. 13 Отвеща же Павел и рече: что творите, плачуще и сокрушающе ми сердце? Аз бо не точию связан быти (хощу), но и умрети во Иерусалиме готов есмь за имя Господа Иисуса. 14 Не повинующуся же ему, умолчахом, рекше: воля Господня да будет. 15 По днех же сих уготовльшеся взыдохом во Иерусалим: 16 приидоша же с нами и нецыи ученицы от Кесарии, ведуще с собою, у негоже бы обитати нам, Мнасона некоего Киприянина, древняго ученика. 17 Бывшым же нам во Иерусалиме, любезно прияша нас братия. 18 На утрие же

вниде Павел с нами ко Иакову, вси же приидоша старцы. 19 И целовав их, сказаше по единому коеждо, еже сотвори Бог во языцех служением его. 20 Они же слышавше славляху Бога и рекоша ему: видиши ли, брате, колико тем есть Иудей веровавших? И вси ревнителие закону суть: 21 увестишася же о тебе, яко отступлению учиши от закона Моисеова живущыя во языцех вся Иудеи, глаголя не обрезовати им чад своих, ниже во обычаех отеческих ходити. 22 Что убо есть? Всяко подобает народу снитися: услышат бо, яко пришел еси. 23 Сие убо сотвори, еже ти глаголем: суть у нас мужие четыри обещавше себе Богу: 24 сия поим очистися с ними и иждиви на них, да острижут си главы: и разумеют вси, яко возвещенная им о тебе ничтоже суть, но пребываеши и сам закон храня. 25 А о веровавших языцех мы послахом, судивше ничтоже таковое соблюдать им, токмо хранити себе от идоложертвенных и крове, и удавленины и блуда. 26 Тогда Павел поемь мужы оны, на утрие с ними очищся вниде во святилище, возвещая исполнение дний очищения, дондеже принесено бысть за единаго коегождо их приношение. 27 И якоже хотяху седьм дний скончатися, иже от Асии Иудее, видевшие его во святилищи, навадиша весь народ и возложиша нань руце, 28 вопиюще: мужие Израилстии, помозите: сей есть человек, иже на люди и закон и на место сие всех всюду учит: еще же и Еллины введе в церковь и оскверни святое место сие. 29 Бяху бо видели Трофима Ефесянина во граде с ним, егоже мняху, яко в церковь ввел есть Павел. 30 Подвижеся же град весь, и бысть стечение людем: и емше Павла, влечаху его вон из церкве, и абие затворишася двери. 31 Ищущым же им убити

его, взыде весть к тысящнику спиры, яко весь возмутися Иерусалим: **32** он же абие поим воины и сотники, притече на ня: они же видевшя тысящника и воины, престаша бити Павла. **33** Приступль же тысящник ят его и повеле связати его веригома железнома двема, и вопрошаше: кто убо есть и что есть сотворил. **34** Друзии же ино нечто вопияху в народе: не могый же разумети известное молвы ради, повеле отвести его в полк. **35** Егда же бысть на степенех, прилучися воздвижену быти ему от воин нужды ради народа, **36** последоваше бо множество людей зовущих: возьми его. **37** Хотя же внити в полк Павел глагола тысящнику: аще леть ми есть глаголати что тебе? Он же рече: гречески умеши ли? **38** Не ты ли еси Египтянин, прежде сих дний превещавый и изведый в пустыню четьри тысящы мужей сикарей? **39** Рече же Павел: аз человек убо есмь Иудеанин, Тарсянин, славнаго града в Киликии житель: молю же тя, повели ми глаголати к людем. **40** Повелевшу же ему, Павел стоя на степенех помаав рукою к людем: многу же безмолвию бывшу, возгласи еврейским языком, глаголя:

**22** Мужие братие и отцы, услышите мой к вам ныне ответ. **2** Слышавше же, яко еврейским языком возгласи к ним, паче приложиша безмолвие. И рече: **3** аз убо есмь муж Иудеанин, родився в Тарсе Киликийском, воспитан же во граде сем при ногу Гамалиилову, наказан известно отеческому закону, ревнитель сый Божий, якоже вси вы есте днесь: **4** иже сей путь гоних даже до смерти, вяжя и предаю в темницу мужы же и жены, **5** якоже и архиерей свидетелствует ми и вси старцы: от нихже и послания приемь к живущым в Дамасце братиям, идях привести сущя тамо связаны во Иерусалим,

да мучатся. 6 Бысть же ми идущу и приближающуся к Дамаску в полудне, внезапно с небесе облиста свет мног окрест мене. 7 Падох же на землю и слышах глас глаголющ ми: Савле, Савле, что Мя гониши? 8 Аз же отвещах: кто еси, Господи? Рече же ко мне: Аз есмь Иисус Назорей, Егоже ты гониши. 9 Со мною же сущии свет убо видеша и пристрашни быша, гласа же не слышаша Глаголющаго ко мне. 10 Рекох же: что сотворю, Господи? Господь же рече ко мне: востав иди в Дамаск, и тамо речется ти о всех, яже вчинено ти есть творити. 11 И якоже не видех от славы света онаго, за руку ведомь от сущих со мною, внидох в Дамаск. 12 Анания же некий, муж благоговейн по закону, свидетелствован от всех живущих в Дамасце Иудей, 13 пришед ко мне и став рече ми: Савле брате, прозри. И аз в той час воззрех нань. 14 Он же рече ми: Бог отец наших изволи тя разумети хотение Его, и видети Праведника, и слышати глас от уст Его: 15 яко будеши Ему свидетель у всех человеков о сих, яже видел еси и слышал: 16 и ныне что медлиши? Востав крестися и омый грехи твоя, призвав имя Господа Иисуса. 17 Бысть же возвратившумися во Иерусалим и молящумися в церкви, быти во изступлении 18 и видети Его глаголюща ми: потщися и изыди скоро из Иерусалима, зане не примут свидетельства твоего, еже о Мне. 19 И аз рех: Господи, сами ведят, яко аз бех всаждая в темницу и бия по сонмищих верующыя в Тя, 20 и егда изливашеся кровь Стефана свидетеля Твоего, и сам бех стоя и соизволяя убиению его и стрегий риз убивающих его. 21 И рече ко мне: иди, яко Аз во языки далече пошлю тя. 22 Послушаху же его даже до сего словесе и воздвигоша глас свой, глаголюще: возьми от земли таковаго, не подобает

бо ему жити. 23 Вопиющим же им и мещущим ризы и прах возметающим на воздух, 24 повеле тысящник отвести его в полк, рек ранами истязати его, да разумеет, за кую вину тако вопияху нань. 25 И якоже протягоша его вервьми, рече к стоящему сотнику Павел: человека Римлянина и неосуждена леть ли есть вам бити? 26 Слышав же сотник, приступи к тысящнику, сказа, глаголя: виждь, что хочеши сотворити? Человек бо сей Римлянин есть. 27 Приступль же тысящник рече ему: глаголи ми, Римлянин ли еси ты? Он же рече: ей. 28 Отвеща же тысящник: аз многою ценою наречение жителства сего стяжах. Павел же рече: аз же и родихся в нем. 29 Абие убо отступиша от него хотящии его истязати, и тысящник же убояся, разумев, яко Римлянин есть, и яко бе его связал. 30 На утрие же, хотя разумети истину, чесо ради оклеветается от Иудей, разреши его от уз и повеле приити архиереем и всему собору их: и свед Павла, постави (его) пред ними.

**23** Воззрев же Павел на сонм, рече: мужие братие, аз всею совестью благою жителствовах пред Богом даже до сего дне. 2 Архиерей же Анания повеле предстоящим ему бити его уста. 3 Тогда Павел рече к нему: бити тя иматъ Бог, стено повапленная: и ты седиши судя ми по закону, преступая же закон велиши, да бият мя. 4 Предстоящии же реша: архиерею ли Божию досаждаеши? 5 Рече же Павел: не ведах, братие, яко архиерей есть: писано бо есть: князю людей твоих да не речеши зла. 6 Разумев же Павел, яко едина часть есть саддукей, другая же фарисей, воззва в сонмищи: мужие братие, аз фарисей есмь, сын фарисеов: о уповании и о воскресении мертвых аз суд

приемлю. 7 Се же ему рекшу, бысть распря между саддукеи и фарисеи, и разделися народ: 8 саддукее бо глаголют не быти воскресения, ни Ангела, ни духа: фарисее же исповедуют обоя. 9 Бысть же кличь велик, и воставше книжницы части фарисейския пряхуся между собою, глаголюще: ни едино зло обретаем в человеце сем: аще же дух глагола ему или Ангел, не противимся Богу. 10 Мнозе же бывшей распри, бояся тысящник, да не растерзан будет Павел от них, повеле воином снити и восхитити его от среды их и вести (его) в полк. 11 В наставшую же ночь представ ему Господь, рече: дерзай, Павле: якоже бо свидетелствовал еси яже о Мне во Иерусалиме, сице ти подобает и в Риме свидетелствовати. 12 Бывшу же дню, сотворше нецыи от Иудей совет, заклаша себе, глаголюще не ясти ни пити, дондеже убьют Павла: 13 бяху же множае четыредесятих сию клятву сотворшии, 14 иже приступльше ко архиереем и старцем, реша: клятвою прокляхом себе ничтоже вкусити, дондеже убием Павла: 15 ныне убо вы скажите тысящнику с собором, яко да утре сведет его к вам, аки бы хотяще разумети известнее яже о нем: мы же, прежде даже не приблизитися ему, готови есмы убити его. 16 Слышав же сын сестры Павловы ков, пришед и вшед в полк, сказа Павлу. 17 Призвав же Павел единого от сотник, рече: юношу сего отведи к тысящнику: имать бо нечто сказати ему. 18 Он же убо поим его приведе к тысящнику и рече: узник Павел призвав мя, умоли сего юношу привести к тебе, имуща нечто глаголати тебе. 19 Поим же его за руку тысящник и отшед на едине, вопрошаше его: что есть, еже имаши возвестити ми? 20 Рече же, яко Иудее совещаша умолити тя, яко да утре сведеши Павла к

ним в собор, аки бы хотящим известнее истязати яже о нем:  
21 ты убо не послушай их: ловят бо его от них мужие множае  
четырехдесяти, иже заклѣша себе ни ясти ни пити, дондеже  
убиют его: и ныне готови суть, чающе обещания, еже от  
тебе. 22 Тысящник убо отпусти юношу, завещав ни единому  
же поведати, яко сия явил еси мне. 23 И призвав два некия  
от сотник, рече: уготовита (ми) воинов вооруженных двесте,  
яко да иду до Кесарии, и конник седмьдесят, и стрелец  
двесте, от третияго часа ноци: 24 и скоты привести, да  
всадивше Павла проводят до Филикса игемона. 25 Написа  
же (и) послание имущее образ сей: 26 Клавдий Лисиа  
державному игемону Филиксу радоватися: 27 мужа сего ята  
от Иудей и имуща убиена быти от них, приступль с воины  
отях его, уведев, яко Римлянин есть: 28 хотя же разумети  
вину, еяже ради поимаху нань, сведох его в сонмище их:  
29 егоже обретох оглаголуема о взыскании закона их, ни  
едино же достойно смерти или узам согрешение имуща: 30  
сказану же бывшу ми кову хотящу быти от Иудей на мужа  
сего, абие послах (его) к тебе, завещав и клеветником (его)  
глаголати пред тобою, яже нань: здрав буди. 31 Воини же  
убо по повеленному им, взявше Павла, ведоша об ноць во  
Антипатриду: 32 во утрие же, оставльше конники ити с ним,  
возвратишася в полк. 33 Они же пришедше в Кесарию и  
вдавше послание игемону, представиша ему и Павла. 34  
Прочет же игемон послание и вопрошь, от коея области  
есть, и уведев, яко от Киликии, рече: 35 услышу о тебе, егда  
и клеветницы твои приидут. И повеле в преторе Иродове  
стрещи его.

**24** По пятих же днех сниде архиерей Ананиа со старцы и с ритором неким Тертилло, иже сказаша игемону о Павле. 2 Призвану же бывшу ему, начат клеветати Тертилл, глаголя: 3 мног мир уллучающе тобою, и исправления бываемая языку сему твоим промышлением, всяким же образом и везде приемлем, державный Филиксе, со всяким благодарением: 4 но да не множае стужаю тебе, молю тя послушати нас вкратце твою кротостию: 5 обретохом бо мужа сего губителя и движуща противление всем иудеем живущим по вселенней и предстателя (суца) Назорейстей ереси, 6 иже и церковь покусися осквернити, егоже и яхом и по закону нашему хотехом судити ему: 7 пришед же Лисиа тысящник, многою силою от рук наших исхити его и к тебе посла, 8 повелев (и нам) поемлющим нань ити к тебе: от негоже возможеш сам разсудив о всех сих познати, о нихже мы поемлем нань. 9 Сложишася же и Иудее, глаголюще сим тако быти. 10 Отвеща же Павел, поманувшу ему игемону глаголати: от многих лет суца тя судию праведна языку сему сведый, благодуще яже о мне отвещаю, 11 могущу ти разумети, яко не множае ми есть дний дванадесятих, отнележе въздох поклонитися во Иерусалим: 12 и ни в церкви обретоша мя к кому глаголюща или разврат творяща народу, ни в сонмищих, ни во граде, 13 ниже довести могут, елика тебе ныне на мя глаголют: 14 исповедую же тебе сие, яко в пути, егоже сии глаголют ересь, тако служу отеческому Богу, веруя всем суцым в законе и пророцех писаным, 15 упование имый на Бога, яко воскресение хочет быти мертвым, праведником же и грешником, егоже и сами сии чают: 16 о сем же и аз подвизаюся, непорочну совесть имети всегда пред Богом



же и человеки: **17** по летех же многих приидох сотворити милостыни во язык мой и приношения: **18** в нихже обретоша мя очищенна в церкви, ни с народом, ниже с молвою, **19** нецыи от Асии Иудее, имже подобаше пред тя приити и глаголати, аще имут что на мя: **20** или сами тии да глаголют, аще кую обретоша во мне неправду, ставшу ми в сонмици, **21** разве единого сего гласа, имже возопих стоя в них, яко о воскресении мертвых аз суд приемлю днесь от вас. **22** Слышав же сия Филикс отвеща им, известнее уведев яже о пути сем, глаголя: егда Лисиа тысящник приидет, рассужду яже о вас. **23** Повеле же сотнику стрещи Павла, и имети ослабу, и ни единому же возбраняти от своих ему служити или приходити к нему. **24** По днех же неких пришед Филикс со Друсиллиею женою своею сущею Иудеанынею, призва Павла, да слышит от него веру, яже во Христа Иисуса. **25** Глаголющу же ему о правде и о воздержании и о суде хотящем быти, пристрашен быв Филикс отвеща: ныне убо иди, время же получив призову тя. **26** Вкупе же и надеяся, яко мзда дастся ему от Павла, яко да отпустит его: темже и часто призывая его, беседоваше с ним. **27** Двема же летома скончавшемася прият изменение Филикс Поркиа Фиста: хотя же угодное сотворити Иудеем Филикс, остави Павла связана.

**25** Фист же убо приимь власть, по триех днех взыде во Иерусалим от Кесарии. **2** Сказаша же ему архиерее и первии от Иудей на Павла и моляху его, **3** просяще благодати нань, яко да послет его во Иерусалим, ков творяще, яко да убьют его на пути. **4** Фист же повеле Павла стрещи в Кесарии, сам тамо хотя вскоре изыти: **5** иже убо сильнии в вас, рече,

со мною шедше, аще есть кая неправда в мужи сем, да глаголют нань. 6 Пребыв же у них не множае десяти дний, сниде в Кесарию: на утрие сед на судищи, повеле Павла привести. 7 Приведену же бывшу ему, окрест сташа иже от Иерусалима сшедшии Иудее, многи и тяжки вины приносяще на Павла, ихже не можаху изявити: 8 отвечавающу ему, яко ни на закон Иудейский, ни на церковь, ни на кесаря что согреших. 9 Фист же хотя угодное Иудеем сотворити, отвечав Павлови рече: хочещи ли, во Иерусалим возшед, тамо о сих суд прияти от мене? 10 Рече же Павел: на судищи кесарева стоя есмь, идеже ми достоит суд прияти: Иудей ничимже обидех, якоже и ты добре веси: 11 аще бо неправдую или достойно смерти сотворих что, не отめцуюся умрети: аще ли же ничтоже есть во мне, еже сии на мя клеветцуют, никтоже мя может тем выдати: кесаря нарицаю. 12 Тогда Фист состязався с советники, отвеща: кесаря ли нарекл еси? К кесарю пойдеши. 13 Днем же минувшым неким, Агриппа царь и Верникиа сидоста в Кесарию целовати Фиста. 14 И якоже многи дни пребыста ту, Фист сказа царю яже о Павле, глаголя: муж некий есть оставлен от Филикса узник, 15 о немже, бывшу ми во Иерусалиме, явиша архиерее и старцы Иудейстии, просяще нань суда. 16 К нимже отвещах, яко несть обычай Римляном выдати человека коего на погибель, прежде даже оклеветаемый не имать пред лицом клеветцующих его и место ответа примет о своем согрешении. 17 Сшедшымся же им zde, закоснение ни едино сотворь, на утрие сед на судищи, повелех привести мужа. 18 Окрест же его ставше клеветницы, ни едину вину, яже аз непщевах, нанесоша: 19 стязания же некая о своей различней вере

имяху к нему и о некоем Иисусе умершем, Егоже глаголаше Павел жива быти. 20 Недоумеяся же аз о взыскании сих, глаголах, аще хочет ити во Иерусалим и тамо суд прияти о сих. 21 Павлу же нарекшу блюдену быти ему до разсуждения Августа, повелех блюсти его, дондеже послю его к кесарю. 22 Агриппа же к Фисту рече: хотел бых и сам человека сего слышати. Он же рече: утре услышиши его. 23 На утрие же пришедшу Агриппе и Верникии со многою гордостью и вшедшым в судебную палату с тысящники и с нарочитыми мужи града, и повелевшу Фисту, приведен бысть Павел. 24 И рече Фист: Агриппо царю и вси сущии с нами мужие, видите сего, о немже все множество Иудей стужаху ми во Иерусалиме же и zde, вопиюще, яко не подобает жити ему ктому: 25 аз же разумев ничтоже достойно смерти сотворша его, и самому же сему нарекшу Севаста, судих послати его: 26 о немже известное что писати господину не имам: темже и приведох его пред вас, наипаче же пред тя, Агриппо царю, яко да разсуждению бывшу имам что писати: 27 безсловесно бо мнится ми, посылающе юзника, а вины, яже нань, не сказати.

**26** Агриппа же к Павлу рече: повелевается ти о себе самому глаголати. Тогда Павел простер руку отвещаваше: 2 о всех, о нихже оклеветаемь есмь от Иудей, царю Агриппо, непщую себе блаженна быти, яко пред тобою отвещати днесь имам, 3 паче же ведца тя суща сведый всех Иудейских обычаев и взысканий. Темже молюся ти долготерпеливно послушати мене. 4 Житие убо мое еже от юности, исперва бывшее во языке моем во Иерусалиме, ведут вси Иудее, 5 ведяще мя исперва, аще хотят свидетелствовати, яко по известней ереси

нашея веры жих фарисей. 6 И ныне о уповании обетования, бывшего от Бога ко отцем нашим, стою судимь, 7 в неже обанадесяте колена наша безпрестани день и ночь служаще надеются дойти: о немже уповании оклеветаемь есмь, царю Агриппо, от Иудей. 8 Что? Неверно ли судится вами, яко Бог мертвыя возставляет? 9 Аз убо мнех, яко подобает ми многа сопротивна противу имене Иисуса Назореа сотворити: 10 еже и сотворих во Иерусалиме, и многи от святых аз в темницах затворях, власть от архиерей приемь: убиваемым же им прилагах совет: 11 и на всех сонмищих множицею мучя их, принуждах хулити: преизлиха же враждуя на них, гонях даже и до внешних градов. 12 В нихже идый в Дамаск со властью и повелением, еже от архиерей, 13 в полудни на пути видех, царю, с небесе паче сияния солнечного осиявший мя свет и со мною идущих. 14 Всем же падшым нам на землю, слышах глас глаголющъ ко мне и вещающъ еврейским языком: Савле, Савле, что Мя гониши? Жестоко ти есть противу рожна прати. 15 Аз же рех: кто еси, Господи? Он же рече: Аз есмь Иисус, Егоже ты гониши: 16 но востани и стани на ногу твоею: на се бо явихся ти, сотворити тя слугу и свидетеля, яже видел еси и яже явлю тебе, 17 изимая тя от людей Иудейских и от язык, к нимже Аз тя пошлю, 18 отверсти очи их, да обратятся от тмы в свет и от области сатанины к Богу, еже прияти им оставление грехов и достояние во святых верою, яже в Мя. 19 Темже, царю Агриппо, не бых противен небесному видению, 20 но сущым в Дамасце прежде и во Иерусалиме, и во всяцей стране Иудейстей и языком проповедую покаяться и обратитися к Богу, достойна покаянию дела творяще. 21 Сих ради мя Иудее емше во

святылици хотяху растерзати. 22 Помощь убо улучив яже от Бога, даже до дне сего стою, свидетелствуя малу же и велику, ничтоже вещая, разве яже пророцы рекоша хотящая быти и Моисей, 23 яко Христос имеяше пострадати, яко первый от воскресения мертвых свет хотяше проповедати людем (Иудейским) и языком. 24 Сия же ему отвещавающе, Фист велиим гласом рече: беснуешися ли, Павле? Многия ты книги в неистовство прелагают. 25 Он же: не беснуюся, рече, державный Фисте, но истины и целомудрия глаголы вещаю: 26 весть бо о сих царь, к немуже и с дерзновением глаголю: утаитися бо ему от сих не верую ничесомуже, несть бо во угле сотворено сие: 27 веруеши ли, царю Агриппо, пророком? Вем, яко веруеши. 28 Агриппа же к Павлу рече: в мале мя препираеши Христианина быти. 29 Павел же рече: молил убо бых Бога, и в мале и во мнозе, не токмо тебе, но и всех слышащих мя днесь, быти им тацем, яков и аз есмь, кроме уз сих. 30 И сия рекшу ему, воста царь и игемон, и Верникиа и сидящие с ними, 31 и отшедше беседоваху друг ко другу, глаголюще, яко ничтоже смерти достойно или уз творит человек сей. 32 Агриппа же Фисту рече: отпущен быти можаше человек сей, аще не бы кесаря нарицал. И тако суди игемон послати его к кесарю.

**27** И якоже суждено бысть отплыти нам во Италию, предаху Павла же и инья некия юзники сотнику, именем Иулию, сперы Севастийския. 2 Вшедше же в корабль Адрамитский, восхотевше плыти во Асийская места, отвезохомся, суцу с нами Аристарху Македонянину от Солуня. 3 В другой же пристахом в Сидоне: человеколюбие же Иулий Павлови дея, повеле к другом шедшу прилежание улучшить. 4 И оттуду

отвезшися приплыхом в Кипр, зане ветри бяху противни: 5 пучину же, яже противу Киликии и Памфилии, преплывше, приидохом в Миры Ликийския. 6 И тамо обрет сотник корабль Александрийский пловуць во Италию, всади ны в онь. 7 Во многи же дни косно плавающе и едва бывше противу Книда, не оставляющу нас ветру, приплыхом под Крит при Салмоне: 8 едва же избирающе край, приидохом на место некое, нарицаемое Доброе Пристанище, емуже близ бе град Ласей. 9 Многу же времени минувшу и сущу уже небезбедну плаванию, занеже и пост уже бе прешел, советоваше Павел, 10 глаголя им: мужие, вижду, яко с досаждением и многою тцетою не токмо бремене и корабля, но и душ наших хочет быти плавание. 11 Сотник же кормчия и навклира послушаше паче, нежели Павлом глаголемых. 12 Не добру же пристанищу сущу ко озимению, мнози совет даяху отвезтися оттуду, аще како возмогут, достигше Финикии, озимети в пристанищи Критстем, зрящем к ливу и к хору. 13 Дхнувшу же югу, мневше волю свою уллучити, воздвигше ветрила, плыху вскрай Крита. 14 Не по мнозе же возвея противен ему ветр бурен, нарицаемый евроклидон. 15 Восхищену же бывшу кораблю и не могущу сопротивитися ветру, вдавшися волнам носими бехом. 16 Остров же некий мимотекше, нарицающься Клавдий, едва возмогохом удержати ладью: 17 юже востягше, всяким образом помогаху, подтверждающе корабль: боящися же, да не в сирть впадут, низпустивше парус, сице носими беху. 18 Вельми же обуреваемым нам, на утрие изметание творяху, 19 и в третий день своими руками ядрило корабленное извергохом. 20 Ни солнцу же, ни звездам явльшымся на многи дни, и зиме не мале належащей,

прочее отимашеся надежда вся, еже спастися нам. 21 Многу же неядению суцу, тогда став Павел посреде их, рече: подобаше убо, о, мужие, послушавше мене, не отвезтися от Крита и избыти досаждения сего и тщеты: 22 и се, ныне молю вы благодушствовати, погибель бо ни единой души от вас будет, разве корабля: 23 предста бо ми в сию ночь Ангел Бога, Егоже аз есмь, Емуже и служу, 24 глаголя: не бойся, Павле, кесарю ти подобает предстати, и се, дарова тебе Бог вся плавающия с тобою. 25 Темже дерзайте, мужие, верую бо Богови, яко тако будет, имже образом речено ми бысть: 26 во остров же некий подобает нам пристати. 27 И егда четвертаянадесять ночь бысть, носимым нам во Адриатстей (пучине), в полунощи непщевашу корабленицы, яко приближаются к некоей стране, 28 и измеривше глубину обретоша сажений двадесять: мало же прешедше и паки измеривше, обретоша сажений пятьнадесять. 29 Боящеся же, да не како в прудная места впадут, от носа корабля вергше котвы четыре, моляхомся, да день будет. 30 Кораблеником же ищущым бежати из корабля и низвесившим ладью в море, изветом аки от носа хотящым котвы простерти, 31 рече Павел сотнику и воином: аще не сии пребудут в корабли, вы спастися не можете. 32 Тогда воины отрезаша узя ладии и оставиша ю отпасти. 33 Егда же хотяше день быти, моляше Павел всех, да примут пищу, глаголя: четыренадесятый днесь день ждуще, не ядше пребываете, ничтоже вкусивше: 34 темже молю вас прияти пищу, се бо к вашему спасению есть: ни единому бо от вас влас главы отпадет. 35 Рек же сия и приемь хлеб, благодари Бога пред всеми и преломль начат ясти. 36 Благонадежни же бывше вси, и тии прияша

пищу: 37 бе же в корабли всех душ двесте седьмьдесят и шесть. 38 Насыщшесе же брашна, облегчиша корабль, изметающе пшеницу в море. 39 Егда же день бысть, земли не познаваху: недро же некое усмотреша имущее песок, в неже, аще мощно есть, совещаша извлеци корабль. 40 И котвы собравше, везяхуся по морю: купно ослабивше узя кормилом и воздвигше малое ветрило к дышущему ветрецу, везохомся на край. 41 Впадше же в место исопное, увязиша корабль: и нос убо увязший пребысть недвижимь, кормило же разбивашесе от нужды волн. 42 Воином же совет бысть, да узники убийют, да не кто поплыв избегнет. 43 Сотник же, хотя соблюсти Павла, возбрани совету их, повеле же могущым плавати, да изскочивше первее изыдут на край, 44 а прочии, ови убо на дщицах, ови же на нечем от корабля. И тако бысть всем спастися на землю.

**28** Спасени же бывше иже с Павлом от корабля, тогда разумеша, яко остров Мелит нарицается. 2 Варвари же творяху не малое милосердие нам: возгнещше бо огонь, прияша всех нас, за настоящий дождь и зиму. 3 Сгромаждшу же Павлу рождия множество и возложившу на огонь, ехидна от теплоты изшедши, секну в руку его. 4 И егда видеша варвари висящу змию от руки его, глаголаху друг ко другу: всяко убийца есть человек сей, егоже спасена от моря суд Божий жити не остави. 5 Той же убо, оттряс змию во огонь, ничтоже зло пострада. 6 Они же чаяху его имуща возгоретися, или пасти внезапу мертва: на мнозе же того чающым и ничтоже зло в нем бывшее видящым, претворшесе, глаголаху Бога того быти. 7 Окрест же места онаго бяху села перваго во острове, именованном Поплия, иже



приимь нас, три дни любезне учреди. 8 Бысть же отцу Поплиеву огнем и водным трудом одержиму лежати: к немуже Павел вшед, и помолився, и возложь руце свои нань, исцели его. 9 Сему же бывшу, и прочии имущии недуги во острове том прихождаху и исцелевахуся: 10 иже и многими чествыми почтоша нас, и отвозящимся нам яже на потребу вложиша. 11 По триех же месяцах отвезохомся в корабли Александрийстем, подписаном Диоскуры, презимевшем во острове, 12 и доплывше в Сиракусы, пребыхом дни три: 13 оттуду же отплывше, приидохом в Ригию, и по едином дни возвевашу югу, во вторый день приидохом в Поттиолы, 14 идеже обретше братию, умолени быхом от них пребыти дний седмь: и тако в Рим идохом. 15 И от тамо братия, слышавше яже о нас, изыдоша во сретение наше даже до Аппиева торго и триех корчемниц: ихже видев Павел и благодарив Бога, прият дерзновение. 16 Егда же приидохом в Рим, сотник предаде узники воеводе, Павлу же повеле пребывати о себе, с соблюдающим его воином. 17 Бысть же по днех триех, созва Павел сущия от Иудеев первыя: шедшымся же им, глаголаше к ним: мужие братие, аз ничтоже противно сотворив людем или обычаем отеческим, узник от Иерусалимлян предан бых в руце Римляном, 18 иже разсудивше яже о мне, хотяху пустити, зане ни едина вина смертная бысть во мне: 19 сопротив же глаголющым Иудеем, нужда ми бысть нарещи кесаря, не яко язык мой имеа в чесом оклеветати: 20 сея ради убо вины умолих вас, да вижду и беседую: надежды бо ради Израилевы веригами сими обложен есмь. 21 Они же к нему реша: мы ниже писания о тебе прияхом от Иудей, ниже пришед кто от братий возвести

или глагола что о тебе зло: 22 молимся же, да слышим от тебе, яже мудрствуеши: о ереси бо сей ведомо есть нам, яко всюду сопотив глаголемо есть. 23 Уставивше же ему день, приидоша к нему в странноприемницу множайшии, имже сказаше свидетелствуя Царствие Божие и уверяя их, яже о Иисусе, от закона Моисеова и пророк, от утра даже до вечера. 24 И ови убо вероваху глаголемым, ови же не вероваху. 25 Несогласни же суще друг ко другу, отхождаху, рекшу Павлу глагол един, яко добре Дух Святыи глагола Исаием пророком ко отцем нашим, 26 глаголя: иди к людем сим и рцы: слухом услышите и не имате разумети: и видяще узрите и не имате видети: 27 одебеле бо сердце людий сих, и ушима тяжко слышаша, и очи свои смежиша, да не како увидят очима, и ушима услышат, и сердцем уразумеют, и обратятся, и исцелю их. 28 Ведомо убо да будет вам, яко языком послася спасение Божие, сии и услышат. 29 И сия тому рекшу, отидоша Иудее, многое имуще между собою состязание. 30 Пребысть же Павел два лета исполнь своею мздою (цела два лета на своем иждивении) и приимаше вся приходящыя к нему, 31 проповедуя Царствие Божие и учя яже о Господе нашем Иисусе Христе со всяким дерзновением невозбранно.

## Послание к Римлянам

**1** Павел, раб Иисус Христов, зван Апостол, избран в благовестие Божие, **2** еже прежде обеща пророки Своими в писаниих святых, **3** о Сыне Своем, бывшем от семене Давидова по плоти, **4** нареченном Сыне Божии в силе, по духу святыни, из воскресения от мертвых, Иисуса Христа Господа нашего, **5** Имже прияхом благодать и апостольство в послушание веры во всех языцех, о имени Его. **6** В нихже есте и вы, звани Иисусу Христу. **7** Всем сущым в Риме возлюбленным Богу, званным святым. Благодать вам и мир от Бога Отца нашего, и Господа Иисуса Христа. **8** Первое убо благодарю Бога моего Иисусом Христом о всех вас, яко вера ваша возвещается во всем мире. **9** Свидетель бо ми есть Бог, Емуже служу духом моим во благовествовании Сына Его, яко безпрестани память о вас творю, **10** всегда в молитвах моих моляся, аще убо когда поспешен буду волю Божию приити к вам. **11** Желая бо видети вас, да некое подам вам дарование духовное, ко утверждению вашему. **12** Сие же есть, соутешитися в вас верою общею, вашею же и моею. **13** Не хочу же не ведети вам, братие, яко множицею восхотех приити к вам, и возбранен бых доселе, да некий плод имею и в вас, якоже и в прочих языцех. **14** Еллином же и варваром, мудрым же и неразумным должен есмь. **15** Тако есть, еже по моему усердию и вам сущым в Риме благовестити. **16** Не стыжуся бо благовествованием Христовым: сила бо Божия есть во спасение всякому верующему, Иудеови же прежде и Еллину. **17** Правда бо Божия в нем является от веры в веру, якоже есть писано. Праведный же от веры жив будет. **18** Открывается бо гнев Божии с небесе на всякое нечестие и

неправду человеков, содержащих истину в неправде. 19  
Зане разумное Божие яве есть в них, Бог бо явил есть им: 20  
невидимая бо Его, от создания мира твореньми помышляема,  
видима суть, и присносущная сила Его и Божество, во еже  
быти им безответным. (aĩdios g126) 21 Занеже разумевше Бога,  
не яко Бога прославиша или благодариша, но осуетишася  
помышлении своими, и омрачися неразумное их сердце.  
22 Глаголющеся быти мудри, объюродеша, 23 и измениша  
славу нетленного Бога в подобие образа тленна человека и  
птиц и четвероног и гад. 24 Темже и предаде их Бог в похотех  
сердец их в нечистоту, во еже сквернитися телесем их в себе  
самех. 25 Иже премениша истину Божию во лжу, и почтоша  
и послужиша твари паче Творца, Иже есть благословен  
во веки, аминь. (aĩon g165) 26 Сего ради предаде их Бог в  
страсти безчестия. И жены бо их измениша естественную  
подобю в презестественную. 27 Такожде и мужи, оставльше  
естественную подобю женска пола, разжегшася похотию  
своею друг на друга, мужи на мужех студ содевающе, и  
возмездие, еже подобаше прелести их, в себе восприемлюще.  
28 И якоже не искусиша имети Бога в разуме, (сего ради)  
предаде их Бог в неискусен ум, творити неподобная,  
29 исполненных всякия неправды, блужения, лукавства,  
лихоимания, злобы. Исполненных зависти, убииства, рвеня,  
льсти, злонравия. 30 Шепотники, клеветники, богомерзки,  
досадители, величавы, горды, обретатели злых, родителем  
непокоривы, 31 неразумны, непримирителны, нелюбовны,  
неклятвохранительны, немилостивны. 32 Нецыи же и  
оправдание Божие разумевше, яко таковая творящии

достойни смерти суть, не точию сами творят, но и соизволяют творящым.

**2** Сего ради безответен еси, о, человече всяк судяй: имже бо судом судиши друга, себе осуждаеши. Таяжде бо твориши судяй. **2** Вемы же, яко суд Божии есть поистинне на творящих таковая. **3** Помышляеши ли же сие, о, человече, судяй таковая творящым и творя сам таяжде, яко ты избежиши ли суда Божия, **4** или о богатстве благодати Его и кротости и долготерпении нерадиши, не ведый, яко благодать Божия на покаяние тя ведет? **5** По жестокости же твоей и непокаянному сердцу, собираеши себе гнев в день гнева и откровения праведнаго суда Божия, **6** Иже воздаст коемуждо по делом его. **7** Овым убо, по терпению дела благаго, славы и чести и нетления ищущым, живот вечный. (aiōnios g166) **8** А иже по рвенению противляются убо истине, повинуются же неправде, ярость и гнев. **9** Скорбь и теснота на всяку душу человека творящаго злое, Иудеа же прежде и Еллина. **10** Слава же и честь и мир всякому делающему благое, Иудееви же прежде и Еллину. **11** Несть бо на лица зрения у Бога. **12** Елицы бо беззаконно согреша, беззаконно и погибнут: и елицы в законе согреша, законом суд примут. **13** Не слышатели бо закона праведни пред Богом, но творцы закона, (сии) оправдятся: **14** егда бо языцы, не имуща закона, естеством законная творят, сии, закона не имуща, сами себе суть закон. **15** Иже являют дело законное написано в сердцах своих, спослушующеи им совести, и между собою помыслом осуждающим или отвещающим, **16** в день, егда судит Бог тайная человеком, по благовестию моему, Иисусом Христом. **17** Се ты Иудей именуешися, и почиваеши на законе, и

хвалишися о Бозе, **18** и разумееш волю, и рассуждаеш лучшая, научаемь от закона, **19** уповая же себе вожда быти слепым, света сущым во тме, **20** наказателя безумным, учителя младенцем, имуща образ разума и истины в законе. **21** Научая убо инаго, себе ли не учиши, **22** проповедая не красти, крадеш: глаголяй не прелюбы творити, прелюбы твориши: гнушаяся идол, святая крадеш: **23** иже в законе хвалишися, преступлением закона Бога безчестуеши. **24** Имя бо Божие вами хулится во языцех, якоже есть писано. **25** Обрезание бо пользует, аще закон твориши. Аще же закона преступник еси, обрезание твое необрезание бысть. **26** Аще убо необрезание оправдание закона сохранит, не необрезание ли его во обрезание вменится, **27** и осудит еже от естества необрезание, закон совершающее, тебе, иже Писанием и обрезанием еси преступник закона. **28** Не бо иже яве, Иудей есть, ни еже яве во плоти, обрезание. **29** Но иже в тайне Иудей, и обрезание сердца духом, (а) не писанием: емуже похвала не от человек, но от Бога.

**3** Что убо лишнее Иудею? Или кая польза обрезания? **2** Много, по всякому образу: первее бо, яко вверена быша им словеса Божия. **3** Что бо, аще не вероваша нецыи? Еда (убо) неверствие их веру Божию упразднит? **4** Да не будет: да будет же Бог истинен, всяк же человек ложь, якоже есть писано: яко да оправдишися во словесех Твоих, и победиши, внегда судити Ти. **5** Аще ли неправда наша Божию правду составляет, что речем? Еда ли неправеден Бог наносяй гнев? По человеку глаголю. **6** Да не будет: понеже како судити имать Бог миру? **7** Аще бо истина Божия в моей лжи избыточествова в славу Его, что еще и аз яко грешник

осуждаюся, 8 и не якоже хулимся, и якоже глаголют нецыи нас глаголати, яко сотворим злая, да приидут благая: ихже суд праведен есть. 9 Что убо, преимеем ли? Никакоже: предукорихом бо Иудеи же и Еллины вся под грехом быти, 10 якоже есть писано. Яко несть праведен никтоже: 11 несть разумеваия, и несть взыскай Бога: 12 вси уклонишася, вкупе непотребни быша. Несть творяй благостыню, несть даже до единого. 13 Гроб отверст гортань их, языки своими льщаху. Яд аспидов под устнами их. 14 Ихже уста клятвы и горести полна суть. 15 Скоры ноги их пролияти кровь: 16 сокрушение и озлобление на путех их, 17 и пути мирнаго не познаша. 18 Несть страха Божия пред очима их. 19 Вемы же, яко елика закон глаголет, сущым в законе глаголет: да всяка уста заградятся, и повинен будет весь мир Богови: 20 зане от дел закона не оправдится всяка плоть пред Ним: законом бо познание греха. 21 Ныне же кроме закона правда Божия явися, свидетельствуема от закона и пророк. 22 Правда же Божия верю Иисус Христовою во всех и на всех верующих: несть бо разнствия, 23 вси бо согрешиша, и лишени суть славы Божия, 24 оправдаеми туне благодатию Его, избавлением, еже о Христе Иисусе, 25 Егоже предположи Бог очищение верю в Крови Его, в явление правды Своея, за отпущение прежде бывших грехов, 26 в долготерпении Божии, и в показание правды Его в нынешнее время, во еже быти Ему праведну и оправдающу суцаго от веры Иисусовы. 27 Где убо похвала, отгнася. Которым законом? Делы ли? Ни, но законом веры. 28 Мыслим убо верю оправдаться человеку, без дел закона. 29 Или Иудеев Бог токмо, а не и языков? Ей, и языков: 30 понеже един Бог, Иже оправдит

обрезание от веры и необрезание верою. 31 Закон ли убо разоряем верою? Да не будет: но закон утверждаем.

**4** Что убо речем Авраама отца нашего обрести по плоти? 2 Аще бо Авраам от дел оправдася, имать похвалу, но не у Бога. 3 Что бо Писание глаголет? Верова же Авраам Богу, и вменися ему в правду. 4 Делавшему же мзда не вменяется по благодати, но по долгу: 5 а не делавшему, верующему же во Оправдающаго нечестива, вменяется вера его в правду. 6 Якоже и Давид глаголет блаженство человека, емуже вменяет Бог правду, без дел закона: 7 блажени, ихже отпустишася беззакония и ихже прикрывшася греси: 8 блажен муж, емуже не вменит Господь греха. 9 Блаженство убо сие на обрезание ли, или на необрезание? Глаголем бо, яко вменися Аврааму вера в правду. 10 Како убо вменися ему, во обрезании ли сущу, или в необрезании, не во обрезании, но в необрезании. 11 И знамение прият обрезания, печать правды веры, яже в необрезании. Яко быти ему отцу всех верующих в необрезании, во еже вменитися и тем в правду. 12 И отцу обрезания, не сущым точию от обрезания, но и ходящим в стопах веры, яже (бе) в необрезании отца нашего Авраама. 13 Не законом бо обетование Аврааму, или семени его, еже быти ему наследнику мирови, но правдою веры. 14 Аще бо сущии от закона наследницы, испразднися вера, и разорися обетование: 15 закон бо гнев соделовает: идеже бо несть закона, (ту) ни преступления. 16 Сего ради от веры, да по благодати, во еже быти известну обетованию всему семени, не точию сущему от закона, но и сущему от веры Авраамовы, иже есть отец всем нам, 17 якоже есть писано: яко отца многим языком положих тя, прямо Богу,



Ему же верова, животворящему мертвыя и нарицающу не  
сущая яко сущая. 18 Иже паче упования во упование верова,  
во еже быти ему отцу многим языком, по реченному: тако  
будет семя твое. 19 И не изнемог верою, ни усмотри своя  
плоти уже умерщвленныя, столетен негде сый, и мертвости  
ложесн Сарриных: 20 во обетовании же Божии не усумнеся  
неверованием, но возможе верою, дав славу Богу 21 и  
известен быв, яко, еже обеща, силен есть и сотворити. 22  
Тем же и вменися ему в правду. 23 Не писано же бысть  
за того единого точию, яко вменися ему, 24 но и за ны,  
им же хочет вменитися, верующим в Воскресившаго Иисуса  
Христа Господа нашего из мертвых, 25 Иже предан бысть за  
прегрешения наша и воста за оправдание наше.

**5** Оравдившеся убо верою, мир имамы к Богу Господем  
нашим Иисус Христом, 2 Им же и приведение обретохом  
верою во благодать сию, в ней же стоим, и хвалимся  
упованием славы Божия. 3 Не точию же, но и хвалимся  
в скорбех, ведяще, яко скорбь терпение соделовает, 4  
терпение же искусство, искусство же упование: 5 упование  
же не посрамит. Яко любы Божия излися в сердца наша  
Духом Святым данным нам. 6 Еще бо Христос сущим нам  
немощным, по времени за нечестивых умре. 7 Едва бо за  
праведника кто умрет: за благаго бо негли кто и дерзнет  
умрети. 8 Составляет же Свою любовь к нам Бог, яко, еще  
грешником сущим нам, Христос за ны умре. 9 Много убо паче,  
оправдани бывше ныне Кровию Его, спасемся Им от гнева.  
10 Аще бо врази бывше примирихомся Богу смертию Сына  
Его, множае паче примирившеся спасемся в животе Его: 11  
не точию же, но и хвалимся о Бозе Господем нашим Иисус

Христом, Имже ныне примирение прияхом. 12 Сего ради якоже едином человеком грех в мир вниде, и грехом смерть, и тако смерть во вся человеки вниде, в немже вси согрешиша. 13 До закона бо грех бе в мире: грех же не вменяшеся, не сущу закону. 14 Но царствова смерть от Адама даже до Моисея и над несогрешившими по подобию преступления Адамова, иже есть образ будущего. 15 Но не якоже прегрешение, тако и дар. Аще бо прегрешением единого мнози умроша, множае паче благодать Божия и дар благодатию единого Человека Иисуса Христа во многих преизлишествова. 16 И не якоже едином согрешшим, дарование. Грех бо из единого во осуждение: дар же от многих прегрешении во оправдание. 17 Аще бо единого прегрешением смерть царствова едином, множае паче избыток благодати и дар правды приемлюще, в жизни воцарятся едином Иисус Христом. 18 Темже убо, якоже единого прегрешением во вся человеки вниде осуждение, такожде и единого оправданием во вся человеки вниде оправдание жизни. 19 Якоже бо послушанием единого человека грешни быша мнози, сице и послушанием единого праведни будут мнози. 20 Закон же привниде, да умножится прегрешение. Идеже бо умножися грех, преизбыточествова благодать: 21 да якоже царствова грех во смерть, такожде и благодать воцарится правдою в жизнь вечную, Иисус Христом Господем нашим. (aiōnios g166)

**6** Что убо речем, пребудем ли во гресе, да благодать преумножится? Да не будет. 2 Иже бо умрохом греху, како паки оживем о нем? 3 Или не разумеете, яко елицы во Христа Иисуса крестихомся, в смерть Его крестихомся? 4 Спогребохомся убо Ему крещением в смерть, да якоже

воста Христос от мертвых славою Отчею, тако и мы во обновлении жизни ходити начнем. 5 Аще бо сообразни быхом подобию смерти Его, то и воскресения будем, 6 сие ведяще, яко ветхий наш человек с Ним распятыся, да упразднится тело греховное, яко ктому не работати нам греху. 7 Умерый бо свободися от греха. 8 Аще же умрохом со Христом, веруем, яко и живи будем с Ним, 9 ведяще, яко Христос воста от мертвых, ктому уже не умирает: смерть Им ктому не обладает. 10 Еже бо умре, греху умре единою: а еже живет, Богови живет. 11 Такожде и вы помышляйте себе мертвых убо быти греху, живых же Богови, о Христе Иисусе Господе нашем. 12 Да не царствует убо грех в мертвеннем вашем теле, во еже послушати его в похотех его: 13 ниже представляйте уды ваша оружия неправды греху: но представляйте себе Богови яко от мертвых живых, и уды ваша оружия правды Богови. 14 Грех бо вами да не обладает. Несте бо под законом, но под благодатию. 15 Что убо, согрешим ли, зане несмы под законом, но под благодатию, да не будет. 16 Не весте ли, яко емуже представляете себе рабы в послушание, раби есте, егоже послушаете, или греха в смерть, или послушания в правду? 17 Благодарим убо Бога, яко бесте рабы греху, послушасте же от сердца, в оньже и предастися образ учения. 18 Свободшеся же от греха, поработистеся правде. 19 Человеческо глаголю, за немощь плоти вашей. Якоже бо представисте уды ваша рабы нечистоте и беззаконию в беззаконие, тако ныне представите уды ваша рабы правде во святыню. 20 Егда бо раби бесте греха, свободни бесте от правды. 21 Кий убо тогда иместе плод? О нихже ныне стыдитесь, кончина бо оных, смерть. 22

Ныне же свободшесе от греха, порабощесе же Богови, имате плод ваш во святыню, кончину же жизнь вечную. (aīōnios g166) 23 Оброцы бо греха смерть: дарование же Божие живот вечный о Христе Иисусе Господе нашем. (aīōnios g166)

**7** Или не разумеете, братие: ведущим бо закон глаголю: яко закон обладает над человеком, во елико время живет? 2 Ибо мужатая жена живу мужу привязана есть законом: аще ли же умрет муж ея, разрешится от закона мужескаго. 3 Темже убо, живу сущу мужу, прелюбодейца бывает, аще будет мужеви иному: аще ли умрет муж ея, свободна есть от закона, не быти ей прелюбодейце, бывшей мужу иному. 4 Темже, братие моя, и вы умросте закону телом Христовым, во еже быти вам иному, Воставшему из мертвых, да плод принесем Богови. 5 Егда бо бехом во плоти, страсти греховныя, яже законом, действоваху во удех наших, во еже плод творити смерти: 6 ныне же упразднихомся от закона, умерше, имже держими бехом, яко работати нам (Богови) во обновлении духа, а не в ветхости писмене. 7 Что убо речем? Закон ли грех? Да не будет: но греха не знах, точию законом: похоти же не ведах, аще не бы закон глаголал: не похощеши. 8 Вину же прием грех заповедию, содела во мне всяку похоть: без закона бо грех мертв есть. 9 Аз же живях кроме закона иногда: пришедшей же заповеди, грех убо оживе, 10 аз же умрох: и обретесе ми заповедь, яже в живот, сия в смерть, 11 грех бо вину прием заповедию, прельсти мя, и тою умертви мя. 12 Темже убо закон свят, и заповедь свята и праведна и блага. 13 Благое ли убо бысть мне смерть? Да не будет: но грех, да явится грех, благим ми содевая смерть, да будет по премногу грешен грех заповедию. 14 Вемы бо, яко закон

духовен есть: аз же плотян есмь, продан под грех. 15 Еже бо содеваю, не разумею: не еже бо хощу, сие творю, но еже ненавижду, то соделоваю. 16 Аще ли, еже не хощу, сие творю, хвалю закон яко добр, 17 ныне же не ктому аз сие содеваю, но живой во мне грех. 18 Вем бо, яко не живет во мне, сиречь во плоти моей, доброе: еже бо хотети прилежит ми, а еже содеяти доброе, не обретаю. 19 Не еже бо хощу доброе, творю, но еже не хощу злое, сие содеваю. 20 Аще ли, еже не хощу аз, сие творю, уже не аз сие творю, но живой во мне грех. 21 Обретаю убо закон, хотящу ми творити доброе, яко мне злое прилежит. 22 Соуслаждаюся бо закону Божию по внутреннему человеку: 23 вижду же ин закон во удех моих, противу воюющь закону ума моего и пленяющь мя законом греховным, сущим во удех моих. 24 Окаянен аз человек: кто мя избавит от тела смерти сея? 25 Благодарю Бога моего Иисус Христом Господем нашим. Темже убо сам аз умом моим работаю закону Божию, плотию же закону греховному.

**8** Ни едино убо ныне осуждение сущым о Христе Иисусе, не по плоти ходящым, но по духу: 2 закон бо духа жизни о Христе Иисусе свободил мя есть от закона греховнаго и смерти. 3 Немощное бо закона, в немже немоществоваше плотию, Бог Сына Своего посла в подобии плоти греха, и о гресе осуди грех во плоти, 4 да оправдание закона исполнится в нас, не по плоти ходящих, но по духу. 5 Сущии бо по плоти, плотская мудрствуют. А иже по духу, духовная. 6 Мудрование бо плотское смерть есть, а мудрование духовное живот и мир, 7 зане мудрование плотское вражда на Бога: закону бо Божию не покаряется, ниже бо может. 8 Сущии

же во плоти, Богу угодити не могут. 9 Вы же несте во плоти, но в душе, понеже Дух Божии живет в вас. Аще же кто Духа Христова не имать, сей несть Его. 10 Аще же Христос в вас, плоть убо мертва греха ради, дух же живет правды ради. 11 Аще ли же Дух Воскресившаго Иисуса от мертвых живет в вас, Воздвигий Христа из мертвых оживотворит и мертвенная телеса ваша, живущим Духом Его в вас. 12 Темже убо, братие, должны есмы не плоти, еже по плоти жити. 13 Аще бо по плоти живете, имате умрети, аще ли духом деяния плотская умерщвляет, живи будете: 14 елицы бо Духом Божиим водятся, сии суть сынове Божии: 15 не приясте бо духа работы паки в боязнь, но приясте Духа сыноположения, о Немже вопием: Авва Отче. 16 Самый Дух спослушествует духови нашему, яко есмы чада Божия. 17 Аще же чада, и наследницы: наследницы убо Богу, снаследницы же Христу, понеже с Ним страждем, да и с Ним прославимся. 18 Непщую бо, яко недостойны страсти нынешняго времени к хотящей славе явится в нас. 19 Чаение бо твари, откровения сынов Божиих чаает: 20 суете бо тварь повинуся не волею, но за повинувшаго ю, на уповании, 21 яко и сама тварь свободится от работы истления в свободу славы чад Божиих. 22 Вемы бо, яко вся тварь с нами совоздыхает и сблезнует даже доныне: 23 не точию же, но и сами начаток Духа имуще, и мы сами в себе воздыхаем, всыновления чающе, избавления телу нашему. 24 Упованием бо спасохомся. Упование же видимое, несть упование: еже бо видит кто, что и уповает? 25 Аще ли, егоже не видим, надеемся, терпением ждем. 26 Сице же и Дух способствует нам в немощех наших: о чесом бо помолимся,

якоже подобает, не вемы, но Сам Дух ходатайствует о нас  
воздыхании неизглаголаннми. 27 Испытай же сердца  
весть, что есть мудрование Духа, яко по Богу приповедует о  
святых. 28 Вемы же, яко любящим Бога вся поспешествуют  
во благое, сущым по предуведению званым: 29 ихже бо  
предуведе, (тех) и предустави сообразных быти образу Сына  
Своего, яко быти Ему первородну во многих братиях: 30 а  
ихже предустави, тех и призва: а ихже призва, сих и оправда:  
а ихже оправда, сих и прослави. 31 Что убо речем к сим, аще  
Бог по нас, кто на ны, 32 Иже убо Своего Сына не пощаде,  
но за нас всех предал есть Его, како убо не и с Ним вся  
нам дарствует? 33 Кто поемлет на избранныя Божия, Бог  
оправдаяй. 34 Кто осуждаяй? Христос Иисус умерый, паче же  
и воскресый, Иже и есть о десную Бога, Иже и ходатайствует  
о нас. 35 Кто ны разлучит от любве Божия, скорбь ли, или  
теснота, или гонение, или глад, или нагота, или беда, или  
мечь? Якоже есть писано: 36 яко Тебе ради умерщвляеми  
есмы весь день: вменихомся якоже овцы заклениа. 37 Но во  
всех сих препобеждаем за Возлюбльшаго ны. 38 Известихся  
бо, яко ни смерть, ни живот, ни Ангели, ни Начала, ниже  
Силы, ни настоящая, ни грядущая, 39 ни высота, ни глубина,  
ни ина тварь кая возможет нас разлучити от любве Божия,  
яже о Христе Иисусе Господе нашем.

**9** Истину глаголю о Христе, не лгу, послушествующей ми  
совести моей Духом Святым, 2 яко скорбь ми есть велия и  
непрестающая болезнь сердцу моему: 3 молил бых ся бо сам  
аз отлучен быти от Христа по братии моей, сродницех моих  
по плоти, 4 иже суть Израилите, ихже всыновление и слава,  
и завети и законоположение, и служение и обетования: 5

ихже отцы, и от нихже Христос по плоти, сый над всеми Бог благословен во веки, аминь. (aion g165) 6 Не такоже, яко отпаде слово Божие: не вси бо сущии от Израиля, сии Израиль, 7 ни зане суть семя Авраамле, вси чада: но во Исааце, рече, наречется ти семя. 8 Сиречь, не чада плотская, сия чада Божия: но чада обетования причитаются в семя. 9 Обетования бо слово сие: на сие время прииду, и будет Сарре сын. 10 Не точию же, но и Ревекка от единого ложа Исаака отца нашего имущи: 11 еще бо не рождшымся, ни сотворившым что благо или зло, да по избранию предложение Божие пребудет 12 не от дел, но от Призывающаго, речеса ей, яко болий поработает меньшему, 13 якоже есть писано: Иакова возлюбих, Исава же возненавидех. 14 Что убо речем? Еда неправда у Бога? Да не будет. 15 Моисеови бо глаголет: помилую, егоже аще помилую, и ущедрю, егоже аще ущедрю. 16 Темже убо ни хотящаго, ни текущаго, но милующаго Бога. 17 Глаголет бо Писание фараонови: яко на истое сие воздвигох тя, яко да покажу тобою силу Мою и да возвестится имя Мое по всей земли. 18 Темже убо, егоже хошет, милует: а егоже хошет, ожесточает. 19 Речеши убо ми: чесо ради еще укоряет, воли бо Его кто противитися может? 20 Темже убо, о, человече, ты кто еси, против отвещающа Богу? Еда речет здание создавшему е: почто мя сотворил еси тако? 21 Или не имать власти скудельник на брени, от тогожде смешения сотворити ов убо сосуд в честь, ов же не в честь? 22 Аще же хотя Бог показати гнев Свой и явити силу Свою, пренесе во мнозе долготерпении сосуды гнева совершены в погибель: 23 и да скажет богатство славы Своя на сосудах милости,



яже предуготова в славу, 24 ихже и призва нас не точию от Иудей, но и от язык: 25 якоже и во Осии глаголет: нареку не люди Моя люди Моя, и невозлюбленную возлюблену: 26 и будет, на месте, идеже речеся им: не людие Мои есте вы, тамо нарекутся сынове Бога живаго. 27 Исаиа же вопиет о Израили: аще будет число сынов Израилевых яко песок морской, останок спасется: 28 слово бо скончаяя и сокращая в правде, яко слово сокращено сотворит Господь на земли, 29 и якоже прорече Исаиа: аще не бы Господь Саваоф оставил нам семене, якоже Содом убо были быхом, и якоже Гоморру уподобилися быхом. 30 Что убо речем, яко языцы, не гонящии правду, постигоша правду, правду же, яже от веры: 31 Израиль же, гоня закон правды, в закон правды не постиже. 32 Чесо ради? Зане не от веры, но от дел закона: преткнушася бо о камень претыкания, 33 якоже есть писано: се, полагаю в Сионе камень претыкания и камень соблазна: и всяк веруай в Онъ не постыдится.

**10** Братие, благоволение убо моего сердца и молитва, яже к Богу по Израили, есть во спасение. 2 Свидетельствую бо им, яко ревность Божию имут, но не по разуму. 3 Не разумеюще бо Божия правды и свою правду ищуще поставити, правде Божией не повинушася: 4 кончина бо закона Христос, в правду всякому верующему. 5 Моисей бо пишет правду юже от закона: яко сотворивый та человек жив будет в них. 6 А яже от веры правда сице глаголет: да не речеши в сердцы твоём: кто взыдет на небо, сиречь Христа свести: 7 или кто снидет в бездну, сиречь Христа от мертвых возвести. (Abyssos g12) 8 Но что глаголет Писание? Близ ти глагол есть, во устех твоих и в сердцы твоём, сиречь глагол веры, егоже проповедаем: 9

яко аще исповеси усты твоими Господа Иисуса, и веруеши в  
сердцы твоём, яко Бог Того воздвиже из мертвых, спасешися:  
10 сердцем бо веруется в правду, усты же исповедуется во  
спасение. 11 Глаголет бо Писание: всяк веруай в Онъ не  
постыдится. 12 Нестъ бо разнствия Иудееви же и Еллину:  
Той бо Бог всех, богатяй во всех призывающих Его. 13 Всяк  
бо, иже аще призовет имя Господне, спасется. 14 Какое убо  
призвут, в Негоже не вероваша? Какое же уверуют, Егоже не  
услышаша? Какое же услышат без проповедающего? 15 Какое  
же проповедят, аще не послани будут? Якоже есть писано:  
коль красны ноги благовествующих мир, благовествующих  
благая. 16 Но не вси послушаша благовествования. Исаия бо  
глаголет: Господи, кто верова слуху нашему? 17 Темже убо  
вера от слуха, слух же глаголголом Божиим. 18 Но глаголю:  
еда не слышаша, темже убо, во всю землю изыде вещание  
их, и в концы вселенныя глаголы их. 19 Но глаголю: еда  
не разуме Израиль? Первый Моисей глаголет: Аз раздражу  
вы не о языке, но о языке неразумне прогневаю вас. 20  
Исаия же дерзает и глаголет: обретохся не ищущим Мене,  
явлен бых не вопрошающим о Мне. 21 Ко Израилю же  
глаголет: весь день воздох руце Мои к людем непокоривым и  
пререкающим.

**11** Глаголю убо: еда отрину Бог люди Своя? Да не будет.  
Ибо и аз Израильтянин есмь, от семене Авраамля, колена  
Вениаминова. 2 Не отрину Бог людей Своих, ихже прежде  
разуме. Или не весте, о Илии что глаголет Писание, яко  
приповедует Богови на Израиля, глаголя: 3 Господи, пророки  
Твоя избиша и олтари Твоя раскопаша: и аз остах един,  
и ищут души моя, изяти ю. 4 Но что глаголет ему

Божественный ответ? Оставих Себе семь тысяч мужей,  
иже не преклониша колена пред Ваалом. 5 Тако убо и в  
нынешнее время останок по избранию благодати бысть. 6  
Аще ли по благодати, то не от дел: зане благодать уже не  
бывает благодать. Аще ли от дел, кому несть благодать:  
зане дело уже несть дело. 7 Что убо? Егоже искаше Израиль,  
сего не получи, а избрание получи. Прочии же ослепишася,  
8 якоже есть писано: даде им Бог дух умиления, очи не  
видети и уши не слышати, даже до днешняго дне. 9 И Давид  
глаголет: да будет трапеза их в сеть и в лов, и в соблазн и в  
воздаяние им: 10 да помрачатся очи их еже не видети, и  
хребет их выну сляцай. 11 Глаголю убо: еда согресиша, да  
отпадут? Да не будет. Но тех падением спасение языком,  
во еже раздражити их. 12 Аще ли же прегрешение их  
богатство мира, и отпадение их богатство языков: кольми  
паче исполнение их? 13 Вам бо глаголю языком: понеже убо  
есмы аз языком Апостол, службу мою прославляю. 14 Аще  
како раздражу мою плоть, и спасу некия от них? 15 Аще бо  
отложение их, примирение миру, что приятие, разве жизнь  
из мертвых? 16 Аще ли начаток свят, то и примешение: и  
аще корень свят, то и ветви. 17 Аще ли некия от ветвей  
отломишася, ты же, дивия маслина съй, прицепился еси в  
них, и причастник корене и масти маслинныя сотворился  
еси, 18 не хвалися на ветви: аще ли же хвалишися, не ты  
корень носиши, но корень тебе. 19 Речеши убо. Отломишася  
ветви, да аз прицеплюся. 20 Добре: неверием отломишася,  
ты же верою стоиши: не высокоумствуй, но бойся. 21  
Аще бо Бог естественных ветвей не пощаде, да не како и  
тебе не пощадит. 22 Видь убо благость и непощадение

Божие: на отпадших убо непощадение, а на тебе благодать Божия, аще пребудеши в благодати: аще ли же ни, то и ты отсечен будеши. 23 И они же, аще не пребудут в неверствии, прицепятся: силен бо есть Бог паки прицепити их. 24 Аще бо ты от естественныя отсечен дивия маслины, и чрез естество прицепился еси к добрей маслине: кольми паче сии, иже по естеству, прицепятся своей маслине? 25 Не бо хочу вас не ведети тайны сея, братие, да не будете о себе мудри, яко ослепление от части Израилеви бысть, дондеже исполнение языков внидет, 26 и тако весь Израиль спасется, якоже есть писано: приидет от Сиона Избавляяй, и отвратит нечестие от Иакова: 27 и сей им от Мене завет, егда отиму грехи их. 28 По благовествованию убо, врази вас ради: по избранию же, возлюблени отец ради. 29 Нераскаянна бо дарования и звание Божие. 30 Якоже бо и вы иногда противистеся Богови, ныне же помиловани бысте сих противлением: 31 такожде и сии ныне противишася вашей милости, да и тии помиловани будут. 32 Затвори бо Бог всех в противление, да всех помилует. (eleēsē g1653) 33 О, глубина богатства и премудрости и разума Божия! Яко неиспытани судове Его, и неизследовани путие Его. 34 Кто бо разуме ум Господень, или кто советник Ему бысть? 35 Или кто прежде даде Ему, и воздастся Ему, 36 яко из Того и Тем и в Нем всяческая. Тому слава во веки. Аминь. (aiōn g165)

**12** Молю убо вас, братие, щедротами Божиими, представите телеса ваша жертву живу, святу, благоугодну Богови, словесное служение ваше, 2 и не сообразуйтесь веку сему, но преобразуйтесь обновлением ума вашего, во еже искушати вам, что есть воля Божия благая и угодная и

совершенная. (aīōn g165) 3 Глаголю бо благодатию давшуюся мне, всякому существу в вас не мудрствовати паче, еже подобает мудрствовати: но мудрствовати в целомудрии, коемуждо якоже Бог разделил есть меру веры. 4 Якоже бо во едином телеси многи уды имамы, уды же вси не тожде имут делание, 5 такожде мнози едино тело есмы о Христе, а по единому друг другу уди. 6 Имуще же дарования по благодати данной нам различна: аще пророчество, по мере веры: 7 аще ли служение, в служении: аще учяй, во учении: 8 аще утешаяй, во утешении: подаваяй, в простоте: предстояй, со тщанием: милуяй, с добрым изволением. 9 Любы нелицемерна: ненавидяще злаго, прилепляйтеся благому: 10 братолюбием друг ко другу любезни: честию друг друга болша творяще: 11 тщанием не лениви, духом горяще, Господви работающе. 12 Упованием радующесе, скобри терпяще, в молитве пребывающе: 13 требованием святых приющающесе, страннолюбия держащесе: 14 благословляйте гонящия вы: благословите, а не клените. 15 Радоватися с радующимися, и плакати с плачущими. 16 Тожде друг ко другу мудрствующе. Не высокая мудрствующе, но смиренными ведущесе: не бывайте мудри о себе: 17 ни единому же зла за зло воздающе, промышляюще добрая пред всеми человеки. 18 Аще возможно, еже от вас, со всеми человеки мир имейте. 19 Не себе отмщающе, возлюблении, но дадите место гневу. Писано бо есть: Мне отмщение, аз воздам, глаголет Господь. 20 Аще убо алчет враг твой, ухлеби его: аще ли жаждет, напой его: сие бо творя, углие огнено собираеши на главу его. 21 Не побежден бывай от зла, но побеждай благим злом.

**13** Всяка душа властем предержащым да повинуется: несть бо власть аще не от Бога, сущыя же власти от Бога учинены суть. **2** Темже противляйся власти, Божию повелению противляется: противляющиися же себе грех приемлют. **3** Князи бо не суть боязнь добрым делом, но злым. Хощеши же ли не бояться власти? Благое твори, и имети будеши похвалу от него: **4** Божий бо слуга есть, тебе во благое. Аще ли злое твориши, бойся, не бо без ума мечь носит: Божий бо слуга есть, отмститель в гнев злое творящему. **5** Темже потреба повиноватися не токмо за гнев, но и за совесть. **6** Сего бо ради и дани даете: служители бо Божии суть, во истое сие пребывающе. **7** Воздадите убо всем должная: емуже (убо) урок, урок: (а) емуже дань, дань: (а) емуже страх, страх: (и) емуже честь, честь. **8** Ни единому же ничимже должны бывайте, точию еже любити друг друга: любяй бо друга, закон исполни. **9** Еже бо: не прелюбы сотвориши, не убиеши, не украдеши, не лжесвидетелствуеши, не похощеши, и аще кая ина заповедь, в сем словеси совершается, во еже: возлюбиши искренняго твоего, якоже сам себе. **10** Любы искреннему зла не творит. Исполнение убо закона любви есть. **11** И сие, ведяще время, яко час уже нам от сна востати. Ныне бо ближайшее нам спасение, нежели егда веровахом. **12** Ночь убо прейде, а день приближися: отложим убо дела темная, и облечемся во оружие света. **13** Яко во дни, благообразно да ходим, не козлогласовании и пьянствы, не любодеянии и студодеянии, не рвением и завистию: **14** но облечытеся Господем нашим Иисус Христом, и плоти угодия не творите в похоти.

**14** Изнемогающаго же в вере приемлите, не в сомнение помышлении. **2** Ов бо верует ясти вся, а изнемогая зелия да яст. **3** Ядый не ядущаго да не укаряет: и не ядый ядущаго да не осуждает: Бог бо его прият. **4** Ты кто еси судяй чуждему рабу? Своему Господви стоит, или падает. Станет же, силен бо есть Бог поставити его. **5** Ов убо разсуждает день чрез день, ов же судит на всяк день. Киждо своею мыслию да известуется. **6** Мудрствуяй день, Господеви мудрствует: и не мудрствуяй день, Господеви не мудрствует. Ядый, Господеви яст. Благодарит бо Бога: и не ядый, Господеви не яст, и благодарит Бога. **7** Никтоже бо нас себе живет, и никтоже себе умирает: **8** аще бо живем, Господеви живем, аще же умираем, Господеви умираем: аще убо живем, аще умираем, Господни есмы. **9** На сие бо Христос и умре и воскресе и оживе, да и мертвыми и живыми обладает. **10** Ты же почто осуждаеши брата твоего, или ты что уничижаеши брата твоего? Все бо предстанем судищу Христову. **11** Писано бо есть: живу Аз, глаголет Господь, яко Мне поклонится всяко колено, и всяк язык исповестся Богови. **12** Темже убо кийждо нас о себе слово даст Богу. **13** Не ктому убо друг друга осуждаем, но сие паче судите, еже не полагати претыкания брату или соблазна. **14** Вем и извещен есмь о Христе Иисусе, яко ничтоже скверно само собою: точию помышляющему что скверно быти, оному скверно есть. **15** Аще же брашна ради брат твой скорбит, уже не по любви ходиши: не брашном твоим того погубляй, за негоже Христос умре. **16** Да не хулится убо ваше благое. **17** Несть бо Царство Божие брашно и питие, но правда и мир и радость о Дусе Святе. **18** Иже бо сими служит Христови, благоугоден есть

Богови и искусен человеком. 19 Темже убо мир возлюбим и яже к созиданию друг ко другу. 20 Не брашна ради разорай дело Божие. Вся бо чиста, но зло человеку претыканием ядущему. 21 Добро не ясти мяс, ниже пити вина, ни о немже брат твой претыкается или соблазняется или изнемогает. 22 Ты веру имаши? О себе сам имей пред Богом. Блажен не осуждаяй себе, о немже искушается. 23 А сомняяйся, аще яст, осуждается, зане не от веры: всяко же, еже не от веры, грех есть.

**15** Должни есмы мы сильнии немощи немощных носити, и не себе угождати: 2 кииждо же вас ближнему да угождает во благое к созиданию. 3 Ибо и Христос не Себе угоди, но якоже есть писано: поношения поносящих Тебе нападоша на Мя. 4 Елика бо преднаписана быша, в наше наказание преднаписашася, да терпением и утешением Писаний упование имамаы. 5 Бог же терпения и утешения да даст вам тожде мудрствовати друг ко другу о Христе Иисусе, 6 да единодушно едиными усты славите Бога и Отца Господа нашего Иисуса Христа. 7 Темже приемлите друг друга, якоже и Христос прият вас во славу Божию. 8 Глаголю же Христа Иисуса служителя бывша обрезания по истине Божией, во еже утвердити обетования отцев. 9 А языком по милости, прославити Бога, якоже есть писано: сего ради исповемся Тебе во языцех, Господи, и имени Твоему пою. 10 И паки глаголет: возвеселитесь, языцы, с людьми Его. 11 И паки: хвалите Господа, вси языцы, и похвалите Его, вси людие. 12 И паки Исаиа глаголет: будет корень Иессеов, и востаяй владети над языки: на Того языцы уповают. 13 Бог же упования да исполнит вас всякия радости и мира



в вере, избыточествовати вам во уповании, силою Духа Святаго. 14 Извещен же есмь, братие моя, и сам аз о вас, яко и сами вы полни есте благодати, исполнены всякаго разума, могуще и инья научити: 15 дерзее же писах вам, братие моя, от части, яко вспомяная вам, за благодать данную ми от Бога, 16 во еже быти ми служителю Иисус Христову во языцех, священнодействующу благовествование Божие, да будет приношение еже от язык благоприятно и освященно Духом Святым. 17 Имам убо похвалу о Христе Иисусе в тех, яже к Богу: 18 не смею бо глаголати что, ихже не содея Христос мною, в послушание языков, словом и делом, 19 в силе знамений и чудес, силою Духа Божия, якоже ми от Иерусалима и окрест даже до Иллирика исполнити благовествование Христово. 20 Сице же потщахся благовестити, не идеже именовася Христос, да не на чужем основании созижду, 21 но якоже есть писано: имже не возвестися о Нем, узрят, и иже не слышаша, уразумеют. 22 Темже и возбранен бых многажды приити к вам. 23 Ныне же ктому места не имыи в странах сих, желание же имый приити к вам от многих лет, 24 яко аще поиду во Испанию, прииду к вам. Уповаю бо мимогрядый видети вас и вами проводитися тамо, аще вас прежде от части насыщуся. 25 Ныне же гряду во Иерусалим, служаи святым, 26 благоволиша бо Македония и Ахаиа общение некое сотворити к ницым святым живуцым во Иерусалиме. 27 Благоволиша бо, и должны им суть. Аще бо в духовных их причастницы быша языцы, должны суть и в плотских послужити им. 28 Сие убо скончав, и запечатлев им плод сей, поиду вами во Испанию: 29 вем же, яко грядый к вам, во исполнении

благословения благовестия Христова прииду. **30** Молю же вы, братие, Господем нашим Иисус Христом и любовью Духа, споспешствуйте ми в молитвах о мне к Богу, **31** да избавлюся от противляющихся во Иудеи, и да служба моя, яже во Иерусалиме, благоприятна будет святым. **32** Да с радостью прииду к вам волею Божию и упокоюся с вами. **33** Бог же мира со всеми вами. Аминь.

**16** Вручаю же вам Фиву сестру нашу, сущу служительницу церкви яже в Кегхреех: **2** да примете ю о Господе достойне святым, и споспешствуйте ей, о нейже аще от вас потребует вещи: ибо сия заступница многим бысть, и самому мне. **3** Целуйте Прискиллу и Акилу, споспешника моя о Христе Иисусе, **4** иже по души моей своя выя положиста, ихже не аз един благодарю, но и вся церкви языческа: и домашнюю их церковь. **5** Целуйте Епенета возлюбленного ми, иже есть начаток Ахаии во Христа. **6** Целуйте Мариамь, яже много трудися о нас. **7** Целуйте Андроника и Иунию, сродники моя и спленники моя, иже суть нарочиты во Апостолех, иже и прежде мене вероваста во Христа. **8** Целуйте Амплиа возлюбленного ми о Господе. **9** Целуйте Урвана споспешника нашего о Христе, и Стахиа возлюбленного ми. **10** Целуйте Апеллиа искусна о Христе. Целуйте сущыя от Аристовула. **11** Целуйте Иродиона сродника моего. Целуйте иже от Наркисса сущыя о Господе. **12** Целуйте Трифену и Трифосу труждающыяся о Господе. Целуйте Персиду возлюбленную, яже много трудися о Господе. **13** Целуйте Руфа избранного о Господе, и мать его и мою. **14** Целуйте Асигкрита, Флегонта, Ерма, Патрова, Ермиа, и сущую с ними братию. **15** Целуйте Филолога и Иулию, Ниреа и сестру его, и Олимпана,

и сущыя с ними вся святыя. 16 Целуйте друг друга лобзанием святым. Целуют вы вся церкви Христовы. 17 Молю же вы, братие, блюдитесь от творящих распри и раздоры, кроме учения, ему же вы научитесь, и уклонитесь от них: 18 таковии бо Господеви нашему Иисусу Христу не работают, но своему чреву: иже благими словесы и благословением прельщают сердца незлобивых. 19 Ваше бо послушание ко всем достиже. Радуюся же еже о вас. Хощу же вас мудрых убо быти во благое, простых же в злое. 20 Бог же мира да сокрушит сатану под ноги ваша вскоре. Благодать Господа нашего Иисуса Христа с вами. Аминь. 21 Целует вас Тимофей споспешник мой, и Лукий и Иасон и Сосипатр, сродницы мои. 22 Целую вы и аз Тертый, написавый послание сие, о Господе. 23 Целует вы Гаие странноприимец мой и церкви всея. Целует вы Ераст строитель градский, и Куарт брат. 24 Благодать Господа нашего Иисуса Христа со всеми вами. Аминь. 25 Могущему же вас утвердити по благовествованию моему и проповеданию Иисус Христову, по откровению тайны, леты вечными умолчанныя, (aiōnios g166) 26 явльшиися же ныне, писании пророческими, по повелению вечнаго Бога, в послушание веры во всех языцех познавшиися, (aiōnios g166) 27 Единому Премудрому Богу, Иисусом Христом, Ему же слава во веки. Аминь. (aiōn g165)

# Первое послание к Коринфянам

**1** Павел, зван Апостол Иисус Христов волею Божиею, и Сосфен брат, **2** церкви Божией сущей в Коринфе, освященным о Христе Иисусе, званым святым, со всеми призывающими имя Господа нашего Иисуса Христа, во всяцем месте, тех же и нашем: **3** благодать вам и мир от Бога Отца нашего и Господа Иисуса Христа. **4** Благодарю Бога моего всегда о вас, о благодати Божией данной вам о Христе Иисусе, **5** яко во всем обогатитесь о Нем, во всяцем слове и всяцем разуме, **6** якоже свидетельство Христово известися в вас: **7** яко вам не лишится ни во единем даровании, чающым откровения Господа нашего Иисуса Христа, **8** Иже и утвердит вас даже до конца неповинных в день Господа нашего Иисуса Христа. **9** Верен Бог, Имже звани бысте во общение Сына Его Иисуса Христа, Господа нашего. **10** Молю же вы, братие, именем Господа нашего Иисуса Христа, да тожде глаголете вси, и да не будут в вас распри, да будете же утверждени в томже разумении и в тойже мысли. **11** Возвестися бо ми о вас, братие моя, (посланным) от Хлоиса, яко рвения в вас суть. **12** Глаголю же се, яко кийждо вас глаголет: аз убо есмь Павлов, аз же Аполлосов, аз же Кифин, аз же Христов. **13** Еда разделися Христос, еда Павел распятыя по вас? Или во имя Павлово креститесь? **14** Благодарю Бога, яко ни единаго от вас крестих, точию Криспа и Гаиа, **15** да не кто речет, яко в мое имя крестих. **16** Крестих же и Стефанинов дом: прочее не вем, аще кого иного крестих. **17** Не посла бо мене Христос крестити, но благовестити, не в премудрости слова, да не испразднится крест Христов.

18 Слово бо крестное погибающим убо юродство есть, а спасаемым нам сила Божия есть. 19 Писано бо есть: погублю премудрость премудрых, и разум разумных отвергу. 20 Где премудр? Где книжник? Где совопросник века сего? Не обуили Бог премудрость мира сего? (aiōn g165) 21 Понеже бо в премудрости Божией не разуме мир премудростию Бога, благоизволил Бог буйством проповеди спасти верующих. 22 Понеже и Иудее знамения просят, и Еллини премудрости ищут: 23 мы же проповедуем Христа распята, Иудеем убо соблазн, Еллином же безумие, 24 самем же званым Иудеем же и Еллином Христа, Божию силу и Божию премудрость: 25 зане буже Божие премудрее человек есть, и немощное Божие крепчае человек есть. 26 Видите бо звание ваше, братие, яко не мнози премудри по плоти, не мнози сильни, не мнози благородни: 27 но буяя мира избра Бог, да премудрыя посрамит, и немощная мира избра Бог, да посрамит крепкая: 28 и худородная мира и уничиженная избра Бог, и не сущая, да сущая упразднит, 29 яко да не похвалится всяка плоть пред Богом. 30 Из Негоже вы есте о Христе Иисусе, Иже бысть нам премудрость от Бога, правда же и освящение и избавление, 31 да, якоже пишется: хваляйся, о Господе да хвалится.

**2** И аз пришед к вам, братие, приидох не по превосходному словеси или премудрости возвещая вам свидетелство Божие: 2 не судих бо ведети что в вас, точию Иисуса Христа, и Сего распята: 3 и аз в немощи и страхе и трепете мнозе бых в вас. 4 И слово мое и проповедь моя не в препретелных человеческия премудрости словесех, но в явлении духа и силы, 5 да вера ваша не в мудрости человечестей,

но в силе Божией будет. **6** Премудрость же глаголем в совершенных, премудрость же не века сего, ни князей века сего престающих, (аіѡн g165) **7** но глаголем премудрость Божию, в тайне сокровенную, юже предустави Бог прежде век в славу нашу, (аіѡн g165) **8** юже никтоже от князей века сего разуме: аще бо быша разумели, не быша Господа славы распяли. (аіѡн g165) **9** Но якоже есть писано: ихже око не виде, и ухо не слыша, и на сердце человеку не въздоша, яже уготова Бог любящим Его. **10** Нам же Бог открыл есть Духом Своим: Дух бо вся испытует, и глубины Божия. **11** Кто бо весть от человек, яже в человеце, точию дух человека, живущий в нем? Такожде и Божия никтоже весть, точию Дух Божий. **12** Мы же не духа мира сего прияхом, но Духа иже от Бога, да вемы яже от Бога дарованная нам, **13** яже и глаголем не в наученых человеческия премудрости словесех, но в наученых Духа Святаго, духовная духовными сразсуждающе. **14** Душевен же человек не приемлет яже Духа Божия: юродство бо ему есть, и не может разумети, зане духовне востязуется. **15** Духовный же востязует убо вся, а сам той ни от единаго востязуется. **16** Кто бо разуме ум Господень, иже изяснит и? Мы же ум Христов имамы.

**3** И аз, братие, не могох вам глаголати яко духовным, но яко плотяным, яко младенцем о Христе. **2** Млеко вы напоих, а не брашном: ибо не у можасте, но ниже еще можете ныне, **3** еще бо плотстии есте. Идеже бо в вас зависти и рвенія и распри, не плотстии ли есте и по человеку ходите? **4** Егда бо глаголет кто: аз убо есмь Павлов, другий же: аз Аполлосов: не плотстии ли есте? **5** Кто убо есть Павел? Кто же ли Аполлос? Но точию служителие, имиже

веровасте, и комуждо якоже Господь даде. **6** Аз насадих, Аполлос напои, Бог же возрасти: **7** темже ни насаждай есть что, ни напаяй, но возвращаяй Бог. **8** Насаждай же и напаяй едино еста: кийждо же свою мзду примет по своему труду. **9** Богу бо есмы споспешницы: Божие тяжание, Божие здание есте. **10** По благодати Божией данной мне, яко премудр архитектон основание положих, ин же назидает: кийждо же да блюдет, како назидает. **11** Основания бо инаго никтоже может положить паче лежащаго, еже есть Иисус Христос. **12** Аще ли кто назидает на основании сем злато, сребро, камень честное, дрова, сено, тростие, **13** кождо дело явлено будет: день бо явит, зане огнем открывается: и кождо дело, якоже есть, огонь искусит. **14** (И) егоже аще дело пребудет, еже назда, мзду примет: **15** (а) егоже дело сгорит, отщелтится: сам же спасется, такожде якоже огнем. **16** Не весте ли, яко храм Божий есте, и Дух Божий живет в вас? **17** Аще кто Божий храм растлит, растлит сего Бог: храм бо Божий свят есть, иже есте вы. **18** Никтоже себе да прельщает: аще кто мнится мудр быти в вас в вещи сем, буй да бывает, яко да премудр будет. (aiōn g165) **19** Премудрость бо мира сего буйство у Бога есть, писано бо есть: запинаяй премудрым в коварстве их. **20** И паки: Господь весть помышления человеческа, яко суть суетна. **21** Темже никтоже да хвалится в человецех, вся бо ваша суть: **22** аще Павел, или Аполлос, или Кифа, или мир, или живот, или смерть, или настоящая, или будущая, вся ваша суть: **23** вы же Христовы, Христос же Божий.

**4** Тако нас да непщует человек, яко слуг Христовых и строителей таин Божиих: **2** а еже прочее ищется в строителех,

да верен кто обрящется. 3 Мне же не велико есть, да от вас истяжуся, или от человеческого дне: но ни сам себе востязую. 4 Ничесоже бо в себе свем, но ни о сем оправдаюся: востязуй же мя Господь есть. 5 Темже прежде време не ничтоже судите, дондеже приидет Господь, Иже во свете приведет тайная тмы и объявит советы сердечныя, и тогда похвала будет комуждо от Бога. 6 Сия же, братие (моя), преобразих на себе и Аполлоса вас ради, да от наю научитесь не паче написанных мудрствовати, да не един по единому гордитесь на другаго. 7 Кто бо тя разсуждает? Что же имаши, егоже неси приял? Аще же и приял еси, что хвалишися яко не прием? 8 Се, сыти есте, се, обогатистесь, без нас воцаристесь: и о, дабы воцарилися есте, да и мы быхом с вами цартсвовали. 9 Мню бо, яко Бог ны посланники последния яви, яко насмертники: зане позор быхом миру и Ангелом и человеком. 10 Мы (убо) буи Христа ради, вы же мудри о Христе: мы немощни, вы же крепцы: вы слави, мы же безчестни. 11 До нынешняго часа и алчем, и жаждем, и наготуем, и страждем, и скитаемся, 12 и труждаемся, делающе своими руками. Укоряеми, благословляем: гоними, терпим: 13 хулими, утешаемся: якоже отреби миру быхом, всем поправление доселе. 14 Не срамляя вас сия пишу, но якоже чада моя возлюбленная наказую. 15 Аще бо (и) многи пестуны имате о Христе, но не многи отцы: о Христе бо Иисусе благовествованием аз вы родих. 16 Молю же вас: подобни мне бывайте, якоже аз Христу. 17 Сего ради послах к вам Тимофеа, иже ми есть чадо возлюблено и верно о Господе, иже вам воспомянет пути моя, яже о Христе Иисусе, якоже везде и во всяцей церкви учу. 18 Яко не грядущу ми к



вам, разгордешася нецыи: **19** прииду же скоро к вам, аще Господь восхоцет, и уразумею не слово разгордевшихся, но силу: **20** не в словеси бо Царство Божие, но в силе. **21** Что хочете? С палицею ли прииду к вам, или с любовию и духом кротости?

**5** Отнюд слышитися в вас блужение, и таково блужение, якоже ни во языцех именуется, яко некоему имети жену отчую. **2** И вы разгордесте, и не паче плакасте, да изменится от среды вас содеявый дело сие. **3** Зане аз убо аще не у вас сый телом, ту же живый духом, уже судих, яко тамо сый: содеявшего сице сие, **4** о имени Господа нашего Иисуса Христа собравшымся вам и моему духу, с силою Господа нашего Иисуса Христа, **5** предати такового сатане во измождение плоти, да дух спасется в день Господа нашего Иисуса Христа. **6** Не добра похвала ваша. Не весте ли, яко мал квас все смешение квасит? **7** Очистите убо ветхий квас, да будете ново смешение, якоже есте безквасни: ибо Пасха наша за ны пожрен бысть Христос. **8** Темже да празднуем не в квасе ветсе, ни в квасе злобы и лукавства, но в безквасиих чистоты и истины. **9** Писах вам в послании не примешатися блудником: **10** и не всяко блудником мира сего, или лихоимцем, или хищником, или идолослужителем, понеже убо должни бы есте были от мира (сего) изыти: **11** ныне же писах вам не примешатися, аще некий, брат именуемь, будет блудник, или лихоимец, или идолослужитель, или досадитель, или пьяница, или хищник: с таковым ниже ясти. **12** Что бо ми и внешних судити? Не внутренних ли вы судите? **13** Внешних же Бог судит. И измите злаго от вас самех.

**6** Смеет ли кто от вас, вещь имея ко иному, судитися от неправедных, а не от святых? **2** Не весте ли, яко святии мирови имут судити? И аще вами суд примет мир, недостойни есте судищем худым? **3** Не весте ли, яко аггелов судити имамы, а не точию житейских? **4** Житейская бо судища аще имате, уничиженных в церкви, сих посаждаете. **5** К сраму вам глаголю: тако ли несть в вас мудр ни един, иже может разсудити между братий своих? **6** Но брат с братом судится, и то пред неверными. **7** Уже убо отнюд вам срам есть, яко тяжбы имате между собою. Почто не паче обидими есте? Почто не паче лишени бываете? **8** Но вы (сами) обидите и лишаете, да еще братию. **9** Или не весте, яко неправедницы Царствия Божия не наследят? Не льстите себе: ни блудницы, ни идолослужителе, ни прелюбодее, (ни сквернителе, ) ни малакии, ни мужеложницы, **10** ни лихоимцы, ни татие, ни пьяницы, ни досадителе, ни хищницы Царствия Божия не наследят. **11** И сими (убо) нецыи бесте, но омыстесь, но освятитесь, но оправдистесь именем Господа нашего Иисуса Христа и Духом Бога нашего. **12** Вся ми леть суть, но не вся на пользу: вся ми леть суть, но не аз обладаю буду от чего. **13** Брашна чреву, и чрево брашном: Бог же и сие и сия упразднит. Тело же не блужению, но Господеви, и Господь телу. **14** Бог же и Господа воздвиже, и нас воздвигнет силою Своею. **15** Не весте ли, яко телеса ваша удове Христовы суть? Возьмь ли убо удовы Христовы, сотворю удовы блудничны? Да не будет. **16** Или не весте, яко прилепляяся сквернодейце едино тело есть (с блудодейцею)? Будета бо, рече, оба в плоть едину. **17** Прилепляяся же Господеви един дух есть (с Господем). **18** Бегайте блудодеяния: всяк (бо)

грех, егоже аще сотворит человек, кроме тела есть: а блудяй во свое тело согрешает. **19** Или не весте, яко телеса ваша храм живущаго в вас Святаго Духа суть, Егоже имате от Бога, и несте свои? **20** Куплени бо есте ценою. Прославите убо Бога в телесех ваших и в душах ваших, яже суть Божия.

**7** А о нихже писасте ми, добро человеку жене не прикасатися. **2** Но блудодеяния ради кийждо свою жену да имать, и каяждо (жена) своего мужа да имать. **3** Жене муж должную любовь да воздает: такожде и жена мужу. **4** Жена своим телом не владеет, но муж: такожде и муж своим телом не владеет, но жена. **5** Не лишайте себе друг друга, точию по согласию до времени, да пребываете в посте и молитве, и паки вкупе собирайтесь, да не искушает вас сатана невоздержанием вашим. **6** Сие же глаголю по совету, (а) не по повелению. **7** Хощу бо, да вси человецы будут, якоже и аз: но кийждо свое дарование имать от Бога, ов убо сице, ов же сице. **8** Глаголю же безбрачным и вдовицам: добро им есть, аще пребудут якоже и аз: **9** аще ли не удержатся, да посягают: лучше бо есть жениться, нежели разжизатися. **10** А оженившимся завещаваю не аз, но Господь: жене от мужа не разлучатися: **11** аще ли же и разлучится, да пребывает безбрачна, или да смирится с мужем (своим): и мужу жены не отпущати. **12** Прочым же аз глаголю, (а) не Господь: аще который брат жену имать неверну, и та благоволит жити с ним, да не оставляет ея: **13** и жена аще имать мужа неверна, и той благоволит жити с нею, да не оставляет его: **14** святится бо муж неверен о жене верне, и святится жена неверна о мужи верне: иначе бо чада ваша нечиста были бы, ныне же свята суть. **15** Аще ли неверный отлучается, да разлучится: не

поработися (бо) брат или сестра в таковых: в мир бо призва нас (Господь) Бог. 16 Что бо веси, жено, аще мужа спасеши? Или что веси, мужу, аще жену спасеши? 17 Точию коемуждо якоже разделил есть Бог, кийждо якоже призван бысть Господем, тако да ходит: и тако во всех церквах повелеваю. 18 Во обрезании ли кто призван бысть? Да не отторгнется: в необрезании ли кто призван бысть? Да не обрезуется. 19 Обрезание ничтоже есть, и необрезание ничтоже есть, но соблюдение заповедий Божиих. 20 Кийждо в звании, в немже призван бысть, в том да пребывает. 21 Раб ли призван был еси? Да не нерадиши: но аще и можеши свободен быти, болше поработи себе. 22 Призванный бо о Господе раб, свободник Господень есть: такожде и призванный свободник, раб есть Христов. 23 Ценою куплени есте: не будите раби человеком. 24 Кийждо, в немже призван бысть, братие, в том да пребывает пред Богом. 25 О девах же повеления Господня не имам, совет же даю, яко помилован от Господа верен быти. 26 Мню убо сие добро быти за настоящую нужду, яко добро человеку тако быти. 27 Привязался ли еси жене? Не ищи разрешения. Отрешился ли еси жены? Не ищи жены. 28 Аще ли же и женишися, не согрешил еси: и аще посягнет дева, не согрешила есть. Скорбь же плоти имети будут таковии: аз же вы щажду. 29 Сие же глаголю, братие, яко время прекращено есть прочее, да и имущии жены, якоже не имущии будут: 30 и плачущиися, якоже не плачущии: и радующиися, якоже не радующеся: и купующии, яко не содержаще: 31 и требующии мира сего, яко не требующе: преходит бо образ мира сего. 32 Хощу же вас безпечальных быти. Не женивыйся печется о Господних, како угодити

Господеви: **33** а оженивийся печется о мирских, како угодити жене. Разделися жена и дева: **34** неприящая печется о Господних, како угодити Господеви, да будет свята и телом и духом: а посягшая печется о мирских, како угодити мужу. **35** Сие же на пользу вам самем глаголю: не да сило вам наложу, но к благообразию и благоприступанию Господеви безмолвну. **36** Аще ли же кто безобразити о деве своей непщует, аще есть превозрастна, и тако должна есть быти: еже хочет, да творит: не согрешает, аще посягнет. **37** А иже стоит твердо сердцем, не имый нужды, власть же имать о своей воли, и се разсудил есть в сердцы своем блюсти деву свою, добре творит. **38** Темже и вдаяй браку свою деву добре творит: и не вдаяй лучше творит. **39** Жена привязана есть законом, в елико время живет муж ея: аще же умрет муж ея, свободна есть, за негоже хочет, посягнути, точию о Господе. **40** Блаженнейша же есть, аще тако пребудет, по моему совету: мнюся бо и аз Духа Божия имети.

**8** О идоложертвенных же вемы: яко вси разум имамы. Разум (убо) кичит, а любы созидает. **2** Аще ли кто мнится ведети что, не у что разуме, якоже подобает разумети: **3** аще же кто любит Бога, сей познан бысть от Него. **4** О ядении же идоложертвенных вемы, яко идол ничтоже есть в мире, и яко никтоже Бог ин, токмо Един. **5** Аще бо и суть глаголемии бози, или на небеси, или на земли: якоже суть бози мнози и господие мнози: **6** но нам един Бог Отец, из Негоже вся, и мы у Него, и един Господь Иисус Христос, Имже вся, и мы Тем. **7** Но не во всех разум: нецыи же совестью идолскою даже доселе якоже идоложертвенное ядят, и совесть их, немощна сущи, сквернится. **8** Брашно же нас не поставляет

пред Богом: ниже бо аще ямы, избыточествуем: ниже аще не ямы, лишаемся. **9** Блюдите же, да не како власть ваша сия преткновение будет немощным. **10** Аще бо кто видитя, имуща разум, в требищи возлежаща, не совесть ли его немощна сущи созиждется идоложертвенная ясти? **11** И погибнет немощный брат в твоём разуме, егоже ради Христос умре. **12** Такжеде согрешающе в братию и биюще их совесть немощну сущу, во Христа согрешаете. **13** Темже аще брашно соблазняет брата моего, не имам ясти мяса во веки, да не соблазню брата моего. (aīōn g165)

**9** Несмы ли Апостол? Несмы ли свободь? Не Иисуса Христа ли Господа нашего видех? Не дело ли мое вы есте о Господе? **2** Аще иным (и) несмы Апостол, но обаче вам есмь: печать бо моего апостолства вы есте о Господе. **3** Мой ответ востязующым мене сей есть. **4** Еда не имамы власти ясти и пити? **5** Еда не имамы власти сестру жену водити, яко и прочии Апостоли, и братия Господня, и Кифа? **6** Или един аз и Варнава не имамы власти еже не делати? **7** Кто воинствует своими оброки когда? Или кто насаждает виноград, и от плода его не яст? Или кто пасет стадо, и от млека стада не яст? **8** Еда по человеку сия глаголю? Не и закон ли сия глаголет? **9** В Моисеове бо законе писано: да не заградиши устну вола молотяща. Еда о волах радит Бог? **10** Или нас ради всяко глаголет? Нас бо ради написася, яко о надежди должен есть орай орати, и молотай с надеждою своего упования причащатися. **11** Аще мы духовная сеяхом вам, велико ли, аще мы ваша телесная пожнем? **12** Аще инии власти ваша причащаются, не паче ли мы? Но не сотворихом по области сей: но вся терпим,

да не прекращение кое дамы благовествованию Христову.  
13 Не весте ли, яко делающии священная от святилища  
ядят? (и) служащии олтарю со олтарем делятся? 14 Тако и  
Господь повеле проповедающим Благовестие от благовестия  
жити. 15 Аз же ни едино сотворих от сих. Не писах же сия,  
да тако будет о мне: добрее бо мне паче умрети, нежели  
похвалу мою кто да испразднит. 16 Аще бо благовествую,  
несть ми похвалы, нужда бо ми належит: горе же мне есть,  
аще не благовествую. 17 Аще убо волею сие творю, мзду  
имам: аще же неволею, строение ми есть предано. 18  
Кая убо ми есть мзда? Да благовествуяй без мзды положу  
Благовестие Христово, во еже не творити ми по области  
моей в благовествовании. 19 Свободен бо сый от всех,  
всем себе поработих, да множайшыя приобрящу: 20 бых  
Иудеем яко Иудей, да Иудеи приобрящу: подзаконным яко  
подзаконен, да подзаконныя приобрящу: 21 беззаконным яко  
беззаконен, не сый беззаконник Богу, но законник Христу, да  
приобрящу беззаконныя. 22 Бых немощным яко немощен,  
да немощныя приобрящу. Всем бых вся, да всяко некия  
спасу. 23 Сие же творю за Благовестие, да сообщник ему  
буду. 24 Не весте ли, яко текущии в позорищи вси убо текут,  
един же приемлет почесть? Тако тецыте, да постигнете. 25  
Всяк же подвизайся от всех воздержится: и они убо да  
истленен венец примут, мы же неистленен. 26 Аз убо тако  
теку, не яко безвестно, тако подвизаюся, не яко воздух бияй:  
27 но умерщвляю тело мое и порабоцваю, да не како, иным  
проповедуя, сам неключимь буду.

**10** Не хощу же вас не ведети, братие, яко отцы наши вси  
под облаком быша, и вси сквозе море проидоша: 2 и вси

в Моисеа крестишася во облаце и в мори: **3** и вси тожде брашно духовное ядоша: **4** и вси тожде пиво духовное пиша, пияху бо от духовнаго последующаго камене: камень же бе Христос. **5** Но не во множайших их благоволи Бог, поражени бо быша в пустыни. **6** Сия же образи нам быша, яко не быти нам похотником злых, якоже и они похотеша. **7** Ни идолослужителе бывайте, якоже нецыи от них, якоже есть писано: седоша людие ясти и пити, и востаха играти. **8** Ниже соблудим, якоже нецыи от них соблудиша, и падоша во един день двадесять три тысящы. **9** Ни да искушаим Христа, якоже нецыи от них искусиша и от змий погибоша. **10** Ни ропщите, якоже нецыи от них ропташа и погибоша от всегубителя. **11** Сия же вся образи прилучахуся онем: писана же быша в научение наше, в нихже концы век достигоша. (aiōn g165) **12** Темже мняйся стояти да блюдется, да не падет. **13** Искушение вас не достиже, точию человеческое: верен же Бог, Иже не оставит вас искуситися паче, еже можете, но сотворит со искушением и избытие, яко возмоци вам понести. **14** Темже, братие моя возлюбленная, бегайте от идолослужения. **15** Яко мудрым глаголю: судите вы, еже глаголю: **16** чаша благословения, юже благословляем, не общение ли Крове Христовы есть? Хлеб, егоже ломим, не общение ли Тела Христова есть? **17** Яко един хлеб, едино тело есмы мнози: вси бо от одинаго хлеба причащаемся. **18** Видите Израиля по плоти: не ядуции ли жертвы общницы олтаревы суть? **19** Что убо глаголю? Яко идол что есть? Или идоложертвенное что есть? **20** Но зане, яже жрут языцы, бесом жрут, а не Богови: не хощу же вас общников быти бесом. **21** Не можете чашу Господню пити и чашу



бесовскую: не можете трапезе Господней причащаться и трапезе бесовстей. 22 Или раздражаем Господа? Еда крепчайши Его есмы? 23 Вся ми леть суть, но не вся на пользу: вся ми леть суть, но не вся назидают. 24 Никтоже своего си да ищет, но еже ближняго кийждо. 25 Все, еже на торжищи продаемое, ядите, ничтоже сумнящися, за совесть: 26 Господня бо земля и исполнение ея. 27 Аще ли кто от неверных призывает вы, и хотите ити, все предлагаемое вам ядите, ничтоже сумнящися, за совесть. 28 Аще ли же кто вам речет: сие идоложертвенно есть: не ядите за оногo поведавшаго, и совесть: Господня бо земля и исполнение ея. 29 Совесть же глаголю не свою, но другаго: вскую бо свобода моя судится от инья совести? 30 Аще аз благодатию причащаюся, почто хулу приемлю, о немже аз благодарю? 31 Аще убо ясте, аще ли пиете, аще ли ино что творите, вся во славу Божию творите. 32 Безпретковени бывайте Иудеем и Еллином и церкви Божией, 33 якоже и аз во всем всем угождаю, не иский своя пользы, но многих, да спасутся.

**11** Подражателе мне бывайте, якоже и аз Христу. 2 Хвалю же вы, братие, яко вся моя помните, и якоже предах вам, предания держите. 3 Хощу же вас ведети, яко всякому мужу глава Христос есть, глава же жене муж, глава же Христу Бог. 4 Всяк муж, молитву дея или пророчествуяй покрытою главою, срамляет главу свою: 5 и всяка жена, молитву деющая или пророчествующая откровенною главою, срамляет главу свою: едино бо есть и тожде остриженной: 6 аще бо не покрывается жена, да стрижется: аще ли же срам жене стрицися или бритися, да покрывается. 7 Муж убо не должен есть покрывати главу, образ и слава Божия

сый: жена же слава мужу есть. 8 Несть бо муж от жены, но жена от мужа: 9 ибо не создан бысть муж жены ради, но жена мужа ради. 10 Сего ради должна есть жена власть имети на главе Ангел ради. 11 Обаче ни муж без жены, ни жена без мужа, о Господе. 12 Якоже бо жена от мужа, сице и муж женою: вся же от Бога. 13 В вас самех судите, лепо ли есть жене откровенней Богу молитися? 14 Или и не самое естество учит вы, яко муж убо аще власы растит, безчестие ему есть, 15 жена же аще власы растит, слава ей есть? Зане растение власов вместо одеяния дано бысть ей. 16 Аще ли кто мнится спорлив быти, мы такового обычая не имамы, ниже церкви Божия. 17 Сие же завещавая не хвалю, яко не на лучшее, но на худшее собираетесь. 18 Первое убо, сходящимся вам в церковь, слышу в вас распри сущия, и часть некую (сих) верую. 19 Подобаает бо и ересем в вас быти, да искуснии явлени бывают в вас. 20 Сходящимся убо вам вкупе, несть Господскую вечерю ясти: 21 кийждо бо свою вечерю предваряет в снадение, и ов убо алчет, ов же упивается. 22 Еда бо домов не имате, во еже ясти и пити? Или о церкви Божией нерадите и срамляете не имущия? Что вам реку? Похваляю ли вы о сем? Не похваляю. 23 Аз бо приях от Господа, еже и предах вам, яко Господь Иисус в ночь, в нюже предан бываше, приемь хлеб, 24 и благодарив преломи, и рече: примите, ядите, сие есть Тело Мое, еже за вы ломимое: сие творите в Мое воспоминание. 25 Такожде и чашу по вечери, глаголя: сия чаша новый завет есть в Моей Крови: сие творите, елижды аще пиете, в Мое воспоминание. 26 Елижды бо аще ясте хлеб сей и чашу сию пиете, смерть Господню возвещаете, дондеже приидет. 27 Темже иже аще

яст хлеб сей или пиет чашу Господню недостойне, повинен будет Телу и Крови Господни. 28 Да искушает же человек себе, и тако от хлеба да яст и от чаши да пиет. 29 Ядый бо и пийй недостойне, суд себе яст и пиет, не разсуждая Тела Господня. 30 Сего ради в вас мнози немощни и недужливи, и спят доволни. 31 Аще бо быхом себе разсуждали, не быхом осуждени были. 32 Судими же, от Господа наказуемся, да не с миром осудимся. 33 Темже, братие моя, сходящесе ясти, друг друга ждите. 34 Аще ли кто алчет, в дому да яст, да не в грех сходитесе. О прочих же, егда прииду, устрою.

**12** О духовных же, братие, не хощу вас не ведети. 2 Весте, яко егда неверни бесте, ко идолом безгласным яко ведоми ведостесе. 3 Темже сказую вам, яко никтоже, Духом Божиим глаголяй, речет анафема Иисуса, и никтоже может рещи Господа Иисуса, точию Духом Святым. 4 Разделения же дарований суть, а тойжде Дух: 5 и разделения служений суть, а тойжде Господь: 6 и разделения действий суть, а тойжде есть Бог, действуяй вся во всех. 7 Комуждо же дается явление Духа на пользу: 8 овому бо Духом дается слово премудрости, иному же слово разума, о томже Дусе: 9 другому же вера, темже Духом: иному же дарования исцелений, о томже Дусе: 10 другому же действия сил, иному же пророчество, другому же разсуждения духовом, иному же роди языков, другому же сказания языков. 11 Вся же сия действует един и тойжде Дух, разделяя властию коемуждо якоже хошет. 12 Акоже бо тело едино есть и уды имать многи, вси же уди единаго тела, мнози суще, едино суть тело: тако и Христос. 13 Ибо едином Духом мы вси во едино тело крестихомся, аще Иудее, аще Еллини, или раби, или свободни: и вси едином

Духом напоихомся. 14 Ибо тело несть един уд, но мнози. 15  
Аще речет нога, яко несъмь рука, несъмь от тела: еда сего ради  
несть от тела? 16 И аще речет ухо, яко несъмь око, несъмь от  
тела: еда сего ради несть от тела? 17 Аще все тело око, где  
слух? Аще (же) все слух, где ухание? 18 Ныне же положи  
Бог уды, одинаго коегождо их в телеси, якоже изволи. 19  
Аще ли быша вси един уд, где тело? 20 Ныне же мнози  
убо удоуе, едино же тело. 21 Не может же око рещи руце:  
не тебе ми еси: или паки глава ногама: не тебе ми есте.  
22 Но много паче, мнящиися уди тела немощнейши быти,  
нужнейши суть, 23 и ихже мним безчестнейших быти тела,  
сим честь множайшую прилагаем: 24 и неблагообразнии  
наши благообразие множайше имут, а благообразнии наши  
не тебе имут. Но Бог раствори тело, худейшему болшу дав  
честь, 25 да не будет распри в телеси, но да тожде в себе  
пекутся уди. 26 И аще страждет един уд, с ним страждут вси  
уди: аще ли же славится един уд, с ним радуются вси уди. 27  
Вы же есте тело Христово, и уди от части. 28 И овых убо  
положи Бог в Церкви первее Апостолов, второе пророков,  
третье учителей: потом же силы, таже дарования исцелений,  
заступления, правления, роди языков. 29 Еда вси Апостоли?  
Еда вси пророцы? Еда вси учителя? Еда вси силы? 30 Еда  
вси дарования имут изцелений? Еда вси языки глаголют?  
Еда вси скажут? 31 Ревнуйте же дарований болших, и еще  
по превосхождению путь вам показую.

**13** Аще языки человеческими глаголю и ангелскими, любве  
же не имам, бых (яко) медь звенящи, или кимвал звяцай. 2  
И аще имам пророчество, и вем тайны вся и весь разум, и  
аще имам всю веру, яко и горы преставляти, любве же не

имам, ничтоже есмь. 3 И аще раздам вся имения моя, и аще предам тело мое, во еже сжещи е, любве же не имам, никакая польза ми есть. 4 Любы долготерпит, милосердствует, любы не завидит, любы не превозносится, не гордится, 5 не безчинствует, не ищет своих си, не раздражается, не мыслит зла, 6 не радуется о неправде, радуется же о истине: 7 вся любит, всему веру емлет, вся уповае, вся терпит. 8 Любы николиже отпадает, аще же пророчества упряднятся, аще ли языцы умолкнут, аще разум испряднится. 9 От части бо разумеваем и от части пророчествуем: 10 егда же приидет совершенное, тогда, еже от части, упряднится. 11 Егда бех младенец, яко младенец глаголах, яко младенец мудрствовах, яко младенец смышлях: егда же бых муж, отвергох младенческая. 12 Видим убо ныне якоже зеркалом в гадании, тогда же лицом к лицу: ныне разумею от части, тогда же познаю, якоже и познан бых. 13 Ныне же пребывают вера, надежда, любы, три сия: болши же сих любы.

**14** Держитесь любве: ревнуйте же духовным, паче же да пророчествуете. 2 Глаголяй бо языки, не человеком глаголет, но Богу: никтоже бо слышит, духом же глаголет тайны: 3 пророчествуяй же, человеком глаголет созидание и утешение и утверждение. 4 Глаголяй (бо) языки себе зиждет, а пророчествуяй церковь зиждет. 5 Хощу же всех вас глаголати языки, паче же да прорицаете: болий бо пророчествуяй, нежели глаголяй языки, разве аще (кто) сказует, да церковь созидание приемлет. 6 Ныне же, братие, аще прииду к вам языки глаголя, кую вам пользу сотворю, аще вам не глаголю или во откровении, или в разуме, или в пророчествии, или в научении? 7 Обаче бездушная глас

дающая, аще сопель, аще гусли, аще разнствия писканием не дадят, како разумно будет пискание или гудение? 8 Ибо аще безвестен глас труба даст, кто уготовится на брань? 9 Тако и вы аще не благоразумно слово дадите языком, како уразумеется глаголемое? Будете бо на воздух глаголюще. 10 Толицы убо, аще ключится, роди гласов суть в мире, и ни един их безгласен. 11 Аще убо не увем силы гласа, буду глаголющему иноязычник, и глаголющий мне иноязычник. 12 Тако и вы, понеже ревнителе есте духовом, (яже) к созиданию церкви просите, да избыточествуете. 13 Темже глаголай языком да молится, да сказует. 14 Аще бо молюся языком, дух мой молится, а ум мой без плода есть. 15 Что убо есть? Помолюся духом, помолюся же и умом: воспою духом, воспою же и умом. 16 Понеже аще благословиши духом, исполняяй место невежды како речет аминь, по твоему благодарению? Понеже не весть, что глаголеши. 17 Ты убо добре благодарши, но другой не создается. 18 Благодарю Бога моего, паче всех вас языки глаголя: 19 но в церкви хощу пять словес умом моим глаголати, да и ины пользую, нежели тмы словес языком. 20 Братие, не дети бывайте умы: но злобою младенствуйте, умы же совершени бывайте. 21 В законе пишет: яко иными языки и устны иными возглаголю людем сим, и ни тако послушают Мене, глаголет Господь. 22 Темже языцы в знамение суть не верующым, но неверным: а пророчество не неверным, но верующым. 23 Аще убо снидется церковь вся вкупе, и вси языки глаголют, внидут же (и) неразумивии или невернии, не рекут ли, яко беснуется? 24 Аще же вси пророчествуют, внидет же некий неверен или невежда, обличается всеми, (и) истязуется от

всех, **25** и сице тайная сердца его явлена бывают: и тако пад ниц поклонится Богови, возвещая, яко воистинну Бог с вами есть. **26** Что убо есть, братие? Егда сходитесь, кийждо вас псалом имать, учение имать, язык имать откровение имать, сказание имать: вся (же) к созиданию да бывают. **27** Аще языком кто глаголет, по двема, или множае по трием, и по части: и един да сказует. **28** Аще ли не будет сказатель, да молчит в церкви, себе же да глаголет и Богови. **29** Пророцы же два или трие да глаголют, и друзии да разсуждают: **30** аще ли иному открыеться сидящу, первый да молчит. **31** Можете бо вси по единому пророчествовати, да вси учатся и вси утешаются. **32** И дуси пророчестии пророком повинуются: **33** несть бо нестроения Бог, но мира, яко во всех церквах святых. **34** Жены ваша в церквах да молчат: не повелесе бо им глаголати, но повиноватися, якоже и закон глаголет. **35** Аще ли чесому научитися хотят, в дому своих мужей да вопрошают: срамно бо есть жене в церкви глаголати. **36** Или от вас слово Божие изыде? Или вас единых достиже? **37** Аще кто мнится пророк быти или духовен, да разумеет, яже пишу вам, зане Господни суть заповеди? **38** Аще ли кто не разумеет, да не разумеает. **39** Темже, братие моя, ревнуйте еже пророчествовати, и еже глаголати языки не возбраняйте: **40** вся же благообразно и по чину да бывают.

**15** Сказую же вам, братие, Благовествование, еже благовестих вам, еже и приясте, в немже и стоите, **2** имже и спасаетесь, кацем словом благовестих вам, аще содержите: разве аще не всуе веровасте. **3** Предах бо вам исперва, еже и приях, яко Христос умре грех наших ради, по Писанием, **4** и яко погребен бысть, и яко воста в третий день, по

Писанием, 5 и яко явися Кифе, таже единонадесятим: 6  
потом же явися боле пяти сот братиям единою, от нихже  
множайшии пребывают доселе, нецыи же и почиша: 7  
потом же явися Иакову, таже Апостолом всем: 8 последи же  
всех, яко некоему извергу, явися и мне. 9 Аз бо есмь мний  
Апостолов, иже несмь достоин нарецися Апостол, зане гоних  
церковь Божию. 10 Благодатию же Божиею есмь, еже есмь,  
и благодать Его, яже во мне, не тща бысть, но паче всех их  
потрудихся: не аз же, но благодать Божия, яже со мною. 11  
Аще убо аз, аще ли они, тако проповедуем, и тако веровасте.  
12 Аще же Христос проповедуется, яко из мертвых воста,  
како глаголют нецыи в вас, яко воскресения мертвых несть?  
13 И аще воскресения мертвых несть, то ни Христос воста: 14  
аще же Христос не воста, тще убо проповедание наше, тща  
же и вера ваша. 15 Обретаемся же и лжесвидетеле Божии,  
яко послушествовахом на Бога, яко воскреси Христа, Егоже  
не воскреси, аще убо мертвии не встают: 16 аще бо мертвии  
не встают, то ни Христос воста: 17 аще же Христос не  
воста, суетна вера ваша, еще есте во гресех ваших: 18 убо и  
умершии о Христе, погибоша. 19 (И) аще в животе сем точию  
уповающе есмы во Христа, окаянейши всех человек есмы.  
20 Ныне же Христос воста от мертвых, начаток умершым  
бысть. 21 Понеже бо человеком смерть (бысть), и человеком  
воскресение мертвых. 22 Якоже бо о Адаме вси умирают,  
такожде и о Христе вси оживут, 23 кийждо же во своем чину:  
начаток Христос, потом же Христу веровавшии в пришествии  
Его. 24 Таже кончина, егда предаст Царство Богу и Отцу,  
егда испразднит всяко началство и всяку власть и силу: 25  
подобает бо Ему царствовати, дондеже положит вся враги



под ногама Своима. 26 Последний же враг испразднится смерть, 27 вся бо покори под нозе Его: внегда же рещи, яко вся покорена суть Ему, яже, яко разве Покоршаго Ему вся. 28 Егда же покорит Ему всяческая, тогда и Сам Сын покорится Покоршему Ему всяческая, да будет Бог всяческая во всех. 29 Понеже что сотворят крестящиися мертвых ради? Аще отнюд мертвии не встают, что и крещаются мертвых ради? 30 Почто (же) и мы беды приемлем на всяк час? 31 По вся дни умираю: тако ми ваша похвала, братие, юже имам о Христе Иисусе Господе нашем. 32 Аще (бо) по человеку со зверем боряся в Ефесе, кая ми польза, аще мертвии не встают? Да ямы и пием, утре бо умрем. 33 Не льститесь: тлят обычаи благи беседы злы. 34 Истрезвитесь праведно и не согрешайте: неведение бо Божие нецыи имут, к сраму вам глаголю. 35 Но речет некто: како востанут мертвии? Коим же телом приидут? 36 Безумне, ты еже сееси, не оживет, аще не умрет: 37 и еже сееси, не тело будущее сееси, но голо зерно, аще случится, пшеницы или иного от прочих: 38 Бог же дает ему тело, якоже восхощет, и коемуждо семени свое тело. 39 Не всяка плоть таже плоть: но ина убо плоть человеком, ина же плоть скотом, ина же рыбам, ина же птицам. 40 И телеса небесная, и телеса земная: но ина убо небесным слава, и ина земным: 41 ина слава солнцу, и ина слава луне, и ина слава звездам: звезда бо от звезды разнствует во славе. 42 Такожде и воскресение мертвых: сеется в тление, встает в нетлении: 43 сеется не в честь, встает в славе: сеется в немощи, встает в силе: 44 сеется тело душевное, встает тело духовное. Есть тело душевное, и есть тело духовное. 45 Тако и писано есть:

бысть первый человек Адам в душу живу, последний Адам в дух животворящъ. 46 Но не прежде духовное, но душевное, потом же духовное. 47 Первый человек от земли, перстен: второй человек Господь с небесе. 48 Яков перстный, такови и перстнии: и яков небесный, тацы же и небеснии: 49 и якоже облекохомся во образ перстнаго, да облечемся и во образ небеснаго. 50 Сие же глаголю, братие, яко плоть и кровь Царствия Божия наследити не могут, ниже тление нетления наследствует. 51 Се, тайну вам глаголю: вси бо не успнем, вси же изменимся 52 вскоре, во мгновении ока, в последней трубе: вострубит бо, и мертвии востанут нетленни, и мы изменимся: 53 подобает бо тленному сему обещися в нетление и мертвенному сему обещися в бессмертие. 54 Егда же тленное сие облечется в нетление и смертное сие облечется в бессмертие, тогда будет слово написанное: пожерта бысть смерть победою. 55 Где ти, смерте, жало? Где ти, аде, победа? (Hadēs 986) 56 Жало же смерти грех: сила же греха закон. 57 Богу же благодарение, давшему нам победу Господем нашим Иисус Христом. 58 Темже, братие моя возлюбленная, тверди бывайте, непоступни, избыточествующе в деле Господни всегда, ведяще, яко труд ваш несть тощъ пред Господем.

**16** О милостыни же, яже ко святым, якоже устроиш церквам Галатийским, тако и вы сотворяйте: 2 по единой от суббот кийждо вас да полагает у себе сохраняя, еже аще что благопоспешится, да не егда прииду, тогда собрания бывают. 3 Егда же прииду, ихже аще искусите, с посланьми сих послю отнести благодать вашу во Иерусалим. 4 Аще же достойно будет и мне ити, со мною пойдут. 5 Прииду же к вам, егда

Македонию преиду: Македонию бо прохожду. 6 У вас же, аще случится мне, пребуду, или и озимею, да вы мя проводите, аможе аще поиду. 7 Не хощу бо вас ныне в мимохождении видети: уповаю же время некое пребыти у вас, аще Господь повелит. 8 Пребуду же во Ефесе до Пентикостии: 9 дверь бо ми отверзется велика и поспешна, и сопротивнии мнози. 10 Аще же придет Тимофей, блюдите, да без страха будет у вас: дело бо Господне делает, якоже и аз: 11 да никтоже убо его уничижит: проводите же его с миром, да придет ко мне, жду бо его с братиею. 12 О Аполлосе же брате: много молих его, да придет к вам с братиею: и всяко не бе воля, да ныне приидет, приидет же, егда упряднится. 13 Бодрствуйте, стойте в вере, мужайтесь, утверждайтесь: 14 вся вам любовь да бывают. 15 Молю же вы, братие: весте дом Стефанинов, яко есть начаток Ахаии, и в служение святым учиниша себе: 16 да и вы повинуетесь таковым и всякому споспешствующу и труждающуся. 17 Возрадовахся же о пришествии Стефанинове и Фуртунатове и Ахаикове, яко ваше лишение сии исполниша: 18 упокоиша бо мой дух и ваш. Познавайте убо таковыя. 19 Целуют вы церкви Асийския: целуют вы о Господе много Акила и Прискилла с домашнею их церковию. 20 Целуют вы братия вся. Целуйте друг друга лобзанием святым. 21 Целование моею рукою Павлею. 22 Аще кто не любит Господа Иисуса Христа, да будет проклят, маран афа. 23 Благодать Господа нашего Иисуса Христа с вами, 24 (и) любы моя со всеми вами о Христе Иисусе. Аминь.

## Второе послание к Коринфянам

**1** Павел, посланник Иисус Христов волею Божию, и Тимофей брат, церкви Божией сущей в Коринфе, со святыми всеми сущими во всей Ахаии: **2** благодать вам и мир от Бога Отца нашего, и Господа Иисуса Христа. **3** Благословен Бог и Отец Господа нашего Иисуса Христа, Отец щедрот и Бог всякия утехи, **4** утешай нас о всяцей скорби нашей, яко возмощи нам утешити сущыя во всяцей скорби, утешением, имже утешаемся сами от Бога. **5** Зане якоже избыточествуют страдания Христова в нас, тако Христом избыточествует и утешение наше. **6** Аще ли же скорбим, о вашем утешении и спасении, действующемся в терпении техже страданий, яже и мы страждем: **7** и упование наше известно о вас. Аще ли утешаемся, о вашем утешении и спасении, ведяще, зане якоже общницы есте страстем нашим, такожде и утешению. **8** Не бо хотим вас, братие, не ведети о скорби нашей бывшей нам во Азии, яко по премногу и паче силы отяготихомся, яко не надеялися нам и жити. **9** Но сами в себе осуждение смерти имехом, да не надеющся будем на ся, но на Бога возставляющаго мертвыя, **10** Иже от толикыя смерти избавил ны есть и избавляет, Наньже и уповахом, яко и еще избавит, **11** споспешествующым и вам по нас молитвою, да от многих лиц, еже в нас дарование, многими благодарится о вас. **12** Похваление бо наше сие есть, свидетельство совести нашея, яко в простоте и чистоте Божией, а не в мудрости плоти, но благодатию Божиею жихом в мире, множае же у вас. **13** Не иная бо пишем вам, но яже чтете и разумеваете: уповаю же, яко и до конца уразумеете, **14** якоже и разумеете нас от

части, яко похваление вам есмы, якоже и вы нам, в день Господа нашего Иисуса Христа. 15 И сим упованием хотех к вам приити прежде, да вторую благодать имате, 16 и вами проити в Македонию, и паки от Македонии приити к вам, и вами проводитися во Иудею. 17 Сие же хотя, еда что убо легкотою деях? Или яже совещаваю, по плоти совещаваю, да будет у мене еже ей, ей, и еже ни, ни. 18 Верен же Бог, яко слово наше, еже к вам, не бысть ей и ни. 19 Ибо Божий Сын Иисус Христос, иже у вас нами проповеданный, мною и Силуаном и Тимофеем, не бысть ей и ни, но в Нем Самем ей бысть: 20 елика бо обетования Божия, в Том ей и в Том аминь: Богу к славе нами. 21 Извествуй же нас с вами во Христа и помазавый нас, Бог, 22 Иже и запечатле нас, и даде обручение Духа в сердца наша. 23 Аз же свидетеля Бога призываю на мою душу, яко щадя вас, ктому не приидох в Коринф, 24 не яко обладаем верою вашею, но (яко) споспешницы есмы вашей радости: верою бо стоите.

**2** Судих же в себе сие, не паки скорбию к вам приити. 2 Аще бо аз скорбь творю вам, то кто есть веселяяй мя, точию приемляй скорбь от мене? 3 И писах вам сие истое, да не пришед скорбь на скорбь прииму, о нихже подобаше ми радоватися, надеяся на вся вы, яко моя радость всех вас есть. 4 От печали бо многия и туги сердца написах вам многими слезами, не яко да оскорбитесь, но любовь да познаете, юже имам избыльно к вам. 5 Аще ли кто оскорбил мене, не мене оскорби, но от части, да не отягчу, всех вас. 6 Довольно бо таковому запрещение сие, еже от многих: 7 темже сопротивное паче вы да даруете и

утешите, да не како многою скорбию пожерт будет таковой:  
8 темже молю вы, утвердите к нему любовь. 9 На сие бо и  
писах, да разумею искусство ваше, аще во всем послушливи  
есте. 10 Емуже аще что даруете, и аз: ибо аз аще что  
даровах, емуже даровах, вас ради, о лица Иисус Христове,  
11 да не обидими будем от сатаны: не не разумеваем бо  
умышлений его. 12 Пришед же в Трояду во благовестие  
Христово, и двери отверзене ми бывшей о Господе, 13 не  
имех покоя духу моему, не обретшу ми Тита брата моего: но  
отрекся им, изыдох в Македонию. 14 Богу же благодарение,  
всегда победители нас творящему о Христе Иисусе и воню  
разума Его являющу нами во всяцем месте. 15 Яко Христово  
благоухание есмы Богови в спасаемых и в погибающих. 16  
Овем убо воня смертная в смерть, овем же воня животная  
в живот. И к сим кто доволен? 17 Несмы бо, якоже мнози,  
нечисто проповедающи слово Божие, но яко от чистоты, но  
яко от Бога, пред Богом, во Христе глаголем.

**3** Зачинаем ли паки нас самех извещавати вам? Или  
требуем, якоже нецыи, извещавательных посланий к вам,  
или от вас известительных? 2 Послание бо наше вы есте,  
написаное в сердцах наших, знаемое и прочитаемое от всех  
человек: 3 являеми, яко есте послание Христово служеное  
нами, написано не чернилом, но Духом Бога жива, не на  
скрижалех каменных, но на скрижалех сердца плотяных.  
4 Надеяние же таково имама Христом к Богу, 5 не яко  
довольни есмы от себе помыслити что, яко от себе, но  
доволство наше от Бога: 6 иже и удоволи нас служители  
быти Нову Завету, не писмени, но духу: писмя бо убивает,  
а дух животворит. 7 Аще ли служение смерти писмены,

образовано в каменех, бысть в славу, яко не мощи взирати сыном Израилевым на лице Моисеово, славы ради лица его престающия. 8 Какое не множае паче служение духа будет в славе? 9 Аще бо служение осуждения, слава, много паче избыточествует служение правды в славе. 10 Ибо не прославися прославленное в части сей, за превосходящую славу. 11 Аще бо престающее, славою: много паче пребывающее, в славе. 12 Имуще убо таково упование, многим дерзновением действуем, 13 и не якоже Моисей полагаше покрывало на лица своем, за еже не мощи взирати сыном Израилевым на конец престающаго. 14 Но ослепишася помышления их: даже бо до сего дне тожде покрывало во чтении Ветхаго Завета пребывает не откровенно, зане о Христе престаает. 15 Но даже до днесь, внегда чтется Моисей, покрывало на сердце их лежит: 16 внегда же обратятся ко Господу, взимается покрывало. 17 Господь же Дух есть: а идеже Дух Господень, ту свобода. 18 Мы же вси откровенным лицом славу Господню взирающе, в тойже образ преобразуемся от славы в славу, якоже от Господня Духа.

**4** Сего ради имуще служение сие, якоже помиловани быхом, не стужаем си: 2 но отрекохомся тайных срама, не в лукавствии ходяще, ни льстяще словесе Божия, но явлением истины представляюще себе ко всяцей совести человечестей, пред Богом. 3 Аще ли же есть покровено благовествование наше, в гибнущих есть покровено, 4 в нихже бог века сего ослепи разумы неверных, во еже не возсияти им свету благовествования славы Христовы, Иже есть образ Бога невидимаго. (aiōn g165) 5 Не себе бо

проповедаем, но Христа Иисуса Господа: себе же самех рабов вам Иисуса Господа ради: 6 яко Бог рекий из тмы свету возсияти, иже возсия в сердцах наших, к просвещению разума славы Божия о лица Иисус Христове. 7 Имамы же сокровище сие в скудельных сосудех, да премножество силы будет Божия, а не от нас: 8 во всем скорбяще, но не стужающе си: нечаеми, но не отчаяваеми: 9 гоними, но не оставляеми: низлагаеми, но не погибающе: 10 всегда мертвость Господа Иисуса в теле носяще, да и живот Иисусов в теле нашем явится. 11 Присно бо мы живии в смерть предаемя Иисуса ради, да и живот Иисусов явится в мертвенней плоти нашей: 12 темже смерть убо в нас действует, а живот в вас. 13 Имуще же тойже дух веры, по писанному: веровах, темже возглаголах: и мы веруем, темже и глаголем, 14 ведяще, яко Воздвигий Господа Иисуса, и нас со Иисусом воздвигнет, и предпоставит с вами. 15 Вся бо вас ради, да благодать умножившаяся, множайшими благодарении избыточествит в славу Божию. 16 Темже не стужаем си: но аще и внешний наш человек тлеет, обаче внутренний обновляется по вся дни. 17 Еже бо ныне легкое печали нашея, по преумножению в преспеяние тяготу вечныя славы соделовает нам, (aiōnios g166) 18 не смотряющим нам видимых, но невидимых: видимая бо временна, невидимая же вечна. (aiōnios g166)

**5** Вемы бо, яко аще земная наша храмина тела разорится, создание от Бога имамы, храмину нерукотворену, вечну на небесех. (aiōnios g166) 2 Ибо о сем въздыхаем, в жилище наше небесное облещися желающе: 3 аще точию и облещеся, не нази обрящемся. 4 Ибо сущии в теле сем въздыхаем



отягчаемы, понеже не хощем совлещися, но пооблещися, да пожерто будет мертвенное животом. 5 Сотворивый же нас в сие истое Бог, Иже и даде нам обручение Духа. 6 Держающе убо всегда и ведяще, яко живуще в теле отходим от Господа: 7 верую бо ходим, а не видением: 8 держаем же и благоволим паче отити от тела и внити ко Господу: 9 темже и тщимся, аще входяще, аще отходяще, благоугодни Ему быти: 10 всем бо явится нам подобает пред судищем Христовым, да примет кийждо, яже с телом содела, или блага, или зла. 11 Ведуще убо страх Господень, человеки увещаваем, Богови же явлени есмы: уповаем же, яко и в совестех ваших явлени есмы. 12 Не паки бо себе хвалим пред вами, но вину даем вам похвалению о нас, да имате к хвалящимся в лица, а не в сердца. 13 Аще бо изумихомся, Богови: аще ли целомудрствуем, вам. 14 Ибо любы Божия обдержит нас суждших сие: яко аще един за всех умре, то убо вси умроша. 15 Христос же за всех умре, да живуции не ктому себе живут, но умершему за них и воскресшему. 16 Темже и мы отныне ни одинаго вемы по плоти: аще же и разумехом по плоти Христа, но ныне ктому не разумеем. 17 Темже аще кто во Христе, нова тварь: древняя мимоидоша, се быша вся нова: 18 всяческая же от Бога, примирившаго нас Себе Иисус Христом и давшаго нам служение примирения: 19 зане Бог бе во Христе мир примиряя Себе, не вменя им согрешений их и положив в нас слово примирения. 20 По Христе убо молим, яко Богу молящу нами, молим по Христе: примиритесь с Богом. 21 Не ведевшаго бо греха по нас грех сотвори, да мы будем правда Божия о Нем.

**6** Споспешствующе же и молим, не вотще благодать Божию прияти вам. **2** Глаголет бо: во время приятно послушах тебе, и в день спасения помогах ти. Се ныне время благоприятно, се ныне день спасения. **3** Ни едино ни в чемже дающе претыкание, да служение безпорочно будет, **4** но во всем представляюще себе якоже Божия слуги, в терпении мнозе, в скорбех, в бедах, в теснотах, **5** в ранах, в темницах, в нестроениих, в трудех, во бдениих, в пощениих, **6** во очищении, в разуме, в долготерпении, в благости, в Дусе Святе, в любви нелицемерне, **7** в словеси истины, в силе Божией, оружии правды десными и шуими, **8** славою и безчестием, гаждением и благохвалением: яко лестцы, и истинни: **9** яко незнаеми, и познаваеми: яко умирающе, и се живи есмы: яко наказуеми, а не умерщвляеми: **10** яко скорбяще, присно же радующеся: яко нищи, а многи богатяще: яко ничтоже имуще, а вся содержаще. **11** Уста наша отверзошася к вам, Коринфяне, сердце наше распространися. **12** Не тесно вмещаетеся в нас, утесняетеся же во утробах ваших. **13** Тоже же возмездие, якоже чадом глаголю, распространитеся и вы. **14** Не бывайте удобь преложни ко иному ярму, якоже невернии. Кое бо причастие правде к беззаконию? Или кое общение свету ко тьме? **15** Кое же согласие Христови с Велиаром? Или кая часть верну с неверным? **16** Или кое сложение церкви Божией со идолы? Вы бо есте церкви Бога жива, якоже рече Бог: яко вселюся в них и похожду, и буду им Бог, и тии будут Мне людие. **17** Темже изыдите от среды их и отлучитеся, глаголет Господь, и нечистоте не прикасайтесь, и Аз прииму вы: **18** и буду вам

во Отца, и вы будете Мне в сыны и дщери, глаголет Господь Вседержитель.

**7** Сицева убо имуще обетования, о возлюблении, очистим себе от всякия скверны плоти и духа, творяще святыню в страсе Божии. **2** Вместите ны: ни единого обидехом, ни единого истлихом, ни единого лихоимствовахом. **3** Не на осуждение глаголю: прежде бо рех, яко в сердцах наших есте, во еже умрети с вами и сожити. **4** Много ми дерзновение к вам, многа ми похвала о вас: исполнился утехи, преизбыточествую радостию о всяцей печали нашей. **5** Ибо пришедшым нам в Македонию, ни единого име покоя плоть наша, но во всем скорбяще: внеуду брани, внутрьуду боязни. **6** Но утешаяй смиренныя, утеши нас Бог пришествием Титовым, **7** не токмо же пришествием его, но и утешением, имже утешися о вас, поведая нам ваше желание, ваше рыдание, вашу ревность по мне, яко ми паче возрадоватися. **8** Яко аще и оскорбих вас посланием, не раскаяся, аще и раскаял бых ся: вижду бо, яко послание оно, аще и к часу, оскорби вас. **9** Ныне радуюся, не яко скорбни бысте, но яко оскорбистесь в покаяние: оскорбесте бо по Бозе, да ни в чемже отщтитесь от нас. **10** Печаль бо, яже по Бозе, покаяние нераскаянно во спасение соделовает, а сего мира печаль смерть соделовает. **11** Се бо сие самое, еже по Бозе оскорбитися вам, колико содела в вас тщание? Но ответ? Но негодование, но страх, но вожделение, но ревность, но отмщение? Во всем представисте себе чисты быти в вещи. **12** Аще бо и писах вам, не обидевшаго ради, ниже обидимаго ради, но за еже явитися в вас тщанию нашему, еже о вас пред Богом. **13** Сего ради утешихомся о

утешении вашем: лишше же паче возрадовахомся о радости Титове, яко покоися дух его от всех вас: **14** яко аще что ему о вас похвалихся, не посрамихся: но яко вся воистинну глаголахом вам, тако и похваление наше, еже к Титу, истинно бысть: **15** и утроба его излиха к вам есть, воспоминающаго всех вас послушание, яко со страхом и трепетом приясте его. **16** Радуюся убо, яко во всем дерзаю в вас.

**8** Скажем же вам, братие, благодать Божию, данную в церквах Македонских: **2** яко во мнозем искушении скорбей избыток радости их, и яже во глубине нищета их избыточествова в богатство простоты их: **3** яко по силе их, свидетельствую, и паче силы добротни, **4** со многим молением моляще нас, благодать и общение служения, еже ко святым, прияти нам: **5** и не якоже надеяхомся, но себе вдаша первее Господеви, и нам волею Божию: **6** во еже умолити нам Тита, да якоже прежде начат, такожде и скончает в вас и благодать сию. **7** Но якоже во всем избыточествуете, верою и словом, и разумом, и всяцем тцанием, и любовию, яже от вас к нам, да и в сей благодати избыточествуете. **8** Не по повелению глаголю, но за иных тцание и ваша любве истинное искушая. **9** Весте бо благодать Господа нашего Иисуса Христа, яко вас ради обнища богат сый, да вы нищетою Его обогатитесь. **10** И совет даю о сем: се бо вам есть на пользу, иже не точию, еже творити, но и еже хотети, прежде начасте от прешедшаго лета. **11** Ныне же и сие творити скончайте, да якоже бысть усердие хотети, тако будет и исполнити от сего, еже имате. **12** Аще бо усердие предложит, по елику аще кто имать, благоприятен есть, а не по елику не имать. **13** Не бо да иным убо отрада, вам

же скорбь: но по изравнению. 14 В нынешнее время ваше избыточествие во оных лишение, да и оных избыток будет в ваше лишение, яко да будет равенство, 15 якоже есть писано: иже многое, не преумножил есть: и иже малое, не умалил. 16 Благодарение же Богови, давшему тожде тщание о вас в сердце Титово: 17 яко моление убо прият, тцаливейший же сый, своєю волею изыде к вам. 18 Послахом же с ним и брата, егоже похвала во евангелии по всем церквам: 19 не точию же, но и освящен от церквей с нами ходити, со благодатию сею, служимую нами к Самого Господа славе и усердию вашему: 20 блюдущеся того, да не кто нас поречет во обилии сем служимем нами: 21 промышляюще добрая не токмо пред Богом, но и пред человеки. 22 Послахом же с ними и брата нашего, егоже искусихом во многих многащи встанлива суца, ныне же зело встанливейша, надеянием многим на вас. 23 Аще ли же о Тите, общник мне и к вам споспешник: аще ли братия наша, посланницы церквей, слава Христова. 24 Показание убо любве вашей и нашего хваления о вас, к ним покажите, и в лице церквей.

**9** О службе бо, яже ко святым, лишше ми есть писати вам, 2 вем бо усердие ваше, имже о вас хвалюся Македоняном, яко Ахаиа приготовися от мимошедшаго лета: и яже от вас ревность раздражи множайших. 3 Послах же братию, да не похваление наше, еже о вас, испразднится в части сей, но да, якоже глаголах, приготовани будете: 4 да не како, аще приидут со мною Македоняне и обрящут вас неприготованных, постыдимся мы, да не глаголем вы, в части сей похваления. 5 Потребно убо умыслих умолити братию, да прежде приидут к вам и предуготовят прежде

возвещенное благословение ваше, сие готово быти тако, якоже благословение, а не яко лихоимство. 6 Се же глаголю: сеяй скудостию, скудостию и пожнет: а сеяй о благословении, о благословении и пожнет. 7 Кийждо якоже изволение имать сердцем, не от скорби, ни от нужды: доброхотна бо дателя любит Бог. 8 Силен же Бог всяку благодать изобиловати в вас, да о всем всегда всяко довольство имуще, избыточествуете во всяко дело благо, 9 якоже есть писано: расточи, даде убогим: правда его пребывает во век века. (aiōn g165) 10 Даяй же семя сеющему и хлеб в снедь, да подаст и умножит семя ваше, и да возрастит жита правды ваша, 11 да о всем богатыя во всяку простоту, яже содевает нами благодарение Богу. 12 Яко работа сего служения не токмо есть исполняющая лишения святых, но и избыточествующая многими благодареньми Богови: 13 искушением служения сего славяще Бога о покорении исповедания вашего в Благовествовании Христове, и о простоте сообщения к ним и ко всем, 14 и о тех молитве о вас, возжелеющих вас за премногую благодать Божию на вас. 15 Благодарение же Богови о неисповедимем Его даре.

**10** Сам же аз Павел молю вы кротостию и тихостию Христовою, иже в лице убо смирен в вас, не сый же у вас дерзаю в вас. 2 Молю же, да не присущ дерзаю надеянием, имже помышляю смети на некия непщующыя нас яко по плоти ходящих. 3 Во плоти бо ходяще, не по плоти воинствуем: 4 оружия бо воинства нашего не плотская, но сильна Богом на разорение твердем: помышления низлагающе, 5 и всяко возношение взимающееся на разум Божий, и пленяюще всяк разум в послушание Христово,

6 и в готовности имущи отмстити всяко преслушание, егда исполнится ваше послушание. 7 Иже ли пред лицом, зрите? Аще кто надеется себе Христова быти, да помышляет паки от себе, зане, якоже он Христов, такожде и мы Христовы. 8 Аще бо и лишше что похваляюся о власти нашей, юже даде нам Господь в создание, а не на разорение ваше, не постыжуся. 9 Но да не явлюся, яко страша вас посланьми. 10 Яко послания убо, рече, тяжка и крепка, а пришествие тела немощно, и слово уничиженно: 11 сие да помышляет таковой, яко яцы же есмы словом посланий, отстояще, таковии и ту суще есмы делом. 12 Не смеем бо судити, или прикладовати себе иным хвалящым себе самех: но сами в себе себе измеряюще, и прилагающе себе самим себе, не разумевают. 13 Мы же не в безмерная похвалимся, но по мере правила, егоже раздели нам Бог меру, достизати даже и до вас. 14 Не яко бо не досяжуще до вас, паче простираем себе, даже бо и до вас достигохом благовестием Христовым: 15 не в безмерная хвалящаяся в чуждих трудех, упование же имущи, растущей вере вашей, в вас величатися по правилу нашему изобильно, 16 во еже и в дальших вас странах благовестити, не чужим правилом в готовых похвалитися. 17 Хваляйся же, о Господе да хвалится: 18 не хваляй бо себе сей искусен, но егоже Бог восхваляет.

**11** О, да бысте мало потерпели безумию моему! Но и потерпите мя. 2 Ревную бо по вас Божиею ревностию: обручих бо вас единому мужу деу чисту представить Христови. 3 Боюся же, да не како, якоже змий Еву прельсти лукавством своим, тако истлеют и разумы ваши от простоты, яже о Христе. 4 Аще бо грядый инаго Иисуса проповедает,

егоже не проповедахом, или Духа инаго приемлете, егоже не приясте, или благовествование ино, еже не приясте, добре бысте потерпели. 5 Непщюю бо ничимже лишитися предних Апостол: 6 аще бо и невежда словом, но не разумом: но везде явльшесе о всем в вас. 7 Или грех сотворих себе смиряя, да вы вознесетея, яко туне Божие Благовествование блавестих вам? 8 От иных церквей уях, приим оброк к вашему служению: и пришед к вам, и в скудости быв, не стужих ни единому: 9 скудость бо мою исполниша братия, пришедше от Македонии: и во всем без стужения вам себе соблюдох и соблюду. 10 Есть истина Христова во мне, яко похваление сие не заградитя о мне в странах Ахайских. 11 Почто? Зане не люблю ли вас? Бог весть. А еже творю, и сотворю, 12 да отсеку вину хотящим вины, да, о немже хвалятыя, обрящутся якоже и мы. 13 Таковии бо лживи апостоли, делателе лъстивии, преобразующесе во Апостолы Христовы. 14 И не дивно: сам бо сатана преобразуется во Ангела светла: 15 не велие убо, аще и служителие его преобразуются яко служители правды: имже кончина будет по делом их. 16 Паки глаголю: да никтоже мнит мя безумна быти: аще ли ни, поне яко безумна приимите мя, да и аз мало что похваляюся. 17 А еже глаголю, не глаголю по Господе, но яко в безумии в сей части похвалы: 18 понеже мнози хвалятыя по плоти, и аз похваляюся. 19 Любезно бо приемлете безумныя, мудри суще: 20 приемлете бо, аще кто вас порабощает, аще кто поядает, аще кто не влепоту проторит, аще кто по лицу биет вы, аще кто величается. 21 По досаждению глаголю, зане аки мы изнемогохом. О немже аще дерзает кто, несмысленно глаголю, дерзаю и



аз. 22 Еврее ли суть? И аз. Израилите ли суть? И аз. Семя Авраамле ли суть? И аз. 23 Служителие ли Христовы суть? Не в мудрости глаголю, паче аз. В трудех множае, в ранах преболе, в темницах излиха, в смертех многащи. 24 От Иудей пять краты четыредесять разве единыя приях: 25 трици палицами биен бых, единою каменьми наметан бых, трикраты корабль опровержеса со мною: ночь и день во глубине сотворих: 26 в путных шествиих множицею: беды в реках, беды от разбойник, беды от сродник, беды от язык, беды во градех, беды в пустыни, беды в мори, беды во лжебратии: 27 в труде и подвизе, во бдениих множицею, во алчбе и жажди, в пощениих многащи, в зиме и наготе. 28 Кроме внешних, нападение еже по вся дни, и попечение всех церквей. 29 Кто изнемогает, и не изнемогаю? Кто соблазняется, и аз не разжизаюся? 30 Аще хвалитися ми подобает, о немощи моей похваляюся. 31 Бог и Отец Господа нашего Иисуса Христа весть, сый благословен во веки, яко не лгу. (aіōn g165) 32 В Дамасце языческий князь Арефы царя стрежаше Дамаск град, яти мя хотя: 33 и оконцем в кошнице свешен бых по стене, и избегах из руку его.

**12** Похвалитися же не пользует ми: прииду бо в видения и откровения Господня. 2 Вем человека о Христе, прежде лет четыренадесяти: аще в теле, не вем, аще ли кроме тела, не вем, Бог весть: восхищена бывша таковаго до третияго небесе. 3 И вем такова человека: аще в теле, или кроме тела, не вем: Бог весть: 4 яко восхищен бысть в рай, и слыша неизреченны глаголголы, ихже не леть есть человеку глаголати. 5 О такомем похваляюся: о себе же не похваляюся, токмо о немощех моих. 6 Аще бо восхощу

похвалитися, не буду безумен, истину бо реку: жажду же, да не како кто вознепщует о мне паче, еже видит мя, или слышит что от мене. 7 И за премногая откровения да не превозношуся, дадеся ми пакостник плоти, аггел сатанин, да ми пакости деет, да не превозношуся. 8 О сем трикраты Господа молих, да отступит от мене, 9 и рече ми: довлеет ти благодать Моя: сила бо Моя в немощи совершается. Сладце убо похвалюся паче в немощех моих, да вселится в мя сила Христова. 10 Темже благоволю в немощех, в досаждениях, в бедах, во изгнаниях, в теснотах по Христе: егда бо немощствую, тогда силен есмь. 11 Бых несмыслен хваляся: вы мя понудисте. Аз бо должен бех от вас хвалимь бывати: ничимже бо лишихся первейших Апостол, аще и ничтоже есмь: 12 знамения бо Апостолова содеяшася в вас во всяцем терпении, в знамениях и чудесех и силах. 13 Что бо есть, егоже лишистесь паче прочих церквей, разве точию яко аз сам не стужих вам? Дадите ми неправду сию. 14 Се третие готов есмь приити к вам, и не стужу вам: не ищю бо ваших, но вас. Не должна бо суть чада родителем снискати имения, но родителе чадом. 15 Аз же в сладость иждиву и иждивен буду по душах ваших, аще и излишше вас любя, меньше любимь есмь. 16 Буди же, аз не отягчих вас, но коварен сый, лестию вас приях. 17 Еда коим от посланных к вам лихоимствовах вас? 18 Умолих Тита, и с ним послах брата: еда лихоимствова чим вас Тит? Не темже ли духом ходихома? Не темиже ли стопами? 19 Паки ли мните, яко ответ вам творим? Пред Богом, о Христе глаголем: вся же, возлюбленнии, о вашем созидании и утверждении. 20 Боюся же, еда како пришед, не яцех же хощу, обрящу

вас, и аз обряцуся вам, якова же не хочете: да не како будут рвеня, зависти, ярости, рети, клеветы, шептания, кичения, нестроения: **21** да не паки пришедша мя смирит Бог мой у вас, и восплачуся многих прежде согрешших и не покаявшихся о нечистоте и блужении и студоложствии, яже содеяша.

**13** Третицею се гряду к вам: при устех двою или триех свидетелей станет всяк глагол. **2** Прежде рех и предлагаю, яко у вас быв второе, и отсутствуя ныне пишу прежде согрешившим и прочым всем, яко аще прииду паки, не пощажду: **3** понеже искушения ищите глаголющаго во мне Христа, Иже в вас не изнемогает, но может в вас: **4** ибо аще и распят бысть от немощи, но жив есть от силы Божия: ибо и мы немощствуем в Нем, но живи будем с Ним от силы Божия в вас: **5** себе искушайте, аще есте в вере: себе искушайте. Или не знаете себе, яко Иисус Христос в вас есть? Разве точию чим неiskusни есте. **6** Уповаю же, яко разумети имате, яко мы неiskusни. **7** Молимся же к Богу, не сотворити вам ни единого зла, не яко да мы искусни явимся, но да вы доброе сотворите, мы же яко неiskusни будем. **8** Ничтоже бо можем на истину, но по истине. **9** Радуюмся бо, егда мы немощствуем, вы же сильни бываете: о сем же и молимся, о вашем совершении. **10** Сего ради не сый у вас сия пишу, да не пришед безщадно сотворю по власти, юже Господь дал ми есть в создание, а не на разорение. **11** Прочее же, братие, радуйтесь, совершайтесь, утешайтесь, тожде мудрствуйте, мир имейте. И Бог любве и мира будет с вами. **12** Целуйте друг друга лобзанием святым. **13** Целуют вы святии вси. **14**

Благодать Господа нашего Иисуса Христа, и любви Бога и  
Отца, и общение Святого Духа со всеми вами. Аминь.

## Послание к Галатам

**1** Павел, Апостол ни от человек, ни человеком, но Иисус Христом и Богом Отцем воскресившим Его из мертвых, **2** и иже со мною вся братия, церквам Галатийским: **3** благодать вам и мир от Бога Отца и Господа нашего Иисуса Христа, **4** давшего Себе по гресех наших, яко да избавит нас от настоящего века лукаваго, по воли Бога и Отца нашего, (aĩōn g165) **5** Ему же слава во веки веков. Аминь. (aĩōn g165) **6** Чуждуся, яко тако скоро прелагаетеся от звавшего вы благодатию Христовою, во ино благовествование: **7** еже несть ино, точию нецыи суть смущающии вы и хотящии превратити благовествование Христово. **8** Но и аще мы, или Ангел с небесе благовестит вам паче, еже благовестихом вам, анафема да будет. **9** Якоже предрекохом, и ныне паки глаголю: аще кто вам благовестит паче, еже приясте, анафема да будет. **10** Ныне бо человеки препираю, или Бога, или ищу человеком угождати? Аще бо бых еще человеком угождал, Христов раб не бых убо был. **11** Сказую же вам, братие, Благовествование благовещенное от мене, яко несть по человеку: **12** ни бо аз от человека приях е, ниже научихся, но явлением Иисус Христовым. **13** Слышасте бо мое житие иногда в Жидовстве, яко по премногу гоних Церковь Божию и разрушах ю, **14** и преспевах в Жидовстве паче многих сверстник моих в роде моем, излиха ревнитель сый отеческих моих преданий. **15** Егда же благоволи Бог, избравый мя от чрева матери моея и призвавый благодатию Своею, **16** явити Сына Своего во мне, да благовествую Его во языцех, абие не приложихся плоти и крови, **17** ни взыдох во Иерусалим к первейшим мене Апостолом, но

идох во Аравию, и паки возвратихся в Дамаск. 18 Потом же по триех летех взыдох во Иерусалим соглядати Петра, и пребых у него дней пятнадцать. 19 Иного же от Апостол не видех, токмо Иакова брата Господня. 20 А яже пишу вам, се пред Богом, яко не лгу. 21 Потом же приидох в страны Сирския и Киликийския. 22 Бех же не знаемь лицем церквам Иудейским, яже о Христе, 23 точию же слышаще бяху, яко гоняй нас иногда, ныне благовествует веру, юже иногда разрушаше: 24 и славляху о мне Бога.

**2** Потом же по четырнадцати летех паки взыдох во Иерусалим с Варнавою, поем с собою и Тита. 2 Взыдох же по откровению, и предложих им благовествование, еже проповедую во языцех, наедине же мнимым, да не како вотще теку, или текох. 3 Но ни Тит, иже со мною, Еллин сый, нужен бысть обрезатися. 4 И за пришедшую лжебратию, иже привнидоша соглядати свободы нашея, юже имамы о Христе Иисусе, да нас поработят: 5 имже ни к часу повинухомся в покорение, да истина благовестия пребудет в вас. 6 От мнящихся же быти что, якови некогда беша, ничтоже ми разнствует: лица Бог человека не приемлет. Мне бо мнимии ничтоже привозложиша: 7 но сопротивное, уразумевше, яко уверено ми бысть благовестие необрезания, якоже Петру обрезания: 8 ибо Споспешествовавый Петру в послание обрезания, споспешествова и мне во языки: 9 и познавше благодать данную ми, Иаков и Кифа и Иоанн, мнимии столпи быти, десницы даша мне и Варнаве общения, да мы во языки, они же во обрезание, 10 точию нищих да помнима: еже и потщахся сие истое сотворити. 11 Егда же прииде Петр во Антиохию, в лице ему противустах, яко зазорен бе. 12

Прежде бо даже не приити неким от Иакова, с языки ядыше: егда же приидоша, опряташеся и отлучашеся, бояся сущих от обрезания. **13** И лицемеришася с ним и прочии Иудеи, яко и Варнаве пристати лицемерству их. **14** Но егда видех, яко не право ходят ко истине Благовествования, рекох Петру пред всеми: аще ты, Иудей сый, язычески, а не иудейски живеши, почто языки нудиши иудейски жительствовати? **15** Мы естеством Иудее, а не от язык грешницы: **16** уведевше же, яко не оправдится человек от дел закона, но токмо верую Иисус Христовою, и мы во Христа Иисуса веровахом, да оправдимся от веры Христовы, а не от дел закона: зане не оправдится от дел закона всяка плоть. **17** Аще ли, ищуще оправдितися о Христе, обретохомся и сами грешницы, Христос убо греху ли служитель? Да не будет. **18** Аще бо, яже разорих, сия паки созидаю, преступника себе представляю. **19** Аз бо законом закону умрох, да Богови жив буду. Христови сраспахся: **20** живу же не ктому аз, но живет во мне Христос. А еже ныне живу во плоти, верую живу Сына Божия, возлюбившаго мене и предавшаго Себе по мне. **21** Не отметаю благодати Божия. Аще бо законом правда, убо Христос туне умре.

**3** О, несмысленнии Галате, кто вы прельстил есть не покоритися истине, имже пред очима Иисус Христос преднаписан бысть, в вас распят? **2** Сие едино хощу уведети от вас: от дел ли закона Духа приясте, или от слуха веры? **3** Тако ли несмысленни есте? Наченше духом, ныне плотию скончаваете? **4** Толика пострадасте туне? Аще точию и туне. **5** Подаяй убо вам Духа и действуяй силы в вас, от дел ли закона, или от слуха веры? **6** Якоже Авраам верова Богу, и

вменися ему в правду. 7 Разумейте убо, яко сущии от веры, сии суть сынове Авраамли. 8 Предувидевшее же Писание, яко от веры оправдает языки Бог, прежде благовествова Аврааму, яко благословятся о тебе вси языцы. 9 Темже сущии от веры, благословятся с верным Авраамом: 10 елицы бо от дел закона суть, под клятвою суть. Писано бо есть: проклят всяк, иже не пребудет во всех писанных в книзе законней, яко творити я. 11 А яко в законе никтоже оправдается от Бога, яве, яко праведный от веры жив будет. 12 Закон же несть от веры: но сотворивый та человек жив будет в них. 13 Христос ны искупил есть от клятвы законныя, быв по нас клятва: писано бо есть: проклят всяк висий на древе: 14 да в языцех благословение Авраамле будет о Христе Иисусе, да обетование Духа приимем верою. 15 Братие, по человеку глаголю: обаче человеческого предутвержденна завета никтоже отмечает или приповелевает. 16 Аврааму же речени быша обеты, и семени его. Не глаголет же: и семенем, яко о мнозех, но яко о едином: и семени твоему, иже есть Христос. 17 Сие же глаголю, завета предутвержденнаго от Бога во Христа, бывый по летех четыриста и тридесятих закон не отмечает, во еже разорити обетование. 18 Аще бо от закона наследие, не ктому уже от обетования: Аврааму же обетованием дарова Бог. 19 Что убо закон? Преступлений ради приложися, дондеже приидет семя, емуже обетовася, вчинен Ангелы, рукою ходатая. 20 Ходатай же единого несть, Бог же един есть. 21 Закон ли убо противу обетованием Божиим? Да не будет. Аще бо дан бысть закон могий оживити, воистинну от закона бы была правда: 22 но затвори Писание всех под грехом, да обетование от веры Иисус



Христовы дастся верующым. 23 Прежде же пришествия веры, под законом стрегоми бехом, затворени в хотящую веру открытися. 24 Темже закон пестун нам бысть во Христа, да от веры оправдимся: 25 пришедшей же вере, уже не под пестуном есмы. 26 Все бо вы сынове Божии есте верою о Христе Иисусе: 27 елицы бо во Христа крестистеся, во Христа облекостеся. 28 Несть Иудей, ни Еллин: несть раб, ни свободь: несть мужеский пол, ни женский: все бо вы едино есте о Христе Иисусе. 29 Аще ли вы Христовы, убо Авраамле семя есте, и по обетованию наследницы.

**4** Глаголю же: в елико время наследник млад есть, ничимже лучший есть раба, господь сый всех: 2 но под повелители и приставники есть даже до нарока отча. 3 Такожде и мы, егда бехом млади, под стихиами бехом мира порабощени: 4 егда же прииде кончина лета, посла Бог Сына Своего Единороднаго, Раждаемаго от жены, бываема под законом, 5 да подзаконныя искупит, да всыновление восприимем. 6 И понеже есте сынове, посла Бог Духа Сына Своего в сердца ваша, вопиюща: Авва Отче. 7 Темже уже неси раб, но сын: аще ли же сын, и наследник Божий Иисус Христом. 8 Но тогда убо, не ведуще Бога, служисте не по естеству суцым богом: 9 ныне же, познавше Бога, паче же познани бывше от Бога, како возвращаетеся паки на немощныя и худыя стихии, имже паки свыше служити хочете? 10 Дни смотрите, и месяцы, и времена, и лета. 11 Боюся о вас, еда како все трудихся в вас. 12 Будите якоже аз, зане и аз, якоже вы: братие, молю вы. Ничимже мене обидесте: 13 весте же, яко за немощь плоти благовестих вам первее. 14 И искушения моего, еже во плоти моей, не унижисте, ни

оплевасте, но якоже Ангела Божия приясте мя, яко Христа Иисуса. 15 Кое убо бяше блаженство ваше, свидетельствую бо вам, яко, аще бы было мощно, очеса ваша извертевше дали бысте ми. 16 Темже враг вам бых, истину вам глаголя? 17 Ревнуют по вас не добре, но отлучити вас хотят, да им ревнуете. 18 Добро же, еже ревновати всегда в добрем, и не точию внегда приходити ми к вам. 19 Чадца моя, имиже паки болезную, дондеже вообразится Христос в вас: 20 хотел же бых приити к вам ныне и изменить глас мой, яко не домышляюся о вас. 21 Глаголите ми, иже под законом хотите быти: закона ли не слушаете? 22 Писано бо есть, яко Авраам два сына име: одинаго от рабы, а другаго от свободныя. 23 Но иже от рабы, по плоти родися: а иже от свободныя, по обетованию. 24 Иже суть иносказаема: сия бо еста два завета: един убо от горы Синайския, в работу раждай, иже есть Агарь: 25 Агарь бо, Сина гора есть во Аравии, прилагается же нынешнему Иерусалиму, работает же с чады своими: 26 а вышний Иерусалим свобода есть, иже есть мати всем нам. 27 Писано бо есть: возвеселися, неплоды, не раждающая: расторгни и возопи, неболящая: яко многа чада пустыя паче, нежели имущия мужа. 28 Мы же, братие, по Исааку обетования чада есмы. 29 Но якоже тогда по плоти родивыйся гоняше духовнаго, тако и ныне. 30 Но что глаголет Писание? Изжени рабу и сына ея, не имать бо наследовати сын рабынин с сыном свободныя. 31 Темже, братие, несмы рабынина чада, но свободныя.

**5** Свободою убо, еуже Христос нас свободи, стойте, и не паки под игом работы держитесь. 2 Се аз Павел глаголю вам, яко аще обрезаетеся, Христос вас ничтоже пользует. 3

Свидетельствую же паки всякому человеку обрезавшемуся, яко должен есть весь закон творити. 4 Упразднитесь от Христа, иже законом оправдается, от благодати отпадосте: 5 мы бо духом от веры упования правды ждем. 6 О Христе бо Иисусе ни обрезание что может, ни необрезание, но вера любовью поспешествуема. 7 Течасте добре: кто вам возбрани не покарятися истине? 8 Препрение не от Призвавшего вы. 9 Мал квас все смешение квасит. 10 Аз надеюся о вас в Господе, яко ничтоже ино разумети будете: смущаяй же вас понесет грех, кто бы ни был. 11 Аз же, братие, аще обрезание еще проповедую, почто еще гонимь есмь? Убо упразднися соблазн креста. 12 О, дабы отсечени были развращающии вас. 13 Вы бо на свободу звани бысте, братие: точию да не свобода ваша в вину плоти, но любовь работайте друг другу. 14 Ибо весь закон в едином словеси исполняется, во еже: возлюбиши ближняго твоего якоже себе. 15 Аще же друг друга угрызаете и снедаете, блюдитесь, да не друг от друга истреблени будете. 16 Глаголю же: духом ходите, и похоти плотския не совершайте: 17 плоть бо похотствует на духа, дух же на плоть: сия же друг другу противятся, да не яже хотите, сия творите. 18 Аще ли духом водими есте, несте под законом. 19 Явлена же суть дела плотская, яже суть прелюбодеяние, блуд, нечистота, студодеяние, 20 идолослужение, чародеяния, вражды, рвеня, завиды, ярости, разжжения, распри, соблазны, ереси, 21 зависти, убийства, пьянства, безчинни кличи и подобная сим: яже предглаголю вам, якоже и предрекох, яко таковая творящии Царствия Божия не наследят. 22 Плод же духовный есть любви, радость, мир, долготерпение, благодать, милосердие,

вера, 23 кротость, воздержание: на таковых несть закона. 24 А иже Христовы суть, плоть распяша со страстьми и похотьми. 25 Аще живем духом, духом и да ходим. 26 Не бываем тщеславни, друг друга раздражающе, друг другу завидяще.

**6** Братие, аще и впадет человек в некое прегрешение, вы духовнии исправляйте такового духом кротости: блюдыи себе, да не и ты искушен будеши. 2 Друг друга тяготы носите, и тако исполните закон Христов. 3 Аще бо кто мнит себе быти что, ничтоже сый, умом льстит себе. 4 Дело же свое да искушает кийждо, и тогда в себе точию хваление да имать, а не во инем: 5 кийждо бо свое бремя понесет. 6 Да общается же учяйся словеси учащему во всех благих. 7 Не льститесь: Бог поругаемь не бывает. Еже бо аще сеет человек, тожде и пожнет: 8 яко сеяи в плоть свою, от плоти пожнет истление: а сеяи в дух, от духа пожнет живот вечный. (aĩḡnios g166) 9 Доброе же творяще, да не стужаем си: во время бо свое пожнем, не ослабеюще. 10 Темже убо, дондеже время имамы, да делаим благое ко всем, паче же к присным в вере. 11 Видите, колицеми книгами писах вам моею рукою. 12 Елицы хотят хвалитися по плоти, сии нудят вы обрезатися, точию да не креста ради Христова гоними будут: 13 ни бо обрезавшии сами закон хранят, но хотят вам обрезаватися, да в вашей плоти похвалятся: 14 мне же да не будет хвалитися, токмо о кресте Господа нашего Иисуса Христа, имже мне мир распяты, и аз миру. 15 О Христе бо Иисусе ни обрезание что может, ни необрезание, но нова тварь. 16 И елицы правилом сим жительствуют, мир на них и милость, и на Израили Божии. 17 Прочее, труды да

никтоже ми дает: аз бо язвы Господа Иисуса на теле моем ношу. 18 Благодать Господа нашего Иисуса Христа со духом вашим, братие. Аминь.

# Послание к Ефесянам

**1** Павел, посланник Иисус Христов волею Божиею, святым сущым во Ефесе и верным о Христе Иисусе: **2** благодать вам и мир от Бога Отца нашего и Господа Иисуса Христа. **3** Благословен Бог и Отец Господа нашего Иисуса Христа, благословивый нас всяцем благословением духовным в небесных о Христе. **4** Якоже избра нас в Нем прежде сложения мира, быти нам святым и непорочным пред Ним в любви, **5** прежде нарек нас во усыновление Иисус Христом в Него, по благоволению хотения Своего, **6** в похвалу славы благодати Своея, еюже облагодати нас о Возлюбленном: **7** о Немже имамы избавление Кровию Его, и оставление прегрешения, по богатству благодати Его, **8** юже преумножил есть в нас во всяцей премудрости и разуме, **9** сказав нам тайну воли Своея по благоволению Своему, еже прежде положи в Нем, **10** в смотрение исполнения времен, возглавити всяческая о Христе, яже на небесех и яже на земли в нем: **11** в Немже и наследницы сотворихомся, прежде наречени бывше по прозрению Божию вся Действующаго по совету воли Своея, **12** яко быти нам в похваление славы Его, прежде уповавшим во Христа: **13** в Немже и вы, слышавше слово истины, благовествование спасения нашего, в Немже и веровавше знаменастеся Духом обетования Святым, **14** Иже есть обручение наследия нашего, во избавление снабдения, в похвалу славы Его. **15** Сего ради и аз слышав вашу веру о Христе Иисусе и любовь, яже ко всем святым, **16** не перестаю благодаря о вас, поминание о вас творя в молитвах моих, **17** да Бог Господа нашего Иисуса Христа, Отец славы, даст вам Духа премудрости и откровения, в познание Его, **18**

просвещенна очеса сердца вашего, яко уведети вам, кое есть упование звания Его, и кое богатство славы достояния Его во святых, **19** и кое преспеющее величество силы Его в нас верующих по действию державы крепости Его, **20** юже содея о Христе, воскресив Его от мертвых и посадив одесную Себе на небесных, **21** превыше всякаго Началства и Власти и Силы и Господства, и всякаго имене именуемаго не точию в веце сем, но и во грядущем: (аіѡн g165) **22** и вся покори под нозе Его, и Того даде главу выше всех Церкви, **23** яже есть Тело Его, исполнение Исполняющаго всяческая во всех.

**2** И вас сущих прегрешеньми мертвых и грехи вашими, **2** в нихже иногда ходисте по веку мира сего, по князю власти воздушныя, духа, иже ныне действует в сынех противления, (аіѡн g165) **3** в нихже и мы вси жихом иногда в похотех плоти нашея, творяще волю плоти и помышлений, и бехом естеством чада гнева, якоже и прочии: **4** Бог же, богат сый в милости, за премногую любовь Свою, еюже возлюбил нас, **5** и сущих нас мертвых прегрешеньми, соживил Христом: благодатию есте спасени: **6** и с Ним воскресил, и спосади на небесных во Христе Иисусе, **7** да явит в вецех грядущих презельное богатство благодати Своея благостынею на нас о Христе Иисусе. (аіѡн g165) **8** Благодатию бо есте спасени чрез веру: и сие не от вас, Божиим даром: **9** не от дел, да никтоже похвалится. **10** Того бо есмы творение, создани во Христе Иисусе на дела благая, яже прежде уготовал Бог, да в них ходим. **11** Темже поминайте, яко вы, иже иногда языцы во плоти, глаголемии необрезание от рекомаго обрезания во плоти, рукотвореннаго, **12** яко бесте во время оно без Христа, отчуждени жития Израилева и чужди от завет обетования,

упования не имуще и безбожни в мире: **13** ныне же о Христе Иисусе вы, бывшии иногда далече, близ бысте Кровию Христовою. **14** Той бо есть мир наш, сотворивый обоя едино, и средостение ограды разоривый, **15** вражду Плотию Своею, закон заповедий учеными упразднив, да оба созиждет Собою во единого новаго человека, творя мир, **16** и примирит обоих во едином теле Богови крестом, убив вражду на нем: **17** и пришед благовести мир вам, дальним и ближним, **18** зане Тем имамы приведение обои во едином Дусе ко Отцу. **19** Темже убо ктому несте странни и пришелцы, но сожителе святым и приснии Богу, **20** наздани бывше на основании Апостол и пророк, суцу краеугольну Самому Иисусу Христу, **21** о немже всяко создание составляемо растет в церковь святую о Господе: **22** о немже и вы созидаются в жилище Божие Духом.

**3** Сего ради аз Павел юзник Иисус Христов о вас языцех. **2** Аще убо слышасте смотрение благодати Божия данная мне в вас, **3** яко по откровению сказася мне тайна, якоже преднаписах в мале: **4** о немже можете чтуще разумети разум мой в тайне Христове, **5** яже во инех родех не сказася сыном человеческим, якоже ныне открыся святым Его Апостолом и пророком Духом Святым: **6** яко быти языком снаследником и стелесником и спричастником обетования Его о Христе Иисусе, благовествованием, **7** емуже бых служитель по дару благодати Божия, данная мне по действию силы Его. **8** Мне меншему всех святых дана бысть благодать сия, во языцех благовестити неизследованное богатство Христово **9** и просветити всех, что есть смотрение тайны сокровенныя от веков в Бозе, создавшем всяческая Иисус



Христом, (аіѡн g165) 10 да скажется ныне началом и властем на небесных Церковию многообразная премудрость Божия, 11 по предложению век, еже сотвори о Христе Иисусе Господе нашем, (аіѡн g165) 12 о Немже имамы дерзновение и приведение в надеянии верою Его. 13 Темже молю (вы) не стужати си в скорбех моих о вас, яже есть слава ваша. 14 Сего ради преклоняю колена моя ко Отцу Господа нашего Иисуса Христа, 15 из Негоже всяко отечество на небесех и на земли именуется: 16 да даст вам по богатству славы Своя, силою утвердиться Духом Его во внутреннем человеце, 17 вселитися Христу верою в сердца ваша: в любви вкоренени и основани, 18 да возможете разумети со всеми святыми, что широта и долгота и глубина и высота, 19 разумети же преспеющую разум любовь Христову, да исполнитеся во всяко исполнение Божие. 20 Могущему же паче вся творити по преизбыточеству, ихже просим или разумеем, по силе действуемей в нас, 21 Тому слава в Церкви о Христе Иисусе во вся роды века веков. Аминь. (аіѡн g165)

**4** Молю убо вас аз юзник о Господе, достойно ходити звания, в неже звани бысте, 2 со всяким смиренномудрием и кротостию, с долготерпением, терпяще друг другу любовью, 3 тщащесе блюсти единение духа в союзе мира. 4 Едино тело, един дух, якоже и звани бысте во едином уповании звания вашего: 5 един Господь, едина вера, едино крещение, 6 един Бог и Отец всех, Иже над всеми и чрез всех и во всех нас. 7 Единому же комуждо нас дадесе благодать по мере дарования Христова. 8 Темже глаголет: возшед на высоту, пленил еси плен, и даде даяния человеком. 9 А еже, взыде, что есть, точию яко и сниде прежде в долнейшыя

страны земли? **10** Сшедый, Той есть и возшедый превыше всех небес, да исполнит всяческая. **11** И Той дал есть овы убо Апостолы, овы же пророки, овы же Благовестники, овы же пастыри и учителя, **12** к совершению святых, в дело служения, в созидание Тела Христова, **13** дондеже достигнем вси в соединение веры и познания Сына Божия, в мужа совершенна, в меру возраста исполнения Христова: **14** да не бываем ктому младенцы, влающеся и скитающеся всяким ветром учения, во лжи человечестей, в коварстве козней льщения: **15** истинствующе же в любви, да возрастим в Него всяческая, Иже есть глава Христос, **16** из Негоже все тело, составляемо и счиневаемо приличне всяцем осязанием подаяния, по действию в мере единыя коеяждо части, возвращение тела творит в создание самага себе любовь. **17** Сие убо глаголю и послушествую о Господе, ктому не ходити вам, якоже и прочии языцы ходят в суете ума их, **18** помрачени смыслом, суще отчуждени от жизни Божия, за невежество сущее в них, за окаменение сердец их: **19** иже в нечаяние вложшеся, предаша себе студодеянию, в делание всякия нечистоты в лихоимании. **20** Вы же не тако познасте Христа: **21** аще убо слышасте Его и о Нем научистеся, якоже есть истина о Иисусе: **22** отложить вам, по первому житию, ветхаго человека, тлеющаго в похотех прелестных, **23** обновлятися же духом ума вашего, **24** и облещися в новаго человека, созданнаго по Богу в правде и в преподобии истины. **25** Темже отложше лжу, глаголите истину кийждо ко искреннему своему. Зане есмы друг другу удове. **26** Гневайтесь и не согрешайте: солнце да не зайдет в гневе вашем: **27** ниже дадите места диаволу. **28** Крадый

ктому да не крадет, но паче да труждается, делая своима рукама благое, да имать подаяти требующему. 29 Всяко слово гнило да не исходит из уст ваших, но точию еже есть благо к созданию веры, да даст благодать слышащим. 30 И не оскорбляйте Духа Святаго Божия, Имже знаменастеся в день избавления. 31 Всяка горесть, и гнев, и ярость, и кличь, и хула да возмется от вас, со всякою злобою: 32 бывайте же друг ко другу блази, милосерди, прощающе друг другу, якоже и Бог во Христе простил есть вам.

**5** Бывайте убо подражателе Богу, якоже чада возлюбленная, 2 и ходите в любви, якоже и Христос возлюбил есть нас, и предаде Себе за ны приношение и жертву Богу в воню благоухания. 3 Блуд же и всяка нечистота и лихоимство ниже да именуется в вас, якоже подобает святым: 4 и сквернословие, и буесловие, или кощуны, яже неподобная, но паче благодарение: 5 сие бо да весте, яко всяк блудник, или нечист, или лихоимец, иже есть идолослужитель, не имать достояния в Царствии Христа и Бога. 6 Никтоже вас да льстит суетными словесы, сих бо ради грядет гнев Божий на сыны непокоривыя. 7 Не бывайте убо сопричастницы сим. 8 Бесте бо иногда тма, ныне же свет о Господе: якоже чада света ходите: 9 плод бо духовный есть во всяцей благостыни и правде и истине: 10 искушающе, что есть благоугодно Богу: 11 и не приобщайтесь к делом неплодным тмы, паче же и обличайте. 12 Бываемая бо отай от них, срамно есть и глаголати. 13 Вся же обличаемая от света являются, все бо являемое свет есть: 14 сего ради глаголет: востани, спяй, и воскресни от мертвых, и осветит тя Христос. 15 Блюдите убо, како опасно ходите, не якоже немудри, но

якоже премудри, **16** искупующе время, яко дние лукави суть. **17** Сего ради не бывайте несмысленни, но разумевайте, что есть воля Божия. **18** И не упивайтесь вином, в немже есть блуд: но паче исполняйтесь Духом, **19** глаголюще себе во псалмех и пениих и песнях духовных, воспевающе и поюще в сердцах ваших Господеви, **20** благодаряще всегда о всех о имени Господа нашего Иисуса Христа Богу и Отцу, **21** повинующеся друг другу в страхе Божии. **22** Жены, своим мужем повинуйтесь, якоже Господу, **23** зане муж глава есть жены, якоже и Христос глава Церкви, и Той есть Спаситель тела: **24** но якоже Церковь повинуется Христу, такожде и жены своим мужем во всем. **25** Мужие, любите своя жены, якоже и Христос возлюбил Церковь, и Себе предаде за ню, **26** да освятит ю, очестив банею водною в глаголголе: **27** да представит ю Себе славному Церкви, не имущу скверны, или порока, или нечто от таковых, но да будет свята и непорочна. **28** Тако должны суть мужие любити своя жены, яко своя телеса: любяй бо свою жену, себе самого любит. **29** Никтоже бо когда свою плоть возненавиде, но питает и греет ю, якоже и Господь Церковь: **30** зане уди есмы Тела Его, от плоти Его и от костей Его. **31** Сего ради оставит человек отца своего и мать, и прилепится к жене своей, и будета два в плоть едину. **32** Тайна сия велика есть: аз же глаголю во Христа и во Церковь. **33** Обаче и вы, по единому кийждо свою жену сице да любит, якоже (и) себе: а жена да боится (своего) мужа.

**6** Чада, послушайте своих родителей о Господе: сие бо есть праведно. **2** Чти отца твоего и мать: яже есть заповедь первая во обетовании: **3** да благо ти будет, и

будеши долголетен на земли. 4 И отцы, не раздражайте чад своих, но воспитывайте их в наказании и учении Господни. 5 Рабы, послушайте господий своих по плоти со страхом и трепетом, в простоте сердца вашего, якоже и Христа, 6 не пред очима точию работающе яко човекоугодницы, но якоже рабы Христовы, творяще волю Божию от души, 7 со благоразумием служаще якоже Господу, а не яко человеком, 8 ведяще, яко кийждо, еже аще сотворит благое, сие примет от Господа, аще раб, аще свободь. 9 И господие, таяжде творите к ним, послабляюще им прещения, ведуще, яко и вам самем и тем Господь есть на небесех, и обинования лица несть у Него. 10 Прочее же, братие моя, возмогайте во Господе и в державе крепости Его: 11 облецытеся во вся оружия Божия, яко возможи вам стати противу кознем диаволским, 12 яко несть наша брань к крови и плоти, но к началом и ко властем (и) к миродержителем тмы века сего, к духовом злобы поднебесным. (aiōn g165) 13 Сего ради примите вся оружия Божия, да возможете противитися в день лют и вся содеявше стати. 14 Станите убо препоясани чресла ваша истиною, и оболкшеся в броня правды, 15 и обувше нозе во уготовление благовествования мира: 16 над всеми же восприимше щит веры, в немже возможете вся стрелы лукаваго разжженныя угасити: 17 и шлем спасения восприимите, и мечь духовныи, иже есть Глаголгол Божий: 18 всякою молитвою и молением молящеся на всяко время духом, и в сие истое бдяще во всяком терпении и молитве о всех святых 19 и о мне, да дастся ми слово во отвержение уст моих, с дерзновением сказати тайну благовествования, 20 о немже посолствую во узах, да в нем дерзаю, якоже

подобает ми глаголати. 21 Да увесте же и вы, яже о мне, что делаю, вся скажет вам Тихик, возлюбленный брат и верен служитель о Господе, 22 егоже послах к вам на сие истое, да увесте, яже о нас, и да утешит сердца ваша. 23 Мир братии и любовь с верою от Бога Отца и Господа Иисуса Христа. 24 Благодать со всеми любящими Господа нашего Иисуса Христа в неистлении. Аминь.

## Послание к Филиппийцам

**1** Павел и Тимофей, рабы Иисус Христовы, всем святым о Христе Иисусе сущим в Филиппех, с епископы и диаконы:  
**2** благодать вам и мир от Бога Отца нашего и Господа Иисуса Христа. **3** Благодарю Бога моего о всей памяти вашей, **4** всегда во всяцей молитве моей за всех вас с радостью молитву мою творя, **5** о общении вашем в благовествование от первого дне даже и донныне, **6** надеявся на сие истое, яко начный дело благо в вас совершит е даже до дне Иисус Христова: **7** якоже есть праведно мне сие мудрствовати о всех вас, за еже имети ми в сердцы вас, во узах моих и во ответе и извещении благовестия, сообщников мне благодати всех вас сущих. **8** Свидетель бо ми есть Бог, яко люблю всех вас по милости Иисус Христове: **9** и о сем молюся, да любовь ваша еще паче и паче избыточествует в разуме и во всяцем чувствии, **10** во еже искушати вам лучшая, да будете чисти и непреткновенни в день Христов, **11** исполнени плодов правды Иисус Христом, в славу и похвалу Божию. **12** Разумети же хошу вам, братие, яко яже о мне паче во успех благовествования приидоша, **13** яко узы моя явленны о Христе быша во всем судищи и в прочих всех, **14** и множайшии братия о Господе, надеявшиися о узах моих, паче дерзают без страха слово Божие глаголати. **15** Нецыи убо по зависти и ревности, друзии же и за благоволение Христа проповедают: **16** ови убо от рвеня Христа возвещают нечисте, мняще печаль нанести узам моим: **17** ови же от любве, ведяще, яко во ответе благовествования лежу. **18** Что убо? Обаче всяцем образом, аще виною, аще истиною Христос проповедаемь

есть, и о сем радуюся, но и возрадуюся: **19** вем бо, яко сие сбудется ми во спасение вашею молитвою и подаянием Духа Иисус Христова, **20** по чаянию и упованию моему, яко ни о едином же постыжуся, но во всяцем дерзновении, якоже всегда, и ныне возвеличится Христос в теле моем, аще животом, аще ли смертию. **21** Мне бо еже жити, Христос, и еже умрети, приобретение (есть). **22** Аще же, еже жити (ми) телом, сие мне плод дела: и что изволю, не вем. **23** Обдержимь же есмь от обою, желание имый разрешитися и со Христом быти, много паче лучше: **24** а еже пребывати во плоти, нужнейше (есть) вас ради. **25** И сие известне вем, яко буду и спребуду вам всем в ваш успех и радость веры, **26** яко да похвала ваша избыточествует о Христе Иисусе во мне, моим пришествием паки к вам. **27** Точию достойне благовествованию Христову жителствуйте, да аще пришед и виде вас, аще и не сый у вас, услышу яже о вас, яко (истиною) стоите во едином дусе, и единомушне сподвизающесе по вере Благовествования (волею), **28** и не колеблющесе ни о едином же от сопротивных: еже тем убо есть явление погибели, вам же спасения. И сие от Бога: **29** яко вам даровася, еже о Христе, не токмо еже в Него веровати, но и еже по Нем страдати, **30** тойже подвиг имуще, яков же во мне видесте и ныне слышите о мне.

**2** Аще убо кое утешение о Христе, (или) аще кая утеха любве, аще кое общение духа, аще кое милосердие и щедроты, **2** исполните мою радость, да тожде мудрствуете, ту же любовь имуще, единомушни, единомудренни: **3** ничтоже по рвеню или тщеславию, но смиренномудрием друг друга честию болша себе творяще. **4** Не своих си кийждо, но и



дружних кийждо смотряйте. 5 Сие бо да мудрствуется в вас, еже и во Христе Иисусе: 6 Иже, во образе Божии сый, не восхищением непщева быти равен Богу: 7 но Себе умалил, зрак раба приим, в подобии человечестем быв, и образом обретеса якоже человек: 8 смирил Себе, послушлив быв даже до смерти, смерти же крестныя. 9 Темже и Бог Его превознесе и дарова Ему имя, еже паче всякаго имене, 10 да о имени Иисусове всяко колени поклонится небесных и земных и преисподних, 11 и всяк язык исповестъ, яко Господь Иисус Христос в славу Бога Отца. 12 Темже, возлюбленнии мои, якоже всегда послушасте мене, не якоже в пришествии моем точию, но ныне много паче во отшествии моем, со страхом и трепетом свое спасение содевайте: 13 Бог бо есть действующий в вас и еже хотети и еже деяти о благоволении. 14 Вся творите без роптания и размышления, 15 да будете неповинни и цели, чада Божия непорочна посреде рода строплива и развращена, в нихже являетеса якоже светила в мире, 16 слово живоотно придержаще, в похвалу мне в день Христов, яко не вотще текох, ни вотще трудихся. 17 Но аще и жрен бываю о жертве и службе веры вашей, радуюся и сорадуюся всем вам: 18 такожде и вы радуйтеса и сорадуйтеса мне. 19 Уповаю же о Господе Иисусе Тимофеа вскоре послати к вам, да и аз благодушствую, уведев яже о вас. 20 Ни единого бо имам равнодушна, иже приснее о вас попечется: 21 вси бо своих си ищут, (а) не яже Христа Иисуса. 22 Искусство же его знаете, зане якоже отцу чадо, со мною поработал в благовестии. 23 Сего же убо уповаю послати абие, повнегда увем яже о мне. 24 Надеюся же о Господе, яко и сам скоро прииду к вам. 25 Потребнее

же возмнех Епафродита брата и споспешника и своинника моего, вашего же посланника и служителя потребе моей, послати к вам, **26** понеже желанием желаше видети всех вас, и тужаше, зане слышаште, яко боле. **27** Ибо боле близ смерти: но Бог помилова его, не его же токмо, но и мене, да не скорбь на скорбь прииму. **28** Скорее убо послах его, да видевше его паки, возрадуется, и аз безпечален пребуду. **29** Примите убо его о Господе со всякою радостию, и таковыя честны имейте, **30** зане за дело Христово даже до смерти приближися, понудив себе вседушно, да исполнит ваше лишение службы яже ко мне.

**3** Прочее же, братие моя, радуйтесь о Господе. Таяжде (бо) писати вам, мне убо неленостно, вам же твердо. **2** Блюдитесь от псов, блюдитесь от злых делателей, блюдитесь от сечения: **3** мы бо есмы обрезание, иже духом Богу служим и хвалимся о Христе Иисусе, а не в плоти надеемся: **4** ибо и аз имею надеяние такожде во плоти. Аще кто ин мнит надеятися во плоти, аз паче, **5** обрезан осмодневно, от рода Израилева, колена Вениаминова, Евреин от Еврей, по закону фарисей, **6** по ревности гоних Церковь Божию, по правде законней быв непорочен. **7** Но яже ми бяху приобретения, сия вмних Христа ради тщету. **8** Но убо вмняю вся тщету быти за превосходящее разумение Христа Иисуса Господа моего, Егоже ради всех отщетиhsя, и вмняю вся уметы быти, да Христа приобрящу **9** и обрящуся в Нем, не имый моя правды, яже от закона, но яже верою (Иисус) Христовою, сущую от Бога правду в вере: **10** яко разумети Его, и силу воскресения Его, и соющение страстей Его, сообразуяся смерти Его, **11** аще како достигну в воскресение

мертвых. **12** Не зане уже достигох, или уже совершихся: гоню же, аще и постигну, о немже и постижен бых от Христа Иисуса. **13** Братие, аз себе не у помышляю достигша: едино же, задняя убо забывая, в предняя же простираяся, **14** со усердием гоню, к почести вышняго звания Божия о Христе Иисусе. **15** Елицы убо совершенни, сие да мудрствуим: и еже аще ино что мыслите, и сие Бог вам открыет. **16** Обаче в неже достигохом, тоже да мудрствуем и темже правилом жителствуем. **17** Подобни ми бывайте, братие, и смотрите тако ходящыя, якоже имате образ нас. **18** Мнози бо ходят, ихже многажды глаголах вам, ныне же и плача глаголю, враги креста Христова: **19** имже кончина погибель, имже бог чрево, и слава в студе их, иже земная мудрствуют. **20** Наше бо житие на небесех есть, отнюдуже и Спасителя ждем, Господа (нашего) Иисуса Христа, **21** Иже преобразит тело смирения нашего, яко быти сему сообразну телу славы Его, по действию еже возмогати Ему и покорити Себе всяческая.

**4** Темже, братие моя возлюбленная и вожденная, радосте и венче мой, тако стойте о Господе, возлюбленнии. **2** Еводию молю и Синтихию молю тожде мудрствовати о Господе: **3** ей, молю и тебе, супружнице присный, споспешествуй им, яже во благовествовании сподвизашася со мною и с Климентом и с прочими споспешники моими, ихже имена в книгах животных. **4** Радуйтесь всегда о Господе: и паки реку: радуйтесь. **5** Кротость ваша разумна да будет всем человеком. Господь близ. **6** Ни о чемже пецьтесе, но во всем молитвою и молением со благодарением прошения ваша да сказуются к Богу: **7** и мир Божий, превосходяй всяк ум, да соблюдет сердца ваша и разумения ваша о Христе

Иисусе. 8 Прочее же, братие (моя), елика суть истинна, елика честна, елика праведна, елика пречиста, елика прелюбезна, елика доброхвальна, аще кая добродетель и аще кая похвала, сия помышляйте. 9 Умже и научитесь, и приясте, и слышасте, и видесте во мне, сия творите: и Бог мира будет с вами. 10 Возрадовахся же о Господе вельми, яко уже когда воспомянусте пещися о мне: понеже и печастесь, но непогодным временем обдержастесь. 11 Не яко по скудости глаголю: аз бо навыхох, в нихже есмь, доволен быти: 12 вем и смиритися, вем и избыточествовати: во всем и во всех навыхох, и насыщатися и алкати, и избыточествовати и лишатися. 13 Вся могу о укрепляющем мя (Иисусе) Христе. 14 Обаче добре сотвористе, сприобщившесе печали моей. 15 Весте же и вы, Филипписиане, яко в начале благовествования, егда изыдох от Македонии, ни едина ми церковь общевася в слово даяния и приятия, точию вы едины: 16 яко и в Солунь и единою и дващи в требование (мое) посласте ми. 17 Не яко ищу даяния, но ищу плода множащагося в слово ваше. 18 Приях же вся и избыточествую: исполнихся, приемь от Епафродита посланная от вас, воню благоухания, жертву приятну, благоугодну Богу. 19 Бог же мой да исполнит всякое требование ваше по богатству Своему в славе, о Христе Иисусе. 20 Богу же и Отцу нашему слава во веки веков. Аминь. (αἰὼν ἡ165) 21 Целуйте всякаго свята о Христе Иисусе. Целуют вы сущая со мною братия. 22 Целуют вы святии вси, паче же иже от кесарева дому. 23 Благодать Господа нашего Иисуса Христа со всеми вами. Аминь.

## Послание к Колоссянам

**1** Павел, Апостол Иисус Христов волею Божию, и Тимофей брат, **2** сущим в Колоссаех святым и верным братиям о Христе Иисусе: **3** благодать вам и мир от Бога Отца нашего, и Господа Иисуса Христа. Благодарим Бога и Отца Господа нашего Иисуса Христа, всегда о вас молящися, **4** слышавше веру вашу, яже о Христе Иисусе, и любовь, юже имате ко всем святым, **5** за упование отложенное вам на небесех, еже прежде слышасте в словеси истины благовествования, **6** сущаго в вас, якоже и во всем мире: и есть плодоносно и растимо, якоже и в вас, от негоже дне слышасте и разуместе благодать Божию во истине: **7** якоже и уведесте от Епафраса, возлюбленного сорботника нашего, иже есть верен о вас служитель Христов, **8** иже и яви нам вашу любовь в душе. **9** Сего ради и мы, от негоже дне слышахом, не престаем о вас молящися и просяще, да исполнитесь в разуме воли Его, во всяцей премудрости и разуме духовнем, **10** яко ходити вам достоин Богу во всячем угождении и всяком деле блазе, плодоносяще и возрастающе в разуме Божии, **11** всякою силою возмогающе по державе славы Его, во всячем терпении и долготерпении с радостию. **12** Благодаряще Бога и Отца, призвавшаго вас в причастие наследия святых во свете. **13** Иже избави нас от власти темныя и престаи в Царство Сына любве Своея, **14** о Немже имамы избавление Кровию Его и оставление грехов. **15** Иже есть образ Бога невидимаго, перворожден всея твари. **16** Яко Тем создана быша всяческая, яже на небеси и яже на земли, видимая и невидимая, аще престолы, аще господствия, аще начала, аще власти: всяческая Тем и о Нем создашася. **17** И Той

есть прежде всех, и всяческая в Нем состоится. 18 И Той есть глава телу Церкви, Иже есть начаток, перворожден из мертвых, яко да будет во всех Той первенствуя. 19 Яко в Нем благоизволи всему исполнению вселиться, 20 и Тем примирити всяческая к Себе, умиротворив Кровию креста Его, чрез Него, аще земная, аще ли небесная. 21 И вас, иногда сущих отчужденных и врагов помышленьми в делех лукавых, 22 ныне же примири в теле Плоти Его смертию Его, представити вас святых и непорочных и неповинных пред Собою, 23 аще убо пребываете в вере основани и тверди, и неподвижими от упования благовествования, еже слышасте, проповеданное всей твари поднебесней, ему же бых аз Павел служитель. 24 Ныне радуюся во страданиях моих о вас, яко исполняю лишение скорбей Христовых во плоти моей за Тело Его, еже есть Церковь. 25 Ей же бых аз служитель по смотрению Божию, данному мне в вас, исполнити слово Божие, 26 тайну сокровенную от век и от родов: ныне же явися святым Его, (αἰὼν ἡ 165) 27 Им же восхоте Бог сказати, кое богатство славы тайны сея во языцех, иже есть Христос в вас, упование славы, 28 Его же мы проповедуем, наказующе всякаго человека и учаще всяцей премудрости, да представим всякаго человека совершенна о Христе Иисусе: 29 в нем же и труждаюся и подвизаюся по действию Его действуемому во мне силою.

**2** Хошу убо вас ведети, колики подвигом имам о вас и о сущих в Лаодикии и во Иераполи, и елицы не видеша лица моего во плоти, 2 да утешатся сердца их, снемшихся в любви и во всяцем богатстве извещения разума, в познание тайны Бога и Отца и Христа, 3 в Нем же суть вся сокровища премудрости

и разума сокровенна. 4 Сие же глаголю, да никтоже вас прельстит в словопрении. 5 Аще бо и плотию отстою, но духом с вами есмь, радуясь и видя ваш чин и утверждение вашей веры, яже во Христа. 6 Якоже убо приясте Христа Иисуса Господа, такожде в Нем ходите, 7 укоренени и наздани в Нем и извествовани верою, якоже научистесь, избыточествующе в ней благодарением. 8 (Братие, ) блюдитесь, да никтоже вас будет прельщая философиєю и тщетною лестию, по преданию человеческому, по стихиям мира, а не по Христе. 9 Яко в Том живет всяко исполнение Божества телесне: 10 и да будете в Нем исполнены, Иже есть глава всякому началу и власти: 11 о Немже и обрезаны бысте обрезанием нерукотворенным, в совлечении тела греховнаго плоти, во обрезании Христове, 12 спогребшесь Ему крещением: о Немже и совостае верою действия Бога, Воскресившаго Его из мертвых. 13 И вас, мертвых сущих в прегрешениях и в необрезании плоти вашей, сооживил есть с Ним, даровав нам вся прегрешения, 14 истребив еже на нас рукописание ученьми, еже бе сопротивно нам, и то взят от среды, пригвоздив е на кресте: 15 совлек начала и власти, изведе в позор дерзновением, избличив их в Себе. 16 Да никтоже убо вас осуждает о ядении, или о питии, или о части праздника, или о новомесячиих, или о субботах: 17 яже суть стень грядущих, тело же Христово. 18 Никтоже вас да прельщает изволенным ему смиренномудрием и службою Ангелов, яже не уведет уя, без ума дмяся от ума плоти своея, 19 а не держа главы, из неяже все тело, составы и соузы подаемо и снемлемо, растит возвращение Божие. 20 Аще убо умросте со Христом от стихий мира, почто аки живуще в мире

стязаетеся? **21** Не коснися, ниже вкуси, ниже осяжи: **22** яже суть вся во истление употреблением, по заповедем и учением человеческим: **23** яже суть слово убо имуща премудрости в самовольней службе и смиреномудрии и непопадении тела, не в чести коей к сытости плоти.

**3** Аще убо воскреснусте со Христом, вышних ищите, идеже есть Христос о десную Бога сядя: **2** горняя мудрствуйте, (а) не земная. **3** Умросте бо, и живот ваш сокровен есть со Христом в Бозе: **4** егда же Христос явится, живот ваш, тогда и вы с Ним явитесь в славе. **5** Умертвите убо уды ваша, яже на земли: блуд, нечистоту, страсть, похоть злую и лихоимание, еже есть идолослужение, **6** ихже ради грядет гнев Божии на сыны противления. **7** В нихже и вы иногда ходисте, егда живясте в них. **8** Ныне же отложите и вы та вся: гнев, ярость, злобу, хуление, срамословие от уст ваших: **9** не лжите друг на друга, совлекшеса ветхаго человека с деяньми его **10** и облекшеса в новаго, обновляемаго в разум по образу Создавшаго его, **11** идеже несть Еллин, ни Иудей, обрезание и необрезание, варвар и Скиф, раб и свободь, но всяческая и во всех Христос. **12** Облецытеся убо якоже избраннии Божии, святы и возлюбленни, во утробы щедрот, благодать, смиреномудрие, кротость и долготерпение, **13** приемлюще друг друга и прощающе себе, аще кто на кого имать поречение: якоже и Христос простил есть вам, тако и вы. **14** Над всеми же сими (стяжите) любовь, яже есть союз совершенства: **15** и мир Божии да водворяется в сердцах ваших, в оньже и звани бысте во едином теле: и благодарни бывайте. **16** Слово Христово да вселяется в вас богато, во всякой премудрости: учаще и вразумляюще себе



самех во псалмех и пениих и песнех духовных, во благодати поюще в сердцах ваших Господеви. 17 И все, еже аще что творите словом или делом, вся во имя Господа Иисуса Христа, благодаряще Бога и Отца Тем. 18 Жены, повинуйтеся своим мужем, якоже подобает о Господе. 19 Мужие, любите жены ваша, и не огорчайте к ним. 20 Чада, послушайте родителей (своих) во всем: сие бо угодно есть Господеви. 21 Отцы, не раздражайте чад ваших, да не унывают. 22 Раби, послушайте по всему плотских господии (ваших), не пред очима точию работающе аки человекоугодницы, но в простоте сердца, боящися Бога. 23 И всяко, еже аще что творите, от души делайте, якоже Господу, а не человеком, 24 ведяще, яко от Господа примете воздаяние достояния: Господу бо Христу работаете. 25 А обидяй восприимет, еже обиде: и несть лица обинования.

**4** Господие, правду и уравнение рабом подавайте, ведяще, яко и вы имате Господа на небесех. 2 В молитве терпите, бодрствующе в ней со благодарением: 3 молящися и о нас вкупе, да Бог отверзет нам двери слова, проглаголати тайну Христову, еяже ради и связан есмь: 4 да явлю ю, якоже подобает ми глаголати. 5 В премудрости ходите ко внешним, время искупующе. 6 Слово ваше (да бывает) всегда во благодати, солию растворено, ведети, како подобает вам единому комуждо отвещавати. 7 Иже о мне, вся скажет вам Тихик, возлюбленный брат и верен служитель и соратник о Господе, 8 егоже послах к вам на се истое, да разумеет яже о вас и утешит сердца ваша, 9 со Онисимом, верным и возлюбленным братом нашим, иже есть от вас: вся вам скажут, яже zde. 10 Целует вы Аристарх спленник мой, и

Марко анепсий Варнавин, о немже приясте заповеди: аще приидет к вам, примите его: **11** и Иисус нареченный Иуст, сущий от обрезания: сии едины споспешницы во Царство Божие, иже быша ми утешение. **12** Целует вы Епафрас, иже от вас, раб Иисуса Христа, всегда подвизаяся о вас в молитвах, да будете совершени и исполнени во всяцей воли Божией. **13** Свидетелствую бо о нем, яко имать ревность многу (и болезнь) о вас и о сущих в Лаодикии и во Иераполи. **14** Целует вы Лука врач возлюбленный, и Димас. **15** Целуйте братию сущую в Лаодикии, и Нимфана, и домашнюю его церковь. **16** И егда прочтется послание сие у вас, сотворите, да и в Лаодикиистей церкви прочтено будет, и написанное от Лаодикии да и вы прочтете. **17** И рцыте Архиппу: блюди служение, еже приял еси о Господе, да довершиши е. **18** Целование моею рукою Павлею. Поминайте моя узы. Благодать со (всеми) вами. Аминь.

# Первое послание к Фессалоникийцам

**1** Павел и Силуан и Тимофей церкви Солунстей о Бозе Отце и Господе Иисусе Христе: благодать вам и мир от Бога Отца нашего и Господа Иисуса Христа. **2** Благодарим Бога всегда о всех вас, поминание о вас творяще в молитвах наших, **3** непрестанно поминающе ваше дело веры, и труд любве, и терпение упования Господа нашего Иисуса Христа, пред Богом и Отцем нашим, **4** ведяще, братие возлюбленная, от Бога избрание ваше: **5** яко благовествование наше не бысть к вам в слове точию, но и в силе, и в Дусе Святе, и во извещении мнозе, якоже и весте, какови быхом в вас ради вас. **6** И вы подобницы бысте нам и Господу, приемше слово в скорби мнозе с радостию Духа Святаго, **7** яко быти вам образ всем верующым в Македонии и Ахаии. **8** От вас бо промчеса слово Господне не токмо в Македонии и Ахаии, но и во всяко место вера ваша, яже к Богу, изыде, яко не требовати нам глаголати что. **9** Тии бо о нас возвещают, каков вход имехом к вам, и како обратистеся к Богу от идол, работати Богу живу и истинну **10** и ждати Сына Его с небес, Егоже воскреси из мертвых, Иисуса, избавляющаго нас от гнева грядущаго.

**2** Сами бо весте, братие, вход наш иже к вам, яко не вотще бысть: **2** но предпострадавшие и досаждени бывше, якоже весте, в Филиппех, дерзнухом о Бозе нашем глаголати к вам благовествование Божие со многим подвигом. **3** Утешение бо наше не от прелести, ни от нечистоты, ни лестию: **4** но якоже искусихомся от Бога верни быти прияти благовествование, тако глаголем, не аки человеком

угождающе, но Богу искушающему сердца наша. 5 Никогдаже бо в словеси ласкания быхом к вам, якоже весте, ниже в вине лихоимания: Бог свидетель! 6 Ни ищуще от человек славы, ни от вас, ни от инех: 7 могуще в тяготе быти, якоже Христовы Апостоли, но быхом тиси посреде вас, якоже доилица греет своя чада. 8 Тако желающе вас, благоволихом подати вам не точию благовествование Божие, но и души своя, занеже возлюблени бысте нам. 9 Помните бо, братие, труд наш и подвиг: ночь бо и день делающе, да не отяготим ни единого от вас, проповедахом вам благовествование Божие. 10 Вы свидетеле и Бог, яко преподобно и праведно и непорочно вам верующым быхом, 11 якоже весте, зане единого кождо вас, якоже отец чада своя, 12 моляще и утешающе вас, и свидетельствующе вам ходити достойно Богу, призвавшему вы во Свое Царство и славу. 13 Сего ради и мы благодарим Бога непрестанно, яко приемше слово слышания Божия от нас, приясте не аки слово человеческо, но, якоже есть воистинну, слово Божие, еже и действуется в вас верующих. 14 Вы бо подобницы бысте, братие, церквам Божиим сущым во Иудеи о Христе Иисусе, зане таяжде и вы пострадасте от своих сплеменник, якоже и тии от Иудей, 15 убивших и Господа Иисуса и Его пророки, и нас изгнавших, и Богу не угодивших, и всем человеком противящихся, 16 и возбраняющих нам глаголати языком, да спасутся, во еже исполнити им грехи своя всегда: постиже же на них гнев до конца. 17 Мы же, братие, осиротевше от вас ко времени часа лицом, а не сердцем, лишше тщахомся лице ваше видети многим желанием. 18 Темже хотехом приити к вам, аз убо Павел, единою и дважды: и возбрани нам сатана. 19 Кто

бо нам упование или радость или венец похваления? Не и вы ли пред Господем нашим Иисус Христом во пришествии Его? 20 Вы бо есте слава наша и радость.

**3** Темже уже не терпяще, благоволихом остатися во Афинех едины, 2 и послахом Тимофеа, брата нашего и служителя Божия и споспешника нашего во благовестии Христове, утвердити вас и утешити о вере вашей, 3 яко ни единому смущатися в скорбех сих: сами бо весте, яко на сие истое лежим. 4 Ибо егда у вас бехом, предрекохом вам, яко имамы скорбети, еже и бысть, и весте. 5 Сего ради и аз ктому не терпя, послах разумети веру вашу, да не како искусил вы искушаяй, и вотще будет труд наш. 6 Ныне же пришедшу Тимофею к нам от вас и благовестившу нам веру вашу и любовь, и яко имате память о нас благу, всегда желающе нас видети, якоже и мы вас: 7 сего ради утешихомся, братие, о вас, во всякой скорби и нужде нашей, вашею верою: 8 яко мы ныне живи есмы, аще вы стоите о Господе. 9 Кое бо благодарение Богу можем воздати о вас, о всякой радости, еюже радуемся вас ради пред Богом нашим, 10 ночь и день преизлиха молящися видети лице ваше и совершити лишение веры вашей? 11 Сам же Бог и Отец наш и Господь наш Иисус Христос да исправит путь наш к вам. 12 Вас же Господь да умножит и да избыточествит любовью друг ко другу и ко всем, якоже и мы к вам, 13 во еже утвердити сердца ваша непорочна в святыни пред Богом и Отцем нашим, в пришествие Господа нашего Иисуса Христа со всеми святыми Его. Аминь.

**4** Темже убо, братие, просим вы и молим о Христе Иисусе, якоже приясте от нас, како подобает вам ходити и угождати

Богови, якоже и ходите, да избыточествуете паче: 2 весте бо, какова повеления дахом вам Господем Иисусом. 3 Сия бо есть воля Божия, святость ваша, хранити себе самех от блуда, 4 и ведети комуждо от вас свой сосуд стяжавати во святыни и чести, 5 а не в страсти похотней, якоже и языцы не ведящии Бога, 6 и еже не преступати и лихоимствовати в вещи брата своего: зане мститель есть Господь о всех сих, якоже и прежде рекохом к вам и засвидетельствовахом. 7 Не призва бо нас Бог на нечистоту, но во святость. 8 Темже убо отменяй не человека отменяет, но Бога, Давшаго Духа Своего Святаго в нас. 9 О братолюбии же, не требуете, да пишется к вам, сами бо вы Богом учени есте, еже любити друг друга: 10 ибо творите то ко всей братии, сущей во всей Македонии. Молим же вы, братие, избыточествовати паче, 11 и любезно прилежати, еже безмолвствовати и деяти своя и делати своима рукама, якоже повелехом вам: 12 да ходите благообразно ко внешним и ни чесогоже требуете. 13 Не хошу же вас, братие, не ведети о умерших, да не скорбите, якоже и прочии не имущии упования. 14 Аще бо веруем, яко Иисус умре и воскресе, тако и Бог умершья во Иисусе приведет с Ним. 15 Сие бо вам глаголем словом Господним, яко мы живуции, оставшии в пришествие Господне, не имамы предварити умерших: 16 яко Сам Господь в повелении, во глаسه Архангелове и в трубе Божии снидет с небесе, и мертвии о Христе воскреснут первее: 17 потом же мы, живуции оставшии, купно с ними восхищени будем на облацех в сретение Господне на воздухе, и тако всегда с Господем будем. 18 Темже утешайте друг друга в словесех сих.

**5** А о летех и о временех, братие, не требе есть вам писати, **2** сами бо вы известно весте, яко день Господень, якоже тать в нощи, тако приидет. **3** Егда бо рекут: мир и утверждение, тогда внезапно нападет на них всегубительство, якоже болезнь во чреве имущей, и не имут избежати. **4** Вы же, братие, несте во тме, да день вас якоже тать постигнет: **5** вси бо вы сынове света есте: и сынове дне: несмы нощи, ниже тьмы. **6** Темже убо да не спим, якоже и прочии, но да бодрствуим и трезвимся. **7** Спящии бо, в нощи спят, и упивающиися в нощи упиваются. **8** Мы же, сынове суще дне, да трезвимся, оболкшеса в броню веры и любве и шлем упования спасения, **9** яко не положи нас Бог в гнев, но в получение спасения Господем нашим Иисус Христом, **10** умершим за нас, да, аще бдим, аще ли спим, купно с Ним живем. **11** Сего ради утешайте друг друга, и созидайте кийждо ближняго, якоже и творите. **12** Молим же вы, братие, знайте труждающихся у вас, и настоятелей ваших о Господе, и наказующих вы, **13** и имейте их по преизлиха в любви за дело их: мирствуйте в себе. **14** Молим же вы, братие, вразумляйте безчинныя, утешайте малодушныя, заступайте немощныя, долготерпите ко всем. **15** Блюдите, да никтоже зла за зло кому воздаст: но всегда доброе гоните и друг ко другу и ко всем. **16** Всегда радуйтесь. **17** Непрестанно молитесь. **18** О всем благодарите: сия бо есть воля Божия о Христе Иисусе в вас. **19** Духа не угашайте. **20** Пророчества не уничижайте. **21** Вся же искушающе, добрая держите. **22** От всякия вещи злыя огребайтесь. **23** Сам же Бог мира да освятит вас всесовершенных во всем: и всесовершен ваш дух и душа и тело непорочно в пришествие Господа нашего

Иисуса Христа да сохранится. 24 Верен Призвавый вас, Иже и сотворит. 25 Братие, молитесь о нас. 26 Целуйте братию всю лобзанием святым. 27 Заклинаю вы Господем, прочести послание сие пред всею святою братиею. 28 Благодать Господа нашего Иисуса Христа с вами. Аминь.



## Второе послание к Фессалоникийцам

**1** Павел и Силуан и Тимофей, церкви Солунстей, о Бозе Отце нашем и Господе Иисусе Христе: **2** благодать вам и мир от Бога Отца нашего, и Господа Иисуса Христа. **3** Благодарити должны есмы Бога всегда о вас, братие, якоже достойно есть, яко превозрастает вера ваша, и множится любовь единого коегождо всех вас друг ко другу: **4** яко самем нам хвалитися о вас в церквах Божиих, о терпении вашем и вере во всех гонениях ваших и скорбех, яже приемлете, **5** показание праведного суда Божия, во еже сподобитися вам Царствия Божия, егоже ради и страждете. **6** Аще убо праведно у Бога, воздати скорбь оскорбляющим вас, **7** а вам оскорбляемым отраду с нами, во откровении Господа Иисуса с небесе, со Ангелы силы Своея, **8** во огни пламенне дающего отмщение не ведущим Бога и не слушающим благовествования Господа нашего Иисуса Христа: **9** иже муку примут, погибель вечную, от лица Господня и от славы крепости Его, (aiōnios g166) **10** егда придет прославится во святых Своих и дивен быти во всех веровавших, яко уверися свидетельство наше в вас, в день он. **11** За сие и молимся всегда о вас, да вы сподобит званию Бог наш и исполнит всяко благоволение благодати и дело веры в силе, **12** яко да прославится имя Господа нашего Иисуса Христа в вас, и вы в Нем, по благодати Бога нашего и Господа Иисуса Христа.

**2** Молим же вы, братие, о пришествии Господа нашего Иисуса Христа и нашем собрании о Нем, **2** не скоро подвизатися вам от ума, ни ужасатися ниже духом, ниже словом, ни посланием аки от нас посланным, яко уже настоит

день Христов. **3** Да никтоже вас прельстит ни по единому же образу: яко аще не приидет отступление прежде, и открытается человек беззакония, сын погибели, **4** противник и превозносяйся паче всякаго глаголемаго Бога или чтилища, якоже ему сести в церкви Божией аки Богу, показующу себе, яко Бог есть. **5** Не помните ли, яко еще живый у вас, сия глаголах вам? **6** И ныне удерживающее весте, во еже явится ему в свое ему время. **7** Тайна бо уже деется беззакония, точию держай ныне дондеже от среды будет: **8** и тогда явится беззаконник, егоже Господь Иисус убиет духом уст Своих, и упразднит явлением пришествия Своего, **9** егоже есть пришествие по действию сатанину во всяцей силе и знамениих и чудесех ложных, **10** и во всякой лъсти неправды в погибающих, зане любви истины не прияша, во еже спастися им. **11** И сего ради послет им Бог действие лъсти, во еже веровати им лжи, **12** да суд примут вси не веровавши истине, но благоволиши в неправде. **13** Мы же должны есмы благодарити Бога всегда о вас, братие возлюбленная от Господа, яко избрал есть вас Бог от начала во спасение во святыни Духа и веры истины, **14** в неже призва вас благовествованием нашим, в получение славы Господа нашего Иисуса Христа. **15** Темже убо, братие, стойте и держите предания, имже научистесь или словом, или посланием нашим. **16** Сам же Господь наш Иисус Христос, и Бог и Отец наш, возлюбивый нас и давый утешение вечно и упование благо в благодати, (aiōnios g166) **17** да утешит сердца ваша и да утвердит во всяцем слове и деле блазе.

**3** Прочее, молитесь о нас, братие, да слово Господне течет и славится, якоже и в вас, **2** и да избавимся от злых и

лукавых человек: не всех бо есть вера. **3** Верен же есть Господь, Иже утвердит вас и сохранит от лукаваго. **4** Уповаем же на Господа о вас, яко, яже повелеваем вам, и творите и сотворите. **5** Господь же да исправит сердца ваша в любовь Божию и в терпение Христово. **6** Повелеваем же вам, братие, о имени Господа нашего Иисуса Христа, отлучатися вам от всякаго брата безчинно ходяща, а не по преданию, еже прияха от нас: **7** сами бо весте, како лепо есть вам подобитися нам: яко не безчинновахом у вас, **8** ниже туне хлеб ядохом у кого, но в труде и подвиже, ночь и день делающе, да не отягчим никогоже от вас: **9** не яко не имамы власти, но да себе образ дамы вам, во еже уподобитися нам. **10** Ибо егда бехом у вас, сие завещавахом вам: яко аще кто не хочет делати ниже да яст. **11** Слышим бо некия безчинно ходящыя у вас, ничтоже делающыя, но лукавно обходящыя: **12** таковым запрещаем и молим о Господе нашем Иисусе Христе, да с безмолвием делающе, свой хлеб ядят. **13** Вы же, братие, не стужайте, доброе творяще. **14** Аще же кто не послушает словесе нашего посланием, сего назнаменуйте и не примешайтесь ему, да посрамится: **15** и не аки врага имейте его, но наказуйте якоже брата. **16** Сам же Господь мира да даст вам мир всегда во всяцем образе: Господь со всеми вами. **17** Целование моею рукою Павлею, еже есть знамение во всяцем послании: сице пишу: **18** благодать Господа нашего Иисуса Христа со всеми вами. Аминь.

## Первое послание к Тимофею

**1** Павел, посланник Иисус Христов по повелению Бога Спаса нашего и Господа Иисуса Христа упования нашего, **2** Тимофею присному чаду в вере: благодать, милость, мир от Бога Отца нашего и Христа Иисуса Господа нашего. **3** Якоже умолих тя пребыти во Ефесе, идыи в Македонию, да завещаеши неким не инако учити, **4** ниже внимати баснем и родословием безконечным, яже стязания творят паче, нежели Божие строение, еже в вере. **5** Конец же завещания есть любы от чиста сердца и совести благия и веры нелицемерныя, **6** в нихже нецыи погрешивше, уклонишася в суесловия, **7** хотяще быти законоучителе, не разумеюще ни яже глаголют, ни о нихже утверждают. **8** Вемы же, яко добр закон (есть), аще кто его законне творит, **9** ведый сие, яко праведнику закон не лежит, но беззаконным и непокоривым, нечестивым (же) и грешником, неправедным и скверным, отца и матере досадителем, мужеубийцам, **10** блудником, мужеложником, разбойником, (клеветником, скотоложником, ) лживым, клятвопреступником, и аще что ино здравому учению противится, **11** по благовестию славы блаженнаго Бога, еже мне уверено бысть. **12** И благодарю укрепляющаго мя Христа Иисуса Господа нашего, яко верна мя непщева, положив (мя) в службу, **13** бывша мя иногда хульника и гонителя и досадителя: но помилован бых, яко неведый сотворих в неверствии: **14** упреумножися же благодать Господа нашего (Иисуса Христа) с верою и любовию яже о Христе Иисусе. **15** Верно слово и всякаго приятия достойно, яко Христос Иисус прииде в мир грешники спасти, от нихже первый есмь аз. **16** Но сего ради помилован бых, да во

мне первом покажет Иисус Христос все долготерпение, за образ хотящих веровати Ему в жизнь вечную. (aiōnios g166) 17 Царю же веков нетленному, невидимому, единому премудрому Богу, честь и слава во веки веков. Аминь. (aiōn g165) 18 Сие же завещание предаю ти, чадо Тимофее, по бывших на тя прежде пророчествиих, да воинствуеши в них доброе воинство, 19 имея веру и благую совесть, юже нецыи отринувше, от веры отпадоша: 20 от нихже есть Именей и Александр, ихже предах сатане, да накажутся не хулити.

**2** Молю убо прежде всех творити молитвы, моления, прошения, благодарения за вся человеки, 2 за царя и за всех, иже во власти суть, да тихое и безмолвное житие поживем во всяцем благочестии и чистоте: 3 сие бо добро и приятно пред Спасителем нашим Богом, 4 Иже всем человеком хоцет спастися и в разум истины приити. 5 Един бо есть Бог, и един ходатай Бога и человеков, человек Христос Иисус, 6 давший Себе избавление за всех: свидетельство времени своими, 7 в неже поставлен бых аз проповедник и Апостол, истину глаголю о Христе, не лгу, учитель языков в вере и истине. 8 Хоцу убо, да молитвы творят мужие на всяцем месте, воздеюще преподобныя руки без гнева и размышления: 9 такожде и жены во украшении лепотнем, со стыдением и целомудрием да украшают себе не в плетениих, ни златом, или бисерми, или ризами многоценными, 10 но, еже подобает женам обещавающимся благочестию, дела благими. 11 Жена в безмолвии да учится со всяким покорением: 12 жене же учити не повелеваю, ниже владети мужем, но быти в безмолвии. 13 Адам бо прежде создан бысть, потом же Ева: 14 и Адам не прельстися, жена же прельстившися, в

преступлении бысть: 15 спасется же чадородия ради, аще пребудет в вере и любви и во святых с целомудрием.

**3** Верно слово: аще кто епископства хошет, добра дела желяет. 2 Подобаает убо епископу быти непорочну, единыя жены мужу, трезвену, целомудру, (благоговейну, ) честну, страннлюбиву, учителну, 3 не пиянице, не бийце, не сварливу, не мшелоимцу, но кротку, (не завистливу, ) не сребролюбцу, 4 свой дом добре правящу, чада имущу в послушании со всякою чистотою: 5 аще же кто своего дому не умеет правити, како о Церкви Божией прилежати возможет? 6 Не новокрещенну, да не разгордевся в суд впадет диаволь. 7 Подобаает же ему и свидетелство добро имети от внешних, да не в поношение впадет и в сеть неприязнену. 8 Диаконом такожде чистым, не двоязычным, не вину многу внимающим, не скверностяжательным, 9 имущым таинство веры в чистой совести. 10 И сии убо да искушаются прежде, потом же да служат, непорочни суще. 11 Женам такожде чистым, не клеветивым, (не навадницам, ) трезвенным, верным во всем. 12 Диаconi да бывають единыя жены мужие, чада добре правяще и своя домы: 13 ибо служившии добре степень себе добр снискают и многое дерзновение в вере, яже о Христе Иисусе. 14 Сия пишу тебе, уповая приити к тебе скоро: 15 аще же замедлю, да увеси, како подобаает в дому Божии жити, яже есть Церковь Бога жива, столп и утверждение истины. 16 И исповедуемо велия есть благочестия тайна: Бог явися во плоти, оправдася в Дусе, показася Ангелом, проповедан бысть во языцех, веровася в мире, вознесся во славе.

**4** Дух же явственне глаголет, яко в последняя времена отступят нецыи от веры, внемлюще духовом лестчым и учением бесовским, **2** в лицемерии лжесловесник, сожженных своею совестью, **3** возбраняющих женитися, удалятися от брашен, яже Бог сотвори в сиедание со благодарением верным и познавшим истину. **4** Зане всякое создание Божие добро, и ничтоже отменно, со благодарением приемлемо, **5** освящается бо словом Божиим и молитвою. **6** Сия вся сказуя братии, добр будещи служитель Иисуса Христа, питаемь словесы веры и добрым учением, емуже последовал еси. **7** Скверных же и бабих басней отрицайся, обучай же себе ко благочестию: **8** телесное бо обучение в мале есть полезно, а благочестие на все полезно есть, обетование имеющее живота нынешняго и грядущаго. **9** Верно слово и всякаго приятия достойно. **10** На сие бо и труждаемся и поношаеми есмы, яко уповахом на Бога жива, Иже есть Спаситель всем человеком, паче же верным. **11** Завещавай сия и учи. **12** Никтоже о юности твоей да нерадит: но образ буди верным словом, житием, любовию, духом, верою, чистотою. **13** Дондеже прииду, внемли чтению, утешению, учению. **14** Не неради о своем даровании живущем в тебе, еже дано тебе бысть пророчеством с возложением рук священничества. **15** В сих поучайся, в сих пребывай, (в сих разумевай, ) да преспеяние твое явлено будет во всех. **16** Внимай себе и учению и пребывай в них: сия бо творя, и сам спасешия и послушающии тебе.

**5** Старцу не твори пакости, но утешай якоже отца: юношы, якоже братию: **2** старицы, якоже матери: юныя, якоже сестры, со всякою чистотою. **3** Вдовицы чти сущыя истинныя

вдовицы. 4 Аще же кая вдовица чада или внучата иматъ,  
да учатся прежде свой дом благочестиво устроити и взаем  
воздаяти родителем: сие бо есть благоугодно пред Богом.  
5 А сущая истинная вдовица и уединена, уповае на Бога  
и пребывает в молитвах и молениих день и ночь: 6  
питающаяся же пространно, жива умерла. 7 И сия завещавай,  
да непорочни будут. 8 Аще же кто о своих, паче же о  
присных не промышляет, веры отверглся есть и невернаго  
горший есть. 9 Вдовица же да причитается не менши лет  
шестидесятих, бывши единому мужу жена, 10 в делех добрых  
свидетелствуема, аще чада воспитала есть, аще святых нозе  
умы, аще странная прият, аще скорбным утешение бысть,  
аще всякому делу благу последовала есть. 11 Юных же  
вдовиц отрицайся: егда бо разсвирепеют о Христе, посягати  
хотят, 12 имущыя грех, яко первыя веры отвергошася: 13  
купно же и праздны учатся обходитьи дома, не точию же  
праздны, но и блядивы и оплазивы, глаголющыя, яже не  
подобает. 14 Хошу убо юным вдовицам посягати, чада  
раждати, дом строити, ни едины же вины даяти противному  
хулы ради: 15 се бо некия развратишася вслед сатаны. 16  
Аще кто верен или верна иматъ вдовицы, да довлит их, и да  
не тяготится Церковь, да сущих истинных вдовиц удоволит.  
17 Прилежании же добре пресвитери сугубыя чести да  
сподобляются: паче же труждающиися в слове и учении.  
18 Глаголет бо Писание: вола молотяща не обратиши: и:  
достоин делатель мзды своя. 19 На пресвитера хулы  
не приемли, разве при двою или триех свидетелех. 20  
Согрешающих же пред всеми обличай, да и прочии страх  
имут. 21 Засвидетелствую пред Богом, и Господем Иисус



Христом, и избранными (его) Ангелы, да сия сохраниши без лицемерия, ничесоже творя по уклонению. 22 Руки скоро не возлагай ни на когоже, ниже приобщайся чужым грехом: себе чиста соблюдай. 23 Ктому не пей воды, но мало вина приемли, стомаха ради твоего и частых твоих недугов. 24 Неких (же) человек греси предявлени суть, предваряюще на суд: неким же и последствуют. 25 Такожде и добрая дела предявлена суть: и сущая инако, утаитися не могут.

**6** Елицы суть под игом раби, своих господий всякия чести да сподобляют, да имя Божие не хулится и учение. 2 Имущии же верных господий да не нерадят о них, понеже братия суть: но паче да работают, зане верни суть и возлюблени, иже благодать восприемлющии. Сия учи и моли. 3 Аще ли кто инако учит и не приступает к здоровым словесем Господа нашего Иисуса Христа и учению, еже по благоверию, 4 разгордеса, ничтоже ведый, но недугуяй о стязаниих и словопрениих, от нихже бывает зависть, рвение, хулы, непщевания лукава, 5 беседы злыя растленных человек умом и лишенных истины, непщующих приобретение быти благочестие. Отступай от таковых. 6 Есть же снискание велие благочестие с доволством. 7 Ничтоже бо внесохом в мир сей: яве, яко ниже изнести что можем. 8 Имеюще же пищу и одеяние, сими доволни будем. 9 А хотящии богатитися впадают в напасти и сеть, и в похоти многи несмысленны и вреждающыя, яже погружают человеки во всегубителство и погибель: 10 корень бо всем злым сребролюбие есть, егоже нецыи желающе заблудиша от веры, и себе пригвоздиша болезнем многим. 11 Ты же, о, человеце Божий, сих бегай: гони же правду, благочестие, веру,

любовь, терпение, кротость: **12** подвизайся добрым подвигом веры, емлися за вечную жизнь, в нюже и зван был еси, и исповедал еси доброе исповедание пред многими свидетели. (aiōnios g166) **13** Завещаваю ти пред Богом оживляющим всяческая, и Христом Иисусом свидетелствовавшим при Понтийстем Пилате доброе исповедание: **14** соблюсти тебе заповедь нескверну и незазорну, даже до явления Господа нашего Иисуса Христа, **15** еже во своя времена явит блаженный и един сильный, Царь царствующих и Господь господствующих, **16** един имеяй безсмертие и во свете живый неприступнем, Егоже никтоже видел есть от человек, ниже видети может: емуже честь и держава вечная. Аминь. (aiōn g165) **17** Богатым в нынешнем веце запрещай не высокоумствовати, ниже уповати на богатство погибающее, но на Бога жива, дающего нам вся обильно в наслаждение: (aiōn g165) **18** благое делати, богатитися в делех добрых, благоподатливым быти, общителным, **19** сокровищующе себе основание добро в будущее, да примут вечную жизнь. **20** О, Тимофее, предание сохрани, уклоняся скверных суесловий и прекословий лжеименного разума: **21** о немже нецыи хвалящися, о вере погресиша. Благодать с тобою. Аминь.

## Второе послание к Тимофею

**1** Павел, Апостол Иисус Христов волею Божию, по обетованию жизни, яже о Христе Иисусе, **2** Тимофею возлюбленному чаду: благодать, милость, мир от Бога Отца и Христа Иисуса Господа нашего. **3** Благодарю Бога, Емуже служу от прародителей чистою совестью, яко непрестанную имам о тебе память в молитвах моих день и ночь, **4** желая видети тя, поминая слезы твоя, да радости исполнюся, **5** воспоминание приемля о сущей в тебе нелицемерней вере, яже вселися прежде в бабу твою Лоиду и в мать твою Евникию: известен же есмь, яко и в тебе. **6** Еяже ради вины воспоминаю тебе возгревати дар Божий живущий в тебе возложением руку мою: **7** не бо даде нам Бог духа страха, но силы и любве и целомудрия. **8** Не постыдися убо страстию Господа нашего Иисуса Христа, ни мною юзником Его: но спостражди благовествованию (Христову) по силе Бога, **9** спасшаго нас и призвавшаго званием святым, не по делом нашим, но по Своему благоволению и благодати данной нам о Христе Иисусе прежде лет вечных, (aiōnios g166) **10** явльшейся же ныне просвещением Спасителя нашего Иисуса Христа, разрушившаго убо смерть и возсиявшаго жизнь и нетление благовествованием, **11** в неже поставлен бых аз проповедник и Апостол и учитель языков. **12** Еяже ради вины и сия стражду: но не стыждуся. Вем бо, Емуже веровах, и известихся, яко силен есть предание мое сохранить в день он. **13** Образ имей здравых словес, ихже от мене слышал еси, в вере и любви, яже о Христе Иисусе. **14** Доброе завещание соблюди Духом Святым живущим в нас. **15** Веси ли сие, яко отвратишася от мене вси, иже от Азии, от нихже

есть Фигелл и Ермоген. **16** Да даст (же) милость Господь Онисифорову дому, яко многажды мя упокои и вериг моих не постыдеса, **17** но пришед в Рим, тощнее взыска мя и обрете: **18** да даст ему Господь обрести милость от Господа в день он: и елико во Ефесе послужи ми, добрее ты веси.

**2** Ты убо, чадо мое, возмогай во благодати, яже о Христе Иисусе, **2** и яже слышал еси от мене многими свидетели, сия предаждь верным человеком, иже доволни будут и иных научити. **3** Ты убо злопостражди яко добр воин Иисус Христов. **4** Никтоже (бо) воин бывая обязуется куплями житейскими, да воеводе угоден будет. **5** Аще же и постраждет кто, не венчается, аще не законно мучен будет. **6** Трудяющемуся делателю прежде подобает от плода вкусити. **7** Разумей, яже глаголю: да даст убо тебе Господь разум о всем. **8** Поминай (Господа) Иисуса Христа воставшаго от мертвых, от семени Давидова, по благовествованию моему, **9** в немже злостражду даже до уз, яко злодей: но слово Божие не вяжется. **10** Сего ради вся терплю избранных ради, да и тии спасение улучат еже о Христе Иисусе, со славою вечною. (aiōnios g166) **11** Верно слово: аще бо с Ним умрохом, то с Ним и оживем: **12** аще терпим, с Ним и воцаримся: аще отвержемся, и Той отвержется нас: **13** аще не веруем, Он верен пребывает: отрещися бо Себе не может. **14** Сия воспоминай, засвидетелствуя пред Господем, не словопретися, ни на куюже потребу, на разорение слышащих. **15** Потщися себе искусна поставити пред Богом, делателя непостыдна, право правяща слово истины. **16** Скверных же тщегласий отметаися: наипаче бо преспеют в нечестие, **17** и слово их яко гагрена жир обрящет: от нихже есть

Именей и Филит, 18 иже о истине погрешиста, глаголюща, яко воскресение уже бысть: и возмущают некоторых веру. 19 Твердое убо основание Божие стоит, имущее печать сию: позна Господь сущия Своя, и: да отступит от неправды всяк именуяй имя Господне. 20 В велицем же дому не точию сосуди злати и сребряни суть, но и древяни и глиняни: и ови убо в честь, ови же не в честь. 21 Аще убо кто очистит себе от сих, будет сосуд в честь, освящен и благопотребен Владыце, на всякое дело благое уготован. 22 Похотей юных бегай, держися же правды, веры, любве, мира со всеми призывающими Господа от чистаго сердца. 23 Буих же и ненаказанных стязаний отрицайся, ведый, яко раждает свары: 24 рабу же Господню не подобает сваритися, но тиху быти ко всем, учителну, незлобиву, 25 с кротостию наказующу противныя, еда како даст им Бог покаяние в разум истины, 26 и возникнут от диавольския сети, живи уловлени от него в свою его волю.

**3** Сие же веждь, яко в последния дни настанут времена люта. 2 Будут бо человецы самолюбцы, сребролюбцы, величави, горди, хулници, родителем противящися, неблагодарни, неправедни, нелюбовни, 3 непримирителни, (продерживи, возносливи, прелагатае, ) клеветницы, невоздержницы, некротцы, неблаголюбцы, 4 предатели, нагли, напыщени, сластолюбцы паче нежели боголюбцы, 5 имущии образ благочестия, силы же его отвергшиися. И сих отвращайся. 6 От сих бо суть поныряющии в дома и пленяющии женища отягощенныя грехами, водимыя похотьми различными, 7 всегда учащяся и николиже в разум истины приити могущя. 8 Якоже Ианний и Иамврий противистася Моисею, такожде

и сии противляются истине, человецы растленни умом (и) неискусни о вере. 9 Но не преуспеют более: безумие бо их явлено будет всем, якоже и онех бысть. 10 Ты же последовал еси моему учению, житию, привету, вере, долготерпению, любви, терпению, 11 изгнанием, страданием, якова ми быша во Антиохии, (и) во Икони, (и) в Листрех: якова изгнания приях, и от всех мя избавил есть Господь. 12 И вси же хотящии благочестно жити о Христе Иисусе, гоними будут: 13 лукавии же человецы и чародее преупеют на горшее, прельщающе и прельщаеми. 14 Ты же пребывай в нихже научен еси и яже вверена суть тебе, ведый, от кого научился еси: 15 и яко измлада священная писания умееши, могущая тя умудрити во спасение верою, яже о Христе Иисусе. 16 Всяко Писание богодухновенно и полезно (есть) ко учению, ко обличению, ко исправлению, к наказанию еже в правде, 17 да совершен будет Божий человек, на всякое дело благое уготован.

**4** Засвидетелствую убо аз пред Богом и Господем нашим Иисус Христом, хотящим судити живым и мертвым в явлении Его и Царствии Его: 2 проповедуй слово, настой благовременне и безвременне, обличи, запрети, умоли со всяким долготерпением и учением. 3 Будет бо время, егда здраваго учения не послушают, но по своим похотех изберут себе учителя, чешеми слухом: 4 и от истины слух отвратят, и к баснем уклонятся. 5 Ты же трезвися о всем, злопостражди, дело сотвори благовестника, служение твое известно сотвори. 6 Аз бо уже жрен бываю, и время моего отшествия наста: 7 подвигом добрым подвизахся, течение скончах, веру соблюдох: 8 прочее убо соблюдается

мне венец правды, егоже воздаст ми Господь в день он, праведный Судия: не токмо же мне, но и всем возлюбльшим явление Его. 9 Потщися скоро приити ко мне. 10 Димас бо мене остави, возлюбив нынешний век, и иде в Солунь: Крискент в Галатию, Тит в Далматию: Лука един есть со мною. (аіѡп g165) 11 Марка поемь приведи с собою, есть бо ми благопотребен в службу. 12 Тихика же послах во Ефес. 13 Фелон, егоже оставих в Троаде у Карпа, грядый принеси, и книги, паче же кожанья. 14 Александр ковачь многа ми зла сотвори: да воздаст ему Господь по делом его: 15 от негоже и ты себе блюди, зело бо противится словесем нашим. 16 В первый мой ответ никтоже бысть со мною, но вси мя оставиша: да не вменится им. 17 Господь же мне предста и укрепи мя, да мною проповедание известно будет, и услышат вси языцы: и избавлен бых от уст львов. 18 И избавит мя Господь от всякаго дела лукава и спасет во Царствие Свое Небесное: Емуже слава во веки веков. Аминь. (аіѡп g165) 19 Целуй Прискиллу и Акилу и Онисифоров дом. 20 Ераст оста в Коринфе: Трофима же оставих в Милите боляща. 21 Потщися прежде зимы приити. Целует тя Еввул и Пуд, и Лин и Клавдия и братия вся. 22 Господь Иисус Христос со духом твоим. Благодать с вами. Аминь.

# Послание к Титу

**1** Павел, раб Божий, Апостол же Иисус Христов, по вере избранных Божиих и разуму истины, яже по благочестию, **2** о уповании жизни вечныя, юже обетова неложный Бог прежде лет вечных, (aiōnios g166) **3** яви же во времена своя слово Свое проповеданием, еже мне поручено бысть по повелению Спасителя нашего Бога: **4** Титу, присному чаду по общей вере: благодать, милость, мир от Бога Отца и Господа Иисуса Христа Спаса нашего. **5** Сего ради оставих тя в Крите, да недокончанная исправиши и устроиши по всем градом пресвитеры, якоже тебе аз повелех: **6** аще кто есть непорочен, единыя жены муж, чада имый верна, не во укорении блуда, или непокорива. **7** Подобаает бо епископу без порока быти, якоже Божию строителю: не себе угождающу, (не дерзу, не напрасливу, ) не гневливу, не пиянице, не биице, не скверностяжательну, **8** но страннолюбиву, благолюбцу, целомудренну, праведну, преподобну, воздержателну, **9** держащемуся вернаго словесе по учению, да силен будет и утешати во здравем учении, и противящыяся обличати. **10** Суть бо мнози непокориви, суесловцы и умом прельщени, наипаче же сущии от обрезания, **11** ихже подобает уста заграждати: иже вся дома развращают, учаще яже не подобает, сквернаго ради прибытка. **12** Рече же некто от них, свой им пророк: Критяне присно лживи, злии зверие, утробы праздныя. **13** Свидетельство сие истинно есть. Еяже ради вины обличай их нещадно, да здрави будут в вере, **14** не внимающе Иудейским баснем, ни заповедем человек отвращающихся от истины. **15** Вся убо чиста чистым: оскверненным же и неверным ничтоже чисто, но осквернися



их и ум и совесть. 16 Бога исповедуют ведети, а дела отмещутся Его, мерзцы суще и непокориви и на всякое дело благое неискусни.

**2** Ты же глаголи, яже подобает здоровому учению: 2 старцем трезвенным быти, честным, целомудренным, здравствующим верою, любовию, терпением: 3 старицам такожде во украшении святолепным, не клеветивым, не вину многу порабощенным, доброучителным, 4 да уцеломудрят юныя, мужелюбикам быти, чадолюбикам, 5 целомудренным, чистым, дома добре правящим, благим, покаяющимся своим мужем, да не слово Божие хулится: 6 юношы такожде моли целомудрствовати. 7 О всем (же) сам себе подавая образ добрых дел, во учении независтное, честность, нетление, 8 слово здоровое, незазорное. Да противный посрамится, ничтоже имея глаголати о нас укорно. 9 Рабы, своим господем повиноватися, во всем благоугодным быти, не прекословным, 10 не крадущим, но веру всяку являющим благу. Да учение Спасителя нашего Бога украшают во всем. 11 Явися бо благодать Божия спасительная всем человеком, 12 наказующи нас, да отвергшися нечестия и мирских похотей, целомудренно и праведно и благочестно поживем в нынешнем веце, (aiōn g165) 13 ждуще блаженного упования и явления славы великаго Бога и Спаса нашего Иисуса Христа, 14 Иже дал есть Себе за ны, да избавит ны от всякаго беззакония и очестит Себе люди избранны, ревнители добрым делом. 15 Сия глаголи, и моли, и обличай со всяким повелением. Да никтоже тя преобидит.

**3** Воспоминай тем началствующим и владеющим повиноватися и покаятися, и ко всякому делу благу готовым

быти: 2 ни одинаго хулити, не сварливым быти, но тихим, всяку являющым кротость ко всем человеком. 3 Бехом бо иногда и мы несмысленни, и непокориви, и прельщени, работающе похотем и сластем различным, в злобе и зависти живуще, мерзцы (сущи и) ненавидяще друг друга. 4 Егда же благодать и человеколюбие явися Спаса нашего Бога, 5 не от дел праведных, ихже сотворихом мы, но по Своей Его милости, спасе нас банею пакибытия и обновления Духа Святаго, 6 Егоже излиа на нас обилно Иисус Христом, Спасителем нашим, 7 да оправдившеся благодатию Его, наследницы будем по упованию жизни вечныя. (aiōnios g166) 8 (Чадо Тите, ) верно слово, и о сих хошу тя извещати, да пекутся добрым делом прилежати веровавшии Богу: сия суть полезна человеком и добра. 9 Буих же стязаний и родословий и рвений и сваров законных отступай: суть бо бесполезны и суетны. 10 Еретика человека по первом и вторем наказании отрицайся, 11 ведый, яко развратися таковой, и согрешает, и есть самоосужден. 12 Егда послю Артему к тебе или Тихика, потщися приити ко мне в Никополь: тамо бо судих озимети. 13 Зину законника и Аполлоса скоро предпосли, и да ничтоже им скудно будет. 14 Да учатся же и наши добрым делом прилежати в нужная требования, да не будут бесплодни. 15 Целуют тя со мною сущии вси. Целуй любящыя ны в вере. Благодать со всеми вами. Аминь.

# Послание к Филимону

**1** Павел юзник Иисус Христов, и Тимофей брат, Филимону возлюбленному и споспешнику нашему, **2** и Апфии сестре возлюбленней, и Архиппу совоинственнику нашему, и домашней твоей церкви: **3** благодать вам и мир от Бога Отца нашего, и Господа Иисуса Христа. **4** Благодарю Бога моего, всегда память о тебе творя в молитвах моих, **5** слышав любовь твою и веру, юже имаши ко Господу Иисусу и ко всем святым. **6** Яко да общение твоея веры действительно будет в разуме всякаго блага, еже в вас, о Христе Иисусе. **7** Радость бо имам многу и утешение о любви твоей, яко утробы святых почиша тобою, брате. **8** Сего ради многое дерзновение имея во Христе повелевати тебе, еже потребно есть, **9** любве же ради паче молю, таков сый якоже Павел старец, ныне же и узник Иисуса Христа: **10** молю тя о моем чаде, егоже родих во узах моих Онисима, **11** иногда тебе непотребнаго, ныне же тебе и мне благопотребна, егоже возпослах тебе, **12** ты же его, сиречь мою утробу, приими. **13** Егоже аз хотех у себе держати, да вместо тебе послужит ми во узах благовествования: **14** без твоея же воли ничтоже восхотех сотворити, да не аки по нужди благое твое будет, но по воли. **15** Негли бо ради сего разлучися на час, да вечна того приимеши, (aiōnios g166) **16** не ктому аки раба, но выше раба, брата возлюбленна, паче же мне, кольми же паче тебе, и по плоти и о Господе. **17** Аще убо имаши мене общника, приими сего якоже мене. **18** Аще же в чесом обиде тебе, или должен есть, мне сие вмени. **19** Аз Павел написах рукою моею: аз воздам: да не реку тебе, яко и сам себе ми еси должен. **20** Ей, брате, аз да получу еже

прошу у тебе о Господе: упокой мою утробу о Господе. 21  
Надеясь на послушание твое написах тебе, ведый, яко и  
паче, еже глаголю, сотвориши. 22 Купно же и уготови ми  
обитель: уповаю бо, яко молитвами вашими дарован буду  
вам. 23 Целует тя Епафрас, пленник мой о Христе Иисусе,  
24 Марко, Аристарх, Димас, Лука, споспешницы мои. 25  
Благодать Господа нашего Иисуса Христа со духом вашим.  
Аминь.

# Послание к Евреям

**1** Многочастне и многообразне древле Бог глаголавый отцем во пророцех, **2** в последок дний сих глагола нам в Сыне, Егоже положи наследника всем, Имже и веки сотвори. (аіѡп g165) **3** Иже съй сияние славы и образ ипостаси Его, нося же всяческая глаголголом силы Своя, Собою очищение сотворив грехов наших, седе о десную престола величества на высоких, **4** толико лучший быв Ангелов, елико преславнее паче их наследствава имя. **5** Кому бо рече когда от Ангел: Сын Мой еси Ты, Аз днесь родих Тя? И паки: Аз буду Ему во Отца, и Той будет Мне в Сына? **6** Егда же паки вводит Первороднаго во вселенную, глаголет: и да поклонятся Ему вси Ангели Божии. **7** И ко Ангелом убо глаголет: творяй Ангелы Своя духи и слуги Своя огонь палящъ. **8** К Сыну же: престол Твой, Боже, в век века: жезл правости жезл Царствия Твоего: (аіѡп g165) **9** возлюбил еси правду и возненавидел еси беззаконие: сего ради помаза Тя, Боже, Бог Твой елеем радости паче причастник Твоих. **10** И (паки): в начале Ты, Господи, землю основал еси, и дела руку Твоею суть небеса: **11** та погибнут, Ты же пребываеши: и вся, якоже риза, обетшают, **12** и яко одежду свиеши их, и изменятся: Ты же тойжде еси, и лета Твоя не оскудеют. **13** Кому же от Ангел рече когда: седи о десную Мене, дондеже положу враги Твоя подножие ног Твоих? **14** Не вси ли суть служебнии дуси, в служение посылаеми за хотящих наследовати спасение?

**2** Сего ради подобает нам лишше внимати слышанным, да не когда отпадем. **2** Аще бо глаголанное Ангелы слово бысть известно, и всяко преступление и ослушание праведное прият мздовоздаяние: **3** како мы убежим, о толицем

нерадивше спасении, еже зачало приемь глаголатися от Господа, слышавшими в нас известися, 4 сосвидетелствующу Богу знаменными же и чудесы, и различными силами, и Духа Святаго разделеными, по Своей Ему воли? 5 Не Ангелом бо покори Бог вселенную грядущую, о нейже глаголем: 6 засвидетелствова же негде некто, глаголя: что есть человек, яко помниши его? Или сын человеческий, яко посещаеши и? 7 Умалил еси его малым нечим от Ангел: славою и честию венчал еси его и поставил еси его над делы руку Твоею, 8 вся покори еси под нозе его. Внегда же покорити ему всяческая, ничтоже остави ему непокорено. Ныне же не у видим ему всяческая покорена: 9 а умаленаго малым чим от Ангел видим Иисуса, за приятие смерти славою и честию венчанна, яко да благодатию Божиею за всех вкусит смерти. 10 Подобаше бо ему, Егоже ради всяческая и Имже всяческая, приведшу многи сыны в славу, начальника спасения их страданьми совершити. 11 И святяй бо и освящаемии, от Единого вси: еже ради вины не стыдится братию нарицати их, глаголя: 12 возведу имя Твое братии Моей, посреде церкви воспою Тя. 13 И паки: Аз буду надеяся Нань. И паки: се, Аз и дети, яже Ми дал есть Бог. 14 Понеже убо дети приобщашася плоти и крови, и Той приискренне приобщися техже, да смертию упразднит имущаго державу смерти, сиречь диавола, 15 и избавит сих, елицы страхом смерти чрез все житие повинни беша работе. 16 Не от Ангел бо когда приемлет, но от семене Авраамова приемлет: 17 отнюдуже должен бе по всему подобитися братии, да милостив будет и верен первосвященник в тех, яже к Богу, во

еже очестити грехи людския. 18 В немже бо пострада, Сам  
искушен быв, может и искушаемым помощи.

**3** Темже, братие святая, звания небеснаго причастницы,  
разумейте Посланника и Святителя исповедания нашего  
Иисуса Христа, 2 верна суца Сотворшему Его, якоже и  
Моисей во всем дому Его. 3 Множайшей бо славе Сей паче  
Моисеа сподобися, елико множайшую честь имать паче дому  
сотворивый его: 4 всяк бо дом созидается от некоего: а  
сотворивый всяческая Бог. 5 И Моисей убо верен бе во  
всем дому Его, якоже слуга, во свидетелство глаголатися  
имевшим: 6 Христос же якоже Сын в дому Своем: Егоже  
дом мы есмы, аще дерзновение и похвалу упования даже  
до конца известно удержим. 7 Темже, якоже глаголет Дух  
Святой, днесь, аще глас Его услышите, 8 не ожесточите  
сердец ваших, якоже в прогневании, во дни искушения  
в пустыни, 9 идеже искусиша Мя отцы ваши, искусиша  
Мя и видеша дела Моя четыредесять лет. 10 Сего ради  
негодовах рода того и рех: присно заблуждают сердцем, тии  
же не познаша путей Моих: 11 яко кляхся во гневе Моем,  
аще внидут в покой Мой. 12 Блюдите, братие, да не когда  
будет в некоем от вас сердце лукаво, (исполнено) неверия,  
во еже отступити от Бога жива. 13 Но утешайте себе на  
всяк день дондеже днесь нарицается, да не ожесточится  
некто от вас лестию греховною: 14 причастницы бо быхом  
Христу, аще точию начаток состава даже до конца известен  
удержим: 15 вегда глаголет: днесь, аще глас Его услышите,  
не ожесточите сердец ваших, якоже в прогневании. 16 Нецыи  
бо слышавше прогневаша, но не вси изшедшии из Египта  
с Моисеом. 17 Коих же негодова четыредесять лет? Не

согрешивших ли, ихже кости падоша в пустыни? 18 Которым же клялся не внити в покоище Его? Яве, яко противльшымся. 19 И видим, яко не возмогша внити за неверствие.

**4** Да убоимся убо, да не когда оставлену обетованию внити в покой Его, явится кто от вас лишився. 2 Ибо нам благовествовано есть, якоже и онем: но не пользова онех слово слуха, не растворенное верою слышавших. 3 Входим бо в покой веровавшии, якоже рече: яко кляхся во гневе Моем, аще внидут в покой Мой: аще и делом от сложения мира бывшым. 4 Рече бо негде о седмем сице: и почи Бог в день седмый от всех дел Своих. 5 И в сем паки: аще внидут в покой Мой. 6 Понеже убо лишени нецым внити в него, и имже прежде благовествовано бе, не внидоша за непослушание: 7 паки некий уставляет день, днесь, в Давиде глаголя, по толицех летех, якоже прежде глаголася: днесь, аще глас Его услышите, не ожесточите сердец ваших. 8 Аще бо бы онех Иисус упокоил, не бы о инем дни глаголал по сих. 9 Убо оставлено есть (и еще) субботство людем Божиим: 10 вшедый бо в покой Его, и той почи от дел своих, якоже от Своих Бог. 11 Потщимся убо внити во оный покой, да не кто в ту же притчу противления впадет. 12 Живо бо слово Божие и действенно, и острейше паче всякаго меча обоюду остра, и проходящее даже до разделения души же и духа, членов же и мозгов, и судително помышлением и мыслем сердечным. 13 И несть тварь неявлена пред Ним, вся же нага и объявлена пред очима Его, к Немуже нам слово. 14 Имуще убо Архиереа велика, прошедшаго небеса, Иисуса Сына Божия, да держимся исповедания. 15 Не имамы бо архиереа не могуца спострадати немощем нашим, но искушена по



всяческим по подобию, разве греха. 16 Да приступаем убо с дерзновением к престолу благодати, да примем милость и благодать обрящем во благовременну помощь.

**5** Всяк бо первосвященник, от человек приемлемь, за человеки поставляется на службы яже к Богу, да приносит дары же и жертвы о гресех, 2 спострадати могий невежствующым и заблуждающим, понеже и той немощию обложен есть: 3 и сего ради должен есть якоже о людех, такожде и о себе приносити за грехи. 4 И никтоже сам себе приемлет честь, но званный от Бога, якоже и Аарон. 5 Тако и Христос не Себе прослави быти первосвященника, но Глаголавый к Нему: Сын Мой еси Ты, Аз днесь родих Тя: 6 якоже и инде глаголет: Ты еси священник во век по чину Мелхиседекову. (aiōn g165) 7 Иже во днех плоти Своя моления же и молитвы к Могущему спасти Его от смерти с воплем крепким и со слезами принес, и услышан быв от благовоинства, 8 аще и Сын бяше, обаче навыче от сих, яже пострада, послушанию, 9 и совершився бысть всем послушающим Его виновен спасения вечнаго, (aiōnios g166) 10 наречен от Бога Первосвященник по чину Мелхиседекову. 11 О немже многое нам слово и неудобь сказаемое глаголати, понеже немощни бысте слухи. 12 Ибо, должны суще быти учителяе лет ради, паки требуете учитися, кая писмена начала словес Божиих: и бысте требующе млека, а не крепкия пици. 13 Всяк бо причащайся млека неискусен слова правды, младенец бо есть: 14 совершенных же есть твердая пища, имущих чувства обучена долгим учением в разсуждение добра же и зла.

**6** Темже оставльше начала Христова слово, на совершение да ведемся, не паки основание покаяния полагающе от мертвых дел, и веры в Бога, **2** крещений учения, возложения же рук, воскресения же мертвых и суда вечнаго. (aīōnios g166) **3** И сие сотворим, аще Бог повелит. **4** Невозможно бо просвещенных единою и вкусивших дара небеснаго, и причастников бывших Духа Святаго, **5** и добраго вкусивших Божия глаголгола и силы грядущаго века, (aīōn g165) **6** и отпадших, паки обновляти в покаяние, второе распинающих Сына Божия себе и обличающих. **7** Земля бо пившая сходящий на ню множицею дождь и раждающая былия добрая оным, имиже и делаема бывает, приемлет благословение от Бога: **8** а износящая терния и волчец непотребна есть и клятвы близ, еяже кончина в пожжение. **9** Надеемся же о вас, возлюбленнии, лучших и придержащихся спасения, аще и тако глаголем. **10** Не обидлив бо Бог, забыти дела вашего и труда любве, юже покажете во имя Его, послуживше святым и служаще. **11** Желаем же, да кийждо вас являет тожде тцание ко извещению упования даже до конца, **12** да не лениви будете, но подражателе наследствующих обетования верою и долготерпением. **13** Аврааму бо обетовая Бог, понеже ни едином имяше болшим клятися, клятся Собою, **14** глаголя: воистинну благословя благословлю тя и умножая умножу тя. **15** И тако долготерпев, получи обетование. **16** Чловецы бо болшим кленутся, и всякому их прекословию кончина во извещение клятва (есть). **17** В немже лишше хотя Бог показати наследником обетования непреложное совета Своего, ходатайствова клятвою: **18** да двема вещьми непреложными, в нихже невозможно

солгати Богу, крепкое утешение имамы прибегшии ятися за предлежащее упование, **19** еже аки котву имамы души, тверду же и известну, и входящую во внутреннейшее завесы, **20** идеже предтеча о нас вниде Иисус, по чину Мелхиседекову Первосвященник быв во веки. (aiōn g165)

**7** Сей бо Мелхиседек, царь Салимский, священник Бога Вышняго, иже срете Авраама возвращшася от сеча царей и благослови его, **2** емуже и десятину от всех отдели Авраам, первее убо сказуется царь правды, потом же царь Салимский, еже есть, царь мира, **3** без отца, без матери, без причта рода, ни начала днем, ни животу конца имея, уподоблен же Сыну Божию, пребывает священник выну. **4** Видите же, елик сей, емуже и десятину дал есть Авраам патриарх от избранных. **5** И приемлющии убо священство от сынов Левиин заповедь имут одесятствовати люди по закону, сиречь, братию свою, аще и от чресл Авраамовых изшедшую: **6** не причитаемый же родом к ним, одесятствова Авраама и имущаго обетования благослови: **7** без всякаго же прекословия меньшее от болшаго благословляется. **8** И zde убо десятины человецы умирающии приемлют: тамо же свидетелствуемый, яко жив есть. **9** И да сице реку, Авраамом и Левий, приемляй десятины, десятины дал есть: **10** еще бо в чреслах отчих бяше, егда срете его Мелхиседек. **11** Аще убо совершенство левитским священством было, людие бо на нем взаконени быша: кая еще потреба по чину Мелхиседекову иному востати священнику, а не по чину Ааронову глаголатися? **12** Прелагаему бо священству, по нужди и закону пременение бывает. **13** О Немже бо глаголются сия, колону иному причастися, от негоже никтоже

приступи ко олтарю: 14 яве бо, яко от колена Иудова возсия Господь наш, о немже колене Моисей о священстве ничесоже глагола. 15 И лишше еще яве есть, яко по подобию Мелхиседекову востает Священник ин, 16 Иже не по закону заповеди плотския бысть, но по силе живота неразрушаемаго. 17 Свидетелствует бо, яко Ты еси священник во век по чину Мелхиседекову. (aiōn g165) 18 Отлагание убо бывает прежде бывшия заповеди за немощное ея и бесполезное: 19 ничтоже бо совершил закон: приведение же есть лучшему упованию, имже приближаемся к Богу. 20 И по елику не без клятвы: 21 они бо без клятвы священницы быша, Сей же с клятвою чрез глаголющаго к Нему: клялся Господь и не раскается: Ты еси священник во век по чину Мелхиседекову: (aiōn g165) 22 по толику лучшаго завета бысть испоручник Иисус. 23 И они множайши священницы быша, зане смертью возбранени суть пребывати: 24 Сей же, занеже пребывает во веки, непреступное имать священство, (aiōn g165) 25 темже и спасти до конца может приходящих чрез Него к Богу, всегда жив сый, во еже ходатайствовати о них. 26 Таков бо нам подобаше Архиерей: преподобен, незлобив, безсквернен, отлучен от грешник и вышше небес бывый, 27 Иже не имать по вся дни нужды, якоже первосвященницы, прежде о своих гресех жертвы приносить, потом же о людских: сие бо сотвори единою, Себе принес. 28 Закон бо человеки поставляет первосвященники, имущыя немощь: слово же клятвенное, еже по законе, Сына во веки совершенна. (aiōn g165)

**8** Глава же о глаголемых: такова имамаи Первосвященника, Иже седе о десную престола величества на небесех, 2 святым служител и скинии истинней, юже водрузи Господь,

а не человек. **3** Всяк бо первосвященник, во еже приносить дары же и жертвы, поставляемъ бывает: темже потреба имети что и Сему, еже принесет. **4** Аще бы бо был на земли, не бы был священник, сущым священником приносящим по закону дары, **5** иже образу и стени служат небесных, якоже глаголаше Моисею, хотящу сотворити скинию: виждь бо, рече, сотвориши вся по образу показанному ти на горе. **6** Ныне же лучшее улужи служение, по елику и лучшаго завета есть ходатай, иже на лучших обетованиих узаконися. **7** Аще бы первый он непорочен был, не бы второму искалося место. **8** Укоряя бо их глаголет: се, дние грядут, глаголет Господь, и совершу на дом Израилев и на дом Иудов завет нов, **9** не по завету, егоже сотворих отцем их в день, в оньже емшу ми их за руку, извести их от земли Египетския: зане тии не пребыша в завете Моем, и Аз нерадих о них, глаголет Господь. **10** Яко сей завет, егоже завещаю дому Израилеву по онех днех, глаголет Господь, дая законы Моя в мысли их, и на сердцах их напишу их, и буду им Бог, и тии будут Мне людие. **11** И не имать научити кийждо искренняго своего и кийждо брата своего, глаголя: познай Господа: яко вси уведят Мя от мала даже и до велика их, **12** зане милостив буду неправдам их и грехов их и беззаконий их не имам помянути ктому. **13** Внегда же глаголет нов, обветши перваго: а обветшавающее и состаревающееся близ есть истления.

**9** Имеяше убо первая скиния оправдания службы, святое же людское: **2** скиния бо сооружена бысть первая, в нейже светилник и трапеза и предложение хлебов, яже глаголется святая. **3** По второй же завесе скиния глаголемая Святая святых, **4** злату имущи кадилницу и ковчег завета окован

всюду златом, в немже стамна злата имущая манну, и жезл Ааронов прозябший, и скрижали завета: 5 превышше же его херувими славы, осеняющие олтарь: о нихже не лететь ныне глаголати подробну. 6 Сим же тако устроенным, в первую убо скинию выну вхождаху священницы, службы совершающе: 7 во вторую же единою в лето един архиерей, не без крове, юже приносит за себе и о людских невежествиих. 8 Сие являюще Духу Святому, яко не у явися святых путь, еще первой скинии имущей стояние. 9 Яже притча во время настоящее утвердися, в немже дарове и жертвы приносятся, не могущия по совести совершити служащаго, 10 точию в брашнах и питиях, и различных омовениях, и оправданиях плоти, даже до времени исправления належашая. 11 Христос же пришед архиерей грядущих благ, болшею и совершеннейшею скиниею, нерукотворенною, сиречь, не сея твари, 12 ни кровию козлею ниже телчею, но Своею Кровию, вниде единою во святая, вечное искупление обретый. (aiōnios g166) 13 Аще бо кровь козля и телчая и пепел юнчий кропящий оскверненныя освящает к плотстей чистоте: 14 кольми паче Кровь Христова, Иже Духом Святым Себе принесе непорочна Богу, очистит совесть нашу от мертвых дел, во еже послужити нам Богу живу и истинну? (aiōnios g166) 15 И сего ради новому завету ходатай есть, да смерти бывшей, во искупление преступлений бывших в первом завете, обетование вечнаго наследия примут званнии. (aiōnios g166) 16 Идеже бо завет, смерти нужно есть вноситься завещающаго, 17 завет бо в мертвых известен есть: понеже ничесоже может, егда жив есть завещаваяй. 18 Темже ни первый без крове обновлен бысть. 19 Реченней бо бывшей всяцей заповеди по закону

от Моисея всем людям, приемь кровь козлюю и телчую, с водою и волною червленою и иссопом, самыя же тыя книги и вся люди покропи, 20 глаголя: сия кровь завета, егоже завеща к вам Бог. 21 И скинию же и вся сосуды служебныя кровию такожде покропи. 22 И отнюд кровию вся очищаются по закону, и без кровопролития не бывает оставление. 23 Нужда убо бяше образом небесных сими очищатися: самем же небесным лучшими жертвами, паче сих. 24 Не в рукотворенная бо святая вниде Христос, противоположная истинных, но в самое небо, ныне да явится лицу Божию о нас, 25 ниже да многожды приносит Себе, якоже первосвященник входит во святая (святых) по вся лета с кровию чуждею: 26 понеже подобаше бы Ему множицею страдати от сложения мира: ныне же единою в кончину веков, во отменение греха, жертвою Своею явися. (aiōn g165) 27 И якоже лежит человеком единою умрети, потом же суд, 28 тако и Христос единою принесесе, во еже вознести многих грехи, второе без греха явится, ждущим Его во спасение.

**10** Сень бо имый закон грядущих благ, (а) не самый образ вещей, на всякое лето темиже жертвами, ихже приносят выну, никогдаже может приступающих совершити. 2 Понеже престали бы быти приносимы, ни единому кому имущим совесть о гресех служащим, единою очищенным. 3 Но в них воспоминание грехов на коеждо лето бывает, 4 невозможно бо крови юнчей и козлей отпущати грехи. 5 Темже входя в мир, глаголет: жертвы и приношения не восхотел еси, тело же совершил Ми еси: 6 всесожжений и о гресе не благоволил еси. 7 Тогда рех: се, иду: в главизне книжней написася о Мне, еже сотворити волю Твою, Боже. 8 Выше глаголя: яко

жертвы и приношения и всесожжений и о гресех не восхотел еси, ниже благоволил еси: яже по закону приносятся: 9 тогда рече: се, иду сотворити волю Твою, Боже. Отемлет первое, да второе поставит. 10 О нейже воли освящены есмы принесением тела Иисус Христова единою. 11 И всяк убо священник стоит на всяк день служа и тыяжде множицею принося жертвы, яже никогдаже могут отяти грехов. 12 Он же едину о гресех принес жертву, всегда седит о десную Бога, 13 прочее ожидая, дондеже положатся врази Его подножие ног Его: 14 едином бо приношением совершил есть во веки освящаемых. 15 Свидетелствует же нам и Дух Святыи, по реченному бо прежде: 16 сей завет, егоже завещаю к ним по днеш оных, глаголет Господь, дая законы Моя на сердца их, и в помышлениях их напишу их: 17 (таже глаголет Господь: ) и грехов их и беззаконий их не имам помянути ктому. 18 А идеже отпущение сих, ктому несть приношения о гресех. 19 Имуще убо дерзновение, братие, входити во святая Кровию Иисус Христовою, путем новым и живым, 20 егоже обновил есть нам завесою, сиречь плотию Своею, 21 и Иереа велика над домом Божиим, 22 да приступаем со истинным сердцем во извещении веры, окроплени сердца от совести лукавыя и измовени телесы водою чистою: 23 да держим исповедание упования неуклонное, верен бо есть Обещавый: 24 и да разумеваем друг друга в поощрении любве и добрых дел, 25 не оставляюще собрания своего, якоже есть неким обычай, но (друг друга) подвизающе, и толико паче, елико видите приближающийся день (судный). 26 Волею бо согрешающим нам по приятии разума истины, ктому о гресех не обретается жертва, 27 страшно же некое чаяние суда и огня ревность,



поясти хотящаго сопротивныя. 28 Отверглся кто закона Моисеова, без милосердия при двоих или триех свидетелех умирает: 29 колико мните горшия сподобится муки, иже Сына Божия поправый, и Кровь заветную скверну возмнив, еуже освятися, и Духа благодати укоривый? 30 Вемы бо Рекшаго: Мне отмщение, Аз воздам, глаголет Господь. И паки: яко судит Господь людем Своим. 31 Страшно (есть) еже власти в руже Бога живаго. 32 Воспоминайте же первыя дни ваша, в нихже просветившеся, многия страсти претерпесте страданий, 33 ово убо, поношеньми и скорбьми позор бывше, ово же, общницы бывше живущым тако: 34 ибо узам моим спострадасте и разграбление имений ваших с радостию приясте, ведяще имети себе имение на небесех пребывающее и лучшее. 35 Не отлагайте убо дерзновения вашего, еже имать мздовоздаяние велико. 36 Терпения бо имате потребу, да волю Божию сотворше, примете обетование: 37 еще бо мало елико елико, Грядый приидет и не укусит. 38 А праведный от веры жив будет: и аще обинется, не благоволит душа Моя о нем. 39 Мы же (братие) несмы обинования в погибель, но веры в снабдение души.

**11** Есть же вера уповаемых извещение, вещей обличение невидимых. 2 В сей бо свидетелствовани быша древнии. 3 Верюю разумеваем совершится веком глаголголом Божиим, во еже от неявляемых видимым быти. (aiōn g165) 4 Верюю множайшую жертву Авель паче Каина принесе Богу, еуже свидетелствован бысть быти праведник, свидетелствующу о дарех его Богу: и тоу умерый еще глаголет. 5 Верюю Енох преложен бысть не видети смерти: и не обреташеся, зане преложи его Бог: прежде бо преложения его свидетелствован

бысть, яко угоди Богу. 6 Без веры же невозможно угодити (Богу): веровати же подобает приходящему к Богу, яко есть, и взыскающим Его мздовоздатель бывает. 7 Верою ответ приим Ное о сих, яже не у виде, убоявся сотвори ковчег во спасение дому своего: еуже осуди (весь) мир, и правды, яже по вере, бысть наследник. 8 Верою зовом Авраам послуша изыти на место, еже хотяше прияти в наследие, и изыде не ведый, камо грядет. 9 Верою прииде Авраам на землю обетования, якоже на чужду, в кровы вселися со Исааком и Иаковом снаследникома обетования тогожде: 10 ждаше бо основания имущаго града, емуже художник и содетель Бог. 11 Верою и сама Сарра неплоды силу во удержание семене прият и паче времени возраста роди, понеже верна непщева Обетовавшего. 12 Темже и от единого родишася, да еще умерщвленного, якоже звезды небесныя множеством и яко песок вскрай моря безчисленный. 13 По вере умроша сии вси, не приемше обетований, но издалеча видевшие я, и целовавшие, и исповедавшие, яко страннии и пришелцы суть на земли: 14 ибо таковая глаголющии являються, яко отечествия взыскуют. 15 И аще бы убо оно помнили, из негоже изыдоша, имели бы время возвратитися: 16 ныне же лучшаго желают, сиречь небеснаго: темже не стыдится сими Бог, Бог нарицатися их: угодова бо им град. 17 Верою приведе Авраам Исаака искушаемь, и едиnorodнаго приношаше, обетования приемый, 18 к немуже глаголаше бысть: яко о Исааце наречется тебе семя: 19 помыслив, яко и из мертвых воскресити силен (есть) Бог, темже того и в притче прият. 20 Верою о грядущих благослови Исаак Иакова и Исава. 21 Верою Иаков умирая коегождо сына

Иосифова благослови и поклонися на верх жезла его. 22  
Верю Иосиф умирая о исхождении сынов Израилевых  
памятствова и о костех своих заповеда. 23 Верю Моисей  
родився сокровен бысть три месяцы от отец своих, зане  
видеша красно отроча и не убояшася повеления царева.  
24 Верю Моисей, велик быв, отвержеся нарицатися сын  
дщере фараоновы: 25 паче (же) изволи страдати с людьми  
Божиими, нежели имети временную греха сладость, 26  
большее богатство вменив Египетских сокровищ поношение  
Христово: взираше бо на мздовоздаяние. 27 Верю остави  
Египет, не убоявся ярости царевы: Невидимаго бо яко видя,  
терпяше. 28 Верю сотвори Пасху и пролитие крове, да не  
погубляяй перворожденная коснется их. 29 Верю преидоша  
Чермное море аки по сусе земли: егоже искушение приемше  
Египтяне истопишася. 30 Верю стены Иерихонския падоша  
обхождением седмих дний. 31 Верю Раав блудница не  
погибе с сопротивльшимися, приемши сходники с миром (и  
иным путем изведши). 32 И что еще глаголю? Не достанет  
бо ми повествуящу време о Гедеоне, Вараце же и  
Сампсоне и Иеффаи, о Давиде же и Самуиле, и о (других)  
пророцех, 33 иже верю победиша царствия, содеяша  
правду, получиша обетования, заградиша уста львов, 34  
угасиша силу огненную, избегоша острей меча, возмогоша  
от немощи, быша крепцы во бранех, обратиша в бегство  
полки чуждых: 35 прияша жены от воскресения мертвых  
своих: инии же избии быша, не приемше избавления,  
да лучшее воскресение улучат: 36 друзии же руганием и  
ранами искушение прияша, еще же и узами и темницею, 37  
камением побиени быша, претрени быша, искушени быша,

убийством меча умроша, проидоша в милотех (и) в козиях  
кожах, лишени, скорбяще, озлоблени: **38** ихже не бе достоин  
(весь) мир, в пустынях скитающиеся и в горах и в вертепах и  
в пропастьех земных. **39** И сии вси послушествани бывше  
верою, не прияша обетования, **40** Богу лучшее что о нас  
предзревшу, да не без нас совершенство приимут.

**12** Темже убо и мы, толик имуще облежаць нас облак  
свидетелей, гордость всяку отложше и удобь обстоятельный  
грех, терпением да течем на предлежащий нам подвиг,  
**2** взирающе на начальника веры и совершителя Иисуса,  
Иже вместо предлежащая Ему радости претерпе крест, о  
срамоте нерадив, о десную же престола Божия седе. **3**  
Помыслите убо таковое Пострадавшаго от грешник на Себе  
прекословие, да не стужаете, душами своими ослабляеми.  
**4** Не у до крове стасте, противу греха подвизающиеся, **5**  
и забысте утешение, еже вам яко сыном глаголет: сыне  
мой, не пренемай наказанием Господним, ниже ослабей,  
от Него обличаемь. **6** Егоже бо любит Господь, наказует:  
биет же всякаго сына, егоже приемлет. **7** Аще наказание  
терпите, якоже сыновом обретається вам Бог. Который бо  
есть сын, егоже не наказует отец? **8** Аще же без наказания  
есте, емуже причастницы быша вси, убо прелюбодейчищи  
есте, а не сынове. **9** К сим, плоти нашей отцы имехом  
наказатели, и срамляхомся: не много ли паче повинемся  
Отцу духовом, и живи будем? **10** Они бо в мало дний, якоже  
годе им бе, наказоваху нас: а Сей на пользу, да причастимся  
святыни Его. **11** Всякое бо наказание в настоящее время не  
мнится радость быти, но печаль: последи же плод мирен  
наученным тем воздает правды. **12** Темже ослабленныя

руки и ослабленная колена исправите 13 и стези правы сотворите ногами вашими, да не хромое совратится, но паче да изцелеет. 14 Мир имейте и святыню со всеми, ихже кроме никтоже узрит Господа: 15 смотряюще, да не кто лишится благодати Божия: да не кий корень горести, выспрь прозябаяй, пакость сотворит, и тем осквернятся мнози: 16 да не кто блудодей, или сквернитель, якоже Исав, иже за ядь едину отдал есть первородство свое. 17 Весте бо, яко и потом похотев наследовати благословение, отвержен бысть: покаяния бо места не обрете, аще и со слезами поискал его. 18 Не приступисте бо к горе осязаемой и разгоревшемуся огню, и облаку и сумраку, и буре 19 и трубному звуку, и гласу глаголющего, егоже слышавшии отрекошася, да не приложится им слово, 20 не терпячу бо повелевающего: аще и зверь прикоснется горе, камением побиен будет: 21 и тако страшно бе видимое, Моисей рече: прирашен есмь и трепетен. 22 Но приступисте к Сионстей горе и ко граду Бога живаго, Иерусалиму небесному и тмам Ангелов, 23 торжеству и церкви первородных на небесех написанных, и Судии всех Богу и духом праведник совершенных, 24 и к Ходатаю завета новаго Иисусу и Крови кропления, лучше глаголющей, нежели Авелева. 25 Блюдите (же), да не отречетеса Глаголющего. Аще бо не избежаша они отрекшиися пророчествующаго на земли, множае паче мы отрицающиися небеснаго, 26 Егоже глас землю тогда поколеба, ныне же обетова, глаголя: еще единою Аз потрясу не токмо землю, но и небом. 27 А еже еще единою, сказует колеблемых преложение, аки сотворенных, да пребудут, яже суть неподвижная. 28 Темже царство непоколебимо приемлюще, да имамы благодать,

еюже служим благоугодно Богу с благоговением и страхом,  
29 ибо Бог наш огонь поядаяй (есть).

**13** Братолюбие да пребывает: 2 страннолюбия не забывают, тем бо не ведяще нецыи странноприяша Ангелы.  
3 Поминайте юзники, аки с ними связаны: озлобляемая, аки и сами суще в теле. 4 Честна женитва во всех и ложе нескверно: блудником же и прелюбодеем судит Бог. 5 Не сребролюбцы нравом, доволни сущими. Той бо рече: не имам тебе оставити, ниже имам от тебе отступити: 6 яко дерзающим нам глаголати: Господь мне помощник, и не убоюсь: что сотворит мне человек? 7 Поминайте наставники ваша, иже глаголаша вам слово Божие: ихже взирающе на скончание жителства, подражайте вере (их). 8 Иисус Христос вчера и днесь Тойже, и во веки. (aiōn g165) 9 В научения странна и различна не прилагайтесь: добро бо благодатию утверждати сердца, (а) не брашны, от нихже не прияша пользы ходившии в них. 10 Имамы (же) олтарь, от негоже не имут власти ясти служащии сени. 11 Ихже бо кровь животных вносится во святая за грехи первосвященником, сих телеса сжигаются вне стана: 12 темже Иисус, да освятит люди Своею Кровию, вне врат пострадади изволил. 13 Темже убо да исходим к Нему вне стана, поношение Его носяще: 14 не имамы бо zde пребывающаго града, но грядущаго взыскуем. 15 Тем убо приносим жертву хваления выну Богу, сиречь плод устен исповедающихся имени Его. 16 Благодворения же и общения не забывают: таковыми бо жертвами благоугождается Бог. 17 Повинуйтесь наставником вашим и покарайтесь: тии бо бдят о душах ваших, яко слово воздати хотяще: да с радостию сие творят, а не въздыхающе,

несть бо полезно вам сие. **18** Молитесь о нас: уповаем бо, яко добру совесть имамы, во всех добре хотяще жити. **19** Лишше же молю, сие творите, да вскоре устроюся вам. **20** Бог же мира, возведый из мертвых Пастыря овцам великаго Кровию завета вечнаго, Господа нашего Иисуса Христа, (αἰῶνιος g166) **21** да совершит вы во всяцем деле блазе, сотворити волю Его, творя в вас благоугодное пред Ним Иисус Христом: Емуже слава во веки веков. Аминь. (αἰὼν g165) **22** Молю же вы, братие, примите слово утешения: ибо в мале написав послах вам. **23** Знайте брата нашего отпущена Тимофеа, с нимже, аще скорее приидет, узрю вас. **24** Целуйте вся наставники ваша и вся святыя. Целуют вы иже от Италии сущии. **25** Благодать со всеми вами. Аминь.

## Послание Иакова

**1** Иаков, Богу и Господу Иисусу Христу раб, обеманадесяте коленома, иже в разсеянии, радоватися. **2** Всяку радость имейте, братие моя, егда во искушения впадаете различна, **3** ведяще, яко искушение ваша веры соделовает терпение: **4** терпение же дело совершенно да имать, яко да будете совершенни и всецели, ни в чемже лишени. **5** Аще же кто от вас лишен есть премудрости, да просит от дающего Бога всем нелицеприемне и не поношающего, и дастся ему. **6** Да просит же верою, ничтоже сумняся: сумняйся бо уподобися волнению морскому, ветры возметаему и развеваему. **7** Да не мнит бо человек он, яко примет что от Бога. **8** Муж двоедушен неустроен во всех путех своих. **9** Да хвалится же брат смиренный в высоте своей, **10** богатый же во смирении своем, зане якоже цвет травный мимоидет: **11** возсия бо солнце со зноем, и изсуши траву, и цвет ея отпаде, и благолепие лица ея погибе: сице и богатый в хождении своем увядает. **12** Блажен муж, иже претерпит искушение: зане искусен быв, примет венец жизни, егоже обеща Бог любящим Его. **13** Никтоже искушаемь да глаголет, яко от Бога искушаемь есмь: Бог бо несть искуситель злым, не искушает же Той ни когоже, **14** кийждо же искушается, от своя похоти влекомь и прельщаемь: **15** таже похоть заченши раждает грех, грех же содеян раждает смерть. **16** Не льститесь, братие моя возлюбленная: **17** всяко даяние благо и всяк дар совершен свыше есть, сходяй от Отца светов, у Негоже несть пременение, или преложения стень. **18** Восхотев бо породил нас словом истины, во еже быти нам начаток некий созданием Его. **19** Темже, братие моя возлюбленная, да



будет всяк человек скор услышати и косен глаголати, косен во гнев, 20 гнев бо мужа, правды Божия не соделоваает. 21 Сего ради отложше всяку скверну и избыток злобы, в кротости примимте всажденное слово, могущее спасти души ваша. 22 Бывайте же творцы слова, а не точию слышатели, прельщающе себе самех. 23 Зане аще кто есть слышатель слова, а не творец, таковый уподобися мужу смотряющу лице бытия своего в зеркале: 24 усмотри бо себе и отиде, и абие забы, каков бе. 25 Приникий же в закон совершен свободы, и пребыв, сей не слышатель забытлив быв, но творец дела, сей блажен в делании своем будет. 26 Аще кто мнится верен быти в вас, и не обуздывает языка своего, но льстит сердце свое, сего суетна есть вера. 27 Вера бо чиста и нескверна пред Богом и Отцем сия есть, еже посещати сирых и вдовиц в скорбех их, (и) нескверна себе блюсти от мира.

**2** Братие моя, не на лица зряще имейте веру Господа нашего Иисуса Христа славы. 2 Аще бо внидет в сонмище ваше муж, злат перстень нося, в ризе светле, внидет же и нищ в худе одежди, 3 и воззрите на носящаго ризу светлу, и речете ему: ты сяди zde добре: и нищему речете: ты стани тамо, или сяди zde на подножии моем: 4 и не рассмотрите в себе, и бысте судии помышлений злых. 5 Слышите, братие моя возлюбленная, не Бог ли избра нищья мира сего богаты в вере и наследники Царствия, еже обеща любящим Его? 6 Вы же укористе нищаго. Не богатии ли насилуют вам, и тии влекут вы на судища? 7 Не тии ли хулят доброе имя нареченное на вас? 8 Аще убо закон совершаете царский, по Писанию: возлюбиши искренняго своего якоже себе

самого, добре творите: **9** аще же на лица зрите, то грех содеваете, обличаеми от закона якоже преступницы. **10** Иже бо весь закон соблюдет, согрешит же во едином, бысть всем повинен. **11** Рекий бо: не прелюбы сотвориши, рекл есть и: не убиеши. Аще же не прелюбы сотвориши, убиеши же, был еси преступник закона. **12** Тако глаголите и тако творите, яко законом свободным имущии суд прияти. **13** Суд бо без милости не сотворшему милости: и хвалится милость на суде. **14** Кая польза, братие моя, аще веру глаголет кто имети, дел же не имать? Еда может вера спасти его? **15** Аще же брат или сестра нага будета и лишена будета дневняя пищи, **16** речет же има кто от вас: идита с миром, грейтася и насыщайтася? Не даст же има требования телеснаго: кая польза? **17** Такожде и вера, аще дел не имать, мертва есть о себе. **18** Но речет кто: ты веру имаши, аз же дела имам: покажи ми веру твою от дел твоих, и аз тебе покажу от дел моих веру мою. **19** Ты веруеши, яко Бог един есть: добре твориши: и беси веруют, и трепещут. **20** Хочеши же ли разумети, о, человече суетне, яко вера без дел мертва есть? **21** Авраам отец наш не от дел ли оправдася, вознес Исаака сына своего на жертвенник? **22** Видиши ли, яко вера поспешествоваше делом его, и от дел совершися вера? **23** И совершися Писание глаголющее: верова же Авраам Богови, и вменися ему в правду, и друг Божий наречеся. **24** Зрите ли убо, яко от дел оправдается человек, а не от веры единыя? **25** Такожде же и Раав блудница не от дел ли оправдася, приемши сходники и иным путем изведши их? **26** Якоже бо тело без духа мертво есть, тако и вера без дел мертва есть.

**3** Не мнози учителие бывайте, братие моя, ведяще, яко большее осуждение приимем, **2** много бо согрешаем вси. Аще кто в слове не согрешает, сей совершен муж, силен обуздати и все тело. **3** Се бо и конем узды во уста влагаем, да повинуются нам, и все тело их обращаем: **4** се, и корабли велицы суще и от жестоких ветров заточаемы, обращаются малым кормилцем, аможе стремление правящаго хочет: **5** такожде же и язык мал уд есть, и вельми хвалится. Се мал огонь, и коль велики вещи сожигает. **6** И язык огонь, лепота неправды: сице и язык водворяется во удех наших, скверня все тело, и паля коло рождения нашего, и опаляясь от геенны: (Геенна g1067) **7** всяко бо естество зверей же и птиц, гад же и рыб, укрощается и укротится естеством человеческим, **8** языка же никтоже может от человек укротити: не удержимо бо зло, исполнь яда смертоносна. **9** Тем благословляем Бога и Отца, и тем кленем человеки бывшыя по подобию Божию: **10** от техже уст исходит благословение и клятва. Не подобает, братие моя возлюбленная, сим тако бывати. **11** Еда ли источник от единого устия источает сладкое и горькое? **12** Еда может, братие моя, смоковница маслины творити, или виноградная лоза смоквы? Такожде ни един источник слану и сладку творит воду. **13** Кто премудр и худог в вас, да покажет от добраго жития дела своя в кротости и премудрости. **14** Аще же зависть горьку имате и рвение в сердцах ваших, не хвалитесь, ни лжите на истину: **15** несть сия премудрость свыше низходящи, но земна, душевна, бесовска: **16** идеже бо зависть и рвение, ту нестроение и всяка зла вещь. **17** А яже свыше премудрость, первее убо чиста есть, потом же мирна, кротка, благопокорлива, исполнь

милости и плодов благих, несуменна и нелицемерна. 18  
Плод же правды в мире сеется творящим мир.

**4** Откуда брани и свары в вас? Не отсюда ли, от сластей  
ваших, воюющих во удех ваших? **2** Желаете, и не имате:  
убиваете и завидите, и не можете улучшить: сваряетесь  
и борете, и не имате, зане не просите: **3** просите, и не  
приемлете, зане зле просите, да в сластех ваших иждивете.  
**4** Прелюбодее и прелюбодейцы, не весте ли, яко любы мира  
сего вражда Богу есть, иже бо восхощет друг быти миру,  
враг Божии бывает. **5** Или мните, яко всуе Писание глаголет:  
к зависти желает дух, иже вселися в ны? **6** Большую же  
дает благодать: темже глаголет: Господь гордым противится,  
смиранным же дает благодать. **7** Повинитесь убо Богу,  
противитесь же диаволу, и бежит от вас. **8** Приблизитесь  
Богу, и приблизится вам: очистите руце, грешницы, исправите  
сердца ваша, двоедушнии: **9** постраждите и слезите и  
плачитесь: смех ваш в плачь да обратится, и радость в  
сетование: **10** смиритесь пред Господем, и вознесет вы. **11**  
Не оклеветайте друг друга, братие: оклеветаяй бо брата,  
или осуждаяй брата своего, оклеветает закон и осуждает  
закон: аще же закон осуждаеш, неси творец закона, но  
судия. **12** Един есть Законоположник и Судия, могий спасти  
и погубити: ты же кто еси осуждаяй друга? **13** Слышите  
ныне, глаголющии: днесь или утре пойдем во он град, и  
сотворим ту лето едино, и куплю деем и приобретение: **14**  
иже не весте, что утре случится: кая бо жизнь ваша, пара бо  
есть, яже в мале является, потом же исчезает. **15** Вместо еже  
бы глаголати вам: аще Господь восхощет, и живи будем, и  
сотворим сие или оно: **16** ныне же хвалитесь в гордынях

ваших: всяка хвала такова зла есть. 17 Ведущему убо добро творити, и не творящему, грех ему есть.

**5** Приидите ныне, богатии, плачитесь и рыдайте о лютых скорбех ваших грядущих на вы. 2 Богатство ваше изгни, и ризы ваша молие поядоша. 3 Злато ваше и серебро изоржаве, и ржа их в послушество на вас будет, и снесть плоти ваша аки огонь: егоже снискасте в последния дни. 4 Се, мзда делателей делавших нивы ваша, удержаная от вас, вопиет, и вопиения жавших во уши Господа Саваофа внидоша. 5 Возвеселистесь на земли, и насладистесь: упитасте сердца ваша аки в день заколения. 6 Осудисте, убисте Праведнаго: не противится вам. 7 Долготерпите убо, братие моя, до пришествия Господня. Се земледелец ждет честнаго плода от земли, долготерпя о нем, дондеже примет дождь ран и позден: 8 долготерпите убо и вы, утвердите сердца ваша, яко пришествие Господне приближися. 9 Не въздыхайте друг на друга, братие, да не осуждени будете: се, Судия пред дверьми стоит. 10 Образ примите, братие моя, злострадания и долготерпения пророки, иже глаголаша именем Господним. 11 Се, блажим терпящя. Терпение Иовле слышасте, и кончину Господню видесте, яко многомилостив есть Господь и щедр. 12 Прежде же всех, братие моя, не кленитесь ни небом, ни землею, ни иною коею клятвою: буди же вам еже ей, ей, и еже ни, ни: да не в лицемерие впадете. 13 Злостраждет ли кто в вас? Да молитву деет: благодушствует ли кто? Да поет. 14 Болит ли кто в вас, да призовет пресвитеры Церковныя, и да молитву сотворят над ним, помазавше его елеем во имя Господне: 15 и молитва веры спасет болящаго, и воздвигнет

его Господь: и аще грехи сотворил есть, отпустятся ему. **16**  
Исповедайте убо друг другу согрешения и молитесь друг за  
друга, яко да исцелее: много бо может молитва праведнаго  
поспешествуема. **17** Илиа человек бе подобострастен нам,  
и молитвою помолися, да не будет дождь, и не одожди по  
земли лета три и месяц шесть: **18** и паки помолися, и небо  
дождь даде, и земля прозябе плод свой. **19** Братие, аще  
кто в вас заблудит от пути истины, и обратит кто его, **20** да  
весть, яко обративый грешника от заблуждения пути его  
спасет душу от смерти и покрывает множество грехов.

# Первое послание Петра

**1** Петр, Апостол Иисус Христов, избранным пришельцем разсеяния Понта, Галатии, Каппадокии, Асии и Вифинии, **2** по прозрению Бога Отца, во святыни Духа, в послушание и кропление Крове Иисус Христовы: благодать вам и мир да умножится. **3** Благословен Бог и Отец Господа нашего Иисуса Христа, Иже по мнозей Своей милости породей нас во упование живо воскресением Иисус Христовым от мертвых, **4** в наследие нетленно и нескверно и неувядаемо, соблюдено на небесех вас ради, **5** иже силою Божиею соблюдаеми есте чрез веру, во спасение готовое явится во время последнее. **6** О немже радуйтесь, мало ныне, аще лепо есть, прискорбни бывше в различных напастех: **7** да искушение ваша веры многочестнейше злата гибнуща, огнем же искушена, обрящется в похвалу и честь и славу, во откровении Иисус Христове, **8** Егоже не видевши любите, и на Негоже ныне не зряще, верующе же, радуется радостью неизглаголанною и прославленною, **9** приемлюще кончину вере вашей, спасение душам: **10** о немже спасении взыскаша и испыташа пророцы, иже о вашей благодати прорекоша, **11** испытующе, в каково или в кое время являше в них Дух Христов, прежде свидетельствуя о Христовых страстех, и о славах, яже по сих: **12** имже открыся, яко не им самем, но нам служаху сия, яже ныне возвестишася вам благовествовавшими вам Духом Святым посланным с небесе, в няже желают Ангели приникнути. **13** Темже, возлюбленнии, препоясавше чресла помышления вашего, трезвящися, совершенно уповайте на приносимую вам благодать откровением Иисус Христовым. **14** Яко чада послушания, не преобразующеся первыми

неведения вашего похотении, 15 но по звавшему вы Святому, и сами святы во всем житии будите. 16 Зане писано есть: святы будите, яко Аз свят есмь. 17 И аще Отца называете нелицемерно судяца комуждо по делу, со страхом жития вашего время жительствуйте, 18 ведяще, яко не истленным серебром или златом избавистесь от суетнаго вашего жития отцы преданнаго, 19 но честною Кровию яко Агнца непорочна и пречиста Христа, 20 предуведена убо прежде сложения мира, явльшася же в последняя лета вас ради, 21 иже Его ради веруете в Бога Воздвигшаго Его из мертвых и славу Ему давши, яко да вера ваша и упование будет на Бога. 22 Душы ваша очистивше в послушании истины Духом, в братолюбие нелицемерно, от чиста сердца друг друга любите прилежно, 23 порождени не от семени истленна, но неистленна, словом живаго Бога и пребывающа во веки. (aiōn g165) 24 Зане всяка плоть яко трава, и всяка слава человека яко цвет травный: изсше трава, и цвет ея отпаде: 25 глаголгол же Господнь пребывает во веки. Се же есть глаголгол благовествованный в вас. (aiōn g165)

**2** Отложше убо всяку злобу и всяку лесть и лицемерие и зависть и вся клеветы, 2 яко новорождени младенцы, словесное и нелестное млеко возлюбите, яко да о нем возрастете во спасение: 3 понеже вкусисте, яко благ Господь. 4 К Немуже приходяще, камени живу, от человек убо уничижену, от Бога же избрану, честну, 5 и сами яко камение живо зиждитесь во храм духовен, святителство свято, возносити жертвы духовны, благоприятны Богови Иисус Христом. 6 Зане писано есть в Писании: се полагаю в Сионе камень краеуголен, избран, честен: и веруйя вонь не



постыдится. 7 Вам убо честь верующым, а противящимся камень, егоже небрегоша зиждуции, сей бысть во главу угла, и камень претыкания и камень соблазна: 8 о немже и претыкаются слову противляющиися, на неже и положени быша. 9 Вы же род избран, царское священство, язык свят, людие обновления, яко да добродетели возвестите из тмы вас Призвавшаго в чудный Свой свет: 10 иже иногда не людие, ныне же людие Божии: иже не помиловани, ныне же помиловани бысте. 11 Возлюбленнии, молю яко пришелцев и странников, огребатися от плотских похотей, яже воюют на душу, 12 житие ваше имуще добро во языцех, да о немже клеветают вас аки злодеев, от добрых дел видевшие, прославят Бога в день посещения. 13 Повинитесь убо всякому человеку созданию Господа ради: аще царю, яко преобладающе: 14 аще ли же князем, яко от него посланным, во отмщение убо злодеем, в похвалу же благотворцем. 15 Яко тако есть воля Божия, благотворящим обуздovati безумных человек невежество: 16 яко свободни, а не яко прикровение имуще злобы свободу, но яко раби Божии. 17 Всех почитайте, братство возлюбите, Бога бойтесь, царя чтите. 18 Раби, повинуйтесь во всяцем страсе владыкам, не токмо благим и кротким, но и строптивым. 19 Се бо есть угодно пред Богом, аще совести ради Божия терпит кто скорби, стражда без правды. 20 Кая бо похвала, аще согрешающе мучими терпите? Но аще добро творяще и страждуще терпите, сие угодно пред Богом, 21 на сие бо и звани бысте: зане и Христос пострада по нас, нам оставль образ, да последуем стопам Его: 22 иже греха не сотвори, ни обретесе лесь во устех Его: 23 иже укаряемь противу

не укаряше, стражда не прещаше, предаваше же Судящему праведно: 24 иже грехи наша Сам вознесе на теле Своем на древо, да от грех избывше, правдою поживем: Егоже язвою изцелесте. 25 Бесте бо яко овцы заблуждшыя не имущя пастыря: но возвратитесь ныне к Пастырю и Посетителю душ ваших.

**3** Такожде же и жены, повинующяся своим мужем, да и аще нецыи не повинуются слову, женским житием без слова пленени будут, 2 видевше еже со страхом чисто житие ваше. 3 Умже да будет не внешняя, плетения влас и обложения злата, или одеяния риз, лепота, 4 но потаеный сердца человек, в неистлении кроткаго и молчаливаго духа, еже есть пред Богом многоценно. 5 Тако бо иногда и святыя жены, уповающыя на Бога, украшаху себе, повинующяся своим мужем: 6 якоже Сарра послушаше Авраама, господина того зовущи: еже бысте чада, благотворящя и не боящяся ни единого страха. 7 Мужие такожде, вкупе живуще со своими женами по разуму, яко немощнейшу сосуду женскому воздающе честь, яко и снаследницы благодатныя жизни, во еже не прекращатися молитвам вашим. 8 Конец же, вси единомудрени будите, милостиви, братолюбцы, милосердни, благоутробни, мудролюбцы, смиреномудри: 9 не воздающе зла за зло, или досаждения за досаждение: супротивное же, благословяще, ведяще, яко на се звани бысте, да благословение наследите. 10 Хотяй бо живот любити и видети дни благи, да удержит язык свой от зла, и устне свои еже не глаголати лъсти. 11 Да уклонится от зла, и да сотворит благо, да възыщет мира и да держится его: 12 зане очи Господни на праведныя, и уши Его в молитву их, лице

же Господне на творящия злая, еже потребити их от земли.  
13 И кто озлобит вас, аще благому подобници будете? 14 Но аще и страждете правды ради, блажени есте: страха же их не убойтесь, ниже смущайтесь. 15 Господа же Бога освятите в сердцах ваших: готови же присно ко ответу всякому вопрошающему вы словесе о вашем уповании, с кротостию и страхом: 16 совесть имуще благу, да о немже клеветуют вас аки злодеев, постыдятся злословящии ваше благое о Христе житие. 17 Лучше бо есть благое творящим, аще хошет воля Божия, пострадати, нежели зло творящим: 18 зане и Христос единою о гресех наших пострада, праведник за неправедники, да приведет ны Богови, умерщвлен убо быв плотию, ожив же духом: 19 о немже и сущым в темнице духовом сошед проповеда, 20 противльшимся иногда, егда ожидаше Божие долготерпение, во дни Ноевы, делаему ковчегу, в немже мало, сиречь осмь душ, спасошася от воды. 21 Егоже воображение ныне и нас спасает крещение, не плотския отложение скверны, но совести благи вопрошение у Бога, воскресением Иисус Христовым, 22 Иже есть о десную Бога, возшед на небо, покоршымся Ему Ангелом и Властем и Силам.

**4** Христу убо пострадавшу за ны плотию, и вы в ту же мысль вооружитесь: зане пострадавый плотию, преста от греха, 2 во еже не ктому человеческим похотем, но воли Божией прочее во плоти жити время. 3 Довлеет бо вам мимошедшее время жития, волю языческую творившим, хождшым в нечистотах, в похотех, в мужеложстве, в скотоложстве, в помыслех, в пиянстве, в козлогласованиях, в лихоимании и богомерзких идолослужениях: 4 о немже дивятся, не сходящимся вам

в тоже блуда разлиание, хуляще: **5** иже воздадят слово готову Сущему судити живым и мертвым. **6** На се бо и мертвым благовестися, да суд убо примут по человеку плотию, поживут же по Бозе духом. **7** Всем же кончина приближися. Уцеломудритесь убо и трезвитесь в молитвах. **8** Прежде же всех друг ко другу любовь прилежну имейте, зане любовь покрывает множество грехов. **9** Страннолюбцы друг ко другу, без роптании. **10** Кийждо якоже прият дарование, между себе сим служаще, яко добрии строителие различныя благодати Божия. **11** Аще кто глаголет, яко словеса Божия: аще кто служит, яко от крепости, юже подает Бог: да о всем славится Бог Иисус Христом, Емуже есть слава и держава во веки веков. Аминь. (aiōn g165) **12** Возлюбленнии, не дивитесь еже в вас раждежению ко искушению вам бываему, яко чужду вам случающуся: **13** но понеже приобщаетесь Христовым страстем, радуйтесь, яко да и в явление славы Его возрадуетесь веселящеся. **14** Аще укоряеми бываете о имени Христове, блажени есте яко Славы и Божий Дух на вас почивает: онеми убо хулятся, а вами прославляется. **15** Да не кто убо от вас постраждет яко убийца, или яко тать, или яко злодей, или яко чуждопосетитель: **16** аще ли же яко Христианин, да не стыдится, да прославляет же Бога в части сей. **17** Яко время начати суд от дому Божия: аще же прежде от вас, кая кончина противящымся Божию Евангелию? **18** И аще праведник едва спасется, нечестивый и грешный где явится? **19** Темже и страждущии по воли Божией, яко верну Зиждителю да предадят души своя во благотворении.

**5** Старцы иже в вас молю, яко старец сый и свидетель Христовым страстем, иже и хотящей славе явится общник:

2 пасите еже в вас стадо Божие, посещающе не нуждею, но волею и по Бозе, ниже неправедными прибытки, но усердно, 3 ни яко обладающе причту, но образи бывайте стаду: 4 и явльшуся Пастыреначальнику, примете неувядаемый славы венец. 5 Также юнии, повинитесь старцем: вси же друг другу повинующеся, смиренномудрие стяжите, зане Бог гордым противится, смиренным же дает благодать. 6 Смиритесь убо под крепкую руку Божию, да вы вознесет во время: 7 всю печаль вашу возвергше Нань, яко Той печется о вас. 8 Трезвитесь, бодрствуйте, зане супостат ваш диавол, яко лев рыкая, ходит, иский кого поглотити: 9 емуже противитесь тверди верою, ведуще, яко теже страсти случаются вашему братству, еже в мире. 10 Бог же всякия благодати, призвавый вас в вечную Свою славу о Христе Иисусе, мало пострадавшыя, Той да совершит вы, да утвердит, да укрепит, да оснует. (aiōnios g166) 11 Тому слава и держава во веки веков. Аминь. (aiōn g165) 12 Силуаном вам верным братом, яко непщую, в мале написах, моля и засвидетельствуя сей быти истинней благодати Божией, в нейже стоите. 13 Целует вы яже в Вавилоне соизбранная, и Марко сын мой. 14 Целуйте друг друга лобзанием любве. Мир вам всем о Христе Иисусе. Аминь.

## Второе послание Петра

**1** Симон Петр, раб и посланник Иисус Христов, равночистную с нами получившими веру в правде Бога нашего и Спаса Иисуса Христа: **2** благодать вам и мир да умножится в познании Бога, и Христа Иисуса Господа нашего. **3** Яко вся нам Божественныя силы Его, яже к животу и благочестию, подана разумом Призвавшего нас славою и добродетелию. **4** Имиже честная нам и великая обетования даровашася, да сих ради будете Божественнаго причастницы естества, отбегше, яже в мире, похотныя тли: **5** и в самое же сие, тщание все привнесше, подадите в вере вашей добродетель, в добродетели же разум, **6** в разуме же воздержание, в воздержании же терпение, в терпении же благочестие, **7** во благочестии же братолюбие, в братолюбии же любовь. **8** Сия бо суцая в вас и множащася, не праздных ниже бесплодных сотворят вы в Господа нашего Иисуса Христа познание: **9** емуже бо несть сих, слеп есть, мжай, забвение приемь очищения древних своих грехов. **10** Темже паче, братие, потщитесь известно ваше звание и избрание творити: сия бо творяще, не имате согрешити никогдаже, **11** сице бо обильно приподастся вам вход в вечное Царство Господа нашего и Спаса Иисуса Христа. (αἰῶνιος 9166) **12** Сего ради не обленюся воспоминати присно вам о сих, аще и ведите, и утверждени есте в настоящей истине. **13** Праведно бо мню, донележе емь в сем телеси, возставляти вас воспоминанием, **14** ведый, яко скоро есть отложение телесе моего, якоже и Господь наш Иисус Христос сказа мне. **15** Потщуся же и всегда имети вас по моем исходе память о сих творити. **16** Не ухищренным бо баснем последовавше сказахом вам силу

и пришествие Господа нашего Иисуса Христа, но самовидцы бывше величества Онаго. 17 Прием бо от Бога Отца честь и славу, гласу пришедшу к Нему от велелепных славы. Сей есть Сын Мой возлюбленный, о Немже Аз благоизволих. 18 И сей глас мы слышахом с небесе сшедшъ, с Ним суще на горе святых. 19 И имамы известнейшее пророческое слово: емуже внимающе якоже светилу сияюще в темном месте, добре творите, дондеже день озарит, и денница возсияет в сердцах ваших, 20 сие прежде ведуще, яко всяко пророчество книжное по своему сказанию не бывает. 21 Ни бо волею бысть когда человеком пророчество, но от Святаго Духа просвещаемы глаголаша святии Божии человецы.

**2** Быша же и лживии пророцы в людех, якоже и в вас будут лживии учителя, иже внесут ереси погибели, и искупльшаго их Владыки отметающесе, приводяще себе скору погибель. 2 И мнози последствуют их нечистотам, ихже ради путь истинный похулится. 3 И в преумножении льстивых словес вас уловят: ихже суд искони не коснит, и погибель их не дремлет. 4 Аще бо Бог аггелов согрешивших не пощаде, но пленицами мрака связав, предаде на суд мучимых блюсти: (Tartaroō g5020) 5 и перваго мира не пощаде, но осмаго Ноа правды проповедника сохрани, потоп миру нечествовавших наведе: 6 и грады Содомския и Гоморрская сжег, разорением осуди, образ хотящим нечествовати положив: 7 и праведнаго Лота, обидима от беззаконных в нечистоте сожития, избави. 8 Видением бо и слухом праведный, живой в них, день от дне душу праведну беззаконными делы мучаше: 9 весть Господь благочестивыя от напасти избавляти, неправедники же на день судный мучимы блюсти, 10 наипаче же вслед плотския

похоти сквернения ходящия и о господстве нерадящия:  
продерзателе, себе угодницы, славы не трепещут хуляще:  
11 идеже Ангели крепостию и силою больши суще, не терпят  
на ся от Господа укоризнен суд. 12 Сии же, яко скоти  
животни естеством бывше в погибель и тлю, в нихже не  
разумеют хуляще, во истлении своем истлеют, 13 приемлюще  
мзду неправедну, сласть мяще вседневное насыщение,  
сквернители и порочницы, питающесе лестьми своими, ядуще  
с вами, 14 очи имуще исполнь блудодеяния и непрестаемаго  
греха, прельщающе души неутверждены, сердце научено  
лихоимству имуще, клятвы чада: 15 оставльше правый путь  
заблудиша, последовавше пути Валаама Восорова, иже мзду  
неправедну возлюби, 16 обличение же име своего беззакония:  
подяремник безгласен, человеческим гласом провещавшь,  
возбрани пророка безумие. 17 Сии суть источницы безводни,  
облацы и мглы от ветр преносими, имже мрак темный во  
веки блюдется. (questioned) 18 Прегордая бо суеты вещающе,  
прельщают в скверны плотския похоти, отбегающих всячески  
от них живущих во льсти, 19 свободу им обещавающе,  
сами раби суще тления: имже бо кто побежден бывает,  
сему и работен есть. 20 Аще бо отбегше скверн мира в  
разум Господа и Спаса нашего Иисуса Христа, сими же  
паки сплетшесе побеждаеми бывают, быша им последняя  
горша первых. 21 Лучше бо бе им не познати пути правды,  
нежели познавшим возвратитися вспять от преданныя им  
святыя заповеди. 22 Случися бо им истинная притча: пес  
возвращься на свою блевотину, и: свиния, омывшись, в кал  
тинный.



**3** Сие уже, возлюбленнии, второе вам пишу послание, в нихже возбуждаю воспоминанием ваш чистый смысл, **2** помянути прежде реченныя глаголы от святых пророк, и Апостол ваших заповедь Господа и Спаса: **3** сие прежде ведяще, яко приидут в последния дни ругателе, по своих похотех ходяще **4** и глаголюще: где есть обетование пришествия Его, отнележе бо отцы упоша, вся тако пребывают от начала создания. **5** Таится бо им сие хотящым, яко небеса беша исперва, и земля от воды и водою составлена, Божиим словом: **6** темже тогдашний мир, водою потоплен быв, погибе. **7** А нынешняя небеса и земля темже Словом сокровена суть, огню блюдома на день суда и погибели нечестивых человек. **8** Едино же сие да не утаится вас, возлюбленнии, яко един день пред Господем яко тысяща лет, и тысяща лет яко день един. **9** Не коснит Господь обетования, якоже нецыи коснение мнят: но долготерпит на нас, не хотя да кто погибнет, но да вси в покаяние приидут. **10** Приидет же день Господень яко тать в нощи, в оньже небеса убо с шумом мимо идут, стихии же сжигаемы разорятся, земля же и яже на ней дела сгорят. **11** Сим убо всем разоряемым, кацем подобает быти вам во святых пребываниих и благочестиих, **12** чающым и скорее быти желающым пришествия Божияго дне, егоже ради небеса жегома разорятся, и стихии опаляемы растаюся? **13** Нова же небесе и новы земли по обетованию Его чаем, в нихже правда живет. **14** Темже, возлюбленнии, сих чающе, потщитесь нескверни и непорочни Тому обрестися в мире, **15** и Господа нашего долготерпение спасение непщуите, якоже и возлюбленный наш брат Павел по данной ему премудрости

написа вам, **16** якоже и во всех своих посланиих, глаголя в них о сих: в нихже суть неудобь разумна некая, яже ненаучени и неутверждени развращают, якоже и прочая Писания, к своей погибели им. **17** Вы же убо, возлюбленнии, предведяще хранитесь, да не лестию беззаконных сведени бывше, отпадете своего утверждения. **18** Но да растете во благодати и разуме Господа нашего и Спаса Иисуса Христа. Тому слава и ныне и в день века. Аминь. (аіѡп g165)

# Первое послание Иоанна

**1** Еже бе исперва, еже слышахом, еже видехом очима нашими, еже узрехом, и руки наша осязаша, о Словеси животнем: **2** и живот явися, и видехом, и свидетелствуем, и возвещаем вам живот вечный, иже бе у Отца и явися нам: (aiōnios g166) **3** еже видехом и слышахом, поведаем вам, да и вы общение имате с нами: общение же наше со Отцем и с Сыном Его Иисусом Христом. **4** И сия пишем вам, да радость ваша будет исполнена. **5** И сие есть обетование, еже слышахом от Него и поведаем вам, яко Бог свет есть, и тмы в Нем несть ни единыя. **6** Аще речем, яко общение имамы с Ним, и во тме ходим, лжем и не творим истины: **7** аще же во свете ходим, якоже Сам Той есть во свете, общение имамы друг ко другу, и Кровь Иисуса Христа Сына Его очищает нас от всякаго греха. **8** Аще речем, яко греха не имамы, себе прельщаем, и истины несть в нас. **9** Аще исповедаем грехи наша, верен есть и праведен да оставит нам грехи наша и очестит нас от всякия неправды. **10** Аще речем, яко не согрешихом, лжа творим Его, и слово Его несть в нас.

**2** Чадца моя, сия пишу вам, да не согрешаете: и аще кто согрешит, ходатая имамы ко Отцу, Иисуса Христа праведника: **2** и Той очищение есть о гресех наших, не о наших же точию, но и о всего мира. **3** И о сем разумеем, яко познахом Его, аще заповеди Его соблюдаем. **4** Глаголяй, яко познах Его, и заповеди Его не соблюдает, ложь есть, и в сем истины несть: **5** а иже аще соблюдает слово Его, поистинне в сем любви Божия совершенна есть: о сем разумеем, яко в Нем есмы. **6** Глаголяй, в Нем пребывати, должен есть, якоже Он ходил есть, и сей такожде да ходит. **7** Возлюбленнии, не

заповедь нову пишу вам, но заповедь ветху, юже иместе исперва. Заповедь ветха есть слово, еже слышасте исперва.

8 Паки заповедь нову пишу вам, еже есть поистинне в Нем и в вас: яко тма мимоходит и свет истинный сей уже сияет. 9 Глаголяй себе во свете быти, а брата своего ненавидяй, во тме есть доселе. 10 Любяй брата своего во свете пребывает, и соблазна в нем несть. 11 А ненавидяй брата своего во тме есть, и во тме ходит, и не весть, камо идет, яко тма ослепи очи ему. 12 Пишу вам, чадца, яко оставляются вам греси имене Его ради. 13 Пишу вам, отцы, яко познасте Безначалнаго. Пишу вам, юноши, яко победисте лукаваго. Пишу вам, дети, яко познасте Отца. 14 Писах вам, отцы, яко познасте Исконнаго: писах вам, юноши, яко крепцы есте, и слово Божие в вас пребывает, и победисте лукаваго. 15 Не любите мира, ни яже в мире: аще кто любит мир, несть любве Отчи в нем: 16 яко все, еже в мире, похоть плотская и похоть очима и гордость житейская, несть от Отца, но от мира сего есть. 17 И мир преходит, и похоть его, а творяй волю Божию пребывает во веки. (αἰὼν ἰ165) 18 Дети, последняя година есть. И якоже слышасте, яко антихрист грядет, и ныне антихристи мнози быша, от сего разумеваем, яко последний час есть. 19 От нас изыдоша, но не беша от нас: аще бы от нас были, пребыли убо быша с нами: но да явятся, яко не суть вси от нас. 20 И вы помазание имате от Святаго, и весте вся. 21 Не писах вам, яко не весте истины, но яко весте ю и яко всяка лжа от истины несть. 22 Кто есть лживый, точию отменяйся, яко Иисус несть Христос? Сей есть антихрист, отменяйся Отца и Сына. 23 Всяк отменяйся Сына, ни Отца имать: а исповедаая Сына, и Отца имать. 24

Вы убо еже слышасте исперва, в вас да пребывает: (и) аще в вас пребудет, еже исперва слышасте, и вы в Сыне и Отце пребудете. 25 И сие есть обетование, еже Сам обеща нам, живот вечный. (aīōnios g166) 26 Сия писах вам о лъстящих вас. 27 И вы еже помазание приясте от Него, в вас пребывает, и не требуете, да кто учит вы: но яко то само помазание учит вы о всем, и истинно есть, и несть ложно: и якоже научи вас, пребывайте в нем. 28 И ныне, чадца, пребывайте в Нем, да егда явится, имамы дерзновение и не посраммся от Него в пришествии Его. 29 Аще весте, яко праведник есть, разумеите, яко всяк творяй правду от Него родися.

**3** Видите, какову любовь дал есть Отец нам, да чада Божия наречемся, и будем. Сего ради мир не знает нас, зане не позна Его. 2 Возлюбленнии, ныне чада Божия есмы, и не у явися, что будем: вемы же, яко, егда явится, подобни Ему будем, ибо узрим Его, якоже есть. 3 И всяк имеяй надежду сию Нань, очищает себе, якоже Он чист есть. 4 Всяк творяй грех, и беззаконие творит: и грех есть беззаконие. 5 И весте, яко Он явися, да грехи наша возмет, и греха в Нем несть. 6 Всяк, иже в Нем пребывает, не согрешает: всяк согрешаяй не виде Его, ни позна Его. 7 Чадца, никтоже да лъстит вас. Творяй правду праведник есть, якоже Он праведен есть. 8 Творяй грех от диавола есть, яко исперва диавол согрешает. Сего ради явися Сын Божий да разрушит дела диаволя. 9 Всяк рожденный от Бога греха не творит, яко семя Его в нем пребывает: и не может согрешати, яко от Бога рожден есть. 10 Сего ради явлена суть чада Божия и чада диаволя: всяк не творяй правды несть от Бога, и не любяй брата своего. 11 Яко се есть завещание, еже слышасте исперва, да любим

друг друга, **12** не якоже Каин от лукаваго бе и закла брата своего. И за кую вину закла его? Яко дела его лукава беша, а брата его праведна. **13** Не чудитесь, братие моя, аще ненавидит вас мир. **14** Мы вемы, яко преидохом от смерти в живот, яко любим братию: не любяй бо брата пребывает в смерти. **15** Всяк ненавидяй брата своего человекоубийца есть: и весте, яко всяк человекоубийца не имать живота вечнаго в себе пребывающа. (aiōnios g166) **16** О сем познахом любовь, яко Он по нас душу Свою положи: и мы должны есмы по братии души полагати. **17** Иже убо имать богатство мира сего, и видит брата своего требующа, и затворит утробу свою от него, како любы Божия пребывает в нем? **18** Чадца моя, не любим словом ниже языком, но делом и истиною. **19** И о сем разумеем, яко от истины есмы, и пред Ним смиряем сердца наша: **20** зане аще зазирает нам сердце наше, яко болий есть Бог сердца нашего и весть вся. **21** Возлюбленнии, аще сердце наше не зазрит нам, дерзновение имамы к Богу, **22** и егоже аще просим, приемлем от Него, яко заповеди Его соблюдаем и угодная пред Ним творим. **23** И сия есть заповедь Его, да веруем во имя Сына Его Иисуса Христа и любим друг друга, якоже дал есть заповедь нам. **24** И соблюдаяй заповеди Его в Нем пребывает, и Той в нем. И о сем разумеем, яко пребывает в нас, от духа, егоже дал есть нам.

**4** Возлюбленнии, не всякому духу веруйте, но искушайте духи, аще от Бога суть: яко мнози лжепророцы изыдоша в мир. **2** О сем познавайте Духа Божия и духа лестча: всяк дух, иже исповедует Иисуса Христа во плоти пришедша, от Бога есть: **3** и всяк дух, иже не исповедует Иисуса Христа во

плоти пришедша, от Бога несть: и сей есть антихристов, егоже слышасте, яко грядет, и ныне в мире есть уже. 4 Вы от Бога есте, чадца, и победисте тех: яко болий есть Иже в вас, нежели иже в мире. 5 Они от мира суть: сего ради от мира глаголют, и мир тех послушает. 6 Мы от Бога есмы: иже знает Бога, послушает нас, и иже несть от Бога, не послушает нас. О сем познаваем духа истины и духа лестча. 7 Возлюбленнии, возлюбим друг друга, яко любви от Бога есть, и всяк любяй от Бога рожден есть, и знает Бога: 8 а не любяй не позна Бога, яко Бог любви есть. 9 О сем явися любви Божия в нас, яко Сына Своего Единородного посла Бог в мир, да живи будем Им. 10 О сем есть любви, не яко мы возлюбихом Бога, но яко Той возлюбил нас, и посла Сына Своего очищение о гресех наших. 11 Возлюбленнии, аще сице возлюбил есть нас Бог, и мы должны есмы друг друга любити. 12 Бога никтоже нигдеже виде. Аще друг друга любим, Бог в нас пребывает, и любви Его совершенна есть в нас. 13 О сем разумеем, яко в Нем пребываем, и Той в нас, яко от Духа Своего дал есть нам. 14 И мы видехом и свидетелствуем, яко Отец посла Сына Спасителя миру. 15 Иже аще исповесть, яко Иисус есть Сын Божий, Бог в нем пребывает, и той в Бозе. 16 И мы познахом и веровахом любовь, юже имать Бог к нам. Бог любви есть, и пребываяй в любви в Бозе пребывает, и Бог в нем пребывает. 17 О сем совершается любви с нами, да дерзновение имамы в день судный, зане, якоже Он есть, и мы есмы в мире сем. 18 Страх несть в любви, но совершенна любви вон изгоняет страх, яко страх муку имать: бояйся же не совершися в любви. 19 Мы любим Его, яко Той первее возлюбил есть нас.

20 Аще кто речет, яко люблю Бога, а брата своего ненавидит, ложь есть: ибо не любяй брата своего, егоже виде, Бога, Егоже не виде, како может любити? 21 И сию заповедь имамы от Него, да любяй Бога любит и брата своего.

**5** Всяк веруяй, яко Иисус есть Христос, от Бога рожден есть: и всяк любяй Рождшаго любит и Рожденнаго от Него. 2 О сем вемы, яко любим чада Божия, егда Бога любим и заповеди Его соблюдаем. 3 Сия бо есть любви Божия, да заповеди Его соблюдаем: и заповеди Его тяжки не суть. 4 Яко всяк рожденный от Бога побеждает мир: и сия есть победа, победившая мир, вера наша. 5 Кто есть побеждай мир, токмо веруяй, яко Иисус есть Сын Божий? 6 Сей есть пришедый водою и кровию и Духом, Иисус Христос, не водою точию, но водою и кровию: и Дух есть свидетельствуй, яко Дух есть истина. 7 Яко трие суть свидетельствующие на небеси, Отец, Слово и Святый Дух: и Сии три едино суть. 8 И трие суть свидетельствующие на земли, дух и вода и кровь: и трие во едино суть. 9 Аще свидетельство человеческое приемлем, свидетельство Божие более есть: яко сие есть свидетельство Божие, еже свидетельства о Сыне Своем. 10 Веруяй в Сына Божия имать свидетельство в себе: не веруяй Богови лжа сотворил есть Его, яко не верова во свидетельство, еже свидетельства Бог о Сыне Своем. 11 И сие есть свидетельство, яко живот вечный дал есть нам Бог, и сей живот в Сыне Его есть. (aiōnios g166) 12 Имеяй Сына Божия имать живот: а не имеяй Сына Божия живота не имать. 13 Сия писах вам верующым во имя Сына Божия, да весте, яко живот вечный имате, и да веруете во имя Сына Божия. (aiōnios g166) 14 И сие есть дерзновение, еже имамы к



Нему, яко аще чесо просим по воли Его, послушает нас: **15** и аще вемы, яко послушает нас, еже аще просим, вемы, яко имамы прошения, ихже просихом от Него. **16** Аще кто узрит брата своего согрешающа грех не к смерти, да просит, и даст ему живот, согрешающим не к смерти. Есть грех к смерти: не о том, глаголю, да молится. **17** Всяка неправда грех есть, и есть грех не к смерти. **18** Вемы, яко всяк рожденный от Бога не согрешает: но рожденный от Бога блюдет себе, и лукавый не прикасается ему. **19** Вемы, яко от Бога есмы, и мир весь во зле лежит. **20** Вемы же, яко Сын Божий прииде и дал есть нам (свет и) разум, да познаем Бога истиннаго и да будем во истиннем Сыне Его Иисусе Христе: Сей есть истинный Бог и живот вечный. (aiōnios g166) **21** Чадца, храните себе от треб идолских. Аминь.

## Второе послание Иоанна

**1** Старец избранней госпоже и чадом ея, ихже аз люблю воистинну, и не аз точию, но и вси разумевшии истину. **2** За истину пребывающую в нас, и с нами будет во веки. (αἰὼν ἰσθῆ) **3** Да будет с вами благодать, милость, мир от Бога Отца, и от Господа Иисуса Христа, Сына Отца, во истине и любви. **4** Возрадовался зело, яко обретох от чад твоих ходящих во истине, якоже заповедь прияхом от Отца. **5** И ныне молю тя, госпоже, не яко заповедь пишу тебе нову, но юже имамы исперва, да любим друг друга. **6** И сия есть любь, да ходим по заповедем Его. Сия есть заповедь, якоже слышасте исперва, да в ней ходите: **7** зане мнози лестцы внидоша в мир, не исповедающе Иисуса Христа пришедша во плоти, сей есть лстец и антихрист. **8** Блюдите себе, да не погубите яже деласте добрая, но да мзду совершенну восприимете. **9** Всяк преступаяй и не пребываяй во учении Христове, Бога не имать: пребываяй же во учении Христове, сей и Отца и Сына имать. **10** Аще кто приходит к вам, и сего учения не приносит, не приемлите его в дом, и радоватися ему не глаголите. **11** Глаголяи бо ему радоватися, сообщается делом его злым. **12** Многа имех писати вам, и не восхотех хартиєю и чернилом, но надеюся приити к вам и усты ко устом глаголати, да радость ваша будет исполнена. **13** Целуют тя чада сестры твоея избранныя. Аминь.

## Третье послание Иоанна

**1**Старец Гаиеви возлюбленному, егоже аз люблю воистинну. **2** Возлюбленне, во всех молюся (о тебе) благоспелити тебе и здравствовати, якоже благоспелити тебе душа. **3** Возрадовахся зело, пришедшим братиям и свидетельствующим твою истину, якоже ты во истине ходиши. **4** Болши сея не имам радости, да слышу моя чада во истине ходяща. **5** Возлюбленне, верно твориши, еже аще делаеши в братию и в странная, **6** иже свидетельствовала о твоей любви пред церковию. Ихже предослав достойно Богу, добре твориши. **7** О имени бо Его изыдоша, ничтоже приемлюще от язык. **8** Мы убо должны есмы приимати таковых, да поспешницы будем истине. **9** Писах церкви: но первенстволюбец их Диотреф не приемлет нас. **10** Сего ради, аще прииду, воспомяну его дела, яже творит, словесы лукавыми укоряя нас: и недоволен бывая о сих, ни сам приемлет братию, и хотящим возбраняет, и от церкви изгонит. **11** Возлюбленне, не уподобляйся злomu, но благому. Благотворяй от Бога есть: а злотворяй не виде Бога. **12** Димитриеви свидетельствовася от всех и от самых истины: и мы же свидетельствуем, и весте, яко свидетельство наше истинно есть. **13** Многа имех писати, но не хошу чернилом и тростию писати тебе, **14** уповаю же абие видети тя и усты ко устом глаголати. Мир тебе. Целуют тя друзи: целуй друзи по имени. Аминь.

# Послание Иуды

**1** Иуда, Иисуса Христа раб, брат же Иакова, сущим о Бозе Отце освященным, Иисус Христом соблюденным званым: **2** милость вам и мир и любы да умножится. **3** Возлюбленнии, всяко тщание творя писати вам о общем спасении вашем, нужду возимех писати вам, моля подвизатися о преданней вере святым единою. **4** Привнидоша бо нецыи человецы, древле предуставленнии на сие осуждение, нечестивии, Бога нашего благодать прелагающи в скверну, и единого Владыки Бога и Господа нашего Иисуса Христа отметающися. **5** Воспомянути же вам хощу, ведущим и вам единою сие, яко Господь люди от земли Египетския спасе, последи неверовавшыя погуби: **6** аггелы же не соблюдшыя своего начальства, но оставльшыя свое жилище, на суд великаго дне узами вечными под мраком соблюде. (aīdios g126) **7** Якоже Содома и Гоморра и окрестнии их грады, подобным им образом преблудивше и ходивше вслед плоти инья, предлежат в показание, огня вечнаго суд подемыше, (aīōnios g166) **8** такожде убо и сии, сония видяще, плоть убо сквернят, господства же отметаются, славы же хуляще (не трепещут). **9** Михаил же Архангел, егда со диаволом разсуждая глаголаше о Моисеове телеси, не смеяше суда навести хульна, но рече: да запретит тебе Господь. **10** Сии же, елика убо не ведят, хулят: елика же по естеству яко безсловесная животная ведят, в сих скверняются. **11** Горе им. Яко в путь Каинов поидоша, и в лесь Валаамовы мзды устремишася, и в пререкании Корреове погибоша. **12** Сии суть в любвах ваших сквернители, с вами ядуще, без боязни себе пасуще: облацы безводни, от ветр преносими: дрeвеса есенна, бесплодна,

дважды умерша, искоренена. **13** Волны свирепыя моря, воспеляюща своя стыдения: звезды прелестныя, имже мрак тьмы во веки блюдется. (aiōn g165) **14** Пророчествова же и о сих седмый от Адама Енох, глаголя: се приидет Господь во тьмах святых Ангел Своих, **15** сотворити суд о всех и избличити всех нечестивых о всех делех нечестия их, имже нечестоваша, и о всех жестоких словесех их, яже глаголаша Нань грешницы нечестивии. **16** Сии суть ропотницы, укорители, (часть порочна, ) в похотех своих ходяще нечестием и законопреступлением: и уста их глаголют прегордая: чудящися лицам пользы ради. **17** Вы же, возлюбленнии, поминайте глаголы преждереченныя от Апостол Господа нашего Иисуса Христа. **18** Зане глаголаху вам, яко в последнее время будут ругатели, по своим похотех ходяще и нечестиих. **19** Сии суть отделяюще себе (от единости веры, и суть) телесни, духа не имуще. **20** Вы же, возлюбленнии, стою вашею верою назидаяще себе, Духом Святым молящися, **21** сами себе в любви Божиеи соблюдайте, ждуще милости Господа нашего Иисуса Христа, в жизнь вечную. (aiōnios g166) **22** И овех убо милуйте разсуждаяще. **23** Овех же страхом спасайте, от огня восхищаяще. Обличайте же с боязнию, ненавидяще и яже от плоти оскверненую ризу. **24** Моущему же сохранить вы без греха и без скверны и поставити пред славою Своею непорочных в радости, **25** Единому Премудрому Богу и Спасу нашему, Иисусом Христом Господем нашим, слава и величие, держава и власть, прежде всего века, и ныне, и во вся веки. Аминь. (aiōn g165)

# Откровение ап. Иоанна Богослова

**1** Апокалипсис Иисуса Христа, егоже даде Ему Бог, показати рабом Своим, имже подобает быти вскоре. И сказа, послав чрез Ангела Своего рабу Своему Иоанну, **2** иже свидетелствова слово Божие и свидетелство Иисус Христово, и елика виде. **3** Блажен чтый, и слышащий словеса пророчествия, и соблюдающийи писаная в нем: время бо близ. **4** Иоанн седмим церквам, яже суть во Асии: благодать вам и мир от Суцаго, и Иже бе, и Грядущаго, и от седми духов, иже пред престолом Его суть, **5** и от Иисуса Христа, Иже есть свидетель верный, первенец из мертвых и князь царей земных: любящу ны и омывшу нас от грех наших Кровию Своею, **6** и сотворил есть нас цари и иереи Богу и Отцу Своему, Тому слава и держава во веки веков. Аминь. (аіѡп g165) **7** Се, грядет со облаки, и узрит Его всяко око и иже Его прободоша, и плачь сотворят о Нем вся колена земная. Ей, аминь. **8** Аз есмь Алфа и Омега, начаток и конец, глаголет Господь, сый, и Иже бе, и грядый, Вседержитель. **9** Аз Иоанн, иже и брат ваш и общник в печали и во царствии и в терпении Иисус Христове, бых во острове нарицаемем Патмос за слово Божие и за свидетелство Иисус Христово. **10** Бых в дусе в день неделный, и слышах за собою глас велий яко трубы глаголюция: Аз есмь Алфа и Омега, Первый и Последний: **11** и: яже видиши, напиши в книгу, и посли церквам, яже суть во Асии: во Ефес и в Смирну, в Пергам и в Фиатир, и в Сардис и в Филадельфию и в Лаодикию. **12** И обратихся видети глас, иже глаголаше со мною: и обратився видех седмь светилник златых, **13** и посреде

седми светилников подобна Сыну Человечу, облечена в подир и препоясана при сосцу поясом златым: 14 глава же Его и власи белы аки ярина белая, якоже снег: и очи Его яко пламень огнен: 15 и нозе Его подобне халколивану, якоже в печи разжженне: и глас Его яко глас вод мног: 16 и держа в руке Своей десней семь звезд: и из уст Его меч обоюду остр изострен исходяй: и лице Его якоже солнце сияет в силе своей. 17 И егда видех Его, падох к ногама Его яко мертв. И положи десницу Свою на мне, глаголя ми: не бойся: Аз есмь Первый и Последний 18 и живый: и бых мертв, и се, жив есмь во веки веков, аминь: и имам ключи ада и смерти. (αἰὼν γ165, Ἅδῆς γ86) 19 Напиши убо, яже видел еси, и яже суть, и имже подобает быти по сем. 20 Таинство седми звезд, яже видел еси на деснице Моей, и семь светилник златых: семь звезд Ангели седми церквей суть: и семь светилников, яже видел еси, семь церквей суть.

**2** Ангелу Ефесския церкви напиши: тако глаголет Держай семь звезд в деснице Своей, Ходяй посреде седми светилников златых: 2 вем твоя дела, и труд твой, и терпение твое, и яко не можеш носити злых, и искусил еси глаголющияся быти апостолы, и не суть, и обрел еси их ложных: 3 и понесл еси, и терпение имаши, и за имя Мое трудился еси и не изнемогл еси. 4 Но имам на тя, яко любовь твою первую оставил еси. 5 Помяни убо, откуда спал еси, и покайся, и первая дела сотвори: аще же ни, гряду тебе скоро и двигну светилник твой от места своего, аще не покаешия. 6 Но се имаши, яко ненавидиши дел Николаитских, ихже и Аз ненавижду. 7 Имеяй ухо да слышит, что Дух глаголет церквам: побеждающему дам ясти от древа животнаго, еже

есть посреде рая Божия. 8 И Ангелу церкви Смирнская напиши: тако глаголет Первый и Последний, Иже бысть мертв, и (се,) жив есть: 9 вем твоя дела и скорбь и нищету, но богат еси, и хулы глаголющихся быти Иудей, и не суть, но сонмище сатанино. 10 Не бойся ничесоже, яже имаши пострадати. Се, имать диавол всаждати от вас в темницы, да искуситеся: и имети будете скорбь до десяти дний. Буди верен даже до смерти, и дам ти венец живота. 11 Имеяй ухо слышати да слышит, что Дух глаголет церквам: побеждай не имать вредитися от смерти вторья. 12 И Ангелу Пергамския церкви напиши: тако глаголет Имеяй меч обоюду изошрен: 13 вем дела твоя, и где живеши, идеже престол сатанин: и держиши имя Мое, и не отверглся еси веры Моея и в (Моя) дни, в няже Антипас свидетель Мой верный, иже убиен бысть в вас, идеже живет сатана. 14 Но имам на тя мало, яко имаши ту держащих учение Валаамова, иже учаше Валака положити соблазн пред сынми Израилевыми, ясти жертвы идолския и любы творити. 15 Тако имаши и ты держащья учение Николаитско, егоже ненавижду. 16 Покайся: аще ли ни, прииду тебе скоро и брань сотворю с ними мечем уст Моих. 17 Имеяй ухо слышати да слышит, что Дух глаголет церквам: побеждающему дам ясти от манны сокровенная, и дам ему камень бел и на камени имя ново написано, егоже никтоже весть, токмо приемляй. 18 И Ангелу Фиатирския церкви напиши: тако глаголет Сын Божий, Имеяй очи свои яко пламень огнен, и нозе Его подобне халколивану: 19 вем твоя дела и любовь, и службу и веру, и терпение твое и дела твоя, и последняя болша первых. 20 Но имам на тя мало, яко оставляеши жене Иезавели, глаголющей себе быти



пророчицу, учити и льстити Моя рабы, любодействовати и снести жертву идолскую. 21 И дах ей время, да покается от любодейства своего, и не покается. 22 Се, Аз полагаю ю на одре и любодеющыя с нею в скорбь велию, аще не покаются от дел своих: 23 и чада их умрут смертию: и уразумеют вся церкви, яко Аз есмь испытаяй сердца и утробы: и дам вам комуждо по делом вашим. 24 Вам же глаголю и прочым сущым в Фиатире, иже не имут учения сего и иже не разумеют глубин сатаниных, якоже глаголют: не возложу на вы тяготы иныя: 25 токмо, еже имате, держите, дондеже прииду. 26 И побеждающему и соблюдающему дела Моя до конца, дам ему власть на языцех, 27 и упасет я жезлом железным, яко сосуды скудельничи сокрушатся, якоже и Аз приях от Отца Моего: 28 и дам ему звезду утреннюю. 29 Имеяй ухо слышати да слышит, что Дух глаголет церквам.

**3** И Ангелу Сардийския церкви напиши: тако глаголет Имеяй семь духов Божиих и семь звезд: вем твоя дела, яко има имаша яко жив, а мертв еси. 2 Буди бдя и утверждая прочая, имже умрети: не обретох бо дел твоих скончанных пред Богом (твоим). 3 Поминай убо, како приял еси и слышал еси, и соблюдай и покайся. Аще убо не бдиши, прииду на тя яко тать, и не имаша почути, в кий час прииду на тя. 4 Но имаша мало имен и в Сардии, иже не оскверниша риз своих, и ходити имут со Мною в белых, яко достойни суть. 5 Побеждаяй, той облечется в ризы белыя, и не имам отмыти имене его от книг животных, и исповем имя его пред Отцем Моим и пред Ангелы Его. 6 Имеяй ухо да слышит, что Дух глаголет церквам. 7 И Ангелу Филадельфийския церкви напиши: тако глаголет Святыи Истинный, имеяй

ключь Давидов, отверзаяй, и никтоже затворит, затворяяй, и никтоже отверзет: 8 вем твоя дела: се, дах пред тобою двери отверсты, и никтоже может затворити их: яко малу имаши силу, и соблюл еси Мое слово, и не отверглся еси имене Моего. 9 Се, даю от сонмища сатанина глаголющяся быти Иудеи, и не суть, но лгут: се, сотворю их, да приидут и поклонятся пред ногама твоима, и уразумеют, яко Аз возлюбих тя. 10 Яко соблюл еси слово терпения Моего, и Аз тя соблюду от години искушения, хотящия приити на всю вселенную искусити живушчя на земли. 11 Се, гряду скоро: держи, еже имаши, да никтоже приимет венца твоего. 12 Побеждающаго сотворю столпа в церкви Бога Моего, и боле не имать изыти ктому: и напишу на нем имя Бога Моего и имя града Бога Моего, новаго Иерусалима, сходящаго с небес от Бога Моего, и имя Мое новое. 13 Имеяй ухо да слышит, что Дух глаголет церквам. 14 И Ангелу Лаодикийския церкви напиши: тако глаголет Аминь, свидетель верный и истинный, начаток создания Божия: 15 вем твоя дела, яко ни студен еси ни тепл: не да студен бы был ни тепл. 16 Тако, яко обуморен еси, и ни тепл ни студен, изблевати тя от уст Моих имам. 17 Зане глаголеши, яко богат есмь и обогатихся и ничтоже требую: и не веси, яко ты еси окаянен и беден, и нищ и слеп и наг. 18 Советую тебе купити от Мене злато разжжено огнем, да обогатишия, и одеяние бело, да облечешися, и да не явится срамота наготы твоея: и коллурием помажи очи твои, да видиши. 19 Аз, ихже аще люблю, обличаю и наказую. Ревнуй убо и покайся. 20 Се, стою при дверех и толку: аще кто услышит глас Мой и отверзет двери, вниду к нему и вечеряю с ним, и той со Мною. 21 Побеждающему

дам сести со Мною на престоле Моем, якоже и Аз победих и седох со Отцем Моим на престоле Его. 22 Имеяй ухо да слышит, что Дух глаголет церквам.

**4** По сих видех: и се, двери отверсты на небеси, и глас первый, егоже слышах яко трубу глаголющъ со мною, глаголя: възиди семо, и покажу ти, емуже подобает быти по сих. 2 И абие бых в душе: и се, престол стояше на небеси, и на престоле Седящъ: 3 и Седяй бе подобен видением камени иаспису и сардинови: и (бе) дуга окрест престола подобна видением смарагдови. 4 И окрест престола престолы двадесять и четыре: и на престолех видех двадесять и четыре старцы сидящыя, облечены в белыя ризы, и имяху венцы златы на главах своих. 5 И от престола исхождаху молния и громи и гласи: и семь свещников огненных горящих пред престолом, иже суть семь духов Божиих: 6 и пред престолом море сткляно, подобно кристаллу: и посреде престола и окрест престола четыре животна исполнена очес спреди и созади. 7 И животно первое подобно льву, и второе животно подобно телцу, и третье животно имущее лице яко человек, и четвертое животно подобно орлу летящу. 8 И животна четыре, едино коеждо их имеяху по шесть крил окрест, и внутрѹду исполнена очес: и покоя не имут день и ночь, глаголюще: свят, свят, свят Господь Бог Вседержитель, Иже бе и сый и грядый. 9 И егда даша животная славу и честь и благодарение Седящему на престоле, Живущему во веки веков, (aiōn g165) 10 падоша двадесять и четыре старцы пред Седящим на престоле, и поклонишася Живущему во веки веков, и положиша венцы своя пред престолом, глаголюще: (aiōn g165) 11 достоин еси, Господи, прияти славу

и честь и силу, яко Ты еси создал всяческая, и волею Твоею суть, и сотворена.

**5** И видех в деснице Седящаго на престоле книгу написану внутрьуду и внеуду, запечатану седмию печатю. **2** И видех Ангела крепка проповедающа гласом великим: кто есть достоин разгнати книгу и разрешити печати ея? **3** И никтоже можаше ни на небеси, ни на земли, ниже под землею, разгнати книгу, ниже зрети ю. **4** И аз плакахся много, яко ни един обретеша достоин разгнати и прочести книгу, ниже зрети ю. **5** И един от старец глагола ми: не плачися: се, победил есть лев, иже сый от колена Иудова, корень Давидов, разгнати книгу и разрешити семь печатей ея. **6** И видех, и се, посреде престола и четырех животных и посреде старец Агнец стоящ яко заколен, имущь рогов семь и очес семь, еже есть семь духов Божиих, посланных во всю землю. **7** И прииде и прият книгу от десницы Седящаго на престоле. **8** И егда прият книгу, четыре животна и двадесять и четыре старцы падоша пред Агнцем, имуще кийждо гусли и фиалы златы полны фимиама, иже суть молитвы святых: **9** и поют песнь нову, глаголюще: достоин еси прияти книгу и отверзти печати ея, яко заклался и искупил еси Богови нас Кровию Своею от всякаго колена и языка и людей и племен, **10** и сотворил еси нас Богови нашему цари и иереи: и воцаримся на земли. **11** И видех, и слышах глас Ангелов многих окрест престола и животных и старец, и бе число их тысяща тысящами, **12** глаголюще гласом великим: достоин есть Агнец заколенный прияти силу и богатство, и премудрость и крепость, и честь и славу и благословение. **13** И всяко создание, еже есть на небеси и на земли, и под

землею и на мори яже суть, и сущая в них, вся слышах глаголющя: Седящему на престоле и Агнцу благословение и честь, и слава и держава во веки веков. (aiōn g165) 14 И четыре животна глаголаху: аминь. И двадесять и четыре старцы падоша и поклонишася Живущему во веки веков.

**6** И видех, егда отверзе Агнец едину от седми печатей, и слышах единого от четырех животных глаголюща якоже глас громный: гряди и виждь. 2 И видех, и се, конь бел, и седяй на нем имеяше лук, и дан бысть ему венец: и изыде побеждаяй, и да победит. 3 И егда отверзе печать вторую, слышах второе животное глаголющее: гряди и виждь. 4 И изыде другой конь рыжь: и седящему на нем дано бысть взяти мир от земли, и да убьют друг друга: и дан бысть ему меч великий. 5 И егда отверзе третью печать, слышах третье животное глаголющее: гряди и виждь. И видех, и се, конь ворон, и седяй на нем имеяше мерило в руце своей. 6 И слышах глас посреде четырех животных глаголющий: мера пшеницы за динарь и три меры ячменя за динарь: и елеа и вина не вреди. 7 И егда отверзе четвертую печать, слышах глас четвертаго животна глаголющий: гряди и виждь. 8 И видех, и се, конь блед, и седяй на нем, имя ему смерть: и ад идяше вслед его: и дана бысть ему область на четвертей части земли убити оружием и голодом, и смертию и зверьми земными. (Hadēs g86) 9 И егда отверзе пятую печать, видех под олтарем души избивенных за слово Божие и за свидетелство, еже имеяху. 10 И возопиша гласом великим, глаголюще: доколе, Владыко Святыи и Истинный, не судиши и не мстиши крове нашея от живущих на земли? 11 И даны быша коемуждо их ризы белы, и речено бысть им, да почьют еще время мало, дондеже

скончаются и клевети их и братия их, имущии избиени быти, якоже и тии. 12 И видех, егда отверзе шестую печать, и се, бысть трус велий, и солнце мрачно бысть яко вретище власяно, и луна бысть яко кровь: 13 и звезды небесныя падоша на землю, якоже смоковница отметае пупы своя, от ветра велика движима: 14 и небо отлучися яко свиток свиваемо, и всяка гора и остров от мест своих двигнушася: 15 и царие земстии и вельможи, и богатии и тысящницы и сильнии, и всяк раб и всяк свободь скрышася в пещерах и камении горстем, 16 и глаголаша горам и камению: падите на ны и покройте ны от лица Седящаго на престоле и от гнева Агнца: 17 яко прииде день великий гнева Его, и кто может стати?

**7** И по сем видех четыри Ангелы стоящыя на четырех углех земли, держащыя четыри ветры земския, да не дышет ветер на землю, ни на море, ни на всяко древо. 2 И видех инаго Ангела восходяща от восхода солнца, имуща печать Бога живаго. И возопи гласом велиим к четырем Ангелом, имже дано бысть вредити землю и море, глаголя: 3 не вредите ни земли, ни моря, ни древес, дондеже запечатлеем рабы Бога нашего на челех их. 4 И слышах число запечатленных: сто четыредесять четыри тысящи запечатленных от всякаго колена сынов Израилевых. 5 От колена Иудова дванадесять тысящ запечатленных: от колена Рувимова дванадесять тысящ запечатленных: от колена Гадова дванадесять тысящ запечатленных: 6 от колена Асирова дванадесять тысящ запечатленных: от колена Неффалимля дванадесять тысящ запечатленных: от колена Манассиина дванадесять тысящ запечатленных: 7 от колена Симеонова дванадесять тысящ

запечатленных: от колена Левиина дванадесять тысяч  
запечатленных: от колена Иссахарова дванадесять тысяч  
запечатленных: 8 от колена Завулоня дванадесять тысяч  
запечатленных: от колена Иосифова дванадесять тысяч  
запечатленных: от колена Вениаминова дванадесять тысяч  
запечатленных. 9 По сих видех, и се, народ мног, егоже  
изчести никтоже может, от всякаго языка и колена, и людей и  
племен, стояще пред престолом и пред Агнцем, облечены в  
ризы белы, и финицы в руках их. 10 И возопиша гласом  
велиим, глаголюще: спасение сидящему на престоле Богу  
нашему и Агнцу. 11 И вси Ангели стояху окрест престола  
и старец и четырех животных: и падоша на лица пред  
престолом и поклонишася Богу, 12 глаголюще: аминь:  
благословение и слава, и премудрость и хвала, и честь и  
сила и крепость Богу нашему во веки веков. Аминь. (aiōn g165)  
13 И отвеща един от старец, глаголя ми: сии облеченнии  
в ризы белыя кто суть и откуда приидоша? 14 И рех ему:  
господи, ты веси. И рече ми: сии суть, иже приидоша от  
скорби великия, и испраша ризы своя, и убелиша ризы своя  
в Крови Агнчи: 15 сего ради суть пред престолом Божиим и  
служат Ему день и ночь в церкви Его, и Седяй на престоле  
вселится в них: 16 не взалчут ктому, ниже вжадут, не имать  
же пасти на них солнце, ниже всяк зной: 17 яко Агнец, Иже  
посреде престола, упасет я и наставит их на животныя  
источники вод, и отимет Бог всяку слезу от очию их.

**8** И егда отверзе седмую печать, бысть безмолвие на небеси  
яко пол часа. 2 И видех седмь Ангелов, иже пред Богом  
стояху: и дано бысть им седмь труб. 3 И другий Ангел  
прииде и ста пред олтарем, имеяй кадилницу злату: и даны

быша ему фимиами мнози, да даст молитвам святых всех на олтарь златый сущий пред престолом. 4 И изыде дым кадилный молитвами святых от руки Ангела пред Бога. 5 И взят Ангел кадилницу, и наполни ю от огня сущаго на олтари, и положи на земли: и быша гласи и громи и блистания и трус. 6 И седмь Ангел, иже имеяху седмь труб, уготовашася, да вострубят. 7 И первому Ангелу вострубившу, бысть град и огонь, смешены с кровию, и падоша на землю: и третия часть древа погоре, и всяка трава злачная погоре. 8 И вторый Ангел воструби, и яко гора велика огнем жегома ввержена бысть в море: и бысть третия часть моря кровь, 9 и умре третия часть созданий сущих в мори, имущих души, и третия часть кораблей погибе. 10 И третий ангел воструби, и паде с небесе звезда велика, горящи яко свеща, и паде на третию часть рек и на источники водныя: 11 и имя звезде глаголется апсинфос: и бысть третия часть вод яко пельнь, и мнози от человек умроша от вод, яко горьки беша. 12 И четвертый Ангел воструби, и уязвена бысть третия часть солнца и третия часть луны и третия часть звезд, да затмится третия часть их, и дне третия часть да не светит, и ночь такожде. 13 И видех и слышах единого Ангела паряща посреде небесе, глаголюща гласом великим: горе, горе, горе живущым на земли от прочих гласов трубных триех Ангел хотящих трубити.

**9** И пятый Ангел воструби, и видех звезду с небесе спадшу на землю: и дан бысть ей ключь студенца бездны: (Abyssos g12) 2 и отверзе студенца бездны, и възыде дым от студенца яко дым пещи велики, и омерче солнце и воздух от дыма студеничнаго. (Abyssos g12) 3 И от дыма изыдоша пружи



на землю, и дана бысть им область, якоже имут область скорпии земныя. 4 И речено бысть им, да не вредят травы земныя, ни всякаго злака, ни всякаго древа, но человеки точию, иже не имут печати Божия на челех своих. 5 И дано бысть им, да не убьют их, но да муку приимут пять месяцев: и мучение их яко мучение скорпиево, егда усекнет человека. 6 И в тыя дни възыщут человецы смерти, и не обрящут ея: и вождедут умрети, и убежит от них смерть. 7 И уподобления пругов подобна конем уготовленным на брань: и на главах их яко венцы уподоблени злату, и лица их яко лица человеческа: 8 и имеяху власы, яко власы женския, и зубы их, яко львов беша: 9 и имеяху броня, яко броня железны, и глас крил их, яко глас колесниц, егда кони мнози текут на брань: 10 и имеяху ошобы подобны скорпииным, и жала бяху во ошобех их: и дана бе область им вредити человеки пять месяц. 11 И имели над собою царя аггела бездны, емуже имя еврейски Аваддон, а еллински Аполлион. (Abyssos g12) 12 Горе едино отиде: се, грядут еще два горя по сих. 13 И шестый Ангел воструби, и слышах глас един от четырех рогов олтаря златаго суцаго пред Богом, 14 глаголющий шестому Ангелу имеющу трубу: разреши четыре Ангелы связаны при реце велицей Евфрат. 15 И разрешени быша четыре Ангелы уготовани на час и день, и месяц и лето, да избьют третью часть человек. 16 И число воинов конных две тме тем: и слышах число их. 17 И тако видех в видении кони, и сидящыя на них имущыя броня огненны и иакинфовы и жупелны: и главы конем (их) яко главы львом, и из уст их исхождаше огонь и дым и жупел. 18 И от триех язв сих погибе третия часть человек, от огня и от дыма

и от жупела, исходящих из уст их: **19** область бо коней во устех их бе, и ошиби их подобни змием, имуще главы и теми пакости деюще. **20** И прочии от человек, иже не вреждени быша язвами сими, ниже покаяшася от дел рук своих, да не поклонятся демоном, ни идолом златым и серебряным, и медяным и каменным и деревяным, иже ни видети могут, ни слышати, ни ходити: **21** и не покаяшася от убийств своих, ни от волхвований своих, ниже от блуда своего, ниже от татьб своих.

**10** И видех инаго Ангела крепка сходяща с небесе, оболчена во облак, и дуга над главою (его), и лице его яко солнце, и нозе его яко столпи огнени, **2** и имеяше в руце своей книгу разгибену: и постави ногу свою десную на мори, а шуюю на земли, **3** и возопи гласом великим, яко лев рыкая: и егда возгласи, глаголаша седмь громов гласы своя. **4** И егда возгласиша седмь громов гласы своя, хотех писати: и слышах глас с небесе глаголющъ ми: запечатлей, яже глаголаша седмь громов, и сего не пиши. **5** И Ангел, егоже видех стояща на мори и на земли, воздвиже руку свою на небо **6** и клятся Живущим во веки веков, Иже созда небо и яже на нем, и землю и яже на ней, и море и яже в нем, яко лета уже не будет: (αἰὼν ἡ 165) **7** но во дни гласа седмаго Ангела, егда имать вострубити, тогда скончается тайна Божия, якоже благовести Своими рабы пророки. **8** И глас его слышах с небесе паки глаголющъ со мною, и глагола: иди и приими книжицу разгнутую в руце Ангела стоящаго на мори и на земли. **9** И идох ко Ангелу, глаголя ему: даждь ми книжицу. И рече ми: приими и снеждь ю: и горька будет во чреве твоём, но во устех ти сладка будет яко

мед. 10 И приях книгу от руки Ангела и снедох ю: и бе во устех моих яко мед сладка: и егда снедох ю, горька бяше во чреве моем. 11 И рече ми: подобает ти паки пророчествовати в людех и во племенех, и во языцех и в царех мнозех.

**11** И дана ми бысть трость подобна жезлу, глаголя: востани и измери церковь Божию и олтарь, и кланяющыяся в ней: 2 а двор сущий внутри церкви изнеси внеуду, ниже измери его, зане дан бысть языком: и град святой поперут четыредесять и два месяцы. 3 И дам обема свидетелема Моима, и прорицати будут дний тысящу двесте и шестьдесят, оболчена во вретисце. 4 Сии суть две маслицы и два свещника пред Богом земли стояща. 5 И иже им неправду сотворит, огонь исходит из уст их и пояст враги их: и иже восхощет обидети их, сему подобает убиену быти. 6 И сии имут область затворити небо, да не снидет дождь (на землю) во дни прорицания их, и область имут на водах, обращати я в кровь и поразити землю всякою язвою, елижды аще восхошут. 7 И егда скончают свидетельство свое, зверь, иже исходит от бездны, сотворит с ними брань и победит их и убьет я, (Abyssos g12) 8 и трупы их оставит на стогнах града великаго, иже нарицается духовне Содом и Египет, идеже и Господь наш распят бысть. 9 И зрети имут от людей и племен, и от язык и колен, телеса их дни три и пол, и трупы их не оставят положити во гробех. 10 И живуции на земли возрадуются и возвеселятся о них, и дары послют друг ко другу, яко оба сия пророка мучиста живуцья на земли. 11 И по триех днех и пол, дух животен внидет в ня от Бога, и станут (оба) на ногах своих: и страх велий нападет на зрящих их. 12 И услышат глас велий с небесе, глаголющ им: взыдита

семо. И въздоста на небо на облацех, и видеша я врази их. **13** И в час той трус бысть велий, и десятая часть града паде, и погибе трусом имен человеческих семь тысяч: и прочии пристрашни быша и даша славу Богу небесному. **14** Горе второе отиде: се, горе третие грядет скоро. **15** И седмый Ангел воструби, и быша гласи велицы на небесех, глаголюще: бысть царство мира Господа нашего и Христа Его, и воцарится во веки веков. (аіѡп g165) **16** И двадесять и четыре старцы, пред Богом сидящи на престолах своих, падоша на лица своя и поклонишася Богу, **17** глаголюще: хвалим Тя, Господи Боже Вседержителю, Иже сый и бе и грядый, яко приял еси силу Твою великую и воцарился еси: **18** и языцы прогневашася: и прииде гнев Твой, и время мертвым суд прияти, и дати мзду рабом Твоим пророком и святым и боящимся имене Твоего, малым и великим, и растлити посмраждшыя землю. **19** И отверзесе храм Божий на небеси, и явися кивот завета Его в храме Его: и быша блистания и гласи, и громи и трус, и град велик.

**12** И знамение велие явися на небеси: жена облечена в солнце, и луна под ногама ея, и на главе ея венец от звезд двюнадесяте: **2** и во чреве имущи, вопиет болящи и страждущи родити. **3** И явися ино знамение на небеси: и се, змий велик чермен, имея глав седмь и рогов десять, и на главах его седмь венец: **4** и хобот его отторже третию часть звезд небесных и положи я в землю. И змий стояше пред женою хотящею родити, да, егда родит, снестъ чадо ея. **5** И роди сына мужеска, иже имать упасти вся языки жезлом железным: и восхищено бысть чадо ея к Богу и престолу Его. **6** А жена бежа в пустыню, идеже име место

уготовано от Бога, да тамо питается дний тысящу двесте  
шестьдесят. 7 И бысть брань на небеси: Михаил и Ангели  
его брань сотвориша со змием, и змий брся и аггели его, 8  
и не возмогоша, и места не обретеса им ктому на небеси. 9  
И вложен бысть змий великий, змий древний, нарицаемый  
диавол и сатана, льстяй вселенную всю, и вложен бысть на  
землю, и аггели его с ним низвержени быша. 10 И слышах  
глас велий на небеси, глаголющ: ныне бысть спасение  
и сила и царство Бога нашего и область Христа Его, яко  
низложен бысть клеветник братии нашея, оклевецая их пред  
Богом нашим день и ночь. 11 И тии победиша его кровию  
Агнчею и словом свидетелства своего, и не возлюбиша душ  
своих даже до смерти. 12 Сего ради веселитесь, небеса и  
живущии на них. Горе живущым на земли и мори, яко сниде  
диавол к вам, имея ярость великую, ведый, яко время мало  
имать. 13 И егда виде змий, яко низложен бысть на землю,  
гоняше жену, яже роди мужеска. 14 И дана быша жене два  
крила орла великаго, да парит в пустыню в место свое,  
идеже препитана бяше ту время и времен и пол времени, от  
лица змиина. 15 И испусти змий за женою из уст своих воду  
яко реку, да ю в реце потопит. 16 И поможе земля жене, и  
отверзе земля уста своя, и пожре реку, юже изведе змий от  
уст своих. 17 И разгневался змий на жену и иде сотворити  
брань со оставшим семенем ея, иже соблюдают заповеди  
Божия и имеют свидетелство Иисус Христово.

**13** И стах на песце морстем: и видех из моря зверя  
исходяща, имуща глав седмь и рогов десять, и на розех его  
венец десять, а на главах его имена хулна. 2 Зверь, егоже  
видех, бе подобен рыси, и нозе ему яко медведи, и уста его

яко уста львова: и даде ему змий силу свою и престол свой и область великую. 3 И видех едину от глав его яко заколену в смерть, и язва смерти его изцеле. И чудися вся земля вслед зверя, и поклонишася змию, иже даде область зверю, 4 и поклонишася зверю, глаголюще: кто подобен зверю и кто может ратоватися с ним? 5 И дана быша ему уста глаголюща велика и хулна, и дана бысть ему область творити месяц четыредесять два. 6 И отверзе уста своя в хуление к Богу, хулити имя Его и селение Его и живущыя на небеси. 7 И дано бысть ему брань творити со святыми и победити я: и дана бысть ему область на всяцем колене (людей) и на языцех и племенех. 8 И поклонятся ему вси живущии на земли, имже не написана суть имена в книгах животных Агнца заколеного от сложения мира. 9 Аще кто имать ухо, да слышит. 10 Иже аще в пленение ведет, в пленение пойдет: аще кто оружием убьет, подобает ему оружием убиену быти. Зде есть терпение и вера святых. 11 И видех инаго зверя восходящаго от земли, и имеяше рога два, подобна агнчим, и глаголаше яко змий. 12 И власть перваго зверя всю творяше пред ним: и творяше землю и вся живущыя на ней поклонитися первому зверю, емуже изцелена бысть язва смертная: 13 и сотвори чудеса велика, да и огонь сотворит сходити с небесе на землю пред человеки. 14 И льстит живущыя на земли, ради знамений, яже дана быша ему пред зверем творити, глаголя живущым на земли, сотворити образ зверю, иже имать язву оружную и жив бысть. 15 И дано бысть ему дати дух образу зверину, да проглаголет икона зверина и сотворит, да иже аще не поклонятся образу звериному, убиени будут. 16 И сотворит вся малыя и великия, богатыя и убогия, свободныя

и работныя, да даст им начертание на десней руке их или на челех их, 17 да никтоже возможет ни купити, ни продати, токмо кто имать начертание, или имя зверя, или число имене его. 18 Зде мудрость есть. Иже имать ум, да почтет число зверино: число бо человеческо есть, и число его шесть сот шестьдесят шесть.

**14** И видех, и се, Агнец стояше на горе Сионстей, и с Ним сто и сорок и четыре тысящи, имуща имя Отца Его написано на челех своих. 2 И слышах глас с небесе, яко глас вод многих и яко глас грома велика: и глас слышах гудец гудущих в гусли своя 3 и поющих яко песнь нову пред престолом и пред четыри животными и старцы: и никтоже можаше навикнути песни, токмо сии сто и сорок и четыре тысящи искуплены от земли. 4 Сии суть, иже с женами не осквернишася, зане девственницы суть: сии последуют Агнцу, аможе аще поидет. Сии суть куплены от людей первенцы Богу и Агнцу, 5 и во устех их не обретеса лесь: без порока бо суть пред престолом Божиим. 6 И видех инаго Ангела паряща посреде небесе, имущаго Евангелие вечно благовестити живущым на земли и всякому племени и языку, и колону и людем, (aiōnios g166) 7 глаголюща гласом великим: убойтеса Бога и дадите Ему славу, яко прииде час суда Его, и поклонитеса Сотворшему небо и землю, и море и источники водныя. 8 И ин Ангел вслед иде, глаголя: паде, паде Вавилон град великий, зане от вина ярости любодения своего напои вся языки. 9 И третий Ангел вслед его иде, глаголя гласом великим: иже аще кто покланяется зверю и иконе его и приемлет начертание на челе своем или на руке своей, 10 и той имать пити от вина ярости Божия,

вина неразтворена в чаши гнева Его, и будет мучен огнем и жупелом пред Ангелы святыми и пред Агнцем: **11** и дым мучения их во веки веков восходит, и не имут покоя день и ночь покланяющийся зверю и образу его и приемлющий начертание имене его. (aiōn g165) **12** Зде есть терпение святых, иже соблюдают заповеди Божия и веру Иисусову. **13** И слышах глас с небесе, глаголющ ми: напиши: блажени мертвии, умирающи о Господе отныне. Ей, глаголет Дух, да починут от трудов своих: дела бо их ходят вслед с ними. **14** И видех, и се, облак светел, и на облаце седяй подобен Сыну Человеческому, имея на главе своей венец злат, и в руке его серп остр. **15** И ин Ангел изыде из храма, вопия велиим гласом сидящему на облаце: послы серп твой и жни, яко прииде час пожати, зане изше трава земная. **16** И положи седяй на облаце серп свой на землю, и пожата бысть земля. **17** И ин Ангел изыде из церкви суция на небеси, имый и той серп остр. **18** И ин Ангел изыде от олтаря, имый область на огни, и возопи кличем великим ко имущему серп острый, глаголя: послы серп твой острый и объемли грозды винограда земнаго, яко созреша уже гроздие ея. **19** И положи Ангел серп свой на земли, и обере виноград земский и вложи в точило великия ярости Божия. **20** И испрано бысть точило вне града, и изыде кровь от точила даже до узд конских, от стадий тысяща и шесть сот.

**15** И видех ино знамение на небеси велие и чудно, седмь Ангел имущих седмь язв последних, зане в тех скончается ярость Божия. **2** И видех яко море сткляно смешено со огнем, и победившыя зверя и образ его, и начертание его и число имене его, стоящыя на мори стклянем, имущыя



гусли Божия: **3** и пояху песнь Моисеа раба Божия и песнь Агнчу, глаголюще: велия и дивна дела Твоя, Господи Боже Вседержителю: праведни и истинни путие Твои, Царю святых: **4** кто не убоится Тебе, Господи, и прославит имя Твое? Яко един преподобен еси, яко вси языцы приидут и поклонятся пред Тобою: яко оправдания Твоя явишася. **5** И по сих видех, и се, отверзесе храм скинии свидения на небеси: **6** и изыдоша седмь Ангел из храма, иже имеяху седмь язв, облечени в ризы льняны чисты и светлы, и препоясани на персех поясы златыми. **7** И едино от четырех животных даде седмим Ангелом седмь фиал златых, исполненных ярости Бога живущаго во веки веков. (аіѡп г165) **8** И наполнися храм дыма от славы Божия и от силы Его, и никтоже можаше внити во храм, дондеже скончаются седмь язв седмим Ангел.

**16** И слышах глас велий от храма глаголющъ седмим Ангелом: идите и излийте седмь фиал ярости Божия на землю. **2** И иде первый Ангел и излия фиал свой на землю: и бысть гной зол и лют на человецех имущих начертание зверино и кланяющихся иконе его. **3** И второй Ангел излия фиал свой в море: и бысть кровь яко мертвеца, и всяка душа жива умре в мори. **4** И третий Ангел излия фиал свой на реки и на источники водныя: и бысть кровь. **5** И слышах Ангела воднаго глаголюща: праведен еси, Господи, съй и Иже бе, и преподобн, яко сия судил еси: **6** зане кровь святых и пророк излияша, и кровь им дал еси пити: достойни бо суть. **7** И слышах другаго от олтаря глаголюща: ей, Господи Боже Вседержителю, истинни и прави суди Твои. **8** И четвертый Ангел излия фиал свой на солнце: и дано бысть ему опаляти человеки огнем. **9** И опалишася человецы

зноем великим, и хулиша имя Божие, иже имать область на язвах сих, и не покаяшася дати Ему славы. 10 И пятый Ангел излия фиал свой на престол зверин: и бысть царство его омрачено, и жваху языки своя от болезни, 11 и хулиша Бога небеснаго от болезни и от язв своих, и не покаяшася от дел своих. 12 И шестый Ангел излия фиал свой на реку велику Евфрат: и изсяче вода ея, да уготовится путь царем суцым от восток солнечных. 13 И видех из уст змия и из уст зверя и из уст лжаго пророка духи три нечистыя, яко жабы исходящыя: 14 суть бо дуси демонстии творяще знамения, иже исходят к царем всея вселенныя, собрати я на брань в день той великий Бога Вседержителя. 15 Се, гряду яко тать: блажен бдяй и блюдый ризы своя, да не наг ходит и узрят срамоту его. 16 И собра их на место нарицаемое еврейски Армагеддон. 17 И седмый Ангел излия фиал свой на воздух: и изыде глас велий от храма небесе от престола, глаголя: бысть. 18 И быша блистания и громи и гласи, и бысть трус велик, яков николиже бысть, отнележе быша человецы на земли, толик трус, тако велий. 19 И бысть град велик в три части, и гради язычестии падоша, и Вавилон великий помяновен бысть пред Богом, дати ему чашу вина ярости гнева Своего. 20 И всяк остров бежа, и горы не обретошася: 21 и град велик, яко талантес, сниде с небесе на человеки: и хулиша человецы Бога от язвы градныя, яко велия есть язва его зело.

**17** И прииде един от седми Ангел имущих седмь фиал, и глагола со мною, глаголя ми: прииди, да покажу ти суд любодейцы великия, седящия на водах многих: 2 с неюже любодейша царие земстии, и упишася живуции на земли от

вина любоддеяния ея. 3 И веде мя в пусто место духом: и видех жену седящу на звери червлене, исполненем имен хулных, иже имеяше глав седьм и рогов десять. 4 И жена бе облечена в порфиру и червленицу, и позлащена златом и камением драгим и бисером, имущи чашу злату в руке своей полну мерзости и скверн любоддеяния ея: 5 и на челе ея написано имя: тайна, Вавилон великий, мати любоддейцам и мерзостем земским. 6 И видех жену пьяну кровьюми святых и кровьюми свидетелей Иисусовых, и дивихся, видево ю, дивом великим. 7 И рече ми Ангел: что дивихся? Аз ти реку тайну жены (сея) и зверя носящаго ю, седьм глав имуща и рогов десять. 8 Зверь, егоже видел еси, бе, и несть, и имать взыти от бездны, и в пагубу поидет: и удивятся живуции на земли, имже имена не написана суть в книгу животную от сложения мира, видяще, яко зверь бе, и несть, и преста. (Abyssos g12) 9 Зде ум, иже имать мудрость. Седьм глав горы суть седьм, идеже жена седит на них, 10 и царие седьм суть: пять их пало, и един есть, (а) другой еще не прииде: и егда приидет, мало ему есть пребыти. 11 И зверь, иже бе и несть, и той осмый есть, и от седмих есть, и в пагубу идет. 12 И десять рогов, яже видел еси, десять царей суть, иже царства еще не прияша, но область яко царие на един час примут со зверем. 13 Сии едину волю имут, и силу и область свою зверю дадут: 14 сии со Агнцем брань сотворят, и Агнец победит я, яко Господь господем есть и Царь царем: и сущии с Ним званнии и избраннии и верни. 15 И глагола ми: воды, яже еси видел, идеже любодейца седит, людие и народи суть, и племена и языцы. 16 И десять рогов, яже видел еси на звери, сии любодейцу возненавидят, и запустевшу

сотворят ю и нагу, и плоть ея снесут, и сожгут ю огнем: 17 Бог бо дал есть в сердца их, сотворити волю Его, и сотворити едину волю, и дати царство свое зверю, дондеже скончаются глаголголы Божии. 18 И жена, юже видел еси, град есть великий, иже имать царство над цари земными.

**18** И по сих видех ина Ангела сходяща с небесе, имуща область велию: и земля просветится от славы его. 2 И возопи в крепости, гласом велиим глаголя: паде, паде Вавилон великий, и бысть жилище бесом и хранитель всякому духу нечисту, и хранилище всех птиц нечистых и ненавидимых: яко от вина ярости любоддеяния своего напои вся языки, 3 и царие земстии с нею любы деяша, и купцы земстии от силы пищи ея разбогатеша. 4 И слышах глас ин с небесе, глаголюще: изыдите из нея, людие Мои, да не причаститесь грехом ея и от язв ея да не вредитесь: 5 яко прилепишася греси ея даже до небесе, и помяну Бог неправды ея. 6 Воздадите ей, яко и та воздаде вам, и усугубите ей сугубо по делом ея: чашею, еюже черпа (вам), черплите ей сугубо. 7 Елико прославися и разсвирепе, толико дадите ей мук и рыданий: яко в сердца своем глаголет, (яко) сежу царицею, и вдова несъм, и рыдания не имам видети. 8 Сего ради во един день приидут язвы ей, смерть и плачь и глад, и огнем сожжена будет, яко крепок Господь Бог судяй ей. 9 И возрыдают и восплачутся ея царие земстии, любы деявшии с нею и разсвирепевшии, егда узрят дым запаления ея, 10 издалеча стояще за страх мук ея, глаголюще: горе, горе, град великий Вавилон, град крепкий, яко во един час прииде суд твой. 11 И купцы земстии возрыдают и восплачутся о нем, яко бремени их никтоже купует ктому, 12 бремени злата и

сребра, и камня драгаго и бисера, и висса и порфиры, и шелка и червени, и всякаго древа фиинна, и всякаго сосуда из кости слоновыя, и всякаго сосуда от древа честнаго, и медяна и железна и мраморна, 13 и корицы и фимиама, и мира и ливана, и вина и елеа, и семидала и пшеницы, и скота и овец, и коней и колесниц, и телес и душ человеческих. 14 И овощи похотей души твоя отидоша от тебе, и вся тучная и светлая отидоша от тебе, и ктому не имаши обрести их. 15 Купцы сими обогащшеся от нея, издалеча станут за страх мучения ея, рыдающе и плачущесея, 16 и глаголюще: горе, горе, град великий, облеченный виссом и порфирую и червленицею, и позлащенный златом и камением драгим и бисером 17 яко во един час погибе толико богатство. И всяк кормчий, и всяк плаваяя в кораблех, и всяк елик в мори делаяя, издалеча сташа, 18 и вопияху, видяще дым раждежения его, глаголюще: кий подобен граду великому? 19 И положиша персть на главах своих, и возопиша плачущесея и рыдающе, глаголюще: горе, горе, град великий, в немже обогатишася вси имущии корабли в мори, от чести его: яко едином часом запусте. 20 Веселися о сем, небо, и святии Апостоли и пророцы, яко суди Бог суд ваш от него. 21 И взят един Ангел крепок камень велик яко жернов и верже в море, глаголя: тако стремлением ввержен будет Вавилон град великий, и не имать обрестися ктому: 22 и глас гудец и мусикий, и пискателей и труб не имать слышатися ктому в тебе: и всяк хитрец всякия хитрости не обрящется ктому в тебе, и шум жерновный не будет слышан в тебе: 23 и свет светилника не имать светити в тебе ктому, и глас жениха и невесты не имать слышан быти в тебе ктому: яко купцы твои

беша вельможи земстии, яко волхвовании твоими прельщени быша вси языцы. 24 И в нем кровь пророческа и святых обретеса и всех избиенных на земли.

**19** И по сих слышах глас велий народа многа на небеси, глаголющаго: аллилуиа: спасение и слава, и честь и сила Господу нашему, 2 яко истинни и прави суди Его: яко судил есть любодейцу велику, яже посмради землю любодеянием своим, и отмстил кровь рабов Своих от руки ея. 3 И второе реша: аллилуиа. И дым ея восхождаше во веки веков. (аіѡн g165) 4 И падоша двадесять и четыре старцы и четыре животна и поклонишася Богови сидящему на престоле, глаголюще: аминь, аллилуиа. 5 И глас изыде от престола глаголющъ: пойте Богу нашему, вси раби Его и боящиися Его, и малии и велицыи. 6 И слысах яко глас народа многа, и яко глас вод многих, и яко глас громов крепких, глаголющих: аллилуиа, яко воцарися Господь Бог Вседержитель: 7 радуимся и веселимся, и дадим славу Ему: яко прииде брак Агнчий, и жена Его уготовила есть себе. 8 И дано бысть ей облещися в виссон чист и светел: виссон бо оправдания святых есть. 9 И глагола ми: напиши: блажени званнии на вечерю брака Агнча. И глагола ми: сия словеса истинна Божия суть. 10 И пад пред ногама его, поклонихся ему: и глагола ми: виждь, ни: клевет ти есмь и братий твоих имущих свидетелство Иисусово: Богу поклонися: свидетелство бо Иисусово есть дух пророчества. 11 И видех небо отверсто, и се, конь бел, и седяй на нем Верен и Истинен, и Правосудный и Воинственный: 12 очи же Ему (еста) яко пламень огнен, и на главе Его венцы мнози: имый имя написано, еже никтоже вестъ, токмо Он Сам: 13

и облечен в ризу червлену кровию. И нарицается имя Его Слово Божие. 14 И воинства небесная идяху вслед Его на конех белых, облечени в виссон бел и чист. 15 И из уст Его изыде оружие остро, да тем избьет языки: и Той упасет я жезлом железным, и Той перет точило вина ярости и гнева Божия Вседержителява. 16 И имать на ризе и на стегне Своем имя написано: Царь царем и Господь господем. 17 И видех единого Ангела стояща на солнце: и возопи гласом велиим, глаголя всем птицам парящим посреде небесе: приидите и соберитесь на вечерю великую Божию, 18 да снесите плоти царей и плоти крепких и плоти тысящников, и плоти коней и сидящих на них, и плоти всех свободных и рабов, и малых и великих. 19 И видех зверя и цари земныя и вои их собраны сотворити брань с Сядящим на кони и с воинствы Его. 20 И ят бысть зверь и с ним лживый пророк, сотворивый знамения пред ним, имиже прельсти приемшыя начертание зверино и покланяющыяся иконе его: жива ввержена быста оба в езеро огненное горящее жупелом: (Limnē Pyr g3041 g4442) 21 а прочии убиени быша оружием Сядящаго на кони, изшедшим из уст Его: и вся птицы насытишася от плотей их.

**20** И видех Ангела сходяща с небесе, имеюща ключь бездны и уже велико в руце своей: (Abyssos g12) 2 и ят змия, змия древняго, иже есть диавол и сатана, и связа и на тысящу лет, 3 и в бездну затвори его, и заключи его, и запечатле над ним, да не прельстит ктому языки, дондеже скончается тысяща лет: и по сих подобает ему отрешену быти на мало время. (Abyssos g12) 4 И видех престолы и сядящыя на них, и суд дан бысть им: и души растесанных за свидетелство Иисусово

и за слово Божие, иже не поклонишася зверю, ни иконе его, и не прияша начертания на челех своих и на руке своей. И ожиша и воцаришася со Христом тысящу лет: **5** прочии же мертвецы не ожиша, дондеже скончается тысяща лет. Се воскресение первое. **6** Блажен и свят, иже имать часть в воскресении первом: на нихже смерть вторая не имать области, но будут иерее Богу и Христу и воцарятся с Ним тысящу лет. **7** И егда скончается тысяща лет, разрешен будет сатана от темницы своя и изыдет прельстити языки сущия на четырех углех земли, Гога и Магога, собрати их на брань, ихже число яко песок морской. **8** И възыдоша на широту земли и обыдоша святых стан и град возлюбленный. **9** И сниде огонь от Бога с небесе и пояде я: **10** и диавол льстай их ввержен будет в езеро огненно и жупелно, идеже зверь и лживый пророк: и мучени будут день и ночь во веки веков. (aīōn g165, Limnē Pyr g3041 g4442) **11** И видех престол велик бел и Сядящаго на нем, Егоже от лица бежа небо и земля, и место не обретесе им. **12** И видех мертвецы малыя и великия стояща пред Богом, и книги разгнушася: и ина книга отверзесе, яже есть животная: и суд прияша мертвецы от написаных в книгах, по делом их. **13** И даде море мертвецы своя, и смерть и ад даста своя мертвецы: и суд прияша по делом своим, (Hadēs g86) **14** и смерть и ад ввержена быста в езеро огненное. И се есть вторая смерть. (Hadēs g86, Limnē Pyr g3041 g4442) **15** И иже не обретесе в книзе животней написан, ввержен будет в езеро огненное. (Limnē Pyr g3041 g4442)

**21** И видех небо ново и землю нову: первое бо небо и земля первая преидоста, и моря несть ктому. **2** И аз Иоанн видех град святой, Иерусалим нов сходящъ от Бога с



небесе, приготован яко невесту украшену мужу своему. 3 И слышах глас велий с небесе, глаголющ: се, скиния Божия с человеки, и вселится с ними: и тии людие Его будут, и Сам Бог будет с ними Бог их: 4 и отимет Бог всяку слезу от очию их, и смерти не будет ктому: ни плача, ни вопля, ни болезни не будет ктому, яко первая мимоидоша. 5 И рече Седяй на престоле: се, нова вся творю. И глагола ми: напиши, яко сия словеса истинна и верна суть. 6 И рече ми: совершишася. Аз есмь Алфа и Омега, начаток и конец: аз жаждущему дам от источника воды животныя туне. 7 Побеждаяй наследит вся, и буду ему Бог, и той будет Мне в сына. 8 Страшливым же и неверным, и скверным и убийцам, и блуд творящым и чары творящым, идоложерцем и всем лживым, часть им в езере горящем огнем и жупелом, еже есть смерть вторая. (Limnē Pyr g3041 g4442) 9 И прииде ко мне един от седми Ангел, имущих семь фиал исполненных седмих язв последних, и рече ко мне, глаголя: гряди, покажу ти невесту Агнчу жену. 10 И веде мя духом на гору велику и високу и показа ми град великий, святыи Иерусалим низходящ с небесе от Бога, 11 имущ славу Божию: и светило его подобно камени драгому, яко камени иаспису кристаловидну: 12 имущ стену велику и високу, имущ врат дванадесять, и на вратех Ангелов дванадесять и имена написана, яже суть имена дванадесятим коленом сынов Израилевых: 13 от востока врата троя и от севера врата троя, от юга врата троя и от запада врата троя. 14 И стена града имевше оснований дванадесять, и на них имен дванадесять Апостолов Агнчих. 15 И глаголай со мною имевше трость злату, да измерит град и врата его и стены его. 16 И град


на четыре углы стоит, и долгота его толика есть, елика же и широта. И измери град тростию на стадий дванадесять тысяч: долгота и широта и высота его равна суть. 17 И размеры стену его во сто и сорок и четыре локти, в меру человеческу, яже есть Ангела. 18 И бе создание стены его иаспис: и град злато чисто, подобен стеклу чисту. 19 И основания стены града всяким драгим камением украшена бяху: основание первое иаспис, второе сапфир, третье халкидон, четвертое смарагд, 20 пятое сардоникс, шестое сардий, седмое хрисолиф, осмое вирилл, девятое топазий, десятое хрисопрас, первоенадесять иакинф, второенадесять амефист. 21 И дванадесять врат дванадесять бисеров: едина каяждо врата беша от единого бисера. И стогны града злато чисто, яко стекло пресветло. 22 И храма не видех в нем: Господь бо Бог Вседержитель храм ему есть, и Агнец. 23 И град не требуя солнца и луны, да светят в нем, слава бо Божия просвети его, и светилник его Агнец. 24 И языцы спасени во свете его пойдут, и царие земстии принесут славу и честь свою в него. 25 И врата его не имут затворитися во дни: нощи бо не будет ту. 26 И принесут славу и честь языков в него: 27 и не имать в него внити всяко скверно, и творяй мерзость и лжу, но токмо написанья в книгах животных Агнца.

**22** И показа ми чисту реку воды животныя, светлу яко кристалл, исходящу от престола Божия и Агнца. 2 Посреде стогны его и по обаполы реки древо животное, еже творит плодов дванадесяте, на кийждо месяц воздая плод свой: и листовие древа во изцеление языком. 3 И всяка анафема не будет ктому: и престол Божий и Агнечь будет в нем, и

раби Его послужат Ему, 4 и узрят лице Его, и имя Его на челех их. 5 И нощи не будет тамо, и не потребуют света от светилника, ни света солнечнаго, яко Господь Бог просвещает я: и воцарятся во веки веков. (aiōn g165) 6 И рече ми: сия словеса верна и истинна: и Господь Бог святых пророк посла Ангела Своего показати рабом Своим, имже подобает быти вскоре. 7 Се, гряду скоро: блажен соблюдай словеса пророчества книги сея. 8 И аз Иоанн видех сия и слышах. И егда слышах и видех, падох поклонитися на ногу Ангела показующаго ми сие: 9 и глагола ми: виждь, ни: клеветет бо твой есмь и братии твоя пророков и соблюдающих словеса книги сея: Богу поклонися. 10 И глагола ми: не запечатлей словес пророчества книги сея: яко время близ есть. 11 Обидяй да обидит еще, и скверный да осквернится еще: и праведный правду да творит еще: и святой да святится еще. 12 И се, гряду скоро, и мзда Моя со Мною, воздати коемуждо по делом его. 13 Аз есмь Алфа и Омега, начаток и конец, Первый и Последний. 14 Блажени творящии заповеди Его, да будет область им на древо животное, и враты внидут во град. 15 Вне же пси и чародее, и любодее и убийцы, и идолослужители и всяк любяй и творяй лжу. 16 Аз Иисус послах Ангела Моего засвидетелствовати вам сия в церквах. Аз есмь корень и род Давидов, и звезда утренняя и денница. 17 И Дух и невеста глаголют: прииди, и слышай да глаголет: прииди. И жаждай да приидет, и хотяй да примет воду животную туне. 18 Сосвидетелствую бо всякому слышащему словеса пророчества книги сея: аще кто приложит к сим, наложит Бог на него язв написанных в книзе сей: 19 и аще кто отимет от словес книги пророчества сего, отимет Бог часть

его от книги животныя, и от града святого, и написанных в книзе сей. 20 Глаголет свидетелствуяй сия: ей, гряду скоро: аминь. Ей, гряди Господи Иисусе. 21 Благодать Господа нашего Иисуса Христа со всеми вами. Аминь.





*И аз Иоанн видех град святой, Иерусалим нов сходящъ от Бога с небесе, приготован  
яко невесту украшену мужу своему. И слышах глас велий с небесе, глаголющъ: се,  
скиния Божия с человеки, и вселится с ними: и тии людие Его будут,  
и Сам Бог будет с ними Бог их:  
Откровение ап. Иоанна Богослова 21:2-3*

# Reader's Guide

церковно-славянском at [AionianBible.org/Readers-Guide](http://AionianBible.org/Readers-Guide)

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

# Glossary

церковно-славянском at [AionianBible.org/Glossary](http://AionianBible.org/Glossary)

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

## **Abyssos** g12

*Greek:* proper noun, place

*Usage:* 9 times in 3 books, 6 chapters, and 9 verses

*Meaning:*

Temporary prison for special fallen angels such as Apollyon, the Beast, and Satan.

## **ai̅dios** g126

*Greek:* adjective

*Usage:* 2 times in Romans 1:20 and Jude 6

*Meaning:*

Lasting, enduring forever, eternal.

## **ai̅ōn** g165

*Greek:* noun

*Usage:* 127 times in 22 books, 75 chapters, and 102 verses

*Meaning:*

A lifetime or time period with a beginning and end, an era, an age, the completion of which is beyond human perception, but known only to God the creator of the ai̅ōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

## **ai̅ōnios** g166

*Greek:* adjective

*Usage:* 71 times in 19 books, 44 chapters, and 69 verses

*Meaning:*

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

## **eleē̅sē** g1653

*Greek:* verb, aorist tense, active voice, subjunctive mood, 3rd person singular

*Usage:* 1 time in this conjugation, Romans 11:32

*Meaning:*

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See [ntgreek.org](http://ntgreek.org).



**Geenna** g1067

*Greek:* proper noun, place

*Usage:* 12 times in 4 books, 7 chapters, and 12 verses

*Meaning:*

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

**Hadēs** g86

*Greek:* proper noun, place

*Usage:* 11 times in 5 books, 9 chapters, and 11 verses

*Meaning:*

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

**Limnē Pyr** g3041 g4442

*Greek:* proper noun, place

*Usage:* Phrase 5 times in the New Testament

*Meaning:*

Lake of Fire, final punishment for those not named in the Book of Life, prepared for the Devil and his angels, Matthew 25:41.

**Sheol** h7585

*Hebrew:* proper noun, place

*Usage:* 66 times in 17 books, 50 chapters, and 64 verses

*Meaning:*

The grave or temporal afterlife world of both the righteous and unrighteous, believing and unbelieving, until the general resurrection.

**Tartaroō** g5020

*Greek:* proper noun, place

*Usage:* 1 time in 2 Peter 2:4

*Meaning:*

Temporary prison for particular fallen angels awaiting final judgment.

# Glossary +

[AionianBible.org/Bibles/SlavonicChurch---Church-Slavonic-Elizabeth/Noted](http://AionianBible.org/Bibles/SlavonicChurch---Church-Slavonic-Elizabeth/Noted)

Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words and may wrongly imply *eternal* or *Hell*. \* The note placement is skipped or adjusted for verses with non-standard numbering.

## **Abyssos**

От Луки святое благовествование 8:31  
Послание к Римлянам 10:7  
Откровение ап. Иоанна Богослова 9:1  
Откровение ап. Иоанна Богослова 9:2  
Откровение ап. Иоанна Богослова 9:11  
Откровение ап. Иоанна Богослова 11:7  
Откровение ап. Иоанна Богослова 17:8  
Откровение ап. Иоанна Богослова 20:1  
Откровение ап. Иоанна Богослова 20:3

## **aidios**

Послание к Римлянам 1:20  
Послание Иуды 1:6

## **aiōn**

От Матфея святое благовествование 12:32  
От Матфея святое благовествование 13:22  
От Матфея святое благовествование 13:39  
От Матфея святое благовествование 13:40  
От Матфея святое благовествование 13:49  
От Матфея святое благовествование 21:19  
От Матфея святое благовествование 24:3  
От Матфея святое благовествование 28:20  
От Марка святое благовествование 3:29  
От Марка святое благовествование 4:19  
От Марка святое благовествование 10:30  
От Марка святое благовествование 11:14  
От Луки святое благовествование 1:33  
От Луки святое благовествование 1:55  
От Луки святое благовествование 1:70  
От Луки святое благовествование 16:8  
От Луки святое благовествование 18:30  
От Луки святое благовествование 20:34  
От Луки святое благовествование 20:35  
От Иоанна святое благовествование 4:14  
От Иоанна святое благовествование 6:51  
От Иоанна святое благовествование 6:58  
От Иоанна святое благовествование 8:35  
От Иоанна святое благовествование 8:51  
От Иоанна святое благовествование 8:52  
От Иоанна святое благовествование 9:32  
От Иоанна святое благовествование 10:28  
От Иоанна святое благовествование 11:26  
От Иоанна святое благовествование 12:34  
От Иоанна святое благовествование 13:8  
От Иоанна святое благовествование 14:16

Деяния святых апостолов 3:21  
Деяния святых апостолов 15:18  
Послание к Римлянам 1:25  
Послание к Римлянам 9:5  
Послание к Римлянам 11:36  
Послание к Римлянам 12:2  
Послание к Римлянам 16:27  
Первое послание к Коринфянам 1:20  
Первое послание к Коринфянам 2:6  
Первое послание к Коринфянам 2:7  
Первое послание к Коринфянам 2:8  
Первое послание к Коринфянам 3:18  
Первое послание к Коринфянам 8:13  
Первое послание к Коринфянам 10:11  
Второе послание к Коринфянам 4:4  
Второе послание к Коринфянам 9:9  
Второе послание к Коринфянам 11:31  
Послание к Галатам 1:4  
Послание к Галатам 1:5  
Послание к Ефессянам 1:21  
Послание к Ефессянам 2:2  
Послание к Ефессянам 2:7  
Послание к Ефессянам 3:9  
Послание к Ефессянам 3:11  
Послание к Ефессянам 3:21  
Послание к Ефессянам 6:12  
Послание к Филиппийцам 4:20  
Послание к Колоссянам 1:26  
Первое послание к Тимофею 1:17  
Первое послание к Тимофею 6:17  
Второе послание к Тимофею 4:10  
Второе послание к Тимофею 4:18  
Послание к Титу 2:12  
Послание к Евреям 1:2  
Послание к Евреям 1:8  
Послание к Евреям 5:6  
Послание к Евреям 6:5  
Послание к Евреям 6:20  
Послание к Евреям 7:17  
Послание к Евреям 7:21  
Послание к Евреям 7:24  
Послание к Евреям 7:28  
Послание к Евреям 9:26  
Послание к Евреям 11:3  
Послание к Евреям 13:8  
Послание к Евреям 13:21  
Первое послание Петра 1:23

Первое послание Петра 1:25  
Первое послание Петра 4:11  
Первое послание Петра 5:11  
Второе послание Петра 3:18  
Первое послание Иоанна 2:17  
Второе послание Иоанна 1:2  
Послание Иуды 1:13  
Послание Иуды 1:25  
Откровение ап. Иоанна Богослова 1:6  
Откровение ап. Иоанна Богослова 1:18  
Откровение ап. Иоанна Богослова 4:9  
Откровение ап. Иоанна Богослова 4:10  
Откровение ап. Иоанна Богослова 5:13  
Откровение ап. Иоанна Богослова 7:12  
Откровение ап. Иоанна Богослова 10:6  
Откровение ап. Иоанна Богослова 11:15  
Откровение ап. Иоанна Богослова 14:11  
Откровение ап. Иоанна Богослова 15:7  
Откровение ап. Иоанна Богослова 19:3  
Откровение ап. Иоанна Богослова 20:10  
Откровение ап. Иоанна Богослова 22:5

## **aiōnios**

От Матфея святое благовествование 18:8  
От Матфея святое благовествование 19:16  
От Матфея святое благовествование 19:29  
От Матфея святое благовествование 25:41  
От Матфея святое благовествование 25:46  
От Марка святое благовествование 3:29  
От Марка святое благовествование 10:17  
От Марка святое благовествование 10:30  
От Луки святое благовествование 10:25  
От Луки святое благовествование 16:9  
От Луки святое благовествование 18:18  
От Луки святое благовествование 18:30  
От Иоанна святое благовествование 3:15  
От Иоанна святое благовествование 3:16  
От Иоанна святое благовествование 3:36  
От Иоанна святое благовествование 4:14  
От Иоанна святое благовествование 4:36  
От Иоанна святое благовествование 5:24  
От Иоанна святое благовествование 5:39  
От Иоанна святое благовествование 6:27  
От Иоанна святое благовествование 6:40  
От Иоанна святое благовествование 6:47  
От Иоанна святое благовествование 6:54  
От Иоанна святое благовествование 6:68

От Иоанна святое благовествование 10:28  
От Иоанна святое благовествование 12:25  
От Иоанна святое благовествование 12:50  
От Иоанна святое благовествование 17:2  
От Иоанна святое благовествование 17:3  
Деяния святых апостолов 13:46  
Деяния святых апостолов 13:48  
Послание к Римлянам 2:7  
Послание к Римлянам 5:21  
Послание к Римлянам 6:22  
Послание к Римлянам 6:23  
Послание к Римлянам 16:25  
Послание к Римлянам 16:26  
Второе послание к Коринфянам 4:17  
Второе послание к Коринфянам 4:18  
Второе послание к Коринфянам 5:1  
Послание к Галатам 6:8  
Второе послание к Фессалоникийцам 1:9  
Второе послание к Фессалоникийцам 2:16  
Первое послание к Тимофею 1:16  
Первое послание к Тимофею 6:12  
Первое послание к Тимофею 6:16  
Второе послание к Тимофею 1:9  
Второе послание к Тимофею 2:10  
Послание к Титу 1:2  
Послание к Титу 3:7  
Послание к Филимону 1:15  
Послание к Евреям 5:9  
Послание к Евреям 6:2  
Послание к Евреям 9:12  
Послание к Евреям 9:14  
Послание к Евреям 9:15  
Послание к Евреям 13:20  
Первое послание Петра 5:10  
Второе послание Петра 1:11  
Первое послание Иоанна 1:2  
Первое послание Иоанна 2:25  
Первое послание Иоанна 3:15  
Первое послание Иоанна 5:11  
Первое послание Иоанна 5:13  
Первое послание Иоанна 5:20  
Послание Иуды 1:7  
Послание Иуды 1:21  
Откровение ап. Иоанна Богослова 14:6

## ***eleēsē***

Послание к Римлянам 11:32

## ***Geenna***

От Матфея святое благовествование 5:22  
От Матфея святое благовествование 5:29  
От Матфея святое благовествование 5:30  
От Матфея святое благовествование 10:28  
От Матфея святое благовествование 18:9  
От Матфея святое благовествование 23:15  
От Матфея святое благовествование 23:33  
От Марка святое благовествование 9:43

От Марка святое благовествование 9:45  
От Марка святое благовествование 9:47  
От Луки святое благовествование 12:5  
Послание Иакова 3:6

## ***Hadēs***

От Матфея святое благовествование 11:23  
От Матфея святое благовествование 16:18  
От Луки святое благовествование 10:15  
От Луки святое благовествование 16:23  
Деяния святых апостолов 2:27  
Деяния святых апостолов 2:31  
Первое послание к Коринфянам 15:55  
Откровение ап. Иоанна Богослова 1:18  
Откровение ап. Иоанна Богослова 6:8  
Откровение ап. Иоанна Богослова 20:13  
Откровение ап. Иоанна Богослова 20:14

## ***Limnē Pyr***

Откровение ап. Иоанна Богослова 19:20  
Откровение ап. Иоанна Богослова 20:10  
Откровение ап. Иоанна Богослова 20:14  
Откровение ап. Иоанна Богослова 20:15  
Откровение ап. Иоанна Богослова 21:8

## ***Sheol***

Бытие 37:35  
Бытие 42:38  
Бытие 44:29  
Бытие 44:31  
Числа 16:30  
Числа 16:33  
Второзаконие 32:22  
Первая книга Царств 2:6  
Вторая книга Царств 22:6  
Третья книга Царств 2:6  
Третья книга Царств 2:9  
Книга Иова 7:9  
Книга Иова 11:8  
Книга Иова 14:13  
Книга Иова 17:13  
Книга Иова 17:16  
Книга Иова 21:13  
Книга Иова 24:19  
Книга Иова 26:6  
Псалтирь 6:5  
Псалтирь 9:17  
Псалтирь 16:10  
Псалтирь 18:5  
Псалтирь 30:3  
Псалтирь 31:17  
Псалтирь 49:14  
Псалтирь 49:15  
Псалтирь 55:15  
Псалтирь 86:13  
Псалтирь 88:3  
Псалтирь 89:48


Псалтирь 116:3  
Псалтирь 139:8  
Псалтирь 141:7  
Притчи Соломона 1:12  
Притчи Соломона 5:5  
Притчи Соломона 7:27  
Притчи Соломона 9:18  
Притчи Соломона 15:11  
Притчи Соломона 15:24  
Притчи Соломона 23:14  
Притчи Соломона 27:20  
Притчи Соломона 30:16  
Книга Екклезиаста 9:10  
Песнь песней Соломона 8:6  
Книга пророка Исаии 5:14  
Книга пророка Исаии 7:11  
Книга пророка Исаии 14:9  
Книга пророка Исаии 14:11  
Книга пророка Исаии 14:15  
Книга пророка Исаии 28:15  
Книга пророка Исаии 28:18  
Книга пророка Исаии 38:10  
Книга пророка Исаии 38:18  
Книга пророка Исаии 57:9  
Книга пророка Иезекииля 31:15  
Книга пророка Иезекииля 31:16  
Книга пророка Иезекииля 31:17  
Книга пророка Иезекииля 32:21  
Книга пророка Иезекииля 32:27  
Книга пророка Осии 13:14  
Книга пророка Амоса 9:2  
Книга пророка Ионы 2:2  
Книга пророка Аввакума 2:5

## ***Tartaroō***

Второе послание Петра 2:4


## ***Questioned***

Книга Иова 33:22  
Псалтирь 63:9  
Притчи Соломона 2:18  
Притчи Соломона 14:12  
Второе послание Петра 2:17




## Abraham's Journey

Верою зовом Авраам послуша изыти на место, еже хотяше прияти в наследие, и изыде не ведый, камо грядет. - Псалтирь к Евреям 11:8



Егда же отпусти фараон люди, не поведе их Бог путем земли Филистимския, яко близ бяше, ибо рече Бог:  
да не когда раскаются люди, видевше рать, и возвратятся во Египет. - Исход 13:17



ибо Сын Человечь не придет, да послужат Ему, но да послужит и даст душу Свою избавление за мнози. - От Марка святое благовествование 10:45



Павел, раб Иисус Христов, зван Апостол, избран в благовестие Божие, - Послание к Римлянам 1:1

## Creation 4004 B.C.



|                                   |      |
|-----------------------------------|------|
| Adam and Eve created              | 4004 |
| Tubal-cain forges metal           | 3300 |
| Enoch walks with God              | 3017 |
| Methuselah dies at age 969        | 2349 |
| God floods the Earth              | 2349 |
| Tower of Babel thwarted           | 2247 |
| Abraham sojourns to Canaan        | 1922 |
| Jacob moves to Egypt              | 1706 |
| Moses leads Exodus from Egypt     | 1491 |
| Gideon judges Israel              | 1245 |
| Ruth embraces the God of Israel   | 1168 |
| David installed as King           | 1055 |
| King Solomon builds the Temple    | 1018 |
| Elijah defeats Baal's prophets    | 896  |
| Jonah preaches to Nineveh         | 800  |
| Assyrians conquer Israelites      | 721  |
| King Josiah reforms Judah         | 630  |
| Babylonians capture Judah         | 605  |
| Persians conquer Babylonians      | 539  |
| Cyrus frees Jews, rebuilds Temple | 537  |
| Nehemiah rebuilds the wall        | 454  |
| Malachi prophesies the Messiah    | 416  |
| Greeks conquer Persians           | 331  |
| Seleucids conquer Greeks          | 312  |
| Hebrew Bible translated to Greek  | 250  |
| Maccabees defeat Seleucids        | 165  |
| Romans subject Judea              | 63   |
| Herod the Great rules Judea       | 37   |

(The Annals of the World, James Usher)

## Jesus Christ born 4 B.C.

## New Heavens and Earth



|  |      |
|--|------|
| Christ returns for his people          | 1956 |
| Jim Elliot martyrdom in Ecuador        | 1830 |
| John Williams reaches Polynesia        | 1731 |
| Zinzendorf leads Moravian mission      | 1614 |
| Japanese kill 40,000 Christians        | 1572 |
| Jesuits reach Mexico                   | 1517 |
| Martin Luther leads Reformation        | 1455 |
| Gutenberg prints first Bible           | 1323 |
| Franciscans reach Sumatra              | 1276 |
| Ramon Llull trains missionaries        | 1100 |
| Crusades tarnish the church            | 1054 |
| The Great Schism                       | 997  |
| Adalbert martyrdom in Prussia          | 864  |
| Bulgarian Prince Boris converts        | 716  |
| Boniface reaches Germany               | 635  |
| Alopen reaches China                   | 569  |
| Longinus reaches Alodia / Sudan        | 432  |
| Saint Patrick reaches Ireland          | 397  |
| Carthage ratifies Bible Canon          | 341  |
| Ulfilas reaches Goth / Romania         | 325  |
| Niceae proclaims God is Trinity        | 250  |
| Denis reaches Paris, France            | 197  |
| Tertullian writes Christian literature | 70   |
| Titus destroys the Jewish Temple       | 61   |
| Paul imprisoned in Rome, Italy         | 52   |
| Thomas reaches Malabar, India          | 39   |
| Peter reaches Gentile Cornelius        | 33   |
| Holy Spirit empowers the Church        | 33   |

(Wikipedia, Timeline of Christian missions)

## Resurrected 33 A.D.



|                             |                               |  |                                |  |                |   |                       |                 |  |                  |  |  |
|-----------------------------|-------------------------------|--|--------------------------------|--|----------------|---|-----------------------|-----------------|--|------------------|--|--|
| <b>What are we?</b> ▲       | Genesis 1:26 - 2:3            |  |                                |  |                | Mankind is created in God's image, male and female He created us                              |                       |                 |  |                  |  |  |
| <b>How are we sinful?</b> ▲ | Romans 5:12-19                |  |                                |  |                | Sin entered the world through Adam and then death through sin                                 |                       |                 |  |                  |  |  |
| <b>When are we?</b> ▼       |                               |  |                                |  |                |   |                       |                 |  |                  |  |  |
| <b>Where are we?</b> ▲      | Innocence                     |  |                                | Fallen   |                |   | Glory                 |                 |  |                  |  |  |
|                             | Eternity Past                 | Creation 4004 B.C.                                       | Fall to sin No Law             | Moses' Law 1500 B.C.                                     | Christ 33 A.D. | Church Age Kingdom Age  | New Heavens and Earth |                 |  |                  |  |  |
|                             | John 10:30                    | Genesis 1:31   | 1 Timothy 6:16                 | John 1:14  | Luke 23:43     | Acts 3:21   | Philippians 2:11      | Revelation 20:3 |  |                  |  |  |
|                             | God's perfect fellowship      | God's perfect fellowship with Adam in The Garden of Eden | Living in unapproachable light | John 14:17   | Paradise       | God's perfectly restored fellowship with all Mankind praising Christ as Lord in the Holy City |                       |                 |  |                  |  |  |
|                             |                               |  |                                |  |                |   |                       |                 |  |                  |  |  |
|                             |                               |  |                                |  |                |   |                       |                 |  |                  |  |  |
|                             |                               |  |                                |  |                |   |                       |                 |  |                  |  |  |
|                             |                               |  |                                |  |                |   |                       |                 |  |                  |  |  |
|                             |                               |  |                                |  |                |   |                       |                 |  |                  |  |  |
|                             |                               |  |                                |  |                |   |                       |                 |  |                  |  |  |
| <b>Who are we?</b> ▲        | Eternity Past                 |  |                                | Innocence  |                |   | Fallen                |                 |  | Glory            |  |  |
|                             | John 10:30                    |  |                                | Genesis 1:31   |                |   | 1 Timothy 6:16        |                 |  | Acts 3:21        |  |  |
|                             | God's perfect fellowship      |  |                                | God's perfect fellowship with Adam in The Garden of Eden |                |   | John 14:17            |                 |  | Philippians 2:11 |  |  |
|                             | Living                        |  |                                | Deceased believing                                       |                |   | Deceased unbelieving  |                 |  | Holy             |  |  |
|                             | Imprisoned                    |  |                                | Fugitive   |                |   | First Beast           |                 |  | False Prophet    |  |  |
|                             | Satan                         |  |                                | Satan  |                |   | Satan                 |                 |  | Satan            |  |  |
|                             | Imprisoned                    |  |                                | Fugitive   |                |   | First Beast           |                 |  | False Prophet    |  |  |
|                             | Satan                         |  |                                | Satan  |                |   | Satan                 |                 |  | Satan            |  |  |
|                             | Imprisoned                    |  |                                | Fugitive   |                |   | First Beast           |                 |  | False Prophet    |  |  |
|                             | Satan                         |  |                                | Satan  |                |   | Satan                 |                 |  | Satan            |  |  |
| <b>Why are we?</b> ▲        | Romans 11:25-36, Ephesian 2:7 |  |                                |  |                | For God has bound all over to disobedience in order to show mercy to all                      |                       |                 |  |                  |  |  |

# Destiny

церковно-славянском at [AionianBible.org/Destiny](http://AionianBible.org/Destiny)

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, *"the gates of Hades will not prevail,"* Matthew 16:18. Paul asks, *"Hades where is your victory?"* 1 Corinthians 15:55. John wrote, *"Hades gives up,"* Revelation 20:13.

Jesus comforts us saying, *"Do not be afraid,"* because he holds the keys to *unlock* death and Hades, Revelation 1:18. Yet too often our *Good News* sounds like a warning to *"be afraid"* because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, *"out of the frying pan, into the fire?"* Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, *"Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. Jesus said, *"You did not choose me, but I chose you,"* John 15:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philippians 2:9-11.



## World Nations

иешде убо научите вся языки, крестяще их во имя Отца и Сына и Святаго Духа, - От Матфея святое благовествование 28:19